


Tnúhu ní cáhá<sup>n</sup> yă  
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

**Tnúhu ní cáhá<sup>n</sup> yă ndiöxí xito cùu uú**  
**New Testament in Mixtec, Peñoles (MX:mil:Mixtec, Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

### Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

SAN MATEO . . . . .	1
SAN MARCOS . . . . .	73
SAN LUCAS . . . . .	117
SAN JUAN . . . . .	186
LOS HECHOS . . . . .	233
ROMANOS . . . . .	296
1 CORINTIOS . . . . .	325
2 CORINTIOS . . . . .	354
GÁLATAS . . . . .	373
EFESIOS . . . . .	383
FILIPENSES . . . . .	393
COLOSENSES . . . . .	400
1 TESALONICENSES . . . . .	407
2 TESALONICENSES . . . . .	413
1 TIMOTEO . . . . .	416
2 TIMOTEO . . . . .	424
TITO . . . . .	430
FILEMÓN . . . . .	434
HEBREOS . . . . .	436
SANTIAGO . . . . .	459
1 PEDRO . . . . .	465
2 PEDRO . . . . .	473
1 JUAN . . . . .	478
2 JUAN . . . . .	484
3 JUAN . . . . .	485
JUDAS . . . . .	486
APOCALIPSIS . . . . .	489

## TNÚHU NÍ CHÍDÓ TNŪNÍ TĒ MÀTEÚ

*Nchaa cue tée ní xíndecu ndéé sanaha cùtnàhá vátá quíxí-gă Xítóhó Jesucrístú*

*(Lc. 3:23-38)*

<sup>1</sup> Te ñaní tnáhá Xítóhó Jesucrístú ní cuu ndíi Dàvíí ndíi ndíi Àbrahám, cue tée ní xíndecu ndéé sanaha vîhi-gă ñuyíú-a. Te duha ndùu cuendá dava-gá cue tée ní cuu ñaní tnáhá-gă ní xíndecu ndéé sanaha.

<sup>2</sup> Ndíi Àbrahám ní xóo ì<sup>n</sup> déhe ndíi, te ndíi-án ní xínani ndíi Isàác. Te déhe ndíi Isàác-án ní cuu ndíi Jàcób, te déhe ndíi Jàcób-án ní cuu ndíi Jùdá, te ñu-ni ndíi Jàcób-án ní cuu tâtá dava-gá cue ñaní ndíi Jùdá-án. <sup>3</sup> Te déhe ndíi Jùdá-án ndíi ñadìhí ndíi, ndíi Tàmár ní cuu ndíi Fàrés ndíi ndíi Zàrá. Te déhe ndíi Fàrés-án ní cuu ndíi Èsróm, te déhe ndíi Èsróm-án ní cuu ndíi Àrám.

<sup>4</sup> Te déhe ndíi Àrám-án ní cuu ndíi Aminàdáb, te déhe ndíi Aminàdáb-án ní cuu ndíi Nàsón, te déhe ndíi Nàsón-án ní cuu ndíi Sàlmón. <sup>5</sup> Te ñadìhí ndíi Sàlmón-án ní xínani-a<sup>n</sup> Ràháb, te ní xóo ì<sup>n</sup> déhe-yu ní xínani-dě Bòóz. Te ñadìhí ndíi Bòóz-án ní xínani-a<sup>n</sup> Rût, te ní xóo ì<sup>n</sup> déhe-yu ní xínani-dě Òbéd, te déhe ndíi Òbéd-án ní cuu ndíi Isàí. <sup>6</sup> Te déhe ndíi Isàí-án ní cuu ndíi Dàvíí tée ní xíndaha ñàha xii cue ñáyiú isràél. Te déhe ndíi Dàvíí-án ndíi ñadìhí ndíi ní cuu ndíi Salòmón. Te díhna-gá ndíi Ùriás ní cándeca ndíi ñadìhí-án te dàtnùní ní naquehe<sup>n</sup> ñaha ndíi Dàvíí-án.

<sup>7</sup> Te déhe ndíi Salòmón ní cuu ndíi Ròboám, te déhe ndíi Ròboám-án ní cuu ndíi Àbíás, te déhe ndíi Àbíás-án ní cuu ndíi Àsá. <sup>8</sup> Te déhe ndíi Àsá-án ní cuu ndíi Josáfát, te déhe ndíi Josáfát-án ní cuu ndíi Jòrám, te déhe ndíi Jòrám-án ní cuu ndíi Ùziás.

<sup>9</sup> Te déhe ndíi Ùziás-án ní cuu ndíi Jòtám, te déhe ndíi Jòtám-án ní cuu ndíi Àcáz, te déhe ndíi Àcáz-án ní cuu ndíi Ezèquiás. <sup>10</sup> Te déhe ndíi

Ezèquiás-án ní cuu ndíi Manàsés, te déhe ndíi Manàsés-án ní cuu ndíi Àmón, te déhe ndíi Àmón-án ní cuu ndíi Jòsiás. <sup>11</sup> Te déhe ndíi Jòsiás-án ní cuu ndíi Jecòniás. Te ñu-ni ndíi Jòsiás-án ní cuu tâtá nchaa dava-gá cue ñaní ndíi Jecòniás-án. Te dàvá-án ní guide yica cue tée ñuú Babiloniá ndécá-güedě ñáyiú isràél cuáhá<sup>n</sup> ñuú-güedě cuèndá yàcá<sup>n</sup> cundecú-yu.

<sup>12</sup> Te sàtá ní yáha duca<sup>n</sup> ní cuu, te ndíi Jecòniás ní xóo ì<sup>n</sup> déhe ndíi ndíi ñadìhí ndíi, te tée-án ní xínani-dě Salàtiél. Te déhe ndíi Salàtiél-án ní cuu ndíi Zorobàbél. <sup>13</sup> Te déhe ndíi Zorobàbél-án ní cuu ndíi Àbíúđ, te déhe ndíi Àbíúđ-án ní cuu ndíi Eliàquím, te déhe ndíi Eliàquím-án ní cuu ndíi Àzór. <sup>14</sup> Te déhe ndíi Àzór-án ní cuu ndíi Sàdóc, te déhe ndíi Sàdóc-án ní cuu ndíi Àquím, te déhe ndíi Àquím-án ní cuu ndíi Èliúđ. <sup>15</sup> Te déhe ndíi Èliúđ-án ní cuu ndíi Eleàzár, te déhe ndíi Eleàzár-án ní cuu ndíi Mátán, te déhe ndíi Mátán-án ní cuu ndíi Jàcób. <sup>16</sup> Te déhe ndíi Jàcób-án ní cuu ndíi Chèé tée ní cuu y<sup>ii</sup> tá Màriá xíchí ní cuu náná Jèsús Yaá ní tendaha Dütú Ndiöxí ní quixi ñuyíú-a.

<sup>17</sup> Te sa ní cuu úxúú tnàhá cue tée cùu ñaní tnáhá ndíi Àbrahám ndécú dàvá-án, te dàtnùní ní cacu ndíi Dàvíí ñu-ni ñaní tnáhá ndíi. Te núú tnàhá méé ndíi Àbrahám ndíi ndíi Dàvíí ní cuu úxícúmí tnàhá-güedě. Te duca<sup>n</sup> te sa ní xínu úxícúmí-gă tucu-güedě ní cacu, te dàtnùní ní tñi ñaha cue tée ñuú Babiloniá xii ñáyiú isràél ndécá ñàha-güedě xii-yu cuáhá<sup>n</sup> ñuú-güedě cuèndá yàcá<sup>n</sup> cundecú-yu. Te sàtá ní yáha sá dúcá<sup>n</sup> ní cuu, te ní cacu úxúní tucu cue tée ní cuu ñaní tnáhá ndíi Àbrahám ndíi ndíi Dàvíí, te dàtnùní ní cacu Xítóhó Jesucrístú ñuyíú-a. Te núú tnàhá méé-gă ní cuu úxícúmí tnàhá-güedě.

*Ní cacu Jèsús*

*(Lc. 2:1-7)*

<sup>18</sup> Te duha ní cuu cùtnàhá ní cacu Xítóhó Jesucrístú, chí dàvá-án ní xíndecu ì<sup>n</sup> xíchí cuéchí ní xínani Màriá. Te xíchí-án sa ní cundáá tnúhu sá tnàndaha-xi ndíi ì<sup>n</sup> tée nàni Cheé.

Te cùmání-gǎ tnándaha-xi ndihí tée-án te Espiritú Yǎ Ndiǒxí ní quide ní ngúhu<sup>n</sup> déhe-xi. <sup>19</sup> Te té Chèé tée cuìní candeca ñaha xii xíchí-ǎ<sup>n</sup> nǐ cutnùní iní-dé sá ñúhú dēhe-xi. Te cùu-dé ì<sup>n</sup> tée quide ndáá, núu xiǎ<sup>n</sup> duu<sup>n</sup> duu<sup>n</sup> ní sani iní-dé sá vǎ tnándaha-gá-dé ndihí-xi, te dicó-ni sá ñà túú ní cǎhá<sup>n</sup>-dé chi ní cuìní-dé sá vǎ cǎhá<sup>n</sup> cuèhé cǎhá<sup>n</sup> duha ñáyiu cuendá-xi. <sup>20</sup> Te sátá dúcá<sup>n</sup> nǐ sani iní-dé te ní ngáva-dé ní xídí-dé, te núú sàní-dé ní sáhá<sup>n</sup> ì<sup>n</sup> espíritú xínú cuèchi núú Yǎ Ndiǒxí ní xáha<sup>n</sup>-xi xii-dé:

—Yòhó té Chèé tée cùu ñaní tnáhá ndii Dávií, yúhú cǎchí tnúhu-í xii-n sǎ ñà túú nǎ caní iní-n, tnándaha nahi-ni-n ndihí tá Màriá cuèi ñúhu déhe-xi, chi mee Espíritú Yǎ Ndiǒxí ní quide-xi duca<sup>n</sup> ní ngúhu<sup>n</sup> déhe-xi.

<sup>21</sup> Te na càcu déhe-xi-á<sup>n</sup> te danàni-n-dé Jèsús. Te duca<sup>n</sup> cùnani-dé, chi tée-án cada-dé cuendá sá vǎ cùndècu-gá cue ñaní tnáhá-dě ñáyiu isràél ichi cuèhé ichi duha —duha ní xáha<sup>n</sup> espíritú-án xii té Chèé-á<sup>n</sup> núú sàní-dé.

<sup>22</sup> Te duca<sup>n</sup> nǐ cuu chi ní quee ndáá-xi nàcuáa ní xáha<sup>n</sup> Yǎ Ndiǒxí xii ì<sup>n</sup> tée ní cǎhá<sup>n</sup> tnúhu-gá ndéé sanaha. Te tée-án nǐ chídó tnùní-dé núú tütú-gá nàcuáa ní xáha<sup>n</sup>-gǎ xii-dé, te duha ní xáha<sup>n</sup>-gǎ:

<sup>23</sup> Cundeçu ì<sup>n</sup> xíchí cuéchi ndèé cuèe-gá.

Te òré ndécú íi-xi vátá ñihí-gá yì-xi te ngúhu<sup>n</sup> déhe-xi.

Te òré ná cǎcú dēhe-xi te danàni ñahá-yu Emànuél.

Duha ní xáha<sup>n</sup>-gǎ xii tée-án nǐ chídó tnùní-dé núú tütú-gá. Te tnúhu Emànuél-á<sup>n</sup> quée-xí: Yá Ndiǒxí ndécú ndihí-o. Núu xiǎ<sup>n</sup> duca<sup>n</sup> nǐ cuu vitna.

<sup>24</sup> Te òré ní ndiquíú ìní té Chèé-á<sup>n</sup> te ní quide-dé nàcuáa ní xáha<sup>n</sup> espíritú-án xii-dé chi ní tnándaha-dé ndihí tá Màriá. <sup>25</sup> Dico ndi díí<sup>n</sup> nǐ xíndécú-yu ndéé ní sáá nduu nǐ cacu déhe-xi. Te òré ní cacu déhe-xi-á<sup>n</sup> te ní dánání ñaha-dé Jèsús.

## 2

*Cue tée cuángoto ñaha xii Jesús*

<sup>1</sup> Te Jèsús ní cacu-gá ì<sup>n</sup> ñuú nání Belén, te ñuú-á<sup>n</sup> yíndèhu-xi distritú Jùdeá. Te dàvá-á<sup>n</sup> cùnùu té Hèrodés yíndàha-dé ñáyiu. Te ñuú Jerusalén ní quexìo cue tée véxi ndàa xio nacuáa quène nchícanhii, cue tée túha dàcuaha cuendá nchaa sá ndéé andiu. <sup>2</sup> Te ndùcu tnúhu-güedé núú ñáyiu ñuú-á<sup>n</sup>, te xáha<sup>n</sup>-güedé:

—¿Vá cùndèe iní-ndó cǎchí tnúhu-ndo ndéé ndécú tée quíndaha ñaha xii ñáyiu isràél-ǎ<sup>n</sup>? Chi ní xiní-ndí ní quene chódíní-dě ndàa xio nacuáa quène nchícanhii, núu xiǎ<sup>n</sup> véxi-ndí chi cuìní-ndí quíni-ndí-dé te chiñuhu-ndí-dé —cǎchí-güedé xáha<sup>n</sup>-güedé xii-yu.

<sup>3</sup> Te òré ní níhí tée cùnùu nani Herodés tnúhu sá ndúcú tnúhu cue tée-á<sup>n</sup> ndéé ndécú tée quíndaha ñaha xii ñáyiu isràél, te ñá túú tnàhí ni cùu váha iní-dé, te diu-ni duca<sup>n</sup> ñà túú ní cùu váha iní tnáhá nchaa ñáyiu ñuú-á<sup>n</sup>. <sup>4</sup> Te ní cana-dé cue tée cùu dútú cùnùu, ndihí cue tée dàcuaha ñaha xii ñáyiu nchaa tnúhu ní chídó tnùní ndí Moisés, te ní xícá<sup>n</sup> tnúhú-dě núú-güedé núu xíní-güedé ndéé cacu Crístú tée tendaha Yǎ Ndiǒxí quixi ñuyíú-a. <sup>5</sup> Te ní xáha<sup>n</sup>-güedé xii-dé:

—Í<sup>n</sup> ñuú yíndèhu distritú Jùdeá cacu-dé, te ñuú-á<sup>n</sup> nání-xí Belén, chi quee ndáá-xi nàcuáa ní xáha<sup>n</sup> Yǎ Ndiǒxí xii ì<sup>n</sup> tée ní xóo cǎhá<sup>n</sup> tnúhu-gá ndéé sanaha. Te duha ndùu tnúhu ní chídó tnùní-dé núú tütú-gá:

<sup>6</sup> Ñuú Belén cúu-xí ì<sup>n</sup> ñuú líhli yíndèhu distritú Jùdeá, te ío-gá cùnùu-xi dacúxí dàva-gá ñuú cùnùu yíndèhu distritú-á<sup>n</sup>,

chi diu ñuú-á<sup>n</sup> quee ì<sup>n</sup> tée ío cùnùu.

Te tée cunuu-ǎ<sup>n</sup> quíndaha-dě ñáyiu cùu cuendá-í ñáyiu isràél.

Duha ní xáha<sup>n</sup>-gǎ xii tée ní xóo cǎhá<sup>n</sup> tnúhu-gá, te duca<sup>n</sup> nǐ chídó tnùní-dé núú tütú-gá —cǎchí-güedé xáha<sup>n</sup>-güedé xii té Hèrodés.

<sup>7</sup> Te sátá dúcá<sup>n</sup> te té Hèrodés dayuhu nǐ cana-dé cue tée ndùcu tnúhu núu ndéé ní cacu tée quíndaha ñaha xii ñáyiu isràél, te ní xícá<sup>n</sup> tnúhú-dě núú-güedé ná nduu cùu-xi nduu díhna

nuu nĩ xini-güedé chódíní. <sup>8</sup> Te sátá dúcá<sup>n</sup> te ní xáha<sup>n</sup>-dẽ xii-güedé:

—Chí cuáhá<sup>n</sup> ñuú Bèlén te nducu tnúhu váha-ndo nuu ndéé ní cacu téé duca<sup>n</sup> quindaha ñaha xii ñáyi israél. Te òré ná nàníhí-ndó-dẽ te quixi-ndo cächí tnúhu-ndo cuendá quíhí<sup>n</sup>-í tnàhá-í chiñuhu-í-dé — cächí-dé xáha<sup>n</sup>-dẽ xii-güedé.

<sup>9</sup> Te sátá dúcá<sup>n</sup> nĩ xáha<sup>n</sup> tẽ Hèrodés-á<sup>n</sup> te ní xica-güedé cuáhá<sup>n</sup>-güedé. Te chódíní nĩ xini-güedé ní quene ndàa xio nacuaa quene nchíanchii-á<sup>n</sup> yòdo nuu-di núu-güedé cuáhá<sup>n</sup>. Te ní ngüíñí chódíní-á<sup>n</sup>, te núú nĩ ngüíñí-di-á<sup>n</sup> yíndáá núu ndécú Jèsús. <sup>10</sup> Te òré ní xini cue téé-á<sup>n</sup> nĩ ngüíñí chódíní-á<sup>n</sup> núu yíndáá ndécú-gã, te ní cudíí víhí iní-güedé. <sup>11</sup> Te duca<sup>n</sup> te ní quexìo-güedé ndéé núu cáá vèhe ndecu Jèsús. Te òré cuánguihu-güedé xití vehe te ní xini-güedé Jèsús ndécú-gã ndihí náná-gã Màriá. Te ní ngüíñí xití-güedé, te ní ngüíta-güedé ní cachí-güedé sá ìo càhnu cuu Jèsús. Te dàtnùní ní nacaá<sup>n</sup>-güedé càjá xínehe-güedé, te ní tava-güedé díhú<sup>n</sup> cuáá<sup>n</sup>, ndihí dúsa sá ìo váha sàhá<sup>n</sup> tnámí nàni insiensú, ndihí yúcu sá nání mirrá ní taxi ndecu-güedé núu Jèsús cuendá cuu-xi ì<sup>n</sup> táhú sá cúu-xí-gã. <sup>12</sup> Te Yá Ndiòxí ní cáhá<sup>n</sup>-gã núu sàní-güedé, te xáha<sup>n</sup>-gã xii-güedé sá vã náyáha-gã-güedé cáhá<sup>n</sup> ndihí-güedé té Hèrodés. Núu xíá<sup>n</sup> cue téé-á<sup>n</sup> cuánuhú-güedé ingá ichi, te ñá túú-gã ní náyáha-güedé núu ndécú tẽ Hèrodés.

#### *Cuáhá<sup>n</sup>-yu ndihí Jèsús nàció<sup>n</sup> Ègiptú*

<sup>13</sup> Te sátá nĩ yáha cuánuhú cue téé ní sángoto ñaha xii Jèsús, te ní quexìo ì<sup>n</sup> espíritú xínú cuèchi núu Yá Ndiòxí núu sàní té Chèé, te xáha<sup>n</sup>-xi xii-dé:

—Véxi-í cächí tnúhu-í xii-n sã ndacóo-n, te ndee-n ñuú-a ndihí Jèsús, ndihí náná-gã cunu-ndo quíhí<sup>n</sup>-ndó nàció<sup>n</sup> Ègiptú, chi té Hèrodés tendaha-dẽ cue téé quixi nanducu ñaha xii Jèsús cuendá cahni ñaha-güedé. Te yacá<sup>n</sup> cundecu-ndo ndéé cachí

tnúhu-í xii-n ndùu ndixi-ndo —cachí espíritú-á<sup>n</sup> xáha<sup>n</sup>-xi xii té Chèé núu sàní-dé.

<sup>14</sup> Te té Chèé-á<sup>n</sup> nĩ ndacóo-dé, te niú ní xica-dé ndihí tá Màriá ndécá-yu Jèsús cuáhá<sup>n</sup> nàció<sup>n</sup> Ègiptú. <sup>15</sup> Te nàció<sup>n</sup> Ègiptú-á<sup>n</sup> ndécú-yu ní xihí té Hèrodés. Te duca<sup>n</sup> nĩ cuu chi ní quee ndáá-xi nacuaa ní cachí ì<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha nĩ quide-dé núu-gã ní cáhá<sup>n</sup>-dé yuhu-gã, te duha ní xáha<sup>n</sup>-gã ní cáhá<sup>n</sup>-dé: “Nàció<sup>n</sup> Ègiptú ndécú Dèhe-í ní cuu, te ní xáha<sup>n</sup>-í xii-dé sá ndéé-dé ñuú-á<sup>n</sup> vã cündecu-gã-dé”, duha ní xáha<sup>n</sup>-gã xii téé ní cáhá<sup>n</sup> tnúhu-gã ní quide-dé núu-gã.

#### *Té Hèrodés ní táuchíú<sup>n</sup>-dẽ cahni-güedé cue landú*

<sup>16</sup> Te cue téé ní sángoto ñaha xii Jèsús ní dándàhú-güedé té Hèrodés, chi ñá túú ní náyáha-güedé cúñaha-güedé sá nĩ naníhí-güedé Jèsús. Te sátá nĩ cutnùní iní té Hèrodés sá nĩ dándàhú ñáhá-güedé xii-dé te ní cudéé<sup>n</sup> víhí-dé, te ní tendaha-dẽ cue téé cuáhá<sup>n</sup> ñuú Bèlén, ndihí nchaa dava-gã ñuú cáá yàtni xíá<sup>n</sup> cuendá cahni-güedé mee-ni cuè landú téé. Te ndéé cue landú íchí ní cacu, ndihí ndéé cue landú sa ní nùtnahá úú cuíá-xi nchaa-güexi cahni-güedé ní xáha<sup>n</sup>-dẽ. Te duca<sup>n</sup> nĩ quide-dé chi ní quide cuendá-dé nacuaa ndùu tnúhu ní xáha<sup>n</sup> cuè téé ní sángoto ñaha xii Jèsús nduu nĩ xini-güedé chódíní, núu xíá<sup>n</sup> duca<sup>n</sup> nĩ táuchíú<sup>n</sup>-dẽ ní quide cue téé-á<sup>n</sup>. <sup>17</sup> Te duca<sup>n</sup> nĩ cuu chi ní quee ndáá-xi nacuaa ní cachí ndíi Jeremiás téé ní xóo cáhá<sup>n</sup> tnúhu Yá Ndiòxí ndéé sanaha, te duha ní cachí ndíi:

<sup>18</sup> Ní tecú ndàhí víhí ñáyi ñuú Ràmá sá ndihú iní-yu,

te ñáyi xíndáhyú-á<sup>n</sup> cúu-yu ñaní tnàhá tã Ràquél, te ndàhyú-yu cuendá sá nĩ xihí déhe-yu.

Te ñáyi-á<sup>n</sup> ñà túú ní cuíní-yu dàñá-yu sá ndihú iní-yu cuendá sá nĩ xihí déhe-yu.

Duha ní cachí ndíi Jeremiás.

<sup>19</sup> Te sátá nĩ xihí té Hèrodés te ní sáhá<sup>n</sup> tucu espíritú xínú cuèchi núu Yá



Ndiöxí núú sàní té Chèè òré ndécú-dé nàció<sup>n</sup> Ègiptú, te ní xáha<sup>n</sup>-xi xii-dé:

<sup>20</sup>—Véxi tucu-í cächí tnúhu-í xii-n sã ndácõo-n, te núhú-n ndihí Jesús ndihí nãná-gã ñuú cue ñaní tnáhá-n ñáyiú isràél cundecu-ndo, chi sa ní xihí cue téé cuíní cahni ñaha xii Jesús ní cùu —cachí espíritú-á<sup>n</sup> xãha<sup>n</sup>-xi xii té Chèè núú sàní-dé.

<sup>21</sup> Te té Chèè-á<sup>n</sup> ñí ndacóo-dé, te ní ndee-dé ndihí Jèsús ndihí nãná-gã cuánuhú-yu ñuú cue ñáyiú isràél ñáyiú cùu ñaní tnáhã-yu. <sup>22</sup> Te té Chèè ní níhí-dé tnúhu sá tẽ Arquelaú ní nucúnutnã-dé núú tãtã-dé té Hèrodés distritú Jùdeá yíndàha-dé ñáyiú. Te ní yùhú té Chèè-á<sup>n</sup>, te ñá túú ní cuíní-dé quihí<sup>n</sup>-dé cundecu-dé distritú-á<sup>n</sup>. Te Yá Ndiöxí ní cáhá<sup>n</sup>-gã núú sàní-dé, te ní xáha<sup>n</sup>-gã xii-dé sá quihí<sup>n</sup>-dé distritú Galileá, núú xíã<sup>n</sup> yàcã<sup>n</sup> cuáhã<sup>n</sup>-yu. <sup>23</sup> Te òré ní quexió-yu distritú Galileá, te ní sáhã<sup>n</sup>-yu ñí ñuú nání Nazarét ní xíndecú-yu. Te duca<sup>n</sup> ñí cuu chi ní quee ndáá-xi nãcuáa ní cachí cue téé ní xóo cáhá<sup>n</sup> tnúhu Yá Ndiöxí ndéé sanaha sá Jèsús cuu-gã téé ñuú Nazarét.

### 3

*Té Juàá téé dacuandute ñaha xii ñáyiú cáhá<sup>n</sup>-dé tnúhu Yá Ndiöxí xití yucu (Mr. 1:1-8; Lc. 3:1-9, 15-17; Jn. 1:19-28)*

<sup>1</sup> Te ní xica nduu sá dúcã<sup>n</sup> ñí cuu, te téé nani Juáá téé dacuandute ñaha xii ñáyiú ní quexió-dé yucu distritú Jùdeá cáhá<sup>n</sup>-dé tnúhu Yá Ndiöxí núú ñáyiú xití yucu-á<sup>n</sup>. <sup>2</sup> Te xáha<sup>n</sup>-dẽ xii-yu:

—Chí dándixi túu iní sá ñà túú quide váha-ndo ndècu-ndo, te dañã-ndo nchãa ichi cuehé ichi duha, chi sa ní cuyatni nduu ndihu ndaha ñaha Yá Ndiöxí xii-ndo —cächí-dé xáha<sup>n</sup>-dẽ xii-yu.

<sup>3</sup> Te diu cuendá té Juáá-á<sup>n</sup> ñí chídó tnùní ndí Chàíá téé ní xóo cáhá<sup>n</sup> tnúhu Yá Ndiöxí ndéé sanaha, te duha ndùu tnúhu ní chídó tnùní ndí cuendá-dé: Tècú cáhá<sup>n</sup> níhi ñí tée yihí xití yucu, te cächí-dé:

“Chí dáñã nchãa ichi cuehé ichi duha ndècu-ndo, te tñi-ndo ichi váha, Te duca<sup>n</sup> càda-ndo cuendá cundecu túha-ndo chi véxi Yaá ío cùnuu”, duha quesaha tẽe-á<sup>n</sup>.

Duha ndùu tnúhu ní chídó tnùní ndí Chàíá-á<sup>n</sup> cuendá té Juáá.

<sup>4</sup> Te té Juáá-á<sup>n</sup> ñí xóo cuihnu-dé dóó idi caméyu, te ñí ñí ní cuu pañú xití-dé, te ní xóo caxi-dé tíca làngóstã ndihí ndudí ñúñú cuéchi. <sup>5</sup> Te ñáyiú ñuú Jerusalén, ndihí ñáyiú nchãa ñuú yíndèhu distritú Jùdeá, ndihí ñáyiú nchãa ñuú cáá yàtni yúte Jòrdán ní sáhã<sup>n</sup>-yu ní xíndedóho-yu nãcuáa ní cáhá<sup>n</sup> té Juáá. <sup>6</sup> Te ní ngüita-yu ní náhmã-yu nchãa cuéchi-yu núú Yá Ndiöxí. Te òré duca<sup>n</sup> ñí náhmã-yu te ní dácuandute ñaha té Juáá xii-yu yúte Jòrdán.

<sup>7</sup> Te vai cue téé cùu fariséú ndihí cue téé cùu saducéú cuáhã<sup>n</sup>-güedé núú ndécú tẽ Juáá cuíní-güedé dacuandute ñaha-dé xii-güedé. Te òré ní quexió-güedé núú ndécú-dé, te ní xáha<sup>n</sup>-dẽ xii-güedé:

—¡Nchãa nchòhó cúú-ndó dàtnã ñí cóo dèé<sup>n</sup> chi ío cuihna iní-ndó! ¿Te nása ní cuu núu tnáhã nchòhó ndúcú-ndó nãcuáa cada-ndo cãcu nihnu-ndo núu tnúndòho cahnu vihi ta cuyatni ñaha xii-ndo véxi-í? <sup>8</sup> Te chí cádá váha vitna cundecu-ndo cuendá duca<sup>n</sup> cùtnuní sá ñí dáñã-ndó nchãa ichi cuehé ichi duha ndècu-ndo. <sup>9</sup> Te vá cächí-ndó sã ío cãhnu cuu-ndo cuendá sá cúú-ndó ñaní tnáhã ndíi Abrahám. Chi cuéi ndéé yúú te ndacu Yá Ndiöxí ndada-gã ñáyiú te cuú-yu ñaní tnáhã ndíi Abrahám. <sup>10</sup> Te caá chi ndècu túha-xi sá quèhndé-xi nchãa yutnu sá dúcã<sup>n</sup> ñà túú càváha sãvidí-xi-á<sup>n</sup>, chi nchãa yutnu-á<sup>n</sup> tẽhndé-xi te cuángèe-xi núú ñùhú càyú-xi. Te duha sãtnáhã-xi ndoho nchãa ñáyiú ñá túú quide váha-á<sup>n</sup> chi nchãa ñáyiú ñá túú quide váha cúú-yu dàtnã nchãa yutnu sá ñà túú càváha sãvidí-xi. <sup>11</sup> Te na cächí tnúhu ndáá-í xii-ndo sã yùhú dácuandute-í mee-ni ñáyiú ní dáñã nchãa ichi cuehé ichi duha. Dico nchícú<sup>n</sup> tucu ingá téé véxi, te téé-á<sup>n</sup> taxi-dé Espíritú

Yã Ndiõxí cundecu ndihi-ndo. Te cùu-xi datná ì<sup>n</sup> ñuhú, chi ndada ndoo ndada nine-xi iní-ndó. Te téé-á<sup>n</sup> ìo-gá cúnùu-dé dácúúxí yùhú, chi yùhú cùu-í ì<sup>n</sup> téé duu<sup>n</sup> duu<sup>n</sup> ñá túú tàú cuita nehe ni chàú-dé dico quide-í chiú<sup>n</sup>-dé. <sup>12</sup> Te téé-á<sup>n</sup> sa véxi túha-dé sá cáda dè<sup>n</sup> ñaha-dé xii-o datná quidé ñáyiú ndàda ndoo triú, chi ñáyiú-á<sup>n</sup> sa nèhe túha-ná-yu yaxí<sup>n</sup>-yu òré náñani cuendá ndada ndoo-yu. Te òré ndádá ndòó-yu triú-á<sup>n</sup> te dàquee dè<sup>n</sup>-yu mihi-xi, te tàxúha-yu mee-ñá triú-á<sup>n</sup> te sàhmí-yu mihi-xi-á<sup>n</sup>. Te datná quidé-yu mihi triú-á<sup>n</sup> duca<sup>n</sup> sãtnahá-xi cada ñaha téé-á<sup>n</sup> xii nchaa ñáyiú ñá túú quide váha, chi daquihí<sup>n</sup> ñáhá-dé xii-yu núú ñuhú núú càyú, te ñuhú-á<sup>n</sup> ñá túú tnàhí ndàhvá — càchí-dé xãha<sup>n</sup>-dè xii-güedé.

### Sàndute Jesús

(Mr. 1:9-11; Lc. 3:21-22)

<sup>13</sup> Te Jèsús ní quee-gá distrítú Galileá cuáhá<sup>n</sup>-gá yúte Jòrdán núú ndécú tẽ Juáá cuendá dacuàndute ñaha-dé xii-gá. <sup>14</sup> Te òré ní quexìo Jesús núú ndécú tẽ Juáá, te ñá cuìní-dé dacuàndute ñaha-dé xii-gá ní cùu, te ní xãha<sup>n</sup>-dè xii-gá:

—Yùhú tàú-í sá dácuaàndute ñaha-n xii-í, te ñá díú dà yùhú dacuàndute ñaha-í xii-n —càchí-dé xãha<sup>n</sup>-dè xii-gá.

<sup>15</sup> Te Jèsús ní xãha<sup>n</sup>-gã xii-dé:

—Quehe<sup>n</sup> dañá, chi dacuítí xini ñuhu-xi duca<sup>n</sup> cada-o nacuaá cundáá-ó núú Yã Ndiõxí —càchí-gá xãha<sup>n</sup>-gã xii-dé.

Te té Juáá-á<sup>n</sup> ñí sáhá<sup>n</sup> uu<sup>n</sup>-dé tnúhu ní xãha<sup>n</sup> Jèsús xii-dé. <sup>16</sup> Te ní dácuaàndute-dé Jèsús. Te òré ní nene-gá xití ndute te ní xiní-gá nchii andiú, te ní quee Espiritú Yã Ndiõxí véxi cuu<sup>n</sup>-xi ngúndecu ndihi ñaha-xi xii-gá, te datná cáá ì<sup>n</sup> lómá cáá Espiritú-á<sup>n</sup> véxi cuu<sup>n</sup>-xi. <sup>17</sup> Te òré-á<sup>n</sup> ñí tecú ní cáhá<sup>n</sup> Yã Ndiõxí ndéé andiú, te xãha<sup>n</sup>-gã xii Jèsús:

—Yòhó cúu-n Dèhe-í téé ío cùu iní-í te ío cùdíí iní ñáhà-í xii-n —càchí-gá xãha<sup>n</sup>-gã xii Jèsús.

## 4

*Sácuíhná quidé yìca-xi cada Jesús sá ñà túú tàú-gá cada-gá ní cùu*

(Mr. 1:12-13; Lc. 4:1-13)

<sup>1</sup> Te Espiritú Yã Ndiõxí ndécá-xi Jèsús cuáhá<sup>n</sup> ì<sup>n</sup> xití yucu cuendá yacá<sup>n</sup> cundecu tnaa-gá, te yacá<sup>n</sup> quexìo sácuíhná coto ndeé ñáhá-xi xii-gá te núu ndisa sá vã cáda-gã ì<sup>n</sup> sá ñá túú tàú-gá cada-gá.

<sup>2</sup> Te Jèsús ñá ní xèxi-gá údico nduu údico niú, te duca<sup>n</sup> te dātñuní ní xicá<sup>n</sup> iní-gá caxi-gá. <sup>3</sup> Te sátá dúcá<sup>n</sup> te ní quexìo sácuíhná quidé yìca-xi cada Jesús ì<sup>n</sup> sá ñá túú tàú-gá cada-gá, te xãha<sup>n</sup>-xi xii-gá:

—Te núu ndisa sá cúu-n Dèhe Yã Ndiõxí te cúñaha xii yúú-a na ndùu-xi paá —càchí-xi xãha<sup>n</sup>-xi xii-gá.

<sup>4</sup> Te Jèsús ní xãha<sup>n</sup>-gã xii-xi:

—Núú tütú Yã Ndiõxí càchí-xi: “Ñá díú mèe-ni paá candeca-xi iní ñáyiú ñuyíú, chi tnàhá nchaa tnúhu càhá<sup>n</sup> Yã Ndiõxí candeca-xi iní-yu”, duha càchí-xi núú tütú-gá —càchí-gá xãha<sup>n</sup>-gã xii-xi.

<sup>5</sup> Te dātñuní sácuíhná-ã<sup>n</sup> ndécá ñaha-xi xii-gá cuáhá<sup>n</sup> ñuu Jerusálén, te yacá<sup>n</sup> ní xãha<sup>n</sup>-xi xii-gá cuásaá-gá díquí véñùhu càhnu sá ìo cùnuu núú ñáyiú isràél, <sup>6</sup> te dātñuní ní xãha<sup>n</sup> tucu-xi xii-gá:

—Te núu ndisa cùu-n Dèhe Yã Ndiõxí te cuandèe ndava núú ñuhú cuendá quee ndáá-xi nàcuáa càhá<sup>n</sup>-xi núú tütú-gá núú càchí-xi: “Yã Ndiõxí tendaha-gá cue espiritú xínú cuèchi núú-gã quixi-xi cuendá coto ñaha-xi xii-n, te núú ndáhá-xi càundodo-n cuendá sá vã dánicuèhé yúú sáhá<sup>n</sup>”, duha càchí-xi núú tütú-gá —càchí sácuíhná-ã<sup>n</sup> xãha<sup>n</sup>-xi xii Jesús.

<sup>7</sup> Te Jèsús ní xãha<sup>n</sup>-gã xii-xi:

—Te càchí tucu-xi núú tütú Yã Ndiõxí: “Vá caní iní-n còto ndeé-n Dütú Ndiõxí Yaá cúú Ndiõxí-n cuendá-ni sá cuìní-n sã dácacu nihnu ñaha-gã xii-n ì<sup>n</sup> sá sání iní-n càda-n”, duha càchí-xi núú tütú-gá —càchí-gá xãha<sup>n</sup>-gã xii-xi.

<sup>8</sup> Te sácuíhná ndécá tucu-xi Jesús cuáhá<sup>n</sup> ì<sup>n</sup> núú tìndúú dùcú<sup>n</sup>, te



uu<sup>n</sup>ni ní dánèhé núú ñáhá-xí xì-gá nchaandi túhú nàció<sup>n</sup> cáá ñùyíú, ndihi nchaa sá yáha ió ñ<sup>n</sup> ñ<sup>n</sup> nàció<sup>n</sup>-á<sup>n</sup>. <sup>9</sup> Te ní xáha<sup>n</sup>-xi xì-gá:

—Te núu yòhó ngüíñí xítí-n núu-í chiñuhu ñaha-n xì-í ñá, te taxi cuèndá-í nchaa sá ñí dánèhé ñáhà-í-a cuu cuèndá-n —càchí-xi xáha<sup>n</sup>-xi xì-gá.

<sup>10</sup> Te Jèsús ní xáha<sup>n</sup>-gã xii-xi:

—Xocuiñí yòhó sácuihná núu ndécù-í-a, chi vá cúú càda-í nàcuáa càchí-n, chi núú tütú Yá Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ñi-ni-gá cada-ndo nchaa nacuáa càhá<sup>n</sup>-gá”, duha càchí-xi núú tütú-gá —càchí-gá xáha<sup>n</sup>-gã xii-xi.

<sup>11</sup> Te dātnùní sácuihná ñí dáñá-xí Jèsús ní xica-xi cuáhá<sup>n</sup>-xi. Te sātá dúcá<sup>n</sup> te ní quexìo cue espíritú xínú cuèchi núú Yá Ndiöxí ní xinu cuechi-xi núú Jèsús.

*Distritú Galileá ní chisaha Jèsús chiù<sup>n</sup> ní táhú Tātá-gã Dütú Ndiöxí cada-gá*

*(Mr. 1:14-15; Lc. 4:14-15)*

<sup>12</sup> Te òré ní níhí Jèsús tnúhu sá ñí ngava té Juáá té dācuandute ñaha xii ñáyiú vecaá, te ní xica-gá cuáhá<sup>n</sup>-gá distritú Galileá. <sup>13</sup> Te ñí ñà túú ní xīndecu-gá ñuú Nazàrét, chi ní yáha-gá cuáhá<sup>n</sup>-gá ndéé ñuú Capèrnaúm yacá<sup>n</sup> ní xīndecu-gá, te ñuú-á<sup>n</sup> cáá yātñi yuhu lagúná, te yatñi xiá<sup>n</sup> cáá ñuhu nani Zabulón, ndihi ñuhu nani Neftalí. <sup>14</sup> Te duca<sup>n</sup> ñí cuu chi ní quee ndáá-xi nàcuáa ní chídó tnùní ndí Chàíá té ní xóo cáhá<sup>n</sup> tnúhu Yá Ndiöxí ndéé sanaha núú tütú-gá núú càchí-xi:

<sup>15</sup> Ñuhu nani Zabulón, ndihi ñuhu nani Neftalí, ñuhu-á<sup>n</sup> yīndèhu-xi distritú Galileá,

te xiá<sup>n</sup> xīndecu cue ñáyiú ñá túú cùu ñáyiú isràél,

te càa-xi yatñi yuhu lagúná te ndàa ingá xio yúte Jòrdán cúú-xí.

<sup>16</sup> Te cue ñáyiú-á<sup>n</sup> ndécü-yu ñí núú néé chi ndécü-yu ichi cuèhé ichi duha,

te sáá nduu te cada iní-ndó sã ñáyiú-á<sup>n</sup> queé-yu núú ditó chi

vá cūndècu-gá-yu ichi cuèhé ichi duha.

Te ñi-ni ñáyiú-á<sup>n</sup> cúü-yu ñáyiú ta xīta nihnu duu<sup>n</sup> cuáhá<sup>n</sup>,

dico sáá nduu te vá cuīta nihnu-gá-yu. Duha ní chídó tnùní ndí núú tütú-gá.

<sup>17</sup> Te dàvá-á<sup>n</sup> ñí ngüíta Jèsús ní dánèhé-gá ñáyiú, te ní xáha<sup>n</sup>-gã xií-yu:

—Chí dāndìxi túu iní sá ñà túú quide váha-ndo ndècu-ndo te dañā-ndo nchaa ichi cuehé ichi duha, chi sa ní cuyatni nduu ndíhu ndaha ñaha Yá Ndiöxí xii-ndo —càchí-gá xáha<sup>n</sup>-gã xii-yu.

*Jèsús càhá<sup>n</sup>-gá cúmí tnàhá cue té tñí chácá*

*(Mr. 1:16-20; Lc. 5:1-11)*

<sup>18</sup> Te Jèsús ñúhú-gã ichi cuáhá<sup>n</sup>-gá tá yáha-gá yuhu làgúná Galileá, te ní xiní-gá úú tnàhá cue té xīdāquē-güedé ñunu-güedé xítí ndute tñí-güedé chácá, chi quiti tnàhí-á<sup>n</sup> cúú chiù<sup>n</sup>-güedé tñí-güedē-di. Te ñí-dé nání-dē Xīmú, àdi Pelú chi úú ñi-dé, te ñaní-dé cúú ingá té ndihí-dé te té-á<sup>n</sup> nání-dē Ndríxí. <sup>19</sup> Te Jèsús ní xáha<sup>n</sup>-gã xii-güedé:

—Chí dáñá chiù<sup>n</sup> quide-ndo-á<sup>n</sup> te quixi-ndo chītnahá ñáhá-ndó xì-í, te taxi-í ingá núú chiù<sup>n</sup> cada-ndo chi quíhí<sup>n</sup>-ndó dàcahá<sup>n</sup>-ndó ñáyiú cuèndá tuha ñàhá-yu xii-í —càchí-gá xáha<sup>n</sup>-gã xii-güedé.

<sup>20</sup> Te òré-ni-á<sup>n</sup> ñí dáñá cuè té-á<sup>n</sup> ñunu-güedé, te ní tuha-güedé Jèsús.

<sup>21</sup> Te ní xica tucu Jèsús cuáhá<sup>n</sup>-gá luha-gá, te ní xiní tucu-gá úú-gá tnàhá cue té tñí chácá. Te ñí-té-á<sup>n</sup> nání-dē Jàcobó, te ñaní-dé cúú ingá té ndihí-dé te té-á<sup>n</sup> nání-dē Juáá, te ndi ndúu-güedé cúú-güedē déhe té Zebèdeú. Te xīxínucóo-güedé ndihi tātá-güedē xítí bàrcú xīnatícu-güedé ñunu-güedé, te Jèsús ní cana ñaha-gã xii-güedé.

<sup>22</sup> Te òré-ni-á<sup>n</sup> ñí dāndōo-güedé bàrcú-güedé, ndihi tātá-güedē, te ní tuha ñaha-güedē xii-gá.

*Jèsús dánèhé-gá cuèhé víhí ñáyiú*  
*(Lc. 6:17-19)*

23 Te Jèsús tá xica ndodo-gá ñihí distritú Galileá cuáhá<sup>n</sup> tá dānehé-gá ñáyiú tnúhu váha tnúhu sá sánú ìchi ñaha xií-yu nācuáa ndíhu ndaha ñaha Yá Ndiöxí xií-yu. Te ndi tnahá ñ<sup>n</sup> ñ<sup>n</sup> ñuú sàá-gá te duca<sup>n</sup> cuānguihu-gá xití veñúhu dānehé-gá ñáyiú tnúhu-á<sup>n</sup>. Te ndi díí<sup>n</sup> ndi díí<sup>n</sup> núú cuēhé tñhá ñ<sup>n</sup> ñ<sup>n</sup> ñáyiú dico nchaa-ní-yu ta quide tátna-gá cuáhá<sup>n</sup>. 24 Te ndéé nchaa ñáyiú yíndehu distritú Siríá ní níhí-yu tnúhu nchaa nācuáa quide Jesús. Te ní queé-yu ñuú-yu te ndécá-yu nchaa ñáyiú tñhá ndi díí<sup>n</sup> núú cuēhé cuáhá<sup>n</sup> núú ndécú Jèsús. Te cuēi ñáyiú xiyíhí, ndihí ñáyiú ñá túú-gă cāndá nihnu, ndihí ñáyiú yíhí ñaha espíritu cūndihí yucu ñávāha ndécá-yu cuáhá<sup>n</sup> núú-gă, te nchaa-yu ní quide tátna ñaha-gă xií-yu. 25 Te ío vāi ñáyiú ní chinchícú<sup>n</sup> ñáhá xii Jesús, chi ní chinchícú<sup>n</sup> ñáhá ñáyiú distritú Galileá, ndihí ñáyiú nchaa ñuú xíndāa Dēcāpólís, ndihí ñáyiú ñuú Jerusālén, ndihí cue ñáyiú nchaa ñuú yíndèhu distritú Jùdeá, ndihí ñáyiú xíndecu yatni yúte Jòrdán ndāa xio quene nchícanhii.

## 5

*Jèsús núcōo-gá ñ<sup>n</sup> núú tìndúú dānehé-gá ñáyiú*

1 Te sātá ñí xini Jèsús sá cuēhé víhí ñáyiú nchícú<sup>n</sup> ñáhá xii-gá, te ní xica-gá cuásaá-gá ñ<sup>n</sup> núú tìndúú te xíá<sup>n</sup> ñí ngóo-gá, te cue téé xica cuu ndihí-gá ní nadúcú<sup>n</sup> ndéé ñáhá-güedě xii-gá. 2 Te ní ngüíta-gá dānehé ñáhá-gă xii-güedě ndihí cue ñáyiú-á<sup>n</sup>, te xāha<sup>n</sup>-gă:

*Cuendá ñáyiú ío váha táhú-xi  
(Lc. 6:20-23)*

3 —Váha táhú nchaa ñáyiú cūtnuní iní-xi sá ío-gá cūmāñi-yu cudíu-yu núú Yá Ndiöxí, chi ñáyiú-á<sup>n</sup> nduu táhú-yu ndíhu ndaha ñaha-gá xií-yu.

4 'Váha táhú nchaa ñáyiú ndàhyú sá ndihú iní-yu, chi Yá Ndiöxí cuāñaha-gă tnúhu ndee iní cundecu ndihí-yu.

5 'Váha táhú nchaa ñáyiú ndàhú iní-xi, chi ñáyiú-á<sup>n</sup> nduu táhú-yu cundecú-yu ñ<sup>n</sup> xichi núú cuāñaha Yá Ndiöxí xií-yu.

6 'Váha táhú nchaa ñáyiú ío cūnì cada nchaa nācuáa cāhá<sup>n</sup> Yá Ndiöxí, chi ñáyiú-á<sup>n</sup> ío nduu vétú iní-yu.

7 'Váha táhú nchaa ñáyiú cūndahú iní tñaha ñáyiú-xi, chi ñáyiú-á<sup>n</sup> ñu-ni duca<sup>n</sup> cāda ñaha Yá Ndiöxí xií-yu cundahú iní ñáhá-gă.

8 'Váha táhú nchaa ñáyiú ní nduu ndoo ní nduu nine iní-xi, chi cue ñáyiú-á<sup>n</sup> nduu táhú-yu cundecú-yu ndihí Yá Ndiöxí.

9 'Váha táhú nchaa ñáyiú cāhá<sup>n</sup> dóho tñaha ñáyiú-xi nācuáa cundecu ndihí váha tñhá-yu, chi cūtnuní sá ñáyiú-á<sup>n</sup> cuú-yu déhe Yá Ndiöxí.

10 'Váha táhú nchaa ñáyiú ío ndòho ndecu ñuyúú-a sá cuendá sá quidě-yu nācuáa cāhá<sup>n</sup> Yá Ndiöxí, chi ñáyiú-á<sup>n</sup> nduu táhú-yu ndíhu ndaha ñaha-gă xií-yu.

11 'Te cūu-ndo ñáyiú ío váha táhú-xi te núu na cūcuēhé ñáhá ñáyiú, àdi cada úhú ñáhă-yu xii-ndo, àdi dāca dāquí ñáhă-yu nāndi cuēchi neñúú xii-ndo sã cuendá-í. 12 Te òré duca<sup>n</sup> na cāda ñahá-yu xii-ndo te cudíí víhí-ní iní-ndó cūndecu-ndo, chi ío váha cāa sá ndécú àndiú nduu táhú-ndó cūndecu ndihí-ndo nduu na saá-ndó yacá<sup>n</sup> cundecu-ndo, chi ñu-ni duca<sup>n</sup> ñí xóo cada ñaha cue ñaní tñáhă-yu xii cue téé ní xóo cāhá<sup>n</sup> tnúhu Yá Ndiöxí ní xíndecu ndéé sanaha.

*Cuendá ñíí ndihí cuendá ñuhú  
(Mr. 9:50; Lc. 14:34-35)*

13 'Te nchòhó cada iní-ndó sã cúu-ndó dàtná ñíí cuendá ñuyúú-a. Te ñíí chi nāndihí-xi dico núu na nduu víxi<sup>n</sup>-xi, te ñá túú-gă nāndihí-xi chi dāngoyo-ná-ó, te yāha ñáyiú xēnihnú-yu. Te duca<sup>n</sup> sātñahá-xi cūu nchohó chi cūu-ndo datná ñíí vāha te núu na cāda váha-ndo, te núu vá cādā vāha-ndo te quee tíhú-ndó.

14 'Te nchòhó cada iní-ndó sã cúu-ndó dàtná ñíí sá dāyēhé ndécú ñuyúú-a, chi sānu ichi-ndo ñáyiú ichi váha. Te nchòhó xini-ndó sã

nũu ì<sup>n</sup> ñũú cáá ì<sup>n</sup> nũú tìndúú te vá cúú cächí-ó sã nguivãha-xi. <sup>15</sup> Te ñá túú xìní-ó ì<sup>n</sup> ñáyiu teñuhú-yu ì<sup>n</sup> linterná te chiváha-yu xití ì<sup>n</sup> cãjá, chi tàxi ndecú-yu núú ñnu cuendá cutnùní núú nchàa ñáyiu ndècu vehe. <sup>16</sup> Te duca<sup>n</sup> càda nchohó cada váha-ndo dàtná quidé ì<sup>n</sup> ñuhú dayèhe-xi núú ñáyiu, te duca<sup>n</sup> quini ñáyiu nacuáa quide-ndo ndecu-ndo, te tnàhá-yu cachí-yu sá ìo cãhnu cuu Dútú Ndiõxí Yáá cúú Tãtã-ndó ndècu andi<sup>u</sup> chi quini-yu sá quidé vãha-ndo ndècu-ndo.

### *Cuendá tnúhu ní chídó tnùní ndí Moisés*

<sup>17</sup> Te vá cání ìní-ndó sã yùhú véxi-í xocàni-í tnúhu ní chídó tnùní ndí Moisés, te ní vá cání ìní-ndó sã véxi-í xocàni-í tnúhu ní chídó tnùní cue tée ní xóo cáhá<sup>n</sup> tnúhu Yá Ndiõxí ndéé sanaha, chi yùhú véxi-í sá cáda-í nacuáa cáhá<sup>n</sup> nchaa tnúhu-á<sup>n</sup>. <sup>18</sup> Te na cächí tnúhu ndáá-í xii-ndo sã tnúhu ní chídó tnùní ndí Moisés ío ndáá cáhá<sup>n</sup>-xi, chi dacutí cùu nchaa nacuáa cáhá<sup>n</sup>-xi. Te yáchí-gá naa andi<sup>u</sup> ndíhi ñuyíú dàcúúxí sã quée cáva ì<sup>n</sup> tnúhu-á<sup>n</sup>. <sup>19</sup> Núu xíã<sup>n</sup> nchaa ñáyiu na cächí sá dává tnúhu ní chídó tnùní ndí Moisés ñá túú xìní ñuhu-xi chi ñá túú cùnuu-xi, te ñáyiu-á<sup>n</sup> di<sup>u</sup>-ni duca<sup>n</sup> dànehé-yu nchaa dava-gá tnàha ñáyíu-yu, te sá dúcá<sup>n</sup> quidé-yu te vá cùnùu vihí-yu núú ndécú Yá Ndiõxí táxí tnùní-gá, chi cuú-yu dàtná ì<sup>n</sup> ñáyiu nchìcú<sup>n</sup> cuii-nã. Dico nchaa ñáyiu nchìcú<sup>n</sup> nihnu quide nchaa nacuáa cáhá<sup>n</sup> nchaa tnúhu-á<sup>n</sup>, te di<sup>u</sup>-ni duca<sup>n</sup> dànehé-yu nchaa dava-gá tnàha ñáyíu-yu, te ñáyiu-á<sup>n</sup> ìo cùnùu-yu núú ndécú Yá Ndiõxí táxí tnùní-gá. <sup>20</sup> Te na cächí tnúhu-í xii-ndo sã ìo xìní ñuhu-xi cada-ndo nchaa nacuáa cáhá<sup>n</sup> Yá Ndiõxí, te vá cáda-ndó dàtná xiquide cue tée dànehé ñáhá xii ñáyiu nchaa tnúhu ní chídó tnùní ndí Moisés, ndíhi dàtná xiquide cue tée cùu fariséú, chi núu na càda-ndo datná xiquide cue tée-á<sup>n</sup> ñá, te vá ndúú tãhú-ndó ndíhu ndaha ñàha Yá Ndiõxí xii-ndo.

### *Jèsús càhá<sup>n</sup>-gá cuendá ñáyiu cùdée<sup>n</sup> (Lc. 12:57-59)*

<sup>21</sup> Te nchòhó sa xìní-ndó sã ncháá ñáyiu ní cuu ñaní tnáhá-ndó ní xindecu ndéé sanaha ñí níhi-yu tnúhu sá vã cúú cãhni-yu tnàha ñáyíu-yu, chi núu duca<sup>n</sup> na càdá-yu te nacháhu-yu cuéchi-yu. <sup>22</sup> Dico vitna na cächí tnúhu-í xii-ndo sã nũu ndédani càa-ndo na cudée<sup>n</sup>-ndó nũu tnàha ñáyiu-ndo, te nacháhu-ndo sã dúcá<sup>n</sup> quide-ndo, àdi núu na cùcuéhé-ndó-yu te núú chítú nũu tàcá cundáá cuéchi-ndo te núu duca<sup>n</sup> na càda-ndo, àdi núu nã cúu-ndo tnàha ñáyiu-ndo ì<sup>n</sup> tnúhu vée vîhi, te cucuéchi vîhi xii-ndo chi quíhí<sup>n</sup>-ndó nũu ùhú núú ndàhú.

<sup>23</sup> Te xíã<sup>n</sup> nũu nchòhó òré ndécú ndíhi-ndo ì<sup>n</sup> sá cuini-ndó cuãha-ndo Yá Ndiõxí nduu tãhú-gã, te òré cuáhá<sup>n</sup>-ndó cuãñaha-ndo xii-gá, te òré ní quexìo-ndo núú dúcá<sup>n</sup> cuãñaha-ndo xii-gá sá ndúú tãhú-gã, te ní ndacu iní-ndó sã ndécú ñáyiu ñá túú cùu váha iní ñáhá xii-ndo cuendá ì<sup>n</sup> sá ñí cumání nũu tnáhá-ndó. <sup>24</sup> Te dàndóo-ndo sã dúcá<sup>n</sup> nèhe-ndo cuáhá<sup>n</sup> nduu tãhú Yá Ndiõxí, te díhna-gá quíhí<sup>n</sup>-ndó nàcáhá<sup>n</sup> cáhnú ìní tnáhá-ndó ndíhi ñáyiu ñá túú cùu váha iní ñáhá xii-ndo-á<sup>n</sup>, te dàtnùní duca<sup>n</sup> te quíhí<sup>n</sup>-ndó cuãha-ndo Yá Ndiõxí sá ndúú tãhú-gã.

<sup>25</sup> Te núu ìó ì<sup>n</sup>-ndo ñí sáhá<sup>n</sup> ñáyiu núú tée cùchiu<sup>n</sup> ní sacá<sup>n</sup> cuéchi-yu cuendá-ndó cuendá ì<sup>n</sup> sá ñí quide-ndo, te òré ní naníhí tnáhá-ndó ndíhi-yu cuáhá<sup>n</sup>-ndó nũu tée cùchiu<sup>n</sup>-á<sup>n</sup>, te nacáhá<sup>n</sup> cáhnú ìní tnáhá-ndó ndíhi-yu cuendá sá vã cuãha cuendá ñáhá-gã-yu xii-ndo nũu tée cùchiu<sup>n</sup>, chi núu duca<sup>n</sup> na càdá-yu te tée cùchiu<sup>n</sup>-á<sup>n</sup> cuãha cuendá ñáhá-dé xii-ndo nũu cuè tée cùu poleciá, te cue tée-á<sup>n</sup> chihi ñaha-güedé vecaá xii-ndo. <sup>26</sup> Te na cächí tnúhu ndáá-í xii-ndo sã vã cãcu-ndo te núu na ngáva-ndo vecaá ndéé nacháhu-ndo nchàa sá tau-ndó.

### *Cuendá cue ñáyiu ñá túú quide váha*

<sup>27</sup> Te nchòhó sa xìní-ndó nacuáa nduu tnúhu ní cáhá<sup>n</sup> cue tée ní

xíndecu ndéé sanaha, te duha ní cachí-güedé: “Nchaa cue téé vá cúú cǎhá<sup>n</sup> ndihí-güedé ñadihí te núú ñá díú ñadihí-güedé cúú-yu, te ñu-ni duca<sup>n</sup> tucu nchaa cue ñáyiu dihi vá cúú cǎhá<sup>n</sup> ndihí-yu téé te núú ñá díú yíi-yu cùu-güedé”, duha ní cachi-güedé. <sup>28</sup> Dico yúhú cǎchí tñuhu-í xii-ndo sǎ ndéda-ni cǎa cue téé na cundehe ñ<sup>n</sup> ñadihí te núú na cǎni iní-güedé cundecu díi iní-güedé ndihí-yu te cada iní-ndó sǎ dátá sǎ sǎ ní cǎhá<sup>n</sup> ndihí ñaha-güedé xií-yu sǎ dúcá<sup>n</sup> ní sani iní-güedé.

<sup>29</sup> Te núú ñ<sup>n</sup> xio tinùu-ndo quide-xi quide-ndo náandi sǎ cuéhé sǎ dúhá te tava-ndo, chi váha-gá sǎ ná cuíta te ñá díú ñihí ní ndúú yiqui cuñú-ndó quíhí<sup>n</sup>-xi núú ùhú núú ndàhú. <sup>30</sup> Te núú ñ<sup>n</sup> xio ndaha-ndo quide-xi quide-ndo náandi sǎ cuéhé sǎ dúhá te quehdé-ndó, chi váha-gá sǎ ná cuíta ñ<sup>n</sup> xio ndaha-ndo te ñá díú sǎ ñihí ní ndúú yiqui cuñú-ndó quíhí<sup>n</sup>-xi núú ùhú núú ndàhú.

*Jèsús cǎhá<sup>n</sup>-gá cuendá cue ñáyiu dàña tnaha*

*(Mt. 19:9; Mr. 10:11-12; Lc. 16:18)*

<sup>31</sup> Te nchòhó sa nàha tucu-ndo nacuáa ní cǎhá<sup>n</sup> tucu cue téé ní xíndecu ndéé sanaha, te duha ní cachí-güedé: “Te núú ñ<sup>n</sup> téé na dàña tnaha-dé ndihí ñadihí-dé, te xini ñuhu-xi cadúha-dé ñ<sup>n</sup> tutú cuáñaha-dé núú cǎhá<sup>n</sup>-xi sǎ ní dáña ñaha-dé”, duha ní cachí-güedé. <sup>32</sup> Dico yúhú cǎchí tñuhu-í xii-ndo sǎ cúú dàña ñ<sup>n</sup> téé ñadihí-dé, te núú cùtnuní ndáa iní-dé sǎ cǎhá<sup>n</sup> ndihí-a<sup>n</sup> ingá téé. Dico núú ñá túú dùca<sup>n</sup> quide-a<sup>n</sup> te ñá túú ndùu váha-xi dàña ñaha-dé. Te núú ñá túú dùca<sup>n</sup> quide ñadihí-dé, te cada iní-ó sǎ méé-dé ní sanu ichi ñaha-dé xii-a<sup>n</sup> cǎhá<sup>n</sup> ndihí-a<sup>n</sup> ingá téé te núú na dàña ñaha-dé. Te téé na nàquehe<sup>n</sup> ñaha xii ñaha ní dáña ñaha yíi-xi-á<sup>n</sup>, te ñu-ni ñá túú ní quide váha-dé sǎ dúcá<sup>n</sup> ní naquehe<sup>n</sup>-dé ñaha-á<sup>n</sup>.

*Ñáyiu cǎcunehe ñaha xii Yá Ndiöxí cuendá cutnùnì iní tnàha ñáyíu-yu sǎ ndáa cadá-yu ñ<sup>n</sup> sǎ sǎni iní-yu cadá-yu*

<sup>33</sup> Te sa nàha tucu-ndo nacuáa ní cǎhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ní cachí-güedé: “Te núú cǎcunehe-ndo Yá Ndiöxí núú tnàha ñáyiu-ndo nacuáa cutnùnì iní-yu sǎ ndáa cada-ndo ñ<sup>n</sup> sǎ sǎni iní-ndó cada-ndo, te cada-ndo”, duha ní cǎhá<sup>n</sup> dóho tnàha-güedé. <sup>34</sup> Dico yúhú cǎchí tñuhu-í xii-ndo sǎ ña túú ña cǎcunehe-ndo sǎ ndáa cada-ndo ñ<sup>n</sup> sǎ sǎni iní-ndó cada-ndo. Te ni vǎ cǎcú nèhe-ndo andiu chi yácá<sup>n</sup> cúú-xí núú núcöo Yá Ndiöxí táxi tñuní-gá. <sup>35</sup> Te ni vǎ cǎcú nèhe-ndo ñuyíu-a, chi tnàhá ñuyíu-a ndècu-gá, te ni vǎ cǎcú nèhe-ndo ñuú Jerusalén chi ñuú-á<sup>n</sup> cúú cuendá-gá, te ñu-gá cúú-gǎ Yaá ío cùnùu. <sup>36</sup> Te ni vǎ cǎcú nèhe-ndo díquí-ndó chi nàha-ndo sǎ ni ñ<sup>n</sup> idi díquí-ndó ña ndácú-ndó ndàda cuixí<sup>n</sup>-ndó àdi ndada tnuu-ndo. <sup>37</sup> Te váha-gá sǎ ñuú ñ<sup>n</sup> sǎ sǎni iní-ndó cada-ndo, te cachí-ni-ndo: “Cuu cada-ndí, àdi vá cúú cada-ndí”, cachí-ni-ndo. Chi nchaa dava-gá sǎ chidó-ndó cǎhá<sup>n</sup>-ndó òrè duca<sup>n</sup> sǎni iní-ndó cada-ndo ñ<sup>n</sup> sǎ cadá-ndó cùu-xí sǎ dǎcàhu iní ñáhá yucu ñávàha.

*Cuendá ñáyiu nàchinaa sǎ quidé ñaha tnaha ñáyíu-xi*

*(Lc. 6:29-30)*

<sup>38</sup> Te sa nàha tucu-ndo nacuáa ní cǎhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ní cachí-güedé: “Ñáyiu na cǎda ñaha tnaha ñáyíu-xi ñ<sup>n</sup> sǎ ña túú vǎha, te nanchòcáva-yu nachinaa-yu sǎ ní quide ñaha tnàha ñáyíu-yu”, duha ní cachí-güedé. <sup>39</sup> Dico yúhú cǎchí tñuhu-í xii-ndo sǎ ña túú ña cada-ndo nchaa cue ñáyiu cuihna iní-xi te núú quide ñahá-yu ñ<sup>n</sup> sǎ ña túú vǎha xii-ndo. Te núú ní canihá-yu ñ<sup>n</sup> xito te cuini tucú-yu canihá-yu ingá xito te dàña-ndo na canihá-yu. <sup>40</sup> Àdi ní sacá<sup>n</sup> cuéchi-yu núú cué téé cùchiu<sup>n</sup> cuendá-ndó, te cuini-yu quendeé-yu dúhnú-ndó te dàña-ndo na canehé-yu quíhí<sup>n</sup>, te tnàhá-ni dóo ndíxí ndòdo-ndo dàña-ndo na canehé-yu quíhí<sup>n</sup>. <sup>41</sup> Te núú quide yicá-yu caca-ndo dátá úú kilómetrú cuido-ndo ndàchiú<sup>n</sup>-yu ña,



te chido-ndo ùú-gá tucu kilómetrú cuido-ndo ndàchiú<sup>n</sup>-yu. <sup>42</sup> Te núu ió ì<sup>n</sup> sá xicá<sup>n</sup>-yu núú-ndó te cuáñaha-ndo, àdi ió ì<sup>n</sup> sá sánùú-yu núú-ndó te cuáñaha nùu-ndo.

*Cuu iní-ó nchàa ñáiyu cùu úhú iní ñáhá xii-o*

*(Lc. 6:27-28, 32-36)*

<sup>43</sup> Te sa nàha tucu-ndo nacuáa ní cachí tucu cue téé ní xindecu ndéé sanaha, chi cue téé-á<sup>n</sup> ní cachí-güedé: “Cuu iní-ndó cuè ñáiyu ndècu ndihí váha-ndo, te cuu úhú iní-ndó cuè ñáiyu cùu úhú iní ñáhá xii-ndo”, duha ní cachí-güedé. <sup>44</sup> Dico yúhú càchí tnúhu-í xii-ndo sã cúú iní-ndó cuè ñáiyu cùu úhú iní ñáhá xii-ndo, te cáhá<sup>n</sup> váha-ndo cuèndá cue ñáiyu càhá<sup>n</sup> úhú ñáhá xii-ndo, te cada-ndo sã váha sá cúú-xí cuè ñáiyu cùu úhú iní ñáhá xii-ndo, te cáhá<sup>n</sup> ndihí-ndo Yá Ndiöxí cuèndá cue ñáiyu xicuèhé ñáhá xii-ndo, ndihí cuèndá cue ñáiyu quède úhú ñáhá xii-ndo. <sup>45</sup> Te núu na càda-ndo nchaa nacuáa càhá<sup>n</sup>-í-a, te duca<sup>n</sup> te cutnùní sá cúú-ndó dèhe Tátá-ndó Dútú Ndiöxí Yaá ndécú àndiu. Te ñu-gá cúú-gã Yaá quidé quène nchíanchii, te ñu-ni-gã cúú-gã Yaá dácùu<sup>n</sup> dáú ñuyíu-a, te duca<sup>n</sup> quède-gá cuèndá cuu-xi sá váha sá cúú-xí cuè ñáiyu quède váha, ndihí sá cúú-xí cuè ñáiyu ñá túú quède váha. <sup>46</sup> Te núu nchòhó ná cúú iní-ndó mèe-ni ñáiyu na cùu iní ñáhá xii-ndo, te vá càchí-ndó sã Yá Ndiöxí taxi-gá sá ndúú tãhú-ndó sã dúcá<sup>n</sup> quède-ndo, chi cuèi cue téé cuihna iní-xi quède cobrá ñáhá xii cue ñáiyu cuèndá impuèstú duca<sup>n</sup> xíquide-güedé. <sup>47</sup> Te núu mee-ni ñáiyu ndècu ndihí váha-ndo ïo váha cáhá<sup>n</sup> ndihí-ndó-yu, te vá càchí-ndó sã ïo váha quède-ndo sá dúcá<sup>n</sup> quède-ndo, chi cuèi ndéé nchaa ñáiyu ñá túú xini dana cuèndá Yá Ndiöxí duca<sup>n</sup> xíquide-yu. <sup>48</sup> Te duha ndùu tnúhu càhá<sup>n</sup>-í cuèndá sã nchòhó cada ndáá-ndó cùndecu-ndo datná quidé ndáá méé Tátá-ndó Dútú Ndiöxí Yaá ndécú àndiu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáiyu.

## 6

*Jèsús dánèhé-gá ñáiyu nacuáa cada-yu sá vãha*

<sup>1</sup> Te Jèsús ndécú-ni-gã dánèhé-gá cue téé xica cuu ndihí-gá ndihí nchaa ñáiyu, te xãhá<sup>n</sup>-gã:

—Te òré quidé-ndó sã vãha te vá cadá-ndó núú ñáiyu cuèndá-ni sá cuèni-ndó cáhá<sup>n</sup> váha-yu cuèndá-ndó, chi núu núú ñáiyu duca<sup>n</sup> na càda-ndo te Dútú Ndiöxí Yaá cúú Tátá-ndó vã táxi-gã sá ndúú tãhú-ndó. <sup>2</sup> Te xãhá<sup>n</sup> núu nchòhó òré chindèe-ndo ñáiyu ndàhú, te vá cùñaha-ndo xii cue ñáiyu sá chindèe-ndo cue ñáiyu ndàhú-á<sup>n</sup> datná xíquide cue ñáiyu dandahú méé-xí sã quidé ndáá te ñá ndáá sá quidé ndáá-yu, chi ñáiyu-á<sup>n</sup> duca<sup>n</sup> xíquide-yu òré sãhá<sup>n</sup>-yu veñúhu, chi datécú tnúhu-yu nchaa ñáiyu òré duca<sup>n</sup> chindee-yu ñáiyu ndàhú. Te ñu-ni duca<sup>n</sup> quidé-yu xãhá<sup>n</sup>-yu xii cue ñáiyu sá chindèe-yu cue ñáiyu ndàhú-á<sup>n</sup> nchaa núú xicá cùu-yu, te duca<sup>n</sup> xíquide-yu cuèndá cuèni-yu cáhá<sup>n</sup> váha ñáiyu cuèndá-yu. Te yúhú na càchí tnúhu ndáá-í xii-ndo sã ñá túú ná nduu tãhú ñáiyu-á<sup>n</sup> núú Yá Ndiöxí sá dúcá<sup>n</sup> quيدة-yu chi mee-ni núú tnàha ñáiyu-yu cùdiú-yu. <sup>3</sup> Te nchòhó òré chindèe-ndo ñáiyu ndàhú, te cuèi ñáiyu ío-gá váha ndècu ndihí-ndo dico vá cùñaha-ndo sã dúcá<sup>n</sup> chindee-ndo cue ñáiyu ndàhú-á<sup>n</sup>, te ni cuèi dava-gá ñáiyu vá cùñaha-ndo. <sup>4</sup> Chi váha-gá sá iní méé-ni-ndó ná cùhu<sup>n</sup> sá dúcá<sup>n</sup> chindee-ndo cue ñáiyu ndàhú-á<sup>n</sup>. Te núu duca<sup>n</sup> na càda-ndo ña, te Dútú Ndiöxí Yaá cúú Tátá-ndó taxi-gá sá ndúú tãhú-ndó chi ñu-ni mee-gã ndéhé-gã nacuáa quède-ndo ndecu-ndo.

*Jèsús dánèhé-gá ñáiyu nacuáa cáhá<sup>n</sup> ndihí-yu Yá Ndiöxí*

*(Lc. 11:2-4)*

<sup>5</sup> Te nchòhó òré cáhá<sup>n</sup> ndihí-ndo Yá Ndiöxí, te vá cadá-ndó datná xíquide cue ñáiyu dandahú méé-xí càchí sá quidé ndáá te ñá ndáá sá quidé ndáá-yu, chi ñáiyu-á<sup>n</sup> tnàhá iní-yu cunutnii-yu cáhá<sup>n</sup> ndihí-yu Yá Ndiöxí

òré yíhí-yu veñúhu. Te ñi-ndí duca<sup>n</sup> xíquidé-yu nchaa núú xícá cùú-yu, te duca<sup>n</sup> quidé-yu cuendá sá cuíní-yu quíní ñáiyu nàcuáa xíquidé-yu. Te na càchí tnúhu ndáá-í xii-ndo sã ñà túú nã nduu táhú ñáiyu-á<sup>n</sup> núú Yã Ndiöxí sá dúcá<sup>n</sup> quidé-yu chi mee-ni núú tnàha ñáiyú-yu cùú-yu. <sup>6</sup> Te nchòhó òré cuíní-ndó cãhá<sup>n</sup> ndihí-ndo Yã Ndiöxí, te ndíhu ndedí nihnu-ndo xítí vehe-ndo, chi ñi-gá cúú Tãtá-ndó te ndècu ndihí ñaha-gá xii-ndo, te ñi-ndí mee-gã ndéhé ñaha-gá xii-ndo nàcuáa quide-ndo, te núú duca<sup>n</sup> na càda-ndo te taxi-gá sá ndúú tãhú-ndó.

<sup>7</sup> Te òré càhá<sup>n</sup> ndihí-ndo Yã Ndiöxí te vá sùúni cuendá-ni ñàcàá-ndó tnúhu càhá<sup>n</sup> ndihí-ndo-gã ñàtná xíquide cue ñáiyu ñà túú xini tnúhu-gá, chi ñáiyu-á<sup>n</sup> sání ñi-yu sá tédòho ñaha vìhi-gá Yã Ndiöxí xií-yu sá dúcá<sup>n</sup> sùúni ñàcàá-yu tnúhu càhá<sup>n</sup> ndihí ñahá-yu xii-gá dico ñahá. <sup>8</sup> Dico nchòhó, vá càdá-ndó ñàtná xíquide cue ñáiyu-á<sup>n</sup>, chi mee Tãtá-ndó Dütú Ndiöxí sã ñaha-gá ná cúú nchaa sá xini ñuhu-ndo cuéi òré vátá càcá<sup>n</sup>-gá-ndó núú-gã. <sup>9</sup> Te duha càhá<sup>n</sup>-ndó òré càhá<sup>n</sup> ndihí-ndo Yã Ndiöxí:

Yòhó Tãtá-ndí Dütú Ndiöxí Yaá ndécú àndíu,  
nchaa ñáiyu na càhá<sup>n</sup>-yu sá cúú-n Yàá ío yíñúhu.

<sup>10</sup> Te xícá<sup>n</sup> táhú-ndí núú-n sã ná sàá nduu ndíhu ndahá-n-yu.

Te cada-n ñàtná càchí ñi-n ñuyúú-a ñàtná quidé-n àndíu.

<sup>11</sup> Te xícá<sup>n</sup> táhú-ndí núú-n sã táxí-n sã cóhó-ndí sá cáxí-ndí ñi<sup>n</sup> nduu ñi<sup>n</sup> nduu.

<sup>12</sup> Te cada càhnu ñi-n nchaa yícá cuèchi-ndí, chi tnàhá nchúhú quidé càhnu ñi-ndí nchaa sá quidé ñaha tnaha ñáiyu-ndí.

<sup>13</sup> Te vá ñàñá-n ñàcãhá<sup>n</sup> ñahá yùcu ñávãha xii-ndí cada-ndí sá ñà túú vãha, chi coto ñaha-n xii-ndí cuendá sá vã dúcá<sup>n</sup> càda ñaha-xi.

Te ñi-ndí cùu-n Yaá ío cùnuu nchaa nduu nchaa quíú, te ío càhnu cuu-n, te ñi-ndí-n quíndaha

ñaha-n xii-ndí ñi caa ñi quíhí<sup>n</sup>.

Te duca<sup>n</sup> na cùnduu.

Duha ñànehé ñahá-í xii-ndo cãhá<sup>n</sup> ndihí-ndo Yã Ndiöxí.

<sup>14</sup> Te núú nchòhó quidé càhnu ñi-ndó nchaa sá quidé ñaha tnaha ñáiyu-ndo, te duca<sup>n</sup> te Tãtá-ndó Dütú Ndiöxí Yaá ndécú àndíu cada càhnu ñi-gá nchaa sá ñà túú vãha quide-ndo tucu. <sup>15</sup> Dico núú nchòhó vá càdá càhnu ñi-ndó nchaa sá quidé ñaha tnaha ñáiyu-ndo ña, te ñi Dütú Ndiöxí Yaá cúú Tãtá-ndó vã càdá càhnu ñi-gá nchaa sá quidé-ndó tucu.

*Cuendá ñáiyu ñà túú tnàhí ná xéxí ñà càhá<sup>n</sup> ndihí-yu Yã Ndiöxí*

<sup>16</sup> Te nchòhó, nduu ñà túú tnàhí ná xéxí-ndó càhá<sup>n</sup> ndihí-ndo Yã Ndiöxí, te vá cùndíyí-ndó ñàtná xíquide nchaa ñáiyu ñàndahú méé-xí càchí sá quidé ndáá te ñà ndáá sá quidé ndáá-yu, chi ñáiyu-á<sup>n</sup> duca<sup>n</sup> xíquidé-yu cuendá sá cuíní-yu cutnùni ñi ñáiyu sá ñà túú tnàhí ná xéxí-yu càhá<sup>n</sup> ndihí-yu Yã Ndiöxí. Te yúhú càchí tnúhu-í xii-ndo sã sã dúcá<sup>n</sup> quidé-yu te ñà túú nã chindee ñaha-xi xií-yu cuendá ñihí-yu ñi<sup>n</sup> sá ndúú tãhú-yu núú Yã Ndiöxí. <sup>17</sup> Dico nchòhó, nduu ñàcà<sup>n</sup> quide-ndo ñà túú tnàhí ná xéxí-ndó càhá<sup>n</sup> ndihí-ndo Yã Ndiöxí, te váha váha naquete-ndo núú-ndó, te váha váha chíhi-ndo cùcá <sup>18</sup> cuendá sá vá cùtnùni ñi ñáiyu sá ñà túú nã xéxí-ndó nduu duca<sup>n</sup> càhá<sup>n</sup> ndihí-ndo Yã Ndiöxí. Te Dütú Ndiöxí Yaá cúú Tãtá-ndó ndècu ndihí-ndo ñi-ndí mee-gã ndéhé-gã nàcuáa quide-ndo ndècu-ndo, te ñi-gá taxi-gá sá ndúú tãhú-ndó.

*Cuendá nchaa sá vãha nduu táhú-ó (Lc. 12:33-34)*

<sup>19</sup> Te vá càni ñi-ndó cùu-ndo ñáiyu cuica ñàndí sá cùndècu ndihí-ndo ñuyúú-a chi vá cùdii-xi, chi ñàva quee tíquidi, te ñàva caxi cudi ñuhu, àdi quíhu ñadúhú vehe-ndo te duhu-güedé. <sup>20</sup> Te váha-gá chí ndúcú nàcuáa cada-ndo cuendá duca<sup>n</sup> ngündècu sá ndúú tãhú-ndó àndíu, te xíá<sup>n</sup> cudíi-xi cundècu ndihí-ndo ñi caa ñi quíhí<sup>n</sup>, chi yàcá<sup>n</sup> vá



quéé-gă tíquidi, te ni vă cáxí-gă cudi ñuhu, te ni vă quíní-gá-ndó ñàdúhú duhu-güedě ndachíu<sup>n</sup>-ndo. <sup>21</sup> Te núu cùu-ndo ñáyíu cuica ndècu ñuyíú-a, te diu-ni nchaa sá ndécú ndíhi-ndo ñuyíú-a ñuhu iní-ndó. Àdi cuu-ndo ñáyíu quide nacuaa ngúndecu sá ndúú tǎhú-ndó àndíu, te diu-ni sá ndúú tǎhú-ndó ndècu andíu-á<sup>n</sup> ñuhú iní-ndó.

*Núú-ó cùu-xi datná ñ<sup>n</sup> ñuhú  
(Lc. 11:34-36)*

<sup>22</sup> 'Te cada iní-ndó sǎ núú-ndó cùu-xi datná ñ<sup>n</sup> ñuhú. Te núu núú-ndó cǎváha te cùtnuní iní-ndó nǎ cúú sǎ ndécú núú-ndó. <sup>23</sup> Dico núu cùhú núú-ndó ñà túú cùtnuní cundehe-ndo ña, te ñà túú cùtnuní iní-ndó nǎ cúú sǎ ndécú núú-ndó. Te sá dúcá<sup>n</sup> cùhú núú-ndó te cada iní-ndó sǎ ndécú-ndó dàtná ñ<sup>n</sup> núú nées. Te duha ndúu tnúhu cǎhá<sup>n</sup>-í chí núu sàni váha iní-ndó cuendá Yǎ Ndiǒxí ñà, te cùu vii cuu váha iní-ndó ndècu-ndo. Á<sup>n</sup> te núu ñà túú sàni váha iní-ndó cuendá-gǎ ñà, te ñà túú tnàhí cùu váha iní-ndó ndècu-ndo. Te sá dúcá<sup>n</sup> ñà túú sàni váha iní-ndó cuendá-gǎ te cada iní-ndó sǎ ndécú-ndó dàtná ñ<sup>n</sup> núú nées.

*Vá ndácú ñ<sup>n</sup> téé cunu cuechi-dě núú úú pàtróó<sup>n</sup>*

*(Lc. 16:13)*

<sup>24</sup> 'Te ni ñ<sup>n</sup> téé xínu cuechi vá ndácú-dě cunu cuechi-dě núú úú pàtróó<sup>n</sup>, chí téé-á<sup>n</sup> cuu váha iní-dé núú ñ<sup>n</sup> pàtróó<sup>n</sup>-dě te tní-dé nchaa tnúhu cǎhá<sup>n</sup> pàtróó<sup>n</sup> téé cùu váha iní-dé núú-xi-á<sup>n</sup>. Te núú ìngá tucu pàtróó<sup>n</sup>-dě vá cúú váha iní-dé, te ni vă tní-dě tnúhu cǎhá<sup>n</sup> ìngá téé-á<sup>n</sup>. Te duca<sup>n</sup> sǎtnahá-xi cùu nchóhó chí vá ndácú-ndó cunu cuechi-ndo núú Yǎ Ndiǒxí te cuhu<sup>n</sup> iní-ndó nchaa sá ìo ñuyíú-a.

*Yǎ Ndiǒxí xító-gǎ nchaa ñáyíu cùu déhe-gǎ*

*(Lc. 12:22-31)*

<sup>25</sup> 'Te na cǎhí tnúhu-í xii-ndo sǎ vă ìo caní iní-ndó núu nása níhí-ndó sǎ cóhó sǎ cáxí-ndó, te ni vă ìo caní iní-ndó núu nása níhí-ndó dǒo cuihnu-ndo, chí cùnuu-gǎ méé-ndó dàcúxí sǎ nchító-ndó, te duca<sup>n</sup>

cùnuu-gǎ yiqui cùnú-ndó dàcúxí dǒo sácúhnu-ndo. <sup>26</sup> Te chí cádá cuendá sá ncháá quiti ndava ñà túú tnàhí ná xítú-güedi, te ni ñà túú ndéé cuáhá<sup>n</sup>-güedi nàtahu-güedi, te ni ñà túú nǎ nàtàxúha-güedi, te ni ñà túú ndéé cáá yácá-güedi, chí mee Tǎtá-ó Dütú Ndiǒxí Yáá ndécú àndíu xito ñaha-gǎ xii-güedi níhí-güedi sá xéxí-güedi. Te núu cue quiti-á<sup>n</sup> duca<sup>n</sup> xito ñaha-gǎ xii-güedi, jte uu<sup>n</sup>-gǎ xító ñaha-gǎ xii nchòhó, chí nchòhó ìo-gǎ cùnuu-ndo dàcúxí cué quiti-á<sup>n</sup>! <sup>27</sup> Te cuéi nándi sá sání vihi iní-ndó ndècu-ndo, dico ñà ndácú-ndó càda-ndo nacuaa cuehnu-ndo cuèdicó ñ<sup>n</sup> yiqui-gǎ.

<sup>28</sup> 'Te vá ìo caní iní-ndó núu nása níhí-ndó dǒo cuihnu-ndo. Te chí cádá cuendá nàcuáa sàhnu nchaa itá ìo yucu, chí nchaa itá-á<sup>n</sup> ñà túú quide chiu<sup>n</sup>-xi, te ni ñà túú quèhe<sup>n</sup>-xi idi. <sup>29</sup> Te na cǎhí tnúhu-í xii-ndo sǎ ndíj Salòmón cuéi ìo vii ní xínduu dǒo ní xóo cuihnu ndíi, dico ñà túú nǔtnahá-xi nàcuáa cǎa nchaa itá, chí ìo-gǎ vii cǎa nchaa itá. <sup>30</sup> Te nchaa itá ìo yucu tnaa-ni cùdí-xi, te yíchí-xi te sàhmi ñáyíu. Te cuéi duca<sup>n</sup> dico mee Yǎ Ndiǒxí quidé-gǎ ìo vii sàcúnduu-xi. Te núu nchaa itá-á<sup>n</sup> duca<sup>n</sup> quide-gǎ xító-gǎ sácúnduu vii-xi, te xǎ<sup>n</sup> cùtnuní sá ìo-gǎ coto ñaha-gǎ xii-ndo, dícó-ni sá ñà túú sàndáá váha iní-ndó-gǎ. <sup>31</sup> Te xǎ<sup>n</sup> núu ñà túú xini ñuhu vihi-xi caní iní-ndó núu nása níhí-ndó sǎ cóhó sǎ cáxí-ndó, àdi nása níhí-ndó dǒo cuihnu-ndo. <sup>32</sup> Chí nchaa ñáyíu ñà túú xini nàcuáa cǎhá<sup>n</sup> tnúhu Yǎ Ndiǒxí mee-ni nchaa xǎ<sup>n</sup> ñuhú iní-yu. Dico nchòhó chí mee Tǎtá-ndó Dütú Ndiǒxí sa naha-gǎ nǎ cúú sǎ xini ñuhu-ndo. <sup>33</sup> Te xǎ<sup>n</sup> núu ìo xini ñuhu-xi sá cùhú<sup>n</sup> iní-ndó sǎ Yǎ Ndiǒxí yíndàha ñaha-gǎ xii-ndo, te duca<sup>n</sup> càda-ndo nchaa nacuaa cuíní-gǎ, te duca<sup>n</sup> te taxi-gǎ nchaa sá xini ñuhu-ndo. <sup>34</sup> Núu xǎ<sup>n</sup> vá ìo caní iní-ndó nása cundecu-ndo ndúu tneé, chí caní iní-ndó nàcuáa cada-ndo cundecu-ndo vitna, chí nduu tnéé-á<sup>n</sup> te òré-nǎ te cùtnuní núu nása cada-ndo cundecu-ndo. Chí nchòhó sa naha-ndo sá ìo titní núú sǎ quidé-xí ñ<sup>n</sup> nduu ñ<sup>n</sup> nduu —duha ní

dánèhé ñáhá Jèsús xii cue téé xica cuu ndihí-gá ndihí nchaa ñáyiu.

## 7

*Vá càhá<sup>n</sup> cuèhé-ó cuèndá tnàha ñáyiu-o*

*(Lc. 6:37-38, 41-42)*

<sup>1</sup> Te Jèsús nděcuu-ni-gá dánèhé-gá cue téé xica cuu ndihí-gá ndihí nchaa ñáyiu, te xàha<sup>n</sup>-gã:

—Vá càhá<sup>n</sup> cuèhé-ndó cuèndá tnàha ñáyiu-ndo, te duca<sup>n</sup> te Yá Ndiöxí ñá túú nã tnúhu cúñaha-gã xii-ndo.

<sup>2</sup> Chi núu na càhá<sup>n</sup> cuèhé-ndó cuèndá tnàha ñáyiu-ndo, te Yá Ndiöxí íó ñ<sup>n</sup> sá cáda ñàha-gá xii-ndo. Te núu nchòhó ná càhá<sup>n</sup> cuèhé víhí-ndó cuèndá tnàha ñáyiu-ndo te Yá Ndiöxí ío-gá dandòho ñaha-gá xii-ndo. <sup>3</sup> ¿Te ná cuèndá ndéhé-ndó ñ<sup>n</sup> sá ñá túú vâha quide tñaha ñáyiu-ndo te mee-ndo víhi-gá quidé-ndó-í? Te sá dúcá<sup>n</sup> quide-ndo te cada iní-ndó sã ndéhé-ndó dàtná ñ<sup>n</sup> mihi líhli ñùhu núú tnàha ñáyiu-ndo te mee-ndo ñùhu ñ<sup>n</sup> mihi cahnu-gá núú-ndó te ñá túú quide cuèndá-ndó. <sup>4</sup> Te núu na nàcanu ichi-ndo tñaha ñáyiu-ndo cuèndá sã ñá túú quide váha-yu ndècú-yu, te mee-ndo víhi-gá quidé-ndó ñá, te cada iní-ndó sã xàha<sup>n</sup>-ndo xii tñaha ñáyiu-ndo sã nátáva-ndo mihi líhli ñùhu núú-yu sá dúcá<sup>n</sup> quide-ndo, te mihi càhnu ñùhu núú méé-ndó ñá túú quide cuèndá-ndó. <sup>5</sup> Te sá dúcá<sup>n</sup> quide-ndo te ío dándahú-ndó mèe-ndo sá quidé ndää-ndó te ñá ndää sá quidé ndää-ndó, te xini ñùhu-xi díhna-gá dañà-ndo nchaa sã ñá túú vâha quide-ndo, te dàtnúni duca<sup>n</sup> te cuu nàcanu ichi-ndo tnàha ñáyiu-ndo cuèndá nchaa sã ñá túú vâha quidé-yu.

<sup>6</sup> Te nchaa ñáyiu ío sàá iní-xi, te vá cáda yica-ndó-yu cundedòho-yu tnúhu Yá Ndiöxí, chi núu na càda yica-ndó-yu te ngóo-yu cuu úhú iní ñáhã-yu xii-ndo. Te ñáyiu-á<sup>n</sup> cúú-yu dàtná iná chi quití-á<sup>n</sup> núu na cuñaha-o ñ<sup>n</sup> sá cuñaha-o, te núu ñá túú cùnuni iní-dí ná cúú xã<sup>n</sup> te tñi ñaha-dí xii-o. Te cùu tucú-yu dàtná cùchí chi quití-á<sup>n</sup> núu na chùcu-o

núú-dí yúú vâha sá ïo vii càa nani pérlá, te dícó-ni cùnu sáhã-dí chi ñá túú cùnuni iní-dí sá cúú-xí yúú vâha.

*Cácá<sup>n</sup>-ó núú Yã Ndiöxí núu ná cuini-ó*

*(Lc. 11:9-13; 6:31)*

<sup>7</sup> Te na càchí tnúhu-í xii-ndo sã cãcá<sup>n</sup>-ndó núú Yã Ndiöxí te núu ná cuini-ndó te taxi-gá, te vá dáñá ndèé-ndó cãcá<sup>n</sup>-ndó núú-gã núu ná cuini-ndó te duca<sup>n</sup> te níhí-ndó. Te cada iní-ndó sã ñi quexio-ndo vehe ñ<sup>n</sup> tñaha ñáyiu-ndo te ní càhá<sup>n</sup>-ndó, te ñáyiu-á<sup>n</sup> ñi tedòho ñáhã-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yá Ndiöxí tedòho ñaha-gã xii-ndo, te taxi-gá sá ná cãcá<sup>n</sup>-ndó núú-gã. <sup>8</sup> Chi nchaa ñáyiu duca<sup>n</sup> xiquide, te Yá Ndiöxí tédòho ñaha-gã xií-yu te níhí-yu sá cuini-yu. Te ñi-ndó duca<sup>n</sup> tucu nchaa ñáyiu na càcá<sup>n</sup> núú-gã ñ<sup>n</sup> sá cuini-yu, chi sãñaha-gã sá xicá<sup>n</sup>-yu núú-gã. Te ñi-ndó duca<sup>n</sup> tucu nchaa ñáyiu ñá túú dàña ndéé xicá<sup>n</sup> núú Yã Ndiöxí sá cuini-yu chi níhí-yu.

<sup>9</sup> Te nchòhó cue téé cùu tátá, ñá túú cùndee iní-ndó cuñaha-ndo xii cue déhe-ndo ñ<sup>n</sup> yúú caxi-güexi òré xicá<sup>n</sup>-güexi ñ<sup>n</sup> pàá núú-ndó caxi-güexi. <sup>10</sup> Te ñi ñá túú cùndee iní-ndó cuñaha-ndo ñ<sup>n</sup> cóo caxi-güexi òré xicá<sup>n</sup>-güexi ñ<sup>n</sup> chácá núú-ndó caxi-güexi. <sup>11</sup> Te nchòhó cuèi ndéé dau-na sàá iní-ndó dico sãha-ndo cuè déhe-ndo sã vâha xèxi-güexi òré ná cúú sã xicá<sup>n</sup>-güexi núú-ndó caxi-güexi. Te núu nchòhó duca<sup>n</sup> quide-ndo, ñte uu<sup>n</sup>-gá duca<sup>n</sup> quide Tátá-ndó Dütú Ndiöxí Yaá ndécú àndi, chi taxi-gá sã vâha sá cúú-xí-ndó te núu na càcá<sup>n</sup>-ndó núú-gã!

<sup>12</sup> Te nchaa sã vâha cuini-ndó càda tñaha ñáyiu-ndo, te cada-ndo tnàhá-ndó ndihí-yu, chi duca<sup>n</sup> sãnu ichi ñaha tnúhu ní chídó tnúni ndíi Moisés, te ñi-ndó duca<sup>n</sup> sãnu ichi ñaha tucu nchaa tnúhu ní chídó tnúni cue téé ní xóo càhá<sup>n</sup> tnúhu Yá Ndiöxí ndéé sanaha.

*Yuyèhe cuiñi*  
*(Lc. 13:24)*

<sup>13-14</sup> Te xini ñùhu-xi nducu-ndo nacuaa cada-ndo tñi-ndo ichi Yá

Ndiöxí. Te ichi-gá-án cúu-xí dàtná ìñ ìñ ichi cuíñi, àdi datná ìñ yuyèhe cuíñi. Te duha càhá-í chí ío úhú xínu iní-ndó tñi-ndo ichi Yá Ndiöxí, te sacú-ni nchòhó cue ñáyiú ndècu ñuyíú-a tñi-ndo ìchi-gá. Te nchaa ñáyiú ndècu ichi cuehé ichi duha ta xíta nihnú-yu cuáhán. Te ichi ndècú-yu-án cada iní-ndó sá cúu-xí ìñ ichi cahnu ichi quehé, àdi ìñ yuyèhe quehé. Te duha càhá-í chí ío vai ñáyiú ndècú-yu ichi-án.

*Ndi ðñ nùú yutnu xini-ó nã yutnu cùu-xi cuendá sá sãvidí-xi (Lc. 6:43-44)*

<sup>15</sup> Te càchí tñuhu-í xii-ndo sã ìo quihi iní-ndó cùndecu-ndo cuendá sã vã dándahú ñáhá cuè téè càchí sá càhá tñuhu Yá Ndiöxí te ñá ndàá sá càhá-güedé tñuhu-gá. Chi cue téè-án sànuu sá quidé-güedé dàtná quidé mbéé quiiti ío váha iní-xi, dico ñá ndàá chí ñá túú ñuhu váha iní-güedé, chí quide-güedé dàtná quidé quiiti déé quiiti nani yíhi. <sup>16</sup> Te òré quexìo-güedé núú ndècú-ndó te cada cuendá-ndó nàcuáa quide-güedé cuendá duca cùtnuní iní-ndó nã ñáyiú cùu-güedé. Te nchòhó xini-ndó sã ñá túú cùu ndéhé yoho yáha stilé tnu ñu, te ní ñá túú xini-ndó cùu ngúxí ìñ tnu ñu. <sup>17-18</sup> Te xini tucu-ndo sã ncháá yutnu váha cùu sávidí váha, te nchaa yutnu váha-án ñá túú cùu sávidí sá ñá túú váha. Te nchaa yutnu sá ñá túú váha ñá túú cùu sávidí váha, chí mee-ni sávidí sá ñá túú váha cùu. <sup>19</sup> Te nchaa yutnu sá ñá túú cùu sávidí váha xèndé-güedé, te cuánguee-xi núú ñuhú càyú-xi. Te duca sãtnahá-xi yáha nchaa cue téè dándahú ñáhá càchí sá càhá tñuhu Yá Ndiöxí te ñá ndàá sá càhá-güedé tñuhu-gá, chí quihi-güedé núú ñuhú núú càyú. <sup>20</sup> Te nchòhó cutnùní iní-ndó nã ñáyiú cùu cue téè-án cuendá nchaa sá quidé-güedé.

*Ñá ncháá ñáyiú ngúndecú-yu núú ndècú Yá Ndiöxí táxi tñuní-gá (Lc. 13:25-27)*

<sup>21</sup> Te na càchí tñuhu-í xii-ndo sã ìo vai ñáyiú cachí-yu sá yúhú cúu-í

Xítóhó-yu, dico ñá ncháá-yu nduu táhú-yu cundecú-yu núú ndècú Tãtã-í Dútú Ndiöxí táxi tñuní-gá, chí mee-ni nchaa ñáyiú na càda nchaa nacuáa càhá-gá ñáyiú-án nduu táhú-yu cundecú-yu núú ndècú-gã táxi tñuní-gá. <sup>22</sup> Te na sáá nduu càda ndáá Yá Ndiöxí cuéchi nchaa ñáyiú, te vai-yu cúñahá-yu xii-í: “Yòhó Xítóhó Jesu-crístú nchúhú cúu-ndí ñáyiú ní càhá tñuhu-n nàcuáa ní cachí-n, te ðiu-ni-n ní cacunehe-ndí te ní sándáá iní ñáhá nchaa espíritú cùndihi yucu ñávãha xii-ndí ní quee-xi yiqui cùnú ñáyiú, te ðiu-ni yòhó ní chindee ñàha-n xii-ndí ní ndacu-ndí ní quide-ndí titní núú sã vã yòo tñahí ndacu cada”, duha cúñahá-yu xii-í dàvá-án. <sup>23</sup> Dico yúhú cúñaha-í xii-yu: “Ñá túú tñahí xini ñáhá-í xii nchòhó núu ndéé ñáyiú cùu-ndo, te chí xócuíñi nchaa nchòhó ñáyiú quide nchaa sá cuéhé sá dúhá núú ndècú-í-a”, duha cúñaha-í xii-yu.

*Ìñ vehe ndècu cimièntú-xi ndihi ìñ vehe ñá túú cimièntú-xi (Mr. 1:22; Lc. 6:47-49)*

<sup>24</sup> Te nchaa ñáyiú sàcúndedóho tñuhu càhá-í te núu na tñi-yu, te ñáyiú-án cúu-yu dàtná ìñ téè ío váha cùtnuní iní-xi. Chi téè-án ní dácáá-dé ìñ vehe, dico díhna-gá ní xete-dé ndéé ní tnahá-dé yúú cáxi te dàtnùní ní tava-dé cimièntú-xi. <sup>25</sup> Te òré ní cuu dáú te ní ndee ndute ñuhu, te ní dándáá-xi ndéé núú cáá vèhe-án, dico ñá túú ní ndacu-xi cuido-xi. Te ní quene tucu táchí ñihi dico ñá túú ní ndacu-xi cuido-xi vehe-án, te duca chí téè ní dácáá vèhe-án ní tava-dé cimièntú-xi núú yúú cáxi. Duha sãtnahá-xi cùu nchaa ñáyiú tñi tñuhu càhá-í. <sup>26</sup> Dico nchaa ñáyiú sàcúndedóho tñuhu càhá-í te ñá túú cuini-yu tñi-yu, ñáyiú-án cúu-yu dàtná ìñ téè ñá túú tñahí cùtnuní iní-xi. Chi téè-án ní dácáá-dé ìñ vehe núú yúú mee-ni ñuhu cúchí. <sup>27</sup> Te òré ní cuu dáú te ní ndee ndute ñuhu, te ní dándáá-xi ndéé núú cáá vèhe-án, te ní quene táchí ñihi te íi-ni ní xido-xi vehe-án cuendá sá núú ñuhu cúchí ní sáá. Duha sãtnahá-xi cùu nchaa

ñáyiú sàcúndedóho tnúhu càhá<sup>n</sup>-í te ñá túú cuíní-yu tñí-yu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáyiú.

<sup>28</sup> Te òré ní ndihí Jèsús sá dúcá<sup>n</sup> nǐ cáhá<sup>n</sup>-gá, te nchaa ñáyiú ní xíndedóho nchaa tnúhu ní cáhá<sup>n</sup>-gá ío ní cuñúhu-yu nàcuáa ní dánèhé ñáhá-gǎ xii-yu. <sup>29</sup> Chi ní cáhá<sup>n</sup>-gá dàtná càhá<sup>n</sup> cue téé cùnūu, te cùnūu ndisa-gá, te ñá túú ní cáhá<sup>n</sup>-gá dàtná càhá<sup>n</sup> nchaa cue téé dàcuaha ñaha xii ñáyiú nchaa tnúhu ní chídó tnùnǐ ndí Moisés.

## 8

*Jèsús quidé tǎtna-gá ñ<sup>n</sup> téé tnàhá cuéhé sǎ dátèhyú nihnu-xi yiqui cùñú-ó (Mr. 1:40-45; Lc. 5:12-16)*

<sup>1</sup> Te Jèsús ní xica-gá cuánuu-gá dǐñǐ tǐndúú nǔú dúcá<sup>n</sup> nǐ xíndecu-gá ní dánèhé-gá ñáyiú-á<sup>n</sup>, te cuéhé víhí ñáyiú nchícú<sup>n</sup> ñáhá xii-gá cuánuu. <sup>2</sup> Te ní quexìo ñ<sup>n</sup> téé tnàhá cuéhé sǎ dátèhyú nihnu-xi yiqui cùñú-ó nǔú Jèsús, te ní ngüñí xití-dě núú-gǎ, te xǎha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núú-n nǔú vá cùndèe iní-n càda tǎtna ñaha-n xii-í, chi cùtnunǐ iní-í sǎ ndácú-n —càchí-dé xǎha<sup>n</sup>-dě xii-gá.

<sup>3</sup> Te Jèsús ní dácàa-gá ndaha-gá ní tendaha ñaha-gá xii-dé, te xǎha<sup>n</sup>-gǎ:

—Cuu cada tǎtna ñaha-í xii-n, te vitna ndúha-n —càchí-gá xǎha<sup>n</sup>-gǎ xii-dé.

Te òré-ni-á<sup>n</sup> nǐ xócuñí cuéhé tnàhá-dé. <sup>4</sup> Te Jèsús ní xǎha<sup>n</sup> tùcu-gá xii-dé:

—Te vitna cuanùhú te vá yǒo ñ<sup>n</sup> cúñaha-n sǎ yǔhú ní quide tǎtna ñaha-í xii-n, núú dǔtú-ni cuàhá<sup>n</sup> cuendá sǎ ná quìní ñáhá-dě xii-n sǎ nǐ ndúha-n, te cuañaha-n sǎ ndúú tǎhú Yǎ Ndiǒxí dàtná ní cachí ndí Moisés. Te duca<sup>n</sup> càda-n cuendá cutnùnǐ iní ñáyiú sǎ nǐ ndúha-n —càchí-gá xǎha<sup>n</sup>-gǎ xii téé ní quide tǎtna-gá-á<sup>n</sup>.

*Jèsús quidé tǎtna-gá ñ<sup>n</sup> téé xìnu cuechi núú ñ<sup>n</sup> téé cùu capitá<sup>n</sup> (Lc. 7:1-10)*

<sup>5</sup> Te Jèsús ní xica-gá cuáhá<sup>n</sup>-gá ñuú Capèrnaúm. Te òré cuánguihu-gá ñuú-á<sup>n</sup> te ní quexìo ñ<sup>n</sup> téé cùu capitá<sup>n</sup> càhá<sup>n</sup> ndàhú-dé núú-gǎ, <sup>6</sup> te xǎha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núú-n nǔú vá cùndèe iní-n càda tǎtna-n ñ<sup>n</sup> téé xìnu cuechi núú-í, chi cùhú-dé te càhú víhí tnàhá-dé, te ío ndòho-dé te ní ñǎ cùndèe-gá-dé candá nihnu-dé —càchí-dé xǎha<sup>n</sup>-dě xii-gá.

<sup>7</sup> Te Jèsús ní xǎha<sup>n</sup>-gǎ xii-dé:

—Te na quihí<sup>n</sup>-ó càda tǎtna-í-dé —càchí-gá xǎha<sup>n</sup>-gǎ xii-dé.

<sup>8</sup> Te téé cùu capitá<sup>n</sup>-á<sup>n</sup> nǐ xǎha<sup>n</sup>-dě xii-gá:

—Mèstrú, ñá túú tàú-í sǎ quihu-n ndèe xití vehe-í, chi cùu-í ñ<sup>n</sup> téé cùtexínu sǎ cúú-xi-n, te cáhá<sup>n</sup>-ni sǎ ndúha téé xìnu cuechi núú-í te ndúha-dé. <sup>9</sup> Chi yúhú ndècu cue téé tàxi tnunǐ ñáhá xii-í, te duca<sup>n</sup> yǔhú tucu ndècu cue sandadú táxi tnùnǐ-í. Te òré xǎha<sup>n</sup>-í xii ñ<sup>n</sup>-dé quihí<sup>n</sup>-dé ñ<sup>n</sup> chiu<sup>n</sup> te cuáhá<sup>n</sup>-dé, te òré xǎha<sup>n</sup>-í xii ingá-dé quixi-dé te véxi-dé, te òré xǎha<sup>n</sup>-í xii ñ<sup>n</sup> téé xìnu cuechi núú-í cada-dé ñ<sup>n</sup> chiu<sup>n</sup> te quide-dé. Núu xiǎ<sup>n</sup> yòhó cáhá<sup>n</sup>-ni sǎ ndúha téé xìnu cuechi núú-í te ndúha-dé —càchí-dé xǎha<sup>n</sup>-dě xii Jèsús.

<sup>10</sup> Te Jèsús ío ní cuñúhu-gá sǎ dúcá<sup>n</sup> nǐ cáhá<sup>n</sup> téé cùu capitá<sup>n</sup>-á<sup>n</sup>, te ní xǎha<sup>n</sup>-gǎ xii nchaa ñáyiú nchícú<sup>n</sup> ñáhá xii-gá:

—Na càchí tnúhu ndáa-í xii-ndo sǎ vǎtá quìní-gá-í ní ñ<sup>n</sup> ñáyiú isràèl, ñáyiú súunǐ ío váha sàndáa iní ñáhá xii Yǎ Ndiǒxí dàtná sàndáa iní ñáhá téé-a xii-gá. <sup>11</sup> Te na càchí tnúhu ndáa tucu-í xii-ndo sǎ ío cuéhé ñáyiú quixi ndàa xio nacuáa quène nchícanhii, te dǐu-ni duca<sup>n</sup> ío cuéhé tucu-yu quixi ndàa xio nacuáa quée tucu nchícanhii. Te nchaa ñáyiú-á<sup>n</sup> naníhí tnáhǎ-yu ndihí té Àbrahám, ndihí té Isàac, ndihí té Jàcób núú ndécú Yǎ Ndiǒxí táxi tnùnǐ-gá te yàcá<sup>n</sup> cundecu ndihí ñàhá-yu xii-güedé. <sup>12</sup> Te nchaa ñáyiú tàú nduu tǎhú cundecu núú ndécú Yǎ Ndiǒxí táxi tnùnǐ-gá ní cùu, ñáyiú-á<sup>n</sup> quee tǐhǔ-yu, chi quihí<sup>n</sup>-yu



ɿ<sup>n</sup> xichi núú néé núú ïo ndohó-yu cundecú-yu, te yàcá<sup>n</sup> ío ndáhí-yu, te dicó rúhñú-nă cuu núhu-yu sá sàtú iní-yu cuendá sá ndóhō-yu —càchí-gá xăha<sup>n</sup>-gă xii-yu.

<sup>13</sup> Te Jèsús ní xáha<sup>n</sup> tùcu-gá xii téé cùu capitá<sup>n</sup>-á<sup>n</sup>:

—Yòhó téé ndècu ndihí téé cùhú cuanùhú vehe-n vîtna chi ndúha-dé chi ní sándáá iní-n Yă Ndiöxí —càchí-gá xăha<sup>n</sup>-gă xii-dé.

Te ðiu-ni òré duca<sup>n</sup> nǐ xáha<sup>n</sup> Jèsús xii téé cùu capitá<sup>n</sup>-á<sup>n</sup> nǐ ndúha téé xînu cuechi núú-dě.

*Jèsús quidé tătna-gá năná ñadîhí té Pèlú*

(Mr. 1:29-31; Lc. 4:38-39)

<sup>14</sup> Te Jèsús ní xica-gá cuáhá<sup>n</sup>-gá vehe té Pèlú, te òré ní quexìo-gá vehe-dé te ní xiní-gá cáá năná ñadîhí-dé cùhú-a<sup>n</sup> ñùhu vihi-a<sup>n</sup> cahni. <sup>15</sup> Te Jèsús ní tñi-gá ndaha ñaha cùhú-á<sup>n</sup>, te òré-ni-á<sup>n</sup> nǐ nchíco-a<sup>n</sup> cahni te ní ndacóo-a<sup>n</sup> ní xînu cuechi-a<sup>n</sup> núú-güedě ndihí-gá.

*Jèsús quidé tătna-gá vâi ñáyiu cùhú*

(Mr. 1:32-34; Lc. 4:40-41)

<sup>16</sup> Te òré ní dáhu nchícanchi te ní quexìo ñáyiu núú ndécú Jèsús, te ndècá-yu vâi ñáyiu yîhi ñaha espíritú cúndîhi yucu ñávâha ní sáá núú-gă te ndèca tucú-yu vâi ñáyiu tnàhá dava-gá núú cuèhé. Te ɿ<sup>n</sup>-ni tnúhu ní cáhá<sup>n</sup> Jèsús ní tenàá-gá nchaa espíritú cúndîhi yucu ñávâha yîhi ñaha xii nchaa ñáyiu-á<sup>n</sup>, te ní quee-xi yiqui cùñú-yu cuáhá<sup>n</sup>-xi. Te tnàhá nchaa dava-gá ñáyiu cùhú-á<sup>n</sup> nǐ quide tătna-gá. <sup>17</sup> Te duca<sup>n</sup> nǐ cuu chi ní quee ndáá-xi nàcuáa ní cáhá<sup>n</sup> ndíi Chàíá téé ní xóo cáhá<sup>n</sup> tnúhu Yă Ndiöxí ndéé sanaha, te duha ní cachí ndíi: “Mee-gă cada tătna ñaha-gă xii-o, chi ðiu-gá xocàni-gá nchaa sá quidé ùhu yiqui cùñú-ó”, duha ní cachí ndíi.

*Ñáyiu cuìní tuha ñaha xii Jèsús*

(Lc. 9:57-62)

<sup>18</sup> Te òré ní xiní Jèsús sá ïo cuéhé ñáyiu xixúcu núú ndécú-gă, te ní xáha<sup>n</sup>-gă xii cue téé xica cuu ndihí-gá sá quèe-gá ndihí-güedé bàrcú cuendá

téhdé-gá ndihí-güedé ndàa ingá xio yuhu làgúná. <sup>19</sup> Te mei òré-á<sup>n</sup> nǐ quexìo ɿ<sup>n</sup> téé dàcuaha ñaha xii cue ñáyiu nchaa tnúhu ní chídó tnùní ndíi Moisés, te xăha<sup>n</sup>-dě xii-gá:

—Mèstrú, cuìní-í canchicú<sup>n</sup> ñáhà-í xii-n nděni ní cuu na quihí<sup>n</sup>-n —càchí-dé xăha<sup>n</sup>-dě xii-gá.

<sup>20</sup> Te Jèsús ní xáha<sup>n</sup>-gă xii-dé:

—Nchaa ñúcuii chi ndècu yaú cúu vèhe-güedi saquíhi-güedi, te nchaa cue quiti ndàva caa tacá-güedi ðiquí yutnu. Dico yúhú Téé cùu ñaní tnáhá-ndó nchaa-ndo chi ñá túú ndéé cáá vèhe-í ñuyíú-a ndetatú-í —càchí-gá xăha<sup>n</sup>-gă xii-dé.

<sup>21</sup> Te ɿ<sup>n</sup> téé ní chitnahá ñáhá xii Jèsús ní xáha<sup>n</sup>-dě xii-gá:

—Jèsús, dañá na nùhú-í cundetu-í cuú tătà-í te chindúxi-í-dé dàtnùní quixi-í chitnahá ñáhá ðuca<sup>n</sup>-ná-í xii-n —càchí-dé xăha<sup>n</sup>-dě xii-gá.

<sup>22</sup> Te Jèsús ní xáha<sup>n</sup>-gă xii-dé:

—Daña ñáyiu ñá túú sándáá iní ñáhá xii-í ná chindúxi tnàha meé-yu, chi ñáyiu-á<sup>n</sup> cúu-yu dàtná ñáyiu ní xihí cuèi ndècu-ní-yu núú ñuyíú-a, te yòhó canchicú<sup>n</sup> ñáhá-ní xii-í —càchí-gá xăha<sup>n</sup>-gă xii-dé.

*Jèsús ngání-gă táchí ndihí ndute làgúná*

(Mr. 4:35-41; Lc. 8:22-25)

<sup>23</sup> Te sáta dúcá<sup>n</sup> te Jèsús cuánguee-gá bàrcú ndihí cue téé xica cuu ndihí-gá, te ní xica bàrcú-á<sup>n</sup> cuáhá<sup>n</sup>-xi. <sup>24</sup> Te nini ñùhu bàrcú-á<sup>n</sup> ichi cuáhá<sup>n</sup>-xi núú ndute ní xidí Jèsús, te ní ngüíta-xi níhi vihi quene táchí, te ta nàdachitú-xi ndute xiti bàrcú cuáhá<sup>n</sup>. <sup>25</sup> Te cue téé xica cuu ndihí-gá cuáhá<sup>n</sup>-güedé núú cáá-gă xidí-gá, te xăha<sup>n</sup>-güedě xii-gá:

—¡Mèstrú, ndiquíú iní chi dàcácu ñaha-n xii-o chi quée naa-o cuìní-xi! —càchí-güedé xăha<sup>n</sup>-güedé xii-gá.

<sup>26</sup> Te Jèsús ní xáha<sup>n</sup>-gă xii-güedé:

—¿Ná cuendá ndéé duca<sup>n</sup> ïo yùhú-ndó? ¿Náa ñá túú sándáá iní ñáhá ndisa-ndo xii-í-á<sup>n</sup>? —càchí-gá xăha<sup>n</sup>-gă xii-güedé.

Te Jèsús ní ndacóo-gá te ní tenàá-gá táchí-á<sup>n</sup> ndihí ndute-á<sup>n</sup>, te ní ngüíñí

táchí-ǎ<sup>n</sup> te ní nucúndecu nahi-nǎ ndute làgúná-á<sup>n</sup>. <sup>27</sup> Te nchaa cue téé ñùhu xítí bàrcú-á<sup>n</sup> nǐ cuñúhu-güedé sá dúcá<sup>n</sup> nǐ quide-gá ní xiní-güedé, te ní xítñàha-güedé:

—¿Te ná téé cùu téé-a núu duha ní cáhá<sup>n</sup>-ni-dé te ní ngüñí táchí te ní nucúndecu nahi-ni ndute làgúná-a-i? —cáchí-güedé xítñàha-güedé.

*Cue téé ñuú Gàdará cue téé yìhi ñaha espíritú cúndìhi yucu ñávǎha*  
(Mr. 5:1-20; Lc. 8:26-39)

<sup>28</sup> Te òré ní quèxio Jesús ndàa ingá xio yuhu làgúná yucu cue téé ñuú Gàdará, te úú tñàhá cue téé quide vehe núu yíndüxi ndíyí ní quee-güedé cuáhá<sup>n</sup>-güedé núu ndécú Jèsús, te ndí ndùú-güedé yíhí ñaha espíritú cúndìhi yucu ñávǎha xii-güedé, te ío màñá-güedé chí vá yòo tñàhí dàña-güedé yáha yatni núu ndécú-güedé. <sup>29</sup> Te cue espíritú yíhí ñaha xii-güedé-á<sup>n</sup> nǐ quide-xi níhi ní cáhá<sup>n</sup>-güedé, te xáha<sup>n</sup>-güedé xii-gá:

—¿Ná cuendá véxi-ò Jèsús Déhe Dútú Ndiòxí chidácá ñáhá-n xii-ndí? ¿Á<sup>n</sup> sàma véxi-n dándoho ñaha-n xii-ndí? Te vátá sàá-gá nduu dùca<sup>n</sup> cada-n —cachí-güedé xáha<sup>n</sup>-güedé xii-gá.

<sup>30</sup> Te yatni xía<sup>n</sup> xíxica cuu vai cuchí xíxexi-güedi. <sup>31</sup> Te cue espíritú cúndìhi yucu ñávǎha yìhi ñaha xii cue téé-á<sup>n</sup> nǐ cáhá<sup>n</sup> ndàhú-xi núu Jèsús, te xáha<sup>n</sup>-xi:

—Te núu vá dáñá-gǎ-n quíhi-ndí yíqui cùñú cue téé-a, te cáhá<sup>n</sup> ndàhú-ndí núu-n sǎ dàña-n na quíhí<sup>n</sup>-ndí quíhu-ndí yíqui cùñú nchaa cùchí-ǎ<sup>n</sup> —cáchí cue espíritú-á<sup>n</sup> xáha<sup>n</sup>-xi xii-gá.

<sup>32</sup> Te Jèsús ní xáha<sup>n</sup>-gǎ xii cue espíritú cúndìhi yucu ñávǎha-á<sup>n</sup>:

—Chí táquèe yíqui cuñú cue téé-á<sup>n</sup> te quíhí<sup>n</sup>-ndó nǐ ndéé ichi quíhí<sup>n</sup>-ndó —cáchí-gá xáha<sup>n</sup>-gǎ xii nchaa espíritú-á<sup>n</sup>.

Te cue espíritú cúndìhi yucu ñávǎha-á<sup>n</sup> nǐ quee-xi yíqui cùñú cue téé-á<sup>n</sup>, te cuáhá<sup>n</sup>-xi cuánguìhu-xi

nchaa cùchí-á<sup>n</sup>. Te cue quiti-á<sup>n</sup> nǐ xinu-güedi duha ní quee-güedi ndàa núu dèhvá yuhu làgúná-á<sup>n</sup>, te ní ngaunihnu-güedi xítí ndute, te ní ndíhi-güedi ní cáhá.

<sup>33</sup> Te cue téé xító ñaha xii nchaa cuchí-á<sup>n</sup> nǐ yùhú-güedé te ní xinu-güedé, te ní sáhá<sup>n</sup>-güedé ní cani-güedé cuendú núu cuè ñáyiu ndéu xítí ñuú nchaa nàcuáa ní cuu cuendá cue téé ní xíhi ñaha nchaa espíritú cúndìhi yucu ñávǎha-á<sup>n</sup>.

<sup>34</sup> Te nchaa ñáyiu ñuú-á<sup>n</sup> nǐ quee-yu cuáhá<sup>n</sup>-yu núu ndécú Jèsús. Te òré ní quexió-yu núu ndécú-gǎ te ní cáhá<sup>n</sup> ndàhú-yu núu-gǎ sá ná quee-gá yucu ñuú-yu núhú-gá.

## 9

*Jèsús quidé tǎtna-gǎ ñ<sup>n</sup> téé cùhú ñá cúu-gǎ candá nihnu*

(Mr. 2:1-12; Lc. 5:17-26)

<sup>1</sup> Te sátá dúcá<sup>n</sup> nǐ cuu te Jèsús cuándee-gá bàrcú cuáhá<sup>n</sup>-gá ní natehndé-gá ndàa ingá xio yuhu làgúná. Te xía<sup>n</sup> nǐ ndexio-gá ñuú núu quidé ñuú-gá. <sup>2</sup> Te xía<sup>n</sup> ndécú-gǎ ní quexio cue téé nchido-güedé ñ<sup>n</sup> téé cùhú ñá cúu-gǎ candá nihnu ñùhu-dé xító, te Jèsús ní cutnùní iní-gá sá sàndáá ndisa iní ñáhá-güedé xii-gá nǐu ní xáha<sup>n</sup>-gǎ xii téé cùhú-á<sup>n</sup>:

—Yòhó téé cùhú vá ndíhú-gá iní-n, chí sa ní quide càhnu iní-í nchaa cuèchi-n —cáchí-gá xáha<sup>n</sup>-gǎ xii-dé.

<sup>3</sup> Te sá dúcá<sup>n</sup> nǐ cáhá<sup>n</sup>-gá nǐu xíǎ<sup>n</sup> cue téé dàcuaha ñaha xii ñáyiu nchaa tñúhu ní chídó tñùní ndí Moisés ní sani iní-güedé: “Téé-a cáhá<sup>n</sup> cuèhé-dé cuendá Yǎ Ndiòxí”, duha ní sani iní-güedé. <sup>4</sup> Te Jèsús ní cutnùní iní-gá nàcuáa sàni iní-güedé nǐu ní xáha<sup>n</sup>-gǎ xii-güedé:

—¿Ná cuendá duca<sup>n</sup> sàni cuèhé sání dùha iní-ndó? <sup>5</sup> Te sá dúhá nǐ xáha<sup>n</sup>-í xii téé cùhú-a sá nǐ quide càhnu iní-í nchaa yíca cuèchi-dé, te xíǎ<sup>n</sup> nchòhó ñá túu cùtnuní iní-ndó nǐu ndáá cáhá<sup>n</sup>-í àdi ñá ndáá. Dico núu cúu-í-dé sá ndácóo-dé te caca-dé, te cutnùní ndáá iní-ndó nǐu ndáá cáhá<sup>n</sup>-í àdi ñá ndáá, chí cundehe núu-ndó nàcuáa



cada-í. <sup>6</sup> Te vitna na càda-í nàcuáa cutnùnì iní-ndó nchàa-ndo sá yùhú Tée cùu ñanì tnàhá-ndó nchàa-ndo ndecu ndìhi-í tnúhu ndee iní ñuyíú-a sá cáda càhnu iní-í nchaa cuéchi ñáyiú —càchí-gá xàha<sup>n</sup>-gã xii-güedé.

Te sátá dúcá<sup>n</sup> te ní xàha<sup>n</sup>-gã xii té cùhú-á<sup>n</sup>:

—Ndacóo, te ndocani-n xító ñùhu-n véxi-á<sup>n</sup> te núhú-n vehe-n —cachí-gá xàha<sup>n</sup>-gã xii-dé.

<sup>7</sup> Te òré-ni-á<sup>n</sup> ñí ndúha tée cùhú-á<sup>n</sup> te ní ndacóo-dé te ní ndocani-dé xító ñùhu-dé ní quexìo-á<sup>n</sup> te ní xica-dé cuánuhú-dé vehe-dé. <sup>8</sup> Te nchaa ñáyiú xíndecu-á<sup>n</sup> ño ní cuñúhu-yu sá dúcá<sup>n</sup> ñí quide Jèsús ní xiní-yu, te ní cachí-yu sá ño càhnu cuu Yá Ndiòxí cuendá sá ñí sáñaha-gã xii Jèsús tnúhu ndee iní cada-gá nchaa sá vã yõo tnàhí ndacu cada.

*Jèsús càhá<sup>n</sup>-gá ñí tée nàni Mateú chitnahá ñáhá-dé xii-gá*

*(Mr. 2:13-17; Lc. 5:27-32)*

<sup>9</sup> Te Jèsús ní nucúhu<sup>n</sup> tucu-gá ichi cuáhá<sup>n</sup>-gá, te ichi ñùhu-gá ní xiní-gá núcõo ñí tée nàni Mateú quidé còbrá-dé ñáyiú chí còbrádór impuèstú cúú-dé, te ní xàha<sup>n</sup>-gã xii-dé:

—Màteú, néhé chitnahá ñáhá-n xii-í —càchí-gá xàha<sup>n</sup>-gã xii-dé.

Te té Màteú-á<sup>n</sup> ñí ndacuñí-dé ní chitnahá ñáhá-dé xii-gá.

<sup>10</sup> Te ñí xito ndècu Jèsús ñí vehe, te yìhi-gá mèsá ndìhi cue tée xica cuu ndìhi-gá xexí ndìhi ñaha-gá xii-güedé. Te tnàhá cue tée cuihna iní-xi quide còbrá ñáhá xii ñáyiú cuendá impuèstú yíhí ndìhi-gá mèsá, te tnàhá tucu dava-gá cue tée ndècu ichi cuehé ichi duha yìhi ndìhi-gá mèsá. <sup>11</sup> Te sá ñí xiní cue tée cùu fariséú xexí Jèsús ndìhi nchaa cue tée-á<sup>n</sup>, te ní xicá<sup>n</sup> tnúhú-güedé núú cuè tée xica cuu ndìhi-gá, te xàha<sup>n</sup>-güedé:

—¿Ná cuendá duca<sup>n</sup> quide tée cùu mestrú-ndó xèxi-dé ndìhi cue tée cuihna iní-xi quide còbrá ñáhá xii ñáyiú cuendá impuèstú, ndìhi nchaa dava-gá cue tée ndècu ichi cuehé ichi duha-í? —càchí-güedé xàha<sup>n</sup>-güedé.

<sup>12-13</sup> Te Jèsús ní tecú dóho-gá nàcuáa ndùu tnúhu ní xàha<sup>n</sup>-güedé xii cue tée xica cuu ndìhi-gá, núú ní xàha<sup>n</sup>-gã xii-güedé:

—Nchaa ñáyiú ñá túú cùhú chí ñá túú xini ñuhú-yu ñátátná, dico nchaa ñáyiú cùhú chí xini ñuhú-yu ñátátná. Te yúhú véxi-í càhá<sup>n</sup>-í ñáyiú cùtnunì iní-xi sá ndécú cuèchi-xi cuendá dàñá-yu nchaa sá cuèhé sá dúhá quidé-yu, te ñá túú véxi-í càhá<sup>n</sup>-í ñáyiú càchí sá ñá túú ndècu cuéchi-xi. Te chí cáda cuendá váha nàcuáa càhá<sup>n</sup> Yá Ndiòxí núú tütú-gá núú càchí-xi: “Yúhú cuiní-í sá cúndàhú iní-ndó cuè tnaha ñáyiú-ndo, te ñá díú mèe-ni sá càhni-ndó quèti nduu táhú-í”, duha càchí-gá núú tütú-gá —càchí Jèsús xàha<sup>n</sup>-gã xii-güedé.

*Cue tée ndùcu tnúhu núú Jèsús cuendá ñáyiú ñá túú tnàhí ná xexí áma càhá<sup>n</sup> ndìhi-yu Yá Ndiòxí*

*(Mr. 2:18-22; Lc. 5:33-39)*

<sup>14</sup> Te cue tée xica cuu ndìhi té Juáá tée dàcuandute ñaha xii ñáyiú ní sáhá<sup>n</sup>-güedé núú ndécú Jèsús, te xicá<sup>n</sup> tnúhú-güedé núú-gã, te xàha<sup>n</sup>-güedé:

—Cuiní-ndí cachí tnúhu-n ñá cuendá nchúhú, ndìhi cue tée cùu fariséú ñá túú tnàhí ná xexí-ndí áma càhá<sup>n</sup> ndìhi-ndí Yá Ndiòxí, te cue tée xica cuu ndìhi-n ñá túú dùca<sup>n</sup> quide-güedé —càchí-güedé xàha<sup>n</sup>-güedé xii-gá.

<sup>15</sup> Te Jèsús ní xàha<sup>n</sup>-gã xii-güedé:

—Nchòhó xini-ndó sã vã cúú cùñaha-o xii ñáyiú ñùhu vico tnàndaha sá vã cúú càxí-yu ñini ndècu ndìhi ñaha tée tnàndaha xií-yu, dico sáá nduu vã cúndècu ndìhi ñaha-gá tée tnàndaha-á<sup>n</sup> xií-yu, te dàvá-á<sup>n</sup> te cahni iní-yu vã càxí-yu cuendá sá ndìhú iní-yu.

<sup>16</sup> Te ni vã yõo dàndée luha dóo sáá ñí dóo sa ní cuu tùhú víhí, chí dóo sáá-á<sup>n</sup> nàndiyi-xi te uu<sup>n</sup>-gá ndata-xi dóo sã ñí cuu tùhú-á<sup>n</sup>. <sup>17</sup> Te ni vã yõo chìhi ndidí sáá xití ñí lamba sa ní cuu tùhú víhí, chí núú yoo duca<sup>n</sup> na càda te ndava lamba sa ní cuu tùhú-á<sup>n</sup> chí ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núú duca<sup>n</sup> na

càdá-yu, núu xíá<sup>n</sup> xíní ñùhu-xi queé ndidí sáá-á<sup>n</sup> xítí ì<sup>n</sup> lamba saa cuèndá duca<sup>n</sup> ñà túú nã cuu cováha-xi — càchí-gá xáha<sup>n</sup>-gã xii-güedé.

*Cuèndá déhe yoco té Jàirú ndihí cuèndá ì<sup>n</sup> ñaha ní tnándeé dóó Jèsús*

*(Mr. 5:21-43; Lc. 8:40-56)*

18 Te càhá<sup>n</sup> dúcá<sup>n</sup>-ní Jèsús ní quexìo ì<sup>n</sup> té cùnūu núú ndécú-gã, ì<sup>n</sup> té tãxi tnuní veñúhu, te ní ngüíñí xítí-dé núú-gã càhá<sup>n</sup> ndàhú-dé, te xáha<sup>n</sup>-dë xii-gá:

—Véxi-í càhá<sup>n</sup> ndàhú-í núú-n nūu vá cündèe iní-n quíhí<sup>n</sup>-ó vèhe-í dandòto-n déhe yoco-í chi ní xíhí-xi tnàvíí, te yúhú cútñuní iní-í sá nūu quíhí<sup>n</sup>-n tëndaha-n yiqui cuñú-xi te ndoto-xi —càchí-dé xáha<sup>n</sup>-dë xii-gá.

19 Te Jèsús ní xica-gá cuáhá<sup>n</sup>-gá ndihí-dé ndihí cue té xica cuu ndihí-gá. 20 Te ichi ñùhu-gá cuáhá<sup>n</sup>-gá ní sáhá<sup>n</sup> ì<sup>n</sup> ñadìhí ní tnándeé-a<sup>n</sup> yuhu dōó-gã ndàa sáta-gã, te ñaha-á<sup>n</sup> sa ní cuu úxúú cuíá sã cùhú-a<sup>n</sup> ngòyo ñaha níñí xii-a<sup>n</sup>. 21 Te duca<sup>n</sup> nĩ quide-a<sup>n</sup> chi ní sani iní-a<sup>n</sup> sá nūu ndacu-a<sup>n</sup> tnándeé-a<sup>n</sup> cuèdicó luha yuhu dóó Jèsús te ndúha-a<sup>n</sup> ní sani iní-a<sup>n</sup>. 22 Te Jèsús ní nchócótó-gã ndàa sáta-gã te ní xíní-gá ñadìhí-á<sup>n</sup>, te ní xáha<sup>n</sup>-gã:

—Yòhó ñaha cùhú, vá ndìhú-gá iní-n vitna chi sa ní ndúha-n, chi ní sándáá iní ñáhá-n xii-í —càchí-gá xáha<sup>n</sup>-gã xii-a<sup>n</sup>.

Te òré-ni-á<sup>n</sup> nĩ ndúha ñaha cùhú-á<sup>n</sup>.

23 Te òré ní quexìo Jèsús vehe té cùnūu taxi tnuní veñúhu-á<sup>n</sup>, te ní xíní-gá xíndáhí víhí ñáyiū, te xíndecu mūsicú. 24 Te ní xáha<sup>n</sup>-gã xii-yu:

—Chí táquèe xítí vehe-a, chi xíchí-a ñá túú ní xíhí-xi chi dícó xidí-xi —càchí-gá xáha<sup>n</sup>-gã xii-yu.

Te ní sácú ndeé ñáhã-yu xii-gá sá dúcá<sup>n</sup> nĩ càhá<sup>n</sup>-gá, chi sá cúú-xí mèe-yu te ní xíhí ndisa xíchí-á<sup>n</sup>. 25 Te ñáyiū-á<sup>n</sup> nĩ queé-yu te cuánguihu Jèsús núú cándòdo xíchí nĩ xíhí-á<sup>n</sup>, te ní tní-gã ndaha-xi te òré-ni-á<sup>n</sup> nĩ ndacóo-xi. 26 Te nchaa ñúú cáá yàtni xíá<sup>n</sup> nĩ níhí ñáyiū tnúhu nàcuáa ní quide Jèsús.

*Jèsús quidé tãtna-gá núú úú tnàhá cue té cuáá*

27 Te sáta dúcá<sup>n</sup> nĩ cuu te ní xica Jèsús cuánuhú-gá, te ichi ñùhu-gá ní chinchícú<sup>n</sup> ñáhá úú tnàhá cue té cuáá xii-gá, te níhí càhá<sup>n</sup>-güedé, te xáha<sup>n</sup>-güedé xii-gá:

—Yòhó Jèsús, té cùu ñaní tnáhá ndí Dávií, cundàhú iní ñáhá xii-ndí —càchí-güedé xáha<sup>n</sup>-güedé xii-gá.

28 Te òré ní nasáá Jèsús núú quidé vèhe-gá, te cue té cuáá-á<sup>n</sup> nĩ quexìo-güedé ndeé núú-gã, te ní xícá<sup>n</sup> tnúhú-gã núú-güedé, te xáha<sup>n</sup>-gã:

—¿Sándáá iní-ndó sã yúhú ndacu-í cada tãtna-í núú-ndó-á<sup>n</sup>? —càchí-gá xáha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Sándáá iní-ndí sá díú yòhó Jèsús ndacu-n càda tãtna-n nūú-ndí —càchí-güedé xáha<sup>n</sup>-güedé xii-gá.

29 Te Jèsús ní dácáá-gá ndaha-gá ní tendaha-gã núú-güedé, te ní xáha<sup>n</sup>-gã xii-güedé:

—Te vitna, ndúha núú-ndó chi ní sándáá iní-ndó sã díú yúhú ndacu-í cada tãtna-í núú-ndó —càchí-gá xáha<sup>n</sup>-gã xii-güedé.

30 Te òré-ni-á<sup>n</sup> nĩ ndúha núú-güedé, te Jèsús ní càhá<sup>n</sup> víhí-gã dóho-güedé cuèndá sá vã càhá<sup>n</sup>-güedé nàcuáa ní cuu ní ndúha núú-güedé.

31 Te cue té-á<sup>n</sup> òré ní ndee-güedé núú ndécú Jèsús, te ní ngüíta-ni-güedé ní cani-güedé cuèndú núú ñáyiū nàcuáa ní quide ñaha-gã xii-güedé. Te nchaa dava-gá ñúú cáá yàtni xíá<sup>n</sup> nĩ sáhá<sup>n</sup>-güedé ní cani-güedé cuèndú núú ñáyiū nàcuáa ní quide ñaha Jèsús xii-güedé.

*Jèsús quidé tãtna-gá ì<sup>n</sup> té ñíhí*

32 Te íhí nĩ ndee cue té ní ndúha núú-xi-á<sup>n</sup> nūú ndécú Jèsús, te ní quexìo ì<sup>n</sup> úú ñáyiū ndécá-yu ì<sup>n</sup> té ñíhí yíhí ñaha espíritú cündihí yucu ñávãha. 33 Te Jèsús ní queñuhu-gá espíritú cündihí yucu ñávãha yíhí ñaha xii té-á<sup>n</sup>, te òré-ni-á<sup>n</sup> nĩ cuu ní nacáhá<sup>n</sup>-dé. Te nchaa ñáyiū xíndecu-á<sup>n</sup> ìo ní cuñúhu-yu, te ní xítnáhá-yu:

—Ñá túú tnàhí xìní-ó ì<sup>n</sup> tée duha cada ñúú nchoo cuè ñáyíu isràél ní cùu —cachí-yu xitnàhá-yu.

<sup>34</sup> Te cue tée cùu fariséú ní ngúíta-güedé xitnàha-güedé:

—Tée-a chi sácúíhná chindèe ñaha-xi xii-dé queñuhu-dé nchaa espíritú yíhí ñaha xii ñáyíu te ñíu-ni sácúíhná-á<sup>n</sup> táxí tnùní-xi nchaa espíritú-á<sup>n</sup> —càchí-güedé xitnàha-güedé.

### *Jèsús cündàhú iní-gá ñáyíu*

<sup>35</sup> Te Jèsús cuáhá<sup>n</sup>-gá nchaa ñúú náhnú ndíhi nchaa ñúú líhli, te ndi tnahá ì<sup>n</sup> ì<sup>n</sup> ñúú sàá-gá te duca<sup>n</sup> cuãnguihu-gá ì<sup>n</sup> ì<sup>n</sup> veñúhu càa nchaa ñúú-á<sup>n</sup> dánèhé-gá ñáyíu tnúhu váha, tnúhu sá sánú ìchi ñaha xií-yu nàcuáa ndíhu ndaha ñaha Yá Ndiõxí xií-yu. Te duca<sup>n</sup>-ni ta quide tátna-gá nchaa ñáyíu cùhú cuáhá<sup>n</sup> cuèi ndi díí<sup>n</sup> ndi díí<sup>n</sup> núú cuèhé tnàhá-yu ì<sup>n</sup> ì<sup>n</sup>-yu. <sup>36</sup> Te sá ní xini Jèsús sá ío vâi ñáyíu nchícú<sup>n</sup> ñáhá xii-gá, te ní cündàhú iní ñáhá-gá xií-yu chi ío ndíhú iní-yu, te vá yõo nèhe cuendá ñáhá xii-yu, te cùú-yu dàtná cue mbéé cue quití ñá túú tòli-xi. <sup>37</sup> Te Jèsús ní xáha<sup>n</sup>-gá xii cue tée xica cuu ndíhi-gá:

—Nchòhó xini-ndó sá òré ná sàá nduu cùu nchaa sá xítú ñáyíu te ío vâi cuu. Te na càchí tnúhu ndáá-í xii-ndo sá dàtná ío vâi sá xítú ñáyíu cùu, duca<sup>n</sup> ío vâi ñáyíu cùmání cundedóho tnúhu-í, te ío sacú ñáyíu dàcuaha ñaha xií-yu. <sup>38</sup> Núu xiá<sup>n</sup> xini ñuhu-xi cáca<sup>n</sup>-ndó núú Yá Ndiõxí Yaá cùú Xítohó-ndó ndíhi-yu cuendá sá ná dàcahá<sup>n</sup>-gá iní-yu cáhá<sup>n</sup>-yu tnúhu-gá núú nchàa dava-gá tnàha ñáyíu-yu cùmání cundedóho tnúhu-gá —càchí-gá xáha<sup>n</sup>-gá xii-güedé.

## 10

*Jèsús sãñaha-gã tnúhu ndee iní xii ndi ùxúú cue tée xica cuu ndíhi-gá*

*(Mr. 3:13-19; Lc. 6:12-16)*

<sup>1</sup> Te Jèsús ní cana-gá ndi ùxúú cue tée xica cuu ndíhi-gá, te ní sãñaha-gã xii-güedé tnúhu ndee iní cundecu ndíhi-güedé cuendá queñuhu-güedé nchaa espíritú cündíhi yucu ñávãha

yíhi ñaha xii ñáyíu, ndíhi cuendá sá cáda tátna-güedé nchaa dava-gá ñáyíu cùhú cuèi nándi núú cuèhé tnàhá-yu.

<sup>2</sup> Te duha xínani ndi ùxúú cue tée-á<sup>n</sup>: tée cùnuu-gá nání-dé Xímú, àdi Pelú chi úú ñíu-dé, te ñaní-dé cùú tã Ndríxí, te tnàhá tée-á<sup>n</sup> cùú-dé tée xica cuu ndíhi Jesús, ndíhi té Jàcobó ndíhi ñaní té Jàcobó-á<sup>n</sup> tãe nàni Juaá, te ndi ndúú cue tée-á<sup>n</sup> cùú-güedé déhe té Zebèdeú. <sup>3</sup> Te tnàhá té Lìpé xicá cùu ndíhi-gá, ndíhi té Bartolómé, ndíhi té Mâxí, ndíhi té Mâteú tée cùu cobradór impuestú ní cùu, ndíhi té Jàcobó déhe té Àlfeú, ndíhi té Lèbeú tée dãnani-güedé Tàdeú, <sup>4</sup> ndíhi té Xímú tée ní cundíhi cue tée cananistá, ndíhi té Jüdás Iscarioté tée ní sáá nduu ní sáha cuendá ñáhá xii Jesús núú cuè tée cùu úhú iní ñáhá xii-gá.

*Jèsús téndàha-gá ndi ùxúú cue tée xica cuu ndíhi-gá quíhí<sup>n</sup>-güedé cáhá<sup>n</sup>-güedé tnúhu-gá núú ñáyíu*

*(Mr. 6:7-13; Lc. 9:1-6)*

<sup>5-6</sup> Te Jèsús ní xáha<sup>n</sup>-gã xii ndi ùxúú cue tée xica cuu ndíhi-gá sá quíhí<sup>n</sup>-güedé cáhá<sup>n</sup>-güedé tnúhu-gá núú ñáyíu, te cùmání-gã caca-güedé quíhí<sup>n</sup>-güedé, te ní xáha<sup>n</sup>-gã xii-güedé:

—Na càchí tnúhu-í xii-ndo sá méé-ní ñúú núú xindecu cue ñáyíu isràél quíhí<sup>n</sup>-ndó cáhá<sup>n</sup>-ndó tnúhu-í, te vá quíhí<sup>n</sup>-ndó nì ì<sup>n</sup> ñúú yíndèhu distritú Sãmariá, te ni vã quíhí<sup>n</sup>-ndó dàva-gá ñúú núú xindecu ñáyíu ñá túú cùu ñáyíu isràél. Te cue ñáyíu isràél-á<sup>n</sup> cùú-yu dàtná cue mbéé cue quití ní xita chi ta xita nihnú-yu cuáhá<sup>n</sup>. <sup>7</sup> Te cùñaha-ndo xii-yu sá sà ní cuyatni nduu ndíhu ndaha ñaha Yá Ndiõxí xii-yu. <sup>8</sup> Te cada tátna-ndo nchàa ñáyíu cùhú cuèi ñáyíu tnàhá cuèhé sã dátèhyú nihnu-xi yiqui cùñú-yu, te queñuhu-ndo nchàa espíritú cündíhi yucu ñávãha yíhi ñaha xii ñáyíu, te dandòto-ndo cue ñáyíu sa ní xíhí, te vá cáca<sup>n</sup>-ndó yãhu-ndo núú ñáyíu òré cada-ndo nchàa chiu<sup>n</sup>-á<sup>n</sup>, chi sa nàha-ndo sá dìcò duca<sup>n</sup> ní taxi-í tnúhu ndee iní ndécú ndíhi-ndo.

9 "Te vá cánèhe-ndo díhú<sup>n</sup> cuu ichi-ndo, <sup>10</sup> te ni vá cánèhe-ndo ñunu cuhu<sup>n</sup> ndachiu<sup>n</sup>-ndo, te ni vá cánèhe-ndo ingá ichi dóó-ndó nàdáma-ndo, te ni vá cánèhe-ndo úú-gá chàú-ndó chi ñu-ni chàú yíhí-ndó-ã<sup>n</sup> xíã<sup>n</sup>-ni quihi-ndo, te ni vá cánèhe-ndo tatnu, te duca<sup>n</sup> càda-ndo chi nchòhó sa nàha-ndo sá ncháá ñáyiú quide chiu<sup>n</sup> te ñu-ni cuendá chiu<sup>n</sup> quidé-yu ñihí-yu sá xéxí-yu.

11 "Te ndi tnahá ñuú ná quèxio-ndo te nducu-ndo ñáyiú cùtnuní iní-ndó sã cúú-yu ñáyiú váha, te vehe ñáyiú-án cundecu-ndo ndéé sáá nduu ndèe-ndo ñuú-án. <sup>12</sup> Te òré quexio-ndo vehé-yu te cúñaha-ndo xií-yu: "Yá Ndiòxí chindèe chitúú ñaha-gã xii-ndo ndècu-ndo", duha cúñaha-ndo xií-yu. <sup>13</sup> Te núu ní cáhá<sup>n</sup> váha ndihí ñahá-yu xii-ndo, te cuu-xi sá váha sá cúú-xí-yu cuendá tnúhu ní xáha<sup>n</sup>-ndo-ã<sup>n</sup>, dico núu ñá túú ní cáhá<sup>n</sup> váha ndihí ñahá-yu xii-ndo, te cúñaha-ndo xií-yu sá vá cúú-xí sã váha xií-yu tnúhu ní xáha<sup>n</sup>-ndo-ã<sup>n</sup>. <sup>14</sup> Te núu ní sáá-ndó ñ<sup>n</sup> ñuú àdi ñ<sup>n</sup> vehe, te núu ñá túú ní cáhá<sup>n</sup> ndihí ñaha váha-yu xii-ndo te ni ñà túú ní cuini-yu cundedóho-yu tnúhu cáhá<sup>n</sup>-ndó te ndee-ndo ñuú-án àdi vehe-án, te naquidi-ndo tícá chúhmá ñí tní sáhá-ndó cuendá ná cùtnuní iní-yu sá ñà túú quide váha-yu. <sup>15</sup> Te na càchí tnúhu ndáá-í xii-ndo sã sàá nduu te ío-gá dandóho ñaha Yá Ndiòxí xii ñáyiú duca<sup>n</sup> na càda ñaha xii-ndo-án dàcúxí ñáyiú ní xíndecu ñuú Sòdomá ndihí ñuú Gòmorrá.

### *Ndoho tnahá-ó cùndecu-o ichi Xítohó Jesucrístú*

16 "Te cada iní-ndó sã cúú-ndó dàtná cue mbéé cue quihi cuáhá<sup>n</sup> núú ío yíhí. Te duca<sup>n</sup> sãtnahá-xi cùu-ndo chi yúhú tendaha ñaha-í xii-ndo quihí<sup>n</sup>-ndó núú xíndecu cue ñáyiú cuihna iní-xi, te ío váha cuáha-ndo cuendá nàcuáa cada-ndo dàtná quidé cõó, dico cunduu váha iní-ndó ñà túú ñà cada-ndo dàtná quidé lõmá. <sup>17</sup> Te quihi iní-ndó chi cue ñáyiú na cùu úhú iní ñahá xii-ndo, te cuáha cuendá ñahá-yu xii-ndo núú cuè téé

cùchiu<sup>n</sup>, te caniha-güedě xii-ndo xití veñúhu-güedé. <sup>18</sup> Te dava tucu ñáyiú cuu úhú iní ñahá xii-ndo candeca ñahá-yu xii-ndo quihí<sup>n</sup> núú cuè téé cùnuu yíndaha nació<sup>n</sup>, àdi núú dàva-gá cue téé cùnuu sá cuendá-í. Te nchòhó ñihí-ndó nàcuáa cada-ndo cáhá<sup>n</sup> váha-ndo cuendá-í núú-güedé ndihí núú cuè ñáyiú ñá túú cùu ñáyiú isràél. <sup>19-20</sup> Dico òré cuáha cuendá ñahá-yu xii-ndo núú ncháa cue téé-án, te vá cání iní-ndó núú nása cunduu tnúhu cáhá<sup>n</sup>-ndó núú-güedé, chi òré-ñà te ñihí-ndó tnúhu cáhá<sup>n</sup>-ndó. Te ñá díú mèe-ndo cahu iní-ndó tnúhu cáhá<sup>n</sup>-ndó, chi mee Espiritú Yá Ndiòxí Yá cúú Tãtã-ndó dàcahú iní ñahá-xí xii-ndo nàcuáa cunduu tnúhu cáhá<sup>n</sup>-ndó.

<sup>21</sup> "Te dava cue téé cuáha cuendá-güedé ñaní-güedé núú cuè téé cùchiu<sup>n</sup> cuendá cahni ñaha-güedé, te dava cue téé cùu tãtã ñu-ni duca<sup>n</sup> càda-güedé déhe-güedé, te ñu-ni duca<sup>n</sup> càda ñaha dava cue ñáyiú cùu déhe xii tãtã-yu ndihí ñahá-yu, chi cuáha cuendá ñahá-yu núú cuè téé cùchiu<sup>n</sup> cuendá cahni ñaha-güedé xií-yu. <sup>22</sup> Te nchòhó chi nchaa ñáyiú ngüíta-yu cuu úhú iní ñahá-yu xii-ndo sã cuendá-í. Te núu na càda ndee-ni iní-ndó càncicú<sup>n</sup> ñhnu-ni-ndo ìchi-í cuèi nãndí sã ná càda ñahá-yu xii-ndo ndéé ná sàá nduu vá cùndecu-gá-ndó ñuúyú-a ña, te nduu táhú-ndó cùndecu-ndo ni caa ni quihí<sup>n</sup> ndihí Yá Ndiòxí. <sup>23</sup> Te núu ñ<sup>n</sup> ñuú cuini-güedé tní ñaha-güedé xii-ndo càda úhú ñahá-güedé sã cuendá-í, te cunu-ndo núú-güedé quihí<sup>n</sup>-ndó ñngá ñuú. Te na càchí tnúhu ndáá-í xii-ndo sã cùmání-gã quihí<sup>n</sup>-ndó ncháa dava-gá ñuú núú xíndecu ñáyiú isràél cáhá<sup>n</sup>-ndó tnúhu-í, te sa quihi tucu yúhú, Téé cùu ñaní tnahá-ndó ncháa-ndo ñuúyú-a.

<sup>24-25</sup> "Te nchòhó xini-ndó sã ñ<sup>n</sup> téé dàcuaha ñá túú cùnuu-dé dàcúxí mèstrú-dé, te núu mèstrú téé-án nãndí yãha-dé ndécú-dé te taú-dé nduu vétú iní-dé te núu tnahá-dé yãha-dé dàtná yãha mèstrú-dé-án. Te ñu-ni duca<sup>n</sup> sãtnahá tucu-xi cùu ñ<sup>n</sup> téé xínu cuechi, chi ñá túú cùnuu-dé



dàcúúxí pàtróón-dě, te nchaa sá yãha pàtróón-dě-án te tàú-dé nduu vétú iní-dé te núu tnàhá-dé yãha-dé dàtná yãha pàtróón-dě-án. Te núu yúhú Yaá táxí tnùnì ñáhá xii-ndo cachí-yu sá cùú-í sácúíhná, te uu<sup>n</sup>-gá duca<sup>n</sup> cùñàhá-yu xii nchòhó cue té cùndihí-í.

*Vá yùhú-ó cuendá nchaa sá cádá ñàha ñáyíu xii-o*

*(Lc. 12:2-7)*

<sup>26</sup> Te nchòhó vá yùhú-ndó nùú ñáyíu. Chi nchaa tnúhu sá cùú yùhu ní cuu vá cùú yùhu-gá, chi nchaa dacuítí sã quée túu-xi núú ñáyíu. <sup>27</sup> Te nchaa tnúhu sá cächí tnúhu-í xii-ndo nùú méé nùú ñá-ó, cùu-xi tnúhu sá ndúú yùhu ní cuu datúu-ndo nùú cué ñáyíu cuéi núú chítú nùú tàcá. <sup>28</sup> Te xini ñuhu-xi sá vá yùhú-ndó cué ñáyíu cuéi na càhni ñahá-yu xii-ndo, chí ñu-ni yiqui cùñú-ndó ndàcú-yu cahní-yu, dico ñá túú nãgá ndacú-yu cada ñahá-yu xii-ndo. Te tàú-ndó sã Yã Ndiõxí yùhú-ndó chi Yaá-án ndacu-gá danãa-gá yiqui cùñú-ndó, te ndacu-gá daquihí<sup>n</sup> ñahá-gã xii-ndo nùú ùhú núú ndàhú.

<sup>29</sup> Te nchòhó xini-ndó sã ndéé úú tnàhá tílaá cùyãhu-dí núú ñá-ní dñhú<sup>n</sup>, te ní ñá-dí ñá túú xihí cùtexínu-dí chí ndéé nùu mee Yã Ndiõxí Yaá cùú Tãtã-ndó ná cächí-gá te xihí-dí. <sup>30</sup> Dico nchòhó chí ío-gá néhé cuendá ñahá Yã Ndiõxí xii-ndo chí ndéé idi díquí-ndó yìndehu. <sup>31</sup> Núu xíã<sup>n</sup> cächí-í sá vá yùhú-ndó chí cùnuu-gá-ndó dàcúúxí tílaá cuéi vãi vihi-güedi.

*Nchaa ñáyíu datúu núú tnàha ñáyíu-xi sá ndécú ndihí-yu Xítohó Jesucrístú*

*(Lc. 12:8-9)*

<sup>32</sup> Te na cächí tnúhu-í xii-ndo sã ncháá ñáyíu na datúu núú tnàha ñáyíu-xi sá ndécú ndihí ñahá-yu xii-í, te duca<sup>n</sup> te tnàhá yúhú datúu-í núú Tãtã-í Dútú Ndiõxí Yaá ndécú àndíu sá ndécú ndihí-í-yu. <sup>33</sup> Dico nchaa ñáyíu na cùñaha xii tnaha ñáyíu-xi sá ñà túú ndècu ndihí ñahá-yu xii-í, te ñu-ni duca<sup>n</sup> càda yúhú tucu chí cùñaha-í xii

Tãtã-í Dútú Ndiõxí Yaá ndécú àndíu sá ñà túú ndècu ndihí-í-yu.

*Ñá túú cùu ñánuu ñáyíu*

*(Lc. 12:51-53; 14:26-27)*

<sup>34</sup> Te na cächí tnúhu-í xii-ndo sã vá cání iní-ndó sã yùhú véxi-í ñuyíú-a te cuu ñánuu-gã ñáyíu cundecú-yu, chí da ngüita-yu vá cùú ñánuu-gá-yu cundecú-yu, te duca<sup>n</sup> chí nchaa ñáyíu vá quindáá iní ñahá xii-í ñáyíu-án ngõo-yu cuu úhú iní-yu nchaa ñáyíu quindáá iní ñahá xii-í. <sup>35</sup> Te dava cue téé xíndecu tãtã-xi te ngóo-güedé cuu úhú iní-güedé tãtã-güedé, te ñu-ni duca<sup>n</sup> càda cue ñáyíu dñhí xíndecu nãná-xi, chí ngóo-yu cuu úhú iní-yu nãná-yu, te ñu-ni duca<sup>n</sup> càda tucu cue ñáyíu cùu sãnu, chí ngóo-yu cuu úhú iní-yu nãná yí-yu. <sup>36</sup> Te ndi mèé-yu vehé-yu ngóo-yu vá cùú ñánuu-gá-yu cundecú-yu.

<sup>37</sup> Te na cächí tnúhu tucu-í xii-ndo sã ncháá ñáyíu ío-gá ná cùu iní tãtã-xi àdi nãná-xi dàcúúxí yùhú, te ñáyíu-án ñà túú tàú-yu cundecu ndihí ñahá-yu xii-í, te nchaa ñáyíu ío-gá ná cùu iní déhe ducu<sup>n</sup>-xi, àdi déhe yoco-xi dàcúúxí yùhú, te ñu-ni duca<sup>n</sup> ñà túú tàú-yu cundecu ndihí ñahá-yu xii-í.

<sup>38</sup> Te nchaa ñáyíu vá cáncñícú<sup>n</sup> ni-hnu ñaha xii-í cuendá sá yùhú-yu ndohó-yu dàtná ndoho-í ñáyíu-án ñà túú tàú-yu cundecu ndihí ñahá-yu xii-í. <sup>39</sup> Te cue ñáyíu na yùhú cuú sá cuendá-í te ñáyíu-án cuíta niñnú-yu, dico nchaa ñáyíu vá yùhú cuú sá cuendá-í, te ñáyíu-án nduu táhú-yu cundecú-yu ní caa ní quihí<sup>n</sup> ndihí Yã Ndiõxí.

*Cuendá sá ndúú tãhú-ó*

*(Mr. 9:41)*

<sup>40</sup> Te nchaa ñáyíu na quèhe<sup>n</sup> cuendá ñahá xii-ndo te cada iní-yu sá tnàhá yúhú ní quehe<sup>n</sup> cuendá-yu. Te nchaa ñáyíu na quèhe<sup>n</sup> cuendá ñahá xii-í, te cada iní-yu sá tnàhá Tãtã-í Dútú Ndiõxí Yaá ní tendaha ñaha xii-í véxi-í ñuyíú-a ní quehe<sup>n</sup> cuendá-yu. <sup>41</sup> Te nchaa ñáyíu na quèhe<sup>n</sup> cuendá ñá téé càhá<sup>n</sup> tnúhu Yã Ndiõxí cuendá sá quidé-dé chíu<sup>n</sup>-gá, te dàtná-ni càa táhú

cuãñaha-gã nduu táhú tẽe duca<sup>n</sup> càhá<sup>n</sup> tnúhu-gá-á<sup>n</sup>, ñi-<sup>n</sup> duca<sup>n</sup> cùnduu táhú cuãñaha-gã nduu táhú ñáyiu duca<sup>n</sup> na quèhe<sup>n</sup> cuendá ñáhá xii-dé. Te nchaa ñáyiu na quèhe<sup>n</sup> cuendá ñi<sup>n</sup> tée quide váha cuendá sá dúcá<sup>n</sup> quide váha-dé, te dàtná-ni càa táhú nduu táhú tẽe-á<sup>n</sup> ñi-<sup>n</sup> duca<sup>n</sup> cùnduu táhú nduu táhú ñáyiu na quèhe<sup>n</sup> cuendá ñáhá xii-dé.

<sup>42</sup> Te nchaa ñáyiu na cuãñaha ñi<sup>n</sup> yaxi<sup>n</sup> ndute coho ñi<sup>n</sup> ñáyiu cùu cuendá-í cuendá sá ñi tuha ñàhá-yu xii-í cuèi ñá túú cùnno vihi-yu, te ñáyiu duca<sup>n</sup> na cuãñaha ndute-á<sup>n</sup> ñihí-yu sá ndúú tãhú-yu núú Yá Ndiõxí —càchí Jèsús xãha<sup>n</sup>-gã xii-güedé.

## 11

*Jèsús càhá<sup>n</sup> ndihí-gá cue tée xica cuu ndihí té Juàá*

*(Lc. 7:18-35)*

<sup>1</sup> Te sátá ñi yáha duca<sup>n</sup> ñi xáha<sup>n</sup> Jèsús xii ndi ùxúú cue tée xica cuu ndihí-gá, te ní xica-gá cuáhá<sup>n</sup>-gá nchaa ñuú cáa yàtni xiá<sup>n</sup> dánèhé-gá ñáyiu tnúhu-gá.

<sup>2</sup> Te té Juàá yihí-dé vecaá te ní níhí-dé tnúhu nchaa nàcuáa quide Xitohó Jesucristú. Te sátá dúcá<sup>n</sup> te ní tendaha-dé ñi<sup>n</sup> úú cue tée xica cuu ndihí-dé cuáhá<sup>n</sup>-güedé núú ndécú Jèsús. <sup>3</sup> Te òré ní quexìo-güedé núú ndécú-gã, te xicá<sup>n</sup> tnúhú-güedé núú-gã nàcuáa ní xáha<sup>n</sup> tẽ Juàá xii-güedé, te xãha<sup>n</sup>-güedé xii-gá:

—Véxi-ndí xicá<sup>n</sup> tnúhú-ndí núú-n ñuú sá díú-n cùu-n Cristú Yaá ní tendaha Yá Ndiõxí véxi ñuyíú-a, àdi sá cùndètu nahi-ni-ndí mei Yáá-á<sup>n</sup> —càchí-güedé xãha<sup>n</sup>-güedé xii-gá.

<sup>4</sup> Te Jèsús ní xáha<sup>n</sup>-gã xii-güedé:

—Chí cuánuhú te cani-ndo cuendú núú tẽ Juàá nchaa sá ñi xini-ndó quide-í, ndihí nchaa nàcuáa nduu tnúhu ní càhá<sup>n</sup>-í ní xindedóho-ndo. <sup>5</sup> Te cúñaha-ndo xii-dé sá quidé tãtna-í núú cuè ñáyiu cuáa, te quide tãtna-í cue ñáyiu yacua, ndihí cue ñáyiu tñàhá cuéhé sã dátèhyú nihnu-xi yiqui cùñú-yu, ndihí cue ñáyiu doho, nchaa ñáyiu-á<sup>n</sup> quidé tãtna-í, te ndúha-yu, te ndéé tñàhá cue ñáyiu sa ní xihí dándòto-í cúñaha-ndo. Te cúñaha

tùcu-ndo xii-dé sá ndècuu-í dánèhé-í nchaa ñáyiu ndàhú, tnúhu sá sánú ìchi ñaha xii-yu nàcuáa naníhí tãhú-yu.

<sup>6</sup> Te cúñaha tùcu-ndo xii-dé sá ìo váha táhú nchaa ñáyiu ñá túú quide sáa iní-xi nchaa tnúhu càhá<sup>n</sup>-í, duha cúñaha-ndo xii-dé —càchí-gá xãha<sup>n</sup>-gã xii-güedé.

<sup>7</sup> Te sátá ñi yáha-güedé cuánuhú-güedé te ní ngüíta Jèsús ní càhá<sup>n</sup>-gá núú ñáyiu cuendá té Juàá, te xãha<sup>n</sup>-gã xii-yu:

—Nchòhó ní sáhá<sup>n</sup> ndéhé-ndó ñi<sup>n</sup> tée ndècu xití yucu, te tée-á<sup>n</sup> ñá túú sàni ñi<sup>n</sup> sàni úú iní-dé, chi ñá túú quide-dé dàtná quidé nchaa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné tãchí. <sup>8</sup> Te ní ñá túú ní sáhá<sup>n</sup> ndéhé-ndó ñi<sup>n</sup> tée nihnu dóó váha dóó vii càa. Te nchòhó xini-ndó sã ncháá ñáyiu nihnu dóó váha dóó vii càa xindecú-yu vehe cue tée cùnno yindaha ñáyiu. <sup>9</sup> Dico

nchòhó chi ní sándéhé-ndó ñi<sup>n</sup> tée càhá<sup>n</sup> tnúhu Yá Ndiõxí, te ndáá sá díú ñi<sup>n</sup> tée càhá<sup>n</sup> tnúhu-gá cúú-dé, te cùnno-gá-dé dàcúxí dàva-gá cue tée càhá<sup>n</sup> tnúhu-gá. <sup>10</sup> Te ñi cuendá té Juàá-á<sup>n</sup> càhá<sup>n</sup>-xi núú tütú Yá Ndiõxí nàcuáa ní xáha<sup>n</sup>-gã xii Cristú, te duha ní xáha<sup>n</sup>-gã:

Tendaha-í ñi<sup>n</sup> tée càhá<sup>n</sup>-dé tnúhu-í codonùu-dé núú-n, cuendá dàtúha-dé ñáyiu cuendá quíndáa iní-yu tnúhu-n.

Duha ní xáha<sup>n</sup>-gã, te duca<sup>n</sup> ñi ngódó tñuní núú tütú-gá. <sup>11</sup> Te na càchí tnúhu ndáá-í xii-ndo sã ñi<sup>n</sup> cue tée ñuyíú-a ñá túú cùnno-güedé dàtná cùnno té Juàá tée dàcuandute ñaha xii ñáyiu. Te nchaa ñáyiu sa ta ndíhu ndaha ñàha Yá Ndiõxí vitna cuáhá<sup>n</sup> cùnno-gá-ni tucú-yu dàcúxí tẽ Juàá cuèi cùu-yu ñáyiu ñá túú cùnno dacúxí dàva-gá ñáyiu yindaha-gá.

<sup>12</sup> Te ndéé cùtnàhá ní ngüíta té Juàá tée dàcuandute ñaha xii ñáyiu càhá<sup>n</sup>-dé tnúhu Yá Ndiõxí ñuyíú-a, ndéé dàvá-á<sup>n</sup> ñi<sup>n</sup> ngüíta ñáyiu cuñi-yu sá ndíhu ndaha ñàha Yá Ndiõxí xii-yu te ndècu ndéé-yu quidé-yu nàcuáa ndíhu ndaha ñàha-gá xii-yu. <sup>13</sup> Te



nchaa cue téé ní xóo cáhá<sup>n</sup> tnúhu Yá Ndiöxí ndéé sanaha ní cáhá<sup>n</sup>-güedé sá díú-gă ndíhu ndaha-gă cue ñáyíu, te diu-ni duca<sup>n</sup> ní cáhá<sup>n</sup> tucu ndíi Moisés ní ngódó tnùní núú tütú ndíi. Te diu-ni duca<sup>n</sup> cùnuu nchaa tnúhu-á<sup>n</sup> càhá<sup>n</sup>-xi nàcuáa ndíhu ndaha Yá Ndiöxí ñáyíu ndéé ní sáá nduu ní ngúíta té Juáa càhá<sup>n</sup>-dé tnúhu-gá ñuyíú-a. <sup>14</sup> Te na cächí tnúhu-í xii-ndo sá cádá cuendá-ndó, chi núú tütú Yá Ndiöxí cächí-xi sá ndíxí tē Èliás, te diu núú tē Èliás-á<sup>n</sup> ní quide té Juáa. <sup>15</sup> Te nchaa nchòhó ñáyíu ndèdóho nchaa tnúhu càhá<sup>n</sup>-í-a te ío váha chí cuáha cuendá.

<sup>16</sup> Te na cächí tnúhu tucu-í xii-ndo nàcuáa sãtnahá-xi cùu ñáyíu ndècu vitna. Chi ñáyíu-á<sup>n</sup> cúú-yu dàtná cue landú sácóo núú yáhu dàdiqui-güexi te níhi càhá<sup>n</sup>-güexi, te xitnáha-güexi ndi mee landú-güexi: <sup>17</sup> “Ní tiú-ndí yaá ndíhi vílu te ñá túú ní cuíní-ndó càta-ndo. Te ío yica iní ní xita yuhu-ndí te ñá túú ní ndáhyú-ndó”, cächí-güexi xitnáha-güexi. Te duca<sup>n</sup> sãtnahá-xi cùu ñáyíu ndècu vitna, <sup>18</sup> chi té Juáa ío ndàhú ní xóo caxi-dé, te ní ñà túú ní xóo coho-dé ndudí ndéhé yoho yàha stilé sá sá ní nduu-xi ndidí, te sá dúcá<sup>n</sup> ní xóo cada-dé te ní cachí-yu sá ní xíndecu ndíhi-dé espíritú cündíhi yucu ñáváha. <sup>19</sup> Te sátá ní quexíó yúhú Tée cùu ñaní tnáhá-ndó nchàa-ndo, te xèxi-í xíhi-í quidè-í, te cächí-yu sá yúhú cúú-í ñ<sup>n</sup> tée xèxi vihi te xíhi vihi, te cächí tucú-yu sá cúú-í tée xica cuu ndíhi cue téé cuíhna iní-xi quide cobrá ñáhá xii-yu cuendá impuèstú ndíhi nchaa dava-gá cue téé ndècu ichi cuehé ichi duha, duha cächí-yu. Te ñáyíu ní tnahá tnúhu ndíhi Yá Ndiöxí, ñáyíu-á<sup>n</sup> quidè-yu sá váha nàcuáa cutnùní sá méé-gă ío ndècu ndíhi-gá sá xini tnùní-gá —cächí-gá xáha<sup>n</sup>-gă xii-yu.

*Cuendá ñáyíu dava ñuú ñá túú sãndáa iní tnúhu Xitohó Jesucristú*  
(Lc. 10:13-15)

<sup>20</sup> Te Jèsús ní ngúíta-gá càhá<sup>n</sup>-gá dóho nchaa ñáyíu ñuú núú ío-gá vai núú sá vă yóo tnàhí ndàcu cada ní

quide-gá, chi nchaa ñáyíu ñuú-á<sup>n</sup> ñà túú cuíní-yu ndixi túu iní-yu sá ñà túú quide váha-yu ndècú-yu, te xáha<sup>n</sup>-gă xii-yu:

<sup>21</sup> —¡Ndàhú nchòhó cue ñáyíu ñuú Corazín! ¡Te ndàhú nchòhó cue ñáyíu ñuú Bètsaidá! Chi núu dícó ñuú Tírú ndíhi ñuú Sidón ní quide-í nchaa sá vă yóo tnàhí ndàcu cada datná ní quide-í ñuú-ndó-á ní xiní-ndó ñá, te sá ndéé ama-gá cuíhnú-yu dóo ndàhú te cunu cóo-yu núú yáa cuendá sá ndíxí cuèchi iní-yu sá ñà túú quide váha-yu ní cùu. <sup>22</sup> Dico sáá nduu te ío-gá dandòho ñaha Yá Ndiöxí xii-ndo dàcúxí ñáyíu ñuú Tírú ndíhi ñáyíu ñuú Sidón. <sup>23</sup> Te nchòhó cue ñáyíu ñuú Capèrnaúm ío quide cahnu-ndo mee-ndo, te quide iní-ndó sá sá cuándaa-ná-ndó àndíu, dico ñáhá chi núú ùhú núú ndàhú nduu táhú-ndó cùndecu-ndo. Te núu dícó ñuú Sòdomá ní quide-í nchaa sá vă yóo tnàhí ndàcu cada datná ní quide-í ñuú-ndó ní xiní-ndó ñá, te ñáyíu-á<sup>n</sup> vă náa-yu chi cundecu-ní-yu ndéé vitna ní cùu. <sup>24</sup> Te na cächí tnúhu-í xii-ndo sá sáá nduu te ío-gá dandòho ñaha Yá Ndiöxí xii-ndo dàcúxí ñáyíu ñuú Sòdomá —cächí-gá xáha<sup>n</sup>-gă xii nchaa ñáyíu ñuú-á<sup>n</sup>.

*Jèsús cuíní-gá sá túhá ñàha ñáyíu xii-gá*

(Lc. 10:21-22)

<sup>25</sup> Te sátá xíá<sup>n</sup> te Jèsús ní ngúíta-gá càhá<sup>n</sup> ndíhi-gá Tătá-gă Dútú Ndiöxí, te xáha<sup>n</sup>-gă:

—Yòhó Tătà-í Dútú Ndiöxí, ío chíñuhu ñaha-í xii-n chi diu-n tàxi tnùní-n àndíu ndíhi ñuyíú-a, te dānehé-n cuè ñáyíu nchaa tnúhu váha, te diu-ni ñáyíu-á<sup>n</sup> cúú-yu ñáyíu ñá túú cùtnùní iní-xi nchaa tnúhu càhá<sup>n</sup> cue téé cächí sá ío túha, te nchaa tnúhu váha-á<sup>n</sup> ñà túú dàtúu-n núú ñáyíu cächí sá ío túha te ío váha sáa díquí-xi. <sup>26</sup> Chi duca<sup>n</sup> cuíní-n cùnduu —cachí-gá xáha<sup>n</sup>-gă xii Tătá-gă.

<sup>27</sup> Te xáha<sup>n</sup>-gă xii nchaa ñáyíu xíndecu-á<sup>n</sup>:

—Mee Tătà-í Dútú Ndiöxí ní cachí-gá sá cùnùu-í núú nchàandi túhú sá ío. Te vá yóo ñ<sup>n</sup>-gá xini nàcuáa

sàni iní yúhú Déhe Dútú Ndiöxí, chi ñndí díí-ni mee-gã xini-gá nàcuáa sàni iní-í, te mee-í xini-í nàcuáa sàni iní méé-gã. Te nchaa ñáyiú cächí iní-í sá quini-yu nàcuáa sàni iní Tātá-í Dútú Ndiöxí te xitnũhu-í-yu, te vá yoo ñ-gá xini chi ñ-yu ñáyiú duca<sup>n</sup> xitnũhu-í-á<sup>n</sup> xini-yu. <sup>28</sup> Te nchaa nchòhó ñáyiú ñá túú ndècu váha, ñáyiú ñá túú nihí nàcuáa cada cundecu váha iní-xi quixi-ndo túha ñaha-ndo xii-í nàcuáa duca<sup>n</sup> cundecu váha iní-ndó. <sup>29</sup> Te cuu vii cuu váha iní-ndó tñi-ndo nchaa tñuhu cãhá<sup>n</sup>-í, te ío dacuaha-ndo, te duca<sup>n</sup> cada-ndo chi yúhú ío cãhnu iní-í, te ío ndàhú iní-í. Te núu duca<sup>n</sup> na cada-ndo te ío váha cuu iní-ndó cundecu-ndo. <sup>30</sup> Te tñi-ndo nchaa tñuhu cãhá<sup>n</sup>-í chi ñá túú cùu-xi ñ<sup>n</sup> sá vëe, chi cada iní-ndó sã cúu-xí dàtná ñ<sup>n</sup> chiu<sup>n</sup> ñamá — cächí-gá xãha<sup>n</sup>-gã xii-yu.

## 12

*Cue téé xica cuu ndihí Jesús sãhnú-güedé yoco triú nduu ndetátú ñáyiú*

(Mr. 2:23-28; Lc. 6:1-5)

<sup>1</sup> Te ñ<sup>n</sup> nduu cùu-xi nduu ndetátú ñáyiú ñuhu Jesús ichi ndihí cue téé xica cuu ndihí-gá, te ta yãha-gá ndihí-güedé ñ<sup>n</sup> xichi núu cáá triú te xixihí-güedé docó nõu xiã<sup>n</sup> ní ngüita-güedé sãhnú-güedé yoco triú-á<sup>n</sup>, te ndihí ndaha-güedé quí<sup>n</sup>-güedé quée triú-á<sup>n</sup> tá xèxi-güedé cuáhã<sup>n</sup>. <sup>2</sup> Te cue téé cùu fariséú ní xini-güedé nàcuáa quide cue téé xica cuu ndihí Jesús, núu ní xãha<sup>n</sup>-güedé xii-gá:

—¿Ná cuendá duca<sup>n</sup> quide cue téé xica cuu ndihí-n sãhnú-güedé yoco triú, te vitna cùu-xi nduu ndetátú-í? Te ñá túú tàú-güedé duca<sup>n</sup> cada-güedé —cächí-güedé xãha<sup>n</sup>-güedé xii-gá.

<sup>3</sup> Te Jesús ní xãha<sup>n</sup>-gã xii-güedé:

—¿Náa ñá túú dacuaha-ndo núu tütú Yã Ndiöxí núu cãhá<sup>n</sup>-xi nàcuáa ní quide ndí Dãvií cútnãhá ní xihí ndí docó ndihí cue téé ní xica cuu ndihí ndí-ã<sup>n</sup>? <sup>4</sup> Chi ndí-á<sup>n</sup> ñ<sup>n</sup> quíhu ndí vehe Yã Ndiöxí ní quehe<sup>n</sup> ndí pãá ní cuu íí ndécú-ã<sup>n</sup> ñ<sup>n</sup> xexi ndí ndihí cue

téé ní xica cuu ndihí ndí, te ñá túú tàú ndí sá dúcã<sup>n</sup> cada ndí ndihí cue téé-ã<sup>n</sup> ní cùu, chi mee-ni cuè dútú tàú-güedé caxi-güedé pãá-ã<sup>n</sup> ní cùu. <sup>5</sup> ¿Te náa ñá túú xini-ndó nàcuáa cãhá<sup>n</sup>-xi núu tütú ndí Moisés sá nchãá cuè dútú vá ndetátú-güedé nduu cùu-xi nduu ndetátú-ã<sup>n</sup>? Te ñá díú ñ<sup>n</sup> cuèchi cùu-xi sá dúcã<sup>n</sup> ñá túú ndetátú-güedé nduu cùu-xi nduu ndetátú. <sup>6</sup> Te na cächí tñuhu-í xii-ndo sã yúhú cùu-í téé ío-gá cùnùu ndecu ndihí-ndo dacúxí veñúhu sã ío cùnùu. <sup>7</sup> Dico nchòhó chi ñá tècú tñuni-ndó nàcuáa cãhá<sup>n</sup> Yã Ndiöxí núu tütú-gá núu cächí-xi: “Yúhú cuini-í sá cundãhú iní-ndó cuè tñaha ñáyiú-ndo te ñá díú mèe-ni sá cáhni-ndó quiti nduu táhú-í”, duha cächí-gá núu tütú-gá. Te núu dicó nchòhó tècú tñuni-ndó ñá, te vá cãhá<sup>n</sup> cuèhé-ndó cuendá nchaa ñáyiú ñá túú ndècu cuèchi-xi. <sup>8</sup> Te yúhú Téé cùu ñani tñãhá-ndó nchaa-ndo, tñãhá-í ndécú ndihí-í tñuhu ndee iní sá cùu-í nchaa ñáyiú nàcuáa cada-yu nduu ndetátú-ó-á —cächí-gá xãha<sup>n</sup>-gã xii-güedé.

*Ñ<sup>n</sup> téé ní yichí ñ<sup>n</sup> xio ndaha-xi*

(Mr. 3:1-6; Lc. 6:6-11)

<sup>9</sup> Te Jesús ní xica-gá cuáhã<sup>n</sup>-gã, te cuánguihu-gá xiti ñ<sup>n</sup> veñúhu. <sup>10</sup> Te xiã<sup>n</sup> ndécú ñ<sup>n</sup> téé ní yichí ñ<sup>n</sup> xio ndaha-dé. Te dava cue téé xindecu-ã<sup>n</sup> ndúcú-güedé nàcuáa cada-güedé cacã<sup>n</sup> cuèchi-güedé cuendá-gá núu cuè téé cùnùu, te ní xicã<sup>n</sup> tñuhú-güedé núu-gã, te xãha<sup>n</sup>-güedé:

—Cachí tñuhu xii-ndí nõu cuu cada tátna-o ñ<sup>n</sup> téé cùhú nduu cùu-xi nduu ndetátú-ó ñ<sup>n</sup> ñãhá —cächí-güedé xãha<sup>n</sup>-güedé xii-gá.

<sup>11</sup> Te Jesús ní xãha<sup>n</sup>-gã xii-güedé:

—Te nchòhó òré ná ngàunihnu ñ<sup>n</sup> mbéé-ndó ñ<sup>n</sup> déhvã cùnùu te nãtava-ndo-di cuèi cùu-xi nduu ndetátú-ó. <sup>12</sup> Te ñ<sup>n</sup> ñáyiú ío-gá cùnùu-yu dacúxí ñ<sup>n</sup> mbéé, núu xiã<sup>n</sup> tàú-ó sã cadã-ó sã váha sã cúu-xi-yu cuèi cùu-xi nduu ndetátú-ó —cächí-gã xãha<sup>n</sup>-gã xii-güedé.

<sup>13</sup> Te dàtnùní ní xãha<sup>n</sup>-gã xii téé cùhú ndaha-xi-ã<sup>n</sup>:

—Ndacani ndaha-n —càchí-gá xáha<sup>n</sup>-gǎ xii-dé.

Te téé-á<sup>n</sup> nǐ ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé. <sup>14</sup> Te cue téé cùu fariséú ní ndee-güedé xití veñúhu, te ní ngúita-güedé ndátnúhu-güedé nǔu nása cada-güedé cahni-güedé Jèsús.

*Nàcuáa sa ndéé tñuní cuèndá Jèsús*

<sup>15</sup> Te sátá nǐ cutnùní iní Jèsús nàcuáa cuìní-güedé cada ñaha-güedé xii-gá te ní xica-gá cuáhá<sup>n</sup>-gá, te ío vǎi ñáyiu nchicú<sup>n</sup> ñáhá xii-gá cuáhá<sup>n</sup>, te tñáhá cue ñáyiu cùhú nchicú<sup>n</sup> ñáhá xii-gá cuáhá<sup>n</sup>, te ní quide tátna-gá cue ñáyiu-á<sup>n</sup>. <sup>16</sup> Te ní xáha<sup>n</sup>-gǎ xii-yu sǎ vǎ càhá<sup>n</sup>-yu yoo cùu-gá. <sup>17</sup> Te duca<sup>n</sup> nǐ cuu chi ní quee ndáá-xi nàcuáa ní xáha<sup>n</sup> Yá Ndióxi xii ndí Chàíá téé ní xóo cáhá<sup>n</sup> tñúhu-gá ndéé sanaha nǐ chídó tñuní ndí nùú tütú-gá, te duha ndùu tñúhu ní xáha<sup>n</sup>-gǎ:

<sup>18</sup> Téé-a cùu-dé téé ní sani iní-í sǎ cúnú cuèchi-dé nùú-í,

te ío cùu iní-í-dé, te cùdí iní-í-dé.

Te yúhú cuáñaha-í Espíritú-í cundecu ndíhi-dé,

te ñu-dé cùñaha-dé xii nchaa ñáyiu ñuyú sǎ yúhú ío ndáá quidé-í.

<sup>19</sup> Te vǎ dácáa-dé tñúhu cáhá<sup>n</sup>-dé ndíhi ñáyiu, te ní vǎ cáná sàa-dé òré cáhá<sup>n</sup>-dé,

te ní vǎ yóo níhi tñúhu nása cáhá<sup>n</sup>-dé cuhu<sup>n</sup>-dé ichi.

<sup>20</sup> Te ní ñà túú nǎ cada-dé cue ñáyiu cùu datná ñ<sup>n</sup> tnu ndóo sǎ cuìní-xi tñáhnú, te ñu-ni ñáyiu-á<sup>n</sup> cúú tucú-yu dàtná ñ<sup>n</sup> mèchá càndíl sǎ ío quène ñúhmá te cuìní-xi ndahvá.

Te duca<sup>n</sup> sǎtnahá-xi cùu ñáyiu-á<sup>n</sup> chi ñá túú níhi ndéé-yu cundecú-yu sǎ cúú-xi-í, te mee-ni sǎ vǎha cada ñaha-dé xii-yu,

te ñu-ni duca<sup>n</sup> càda-dé ndéé sǎá ndu cùtñuní iní nchaa ñáyiu sǎ ío ndáá quidé-dé.

<sup>21</sup> Te nchaa ñáyiu níhi ñuyú ío cundee cùu cahnu iní ñáhǎ-yu xii-dé.

Duha ní xáha<sup>n</sup>-gǎ xii ndí Chàíá ní chídó tñuní ndí nùú tütú-gá.

*Càchí-güedé sǎ ndécú ndíhi Jèsús espíritú cùndíhi yucu ñávǎha*

(Mr. 3:20-30; Lc. 11:14-23; 12:10)

<sup>22</sup> Te ní quexío ñ<sup>n</sup> úú cue téé nùú ndécú Jèsús, te ndéca-güedé ñ<sup>n</sup> téé níhi te cuáa-dé, te yíhi ñaha espíritú cùndíhi yucu ñávǎha xii-dé, te Jèsús ní queñuhu-gá espíritú cùndíhi yucu ñávǎha yíhi ñaha xii-dé, te òré-ni-á<sup>n</sup> nǐ cuu ní nacáhá<sup>n</sup>-dé te ní ndúha nùú-dé. <sup>23</sup> Te nchaa ñáyiu xǐndecu-á<sup>n</sup> ío ní cuñúhu-yu sǎ dúcá<sup>n</sup> nǐ quide-gá, te ní xítñahá-yu:

—Váa téé-a cùu-dé ñani tñáhá ndí Dávíí téé tendaha Yá Ndióxi quixi ñuyú-a —càchí-yu xítñahá-yu.

<sup>24</sup> Te cue téé cùu fariséú ní tecú dóho-güedé nàcuáa ndùu tñúhu xítñahá-yu, nùu xǎ<sup>n</sup> ní xítñaha-güedé:

—Téé-a ndèñuhu-dé nchaa espíritú cùndíhi sácúíhná yíhi ñaha xii ñáyiu, chi ñu-ni sácúíhná-á<sup>n</sup> chǐndé ñaha-xi xii-dé te ñu-ni-xi tàxi tñuní-xi nchaa espíritú-á<sup>n</sup> —duha ní xítñaha-güedé.

<sup>25</sup> Te Jèsús ní cutnùní iní-gá nàcuáa ndùu tñúhu ní xítñaha-güedé, nùu ní xáha<sup>n</sup>-gǎ xii-güedé:

—Te nchòhó xǐní-ndó sǎ ñu ñ<sup>n</sup> téé yǐndaha ñ<sup>n</sup> nació<sup>n</sup> vǎ cúú ñ<sup>n</sup>nuu-dé ndíhi cue téé cùndíhi-dé, te vǎ cùdí-dé cunuu-dé. Te ñu-ni duca<sup>n</sup> sǎtnahá tucu-xi cùu tucu cue téé cùchiu<sup>n</sup> ñ<sup>n</sup> ñuú, chi nùu vǎ cúú ñ<sup>n</sup>nuu-güedé cundecu-güedé, te vǎ cùdí-güedé cundecu-güedé taxi tñuní-güedé. Te ñu-ni duca<sup>n</sup> sǎtnahá tucu-xi cùu cue ñáyiu xǐndecu ñ<sup>n</sup>-ni vèhe, chi nùu vǎ cúú ñ<sup>n</sup>nuú-yu cundecú-yu te vǎ cùdí-yu cundecu càhnú-yu.

<sup>26</sup> Te nùu sácúíhná duca<sup>n</sup> quide-xi queñuhu-xi cue espíritú cùndíhi-xi yíhi ñaha xii ñáyiu ña, te ñá túú cùu ñ<sup>n</sup>nuu-xi ndecu-xi te nùu duca<sup>n</sup>, te vǎ cùdí sácúíhná-á<sup>n</sup> cundecu-xi taxi tñuní-xi te nùu duca<sup>n</sup> quide-xi. <sup>27</sup> Te duha càhá<sup>n</sup>-í chi nchòhó càchí-ndó sǎ chǐndé ñaha sácúíhná xii-í queñuhu-í

nchaa espíritú cùndíhi-xi yíhi ñaha xii ñáyiu. Te nùu yúhú quidé cuèndá-ndó sǎ sácúíhná chǐndé ñaha-xi xii-í, te xǐni ñuhu-xi cada cuèndá-ndó yóo chindee ñaha xii cue téé xica

cuu ndihi-ndo queñuhu-güedé nchaa espíritú cündihi yucu ñávaha yíhi ñaha xii ñáiyu. Te mee-güedé cächí-güedé sá nchòhó ñá túú càhá<sup>n</sup> ndáá-ndó sá dúcá<sup>n</sup> càhá<sup>n</sup>-ndó. <sup>28</sup> Dico yúhú chi Espíritú Yá Ndiöxí chindèe ñaha-xi xii-í queñuhu-í nchaa espíritú cündihi sácuíhná yíhí ñaha xii ñáiyu, te sá dúcá<sup>n</sup> chindee ñaha Espíritú-gá xii-í, xíá<sup>n</sup> cútnùní sá sà ní sáá nduu cuìní-gá ndíhu ndaha ñàha-gá xii-ndo.

<sup>29</sup> 'Te nchòhó xìní-ndó sá cuè ñadúhú chi vá ndácú-güedé cuendá-ni quíhu-güedé duhu-güedé vehe ì<sup>n</sup> téé ío ndee, chi díhna-gá xìní ñùhu-xi tñi-güedé téé-á<sup>n</sup> dacùtu ñaha-güedé xii-dé dàtnùní duca<sup>n</sup> te ndacu-güedé duhu-güedé nchaa sá ndécú ndihi-dé.

<sup>30</sup> 'Te nchaa ñáiyu ñá túú cündihi ñaha xii-í, te cùu úhú iní ñáhá-yu. Te nchaa ñáiyu ñá túú chindee ñaha xii-í, te dàquee tíhü-yu chi<sup>n</sup> quide-í.

<sup>31</sup> 'Te na cächí tnúhu-í xii-ndo sá ncháá ñáiyu quide nchaa sá cuèhé sá dúhá cuu cada càhnu iní ñáhá Yá Ndiöxí xii-yu, te ñi<sup>n</sup>-ni duca<sup>n</sup> cùu cada cahnu iní-gá nchaa tnúhu cuèhé tnúhu duha càhá<sup>n</sup>-yu. Dico cue ñáiyu na càhá<sup>n</sup> úhú cuendá Espíritú-gá, te ñáiyu-á<sup>n</sup> vǎ cádá càhnu iní ñáhá tnàhí-gá xii-yu. <sup>32</sup> Te nchaa ñáiyu na càhá<sup>n</sup> úhú cuendá yúhú Téé cùu ñaní tnáhá-yu ncháá-yu, te cuu cada càhnu iní ñáhá Yá Ndiöxí xii-yu. Dico cue ñáiyu na càhá<sup>n</sup> úhú cuendá Espíritú-gá te vá cádá càhnu iní ñáhá tnàhí-gá xii-yu cuèi vitna ndècu vívü-yu, te cuèi na cùú-yu.

*Ndi díí<sup>n</sup> núú yutnu xìní-ó nǎ yutnu cùu-xi cuendá sá sǎvidí-xi (Lc. 6:43-45)*

<sup>33</sup> 'Te nchòhó xìní-ndó sá ndí díí<sup>n</sup> núú yutnu xìní-ó nǎ yutnu cùu-xi cuendá sá sǎvidí-xi, te xìní-ó sá ncháá yutnu váha cùu<sup>n</sup> mee-ni sǎvidí váha, dico nchaa yutnu sá ñà túú váha te cùu<sup>n</sup> mee-ni sǎvidí sá ñà túú váha. Te duha càhá<sup>n</sup>-í cuendá cada cuendá váha-ndo nàcuáa ndùu chi<sup>n</sup> quide-ndo ì<sup>n</sup> ì<sup>n</sup>-ndo cuendá duca<sup>n</sup> cùtnuní ná ñáiyu cùu-ndo. <sup>34</sup> Dico

nchòhó cúú-ndó dàtná ì<sup>n</sup> cóó dèé<sup>n</sup> chi ío cuihna iní-ndó, te vá cání iní-ndó sá ndácú-ndó càhá<sup>n</sup>-ndó ì<sup>n</sup> tnúhu váha, chi ío cuihna iní-ndó. Te nchòhó xìní-ndó sá ncháá ñáiyu càhá<sup>n</sup>-yu nání véxi iní-yu. <sup>35</sup> Te nchaa ñáiyu váha iní-xi càhá<sup>n</sup>-yu tnúhu váha, chi ñi<sup>n</sup>-ni tnúhu váha-á<sup>n</sup> ñúhú iní-yu. Te nchaa ñáiyu cuihna iní-xi càhá<sup>n</sup>-yu tnúhu cuèhé tnúhu duha, chi ñi<sup>n</sup>-ni tnúhu cuèhé tnúhu duha-á<sup>n</sup> ñúhú iní-yu. <sup>36</sup> Te na cächí tnúhu-í xii-ndo sá ná sáá nduu càda ndáá Yá Ndiöxí cuèchi nchaa nchòhó ñáiyu ndècu ñuyíú-a, te nchaa tnúhu cuèhé tnúhu duha càhá<sup>n</sup>-ndó càhá<sup>n</sup>-gá sá ñà túú ní quide váha-ndo sá dúcá<sup>n</sup> ní càhá<sup>n</sup>-ndó tnúhu-á<sup>n</sup>. <sup>37</sup> Te nàcuáa ndùu tnúhu ní càhá<sup>n</sup>-ndó ì<sup>n</sup> ì<sup>n</sup>-ndo, te duca<sup>n</sup> càhá<sup>n</sup> Yá Ndiöxí te núu ndècu cuèchi-ndo àdi ñá túú ndècu cuèchi-ndo. Te núu ñá túú cuèchi-ndo te cácu-ndo, dico núu ndècu cuèchi-ndo te vá cácu-ndo —cächí-gá xàha<sup>n</sup>-gǎ xii cue téé cùu fariséú-á<sup>n</sup>.

*Cue téé cuìní sá cádá Jèsús ì<sup>n</sup> sá vǎ yǎo tnàhí ndàcu cada*

*(Mr. 8:12; Lc. 11:29-32)*

<sup>38</sup> Te cue téé cùu fariséú, ndihi cue téé dàcuaha ñaha xii ñáiyu nchaa tnúhu ní chídó tnùní ndí Moisés xàha<sup>n</sup>-güedé xii Jèsús:

—Mèstrú, cuìní-ndí cada-n ì<sup>n</sup> sá vǎ yǎo tnàhí ndàcu cada cuendá duca<sup>n</sup> cùtnuní iní-ndí sá Yá Ndiöxí chindèe ñaha-gá xii-n —cächí-güedé xàha<sup>n</sup>-güedé xii-gá.

<sup>39</sup> Te Jèsús ní xàha<sup>n</sup>-gǎ xii-güedé:

—Ñáiyu ndècu ichi cuehé ichi duha ñá túú cuìní-yu tñi<sup>n</sup>-yu tnúhu càhá<sup>n</sup> Yá Ndiöxí, te ñáiyu-á<sup>n</sup> cuìní-yu cada-í ì<sup>n</sup> sá vǎ yǎo tnàhí ndàcu cada nàcuáa cutnùní iní-yu núu ndáá sá Yá Ndiöxí chindèe ñaha-gá xii-í. Dico yúhú chi ñá túú nǎgá cada-í quini-yu, chi sa nihí-yu tnúhu nàcuáa ní yáha ndí Jónás téé ní xóo càhá<sup>n</sup> tnúhu Yá Ndiöxí ndéé sanaha, te ñi<sup>n</sup>-ni duca<sup>n</sup> yáha yúhú tucu. <sup>40</sup> Chi ndí Jónás-á<sup>n</sup> ní xúhu<sup>n</sup> ndí úní nduu úní niú xití ì<sup>n</sup> chácá cáhnú vñhi nani ballená. Te ñi<sup>n</sup>-ni duca<sup>n</sup> yáha yúhú Téé cùu ñaní tnáhá-ndó nchàa-ndo, chi úní nduu



úni niú cuhu<sup>n</sup>-í xití ñuhu. <sup>41</sup> Te na sáa nduu càda ndáá Yá Ndiöxí cuéchi nchaa ñáyi ndècu ñuyíú-a, te dàvá-á<sup>n</sup> cachí nchaa ñáyi ñuú Nínivé sá ñà túú ní quide ndáá nchaa ñáyi ndècu vitna, te duca<sup>n</sup> cǎhá<sup>n</sup>-yu chi mèe-yu ní dáñá-yu ichi cuèhé ichi duha cútnàhá ní sáhá<sup>n</sup> ndí Jònás ñuú-yu ní cǎhá<sup>n</sup> ndí tñúhu Yá Ndiöxí núú-yu. Dico vitna iha ndècu ndihí ñaha-ndo xii yúhú, te ñuú-í ío-gá cúnú-í dàcúúxí ndí Jònás. <sup>42</sup> Te nduu càda ndáá Yá Ndiöxí cuéchi nchaa ñáyi, te dàvá-á<sup>n</sup> quini-ndó ñ<sup>n</sup> ñadihí ñaha ní xíndaha ñ<sup>n</sup> nació<sup>n</sup> cáá ndàa xio datni núú quéné nchícanhii, te ñaha-á<sup>n</sup> ío xica ñí xíndecu-a<sup>n</sup> te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tñúhu ní cǎhá<sup>n</sup> ndí Salómón, chí ndí-á<sup>n</sup> ío ní sáa sá xíní tñúni ndí. Te tñàhá ñaha-á<sup>n</sup> cǎhá<sup>n</sup>-a<sup>n</sup> sá ñà túú ní quide ndáá nchaa ñáyi ndècu vitna. Dico vitna iha ndècu ndihí ñaha-ndo xii yúhú, te ñuú-í ío-gá cúnú-í dàcúúxí ndí Salómón.

*Espiritú cündihí yucu ñávãha sá nánchòcáva xito cùu uu*  
(Lc. 11:24-26)

<sup>43</sup> Te òré ná quée ñàha ñ<sup>n</sup> espíritu cündihí yucu ñávãha xii ñ<sup>n</sup> ñáyi, te cuáhá<sup>n</sup>-xi ndùcu-xi ñ<sup>n</sup> xichí núú cündècu-xi te ñà ñihí-xi te ní sani iní-xi: <sup>44</sup> “Váha-gá núhú tucu-í núú ñí xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xíní-xi sá cáá ñí ñáyi-á<sup>n</sup> dàtná cáá-ñá ñ<sup>n</sup> vehe ní natíhú ní nduu vii-ná te vá yòo-gá ndécú. <sup>45</sup> Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xi úsá tñàhá espíritu cündihí-xi sá nèhé víhí-gǎ xíquide. Te òré ní ñihí-xi cue espíritu-á<sup>n</sup> te ndèca ñaha-xi cuáhá<sup>n</sup> cuèndá ngúndecu ndihí-xi ñáyi-á<sup>n</sup>. Te ñáyi-á<sup>n</sup> uu<sup>n</sup>-gá nándí yáha-yu dàcúúxí ndéé díhna. Te ñuú-í duca<sup>n</sup> sátnahá-xi yáha nchaa ñáyi cuihna iní-xi ndècu ñuyíú-a vitna —càchí-gá xǎha<sup>n</sup>-gǎ xii-güedé.

*Cue ñaní Jèsús ndihí nǎná-gǎ*  
(Mr. 3:31-35; Lc. 8:19-21)

<sup>46</sup> Te cǎhá<sup>n</sup> dúcá<sup>n</sup>-ní Jèsús ní quexìo náná-gǎ ndihí cue ñaní-gá cuini-yu

cǎhá<sup>n</sup> ndihí ñàhá-yu xii-gá, te ní ngúnu tñí-yu ndàa quehé vehe núú ndécú-gǎ. <sup>47</sup> Te ñ<sup>n</sup> cue ñáyi xíndecu-á<sup>n</sup> ñí xǎhá<sup>n</sup>-yu xii-gá:

—Ní quexìo náná-n ndihí cue ñaní-n xínutñí-yu quehé, te cuini-yu cǎhá<sup>n</sup> ndihí ñàhá-yu xii-n —càchí ñáyi-á<sup>n</sup> xǎhá<sup>n</sup>-yu xii-gá.

<sup>48</sup> Te ní xǎhá<sup>n</sup>-gǎ xii ñáyi duca<sup>n</sup> xǎha<sup>n</sup> xii-gá-á<sup>n</sup>:

—Te cachí tñúhu yóndi-gá ñáyi cùu datná nǎná-í ndihí dàtná cue ñaní-í —càchí-gá xǎha<sup>n</sup>-gǎ xii ñáyi-á<sup>n</sup>.

<sup>49</sup> Te ní dánèhé ñàhá-gǎ nchaa cue téé xica cuu ndihí-gá, te ní xǎhá<sup>n</sup>-gǎ xii ñáyi-á<sup>n</sup>:

—Cue téé-a cùu-güedé dàtná nǎná-í, ndihí dàtná cue ñaní-í. <sup>50</sup> Te nchaa ñáyi na càda nchaa nacúáa cǎhá<sup>n</sup> Tǎtà-í Dútú Ndiöxí Yaá ndécú àndíu, te ñáyi-á<sup>n</sup> cúú-yu dàtná nǎná-í, ndihí dàtná cue ñaní-í, ndihí dàtná cue cúha-í —càchí-gá xǎha<sup>n</sup>-gǎ xii ñáyi duca<sup>n</sup> ñí dáyãha tñúhu núú-gǎ-á<sup>n</sup>.

## 13

*Nàcuáa quide téé cuángacá<sup>n</sup> triú*  
(Mr. 4:1-9; Lc. 8:4-8)

<sup>1</sup> Te ñuú-í nduu-á<sup>n</sup> ní quee Jèsús vehe núú ndécú-gǎ, te ní xica-gá cuáhá<sup>n</sup>-gá ní ngóo-gá yuhu làgúná.

<sup>2</sup> Te ío cuéhé ñáyi ní tacá núú ndécú-gǎ. Te sátá dúcá<sup>n</sup> ío cuéhé ñáyi núú ní quée-gá xití ñ<sup>n</sup> bàrcú nùtní xití ndute làgúná-á<sup>n</sup>, te núú xǎ<sup>n</sup> ní ngóo-gá, te nchaa ñáyi-á<sup>n</sup> xíxúcu-yu yuhu làgúná-á<sup>n</sup>. <sup>3</sup> Te Jèsús ní ngúita-gá ní cani-gá tñí cuèndú núú-yu nàcuáa tecú tñúni-yu nchaa nàcuáa ndùu tñúhu-gá, te xǎha<sup>n</sup>-gǎ xii-yu:

—Ñ<sup>n</sup> téé cuángacá<sup>n</sup>-dé triú, <sup>4</sup> te òré ní ngúita-dé dǎngoyo-dé triú-á<sup>n</sup>, te dava ní quene ndava ní ngava ndéé ichi, te ní xíní cue tǎláa te ní nàdatàcá-güedi. <sup>5</sup> Te dava ní ngava ñuhu yadi núú yíhí víhí yúú, te ndíhí-ní ní xínu-xi chí ñà túú cavihi ñuhu. <sup>6</sup> Dico òré ní nayehé te ñà túú ní cùndee iní-xi chí ní yíchí-xi, chí ñà túú ní ñíhí quíhí<sup>n</sup> cùnú yóho-xi. <sup>7</sup> Te

dava ní ngava núú yúcu ndíquín tnu iñu, te ññuu-ni ní xínu-xi ndíhi tnu iñu. Te tnu iñu-án ní sañnu-xi te ní dánáá-xí nchàa triú sá ní xínu-án.<sup>8</sup> Dico dava-gá triú ní ngava núú ndécú ññuhu cocón te xián ío váha ní cuu, chi núú ññ-ní triú-án te dava yoco-xi ní nguíhi ócò úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ññ cièndú triú-xi.<sup>9</sup> Te vitna nchaa nchòhó ññáyu ní xíndedóho tnúhu ní cáhá-í-a, te ío váha chí cuàha cuèndá —càchí-gá xáha-gã xií-yu.

*Cue téé xica cuu ndíhi Jesús ndúcu tnúhu-güedé núú-gã ná cuèndá caní-gã cuèndú núú ññáyu*

*(Mr. 4:10-12; Lc. 8:9-10)*

<sup>10</sup> Te cue téé xica cuu ndíhi Jesús ní sáhá-güedé ndéé núú-gã, te xáha-güedé xii-gá:

—Ndúcu tnúhu-ndí núú-n núú ná cuèndá duca<sup>n</sup> mée-ni cuèndú caní-n núú ññáyu —càchí-güedé xáha-güedé xii-gá.

<sup>11</sup> Te ní xáha-gã xii-güedé:

—Nchòhó chi sa càchí tnúhu Yá Ndiöxí xii-ndo ññ sá vátá quíní-gá-ndó, chi càchí tnúhu-gá nàcuáa quide-gá ndíhu ndaha-gã ññáyu, dico dava-gá ññáyu chi ñá túú nã xáha-gã xií-yu.<sup>12</sup> Te nchaa ññáyu sa təcú tnùní te uu<sup>n</sup>-gá cuita tecú tnùní-yu quíhí<sup>n</sup>, te nchaa ññáyu ñá túú təcú tnùní te uu<sup>n</sup>-gá vá təcú tnùní-yu.<sup>13</sup> Te xián núú duha caní-í mee-ni cuèndú núú-yu, chi cuéi na quíní-yu nchaa nàcuáa cuu dico ni vá cútnùní iní-yu ná cuèndá duca<sup>n</sup> cùu, te cuéi na cùndedóho-yu dico ni vá təcú tnùní-yu.<sup>14</sup> Te diu cuèndá ññáyu-án ní xáha<sup>n</sup> Yá Ndiöxí xii ndí Chàíá téé ní xóo cáhá<sup>n</sup> tnúhu-gá ndéé sanaha ní chídó tnùní ndíi núú tütú-gá núú càchí-xi:

Nchaa nchòhó cùndedóho-ndo tnúhu cáhá<sup>n</sup>-í, dico ni vá təcú tnùní-ndó,

te cuéi na quíní-ndó nchaa nàcuáa cada-xi, dico ni vá cútnùní iní-ndó nã cuèndá duca<sup>n</sup> quide-xi.

<sup>15</sup> Te duca<sup>n</sup> chi cùu-ndo ññáyu ío sàá iní-xi,

te cùu-ndo ññáyu ñá túú təcú tnùní tnúhu cáhá<sup>n</sup>-í,

te cùu tucu-ndo datná cue ññáyu cuáá chí ñá túú cuíní-ndó cada cuèndá-ndó tnúhu-í,

te ni ñá túú cuíní-ndó cùndedóho-ndo, te ni ñá túú cuíní-ndó təcú tnùní-ndó,

te ni ñá túú cuíní-ndó nàtuha ñaha-ndo xii-í cuèndá cada càhnu iní-í nchaa yíca cuéchi-ndo nàcuáa ío váha cuu iní-ndó cùndecu-ndo.

Duha ní xáha<sup>n</sup> Yá Ndiöxí xii ndí Chàíá ní chídó tnùní ndíi núú tütú-gá.

<sup>16</sup> Dico nchòhó chí ío váha táhú-ndó chí cùtnùní iní-ndó nchaa nàcuáa quide-í, te cùtnùní tucu iní-ndó nchaa nàcuáa ndúu tnúhu cáhá<sup>n</sup>-í.<sup>17</sup> Te na càchí tnúhu ndáá-í xii-ndo sã ío vãi cue téé ní xóo cáhá<sup>n</sup> tnúhu Yá Ndiöxí ndéé sanaha ndíhi nchaa dava-gá ññáyu váha iní-xi ní cuíní-yu cundehé-yu nchaa sá ndéhé-ndó vitna quide-í dico ñá túú ní xíní-yu, te ní cuíní tucú-yu cùndedóho-yu nchaa tnúhu ndèdóho-ndo vitna cáhá<sup>n</sup>-í te ñá túú ní xíndedóho-yu.

*Jesús cáhá<sup>n</sup>-gá nàcuáa quèe-xi cuèndá téé cuángacá<sup>n</sup> triú*

*(Mr. 4:13-20; Lc. 8:11-15)*

<sup>18</sup> Te vitna cùndedóho váha-ndo na càchí tnúhu-í xii-ndo nàcuáa quèe-xi cuèndú téé cuángacá<sup>n</sup> triú ní caní-í núú-ndó.<sup>19</sup> Te triú sá ní quene ndava ní ngava ndéé ichi, xián cúú-xí datná ññáyu ní xíndedóho tnúhu sá cáhá<sup>n</sup> nàcuáa ndíhu ndaha ñaha Yá Ndiöxí xii-yu, dico ñá túú ní cuíní-yu tní<sup>n</sup>-yu, chí sácuíhná cuáhá<sup>n</sup>-xi nàdatuhú-xi iní-yu cuèndá sá vá cànchícú<sup>n</sup> ni-hnú-yu nàcuáa cáhá<sup>n</sup> tnúhu-án.<sup>20</sup> Te triú sá ní ngava ññuhu yadi núú yíhí vîhi yúú-ã<sup>n</sup>, xián cúú-xí datná ññáyu ní xíndedóho tnúhu Yá Ndiöxí te díí iní ní tní<sup>n</sup>-yu tnúhu-gá,<sup>21</sup> dico òré ná nguíta ññáyu cúcuèhé ññã<sup>n</sup>-yu xií-yu àdi nándí-gá sá yãha-yu sá cuèndá tnúhu-gá, te ñá cùndèe iní-yu chí dàñá-yu tnúhu-gá cuèndá sá ñá túú nihí ndéé-yu.<sup>22</sup> Te triú sá ní ngava núú yúcu ndíquín tnu iñu-án, xián

cúu-xí dàtná ñáyiú ní tecú dóho-xi tnúhu Yá Ndiöxí dico cuèé cuèé ní nacuanaá-yu tnúhu-gá, chi cuendá mee-ni sã ío ñuyíú-a ñùhu iní-yu, ndihi cuendá sã ío sàni iní-yu cuu cuicá-yu, te mee-ni nchàa xíá<sup>n</sup> ñùhú iní-yu te ñá túú ñùhu iní-yu tnúhu sã ñí xíndedóho-yu-á<sup>n</sup> nàcuáa cada váha-yu cundecú-yu. <sup>23</sup> Dico triú sã ñí ngava núú ndécú ñùhu coco<sup>n</sup>-á<sup>n</sup>, xíá<sup>n</sup> cúu-xí dàtná ñáyiú ní xíndedóho tnúhu Yá Ndiöxí te quidé-yu nàcuáa càhá<sup>n</sup> tnúhu-gá. Te cada iní-ndó sã ñáyiú-á<sup>n</sup> cúu-yu dàtná triú sã ñí nguíhi yoco-xi ócú úxí triú-xi, ndihi triú sã ñí nguíhi yoco-xi únídico triú-xi, ndihi triú sã ñí nguíhi yoco-xi ì<sup>n</sup> ciendú triú-xi. Duca<sup>n</sup> sãtnahá-xi cúu-yu chi ío váha quidé-yu —càchí-gá xãha<sup>n</sup>-gã xii-güedé.

*Cuendá nchaa cùhú sã ñà túú vãha xñu xítí triú*

<sup>24</sup> Te Jèsús ní cani-gá ì<sup>n</sup> cuendú núú ñáyiú nàcuáa tecú tnùní-yu tnúhu-gá, te xãha<sup>n</sup>-gã xií-yu:

—Te vitna na càni-í ì<sup>n</sup> cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiú. Ì<sup>n</sup> téé ío váha triú ní sacá<sup>n</sup>-dé núú ñùhú-dé. <sup>25</sup> Dico xítí niú ní sáhá<sup>n</sup> ì<sup>n</sup> téé cùu úhú iní ñáhá xii-dé, te ní dǎngoyo-dé ndíquí<sup>n</sup> yúcú sã ñà túú vãha núú ñí sacá<sup>n</sup>-dé triú-á<sup>n</sup>. <sup>26</sup> Te òré vitna váha váha ní nguíta-xi quène yoco nchaa triú-á<sup>n</sup>, te ní xínu coyo nchaa yúcú sã ñà túú vãha-á<sup>n</sup>. <sup>27</sup> Te cue téé xínu cuechi núú téé ní sacá<sup>n</sup> triú-á<sup>n</sup> ñí xítñùhu ñàha-güedé xii-dé sã dúcá<sup>n</sup> ñí xínu cùhú sã ñà túú vãha-á<sup>n</sup> núú triú-dé, te xãha<sup>n</sup>-güedé: “Pàtróó<sup>n</sup>, ¿nása ní cuu núú ní xínu cùhú sã ñà túú vãha núú triú-n, te ío váha càa triú ní sacá<sup>n</sup>-n ní cùu?”, cachí-güedé xãha<sup>n</sup>-güedé. <sup>28</sup> Te téé cùu patróó<sup>n</sup>-güedé-á<sup>n</sup> ñí xãha<sup>n</sup>-dë xii-güedé: “Ì<sup>n</sup> téé cùu úhú iní ñáhá nàhi xii-í duca<sup>n</sup> ñí quide-dé ní sáhá<sup>n</sup>-dé ní dǎngoyo-dé ndíquí<sup>n</sup> cùhú sã ñà túú vãha-á<sup>n</sup> núú triú-í núu duca<sup>n</sup> ñí xínu coyo-xi”, càchí-dé xãha<sup>n</sup>-dë xii-güedé. Te cue téé xínu cuechi núú-dë ní xãha<sup>n</sup>-güedé xii-dé: “Te núu cuiní-n te quíhí<sup>n</sup>-ndí

tnuhu-ndí nchaa cùhú sã ñà túú vãha ní xínu núú triú-n”, càchí-güedé xãha<sup>n</sup>-güedé xii-dé. <sup>29</sup> Te téé cùu xítóhó triú-á<sup>n</sup> ñí xãha<sup>n</sup>-dë xii cue téé xínu cuechi núú-dë-á<sup>n</sup>: “Ñáhá, vá quíhí<sup>n</sup>-ndó tñuhu-ndo, chi òré tñuhu-ndo te tñahá-ni triú quene chi càa vihi cùhú-á<sup>n</sup>. <sup>30</sup> Vãha-gá chí dáñá ná cuíhñu nahi ndéé ná cùu triú, te dàtnùní nducu-í cue téé quíhí<sup>n</sup>-güedé tñuhu-güedé nchaa cùhú sã ñà túú vãha-á<sup>n</sup>, te dacùtu nuhní-güedé te cahmi-güedé, te dàtnùní nàquehdé-güedé triú nacani-güedé te nataxúha-güedé xítí yacá-í”, càchí-dé xãha<sup>n</sup>-dë xii-güedé — duha ní cani Jèsús cuendú núú-yu.

*Cuendá ndíquí<sup>n</sup> yutnu nàni mostázá (Mr. 4:30-32; Lc. 13:18-19)*

<sup>31</sup> Te Jèsús ní cani tucu-gá ingá cuendú núú ñáyiú nàcuáa tecú tnùní-yu tnúhu-gá, te xãha<sup>n</sup>-gã xií-yu:

—Na càni-í ì<sup>n</sup> cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiú. Ì<sup>n</sup> téé ní quehe<sup>n</sup>-dé ndíquí<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dé núú ñùhú-dé. <sup>32</sup> Te ndíquí<sup>n</sup> yutnu-á<sup>n</sup> ío chàhu, dico òré ná xñu-xi te sàhñu-gá-xi dàcúúxí nchaa cùhú, te cue quítí ndàva núú tàchí cadúha-güedé tacá-güedé núú dité-xi — càchí-gá xãha<sup>n</sup>-gã xií-yu.

*Nàcuáa quide levadurá (Lc. 13:20-21)*

<sup>33</sup> Te Jèsús ní xãha<sup>n</sup> tucu-gá xii ñáyiú: —Te na càchí tñuhu tucu-í xii-ndo nàcuáa cada-xi òré ndíhu ndaha ñàha Yá Ndiöxí xii ñáyiú. Ì<sup>n</sup> ñadíhí ní chíhi-a<sup>n</sup> levadurá úní arròbá yuchi triú, te levadurá-á<sup>n</sup> ñí quide-xi ní ndaa ñíhí yusa<sup>n</sup>-á<sup>n</sup> —càchí-gá xãha<sup>n</sup>-gã xií-yu.

*Mee-ni cuendú ní cani Jèsús núú ñáyiú*

*(Mr. 4:33-34)*

<sup>34</sup> Te mee-ni cuendú ní cani Jèsús núú ñáyiú ndi tñahá òré ní dánèhé ñáhá-gã xií-yu tnúhu-gá. <sup>35</sup> Te duca<sup>n</sup> ñí quide-gá chi ní quee ndáá-xi nàcuáa ní chídó tnùní ì<sup>n</sup> téé ní xóo

cáhá<sup>n</sup> tnúhu Yá Ndiöxí ndéé sanaha núú tütú-gá núú càchí-xi:

Mee-ni cuendú cani-í núú ñáyiú òré danèhé-í-yu tnúhu-í cuendá tecú tnùn-í-yu,

te nchaa tnúhu sá vátá yõo-gá cund-edóho danèhé-í-yu, te nchaa tnúhu-á<sup>n</sup> ndúú yùhu-xi ndéé cùtnàhá ní ngáva ñuyú.

Duha ní chídó tnùn-í té-á<sup>n</sup> núú tütú-gá.

*Jèsús càhá<sup>n</sup>-gá nàcuáa quèe-xi cuendá cùhú sã ñà túú vãha càa xití triú*

<sup>36</sup> Te Jèsús ní dándácá-gã ñáyiú te cuánuhú-gá vehe, te cue téé xica cuu ndih-í-gá ní xáha<sup>n</sup>-güedé xii-gá:

—Cachí tnúhu xii-ndí nása quèe-xi cuendá cùhú sã ñà túú vãha càa xití triú —càchí-güedé xáha<sup>n</sup>-güedé xii-gá.

<sup>37</sup> Te Jèsús ní xáha<sup>n</sup>-gã xii-güedé:

—Téé càchí-í ní sacá<sup>n</sup> triú cávãha-á<sup>n</sup> cúú yùhú Téé cùu ñaní tnáhá-ndó nchaa-ndo. <sup>38</sup> Te nchaa núú ñí sacá<sup>n</sup> té-á<sup>n</sup> triú cúú-xí ñuyú. Te tatá

váha-á<sup>n</sup> cúú-xí cuè ñáyiú yindaha ñaha Yá Ndiöxí. Te nchaa cùhú sã ñà túú vãha-á<sup>n</sup> cúú-xí ñáyiú yindaha ñaha sácúhná. <sup>39</sup> Te téé ní dǎngoyo ndíquí<sup>n</sup> cùhú sã ñà túú vãha núú triú-á<sup>n</sup> cúú-dé mee sácúhná. Te nduu nàtehndé-nã triú-á<sup>n</sup> cúú-xí ndúu ndih-í nihnu-ná nchaa sá íó ñuyú-a. Te nchaa ñáyiú nàquehndé triú-á<sup>n</sup> cúú-yu mee-ni cuè espíritú

xínú cuèchi núú Yá Ndiöxí. <sup>40</sup> Te dàtná cada cue téé quíhí<sup>n</sup> tnuhu nchaa cùhú sã ñà túú vãha-á<sup>n</sup> dacùtu nuhni-güedé te cahmi-güedé, duca<sup>n</sup> sãtnahá-xi yáha nchaa ñáyiú cùndih-í yucu ñávãha na sàá nduu. <sup>41</sup> Te yúhú Téé cùu ñaní tnáhá-ndó nchaa-ndo tendaha-í nchaa espíritú xínú cuèchi núú-í quíhí<sup>n</sup>-xi nadatácá-xi nchaa ñáyiú sãnu ichi cue tnaha ñáyiú-xi ichi cuèhé ichi duha, ndih-í nchaa dava-gá ñáyiú ñà túú quide váha, te nchaa ñáyiú-á<sup>n</sup> xindecú-yu nchaa núú ndécú cuè ñáyiú yindaha-í. <sup>42</sup> Te cue espíritú-á<sup>n</sup> daquíhí<sup>n</sup>-xi cue ñáyiú-á<sup>n</sup> núú ñùhú núú càyú, te yacá<sup>n</sup> ío ndáhyú-yu te dicó rúhñú-nã cuu núhu-yu sá sätú iní-yu sá ndóhõ-yu.

<sup>43</sup> Te nchaa ñáyiú quide nchaa nacúaa cuení Tãtä-yu Dútú Ndiöxí, ñáyiú-á<sup>n</sup> ío cunúú-yu cundecú-yu núú ndécú-gã táxi tnùn-í-gá, chí cuú-yu dàtná nchíanchii dayèhé-yu cundecú-yu núú ndécú-gã. Te nchaa nchòhó ñáyiú ndèdóho nchaa tnúhu càhá<sup>n</sup>-í-a, te ío váha chí cuãha cuendá —càchí-gã xáha<sup>n</sup>-gã xii-güedé.

*Cuendá ñ<sup>n</sup> sá ío ndèyáhu*

<sup>44</sup> Te Jèsús xáha<sup>n</sup> tucu-gá xii-güedé:

—Na càni tucu-í ingá cuendú núú-ndó nàcuáa tecú tnùn-í-ndó nàcuáa cada-xi òré ndíhu ndaha ñàha Yá Ndiöxí xii ñáyiú. ñ<sup>n</sup> téé ní naníhí-dé ñ<sup>n</sup> sá ío ndèyáhu yìndúxi ñ<sup>n</sup> xichi, te ní nachindúxi tucu-dé ñ<sup>n</sup> ní núú ñí naníhí-dé-á<sup>n</sup>, te ío ní cudí iní-dé sá dúcá<sup>n</sup> ñí naníhí-dé xíá<sup>n</sup>. Te ní xica-dé cuánuhú-dé te ní nadico-dé nchaa sá ndécú ndih-í-dé, te ní nacúaa<sup>n</sup>-dé ñuhu núú dúcá<sup>n</sup> ñí naníhí-dé xíá<sup>n</sup>.

*Cuendá ñ<sup>n</sup> sá ío ndèyáhu nàni pèrlá*

<sup>45</sup> Te na càni tucu-í ingá cuendú núú-ndó nàcuáa tecú tnùn-í-ndó nàcuáa cada-xi òré ndíhu ndaha ñàha Yá Ndiöxí xii ñáyiú. ñ<sup>n</sup> téé quide ndáhu ndúcú-dé sá nání pèrlá sá ío ndèyáhu. <sup>46</sup> Te ní naníhí-dé ñáyiú ndècu ndih-í ñ<sup>n</sup> pèrlá sá ío-gá ndèyáhu, te ní xica-dé cuánuhú-dé te ní nadico-dé nchaa sá ndécú ndih-í-dé, te ní sáhá<sup>n</sup>-dé ní saa<sup>n</sup>-dé pèrlá sá ío-gá ndèyáhu-á<sup>n</sup>.

*Cuendá ñunu tnè-güedé chácá*

<sup>47</sup> Te na càni tucu-í ingá cuendú núú-ndó nàcuáa tecú tnùn-í-ndó nàcuáa cada-xi òré ndíhu ndaha ñàha Yá Ndiöxí xii ñáyiú. Cue téé tnè chácá ñí dáquèe-güedé ñunu-güedé xití ndute làmár tnè-güedé chácá, te dàcá nuu dàcá nihnu chácá cuànguee-güedé xití ñunu-á<sup>n</sup>. <sup>48</sup> Te òré ní cutnùn-í iní-güedé sá ñí chítú ñunu-güedé, te ní natava-güedé ní nene yuhu làmár, te ní ngüita-güedé nácãxi-güedé nchaa chácá-ã<sup>n</sup>. Te nchaa chácá vãha dàquèe-güedé-di xití tidih-í, te nchaa chácá nèhé dǎngoyo-güedé-di. <sup>49</sup> Te dàtná ní quide cue té-á<sup>n</sup> duca<sup>n</sup> càda cue espíritú xínú cuèchi núú Yá Ndiöxí ná sàá nduu vã cùndècu-gá nchaa sá



ío ñuyú-a, chi cue espíritú-án daquèe dñ<sup>n</sup>-xi nchaa ñáyu ní quide váha tnuú nchaa ñáyu ñá túú ní quide váha. <sup>50</sup>Te nchaa ñáyu ñá túú ní quide váha-án daquihí<sup>n</sup> ñáhá-xí xii-yu núú ñùhú núú càyú, te yàcá<sup>n</sup> ío ndáhyú-yu, te dicó rúhñú-ná cuu núhu-yu sá sàtú iní-yu cuendá sá ndóhō-yu —càchí-gá xáha<sup>n</sup>-gá xii cue téé xica cuu ndihí-gá.

*Cuendá cue téé ndècu ndihí sá ñí quee túu díhna ndihí sá ñí quee túu saa*

<sup>51</sup> Te Jèsús ní xicá<sup>n</sup> tñuhú-gá núú-güedé, te xáha<sup>n</sup>-gá xii-güedé:

—¿Ní tecú tñuní-ndó nàcuáa ndùu nchaa tñuhu ní cáhá<sup>n</sup>-í-ã<sup>n</sup>? —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Ní tecú tñuní-ndí —càchí-güedé xáha<sup>n</sup>-güedé xii-gá.

<sup>52</sup> Te ní xáha<sup>n</sup> tucu Jèsús xii-güedé:

—Te núu ñ<sup>n</sup> téé dàcuaha ñaha xii ñáyu nchaa tñuhu ní chídó tñuní ndí Moisés ná cùnuni iní-dé nàcuáa quide Yá Ndióxi ndihu ndaha-gá ñáyu, te téé-án cúu-dě dàtná ñ<sup>n</sup> téé cùu xítohó vehe. Te téé cùu xítohó vehe-án ñí queñuhu-dé nchaa sá ñí quee túu díhna ndècu ndihí-dé, ndihí nchaa sá ñí quee túu saa. Te duca<sup>n</sup> sãtnahá-xi cùu téé-án te núu na cùnuni iní-dé nàcuáa quide Yá Ndióxi ndihu ndaha-gá ñáyu —càchí-gá xáha<sup>n</sup>-gá xii-güedé.

*Jèsús ndécú-gá ñuú núú ñí sañu-gá (Mr. 6:1-6; Lc. 4:16-30)*

<sup>53</sup> Te sátá ñí yáha duca<sup>n</sup> ñí caní Jèsús cuendú núú-güedé, te ní xica-gá cuánuhú-gá. <sup>54</sup> Te ní ndexìo-gá ñuú núú cúu ñuú-gá, te cuánguihu-gá xití veñuhu càa ñuú-án te ní ngüita-gá dánèhé-gá ñáyu. Te nchaa ñáyu ndedóho nchaa tñuhu càhá<sup>n</sup>-gá xicuñuhu-yu, te xitnàhá-yu:

—¿Náa ní cuu núu ío váha cùnuni iní téé-a nàcuáa cunduu tñuhu cáhá<sup>n</sup>-dé, te quide-dé nchaa sá vã yõo tñahí ndàcu cada-í? <sup>55</sup> Te dicó déhe téé cùu carpinterú ndihí tá Mária cúu-dé, te ñaní-dé cúu tã Jacobó, ndihí té Chèé, ndihí té Ximú, ndihí té Jüdás. <sup>56</sup> Te cue cúha-dé ndécú ndihí ñahá-yu xii-o

ñuú-a. ¿Te náa ní quide-dé núu ndéé dàcá<sup>n</sup> ío váha cùnuni iní-dé nàcuáa cunduu tñuhu cáhá<sup>n</sup>-dé-í? —càchí-yu xitnàhá-yu.

<sup>57</sup> Te ñá túú ní cuiní-yu cáhá<sup>n</sup> ndihí váha-yu Jèsús, dico mee-gã ní xáha<sup>n</sup>-gã xii-yu:

—Te núu ñ<sup>n</sup> téé càhá<sup>n</sup> tñuhu Yá Ndióxi ná nàsáá-dé ñuú-dé, te nchaa ñáyu ñuú-dé-án ndihí nchaa ñáyu cùu ndimee-dé ñá túú nèhé-yu sá yíñuhu núú-dě, dico cue ñáyu nchaa dáva-gã ñuú chi nèhé-yu sá yíñuhu núú-dě —càchí-gá xáha<sup>n</sup>-gã xii-yu.

<sup>58</sup> Te ñá túú ní quide Jèsús titní núú sã vã yõo tñahí ndàcu cada ñuú-án, chi ñá túú ní cuiní-yu quindáa iní ñáhã-yu xii-gá.

## 14

*Nàcuáa ní cuu ní xihí té Juáa tée dàcuandute ñaha xii ñáyu*

*(Mr. 6:14-29; Lc. 9:7-9)*

<sup>1</sup> Te diu-ni dàvá-án ñí níhí tã Hèrodés tñuhu nchaa nàcuáa quide Jèsús, te té Hèrodés-án cúu-dě téé tàxi tñuní distritú Galileá. <sup>2</sup> Te ní xáha<sup>n</sup>-dé xii nchaa cue téé ndècu ndihí-dé:

—Téé dii cuendú-xi ñihí-ó-án cùu-dé té Juáa téé dàcuandute ñaha xii ñáyu, téé ní xihí ní cùu te ní ndoto-dé núu dàcá<sup>n</sup> ndácú-dě quidé-dě nchaa sá vã yõo tñahí ndàcu cada —cachí-dé xáha<sup>n</sup>-dě xii-güedé.

<sup>3</sup> Te duca<sup>n</sup> ñí cáhá<sup>n</sup> té Hèrodés chi mee-dé ní táuchíú<sup>n</sup>-dë ní tñí ñaha-güedé xii té Juáa, te ní dácútú ñaha-güedé xii-dé, te ní chihi ñaha-güedé vecaá. Te duca<sup>n</sup> ñí quide té Hèrodés-án sã cuendá ñaha nani Herodiás, ñaha ní cándeca ñaní-dé té Lìpé, te ní naquehe<sup>n</sup> ñaha-dë xii-án ndèca ñaha-dé. <sup>4</sup> Te té Juáa ní xáha<sup>n</sup>-dë xii té Hèrodés:

—Ná túú ní quide váha-n dùha ní naquehe<sup>n</sup>-n ñaha ní cándeca ñaní-n —duha ní xáha<sup>n</sup> tã Juáa xii té Hèrodés.

<sup>5</sup> Te sá dúcá<sup>n</sup> ñí xáha<sup>n</sup> tã Juáa-án xii té Hèrodés, te ní cuiní té Hèrodés-án cahni-dé té Juáa-án, dico ñá túú ní cùyi-dé chi ní yùhú-dé núu cue ñáyu, chi ncháa-yu ní cutnuni iní-yu sá tã Juáa cúu-dě ñ<sup>n</sup> téé càhá<sup>n</sup> tñuhu

Yá Ndiöxí. <sup>6</sup> Te ñ<sup>n</sup> nduu ní quide té Hèrodés vico vehe-dé ní quide càhnu-dé nduu nǐ cacu-dé. Te ndècu ñ<sup>n</sup> déhe yoco ñàha nani Herodiás-á<sup>n</sup>, te xíchí-ǎ<sup>n</sup> nǐ quíhu-xi xití vehe núú cúú víco-á<sup>n</sup> nǐ xita saha-xi. Te núcóo té Hèrodés ndihí cue téé ní cáhá<sup>n</sup>-dé ndéhe-güedé, te ío ní cudíí ìní-dé nàcuáa ní xita xíchí-ǎ<sup>n</sup>. <sup>7</sup> Te té Hèrodés-á<sup>n</sup> nǐ cacunehe-dé ndéé Yá Ndiöxí nàcuáa cutnùní ìní xíchí-ǎ<sup>n</sup> sǎ ndàa cuañaha-dé nǔu ná cúú sǎ ná càcá<sup>n</sup>-xi núú-dé. <sup>8</sup> Te xíchí-ǎ<sup>n</sup> nǐ dácáhu ìní ñáhá náná-xi xii-xi ná cúú sǎ càcá<sup>n</sup>-xi núú té Hèrodés, núú xiǎ<sup>n</sup> ní xáha<sup>n</sup>-xi xii-dé:

—Cuñí-í quehndé-n díquí tē Juàá téé dàcuandute ñaha xii ñáyiú te taxi-n, dico na cùhu<sup>n</sup> ñ<sup>n</sup> xití cóhó taxi-n —càchí-xi xáha<sup>n</sup>-xi xii-dé.

<sup>9</sup> Te sá dúcá<sup>n</sup> nǐ xáha<sup>n</sup>-xi, te ní cundiyí té Hèrodés, dico ñá túú ní nǐhí-dé nása cada-dé, chi ndédóho ñáyiú òré ní cacunehe-dé Yá Ndiöxí sá ndàa cuañaha-dé ñ<sup>n</sup> sá ná càcá<sup>n</sup>-xi núú-dé. Te ní quide-dé nàcuáa ní xáha<sup>n</sup>-xi. <sup>10</sup> Chi ní táuchíú<sup>n</sup>-dé ní sáhá<sup>n</sup> cue téé ní xehndé-güedé díquí tē Juàá òré yíhí-dé vecaá. <sup>11</sup> Te ní chihí-güedé díquí-dé ñ<sup>n</sup> xití cóhó te nèhe-güedé cuánuhú ní sáñaha-güedé xii xíchí-ǎ<sup>n</sup>, te xíchí-ǎ<sup>n</sup> nǐ nacuañaha-xi xii náná-xi.

<sup>12</sup> Te cue téé xica cuu ndihí té Juàá-á<sup>n</sup> nǐ sáhá<sup>n</sup>-güedé ní naquehe<sup>n</sup>-güedé yiqui cùñú-dé ní chindúxi-güedé, te dātnùní ní sáhá<sup>n</sup>-güedé ní xáha<sup>n</sup>-güedé xii Jèsús nàcuáa ní cuu.

*Jèsús dácaxi-gá úhú<sup>n</sup> mǐl cue téé te dñ<sup>n</sup> ñáyiú dñí ndihí landú*

(Mr. 6:30-44; Lc. 9:10-17; Jn. 6:1-14)

<sup>13</sup> Te Jèsús ní nǐhí-gǎ tnúhu nàcuáa ní cuu ní xihí té Juàá. Te sáta xiǎ<sup>n</sup> te cuánguee-gá ñ<sup>n</sup> bàrcú cuáhá<sup>n</sup>-gá ñ<sup>n</sup> xichi núú ñá túú ñáyiú ndècu, dico nchaa ñáyiú xíndecu nchaa ñuú cáá yàtni xiá<sup>n</sup> nǐ nǐhí-yu tnúhu sá cuáhá<sup>n</sup>-gá, te ní queé-yu ñuú-yu xica sahá-yu cuáhá<sup>n</sup> núú quidé-yu cuèndá quexìo Jèsús. <sup>14</sup> Te òré ní quexìo Jèsús núú cuáhá<sup>n</sup>-gá, te ní quene-gá bàrcú, te ní xiní-gá cuéhé víhí ñáyiú

xixúcu-yu xiá<sup>n</sup>, te ní cundàhú ìní ñáhá-gǎ xii-yu, te ní quide tátna-gá nchaa ñáyiú cùhú ndihí-yu. <sup>15</sup> Te sáta nǐ cuaa te ní sáhá<sup>n</sup> cue téé xica cuu ndihí Jèsús núú-gǎ, te xáha<sup>n</sup>-güedé xii-gá:

—Sa ní cuu dandàca-n nchaa ñáyiú-a chi sa ní cuaa, te na quíhí<sup>n</sup>-yu nchaa ñuú cáá yàtni iha cuaa<sup>n</sup>-yu sá cáxi-yu, chi núú ndécú-ó iha ñá túú tnàhí ná ío —càchí-güedé xáha<sup>n</sup>-güedé xii-gá.

<sup>16</sup> Te Jèsús ní xáha<sup>n</sup>-gǎ xii-güedé:

—Ñáhá, vá dandàca-í-yu, váha-gá mee-ndo chí cuañaha sǎ ná càxí-yu —càchí-gá xáha<sup>n</sup>-gǎ xii-güedé.

<sup>17</sup> Te ní xáha<sup>n</sup>-güedé xii-gá:

—Ñá túú nǎgá ndécú ndihí-ndí, chi úhú<sup>n</sup> duha-ná pàá ndihí úú-nǎ chácá ndécú ndihí-ndí —càchi-güedé xáha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gǎ xii-güedé:

—Chí cánèhe paá-á<sup>n</sup> ndihí chácá-á<sup>n</sup> táquixi iha —cachí-gá xáha<sup>n</sup>-gǎ xii-güedé.

<sup>19</sup> Te Jèsús ní xáha<sup>n</sup>-gǎ xii nchaa

ñáyiú sá ná ngõo-yu ncháa-yu núú ìté cuí càa xiá<sup>n</sup>, te ní quehe<sup>n</sup>-gá ndí ùhú<sup>n</sup> pàá-á<sup>n</sup> ndihí ndí ndúú chácá-á<sup>n</sup> te ní ndacoto-gá andíu, te ní ndacá<sup>n</sup> táhú-gǎ núú Yá Ndiöxí, te dātnùní ní táhú cuèchi-gá pàá-á<sup>n</sup> te ní sáñaha-gǎ xii cue téé xica cuu ndihí-gá ní dácāhñu-güedé cue ñáyiú ní xexí-yu.

<sup>20</sup> Te ncháa-yu ní xexí-yu ní ndahá xití-yu. Te sáta nǐ túhú cóhó-yu te ní nadatàcá-güedé nchaa sá nǐ quendóo, te ní chítú ùxúú tnàhá tídihi mee-ni sǎ nǐ quendóo. <sup>21</sup> Te nchaa ñáyiú ní xexi-á<sup>n</sup> nǐ xínu úhú<sup>n</sup> mǐl mee-ni cuè téé chi mee-ni cuè téé-á<sup>n</sup> nǐ quíundehu, te dñ<sup>n</sup> cue ñáyiú dñí ndihí cue landú.

*Jèsús xicá-gǎ núú ndute*

(Mr. 6:45-52; Jn. 6:16-21)

<sup>22</sup> Te òré-ni-á<sup>n</sup> nǐ xáha<sup>n</sup> Jèsús xii cue téé xica cuu ndihí-gá sá quèe-güedé bàrcú téhndé-güedé ndàa ìngá xio yuhu làgúná, te mee-gǎ quendóo-gá cada ndee ìní tnàhá-gǎ ndihí cue ñáyiú. <sup>23</sup> Te sáta nǐ yáha ní quide

ndee iní tnáhá-gă ndihi cue ñáyi, te medli-gá ní xica-gá cuásaá-gá ñ<sup>n</sup> tĩndúú cáá yàtni xía<sup>n</sup> cuendá cáhá<sup>n</sup> ndihi-gá Yá Ndiöxí, te ñu-ni medli-gá ndécú xía<sup>n</sup> ñi cundi<sup>n</sup>. <sup>24</sup> Te bàrcú sá ñúhú cuè téé xica cuu ndihi-gá-á<sup>n</sup> sa cuáhá<sup>n</sup>-xi ndéé cuádava xití làgúná-á<sup>n</sup>, te níhi vñhi quene táchí ndàa ichi cuáhá<sup>n</sup>-xi, te dàcandau ndeé-xi ndute nchaa ññi-xi. <sup>25</sup> Te tàcuñhdá váhi-gá tá xica Jesús núú ndute cuáhá<sup>n</sup> tá cùyatni-gá bàrcú-á<sup>n</sup>. <sup>26</sup> Te cue téé xica cuu ndihi-gá ní xini ñáhá-güedé xii-gá tá xica-gá núú ndute cuáhá<sup>n</sup>, te ní yùhú-güedé te níhi ní cáhá<sup>n</sup>-güedé te xĩtnàha-güedé:

—ñ<sup>n</sup> àlmá! —càchí-güedé xĩtnàha-güedé.

<sup>27</sup> Te Jesús ní cáhá<sup>n</sup>-gá, te xàha<sup>n</sup>-gă xii-güedé:

—Ñí cunduu-ndo vă yùhú-ndó, chi yùhú cúu-í —càchí-gá xàha<sup>n</sup>-gă xii-güedé.

<sup>28</sup> Te té Pèlú ní xàha<sup>n</sup>-dē xii-gá:

—Mèstrú, te núú ñu-n te tauchìu<sup>n</sup> sá tnàhá-í ná càca-í núú ndute quixi tnàhá ñáhà-í xii-n —càchí-dé xàha<sup>n</sup>-dē xii-gá.

<sup>29</sup> Te Jesús ní xàha<sup>n</sup>-gă xii-dé:

—Taquixi —cachí-gá xàha<sup>n</sup>-gă xii-dé.

Te té Pèlú ní nuu-dé núú bàrcú, te ní ngüita-dé tá xica-dé núú ndute cuáhá<sup>n</sup> cuátnahá ñáhá-dē xii-gá. <sup>30</sup> Te ní cutnùnini-í-dé sá ño níhi xico táchí, te ní ngüita-dé yùhú-dé. Te òré-ni-á<sup>n</sup> tá quēe naa-dé xití ndute cuáhá<sup>n</sup> ní cùu, te níhi ní cáhá<sup>n</sup>-dé xàha<sup>n</sup>-dē xii Jesús:

—ñ Mèstrú, vá dáñá-n quēe naa-í xití ndute! —càchí-dé xàha<sup>n</sup>-dē xii-gá.

<sup>31</sup> Te òré-ni-á<sup>n</sup> ñi tñi Jesús ndaha-dé, te ní xàha<sup>n</sup>-gă xii-dé:

—ñ Ná cuendá ñá túú sàndáá ndisa iní ñáhá-n xii-í sàñi ñ<sup>n</sup> sani úú iní-n-í? —càchí-gá xàha<sup>n</sup>-gă xii-dé.

<sup>32</sup> Te òré cuánguee Jesús ndihi té Pèlú xití bàrcú, te òré-ni-á<sup>n</sup> ñi ngüíñi táchí. <sup>33</sup> Te cue téé ñùhu xití bàrcú-á<sup>n</sup> ñi ngüíñi xití-güedé núú-gă, te xàha<sup>n</sup>-güedé xii-gá:

—Sá ndàá sá cuítí sã díú yòhó cúu-n Dēhe Dútú Ndiöxí —càchí-güedé xàha<sup>n</sup>-güedé xii-gá.

*Jesús quidé tãtna-gá ñáyi cùhú ñ<sup>n</sup> xichi núú nání Gènesarét (Mr. 6:53-56)*

<sup>34</sup> Te ní quexìo Jesús ndihi cue téé xica cuu ndihi-gá ndàa ingá xio yuhu làgúná, te núú ñi quexìo-gá ndihi-güedé-á<sup>n</sup> nání-xi Gènesarét. <sup>35</sup> Te nchaa ñáyi xĩndecu xía<sup>n</sup> ñi cutnùnini-í-yu sá díú-gă ní quexìo, te ní dátécú tnùhu-yu nchaa dava-gá ñáyi xĩndecu yatni xía<sup>n</sup> sã ñi quexìo-gá. Te ndécá-yu nchaa ñáyi cùhú ndécú ndihí-yu cuáhá<sup>n</sup> núú ndécú Jesús. <sup>36</sup> Te nchaa ñáyi cùhú-á<sup>n</sup> ñi ngüita-yu càhá<sup>n</sup> ndàhú-yu núú Jesús sá ná dàña-gá tnàndeé-yu cuèdicó luha yuhu dõó-gă cuendá ndúha-yu, te cue ñáyi cùhú, ñáyi ní tnàndeé yuhu dõó-gă ní ndúha-yu.

## 15

*Cuendá nchaa sá quidé-xi ngündecu cuéchi ñáyi*

*(Mr. 7:1-23)*

<sup>1</sup> Te sáta dúcá<sup>n</sup> te ñ<sup>n</sup> úú cue téé cùu fariséu ní quee-güedé ñuú Jerusalén, ndihi cue téé dàcuaha ñaha xii ñáyi nchaa tnùhu ní chídó tnùnini ndi Moisés ní quexìo-güedé núú ndécú Jesús, te xàha<sup>n</sup>-güedé xii-gá:

<sup>2</sup> —ñ Ná cuendá cue téé xica cuu ndihi-n ñá túú nàquete-güedé ndaha-güedé òré caxi-güedé nàcuáa ní cachí cue ñani tnàhá-ó ñi xĩndecu ndéé sanaha-í? —càchí-güedé xàha<sup>n</sup>-güedé xii-gá.

<sup>3</sup> Te Jesús ní xàha<sup>n</sup>-gă xii-güedé:

—Te nchòhó tucu, ñá cuendá ñá túú quide-ndo nacuáa ní cachí Yá Ndiöxí cada-ndo, núú da nàcuáa ta quide cue téé ñuyíú-a quide-ndo-í?

<sup>4</sup> Te Yá Ndiöxí càchí-gá núú tütú-gá: “Canehe-ndo sã yíñùhu núú tãtá-ndó ndihi núú nãná-ndó”, càchí-gá. Te càchí tucu-gá ingá xichi núú tütú-gá: “Nchaa ñáyi na càhá<sup>n</sup> úhú tãtá-xi àdi náná-xi te cahni ñaha-güedé xií-yu”, duha càchí-gá núú tütú-gá.

5 Dico nchòhó cächí-ndó sã cuè ñáyiú chi cuu cúñahá-yu xii tãtä-yu àdi nánã-yu: “Vá cúú chindee ñaha-ndí xii-n, chi sá táxí-ndí xii-n ni cùu, xíã<sup>n</sup> ní nduu cuendá Yã Ndiõxí”, cuu duha cúñaha ñáyiú xii tãtä-yu àdi nánã-yu cächí-ndó. 6 Te cächí-ndó sã cuè ñáyiú duca<sup>n</sup> na cúñaha xii tãtä-xi àdi nánã-xi te ñá túú-gã tàú-yu chindéé-yu ni tãtä-yu ni nánã-yu. Te duca<sup>n</sup> quide-ndo chi ní dáquée tihú-ndó nàcuáa ní cachí Yã Ndiõxí cada-ndo, te mee-ni nàcuáa ta quide cue téé ñuyíú-a véxi nchicú<sup>n</sup> nihnu-ndo quide-ndo. 7 ;Te nchòhó cúú-ndó ñáyiú ío dándahú méé-xí, chi cächí-ndó sã quidé ndáá-ndó te ñá ndáá sá quidé ndáá-ndó! Te ní quee ndáá-xi nàcuáa ní chídó tnùní ndíi Chàiaá téé ní xóo cáhá<sup>n</sup> tnúhu Yã Ndiõxí ndéé sanaha núú tütú-gã núú cáhá<sup>n</sup>-xi nàcuáa ní cáhá<sup>n</sup>-gã cuendá-ndó, te duha ní cachí-gã:

8 Ñáyiú-a cächí-yu sá ío càhnu cuu-í dico dícó-ni yuhu càhá<sup>n</sup>-yu, chi duu<sup>n</sup> duu<sup>n</sup> ñá túú ñùhu iní ñáhã-yu xii-í.

9 Te àú<sup>n</sup> ñã cuu chĩñuhu ñahá-yu xii-í chi ñá túú vèdana ndéé nándĩhi-xi, chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá ñi cahu iní cue ñáyiú ñuyíú-a càhá<sup>n</sup>-yu.

Duha ní chídó tnùní ndíi Chàiaá núú tütú Yã Ndiõxí nàcuáa ní cáhá<sup>n</sup>-gã cuendá-ndó —cächí-gã xãha<sup>n</sup>-gã xii-güedé.

10 Te ní xáha<sup>n</sup>-gã xii cue ñáyiú:

—Chí táquixi ndehe iha, te cund-edóho váha-ndo tnúhu na càhá<sup>n</sup>-í, te ío váha cuáha-ndo cuendá. 11 Nchaa sá xéxi-ndó chi ñá túú ñã quidé-xí iní-ndó, dico nchaa sá cuéhé sá dúhá sàni iní-ndó càhá<sup>n</sup>-ndó nchàa xíã<sup>n</sup> quidé-xí ndècu cuéchi-ndo —cächí-gã xãha<sup>n</sup>-gã xii-yu.

12 Te cue téé xica cuu ndihí-gã ní sáhã<sup>n</sup>-güedé ndéé núú-gã, te xãha<sup>n</sup>-güedé xii-gã:

—Véxi-ndí cächí tnúhu-ndí xii-n sã cuè téé cùu fariséú ñá túú cùu váha

iní-güedé cuendá tnúhu ní cáhá<sup>n</sup>-n —cächí-güedé xãha<sup>n</sup>-güedé xii-gã.

13 Te ní xáha<sup>n</sup>-gã xii-güedé:

—Nchaa ñáyiú ñá túú cùu cuendá Tãtä-í Dútú Ndiõxí cuíta nihnú-yu, chi ñáyiú-á<sup>n</sup> cúú-yu dàtná nchaa cùhú sã ñá túú nándĩhi te tnúhu ñáyiú. 14 Te vá cádá cuendá-ndó nàcuáa cáhá<sup>n</sup> cue téé-á<sup>n</sup>, chi cùu-güedé dàtná cue ñáyiú cuáá sácuíta nehe tnàha. Te nchòhó xini-ndó sã núú ñã ñáyiú cuáá ná cuíta nèhe tucú-yu ingá ñáyiú cuáá, te ndi ndúú-yu quée-yu déhvã —cächí-gã xãha<sup>n</sup>-gã xii-güedé.

15 Te té Pèlú ní xáha<sup>n</sup>-dè xii-gã:

—Cachí tnúhu xii-ndí nàcuáa quée-xi tnúhu ní cáhá<sup>n</sup>-n-ã<sup>n</sup> —cächí-dé xãha<sup>n</sup>-dè xii-gã.

16 Te Jèsús ní xáha<sup>n</sup>-gã:

—¿Náa tnàhá nchòhó ñá túú ní tècú tnùní-ndó nàcuáa ndùu tnúhu ní cáhá<sup>n</sup>-í núú ñáyiú-ã<sup>n</sup> ñã? 17 Nchaa sá xéxi-yu cuánguee-xi xití-yu, te dàtnùní náyãha ñaha-xi xii-yu. 18 Dico nchaa tnúhu cuéhé tnúhu duha càhá<sup>n</sup>-yu xíã<sup>n</sup> véxi quene-xi iní-yu, te ñi nchaa xíã<sup>n</sup> quidé-xí ndècu cuéchi-yu. 19 Te iní-yu-á<sup>n</sup> cácu ñihnu nchaa sá cuéhé sá dúhá, chi sàni cuéhé sání dùha iní-yu, te sàhni-yu tnàha ñáyiú-yu, te cue téé càhá<sup>n</sup> ndihí-güedé ñáyiú dñí te ñá díú ñàdñí-güedé cúú-yu. Te ñi-ni duca<sup>n</sup> quide cue ñáyiú dñí càhá<sup>n</sup> ndihí-yu cue téé te ñá díú yñ-yu cùu-güedé, te cuèi téé te cuèi ñadñí mee-ni ìchi díí iní cúdí iní-yu cundecú-yu, te dùhu ndachiu<sup>n</sup> tnahá-yu, te dàcuandehndé-yu, te càhá<sup>n</sup> cuéhé-yu cuendá tnàha ñáyiú-yu. 20 Te nchaa xíã<sup>n</sup> quidé-xí ndècu cuéchi-yu, dico ñá díú sã ñá túú ndàhá-yu dàtná ní cachí cue téé ndéé sanaha, chi xíã<sup>n</sup> ñá túú quide-xi cuendá ngündecu cuéchi-yu —cächí-gã xãha<sup>n</sup>-gã xii-güedé.

*Ñã ñadñí ñaha cùu ñani tnàhá ñáyiú canànéa ní sándáa iní-a<sup>n</sup> Jèsús*

(Mr. 7:24-30)

21 Te Jèsús ní xica-gã cuáhã<sup>n</sup>-gã ní sáa-gã yucu cue téé ñuú Tírú, ndihí yucu cue téé ñuú Sídón. 22 Te ñã ñadñí



ñaha cùu ñaní tnáhá ñáyiú canànea ndécú yàtni-a<sup>n</sup> xíá<sup>n</sup>, te níhi ta càhá<sup>n</sup>-a<sup>n</sup> ní quexìo núú ndécú Jèsús, te xáha<sup>n</sup>-a<sup>n</sup> xii-gá:

—¡Mèstrú, ñaní tnáhá ndíi Dàvíi, cundàhú iní ñáhá xii-í cada tátna-n dèhe yoco-í! Chi yíhi ñaha espíritú cúndíhi yucu ñávãha xii-xi te ío dândoho ñaha-xi —cachí-a<sup>n</sup> xáha<sup>n</sup> xii-gá.

<sup>23</sup> Dico Jèsús ñá túú tnàhí ni càhá<sup>n</sup>-gá, te cue tée xica cuu ndíhi-gá ní sáhá<sup>n</sup>-güedé núú-gã, te xáha<sup>n</sup>-güedé xii-gá:

—Cúñaha xii ñaha-á<sup>n</sup> ná nùhú-a<sup>n</sup>, chi ío níhi càhá<sup>n</sup>-a<sup>n</sup> nchìcú<sup>n</sup> ñáhá-á<sup>n</sup> xii-o —cachí-güedé xáha<sup>n</sup>-güedé xii-gá.

<sup>24</sup> Te Jèsús ní xáha<sup>n</sup>-gã xii-güedé:

—Yá Ndiõxí ní tendaha ñaha-gá xii-í véxi-í mee-ni ñúú núú xíndecu cue ñáyiú isràél, chi ñáyiú-á<sup>n</sup> cúu-yu dàtná cue mbèé cue quití ní xíta, chi ta xíta nihnú-yu cuáhá<sup>n</sup> —càchí-gá xáha<sup>n</sup>-gã xii-güedé.

<sup>25</sup> Te ñadìhí-á<sup>n</sup> ní sáhá<sup>n</sup>-a<sup>n</sup> ndéé núú Jèsús ní ngüíñí xítí-á<sup>n</sup>, te xáha<sup>n</sup>-a<sup>n</sup> xii-gá:

—¡Mèstrú, chindee ñaha xii-í! —càchí-a<sup>n</sup> xáha<sup>n</sup>-a<sup>n</sup> xii-gá.

<sup>26</sup> Te Jèsús ní xáha<sup>n</sup>-gã xii-a<sup>n</sup>:

—Vá cúú chindee-í cue ñáyiú ñá túú cùu ñáyiú isràél, chi ñí-ni cùu-xi núu na quèhe<sup>n</sup>-o paá cúú cuendá cue landú te cuáha-o iná caxi-di —càchí-gá xáha<sup>n</sup>-gã xii-a<sup>n</sup>.

<sup>27</sup> Dico ñaha-á<sup>n</sup> ní xáha<sup>n</sup>-a<sup>n</sup> xii-gá:

—Ndáá càhá<sup>n</sup>-n, dico cue iná chi nàdatacá-güedi sá ngóyó yùhu cóhó xítóhó-güedi —càchí-a<sup>n</sup> xáha<sup>n</sup>-a<sup>n</sup> xii-gá.

<sup>28</sup> Te Jèsús ní xáha<sup>n</sup>-gã xii-a<sup>n</sup>:

—¡Yòhó ñaha cùhú déhe-xi, ío váha sàndáá iní ñáhá-n xii-í! Te na càda-í nàcuáa cùnín-n —càchí-gá xáha<sup>n</sup>-gã xii-a<sup>n</sup>.

Te òré-ni-á<sup>n</sup> ní ndúha déhe-a<sup>n</sup>.

*Jèsús quidé tátna-gá vài ñáyiú cùhú*

<sup>29</sup> Te sátá dúcá<sup>n</sup> ní cuu te Jèsús ní xica-gá cuáhá<sup>n</sup>-gá ní yáha-gá yuhu làgúná distritú Galileá, te cuásaá-gá ñí tindúú te xíá<sup>n</sup> ní ngóo-gá. <sup>30</sup> Te xíá<sup>n</sup> núcõo-gá ní quexìo cuéhé víhí ñáyiú, te ndécá-yu ñáyiú yacua, ndíhi

ñáyiú ní yíchí ñí xio ndaha-xi, ndíhi ñáyiú cuáá, ndíhi ñáyiú ñíhí, te vài dava-gá cue ñáyiú cùhú tnàhá dava-gá núú cuéhé ndécá-yu ní quexìo núú ndécú-gã. Te ní taxi ndecu ñáhá-yu núú Jèsús te ní quide tátna ñaha-gã xii-yu te ní ndúha-yu.

<sup>31</sup> Te nchaa ñáyiú xíndecu-á<sup>n</sup> ío ní cuñúhu-yu sá dúcá<sup>n</sup> ní xini-yu ní cuu ní nacáhá<sup>n</sup> nchaa ñáyiú ñíhí, ndíhi cuendá sá ní ndúha nchaa cue ñáyiú yacua, ndíhi cuendá sá ní ndúha cue ñáyiú ní yíchí ñí xio ndaha-xi, ndíhi cuendá sá ní ndúha núú cué ñáyiú cuáá. Te ncháa-yu ní cachí-yu sá ío càhnu cuu Yá Ndiõxí Yáa cúú Ndiõxí cue ñáyiú isràél.

*Jèsús dácàxi-gá cúmí mĩl cue tée te dñí ñáyiú dñí ndíhi landú*  
(Mr. 8:1-10)

<sup>32</sup> Te Jèsús ní cana-gá cue tée xica cuu ndíhi-gá, te ní xáha<sup>n</sup>-gã xii-güedé:

—Yúhú cúndàhú iní-í nchaa ñáyiú-a, chi sa ní cuu úní nduu ndècu ndíhi ñáhá-yu xii-o ìha, te ñá túú tnàhí-gá sá cáxi-yu, te ñá túú cùnín-í natendaha-í-yu núhú tnámã-yu vehé-yu, chi ná ndèé cuáhá<sup>n</sup> cuneé-yu docó ichi —càchí-gá xáha<sup>n</sup>-gã xii-güedé.

<sup>33</sup> Te ní xáha<sup>n</sup>-güedé xii-gá:

—¿Te ndèé níhí-ó sã cuãñaha-o càxi nchaa ñáyiú-a, te ío cuéhé-yu te ñá túú nã ío ìha chi cùu-xi xítí yucu-í? —càchí-güedé xáha<sup>n</sup>-güedé xii-gá.

<sup>34</sup> Te Jèsús ní xícá<sup>n</sup> tnúhú-gã núú-güedé, te xáha<sup>n</sup>-gã:

—¿Ná daha-gá paá ndécú ndíhi-ndo-í? —cachí-gá xáha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Ndècu ndíhi-ndí úsá-gá tnàhá paá ndíhi ñí úú-gá chácá —càchí-güedé xáha<sup>n</sup>-güedé xii-gá.

<sup>35</sup> Te Jèsús ní xáha<sup>n</sup>-gã xii nchaa ñáyiú sá ná ngõo-yu ncháa-yu, te ní ngóo-yu. <sup>36</sup> Te ní quehe<sup>n</sup>-gá ndí úsá paá-á<sup>n</sup> ndí ñí úú-gá chácá-ã<sup>n</sup>, te ní ndacá<sup>n</sup> táhú-gã núú Yá Ndiõxí, te dàtnúní ní táhú cuèchi-gá paá-á<sup>n</sup> ndíhi chácá-ã<sup>n</sup> te ní sãñaha-gã xii cue tée

xica cuu ndihi-gá ní dácãhñu-güedé nchaa ñáyiú-án. <sup>37</sup> Te nchaá-yu ní xexi-yu ní ndahá xití-yu. Te sátá ní túhú cóhó-yu te ní nadatácá-güedé nchaa sá ní quendóo, te ní chítú úsá tnàhá tídihi mee-ni sã ní quendóo-án. <sup>38</sup> Te núú ncháá ñáyiú ní xexi te ní xínu cúmí mĩ mee-ni cuè téé chi ñu-ni cue téé-án ní quiúndehu, te ñu<sup>n</sup> cue ñáyiú ñíhi ndihi cue landú. <sup>39</sup> Te sátá dúcá<sup>n</sup> te Jèsús ní dándácá ñàha-gá xii-yu, te cuánguee-gá bàrcú cuáhá<sup>n</sup>-gá yucu cue téé ñuú Màgdalá.

## 16

*Cue téé cùu fariséú ndihi cue téé cùu saducéú xãha<sup>n</sup>-güedé xii Jèsús cada-gá ñ<sup>n</sup> sá vã yõo tnàhí ndàcu cada*  
(Mr. 8:11-13; Lc. 12:54-56)

<sup>1</sup> Te cue téé cùu fariséú ndihi cue téé cùu saducéú ní sáá-güedé núú ndécú Jèsús xitó ndèé ñáhá-güedé xii-gá, te xãha<sup>n</sup>-güedé sá ná cáda-gã ñ<sup>n</sup> sá vã yõo tnàhí ndàcu cada cundehe-güedé nàcuáa cutnùní iní-güedé núú ndáá sá Yã Ndiõxí ní tendaha ñàha-gá xii-gá véxi-gá ñuyúú-a. <sup>2</sup> Te Jèsús ní xãha<sup>n</sup>-gã xii-güedé:

—Nchòhó chi òré tá cuàa cuáhá<sup>n</sup> te ndàcoto-ndo andiú, te càchí-ndó: “Ío váha cada-xi tneé chi càa vícò tícuèhé andiú”, duha càchí-ndó. <sup>3</sup> Te òré dátneé ndàcòto tucu-ndo andiú, te càchí-ndó: “Vã cáda váha-xi nduu vitna chi tícuèhé andiú, te càa vícò”, duha càchí-ndó. ¡Dico nchòhó cúú-ndó ñáyiú ío dándahú méé-xí sã quidé ndáá te ñá ndáá sá quidé ndáá-ndó! Te cutnùní iní-ndó nàcuáa quide-xi andiú, dico ñá túú cutnùní iní-ndó nàcuáa quèe-xi nchaa sá quidé Yã Ndiõxí vitna. <sup>4</sup> Dico nchaa nchòhó ñáyiú ndècu ñuyúú vitna ío cuihna iní-ndó, te ñá túú cuiní-ndó càda ndáá-ndó núú Yã Ndiõxí, te cuiní-ndó càda-í ñ<sup>n</sup> sá vã yõo tnàhí ndàcu cada dico ñá túú nãgá cada-í, chi ñu-ni nàcuáa ní quide Yã Ndiõxí ndíi Jónás ñu-ni duca<sup>n</sup> càda tucu-gá vitna —càchí-gá xãha<sup>n</sup>-gã xii-güedé.

Te duca<sup>n</sup> te ní xica-gá cuáhá<sup>n</sup>-gá ndihi cue téé xica cuu ndihi-gá.

*Cuendá cue téé cùu fariséú ndihi cuendá cue téé cùu saducéú*  
(Mr. 8:14-21)

<sup>5</sup> Te òré ní quexio ndihi ñàha-gá xii-güedé ndàa ingá xio yuhu làgúná, te ní ndacu iní-güedé sá ní cunaa-güedé canehe-güedé pàá quihí<sup>n</sup> caxi-güedé. <sup>6</sup> Te Jèsús ní cáhá<sup>n</sup>-gá dóho-güedé, te xãha<sup>n</sup>-gã xii-güedé:

—Na càchí tnúhu-í xii-ndo sã ño quihi iní-ndó cundecu-ndo, te vá cáda cuendá tnàhí-ndo lèvadurá cue téé cùu fariséú ndihi cue téé cùu saducéú —càchí-gá xãha<sup>n</sup>-gã xii-güedé.

<sup>7</sup> Te ní ngüíta-güedé xitnàha-güedé:

—Cuendá sá ñà túú ní cãnehe-o pàá quixi xiã<sup>n</sup> duha càhá<sup>n</sup>-gá —càchí-güedé xitnàha-güedé.

<sup>8</sup> Te Jèsús ní cutnùní iní-gá nàcuáa nduu tnúhu xitnàha-güedé, núú ní xãha<sup>n</sup>-gã xii-güedé:

—Nchòhó chi ñá túú sàndáá iní ñáhá váha-ndo xii-í núu xiã<sup>n</sup> da sã ñà túú ní cãnehe-ndo pàá quixi càhá<sup>n</sup>-ndó. <sup>9</sup> ¿Te náa ñá ndácú iní-ndó sã núú ùhú<sup>n</sup>-ni pàá, te ní taxi-í ní dácãhñu-ndo ní xexi ùhú<sup>n</sup> mĩ cue téé, chi ñu-ni cue téé-án ní quiúndehu, te sátá ní túhú cóhó-güedé te ní chítú títñí tídihi mee-ni sã ní quendóo-án? Te ñá tècú tnùní-ndó nàcuáa quèe-xi nàcuáa ní quide-í. <sup>10</sup> ¿Te náa ñá ndácú tucu iní-ndó sã núú úsá-ni pàá te ní taxi-í ní dácãhñu tucu-ndo ní xexi cúmí mĩ cue téé, chi ñu-ni cue téé-án ní quiúndehu, te sátá ní túhú cóhó-güedé te ní nadatácá-ndó nchaa sá ní quendóo, te ní chítú títñí tídihi mee-ni sã ní quendóo-án? <sup>11</sup> Dico nchòhó chi ñá túú ní quide cuendá-ndó nàcuáa nduu tnúhu càhá<sup>n</sup>-í òré ní cachí-í sá vã quèhé<sup>n</sup> cuendá-ndó lèvadurá cue téé cùu fariséú ndihi cue téé cùu saducéú, chi ñá díú cuendá pàá ní cáhá<sup>n</sup>-í —càchí-gá xãha<sup>n</sup>-gã xii-güedé.

<sup>12</sup> Te sátá dúcá<sup>n</sup> ní xãha<sup>n</sup> Jèsús xii cue téé xica cuu ndihi-gá, te ní tecú tnùní-güedé sá xãha<sup>n</sup>-gã xii-güedé sá vã tñí-güedé tnúhu càhá<sup>n</sup> cue téé cùu fariséú ndihi cue téé cùu saducéú,

te ñá díú cuendá levadùrá sá quihu yuchi cuãha pàá ní cãhá<sup>n</sup>-gá.

*Té Pèlú xãha<sup>n</sup>-dẽ xii Jèsús sá díú-gã cúú-gã Crìstú*

*(Mr. 8:27-30; Lc. 9:18-21)*

<sup>13</sup> Te Jèsús ní quexìo-gá yucu cue tée ñúú Cèsareá Filipú, te ní xicá<sup>n</sup> tnúhú-gã núú cuè tée xica cuu ndihi-gá, te xãha<sup>n</sup>-gã xii-güedé:

—¿Yoo cùu yúhú Tée cùu ñaní tnáhá-ndó nchaa-ndo cachí cue ñáyiu-va? —cächí-gá xãha<sup>n</sup>-gã xii-güedé.

<sup>14</sup> Te ní xáha<sup>n</sup>-güedé xii-gá:

—Davá-yu cächí-yu sá cúú-n ndii Juáá tée ní xóo dacuàndute ñaha xii ñáyiu, te davá-yu cächí-yu sá cúú-n tẽ Eliás, te davá-yu cächí-yu sá cúú-n ndii Jeremiás tée ní xóo cáhá<sup>n</sup> tnúhu Yá Ndiõxí ndéé sanaha, àdi cuu-n ingá tée ní xóo cáhá<sup>n</sup> tnúhu-gá ndéé sanaha, duha cächí-yu —cächí-güedé xãha<sup>n</sup>-güedé xii-gá.

<sup>15</sup> Te Jèsús ní xicá<sup>n</sup> tnúhú tùcu-gá núú-güedé, te xãha<sup>n</sup>-gã xii-güedé:

—Te nchòhó, ¿yoo sàni iní-ndó cùu-í-i? —cächí-gá xãha<sup>n</sup>-gã xii-güedé.

<sup>16</sup> Te té Xímú, àdi Pelú chi úú diu-dé, ní xáha<sup>n</sup>-dẽ xii-gá:

—Yòhó cúú-n Crìstú Yaa ní tendaha Yá Ndiõxí véxi ñuyíú-a, te diu Yá Ndiõxí cúú-gã Yaa ndécú nchaa nduu nchaa quíú, te yòhó cúú-n Dẽhe-gá —cächí-dé xãha<sup>n</sup>-dẽ xii-gá.

<sup>17</sup> Te Jèsús ní xáha<sup>n</sup>-gã xii-dé:

—Yòhó té Xímú déhe té Jónás, ío váha táhú-n chi mee Tãtà-í Dútú Ndiõxí ní dácáhu ìní ñáhá-gã xii-n nàcuáa cunduu tnúhu cáhá<sup>n</sup>-n, te ñá díú ñáyiu ñuyíú-a duca<sup>n</sup> ni dàcahu iní ñáhá-yu xii-n tnúhu-á<sup>n</sup>. <sup>18</sup> Te yúhú xãha<sup>n</sup>-í Pèlú xii-n, te tnúhu-á<sup>n</sup> quéé-xí yúú, chi quèe ndáá-xi nàcuáa nani-n, chi cuu-n ñáyiu tée vá caní ñáyiu caní úú iní-xi canu ichi-n cuè ñáyiu nàcuáa cundecu ndihi ñáhá-yu xii-í. Te nchaa ñáyiu cùu cuendá-í vá ndácú yucu ñávãha dacuíta nihnu ñaha-xi xii-yu. <sup>19</sup> Te yúhú taxi-í tnúhu ndee ìní cundecu ndihi-n cuendá cunuu-n núú cuè ñáyiu yindaha ñaha Yá Ndiõxí,

te nchaa sá ná cãhá<sup>n</sup>-n sã cúú-xí sã vãha, te diu-ni duca<sup>n</sup> cãhá<sup>n</sup> Yá Ndiõxí, te nchaa sá ná cãhá<sup>n</sup>-n sã ñà túú cùu-xí sã vãha, te diu-ni duca<sup>n</sup> cãhá<sup>n</sup> tucu-gá, chi quide-n nacuáa cuiní-gá —cächí-gá xãha<sup>n</sup>-gã xii-dé.

<sup>20</sup> Te sátá dúcá<sup>n</sup> te ní xáha<sup>n</sup> Jèsús xii cue tée xica cuu ndihi-gá sá vã yòo cúñaha-güedé sá díú-gã cúú-gã Crìstú Yaa ní tendaha Yá Ndiõxí véxi ñuyíú-a.

*Jèsús cãhá<sup>n</sup>-gá sá cáhni ñãha-güedé xii-gá*

*(Mr. 8:31-9:1; Lc. 9:22-27)*

<sup>21</sup> Te ndéé dàvá-á<sup>n</sup> ñí ngüíta Jèsús xãha<sup>n</sup>-gã xii cue tée xica cuu ndihi-gá:

—Dacuití sã quihí<sup>n</sup>-í ñúú Jerusálén, te yacá<sup>n</sup> cue tée cùu sacuéhé núú ñáyiu isràél, ndihi cue dútú cùnùu, ndihi cue tée dàcuaha ñaha xii ñáyiu nchaa tnúhu ní chídó tnùnì ndii Moisés, nchaa cue tée-á<sup>n</sup> ìo dandòho ñaha-güedé xii-í, te cahni ñaha-güedé, dico nduu únì sá cùú-í te ndoto-í —cächí-gá xáha<sup>n</sup>-gã xii-güedé.

<sup>22</sup> Te té Pèlú ní cana-dé Jèsús ñí xio, te ní ngüíta-dé ténàá ñáhá-dẽ xii-gá, te xãha<sup>n</sup>-dẽ:

—¿Sá vã cächí Ndiõxí sá dúcá<sup>n</sup> ndòho-n chi ñá túú tàú-n sã dúcá<sup>n</sup> ndòho-n! —cachí-dé xãha<sup>n</sup>-dẽ xii-gá.

<sup>23</sup> Te ndaa sátá Jèsús nútni té Pèlú òré duca<sup>n</sup> xãha<sup>n</sup>-dẽ xii-gá ñuu ní nchócũhnu-gá, te xãha<sup>n</sup>-gã xii-dé:

—¿Xocuñí yòhó yucu ñávãha núú-í-a chi dicó quidé tneñu-n! Chi ñá túú sàni iní-õ dàtná sání ìní Yá Ndiõxí chi ñáyiu sàni iní-õ ndihi dava-gá cue ñáyiu ndècu ñuyíú-a —cächí-gá xãha<sup>n</sup>-gã xii-dé.

<sup>24</sup> Te sátá dúcá<sup>n</sup> te ní xáha<sup>n</sup>-gã xii nchaa cue tée xica cuu ndihi-gá:

—Nchaa ñáyiu cuiní chitnahá ñáhá xii-í, te xini ñuhu-xi dañá-yu vá cáda-gã-yu sá sání ìní méé-yu, te ío cada ndee ìní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. <sup>25</sup> Te nchaa ñáyiu cuiní sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiu ñá túú tnàhí yúhú cuèi nándi sá ná yãha-yu cundecú-yu

ñuyíu-a sá cuèndá-í, te ñáyi-u-á<sup>n</sup> naníhí tãhú-yu. <sup>26</sup> Te cuèi nchaandi túhú sá ío ñuyíu-a na ñihí ñáyi-u cundecu ndihí-yu, dico núu ñu nchaa xiã<sup>n</sup> ná càda cuíta ñihí-yu te ñá túú vèdana nàndíhi-xi sá dúcá<sup>n</sup> ndècu ndihí-yu nchaa xiã<sup>n</sup>. Te ni ñ<sup>n</sup> sá ío ñuyíu-a vá chindèe ñaha-xi xií-yu cuèndá naníhí tãhú-yu. <sup>27</sup> Te ndáá quée-xí tñúhu càhá<sup>n</sup>-í, chi na quixi tucu yúhú Tée cùu ñaní tñáhá-yu nchaá-yu, te dàvá-á<sup>n</sup> quini-yu sá ío càhnu cuu-í dàtná càhnu cuu Tátà-í Dútú Ndiõxí, te quixi-í ndihí cue espíritú xínú cuèchi núú-gã, te dàvá-á<sup>n</sup> cuãha-í nchaa ñáyi-u sá ndúú tãhú-yu nàcuáa ndùu sá ñi quidé-yu ñ<sup>n</sup> ñ<sup>n</sup>-yu. <sup>28</sup> Te na càchí tñúhu ndáá-í xii-ndo sã ío dàva nchòhó ñáyi-u ndècu iha vitna vá cùu-ni-ndo, chi cundecu-ni-ndo ndèe quini-ndó quixi tucu yúhú Tée cùu ñaní tñáhá-ndó nchàa-ndo taxi tñuní-í nchaa ñáyi-u —càchí-gã xãha<sup>n</sup>-gã xii-güedé.

## 17

### *Ní nadáma dóo Jèsús ndihí núú-gã (Mr. 9:2-13; Lc. 9:28-36)*

<sup>1</sup> Te núú ññú nduu sá dúcá<sup>n</sup> ñi càhá<sup>n</sup> Jèsús, te ní xica-gã cuásaá-gã ñ<sup>n</sup> yucu dùcú<sup>n</sup>, te ndèca-gã té Pèlú, ndihí té Jàcobó, ndihí té Juáá ñaní té Jàcobó-á<sup>n</sup> cuásaá. Te úní tñáhí-ni cue tée-á<sup>n</sup> ndécá-gã cuásaá. <sup>2</sup> Te yucu-á<sup>n</sup> ndécú-gã ní nadáma núú-gã ndihí dóo-gã, te núú-gã súúni dàtása<sup>n</sup>-xi dàtná quidé-xí núú nchícanhii, te dóo-gã súúni ñi nduu cuixí<sup>n</sup> dàtná cáá ñhú cuixí<sup>n</sup>. <sup>3</sup> Te òré-ni-á<sup>n</sup> ñi xiní-güedé ndí Moisés ndihí té Èliás nùtní-güedé ndihí-gã ndátnúhu ndihí ñaha-güedé xii-gã. <sup>4</sup> Te té Pèlú ní xãha<sup>n</sup>-dè xii Jèsús:

—Mèstrú, ¡váha ní cuu sá ndécú-ó iha vitna! Te núu cuini-n, te na dàcaa-ndí úní tñáhá vehe tñuvixi<sup>n</sup>, te ñ<sup>n</sup> cuu cuèndá-n, te ñ<sup>n</sup> cuu cuèndá té Moisés, te ñ<sup>n</sup> cuu cuèndá té Èliás —càchí-dé xãha<sup>n</sup>-dè xii-gã.

<sup>5</sup> Te ñini dùca<sup>n</sup> cahá<sup>n</sup> té Pèlú ní quexio ñ<sup>n</sup> vícò núú ndécú-güedé ní

dádãhu ñaha-xi xii-güedé te súúni chàhñchí. Te xití vícò-ã<sup>n</sup> ñi tecú ní càhá<sup>n</sup> Yã Ndiõxí, te xãha<sup>n</sup>-gã xii-güedé:

—Tée-a cùu-dé Déhe-í tée ío cùu iní-í, te ío cùdú iní-í-dé, te cund-edóho-ndo nchàa tñúhu càhá<sup>n</sup>-dé —duha ní xãha<sup>n</sup>-gã xii-güedé.

<sup>6</sup> Te sá dúcá<sup>n</sup> ñi càhá<sup>n</sup> Yã Ndiõxí ní tecú dóho cue tée xica cuu ndihí Jèsús te ío ní yùhú-güedé, te ní ngúñí xití-güedé te ní nuu núú-güedé ndaa núú ñhú. <sup>7</sup> Te Jèsús cuáhá<sup>n</sup>-gã núú xíndecu cue tée xica cuu ndihí-gã, te ní tendaha ñaha-gã, te xãha<sup>n</sup>-gã xii-güedé:

—Chí ndácuñí, vá yùhú-ndó —càchí-gã xãha<sup>n</sup>-gã xii-güedé.

<sup>8</sup> Te òré ní ndanehe núú-güedé, te ñá túú-gã ní xiní-güedé cue tée úú-á<sup>n</sup> chi mee-nã Jèsús. <sup>9</sup> Te òré cuánuu ndihí ñaha Jèsús xii-güedé tñdúú-ã<sup>n</sup>, te ní xãha<sup>n</sup>-gã xii-güedé:

—Vá yõo cúñaha-ndo ñi ñ<sup>n</sup> sá ñi xiní-ndó núú ñi sáá-ó-á, te cuu càhá<sup>n</sup>-ndó dico ndéé ná yãha ndoto yúhú Tée cùu ñaní tñáhá-ndó nchàa-ndo sá cùu-í —càchí-gã xãha<sup>n</sup>-gã xii-güedé.

<sup>10</sup> Te cue tée xica cuu ndihí-gã ní xãha<sup>n</sup>-güedé xii-gã:

—Cuini-ndí cachí tñúhu-n ña cuèndá cue tée dàcuaha ñaha xii ñáyi-u nchaa tñúhu ní chídó tñuní ndí Moisés càchí-güedé sá dñhna-gã té Èliás quixi, te dàtnúni quixi Yáá tendaha Yã Ndiõxí quixi ñuyíu-a —càchí-güedé xãha<sup>n</sup>-güedé xii-gã.

<sup>11</sup> Te Jèsús ní xãha<sup>n</sup>-gã xii-güedé:

—Ndáá sá códo núu ñ<sup>n</sup> tée quixi-dé te cada-dé dàtná ní quide té Èliás te tée-á<sup>n</sup> cada ndáá-dé nchaa nàcuáa cùu. <sup>12</sup> Te na càchí tñúhu-í xii-ndo vitna sá sã ní quixi tée ní quide dàtná ní xóo cada té Èliás, te cue ñáyi-u ñá túú ní cùtñuní iní-yu sá díú-dè, te ní quide ñáhá-yu xii-dé nchaa nàcuáa ní quixi iní mée-yu, te ñu-ni duca<sup>n</sup> càda ñaha tucú-yu xii yúhú Tée cùu ñaní tñáhá-yu nchaá-yu, chi dandòho ñáhá-yu xii-í —càchí-gã xãha<sup>n</sup>-gã xii-güedé.



13 Te cue téé xica cuu ndihi-gá ní cutnùní iní-güedé sá cuendá ndí Juáá téé ní xóo dacuàndute ñaha xii ñáyiú ní cáhá<sup>n</sup>-gá.

*Jèsús quidé tātna-gá #<sup>n</sup> téé cuechi tnàhá cuéhé xiyíhí*

(Mr. 9:14-29; Lc. 9:37-43)

14 Te Jèsús ní nasáá-gá ndihi cue téé ní sáá ndihi-gá tĩndúú-ã<sup>n</sup> núú xĩndecu vài ñáyiú, te ní quexìo #<sup>n</sup> téé núú-gã ní ngüíñí xítí-dě, te xãha<sup>n</sup>-dě xii-gá:

15 —Mèstrú, cundàhú iní déhe-í chi tnàhá-dé cuéhé xiyíhí, te ío dándoho ñaha-xi xii-dé, te ní cuu vài xito daquéé ñaha-xi núú ñùhú xii-dé, te ní cuu vài tucu xito dangauñi-hnu ñaha-xi ndute xii-dé. 16 Te sa ndéca-í-dé ní quixi núú cuè téé xica cuu ndihi-n dico ñá túú ní ndàcu-güedé cada tātna ñaha-güedé xii-dé —càchí-dé xãha<sup>n</sup>-dě xii-gá.

17 Te Jèsús ní xãha<sup>n</sup>-gã xii nchaa ñáyiú xĩndecu-á<sup>n</sup>:

—Nchaa nchòhó ñáyiú ndècu ñuyíú-a, ío sáá iní-ndó chi ñá túú cuíní-ndó quĩndáá iní-ndó Yã Ndiõxí, te ní cuu vài nduu quide ndee iní-í nchaa sá quidé-ndó. ¿Te ná ndéé ama vá dúcá<sup>n</sup>-gã cada-ndo-i? Te chí cándèca téé cùhú-á<sup>n</sup> táquixi iha —cachí-gá xãha<sup>n</sup>-gã xii-yu.

18 Te Jèsús ní tenáá-gá espíritú cundihí yucu ñávãha yìhi ñaha xii téé-á<sup>n</sup>, te ní quee ñaha-xi xii-dé, te òré-ni-á<sup>n</sup> nĩ ndúha-dé.

19 Te sáá dúcá<sup>n</sup> te òré ndécú mèe Jèsús ndihi cue téé xica cuu ndihi-gá, te ní xicá<sup>n</sup> tnúhú-güedé núú-gã, te xãha<sup>n</sup>-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cundihí yucu ñávãha yìhi ñaha xii téé-ã<sup>n</sup> —càchí-güedé xãha<sup>n</sup>-güedé xii-gá.

20 Te Jèsús ní xãha<sup>n</sup>-gã xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yã Ndiõxí. Te na càchí tnúhu ndáá-í xii-ndo sã nõu nchòhó quĩndáá ndisa iní-ndó Yã Ndiõxí cuèdicó luha líí dàtná lĩhli ndíquí<sup>n</sup> yutnu nàni mostázá, te

duca<sup>n</sup> te cuu cúñaha-ndo xii #<sup>n</sup> tĩndúú xocuñí-xi núú ndécú-xí te xocuñí-xi. Te nchaa núú sã vãha ndacu-ndo càda-ndo te núú na quĩndáá iní ndisa-ndo Yã Ndiõxí. 21 Te xìni ñuhu-xi sá ío cáhá<sup>n</sup> ndihi-ndo-gã te ñá túú tnàhí ná caxi-ndo cáhá<sup>n</sup> ndihi-ndo-gã, te duca<sup>n</sup> te ndacu-ndo queñuhu-ndo espíritú cundihí yucu ñávãha yìhi ñaha xii ñáyiú, dàtná cúú espíritú sá yíhí ñaha xii téé-ã<sup>n</sup> ní cùu —cachí-gá xãha<sup>n</sup>-gã xii-güedé.

*Jèsús càhá<sup>n</sup> tucu-gá sá cáhni ñaha-güedé xii-gá*

(Mr. 9:30-32; Lc. 9:43-45)

22 Te nini xica cuu Jèsús ndihi cue téé xica cuu ndihi-gá distritú Galileá, te ní xãha<sup>n</sup>-gã xii-güedé:

—Yúhú Téé cùu ñaní tnàhá-ndó nchaa-ndo sáá #<sup>n</sup> nduu te cuáha cuendá ñáhá-güedé xii-í núú cuè téé cùu úhú iní ñáhá, 23 te cahni ñaha-güedé xii-í dico nduu úní sá cùú-í te ndoto-í —càchí-gá xãha<sup>n</sup>-gã xii-güedé.

Te sá dúcá<sup>n</sup> nĩ xãha<sup>n</sup>-gã xii-güedé, te ío ní ndíhú iní-güedé.

*Díhú<sup>n</sup> cuendá veñúhu*

24 Te òré ní quexìo Jèsús ndihi cue téé xica cuu ndihi-gá ñuú Capèrnaúm, te cue téé quide cobrá díhú<sup>n</sup> cuendá veñúhu ní sáhá<sup>n</sup>-güedé ní cáhá<sup>n</sup> ndihi-güedé té Pèlú, te xãha<sup>n</sup>-güedé:

—¿Chãhu mèstrú-ndó úú díhú<sup>n</sup> sã nání drácmá cuendá veñúhu ã<sup>n</sup> ñáhá? —càchí-güedé xãha<sup>n</sup>-güedé xii-dé.

25 Te té Pèlú ní xãha<sup>n</sup>-dě:

—Chãhu-dé —càchí-dé xãha<sup>n</sup>-dě xii-güedé.

Te té Pèlú cuánguihu-dé xití vehe núú ndécú Jèsús, te díhna-gá ní cáhá<sup>n</sup>-gá, te xãha<sup>n</sup>-gã xii-dé:

—Xímú, ¿nása sàni iní-n, ná cúú ñáyiú quide cobrá ñáhá cuè téé yĩndaha ñáyiú ndècu ñuyíú-a cuendá nchaa sá ndúú yãhu ñuú-güedé ndihi cuendá nchaa díhú<sup>n</sup> sã ngáútnàha, cue ñáyiú ñuú-güedé ã<sup>n</sup> cuè ñáyiú véxi xica quide cobrá-güedé? —càchí-gá xãha<sup>n</sup>-gã xii-dé.

26 Te té Pèlú ní xãha<sup>n</sup>-dě xii-gá:

—Cue ñáiyu véxi xica quide co-  
brá-güedé —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gã xii-dé:

—Te núu duca<sup>n</sup> te cue ñáiyu ñúú-güedé ñá túú nã chãhu-yu te núu duca<sup>n</sup>. <sup>27</sup> Dico cuendá sá vã yõ dasátú-ó ìní-xi, te cuahá<sup>n</sup> làgúná te dàquée-n sã tñí-n chãcá xití ndute, te chácá dñhanuu na tãva-n te cundehe-n yùhu-di, chi yìhi ì<sup>n</sup> díhú<sup>n</sup> cuixí<sup>n</sup>. Te díhú<sup>n</sup>-ã<sup>n</sup> canehe-n quihí<sup>n</sup> cháhu-n cuendá-í ndihí cuendá-n, chi díhú<sup>n</sup>-ã<sup>n</sup> sa tnahá quéyãhu cuendá-ó ndì ndúú-ó —càchí-gá xáha<sup>n</sup>-gã xii-dé.

## 18

*Cue tée ndücu tnúhu núú Jèsús yoo  
ío-gá cúnüu*

(Mr. 9:33-37; Lc. 9:46-48)

<sup>1</sup> Te sátá dúcá<sup>n</sup> te cue tée xica cuu ndihí Jèsús ní sáhá<sup>n</sup>-güedé núú-gá, te xáha<sup>n</sup>-güedé xii-gá:

—Cachí tnúhu xii-ndí, yoo ío-gá cúnüu núú cuè ñáiyu yíndaha ñaha Yá Ndiõxí —càchí-güedé xáha<sup>n</sup>-güedé xii-gá.

<sup>2</sup> Te Jèsús ní cana-gá ì<sup>n</sup> té líhli te ní sanutñí ñaha-gã xii-dé cuádava tnuú-güedé. <sup>3</sup> Te xáha<sup>n</sup>-gã xii-güedé:

—Na càchí tnúhu ndáá-í xii-ndo sã nüü vá dáñá-ndó nchaa sá ñà túú vãha quide-ndo, te nduu ndàhú ìní-ndó dàtná ndàhú ìní té líhli-a, te vá ndúú tãhú-ndó ndíhu ndaha ñaha Yá Ndiõxí xii-ndo. <sup>4</sup> Te ñáiyu quide datná quidé tã líhli-a ndàhú ìní-yu, te ñá túú quide cahnú-yu mée-yu, ñáiyu-á<sup>n</sup> ío cunúú-yu núú ndécú Yá Ndiõxí táxí tnùnigá. <sup>5</sup> Te nchaa ñáiyu na quèhe<sup>n</sup> cuendá ì<sup>n</sup> landú dàtná té líhli-a cuendá sá cúú ìní ñáhã-yu xii-í ñá, te cada ìní-yu sá yùhú ní quehe<sup>n</sup> cuendá-yu —càchí-gá xáha<sup>n</sup>-gã xii-güedé.

*Quihi ìní-ó vã cündècu-o ichi cuehé  
ichi duha*

(Mr. 9:42-48; Lc. 17:1-2)

<sup>6</sup> Te Jèsús xáha<sup>n</sup> tùcu-gá xii-güedé:

—Te núu ì<sup>n</sup> té na dàcahá<sup>n</sup>-dé cue ñáiyu sàndáá ìní ñáhã xii-í cadá-yu nándi sá cuèhé sá dúhá, te váha-gá

sá ná dàcutu ndeé-güedé ì<sup>n</sup> yúú yõdó dúcú<sup>n</sup>-dè, te dàquée ñaha-güedé xii-dé xití ndute làmár, te ñá díú sã cündècu-dé duca<sup>n</sup> càda-dé. <sup>7</sup> Te ndàhú ní cuu nchaa ñáiyu xíndecu ñuyú-a, chi coo cue tée dacahá<sup>n</sup> ñáhã xii-yu cadá-yu nándi sá cuèhé sá dúhá te dacuití sã dúcá<sup>n</sup> càda-xi! Dico ndàhú ní cuu cue tée duca<sup>n</sup> na dàcahá<sup>n</sup> ñáhã xii-yu cadá-yu nándi sá cuèhé sá dúhá!

<sup>8</sup> Te núu ì<sup>n</sup> xio ndaha-ndo àdi ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehdé-ndó ná cuíta, chi váha-gá sá nánihí tãhú-ndó cuèi na cuíta ì<sup>n</sup> xio ndaha-ndo àdi ì<sup>n</sup> xio sáhá-ndó, te ñá díú sã quihí<sup>n</sup>-ndó ñihí ní ndúú-ndó nüü ñùhú núú càyú. <sup>9</sup> Te núu ì<sup>n</sup> xio tinüu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chi váha-gá sá nánihí tãhú-ndó cuèi na cuíta ì<sup>n</sup> xio tinüu-ndo, te ñá díú sã ndì ndúú xio núú-ndó quihí<sup>n</sup>-ndó nüü ñùhú núú càyú.

*Cuendá ì<sup>n</sup> mbéé quiti ní xíta  
(Lc. 15:3-7)*

<sup>10</sup> Te vá dàquée tihú-ndó cuè ñáiyu cùu cuendá-í cuèi cùú-yu ñáiyu ío ndàhú ìní-xi. Te na càchí tnúhu-í xii-ndo sã cuè espíritú xínú cuèchi núú Yá Ndiõxí, cue espíritú néhé cuendá ñáhã xii-yu ñuyú-a, nchaa-ni nduu nchaa-ni òré ndécú-xi nüü Tãtã-í Dútú Ndiõxí Yá ndécú àndü. <sup>11</sup> Te duca<sup>n</sup> chi yùhú Tée cùu ñani tnahá-ndó nchaa-ndo véxi-í ñuyú-a dàcácu nihnu-í ñáiyu núú ùhú núú ndàhú, ñáiyu ta xíta nihnu cuáhã<sup>n</sup>.

<sup>12</sup> Te nása sàni ìní-ndó cuendá ì<sup>n</sup> té ndècu ì<sup>n</sup> ciendú mbéé-xi?, chi núu na cuíta ì<sup>n</sup>-di te dàndóo-dé cúmídícó sáhú<sup>n</sup> cúmí-di cundecu-di ì<sup>n</sup> yucu te quihí<sup>n</sup>-dé cúnúndúcú-dè quiti ní xíta-á<sup>n</sup>. <sup>13</sup> Te núu na nánihí-dè-di, te nchòhó sa cùtnuní ìní-ndó sã ío-gá cudí ìní-dé cuendá quiti ní xíta-á<sup>n</sup> òré nanihí-dè-di dàcúúxí cúmídícó sáhú<sup>n</sup> cúmí quiti ñá túú ní xíta-á<sup>n</sup>. <sup>14</sup> Te duca<sup>n</sup> sãtnahá-xi quide Tãtã-ó Dútú Ndiõxí Yá ndécú àndü, chi cuínigá sá vã cuíta ni ì<sup>n</sup> cue ñáiyu cùu cuendá-gá.

*Cada càhnu iní-ó sã quidé ñàha tnahã ñáyiu-o*

*(Lc. 17:3)*

15 "Te núu ñá ñáyiu ndècu ndìhi-ndo ní quidé-yu ñá sã ñà túú tàú-yu cada-yu sã cúu-xí-ndó, te cáhá<sup>n</sup>-ndó dõho-yu núú méé nũú ñá-ndó ndìhí-yu cuendá sã ná ndìxi cuéchi iní-yu sã ñà túú quide váha-yu. Te núu ní tñí-yu tñúhu ní xáha<sup>n</sup>-ndo xii-yu, te ní ndacu-ndo ñí nacanu ichi-ndõ-yu. 16 Te núu ñá túú ní cuiní-yu tñí-yu tñúhu xáha<sup>n</sup>-ndo xii-yu, te nducu-ndo ñá àdi úú tñàhá cue téé canehe núú-güedé cuendá cundedóho-güedé nàcuáa ndùu tñúhu ndàtnúhu-ndo ndìhí-yu. 17 Te tñàhá cue téé-á<sup>n</sup> cáhá<sup>n</sup>-güedé dóho-yu, dico núu ní tñúhu cáhá<sup>n</sup> cue téé-á<sup>n</sup> ñà túú ní cuiní-yu tñí-yu, te dàtúu-ndo nũú dàva-gá ñáyiu ndècu ndìhi-ndo ichi Xitohó Jesucristú cuendá cutnùní iní-yu nàcuáa quide ñáyiu-á<sup>n</sup>. Te núu ñáyiu ndècuéchi-á<sup>n</sup> ñà túú ní cuiní-yu tñí-yu tñúhu sã ñí xáha<sup>n</sup> dàva-gá cue ñáyiu ndècu ichi-gá, te cada-ná iní-ndó sã cúu-yu ñáyiu ñá túú ndècu ichi Yá Ndiõxí dàtná cue téé cuhna iní-xi quide cobra ñàhá xii ñáyiu cuendá impuèstú.

18 "Te na càchí tñúhu ndáá-í xii-ndo sã nũu nchòhó ná càchí-ndó sã ndécú cuéchi ñáyiu, te ñíu-ni duca<sup>n</sup> cáhá<sup>n</sup> Yá Ndiõxí, àdi cachí-ndó sã ñà túú cuéchi-yu te ñíu-ni duca<sup>n</sup> cáhá<sup>n</sup> tucu-gá, te duca<sup>n</sup> chi nchòhó quidé-ndó nàcuáa cáhá<sup>n</sup>-gá.

19 "Te na càchí tñúhu-í xii-ndo sã nũu úú tñàhá-ndó cùu ñá nuu-ndo cáhá<sup>n</sup> ndìhi-ndo Tãtã-í Dútú Ndiõxí Yá ndécú àndiú xicá<sup>n</sup>-ndó nũú-gã nũu ná cúú sã cuiní-ndó, te taxi-gá nũu ná cúú sã xicá<sup>n</sup>-ndó nũú-gã. 20 Te núu úú tñàhá-ndó àdi úní tñàhá-ndó ñí nataká-ndó ñá xichi cuendá sã ñúhú iní ñàhá-ndó xii-í, te xíá<sup>n</sup> ndécú ndìhi ñàhá-í xii-ndo —càchí-gá xáha<sup>n</sup>-gã xii-güedé.

21 Te té Pèlú ní sáhá<sup>n</sup> ndehe yatni-dé núú Jèsús, te xáha<sup>n</sup>-dè xii-gá:

—Mèstrú, cachí tñúhu xii-í ná daha xito cada càhnu iní-í tñàhá ñáyiu-í

te núu ñá sã ná càda ñàhá-yu xii-í. ¿Cuèdicó úsá xito-ã<sup>n</sup>? —càchí-dé xáha<sup>n</sup>-dè xii-gá.

22 Te Jèsús ní xáha<sup>n</sup>-gã xii-dé:

—Yúhú càchí-í sã ñà díú-ní úsá xito cada càhnu iní-n-yu, chi únídico úxí xito ndìhi úsá ndìhi úsá xito cada càhnu iní-n-yu —càchí-gá xáha<sup>n</sup>-gã xii-dé.

*Cuendá téé ñá túú quide cahnu iní tñàhá ñáyiu-xi*

23 Te xáha<sup>n</sup> tucu-gá xii-güedé:

—Na càni-í ñá cuendú núú-ndó nàcuáa tecú tñùní-ndó nàcuáa cada-xi òré ndíhu ndaha ñàhá Yá Ndiõxí xii ñáyiu. ñá téé yindaha ñàhá xii ñáyiu ní sani iní-dé sã cáda ndáá-dé ndìhi cue téé xinu cuechi núú-dè cuendá nchaa sã tàú-güedé núú-dè. 24 Te òré sa ní ngúndecu túha-dé te ní quexio ñá téé xinu cuechi núú-dè. Te téé-á<sup>n</sup> tàú-dé cuéhé víhí díhú<sup>n</sup> nũú-dè, chi tàú-dé úxí mĩ díhú<sup>n</sup> sã nání talentú. 25 Te téé xinu cuechi-á<sup>n</sup> ñà túú díhú<sup>n</sup> ndécú ndìhi-dé nacháhu-dé sã tàú-dé núú patróo<sup>n</sup>-dè-á<sup>n</sup>, núu xíá<sup>n</sup> ní táuchíú<sup>n</sup> téé cùu patróo<sup>n</sup>-dè-á<sup>n</sup> dico ñàhá-güedé xii-dé ndìhi ñadìhí-dé ndìhi cue déhe-dé ndìhi nchaa sã ndécú ndìhi-dé cuendá ncháa-yu cuú-yu ñáyiu ñá túú tñàhí dàñá quee núú chíú<sup>n</sup> patróo<sup>n</sup>-xi, te duca<sup>n</sup> te ndéyáhu sã tàú-dé núú patróo<sup>n</sup>-dè.

26 Te téé xinu cuechi-á<sup>n</sup> ñí ngüñí xití-dè núú patróo<sup>n</sup>-dè, te xáha<sup>n</sup>-dè: "Patróo<sup>n</sup>, cáhá<sup>n</sup> ndàhú-í núú-n sã ñó ndee ñó càhnu cada iní-n sã dúhá tàú-í núú-n, te ñà túú ñà caní iní-n chi nacháhu-í nchaa sã tàú-í núú-n", càchí-dé xáha<sup>n</sup>-dè xii patróo<sup>n</sup>-dè. 27 Te téé cùu patróo<sup>n</sup>-dè-á<sup>n</sup> ñí cundàhú iní ñàhá-dè xii-dé, te ní quide càhnu iní ñàhá-dè, te ní dàñá ñàhá-dé cuánuhú-dé. 28 Te téé xinu cuechi-á<sup>n</sup> ñí naníhí-dè ñá téé xinu cuechi ndìhi-dè ichi cuánuhú-dé, te téé ní naníhí-dè-á<sup>n</sup> tàú-dé sacú-ni díhú<sup>n</sup> nũú-dè chi ñá ciendú-ni díhú<sup>n</sup> denariú tàú-dé. Te ní tñí-dé téé tàú núú-dè-á<sup>n</sup> dácüehné ñàhá-dè xii-dé, te xáha<sup>n</sup>-dè: "Nacháhu sã tàú-n nũú-í", càchí-dé xáha<sup>n</sup>-dè.

29 Te téé tàú-á<sup>n</sup> ñí ngüñí xití-dè núú téé dii nũú-xi tàú-dè-á<sup>n</sup>, te xáha<sup>n</sup>-dè: "Cáhá<sup>n</sup> ndàhú-í núú-n sã cáda càhnu

iní ñáhá-n xii-í sá tàú-í núú-n, te nacháhu cuèé-í nchaa sá tàú-í núú-n”, cächí-dé xáha<sup>n</sup>-dë. <sup>30</sup> Dico téé dii núú-xi tàú-dé-á<sup>n</sup> ñà túú ní cuíni-dé cada ndee iní-dé cundetú-dé nacháhu cuèé téé-á<sup>n</sup> sá tàú-dé, chi ní chíhi ñaha-dë vecaá cuèndá yàcá<sup>n</sup> quihi-dé ndéé nacháhu-dé nchaa sá tàú-dé. <sup>31</sup> Te dava-gá cue téé xinu cuechi ní xiní-güedé nàcuáa ní quide téé-á<sup>n</sup>, te ní cudéé<sup>n</sup>-güedé núú-dë, te ní sáhá<sup>n</sup>-güedé ní xitnúhu-güedé téé cùu patróó<sup>n</sup>-güedé sá dúcá<sup>n</sup> nǐ quide-dé. <sup>32</sup> Te téé cùu patróó<sup>n</sup>-güedé-á<sup>n</sup> nǐ cana-dé téé duca<sup>n</sup> nǐ quide-á<sup>n</sup>, te ní xáha<sup>n</sup>-dë: “Yòhó cúú-n ì<sup>n</sup> téé ío cuihna iní-xi xinu cuechi núú-í, chí yúhú ní quide càhnu iní ñáhà-í xii-n cuèndá nchaa sá tàú-n núú-í òré ní cáhá<sup>n</sup> ndàhú-n. <sup>33</sup> Te tnàhá yòhó tàú-n dùca<sup>n</sup> cada-n cada cahnu iní-n téé xinu cuechi ndihi-n núú-í cuèndá nchaa sá tàú-dé núú-n dàtná ní quide ñaha-í xii-n nǐ quide càhnu iní-í cuèndá nchaa sá tàú-n”, cächí téé cùu patróó<sup>n</sup>-á<sup>n</sup> xáha<sup>n</sup>-dë xii téé duca<sup>n</sup> nǐ quide-á<sup>n</sup>. <sup>34</sup> Te téé cùu patróó<sup>n</sup>-á<sup>n</sup> nǐ cudéé<sup>n</sup> víhí-dë sá dúcá<sup>n</sup> nǐ quide téé-á<sup>n</sup>, te ní táuchíú<sup>n</sup>-dë dandòho ñaha-güedé xii-dé ndéé nacháhu-dé nchaa sá tàú-dé —duha ní cani Jèsús cuèndú núú-güedé.

<sup>35</sup> Te xáha<sup>n</sup> tùcu-gá xii-güedé:

—Dàtná ní quide téé cùu patróó<sup>n</sup>-á<sup>n</sup> nǐ dándóhó-dë téé tàú núú-dë-á<sup>n</sup> duca<sup>n</sup> càda ñaha Tàtá-í Dútú Ndiòxí Yaá ndécú àndiu xii-ndo, te núu vá ní yúhu ní iní-ndó càda cahnu iní-ndó sá quidé ñaha tnaha ñáyíu-ndo xii-ndo —cachí-gá xáha<sup>n</sup>-gá xii-güedé.

## 19

*Jèsús càhá<sup>n</sup>-gá cuèndá cue ñáyíu dàña tnaha*

(Mr. 10:1-12; Lc. 16:18)

<sup>1</sup> Te sátá nǐ yáha duca<sup>n</sup> nǐ cáhá<sup>n</sup> Jèsús, te ní ndee-gá distritú Galileá cuáhá<sup>n</sup>-gá ndàa ingá xio yúte Jòrdán yucu distritú Jùdeá. <sup>2</sup> Te ío cuéhé ñáyíu nchícú<sup>n</sup> ñáhá xii-gá cuáhá<sup>n</sup>, te yàcá<sup>n</sup> ní quide tátna-gá nchaa ñáyíu cùhú.

<sup>3</sup> Te ní quexìo ì<sup>n</sup> úú cue téé cùu fariséú núú ndécú Jèsús xító ndèe

ñáhá-güedé xii-gá núu nása cunduu tnúhu cáhá<sup>n</sup>-gá, te xáha<sup>n</sup>-güedé xii-gá:

—Véxi-ndí xicá<sup>n</sup> tnúhú-ndí núú-n, ¿cuu dàña ì<sup>n</sup> téé ñadìhí-dé núu ndèdani càa ì<sup>n</sup> sá ñà túú cùndáá-yu-á<sup>n</sup>? — cächí-güedé xáha<sup>n</sup>-güedé xii-gá.

<sup>4</sup> Te Jèsús ní xáha<sup>n</sup>-gá xii-güedé:

—Te nchòhó, ¿náa ñá túú dàcuaha-ndo núú tütú Yá Ndiòxí, te diu núú tütú-gá cáhá<sup>n</sup>-xi sá cùtnàhá ní cadúha-gá ñáyíu, te téé ñadìhí ní cadúha-gá-á<sup>n</sup>? <sup>5</sup> Te duha cächí tucu-xi núú tütú Yá Ndiòxí nàcuáa ní cáhá<sup>n</sup>-gá: “Cue téé na ñihí ñadìhí-xi te dè<sup>n</sup>-ná cada-güedé tātá-güedé ndihi náná-güedé, chí ñadìhí-ná-güedé cuu cuu ndihi-güedé, te cada iní-ndó sá ì<sup>n</sup>-ná yiqui cùnú cuú-yu cundecú-yu”, duha cächí Yá Ndiòxí núú tütú-gá. <sup>6</sup> Te xíá<sup>n</sup> núu cada iní-ndó sá cuè ñáyíu úú-á<sup>n</sup> ì<sup>n</sup>-ná yiqui cùnú cuú-yu, te ñá túú-gá ndí díí<sup>n</sup> ndí díí<sup>n</sup> yiqui cùnú cuú-yu. Núu xíá<sup>n</sup> ñá túú ndùu váha-xi dàña cuè téé ñadìhí-güedé, chí mee Yá Ndiòxí ní cachí-gá sá cúú úú-yu cundecú-yu — cächí Jèsús xáha<sup>n</sup>-gá xii-güedé.

<sup>7</sup> Te ní xáha<sup>n</sup>-güedé xii Jèsús:

—Te núu duca<sup>n</sup>, ¿te ná cuèndá ndíi Moisés ní cachí ndíi sá núu ì<sup>n</sup> téé cuíni-dé dàña-dë ñadìhí-dé, te cuu cadúha-dé ì<sup>n</sup> tutú núú cáhá<sup>n</sup>-xi sá nǐ dáña-dë ñadìhí-dé, te duca<sup>n</sup> te cuu dàña ñaha-dé ní cachí ndíi vǎ<sup>n</sup>? — cächí-güedé xáha<sup>n</sup>-güedé xii-gá.

<sup>8</sup> Te Jèsús ní xáha<sup>n</sup>-gá xii-güedé:

—Te duca<sup>n</sup> nǐ cachí ndíi Moisés sá cúú dàña-ndo ñadìhí-ndó, chí nchòhó ío sàá iní-ndó, dico ndéé díhna chí ní tecú tnúhu nchaa cue téé sá vǎ dáña-güedé ñadìhí-güedé. <sup>9</sup> Dico yúhú cächí tnúhu-í xii-ndo sá núu ì<sup>n</sup> téé na dàña-dé ñadìhí-dé te naquehe<sup>n</sup>-dé ingá ñadìhí te ío nèhé quidé-dë, te núu ñá díú cuèndá sá cáhá<sup>n</sup> ndihi-a<sup>n</sup> ingá téé duca<sup>n</sup> na dàña ñaha-dé. Te sá dúcá<sup>n</sup> cuèndá-ni na dàña ì<sup>n</sup> téé ñadìhí-dé, te ì<sup>n</sup>-ní cuèchi cùu-xi ndihi cuèchi quide téé ndèca ñadìhí te cáhá<sup>n</sup> ndihi-dé ingá ñadìhí —cächí-gá xáha<sup>n</sup>-gá xii-güedé.



10 Te cue tée xica cuu ndihi-gá ní xáha<sup>n</sup>-güedě xii-gá:

—Te núu duca<sup>n</sup> cùu cuendá cue tée ndihi ñadihí-güedé, te váha-gá sá vǎ cándeca cue tée ñadihí —càchí-güedé xáha<sup>n</sup>-güedě xii-gá.

11 Te Jèsús ní xáha<sup>n</sup>-gǎ xii-güedé:

—Ñá ncháá ñǎyiu duca<sup>n</sup> ndùu tǎhù-yu cundecú-yu, chi mee-ni ñǎyiu ní cachí Yǎ Ndiöxí sá dúcá<sup>n</sup> tnàhí nduu tǎhú cundecu mee. 12 Te ió cue tée duca<sup>n</sup> tnàhí ní nduu tǎhú-güedé ndéé òré ní cacu-güedé sá vǎ cándeca-güedé ñadihí. Te ió cue tée ñá ndácú-güedé candeca-güedé ñadihí cuendá sá ñi quide ñaha dàva-gá cue tnàha tée-güedé xii-güedé. Te dava-güedé ñá túú cándeca-güedé ñadihí chi cuení-güedé sá vǎ dáñá ndéé-güedé cunu cuechi-güedé núu Yǎ Ndiöxí. Te nchaa cue tée duca<sup>n</sup> ñi nduu tǎhú núu Yǎ Ndiöxí cundecu mee, te váha-ni te núu na cundecu mee-güedé —càchí-gá xáha<sup>n</sup>-gǎ xii-güedé.

*Jèsús xicá<sup>n</sup> tǎhú-gǎ núu Yǎ Ndiöxí cuendá landú (Mr. 10:13-16; Lc. 18:15-17)*

13 Te ñ<sup>n</sup> úú ñǎyiu ndécá-yu landú lǐhli cuáhá<sup>n</sup> núu Jèsús, chi cuení-yu sá téndaha ñaha-gá xii-güexi, te cacá<sup>n</sup> tǎhú-gǎ núu Yǎ Ndiöxí cuendá-güexi. Te cue tée xica cuu ndihi-gá ní ngüíta-güedé ténàá ñáhá-güedé xií-yu, te xáha<sup>n</sup>-güedé sá vǎ dúcá<sup>n</sup> càdá-yu.

14 Te Jèsús ní xáha<sup>n</sup>-gǎ xii-güedé:

—Chí dáñá ná quixi nahi cue landú lǐhli-á<sup>n</sup> núu-í-a, te vǎ càdí-ndó ìchi-güexi, chi dàtná cúú vǎha iní cue landú lǐhli-á<sup>n</sup> duca<sup>n</sup> cùu váha iní cue ñáyiu yìndaha ñaha Yǎ Ndiöxí —càchí-gá xáha<sup>n</sup>-gǎ xii-güedé.

15 Te ní tendaha ñaha-gá xii-güexi, te ní xicá<sup>n</sup> tǎhú-gǎ núu Yǎ Ndiöxí cuendá-güexi, te sátá dúcá<sup>n</sup> ñi quide-gá te ní xica-gá cuáhá<sup>n</sup>-gá.

*Ñ<sup>n</sup> tée cuica càhá<sup>n</sup> ndihi-dé Jèsús (Mr. 10:17-31; Lc. 18:18-30)*

16 Te ñ<sup>n</sup> tée cuechi ñi quexìo-dé núu ndécú Jèsús, te xicá<sup>n</sup> tnúhú-dě núu-gǎ, te xáha<sup>n</sup>-dě xii-gá:

—Yòhó Mèstrú, cùu-n tée ío váha iní-xi, te cuení-í núu vǎ cündèe iní-n càchí tnúhu-n ñǎ cúú sǎ vǎha cada-í cuendá nduu tǎhú-í cundecu-í ndihi Yǎ Ndiöxí ñi caa ñi quíhí<sup>n</sup> —càchí-dé xáha<sup>n</sup>-dě xii-gá.

17 Te Jèsús ní xáha<sup>n</sup>-gǎ xii-dé:

—¿Te cùtnuní iní-n nàcuáa ndùu tnúhu càhá<sup>n</sup>-n sǎ yùhú váha iní-á<sup>n</sup>?, chi ñ<sup>n</sup>dií díí-ni Yǎ Ndiöxí ío váha iní-gá. Te núu cuení-n nàníhí tǎhú-n te tní-n nchàa tnúhu càhá<sup>n</sup> Yǎ Ndiöxí, tnúhu sá sánú ìchi ñaha xii ñáyiu nàcuáa cadá-yu cundecú-yu —càchí-gá xáha<sup>n</sup>-gǎ xii-dé.

18 Te tée cuechi-á<sup>n</sup> ní xáha<sup>n</sup>-dě xii-gá:

—¿Te ndëndida càa tnúhu càhá<sup>n</sup> Yǎ Ndiöxí cada-í-i? —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gǎ xii-dé:

—Te duha ní cachí Yǎ Ndiöxí cada ñáyiu: “Vǎ cáhni-ndó tnàha ñáyiu-ndo, vǎ càhá<sup>n</sup> ndihi-ndo ñadihí te núu ñá díú ñadihí-ndó cùu-yu, te duca<sup>n</sup>-ni nchòhó cue ñáyiu dìhí tucu vǎ càhá<sup>n</sup> ndihi-ndo tée te núu ñá díú yí-ndo cuu-güedé, te vǎ dúhú-ndó sǎ ndécú ndihi tnaha ñáyiu-ndo, vǎ dácàcu-ndo cuéchi neñúú sá cúú-xí tnàha ñáyiu-ndo. 19 Te canehe-ndo sǎ yíñùhu núu tǎtá-ndó ndihi núu náná-ndó, te cundàhú iní-ndó tnàha ñáyiu-ndo dàtná cündàhú iní-ndó mèe-ndo”, duha ní cachí Yǎ Ndiöxí cada ñáyiu —càchí-gá xáha<sup>n</sup>-gǎ xii-dé.

20 Te tée cuechi-á<sup>n</sup> ní xáha<sup>n</sup>-dě xii-gá:

—Nchaa xíá<sup>n</sup> ní ngüíta-í quidè-í ndéé cùtnàhá cúú landú-í, ¿te vitna nágá cúmǎní cada-í-i? —càchí-dé xáha<sup>n</sup>-dě xii-gá.

21 Te Jèsús ní xáha<sup>n</sup>-gǎ xii-dé:

—Te núu cuení-n cùu-n ñ<sup>n</sup> tée ío váha cada ndáá, te cuáhá<sup>n</sup> dico-n nchàa sǎ ndécú ndihi-n, te díhú-n cuáha tǎhú-n cuè ñáyiu ndàhú, te duca<sup>n</sup> te nduu tǎhú-n ngündecu váha-n núu ndécú Yǎ Ndiöxí táxí tnùn-í-gá. Te sátá ná yǎha duca<sup>n</sup> càda-n te quixi-n chìtnahá ñáhá-n xii-í —càchí-gá xáha<sup>n</sup>-gǎ xii-dé.

<sup>22</sup> Te sá dúcá<sup>n</sup> nǐ xáha<sup>n</sup> Jèsús xii-dé te ío ní cundíyí-dé, chí ío cuica-dě, te ní xica-dé cuáhá<sup>n</sup>-dé.

<sup>23</sup> Te Jèsús ní xáha<sup>n</sup>-gǎ xii cue téé xica cuu ndíhi-gá:

—Na cǎchí tnúhu ndáá-í xii-ndo sǎ ío úhú quíndáá iní ñaha cuè ñáyíu cuica xii Yá Ndiǒxí cuéndá ndíhu ndaha ñaha-gá xii-yu. <sup>24</sup> Te na cǎchí tnúhu tucu-í xii-ndo sǎ yǎchí-gá yáha ñ<sup>n</sup> cǎméyu yaú ñ<sup>n</sup> yíqui tícú dàcúxí sǎ quíndáá iní ñ<sup>n</sup> ñáyíu cuica Yá Ndiǒxí cuéndá ndíhu ndaha ñaha-gá xii-yu —cǎchí-gá xáha<sup>n</sup>-gǎ xii-güedé.

<sup>25</sup> Te sá dúcá<sup>n</sup> nǐ cǎhá<sup>n</sup> Jèsús, xǎá<sup>n</sup> ío ní cuñúhu cue téé xica cuu ndíhi-gá, te ní ngúíta-güedé xǐtnàha-güedé:

—¿Yoo naníhí tǎhú te núu duca<sup>n</sup> vaí<sup>n</sup>? —cǎchí-güedé xǐtnàha-güedé.

<sup>26</sup> Te Jèsús ní ndacoto-gá núu-güedé, te xáha<sup>n</sup>-gǎ xii-güedé:

—Nchaa ñáyíu ñuyíú-a chí vá ndácü-yu ná cadá-yu nàcuáa ndíhu ndaha ñaha Yá Ndiǒxí xii-yu, dico mee-gǎ chí ndacu-gá ndíhu ndaha ñaha-gá xii-yu chí nchaandi túhú sá váha ndacu-gá quíde-gǎ —cǎchí-gá xáha<sup>n</sup>-gǎ xii-güedé.

<sup>27</sup> Te té Pèlú ní xáha<sup>n</sup>-dě xii-gá:

—Nchúhú ní dándóo-ndí nchaa sá ndécú ndíhi-ndí, te ní tuha ñaha-ndí xii-n, ¿te ná cúú sǎ ñíhí-ndí nduu táhú-ndí sá dúcá<sup>n</sup> nǐ quide-ndí-i? —cǎchí-dé xáha<sup>n</sup>-dě xii-gá.

<sup>28</sup> Te Jèsús ní xáha<sup>n</sup>-gǎ xii-güedé:

—Na cǎchí tnúhu ndáá-í xii-ndo sǎ ná sǎá nduu, ndúu saa nchaa sá ío andíu ndíhi ñuyíú-a, te dàvá-á<sup>n</sup> cunucóo yúhú Téé cùu ñani tnáhá-ndó nchàa-ndo ñ<sup>n</sup> núú xilé váha, te nchaa ñáyíu quíní-yu sá ío cǎhnu cuu-í, te nchòhó cue téé ní tuha ñaha xii-í tnáhá-ndó cunucóo-ndo núú ñ<sup>n</sup> caa xilé váha ndí ùxúú tnáhá-ndó, te xǎá<sup>n</sup> cunucóo-ndo càda ndáá-ndó cuèchi ndí ùxúú xichi cue ñáyíu isràél. <sup>29</sup> Te nchaa ñáyíu na dándóo vehe-xi, àdi ñani-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu duca<sup>n</sup> na cadá-yu sá cuéndá-í te ío-gá cuéhé sǎ cuǎñaha

Yá Ndiǒxí cundecu ndíhi-yu, te ñá díú-ní xǎá<sup>n</sup> chí tnáhá nduu táhú-yu cundecú-yu ndíhi-gá ní caa ní quíhí<sup>n</sup>.

<sup>30</sup> Te dava ñáyíu cùnnuu ndecu ichi Yá Ndiǒxí vitna, ñáyíu-á<sup>n</sup> sǎá nduu te vá ío-gá cunúú-yu dàtná cùnúú-yu vitna, te dava ñáyíu nchícú<sup>n</sup> ñá túú cùnnuu vitna, ñáyíu-á<sup>n</sup> sǎá nduu te ío cunúú-yu —cǎchí-gá xáha<sup>n</sup>-gǎ xii-güedé.

## 20

### *Cuéndá cue téé quide chiu<sup>n</sup>*

<sup>1</sup> Te xáha<sup>n</sup> tucu Jesús xii cue téé xica cuu ndíhi-gá:

—Na cǎni-í ñ<sup>n</sup> cuéndú núu-ndó cuéndá tecú tnùní-ndó nàcuáa cada-xi òré ndíhu ndaha ñaha Yá Ndiǒxí xii ñáyíu. ñ<sup>n</sup> téé ní xitu-dé yoho yàha stilé, te ñ<sup>n</sup> nduu ní quee-dé nehé-ni cuándúcú-dě cue téé cada chiu<sup>n</sup> núú dúcá<sup>n</sup> nǐ xitu-dé yoho yàha stilé-á<sup>n</sup>.

<sup>2</sup> Te òré ní níhí-dě cue téé cada chiu<sup>n</sup>-á<sup>n</sup>, te ní quide ndáá-dé ndíhi-güedé sá chǎhu ñaha-dě xii-güedé ñ<sup>n</sup> díhú<sup>n</sup> denàriú ñ<sup>n</sup> nduu. Te sǎtá dúcá<sup>n</sup> te ní tendaha ñaha-dé xii-güedé cuáhá<sup>n</sup>-güedé cada chiu<sup>n</sup>-güedé núú dúcá<sup>n</sup> nǐ xitu-dé yoho yàha stilé-á<sup>n</sup>.

<sup>3</sup> Te dàtnùní ní xica tucu-dé cuáhá<sup>n</sup>-dé dàtná òré caá ñ<sup>n</sup> dátneé cuándúcú-gǎ-dé cue téé cada chiu<sup>n</sup> núú nǐ xitu-dé yoho yàha stilé-á<sup>n</sup>, te ní xiní-dé xǐnutní ñ<sup>n</sup> úú cue téé núú yǎhu te ñá túú nǎ chiu<sup>n</sup> xíquide-güedé. <sup>4</sup> Te ní xáha<sup>n</sup>-dě xii-güedé: “Ñá túú cùdana cuyáchí-ndó càda-ndo chiu<sup>n</sup>-í te chǎhu ñaha-í xii-ndo nàcuáa tàú-xi cundu-á<sup>n</sup>”, cǎchí-dé xáha<sup>n</sup>-dě xii-güedé. Te cue téé-á<sup>n</sup> nǐ sáha-güedé tnúhu cada chiu<sup>n</sup>-güedé te ní xica-güedé cuáhá<sup>n</sup>-güedé. <sup>5</sup> Te téé ní xitu yoho yàha stilé-á<sup>n</sup> nǐ xica tucu-dé dàtná òré caúxúú nduu cuándúcú-gǎ-dé cue téé cada chiu<sup>n</sup>-dé, te ní níhí tucu-dé cue téé cada chiu<sup>n</sup>. Te ní quee tucu-dé dàtná òré caá úní sacuaa, te díu-ni duca<sup>n</sup> nǐ quide tucu-dé. <sup>6</sup> Te ní quee tucu-dé dàtná òré caá úhú<sup>n</sup> sacuaa cuándúcú-gǎ-dé cue téé cada chiu<sup>n</sup>-dé, te ní xiní-dé xǐnutní ñ<sup>n</sup> úú cue téé

d̩u-ni núú yǎhu-án te ñá túú nǎ chiún quide-güedé, te ní xáha<sup>n</sup>-dē xii-güedé: “Sànuu sá nchòhó ní cuu nchàca vitna ñá túú ñihí-ndó chiún cada-ndo”, cachí-dé xáha<sup>n</sup>-dē xii-güedé. <sup>7</sup> Te cue téé-án ñí xáha<sup>n</sup>-güedé xii-dé: “Ñá túú ñihí-ndí chiún cada-ndí chi vá yõo ndùcu ñaha xii-ndí”, cächí-güedé xáha<sup>n</sup>-güedé xii-dé. Te ní xáha<sup>n</sup>-dē xii-güedé: “Yúhú taxi-í chiún cada-ndo, te quíhí-ndó núú ñí xitu-í yoho yàha stilé yàcá<sup>n</sup> cada chiún-ndo, te cháhu ñaha-í xii-ndo nàcuáa tàú-xi cunduu”, cächí-dé xáha<sup>n</sup>-dē xii-güedé. <sup>8</sup> Te sáta ñí dáhu nchícanhii, te téé dii chiún-xi-án ñí xáha<sup>n</sup>-dē xii téé tàxi tñuní ñáhá xii cue téé quide chiún-án: “Cúñaha xii nchaa cue téé quide chiún-án ná quíxí-güedé te cháhu-n-güedé, te díhna-gá cue téé nchícú<sup>n</sup> cuíi-nǎ cuánguìhu núú chíú<sup>n</sup> ngũita-n cháhu-n, te ndéé núú ñí ndihí-ná cháhu-n cuè téé cuánguìhu díhna nuu-gǎ núú chíú<sup>n</sup>”, cächí-dé xáha<sup>n</sup>-dē xii téé tàxi tñuní ñáhá xii cue téé quide chiún-án. <sup>9</sup> Te díhna-gá cue téé cuánguìhu caá úhú<sup>n</sup> sacuaa ní quexìo-güedé cuendá cháhu ñaha-dé, te ní cháhu ñaha-dé ñí caa díhú<sup>n</sup> denàriú xii ñí ñí-güedé. <sup>10</sup> Te sáta ñí cháhu-dé dava-gá cue téé ní quide chiún. Te ndéé núú ñí ndihí-ná ní cháhu-dé cue téé cuánguìhu díhna nuu-gǎ núú chíú<sup>n</sup>. Te cue téé-án ñí sani iní-güedé sá vái-gǎ cháhu ñaha-dé xii-güedé, dico ñáhá chi ñí caa-ni díhú<sup>n</sup> denàriú ní cháhu ñaha-dé xii ñí ñí-güedé. <sup>11</sup> Te cue téé-án ñí quehe<sup>n</sup> cuendá-güedé díhú<sup>n</sup>-güedé dico ñá túú ní quide váha-xi iní-güedé. <sup>12</sup> Te ní xáha<sup>n</sup>-güedé xii téé dii chiún-xi ní quide-güedé: “¿Ná cuendá cue téé nchícú<sup>n</sup> cuíi-nǎ cuánguìhu núú chíú<sup>n</sup> ñí-ni ñí cháhu ñaha-n xii-ndí ndihí-güedé, te ñí dii oré duha ní quide chiún-güedé? Te nchúhú nchàca nchaa ní sahani iní-ndí ní quide chiún-ndí, te ní ndoho-ndí cahni, te ñí-ni ñí cháhu ñaha-n xii-ndí ndihí-güedé”, cächí-güedé xáha<sup>n</sup>-güedé xii téé dii chiún-xi ní quide-güedé. <sup>13</sup> Te téé dii chiún-xi

ní quide-güedé-án ñí xáha<sup>n</sup>-dē xii ñí téé-án: “Yòhó, ñá túú quide-í ñí sá ñá túú tàú-í cada-í sá cúú-xi-n, chi ní quide ndáá-ó sǎ díú-ni ñí díhú<sup>n</sup> denàriú cháhu ñaha-í xii-n ñí nduu. <sup>14</sup> Te vitna quehe<sup>n</sup> díhú<sup>n</sup> cuendá nduu-n te núhú-n, chi yúhú cuíni-í sá ñí-ni cháhu ñaha-í xii-n ndihí cue téé nchícú<sup>n</sup> cuíi-nǎ cuánguìhu núú chíú<sup>n</sup>. <sup>15</sup> Chi yúhú cuu-ni cada-í nání cuíni-í ndihí díhú<sup>n</sup>-í, ¿àdi dico ñá túú quide váha-xi iní-n sǎ dúhá cundahú iní-í cue téé-án duca<sup>n</sup> cháhu-í-güedé?”, cächí téé cùu patróo<sup>n</sup>-án xáha<sup>n</sup>-dē xii téé-án. Duha ndùu cuendú caní-í núú-ndó. <sup>16</sup> Te duha cǎhá<sup>n</sup>-í chi dava ñáyiú cùnuu ndecu ichi Yá Ndiõxí vitna sáá nduu te vá cùnùu vihi-gá-yu dàtná cùnùú-yu vitna, te dava ñáyiú ñá túú cùnuu vitna sáá nduu ño cùnùú-yu. Te ío cuéhé ñáyiú cǎhá<sup>n</sup> ñáhá Yá Ndiõxí xii-yu dico sacú-ni-yu nduu táhú-yu cundecú-yu ndihí-gá — cächí-gá xáha<sup>n</sup>-gǎ xii-güedé.

*Jesús cǎhá<sup>n</sup> tucu-gá sá cǎhni ñàha-güedé xii-gá*

*(Mr. 10:32-34; Lc. 18:31-34)*

<sup>17</sup> Te ñùhu Jesús ichi cuásaá-gá ñúu Jerusalén ndihí cue téé xica cuu ndihí-gá, te ní cana ñaha-gǎ xii-güedé ní naníhí tñáhá-güedé ndihí-gá, te ta ndàtnúhu ndihí ñaha-gǎ xii-güedé cuáhá<sup>n</sup>, te xáha<sup>n</sup>-gǎ xii-güedé:

<sup>18</sup> —Vitna ñùhu-o ichi cuásaá-ó ñúu Jerusalén, te yàcá<sup>n</sup> cuáha cuendá ñáhá-güedé xii yúhú Téé cùu ñaní tñáhá-ndó nchàa-ndo núú cuè téé cùu dútú cùnùu, ndihí núú cuè téé dàcuaha ñaha xii ñáyiú nchaa tñuhu ní chídó tñuní ndíi Moisés. Te d̩u cue téé-án cǎñaha-güedé xii dava-gá cue téé sá cǎhni ñàha-güedé xii-í. <sup>19</sup> Te cuáha cuendá ñáhá-güedé xii-í núú cuè téé ñá túú cùu cue téé isràél, te cue téé-án cudíquí ndéé ñáhá-güedé xii-í, te caniha-güedé ndihí ñí, te dàtnùni cata caa ñaha-güedé xii-í núú cùrúxí te núú cùrúxí-án cuú-í, dico nduu úní sá cùú-í te ndoto-í — cächí-gá xáha<sup>n</sup>-gǎ xii-güedé.

*Náná tē Jàcobó ndihí té Juàá cuìní-a<sup>n</sup> sá cùnù-güedé ndihí Jèsús*

*(Mr. 10:35-45)*

<sup>20</sup> Te cue déhe té Zebèdeú té Jàcobó ndihí té Juàá ndécá ñàha náná-güedé xii-güedé cuáhá<sup>n</sup> núú ndécú Jèsús, te òré ní quexìo-a<sup>n</sup> ndihí-güedé núú ndécú-gã te ní ngüíñí xítí-á<sup>n</sup> núú-gã cuendá cuìní-a<sup>n</sup> ndàtnúhu ndihí ñàha-a<sup>n</sup> xii-gá cuendá sá cúú-xí cuè déhe-a<sup>n</sup>. <sup>21</sup> Te cùmání-gã cáhá<sup>n</sup>-a<sup>n</sup> te ní xicá<sup>n</sup> tnúhú Jèsús núú-a<sup>n</sup>, te xàha<sup>n</sup>-gã:

—¿Ná cuìní-n? —càchí-gá xàha<sup>n</sup>-gã xii-a<sup>n</sup>.

Te ní xàha<sup>n</sup>-a<sup>n</sup> xii-gá:

—Véxi-í càhá<sup>n</sup> ndàhú-í núú-n nùu vá cündèe iní-n cùnucóo ñ<sup>n</sup> déhe-í-a xio cùha-n, te ingá-dé cunucóo-dé xio dàtni-n na saá nduu cùnucóo-n nùú táxí tnùnì-n —càchí-á<sup>n</sup> xàha<sup>n</sup>-a<sup>n</sup> xii-gá.

<sup>22</sup> Te Jèsús ní xàha<sup>n</sup>-gã xii úú cue té-á<sup>n</sup>:

—Nchòhó, ñá túú cùtnuní váha iní-ndó nàcuáa ndùu sá xicá<sup>n</sup>-ndó nùú-í. ¿Te náa cundee iní-ndó dàndoho ñàha ñáyíu xii-ndo dàtná dandòho ñàhá-yu xii-í, te cundee tùcu iní-ndó càhni ñàhá-yu xii-ndo dàtná cahni ñàhá-yu xii-í-á<sup>n</sup>? —càchí-gá xàha<sup>n</sup>-gã xii-güedé.

Te ní xàha<sup>n</sup>-güedé xii-gá:

—Cundee iní-ndí yáha-ndí nchaa nàcuáa càhá<sup>n</sup>-n-á<sup>n</sup> —càchí-güedé xàha<sup>n</sup>-güedé xii-gá.

<sup>23</sup> Te Jèsús ní xàha<sup>n</sup>-gã xii-güedé:

—Ndáá sá cündèe iní-ndó ndòho-ndo nchaa nàcuáa ndòho-í, dico sá dúcá<sup>n</sup> cuìní-ndó sã ñ<sup>n</sup>-ndó cùnucóo-ndo xio cuhá-í, te ñ<sup>n</sup>-ndo cùnucóo-ndo xio datni-í, te xíá<sup>n</sup> chi ñá díú yùhú tàú-í càchí-í nùu sá cúú cùnucóo-ndo àdí sá vá cúú cùnucóo-ndo, chi mee Tàtá-í Dútú Ndiòxí cachí-gá te núu ná cúú ñáyíu nduu táhú cunucóo dìñí-í dàvá-á<sup>n</sup> —càchí-gá xàha<sup>n</sup>-gã xii-güedé.

<sup>24</sup> Te òré ní níhí ùxí-gá cue téé xica cuu ndihí-gá tnúhu nàcuáa ndùu sá cuìní cue téé úú-á<sup>n</sup>, te ní cudéé<sup>n</sup>-güedé núú cuè téé úú-á<sup>n</sup>. <sup>25</sup> Te Jèsús ní cana-gá nchaa cue téé xica cuu ndihí-gá, te ní xàha<sup>n</sup>-gã xii-güedé:

—Nchòhó xìnì-ndó sã cuè téé yìndaha nació<sup>n</sup> quidé-güedé sá ño

cùnùu-güedé, te nchaa dava-gá cue téé cùnùu ndihí-güedé quidé-güedé tnàhá-güedé sá ño cùnùu-güedé. <sup>26</sup> Dico nchòhó chi vá dúcá<sup>n</sup> càda-ndo, chi núu dava-ndo cuìní-ndó cùnùu-ndo, te xini ñuhu-xi cunu cuechi núú tnàhá-ndó te vá cáda-ndó sã cùnùu-ndo. <sup>27</sup> Te núu dava-ndo cuìní-ndó quène cáva-ndo, te cuu-ndo dàtná cue ñáyíu ñá túú tnàhí dàná quee núú chíú<sup>n</sup> pàtróo<sup>n</sup>-xi cunu cuechi nùú tnàhá-ndó. <sup>28</sup> Te cada-ndo dàtná quidé yùhú Téé cuu ñaní tnàhá-ndó nchaa-ndo, chi yùhú véxi-í ñuyíú-a dico ñá díú sã cùnùu cuèchi ñáyíu núú-í chi véxi-í sá cùnùu cuèchi-í núú-yu. Te cuú-í ñuyíú-a cuendá vái-yu cácu nihnú-yu núú ùhú núú ndàhú —càchí-gá xàha<sup>n</sup>-gã xii-güedé.

*Jèsús quidé tãtna-gá núú úú tnàhá cue téé cuáá*

*(Mr. 10:46-52; Lc. 18:35-43)*

<sup>29</sup> Te òré ní quee Jèsús ñuú Jericó ndihí cue téé xica cuu ndihí-gá, te cuéhé víhí ñáyíu nchicú<sup>n</sup> ñàhá xii-gá cuáhá<sup>n</sup>. <sup>30</sup> Te yuhu ìchi cuáhá<sup>n</sup>-gá xìnucóo úú tnàhá cue téé cuáá, te cue téé-á<sup>n</sup> ñí cutnùnì iní-güedé sá Jèsús ñúhú-gã ichi-á<sup>n</sup> te ní ngüíta-güedé níhi càhá<sup>n</sup>-güedé, te xàha<sup>n</sup>-güedé xii-gá:

—¿Yòhó Mèstrú, ñaní tnàhá ndíi Dàvíí, cundàhú iní ñàhá xii-ndí! —càchí-güedé xàha<sup>n</sup>-güedé xii-gá.

<sup>31</sup> Te cue ñáyíu tènáá ñàhá-yu xii-güedé, te xàhá<sup>n</sup>-yu sá ná càdí-güedé yuhu-güedé, dico uu<sup>n</sup>-gá níhi ní cáhá<sup>n</sup>-güedé, te xàha<sup>n</sup>-güedé xii-gá:

—¿Yòhó Mèstrú, ñaní tnàhá ndíi Dàvíí, cundàhú iní ñàhá xii-ndí! —càchí-güedé xàha<sup>n</sup>-güedé xii-gá.

<sup>32</sup> Te ní ngüíñí Jèsús te ní cana ñàha-gã xii-güedé, te ní xicá<sup>n</sup> tnúhú-gã núú-güedé, te xàha<sup>n</sup>-gã:

—¿Ná cuìní-ndó càda ñàha-í xii-ndo-i? —càchí-gá xàha<sup>n</sup>-gã xii-güedé.

<sup>33</sup> Te ní xàha<sup>n</sup>-güedé xii-gá:

—Mèstrú, cuìní-ndí sá cáda tãtna-n nùú-ndí cuendá cundehe-ndí —càchí-güedé xàha<sup>n</sup>-güedé xii-gá.



34 Te Jèsús ní cundàhú iní ñáhá-gǎ xii-güedé, te ní tendaha-gǎ núú-güedé. Te òré-ni ní ndúha núú-güedé, te nchìcú<sup>n</sup> ñáhá-güedé xii-gǎ cuáhá<sup>n</sup>.

## 21

*Jèsús cuánguihu-gǎ ñuú Jerusàlén*  
(Mr. 11:1-11; Lc. 19:28-40; Jn. 12:12-19)

<sup>1</sup> Te òré sa ta cùyatni Jèsús ndihi cue téé xica cuu ndihi-gǎ ñuú Jerusàlén, te ní quexìo-gǎ ndihi-güedé yatni víi-nǎ ñuú Bèttagé, te xía<sup>n</sup> cáá yùcu nani Olívú. Te ní ndatnúhu-gǎ ndihi úú cue téé xica cuu ndihi-gǎ, <sup>2</sup> te ní xáha<sup>n</sup>-gǎ xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te nanihí-ndó ì<sup>n</sup> búrru dīhí ndètní-dī ndihi déhe-dī, te nandaxi-ndo-güèdī te candeca-ndo-güèdī quixi. <sup>3</sup> Te núu ió ñáiyu dàdaha<sup>n</sup> ñaha xii-güedi, te cúñaha-ndo xii-yu sá yùhú Yaá xicá cùu ndihi-ndo xini ñuhu-í-güedi, te ndīhi-ni natendaha-í-güedi nùhú-güedi cúñaha-ndo —càchí-gǎ xǎha<sup>n</sup>-gǎ xii-güedé.

<sup>4</sup> Te duca<sup>n</sup> ní cuu chi ní quee ndáá-xi nàcuáa ní chídó tnùní ì<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha núú tütú-gǎ núú càchí-xi:

<sup>5</sup> Chí cùñaha cuè ñáiyu ñuú Sìón ná cádá cuendá-yu, chi véxi téé yìndaha ñaha xii-yu yòdo-dé ì<sup>n</sup> búrru líhli déhe ì<sup>n</sup> búrru quitì sa xido,

te cùu-dé ì<sup>n</sup> téé ío ndàhú iní-xi. Duha ní chídó tnùní ì<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha núú tütú-gǎ.

<sup>6</sup> Te cue téé xica cuu ndihi-gǎ ní xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gǎ xii-güedé cada-güedé. <sup>7</sup> Te ní ndexìo-güedé ndécá-güedé ì<sup>n</sup> búrru dīhí ndihi déhe-dī, te ní sacá<sup>n</sup> ndodo-güedé dóo-güedé sáta-güedi, te dàtnùní cuásaá Jèsús sáta ì<sup>n</sup>-dī ní ngódó ñaha-gǎ xii-dī. <sup>8</sup> Te ío cuéhé ñáiyu ta sàcá<sup>n</sup>-yu dóo-yu ichi cuáhá<sup>n</sup>-gǎ cuendá núú dǒo-yu-á<sup>n</sup>

yǎha-gǎ ndihi quitì yòdo-gǎ. Te davá-yu xèhndé-yu ndaha yùtnu ñuú tá sàcá<sup>n</sup>-yu cuáhá<sup>n</sup>. <sup>9</sup> Te nchaa ñáiyu yòdonuu núú-gǎ ndihi nchaa ñáiyu nchìcú<sup>n</sup> ndàa sáta-gǎ ní ngúita-yu níhi càhá<sup>n</sup>-yu, te càchí-yu:

—Ío càhnu cuu Yaá cúú ñàní tnáhá ndī Dàvíí! ;Te Yá Ndiòxí ío na chìndee ñaha-gǎ chí cùu-gǎ Yaá ní tendaha Yá Ndiòxí véxi quide núú-gǎ! ;Te ndéé nchaa sá ío andi na càchí-xi sá ío càhnu cuu-gǎ! —duha càchí-yu.

<sup>10</sup> Te òré cuánguihu Jèsús ñuú Jerusàlén, te nchaa ñáiyu ñuú-á<sup>n</sup> ní ngúita-yu xicuáá-yu, te davá-yu ní ngúita-yu xitnàhá-yu:

—¿Yoo cùu téé-á<sup>n</sup>? —càchí-yu xitnàhá-yu.

<sup>11</sup> Te davá-yu xitnàhá-yu:

—Téé-á<sup>n</sup> cúú-dé Jèsús téé càhá<sup>n</sup> tnúhu Yá Ndiòxí, te cùu-dé téé ñuú Nazàrét ñuú yìndèhu distritú Galileá —càchí-yu xitnàhá-yu.

*Jèsús ñá túú tnàhá iní-gǎ nàcuáa xiquide ñáiyu xitì veñúhu*

(Mr. 11:15-19; Lc. 19:45-48; Jn. 2:13-22)

<sup>12</sup> Te Jèsús cuánguihu-gǎ xitì veñúhu càhnu sá ío cùnuu, te xitì veñúhu-á<sup>n</sup> xìndecu ñáiyu quide ndáhú nàdicó-yu, ndihi ñáiyu xísaa<sup>n</sup>, te nchaá-yu ní queñuhu ñaha Jèsús xii-yu quehé, te ní dándúá-gǎ mèsá nchaa ñáiyu dàma dīhú<sup>n</sup>, ndihi nchaa xilé sácóo nchihí ñáiyu dīco lómá xìndecu xitì veñúhu-á<sup>n</sup>.

<sup>13</sup> Te ní xáha<sup>n</sup>-gǎ xii-yu:

—Núú tütú Yá Ndiòxí càhá<sup>n</sup>-xi nàcuáa ní cáhá<sup>n</sup>-gǎ, te ní cachí-gǎ: “Vehe-í cúú-xi núú càhá<sup>n</sup> ndihi ñaha ñáiyu xii-í”, duha ní cáhá<sup>n</sup>-gǎ càchí-xi núú tütú-gǎ. Dico nchòhó quidé-ndó vèhe-gǎ vehe ñadúhú —càchí-gǎ xǎha<sup>n</sup>-gǎ xii-yu.

<sup>14</sup> Te xía<sup>n</sup> ndécú Jèsús ní quexìo cue téé cuáá ndihi cue téé yacua, te ní quide tátna ñaha-gǎ xii-güedé te ní ndúha-güedé. <sup>15</sup> Te cue dútú cùnùu ndihi cue téé dàcuaha ñaha xii ñáiyu nchaa tnúhu ní chídó tnùní ndī Moisés ní xiní-güedé ní quide Jèsús sá vǎ yóo tnàhí ndàcu cada, te ndèdóho

tucu-güedé níhi xícáhá<sup>n</sup> cue landú xití veñúhu càhnu sá ïo cùnuu-á<sup>n</sup>, te cächí-güexi: “Ío càhnu cuu Yaá cúú ñàní tnáhá ndíi Dàvíí”, cächí-güexi. Te ní cudéé<sup>n</sup>-güedé, <sup>16</sup> te ní xáha<sup>n</sup>-güedé xii Jèsús:

—¿Ndèdóho-n nàcuáa càhá<sup>n</sup> cue landú-á<sup>n</sup> ñǎ? —cächí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gǎ xii-güedé:

—Ndèdóho-í, te nchòhó náa ñá túú dàcuaha-ndo núú tùtú Yǎ Ndiöxí núú càhá<sup>n</sup>-xi cuèndá cue landú-á<sup>n</sup>, te duha cächí-xi:

Yòhó ní quide-n sǎ cuè landú vitna sàdi, ndíhi cue dava-gá landú, chiñuhu ñaha-güexi xii-n nàcuáa tàú-xi cunduu.

Duha cächí-xi núú tùtú-gá —cächí-gá xáha<sup>n</sup>-gǎ xii-güedé.

<sup>17</sup> Te xía<sup>n</sup> ñí dándóo ñaha Jèsús xii-güedé, te ní xica-gá cuáhá<sup>n</sup>-gǎ ñuú Bètaniá, yacá<sup>n</sup> ní xíndecu-gá niú-á<sup>n</sup>.

*Jèsús xáha<sup>n</sup>-gǎ xii yutnu ngüxí sá vǎ cúú<sup>n</sup>-gǎ sávidí-xi*

*(Mr. 11:12-14, 20-26)*

<sup>18</sup> Te nduu tnéé-á<sup>n</sup> nehé-ni cuáhá<sup>n</sup> tucu Jèsús ñuú Jerusálén, te ìchi ñuhu-gá ní xihí-gá docó. <sup>19</sup> Te ní xiní-gá ñ<sup>n</sup> yutnu ngüxí nútn<sup>ñ</sup> ñ<sup>n</sup> xio yuhu ìchi, te ní xica-gá cuáhá<sup>n</sup> ndéhé-gǎ ñuu ndéé sávidí-xi, dico ñá túú ñǎ ndéé chi mee-ni ndàha-xi ndéé. Te ní xáha<sup>n</sup>-gǎ xii yutnu ngüxí-á<sup>n</sup>:

—¿Vitna te vǎ ñ<sup>n</sup> ndùu-gá cuu<sup>n</sup> sávidí-n! —cächí-gá xáha<sup>n</sup>-gǎ xii-xi.

Te òré-ni-á<sup>n</sup> ñí yíchí yutnu ngüxí-á<sup>n</sup>. <sup>20</sup> Te sá dúcá<sup>n</sup> ñí cuu ní xiní cue téé xica cuu ndíhi Jesús, te ïo ní cuñúhu-güedé, te ní xicá<sup>n</sup> tnúhú-güedé núú-gǎ, te xáha<sup>n</sup>-güedé:

—¿Ná cuèndá ndéé dàcá<sup>n</sup> ïo ndíhi ní yíchí yutnu ngüxí-á<sup>n</sup>-í? —cächí-güedé xáha<sup>n</sup>-güedé xii-gá.

<sup>21</sup> Te Jèsús ní xáha<sup>n</sup>-gǎ xii-güedé:

—Na cächí tnúhu ndáá-í xii-ndo sǎ ñuu nchòhó quíndáá ndisa iní-ndó Yǎ Ndiöxí, te vǎ cání ñ<sup>n</sup> cani úú iní-ndó, te ñá díú-ní sǎ ñí quide-í-a ní xiní-ndó ndàcu-ndo cada-ndo,

chi ndéé tándúú-a xocuíñí-xi núú ndécú-xí te núu cuñaha-ndo sǎ xocuíñí-xi te quíhí<sup>n</sup>-xi quée-xi xití lámár. Te ðiu duca<sup>n</sup> càda-xi te núu na quíndáá iní-ndó. <sup>22</sup> Te nchaa sǎ ná càcá<sup>n</sup>-ndó núú Yǎ Ndiöxí òré càhá<sup>n</sup> ndíhi-ndo-gǎ te taxi-gá te núu sàndáá ndisa iní-ndó sǎ táxí-gǎ sǎ xicá<sup>n</sup>-ndó núú-gǎ —cächí-gá xáha<sup>n</sup>-gǎ xii-güedé.

*Jèsús ndécú ndíhi-gá tnúhu ndee ìní*  
*(Mr. 11:27-33; Lc. 20:1-8)*

<sup>23</sup> Te Jèsús cuánguihu-gá xití veñúhu càhnu sá ïo cùnuu danehé-gá ñáyiu, te xía<sup>n</sup> ndécú-gǎ ní quexio cue dútú cúnúu ndíhi cue téé cùu sacuéhé núú ñáyiu israél, te xáha<sup>n</sup>-güedé xii-gá:

—Cuíní-ndí cachí tnúhu-n xii-ndí nása nduu tnúhu ndee ìní ndécú ndíhi-n núu quide-n nándí sǎ quidé-n, ¿te yoo duca<sup>n</sup> ñí taxi tnúhu ndee ìní-á<sup>n</sup> xii-n-í? —cächí-güedé xáha<sup>n</sup>-güedé xii-gá.

<sup>24</sup> Te Jèsús ní xáha<sup>n</sup>-gǎ xii-güedé:

—Yúhú tnàhá-í cuíní-í càcá<sup>n</sup> tnúhu-í ñ<sup>n</sup> sǎ càcá<sup>n</sup> tnúhu-í núú-ndó, te núu na cächí tnúhu-ndo te cachí tnúhu-í xii-ndo yòo ní taxi tnúhu ndee ìní duha quide-í. <sup>25</sup> Te chí cächí tnúhu xii-í yoo ní táuchíú<sup>n</sup> ñí dácuándüte ndíi Juáá ñáyiu, ¿Yá Ndiöxí á<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndíi?, te chí cächí tnúhu —cächí-gá xáha<sup>n</sup>-gǎ xii-güedé.

Te ní ngüíta-güedé xítnàha-güedé:

—¿Nása cúñaha-o? Chi núu na cúñaha-o sǎ Yǎ Ndiöxí ní táuchíú<sup>n</sup> dùca<sup>n</sup> ní quide ndíi Juáá ñá, te quesaha-dé: “¿Ná cuèndá ñá túú ní sàndáá iní-ndó tnúhu ní càhá<sup>n</sup> ndíi vǎí?”, quesaha-dé. <sup>26</sup> Te núu na cúñaha-o sǎ cuè ñáyiu ñuyíú-a ní táuchíú<sup>n</sup> dùca<sup>n</sup> ní quide ndíi ña, te cudéé<sup>n</sup> ñáyiu núú-ó, chi nchaa-yu cächí-yu sǎ Yǎ Ndiöxí ní xáha<sup>n</sup>-gǎ xii ndíi sǎ càhá<sup>n</sup> ndíi tnúhu-gá núú ñáyiu —cächí-güedé xítnàha-güedé.

<sup>27</sup> Te ní xáha<sup>n</sup>-güedé xii Jèsús:

—Ñá túú xiní-ndí yoo ní táuchíú<sup>n</sup> dùca<sup>n</sup> ní dácuándüte ndíi Juáá ñáyiu —cächí-güedé xáha<sup>n</sup>-güedé xii-gá.

Te ní xáha<sup>n</sup>-gǎ xii-güedé:

—Te núu duca<sup>n</sup> te ni yǔhú vá cǎchí tnúhu-í xii-ndo yòo ní taxi tnúhu ndee ìní duha quide-í —cǎchí-gá xǎha<sup>n</sup>-gǎ xii-güedé.

*Cuendá ñ<sup>n</sup> té ndihi úú déhe-dé*

<sup>28</sup> Te Jèsús ní xǎha<sup>n</sup> tucu-gá xii-güedé:

—Na cǎni-í ñ<sup>n</sup> cuendú núú-ndó nǎcuáa tecú tnúni-ndó tnúhu cǎhá<sup>n</sup>-í. ñ<sup>n</sup> té ndècu úú déhe-dé, te ní xǎha<sup>n</sup>-dè xii déhe-dé té sacuéhé-gǎ: “Yòhó déhe-í, véxi-í cǎhá<sup>n</sup> ndàhú-í núú-n núu vá cündèe ìní-n cuǎñundaha ñaha-n xii-í cada chiu<sup>n</sup>-o núú ñí xitu-í yoho yàha stilé”, cǎchí-dé xǎha<sup>n</sup>-dè. <sup>29</sup> Te ní xǎha<sup>n</sup> dèhe-dé xii-dé: “Vá quihí<sup>n</sup>-í cada chiu<sup>n</sup>-í núú chíú<sup>n</sup>-n”, cǎchí-dé xǎha<sup>n</sup>-dè xii tǎtá-dè. Dico cuéé ní nacani ìní-dé te ní sǎhá<sup>n</sup>-dé ní quide chiu<sup>n</sup>-dé núú chíú<sup>n</sup> tǎtá-dè. <sup>30</sup> Te té-á<sup>n</sup> ñí sǎhá<sup>n</sup> tucu-dé ní xǎha<sup>n</sup>-dè xii déhe-dé té lihli-gá núu vá cündèe ìní-dé cuǎñundaha ñaha-dé, te ní xǎha<sup>n</sup> dèhe-dé-á<sup>n</sup> xii-dé: “Cuu cuǎñundaha ñaha-í xii-n”, cǎchí-dé xǎha<sup>n</sup>-dè. Dico ñá túú ní sǎhá<sup>n</sup>-dé cada chiu<sup>n</sup>-dè. <sup>31</sup> Te vitna chí cǎhá<sup>n</sup> núu ndèdacáa cue téé úú-á<sup>n</sup> ñí quide-güedé sǎ cuíni tǎtá-güedé —cǎchí-gá xǎha<sup>n</sup>-gǎ xii-güedé.

Te ní xǎha<sup>n</sup>-güedé xii-gá:

—Téé cùu sacuéhé-gǎ, téé ní cǎhá<sup>n</sup> ndihi-dé díhna —cǎchí-güedé xǎha<sup>n</sup>-güedé xii-gá.

Te Jèsús ní xǎha<sup>n</sup>-gǎ xii-güedé:

—Na cǎchí tnúhu ndáá-í xii-ndo sǎ ncháa cué téé cuihna ìní-xi quide cobrá ñáhá xii ñáyiú cuendá impuèstú, ndihi cue ñáyiú ñíhí xǐndecu ichi díí ìní yáchí-gá ndíhu ndaha ñàha Yá Ndiõxí xii cue téé-á<sup>n</sup> ndihi cue ñáyiú ñíhí-á<sup>n</sup> dàcúxí nchòhó. <sup>32</sup> Chi ndíí Juáa téé ní xóo dacuàndute ñaha xii ñáyiú ní cǎhá<sup>n</sup> ndíí nǎcuáa cadá-yu cundecú-yu, dico nchòhó chí ñá túú cuíni-ndó quíndáa ìní-ndó nǎcuáa ní cǎhá<sup>n</sup> ndíí, dico cue téé cuihna ìní-xi quide cobrá ñáhá xii ñáyiú cuendá impuèstú, ndihi cue ñáyiú ñíhí xǐndecu ichi díí ìní, chí sàndáa ìní-güedé ndíhí-yu tnúhu ní cǎhá<sup>n</sup> ndíí. Te nchòhó cuéi ndèhe-ndo sǎ sàndáa ìní cue ñáyiú-á<sup>n</sup> ncháa

tnúhu ní cǎhá<sup>n</sup> ndíí, dico ñá túú cuíni-ndó ndíxi cuéchi ìní-ndó cuendá ncháa sǎ cuéhé sǎ dúhá quide-ndo cuendá tñi-ndo tnúhu ní cǎhá<sup>n</sup> ndíí —cǎchí-gá xǎha<sup>n</sup>-gǎ xii-güedé.

*Cuendá cue téé cuihna ìní-xi*  
(Mr. 12:1-12; Lc. 20:9-19)

<sup>33</sup> Te xǎha<sup>n</sup> tucu Jesús xii-güedé:

—Cundedóho-ndo na cǎni tucu-í ñgá cuendú núú-ndó cuendá tecú tnúni-ndó tnúhu cǎhá<sup>n</sup>-í. ñ<sup>n</sup> téé ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sǎ vá cúú dàñú, te ní cadúha-dé núú quíhni-dé ndéhé yoho yàha stilé-á<sup>n</sup> òré ná cùu, te ní cadúha-dé ñ<sup>n</sup> xító dùcú<sup>n</sup> núú cáúndòdo cue téé coto ncháa yoho yàha stilé-á<sup>n</sup>.

’Te ní sǎá ñ<sup>n</sup> nduu quèe-dé quíngaca cuu xica-dé te ní dándòo ndaha-dé sǎ ñí xitu-dé-á<sup>n</sup> xii ñ<sup>n</sup> úú cue téé xíní tnáhá ndíhi-dé cuendá cada chiu<sup>n</sup>-güedé, te ní ndatnúhu-güedé sǎ òré ná cúú te cuu cuendá dava-güedé, te duca<sup>n</sup> te ní quee-dé cuáhá<sup>n</sup>-dé. <sup>34</sup> Te sǎtá ñí sǎá nduu ñí cuu ndéhé ncháa yoho yàha stilé sǎ ñí xitu-dé-á<sup>n</sup>, te ní xǎha<sup>n</sup>-dè xii ñ<sup>n</sup> úú cue téé xínu cuechi núú-dé: “Chí cuáhá<sup>n</sup> cǎcá<sup>n</sup>-ndó sǎ cúú cuendá-í núú cué téé ní dándòo ndàha-í ncháa yoho yàha stilé sǎ ñí xitu-í”, cǎchí-dé xǎha<sup>n</sup>-dè xii-güedé.

<sup>35</sup> Te cue téé ní dándòo ndaha-dé ncháa yoho yàha stilé sǎ ñí xitu-dé-á<sup>n</sup> ñí tñi-güedé cue téé xínu cuechi núú-dé-á<sup>n</sup>, te ñ<sup>n</sup>-dé ní cani-güedé, te ñ<sup>n</sup>-dé ní sañi ñaha-güedé, te ñgá-dé ní sǎñaha-güedé yúú. <sup>36</sup> Te téé ní xitu yoho yàha stilé-á<sup>n</sup> ñí tendaha-dé tñí-gá tucu cue téé xínu cuechi núú-dé cuáhá<sup>n</sup>-güedé cuángacá<sup>n</sup>-güedé sǎ cúú cuendá-dé núú cué téé ní dándòo ndaha-dé sǎ ñí xitu-dé-á<sup>n</sup>, dico ñí-duca<sup>n</sup> ñí quide ñaha cué téé-á<sup>n</sup> xii cue téé xínu cuechi núú-dé-á<sup>n</sup>.

<sup>37</sup> Te téé cùu xítóhó ncháa yoho yàha stilé-á<sup>n</sup> ñí sani ìní-dé: “Váha-gá núu tendaha-í déhe-í-a núhú-dé, chí òré quíni ñáhá-güedé xii-dé te canehe-güedé sǎ yíñúhu núú-dé”, duha ní sani ìní-dé. Te ní tendaha-dé déhe-dé cuánuhú-dé. <sup>38</sup> Dico òré ní xíní cue téé quide chiu<sup>n</sup>-á<sup>n</sup> dèhe

tée cùu xítohó nchaa yoho yàha stilé-án, te ní xítñaha-güedé: “Tée-án tée véxi nduu táhú ñuhu-a ndihí nchaa sá cáá núú-xi, dico cahni-o-dé te mee-o ndùu táhú-ó sá ndúú táhú-dé”, cächí-güedé xítñaha-güedé.

<sup>39</sup> Te ní tñi-güedé tée-án te ndèca ñaha-güedé cuáhán ñi xio yuhu ñuhu-án, te ní sahani ñaha-güedé xii-dé —duha cuáhán cuèndú ní cani Jèsús núú-güedé.

<sup>40</sup> Te ní xáha<sup>n</sup> tucu Jèsús xii-güedé:

—¿Te nchòhó sa cùtnuní iní-ndó nãsa cada ñaha xítohó ñuhu-án xii cue tée-án ñá? —cächí-gá xáha<sup>n</sup>-gá xii-güedé.

<sup>41</sup> Te cue tée-án ñi xáha<sup>n</sup>-güedé xii-gá:

—Tée cùu xítohó ñuhu-án nùhú-dé, te vá cùndàhú iní-dé cue tée cuihna iní-xi-án chi cahni ñaha-dé xii-güedé, te dàndóo ndaha-dé ñuhu-dé xii cue tée cùtnuní iní-dé cada ndáá cuèndá ndi tnahá cúú<sup>n</sup> ndéhé nchaa yoho yàha stilé sá ñi xitu-dé-án te cuáñaha-güedé xii-dé sá cúú cuèndá-dé —cächí-güedé xáha<sup>n</sup>-güedé xii-gá.

<sup>42</sup> Te Jèsús ní xáha<sup>n</sup>-gá xii-güedé:

—Te nchòhó, náa ñá túú dàcuaha-ndo núú tütú Yá Ndiòxí núú cächí-xi:

Yúú sá ñi dáquéé tihú cue tée dàcaa vehe, ní cuu-xi yúú cùnùu vitna.

Chi mee Dütú Ndiòxí duca<sup>n</sup> ñi cächí-gá cunduu, te cùu-xi ñi sá ño cùñuhu-o vitna.

Duha cächí-xi núú tütú-gá. <sup>43</sup> Te duha cáhán-í chi Yá Ndiòxí cada-gá te vá ñihí-ndó tñuhu ndee iní cundecu ndihí-ndo cuèndá ndihu ndaha ñaha-gá xii-ndo, chi tñuhu ndee iní-án cundecu ndihí cue ñáyiu cada ndáá cuèndá ndihu ndaha ñaha Yá Ndiòxí xii-yu. <sup>44</sup> Te yúú sá cùnùu-án cúú-xi yùhú, te nchaa ñáyiu ñá túú tñi tñuhu-í cùu-yu dàtná ñi ñáyiu ndúá núú yúú-án te tñahnú duú<sup>n</sup>-yu, àdi núu na tàú ñáhá-xi xii-yu, te dacächi duu<sup>n</sup> ñaha-xi —cächí-gá xáha<sup>n</sup>-gá xii-güedé.

<sup>45</sup> Te sá dúcá<sup>n</sup> ndùu cuèndú ní cani Jèsús te cue tée cùu dütú cùnùu-án, ndihí cue tée cùu fariséú ní cutnùní iní-güedé sá cuèndá-güedé

ní cáhán-gá. <sup>46</sup> Te ní cuiní-güedé tñi ñaha-güedé xii-gá òré-án dico ñá túú ní cùu-güedé, chi ní yùhú-güedé cue ñáyiu, chi ní cutnùní iní-yu sá cúú-gá ñi tée cáhán tñuhu Yá Ndiòxí.

## 22

### *Cuèndá ñi vico tñándaha*

<sup>1</sup> Te Jèsús ní ngüíta tucu-gá cáni-gá ingá cuèndú núú-güedé, te xáha<sup>n</sup>-gá:

<sup>2</sup> —Na cànì tucu-í ingá cuèndú núú-ndó cuèndá tecú tñuní-ndó nàcuáa cada-xi òré ndihu ndaha ñaha Yá Ndiòxí xii ñáyiu. ñi tée yìndaha ñaha xii ñáyiu ní quide-dé ñi vico ní dàtnándaha-dé déhe ducu<sup>n</sup>-dé. <sup>3</sup> Te ní tendaha-dé cue tée xinu cuechi núú-dé cuáhán-güedé cuàngana-güedé cue ñáyiu sa ní cáhán-dé cuhu<sup>n</sup> vico,

dico ñáyiu-án ñá túú ní cuiní-yu quíhí<sup>n</sup>-yu. <sup>4</sup> Te ní xáha<sup>n</sup> tucu-dé xii dáva-gá cue tée xinu cuechi núú-dé: “Quíhí<sup>n</sup>-ndó cùñaha-ndo xii cue ñáyiu sa ní cáhán-í cuhu<sup>n</sup> vico sá sá ní quide túha-í sá cáxi-yu, te sa ní sahani-í ndicutu ndihí nchaa dáva-gá quiti ní dánúcuñhu-í, te nchaa sa ní quide túha-í, te na quixí-yu cuhú<sup>n</sup>-yu vico cächí-í cùñaha-ndo”, cächí-dé xáha<sup>n</sup>-dé xii cue tée xinu cuechi núú-dé-án. <sup>5</sup> Dico ñi ñi ñáyiu ní cáhán-dé-án ñá túú ní cuiní-yu quíhí<sup>n</sup>-yu cuhú<sup>n</sup>-yu vico. Chi ñi-yu ní sáhán-yu ní quide chiú<sup>n</sup>-yu núú ñúhú-yu, te ingá-yu ní sáhán-yu ní nadicó-yu núu nándi cùu ndáhú quidé-yu. <sup>6</sup> Te dáva-gá-yu ní tñi-yu dáva cue tée xinu cuechi núú tée quide vico-án, te ní canihá-yu ndéé ní sahani ñáhá-yu xii-güedé. <sup>7</sup> Te tée yìndaha ñaha xii ñáyiu quide vico-án ñi cudéé<sup>n</sup> víhí-dé sá dúcá<sup>n</sup> ñi quidé-yu, te ní tendaha-dé cue sandádú-dé ní sáhán-güedé ní sahani-güedé cue ñáyiu duca<sup>n</sup> ñi quide-án, te ní sahani-güedé nchaa vehe cãa ñuú-yu. <sup>8</sup> Te sá tá dúcá<sup>n</sup> te ní xáha<sup>n</sup>-dé xii dáva-gá cue tée xinu cuechi núú-dé: “Nchaa sa ndècu túha, te cue ñáyiu ní cáhán-í cuhu<sup>n</sup> vico-a ni cùu ñá túú-gá tàú-yu sá cùhú<sup>n</sup>-yu. <sup>9</sup> Te chí cuáhán ndèni ní cuu te cáhán-ndó nchaa



ñáyiú na nánihí-ndó ichi na quixí-yu cuhú<sup>n</sup>-yu vico-a”, cächí-dé xǎha<sup>n</sup>-dë xii-güedé. <sup>10</sup> Te cue téé xínu cuechi-án<sup>n</sup> nǐ quee-güedé cuáhá<sup>n</sup>-güedé, te ní cáhá<sup>n</sup>-güedé nchaa ñáyiú ní naníhí-güedé ichi, te cuéi ñáyiú váha iní-xi, te cuéi ñáyiú cuihna iní-xi, te ní chítŷ-yu núú cúú vico-án<sup>n</sup>.

<sup>11</sup> Te sáta dúcá<sup>n</sup> te téé yíndaha ñáyiú quide vico-án<sup>n</sup> nǐ quíhu-dé xítí vehe ní xíndéhé-dë cue ñáyiú ñùhu vico-án<sup>n</sup>, te ní xíní-dé ì<sup>n</sup> téé ñùtnahá tnuú-yu te ñá túú càa dóó-dë dàtná cáá dǒo níhnú cué ñáyiú ñùhu vico-án<sup>n</sup>. <sup>12</sup> Te ní xáha<sup>n</sup>-dë xii téé-án<sup>n</sup>: “¿Táta, nása ní cuu cuánguihu-ǒ iha, te ñá túú càa dóó-ñ dàtná cáá dǒo níhnú cué ñáyiú ñùhu vico tñándaha-i?”, cächí-dé xǎha<sup>n</sup>-dë xii téé-án<sup>n</sup>. Dico téé-án<sup>n</sup> ñà túú ní ñíhí-dë tñúhu cáhá<sup>n</sup>-dë. <sup>13</sup> Te téé yíndaha ñáyiú quide vico-án<sup>n</sup> nǐ xáha<sup>n</sup>-dë xii cue ñáyiú xínu cuechi núú mèsá: “Chí tñí<sup>n</sup> tée-án<sup>n</sup> te dacùtu-ndo-dé, te queñuhu-ndo-dë ná quíhí<sup>n</sup>-dé cundecu-dé ì<sup>n</sup> xichi núú néé nŷú ïo ndoho-dé, te yacá<sup>n</sup> ïo ndáhyú-dé te dìcǒ rúhñú-nǎ cuu núhu-dé sá sàtú iní-dé sá ndóhó-dë”, cächí-dé xǎha<sup>n</sup>-dë xii cue ñáyiú xínu cuechi núú mèsá-án<sup>n</sup>. <sup>14</sup> Te duha ndúu cuendú cáhá<sup>n</sup>-í chi ïo cuéhé ñáyiú cáhá<sup>n</sup> ñáhá Yǎ Ndiǒxí xii-yu, dico sacú-ni-yu nduu táhŷ-yu cundecú-yu ndíhi-gá —cächí-gá xǎha<sup>n</sup>-gǎ xii-güedé.

#### *Cuendá impuèstú*

(Mr. 12:13-17; Lc. 20:20-26)

<sup>15</sup> Te cue téé cùu fariséú ní sáhá<sup>n</sup>-güedé ì<sup>n</sup> xichi níndatnúhu-güedé nàcuáa cada-güedé datícánuu-güedé Jèsús núú tñúhu cáhá<sup>n</sup>-gá cuendá duca<sup>n</sup> ñíhí-güedé nàcuáa cada-güedé cacá<sup>n</sup> cuéchi-güedé cuendá-gá. <sup>16</sup> Te ní tendaha-güedé ì<sup>n</sup> ŷú cue téé cùndíhi-güedé, ndíhi cue téé cùndíhi té Hèrodés cuáhá<sup>n</sup>-güedé núú ndécú Jèsús. Te òré ní quexio-güedé núú ndécú-gǎ, te ní xáha<sup>n</sup>-güedé xii-gá:

—Mèstrú, ñíhí-ndí tñúhu sá ïo ndáá cáhá<sup>n</sup>-n, te cáhá<sup>n</sup> ndáá-n nàcuáa cáhá<sup>n</sup> Yǎ Ndiǒxí cundecu-o ñùyíú-a, te cuéi ndëda-ni càa ñáyiú ì<sup>n</sup>-ni

cáhá<sup>n</sup>-n ndíhí-yu chi ñá túú quide cuendá-n cuéi ná ñáyiú cùú-yu. <sup>17</sup> Te cachí tñúhu xii-ndí, núu váha-ni quide-ndí sá chǎhu-ndí té Cèsár téé ïo cùnuu cuendá impuèstú án<sup>n</sup> ñáhá —cächí-güedé xǎha<sup>n</sup>-güedé xii-gá.

<sup>18</sup> Dico Jèsús ní cutnùní iní-gá sá xító ndéé ñáhá-güedé xii-gá, núu ní xáha<sup>n</sup>-gǎ xii-güedé:

—Nchòhó cue téé dándahú méé-xí sǎ quidé ndáá te ñá ndáá sá quidé ndáá-ndó, ¿ná cuendá xító ndéé ñáhá-ndó xii-í? <sup>19</sup> Chí dánèhé ñáhá xii-í ì<sup>n</sup> díhú<sup>n</sup> sǎ chǎhu-ndo cuendá impuèstú núu nása càa —cachí-gá xǎha<sup>n</sup>-gǎ xii-güedé.

Te ní dánèhé ñáhá-güedé xii-gá ì<sup>n</sup> díhú<sup>n</sup> sǎ nání dènariú. <sup>20</sup> Te òré ní xíní-gá díhú<sup>n</sup>-ǎ<sup>n</sup> te ní xicá<sup>n</sup> tñúhú-gǎ núú-güedé, te xǎha<sup>n</sup>-gǎ:

—Chí cächí tñúhu yoo núú-xi ndéé ndíhi yoo dù-xi ndéé —cächí-gá xǎha<sup>n</sup>-gǎ xii-güedé.

<sup>21</sup> Te ní xáha<sup>n</sup>-güedé xii-gá:

—Núú tē Cèsár ndéé ndíhi dù-dé —cächí-güedé xǎha<sup>n</sup>-güedé xii-gá.

Te Jèsús ní xáha<sup>n</sup>-gǎ xii-güedé:

—Te núu duca<sup>n</sup> te chí nàcuáha té Cèsár sá cúú cuendá-dé, te sá cúú cuendá méé Yǎ Ndiǒxí te xíǎ<sup>n</sup> nàcuáha-ndo-gǎ —cächí-gá xǎha<sup>n</sup>-gǎ xii-güedé.

<sup>22</sup> Te cue téé-án<sup>n</sup> ïo ní cuñúhu-güedé sá dúcá<sup>n</sup> nǐ cáhá<sup>n</sup>-gá, te ní natnì-güedé ichi cuánuhú-güedé.

#### *Cuendá cue ñáyiú ndoto*

(Mr. 12:18-27; Lc. 20:27-40)

<sup>23</sup> Te diu-ni nduu-ǎ<sup>n</sup> nǐ quexio ì<sup>n</sup> úú cue téé cùu saducéú núú ndécú Jèsús. Te cue téé-án<sup>n</sup> ñà túú sàndáá iní-güedé sá ndótó cué ñáyiú ní xíhí, te ní xáha<sup>n</sup>-güedé xii-gá:

<sup>24</sup> —Mèstrú, ndíi Moisés ní cachí ndíi sá nŷu ì<sup>n</sup> téé ndèçu ñadíhí-xi cuú-dé te quendóo ñadíhí-dé, te núu ñá túú dèhe-dé ní xǒo ndíhi-a<sup>n</sup> te téé cùu ñaní-dé naquehe<sup>n</sup>-dé ñaha ní quendóo quèé-án<sup>n</sup> cuendá coo déhe-dé ndíhi-a<sup>n</sup> cuendá ñaní-dé téé ní xíhí-án<sup>n</sup>.

<sup>25</sup> Te ñuu-ndí-a ní xíndecu úsá tñàhá cue téé mee-ni ndí ñaní-güedé. Te téé díhna ní níhí ñadíhí-dé te ñá

túú ní cùdíi-dé cundecu-dé chi ní xíhí-dé, te ni ñ<sup>n</sup> déhe-dé ñá túú ní xõ ndihí ñadìhí-dé-á<sup>n</sup>. Te téé cùu uú ní nàquehe<sup>n</sup>-dé ñaha ní quendóo quèé-á<sup>n</sup>.  
 26 Dico ní xíhí tucu-dé, te ni ñ<sup>n</sup> tucu déhe-dé ñá túú ní xõ ndihí ñaha-á<sup>n</sup>, te ñi-ni duca<sup>n</sup> ní yáha téé cùu uní, te ní xínu ndí ùsá-güedé ní cándeca ñaha-güedé xii ñaha-á<sup>n</sup> dico ñi-ni duca<sup>n</sup> ní xíhí-güedé. 27 Te ndéé núú ní ndihí-ná te ní xíhí tnàhá ñadìhí-á<sup>n</sup>.  
 28 Te na sàá nduu ndòto-güedé ndihí ñaha-á<sup>n</sup>, ¿te ndèdacàa-güedé ñadìhí-güedé cuu-a<sup>n</sup>-i? Chi ndí ùsá-güedé ní cándeca ñaha-güedé xii-a<sup>n</sup> —càchí-güedé xáha<sup>n</sup>-güedé xii-gá.

29 Te Jèsús ní xáha<sup>n</sup>-gã xii-güedé:

—Ní xíta nchòhó tnúhu càhá<sup>n</sup>-ndó, chi ñá túú xíní-ndó nàcuáa càhá<sup>n</sup> Yá Ndiòxí núú tütú-gá, te ni ñá túú cùtnuní iní-ndó sã díú-gã ndácú-gã quidé-gã nchaandi túhú sã vãha. 30 Te na càchí tnúhu-í xii-ndo sã òré ná sàá nduu ndòto nchaa ñáyiú ní xíhí, te dàvá-á<sup>n</sup> vã yõ-gá dasa<sup>n</sup> dèhe yoco-xi chi vá yõ-gá candeca tnàha, chi cuu-ná-yu dàtná cue espíritú xínú cuèchi núú Yá Ndiòxí. 31 ¿Te náa ñá túú quide cuendá-ndó nàcuáa càhá<sup>n</sup> Yá Ndiòxí núú tütú-gá núú càhá<sup>n</sup>-gá cuendá cue ñáyiú ní xíhí-á<sup>n</sup>? Te duha càchí-gá: 32 “Yúhú cùu-í Ndiòxí tẽ Abrahám, ndihí té Isàác, ndihí té Jácób”, duha càchí-gá núú tütú-gá. Te cue téé-á<sup>n</sup> chi cuèi ní xíhí-güedé núú ñùyíú-a, dico sã cúu-xí Yá Ndiòxí chi ndècu vívú-ni-güedé. Chi ñi-ni gá cúu-gã Ndiòxí mee-ni cuè ñáyiú xíndecu vívú, te ñá túú cùu-gá Ndiòxí cue ñáyiú ñá túú ndècu vívú —càchí-gá xáha<sup>n</sup>-gã xii-güedé.

33 Te sã dúcá<sup>n</sup> ní càhá<sup>n</sup>-gá ní xí-gá cue téé-á<sup>n</sup>, te ío ní cuñúhu nchaa ñáyiú cuendá sã ío váha nduu tnúhu ní càhá<sup>n</sup>-gá.

*Tnúhu sã ío-gá cúnùu*  
 (Mr. 12:28-34)

34 Te cue téé cùu fariséú ní xíní-güedé ní sadí Jèsús yuhu cue téé cùu saducéú, chi ñá túú ní ñíhí-gã-güedé tnúhu cúñaha-güedé

xii-gá, te cue téé cùu fariséú-á<sup>n</sup> ní nat-acá-güedé te cuáhá<sup>n</sup>-güedé núú ndécú Jèsús. 35 Te ñ<sup>n</sup> téé cùu fariséú-á<sup>n</sup> ío váha cùtnuní iní-dé nàcuáa nduu nchaa tnúhu ní chídó tnùní ndíi Moisés te xito ndéé-dé Jèsús, te xáha<sup>n</sup>-dẽ xii-gá:

36 —Mèstrú, cachí tnúhu ndèdacàa tnúhu sã ní chídó tnùní ndíi Moisés ío-gá cúnùu cada-o —cachí-dé xáha<sup>n</sup>-dẽ xii-gá.

37 Te Jèsús ní xáha<sup>n</sup>-gã xii-dé:

—Duha càhá<sup>n</sup> tnúhu sã ío-gá cúnùu: “Cuu iní-ndó Dütú Ndiòxí Yáa cúu Ndiòxí-ndó ñi yuhu ñi iní-ndó, te caní iní-ndó càda-ndo datná cuíní mée-gã, te mee-ni tnúhu váha caní iní-ndó nàcuáa cuu víi cuu váha-ndo núú-gã”, 38 duha càhá<sup>n</sup> tnúhu sã ío-gá cúnùu. 39 Te duha càhá<sup>n</sup> tucu ingá tnúhu cùu uú sã ío cúnùu, te sa yatni ñ<sup>n</sup>-ni cùu-xi ndihí tnúhu díhna nuu, te càchí-xi: “Cuu iní-ndó tnàha ñáyiú-ndo dàtná cúu iní-ndó mée-ndo”, duha càhá<sup>n</sup> tnúhu cùu uú-á<sup>n</sup>. 40 Te cuendá úú tnúhu-a ní cáa nchaa tnúhu ní càhá<sup>n</sup> ndíi Moisés nàcuáa cada ñáyiú, te ñi-ni cuendá úú tnúhu-a ní cáa tnúhu ní càhá<sup>n</sup> nchaa cue téé ní xóo càhá<sup>n</sup> tnúhu Yá Ndiòxí ndéé sanaha —càchí-gá xáha<sup>n</sup>-gã xii-güedé.

*Yoo cùu Xítohó Jesucristú*  
 (Mr. 12:35-37; Lc. 20:41-44)

41 Te ndècu duca<sup>n</sup>-ni cue téé cùu fariséú núú ndécú Jèsús. 42 Te ní xícá<sup>n</sup> tnúhú-gã núú-güedé, te xáha<sup>n</sup>-gã:

—Cuíní-í cachí tnúhu-ndo yòo déhe-xi cùu Cristú Yáa tendaha Yá Ndiòxí quixi ñuyíú-a —càchí-gá xáha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Déhe ndíi Dàvíí cúu Yáa-á<sup>n</sup> —càchí-güedé xáha<sup>n</sup>-güedé xii-gá.

43 Te Jèsús ní xáha<sup>n</sup>-gã xii-güedé:

—¿Te nása càchí-tu-ndo sã dèhe ndíi Dàvíí cúu Cristú Yáa tendaha Yá Ndiòxí quixi ñuyíú-a, te mee ndíi Dàvíí-á<sup>n</sup> ní dácáhu iní ñáhá Espíritú Yá Ndiòxí xii ndíi, te ní cachí ndíi sã Crístú Yáa tendaha Yá Ndiòxí quixi ñuyíú-a cùu-gá Xítohó ndíi? Te duha ní cachí ndíi:

44 Dütú Ndiòxí ní xáha<sup>n</sup>-gã xii Yáa cúu Xítohó-í:

“Ngóo xio cùha-í, te yúhu cada-í te nchaa sá cúu ũhú iní ñáhá xii-n canehe-xi sá yíñuhu núu-n.”

Duha ní xáha<sup>n</sup> Dütú Ndiöxí xii Yaá cúu Xítohó-í, càchí ndíi. <sup>45</sup> ¿Te nása cùu Cristú déhe ndíi Dàvií, te mee ndíi ní cachí ndíi sá cúu-gã Xítohó ndíi? — càchí Jèsús xáha<sup>n</sup>-gã xii-güedé.

<sup>46</sup> Te ni ññ-güedé ñá túu-gã ní ñhí-güedé tnúhu cúñaha-güedé xii-gã. Te ndéé nduu-ã<sup>n</sup> ñá túu-gã ní cùyi-güedé ná tnúhu cáca<sup>n</sup> tnúhú-güedé núu-gã.

## 23

*Jèsús càhá<sup>n</sup>-gã cuendá cue téé cùu fariséu ndíi cuendá cue téé dàcuaha ñaha xii ñáyiu*

(Mr. 12:38-40; Lc. 11:37-54; 20:45-47)

<sup>1</sup> Te Jèsús ní càhá<sup>n</sup> ndodo-gã núu nchaa ñáyiu, ndíi núu cuè téé xica cuu ndíi-gã, te xáha<sup>n</sup>-gã:

<sup>2</sup> —Cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndíi cue téé cùu fariséu ndécú ndíi-güedé tnúhu ndee iní càhá<sup>n</sup>-güedé nchaa tnúhu sá ñí chídó tnùní ndíi Moisés-á<sup>n</sup>. <sup>3</sup> Te cada-ndo nàcuáa dànehé ñáhá-güedé xii-ndo, dico vá cáda-ndó dàtná xíquide-güedé, chi tucu ndúu tnúhu càhá<sup>n</sup>-güedé, te tucu quide-güedé. <sup>4</sup> Te quide-güedé dàtná quidé ñáyiu dàcuidó ññ tñaha ñáyiu-xí ññ sá ïo véé, te mée-yu ni lùha ñá túu cuíní-yu cuidó-yu. Te duca<sup>n</sup> sãtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ni lùha ñá túu cuíní-güedé cada-güedé nàcuáa dànehé ñáhá-güedé xii-ndo. <sup>5</sup> Te mee-ni ndúcu-güedé nàcuáa quide-güedé cuendá quiní ñáyiu sá ïo cùu cahnu-güedé. Te ndéé xindá sá ndéé ññ ũú tnúhu Yá Ndiöxí tñeé-güedé ndíi ndaha-güedé, te tñahá iní-güedé sá ïo-gã cunduu quéhé<sup>n</sup> xindá-á<sup>n</sup> dàcúxí xindá dava-gã ñáyiu. Te tñahá tucu iní-güedé sá ïo-gã cunduu nani núu dõó sácúñhu-güedé dàcúxí dõó sácúñhu dava-gã-yu. <sup>6</sup> Te ndíi tñahá

òré sácõo vico, òré quíhu-güedé mèsá caxi-güedé te ïo-gã cúdíi iní-güedé cunucóo-güedé núu xilé núu sácõo cue téé cùnuu-gã, te ññ-ni duca<sup>n</sup> quide tucu-güedé cuéi xití veñúhu. <sup>7</sup> Te nchaa núu xicá cùu-güedé cuíní-güedé sá ndíi tnúhu yíñuhu càhá<sup>n</sup> ndíi ñaha ñáyiu xii-güedé, te cuíní tucu-güedé sá cùñahá-yu xii-güedé mèstrú.

<sup>8</sup> 'Dico nchòhó vá cùñaha-ndo xii ñáyiu sá cùñahá-yu mèstrú xii-ndo, chi nchòhó ññ-ni cùu-ndo ndecu-ndo, chi duca<sup>n</sup> ññ-dii-ni yúhu Yaá ní tendaha Yá Ndiöxí véxi ñuyíu-a cùu-í Mèstrú ndécú ndíi ñaha-í xii-ndo. <sup>9</sup> Te ññ-dii-ni Dütú Ndiöxí Yaá ndécú àndúu cuu-gã Tãtã-ndó, núu xiã<sup>n</sup> vá càhá<sup>n</sup>-ndó sã dàva cue téé ñuyíu-a cùu-güedé tãtã-ndó. <sup>10</sup> Te ni vá cání iní-ndó càda-ndo nacuáa càhá<sup>n</sup> ñáyiu sá cùnùu-ndo, chi ññ-dii-ni yúhu Cristú Yaá ní tendaha Yá Ndiöxí véxi ñuyíu-a cùnuu-í. <sup>11</sup> Te ñáyiu ïo-gã cùnùu ndecu ndíi-ndo, ñáyiu-á<sup>n</sup> cúu-yu ñáyiu xinu cuechi núu-ndó. <sup>12</sup> Te nchaa ñáyiu quide cahnu mee-xi ñáyiu-á<sup>n</sup> vá cúu-yu ñáyiu cùnuu, te nchaa ñáyiu ñá túu quide cahnu mee-xi ñáyiu-á<sup>n</sup> cùnùu-yu.

<sup>13</sup> Te nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndíi nchòhó cue téé cùu fariséu, cùu-ndo cue téé ïo dàndahú mée-xí sã quidé ndãá te ñá ndãá sã quidé ndãá-ndó, te ndáhú ní cuu-ndo chi sãdí-ndó ìchi ñáyiu ñá dáñá-ndó ndíhu ndaha ñaha Yá Ndiöxí xií-yu, te ni mée-ndo ñá túu quide-ndo nacuáa ndíhu ndaha ñaha-gã xii-ndo, te ni dàva-gã cue ñáyiu cuíní sá ndíhu ndaha ñaha-gã xií-yu ñá dáñá-ndó.

<sup>14</sup> Te nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndíi nchòhó cue téé cùu fariséu, cúu-ndó cuè téé ïo dàndahú mée-xí sã quidé ndãá te ñá ndãá sã quidé ndãá-ndó, te ndáhú ní cuu-ndo chi quèndé-ndó véhe cue ñáyiu quèé, te ïo naha càhá<sup>n</sup> ndíi-ndo Yá Ndiöxí cuendá cuíní-ndó sã vá yõo cutnùní iní-xi nàcuáa quide-ndo. Te sá dúcã<sup>n</sup>

quide-ndo te ío-gá ndoho-ndo nõú ùhú núú ndàhú dàcúúxí dàva-gá ñáiyu.

15 'Te nchòhó cue tée dàcuaha ñaha xii ñáiyu nchaa tnúhu ní chídó tnùnì ndíi Moisés, ndihì nchòhó cue tée cùu fariséu, cúu-ndó cuè tée ío dándahú méé-xí sã quidé ndää te ñá ndää sã quidé ndää-ndó, te ndàhú ní cuu-ndo chi sàhni iní-ndó cuáhá-ndó ndèni ní cuu dàçahá-ndó ñáiyu cuendá cuiní-ndó tñi-yu ichi ndècu-ndo. Te òré ná xñu iní-yu tñi-yu ichi ndècu-ndo-án te uu-gá cuíta nihnú-yu dàcúúxí mèe-ndo.

16 'Te nchòhó cúu-ndó dàtná cue ñáiyu cuàá, chi ñá cùtnùnì iní-ndó nàcuáa canu ichi-ndo ñáiyu, te ndàhú ní cuu-ndo chi càchí-ndó: "Íñ ñáiyu na càcunehe veñúhu càhnu sã ío cùnunu òré cuiní-yu cutnùnì iní tnàha ñáiyú-yu sã ndää cadá-yu ìñ sã sání iní-yu cadá-yu, te vã cúu cuèchi xií-yu cuèi vã cádá-yu. Dico núu na càcu nehé-yu díhú cuáán yíhí xítí veñúhu-án te cuu cuèchi xií-yu te núu vã cádá-yu sã ñi cachí-yu cadá-yu", duha càchí-ndó.

17 ;Nchòhó cúu-ndó cuè tée ío ñi ñi dñquí-xi, te cùu-ndo datná cue ñáiyu cuàá chi ñá tècú tnùnì-ndó! Te vã càchí-ndó sã ío-gá cùnunu díhú cuáán dàcúúxí veñúhu, chi ñi cuendá veñúhu-án ñi cuu íi díhú cuáán-án.

18 Te càchí tucu-ndo: "Íñ ñáiyu na càcunehe xító núú sácódó sã ndúú tãhú Yã Ndiõxí òré cuiní-yu cutnùnì iní tnàha ñáiyú-yu sã ndää cadá-yu ìñ sã sání iní-yu cadá-yu, te vã cúu cuèchi xií-yu cuèi vã cádá-yu, dico núu na càcu nehé-yu sã ndúú tãhú Yã Ndiõxí yódó nõú xító-án te cuu cuèchi xií-yu te núu vã cádá-yu sã ñi sani iní-yu cadá-yu", duha càchí-ndó.

19 ;Te cùu-ndo cue tée ío ñi ñi dñquí-xi, te cùu-ndo datná cue ñáiyu cuàá chi ñá tècú tnùnì-ndó! Te vã cánì iní-ndó sã ío-gá nándihì sã ndúú tãhú Yã Ndiõxí sácódó nõú xító núú sácódó tnàhí sã ndúú tãhú-gã-án dàcúúxí mèe xító-án.

20 Chi nchaa ñáiyu duca càcunehe xító-án, te tnàhá-ni sã yódó nõú-xi càcu nehé-yu òré duca càhá-yu. 21 Te nchaa ñáiyu duca

càcunehe veñúhu càhnu sã ío cùnunu te ñá díú mèe-ni veñúhu càcu nehé-yu òré duca càhá-yu, chi tnàhá-ni Yã Ndiõxí Yaá cúu cuendá veñúhu-án cãcú nehé-yu òré duca càhá-yu.

22 Te nchaa ñáiyu càcunehe andiu cuendá cutnùnì iní tnàha ñáiyú-yu sã ndää cadá-yu ìñ sã sání iní-yu cadá-yu, te ñá díú mèe-ni andiu cacu nehé-yu chi tnàhá-ni núu núcõo Yã Ndiõxí táxí tnùnì-gá cãcú nehé-yu òré duca càhá-yu, te tnàhá méé-gã cãcú nehé-yu òré duca càhá-yu.

23 'Te nchòhó cue tée dàcuaha ñaha xii ñáiyu nchaa tnúhu ní chídó tnùnì ndíi Moisés, ndihì nchòhó cue tée cùu fariséu, cúu-ndó cuè tée ío dándahú méé-xí sã quidé ndää te ñá ndää sã quidé ndää-ndó. Te cuèi núu ùxí xichi yúcú mèntá ñihí-ndó, te sãñaha-ndo ìñ xichi xii Yã Ndiõxí, te ñi duca quide-ndo yúcú nání ànís, ndihì yúcú nání còminú, dico ndàhú ní cuu-ndo chi ñá túú quide cuendá-ndó nàcuáa càhá nchaa tnúhu sã ío-gá cùnunu sanu ichi ñaha xii-ndo, te tnúhu-án càchí-xi sã ío xini ñuhu-xi cada ndää-ndó cùndecu-ndo, te cundàhú iní-ndó cuè tnàha ñáiyu-ndo, te quindää iní-ndó Yã Ndiõxí, te cada-ndo nchaa nàcuáa ndúu tnúhu càhá-ndó, te nchaa tnúhu-án cúu-xi tnúhu sã ío cùnunu xini ñuhu-xi cada-ndo nàcuáa càhá-xi, dico vã dáñá ndèé-ndó cada-ndo nchaa dava-gá nàcuáa càhá tnúhu sã sánú ichi ñaha xii-ndo. 24 ;Te nchòhó cúu-ndó dàtná cue ñáiyu cuàá, chi ñá túú cùtnùnì iní-ndó nàcuáa canu ichi-ndo ñáiyu, chi quide cuendá-ndó mèe-ni nchaa tnúhu sã ñá túú ío cùnunu, dico nchaa tnúhu sã ío-gá cùnunu xini ñuhu-xi cada cuendá-ndó ñá túú quide cuendá-ndó!

25 'Te nchòhó cue tée dàcuaha ñaha xii ñáiyu nchaa tnúhu ní chídó tnùnì ndíi Moisés, ndihì nchòhó cue tée cùu fariséu, cùu-ndo cue tée ío dándahú méé-xí sã quidé ndää te ñá ndää sã quidé ndää-ndó. Te ndàhú ní cuu-ndo chi cùu-ndo datná cue ñáiyu nàquete sátá-ni tàsá ndihì sátá-ni cõhó te xítí-xi càndehe caduha-ni. Te duca sãtnahá-xi cùu-ndo chi mèe-ni sã



ndécú ndìhi tnahá ñáyi-ndo ñuhu iní-ndó, te nándi dándahú-ndó-yu te quèhe<sup>n</sup>-ndo sá ndécú ndìhí-yu. <sup>26</sup> Te nchòhó cue téé cùu fariséu, cúu-ndó dàtná cue ñáyi cuàá, chí ñá túú cùtnuní iní-ndó nàcuáa ndùu sá quidé-ndó. Te ío xìni ñuhu-xì sá cáda-ndó nàcuáa nduu ndoo nduu nine iní-ndó cuèndá ndacu-ndo càda-ndo sá váha, te xiá<sup>n</sup> núu chí cáda dàtná xíquide ñáyi nàquete ndaa xití tásá<sup>n</sup> ndìhi ndàa xití cóhó.

<sup>27</sup> Te nchòhó cue téé dàcuaha ñaha xii ñáyi nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cùu-ndo cue téé ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chí cùu-ndo datná núu yíndüxi ndíyi núu nì cuáha vii te ní nacáhyú sá cuixí<sup>n</sup>, dico xití yaú-á<sup>n</sup> chí càndehe caduha chí mee-ni yiqui ndíyi ñuhu. <sup>28</sup> Te duca<sup>n</sup> sátnahá-xì cùu-ndo chí sànuu sá cúu-ndó cuè téé váha dico iní-ndó chí mee-ni sá cuèhé sá dúhá ñuhu, te ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó.

<sup>29</sup> Te nchòhó cue téé dàcuaha ñaha xii ñáyi nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cúu-ndó cuè téé ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chí càdúha-ndo nchàa núu nì nguíndüxi cue téé ní xóo cáhá<sup>n</sup> tnúhu Yá Ndióxi ndéé sanaha, te ío vii quide-ndo nchaa núu sá nì cuáha núu yíndüxi cue ñáyi ní quide váha ní xíndecu ñuyíú-a. <sup>30</sup> Te cächí-ndó: “Te núu dícó nchoo ní xíndecu-o cùtnahá ní xíndecu cue ñaní tnáhá-ó ndéé sanaha, te vá chítnahá-ó-güedé cahni-o cuè téé ní xóo cáhá<sup>n</sup> tnúhu Yá Ndióxi dàvá-á<sup>n</sup> ní cùu”, duha cächí-ndó. <sup>31</sup> Te sá dúcá<sup>n</sup> cáhá<sup>n</sup>-ndó, te xiá<sup>n</sup> cùtnùnì sá íí<sup>n</sup>-ní cùu-ndo ndìhi cue ñaní tnáhá-ndó cuè téé ní xíndecu ndéé sanaha, cue téé ní sahani ñaha xii cue téé ní cáhá<sup>n</sup> tnúhu Yá Ndióxi dàvá-á<sup>n</sup>. <sup>32</sup> Te núu duca<sup>n</sup> te chí dáxínu cava chiu<sup>n</sup> ní tausaha-güedé.

<sup>33</sup> Te nchòhó cúu-ndó cuè téé ío cuíhna iní-xi, chí cùu-ndo datná

cóo dēé<sup>n</sup>! Te nchòhó vá nihí-ndó nàcuáa cada-ndo cácu nihnu-ndo núu úhú núu ndàhú. <sup>34</sup> Te cuèndá xiá<sup>n</sup> núu tendaha-í cue téé cáhá<sup>n</sup> tnúhu Yá Ndióxi quixi núu-ndó, ndìhi cue téé cùu mestrú danèhé ñháá xì-ndo tnúhu-gá, ndìhi cue téé ío váha cùtnuní iní-xi cuèndá cáhá<sup>n</sup>-güedé tnúhu-gá núu-ndó. Dico nchòhó chí da cùu úhú iní-ndó-güedé, chí dava-güedé cahni-ndo-güedé, te dava-güedé cata caa-ndo-güedé núu cùrúxi, te dava-güedé cani-ndo-güedé xití veñúhu, te ndi tnahá ñuu ndi tnahá ñuu quíhí<sup>n</sup>-ndó nànducu-ndo-güedé cuèndá cada úhú iní-ndó-güedé. <sup>35</sup> Te sá dúcá<sup>n</sup> ná càda-ndo, te ndadíquí-ndó cuè téé ní quide ndáá ní xíndecu ní xíhí ní sahani ñaha cuè ñaní tnáhá-ndó. Te ndéé ndíi Abél téé ío váha ní quide ndáá ní xíndecu ní sahani-güedé ndadíquí-ndó, ndìhi nchaa dava-gá cue téé ní sahani-güedé, ndìhi ndéé ndíi Zacàriá déhe ndíi Berèquiás téé ní sahani-güedé ndéé núu nì ndìhi-ná ndadíquí-ndó, te ndíi-á<sup>n</sup> nì sahani-güedé mei tnúu veñúhu càhnu sá ío cùnuu ndìhi xító núu sácódó sá ndúú tãhú Yá Ndióxi, te nchaa cue téé-á<sup>n</sup> ndadíquí-ndó chí dàtná tnúhu mee-ndo nì sahani-ndo cuè téé-á<sup>n</sup>, chí ñu-ni ñaní tnáhá mèe-ndo duca<sup>n</sup> ní sahani ñaha xii-güedé. <sup>36</sup> Te na cächí tnúhu ndáá-í xii-ndo sá nchàa cue téé ní quide ndáá ní xíndecu ní sahani-güedé, nchaa cue téé-á<sup>n</sup> ndadíquí nchaa ñáyi ndècu vitna — cachí-gá xãha<sup>n</sup>-gã xii-güedé.

*Jèsús cáhá<sup>n</sup>-gá cuèndá ñáyi ñuu Jerusàlén*

*(Lc. 13:34-35)*

<sup>37</sup> Te xãha<sup>n</sup> Jèsús xii ñáyi ñuu Jerusàlén:

—Nchòhó ñáyi ñuu Jerusàlén sahani-ndo cue téé ní tendaha Yá Ndióxi véxi cáhá<sup>n</sup> tnúhu-gá núu-ndó, te mee-ni ndìhi yúu sáhní-ndó dàva-güedé. Te yúhú titní xito ní cuíni-í coto ñaha-í xii-ndo dàtná quidé nchüxi xito-güedi déhe-güedi sàquíhi-güedi xití ndíxí<sup>n</sup>-güedi, dico nchòhó ñá túu ní cuíni-ndó, te ñu-ni

duca<sup>n</sup> sàni iní-í ndéé vitna! <sup>38</sup> Te na cächí tñúhu ndáá-í xii-ndo sã sã nduu te ío ndàhú yáha ñuú-ndó, te vá cùndècu-gá-ndó. <sup>39</sup> Te na cächí tñúhu tucu-í xii-ndo sã vã quini ñáhá-gã-ndó xii-í, dico sáá nduu quini ñáhá tucu-ndo, te dàvá-á<sup>n</sup> cachí-ndó: “Ío cãhnu cuu Yaá ní tendaha Dütú Ndiõxí véxi”, duha cachí-ndó — cächí-gá xãha<sup>n</sup>-gã xii-yu.

## 24

*Jèsús cächí-gá sá ngóyó veñúhu*

*(Mr. 13:1-2; Lc. 21:5-6)*

<sup>1</sup> Te Jèsús ní quee-gá veñúhu cãhnu sã ío cùnuu, te mei òré ní quehe<sup>n</sup>-gá ichi quíhí<sup>n</sup>-gá ì<sup>n</sup> xichi, te ní sãndehe yatni cue téé xica cuu ndíhi-gá dìñi-gá, te xãha<sup>n</sup>-güedë xii-gá:

—Cundehe veñúhu-a nã ío váha ní sáá —cächí-güedë xãha<sup>n</sup>-güedë xii-gá.

<sup>2</sup> Te Jèsús ní xãha<sup>n</sup>-gã xii-güedë:

—Na cächí tñúhu ndáá-í xii-ndo sã ncháá sã ndéhe-ndó-á vitna saá nduu te vá cùndùu-gá-xi dàtná cáá-xí vitna, chi ni ì<sup>n</sup>-gá yúú vã códó nchíhi tnaha-xi chi ndíhi ngoyo —cächí-gá xãha<sup>n</sup>-gã xii-güedë.

*Nàcuáa cada-xi nduu ta cùyatni naa ñuyíú-a*

*(Mr. 13:3-23; Lc. 21:7-24; 17:22-24)*

<sup>3</sup> Te Jèsús ní sáá-gá ndíhi cue téé xica cuu ndíhi-gá yucu Òlívú, te xíá<sup>n</sup> ní ngóo-gá te núú núcõo-gá-á<sup>n</sup> ní sáhá<sup>n</sup> cue téé xica cuu ndíhi-gá, te dayuhu ní xãha<sup>n</sup>-güedë xii-gá:

—Cuini-ndí cachí tñúhu-n nã nduu dùca<sup>n</sup> cada-xi ngoyo veñúhu cãhnu sã ío cùnuu, ndíhi nándi cùu sã cáda-xí òré sa ta cùyatni nduu quixi tucu-n ñuyíú-a, ndíhi òré sa ta cùyatni naa-xi —cachí-güedë xãha<sup>n</sup>-güedë xii-gá.

<sup>4</sup> Te Jèsús ní xãha<sup>n</sup>-gã xii-güedë:

—Ío quíhi iní-ndó cùndecu-ndo cuendá sã vã yõo dandàhú ñáhá xii-ndo. <sup>5</sup> Chi ío cuéhé cue téé coo ñuyíú, te danàni-güedë méé-güedë dàtná nani-í, te cachí-güedë: “Yúhú cùu-í Crístú Yaá ní tendaha Yã Ndiõxí véxi ñuyíú-a”, duha cachí-güedë. Te sã dúcá<sup>n</sup> cãhá<sup>n</sup>-güedë te ío vãi ñáyiu dandàhú-güedë. <sup>6</sup> Te níhí-ndó

tnúhu nàá-güedë ndëni ní cuu, dico vá yùhú-ndó chi dacuítí sã dúcá<sup>n</sup> cáda-xi, dico vátá sáá-gá nduu nã ñuyíú òré duca<sup>n</sup> cáda-xi. <sup>7</sup> Chi cue téé ì<sup>n</sup> nació<sup>n</sup> nàá-güedë ndíhi cue téé ingá nació<sup>n</sup>, te titní ñuú ngüíta-güedë nàá-güedë, te titní xichi ñuyíú coo tnamá, te titní tucu xichi ñuyíú quixi cuéhé, te titní tucu xichi ñuyíú ío níhi tnáa. <sup>8</sup> Te nchaa xíá<sup>n</sup> cuu-xi tnúndòho sã vítná vãha váha quèsaha sã cúu-xí cuè ñáyiu xíndecu ñuyíú.

<sup>9</sup> Te cue ñáyiu na cùu úhú iní ñáhá xii-ndo cuáha cuendá ñáhá-yu núú cuè téé cùchiu<sup>n</sup> cuendá caníha-güedë xii-ndo, te dava-ndo cãhni ñaha-güedë, te nchaa ñáyiu cuu úhú iní ñáhá-yu xii-ndo sã cuendá-í.

<sup>10</sup> Te dàvá-á<sup>n</sup> ío vãi ñáyiu dàñá-yu sã sãndáá iní-yu Yá Ndiõxí, te ngóo-yu cuu úhú iní tnáhá-yu, te cuáha cuendá tnáhá-yu núú cuè téé cùchiu<sup>n</sup>. <sup>11</sup> Te ío vãi cue téé cachí-güedë sã cãhá<sup>n</sup>-güedë tñúhu Yá Ndiõxí te ñá ndáá sã cãhá<sup>n</sup>-güedë tñúhu-gá, te duca<sup>n</sup> ío vãi ñáyiu dandàhú-güedë. <sup>12</sup> Te dàvá-á<sup>n</sup> cuñuu mèe-ni nchaa sã cuéhé sã dúhá cáda-yu, te vãi-yu vá cúu iní-gá-yu tnàha ñáyíu-yu. <sup>13</sup> Dico nchaa ñáyiu na cáda ndee-ni iní canchicú<sup>n</sup> nihnu ñaha-ni xii-í, ñáyíu-á<sup>n</sup> naníhí tãhú-yu. <sup>14</sup> Te nihí ñuyíú quíhí<sup>n</sup> ñáyíu cáhá<sup>n</sup>-yu tñúhu váha, tñúhu sã cãhá<sup>n</sup> nàcuáa ndíhu ndaha ñaha Yá Ndiõxí xii ñáyíu, te sátá ná nihí nchaa ñáyíu tñúhu-á<sup>n</sup> te naa ñuyíú.

<sup>15</sup> Te ndí Dániél téé ní xóo cáhá<sup>n</sup> tñúhu Yá Ndiõxí ndéé sanaha ní chídó tñúni ndí cuendá ì<sup>n</sup> sã dáquèe tihú Yá Ndiõxí cundecu ì<sup>n</sup> xichi núú ní cuu íí, te xíá<sup>n</sup> cada-xi sã vã cùndècu-gá ni ì<sup>n</sup> ñáyíu xíá<sup>n</sup>. Te cada cuendá váha-ndo nàcuáa ní cáhá<sup>n</sup> ndí, chi nduu na quini-ndó xíá<sup>n</sup> cundecu-xi núú dúcá<sup>n</sup> ní cuu íí, <sup>16</sup> te dàvá-á<sup>n</sup> nchaa ñáyíu xíndecu distritú Jùdeá xini ñuhu-xi cunú-yu quíhí<sup>n</sup>-yu xití yucu. <sup>17</sup> Te nchaa ñáyíu ndáa ndódó díquí véhé-xí vã ndíhu-gá-yu vehé-yu quehé<sup>n</sup>-yu ì<sup>n</sup> ndachíu<sup>n</sup>-yu canehé-yu quíhí<sup>n</sup>. <sup>18</sup> Te nchaa ñáyíu cuáhá<sup>n</sup> yucu vá

nùhú-gá-yu vehé-yu cúnúquehé<sup>n</sup>-yu dóó-yu. <sup>19</sup> Te ndàhú ní cuu nchaa ñáyiú ðíhí ñúhú ðèhe-xi, ndíhi cue ñáyiú ðíhí xĩndeca déhe vitna sàdi na saá nduu dùca<sup>n</sup> cada-xi! <sup>20</sup> Te nchòhó, chí càcá<sup>n</sup> táhú nùú Yá Ndiòxí cuendá sá vǎ dúcá<sup>n</sup> ndòho-ndo yóó quidé vǐxi<sup>n</sup>-xi, te ni vǎ dúcá<sup>n</sup> ndòho-ndo nduu cuu-xi nduu ndetatú-ndó. <sup>21</sup> Chi dàvǎ-á<sup>n</sup> coo tnúndòho cahnu vihi ñuyíú, te vátá ñ<sup>n</sup> ndùu-gá coo tnúndòho cahnu vihi-á<sup>n</sup> ndèé cútñàhá ní ngáva ñuyíú, chi ðiu-ni dàvǎ-á<sup>n</sup> coo tnúndòho cahnu vihi-á<sup>n</sup>, te ni nùú cuàhá<sup>n</sup> núú vèxi vá cóó-gǎ tnúndòho-á<sup>n</sup>. <sup>22</sup> Te Yá Ndiòxí càchí-gá sá vǎ ìo vǎi nduu coo tnúndòho cahnu vihi-á<sup>n</sup> sǎ cuendá nchaa ñáyiú ní cáhá<sup>n</sup>-gá cundecu ndíhi-gá. Chi núu vǎi nduu na coo tnúndòho-á<sup>n</sup> te vǎ yǎo cácu nihnu.

<sup>23</sup> Te núu ìo ñáyiú càchí-yu xii-ndo: “Chí cundèhe iha, chi iha ní quexìo Cristú Yaá ní tendaha Yá Ndiòxí véxi ñuyíú-a”, àdi cachí-yu: “Chí cundèhe yacá<sup>n</sup> chi yàcá<sup>n</sup> ndécú-gǎ”, càchí-yu ña. Te vǎ quìndáá iní-ndó tnúhu càhá<sup>n</sup>-yu. <sup>24</sup> Chi coo cue téé cachí-güedé sá cúú-güedé Yaá ní tendaha Yá Ndiòxí véxi ñuyíú-a, te dava-güedé cachí-güedé sá cúú-güedé cue téé càhá<sup>n</sup> tnúhu Yá Ndiòxí dico ñá ndàá sá cúú-güedé cue téé càhá<sup>n</sup> tnúhu-gá, te cada-güedé tĩtĩ ní núú sǎ vǎ yǎo tnàhí ndàcu cada cuendá dandàhú-güedé ñáyiú. Te cani iní-güedé dandàhú-güedé ndèé cue ñáyiú ní cáhá<sup>n</sup> Yá Ndiòxí cundecu ndíhi-gá. <sup>25</sup> Te duha ndùu tnúhu càhá<sup>n</sup>-í dátùha ñaha-í xii-ndo, <sup>26</sup> Te núu càchí-yu xii-ndo: “Xití yucu-á<sup>n</sup> ní quexìo Yaá ní tendaha Yá Ndiòxí véxi ñuyíú-a”, càchí-yu. Te vǎ quìndáá iní-ndó quíhí<sup>n</sup>-ndó, àdi cachí-yu: “Vehe-á<sup>n</sup> ndécú Yàá ní tendaha Yá Ndiòxí véxi ñuyíú-a”, càchí-yu. Te vǎ quìndáá iní-ndó tnúhu càhá<sup>n</sup>-yu. <sup>27</sup> Chi dàtná xini nchaa ñáyiú quide-xi oré sàá nduté dàyehé-xi ni càa xico ñuyíú duca<sup>n</sup> càda-xi oré quixi tucu yúhú Tée cùu ñaní tnáhá-ndó nchàa-ndo chi

nchaa-yu quiní ñáhǎ-yu xii-í. <sup>28</sup> Te nchòhó xini-ndó sǎ nchaa nùú yúcu yiqui cuñú ní xihí te yàcá<sup>n</sup> tàcá nchaa ndixíí xéxi-güedi.

*Nàcuáa cada-xi òré quixi tucu Tée cùu ñaní tnáhá cue ñáyiú*  
(Mr. 13:24-37; Lc. 21:25-33; 17:26-30, 34-36)

<sup>29</sup> Te na yǎha-ni coo tnúndòho cahnu vihi-á<sup>n</sup>, te vǎ dàyehé-gá nchíanchii, te ni vǎ dàyehé-gá yóó, te ngoyo nchaa chódiní ndèé andiu, te quidi-xi andiu <sup>30</sup> nàcuáa cutnùníní iní ñáyiú sá sǎ véxi yúhú Tée cùu ñaní tnáhǎ-yu nchaa-yu. Te cue ñáyiú nihí ñuyíú ndǎhyú-yu sá ndíhú iní-yu òré duca<sup>n</sup> càda-xi, te nchaa-yu quiní ñáhǎ-yu xii-í quee-í andiu quixi-í ichi xití vícò, te quiní-yu sá ìo càhnu cuu-í, te quide-í nchaa sá vǎha. <sup>31</sup> Te tauchìu<sup>n</sup>-í cue espíritú xínú cuèchi núu-í níhi tíú-xi cútú nadatàcá-xi nchaa ñáyiú ní cáhá<sup>n</sup>-í chitnahá ñáhǎ xii-í xĩndecu ni càa xico ñuyíú.

<sup>32</sup> Te nchòhó sa xini-ndó nàcuáa quide yutnu ngúxí, chi yutnu-á<sup>n</sup> ndúú yùte núú díté-xi te nàtáhú ndaha-xi. Te òré duca<sup>n</sup> quide-xi te càchí-ndó sǎ sǎ ní cuyatni nuu cahni. <sup>33</sup> Te ðiu-ni duca<sup>n</sup> sǎtnahá-xi cada-xi ñuyíú-a òré ná quini-ndó càda-xi nchaa nàcuáa ní cáhá<sup>n</sup>-í, te cutnùníní iní-ndó sǎ sǎ ní cuyatni vii-nǎ nduu nàa ñuyíú. <sup>34</sup> Te na càchí tnúhu ndáá-í xii-ndo sǎ òré vátá cùú-gá nchaa ñáyiú xĩndecu ñuyíú-a vitna, te cada-xi nchaa nàcuáa ní cáhá<sup>n</sup>-í. <sup>35</sup> Te andiu ndíhi ñuyíú-a chi ndíhi nihnu-xi, dico tnúhu-í chi vǎ ndíhí nihnu-xi chi cùu-xi tnúhu ndáá cuiti.

<sup>36</sup> Dico ñá túú cùtnuní ná nduu quixi tucu-í, te ni ñá túú cùtnuní ná òré chi vǎ yǎo xini, te ni cuè espíritú xínú cuèchi núú Yá Ndiòxí ñá túú xini-xi ná nduu quixi-í, te ni mèe yúhú Tée cùu Déhe Dútú Ndiòxí ñá túú xini-í ná nduu quixi tucu-í, chi ñ<sup>n</sup>dií díi-ni mee-gǎ xini-gá nùu ná nduu quixi-í.

<sup>37</sup> Te nduu na quixi tucu yúhú Tée cùu ñaní tnáhá-ndó nchaa-ndo ñuyíú-a te cada-xi dàtná ní quide-xi cútñàhá ní xĩndecu ndíí Nòé. <sup>38</sup> Chi

nchaa ñáyiú ní xíndecu dàvá-á<sup>n</sup> òré vátá ndáá-gă ndute ñuyíú, te xèxí-yu xihí-yu quidé-yu, te davá-yu ío-yu vico tnândaha, te davá-yu dásá<sup>n</sup>-yu déhe yòcò-yu candeca ñaha tée, te duca<sup>n</sup>-ni xíquidè-yu ndéé ní sáá nduu cuănguee té Nòé xití bàrcú. <sup>39</sup> Te ñá túú ní cùtnuní iní-yu nàcuáa cada-xi ñuyíú ndéé ní sáá nduu ní ngüíta-xi ní cuu<sup>n</sup> dáú ní ndaa ndute ñuyíú ní dánáá ñaha-xi xii-yu. Te diu-ni duca<sup>n</sup> sãtnahá tucu-xi cada-xi nduu na quixi tucu yúhú Tée cùu ñaní tnáhã-yu nchaá-yu ñuyíú-a, chi nduu ñà túú nã yíhí iní-yu te quixi tucu-í. <sup>40</sup> Te dàvá-á<sup>n</sup> nũu úú tnáhá cue tée yìhi-güedé xití yucu, te ñ<sup>n</sup>-dé ndanchita te ñ<sup>n</sup>-dé quendóo. <sup>41</sup> Àdi úú ñáyiú ðihí nchicò-yu ñ<sup>n</sup>-ni vèhe, te ñ<sup>n</sup>-yu ndanchita te ñ<sup>n</sup>-yu quendóo.

<sup>42</sup> Te duha nduu tnúhu càhá<sup>n</sup>-í cuëndá nchòhó cundecu túha-ndo, chi ñá túú xíní-ndó nã òré quixi tucu yúhú Yaá cúú Xitohó-ndó. <sup>43</sup> Te nchòhó xíní-ndó sã nũu ñ<sup>n</sup> tée cùu xitohó vehe xíní-dé ná òré cúú-xí niú quihu ñadúhú vehe-dé duhu-güedé, te quihí iní-dé cundecu-dé cuëndá sá vã dáñá-dé quihu ñadúhú-ã<sup>n</sup> vehe-dé duhu-güedé, dico ñá túú xíní-dé. <sup>44</sup> Te duha càhá<sup>n</sup>-í chi nchòhó xíní ñùhu-xi cundecu túha-ndo, chi na cuáhá<sup>n</sup> òré ñá túú nã yíhí iní-ndó quèxio yúhú Tée cùu ñaní tnáhá-ndó nchàa-ndo.

#### *Cuëndá ñ<sup>n</sup> tée xínu cuechi (Lc. 12:41-48)*

<sup>45</sup> Te na càni-í ñ<sup>n</sup> cuëndú núú-ndó. ñ<sup>n</sup> tée xínu cuechi núú ñ<sup>n</sup> patróó<sup>n</sup> cúú-dé ñ<sup>n</sup> tée ío váha tècú tnùní, te quide ndáá-dé ndécú-dé. Te ñ<sup>n</sup> xito ní dándõo ndaha ñaha patróó<sup>n</sup>-dë xii-dé nchaa cue ñáyiú ndècu vehe-dé cuëndá coto ñaha-dé xii-yu cuãñaha-dé sá cáxi-yu òré tàú-xi caxí-yu, te tée cùu patróó<sup>n</sup>-á<sup>n</sup> ní quee-dé cuáhá<sup>n</sup>-dé. <sup>46</sup> Te váha táhú tée xínu cuechi-á<sup>n</sup> te núú ndèccu-dé quidé-dé nchaa nàcuáa ní xáha<sup>n</sup> patróó<sup>n</sup>-dë cada-dé mei òré ní nasáá patróó<sup>n</sup>-dë-á<sup>n</sup>. <sup>47</sup> Te na càchí tnúhu ndáá-í xii-ndo sã tée cùu patróó<sup>n</sup>-dë-á<sup>n</sup> cũñaha-dé xii-dé sá

quíndàha-dé nchaa sá ndécú ndihí-dé. <sup>48</sup> Dico núú tée xínu cuechi-á<sup>n</sup> ní cùu-dé ñ<sup>n</sup> tée cuihna iní-xi, te ngóo-dé cani iní-dé sá cùyàa patróó<sup>n</sup>-dë vá násáá ndihí-dé. <sup>49</sup> Te ngüíta-dé cani-dé nchaa dava-gá cue ñáyiú xínu cuechi ndihí-dé, te ngóo-dé caxi-dé coho-dé cada-dé ndihí nchaa cue tée quihu. <sup>50</sup> Te ñ<sup>n</sup> nduu òré ñá túú yìhi iní-dé nasáá patróó<sup>n</sup>-dë, <sup>51</sup> te ío dandòho ñaha patróó<sup>n</sup>-dë xii-dé, chi daquihí<sup>n</sup> ñáhá-dë xii-dé núú xíndecu cue ñáyiú ní cachí sá ní quide ndáá te ñá ndáá sá ní quide ndáá-yu. Te duca<sup>n</sup> sãtnahá-xi dandòho ñaha Yá Ndiõxí xii ñáyiú, chi daquihí<sup>n</sup> ñáhá-gã xii-yu ñ<sup>n</sup> xichi núú ío ndohó-yu te yàcá<sup>n</sup> ío ndáhyú-yu, te dicó rúhñú-nã cuu núhu-yu sá sàtú iní-yu sá ndóhò-yu —càchí-gá xãha<sup>n</sup>-gã xii-güedé.

## 25

### *Cuëndá úxí ñáyiú ðihí*

<sup>1</sup> Te xãha<sup>n</sup> tùcu Jesús xii-güedé:

—Na càni-í ñ<sup>n</sup> cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyiú. Te úxí tnáhá ñáyiú ðihí ñáyiú cuechi ní quehé<sup>n</sup>-yu lintèrnã-yu, te cuáhá<sup>n</sup>-yu ñ<sup>n</sup> xichi núú cóo vico tnândaha cuëndá cundetú-yu quexio tée tnândaha. <sup>2</sup> Te úhú<sup>n</sup> ñáyiú cuechi-ã<sup>n</sup> ío váha cùtnuní iní-yu, te úhú<sup>n</sup>-yu ñáhá. <sup>3</sup> Te ndi ùhú<sup>n</sup> ñáyiú cuechi dùca<sup>n</sup> ñá túú cùtnuní iní-xi-á<sup>n</sup> ñà túú ní cãnehé-yu sá ndëe lintèrnã-yu. <sup>4</sup> Dico ndi ùhú<sup>n</sup> ñáyiú cuechi cùtnuní iní-xi-á<sup>n</sup> nêhë-yu sá ndëe lintèrnã-yu. <sup>5</sup> Te tée tnândaha-á<sup>n</sup> cùyàa-dé quexio-dé núú ndétú ñáhá-yu-á<sup>n</sup>, te nini dùca<sup>n</sup> cuyaa-dé ní tñi ñaha sání xii-yu ní xidí-yu. <sup>6</sup> Te cùu-xi datná dava niú níhi ní cáhá<sup>n</sup> dava-gá ñáyiú, te càchí-yu: “Sa véxi tée tnândaha, chí táquèe quehé quehe<sup>n</sup> cuëndá-ndó-dë”, càchí-yu. <sup>7</sup> Te ndi ùxí ñáyiú cuechi-ã<sup>n</sup> ní ndacóo-yu quide túha-yu lintèrnã-yu. <sup>8</sup> Te ndi ùhú<sup>n</sup> ñáyiú cuechi ñà túú cùtnuní iní-xi-á<sup>n</sup> ní xáhã<sup>n</sup>-yu xii cue ndi ùhú<sup>n</sup>



ñáyu cùtnuní iní-xi-á: “Chí táxi nùu luha sá ndëe lintérná-ndó ná ndëe lintérná-ndí chi ñá cuíní-xi cáyú mee-ni ndàhvá”, càchí-yu xähá-yu. <sup>9</sup> Te cue ñáyu cuechi cùtnuní iní-xi-á nñ xähá-yu: “Vá táxi nùu-ndí chi vá tnàhá canehe chiù<sup>n</sup> mee-ndí, te váha-gá chí cuáhá<sup>n</sup> cuaa<sup>n</sup>-ndo nùú cuè ñáyu xídíco cuèndá sá vã cúmăní xii-ndo, te vá cúmăní xii nchúhú tucu”, càchí-yu xähá-yu. <sup>10</sup> Te nini cuáhá<sup>n</sup> ndí ùhú<sup>n</sup> ñáyu duca<sup>n</sup> ñà túú cùtnuní iní-xi-á<sup>n</sup> cuănguaá<sup>n</sup>-yu sá ndëe lintérnă-yu ní quexió téé tnândaha. Te ndí ùhú<sup>n</sup> ñáyu cuechi cùtnuní iní-xi-á<sup>n</sup> nñ quehe<sup>n</sup> cuèndá ñáhă-yu xii-dé, te cuănguïhu ndihî ñàhá-yu xii-dé núú cóó vico tnândaha, te sátá dúcá<sup>n</sup> te ní nandedí yuyèhe. <sup>11</sup> Te òré ní nasáá cue ñáyu cuechi ñăyiu ní sânguaa<sup>n</sup> sá ndëe lintérná-xi-á<sup>n</sup>, te ní ngüíta-yu càhá<sup>n</sup>-yu xĩnutnî-yu ndăa sátá yuyèhe ndaa quehé, te xähá<sup>n</sup>-yu xii téé tnândaha-á<sup>n</sup>: “¡Tăta, nacaá<sup>n</sup> yuyèhe na quïhu-ndí!”, càchí-yu xähá<sup>n</sup>-yu xii-dé. <sup>12</sup> Te téé tnândaha-á<sup>n</sup> nñ xáha<sup>n</sup>-dë xii-yu: “Na càchí tnúhu ndáá-í xii-ndo sã nchòhó ñá túú tàú-ndó quïhu-ndo vico-a, chi ñá túú tnàhá tnúhu ndihî ñaha-ndo xii-í”, càchí-dé xáha<sup>n</sup>-dë xii-yu —càchí Jësús xáha<sup>n</sup>-gă xii-güedé.

<sup>13</sup> Te xáha<sup>n</sup> tùcu Jësús xii-güedé:

—Ío quihî iní-ndó cùndecu-ndo, chi ñá túú xini-ndó nă nduu, te ni ñà túú xini-ndó nă òré quixi tucu yúhú Téé cùu ñanı tnàhá-ndó nchăa-ndo —cachí-gă xáha<sup>n</sup>-gă xii-güedé.

*Cuèndá cue téé ní ndóo ndaha dñhú<sup>n</sup> (Lc. 19:11-27)*

<sup>14</sup> Te xáha<sup>n</sup> tùcu Jësús xii-güedé:

—Na cànî tucu-í ingá cuèndú núú-ndó năcuáa tecú tnùnî-ndó năcuáa cada-xi òré ndíhu ndaha ñàha Yá Ndiòxí xii ñáyu. ñ<sup>n</sup> téé sa ñuhu ichi-ná-dé sá cáca-dë quíngaca cuu xica-dë, te ní cana-dé cue téé xinu cuechi núú-dë cuèndá dândóo ndaha ñàha-dé dñhú<sup>n</sup>-dë xii-güedé.

<sup>15</sup> Te năcuáa ndùu chiu<sup>n</sup> quide ñ<sup>n</sup> ñ<sup>n</sup>-güedé te duca<sup>n</sup> dñhú<sup>n</sup> nñ sãñaha-dë

xii-güedé, te ñ<sup>n</sup>-dé ní sãñaha-dë ùhú<sup>n</sup> tnàhá dñhú<sup>n</sup> sã ïo yahu nàni talentú, te ingá-dé ní sãñaha-dë úú tnàhá dñhú<sup>n</sup>-ă<sup>n</sup>, te ingá-dé ní sãñaha-dë ñ<sup>n</sup> dñhú<sup>n</sup>-ă<sup>n</sup>, te dătnùnî ní quee-dé cuáhá<sup>n</sup>-dé. <sup>16</sup> Te téé ní quehe<sup>n</sup> cuèndá ùhú<sup>n</sup> tnàhá dñhú<sup>n</sup> sã nánî tàlentú ní quide-dé ndáhú ndihî-xi te ní níhî tucu-dé ùhú<sup>n</sup>-gá tucu tnàhá dñhú<sup>n</sup>-ă<sup>n</sup>. <sup>17</sup> Te ñ<sup>n</sup>-ni duca<sup>n</sup> nñ quide tucu téé ní níhî ùú dñhú<sup>n</sup> sã nánî tàlentú-á<sup>n</sup>, chi ní quide-dé ndáhú te ní níhî tucu-dé úú-gá tucu tnàhá. <sup>18</sup> Dico téé ní níhî ñ<sup>n</sup>-ni dñhú<sup>n</sup>-ă<sup>n</sup> chi da ní chiváha-dé dñhú<sup>n</sup> pàtróo<sup>n</sup>-dë, chi ní xete-dé ñ<sup>n</sup> yaú te ní chindúxi-dé.

<sup>19</sup> Te ní cuu cuéhé nduu sá nñ quee pàtróo<sup>n</sup>-güedë-á<sup>n</sup> ní sângaca cuu-dé, te ní nasáá-dé te ní ngüíta-dé quidé ndáá-dé ndihî-güedé cuèndá dñhú<sup>n</sup> sã nñ dândóo ndaha ñàha-dé xii-güedé. <sup>20</sup> Te téé ní quendóo ndaha ùhú<sup>n</sup> tnàhá dñhú<sup>n</sup>-ă<sup>n</sup> nñ xáha<sup>n</sup>-dë xii pàtróo<sup>n</sup>-dë: “Pàtróo<sup>n</sup>, náú ùhú<sup>n</sup> tnàhá dñhú<sup>n</sup> sã nñ dândóo ndaha ñàha-n xii-í-a, te ní sáhá<sup>n</sup>-í ní quide-í ndihî-xi ndáhú te ní chídó-xí ùhú<sup>n</sup>-gá tucu tnàhá, te náú-a naquehe<sup>n</sup> cuèndá-n”, càchí-dé xáha<sup>n</sup>-dë xii pàtróo<sup>n</sup>-dë. <sup>21</sup> Te téé cùu pàtróo<sup>n</sup>-dë-á<sup>n</sup> nñ xáha<sup>n</sup>-dë xii-dé: “Ío váha ní quide-n, te vitna quide ñàha-í xii-n ñ<sup>n</sup> téé váha téé quide ndáá, te sá sàcú dñhú<sup>n</sup> nñ dândóo ndaha ñàha-í xii-n te ní quide ndáá-n, te sá dúcá<sup>n</sup> nñ quide-n te vâi-gá taxi cuèndá ñàhà-í xii-n. Te vitna cuu cundecu-n nùú ndécù-í, te ío cudíí iní-ó cùndecu ndihî tnaha-o”, cachí téé cùu pàtróo<sup>n</sup>-dë-á<sup>n</sup> xáha<sup>n</sup>-dë xii-dé. <sup>22</sup> Te sátá dúcá<sup>n</sup> te téé ní quendóo ndaha úú tnàhá dñhú<sup>n</sup> sã nánî tàlentú-á<sup>n</sup> nñ xáha<sup>n</sup>-dë xii pàtróo<sup>n</sup>-güedé: “Pàtróo<sup>n</sup>, náú úú tnàhá dñhú<sup>n</sup> sã nñ dândóo ndaha ñàha-n-a, te ní sáhá<sup>n</sup>-í ní quide-í ndihî-xi ndáhú, te ní chídó-xí ùú-gá tucu tnàhá, te náú-a naquehe<sup>n</sup> cuèndá-n”, càchí-dé xáha<sup>n</sup>-dë xii pàtróo<sup>n</sup>-güedé. <sup>23</sup> Te ní xáha<sup>n</sup> tēe cùu pàtróo<sup>n</sup>-á<sup>n</sup> xii-dé: “Ío váha ní quide-n, te vitna quide ñàha-í xii-n ñ<sup>n</sup> téé váha téé quide ndáá, te sá sàcú dñhú<sup>n</sup> nñ dândóo ndaha ñàha-í xii-n te ní quide ndáá-n, te

sá dúcá<sup>n</sup> nǐ quide-n te vâi-gá taxi cuendá-í. Te vitna cuu cundecu-n nǔú ndécù-í, te ío cudíí iní-ó cundecu ndihi tnaaha-o”, cachí tée cùu patróón-án xăha<sup>n</sup>-dě xii-dé. <sup>24</sup> Te tée ní ndóo ndaha ì<sup>n</sup>-ni díhú<sup>n</sup>-ă<sup>n</sup> nǐ xăha<sup>n</sup>-dě xii tée cùu patróón-dě-á<sup>n</sup>: “Pàtróón, yúhú sa năha-í sá yòhó cúú-n ì<sup>n</sup> tée ndùcu mee-ni sá cúú-xí mēe-xi te tâhu-n chiu<sup>n</sup> cuáhá<sup>n</sup> nchúhú cue tée xînu cuechi núú-n sâcá<sup>n</sup>-ndí triú, te òré ná nătaxi tnaaha-ndí, te yòhó dîcô-nă náquêhe<sup>n</sup> cuendá-n tàxúha-n. <sup>25</sup> Te núu xiă<sup>n</sup> ní yùhú-í cada-í ndáhú ndihi díhú<sup>n</sup>-n, te ní sáhá<sup>n</sup>-í ní xete-í ì<sup>n</sup> yaú te ní chindúxi-í, te náu díhú<sup>n</sup>-n-á<sup>n</sup> naquehe<sup>n</sup> cuendá-n”, cächí-dé xăha<sup>n</sup>-dě xii tée cùu patróón-án. <sup>26</sup> Te tée cùu patróón-án nǐ xăha<sup>n</sup>-dě: “Yòhó cúú-n ì<sup>n</sup> tée cuihna iní-xi xînu cuechi núú-í te cuhndu-n, te núu yòhó sání iní-n sǎ cúú-í ì<sup>n</sup> tée tàuchiu<sup>n</sup> cuáhá<sup>n</sup>-ndó sâcá<sup>n</sup>-ndó triú te òré nătaxi tnaaha-ndo, te yúhú dîcô-nă náquêhe<sup>n</sup> cuendá-í nătàxúha-í. <sup>27</sup> Te núu sâni iní-n sǎ dúcá<sup>n</sup> quide-í, te dasa<sup>n</sup> nùu-n díhú<sup>n</sup>-í te cúñaha-n chăhu-yu díquí-xi ni cùu, te òré ndexiò-í te sa ngódó lùha-gá díquí-xi naquehe<sup>n</sup>-í ní cùu”, cachí-dé xăha<sup>n</sup>-dě xii tée xînu cuechi-á<sup>n</sup>. <sup>28</sup> Te tée cùu patróón-án nǐ xăha<sup>n</sup>-dě xii dava-gá cue tée ndècu ndihi-dé: “Chí quéndèe ì<sup>n</sup> díhú<sup>n</sup> sǎ nání tàlentú néhé tēe-á<sup>n</sup>, te cuáha-ndo tēe nèhe úxí tnàhá díu-ni díhú<sup>n</sup>-ă<sup>n</sup>. <sup>29</sup> Chì cue tée sa ndècu ndihi te níhí-gǎ-güedé cundecu ndihi-güedé, te ni vǎ nihí-gǎ-güedé ndèe cundecu nchaa sá cündècu ndihi-güedé. Te cue tée ñá túú nă ndécú ndihi vai, te nchaa sá ndécú ndihi-güedé vá cündècu ndihi-gǎ-güedé. <sup>30</sup> Te tée xînu cuechi ñá túú vèdana nândíhi-á<sup>n</sup>, chí tníí-dě te daquihí<sup>n</sup>-ndó-dě ì<sup>n</sup> xichi núú née nǔú ìo ndoho-dé, te yâcá<sup>n</sup> ndáhyú-dé, te dîcô rúhñú-nă cuu núhu-dé sá sâtú iní-dé sá ndóhó-dě”, cächí tée cùu patróón-án xăha<sup>n</sup>-dě xii-güedé. Duha sâtnahá-xi ndoho nchaa ñá yiu ñá túú quide váha — cächí-gá xăha<sup>n</sup>-gǎ xii-güedé.

*Cuendá cue ñá yiu ní quide váha ndihi*

*cuendá cue ñá yiu ñá túú ní quide váha*

<sup>31</sup> Te xăha<sup>n</sup> tucu Jesús xii-güedé:

—Te nduu na quixi tucu yúhú Tée cùu ñaní tnáhá-ndó nchàa-ndo, te quixi-í ndihi nchaa cue espíritú xínú cuèchi núú-í, te nchaa ñá yiu quini-yu sá ìo càhnu cuu-í, te dàvá-á<sup>n</sup> cunucóo-í núú táxi tnùn-í, te ío cuñúhu ñá yiu sá ìo càhnu cuu-í. <sup>32</sup> Te dàvá-á<sup>n</sup> natacá nchaa ñá yiu xîndecu ni cãa xico ñuyú cundecú-yu núú-í, te cada-í-yu dàtná quidé ì<sup>n</sup> toli oré táu dîñ-dé nchaa mbéé ndihi nchaa chivá chí dîñ taxi ndecu-dé nchaa mbéé, te dîñ taxi ndecu-dé nchaa chivá. <sup>33</sup> Te duca<sup>n</sup> sâtnahá-xi cada-í chí nchaa ñá yiu ní quide ndáá núú-í ñá yiu-á<sup>n</sup> taxi ndecu-í-yu xio cùha-í, te nchaa ñá yiu cuihna iní-xi ñá túú ní cuini cada ndáá núú-í ñá yiu-á<sup>n</sup> taxi ndecu-í-yu xio dàtni-í. <sup>34</sup> Te duca<sup>n</sup> te yúhú tée ío cùnuu cúñaha-í xii ñá yiu na cundecu xio cuha-í: “Nchaa nchòhó ñá yiu ní quide váha ñaha Tătà-í Dútú Ndiöxí, chí nèhé chí vitna ní sáá nduu cundecu-ndo núú ndécú-gǎ táxi tnùn-í-gǎ, chí ndéé cútnáhá ní ngáva ñuyú sa ndècu túha tnàhí núú ndécú-gǎ-á<sup>n</sup> sǎ nchòhó nduu táhú-ndó cundecu-ndo. <sup>35</sup> Te duca<sup>n</sup> chí òré xihí-í docó te ní taxi-ndo sǎ nǐ xexi-í, te òré yìchí-í ndute te ní taxi-ndo ndute ní xihí-í, te òré ñúhù-í ichi te ní taxi-ndo vèhe ní ndetatú-í. <sup>36</sup> Te òré xíní ñúhu-í dóo cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vècáá te ní quixi tucu-ndo nǐ quixi coto ñaha-ndo xii-í”, duha cúñaha-í xii nchaa ñá yiu-á<sup>n</sup>. <sup>37</sup> Te nchaa ñá yiu duca<sup>n</sup> nǐ quide ndáá-á<sup>n</sup> cùñahá-yu xii-í: “Yòhó Yaá cúú Xîtohó-ndí, ni ì<sup>n</sup> xito ñá túú ní tàxi-ndí sá cáxi-n òré xihí-n dòcô, te ni ì<sup>n</sup> xito ñá túú ní tàxi-ndí ndute coho-n òré yìchí-n. <sup>38</sup> Te ni ñà túú ní tàxi-ndí vehe ndetatú-n òré ñúhú-n ichi, te ni ñà túú ní tàxi-ndí dóo cuihnu-n òré xíní ñúhu-n. <sup>39</sup> Te ni ñà túú ní quixi coto ñaha-ndí xii-n òré ní cuhú-n, te ni ñà túú ní quixi coto ñaha-ndí xii-n òré ní xihí-n vècáá”, duha quesàhá-yu

cũñahá-yu xii-í. <sup>40</sup> Te yúhú té cùnūu cũñaha-ĩ xii-yu: “Na cächí tnúhu ndáá-í xii-ndo sã ncháá sã vãha ní quide-ndo sã cúu-xí nchaa ñáyiu xĩndecu ichi-í cuëi ío ndàhú xĩndáa-yu, te sá dúcá<sup>n</sup> ñi quide-ndo sã vãha sá cúu-xí-yu, te cada iní-ndó sã mēe-í duca<sup>n</sup> ñi quide-ndo ñi xito ñaha-ndo xii-í”, duha cũñaha-ĩ xii-yu.

<sup>41</sup> Te dātnūnī cũñaha-ĩ xii ñáyiu na cūndecu xio datni-í: “Nchaa nchòhó ñáyiu ní xíta nihnu chí xócuĩñi núu ndécú-í-a, chi nchòhó ní nduu táhú-ndó cūndecu-ndo núu ñũhú núu càyú, ñu-ni núu ñi quide túha-í cūndecu sácuihná ndihi nchaa espíritú cūndihi-xi, te yacá<sup>n</sup> cūndecu-ndo ñi caa ñi quíhí<sup>n</sup>. <sup>42</sup> Chi yúhú òré xihí-í docó te ñá túú ní tàxi-ndo sá cáxi-í, te ñi òré yichí-í ndute te ñá túú ní tàxi-ndo ndute coho-í. <sup>43</sup> Te ñi òré ní xúhu<sup>n</sup>-í ichi ñá túú ní tàxi-ndo vehe ndetatú-í, te ñi òré xini ñũhu-í dóo cuihnu-í te ñá túú ní tàxi-ndo, te ñi òré ní cuhú-í te ñá túú ní quixi-ndo quixi coto ñaha-ndo xii-í, te ñi òré ní xihí-í vecaá te ñu-ni duca<sup>n</sup> ñi quide-ndo ñá túú ní quixi-ndo quixi coto ñaha-ndo xii-í”, duha cũñaha-ĩ xii-yu. <sup>44</sup> Te ñáyiu-án cũñahá-yu xii-í: “Yòhó Yaá cúu Xitohó-ndí ñi ñi<sup>n</sup> xito ñá túú ní xini-ndí òré xihí-n dòcò cuendá taxi-ndí sá cáxi-n, te ñi ñi<sup>n</sup> xito ñá túú ní xini-ndí òré yichí-n ndute cuendá taxi-ndí ndute coho-n, te ñi ñi<sup>n</sup> xito ñá túú ní xini-ndí cuhu<sup>n</sup>-n ichi cuendá taxi-ndí vehe ndetatú-n, te ñi ñi<sup>n</sup> xito ñá túú ní xini-ndí òré xini ñũhu-n dóo cuendá taxi-ndí dóo cuihnu-n, te ñi ñi<sup>n</sup> xito ñá túú ní xini-ndí òré cùhú-n cuendá quixi coto ñaha-ndí xii-n, te ñi ñi<sup>n</sup> xito ñá túú ní xini-ndí quihí-n vecaá cuendá quixi coto ñaha-ndí xii-n”, duha quesahá-yu cũñahá-yu xii-í. <sup>45</sup> Te yúhú cũñaha-ĩ xii-yu: “Na cächí tnúhu ndáá-í xii-ndo sã sã cuendá sã ñá túú ní quide-ndo ñi<sup>n</sup> sã vãha sá cúu-xí cuè ñáyiu ndècu ichi-í cuëi ío ndàhú xĩndáa-yu, te sá dúcá<sup>n</sup> ñi quide-ndo ñá túú ní quide-ndo sã vãha sá cúu-xí-yu, te cada iní-ndó sã mēe-í duca<sup>n</sup> ñi quide-ndo ñá túú

ní quide-ndo sã vãha sá cúu-xí-í”, duha cũñaha-ĩ xii-yu. <sup>46</sup> Te nchaa ñáyiu-án quíhí<sup>n</sup>-yu núu ùhú núu ndàhú ñi caa ñi quíhí<sup>n</sup>. Te nchaa ñáyiu ní quide ndáá núu-í ní xĩndecu ñuyíú-a, ñáyiu-án nduu táhũ-yu ío vãha cūndecú-yu ñi caa ñi quíhí<sup>n</sup> — cächí-gá xãha<sup>n</sup>-gã xii-güedé.

## 26

*Cue téé cūu úhú iní ñáhá xii Jesús ndúcú-güedé nacuáa cada-güedé tñi ñaha-güedé xii-gá*

(Mr. 14:1-2; Lc. 22:1-2; Jn. 11:45-53)

<sup>1</sup> Te sátá ñi yáha duca<sup>n</sup> ñi cáhán Jèsús, te ní xáha<sup>n</sup>-gã xii cue téé xica cuu ndihi-gá:

<sup>2</sup> —Nchòhó sa xini-ndó sã cūmání úú-gá nduu te coo vico pascuá, te cächí tnúhu-í xii-ndo sã yúhú Téé cūu ñaní tnáhá-ndó nchaa-ndo tñi ñaha-güedé xii-í, te cuáha cuendá ñáhá-güedé núu cuè téé cūu úhú iní ñáhá xii-í, te cata caa ñaha-güedé núu cùrúxí te núu cùrúxí-án cuú-í —cächí-gá xãha<sup>n</sup>-gã xii-güedé.

<sup>3</sup> Te ñu-ni òré cáhán ndihi Jèsús cue téé xica cuu ndihi-gá ní nataká cue téé cūu dútú cūnūu, ndihi cue téé dācuaha ñaha xii ñáyiu nchaa tnúhu ní chídó tnūnī ndí Moisés, ndihi cue téé cūu sacuéhé núu ñáyiu israhél. Te mei quéhé vehe núu cúu vèchiu<sup>n</sup> té Caifás téé cūu dútú ío-gá cūnūu ní nataká-güedé.

<sup>4</sup> Te xía<sup>n</sup> ñi ndatnúhu-güedé nacuáa cada-güedé dandàhú-güedé Jèsús cuendá tñi ñaha-güedé xii-gá, te cahni ñaha-güedé. <sup>5</sup> Te ní xitnaha-güedé:

—Váha-gá sá vã tñi-ó Jèsús mei ndūu vico, chi núu duca<sup>n</sup> na càda-o te ío dusa<sup>n</sup> càda ñáyiu —cächí-güedé xitnaha-güedé.

*Ñi ñadihí chíhí-án àciti ñiquí Jèsús*  
(Mr. 14:3-9; Jn. 12:1-8)

<sup>6</sup> Te ndècu Jesús ñuú Bètaniá vehe ñi<sup>n</sup> téé nani Xímú, téé ní tnahá cuéhé sã dátèhyú nihnu-xi yiquí cūnú-ó.

<sup>7</sup> Te xía<sup>n</sup> ndécú-gã ní quexìo ñi<sup>n</sup> ñadihí néhé-án ñi<sup>n</sup> sá ñi cuáha yúu vãha nani

alabastrú, te xití xíãñ ñúhú àcítí sàhá<sup>n</sup> tnámí sã ïo ndèyáhu. Te yìhi Jesús mèsá xéxí-gã, te ñaha-á<sup>n</sup> ní sáhá<sup>n</sup>-a<sup>n</sup> ní sódó-a<sup>n</sup> àcítí ñúhú xití xíãñ díquí-gã. <sup>8</sup> Te òré ní xíní cue téé xica cuu ndihí Jesús sá dúcá<sup>n</sup> ní quide ñaha-á<sup>n</sup> te ní cudéé<sup>n</sup>-güedé, te ní ngüíta-güedé xítnàha-güedé:

—Ñá túú quide váha ñaha-ã<sup>n</sup> dàcá<sup>n</sup> quidé-á<sup>n</sup> dacuíta-a<sup>n</sup> acítí-ã<sup>n</sup>. <sup>9</sup> Chi váha-gá nùu cuyáhu acítí-ã<sup>n</sup> ní cùu chi ío ndèyáhu, te díhú<sup>n</sup> cuyáhu acítí-ã<sup>n</sup> cuu cuendá cue ñáyu ndàhú ní cùu —càchí-güedé xítnàha-güedé.

<sup>10</sup> Te Jesús ní cutnùní iní-gá nàcuáa ndùu tnúhu xítnàha-güedé, núu ní xáha<sup>n</sup>-gã xii-güedé:

—Vá dásatú-ndó ìní ñadìhí-a, chi sá ní quide ñaha-a<sup>n</sup> xii-í cúu-xí ñ<sup>n</sup> sá váha. <sup>11</sup> Chi cue ñáyu ndàhú duca<sup>n</sup>-ni cùtnahá ñáyu-á<sup>n</sup> tnuú-ndó, dico yúhú chi vá ncháá ndùu cundecu ndihí ñaha-í xii-ndo ñùyíu-a. <sup>12</sup> Te sá dúhá ní quide ñaha ñadìhí-a xii-í ní sódó-a<sup>n</sup> àcítí díquí-í, te xíãñ cada iní-ndó sã sá quide túha-a<sup>n</sup> yiqui cùñú-í cuendá nguíndüxi-xi. <sup>13</sup> Te na càchí tnúhu ndáá-í xii-ndo sã ndèni ní cuu ñihí ñuyíu ná càhá<sup>n</sup> ñáyu tnúhu-í, te càhá<sup>n</sup>-yu tnàhá cuendá ñadìhí-a cuendá quini nchaa ñáyu nàcuáa ní quide-a<sup>n</sup> te duca<sup>n</sup> vã nàcuánaá-yu —càchí-gã xáha<sup>n</sup>-gã xii-güedé.

*Té Jùdás ndúcú-dé nàcuáa cada-dé cuáha cuendá-dé Jesús núu cuè téé cùu úhú iní ñáhá xii-gá*

(Mr. 14:10-11; Lc. 22:3-6)

<sup>14</sup> Te sátá dúcá<sup>n</sup> te té Jùdás Iscarioté ní sáhá<sup>n</sup>-dé ní ndatnúhu-dé ndihí cue téé cùu dútú cùnùu. Te núu tnàhá té Jùdás-á<sup>n</sup> cúu ùxúú cue téé xica cuu ndihí Jesús. <sup>15</sup> Te ní xáha<sup>n</sup>-dè xii cue téé cùu dútú cùnùu-á<sup>n</sup>:

—¿Ndèdau cháhu ñaha-ndo xii-í te taxi cuendá-í Jesús xii-ndo-i? —càchí-dé xáha<sup>n</sup>-dè xii-güedé.

Te cue dútú-ã<sup>n</sup> ní xáha<sup>n</sup>-güedé xii-dé sá cuáñaha-güedé ócú úxí díhú<sup>n</sup> cuixí<sup>n</sup>, te diu-ni duca<sup>n</sup> ní sáñaha-güedé xii-dé. <sup>16</sup> Te ndéé òré ní quehe<sup>n</sup> cuendá té Jùdás-á<sup>n</sup> díhú<sup>n</sup>, te ní ngüíta-dé

ndúcú-dé nàcuáa cada-dé cuáha cuendá-dé Jesús núu-güedé.

*Cùdini Jesús ndihí cue téé xica cuu ndihí-gá*

(Mr. 14:12-25; Lc. 22:7-23; Jn. 13:21-30; 1 Co. 11:23-26)

<sup>17</sup> Te ní sáá nduu ní quesaha vico xexi ñáyu pàá sá ñà túu yìhi levadurá diu-ni vico pàscuá, te cue téé xica cuu ndihí Jesús ní sàndehe yatni-güedé dñi-gá, te xáha<sup>n</sup>-güedé xii-gá:

—Mèstrú, véxi-ndí xicá<sup>n</sup> tnúhú-ndí núu-n nùu ndéé cuini-n càda túha-ndí cuendá cudini-o sacuaa nduu vico pascuá —càchí-güedé xáha<sup>n</sup>-güedé xii-gá.

<sup>18</sup> Te Jesús ní xáha<sup>n</sup>-gã xii-güedé:

—Chí cuáhá<sup>n</sup> xití ñuú-ã<sup>n</sup>, te yàcá<sup>n</sup> naníhí-ndó ñ<sup>n</sup> téé cùtnuní iní-ndó sã sá xíní ñáhá-dè xii-o, te cùñaha-ndo xii-dé: “Yáá cúu Mèstrú càchí-gá sá sá ní cuyatni nduu vã cùndecu-gá ñuyíu-a, te vehe-n cuini-gá cada-gá vico pàscuá ndihí cue téé xica cuu ndihí-gá”, duha cùñaha-ndo xii téé-á<sup>n</sup> —càchí-gã xáha<sup>n</sup>-gã xii-güedé.

<sup>19</sup> Te cue téé xica cuu ndihí-gá-á<sup>n</sup> ní xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gã xii-güedé, te ní quide túha-güedé sá cùdini-güedé ndihí-gá sacuaa nduu vico pascuá-á<sup>n</sup>. <sup>20</sup> Te òré sa ní cundiqui<sup>n</sup> te cuánguìhu Jesús ndihí ndi ùxúú cue téé xica cuu ndihí-gá mèsá cuendá cudini-gá ndihí-güedé. <sup>21</sup> Te nini xèxi-gá ndihí-güedé ní xáha<sup>n</sup>-gã xii-güedé:

—Na càchí tnúhu ndáá-í xii-ndo sã díú ñ<sup>n</sup> nchohó cue téé xica cuu ndihí-í cuáha cuendá ñáhá-ndó xii-í núu cuè téé cùu úhú iní ñáhá —càchí-gã xáha<sup>n</sup>-gã xii-güedé.

<sup>22</sup> Te sátá dúcá<sup>n</sup> ní xáha<sup>n</sup>-gã xii-güedé te nchaa-güedé ní ngüíta-güedé cùndiyí-güedé, te da ñ<sup>n</sup> da ñ<sup>n</sup>-güedé ní ngüíta-güedé xáha<sup>n</sup>-güedé xii-gá:

—Mèstrú, ¿ñá díú yúhú duca<sup>n</sup> sàni iní-n càda-í-u? —càchí-güedé xáha<sup>n</sup>-güedé xii-gá.

<sup>23</sup> Te ní xáha<sup>n</sup>-gã xii-güedé:



—Tée nacaxi ndihi-í #<sup>n</sup>-ni cóhó caxi-ndí, té-á<sup>n</sup> cuáha cuèndá ñáhá-dě xii-í núú cuè téé cùú úhú iní ñáhá. <sup>24</sup> Te yúhú Téé cùú ñaní tnáhá-ndó nchàa-ndo ñuhu ichi-í cuáhá<sup>n</sup>-í yáha-í nàcuáa càhá<sup>n</sup>-xi núú tütú Yă Ndiöxí, dico ndàhú ní cuu téé duca<sup>n</sup> na cuáha cuèndá ñáhá xii-í núú cuè téé cùú úhú iní ñáhá, chi váha-gá sá vâ cáciú tée-á<sup>n</sup> cundecu-dé ní cùú, te ñá díú sã ñí cacu-dé te duca<sup>n</sup> càda-dé —càchí-gá xáha<sup>n</sup>-gã xii-güedé.

<sup>25</sup> Te sátá dúcá<sup>n</sup> te ní cáhá<sup>n</sup> té Júdás téé cuáha cuèndá ñáhá xii-gá, te xáha<sup>n</sup>-dě:

—Mèstrú, ¿te náa sàni iní-n sã yúhú cuáha cuèndá ñáhá-í xii-n núú cuè téé cùú úhú iní ñáhá xii-n-á<sup>n</sup>? —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gã xii-dé:

—Diu-n —càchí-gá xáha<sup>n</sup>-gã xii-dé.

<sup>26</sup> Te ñini cùdini cue téé xica cuu ndihi Jesús ní quehe<sup>n</sup>-gá pàá, te ní ndacá<sup>n</sup> táhú-gã núú Yă Ndiöxí, te dàtnùní ní táhú cuèchi-gá te ní ngüíta-gá dácãhñu-gá cue téé xica cuu ndihi-gá-á<sup>n</sup>, te xáha<sup>n</sup>-gã xii-güedé:

—Chí quéhé<sup>n</sup> pàá-a caxi-ndo, te cada iní-ndó sã yiqui cuñú-í cúú-xí —càchí-gá xáha<sup>n</sup>-gã xii-güedé.

<sup>27</sup> Te ní quehe<sup>n</sup>-gá vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gã núú Yă Ndiöxí, te dàtnùní ní ngüíta-gá sãñaha-gã xii-güedé cuèndá coho-güedé luha luha sá ñúhú xití-xi, te xáha<sup>n</sup>-gã xii-güedé:

—Chí cóhó nchàa nchohó ndudí ndéhé yoho yàha stilé ñúhú xití vàsú-a. <sup>28</sup> Te cada iní-ndó sã cúú-xí dàtná ñíñí-í sá cãtí òré cahni ñaha-güedé xii-í, te sá dúcá<sup>n</sup> cãtí ñíñí-í xíã<sup>n</sup> cutnùní ndáá sá Yă Ndiöxí cada-gá ingá núú sã váha sá cúú-xí vâi ñáyiu dàtná ní cachí-gá cada-gá, te ío vâi ñáyiu cada càhnu iní-gá cuèchi-yu.

<sup>29</sup> Te na càchí tnúhu-í xii-ndo sã vítná-nã duha xihí ndihi ñaha-í xii-ndo ndùdí ndéhé yoho yàha stilé-a, te vá cóhó ndihi ñaha-gá-í xii-ndo, dico na sàá nduu nànihí tnáhá-ó núú ndécú Tãtà-í Dútú Ndiöxí táxí tnùní-gá te dàvá-á<sup>n</sup> cada iní-ndó sã dàtná sá cóhó

ndihi ñaha tucu-í xii-ndo chi ío cudíí iní-ó —càchí-gá xáha<sup>n</sup>-gã xii-güedé.

*Té Pèlú cúñaha-dě xii ñáyiu sã ñà túú xini-dé Jèsús*

(Mr. 14:26-31; Lc. 22:31-34; Jn. 13:36-38)

<sup>30</sup> Te Jèsús ní xita-gá #<sup>n</sup> ndudú ndihi cue téé xica cuu ndihi-gá, te dàtnùní ní xica-gá cuáhá<sup>n</sup>-gã ndihi-güedé yucu Òlívú. <sup>31</sup> Te yàcá<sup>n</sup> ní xáha<sup>n</sup>-gã xii-güedé:

—Na càchí tnúhu-í xii-ndo sã nchàá-ndó dándóo ñaha-ndo xii-í niú vitna, chi quee ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi: “Yúhú cuáha-í tnúhu cahni-güedé téé cùú toli, te nchaa mbéé-dě ndihi-güedi cuténuu”, duha càchí-xi núú tütú-gá. <sup>32</sup> Dico na ndòto-í te codonùu-í núú-ndó quíhí<sup>n</sup> distrítú Galileá —càchí-gá xáha<sup>n</sup>-gã xii-güedé.

<sup>33</sup> Te té Pèlú ní xáha<sup>n</sup>-dě xii-gá:

—Te cuèi nchaa-güedé ná dándóo ñaha-güedé xii-n, dico yúhú chi vá dándóo ñaha-í xii-n —càchí-dé xáha<sup>n</sup>-dě xii-gá.

<sup>34</sup> Te Jèsús ní xáha<sup>n</sup>-gã xii-dé:

—Na càchí tnúhu ndáá-í xii-n sã niú vitna cùmání-gã cana #<sup>n</sup> líhi, te úní xito cáhá<sup>n</sup>-n núú ñáyiu sã ñà túú xini ñáhá-n xii-í —càchí-gá xáha<sup>n</sup>-gã xii-dé.

<sup>35</sup> Te té Pèlú ní xáha<sup>n</sup>-dě xii-gá:

—Cuèi na cùú ndihi ñaha-í xii-n dico vá càhá<sup>n</sup>-í núú ñáyiu sã ñà túú xini ñáhá-í xii-n —càchí-dé xáha<sup>n</sup>-dě xii-gá.

Te nchaa dava-gá cue téé xica cuu ndihi-gá diu-ni duca<sup>n</sup> ñí xáha<sup>n</sup>-güedé xii-gá.

*Jèsús càhá<sup>n</sup> ndihi-gá Yă Ndiöxí #<sup>n</sup> xichí núú nání Gètsemaní*

(Mr. 14:32-42; Lc. 22:39-46)

<sup>36</sup> Te Jèsús ní quexìo-gá ndihi cue téé xica cuu ndihi-gá #<sup>n</sup> xichi núú nání Gètsemaní, te xíã<sup>n</sup> ñí xáha<sup>n</sup>-gã xii-güedé:

—Chí cúnúçõo iha cundetú-ndo na quíhí<sup>n</sup>-í yàcá<sup>n</sup> cáhá<sup>n</sup> ndihi-í Yă Ndiöxí —càchí-gá xáha<sup>n</sup>-gã xii-güedé.

<sup>37</sup> Te ndèca-gá té Pèlú, ndihi ndi nduú déhe té Zebèdeú cuáhá<sup>n</sup>, te ní

ngüíta-xi súúni ndìhú iní-gá. <sup>38</sup> Te ní xáha<sup>n</sup>-gã xii cue tée úní-á<sup>n</sup>:

—Súúni ndìhú iní-í dàtná sá cùú-í, te chí quéndõ nchòhó iha te vá cùdú-ndó chi yúhú vá cùdú-í — càchí-gá xáha<sup>n</sup>-gã xii-güedé.

<sup>39</sup> Te sa ñunchíí luha ní xica ndehe Jèsús núú ndécú-güedé, te ní ngüíñí xítí-gã te ní nuu núú-gã ndàa núú ñúhú, te ní ngüíta-gá càhá<sup>n</sup> ndìhi-gá Tátá-gã Dútú Ndiõxí, te xáha<sup>n</sup>-gã:

—Yòhó Tátá mée-í, càhá<sup>n</sup> ndàhú-í núú-n núu vá cùndèe iní-n tàunihnu ñaha-n xii-í cuendá sá vã ndóhò-í ná sáà òré, dico vá cáda-n nàcuáa càchí iní mée-í, chí cada-n nàcuáa càchí iní mée-n —càchí-gá xáha<sup>n</sup>-gã xii Tátá-gã Dútú Ndiõxí.

<sup>40</sup> Te sáta ní yáha ní càhá<sup>n</sup> ndìhi-gá Tátá-gã Dútú Ndiõxí, te cuánuhú-gá núú ní dándõ-gá cue tée úní-á<sup>n</sup> te xixídí-güedé òré ní nasáá-gá, te ní xáha<sup>n</sup>-gã xii té Pèlú:

—¿Náa ñá cùndèe iní-ndó vá cùdú-ni-ndo cuèdicó ñ<sup>n</sup> òré ñini càhá<sup>n</sup> ndìhi-í Yá Ndiõxí-á<sup>n</sup>? <sup>41</sup> Te chí quéndõ tucu te cuhu<sup>n</sup> iní-ndó vá cùdú-ndó, te càhá<sup>n</sup> ndìhi-ndo Yá Ndiõxí cuendá sá vã dácàhá<sup>n</sup> ñáhá yúcu ñávaha xii-ndo càda-ndo sá ña túú tàú-ndó càda-ndo. Te xini ndáá-í sá nchòhó cuíni-ndó càda-ndo nchaa nacuáa càhá<sup>n</sup>-í dicó-ni sá ña túú ñihí ndéé-ndó —càchí-gá xáha<sup>n</sup>-gã xii-güedé.

<sup>42</sup> Te xito cùu uú cuáhá<sup>n</sup> tucu Jèsús càhá<sup>n</sup> ndìhi-gá Tátá-gã Dútú Ndiõxí, te xáha<sup>n</sup>-gã:

—Yòhó Tátá mée-í, te núu vá cùndèe iní-n tàunihnu ñaha-n xii-í cuendá sá vã ndóhò-í, te cada nàcuáa càchí iní mée-n —càchí-gá xáha<sup>n</sup>-gã xii Tátá-gã Dútú Ndiõxí.

<sup>43</sup> Te òré ní yáha ní càhá<sup>n</sup> ndìhi-gá Tátá-gã Dútú Ndiõxí, te cuánuhú tucu-gá núú xindecu cue tée úní xíca cùu ndìhi-gá-á<sup>n</sup>, te xidí-ni tucu-güedé òré ní nasáá-gá, te duca<sup>n</sup> ní quide-güedé chí súúni ñùhu saní núú-güedé. <sup>44</sup> Te ní dándõ ñaha tucu Jesús xii-güedé xíá<sup>n</sup>, te cuáhá<sup>n</sup> tucu-gá xito cùu úní càhá<sup>n</sup> ndìhi tucu-gá Tátá-gã Dútú Ndiõxí, te ñu-ni tnúhu sá sà ní xáha<sup>n</sup>-gã xii Tátá-gã

Dútú Ndiõxí, ñu-ni tnúhu-á<sup>n</sup> ní xáha<sup>n</sup> tucu-gá. <sup>45</sup> Te sáta ní yáha ní càhá<sup>n</sup> ndìhi-gá Tátá-gã Dútú Ndiõxí, te cuánuhú tucu-gá núú ndécú cue tée xica cuu ndìhi-gá-á<sup>n</sup>, te òré ní nasáá-gá, te ní xáha<sup>n</sup>-gã xii-güedé:

—¿Te náa xidí-ni tucu-ndo? Te sa ní sáà òré cuáha cuendá ñáhá-güedé xii-í núú cue tée ndècu ichi cuehé ichi duha. <sup>46</sup> Dico vitna chí ndácõ na quíhí<sup>n</sup>-ó, chí sa véxi tée cuáha cuendá ñáhá xii-í núú cue tée cùu úhú iní ñáhá —càchí-gá xáha<sup>n</sup>-gã xii-güedé.

*Ní tñi-güedé Jèsús ndécá ñàha-güedé xii-gá cuáhá<sup>n</sup>*

(Mr. 14:43-50; Lc. 22:47-53; Jn. 18:2-11)

<sup>47</sup> Te càhá<sup>n</sup> dúcá<sup>n</sup>-ní Jèsús ní quexìo té Jùdás. Te núú tnàhá tée-á<sup>n</sup> cùú ùxúú tnàhá cue tée xica cuu ndìhi-gá ní cùu te duca<sup>n</sup> ní quide-dé. Te ndìhi-dé vãi cue tée ní quexìo te dava-güedé xinehe-güedé machití, te dava-güedé xinehe-güedé carrutí. Te cue tée-á<sup>n</sup> ní tendaha ñaha cue dútú cùnùu, ndìhi cue tée cùu sacuéhé núú ñäyiu isràél. <sup>48</sup> Te té Jùdás tée cuáha cuendá ñáhá xii-gá-á<sup>n</sup> sa ní xitnùhu-dé cue tée-á<sup>n</sup> nàcuáa cada-dé cuáha cuendá-dé Jèsús núú-güedé, te duha ní xáha<sup>n</sup>-dè xii-güedé:

—Cundehe-ndo tée na tèyuhu-í te tée-á<sup>n</sup> tñi-ndo-dè chí tée-á<sup>n</sup> cùú-dè tée ndéé iní-ndó —duha ní xáha<sup>n</sup>-dè xii-güedé.

<sup>49</sup> Te sáta dúcá<sup>n</sup> ní xáha<sup>n</sup>-dè xii-güedé, te ní sàndehe yatni-dé núú Jèsús, te ní xáha<sup>n</sup>-dè xii-gá:

—¿Ràció<sup>n</sup> Mèstrú! —càchí-dé xáha<sup>n</sup>-dè xii-gá.

Te ní teyuhu ñàha-dé xii-gá. <sup>50</sup> Te Jèsús ní xáha<sup>n</sup>-gã xii-dé:

—Yòhó tée ní chitnahá ñáhá xii-í, ¿ná cuíni-n núu véxi-n núu-í? —càchí-gá xáha<sup>n</sup>-gã xii-dé.

Te òré-ni-á<sup>n</sup> ní tñi ñaha cue tée ndìhi té Jùdás-á<sup>n</sup> xii Jèsús, te ndèca ñaha-güedé xii-gá cuáhá<sup>n</sup>.

<sup>51</sup> Te ñ<sup>n</sup> cue tée ndìhi Jèsús ní tava-dé machití-dé, te ní xehndé-ni-dé ñ<sup>n</sup> xio lóho ñ<sup>n</sup> tée xinu cuechi núú dútú cùnùu te ní quendeé duu<sup>n</sup> lóho-dé. <sup>52</sup> Te Jèsús

ní xáha<sup>n</sup>-gã xii téé duca<sup>n</sup> nĩ xehndé lóho téé-á<sup>n</sup>:

—Nachihí machití-n ññi-xi, chí nchaa cue téé na nàá ndihí machití cahni-güedé tnàha ñáyiü-güedé te ñiü-ni ndihí machití cuú méé-güedé tuçu. <sup>53</sup> Te na càchí tnúhu-í xii-ndo sã nüü yúhú cuini-í cácu-í te cáhá<sup>n</sup> ndihí-í Tãtã-í Dútú Ndiöxí, te tendaha-gã cuéhé víhí espíritú xínú cuèchi núú-gã quixi-xi dàcácu ñaha-xi xii-í. <sup>54</sup> Dico núu duca<sup>n</sup> na càda-í te vá queé ndáá-xi nàcuáa càhá<sup>n</sup>-xi núú tütú Tãtã-í Dútú Ndiöxí núú ndéé tnuní sã dàcuítí xini ñuhu-xi nándi ndoho-í — càchí-gã xáha<sup>n</sup>-gã xii-dé.

<sup>55</sup> Te Jèsús ní xáha<sup>n</sup>-gã xii cue téé duca<sup>n</sup> nĩ tnñ ñaha xii-gã-á<sup>n</sup>:

—Nchaa-ni nduu ní xiní-ndó nĩ xóo cunucóo-í xití veñúhu càhnu sã ño cùnnu ní xóo danèhé-í ñáyiü, te ñá túú ní tnñ ñaha-ndo xii-í, ¿te ná cuendá vitna quide ñaha-ná-ndó xii-í dàtná quidé-ndó ññ ñadúhú, nèhe-ná-ndó màchití nèhe-ná-ndó càrrutí ní quexìo ní tnñ ñaha-ndo xii-í-i? <sup>56</sup> Dico dacuítí sã dúhá càda-xi nàcuáa quee ndáá-xi nàcuáa ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha nĩ ngódó tnùní núú tütú-gã —càchí-gã xáha<sup>n</sup>-gã xii-güedé.

Te nchaa cue téé xica cuu ndihí-gã ní xinü-güedé ní dándöo ñaha-güedé xii-gã.

### *Jèsús ndécú-gã jùndá*

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Te cue téé ní tnñ ñaha xii Jèsús ndécá ñaha-güedé xii-gã cuáhá<sup>n</sup> núú tẽ Caifás téé cùu dútú cùnùu-gã. Te núú ndécú dútú cùnùu-gã-á<sup>n</sup> sa ní tacá cue téé dàcuaha ñaha xii ñáyiü nchaa tnúhu ní chídó tnùní ndí Moisés, ndihí cue téé cùu sacuéhé nüü ñáyiü isràél cuendá cada-güedé jùndá. <sup>58</sup> Te té Pèlú xica xica-ni nchicú<sup>n</sup> ñáhá-dé xii-gã cuáhá<sup>n</sup> ní sáá-dé ndéé quehé vehe núú ndécú téé cùu dútú cùnùu-gã-á<sup>n</sup>, te xiá<sup>n</sup> nĩ ngóo-dé ndihí cue téé cùu poleciá cuendá cuini-dé quiní-dé nása cada ñaha-güedé xii Jèsús.

<sup>59</sup> Te cue téé cùu dútú cùnùu, ndihí cue téé cùu sacuéhé nüü ñáyiü isràél, ndihí nchaa dava-gã cue téé xĩndecu jùndá ndúcú-güedé nàcuáa cada-güedé dacàa-güedé ññ cuèchi díquí Jèsús cuèi cùu-xi ññ sã ñã ndáá cuendá níhí-güedé nàcuáa cada-güedé cahni ñaha-güedé xii-gã. <sup>60</sup> Te vãi cue téé ní ngúita-güedé dacàa-güedé cuèchi díquí-gã, dico ñá túú ní cùndee tnúhu-güedé chí mee-ni tnúhu ndehnde cùu-xi. Te sátá dúcá<sup>n</sup> te ní quexìo tuçu úú tnàhá cue téé dàcuandehnde-güedé, <sup>61</sup> te xáha<sup>n</sup>-güedé xii nchaa cue téé xĩndecu jùndá:

—Véxi-ndí càchí tnúhu-ndí xii-ndo sã tẽ-a càchí-dé sã dängöyo-dé veñúhu càhnu sã ño cùnnu núú chíñúhu-o Yá Ndiöxí, te dandaa-dé ingá veñúhu saa, ñiü-ni núú cáá tnàhí veñúhu-ã<sup>n</sup>, te xití úní-ni nduu sa nadaxĩnu-dé, duha càchí-dé — càchí-güedé xáha<sup>n</sup>-güedé.

<sup>62</sup> Te téé cùu dútú cùnùu-gã-á<sup>n</sup> nĩ ndacuíñí-dé, te xáha<sup>n</sup>-dẽ xii Jèsús:

—¿Ná cuendá duha nduu tnúhu càhá<sup>n</sup> cue téé-a cuendá-n? Te cáhá<sup>n</sup> nüü nása cunduu tnúhu cáhá<sup>n</sup>-n — càchí-dé xáha<sup>n</sup>-dẽ xii-gã.

<sup>63</sup> Dico Jèsús ñá túú tnàhí ní cáhá<sup>n</sup>-gã. Te téé cùu dútú cùnùu-gã-á<sup>n</sup> nĩ xáha<sup>n</sup> tucu-dé xii-gã:

—Yúhú, cácu nèhe-í Yá Ndiöxí chí cuini-í sã càchí tnúhu ndáá-n xii-ndí nüü sã díú Cristú Déhe Yá Ndiöxí Yaá ní tendaha-gã véxi ñuyíü-a cùu-n — cachí-dé xáha<sup>n</sup>-dẽ xii-gã.

<sup>64</sup> Te Jèsús ní xáha<sup>n</sup>-gã xii-dé:

—Ñiü Yaá-á<sup>n</sup> cùu-í dàtná càchí-n-ã<sup>n</sup>, te na càchí tnúhu-í xii-ndo sã sáá nduu te quiní-ndó yúhú Téé cùu ñaní tnàhá-ndó nchaa-ndo cunucóo-í xio cùha Dútú Ndiöxí Yaá ndácú quide nchaandi túhú sã vãha. Te dàvá-á<sup>n</sup> quiní ñáhá-ndó xii-í quee-í andiü quixi-í ichi xití vícö —càchí-gã xáha<sup>n</sup>-gã xii-dé.

<sup>65</sup> Te dútú cùnùu-gã-á<sup>n</sup> nĩ ndátá-dé dóó níhñú-dé cuendá sã ñá túú ní tnàhá iní-dé nàcuáa ní cáhá<sup>n</sup> Jèsús, te ní xáha<sup>n</sup>-dẽ xii nchaa cue téé xĩndecu jùndá:

—Tée-a cãhá<sup>n</sup> úhú-dé cuendá Yã Ndiõxí, te vitna ñá túú-gã xíní ñùhu-xi cue té cãhá<sup>n</sup> ndáá nũ ndáá sã ndècuéchi-dé àdi ñá túú ndècuéchi-dé, chi sa ní tecú dóho-o nãcuáa ndùu tñùhu ní cãhá<sup>n</sup>-dé ní cãhá<sup>n</sup> úhú-dé cuendá Yã Ndiõxí. <sup>66</sup> Te nchaa-ndo chí cãhá<sup>n</sup> vitna núu nása sàni iní-ndó cùnduu cuendá té-a —càchí-dé xãhá<sup>n</sup>-dẽ xii nchaa cue té-a<sup>n</sup>.

Te cue té-a<sup>n</sup> ní xãhá<sup>n</sup>-güedé:

—Nchúhú càchí-ndí sã tàú-xi cuú-dé chi ndècuéchi-dé —càchí-güedé xãhá<sup>n</sup>-güedé.

<sup>67</sup> Te ní ngüíta-güedé ní tiú dí ñáhã-güedé xii-gã te ní caniha-güedé, te tñáhã núú-gã ní cani-güedé. <sup>68</sup> Te ní cudíquí ndeé ñáhã-güedé xii-gã, te xãhá<sup>n</sup>-güedé:

—Yòhó Tée càchí sã cúú Crístú Yaa ní tendaha Yã Ndiõxí véxi ñuyúú-a, cãhá<sup>n</sup> ná còto yoo ní caniha xii-n —cachí-güedé xãhá<sup>n</sup>-güedé xii-gã.

*Té Pèlú xãhá<sup>n</sup>-dẽ xii ñáyúú sã ñà túú xíní-dé Jèsús*

*(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Te nini núcóo té Pèlú quehé, te ní sãhá<sup>n</sup> ñá xíchí xínú cuèchi vehe-á<sup>n</sup> núú-dé, te xãhá<sup>n</sup>-xi xii-dé:

—Yòhó tñáhã-n cùu-n té xica cuu ndihí Jèsús té distritú Galileá —càchí-xi xãhá<sup>n</sup>-xi xii-dé.

<sup>70</sup> Te té Pèlú ñá túú ní nũnuu-dé, te ndèdóho nchaa ñáyúú xĩndecu-á<sup>n</sup> ní xãhá<sup>n</sup>-dẽ xii xíchí-ã<sup>n</sup>:

—Yúhú, ñá túú cùtnuní iní-í nása ndùu tñùhu cãhá<sup>n</sup>-n —càchí-dé xãhá<sup>n</sup>-dẽ xii-xi.

<sup>71</sup> Te ní xica té Pèlú cuáhã<sup>n</sup>-dé ndàa nacuáa nchíi yuyèhe vehe-á<sup>n</sup>, te ní xíní ñáhã tùcu ingá xíchí xínú cuèchi vehe-á<sup>n</sup>, te xãhá<sup>n</sup>-xi xii nchaa ñáyúú xĩndecu-á<sup>n</sup>:

—Tée-a tñáhã-dé xicã cùu-dé ndihí Jèsús té ñuú Nazàrét —càchí-xi xãhá<sup>n</sup>-xi xii-yu.

<sup>72</sup> Te té Pèlú ní xãhá<sup>n</sup>-dẽ:

—Nchàcui<sup>t</sup>i Yã Ndiõxí sã ñà túú xíní-í té cãcunehe-ndo-á<sup>n</sup> —càchí-dé xãhá<sup>n</sup>-dẽ xii-yu.

<sup>73</sup> Te tna tnaa-ni ní cuu, te dava ñáyúú xĩndecu xíá<sup>n</sup> ní xãhá<sup>n</sup> tùcú-yu xii té Pèlú:

—Ndáá sã tñáhã-n xica cuu-n ndihí té ndèca-güedé cuànguihu-ã<sup>n</sup>, chí ñáyúhú cãhá<sup>n</sup>-n —càchí-yu xãhá<sup>n</sup>-yu xii-dé.

<sup>74</sup> Te té Pèlú ní xãhá<sup>n</sup>-dẽ xii-yu:

—Nchàcui<sup>t</sup>i Yã Ndiõxí sã yũhú cãhá<sup>n</sup> ndáá-í sã ñà túú xíní-í té cãcunehe-ndo-á<sup>n</sup> —càchí-dé xãhá<sup>n</sup>-dẽ xii-yu.

Te òré-ni-á<sup>n</sup> ní cana ñá ñhi. <sup>75</sup> Te ní ndacu iní té Pèlú nacuáa ní xãhá<sup>n</sup> Jèsús xii-dé sã cùmání-gã cana ñá ñhi te úní xito cãhá<sup>n</sup>-dé sã ñà túú xíní ñáhã-dé xii-gã. Te ní quee-dé tnuú ñáyúú-á<sup>n</sup> cuáhã<sup>n</sup>-dé ñá xio ní ndáhyú víhí-dé ní ndixi cuéchi iní-dé.

## 27

*Ndèca-güedé Jèsús cuáhã<sup>n</sup> núú tẽ Pìlatú*

*(Mr. 15:1; Lc. 23:1-2; Jn. 18:28-32)*

<sup>1</sup> Te sátã ní túndaá te nchaa cue té cùu dútú cùnuu, ndihí cue té cùu sacuéhé núú ñáyúú isràél ní ndatnúhu-güedé nacuáa cada-güedé cahni-güedé Jèsús. <sup>2</sup> Te ní dácútú ñàha-güedé xii-gã, te ndèca ñàha-güedé cuáhã<sup>n</sup> núú tẽ Pìlatú té cùu gobiernú.

*Ní xihí té Jùdás*

<sup>3</sup> Te té Jùdás té ní sãha cuendá ñáhã xii Jèsús ní cutnùní iní-dé sã cãhní ñàha-güedé xii-gã, te ní ndixi cuéchi iní-dé sã ñà túú ní quide váha-dé sã dúcã<sup>n</sup> ní quide-dé ní sãha cuendá ñáhã-dé xii-gã núú cuè té cùu úhú iní ñáhã, te ní xica-dé cuáhã<sup>n</sup>-dé dançhòcãva-dé ócò úxí díhú<sup>n</sup> cuixí<sup>n</sup> núú cuè dútú cùnuu-á<sup>n</sup>, ndihí núú cuè té cùu sacuéhé núú ñáyúú isràél, chí ñu cue té-a<sup>n</sup> ní sãñaha-güedé díhú<sup>n</sup> xii-dé. <sup>4</sup> Te òré ní quexìo té Jùdás-á<sup>n</sup> núú ndécú-güedé, te xãhá<sup>n</sup>-dẽ xii-güedé:

—Yúhú, ñá túú ní quide váha-í sã dúcã<sup>n</sup> ní quide-í ní taxi cuendá-í ñá té ñá túú tñáhí cuéchi-xi cahni-ndo-dé —càchí-dé xãhá<sup>n</sup>-dẽ xii-güedé.

Te cue té-a<sup>n</sup> ní xãhá<sup>n</sup>-güedé xii-dé:

—Nchúhú, ñá túú nãgã cuendú cuíní-ndí cãhá<sup>n</sup> ndihí ñàha-ndí xii-n, te mee-n ñàha núu nása sàni iní-n cada-n —cachí-güedé xãhá<sup>n</sup>-güedé xii-dé.



<sup>5</sup> Te té Jùdás ní dǎngoyo-dé díhú<sup>n</sup>-ǎ<sup>n</sup> xítí veñúhu càhnu sá ìo cùnùu, te ní xica-dé cuáhá<sup>n</sup>-dé ní dácùèhné-dé méé-dě.

<sup>6</sup> Te cue dútú cùnùu ní naquehe<sup>n</sup>-güedé díhú<sup>n</sup>-ǎ<sup>n</sup>, te ní xítàha-güedé:

—Díhú<sup>n</sup>-a ní quéyǎhu cuendá sá cùu ì<sup>n</sup> ñáyíu, núu xíá<sup>n</sup> vá cùú nàchihí-o xítí càjá núú ñúhú sǎ cùú cuendá Yǎ Ndiǒxí —càchí-güedé xítàha-güedé.

<sup>7</sup> Te ní ndatnúhu-güedé te ní cuu ì<sup>n</sup>nuu-güedé cuendá nacuaa<sup>n</sup>-güedé ì<sup>n</sup> xichí núú cáá ñùhu danani-güedé Núú Cuǎha Nchaa Sá Cuǎha Ñuhu, te xíá<sup>n</sup> ñí saa<sup>n</sup>-güedé cuendá xíá<sup>n</sup> nguǐndǔxi nchaa ñáyíu véxi xica.

<sup>8</sup> Te ní nadáma diu ñuhu-á<sup>n</sup>, te vitna dānani-güedé Ñuhu Yáhu Níñí, duha dānani-güedé. <sup>9</sup> Te duca<sup>n</sup> ñí cuu chí ní quee ndáá-xi nàcuáa ní cáhá<sup>n</sup> ndí Jeremiás té ní xóo cáhá<sup>n</sup> tnúhu Yá Ndiǒxí ndéé sanaha, te duha ní cachí ndí: “Cue tée isràél ní cachí-güedé sá òcò úxí díhú<sup>n</sup> cuixí<sup>n</sup> cháhu-güedé cuendá ì<sup>n</sup> tée quehe<sup>n</sup> cuendá-güedé. Te díhú<sup>n</sup>-ǎ<sup>n</sup> nàquehe<sup>n</sup>-güedé, <sup>10</sup> te cuaa<sup>n</sup>-güedé ì<sup>n</sup> xichí núú nání Nùú Cuǎha Nchaa Sá Cuǎha Ñuhu, te duca<sup>n</sup> càda-xi chí duca<sup>n</sup> ñí cachí Yǎ Ndiǒxí cunduu”, duha ní cachí ndí Jeremiás-á<sup>n</sup>.

### *Jèsús ndécú-gǎ núú tǎ Pilatú*

(Mr. 15:2-5; Lc. 23:3-5; Jn. 18:33-38)

<sup>11</sup> Te Jèsús ndécú-gǎ núú tǎ Pilatú tée cùu gobiernú, te tée-á<sup>n</sup> ñí xicá<sup>n</sup> tnúhú-dě núú-gǎ, te xǎha<sup>n</sup>-dě xii-gá:

—¿Ndáá sá díú-n cùu-n tée yíndaha ñaha xii ñáyíu isràél-á<sup>n</sup>? —càchí-dé xǎha<sup>n</sup>-dě xii-gá.

Te Jèsús ní xáha<sup>n</sup>-gǎ xii-dé:

—Diu-í yíndaha-í-yu —càchí-gá xǎha<sup>n</sup>-gǎ xii-dé.

<sup>12</sup> Te cue dútú cùnùu ndíhi cue tée cùu sacuéhé núú ñáyíu isràél sàcá<sup>n</sup> cuéchi-güedé núú tǎ Pilatú cuendá Jèsús, dico mee-gǎ ni ì<sup>n</sup> tnúhu ñá túú ní cáhá<sup>n</sup>-gá. <sup>13</sup> Te té Pilatú ní xáha<sup>n</sup>-dě xii-gá:

—Cáhá<sup>n</sup>, ná cuendá ñá túú càhá<sup>n</sup>-n, te cundehe nǎ ndéé duha titní cuéchi

dàcaa cue tée-a díquí-n —càchí-dé xǎha<sup>n</sup>-dě xii-gá.

<sup>14</sup> Dico Jèsús ñá túú tnàhí ni cáhá<sup>n</sup>-gá, te té Pilatú tée cùu gobiernú-á<sup>n</sup> ìo ní cuñúhu-dé sá dúcá<sup>n</sup> ñá túú tnàhí ni cáhá<sup>n</sup>-gá.

### *Ní quide ndáá-güedé sá cáhni-güedé Jèsús*

(Mr. 15:6-20; Lc. 23:13-25; Jn. 18:38-19:16)

<sup>15</sup> Te ndí tnahá nduu víco pascuá dácácu té Pilatú tée cùu gobiernú-á<sup>n</sup> ì<sup>n</sup> tée yíhi vecaá chí duca<sup>n</sup> tnàhí quide-dé, te mee ñáyíu càhá<sup>n</sup>-yu te núu ndédacàa tée yíhi vecaá-á<sup>n</sup> cǎcu-dé te tée-á<sup>n</sup> dácácu-dé. <sup>16</sup> Te dàvá-á<sup>n</sup> yíhí ì<sup>n</sup> tée nàni Barrabás vecaá, te tée-á<sup>n</sup> ió cuendú-dé sá ìo nèhé ní quide-dé.

<sup>17</sup> Te ní nataká nchaa ñáyíu, te té Pilatú ní xicá<sup>n</sup> tnúhú-dě núú-yu, te xǎha<sup>n</sup>-dě:

—¿Ndédacàa núú úú cue tée-a cuíni-ndó dácácu-í-güedé-í? ¿Té Barrabás á<sup>n</sup> Jèsús tée nàni Cristú? —càchí-dé xǎha<sup>n</sup>-dě xii-yu.

<sup>18</sup> Te duca<sup>n</sup> ñí cáhá<sup>n</sup> té Pilatú, chí ní cutnùní iní-dé sá dicó sá cuèdú iní-güedé duca<sup>n</sup> ñí quide-güedé ní sáha cuendá ñáhá-güedé xii Jèsús núú-dě.

<sup>19</sup> Te ñini núcóo té Pilatú núú xèhndé-dé cuéchi ní tendaha ñadíhí-dé tnúhu cuáhá<sup>n</sup> núú-dě, te duha ndùu tnúhu ní tendaha-a<sup>n</sup>: “Vá cání iní-n nǎ cada-n tée ní taxí cuendá ñáhá-güedé xii-n, tée ñá túú tnàhí cuéchi-xi, chí icuini ió nèhé ní dácótó ñaha saní-í cuendá-dé”, duha ndùu tnúhu ní xáha<sup>n</sup>-a<sup>n</sup> xii té Pilatú.

<sup>20</sup> Dico cue tée cùu dútú cùnùu, ndíhi cue tée cùu sacuéhé núú ñáyíu isràél ní xáha<sup>n</sup>-güedé xii ñáyíu sá ná cuñáhá-yu xii té Pilatú dácácu-dé té Barrabás te cahni-dé Jèsús, te ní quidé-yu nàcuáa ní xáha<sup>n</sup>-güedé. <sup>21</sup> Te té Pilatú-á<sup>n</sup> ñí xáha<sup>n</sup> tùcu-dé xii-yu:

—¿Ndédacàa núú úú cue tée-a cuíni-ndó dácácu-í? —càchí-dé xǎha<sup>n</sup>-dě xii-yu.

Te ní xáhǎ<sup>n</sup>-yu xii-dé:

—Té Barrabás dácácu-n —càchí-yu xáhǎ<sup>n</sup>-yu xii-dé.

<sup>22</sup> Te té Pilatú ní xicá<sup>n</sup> tnúhú-dě núú-yu, te xǎha<sup>n</sup>-dě:

—¿Te ná cuini-ndó cada-í Jèsús tée nani Cristú tée cachi sá Yá Ndióxi ní tendaha ñaha xii-dé véxi-dé ñuyíu-a-i? —cachi-dé xaha<sup>n</sup>-dè xii-yu.

Te nchaá-yu ní cáhá<sup>n</sup>-yu, te xähá<sup>n</sup>-yu:

—Cata caa-dé núú cùrúxí — cachi-yu xähá<sup>n</sup>-yu xii-dé.

<sup>23</sup> Te té Pilatú ní xaha<sup>n</sup> tùcu-dé xii-yu:

—¿Te ná cúú cuèchi ní guide-dé núú duca<sup>n</sup> cuini-ndó cada-í-dé-i? — cachi-dé xaha<sup>n</sup>-dè xii-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xähá<sup>n</sup>-yu xii-dé:

—¡Cata caa-dé núú cùrúxí! — cachi-yu xähá<sup>n</sup>-yu xii-dé.

<sup>24</sup> Te té Pilatú ní cutnùní iní-dé sá vâ nihí-dé nâcuáa cada-dé, chi uu<sup>n</sup>-gá ní ngúita ñáyu xicuáa-yu, te xiá<sup>n</sup> ní xicá<sup>n</sup>-dé ndute ní ndáhá-dè núú ncháa ñáyu, te ní xaha<sup>n</sup>-dè xii-yu:

—Tée-a cùu-dé ì<sup>n</sup> tée ñá túú tnàhí cuèchi-xi, te nchòhó cuini-ndó sá cùú-dé, dico ñu-ni mee-ndo cuído yáhu-ndo-dè chi yúhú vá cuído yáhu-í-dé —cachi-dé xaha<sup>n</sup>-dè xii-yu.

<sup>25</sup> Te nchaá-yu ní xähá<sup>n</sup>-yu xii-dé:

—¡Ñu nchúhú ndihi cue déhe-ndí cuído yáhu-ndí-dé! —cachi-yu xähá<sup>n</sup>-yu.

<sup>26</sup> Te sátá dúcá<sup>n</sup> te té Pilatú ní dâcâcu-dé té Barrábás, te ní táuchíu<sup>n</sup>-dè ní cani-güedé Jèsús. Te sátá dúcá<sup>n</sup> ní quide ñaha-güedé xii-gá, te ní táuchíu<sup>n</sup>-dè candeca ñaha-güedé xii-gá quíhí<sup>n</sup> cata caa ñaha-güedé xii-gá núú cùrúxí.

<sup>27</sup> Te cue tée cùu sandadú té Pilatú ndécá-güedé Jèsús cuánguihu xiti vehe càhnu cuu cuendá-dé, te cue tée cùu sandadú-án ñi cana-güedé dava-gá cue sandadú núú dúcá<sup>n</sup> ndèca-güedé Jèsús cuánguihu-án. <sup>28</sup> Te xiá<sup>n</sup> ñi taunuu-güedé dóó-gă, te ní dâcuíhnú ñaha-güedé xii-gá ì<sup>n</sup> dóó tícuèhé víhí. <sup>29</sup> Te ní cadúha-güedé ì<sup>n</sup> coróná ñu ní chihí-güedé díquí-gă, te ní chitnî-güedé ì<sup>n</sup> carrutí ndaha cùha-gá, te ní ngúíñí xiti-güedé núú-gá cúdíquí ndeé ñáhá-güedé xii-gá, te xähá<sup>n</sup>-güedé:

—¡Ío càhnu cuu yohó tée yindaha ñaha xii ñáyu isràél! —cachi-güedé xähá<sup>n</sup>-güedé xii-gá.

<sup>30</sup> Te ní tíú díí ñáhá-güedé xii-gá, te ní quehe<sup>n</sup>-güedé carrutí sá ñi sãñaha-güedé xii-gá te ní ducu<sup>n</sup>-güedé díquí-gă. <sup>31</sup> Te sátá ñi yáha ní

cúdíquí ndeé ñáhá-güedé xii-gá, te ní nataunuu ñaha-güedé xii-gá dóó tícuèhé víhí sã ñi dâcuíhnú ñaha-güedé xii-gá, te ní dândíunuu ñaha-güedé xii-gá dóó méé-gă, te dâtnùní ndécá ñaha-güedé cuáhá<sup>n</sup> núú catá cà ñaha-güedé xii-gá núú cùrúxí.

*Sata caa-güedé Jèsús núú cùrúxí*

(Mr. 15:21-32; Lc. 23:26-43; Jn. 19:17-27)

<sup>32</sup> Te ñuhu-güedé ndihi-gá ichi, te ní naníhí-güedé ì<sup>n</sup> tée ñuú Cirené naní-dè Xímú, te tée-án ñi quide yica-güedé ní xido-dé cùrúxí sá nchídó Jèsús.

<sup>33</sup> Te ní sáa-güedé ndihi-gá ì<sup>n</sup> xichi núú naní Gôlgotá, te tnúhu-án quée-xí: Núú naní yiqui díquí ndíyi, duha quèe-xi tnúhu-án. <sup>34</sup> Te xiá<sup>n</sup> sãñaha-güedé ndudí úa coho-gá ní cùu, te ñá túú ní xihí-gá chi dico-ni ní xito ndée-gă.

<sup>35</sup> Te ní sata caa ñaha-güedé xii-gá núú cùrúxí, te sátá dúcá<sup>n</sup> te cue tée cùu sandadú-án ñi xito ndée-güedé núu ndèdacàa-güedé cuu cuendá-güedé dóó-gă. Te duca<sup>n</sup> ñi cuu chi ní quee ndáa-xi nâcuáa ní cáhá<sup>n</sup> ì<sup>n</sup> tée ní xóo cáhá<sup>n</sup> tnúhu Yá Ndióxi ndée sanaha yòdo tnuní núú tütú-gá, te duha cachi-xi: “Ní xito ndée-güedé núu ndèdacàa-güedé cuu cuendá-güedé dóó-gă”, duha ní cachi tée-án te duca<sup>n</sup> ñi ngódó tnùní núú tütú-gá.

<sup>36</sup> Te sátá dúcá<sup>n</sup> ñi quide-güedé, te ní ngóo-güedé ndèé ñáhá-güedé xii-gá. <sup>37</sup> Te ní taxi ndecu-güedé ì<sup>n</sup> sá ndèé lètrá ndàa díquí-gă. Te lètrá-án cáhá<sup>n</sup>-xi ná cuendá duca<sup>n</sup> ñi quide ñaha-güedé xii-gá, te duha cáhá<sup>n</sup> lètrá-án: “Tée-a cùu-dé tée yindaha ñaha xii ñáyu isràél”, duha cachi-xi.

<sup>38</sup> Te tnàhá úú tée cùu ñadúhú ñi sata caa-güedé ñu-ni núú cùrúxí

tucu, te ì<sup>n</sup>-dé ní sata caa-güedé xio cùha-gá, te ingá-dé ní sata caa-güedé xio dàtni-gá. <sup>39</sup> Te nchaa ñáyiú yáha yatni núú táca-gá-á<sup>n</sup>, te dàcuicó-yu díquí-yu ndèhe ñahá-yu xii-gá, te xícuèhé ñáhá-yu. <sup>40</sup> Te xáhá<sup>n</sup>-yu xii-gá:

—Yòhó cächí-n sã dàngoyo-n veñúhu càhnu sá ìo cùnunu, te dandàa-n ingá veñúhu saa, te xítí úní-ni nduu sa nadaxínu-n, te vitna tanùu núú cùrúxí-á<sup>n</sup> dàcácu-n mèe-n te núú ndisa sá Dèhe Yá Ndiòxí cúú-n —cächí-yu xáhá<sup>n</sup>-yu xii-gá.

<sup>41</sup> Te diu-ni duca<sup>n</sup> cùdiquí ndeé ñahá cuè tée cùu dútú cùnùu xii-gá, ndihi cue tée dàcuaha ñaha xii ñáyiú nchaa tnúhu ní chídó tnùnì ndii Moisés, ndihi cue tée cùu fariséu, ndihi cue tée cùu sacuéhé núú ñáyiú israél, te xítnàha-güedé:

<sup>42</sup> —Tée-a ní ndacu-dé ní dácácu-dé dava ñáyiú, te mee-dě ñá ndácú-dě dàcácu nihnu-dé mée-dě. Te núú ndisa sá cúú-dé tée yíndaha ñaha xii ñáyiú israél, te na cùndehe-o nuu-dé núú cùrúxí-a cuèndá quíndáá iní-ó-dě. <sup>43</sup> Te cächí-dé sá sàndáá iní-dé Yá Ndiòxí, te mee-gã ná dàcácu ñaha-gã xii-dé te núú cùndahú iní ñahá-gã, chí mee-dě cächí-dé sá Dèhe-gá cúú-dě —cächí-güedé xítnàha-güedé.

<sup>44</sup> Te ndeé tnàhá cue tée cùu ñadúhú táca xio xio diñi-gá xícuèhé ñahá-güedé xii-gá.

### Ní xíhí Jèsús

(Mr. 15:33-41; Lc. 23:44-49; Jn. 19:28-30)

<sup>45</sup> Te òré ní cuu cuádava nduu te ní cunee nihí ñuyíú, te duca<sup>n</sup>-ni càa ní cuu caá úní sacuaa. <sup>46</sup> Te òré sa ta cùyatni cuu caá úní sacuaa-á<sup>n</sup>, te níhi ní cáhá<sup>n</sup> Jèsús, te cächí-gá:

—Èlì, Èlì, ¿láma sabàctaní? — cächí-gá.

Te tnúhu-á<sup>n</sup> quée-xí: Ndiòxí mée-í, Ndiòxí mée-í, ¿ná cuèndá ní dáña ñaha-n xii-í?, duha quèe-xi tnúhu-á<sup>n</sup>.

<sup>47</sup> Te dava cue tée xíndecu yatni núú táca-gá-á<sup>n</sup> ní tecú dóho-güedé nàcuáa ní cáhá<sup>n</sup>-gá, te ní xítnàha-güedé:

—Tée-a càna-dé té Èliás — cächí-güedé xítnàha-güedé.

<sup>48</sup> Te òré-ni-á<sup>n</sup> ní quene cunu ì<sup>n</sup> cue tée xíndecu-á<sup>n</sup> ní quehe<sup>n</sup>-dé luha cáhí, te ní chindóyo-dé xítí ndudí íá, te ní chinenu-dé díquí ì<sup>n</sup> yutnu càni te ní ndocani-dé ní chihi-dé yuhu-gá. <sup>49</sup> Te dava-güedé ní xáha<sup>n</sup>-güedé xii tée-á<sup>n</sup>:

—Cundetú tnaa na cùndehe-o nacoto núu quixi té Èliás dàcácu ñaha-dě xii-dé —cächí-güedé xáha<sup>n</sup>-güedé xii tée-á<sup>n</sup>.

<sup>50</sup> Te Jèsús níhi ní cana saa-gá, te ní xíhí-ni-gá. <sup>51</sup> Te sátá dúcá<sup>n</sup> te ní ndátá dđó cúú còrtiná xítí veñúhu càhnu sá ìo cùnunu ní quée dava ndáá,

te ndaa núú ñinu ní ngüíta-xi ní ndátá, te ní tnáa, te dava cava nàhnu ní táhú. <sup>52</sup> Te dava yaú núú yíndüxi ñáyiú ní xíhí ní sàndáá iní ñahá xii Yá Ndiòxí ní nacaá<sup>n</sup> te ní ndotó-yu.

<sup>53</sup> Te sátá ní yáha ní ndoto Jèsús, te cue ñáyiú ní ndoto-á<sup>n</sup> cuànguìhú-yu xítí ñuú Jerusàlén, te cue ñáyiú ñuú-á<sup>n</sup> ìo vai-yu ní xini-yu cue ñáyiú duca<sup>n</sup> ní ndoto-á<sup>n</sup>.

<sup>54</sup> Te sá dúcá<sup>n</sup> nãndi ní quide-xi, ndihi sá dúcá<sup>n</sup> ní tnáa xíá<sup>n</sup> ío ní yuhú tée cùu capitá<sup>n</sup> ndihi nchaa dava-gá cue tée ndècu ndihi-dé ndeè-güedé yiqui cùñú Jèsús, te ní xítnàha-güedé:

—Sá ndáá ndisa sá díú tée-a cùu-dé Dèhe Yá Ndiòxí ní cùu —cachí-güedé xítnàha-güedé.

<sup>55</sup> Te xica xínutnì vai ñáyiú dìhí ndéhé-yu nchaa nàcuáa ní quide ñaha-güedé xii Jèsús, te ñáyiú-á<sup>n</sup> cúú-yu ñáyiú ní chindéè-yu Jèsús, te ndeé distritú Galileá ní chinchícú<sup>n</sup> ñáhá-yu xii-gá. <sup>56</sup> Te tnuú ñáyiú-á<sup>n</sup> tnàhá tá Màriá Magdalèná, ndihi tá Màriá nãná tẽ Jàcobó ndihi té Chèè, ndihi nãná cue déhe té Zebèdeú.

### Chìndúxi-güedé Jèsús

(Mr. 15:42-47; Lc. 23:50-56; Jn. 19:38-42)

<sup>57</sup> Te ndècu ì<sup>n</sup> tée cuica nàni-dé Chèè te cùu-dé tée ñuú Arimàteá, te tnàhá-dé ní tnàhá tnúhu-dé ndihi Jèsús. Te òré sa ní cuua, <sup>58</sup> te ní sáhá<sup>n</sup>-dé núú tẽ Pilatú, te xáha<sup>n</sup>-dè núu vá cùndèè iní-dé dáña-dě chindúxi-dé

yiqui cùñú Jèsús. Te té Pilatú-án nǐ sáha-dé tnúhu, te ní táuchíú<sup>n</sup>-dē sá cuáha cuendá-güedé té Chèé-án yiqui cùñú-gá. <sup>59</sup> Te té Chèé-án nǐ quehe<sup>n</sup> cuendá-dé yiqui cùñú-gá, te ní chidúcú<sup>n</sup>nuu-dé ñ<sup>n</sup> dóó cuixí<sup>n</sup> dóó cándò. <sup>60</sup> Te sa nchii ñ<sup>n</sup> yaú sáá nǐ caá<sup>n</sup> té Chèé-án ñ<sup>n</sup> yiqui naha càva te xiá<sup>n</sup> cúú cuendá-dé, te yaú-án nǐ chihi-dé yiqui cùñú Jèsús, te dàtnùnǐ ní sadí-dé ñ<sup>n</sup> yúú cáhnú yúú quèhé<sup>n</sup> yuhu yaú-án, te ní xica-dé cuánuhú-dé. <sup>61</sup> Te tnàhá tá Màriá Magdalèná, ndihi ingá xíchí nání Màriá ní quexió-yu ní ngóo-yu yatni núú nchii yaú-án.

### *Cue té ndèé yaú núú yíhí yiqui cùñú Jèsús*

<sup>62</sup> Te sátá nǐ yáha ní quide túha ñáyiú nchaa sá nándíhi-yu nduu tnèé nduu ndètatú-yu-án, te diu-ni nduu ndètatú-yu-án nǐ sáhá<sup>n</sup> cue dútú cùnù, ndihi cue téé cùu fariséú ní cáhá<sup>n</sup> ndihi-güedé té Pilatú. <sup>63</sup> Te xáha<sup>n</sup>-güedé xii-dé:

—Yòhó téé cùnùu, véxi-ndí càchí tnúhu-ndí sá nǐ ndacu iní-ndí sá téé ndehnde nǐ xíhí-á<sup>n</sup> càchí-dé òré ndécú-gá-dé sá ndùu úní sá cùú-dé, te ndoto-dé. <sup>64</sup> Te tendaha-n cue téé na quíhí<sup>n</sup>-güedé cundeé-güedé yuhu yaú núú nǐ chihi-güedé yiqui cùñú-dé, chi na cuáhá<sup>n</sup> quíhí<sup>n</sup> cue téé ní xica cuu ndihi-dé duhu-güedé yiqui cùñú-dé, te cùñaha-güedé xii ñáyiú sá nǐ ndoto-dé. Chi núu duca<sup>n</sup> na càda-güedé te ío-gá dandàhú-güedé cue ñáyiú dàcúxí dàtná ní quide mee téé ní xíhí-á<sup>n</sup> —càchí-güedé xáha<sup>n</sup>-güedé.

<sup>65</sup> Te té Pilatú ní xáha<sup>n</sup>-dē xii-güedé:

—Náú cue sandàdú-a can-deca-ndo-güedé quíhí<sup>n</sup>, te cadí váha-ndo ndihi-güedé yuhu yaú-án nàcuáa tàú-xi cunduu, te na cundeé-güedé nàcuáa sàni iní-ndó cùnùu —cachí-dé xáha<sup>n</sup>-dē xii-güedé.

<sup>66</sup> Te cue téé-án nǐ xica-güedé cuáhá<sup>n</sup>-güedé, te ní tee-güedé ñ<sup>n</sup> sèñá yúú ndèdí yèhe yaú-án, te ní dándò-güedé cue sandàdú-án

ndèé-güedé yaú-án, te duca<sup>n</sup> nǐ quide-güedé cuendá sá vǎ yòo quíhí<sup>n</sup> nacaá<sup>n</sup> yaú-án.

## 28

### *Ní ndoto Jèsús*

(Mr. 16:1-8; Lc. 24:1-12; Jn. 20:1-10)

<sup>1</sup> Te sátá nǐ yáha nduu ndètatú ñáyiú, te ndumíngú nehé víhí-ní nǐ xica tá Màriá Magdalèná ndihi ingá xíchí nání Màriá cuángotó-yu yaú núú nǐ chihi-güedé yiqui cùñú Jèsús. <sup>2</sup> Te uu<sup>n</sup>ni níhi víhi ní tnáa, te òré duca<sup>n</sup> nǐ quide-xi chi ñ<sup>n</sup> espíritú xínú cuèchi núú Yǎ Ndiòxí ní quexió-xi núú dúcá<sup>n</sup> nchii yaú núú nǐ chihi-güedé yiqui cùñú Jèsús, te ní xócání espíritú-án yúú ndèdí yèhe yaú-án te ní ngóo-xi núú yúú-á<sup>n</sup>. <sup>3</sup> Te dàtná dátasa<sup>n</sup>-xi òré sáa nduté dùca<sup>n</sup> dátasa<sup>n</sup>-xi núú espíritú-án, te dóó níhnú-xí cuixí<sup>n</sup> quiyí. <sup>4</sup> Te òré duca<sup>n</sup> nǐ quide-xi te cue sandàdú ndèé yaú-án nǐ quidi ñaha-xi xii-güedé sá nǐ yùhú-güedé, te ní nduá-güedé, te ní xíta sá xíní tnùnǐ-güedé. <sup>5</sup> Te espíritú-án nǐ xáha<sup>n</sup>-xi xii cue ñáyiú dǐhí cuángoto yaú-án:

—Nchòhó ñáyiú dǐhí véxi coto yaú-a, vá yùhú-ndó chi yùhú cùtnùnǐ iní-í sá nchòhó véxi-ndo nànducu-ndo yiqui cùñú Jèsús Yaá ní xíhí núú cùrúxí. <sup>6</sup> Dico Yaá-án chi ñá túú-gǎ ndécú yiqui cùñú-gá iha, chi sa ní ndoto-gá, te diu duca<sup>n</sup> nǐ cachí-gá sá ndótó-gǎ cùtnàhá vátá cùú-gá, te chí táquixi cundehe-ndo núú nǐ sacá<sup>n</sup>-güedé yiqui cùñú-gá ní cùu te quíní-ndó nǎ ñá túú-gǎ. <sup>7</sup> Te vitna ío ndíhi chí cuáhá<sup>n</sup> núú xǐndecu cue téé ní xica cuu ndihi-gá, te duha cùñaha-ndo xii-güedé: “Ní ndoto Jèsús Yaá ní xíhí ní cùu, te codonùu-gá núú-ndó quíhí<sup>n</sup> distritú Galileá te yàcá<sup>n</sup> quíní-ndó-gǎ”, duha cùñaha-ndo xii-güedé. Duha ndùu tnúhu ní cachí tnúhu-í xii-ndo —càchí espíritú-án xáha<sup>n</sup>-xi xii cue ñáyiú dǐhí-á<sup>n</sup>.



8 Te cue ñáyiú dîhî-á<sup>n</sup> ñî natnîi-yu ichi, te súúni ndîhî cuánuhú-yu núú xîndecu cue téé ní xica cuu ndîhî Jèsús cuèndá nacani tnúhu-yu núú-güedé nàcuáa ní xáha<sup>n</sup> espíritú-á<sup>n</sup> xií-yu, te cuèi ní yùhú-yu dico súúni cùdîi ìní-yu. 9 Te ichi ñùhú-yu cuánuhú-yu, te na iní-yu ní quexìo Jèsús núú-yu ní dándácõo váha ñaha-gã xií-yu. Te ñáyiú-á<sup>n</sup> ñî ngüíñî xítî-yu núú-gã, te ní numi ñàhá-yu xii-gã, te ní chiñuhu ñàhá-yu. 10 Te ní xáha<sup>n</sup>-gã xií-yu:

—Vá yùhú-ndó, chí cuáhá<sup>n</sup> cúñaha-ndo xii cue téé ní xica cuu ndîhî-í sá ná quîhî<sup>n</sup>-güedé distritú Galileá, te yàcá<sup>n</sup> quini ñàhá-güedé xii-í —càchî-gã xáha<sup>n</sup>-gã xií-yu.

*Nàcuáa ndùu tnúhu ní nacani cue sandàdú*

11 Te ñîni ñùhu cue ñáyiú dîhî-á<sup>n</sup> ichi cuánuhú-yu, te dava cue sandàdú cue téé ndéé yaú-á<sup>n</sup> ní cùu ní xica-güedé cuánuhú-güedé ñuú cuèndá nacani tnúhu-güedé núú cuè téé cùu dútú cùnùu nacuáa ní cuu. 12 Te cue téé cùu dútú cùnùu-á<sup>n</sup> ñî quide-güedé jùndá ndîhî cue téé cùu sacuéhé núú ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndîhî cue sandàdú-á<sup>n</sup> sá cuáñaha-güedé vai díhú<sup>n</sup> cuèndá dacuàndehnde-güedé. 13 Te ní xáha<sup>n</sup>-güedé xii cue sandàdú-á<sup>n</sup>:

—Cuìní-ndí sá vã càhá<sup>n</sup> ndáá-ndó núú ñáyiú nàcuáa ní cuu, chí cúñaha-ndo xii-yu sá òré xidí-ndó ñî quixi cue téé ní xica cuu ndîhî-dé ní dúhú-güedé yiqui cùñú-dé néhé-güedé cuáhá<sup>n</sup>, duha cúñaha-ndo xii-yu. 14 Te núu na ñîhî té Pilatú téé cùu gobiernú tnúhu nàcuáa cúñaha-ndo xii ñáyiú, te nchúhú cada ndáá-ndí ndîhî-dé cuèndá sá ñà túú nã cada ñaha-dé xii-ndo —càchî-güedé xáha<sup>n</sup>-güedé xii cue sandàdú-á<sup>n</sup>.

15 Te cue sandàdú-á<sup>n</sup> ñî quehe<sup>n</sup> cuèndá-güedé díhú<sup>n</sup>, te ní xica-güedé cuáhá<sup>n</sup>-güedé te ní càhá<sup>n</sup>-güedé nàcuáa ní xáha<sup>n</sup> cuè téé-á<sup>n</sup> càhá<sup>n</sup>-güedé. Te nchaa ñáyiú isràél ní ñîhî-yu tnúhu

ní càhá<sup>n</sup>-güedé-á<sup>n</sup>, te diu-ni tnúhu-á<sup>n</sup> càhá<sup>n</sup>-yu ndéé vitna.

*Jèsús xáha<sup>n</sup>-gã xii cue téé ní xica cuu ndîhî-gã nàcuáa ndùu chiu<sup>n</sup> cada-güedé (Mr. 16:14-18; Lc. 24:36-49; Jn. 20:19-23)*

16 Te ndî ùxí ñî<sup>n</sup> cue téé ní xica cuu ndîhî Jèsús ní xica-güedé cuáhá<sup>n</sup>-güedé ñî<sup>n</sup> yucu càa distritú Galileá núú ñî xáha<sup>n</sup>-gã naníhî tnàhá-güedé ndîhî-gã. 17 Te òré ní xiní-güedé Jèsús te ní chiñuhu ñaha-güedé xii-gã, dico dava-güedé sàni ñî<sup>n</sup> sani úú iní-güedé núu diu-gã àdi ñà díú-gã. 18 Te Jèsús ní sàndehe yatni-gã ndéé núú-güedé, te ní xáha<sup>n</sup>-gã xii-güedé:

—Yúhú ndécú ndîhî-í tnúhu ndee ìní táxí tnùní-í cuèi andîu te cuèi ñuyíú-a. 19 Te vitna tàuchiu<sup>n</sup>-í sá quîhî<sup>n</sup>-ndó ñîhî ñuyíú càhá<sup>n</sup>-ndó tnúhu-í núú ñáyiú cuèndá tuha ñàhá-yu xii-í, te dacuàndute-ndó-yu. Te òré duca<sup>n</sup> càda-ndo, te cacunehe-ndo tãtá-ó Dútú Ndiõxí ndîhî yúhú Yaá cúú Dêhe-gã ndîhî Espíritú-gã. 20 Te cúñaha-ndo xii-yu sá ná càdá-yu nchaa nàcuáa sa ní dánèhé ñàhá-í xii-ndo càda-ndo. Te na càchî tnúhu-í sá cùndecu ndîhî ñaha-ñî-í xii-ndo ñuyíú-a ndéé ná sàa nduu nàa-xi —cachî-gã xáha<sup>n</sup>-gã xii-güedé. Te duca<sup>n</sup> na cùnduu.

## TNÚHU NÍ CHÍDÓ TNUNÍ TÈ MÀCÚ

*Té Juàá téè dàcuandute ñaha xii ñáyiú cáhá<sup>n</sup>-dé tnúhu Yá Ndiöxí xití yucu (Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Duha ní quesaha tnúhu sá cáhá<sup>n</sup> nàcuáa naníhí tãhú-ó tnúhu Xítohó Jesucristú Déhe Yá Ndiöxí.

<sup>2</sup> Te ndíi Chàíá téè ní xóo cáhá<sup>n</sup> tnúhu Yá Ndiöxí ndéé sanaha ní chídó tnuní ndíi nàcuáa ní xáha<sup>n</sup> Yá Ndiöxí xii Déhe-gá, te duha ní xáha<sup>n</sup>-gã:

Tendaha-í ñí téè codonúu-dé núú-n, te dàtúha-dé ñáyiú cuendá tnií-yu tnúhu-n.

<sup>3</sup> Te téè-án quíhi-dé xití yucu te níhi cáhá<sup>n</sup>-dé cúñaha-dé xii ñáyiú:

“Chí dáñá nchàa ichi cuehé ichi duha ndècu-ndo, te tnií-ndo ichi váha, te duca<sup>n</sup> càda-ndo cuendá cundecu túha-ndo, chí véxi Yaá ío cùnúu”, duha cúñaha-dé xií-yu.

Duha ndúu tnúhu ní chídó tnuní ndíi Chàíá nàcuáa ní xáha<sup>n</sup> Yá Ndiöxí xii Déhe-gá. <sup>4</sup> Te téè dii cuendá-xi ní ngódó tnuní-án nání-dé Juàá, te téè-án ní xíhi-dé xití yucu ní cáhá<sup>n</sup>-dé tnúhu Yá Ndiöxí, te ní xóo dacuandute-dé ñáyiú, te duha ní xáha<sup>n</sup>-dè xií-yu:

—Chí dándixi túu iní sá ñà túú quíde váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te duca<sup>n</sup> te Yá Ndiöxí cada càhnu iní-gá nchaa yíca cuèchi-ndo — duha ní xáha<sup>n</sup>-dè xií-yu.

<sup>5</sup> Te nchaa ñáyiú distritú Jùdeá, ndíhi ñáyiú ñuú Jerusàlén ní sáhá<sup>n</sup>-yu ndéé yúte Jòrdán núú ndécú tè Juàá ní xíndedóho-yu nchaa tnúhu ní cáhá<sup>n</sup>-dé. Te cue ñáyiú ní náhmá nchaa yíca cuèchi-xi te ní dacuandute ñaha-dé xií-yu.

<sup>6</sup> Te té Juàá-án ní xíhnu-dé dóo idi caméyu, te ñí ñí ní cuu pañú xití-dé, te ní xóo caxi-dé tíca làngóstá ndíhi ndudí ñúñú cuéchi. <sup>7</sup> Te ní xáha<sup>n</sup> tucu-dé xii ñáyiú:

—Nchicú<sup>n</sup> ñí téè véxi, te téè-án ío-gá cúnúu-dé dàcúxí yúhú, chí yúhú cúu-í ñí téè duu<sup>n</sup> duu<sup>n</sup> ñà túú tàú-í ngúnundeyi-í nandaxi cuèdicó ñí nihnu chàú-dé dico quíde-í chiu<sup>n</sup>-dé. <sup>8</sup> Te yúhú dacuandute ñaha-í xii-ndo, dico mee-dè taxi-dé Espiritú Yá Ndiöxí cundecu ndíhi-ndo —càchí-dé xáha<sup>n</sup>-dè xií-yu.

*Sàndute Jesús*

*(Mt. 3:13-17; Lc. 3:21-22)*

<sup>9</sup> Te dàvá-án ñí quee Jèsús ñuú Nazàrét ñí ñuú yíndèhu distritú Galileá cuáhá<sup>n</sup>-gá yúte Jòrdán. Te yàcá<sup>n</sup> ní dacuandute ñaha té Juàá xii-gá. <sup>10</sup> Te òré ní nene-gá xití ndute, te ní xiní-gá nchíi andíu, te ní quee Espiritú Yá Ndiöxí véxi cuu<sup>n</sup>-xi ngúndecu ndíhi ñaha-xi xii-gá, te dàtná cáá ñí lómá cáá Espiritú-án véxi cuu<sup>n</sup>-xi. <sup>11</sup> Te òré-án ñí tecú ní cáhá<sup>n</sup> Yá Ndiöxí ndéé andíu, te xáha<sup>n</sup>-gã xii Jèsús:

—Yòhó cúu-n Déhe-í téè ío cùu iní-í te ío cùdí iní ñáhà-í xii-n —càchí-gá xáha<sup>n</sup>-gã.

*Sácuíhná quíde yíca-xi cada Jesús sá ñà túú tàú-gá cada-gá dico ñà túú ní quíde-gá*

*(Mt. 4:1-11; Lc. 4:1-13)*

<sup>12</sup> Te Espiritú Yá Ndiöxí ndécá-xí Jèsús cuáhá<sup>n</sup> ñí xití yucu. <sup>13</sup> Te xití yucu-án ío víhí quíti déé<sup>n</sup>, te xíá<sup>n</sup> ndécú Jèsús ní ngúita sácuíhná quíde yíca-xi cada-gá ñí sá ñà túú tàú-gá cada-gá dico ñà túú ní sàndáá iní-gá. Te cue espíritú xínú cuèchi núú Yá Ndiöxí ní xínu cuechi-xi núú-gã. Te ní xíndecu-gá údico nduu xití yucu-án.

*Distritú Galileá ní chisaha Jèsús chiu<sup>n</sup> ní táhú Tãtã-gã Dútú Ndiöxí cada-gá*

*(Mt. 4:12-17; Lc. 4:14-15)*

<sup>14</sup> Te sáta ñí ngava té Juàá ve-caá, te Jèsús cuáhá<sup>n</sup>-gá distritú Galileá dànehé-gá ñáyiú tnúhu váha, tnúhu sá cáhá<sup>n</sup> nàcuáa ndíhu ndaha ñaha Yá Ndiöxí xií-yu. <sup>15</sup> Te xáha<sup>n</sup>-gã xií-yu:

—Vitna sa ní cuyatni nduu ndíhu ndaha ñaha Yá Ndiöxí xii-ndo, te

chí dáñá nchàa ichi cuehé ichi duha ndècu-ndo, te quindáá iní-ndó tnúhu váha, tnúhu sá càhá<sup>n</sup> nàcuáa naníhí tàhú-ndó —càchí-gá xàha<sup>n</sup>-gã xií-yu.

*Jèsús càhá<sup>n</sup>-gá cúmí tnàhá cue téé tnè chácá*

*(Mt. 4:18-22; Lc. 5:1-11)*

16 Te Jèsús ñúhú-gã ichi cuáhán-gá tá yàha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí xídáquëe-güedé ñunu-güedé xítí ndute tnè-güedé chácá, chi quití tnàhí-á<sup>n</sup> cúu chiu<sup>n</sup>-güedé tnè-güedé-di. 17 Te Jèsús ní xáha<sup>n</sup>-gã xii-güedé:

—Chí dáñá chiu<sup>n</sup> quide-ndo-á<sup>n</sup>, te quixi-ndo chitnahá ñáhá-ndó xii-í te taxi-í ingá núu chiu<sup>n</sup> cada-ndo chi quíhí<sup>n</sup>-ndó càhá<sup>n</sup>-ndó ñáyiu cuendá dacuàhá-yu tnúhu-í —càchí-gá xàha<sup>n</sup>-gã xii-güedé.

18 Te òré-ni-á<sup>n</sup> ní dáñá cuè téé-á<sup>n</sup> ñunu-güedé te ní tuha ñaha-güedé xii-gá.

19 Te cuáhán-gá luha-gá, te ní xiní-gá té Jàcobó ndíhi ñaní-dé té Juàá ñúhú-güedé xítí bàrcú-güedé nátícu-güedé ñunu-güedé, te ndí ndùú-güedé cúu-güedé déhe té Zebèdeú. 20 Te ní cana ñaha-gã xii-güedé, te ní dándõo-güedé tātá-güedé ndíhi cue téé xínu cuechi núu-güedé xítí bàrcú, te ní tuha ñaha-güedé xii-gá.

*È<sup>n</sup> téé yíhi ñaha espíritú cündíhi yucu ñávãha*

*(Lc. 4:31-37)*

21 Te ní quexìo Jesús ndíhi cue téé-á<sup>n</sup> è<sup>n</sup> ñúu nání Càpernaúm, te yàcá<sup>n</sup> ndécú-gã ní tnahá nduu ndètatú ñáyiu, te cuánguèhu-gá veñúhu ñáyiu isràél dānehé ñáhá-gã xií-yu. 22 Te xicuñúhu vñí-yu nchaa tnúhu càhá<sup>n</sup>-gá, chi quide-gá sá cúu-gã è<sup>n</sup> Yaá táxí tnùní víhí, te ñá túú dàcuaha ñaha-gá xií-yu dàtná dácuaha ñaha cue téé dàcuaha ñaha xií-yu nchaa tnúhu ní chídó tnùní ndíi Moisés. 23 Te xítí veñúhu-á<sup>n</sup> ndécú tnàhá è<sup>n</sup> téé yíhi ñaha è<sup>n</sup> espíritú cündíhi yucu ñávãha, te

espíritú-á<sup>n</sup> ní quide-xi níhi ní cáhá<sup>n</sup> téé-á<sup>n</sup>, te xàha<sup>n</sup>-dē xii Jèsús:

24 —¿Te ná cuíní yòhó Jèsús téé ñúu Nazàrét cada ñaha-n xii-ndí ñúu véxi-n ñúu ndécú-ndí-i? ¿Á<sup>n</sup> véxi-n dànaa ñaha-n xii-ndí? Chi yúhú xiní ñáhà-í xii-n sá cúu-n è<sup>n</sup> téé ñá túú tnàhí cuéchi-xi, chi núu Yá Ndiòxí ní quee-n véxi-n ñúyíu-a —càchí-dé xàha<sup>n</sup>-dē xii-gá.

25 Dico Jèsús ní tenàá-gá espíritú cündíhi yucu ñávãha-á<sup>n</sup>, te xàha<sup>n</sup>-gã:

—¿Cadí yuhu-n, te taquèe yiqui cuñú téé-á<sup>n</sup>! —càchí-gá xàha<sup>n</sup>-gã xii espíritú-á<sup>n</sup>.

26 Te espíritú cündíhi yucu ñávãha-á<sup>n</sup> ní dácüyíhí ñáhá-xí xii téé-á<sup>n</sup>, te ní dácáná sàa ñaha-xi, te ní quee-xi yiqui cuñú-dé cuáhán-xi.

27 Te nchaa ñáyiu xíndecu-á<sup>n</sup> ío ní cuñúhu-yu, te ní xítinahá-yu:

—¿Te nása nduu-tu sá quidé tēe-a? ¿Ndudú sáa càhá<sup>n</sup>-tu-dé sánuu? Te quide-dé dàtná quidé è<sup>n</sup> téé cùnno vihi, chi càhá<sup>n</sup>-ni-dé te sàndáá iní ñáhá nchaa espíritú cündíhi yucu ñávãha —càchí-yu xítinahá-yu.

28 Te ío ndíhi ní níhi nchaa ñáyiu dava-gá ñúu yíndèhu distritú Galileá tnúhu nchaa nàcuáa càhá<sup>n</sup> Jèsús ndíhi nchaa sá quidé-gã.

*Jèsús quidé tātna-gá náná ñadíhí té Xímú*

*(Mt. 8:14-15; Lc. 4:38-39)*

29 Te òré ní ndee Jèsús veñúhu cue ñáyiu isràél, te cuáhán-gá ndíhi té Jàcobó ndíhi té Juàá vehe té Xímú ndíhi té Ndríxí. 30 Te náná ñadíhí té Xímú cùhú-a<sup>n</sup> ñúhu vihi-a<sup>n</sup> cahni, te ndíhi-ni ní xáha<sup>n</sup>-güedé xii Jèsús sá cùhú-a<sup>n</sup>. 31 Te ní sáhán-gá núu cáá ñàha cùhú-á<sup>n</sup> te ní tñi-gá ndaha-a<sup>n</sup> ní ndocani ñaha-gã xii-a<sup>n</sup>. Te òré-ni-á<sup>n</sup> ní nchíco-a<sup>n</sup> cahni, te ní ngüíta-a<sup>n</sup> xínu cuechi-a<sup>n</sup> núu-güedé ndíhi-gã.

*Jèsús quidé tātna-gá vài ñáyiu cùhú*

*(Mt. 8:16-17; Lc. 4:40-41)*

32 Te òré sa cuíní-xi cundiquè<sup>n</sup> te ní quexìo ñáyiu núu ndécú Jèsús, te nchaa ñáyiu cùhú ní dátacá-yu

ndècá-yu ní sáá núú-gă, te tnàhá cue ñáyiú yìhi ñaha espíritú cùndìhi yucu ñávàha ndècá-yu ní sáá núú-gă. <sup>33</sup> Te nchaa ñáyiú ñuú-án nǐ chítú níhnǔ-yu yuyèhe vehe núú nǐ quexìo Jesús. <sup>34</sup> Te Jèsús ní quide tátna-gá nchaa ñáyiú cùhú cuèi ndi díí<sup>n</sup> ndi díí<sup>n</sup> núú cuèhé tnàhá-yu ì<sup>n</sup> ì<sup>n</sup>-yu, te ní queñuhu-gá nchaa espíritú cùndìhi yucu ñávàha yìhi ñaha xii ñáyiú, te ñá túú ní dàña-gá cáhá<sup>n</sup> cue espíritú cùndìhi yucu ñávàha-án ni ì<sup>n</sup> tnúhu, te duca<sup>n</sup> nǐ quide-gá chi cue espíritú-án sa xìní-xi yoo cùu-gá.

*Jèsús càhá<sup>n</sup>-gá tnúhu Yá Ndiõxí distritú Galileá*

*(Lc. 4:42-44)*

<sup>35</sup> Te òré vátá tũndaá váha-gá ní ndacóo Jèsús cuáhá<sup>n</sup>-gá ì<sup>n</sup> xio yuhu ñuú núú ñà túú ñáyiú ndècu cuendá yácá<sup>n</sup> cáhá<sup>n</sup> ndihí-gá Yá Ndiõxí. <sup>36</sup> Te té Xímú ndihí cue té cùndihí-dé nánducu ñaha-güedé xii-gá. <sup>37</sup> Te òré ní naníhí ñáhá-güedé xii-gá, te ní xáha<sup>n</sup>-güedé:

—Nchaa ñáyiú nànducu ñahá-yu xii-n —càchí-güedé xáha<sup>n</sup>-güedé xii-gá.

<sup>38</sup> Te ní xáha<sup>n</sup>-gá xii-güedé:

—Chí ná quíhí<sup>n</sup>-ó nchaa ñuú xĩndáa yatni-a, chí danèhé-í ñáyiú tnúhu Yá Ndiõxí chí ñuú chiu<sup>n</sup>-án vèxi-í —càchí-gá xáha<sup>n</sup>-gá xii-güedé.

<sup>39</sup> Te Jèsús tá xica ndodo-gá cuáhá<sup>n</sup> nchaa ñuú yĩndèhu distritú Galileá dánèhé-gá ñáyiú, te ndi tnàhá ì<sup>n</sup> ì<sup>n</sup> ñuú sáá-gá te duca<sup>n</sup> cuãnguihu-gá veñúhu-yu dànehé ñáhá-gá xii-yu tnúhu Yá Ndiõxí, te cue ñáyiú yìhi ñaha espíritú cùndìhi yucu ñávàha ta queñuhu-gá nchaa espíritú-án yiqui cùñú-yu cuáhá<sup>n</sup>.

*Jèsús quidé tátna-gá ì<sup>n</sup> té tnàhá cuéhé sã dátèhyú nihnu-xi yiqui cùñú-ó*  
*(Mt. 8:1-4; Lc. 5:12-16)*

<sup>40</sup> Te ní quexìo ì<sup>n</sup> té tnàhá cuéhé sã dátèhyú nihnu-xi yiqui cùñú-ó núú Jèsús, te ní ngüíñí xítí-dé núú-gá càhá<sup>n</sup> ndàhú-dé, te xáha<sup>n</sup>-dè xii-gá:

—Véxi-í càhá<sup>n</sup> ndàhú-í núú-n núú vá cùndèe ìni-n càda tátna ñaha-n xii-í chí cùtnuní ìni-í sá ndácú-n —càchí-dé xáha<sup>n</sup>-dè xii-gá.

<sup>41</sup> Te Jèsús ní cundàhú ìni ñáhá-gá xii-dé te ní dácáá-gá ndaha-gá ní tendaha ñaha-gá xii-dé, te xáha<sup>n</sup>-gá:

—Cuu cada tátna ñaha-í xii-n, te vitna ndúha-n —càchí-gá xáha<sup>n</sup>-gá xii-dé.

<sup>42</sup> Te òré-ni-án nǐ xócuíñí cuéhé tnàhá-dé. <sup>43-44</sup> Te Jèsús ní cáhá<sup>n</sup> víhí-gá dóho-dé, te xáha<sup>n</sup>-gá xii-dé:

—Vitna cuanùhú-na, dico vá yõo ì<sup>n</sup> cùñaha-n sã ní quide tátna ñaha-í xii-n, te núú dütú-ni cuáhá<sup>n</sup> cuendá sã ná quíni ñáhá-dè xii-n sã ní ndúha-n te cuáha-n-dè sã ndúú tãhú Yá Ndiõxí dátna ní cachí ndi Moisés cuendá ná quíni ñáyiú sã ndáa ní ndúha-n —càchí-gá xáha<sup>n</sup>-gá xii-dé.

<sup>45</sup> Te té ní cùhú-án nǐ xica-dé cuáhá<sup>n</sup>-dè, te ní ngüíta-dé xáha<sup>n</sup>-dè xii nchaa ñáyiú ta naníhí-dè nàcuáa ní quide Jèsús ní quide tátna ñaha-gá xii-dé. Te sã dúcá<sup>n</sup> nǐ xité nuu té-án cuendú nàcuáa ní quide ñaha Jèsús xii-dé ní quide tátna ñaha-gá ní ndúha-dé, te xíá<sup>n</sup> núú dayuhu nǐ xóo quíhu-gá dava ñuú núú ïo vãi ñáyiú ndèhe ñaha xii-gá, te ní xóo cundecu-gá xítí yucu núú ñà túú ñáyiú ndècu. Te nchaa ñuú ní quee ñáyiú ní sáhá<sup>n</sup>-yu núú ndécú-gá ní cáhá<sup>n</sup> ndihí ñahá-yu xii-gá.

## 2

*Jèsús quidé tátna-gá ì<sup>n</sup> té cùhú ñá cùú-gá candá nihnu*

*(Mt. 9:1-8; Lc. 5:17-26)*

<sup>1</sup> Te sátá nǐ cuu ì<sup>n</sup> ùú nduu sã nǐ quee Jèsús ñuú Capernaúm te ní nasáa tucu-gá, te cue ñáyiú ní níhí-yu tnúhu sã nǐ ndexìo-gá núú quidé vèhe-gá. <sup>2</sup> Te ndihí-ni ní tacá cuéhé víhí-yu, te ní chítú víhí-yu ndéé yuyèhe te ñá ní tnàhá-gá-yu. Te ní ngüíta-gá ní dánèhé ñáhá-gá xii-yu tnúhu Yá Ndiõxí. <sup>3</sup> Te òré-án nǐ quexìo cúmí tnàhá cue té núú ndécú-gá nchídó-güedé ì<sup>n</sup> té cùhú ñá cùú-gá candá nihnu-dé. <sup>4</sup> Dico ñá túú ní ndàcu-güedé sáa-güedé ndéé



núú-gă chi ío cuéhé ñăyiu ndècu. Te xíà<sup>n</sup> núu ní sáá-güedé díquí véhé núú yíhí-gă-á<sup>n</sup> nǐ caá<sup>n</sup>-güedé, te ichi ndàa díquí véhé-ă<sup>n</sup> nǐ dáquëe-güedé téé cùhú-á<sup>n</sup>, te ñùhu-dé ì<sup>n</sup> xító ní dáquëe ñaha-güedé ndéé núú-gă. <sup>5</sup> Te Jèsús sa ní cutnùní iní-gá sá sàndáá iní ñáhá-güedé xii-gá núu ní xáha<sup>n</sup>-gă xii téé cùhú-á<sup>n</sup>:

—Yòhó téé cùhú, sa ní quide càhnu iní-í nchaa cuéchi-n —càchí-gá xăha<sup>n</sup>-gă xii-dé.

<sup>6</sup> Te xíà<sup>n</sup> xǐnucóo ì<sup>n</sup> ùú cue téé dàcuaha ñaha xii ñáyiu nchaa tnúhu ní chídó tnùní ndíi Moisés, te sá dúcá<sup>n</sup> nǐ cáhá<sup>n</sup> Jèsús núú cue téé-á<sup>n</sup> nǐ sani iní-güedé: <sup>7</sup> “Téé-a càhá<sup>n</sup> cuéhé-dé cuendá Yá Ndiöxí duha càhá<sup>n</sup>-dé, chi vá yòo ì<sup>n</sup> ndàcu cada cahnu iní nchaa yíca cuéchi ñáyiu chi ì<sup>n</sup>di díí-ni Yá Ndiöxí quidé càhnu iní-gá”, duha ní sani iní-güedé. <sup>8</sup> Dico òré-ni-á<sup>n</sup> nǐ cutnùní iní Jèsús nàcuáa sàni iní-güedé, núu ní xáha<sup>n</sup>-gă xii-güedé:

—¿Te ná cuendá duca<sup>n</sup> sàni iní-ndó-í? <sup>9</sup> Te sá dúhá nǐ xáha<sup>n</sup>-í xii téé cùhú-a sá nǐ quide càhnu iní-í nchaa yíca cuéchi-dé, te xíà<sup>n</sup> nchòhó ñá túú cùtnuní iní-ndó núu ndáá càhá<sup>n</sup>-í àdi ñá ndáá. Dico núu cùu-í-dé sá ndácóo-dé, te ndocani-dé xító ñùhu-dé véxi, te caca-dé, te cutnùní ndáá iní-ndó núu ndáá càhá<sup>n</sup>-í àdi ñá ndáá chi cundehe núú-ndó nàcuáa cada-í. <sup>10</sup> Te vitna na càda-í nàcuáa cutnùní iní-ndó nchaa-ndo sá yúhú Téé cùu ñani tnáhá-ndó nchaa-ndo ndecu ndíhi-í tnúhu ndee iní sá cáda càhnu iní-í nchaa cuéchi ñáyiu ñuyíú-a —càchí-gá xăha<sup>n</sup>-gă xii-güedé.

Te sátá dúcá<sup>n</sup> te ní xáha<sup>n</sup>-gă xii téé cùhú-á<sup>n</sup>:

<sup>11</sup> —Ndacóo te ndocani-n xító ñùhu-n véxi-á<sup>n</sup>, te núhú-n vèhe-n —cachí-gá xăha<sup>n</sup>-gă xii-dé.

<sup>12</sup> Te òré-ni-á<sup>n</sup> nǐ ndacóo-dé, te ní ndocani-dé xító ñùhu-dé ní quexio-á<sup>n</sup>, te ndèhe nchaa ñáyiu xǐndecu-á<sup>n</sup> nǐ ndee-dé tnuú-yu cuáhá<sup>n</sup>-dé. Te sá dúcá<sup>n</sup> nǐ quide Jèsús ní quide tátna-gá téé-á<sup>n</sup>, xíà<sup>n</sup> ío ní cuñúhu nchaa ñáyiu, te ní xítñahá-yu:

—Càhnu vihi cuu Yá Ndiöxí, chi ñá ì<sup>n</sup> ndùu quiní-ó dùha cuu datná ní cuu vitna —càchí-yu xítñahá-yu.

*Jèsús càhá<sup>n</sup>-gá ì<sup>n</sup> téé nàni Leví  
(Mt. 9:9-13; Lc. 5:27-32)*

<sup>13</sup> Te Jèsús cuáhá<sup>n</sup> tucu-gá yuhu làgúná, te ío cuéhé ñáyiu ní sátñahá ñáhá xii-gá, te ní dánèhé ñáhá-gă xii-yu tnúhu Yá Ndiöxí. <sup>14</sup> Te òré ní yáha ní dánèhé ñáhá-gă xii-yu, te ní naquehe<sup>n</sup>-gá ichi, te ní yáha yatni-gá ì<sup>n</sup> xichi núú núcóo ì<sup>n</sup> téé nàni Leví déhe ì<sup>n</sup> téé nàni Alfeú quidé còbrá-dé ñáyiu cuendá impuèstú chi cobradór cúu-dé. Te òré ní xiní ñáhá-gă xii-dé, te ní xáha<sup>n</sup>-gă:

—Néhe chitnahá ñáhá-n xii-í —càchí-gá xăha<sup>n</sup>-gă xii-dé.

Te té Lèví-á<sup>n</sup> nǐ ndacuñí-dé, te ní tuha ñaha-dé xii-gá.

<sup>15</sup> Te té Lèví-á<sup>n</sup> cuáhá<sup>n</sup>-dé ndíhi Jèsús vehe-dé. Te yíhi Jesús mésá xéxi-gă ndíhi cue téé xica cuu ndíhi-gă, te tnáhá vài cue téé cuihna iní-xi quide cobrá ñáhá xii ñáyiu cuendá impuèstú, ndíhi dava-gá cue téé ndècu ichi cuehé ichi duha núcóo ndíhi ñaha-güedé xii-gá xéxi ndíhi ñaha-güedé, te duca<sup>n</sup> chi ío vài ñáyiu nchicú<sup>n</sup> ñáhá xii-gá. <sup>16</sup> Te sá nǐ xiní cue téé dàcuáha ñaha xii-yu nchaa tnúhu ní chídó tnùní ndíi Moisés, ndíhi cue téé cùu fariséú xéxi Jèsús ndíhi nchaa cue téé-á<sup>n</sup> núu ní xicá<sup>n</sup> tnúhú-güedé núú cue téé xica cuu ndíhi-gá, te xăha<sup>n</sup>-güedé:

—¿Ná cuendá duca<sup>n</sup> quide téé cùu mestrú-ndó xéxi-dé ndíhi cue téé cuihna iní-xi quide cobrá ñáhá xii ñáyiu cuendá impuèstú, ndíhi nchaa dava-gá cue téé ndècu ichi cuehé ichi duha-í? —càchí-güedé xăha<sup>n</sup>-güedé.

<sup>17</sup> Te Jèsús ní tecú dóho-gá nàcuáa ndùu tnúhu ní xáha<sup>n</sup>-güedé xii cue téé xica cuu ndíhi-gá, núu ní xáha<sup>n</sup>-gă xii-güedé:

—Nchaa ñáyiu ñá túú cùhú chi ñá túú xini ñuhú-yu ñátátná, dico nchaa ñáyiu cùhú chi xini ñuhú-yu ñátátná. Te yúhú véxi-í càhá<sup>n</sup>-í ñáyiu cùtnuní iní-xi sá ndécú cuéchi-xi te ñá túú véxi-í càhá<sup>n</sup>-í ñáyiu càchí sá ñá túú

ndècu cuéchi-xi —càchí-gá xǎha<sup>n</sup>-gǎ xii-güedé.

*Cuendá cue ñáyiú ñá túú tnàhí ná xéxí áma càhá<sup>n</sup> ndihí-yu Yá Ndiöxí (Mt. 9:14-17; Lc. 5:33-39)*

<sup>18</sup> Te cue téé xica cuu ndihí té Juàá, ndihí cue téé xica cuu ndihí cue téé cùu fariséú ñá túú tnàhí ná xéxí-güedé áma càhá<sup>n</sup> ndihí-güedé Yá Ndiöxí. Te ñ<sup>n</sup> nduu duca<sup>n</sup> xiquide-güedé, te ní sáhá<sup>n</sup> ñáyiú ní xicá<sup>n</sup> tnúhũ-yu núú Jèsús, te xǎhá<sup>n</sup>-yu xii-gá:

—Cuñí-ndí cachí tnúhu-n ná cuendá cue téé xica cuu ndihí té Juàá, ndihí cue téé xica cuu ndihí cue téé cùu fariséú ñá túú tnàhí ná xéxí-güedé áma càhá<sup>n</sup> ndihí-güedé Yá Ndiöxí, te cue téé xica cuu ndihí-n ñá túú dùca<sup>n</sup> quide-güedé —càchí-yu xǎhá<sup>n</sup>-yu xii-gá.

<sup>19</sup> Te Jèsús ní xáha<sup>n</sup>-gǎ xií-yu:

—Nchòhó xìní-ndó sǎ vǎ cúú cǔñaha-o xii ñáyiú ñùhu vico tnándaha sǎ vǎ cúú càxí-yu nini ndècu ndihí ñaha téé tnándaha xií-yu. <sup>20</sup> Dico sáá nduu te vǎ cùndècu ndihí ñaha-gá téé tnándaha-á<sup>n</sup> xií-yu, te dàvá-á<sup>n</sup> te cahni iní-yu vǎ cáxí-yu cuendá sǎ ndihú iní-yu.

<sup>21</sup> Te vǎ yǎo ñ<sup>n</sup> dándée luha dóó sáá ñ<sup>n</sup> dóó sa ní cuu tühú víhí, chi dóó sáá-á<sup>n</sup> nàndiyi-xi te uu<sup>n</sup>-gǎ ndata-xi dǎo sǎ ní cuu tühú-á<sup>n</sup>. <sup>22</sup> Te ní vǎ yǎo ñ<sup>n</sup> chihí ndidí sáá xití ñ<sup>n</sup> lamba sa ní cuu tühú víhí, chi núu yoo duca<sup>n</sup> na càda te ndava lamba sa ní cuu tühú-á<sup>n</sup>, chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núu duca<sup>n</sup> na càdá-yu. Núu xǎ<sup>n</sup> xìní ñùhu-xi quée ndidí sáá-á<sup>n</sup> xití ñ<sup>n</sup> lamba saa —càchí-gá xǎha<sup>n</sup>-gǎ xií-yu.

*Cue téé xica cuu ndihí Jesús sàhnú-güedé yoco triú nduu ndetátú ñáyiú*

*(Mt. 12:1-8; Lc. 6:1-5)*

<sup>23</sup> Te ñ<sup>n</sup> nduu cùu-xi nduu ndetátú ñáyiú ñùhu Jesús ichi ndihí cue téé xica cuu ndihí-gá, te ta yǎha-gá ndihí-güedé ñ<sup>n</sup> xichi núú cáá triú, te ní ngúíta-güedé sàhnú-güedé yoco triú-á<sup>n</sup>. <sup>24</sup> Te cue téé cùu fariséú ní xáha<sup>n</sup>-güedé xii-gá:

—¿Ná cuendá duca<sup>n</sup> quide cue téé xica cuu ndihí-n sàhnú-güedé yoco triú vitna cùu-xi nduu ndetátú-i? Te ñá túú tàú-güedé duca<sup>n</sup> càda-güedé —càchí-güedé xǎha<sup>n</sup>-güedé xii-gá.

<sup>25</sup> Te ní xáha<sup>n</sup>-gǎ xii-güedé:

—¿Te náa vátá dácuàha tnahí-gá-ndó núú tütú Yá Ndiöxí núú càhá<sup>n</sup>-xi nàcuáa ní quide ndí Dàvíí cùtnàhá ní xihí ndí docó ndihí cue téé ní xica cuu ndihí ndí-á<sup>n</sup>? <sup>26</sup> Te dàvá-á<sup>n</sup> ní xíndecu ñ<sup>n</sup> téé ní xínani Abiátár ní cuu-dé dútú cúnùu, te ndí Dàvíí ní quihu ndí xití vehe Yá Ndiöxí ní quehe<sup>n</sup> ndí pàá ní cuu íí ndécú-á<sup>n</sup> ní dácǎhñu ndí cue téé ní xica cuu ndihí ndí ní xexi ndí ndihí-güedé, te mee-ni cuè dútú tàú-güedé caxi-güedé pàá-á<sup>n</sup> ní cùu —cachí-gá xǎha<sup>n</sup>-gǎ xii-güedé.

<sup>27</sup> Te ní xáha<sup>n</sup> tucu Jesús xii-güedé:

—Mee Yá Ndiöxí ní taxi ndecu-gá nduu ndetátú ñáyiú, te ñá túú ní càchí-gá sǎ mee-yu nándi cani iní-yu cadá-yu canehe íi-yu nduu ndetátú-yu-á<sup>n</sup>. <sup>28</sup> Te yúhú Téé cùu ñaní tnáhá-ndó nchàa-ndo, tnáhá-í ndécú ndíhí-í tnúhu ndee iní sǎ cùu-í nchaa ñáyiú nàcuáa cadá-yu nduu ndetátú-ó-á<sup>n</sup> —càchí-gá xǎha<sup>n</sup>-gǎ xii-güedé.

### 3

*Ñ<sup>n</sup> téé ní yíchí ñ<sup>n</sup> xio ndaha-xi (Mt. 12:9-14; Lc. 6:6-11)*

<sup>1</sup> Te Jèsús cuánguihu tucu-gá xití veñúhu, te xití veñúhu-á<sup>n</sup> ndécú ñ<sup>n</sup> téé ní yíchí ñ<sup>n</sup> xio ndaha-dé. <sup>2</sup> Te xíá<sup>n</sup> ndécú cuè téé xito dayuhu ñaha xii-gá, te núu cada tátna-gá téé cùhú-á<sup>n</sup> nduu cùu-xi nduu ndetátú-güedé ndihí ñáyiú, cuendá duca<sup>n</sup> te níhí-güedé nàcuáa cada-güedé cacá<sup>n</sup> cuéchi-güedé cuendá-gá. <sup>3</sup> Te ní xáha<sup>n</sup>-gǎ xii téé cùhú ndaha-xi-á<sup>n</sup>:

—Ndacuíñí te ngúnutñí-n cuädava iha —càchí-gá xǎha<sup>n</sup>-gǎ xii-dé.

<sup>4</sup> Te ní xicá<sup>n</sup> tnúhú-gǎ núú-güedé, te xǎha<sup>n</sup>-gǎ:

—Chí càchí tnúhu ná cúú sǎ cúú càda-o nduu ndetátú-ó. ¿Sǎ vǎha ñá sǎ cuèhé? ¿Sǎ cáda tátna-o ñáyiú cùhú

ñã sá cáhni-ó-yu? —càchí-gá xãha<sup>n</sup>-gã xii-güedé.

Dico ni ì<sup>n</sup>-güedé ñã túú tnàhí ni cáhá<sup>n</sup>-güedé. <sup>5</sup> Te Jèsús ní xíndéhé vãha-gá núú nchaa-güedé te ní cudéé<sup>n</sup>-gã, te ní ndíhú iní-gá chi ío sàá iní-güedé, te ní xáha<sup>n</sup>-gã xii téé cùhú ndaha-xi-á<sup>n</sup>:

—Ndocani ndaha-n —càchí-gá xãha<sup>n</sup>-gã xii-dé.

Te ní ndocani-dé ndaha-dé, te òré-ni-á<sup>n</sup> ñí ndúha. <sup>6</sup> Te cue téé cùu fariséú ní xica-güedé cuáhá<sup>n</sup>-güedé ì<sup>n</sup> xichi núú ñí naníhí tnáhá-güedé ndíhi cue téé cùndíhi té Hèrodés cuèndá ndatnúhu-güedé nása cada-güedé cahni-güedé Jèsús.

*Cuéhé vñí ñãyiú ní quexìo yuhu lagúná*

<sup>7</sup> Te Jèsús ní xica-gá cuáhá<sup>n</sup>-gá ndíhi cue téé xica cuu ndíhi-gá yuhu làgúná distritú Galileá, te ío cuéhé ñãyiú distritú-á<sup>n</sup> nchícú<sup>n</sup> ñáhã-yu xii-gá cuáhá<sup>n</sup>. <sup>8</sup> Te núú ñí quexìo-gá-á<sup>n</sup> ñí sáhá<sup>n</sup> ñãyiú distritú Júdeá, ñãyiú ñúú Jerusálén, ñãyiú distritú Idumeá, ñãyiú xíndecu ndaa ingá xio yúte Jòrdán, ndíhi ñãyiú xíndecu yatni ñúú Tírú ndíhi ñúú Sídón, te duca<sup>n</sup> ío vãi-yu ní sáhá<sup>n</sup> núú ndécú-gã chi ní níhí-yu tnúhu nchaa nàcuáa quide-gá.

<sup>9</sup> Te Jèsús ní xáha<sup>n</sup>-gã xii cue téé xica cuu ndíhi-gá sá cádá tũha-güedé ì<sup>n</sup> bàrcú cuèndá caa-gá núú-xi cuèndá sá vã dádèhnde ñahá-yu xii-gá chi ío cuéhẽ-yu. <sup>10</sup> Te sá dúcá<sup>n</sup> ñí níhí-yu tnúhu sá quidé tãtna-gá ñãyiú cùhú, núú xíá<sup>n</sup> nchaa dava-gá ñãyiú cùhú súúni dìcò ngõnchihi tnáhá-yu cuáhá<sup>n</sup>-yu núú ndécú-gã cuíní-yu tnándeé ñáhã-yu xii-gá cuèndá sá cuíní-yu ndúha-yu. <sup>11</sup> Te cue ñãyiú yìhi ñaha espíritú cùndíhi yucu ñávãha ní sanu xiti ñaha-xi xii-yu núú Jèsús òré ní xini ñáhá-xi xii-gá, te xíá<sup>n</sup> ní quide níhi ní cáhá<sup>n</sup>-yu, te xãhã<sup>n</sup>-yu xii Jèsús:

—jYòhó cúú-n Dèhe Yá Ndiõxí! —càchí-yu xãhã<sup>n</sup>-yu xii-gá.

<sup>12</sup> Te Jèsús ní tenàá-gá nchaa espíritú cùndíhi yucu ñávãha-á<sup>n</sup>, te ní

xáha<sup>n</sup>-gã xii nchaa ñãyiú ní xíhi-xi-á<sup>n</sup> sã vã cáhá<sup>n</sup>-yu núú ñãyiú yoo cùu-gá.

*Jèsús cáxi-gá úxúú tnáhá cue téé dacuàha ñaha xii ñãyiú tnúhu-gá*

*(Mt. 10:1-4; Lc. 6:12-16)*

<sup>13</sup> Te sátá dúcá<sup>n</sup> ñí cuu te Jèsús ní sáá-gá ì<sup>n</sup> yucu, te xíá<sup>n</sup> ndécú-gã ní cana-gá nchaa cue téé càchí iní-gá. Te òré ní quexìo nchaa cue téé-á<sup>n</sup> núú-gã, <sup>14</sup> te ní cáxi-gá úxúú tnáhá cue téé caca cuu ndíhi-gá, te diu-ni cue téé-á<sup>n</sup> tendaha-gã quíhí<sup>n</sup>-güedé cáhá<sup>n</sup>-güedé tnúhu-gá núú ñãyiú. <sup>15</sup> Te ní sãñaha-gã xii-güedé tnúhu ndee ìní cundecu ndíhi-güedé cuèndá cada tãtna-güedé ñãyiú cùhú, ndíhi cuèndá queñuhu-güedé nchaa espíritú cùndíhi yucu ñávãha yìhi ñaha xii ñãyiú. <sup>16</sup> Te duha xínani ndi úxúú cue téé-á<sup>n</sup>: ì<sup>n</sup>-dé nání-dé Xímú, te mee-gã ní taudiu ñaha-gá xii-dé sá cúnani-dé Pèlú. <sup>17</sup> Te ingá-dé nání-dé Jàcobó, te ingá-dé nání-dé Juàá, te ñani té Jàcobó-á<sup>n</sup> cúú tẽ Juàá te ndi ndúú-güedé cúú-güedé déhe té Zebèdeú, te ndi ndúú cue téé-á<sup>n</sup> ñí dánání ñaha Jèsús xii-güedé Boànergés, te tnúhu-á<sup>n</sup> quèé-xi: Cue téé ío yáchí cùdèé<sup>n</sup>, duha quèe-xi tnúhu-á<sup>n</sup>. <sup>18</sup> Te duha xínani dàva-gá-güedé: Té Ndríxí, té Lìpé, té Bartolómé, té Mâteú, té Mãxí, té Jàcobó déhe té Àlfeú, té Tàdeú, té Xímú téé ní cundíhi cue téé cananistá ní cùu, <sup>19</sup> ndíhi té Jùdás Iscarioté téé ní sáá nduu ñí sáha cuèndá ñáhá xii Jèsús núú cuè téé cùu úhú iní ñáhá xii-gá, duha xínani cuè téé ní cáxi Jèsús ní xica cuu ndíhi-gá.

*Càchí-güedé sá ndécú ndíhi Jèsús yucu ñávãha dico ñã ndàá*

*(Mt. 12:22-32; Lc. 11:14-23; 12:10)*

Te sátá dúcá<sup>n</sup> te cuáhá<sup>n</sup>-gá ndíhi-güedé núú quidé vèhe-gá. <sup>20</sup> Te ío vãi ñãyiú ní tacá-ni tucú-yu xíá<sup>n</sup>, te ni ñã ní níhí-gã nása cada-gá caxi-gá ndíhi cue téé xica cuu ndíhi-gá cuèndá sá ío vãi-yu. <sup>21</sup> Te cue ñãyiú cùu ndi mee Jèsús ní níhí-yu tnúhu nchaa nàcuáa cùu, te nchaa ñãyiú ñã cùtnuní váha iní-xi ní cachí-yu sá ñí nduu

lúcú-gá nõu xiã<sup>n</sup> cuáhã<sup>n</sup> ñáyiú cùu ndi mee Jesús núú ndécú-gã cuendã candeca ñáhã-yu xii-gã núhú ní cùu.

<sup>22</sup> Te cue tée dàcuaha ñaha xii ñáyiú nchaa tnúhu ní chídó tnùní ndí Moisés véxi ndéé ñuú Jerusalén ní cáhá<sup>n</sup> cuèhé-güedé cuendã Jesús, chi ní xítñaha-güedé:

—Tée-a ndècu ndìhi-dé sácúíhnã, te ñuú xiã<sup>n</sup> chindèe ñaha-xi xii-dé queñuhu-dé nchaa espíritú cündìhi-xi yíhi ñaha xii ñáyiú, te ñuú-ni-xi tàxi tnùní-xi nchaa espíritú-á<sup>n</sup> —duha ní xítñaha-güedé.

<sup>23</sup> Te Jesús ní cana ñaha-gã xii-güedé, te ní cani-gã ñ<sup>n</sup> cuendú núú-güedé nàcuãa tecú tnùní-güedé tnúhu-gã, te xãha<sup>n</sup>-gã xii-güedé:

—¿Te nása cada sácúíhnã queñuhu-xi cue espíritú cündìhi-xi yíhi ñaha xii ñáyiú-í? <sup>24</sup> Te nchòhó xíní-ndó sã nõu ñ<sup>n</sup> tée yíndaha ñ<sup>n</sup> nació<sup>n</sup> vá cúú ñ<sup>n</sup>nuu-dé ndìhi cue tée cündìhi-dé, te vá cúdìi-dé cunu-dé. <sup>25</sup> Te ñuú-ni duca<sup>n</sup> sãtnahã-xi cùu tucu ñáyiú xíndecu ñ<sup>n</sup>-ni vèhe, chi núú vá cúú ñ<sup>n</sup>nuú-yu, te vá cúdìi-yu cundecu càhnú-yu. <sup>26</sup> Te núú sácúíhnã ñã túú cùu ñ<sup>n</sup>nuu-xi ndìhi cue espíritú cündìhi-xi, te vá cúdìi-xi cundecu-xi taxi tnùní-xi te núú duca<sup>n</sup> quìde-xi.

<sup>27</sup> Te nchòhó xíní-ndó sã cuè ñadúhú chi vá ndácú-güedé cuendã-ni quíhu-güedé duhu-güedé vehe ñ<sup>n</sup> tée ío ndee, chi díhna-gã xíní ñùhu-xi tnì-güedé tée-á<sup>n</sup> dacùtu ñaha-güedé xii-dé dàtnùní duca<sup>n</sup> te ndacu-güedé duhu-güedé nchaa sã ndécú ndìhi-dé.

<sup>28</sup> Te na càchí tnúhu ndáá-í xii-ndo sã ncháã sã cuèhé sã dúhá quìde ñáyiú, ndìhi nchaa tnúhu cuèhé tnúhu duha càhá<sup>n</sup>-yu cuendã Yã Ndiõxí cuu cada càhnu iní-gã. <sup>29</sup> Dico cue ñáyiú na càhá<sup>n</sup> cuèhé cuendã Espíritú Yã Ndiõxí, ñáyiú-á<sup>n</sup> vã cádá càhnu iní ñáhã tnàhí-gã xií-yu, chi cundecu-ni cuéchi-yu núú-gã ñi caa ñi quíhí<sup>n</sup> —càchí-gã xãha<sup>n</sup>-gã xii-güedé.

<sup>30</sup> Te duca<sup>n</sup> ñi cáhá<sup>n</sup>-gã chi càchí-güedé sã ndécú ndìhi-gã espíritú cündìhi yucu ñávãha.

*Nãná Jesús ndìhi cue ñaní-gã*  
(Mt. 12:46-50; Lc. 8:19-21)

<sup>31</sup> Te ní quexìo nánã Jesús ndìhi cue ñaní-gã núú ndécú-gã xínutñi-yu quehé, te ní xáhã<sup>n</sup>-yu xii ñ<sup>n</sup> ñáyiú xíndecu-á<sup>n</sup> sã dáyãha-yu tnúhu núú-gã cuendã quee-gã ndatnúhu ndìhi ñaha-gã xií-yu. <sup>32</sup> Te cue ñáyiú xínucóo ñi càndéé dñi-gã ní xáhã<sup>n</sup>-yu xii-gã:

—Nãná-n ndìhi cue ñaní-n ndécú-yu quehé nándücu ñáhã-yu xii-n —càchí-yu xáhã<sup>n</sup>-yu xii-gã.

<sup>33</sup> Te Jesús ní xãha<sup>n</sup>-gã xií-yu:

—Te cachí tnúhu-ndo yõndi-gã ñáyiú cùu datná nãná-í ndìhi dàtnã cue ñaní-í —càchí-gã xãha<sup>n</sup>-gã xií-yu.

<sup>34</sup> Te dàtnùní ní xíndéhé vãha-gã núú ncháã ñáyiú xínucóo ñi càndéé dñi-gã-á<sup>n</sup>, te ní xãha<sup>n</sup>-gã xií-yu:

—Nchaa ñáyiú-a cùú-yu dàtnã nãná-í ndìhi dàtnã cue ñaní-í. <sup>35</sup> Chi nchaa ñáyiú quìde nacuãa càhá<sup>n</sup> Yã Ndiõxí, ñáyiú-á<sup>n</sup> cúú-yu dàtnã cue ñaní-í, ndìhi dàtnã cue cúha-í, ndìhi dàtnã nãná-í —càchí-gã xãha<sup>n</sup>-gã xií-yu.

## 4

*Nàcuãa quìde tée cuángacã<sup>n</sup> triú*  
(Mt. 13:1-9; Lc. 8:4-8)

<sup>1</sup> Te Jesús ní ngüíta-gã dácuàha tucu-gã ñáyiú yuhu làgúnã. Te cuèhé víhí-yu ní tacã xiã<sup>n</sup> nõu cuásaã-gã núú ñ<sup>n</sup> bàrcú nùtnñi xití ndute làgúnã-á<sup>n</sup>, te núú xiã<sup>n</sup> ní ngóo-gã te ní ngüíta-gã dánèhé ñáhã-gã xií-yu, te ncháã-yu xixúcu-yu yuhu làgúnã-á<sup>n</sup>.

<sup>2</sup> Te ní ngüíta-gã ní cani-gã titní cuendú núú-yu nàcuãa tecú tnùní-yu tnúhu-gã, te xãha<sup>n</sup>-gã xií-yu:

<sup>3</sup> —Chí cündedóho vãha ñ<sup>n</sup> cuendú ná càni-í-a. ñ<sup>n</sup> tée cuángacã<sup>n</sup>-dé triú.

<sup>4</sup> Te òré ní ngüíta-dé dãngoyo-dé triú-á<sup>n</sup>, te dava ní quene ndava ní ngava ndéé ichi, te ní xíní cue tílaã te ní nadatãcã-güedi. <sup>5</sup> Te dava ní ngava ñuhu yadi núú yíhí víhi yúú, te ndìhi-ni ní xínu-xi cuendã sã ñã túú càvìhi ñuhu. <sup>6</sup> Dico òré ní nayehé ñã túú ní cündee iní-xi chi ní yíchí-xi, chi ñã túú ní ñhí quíhí<sup>n</sup> cùnú yóho-xi.



7 Te dava ní ngava núú yúcu ndíquín tnu ìñu, te ìñu-ni ní xínu-xi ndíhi tnu ìñu, te tnu ìñu-án ní sañu-xi te ní dánáá-xí nchàa triú sá ní xínu-án.

8 Dico dava triú-án ní ngava-xi núú ndécú ñuhu coco, te xíá ní xínu-xi te ní sañu-xi te ío váha ní cuu, chí núú ìñ-ní triú-án te dava yoco-xi ní nguíhi ócò úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ìñ cièndú triú-xi —càchí-gá xáha-gă xií-yu.

9 Te xáha-ní tucu-gá xií-yu:

—Nchaa nchòhó ñáyiú ní xíndedóho nchaa tñuhu ní cáhá-í-a, te ío váha chí cuáha cuèndá —càchí-gá xáha-gă xií-yu.

*Jèsús càhá-gá ná cuèndá duca-ní-gá cuèndú*

*(Mt. 13:10-17; Lc. 8:9-10)*

10 Te sátá ní ndaca ñáyiú-án te ní quèndó mee-ná Jèsús ndíhi cue téé xíca cuu ndíhi-gá, ndíhi ìñ ùú-ná ñáyiú. Te ñáyiú-án ndíhi cue téé-án ní xíca tñuhú-yu ndíhi-güedé núú-gă, núú nása quèe-xi cuèndú ní cani-gá núú-yu ndíhi-güedé. 11 Te ní xáha-gă:

—Nchòhó chí sa càchí tñuhu Yá Ndiòxí xii-ndo ìñ sá vátá quíní-gá-ndó, chí càchí tñuhu-gá nàcuáa cada-gá ndíhu ndaha-gă ñáyiú, dico dava-gá ñáyiú caní-í mee-ní cuèndú núú-yu. 12 Chí cuèi na quíní-yu nchaa nàcuáa cuu dico ní vă cutnùní iní-yu ná cuèndá duca-ní cùu, àdi cuèi na cùndedóho-yu dico ní vă tècú tñùní-yu. Te duca-ní ndòhó-yu cuèndá sá vă quíndáá iní-yu Yá Ndiòxí, ndíhi cuèndá sá vă cádá càhnu iní-gá nchaa yíca cuèchi-yu —càchí-gá xáha-gă xií-yu ndíhi-güedé.

*Jèsús càhá-gá nàcuáa quèe-xi cuèndá téé cuángacá-ní triú*

*(Mt. 13:18-23; Lc. 8:11-15)*

13 Te ní xáha-ní tucu Jesús xii cue téé xíca cuu ndíhi-gá, ndíhi cue ñáyiú-án:

—Nchòhó, ñá túú ní tècú tñùní-ndó cuèndú ní cani-í núú-ndó, te núú duca-ní, ¿te nása tecú tñùní-ndó dàva-gá cuèndú cani-í núú-ndó-í? Te na càchí tñuhu-í xii-ndo nàcuáa quèe-xi

cuèndú ní cani-í núú-ndó. 14 Te téé cuángacá-ní triú-án cúú-dě dàtná ìñ téé cuáhá-ní càhá-ní tñuhu Yá Ndiòxí núú ñáyiú. 15 Te triú-án cúú-xí dàtná tñuhu Yá Ndiòxí, te triú sá ní quene ndava ní ngava ndéé ichi, xíá cúú-xí dàtná ñáyiú ní tnahá iní-xi tñuhu Yá Ndiòxí, dico sàcuíhna cuáhá-ní xòcani-xi tñuhu-gá iní-yu cuèndá sá vă cànchícú-ní nihnú-yu nàcuáa càhá-ní tñuhu-án. 16 Te triú sá ní ngava ñuhu yadi núú yíhí vèhi yúú, xíá cúú-xí dàtná ñáyiú ní xíndedóho tñuhu Yá Ndiòxí te díí iní ní tñí-yu tñuhu-gá.

17 Dico òré ná nguíta ñáyiú cúcuèhé ñáhă-yu xií-yu àdi nándi-gá sá yáha-yu sá cuèndá tñuhu-gá, te ñá cùndèe iní-yu chí dàñá-yu tñuhu-gá cuèndá sá ñá túú nihí ndéé-yu. 18 Te triú sá ní ngava núú yúcu ndíquín tnu ìñu xíá cúú-xí dàtná ñáyiú ní tecú dóho-xi tñuhu Yá Ndiòxí, 19 dico cuèé cuèé ní nacuanaá-yu tñuhu-gá, chí cuèndá mee-ní sá cúú-xí mèe-yu ñuhu iní-yu, ndíhi cuèndá sá ío sàni iní-yu cuu cuìca-yu, ndíhi cuèndá sá ío cùdí iní-yu nchaa sá ío ñuyíú-a, te ñá túú ñuhu iní-yu tñuhu sá ní xíndedóho-yu-án nàcuáa cada váha-yu cundecú-yu. 20 Dico triú sá ní ngava núú ndécú ñuhu coco, xíá cúú-xí dàtná ñáyiú ní xíndedóho tñuhu Yá Ndiòxí te quidé-yu nchaa nàcuáa càhá-ní tñuhu-án. Te cada iní-ndó sá ñáyiú-án cúú-yu dàtná triú sá ní nguíhi yoco-xi ócò úxí triú-xi, ndíhi triú sá ní nguíhi yoco-xi únídico triú-xi, ndíhi triú sá ní nguíhi yoco-xi ìñ cièndú triú-xi. Te duca-ní sàtnahá-xi cùú-yu chí ío váha quidé-yu —càchí-gá xáha-gă xii cue téé xíca cuu ndíhi-gá ndíhi cue ñáyiú-án.

*Cuèndá ití*  
*(Lc. 8:16-18)*

21 Te xáha-gă xii nchaa ñáyiú:

—Ñá túú ní ìñ ñáyiú tèñuhú ití te chiváha-yu ìñ xítí quídí, àdi chiváha-yu ìñ caha càamá, chí tàxi ndecú-yu ìñ núú dùcú cuèndá cutnùní núú nchaa ñáyiú. 22 Te

ni ì<sup>n</sup> tnúhu sá ñǎ tècú tnùnì ñáyiú vitna cachí-ó sǎ vǎ tècú tnùnì-yu chi dacuítí sǎ tècú tnùnì-yu, te ni ì<sup>n</sup> tnúhu sá cǎchí-ó cùu yuhu vitna vá cúú yùhu chi dacuítí sǎ quée túu-xi núú ñáyiú. <sup>23</sup> Te nchòhó cue ñáyiú ní xíndedóho nchaa tnúhu ní cǎhá<sup>n</sup>-í-a, te ío váha chí ná cuǎha cuendá —cǎchí-gǎ xǎha<sup>n</sup>-gǎ xií-yu.

<sup>24</sup> Te ní xǎha<sup>n</sup> tucu-gǎ:

—Ío váha chí cùndedóho tnúhu na cǎhá<sup>n</sup>-í-a. Te nǎcuáa-ní quide-ndo danehé-ndó ñáyiú tnúhu Yá Ndiòxí, te ñi-ni duca<sup>n</sup> cǎda ñaha-gǎ xii-ndo, te uu<sup>n</sup>-gǎ duca<sup>n</sup> cǎda-gǎ sá cúú-xí-ndó. <sup>25</sup> Te nchaa nchòhó ñáyiú tècú tnùnì tnúhu Yá Ndiòxí, uu<sup>n</sup>-gǎ cuita tecú tnùnì-ndó tnúhu-gǎ quíhí<sup>n</sup>. Te nchaa nchòhó ñáyiú ñǎ túú tècú tnùnì tnúhu-gǎ, te uu<sup>n</sup>-gǎ vá tècú tnùnì-ndó —cǎchí-gǎ xǎha<sup>n</sup>-gǎ xií-yu.

*Nàcuáa sàhnu triú*

<sup>26</sup> Te Jèsús xǎha<sup>n</sup> tucu-gǎ:

—Na cǎni-í ì<sup>n</sup> cuendú núú-ndó cuendá tecú tnùnì-ndó nǎcuáa cada-xi òré ndíhu ndaha ñaha Yá Ndiòxí xii ñáyiú. Ì<sup>n</sup> tée cuángacá<sup>n</sup>-dé triú. <sup>27-28</sup> Te sátá ñǎ yáha ní sacá<sup>n</sup>-dé triú-á<sup>n</sup>, te cuánuhú-dé vehe-dé ndétátú-dé. Te duca<sup>n</sup>-ni ta xica nduu cuáhá<sup>n</sup> te ní xínu triú-á<sup>n</sup>, te nǎcuáa ta sàhnu-xi cuáhá<sup>n</sup> te ta quée ndaha-xi, te duca<sup>n</sup>-ni cùu ní sáá nduu ñǎ quene yoco-xi te ní nguíhi triú-xi, dico tée ní sacá<sup>n</sup> triú-á<sup>n</sup> ñǎ túú xíní-dé nása ní sahnu-xi, chi mee ñùhu ní quide-xi ní sahnu triú-á<sup>n</sup>. <sup>29</sup> Te òré sa ní ndíhi ní cuaa<sup>n</sup> te ní nguíta tée ní sacá<sup>n</sup>-á<sup>n</sup> nǎquèhndé-dé nátàxi tnahá-dé —cǎchí-gǎ xǎha<sup>n</sup>-gǎ xií-yu.

*Cuendá ndíquí<sup>n</sup> yutnu nàni mostázá*  
(Mt. 13:31-32; Lc. 13:18-19)

<sup>30</sup> Te xǎha<sup>n</sup> tucu Jèsús xií-yu:

—Na cǎni tucu-í ingá cuendú núú-ndó cuendá tecú tnùnì-ndó nǎcuáa cada-xi òré ndíhu ndaha ñaha Yá Ndiòxí xii ñáyiú. <sup>31</sup> Ì<sup>n</sup> yutnu nàni mostázá cúú-xí ì<sup>n</sup> yutnu sá líhli vìhi-gǎ ndíquí<sup>n</sup>-xi dàcúxí ndíquí<sup>n</sup> nchaa cúhú, <sup>32</sup> dico òré ná cǎcá<sup>n</sup>-güedé núú ñùhú-güedé, te na xínu-xi te

sàhnu-gǎ-xi dàcúxí nchaa cúhú, te nchaa díté-xi ío cùu cahnu-xi, te ndée cue quiti ndava núú tàchí sácõ-güedi nchaa núú díté-xi xínu ndeti-güedi —cachí-gǎ xǎha<sup>n</sup>-gǎ xií-yu.

*Ío titní cuendú ní cani Jèsús núú ñáyiú*  
(Mt. 13:34-35)

<sup>33</sup> Te ío-gǎ vai cuendú ní cani Jèsús núú ñáyiú cuendá tecú tnùnì-yu tnúhu Yá Ndiòxí, dico dava cuendú ñǎ túú ní cǎni-gǎ núú-yu, chi ní cutnùnì iní-gǎ sá vǎ tècú tnùnì-yu nchaa. <sup>34</sup> Te mee-ni cuendú ní cani Jèsús núú ñáyiú ndi tnahá òré ní dánèhé ñáhá-gǎ xií-yu tnúhu-gǎ. Te òré ndécú mee Jèsús ndíhi cue tée xica cuu ndíhi-gǎ, te ní xǎha<sup>n</sup>-gǎ xii-güedé nǎcuáa quée-xi ì<sup>n</sup> ì<sup>n</sup> cuendú ní cani-gǎ núú ñáyiú.

*Jèsús ngání-gǎ táchí ndíhi ndute làgúná*

(Mt. 8:23-27; Lc. 8:22-25)

<sup>35</sup> Te ñi-ni nduu-á<sup>n</sup> òré sa ta cùndíquí<sup>n</sup> cuáhá<sup>n</sup> ní xǎha<sup>n</sup> Jèsús xii cue tée xica cuu ndíhi-gǎ:

—Chí ná quíhí<sup>n</sup>-ó ndaa ingá xio yuhu làgúná —cǎchí-gǎ xǎha<sup>n</sup>-gǎ xii-güedé.

<sup>36</sup> Te ní quide ndee iní-gǎ nchaa ñáyiú xixúcu-á<sup>n</sup>, te ñi-ni bàrcú sá ñùhú-gǎ òré ní dánèhé-gǎ ñáyiú tnúhu-gǎ ñi-ni xíǎ<sup>n</sup> ní dácacá cuè tée xica cuu ndíhi-gǎ ndécá ñaha-güedé xii-gǎ cuáhá<sup>n</sup>, te tnahá ì<sup>n</sup> úú-gǎ bàrcú ní xica-xi nchícú<sup>n</sup>-xi bàrcú ñùhú-gǎ-á<sup>n</sup> cuáhá<sup>n</sup>. <sup>37</sup> Te ñùhu bàrcú ñùhú-gǎ-á<sup>n</sup> ichi cuáhá<sup>n</sup>-xi núú ndute, te ní quexìo ì<sup>n</sup> táchí ñíhi, te ta nǎdachítú-xi ndute xítí bàrcú-á<sup>n</sup> cuáhá<sup>n</sup>, te sa cuíní-ñǎ-xi quée naa bàrcú-á<sup>n</sup> xítí ndute ni cùu. <sup>38</sup> Te Jèsús cáá-gǎ xidí-gǎ ì<sup>n</sup> xichi ndaa sátá bàrcú-á<sup>n</sup>, te yínchihi ì<sup>n</sup> dóo díquí-gǎ. Te sá dúcá<sup>n</sup> cuíní-xi quée naa bàrcú-á<sup>n</sup> núu ní sáhá<sup>n</sup>-güedé ní ndocani ñaha-güedé xii-gǎ, te xǎha<sup>n</sup>-güedé:

—¡Mèstrú, ndíquíú iní! ¿Náa ñǎ túú ndíhú iní-n sǎ tá quée naa-o cuáhá<sup>n</sup>-á<sup>n</sup>? —cǎchí-güedé xǎha<sup>n</sup>-güedé xii-gǎ.

39 Te Jèsús ní ndiquíú iní-gá te ní ndacóo-gá, te ní tenáá-gá táchí-ǎn, te ní xáha<sup>n</sup>-gǎ xii ndute làgúná:

—ǎTnaví-nǎ cuhu<sup>n</sup>, chí ío dusa<sup>n</sup>! — cǎchí-gá xáha<sup>n</sup>-gǎ xii ndute-á<sup>n</sup>.

Te òré-ni ní ngüíñí táchí-ǎ<sup>n</sup> te ní nucúndecu nahi-nǎ ndute làgúná-á<sup>n</sup>.

40 Te Jèsús ní xáha<sup>n</sup>-gǎ xii-güedé:

—ǎNá cuendá ndéé dúcá<sup>n</sup> yùhú-ndó-í? ǎNáa ñá túú sàndáá iní ñáhá ndisa-ndo xii-í-ǎ<sup>n</sup>? —cǎchí-gá xáha<sup>n</sup>-gǎ xii-güedé.

41 Dico mee-güedé chí ío ní yùhú-güedé sá duca<sup>n</sup> ñí quide-gá ní xiní-güedé, te ní xitnáha-güedé:

—ǎTe ná téé cùu téé-a núu ní cǎhá<sup>n</sup>-ni-dé, te ní ngüíñí táchí te ní nucúndecu nahi ndute làgúná-a-í? — cǎchí-güedé xitnáha-güedé.

## 5

*ǎn téé yìhi ñaha espíritú cúndìhi yucu ñávǎha*

(Mt. 8:28-34; Lc. 8:26-39)

1 Te ní sáá Jèsús ndìhi cue téé xica cuu ndìhi-gá ndàa ingá xio yuhu làgúná yucu cue téé ñuú Gàdará. 2 Te òré ní quene-gá xití bàrcú te ñ<sup>n</sup> téé yìhi ñaha espíritú cúndìhi yucu ñávǎha ní quee-dé núu yíndüxi ndíyí cuáhá<sup>n</sup>-dé núu-gǎ. 3 Te mee-ni núu yíndüxi ndíyí-á<sup>n</sup> quidé vèhe-dé, te cuéi dàcutu ñaha-güedé cadèná xii-dé dico ñá túú tñàhí ndàcu-güedé núu-dě. 4 Te ío titní xito ní dácútú-güedé cadèná sáhá-dé ndìhi ndaha-dé dico ní dándává-ni-dé, te ní xóo dacàchi-gá-dé nchaa cadèná-á<sup>n</sup>, te ñá túú tñàhí ní ndàcu-güedé núu-dě. 5 Te cuéi nduu cuéi niú ní xóo cana saa-dé, te váha-ni núu xití yucu ndècu-dé àdi núu yíndüxi ndíyí dico càna saa nahi-ni-dé, te ío ní xóo dǎnicuèhé-dé méé-dě ndìhi yúú. 6 Te òré ní xiní-dé Jèsús te xinu-dé ní sáhá<sup>n</sup> núu-gǎ, te ní ngüíñí xití-dě, 7 te espíritú yíhi ñaha xii-dé-á<sup>n</sup> ñí quide-xi níhi ní cǎhá<sup>n</sup>-dé, te xáha<sup>n</sup>-dě xii-gá:

—ǎNá cuendá véxi yòhó Jèsús Déhe Dútú Ndióxi sàdí-n ìchi-í? Te cǎhá<sup>n</sup> ndàhú-í núu Ndióxi yuhu núu-n sǎ

vǎ dándòho ñaha-n xii-í —cǎchí-dé xáha<sup>n</sup>-dě xii-gá.

8 Te duca<sup>n</sup> ñí cǎhá<sup>n</sup>-dé cuendá sá Jèsús ní xáha<sup>n</sup>-gǎ xii espíritú cúndìhi yucu ñávǎha yìhi ñaha xii-dé-á<sup>n</sup> sǎ queé ñàha-xi xii-dé.

9 Te Jèsús ní xicá<sup>n</sup> tñuhú-gǎ núu-dě, te xáha<sup>n</sup>-gǎ:

—ǎNása nàni-n-í? —cǎchí-gá xáha<sup>n</sup>-gǎ xii-dé.

Te ní xáha<sup>n</sup>-dě:

—Vài Sandadú, duha nàni-í chí ío cuèhé-ndí —cǎchí-dé xáha<sup>n</sup>-dě xii-gá.

10 Te cue espíritú cúndìhi yucu ñávǎha-á<sup>n</sup> ñí cǎhá<sup>n</sup> ndàhú-xi núu Jèsús sá vǎ téndàha ñaha-gǎ xii-xi quíhí<sup>n</sup>-xi ingá xichi. 11 Te dǎu-ni yatni yucu núu ndécú Jèsús-á<sup>n</sup> yíhí vài cuchí xixexi-güedi. 12 Te nchaa cue espíritú-á<sup>n</sup> ñí cǎhá<sup>n</sup> ndàhú-xi núu-gǎ, te xáha<sup>n</sup>-xi xii-gá:

—Cǎhá<sup>n</sup> ndàhú-ndí núu-n sǎ dáñá-n quíhu-ndí yiqui cùñú nchaa cùchí-ǎ<sup>n</sup> —cǎchí-xi xáha<sup>n</sup>-xi xii-gá.

13 Te Jèsús ní xáha<sup>n</sup>-gǎ sá cúu quíhu-xi yiqui cùñú-güedi, te xinu dàtná úú mǐl-güedi yìhi yucu-á<sup>n</sup>. Te nchaa espíritú cúndìhi yucu ñávǎha yìhi ñaha xii téé-á<sup>n</sup> ñí quee ñaha-xi xii-dé, te cuánguìhu-xi yiqui cùñú nchaa cùchí-á<sup>n</sup>, te nchaa-güedi ní xinu-güedi duha ní queé-güedi ndàa núu dèhvá yuhu làgúná-á<sup>n</sup>, te ní ngaunihnu-güedi xití ndute te ní ndìhi-güedi ní cǎhá.

14 Te òré ní xiní cue téé xito cuchí-á<sup>n</sup> nàcuáa ní cuu te ní xinu-güedé, te ní sáhá<sup>n</sup>-güedé ní caní-güedé cuèndú núu cuè ñáyiú ndècu xití ñuú, ndìhi núu cuè ñáyiú ndècu xití yucu. Te nchaa ñáyiú ní níhí tñuhu ní xicá-yu cuáhá<sup>n</sup> ndéhě-yu nàcuáa ní cuu. 15 Te òré ní quexió-yu núu ndécú Jèsús te ní xiní-yu téé ní xíhi ñaha cuè espíritú cúndìhi yucu ñávǎha-á<sup>n</sup> núcóo-dé núu sáhá Jèsús, te nìhnu-ná-dé dóó-dě te núcóo-ná-dé dàtná ñ<sup>n</sup> ñáyiú váha, te ní yùhú-yu òré ní xiní ñáhá-yu xii-dé.

16 Te nchaa ñáyiú ní xiní nàcuáa ní cuu ní ndúha téé yìhi ñaha cue

espíritú cùndìhi yucu ñávãha-án ní cùu ní caní-yu cuèndú núú nchàa ñáyiu ní quexìo-án nàcuáa ní cuu ní ndúha téé-án ndìhi nàcuáa ní cuu cuèndá nchaa cùchí-án. <sup>17</sup> Te sá dúcá<sup>n</sup> ní ñíhí ñáyiu-án tñùhu nàcuáa ní cuu núu ncháá-yu ní ngüíta-yu càhá<sup>n</sup> ndàhú-yu núú Jèsús sá ná quèe-gá yucu ñuú-yu núhú-gá.

<sup>18</sup> Te ní xica-gá cuáhá<sup>n</sup>-gá núú ndécú bàrcú, te òré ndée-gá bàrcú-án nùhú-gá ní ngüíta téé ní xíhi ñaha cuè espíritú cùndìhi yucu ñávãha-án càhá<sup>n</sup> ndàhú-dé núú-gã nùu vá cùndèe iní-gá quíhí<sup>n</sup> ndìhi ñaha-gã xii-dé. <sup>19</sup> Dico ñá túú ní sãha-gá tñùhu quíhí<sup>n</sup> ndìhi ñaha-gã xii-dé, te ní xáha<sup>n</sup>-gã xii-dé:

—Cuanùhú vehe-n, te cani-n cuèndú núú cuè ñáyiu sá Yã Ndiöxí ní cundàhú iní ñáhá-gã xii-n, te ío càhnu cuu nchaa sá vãha ní quide-gá sá cúu-xí-n —càchí-gá xãha<sup>n</sup>-gã xii-dé.

<sup>20</sup> Te téé-án ñí xica-dé cuánuhú-dé, te ní sáhá<sup>n</sup>-dé ndí ùxí ñuú nání Dècápolis, te ní cani-dé cuèndú núú nchàa ñáyiu sá ío càhnu cuu nchaa sá vãha ní quide ñaha Jèsús xii-dé, te ncháá-yu ío ní cuñúhu-yu.

*Cuèndá déhe yoco té Jàirú ndìhi cuèndá ñí ñadìhí ní tnándeé dóó Jèsús (Mt. 9:18-26; Lc. 8:40-56)*

<sup>21</sup> Te Jèsús cuánde-gá bàrcú, te ní natehndé-gá ndàa ìngá xio yuhu làgúná, te ío vãi ñáyiu ní tacá núú ñí quexìo-gá-án, te xíá<sup>n</sup> ndécú-gã <sup>22</sup> ní quexìo ñí téé tàxi tñuní veñúhu núú-gã, te téé-án nání-dè Jàirú, te ní ngüíñí xítí-dè núú-gã. <sup>23</sup> Te ní ngüíta-dé càhá<sup>n</sup> ndàhú-dé núú-gã, te xãha<sup>n</sup>-dè xii-gá:

—Ío càhú tñáhá déhe yoco-í cùhú-xi, te ndècu-ná-xi sá cùu-xi, te véxi-í càhá<sup>n</sup> ndàhú-í núú-n nùu vá cùndèe iní-n quíhí<sup>n</sup>-ó vèhe-í tendaha-n-xi cuèndá ndúha-xi, te cundecu-xi —càchí-dé xãha<sup>n</sup>-dè xii-gá.

<sup>24</sup> Te Jèsús ní xica-gá cuáhá<sup>n</sup>-gá ndìhi téé-án, te ío vãi ñáyiu nchìcú<sup>n</sup> ñáhá xii-gá cuáhá<sup>n</sup>, te dàdehnde ñaha-ná-yu xii-gá ní cùu. <sup>25</sup> Te tnuú

nchaa ñáyiu-án ñútnàhá ñí ñaha cùhú, te ñaha-án sa ní cuu úxúú cuíá sã cùhú-a<sup>n</sup> ngòyo ñaha ñíñí xii-a<sup>n</sup>. <sup>26</sup> Te ío ta ndòho-a<sup>n</sup> véxi, te ío cuéhé ñátátná ñí cuu ta quide tátna ñaha xii-a<sup>n</sup>, te sa ní ndìhi nchaa sá ndécú ndìhi-a<sup>n</sup> ní nadico-a<sup>n</sup> cuèndá ní ñíhí-a<sup>n</sup> díhú<sup>n</sup> ñí quehe<sup>n</sup> nchaa ñáyiu ní quide tátna ñaha xii-a<sup>n</sup> dico ní ñí<sup>n</sup>-yu ñá túú ní ndàcú-yu ndúha-a<sup>n</sup>, chi da uu<sup>n</sup>-gá tá cùu cahú-a<sup>n</sup> cuáhá<sup>n</sup>. <sup>27</sup> Te òré ní ñíhí-a<sup>n</sup> tñùhu cuèndá Jèsús, te ní xica-a<sup>n</sup> cuáhá<sup>n</sup>-a<sup>n</sup> núú ndécú-gã. Te òré ní quexìo-a<sup>n</sup> núú ndécú-gã te ní sáhá<sup>n</sup> ndehe yatni-a<sup>n</sup> ndàa sátá-gã ní tnándeé-a<sup>n</sup> dóó-gã. <sup>28</sup> Te duca<sup>n</sup> ñí quide-a<sup>n</sup> chi ní sani iní-a<sup>n</sup> sá nùu ndacu-a<sup>n</sup> tnándeé-a<sup>n</sup> cuèdicó luha yuhu dóó Jèsús te ndúha-a<sup>n</sup> ní sani iní-a<sup>n</sup>. <sup>29</sup> Te òré duca<sup>n</sup> ñí quide-a<sup>n</sup> te ñá túú-gã ní ngòyo ñaha-gá ñíñí xii-a<sup>n</sup>, te òré-án ñí cutnùní iní-a<sup>n</sup> sá ñí ndúha-a<sup>n</sup> cuéhé tñáhá-a<sup>n</sup>. <sup>30</sup> Te Jèsús ní cutnùní iní-gá sá ñí ñáyiu ní ndúha sá cuèndá-gá, núu ní nchócótó-gã ndàa sátá-gã te ní xícá<sup>n</sup> tñùhú-gã núú nchàa ñáyiu nchìcú<sup>n</sup> ñáhá xii-gá, te xãha<sup>n</sup>-gã xii-yu:

—¿Ndèdacàa-ndo ní tnándeé ñáhá xii-í? —càchí-gá xãha<sup>n</sup>-gã xii-yu.

<sup>31</sup> Te cue téé xica cuu ndìhi-gá ní xáha<sup>n</sup>-güedè xii-gá:

—Mèstrú, ndèhe-n sá vái ñáyiu nchìcú<sup>n</sup> ñáhá xii-n, te texio texio dàdehnde ñahá-yu xii-n te xícá<sup>n</sup> tñùhú-gã-n yòo ní tnándeé ñáhá xii-n —cachí-güedé xãha<sup>n</sup>-güedé xii-gá.

<sup>32</sup> Te Jèsús ní xíndéhé vãha-gá xio xio dñí-gá nùu ndèdacàa ñáyiu ní tnándeé ñáhá xii-gá. <sup>33</sup> Te sá dúcá<sup>n</sup> ñí cutnùní iní ñadìhí-án nàcuáa ní cuu, núu yùhú yùhú-a<sup>n</sup> ní sáhá<sup>n</sup>-a<sup>n</sup> ní ngüíñí xítí-án nùú Jèsús, te ní xáha<sup>n</sup> ndáá-a<sup>n</sup> xii-gá nàcuáa ndùu cuèndá-a<sup>n</sup>. <sup>34</sup> Te Jèsús ní xáha<sup>n</sup>-gã xii-a<sup>n</sup>:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndìhú-gá iní-n, chi vá dúcá<sup>n</sup>-gã ndòho-n —càchí-gá xãha<sup>n</sup>-gã xii-a<sup>n</sup>.



35 Te càhá<sup>n</sup> dúcá<sup>n</sup>-ní Jèsús ní sáá cue téé xínu cuechi vehe té Jàirú téé tàxi tnuní veñúhu-á<sup>n</sup>, te xăha<sup>n</sup>-güedě xii-dé:

—Sa ní xíhí déhe-n, vá chíchiu<sup>n</sup>-gá-n Mèstrú —càchí-güedé xăha<sup>n</sup>-güedě xii-dé.

36 Dico Jèsús ñá túú ní quide cuendá-gá nàcuáa ndùu tnúhu ní cáhá<sup>n</sup> cue téé-á<sup>n</sup>, te ní xáha<sup>n</sup>-gă xii téé tàxi tnuní veñúhu-á<sup>n</sup>:

—Ñá túú nă caní iní-n, quindáá iní ñáhá-ní-n xii-í —càchí-gă xăha<sup>n</sup>-gă xii-dé.

37 Te Jèsús vá yŏo-gă ní cuiní-gă canchicú<sup>n</sup> ñáhá xii-gă quíhí<sup>n</sup>, chí té Pèlú-ni, ndihí té Jăcobó-ni, ndihí ñaní-ni-dé té Juáá cuáhá<sup>n</sup> ndihí ñaha-gă xii-güedé. 38 Te òré ní quexiò-gă ndihí-güedé vehe téé tàxi tnuní veñúhu-á<sup>n</sup>, te ní xiní-gă sá ïo vâi ñáyiu xĩndecu, te súúní dùsa<sup>n</sup> quidé-yu te níhí xícáhá<sup>n</sup>-yu te xĩndáhí-yu. 39 Te òré cuánguihu-gă xití vehe, te ní xáha<sup>n</sup>-gă xii-yu:

—¿Ná cuendá ndéé dúcá<sup>n</sup> ïo dusa<sup>n</sup> quide-ndo, te ndàhyú-ndó? Te xíchí-a ñá túú ní xíhí-xi chí dicó xidí-xi —càchí-gă xăha<sup>n</sup>-gă xii-yu.

40 Te ní sácú ndéé ñáhă-yu xii-gă sá dúcá<sup>n</sup> ñí cáhá<sup>n</sup>-gă, chí sá cúú-xí mèé-yu chí ní xíhí ndisa xíchí-ă<sup>n</sup>. Te òré-á<sup>n</sup> ñí queñuhu-gă nchaá-yu quehé, te cuánguihu-gă núú cándòdo yiqui cuñú xíchí ñí xíhí-á<sup>n</sup>. Te ndèca-gă tátá xíchí ñí xíhí-á<sup>n</sup> ndihí năná-xi cuánguihu, te tnàhá cue téé úní ndihí-gă-á<sup>n</sup> cuánguihu ndihí-gă. 41 Te ní tñi-gă ndaha xíchí ñí xíhí-á<sup>n</sup>, te ní xáha<sup>n</sup>-gă:

—Tálita, cúmí —càchí-gă xăha<sup>n</sup>-gă.

Te tnúhu-á<sup>n</sup> quée-xí: Yòhó xíchí cuéchí yúhú càchí-í sá ndácŏo-n, duha quèe-xi tnúhu-á<sup>n</sup>.

42 Te òré-ni-á<sup>n</sup> ñí ndoto xíchí cuéchí-ă<sup>n</sup> ñí ndacóo-xi ní nacaca cuu-xi, te ndècu-xi úxúú cuíá-xi. Te ïo ní cuñúhu nchaa ñáyiu sá dúcá<sup>n</sup> ñí dándótó ñaha Jesús xii-xi. 43 Te Jèsús ní cáhá<sup>n</sup> víhí-gă dóho tátá-xi ndihí năná-xi sá vă yŏo ï<sup>n</sup> cúñàhá-yu sá ñí dándótó ñaha-gă xii-xi. Te sátá dúcá<sup>n</sup>

te ní xáha<sup>n</sup>-gă xii-yu sá cuñàhá-yu xii-xi sá cáxi-xí.

## 6

*Jèsús ndécú-gă ñuú Nazàrét*  
(Mt. 13:53-58; Lc. 4:16-30)

1 Te Jèsús ní ndee-gă ñuú núú ñí dándótó-gă xíchí ñí xíhí-á<sup>n</sup>, te cuánuhú-gă núú cúú ñuú-gă, te tnàhá cue téé xica cuu ndihí-gă cuánuhú ndihí-gă. 2 Te ndècu Jesús ñuú-gă ní tnàhá nduu ndètatú ñáyiu. Te nduu-ă<sup>n</sup> cuánguihu-gă xití veñúhu dàcuaha ñaha-gă xii-yu. Te vâi ñáyiu ndèdóho nchaa tnúhu càhá<sup>n</sup>-gă, te xícúñúhu vîhí-yu, te xĩtnàhá-yu:

—¿Ndèé ní sáhá<sup>n</sup> dăcuáhá tēe-a núu ndéé duha váha càhá<sup>n</sup>-dé, nása ní quide-dé núu ndéé duha ïo váha cùtnuní iní-dé, te ndàcu-dé quidé-dé nchaa sá vă yŏo tnàhí ndàcu cada-í?

3 Te dicó carpintèrú cúú-dě, dicó déhe tá Màriá cúú-dě, te ñaní-dé cúú tē Jăcobó, ndihí té Chèé, ndihí té Júdás, ndihí té Xímú, te ðu-ni cue cúha-dé cúú ñáyiu ndècu ndihí-o ñuú-a —càchí-yu xĩtnàhá-yu.

Te ñá túú ní cuiní-gă-yu cáhá<sup>n</sup> ndihí váha ñàhá-yu xii-gă. 4 Te Jèsús ní xáha<sup>n</sup>-gă xii-yu:

—Te núu ï<sup>n</sup> téé càhá<sup>n</sup> tnúhu Yá Ndiŏxí ná năsáá-dé ñuú-dé dăcuàha-dé ñáyiu tnúhu-gă, te nchaa ñáyiu ñuú-dé-á<sup>n</sup>, ndihí nchaa ñáyiu ndècu ndihí-dé vehe-dé, ndihí nchaa ñáyiu cùu ndi mee-dé ñá túú nèhé-yu sá yíñùhu núú-dě, dico cue ñáyiu nchaa dava-gă ñuú chí nèhé-yu sá yíñùhu núú-dě —càchí-gă xăha<sup>n</sup>-gă xii-yu.

5 Te ñá túú ní quide tátna Jèsús vâi ñáyiu cuendá sá ñà túú ní sàndáá iní ñáhă-yu xii-gă, dico ní quide tátna-gă ï<sup>n</sup> úú ñáyiu cùhú ní sàndáá iní ñáhá xii-gă. Te ní tendaha ñaha-ni-gă xii-yu te ní ndúha-yu. 6 Te ïo ní cuñúhu-gă sá dúcá<sup>n</sup> ñà túú ní cuiní-yu quindáá iní ñáhă-yu xii-gă. Te sátá dúcá<sup>n</sup> te ní xica-gă cuáhá<sup>n</sup>-gă nchaa dava-gă ñuú líhli càa yatni xiá<sup>n</sup> cuendá dăcuàha-gă ñáyiu tnúhu-gă.

*Jèsús táuchìu<sup>n</sup>-gá quíhí<sup>n</sup> cue téé xìca cuu ndìhi-gá cáhá<sup>n</sup>-güedé tnúhu Yá Ndiöxí núú ñáyi*

*(Mt. 10:5-15; Lc. 9:1-6)*

<sup>7</sup> Te Jèsús ní cana-gá ndi ùxúú cue téé xìca cuu ndìhi-gá, te ní sáñaha-gã xii-güedé tnúhu ndee ìní cundecu ndìhi-güedé cuendá queñuhu-güedé nchaa espíritú cúndìhi yucu ñávãha yìhi ñaha xii ñáyi. Te ní xáha<sup>n</sup>-gã xii-güedé sá ndì ndúú ndi ndúú-güedé quíhí<sup>n</sup>-güedé cáhá<sup>n</sup>-güedé tnúhu Yá Ndiöxí núú ñáyi. <sup>8-9</sup> Te cùmání-gã caca-güedé quíhí<sup>n</sup>-güedé, te ní xáha<sup>n</sup>-gã xii-güedé:

—Vá cánèhe-ndo ñunu cuhu<sup>n</sup> ndachiu<sup>n</sup>-ndo, te ní vã cánèhe-ndo sá cáxí-ndó, te ní vã cánèhe-ndo díhú<sup>n</sup>, chí ì<sup>n</sup> caa-ni tàtnu canehe-ndo, te chàu yíhí-ní-ndó-ã<sup>n</sup> xíã<sup>n</sup>-ni quíhi-ndo, te vã cánèhe-gá-ndó ìngá ichi dóó-ndó chí dïu-ni dóó níhnú-ndó-ã<sup>n</sup> xíã<sup>n</sup> tnàhí-ni cuihnu-ndo te ñá túú tnàhí-gã ná canehe-ndo —càchí-gã xáha<sup>n</sup>-gã xii-güedé.

<sup>10</sup> Te xáha<sup>n</sup> tùcu-gá:

—Te òré ná sàá-ndó ì<sup>n</sup> ñuú, te ió ñáyi cáhá<sup>n</sup> ñãhã-yu xii-ndo vèhé-yu, te xíã<sup>n</sup>-ni cundecu-ndo ndéé ná sàá nduu ndèe-ndo ñuú-á<sup>n</sup>. <sup>11</sup> Te núu ió dava ñuú ñá túú cuìní-yu cáhá<sup>n</sup> ndìhi ñaha vãha-yu xii-ndo, te ní ñà túú cuìní-yu cundedóho-yu tnúhu càhá<sup>n</sup>-ndó, te ndee-ni-ndo ñuú-á<sup>n</sup> te naquidi-ndo ticáchúhmá ní tñi sáhá-ndó cuendá ná cùtnuní ìní-yu sá ñà túú quide váha-yu. Te na càchí tnúhu ndáá-í xii-ndo sã ná sàá nduu càda ndáá Yá Ndiöxí cuéchi nchaa ñáyi, te cue ñáyi duca<sup>n</sup> na càda ñaha xii-ndo-á<sup>n</sup> ïo-gá ndohó-yu dàvá-á<sup>n</sup> dàcúxí dàtná ndoho cue ñáyi ñuú Sòdomá ndìhi cue ñáyi ñuú Gòmorá —càchí-gã xáha<sup>n</sup>-gã xii-güedé.

<sup>12</sup> Te cue téé-á<sup>n</sup> ñi xica-güedé cuáhá<sup>n</sup>-güedé te ní ngúita-güedé dácua<sup>n</sup>-güedé cue ñáyi tnúhu Yá Ndiöxí, te xáha<sup>n</sup>-güedé xii-yu:

—Chí dándixi túu ìní sá ñà túú quide váha-ndo ndècu-ndo, te dañà-ndo nchàa ichi cuehé ichi

duha ndècu-ndo. —càchí-güedé xáha<sup>n</sup>-güedé xii-yu.

<sup>13</sup> Te vãi espíritú cúndìhi yucu ñávãha yìhi ñaha xii ñáyi ta queñuhu-güedé yiqui cùnú-yu cuáhá<sup>n</sup>, te vãi tucu ñáyi cùhú tá quide tátna-güedé cuáhá<sup>n</sup> chíhí ñaha-güedé acítí xii-yu te ndüha-yu.

*Nàcuáa ní cuu ní xíhí té Juáa tée dàcuandute ñaha xii ñáyi*

*(Mt. 14:1-12; Lc. 9:7-9)*

<sup>14</sup> Te nchaa xichi ní níhí ñáyi tnúhu nchaa nàcuáa quide Jesús, te tnàhá té Hèrodés téé yìndaha ñaha xii ñáyi ní níhí-dé tnúhu nchaa nàcuáa quide-gá, te ní cachí-dé:

—Té Juáa téé ní xóo dacuandute ñaha xii ñáyi ní ndoto núu dàcá<sup>n</sup> ndácú-dé quidé-dé nchaa sá vã yõ tnàhí ndàcu cada —duha ní cachí-dé.

<sup>15</sup> Te dava ñáyi càchí-yu sá tã Èliás téé ní xóo cáhá<sup>n</sup> tnúhu Yá Ndiöxí ndéé sanaha ní nasáá-dé.

Te davá-yu càchí-yu sá cúú-gã dàtná ì<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha. <sup>16</sup> Te té Hèrodés ní níhí-dé tnúhu nchaa nàcuáa càhá<sup>n</sup>-yu, te ní cachí-dé:

—Dïu té Juáa téé ní táuchíu<sup>n</sup>-í ní xehndé-güedé díquí-xi ní ndoto —càchí-dé.

<sup>17-18</sup> Te duha ní cuu cútnàhá ní sahani té Hèrodés té Juáa, chí dàvá-á<sup>n</sup> ñi naquehe<sup>n</sup> té Hèrodés-á<sup>n</sup> ì<sup>n</sup> ñaha nàni Herodiás ndécá-dé, te ñaha-á<sup>n</sup> sà ní cãndeca ñaha ñàní-dé té Lìpé. Te té Juáa ní xáha<sup>n</sup>-dè xii té Hèrodés sá ñà túú ní quide váha-dé sá dúcá<sup>n</sup> ñi naquehe<sup>n</sup>-dé ñaha ní cãndeca ñàní-dé, núu sá cuendá ñaha-á<sup>n</sup> ñi táuchíu<sup>n</sup> tã Hèrodés ní tñi-güedé té Juáa ní chíhi ñaha-güedé vecáa, te ní dàcútú ñaha-güedé xii-dé, te duca<sup>n</sup> ñi quide-dé cuendá sá ndécá ñaha-dé xii-á<sup>n</sup>.

<sup>19</sup> Te ñaha nàni Herodiás ndécá tã Hèrodés-á<sup>n</sup> ïo ní cuu úhú ìní-á<sup>n</sup> té Juáa, te ní cuìní-á<sup>n</sup> cahni-á<sup>n</sup>-dé, dico ñà túú ní níhí-á<sup>n</sup> nàcuáa cada-á<sup>n</sup>. <sup>20</sup> Te mee tã Hèrodés chí ní cùtnuní ndáá ìní-dé sá tã Juáa cúú-dé ì<sup>n</sup> téé quide mee-ni sá vãha, te quide ndáá-dé núu Yá Ndiöxí, te ní xóo yùhú ñàhá-dé

nũu xíá<sup>n</sup> ñá túú ní dàña-dé ná cada ñaha ñaha ndeca-dé-á<sup>n</sup> xii té Juáá. Te té Hèrodés-á<sup>n</sup> ïo ní cudíí ìní-dé ní xíndedóho-dé nchaa tnúhu ní xáha<sup>n</sup> tẽ Juáá xii-dé, dico ñá túú ní sàni ìní-dé duu<sup>n</sup> duu<sup>n</sup> tní-dé tnúhu-á<sup>n</sup>. <sup>21</sup> Te ì<sup>n</sup> nduu ní xóo vico vehe té Hèrodés ní quide càhnu-dé nduu ní cacu-dé. Te nduu-á<sup>n</sup> ní níhí ñaha nàni Herodiás-á<sup>n</sup> nàcuáa cada-a<sup>n</sup> cuèndá cuú té Juáá. Te nduu-á<sup>n</sup> ní cáhá<sup>n</sup> té Hèrodés nchaa cue tée cùchiu<sup>n</sup>, ndíhi nchaa cue tée tàxi tnuní ñáhá xii cue sandadú, ndíhi nchaa cue tée cuica ndècu distritú Galiléa cuèndá cudini ndíhi ñaha-dé xii-güedé nduu-á<sup>n</sup>. <sup>22</sup> Te ndècu ì<sup>n</sup> déhe yoco ñaha nani Herodiás-á<sup>n</sup>, te xíchí-á<sup>n</sup> ní quíhu-xi vehe núú cúú vico-á<sup>n</sup> ní xita saha-xi mèi oré yíhí tẽ Hèrodés mèsá ndíhi nchaa cue tée ní cáhá<sup>n</sup>-dé, te ío ní cudíí ìní-dé ndíhi nchaa cue tée-á<sup>n</sup> nàcuáa ní xita xíchí-á<sup>n</sup>. Te té Hèrodés ní xáha<sup>n</sup>-dẽ xii-xi:

—Cáca<sup>n</sup> núú-í nũu ná cuíní-n te taxi-í —càchí-dé xáha<sup>n</sup>-dẽ xii-xi.

<sup>23</sup> Te ní cacunehe-dé ndéé Yá Ndiõxí nàcuáa cutnùní ìní xíchí-á<sup>n</sup> sá ndàá cuáñaha-dẽ nũu ná cúú sã ná càcá<sup>n</sup>-xi núú-dẽ cuèi ndéé cuádava nchaa sá ndécú ndíhi-dé, te núu na càcá<sup>n</sup>-xi. <sup>24</sup> Te sá dúcá<sup>n</sup> ní xáha<sup>n</sup>-dẽ xii-xi núu ní quee-xi quehé ní xáha<sup>n</sup>-xi xii náná-xi:

—Náá, ¿ná cúú sã càcá<sup>n</sup>-í núú tẽ Hèrodés? —càchí-xi xáha<sup>n</sup>-xi xii-a<sup>n</sup>.

Te náná-xi-á<sup>n</sup> ní xáha<sup>n</sup>-a<sup>n</sup> xii-xi:

—Cuáhá<sup>n</sup> cáca<sup>n</sup>-n díquí tẽ Juáá tée dàcuandute ñaha xii ñáyíu —càchí-a<sup>n</sup> xáha<sup>n</sup>-a<sup>n</sup>.

<sup>25</sup> Te ndíhi-ni cuándihu xíchí-á<sup>n</sup> xití vehe núú yíhí tẽ Hèrodés-á<sup>n</sup>, te xáha<sup>n</sup>-xi xii-dé:

—Cuíní-í sá mèi nduu vitna quehndé-n díquí tẽ Juáá tée dàcuandute ñaha xii ñáyíu te taxi-n, dico na cùhu<sup>n</sup> ì<sup>n</sup> xití cóhó taxi-n —càchí-xi xáha<sup>n</sup>-xi xii-dé.

<sup>26</sup> Te té Hèrodés ní ngüíta-dé ndíhú víhí ìní-dé sá dúcá<sup>n</sup> ní xáha<sup>n</sup>-xi xii-dé, dico ñá túú ní cùyíi-dé cúñaha-dẽ xii-xi sá vã cúú cuáñaha-dẽ sá xicá<sup>n</sup>-xi, chí cuèndá sá núú nchaa ñáyíu ní xáha<sup>n</sup>-dẽ sá cúú cuáñaha-dẽ nũu ná cúú sã ná càcá<sup>n</sup>-xi, te ní cacunehe-dé ndéé Yá Ndiõxí nàcuáa cutnùní ìní-xi

sá ndàá cuáñaha-dẽ sá ná càcá<sup>n</sup>-xi núú-dẽ. <sup>27</sup> Te té Hèrodés-á<sup>n</sup> ndíhi-ni ní xáha<sup>n</sup>-dẽ xii ì<sup>n</sup> sandadú sá quíhí<sup>n</sup>-dé quehndé-dé díquí tẽ Juáá. <sup>28</sup> Te sandadú-á<sup>n</sup> ní xica-dé cuáhá<sup>n</sup>-dé vecaá núú yíhí tẽ Juáá-á<sup>n</sup>, te ní quexìo-dé te ní xehndé-ni-dé díquí tẽ Juáá, te ní chihi-dé ì<sup>n</sup> xití cóhó te nèhe-dé cuánuhú ní sáha-dé xíchí xicá<sup>n</sup>-á<sup>n</sup>, te xíchí-á<sup>n</sup> ní nacuáha-xi náná-xi. <sup>29</sup> Te òré ní níhí nchaa cue tée ní xica cuu ndíhi ndíi Juáá-á<sup>n</sup> tnúhu sá dúcá<sup>n</sup> ní sahani ñaha-güedé xii ndíi, te ní sáhá<sup>n</sup>-güedé ní ndocani-güedé yíquí cùñú ndíi te ní chindúxi-güedé.

*Jèsús dácàxi-gá úhú<sup>n</sup> mìl cue tée te dè<sup>n</sup> ñáyíu dèhí ndíhi landú*

(Mt. 14:13-21; Lc. 9:10-17; Jn. 6:1-14)

<sup>30</sup> Te nchaa cue tée ní táuchíú<sup>n</sup> Jèsús cuáhá<sup>n</sup> cáhá<sup>n</sup> tnúhu Yá Ndiõxí núú ñáyíu ní ndexìo-güedé núú-gã te ní ngüíta-güedé nàcàni tnúhu-güedé nchaa nàcuáa ní quide-güedé ndíhi nchaa nàcuáa ní dánèhé ñáhá-güedé xii-yu. <sup>31</sup> Te Jèsús ní xáha<sup>n</sup>-gã xii-güedé:

—Chí nèhé ná quíhí<sup>n</sup>-ó ì<sup>n</sup> xichi núú ñà túú ñáyíu ndetatú-ó —càchí-gá xáha<sup>n</sup>-gã xii-güedé.

Te duca<sup>n</sup> ní xáha<sup>n</sup>-gã xii-güedé, chí ío cuéhé ñáyíu cuáhá<sup>n</sup> véxi-yu cùu-yu núú ndécú-gã. Te ni ñã nihí-gá nása cada-gã caxi-gá ndíhi cue tée xica cuu ndíhi-gá. <sup>32</sup> Te Jèsús cuánguee-gá bàrcú ndíhi mee-ni cuè tée ní táuchíú<sup>n</sup>-gã cáhá<sup>n</sup> tnúhu-gá, te cuáhá<sup>n</sup>-gá ndíhi-güedé ì<sup>n</sup> xichi núú ñà túú ñáyíu ndècu. <sup>33</sup> Dico vãi ñáyíu ní cutnùní ìní-yu sá díú-gã ñúhú bàrcú-á<sup>n</sup> cuáhá<sup>n</sup> ndíhi cue tée xica cuu ndíhi-gá, te nchaa ñuú cáá yàtni xíá<sup>n</sup> ní quee ñáyíu xixínú-yu cuáhá<sup>n</sup> núú ní quidé-yu cuèndá quexìo Jèsús, te sa ndécú-yu xíá<sup>n</sup> ní quexìo-gá. <sup>34</sup> Te òré ní quene Jèsús xití bàrcú, te ní xiní-gá cuéhé víhí ñáyíu xixúcu núú ní quexìo-gá-á<sup>n</sup>, te ní cundàhú ìní ñáhá-gã xii-yu chí ndécú-yu dàtná xíndecu cue mbéé cue quití ñá túú tòli-xi, te ío vãi núú sã ní ngüíta-gá

ní dácuáhá ñàha-gá xii-yu. <sup>35</sup> Te sátá tá cuàa cuáhán te ní sáhán cue téé xìca cuu ndihí Jesús núú-gă, te xăha<sup>n</sup>-güedě xii-gá:

—Sa ní cuaa te ñá túú ñăyiu ndècu yatni iha. <sup>36</sup> Váha-gá dandàca nchaa ñăyiu-a chi na quihí<sup>n</sup>-yu nchaa vehe càa xití yucu-a, ndihí nchaa ñuú cáa nchaa yatni iha cuaá<sup>n</sup>-yu sá cáxí-yu —càchí-güedě xăha<sup>n</sup>-güedě xii-gá.

<sup>37</sup> Te Jèsús ní xăha<sup>n</sup>-gă:

—Mee-ndo chî cuăñaha să ná cáxí-yu —càchí-gă xăha<sup>n</sup>-gă xii-güedě.

Te xăha<sup>n</sup>-güedě xii-gá:

—¿Te nása cada-ndí, chi xini ñuhu-xi datná úú ciendú díhú<sup>n</sup> denàriú cuendá cuaa<sup>n</sup>-ndí sá cáxí-yu? —càchí-güedě xăha<sup>n</sup>-güedě xii-gá.

<sup>38</sup> Te Jèsús ní xăha<sup>n</sup>-gă xii-güedě:

—Chí cuáhán cundehe-ndo nŭu ná daha pàá ndécú ndihí-ndo te cachí tnúhu-ndo —càchí-gă xăha<sup>n</sup>-gă xii-güedě.

Te ní sáhán ndéhé-güedě nŭu ná daha pàá ndécú, te ní xăha<sup>n</sup>-güedě xii-gá:

—Úhú<sup>n</sup> duha-ná pàá ndihí úú-nă chácá ndécú —càchí-güedě xăha<sup>n</sup>-güedě xii-gá.

<sup>39</sup> Te Jèsús ní xăha<sup>n</sup>-gă xii nchaa ñăyiu sá ná ñihí tnáhă-yu cuu titní xichí-yu, te ngóo-yu nchaa núú cŭhú cuí càa xián. <sup>40</sup> Te nchaá-yu ní ngóo-yu, te dava xichí-yu ní ngóo ñ<sup>n</sup> ciendú-yu, te dava xichí-yu ní ngóo údico úxí-yu. <sup>41</sup> Te sátá ñí ndihí-yu ní ngóo, te ní quehe<sup>n</sup> Jèsús ndi ùhú<sup>n</sup> pàá ndi úú chácá-ă<sup>n</sup>, te ní ndacoto-gá andi<sup>n</sup> te ní ndacá<sup>n</sup> táhú-gă núú Yă Ndiöxí, te dătnùní ní táhú cuèchi-gá pàá-ă<sup>n</sup> te ní sãñaha-gă xii cue téé xìca cuu ndihí-gá ní dăcãhñu-güedě nchaa ñăyiu-ă<sup>n</sup> ní xexí-yu. Te diu-ni duca<sup>n</sup> ñí quide tucu-gá úú chácá-ă<sup>n</sup>. <sup>42</sup> Te nchaá-yu ní xexí-yu ní ndahá xití-yu. <sup>43</sup> Te sátá ñí túhú cóhő-yu te ní nadatácă-güedě nchaa sá ñí quendóo, te ní chítú ùxúú tnáhá tídihi mee-ni sã ñí quendóo núú ùhú<sup>n</sup>-ni pàá, ndihí núú ùú-ni chácá. <sup>44</sup> Te nchaa ñăyiu ní xexi-ă<sup>n</sup> chi xñu úhú<sup>n</sup> mĩl mee-ni cuè

tée chi diu-ni cue téé-ă<sup>n</sup> ñí quíúndehu, te diñ<sup>n</sup> ñăyiu dihí ndihí cue landú.

*Jèsús xicá-gă núú ndute*

*(Mt. 14:22-27; Jn. 6:16-21)*

<sup>45</sup> Te òré-ni-ă<sup>n</sup> ñí xăha<sup>n</sup> Jèsús xii cue téé xìca cuu ndihí-gá sá quèe-güedě bàrcú codonùu-güedě quihí<sup>n</sup>-güedě ñ<sup>n</sup> ñuú nání Betsaidá cáá ndàa ingá xio yuhu làgúná núú ndécú-güedě-ă<sup>n</sup>, te mee-gă quendóo-gá cada ndee ñí tnáhă-gă ndihí cue ñăyiu. <sup>46</sup> Te sátá ñí yáha ní quide ndee ñí tnáhă-gă ndihí-yu, te ní xica-gá cuáhán-gá ñ<sup>n</sup> tindúú cáá yàtni xián cuendá cáhán ndihí-gá Yă Ndiöxí. <sup>47</sup> Te òré sa ní cundiqui<sup>n</sup> te bàrcú sá ñúhú cuè téé xìca cuu ndihí-gá sa cuáhán-xi ndéé cuádava xití làgúná-ă<sup>n</sup>, te mee-gă ndécú-gă ñ<sup>n</sup> núú tindúú. <sup>48</sup> Te túu ndèhe-gá sá sŭúní ndòho-güedě tá dăcaca-güedě bàrcú-ă<sup>n</sup> cuáhán, chi cuendá ndàa nacuáa cuáhán-xi-ă<sup>n</sup> duha véxi táchí te nătúndaha-xi. Te ingá nduu-ă<sup>n</sup> tàcuíhndá-gá sa ní cuyatni vií-nă Jèsús bàrcú ñúhú-güedě-ă<sup>n</sup>, dico núú ndute tá xìca-gá cuáhán te luha-ná te yáha ñaha-gă xii-güedě ní cùu. <sup>49-50</sup> Te òré ní xiní ñáhá cuè téé ñuhu bàrcú-ă<sup>n</sup> xii-gă te ní yùhú-güedě ní cana saa-güedě, chi ní sani ñí-güedě sá ñ<sup>n</sup> almá cúú-gă. Te ní xăha<sup>n</sup>-gă xii-güedě:

—¡Ñí cunduu-ndo, vá yùhú-ndó, chi yùhú cúú-í! —càchí-gă xăha<sup>n</sup>-gă xii-güedě.

<sup>51</sup> Te Jèsús cuánguee-gá xití bàrcú ñúhú-güedě-ă<sup>n</sup>, te sátá cuánguee-gá te òré-ni ní ngüíñí táchí, te ní cuñuhu vihi-güedě. <sup>52</sup> Te duca<sup>n</sup> chi cue téé-ă<sup>n</sup> ñà túú ní cùtnuní ñí-güedě nása quide-gá, chi ñá túú ní cùtnuní váha ñí-güedě năcuáa ndùu sá ñí quide-gá òré ní nadacàyá-gá pàá, chi ío ñí dĩquí-güedě.

*Jèsús quidé tătna-gá ñăyiu cùhú ñuú*

*Genesàrét*

*(Mt. 14:34-36)*

<sup>53</sup> Te ní yáha-güedě ndihí-gá ndàa ingá xio yuhu làgúná, te ní sáa-güedě ndihí-gá yucu cue téé ñuú Genesàrét.



Te yacá<sup>n</sup> ní dácútú ndèé-güedé bàrcú-güedé yuhu làgúná. <sup>54</sup> Te òré ní quene Jèsús ndìhi cue téé xìca cuu ndìhi-gá xití bàrcú, te nchaa ñáyiú xĩndecu-á<sup>n</sup> ñĩ cutnùnì iní-yu sá díú-gă. <sup>55</sup> Te ñáyiú-á<sup>n</sup> ndìhi-ni ní sáhá<sup>n</sup>-yu nchaa núú xĩndecu cue ñáyiú cùhú, te cue ñáyiú cùhú-á<sup>n</sup> ñĩ quée-yu xító nchìdo ñahá-yu cuáhá<sup>n</sup> ndi tnahá ì<sup>n</sup> ì<sup>n</sup> xichi núú ñihí-yu tnúhu quèxio Jèsús. <sup>56</sup> Te nchaa ñúú náhnú ndìhi nchaa ñúú lìhli núú cuáhá<sup>n</sup> Jèsús, duca<sup>n</sup> xĩndecá-yu nchaa ñáyiú cùhú cuáhá<sup>n</sup> xití ñúú sàcá<sup>n</sup> ñáhă-yu núú-gă cuendá cada tátna ñaha-gă xii-yu. Te ñiu-ni duca<sup>n</sup> xĩquidé-yu nchaa dava-gă xichi núú cuáhá<sup>n</sup>-gá núú xĩndecu cue ñáyiú, te càhá<sup>n</sup> ndàhú-yu núú-gă sá ná dáñá-gă tnándeé cue ñáyiú cùhú-á<sup>n</sup> cuèdicó luha yuhu dǒó-gă cuendá ndúha-yu. Te nchaa ñáyiú cùhú ní tnándeé yuhu dǒó-gă ní ndúha-yu.

## 7

*Cuendá nchaa sá quidé-xí ngũndecu cuéchi ñáyiú*  
(Mt. 15:1-20)

<sup>1</sup> Te ñúú Jerusàlén ní quee cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, te ní quexìo-güedé núú ndécú Jèsús, te tnahá cue téé cùu fariséú ní quexìo ndìhi-güedé. <sup>2</sup> Te cue téé-á<sup>n</sup> ñĩ xini-güedé sá dâva cue téé xìca cuu ndìhi Jèsús ñá túú ndàha-güedé dàtná ndáhá mèe cue téé cùu fariséú-á<sup>n</sup> òré caxi-güedé. Te xíá<sup>n</sup> núú cue téé ní quexìo-á<sup>n</sup> ñĩ càhá<sup>n</sup> cuèhé-güedé cuendá cue téé xìca cuu ndìhi-gă. <sup>3</sup> Te duca<sup>n</sup> chi nchaa cue téé cùu fariséú-á<sup>n</sup> ndìhi nchaa ñáyiú isràél nchìcú<sup>n</sup> nihnú-yu quidé-yu dàtná ní xóo cada nchaa cue ñanì tnáhă-yu ní xĩndecu ndéé sanaha, chi nchaa ñáyiú-á<sup>n</sup> và caxi-yu te núú và ndáhă-yu dàtná ní xóo ndaha nchàa cue ñanì tnáhă-yu ní xĩndecu ndéé sanaha-ă<sup>n</sup>. <sup>4</sup> Te ñáyiú-á<sup>n</sup> ndi tnahá òré cuáhá<sup>n</sup>-yu núú yăhu te nàsáá-yu, te ndàhă-yu nàcuáa sàni iní-yu ndùvétú iní Yă Ndiǒxí, te núú và dúcá<sup>n</sup> càdá-yu te

vá caxi-yu. Te tnahá náquèté-yu vàsú sá sácũhu<sup>n</sup> sá xihí-yu, ndìhi lítu, ndìhi cóhó càá, ndìhi càamá. Te nchaa xéhé náquèté-yu nàcuáa sàni iní-yu ndùvétú iní Yă Ndiǒxí. Te ío-gă titní sá ñĩ xóo cada nchaa ñáyiú ní xĩndecu ndéé sanaha-ă<sup>n</sup> nchìcú<sup>n</sup> nihnú-yu quidé-yu. <sup>5</sup> Te cue téé cùu fariséú-á<sup>n</sup>, ndìhi cue téé dàcuaha ñaha xii ñáyiú nchaa tnúhu ní chídó tnùnì ndíi Moisés-á<sup>n</sup> ñĩ xáha<sup>n</sup>-güedé xii Jèsús:

—¿Ná cuendá cue téé xìca cuu ndìhi-n ñá túú nàquete-güedé ndaha-güedé òré caxi-güedé dàtná ní cachí nchaa cue téé ní xĩndecu ndéé sanaha-i? —càchí-güedé xáha<sup>n</sup>-güedé xii-gă.

<sup>6</sup> Te Jèsús ní xáha<sup>n</sup>-gă xii-güedé:

—Nchòhó cúú-ndó cue téé ío dándahú mée-xí chi càchí-ndó sã ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùnì ndíi Chàíá téé ní xóo càhá<sup>n</sup> tnúhu Yă Ndiǒxí ndéé sanaha núú tütú-gă núú càhá<sup>n</sup>-xi nàcuáa ní càhá<sup>n</sup>-gă cuendá-ndó, te duha ní cachí-gă:

Ñáyiú-a càchí-yu sá ío càhnu cuu-í, dico dicó-ni yuhu càhá<sup>n</sup>-yu, chi ñá túú ñùhu iní ñáhă-yu xii-í.

<sup>7</sup> Te àú<sup>n</sup> nă cuu chiñuhu ñahá-yu xii-í, chi ñá túú vèdana ndèé nándĩhi-xi,

chi cue ñáyiú-a dàcuahá-yu cue tnahá ñáyiú-yu nàcuáa cundecú-yu, dico mee-ni tnúhu sá ñĩ cahu iní cue ñáyiú ñuyíú-a càhá<sup>n</sup>-yu.

Duha ní chídó tnùnì ndíi Chàíá núú tütú Yă Ndiǒxí nàcuáa ní càhá<sup>n</sup>-gă cuendá-ndó. <sup>8</sup> Te nchòhó ní dáñá-ndó nàcuáa ní cachí Yă Ndiǒxí cada-ndo, te nchìcú<sup>n</sup> nihnu-ndo quide-ndo nàcuáa ní cahu iní cue ñáyiú ñuyíú-a, chi nàquete-ni-ndo lítu, te nàquete-ni-ndo vasú sácũhu<sup>n</sup> sá xihí-ndó nàtava-ndo nàcuáa ní xóo cada ñáyiú-á<sup>n</sup> ñĩ xóo naqueté-yu nchaa xíá<sup>n</sup>, te nándi-gă nchaa núú sã quidé-ndó —càchí Jèsús xáha<sup>n</sup>-gă xii-güedé.

<sup>9</sup> Te ní xáha<sup>n</sup> tùcu-gă xii-güedé:

—Te nchòhó, ñá túú cuiní-ndó càda-ndo nàcuáa cuiní Yă Ndiǒxí,

chi mee-ni nàcuáa ní cachí cue téé ní xíndecu ndéé sanaha nchícú<sup>n</sup> nihnu-ndo quide-ndo. <sup>10</sup> Te ndíi Moisés ní cachí ndíi sá ncháá ñáyiú canehé-yu sá yíñùhu núú tātá-yu ndíhi núú nǎǎ-yu. Te nchaa ñáyiú na càhá<sup>n</sup> úhú cuendá tātá-yu àdi cuendá nǎǎ-yu te cahni ñaha-güedé xii-yu ní cachí ndíi. <sup>11</sup> Te nchòhó càchí-ndó sǎ ñú ñ<sup>n</sup> téé na cūñaha-dě xii tātá-dě ndíhi nǎǎ-dě sá sǎ ní sani iní-dé cuañaha-dě xii-yu cùu-xi Corbán, te ñá túú-gǎ xíní ñùhu-xi sá cuañaha-dě xii-yu, te tnúhu Còrbán-á<sup>n</sup> quéé-xí: Sá cúú cuendá Yǎ Ndióxi. <sup>12</sup> Te sá dúcá<sup>n</sup> ná càhá<sup>n</sup> ñ<sup>n</sup> téé-á<sup>n</sup> te nchòhó chíndèe tnúhu-ndo-dě cuendá sá vǎ chíndèe-gǎ-dé tātá-dě ndíhi nǎǎ-dě. <sup>13</sup> Te duca<sup>n</sup> quide-ndo chi ní dáquéé tǐhú-ndó nàcuáa ní cachí Yǎ Ndióxi cada-ndo, te mee-ni nàcuáa ta quide cue téé ñuyíú-a véxi nchícú<sup>n</sup> nihnu-ndo quide-ndo, te ñu-ni duca<sup>n</sup> ta sǎnu ichi tnaha-ndo véxi, te nándi-gǎ nchaa sá cáhú iní-ndó quide-ndo —cachí-gǎ xǎha<sup>n</sup>-gǎ xii-güedé.

<sup>14</sup> Te Jèsús ní xǎha<sup>n</sup> tùcu-gǎ xii cue ñáyiú xíndecu-á<sup>n</sup>:

—Chí táquixi ndehe iha, te cundedóho váha-ndo tnúhu na càhá<sup>n</sup>-í-a te ío váha cuáha-ndo cuendá. <sup>15</sup> Nchaa sá xéxi-ndó chi ñá túú nǎ quide-xí iní-ndó, dico nchaa sá cuèhé sá dúhá sǎni iní-ndó quide-ndo, nchaa xǎ<sup>n</sup> quide-xí ndècu cuéchi-ndo. <sup>16</sup> Te nchaa nchòhó ñáyiú ndédóho nchaa tnúhu càhá<sup>n</sup>-í-a ío váha chí cuáha cuendá —càchí-gǎ xǎha<sup>n</sup>-gǎ xii-yu.

<sup>17</sup> Te Jèsús ní dándõ-gǎ nchaa ñáyiú núú xixúcu-yu-á<sup>n</sup> te cuándihu-gǎ xití vehe. Te cue téé xica cuu ndíhi-gǎ ní xicá<sup>n</sup> tnúhú-güedé núú-gǎ ñú nása quèe-xi cuendú ní cani-gǎ núú ñáyiú-á<sup>n</sup>. <sup>18</sup> Te ní xǎha<sup>n</sup>-gǎ xii-güedé:

—¿Te náa tnàhá nchòhó ñá túú ní təcú tnùn-ndó cuendú ní cani-í núú ñáyiú-á<sup>n</sup>? Nchaa sá xéxi-yu cuánguee xití-yu ñá túú quide-xi iní-yu nàcuáa ngúndecu cuéchi-yu. <sup>19</sup> Chi ñá díú iní-yu cuánguee-xi chí cuánguee ndáá-xi xití-yu, te náyáha ñaha-xi xii-yu —càchí-gǎ xǎha<sup>n</sup>-gǎ xii-güedé.

Te sá dúcá<sup>n</sup> ní cáhá<sup>n</sup>-gǎ te ní dátüu-gǎ sá cúú càxi-o nchaa núú sǎ cúú càxi-o. <sup>20</sup> Te ní xǎha<sup>n</sup> tùcu-gǎ xii-güedé:

—Nchaa sá cuèhé sá dúhá quide ñáyiú xǎ<sup>n</sup> cácu nihnu-xi iní-yu, te nchaa xǎ<sup>n</sup> quide-xi ndècu cuéchi-yu. <sup>21</sup> Te iní-yu-á<sup>n</sup> cácu nihnu nchaa sá cuèhé sá dúhá, chí sǎni cuèhé sǎni dùha iní-yu. Te cue téé càhá<sup>n</sup> ndíhi-güedé ñadíhi te ñá díú ñadíhi-güedé cúú-yu, te ñu-ni duca<sup>n</sup> quide cue ñáyiú díhi càhá<sup>n</sup> ndíhi-yu téé te ñá díú yí-yu cùu-güedé. Te sǎhni-yu cue tnàha ñáyiú-yu, te mee-ni ichi díú iní cúdí iní-yu cundecú-yu. <sup>22</sup> Te dùhu ndachiu<sup>n</sup> tnahá-yu, te xihó-yu cundecu ndíhi-yu sá ndécú ndíhi tnaha ñáyiú-yu, te ío quide úhú iní-yu sá cúú-xí tnàha ñáyiú-yu, te ío dándahú tnáhǎ-yu, te mee-ni nchaa sá cuèhé sá dúhá cùdí iní-yu quide-yu, te ío cuédú iní-yu, te ío yití yùhú-yu, te ío quide cahnú-yu mèe-yu, te quide-yu nándi-gǎ sá ñá túú tàú-yu cada-yu. <sup>23</sup> Te nchaa sá cuèhé sá dúhá-á<sup>n</sup> cácu nihnu-xi iní-yu, te nchaa xǎ<sup>n</sup> quide-xi ndècu cuéchi-yu, te ñá túú cùu-xi sá váha sá cúú-xí iní-yu.

*Í<sup>n</sup> ñadíhi véxi ñúú xicá ní sándáá iní-a<sup>n</sup> Jèsús*

*(Mt. 15:21-28)*

<sup>24</sup> Te ní xica Jèsús cuáhá<sup>n</sup>-gǎ ndéé yucu cue téé ñúú Tirú, ndíhi yucu cue téé ñúú Sidón. Te òré ní quexìo-gǎ xǎ<sup>n</sup> te cuánguìhu-gǎ ñ<sup>n</sup> vehe te xǎ<sup>n</sup> cundecu-gǎ, te cuíní-gǎ sá vǎ quíní ñáyiú sá xǎ<sup>n</sup> ndécú-gǎ ní cùu, dico dai ní níhí-yu tnúhu. <sup>25</sup> Te ñ<sup>n</sup> ñadíhi ndécú ñ<sup>n</sup> déhe yoco-a<sup>n</sup>, te yíhi ñaha espíritú cundíhi yucu ñávǎha xii-xi, te ñaha-á<sup>n</sup> ío ndíhi ní níhí-a<sup>n</sup> tnúhu sá ní quexìo Jesús xǎ<sup>n</sup> ñúú ní sáhá<sup>n</sup>-a<sup>n</sup> núú ndécú-gǎ, te ní ngüíñí xití-á<sup>n</sup> núú-gǎ. <sup>26</sup> Te ní ngüíta-a<sup>n</sup> càhá<sup>n</sup> ndáhú-a<sup>n</sup> núú-gǎ, te xǎha<sup>n</sup>-a<sup>n</sup> sǎ ñúú vá cundèe iní-gǎ queñuhu-gǎ espíritú cundíhi yucu ñávǎha yíhi ñaha xii déhe-a<sup>n</sup>. Dico ñá díú ñàha israel

cúu-á<sup>n</sup> chi ñaha ñuú Sirofènicía cúu-á<sup>n</sup> te tnúhu griégú cúu tnúhu-a<sup>n</sup>. <sup>27</sup> Te xíá<sup>n</sup> nùu ní xáha<sup>n</sup> Jèsús xii-a<sup>n</sup>:

—Daña na càxi tnaa nchaá landú chítú xítí-güexi, te dätñuní caxi cue iná, chi ñá túú ndùu váha-xi quehe<sup>n</sup>-o sã xéxí làndú te cuáha-o ìná —càchí-gá xãha<sup>n</sup>-gã xii-a<sup>n</sup>.

<sup>28</sup> Te ní xáha<sup>n</sup>-a<sup>n</sup> xii-gá:

—Mèstrú, ndáá-ni càhá<sup>n</sup>-n, dico iná chi nàdatacá-güedi sá ngóyó yùhu cóhó làndú —càchí-a<sup>n</sup> xãha<sup>n</sup>-a<sup>n</sup> xii-gá.

<sup>29</sup> Te Jèsús ní xáha<sup>n</sup>-gã xii-a<sup>n</sup>:

—Ío váha ní càhá<sup>n</sup>-n, te cuanùhú te ñá túú-gã ná cani iní-n, chi sa ní quee espíritú cündìhi yucu ñávãha yìhi ñaha xii déhe-n —càchí-gá xãha<sup>n</sup>-gã xii-a<sup>n</sup>.

<sup>30</sup> Te ñaha-á<sup>n</sup> ñi nasáá-a<sup>n</sup> vehe-a<sup>n</sup> te càa déhe-a<sup>n</sup> núu càamá, dico ñá túú-gã espíritú cündìhi yucu ñávãha yìhi ñaha xii-xi chi sa ní quee ñaha-xi.

*Jèsús quidé tãtna-gá ñ<sup>n</sup> téé ñá cúu càhá<sup>n</sup> váha te doho-dě*

<sup>31</sup> Te Jèsús ní ndee-gá yucu cue téé ñuú Tírú te ní yáha-gá yucu cue téé ñuú Sidón, ndìhi yucu ndi ùxi ñuú nání Dècápolís, te ní sáa-gá ndéé yuhu làgúná distritú Galileá. <sup>32</sup> Te xíá<sup>n</sup> ndécú-gã ní quexìo ñáyiu ndéé núú-gã ndécã-yu ñ<sup>n</sup> téé ñá cúu càhá<sup>n</sup> váha-dé te doho-dě. Te càhá<sup>n</sup> ndàhú-yu núú-gã sá ná tëndaha ñaha-gá xii-dé cuèndá ndúha-dé. <sup>33</sup> Te Jèsús ní queñuhu ñaha-gã xii-dé tnuú-yu, te ndèca ñaha-gá cuáhá<sup>n</sup> ñ<sup>n</sup> xio, te ní dáquihu-gá díquí ndáhá-gã yaú lóho-dé, te ní dácánùu-gá díí-gá díquí ndáhá-gã, te ní tendaha-gã yàa-dé. <sup>34</sup> Te ní ndacoto-gá andiù te ní sánuu iní-gá, te ní càhá<sup>n</sup>-gá tnúhu mee-gã, te xãha<sup>n</sup>-gã:

—¡Éfatá! —càchí-gá xãha<sup>n</sup>-gã xii-dé.

Te tnúhu-á<sup>n</sup> quée-xí: Nacaá<sup>n</sup> yòhó lóho. <sup>35</sup> Te òré-ni-á<sup>n</sup> ñi nacaá<sup>n</sup> lóho-dé, te ní nduu váha yàa-dé, te ní cuu càhá<sup>n</sup> váha-dé. <sup>36</sup> Te Jèsús ní càhá<sup>n</sup> víhí-gã dóho ñáyiu ndìhi ñaha xii téé ní quide tátna-gá-á<sup>n</sup> sã vã yõo ñ<sup>n</sup> cúñahá-yu sá ñi quide tátna ñaha-gã xii-dé, dico uu<sup>n</sup>-gá ní quidé-yu ní càhá<sup>n</sup>-yu núu ñáyiu sá ñi quide tátna-gá téé-á<sup>n</sup>.

<sup>37</sup> Te nchaá-yu ío ní cuñúhu-yu, te ní xitnàhá-yu:

—Váha vìhi quide-dé, chi nchaá-ni ndàcu-dé quidé-dě, chi quide tátna-ni-dé ñáyiu doho, te quide tátna-ni-dé ñáyiu ñìhí —càchí-yu xitnàhá-yu.

## 8

*Jèsús dácàxi-gá cúmí mĩ ñáyiu*

*(Mt. 15:32-39)*

<sup>1</sup> Te ñ<sup>n</sup> nduu tucu ío cuéhé ñáyiu ní tacá núú ndécú Jèsús, te ñá túú tnàhí sá caxí-yu. Te ní cana-gá cue téé xica cuu ndìhi-gá, te ní xáha<sup>n</sup>-gã xii-güedé:

<sup>2</sup> —Yúhú, cündahú iní-í nchaá ñáyiu-a chi sa ní cuu úní nduu ndècu ndìhi ñahá-yu xii-o ìha, te ñá túú tnàhí ná sá caxí-yu. <sup>3</sup> Te núu na nàtendaha-í-yu núhú tnámã-yu vehé-yu, te cuneé-yu docó ichi, chi davá-yu ío xica ndécú-yu —càchí-gá xãha<sup>n</sup>-gã xii-güedé.

<sup>4</sup> Te ní xáha<sup>n</sup>-güedě xii-gá:

—¿Te ndéé níhí-ó sã cuãñaha-o càxi nchaá ñáyiu-a, te ìha ñá túú nã ío chi cùu-xi xítí yucu-i? —càchí-güedé xãha<sup>n</sup>-güedě xii-gá.

<sup>5</sup> Te Jèsús ní xicá<sup>n</sup> tnúhú-gã núú-güedě, te xãha<sup>n</sup>-gã:

—¿Ná daha-gá pàá ndécú ndìhi-ndo-i? —cachí-gá xãha<sup>n</sup>-gã xii-güedé.

Te ní xáha<sup>n</sup>-güedě xii-gá:

—Ndècu ndìhi-ndí úsá-gá tnàhá —càchí-güedé xãha<sup>n</sup>-güedě xii-gá.

<sup>6</sup> Te Jèsús ní xáha<sup>n</sup>-gã xii nchaá ñáyiu sá ngõo-yu nchaá-yu, te ní ngóo-yu, te ní quehe<sup>n</sup>-gá ndi úsá pàá-á<sup>n</sup>, te ní ndacá<sup>n</sup> táhú-gã núú Yã Ndiõxí. Te dätñuní ní táhú cuèchi-gá te ní sãñaha-gã xii cue téé xica cuu ndìhi-gá ní dácãhñu-güedé nchaá ñáyiu-á<sup>n</sup>. <sup>7</sup> Te ndècu ndìhi-güedé ñ<sup>n</sup> úú chácá lĩhli, te dñu-ni duca<sup>n</sup> ñi quide-gá ní ndacá<sup>n</sup> táhú-gã núú Yã Ndiõxí. Te dätñuní ní táuchíú<sup>n</sup>-gã ní dácãhñu ñaha-güedě xii-yu. <sup>8</sup> Te nchaá-yu ní xexí-yu ní ndahá xítí-yu. Te sátá ñi túhú cóhõ-yu te ní nadatàcá-güedé nchaá sá ñi quendóo, te ní chítú úsá

tnàhá tídihi mee-ni sã nĩ quendóo-án.  
 9 Te núú ncháá ñáyiú ní xexi-án xĩnu dàtná cúmí mĩ-yu. Te sáta nĩ yáha ní dácáxí ñàha Jesús xii-yu te ní dándácá ñàha-gá. 10 Te dàtnùnì cuánguee-gá bàrcú ndihì cue tée xica cuu ndihì-gá cuáhán-gá ndihì-güedé yucu cue tée ñuú Dalmànutá.

*Cue tée cùu fariséú xàha<sup>n</sup>-güedě xii Jèsús cada-gá #<sup>n</sup> sá vã yõo tnàhí ndàcu cada*

*(Mt. 16:1-4; Lc. 12:54-56)*

11 Te núú nĩ quexìo Jesús xián nĩ sáa cue tée cùu fariséú, te ní ngüíta-güedé nándi tnúhu xáha<sup>n</sup>-güedě xii-gá xító ndèé ñáhá-güedě. Te xàha<sup>n</sup>-güedě sá ná cáda-gá #<sup>n</sup> sá vã yõo tnàhí ndàcu cada cundehe-güedé nàcuáa cutnùnì iní-güedé nũ ndáá sá Yã Ndiõxí ní tendaha ñàha-gá xii-gá véxi-gá ñuyíú-a. 12 Te ní sánuu iní-gá te ní xáha<sup>n</sup>-gã xii-güedé:

—Nchaa nchòhó ñáyiú ndècu ñuyíú-a cuiní-ndó càda-í #<sup>n</sup> sá vã yõo tnàhí ndàcu cada nacúáa cutnùnì iní-ndó nũ ndáá sá Yã Ndiõxí chindèe ñàha-gá xii-í. Dico na càchí tnúhu ndáá-í xii-ndo sã vã cáda-í sá cuiní-ndó —càchí-gá xàha<sup>n</sup>-gã xii-güedé.

13 Te ní dándõo-gá ñáyiú xĩndecu-án, te cuánde-gá bàrcú ndihì cue tée xica cuu ndihì-gá te cuáhán-gá ndihì-güedé ndàa ingá xio yuhu làgúná.

*Nàcuáa quide cue tée cùu fariséú (Mt. 16:5-12)*

14 Te ní cunaa-güedé canehe-güedé sá cáxí-güedě quíhí<sup>n</sup>, te #<sup>n</sup>dìi-ni paá ndécú xití bàrcú-án nĩ naníhí-güedě. 15 Te Jèsús ní cáhán-gá dóho-güedé, te xàha<sup>n</sup>-gã xii-güedé:

—Na càchí tnúhu-í xii-ndo sã ïo quihì iní-ndó cùndecu-ndo te vã cáda cuèndá tnàhí-ndo lèvadurá cue tée cùu fariséú, ndihì levadurá cue tée cùndihì té Herodés —càchí-gá xàha<sup>n</sup>-gã xii-güedé.

16 Te ní ngüíta-güedé xĩtnàha-güedé:

—Cuèndá sá ñà túú ní cãnehe-o paá quixi núú xián duha càhán-gá —càchí-güedé xĩtnàha-güedé.

17 Te Jèsús ní cutnùnì iní-gá nàcuáa ndùu tnúhu xĩtnàha-güedé, núú ní xáha<sup>n</sup>-gã xii-güedé:

—¿Ná cuèndá da sá ñà túú ní cãnehe-ndo paá quixi càhán-ndó? Te ñá diú cuèndá paá-án ní cãhán-í, te dìcò-ni sá méé-ndó ñà túú quide cuèndá váha-ndo nàcuáa ndùu tnúhu càhán-í, te ni ñã tècú tnùnì-ndó chí ío nĩ dĩquí-ndó. 18 Te cuèi ndèhe-ndo dico ñá túú cùtnumì iní-ndó nã cúú ncháa sá quide-í, te cuèi ndédóho-ndo ncháa tnúhu càhán-í dico ñá cùtnùnì iní-ndó nãsa ndùu-xi, te ni ñã ndácú iní-ndó ncháa sá tá quide-í véxi. 19 Te chí dándàcu iní cùtnàhá ní táhú cuèchi-í úhú<sup>n</sup>-ni paá te ní xexi úhú<sup>n</sup> mĩ mee-ni cuè tée chí diu-ni cue tée-án nĩ quíúndehu. Te chí càchí tnúhu ná daha tídihi ní chítú mee-ni sã nĩ quendóo òré ní nadatácá-ndó —càchí-gá xàha<sup>n</sup>-gã xii-güedé.

Te ní xáha<sup>n</sup>-güedě xii-gá:

—Úxúú tnàhá tídihi ní chítú mee-ni sã nĩ quendóo —càchí-güedé xàha<sup>n</sup>-güedě xii-gá.

Te xàha<sup>n</sup> tucu-gá:

20 —Te cùtnàhá ní táhú cuèchi tucu-í úsá tnàhá paá ní xexi cúmí mĩ ñáyiú, te chí càchí tnúhu ná daha tucu tídihi ní chítú mee-ni sã nĩ quendóo —càchí-gá xàha<sup>n</sup>-gã xii-güedé.

Te ní xáha<sup>n</sup>-güedě xii-gá:

—Úsá tnàhá tídihi ní chítú mee-ni sã nĩ quendóo —càchí-güedé xàha<sup>n</sup>-güedě xii-gá.

21 Te Jèsús ní xáha<sup>n</sup> tucu-gá xii-güedé:

—Vitna, ¿te sa ní tecú tnùnì-ndó tnúhu ní cáhán-í ã<sup>n</sup> ñáhá? —càchí-gá xàha<sup>n</sup>-gã xii-güedé.

*Jèsús quidé tãtna-gá #<sup>n</sup> tée cuáa ñuú Bètsaidá*

22 Te Jèsús ní sáa-gá ndihì cue tée xica cuu ndihì-gá ñuú Bètsaidá. Te ñuú-án ndécú-gã ní quexìo ñáyiú núú-gã tánèhé-yu #<sup>n</sup> tée cuáa, te càhán ndàhú-yu núú-gã nũ vã cùndèe iní-gá tendaha ñàha-gá xii-dé cuèndá ndúha núú-dě. 23 Te Jèsús ní tñ-gá ndaha tée cuáa-án, te ní queñuhu ñàha-gã tnuú-yu, te ndèca ñàha-gá



cuáhá<sup>n</sup> ì<sup>n</sup> xio yuhu ñùú. Te yàcá<sup>n</sup> ní dácánùu-gá díi-gá núú-dě te ní tendaha ñàha-gá xii-dě, te dàtnùní ní xíca<sup>n</sup> tnúhú-gá núú-dě, te xàha<sup>n</sup>-gá:

—¿Cùtnuní núú-n-ǎ<sup>n</sup>? —càchí-gá xàha<sup>n</sup>-gá xii-dě.

<sup>24</sup> Te tée cuàá-á<sup>n</sup> ñí ndonehe núú-dě, te xàha<sup>n</sup>-dě xii-gá:

—Cùtnuní núú-í ndéhè-í nchaa cue tée-ǎ<sup>n</sup>, dico dà ndáa yutnu cuii ndáa-güedé te xíca-güedé —càchí-dé xàha<sup>n</sup>-dě xii-gá.

<sup>25</sup> Te Jèsús ní tendaha tùcu-gá núú-dě te ní cuu ní ndacoto váha-gá-dé, te òré-á<sup>n</sup> ñí ndúha núú-dě. Te nchaandi túhú sá ndéhé-dě ní cutnùní váha núú-dě nándi cùu nchaa xíá<sup>n</sup>. <sup>26</sup> Te ní xáha<sup>n</sup> Jèsús xii-dě:

—Vitna te núhú-n, dico ndáa ichi vehe-n nùhú-n te ñá díú dà xití ñuú quíhí<sup>n</sup>-n, te vá yòo ì<sup>n</sup> cúñaha-n sá yùhú ní quide tátna-í núú-n ñí ndúha —càchí-gá xàha<sup>n</sup>-gá xii-dě.

*Té Pèlú xàha<sup>n</sup>-dě xii Jèsús sá díú-gá cúú-gá Crìstú*

*(Mt. 16:13-20; Lc. 9:18-21)*

<sup>27</sup> Te Jèsús ní xica-gá cuáhá<sup>n</sup>-gá ndihí cue tée xíca cuu ndihí-gá nchaa ñuú líhli càa ñuú Cèsareá Filipú, te òré ñúhú-gá ndihí-güedé ichi te ní xíca<sup>n</sup> tnúhú-gá núú-güedé, te xàha<sup>n</sup>-gá xii-güedé:

—Chí càchí tnúhu nása càhá<sup>n</sup> ñáyiú cuèndá-í. ¿Yoo cùu-í càchí-yu-va? —càchí-gá xàha<sup>n</sup>-gá xii-güedé.

<sup>28</sup> Te ní xáha<sup>n</sup>-güedé xii-gá:

—Davá-yu càchí-yu sá cúú-n ndíi Juáa tée ní xóo dacuàndute ñaha xii ñáyiú, te davá-yu càchí-yu sá cúú-n tē Èliás, te dava tucú-yu càchí-yu sá cúú-n ì<sup>n</sup> tée ní xóo càhá<sup>n</sup> tnúhu Yá Ndióxi ndéé sanaha, duha càchí-yu —càchí-güedé xàha<sup>n</sup>-güedé xii-gá.

<sup>29</sup> Te ní xíca<sup>n</sup> tnúhú tùcu-gá núú-güedé, te xàha<sup>n</sup>-gá xii-güedé:

—Te nchòhó, ¿yoo sàni iní-ndó cùu-í-í? —càchí-gá xàha<sup>n</sup>-gá xii-güedé.

Te té Pèlú ní xáha<sup>n</sup>-dě xii-gá:

—Yòhó cúú-n Crìstú Yaá ní tendaha Yá Ndióxi véxi ñuyíú-a —càchí-dé xàha<sup>n</sup>-dě xii-gá.

<sup>30</sup> Te Jèsús ní càhá<sup>n</sup>-gá dóho-güedé, te xàha<sup>n</sup>-gá:

—Vá yòo ì<sup>n</sup> cúñaha-ndo yòo cuu-í —càchí-gá xàha<sup>n</sup>-gá xii-güedé.

*Jèsús càhá<sup>n</sup>-gá sá càhni ñàha-güedé xii-gá*

*(Mt. 16:21-28; Lc. 9:22-27)*

<sup>31</sup> Te Jèsús ní ngüíta-gá xitnùhu-gá cue tée xíca cuu ndihí-gá nàcuáa yáha-gá, te xàha<sup>n</sup>-gá xii-güedé:

—Yúhú Téee cùu ñaní tnáhá-ndó nchàa-ndo chí ío ndoho-í, chí daquée tíhú ñáhá nchàa cue tée cùu sacuéhé nùú ñáyiú israél, ndihí cue dútú cúnùu, ndihí cue tée dàcuaha ñaha xii ñáyiú nchaa tnúhu ní chídó tnùní ní chídó tnùní ndíi Moisés, nchaa cue tée-á<sup>n</sup> dàquee tíhú ñáhá-güedé xii-í. Te sáa nduu te cahni ñaha-güedé xii-í, dico nduu úní sá cùú-í te ndoto-í —càchí-gá xàha<sup>n</sup>-gá xii-güedé.

<sup>32</sup> Te duca<sup>n</sup> ñí càhá<sup>n</sup> Jèsús núú cue tée xíca cuu ndihí-gá nàcuáa tecú tnùní váha-güedé tnúhu càhá<sup>n</sup>-gá. Te té Pèlú ní cana ñaha-dě xii-gá ì<sup>n</sup> xio, te ní ngüíta-dé ténáa ñáhá-dě xii-gá ní cùu. <sup>33</sup> Dico Jèsús ndihí-ni ní nchócuíhnu-gá ní ndàcoto-gá núú nchàa-güedé chí ndàa sátá-gá xíndecu-güedé, te ní ngüíta-gá ténáa-gá té Pèlú, te xàha<sup>n</sup>-gá xii-dé:

—¿Xocuíñí yòhó núú-í-a, chí dàtná càhá<sup>n</sup> yucu ñávàha càhá<sup>n</sup>-n! Chí ñá túú sàni iní-ò dàtná sání iní Yá Ndióxi, chí ì<sup>n</sup>-ni sàni iní-ò ndihí dava-gá cue ñáyiú ndècu ñuyíú-a —càchí-gá xàha<sup>n</sup>-gá xii-dé.

<sup>34</sup> Te Jèsús ní cana-gá nchaa cue tée xíca cuu ndihí-gá, ndihí nchaa ñáyiú xíndecu-á<sup>n</sup>, te ní xáha<sup>n</sup>-gá:

—Nchaa ñáyiú cuíni chitnahá ñáhá xii-í, te xini ñuhu-xi vá cadá-gá-yu sá sání iní méé-yu, te ío cada ndee iní-yu cundecu túha-yu ndohó-yu cuèndá-í, te cuéi na ndohó-yu dàtná ndoho-í.

<sup>35</sup> Te nchaa ñáyiú cuíni sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuéi nándi sá ná yáha-yu cundecú-yu ñuyíú-a sá cuèndá-í, ndihí sá cuèndá tnúhu-í, te ñáyiú-á<sup>n</sup> naníhí

tàhú-yu. <sup>36</sup> Te cuèi nchaandi túhú sá íó ñuyíú-a na ñihí ñáyíu cundecu ndihí-yu, dico núu ñíu nchaa xíá<sup>n</sup> ná càda cuíta niñnú-yu te ñá túú vèdàna nàndíhi-xi sá dúcá<sup>n</sup> ndècu ndihí-yu nchaa xíá<sup>n</sup>. <sup>37</sup> Te ni ñí<sup>n</sup> sá íó ñuyíú-a vá chíndèe-xi ñáyíu cuendá naníhí tàhú-yu. <sup>38</sup> Te nchaa ñáyíu na cùcaha<sup>n</sup> núú-xi cáhá<sup>n</sup> váha cuendá-í, ndihí cuendá tnúhu-í núú nchàa ñáyíu dàquee tihú ñáhá xii Yá Ndiöxí, ñáyíu xíndecu ichi cuèhé ichi duha, te tnàhá yúhú Tée cùu ñaní tnáhá-yu nchaa-yu cùcaha<sup>n</sup> núú-í núú-yu òré ná quixi tucu-í ndihí cue espíritu xínú cuèchi núú Tàtá-í Dútú Ndiöxí. Te mee-gã cada cutnùní iní nchaa ñáyíu sá yúhú ío càhnu cuu-í.

## 9

<sup>1</sup> Te na càchí tnúhu ndáá-í xii-ndo sá íó dava nchòhó ñáyíu xíndecu iha vitna vá cùú-ni-ndo, chi cundecu-ni-ndo ndèé quini-ndó sàá nduu ndíhu ndaha ñàha Yá Ndiöxí xii ñáyíu, te dàvá-á<sup>n</sup> quini-ndó sá ndácú-gã quidé-gã nchaandi túhú sá váha —càchí-gã xáha<sup>n</sup>-gã xii cue tée xica cuu ndihí-gã ndihí cue ñáyíu-á<sup>n</sup>.

*Jèsús ní nadama dóó-gã ndihí núú-gã*

*(Mt. 17:1-13; Lc. 9:28-36)*

<sup>2</sup> Te núú ñíú nduu sá dúcá<sup>n</sup> ñí cáhá<sup>n</sup> Jèsús te ní xica-gã cuásaá-gã ñí yucu dùcú<sup>n</sup>, te ndèca-gã té Pèlú, ndihí té Jàcobó, ndihí té Juàá cuásaá, te úní tnàhí-ni cue tée-á<sup>n</sup> ndécá-gã cuásaá. Te yucu-á<sup>n</sup> ndécú-gã ní nadama núú-gã, <sup>3</sup> te ní nadama dóó-gã. Te dóó-gã-á<sup>n</sup> sùúní ñí nduu cuixí<sup>n</sup> quixí te tása<sup>n</sup>, te ni ñí<sup>n</sup> ñáyíu ñuyíú-a ñá túú ndácú-yu naqueté-yu ñí dóó nduu cuixí<sup>n</sup> dàtná ní nduu dóó-gã. <sup>4</sup> Te ní xiní-güedé té Moisés ndihí té Èliás nútñí-güedé ndihí-gã ndátnúhu ndihí ñaha-güedé xii-gã. <sup>5</sup> Te té Pèlú ní xáha<sup>n</sup>-dè xii Jèsús:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnuvixí<sup>n</sup>, te ñí<sup>n</sup> cuu cuendá-n te ñí<sup>n</sup>

cuu cuendá té Moisés te ñí<sup>n</sup> cuu cuendá té Èliás —càchí-dé xáha<sup>n</sup>-dè xii-gã.

<sup>6</sup> Te duca<sup>n</sup> ñí cáhá<sup>n</sup>-dé chi ío ní yúhú-güedé, te cuendá-ni ní cuu yáchí-dé ní cáhá<sup>n</sup>-dé, te ni mèe-dé ñá túú ní cùtnuní iní-dé nása nduu tnúhu ní cáhá<sup>n</sup>-dé. <sup>7</sup> Te òré-á<sup>n</sup> ñí quexìo ñí vico núú ndécú-güedé ndihí Jèsús ní dádáhu ñaha-xi xii-güedé ndihí-gã, te xití vico-á<sup>n</sup> ñí cáhá<sup>n</sup> Yá Ndiöxí ní tecú dóho-güedé, te xáha<sup>n</sup>-gã xii-güedé:

—Tée-a cùu-dé Déhe-í tée ío cùu iní-í, te cundedóho-ndo nchàa tnúhu càhá<sup>n</sup>-dé —càchí-gã xáha<sup>n</sup>-gã xii-güedé.

<sup>8</sup> Te òré ní quide cuendá-güedé, te ñá túú-gã ní xiní-güedé cue tée úú-á<sup>n</sup> chi mee-nã Jèsús ndécú.

<sup>9</sup> Te òré cuánuu ndihí ñaha-gã xii-güedé yucu-á<sup>n</sup>, te ní cáhá<sup>n</sup>-gã dóho-güedé, te xáha<sup>n</sup>-gã:

—Vá yóo ñí<sup>n</sup> cùñaha-ndo nchàa sá ñí xiní-ndó núú ñí sáá-ó-á, te cuu cáhá<sup>n</sup>-ndó dico ndéé ná yáha ndoto yúhú Tée cùu ñaní tnáhá-ndó nchàa-ndo sá cùú-í —càchí-gã xáha<sup>n</sup>-gã xii-güedé.

<sup>10</sup> Núú xíá<sup>n</sup> cue tée-á<sup>n</sup> ñí xúhu<sup>n</sup> nahi-ni iní-güedé nchaa sá ñí xiní-güedé núú ñí sáhá<sup>n</sup>-güedé ndihí Jèsús te ñá túú tnàhí ní cáhá<sup>n</sup>-güedé, dico ní ndúcú tnúhu núú tnáhá-güedé ná cuendá duca<sup>n</sup> ñí cáhá<sup>n</sup>-gã sá ndèé ná yáha ndoto-gã sá cùú-gã te dàtnùní cáhá<sup>n</sup>-güedé nàcuáa nduu nchaa sá ñí xiní-güedé. <sup>11</sup> Te ní xicá<sup>n</sup> tnúhú-güedé núú Jèsús, te xáha<sup>n</sup>-güedé xii-gã:

—¿Cuíní-ndí cachí tnúhu-n ná cuendá càchí cue tée dàcuaha ñaha xii ñáyíu nchaa tnúhu ní chídó tnùní ndí Moisés sá dñhna-gã té Èliás ndixi-dé te dàtnùní quixi Yaá tendaha Yá Ndiöxí quixi ñuyíú-a? —càchí-güedé xáha<sup>n</sup>-güedé xii-gã.

<sup>12</sup> Te Jèsús ní xáha<sup>n</sup>-gã:

—Ndáá sá códo núu ñí<sup>n</sup> tée quixi-dé te cada-dé dàtná ní quide té Èliás, te tée-á<sup>n</sup> cada ndáá-dé nchaa nàcuáa cùu. Dico núú tütú Yá Ndiöxí càhá<sup>n</sup>-xi cuendá yúhú Tée cùu ñaní tnáhá-ndó nchàa-ndo sá ío ndoho-í, te daquée tihú ñáhá ñáyíu xii-í. <sup>13</sup> Te na càchí

tnúhu-í xii-ndo vitna sá sà ní quixi #<sup>n</sup> téé ní quide dàtná ní xóo cada té Èliás, te cue ñáyiú ñá túú ní cãnehé-yu sá yíñùhu núú-dě, te ní quide ñàhá-yu xii-dé nchaa nàcuáa ní quixi iní méě-yu. Te núú tütú Yã Ndiöxí sa ndèé tnuní nchaa nàcuáa yáha-dé, te nchaa xíã<sup>n</sup> sa ní quide ñaha ñáyiú xii-dé —càchí-gá xãha<sup>n</sup>-gã xii-güedé.

*Jèsús quidé tãtna-gá #<sup>n</sup> téé cuechi yìhi ñaha espíritú cündìhi yucu ñávãha (Mt. 17:14-21; Lc. 9:37-43)*

<sup>14</sup> Te Jèsús ní ndexìo-gá ndìhi cue téé úní-á<sup>n</sup> núú xíndecu dava-gá cue téé xica cuu ndìhi-gá, te vãi vihi ñáyiú ndècu núú ndécú-güedé-á<sup>n</sup>, te tnàhá cue téé dàcuaha ñaha xii-yu nchaa tnúhu ní chídó tnùní ndíi Moisés xíndecu, te cue téé-á<sup>n</sup> nãndi tnúhu xãha<sup>n</sup>-güedé xii cue téé xica cuu ndìhi Jèsús. <sup>15</sup> Te òré ní xini-yu ní ndexìo-gá, te ncháá-yu ío ní cuñúhu-yu, te xínú-yu ní sáhá<sup>n</sup> ní cáhá<sup>n</sup> ndìhi ñàhá-yu xii-gá. <sup>16</sup> Te ní xicá<sup>n</sup> tnúhú-gã núú cuè téé xica cuu ndìhi-gá núu ná tnúhu ndàtnúhu-güedé ndìhi cue téé-á<sup>n</sup>. <sup>17</sup> Te #<sup>n</sup> ñáyiú xíndecu xíã<sup>n</sup> nã xáhã<sup>n</sup>-yu xii-gá:

—Mèstrú, ndèca-í déhe-í véxi nãnducu ñaha-í xii-n, chi yìhi ñaha espíritú cündìhi yucu ñávãha xii-dé, te dïu xíã<sup>n</sup> ní quide ní cuu ñìhí-dé. <sup>18</sup> Te ío ndòho-dé chi súúní ndèni ní cuu ngòtni ñaha-xi xii-dé, te òré duca<sup>n</sup> quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nùhu-dé, te ndàda ruú<sup>n</sup> ñáhá-xí xii-dé. Te sa ní xáhã<sup>n</sup>-í xii cue téé xica cuu ndìhi-n sá queñuhu-güedé espíritú cündìhi yucu ñávãha yìhi ñaha xii-dé dico ñá túú ní ndàcu-güedé queñuhu-güedé-xi —càchí ñáyiú-á<sup>n</sup> xáhã<sup>n</sup>-yu xii-gá.

<sup>19</sup> Te Jèsús ní xáhã<sup>n</sup>-gã:

—¡Nchaa nchòhó ñáyiú ndècu ñuyíú-a ío sàá iní-ndó, chi ñá túú cuíní-ndó quíndáá iní-ndó Yã Ndiöxí, te ní cuu vãi nduu quide ndee iní-í nchaa sá quidé-ndó! ¿Te ná ndéé ama vá dúcá<sup>n</sup>-gã cada-ndo-i? Te chí

cándèca téé cùhú-á<sup>n</sup> táquixi iha —cachí-gá xãha<sup>n</sup>-gã xii-yu.

<sup>20</sup> Te ñáyiú ndìhi ñaha xii téé yìhi ñaha espíritú cündìhi yucu ñávãha-á<sup>n</sup> ndécá ñàhá-yu xii-dé cuáhá<sup>n</sup> ndéé núú Jèsús, te òré ní xini ñáhá espíritú cündìhi yucu ñávãha-á<sup>n</sup> xii-gá, te ní ngüíta-ni-xi sàhni yìhí ñáhá tucu-xi xii-dé, te ní dánduá ñáhá-xí xii-dé, te ní ngüíta-dé xíchí ñùhu-dé, te quène tíñú yuhu-dé. <sup>21</sup> Te Jèsús ní xicá<sup>n</sup> tnúhú-gã núú tãtá-dé, te xáhã<sup>n</sup>-gã xii-dé:

—¿Ná ndéé ama ní ngüíta-xi duha ndòho déhe-n? —càchí-gá xãha<sup>n</sup>-gã xii-dé.

Te téé-á<sup>n</sup> nã xáhã<sup>n</sup>-dè xii-gá:

—Ndéé cútnàhá cúú lìhli-dé ní ngüíta espíritú cündìhi yucu ñávãha duha quide ñaha-xi xii-dé. <sup>22</sup> Te ní cùtìtní xito dàngaunihnu ñaha-xi xii-dé núú ñùhú, te ní cùtìtní tucu xito dàngaunihnu ñaha-xi xii-dé ndute cuíní-xi cahni ñaha-xi xii-dé. Te ndèca-í-dé véxi núú-n te núu ndacu-n càda tãtna-n-dé, te cundàhú iní ñáhá-n xii-ndí chindee ñaha-n —cachí-dé xáhã<sup>n</sup>-dè xii-gá.

<sup>23</sup> Te Jèsús ní xáhã<sup>n</sup>-gã:

—Te ná cuèndá càchí-n núu ndacu-í cada tãtna-í déhe-n, chi nchaa ñáyiú na quíndáá iní ñáhá xii-í te nihí-yu sá ná càcá<sup>n</sup>-yu núu-í —càchí-gá xáhã<sup>n</sup>-gã xii-dé.

<sup>24</sup> Te tãtá tõe cuechi-ã<sup>n</sup> ñìhi ní cáhá<sup>n</sup>-dè xáhã<sup>n</sup>-dè xii-gá:

—Sàndáá iní ñáhà-í xii-n, dico chindee ñaha xii-í cuèndá ná quíndáá iní ñáhá-gã-í xii-n —càchí-dé xáhã<sup>n</sup>-dè xii-gá.

<sup>25</sup> Te Jèsús ndéhé-gã sá ío vãi ñáyiú ta tàcá núú ndécú-gã-á<sup>n</sup>. Te ní tenàá-gá espíritú cündìhi yucu ñávãha-á<sup>n</sup>, te xáhã<sup>n</sup>-gã xii-xi:

—Yòhó espíritú cündìhi yucu ñávãha, ní quide ñìhí-n nã quide doho-n tõe-a, dico vitna yúhú càchí-í sá quèé-n yìqui cuñú-dé te vá ndìhu-gá-n —càchí-gá xáhã<sup>n</sup>-gã xii espíritú cündìhi yucu ñávãha-á<sup>n</sup>.

26 Te espíritú cündìhi yucu ñávãha-án nĩ dácáná sàa ñaha-xi xii téé-án, te ní sahani yìhĩ ñáhá tùcu-xi xii-dé, te dãtnùní ní quee ñaha-xi xii-dé cuáhán-xi, dico téé-án chi dacàa-ni ndíyĩ cãa-dé cãtùu-dé. Te nchaa ñáyiu xĩndecu xíán cãchĩ-yu sã nĩ xihĩ-dé ní cùu. 27 Te Jèsús ní tñi-gã ndaha-dé ní ndocani ñaha-gã xii-dé, te ní ndacóo-dé ní nucúnutnĩ-dé.

28 Te Jèsús cuándihu-gã xití vehe ndihĩ cue téé xica cuu ndihĩ-gã, te òré ndéhé-güedé ñá túú-gã ñáyiu, te ní xicán tñuhú-güedé núú-gã, te xãhã-gã xii-güedé:

—Cachĩ tñuhu xii-ndĩ ná cuendã ñá túú ní ndàcu-ndĩ queñuhu-ndĩ espíritú cündìhi yucu ñávãha yìhĩ ñaha xii téé-án —cãchĩ-güedé xãhã-gã xii-gã.

29 Te Jèsús ní xãhã-gã xii-güedé:

—Na cãchĩ tñuhu-í xii-ndo sã nõu òré cuinĩ-ndó queñuhu-ndo espíritú cündìhi yucu ñávãha yìhĩ ñaha xii ñáyiu dãtnã cúú espíritú cündìhi-xi yìhĩ ñaha xii téé-án ní cùu ñã, te xini ñuhu-xi sã ïo cãhã ndihĩ-ndo Yã Ndiõxí te ñá túú tñahĩ ná caxi-ndo cãhã ndihĩ-ndo-gã, te duca te ndacu-ndo queñuhu-ndo espíritú cündìhi yucu ñávãha yìhĩ ñaha xii ñáyiu —cãchĩ-gã xãhã-gã xii-güedé.

*Jèsús cãhã tucu-gã sã cãhni ñaha-güedé xii-gã*

*(Mt. 17:22-23; Lc. 9:43-45)*

30 Te Jèsús ní quee-gã núú ndécú-gã-án ndihĩ cue téé xica cuu ndihĩ-gã cuáhã-gã ndihĩ-güedé distritú Galileá, te cuinĩ-gã sã vã quini ñáyiu ndéé ichi cuáhã-gã. 31 Te duca nĩ sani iní-gã, chi mee-gã sa ñaha-gã sã ndãã cada-xi ñacuãã xãhã-gã xii cue téé xica cuu ndihĩ-gã, te duha xãhã-gã xii-güedé:

—Yuhú Téé cùu ñani tñahã-ndó nchãa-ndo sãã ñi nduu te cuãha cuendã ñahã-güedé xii-í núú cùé téé cùu úhú iní ñahã, te cahni ñaha-güedé xii-í, dico nduu únĩ sã cùú-í te ndoto-í —cãchĩ-gã xãhã-gã xii-güedé.

32 Dico ñá túú tñahĩ ní tècú tñunĩ-güedé nása ndùu tñuhu ní cãhã-gã, te ní ñã túú ní cùyi-güedé cãcã tñuhú-güedé núú-gã.

*Cue téé ndùcu tñuhu núú tñahã nõu ndédacã-güedé ïo-gã cùnùu*

*(Mt. 18:1-5; Lc. 9:46-48)*

33 Te Jèsús ní quexiõ-gã ndihĩ cue téé xica cuu ndihĩ-gã ñuu Capernaúm, te òré sa ndècu-gã ñi vehe te ní xicã tñuhú-gã núú-güedé, te xãhã-gã xii-güedé:

—¿Nãndĩ cùu tñuhu ta xĩtñaha-ndo véxi? —cãchĩ-gã xãhã-gã xii-güedé.

34 Dico ñá túú tñahĩ ní cãhã-güedé cúñaha-güedé xii-gã nõu ná tñuhu xĩtñaha-güedé òré ñuhú-güedé ichi. Te duca nĩ quide-güedé chi cuendã tá ndãtñuhu-güedé nõu ndédacã-güedé ïo-gã cùnùu. 35 Te Jèsús ní ngóo-gã, te ní xãhã-gã xii ndi ùxúú cue téé xica cuu ndihĩ-gã:

—Chĩ táquixi iha te cundedõho-ndo tñuhu na cãhã-í-a. Te núu ïo dava-ndo cuinĩ-ndó cùnùu-ndo, te cada-ndo sã cúú-ndó ñáyiu nchicún cuinĩ-ñã, te cunu cuechi-ndo nõu tñaha ñáyiu-ndo —cãchĩ-gã xãhã-gã xii-güedé.

36 Te Jèsús ní sanutnĩ-gã ñi té lĩhli cuãdava tñuhú-güedé, te dãtnùní ní nguídèhé ñahã-gã xii-dé, te xãhã-gã xii-güedé:

37 —Nchaa ñáyiu na quèhe cuendã ñi té lĩhli dãtnã té lĩhli-a cuendã sã ñuhú iní ñahã-yu xii-í ñã, te cada iní-yu sã yũhú ní quehe cuendã-yu. Te nchaa ñáyiu na quèhe cuendã ñahã xii-í te ñã díú-ni mèe-í ní quèhe cuendã-yu, chi tñahã Tãtã-í Dútú Ndiõxí Yãã ní tendaha ñaha xii-í véxi-í ñuyúú-a ní quehe cuendã-yu —cãchĩ-gã xãhã-gã xii-güedé.

*Nchaa ñáyiu ñá túú cùu úhú iní ñahã xii-o te cündìhi ñahã-yu*

*(Mt. 10:42; Lc. 9:49-50)*

38 Te té Juãã ñi-ni ñi téé xica cuu ndihĩ-gã ní xãhã-dé xii-gã:

—Mèstrú, ní xinĩ-ndĩ ñi téé cãcunehe ñaha-dé xii-n, te queñuhu-dé espíritú cündìhi yucu ñávãha yìhĩ ñaha



xii ñáyi, te nchúhú ñá túú ní dañá-gá-ndí duca<sup>n</sup> càda-dé, chi ñá túú xica cuu ndíhi ñaha-dé xii-o —càchí-dé xáha<sup>n</sup>-dè xii-gá.

<sup>39</sup> Te Jèsús ní xáha<sup>n</sup>-gã xii-güedé:

—Daña-ndo na càda nahi-dé ní cùu, chi ñá túú ní ì<sup>n</sup> ñáyi ndíhi ndíhi-ni ndacu cáhá<sup>n</sup> cuèhé cuendá-í te núu càcunehe ñahá-yu xii-í, te quidé-yu sá vã yõ tnàhí ndàcu cada. <sup>40</sup> Te nchaa ñáyi ñá túú cùu úhú iní ñahá xii-o te cùndíhi ñahá-yu. <sup>41</sup> Te na càchí tnúhu-í xii-ndo sã cuè ñáyi na tàxi ì<sup>n</sup> yaxi<sup>n</sup> ndute coho-ndo cuendá sá cúú-ndó cuè téé xica cuu ndíhi-í, te ñáyi-á<sup>n</sup> sãá nduu te dacuèi sá ñihí-yu sá ndúú tãhú-yu —càchí-gá xáha<sup>n</sup>-gã xii-güedé.

*Cada cuendá-ó vã cùndècu-o ichi cuèhé ichi duha*

(Mt. 18:6-9; Lc. 17:1-2)

<sup>42</sup> Te xáha<sup>n</sup> tucu Jèsús xii-güedé:

—Te núu ì<sup>n</sup> téé na dàcahá<sup>n</sup>-dé cue ñáyi sàndáá iní ñahá xii-í cadá-yu nándi sá cuèhé sá dúhá, te váha-gá sá núu na dàcutu ndeé-güedé ì<sup>n</sup> yúú yödó dúcú<sup>n</sup>-dè, te dàquée ñaha-güedé xii-dé xití ndute làmár, te ñá díú sã cùndècu-dé duca<sup>n</sup> càda-dé. <sup>43</sup> Te núu ì<sup>n</sup> xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ì<sup>n</sup> xio ndaha-ndo te ñá díú sã quihí<sup>n</sup>-ndó ñihí ní ndúú-ndó núú ùhú núú ndàhú núú dicó sãá ndáhá itá ñuhú ni caa ni quihí<sup>n</sup>. <sup>44</sup> Chi yacá<sup>n</sup> cúú-xí núú ñà túú tnàhí ndàhvã ñuhú, te ío ndoho-ndo cùndecu-ndo xía<sup>n</sup> ni caa ni quihí<sup>n</sup>. <sup>45</sup> Te núu ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ì<sup>n</sup> xio sáhá-ndó, te ñá díú sã quihí<sup>n</sup>-ndó ñihí ní ndúú-ndó núú ùhú núú ndàhú núú dicó sãá ndáhá itá ñuhú ni caa ni quihí<sup>n</sup>. <sup>46</sup> Chi yacá<sup>n</sup> ñá túú tnàhí ndàhvã ñuhú, te ío ndoho-ndo cùndecu-ndo xía<sup>n</sup> ni caa ni quihí<sup>n</sup>. <sup>47</sup> Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cùndècu-ndo núú ndécú

Yã Ndiõxí táxi tnùnigá cuèi na cuíta ì<sup>n</sup> xio tinùu-ndo, te ñá díú sã ndí nduú xio núú-ndó quihí<sup>n</sup>-ndó núú ùhú núú ndàhú. <sup>48</sup> Chi yacá<sup>n</sup> ñá túú tnàhí ndàhvã ñuhú, te ío ndoho-ndo cùndecu-ndo xía<sup>n</sup> ni caa ni quihí<sup>n</sup>.

<sup>49</sup> Te dàtná quidé-güedé quiti sàhni-güedé chihigüedé cuñú-di ñí te dàquée-güedé núú ñuhú, duca<sup>n</sup> sãtnahá-xi ndoho cue ñáyi chi ío ndohó-yu. <sup>50</sup> Te ñí chi ío váha nándíhi-xi, dico núu na nduu víxi<sup>n</sup>-xi te ñá túú-gã nándíhi-xi te ni ñà túú-gã nása cada-o nduu úhá tucu-xi. Te ío váha cada cuendá-ndó nàcuáa cundecu-ndo cuendá cuu-ndo ñáyi váha, te duca<sup>n</sup> te cuu-ndo dàtná ñí sã ñà túú nduu víxi<sup>n</sup>, te ío váha cundecu ndíhi tnàha-ndo —cachí-gá xáha<sup>n</sup>-gã xii-güedé.

## 10

*Jèsús càhá<sup>n</sup>-gá cuendá cue ñáyi dàña tnaha*

(Mt. 19:1-12; Lc. 16:18)

<sup>1</sup> Te Jèsús ní xica-gá cuhá<sup>n</sup>-gá ní yáha-gá yucu distritú Júdeá ní téhndé-gá ndàa ingá xio yúte Jòrdán. Te yacá<sup>n</sup> ndécú-gã ní tacá tucu cuèhé víhí ñáyi, te ní ngúita-ni tucu-gá dánèhé ñahá-gã xi-yu tnúhu-gá chi duca<sup>n</sup> tnàhí quide-gá. <sup>2</sup> Te ní quèxio ì<sup>n</sup> úú cue téé cùu fariséú núú ndécú Jèsús xito ndèé ñahá-güedé xii-gá núu nása cunduu tnúhu cáhá<sup>n</sup>-gá, te xáha<sup>n</sup>-güedé xii-gá:

—Véxi-ndí xicá<sup>n</sup> tnúhú-ndí núú-n núu cuu dañá ì<sup>n</sup> téé ñadíhi-dé ã<sup>n</sup> ñahá —càchí-güedé xáha<sup>n</sup>-güedé xii-gá.

<sup>3</sup> Te Jèsús ní xáha<sup>n</sup>-gã xii-güedé:

—Te nchòhó, ¿nása ní cachí ndí Moisés cada-ndo-i? —càchí-gá xáha<sup>n</sup>-gã xii-güedé.

<sup>4</sup> Te ní xáha<sup>n</sup>-güedé xii-gá:

—Ndí Moisés ní cachí ndí sá cúú dañá ì<sup>n</sup> téé ñadíhi-dé dicó-ni sá cadúha-dé ì<sup>n</sup> tutú cuáñaha-dé, te núú tütú-á<sup>n</sup> codo tnùnigá ní dáña ñaha-dé, te duca<sup>n</sup> te cuu dañá-dé ñadíhi-dé —càchí-güedé xáha<sup>n</sup>-güedé xii-gá.

<sup>5</sup> Te Jèsús ní xáha<sup>n</sup>-gã xii-güedé:

—Te duca<sup>n</sup> nĩ chídó tnùnĩ ndí Moisés cada-ndo cuendá sá ío sàá iní-ndó. <sup>6</sup> Dico Yá Ndiöxí cútnàhá ní cadúha-gá ñuyíú ndihí nchaa sá ío, chi téé ñadìhí ní cadúha-gá. <sup>7</sup> Te xiá<sup>n</sup> nũu nchaa cue téé na nìhí ñadìhí-xi, te ðí<sup>n</sup>-ná cada-güedé tātá-güedé ndihí náná-güedé, chi mee-ná ñadìhí-güedé cuu cuu ndihí-güedé. <sup>8</sup> Te cue ñáyiu úú-án ñá túú-gá ndí ðí<sup>n</sup> ndí ðí<sup>n</sup> yìquĩ cuñú cúú-yu, chi cada iní-ndó sá íí<sup>n</sup>-ná yìquĩ cuñú cúú-yu. <sup>9</sup> Te xiá<sup>n</sup> nũu ñá túú ndũu váha-xi dañá cue téé ñadìhí-güedé, chi mee Yá Ndiöxí ní cachí-gá sá cúú úú-yu cundecú-yu ndéé naa ndéé cuú-yu —càchí-gá xáha<sup>n</sup>-gá xii-güedé.

<sup>10</sup> Te òré yíhí Jèsús ndihí cue téé xica cuu ndihí-gá vehe, te ní xicá<sup>n</sup> tnúhú-güedé núú-gá nása ndũu tnúhu ní cáhá<sup>n</sup>-gá cuendá cue ñáyiu dañá tnaha. <sup>11</sup> Te Jèsús ní xáha<sup>n</sup>-gá xii-güedé:

—Te núu ðí<sup>n</sup> téé na dàña-dé ñadìhí-dé te naquehe<sup>n</sup>-dé ingá ñadìhí, te ío nèhé quidé-dé, te ðí<sup>n</sup>-ni cuéchi cùu-xi ndihí cuéchi quide téé ndéca ñadìhí te càhá<sup>n</sup> ndihí-dé ingá ñadìhí. <sup>12</sup> Te ðiu-ni duca<sup>n</sup> sãtnahá-xi cùu tucu ñáyiu ðihí te núu na dàñá-yu yí-yu te naquehé<sup>n</sup>-yu ingá téé, chí ðí<sup>n</sup>-ni cuéchi cùu-xi sá quidé-yu ndihí sá quidé cue ñáyiu ðihí ndécú yí-xi, te càhá<sup>n</sup> ndihí-yu ingá téé —càchí-gá xáha<sup>n</sup>-gá xii-yu.

*Jèsús xicá<sup>n</sup> táhú-gá núú Yá Ndiöxí cuendá landú*  
(Mt. 19:13-15; Lc. 18:15-17)

<sup>13</sup> Te ðí<sup>n</sup> úú ñáyiu ndécá-yu landú líhli cuáhá<sup>n</sup> núú Jèsús, chí cuiní-yu sá téndàha ñaha-gá xii-güexi. Te cue téé xica cuu ndihí-gá ní ngüíta-güedé ténáá ñáhá-güedé xii-yu, te xáha<sup>n</sup>-güedé sá vã dúcá<sup>n</sup> càdá-yu. <sup>14</sup> Te òré ní xiní-gá sá dúcá<sup>n</sup> quide-güedé, te ní cudéé<sup>n</sup>-gá núú-güedé, te xáha<sup>n</sup>-gá xii-güedé:

—Chí dáñá ná quixi nahi cue landú líhli-án nũu-í-a te vã càdí-ndó ìchi-güexi, chí dàtná cúú váha iní cue landú líhli-án duca<sup>n</sup> cùu váha iní cue

ñáyiu yíndaha Yá Ndiöxí. <sup>15</sup> Te na càchí tnúhu ndáá-í xii-ndo sã nũu vã quíndáá iní ñáhá-ndó dàtná quidé cue landú líhli sàndáá iní ñáhá xii-í, te vã ndíhu ndaha ñàha Yá Ndiöxí xii-ndo —càchí-gá xáha<sup>n</sup>-gá xii-güedé.

<sup>16</sup> Te sátá dúcá<sup>n</sup> ní xáha<sup>n</sup>-gá te ní nguídèhé-gá cue landú-án te ní tendaha ñàha-gá xii-güexi, te ní xicá<sup>n</sup> táhú-gá núú Yá Ndiöxí cuendá-güexi.

*Í<sup>n</sup> téé cuica càhá<sup>n</sup> ndihí-dé Jèsús*  
(Mt. 19:16-30; Lc. 18:18-30)

<sup>17</sup> Te òré sa ñũhu ichi Jèsús caca-gá quíhí<sup>n</sup>-gá ingá xichi ní cùu ní quexio cunu ðí<sup>n</sup> téé ní ngüíñí xítí-dé núú-gá, te xáha<sup>n</sup>-dè xii-gá:

—Yòhó Mèstrú, cùu-n téé ío váha iní-xi, te cuiní-í nũu vã cündèe iní-n càchí tnúhu-n ñá cúú sã càdá-í cuendá nduu táhú-í cundecu-í ndihí Yá Ndiöxí ní caa ní quíhí<sup>n</sup> —càchí-dé xáha<sup>n</sup>-dè xii-gá.

<sup>18</sup> Te Jèsús ní xáha<sup>n</sup>-gá xii-dé:

—¿Te cùtnuní iní-n nàcuáa ndũu tnúhu càhá<sup>n</sup>-n sã yúhú váha iní-án? Chí ðí<sup>n</sup> díí-ni Yá Ndiöxí ío váha iní-gá. <sup>19</sup> Te yòhó xiní-n nàcuáa ní cachí Yá Ndiöxí cada ñáyiu, te duha ní cachí-gá: “Nchòhó cue téé vã càhá<sup>n</sup> ndihí-ndo ñadìhí te núu ñá díú ñadìhí-ndó cúú-yu, te duca<sup>n</sup>-ni nchòhó cue ñáyiu ðihí tucu vã càhá<sup>n</sup> ndihí-ndo tée te núu ñá díú yí-ndo cuu-güedé, te vã cáhni-ndó tnàha ñáyiu-ndo, te ni vã dúhú-ndó sã ndécú ndihí-yu, te ni vã dácàcu-ndo cuéchi neñúú sá cúú-xi tnàha ñáyiu-ndo, te ni vã dácùandehnde-ndo, te canehe-ndo sã yíñũhu núú tātá-ndó ndihí núú náná-ndó”, duha ní cachí Yá Ndiöxí cada ñáyiu —càchí-gá xáha<sup>n</sup>-gá xii-dé.

<sup>20</sup> Te téé-án ní xáha<sup>n</sup>-dè xii-gá:

—Mèstrú, nchaa xiá<sup>n</sup> ní ngüíta-í quidè-í ndéé cútnàhá cúú landú-í —càchí-dé xáha<sup>n</sup>-dè xii-gá.

<sup>21</sup> Te Jèsús ní xíndéhé ñàha váha-gá xii-dé, te ní cuu váha iní ñáhá-gá, te ní xáha<sup>n</sup>-gá xii-dé:

—Dico cùmání ingá núú sã càdá-n. Vitna te quíhí<sup>n</sup>-n te dico-n nchàa

sá ndécú ndíhi-n, te díhú<sup>n</sup>-n cuáha táhú-n cuè ñáyiú ndàhú. Te duca<sup>n</sup>, te nduu táhú-n nùcúndecu váha-n nùú ndécú Yá Ndiòxí táxí tnùní-gá, te sátá ná yáha duca<sup>n</sup> càda-n, te quixi-n chitnahá ñáhá-n xii-í cuèi na ndòho-n datná ndoho-í —càchí-gá xáha<sup>n</sup>-gá xii-dé.

<sup>22</sup> Te sá dúcá<sup>n</sup> ñí xáha<sup>n</sup> Jèsús xii-dé te ío ní cundíyí-dé chí ío cuica-dé, te ní xica-dé cuánuhú-dé.

<sup>23</sup> Te ní ndacoto-gá ñi càndéé dèñi-gá, te ní xáha<sup>n</sup>-gá xii cue téé xica cuu ndíhi-gá:

—Cue ñáyiú cuica chí ío úhú quíndáá iní-yu Yá Ndiòxí cuèndá ndíhu ndaha ñàha-gá xií-yu —càchí-gá xáha<sup>n</sup>-gá xii-güedé.

<sup>24</sup> Te cue téé xica cuu ndíhi-gá-á<sup>n</sup> ío ní cuñúhu-güedé nàcuáa ní cáhá<sup>n</sup>-gá, te ní xáha<sup>n</sup> tucu-gá xii-güedé:

—Nchòhó cue téé xica cuu ndíhi-í càchí tnúhu tucu-í xii-ndo sá ío úhú quíndáá iní cue ñáyiú cuica Yá Ndiòxí cuèndá ndíhu ndaha ñàha-gá xií-yu, chí sàni iní-yu sá ncháá sá ndécú ndíhi-yu dàcácu nihnu ñaha-xi xii-yu núú ùhú núú ndàhú. <sup>25</sup> Te yáchí-gá yáha ñ<sup>n</sup> càméyu yaú ñ<sup>n</sup> yiqui tìcú dàcúxí sá quíndáá iní ñ<sup>n</sup> ñáyiú cuica Yá Ndiòxí cuèndá ndíhu ndaha ñàha-gá xií-yu —càchí-gá xáha<sup>n</sup>-gá xii-güedé.

<sup>26</sup> Te cue téé xica cuu ndíhi-gá ní cuñúhu vñhi-gá-güedé sá dúcá<sup>n</sup> ñí cáhá<sup>n</sup>-gá, te ní ngúita-güedé xítnàha-güedé:

—¿Te yoo sa ndacu naníhí tàhú te núú duca<sup>n</sup> vèí<sup>n</sup>? —càchí-güedé xítnàha-güedé.

<sup>27</sup> Te Jèsús ní xíndéhé vaha ñaha-gá xii-güedé, te ní xáha<sup>n</sup>-gá:

—Nchaa ñáyiú ñuyíú-a chí vá ndácü-yu ná cadá-yu nàcuáa ndíhu ndaha ñàha Yá Ndiòxí xií-yu, dico mee-gá chí ndacu-gá ndíhu ndaha ñàha-gá xií-yu, chí nchaandi túhú sá vaha ndàcu-gá quídé-gá —càchí-gá xáha<sup>n</sup>-gá xii-güedé.

<sup>28</sup> Te té Pèlú ní xáha<sup>n</sup>-dè xii-gá:

—Nchúhú ní dándóo-ndí nchaandi túhú sá ndécú ndíhi-ndí te ní tuha ñaha-ndí xii-n —càchí-dé xáha<sup>n</sup>-dè xii-gá.

<sup>29</sup> Te Jèsús ní xáha<sup>n</sup>-gá xii-dé:

—Na càchí tnúhu ndáá-í xii-ndo sá ncháá ñáyiú na dándóo vehe-xi, àdi ñaní-xi, cúha-xi, tātá-xi, náná-xi, déhe-xi, àdi ñuhu-xi, te núú duca<sup>n</sup> na càdá-yu sá cuèndá-í ndíhi sá cuèndá tnúhu-í, <sup>30</sup> te ío-gá cuéhé sá cuñaha Yá Ndiòxí cundecu ndíhi-yu, chí níhi-yu vehé-yu, ñuhú-yu, ñaní-yu, cúha-yu, náná-yu, déhe-yu, te ñá díú-ní sá nchàa xíá<sup>n</sup> níhi-yu cundecu ndíhi-yu, chí tnàhá nduu táhú-yu cundecu ndíhi ñàhá-yu xii-í ñi caa ñi quíhí<sup>n</sup> ná sàá nduu. Dico díhna-gá ndoho tnahá-yu núú ñuyíú-a sá cuèndá-í.

<sup>31</sup> Te dava ñáyiú cùnuu ndecu ichi Yá Ndiòxí vitna, ñáyiú-á<sup>n</sup> sáá nduu te vá ío-gá cunúú-yu dàtná cùnúú-yu vitna, te dava ñáyiú nchìcú<sup>n</sup> ñá túú cùnuu vitna ñáyiú-á<sup>n</sup> sáá nduu te ío cunúú-yu —càchí-gá xáha<sup>n</sup>-gá xii-güedé.

*Jèsús càhá<sup>n</sup> tucu-gá sá cáhni ñàha-güedé xii-gá*

*(Mt. 20:17-19; Lc. 18:31-34)*

<sup>32</sup> Te ñuhu Jèsús ichi ndíhi cue téé xica cuu ndíhi-gá cuásaá ndíhi ñaha-gá xii-güedé ñuú Jerusalén, te yòdo nuu-gá núú-güedé cuásaá. Te cue téé-á<sup>n</sup> xícuñúhu-güedé sá dúcá<sup>n</sup> cuáhá<sup>n</sup>-gá ñuú Jerusalén, te dava cue ñáyiú xínchìcú<sup>n</sup> xiyùhú-yu. Te ní taudí<sup>n</sup>-gá ndí ùxúú cue téé xica cuu ndíhi-gá, te ní ngúita-gá cání-gá cuèndú núú-güedé nchaa nàcuáa yáha-gá. <sup>33</sup> Te xáha<sup>n</sup>-gá xii-güedé:

—Vitna ñuhu-o ichi cuásaá-ó ñuú Jerusalén, te yàcá<sup>n</sup> cuáha cuèndá ñáhá-güedé xii yúhú Téé cùu ñaní tnàhá-ndó nchàa-ndo núú cuè téé cùu dútú cùnúu, ndíhi núú cuè téé dàcuaha ñaha xii ñáyiú nchaa tnúhu ní chídó tnùní ndíi Moisés. Te díu cue téé-á<sup>n</sup> cùñaha-güedé xii dava-gá cue téé sá cáhni ñàha-güedé xii-í, te cuáha cuèndá ñáhá-güedé xii-í núú cuè téé ñá túú cùu cue téé isràél. <sup>34</sup> Te cue

tée-á<sup>n</sup> cudíquí ndeé ñáhá-güedě xii-í, te caniha-güedě ndihi ñii, te tiú díí ñáhá-güedě, te cahni ñaha-güedě xii-í dico nduu úní sá cùú-í te ndoto-í — cächí-gá xáha<sup>n</sup>-gá xii-güedé.

*Té Jàcobó ndihi té Juàá càhá<sup>n</sup> ndàhú-güedé núú Jèsús sá cádá-gă ñ<sup>n</sup> sá cuìní-güedé*

(Mt. 20:20-28)

<sup>35</sup> Te cue déhe té Zebèdeú té Jàcobó ndihi té Juàá ní quexìo-güedé núú Jèsús, te xáha<sup>n</sup>-güedě xii-gá:

—Mèstrú, véxi-ndí càhá<sup>n</sup> ndàhú-ndí núú-n nùu vá cùndèe iní-n càda-n ñ<sup>n</sup> sá cuìní-ndí —cächí-güedé xáha<sup>n</sup>-güedě xii-gá.

<sup>36</sup> Te Jèsús ní xíca<sup>n</sup> tnúhú-gá núú-güedě, te xáha<sup>n</sup>-gă:

—¿Ná cúú sá cuìní-ndó càda-í-i? — cächí-gá xáha<sup>n</sup>-gă xii-güedé.

<sup>37</sup> Te ní xáha<sup>n</sup>-güedě xii-gá:

—Cuìní-ndí sá òré ná sàá nduu cùndecu-n núú táxí tnùnín, te ñ<sup>n</sup>-ndí cunucóo-ndí xio cùha-n te ñ<sup>n</sup>-ndí cunucóo-ndí xio dàtni-n — cächí-güedé xáha<sup>n</sup>-güedě xii-gá.

<sup>38</sup> Te Jèsús ní xáha<sup>n</sup>-gă xii-güedé:

—Nchòhó, ñá túú cùtnuní iní-ndó nàcuáa nduu sá xíca<sup>n</sup>-ndó nùú-í. ¿Te náa cundee iní-ndó dándoho ñaha ñáyiú xii-ndo dàtná dándoho ñahá-yu xii-í, te cundee tùcu iní-ndó cahní ñahá-yu xii-ndo dàtná cahní ñahá-yu xii-í-á<sup>n</sup>? —cächí-gá xáha<sup>n</sup>-gă xii-güedé.

<sup>39</sup> Te ní xáha<sup>n</sup>-güedě xii-gá:

—Cundee iní-ndí yáha-ndí nchaa nàcuáa càhá<sup>n</sup>-n-á<sup>n</sup> —cächí-güedé xáha<sup>n</sup>-güedě xii-gá.

Te Jèsús ní xáha<sup>n</sup>-gă xii-güedé:

—Ndáá sá cùndèe iní-ndó ndòho-ndo nchaa nàcuáa ndòho-í, te cundee tùcu iní-ndó cahní ñahá-yu xii-ndo, chi yúhú cahní ñahá-yu xii-í.

<sup>40</sup> Dico sá dúcá<sup>n</sup> cuìní-ndó sá ñ<sup>n</sup>-ndó cùnucóo-ndo xio cuhá-í te ñ<sup>n</sup>-ndo cùnucóo-ndo xio datni-í, te xíá<sup>n</sup> chi ñá díú yúhú tàú-í cachí-í te núú sá cúú cùnucóo-ndo àdi sá vâ cúú cùnucóo-ndo, chi mee Tàtà-í Dútú Ndióxi cachí-gá te núú ná cúú ñáyiú nduu táhú cunucóo dìñi-í dàvá-á<sup>n</sup> — cächí-gá xáha<sup>n</sup>-gă xii-güedé.

<sup>41</sup> Te òré ní níhí ùxí-gá cue tée xica cuu ndihi-gá tnúhu nàcuáa nduu sá cuìní té Jàcobó ndihi ñaní-dé té Juàá, te ní cudéé<sup>n</sup>-güedě núú cuè tée úú-á<sup>n</sup>.

<sup>42</sup> Te Jèsús ní cana-gá nchaa cue tée xica cuu ndihi-gá-á<sup>n</sup>, te ní xáha<sup>n</sup>-gă xii-güedé:

—Nchòhó xìní-ndó sá cuè tée yìndaha ñ<sup>n</sup> nació<sup>n</sup> quide-güedé sá ïo cùnucóo-güedé, te nchaa dava-gá cue tée cùndihi-güedé tnàhá-güedé quidé-güedě sá ïo cùnucóo-güedé. <sup>43</sup> Dico nchòhó chi vá dúcá<sup>n</sup> càda-ndo. Chi núú dava-ndo cuìní-ndó cùnucóo-ndo te xini ñuhu-xi cunu cuechi núú tnàhá-ndó te vá cádá-ndó sá cùnucóo-ndo. <sup>44</sup> Te núú dava-ndo cuìní-ndó quène cáva-ndo, te cuu-ndo dàtná cue ñáyiú ñá túú tnàhí dàñá quee núú chíú<sup>n</sup> pàtróo<sup>n</sup>-xi cunu cuechi núú tnàhá-ndó. <sup>45</sup> Te yúhú Tée cùu ñaní tnàhá-ndó nchàa-ndo, chi ñá túú véxi-í sá cùnucóo cuèchi ñáyiú núú-í, chi véxi-í sá cùnucóo cuèchi-í núú-yu.

Te cuú-í ñuyíú-a cuendá vâi-yu cácu nihnu núú ùhú núú ndàhú —cächí-gá xáha<sup>n</sup>-gă xii-güedé.

*Jèsús quidé tātna-gă ñ<sup>n</sup> tée cuàá nání-dě Bartimeú*

(Mt. 20:29-34; Lc. 18:35-43)

<sup>46</sup> Te Jèsús ní quexìo-gă ñuú Jericó ndihi cue tée xica cuu ndihi-gá, te ní yáha-gá ndihi-güedé ichi xití ñuú-á<sup>n</sup>, te ïo cuéhé ñáyiú nchícú<sup>n</sup> ñahá xii-gá cuáhá<sup>n</sup> te ñ<sup>n</sup> xio yuhu ichi sá ñí quee xití ñuú-á<sup>n</sup> núcóo ñ<sup>n</sup> tée cuàá nání-dě Bartimeú, te tātá-dě nání-dě Tìmeú, te tée-á<sup>n</sup> núcóo-dé yuhu ichi-á<sup>n</sup> xíca<sup>n</sup> ndàhú-dé. <sup>47</sup> Te tée-á<sup>n</sup> ñí cutnùnín iní-dé sá Jèsús tée ñuú Nazàrét ñúhú-dě ichi, te ní ngüíta-dé níhi càhá<sup>n</sup>-dé, te xáha<sup>n</sup>-dě xii-gá:

—Jèsús, ñaní tnàhá ndii Dàvíí, cundàhú iní ñahá xii-í! —cächí-dé xáha<sup>n</sup>-dě xii-gá.

<sup>48</sup> Te vâi ñáyiú tènaá ñahá-yu xii-dé, te xáhá<sup>n</sup>-yu sá ná càdí-dé yuhu-dé dico uu<sup>n</sup>-gă níhi ní cáhá<sup>n</sup>-dé xáha<sup>n</sup>-dě xii-gá:

—Jèsús, ñaní tnàhá ndii Dàvíí cundàhú iní ñahá xii-í! —cächí-dé xáha<sup>n</sup>-dě xii-gá.



49 Te Jèsús ní ngüíñí-gá te ní xáha<sup>n</sup>-gã xii cue téé ndíhi-gá:

—Chí cuánguaca téé cuàá-á<sup>n</sup> can-deca-ndo-dě quixi iha —càchí-gá xáha<sup>n</sup>-gã.

Te cue téé-á<sup>n</sup> nǐ xica-güedé cuánguaca-güedé téé cuàá-á<sup>n</sup>, te òré ní quexìo-güedé núú-dě te ní xáha<sup>n</sup>-güedě xii-dé:

—Ndacuíñí te vá ndìhú-gá iní-n, na quíhí<sup>n</sup>-ó chi càna ñaha Jesús xii-n —càchí-güedé xáha<sup>n</sup>-güedě xii-dé.

50 Te téé-á<sup>n</sup> nǐ xócání-dě dóo ndíxí-dě, te ndíhi-ni ní ndacuíñí-dé te ní xica-dé cuáhá<sup>n</sup>-dé núú Jèsús. 51 Te òré ní quexìo-dé te ní xícá<sup>n</sup> tnúhú-gã núú-dě, te xáha<sup>n</sup>-gã xii-dé:

—¿Ná cuíní-n càda ñaha-í xii-n-i? —càchí-gá xáha<sup>n</sup>-gã xii-dé.

Te téé cuàá-á<sup>n</sup> nǐ xáha<sup>n</sup>-dě xii-gá:

—Mèstrú, cuíní-í cada tátna-n nùú-í cuèndá cundehe-í —càchí-dé xáha<sup>n</sup>-dě xii-gá.

52 Te Jèsús ní xáha<sup>n</sup>-gã xii-dé:

—Cuanùhú vitna, chi sa ní ndúha núú-n chi ní sándáá iní-n Yá Ndiöxi —càchí-gá xáha<sup>n</sup>-gã xii-dé.

Te òré-ni-á<sup>n</sup> nǐ ndúha núú-dě te nchìcú<sup>n</sup>-dé Jèsús cuáhá<sup>n</sup>.

## 11

*Jèsús cuánguihu-gá ñuú Jerusàlén*

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gá ndíhi cue téé xica cuu ndíhi-gá ñuú Bètaniá, ndíhi ñuú Bèttagé, te xía<sup>n</sup> cáá yùcu nani Olívú, te yatni víí-nǎ xía<sup>n</sup> cáá ñuú Jerusàlén. Te Jèsús ní cana-gá úú-ni tnàhá cue téé xica cuu ndíhi-gá. 2 Te ní xáha<sup>n</sup>-gã xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te naníhí-ndó ñ<sup>n</sup> búrru ndètní-di, te vátá yóo ñ<sup>n</sup>-gá codo ñaha xii-di, te nandaxi-ndo-di te candeca-ndo-di quixi. 3 Te núu yoo na càcá<sup>n</sup> tnúhú nùú-ndó nǎ cuèndá nándàxi-ndo-di, te cúñaha-ndo sǎ yùhú Yáá xícá cùu ndíhi-ndo xini ñuhu-í-di, te na yàha canehe chiu<sup>n</sup>-í-di te ndíhi-ni natendaha-í-di,

duha cúñaha-ndo —càchí-gá xáha<sup>n</sup>-gã xii-güedé.

4 Te cue téé-á<sup>n</sup> nǐ xica-güedé cuáhá<sup>n</sup>-güedé, te òré ní quexìo-güedé ñuú-á<sup>n</sup> te ní naníhí-güedě ñ<sup>n</sup> búrru ndètní-di ñ<sup>n</sup> yutnu ñihnu yatni ñ<sup>n</sup> yuyehe vehe caa yatni yuhu ichi, te ní ngüíta-güedé nándàxi-güedé-di.

5 Te mei òré nándàxi-güedé-di ní quexìo ñáyiú xáhã<sup>n</sup>-yu xii-güedé:

—¿Ná cuèndá nándàxi-ndo búrru-á<sup>n</sup>-i? —càchí-yu xáhã<sup>n</sup>-yu xii-güedé.

6 Te cue téé-á<sup>n</sup> nǐ xáha<sup>n</sup>-güedě xií-yu nàcuáa ní xáha<sup>n</sup> Jèsús cúñaha-güedě. Te sátá dúcá<sup>n</sup> te ní dáñã-yu ndèca-güedé búrru-á<sup>n</sup> cuáhá<sup>n</sup> núú ndécú Jèsús. 7 Te òré ní quexìo-güedé ndíhi-di núú ndécú-gã, te ní sacá<sup>n</sup> ndodo-güedé dóo-güedě sátá-di, ní ngódó ñaha Jesús xii-di. 8 Te ío cuéhé ñáyiú ta sàcá<sup>n</sup>-yu dóo-yu ichi cuáhá<sup>n</sup>-gá cuèndá núú dõo-yu-á<sup>n</sup> yàha-gá ndíhi quití yòdo-gá, te davá-yu xèhndé-yu ndaha yutnu ta sacá<sup>n</sup>-yu cuáhá<sup>n</sup>.

9 Te nchaa ñáyiú yòdo nuu núú-gã ndíhi nchaa ñáyiú nchìcú<sup>n</sup> ndaa sátá-gã ní ngüíta-yu níhi càhá<sup>n</sup>-yu, te càchí-yu:

—Ío càhnu cuu Yáá-a! ¡Te Yá Ndiöxi ná chindee ñaha-gá, chi diu-gá cúú-gã Yáá ní tendaha-gã véxi quide núú-gã! 10 ¡Te diu-ni Yáá-á cúú-gã Yáá véxi quindaha ñaha xii-o datná ní xóo cada ndí Dàvíí! ¡Te ndéé nchaa sá ío andíu na càchí-xi sá ío càhnu cuu-gã! —duha càchí-yu.

11 Te Jèsús ní quexìo-gá ñuú Jerusàlén, te cuánguihu-gá xití veñúhu càhnu sá ío cùnūu, te ní xíndéhé vǎha-gá nchaa sá ndécú xití veñúhu-á<sup>n</sup>. Te sátá dúcá<sup>n</sup> te ní ndee-gá cuáhá<sup>n</sup>-gá ñuú Bètaniá ndíhi ndí ùxúú cue téé xica cuu ndíhi-gá chi sa ní cuaa.

*Jèsús xáha<sup>n</sup>-gã xii yutnu ngüxi sá vǎ cúú<sup>n</sup>-gã sávidí-xi*

(Mt. 21:18-19)

12 Te nduu tnéé-á<sup>n</sup> nǐ quee Jèsús ñuú Bètaniá ndíhi cue téé xica cuu ndíhi-gá, te ichi ñuhu-gá ní

xíhí-gá docó. <sup>13</sup> Te xica nǐ xini-gá nǔtníi ñ<sup>n</sup> yutnu ngǔxí, te ní xica-gá cuándéhé-gǎ nǔu ndéé sávídí-xi te ñá túú nǎ ndéé, chi mee-ni ndàha-xi ndéé chi ñá díú yǒó sácǔndéé sávídí-xi. <sup>14</sup> Te Jèsús ní xáha<sup>n</sup>-gǎ xii yutnu ngǔxí-á<sup>n</sup>:

—Vitna te vá yǒo ñ<sup>n</sup>-gǎ caxi sávídí-n, chi vá cúú<sup>n</sup>-gǎ —càchí-gǎ xǎha<sup>n</sup>-gǎ xii yutnu ngǔxí-á<sup>n</sup>.

Te cue téé xica cuu ndihi-gá ní tecú dóho-güedé nàcuáa ní xáha<sup>n</sup>-gǎ xii yutnu ngǔxí-á<sup>n</sup>.

*Jèsús ñá túú tnàhá iní-gá nàcuáa quide ñáyiú xití veñúhu*

(Mt. 21:12-17; Lc. 19:45-48; Jn. 2:13-22)

<sup>15</sup> Te Jèsús ní quexìo tucu-gá ndihi cue téé xica cuu ndihi-gá ñúú Jerusàlén, te cuánguihu tucu-gá xití veñúhu càhnu sá ïo cùnūu, te xití veñúhu-á<sup>n</sup> xǐndecu cue ñáyiú quide ndáhú nádicó-yu, ndihi cue ñáyiú xǐsaa<sup>n</sup>. Te ncháa-yu ní queñuhu ñaha Jèsús xii-yu quehé, te ní dándúá-gá mèsá cue ñáyiú dàma díhú<sup>n</sup>, ndihi ncháa xilé sácóo nchihí cue ñáyiú dīco lómá xǐndecu xití veñúhu-á<sup>n</sup>. <sup>16</sup> Te ñá túú tnàhí-gá ní dàña-gá yáha cue ñáyiú ndihi ncháa sá nchídō-yu ichi xití veñúhu-á<sup>n</sup>. <sup>17</sup> Te ní xáha<sup>n</sup>-gǎ xii-yu:

—Núú tütú Yǎ Ndiǒxí càhá<sup>n</sup>-xi nàcuáa ní cáhá<sup>n</sup>-gǎ, te ní cachí-gá: “Vehe-í cúú-xí vèhe núú tàcá ñáyiú ñihí ñuyú cáhá<sup>n</sup> ndihi ñàhá-yu xii-í”, duha ní cáhá<sup>n</sup>-gǎ càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gǎ xǎha<sup>n</sup>-gǎ xii-yu.

<sup>18</sup> Te ncháa dütú cùnūu, ndihi ncháa cue téé dàcuaha ñaha xii-yu ncháa tnúhu ní chídó tnùní ndíi Moisés ní tecú dóho-güedé nàcuáa ní cáhá<sup>n</sup>-gǎ te ní ngüita-güedé ndúcú-güedé nàcuáa cada-güedé cahni ñaha-güedé xii-gá, chi yùhú-güedé sá ïo cùnūu-gǎ, te duca<sup>n</sup> chi ncháa ñáyiú ío cùnūhu-yu ncháa tnúhu càhá<sup>n</sup>-gǎ. <sup>19</sup> Te òré sa ní cuaa cuíi-nǎ, te ní quee tucu Jèsús ndihi cue téé xica cuu ndihi-gá ñúú Jerusàlén cuáhá<sup>n</sup>-gǎ ndihi-güedé ingá xichi.

*Ní yíhí yutnu ngǔxí*  
(Mt. 21:20-22)

<sup>20</sup> Te nduu tnéé nehé-ni ní yáha tucu Jèsús ndihi cue téé xica cuu ndihi-gá núú níhnú yùtnu ngǔxí, te ní xini-güedé sa ní yíhí ñihí ndéé yóho-xi. <sup>21</sup> Te té Pèlú ní ndacu iní-dé nàcuáa ní xáha<sup>n</sup> Jèsús xii yutnu ngǔxí-á<sup>n</sup>, te ní xáha<sup>n</sup>-dē xii-gá:

—Mèstrú, cundehe nǎ ní yíhí yutnu ngǔxí sá ñí xáha<sup>n</sup>-n sǎ vá cúú<sup>n</sup>-gǎ sávídí-xi —càchí-dé xǎha<sup>n</sup>-dē xii-gá.

<sup>22</sup> Te Jèsús ní xáha<sup>n</sup>-gǎ xii-güedé:

—Quindáa ndisa iní-ndó Yǎ Ndiǒxí.

<sup>23</sup> Te na càchí tnúhu ndáa-í xii-ndo sǎ nǔu nchòhó cúñaha-ndo xii tǐndúú-a xocuñí-xi núú ndécú-xí, te quíhí<sup>n</sup>-xi quée-xi xití lámár. Te díu duca<sup>n</sup> càda-xi te núu nchòhó vá cání ñ<sup>n</sup> caní úú iní-ndó, te quindáa iní-ndó sǎ dúcá<sup>n</sup> càda-xi. <sup>24</sup> Te xǎ<sup>n</sup> nǔu càchí tnúhu-í xii-ndo sǎ ncháa sá ná càcá<sup>n</sup>-ndó nǔú Yǎ Ndiǒxí òré càhá<sup>n</sup> ndihi-ndo-gǎ, te taxi-gá te núu nchòhó sàndáa ndisa iní-ndó sǎ táxí-gǎ sá xicá<sup>n</sup>-ndó nǔú-gǎ. <sup>25</sup> Te òré càhá<sup>n</sup> ndihi-ndo Yǎ Ndiǒxí te dandacu iní-ndó te núu ndéu ñáyiú ñá túú cùu váha iní ñáhá xii-ndo, te cada càhnu iní-ndó-yu cuendá duca<sup>n</sup> càda cahnu iní ñáhá Tǎtá-ndó Dütú Ndiǒxí Yaá ndécú àndiú xii-ndo cuendá ncháa sá ñà túú váha quide-ndo. <sup>26</sup> Dico núu nchòhó vá cadá càhnu iní-ndó sǎ quidé ñàha tñaha ñáyiú-ndo xii-ndo, te ni Tǎtá-ndó Dütú Ndiǒxí vá cadá càhnu iní ñáhá-gǎ xii-ndo cuendá ncháa sá ñà túú váha quide-ndo —cachí-gǎ xǎha<sup>n</sup>-gǎ xii-güedé.

*Jèsús ndécú ndihi-gá tnúhu ndee iní*  
(Mt. 21:23-27; Lc. 20:1-8)

<sup>27</sup> Te Jèsús ní ndexìo tucu-gá ñúú Jerusàlén ndihi cue téé xica cuu ndihi-gá, te cuánguihu tucu-gá xití veñúhu càhnu sá ïo cùnūu ndihi-güedé. Te xití veñúhu-á<sup>n</sup> yíhí-gǎ ní quexìo cue dütú cùnūu ndihi cue téé dàcuaha ñaha xii ñáyiú ncháa tnúhu ní chídó tnùní ndíi Moisés, ndihi cue téé cùu sacuéhé nǔú ñáyiú isràél. <sup>28</sup> Te xǎha<sup>n</sup>-güedé xii-gá:

—Cuini-ndí cachí tnúhu-n xii-ndí nása nduu tnúhu ndee iní ndécú ndihí-n núu quide-n nándi sá quidé-n, ¿te yoo duca<sup>n</sup> ní taxi tnúhu ndee iní-á<sup>n</sup> xii-n-i? —càchí-güedé xáha<sup>n</sup>-güedé xii-gá.

<sup>29</sup> Te Jèsús ní xáha<sup>n</sup>-gá xii-güedé:

—Yúhú tnàhá-í cuini-í cacá<sup>n</sup> tnúhu-í ñ<sup>n</sup> sá cacá<sup>n</sup> tnúhu-í núú-ndó te núu na cachi tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í. <sup>30</sup> Te chí cachi tnúhu xii-í yoo ní táuchíú<sup>n</sup> ní dácúándüte ndí Juàá ñáyu, ¿Yá Ndiöxí ã<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndí? Te chí cachi tnúhu —càchí-gá xáha<sup>n</sup>-gá xii-güedé.

<sup>31</sup> Te ní ngüita-güedé xitnàha-güedé:

—¿Nása cüñaha-o? Chi núu na cüñaha-o sá Yá Ndiöxí ní táuchíú<sup>n</sup> dùca<sup>n</sup> ní quide ndí Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní caha<sup>n</sup> ndí vè<sup>n</sup>?”, quesaha-dé. <sup>32</sup> Te ni vè cúu cüñaha-o sá cuè ñáyu ñuyíú-a ní táuchíú<sup>n</sup> dùca<sup>n</sup> ní quide ndí Juàá —càchí-güedé xitnàha-güedé.

Te duca<sup>n</sup> ní xitnàha-güedé chí ñá túú ní cütuní iní-güedé nása cüñaha-güedé xii-gá, chí xiyùhú-güedé cuè ñáyu chí nchaa ñáyu-á<sup>n</sup> ní cutnùní ndáá iní-yu sá Yá Ndiöxí ní táuchíú<sup>n</sup>-gá duca<sup>n</sup> ní quide ndí Juàá.

<sup>33</sup> Te ní xáha<sup>n</sup>-güedé xii Jèsús:

—Ñá túú xini-ndí yoo ní táuchíú<sup>n</sup> dùca<sup>n</sup> ní dácúándüte ndí Juàá ñáyu —càchí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Te núu duca<sup>n</sup> te ni yúhú vá cachi tnúhu-í xii-ndo yòo ní taxi tnúhu ndee iní duha quide-í —càchí-gá xáha<sup>n</sup>-gá xii-güedé.

## 12

*Cuendá cue téé cuihna iní-xi  
(Mt. 21:33-46; Lc. 20:9-19)*

<sup>1</sup> Te Jèsús ní ngüita-gá caní-gá ñ<sup>n</sup> cuendú núu ñáyu nacuáa tecú tnùní-yu tnúhu-gá, te xáha<sup>n</sup>-gá xii-yu:

—Ñ<sup>n</sup> téé ní nacúxi-dé mee-ni yòo yaha stilé núu ñúhú-dé, te ní chidoco-dé cuendá sá vè cúu dàñú, te

ní cadúha-dé núu quíhni-dé ndéhé yoho yàha stilé-á<sup>n</sup> òré ná cùu, te ní cadúha-dé ñ<sup>n</sup> xító dùcú<sup>n</sup> núu cáundòdo cue téé coto yoho yàha stilé-á<sup>n</sup>.

’Te ní sáá ñ<sup>n</sup> nduu quèe-dé quíngaca cuu xica-dé vèi nduu, te ní dándöo ndaha-dé sá ñ<sup>n</sup> xitu-dé-á<sup>n</sup> xii ñ<sup>n</sup> úú cue téé caha<sup>n</sup> ndihí-dé cuendá cada chiú<sup>n</sup>-güedé, te ní ndatnúhu-güedé sá òré ná cúu te cuu cuendá dava-güedé te duca<sup>n</sup> te ní quee-dé cuahá<sup>n</sup>-dé.

<sup>2</sup> Te sáta ñ<sup>n</sup> sáá nduu ñ<sup>n</sup> cuu ndéhé yoho yàha stilé sá ñ<sup>n</sup> xitu-dé-á<sup>n</sup>, te ní xáha<sup>n</sup>-dé xii ñ<sup>n</sup> téé xínu cuechi núú-dé: “Cuahá<sup>n</sup> cacá<sup>n</sup>-ñ<sup>n</sup> sá cúu cuendá-í núu cuè téé ní dándöo ndaha-í nchaa yoho yàha stilé sá ñ<sup>n</sup> xitu-í-á<sup>n</sup>”, cachi-dé xáha<sup>n</sup>-dé. Te téé xínu cuechi-á<sup>n</sup> ní xica-dé cuahá<sup>n</sup>-dé. <sup>3</sup> Te cue téé-á<sup>n</sup> ní tñ<sup>n</sup>-güedé téé xínu cuechi-á<sup>n</sup>, te ní caniha-güedé xii-dé, te dàtnùní ní nacúíú<sup>n</sup> ñáhá-güedé, te ñá túú tnàhí ná ní sáñaha-güedé. <sup>4</sup> Te téé cùu xítóhó yoho yàha stilé-á<sup>n</sup> ní tendaha tucu-dé ingá téé xínu cuechi núú-dé cuahá<sup>n</sup>-dé. Te òré ní quexìo téé xínu cuechi-á<sup>n</sup> te cue téé-á<sup>n</sup> ní sáha ñaha-güedé yúu xii-dé, te ní táhú-güedé díquí-dé, te ní xicuéhé ñáhá-güedé xii-dé. <sup>5</sup> Te téé cùu xítóhó nchaa yoho yàha stilé-á<sup>n</sup> ní tendaha tucu-dé ingá téé xínu cuechi núú-dé cuahá<sup>n</sup>-dé núu cuè téé-á<sup>n</sup>, dico téé-á<sup>n</sup> òré ní quexìo-dé te ní sahani ñaha-güedé xii-dé. Te téé cùu xítóhó nchaa yoho yàha stilé-á<sup>n</sup> ní tendaha-dé vèi-gá cue téé xínu cuechi núú-dé cuahá<sup>n</sup> ngacá<sup>n</sup>-güedé sá cúu cuendá-dé ní cùu dico ñ<sup>n</sup>-ni duca<sup>n</sup> ní quide ñaha tucu cue téé ndéé nchaa yoho yàha stilé-á<sup>n</sup> xii-güedé, chí dava-güedé ní caniha-güedé te dava-güedé ní sahani ñaha-güedé.

<sup>6</sup> ’Te téé cùu xítóhó nchaa yoho yàha stilé-á<sup>n</sup> ndécú ñ<sup>n</sup> dii-ná téé tendaha-dé quíhí<sup>n</sup> núu cuè téé ní dándöo ndaha-dé sá ñ<sup>n</sup> xitu-dé-á<sup>n</sup>, te téé tendaha-dé-á<sup>n</sup> cúu-dé déhe ducu<sup>n</sup>-dé, te ío cùu iní ñáhá-dé. Te ní sani iní-dé: “Váha-gá núu tendaha-í déhe-í-a núhú-dé, chí òré quini ñáhá-güedé xii-dé te cànehe-güedé sá yíñùhu núú-dé”, duha ní sani

iní-dé. Te duca<sup>n</sup> te ní xáha<sup>n</sup>-dê xii déhe-dé-á<sup>n</sup> sá nùhú-dé, te téé-á<sup>n</sup> cuánuhú-dé cuáhá<sup>n</sup> ngácá<sup>n</sup>-dé sá cúu cuendá tătă-dê núu cuè téé-á<sup>n</sup>. <sup>7</sup> Dico òré ní xiní cue téé quide chiu<sup>n</sup>-á<sup>n</sup> dêhe téé cùu xítohó nchaa yoho yàha stilé-á<sup>n</sup>, te ní xítàha-güedé: “Téé-á<sup>n</sup> téé véxi nduu táhú ñuhu-a ndihí sá cáá nùú-xi, dico cahni-o-dê te mee-o ndùu táhú-ó sá ndúú táhú-dê”, duha ní xítàha-güedé. <sup>8</sup> Te ní tñi-güedé téé-á<sup>n</sup>, te ní sahani ñaha-güedé, te ní dáquéné-güedé yiqui cùñú-dé ñ<sup>n</sup> xio yuhu ñuhu núu cáá yòho yaha stilé-á<sup>n</sup> —duha cuáhá<sup>n</sup> cuendú ní cani Jèsús núú-yu.

<sup>9</sup> Te Jèsús ní xáha<sup>n</sup> tùcu-gá xií-yu:

—¿Te nchòhó sa cùtnuní iní-ndó nàcuáa cada xítohó ñuhu-á<sup>n</sup> ã<sup>n</sup>? Chi nùhú-dé te cahni-dé cue téé-á<sup>n</sup> te dándóo ndaha-dê ñuhu-dé xii cue téé cùtnuní iní-dé cada ndáá —càchí-gá xáha<sup>n</sup>-gá xií-yu.

<sup>10</sup> Te xáha<sup>n</sup> tùcu-gá xií-yu:

—Te nchòhó, náa ñá túú dàcuaha-ndo núu tütú Yá Ndiöxí núu càchí-xi: Yúú sá ñí dáquéé tñhú cue téé dàcaa vehe, ní cuu-xi yúú cúnùu vitna.

<sup>11</sup> Chi mee Yá Ndiöxí duca<sup>n</sup> ñí cachí-gá cunduu, te cùu-xi ñ<sup>n</sup> sá ïo cùñúhu-o vitna. Duha càchí-xi núu tütú-gá —càchí Jèsús xáha<sup>n</sup>-gá xií-yu.

<sup>12</sup> Te cue téé ní xíndedóho nàcuáa ndùu tnúhu ní cáhá<sup>n</sup>-gá ní cuiní-güedé tñi ñaha-güedé xii-gá ní cùu, chi ní cutnùní iní-güedé sá cuendá-güedé ní cáhá<sup>n</sup>-gá, dico ní yùhú-güedé tñi ñaha-güedé xii-gá cuendá sá ïo vai ñáiyu, te ná ïo ná cada ñáhá-yu xii-güedé ní sani iní-güedé, te ní xica-güedé cuáhá<sup>n</sup>-güedé.

### *Cuendá impuèstú*

(Mt. 22:15-22; Lc. 20:20-26)

<sup>13</sup> Te sátá ñí xica-güedé cuáhá<sup>n</sup>-güedé, te ní tendaha-güedé ñ<sup>n</sup> úú cue téé cùu fariséu, ndihí ñ<sup>n</sup> úú cue téé cùndihí té Hèrodés cuáhá<sup>n</sup>-güedé núu ndécú Jèsús ndúcú-güedé nàcuáa cada-güedé datìcanuu ñaha-güedé xii-gá núu tnúhu càhá<sup>n</sup>-gá. <sup>14</sup> Te cue

téé-á<sup>n</sup> ñí quexìo-güedé núu Jèsús, te xáha<sup>n</sup>-güedé xii-gá:

—Mèstrú, cùtnuní iní-ndí sá ïo ndáá càhá<sup>n</sup>-n, te ñá túú quide cuendá-n nàcuáa càhá<sup>n</sup> ñáiyu, te cuèi ndédani cáa-yu ñ<sup>n</sup>-ni càhá<sup>n</sup>-n ndihí-yu chi ñá túú quide cuendá-n cuèi ná ñáiyu cùu-yu, te càhá<sup>n</sup> ndáá-n nàcuáa càhá<sup>n</sup> Yá Ndiöxí cundecu-o ñúyíu-a. Te cachí tnúhu xii-ndí nùu váha-ni quide-ndí sá cháhu-ndí té Cèsár téé ïo cùnuu cuendá impuèstú ã<sup>n</sup> ñáhá —càchí-güedé xáha<sup>n</sup>-güedé xii-gá.

<sup>15</sup> Dico Jèsús ní cutnùní iní-gá sá xító ndéé ñáhá-güedé xii-gá, núu ní xáha<sup>n</sup>-gá xii-güedé:

—¿Ná cuendá duca<sup>n</sup> xito ndeé ñáhá-ndó xii-í? Chí dánèhé ñáhá xii-í ñ<sup>n</sup> díhú<sup>n</sup> sá cháhu-ndo cuendá impuèstú te núu nása càa —cachí-gá xáha<sup>n</sup>-gá xii-güedé.

<sup>16</sup> Te cue téé-á<sup>n</sup> ñí dánèhé ñáhá-güedé xii-gá ñ<sup>n</sup> díhú<sup>n</sup> sá cháhu-güedé cuendá impuèstú. Te Jèsús ní xáha<sup>n</sup>-gá xii-güedé:

—Chí càchí tnúhu xii-í nùu yoo núu-xi ndéé ndihí yoo diu-xi ndeé —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú tē Cèsár ndéé ndihí diu-dé —càchí-güedé xáha<sup>n</sup>-güedé xii-gá.

<sup>17</sup> Te Jèsús ní xáha<sup>n</sup>-gá xii-güedé:

—Te núu duca<sup>n</sup> te chí nàcuáha té Cèsár sá cúu cuendá-dé, te sá cúu cuendá méé Yá Ndiöxí te xiá<sup>n</sup> nàcuáha-ndo-gá —càchí-gá xáha<sup>n</sup>-gá xii-güedé.

Te cue téé-á<sup>n</sup> ïo ní cuñúhu-güedé sá dúcá<sup>n</sup> ñí cáhá<sup>n</sup>-gá.

### *Cuendá cue ñáiyu ndoto*

(Mt. 22:23-33; Lc. 20:27-40)

<sup>18</sup> Te sátá dúcá<sup>n</sup> te ní quexìo ñ<sup>n</sup> úú cue téé cùu saducéu núu ndécú Jèsús, te cue téé-á<sup>n</sup> ñá túú sàndáá iní-güedé sá ndótó cuè ñáiyu ní xihí, te ní xáha<sup>n</sup>-güedé xii-gá:

<sup>19</sup> —Mèstrú, ndíi Moisés càchí ndíi núu tütú ndíi ndècu vitna sá nùu ñ<sup>n</sup> téé na cùu-dé te quendóo ñadihí-dé, te núu ñá túú ní xòo déhe-dé ndihí ñadihí-dé-á<sup>n</sup>, te téé cùu ñaní-dé naquehe-dé ñaha ní



quendóo quèé-á<sup>n</sup> cuendá coo déhe-dé ndihí-a<sup>n</sup> cuendá téé ní xíhí-á<sup>n</sup>. <sup>20</sup> Te ní xíndecu úsá tnàhá cue téé mee-ní ndí ñaní-güedé. Te téé díhna ní níhí ñadìhí-dé, te ñá túú ní cùdí-dé cundecu-dé chi ní xíhí-dé, te ní ì<sup>n</sup> déhe-dé ñá túú ní xòo ndihí ñadìhí-dé. <sup>21</sup> Te téé cùu uú ní naquehe<sup>n</sup>-dé ñaha ní quendóo quèé-á<sup>n</sup>, dico ní xíhí tucu-dé, te ní ì<sup>n</sup> tucu déhe-dé ñá túú ní xòo ndihí ñaha-á<sup>n</sup>. Te ñu-ni duca<sup>n</sup> ní xíhí téé cùu uní. <sup>22</sup> Te ní xínu ndí ùsá-güedé ní cándeca ñaha-güedé xii ñaha-á<sup>n</sup>, dico ní ì<sup>n</sup>-güedé ñá túú ní xòo déhe-güedé ndihí-a<sup>n</sup>, te ní ndihí-güedé ní xíhí te ndéé núú ní ndihí-ná ní xíhí tnàhá ñadìhí-á<sup>n</sup>. <sup>23</sup> Te na sàá nduu ndòto-güedé ndihí ñaha-á<sup>n</sup>, ¿te ndédacàa-güedé ñadìhí-güedé cuu-a<sup>n</sup>-i? Chi ndí ùsá-güedé ní cándeca ñaha-güedé xii-a<sup>n</sup> —càchí-güedé xàha<sup>n</sup>-güedé xii-gá.

<sup>24</sup> Te Jèsús ní xàha<sup>n</sup>-gá xii-güedé:

—Ní xíta nchòhó tnúhu càhá<sup>n</sup>-ndó, chi ñá túú xíní-ndó nàcuáa càhá<sup>n</sup> Yá Ndiòxí núú tütú-gá, te ní ñá túú xíní-ndó sá díú-gá ndácú-gá quidé-gá nchaandi túhú sá vâha. <sup>25</sup> Te na càchí tnúhu-í xii-ndo sá òré ná sàá nduu ndòto nchaa ñáyíu ní xíhí, te dàvâ-á<sup>n</sup> vâ yòo-gá dasa<sup>n</sup> dèhe yoco-xi chi vá yòo-gá candeca tnàha, chi na ndòtó-yu te cuu-ná-yu dàtná cue espíritú xínu cuèchi núú Yá Ndiòxí. <sup>26</sup> Te núu nchòhó cuíní-ndó càhá<sup>n</sup>-ndó cuendá nchaa ñáyíu ndoto, te díhna-gá dacuàha-ndo nacuáa ní chídó tnùní ndí Moisés núú tütú ndí ni cùu. Chi ñu núú tütú ndí càhá<sup>n</sup>-xí nàcuáa ní xàha<sup>n</sup> Yá Ndiòxí xii ndí cùtnàhá ní càhá<sup>n</sup> ndihí ñaha-gá ì<sup>n</sup> xichi núú níhnú tnùtaú nchìcú<sup>n</sup> ñuhú. Te duha ní xàha<sup>n</sup>-gá xii ndí: “Yúhú cùu-í Ndiòxí tē Àbrahám, ndihí té Isàác, ndihí té Jàcób”, duha ní xàha<sup>n</sup> Yá Ndiòxí xii ndí càchí-xi núú tütú ndí. <sup>27</sup> Te Yá Ndiòxí ñá túú cùu-gá Ndiòxí cue ñáyíu ní xíhí, chi cùu-gá Ndiòxí cue ñáyíu xíndecu vívú, núu xíá<sup>n</sup> nchòhó ío xíta-ndo tnúhu càhá<sup>n</sup>-ndó. Te sá dúcá<sup>n</sup> ní càhá<sup>n</sup>-gá cuendá cue téé-á<sup>n</sup>, te xíá<sup>n</sup> cùtnùní sá cuèi ní xíhí-güedé sá cùu-xí tnàha ñáyíu-güedé, dico ndècu

vívú-güedé sá cùu-xí-gá —càchí-gá xàha<sup>n</sup>-gá xii-güedé.

*Tnúhu sá ìo-gá cùnùu*  
(Mt. 22:34-40)

<sup>28</sup> Te tnàhá ì<sup>n</sup> téé dàcuaha ñaha xii ñáyíu nchaa tnúhu ní chídó tnùní ndí Moisés ndédóho-dé nchaa tnúhu càhá<sup>n</sup> Jèsús ndihí cue téé cùu saducéu-á<sup>n</sup>, te ndédóho-dé sá sùúní vâha níhí-gá tnúhu nàdanchocáva-gá. Te ní sàndehe yatni-dé núú-gá, te xàha<sup>n</sup>-dè xii-gá:

—Cachí tnúhu xii-í ndédacàa tnúhu sá ní càhá<sup>n</sup> Yá Ndiòxí ío-gá cùnùu cuu díhna —càchí-dé xàha<sup>n</sup>-dè xii-gá.

<sup>29</sup> Te Jèsús ní xàha<sup>n</sup>-gá xii-dé:

—Duha càhá<sup>n</sup> tnúhu sá ìo-gá cùnùu: “Nchòhó ñáyíu isràèl ío váha chí cùndédóho tnúhu-a. ì<sup>n</sup>ndí díí-ni Yá Ndiòxí ndécú, te ñu-ni-gá cùu-gá Ndiòxí-ó. <sup>30</sup> Te cuu iní-ndó Dütú Ndiòxí Yá cùu Ndiòxí-ndó ní yuhu ní iní-ndó, te caní iní-ndó càda-ndo datná cuíní mée-gá, te mee-ni tnúhu váha caní iní-ndó cuendá cuu víi cuu váha-ndo núú-gá, te coo iní-ndó càda-ndo nacuáa cuu váha iní-gá”, duha càhá<sup>n</sup> tnúhu sá ìo-gá cùnùu. <sup>31</sup> Te duha càhá<sup>n</sup> tucu ñngá tnúhu cùu uú sá ìo cùnùu: “Cuu iní-ndó tnàha ñáyíu-ndo dàtná cùu iní-ndó mée-ndo”, duha càhá<sup>n</sup> tnúhu cùu uú-á<sup>n</sup>. Te úú duha-ni tnúhu-a cùu-xí tnúhu sá ìo-gá cùnùu —cachí-gá xàha<sup>n</sup>-gá xii-dé.

<sup>32</sup> Te téé dàcuaha ñaha xii ñáyíu nchaa tnúhu ní chídó tnùní ndí Moisés ní xàha<sup>n</sup>-dè xii-gá:

—Mèstrú, váha-ni càhá<sup>n</sup>-n chi ndáá sá ì<sup>n</sup>ndii-ni Yá Ndiòxí ndécú, te ñá túú-gá ndéé ndécú ñngá ndiòxí. <sup>33</sup> Te dàtná ní cachí-n sá ní yuhu ní iní-ó cùu iní-ó Yá Ndiòxí, te caní iní-ó càda-o nacuáa cuu víi cuu váha iní-gá te ío víi ío váha cuu iní-ó dàtná cuíní mée-gá, te coo iní-ó càda-o nacuáa cuu váha iní-gá, te cuu iní-ó cue tnàha ñáyíu-o dàtná cùu iní-ó mée-o. Te nchaa xíá<sup>n</sup> ío-gá xíní ñuhu-xi cada-o dacúxí sá cuáñaha-o quèti cahni-güedé te cáyú-di nduu táhú ñáhá Yá Ndiòxí, ndihí dàcúxí nchàa

dava-gá sá sãñaha-o ndùu táhú-gã —  
càchí-dé xãha<sup>n</sup>-dẽ xii-gá.

<sup>34</sup> Te sá dúcá<sup>n</sup> ìo váha ndùu tnúhu ní  
cáhá<sup>n</sup> téé-á<sup>n</sup>, núu ní xáha<sup>n</sup> Jèsús xii-dé:

—Luha-ná cúmãní xii-n te ndíhu  
ndaha ñaha Yá Ndiõxí —càchí-gá  
xãha<sup>n</sup>-gã xii-dé.

Te sá dúcá<sup>n</sup> ñí xáha<sup>n</sup>-gã xii téé-á<sup>n</sup>,  
núu vá yõo ñ<sup>n</sup>-gá ní cùy<sup>ñ</sup> nágá tnúhu  
nducu tnúhu-yu núú-gã.

*Yoo cùu Xítóhó Jesucristú*  
(Mt. 22:41-46; Lc. 20:41-44)

<sup>35</sup> Te Jèsús yíhí-gã xití veñúhu  
càhnu sá ìo cùnnoo danehé-gá ñáyi, te  
xãha<sup>n</sup>-gã xii-yu:

—Cue téé dàcuaha ñaha xii ñáyi  
nchaá tnúhu ní chídó tnùní ndí  
Moisés càchí-güedé sá Cristú Yaá  
tendaha Yá Ndiõxí quixi ñuyíú-a  
cùu-gá déhe ndí Dàví, te ndí-á<sup>n</sup> ñí  
cunaha vìhi ní xíhí ndí. ¿Te ná cuendá  
duca<sup>n</sup> cáhá<sup>n</sup>-güedé? <sup>36</sup> Te mee ndí  
Dàví-á<sup>n</sup> ñí dácáhu ìní ñáhá Espiritú  
Yá Ndiõxí xii ndí nàcuáa cáhá<sup>n</sup> ndí,  
te duha ní cachí ndí:

Dútú Ndiõxí ní xáha<sup>n</sup>-gã xii Yaá cúu  
Xítóhó-í:

“Ngóo xio cùha-í,  
te yúhú cada-í te nchaá sá cúu ùhú ìní  
ñáhá xii-n canehé-xi sá yíñùhu  
núú-n.”

Duha ní xáha<sup>n</sup> Dútú Ndiõxí xii Yaá cúu  
Xítóhó-í.

Duha ní cachí ndí. <sup>37</sup> ¿Te nása cùu  
Cristú déhe ndí Dàví, te mee ndí ní  
cachí ndí sá cúu-gã Xítóhó ndí? —  
càchí Jèsús xãha<sup>n</sup>-gã xii-yu.

Te ìo cuéhé ñáyi ní xíndedóho  
nchaá tnúhu ní cáhá<sup>n</sup>-gá, te ìo ní cudí  
ìní-yu ní xíndedóho ñáhá-yu xii-gá.

*Jèsús cáhá<sup>n</sup>-gá cuendá cue téé*  
*dàcuaha ñaha xii ñáyi nchaá tnúhu ní*  
*chídó tnùní ndí Moisés*

(Mt. 23:1-36; Lc. 11:37-54; 20:45-  
47)

<sup>38</sup> Te òré dánèhé ñáhá Jèsús xii cue  
ñáyi, te xãha<sup>n</sup>-gã xii-yu:

—Cada cuendá-ndó vã cáda-ndó  
dàtná quidé cué téé dàcuaha ñaha xii  
ñáyi nchaá tnúhu ní chídó tnùní ndí  
Moisés, chi cue téé-á<sup>n</sup> tnàhá ìní-güedé  
cuihnu-güedé dóo nání sã sácuihnu

cue téé cùnnoo-gá te cuíní-güedé sá  
mée-ní ndíhí tnúhu yíñùhu cáhá<sup>n</sup>  
ndíhí ñaha ñáyi xii-güedé nchaá núu  
xícá cùu-güedé. <sup>39</sup> Te nàcáxi-güedé  
xilé sácóo nchihi cue téé cùnnoo-gá  
xití veñúhu sácóo nchihi-güedé.  
Te duca<sup>n</sup>-ni quíde-güedé cuéi òré  
quíhu-güedé mèsá caxi-güedé òré  
ndécú-güedé ñí vico, chi mee-ni  
núú sácóo cue téé cùnnoo cuíní-güedé  
coo-güedé. <sup>40</sup> Te quèndeé-güedé vehe  
nchaá ñáyi quèé, te ìo naha cáhá<sup>n</sup>  
ndíhí-güedé Yá Ndiõxí dándahú-güedé  
mée-güedé sá ìo quíde ndáá-güedé  
cuendá sá cuíní-güedé cáhá<sup>n</sup> váha  
ñáyi cuendá-güedé. Te sá dúcá<sup>n</sup>  
quíde-güedé te ìo-gá ndoho-güedé núu  
ùhú núu ndàhú dácúxí dàva-gá ñáyi  
—càchí-gá xãha<sup>n</sup>-gã xii-yu.

*Díhú<sup>n</sup> nduu táhú Yá Ndiõxí ní dáquëe*  
*ñí ñaha ndàhú ñaha quèé*  
(Lc. 21:1-4)

<sup>41</sup> Te núcóo Jèsús xití veñúhu yatni  
núu ndécú àlcançiá te ndèhe-gá  
xidáquëe ñáyi díhú<sup>n</sup> xití àlcançiá-á<sup>n</sup>,  
te tnàhá cue ñáyi cuica xidáquëe-yu  
vài díhú<sup>n</sup>. <sup>42</sup> Te ní quexìo ñí ñaha  
ndahú ñaha quèé, te ndèhe-gá ní  
dáquëe-a<sup>n</sup> úú tnàhá díhú<sup>n</sup> còbrí xití  
àlcançiá, te díhú<sup>n</sup>-á<sup>n</sup> ìo sacú yáhu-xi.  
<sup>43</sup> Te Jèsús ní cana-gá cue téé xica cuu  
ndíhí-gá, te ní xáha<sup>n</sup>-gã xii-güedé:

—Na càchí tnúhu ndáá-í xii-ndo sã  
ñaha ndahú ñaha quèé-a ìo-gá nándíhí  
díhú<sup>n</sup> ñí dáquëe-a<sup>n</sup> xití àlcançiá  
dácúxí díhú<sup>n</sup> ñí dáquëe dava-gá-yu.  
<sup>44</sup> Chi nchaá ñáyi-á<sup>n</sup> ñí dáquëe-yu  
mee-nã díhú<sup>n</sup> sã ñí quendóo-ná, dico  
ñaha quèé-a cuéi ndàhú-a<sup>n</sup> dico ní  
dáquëe-a<sup>n</sup> ñíhí díhú<sup>n</sup> sã cuáá<sup>n</sup> sã  
cáxi-á<sup>n</sup> ní cùu —cachí-gá xãha<sup>n</sup>-gã  
xii-güedé.

## 13

*Jèsús càchí-gá sá ngóyó veñúhu*  
(Mt. 24:1-2; Lc. 21:5-6)

<sup>1</sup> Te òré ní ndee Jèsús xití veñúhu  
càhnu sá ìo cùnnoo, te ñí téé xica cuu  
ndíhí-gá ní xáha<sup>n</sup>-dẽ xii-gá:

—¡Mèstrú, cundehe nã ío vii ní sáá veñúhu-a<sup>n</sup> ndihí nchaa vehe nèhe tnaha ndihí-xi, te ío vii ndãa nchaa yúú yíhí! —càchí-dé xãha<sup>n</sup>-dë xii-gá.

<sup>2</sup> Te Jèsús ní xãha<sup>n</sup>-gã xii-dé:

—Nchaa nãcuáa càa nchaa vehe sá cùñúhu-n-a vitna sáá nduu te vá cùndúu-gá-xi dàtná cáá-xí vitna, chi ní ì<sup>n</sup>-gá yúú vã códó nchihí tnaha-xi, chi ndihí ngoyo —càchí-gá xãha<sup>n</sup>-gã xii-dé.

*Nàcuáa cada-xi nduu ta cùyatni naa ñuyúú*

(Mt. 24:3-28; Lc. 21:7-24; 17:22-24)

<sup>3</sup> Te Jèsús ní xica-gá ndihí cue téé xica cuu ndihí-gá cuáhá<sup>n</sup> ndihí ñaha-gã xii-güedé yucu nãni Olívú, te yucu Òlívú-á<sup>n</sup> túu ndáá núú cáá veñúhu càhnu sá ío cùnuu. Te Jèsús ní quexìo-gá ndihí-güedé yucu Òlívú-á<sup>n</sup>, te xía<sup>n</sup> ní ngóo-gá te núú núcõo-gá-á<sup>n</sup> ní sáhá<sup>n</sup> té Pèlú ndihí té Jàcobó ndihí té Juàá ndihí té Ndríxí, te dayuhu ní xãha<sup>n</sup>-güedé xii-gá:

<sup>4</sup> —Cuìní-ndí cachí tnúhu-n nã nduu dùca<sup>n</sup> cada-xi ngoyo veñúhu càhnu sá ío cùnuu, àdi nãndí cùu sá cádá-xí cuendá cutnùnì iní-ndí sá sã ta cuyatni nduu duca<sup>n</sup> cada-xi —cachí-güedé xãha<sup>n</sup>-güedé xii-gá.

<sup>5</sup> Te Jèsús ní xãha<sup>n</sup>-gã xii-güedé:

—Ío quíhi iní-ndó cùndecu-ndo cuendá sã vã yõo dandàhú ñáhá xii-ndo. <sup>6</sup> Chi ío cuéhé cue téé coo ñuyúú te danãni-güedé méé-güedé dàtná nãni-í, te cachí-güedé: “Yúhú cùu-í Crístú Yaa ní tendaha Yã Ndiõxí véxi ñuyúú-a”, duha cachí-güedé. Te sã dúcá<sup>n</sup> cãhá<sup>n</sup>-güedé te ío vai ñáyiu dandàhú-güedé.

<sup>7</sup> Te òré ná nihí-ndó tnúhu sã nãá-güedé ndèni ní cuu, te vá yuhú-ndó chi dacuítí sã dúcá<sup>n</sup> càda-xi, dico vátá sãá-gá nduu nãa ñuyúú òré duca<sup>n</sup> càda-xi. <sup>8</sup> Chi cue téé ì<sup>n</sup> nãció<sup>n</sup> nãá-güedé ndihí cue téé ingá nãció<sup>n</sup>, te titní ñuu ngüíta-güedé nãá-güedé, te titní xichi ñuyúú ñihí vñhi tnáa, te titní tucu xichi ñuyúú coo tnamá, te ío-gá cuéhé sã yãha ñáyiu. Te nchaa sã dúcá<sup>n</sup> càda-xi-á<sup>n</sup>

cúu-xí tnũndòho sã vitná vãha váha quèsaha-xi sácúu-xí cuè ñáyiu ndècu ñuyúú-a.

<sup>9</sup> 'Dico nchòhó ío quíhi iní-ndó cùndecu-ndo, chi nchaa ñáyiu na cùu úhú iní ñáhá xii-ndo cuáha cuendá ñáhã-yu xii dava-ndo núú cuè téé cùchiu<sup>n</sup>, te candeca ñaha-güedé xii-ndo quíhí<sup>n</sup> xití veñúhu-güedé, te yacá<sup>n</sup> caniha-güedé xii-ndo. Te quíhí<sup>n</sup>-ndó núú cuè téé yìndaha nació<sup>n</sup> àdi núú dàva-gá cue téé cùnuu sã cuendá-í, te nchòhó nihí-ndó nãcuáa cada-ndo cãhá<sup>n</sup> váha-ndo cuendá-í núú-güedé. <sup>10</sup> Te cùmání-gã sáá nduu nãa ñuyúú-a te sa cuténuu tnúhu-í ní càa xico ñuyúú-a, te tnúhu-á<sup>n</sup> cãhá<sup>n</sup>-xi nãcuáa naníhí tãhú ñáyiu. <sup>11</sup> Te òré ná càndeca ñaha ñáyiu xii-ndo quíhí<sup>n</sup> núú cuè téé cùchiu<sup>n</sup> cuáha cuendá ñáhã-yu, te òré vátá sãá-gá-ndó núú-güedé te vá cánì iní-ndó núu nãsa cunduu tnúhu cúñaha-ndo xii-güedé. Chi òré-nã te Yã Ndiõxí dacàhu iní ñáhã-gã xii-ndo nãsa cunduu tnúhu cúñaha-ndo xii-güedé, te ñu-ni tnúhu sã dacàhu iní ñáhã-gã-á<sup>n</sup> cùñaha-ndo xii-güedé. Te ñá díú mèe-ndo cãhá<sup>n</sup>-ndó chi Espiritú Yã Ndiõxí cãhá<sup>n</sup>-xi yuhu-ndo. <sup>12</sup> Te dava cue téé cuáha cuendá-güedé ñani-güedé núú cuè téé cùchiu<sup>n</sup> cuendá cãhni ñaha-güedé. Te dava cue téé cùu tátá ñu-ni duca<sup>n</sup> càda-güedé cuáha cuendá-güedé déhe-güedé núú cuè téé cùchiu<sup>n</sup>. Te dava cue téé cùu déhe cuu úhú iní-güedé tátá-güedé ndihí nãná-güedé, te cuáha cuendá ñáhã-güedé xií-yu núú cuè téé cùchiu<sup>n</sup> cuendá cãhni ñaha-güedé xií-yu. <sup>13</sup> Te ío cuéhé ñáyiu cuu úhú iní ñáhã-yu xii-ndo sã cuendá-í, dico nchaa nchòhó ñáyiu na càda ndee-ni iní canchicú<sup>n</sup> nihnu ñaha-ni xii-í te naníhí tãhú-ndó.

<sup>14</sup> 'Te ndíi Dániél téé ní xóo cãhá<sup>n</sup> tnúhu Yã Ndiõxí ndéé sanaha ní chídó tnùnì ndíi núú tütú ndíi cuendá ì<sup>n</sup> sã dáquèe tíhú Yã Ndiõxí cundecu ì<sup>n</sup> xichi núú ñà túú tàú-xi cundecu-xi, te xía<sup>n</sup> cada-xi sã vã cùndècu-gá ní ì<sup>n</sup> ñáyiu xía<sup>n</sup>. Te cada cuendá váha-ndo

nàcuáa ní cáhá<sup>n</sup> ndíi, chi nduu na quíní-ndó xǎ<sup>n</sup> cundecu-xi ì<sup>n</sup> xichi núú ñà túú tàú-xi cundecu-xi, te dàvá-á<sup>n</sup> nchaa ñáyiú xǎndecu distritú Jùdeá xíní ñùhu-xi cunú-yu quíhí<sup>n</sup>-yu xití yucu. <sup>15</sup> Te nchaa ñáyiú ndáa ndódó dìquí véhé-xí vǎ ndíhu-gá-yu vehé-yu quehé<sup>n</sup>-yu ì<sup>n</sup> ndachìú<sup>n</sup>-yu canehé-yu quíhí<sup>n</sup>. <sup>16</sup> Te nchaa ñáyiú cuáhá<sup>n</sup> yucu ni vǎ nùhú-gá-yu vehé-yu cúnúquehé<sup>n</sup>-yu dóó-yu. <sup>17</sup> Te ndàhú ní cuu nchaa ñáyiú dìhí ñùhú dèhe-xi, ndíhi cue ñáyiú dìhí xǎndeca déhe vitna sàdi na saá nduu dùca<sup>n</sup> cada-xi! <sup>18</sup> Te nchòhó ío chí càcá<sup>n</sup> táhú núú Yǎ Ndióxi cuèndá sǎ vǎ dúcá<sup>n</sup> ndòho-ndo yóó quidé víxi<sup>n</sup>-xi. <sup>19</sup> Chi dàvá-á<sup>n</sup> coo tnúndòho cahnu vihi ñuyíú, te vátá ì<sup>n</sup> ndúu-gá coo tnúndòho cahnu vihi-á<sup>n</sup> ndéé cùtnàhá ní cadúha Yǎ Ndióxi ñuyíú, chi ñu-ni dàvá-á<sup>n</sup> coo tnúndòho cahnu vihi-á<sup>n</sup>, te ni núú cuáhá<sup>n</sup> núú véxi vǎ cóo-gǎ tnúndòho-á<sup>n</sup>. <sup>20</sup> Te Yǎ Ndióxi càchí-gǎ sǎ vǎ ío vǎi nduu coo tnúndòho cahnu vihi-á<sup>n</sup> ñuyíú sǎ cuèndá nchaa ñáyiú ní cáhá<sup>n</sup>-gǎ cundecu ndíhi-gǎ. Te núú vǎi nduu na coo tnúndòho-á<sup>n</sup>, te vǎ yóo cácu nihnu.

<sup>21</sup> Te dàvá-á<sup>n</sup> cǎñaha ñáyiú xii-ndo: “Chí cùndèhe iha, chi iha ní quexìo Cristú Yaá ní tendaha Yǎ Ndióxi véxi ñuyíú-a”, duha cǎñahá-yu xii-ndo. Àdi quesahá-yu: “Chí cùndèhe yacá<sup>n</sup> chí yacá<sup>n</sup> ndécú-gǎ”, quesahá-yu. Te vǎ quèndáá iní-ndó tnúhu càhá<sup>n</sup>-yu. <sup>22</sup> Te coo cue tée danàni-güedé méé-güedé dàtná nánì-í te cachí-güedé sǎ cúu-güedé Yaá ní tendaha Yǎ Ndióxi véxi ñuyíú-a. Te dava-güedé cachí-güedé sǎ cúu-güedé cue tée càhá<sup>n</sup> tnúhu Yǎ Ndióxi dico ñá ndáá sǎ cúu-güedé cue tée càhá<sup>n</sup> tnúhu-gǎ, te cada-güedé tǎtní núú sǎ vǎ yóo tnàhí ndàcu cada cuèndá dandàhú-güedé ñáyiú, te caní iní-güedé dandàhú-güedé ndéé cue ñáyiú ní cáhá<sup>n</sup> Yǎ Ndióxi cundecu ndíhi-gǎ. <sup>23</sup> Te vitna ío vǎha cuáha-ndo cuèndá, te quíhi iní-ndó cundecu-ndo, chi nchaa sa ní dátùha ñaha-í xii-ndo.

*Nàcuáa cada-xi òré quixi tucu Tée cùu ñaní tnàhá nchaa ñáyiú*

(Mt. 24:29-35,42-44; Lc. 21:25-36)

<sup>24</sup> Te nà yáha-ni coo tnúndòho cahnu vihi-á<sup>n</sup>, te vǎ dáyèhé-gǎ nchíanchii te ni vǎ dáyèhé-gǎ yóó. <sup>25</sup> Te ngoyo nchaa chódíní ndéé andíu, te quidi-xi andíu. <sup>26</sup> Te dàvá-á<sup>n</sup> quíní ñáhá nchaa ñáyiú xii yúhú Tée cùu ñaní tnàhá-yu ncháa-yu quee-í andíu quixi-í ichi xití vícò, te quíní-yu sǎ ío càhnu cuu-í, te quide-í nchaa sǎ vǎha. <sup>27</sup> Te tendaha-í cue espíritú xínú cuèchi núú-í quíhí<sup>n</sup>-xi nadatàcá-xi nchaa ñáyiú ní cáhá<sup>n</sup>-í chitnahá ñáhá xii-í xǎndecu ni càa xico ñuyíú.

<sup>28</sup> Te cundehe-ndo nàcuáa quide yutnu ngúxí, chi yutnu-á<sup>n</sup> ndúú yùte núú dìté-xi te nàtahú ndaha-xi, te òré duca<sup>n</sup> quide-xi te càchí-ndó sǎ sǎ ní cuyatni nuu cahni. <sup>29</sup> Te duca<sup>n</sup> sǎtnahá-xi cada-xi òré ná quíní-ndó càda-xi nchaa nacúáa ní cáhá<sup>n</sup>-í, te cutnúní iní-ndó sǎ sǎ ní cuyatni vii-nǎ nduu nàa ñuyíú. <sup>30</sup> Te na càchí tnúhu ndáá-í xii-ndo sǎ òré vátá cùú-gǎ cue ñáyiú xǎndecu ñuyíú-a vitna, te cada-xi nchaa nàcuáa ní cáhá<sup>n</sup>-í. <sup>31</sup> Te andíu ndíhi ñuyíú-a chí ndíhi nihnu-xi, dico tnúhu-í chí vǎ ndíhí nihnu-xi chí cùu-xi tnúhu ndáá.

<sup>32</sup> Dico ñá túú cùtnuní ná nduu quixi tucu-í, te ni ñà túú cùtnuní ná òré chí vǎ yóo xíní, te ni cuè espíritú xínú cuèchi núú Yǎ Ndióxi ñá túú xíní-xi ná nduu quixi-í, te ni mèe yúhú tée cùu Déhe Dútú Ndióxi ñá túú xíní-í ná nduu quixi tucu-í, chí ì<sup>n</sup> dìí-ni mee Tǎtà-í Dútú Ndióxi xíní-gǎ núu ná nduu quixi-í.

<sup>33</sup> Te nchòhó xíní ñùhu-xi sǎ ío quíhi iní-ndó cundecu-ndo, te cáhá<sup>n</sup> ndíhi-ndo Yǎ Ndióxi, chí ñá túú xíní-ndó nǎ nduu quixi tucu-í. <sup>34</sup> Te na càchí tnúhu-í xii-ndo cuèndá ì<sup>n</sup> tée cuíní quíngaca cuu xica. Te tée-á<sup>n</sup> cùmání-gǎ quee-dé vehe-dé te ní xáha<sup>n</sup>-dǎ xii cue tée xínu cuechi núú-dǎ sǎ ná cáda cuèndá-güedé vehe-dé. Te ní sǎñaha-dǎ xii-güedé ndí dǎñú-núú-güedé chiu<sup>n</sup> cada-güedé. Te ní xáha<sup>n</sup>-dǎ xii tée ndéé yuyèhe



sá ná cùndecu túha-ni-dé yuyèhe ndéé nàsáá-dé. <sup>35</sup> Te duha ndùu tñúhu càhá<sup>n</sup>-í cuèndá nchòhó cundecu túha-ndo, chi ñá túú xini-ndó nã nduu te ni ñá túú xini-ndó nã òré quixi tucu yúhú Yaá cúú Xitohó-ndó, núu òré sa ní cundiqui<sup>n</sup>, àdi dava niú, àdi oré sa ní cana uu<sup>n</sup> líhi, àdi oré sa ta cùditó cuáhá<sup>n</sup>, núu xíá<sup>n</sup> ío chí cùndècu túha. <sup>36</sup> Te duha càhá<sup>n</sup>-í chi na cuáhá<sup>n</sup> òré ñá túú nã yíhí iní-ndó quèxio-í, te ñá túú ndècu túha-ndo. <sup>37</sup> Te dàtná-ni xáha<sup>n</sup>-í xii nchòhó sá cùndècu túha-ndo, te ñu-ni duca<sup>n</sup> xáha<sup>n</sup>-í xii nchaa dava-gá ñá yiu sá cùndècu túha-yu —càchí-gá xáha<sup>n</sup>-gã xii-güedé.

## 14

*Ndùcu-güedé nàcuáa cada-güedé cahni-güedé Jèsús*

(Mt. 26:1-5; Lc. 22:1-2; Jn. 11:45-53)

<sup>1</sup> Te cùmání ùú-gá nduu te quesaha vico pascuá, vico xèxi ñá yiu pàá sá ñá túú yíhi levadurá. Te cue dútú cùnùu, ndihí cue téé dàcuaha ñaha xii ñá yiu nchaa tñúhu ní chídó tñùní ndíi Moisés ndúcú-güedé nàcuáa cada-güedé dandàhú-güedé Jèsús cuèndá tñi ñaha-güedé xii-gá te cahni ñaha-güedé. <sup>2</sup> Te ní xitnàha-güedé:

—Váha-gá sá vã tñí-ó Jèsús mei ndùu vico, chi núu duca<sup>n</sup> na càda-o te ío dusa<sup>n</sup> càda ñá yiu —càchí-güedé xitnàha-güedé.

*Íñ ñadìhí chíhí-á àcítí díquí Jèsús*  
(Mt. 26:6-13; Jn. 12:1-8)

<sup>3</sup> Te Jèsús ndécú-gã ñuú Bètaniá vehe ñi<sup>n</sup> téé nàni Xímú, téé ní tnahá cuéhé sã dátèhyú nihnu-xi yiqui cùñú-ó. Te yíhi Jèsús mèsá xéxi-gã ní quexìo ñi<sup>n</sup> ñadìhí néhé-á<sup>n</sup> ñi<sup>n</sup> sá ñi cuáha yúú vãha yúú nání àlabastrú, te xití xíá<sup>n</sup> ñúhú àcítí sáhá<sup>n</sup> tñámí sã nání nãrdú sá ío ndèyáhu, te ní táhú-á<sup>n</sup> xíá<sup>n</sup> te acítí ñúhú xití-xi-á<sup>n</sup> ñi sódó-a<sup>n</sup> díquí Jèsús. <sup>4</sup> Te ñi<sup>n</sup> ùú cue téé xindècu-á<sup>n</sup> ñi cudéé<sup>n</sup>-güedé sá dúcá<sup>n</sup> ñi quide-a<sup>n</sup>, te ní xitnàha-güedé:

—Ñá túú quide váha ñaha-á<sup>n</sup> dàcá<sup>n</sup> quidé-á<sup>n</sup>, chí íi ñi dácuíta-a<sup>n</sup> acítí

váha-á<sup>n</sup>. <sup>5</sup> Chi váha-gá ñuú cuyáhu acítí-á<sup>n</sup> sá ùní cièndú díhú<sup>n</sup> denàriú, te díhú<sup>n</sup> sã cùyáhu acítí-á<sup>n</sup> cuu cuèndá ñá yiu ndàhú ní cùu —cachí-güedé xitnàha-güedé.

Te ní tenáa-güedé ñaha-á<sup>n</sup> sã dúcá<sup>n</sup> ñi quide-a<sup>n</sup>.

<sup>6</sup> Te Jèsús ní xáha<sup>n</sup>-gã xii-güedé:

—Chí dáñá, vá dásatú-ndó ñi ñadìhí-a, chí sá ñi quide ñaha-a<sup>n</sup> xii-í cúú-xi ñi<sup>n</sup> sá vãha. <sup>7</sup> Chi cue ñá yiu ndàhú duca<sup>n</sup>-ni cùtnahá ñá yiu-á<sup>n</sup> tnuú-ndó, te nání òré càchí iní-ndó te chindee-ndó-yu. Dico yúhú chí vá ncháá ndùu cundecu ndihí ñaha-í xii-ndo ñu yíu-a. <sup>8</sup> Te ñadìhí-a ní quide-a<sup>n</sup> ñi<sup>n</sup> sá vãha ndéé není ní ndacu-a<sup>n</sup>, chí sá dúhá ñi quide ñaha-a<sup>n</sup> xii-í ní chíhi ñaha-a<sup>n</sup> àcítí, te xíá<sup>n</sup> cada iní-ndó sã sã quide túha-a<sup>n</sup> yiqui cùñú-í cuèndá quíndúxi-xi. <sup>9</sup> Te na càchí tñúhu ndáá-í xii-ndo sã ndèni ní cuu ñihí ñu yíu ná càhá<sup>n</sup> ñá yiu tñúhu-í, te càhá<sup>n</sup>-yu tnahá cuèndá ñadìhí-a cuèndá quini nchaa ñá yiu nàcuáa ní quide-a<sup>n</sup>, te duca<sup>n</sup> vã nàcuánaá-yu —càchí-gá xáha<sup>n</sup>-gã xii-güedé.

*Té Jùdás ndúcú-dé nàcuáa cada-dé cuáha cuèndá-dé Jèsús núu cuè téé cùu úhú iní ñáhá xii-gá*

(Mt. 26:14-16; Lc. 22:3-6)

<sup>10</sup> Te té Jùdás Iscarioté ní sáhá<sup>n</sup>-dé ní ndatnúhu-dé ndihí cue téé cùu dútú cùnùu sá cuáha cuèndá-dé Jèsús núu-güedé, te núu tnahá té Jùdás-á<sup>n</sup> cúú ùxúú tnahá cue téé xica cuu ndihí-gá ní cùu. <sup>11</sup> Te òré duca<sup>n</sup> ñi ndatnúhu-dé ndihí-güedé, te ío ní cudí iní-güedé, te ní xáha<sup>n</sup>-güedé xii-dé sá cuáñaha-güedé díhú<sup>n</sup> xii-dé. Te té Jùdás-á<sup>n</sup> ñi ngüíta-dé ndúcú-dé nàcuáa cada-dé cuáha cuèndá-dé Jèsús núu-güedé.

*Cùdini Jèsús ndihí cue téé xica cuu ndihí-gá*

(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup> Te ní sáá nduu ñi quesaha vico pascuá, vico ñá túú xèxi ñá yiu pàá sá ñá túú yíhi levadurá, te ñu-ni nduu-á<sup>n</sup> sáhní-güedé ñi<sup>n</sup> mbéé líhli

xèxi-yu nduu vico pascuá-án. Te cue téé xica cuu ndihi Jesús ní xicá<sup>n</sup> tnúhú-güedé núú-gă, te xăha<sup>n</sup>-güedé xii-gá:

—Mèstrú, véxi-ndí xicá<sup>n</sup> tnúhú-ndí núú-n núu ndèé cáá vèhe cuiní-n cada túha-ndí sá cúdini-o sacuaa nduu vico pascuá —càchí-güedé xăha<sup>n</sup>-güedé xii-gá.

13 Te Jèsús ní xăha<sup>n</sup>-gă xii úú-ni tnàhá cue téé xica cuu ndihi-gá:

—Chí cuàhá<sup>n</sup> xití ñuú-ă<sup>n</sup>, te yacá<sup>n</sup> naníhí-ndó ì<sup>n</sup> téé tànehe yóó ndute, te téé-á<sup>n</sup> cándëndaha-ndo-dě quíhí<sup>n</sup>.

14 Te núu ndédacàa vehe na ndihu-dé te xía<sup>n</sup> quíhu-ndo. Te cúñaha-ndo xii xítóhó vehe-á<sup>n</sup>: “Yaá cúú Mèstrú càchí-gá sá núu ndédacàa xichi xití vehe-n cuñaha núu-n xii-gá cudini-gá ndihi cue téé xica cuu ndihi-gá sacuaa nduu pascuá”, duha cúñaha-ndo.

15 Te dătnúni danèhé ñáhá-dě xii-ndo ì<sup>n</sup> quartú cáhnú cāa núú ñinu, chi vehe yodo tnaha cuu-xi, te sa ní quide túha-dé nchaa sá nándíhi, te nchòhó dícó-nă comidá cada túha-ndo cúdini-o —cachí-gá xăha<sup>n</sup>-gă xii-güedé.

16 Te cue téé-á<sup>n</sup> ñi xica-güedé cuáhá<sup>n</sup>-güedé xití ñuú-á<sup>n</sup>, te nchaa-ni năcuáa ní xăha<sup>n</sup> Jèsús ní cuu. Te ní quide túha-güedé sá cúdini-güedé ndihi-gá sacuaa nduu vico pascuá-án.

17 Te sátá ñi cundiqui<sup>n</sup> te ní quexio Jesús ndihi ndi úxúú cue téé xica cuu ndihi-gá. 18 Te cuánguihu-gá mèsá ndihi-güedé cuëndá cudini ndihi ñaha-gá xii-güedé, te òré yíhí-gă mèsá ndihi-güedé, te xăha<sup>n</sup>-gă xii-güedé:

—Na càchí tnúhu ndáá-í xii-ndo să ì<sup>n</sup> nchòhó cue téé xèxi ndihi ñaha xii-í cuáha cuëndá ñáhá-ndó núú cuè téé cùu úhú iní ñáhá xii-í —càchí-gá xăha<sup>n</sup>-gă xii-güedé.

19 Te sá dúcá<sup>n</sup> ñi xăha<sup>n</sup>-gă xii-güedé, te nchaa-güedé ní ngúita-güedé cundiyí-güedé. Te da ì<sup>n</sup> da ì<sup>n</sup>-güedé ní ngúita-güedé xicá<sup>n</sup> tnúhú-güedé núú-gă, te xăha<sup>n</sup>-güedé xii-gá:

—¿Ñá díú yúhú duca<sup>n</sup> sàni iní-n cada-í-u? —càchí-güedé xăha<sup>n</sup>-güedé xii-gá.

20 Te Jèsús ní xăha<sup>n</sup>-gă xii-güedé:

—Diu-ni ì<sup>n</sup> nchòhó cue téé úxúú xicá cùu ndihi-í, téé na dàquëndaha còhó òré daquëndaha-í, téé-á<sup>n</sup> cuáha cuëndá ñáhá-dě xii-í núú cuè téé cùu úhú iní ñáhá. 21 Te yúhú Téé cùu ñaní tnáhá-ndó nchàa-ndo ñuhu ichi-í cuáhá<sup>n</sup>-í ndoho-í năcuáa càhá<sup>n</sup>-xi núú tütú Yă Ndiòxí. Dico ndàhú ní cuu téé duca<sup>n</sup> na cuáha cuëndá ñáhá xii-í núú cuè téé cùu úhú iní ñáhá, chí váha-gá sá vă cacú tēe-á<sup>n</sup> cundecu-dé ní cùu, te ñá díú să ñi cacu-dé te duca<sup>n</sup> cada-dé —càchí-gá xăha<sup>n</sup>-gă xii-güedé.

22 Te ñini cúdini cue téé xica cuu ndihi Jesús ní quehe<sup>n</sup>-gă pàá, te ní ndacá<sup>n</sup> táhú-gă núú Yă Ndiòxí, te dătnúni ní táhú cuèchi-gă, te ní ngúita-gă dăcăhñu ñaha-gă xii-güedé, te xăha<sup>n</sup>-gă:

—Chí quéhé<sup>n</sup> pàá-a caxi-ndo, te cada iní-ndó să cúú-xí dătná yiqui cùnú-í —càchí-gă xăha<sup>n</sup>-gă xii-güedé.

23 Te ní quehe<sup>n</sup>-gă văsú ñúhú ndùdí ndéhé yoho yàha stilé, te ní ndacá<sup>n</sup> táhú-gă núú Yă Ndiòxí, te dătnúni ní ngúita-gă săñaha-gă xii-güedé cuëndá coho-güedé luha luha sá ñúhú xití-xi, te nchaa-güedé ní xihí. 24 Te ní xăha<sup>n</sup>-gă xii-güedé:

—Ndudí ndéhé yoho yàha stilé-a cada iní-ndó să cúú-xí dătná ñiñí-í sá catí òré cahni ñaha-güedé xii-í. Te sá dúcá<sup>n</sup> catí ñiñí-í xăñ cūtnúni ndáá sá Yă Ndiòxí cada-gă ingá núú sá váha sá cúú-xí vâi ñăyiu dătná ní cachí-gă cada-gă. 25 Te na càchí tnúhu ndáá-í xii-ndo să vítná-nă duha xihí-í ndudí ndéhé yoho yàha stilé-a te vá cóhó-gă-í, dico na sàá nduu cundecu-í núú ndécú Yă Ndiòxí táxí tnúni-gă, te dāvá-á<sup>n</sup> cada iní-í sá dătná sá cóhó tucu-í chí ío cudí iní-í —càchí-gă xăha<sup>n</sup>-gă xii-güedé.

*Jèsús càhá<sup>n</sup>-gă sá tē Pèlú cúñaha-dě xii ñăyiu sá ñà túú xini ñáhá-dě xii-gá (Mt. 26:30-35; Lc. 22:31-34; Jn. 13:36-38)*

26 Te Jèsús ní xita-gá ìṣṣṣ ndudú ndihí cue té xica cuu ndihí-gá, te dàtnùní ní xica-gá cuáhá<sup>n</sup>-gá ndihí-güedé yucu Òlívú. 27 Te yàcá<sup>n</sup> ní xáha<sup>n</sup>-gá xii-güedé:

—Na càchí tñuhu-í xii-ndo sã ncháá-ndó dàña nihnu ñaha-ndo xii-í niú vitna, chi quee ndáá-xi nàcuáa càhá<sup>n</sup>-xi núú tütú Yã Ndiöxí núú càchí-xi: “Yúhú cuáha-í tñuhu cahni-güedé tée cùu toli, te nchaa mbèé-dě ndihí-güedi cuténuu”, duha càchí-xi núú tütú-gá. 28 Dico na cùú-í te ndoto-í te codonùu-í núú-ndó quíhí<sup>n</sup> distrítú Galiléa —càchí-gá xáha<sup>n</sup>-gá xii-güedé.

29 Te té Pèlú ní xáha<sup>n</sup>-dě xii-gá:

—Te cuèi nchaa-güedé ná dándóo ñaha-güedé xii-n, dico yúhú chi vá dándóo ñaha-í xii-n —càchí-dé xáha<sup>n</sup>-dě xii-gá.

30 Te Jèsús ní xáha<sup>n</sup>-gá xii-dé:

—Na càchí tñuhu ndáá-í xii-n sã niú vitna cùmání-gá cana líhi úú xito, te úní xito cáhá<sup>n</sup>-n núú ñàyiú sá ñà túú xìní ñáhà-n xii-í —càchí-gá xáha<sup>n</sup>-gá xii-dé.

31 Dico té Pèlú ní cáhá<sup>n</sup> ñí-dé, te xáha<sup>n</sup>-dě xii-gá:

—Cuèi na cùú ndihí ñaha-í xii-n dico vá cáhá<sup>n</sup>-í núú ñàyiú sá ñà túú xìní ñáhà-í xii-n —càchí-dé xáha<sup>n</sup>-dě xii-gá.

Te nchaa dava-gá cue té xica cuu ndihí-gá ñu-ni duca<sup>n</sup> ñí xáha<sup>n</sup>-güedé xii-gá.

*Jèsús càhá<sup>n</sup> ndihí-gá Yã Ndiöxí ìṣṣṣ xi-chi núú nání Gètsemaní (Mt. 26:36-46; Lc. 22:39-46)*

32 Te Jèsús cuáhá<sup>n</sup>-gá ndihí cue té xica cuu ndihí-gá ìṣṣṣ xichi núú nání Gètsemaní. Te òré ní quexìo-gá ndihí-güedé xía<sup>n</sup>, te ní xáha<sup>n</sup>-gá xii-güedé:

—Chí cúnúcoo iha cundetù-ndo na quíhí<sup>n</sup>-í yàcá<sup>n</sup> cáhá<sup>n</sup> ndihí-í Yã Ndiöxí —càchí-gá xáha<sup>n</sup>-gá xii-güedé.

33 Te ndèca-gá té Pèlú, ndihí té Jàcobó, ndihí té Juáá cuáhá<sup>n</sup>, te ñà túú tñahí-gá cúú vaha iní-gá te ní ngúíta-xi sùúní ndihú iní-gá. 34 Te ní xáha<sup>n</sup>-gá xii cue tée úní-á<sup>n</sup>:

—Súúní ndihú iní-í dàtná sá cùú-í, te chí quéndóo iha te vá cùú-ndó —càchí-gá xáha<sup>n</sup>-gá xii-güedé.

35 Te sa ñùnchií luha ní xica ndehe Jèsús núú ndécú-güedé, te ní ngáundeyi-gá ndéé ñuhu càhá<sup>n</sup> ndihí-gá Tãtá-gá Dútú Ndiöxí sá ñuú vá cùndèe iní-gá taunihnu ñaha-gá xii-gá cuendá nchaa nàcuáa yáha-gá. 36 Te òré càhá<sup>n</sup> ndihí Jèsús Tãtá-gá Dútú Ndiöxí, te xáha<sup>n</sup>-gá:

—Yòhó tãtá mée-í, nchaandi túhú sá vaha ndàcu-n quide-n, te càhá<sup>n</sup> ndàhú-í núú-n ñuú vá cùndèe iní-n taunihnu ñaha-n xii-í cuendá sá vã ndóhò-í ná sàá òré, dico vá cádá-n nàcuáa càchí iní mée-í chí cada-n nàcuáa càchí mee-n —càchí-gá xáha<sup>n</sup>-gá xii Tãtá-gá Dútú Ndiöxí.

37 Te sàtá ñí yáha ní cáhá<sup>n</sup> ndihí-gá Tãtá-gá Dútú Ndiöxí, te cuánuhú-gá núú ñí dándóo-gá cue tée úní-á<sup>n</sup>, te xixídí-güedé òré ní nasáá-gá, te ní xáha<sup>n</sup>-gá xii té Pèlú:

—Xímú, ¿náa sama xidí-n? ¿Náa ñà cùndèe tñahi núú-n vá cùú-ni-n cuèdico ìṣṣṣ òré-á<sup>n</sup>? —càchí-gá xáha<sup>n</sup>-gá xii-dé.

Te ní xáha<sup>n</sup> tucu-gá xii-güedé:

38 —Te chí quéndóo tucu, te cuhú iní-ndó vá cùú-ndó, te cáhá<sup>n</sup> ndihí-ndo Yã Ndiöxí cuendá sá vã dácàhá<sup>n</sup> ñáhà yucu ñávaha xii-ndo càda-ndo sá ñà túú tau-ndó càda-ndo. Te na càchí tñuhu ndáá-í xii-ndo sã nchòhó cuíní-ndó càda-ndo nchaa nàcuáa càhá<sup>n</sup>-í dícó-ni sá ñà túú nihí ndéé-ndó —càchí-gá xáha<sup>n</sup>-gá xii-güedé.

39 Te Jèsús ní xica tucu-gá cuáhá<sup>n</sup>-gá cáhá<sup>n</sup> ndihí-gá Tãtá-gá Dútú Ndiöxí, te ñu-ni nàcuáa ní xáha<sup>n</sup>-gá díhna xáha<sup>n</sup> tucu-gá. 40 Te òré ní yáha ní cáhá<sup>n</sup> ndihí-gá Tãtá-gá Dútú Ndiöxí, te cuánuhú tucu-gá núú xíndecu cue tée úní xicá cùu ndihí-gá-á<sup>n</sup>, te xidí-ni tucu-güedé òré ní nasáá-gá, te duca<sup>n</sup> ñí quide-güedé chí sùúní ñuhu saní núú-güedé, te ñà ní nihí-güedé tñuhu cùñaha-güedé xii-gá òré ní nasáá-gá.

41 Te ní sáhá<sup>n</sup> tucu-gá xito cùu úní ní cáhá<sup>n</sup> ndihí-gá Tãtá-gá Dútú Ndiöxí, te òré ní nasáá tucu-gá núú xíndecu-güedé, te xáha<sup>n</sup>-gá xii-güedé:

—¿Te náa xidí-ni tucu-ndo?, te vitna vá cùdú-gá-ndó chi sa ní sáá òré cuáha cuèndá ñáhá-güedë xii yúhú Tée cù ñaní tnáhá-ndó nchàa-ndo núú cuè tée ndècu ichi cuehé ichi duha. <sup>42</sup> Te vitna chí ndácõo na quíhí<sup>n</sup>-ó chi sa véxi tée cuáha cuèndá ñáhá xii-í núú cuè tée cùu úhú iní ñáhá —càchí-gá xáha<sup>n</sup>-gã xii-güedé.

*Ní tñi-güedé Jèsús ndécá ñàha-güedé xii-gá cuáhá<sup>n</sup>*

(Mt. 26:47-56; Lc. 22:47-53; Jn. 18:2-11)

<sup>43</sup> Te càhá<sup>n</sup> dúcá<sup>n</sup>-ní Jèsús ní quexìo té Jùdás. Te núú tnáhá tée-á<sup>n</sup> cúú ùxúú tnáhá cue tée xica cuu ndihi-gá. Te ndihi-dé vai cue tée ní quexìo, te dava-güedé xínehe-güedé machití te dava-güedé xínehe-güedé carrutí. Te cue tée-á<sup>n</sup> ñí tendaha ñàha cue dútú cùnùu ndihi cue tée dàcuaha ñàha xii ñáyiú nchaa tnúhu ní chídó tnùní ndíi Moisés, ndihi cue tée cùu sacuéhé núú ñáyiú isràél. <sup>44</sup> Te té Jùdás tée cuáha cuèndá ñáhá xii Jèsús sa ní xitnùhu-dé cue tée-á<sup>n</sup> nàcuáa cada-dé cuáha cuèndá ñáhá-dé xii Jèsús núú-güedé. Te duha ní xáha<sup>n</sup>-dë xii-güedé:

—Cundehe-ndo tée na tèyuhu-í, te tée-á<sup>n</sup> tñi-ndo-dë chi tée-á<sup>n</sup> cúú-dë tée ndéé iní-ndó, te ío quíhí iní-ndó càndeca-ndo-dé quíhí<sup>n</sup> —duha ní xáha<sup>n</sup>-dë xii-güedé.

<sup>45</sup> Te òré ní quexìo té Jùdás ndihi cue tée-á<sup>n</sup> núú ndécú Jèsús, te ní xáha<sup>n</sup>-dë xii-gá:

—Mèstrú —càchí-dé xáha<sup>n</sup>-dë xii-gá.

Te ní teyuhu ñàha-dé. <sup>46</sup> Te nchaa cue tée ndihi-dé-á<sup>n</sup> ñí tñi-güedé Jèsús cuèndá candeca ñàha-güedé xii-gá quíhí<sup>n</sup>. <sup>47</sup> Te ñí cue tée cùndihi Jèsús ní tava-dé machití-dé, te ní xehndé-ni-dé ñí xio lóho ñí tée xinu cuechi núú dútú cùnùu, te ní quendé duu<sup>n</sup> lóho tée-á<sup>n</sup>. <sup>48</sup> Te Jèsús ní xáha<sup>n</sup>-gã xii cue tée ní tñi ñàha xii-gá-á<sup>n</sup>:

—Nchòhó, nèhe-ná-ndó màchití, nèhe-ná-ndó càrrutí véxi ní tñi ñàha-ndo xii-í, dàtná quidé-ndó ñí ñadúhú quidé ñàha-ndo xii-í.

<sup>49</sup> Te nchaa-ni nduu ní xiní-ndó ñí xíndecu-í xití veñúhu càhnu sá ño cùnùu ní xóo danèhé-í ñáyiú, te ñá túú ní tñi ñàha-ndo xii-í. Dico dàcuítí sá dúhá yáha-í cuèndá quee ndáá-xi nàcuáa càhá<sup>n</sup>-xi núú tütú Yá Ndiõxí —càchí-gá xáha<sup>n</sup>-gã xii-güedé.

<sup>50</sup> Te nchaa cue tée xica cuu ndihi-gá ní xinu-güedé ní dándõo ñàha-güedé xii-gá.

*Ñí tée cuechi ñí xinu-dé*

<sup>51</sup> Te ñí tée cuechi ndëndaha-dë Jèsús cuáhá<sup>n</sup>, te lavichi-dë, ñí-ni dóó yadí yídúcú<sup>n</sup> nuu-dé ñihí-dé, te ní tñi ñàha-güedé xii-dé, <sup>52</sup> dico ní ndacu-dé ní quenuñi-dë te ní dándõo-dé dóó yídúcú<sup>n</sup> nuu-dé-á<sup>n</sup> ñí xinu-dé.

*Jèsús ndécú-gã jùndá*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Te cue tée ní tñi ñàha xii Jèsús ndécá ñàha-güedé xii-gá cuáhá<sup>n</sup> núú tée cùu dútú cùnùu-gá. Te xía<sup>n</sup> ñí tacá nchaa dava-gá cue tée cùu dútú cùnùu, ndihi cue tée cùu sacuéhé núú ñáyiú isràél, ndihi cue tée dàcuaha ñàha xii-yu nchaa tnúhu ní chídó tnùní ndíi Moisés cuèndá cada-güedé jùndá. <sup>54</sup> Te té Pèlú xica xica-ni nchicú<sup>n</sup> ñáhá-dé xii-gá cuáhá<sup>n</sup> ní sáá-dé ndéé quehé vehe núú ndécú tée cùu dútú cùnùu-gá-á<sup>n</sup>, te xía<sup>n</sup> ñí ngóo teté-dé yuhu nùhú ndihi cue tée cùu poleciá.

<sup>55</sup> Te cue tée cùu dútú cùnùu ndihi nchaa dava-gá cue tée xíndecu jùndá ndúcú-güedé ñáyiú dacáa ñí cuéchi díquí Jèsús cuèndá duca<sup>n</sup> ñihí-güedé nàcuáa cada-güedé cahni ñàha-güedé xii-gá, dico ñá túú ní ndàcu-güedé.

<sup>56</sup> Te cuéi vai ñáyiú dàcaá-yu cuéchi díquí-gã dico mee-ni sá ñí cahu iní méé-yu ní cáhá<sup>n</sup>-yu, chi tucu càhá<sup>n</sup> ñí tucu càhá<sup>n</sup> ñí-yu. <sup>57</sup> Te davá-yu ní ndacuñí-yu te ní ngüíta-yu dàcaá-yu ñí cuéchi neñùú díquí-gã, te xáhã<sup>n</sup>-yu xii nchaa cue tée cùnùu:

<sup>58</sup> —Nchúhú ní tecú dóho-ndí càchí-dé sá dándõyo-dé veñúhu càhnu sá ño cùnùu sá ñí dácáá cuè tée ñuyíú-a, te dandàa tucu-dé ingá veñúhu saa, diu-ni núú cáá tnáhí veñúhu-á<sup>n</sup> te



xítí úní-ni nduu sa nadaxĩnu-dé, te vá cúú-gǎ-xi veñúhu sá nǐ dácáá cuè téé ñuyíú-a, duha càchí-dé ní tecú dóho-ndí —càchí-yu xǎhǎ<sup>n</sup>-yu xii-güedé.

<sup>59</sup> Dico ni dùca<sup>n</sup> ñá túú ní cùu ñ<sup>n</sup>nuú-yu nchaa tnúhu ní cáhá<sup>n</sup>-yu.

<sup>60</sup> Te téé cùu dútú cúnùu-gá ní ndacuñí-dé tnuú nchaa ñáyiú, te xǎha<sup>n</sup>-dǎ xii Jèsús:

—¿Ná cuendá duha ndùu tnúhu càhá<sup>n</sup> ñáyiú-a cuendá-n? Te cáhá<sup>n</sup> nǔu nása ndùu tnúhu cáhá<sup>n</sup>-n —càchí-dé xǎha<sup>n</sup>-dǎ xii-gá.

<sup>61</sup> Dico Jèsús ñá túú tnàhí ní cáhá<sup>n</sup>-gá. Te téé cùu dútú cúnùu-gá-á<sup>n</sup> ní xáha<sup>n</sup> tùcu-dé xii-gá:

—Cuíní-í cachí tnúhu-n xii-ndí nǔu sá díú Crístú Déhe Yá Ndiõxí Yaá ní tendaha-gǎ véxi ñuyíú-a cùu-n. Te díu Yá Ndiõxí cúú-gǎ Yaá quidé càhnu-ndí —càchí-dé xǎha<sup>n</sup>-dǎ xii-gá.

<sup>62</sup> Te Jèsús ní xáha<sup>n</sup>-gǎ xii-dé:

—Díu Yaá-á<sup>n</sup> cúu-í, te na càchí tnúhu-í xii-ndo sǎ sǎá nduu te quíní-ndó yúhú Téé cùu ñaní tnáhá-ndó nchàa-ndo cunucóo-í xio cùha Dútú Ndiõxí Yaá ndácú quide nchaandi túhú sá váha. Te dǎvá-á<sup>n</sup> quíní ñáhá-ndó xii-í quee-í andíu quixi-í ichi xítí vícú —càchí-gá xǎha<sup>n</sup>-gǎ xii-dé.

<sup>63</sup> Te dútú cúnùu-gá-á<sup>n</sup> nǐ ndátá-dǎ dóo cání ñihnu-dé cuendá sá ñà túú ní tnàhá iní-dé nàcuáa ní cáhá<sup>n</sup> Jèsús, te ní xáha<sup>n</sup>-dǎ xii nchaa cue téé xǐndecu jùndá:

—Ñá túú-gǎ xíní ñùhu-xi cue téé cáhá<sup>n</sup> nǔu ndáá sá ndècuéchi-dé àdi ñá túú ndècuéchi-dé. <sup>64</sup> Chì sa ní xǐndedóho-o nàcuáa ndùu tnúhu ní cáhá<sup>n</sup>-dé ní cáhá<sup>n</sup> úhú-dé cuendá Yá Ndiõxí, te nchaa-ndo chǐ càhá<sup>n</sup> vitna núu nása sàni iní-ndó cùnduu cuendá téé-a —càchí-dé xǎha<sup>n</sup>-dǎ xii-í-güedé.

Te nchaa-güedé ní cachí-güedé sá ná cùu-dé.

<sup>65</sup> Te dǎva-güedé ní ngüíta-güedé ní tíú díí ñáhá-güedé xii-gá, te ní dádǎhu-güedé núú-gǎ, te ní ngüíta-güedé cánìha-güedé xii-gá, te xǎha<sup>n</sup>-güedé:

—¿Cáhá<sup>n</sup> ná cótó nǎ cúú téé ní caniha xii-n! —cachí-güedé xǎha<sup>n</sup>-güedé xii-gá.

Te cue téé cùu poleciá ní cani-güedé núú-gǎ.

*Té Pèlú càhá<sup>n</sup>-dé núú ñáyiú sá ñà túú xini-dé Jèsús*

(Mt. 26:69-75; Lc. 22:56-62; Jn. 18:15-18, 25-27)

<sup>66</sup> Te ndéé xítí vehe càa núú ñinu quide-güedé jùndá, chí vehe yòdo tnaha cuu-xi, te té Pèlú núcõo-dé quehé vehe-á<sup>n</sup>. Te ñ<sup>n</sup> xíchí xínú cuèchi núú dútú cúnùu-á<sup>n</sup> nǐ quexìo-xi núú núcõo té Pèlú. <sup>67</sup> Te òré ní xíní ñáhá-xí xii-dé núcõo teté-dé yuhu nùhú, te ní xíndéhé ñàha váha-xi xii-dé, te xǎha<sup>n</sup>-xi:

—Yòhó tnàhá-n cùu-n téé xica cuu ndíhi Jesús téé ñuú Nazàrét —càchí-xi xǎha<sup>n</sup>-xi xii-dé.

<sup>68</sup> Te té Pèlú ní xáha<sup>n</sup>-dǎ xii-xi:

—Yúhú ñá túú xini-í téé-á<sup>n</sup>, te ní ñà túú cùtnuní iní-í nása ndùu tnúhu càhá<sup>n</sup>-n —càchí-dé xǎha<sup>n</sup>-dǎ xii-xi.

Te té Pèlú ní xica-dé cuáhá<sup>n</sup>-dé ndàa nacuáa nchíi yuyèhe vehe-á<sup>n</sup>, te ní cana ñ<sup>n</sup> líhi. <sup>69</sup> Te xíchí xínú cuèchi-á<sup>n</sup> ní xíní ñáhá tùcu-xi xii-dé, te xǎha<sup>n</sup>-xi xii nchaa ñáyiú xǐndecu-á<sup>n</sup>:

—Díu téé-á<sup>n</sup> tnàhá-dé xicá cùu-dé ndíhi téé ndèca-güedé cuànguihu-a —càchí-xi xǎha<sup>n</sup>-xi xii-yu.

<sup>70</sup> Dico té Pèlú ñá túú ní nǔnuu tucu-dé sá xicá cùu-dé ndíhi Jèsús. Te tna tnaa-ni ní cuu sá dúcá<sup>n</sup> nǐ xáha<sup>n</sup> xíchí-á<sup>n</sup> xii-dé, te ní xáha<sup>n</sup> tùcu dǎva cue ñáyiú xǐndecu-á<sup>n</sup> xii-dé:

—Ndáá sá tnàhá-n cùu-n téé xica cuu ndíhi téé ndèca-güedé cuànguihu-á<sup>n</sup> chí cùu-n téé distritú Galiléa, te càhá<sup>n</sup>-n dàtná càhá<sup>n</sup>-güedé —càchí-yu xǎhǎ<sup>n</sup>-yu xii-dé.

<sup>71</sup> Te té Pèlú ní xáha<sup>n</sup>-dǎ xii-yu:

—Nchàcuítì Yá Ndiõxí sá yúhú càhá<sup>n</sup> ndáá-í sá ñà túú xini-í téé càcunehe-ndo-á<sup>n</sup> —càchí-dé xǎha<sup>n</sup>-dǎ xii-yu.

<sup>72</sup> Te òré-ni-á<sup>n</sup> nǐ cana tucu líhi xito cùu uú, te òré-á<sup>n</sup> nǐ ndacu iní té Pèlú nàcuáa ní xáha<sup>n</sup> Jèsús xii-dé sá cùmání-gǎ cana ñ<sup>n</sup> líhi úú xito te úní xito cáhá<sup>n</sup>-dé núú ñáyiú sá ñà túú xini ñáhá-dǎ xii-gá. Te òré duca<sup>n</sup> nǐ ndacu

iní-dé nàcuáa ní xáha<sup>n</sup> Jèsús xii-dé, te ní ndáhyú-dé ní ndixi cuéchi iní-dé.

## 15

*Jèsús ndécú-gă núú tĕ Pìlatú*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Te sàtá nĭ túndaá te cue tée cùu dútú cúnùu, ndihì cue tée cùu sacuéhé nùú ñáyiù isràél, ndihì cue tée dàcuaha ñaha xii ñáyiù nchaa tnúhu ní chídó tnùnì ndí Moisés, ndihì nchaa dava-gá cue tée cùnùu ní xíndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáhá<sup>n</sup> núú tĕ Pìlatú. <sup>2</sup> Te tĕ Pìlatú ní xícá<sup>n</sup> tnúhú-dĕ núú Jèsús, te xáha<sup>n</sup>-dĕ xii-gá:

—¿Ndáá sá díú-n cùu-n tée yìndaha ñaha xii ñáyiù isràél-ă<sup>n</sup>? —càchí-dé xáha<sup>n</sup>-dĕ xii-gá.

Te Jèsús ní xáha<sup>n</sup>-gă xii-dé:

—Diu-í yìndaha-í-yu —càchí-gá xáha<sup>n</sup>-gă xii-dé.

<sup>3</sup> Te cue tée cùu dútú cúnùu da-caa-güedé vâi cuéchi díquí-gă. <sup>4</sup> Te tĕ Pìlatú ní xícá<sup>n</sup> tnúhú tùcu-dé núú-gă, te xáha<sup>n</sup>-dĕ xii-gá:

—Cáhán, ná cuèndá ñá càhá<sup>n</sup>-n te cundehe nă ndéé duha tĭtní cuéchi dàcaa díquí ñáhá cuè tée-a xii-n —càchí-dé xáha<sup>n</sup>-dĕ xii-gá.

<sup>5</sup> Dico Jèsús ñá túú tnàhí ni cáhán-gă te tĕ Pìlatú ío ní cuñúhu-dé sá dúcá<sup>n</sup> ñá túú tnàhí ni cáhán-gă.

*Cue ñáyiù xăhă<sup>n</sup>-yu xii tĕ Pìlatú sá cáhni-dĕ Jèsús*

(Mt. 27:15-31; Lc. 23:13-25; Jn. 18:38-19:16)

<sup>6</sup> Te ndi tnahá nduu vico pascuá dácăcu tĕ Pìlatú ì<sup>n</sup> tĕe yĭhi vecaá chi duca<sup>n</sup> tnàhí quide-dé, te mee ñáyiù càhá<sup>n</sup>-yu te núu ndĕdacăa tĕe yĭhi vecaá-á<sup>n</sup> căcu-dé, te tĕe-á<sup>n</sup> dácăcu-dé. <sup>7</sup> Te yĭhi ì<sup>n</sup> tĕe nani Barrabás vecaá ndihì dava-gá cue tĕe cùndihì-dé. Te tĕ Barrabás-án nĭ sanu ichi-dé ñáyiù ñúú ingá ichi, te ní ngüíta-yu ndihì-dé ní cuu úhú iní-yu cue tĕe cùchiu<sup>n</sup>, te ní sahani-dé ndíyĭ núu xiă<sup>n</sup> ní chihi ñaha-güedĕ vecaá xii-dé. <sup>8</sup> Te nchaa

ñáyiù ní sáhá<sup>n</sup>-yu núú tĕ Pìlatú, te càhá<sup>n</sup> ndàhú-yu núú-dĕ sá ná cádá nàhi-ni-dé dàtná quidĕ-dĕ. <sup>9</sup> Te tĕ Pìlatú ní xáha<sup>n</sup>-dĕ xií-yu:

—¿Cuinì-ndó să dácăcu-í tĕe yìndaha ñaha xii ñáyiù isràél-ă<sup>n</sup>? —càchí-dé xáha<sup>n</sup>-dĕ xií-yu.

<sup>10</sup> Te duca<sup>n</sup> nĭ cáhán tĕ Pìlatú, chi ní cutnùnì iní-dé sá dĭcó sá cuèdú iní cuè dútú cúnùu núu xiă<sup>n</sup> duca<sup>n</sup> nĭ quide-güedé ní sáha cuèndá ñáhá-güedĕ xii Jèsús núú-dĕ. <sup>11</sup> Te cue dútú cúnùu ní xáha<sup>n</sup>-güedĕ xii nchaa ñáyiù sá ná cūñáhá-yu xii tĕ Pìlatú dácăcu-dé tĕ Barrabás, te ní quidĕ-yu nàcuáa ní xáha<sup>n</sup>-güedĕ. <sup>12</sup> Te tĕ Pìlatú ní xícá<sup>n</sup> tnúhú-dĕ núu-yu, te xáha<sup>n</sup>-dĕ xií-yu:

—¿Ná cuinì-ndó cādă-í tĕe cāchí-ndó yìndaha ñaha xii ñáyiù isràél-i? —càchí-dé xáha<sup>n</sup>-dĕ xií-yu.

<sup>13</sup> Te ncháá-yu níhi ní cáhán-yu, te xăhă<sup>n</sup>-yu xii-dé:

—¿Cata caa-dé núú cùrúxí! —càchí-yu xăhă<sup>n</sup>-yu xii-dé.

<sup>14</sup> Te tĕ Pìlatú ní xáha<sup>n</sup>-dĕ xií-yu:

—¿Te ná cúú cuĕchi ní quide-dé te núu duca<sup>n</sup> cuinì-ndó cādă-í-dé-i? —càchí-dé xáha<sup>n</sup>-dĕ xií-yu.

Dico ncháá-yu uu<sup>n</sup>-gá níhi ní cáhán-yu, te xăhă<sup>n</sup>-yu xii-dé:

—¿Cata caa-dé núú cùrúxí! —càchí-yu xăhă<sup>n</sup>-yu xii-dé.

<sup>15</sup> Te tĕ Pìlatú ní quide-dé nàcuáa ní xăhă<sup>n</sup>-yu xii-dé cuèndá sá cúdiu-dé núu-yu, te ní dácăcu-dé tĕ Barrabás, te ní táuchíú<sup>n</sup>-dĕ ní cani-güedĕ Jèsús ndihì ñĭ. Te sàtá dúcá<sup>n</sup> nĭ quide ñaha-güedĕ xii-gá, te ní táuchíú<sup>n</sup>-dĕ candeca ñaha-güedĕ quíhĭ<sup>n</sup> cata caa ñaha-güedĕ xii-gá núú cùrúxí.

<sup>16</sup> Te cue tĕe cùu sandadú ndéca ñaha-güedĕ xii-gá cuáhán vechi<sup>n</sup>, te diu-ni xiá<sup>n</sup> cúú vĕhe tĕe cùu gobiernú. Te xiá<sup>n</sup> nĭ tacá nchaa dava-gá cue tĕe cùu sandadú. <sup>17</sup> Te xiá<sup>n</sup> nĭ dácúhnú ñaha-güedĕ xii-gá ì<sup>n</sup> dóo tĭcuĕhé víhĭ, te ní cadúha-güedĕ ì<sup>n</sup> coróná iñu ní chihi-güedĕ díquí-gă. <sup>18</sup> Te ní ngüíta-güedĕ níhi càhá<sup>n</sup>-güedĕ

cúdíquí ndeé ñáhá-güedě xii-gá, te xăha<sup>n</sup>-güedě:

—Ío càn<sup>u</sup> cuu yohó tée yìndaha ñaha xii ñáyi<sup>u</sup> isràél! —càchí-güedě xăha<sup>n</sup>-güedě xii-gá.

19 Te càn<sup>i</sup>-güedě díquí-gă ndih<sup>i</sup> ì<sup>n</sup> carrutí, te tìú díí ñáhá-güedě xii-gá, te ngüñí xítí-güedě núú-gă quidé-güedě sá néhé-güedě sá yíñùhu núú-gă dico ñá ndáá chi dicó cúdíquí ndeé ñáhá-güedě xii-gá.

20 Te sátá dúcá<sup>n</sup> ñí cudíquí ndeé ñáhá-güedě xii-gá, te ní nataunuu ñaha-güedě xii-gá dóó t̃cuèhé vîhí sã ñí dácúhnú ñàha-güedě, te ní dándíunuu ñaha-güedě xii-gá dóó méé-gă. Te dâtnùn<sup>i</sup> ndécá ñàha-güedě cuáhá<sup>n</sup> núú catá cã ñaha-güedě xii-gá núú cùrúxí.

*Sàta caa-güedé Jèsús núú cùrúxí*  
(Mt. 27:32-44; Lc. 23:26-43; Jn. 19:17-27)

21 Te ichi cuáhá<sup>n</sup>-güedě ndih<sup>i</sup> Jèsús ní naníhí-güedě ì<sup>n</sup> tée ñuú Cirené nání-dě Xímú, te déhe-dé cúú ì<sup>n</sup> tée nàni Lijandrú, ndih<sup>i</sup> ingá tée nàni Rúfú. Te té Xímú-á<sup>n</sup> ñúhú-dě ichi duha cuándixi-dé ní sáhá<sup>n</sup>-dé yucu, te ní quide yica-güedě ní xido-dé cùrúxí sã nchídó Jèsús.

22 Te ndèca-güedě Jèsús cuáhá<sup>n</sup> ì<sup>n</sup> xichi núú nání Gôlgotá, te tnúhu-á<sup>n</sup> quée-xí: ì<sup>n</sup> xichi núú nání yìquí díquí ndíy<sup>i</sup>, duha quèe-xi tnúhu-á<sup>n</sup>. 23 Te ní sãñaha-güedě xii-gá ndudí sã ñí quée yúcu nání mîrrá coho-gá ní cùu dico ñá túú ní xîhi-gá. 24 Te ní sata caa ñaha-güedě xii-gá núú cùrúxí. Te sátá dúcá<sup>n</sup> te cue tée cùu sandadú-á<sup>n</sup> ñí xito ndeé-güedě núu ndédacã-güedě cuu cuendá-güedě dóó-gă.

25 Te cùu-xi caá ì<sup>n</sup> dátneé òré ní sata caa ñaha-güedě xii-gá núú cùrúxí. 26 Te ní taxi ndecu-güedě ì<sup>n</sup> sã ndeé lètrá núú táca-gá. Te lètrá-á<sup>n</sup> cãhá<sup>n</sup>-xi ná cuendá duca<sup>n</sup> ñí quide ñaha-güedě xii-gá. Te duha cãhá<sup>n</sup> lètrá-á<sup>n</sup>: “Tée yìndaha ñaha xii ñáyi<sup>u</sup> isràél”, duha cãchí-xi. 27 Te tnàhá úú cue tée cùu ñadúhú ñí sata

caa-güedě ð<sup>i</sup>u-ni núú cùrúxí tucu. Te ì<sup>n</sup>-dè ní sata caa-güedě xio cùha-gá, te ingá-dé ní sata caa-güedě xio dâtni-gá. 28 Te duca<sup>n</sup> ñí cuu chi ní quee ndáá-xi nãcuáa cãhá<sup>n</sup>-xi núú tütú Yã Ndiõxí núú cãchí-xi: “Ì<sup>n</sup>-ni ñí quide ñaha-güedě xii-gá ndih<sup>i</sup> cue tée ndècu cuéchi-xi”, duha cãchí-xi núú tütú-gá.

29 Te nchaa ñáyi<sup>u</sup> yăha yatni núú táca-gá dácúicó-yu díquí-yu te x̃cuèhé ñáhă-yu xii-gá, te xăhă<sup>n</sup>-yu:

—Te ná cuendá duca<sup>n</sup> cãa-n tacaa-n xiá<sup>n</sup>, te cãchí-n sã dàngoyo-n veñúhu càn<sup>u</sup> sã ìo cùn<sup>u</sup> te dandãa-n ingá veñúhu saa, te xití ún<sup>i</sup>-ni nduu sa nađaxinu-n cãchí-n. 30 Te vitna tanùu núú cùrúxí-á<sup>n</sup> dácacu-n mée-n —cachí-yu xăhă<sup>n</sup>-yu xii-gá.

31 Te ð<sup>i</sup>u-ni duca<sup>n</sup> ñí quide cue tée cùu dútú cùn<sup>u</sup>, ndih<sup>i</sup> cue tée dácua<sup>h</sup> ñaha xii ñáyi<sup>u</sup> nchaa tnúhu ní chídó tnùn<sup>i</sup> ndíi Moisés, chi ní cudíquí ndeé ñáhá-güedě xii-gá, te ní xitnàha-güedě:

—Tée-a ní ndacu-dé ní dácacu nihnu-dé ñáyi<sup>u</sup>, ¿te ná cuendá ñá ndácú-dé dácacu nihnu-dé méé-dè-i?

32 Te núu ndáá sã díú-dé cúú-dé Crìstú Yáá ní tendaha Yã Ndiõxí véxi ñuyíú-a quindaha ñaha xii ñáyi<sup>u</sup> isràél, te na cundehe-o nuu-dé núú cùrúxí, cuendá quíndáá iní-ó-dè —cãchí-güedě xitnàha-güedě.

Te ndeé tnàhá cue tée tâca<sup>h</sup> xio xio ðíñi-gá x̃cuèhé ñáhá-güedě xii-gá.

*Ní xîhí Jèsús*  
(Mt. 27:45-56; Lc. 23:44-49; Jn. 19:28-30)

33 Te òré ní cuu cuádava nduu, te ní cunee nihí ñuyíú, te duca<sup>n</sup>-ni cãa ní cuu ndeé caá ún<sup>i</sup> sacuaa. 34 Te ð<sup>i</sup>u-ni òré caá ún<sup>i</sup> sacuaa-á<sup>n</sup> ñíhi ní cãhá<sup>n</sup> Jèsús, te xăha<sup>n</sup>-gă xii Tãtá-gă Dútú Ndiõxí:

—Elói, Elói, láma sabactaní —cãchí-gá xăha<sup>n</sup>-gă.

Te tnúhu-á<sup>n</sup> quée-xí: Ndiõxí méé-í, Ndiõxí méé-í, ná cuendá ní dáñã ñàha-n xii-í, duha quèe-xi tnúhu-á<sup>n</sup>.

35 Te dava cue tée x̃ndecu yatni núú táca-gá-á<sup>n</sup> ñí tecú dóho-güedě nãcuáa ní cãhá<sup>n</sup>-gá, te ní xitnàha-güedě:

—Chí cündedóho chi càna-dé té Èliás —càchí-güedé xítñaha-güedé.

<sup>36</sup> Te ìñ cue té xíndecu-án xínú-dé ní sáhán ní chindóyo-dé luha cáchí xítí ndudí íá, te ní chinenu-dé díquí ìñ yutnu càni te ní ndocani-dé chíhí-dé yuhu-gá cuendá coho-gá. Te ní xáha<sup>n</sup> cuè té xíndecu-án xii té-án:

—Cundetú tnaa na cundehe-o nacoto núu quixi té Èliás nunehe ñaha-dé xii-dé núu cùrúxí —càchí-güedé xáha<sup>n</sup>-güedé xii-dé.

<sup>37</sup> Te Jèsús níhi ní canasaa-gá te ní xíhí-ni-gá. <sup>38</sup> Te sátá dúcá<sup>n</sup> te ní ndátá dǒo cúu còrtíná xítí veñúhu càhnu sá ìo cùnuu ní quée dava ndáá, te ndáa núu ñinu ní ngüíta-xi ní ndátá. <sup>39</sup> Te té cùu capitá<sup>n</sup> nútñ-dé ndàa núu Jèsús, te ndèhe-dé nàcuáa ní quide-gá òré ní xíhí-gá, te ní cachí-dé:

—Sá ndáa ndisa sá díú tée-a cùu-dé Déhe Yá Ndiǒxí ní cùu —duha ní cachí-dé.

<sup>40</sup> Te xica xínutñ ìñ ùú ñáyiú dǐhí ndéhě-yu nchaa nàcuáa ní quide ñaha-güedé xii Jèsús, te tñahá tá Màriá Magdaléná, ndihí tá Salómé, ndihí tá Màriá ñaná tē Chèé ndihí té Jàcobó té càchí-güedé cúu líhli-gá.

<sup>41</sup> Te cue ñáyiú dǐhí-án ñi xica cuú-yu ndihí Jèsús distritú Galileá ní xinu cuèchí-yu núu-gá. Te cue ñáyiú dǐhí-án nchícú<sup>n</sup> ñáhã-yu xii-gá ní quexìo ndéé ñuú Jerusalén ndihí dava-gá ñáyiú dǐhí nchícú<sup>n</sup> ñáhã xii-gá cuáhá<sup>n</sup>.

#### *Chindúxi-güedé Jèsús*

(Mt. 27:57-61; Lc. 23:50-56; Jn. 19:38-42)

<sup>42</sup> Te cùu-xi nduu vispré nduu ndètátú ñáyiú. Te nduu-ã xíquide túha-yu sá cúu ìngá nduu nduu ndètátú-yu-án, te díu-ni nduu-ã sa ní cuaa vñhi, <sup>43</sup> te ìñ té nàni Cheé téé ñuú Arimáteá ní cuyí-dé ní sáhán-dé núu tē Pilatú, te ní xáha<sup>n</sup>-dē sá ñuu vá cündée iní-dé dañá-dé chindúxi-dé yiqui cùñú Jèsús. Te tñahá té Chèé-án cúu-dé ìñ té cùnuu cundihí-dé cue téé quide jundá, te tñahá-dé ndétú-dé sáá nduu ndíhu ndaha ñaha Yá Ndiǒxí xii-dé ndihí cue ñáyiú. <sup>44</sup> Te té Pilatú ío ní cùñúhu-dé sá dúcá<sup>n</sup> ìo ndihí

ní xíhí Jèsús, te ní cana-dé téé cùu capitá<sup>n</sup> ní xicá<sup>n</sup> tñuhú-dé núu-dé ñuu ndisa sá sà ní xíhí-gá. <sup>45</sup> Te téé cùu capitá<sup>n</sup>-án ñi xáha<sup>n</sup>-dē xii té Pilatú sá ndáa ní xíhí Jèsús, núu xíá<sup>n</sup> té Pilatú-án ñi sáha-dé tñuhu chindúxi té Chèé-án yiqui cùñú-gá. <sup>46</sup> Te té Chèé-án ñi saan-dé ìñ dǒo vñha, te ní sáhán-dé ní nunehe-dé yiqui cùñú Jèsús núu cùrúxí, te ní chidúcú<sup>n</sup>nuu-dé yiqui cùñú-gá dǒo vñha sá ñi saan-dé-án, te dǎtnùní néhé-dé yiqui cùñú-gá cuáhá<sup>n</sup> ní chihi-dé ìñ yaú nchii yiqui naha càva, te ní sadí-dé yuhu yaú-án ndihí ìñ yúú quéhé<sup>n</sup>. <sup>47</sup> Te tá Màriá Magdaléná, ndihí tá Màriá ñaná tē Chèé ní xiní-yu núu ñi chihi-dé yiqui cùñú Jèsús.

## 16

### *Ní ndoto Jèsús*

(Mt. 28:1-10; Lc. 24:1-12; Jn. 20:1-10)

<sup>1</sup> Te sátá ñi cundiquí<sup>n</sup> nduu ndètátú ñáyiú, te tá Màriá Magdaléná, ndihí tá Salómé, ndihí tá Màriá ñaná tē Jàcobó ní saán-yu acítí sáhán tñamí cuendá canehé-yu quíhí<sup>n</sup> chíhí-yu yiqui cùñú Jèsús. <sup>2</sup> Te ndumìngú nehé-ni òré vitna váha váha ní xínu coto núu nchícanhii ní quexìo-yu núu nchii yaú yíhí yiqui cùñú Jèsús. <sup>3</sup> Te ní xítñahá-yu:

—Yoo cúñaha-o xòcani yúú ndèdí yuhu yaú-a, chi vá yǒo tñahí ndècu ìha —cachí-yu xítñahá-yu.

<sup>4</sup> Te òré ní xíndéhé vñha-yu te ní xiní-yu sá yúú cáhnú ndèdí yuhu yaú-án ìñ xio-ná ndécú. <sup>5</sup> Te cuánguñhú-yu xítí yaú-án, te ní xiní-yu núcóo ìñ espíritú xínú cuèchi núu Yá Ndiǒxí ndáa xio cuhá-yu, te càa-xi datná cáá ìñ téé cuechi, te ñihnu-xi ìñ dǒo cuixí<sup>n</sup> dǒo cání, te ní yùhú-yu òré ní xiní-yu espíritú-án. <sup>6</sup> Te espíritú-án ñi xáha<sup>n</sup>-xi xii-yu:

—Vá yùhú-ndó, chi yùhú sa cùtnuní iní-í sá nchòhó véxi-ndo nànducu-ndo yiqui cùñú Jèsús téé ñuú Nazàrét téé ní sahani-güedé núu cùrúxí, dico ñá túú-gá yiqui cùñú-dé ndécú ìha



chi sa ní ndoto-dé, te chí cùndèhe núú nǐ sacá<sup>n</sup>-güedé yiqui cùñú-dé te quiní-ndó nǎ ñá túú-gǎ-dé. <sup>7</sup> Te chí cuàhá<sup>n</sup> núú ndécú tǎ Pèlú ndihí dava-gá cue téé ní xica cuu ndihí-dé, te duha cúñaha-ndo xì-güedé: “Jèsús codonùu-gá núú-ndó quíhí<sup>n</sup> distritú Galileá, te yàcá<sup>n</sup> quiní-ndó-gǎ dàtná ní cachí-gá xii-ndo”, duha cúñaha-ndo xì-güedé —càchí espíritú-á<sup>n</sup> xǎha<sup>n</sup>-xi xí-yu.

<sup>8</sup> Te cue ñáyiú dǐhí-á<sup>n</sup> ïo ní yùhú-yu, te ní queene cunú-yu cuánuhú-yu, te quèdì ñaha-ná-xi xii-yu sá ïo ní yùhú-yu, te ñá túú tnàhí ná tnúhu ni xǎhǎ<sup>n</sup>-yu xii cue ñáyiú ní naníhí-yu ichi cuèndá sá ïo ní yùhú-yu.

*Tá Màriá Magdalèná ní xini-xi Jèsús (Jn. 20:11-18)*

<sup>9</sup> Te sátá dúcá<sup>n</sup> nǐ ndoto Jèsús ndumìngú nehé-ni-á<sup>n</sup>, te dǐhna nuu-gǎ tá Màriá Magdalèná ní quee túu-gá núú-xi, te dǐu tá Màriá-á<sup>n</sup> cúu-xí xíchí nǐ xíhí ñaha ùsá espíritú cùndihí yucu ñávǎha ni cùu, te Jèsús ní queñuhu-gá nchaa espíritú-á<sup>n</sup> yiqui cùñú-xi. <sup>10</sup> Te xíchí-á<sup>n</sup> nǐ sáhá<sup>n</sup>-xi ní xítñuhu-xi cue téé ní xica cuu ndihí Jèsús nàcuáa ní cuu, te xǐndáhí-güedé sá ndìhú iní-güedé òré ní quexìo-xi núú ndécú-güedé. <sup>11</sup> Te òré ní xǎha<sup>n</sup> tǎ Màriá xii-güedé sá nǐ ndoto Jèsús ndihí sá nǐ xini ñáhá-xí xii-gá, te ñá túú ní sàndáá iní-güedé.

*Jèsús ní quee túu-gá núú úú cue téé ní xica cuu ndihí-gá (Lc. 24:13-35)*

<sup>12</sup> Te úú tnàhá cue téé ní xica cuu ndihí Jèsús ñúhú-güedé ichi cuáhá<sup>n</sup>-güedé yucu, te uu<sup>n</sup>i ní quee túu-gá núú-güedé, te ní dácótó ñaha-xi xii-güedé sá ñà túú-gǎ cáá-gǎ dàtná cáá-gǎ. <sup>13</sup> Te cue téé úú-á<sup>n</sup> nǐ xica-güedé cuáhá<sup>n</sup>-güedé ní xítñuhu-güedé nchaa dava-gá cue téé ní xica cuu ndihí-gá sá nǐ xini ñáhá-güedé xii-gá, dico dǐu-ni duca<sup>n</sup> ñà túú ní sàndáá iní cue téé-á<sup>n</sup> tnúhu ní cáhá<sup>n</sup>-güedé.

*Jèsús xǎha<sup>n</sup>-gǎ xii cue téé ní xica cuu ndihí-gá nàcuáa ndiù chiu<sup>n</sup> cada-güedé (Mt. 28:16-20; Lc. 24:36-49; Jn. 20:19-23)*

<sup>14</sup> Te ndi ùxí ïi<sup>n</sup> cue téé ní xica cuu ndihí Jèsús yíhí-güedé mèsá xéxí-güedé, te ní quee túu-gá núú-güedé te ní tenáá ñáhá-gǎ xii-güedé cuèndá sá ïo sáá iní-güedé ñá túú sàndáá iní ñáhá vǎha-güedé xii-gá, chí ñá túú ní cuini-güedé quíndáá iní-güedé nàcuáa ní xǎha<sup>n</sup> ñáyiú ní xini ñáhá xii-gá sátá nǐ yáha ní ndoto-gá. <sup>15</sup> Te ní xǎha<sup>n</sup>-gǎ xii-güedé:

—Quíhí<sup>n</sup>-ndó ñihí ñuyú cáhá<sup>n</sup>-ndó núú nchaa ñáyiú tnúhu vǎha tnúhu sá cáhá<sup>n</sup> nàcuáa naníhí tǎhú-yu. <sup>16</sup> Te nchaa ñáyiú na quíndáá iní tnúhu-á<sup>n</sup> te cuanduté-yu, te naníhí tǎhú-yu, dico nchaa ñáyiú vá quíndáá iní tnúhu-á<sup>n</sup> te cuíta nihnú-yu. <sup>17</sup> Te nchaa ñáyiú na quíndáá iní ñáhá xii-í te cadá-yu sá vǎ yǒo tnàhí ndàcu cada, te cacunehe ñáhá-yu xii-í, te queñuhú-yu nchaa espíritú cùndihí yucu ñávǎha yíhí ñaha xii ñáyiú. Te uu<sup>n</sup>i ndacú-yu cáhá<sup>n</sup>-yu ñngá núú tnúhu sá vǎtá dácuàha-gá-yu. <sup>18</sup> Te cuèi na tnǐ<sup>n</sup>-yu cóo dǎé<sup>n</sup> dico ñá túú nǎ cada ñaha-dǐ xii-yu, te cuèi venènú ná cáxí-yu dico ñá túú nǎ tnahá-yu, te tendáhá-yu cue ñáyiú cùhú te ndúha-yu —càchí-gá xǎha<sup>n</sup>-gǎ xii-güedé.

*Jèsús cuánda-gá andiù (Lc. 24:50-53)*

<sup>19</sup> Te sátá nǐ yáha duca<sup>n</sup> nǐ xǎha<sup>n</sup> Jèsús xii cue téé ní xica cuu ndihí-gá, te ní ndanchita-gá cuánda-gá andiù te ní ngóo-gá xio cùha Dútú Ndiǒxí. <sup>20</sup> Te cue téé-á<sup>n</sup> nǐ xica-güedé cuáhá<sup>n</sup>-güedé, te ní ngúita-güedé cáhá<sup>n</sup>-güedé tnúhu Xítóhó Jesucristú nchaa xichi. Te mee-gǎ ní chindee ñaha-gá xii-güedé ní quide-güedé nchaa sá vǎ yǒo tnàhí ndàcu cada cuèndá cutnùni iní ñáyiú sá ndáá cáhá<sup>n</sup>-güedé tnúhu-gá. Duha ní cuu dàvá-á<sup>n</sup>.

## TNÚHU NÍ CHÍDÓ TNÜNÍ TÈ LÚCÁ

*Nàcuáa ní ngódó tnùnì tnúhu Yá Ndiöxí*

<sup>1</sup> Te vâi ñáyiú chîdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu. <sup>2</sup> Te ñiú-ni nchaa tnúhu chîdo tnuní-yu-án cúú-xí tnúhu ní cáhá<sup>n</sup> nchaa cue téé ní xiní ndáá nàcuáa ní cuu ndéé díhna, cue téé ní cáhá<sup>n</sup> tnúhu Yá Ndiöxí. <sup>3</sup> Te yúhú sa ní cuu nduu quide cuendá-í nchaa nàcuáa ní cuu, núu xǎ<sup>n</sup> ní sani iní-í tee váha-í nchaa tnúhu-a núú tütú sá cúú-xí yòhó té Tèofilú chi ío váha cùu iní-í sá cúú-xí-n, <sup>4</sup> te tèe-í cuendá cutnùnì iní-n sǎ sǎ ndáá cúú-xí nchaa sá ní dánèhé ñáhá-güedé xii-n.

*È<sup>n</sup> espíritú xínú cuèchi núú Yá Ndiöxí cǎchí-xi sá cǎcú è<sup>n</sup> téé cunani Juáá*

<sup>5</sup> Te cútñàhá ní xíndaha té Hèrodés ñáyiú distritú Júdeá dàvá-án ní xíndecu è<sup>n</sup> dútú ní xínani-dé Zacàriá, te ní cundihí-dé cue dútú Àbiás. Te ñadìhí-dé ní xínani-a<sup>n</sup> Èlisabét, te ñaha-án ní cuu-a<sup>n</sup> ñaní tnàhá ndìi Àrón. <sup>6</sup> Te ndì ndùú-yu ío ní quide ndáá-yu núú Dütú Ndiöxí, chi ní tní-yu nchaa tnúhu ní cáhá<sup>n</sup>-gá. <sup>7</sup> Te ñá túú nì è<sup>n</sup> déhe-yu, chi duca<sup>n</sup> tǎhú tǎ Elisabét sá vǎ cóo déhe-a<sup>n</sup>, te duca<sup>n</sup> ndì nduú-yu ío ní sahnú-yu.

<sup>8</sup> Te è<sup>n</sup> nduu xínu cuechi tucu té Zacàriá ndihí nchaa cue téé cundihí-dé núú Yá Ndiöxí xití veñúhu. <sup>9</sup> Te dàvá-án ní xito ndéé-güedé cuendá cutnùnì iní-güedé nùu ndédacàa-güedé quíhu núú nàá xití veñúhu-án cahmi-güedé sá sàhá<sup>n</sup> tnámí, te ní cutnùnì sá tè Zacàriá quíhu-dé. Te duca<sup>n</sup> nì quide-güedé, chi duca<sup>n</sup> tnàhí ní xóo cada nchaa cue dútú dàvá-án. <sup>10</sup> Te ñini sàhmi té Zacàriá sá sàhá<sup>n</sup> tnámí núú nàá, te vâi vihi ñáyiú xíndecu quehé veñúhu-án cǎhá<sup>n</sup> ndihí-yu Yá Ndiöxí. <sup>11</sup> Te ní xiní té Zacàriá è<sup>n</sup> espíritú xínú cuèchi núú

Yá Ndiöxí nútní-xi xio cùha núú nàá núú cǎyú sá sàhá<sup>n</sup> tnámí-án. <sup>12</sup> Te òré ní xiní té Zacàriá espíritú-án te ñá ní cùtnunì iní-dé nása cada-dé chi ío ní yùhú-dé. <sup>13</sup> Te espíritú-án nì xáha<sup>n</sup>-xi:

—Zacàriá, vá yùhú-n chi Yá Ndiöxí ní tedóho-gá tnúhu ní cáhá<sup>n</sup>-n, te vitna coo è<sup>n</sup> déhe ñadìhí-n tǎ Elisabét te danàni-n-dé Juáá. <sup>14</sup> Te ío cudíi iní-n, te duca<sup>n</sup> ío vâi ñáyiú cudíi iní-yu na cǎcu-dé. <sup>15</sup> Te ío cudíu-dé núú Yá Ndiöxí, te nì vǎ cóhó-dé ndidí te nì vǎ cóhó-dé ndudí sá nì natiu, te sa cundecu ndihí-dé Espíritú Yá Ndiöxí òré cacu-dé. <sup>16</sup> Te ñiú-dé cada te ío vâi ñáyiú isràél natuhá-yu ichi Dütú Ndiöxí Yaá cúú Ndiöxí-ó. <sup>17</sup> Te té Juáá-án codonùu-dé núú-gǎ, te cundecu ndihí-dé Espíritú-gǎ, te taxi tnùnì-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá váha sá cúú-xí cuè téé cuechi, te cuèi cue téé ío sǎá iní-xi, te ñiú-dé cada te tní-güedé tnúhu váha, tnúhu cǎhá<sup>n</sup> ñáyiú quide ndáá. Te duca<sup>n</sup> cǎda-dé cǎda túha-dé ñáyiú cuendá cunu cuèchi-yu núú Dütú Ndiöxí —cǎchí-xi xáha<sup>n</sup>-xi xii-dé.

<sup>18</sup> Te té Zacàriá ní ndúcú tnúhu-dé núú espíritú-án, te xáha<sup>n</sup>-dè:

—¿Te nása cutnùnì ndáá iní-í tnúhu cǎhá<sup>n</sup>-n-í? Chi yúhú ío ní sahnú-í ndihí ñadìhí-í —cǎchí-dé xáha<sup>n</sup>-dè xii-xi.

<sup>19</sup> Te espíritú-án nì xáha<sup>n</sup>-xi:

—Yúhú cùu-í espíritú nání Gàbriél, te xínu cuechi-í núú Yá Ndiöxí, te mee-gǎ ní táuchíú<sup>n</sup>-gǎ náhà-í tnúhu-gǎ véxi cuendá cutnùnì iní-n nàcuáa cada ñaha-gǎ xii-ndo. <sup>20</sup> Te vitna cuu ñihí-n te vǎ cǎhá<sup>n</sup>-gá-n ndéé ná sǎá nduu cǎcu déhe ñadìhí-n, chi ñá túú ní sàndáá-ni iní-n tnúhu ní cáhá<sup>n</sup>-í. Te dacuitíi sǎá nduu cǎda-xi nàcuáa ní cáhá<sup>n</sup>-í-a —cǎchí espíritú-án xáha<sup>n</sup>-xi xii-dé.

<sup>21</sup> Te nchaa ñáyiú xíndecu quehé ndétü-yu té Zacàriá, te xícuñúhu-yu sá ío cùyaa-dé xití veñúhu. <sup>22</sup> Te òré ní ndee té Zacàriá, te ñá ní cùu-gǎ cáhá<sup>n</sup> ndihí ñaha-dé xii-yu, te òré-án nì cutnùnì iní-yu sá nì xiní-dé è<sup>n</sup> espíritú xínú cuèchi núú Yá Ndiöxí xití veñúhu. Te mee-nǎ ndaha-dé

ní quide-dé núŷ-yu chi ñá ní cùu-gá cáhá<sup>n</sup>-dé.

<sup>23</sup> Te ní xínu nduu nĩ xínu cuechi tẽ Zacàriá núú Yă Ndiõxí xití veñúhu, te cuánuhú-dé vehe-dé. <sup>24</sup> Te sátá dúcá<sup>n</sup> nĩ cuu te ñadĩhí-dé tá Elisàbét ní ngúhu<sup>n</sup> déhe-a<sup>n</sup>, te úhú<sup>n</sup> yóó ñà túú tnàhí-gá ní quèe-a<sup>n</sup> caca cuu-a<sup>n</sup>, te ní cachí-a<sup>n</sup>: <sup>25</sup> “Mee Dútú Ndiõxí duha ní cundàhú iní ñáhá-gă sá cóó ì<sup>n</sup> déhe-í cuendá sá vă cúú yíhí iní ñáhá ñáyiu xii-í”, duha ní cachí-a<sup>n</sup>.

*È<sup>n</sup> espíritú xínú cuèchi núú Yă Ndiõxí cächí-xi sá cácu Jèsús*

<sup>26-27</sup> Te núú ìñú yóó sã nĩ ngúhu<sup>n</sup> déhe tá Elisàbét, te ní tendaha tùcu Yă Ndiõxí espíritú nání Gábriél cuáhá<sup>n</sup>-xi ì<sup>n</sup> ñuu nání Nàzarét cuáhá<sup>n</sup> ngoto-xi ì<sup>n</sup> xíchí cuéchí nàni Mariá. Te ñuu-á<sup>n</sup> yíndèhu-xi distritú Galileá. Te xíchí-á<sup>n</sup> sa ní cundáá tnúhu sá tnãndaha-xi ndihí ì<sup>n</sup> tée nàni Cheé ñaní tnáhá ndí Dávíí. <sup>28</sup> Te espíritú-á<sup>n</sup> nĩ quíhu-xi ndéé xití vehe núú ndécú tă Măriá, te ní xáha<sup>n</sup>-xi:

—¿Covãha-n-a<sup>n</sup>! Dútú Ndiõxí ío cùu iní ñáhá-gă xii-n te ndècu ndihí ñaha-gá, te ío-gá xító ñaha-gá xii-n dàcúúxí dáva-gá ñáyiu dñí —cächí espíritú-á<sup>n</sup> xáha<sup>n</sup>-xi.

<sup>29</sup> Dico òré ní xiní tá Măriá espíritú-á<sup>n</sup>, te ní quíyùhú iní-xi sá dúcá<sup>n</sup> nĩ cáhá<sup>n</sup> espíritú-á<sup>n</sup>. Te ní sani iní-xi: “¿Ná cuendá duha càhá<sup>n</sup>-tu espíritú-a-í?”, duha ní sani iní-xi. <sup>30</sup> Te espíritú-á<sup>n</sup> nĩ xáha<sup>n</sup>-xi:

—Măriá, vá yùhú-n chi duca<sup>n</sup> nĩ nduu táhú-n nõu Yă Ndiõxí. <sup>31</sup> Te vitna ngúhu<sup>n</sup> déhe-n, te na càcu-dé te danàni-n-dé Jèsús. <sup>32</sup> Te ío cunuu-dě, chi Dútú Ndiõxí Yáá ío cunuu cachí-gá sá Dèhe-gá cúú-dě, te diu-gá cada te cuu-dé ì<sup>n</sup> tée cunuu núú ñáyiu isràél dàtná ní quide-gá ndí Dávíí. <sup>33</sup> Te taxi tnùn-í-dé ñáyiu isràél, te duca<sup>n</sup>-ni cunuu-dé ni caa ni quíhí<sup>n</sup> —cächí-xi xáha<sup>n</sup>-xi.

<sup>34</sup> Te tá Măriá ní xáha<sup>n</sup>-xi xii espíritú-á<sup>n</sup>:

—¿Te nása cuu tnúhu càhá<sup>n</sup>-n te ñá túú yè-í-í? —cächí-xi xáha<sup>n</sup>-xi.

<sup>35</sup> Te ní xáha<sup>n</sup> espíritú-á<sup>n</sup>:

—Espíritú Yă Ndiõxí quixi cundecu ndihí-n, te duca<sup>n</sup> Yă Ndiõxí cada-gá ì<sup>n</sup> sá vãha sá cúú-xi-n ná càcu déhe-n. Te Yă Ndiõxí cächí-gá sá ío cundecu yíñuhu-dé núú-gă, chi Dèhe-gá cúú-dě. <sup>36</sup> Te tnàhá didí-n tă Elisàbét ñúhú dèhe-a<sup>n</sup> cuèi ío ní sahu-a<sup>n</sup>, te diu-a<sup>n</sup> cächí-yu sá vă cóó dèhe-a<sup>n</sup> ni cùu, te vitna sa ní cuu ìñú yóó ñúhú dèhe-a<sup>n</sup>. <sup>37</sup> Chi Yă Ndiõxí ndácú-gă quidé-gă nchaa sá vă yõo tnàhí ndàcu cada —cachí-xi xáha<sup>n</sup>-xi.

<sup>38</sup> Te tá Măriá ní xáha<sup>n</sup>-xi:

—Yúhú ná cúnú cuèchi-í núú Dútú Ndiõxí, te mee-gá ná cádá ñaha-gá xii-í nàcuáa ní cachí-n —cächí-xi xáha<sup>n</sup>-xi xii espíritú-á<sup>n</sup>.

Te sátá dúcá<sup>n</sup> te espíritú-á<sup>n</sup> nĩ xica-xi cuáhá<sup>n</sup>-xi.

*Tá Măriá cuáhá<sup>n</sup> ngoto-xi tá Elisàbét*

<sup>39</sup> Te tá Măriá ío ndihí cuáhá<sup>n</sup>-xi ì<sup>n</sup> ñuu cáá xití yucu distritú Jùdeá.

<sup>40</sup> Te ní sáa-xi vehe té Zacàriá, te cuánguñhu-xi ní dándácõo váha-xi tá Elisàbét. <sup>41</sup> Te òré ní tecú dóho tá Elisàbét ní cáhá<sup>n</sup> tá Măriá, te ní candá déhe-a<sup>n</sup> xití-a<sup>n</sup>, te òré-á<sup>n</sup> nĩ ngúndecu ndihí-a<sup>n</sup> Espíritú Yă Ndiõxí. <sup>42</sup> Te níhi ní cáhá<sup>n</sup>-a<sup>n</sup>, te xáha<sup>n</sup>-a<sup>n</sup> xii tá Măriá:

—Yă Ndiõxí ío xito ñaha-gá xii-n dàcúúxí dáva-gá tnàha dñí-ó, te duca<sup>n</sup>-ni xito-gá cuèi déhe-n. <sup>43</sup> ¿Te ná cúú yùhú nõu véxi coto ñaha yòhó nãná Yáá cúú Xítohó-í-í? <sup>44</sup> Chi òré-ni ní tecú dóho-í ní cáhá<sup>n</sup>-n te ní candá-ni déhe-í xití-í sá cùdí ìni-dé. <sup>45</sup> Te váha táhú yòhó sá ni sãndáá iní-n, chi dacuití sã cádá Dútú Ndiõxí nàcuáa ní cáhá<sup>n</sup> espíritú ní tendaha-gă ní quixi ní cachí tnúhu xii-n nàcuáa cada-gá —cächí-a<sup>n</sup> xáha<sup>n</sup>-a<sup>n</sup> xii tá Măriá.

<sup>46</sup> Te ní xáha<sup>n</sup> tă Măriá:

Ío càhnu cuu Dútú Ndiõxí,

<sup>47</sup> ío cùdí ìni-í chi diu-gá taunihnu ñaha-gă xii-í núú ùhú núú ndàhú.

<sup>48</sup> Chi ní ndacu iní ñáhá-gă xii yúhú, te dícó ì<sup>n</sup> xíchí xínú cuèchi núú-gă cúú-í,

te vitna te nchaandi túhú ñáyiu cachí-yu sá ío váha táhú-í.

49 Te Yá Ndiöxí cándòo caa nine iní-gá, te ío càhnu ì<sup>n</sup> sá vâha ní quide-gá sá cúú-xì-í.

50 Te cùndahú iní-gá nchaa ñáyiú nêhe sá yíñùhu núú-gă.

Te duca<sup>n</sup>-ni cuëi ñáyiú sa ndècu ñuyíú-a ndihí ñáyiú vitna véxi.

51 Chi ta quide-gá nchaa sá vâ yôo tnàhí ndàcu cada véxi, te ta dàndòo canúú-gă cue ñáyiú quide cahnu mee-xi.

52 Te cue ñáyiú tàxi tnuní ñá túú-gă dáñá-gă taxi tnùní-yu, te cue ñáyiú ndàhú ní quide nínu ñaha-gă xií-yu.

53 Te cue ñáyiú ndècu ndihí tnúndòho tnúhu ndàhú ní quide váha ñaha-gă xií-yu,

te cue ñáyiú cuica ñà túú nă ní nñí-gă-yu cundecu ndihí-yu.

54 Te chindee-gá ñáyiú isrâél, ñáyiú xínu cuechi núú-gă, te ñá túú dàña nihnu ñaha-gă xií-yu, chi cùndahú iní ñáhá-gă.

55 Chi duca<sup>n</sup> ñí xáha<sup>n</sup>-gă xii ndíi Àbrahám, ndihí cue ñaní tnáhá ndíi.

Duha ní xáha<sup>n</sup> tá Màriá xii tá Elisàbét.

56 Te ní xíndecu tá Màriá dàtná úní yóo ndihí tá Elisàbét te dàtnúni cuánuhú-xi vehe-xi.

*Ní cacu té Juàá téé dacuàndute ñaha xii ñáyiú*

57 Te ní sáá nduu ñí cacu ì<sup>n</sup> déhe téé tá Elisàbét. 58 Te nchaa ñáyiú ndècu yatni ndihí-a<sup>n</sup>, ndihí nchaa ñaní tnáhá-á<sup>n</sup> ñí níhí-yu tnúhu nàcuáa ní chindee ñaha Yá Ndiöxí xii-a<sup>n</sup>. Te ío ní cudíi iní-yu cuendá-a<sup>n</sup>. 59 Te núú ùná nduu sá ñí cacu déhe-a<sup>n</sup>, te ní sáhá<sup>n</sup> ñáyiú núú ndécú-á<sup>n</sup> cuendá cuáhă-yu sèñá ñí déhe-a<sup>n</sup>. Te cuíní-yu cunani dèhe-á<sup>n</sup> Zacàriá dàtná nání tătă ní cùu.

60 Te ní xáha<sup>n</sup> náná dèhe-á<sup>n</sup>:

—Ñáhá, chi Juàá cunani-dě — cächí-a<sup>n</sup> xáha<sup>n</sup>-a<sup>n</sup> xií-yu.

61 Te ní xáhă-yu:

—¿Te ná cuendá te ñá túú nì ì<sup>n</sup> ñaní tnáhá-ndó dùca<sup>n</sup> nani-i? —cachí-yu xáhă-yu.

62 Te ní quidé-yu ndàhá-yu núú tătă dèhe-á<sup>n</sup> cuendá cuíní-yu núú nása

cuíní méé-dě cunani dèhe-dé. 63 Te ní xícá<sup>n</sup>-dé ì<sup>n</sup> tutú ní chídó tnùní-dé nàcuáa cunani dèhe-dé, te duha ní chídó tnùní-dé: “Juàá cunani-dě”, cächí-xi núú tütú ní tee-dé-á<sup>n</sup>. Te nchaa ñáyiú xíndecu-á<sup>n</sup> ñí cuñúhu-yu nàcuáa ní cuu. 64 Te òré-á<sup>n</sup> ñí nacáhá<sup>n</sup> té Zacàriá sá ñí cuu ñíhí-dé ní cùu, te ní ngúíta-dé ní cachí-dé sá ío càhnu cuu Yá Ndiöxí. 65 Te nchaa ñáyiú xíndecu yatni ndihí-dé ní cuñúhu-yu, te nchaa ñáyiú xíndecu nihíi xití yucu distrítú Jùdeá ní níhí-yu tnúhu nàcuáa ní cuu. 66 Te nchaa ñáyiú-á<sup>n</sup> ío vâi ní sani iní-yu, te ní xítñahá-yu:

—¿Ná cúú sá cádá tée-á<sup>n</sup> ndéé idá-gá ná cuèhnu-dé? —cächí-yu xítñahá-yu.

Te duca<sup>n</sup> ñí xítñahá-yu chi Dútú Ndiöxí ndécú ndihí ñaha-gă xii-dé.

*Té Zacàriá cächí-dé sá ío càhnu cuu Yá Ndiöxí*

67 Te té Zacàriá tătă tē lîhli-á<sup>n</sup> ñí ngúndecu ndihí-dé Espíritú Yá Ndiöxí te ní cáhá<sup>n</sup>-dé nchaa tnúhu sá ñí dánèhé ñáhá-gă, te ní cachí-dé:

68 Ío càhnu cuu Dútú Ndiöxí nchoo ñáyiú isrâél,

chi ní quixi coto ñaha-gă xii-o, te cùu-o ñáyiú cùu cuendá-gă, chi dàcácu nihnu ñaha-gă xii-o vitna.

69 Chi ní tendaha-gă ì<sup>n</sup> tée véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíi tée ní xínu cuechi núú-gă ndéé sanaha.

70 Te ñíu-ni tnúhu ní cáhá<sup>n</sup> Yá Ndiöxí ní cáhá<sup>n</sup> cue tée ní quide ndáá ní xíndecu núú-gă ñuyíú-a ndéé sanaha.

71 Te ní cachí-güedé sá táúnìhnu ñaha-gă xii-o núú nchaa ñáyiú cùu ùhú iní ñáhá, ndihí núú nchaa ñáyiú ñá túú cùu quiní ndee ñáhá.

72 Te ní xáha<sup>n</sup>-gă sá cùndàhú iní ñáhá-gă xii-o, te duca<sup>n</sup> càda-gă chi vá nàcuánaa-gă tnúhu ní cáhá<sup>n</sup>-gă ndihí-güedé.

73 Te ñíu duca<sup>n</sup> ndúu tnúhu ní xáha<sup>n</sup>-gă xii ndíi Àbrahám sá

74 táúnìhnu ñaha-gă xii-o núú nchaa ñáyiú cùu ùhú iní ñáhá,



cuendá sá vǎ yùhú-ó cùnu cuechi-o nùú-gǎ.

75 Te cada ndáá-ó, te cundecu yíñùhu-o nùú-gǎ ndi nchàa nduu cundecu-o ñuyíú-a.

Duha ní cachí té Zacàriá.

76 Te xáha<sup>n</sup>-dè xii té lǐhli-á<sup>n</sup>:

Te yòhó té lǐhli, cáhá<sup>n</sup> ñáyiú cuendá-n sǎ cúú-n ì<sup>n</sup> téé cáhá<sup>n</sup> tnúhu Dútú Ndiòxí Yaá ío cùnuu,

chi quíhí<sup>n</sup>-n còdonuu-n nùú Yǎá cúú Xítóhó-ó dátúha-n ñáyiú cuendá cundecu túha-yu òré quexìo-gǎ.

77 Te cúñaha-n xii ñáyiú isràél sá cuíní-gǎ cada càhnu iní-gǎ nchaa cuéchi-yu,

te naníhí tàhú-yu.

78 Te duca<sup>n</sup> càda-gǎ chi ío cùu iní ñáhá-gǎ xii-o, chi ndéé andiú ní tendaha-gǎ ì<sup>n</sup> téé véxi

cuu<sup>n</sup>-dè dandìxi túu-dé iní-ó cuendá cutnùní iní-ó nàcuáa ndùu cuendá Yǎ Ndiòxí.

79 Te duca<sup>n</sup> dandìxi túu-dé iní nchaa ñáyiú ndècu ichi cuehé ichi duha ta xíta nihnu cuáhá<sup>n</sup> cuendá nucúnu ichí-yu ì<sup>n</sup> ichi váha.

Duha ní xáha<sup>n</sup> tǎ Zacàriá xii déhe-dé.

80 Te té lǐhli-á<sup>n</sup> tá sàhnu-dé, te ta chindee chitúu ñaha Yǎ Ndiòxí xii-dé cuáhá<sup>n</sup>, te ní xíndecu-dé xití yucu ndéé ní sáá nduu ní ngúíta-dé ní cáhá<sup>n</sup>-dè nùú cuè ñáyiú isràél tnúhu Yǎ Ndiòxí.

## 2

### *Ní cacu Jesús*

(Mt. 1:18-25)

1 Te dàvá-á<sup>n</sup> ní táuchíú<sup>n</sup> tǎ Àugustú Cèsár nucódó tnùnì nchaa ñáyiú nàció<sup>n</sup> yíndàha-dé. 2 Te xéhé sǎ dǐhnanuu ní nucódó tnùnì ñáyiú, te diu-ni dàvá-á<sup>n</sup> ní cunuu té Cìreniú distritú Siríá. 3 Te nchaa ñáyiú ní nataká-yu ñuú nùú ní cacú-yu cuendá nucódó tnùnì-yu. 4 Nùu xíá<sup>n</sup> ní quee té Chèé ñuú Nazàrét ì<sup>n</sup> ñuú yíndèhu distritú Galileá, te cuáhá<sup>n</sup>-dè ñuú Bèlén ì<sup>n</sup> ñuú yíndèhu distritú Jùdeá, chi xíá<sup>n</sup> ní cuu ñuú ndí Dàvíí, te diu-ni ñanì tnáhá tǎ Chèé-á<sup>n</sup> ní cuu ndí. 5 Nùu xíá<sup>n</sup> cuáhá<sup>n</sup>-dè

ndéé ñuú Bèlén nucódó tnùnì-dé, te tnáhá tá Màriá xíhí ní cundáá tnúhu sá tnàndaha ndíhi-dé cuáhá<sup>n</sup> ndíhi ñaha-dé, te sa ñùhu déhe-xi. 6 Te nini cùyaá-yu ñuú Bèlén-á<sup>n</sup> ní sáá òré cacu déhe-xi. 7 Te ní cacu déhe díhna-xi, te ní chidúcú<sup>n</sup>nuu-xi dóó, te ní sacá<sup>n</sup> ñáhá-xí ì<sup>n</sup> vehe nùú cúú vèhe quiti, chi ñá túú ní ñíhí-yu vehe coó-yu.

*Cue espíritú xínú cuèchi nùú Yǎ Ndiòxí ndíhi cue toli.*

8 Te yatni ñuú-á<sup>n</sup> xíndecu ì<sup>n</sup> úú toli ndéé-güedé mbèé-güedé ndécú-güedé majadá niú-á<sup>n</sup>. 9 Te uu<sup>n</sup>ni ní quexìo ì<sup>n</sup> espíritú xínú cuèchi nùú Yǎ Ndiòxí, te Yǎ Ndiòxí ní quide-gǎ ní dáyèhé-xi ní càndéé nùú xíndecu-güedé, te ní yùhú víhí-güedé. 10 Te ní xáha<sup>n</sup> espíritú-á<sup>n</sup>:

—Vá yùhú-ndó, chi nàha-í ì<sup>n</sup> tnúhu váha véxi sá cúú-xí-ndó, te ío cudíí iní-ndó ndíhi nchaa ñáyiú. 11 Chi vitna ní cacu ì<sup>n</sup> téé dàcácu nihnu ñaha xii-ndo nùú ùhú nùú ndàhú ñuú ndí Dàvíí, te téé-á<sup>n</sup> cúú-dé Xítóhó Jesucristú. 12 Te dàtná ì<sup>n</sup> sèñá te naníhí-ndó tǎ lǐhli-á<sup>n</sup> yídúcú<sup>n</sup> nuu-dé dóó cáá-dé ì<sup>n</sup> vehe quiti —càhí-xi xáha<sup>n</sup>-xi xii-güedé.

13 Te òré-á<sup>n</sup> ní quexìo cuéhé víhí espíritú véxi cuu<sup>n</sup> andiú ní naníhí tnáhá-xí ndíhi espíritú-á<sup>n</sup>, te ní ngúíta-xi ní chiñuhu-xi Yǎ Ndiòxí, te càhí-xi:

14 ¡Ío càhnu cuu Yǎ Ndiòxí Yaá ndécú andiú,

te na cùndecu váha-ni nchaa ñáyiú cùu iní méé-gǎ!

Duha càhí cue espíritú-á<sup>n</sup>.

15 Te òré cuánda cue espíritú-á<sup>n</sup> andiú, te ní ngúíta cue toli-á<sup>n</sup> xítñaha-güedé:

—Na quíhí<sup>n</sup>-ó ñuú Bèlén quiní-ó nàcuáa ní cuu, chi Dútú Ndiòxí sa ní cachí tnúhu-gǎ —càhí-güedé xítñaha-güedé.

16 Te ní tní-güedé ichi súúni ndíhi cuáhá<sup>n</sup>-güedé, te ní naníhí-güedé tá Màriá ndíhi té Chèé, ndíhi té lǐhli-á<sup>n</sup> cáá-dé xití ì<sup>n</sup> vehe quiti.

17 Te òré ní xíní ñáhá-güedé te ní xáha<sup>n</sup>-güedé xii-yu nàcuáa ní

xáha<sup>n</sup> espíritú-á<sup>n</sup> xii-güedé cuendá té lihli-á<sup>n</sup>. <sup>18</sup> Te nchaa ñáyu ní tecú dóho-xi ní cuñúhu-yu nàcuáa ní cáhá<sup>n</sup>-güedé. <sup>19</sup> Dico tá Màriá chi ñúhu nahi-ni iní-xi, te dícó-ni sàni iní-xi cuendá nchaa tnúhu-á<sup>n</sup>. <sup>20</sup> Te cue toli-á<sup>n</sup> ñi natnii-güedé ichi, te ta xitnáha-güedé cuánuhú sá ïo càhnu cuu Yá Ndiöxí cuendá nchaa tnúhu ní xíndedóho-güedé, ndihí cuendá nchaa sá ñi xini-güedé, chi cuendá sá ndáa ní cuu nchaa nàcuáa ní tecú tnúhu-güedé.

### *Ndècá-yu Jèsús cuáhá<sup>n</sup> veñúhu*

<sup>21</sup> Te núú ùná nduu sá ñi cacu té lihli-á<sup>n</sup>, te ní sáha-güedé sèñá ñi-dé, te ní dánání ñaha-güedé Jèsús xii-dé, ñi-ni nàcuáa ní xáha<sup>n</sup> espíritú xínú cuèchi núú Yá Ndiöxí xii tá Màriá ndéé cútñahá vátá ngúhu<sup>n</sup>-gá-dé xití-xi.

<sup>22</sup> Te sátá ñi tnahá nduu, ndùu ñi-yu nàcuáa càhá<sup>n</sup> nchaa tnúhu ní chídó tnùnì ndii Moisés, te ndècá-yu té lihli-á<sup>n</sup> cuáhá<sup>n</sup> ñuú Jerusalén cuendá quee túu-dé núú Dútú Ndiöxí. <sup>23</sup> Te ñuca<sup>n</sup> ñi quidé-yu, chi ñuca<sup>n</sup> càhá<sup>n</sup>-xi núú tütú Yá Ndiöxí sá ncháá lándú té na càcu díhna quetúu-güexi núú-gá cuendá cundecu-ná-güexi cuendá-gá. <sup>24</sup> Te ní quidé-yu nàcuáa càhá<sup>n</sup> Yá Ndiöxí núú tütú-gá núú càchí-xi: “Canehe-ndo úú lómá àdi úú cücu quíhí<sup>n</sup> nduu táhú ñáhá Yá Ndiöxí”, ñuca càhá<sup>n</sup>-gá núú tütú-gá.

<sup>25</sup> Te ñavá-á<sup>n</sup> ndécú ñi<sup>n</sup> té nàni Mió ñuú Jerusalén. Te ïo váha iní-dé, te chñuhu-dé Yá Ndiöxí, te ndètu-dé sáa nduu chindee ñaha Yá Ndiöxí xii ñáyu israhél. Te ndècu ndihí té Mió-á<sup>n</sup> Espíritú Yá Ndiöxí. <sup>26</sup> Te sa ní xáha<sup>n</sup>-xi xii-dé sá vã cùu-ni-dé, chi dacutíi quini-dé Crístú Yaá tendaha Yá Ndiöxí quixi ñuyíu-a. <sup>27</sup> Te té-á<sup>n</sup> ndécá ñaha Espíritú Yá Ndiöxí xii-dé cuáhá<sup>n</sup> veñúhu càhnu sá ïo cùnuu. Te cuáhá<sup>n</sup>-yu ndihí Jèsús veñúhu-á<sup>n</sup> cuendá cadá-yu ndihí-gá nàcuáa càhá<sup>n</sup> tnúhu ní chídó tnùnì ndii Moisés. <sup>28</sup> Te òré ní sáa-yu, te té Mió-á<sup>n</sup> ñi nguidèhé-dé Jèsús, te ní cáhá<sup>n</sup>-dé sá ïo càhnu cuu Yá Ndiöxí, te ní xáha<sup>n</sup>-dè xii-gá:

<sup>29</sup> Yòhó Dútú Ndiöxí sa ní cuu ñaña-n cùu-í vitna,

chi sa ní quide-n nàcuáa ní cachí-n xii yúhú té xínu cuechi núú-n.

<sup>30</sup> Chi sa ní xini núu-í Yaá ñacácu ñi-hnu ñaha xii ñáyu núú ùhú núú ndàhú vitna.

<sup>31</sup> Te Yaá ní tendaha-n vèxi núú ndécú nchaa ñáyu ñuyíu-a.

<sup>32</sup> Te cùu-gá ñatná ñi<sup>n</sup> ñuhú, chi dandixi túu-gá iní ñáyu cuendá cutnùnì iní-yu cuendá Yá Ndiöxí cuèi ñá díú ñáyu israhél cùu-yu.

Te ñi-gá cada, te canehe ñáyu ñuca-gá ñuú sá yíñuhu núú ñáyu israhél chi ñi ñáyu israhél cùu-yu ñáyu cùu cuendá-n.

Duha ní xáha<sup>n</sup> tã Mió xii Yá Ndiöxí.

<sup>33</sup> Te té Chèé ndihí ñaná Jèsús ní cuñúhu-yu tnúhu ní cáhá<sup>n</sup> té Mió cuendá-gá. <sup>34</sup> Te ñatnùnì té Mió ní xicá<sup>n</sup> táhú-dè núú Yá Ndiöxí cuendá-yu, te xáha<sup>n</sup>-dè xii tá Màriá ñaná Jèsús:

—Cundedóho tnúhu na càhá<sup>n</sup>-í-a, té lihli-a ní nduu táhú-dè ñacanu ichi-dé ñuca ñáyu israhél ichi Yá Ndiöxí, te ñavá-yu vá tñi-yu tnúhu càhá<sup>n</sup>-dé, te ñáyu-á<sup>n</sup> cuíta ñiñú-yu, te cada-dé nàcuáa cutnùnì iní ñáyu sá Yá Ndiöxí ní tendaha ñaha-gá xii-dé, dico vá quíndáa iní-yu, chi ñaquèe tíhú ñáhá-yu xii-dé. <sup>35</sup> Te ñuca<sup>n</sup> te cutnùnì nàcuáa sàni iní ñi<sup>n</sup> ñáyu. Dico sá cùu-xi yòhó chi ïo cada ndàhú-xi iní-n, chi súunì ñatná sá ñi ñicuehé iní-n càda-xi —cachí-dé xáha<sup>n</sup>-dè xii tá Màriá.

<sup>36</sup> Te xíá<sup>n</sup> ndécú tñahá ñi<sup>n</sup> ñaha càhá<sup>n</sup> tnúhu Yá Ndiöxí nání-á<sup>n</sup> Àná, te tãtá-a<sup>n</sup> ní xínani-dè Fànuél ñani tñahá ndii Àser. Te ñaha-á<sup>n</sup> sa ní sahnu vñi-a<sup>n</sup>, te cuechi-ni-a<sup>n</sup> ñi tñandaha-a<sup>n</sup> te úsá-ni cuíá ñi xíndecu-a<sup>n</sup> ndihí yñi-a<sup>n</sup>, <sup>37</sup> te ní quendóo quèe-a<sup>n</sup>, te sa ñuhu-a<sup>n</sup> cùmídíco cùmí cuíá-a<sup>n</sup>. Te ñá túú ní xòo quee-a<sup>n</sup> veñúhu càhnu sá ïo cùnuu, chi nduu niú ní xòo chñuhu-a<sup>n</sup> Dútú Ndiöxí, te áma ñá túú tñahí ná ní xòo caxi-a<sup>n</sup> ní xòo cáhá<sup>n</sup> ndihí-a<sup>n</sup> Yá Ndiöxí. <sup>38</sup> Te ñi-ni òré ndécú-yu ndihí Jèsús ní quexìo-a<sup>n</sup> núu-yu, te ní ndacá<sup>n</sup> táhú-á<sup>n</sup> núú Yá Ndiöxí cuendá sá ñi xini-a<sup>n</sup> Jèsús, te ñatnùnì

ní ngúíta-a<sup>n</sup> càhá<sup>n</sup> váha-a<sup>n</sup> cuendá-gá núú nchàa ñáyiú, ñáyiú ndètu quini sáá nduu dàcácu Yá Ndiöxí ñáyiú Jerusàlén núú tnündòho tnúhu ndàhú.

#### *Cuánuhú-yu ñuú Nazàrét*

<sup>39</sup> Te sáta ní quidé-yu nchaa nàcuáa càhá<sup>n</sup> tnúhu Yá Ndiöxí, te cuánuhú-yu ñuú Nazàrét núú ndécú tnàhí-yu, te ñuú-á<sup>n</sup> yíndèhu-xi distritú Galileá. <sup>40</sup> Te té líhli nàni Jesús-á<sup>n</sup> tá sàhnu-dé, te ta nihí ndéé-dé cuáhá<sup>n</sup>, te duca<sup>n</sup> ïo váha ta sáa sá xini tnùní-dé cuáhá<sup>n</sup>, chi Yá Ndiöxí ndécú ndihí ñaha-gá xii-dé.

#### *Jèsús ndécú-gã veñúhu*

<sup>41</sup> Te ndi tnahá cuía ní xóo quíhí<sup>n</sup> té Chèé ndihí náná Jèsús vico pàscuá ñuú Jerusàlén. <sup>42</sup> Te cútnàhá ní chítú Jèsús úxúú cuía-gã, te cuáhá<sup>n</sup>-yu ndihí-gá ñuú Jerusàlén vico pàscuá, chi duca<sup>n</sup> tnàhí quidé-yu. <sup>43</sup> Te òré ní yáha vico, te ní natni<sup>n</sup>-yu ichi cuánuhú-yu, te ní quendóo-gá ñuú Jerusàlén, te ní náná-gã, te ní tã Chèé ñá túú ní xini ní quendóo-gá. <sup>44</sup> Chi ní sani iní-yu sá ñútnàhá-gá tnuú nchaa ñáyiú ní sáhá<sup>n</sup> vico cuánuhú. Te ní xúhu<sup>n</sup>-yu ï<sup>n</sup> nduu ichi ta ndùcu tnúhu-yu-gá núú nchàa ñani tnáhã-yu, ndihí núú nchàa ñáyiú xini tnáhã ndihí-yu, <sup>45</sup> te ñá túú ní nánihí ñáhã-yu xii-gá. Núú ní nacuícó-yu cuánuhú tucú-yu ñuú Jerusàlén cuendá yacá<sup>n</sup> nanducu ñáhã-yu xii-gá.

<sup>46</sup> Te núú ùní nduu sá ní dana núú ñáhã-yu xii-gá, te ní nanihí ñáhã-yu núcóo-gá xití veñúhu càhnu sá ïo cùnuu tnuú cue tée dàcuaha ñaha xii-yu nchaa tnúhu ní chídó tnùní ndí Moisés, te ndèdóho ñaha-gã xii-güedé, te nándi sá ndúcú tnúhu-gá núú-güedé. <sup>47</sup> Te nchaa cue tée xíndedóho ñaha xii-gá xicuñúhu-güedé sá ïo váha sáa sá xini tnùní-gá, te ïo váha nihí-gá tnúhu nàdanchocáva-gá. <sup>48</sup> Te òré ní xini ñáhã tã Chèé ndihí náná-gã xii-gá, te ïo ní cuñúhu-yu, te ní xáha<sup>n</sup> náná-gã xii-gá:

—Yòhó déhe-í, ¿ná cuendá duca<sup>n</sup> ní quide ñaha-n xii-ndí? Te tãtá-n ndihí yúhú ndihú iní-ndí xicá nanducu

ñaha-ndí xii-n —càchí-xi xáha<sup>n</sup>-xi xii-gá.

<sup>49</sup> Te ní xáha<sup>n</sup> Jèsús xii-yu:

—¿Ná cuendá nánducu ñaha-ndo? ¿Náa ñá túú xini-ndó sã núú chíú<sup>n</sup> Tãtá-í tàú-í caca cuu-í-ã<sup>n</sup>? —càchí-gá xáha<sup>n</sup>-gã xii-yu.

<sup>50</sup> Dico mèé-yu ñá túú ní tècú tnùní-yu nàcuáa ní xáha<sup>n</sup>-gã.

<sup>51</sup> Te sáta dúcá<sup>n</sup> te cuánuhú ndihí ñáhã-yu xii-gá ñuú Nazàrét, te ïo ní sándáá iní ñáhã-gã xii-yu. Te nchaa sá ní quide-gá-á<sup>n</sup> ní xúhu<sup>n</sup> nahi-ni iní náná-gã. <sup>52</sup> Te Jèsús duca<sup>n</sup>-ni ta sàhnu-gá cuáhá<sup>n</sup>, te ta sáa-gá sá xini tnùní-gá cuáhá<sup>n</sup>, te duca<sup>n</sup> cùdiu-gá núú Yá Ndiöxí, ndihí núú nchàa ñáyiú.

### 3

*Té Juàá tée dàcuandute ñaha xii ñáyiú càhá<sup>n</sup>-dé tnúhu Yá Ndiöxí xití yucu (Mt. 3:1-12; Mr. 1:1-8; Jn. 1:19-28)*

<sup>1</sup> Te ní cuu sáhú<sup>n</sup> cuía sã yíndàha té Tiberiú cuéhé nació<sup>n</sup>, te dàvá-á<sup>n</sup> ní cunuu té Pilatú distritú Jüdeá, te té Hèrodés ní cunuu-dé distritú Galileá, te ñani-dé té Lìpé ní cunuu-dé distritú Itüreá ndihí ingá distritú nání Tràconité, te té Lisaniás ní cunuu-dé distritú Abiliniá. <sup>2</sup> Te té Anás ndihí té Caifás ní cuu-güedé dútú cùnùu. Te dàvá-á<sup>n</sup> ní cáhá<sup>n</sup> ndihí ñaha Yá Ndiöxí xii té Juàá déhe té Zacàriá xití yucu sá quíhí<sup>n</sup>-dé cáhá<sup>n</sup>-dé tnúhu-gá núú ñáyiú. <sup>3</sup> Te té Juàá ní yáha-dé nchaa ñuú cáa yàtni yúte Jòrdán, te xáha<sup>n</sup>-dè xii nchaa ñáyiú:

—Chí dándixi túu iní sá ñà túú quide váha-ndo, te dañá-ndo nchaa ichi cuehé ichi duha ndècu-ndo, te cuandute-ndo, te duca<sup>n</sup> te cada càhnu iní Yá Ndiöxí nchaa yicá cuèchi-ndo —duha ní xáha<sup>n</sup>-dè xii-yu.

<sup>4</sup> Te duca<sup>n</sup> ní quide-dé chi ní quee ndáá-xi nàcuáa ní chídó tnùní ndí Chàíá tée ní xóo cáhá<sup>n</sup> tnúhu Yá Ndiöxí ndéé sanaha núú tütú ndí núú càchí-xi:

Tècú càhá<sup>n</sup> níhi ï<sup>n</sup> tée yìhi xití yucu, te xáha<sup>n</sup>-dè xii ñáyiú:

“Chí dáñá nchàa ichi cuehé ichi duha ndècu-ndo, te tni<sup>n</sup>-ndo ichi váha,

te duca<sup>n</sup> càda-ndo cuendá cundecu túha-ndo, chi véxi Yaá ío cùnuu.

<sup>5</sup> Te nchaa núú cùnú nachítú, te nchaa tindúú ndíhi nchaa yucu ngoyo nihnu cuendá nduu ndáá,

te nchaa ichi ñá túú cuáhá<sup>n</sup> ndáá nduu ndáá,

te nchaa ichi ñá túú càváha nduu váha.

<sup>6</sup> Te nchaa ñáyiú ñuyíú-a níhi-yu tnúhu sá Yá Ndiöxí véxi-gá dàcácu nihnu ñaha-gă xii-yu núú ùhú núú ndàhú.”

Duha ní chídó tnùní ndíi Chàiaá núú tütú ndíi.

<sup>7</sup> Te òré ní xica ñáyiú cuáhá<sup>n</sup>-yu cuendá dacuàndute ñaha té Juàá xii-yu, te ní xáha<sup>n</sup>-dë:

—¡Nchaa nchòhó cúú-ndó dàtná ì<sup>n</sup> cóó dëé<sup>n</sup> chi ío cuihna ìní-ndó! ¿Te nása ní cuu núú tnàhá nchòhó ndúcú-ndó nàcuáa cácu nihnu-ndo núú tnündòho cahnu vihi sá tá cùyatni ñaha xii-ndo véxi-i? <sup>8</sup> Te chí cáda váha vitna cuendá duca<sup>n</sup> cùnùní sá ní dáñá-ndó nchàa ichi cuehé ichi duha ndècu-ndo. Te vá càchí-ndó sá ío cahnu cuu-ndo cuendá sá cúú-ndó ñaní tnáhá ndíi Àbrahám, chi cuéi ndéé yúú te ndacu Yá Ndiöxí ndada-gá ñáyiú te cuú-yu ñaní tnáhá ndíi Àbrahám. <sup>9</sup> Te caá chi ndècu túha-xi sá quèhndé-xi nchaa yutnu sá ñà túú càváha sávidí-xi, chi nchaa yutnu-á<sup>n</sup> tèhndé-xi te cuánguee-xi núú ñùhú càyú-xi. Te duha sàtnahá-xi ndoho nchaa ñáyiú ñá túú quide váha, chi nchaa ñáyiú duca<sup>n</sup> ñà túú quide váha cùú-yu dàtná nchaa yutnu sá ñà túú càváha sávidí-xi. —càchí-dé xáha<sup>n</sup>-dë xii-yu.

<sup>10</sup> Te ní xicá<sup>n</sup> tnúhu-yu núú-dë, te xähá<sup>n</sup>-yu:

—¿Te nása cada-ndí vái<sup>n</sup>? — càchí-yu xähá<sup>n</sup>-yu xii-dé.

<sup>11</sup> Te xáha<sup>n</sup>-dë:

—Te núú ndèdacàa-ndo ndecu ndíhi-ndo úú dóó te cuáñaha-ndo ì<sup>n</sup> xii ñáyiú ñá túú ndècu ndíhi, àdi núú ndècu ndíhi-ndo sá nchító-ó te cuáha-ndó-yu na càxí-yu —càchí-dé xáha<sup>n</sup>-dë xii-yu.

<sup>12</sup> Te ní quexìo ì<sup>n</sup> úú cue téé cuihna ìní-xi quide cobrá

ñáhá xii ñáyiú cuendá impuèstú cuendá cuàndute-güedé, te ní xicá<sup>n</sup> tnúhu-güedé núú tè Juàá, te xáha<sup>n</sup>-güedë:

—Mèstrú, ¿te nása cada-ndí cuendá cuu váha ìní Yá Ndiöxí-i? — càchí-güedé xáha<sup>n</sup>-güedë xii-dé.

<sup>13</sup> Te té Juàá ní xáha<sup>n</sup>-dë:

—Vá cuidó-ndó càda cobrá-ndó ñáyiú —càchí-dé xáha<sup>n</sup>-dë xii-güedé.

<sup>14</sup> Te tnàhá ì<sup>n</sup> úú cue téé cùu sandadú xíndecu-á<sup>n</sup> ní xicá<sup>n</sup> tnúhú-güedé núú tè Juàá, te xáha<sup>n</sup>-güedë:

—Te nchúhú ¿nása cada-ndí cuendá cuu váha ìní Yá Ndiöxí-i? — càchí-güedé xáha<sup>n</sup>-güedë xii-dé.

Te ní xáha<sup>n</sup> tè Juàá:

—Vá quèndèe-ndó sá néhé tnàha ñáyiú-ndo, te ni vâ dácàa díquí-ndó-yu ì<sup>n</sup> sá ñà túú ñà quidë-yu, te nduu vétú ìní-ndó nàcuáa ñùhu yáhu-ndo —càchí-dé xáha<sup>n</sup>-dë xii-güedé.

<sup>15</sup> Te nchaa ñáyiú xíndetu sá quíxí Crìstú sàni ì<sup>n</sup> sàni úú ìní-yu núú sá díú Crìstú Yaá tendaha Yá Ndiöxí quixi ñuyíú-a cùu te Juàá àdi ñáhá. <sup>16</sup> Dico té Juàá ní cáhá<sup>n</sup> ndodo-dé núú-yu nchaa-yu, te xáha<sup>n</sup>-dë:

—Na càchí tnúhu ndáá-í xii-ndo sá yùhú véxi-í sá cuendá-ni dacuàndute ñaha-í xii-ndo dàtná ní cachí Yá Ndiöxí, dico nchícú<sup>n</sup> ìngá téé véxi, te téé-á<sup>n</sup> taxi-dé Espíritú Yá Ndiöxí cundecu ndíhi-ndo, te cùu-xi datná ì<sup>n</sup> ñuhú, chi ndada ndoo ndada nine-xi ìní-ndó. Te téé-á<sup>n</sup> ìo-gá cùnùu-dé dàcúxí yùhú, chi yùhú cùú-í ì<sup>n</sup> téé duu<sup>n</sup> duu<sup>n</sup> ñá túú tàú-í nandaxi-í cuèdicó ñi chàu-dé dico quide-í chiu<sup>n</sup>-dë. <sup>17</sup> Te téé-á<sup>n</sup> sa véxi túha-dé sá cáda dè<sup>n</sup> ñaha-dé xii-o dàtná quidë ñáyiú ndàda ndoo triú, chi ñáyiú-á<sup>n</sup> sa nèhe túha-ná-yu yaxí<sup>n</sup>-yu òré nãñani cuendá ndada ndoo-yu, te òré ndádá ndoo-yu triú-á<sup>n</sup> te dàquee dè<sup>n</sup>-yu mihi-xi, te tàxúha-yu mee-ñà triú-á<sup>n</sup>, te mihi-xi-á<sup>n</sup> sáhmí-yu. Te dàtná quidë-yu mihi triú-á<sup>n</sup> duca<sup>n</sup> sàtnahá-xi cada ñaha téé-á<sup>n</sup> xii nchaa ñáyiú ñá túú quide váha, chi daquihí<sup>n</sup> ñáhá-dë xii-yu núú ñùhú núú càyú,



te ñuhú-án ñà túú tnàhí ndàhvá — cächí-dé xáha<sup>n</sup>-dè xii-yu.

18 Te titní víhí-gã tnúhu váha ní xáha<sup>n</sup> tẽ Juàá xii-yu òré ní dásàhú ñáhá-dè. 19 Te ní cáhá<sup>n</sup>-dé dóho té Hèrodés cuendá sá ndécá-dé ìí<sup>n</sup> ñaha nàni Herodiás ñaha ní cándeca ñaní-dé té Lìpé, te ní xáha<sup>n</sup>-dè cuendá nchaa dava-gá sá cuèhé sá dúhá quide-dé. 20 Dico té Hèrodés ñá túú ní quide cuendá-dé tnúhu ní cáhá<sup>n</sup> té Juàá, chi nèhé-gá tucu ní quide-dé, chi da ve-caá ní chihi-dé té Juàá.

### *Sàndute Jesús*

*(Mt. 3:13-17; Mr. 1:9-11)*

21 Te òré dácua<sup>n</sup>ndute té Juàá nchaa ñáyiú, te tnàhá Jèsús ní dácua<sup>n</sup>ndute ñaha-dé xii-gá. Te nini càhá<sup>n</sup> ndihí-gá Dútú Ndiòxí ní nacaá<sup>n</sup> andiú, 22 te ní quee Espiritú Yá Ndiòxí véxi cuu<sup>n</sup> túu-xi, te càa-xi datná cáá ìí<sup>n</sup> lómá, te òré-án ní tecú ní cáhá<sup>n</sup> Yá Ndiòxí ndéé andiú, te xáha<sup>n</sup>-gã xii Jèsús:

—Yòhó cúu-n Dèhé-í tée ío cùu iní-í, te ío cùdí iní ñáhà-í xii-n —cächí-gá xáha<sup>n</sup>-gã xii Jèsús.

### *Cue tée ní xindecu díhna-gá ñuyúú-a dácúúxí Xìtohó Jesucristú*

*(Mt. 1:1-17)*

23 Te ndècu Jesús dàtná ócò úxí cuiá-gã cútnàhá ní chisaha-gã chiú<sup>n</sup> ní táhú Tátá-gã Dútú Ndiòxí cada-gá. Te ní cuu-gá déhe té Chèé chi duca<sup>n</sup> sàni iní ñáyiú ñuyúú-a. Te té Chèé-án ñí cuu-dé déhe té Èlí, 24 te tée-án ñí cuu-dé déhe té Mátát. Te té Mátát-án ñí cuu-dé déhe té Lèví, te tée-án ñí cuu-dé déhe té Mèlquí. Te té Mèlquí-án ñí cuu-dé déhe té Jàná, te tée-án ñí cuu-dé déhe té Chèé. 25 Te té Chèé-án ñí cuu-dé déhe té Matàtiás, te tée-án ñí cuu-dé déhe té Àmós. Te té Àmós-án ñí cuu-dé déhe té Nàhúm, te tée-án ñí cuu-dé déhe té Èslí. Te té Èslí-án ñí cuu-dé déhe té Nagàí, 26 te tée-án ñí cuu-dé déhe té Màát. Te té Màát-án ñí cuu-dé déhe té Matàtiás, te tée-án ñí cuu-dé déhe té Semèí. Te té Semèí-án ñí cuu-dé déhe té Chèé, te tée-án ñí cuu-dé déhe té Jùdá. 27 Te té Jùdá-án ñí cuu-dé déhe té Jòaná, te tée-án ñí cuu-dé déhe té Rèsá. Te té Rèsá-án ñí cuu-dé déhe té Zorobàbél, te tée-án

ñí cuu-dé déhe té Salàtiél. Te té Salàtiél-án ñí cuu-dé déhe té Nèrí, 28 te tée-án ñí cuu-dé déhe té Mèlquí. Te té Mèlquí-án ñí cuu-dé déhe té Àdí, te tée-án ñí cuu-dé déhe té Còsám. Te té Còsám-án ñí cuu-dé déhe té Elmòdám, te tée-án ñí cuu-dé déhe té Ęr. 29 Te té Ęr-án ñí cuu-dé déhe té Jòsué, te tée-án ñí cuu-dé déhe té Elièzér. Te té Elièzér-án ñí cuu-dé déhe té Jòrím, te tée-án ñí cuu-dé déhe té Mátát. 30 Te té Mátát-án ñí cuu-dé déhe té Lèví, te tée-án ñí cuu-dé déhe té Mió. Te té Mió-án ñí cuu-dé déhe té Jùdá, te tée-án ñí cuu-dé déhe té Chèé. Te té Chèé-án ñí cuu-dé déhe té Jònán, te tée-án ñí cuu-dé déhe té Eliàquím. 31 Te té Eliàquím-án ñí cuu-dé déhe té Mèléá, te tée-án ñí cuu-dé déhe té Mainán. Te té Mainán-án ñí cuu-dé déhe té Mátát, te tée-án ñí cuu-dé déhe té Nátán. 32 Te té Nátán-án ñí cuu-dé déhe té Dàvíí, te tée-án ñí cuu-dé déhe té Isàí. Te té Isàí-án ñí cuu-dé déhe té Òbéd, te tée-án ñí cuu-dé déhe té Bòóz. Te té Bòóz-án ñí cuu-dé déhe té Sàlmón, te tée-án ñí cuu-dé déhe té Naàson. 33 Te té Naàson-án ñí cuu-dé déhe té Aminadáb, te tée-án ñí cuu-dé déhe té Àrám. Te té Àrám-án ñí cuu-dé déhe té Èsróm, te tée-án ñí cuu-dé déhe té Fàrés. Te té Fàrés-án ñí cuu-dé déhe té Jùdá, 34 te tée-án ñí cuu-dé déhe té Jàcób. Te té Jàcób-án ñí cuu-dé déhe té Isàác, te tée-án ñí cuu-dé déhe té Àbrahám. Te té Àbrahám-án ñí cuu-dé déhe té Tàré, te tée-án ñí cuu-dé déhe té Nàcór. 35 Te té Nàcór-án ñí cuu-dé déhe té Sèrúg, te tée-án ñí cuu-dé déhe té Ragàú. Te té Ragàú-án ñí cuu-dé déhe té Pèlég, te tée-án ñí cuu-dé déhe té Hèbér. Te té Hèbér-án ñí cuu-dé déhe té Salá, 36 te tée-án ñí cuu-dé déhe té Cainán. Te té Cainán-án ñí cuu-dé déhe té Arfaxád, te tée-án ñí cuu-dé déhe té Sèm. Te té Sèm-án ñí cuu-dé déhe té Nòé, te tée-án ñí cuu-dé déhe té Làméc. 37 Te té Làméc-án ñí cuu-dé déhe té Matusalén, te tée-án ñí cuu-dé déhe té Ènóc. Te té Ènóc-án ñí cuu-dé déhe té Jàréd, te tée-án ñí cuu-dé déhe té Mahalàleél. Te té Mahalàleél-án ñí cuu-dé déhe té Cainán, 38 te tée-án ñí cuu-dé déhe té Ènós. Te té Ènós-án ñí cuu-dé déhe té Sèt, te tée-án ñí cuu-dé

déhe té Adán. Te té Adán-án chi mee Yá Ndiöxí ní cadúha ndaha ñaha-gá xii-dé.

## 4

*Sácuíhná quidé yica-xi cada Jesús sá ñà túú tàú-gá cada-gá ní cùu*  
(Mt. 4:1-11; Mr. 1:12-13)

<sup>1</sup> Te Jèsús ní naquehe<sup>n</sup>-gá ichi yuhu yúte Jòrdán cuánuhú-gá. Te sa ndècu ndihi-gá Espíritú Yá Ndiöxí, te Espíritú-á<sup>n</sup> ndécá ñaha-xi xii-gá cuáhá<sup>n</sup> ì<sup>n</sup> xití yucu. <sup>2</sup> Te yàcá<sup>n</sup> ní xindecu-gá údico nduu, te sácuíhná ñí cuiní-xi coto ndeé ñáhá-xí xii-gá te núu ndisa sá vǎ cadá-gǎ ì<sup>n</sup> sá ñà túú tàú-gá cada-gá. Te ñà túú tnàhí ná ní xèxi-gá ndi údico nduu-á<sup>n</sup>, te sátá dúcá<sup>n</sup> te ní xícá<sup>n</sup> iní-gá caxi-gá. <sup>3</sup> Te sácuíhná-ǎ<sup>n</sup> ñí xáha<sup>n</sup>-xi xii-gá:

—Te núu ndisa sá cúu-n Dèhe Yá Ndiöxí, te cúñaha xii yúú-a na ndùu-xi paá —càchí-xi xáha<sup>n</sup>-xi xii-gá.

<sup>4</sup> Te Jèsús ní xáha<sup>n</sup>-gǎ xii-xi:

—Núú tütú Yá Ndiöxí càchí-xi: “Ñá díú mèe-ni paá candeca-xi iní ñáyiu, chi tnàhá nchaa tnúhu càhá<sup>n</sup> Yá Ndiöxí candeca-xi iní-yu”, duha càchí-xi núú tütú-gá —càchí-gá xáha<sup>n</sup>-gǎ xii-xi.

<sup>5</sup> Te dǎtnùní sácuíhná ndécá ñaha-xi xii-gá cuáhá<sup>n</sup> ì<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhá-xí xii-gá nchaandi túhú nàció<sup>n</sup> cáá ñùyíú. <sup>6</sup> Te ní xáha<sup>n</sup>-xi xii-gá:

—Yúhú cada-í, te taxi tnùnín nchaa-ndi túhú nàció<sup>n</sup>-a ndihi nchaa sá vǎha íó diu-ni nchaa nàció<sup>n</sup>-a, te cachí ñáyiu sá ìo cùnuu-n, chi yúhú cúú cuendá-í nchaa sá ío nchaa nàció<sup>n</sup>-a, te ndédani càa ñáyiu cùu iní-í te cúñaha-í xii-yu taxi tnùnín-yu. <sup>7</sup> Te núu ñí yùhu ñí iní-n chìnúhu ñaha-n xii-í ñá, te nchaa taxi-í cuu cuendá-n —càchí-xi xáha<sup>n</sup>-xi xii-gá.

<sup>8</sup> Te Jèsús ní xáha<sup>n</sup>-gǎ xii-xi:

—Xocuiñí yòhó sácuíhná núú ndécú-í-a, chi vá cúú càda-í nàcuáa càchí-n chi núú tütú Yá Ndiöxí càchí-xi: “Chinúhu-ndo Dütú Ndiöxí Yá cúú Ndiöxí-ndó, te ì<sup>n</sup>ndi díí-ni-gǎ cada-ndo nchaa nàcuáa càhá<sup>n</sup>-gǎ”,

duha càchí-xi núú tütú-gá —càchí-gá xáha<sup>n</sup>-gǎ xii-xi.

<sup>9</sup> Te sácuíhná ndécá ñaha tucu-xi xii-gá cuáhá<sup>n</sup> ñuú Jerusàlén, te ní xáha<sup>n</sup>-xi xii-gá cuásaá-gá díquí veñúhu càhnu sá ìo cùnuu, te ní xáha<sup>n</sup> tucu-xi:

—Te núu ndisa cùu-n Dèhe Yá Ndiöxí te cuandèe ndava ndeé núú ñuhú <sup>10</sup> cuendá quee ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi:

Yá Ndiöxí tendaha-gǎ cue espíritú xínú cuèchi núú-gǎ quixi-xi coto ñaha-xi xii-n.

<sup>11</sup> Te núú ndáhá-xi càundodo-n cuendá sá vǎ dǎncuèhé yúú sǎhá-n, duha càchí-xi núú tütú-gá —càchí sácuíhná xáha<sup>n</sup>-xi xii-gá.

<sup>12</sup> Te Jèsús ní xáha<sup>n</sup>-gǎ xii-xi:

—Te càchí tucu-xi núú tütú Yá Ndiöxí: “Vá caní ìni-n coto ndeé-n Dütú Ndiöxí Yá cúú Ndiöxí-n ñuu ndisa sá dácǎcu nihnu ñaha-gǎ xii-n cuendá ì<sup>n</sup> sá sání ìni-n càda-n sá cúú-xí mèe-n”, duha càchí-xi núú tütú-gá —càchí-gá xáha<sup>n</sup>-gǎ xii-xi.

<sup>13</sup> Te sátá dúcá<sup>n</sup> te sácuíhná ñà túú-gá ní cùtnuní iní-xi nása cada-xi Jèsús, núu xǎ<sup>n</sup> ní xica-xi cuáhá<sup>n</sup>-xi ní sanaa tnaa-xi.

*Distritú Galileá ní chisaha Jèsús chiú<sup>n</sup> ní táhú Tǎtá-gǎ Dütú Ndiöxí cada-gá*

(Mt. 4:12-17; Mr. 1:14-15)

<sup>14</sup> Te Jèsús cuáhá<sup>n</sup> tucu-gá distritú Galileá, dico sa ndècu ndihi-gá Espíritú Yá Ndiöxí, te ñí càa xico xǎ<sup>n</sup> ñí níhi-yu tnúhu nchaa nàcuáa quide-gá. <sup>15</sup> Te ndi tnahá ñuú cuáhá<sup>n</sup>-gǎ duca<sup>n</sup> cuànguihu-gá veñúhu-yu dǎnehé ñáhá-gǎ xii-yu, te nchaa-yu càchí-yu sá ìo càhnu cuu-gá.

*Jèsús ndécú-gǎ ñuú Nazàrét*

(Mt. 13:53-58; Mr. 6:1-6)

<sup>16</sup> Te Jèsús ní sáhá<sup>n</sup>-gǎ ñuú Nazàrét ñuú núú ñí sahnú-gá. Te nduu ndètatú ñáyiu ní quihu-gá veñúhu, chi duca<sup>n</sup> tnàhí quide-gá, te ní ngúnutnǎi-gá dácuàha-gá tutú ndeé tnúhu Yá Ndiöxí. <sup>17</sup> Te ní sáñaha-güedé xii-gá tutú ndeé tnúhu ní cáhá<sup>n</sup> ndi Chàíá téé ní xóo cáhá<sup>n</sup> tnúhu Yá Ndiöxí ndeé sanaha, te òré ní nandíca-gá

núú tütú-án te ní naníhí-gă núú cächí-xi:

18 Espíritú Yă Ndiöxí ndécú ndìhi ñaha-xi xii-í, chi ní cachí-gá sá cãhá-í tnúhu-gá sá cúú-xi ñăyiu ndàhú, ñăyiu vátá cündedóho tnàhí-gá.

Te véxi-í cuendá vá ndìhú-gá iní ñăyiu ñá túú ndècu váha iní-xi, te cue ñăyiu sa nèhe váha ñaha-nă yucu ñávãha dácácu ni-hnu-í-yu.

Te cue ñăyiu cuáá nacaán-í núú-yu, te ñăyiu ndòho dandoho ñaha tnaha ñăyiu-xi taunihnu-í-yu.

19 Te cúñaha-í xii ñăyiu sá sàá nduu càda Yă Ndiöxí ìñ sá vãha sá cúú-xi-yu.

Duha cächí-xi núú tütú dácuaàha-gá.

20 Te Jèsús ní nacadí-gá núú tütú-án, te ní nacuaàha-gá ìñ tée xìnu cuechi veñúhu-án, te ní ngóo-gá. Te nchaa ñăyiu yìhi veñúhu ñá núú núú-yu ndèhe ñahá-yu xii-gá. 21 Te xãha-n-gă xií-yu:

—Mei vitna ní quee ndáá-xi nàcuáa cãhá-xi núú tütú Yă Ndiöxí — cächí-gá xãha-n-gă xií-yu.

22 Te nchaa-yu ní cãhá váha-yu cuendá-gá, te ní cuñúhu-yu tnúhu váha cãhá-n-gá, te xìtnàhá-yu:

—¿Te náa ñá díú tée-a cùu-dé déhe té Chèè-ãñ? —cächí-yu xìtnàhá-yu.

23 Te Jèsús ní xãha-n-gă:

—Na cächí tnúhu ndáá-í xii-ndo sã ñúhú iní-ndó cũñaha-ndo xii-í ìñ tnúhu cùtexínu sá cãhá méé-ndó, te quesaha-ndo: “Nátátná cada tátna mee-n”, duha quesaha-ndo. Te cúñaha tucu-ndo xii-í: “Sa ní níhí-ndí tnúhu nàcuáa ní quide-n ñúú Capèrnaúm, te cada-n tnàhá ñúú núú ní sahnu-n”, duha quesaha-ndo — cächí-gá xãha-n-gă xií-yu.

24 Te ní xãha-n tucu-gá:

—Na cächí tnúhu ndáá-í xii-ndo sã ñú ìñ tée cãhá tnúhu Yă Ndiöxí ñá túú tnàhá iní ñahá ñăyiu ñúú-dé. 25 Te na cächí tnúhu ndáá tucu-í xii-ndo sã ìo vãi ñăyiu dìhí ñăyiu quèé ní xíndecu nacióñ Isràèl cùtnàhá ní xíndecu té Èliás cùtnàhá ñá túú ní cùu dáú ùní

cuiá dava, te dàvá-án ìo ní ndoho ñăyiu docó nitùhú nacióñ. 26 Dico Yă Ndiöxí ñá túú ní tëndaha-gá té Èliás quíhí-n-dé vehe ndèdani càa ñăyiu dìhí-án, chi vehe ìñ ñaha ñúú Sàreptá ní xãha-n-gă ní sãhá-n-dé, te ñúú-án cáa yàtni-xi ñúú Sidón. 27 Te ní xíndecu tucu ingá tée ní xóo cãhá tnúhu Yă Ndiöxí ndéé sanaha, te tée-án ñí xínani-dě Eliseú, te diu-ni dàvá-án ñí xíndecu tucu vãi ñăyiu cùhú nacióñ Isràèl, ñăyiu ní tnahá cuéhé sã dátèhyú nihnu-xi yiqui cùñú-yu dico ñá túú ní ndúha-yu, chi ìñ dì-ni té Nàamán tée distritú Síríá ní ndúha-dé —cächí-gá xãha-n-gă xií-yu.

28 Te sá dúcá ñí cãhá-n-gá te xiã ñí cudéé víhí nchaa ñăyiu yìhi veñúhu-ãñ núú-gă. 29 Te ní queñuhú-yu Jèsús yuhu dèhvã tìndúú núú cáa ñúú-yu-án cuendá yácã dàquée-yu-gá dèhvã ní cùu. 30 Dico Jèsús vii-ni ní quee-gá tnuú-yu cuáhã-n-gá.

*Ìñ tée yìhi ñaha espíritú cündìhi yucu ñávãha (Mr. 1:21-28)*

31 Te Jèsús cuáhã-n-gá ñúú Capèrnaúm, te ñúú-án yíndèhu-xi distritú Galileá. Te yácã ndécú-gă ní tnahá nduu ndètatú ñăyiu, te ní ngúita-gá dácuaàha-gá ñăyiu. 32 Te xìcuñúhu-yu nchaa nàcuáa dànehé ñahá-gă xií-yu, chi cãhá-n-gá dàtná cãhá ìñ tée cùnuu, te cùnuu ndisa-gá.

33 Te xití veñúhu yìhi ìñ tée yìhi ñaha ìñ espíritú cündìhi yucu ñávãha, te espíritú-án ñí quide-xi níhi ní cãhá tée-án, te xãha-n-dě xii Jèsús:

34 —¿Te ná cuíní yòhó Jèsús tée ñúú Nazàrét cada ñaha-n xii-ndí núu véxi-n núú ndécú-ndí-i? ¿Áñ vèxi-n dànaa ñaha-n xii-ndí? Chi yúhú xini ñahã-í xii-n sã cúú-n ìñ tée ñá túú tnàhí cuéchi-xi chi núú Yă Ndiöxí ní quee-n vèxi-n ñùyíú-a —cächí-dé xãha-n-dě xii-gá.

35 Te Jèsús ní tenáá-gá espíritú cündìhi yucu ñávãha-án, te xãha-n-gă:

—¡Cadí yuhu-n, te taquèe yiqui cuñú té-á<sup>n</sup>! —càchí-gá xǎha<sup>n</sup>-gǎ.

Te espíritú cúndìhi yucu ñávǎha-á<sup>n</sup> nǐ dándúá-xi té-á<sup>n</sup> ndéé ñuhu tnuú ñáiyu xǐndecu-á<sup>n</sup>, te ñá túú-gǎ ná ní quide ñaha-xi, te ní quee ñaha-xi xii-dé. <sup>36</sup> Te nchaa ñáiyu xǐndecu-á<sup>n</sup> nǐ cuñúhu-yu, te ní xítñàhá-yu:

—¿Te nása ndùu-tu tnuúhù càhá<sup>n</sup> té-á<sup>n</sup> ñá? ¡Te càhá<sup>n</sup>-dé dàtná càhá<sup>n</sup> ì<sup>n</sup> téé tàxi tnuú ní víhí, chí càhá<sup>n</sup>-ni-dé te nchaa espíritú cúndìhi yucu ñávǎha quèe-ni-xi yiqui cuñú-yu! —càchí-yu xítñàhá-yu.

<sup>37</sup> Te nchaa xichi ní níhǐ-yu tnuúhù nàcuáa quide Jesús.

*Jèsús quidé tǎtna-gá nǎná ñadìhí té Xímú*  
(Mt. 8:14-15; Mr. 1:29-31)

<sup>38</sup> Te Jèsús ní ndee-gá xití veñúhu, te cuáhá<sup>n</sup>-gá vehe té Xímú. Te nǎná ñadìhí té Xímú-á<sup>n</sup> cùhú-a<sup>n</sup> ñuhu vihi-a<sup>n</sup> cahni, te ní cáhá<sup>n</sup> ndàhú-yu núú Jèsús cuèndá-a<sup>n</sup>. <sup>39</sup> Te Jèsús ní sáhá<sup>n</sup>-gá núú ndécú-á<sup>n</sup>, te ní ngúnundeyi-gá te ní xáha<sup>n</sup>-gǎ xii cahni-á<sup>n</sup> sǎ ná xòcuíñí-xi, te ní xócuíñí-ni-xi, te òré-ni-á<sup>n</sup> nǐ ndúha ñaha cùhú-á<sup>n</sup> te ní ndacóo-a<sup>n</sup> ní xinu cuechi-a<sup>n</sup> núú-güedé ndìhi-gǎ.

*Jèsús quidé tǎtna-gá vǎi ñáiyu cùhú*  
(Mt. 8:16-17; Mr. 1:32-34)

<sup>40</sup> Te òré ní ngódó tnuú nchíanchii, te nchaa ñáiyu xǐndecu ndìhi ñáiyu cùhú vehe-xi ndèca ñahá-yu cuáhá<sup>n</sup> núú Jèsús. Te Jèsús ní sacá<sup>n</sup> ndodo-gá ndaha-gá díquí ì<sup>n</sup> ì<sup>n</sup> ñáiyu cùhú-á<sup>n</sup>, te duca<sup>n</sup> nǐ quide-gá te ní ndúha-yu. Te ndi díí<sup>n</sup> núú cuèhé tñàhá-yu ì<sup>n</sup> ì<sup>n</sup>-yu ní cùu. <sup>41</sup> Te tñàhá dǎva ñáiyu cùhú-á<sup>n</sup> yíhí ñàha espíritú cúndìhi yucu ñávǎha xii-yu ní cùu, te òré ní quee ñaha-xi xii-yu, te xǎ<sup>n</sup> ní quide-xi níhi ní cáhá<sup>n</sup>-yu, te xǎhǎ<sup>n</sup>-yu xii Jèsús:

—Yòhó cúú-n Dèhe Dútú Ndiöxí —càchí-yu xǎhǎ<sup>n</sup>-yu xii-gǎ.

Dico Jèsús níhi ní cáhá<sup>n</sup>-gá ní tenáá-gá nchaa espíritú cúndìhi yucu ñávǎha-á<sup>n</sup>, te xǎha<sup>n</sup>-gǎ sǎ vǎ dúcá<sup>n</sup>-gǎ cada-xi, chí sa xini-xi sǎ díú-gǎ cúú-gǎ

Crístú Yaá ní tendaha Yǎ Ndiöxí véxi ñuyíú-a.

*Jèsús dánèhé-gá ñáiyu distritú Galileá*

(Mr. 1:35-39)

<sup>42</sup> Te ì<sup>n</sup> nduu ní túndaá-ni ní quee Jèsús ñuu núú ndécú-gǎ-á<sup>n</sup> cuáhá<sup>n</sup>-gá ì<sup>n</sup> xichi núú ñǎ túú ñáiyu ndècu. Te cue ñáiyu ní ngüíta-yu nànducu ñahá-yu xii-gá te ní naníhí ñáhǎ-yu, te cuíni-yu ngani ñahá-yu xii-gá cuèndá sǎ ñà túú-gǎ ndéé quíhí<sup>n</sup>-gá ní cùu. <sup>43</sup> Dico ní xáha<sup>n</sup>-gǎ xii-yu:

—Dacuití quíhí<sup>n</sup>-í cúñaha-í xii nchaa ñáiyu dǎva-gá ñuu tnuúhù sǎ càhá<sup>n</sup> nàcuáa ndíhu ndaha ñàha Yǎ Ndiöxí xii-yu, chí chiú<sup>n</sup> tnahí-á<sup>n</sup> véxi-í —càchí-gá xǎha<sup>n</sup>-gǎ xii-yu.

<sup>44</sup> Te ní xica cuu Jèsús ní dánèhé-gá ñáiyu tnuúhù-gá nchaa xití veñúhu ndáa distritú Galileá.

## 5

*Jèsús ní quide-gá ní níhí-güedé chácá*  
(Mt. 4:18-22; Mr. 1:16-20)

<sup>1</sup> Te ì<sup>n</sup> xito ndècu Jesús yuhu làgúná Genesàrét, te ío cuèhé ñáiyu ní sǎá, te ta dàdehnde ñaha-ná-yu xii-gá cuáhá<sup>n</sup> sǎ cuíni-yu cundedóho-yu nchaa tnuúhù càhá<sup>n</sup>-gá. <sup>2</sup> Te Jèsús ní xiní-gá úú bàrcú cue téé tñè chácá xínutnǐ-xi yatni yuhu làgúná-á<sup>n</sup>, te sa ní quene cue téé ñuhu xití-xi-á<sup>n</sup> xǎnaquete-güedé ñunu-güedé. <sup>3</sup> Te Jèsús cuásaá-gá núú ì<sup>n</sup> bàrcú-á<sup>n</sup>, te bàrcú-á<sup>n</sup> cúú-xi bàrcú té Xímú, te ní xáha<sup>n</sup>-gǎ xii té Xímú-á<sup>n</sup> sǎ dánñundehe-dé-xi luha-gá xití ndute. Te dàtnùní ní ngóo-gá núú bàrcú-á<sup>n</sup>, te xǎ<sup>n</sup> núcòo-gá ní ngüíta-gá dánèhé-gá ñáiyu. <sup>4</sup> Te òré ní túhú ní dánèhé ñáhǎ-gǎ xii-yu, te ní xáha<sup>n</sup>-gǎ xii té Xímú:

—Daquíhí<sup>n</sup> bàrcú-a xití làgúná mei núú cùnú-gá, te dàquèe-ndo ñunu-ndo tñè-ndo chácá —càchí-gá xǎha<sup>n</sup>-gǎ xii-dé.

<sup>5</sup> Te té Xímú ní xáha<sup>n</sup>-dè:

—Mèstrú, ní niú ní quide chiú<sup>n</sup>-ndí te ní ì<sup>n</sup> chácá ñà túú ní níhí-ndí, dico vitna cuèndá-ni sǎ yòhó táuchìu<sup>n</sup>-n te



na dàquée-ndí ñunu-ndí vá<sup>n</sup> —càchí-dé xǎha<sup>n</sup>-dě xii-gá.

<sup>6</sup> Te òré ní dáquëe-güedé ñunu-güedé te súúni vâi chácá nî níhí-güedé, te ta ndátá-nǎ ñunu-güedé cuáhá<sup>n</sup> ní cùu. <sup>7</sup> Núu ní quide-güedé ndaha-güedé núú dàva-gá cue tée cündihí-güedé xǐxúhu<sup>n</sup> ingá bàrcú cuendá quíhí<sup>n</sup>-güedé chindee ñaha-güedé. Te cue tée-á<sup>n</sup> nî sáhá<sup>n</sup>-güedé ní chindee tnàha-güedé ní dáchítú-güedé ndi ndúú bàrcú mee-ni chácá, te súúni nî cuu véé núu cuíní-na-xi quée naa-güedé ndihí bàrcú ní cùu. <sup>8</sup> Te sá dúcá<sup>n</sup> cuíní-xi quée naa bàrcú ní cùu, núu té Xímú, àdi Pelú chi úú òu-dé, ní ngüíñí xítí-dé núú Jèsús, te xǎha<sup>n</sup>-dě:

—Xocuñí yòhó Jèsús núú ndécù-í-a, chi yúhú cùú-í ñ<sup>n</sup> téé ío ndècu cuéchi-xi —càchí-dé xǎha<sup>n</sup>-dě xii-gá.

<sup>9</sup> Te duca<sup>n</sup> nî cáhá<sup>n</sup>-dé chi ní yùhú-dé, te ní cuñúhu-dé ndihí nchaa cue téé ndihí-dé-á<sup>n</sup> cuendá sá ío vâi chácá nî níhí-güedé. <sup>10</sup> Te tnàhá té Jàcobó ndihí té Juàá cue déhe té Zebèdeú ío ní cuñúhu-güedé, te òu-ni cue téé cündihí té Xímú-á<sup>n</sup> cúú-güedé tnàhá-güedé. Te Jèsús ní xǎha<sup>n</sup>-gǎ xii té Xímú:

—Vá yùhú-n, chi není vitna quíhí<sup>n</sup>-n dàcahá<sup>n</sup>-n ñáyiú cuendá tuha ñáhá-yu xii-í —càchí-gá xǎha<sup>n</sup>-gǎ xii-dé.

<sup>11</sup> Te ní quene-güedé ndihí bàrcú ndéé ñuhu yìchí yuhu làgúná-á<sup>n</sup>. Te òré-á<sup>n</sup> nî dándòo-güedé nchaandi túhú sá ndécú ndihí-güedé, te ní tuha-güedé Jèsús.

*Jèsús quidé tǎtna-gá ñ<sup>n</sup> téé tnàhá cuéhé sǎ dátèhyú nihnu-xi yiquí cùñú-ó (Mt. 8:1-4; Mr. 1:40-45)*

<sup>12</sup> Te òré ní quexìo Jèsús ñ<sup>n</sup> ñuú, te ní quexìo ñ<sup>n</sup> téé cùhú tnàhá-dé cuéhé sǎ dátèhyú nihnu-xi yiquí cùñú-ó, te òré ní xiní-dé Jèsús te ní sáhá<sup>n</sup>-dé núú ndécú-gǎ, te ní ngüíñí xítí-dé núú-gǎ te ní nuu núú-dé ndàa núú ñúhú te càhá<sup>n</sup> ndàhú-dé, te xǎha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núú-n nùu vá cündèe iní-n càda

tátna ñaha-n xii-í, chi cùtnuní iní-í sá ndácú-n —càchí-dé xǎha<sup>n</sup>-dě xii-gá.

<sup>13</sup> Te Jèsús ní dácàá-gá ndaha-gá ní tendaha ñaha-gá xii-dé, te xǎha<sup>n</sup>-gǎ:

—Cuu cada tátna ñaha-í xii-n, te vitna te ndúha-n —càchí-gá xǎha<sup>n</sup>-gǎ xii-dé.

Te òré-ni ní xócuñí cuéhé tnàhá-dé. <sup>14</sup> Te dàtnuní ní xáha<sup>n</sup> tùcu Jèsús xii-dé:

—Vá yòo ñ<sup>n</sup> cúñaha-n sǎ nî quide tátna ñaha-í xii-n, núú dùtú-ni cuáhá<sup>n</sup> cuendá sá ná quíní ñáhá-dé xii-n sǎ nî ndúha-n te cuáhá-n-dé sá ndúú tǎhú Yá Ndiòxí dàtná ní cachí ndí Moisés cuendá ná quíní ñáyiú sá ndàá ní ndúha-n —càchí-gá xǎha<sup>n</sup>-gǎ xii-dé.

<sup>15</sup> Te duca<sup>n</sup> ta xíté nuu-gá tnúhu nchaa nàcuáa quide Jèsús, te ío cuéhé ñáyiú ní xóo tacá nchaa núú nî xíndecu-gá cuendá sá cuíní-yu cundedóho-yu tnúhu càhá<sup>n</sup>-gá, ndihí cuendá sá cuíní-yu cada tátna ñaha-gǎ xií-yu. <sup>16</sup> Dico Jèsús ní xóo quee nihni-gá tnuú-yu ní xóo quíhí<sup>n</sup>-gá núú ñà túú ñáyiú ndècu ní xóo cáhá<sup>n</sup> ndihí-gá Yá Ndiòxí.

*Jèsús quidé tǎtna-gá ñ<sup>n</sup> téé cùhú ñǎ cúú-gǎ candá nihnu*

*(Mt. 9:1-8; Mr. 2:1-12)*

<sup>17</sup> Te ñ<sup>n</sup> nduu dànehé-gá ñáyiú, te xínucóo ñ<sup>n</sup> ùú cue téé cùu fariséú, ndihí cue téé dàcuaha ñaha xii ñáyiú nchaa tnúhu ní chídó tnùní ndí Moisés. Te cue téé-á<sup>n</sup> nî quee-güedé nchaa ñuú yíndèhu distritú Galileá, ndihí distritú Jùdeá, ndihí ñuú Jerusalén, te nchaa ñuú-á<sup>n</sup> nî quee-güedé cuáhá<sup>n</sup>-güedé núú ndécú-gǎ. Te Yá Ndiòxí chíndèe ñaha-gá quidé tǎtna-gá ñáyiú cùhú.

<sup>18</sup> Te ñ<sup>n</sup> ùú cue téé nchìdo-güedé ñ<sup>n</sup> téé cùhú ñǎ cúú-gǎ candá nihnu ñúhu-dé xító ní quexìo ndihí ñaha-güedé, te cuíní-güedé quíhu ndihí ñaha-güedé ndéé xítí vehe, sáá-güedé ndéé núú Jèsús ndihí téé cùhú-á<sup>n</sup>. <sup>19</sup> Dico ñǎ túú ní ñhí-güedé ndèe ichi quíhu-güedé, chi cuendá ío cuéhé ñáyiú ndècu, núu xǎ<sup>n</sup> ní sáá-güedé díquí véhé-á<sup>n</sup> nî caá<sup>n</sup>-güedé te ndàa díquí véhé-á<sup>n</sup> nî dáquëe-güedé téé cùhú-á<sup>n</sup>, te

ñuhu-ni-dé xító ní dáquëe ñaha-güedë tnuú ñáyiú ní sáá ndéé núú Jèsús.

<sup>20</sup> Te Jèsús ní cutnùnì iní-gá sá ñi yuhu ñi iní-güedé sàndáá iní ñáhá-güedë xii-gá, núú ní xáha<sup>n</sup>-gã xii téé cùhú-á<sup>n</sup>:

—Yòhó téé cùhú, sa ní quide càhnu iní-í nchaa cuéchi-n —càchí-gá xãha<sup>n</sup>-gã xii-dé.

<sup>21</sup> Te cue téé dàcuaha ñaha xii-yu nchaa tnúhu ní chídó tnùnì ndíi Moisés ndíhi cue téé cùu fariséú ní sani iní-güedé: “¿Ná cùú tée-a núú càhá<sup>n</sup> cuèhé-dé cuendá Yá Ndiòxí-i? Te vá yòo ñi ndàcu cada cahnu iní nchaa yíca cuèchi ñáyiú, chi ñi ndíi díi-ni Yá Ndiòxí quidé càhnu iní-gá”, duha ní sani iní-güedé.

<sup>22</sup> Dico Jèsús sa ní cutnùnì iní-gá nàcuáa sàni iní-güedé núú ní xáha<sup>n</sup>-gã xii-güedé:

—¿Te ná cuendá duca<sup>n</sup> sàni iní-ndó-í? <sup>23</sup> Te sá dúhá ñi xáha<sup>n</sup>-í xii téé cùhú-a sá cáda càhnu iní-í nchaa yíca cuèchi-dé, te xiã<sup>n</sup> nchòhó ñá túú cùtnunì iní-ndó núú ndáá càhá<sup>n</sup>-í àdi ñá ndáá. Dico núú cùú-í-dé sá ndácóo-dé, te caca-dé te cutnùnì ndáá iní-ndó núú ndáá càhá<sup>n</sup>-í àdi ñá ndáá, chi cundehe núú-ndó nàcuáa cada-í. <sup>24</sup> Te vitna na càda-í nàcuáa cutnùnì iní-ndó nchaa-ndo sá yúhú Téé cùu ñani tnáhá-ndó nchaa-ndo ndecu ndíhi-í tnúhu ndee ñi sá cáda càhnu iní-í nchaa cuéchi ñáyiú ñuyíú-a —càchí-gá xãha<sup>n</sup>-gã xii-güedé.

Te sáta dúcá<sup>n</sup> te ní xáha<sup>n</sup>-gã xii téé cùhú-á<sup>n</sup>:

—Ndacóo, te ndocani-n xító ñuhu-n véxi-á<sup>n</sup>, te núhú-n vèhe-n —cachí-gá xãha<sup>n</sup>-gã xii-dé.

<sup>25</sup> Te òré-ñi-á<sup>n</sup> ñi ndúha téé cùhú-á<sup>n</sup> te ní ndacóo-dé, te ní ndocani-dé xító ñuhu-dé ní quexìo-á<sup>n</sup>, te ní natnii-dé ichi ta càhá<sup>n</sup>-dé cuánuhú sá ïo càhnu cuu Yá Ndiòxí. <sup>26</sup> Te nchaa ñáyiú xíndecu-á<sup>n</sup> ñi cuñúhu-yu, te tnáhá-yu ní cachí-yu sá ïo càhnu cuu Yá Ndiòxí, te duca<sup>n</sup> ïo ní yúhú-yu, te ní xitnàhá-yu:

—Vitna ní xiní-ó ñi sá ñá túú tnàhí xiní-ó ní cùu —cachí-yu xitnàhá-yu.

*Jèsús cáná-gã té Lèví  
(Mt. 9:9-13; Mr. 2:13-17)*

<sup>27</sup> Te sáta dúcá<sup>n</sup> ñi cuu te ní quee Jèsús xiá<sup>n</sup>, te ní xiní-gá ñi tée nàni Leví núcõo-dé ñi xichi quide cobrá-dé ñáyiú cuendá impuèstú, chi cobradór cùú-dë, te ní xáha<sup>n</sup>-gã xii-dé:

—Néhe chitnàhá ñáhá-n xii-í —càchí-gá xãha<sup>n</sup>-gã xii-dé.

<sup>28</sup> Te té Lèví-á<sup>n</sup> ñi ndàcuíñi-dé te ní dándõo-dé nchaa sá ndécú ndíhi-dé núú núcõo-dé-á<sup>n</sup>, te ní tuha-dé Jèsús.

<sup>29</sup> Te sáta dúcá<sup>n</sup> te té Lèví-á<sup>n</sup> ñi quide-dé ñi vico càhnu vehe-dé sá cùú-xí Jèsús, te ní tacá vai cue téé quide chiu<sup>n</sup> quide-dé, te nchaa-güedé cuánguihu-güedé mèsá ní ngóo-güedé ndíhi dava-gá ñáyiú ní quexìo cuendá caxi-güedé ndíhi-yu. <sup>30</sup> Dico cue téé cùu fariséú ndíhi cue téé dàcuaha ñaha xii-yu nchaa tnúhu ní chídó tnùnì ndíi Moisés ní ngüita-güedé xícuèhé-güedé cue téé xica cuu ndíhi-gá, te xãha<sup>n</sup>-güedé:

—¿Ná cuendá xéxi-ndó xìhi-ndo ndíhi cue téé cuìhna iní-xi quide cobrá ñáhá xii ñáyiú cuendá impuèstú, ndíhi nchaa dava-gá cue téé ndècu ichi cuèhé ichi duha-i? —càchí-güedé xãha<sup>n</sup>-güedé.

<sup>31</sup> Te Jèsús ní xáha<sup>n</sup>-gã xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhu ñahá-yu. <sup>32</sup> Te yúhú véxi-í càhá<sup>n</sup>-í ñáyiú cùtnunì iní-xi sá ndécú cuèchi-xi cuendá dàñá-yu nchaa sá cuèhé sá dúhá quidé-yu, te ñá túú véxi-í càhá<sup>n</sup>-í ñáyiú càchí sá ñá túú ndècu cuéchi-xi —càchí-gá xãha<sup>n</sup>-gã xii-güedé.

*Cue téé ndècu tnúhu núú Jèsús cuendá ñáyiú ñá túú tnàhí ná xéxi áma càhá<sup>n</sup> ndíhi-yu Yá Ndiòxí*

*(Mt. 9:14-17; Mr. 2:18-22)*

<sup>33</sup> Te ní xáha<sup>n</sup>-güedé xii Jèsús:

—Te áma ñá túú tnàhí ná xéxi cuè téé xica cuu ndíhi té Juáá càhá<sup>n</sup> ndíhi-güedé Yá Ndiòxí, te ñi-ni duca<sup>n</sup> quide cue téé xica cuu ndíhi nchúhú cue téé cùu fariséú. ¿Te ná cuendá cue téé xica cuu ndíhi-n ñá túú dùca<sup>n</sup> quide-güedé núú nchaa-ni nduu xèxi-güedé xìhi-güedé quidé-güedé-i? —cachí-güedé xãha<sup>n</sup>-güedé xii-gá.

<sup>34</sup> Te Jèsús ní xáha<sup>n</sup>-gã xii-güedé:  
—Nchòhó xìní-ndó sã vã cúú cũñaha-o xii cue ñáyiú ñùhu vico tnándaha sã vã cúú càxí-yu nini ndècu ndihí ñaha téé tnándaha-á<sup>n</sup> xii-yu.  
<sup>35</sup> Dico sáá nduu te vã cündècu ndihí ñaha-gã téé tnándaha-á<sup>n</sup> xii-yu, te dává-á<sup>n</sup> te cahni iní-yu vã cáxí-yu sá ndihú iní-yu —càchí-gã xáha<sup>n</sup>-gã xii-güedé.

<sup>36</sup> Te ní cani-gã ì<sup>n</sup> cuèndú núú ñáyiú nàcuáa tecú tnùní-yu tnúhu-gã, te xáha<sup>n</sup>-gã:

—Vá yõo ì<sup>n</sup> dándée luha dóó sáá ì<sup>n</sup> dóó sa ní cuu tühú víhí, chi núú yoo duca<sup>n</sup> na càda, te dóó sáá-á<sup>n</sup> nàndiyí-xi te uu<sup>n</sup>-gã ndata-xi dõó sã ní cuu tühú-á<sup>n</sup>, te luha dóó sáá-á<sup>n</sup> ñà túú nàtaú-xi ndée dóó sã ní cuu tühú-á<sup>n</sup>. <sup>37</sup> Te ní vá yõo ì<sup>n</sup> chihí ndidí sáá xití ì<sup>n</sup> lamba sa ní cuu tühú víhí, chi núú yoo duca<sup>n</sup> na càda, te ndava lamba sa ní cuu tühú-á<sup>n</sup> chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup>. <sup>38</sup> Núú xíá<sup>n</sup> xíní ñùhu-xi quée ndidí sáá-á<sup>n</sup> xití ì<sup>n</sup> lamba saa cuèndá duca<sup>n</sup> ñà túú nã cuu cováha-xi. <sup>39</sup> Te ní ì<sup>n</sup> ñáyiú ñà túú tnàhá iní-yu cohó-yu ndidí sáá, te núú díhna-gã ná còhó-yu ndidí sá ní quene díhna-gã, chi càchí-yu sá xihí vãha-gã ndidí sá ní quene díhna-gã-á<sup>n</sup> dàcúxí ndidí sáá —càchí-gã xáha<sup>n</sup>-gã xii-yu.

## 6

*Cue téé xica cuu ndihí Jesús sàhnú-güedé yoco triú nduu ndètatú ñáyiú*

*(Mt. 12:1-8; Mr. 2:23-28)*

<sup>1</sup> Te ì<sup>n</sup> nduu cùu-xi nduu ndetátú ñáyiú ñùhu Jesús ichi ndihí cue téé xica cuu ndihí-gã, te ta yãha-gã ndihí-güedé ì<sup>n</sup> xichi núú cáá triú, te ní ngúíta-güedé sàhnú-güedé yoco triú-á<sup>n</sup> te ndihí ndaha-güedé quíí<sup>n</sup>-güedé quée triú tá xèxi-güedé cuáhá<sup>n</sup>. <sup>2</sup> Te ì<sup>n</sup> úú cue téé cùu fariséú ní xáha<sup>n</sup>-güedé xii cue téé xica cuu ndihí-gã:

—¿Te ná cuèndá duca<sup>n</sup> quide nchohó ì<sup>n</sup> sã ñà túú tàú-ó càda-o

vitna cuu-xi nduu ndetátú-ó-í? —càchí-güedé xáha<sup>n</sup>-güedé.

<sup>3</sup> Te Jèsús ní xáha<sup>n</sup>-gã xii-güedé:

—¿Te náa ñà túú dàcuaha-ndo núú tütú Yã Ndiõxí núú càhá<sup>n</sup>-xi nàcuáa ní quide ndí Dávíí cùtnàhá ní xihí ndí docó ndihí cue téé ní xica cuu ndihí ndí-á<sup>n</sup>? <sup>4</sup> Chi ní quíhu ndí vehe Yã Ndiõxí, te ní quehe<sup>n</sup> ndí pàá ní cuu íí ndécú-á<sup>n</sup> ní dácãhñu ndí cue téé xica cuu ndihí ndí ní xexi ndí ndihí-güedé, te ñà túú tàú ndí sá dúcá<sup>n</sup> càda ndí ni cùu, chi mee-ni cùé dútú tàú-güedé caxi-güedé pàá-á<sup>n</sup> ní cùu —cachí-gã xáha<sup>n</sup>-gã xii-güedé.

<sup>5</sup> Te ní xáha<sup>n</sup> tùcu-gã:

—Te yúhú Téé cùu ñaní tnàhá-ndó nchàa-ndo, tnàhá-í ndécú ndihí-í tnúhu ndee ìní sã cùu-í nchaa ñáyiú nàcuáa cadá-yu nduu ndetátú-ó-á —càchí-gã xáha<sup>n</sup>-gã xii-güedé.

*Ì<sup>n</sup> téé ní yíchí ì<sup>n</sup> xio ndaha-xi (Mt. 12:9-14; Mr. 3:1-6)*

<sup>6</sup> Te ingá nduu ðiu-ni nduu ndètatú ñáyiú cuánguihu Jèsús xití veñúhu dānehé-gã ñáyiú. Te xíá<sup>n</sup> ndécú ì<sup>n</sup> téé cùhú ní yíchí nihnu ì<sup>n</sup> xio ndaha cùha-dé. <sup>7</sup> Te cue téé dàcuaha ñaha xii ñáyiú nchaa tnúhu ní chídó tnùní ndí Moisés, ndihí cue téé cùu fariséú ndéhe-güedé nùu cada tátna ñaha Jèsús xii téé cùhú-á<sup>n</sup> nduu ndètatú-güedé-á<sup>n</sup> cuèndá níhí-güedé nàcuáa cada-güedé cacá<sup>n</sup> cuéchi-güedé cuèndá-gã. <sup>8</sup> Dico Jèsús sa ní cutnùní iní-gã nàcuáa sàni iní-güedé, te ní xáha<sup>n</sup>-gã xii téé cùhú ndaha-xi-á<sup>n</sup>:

—Ndàcuiñí te ngúnutnii-n cuádava tnuú-ndí-a —càchí-gã xáha<sup>n</sup>-gã xii-dé.

Te téé-á<sup>n</sup> ní ndacuiñí-dé te ní ngúnutnii-dé cuádava tnuú-güedé ndihí-gã. <sup>9</sup> Te dātnùní Jèsús ní xicá<sup>n</sup> tnúhú-gã núú cùé ñáyiú xĩndecu-á<sup>n</sup>, te xáha<sup>n</sup>-gã xii-yu:

—Cuíní-í cachí tnúhu-ndo nã cúú sã vãha cada-o nduu ndetátú-ó. ¿Ì<sup>n</sup> chiu<sup>n</sup> váha àdi ì<sup>n</sup> chiu<sup>n</sup> cuehé, sã cáda tátna-o ñáyiú cùhú àdi sã cáhni-ó-yu? —càchí-gã xáha<sup>n</sup>-gã xii-yu.

<sup>10</sup> Te dātnùní ní ndacoto-gã núú-yu nchaa-yu, te ní xáha<sup>n</sup>-gã xii téé cùhú ndaha-xi-á<sup>n</sup>:

—Ndocani ndaha-n —càchí-gá xáha<sup>n</sup>-gã xii-dé.

Te ní ndocani-dé ndaha-dé, te òré-ni ní ndúha. <sup>11</sup> Te cue téé xĩndecu-á<sup>n</sup> sùúni ní cudéé<sup>n</sup>-güedě sá dúcá<sup>n</sup> ní quide tátna Jèsús téé cùhú-á<sup>n</sup>, te ní ngúíta-güedé ndátnũhu-güedé nũu nása cada ñaha-güedě xii-gá.

*Jèsús cãxi-gá úxúú tnàhá cue téé dacuàha ñaha xii ñáyiu tnúhu-gá (Mt. 10:1-4; Mr. 3:13-19)*

<sup>12</sup> Te sátá dúcá<sup>n</sup> ní cuu te ní xica Jèsús cuáhá<sup>n</sup>-gá xití yucu cuèndá yàcá<sup>n</sup> cáhá<sup>n</sup> ndihí-gá Tátá-gã Dútú Ndiõxí, te ní niú ní cáhá<sup>n</sup> ndihí ñaha-gã. <sup>13</sup> Te sátá ní túndaá, te ní cana-gá nchaa cue téé xica cuu ndihí-gá, te ní cáxi-gá úxúú tnàhá-güedé, te cue téé-á<sup>n</sup> ní xáha<sup>n</sup>-gã sá díú-güedé cuu-güedé cue téé quíhí<sup>n</sup> cáhá<sup>n</sup> tnúhu-gá núú ñáyiu. <sup>14</sup> Te duha xĩnani ndi úxúú cue téé-á<sup>n</sup>. Té Xímú, àdi Pelú chi úú diu-dé, ndihí ñaní-dé té Ndríxí, ndihí té Jàcobó, ndihí té Juàá, ndihí té Lìpé, ndihí té Bartolòmé, <sup>15</sup> ndihí té Màteú, ndihí té Mǎxí, ndihí té Jàcobó déhe té Àlfeú, ndihí ingá té Xímú téé ní cundihí cue téé canànistá, <sup>16</sup> ndihí té Jùdás ñaní té Jàcobó, ndihí té Jùdás Iscarioté téé ní sáá nduu ní sáha cuèndá ñáhá xii Jèsús núú cuè téé cùu úhú iní ñáhá xii-gá, duha xĩnani cuè téé ní cáxi Jèsús ní xica cuu ndihí-gá.

*Jèsús dánèhé-gá cuéhé víhí ñáyiu (Mt. 4:23-25)*

<sup>17</sup> Te Jèsús cuánuu-gá yucu núú ní sáá-gá-á<sup>n</sup>, te ní ngava-gá ñ<sup>n</sup> núú ndàá ndihí cue téé xica cuu ndihí-gá, te xía<sup>n</sup> ní ngúnutnǎi-gá. Te xía<sup>n</sup> ndécú dàva-gá cue téé xica cuu ndihí-gá ndihí vǎi ñáyiu ndètu ñahá-yu xii-gá, te ñáyiu-á<sup>n</sup> vèxi-yu nchaa ñuú cáá dístritú Jùdeá, ndihí ñuú Jerusalén, te ndècu ñáyiu véxi ndàa yuhu lamár yatni ñuú Tírú, ndihí ñuú Sidón. Te nchaa ñáyiu-á<sup>n</sup> ní quexió-yu cuíni-yu cundedóho-yu nchaa tnúhu càhá<sup>n</sup> Jèsús, ndihí cuèndá sá cuíni-yu ndúha-yu nchaa cuéhé tnàhá-yu. <sup>18</sup> Te tnàhá ñáyiu yíhí ñaha espíritú cundihí yucu ñáváha.

<sup>19</sup> Te nchaá-yu cuíni-yu dacàá-yu ndahá-yu tendàhá-yu Jèsús ní cùu cuendá sá ní níhí-yu tnúhu sá ndècu ndihí-gá tnúhu ndee iní quidé tátna-gá nchaa ñáyiu cùhú.

*Cuèndá ñáyiu ío váha táhú-xi (Mt. 5:1-12)*

<sup>20</sup> Te Jèsús ní ndacoto-gá núú cuè téé xica cuu ndihí-gá, te ní xáha<sup>n</sup>-gã:

—Váha táhú nchaa nchòhó cue ñáyiu ndàhú, chi nduu táhú-ndó cùndecu-ndo núú táxi tnúni Yá Ndiõxí.

<sup>21</sup> Váha táhú nchaa nchòhó ñáyiu ío cuíni cundedóho tnúhu Yá Ndiõxí chi ío víi ío váha cuu iní-ndó.

Váha táhú nchaa nchòhó ñáyiu ndàhyú sá ndihú iní-ndó, chi sáá nduu te cudíí iní-ndó ní caa ní quíhí<sup>n</sup>.

<sup>22</sup> Váha táhú nchaa nchòhó ñáyiu na cùu úhú iní ñáhá tnàha ñáyiu-xi, chi sáá nduu te vá dáñá-gã-yu quíhu-ndo vèñúhu, te cúcuèhé ñáhã-yu xii-ndo, te cachí-yu sá ñà díú ñáyiu váha cùu-ndo, te duca<sup>n</sup> càda ñahá-yu xii-ndo sã cuèndá yúhú Téé cùu ñaní tnàhá-ndó nchaa-ndo. <sup>23</sup> Te òré duca<sup>n</sup> na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu nduu táhú-ndó sã ío váha càa ndecu andiú cundecu ndihí-ndo nduu na nasaá-ndó yàcá<sup>n</sup> cundecu-ndo, chi diu-ni duca<sup>n</sup> ní xóo cada ñaha cuè ñaní tnàhá-yu xii cue téé ní xóo cáhá<sup>n</sup> tnúhu Yá Ndiõxí ní xĩndecu ndéé sanaha.

<sup>24</sup> Te ndàhú ní cuu nchaa ñáyiu cuica ñà túú sàndáá iní ñáhá xii Yá Ndiõxí, chi vitna ío váha ndècú-yu, dico sáá nduu te nduu ndàhú-yu.

<sup>25</sup> Te ndàhú ní cuu tucu nchaa ñáyiu ñà túú tnàhí ná cúmǎní xii-xi vitna, chi sáá nduu quíni-yu tnúndòho tnúhu ndàhú.

Te ndàhú ní cuu nchaa ñáyiu cùdíí iní-xi ndècu ichi cuehé ichi duha vitna, chi sáá nduu te ndàhyú-yu sá ndihú iní-yu.

<sup>26</sup> Te ndàhú ní cuu nchaa ñáyiu na càhá<sup>n</sup> váha dàva-gá ñáyiu cuèndá-xi, chi duca<sup>n</sup> ní xóo cáhá<sup>n</sup> váha-yu cuèndá nchaa cue téé ní xóo dandàhú ñáhá xii ñáyiu ndéé sanaha, chi ní cachí-güedé



sá cãhá<sup>n</sup>-güedé tnúhu Yá Ndiõxí te ña ndàá —cãchí-gá xãhá<sup>n</sup>-gã xii-güedé.

*Cuu iní-ó nchaa ñáyiú cùu úhú iní ñáhá xii-ó*

(Mt. 5:38-48; 7:12)

<sup>27</sup> Te Jèsús ní xáhá<sup>n</sup>-gã xii nchaa ñáyiú xĩndecu-á<sup>n</sup>:

—Nchaa nchòhó ñáyiú xĩndedóho ñaha cãchí tnúhu-í xii-ndo sã cúú iní-ndó ñáyiú cùu úhú iní ñáhá xii-ndo, te cada-ndo sã vãha sá cúú-xí-yu cuèi nándi sá ná cádá ñáhá-yu xii-ndo. <sup>28</sup> Te cáca<sup>n</sup> táhú-ndó nũú Yá Ndiõxí cuendá ñáyiú cãhá<sup>n</sup> úhú ñáhá xii-ndo, ndihi cuendá ñáyiú tèe ñaha cuéchi neñúú xii-ndo. <sup>29</sup> Te núu ní canihá-yu xii-ndo ì<sup>n</sup> xito te cuini tucú-yu canihá-yu, te dañá-ndo na cànihá-yu, àdi núu na quèndé-yu dóo ndíxí ndòdo-ndo, ndihi dúhnú-ndó, te dañá-ndo na cànehé-yu quíhí<sup>n</sup>. <sup>30</sup> Te núu xicá<sup>n</sup>-yu ì<sup>n</sup> sá nándíhi-yu núú-ndó te cuáñaha-ndo, àdi quèndé-yu ì<sup>n</sup> ndachiu<sup>n</sup>-ndo, te vá nándácá<sup>n</sup>-ndó nũú-yu. <sup>31</sup> Te nchaa sã vãha cuini-ndó càda tnaha ñáyiú-ndo, te cada-ndo tnàhá-ndó ndihí-yu.

<sup>32</sup> 'Chi núu nchòhó ná cùu iní-ndó mèe-ni ñáyiú cùu iní ñáhá xii-ndo, te vá cãchí-ndó sã ïo vãha quide-ndo, chi tnàhá nchaa ñáyiú ndècu ichi cuehé ichi duha duca<sup>n</sup> xĩquidé-yu.

<sup>33</sup> Àdi mee-ni ñáyiú quide ñaha sã vãha xii-ndo quide vãha-ndõ-yu, te vá cãchí-ndó sã ïo vãha quide-ndo, chi tnàhá nchaa ñáyiú ndècu ichi cuehé ichi duha duca<sup>n</sup> xĩquidé-yu. <sup>34</sup> Àdi mee-ni ñáyiú sàni iní-ndó nàcoto ñaha xii-ndo cuáñaha-ndo ì<sup>n</sup> sá xicá<sup>n</sup>-yu núú-ndó, te vá cáni iní-ndó sã ïo quide vãha-ndo, chi tnàhá ñáyiú ndècu ichi cuehé ichi duha dàsa<sup>n</sup> nuú-yu ì<sup>n</sup> sá néhé vãha-yu, te ndètu cahnu-ná-yu nacoto ñaha ñáyiú ní sáha nùú-yu-á<sup>n</sup>. <sup>35</sup> Dico nchòhó xini ñuhu-xi cuu iní-ndó ñáyiú cùu úhú iní ñáhá xii-ndo, te cada-ndo sã vãha sá cúú-xí-yu, te cuáñaha nùu-ndo ì<sup>n</sup> sá ná ndíhi-yu te núu xicá<sup>n</sup>-yu núú-ndó, te vá cundètu-ndo nacoto ñáhá-yu xii-ndo. Te duca<sup>n</sup> te ïo-gá

cuéhé ñihí-ndó cùndecu ndihi-ndo, te cuu ndisa-ndo dèhe Dútú Ndiõxí, chi ïo cãhnu iní-gá sá cúú-xí nchaa ñáyiú ñá túú ndácá<sup>n</sup> táhú nũú-gã cuendá nchaa sã vãha quide-gá, ndihi sá cúú-xí nchaa ñáyiú ndècu ichi cuehé ichi duha. <sup>36</sup> Te cunduu cãhnu iní nchòhó tucu dàtná cãhnu iní Tátá-ó Dútú Ndiõxí.

*Vá cãhá<sup>n</sup> cuèhé-ó cuendá tnàha ñáyiú-ó*

(Mt. 7:1-5)

<sup>37</sup> 'Te vá cãhá<sup>n</sup> cuèhé-ndó cuendá sá quidé tnàha ñáyiú-ndo, te duca<sup>n</sup> te Yá Ndiõxí ñá túú nà tnúhu cúñaha-gã xii-ndo. Te vá cũñaha-ndo xii ñáyiú sá quíhí<sup>n</sup>-yu ì<sup>n</sup> xichi núú ùhú núú ndàhú ndohó-yu cuendá nchaa sã ñá túú vãha quidé-yu, te duca<sup>n</sup> te Yá Ndiõxí vá cũñaha-gã xii-ndo sã tnàhá-ndó quíhí<sup>n</sup>-ndó ì<sup>n</sup> xichi núú ùhú núú ndàhú ndoho-ndo. Te chí cádá cãhnu iní nchaa sá quidé-yu, te duca<sup>n</sup> te Yá Ndiõxí cada cãhnu iní ñáhá-gã xii-ndo tucu. <sup>38</sup> Te chí cuáñaha xii ñáyiú núu ná cúú sã xini ñùhú-yu, te dàtná chitu ì<sup>n</sup> yicá súúni xidó coyo-ná, duca<sup>n</sup> tàxi Yá Ndiõxí xii-ndo. Te nánicuáa na càda-ndo cada vãha-ndo sã cúú-xí tnàha ñáyiú-ndo, te ñu-ni duca<sup>n</sup> càda ñaha Yá Ndiõxí xii-ndo —cãchí Jèsús xãhá<sup>n</sup>-gã xií-yu.

<sup>39</sup> Te dàtnúni ní cani-gá ì<sup>n</sup> cuendú núú-yu nàcuáa tecú tnúni-yu tnúhu-gá, te xãhá<sup>n</sup>-gã:

—Ì<sup>n</sup> tée cuáa chi ñá ndácú-dé cuita nehe-dé ingá tée cuáa, chi núu duca<sup>n</sup> na càda-güedé te ndi ndùú-güedé ngaunihnu-güedé déhvá. <sup>40</sup> Te ni ì<sup>n</sup> landú yíhí scuèlá ñá túú cùnuu-gá-güexi dàcúxí mèstrú-güexi, te ndéé nũu na cútúha vãha-güexi, te dàtnúni nùtnahá-güexi tée dànehé ñáhá xii-güexi.

<sup>41</sup> 'Te na cãchí tnúhu-í xii-ndo sã nchaa cuéchi quide ñáyiú cùu-xi datná ì<sup>n</sup> mihi líhli. ¿Te ná cuendá ndéhé-ndó ì<sup>n</sup> sá ñá túú vãha quide tnaha ñáyiú-ndo, te mee-ndo vihi-gá quidé-ndó-í? Te sá dúcá<sup>n</sup> quide-ndo te cada iní-ndó sã ndéhé-ndó dàtná ì<sup>n</sup> mihi líhli ñuhu núú tnàha ñáyiú-ndo,

te mee-ndo ñùhu ì<sup>n</sup> mihi cahnu-gá núú-ndó. <sup>42</sup> Te núu na nàcanu ichi-ndo tnaha ñáyi-ndo cuendá sá ñà túú quide váha-yu ndécú-yu te mee-ndo vîhi-gá quidé-ndó ñá, te cada iní-ndó sá xâha<sup>n</sup>-ndo xîi-yu sá nâtáva-ndo mihi líhli ñùhu núú-yu, te mihi càhnu ñùhu núú méé-ndó ñà túú quide cuendá-ndó. ¡Te sá dúcá<sup>n</sup> quide-ndo te ío dândahú-ndó mée-ndo sá quidé ndáá-ndó te ñá ndáá sá quidé ndáá-ndó! Te xîni ñùhu-xi díhna-gá dañá-ndo nchâa sá ñà túú váha quide-ndo, te dâtnùní duca<sup>n</sup> te cutnùní váha iní-ndó nâcuáa nâcanu ichi-ndo tnaha ñáyi-ndo.

*Ndi dí<sup>n</sup> núú yutnu xîní-ó nâ yutnu cùu-xi cuendá sá sâvidí-xi (Mt. 7:17-20; 12:34-35)*

<sup>43</sup> Te ñà túú nî ì<sup>n</sup> yutnu váha te quiní-ó cùu<sup>n</sup> sâvidí sá ñà túú váha, te nî ì<sup>n</sup> yutnu sá ñà túú váha, te quiní-ó cùu<sup>n</sup> sâvidí váha, chi mee-ni sâvidí sá ñà túú váha cùu<sup>n</sup>. <sup>44</sup> Te ndi dí<sup>n</sup> núú yutnu xîní-ó nâ yutnu cùu-xi cuendá sá sâvidí-xi, chi ñà túú xîní-ó cùu<sup>n</sup> ngúxí ì<sup>n</sup> tnu ñù, te nî ñà túú xîní-ó cùu<sup>n</sup> ndéhé yoho yâha stilé díquí ì<sup>n</sup> yoho yâha cutexínu. <sup>45</sup> Te nchaa ñáyi-ndo váha iní-xi càhá<sup>n</sup>-yu tnúhu váha, chi ñù-ni tnúhu váha tnâhí-á<sup>n</sup> ñùhú iní-yu, te nchaa ñáyi-ndo ñà túú váha iní-xi càhá<sup>n</sup> cuèhé-yu, chi ñù-ni tnúhu cuèhé tnâhí-á<sup>n</sup> ñùhú iní-yu, chi nchaa sá ñùhú iní-yu te xîá<sup>n</sup> càhá<sup>n</sup>-yu.

*Ì<sup>n</sup> vehe ndècu cimientú-xi ndihî ì<sup>n</sup> vehe ñà túú cimientú-xi (Mt. 7:24-27)*

<sup>46</sup> ¿Te ná cuendá càchí-ndó sâ yùhú cùu-í Yáá cúú Xîtohó-ndó te ñà túú quide-ndo nchaa nacúáa càhá<sup>n</sup>-í-í? <sup>47</sup> Te na càchí tnúhu-í xii-ndo cuendá ñáyi-ndo túha ñaha xii-í, chi ñáyi-á<sup>n</sup> sâcúndedóho-yu nchaa tnúhu càhá<sup>n</sup>-í te tnî-yu. <sup>48</sup> Te ñáyi-á<sup>n</sup> cúu-yu dàtná ì<sup>n</sup> tée ní dácáá ì<sup>n</sup> vehe, chi tée-á<sup>n</sup> díhna-gá ní xete-dé ndéé ní tnahá-dé yúú cáxí<sup>n</sup> te dâtnùní ní tava-dé cimientú-xi, te òré ní cuu<sup>n</sup> dáú, te ní ndee ndute ñùhu, te ní ndacá<sup>n</sup>-xi ndéé núú cáá vèhe-á<sup>n</sup>, dico ñà túú ní ndàcu-xi cuidu-xi, te duca<sup>n</sup> chi tée ní

dácáá vèhe-á<sup>n</sup> ní tava-dé cimientú-xi núú yúú cáxí<sup>n</sup>. Duha sâtnahá-xi cùu nchaa ñáyi-ndo sâcúndedóho tnúhu càhá<sup>n</sup>-í te tnî-yu. <sup>49</sup> Te ñáyi-ndo sâcúndedóho tnúhu càhá<sup>n</sup>-í te ñà túú tnî-yu, ñáyi-á<sup>n</sup> cúu-yu dàtná ì<sup>n</sup> tée ní dácáá ì<sup>n</sup> vehe, te ñà túú ní tava-dé cimientú-xi, te òré ní cuu<sup>n</sup> dáú, te ní ndee ndute ñùhu, te ní ndacá<sup>n</sup>-xi ndéé núú cáá vèhe-á<sup>n</sup>, te íi-ni ní xido-xi vehe-á<sup>n</sup> cuendá sá ñà túú ní quene cimientú-xi. Duha sâtnahá-xi cùu nchaa ñáyi-ndo sâcúndedóho tnúhu-í te ñà túú cuini-yu tnî-yu —câchí-gá xâha<sup>n</sup>-gá xii-yu.

## 7

*Jèsús quidé tâtna-gá ì<sup>n</sup> tée xînu cuechi núú ì<sup>n</sup> tée cùu capitá<sup>n</sup> (Mt. 8:5-13)*

<sup>1</sup> Te sátá ní yâha ní càhá<sup>n</sup> Jèsús ndihî ñáyi-ndo, te cuáhá<sup>n</sup>-gá ñúú Capèrnaúm. <sup>2</sup> Te yàcá<sup>n</sup> ndécú ì<sup>n</sup> tée cùu capitá<sup>n</sup>, te cùhú ì<sup>n</sup> tée xînu cuechi núú-dé tée ío-gá cúú iní-dé, te sa ndècu-ná-dé sá cúú-dé. <sup>3</sup> Te òré ní níhí tée cùu capitá<sup>n</sup>-á<sup>n</sup> tnúhu cuendá Jèsús, te ní tendaha-dé ì<sup>n</sup> úú cue tée cùu sacuéhé núú ñáyi-ndo isràél cuáhá<sup>n</sup>-güedé càhá<sup>n</sup> ndâhú-güedé núú-gá núu vá cündèe iní-gá quíhí<sup>n</sup>-gá cada tâtna-gá tée xînu cuechi núú-dé-á<sup>n</sup>. <sup>4</sup> Te ní quexíu-güedé núú ndécú Jèsús, te ní ngúita-güedé càhá<sup>n</sup> ndâhú víhí-güedé núú-gá, te xâha<sup>n</sup>-güedé:

—Tée cùu capitá<sup>n</sup> ní cachí-dé véxi-ndí núu vá cündèe iní-n quíhí<sup>n</sup>-n càda tâtna-n ì<sup>n</sup> tée xînu cuechi núú-dé chí cùhú-dé, te tàú ndisa-n càda-n nacúáa càhá<sup>n</sup> capitá<sup>n</sup>-á<sup>n</sup>, <sup>5</sup> chí tée-á<sup>n</sup> ío cùu iní ñáhá-dé xii nchaa nchúhú ñáyi-ndo isràél te ñù-dé ní táuchíu<sup>n</sup>-dè ní sáá veñúhu-ndí —câchí-güedé xâha<sup>n</sup>-güedé xii-gá.

<sup>6</sup> Te sátá dúcá<sup>n</sup> te Jèsús ní xica-gá cuáhá<sup>n</sup>-gá ndihî-güedé, te òré tá cùyatni-gá vehe núú ndécú tée cùhú-á<sup>n</sup> cuáhá<sup>n</sup>, te tée cùu capitá<sup>n</sup>-á<sup>n</sup> ní xâha<sup>n</sup>-dè xii ì<sup>n</sup> úú cue tée càhá<sup>n</sup> ndihî-dé:

—Quíhí<sup>n</sup>-ndó cùñaha-ndo xîi Yáá cúú Mèstrú sá càchí-í sá ñà túú nâ cani

iní-gá, chi ñá túú tàú-í sá quíhu-gá ndéé xití vehe-í,<sup>7</sup> chi ní sá cùnú ndúcú mèe-í-gá ñá túú ní cùyí-í. Núu xiá<sup>n</sup> cúñaha-ndo xii-gá sá ná càhá<sup>n</sup>-ni-gá sá ndúha téé xinu cuechi núù-í-a te ndúha-dé.<sup>8</sup> Chi yúhú ndécú cuè téé tàxi tnuní ñáhá xii-í, te duca<sup>n</sup> yúhú tucu ndécú cue sandadú táxi tnùn-í. Te òré xáha<sup>n</sup>-í xii ñ<sup>n</sup>-dé quíhí<sup>n</sup>-dé ñ<sup>n</sup> chiú<sup>n</sup> te cuáhá<sup>n</sup>-dé, te òré xáha<sup>n</sup>-í xii ingá-dé quixi-dé te véxi-dé, te òré xáha<sup>n</sup>-í xii téé xinu cuechi núù-í cada-dé ñ<sup>n</sup> chiú<sup>n</sup> te quide-dé. Duha càchí-í cúñaha-ndo xii-gá —càchí-dé xáha<sup>n</sup>-dè xii cue téé càhá<sup>n</sup> ndihí-dé-á<sup>n</sup>.

<sup>9</sup> Te sátá dúcá<sup>n</sup> ñí xáha<sup>n</sup>-güedé xii Jèsús, te ní cuñúhu-gá nchaa tnúhu ní cáhá<sup>n</sup> téé cùu capitá<sup>n</sup>-á<sup>n</sup>, te ní nchócótó-gá núú nchaa ñáyiú nchícú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gã:

—Na càchí tnúhu ndáá-í xii-ndo sã vátá quini-gá-í ní ñ<sup>n</sup> ñáyiú israhél, ñáyiú ío váha sándáá iní-xi Yá Ndióxi dàtná sándáá iní ñáhá tée-ã<sup>n</sup> xii-gá —càchí-gá xáha<sup>n</sup>-gã xií-yu.

<sup>10</sup> Te òré ní ndexio cue téé nèhe tnúhu-á<sup>n</sup> ñí sáhá<sup>n</sup> núú Jèsús, te sa ní ndúha téé cùhú-á<sup>n</sup>.

#### *Jèsús dándòto-gá déhe ñ<sup>n</sup> ñaha quèé*

<sup>11</sup> Te sátá dúcá<sup>n</sup> ñí cuu te ní xica Jèsús cuáhá<sup>n</sup>-gã ñ<sup>n</sup> ñuú nání Náin, ndihí cue téé xica cuu ndihí-gá, ndihí vai ñáyiú. <sup>12</sup> Te òré ní sáá-gá yuhu ñuú-á<sup>n</sup>, te ní xiní-gá nchídó-güedé ñ<sup>n</sup> ndíyi cuáhá<sup>n</sup> chindúxi ñaha-güedé, te ndíyi-á<sup>n</sup> cúú dèhe ñ<sup>n</sup> ñaha quèé, te ñ<sup>n</sup>ndí duca<sup>n</sup>-ni déhe-a<sup>n</sup> ndécú ní cuu te ní xihí-dé. Te ío cuéhé ñáyiú cuáhá<sup>n</sup> chindúxi ñaha. <sup>13</sup> Te òré ní xiní ñáhá Jèsús xii-a<sup>n</sup> ndàhyú-a<sup>n</sup> te ní cundàhú iní ñáhá-gã, te ní xáha<sup>n</sup>-gã:

—Vá ndàhyú-n —càchí-gá xáha<sup>n</sup>-gã xii-a<sup>n</sup>.

<sup>14</sup> Te ní dáyatní-gã càjá ñúhú ndíyi-á<sup>n</sup> te ní dácáá-gá ndaha-gá te ní tendaha-gã càjá-á<sup>n</sup>, te ní ngüíñí cue téé nchido ñaha-á<sup>n</sup>. Te ní xáha<sup>n</sup>-gã xii ndíyi-á<sup>n</sup>:

—Tée cuechi, yúhú càchí-í sá ndácóo-n —càchí-gá xáha<sup>n</sup>-gã xii ndíyi-á<sup>n</sup>.

<sup>15</sup> Te téé ní xihí-á<sup>n</sup> ñí nucúnucóo-dé te ní ngüíta-dé càhá<sup>n</sup>-dé, te Jèsús ní nacuáha cuendá ñáhá-gã xii-dé ndaha náná-dè. <sup>16</sup> Te sátá dúcá<sup>n</sup> ñí quide Jèsús ní xiní-yu te ío ní yuhú-yu, te ní xitnàhá-yu:

—Ío càhnu cuu Yá Ndióxi chi ñ<sup>n</sup> téé càhá<sup>n</sup> tnúhu-gá ní quexio núú ndécú-ó —càchí-yu xitnàhá-yu.

Te ní xitnàha tucú-yu:

—Yá Ndióxi véxi-gá chindee ñaha-gá xii nchaa nchoo ñáyiú cùu cuendá-gá —càchí-yu xitnàhá-yu.

<sup>17</sup> Te nchaa ñuú distritú Júdeá, ndihí dava-gá ñuú ní níhí-yu tnúhu nacuáa ní quide Jèsús.

#### *Cue téé ní tendaha té Juáá cuáhá<sup>n</sup> núú ndécú Jèsús*

(Mt. 11:2-19)

<sup>18</sup> Te cue téé xica cuu ndihí té Juáá ní xáha<sup>n</sup>-güedé xii-dé nchaa sátá ñí quide-gá, núu ní cana-dé úú tnàhá-güedé <sup>19</sup> cuendá cúñaha-dé quíhí<sup>n</sup>-güedé nducu tnúhu-güedé núú Jèsús, te núu sátá díú-gã cúú-gã Crístú Yáá ní tendaha Yá Ndióxi véxi ñuyú-a àdi sátá cündètu nahi-ni-güedé mei Yáá-á<sup>n</sup>. <sup>20</sup> Te òré ní quexio cue téé ní tendaha tẽ Juáá núú ndécú Jèsús, te xáha<sup>n</sup>-güedé xii-gã:

—Té Juáá téé dàcuandute ñaha xii ñáyiú ní tendaha ñaha-dé xii-ndí véxi-ndí cácá<sup>n</sup> tnúhú-ndí núú-n, núu sátá díú-n cùu Crístú Yáá quixi ñuyú-a, àdi sátá cündètu-ndí mei Crístú càchí-dé —càchí-güedé xáha<sup>n</sup>-güedé xii-gã.

<sup>21</sup> Te mei òré ní quexio-güedé-á<sup>n</sup> ñí quide tátna Jèsús vai ñáyiú cùhú, te davá-yu càhú víhí tnàhá-yu, te ndí díí<sup>n</sup> ndí díí<sup>n</sup> núú cuéhé tnàhá-yu ñ<sup>n</sup> ñ<sup>n</sup>-yu, te cue ñáyiú yihí ñaha espíritú cündihí yucu ñávaha ní queñuhu-gá espíritú-á<sup>n</sup> yiqui cùñú-yu, te ío vai ñáyiú cuáá ní nacaá<sup>n</sup>-gá núú-yu. <sup>22</sup> Te Jèsús ní xáha<sup>n</sup>-gã xii-güedé:

—Chí cuánùhú te cani-ndo cuendú núú tẽ Juáá nchaa sátá ñí xiní-ndó quide-í, ndihí nchaa nacuáa ndùu tnúhu ní cáhá<sup>n</sup>-í ní xindedóho-ndo. Te cúñaha-ndo xii-dé sátá quidé tátna-í núú cuè ñáyiú cuáá, te quide tátna-í cue

ñáiyu yacua, ndihi cue ñáiyu tnàhá cuéhé sã dátèhyú nihnu-xi yiqui cùñú-yu, ndihi cue ñáiyu doho, nchaa ñáiyu-án quide tátna-í te ndüha-yu, te ndéé cue ñáiyu sa ní xihí dándòto-í cùñaha-ndo xii-dé, te cùñaha tucu-ndo xii-dé sá ndècuu-í dánèhé-í nchaa ñáiyu ndàhú tnúhu sá sánú ichi ñaha xii-yu nàcuáa naníhí tãhú-yu. <sup>23</sup> Te cùñaha tucu-ndo xii-dé sá ïo vãha tãhú nchaa ñáiyu ñã túú quide sáá iní nchaa tnúhu càhá<sup>n</sup>-í, duha cùñaha-ndo xii-dé —càchí-gá xãha<sup>n</sup>-gã xii-güedé.

<sup>24</sup> Te sãtã ñiyãha-güedé cuánuhú-güedé te ní ngüita Jèsús ní càhá<sup>n</sup>-gã núú ñáiyu cuendã té Juãá, te xãha<sup>n</sup>-gã xii-yu:

—Nchòhó ní sãndéhé-ndó ñ<sup>n</sup> tée ndècu xití yucu, te tée-ã<sup>n</sup> ñã túú sãni ñ<sup>n</sup> saní úú iní-dé, chi ñã túú quide-dé dàtnã quidé nchãa ité náhnú cuãhá<sup>n</sup>-xi duha cuãhá<sup>n</sup>-xi dàcã<sup>n</sup> òré quéné tãchí. <sup>25</sup> Te ni ñã túú ní sãndéhé-ndó ñ<sup>n</sup> tée nihnu dóó vãha dóó vii càa. Te nchòhó xiní-ndó sã ñáiyu sãcuíhnu dóó vãha dóó vii càa ñã túú nã cúmãní xii-yu, te nchaa ñáiyu-án ndécü-yu vehe cue tée cùnuu yindaha ñaha xii ñáiyu. <sup>26</sup> Dico nchòhó chi ní sãndéhé-ndó ñ<sup>n</sup> tée càhá<sup>n</sup> tnúhu Yã Ndiõxí. Te ndãá sã díú tãe càhá<sup>n</sup> tnúhu-gã cúú-dé dico cùnuu-gã-dé dacúúxí dàva-gã cue tée càhá<sup>n</sup> tnúhu-gã. <sup>27</sup> Te ñiu cuendã té Juãá-ã<sup>n</sup> càhá<sup>n</sup>-xi núú tütú Yã Ndiõxí nàcuáa ní xãha<sup>n</sup>-gã xii Crìstú, te duha ní xãha<sup>n</sup>-gã:

Tendaha-ï ñ<sup>n</sup> tée càhá<sup>n</sup> tnúhu-í codonüu-dé núú-n cuendã dätúha-dé ñáiyu cuendã quíndãá iní-yu tnúhu-n.

Duha ní xãha<sup>n</sup>-gã, te duca<sup>n</sup> ñi ngódó tnùní núú tütú-gã. <sup>28</sup> Te na càchí tnúhu-í xii-ndo sã ñi ñ<sup>n</sup> cue tée ñuyíú-a ñã túú cùnuu-güedé dàtnã cùnùu té Juãá tée dàcuandute ñaha xii ñáiyu. Te nchaa ñáiyu sa ta ndïhu ndaha ñaha Yã Ndiõxí vitna cuãhá<sup>n</sup> cùnùu-gã-ni tucú-yu dacúúxí tã Juãá cuëi cùu-yu ñáiyu ñã túú cùnuu

dacúúxí dàva-gã ñáiyu yindaha-gã —càchí Jèsús xãha<sup>n</sup>-gã xii-yu.

<sup>29</sup> Te sã dúcã<sup>n</sup> ñi càhá<sup>n</sup> Jèsús, núu nchaa ñáiyu ní dacuándute té Juãá ní cachí-yu sã ïo vãha quide Yã Ndiõxí, te ñiu-ni duca<sup>n</sup> ñi càhá<sup>n</sup> cue tée cuihna iní-xi quide cobrá ñãhá xii ñáiyu cuendã impuèstú, cue tée ní dacuándute-dé. <sup>30</sup> Dico cue tée cùu farisèú, ndihi cue tée dàcuaha ñaha xii ñáiyu nchaa tnúhu ní chídó tnùní ndí Moisés, cue tée ñã túú ní dàcuandute té Juãá ñã túú ní tnàhá iní-güedé cada-güedé nchaa sã vãha cuíni Yã Ndiõxí. <sup>31</sup> Te Xitohó Jesucristú ní xãha<sup>n</sup>-gã xii-yu:

—Na càchí tnúhu-í xii-ndo nàcuáa sãtnahã-xi cùu ñáiyu ndècu vitna. <sup>32</sup> Chi ñáiyu-ã<sup>n</sup> cúu-yu dàtnã cue landú sãcõo núú yãhu dàdiqui-güexi te níhi càhá<sup>n</sup>-güexi, te xitnãha-güexi: “Ní tiú-ndí yaá ndihi vilu te ñã túú ní cuíni-ndó càta-ndo. Te ío yica iní ní xita yuhu-ndí te ñã túú ní ndãhyú-ndó”, càchí-güexi xitnãha-güexi. Te duca<sup>n</sup> sãtnahã-xi cùu ñáiyu ndècu vitna. <sup>33</sup> Te té Juãá tée ní xóo dacuandute ñaha xii ñáiyu ío ndàhú ní xóo caxi-dé, te ni ñã túú ní xóo coho-dé ndudí ndéhé yoho yãha stilé sã sã ní nduu-xi ndidí, te ní cachí-ndó sã ñi xindecu ndihi-dé espíritú cündihí yucu ñãvãha. <sup>34</sup> Te sãtã ñi quexio yúhú Tée cùu ñaní tnãhá-ndó nchãa-ndo, te xèxi-í xihí-í ndécü-í te càchí-ndó sã cúu-í tée xèxi vihi te xihí vihi-í. Te càchí tucu-ndo sã cúu-í tée xica cuu ndihi cue tée cuihna iní-xi quide cobrá ñãhá xii ñáiyu cuendã impuèstú, ndihi nchaa dava-gã cue tée ndècu ichi cuéhé ichi duha, duha càchí-ndó. <sup>35</sup> Te ñáiyu ní tnãhá tnúhu ndihi Yã Ndiõxí, ñáiyu-ã<sup>n</sup> quidè-yu nàcuáa cutnùní sã mée-gã ío ndècu ndihi-gã sã xiní tnùnigã —càchí-gã xãha<sup>n</sup>-gã xii-yu.

*Jèsús ndécü-gã vehe ñ<sup>n</sup> tée cùu farisèú tée nãni Xímú*

<sup>36</sup> Te ñ<sup>n</sup> tée cùu farisèú ní càhá<sup>n</sup>-dé Jèsús vehe-dé caxi-gã, te òré ní quexio-gã te cuánguïhu-gã mèsã. <sup>37</sup> Te xiã<sup>n</sup> núcõo-gã ní sãá ñ<sup>n</sup> ñãndihí te ñiu-ni



ñaha ñuú-á<sup>n</sup> cúu-á<sup>n</sup>, te ndècu-a<sup>n</sup> ichi díí ìní, te sá ñí ñíhí-a<sup>n</sup> tnúhu sá cuängaxi Jèsús vehe tée cùu fariséu-á<sup>n</sup>, núu nèhe-a<sup>n</sup> ì<sup>n</sup> yoó chitu àcítí sàhá<sup>n</sup> tnámí.

<sup>38</sup> Te ní ngóo-a<sup>n</sup> ì<sup>n</sup> xio díñi Jesús, te ní ngúita-a<sup>n</sup> ndàhyú-a<sup>n</sup> te ndihí ndute núu-a<sup>n</sup> ní naquete-a<sup>n</sup> sàhá-gă. Te dătnùní ní nadayìchí-a<sup>n</sup> ndihí idi díquí-a<sup>n</sup>, te ní teyuhu-a<sup>n</sup> sàhá-gă, te ní chihí ñaha-a<sup>n</sup> àcítí sàhá<sup>n</sup> tnámí-ă<sup>n</sup>. <sup>39</sup> Te sá dúcá<sup>n</sup> ñí quide-a<sup>n</sup> ní xiní tée cùu fariséu tée ní cáhá<sup>n</sup> ñáhá xii-gá-á<sup>n</sup> nùu ní sani iní-dé: “Te núu dícó ndisa tée càhá<sup>n</sup> tnúhu Yá Ndiöxí cúu tée-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-a<sup>n</sup>, te dícó ì<sup>n</sup> ñaha ndècu ichi díí ìní cúu-á<sup>n</sup>”, duha ní sani iní-dé. <sup>40</sup> Te Jèsús ní xáha<sup>n</sup>-gă xii-dé:

—Xímú, ndècu ì<sup>n</sup> tnúhu cachí tnúhu-í xii-n —càchí-gă xăha<sup>n</sup>-gă xii-dé.

Te tée cùu fariséu-á<sup>n</sup> xăha<sup>n</sup>-dë xii-gá:

—Cachí tnúhu, Mèstrú —càchí-dé xăha<sup>n</sup>-dë xii-gá.

<sup>41</sup> Te Jèsús ní xáha<sup>n</sup>-gă:

—Ní xíndecu ì<sup>n</sup> tée ní xóo dasa<sup>n</sup> nùu díhú<sup>n</sup>, te ní xítaú úú tnàhá-güedé núu-dë. Te ì<sup>n</sup>-dé ní sàha-dé úhú<sup>n</sup> ciëndú díhú<sup>n</sup> denàriú, te ingá-dé ní sàha-dé údico úxí. <sup>42</sup> Te ñá ní ñíhí-güedé nacháhu-güedé núu-dë, te tée ní sánùu ñaha-á<sup>n</sup> ñí quide càhnu iní-dé ndi ndùu-güedé. Te vitna cachí-ö tucu te núu ndëda càa-güedé cúu ìní ñáhá-gă-güedé xii-dé —càchí-gă xáha<sup>n</sup>-gă xii-dé.

<sup>43</sup> Te ní xáha<sup>n</sup> tē Xímú-á<sup>n</sup>:

—Sànuu sá tēe tàú vâi-gă díhú<sup>n</sup> ño-gă cúu ìní-dé tée ní sánùu ñaha díhú<sup>n</sup>-ă<sup>n</sup> —càchí-dé xăha<sup>n</sup>-dë xii-gá.

Te ní xáha<sup>n</sup> Jèsús:

—Sá ndàá càhá<sup>n</sup>-n —càchí-gă xáha<sup>n</sup>-gă xii-dé.

<sup>44-46</sup> Te Jèsús ní ndacoto-gă núu ñadìhí-á<sup>n</sup>, te ní xáha<sup>n</sup>-gă xii té Xímú-á<sup>n</sup>:

—¿Ndèhe-n nacuáa quide ñadìhí-a ñă? Chi cuánguïhu-í vehe-n, dico ñá túú ní tàxi-n ndute ndoo sàhá-í, te ní ñá túú ní tēyuhu ñaha-n, te ní ñá túú ní chihí-n acítí díquí-í, dico ñadìhí-a ní naquete-a<sup>n</sup> ndihí ndute núu-a<sup>n</sup> sàhá-í,

te ní nadayìchí-a<sup>n</sup> ndihí idi díquí-a<sup>n</sup>, te nuu núu teyuhu-a<sup>n</sup> sàhá-í, te ní chihí-a<sup>n</sup> acítí sàhá<sup>n</sup> tnámí sàhá-í. <sup>47</sup> Te na càchí tnúhu-í xii-n sã ño cùu ìní ñáhá-á<sup>n</sup> xii-í, te núu xía<sup>n</sup> cùtnùní iní-ó sã cuëi ío vâi sá cuéhé sá dúhá ñí quide-a<sup>n</sup>, dico Yá Ndiöxí sa ní quide càhnu ìní ñáhá-gă xii-a<sup>n</sup>. Chi Yá Ndiöxí quidé càhnu ìní-gă ñáyiú cuëi vâi àdi sacú cuéchi-yu, te núu sacú cuéchi-yu te sacú cúu ìní ñáhá-yu xii-í —càchí-gă xáha<sup>n</sup>-gă xii-dé.

<sup>48</sup> Te ní xáha<sup>n</sup>-gă xii ñadìhí-á<sup>n</sup>:

—Sa ní quide càhnu ìní-í nchaa cuéchi-n —càchí-gă xáha<sup>n</sup>-gă xii-a<sup>n</sup>.

<sup>49</sup> Te cue tée xínucóo ndihí-gă xitnàha-güedé:

—¿Ná tée cùu tée-a núu nándi sá quidé-dë, te ndéé nchaa yícá cuéchi ñáyiú quide cahnu ìní-dé-í? —càchí-güedé xitnàha-güedé.

<sup>50</sup> Te Jèsús ní xáha<sup>n</sup> tucu-gă xii ñadìhí-á<sup>n</sup>:

—Sa ní cácu nihnu-n nùú ùhú núu ndàhú vitna chi ní sándáá ìní ñáhá-n xii-í, te vitna cuanùhú te ñá túú-gă ná cani ìní-n —càchí-gă xáha<sup>n</sup>-gă xii-a<sup>n</sup>.

## 8

### *Ñáyiú dîhí ní chindee ñàha xii Jesús*

<sup>1</sup> Te sátá dúcá<sup>n</sup> ñí cuu te Jèsús ní xica-gă cuáhá<sup>n</sup>-gă títñí víhí ñùú náhnú, ndihí ñuú líhli dānehé-gă ñáyiú nācuáa ndíhu ndaha ñàha Yá Ndiöxí xii-yu. Te cuáhá<sup>n</sup> ndihí-gă ndi ùxúú tnàhá cue tée xica cuu ndihí-gă, <sup>2</sup> ndihí ì<sup>n</sup> úú ñáyiú dîhí ní quide tátna-gă ní xihí ñaha espíritú cündihí yucu ñávàha, ndihí ñáyiú tnàhá dava-gă cuéhé ùhú ní cùu. Te xía<sup>n</sup> tnàhá tucu ì<sup>n</sup> ñaha nàni Mariá Magdaléná, te ñaha-á<sup>n</sup> ñí xihí ñaha ùsá espíritú cündihí yucu ñávàha xii-a<sup>n</sup> ni cùu, te ní quee ñaha-xi. <sup>3</sup> Te tnàhá ì<sup>n</sup> ñaha nàni Juáná ñadìhí ì<sup>n</sup> tée nàni Chúza tée ní cunuu ñí xinu cuechi vèhe té Hérodés, ndihí ingá ñaha nàni Susaná nchaa ñáyiú-á<sup>n</sup> ñí chindee ñáhá-yu xii-gă ndihí nchaa sá ndécú ndihí-yu, te ñu-ni duca<sup>n</sup> ñí quide vâi-gă tucu ñáyiú nchícú<sup>n</sup> ñáhá xii-gă cuáhá<sup>n</sup>.

*Nàcuáa quide téé cuángacá<sup>n</sup> triú*  
(Mt. 13:1-9; Mr. 4:1-9)

<sup>4</sup> Te ío vâi ñáyíu ndaa ñúú ní tacá-yu núú ndécú Jèsús, te ní ngüíta-gá ní cani-gá ñ<sup>n</sup> cuèndú núú-yu cuèndá tecú tnùní-yu tnúhu-gá, te xáha<sup>n</sup>-gã xií-yu:

<sup>5</sup> — ñ<sup>n</sup> téé cuángacá<sup>n</sup>-dé triú. Te òré ní ngüíta-dé dǎngoyo-dé triú-á<sup>n</sup> te dava ní quene ndava ní ngava ndéé ichi, te ní xénihnu ñáyíu, te ní xíní tílaá te ní nadatácá-güedi. <sup>6</sup> Te dava ní ngava ñuhu yadi núú yíhí vîhi yúú, te ní xínu-xi dico núú sâcú-ni nduu te ní yíhí-xi, chi ñá túú còhyo yíhí.

<sup>7</sup> Te dava ní ngava núú yúcu ndíquí<sup>n</sup> tnu ñúu, te ñ<sup>n</sup>nuu-ni ní xínu-xi ndíhí tnu ñúu-á<sup>n</sup>, te tnu ñúu-á<sup>n</sup> ní dánáá-xí nchaa triú sá ñí xínu-á<sup>n</sup>. <sup>8</sup> Dico dava triú-á<sup>n</sup> ní ngava-xi núú ndécú ñúhu coco<sup>n</sup>, te xiá<sup>n</sup> ní xínu-xi te ní sahnu-xi, te ío váha ní cuu, chi núú ñ<sup>n</sup>-ní triú te ní nguíhí yoco-xi ñ<sup>n</sup> cièndú triú-xi — cǎchí-gá xáha<sup>n</sup>-gã xií-yu.

Te níhí ní cáhá<sup>n</sup>-gá ní xáha<sup>n</sup> tùcu-gá xií-yu:

— Nchaa nchòhó ñáyíu ní xíndedóho tnúhu ní cáhá<sup>n</sup>-í-a, te ío váha chí cuáha cuèndá — cǎchí-gá xáha<sup>n</sup>-gã xií-yu.

*Nàcuáa quèe-xi tnúhu ní cáhá<sup>n</sup> Jèsús*  
(Mt. 13:10-17; Mr. 4:10-12)

<sup>9</sup> Te cue téé xíca cuu ndíhí Jèsús ní xíca<sup>n</sup> tnúhú-güedé núú-gã núu nása quèe-xi cuèndú ní cani-gá núú ñáyíu.

<sup>10</sup> Te ní xáha<sup>n</sup>-gã xii-güedé:

— Nchòhó chi sa cǎchí tnúhu Yá Ndiöxí xii-ndo ñ<sup>n</sup> sá vǎtá quíní-gá-ndó, chí cǎchí tnúhu-gá nàcuáa cada-gá ndíhu ndaha-gã ñáyíu, dico dava-gá ñáyíu cǎni-í mee-ni cuèndú núú-yu, chí cuèi na quíní-yu nchaa nàcuáa cuu dico ní vá cùtnùní iní-yu ná cuèndá duca<sup>n</sup> cùu, àdi cuèi na cùndedóho-yu dico ní vá tècú tnùní-yu — cǎchí-gá xáha<sup>n</sup>-gã xii-güedé.

*Jèsús cáhá<sup>n</sup>-gá nàcuáa quèe-xi tnúhu cuèndá téé cuángacá<sup>n</sup> triú*

(Mt. 13:18-23; Mr. 4:13-20)

<sup>11</sup> Te xáha<sup>n</sup> tùcu-gá xii-güedé:

— Duha quèe-xi cuèndú ní cani-í núú-ndó, chí triú ní sacá<sup>n</sup> téé-á<sup>n</sup>

cúu-xí dàtná tnúhu Yá Ndiöxí. <sup>12</sup> Te triú sá ñí quene ndava ní ngava ndéé ichi-á<sup>n</sup>, xiá<sup>n</sup> cúu-xí dàtná ñáyíu ní quèe iní-xi tnúhu Yá Ndiöxí, dico sáculhá<sup>n</sup> cuáhá<sup>n</sup>-xi xòcani-xi tnúhu-gá iní-yu cuèndá sá vǎ quíndáá iní-yu, te vá nánihí tàhú-yu. <sup>13</sup> Te triú sá ñí ngava ñuhu yadi núú yíhí vîhi yúú, xiá<sup>n</sup> cúu-xí dàtná ñáyíu ní xíndedóho tnúhu Yá Ndiöxí te díí iní ní tní-yu tnúhu-gá, dico òré ná dàcahá<sup>n</sup> ñáhá yùcu ñávǎha xií-yu nándi cadá-yu, te dàña nihnú-yu tnúhu-gá chí ñá nihí ndéè-yu canchicú<sup>n</sup> nihnú-yu nàcuáa cáhá<sup>n</sup> tnúhu-gá. <sup>14</sup> Te triú sá ñí ngava núú yúcu ndíquí<sup>n</sup> tnu ñúu-á<sup>n</sup>, xiá<sup>n</sup> cúu-xí dàtná ñáyíu ní tecú dóho-xi tnúhu Yá Ndiöxí, dico cuèé cuèé ní nacuanaá-yu tnúhu-gá, chí cuèndá mee-ni sǎ cúu-xí mèe-yu ñúhu iní-yu, ndíhí cuèndá sá ío sàni iní-yu cuu cuicá-yu, ndíhí cuèndá sá ío cùdíí iní-yu nchaa sá ío ñuyíú-a núu xiá<sup>n</sup> àú<sup>n</sup> nǎ cuu ní xíndedóho-yu tnúhu-gá. <sup>15</sup> Dico triú sá ñí ngava núú ndécú ñúhu coco<sup>n</sup>, xiá<sup>n</sup> cúu-xí dàtná ñáyíu váha iní-xi ní xíndedóho tnúhu Yá Ndiöxí chí ñá túú dàña nihnú-yu, te ní yùhu ní iní-yu quidè-yu nchaa nàcuáa cáhá<sup>n</sup> tnúhu-gá.

*Nàcuáa quidè-yu ití*  
(Mr. 4:21-25)

<sup>16</sup> Te ñá túú nì ñ<sup>n</sup> ñáyíu tèñuhú-yu ñ<sup>n</sup> ití te dàdáhu-yu, àdi chiváha-yu ñ<sup>n</sup> caha cǎmá, chí tàxi ndecú-yu núú ñínu cuèndá cutnùní núú nchaa ñáyíu ndècu vehe. <sup>17</sup> Te ní ñ<sup>n</sup> tnúhu sá ñǎ tècú tnùní ñáyíu vitna vá cǎchí-ó sǎ vǎ tècú tnùní-yu chí dacuèi sá tècú tnùní-yu, te ní ñ<sup>n</sup> tnúhu sá cǎchí-ó cùu yuhu vitna vá cúu yùhu chí dacuítí sǎ quèé tǔu-xi núú ñáyíu.

<sup>18</sup> Te chí cùndedóho váha tnúhu na cáhá<sup>n</sup>-í-a. Nchaa ñáyíu sàndáá iní ñáhá xii Yá Ndiöxí ío-gá cuita quíndáá-gá iní ñáhǎ-yu xii-gá quíhí<sup>n</sup>, te nchaa ñáyíu ñá túú sàndáá iní ñáhá xii-gá uu<sup>n</sup>-gá cuita cuu sàá-gá iní-yu núú-gã quíhí<sup>n</sup> — cǎchí-gá xáha<sup>n</sup>-gã xii-güedé.

*Cue ñaní Jèsús ndihí náná-gă  
(Mt. 12:46-50; Mr. 3:31-35)*

<sup>19</sup> Te ní quexìo náná Jèsús ndihí cue ñaní-gă vehe núú ndécú-gă, te ñá ndácú-yu cáhá<sup>n</sup> ndihí ñàhá-yu xii-gă chi ío cuéhé ñáyiú ndècu núú ndécú-gă. <sup>20</sup> Te ì<sup>n</sup> ñáyiú xĩndecu-á<sup>n</sup> ñí dáyàha-yu tnúhu núú-gă, te xăhă<sup>n</sup>-yu:

—Ní quexìo náná-n ndihí cue ñaní-n xĩnutnĩ-yu quehé, te cuíní-yu cáhá<sup>n</sup> ndihí ñàhá-yu xii-n —càchí-yu xăhă<sup>n</sup>-yu xii-gă.

<sup>21</sup> Te ní xáha<sup>n</sup>-gă:

—Nchaa ñáyiú sàcúndedóho tnúhu Yá Ndióxi te quidé-yu nchaa nàcuáa càhá<sup>n</sup> tnúhu-gă, ñáyiú-á<sup>n</sup> cúú-yu dàtná náná-í ndihí dàtná cue ñaní-í —càchí-gă xáha<sup>n</sup>-gă xii ñáyiú ní dáyàha tnúhu núú-gă-á<sup>n</sup>.

*Jèsús ngání-gă táchí ndihí ndute  
làgúná*

*(Mt. 8:23-27; Mr. 4:35-41)*

<sup>22</sup> Te ì<sup>n</sup> nduu ní quée Jèsús bàrcú ndihí cue téé xica cuu ndihí-gă, te ní xáha<sup>n</sup>-gă:

—Chí ná quíhí<sup>n</sup>-ó ndàa ìngá xio yuhu làgúná —càchí-gă xáha<sup>n</sup>-gă xii-güedé.

Te cuáhá<sup>n</sup>-güedé ndihí-gă. <sup>23</sup> Te ñini ñuhu bàrcú ichi cuáhá<sup>n</sup>-xi núú ndute ní xídí Jèsús. Te ní ngüíta-xi níhi vìhi quene táchí te ta nàdachitú-xi ndute xití bàrcú-á<sup>n</sup> cuáhá<sup>n</sup>, te sa cuíní-nă-xi quée naa bàrcú-á<sup>n</sup> xití ndute ni cùu. <sup>24</sup> Te ní sáhá<sup>n</sup>-güedé núú cáá Jèsús xídí-gă, te ní xáha<sup>n</sup>-güedé xii-gă:

—ìMèstrú, ndiquíú ìní chi tà quée naa-o cuáhá<sup>n</sup>! —càchí-güedé xáha<sup>n</sup>-güedé xii-gă.

Te Jèsús ní ndiquíú ìní-gă te ní ndacóo-gă te ní tenáá-gă táchí-ă<sup>n</sup> ndihí ndute làgúná-á<sup>n</sup>, te ní ngüíñí-ni táchí-ă<sup>n</sup> te ní nucúndecu nahí-ñá ndute làgúná-á<sup>n</sup>. <sup>25</sup> Te ní xáha<sup>n</sup>-gă xii-güedé:

—ìNáa ñá túú sàndáá ìní ñáhá ndìsa-ndo xii-í ă<sup>n</sup>? —càchí-gă xáha<sup>n</sup>-gă xii-güedé.

Te ní cuñúhu-güedé sá dúcá<sup>n</sup> ñí quide-gă ní xiní-güedé, te ní yùhú-güedé, te ní xitnàha-güedé:

—ìTe ná téé cùu téé-a núú ní cáhá<sup>n</sup>-ni-dé te ní ngüíñí táchí te ní nucúndecu nahí-ni ndute làgúná-a-í? —càchí-güedé xitnàha-güedé.

*Tée yìhi ñaha cue espíritú cúndihí  
yucu ñávàha*

*(Mt. 8:28-34; Mr. 5:1-20)*

<sup>26</sup> Te ní sáá-gă ndihí-güedé yucu cue téé ñuú Gàdará, te yìhi ndáá-ni ndàa ìngá xio làgúná-á<sup>n</sup> cáá dístítú Galiléa. <sup>27</sup> Te òré ní quene Jèsús xití bàrcú te ní dáyátní ñàha ì<sup>n</sup> téé ñuú-á<sup>n</sup> xii-gă, te yìhi ñaha titní espíritú cúndihí yucu ñávàha xii-dé. Te ní cunaha ñà túú-gă sácúñhu-dé dóó-dě, te ni ñà túú-gă sácúndecu-dé vehe-dé, chi da nchaa núú yíndüxi ndíyí quide vehe-dé. <sup>28</sup> Te òré ní xiní-dé Jèsús te ní ngüíñí xití-dě núú-gă, te cue espíritú yìhí ñàha xii-dé-á<sup>n</sup> ñí quide-xi níhi ní cáhá<sup>n</sup>-dé, te xáha<sup>n</sup>-dě xii-gă:

—ìNá cuèndá véxi-ò Jèsús Déhe Dútú Ndióxi sàdí-n ichi-í-í? Te càhá<sup>n</sup> ndáhú-í núú-n sá và dándòho ñaha-n xii-í —càchí-dé xáha<sup>n</sup>-dě xii-gă.

<sup>29</sup> Te duca<sup>n</sup> ñí cáhá<sup>n</sup>-dé cuèndá sá Jèsús ní xáha<sup>n</sup>-gă xii nchaa espíritú cúndihí yucu ñávàha yìhi ñaha sá ná quée ñaha-xi xii-dé. Te nchaa xíá<sup>n</sup> ní xóo dacàhá<sup>n</sup>-xi ìní-dé nándi sá ñí xóo cada-dé nùu ní xóo dacùtu ñaha-güedé cadèná xii-dé cuèndá sá ñà túú-gă ná cada-dé, te ní xóo cundeé ñáhá-güedé, dico cuèi duca<sup>n</sup> dico ní xóo dandàva-ni-dé cadèná, te cue espíritú cúndihí yucu ñávàha-á<sup>n</sup> ñí xóo dacùnu ñaha-xi xii-dé ní xóo quíhí<sup>n</sup>-dé xití yucu. <sup>30</sup> Te Jèsús ní xicá<sup>n</sup> tnúhú-gă núú-dě, te xáha<sup>n</sup>-gă:

—ìNása nàni-n-í? —cachí-gă xáha<sup>n</sup>-gă.

Te ní xáha<sup>n</sup>-dě:

—Vài Sandadú nánì-í —càchí-dé xáha<sup>n</sup>-dě xii-gă.

Te duca<sup>n</sup> ñí xáha<sup>n</sup>-dě xii-gă cuèndá sá ìo cuéhé espíritú cúndihí yucu ñávàha yìhi ñaha xii-dé. <sup>31</sup> Te nchaa

espíritú-á<sup>n</sup> ní cáhá<sup>n</sup> ndàhú-xi núú Jèsús sá vǎ téndàha ñaha-gá xii-xi quíhí<sup>n</sup>-xi núú ùhú núú ndàhú. <sup>32</sup> Te ðiu-ni yatni yucu núú ndécú Jèsús-á<sup>n</sup> yíhí vǎi cuchí xǐxexi-güedi, te nchaa espíritú-á<sup>n</sup> ní cáhá<sup>n</sup> ndàhú-xi núú-gǎ sá ná dàña-gá quíhu-xi yǐqui cùñú nchaa cùchí-á<sup>n</sup>, te Jèsús ní xáha<sup>n</sup>-gǎ sá cúú quíhu-xi yǐqui cùñú-güedi. <sup>33</sup> Te ní quee ñaha nchàa espíritú-á<sup>n</sup> xii tée-á<sup>n</sup>, te ní quíhu-xi nchaa cùchí-á<sup>n</sup>, te cùchí-á<sup>n</sup> ní xinu-güedi duha ní quee-güedi ndàa núú dèhvǎ yuhu làgúná-á<sup>n</sup>, te ní ngaunihnu-güedi xití ndute te ní ndihi-güedi ní cáhá.

<sup>34</sup> Te òré ní xiní cue tée xitò cuchí-á<sup>n</sup> nàcuáa ní cuu te ní yùhú-güedé ní xinu-güedé, te ní sáhá<sup>n</sup>-güedé ní cani-güedé cuèndú núú cuè ñáyi ndècu xití ñuú, ndihi núú cuè ñáyi ndècu xití yucu. <sup>35</sup> Te nchaa ñáyi ní níhí tñùhu ní queé-yu cuáhá<sup>n</sup> ndéhe-yu nàcuáa ní cuu. Te òré ní quexió-yu núú ndécú Jèsús, te ní xiní-yu tée ní xíhi ñaha cuè espíritú cùndihi yucu ñávǎha-á<sup>n</sup> núcòo-dé núú sàhá Jèsús, te ñhnu-ná-dé dóo-dě, te núcòo-dé dàtná ì<sup>n</sup> ñáyi váha, te ní yùhú-yu òré ní xiní ñáhǎ-yu xii-dé. <sup>36</sup> Te nchaa ñáyi ní xiní nàcuáa ní cuu ní ndúha tée yíhi ñaha cue espíritú cùndihi yucu ñávǎha-á<sup>n</sup> ní cùu ní caní-yu cuèndú núú nchàa ñáyi ní quexió-á<sup>n</sup> nàcuáa ní cuu ní ndúha tée-á<sup>n</sup> ndihi nàcuáa ní cuu cuèndá nchaa cùchí-á<sup>n</sup>. <sup>37</sup> Te sá dúcá<sup>n</sup> ní níhí-yu tñùhu nàcuáa ní cuu, núu nchaa ñáyi ñuú Gàdará ío ní yùhú-yu te ní ngúíta-yu càhá<sup>n</sup> ndàhú-yu núú Jèsús sá ná nùhú-gá nùu ndéé ichi véxi-gá. Te sá dúcá<sup>n</sup> ní cáhá<sup>n</sup>-yu núu cuáhá<sup>n</sup>-gá núú ndécú bàrcú. Te òré ndéé-gá bàrcú-á<sup>n</sup> nùhú-gá <sup>38</sup> ní ngúíta tée ní xíhi ñaha cuè espíritú cùndihi yucu ñávǎha càhá<sup>n</sup> ndàhú-dé núú-gǎ nùu vá cùndèe iní-gá quíhí<sup>n</sup> ndihi ñaha-gǎ xii-dé, dico Jèsús ní quide ndee iní ñáhǎ-ni-gǎ xii-dé, te ní xáha<sup>n</sup>-gǎ:

<sup>39</sup> —Cuanùhú vehe-n, te cani-n

cuèndú núú nchàa ñáyi sá ío càhnu cuu nchaa sá vǎha ní quide ñaha Yǎ Ndiòxí xii-n —càchí-gá xáha<sup>n</sup>-gǎ xii-dé.

Te tée-á<sup>n</sup> ní xica-dé cuánuhú-dé te ní ngúíta-dé ní cani-dé cuèndú núú nchàa ñáyi xǐndecu ñhí ñuú sá ío càhnu cuu nchaa sá vǎha ní quide ñaha Jèsús xii-dé.

*Cuèndá déhe yoco tǎ Jàirú, ndihi cuèndá ì<sup>n</sup> ñadìhí ní tnándeé dóó Jèsús*

*(Mt. 9:18-26; Mr. 5:21-43)*

<sup>40</sup> Te òré ní ndexìo Jèsús ndàa ingá xio yuhu làgúná, te ñáyi xǐndecu xíá<sup>n</sup> sa ndètu cahnu ñaha-ná-yu, te ío váha ní cáhá<sup>n</sup> ndihi ñáhǎ-yu xii-gá òré ní nasáá-gá. <sup>41</sup> Te ì<sup>n</sup> tée tàxi tñuní veñùhu ní quexió-dé núú ndécú Jèsús, te tée-á<sup>n</sup> nání-dě Jàirú, te ní ngúíhí xití-dě núú-gǎ càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n nùu vá cùndèe iní-n quíhí<sup>n</sup>-ó vèhe-í cada tátna-n déhe yoco-í —càchí-dé xáha<sup>n</sup>-dě xii-gá.

<sup>42</sup> Te duca<sup>n</sup> ní xáha<sup>n</sup>-dě chi ndècu ì<sup>n</sup> dii-ni déhe yoco-dě, te ndècu-xi datná úxúú cuíá-xi, te càhú víhí tñáhǎ-xi cùhú-xi te cuíní-xi cuú-xi. Te Jèsús ní xica-gá cuáhá<sup>n</sup>-gá ndihi tée-á<sup>n</sup>, te ío vǎi ñáyi nchìcú<sup>n</sup> ñáhǎ xii-gá cuáhá<sup>n</sup>, te dàdehnde ñaha-ná-yu xii-gá ní cùu.

<sup>43</sup> Te tnuú nchaa ñáyi-á<sup>n</sup> ñútnàhá ì<sup>n</sup> ñaha cùhú, te ñaha-á<sup>n</sup> sà ní cuu úxúú cuíá sǎ cùhú-a<sup>n</sup> ngòyo ñaha níhí xii-a<sup>n</sup>, te ío cuéhé dǐhú<sup>n</sup> ní cuu dàndonuhu-a<sup>n</sup> chi ní nadico-a<sup>n</sup> nchàa sá ndécú ndihi-a<sup>n</sup> cuèndá ní níhí-a<sup>n</sup> dǐhú<sup>n</sup> ní quehe<sup>n</sup> nchaa ñáyi ní quide tátna ñaha xii-a<sup>n</sup>, dico ní ì<sup>n</sup>-yu ñá túú ní ndàcú-yu ndúha-a<sup>n</sup>. <sup>44</sup> Te ní sáhá<sup>n</sup> ndehe yatni-a<sup>n</sup> ndàa sátá Jèsús, te ní tnándeé-a<sup>n</sup> luha yuhu dóo-gǎ te òré-ni-á<sup>n</sup> ní ndúha-a<sup>n</sup>.

<sup>45</sup> Te Jèsús ní xicá<sup>n</sup> tñuhú-gǎ núu-yu, te xáha<sup>n</sup>-gǎ:

—¿Ndédacàa-ndo ní tnándeé ñáhǎ xii-í? —càchí-gá xáha<sup>n</sup>-gǎ xii-yu.

Te ncháa-yu ní xáhǎ<sup>n</sup>-yu sá ní ì<sup>n</sup>-yu ñá túú ní tnándeé ñáhǎ xii-gá. Te té Pèlú ndihi cue tée cùndihi-dé ní xáha<sup>n</sup>-güedé xii-gá:



—Mèstrú, ndèhe-n sá vái ñáyiú nchícú<sup>n</sup> ñáhá xii-n, te xio xio dàdehnde ñáhá-yu, te xicá<sup>n</sup> tnúhú-gã-n yòo ní tnándeé ñáhá xii-n —cachí-güedé xáha<sup>n</sup>-güedé xii-gá.

<sup>46</sup> Dico Jèsús ní xáha<sup>n</sup>-gã xii-yu:

—Dico ñáyiú ñándeé ñáhá xii-í, chi ní cutnùní iní-í sá ñáyiú cùhú ní tnándeé ñáhá xii-í te ní ndúha-yu —càchí-gá xáha<sup>n</sup>-gã xii-yu.

<sup>47</sup> Te sáta ní xini ñaha-á<sup>n</sup> sã ní cutnùní iní Jèsús sá ní tnándeé ñáhá-á<sup>n</sup> xii-gá, te yùhú yùhú-a<sup>n</sup> ní sáhá-a<sup>n</sup> ní ngüíñí xití-á<sup>n</sup> nùú-gã, te ní náhmá-a<sup>n</sup> nùú-gã, ndihi nùú nchàa ñáyiú ná cuendá duca<sup>n</sup> ní quide-a<sup>n</sup> ní tnándeé-a<sup>n</sup>-gá, ndihi cuendá sá òré-ni-á<sup>n</sup> ní ndúha-a<sup>n</sup>. <sup>48</sup> Te Jèsús ní xáha<sup>n</sup>-gã xii-a<sup>n</sup>:

—Yòhó ñaha cùhú, ní sándáá iní ñáhá-n xii-í nùú ní ndúha-n, te cuanùhú vitna te ñá túú-gã ná cani iní-n —càchí-gá xáha<sup>n</sup>-gã xii-a<sup>n</sup>.

<sup>49</sup> Te càhá<sup>n</sup> dúcá<sup>n</sup>-ní Jèsús ní sáá ñáyiú tée xinu cuechi vehe té Jàirú tée tàxi tnuní veñúhu, te xáha<sup>n</sup> tée xinu cuechi-á<sup>n</sup> xii-dé:

—Sa ní xihí déhe-n, vá chíchiu<sup>n</sup>-gá-n Mèstrú —càchí-dé xáha<sup>n</sup>-dè.

<sup>50</sup> Te sá dúcá<sup>n</sup> xáha<sup>n</sup> tée xinu cuechi-á<sup>n</sup> xii té Jàirú ní tecú dóho Jèsús, nùú ní xáha<sup>n</sup>-gã xii-dé:

—Vá ndihú iní-n, quindáá iní ñáhá-ni-n xii-í te ndúha déhe-n —càchí-gá xáha<sup>n</sup>-gã xii-dé.

<sup>51</sup> Te òré ní sáa-gá vehe té Jàirú te ñá ní dàña-gá quíhu ñáyiú cùtexínu, nùú té Pèlú-ni ndihi té Jàcobó-ni, ndihi té Juáa-ni, ndihi tãtã ndihi nãná-ni xíchí ní xihí-á<sup>n</sup> cuãnguìhu ndihi-gá xití vehe. <sup>52</sup> Te nchaa ñáyiú sa xindecu vehe-dé-á<sup>n</sup> xindáhyú-yu sá ndihú iní-yu cuendá sá ní xihí-xi. Te Jèsús ní xáha<sup>n</sup>-gã xii-yu:

—Vá ndáhyú-ndó, chi dícó-ni xidí-xi ñá túú ní xihí-xi —càchí-gá xáha<sup>n</sup>-gã xii-yu.

<sup>53</sup> Te ní sácú ndeé ñáhã-yu xii-gá, chi sá cúú-xí mèé-yu chi ní xihí ndisa xíchí-ã<sup>n</sup>. <sup>54</sup> Te Jèsús ní tñi-gá ndaha xíchí ní xihí-á<sup>n</sup>, te níhi ní càhá<sup>n</sup>-gá, te xáha<sup>n</sup>-gã:

—Xíchí cuéchí, ndacóo —càchí-gá xáha<sup>n</sup>-gã.

<sup>55</sup> Te xíchí-ã<sup>n</sup> ní ndoto-xi, te òré-ni ní ndacóo-xi, te Jèsús ní xáha<sup>n</sup>-gã sá ná cuãñáhã-yu sá cáxi-xí. <sup>56</sup> Te tãtã-xi ndihi nãná-xi súúni ní cuñúhu-yu sá dúcá<sup>n</sup> ní dándótó ñaha Jesús xii-xi, te ní xáha<sup>n</sup>-gã xii-yu sá vã yòo ñáyiú cuñáhã-yu sá dúcá<sup>n</sup> ní quide-gã.

## 9

*Jèsús téndàha-gá ndi ùxúú cue tée xica cuu ndihi-gá quíhí<sup>n</sup>-güedé càhá<sup>n</sup>-güedé tnúhu-gá*

(Mt. 10:5-15; Mr. 6:7-13)

<sup>1</sup> Te Jèsús ní cana-gá ndi ùxúú cue tée xica cuu ndihi-gá, te ní sãñaha-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cündihi yucu ñávãha yìhi ñaha xii ñáyiú, ndihi cuendá sá cáda tãtã-güedé nchaa ñáyiú cùhú. <sup>2</sup> Te ní xáha<sup>n</sup>-gã xii-güedé sá quíhí<sup>n</sup>-güedé danèhé-güedé ñáyiú nàcuáa cada Yá Ndiõxí ndihu ndaha ñaha-gá xii-yu, te duca<sup>n</sup> càda tãtã-güedé cue ñáyiú cùhú. <sup>3</sup> Te cùmání-gã caca-güedé quíhí<sup>n</sup>-güedé, te ní xáha<sup>n</sup>-gã xii-güedé:

—Ñá túú tnàhí ná canehe-ndo cùu ichi-ndo, ni tãtã, ni ñunu, ni sã cáxi-ndó, ni dñhú<sup>n</sup>. Te ni vã cànehe-ndo ingá ichi dóo-ndó, chi ñáyiú ní dóo níhñú-ndó-ã<sup>n</sup> xíã<sup>n</sup> tnàhí-ni. <sup>4</sup> Te ndédani càa vehe na saá-ndó, te xíã<sup>n</sup> cundecu-ndo ndeé ná sáa nduu ndeé-ndo. <sup>5</sup> Te nùú ñá túú cuini-yu quehe<sup>n</sup> cuendá ñáhã-yu xii-ndo, te ndee-ndo ñúú-á<sup>n</sup>, te naquidi-ndo ticá chúhmá ní tñi sáhá-ndó cuendá sá ná cutnuni iní-yu sá ñá túú quide váha-yu —càchí-gá xáha<sup>n</sup>-gã xii-güedé.

<sup>6</sup> Te sáta dúcá<sup>n</sup> ní xáha<sup>n</sup> Jèsús xii-güedé, te ní quee-güedé cuáhã<sup>n</sup>-güedé nchaa ñuú dácuãha-güedé ñáyiú tnúhu Yá Ndiõxí, tnúhu sá càhá<sup>n</sup> nàcuáa naníhí tãhú-yu, te duca<sup>n</sup> ta quide tãtã-güedé nchaa ñáyiú cùhú cuáhã<sup>n</sup>.

*Nàcuáa ní cuu ní xihí té Juáa tée dàcuandute ñaha xii ñáyiú*

(Mt. 14:1-12; Mr. 6:14-29)

7 Te té Hèrodés téé cùu gobiernú ní níhí-dě tnúhu nchaa nàcuáa quide Jesús, te quíyuhú iní-dé te sàni iní-dé yoo cùu-gá. Te duca<sup>n</sup> nǐ sani iní-dé chi dava ñáyiú càchí-yu sá tǐ Juàá téé ní xóo dacuàndute ñaha xii ñáyiú ní ndoto cùu-gá. 8 Te davá-yu càchí-yu sá tǐ Èliás cúu-gǎ, te davá-yu càchí-yu sá ñ<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha vìhi ní ndoto cùu-gá, càchí-yu. 9 Dico té Hèrodés ní cachí-dé:

—Yúhú ní táuchíú<sup>n</sup>-í ní xehndé-güedé díquí tǐ Juàá. ¿Te yoo cùu téé dii cuèndú-xi níhí-a sá sũúni cuèhé nũú sǎ quidé-dě váí<sup>n</sup>? —duha ní cachí-dé.

Te té Hèrodés ndúcú-dě nàcuáa cada-dé cuèndá quini-dé Jèsús.

*Jèsús dácàxi-gá úhú<sup>n</sup> mǐl cue téé te ñáyiú ñáyiú ñáyiú ndíhi landú*

(Mt. 14:13-21; Mr. 6:30-44; Jn. 6:1-14)

10 Te nchaa cue téé ní táuchíú<sup>n</sup> Jèsús cuáhá<sup>n</sup> cáhá<sup>n</sup> tnúhu Yá Ndiöxí núú ñáyiú ní ndexio-güedé núú-gǎ te ní ngüita-güedé nácàni tnúhu-güedé nchaa nàcuáa ní quide-güedé. Te dàtnùni ní xica-gá medì-ni-gá ndécá ñaha-gá xii-güedé cuáhá<sup>n</sup> ñ<sup>n</sup> xichi núú ñà túú ñáyiú ndècu, yatni núú cáá ñúú Bètsaidá. 11 Dico òré ní níhí ñáyiú tnúhu sá cuáhá<sup>n</sup> Jèsús, te nchìcú<sup>n</sup>-yu-gá cuáhá<sup>n</sup>, te òré ní quexió-yu núú-gǎ, te ní quehe<sup>n</sup> cuèndá ñáhá-gǎ xií-yu, te ní dánèhé ñáhá-gǎ xií-yu nàcuáa ndíhu ndaha ñaha Yá Ndiöxí xií-yu, te ní quide tátna-gá nchaa ñáyiú cùhú.

12 Te òré sa ní cuaa te ní natacá ndí ùxúú cue téé xica cuu ndíhi-gá núú-gǎ, te ní xáha<sup>n</sup>-güedé xii-gá:

—Sa ní cuu dandàca-n nchaa ñáyiú-a, chi sa ní cuaa, te na quíhí<sup>n</sup>-yu nchaa vehe càa yatni iha, ndíhi nchaa xití ñúú cáá yatni iha cuaá<sup>n</sup>-yu sá cáxí-yu, te ñu-ni yacá<sup>n</sup> ndetatú-yu, chi núú ndécú-ó ña ñà túú tnàhí ná ío —càchí-güedé xáha<sup>n</sup>-güedé xii-gá.

13 Te Jèsús ní xáha<sup>n</sup>-gǎ xii-güedé:

—Mee-ndo chí cuñaha sǎ ná cáxí-yu —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedé xii-gá:

—Ñá túú nǎgá ndécú ndíhi-ndí, chi úhú<sup>n</sup> duha-ná pàá, ndíhi úú-nǎ chácá ndécú ndíhi-ndí, te ñu-ni núu quíhí<sup>n</sup>-ndí cuaa<sup>n</sup>-ndí sá cáxí-yu —càchí-güedé xáha<sup>n</sup>-güedé xii-gá.

14 Te xínu dàtná úhú<sup>n</sup> mǐl mee-ni cue téé, te ñáyiú ñáyiú ñáyiú ndíhi landú. Te Jèsús ní xáha<sup>n</sup>-gǎ xii cue téé xica cuu ndíhi-gá:

—Chí cuñaha na ngõo ndí údico úxí ndí údico úxí-yu ñ<sup>n</sup> ñ<sup>n</sup> xichi —càchí-gá xáha<sup>n</sup>-gǎ xii-güedé.

15 Te duca<sup>n</sup> nǐ quide-güedé, te ní ngóo-yu nchaa-yu. 16 Te dàtnùni ní quehe<sup>n</sup>-gá ndí ùhú<sup>n</sup> pàá-án, ndíhi ndí ndúú chácá-ǎ<sup>n</sup>. Te ní ndacoto-gá andíu, te ní ndacá<sup>n</sup> táhú-gǎ núú Yá Ndiöxí, te dàtnùni ní táhú cuèchi-gá pàá-án ndíhi chácá-ǎ<sup>n</sup>, te ní sáha-gá nchaa cue téé xica cuu ndíhi-gá ní dácãhñu ñaha-güedé xií-yu. 17 Te nchaa-yu ní xexí-yu ní ndahá xití-yu. Te sátá nǐ túhú cóhõ-yu te ní nadatacá-güedé nchaa sá nǐ quendóo, te ní chítú ùxúú tnàhí tídihi mee-ni sǎ nǐ quendóo.

*Té Pèlú xáha<sup>n</sup>-dě xii Jèsús sá ñáyiú-gǎ cúu-gǎ Crístú*

(Mt. 16:13-19; Mr. 8:27-29)

18 Te ñ<sup>n</sup> nduu ndècu mee Jesús ndíhi cue téé xica cuu ndíhi-gá, te càhá<sup>n</sup> ndíhi-gá Yá Ndiöxí, te sátá nǐ yáha ní cáhá<sup>n</sup> ndíhi-gá Yá Ndiöxí, te ní xicá<sup>n</sup> tnúhú-gǎ núú-güedé, te xáha<sup>n</sup>-gǎ xii-güedé:

—¿Yoo cùu yúhú càchí ñáyiú-va? —càchí-gá xáha<sup>n</sup>-gǎ xii-güedé.

19 Te ní xáha<sup>n</sup>-güedé xii-gá:

—Davá-yu càchí-yu sá cúu-n ndíi Juàá téé ní xóo dacuàndute ñaha xii ñáyiú, te davá-yu càchí-yu sá cúu-n tǐ Èliás, te davá-yu càchí-yu sá ñ<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha nǐ ndoto cùu-n, duha càchí-yu —càchí-güedé xáha<sup>n</sup>-güedé xii-gá.

20 Te ní xicá<sup>n</sup> tnúhú tùcu-gá núú-güedé, te xáha<sup>n</sup>-gǎ xii-güedé:

—Te nchòhó, ¿yoo sàni iní-ndó cùu-í-í? —càchí-gá xáha<sup>n</sup>-gǎ xii-güedé.

Te té Pèlú ní xáha<sup>n</sup>-dě xii-gá:

—Yòhó cúú-n Crístú Déhe Dútú Ndiòxí —càchí-dé xáha<sup>n</sup>-dë xii-gá.

*Jèsús càhá<sup>n</sup>-gá sá cáhni ñàha-güedé xii-gá*

(Mt. 16:20-28; Mr. 8:30-9:1)

<sup>21</sup> Te ní xáha<sup>n</sup>-gá xii-güedé sá vǎ yǎo ñ<sup>n</sup> cúñaha-güedé yoo cùu-gá. <sup>22</sup> Te ní xáha<sup>n</sup>-gá xii-güedé:

—Yúhú Tée cùu ñàni tnàhá-ndó nchàa-ndo ío cuéhé sǎ ndòhò-í, chi daquèe tíhú ñàhá cuè tée cùu sacuéhé nùú ñáyiu isràél, ndihí cue dútú cùnùu, ndihí cue tée dàcuaha ñaha xii ñáyiu nchaa tnúhu ní chidó tnùní ndíi Moisés, te sáá nduu te cahni ñaha-güedé xii-í, dico nduu úní sá cùú-í te ndoto-í —càchí-gá xáha<sup>n</sup>-gá xii-güedé.

<sup>23</sup> Te dàtnùní ní xáha<sup>n</sup>-gá xii nchaa ñáyiu:

—Nchaa ñáyiu cuení chitnahá ñáhá xii-í, te xini ñuhu-xi vǎ cáda-gǎ-yu sá sání ìní mée-yu, te ñ<sup>n</sup> nduu ñ<sup>n</sup> nduu cada ndee ìní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. <sup>24</sup> Te nchaa ñáyiu cuení sá ñà túú tnàhí ná yáha cundecu ñuyúú-a cuíta nihnú-yu. Dico nchaa ñáyiu ñà túú yùhú cuèi nándi sá ná yáha-yu cundecú-yu ñuyúú-a sá cuendá-í, te ñáyiu-á<sup>n</sup> naníhí tǎhú-yu.

<sup>25</sup> Te cuèi nchaandi túhú sá ío ñuyúú-a na nihí ñáyiu cundecu ndihí-yu, dico núu ñu nchaa xiǎ<sup>n</sup> ná càda cuíta nihnú-yu te ñà túú vèdana nàndihí-xi sá dúcá<sup>n</sup> ndècu ndihí-yu nchaa xiǎ<sup>n</sup>.

<sup>26</sup> Te nchaa ñáyiu na cùcaha<sup>n</sup> núú-xi cáhá<sup>n</sup> váha cuendá-í ndihí cuendá nchaa tnúhu-í, te tnàhá yùhú Tée cùu ñàni tnàhá-ndó nchàa-ndo cucaha<sup>n</sup> núú-í núú-yu òré quixi tucu-í ndihí cue espíritú xínú cuèchi núú Tǎtà-í Dútú Ndiòxí, te mee-gǎ cada cutnùní ìní nchaa ñáyiu sá ío càhnu cuu-í. <sup>27</sup> Te na càchí tnúhu ndáá-í xii-ndo sǎ ío ñà nchòhó ñáyiu ndècu iha vitna vǎ cùú-ni-ndo, chi cundecu-ni-ndo ndéé quini-ndó sáá nduu ndíhu ndaha ñàha Yá Ndiòxí xii ñáyiu —càchí-gá xáha<sup>n</sup>-gá xií-yu.

*Ní nadáma dóó Jèsús ndihí núú-gǎ (Mt. 17:1-8; Mr. 9:2-8)*

<sup>28</sup> Te ní cuu dàtná úná nduu sá dúcá<sup>n</sup> ñí cáhá<sup>n</sup> Jèsús, te cuásaá-gǎ ñ<sup>n</sup> yucu cáhá<sup>n</sup> ndihí-gá Yǎ Ndiòxí, te ndèca-gá té Pèlú, ndihí té Jàcobó, ndihí té Juáá cuásaá. <sup>29</sup> Te ñini càhá<sup>n</sup> ndihí-gá Yǎ Ndiòxí ní nadáma núú-gǎ ndihí dóó-gǎ, te dóó-gǎ-á<sup>n</sup> sùúní ñí nduu cuixí<sup>n</sup> víhí, te sùúní dàtása<sup>n</sup>-xi. <sup>30</sup> Te òré-ni-á<sup>n</sup> ñí xiní-güedé úú tnàhá cue tée càhá<sup>n</sup> ndihí-gá, te ñ<sup>n</sup>-dé cúú-dé té Moisés, te ñngá-dé cúú-dé té Èliás, <sup>31</sup> te sùúní dàtása<sup>n</sup>-xi ñí càndéé núú ndécú cuè tée úú-á<sup>n</sup> ndihí-gá, te xíndatnúhu-güedé nàcuáa ndoho Jèsús cuú-gá ñuú Jerusalén dàtná ní cachí mée-gǎ. <sup>32</sup> Te té Pèlú ndihí úú-gá-güedé cuení víhí-güedé cúdú-güedé, dico ní sahani ìní-güedé ñà túú ní xídí-güedé, te ní dánèhé núú ñáhá-xi xii-güedé sá sùúní vǎha càa núú ndécú Jèsús, ndihí úú cue tée càhá<sup>n</sup> ndihí-gá-á<sup>n</sup>. <sup>33</sup> Te òré sa ndùcu ndee cue tée úú-á<sup>n</sup> caca-güedé núhú-güedé, te ní xáha<sup>n</sup> tǎ Pèlú xii-gá:

—Mèstrú, ñvǎha ní cuu sá ndécú-ó iha vitna! Te na dàcaa-ndí úní tnàhá vehe tnuvixi<sup>n</sup>, ñ<sup>n</sup> cuu cuendá-n, te ñ<sup>n</sup> cuu cuendá té Moisés, te ñ<sup>n</sup> cuu cuendá té Èliás —càchí-dé xáha<sup>n</sup>-dë xii-gá.

Dico té Pèlú chi ñí mée-dé ñà túú ní cùtnuní ìní-dé nása ndùu tnúhu ní cáhá<sup>n</sup>-dé. <sup>34</sup> Te ñini càhá<sup>n</sup>-dé ní quexio ñ<sup>n</sup> vícò núú ndécú-güedé-á<sup>n</sup> ñí dàdáhu ñaha-xi xii-güedé, te ní yùhú-güedé sá dúcá<sup>n</sup> ñí quexio vícò-á<sup>n</sup> ñí dàdáhu ñaha-xi. <sup>35</sup> Te xití vícò-á<sup>n</sup> ñí tecú ní cáhá<sup>n</sup> Yǎ Ndiòxí, te xáha<sup>n</sup>-gǎ xii-güedé:

—Tée-a cùu-dé Déhe-í, tée ío cùu ìní-í, te tní-ndo nchàa tnúhu càhá<sup>n</sup>-dé —duha ní xáha<sup>n</sup>-gǎ xii-güedé.

<sup>36</sup> Te sáta dúcá<sup>n</sup> ñí cáhá<sup>n</sup> Yǎ Ndiòxí, te ní quide cuendá-güedé sá mèdii-ná Jèsús ndécú-gǎ xiá<sup>n</sup>. Te vǎ yǎo ñ<sup>n</sup> ñí xáha<sup>n</sup>-güedé nàcuáa ndùu nchaa sá ñí xiní-güedé-á<sup>n</sup>.

*Jèsús quidé tǎtna-gǎ ñ<sup>n</sup> tée cuechi yíhi ñàha espíritú cùndihí yucu ñávǎha (Mt. 17:14-21; Mr. 9:14-29)*

<sup>37</sup> Te ñngá nduu-á<sup>n</sup> cuǎnuu-gǎ yucu-á<sup>n</sup> ndihí-güedé, te ío cuéhé ñáyiu

cuáhá<sup>n</sup> tnahá ñáhá xii-gá. <sup>38</sup> Te ñ<sup>n</sup> tée ñuhu tnahá tnuú-yu-á<sup>n</sup> ñí cáhá<sup>n</sup> níhi-dé, te xáha<sup>n</sup>-dë xii-gá:

—Mèstrú, ío càhá<sup>n</sup> ndàhú-í núú-n ñuu vá cùndèe iní-n càda tátna-n dèhe-í, chí ñ<sup>n</sup>dìi duha-dé ndécú, <sup>39</sup> te yìhi ñaha espíritú cùndìhi yucu ñávãha xii-dé, te òré ná nàtni ñaha-xi xii-dé, te dàcana saa ñaha-xi, te ndàda ruú<sup>n</sup> ñáhá-xí xii-dé, te tàva-xi tíñú yuhu-dé. Te ío dándoho ñaha-xi xii-dé, chí ndéé núú ñà cúú-gã, te dàña ñaha tnaa-xi xii-dé. <sup>40</sup> Te sa ní cáhá<sup>n</sup> ndàhú-í núú cuè tée xica cuu ndìhi-n queñuhu-güedé-xi, dico ñá túú ní ndàcu-güedé —càchí-dé xáha<sup>n</sup>-dë xii-gá.

<sup>41</sup> Te Jèsús ní xáha<sup>n</sup>-gã xii nchaa ñáyiu:

—¡Nchaa nchòhó ñáyiu ndècu ñuyíú-a ío sàá iní-ndó, chí ñá túú cuíní-ndó quíndáá iní-ndó Yã Ndiöxí! Te ní cuu vai nduu quide ndee iní-í nchaa sá quidé-ndó, ¿te ná ndéé ama vá dúcá<sup>n</sup>-gã cada-ndo-i? —càchí-gá xáha<sup>n</sup>-gã xii-yu.

Te ní xáha<sup>n</sup>-gã xii tée cùhú déhe-xi-á<sup>n</sup>:

—Taxi déhe-n ìha —càchí-gá xáha<sup>n</sup>-gã xii-dé.

<sup>42</sup> Te òré cuáhá<sup>n</sup> tée cuechi-ã<sup>n</sup> núú-gã, te espíritú cùndìhi yucu ñávãha-á<sup>n</sup> ñí dándüá ñáhá-xí xii-dé, te sàhni yìhí ñáhá tùcu-xi xii-dé ní cùu, dico Jèsús níhi ní cáhá<sup>n</sup>-gá ní tenáá-gá espíritú-á<sup>n</sup>, te ní quee ñaha-xi xii-dé, te ní nacuéha cuèndá ñáhá-gã xii-dé tátá-dë. <sup>43</sup> Te ncháá-yu ní cuñúhu-yu sá dúcá<sup>n</sup> ñí cuu, te ní cachí-yu sá ño càhnu cuu Yá Ndiöxí.

*Jèsús càhá<sup>n</sup> tucu-gá sá cùú-gá*  
(Mt. 17:22-23; Mr. 9:30-32)

Te ñini xicuñúhu-yu nàcuáa ní quide Jèsús, te ní xáha<sup>n</sup>-gã xii cue tée xica cuu ndìhi-gá:

<sup>44</sup> —Nchòhó cundedóho váha-ndo tñuhu na càhá<sup>n</sup>-í-a, te vá ná cuànaa-ndo, chí yúhú Tée cùu ñani tñáhá-ndó ncháa-ndo sáá ñ<sup>n</sup> nduu te cuáha cuèndá ñáhá-güedé xii-í núú cuè tée cùu úhú iní ñáhá —càchí-gá xáha<sup>n</sup>-gã xii-güedé.

<sup>45</sup> Dico cue tée-á<sup>n</sup> ñà túú ní tècú tnùnì-güedé nàcuáa nduu tñuhu ní xáha<sup>n</sup>-gã xii-güedé, te duca<sup>n</sup> ñí yáha-güedé, chí duca<sup>n</sup> tñahí ní cachí-gá sá vá tècú tnùnì-güedé, te ní yúhú-güedé caca<sup>n</sup> tñuhú-güedé núú-gã nása nduu tñuhu ní xáha<sup>n</sup>-gã xii-güedé.

*Cue tée ndècu tñuhu núú tñáhá ñuu ndédacàa-güedé ío-gá cùnùu*  
(Mt. 18:1-5; Mr. 9:33-37)

<sup>46</sup> Te cue tée xica cuu ndìhi-gá ní ngúita-güedé ndátnñuhu-güedé ñuu ndédacàa-güedé ío-gá cùnùu, <sup>47</sup> dico Jèsús ní cutnùnì iní-gá nàcuáa sàni iní-güedé ñuu ní cana-gá ñ<sup>n</sup> té lìhli, te ní sanu tñi ñaha-gã ñ<sup>n</sup> xio dñi-gá. <sup>48</sup> Te ní xáha<sup>n</sup>-gã xii-güedé:

—Nchaa ñáyiu na quèhe<sup>n</sup> cuendá ñ<sup>n</sup> té lìhli dàtná té lìhli-a cuèndá sá ñuhú ñni ñáhá-yu xii-í ñá, te cada iní-yu sá yúhú ní quehe<sup>n</sup> cuèndá-yu, te nchaa ñáyiu na quèhe<sup>n</sup> cuendá ñáhá xii yúhú, te cada iní-yu sá tñáhá Tàtà-í Dútú Ndiöxí Yáa ní tendaha ñaha xii-í véxi-í ñuyíú-a ní quehe<sup>n</sup> cuèndá-yu. Te nchaa ñáyiu ío ndàhú iní-xi mee-ni xinu cuechí-yu, ñáyiu-á<sup>n</sup> ío-gá cùnùú-yu —càchí-gá xáha<sup>n</sup>-gã xii-güedé.

*Ñáyiu ñá túú cùu úhú iní ñáhá cùndìhi ñáhá-yu xii-o*  
(Mr. 9:38-40)

<sup>49</sup> Te té Juáa ñu-ni ñ<sup>n</sup> tée xica cuu ndìhi-gá ní xáha<sup>n</sup>-dë xii-gá:

—Mèstrú, ní xiní-ndí ñ<sup>n</sup> tée càcunehe ñaha-dé xii-n, te ndèñuhu-dé espíritú cùndìhi yucu ñávãha yìhi ñaha xii ñáyiu, te nchúhú ñá túú ní dàña-gá-ndí duca<sup>n</sup> càda-dé, chí ñá túú xica cuu ndìhi ñaha-dé xii-o —càchí-dé xáha<sup>n</sup>-dë xii-gá.

<sup>50</sup> Te Jèsús ní xáha<sup>n</sup>-gã xii-dé:

—Daña-ndo na càda nahi-dé ní cùu, chí ñáyiu ñá túú cùu úhú iní ñáhá xii-o te cùndìhi ñáhá-yu —càchí-gá xáha<sup>n</sup>-gã xii-dé.

*Jèsús càhá<sup>n</sup>-gá dóho té Jàcobó ndìhi té Juáa*

<sup>51</sup> Te òré sa ta cùyatni ndaa Jèsús andi, te ní xica-gá cuáhá<sup>n</sup>-gá



ñuú Jerusálén, chi duu<sup>n</sup> duu<sup>n</sup> ní sani iní-gá sá quíhí<sup>n</sup>-gá. <sup>52</sup> Te ní tendaha-gã cue téé yòdo nuu cuáhá<sup>n</sup>, te ní quexio-güedé ì<sup>n</sup> ñuú, te ñuú-á<sup>n</sup> yíndèhu-xi distritú Sàmariá, te ndùcu-güedé ì<sup>n</sup> vehe cada túha-güedé òré quexio-gá. <sup>53</sup> Dico ñáyiú Sàmariá ñá túú ní cuíní-yu cuáñaha nùú-yu vehe, chi cuèndá sá ñí cutnùní iní-yu sá ìchi yáha-ni-gá quíhí<sup>n</sup>-gá ñuú Jerusálén. <sup>54</sup> Te sá dúcá<sup>n</sup> ñí quidé-yu ñá túú ní cuíní-yu cuáñaha nùú-yu vehe ndetatú-gá, núu ní xáha<sup>n</sup> tẽ Jàcobó ndíhi té Juàá cue téé xica cuu ndíhi-gá xii-dé:

—Mèstrú, ¿cuíní-n càcá<sup>n</sup> táhú-ó nùú Yã Ndiõxí cuèndá dangáva-gá ñuhú danàa-gá ñáyiú ñuú-a dàtná ní quide té Èliás téé ní xóo cáhá<sup>n</sup> tnúhu Yá Ndiõxí ndéé sanaha-ã<sup>n</sup>? — càchí-güedé xáha<sup>n</sup>-güedé xii-gá.

<sup>55</sup> Te Jèsús ní nchócótó-gã núu-güedé, te níhi ní cáhá<sup>n</sup>-gá dóho-güedé, te xáha<sup>n</sup>-gã:

—Nchòhó, chi ñá túú vãha iní-ndó te núu duca<sup>n</sup> càhá<sup>n</sup>-ndó. <sup>56</sup> Chi yúhú Téé cùu ñaní tnáhá-ndó nchàa-ndo véxi-í sá dácãcu nihnu-í ñáyiú, te ñá díú vèxi-í sá dácuíta nihnu-í-yu — càchí-gá xáha<sup>n</sup>-gã xii-güedé.

Te sátá dúcá<sup>n</sup> ñí xáha<sup>n</sup>-gã, te ní xica-gá cuáhá<sup>n</sup>-gá ndíhi-güedé ingá ñuú.

*Ñáyiú cuíní chitnahá ñáhá xii Jèsús ní cùu*

(Mt. 8:19-22)

<sup>57</sup> Te ñuhu Jèsús ichi ndíhi-güedé, te ì<sup>n</sup> téé ní xáha<sup>n</sup>-dẽ xii-gá:

—Mèstrú, cuíní-í canchicú<sup>n</sup> ñáhà-í xii-n ndèni ní cuu na quíhí<sup>n</sup>-n — càchí-dé xáha<sup>n</sup>-dẽ xii-gá.

<sup>58</sup> Te Jèsús ní xáha<sup>n</sup>-gã xii-dé:

—Nchaa ñúcuí chi ndècu yaú cùú vèhe-güedé saquíhi-güedé, te nchaa quíti ndáva caa tacá-güedé díquí yutnu, dico yúhú Téé cùu ñaní tnáhá-ndó nchàa-ndo chi ñá túú ndéé cáá vèhe-í ñuyíú-a ndetatú-í — càchí-gá xáha<sup>n</sup>-gã xii-dé.

<sup>59</sup> Te dàtnùní ní xáha<sup>n</sup> tucu-gá xii ingá-dé:

—Yòhó taquixi chitnahá ñáhá-n xii-í — càchí-gá xáha<sup>n</sup>-gã xii-dé.

Dico téé-á<sup>n</sup> ñí xáha<sup>n</sup>-dẽ xii-gá:

—Mèstrú, dañá na nùhú-í cundetu-í cuú tãtã-í te chindúxi-í-dé, te dàtnùní quixi-í chitnahá ñáhá dùca<sup>n</sup>-ná-í xii-n — càchí-dé xáha<sup>n</sup>-dẽ xii-gá.

<sup>60</sup> Te Jèsús ní xáha<sup>n</sup>-gã xii-dé:

—Daña ñáyiú ñá túú sándáá iní ñáhá xii-í ná chindúxi tnàha meé-yu, chi ñáyiú-á<sup>n</sup> cúú-yu dàtná ñáyiú ní xíhí cuèi ndècu-ní-yu núú ñuyíú-a. Te yòhó taquixi, chi quíhí<sup>n</sup>-n dànehé-n ñáyiú nàcuáa cada Yá Ndiõxí ndíhu ndaha ñàha-gá xii-yu — càchí-gá xáha<sup>n</sup>-gã xii-dé.

<sup>61</sup> Te ní xáha<sup>n</sup> tucu ingá-dé xii-gá:

—Mèstrú, cuíní-í chitnahá ñáhà-í xii-n, dico díhna-gá dañá na nùhú-í cada ndee iní-í nchaa ñáyiú ndècu vehe-í, te dàtnùní quixi-í — càchí-dé xáha<sup>n</sup>-dẽ xii-gá.

<sup>62</sup> Te Jèsús ní xáha<sup>n</sup>-gã:

—Nchaa ñáyiú ní sándáá iní ñáhá xii-í, te núu vá cãchicú<sup>n</sup> nihnu ñáhá-yu ñí yùhu ñí iní-yu, te cùú-yu dàtná ì<sup>n</sup> téé ní tní ndaha làtú cutu-dé, chi téé-á<sup>n</sup> nùu na ndàcoto-dé ndàa sátá-dẽ òré xítú-dẽ, te vá quíhí<sup>n</sup> ndáa làtú-dé duca<sup>n</sup> sãtnahá-xi cùú-yu. Te cue ñáyiú chi vá cúú ndáa-yu nàcuáa ndíhu ndaha-gá dava-gá ñáyiú — càchí-gá xáha<sup>n</sup>-gã xii-dé.

## 10

*Jèsús téndaha-gá únídico úxí cue téé quíhí<sup>n</sup> cáhá<sup>n</sup> tnúhu-gá núú ñáyiú*

<sup>1</sup> Te sátá dúcá<sup>n</sup> ñí cuu, te ní cáxi tucu Xítohó Jesucristú únídico úxí cue téé codonùu-güedé quíhí<sup>n</sup>-güedé cáhá<sup>n</sup>-güedé tnúhu-gá nchaa ñuú, ndíhi nchaa dava-gá xichi núú quíhí<sup>n</sup>-gá, te ndí ndúú ndí ndúú-güedé tendaha ñàha-gá xii-güedé quíhí<sup>n</sup>-güedé. <sup>2</sup> Te cùmání-gã caca-güedé, te ní xáha<sup>n</sup>-gã xii-güedé:

—Nchòhó xini-ndó sã òré ná sàa yóo cuu nchaa sá xítú ñáyiú, te ío vài cuu. Te na càchí tnúhu ndáá-í xii-ndo sã dàtná vài sá xítú ñáyiú cùu, duca<sup>n</sup> ìo vài ñáyiú cùmání cundedóho

tnúhu Yá Ndiöxí te ío sacú ñáyiú dâcuaha ñaha xii-yu tnúhu-gá, núu xíá<sup>n</sup> xíní ñùhu-xi cáca<sup>n</sup>-ndó núú Yá Ndiöxí cuendá sá ná dàcahá<sup>n</sup>-gá iní ñáyiú cáhá<sup>n</sup>-yu tnúhu-gá núú ñáyiú cùmání cundedóho tnúhu-gá. <sup>3</sup> Te nchòhó cúú-ndó dàtná cue mbéé cue quití cuahá<sup>n</sup> núú yíhí cue quití déé<sup>n</sup>. Chi tendaha ñaha-í xii-ndo quíhí<sup>n</sup>-ndó núú xíndecu nchaa ñáyiú cuihna iní-xi. <sup>4</sup> Te vá cánèhe-ndo ñunu cuhu<sup>n</sup> ndachiu<sup>n</sup>-ndo, ni núú cúhú<sup>n</sup> dǐhú<sup>n</sup>-ndó, te ni vǎ cádá tǔha-gá-ndó chàú-ndó chi ñiú-ni chàú yíhí-ndó-ǎ<sup>n</sup> xíá<sup>n</sup>-ni quíhí-ndo, te vá ío cuyaa-ndo cáhá<sup>n</sup> ndíhí-ndo ñáyiú ñùhu ichi. <sup>5</sup> Te òré ná quèxio-ndo ñ<sup>n</sup> vehe, te duha cúñaha-ndo xii ñáyiú dii vèhe-xi-á<sup>n</sup>: “Yá Ndiöxí chindee ñaha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu. <sup>6</sup> Te núu ñáyiú-á<sup>n</sup> ní nduu táhǔ-yu sá cùndècu váha iní-yu núú Yá Ndiöxí, te cuu-xi sá váha sá cúú-xí-yu tnúhu cúñaha-ndo-ǎ<sup>n</sup>, dico núu ñá túú ní cáhá<sup>n</sup> váha ndíhí ñáhá-yu xii-ndo, te cúñaha-ndo sǎ vǎ cúú-xí sǎ váha sá cúú-xí-yu. Dico núu ní cáhá<sup>n</sup> váha ndíhí ñáhá-yu xii-ndo, <sup>7</sup> te ñiú-ni vehe-á<sup>n</sup> cada vehe tnaa-ndo, te ñá túú-gǎ ndéé nducu-ndo vèhe cundecu-ndo, te caxi-ndo nchàa sá ná tàxí-yu, chi nchaa cue téé quide chiu<sup>n</sup> dacuití tàú-güedé sá ñíhí-güedé sá cáxí-güedé cuendá nchaa chiú<sup>n</sup> quide-güedé. <sup>8</sup> Te núu ní sáá-ndó ñ<sup>n</sup> núú núú ní quehe<sup>n</sup> cuendá ñáhǎ-yu xii-ndo, te caxi-ndo nchàa sá ná tàxí-yu. <sup>9</sup> Te cada tátna-ndo cue ñáyiú cùhú xíndecu ñuú-á<sup>n</sup>, te cúñaha-ndo xii-yu sá sǎ ní sáá nduu ndíhu ndaha ñaha Yá Ndiöxí xii-yu. <sup>10</sup> Dico núu ní sáá-ndó ñ<sup>n</sup> núú núú ñá túú ní quehe<sup>n</sup> cuendá ñáhǎ-yu xii-ndo, te tñí-ndo ìchi cuita cáhá<sup>n</sup>-ndó cuahá<sup>n</sup>, te cúñaha-ndo xii-yu: <sup>11</sup> “Ndéé tíca chúhmá ní tñí sáhá-ndí ñuú-ndó nàquidi-ndí, te duha quide-ndí cuendá cutnùní iní-ndó sǎ ñá túú quide váha-ndo ndècu-ndo. Dico cunaha-ndo sǎ sǎ ní sáá nduu ndíhu ndaha ñaha Yá Ndiöxí xii-ndo ní cùu”, duha

cúñaha-ndo xii-yu. <sup>12</sup> Te na càchí tnúhu-í xii-ndo sǎ ná sáá nduu càda ndáá Yá Ndiöxí cuéchi nchaa ñáyiú, te ñáyiú ñuú-á<sup>n</sup> ío-gá ndohó-yu dàvá-á<sup>n</sup> dâcúxí ñáyiú ñuú Sòdomá —càchí-gá xáha<sup>n</sup>-gǎ xii-güedé.

*Cuendá ñáyiú dava ñuú ñá túú sàndáá iní tnúhu Xítohó Jesucristú (Mt. 11:20-24)*

<sup>13</sup> Te Jèsús xáha<sup>n</sup>-gǎ xii ñáyiú dava ñuú ñá túú sàndáá iní tnúhu-gá:

—¡Ndàhú nchòhó cue ñáyiú ñuú Corazín! ¡Te ndàhú nchòhó cue ñáyiú ñuú Bètsaidá! Chi núu dícó ñuú Tírú, ndíhí ñuú Sídón ní quide-í nchaa sá vǎ yǒo tñahí ndàcu cada datná ní quide-í ñuú-ndó-á<sup>n</sup> ní xiní-ndó ñá, te sá ndéé ama-gá cuihnú-yu dóó ndàhú, te cunucóo-yu núú yáa cuendá sá ndíxí cuéchi iní-yu sá ñá túú quide váha-yu ní cùu. <sup>14</sup> Dico sáá nduu te ío-gá dandòho ñaha Yá Ndiöxí xii-ndo dâcúxí ñáyiú ñuú Tírú, ndíhí ñáyiú ñuú Sídón. <sup>15</sup> Te nchòhó ñáyiú ñuú Capèrnaúm quide iní-ndó sǎ sǎ cuàndaa-ndo àndíu, dico ñáhá chi núú ùhú núú ndàhú cundecu-ndo —duha ní xáha<sup>n</sup>-gǎ xii nchaa ñáyiú ñuú-á<sup>n</sup>.

<sup>16</sup> Te xáha<sup>n</sup> tùcu-gá xii cue téé tendaha-gǎ quíhí<sup>n</sup> cáhá<sup>n</sup> tnúhu-gá-á<sup>n</sup>:

—Nchaa ñáyiú na cùndedóho nchaa tnúhu cáhá<sup>n</sup>-ndó, te cada iní-yu sá yǔhú cáhá<sup>n</sup>-í ndèdóho-yu, te nchaa ñáyiú na dàquee tíhú ñáhá xii-ndo, te tñahá yúhú daquèe tíhǔ-yu, te nchaa ñáyiú duca<sup>n</sup> na dàquee tíhú ñáhá xii-í, te tñahá Tǎtà-í Dútú Ndiöxí Yáá ní tendaha ñaha xii-í véxi-í ñuyúú-a dàquee tíhǔ-yu —càchí-gá xáha<sup>n</sup>-gǎ xii-güedé.

Te duca<sup>n</sup> te ní xica-güedé cuahá<sup>n</sup>-güedé.

*Ní nasáá cue téé únídico úxí ní tendaha Jèsús ní sáhá<sup>n</sup> ní cáhá<sup>n</sup> tnúhu-gá núú ñáyiú*

<sup>17</sup> Te cue téé únídico úxí-á<sup>n</sup> ní nasáá-güedé te súúní cùdí iní-güedé, te xáha<sup>n</sup>-güedé xii Jèsús:

—Mèstrú, ndéé espíritú cùndíhí yucu ñávǎha sàndáá iní ñáhá-xí xii-ndí òré cácu nèhe ñaha-ndí xii-n —càchí-güedé xáha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gǎ:

—Ndáá càhá<sup>n</sup>-ndó chi yúhú ní xiní-í cùtnàhá ní xíta nihnu yucu ñávàha, chi dàtná ní ngava ì<sup>n</sup> tasa<sup>n</sup> ñí ngava-xi ñuyíú-a. <sup>19</sup> Te dàtná quidé-ndó òré xènihnu-ndo ì<sup>n</sup> cóó, àdi ì<sup>n</sup> nchacua duca<sup>n</sup> cada-ndo daquee tíhú-ndó yucu ñávàha, te ñá túú nà cada ñaha-xi xii-ndo, chi ní taxi-í tnúhu ndee ìní ndécú ndìhi-ndo. <sup>20</sup> Dico vá cùdìí ìní-ndó cuèndá sá sàndáá ìní ñáhá cuè espíritú cùndìhi yucu ñávàha xii-ndo, chi cùdìí ìní-ndó cuèndá sá sà yodo tnuní-ndó nùú tùtú Yá Ndiöxí Yaá ndécú àndiu —cachí-gá xáha<sup>n</sup>-gã xii-güedé.

*Jèsús cùdìí ìní-gá*  
(Mt. 11:25-27; 13:16-17)

<sup>21</sup> Te òré-á<sup>n</sup> sùúni ñí quide díí ìní ñáhá Espíritú Yá Ndiöxí xii Jèsús, te ní xáha<sup>n</sup>-gã xii Yá Ndiöxí:

—Yòhó Tàtá-í Dútú Ndiöxí, ío chihnuhu ñaha-í xii-n chi diu-n tàxi tnuní-n àndiu ndìhi ñuyíú-a, te dànehé-n cuè ñáyiu nchaa tnúhu váha, te diu-ni ñáyiu-á<sup>n</sup> cù-yu ñáyiu ñá túú cùtnuní ìní-xi nchaa tnúhu càhá<sup>n</sup> cue téé túha, te nchaa tnúhu càhá<sup>n</sup>-n-á<sup>n</sup> ñà túú ní dàtúu-n nùú ñáyiu càchí sá ío túha, te ío váha sàá díquí-xi. Te duca<sup>n</sup> quide-n, chi duca<sup>n</sup> cuìní-n cùnduu —cachí-gá xáha<sup>n</sup>-gã xii Yá Ndiöxí.

<sup>22</sup> Te xáha<sup>n</sup> tùcu-gá xii cue téé ní nasáá-á<sup>n</sup>:

—Mee Tàtá-í Dútú Ndiöxí ní cachí-gá sá cùnùu-í nùú nchàa-ndi túhú sá ío. Te vá yòo ì<sup>n</sup> xiní nàcuáa sàni ìní yúhú Déhe Dútú Ndiöxí, chi ì<sup>n</sup>ndi díí-ni mee-gã xini-gá nàcuáa sàni ìní-í. Te duca<sup>n</sup> ì<sup>n</sup>ndi-ni yúhú xiní-í nàcuáa sàni ìní mée-gã, te nchaa ñáyiu càchí ìní-í sá quini-yu nàcuáa sàni ìní Tàtá-í Dútú Ndiöxí te xitnùhu-í-yu, te vá yòo ì<sup>n</sup>-gã xiní nàcuáa sàni ìní-gá chi diu-ni ñáyiu duca<sup>n</sup> xitnùhu-í-á<sup>n</sup> xiní-yu —cachí-gá xáha<sup>n</sup>-gã xii-güedé.

<sup>23</sup> Te ní nchócótó-gã nùú xindecu mee-ni cuè téé xica cuu ndìhi-gá, te ní xáha<sup>n</sup>-gã xii-güedé:

—Váha táhu nchòhó ndìhi nchaa ñáyiu ndèhe nchaa nacuaá quide-í vitna. <sup>24</sup> Chi ío cuéhé cue téé ní xóo

cáhá<sup>n</sup> tnúhu Yá Ndiöxí ndéé sanaha, ndìhi cue téé ní xindaha ñàha xii ñáyiu ní cuini-güedé cundehe-güedé nchaa sá ndéhé-ndó quide-í vitna, te ñá túú ní xiní-güedé, te ní cuini-güedé cund-edóho-güedé nchaa tnúhu càhá<sup>n</sup>-í ndèdóho-ndo vitna, te ñá túú ní xindedóho-güedé —cachí-gá xáha<sup>n</sup>-gã xii-güedé.

*Nàcuáa ní quide ì<sup>n</sup> téé distritú Sàmariá*

<sup>25</sup> Te ì<sup>n</sup> téé dàcuaha ñaha xii ñáyiu nchaa tnúhu ní chidó tnuní ndi Moisés ní ndacuñí-dé xító ndéé-dé Jèsús nùu nása cunduu tnúhu càhá<sup>n</sup>-gá, te xáha<sup>n</sup>-dè xii-gá:

—Mèstrú, ¿ná cúú sã càdà-í cuèndá nduu táhù-í cundecu-í ndìhi Yá Ndiöxí ñi caa ñi quihí<sup>n</sup>-i? —cachí-dé xáha<sup>n</sup>-dè xii-gá.

<sup>26</sup> Te Jèsús ní xáha<sup>n</sup>-gã xii-dé:

—Cuìní-í cachí tnúhu-n nása càhá<sup>n</sup>-xi nùú tùtú ndi Moisés —cachí-gá xáha<sup>n</sup>-gã xii-dé.

<sup>27</sup> Te xáha<sup>n</sup>-dè xii-gá:

—Ndi Moisés càchí ndi nùú tùtú ndi: “Cuu ìní-ndó Dútú Ndiöxí Yaá cúú Ndiöxí-ndó ñi yuhu ñi ìní-ndó, te cani ìní-ndó càda-ndo datná cuini mée-gã, te mee-ni tnúhu váha cani ìní-ndó nàcuáa cuu vii cuu váha-ndo nùú-gã, te coo ìní-ndó cuu ìní-ndó-gã. Te cuu ìní-ndó tnàha ñáyiu-ndo dàtná cúú ìní-ndó mée-ndo”, duha càchí ndi nùú tùtú ndi —cachí-dé xáha<sup>n</sup>-dè xii-gá.

<sup>28</sup> Te Jèsús ní xáha<sup>n</sup>-gã:

—Váha-ni càhá<sup>n</sup>-n, te nùu cada-n nàcuáa càhá<sup>n</sup>-n á<sup>n</sup>, te nduu táhù-n cundecu-n ndìhi Yá Ndiöxí ñi caa ñi quihí<sup>n</sup> —cachí-gá xáha<sup>n</sup>-gã xii-dé.

<sup>29</sup> Te sá dúcá<sup>n</sup> ñí xáha<sup>n</sup> Jèsús xii-dé nùu nducu-dé nàcuáa cada-dé cácu nihnu-dé nùú tnúhu ní càhá<sup>n</sup>-dé, te ní xicá<sup>n</sup> tnúhú-dè nùú-gã, te xáha<sup>n</sup>-dè:

—¿Yoo cuu tnaha ñáyiu-í-i? —cachí-dé xáha<sup>n</sup>-dè xii-gá.

<sup>30</sup> Te Jèsús ní cani-gá ì<sup>n</sup> cuèndú nùú-dè nàcuáa tecú tnuní-dé tnúhu-gá, te xáha<sup>n</sup>-gã:

—Ì<sup>n</sup> téé ní ndee-dé nùú Jerusalén ñuhú-dè ichi cuánuu-dé cuáhá<sup>n</sup>-dé nùú Jericó, te ní quee ñadúhú ichi-dé

ní dúhú-güedě dóó níhnú-dě, ndihí nchaa sá néhé-dě, te ní caniha vihi-güedé, te nchìto diu-ná-dé ní dáña ñàha-güedé te cuáhá<sup>n</sup>-güedé.

<sup>31</sup> Te mei òré cātùu-dé-á<sup>n</sup> ñúhú ì<sup>n</sup> dútú ichi-á<sup>n</sup>, te òré ní xiní ñáhá dútú-á<sup>n</sup> xii-dé, te ì<sup>n</sup> xio-ni ní xócóo ndee-dé ní yáha-dé. <sup>32</sup> Te ñùhu tucu ì<sup>n</sup> téé cùu levítá ichi-á<sup>n</sup>, te òré ní xiní-dé téé-á<sup>n</sup> cātùu-dé, te diu-ni duca<sup>n</sup> ñi quide-dé ì<sup>n</sup> xio-ni ní xócóo ndee-dé ní yáha-dé. <sup>33</sup> Dico ì<sup>n</sup> téé distritú Sàmariá ñúhú tucu-dé ichi-á<sup>n</sup> te òré ní xiní-dé téé-á<sup>n</sup> cātùu-dé, te ní cundàhú iní ñáhá-dě. <sup>34</sup> Te ní sáhá<sup>n</sup>-dé núú cātùu téé-á<sup>n</sup>, te ní quide tátna-dé nchaa núú ñi nícuèhé xii téé-á<sup>n</sup> ñi chihi-dé yúcu, te ní dácútú-dě. Te dàtnùní ní dácáá ñàha-dé sátá quiti-dé, te ndèca ñàha-dé cuáhá<sup>n</sup> ì<sup>n</sup> vehe núú sácóo cue ñáyiú sácúhu<sup>n</sup> ichi, te yàcá<sup>n</sup> ní xito ñàha-dě. <sup>35</sup> Te ingá nduu òré ní nucúhu<sup>n</sup> téé Samaritànú-á<sup>n</sup> ichi, te ní tava-dé úú díhú<sup>n</sup> denariú, te ní sáha-dé téé cùu xitohó vehe-á<sup>n</sup>, te ní xáha<sup>n</sup>-dě: “Coto saú-n tée-a, te núú ñá ní tnàhá díhú<sup>n</sup> sã ñi taxi-í, te cuèi na dāndoñuhu-gá-n díhú<sup>n</sup>-n cuendá-dé, te òré ná quixi tucu-í te nacháhu-í”, duha ní xáha<sup>n</sup> tée Samaritànú-á<sup>n</sup> xii téé dii vèhe xiá<sup>n</sup>. <sup>36</sup> Te vitna cáhá<sup>n</sup>, te núú ndèdacáa cue téé úní-á<sup>n</sup> cúú-güedě téé váha cùu iní-güedé tnàha ñáyiú-güedé — càchí-gá xáha<sup>n</sup>-gã xii téé dàcuaha ñàha xii-í ñáyiú-á<sup>n</sup> nchaa tnúhu ní chídó tnùnì ndíi Moisés.

<sup>37</sup> Te téé-á<sup>n</sup> ñi xáha<sup>n</sup>-dě xii-gá:

—Téé ní cundàhú iní ñáhá xii téé ní dānícuehé ñáhá cue ñadúhú-á<sup>n</sup>, téé-á<sup>n</sup> cúú-dě téé cùu iní tnàha ñáyiú-xi — càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gã:

—Cuáhá<sup>n</sup> te diu-ni duca<sup>n</sup> càda-n tnahá-n — càchí-gá xáha<sup>n</sup>-gã xii-dé.

*Jèsús ndécú-gã vehe tá Mārta ndihí tá Màriá*

<sup>38</sup> Te Jèsús ñúhú-ni-gã ichi cuáhá<sup>n</sup>-gá ndihí cue téé xica cuu ndihí-gá, te ní sáá-gá ì<sup>n</sup> ñuú lìhli, te xiá<sup>n</sup> ñi quee ì<sup>n</sup> xíchí nání Mārta ní cáhá<sup>n</sup> ñáhá-xi xii-gá vehe-xi. <sup>39</sup> Te tá Mārta ndècu ì<sup>n</sup> cúhú-xi nàni-xi Mariá, te xíchí-á<sup>n</sup> ñi ngóo-xi núú Jèsús

ndèdóho-xi nchaa tnúhu càhá<sup>n</sup>-gá. <sup>40</sup> Te tá Mārta-á<sup>n</sup> ndihí vihi-ni iní-xi quide-xi chiu<sup>n</sup>-xi, te ní sáhá<sup>n</sup>-xi núú Jèsús, te ní xáha<sup>n</sup>-xi:

—Mèstrú, ¿náa ñá túú tnàhí sàni iní-n sã ñi dāndóo ndaha ñàha cúhú-í nchaa chiu<sup>n</sup>-á<sup>n</sup>? Cúñaha saú ná quixi-xi chindee ñàha-xi —cachí-xi xáha<sup>n</sup>-xi xii-gá.

<sup>41</sup> Dico Jèsús ní xáha<sup>n</sup>-gã:

—Yòhó Mārta, ñùhu tneñu vihi-n, te ndihú iní-n sã ño vāi chiu<sup>n</sup>-n ñuhu, <sup>42</sup> dico xini ñuhu vihi-gá-xi cundedóho-n tnúhu càhá<sup>n</sup>-í, chi tá Màriá-a sa ndèdóho-xi tnúhu-í, te vá yóo ì<sup>n</sup> ndacu xocàni tnúhu-í sã ñi ngúndecu ndihí-xi —càchí-gá xáha<sup>n</sup>-gã xii-xi.

## 11

*Jèsús dánèhé-gá cue téé xica cuu ndihí-gá nācuáa cáhá<sup>n</sup> ndihí-güedé Yã Ndiõxí*

(Mt. 6:9-15, 7:7-11)

<sup>1</sup> Te ì<sup>n</sup> nduu càhá<sup>n</sup> ndihí Jèsús Yã Ndiõxí ì<sup>n</sup> xichi, te sátá ñi yáha ní cáhá<sup>n</sup> ndihí-gá Yã Ndiõxí, te ní xáha<sup>n</sup> ì<sup>n</sup> téé xica cuu ndihí-gá xii-gá:

—Mèstrú, danèhé ñáhá xii-ndí nása cáhá<sup>n</sup> ndihí-ndí Yã Ndiõxí dàtná ní quide ndíi Juáá ní dánèhé ndíi cue téé ní xica cuu ndihí ndíi —càchí-dé xáha<sup>n</sup>-dě xii-gá.

<sup>2</sup> Te Jèsús ní xáha<sup>n</sup>-gã:

—Òré cáhá<sup>n</sup> ndihí-ndo Yã Ndiõxí, te cachí-ndó:

Yòhó tātá-ndí Dútú Ndiõxí Yaá ndécú àndiú,

nchaa ñáyiú na càhá<sup>n</sup>-yu sá cúú-n Yàá ío yiñùhu.

Te xicá<sup>n</sup> táhú-ndí núú-n sã ná sàá nduu ndíhu ndàhá-n-yu.

Te cada-n dàtná càchí iní-n ñuyíú-a dàtná quidé-n àndiú.

<sup>3</sup> Te xicá<sup>n</sup> táhú-ndí núú-n sã táxi-n sã cándèca iní-ndí ì<sup>n</sup> nduu ì<sup>n</sup> nduu.

<sup>4</sup> Te cada càhnu iní-n nchàa yicá cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.



Te vá dáñá-n dàcahá<sup>n</sup> ñáhá yücu ñáváha xii-ndí cada-ndí sá ñà túú vâha, chi coto ñaha-n xii-ndí cuëndá sá vâ dúcá<sup>n</sup> càda ñaha-xi,

duha cáhá<sup>n</sup>-ndó

—càchí-gá xáha<sup>n</sup>-gã xii-güedé.

<sup>5</sup> Te Jèsús ní xáha<sup>n</sup> tücu-gá:

—Te núu ndédacàa nchóhó ndécú ñ<sup>n</sup> téé tnàha tnúhu ndihí-ndo, te dava niú cuáhá<sup>n</sup>-ndó vehe-dé, te òré ní quexìo-ndo, te xáha<sup>n</sup>-ndo xii-dé: “Véxi-í núu vá cündèe iní-n tàxi nuu-n úní tnàhá pàá, <sup>6</sup> chi ñ<sup>n</sup> téé xìní tnáhá ndihí-í ñúhú-dě ichi ní quexìo-dé vehe-í, te ñá túú tnàhí ná cuñaha-í caxi-dé”, quesaha-ndo cñaha-ndo. <sup>7</sup> Te téé-án cáhá<sup>n</sup>-dé ndéé xití vehe-dé, te cñaha-dě xii-ndo: “Vá dásatú nihá-n chi ndédí yuyèhe-í, te càa-í ndihí cue landú-í, te vá cúú ndácóo-í taxi-í sá cuíní-n”, quesaha-dě cñaha-dě xii-ndo. <sup>8</sup> Te na càchí tnúhu-í xii-ndo sã cuèi cùu-dé téé tnàha tnúhu ndihí-ndo, dico duca<sup>n</sup> cñaha-dě xii-ndo, dico dacuití sã ndácóo-dé taxi-dé sá cuíní-ndó cuëndá sá vâ dásatú-gá-ndó iní-dé. <sup>9</sup> Te yúhú càchí-í xii-ndo sã càcá<sup>n</sup>-ndó núu ná cuíní-ndó núú Yá Ndiöxí te taxi-gá. Te vá dáñá ndèé-ndó càcá<sup>n</sup>-ndó núú-gã núu ná cuíní-ndó, te duca<sup>n</sup> te níhí-ndó. Te cada iní-ndó sã ñí quexìo-ndo vehe ñ<sup>n</sup> tnaha ñáyiü-ndo te ní cáhá<sup>n</sup>-ndó, te ñáyiü-án ñí tedóho ñàhá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yá Ndiöxí tedóho ñaha-gã xii-ndo, te taxi-gá sá ná càcá<sup>n</sup>-ndó núú-gã. <sup>10</sup> Chi nchaa ñáyiü duca<sup>n</sup> xiquide te Yá Ndiöxí tedóho ñaha-gã xií-yu nihí-yu sá cuíní-yu. Te ñiü-ni duca<sup>n</sup> tücu nchaa ñáyiü na càcá<sup>n</sup> núú-gã ñ<sup>n</sup> sá cuíní-yu, chi sãñaha-gã sá xicá<sup>n</sup>-yu núú-gã. Te ñiü-ni duca<sup>n</sup> tücu níhí nchaa ñáyiü ñá túú dàña ndeé xicá<sup>n</sup> núú Yá Ndiöxí sá cuíní-yu, chi nihí-yu.

<sup>11</sup> Te nchòhó cue téé cùu tátá ñá túú cündee iní-ndó cuãha-ndo cuè déhe-ndo ñ<sup>n</sup> yúú caxi-güexi òré xicá<sup>n</sup>-güexi ñ<sup>n</sup> pàá núú-ndó càxi-güexi, te ni ñà túú cündee

iní-ndó cuãñaha-ndo ñ<sup>n</sup> cóo caxi-güexi òré xicá<sup>n</sup>-güexi ñ<sup>n</sup> chácá núú-ndó càxi-güexi. <sup>12</sup> Te ni ñà túú cündee iní-ndó cuãñaha-ndo ñ<sup>n</sup> nchacua caxi-güexi òré xicá<sup>n</sup>-güexi ñ<sup>n</sup> ndíú núú-ndó càxi-güexi. <sup>13</sup> Te nchòhó cuèi ndèé dau sàá iní-ndó, dico sãha-ndo cuè déhe-ndo sã vâha xèxi-güexi òré xicá<sup>n</sup>-güexi núú-ndó. Te núu nchòhó duca<sup>n</sup> quide-ndo, ñte uu<sup>n</sup>-gá duca<sup>n</sup> quide Tátá-ndó Dütú Ndiöxí Yáá ndécú àndiü, chi taxi-gá Espiritú-gá cundecu ndihí-ndo te núu na càcá<sup>n</sup>-ndó núú-gã! —càchí-gá xáha<sup>n</sup>-gã xii-güedé.

*Càchí-güedé sá ndécú ndihí Jèsús yucu ñáváha*

(Mt. 12:22-30; Mr. 3:20-27)

<sup>14</sup> Te Jèsús ndèñuhu-gá espíritú cündihí yucu ñáváha yihí ñaha xii ñ<sup>n</sup> téé ní quide ñihí-xi, te òré ní ndee ñaha espíritú-án xii téé-án, te ní nacáhá<sup>n</sup>-dé. Te ío ní cuñúhu ñáyiü sá dúcá<sup>n</sup> ñí quide-gá. <sup>15</sup> Te davá-yu ní xitnàhá-yu:

—Téé-a ndèñuhu-dé nchaa espíritú cündihí sácúihná yihí ñaha xii ñáyiü, chi ñiü-ni sácúihná-ñ<sup>n</sup> chindèe ñaha-xi xii-dé, te ñiü-ni-xi tàxi tnuní-xi nchaa espíritú-án —càchí-yu xitnàhá-yu.

<sup>16</sup> Te davá-yu xito ndeé ñáhã-yu xii-gá, te xáhá<sup>n</sup>-yu sá ná cadá-gã ñ<sup>n</sup> sá vâ yõo tnàhí ndàcu cada ñuyiü-a cundehé-yu nàcuáa cutnùní iní-yu núu ndáá sá Yá Ndiöxí ní tendaha ñaha-gá xii-gá véxi-gá ñuyiü-a. <sup>17</sup> Dico mee-gã sa ní cutnùní iní-gá nchaa nàcuáa sàni iní-yu, núu ní xáha<sup>n</sup>-gã xii-yu:

—Te nchòhó xìní-ndó sã núu ñ<sup>n</sup> téé yindaha ñ<sup>n</sup> nació<sup>n</sup> vá cúú ñ<sup>n</sup>nuu-dé ndihí cue téé cündihí-dé, te vá cúdí-dé cunuu-dě. Te ñiü-ni duca<sup>n</sup> sãtnahá tücu-xi cùu cue ñáyiü xindecu ñ<sup>n</sup>-ni vehe, chi núu vá cúú ñ<sup>n</sup>nuu-yu cundecú-yu, te vá cúdí-yu cundecu càhnú-yu. <sup>18</sup> Te duca<sup>n</sup> sãtnahá-xi cùu sácúihná, chi núu vá cúú ñ<sup>n</sup>nuu-xi ndihí nchaa espíritú cündihí-xi te vá cúdí-xi cundecu-xi taxi tnùní-xi. Te duha cáhá<sup>n</sup>-í chi nchòhó càchí-ndó sã sácúihná chindèe ñaha-xi xii-í



d̄iu-ni nduu càda ndáá Yă Ndiöxí cuéchi nchaa nchòhó ñáyiu ndècu ñuyú-a vitna, dàvá-á<sup>n</sup> tnàhá cue ñáyiu ní x̄indecu ñuú N̄nivé cundecú-yu núú Yă Ndiöxí, te tnàhá-yu cachí-yu sá ñà túú ní quide ndáá-ndó. Chi ñáyiu ñuú N̄nivé-á<sup>n</sup> ñi ndixi túu iní-yu sá ñà túú quide váha-yu ndècú-yu te ní natuhá-yu ichi Yá Ndiöxí cútnàhá ní cáhá<sup>n</sup> ndih̄i ñaha ndíi Jónás tnúhu-gá xií-yu. Dico vitna iha ndècu ndih̄i ñaha-ndo xii yúhú téè cãhá<sup>n</sup> tucu tnúhu Yá Ndiöxí, te d̄iu-í ío-gá cúnùu-í d̄acúxí ndii Jónás.

*Núú-ó cùu-xi datná ñ<sup>n</sup> ñuhú*  
(Mt. 5:15; 6:22-23)

<sup>33</sup> 'Te ñà túú ñi ñ<sup>n</sup> ñáyiu tẽñuhú ñ<sup>n</sup> linterná, te taxi ndecú-yu ñ<sup>n</sup> núú yídãhu, àdi chiváha-yu xití ñ<sup>n</sup> tídihi, chi tàxi ndecú-yu ñ<sup>n</sup> núú ñinu cuendá nchaa ñáyiu quíhu vehe cutnùní núu-yu. <sup>34</sup> Te núú-ndó cùu-xi datná ñ<sup>n</sup> ñuhú, chi ñ<sup>n</sup> sá ná quini-ndó te ndixi túu iní-ndó ñà cúú x̄iã<sup>n</sup>, te núu cãváha núu-ndó, te duca<sup>n</sup> cùtnuní iní-ndó ñà cúú sá ndécú núu-ndó, á<sup>n</sup> te núu cùhú, te vá cùtnùní iní-ndó ñà cúú sá ndécú núu-ndó. Te sá dúcá<sup>n</sup> cùhú núu-ndó te cada iní-ndó sá ndécú-ndó dàtná ñ<sup>n</sup> núú néé. <sup>35</sup> Te ío cada cuendá-ndó vã cáni cuèhé iní-ndó cuendá tnúhu Yá Ndiöxí cuendá cutnùní iní-ndó nãcuáa cundecu-ndo, chi núu na càni cuèhé iní-ndó cuendá tnúhu-gá, te cùu-ndo datná ñ<sup>n</sup> ñáyiu ñà túú cùtnuní núu-xi. <sup>36</sup> Te núu cãndoo canine iní-ndó, te mee-ni sã vãha ñùhu iní-ndó, te cùtnuní váha iní-ndó tnúhu ndáá dàtná cùtnùní váha núu-ndó òré càyú ñuhú, duca<sup>n</sup> cùtnuní iní-ndó — cãchí-gá xáha<sup>n</sup>-gã xií-yu.

*Jèsús cãhá<sup>n</sup>-gá cuendá cue téè cùu fariséu ndih̄i cue téè d̄acuaha ñaha xii-í ñáyiu*

(Mt. 23:1-36; Mr. 12:38-40; Lc. 20:45-47)

<sup>37</sup> Te òré ní ndih̄i tnúhu ní cáhá<sup>n</sup> Jèsús, te ñ<sup>n</sup> téè cùu fariséu ní cáhá<sup>n</sup> ñáhã-dẽ xii-gá vehe-dé caxi-gá, te cuánguìhu-gá vehe-dé, te ní ngóo-gá mèsá. <sup>38</sup> Te téè cùu fariséu-á<sup>n</sup> ío ní cuñúhu-dé, chi Jèsús ñà túú ní ndàha-gá nãcuáa sàni iní-güedé nduu

vétú iní Yă Ndiöxí òré ní ngóo-gá caxi-gá dàtná quidé mèe-güedé. <sup>39</sup> Te Jèsús ní xáha<sup>n</sup>-gã xii-dé:

—Nchòhó cue téè cùu fariséu x̄ini-ndó sã ío ñáyiu nàquete sátã-ni tãså<sup>n</sup> ndih̄i sátã-ni cõhó, te xití-xi cãndehe caduha-ni. Te duca<sup>n</sup> sãtnahã-xi cùu nchohó, chi ndaha-ni-ndo nàquete-ndo, te iní-ndó ñà túú nduu ndoo, te nãndi d̄andahú-ndó tnàha ñáyiu-ndo, te quèhe<sup>n</sup>-ndo sá ndécú ndih̄i-yu, te nãndi-gá nchaa sá cuèhé sá dúhá ñùhu iní-ndó quide-ndo. <sup>40</sup> Te nchòhó cúú-ndó cuè téè ío ñi iní-xi! ¿Te náa ñà túú cùtnuní iní-ndó sã Yă Ndiöxí Yá ní cadúha yiqui cùñú-ó d̄iu-ni-gá ní chih̄i-gá iní-ó-ã<sup>n</sup>? <sup>41</sup> Te nchaa sã vãha ndècu ndih̄i-ndo cuáha-ndo nchaa ñáyiu x̄ini ñuhu na cundecu ndih̄i-yu, te núu duca<sup>n</sup> na càda-ndo, te cuu-ndo ñáyiu sa ní nduu ndoo ní nduu nine iní-xi.

<sup>42</sup> 'Te ndàhú ní cuu nchaa nchòhó cue téè cùu fariséu! Chi sãha-ndo Yă Ndiöxí núú ùxí xichi yúcú nání mენტá, ndih̄i yúcú rùdá, ndih̄i nchaa dava-gá núú yúcú quèe comidá, dico ñà túú quide ndáá-ndó, te ni ñà túú ñùhu iní-ndó Yă Ndiöxí. Dico tnúhu cãhá<sup>n</sup>-í-a tàú-ndó càda-ndo, te ni vã dãñã ndéé-ndó càda-ndo nchaa dava-gá sã vãha.

<sup>43</sup> 'Te ndàhú ní cuu nchòhó cue téè cùu fariséu! Chi cùini-ndó cùnucóo-ndo núú sãcõo cue téè ío cùnuu xití veñúhu, te cùini-ndó mèe-ni ndih̄i tnúhu yìñùhu cáhá<sup>n</sup> ndih̄i ñaha ñáyiu xii-ndo nchaa núú xicá cùu-ndo.

<sup>44</sup> 'Te ndàhú ní cuu nchòhó cue téè d̄acuaha ñaha xii ñáyiu nchaa tnúhu ní chídó tnùní ndii Moisés, ndih̄i nchòhó cue téè cùu fariséu chi ío d̄andahú-ndó mèe-ndo sá quidé ndáá-ndó te ñà ndáá sá quidé ndáá-ndó! Chi cùu-ndo datná ñ<sup>n</sup> ñáyiu ní xih̄i te ní nguindũxi, te ñà túú cùtnuní-gá ndèè yindũxi-yu, te cuèi nã yáha ñáyiu dico ñà túú cùtnuní sá yindũxi ndiyi. Te duca<sup>n</sup> sãtnahã-xi cùu nchohó, chi nchaa ñáyiu ndèhe ñaha xii-ndo ñà túú cùtnuní iní-yu nchaa sá cuèhé sá

dúhá sàni iní-ndó —càchí-gá xáha<sup>n</sup>-gã xii-güedé.

45 Te ní xáha<sup>n</sup> ì<sup>n</sup> tée dàcuaha ñaha xií-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcá<sup>n</sup> càhá<sup>n</sup>-n te tnàhá nchúhú xícuèhé-n ǎ<sup>n</sup> —càchí-dé xáha<sup>n</sup>-dè xii-gá.

46 Te Jèsús ní xáha<sup>n</sup>-gã:

—jNdàhú ní cuu tnàhá nchaa nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés! Chi quíde-ndo datná quidé ñáyiú dàcuído ì<sup>n</sup> tnaha ñáyiú-xi ì<sup>n</sup> sá ïo véé, te mèé-yu ni lùha ñá túú cuíní-yu cuidó-yu. Te duca<sup>n</sup> sǎtnahá-xi quíde nchòhó chi dānehé-ndó ñáyiú nācuáa cadá-yu, dico mee-ndo chi ni lùha ñá túú cuíní-ndó càda-ndo nācuáa dānehé-ndó-yu.

47 'jTe ndàhú ní cuu tucu-ndo! Chi càdúha-ndo nūú nǐ nguíndūxi cue tée ní xóo cáhá<sup>n</sup> tnúhu Yá Ndiǒxí ndéé sanaha cuèndá sá cúnàha-ndo nūú yíndūxi cue ndíi, te ñiú-ni cue ñani tnàhá-ndó nǐ sahni-güedé cue ndíi.

48 Te nchòhó sa nàha-ndo nācuáa ní quíde cue ñani tnàhá-ndó, te càchí-ndó sǎ nǐ quíde váha-güedé sá dúcá<sup>n</sup> nǐ sahni-güedé cue ndíi-án, te vitna càdúha-ndo nūú nǐ nguíndūxi cue ndíi.

49 'Te Yá Ndiǒxí ío sàá nchaa sá xíní tnùní-gá, te ní cachí-gá sá dácàhá<sup>n</sup>-gá iní cue tée cuèndá cáhá<sup>n</sup>-güedé tnúhu-gá nūú ñáyiú, te cada-güedé nchaa nācuáa cuíní-gá, te dava-güedé cahni ñàhá-yu xii-güedé, te dava-güedé ío dandòho ñahá-yu xii-güedé duha ní cachí-gá.

50 Te nchaa ñáyiú ñuyíú vitna tnàhá-yu nacháhu-yu nūú Yá Ndiǒxí cuèndá sá nǐ sahni-güedé cue tée ní cáhá<sup>n</sup> tnúhu-gá ndéé cútnàhá ní ngáva ñuyíú. 51 Te ndéé ndíi Àbél tée ní sahni-güedé ndéé díhna nuu, ndíi ndéé ndíi Zacàriá tée ní sahni-güedé ndéé nūú nǐ ndíi-ná ndácá<sup>n</sup> cuèndá ñahá Yá Ndiǒxí nūú ñáyiú ndècu ñuyíú vitna, te ñiú ndíi-án nǐ sahni-güedé mei tnúú veñúhu càhnu sá ïo cūnuu, ndíi xító nūú sácòdó sǎ ndúú tǎhú Yá Ndiǒxí.

52 'jTe ndàhú ní cuu tucu nchaa nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés! Chi quíde-ndo datná quidé ì<sup>n</sup> tée tàxi tnùní ì<sup>n</sup> vehe, chi nacadí-dé te ñá dáñá-dè quíhu ñáyiú te ni mèé-dé ñá túú quíhu-dé. Te duca<sup>n</sup> sǎtnahá-xi quíde-ndo, chi dàcuaha-ndo tnúhu Yá Ndiǒxí te ñá túú cuíní-ndó quíndáá iní-ndó te ni ñà túú dānehé-ndó ñáyiú cuíní tñi tnúhu-gá nācuáa tàú-xi cunduu cuèndá naníhí tǎhú-yu —càchí-gá xáha<sup>n</sup>-gã xii-dé.

53 Te òré ní ndee Jèsús vehe tée cūu fariséú-án, te cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíi cue tée cūu fariséú ní cudéé<sup>n</sup>-güedé nūú-gã, te ní ngúíta-güedé nándi sá xícá<sup>n</sup> tnúhú-güedé nūú-gã cuèndá cuíní-güedé nūu vá cuíta-gá ì<sup>n</sup> tnúhu càhá<sup>n</sup>-gá 54 cuèndá duca<sup>n</sup> ñíhí-güedé nācuáa cada-güedé cacá<sup>n</sup> cuéchi-güedé cuèndá-gá.

## 12

*Jèsús càhá<sup>n</sup>-gá cuèndá cue tée dāndahú méé-xí*

1 Te òré-án nǐ tacá titní mǐl ñáyiú nūú ndécú Jèsús, te súúni dicó ngǒnchihi tnàha-ná-yu. Te ndèdòho-yu ní xáha<sup>n</sup> Jèsús xii cue tée xica cuu ndíi-gá:

—Cada cuèndá-ndó vǎ cǎnchícú<sup>n</sup> nihnu-ndo nācuáa quíde cue tée cūu fariséú, chi cue tée-án ïo dāndahú-güedé méé-güedé sá quidé ndǎá-güedé dico ñá ndǎá sá quidé ndǎá-güedé. 2 Te nchaa tnúhu sá cúú yùhu ni cuu vá cúú yùhu-gá, chi nchaa dacuítí sǎ quéé túu-xi nūú ñáyiú.

3 Chi nchaa tnúhu càhá<sup>n</sup> dayuhu-ndo quèe túu-xi nūú chítú nūú tàcá, te nchaa tnúhu càhá<sup>n</sup> méé-ndó vèhe-ndo dacuítí sǎ nihí ñáyiú tnúhu.

*Yá Ndiǒxí xíní ñùhu-xi yuhú-ó-gá (Mt. 10:26-31)*

4 'Te nchòhó cue tée ío váha tnàhá tnúhu ndíi-í ná càchí tnúhu-í xii-ndo sǎ vǎ yùhú-ndó cuè ñáyiú cuèi na càhni ñahá-yu xii-ndo, chi ñiú-ni yíqui cūnú-ndó ndàcú-yu cahni-yu, te ñá



túu nǎgá ndacú-yu cada ñàhá-yu xii-ndo. <sup>5</sup> Te na càchí tnúhu-í xii-ndo sǎ Yǎ Ndiǒxí tàú-ndó yùhú-ndó-gǎ, chi mee-gǎ ío cùnuu-gǎ, te ñi-gǎ quidé-gǎ sǎ vǎ cùndècu-gǎ ñáyíu ñuyíú, te daquihí<sup>n</sup> ñàhá-gǎ xií-yu núu ùhú núu ndàhú, núu xiǎ<sup>n</sup> càchí tnúhu-í xii-ndo sǎ Yǎá-á<sup>n</sup> tàú-ndó yùhú-ndó-gǎ.

<sup>6</sup> Te nchòhó xíní-ndó sǎ ndèé úhú<sup>n</sup> tnàhá tìlaá cùyǎhu-di núu ùú díhú<sup>n</sup>, dico Yǎ Ndiǒxí ñà túu cùnaa-gǎ ni ñ<sup>n</sup>-güedi, chi nèhe cuendá ñàhá-gǎ xii-güedi. <sup>7</sup> Te nchòhó ndèé ñ<sup>n</sup> ñ<sup>n</sup> idi díquí-ndó yìndehu, núu xiǎ<sup>n</sup> càchí-í sǎ vǎ yùhú-ndó, chi cùnuu-gǎ-ndó dàcúxí tìlaá cuèi vǎi vihi-güedi.

*Ñáyíu na dàtúu núu dàva-gǎ ñáyíu sǎ ndécú ndìhí-yu Xítohó Jesucristú*  
(Mt. 10:32-33; 12:32; 10:19-20)

<sup>8</sup> Te na càchí tnúhu-í xii-ndo sǎ ñuu na dàtúu-ndo ñúú dàva-gǎ ñáyíu sǎ ndécú ndìhí ñàhá-í xii-ndo. Te duca<sup>n</sup> te tnàhá yùhú Tée cùu ñaní tnàhá-ndó nchàa-ndo datúu-í núu nchàa cue espíritú xínú cuèchi núu Yǎ Ndiǒxí sǎ nchòhó ndécú ndìhí ñàhá-ndo xii-í. <sup>9</sup> Dico núu na cùñaha-ndo xii ñáyíu sǎ ñà túu ndècu ndìhí ñàhá-ndo xii-í, te ñi-ni duca<sup>n</sup> càda yùhú Tée cùu ñaní tnàhá-ndó nchàa-ndo, chi cùñaha-í xii cue espíritú xínú cuèchi núu Yǎ Ndiǒxí sǎ ñà túu ndècu ndìhí ñàhá-í xii-ndo.

<sup>10</sup> Te ndèdani cà ñáyíu na càhá<sup>n</sup> cuèhé cuendá yùhú Tée cùu ñaní tnàhá-ndó nchàa-ndo, te cada càhnu iní ñàhá Yǎ Ndiǒxí xií-yu. Dico ñáyíu na càhá<sup>n</sup> cuèhé cuendá Espíritú Yǎ Ndiǒxí, te ñáyíu-á<sup>n</sup> vǎ càdá càhnu iní ñàhá-gǎ xií-yu.

<sup>11</sup> Te òré ná càndeca ñàhá-güedé xii-ndo quihí<sup>n</sup> veñúhu, àdi núu cuè tée cùchiu<sup>n</sup>, te ni vǎ cání ìní-ndó ñuu nása cunduú tnúhu cùñaha-ndo xii-güedé, te ni vǎ cání ìní-ndó ñuu ná tnúhu ñàdànchocáva-ndo ñuu ná tnúhu na cùñaha-güedé xii-ndo, <sup>12</sup> chi òré-nǎ te mee Espíritú Yǎ Ndiǒxí dàcàhu iní ñàhá-xí xii-ndo tnúhu cùñaha-ndo xii-güedé —càchí-gǎ xáha<sup>n</sup>-gǎ xii-güedé.

### *Cuendá ñ<sup>n</sup> tée cuica*

<sup>13</sup> Te ñ<sup>n</sup> tée ñùhu tnàhá tnuú ñáyíu-á<sup>n</sup> ñí xáha<sup>n</sup>-dè xii Jèsús:

—Mèstrú, cùñaha xii ñaní-í sǎ ná chidava-dé sǎ ñí dándõ tǎtá-ndí cuu cuendá-ndí —càchí-dé xáha<sup>n</sup>-dè xii-gǎ.

<sup>14</sup> Te Jèsús ní xáha<sup>n</sup>-gǎ xii-dé:

—¿Te ná cuendá duca<sup>n</sup> càhá<sup>n</sup>-n? Te ñà díú chiu<sup>n</sup>-á<sup>n</sup> vèxi-í cada-í, chi ñà díú tée cùchiu<sup>n</sup> cuu-í —càchí-gǎ xáha<sup>n</sup>-gǎ xii-dé.

<sup>15</sup> Te xáha<sup>n</sup>-gǎ xii nchaa ñáyíu xíndecu-á<sup>n</sup>:

—Nchaa nchòhó ñáyíu ndèdóho nchaa tnúhu càhá<sup>n</sup>-í ío váha cada cuendá-ndó, te vǎ cání ìní-ndó nǎndi nducu-ndo cùndecu ndìhí-ndo, chi cuèi vǎi vihi na nihí-ndó cùndecu ndìhí-ndo, dico vǎ chindèe ñàhá-xi cudíi-ndo cùndecu-ndo ñuyíú-a —càchí-gǎ xáha<sup>n</sup>-gǎ xií-yu.

<sup>16</sup> Te dàtnùní ní ngüíta-gǎ cání-gǎ ñ<sup>n</sup> cuendú ñú-yu cuendá tecú tnùní-yu tnúhu-gǎ, te xáha<sup>n</sup>-gǎ:

—Í<sup>n</sup> tée cuica sùúní ñí cuu nchaa tatá ní xitu-dé núu ñùhú-dè. <sup>17</sup> Te ní ngüíta-dé sání ìní-dé: “¿Te nása cada-í? Te ñà túu ndèé nataxúha-í nchaa sǎ ñí xitu-í”, duha ní sani ìní-dé.

<sup>18</sup> Te dàtnùní ní sáha váha tucu-dé cuendá nàcuáa cada-dé, te ní cachí-dé: “Duha na cunduú, dangòyo-í yacá-í, te ndada càhnu-gǎ-í, te xití-xi nataxúha-í nchaandi túhú sǎ ñí xitu-í, ndìhí nchaa dàva-gǎ sǎ ndécú ndìhí-í. <sup>19</sup> Te sǎtá dúcá<sup>n</sup>, te cachí-í: Ío vǎi sǎ ndécú ndìhí-í, te cudíi-xi cuèhé cuíá, te vitna ndetatú-í, te coho-í te caxi-í cada-í, te nǎndi-gǎ cada-í cuendá cudíi ìní-í cundecu-í, duha quesaha-í”, càchí-dé.

<sup>20</sup> Dico Yǎ Ndiǒxí ní xáha<sup>n</sup>-gǎ xii-dé: “Yòhó, ñà túu nǎndìhí sǎ sání ìní-n, chi yùhú càchí-í sǎ niú vitna cuú-n, te nchaa sǎ ndécú ndìhí-n ¿yoo cuu sǎ váha xii-a<sup>n</sup>-i?”, càchí-gǎ xáha<sup>n</sup>-gǎ xii-dé. <sup>21</sup> Duha yáha nchaa ñáyíu nǎndi sání ìní-xi cundecu ndìhí-xi ñuyíú-a, dico ñáyíu-á<sup>n</sup> ío ndàhú-yu chi ñà túu nǎ nduu táhú-yu núu Yǎ Ndiǒxí cundecu ndìhí-yu —càchí Jèsús xáha<sup>n</sup>-gǎ xií-yu.

*Yá Ndiõxí xító-gă nchaa ñáyiu sàndáá iní ñáhá xì-gá*  
(Mt. 6:25-34)

<sup>22</sup> Te ní xáha<sup>n</sup> Jèsús xii cue téé xica cuu ndihí-gá:

—Te na càchí tnúhu-í xii-ndo sã vã ïo cani iní-ndó nõu nása cundecu-ndo, àdi nása níhí-ndó sã cáxí-ndó, àdi nása níhí-ndó dõó cuihnu-ndo. <sup>23</sup> Chi cùnũu-gá mée-ndó dàcúúxí sã nchító-ndó, te duca<sup>n</sup> yìiqui cuñú-ndó cùnũu-gá-xi dàcúúxí dõó sácũhnu-ndo. <sup>24</sup> Te chí cuãha cuendá nàcuáa quide cue tícácá, chi ni ñà túú chihi-güedi tatá cuu itú natahu-güedi te ni ñà túú ndèé nútñi yacá-güedi, te nihí-güedi xèxi-güedi, chi Yá Ndiõxí xító ñàha-gá xii-güedi. ¡Te nchòhó cùnũu-gá-ndó dàcúúxí nchàa cue quitì ndava! <sup>25</sup> Te cuèi nándi sá sání vèhi iní-ndó ndècu-ndo, dico ñà ndácú-ndó càda-ndo nacuáa cuehnu-ndo cuèdicó ì<sup>n</sup> yìiqui-gã. <sup>26</sup> Te núu ni sã lúhá xǎ<sup>n</sup> ñà ndácú-ndó càda-ndo, ¿te ná cuendá ïo sàni iní-ndó cuendá nchaa sá cuini-ndó ñihí-ndó cundecu ndihí-ndo?

<sup>27</sup> Te chí cadá cuendá nàcuáa sàhnu ì<sup>n</sup> tnu itá, chi ni ñà túú quide chiũ-xi, te ni ñà túú quèhe-xi idi. Te na càchí tnúhu-í xii-ndo sã ndíi Salòmón ïo vii ní cáa nchaa sá ni xíndecu ndihí ndíi, dico vii-gá tucu càa nchaa itá dàcúúxí nchàa sá ñi xíndecu ndihí ndíi. <sup>28</sup> Te cùhú sã ïó vitna tnaa-ni cùdíi-xi te sàhmí-yu, te cuèi duca<sup>n</sup> dico ïo vii càdúha Yá Ndiõxí nchaa cùhú-ã<sup>n</sup>. ¡Te nchòhó ïo cùnũu-ndo dàcúúxí nchàa cùhú-ã<sup>n</sup>, núu xǎ<sup>n</sup> ïo xító ñàha-gá xii-ndo, te dícó yica cùu iní-ndó sàndáá iní-ndó-gã! <sup>29</sup> Te vã ïo canchicú<sup>n</sup> nihnu-ndo sã cóhó sã cáxí-ndó, te ni vã dándihú-ndó ìni-ndó nõu nása cada-ndo nihí-ndó. <sup>30</sup> Chi nchaa ñáyiu ñà túú sàndáá iní ñáhá xì Yá Ndiõxí duca<sup>n</sup> mée-ni sá cóhó sã cáxí-yu xica nchicú<sup>n</sup> nihnú-yu. Dico mee Tãtá-ó Dütú Ndiõxí sa nàha-gá nándi cùu sá xíní ñũhu-ndo, te taxi-gá. <sup>31</sup> Te cada-ndo nchàa nacuáa càhá<sup>n</sup> Yá Ndiõxí Yaá yíndàha ñàha xii-ndo, te duca<sup>n</sup> te taxi-gá nchaa sá xíní ñũhu-ndo.

*Cuendá sá vãha nduu táhú-ó nõu Yá Ndiõxí*  
(Mt. 6:19-21)

<sup>32</sup> Te vã yùhú nchòhó cue téé ndècu ndihí-í cuèi ïo sacú-ndó, chi Tãtá-ó Dütú Ndiõxí ní cachí-gá sá ndúú táhú-ndó cundecu-ndo núu ndécú-gã taxi tnùní-ndó tnàhá-ndó. <sup>33</sup> Te chí dícó nchàa sá ndécú ndihí-ndo, te chí cuãha nchaa ñáyiu ndàhú díhú<sup>n</sup>-ndó ñáyiu xini ñũhu, te cada váha-ndo cundecu-ndo, te duca<sup>n</sup> te nduu táhú-ndó sã ïo-gá vãha núu Yá Ndiõxí cundecu ndihí-ndo, te xǎ<sup>n</sup> vã cúú tũhú tnàhí-gá-xi, te ni vã ndíhí nihnu-gá-xi, te ni ñadúhú vã ndácú-güedě duhu-güedě, te ni tiquidi vã quée-dí. <sup>34</sup> Te núu xǎ<sup>n</sup> cúú cuendá-ndó ñà, te ñũu-ni xǎ<sup>n</sup> ñũhú ìni-ndó, á<sup>n</sup> te núu mee-ni sã ndécú ñũyíú-a ndècu ndihí-ndo, te ñũu-ni nchaa xǎ<sup>n</sup> ñũhú ìni-ndó.

*Xini ñũhu-xi quíhi iní-ó cundecu-o*

<sup>35-36</sup> Te ïo quíhi iní-ndó cundecu-ndo, te cada-ndo dàtná quidé dàva cue téé xínu cuechi sacúndecu túha-güedé cuèi nání òré-á<sup>n</sup> ndétú-güedě pàtróó<sup>n</sup>-güedě ná òré nasáá-dé sá cuahá<sup>n</sup>-dé vico tnãndaha. Te núu niú te sa cúú cáyú-ni ñũhú-güedé sá cùndètu ñàha-güedé, chi òré ná nasáá-dé dacàsa<sup>n</sup>-dé yuyèhe, te ndíhi-ni nacaá<sup>n</sup>-güedé ndíhu-dé. <sup>37</sup> Te váha táhú nchaa cue téé xínu cuechi-á<sup>n</sup>, chi ndècu túha-ni-güedé ndétú-güedě ndéé òré ní nasáá pàtróó<sup>n</sup>-güedě, te na càchí tnúhu ndáá-í xii-ndo sã òré ná nasáá pàtróó<sup>n</sup>-güedě-á<sup>n</sup> te chihi ñàha-dě mèsá xii-güedé, te ndacá<sup>n</sup> ndee-dé dóó níhnú-dě núu yìiquí-dě, te ngúita-dé cani-dé cóhó-güedě cuendá caxi-güedé. <sup>38</sup> Te ñũu-ni duca<sup>n</sup> càda-dé cuèi dàva niú, àdi tacuĩhndá-gá, te núu ñà túú xidí-güedé òré nasáá-dé, te cue téé xínu cuechi-á<sup>n</sup> ïo váha tnàhá-güedé. <sup>39</sup> Te núu dícó ì<sup>n</sup> téé cùu xítóhó ì<sup>n</sup> vehe xíní-dé ná òré quíhu ñadúhú vehe-dé ñà, te quíhi iní-dé te vã cùdú-dé, te vã dàñá-dě nacaá<sup>n</sup>-güedé yuyèhe-dé quíhu-güedé duhu-güedě. <sup>40</sup> Te nchòhó tucu

nchaa-ni nduu quihí iní-ndó cùndecu túha-ndo, chi na cuáhá<sup>n</sup> nduu ñá túú yíhi iní-ndó, te quixi tucu yúhú Tée cùu ñani tnáhá-ndó nchaa-ndo — cachi-gá xáha<sup>n</sup>-gá xii-güedé.

*Cue tée quide ndáá ndihí cue tée ñá túú quide ndáá*

*(Mt. 24:45-51)*

<sup>41</sup> Te té Pèlú ní xicá<sup>n</sup> tnúhú-dě núú Jèsús, te xáha<sup>n</sup>-dě:

—Mèstrú, ¿te tnúhu ní cáhá<sup>n</sup>-n-ã<sup>n</sup> cùu-xi mee-ni cuendá nchúhú ã<sup>n</sup> cuendá nchaa ñáiyu? —cächí-dé xáha<sup>n</sup>-dě xii-gá.

<sup>42</sup> Te Jèsús ní xáha<sup>n</sup>-gã:

—Cáhá<sup>n</sup>-í cuendá ñáiyu quide váha dàtná quidé ñ<sup>n</sup> tée tàxi tnuní ñáhá xii cue ñáiyu xínu cuechi ndecu vehe patróo<sup>n</sup>-xi, chi tée-á<sup>n</sup> ïo váha tècú tnùní-dé, te quide-dé nchaa nàcuáa cáhá<sup>n</sup> patróo<sup>n</sup>-dě, te dàcaxi-dé cue ñáiyu xínu cuechi oré tàú-xi caxí-yu. <sup>43</sup> Te núu duca<sup>n</sup> quide váha tée tàxi tnuní ñáhá xii cue ñáiyu xínu cuechi-á<sup>n</sup> ñá, te ïo váha tnáhá-dé òré násáá patróo<sup>n</sup>-dě núu ndèé cuáhá<sup>n</sup>-dé.

<sup>44</sup> Te na cächí tnúhu ndáá-í xii-ndo sã tée quide ndáá táxi tnùní ñáhá xii cue ñáiyu xínu cuechi-á<sup>n</sup> cũñaha-ñá patróo<sup>n</sup>-dě xii-dé sã ncháándi túhú-ñá sã ndécú ndihí-dé quindaha-dé.

<sup>45</sup> Dico núu tée tàxi tnuní ñáhá xii cue ñáiyu xínu cuechi-á<sup>n</sup> ná caní iní-dé sã cùyàa patróo<sup>n</sup>-dě vá násáá ndihí-ni-dé ñá, te ngüíta-dé cani-dé nchaa ñáiyu xínu cuechi, cuëi tée cuëi ñadihí, te ngüíta-dé caxi-dé coho-dé, te dàxíni-dé méé-dé, <sup>46</sup> te nduu ñá túú yíhi iní-dé te násáá patróo<sup>n</sup>-dě, te dandòho ñaha patróo<sup>n</sup>-dě-á<sup>n</sup> xii-dé, te daquihí<sup>n</sup> ñáhá-dé xii-dé núu ndécú ñáiyu ñá túú ní quide ndáá.

<sup>47</sup> Te dava cue tée xínu cuechi xiní-güedé nàcuáa cuiní patróo<sup>n</sup>-güedé cada-güedé te ñá túú quide-güedé, te ni ñá túú cuiní-güedé cundecu túha-güedé cundetu-güedé patróo<sup>n</sup>-güedé, te nchaa cue tée duca<sup>n</sup> xíquide dandòho ñaha patróo<sup>n</sup>-güedé, chi ñani vñhi-güedé. <sup>48</sup> Te dava cue tée xínu cuechi ñá túú xiní-güedé nàcuáa

cuiní patróo<sup>n</sup>-güedé cada-güedé, te ní quide-güedé sã néñúú-güedé ñ<sup>n</sup> sã ñá túú tàú-güedé cada-güedé ñá, te cue tée-á<sup>n</sup> sacú-gá dandòho ñaha patróo<sup>n</sup>-güedé, chi sacú-gá ñani-güedé. Te ñáiyu cùtnuní iní-xi nàcuáa cuiní Yã Ndiõxí cadá-yu, te ñiu-ni duca<sup>n</sup> tàú-yu cadá-yu nàcuáa cuiní-gá. Te ñáiyu vai-gá tècú tnùní nàcuáa cáhá<sup>n</sup>-gá, te ñiu-ni duca<sup>n</sup> vai nchaa sã cáhá<sup>n</sup>-gá tàú-yu cadá-yu.

*Ñá túú cùu ñ<sup>n</sup>nuu ñáiyu*

*(Mt. 10:34-36)*

<sup>49</sup> Te yúhú véxi-í ñuyíú-a cuendá cutnùní iní ñáiyu nàcuáa cada ñaha Yã Ndiõxí xii-yu, ¿te cuiní-í sã ndihí-ni cada-gá nàcuáa sàni iní-gá! <sup>50</sup> Te yúhú ïo vai tnúhu sàni iní-í, ¿chi sáá nduu te ïo ndoho-í, te ñiu-ni xíã<sup>n</sup> cuhu<sup>n</sup> iní-í ndéé ná sáá nduu duca<sup>n</sup> yáha-í! <sup>51</sup> Te nchòhó vá caní iní-ndó sã yúhú véxi-í ñuyíú-a te cundecu ndihí tnàha váha-ni ñáiyu, te ñáhá chi da ngüíta-yu vá cúú ñ<sup>n</sup>nuú-yu cundecú-yu. <sup>52</sup> Te ndéé není vitna ngüíta ñáiyu vá cúú ñ<sup>n</sup>nuú-yu cundecú-yu, te na càda-o cuendá te núu úhú<sup>n</sup> ñáiyu xíndecu ñ<sup>n</sup>-ni vehe, te vá cúú ñ<sup>n</sup>nuu-gá-yu, chi úní-yu ndatnúhu-yu te nàá-yu ndihí úú-gá-yu, àdi ñáiyu úú-á<sup>n</sup> ndatnúhu-yu te nàá-yu ndihí ñáiyu úní-á<sup>n</sup>. <sup>53</sup> Te dava cue tée cùu tátá vá cúú ñ<sup>n</sup>nuu-gá-güedé ndihí déhe ducu<sup>n</sup>-güedé, te ni dàva cue ñáiyu cùu náná vá cúú ñ<sup>n</sup>nuu-gá-yu ndihí déhe yòcò-yu, te ni sãnu-yu vá cúú ñ<sup>n</sup>nuu ndihí-gá-yu. Te duca<sup>n</sup> cadá-yu chi davá-yu quindáá iní ñáhã-yu xii-í, te davá-yu vá quindáá iní ñáhã-yu — cächí-gá xáha<sup>n</sup>-gã xii-güedé.

*Ñáiyu cùtnuní iní-xi nàcuáa quide-xi ñuyíú ndihí andiu*

*(Mt. 16:1-4; Mr. 8:11-13)*

<sup>54</sup> Te Jèsús ní xáha<sup>n</sup>-gã xii nchaa ñáiyu xíndecu-á<sup>n</sup>:

—Te nchòhó òré ndéhé-ndó ndànchita vícò ndàa xio quée nchíanchii, te cächí-ndó sã cúú<sup>n</sup> dãú, te ñiu duca<sup>n</sup> ndisa quide-xi. <sup>55</sup> Te òré ná quène táchí ndàa xio

datni nacuaa quene nchíanchii, te cächí-ndó sã ïo cada ihni-xi, te ðiu duca<sup>n</sup> ndísa quide-xi. <sup>56</sup> Te nchòhó ïo váha cùtnuní iní-ndó nàcuáa quide-xi andiu ndíhi ñuyíú, ¿te ná cuendá quidé-ní-ndó sã ñã tècú tnùní-ndó nàcuáa quide Yá Ndiõxí vitna? Te sá dúcá<sup>n</sup> quide-ndo-á<sup>n</sup> ïo dándahú-ndó mèe-ndo sá ïo váha cùtnuní iní-ndó, chi ñã ndàá sá cùtnuní iní-ndó.

*Nducu-o nàcuáa nucúndecu ndíhi váha-o ñáyiú cùu úhú iní ñáhá*

(Mt. 5:25-26)

<sup>57</sup> Te nchòhó, ¿ná cuendá ñã túú dándixi túu-ndo iní-ndó càda-ndo mee-ni sá váha sá tàú-ndó càda-ndo-i? <sup>58</sup> Te núu ïó ñ<sup>n</sup>-ndo ní sacá<sup>n</sup> cuéchi ñáyiú cuendá-ndó cuendá ñ<sup>n</sup> sá ní quide-ndo, te cuáhá<sup>n</sup>-ndó ndíhi-yu núu tõe cùchiu<sup>n</sup>, te nini ñuhu-ndo ndíhi-yu ichi, te nducu-ndo nàcuáa cada-ndo nàcáhá<sup>n</sup> cáhnú iní tnáhá-ndó ndíhi-yu cuendá sá vã cándeca ñaha-gá-yu quíhí<sup>n</sup> núu tõe cùchiu<sup>n</sup>, chi núu duca<sup>n</sup> na càdá-yu te tõe cùchiu<sup>n</sup>-á<sup>n</sup> nachíhi ñaha-dẽ ndaha cue tõe cùu poleciá, te cue tõe-á<sup>n</sup> chíhi ñaha-güedẽ vecaá xii-ndo. <sup>59</sup> Te na cächí tnúhu-í xii-ndo sã núu na ngáva-ndo vecaá, te vá càcu-ndo te núu vá náchãhu-ndo nchàa sá tàú-ndó —cächí-gá xáha<sup>n</sup>-gã xií-yu.

### 13

*Xini ñuhu-xi natuha-o ichi Yá Ndiõxí*

<sup>1</sup> Te ðiu-ni òré-á<sup>n</sup> ní ngúnutnii ñ<sup>n</sup> úú ñáyiú núu Jèsús caní-yu cuendú núu-gã nàcuáa ní quide ñaha té Pilatú xii cue tõe distrítú Galileá cue tõe ní sahní quiti nduu táhú Yá Ndiõxí, te mei òré ní sahní-güedé cue quiti-á<sup>n</sup> ní táuchíú<sup>n</sup> tẽ Pilatú cue sandádú-dé ní sahní-güedé cue tõe Galileá-á<sup>n</sup>, te ní xica níñi-güedẽ núu ñuhú ndíhi níñi cue quiti-á<sup>n</sup>, te ní nadácánuu-xi. <sup>2</sup> Te Jèsús ní xáha<sup>n</sup>-gã xií-yu:

—Te núu nchòhó sání iní-ndó sã sá dúcá<sup>n</sup> ní yáha cue tõe distrítú Galileá-á<sup>n</sup> te cùu-güedé cue tõe ndècu vihi-gá cuéchi-xi dàcúxí cuè tõe ñuú-güedé ñã. <sup>3</sup> Te na cächí tnúhu-í xii-ndo sã ñáhá. Te núu nchòhó vá ndíxí cuéchi iní-ndó cuendá nchaa sá

cuèhé sá dúhá quide-ndo ndecu-ndo ñã, te tnáhá nchaa nchòhó cuíta nihnu-ndo te núu vá nátnii-ndo ichi Yá Ndiõxí. <sup>4</sup> Te núu nchòhó sání iní-ndó sã ñáyiú sáhú<sup>n</sup> úní ní xíhí ní táú ñáhá vèhe ducú<sup>n</sup> Silòé ïo-gá ndécú cuéchi-yu dàcúxí nchàa ñáyiú xíndecu ñuú Jerusàlén ñã, <sup>5</sup> te na cächí tnúhu tucu-í xii-ndo sã ñáhá. Te núu nchòhó vá ndíxí cuéchi iní-ndó cuendá nchaa sá cuèhé sá dúhá quide-ndo ndecu-ndo ñã, te tnáhá nchaa nchòhó cuíta nihnu-ndo te núu vá nátnii-ndo ichi Yá Ndiõxí —cächí-gá xáha<sup>n</sup>-gã xií-yu.

*Yutnu ngüxí ñã túú cùu sávidí-xi*

<sup>6</sup> Te Jèsús ní caní tucu-gá ñ<sup>n</sup> cuendú núu-yu nàcuáa tecú tnùní-yu tnúhu-gá, te xáha<sup>n</sup>-gã:

—Ñ<sup>n</sup> tõe nùtnii ñ<sup>n</sup> yutnu ngüxí núu ñuhú-dẽ, te cuáhá<sup>n</sup> ndéhé-dẽ núu ní cuu<sup>n</sup> sávidí-xi ní cùu, te ní ñ<sup>n</sup> ñã túú ní cùu<sup>n</sup>. <sup>7</sup> Te ní xáha<sup>n</sup> tõe-á<sup>n</sup> xii tõe ndèé ñuhu-dé: “Ñaha-ñ sá vitna ní cuu úní cuíá quíxí còto-í yutnu ngüxí-a te ñã túú xiní-í ní ñ<sup>n</sup> sávidí-xi. Te quehdé-n vitna, chi àú<sup>n</sup> nã cuu nùtnii-xi quide tneñu-xi núu ñuhu-á<sup>n</sup>”, cächí-dé xáha<sup>n</sup>-dẽ xii tõe ndèé ñuhu-dé-á<sup>n</sup>. <sup>8</sup> Te tõe ndèé ñuhu-á<sup>n</sup> ní xáha<sup>n</sup>-dẽ: “Pàtróon, daña na cùhnu-xi cuíá vitna-ná, te na nàdatayá-í ñuhu núu sàhá-xi, te chíhi-í sahá<sup>n</sup>. <sup>9</sup> Te duca<sup>n</sup> te cudana cuu<sup>n</sup> sávidí-xi, àdi núu ñã túú ní cùu<sup>n</sup> sávidí-xi ñã te téhdé-nã-xi”, cächí-dé xáha<sup>n</sup>-dẽ xii pàtróon-dẽ —cächí-gá xáha<sup>n</sup>-gã xií-yu.

*Jèsús quidé tãtna-gá ñ<sup>n</sup> ñadíhi ní nduu cueyi sãtá-xi nduu ndètatú ñáyiú*

<sup>10</sup> Te ñ<sup>n</sup> xito cùu-xi nduu ndètatú ñáyiú, te yíhi Jèsús ñ<sup>n</sup> veñúhu dànehé-gá ñáyiú. <sup>11</sup> Te xía<sup>n</sup> ndécú ñ<sup>n</sup> ñadíhi ní cuu sáhú<sup>n</sup> úní cuíá sã cùhú-a<sup>n</sup> yíhi ñaha espíritú cùndíhi yucu ñávãha xii-a<sup>n</sup>, te xía<sup>n</sup> ní ndada cueyi-xi sãtá-a<sup>n</sup>, te ñã dáñá-gã-xi nucúnutnii ndáá-a<sup>n</sup>. <sup>12</sup> Te òré ní xiní ñáhá Jèsús xii-a<sup>n</sup> te ní cana ñaha-gã, te xáha<sup>n</sup>-gã:

—Yòhó ñaha cùhú, ndúha-n cuèhé tnáhá-n —cächí-gá xáha<sup>n</sup>-gã xii-a<sup>n</sup>.



13 Te ní dácàá-gá ndaha-gá ní tendaha ñàha-gá xii-a<sup>n</sup>, te òré-ni-á<sup>n</sup> ní ndúha-a<sup>n</sup> te ní nucúnutnî ndáá-a<sup>n</sup>, te ní nguíta-a<sup>n</sup> ní cachí-a<sup>n</sup> sá ïo càhnu cuu Yá Ndiõxí. 14 Dico téè tàxi tnuní veñúhu ní cudéé<sup>n</sup>-dè sá dúcá<sup>n</sup> ní quide Jèsús ní quide tátna-gá ñaha cùhú-á<sup>n</sup> nduu ndetátú-yu, te ní xáha<sup>n</sup>-dè xií-yu:

—Íó íñú nduu tàú-ó càda chiu<sup>n</sup>-o, te ndèdani càa nduu-á<sup>n</sup> quixi-ndo cùtátna-ndo, dico ñá díú ndùu cuu-xi nduu ndetátú-ó —càchí-dé xáha<sup>n</sup>-dè xií-yu.

15 Te ní xáha<sup>n</sup> Jèsús:

—Nchòhó chi ío dándahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó á<sup>n</sup>? 16 Te ñadîhí-a cùu-a<sup>n</sup> ñaní tnáhá ndîi Àbrahám, te dicó-ni sá yùcu ñávàha quide duha cùhú-a<sup>n</sup> ní cuu sáhú<sup>n</sup> úní cuiá, ¿te náa ñá túú xìni ñuhu-xi cutátna-a<sup>n</sup> cuèi cùu-xi nduu ndetátú-ó á<sup>n</sup>? —càchí-gá xáha<sup>n</sup>-gá xii-dé.

17 Te sá dúcá<sup>n</sup> ní cáhán Jèsús, núu nchaa cue téè cùu úhú iní ñáhá xii-gá ní cucaha<sup>n</sup> núu-güedè, dico nchaa dava-gá ñáyiu chi xícudîi iní-yu xîndéhè-yu nchaa sá vǎ yõo tnàhí ndàcu cada quide-gá.

*Cuèndá ndîquí<sup>n</sup> yutnu nàni mostázá (Mt. 13:31-32; Mr. 4:30-32)*

18 Te ní xáha<sup>n</sup>-gá xií-yu:

—Na càni-í ñ<sup>n</sup> cuèndú núu-ndó nàcuáa tecú tnùní-ndó nàcuáa cada-xi òré ndîhu ndaha ñàha Yá Ndiõxí xii-ndo. 19 ñ<sup>n</sup> téè ní quehe<sup>n</sup>-dé ndîquí<sup>n</sup> yutnu nàni mostázá te nèhe-dé cuáhán ní sacá<sup>n</sup>-dé núu ñúhú-dè te ní xínu-xi, te ní sahnu-xi ní cuu dùcú<sup>n</sup>-xi, te cue quiti ndàva núu tàchí cádùha-güedi tacá-güedi núu dìté-xi —càchí-gá xáha<sup>n</sup>-gá xií-yu.

*Nàcuáa quide levadurá (Mt. 13:33)*

20 Te ní xáha<sup>n</sup> tucu Jèsús xií-yu:

—Te na càchí tnúhu tucu-í xii-ndo nàcuáa cada tucu Yá Ndiõxí òré ndîhu ndaha ñàha-gá xii-ndo. 21 ñ<sup>n</sup> ñadîhí

ní quehe<sup>n</sup>-a<sup>n</sup> levadurá ní chihi-a<sup>n</sup> úní arróbá yuchi triú, te levadurá-á<sup>n</sup> ní quide-xi ní ndaa nihîi yusa<sup>n</sup>-á<sup>n</sup> —càchí-gá xáha<sup>n</sup>-gá xií-yu.

*Yuyèhe cuiñî*

*(Mt. 7:13-14, 21-23)*

22 Te ichi ñùhu Jèsús cuáhán-gá ñúu Jerusálén, te nchaa ñúu náhnú, ndîhi nchaa ñúu líhli ta yàha-gá duca<sup>n</sup> ta dànehé-gá ñáyiu tnúhu-gá cuáhán.

23 Te ñ<sup>n</sup> ñúu-á<sup>n</sup> ní xáha<sup>n</sup> ñ<sup>n</sup> téè xii-gá:

—Mèstrú, cuíní-í cáca<sup>n</sup> tnúhu-í ñ<sup>n</sup> tnúhu núu-n, ¿ndáá sá ïo sacú ñáyiu nánihí tàhú-á<sup>n</sup>? —càchí-dé xáha<sup>n</sup>-dè xii-gá.

Te Jèsús ní xáha<sup>n</sup>-gá xii-dé ndîhi nchaa ñáyiu:

24 —Cada-ndo sǎ nánihí tàhú-ndó, te tnî-ndo ichi Yá Ndiõxí, te ichi-gá-á<sup>n</sup> cúu-xí dàtná ñ<sup>n</sup> yuyèhe cuiñî, te càchí tnúhu-í xii-ndo sǎ ïo cuéhé ñáyiu cachí iní-yu quíhu-yu yuyèhe cuiñî-á<sup>n</sup> dico vá ndácü-yu. 25 Te na càni tucu-í ingá cuèndú núu-ndó nàcuáa tecú tnùní-ndó tnúhu càhán-í. Te òré ná ndàcuíñî téè cùu xítóhó vehe, te nacadí-dé yuyèhe, te nchaa nchòhó ñáyiu na quèndóo quehé dacàsa<sup>n</sup>-ndo yuyèhe, te quesaha-ndo cùñaha-ndo xii-dé: “Tátá, nacaá<sup>n</sup> yuyèhe na quíhu-ndí”, quesaha-ndo cùñaha-ndo xii-dé. Dico téè cùu xítóhó vehe-á<sup>n</sup> cùñaha-dè xii-ndo: “Ñá túú xìní-í nchòhó ndéè ñáyiu cùu-ndo”, duha cùñaha-dè xii-ndo. 26 Te dàtnùní nguíta nchòhó cùñaha-ndo xii-dé: “Nchúhú ní xexi ndîhi ñaha-ndí, te ní xihí ndîhi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cùñaha-ndo xii-dé. 27 Dico cachí tucu téè cùu xítóhó vehe-á<sup>n</sup> cùñaha-dè xii-ndo: “Sa ní cachí-í sá ñà túú xìní-í ndéè ñáyiu cùu-ndo. Te chí xócuíñî nchòhó ñáyiu ndècu ichi cuehé ichi duha núu ndècu-í”, quesaha-dè cùñaha-dè xii-ndo. 28 Te na sáa nduu dùca<sup>n</sup> cada-xi te quiní-ndó tǎ Àbrahám, ndîhi té Isàác, ndîhi té Jàcób, ndîhi nchaa cue téè ní xóo cáhán tnúhu Yá Ndiõxí, te nchaa cue téè-á<sup>n</sup> ndécú-güedè núu ndécú-gǎ táxí

tnùní-gá, te nchòhó quee tíhú-ndó nùú-gá sá tnùhu ñá túú ní cuíní cada ndáá, te dàvá-án ndàhyú-ndó te cuu rúhñú-nă núhu-ndo sã sätú iní-ndó cuëndá sá ndóhó-ndó. <sup>29</sup> Te dàvá-án quíhu nchaa ñáyiú ndi cùmí xio ñuyíú nùú ndécú Yá Ndiöxí táxí tnùní-gá caxí-yu ndihí-gá, te cundecú-yu ndihí-gá. <sup>30</sup> Te dava ñáyiú nchícúñ ñá túú cùnūu ndecu ichi Yá Ndiöxí vitna, ñáyiú-án sãá nduu te ío cunúú-yu. Te dava ñáyiú cùnūu ndecu ichi-gá vitna, ñáyiú-án sãá nduu te vá ío-gá cunúú-yu —càchí-gá xáha<sup>n</sup>-gã xií-yu.

*Jèsús ndàhyú-gá cuëndá ñáyiú ñuú Jerusàlén*

(Mt. 23:37-39)

<sup>31</sup> Te diu-ni nduu-ã<sup>n</sup> ñí quexìo ñí úú cue tée cùu fariséú núú ndécú-gã, te xáha<sup>n</sup>-güedě xii-gá:

—Quee-n ìha quíhí<sup>n</sup>-n nùu ndèé quíhí<sup>n</sup>-n, chi tée cùu Herodés cuíní-dé cahni ñaha-dě xii-n —càchí-güedě xáha<sup>n</sup>-güedě xii-gá.

<sup>32</sup> Te Jèsús ní xáha<sup>n</sup>-gã:

—Chí cuàhá<sup>n</sup> te cúñaha-ndo xii tée nèhe mañá-án sã càchí-í sá ná cùndedóho váha-dé ñí tnúhu càhá<sup>n</sup>-í, chi cùmání ñí úú-gá nduu cundecu-í xocàni-í nchaa espíritú cùndihí yucu ñávaha yìhi ñaha xii ñáyiú, te cada tátna-í nchaa dava-gá ñáyiú cùhú, te duca<sup>n</sup> te ndihí chùu-í, duha cúñaha-ndo xii-dé. <sup>33</sup> Dico dacuítí sã cùhú-í ichi ñí úú-gá nduu, te duca<sup>n</sup> te sáá-í núú quíhí<sup>n</sup>-í, chi vá cúú tnàhí cuú ñí tée càhá<sup>n</sup> tnúhu Yá Ndiöxí ingá ñuú, chi mei ñuú Jerusàlén cuú-güedě —càchí-gá xáha<sup>n</sup>-gã xii-güedě.

<sup>34</sup> Te ní xáha<sup>n</sup>-gã xii ñáyiú ñuú Jerusàlén:

—Nchòhó chi sàhni-ndo nchaa cue tée càhá<sup>n</sup> tnúhu Yá Ndiöxí, cue tée ní tendaha-gã véxi, te mee-ni ndihí yúú sàhni-ndó-güedě. ¡Te titní xito ní cuíní-í nadatàcá ñáhà-í xii-ndo dàtná nadatàcá ñí nchuxi cuè déhe-di sàquihí-güedi xiti ndíxí<sup>n</sup>-di, dico ñá ní cuíní-ndó, te duca<sup>n</sup>-ni sàni iní-í ndéé vitna! <sup>35</sup> Te chí cùndedóho tucu ingá tnúhu na càhá<sup>n</sup>-í-a: Yá Ndiöxí daña

ñaha-gá xii-ndo. Te na càchí tnúhu tucu-í xii-ndo sã vã quíní ñáhá-gã-ndó xii-í, dico sáá nduu te quíní ñáhá tucu-ndo, te nduu-ã<sup>n</sup> cachí-ndó sã ío càhnu cuu yúhú Yaá ní tendaha Dütú Ndiöxí véxi ñuyíú-a —càchí-gá xáha<sup>n</sup>-gã xií-yu.

## 14

*Jèsús quidé tãtna-gá ñí téé ñùhu cuiñu*

<sup>1</sup> Te duha ní cuu ñí nduu, nduu ndètatú ñáyiú chí ñí téé cùu fariséú cùnūu ní cáhá<sup>n</sup>-dé Jèsús vehe-dé caxi-gá, te cue téé ndècu vehe-dé ndéhé-güedě nùu nása cada-gá. <sup>2</sup> Te xiá<sup>n</sup> ndécú tnàhá ñí téé cùhú ñùhú-dě cuiñu. <sup>3</sup> Te Jèsús ní xicá<sup>n</sup> tnúhú-gã núú cuè téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí núú cuè téé cùu fariséú, te xáha<sup>n</sup>-gã:

—¿Cuu cada tátna-o ñí ñáyiú cùhú nduu ndètatú-ó ñí ñáhá? —càchí-gá xáha<sup>n</sup>-gã xii-güedě.

<sup>4</sup> Dico cue téé-án ñá túú tnàhí ní cáhá<sup>n</sup>-güedě. Te ní dácáá-gá ndaha-gá ní tendaha-gã téé cùhú-án ñí quide tátna ñaha-gã xii-dé, te ní xáha<sup>n</sup>-gã sá ná ñùhú-dé vehe-dé. <sup>5</sup> Te ní xicá<sup>n</sup> tnúhú-gã núú nchaa cue téé-án, te xáha<sup>n</sup>-gã:

—¿Te núu nchòhó ná ngáúnìhnu ñí búrru-ndo àdi ñí ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndetatu-ndó-ã<sup>n</sup>? —càchí-gá xáha<sup>n</sup>-gã xii-güedě.

<sup>6</sup> Te ñá túú ní ñíhí-güedě tnúhu na dànhocáva-güedě.

*Ñáyiú càhá<sup>n</sup>-yu quíhí<sup>n</sup> vico tnãndaha*

<sup>7</sup> Te ndèhe Jesús nàcuáa xiquide nchaa ñáyiú ndècu vico sá súúni ñí nacáxi-yu xilé sácõo nchihi cue téé cùnūu-gá conchihí-yu òré cuànguìhú-yu mèsá caxi-yu, núu ní xáha<sup>n</sup>-gã xií-yu:

<sup>8</sup> —Òré ná càhá<sup>n</sup> ñáhá ñí ñáyiú xii-ndo ñí vico tnãndaha, te vá cóó-ndó nùú xilé sácõo cue téé cùnūu-gá, chí núu duca<sup>n</sup> na càda-ndo, te cudana quexìo dava-gá ñáyiú cùnūu-gá dàcúúxí nchòhó. <sup>9</sup> Te ñáyiú ní cáhá<sup>n</sup> ñáhá xii-ndo-án quixi-yu te

cũñàhá-yu xii-ndo: “Chí cuñaha xilé núcõo nchihi-ndo-ã<sup>n</sup> ná cõnchihi ñáyiú ní quexiõ-a”, quesàhá-yu cũñàhá-yu xii-ndo. Te cũnín-ndó ñàhá cuẽi cùcaha<sup>n</sup> núú-ndó ndàcũíñí-ndó quíhí<sup>n</sup>-ndó ngõo-ndo nõú xilé xĩnutnĩ ndéé núú nĩ ndihí-ná ndàa sátá-xi. <sup>10</sup> Te yúhú cãchí-í sá òré ná cãhá<sup>n</sup> ñáhã-yu xii-ndo, te ngõo-ndo nõú xilé xĩnutnĩ ndéé núú nĩ ndihí-ná ndàa sátá-xi chí cuèndá òré ná quèxio ñáyiú ní cãhá<sup>n</sup> ñáhã xii-ndo, te cũñàhá-yu xii-ndo: “Nchòhó cue ñáyiú cãhá<sup>n</sup> ndihí-í, chí yãha núú xilé sácõo cue tée cùnuu-gã coo-ndo”, duha cũñàhá-yu xii-ndo. Te duca<sup>n</sup> te cada nínu ñaha nchaa ñáyiú yìhi ndihí-ndo mesá. <sup>11</sup> Te nchaa ñáyiú na càda nínu mee-xi, te ñáyiú-á<sup>n</sup> ñà túú cùu nínu-yu, te nchaa ñáyiú ñà túú quide nínu mee-xi, ñáyiú-á<sup>n</sup> cúú nĩnu-yu — cãchí-gã xáha<sup>n</sup>-gã xii-yu.

<sup>12</sup> Te dãtnùní ní xáha<sup>n</sup>-gã xii tée ní cãhá<sup>n</sup> ñáhã xii-gã:

—Te yòhó òré cũnín-n càda-n ì<sup>n</sup> vico, te vá cãhá<sup>n</sup>-n mée-ni cue tée cãhá<sup>n</sup> ndihí-n, ní cuè ñaní-n, ní cuè ñáyiú cùu ñaní tnáhã-n, ní cuè ñáyiú cuica ndècu yatni ndihí-n, chí ñáyiú-á<sup>n</sup> duca<sup>n</sup> càdá-yu ì<sup>n</sup> nduu cãhá<sup>n</sup> ñáhã-yu xii-n te ndéyãhu-ni sá nĩ quidé-n-yu. <sup>13</sup> Te ñáhã chí òré ná càda-n ì<sup>n</sup> vico, te cãhá<sup>n</sup>-n ñáyiú ndàhú, ndihí ñáyiú ñà cúú càca, ndihí ñáyiú yacua, ndihí ñáyiú cuàá. <sup>14</sup> Te núú duca<sup>n</sup> na càda-n, te cuu-xi ì<sup>n</sup> sá vãha xii-n, chí ñáyiú-á<sup>n</sup> vã nihí-yu nacoto ñàhá-yu xii-n, dico na cùú-n te sáá nduu ndòto-n ndihí nchaa ñáyiú ní quide ndáá ní xĩndecu ichi Yá Ndiõxí, te dàvá-á<sup>n</sup> taxi-gã sá ndúú tàhú-n —cãchí-gã xáha<sup>n</sup>-gã xii-dé.

*Nàcuáa xĩquide ñáyiú òré cãhá<sup>n</sup> ñáhã ì<sup>n</sup> tée cada vico (Mt. 22:1-10)*

<sup>15</sup> Te sá dúcã<sup>n</sup> nĩ cãhá<sup>n</sup> Jèsús ní tecú dóho cue tée yìhi mesá-á<sup>n</sup>, núú ní xáha<sup>n</sup> ì<sup>n</sup>-dé xii-gã:

—Ío váha tàhú nchaa ñáyiú na càxi nchaa sá cuãha ñaha Yá Ndiõxí nduu na sãa-yu cundecú-yu núú ndécú-gã

táxi tnùní-gã —cãchí-dé xáha<sup>n</sup>-dẽ xii-gã.

<sup>16</sup> Te Jèsús ní xáha<sup>n</sup>-gã xii-dé:

—Í<sup>n</sup> tée quide-dé vico, te ní dátècú tnúhu-dé cuéhé víhí ñáyiú quíhí<sup>n</sup>-yu caxí-yu. <sup>17</sup> Te òré sa ní cuu-ná sá cãxí-yu, te ní xáha<sup>n</sup>-dẽ xii tée xĩnu cuechi núú-dẽ sá quíhí<sup>n</sup>-dé cũñaha-dẽ quíhí<sup>n</sup>-yu caxí-yu, chí sa ndècu túha nchaa sá cãxí-yu. <sup>18</sup> Dico nchaa-yu ní xáhá<sup>n</sup>-yu xii-dé sá ná cáda càhnu iní tée cãhá<sup>n</sup> ñáhã-ã<sup>n</sup>, chí ñà túú cùyáchí-yu quíhí<sup>n</sup>-yu vico-á<sup>n</sup>. Te tée ní cãhá<sup>n</sup> ndihí tée xĩnu cuechi-á<sup>n</sup> dĩhna ní xáha<sup>n</sup>-dẽ: “Íchí nĩ saa<sup>n</sup>-í ì<sup>n</sup> pedàsú ñuhu, te quíhí<sup>n</sup> ndéhè-í tnaví, núú xiã<sup>n</sup> cãhá<sup>n</sup> ndàhú-í núú-n sã cũñaha-n xii tée cãhá<sup>n</sup> ñáhã-ã<sup>n</sup> xii-í sá ná cáda càhnu iní-dé chí ñà túú cùyáchí-í”, cãchí-dé xáha<sup>n</sup>-dẽ. <sup>19</sup> Te ìngã-dé ní xáha<sup>n</sup>-dẽ: “Ní saa<sup>n</sup>-í úhú<sup>n</sup> yùndá ndicutu sa xitu, te cue quiti-á<sup>n</sup> quíhí<sup>n</sup>-í coto ndéé-í-güedi vitna, núú xiã<sup>n</sup> cãhá<sup>n</sup> ndàhú-í núú-n sã cũñaha-n xii tée cãhá<sup>n</sup> ñáhã-ã<sup>n</sup> xii-í sá ná cáda càhnu iní-dé chí ñà túú cùyáchí-í”, cãchí-dé xáha<sup>n</sup>-dẽ. <sup>20</sup> Te ìngã tucu-dé ní xáha<sup>n</sup>-dẽ: “Íchí nĩ tnándaha-í nõu xiã<sup>n</sup> vá cùyáchí-í quíhí<sup>n</sup>-í”, cãchí-dé xáha<sup>n</sup>-dẽ. <sup>21</sup> Te òré ní nasáá tée xĩnu cuechi-á<sup>n</sup>, te ní nacani tnúhu-dé núú pãtróó<sup>n</sup>-dẽ nchaa nàcuáa ní xáhá<sup>n</sup>-yu. Te ní cudéé<sup>n</sup> tée cùu pãtróó<sup>n</sup>-ã<sup>n</sup>, te ní xáha<sup>n</sup>-dẽ xii tée xĩnu cuechi núú-dẽ-á<sup>n</sup>: “Yáchí cuáhã<sup>n</sup> nanducu-n nchaa ñáyiú ndàhú, ndihí nchaa ñáyiú ñà cúú càca, ndihí nchaa ñáyiú yacua, ndihí nchaa ñáyiú cuàá, te ndèni ní cuu na nãníhĩ-n-yu te candecá-n-yu quixi”, cãchí-dé xáha<sup>n</sup>-dẽ. <sup>22</sup> Te sátá nĩ nasáá tée xĩnu cuechi-á<sup>n</sup>, te ní xáha<sup>n</sup>-dẽ xii pãtróó<sup>n</sup>-dẽ: “Pãtróó<sup>n</sup>, sa ní quide-í chiú<sup>n</sup> ní tàhú-n, dico ndècu-gã núú cóo-yu”, cãchí-dé xáha<sup>n</sup>-dẽ. <sup>23</sup> Te tée cùu pãtróó<sup>n</sup>-dẽ-á<sup>n</sup> nĩ xáha<sup>n</sup>-dẽ: “Cuáhã<sup>n</sup> tucu ndèni ní cuu te cada yica-n na quixí-yu quíhu-yu cuèndá ná chitú vehe-í. <sup>24</sup> Te na cãchí tnúhu-í xii-n sã nĩ ì<sup>n</sup> ñáyiú ní cãhá<sup>n</sup>-í dĩhna vá cúú-gã caxí-yu sá sã ní quide túha-í caxí-yu ní cùu”, cãchí tée-á<sup>n</sup> xáha<sup>n</sup>-dẽ xii tée xĩnu cuechi núú-dẽ —cãchí-gã

xáha<sup>n</sup>-gã xii téé-á<sup>n</sup>.

*Ndoho-o cùndecu-o ichi Xítóhó Jesu-  
crístú*

(Mt. 10:37-38)

<sup>25</sup> Te ío cuéhé ñáyiú nchícú<sup>n</sup>-yu Jèsús, te ní xáha<sup>n</sup>-gã xií-yu:

<sup>26</sup>—Te núu dava nchòhó cuìní-ndó chítnahá ñáhá-ndó xii-í, te cuu iní ñáhá ndísa-ndo. Te cuèi na dándóo-ndo tátá-ndó, ndìhi náná-ndó, ndìhi ñadíhí-ndó, ndìhi déhe-ndo, ndìhi ñaní-ndó, ndìhi cúha-ndo, te caní iní-ndó sã cuèi na cùú-ndó sã cuèndá-í, te duca<sup>n</sup> te cuu ndisa-ndo cuè ñáyiú tnàhá tnúhu ndìhi-í. <sup>27</sup> Te nchaa ñáyiú vá cáncíhícú<sup>n</sup> nihnu ñaha xii-í cuèndá sá yùhú-yu ndohó-yu dàtná ndoho-í, ñáyiú-á<sup>n</sup> vã cúú-yu ñáyiú tnahá tnúhu ndìhi-í. <sup>28</sup> Te núu ì<sup>n</sup> nchòhó ná càni iní-ndó dàcaa-ndo ì<sup>n</sup> vehe ducú<sup>n</sup>, ¿te náa ñá díú díhna-gá cada cuèndá-ndó nũ ndědau díhú<sup>n</sup> cuu, duca<sup>n</sup> te cutnúni iní-ndó nũ tnahá díhú<sup>n</sup>-ndó càa vehe-á<sup>n</sup> àdi ñáhá? <sup>29</sup> Chí núu vá dúcá<sup>n</sup> càda-ndo, te na ngúita-ndo tàusaha-ndo te vá xínu cada-ndo, te nchaa ñáyiú na cùndehe ñaha xii-ndo, te cáhá<sup>n</sup> cuèhé-yu cuèndá-ndó. <sup>30</sup> Te cachí-yu: “Tée-á<sup>n</sup> ní ngúita-dé dácàa-dé ì<sup>n</sup> vehe te ñá ní ndàcu-dé xínu”, cachí-yu. <sup>31</sup> Àdi te núu ì<sup>n</sup> téé yìndaha ñaha xii ñáyiú cuìní-dé nàá-dé ndìhi ingá tucu téé yìndaha ñaha xii ñáyiú, ¿te náa ñá díú díhna-gá cada cuèndá-dé te núu ndacu-dé ndìhi úxí mìl cue sandàdú-dé nàá-güedé, ndìhi ócò mìl cue sandàdú ingá tucu téé yìndaha ñaha xii ñáyiú cùu úhú iní tnàhá ndìhi-dé-á<sup>n</sup>? <sup>32</sup> Àdi te núu xító-dé sá vã ndácú-dé ñá, te òré vátá cùyàtni ñaha-gá téé cùu úhú iní tnàhá ndìhi-dé-á<sup>n</sup>, te tendaha-dě ì<sup>n</sup> téé quíhí<sup>n</sup>-dé quíhu-dé tnúhu ndàhú núu tée-á<sup>n</sup> cuèndá sá vã nàá-güedé. <sup>33</sup> Te duha càhá<sup>n</sup>-í chí núu nchòhó vá cáda ndèe iní-ndó dàña-ndo nchaa sá ndécú ndìhi-ndo cuèndá chitnahá ñáhá-ndó xii-í, te vá cúú-ndó cuè ñáyiú tnàhá tnúhu ndìhi-í.

*Ñí ñí nduu víxi<sup>n</sup>*  
(Mt. 5:13; Mr. 9:50)

<sup>34</sup> Te ñí chí ío váha, dico núu na ndùu víxi<sup>n</sup>-xi, ¿te nása-gá cada-o nándìhi-o te núu duca<sup>n</sup>-i? <sup>35</sup> Chí ñá túú-gã nándìhi-xi nì sá dàcá ñuhu, te nì sá dàcá sahá<sup>n</sup>, chí cuèndá-ñá dāngoyo-o. Te nchaa nchòhó ñáyiú ní xíndedóho tnúhu ní cáhá<sup>n</sup>-í-a xini ñuhu-xi ío váha cuáha-ndo cuèndá — càchí-gã xáha<sup>n</sup>-gã xií-yu.

## 15

*Cuèndá ì<sup>n</sup> mbéé quiti ní xíta*

(Mt. 18:10-14)

<sup>1</sup> Te cue téé cuihna iní-xi quide cobrá ñáhá xii ñáyiú cuèndá impuèstú ndìhi cue dava-gá ñáyiú ndècu ichi cuehé ichi duha ní quexió-yu núu ndécú Jèsús cuèndá cundedóho-yu tnúhu càhá<sup>n</sup>-gá. <sup>2</sup> Te ní ngúita cue téé cùu fariséú, ndìhi cue téé dàcuaha ñaha xii ñáyiú nchaa tnúhu ní chídó tnùní ndí Moisés xicáhá<sup>n</sup> cuèhé-güedé cuèndá-gá, te càchí-güedé:

—Tée-a quèhe<sup>n</sup> cuèndá-dé ñáyiú ndècu ichi cuehé ichi duha, te xèxi ndìhi ñaha-dé xií-yu —càchí-güedé xitnàha-güedé.

<sup>3</sup> Te Jèsús ní caní-gá ì<sup>n</sup> cuèndú nàcuáa tecú tnùní-güedé tnúhu-gá, te xáha<sup>n</sup>-gã xii-güedé:

<sup>4</sup>—Ì<sup>n</sup> téé ndècu ì<sup>n</sup> ciendú mbéé-dě, te ní xíta ì<sup>n</sup>-di, te nchòhó sa cùtnuní iní-ndó nàcuáa cada téé-á<sup>n</sup>, chí dándóo-dé cúmídícó sãhú<sup>n</sup> cúmí-di ì<sup>n</sup> yucu, te cúnúndúcú-dě quiti ní xíta xiá<sup>n</sup> ndèé ndéé naníhí-dě-di. <sup>5</sup> Te òré ní naníhí-dě-di te ní dácáá-dě-di chíó-dě ní docó-dé-di sá cúdí iní-dé. <sup>6</sup> Te òré ní nasáá-dé vehe-dé, te ní dátàcá-dé nchaa cue téé càhá<sup>n</sup> ndìhi-dé, ndìhi nchaa ñáyiú ndècu yatni ndìhi-dé, te ní xáha<sup>n</sup>-dě: “Chí ná cùdí iní-ó vitna, chí ní naníhí-í mbèè-í quiti ní xíta nì cùu”, cachí-dé xáha<sup>n</sup>-dě xií-yu. <sup>7</sup> Te yúhú càchí-í sá ío-gá cúdí iní Yã Ndiõxí ndìhi cue espíritú xínú cuèchi núú-gã nũ ì<sup>n</sup> ñáyiú ndècu ichi cuehé ichi duha na ndixi cuèchi iní-yu cuèndá nchaa sá ñá túú vãha quide-yu ndécú-yu te tnií-yu ichi-gá, dàcúúxí cúmídícó sãhú<sup>n</sup> cúmí ñáyiú sa ní tuha ichi-gá, chí ñá túú-gã xini ñuhu-xi



ndixi cuéchi iní-yu chi sa ndécú-yu ichi-gá —càchí-gá xáha<sup>n</sup>-gã xii-güedé.

*Cuendá díhú<sup>n</sup> nĩ xíta*

8 Te ní cani Jèsús ingá cuendú núu-güedé, te xáha<sup>n</sup>-gã:

—H<sup>n</sup> ñadìhí ndécú ndìhi-a<sup>n</sup> úxí díhú<sup>n</sup> cuìxí<sup>n</sup>, te ní dácúita-a<sup>n</sup> ì<sup>n</sup> te ní teñuhú-a<sup>n</sup> iti, te ní ngüita-a<sup>n</sup> nàtihu-a<sup>n</sup> vehe, te súúni vâha vâha ní nan-ducu-a<sup>n</sup> ndéé ní naníhí-a<sup>n</sup>. 9 Te òré ní naníhí-a<sup>n</sup>, te ní dátacá-a<sup>n</sup> nchaa ñáyiú dîhí càhá<sup>n</sup> ndìhi-a<sup>n</sup> ndìhi nchaa ñáyiú ndècu yatni ndìhi-a<sup>n</sup>, te ní xáha<sup>n</sup>-a<sup>n</sup>: “Chí ná cùdí<sup>n</sup> iní-ó vîtna chi ní naníhí-í díhú<sup>n</sup>-í sá nĩ xíta ní cùu”, cachí-a<sup>n</sup> xáha<sup>n</sup>-a<sup>n</sup> xii-yu. 10 Te yúhú càchí-í sá dúcá<sup>n</sup> ïo cùdí<sup>n</sup> iní nchaa espíritú xínú cuèchi núú Yã Ndiöxí, núu ì<sup>n</sup> ñáyiú ndècu ichi cuehé ichi duha na ndixi cuéchi iní-yu cuendá nchaa sá ñà túú vâha quidé-yu, te tñí-yu ichi-gá —càchí-gá xáha<sup>n</sup>-gã xii-güedé.

*Cuendá ì<sup>n</sup> téé ñá túú ní quide váha*

11 Te ní cani tucu Jèsús ingá cuendú núu-güedé, te xáha<sup>n</sup>-gã:

—H<sup>n</sup> téé ndècu úú déhe ducu<sup>n</sup>-dé, 12 te téé líhli-gá ní xáha<sup>n</sup>-dè xii tâtá-dè: “Táu, taxi-n tãhú sã cúú cuendá-í”, càchí-dé xáha<sup>n</sup>-dè. Te tâtá-dè-á<sup>n</sup> nĩ sãñaha-dè ndí dí<sup>n</sup> núu-güedé sá cúú cuendá-güedé. 13 Te núú sàcú-ni nduu, te déhe-dé téé líhli-gá-á<sup>n</sup> nĩ nadico-dè nchaa sá nĩ sãñaha tâtá-dè, te ní xica-dé cuáhá<sup>n</sup>-dé ì<sup>n</sup> ñúú xícá, te yacá<sup>n</sup> ní tñí-dé ì<sup>n</sup> ichi cuéhé ichi duha, te ní ndìhi díhú<sup>n</sup>-dè ní dándóñuhu-dé ndìhi cue téé càhá<sup>n</sup> ndìhi-dé, ndìhi nchaa ñáyiú dîhí xîndecu ichi dí<sup>n</sup> iní. 14 Te ní ndìhi ndoo díhú<sup>n</sup>-dè ní dándóñuhu-dé, te núú sàcú-ni nduu ní sáá tnamá ñúú núú ndécú-dè-á<sup>n</sup>, te ñá ñihí-gá-dé sá caxí-dè, te xihí-dé docó. 15 Núú ní xica-dé cuáhá<sup>n</sup> ndúcú chiu<sup>n</sup>-dé núú ì<sup>n</sup> téé diu-ni ñúú xíá<sup>n</sup>, te téé-á<sup>n</sup> nĩ sáha chiu<sup>n</sup> ñaha-dé ì<sup>n</sup> xichi núú ñúhú-dè coto-dé cùchí. 16 Te súúni xihí-dé docó te cuìní-dé caxi-dé nchaa sá sáha-yu cùchí-á<sup>n</sup> ní cùu, dico ñá túú ní sãñahá-yu xii-dé. 17 Te uu<sup>n</sup> ní sani váha iní-dé, te ní cachí-dé: “Ío cuéhé cue téé xínu cuechi vehe tâtá-í

te ío cuéhé sã xéxí-güedé ndécú, te yúhú duha ndòho-í docó iha! 18 Te ndacuíñí-í te núhú-í vehe tâtá-í, te cúñaha-í xii-dé: Táu, ñá túú ní quide váha-í núú Yã Ndiöxí te ní ñà túú ní quide váha-í núú-n, 19 te ñá túú-gã tàú-í sá cúú-í déhe-n vîtna, te cada ñaha-ñá-n xii-í dátá ì<sup>n</sup> téé xínu cuechi núú-n”, duha ní sani iní-dé cúñaha-dé xii tâtá-dé. 20 Te sátá dúcá<sup>n</sup> nĩ sani iní-dé, te ní natñi-dé ichi cuánuhú-dé vehe tâtá-dé, te xica-gã cuánuhú-dé ní xiní ñáhá tâtá-dé xii-dé te ní cundáhú iní ñáhá-dé. Te xínu tâtá-dè-á<sup>n</sup> nĩ sáhá<sup>n</sup> nútnahá ñáhá-dè, te ní numi ñaha-dè, te ío váha ní càhá<sup>n</sup> ndìhi ñaha-dè. 21 Te ní xáha<sup>n</sup> déhe-dé-á<sup>n</sup> xii-dé: “Táu, ñá túú ní quide váha-í núú Yã Ndiöxí te ní ñà túú ní quide váha-í núú-n, te ñá túú-gã tàú-í sá cúú-í déhe-n vîtna”, cachí-dé xáha<sup>n</sup>-dè.

22 ’Dico tâtá-dè-á<sup>n</sup> nĩ xáha<sup>n</sup>-dè xii cue téé xínu cuechi núú-dè: “Chí quèñuhu ndìhi-ni dóó vâha-gã cuáha-ndo déhe-í-a na cuìhnu-dé, ndìhi ì<sup>n</sup> dehé ná quìhi díquí ndáhá-dè, ndìhi chàú váha na quìhi-dé. 23 Te quíhí<sup>n</sup> nguehe<sup>n</sup>-ndo ì<sup>n</sup> ndicutu numa quiti caváha-gá, te cahni-ndo-di, te na càda-o vico, te na caxi-o-di. 24 Chi déhe-í-a ní sani iní-í sá nĩ xihí-dé ní cùu, te ñáhá chi ndècu vívú-dè, te ní sani tucu iní-í sá nĩ xíta-dé ní cùu te ní nasáá méé-dè”, càchí-dé xáha<sup>n</sup>-dè xii cue téé xínu cuechi núú-dè-á<sup>n</sup>. Te ní ngüita-güedé ní quide-güedé vico.

25 ’Te déhe-dé téé sàcuéhé-gã cuáhá<sup>n</sup>-dé yucu, te òré cuándixi-dé tá nduu yatni-dé vehe, te ní tecú dóho-dé ío yaá cúú vico. 26 Te ní cana-dé ì<sup>n</sup> téé xínu cuechi, te ní xícá<sup>n</sup> tñúhú-dè núú-dè ná cuendá duca<sup>n</sup> ío yaá. 27 Te téé xínu cuechi-á<sup>n</sup> nĩ xáha<sup>n</sup>-dè: “Ñaní-n tée cuáhá<sup>n</sup> ní cùu ní nasáá-dé, te tâtá-n nĩ táúchíú<sup>n</sup>-dè ní xihí ì<sup>n</sup> ndicutu nùma quiti caváha-gã cuendá sá nĩ nasáá váha-dé”, càchí-dé xáha<sup>n</sup>-dè.

28 ’Dico ñaní-dé téé sàcuéhé-á<sup>n</sup> nĩ cudéé<sup>n</sup>-dè, te ní cachí-dé sá vã ndìhu-dé vehe cundecu-dé vico-á<sup>n</sup> ní cùu, dico ní quee tâtá-güedé ní càhá<sup>n</sup> ndáhú-dé núú-dè cuendá ndìhu-dé. 29 Te ní xáha<sup>n</sup>-dè xii tâtá-dé: “Táu,

cundedóho váha saú-n tnũhu na cãhá<sup>n</sup>-í-a, yúhú ío cuéhé cuíá nĩ cuu xĩnu cuechi-í núú-n, te ni ì<sup>n</sup> xito ñá túú quide sáá iní-í núú-n, te ni ì<sup>n</sup> chivá líhli ñá túú tàxi-n-dĩ caxi dĩ iní-í-dĩ ndĩhi cue tée cãhá<sup>n</sup> ndĩhi-í. <sup>30</sup> Te vitna ní nasáá déhe-n tée ní sáhá<sup>n</sup> ní dándõñũhu díhú<sup>n</sup>-n ndĩhi nchaa ñáyiũ xĩndecu ichi dũ iní. Te ní sahnĩ-n ì<sup>n</sup> ndicutu numa quiti caváha-gá sá cuendá-dé”, cãchĩ-dé xãhá<sup>n</sup>-dẽ xii tãtã-dẽ. <sup>31</sup> Te ní xãhá<sup>n</sup> tãtã-dẽ xii-dé: “Yòhó déhe-í duca<sup>n</sup>-ni ndècu ndĩhi ñaha-n xii-í, te nchaa sá ndécú ndĩhi-í cúú-xí cuendá-n. <sup>32</sup> Te vitna dacutĩ táu-xi sá cádá-ó vico, te cudĩ iní-ó, chi ñanĩ-n-á<sup>n</sup> nĩ quide-í cuendá sá nĩ xihĩ-dé ní cùu, te ñáhá chi ndècu vívú-dẽ, te sa ní xíta-dé ní cùu, te ní nasáá méé-dẽ”, cãchĩ-dé xãhá<sup>n</sup>-dẽ xii déhe-dé tée sãcuéhé-gã-á<sup>n</sup> —duha cuáhá<sup>n</sup> cuendú ní cani Jèsús núú-güedẽ.

## 16

*Nàcuáa ní quide ì<sup>n</sup> tée tàxi tnuní ñáhá xii cue tée xĩnu cuechi*

<sup>1</sup> Te Jèsús xãhá<sup>n</sup>-gã xii cue tée xica cuu ndĩhi-gá:

—Ní xĩndecu ì<sup>n</sup> tée cuica, te duca<sup>n</sup> nĩ xĩndecu ì<sup>n</sup> tée ní taxi tnuní ñáhá xii cue tée ní xĩnu cuechi núú-dẽ. Te tée-á<sup>n</sup> nĩ xini ñáhá ñáyiũ dùhu-dé díhú<sup>n</sup> tée cùu patróó<sup>n</sup>-dẽ, te cuáhá<sup>n</sup>-dé dándõñũhu-dé, te ní xãhá<sup>n</sup>-yu xii tée cùu patróó<sup>n</sup>-dẽ sá dúcá<sup>n</sup> quide-dé. <sup>2</sup> Te tée cùu patróó<sup>n</sup>-dẽ-á<sup>n</sup> nĩ cana ñaha-dẽ xii-dé, te ní xãhá<sup>n</sup>-dẽ: “¿Ná cuendá duha cãhá<sup>n</sup> ñáyiũ cuendá-n? Yáchĩ chi na tàxi cuendá-n nchaa chiu<sup>n</sup> ní quide-n, chi vitna te vá táxi tnuní-gá-n cuè tée xĩnu cuechi núú-í”, cãchĩ-dé xãhá<sup>n</sup>-dẽ. <sup>3</sup> Te tée tàxi tnuní ñáhá xii cue tée xĩnu cuechi-á<sup>n</sup> nĩ sani iní-dé: “¿Te nása cada-í vitna na quèhdé patróó<sup>n</sup>-í chiu<sup>n</sup>-í? Chi ñá cundèe-gá-í cada-í chiu<sup>n</sup> vée, te cùcaha<sup>n</sup> núú-í cáca<sup>n</sup> ndàhú-í. <sup>4</sup> Dico duha cada-í cuendá quehe<sup>n</sup> cuendá ñáhá ñáyiũ vehé-yu òré ná quèhdé duu<sup>n</sup>-ná patróó<sup>n</sup>-í chiu<sup>n</sup>-í”, duha ní sani iní-dé. <sup>5</sup> Te sátá dúcá<sup>n</sup> te ní cana-dé ì<sup>n</sup> ì<sup>n</sup> cue tée táu núú patróó<sup>n</sup>-güedẽ. Te tée díhna ní xicá<sup>n</sup>

tnúhú-dẽ núú-dẽ, te xãhá<sup>n</sup>-dẽ: “¿Ndèé dau tàú-n núú patróó<sup>n</sup>-í?”, cãchĩ-dé xãhá<sup>n</sup>-dẽ. <sup>6</sup> Te tée-á<sup>n</sup> nĩ xãhá<sup>n</sup>-dẽ: “Táú-í ì<sup>n</sup> ciendú barril acitĩ”, cãchĩ-dé xãhá<sup>n</sup>-dẽ. Te tée tàxi tnuní ñáhá xii cue tée xĩnu cuechi-á<sup>n</sup> nĩ xãhá<sup>n</sup>-dẽ: “Iha náu reciú-n-á, te ndadúha ingá sá ùdico úxí taxi-n”, cãchĩ-dé xãhá<sup>n</sup>-dẽ. <sup>7</sup> Te dãtnuní ní xicá<sup>n</sup> tnúhú tucu-dé núú ingá-dé, te xãhá<sup>n</sup>-dẽ: “Te yòhó, ¿ndèé dau tàú-n-í?”, cãchĩ-dé xãhá<sup>n</sup>-dẽ. Te tée táu-á<sup>n</sup> nĩ xãhá<sup>n</sup>-dẽ: “Ì<sup>n</sup> ciendú ngohnchi triú táu-í”, cãchĩ-dé xãhá<sup>n</sup>-dẽ. Te tée tàxi tnuní ñáhá xii cue tée xĩnu cuechi-á<sup>n</sup> nĩ xãhá<sup>n</sup>-dẽ: “Iha náu reciú-n-á, te cadúha ingá sá cùmídícó-nã taxi-n”, cãchĩ-dé xãhá<sup>n</sup>-dẽ. <sup>8</sup> Te tée cùu patróó<sup>n</sup>-á<sup>n</sup> nĩ cachĩ-dé sá ìo váha ñũhu díquí tée dùhu-á<sup>n</sup> nãcuáa cada-dé cundecu váha-dé. Te nchaa ñáyiũ xĩndecu ichi cuéhé ichi duha, ío-gá váha ñũhu díquí-yu nãcuáa cada-yu cundecu váha-yu ndĩhi nchaa ñáyiũ cundihĩ-yu dàcúúxí ñáyiũ ndècu ichi Yá Ndiõxí.

<sup>9</sup> Te yúhú cãchĩ-í sá cádá-ndó sã vãha ndĩhi nchaa sá ndécú ndĩhi-ndo ní cuáha ñuyúú yicá cuèchi-a, te duca<sup>n</sup> te coo cue tée ío váha tnahá tnúhu ndĩhi-ndo, te òré ná ndĩhi nchaa sá ío ñuyúú-a, te Yá Ndiõxí quehe<sup>n</sup> cuendá ñáhá-gã xii-ndo, te cundecu-ndo ndĩhi-gá ni caa ni quihĩ<sup>n</sup>.

<sup>10</sup> Te núu ì<sup>n</sup> tée quide ndáá cuèi ì<sup>n</sup> chiu<sup>n</sup> líhli na càda-dé, te diu-ni duca<sup>n</sup> quide ndáá-dé cuèi ì<sup>n</sup> chiu<sup>n</sup> cahnu na cada-dé. Dico tée ñá túú quide ndáá, chi cuèi chiu<sup>n</sup> líhli àdi chiu<sup>n</sup> cahnu na cada-dé dico ì<sup>n</sup>-ni quide-dé. <sup>11</sup> Te núu nchòhó vá cádá-ndó sã vãha ndĩhi nchaa sá ní cuáha ñuyúú yicá cuèchi-a ña, te Yá Ndiõxí vá táxi-gã sá vãha ndècu ndĩhi-gá xii-ndo. <sup>12</sup> Te núu vá cádá ndáá-ndó còto-ndo nchaa sá táxi núu tnahá ñáyiũ-ndo, te vá yõo taxi sá ndúú tàhú-ndó.

<sup>13</sup> Te ni ì<sup>n</sup> tée xĩnu cuechi vá ndácú-dé cunu cuechi-dé núú ùú patróó<sup>n</sup>, chi tée-á<sup>n</sup> cuu váha iní-dé núú ì<sup>n</sup> patróó<sup>n</sup>-dẽ te tni-dé nchaa tnúhu cãhá<sup>n</sup> patróó<sup>n</sup> tée cùu váha iní-dé núú-xi-á<sup>n</sup>. Te núú ingá tucu patróó<sup>n</sup>-dẽ vá cúú vãha iní-dé, te ni vã

tníí-dě tnúhu càhá<sup>n</sup> pàtróó<sup>n</sup>-dě-á<sup>n</sup>. Te duca<sup>n</sup> sàtnahá-xi cùu nchohó chi vá ndácú-ndó cùnu cuechi-ndo núú Yá Ndiòxí te cuhu<sup>n</sup> iní-ndó nchaa sá ìò ñuyíú-a —càchí-gá xáha<sup>n</sup>-gá xii-güedé.

14 Te nchaa cue téé cùu fariséú ío ñùhu iní-güedé nchaa sá ìò ñuyíú-a, te xíndedóho-güedé nchaa tnúhu càhá<sup>n</sup> Jèsús, te ní cáhá<sup>n</sup> yíchí-güedé cuendá-gá. 15 Te Jèsús ní xáha<sup>n</sup>-gá xii-güedé:

—Nchòhó cúú-ndó cuè téé ío váha càhá<sup>n</sup> núú ñáyiú cuendá-ni sá cuíní-ndó cãhá<sup>n</sup> váha-yu cuendá-ndó, dico Yá Ndiòxí xìní ndáá-gá nàcuáa càa iní-ndó ñ<sup>n</sup> ñ<sup>n</sup>-ndo, te nchaa sá càchí cue ñáyiú ñuyíú-a sá ìo nàndíhi, Yá Ndiòxí dáquèe tíhú-gá.

#### *Cuendá nchaa tnúhu ní chídó tnùnì ndí Moisés*

16 Te nchaa tnúhu ní chídó tnùnì ndí Moisés cùnù-xi ni cuu, ndíhi nchaa tnúhu ní chídó tnùnì cue téé ní xóo cáhá<sup>n</sup> tnúhu Yá Ndiòxí ndéé sanaha. Dico cútnáhá ní nguíta té Juáá téé ní xóo dacuàndute ñaha xii ñáyiú ní cáhá<sup>n</sup>-dé tnúhu-í, ndéé dàvá-á<sup>n</sup> ñà túú-gá ní cùnùu nchaa tnúhu ní chídó tnùnì ndí Moisés ndíhi nchaa tnúhu ní chídó tnùnì cue téé ní xóo cáhá<sup>n</sup> tnúhu Yá Ndiòxí ndéé sanaha. Te ñu-ni ndéé dàvá-á<sup>n</sup> ní quesaha ta təcú tnùnì ñáyiú nàcuáa ndíhu ndaha ñaha Yá Ndiòxí xii-yu, te vài ñáyiú ío sàni iní-yu vitna nàcuáa cadá-yu ndíhu ndaha ñaha Yá Ndiòxí xii-yu. 17 Te nchaa tnúhu ní chídó tnùnì ndí Moisés ío ndáá càhá<sup>n</sup>-xi, te ndíhi-gá naa andíu ndíhi ñuyíú dàcúxí sá ndíhi ñ<sup>n</sup> ñ<sup>n</sup> tnúhu-á<sup>n</sup> cada-xi nàcuáa càhá<sup>n</sup>-xi.

#### *Jèsús càhá<sup>n</sup>-gá cuendá ñáyiú dàña tnaha*

(Mt. 19:1-12; Mr. 10:1-12)

18 Te núu ñ<sup>n</sup> téé na dàña tnaha-dé, ndíhi ñadíhi-dé, te tnándaha tucu-dé ndíhi ingá-yu, te nèhé víhí quide-dé te núu duca<sup>n</sup> na càda-dé, te téé na tnándaha ndíhi ñaha ní dáña yí-xi, te ñu-ni duca<sup>n</sup> ñà túú cùu-xi sá váha te núu duca<sup>n</sup> na càdá-yu —càchí-gá xáha<sup>n</sup>-gá xii-güedé.

#### *Cuendá ñ<sup>n</sup> téé nàni Lázará ndíhi cuendá ñ<sup>n</sup> téé cuica*

19 Te xáha<sup>n</sup> tucu-gá xii-güedé:

—Ní xíndecu ñ<sup>n</sup> téé cuica, te ní xóo cuihnu-dé mee-ni dõó váha dóó vii càa, te nchaa nduu súúni váha ní xóo cada-dé vico vehe-dé. 20 Te ní xíndecu tucu ñ<sup>n</sup> téé ndàhú ní xínani-dé Lázará, te téé-á<sup>n</sup> ní cuhú-dé ní xíndeé-dé nitùhú-dé ndíhi, te ñ<sup>n</sup> nduu ñ<sup>n</sup> nduu ní xóo taxinucóo ñaha-güedé xii-dé yuyèhe téé cuica-á<sup>n</sup>. 21 Te téé ndàhú-á<sup>n</sup> ní xóo cuú-dé docó, te ní xóo cuíní-dé caxi-dé nchaa sá ñà túú-gá ní xóo yáha caxi téé cuica-á<sup>n</sup>, te ñà túú ní xóo níhí-dé. Te cuèi iná ní xóo quíhí<sup>n</sup>-di ní xóo nayuu-di nchaa núú ndíhi ndéé-dé-á<sup>n</sup>. 22 Te ní sáá ñ<sup>n</sup> nduu te ní xíhí téé ndàhú-á<sup>n</sup>, te cue espíritú xínú cuèchi núú Yá Ndiòxí ndécá ñaha-xi xii-dé cuándaá núú ndécú té Àbrahám cundecu-dé. Te ní sáá nduu ní xíhí téé cuica-á<sup>n</sup> tnáhá-dé, te ní chindúxi ñaha-güedé xii-dé. 23 Te ní sáá-dé núú xíndecu nchaa ñáyiú ní xíhí ñà túú ní quide ndáá núú Yá Ndiòxí te xía<sup>n</sup> ìo ndòho-dé ndécú-dé, te ní ndonehe núú-dé te xica ní xíní-dé té Àbrahám ndíhi té Lázará-á<sup>n</sup> xíndecu-güedé. 24 Te níhi ní cáhá<sup>n</sup>-dé, te xáha<sup>n</sup>-dè: “Yòhó tãtã Àbrahám, cundàhú iní ñáhá xii-í, te cúñaha xii té Lázará ná dándaxi<sup>n</sup>-dé díquí ndáhá-dé, te na quixi-dé dandàxi<sup>n</sup>-dé yàa-í, chi ío ndòho-í ñùhù-í núú ñùhú núú càyú-a”, càchí-dé xáha<sup>n</sup>-dè xii té Àbrahám. 25 Dico té Àbrahám ní xáha<sup>n</sup>-dè: “Ndàhú yòhó ñaní tnáhà-í, dandàcu iní sá ìo váha ní xíndecu-n ñuyíú, te té Lázará ío ndàhú ní ndòho-dé ní xíndecu-dé. Te vitna ní nucúndecu váha-dé iha, te yòhó ndóhó-n vitna. 26 Te ñà díú-ni sá xíã<sup>n</sup> tucu, chi cuádava ndècu ñ<sup>n</sup> déhvã cùnù ñùhú nèhu-xi núú ndécú-ó, te cuèi nchaa ñáyiú xíndecu iha na càchí iní-yu quixí-yu núú ndécú-ndó dico vá ndácú-yu, te ni nchòhó vá ndácú-ndó quixi-ndo núú ndécú-ndí”, càchí-dé xáha<sup>n</sup>-dè. 27 Te ní xáha<sup>n</sup> téé cuica-á<sup>n</sup>: “Te núu duca<sup>n</sup> te càhá<sup>n</sup> ndàhú-í núú yòhó tãtã Àbrahám vitna sá téndàha-n té Lázará ná quíhí<sup>n</sup>-dé

vehe tătà-í, <sup>28</sup> chi ndècu úhú<sup>n</sup>-gá ñaní-í, te na cǔñaha-dě xii-güedé sá vǎ cáda-güedé dàtná ní quide-í cuendá sá vǎ quixí-güedé tnàhá-güedé núú ndécù-í ndóhò-í-a”, cǎchí-dé xǎha<sup>n</sup>-dě. <sup>29</sup> Te té Àbrahám ní xǎha<sup>n</sup>-dě: “Mee-güedé ndécú ndìhi-güedé nchaa tnúhu ní chídó tnùnì ndíi Moisés, ndìhi nchaa tnúhu ní chídó tnùnì cue téé ní xóo cáhá<sup>n</sup> tnúhu Yá Ndiòxí ndéé sanaha, te nchaa tnúhu-á<sup>n</sup> ná tnì-güedé nàcuáa cǎhá<sup>n</sup>-xi”, cǎchí-dé xǎha<sup>n</sup>-dě xii-dé. <sup>30</sup> Te ní xǎha<sup>n</sup> tùcu téé cuica-ǎ<sup>n</sup>: “Tătá Àbrahám, dico vǎ cáda cuendá-güedé nchaa tnúhu-á<sup>n</sup>, dico núú ì<sup>n</sup> ñáiyu ñá túú-gǎ ndécú ñùyíú ì<sup>n</sup> ñáiyu ndècu ndìhi-n quíhí<sup>n</sup>-yu cáhá<sup>n</sup> ndìhi ñàhá-yu xii-güedé nàcuáa ndùu tnúhu váha, te ndixi cuéchi iní-güedé nchaa sá ñà túú quide váha-güedé ndécú-güedé, te cada váha-güedé”, cǎchí-dé xǎha<sup>n</sup>-dě xii-dé. <sup>31</sup> Dico té Àbrahám ní xǎha<sup>n</sup>-dě: “Te núú ñá túú cuiní-güedé tnì-güedé tnúhu ní cáhá<sup>n</sup> ndíi Moisés, ndìhi tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiòxí ndéé sanaha ña, te ñu-ni duca<sup>n</sup> cáda-güedé cuèi ì<sup>n</sup> ñáiyu ní xíhí ná ndótó-yu cúñahá-yu nàcuáa ndùu tnúhu váha, chi vǎ quindáá iní-güedé”, cǎchí té Àbrahám xǎha<sup>n</sup>-dě xii téé cuica-ǎ<sup>n</sup> — cǎchí Jèsús xǎha<sup>n</sup>-gǎ xii cue téé cùu fariséú.

## 17

*Quihi iní-ó vǎ cùndècu-o ichi cuehé ichi duha*

(Mt. 18:6-7, 21-22; Mr. 9:42)

<sup>1</sup> Te Jèsús ní xǎha<sup>n</sup>-gǎ xii cue téé xìca cuu ndìhi-gǎ:

—Dacuitíi sǎ cóo cuè téé dacàhá<sup>n</sup>-güedé ñáiyu cadá-yu nándi sá cuèhé sá dúhá, ñdico ndàhú ní cuu cue téé duca<sup>n</sup> na dàcàhá<sup>n</sup> ñàhá xii-yu cadá-yu nándi sá cuèhé sá dúhá! <sup>2</sup> Chi váha-gǎ sá ñu na dàcutu ndéé ñáiyu ì<sup>n</sup> yúú yódó dücú<sup>n</sup>-güedé te dàquée ñàhá-yu xii-güedé xiti ndute làmár, te ñá díú sǎ cùndècu-güedé dacàhá<sup>n</sup>-güedé ñáiyu cadá-yu nándi sá cuèhé sá dúhá, cuèi ñáiyu ndàhú iní-xi dandàhú-güedé.

<sup>3</sup> Te ío quihi iní-ndó cùndècu-ndo.

“Te núú ì<sup>n</sup> ñaní tnàhá-ndó quide-dé ì<sup>n</sup> sá ñà túú tàú-dé cada-dé sá cúú-xí-ndó te cáhá<sup>n</sup>-ndó dǎho-dé, te núú ní ndixi cuéchi iní-dé sá ñà túú ní quide váha-dé, te cada cǎhnu iní-ndó sǎ ñi quide-dé. <sup>4</sup> Te cuèi úsá xito na cáda-dé nándi sá ñà túú tàú-dé cada-dé sá cúú-xí-ndó ì<sup>n</sup> nduu, te núú na quixi-dé úsá xito núú-ndó, te cǎchí-dé sá vǎ dúcá<sup>n</sup>-gǎ cada-dé, te xini ñuhu-xi cada cǎhnu iní-ndó-dé — cǎchí-gǎ xǎha<sup>n</sup>-gǎ xii-güedé.

*Ñáiyu sàndáá ndisa iní-xi*

<sup>5</sup> Te ní xǎha<sup>n</sup> cuè téé xìca cuu ndìhi Jèsús xii-gǎ:

—Chindee ñàha xii-ndí cuendá duca<sup>n</sup> te quindáá-gǎ iní-ndí sá Yá Ndiòxí ndácú-gǎ quidé-gǎ nchaa sá váha — cǎchí-güedé xǎha<sup>n</sup>-güedé xii-gǎ.

<sup>6</sup> Te ní xǎha<sup>n</sup> Jèsús:

—Te núú nchòhó quindáá ndisa iní-ndó sùunì cuèdicó luha líi dàtná cuiní-ndó cǎa ì<sup>n</sup> ndíquí<sup>n</sup> yutnu nàni mostázá, te duca<sup>n</sup> te cuu cúñaha-ndo xii ì<sup>n</sup> yutnu: “Quene-n iha te quíhí<sup>n</sup>-n cuìhnu-n xití làmár”, duha cúñaha-ndo. Te duca<sup>n</sup> cáda-xi te núú na quindáá ndisa iní ñàhá-ndó xii-í — cǎchí-gǎ xǎha<sup>n</sup>-gǎ xii-güedé.

*Nàcuáa tàú ì<sup>n</sup> téé xìnu cuechi cada-dé*

<sup>7</sup> Te xǎha<sup>n</sup> tùcu-gǎ xii-güedé:

—Te núú ì<sup>n</sup> nchòhó ndécú ì<sup>n</sup> téé xìnu cuechi núú-ndó, te cuáhá<sup>n</sup>-dé yucu cuángada chiù<sup>n</sup>-dé, àdi cuáhá<sup>n</sup>-dé yucu coto-dé quiti, te òré ní nasáá-dé vehe sá ñi sáhá<sup>n</sup>-dé yucu, te vǎ cǔñaha nchòhó cue téé cùu patróó<sup>n</sup>-dě xii-dé: “Yáchí nehé caxi-n dítá”, vǎ dúhá cǔñaha-ndo. <sup>8</sup> Chi nchòhó cue téé cùu patróó<sup>n</sup>-dě cǔñaha-ndo xii-dé: “Cundihí iní cada túha sá cùdini-í, te díhna-gǎ-í caxi-í dítá te dàtnùnì caxi-n”, duha cúñaha nchòhó cue téé cùu patróó<sup>n</sup> xii-dé. <sup>9</sup> Te òré ná ndíhí chiù<sup>n</sup> ní táhú nchòhó cue téé cùu patróó<sup>n</sup> cada téé xìnu cuechi núú-ndó, te ñà túú tàú-ndó ndácá<sup>n</sup> táhú-ndó ñuú téé xìnu cuechi núú-ndó. <sup>10</sup> Te duha cǎhá<sup>n</sup>-í chi núú òré ná ndìhi nchaa chiù<sup>n</sup> ní táhú Yá Ndiòxí cada-ndo,



te cachí-ndó: “Nchúhú cúú-ndí cue tée xínu cuechi núú Yá Ndióxi, dico ñá túú tàú-gá ndacá<sup>n</sup> táhú-gá núú-ndí, chi mee-ni chiú<sup>n</sup> ní táhú-gá ní quide-ndí”, duha cachí-ndó — cächí-gá xáha<sup>n</sup>-gã xii-güedé.

*Jèsús quidé tãtna-gá úxi cue tée tnàhá cuéhé sã dátèhyú nihnu-xi yiqui cùñú ñáyiu*

<sup>11</sup> Te ñuhu Jesús ichi cuáhá<sup>n</sup>-gá ñuu Jerusálén, te ní yáha-gá núú ràyá distritú Sãmariá ndihi distritú Galiléa. <sup>12</sup> Te ta cùyatni-gá ñ<sup>n</sup> ñuu líhli cuáhá<sup>n</sup>, te ní sãtnahá ñáhá úxi tnàhá cue tée cùhú xii-gá, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngúnu tní-güedé, <sup>13</sup> te níhi ní cáhá<sup>n</sup>-güedé, te xáha<sup>n</sup>-güedé xii Jèsús:

—¡Mèstrú, cundàhú iní ñáhá xii-ndí! —cächí-güedé xáha<sup>n</sup>-güedé xii-gá.

<sup>14</sup> Te òré ní xiní ñáhá Jèsús xii-güedé, te ní xáha<sup>n</sup>-gã:

—Chí cuáhá<sup>n</sup> núú dütú ná cundehe ñaha-dé xii-ndo —cächí-gá xáha<sup>n</sup>-gã xii-güedé.

Te ní xica-güedé cuáhá<sup>n</sup>-güedé, te ichi-ni ñuhu-güedé cuáhá<sup>n</sup>-güedé ní ndúha-güedé cuéhé tnàhá-güedé. <sup>15</sup> Te nchaa-güedé ní cutnùni iní-güedé sã ñí ndúha-güedé, dico ñ<sup>n</sup>-ni-dé ní nacuico-dé, te ní ngúita-dé níhi ní cáhá<sup>n</sup>-dé, te ní cachí-dé sã ïo càhnu cuu Yá Ndióxi. <sup>16</sup> Te ní ngüíñí xití-dé núú Jèsús, te ní nuu núú-dé ndàa núú ñúhú ndacá<sup>n</sup> táhú-dé núú-gã. Te tée-á<sup>n</sup> cúú-dé tée distritú Sãmariá. <sup>17</sup> Te Jèsús ní cachí-gá:

—Úxi tnàhá-güedé ní ndúha cuéhé tnàhá-güedé. ¿Te ndéé ndécú dàva-gá-güedé-i? <sup>18</sup> ¿Te náa ñ<sup>n</sup>dii-ni tée ingá ñuu-a ní nacuico-dé ndacá<sup>n</sup> táhú-dé núú Yá Ndióxi, te cächí-dé sã ïo càhnu cuu-gã ñã? —cächí-gá.

<sup>19</sup> Te ní xáha<sup>n</sup>-gã xii tée-á<sup>n</sup>:

—Ndacuíñí te núhú-n, chi sa ní ndúha-n cuéhé tnàhá-n, chi ní sãndáa iní-n Yá Ndióxi —cächí-gá xáha<sup>n</sup>-gã xii-dé.

*Nàcuáa yìndaha ñaha Yá Ndióxi (Mt. 24:23-28, 36-41)*

<sup>20</sup> Te cue tée cùu fariséú ní xicá<sup>n</sup> tnúhú-güedé núú Jèsús ñuu ná ama ngúita Yá Ndióxi ndíhu ndaha-gã ñáyiu. Te ní xáha<sup>n</sup>-gã:

—Ñá túú ñã cada-xi ñuyú quini-ndó cuendá cutnùni iní-ndó sã ndíhu ndaha ñaha Yá Ndióxi xii-ndo. <sup>21</sup> Te ni vã yõo cachí: “Iha ndècu-gá táxi tnùni-gá, àdi yacá<sup>n</sup> ndécú-gã táxi tnùni-gá”, chi tnuú-ndó sã ndecu-gá ndihi nchaa ñáyiu yìndaha-gã — cächí-gá xáha<sup>n</sup>-gã xii-güedé.

<sup>22</sup> Te ní xáha<sup>n</sup>-gã xii cue tée xica cuu ndihi-gá:

—Te nchòhó chi sáa nduu, te cachí iní-ndó sã súuni cuédicó ñ<sup>n</sup> nduu quini ñáhá-ndó xii yúhú Tée cùu ñaní tnàhá-ndó nchaa-ndo, dico vá quini ñáhá-gã-ndó xii-í. <sup>23</sup> Te coo ñáyiu cùñáhá-yu xii-ndo: “Iha ndècu-gá, á<sup>n</sup> yacá<sup>n</sup> ndécú-gã”, quesàhá-yu cùñáhá-yu xii-ndo. Dico vá quindáa iní-ndó quíhí<sup>n</sup>-ndó ndíhí-yu núú cächí-yu, te ni vã cáni iní-ndó quíhí<sup>n</sup> méé-ndó. <sup>24</sup> Chi dàtná cuini-ndó quide-xi oré sãa nduté àndiu, chi uu<sup>n</sup>ni dàyehé-xi níhí ñuyú, duca<sup>n</sup> cada-xi nduu na quixi tucu yúhú Tée cùu ñaní tnàhá-ndó nchaa-ndo, te dàvá-á<sup>n</sup> quini ñáhá nchaa-ndi túhú ñáyiu xii-í. <sup>25</sup> Dico díhna-gá ndoho vhi-í, te daquèe tíhú ñáhá ñáyiu ñuyú-a xii-í. <sup>26</sup> Te cadá-yu dàtná ní quide ñáyiu ní xindecu cútnàhá ní xindecu té Nõé, te ñu-ni duca<sup>n</sup> sãtnahá-xi cada nchaa ñáyiu ndècu vitna ndéé sãa nduu quixi tucu yúhú Tée cùu ñaní tnàhá-ndó nchaa-ndo. <sup>27</sup> Chi caxi-ni-yu, coho-ni-yu, te caca cuu-ni cue tée xica ndáhú, te tnàndaha-ni-yu, chi duca<sup>n</sup> ñí quidé-yu dàvá-á<sup>n</sup> ndéé ní sãa nduu cuãnguee té Nõé xití bàrcú, te ní ngúita-xi ní cuu<sup>n</sup> dáu ñí ndaa ndute ñuyú, te ncháa-yu ní xihí ní cáhá-yu dàvá-á<sup>n</sup>. <sup>28</sup> Te ñu-ni duca<sup>n</sup> ñí quide tucu ñáyiu cútnàhá ní xindecu té Lõt, chi xèxi-yu xihí-yu, te sãa<sup>n</sup>-yu te nàdicó-yu, te xixitú-yu nándi sã xixitú-yu, te nchaa



cuihna iní-xi quide cobrá ñáhá xii ñáyiú cuendá impuèstú ndécú lha. <sup>12</sup> Chi yúhú ñá túú tnàhí ná xéxi-í úú nduu xití samàná cuendá sá càhá<sup>n</sup> ndihí ñaha-í xii-n, te nchaa sá ñihí-í te càhu-í úxí xichi, te ì<sup>n</sup> xichi tàxi-í xii-n”, càchí-dé xáha<sup>n</sup>-dè xii Yá Ndiöxí. <sup>13</sup> Dico téé cuihna iní-xi quide cobrá ñáhá xii ñáyiú cuendá impuèstú-á<sup>n</sup> chi xica lùha nutñi-dé, te ni lùha ñá túú cùyi-dé ndonehe núú-dè andiú cuendá sá ndíxí cuèchi iní-dé nchaa sá ñà túú vâha quide-dé, te ndèdí ndaha-dé pèchú-dé sá ndihú iní-dé, te xáha<sup>n</sup>-dè xii Yá Ndiöxí: “¡Yòhó Dútú Ndiöxí cundàhú iní ñáhá xii-í, chi ío cuéhé sá ñà túú vâha quide-í núú-n!”, càchí-dé xáha<sup>n</sup>-dè xii Yá Ndiöxí. <sup>14</sup> Te na càchí tnúhu-í xii-ndo sá téé cuihna iní-xi quide cobrá ñáhá xii ñáyiú-á<sup>n</sup> ñí tedóho Yá Ndiöxí nchaa tnúhu ní cáhá<sup>n</sup>-dè, te ní quide càhnu iní-gá nchaa sá ñà túú vâha ní quide-dé, te cuánuhú-dé vehe-dé. Te téé cùu fariséú-á<sup>n</sup> ñà túú ní tedóho ñaha Yá Ndiöxí xii-dé. Chi nchaa ñáyiú na càda cahnu mee-xi ñuyíú-a te vâ cúú-yu ñáyiú cùnnoo, te nchaa ñáyiú ñá túú quide cahnu mee-xi, ñáyiú-á<sup>n</sup> cunúú-yu —càchí Jèsús xáha<sup>n</sup>-gã xii-yu.

*Jèsús quidé ÿ-gã landú*  
(Mt. 19:13-15; Mr. 10:13-16)

<sup>15</sup> Te ì<sup>n</sup> úú ñáyiú ndécá-yu landú lîhli cuáhá<sup>n</sup> núú Jèsús chi cuení-yu sá téndàha ñaha-gá xii-güexi, te òré ní xiní cue téé xica cuu ndihí-gá sá ndécá-yu landú-á<sup>n</sup> cuáhá<sup>n</sup> núú-gã, te ní ngüíta-güedé ténàá ñáhá-güedé xii-yu, te xáha<sup>n</sup>-güedé sá vâ dúcá<sup>n</sup> càdá-yu. <sup>16</sup> Dico Jèsús ní cana ñaha-gã xii-güedé, te ní xáha<sup>n</sup>-gã:

—Chí dáñá ná quixi nahi landú lîhli-á<sup>n</sup> núú-í-a, te vâ càdí-ndó ìchi-güexi, chi dàtná cúú vâha iní cue landú lîhli-á<sup>n</sup> duca<sup>n</sup> cùu vâha iní cue ñáyiú yindaha ñaha Yá Ndiöxí. <sup>17</sup> Te na càchí tnúhu ndáá-í xii-ndo sá núú vâ quíndáá iní ñáhá-ndó dàtná quidé dàva landú lîhli sàndáá iní ñáhá xii-í, te vâ ndíhu ndaha ñaha Yá Ndiöxí xii-ndo, te vâ ndúú tãhú-ndó

cùndecu-ndo ndihí-gá ni caa ni quíhí<sup>n</sup> —càchí-gá xáha<sup>n</sup>-gã xii-güedé.

*Ì<sup>n</sup> téé cuica càhá<sup>n</sup> ndihí-dé Jèsús*  
(Mt. 19:16-30; Mr. 10:17-31)

<sup>18</sup> Te ì<sup>n</sup> téé cùnnoo ní xicá<sup>n</sup> tnúhú-dè núú Jèsús, te xáha<sup>n</sup>-dè xii-gá:

—Yòhó Mèstrú, cùu-n téé ío váha iní-xi, te cuení-í núú vâ cùndèe iní-n càchí tnúhu-n ñá cúú sá vâha cada-í cuendá nduu tãhú-í cùndecu-í ndihí Yá Ndiöxí ni caa ni quíhí<sup>n</sup> —càchí-dé xáha<sup>n</sup>-dè xii-gá.

<sup>19</sup> Te Jèsús ní xáha<sup>n</sup>-gã xii-dé:

—¿Te cùtnuní iní-n nàcuáa ndùu tnúhu càhá<sup>n</sup>-n sá yúhú váha iní-ã<sup>n</sup>? Chi ì<sup>n</sup> díí-ni Yá Ndiöxí váha iní-gá.

<sup>20</sup> Te yòhó xiní-n nàcuáa ní cachí Yá Ndiöxí cada ñáyiú, te duha ní cachí-gá: “Nchòhó cue téé vâ càhá<sup>n</sup> ndihí-ndo ñàdihí te núú ñá díú ñàdihí-ndó cùú-yu, te duca<sup>n</sup>-ni nchòhó cue ñáyiú dîhí tucu vâ càhá<sup>n</sup> ndihí-ndo téé te núú ñá díú yì-ndo cuu-güedé, te vâ cáhni-ndó tnàha ñáyiú-ndo, te ni vâ dúhú-ndó sá ndécú ndihí-yu, te ni vâ dácàcu-ndo cuèchi neñúú sá cúú-xí tnàha ñáyiú-ndo, te canehe-ndo sá yíñuhu núú tãtá-ndó ndihí núú ñaná-ndó”, duha ní cachí Yá Ndiöxí cada ñáyiú —càchí Jèsús xáha<sup>n</sup>-gã xii-dé.

<sup>21</sup> Te téé-á<sup>n</sup> ñí xáha<sup>n</sup>-dè xii-gá:

—Nchaa xíá<sup>n</sup> ní ngüíta-í quidè-í ndéé cùtnàhá cúú landú-í —càchí-dé xáha<sup>n</sup>-dè xii-gá.

<sup>22</sup> Te Jèsús ní xáha<sup>n</sup>-gã xii-dé:

—Dico cùmání ìngá núú sá càdá-n, vitna te quíhí<sup>n</sup>-n te dico-n nchàa sá ndécú ndihí-n, te dîhú<sup>n</sup>-n cuáha tãhú-n cuè ñáyiú ndàhú, te duca<sup>n</sup> te nduu tãhú-n cùndecu váha-n núú ndécú Yá Ndiöxí táxi tnúni-gã, te na yãha duca<sup>n</sup> càda-n te quixi-n chitnahá ñáhá-n xii-í —càchí-gá xáha<sup>n</sup>-gã xii-dé.

<sup>23</sup> Te sá dúcá<sup>n</sup> ñí xáha<sup>n</sup> Jèsús xii-dé, te ío ní cundiyí-dé, chi ío cuica-dè.

<sup>24</sup> Te sá ñí xiní ñáhá Jèsús xii-dé cùndiyí-dé, núú ní cachí-gá:

—¡Ío úhú quíndáá iní ñáyiú cuica Yá Ndiöxí cuendá ndíhu ndaha ñaha-gá

xii-yu! <sup>25</sup> Te yáchí-gá yáha ì<sup>n</sup> càméyu yaú ì<sup>n</sup> yiqui tìcú dàcúxí sǎ quìndáá iní ì<sup>n</sup> ñáyiú cuica Yá Ndiòxí cuèndá ndíhu ndaha ñàha-gá xii-yu —duha ní cachí-gá.

<sup>26</sup> Te nchaa ñáyiú ní tecú dóho-xi tnúhu ní cáhá<sup>n</sup>-gá ní xáhã<sup>n</sup>-yu xii-gá:

—¿Te yoo naníhí tàhú te núu duca<sup>n</sup> vai<sup>n</sup>? —càchí-yu xáhã<sup>n</sup>-yu xii-gá.

<sup>27</sup> Te Jèsús ní xáha<sup>n</sup>-gǎ xii-yu:

—Cue ñáyiú ñuyíú-a chi vá ndácũ-yu ná cadá-yu nàcuáa ndíhu ndaha ñàha Yá Ndiòxí xii-yu, dico mee-gǎ chi ndacu-gá ndíhu ndaha ñàha-gá xii-yu chi nchaa sá vǎha ndàcu-gá quídé-gǎ —càchí-gá xáha<sup>n</sup>-gǎ xii-yu.

<sup>28</sup> Te té Pèlú ní xáha<sup>n</sup>-dě xii-gá:

—Nchúhú ní dándóo-ndí nchaa sá ndécú ndíhi-ndí, te ní tuha ñaha-ndí xii-n —càchí-dé xáhã<sup>n</sup>-dě xii-gá.

<sup>29</sup> Te ní xáha<sup>n</sup>-gǎ xii ñáyiú:

—Na càchí tnúhu ndáá-í xii-ndo sǎ ncháá ñáyiú na dándóo vehe-xi, àdi tátá-xi, nǎná-xi, ñaní-xi, cúha-xi, ñadíhí-xi, déhe-xi cuèndá sá cuíní-yu ndíhu ndaha ñàha Yá Ndiòxí xii-yu, <sup>30</sup> te ío-gá cuéhé sǎ cuǎñaha-gǎ xii-yu cundecu ndíhi-yu, te ñá díú-ní xǎ<sup>n</sup>, chi tnàhá nduu táhũ-yu cundecu ndíhi ñàhá-yu xii-í ní caa ní quíhí<sup>n</sup> ná sáá nduu —càchí-gá xáha<sup>n</sup>-gǎ xii-yu.

*Jèsús càhá<sup>n</sup> tucu-gá sá cáhni ñàha-güedé xii-gá*

*(Mt. 20:17-19; Mr. 10:32-34)*

<sup>31</sup> Te Jèsús ní taudí<sup>n</sup>-gá ndi ùxúú cue téé xica cuu ndíhi-gá tnuú ñáyiú, te ní xáha<sup>n</sup>-gǎ xii-güedé:

—Vitna te quíhí<sup>n</sup>-ó ñùú Jerusàlén, chi yàcá<sup>n</sup> cada-xi nchaa nàcuáa sa ní chídó tnùnì cue téé ní xóo cáhá<sup>n</sup> tnúhu Yá Ndiòxí ndéé sanaha nàcuáa yáha yúhú Téé cùu ñaní tnàhá-ndó nchàa-ndo. <sup>32</sup> Chi cuáha cuèndá ñàhá-güedé xii-í núú cuè téé ñá túú cùu cue téé isràél, te cudíquí ndéé ñàhá-güedé xii-í, te cúcuéhé ñàhá-güedé, te tíú díí ñàhá-güedé xii-í. <sup>33</sup> Te caniha-güedé ndíhi ñí, te dàtnùnì cahni ñaha-güedé xii-í,

dico nduu úní sá cùú-í te ndoto-í —càchí-gá xáha<sup>n</sup>-gǎ xii-güedé.

<sup>34</sup> Dico ní ì<sup>n</sup> tnúhu ní cáhá<sup>n</sup>-gá ñá túú ní tècú tnùnì-güedé, chi ío yidáhu tnúhu ní cáhá<sup>n</sup>-gá nùu xǎ<sup>n</sup> ní ì<sup>n</sup> ñá túú ní tècú tnùnì-güedé.

*Jèsús quídé tǎtna-gá núú ì<sup>n</sup> téé cuàá ñuú Jericó*

*(Mt. 20:29-34; Mr. 10:46-52)*

<sup>35</sup> Te òré tá cùyatni Jesús ñuú Jericó cuáhá<sup>n</sup>, te yuhu ìchi cuáhá<sup>n</sup>-gá-án núcóo ì<sup>n</sup> téé cuàá xicá<sup>n</sup> ndàhú-dé.

<sup>36</sup> Te òré ní tecú dóho-dé xicáhá<sup>n</sup> vai ñáyiú xǎyáha-yu, te ní xicá<sup>n</sup> tnúhú-dé núú ñáyiú ndècu ndíhi-dé ná cuèndá duca<sup>n</sup> vai-yu yáha. <sup>37</sup> Te ní xáhã<sup>n</sup>-yu sá Jèsús téé ñuú Nazàrét ñúhú-dé ìchi.

<sup>38</sup> Te níhi ní cáhá<sup>n</sup>-dé, te xáhã<sup>n</sup>-dě xii-gá:

—¡Jèsús ñaní tnàhá ndíi Dàvíi, cundàhú iní ñàhá xii-í! —càchí-dé xáhã<sup>n</sup>-dě xii-gá.

<sup>39</sup> Te ñáyiú xǎxódó núú nùú Jèsús ní tenáá ñàhá-yu xii-dé, te xáhã<sup>n</sup>-yu sá ná càdí-dé yuhu-dé dico uu<sup>n</sup>-gá níhi ní cáhá<sup>n</sup>-dé xáhã<sup>n</sup>-dě xii-gá:

—¡Yòhó téé cùu ñaní tnàhá ndíi Dàvíi, cundàhú iní ñàhá xii-í! —càchí-dé xáhã<sup>n</sup>-dě xii-gá.

<sup>40</sup> Te Jèsús ní ngúíhí-gá, te ní táuchíú<sup>n</sup>-gǎ ní sánguehe<sup>n</sup> ñaha cuè téé ndíhi-gá. Te òré ní quexìo-dé núú-gǎ, te ní xicá<sup>n</sup> tnúhú-gǎ núú-dé, te xáha<sup>n</sup>-gǎ:

<sup>41</sup> —¿Ná cuíní-n càda ñaha-í xii-n-í? —càchí-gá xáha<sup>n</sup>-gǎ xii-dé.

Te téé cuàá-án ñí xáha<sup>n</sup>-dě:

—Mèstrú, cuíní-í cada tátana-n nùú-í cuèndá cundehe-í —càchí-dé xáhã<sup>n</sup>-dě xii-gá.

<sup>42</sup> Te Jèsús ní xáha<sup>n</sup>-gǎ:

—Sa ní ndúha núú-n chi ní sándáá iní-n Yá Ndiòxí —càchí-gá xáha<sup>n</sup>-gǎ xii-dé.

<sup>43</sup> Te òré-ni-án ñí ndúha núú-dé, te ní chinchícu<sup>n</sup>-dé Jèsús, te ní cachí-dé sá ío càhnu cuu Yá Ndiòxí. Te nchaa ñáyiú ní xiní nàcuáa ní cuu ní ndúha núú-dé tnàhá-yu ní cachí-yu sá ío càhnu cuu Yá Ndiòxí.



## 19

### Jèsús ndìhi ìn tée nàni Zaqueú

<sup>1</sup> Te Jèsús ní sáá-gá ñuú Jericó, te ta yãha-gá xití ñuú-á<sup>n</sup> cuáhá<sup>n</sup>. <sup>2</sup> Te ñuú-á<sup>n</sup> ndécú ìn tée cuica nàni-dé Zaqueú, te cùnuu-dé táxí tnùnì-dé cue tée cùndìhi-dé, cue tée cuihna ìní-xi quide cobrá ñáhá xii ñáyiú cuendá impuèstú. <sup>3</sup> Te tée-á<sup>n</sup> cuìní-dé quini-dé Jèsús òré-á<sup>n</sup> ní cùu te ñá ní ndàcu-dé, chi ío cuéhé ñáyiú, te ñá túú dùcú<sup>n</sup>-dé. <sup>4</sup> Te xìnu-dé ní ngódó núú-dě te ní sáá-dé díquí ìn yutnu sícómorú nùtní yatni yuhu ìchi núú yãha Jèsús cuendá cuìní-dé quini ñáhá-dě xii-gá. <sup>5</sup> Te òré tá yãha Jèsús xíá<sup>n</sup>, te ní ndonehe núú-gá díquí yutnu núú cándòdo-dé-á<sup>n</sup>, te ní xáha<sup>n</sup>-gá xii-dé:

—Zaqueú, tanùu ndìhi díquí yutnu-á<sup>n</sup>, chi tnaví quexìo-í vehe-n ndètátú-í —càchí-gá xáha<sup>n</sup>-gá xii-dé.

<sup>6</sup> Te té Zaqueú-á<sup>n</sup> ñi nuu ndìhi-dé díquí yutnu-á<sup>n</sup>, te ío ní cudí ìní-dé ní quehe<sup>n</sup> cuendá-dé Jèsús vehe-dé. <sup>7</sup> Te sá ñi xini ñáyiú ní quexìo Jèsús vehe-dé, te ncháa-yu ní ngúita-yu càhá<sup>n</sup> cuéhé-yu cuendá-gá, te xitnàhá-yu:

—Tée-a cuánguihu-dé vehe ìn tée ndècu ìchi cuehé ìchi duha —càchí-yu xitnàhá-yu.

<sup>8</sup> Te té Zaqueú-á<sup>n</sup> ñi ndacuíñí-dé tnuú-yu, te xáha<sup>n</sup>-dě xii Jèsús:

—Yòhó Mèstrú, na cuãha-í ñáyiú ndàhú cuádava ncháa sá ndécú ndìhi-í. Te núu yoo ní dándàhú-í ní dúhù-í, te codo ùní-gá tnàhá sá ñi dúhù-í-yu nacuañaha-í xii-yu —càchí-dé xáha<sup>n</sup>-dě xii-gá.

<sup>9</sup> Te Jèsús ní xáha<sup>n</sup>-gá xii té Zaqueú:

—Vitna ní naníhí tàhú-n ndìhi ncháa ñáyiú xindecu vehe-n, chi tnàhá-n cùu-n ñani tnàhá ndìhi Abrahám. <sup>10</sup> Te yúhú Tée cùu ñani tnàhá-ndó ncháa-ndo véxi-í nándùcu-í ñáyiú ní xíta nihnu cuendá dàcácu nihnu-í-yu núú ùhú núú ndàhú —càchí-gá xáha<sup>n</sup>-gá xii-dé.

### Nàcuáa ní quide-güedé ndìhi díhú<sup>n</sup> cuáá<sup>n</sup>

(Mt. 25:14-30)

<sup>11</sup> Te ncháa ñáyiú-á<sup>n</sup> ñi sani iní-yu sá ndìhi-ni ndìhu ndaha ñàha Yá Ndiõxí xii-yu cuendá sá ñi cuyatni Jèsús ñuú Jerusalén, te xíá<sup>n</sup> núu ní ngúita Jèsús ní cani-gá ìn cuendú núu-yu cuendá tecú tnùnì váha-yu tnúhu-gá. <sup>12</sup> Te xáha<sup>n</sup>-gá xii-yu:

—Ní xindecu ìn tée cùu ñani tnàhá ñáyiú cùnuu, te cuáhá<sup>n</sup>-dé ingá ñuú xíca cuendá yacá<sup>n</sup> cuáha ñaha-güedé chiu<sup>n</sup> coo-dé, te dàtnùnì ndixi-dé quindaha-dě titní ñuú. <sup>13</sup> Te cùmání-gá quee-dé quíhí<sup>n</sup>-dé, te ní cana-dé úxí cue tée xìnu cuechi núú-dě, te ní sáñaha-dě ndí díhú<sup>n</sup> núu-güedé ìn caa ìn caa díhú<sup>n</sup> cuáá<sup>n</sup>, te ní xáha<sup>n</sup>-dě: “Chí cáda ndàhú ndìhi díhú<sup>n</sup>-á<sup>n</sup> ndèé ná sáa nduu nàsáa-í”, càchí-dé xáha<sup>n</sup>-dě xii-güedé. <sup>14</sup> Dico ncháa ñáyiú ñuú quindaha-dě-á<sup>n</sup> ñà túú tnàhá iní-yu sá quindaha ñaha-dé, núu ní tendàhá-yu cue tée nèhe tnúhu cuáhá<sup>n</sup> núú cuè tée cuañaha chiu<sup>n</sup> coo-dé-á<sup>n</sup>, te ní xáhá<sup>n</sup>-yu sá cùñaha-güedé sá ñà túú tnàhá iní-yu sá tée-á<sup>n</sup> quindaha ñaha-dé xii-yu. <sup>15</sup> Dico dacuití sá ñi sáha-güedé tée-á<sup>n</sup> chiu<sup>n</sup> coo-dé sá díú-dě quindaha-dě ñáyiú ncháa ñuú-á<sup>n</sup>, te ní nacuico-dě cuánuhú-dé ñuú-dé. Te òré ní nasáa-dé vehe-dé, te ní tendaha-dě ìn tée ní sánucana ñaha xii cue tée xìnu cuechi núú-dě, cue tée ní dándõo ndaha-dě díhú<sup>n</sup> cuendá cáca<sup>n</sup> tnúhú-dě núú-güedé ìn ìn-güedé núu ndèé dau ní chídó-xí díquí díhú<sup>n</sup> sá ñi dándõo ndaha ñaha-dé-á<sup>n</sup>. <sup>16</sup> Te tée ní ndèxio díhna xáha<sup>n</sup>-dě: “Patróó<sup>n</sup>, ní quide-í ndàhú ndìhi díhú<sup>n</sup>-n sá ñi dándõo ndaha ñaha-n xii-í, te sá ìn ñi taxi-n te ní chídó-xí ùxí-gá tnàhá te náu-a naquehe<sup>n</sup> cuendá-n”, càchí-dé xáha<sup>n</sup>-dě. <sup>17</sup> Te tée cùu patróó<sup>n</sup>-dě-á<sup>n</sup> ñi xáha<sup>n</sup>-dě: “Ío váha tée xìnu cuechi cuu-n chi ío váha ní quide-n, te sá ñi quide váha-n ndìhi sacú díhú<sup>n</sup> sá ñi dándõo ndaha ñaha-í xii-n, te xíá<sup>n</sup> núu yúhú càchí-í sá táxí tnùnì-n ùxí ñuú vitna”, càchí-dé xáha<sup>n</sup>-dě. <sup>18</sup> Te

ní ndexìo ingá-dé, te ní xáha<sup>n</sup>-dë: “Pàtróón, ní quide-í ndáhú ndìhi díhú<sup>n</sup>-n sã ñí dándõ ndaha ñàha-n xii-í, te sá ìí<sup>n</sup> ñí taxi-n te ní chídó-xí ùhú<sup>n</sup>-gá tnhá te ná-u-a naquehe<sup>n</sup> cuendá-n”, càchí-dé xáha<sup>n</sup>-dë. <sup>19</sup> Te ní xáha<sup>n</sup> tée cùu patróón-dë-á<sup>n</sup> xii-dé: “Te yòhó taxi tñuní-n ùhú<sup>n</sup> ñuú”, càchí-dé xáha<sup>n</sup>-dë xii tée xìnu cuechi-á<sup>n</sup>. <sup>20</sup> Te dātñuní ní ndexìo tucu ingá-dé, te xáha<sup>n</sup>-dë: “Pàtróón, náu díhú<sup>n</sup>-n-á, te naquehe<sup>n</sup> cuendá-n chí ní taxúha-í ní chidúcú<sup>n</sup>nuu-í ìí<sup>n</sup> pàñú te ñá túú ní quide-í ndáhú ndìhi díhú<sup>n</sup>-n, <sup>21</sup> chí ní yuhú ñáhà-í xii-n, chí cùu-n ìí<sup>n</sup> tée díi, te nàquehe<sup>n</sup>-n ìí<sup>n</sup> sá ñà túú ní tàxi ndecu-n, te nàtahu-n ìí<sup>n</sup> xichi núú ñà túú ní chíhi-n tatá”, càchí-dé xáha<sup>n</sup>-dë xii patróón-dë. <sup>22</sup> Te ní xáha<sup>n</sup> patróón-dë xii-dé: “Yòhó cúú-n ìí<sup>n</sup> tée cuihna iní-xi xìnu cuechi núú-í, te ñu-ni nchaa tñuhu càhá<sup>n</sup>-n-á<sup>n</sup> càchí tñuní-xi nàcuáa cuu ndáá cuéchi-n. Te núu sàni iní-n sã cúú-í ìí<sup>n</sup> tée díi, te nàquehe<sup>n</sup>-í ìí<sup>n</sup> sá ñà túú ní tàxi ndecu-í, te nàtahu-í ìí<sup>n</sup> xichi núú ñà túú ñí chíhi-í tatá, <sup>23</sup> te núu duca<sup>n</sup> ña, ¿te ná cuendá ñá túú ní càhu iní-n dàsa<sup>n</sup> nuu-n díhú<sup>n</sup> ñí taxi-í, te cúñaha-n chãhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naquehe<sup>n</sup> cuendá-í ní cùu-í?”, càchí-dé xáha<sup>n</sup>-dë xii tée xìnu cuechi-á<sup>n</sup>. <sup>24</sup> Te ní xáha<sup>n</sup> tée cùu patróón-á<sup>n</sup> xii cue tée xìndecu xiá<sup>n</sup>: “Chí quèndèé díhú<sup>n</sup> cuáá<sup>n</sup> néhé tée-a, te cuáha-ndo tée nèhe úxí tucu díhú<sup>n</sup> cuáá<sup>n</sup>-á<sup>n</sup>”, càchí-dé xáha<sup>n</sup>-dë xii-güedé. <sup>25</sup> Te ní xáha<sup>n</sup>-güedé: “Pàtróón, dico sa nèhe-dé úxí díhú<sup>n</sup> cuáá<sup>n</sup>”, càchí-güedé xáha<sup>n</sup>-güedé. <sup>26</sup> Te ní xáha<sup>n</sup> tée cùu patróón-á<sup>n</sup>: “Na càchí tñuhu-í xii-ndo sã cuè ñáyíu ò xii-xi te níhí-gã-yu cundecu ndìhí-yu, te cue ñáyíu sacú ndécú ndìhi cuita ndìhi nihnu nchaa sá ndécú ndìhí-yu”, càchí tée cùu patróón-á<sup>n</sup> xáha<sup>n</sup>-dë xii-güedé. <sup>27</sup> Te xáha<sup>n</sup> tucu-dé xii-güedé: “Nchaa ñáyíu cùu úhú iní ñáhá xii-í ñá tnhá iní-yu quindaha-í-yu, te chí cándecá-yu taquixi iha, te cahni-ndõ-yu núú-í-a”, càchí tée cùu patróón-á<sup>n</sup> xáha<sup>n</sup>-dë

xii-güedé —duha cuáhá<sup>n</sup> cuendú ní cani Jèsús núú ñáyíu.

*Jèsús cuánguìhu-gá ñuú Jerusalén*  
(Mt. 21:1-11; Mr. 11:1-11; Jn. 12:12-19)

<sup>28</sup> Te sáta dúcá<sup>n</sup> ñí cáhá<sup>n</sup>-gá, te ní nucúhu<sup>n</sup> ichi-gá cuáhá<sup>n</sup>-gá ñuú Jerusalén. <sup>29</sup> Te òré sa ní cuyatni-gá ñuú Bèttagé, ndìhi ñuú Bètaniá te xiá<sup>n</sup> cáa yùcu nani Olívú, te ní xáha<sup>n</sup>-gã xii úú cue tée xìca cuu ndìhi-gá:

<sup>30</sup> —Chí cuáhá<sup>n</sup> ñuú cáa yàtni yacá<sup>n</sup>, te òré quexìo-ndo yacá<sup>n</sup>, te naníhí-ndó ìí<sup>n</sup> búrru ndètníi-di, te vátá yòo ìí<sup>n</sup>-gá codo ñàha xii-di, te nandaxi-ndo-di te candeca-ndo-di quixi. <sup>31</sup> Te núu yoo na càcá<sup>n</sup> tñuhu núú-ndó ñá cuendá nándaxi-ndo-di, te cúñaha-ndo xií-yu sá yuhú Yaá xícá cùu ndìhi-ndo xini ñuhu-í-di —càchí-gá xáha<sup>n</sup>-gã xii-güedé.

<sup>32</sup> Te cue tée-á<sup>n</sup> ñí xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús duca<sup>n</sup> ñí cuu, <sup>33</sup> chí mei òré nándaxi-güedé búrru-á<sup>n</sup> ñí quexìo cue ñáyíu cùu xitohó-di xícá<sup>n</sup> tñuhu-yu núú-güedé, te xáhã<sup>n</sup>-yu:

—¿Ná cuendá nándaxi-ndo búrru-ndí-í?  
—càchí-yu xáhã<sup>n</sup>-yu.

<sup>34</sup> Te ní xáha<sup>n</sup>-güedé xií-yu:

—Nà ndaxi-ndí-di chí Yaá xícá cùu ndìhi-ndí xini ñuhu ñaha-gá xii-di —càchí-güedé xáha<sup>n</sup>-güedé xií-yu.

<sup>35</sup> Te ndèca-güedé-di cuáhá<sup>n</sup> núú ndécú Jèsús, te òré ní quexìo-güedé ndìhi-di núú ndécú-gã te ní sacá<sup>n</sup> ndodo-güedé dóo-güedé sáta-di, te ní ngódó ñáhá-gã xii-di. <sup>36</sup> Te ío cuéhé ñáyíu ta sàcá<sup>n</sup>-yu dóo-yu ichi cuáhá<sup>n</sup>-gá cuendá núú dóo-yu-á<sup>n</sup> yáha-gá ndìhi quiti yòdo-gá. <sup>37</sup> Te ní nucuíta nuu-gá ichi tindúú yucu Olívú tá cùyatni-gá ñuú Jerusalén cuáhá<sup>n</sup>, te nchaa ñáyíu sàndáá iní ñáhá xii-gá nchícú<sup>n</sup> ñáhã-yu te ní ngúíta-yu níhi càhá<sup>n</sup>-yu sá cúdí iní-yu, te càchí-yu sá ò càhnu cuu Yá Ndióxí cuendá sá ñí xini-yu nchaa sá vã yòo tnhá ndàcu cada ní quide-gá. <sup>38</sup> Te càchí-yu:

—Ío càhnu cuu Yaá véxi quindaha ñàha xii-o, te ñu-gá cúú-gã Yaá ní

tendaha Yă Ndiöxí véxi quide núú-gă! ;Te ío càhnu cuu mee-gá! ;Te andiu ña túú tnàhí ná cúú! —duha càchí-yu.

<sup>39</sup> Te ì<sup>n</sup> úú cue téé cùu fariséú ñúhú tnàhá tnuú ñáyiú-á<sup>n</sup> ñí xáha<sup>n</sup>-güedě xii Jèsús:

—Mèstrú, cúñaha nchàa ñáyiú ndihí-n na càdí-yu yuhú-yu — càchí-güedě xáha<sup>n</sup>-güedě xii-gá.

<sup>40</sup> Dico Jèsús ní xáha<sup>n</sup>-gă xii-güedě:

—Te na càchí tnúhu-í xii-ndo sã núú ñáyiú-a na càdí-yu yuhú-yu ña, te nchaa yúú cãhá<sup>n</sup> níhi-xi dàtná ì<sup>n</sup> ñáyiú —càchí-gă xáha<sup>n</sup>-gă xii-güedě.

<sup>41</sup> Te òré ní cuyatni-gă ñuú Jerusálén te ní xiní-gă, te ní ndáhyú-gă cuendá nchaa ñáyiú dii ñuú-xi-á<sup>n</sup> sã ndihú iní-gă. <sup>42</sup> Te ní xáha<sup>n</sup>-gă xii cue ñáyiú-á<sup>n</sup>:

—Ío cuu váha iní-í te núú dicó nchòhó tecú tnùní-ndó vitna ì<sup>n</sup> tnúhu sá cadá váha ñaha xii-ndo, chi ñá túú-gă ná cuu cundecu-ndo, te núú na tècú tnùní-ndó. Dico ñá tècú tnùní-ndó, chi ío yidáhu tnúhu-a. <sup>43</sup> Te sáá nduu tnündòho tnúhu ndàhú sá cúú-xí-ndó, te nchaa cue téé dava-gă ñuú cúú úhú iní tnàhá ndihí-ndo quixi-güedě chidoco ñaha-güedě xii-ndo, te ñi càndéé núú ndécú-ndó-ă<sup>n</sup> dacàa-güedě ndóho cuendá xiá<sup>n</sup> quihí váha-güedě nàá ndihí ñaha-güedě xii-ndo, te vá dáñá-güedě cunu-ndo. <sup>44</sup> Te cahni ñaha-güedě xii-ndo, te ndihí nchaa vehe-ndo dängoyo-güedě ndéé cimièntú-xi, chi ñá túú ní cuiní-ndó nàcuáha-ndo cuendá òré ní quixi coto ñaha Yă Ndiöxí xii-ndo —duha ní xáha<sup>n</sup>-gă xii ñáyiú ñuú-á<sup>n</sup>.

*Jèsús ñá túú tnàhá iní-gă nàcuáa quidé-yu veñúhu*

(Mt. 21:12-17; Mr. 11:15-19; Jn. 2:13-22)

<sup>45</sup> Te Jèsús cuánguihu-gă xití veñúhu càhnu sá ío cùnuu, te xití veñúhu-á<sup>n</sup> xĩndecu cue ñáyiú quide ndáhu ndihí cue ñáyiú xísaa<sup>n</sup>. Te ní queñuhu ñaha Jèsús xií-yu quehé. <sup>46</sup> Te ní xáha<sup>n</sup>-gă xií-yu:

—Núú tütú Yă Ndiöxí càhá<sup>n</sup>-xi nàcuáa ní cãhá<sup>n</sup>-gă, te duha ní

cachí-gă: “Vehe-í cúú-xí núú càhá<sup>n</sup> ndihí ñaha ñáyiú xii-í”, duha ní cãhá<sup>n</sup>-gă càchí-xi núú tütú-gă. Dico nchòhó quidé-ndó vehe-gă vehe ñadúhú —càchí-gă xáha<sup>n</sup>-gă xií-yu.

<sup>47</sup> Te Jèsús nchaa nduu dānehé-gă ñáyiú xití veñúhu, dico cue téé cùu dütú cùnùu, ndihí cue téé dācuaha ñaha xii ñáyiú nchaa tnúhu ní chídó tnùní ndii Moisés, ndihí cue téé cùnùu ñuú-á<sup>n</sup> ndúcú-güedě nàcuáa cada-güedě cahni ñaha-güedě xii-gă. <sup>48</sup> Dico ñá ñihí-güedě nàcuáa cada-güedě, chi cuendá nchaa ñáyiú ío cùdíí iní-yu ndèdòho-yu nchaa tnúhu càhá<sup>n</sup>-gă.

## 20

*Jèsús ndécú ndihí-gă tnúhu ndee iní (Mt. 21:23-27; Mr. 11:27-33)*

<sup>1</sup> Te ì<sup>n</sup> nduu yihí Jesús xití veñúhu càhnu sá ío cùnùu danehé-gă ñáyiú tnúhu sá càhá<sup>n</sup> nàcuáa naníhí tãhú-yu. Te ní quexio cue téé cùu dütú cùnùu ndihí cue téé dācuaha ñaha xii ñáyiú nchaa tnúhu ní chídó tnùní ndii Moisés, ndihí cue téé cùu sacuéhé núú ñáyiú isràél, <sup>2</sup> te ní xáha<sup>n</sup>-güedě xii-gă:

—Cuiní-ndí cachí tnúhu-n xii-ndí nása nduu tnúhu ndee iní ndécú ndihí-n núú quide-n nándi sá quidé-n. ¿Te yoo duca<sup>n</sup> ñí taxi tnúhu ndee iní-á<sup>n</sup> xii-n? —càchí-güedě xáha<sup>n</sup>-güedě xii-gă.

<sup>3</sup> Te Jèsús ní xáha<sup>n</sup>-gă:

—Yúhú tnàhá-í cuiní-í cãcã<sup>n</sup> tnúhu-í ì<sup>n</sup> sá cãcã<sup>n</sup> tnúhu-í núú-ndó, te cachí tnúhu-ndo. <sup>4</sup> Te chí càchí tnúhu xii-í yoo ní táuchíú<sup>n</sup> ñí dācuándute ndii Juáá ñáyiú. ¿Yá Ndiöxí ă<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndii? —càchí-gă xáha<sup>n</sup>-gă xii-güedě.

<sup>5</sup> Te ní ngüita-güedě xitnàha-güedě:

—¿Nása cúñaha-o? Chi núú nà cúñaha-o sã Yă Ndiöxí ní táuchíú<sup>n</sup> dùca<sup>n</sup> ní quide ndii Juáá ñá, te quesaha-dé: “¿Ná cuendá ñá túú ní sãndáá iní-ndó tnúhu ní cãhá<sup>n</sup> ndii vãí<sup>n</sup>?”, quesaha-dé. <sup>6</sup> Àdi te núú nà cúñaha-o sã cuè ñáyiú ñuyíú-a ní táuchíú<sup>n</sup> dùca<sup>n</sup> ní quide ndii ña, te nchaa ñáyiú cuáha ñahá-yu yúú

xii-o, te cahni ñàhá-yu, chi càchí-yu sá ndáá sá Yá Ndiõxí ní táuchíú<sup>n</sup>-gá ní cáhá<sup>n</sup> ndí Juáá tnúhu-gá núú ñáyi —càchí-güedé xítnàha-güedé.

<sup>7</sup> Te ní xáha<sup>n</sup>-güedé xii-gá sá ñà túú xìní-güedé yoo ní táuchíú<sup>n</sup> dùca<sup>n</sup> ní dácúandùte ndí Juáá ñáyi. <sup>8</sup> Te ní xáha<sup>n</sup> Jèsús xii-güedé:

—Te núu duca<sup>n</sup> te ni yùhú vá càchí tnúhu-í xii-ndo yòo ní taxi tnúhu ndee ìní duha quide-í —càchí-gá xáha<sup>n</sup>-gá xii-güedé.

*Cuendá cue té cuihna iní-xi  
(Mt. 21:33-44; Mr. 12:1-11)*

<sup>9</sup> Te sáta dúcá<sup>n</sup> te ní nguíta Jèsús ní cani-gá ì<sup>n</sup> cuendú núú ñáyi nàcuáa tecú tnùní-yu tnúhu-gá, te xáha<sup>n</sup>-gá xií-yu:

—Ì<sup>n</sup> téé ní xitu-dé mee-ni yòho yaha stilé núú ñúhú-dé. Te ní sáá ì<sup>n</sup> nduu quingaca cuu xica-dé vài nduu te ní dándõo ndaha-dé sá ñi xitu-dé-á<sup>n</sup> xii ì<sup>n</sup> úú cue téé càhá<sup>n</sup> ndihí-dé cuendá cada chiú<sup>n</sup>-güedé, te ní ndatnúhu-güedé sá òré ná cùu te cuu cuendá dava-güedé te duca<sup>n</sup> te ní quee-dé cuáhá<sup>n</sup>-dé. <sup>10</sup> Te sáta ñi sáá nduu ñi cuu nchaa ndéhé yoho yàha stilé sá ñi xitu-dé-á<sup>n</sup>, te ní xáha<sup>n</sup>-dé xii ì<sup>n</sup> téé xínu cuechi núú-dé: “Cuáhá<sup>n</sup> cáca<sup>n</sup>-ñ sá cúú cuendá-í núú cuè téé ní dándõo ndàha-í nchaa yoho yàha stilé sá ñi xitu-í”, càchí-dé xáha<sup>n</sup>-dé. Te téé xínu cuechi-á<sup>n</sup> ñi xica-dé cuáhá<sup>n</sup>-dé, dico cue téé ndéé nchaa yoho yàha stilé-á<sup>n</sup> ñi tñi-güedé téé xínu cuechi-á<sup>n</sup> te ní caniha-güedé, te ní nacuícú<sup>n</sup> ñàhá-güedé xii-dé, te ñá túú tnàhí ná ní sãñaha-güedé. <sup>11</sup> Te dätñuní téé cùu xítóhó nchaa yoho yàha stilé-á<sup>n</sup> ñi tendaha tucu-dé ingá téé xínu cuechi núú-dé cuáhá<sup>n</sup>-dé, dico ñu-ni duca<sup>n</sup> ñi quide ñaha-güedé xii-dé, chi ní xícühé ñàhá-güedé, te ní caniha-güedé te ní nacuícú<sup>n</sup> ñàhá-güedé, te ñá túú tnàhí ná ní sãñaha-güedé. <sup>12</sup> Te téé cùu xítóhó nchaa yoho yàha stilé-á<sup>n</sup> ñi tendaha tucu-dé ingá-dé cuáhá<sup>n</sup>-dé, te ñu-ni duca<sup>n</sup> ñi quide ñaha tucu-güedé, chi ní dánícühé ñàhá-güedé, te ní nacuícú<sup>n</sup> ñàhá-güedé.

<sup>13</sup> Te téé cùu xítóhó nchaa yoho yàha stilé-á<sup>n</sup> ñi sani iní-dé: “¿Nása cada-í vitna? Váha-gá tendaha-í déhe-í téé ío cùu iní-a núhú-dé, chi cudana te òré quini ñàhá-güedé xii-dé, te canehe-güedé sá yíñuhu núú-dé”, duha ní sani iní-dé. <sup>14</sup> Dico òré ní xini cue téé quide chiú<sup>n</sup>-á<sup>n</sup> déhe xítóhó nchaa yoho yàha stilé-á<sup>n</sup>, te ní xítnàha-güedé: “Téé-á<sup>n</sup> téé véxi nduu táhú ñuhu-a ndihí nchaa sá cáá núú-xi, dico cahni-o-dé te mee-o nduu tahú-ó sá ndúú táhú-dé”, càchí-güedé xítnàha-güedé. <sup>15</sup> Te ní queñuhu ñaha-güedé ì<sup>n</sup> xio yuhu ñuhu-á<sup>n</sup>, te ní sañi ñaha-güedé xii-dé —duha cuáhá<sup>n</sup> cuendú ní cani Jèsús núú-yu.

Te dätñuní ní xáha<sup>n</sup> tucu-gá xií-yu:

—¿Te nchòhó sa cùtnuní iní-ndó nàcuáa cada ñaha xítóhó ñuhu-á<sup>n</sup> xii cue téé-á<sup>n</sup> ñá? <sup>16</sup> Chi núhú-dé te cahni-dé cue téé-á<sup>n</sup>, te dándõo ndaha-dé ñuhu-dé xii cue téé cùtnuní iní-dé cada ndáá —càchí-gá xáha<sup>n</sup>-gá xií-yu.

Te sá dúcá<sup>n</sup> ñi cáhá<sup>n</sup>-gá, núu ní cachí-yu:

—¿Sá vã càchí Ndiõxí sá dúcá<sup>n</sup> yàha-o! —càchí-yu.

<sup>17</sup> Te Jèsús ní ndacoto-gá núú-yu, te ní xáha<sup>n</sup>-gã:

—Chí càchí tnúhu nása quèe-xi nacuícú<sup>n</sup> càhá<sup>n</sup>-xi núú tütú Yá Ndiõxí, núú càchí-xi:

Yúú sá ñi dáquéé tñhú cue téé dàcaa vehe ní saa-xi cùu-xi yúú cúnùu vitna.

Duha càchí-xi núú tütú-gá. <sup>18</sup> Te nchaa ñáyi ñá túú cuini tñi tnúhu-í, te ndohó-yu dätñá ì<sup>n</sup> ñáyi tnàhnú duu<sup>n</sup> òré ndúá-yu núú yúú, àdi núu na tàú ñàhá-xi te dácachi duu<sup>n</sup> ñaha-xi —cachí-gá xáha<sup>n</sup>-gã xií-yu.

*Cuendá impuèstú*

*(Mt. 21:45-46; 22:15-22; Mr. 12:12-17)*

<sup>19</sup> Te cue téé cùu dütú cúnùu, ndihí cue téé dàcuaha ñaha xii ñáyi nchaa tnúhu ní chídó tnùní ndí Moisés ní cuini-güedé tñi-güedé Jèsús òré-ni-á ní cùu, chi ní cutñuní iní-güedé sá cuendá-güedé ní cáhá<sup>n</sup>-gá, dico



ní yùhú-güedé cuèndá sá ïo vâi ñáiyu. <sup>20</sup> Te ní ndúcú-güedé nâcuâa cada-güedé tñi ñaha-güedé xii-gá, te ní tendaha-güedé cue tée cuáhá<sup>n</sup> ngoto dayuhu ñaha xii-gá, te cuáhá<sup>n</sup>-güedé dàtná cue tée váha iní-xi, te ndùcu-güedé nâcuâa cada-güedé ñu cáhá<sup>n</sup>-gá ñ<sup>n</sup> tnúhu sá ñà túú tàú-gá cáhá<sup>n</sup>-gá cuèndá duca<sup>n</sup> te candeca ñaha-güedé xii-gá quíhí<sup>n</sup> cuáha cuèndá ñáhá-güedé núú tēe cùnū. <sup>21</sup> Te ní xáha<sup>n</sup>-güedé xii Jèsús:

—Mèstrú, ñihí-ndí tnúhu sá dánèhé-n ñáiyu mee-ni tnúhu váha, te cuèi ndédani càa ñáiyu ñ<sup>n</sup>-ni càhá<sup>n</sup>-n ndihí-yu, te càhá<sup>n</sup> ndáá-n nâcuâa càhá<sup>n</sup> Yá Ndiöxí cundecu-o ñùyú-a. <sup>22</sup> Te cachí tnúhu xii-ndí ñu váha-ni cháhu-ndí té Cèsár téé ío cùnū cuendá impuèstú ã<sup>n</sup> ñáhá —càchí-güedé xáha<sup>n</sup>-güedé xii-gá.

<sup>23</sup> Dico Jèsús ní cutnùní iní-gá sá xító ndéé ñáhá-güedé xii-gá, núú ní xáha<sup>n</sup>-gá xii-güedé:

<sup>24</sup> —Chí dánèhé ñáhá xii-í ñ<sup>n</sup> díhú<sup>n</sup> cuixí<sup>n</sup> te cachí tnúhu-ndo ñu yoo núú-xi ndéé, ndihí yoo ñu-xi ndéé —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú tē Cèsár ndéé ndihí ñu-dé —càchí-güedé xáha<sup>n</sup>-güedé xii-gá.

<sup>25</sup> Te ní xáha<sup>n</sup> tùcu-gá xii-güedé:

—Te núú duca<sup>n</sup> te chí nácuáha té Cèsár sá cúú cuèndá-dé, te sá cúú cuèndá méé Yá Ndiöxí, te xiá<sup>n</sup> nacuáha-ndo-gá —càchí-gá xáha<sup>n</sup>-gá xii-güedé.

<sup>26</sup> Te ñá ní ndàcu tnahí-güedé dàtìcànū ñaha-güedé xii-gá núú tnúhu càhá<sup>n</sup>-gá, chí òré ní càhá<sup>n</sup>-gá, te da ní cuñúhu-güedé nchaa tnúhu ní càhá<sup>n</sup>-gá, te váha-gá ní sadí-güedé yuhu-güedé.

*Cuèndá nchaa ñáiyu ndoto  
(Mt. 22:23-33; Mr. 12:18-27)*

<sup>27</sup> Te sátá dúcá<sup>n</sup> te ní sáá ñ<sup>n</sup> ùú cue tée cùu saducéú núú ndécú Jèsús. Te cue téé-án ñà túú sàndáá iní-güedé sá ndótó cuè ñáiyu ní xihí, te ní xáha<sup>n</sup>-güedé xii-gá:

<sup>28</sup> —Mèstrú, ndíi Moisés càchí ndíi núú tùtú ndècu vitna sá ñu ñ<sup>n</sup> téé na cùú, te quendóo ñadìhí-dé te ñá túú dēhe-dé ní xōo ndihí-a<sup>n</sup>, te téé cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuèndá coo dēhe-dé ndihí-a<sup>n</sup> cuèndá ñaní-dé téé ní xihí-á<sup>n</sup>. <sup>29</sup> Te ní xíndecu úsá tñáhá cue téé mee-ni ndí ñaní-güedé. Te téé díhna ní níhí ñadìhí-dé, dico ñá túú ní cùdí-dé cundecu-dé chí ní xihí-dé, te ní ñ<sup>n</sup> dēhe-dé ñá túú ní xōo ndihí ñadìhí-dé-á<sup>n</sup>. <sup>30</sup> Te téé cùu uú ní naquehe<sup>n</sup>-dé ñaha ní quendóo quèé-á<sup>n</sup> dico ní xihí tucu-dé, te ní ñ<sup>n</sup> tucu dēhe-dé ñá túú ní xōo ndihí ñaha-á<sup>n</sup>. <sup>31</sup> Te téé cùu uní ní naquehe<sup>n</sup> tucu-dé ñaha ní quendóo quèé-á<sup>n</sup>, te ñu-ni duca<sup>n</sup> ní xihí-dé, te ní xínu ndí ùsá-güedé ní càndeca ñaha-güedé xii ñaha-á<sup>n</sup>, dico ní ñ<sup>n</sup>-güedé ñá túú ní xōo dēhe-güedé ndihí-a<sup>n</sup>, te ní ndihí-güedé ní xihí. <sup>32</sup> Te ndéé núú ñ<sup>n</sup> ndihí-ná ní xihí tñáhá ñadìhí-á<sup>n</sup>. <sup>33</sup> Te na sáa nduu ndòto-güedé ndihí ñaha-á<sup>n</sup> ¿Te ndédacàa-güedé ñadìhí-güedé cuu-a<sup>n</sup>-i? Chí ndí ùsá-güedé ní càndeca ñaha-güedé xii-a<sup>n</sup> —càchí-güedé xáha<sup>n</sup>-güedé xii-gá.

<sup>34</sup> Te Jèsús ní xáha<sup>n</sup>-gá xii-güedé:

—Nchaa ñáiyu ñuyú-a tñandahá-yu. <sup>35</sup> Dico nchaa ñáiyu ní nduu táhú ndoto díhna nuu ñáiyu-á<sup>n</sup> cundecú-yu ndihí Yá Ndiöxí ní caa ní quíhí<sup>n</sup>, te yacá<sup>n</sup> ñá túú-gá sá càndeca tñahá-yu. <sup>36</sup> Te ní ñà túú-gá tnúhu xihí, chí cuu-ná-yu dàtná cue espíritú xínú cuèchi núú Yá Ndiöxí cuèndá sá ñ<sup>n</sup> ndotó-yu, chí cúú-yu dēhe-gá. <sup>37</sup> Te ndéé ndíi Moisés ní chídó tñùní ndíi núú tùtú ndíi sá ncháá ñáiyu ní xihí ndotó-yu, te ñu-ni xiá<sup>n</sup> càhá<sup>n</sup>-xi cuèndá tnutàú nchìcú<sup>n</sup> ñuhú, te ñu-ni xiá<sup>n</sup> càchí tucu-xi sá Yá Ndiöxí cúú-gá Ndiöxí ndíi Àbrahám, ndíi Isàác, ndihí ndíi Jàcób. <sup>38</sup> Te cue téé-án chí cuèi ní xihí-güedé sá cúú-xi nchòhó, dico sá cúú-xi Yá Ndiöxí chí ndècu vívú-ni-güedé. Chí cùtnuní iní-ó sá Yá Ndiöxí cúú-gá Ndiöxí mee-ni cuè ñáiyu xíndecu vívú, te ñá túú cùu-gá Ndiöxí cue ñáiyu ñá túú ndècu vívú.

Te sá cúu-xí mèe-gá chi nchaa ñáyiú ndècu ndihi-gá ndécú vïvũ-yu cuèi sa ní xihí-yu núú ñùyíú-a —càchí-gá xáha<sup>n</sup>-gã xii-güedé.

<sup>39</sup> Te ñ<sup>n</sup> tée dàcuaha ñaha xii ñáyiú nchaa tnúhu ní chídó tnùní ndí Moisés ní xáha<sup>n</sup>-dë xii Jèsús:

—Mèstrú, váha-ni càhá<sup>n</sup>-n —càchí-dé xáha<sup>n</sup>-dë xii-gá. <sup>40</sup> Te ñá túú-gã ní cùyi-güedé cáca<sup>n</sup> tnúhú-güedé ni ñ<sup>n</sup> tnúhu núú-gã.

*Yoo déhe-xi cùu Cristú*  
(Mt. 22:41-46; Mr. 12:35-37)

<sup>41</sup> Te Jèsús ní xáha<sup>n</sup>-gã xii-güedé:

—¿Te nása càchí-tu-yu sá Cristú Yaá tendaha Yã Ndiöxí quixi ñuyíú-a cùu-gá déhe ndí Dàvií? <sup>42</sup> Te mee ndí Dàvií-á<sup>n</sup> ñí cachí ndí núú lìbrú Sãlmú: Dútú Ndiöxí ní xáha<sup>n</sup>-gã xii Yaá cúu Xítóhó-í:

“Ngóo xio cùha-í,

<sup>43</sup> te yúhú cada-í te nchaa sá cúu ùhú iní ñáhá xii-n canehe-xi sá yíñùhu núú-n.”

Duha ní xáha<sup>n</sup> Dútú Ndiöxí xii Yaá cúu Xítóhó-í càchí ndí núú lìbrú Sãlmú.

<sup>44</sup> ¿Te nása cùu Cristú déhe ndí Dàvií, te mee ndí ní cachí ndí sá cúu-gã Xítóhó ndí-i? —càchí Jèsús xáha<sup>n</sup>-gã xii-güedé.

*Jèsús càhá<sup>n</sup>-gá cuendá cue tée dàcuaha ñaha xii ñáyiú nchaa tnúhu ní chídó tnùní ndí Moisés*

(Mt. 23:1-36; Mr. 12:38-40; Lc. 11:37-54)

<sup>45</sup> Te òré ndátnùhu Jèsús ndihi cue tée xica cuu ndihi-gá xíndedóho ñaha ñáyiú, te xáha<sup>n</sup>-gã xii-güedé:

<sup>46</sup> —Cada cuendá-ndó vã cáda-ndó nàcuáa quide cue tée dàcuaha ñaha xii ñáyiú nchaa tnúhu ní chídó tnùní ndí Moisés, chi tnàhá iní-güedé cuihnu-güedé dóó nání sã sácuihnu cue tée cùnuu. Te nchaa núú tàcá ñáyiú cuiní-güedé sá ndihi tnúhu yíñùhu càhá<sup>n</sup> ndihi ñáhá-yu xii-güedé, te nàcaxi-güedé xilé sácõo nchihi cue tée cùnuu-gá xití veñúhu conchihi-güedé, te duca<sup>n</sup>-ni quide-güedé cuèi òré quíhu-güedé mèsá caxi-güedé òré ndécú-güedé ñ<sup>n</sup> vico, chi mee-ni núú sácõo cue tée cùnuu-gá cuiní-güedé

coo-güedé. <sup>47</sup> Te quèndeé-güedé vehe nchaa ñáyiú dìhí ñáyiú quèé, te ío naha càhá<sup>n</sup> ndihi-güedé Yã Ndiöxí cuendá cuiní-güedé càhá<sup>n</sup> váha-yu cuendá-güedé. Te sá dúcá<sup>n</sup> quide-güedé te sáá nduu te ío-gá ndoho-güedé núú ùhú núú ndàhú dàcúxí dàva-gá ñáyiú —càchí-gá xáha<sup>n</sup>-gã xii-güedé.

## 21

*Díhú<sup>n</sup> nduu táhú Yã Ndiöxí ní dáquëe ñ<sup>n</sup> ñaha ndàhú ñaha quèé*  
(Mr. 12:41-44)

<sup>1</sup> Te Jèsús ní xiní-gá xití veñúhu xídáquëe cue tée cuica díhú<sup>n</sup> nduu táhú Yã Ndiöxí xití alcanciá. <sup>2</sup> Te ní xiní-gá tnàhá ñ<sup>n</sup> ñaha ndàhú ñaha quèé ní dáquëe-a<sup>n</sup> úú díhú<sup>n</sup> còbrí, <sup>3</sup> te ní xáha<sup>n</sup> Jèsús xii cue ñáyiú xíndecu-á<sup>n</sup>:

—Na càchí tnúhu ndáá-í xii-ndo sã ñaha ndahú ñaha quèe-a ío-gá nándihi díhú<sup>n</sup> ñí dáquëe-a<sup>n</sup> xití alcanciá nduu táhú Yã Ndiöxí dàcúxí díhú<sup>n</sup> ñí dáquëe dáva-gá-yu. <sup>4</sup> Chi nchaa ñáyiú-á<sup>n</sup> ñí dáquëe-yu mee-nã sá ñí ndóo-ná, dico ñaha quèe-a cuèi ndàhú-a<sup>n</sup> dico ní dáquëe-a<sup>n</sup> ñihí díhú<sup>n</sup> sã cuáá<sup>n</sup>-á<sup>n</sup> sã cáxí-á<sup>n</sup> ní cùu —cachí-gá xáha<sup>n</sup>-gã xii-yu.

*Jèsús càchí-gá sá ngóyó veñúhu*  
(Mt. 24:1-2; Mr. 13:1-2)

<sup>5</sup> Te ñ<sup>n</sup> úú ñáyiú xicáhá<sup>n</sup>-yu cuendá veñúhu càhnu sá ío cùnuu sá ío vii cà nchaa yúú yíhí, ndihi cuendá nchaa sá ñí sáñaha táhú ñáyiú yíhí xití-xi. Te Jèsús ní xáha<sup>n</sup>-gã xii-yu:

<sup>6</sup> —Sáá nduu te nchaa sá cúñùhu-ndo-a vã cùnduu-gá-xi dàtná cáá-xí vitna, chi ni ñ<sup>n</sup>-gá yúú vã códo nchihi tnaha-gá-xi chi ndihi ngoyo —càchí-gá xáha<sup>n</sup>-gã xii-yu.

*Nàcuáa cada-xi nduu ta cùyatni naa ñuyíú*

(Mt. 24:3-28; Mr. 13:3-23)

<sup>7</sup> Te cue tée xíndecu-á<sup>n</sup> ñí xicá<sup>n</sup> tnúhú-güedé núú Jèsús, te xáha<sup>n</sup>-güedé xii-gá:

—Mèstrú, ¿te ná nduu dùca<sup>n</sup> cada-xi ngoyo veñúhu, àdi nándi cùu sá cáda-xí cuendá cutnùní iní-ndí sá sá

ta cuyatni nduu duca<sup>n</sup> cada-xi-i? — cachí-güedé xáha<sup>n</sup>-güedé xii-gá.

<sup>8</sup> Te Jèsús ní xáha<sup>n</sup>-gá xii-güedé:

—Ío quihi iní-ndó cùndecu-ndo, te vá dáñá-ndó mée-ndo dandahú ñáhá ñáyiú xii-ndo. Chi ío cuéhé cue téé coo ñuyíú-a, te danàni-güedé méé-güedé dàtná nàni-í te cachí-güedé: “Yúhú cùú-í Crístú Yaa ní tendaha Yá Ndiöxí véxi ñuyíú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuaá ní cáhá<sup>n</sup>-í”, duha cachí-güedé. Dico vá quíndáá iní-ndó, te nì vá túhá-ndó-güedé. <sup>9</sup> Te òré ná ñihí-ndó tnúhu sá titní nació<sup>n</sup> xñàá-güedé te dava ñuú xñàá-güedé ndi mée-güedé, te vá yùhú-ndó chi dacuítí sá dúcá<sup>n</sup> càda-xi, dico vátá sàá-gá nduu nàa ñuyíú òré duca<sup>n</sup> càda-xi —cachí-gá xáha<sup>n</sup>-gá xii-güedé.

<sup>10</sup> Te xáha<sup>n</sup> tucu-gá xii-güedé:

—Nchaa cue téé ñ<sup>n</sup> nació<sup>n</sup> nàá-güedé ndihi cue téé ingá nació<sup>n</sup>, te titní ñuú ngüíta-güedé nàá-güedé. <sup>11</sup> Te titní xichi ñuyíú ñihi vihi tnáa, te titní tucu xichi ñuyíú coo tnamá, te titní tucu xichi ñuyíú quixi cuéhé, te titní núú sá cádá-xí àndiú, te yùhú ñáyiú.

<sup>12</sup> Te òré cúmání-gá cada-xi nchaa nàcuáa càhá<sup>n</sup>-í-a, te cue téé cùú úhú iní ñáhá xii-ndo tñi ñaha-güedé, te candeca ñaha-güedé xii-ndo quíhí<sup>n</sup> xití veñúhu-güedé cada ndáá-güedé cuéchi-ndo, te chihi ñaha-güedé vecaá xii-ndo, te candeca ñaha-güedé quíhí<sup>n</sup> núú cuè téé cùnúu yíndaha nació<sup>n</sup> àdi núú dàva-gá cue téé cùnúu sá cuèndá-í. <sup>13</sup> Te òré duca<sup>n</sup> na càda ñaha-güedé xii-ndo, te òré-á<sup>n</sup> tàú-xi cáhá<sup>n</sup> váha-ndo cuèndá-í núú-güedé. <sup>14</sup> Te vá cání iní-ndó ñuú nása cunduu tnúhu cúñaha-ndo xii-güedé cuèndá cácu nihnu-ndo. <sup>15</sup> Chi yúhú dacàhu iní ñáhà-í xii-ndo tnúhu cúñaha-ndo xii-güedé, te taxi-í sá vátá quíni tnùnigá-ndó, te ni ñ<sup>n</sup> ñáyiú cùú úhú iní ñáhá xii-ndo vá ñihí-gá-yu tnúhu cúñàhá-yu xii-ndo. <sup>16</sup> Te ndéé

tátá-ndó, ndihi ñaní-ndó, ndihi cue ñáyiú cùú ñaní tnáhá-ndó, ndihi cue ñáyiú càhá<sup>n</sup> ndihi váha-ndo cuáha cuèndá ñáhá-yu xii-ndo núú cuè téé cùchiu<sup>n</sup>, te dava-ndo càhni ñaha-güedé xii-ndo. <sup>17</sup> Te ío cuéhé ñáyiú cuu úhú iní ñáhá-yu xii-ndo sá cuèndá-í. <sup>18</sup> Dico Yá Ndiöxí ío coto ñaha-gá xii-ndo chi ndéé idi díquí-ndó còto-gá. <sup>19</sup> Te núu na càda ndee iní-ndó càncicú<sup>n</sup> nihnu ñaha-ndo xii-í, te nduu táhú-ndó cùndecu-ndo ndihi Yá Ndiöxí ni caa ni quíhí<sup>n</sup>.

<sup>20</sup> Te nduu na quíni-ndó ñùhu doco sandadú ni càndéé yuhu ñuú Jerusàlén, te sa cutnùnigá iní-ndó sá sá ní cuyatni nduu dànaa-güedé ñuú-á<sup>n</sup>. <sup>21</sup> Te dàvá-á<sup>n</sup> nchaa ñáyiú xñdecu distritú Jùdeá xíní ñùhu-xi cunú-yu quíhí<sup>n</sup>-yu xití yucu, te nchaa ñáyiú xñdecu ñuú Jerusàlén queé-yu xití ñuú-á<sup>n</sup>, te ñáyiú ñá túú xñdecu ñuú-á<sup>n</sup> vã ndiñu-gá-yu. <sup>22</sup> Chi dàvá-á<sup>n</sup> cuu-xi nduu tnùndòho tnúhu ndàhú, te duca<sup>n</sup> càda-xi chi duca<sup>n</sup> ndéé tnuní núú tütú Yá Ndiöxí nàcuáa dandòho ñaha-gá xii-yu. <sup>23</sup> Te ndàhú ní cuu nchaa ñáyiú dìhí ñúhú dèhe-xi, ndihi nchaa ñáyiú ndèca déhe vitna sàdi na sáá nduu dùca<sup>n</sup> cada-xi! Chi ío cuéhé tnùndòho tnúhu ndàhú coo núú ndécü-yu dàvá-á<sup>n</sup>, te xíá<sup>n</sup> cuu-xi ñ<sup>n</sup> tnùndòho tendaha Yá Ndiöxí quixi sá cúú-xi-yu. <sup>24</sup> Te dava cue téé cuú-güedé cahni ñaha-güedé, te dava-güedé tñi ñaha-güedé candeca ñaha-güedé quíhí<sup>n</sup> nchaa ñuú xícá, te cue téé dava-gá ñuú cunuu-güedé ñuú Jerusàlén, te mee Yá Ndiöxí cachí-gá te núu ná daha nduu cunuu-güedé ñuú-á<sup>n</sup>.

*Nàcuáa cada-xi òré quixi tucu Téé cùú ñaní tnáhá cuè ñáyiú*

(Mt. 24:29-35, 42-44; Mr. 13:24-37)

<sup>25</sup> Te cada-xi ñ<sup>n</sup> sá vátá quíni-gá ñáyiú núú nchícanchii, ndihi núú yóó, ndihi núú nchàa chódíní, te ñuyíú-a coo tnúhu ndihú iní-xi te vá cutnùnigá iní-yu nása cadá-yu cuèndá sá ío dusa<sup>n</sup> càda ndute lamár òré candaundéé tnáhá-xí. <sup>26</sup> Te nchaa ñáyiú cuneé-yu sá yùhú-yu, ndihi sá

ndìhú iní-yu cuèndá nchaa sá cáda-xí ñùyíú-a, te quidi-xi andiu. <sup>27</sup> Te sáta dúcá<sup>n</sup> te quini-ndó yùhú Tée cùu ñaní tnáhá-ndó nchàa-ndo quee-í andiu quixi-í ichi xití vícò, te dàvá-á<sup>n</sup> quini ñáhá nchàa ñáyiú sá ìo cùnùu-í te ndàcu-í quide-í nchaa sá vâha. <sup>28</sup> Te òré ná ngüita-xi duca<sup>n</sup> càda-xi, te cuita cundee-gã iní-ndó quihí<sup>n</sup>, te quihí iní-ndó chi sa ní cuyatni vií-nã nduu cãcu nihnu-ndo vã cùndècu-gá-ndó nùú ñùyíú yíca cuèchi-a —càchí-gá xáha<sup>n</sup>-gã xii-güedé.

<sup>29</sup> Te ní cani-gá ì<sup>n</sup> cuèndú núú-güedé nàcuáa tecú tnùnì vâha-güedé tnúhu-gá, te xáha<sup>n</sup>-gã xii-güedé:

—Chí cùndèhe yutnu ngúxí ndihí nchaa dava-gá yutnu. <sup>30</sup> Chi nàtahú ndaha-xi, te òré duca<sup>n</sup> quide-xi te càchí-ndó sã sã ní cuyatni nuu cahni. <sup>31</sup> Te ñu-ni duca<sup>n</sup> sãtnahá-xi cùu òré ná quini-ndó càda-xi nchaa nacuaá càhá<sup>n</sup>-í, te sá dúcá<sup>n</sup> te cutnùnì iní-ndó sã sã ní cuyatni nduu ndihu ndaha ñàha Yá Ndiõxí xii-ndo.

<sup>32</sup> Te na càchí tnúhu ndáá-í xii-ndo sã òré vátá cùu-gá cue ñáyiú xíndecu ñuyíú-a vitna, te cada-xi nchaa nàcuáa ní cáhá<sup>n</sup>-í. <sup>33</sup> Te andiu ndihí ñuyíú-a chi ndihí nihnu-xi, dico tnúhu-í chi vá ndihí nihnu-xi, chi cùu-xi tnúhu ndáá.

<sup>34</sup> Te quihí iní-ndó vã cùndècu-ndo ichi cuehé ichi duha, te vá cúu-ndó ñáyiú quihu, te vá cùhú<sup>n</sup> iní-ndó mée-ni nchaa sá ío ñuyíú-a, chi núu duca<sup>n</sup> na càda-ndo te nacua-naa-ndo sã sã nduu càda-xi nacuaá ní cáhá<sup>n</sup>-í. Te uu<sup>n</sup>ni sãá nduu-ã<sup>n</sup>, <sup>35</sup> te cada-xi dàtná cuini-ndó quide ì<sup>n</sup> trampá chi uu<sup>n</sup>ni ngáva-xi, te duca<sup>n</sup> càda-xi nchaa ñáyiú xíndecu ñuyíú-a, chi uu<sup>n</sup>ni sãá nduu-ã<sup>n</sup>. <sup>36</sup> Te nchòhó cundecu túha-ndo te ío cáhá<sup>n</sup> ndihí-ndo Yá Ndiõxí cuèndá ndacu-ndo yâha-ndo nchàa tnúndòho quixi ñuyíú-a, te duca<sup>n</sup> te nasáá-ndó cùndecu-ndo núú ndécú yùhú Tée cùu ñaní tnáhá-ndó nchàa-ndo —cachí-gá xáha<sup>n</sup>-gã xii-güedé.

<sup>37</sup> Te nduu nduu ní xóo danèhé Jèsús ñáyiú tnúhu-gá xití veñúhu càhnu sá ìo cùnùu, te niú niú ní xóo quihí<sup>n</sup> ngúdú-gá xití yucu Òlívú.

<sup>38</sup> Te nehé nehé ní xóo quihí<sup>n</sup> nchaa ñáyiú veñúhu-á<sup>n</sup> ñí xóo cundedòho-yu nchaa tnúhu càhá<sup>n</sup>-gá.

## 22

*Ndùcu-güedé nàcuáa cada-güedé cahni-güedé Jèsús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Te sa ní cuyatni nduu tnàhá vico pascuá, te vico-á<sup>n</sup> xéxí ñáyiú pàá sá ñà túú yìhi levadurá. <sup>2</sup> Te cue tée cùu dútú cùnùu, ndihí cue tée dàcuaha ñaha xii ñáyiú nchaa tnúhu ní chídó tnùnì ndí Moisés ndúcú-güedé nàcuáa cada-güedé cahni-güedé Jèsús, te dicó-ni sá xiyùhú-güedé ñáyiú.

<sup>3</sup> Te yucu ñávâha ní dácáhu ìní ñáhá-xí xì té Jùdás déhe té Iscarioté, te núú tnàhá tée-á<sup>n</sup> cúu ùxúú tnàhá cue tée xica cuu ndihí-gá ní cùu. <sup>4</sup> Te té Jùdás-á<sup>n</sup> ñí sáhá<sup>n</sup>-dé ní ndatnúhu-dé ndihí cue tée cùu dútú cùnùu, ndihí cue tée tàxi tnùnì ñáhá xii cue tée quide cuèndá veñúhu nàcuáa cada-dé cuáha cuèndá-dé Jèsús núú-güedé. <sup>5</sup> Te ío ní cudí<sup>n</sup> iní-güedé, te ní xáha<sup>n</sup>-güedé xii-dé sá cuñaha-güedé díhú<sup>n</sup>, <sup>6</sup> te ní xáha<sup>n</sup>-dè sá cúu quehe<sup>n</sup>-dé díhú<sup>n</sup>-ã<sup>n</sup>, te ní ngüita-dé ndúcú-dé nàcuáa cada-dé cuáha cuèndá-dé Jèsús núú-güedé òré ñá túú ñáyiú.

*Cùdini Jèsús ndihí cue tée xica cuu ndihí-gá*

(Mt. 26:17-29; Mr. 14:12-25; Jn. 13:21-30; 1 Co. 11:23-26)

<sup>7</sup> Te ní sãá nduu ñí quesaha vico xexí-yu pàá sá ñà túú yìhi levadurá, te ñu-ni nduu-ã<sup>n</sup> sáhní-güedé ì<sup>n</sup> mbéé líhli xéxí-yu. <sup>8</sup> Te Jèsús ní xáha<sup>n</sup>-gã xii té Pèlú ndihí té Juáa:

—Chí cuahá<sup>n</sup> chi cada túha-ndo nùú cùdini-o sacuaa nduu vico pascuá —càchí-gá xáha<sup>n</sup>-gã xii-güedé.

<sup>9</sup> Te ní xicá<sup>n</sup> tnúhú-güedé núú-gã, te xáha<sup>n</sup>-güedé xii-gá:



—¿Te ndéé cáá vehe cuini-n cada túha-ndí-i? —càchí-güedé xáha<sup>n</sup>-güedé xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cündedóho na càchí tnúhu-í xii-ndo nàcuáa cada-ndo. Òré quíhu-ndo xítí ñúú núú quíhí<sup>n</sup>-ndó, te

naníhí-ndó ñ<sup>n</sup> téé tanehe ñ<sup>n</sup> yoó ndute, te téé-á<sup>n</sup> candéndaha-ndo-dě quíhí<sup>n</sup>, te núú ndédacàa vehe na ndíhu-dé te xiá<sup>n</sup> quíhu-ndo. <sup>11</sup> Te cúñaha-ndo xii xítóhó vehe-á<sup>n</sup>: “Yaá cúú Mèstrú càchí-gá núú ndédacàa xichi xítí vehe-n cuñaha nùu-n xii-gá cudìni-gá ndíhi cue téé xica cuu ndíhi-gá sacuaa nduu víco pascuá”, duha cúñaha-ndo.

<sup>12</sup> Te dàtnùní danèhé ñáhá-dě xii-ndo ñ<sup>n</sup> cuartú cáhnú càa núú ñinu, chi vehe yòdo tñaha cuu-xi, te sa ní quide túha-dé nchaa sá ná ndíhi, te nchòhó dícó-ná sá cudìni-o cada túha-ndo —càchí-gá xáha<sup>n</sup>-gá xii-güedé.

<sup>13</sup> Te ní xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús xii-güedé ní cuu, chi nchaa sa ndècu túha, te ní quide túha-güedé sá cudìni-güedé ndíhi-gá sacuaa nduu víco pascuá-á<sup>n</sup>.

<sup>14</sup> Te sátá ñí tñahá òré cudìni Jèsús ndíhi cue téé ní táuchíú<sup>n</sup>-gá cáhá<sup>n</sup> tnúhu-gá núú ñáyyiu, te cuánguihu ndíhi ñaha-gá xii-güedé mèsá. <sup>15</sup> Te xáha<sup>n</sup>-gá xii-güedé:

—¿Duca<sup>n</sup>-ni ño sàni iní-í sá cudìni ndíhi ñaha-í xii-ndo sàcuáa nduu víco pascuá òré cúmání-gá sáá nduu ndòho-í te cuú-í! <sup>16</sup> Te na càchí tnúhu-í xii-ndo sá vǎ dúhá-gá caxi ndíhi ñaha-í xii-ndo nduu víco pascuá, chi ndéé òré ná sáá nduu nàsáá-ndó núú táxí tnùní Yǎ Ndiòxí cundecu-o, te dàvá-á<sup>n</sup> cada iní-ndó sǎ dàtná sá cáxí tùcu-o chi ño váha cuu iní-ó cundecu-o —càchí-gá xáha<sup>n</sup>-gá xii-güedé.

<sup>17</sup> Te ní quehe<sup>n</sup>-gá ñ<sup>n</sup> vǎsú ñúhú ndùdí ndéhé yoho yàha stilé, te ní ndacá<sup>n</sup> táhú-gǎ núú Yǎ Ndiòxí, te dàtnùní ní xáha<sup>n</sup>-gǎ xii-güedé:

—Chí quéhé<sup>n</sup> vǎsú ñúhú ndùdí ndéhé yoho yàha stilé-a, te coho-ndo lùha luha nchaa-ndo. <sup>18</sup> Te na càchí tnúhu tucu-í xii-ndo sǎ vítná-nǎ duha xíhi ndíhi ñaha-í xii-ndo ndùdí ndéhé

yoho yàha stilé-a te vǎ cóhó ndíhi ñaha-gá-í, dico na sáá nduu naníhí tnáhá-ó núú ndécú Tǎtà-í Dútú Ndiòxí táxí tnùní-gǎ, te dàvá-á<sup>n</sup> cada iní-ó sǎ dàtná sá cóhó ndíhi ñaha tucu-í xii-ndo, chi ño cudíi iní-ó —càchí-gǎ xáha<sup>n</sup>-gǎ xii-güedé.

<sup>19</sup> Te sátá ñí túhú cóhó-güedé ní cudìni-güedé, te ní quehe<sup>n</sup>-gǎ pǎá te ní ndacá<sup>n</sup> táhú tùcu-gǎ núú Yǎ Ndiòxí, te dàtnùní ní táhú cuèchi-gǎ, te ní dǎcǎhñu ñaha-gǎ xii-güedé, te xáha<sup>n</sup>-gǎ:

—Pǎá-a cùu-xi datná yiqui cùnú-í, chi cahni ñaha-güedé xii-í sǎ cuendá-ndó, te duca<sup>n</sup>-ni càxi-ndo paá-a cuendá ndacu iní ñáhá-ndó xii-í —càchí-gǎ xáha<sup>n</sup>-gǎ xii-güedé.

<sup>20</sup> Te ñiu-ni duca<sup>n</sup> ñí quide-gǎ ndíhi vǎsú ñúhú ndùdí ndéhé yoho yàha stilé, chi ní quehe<sup>n</sup>-gǎ te òré sǎñaha-gǎ xii-güedé coho-güedé, te ní xáha<sup>n</sup>-gǎ:

—Ndudí ñúhú vǎsú-a cada iní-ndó sǎ cúú-xí dàtná níñí-í sǎ cáti òré cahni ñaha-güedé xii-í. Te sǎ dúcá<sup>n</sup> càti níñí-í xiá<sup>n</sup> cutnùní ndáá sǎ Yǎ Ndiòxí cada-gǎ ñngǎ núú sǎ váha sǎ cúú-xí-ndó.

<sup>21</sup> ‘Dico vitna chi iha tñahá téé cuáha cuendá ñáhá xii-í núú cuè téé cùu úhú iní ñáhá yíhi-dé mèsá.

<sup>22</sup> Te yúhú Téé cùu ñaní tnáhá-ndó nchaa-ndo ñuhu ichi-í cuáhá<sup>n</sup>-í cuú-í dàtná ní cachí Yǎ Ndiòxí. ¡Dico ndàhú ní cuu téé duca<sup>n</sup> na cuáha cuendá ñáhá xii-í núú cuè téé cùu úhú iní ñáhá! —càchí-gǎ xáha<sup>n</sup>-gǎ xii-güedé.

<sup>23</sup> Te ní ngüíta-güedé ndúcú tnúhu núú tnáhá-güedé núú ndéda càa-güedé duca<sup>n</sup> càda cuáha cuendá ñáhá xii-gǎ núú cuè téé cùu úhú iní ñáhá.

*Xíndatnúhu-güedé ndédacàa-güedé cunuu-gǎ*

<sup>24</sup> Te sátá dúcá<sup>n</sup> te ní ngüíta-güedé xíndatnúhu-güedé núú ndédacàa-güedé táu-güedé cunuu-güedé. <sup>25</sup> Dico Jèsús ní xáha<sup>n</sup>-gǎ xii-güedé:

—Nchaa cue téé yíndaha ñaha xii ñáyyiu ño tàxi tnùní-güedé, te mee-güedé cuini-güedé sǎ cáhá<sup>n</sup> váha ñáyyiu cuendá-güedé. <sup>26</sup> Dico nchòhó vǎ dúcá<sup>n</sup> càda-ndo, chi núú ñ<sup>n</sup>-ndo

cunuu te cada-ni-ndo sã ñà túú cunuu-ndo, àdi cuu-ndo ì<sup>n</sup> tée tàxi tnuní ñáhá xii cue tée xinu cuechi, te cada-ni-ndo sã cúú-ndó ì<sup>n</sup> tée xinu cuechi-á<sup>n</sup>. <sup>27</sup> Te vá càchí-ó sã tée xinu cuechi cunuu-gá-dé, chi tée quihu mèsá cúnùu-gá-dé. Dico yúhú ndécú ndìhì ñaha-í xii-ndo dàtná ì<sup>n</sup> tée xinu cuechi.

<sup>28</sup> Te nchòhó duca<sup>n</sup>-ni ndècu ndìhì ñaha-ndo xii-í, te tàyáha ndìhì ñaha-ndo xii-í nchaa sá táyáha-í véxi. <sup>29</sup> Te Tàtá-í Dútú Ndiòxí ní cachí-gá sá táxi tnuní-í, te yúhú càchí-í xii-ndo sã sáa nduu te tnáhá-ndó tàxi tnuní-ndó. <sup>30</sup> Te dàvá-á<sup>n</sup> caxi-o coho-o càda-o núú táxi tnuní-í, te yàcá<sup>n</sup> nguíta-ndo càda ndáá-ndó cuèchi ndì ùxúú xichi ñáyiú isràél —càchí-gá xáha<sup>n</sup>-gã xii-güedé.

*Jèsús càhá<sup>n</sup>-gá sá tẽ Pèlú cúñaha-dẽ xii ñáyiú sá ñà túú xini ñáhá-dẽ xii-gá (Mt. 26:31-35; Mr. 14:27-31; Jn. 13:36-38)*

<sup>31</sup> Te Xítohó Jesucristú ní xáha<sup>n</sup>-gã xii té Xímú:

—Yòhó Xímú, cundedóho váha ì<sup>n</sup> tnúhu na càhá<sup>n</sup>-í-a, chi dàtná cuiní-n quide táchí triú sácá<sup>n</sup>-xi duha sácá<sup>n</sup>-xi dácá<sup>n</sup>, duca<sup>n</sup> quèsaha yucu ñáváha cada ñaha-xi xii-ndo. Chi coto ndeé ñáhá-xi xii-ndo te núú ndisa sàndáá iní ñáhá-ndó xii-í. <sup>32</sup> Dico yúhú xicá<sup>n</sup> táhù-í núú Yá Ndiòxí cuèndá-n, cuèndá sá vã dáñá ndeé-n quindáá iní ñáhá-n xii-í. Te òré ndixi túú iní-n sã ñà túú ní quide váha-n, te quihí<sup>n</sup>-n cuáha-n cuè tée cundìhì-n tnúhu ndee iní cuèndá canchicú<sup>n</sup> nihnu-ni-güedé ichi Yá Ndiòxí —càchí-gá xáha<sup>n</sup>-gã xii-dé.

<sup>33</sup> Te ní xáha<sup>n</sup>-dẽ xii-gá:

—Mèstrú, sa ndècu túha-í sá quihí<sup>n</sup> ndìhì ñaha-í xii-n vècaá, àdi cuéi na cùú ndìhì ñaha-í xii-n —càchí-dé xáha<sup>n</sup>-dẽ xii-gá.

<sup>34</sup> Te Jèsús ní xáha<sup>n</sup>-gã:

—Pèlú, na càchí tnúhu-í xii-n sã cùmání-gã cana ì<sup>n</sup> líhi te úní xito càhá<sup>n</sup>-n núú ñáyiú sá ñà túú xini ñáhá-n xii-í —càchí-gá xáha<sup>n</sup>-gã xii-dé.

*Sa ní cuyatni ndoho Jèsús*

<sup>35</sup> Te Jèsús ní xáha<sup>n</sup>-gã xii-güedé:

—Te cútnáhá ní tendaha ñaha-í xii-ndo ní sáhá<sup>n</sup>-ndó chiú<sup>n</sup>-í, chi ñá túú ní cànehe-ndo ní ì<sup>n</sup> sá cúhú<sup>n</sup> díhú<sup>n</sup>-ndó, te ní ì<sup>n</sup> sá cúhú<sup>n</sup> ndàchiu<sup>n</sup>-ndo ñá túú ní cànehe-ndo. Te chí càchí tnúhu núú ió ì<sup>n</sup> sá ní cùmání xii-ndo —càchí-gá xáha<sup>n</sup>-gã xii-güedé.

Te ní xáha<sup>n</sup>-güedé:

—Ñáhá, chi ní ì<sup>n</sup> sá ñà túú ní cùmání xii-ndí —càchí-güedé xáha<sup>n</sup>-güedé xii-gá.

<sup>36</sup> Te ní xáha<sup>n</sup>-gã:

—Te vitna núú ndècu ndìhì-ndo sá sácúhu<sup>n</sup> díhú<sup>n</sup>-ndó, àdi sá sácúhu<sup>n</sup> ndachiu<sup>n</sup>-ndo te canehe-ndo. Te núú ñá túú ndècu ndìhì-ndo machití, te nadico-ndo dõó tĩcachi nihnu-ndo te cuaa<sup>n</sup>-ndo. <sup>37</sup> Te na càchí tnúhu-í xii-ndo sã dàcutíí sã yáha-í nàcuáa càhá<sup>n</sup>-xi núú tütú Yá Ndiòxí núú càchí-xi: “Ì<sup>n</sup>-ni ní quide ñaha-güedé xii-gá, ndìhì cue tée ndècu cuèchi-xi”, duha càchí-xi núú tütú-gá. Te ñá díú-ní xǎ<sup>n</sup> yáha-í chi nchaandi túhú nàcuáa càhá<sup>n</sup>-xi núú tütú-gá yáha-í —càchí-gá xáha<sup>n</sup>-gã xii-güedé.

<sup>38</sup> Te xáha<sup>n</sup>-güedé:

—Mèstrú, iha ndècu úú machití —càchí-güedé xáha<sup>n</sup>-güedé xii-gá.

Te ní xáha<sup>n</sup>-gã:

—Chí návíí-nã yuhu-ndo, vá càhá<sup>n</sup>-gá-ndó —càchí-gá xáha<sup>n</sup>-gã xii-güedé.

*Jèsús càhá<sup>n</sup> ndìhì-gá Yá Ndiòxí yucu Òlívú*

*(Mt. 26:36-46; Mr. 14:32-42)*

<sup>39</sup> Te Jèsús ní quee-gá cuáhá<sup>n</sup>-gá yucu Òlívú, chi duca<sup>n</sup> tnàhí quide-gá. Te cue tée xica cuu ndìhì-gá nchicú<sup>n</sup> ñáhá-güedé xii-gá cuáhá<sup>n</sup>. <sup>40</sup> Te òré ní quexio-gá xía<sup>n</sup>, te ní xáha<sup>n</sup>-gã xii-güedé:

—Chí càhá<sup>n</sup> ndìhì Yá Ndiòxí cuèndá sá vã dácàhá<sup>n</sup> ñáhá yucu ñáváha xii-ndo càda-ndo sá ñà túú tàú-ndó càda-ndo —cachí-gá xáha<sup>n</sup>-gã xii-güedé.

<sup>41</sup> Te sátá dúcá<sup>n</sup> te ní quee dè<sup>n</sup>-gá tnuú-güedé cuáhá<sup>n</sup>-gá ì<sup>n</sup> xio, te sa ñùnchií luha ní xica ndehe-gá núú ndécú-güedé, te xía<sup>n</sup> ní nguíñí xití-gã

càhá<sup>n</sup> ndihí-gá Tătá-gă Dútú Ndiöxí.  
42 Te xáha<sup>n</sup>-gă:

—Táu, te núu dicó cachí-n te tauni-hnu ñaha-n xì-í cuendá sá vă ndóhò-í ná sàá òré, dico vá cáda-n nàcuáa càchí iní mée-í, chi cada-n nàcuáa càchí iní mée-n —càchí-gá xáha<sup>n</sup>-gă xii Tătá-gă Dútú Ndiöxí.

43 Te sátá dúcá<sup>n</sup> te ní quexìo ì<sup>n</sup> espíritú xínú cuèchi núú Yă Ndiöxí ní sáñaha-gă-xi tnúhu ndee iní xii-gá.

44 Te òré súúní ndihú iní-gá, te uu<sup>n</sup>-gá súúní nì yuhu nì iní-gá càhá<sup>n</sup> ndihí-gá Dútú Ndiöxí, te tnée-gă cáá dàtná cáá ñíñí te ngóyó núú ñúhú.

45 Te sátá ñí yáha ní cáhá<sup>n</sup> ndihí-gá Tătá-gă Dútú Ndiöxí, te ní ndacuíñí-gá cuánuhú-gá núú ñí dándöo-gá cue téé-á<sup>n</sup>, te òré ní nasáá-gá te xixídí-güedé cuendá sá ïo cuéhé tnúhu sàni iní-güedé cuendá-gá.

46 Te xáha<sup>n</sup>-gă xii-güedé:

—¿Ná cuendá xidí-ndó? Chí ndácöo, te cáhá<sup>n</sup> ndihí-ndo Yă Ndiöxí cuendá sá vă dácàhá<sup>n</sup> ñáhá yücu ñáyáha xii-ndo càda-ndo sá ñà túú tàú-ndó càda-ndo —cachí-gá xáha<sup>n</sup>-gă xii-güedé.

*Ní tñi-güedé Jèsús ndécá ñàha-güedé cuáhá<sup>n</sup>*

*(Mt. 26:47-56; Mr. 14:43-50; Jn. 18:2-11)*

47 Te càhá<sup>n</sup> dúcá<sup>n</sup>-ní Jèsús ní quexìo vai cue téé, te ì<sup>n</sup> téé xica cuu ndihí-gá nání Jüdás cúnúu-dé yódó nùu-dé núú-güedé ní quexìo ndéé núú-gă, te ní teyuhu ñàha-dé xii-gá, te núú tnàhá téé-á<sup>n</sup> cúú ùxúú cue téé xica cuu ndihí-gá. 48 Te ní xáha<sup>n</sup> Jèsús xii-dé:

—Jüdás, ¿te yòhó cuáha cuendá ñáhá-n xì yúhú Téé cùu ñani tnàhá-ndó nchàa-ndo núú cuè téé cùu úhú iní ñáhá xì-í cáhá<sup>n</sup>-n núu duha tàyuhu ñaha-n-á<sup>n</sup>? —càchí-gá xáha<sup>n</sup>-gă xii-dé.

49 Te sátá ñí xiní nchaa cue téé cündihí Jèsús nàcuáa cùu cue téé ní quexìo-á<sup>n</sup>, núu ní xicá<sup>n</sup> tnúhú-güedé núú-gă, te xáha<sup>n</sup>-güedé xii-gá:

—Mèstrú, ¿cùu nàá-ndí ndihí-güedé ndihí machití-a ñá? —càchí-güedé xáha<sup>n</sup>-güedé xii-gá.

50 Te ì<sup>n</sup>-dé ní xehndé-ni-dé lóho xio cùha ì<sup>n</sup> cue téé ní quexìo-á<sup>n</sup>, te téé-á<sup>n</sup> xínú cuèchi-dé núú dütú cúnúu-gá, te ní quendéé duu<sup>n</sup> lóho-dé. 51 Te Jèsús ní xáha<sup>n</sup>-gă xii-güedé:

—Chí dáñá-güedé, vá dúcá<sup>n</sup> càda-ndo —cachí-gá xáha<sup>n</sup>-gă xii-güedé.

Te ní dácàá-gá ndaha-gá ní tendaha-gă núú ñí xindeé lóho téé-á<sup>n</sup>, te ní nduu váha dàtná-ni càa. 52 Te nchaa cue téé cùu dütú cúnúu, ndihí cue téé tàxi tnuní nchaa cue téé quide cuendá veñúhu sá ïo cúnúu, ndihí cue téé cùu sacuéhé núú ñáyüu isràél, nchaa cue téé-á<sup>n</sup> vèxi tñi ñaha-güedé xii-gá, te ní xáha<sup>n</sup>-gă xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécù-í, dàtná quidé-ndó ì<sup>n</sup> ñadúhú quidé ñàha-ndo xii-í. 53 Te duca<sup>n</sup>-ni ñí xiní-ndó ñí xindecu-í xití veñúhu càhnu sá ïo cúnúu ní xóo danèhé-í ñáyüu, te ní lùha ñá túú ní cùu tnàndéé ñáhá-ndó xì-í òré-á<sup>n</sup>, te vitna ní sáá òré duca<sup>n</sup> càda-ndo, te cada sàcuíhna nàcuáa cùu iní-xi —càchí-gá xáha<sup>n</sup>-gă xii-güedé.

*Té Pèlú càhá<sup>n</sup>-dé núú ñáyüu sá ñà túú xiní-dé Jèsús*

*(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

54 Te ní tñi-güedé Jèsús, te ndèca ñaha-güedé xii-gá cuáhá<sup>n</sup> vehe téé cùu dütú cúnúu-gá, te té Pèlú xica xica-ni nchicú<sup>n</sup> ñáhá-dé xii-gá cuáhá<sup>n</sup>.

55 Te òré ní quexìo-güedé xía<sup>n</sup> te ní dátñáhá-güedé ñuhú quehé vehe-á<sup>n</sup>, te ní càndéé yuhu nùhú-á<sup>n</sup> ñí ngóo teté-güedé, chi quide víxi<sup>n</sup>-xi, te tnàhá té Pèlú ní ngóo teté ndihí ñaha-dé xii-güedé. 56 Te xía<sup>n</sup> ndécú ì<sup>n</sup> xíchí xínú cuèchi vehe-á<sup>n</sup>, te òré ní xiní-xi núcóo teté tnàhá té Pèlú, te ní ndacoto-xi núú-dé, te ní xáha<sup>n</sup>-xi xì-güedé:

—Tnàhá téé-a xica cuu ndihí-dé té ndèca-güedé cuàngüihu-á<sup>n</sup> —càchí-xi xáha<sup>n</sup>-xi xì-güedé.

57 Dico té Pèlú ñá túú ní nñuu-dé, te xáha<sup>n</sup>-dè xii-xi:

—Yúhú ñá túú xiní-í téé-á<sup>n</sup> —càchí-dé xáha<sup>n</sup>-dè xii-xi.

<sup>58</sup> Te tna tnaa-ni ní cuu, te ní xiní ñáhá tucu ñ<sup>n</sup>-dé, te xáha<sup>n</sup>-dě:

—Yòhó tnàhá-n xìca cuu ndihi-n téé ndèca-güedé cuánguìhu-ã<sup>n</sup> —càchí-dé xáha<sup>n</sup>-dě xii-dé.

Dico té Pèlú ní xáha<sup>n</sup>-dě:

—Ñáhá, ñá díú yǔhú xíca cùu ndihi-í-dé —càchí-dé xáha<sup>n</sup>-dě.

<sup>59</sup> Te sa ní cuu dàtná ñ<sup>n</sup> òré te càchí tucu ìngá-dé:

—Ndáá sá tǔe-a xìca cuu ndihi-dé téé ndèca-güedé cuánguìhu-ã<sup>n</sup>, chí tnàhá-dé cúú-dé téé distritú Galilea —càchí-dé xáha<sup>n</sup>-dě xii-güedé.

<sup>60</sup> Te té Pèlú ní xáha<sup>n</sup>-dě xii téé-á<sup>n</sup>:

—Yúhú ñá túú cùtnuní iní-í nása ndùu tnúhu càhá<sup>n</sup>-n —càchí-dé xáha<sup>n</sup>-dě.

Te ní vǎtá xǐnu duca<sup>n</sup>-gǎ tnúhu càhá<sup>n</sup>-dé ní cana-ni ñ<sup>n</sup> líhi. <sup>61</sup> Te Xítóhó Jesucristú ní nchócótó-gǎ núú-dé, te òré-ni-á<sup>n</sup> ñí ndacu iní-dé tnúhu ní xáha<sup>n</sup>-gǎ xii-dé sá cùmáni-gǎ cana ñ<sup>n</sup> líhi, te úní xito cáhá<sup>n</sup>-dé sá ñá túú xíní ñáhá-dé xii-gǎ. <sup>62</sup> Te té Pèlú ní quee-dé tnuú-güedé cuáhá<sup>n</sup>-dé ñ<sup>n</sup> xio, te ní ndáhyú víhí-dé ní ndixi cuéchi iní-dé.

*Cùdíquí ndeé-güedé Jèsús*

(Mt. 26:67-68; Mr. 14:65)

<sup>63-64</sup> Te cue téé ndèé ñáhá xii Jèsús ní cudíquí ndeé ñáhá-güedé xii-gǎ, te ní dádǎhu-güedé núú-gǎ, te ní caniha-güedé xii-gǎ, te xáha<sup>n</sup>-güedé:

—¿Cáhá<sup>n</sup> ná cótó yòo ní caniha xii-n! —cachí-güedé xáha<sup>n</sup>-güedé xii-gǎ.

<sup>65</sup> Te cuéhé víhí-gǎ tnúhu cuéhé ní xáha<sup>n</sup>-güedé xii-gǎ.

*Jèsús ndécú-gǎ jùndá*

(Mt. 26:59-66; Mr. 14:55-64; Jn. 18:19-24)

<sup>66</sup> Te sátá ñí túndaá, te ní tacá cue téé cùu sacuéhé nǔú ñáyiú israél, ndihi cue téé cùu dútú cùnùu, ndihi cue téé dàcuaha ñaha xii-yu nchaa tnúhu ní chídó tnùní ndíi Moisés, te ndèca-güedé Jèsús cuáhá<sup>n</sup> núú cádá-güedé jùndá, te òré ní quexìo-güedé ndihi-gǎ núú cádá-güedé jùndá-á<sup>n</sup>, te ní xáha<sup>n</sup>-güedé xii-gǎ:

<sup>67</sup> —Cuìní-ndí cachí tnúhu-n xii-ndí nǔu díu-n cùu-n Cristú Yaá ní tendaha

Yǎ Ndiǒxí véxi ñuyíú-a —càchí-güedé xáha<sup>n</sup>-güedé xii-gǎ.

Te ní xáha<sup>n</sup>-gǎ xii-güedé:

—Te núu na càchí-í sá díú-í cúú Crìstú ñá, te ní vá quìndáá iní-ndó, <sup>68</sup> àdi te núu ñ<sup>n</sup> sá ná càcá<sup>n</sup> tnúhu-í núú-ndó, te ní vá càchí tnúhu-ndo, te ní vǎ dáñá ñaha-ndo. <sup>69</sup> Dico vitna ní cuyatni nduu ngóo yúhú Téé cùu ñaní tnàhá-ndó nchaa-ndo xio cuha Dútú Ndiǒxí Yaá ío cùnùu —cachí-gǎ xáha<sup>n</sup>-gǎ xii-güedé.

<sup>70</sup> Te dàtnuní nchaa-güedé ní xicá<sup>n</sup> tnúhú-güedé núú-gǎ, te xáha<sup>n</sup>-güedé xii-gǎ:

—¿Te yòhó cúú-n Dǎhe Yá Ndiǒxí te núu duca<sup>n</sup> vǎni? —càchí-güedé xáha<sup>n</sup>-güedé xii-gǎ.

Te ní xáha<sup>n</sup> Jèsús:

—Ndáá sá díú Dǎhe-gǎ cúú-í dàtná càchí méé-ndó-ã<sup>n</sup> —càchí-gǎ xáha<sup>n</sup>-gǎ xii-güedé.

<sup>71</sup> Te ní xitnàha-güedé:

—Ñá túú-gǎ xíní ñùhu-xi cue téé cáhá<sup>n</sup> nǔu ndáá sá ndècuéchi-dé àdi ñá túú ndècuéchi-dé chí yuhu mee-dé ní cáhá<sup>n</sup>-dé vitna ní xíndedóho-o —càchí-güedé xitnàha-güedé.

## 23

*Jèsús ndécú-gǎ núú tǎ Pilatú*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Te nchaa-güedé ní ndacuíñí-güedé, te ndèca-güedé Jèsús cuáhá<sup>n</sup> núú tǎ Pilatú, <sup>2</sup> te núú tǎe-á<sup>n</sup> ñí ngúita-güedé sàcá<sup>n</sup> cuéchi-güedé cuendá-gǎ, te xáha<sup>n</sup>-güedé:

—Ní naníhí-ndí téé-a dándahú-dé ñáyiú ñuú-ó, chí xáha<sup>n</sup>-dě xii-yu sá vǎ chǎhu-gǎ-yu impuèstú xii té Cèsár téé ío cùnùu, te càchí-dé sá díú-dé cúú-dé Crìstú Yaá ní tendaha Yǎ Ndiǒxí véxi ñuyíú-a te yíndaha-dé ñáyiú càchí-dé —càchí-güedé xáha<sup>n</sup>-güedé xii-dé.

<sup>3</sup> Te té Pilatú ní xicá<sup>n</sup> tnúhu-dé núú-gǎ, te xáha<sup>n</sup>-dě xii-gǎ:

—¿Ndáá sá díú-n cùu-n téé yíndaha ñaha xii ñáyiú israél-ã<sup>n</sup>? —càchí-dé xáha<sup>n</sup>-dě xii-gǎ.

Te Jèsús ní xáha<sup>n</sup>-gǎ xii-dé:



—Diu-í yíndàha-í-yu —càchí-gá xáha<sup>n</sup>-gã xii-dé.

<sup>4</sup> Te té Pilatú ní xáha<sup>n</sup>-dë xii nchaa ñáyi, ndihi cue tée cùu dùtú cùnùu:

—Yúhú cútnùní iní-í sá ñà túú nì ì<sup>n</sup> cuèchi té-e-a —càchí-dé xáha<sup>n</sup>-dë xií-yu.

<sup>5</sup> Dico níhi-gá ní cáhá<sup>n</sup>-güedé, te xáha<sup>n</sup>-güedë:

—Càchí-ndí sá ìo dusa<sup>n</sup> xíquide ñáyi cuendá nchaa sá dánèhé ñáhá-dë xií-yu, te ní quesaha-dë ndéé distritú Galileá, te ní yáha-dé nihí distritú Júdeá dánèhé-dé ñáyi, te vitna ní sáá-ni-tu-dé ndéé ndíha dānehé-dé-yu —càchí-güedé xáha<sup>n</sup>-güedë xii té Pilatú.

### *Jèsús ndécú-gã núú tē Hèrodés*

<sup>6</sup> Te sá dúcá<sup>n</sup> ñí tecú dóho té Pilatú ní cacu nehé-yu distritú Galileá, núu xiá<sup>n</sup> ní xicá<sup>n</sup> tnúhú-dë núu-yu núu té Galileá cúu-gã. <sup>7</sup> Te ní xáhã<sup>n</sup>-yu sá díú tēe yàcá<sup>n</sup> cúu-gã, núu xiá<sup>n</sup> ní na dàyáha ñaha-dë xii-gá ndaha té Hèrodés tée cùu gobiernú distritú Galileá chi nduu-ã<sup>n</sup> ndécú-dë tnàhá-dé ñúú Jerusálén-ã<sup>n</sup>. <sup>8</sup> Te òré ní xiní té Hèrodés-ã<sup>n</sup> Jèsús te ío ní cudíí iní-dé, chi ní cunaha dùca<sup>n</sup>-ni cuiní-dé quini ñáhá-dë xii-gá te ñà túú tnàhí xiní ñáhá-dë xii-gá ní cùu, chi cuendá-ni tnúhu nihí-dé cuendá-gá, te ndètu-dé sáá ì<sup>n</sup> nduu quini ñáhá-dë xii-gá, te cada-gá ì<sup>n</sup> sá vã yõ tnàhí ndàcu cada cundehe-dé ní sani iní-dé. <sup>9</sup> Te vài sá ñí xicá<sup>n</sup> tnúhú-dë núú Jèsús, dico ní ì<sup>n</sup> tnúhu ñà túú ní cáhá<sup>n</sup>-gá. <sup>10</sup> Te xiá<sup>n</sup> xíndecu tnàhá cue tée cùu dùtú cùnùu, ndihi cue tée dàcuaha ñaha xii ñáyi nchaa tnúhu ní chídó tnùní ndí Moisés, te cue tée-ã<sup>n</sup> sùúní ìo iní-güedé sàcá<sup>n</sup> cuèchi-güedé cuendá-gá. <sup>11</sup> Te té Hèrodés ndihi cue tée cùu sandadú-dé ñà túú ní cùu váha iní-güedé núú Jèsús, te ní cudíquí ndéé ñáhá-güedë xii-gá, te ní dácuíhnú ñaha-güedé dóo váha xii-gá dàtná cáá dóo sácúíhnu cue tée sàquíndaha ñaha xii ñáyi. Te dàtnùní té Hèrodés ní dánùhú ñáhá tùcu-dé xii-gá ndaha té Pilatú. <sup>12</sup> Te nduu-ã<sup>n</sup> ñí tnàhá tnúhu té Pilatú

ndihi té Hèrodés, chi cùu úhú iní tnàhá-güedë ní cùu.

### *Càchí-güedé sá cáhni-güedë Jèsús*

(Mt. 27:15-26; Mr. 15:6-15; Jn. 18:39-19:16)

<sup>13</sup> Te té Pilatú ní nadatàcá-dé nchaa cue tée cùu dùtú cùnùu ndihi dava-gá cue tée cùnùu, ndihi nchaa ñáyi ñúú-á<sup>n</sup>, <sup>14</sup> te ní xáha<sup>n</sup>-dë:

—Nchòhó ndécá-ndó tēe-a véxi ní taxi cuendá-ndó-dë iha, te càchí-ndó sá ìo dusa<sup>n</sup> quide ñáyi cuendá nchaa sá dánèhé ñáhá-dë xií-yu, te núú-ndó ndùcu tnúhu-í núú-dë núu ná ní quide-dé. Dico yúhú cútnùní iní-í sá ñà túú nì ì<sup>n</sup> cuèchi-dé dàtná cáhá<sup>n</sup>-ndó-ã<sup>n</sup>. <sup>15</sup> Te cuéi té Hèrodés diu-ni duca<sup>n</sup> cáhá<sup>n</sup>-dé sá ñà túú cuèchi-dé núu ní techiù<sup>n</sup> ñaha tucu-dé cuándixi-dé iha. Te vitna sa ní cutnùní iní-ó sá ñà túú tàú-xi cahni-o-dë chi ñà túú cuèchi ní quide-dé. <sup>16</sup> Te na dāndoho-ni-í-dé te dàcácu-í-dé —càchí-dé xáha<sup>n</sup>-dë xií-yu.

<sup>17</sup> Te ndi tnàhá nduu vico pascuá te dacuíí sá dácácu té Pilatú-ã<sup>n</sup> ì<sup>n</sup> cue tée yíhi vecaá, chi duca<sup>n</sup> tnàhí quide-dé. <sup>18</sup> Dico ncháá-yu ní cuáá-yu, te xáhã<sup>n</sup>-yu xii-dé:

—¡Queñuhu tée nani Jesús-ã<sup>n</sup>, te cahni-n-dë! ¡Te dàcácu-n tē Barrábás! —càchí-yu xáhã<sup>n</sup>-yu xii-dé.

<sup>19</sup> Te té Barrábás-ã<sup>n</sup> ñí sanu ichi-dé ñáyi ñúú ingá ichi, te ní ngúíta-yu ndihi-dé ní cuu úhú iní-yu cue tée cùchiu<sup>n</sup>, te ní sahani-dé ndíyí núu xiá<sup>n</sup> ní chihi ñaha-güedë vecaá xii-dé. <sup>20</sup> Te té Pilatú cuiní-dé dàcácu-dé Jèsús núu xiá<sup>n</sup> cáhá<sup>n</sup> ndihi ñaha tùcu-dé xií-yu ní cùu, <sup>21</sup> dico uu<sup>n</sup>-gá níhi ní cuáá-yu, te ní xáhã<sup>n</sup>-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xáhã<sup>n</sup>-yu xii-dé.

<sup>22</sup> Te xito cuu úní ní xáha<sup>n</sup> tē Pilatú:

—¿Te ná cúu cuèchi ní quide-dé te núu duca<sup>n</sup> cuiní-ndó càda-í-dé-í? Te yúhú cútnùní iní-í sá ñà túú cuèchi ní quide-dé núu xiá<sup>n</sup> ñà túú tàú-xi cahni-o-dë, te na dāndoho-ni-í-dé te dàcácu-í-dé —càchí-dé xáha<sup>n</sup>-dë xií-yu.

<sup>23</sup> Dico níhi-ni cáhá<sup>n</sup>-yu xáhã<sup>n</sup>-yu sá ná càta caa ñaha-dé xii-gá núú

cùrúxí, te ñáyiú-á<sup>n</sup> ndíhi nchaa cue tée cùu dùtú cùnùu xícáhá<sup>n</sup> níhi-güedé ndíhi-yu ndéé ní xínu iní té Pilatú cada-dé nàcuáa càchí iní-yu. <sup>24</sup> Te ní xáha<sup>n</sup>-dë xií-yu sá cúu càda-dé nàcuáa xähä<sup>n</sup>-yu. <sup>25</sup> Te duca<sup>n</sup> te ní dácäcu-dé té Barrábás téé ní sanu ichi ñáyiú ñuú ingá ichi, te diu-ni-dé ní sahani-dé ndíyi núu xiä<sup>n</sup> ní xíhi-dé vecaá, te dàtnùnì ní táuchíú<sup>n</sup>-dë cada-güedé Jèsús nàcuáa xähä<sup>n</sup>-yu.

*Sàta caa-güedé Jèsús núu cùrúxí*  
(Mt. 27:32-44; Mr. 15:21-32; Jn. 19:17-27)

<sup>26</sup> Te ndèca-güedé Jèsús cuáhá<sup>n</sup> núu catá cà ñaha-güedé xii-gá, te ichi cuáhá<sup>n</sup>-güedé ndíhi-gá ní tñi-güedé ì<sup>n</sup> téé ñuú Cirené nání-dë Xímú ñúhú-dë ichi duha cuándixi-dé ní sáhá<sup>n</sup>-dë yucu, te ní dácúidó ñaha-güedé xii-dé cùrúxí nchídó Jèsús, te ní ngúita nchicú<sup>n</sup>-dë sátá-gä.

<sup>27</sup> Te ío cuéhé ñáyiú nchicú<sup>n</sup> ñáhá xii-gá cuáhá<sup>n</sup>, te vài ñáyiú dñí ío níhi ndàhí-yu sá ndíhú iní-yu cuendá Jèsús. <sup>28</sup> Te Jèsús ní nchócótó-gä núu-yu, te ní xáha<sup>n</sup>-gä:

—Nchòhó ñáyiú dñí ñuú Jerusàlén, vá ndàhyú-ndó cuendá-í chí ndàhyú cuendá méé-ndó ndíhi cuendá déhe-ndo. <sup>29</sup> Chí sáá nduu quèsaha ñáyiú: “Sá vaha táhú nchaa ñáyiú ñá túú càcu déhe-xi, ndíhi nchaa ñáyiú vátá quíní-gá cuhu<sup>n</sup> déhe-xi, chí ní ñà túú xíní-yu dacadí-yu”, duha quesàhá-yu. <sup>30</sup> Te dàvá-á<sup>n</sup> cùñaha ñáyiú xii nchaa tñdúú ndíhi nchaa núu xìquí: “Chí təcùu<sup>n</sup> ngónchihí ñaha-ndo xii-ndí”, duha cùñahá-yu. <sup>31</sup> Te núu yúhú téé quide ndáá duha quide ñaha-güedé xii-í vitna, te ndèé-gá cada-güedé nchaa ñáyiú ndècu ichi cuehé ichi duha —càchí-gá xáha<sup>n</sup>-gä xií-yu.

<sup>32</sup> Te ndèca tucu-güedé úu tñahá cue téé ndècu ndisa cuéchi-xi cuáhá<sup>n</sup> cuendá cahni ñaha-güedé xii-güedé ndíhi Jèsús. <sup>33</sup> Te òré ní quexìo-güedé ndíhi-gá ì<sup>n</sup> xichi núu nání Yìquí Díquí Ndíyi, te xiá<sup>n</sup> ní sata caa ñaha-güedé

xii-gá núu cùrúxí, ndíhi úu cue téé ndècu ndisa cuéchi-xi-á<sup>n</sup>, te ì<sup>n</sup>-dé ní sata caa-güedé xio cùha-gá te ingá-dé ní sata caa-güedé xio dàtni-gá diu-ni núu cùrúxí tucu. <sup>34</sup> Te ní xáha<sup>n</sup>-gä xii Tátá-gä Dùtú Ndiöxí:

—Táu, cada càhnu iní sá quidé-güedé, chí ñá túú cùtnunì iní-güedé ná cúu sá quidé-güedé —càchí-gá xáha<sup>n</sup>-gä.

Te cue téé cùu sandadú ní xito ndèé-güedé ñuú ndèdacàa-güedé cuu cuendá-güedé dóó-gä. <sup>35</sup> Te nchaa ñáyiú xíndecu-á<sup>n</sup> ndéhé-yu nàcuáa quide-güedé Jèsús, te nchaa cue téé cùnuu ní cudíquí ndéé ñáhá-güedé xii-gá, te ní xitñaha-güedé:

—Te dava ñáyiú ní ndacu-dé ní dácäcu nihnu-dé, te vitna na dácäcu nihnu-dé méé-dë, te núu ndisa sá Crìstú Yaá ní tendaha Yä Ndiöxí véxi ñuyíú-a cùu-dé —càchí-güedé xitñaha-güedé.

<sup>36</sup> Te tñahá cue téé cùu sandadú ní cudíquí ndéé ñáhá-güedé xii-gá, chí ní sàndehe yatni-güedé núu təcàa-gä sñaha-güedé ndudí ía còho-gá ní cùu, <sup>37</sup> te ní xáha<sup>n</sup>-güedé xii-gä:

—Te núu yòhó cúu-n tée yìndaha ñaha xii ñáyiú isràél, te dácäcu nihnu mee-n —càchí-güedé xáha<sup>n</sup>-güedé xii-gä.

<sup>38</sup> Te ní taxi ndecu-güedé ì<sup>n</sup> sá ndèé lètrá ndàa díquí-gä te ndèé únì núu tñùhu, tñùhu grìégú, ndíhi tñùhu látín, ndíhi tñùhu hèbreú, te duha quèe-xi ndí nunì núu tñùhu-á<sup>n</sup> “Tée-a cùu-dé téé yìndaha ñaha xii ñáyiú isràél”, duha quèe-xi.

<sup>39</sup> Te ì<sup>n</sup> téé ndècu ndisa cuéchi-xi, téé ní sata caa-güedé dñi-gá xícuèhé ñáhá-dë xii-gä, te xáha<sup>n</sup>-dë:

—Te núu yòhó cúu-n Crìstú Yaá ní tendaha Yä Ndiöxí véxi ñuyíú-a, te dácäcu nihnu mee-n, te dácäcu nihnu ñaha xii nchúhú tñahá-ndí tucu —càchí-dé xáha<sup>n</sup>-dë xii-gä.

<sup>40</sup> Dico ingá téé cùndíhi-dé téé tàcaa ingá xio dñi-gá ní tenàá ñáhá-dë xii-dé, te xáha<sup>n</sup>-dë:

—¿Te náa ñá túú ndàcu iní-n Yä Ndiöxí vitna duha càa-o ndoho-o ndíhi téé nani Jèsús-a ñä? <sup>41</sup> Chí

nchoo tàù ndisa-o sã dúhá ndòho-o nacháhu-o cuèchi-o, dico Jèsús-a chi ñá túú cuèchi-dé —càchí-dé xáha<sup>n</sup>-dë xii téé tàcaa ndihí-dé-á<sup>n</sup>.

<sup>42</sup> Te dàtnùní ní xáha<sup>n</sup>-dë xii-gá:

—Jèsús, ndacu iní ñáhá-n xii-í òré ná quixi-n taxi tnuní-n ñùyíú-a —càchí-dé xáha<sup>n</sup>-dë xii-gá.

<sup>43</sup> Te Jèsús ní xáha<sup>n</sup>-gã:

—Na càchí tnúhu ndáá-í xii-n sã méí ndùu vitna cundecu ndihí ñaha-í xii-n núú ní nduu táhù-í cundecu-í —càchí-gá xáha<sup>n</sup>-gã xii-dé.

*Ní xihí Jèsús*

(Mt. 27:45-56; Mr. 15:33-41; Jn. 19:28-30)

<sup>44</sup> Te òré ní cuu cuádava nduu. Te ní cunee nihíí ñuyíú, te duca<sup>n</sup>-ni càa ní cuu ndéé caá úní sacuaa. <sup>45</sup> Chi ñá túú-gã ní dàyehé nchícanhii te ní ndátá dóó cúú còrtiná veñúhu càhnu sá ío cùnnu ní quée dava ndáá. <sup>46</sup> Te níhi ní cáhá<sup>n</sup> Jèsús, te xáha<sup>n</sup>-gã xii Tátá-gã Dútú Ndiöxí:

—Táu, naquehe<sup>n</sup> cuendá-n espíritú-í —càchí-gá xáha<sup>n</sup>-gã xii Tátá-gã.

Te tnúhu-ná-á<sup>n</sup> ní cáhá<sup>n</sup>-gá te ní xihí-ni-gá.

<sup>47</sup> Te òré ní xiní téé cùu capitá<sup>n</sup> sá dúcá<sup>n</sup> ní cuu, te ní ndacu iní-dé Yá Ndiöxí, te ní cachí-dé:

—Sá ndáá ndisa sá tée-a cùu-dé ì<sup>n</sup> téé ío quide ndáá ndécú ñùyíú-a ní cùu —duha ní cachí-dé.

<sup>48</sup> Te chitu ñáyiú ní tacá xía<sup>n</sup> chi cuíní-yu cundèhé-yu nása cada-güedé Jèsús. Te sátá ní yáha ní xiní-yu nàcuáa ní quide ñaha-güedë xii-gá, te ní ndihí-yu ní ndaca ta caní-yu pèchú-yu cuánuhú sá ndihú iní-yu.

<sup>49</sup> Dico ndècu tnahá cue ñáyiú xiní tnahá ndihí Jèsús, ndihí ñáyiú dñí ní chinchícú<sup>n</sup> ñáhá xii-gá ndéé distritú Galileá, te ñáyiú-á<sup>n</sup> xica-ni xixínutnñi-yu xíndéhë-yu nchaa nàcuáa ní quide ñaha-güedë xii-gá.

*Chindúxi-güedé Jèsús*

(Mt. 27:57-61; Mr. 15:42-47; Jn. 19:38-42)

<sup>50</sup> Te ndècu ì<sup>n</sup> téé ñuú Arimàtea nání-dë Chèé, te ñuú-á<sup>n</sup> yíndèhu-xi distritú Jùdeá, te ío váha iní-dé te

quide ndáá-dé núú Yá Ndiöxí, te tnahá-dé cúú-dë chiú<sup>n</sup> te ní xíndecu-dé jùndá cue téé israél. <sup>51</sup> Te ñá ní tnahá tnahí iní-dé nàcuáa ní cáhá<sup>n</sup>-güedé núú jùndá nàcuáa cada-güedé Jèsús.

Te téé-á<sup>n</sup> ndétú-dë sáá nduu ndíhu ndaha ñaha Yá Ndiöxí xii-dé ndihí ñáyiú. <sup>52</sup> Te téé-á<sup>n</sup> ní sáhá<sup>n</sup>-dé núú tē Pilatú te ní xáha<sup>n</sup>-dë sá ñuu vá cùndèe iní-dé daña-dë chindúxi-dé yiqui cùñú Jèsús. Te té Pilatú-á<sup>n</sup> ní sáha-dé tnúhu. <sup>53</sup> Te ní nunehe-dé yiqui cùñú-gá núú cùrúxí, te ní chidúcú<sup>n</sup>nuu-dé ì<sup>n</sup> dóó cuixí<sup>n</sup>, te ní chihi-dé ì<sup>n</sup> yaú nchii yiqui naha càva, te vátá yõo ì<sup>n</sup>-gá nguíndüxi yaú-á<sup>n</sup>.

<sup>54</sup> Te cùu-xi nduu vispré nduu ndètatú ñáyiú, núu xíquide túha-ná-yu sá cúú ìngá nduu.

<sup>55</sup> Te nchaa ñáyiú dñí ní chinchícú<sup>n</sup> ñáhá xii Jèsús ndéé distritú Galileá ndèndàhá-yu té Chèé ní sáhá<sup>n</sup> núú nchii yaú-á<sup>n</sup>, núu ní xiní-yu nàcuáa ní sacá<sup>n</sup>-dé yiqui cùñú-gá xití yaú-á<sup>n</sup>.

<sup>56</sup> Te duca<sup>n</sup> te cuánuhú-yu vehé-yu, te ní quide túha-yu acití sáhá<sup>n</sup> tnámí, ndihí pomadá, te ní ndetatú-yu ìngá nduu-á<sup>n</sup> ní quidé-yu nàcuáa càhá<sup>n</sup> tnúhu Yá Ndiöxí.

## 24

*Ní ndoto Jèsús*

(Mt. 28:1-10; Mr. 16:1-8; Jn. 20:1-10)

<sup>1</sup> Te ndumìngú nehé víhí-ní cuáhá<sup>n</sup> tucu ñáyiú dñí núú nchii yaú ní chihi-güedé yiqui cùñú Jèsús, te nehé-yu nchaa sá sáhá<sup>n</sup> tnámí ní quide túha-yu-á<sup>n</sup> cuáhá<sup>n</sup>, te tnahá tucu ì<sup>n</sup> ùú-gá tnahá dñí-yu nchícú<sup>n</sup> ñáhá xii-yu cuáhá<sup>n</sup>. <sup>2</sup> Te òré ní quexió-yu yuhu yaú-á<sup>n</sup> te ní xiní-yu sá yúú ndèdí ì<sup>n</sup> xio-ná ndécú, <sup>3</sup> te ní quíhu-yu xití yaú-á<sup>n</sup>, dico ñá túú-gã yiqui cùñú Jèsús yíhí. <sup>4</sup> Te ñá ní cùtnuní tnahí iní-yu ndéé ichi cuáhá<sup>n</sup> yiqui cùñú-gá, te ní xiní-yu úú espíritú xínú cuèchi núú Yá Ndiöxí xínutnñi-xi dñí-yu te xixíhnu-xi dóó chàhnchí. <sup>5</sup> Te ní yùhú-yu te ñá túú ní

cùyí-yu cundèhé-yu cue espíritú-án, te cue espíritú-án nǐ xáha<sup>n</sup>-xi xii-yu:

—¿Ná cuèndá nándücu-ndo Jesús Yaá ndécú vǐvú núú yǐndǔxi ñáyiú ní xíhí-i? <sup>6</sup> Te ñá túú-gǎ yǐqui cùñú-gá ndécú ìha chi sa ní ndoto-gá, te chí dándàcu iní nàcuáa ní cáhá<sup>n</sup>-gá cútnàhá ní xíndecu-ndo ndìhi-gá distritú Galileá, <sup>7</sup> chi ní cachí-gá sá méé-gǎ cúú-gǎ ñaní tnáhá-ndó nchàa-ndo, te dacuítí cuàha cuèndá ñáhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-án cuú-gá dico nduu úní sá cùú-gá te ndoto-gá, duha ní cachí-gá xii-ndo.

<sup>8</sup> Te òré-án nǐ ndacu iní-yu tnúhu ní cáhá<sup>n</sup> Jèsús. <sup>9</sup> Te sáta dúcá<sup>n</sup> te ní naquehé<sup>n</sup>-yu ichi cuánuhú-yu, te ní caní-yu cuèndú núú ndì úxí ñ<sup>n</sup> cue téé ní táúchíú<sup>n</sup> Jèsús cáhá<sup>n</sup> tnúhu-gá, ndìhi núú dàva-gá ñáyiú. <sup>10</sup> Te ñáyiú duca<sup>n</sup> nàha tnúhu cuánuhú núú-güedé-án cúú tǎ Màriá Magdalèná, ndìhi tá Juáná, ndìhi tá Màriá nǎná tǎ Jàcobó, ndìhi dàva-gá ñáyiú dǐhí. <sup>11</sup> Dico cue téé-án nǐ sani iní-güedé sá dícó cáhú ìní-yu tnúhu xǎhá<sup>n</sup>-yu xii-güedé nǔu ñá túú ní sàndáá iní-güedé nàcuáa ní xǎhá<sup>n</sup>-yu.

<sup>12</sup> Dico té Pèlú ní quee-dé xínú-dé cuáhá<sup>n</sup> cuándéhé-dé yaú núú nǐ chihi-güedé yǐqui cùñú Jèsús, te ní sáá-dé te ní ngáundeyi-dé xító ñìhni-dé xítí yaú-án te ní xíní-dé sá méé-nǎ dóó nǐ xídúcú<sup>n</sup> nuu-gá yúcú ñ<sup>n</sup> xio, te ío ní cuñúhu-dé sá dúcá<sup>n</sup> nǐ cuu, te ní natnǐ-dé ichi cuánuhú-dé vehe núú xíndecu-güedé.

### *Ichi ñuú Emàús* (Mr. 16:12-13)

<sup>13</sup> Te dǐu-ni nduu-ǎ<sup>n</sup> ñúhú úú cue téé ní xica cuu ndìhi Jèsús ichi cuáhá<sup>n</sup>-güedé ñ<sup>n</sup> ñuú nání Emàús, te sàcúhu<sup>n</sup>-güedé dàtná úú òré ichi ndéé ñuú Jerusálén, te ndéé ñuú Emàús. <sup>14</sup> Te ta ndàtnúhu-güedé cuáhá<sup>n</sup> nchaa nàcuáa ní cuu, <sup>15</sup> te nini dùca<sup>n</sup> xícáhá<sup>n</sup>-güedé, te Jèsús ní natnahá ñáhá-gǎ xii-güedé te ndèca

tnaha-gá ndìhi-güedé cuáhá<sup>n</sup>. <sup>16</sup> Te cuèi ndèhe ñaha-güedé xii-gá dico dàtná ñ<sup>n</sup> sá ndèdí núú-güedé, chi ñá ná quìní ñáhá-güedé xii-gá ní cùu. <sup>17</sup> Te Jèsús ní xícá<sup>n</sup> tnúhú-gǎ núú-güedé, te xáha<sup>n</sup>-gǎ:

—¿Ná tnúhu xícáhá<sup>n</sup>-ndó ñùhu-ndo ichi núu duca<sup>n</sup> ío cùu ndìyí-ndó-í? —càchí-gá xáha<sup>n</sup>-gǎ xii-güedé.

<sup>18</sup> Te ñ<sup>n</sup> téé nàni Cleofás ní xáha<sup>n</sup>-dǎ xii-gá:

—¿Te ná cuèndá nchaa ñáyiú íchí nǐ sáá ñuú Jerusálén xíní-yu nchaa nàcuáa ní cuu, te ñ<sup>n</sup> dǐi-ná yòhó ñá túú xíní-n-í? —càchí-dé xáha<sup>n</sup>-dǎ xii-gá.

<sup>19</sup> Te ní xáha<sup>n</sup>-gǎ xii-güedé:

—¿Te ná ní cuu-i? —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedé xii-gá:

—Cuèndá Jèsús téé ñuú Nazàrét càhá<sup>n</sup>-ndí, chi téé-án cúú-dé ñ<sup>n</sup> téé càhá<sup>n</sup> tnúhu Yá Ndiòxí, te ío váha ndùu tnúhu càhá<sup>n</sup>-dé ní cùu, te quide-dé sá vǎ yòo tnàhí ndàcu cada nàcuáa cudí ìní Yá Ndiòxí ndìhi ñáyiú ní cùu.

<sup>20</sup> Te cue téé cùu dútú cùnùu, ndìhi cue téé cùnùu taxi tnuní ñáhá xii-ndí ní sáha cuèndá ñáhá-güedé xii-dé núú tǎ Pilatú te ní sata caa ñaha-güedé te núú cùrúxí-án nǐ xíhí-dé. <sup>21</sup> Dico vitna sa ní cuu úní nduu sá ní xíhí-dé, te nchúhú ní sani iní-ndí sá tǎe-án dàcácu ñìhnu ñaha-dé xii nchúhú ñáyiú isràèl núú nchàa tnúndòho tnúhu ndàhú ndécú-ndí. <sup>22</sup> Dico ío cùñúhu-ndí cúú, chi ñ<sup>n</sup> úú ñáyiú dǐhí ní tuha ñaha xii-dé ndécú ndìhi-ndí ní sáhá<sup>n</sup> ngotó-yu ndéxuehe tàcúhndá-gá yaú núú nǐ chihi-güedé yǐqui cùñú-dé, <sup>23</sup> te ní nasáa-yu càchí-yu xii-ndí sá ñà túú-gǎ yǐqui cùñú-dé yíhí xítí yaú-án. Te ní xíní-yu espíritú xínú cuèchi núú Yá Ndiòxí, te ní xáha<sup>n</sup>-xi xii-yu sá ndécú vǐvú-dé. <sup>24</sup> Te sáta dúcá<sup>n</sup> te ñ<sup>n</sup> úú cue téé cùndìhi-ndí ní sáhá<sup>n</sup> ndéhé-güedé yaú-án, te ní xíní-güedé sá ndàá cúú-xí nchàa tnúhu ní cáhá<sup>n</sup> ñáyiú dǐhí-án, dico ñá túú ní xíní-güedé téé-án —càchí-güedé xáha<sup>n</sup>-güedé xii-gá.

<sup>25</sup> Te Jèsús ní xáha<sup>n</sup>-gǎ xii-güedé:



—¿Ío cùmání sǎ xíní tnùní-ndó, chi ío cuèé sàndáá iní-ndó tnùhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiòxí ndéé sanaha! <sup>26</sup> ¿Te náa ñá túú tàú-xi sá ndóhó Cristú òré cùmání-gǎ sáá nduu ndaa-gá andiú nùú ndécú Dütú Ndiòxí cundecu-gá-ǎ? —càchí-gá xáha<sup>n</sup>-gǎ xii-güedé.

<sup>27</sup> Te ní ngüíta-gá xáha<sup>n</sup>-gǎ nàcuáa quèe-xi nchaa tnúhu càhá<sup>n</sup>-xi núú tütú Yá Ndiòxí cuèndá-gá, te díhna-gá ní cáhá<sup>n</sup>-gá nàcuáa nduu nchaa tnúhu yòdo tnuní núú tütú ndí Moisés, te dàtnùní ní cáhá<sup>n</sup>-gá nàcuáa nduu nchaa tnúhu yòdo tnuní núú tütú nchaa cue téé ní xóo cáhá<sup>n</sup> tnúhu Yá Ndiòxí ndéé sanaha.

<sup>28</sup> Te òré ní quexìo-güedé yuhu ñúú núú cuahá<sup>n</sup>-güedé-á<sup>n</sup>, te Jèsús ní quide-ni-gá sá yǎha-gá quíhí<sup>n</sup>-gá ingá xichi ní cùu. <sup>29</sup> Dico ní cáhá<sup>n</sup> ndàhú-güedé núú-gǎ sá quéndòo-gá xíá<sup>n</sup> ndetatú-gá ndihí-güedé, te xáha<sup>n</sup>-güedé xii-gá:

—Quendóo ndihí ñaha xii-ndí iha ndetatú-n chi sa ní cuaa, te tnaví cundiquí<sup>n</sup> —càchí-güedé xáha<sup>n</sup>-güedé xii-gá.

Te xíá<sup>n</sup> cáá ì<sup>n</sup> vehe cuánguihu-güedé ndetatú-güedé ndihí-gá. <sup>30</sup> Te òré sa yìhi-güedé mèsá ndihí-gá cùdini ndihí ñaha-güedé, te ní quehe<sup>n</sup>-gá pàa te ní ndacá<sup>n</sup> táhú-gǎ núú Yá Ndiòxí, te ní táhú cuèchi-gá te dàtnùní ní dácãhñu ñaha-gǎ xii-güedé. <sup>31</sup> Te òré-á<sup>n</sup> ñí naquiní ñáhá-güedé xii-gá ní cùu, dico uu<sup>n</sup> ní ndóñhú-gá. <sup>32</sup> Te ní xítñaha-güedé:

—Te ndáá sá sùúni cùdíí ìní-ó òré tá ndàtnúhu-o ndihí Jèsús véxi ichi, te ta dànehé ñáhá-gǎ xii-o nchàa nacuáa quèe-xi tnúhu càhá<sup>n</sup>-xi núú tütú Yá Ndiòxí —càchí-güedé xítñaha-güedé.

<sup>33</sup> Te ñá túú-gǎ ní xíndetu-güedé chi ndihí-ni ní natnì-güedé ichi cuánuhú-güedé ñuú Jerusálén, te ní nasáá-güedé núú xíndecu ndí ùxí ì<sup>n</sup> cue téé ní táuchíú<sup>n</sup> Jèsús cáhá<sup>n</sup> tnúhu-gá, ndihí dava-gá ñáyíu. <sup>34</sup> Te cue téé xíndecu-á<sup>n</sup> xáha<sup>n</sup>-güedé:

—Ndáá sá ñí ndoto Yaá cúu Mèstrú, chi ní xíní ñáhá tǎ Xímú —càchí-güedé xáha<sup>n</sup>-güedé.

<sup>35</sup> Te cue téé ní nasáá-á<sup>n</sup> ñí cani-güedé cuèndú nàcuáa ní cuu ichi, ndihí nàcuáa ní cuu ní naquiní-güedé Jèsús òré ní táhú-gǎ pàa ní dácãhñu ñaha-gǎ xii-güedé.

*Jèsús ní quexìo-gá núú xíndecu cue téé ní xica cuu ndihí-gá*

(Mt. 28:16-20; Mr. 16:14-18; Jn. 20:19-23)

<sup>36</sup> Te càhá<sup>n</sup> dúcá<sup>n</sup>-ní-güedé nàcuáa ní cuu ní quexìo Jèsús ní ngúnutnì-gá ndéé tnuú-güedé, te xáha<sup>n</sup>-gǎ xii-güedé:

—Yá Ndiòxí chíndèe ñaha-gǎ xii-ndo ío váha cùu iní-ndó ndècu-ndo —càchí-gá xáha<sup>n</sup>-gǎ xii-güedé.

<sup>37</sup> Te da ní yùhú-güedé, te ní sani iní-güedé sá dícó ì<sup>n</sup> espíritú cúu sǎ ndéhé-güedé ní cùu. <sup>38</sup> Dico Jèsús ní xáha<sup>n</sup>-gǎ xii-güedé:

—¿Ná cuèndá yùhú-ndó, te sàni ì<sup>n</sup> sani úú iní-ndó-í? <sup>39</sup> Chí cùndèhe ndaha-í ndihí sáhá-í te quiní-ndó ñá dñu-ni-í. Te chí téndàha ñaha xii-í te cundehe-ndo, te núu ì<sup>n</sup> espíritú ndécú yìquí cuñú-xi dàtná ndécú ndihí yùhú —càchí-gá xáha<sup>n</sup>-gǎ xii-güedé.

<sup>40</sup> Te sátá dúcá<sup>n</sup> ñí xáha<sup>n</sup>-gǎ te ní dánèhé ñáhá-gǎ xii-güedé ndaha-gá ndihí sáhá-gǎ. <sup>41</sup> Te ío ní cuñúhu-güedé, te ní cudíí ìní-güedé sá ndécú-gǎ tnuú-güedé dico sàni ì<sup>n</sup> sani úú iní-güedé, te ní xáha<sup>n</sup> Jèsús xii-güedé:

—¿Ndècu ndihí-ndo luha sá cáxí-ó ìha ñá? —càchí-gá xáha<sup>n</sup>-gǎ xii-güedé.

<sup>42</sup> Te ní sáñaha-güedé xii-gá luha chácá ñí chíhó, ndihí dítá ññú ññú ndúdí, <sup>43</sup> te ní quehe<sup>n</sup>-gá te ndèhe-güedé ní xexi-gá. <sup>44</sup> Te dàtnùní ní xáha<sup>n</sup>-gǎ:

—Nchaa sá ñí yáha-í-a cùu-xi sá ñí cachí tnúhu-í xii-ndo cùtnàhá ndécú ndihí ñaha-gá-í xii-ndo, chi ní cachí-í sá dàcuiíí càda-xi nchaa nacuáa càhá<sup>n</sup>-xi núú tütú ndí Moisés, ndihí núú tütú ndéé tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiòxí

ndéé sanaha, ndihí núú librú Sălmú  
—cächí-gá xáha<sup>n</sup>-gă xii-güedé.

<sup>45</sup> Te òré-á<sup>n</sup> nǐ sǎñaha-gă sá xini  
tnùní-güedé, te ní tecú tnùní-güedé  
nchaa tnúhu cǎhá<sup>n</sup>-xi núú tütú Yă  
Ndiǒxí. <sup>46</sup> Te ní xáha<sup>n</sup>-gă xii-güedé:

—Duca<sup>n</sup> ndéé tnuní núú tütú Yă  
Ndiǒxí sá dàcutíí sǎ yǔhú Crístú  
cuú-í, te nduu úní ndoto-í. <sup>47</sup> Te  
nǐhí nǐuyú cüténuu tnúhu ní cǎhá<sup>n</sup>-í,  
dico díhna nuu-gă nǐú Jerusálén  
ngúita-yu cacunehe ñàhá-yu xii-í,  
te cǎhá<sup>n</sup>-yu nàcuáa ní dánèhé-í-yu,  
te cúñàhá-yu xii cue ñáyu sá ná  
dàndixi túu-yu iní-yu sá ñà túú quide  
váha-yu, te dàñá-yu nchaa ichi cuèhé  
ichi duha ndècú-yu, te natnǐ-yu ichi  
Yă Ndiǒxí, te duca<sup>n</sup> te cada cǎhnu  
iní-gá nchaa yícá cuèchi-yu. <sup>48</sup> Te  
vitna nchòhó cuu-ndo cuè té cǎhá<sup>n</sup>  
ndáá nchaa nàcuáa ní cuu chí ní  
xini núú-ndó. <sup>49</sup> Te yúhú tendaha-í  
Espíritú Yă Ndiǒxí quixi cundecu  
ndihí-ndo, chí duca<sup>n</sup> nǐ cachí-gá. Dico  
chí cündècu-ni nǐú Jerusálén-á<sup>n</sup> ndéé  
ná quèxio Espíritú Yă Ndiǒxí ngúndecu  
ndihí-ndo cuèndá chindee ñàha-xi  
xii-ndo cada-ndo nchaa nàcuáa ní  
cǎhá<sup>n</sup>-í —cächí-gá xáha<sup>n</sup>-gă xii-güedé.

*Jèsús cuánda-gá andiu*

(Mr. 16:19-20)

<sup>50</sup> Te Jèsús ní queñuhu ñaha-gă  
xii-güedé nǐú Jerusálén ndécá  
ñàha-gá cuáhá<sup>n</sup> nǐú Bètaniá, te xía<sup>n</sup> nǐ  
ndonehe-gá ndaha-gá núú nǐnu, te ní  
xícá<sup>n</sup> táhú ñàha-gá xii-güedé núú Yă  
Ndiǒxí. <sup>51</sup> Te sáta nǐ xícá<sup>n</sup> táhú ñàha-gá  
xii-güedé núú Yă Ndiǒxí, te ní quee-gá  
tnúú-güedé cuánda-gá andiu. <sup>52</sup> Te  
ní ngúita-güedé ní cachí-güedé sá ïo  
cǎhnu cuu Jesús, te ní natnǐ-güedé  
ichi cuánuhú-güedé nǐú Jerusálén, te  
súúni cùdíí ìní-güedé ñúhú-güedé ichi.  
<sup>53</sup> Te nchaa nduu ní xíndecu-güedé  
veñúhu cǎhnu sá ïo cùnūú ní ndacá<sup>n</sup>  
táhú-güedé núú Yă Ndiǒxí, te ní  
cachí-güedé sá ïo cǎhnu cuu-gá. Duha  
ní cuu dàvá-á<sup>n</sup>.

## TNÚHU NÍ CHÍDÓ TNÜNÍ TÈ JUÀÁ

*Déhe Yá Ndiöxí ní cuu-gá ññáiyu*

1 Cùmání-gă ngáva ñuyú, te sa ndècu ndihí Yá Ndiöxí Déhe-gá. Te ññ-ni xícuu-gá. Te Déhe-gá-án ní cuu-gá dàtná ññ tnúhu, chi ní cachí tnúhu-gá nàcuáa càa Tátá-gă Dútú Ndiöxí. 2 Te sa ndècu-gá ndihí Dútú Ndiöxí te ní ngáva ñuyú. 3 Te ññ-ni tnúhu mee Dútú Ndiöxí ní cuu ní cadúha Déhe-gá nchaa sá ío ñuyú. Te núu ñá túú Déhe-gá ñá, te ñá túú nă coo ñuyú-a ni cùu. 4 Te ññ-ni Déhe-gá quidé-gă ndécú-ó, te ní dáyèhé-gá iní-ó nàcuáa cundecu-o. 5 Te tnúhu-gá ní xité nuu-xi núu ndécú nchaa ñáiyu ññu ichi cuehé ichi duha. Te ñáiyu-án cùu-yu dàtná cue ñáiyu ndècu ññ núu néé, te ññ-ni-yu cachí iní-yu xocání-yu tnúhu-gá dico vá ndácü-yu.

6-7 Te ní xíndecu ññ tée ní xínani-dé Juàá, te tée-án ní táuchíú Yá Ndiöxí sá càhá-dé tnúhu-gá núu ñáiyu. Te ní xáha-dé xii-yu sá vèxi Déhe-gá ñuyú-a, te dandixi túu-gá iní-yu cuendá cutnùní iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. 8 Te ñá díú mée té Juàá ní dandixi túu-dé iní-yu cuendá cutnùní iní-yu nàcuáa ndùu cuendá Yá Ndiöxí, chi cuendá-ni ní xica cuu-dé ní càhá-dé sá Déhe Yá Ndiöxí véxi-gá dandixi túu-gá iní-yu. 9 Te ndáá ndisa sá méé-gă dándixi túu-gá iní ñáiyu ñuyú-a cuendá cutnùní iní-yu nàcuáa ndùu cuendá Yá Ndiöxí.

10 Te ní xíndecu-gá ñuyú-a, te ñáiyu ñuyú-a ñá ní cùtnuní iní-yu yoo cùu-gá, te ññ-ni mee-gă ní cadúha-gá ñuyú-a ní quide-gá chùú ní táhú Dútú Ndiöxí. 11 Te ní quixi-gá ñuyú ní cadúha mee-gă, dico cue ñáiyu ñuyú-a ñá ní cùu váha iní-yu núu-gă. 12 Dico dáva-yu ní sándáá iní ñáhă-yu xii-gá, te ní nduu táhü-yu ní nduu déhe ñaha Yá Ndiöxí xii-yu. 13 Te ñá túú ní ndùu

déhe ñaha-gă xii-yu sá cùu-yu déhe ñáiyu ñuyú-a, àdi sá ndécú tătă-yu, nănă-yu chi mee Yá Ndiöxí ducañ ní cuíní-gá cunduu sá ndúú déhe ñaha-gă xii-yu.

14 Te Déhe-gá ní quixi túu-gá ñuyú-a, te ní cuu-gá ññ yiqui cùñú ní xíndecu ndihí ñaha-gă xii nchoo cue ñáiyu ní xica cuu túu ndihí-gá. Te ní xini-ó sá ío càhnu cuu-gá cuendá sá ññ dìi díi-ni-gă cùu-gă Déhe Yá Ndiöxí, te ío cùndahú iní ñáhá-gă chíndèe ñaha-gá xii nchoo ñáiyu ndècu ñuyú-a, te ío ndáá càhá-gá. 15 Te duha ní càhá té Juàá cuendá Déhe Yá Ndiöxí ní xáha-dé xii ñáiyu:

—Cuendá tée iha ni càhá-í ndéé cãni-gá ní cachí-í sá quixí ññ tée quixi. Te tée-án cùnùu-gá-dé, chi díhna-gá-dé sa ndècu-dé dàcúxí yùhú —duha ní xáha-dé xii-yu.

16 Te ío váha iní Yaá-án chi xìto ñaha-gá xii-o nchaa-o ññ nduu ññ nduu. 17 Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ichi ñaha xii-o nàcuáa cundecu-o, dico Déhe-gá Xítohó Jesucristú ní cachí-gá sá ío cùu iní ñáhá Yá Ndiöxí xii-o. Te ní càhá-gá nchaa dáva-gá tnúhu ndáá.

18 Te ñá ññ ñáiyu xini túu-yu Yá Ndiöxí. Dico ññ dìi díi-ni Déhe-gá Yaá ndécú ndihí-gá càchí tnúhu-gá nàcuáa càa-gá.

*Té Juàá tée dàcuandute ñaha xii ñáiyu càhá váha-dé cuendá Xítohó Jesucristú (Mt. 3:11-12; Mr. 1:7-8; Lc. 3:15-17)*

19 Te cue tée israhél ndécú ññú Jerusalén ní tendaha-güedé cue dútú ndihí cue tée cùu levítá cuáhá-güedé núu ndécú tē Juàá ndúcú tnúhu-güedé núu-dé ññu ná tée cùu-dé. 20 Te ní càhá ndáá-dé ní xáha-dé xii-güedé:

—Yùhú, ñá díú Cristú Yaá ní tendaha Yá Ndiöxí véxi ñuyú-a cùu-í —càchí-dé xáha-dé.

21 Te ní xáha ññ-cu-güedé:

—¿Te yoo cùu yohó váíñ? ¿Á yohó cùu-n tē Eliás? —càchí-güedé xáha-güedé xii-dé.

Te ní xáha tē Juàá:

—Yùhú, ñá díú tē Eliás cùu-í —càchí-dé xáha-dé.

Te xáha<sup>n</sup> tùcu-güedé:

—¿Te yòhó cúú-n tée ní cachí cue tée ndéé sanaha quixi cáhá<sup>n</sup> tnúhu Yá Ndiöxí-á<sup>n</sup>? —cächí-güedé xáha<sup>n</sup>-güedé xii-dé.

Te ní xáha<sup>n</sup>-dë:

—Ni ñà díú tée-á<sup>n</sup> cúú-í —cächí-dé xáha<sup>n</sup>-dë xii-güedé.

<sup>22</sup> Te ní xáha<sup>n</sup> tùcu-güedé:

—¿Te ná tée cùu yohó váí<sup>n</sup>?, cuèndá duca<sup>n</sup> nàcani tnúhu-ndí núú cuè tée ní tendaha ñaha xii-ndí véxi-ndí, te cáhá<sup>n</sup> duu<sup>n</sup>-n ñuu ná tée cùu-n —cachí-güedé xáha<sup>n</sup>-güedé xii-dé.

<sup>23</sup> Te ní xáha<sup>n</sup> tē Juàá:

—Yúhú cúú-í tée xica cáhá<sup>n</sup> xití yucu nàcuáa ní cáhá<sup>n</sup> ndí Chaiá, chi ndí-á<sup>n</sup> ñí cachí ndí: “Chí dáñá ìchi cuehé ìchi duha ndècu-ndo te tñi-ndo ìchi váha, chi véxi Yaá ío cùnuu”, duha ní cachí ndí —cächí té Juàá xáha<sup>n</sup>-dë xii-güedé.

<sup>24</sup> Te cue tée ndècu tnúhu núú tē Juàá ñuu ná tée cùu-dé, cue tée-á<sup>n</sup> ñí tendaha ñaha cue tée cùu fariséu xii-güedé. <sup>25</sup> Te ní xáha<sup>n</sup> tùcu-güedé xii té Juàá:

—¿Ná cuèndá dácuàndute-n ñáyiú te núú ñà díú Cristú cúú-n, te ni ñà díú tē Eliás, te ni ñà díú tē véxi cáhá<sup>n</sup> tnúhu Yá Ndiöxí cúú-n vâí<sup>n</sup>? —cächí-güedé xáha<sup>n</sup>-güedé xii-dé.

<sup>26-27</sup> Te ní xáha<sup>n</sup> tē Juàá:

—Yúhú ní ngódó núú-í dácuàndute-í ñáyiú. Dico nchícú<sup>n</sup> ñí tée véxi, te tée-á<sup>n</sup> cúnúu-gá-dé dàcúxí yúhú, chi yúhú cúú-í ñí tée duu<sup>n</sup> duu<sup>n</sup> ñá túú tàú nandaxi cuèdicó ñí chàú-dé dico quide-í chiú<sup>n</sup>-dé. Te tée-á<sup>n</sup> sa ñúhu tnahá-dé tnuú-ndó dicó-ni sá ñá túú xini-ndó-dé —cächí-dé xáha<sup>n</sup>-dë.

<sup>28</sup> Duha ní cuu ñuu Bètábará ñuu cáá ndàa ingá xio yúte Jòrdán, yàcá<sup>n</sup> ní xindecu té Juàá ní dácuàndute-dé ñáyiú.

*Jèsús quidé càhmu iní-gá nchaa yíca cuèchi ñáyiú*

<sup>29</sup> Te nduu tñéé ní xini té Juàá Jèsús véxi yatni-gá núú ndécú-dé ndíhi ñáyiú. Te ní xáha<sup>n</sup>-dë xií-yu:

—Chí cündèhe tée-á<sup>n</sup>, chi tée-á<sup>n</sup> cúú-dé Cristú Yaá ní tendaha Yá Ndiöxí véxi ñuyíú-a, te véxi-dé cada

càhnu iní-dé nchaa yíca cuèchi ñáyiú ñuyíú. Te cùu-dé dàtná ñí mbéé quiti ío váha iní-xi. <sup>30</sup> Te díu tée-á<sup>n</sup> ní cachí-í sá cànchícú<sup>n</sup>-dé quixi. Te cùnuu-gá-dé dàcúxí yúhú, chi díhna-gá-dé sa ndècu ní cachí-í xii-ndo. <sup>31</sup> Te ni yúhú ñá túú xini-í-dé ní cùu, dico xica cuu-í dácuàndute-í ñáyiú cuèndá nchaa ñáyiú israél quini ñáhã-yu xii-dé —cächí-dé xáha<sup>n</sup>-dë xií-yu.

<sup>32</sup> Te ní xáha<sup>n</sup> tùcu-dé:

—Ní xini-í Espiritú Yá Ndiöxí ní quee-xi andíu véxi cuu<sup>n</sup>-xi ngúndecu ndíhi ñaha-xi xii-dé, te dàtná cáá lõmá cáá Espiritú-á<sup>n</sup> véxi cuu<sup>n</sup>-xi. <sup>33</sup> Te yúhú ñá túú xini-í-dé ní cùu, dico Yá Ndiöxí Yaá ní tendaha ñaha xii-í xicá cùu-í dácuàndute-í ñáyiú, Yaá-á<sup>n</sup> ñí cachí tnúhu-gá sá tée na quini-í ngúndecu ndíhi Espiritú-gá sá véxi cuu<sup>n</sup> andíu, te tée-á<sup>n</sup> taxi-dé Espiritú-gá cundecu ndíhi-o. <sup>34</sup> Te yúhú ní xini-í-dé te xini ndáá-í sá Dèhe Dútú Ndiöxí cúú-dé. Te xiá<sup>n</sup> cächí tnúhu-í xii-ndo —cächí té Juàá xáha<sup>n</sup>-dë xií-yu.

*Cue tée díhna nuu xica cuu ndíhi Jèsús*

<sup>35</sup> Te nduu tñéé-á<sup>n</sup> díu-ni xiá<sup>n</sup> ndécú tē Juàá ndíhi úú cue tée xica cuu ndíhi-dé. <sup>36</sup> Te ní xini-dé Jèsús ñúhú-gã ìchi, te ní xáha<sup>n</sup>-dë xii cue tée xica cuu ndíhi-dé-á<sup>n</sup>:

—Chí cündèhe tée-á<sup>n</sup>, chi tée-á<sup>n</sup> cúú-dé Cristú Yaá ní tendaha Yá Ndiöxí véxi ñuyíú-a. Te cùu-dé dàtná ñí mbéé quiti ío váha iní-xi —cächí-dé xáha<sup>n</sup>-dë.

<sup>37</sup> Te sá dúcá<sup>n</sup> ñí cáhá<sup>n</sup> té Juàá núú cuè tée úú ndíhi-dé-á<sup>n</sup> ñuu ní chinchícú<sup>n</sup>-güedé Jèsús. <sup>38</sup> Te ní nchócótó-gã ndàa sátá-gã, te ní xini-gá sá nchícú<sup>n</sup> ñáhã-güedé xii-gá. Te ní xáha<sup>n</sup>-gã xii-güedé:

—¿Ná nánducu-ndo? —cachí-gá xáha<sup>n</sup>-gã xii-güedé.

Te ní xáha<sup>n</sup>-güedé:

—¿Ndèé ndécú-n, Rabií? —cächí-güedé xáha<sup>n</sup>-güedé xii-gá.

Te Rabií-á<sup>n</sup> quée-xí Mèstrú tnúhu mee-güedé. <sup>39</sup> Te ní xáha<sup>n</sup> Jèsús xii-güedé:

—Chí nèhé te quini-ndó —cächí-gá xáha<sup>n</sup>-gã.



Te ní xica-güedé cuáhán-güedé, te ní quexio-güedé núú quidé vèhe-gá. Te ndècu-ni-güedé ndihí-gá ní cuaa, chi dàtná òré caa cúmí sacuaa ní sáá-güedé.

40 Te úú cue téé-án ñí tñi-güedé tñuhu ní cáhá<sup>n</sup> té Juáá, te ní chinchícú<sup>n</sup>-güedé Jèsús. Te núú úú cue téé-án, ñí<sup>n</sup>-dé nání-dě Ndríxí, te ñaní-dé cúú tē Xímú, àdi Pelú chi úú diu-dé. 41 Te té Ndríxí-án ñí nanducu-ni-dě ñaní-dé te ní xáha<sup>n</sup>-dē:

—Ní naníhí-ndí téé cùu Mesías — cächí-dé xáha<sup>n</sup>-dē.

Te Mesiás-án quée-xí Crístú tñuhu mee-güedé, Yaá ní tendaha Yá Ndiòxí véxi ñuyíú-a. 42 Te ndèca té Ndríxí ñaní-dé cuáhán núú ndécú Jèsús. Te òré ní xiní ñáhá Jèsús xii té Xímú, te ní xáha<sup>n</sup>-gǎ:

—Yòhó cúú-n tē Xímú déhe té Jònás, te vitna danàni ñaha-í Cèfás xii-n — cächí-gá xáha<sup>n</sup>-gǎ.

Te Cèfás-án quée-xí Pèlú tñuhu mee-güedé.

### *Jèsús ní cáhá<sup>n</sup>-gá té Lìpé ndihí té Natanàél*

43 Te nduu tñéé ní sani iní-gá quíhí<sup>n</sup>-gá distritú Galileá. Te ní naníhí-gǎ ñí<sup>n</sup> téé nàni Lìpé, te ní xáha<sup>n</sup>-gǎ xii-dé:

—Néhe ná quíhí<sup>n</sup>-ó núú quíhí<sup>n</sup>-í-a — cächí-gá xáha<sup>n</sup>-gǎ.

44 Te té Lìpé-án cúú-dě téé ñuú Betsaidá. Te diu-ni ñuú yàcá<sup>n</sup> cúú ñuú té Ndríxí ndihí té Pèlú. 45 Te té Lìpé ní naníhí tnáhá-dě ndihí té Natanàél, te ní xáha<sup>n</sup>-dē:

—Ní naníhí-ndí téé dii cuèndú-xi ní chídó tñuní ndíi Moisés ndihí dava-gá cue téé ní xóo cáhá<sup>n</sup> tñuhu Yá Ndiòxí ndéé sanaha. Te téé-án nání-dě Jèsús déhe té Chèé, téé ñuú Nazàrét — cächí-dé xáha<sup>n</sup>-dē.

46 Te ní xáha<sup>n</sup> tē Natanàél xii té Lìpé:

—¿Te náa ío váha càa ñuú Nazàrét nùu da yàcá<sup>n</sup> quee téé cáhá<sup>n</sup> tñuhu Yá Ndiòxí? — cächí-dé xáha<sup>n</sup>-dē.

Te ní xáha<sup>n</sup> tē Lìpé:

—Néhe ná quíhí<sup>n</sup>-ó te quiní-n — cächí-dé xáha<sup>n</sup>-dē.

47 Te òré ní xiní Jèsús té Natanàél tá cùyatni-dé cuáhán, te ní cáhá<sup>n</sup>-gá cuèndá-dé te ní cachí-gá:

—Tée véxi-án cúú-dě mei tēe isràél, te ñá ñí<sup>n</sup> ndùu dandahú-dé ñáyiu — cächí-gá xáha<sup>n</sup>-gǎ.

48 Te ní xáha<sup>n</sup> tē Natanàél xii Jèsús:

—¿Te nása náquiní ñáhá-n? — cächí-dé xáha<sup>n</sup>-dē.

Te ní xáha<sup>n</sup> Jèsús:

—Yúhú sa ní xiní ñáhà-í xii-n òré ndécú-gǎ-n càha yutnu ngúxí-án te ní tē Lìpé vátá cáná ñaha-gá-dé xii-n òré-án — cächí-gá xáha<sup>n</sup>-gǎ xii-dé.

49 Te sá dúcá<sup>n</sup> ñí cáhá<sup>n</sup>-gá, núu ní xáha<sup>n</sup> tē Natanàél xii-gá:

—Mèstrú, yòhó cúú-n Dèhe Dútú Ndiòxí yíndàha-n ñáyiu isràél — cächí-dé xáha<sup>n</sup>-dē xii-gá.

50 Te Jèsús ní xáha<sup>n</sup>-gǎ:

—Cuèndá sá ñí xiní ñáhà-í xii-n càha yutnu ngúxí xián iní ñáhá-n, dico cuéhé-gǎ núú sá quiní-n — cächí-gá xáha<sup>n</sup>-gǎ xii-dé.

51 Te ní xáha<sup>n</sup> tùcu-gá:

—Na cächí tñuhu ndáá-í sá sàa nduu, te quiní-ndó nàcaá<sup>n</sup> andíu. Te quiní-ndó cuè espíritú xínú cuèchi núú Yá Ndiòxí sá ndàa nuu-xi quide-xi núú cùndècu yúhú Tée cùu ñaní tnáhá-ndó nchàa-ndo — cachí-gá xáha<sup>n</sup>-gǎ xii-güedé.

## 2

### *Vico tnándaha ío ñuú Cànaá*

1 Te nduu úní sá dúcá<sup>n</sup> ñí cuu te ní xóo ñí<sup>n</sup> vico tnándaha ñuú Cànaá, ñí<sup>n</sup> ñuú yíndèhu distritú Galileá. Te yàcá<sup>n</sup> ní xíndecu náná Jèsús. 2 Te tnàhá Jèsús ndihí cue téé xica cuu ndihí-gá ní cáhá<sup>n</sup>-yu cuáhán-gá ndihí-güedé vico-án. 3 Te òré ní ndihí vínú, te ní xáha<sup>n</sup> náná Jèsús xii-gá:

—Ñá túú-gǎ vínú ndécú ndihí-yu — cächí-a<sup>n</sup> xáha<sup>n</sup>-a<sup>n</sup>.

4 Te ní xáha<sup>n</sup> Jèsús xii-a<sup>n</sup>:

—Náá, ñá túú xini ñuhu-xi da yúhú cúñaha-n cuèndá vínú-án, chi vátá tnàhá-gá òré quiní-yu yoo cùu yúhú — cächí-gá xáha<sup>n</sup>-gǎ xii-a<sup>n</sup>.

5 Te ní xáha<sup>n</sup>-a<sup>n</sup> xii ñáyiu xínu cuechi:

—Cada-ndo nchàa nacuaá na càhá<sup>n</sup> Jèsús —càchí-a<sup>n</sup> xáha<sup>n</sup>-a<sup>n</sup>.

<sup>6</sup> Te yàcá<sup>n</sup> nútnǎ íñú quídi yúú te quée dàtná ì<sup>n</sup> cièndú lítrú ndute ì<sup>n</sup> ì<sup>n</sup> quídi-á<sup>n</sup>. Te ndute-á<sup>n</sup> nándǎhi ñáyiú isràél ndáhǎ-yu te nàqueté-yu cóhǒ-yu chi duca<sup>n</sup> tnàhí quidé-yu nàcuáa sàndáá iní-yu Yá Ndiǒxí. <sup>7</sup> Te ní xáha<sup>n</sup> Jèsús xii nchaa cue tée xínu cuechi:

—Nadachítú-ndó ndùte ndi nchaa quídi-á<sup>n</sup> —càchí-gá xáha<sup>n</sup>-gǎ xii-güedé.

Te ní nadachítú-güedé. <sup>8</sup> Te ní xáha<sup>n</sup>-gǎ:

—Vitna te tava-ndo lùha, te canehe-ndo quǎhí<sup>n</sup> cuáha-ndo tée quíde vico —cachí-gá xáha<sup>n</sup>-gǎ xii-güedé.

Te duca<sup>n</sup> ñí quíde-güedé ní tava-güedé luha nèhe-güedé cuáhá<sup>n</sup> ní sáha-güedé tée quíde vico. <sup>9</sup> Te ní xito ndéé tée quíde vico-á<sup>n</sup>, te sa ní nduu-xi vǐnú, te ñá túú ní xíní-dé ndéé véxi-xi, dico mee cuè tée xínu cuechi sa naha-güedé núú ñí tava-güedé. Duca<sup>n</sup> te tée quíde vico-á<sup>n</sup> ñí cana-dé tée tnǎndaha. <sup>10</sup> Te ní xáha<sup>n</sup>-dǎ:

—Nchaa ñáyiú quíde vico queñuhú-yu díhna-gá vǐnú váha. Te sa vǐnú váha xihí-yu, te dàtnùní queñùhú-yu vǐnú ndàhú. Te yòhó díhna-gá vǐnú ndàhú ní queñuhu-n, te ndéé núú ñí ndihí-ná ní queñuhu-n vǐnú váha —càchí tée quíde vico-á<sup>n</sup> xáha<sup>n</sup>-dǎ xii tée tnǎndaha-á<sup>n</sup>.

<sup>11</sup> Te sá ñí nadatùu Jesús ndute-á<sup>n</sup> ñí nduu-xi vǐnú cúú-xí ì<sup>n</sup> chiu<sup>n</sup> díhna nuu sǎ vǎ yòo tnàhí ndàcu cada ní quíde-gá ñuú Cànaá, ì<sup>n</sup> ñuú yǐndèhu dístrítú Galiléa, te chiù<sup>n</sup> ní quíde-gá-á<sup>n</sup> cúú-xí ì<sup>n</sup> chiu<sup>n</sup> cahnu vihi, núú xǎ<sup>n</sup> ní cutnùní iní-yu sá ìo càhnu cuu-gá, te ní sàndáá iní ñáhá nchaa cue tée xìca cuu ndihí-gá.

<sup>12</sup> Te sátá ñí yáha vico, te ní xica Jèsús ndihí nǎná-gǎ, ndihí cue ñaná-gá, ndihí nchaa cue tée xìca cuu ndihí-gá cuáhá<sup>n</sup>-yu ñuú Capèrnaúm. Te yàcá<sup>n</sup> ní xíndecú-yu ì<sup>n</sup> úú nduu ndihí-gá.

*Jèsús ñá túú tnàhá iní-gá nàcuáa quíde ñáyiú xití veñúhu*

(Mt. 21:12-13; Mr. 11:15-18; Lc. 19:45-46)

<sup>13</sup> Te ta cùyatni cada ñáyiú isràél vico pàscuá, te ní xica Jèsús cuáhá<sup>n</sup>-gá ñuú Jerusàlén. <sup>14</sup> Te sátá ñí sáa-gá yàcá<sup>n</sup>, te ní xica-gá cuáhá<sup>n</sup>-gá veñúhu càhnu sá ìo cùnuu, te xití veñúhu-á<sup>n</sup> ñí xíní-gá ndécú ñáyiú dícó-yu ndicutu, mbéé ndihí lómá, te tnàhá ñáyiú dàma díhú<sup>n</sup> núcǒo-yu ní xíní-gá. <sup>15</sup> Te ní quehe<sup>n</sup>-gá ì<sup>n</sup> úú yoho, te ní cáunuu tnàha-gá, te ní dáyùhu-gá ñáyiú ní queé-yu quehé veñúhu, ndihí ndicutú-yu ndihí mbéé-yu. Te cue ñáyiú dàma díhú<sup>n</sup>-ǎ<sup>n</sup> ní dǎngǒyo-gá díhǔ<sup>n</sup>-yu, te ní dándüá-gá mèsá-yu. <sup>16</sup> Te ní xáha<sup>n</sup>-gǎ xii cue ñáyiú dícó lómá:

—¡Queñuhu-ndo nchaa quití-a xití veñúhu-a! ¡Vá cáda-ndó vèhe núú yáhu núú cúú vèhe Tátà-í Dútú Ndiǒxí! —càchí-gá xáha<sup>n</sup>-gǎ xii-yu.

<sup>17</sup> Te xǎ<sup>n</sup> ní ndacu iní cue tée xìca cuu ndihí-gá sá dúcá<sup>n</sup> yòdo tnuní núú tütú-gá, te càchí-xi: “Ío cùyica iní-í chi ñá cuíní-yu canehe ì<sup>n</sup>-yu vehe Tátà-í”, duha càchí-xi núú tütú-gá.

<sup>18</sup> Te ní xáha<sup>n</sup> cuè tée isràél xii-gá:

—¿Ná cúú sǎ vǎ yòo tnàhí ndàcu cada, cada-n cuèndá cutnùní iní-ndí sá cúú dùha taxi tnuní ñáhá-n xii-ndí-í? —càchí-güedé xáha<sup>n</sup>-güedé xii-gá.

<sup>19</sup> Te ní xáha<sup>n</sup> Jèsús:

—Chí dǎngǒyo veñúhu-a, te neni xití úní nduu te sa nadàxínu-í —càchí-gá xáha<sup>n</sup>-gǎ xii-güedé.

<sup>20</sup> Te ní xáha<sup>n</sup> tùcu cue tée isràél:

—Údico íñú cuía ñí xíndecuu-güedé ní sáa veñúhu-a, te yòhó cuíní-n nàdaxínu-n xití úní-ñi nduu —càchí-güedé xáha<sup>n</sup>-güedé xii-gá.

<sup>21</sup> Dico sá ñí cáhá<sup>n</sup>-gá chi ñá díú cuèndá veñúhu ní cǎhá<sup>n</sup>-gá chi cuèndá yiqui cùñú-gá ní cáhá<sup>n</sup>-gá. <sup>22</sup> Núú sátá ñí xihí-gá, te ní ndoto-gá, te òré-á<sup>n</sup> ñí ndacu iní cue tée ní xica cuu ndihí-gá nàcuáa ní cáhá<sup>n</sup>-gá, núú xǎ<sup>n</sup> ní sàndáá iní-güedé tnúhu yòdo tnuní

núú tütú-gá. Te duca<sup>n</sup> te ní sándáá iní-güedé tnúhu ní cáhá<sup>n</sup>-gá.

*Jèsús xiní-gá nàcuáa càa iní nchaa ñáyiu*

<sup>23</sup> Te òré ndécú Jèsús vico pàscuá, te ío vai ñáyiu ní sándáá iní ñáhá xii-gá cuendá ío titní sá vǎ yǒo tnàhí ndàcu cada ní quide-gá ní xiní-yu. <sup>24</sup> Dico Jèsús ñá ní cáhá<sup>n</sup>-gá nchaa tnúhu ñúhu iní-gá, chi sa ní cutnùní iní-gá sá ñà túú cùu váha iní-yu. <sup>25</sup> Te ñá túú xini ñuhu-gá ì<sup>n</sup> ñáyiu cúñaha nàcuáa càa iní nchaa tnàha ñáyíu-yu, chi mee-gǎ sa nàha ndáá-gá nàcuáa càa iní-yu nchaa-yu.

### 3

*Jèsús ndìhi té Nicòdemú*

<sup>1</sup> Ní xíndecu ì<sup>n</sup> té cùu fariséu ní xínani-dé Nicòdemú, te ní cuu-dé ì<sup>n</sup> té cùnūu núú ñáyiu isràél. <sup>2</sup> Te té-á<sup>n</sup> ñí sáhá<sup>n</sup>-dé niú ní cáhá<sup>n</sup> ndìhi-dé Jèsús, te ní xáha<sup>n</sup>-dǎ:

—Mèstrú, yúhú ndìhi dava-gá-güedé sa nàha-ndí sá Yǎ Ndiǒxí ní tendaha ñàha-gá xii-n véxi-n dānehé ñáhá-n xii-ndí, chi núu ñá túú Yǎ Ndiǒxí ndécú ndìhi-n, te vá ndácú-n càda-n nchaa sá vǎ yǒo tnàhí ndàcu cada quide-n —cachí-dé xáha<sup>n</sup>-dǎ.

<sup>3</sup> Te ní xáha<sup>n</sup> Jèsús:

—Na càchí tnúhu ndáá-í xii-n sǎ ncháá ñáyiu vá ná càcu saa tucu, te vá ndìhu ndaha ñàha Yá Ndiǒxí xii-yu —càchí-gá xáha<sup>n</sup>-gǎ xii-dé.

<sup>4</sup> Te ní xáha<sup>n</sup> té Nicòdemú:

—¿Te nása cada ì<sup>n</sup> ñáyiu sa ní yì te cacu-ni tucú-yu? ¿Náa ndìhu tucú-yu xití nǎnǎ-yu te cacu tucú-yu xito cùu uú-á<sup>n</sup>? —càchí-dé xáha<sup>n</sup>-dǎ xii-gá.

<sup>5</sup> Te ní xáha<sup>n</sup> Jèsús:

—Na càchí tnúhu ndáá-í xii-n sǎ nchàa ñáyiu na ndùu ndoo nduu nine iní-xi cuú-yu ñáyiu ní na càcu saa ndìhi ndute ndìhi Espiritú Yǎ Ndiǒxí, ñáyiu-á<sup>n</sup> ndìhu ndaha ñàha-gá xii-yu. <sup>6</sup> Te nchaa ñáyiu càcu ñuyíu-a, chi déhe ñáyiu ñuyíu-a cùu-yu. Te ñáyiu ní nduu ndoo ní nduu nine iní-xi, ñáyiu-á<sup>n</sup> ñí nduu táhǔ-yu Espiritú Yǎ Ndiǒxí te tàxi tnuní ñáhá-nǎ

Espiritú-gá xii-yu. <sup>7</sup> Te vá cúñǔhu-n tnúhu ní cáhá<sup>n</sup>-í-a, chi nchaa ñáyiu ní sándáá iní ñáhá xii-í ní nduu ndoo ní nduu nine iní-yu, te ñáyiu-á<sup>n</sup> cúu-yu dàtná ñáyiu ní nacacu saa. <sup>8</sup> Táchí ndèni xiá<sup>n</sup> tècú dóho-o xico-xi, dico ñá túú xiní-ó ndéé ichi véxi-xi, te ní ñà túú xiní-ó ndéé ichi cuáhá<sup>n</sup>-xi. Duca<sup>n</sup> sǎtnahá-xi cùu Espiritú-gá ndécú ndìhi ñáyiu ní nduu ndoo ní nduu nine iní-xi —càchí-gá xáha<sup>n</sup>-gǎ xii-dé.

<sup>9</sup> Te dàtnùní ní xicá<sup>n</sup> tnúhú tucu té Nicòdemú núú-gǎ, te xáha<sup>n</sup>-dǎ xii-gá:

—¿Te nása ndùu tnúhu càhá<sup>n</sup>-n dùca<sup>n</sup> cahá<sup>n</sup>-n? —càchí-dé xáha<sup>n</sup>-dǎ xii-gá.

<sup>10</sup> Te ní xáha<sup>n</sup> Jèsús:

—Yòhó cúu-n ì<sup>n</sup> té cùnūnì iní-xi, chi dàcuaha-n ñáyiu isràél, ¿te ñá tècú tnùnì-n tnúhu càhá<sup>n</sup>-í-u? <sup>11</sup> Te na càchí tnúhu ndáá-í xii-n sǎ nchǔhú càhá<sup>n</sup>-ndí ì<sup>n</sup> sá ñí tecú tnùnì-ndí, te càhá<sup>n</sup> ndáá-ndí cuendá ì<sup>n</sup> sá ñí xiní-ndí. Dico nchòhó ñá tècú tnùnì-ndó tnúhu càhá<sup>n</sup>-ndí. <sup>12</sup> Te ñá sándáá iní-ndó tnúhu càhá<sup>n</sup>-í cuendá nchaa nàcuáa cùu ñuyíu-a, te uu<sup>n</sup>-gá cada-ndo núu cáhá<sup>n</sup>-í cuendá nchaa nàcuáa cùu andíu.

<sup>13</sup> Vǎ yǒo ì<sup>n</sup> sáa andíu, te cani-xi cuendú nàcuáa càa. Chi ì<sup>n</sup> dīi dīi-ni yúhú véxi cuu<sup>n</sup>-í andíu, te cùu-í ñanì tnáhá-ndó nchàa-ndo. Te dīu-ni yácá<sup>n</sup> ndaa-í cundecu-í. <sup>14</sup> Te dàtná ní ndanehe ndí Moisés cóo ñí sata caa ndíi-dí xití yucu, duca<sup>n</sup> càda ñaha-güedé cata caa ñaha-güedé núú cùrúxí xii yúhú Tée cùu ñanì tnáhá-ndó nchàa-ndo ì<sup>n</sup> nduu, <sup>15</sup> te duca<sup>n</sup> yǎha-í cuendá nchaa ñáyiu na quíndáá iní ñáhá xii-í te nduu táhǔ-yu cundecu-yu ndìhi Yá Ndiǒxí ñí caa ñí quíhí<sup>n</sup> —càchí-gá xáha<sup>n</sup>-gǎ xii-dé.

*Yá Ndiǒxí ío cùu iní-gá ñáyiu ñuyíu-a*

<sup>16</sup> Te Yá Ndiǒxí ío cùu iní-gá ñáyiu ñuyíu-a. Te ì<sup>n</sup> dīi-ni Déhe-gá ndécú, te ní tendaha ñàha-gá ní quixi-gá ñuyíu-a, te núu na quíndáá iní ñáhá ñáyiu, te vá cuíta nihnú-yu, chi nduu táhǔ-yu cundecu-yu ndìhi-gá ñí caa ñí quíhí<sup>n</sup>. <sup>17</sup> Te Yá Ndiǒxí ñá túú ní tendaha-gá Déhe-gá quixi-gá ñuyíu-a

dacuïta nihnu-gá ñáyi, chi ní tendaha-gã Déhe-gá ní quixi-gá sá dácacu nihnu-gá ñáyi ñuyíú-a núú ùhú núú ndàhú.

<sup>18</sup> Nchaa ñáyi sàndáá iní ñáhá xii Déhe-gá, te vá cuïta nihnú-yu. Te nchaa ñáyi ñá túú sàndáá iní ñáhá xii Déhe-gá ñùhú-yu ichi cuáhá<sup>n</sup>-yu núú ùhú núú ndàhú, chi ñá túú sàndáá iní-yu Déhe Dútú Ndiöxí. <sup>19</sup> Chi ní quixi Déhe-gá ñuyíú-a ní dándíxí túu-gá iní-yu cuendá cutnùn iní-yu nàcuáa ndùu cuendá Yã Ndiöxí te tñi-yu ñ<sup>n</sup> ichi váha ni cùu, te ñá ní tnàhá iní-yu, chi ní cudíí-gã iní-yu nchaa sá cuèhé sá dúhá dácúúxí sá váha, núu xiá<sup>n</sup> tá xita nihnú-yu cuáhá<sup>n</sup>. <sup>20</sup> Te nchaa ñáyi quide nchaa sá cuèhé sá dúhá ñá tnàhá iní-yu cutnùn iní-yu nàcuáa ndùu cuendá Yã Ndiöxí, te ñá tñi-yu tnúhu-gá cuendá yùhú-yu nduu tnùn nchaa sá quidè-yu. <sup>21</sup> Te nchaa ñáyi ñùhu ichi ndáá cuíní-yu cutnùn iní-yu nàcuáa ndùu cuendá Yã Ndiöxí, te cùtnuní sá chindèe ñaha-gá xií-yu, chi quide váha-yu.

*Té Juàá té dácuan-dute ñaha xii ñáyi cãhá<sup>n</sup> váha tucu-dé cuendá Jèsús*

<sup>22</sup> Te sátá dúcá<sup>n</sup> ñi cuu, te ní quee Jèsús cuáhá<sup>n</sup>-gá ndihi cue té xica cuu ndihi-gá distritú Jùdeá. Te yàcá<sup>n</sup> ní xindecu tnaa-gá ndihi-güedé ní xóo dacuandute-güedé ñáyi. <sup>23</sup> Te ndècu té Juàá ñ<sup>n</sup> xichi núú nání Ènón yatni ñúú Sàlém dácuan-dute-dé ñáyi, chi yàcá<sup>n</sup> ío váha ñùhu ndute, núu xiá<sup>n</sup> ní xóo quíhí<sup>n</sup> ñáyi yàcá<sup>n</sup> ní xóo cuanduté-yu. <sup>24</sup> Duha ní cuu cútnàhá vátá ngává-gã té Juàá vecaá.

<sup>25</sup> Te ní cacu ñ<sup>n</sup> cuendú ní cãhá<sup>n</sup> cue té xica cuu ndihi té Juàá ndihi ñ<sup>n</sup> úú cue té israél, núu ndèdacàa sá váha-gá cada ñáyi cuendá nduu íi-yu. <sup>26</sup> Te ní sáhá<sup>n</sup>-güedé núú ndécú tã Juàá ní xáha<sup>n</sup>-güedé:

—Mèstrú, té ní quixi núú ñi xindecu-n ndàa ingá xio yúte Jòrdán, té dii cuendú-xi ní cãhá<sup>n</sup>-n, té-ã<sup>n</sup> dácuan-dute-dé tnàhá-dé ñáyi. Te ío

vài ñáyi ní chinchícú<sup>n</sup> ñáhá xii-dé — cãhí-güedé xáha<sup>n</sup>-güedé xii-dé.

<sup>27</sup> Te ní xáha<sup>n</sup> tã Juàá:

—Te vá yõo ñ<sup>n</sup> ndacu cada ñ<sup>n</sup> chiu<sup>n</sup> nacuáa cuu váha iní Yã Ndiöxí, te núu ñá túú mèe-gá chindèe ñaha-gá xií-yu. <sup>28</sup> Te nchòhó sa ñaha-ndo sá yùhú ní cãhá<sup>n</sup> ndáá-í sá ñá díú Crìstú cúu-í, dico mee Yã Ndiöxí ní tendaha ñaha-gá yódó nùu-í véxi núú Yàá-á<sup>n</sup>. <sup>29</sup> Te nchòhó xiní-ndó sã ñ<sup>n</sup> té tñandaha te xichí tñandaha ndihi-ná-dé cùndihi-dé. Te té ní xica ndáhú ío cùdíí iní-dé ndèdòho-dé nchaa tnúhu cãhá<sup>n</sup> té tñandaha-á<sup>n</sup>. Te duca<sup>n</sup> sãtnahá-xi cùu yùhú, chi ío cùdíí iní-í sá vái ñáyi ta chinchícú<sup>n</sup> ñáhá xii Jèsús cuáhá<sup>n</sup>. <sup>30</sup> Te uu<sup>n</sup>-gá cuita cuu vai ñáyi cutnùn iní-xi sá ío cùnuu-gá, te yùhú cuita ndóo ndee-í quíhí<sup>n</sup> — cãhí-dé xáha<sup>n</sup>-dè xii-güedé.

*Crìstú véxi cuu<sup>n</sup>-gá andiü*

<sup>31</sup> Te ñ<sup>n</sup> dii díi-ni Crìstú Yáá véxi cuu<sup>n</sup> andiü cùnuu-gá núú ñuyíú-a. Te nchaa ñáyi ndècu ñuyíú-a cùu-yu ñáyi ñuyíú iha, te cãhá<sup>n</sup>-yu sá cúu-xí ñuyíú-a. Dico Crìstú Yáá véxi cuu<sup>n</sup> andiü <sup>32</sup> cãhá<sup>n</sup>-gá ñ<sup>n</sup> sá ñi xiní-gá, te cãhá<sup>n</sup>-gá ñ<sup>n</sup> sá ñi tecú dóho-gá. Te ñá túú cuíní-yu quindáá iní-yu tnúhu cãhá<sup>n</sup>-gá. <sup>33</sup> Te nchaa ñáyi tñi tnúhu cãhá<sup>n</sup> Yáá véxi cuu<sup>n</sup> andiü-á<sup>n</sup> cãhá<sup>n</sup>-yu sá tnúhu Yá Ndiöxí cúu-xí ñ<sup>n</sup> sá ndàá. <sup>34</sup> Te Déhe-gá Yáá véxi cuu<sup>n</sup> andiü cãhá<sup>n</sup>-gá mee-ni tnúhu-gá. Te ñá ùhú iní-gá ní sãñaha-gã Espiritú-gá ndécú ndihi Déhe-gá. <sup>35</sup> Te Dútú Ndiöxí ío cùu iní-gá Déhe-gá, núu ní xáha<sup>n</sup>-gã sá mée-gã taxi tnùn-gá nchaandi túhú sá ío. <sup>36</sup> Te nchaa ñáyi na quindáá iní ñáhá xii Déhe-gá, ñáyi-á<sup>n</sup> cundecú-yu ndihi-gá ñi caa ñi quíhí<sup>n</sup>. Te nchaa ñáyi vá quindáá iní ñáhá xii Déhe Yá Ndiöxí ío dandòho ñaha-gá xií-yu.

## 4

*Jèsús ndihi ñ<sup>n</sup> ñaha Sãmariá*

<sup>1</sup> Te ní níhí cue té cùu fariséu tnúhu sá vai-gá ñáyi ta chinchícú<sup>n</sup> ñáhá xii Jèsús. Te duca<sup>n</sup> vai-gá-yu ta



dàcuandute-gá cuáhá<sup>n</sup> dàcúúxí tẽ Juàá.  
 2 Te cuẽi ñá díú mèe-gá dácuañdute ñaha-gá xii-yu, dico cue tée xica cuu ndihi-gá dácuañdute ñaha-güedé xii-yu. 3 Te ní níhí Jèsús tnúhu nàcuáa càhá<sup>n</sup> cue tée cùu fariséú, núu ní ndee-gá distritú Jùdeá cuánuhú tucu-gá distritú Galileá.

4 Te ichi ñùhu-gá ní nayáha-gá distritú Sàmariá. 5 Te ní sáá-gá ì<sup>n</sup> ñúú nání Sícár te ñúú-á<sup>n</sup> yíndèhu-xi distritú Sàmariá. Te xía<sup>n</sup> cáá yàtni ñuhu núú ñí sáha táhú ndíi Jàcób déhe ndíi ndíi Chèé. 6 Te yàcá<sup>n</sup> cáá dòco ní cuu cuendá ndíi Jàcób. Te cùu-xi datná cuádava nduu ñùhu Jesús ichi, te ío ní xàú-gá ñúu ní sáá-gá yuhu dòco-á<sup>n</sup> ñí ngóo-gá ndétátú-gá. 7-8 Te ní xica cue tée xica cuu ndihi-gá cuáhá<sup>n</sup>-güedé xití ñúú Sícár cuánguaa<sup>n</sup>-güedé sá cáxí-güedé. Te yuhu dòco-á<sup>n</sup> núcõo-gá ní sáá ì<sup>n</sup> ñadìhí ñaha distritú Sàmariá véxi quèhnu-a<sup>n</sup> ndute, te ní xáha<sup>n</sup> Jèsús:

—Taxi táhú luha ndute na còho-í —càchí-gá xáha<sup>n</sup>-gá.

9 Te ní xáha<sup>n</sup> ñàdìhí-á<sup>n</sup>:

—¿Ná cuendá da núu-í xicá<sup>n</sup>-n ndute coho-n? Te yòhó cúu-n tẽe isràél, te yúhú cúu-í ñaha Sàmariá —càchí-a<sup>n</sup> xáha<sup>n</sup>-a<sup>n</sup> xii-gá.

Te duca<sup>n</sup> ñí xáha<sup>n</sup>-a<sup>n</sup>, chi ñá túú ndècu váha ñáyíu isràél ndihi ñáyíu distritú Sàmariá. 10 Te ní xáha<sup>n</sup> Jèsús xii-a<sup>n</sup>:

—Ñá cútnùni iní-n ñá taxi Yá Ndiõxí xii-n, te ni ñá cútnùni iní-n yòo xicá<sup>n</sup> ndute núu-n. Te núu dìcò xìní-n yòo cuu yúhú á, te da mee-n cãcá<sup>n</sup>-n ndute núu-í coho-n, te yúhú taxi-í ndute cundecu ndihi-n núú cuáhá<sup>n</sup> núú véxi —càchí-gá xáha<sup>n</sup>-gá.

11 Te ní xáha<sup>n</sup> tucu ñadìhí-á<sup>n</sup>:

—Tátá, ni sá quèhnu-n ndute ñá túú nèhe-n, te doco-a cùnú víhí, te ñá túú ndèé quínguehe<sup>n</sup>-n ndute taxi-n coho-í. 12 Ndíi Jàcób ñaní tnáhá-ndíi ní xíndecu ndèé sanaha ñí cadúha ndíi doco-a ñí tóo ndute ní xihí ndíi, ndihi nchaa déhe ndíi, ndihi nchaa quítí ndíi, te ní ndóo cùu cuendá-ndíi.

¿Te násai, te yòhó cùnùu-gá-n dàcúúxí ndíi-á<sup>n</sup>? —càchí-a<sup>n</sup> xáha<sup>n</sup>-a<sup>n</sup> xii-gá.

13 Te ní xáha<sup>n</sup> Jèsús:

—Nchaa ñáyíu xihí ndute doco-a, te vá cúú vétú dúcá<sup>n</sup> iní-yu chi dayìchí ñáhá-ní tucu-xi ndute-a. 14 Dico nchaa ñáyíu na còho ndute na cuáñaha-í, te vá ì<sup>n</sup> ndùu-gá dayìchí ñáhá-xí ndute-á<sup>n</sup> xii-yu, chi ndute cuáñaha-í cúu-xí ndute váha-gá. Te dàtná quée ñihni ndute xití doco-a, nchaa-ni nduu ñùhu ñá túú yìchí, duca<sup>n</sup> sãtnahá-xi cada-xi chi candeca-xi iní-yu ni caa ni quíhí<sup>n</sup>, te núu na còhó-yu ndute cuáñaha yúhú —càchí-gá xáha<sup>n</sup>-gá xii-a<sup>n</sup>.

15 Te ní xáha<sup>n</sup>-a<sup>n</sup>:

—Tátá, taxi ndute-á<sup>n</sup> ná còho-í cuendá sá vá dayìchí ñáhá tnáhí-gá-xi ndute. Te vá quíxí-gá-í quixi quèhnu-í ndute doco-a —càchí-a<sup>n</sup> xáha<sup>n</sup>-a<sup>n</sup> xii-gá.

16 Te ní xáha<sup>n</sup> Jèsús:

—Cuáhá<sup>n</sup> cuángàna yìi-n, te quixi-ndo ìha —càchí-gá xáha<sup>n</sup>-gá xii-a<sup>n</sup>.

17 Te ní xáha<sup>n</sup>-a<sup>n</sup>:

—Ñá túú yìi-í —càchí-a<sup>n</sup> xáha<sup>n</sup>-a<sup>n</sup> xii-gá.

Te ní xáha<sup>n</sup> tucu Jesús:

—Ndáá càhá<sup>n</sup>-n sã ñá túú yìi-n.

18 Dico ní cuu úhú<sup>n</sup> tée cãndeca-n, te tée ndèca-n vitna chi ñá díú yìi-n cuu-dé, te ndáá càhá<sup>n</sup>-n sã ñá túú yìi-n —càchí-gá xáha<sup>n</sup>-gá xii-a<sup>n</sup>.

19 Te sá dúcá<sup>n</sup> ñí xáha<sup>n</sup>-gá ñúu ní xáha<sup>n</sup> tucu-a<sup>n</sup>:

—Tátá, yúhú sání iní-í sá yòhó cúu-n ì<sup>n</sup> tée càhá<sup>n</sup> tnúhu Yá Ndiõxí. 20 Te cue ñaní tnáhá-ndíi ní xíndecu ndèé sanaha ñí xóo cada càhnú-yu Yá Ndiõxí tìndúú-a, dico nchòhó ñáyíu isràél càchí-ndó sã ndèé ñúú Jerusàlén cada càhnu-o-gá —càchí-a<sup>n</sup> xáha<sup>n</sup>-a<sup>n</sup> xii-gá.

21 Te ní xáha<sup>n</sup> Jèsús xii-a<sup>n</sup>:

—Ì<sup>n</sup> tnúhu na càhá<sup>n</sup>-í-a, te quíndáá iní-n. Sa ta cùyatni sáá nduu sá ñá díú-gá mee-ni tìndúú-a, te ni ñá díú-gá mee-ni ñúú Jerusàlén cada càhnu-ndo Tátá-ó Dútú Ndiõxí, chi

ndëni ní cuu cada càhnu-ndo-gá.  
 22 Te nchòhó cue ñáyiú Sàmariá chi ñá cùtnùnì iní-ndó nã cúú sã quidé càhnu-ndo, dico nchúhú ñáyiú isràél, chi cùtnunì iní-ndí ná cúú sã quidé càhnu-ndí. Chi ì<sup>n</sup> tée isràél véxi-dé dácácu nihnu-dé ñáyiú cuèndá vá quìhí<sup>n</sup>-yu núú ùhú núú ndàhú. 23 Te není vitna ngüíta-yu cada càhnu ndisá-yu Tátá-ó Dütú Ndiöxí, te cadá-yu ni yùhu ni iní-yu sá cúú-xí-gã, chi mee-gã duca<sup>n</sup> cuìní-gá cadá-yu cada càhnu-yu-gá. 24 Te Yá Ndiöxí chi ì<sup>n</sup> espíritú cúú-gã. Te nchaa ñáyiú na càda cahnu ñaha, te cadá-yu ni yùhu ni iní-yu sá cúú-xí-gã te cadá-yu dàtná càhá<sup>n</sup> tnúhu-gá —càchí-gá xáha<sup>n</sup>-gã xii-a<sup>n</sup>.

25 Te ní xáha<sup>n</sup> ñàdihí-á<sup>n</sup>:

—Xìní-í sá quíxí tée cùu Mesiás, tée càchí-güedé nánì Crìstú. Te tée-ã<sup>n</sup> ná sàá-dé, te cachí tnúhu ndáá-dé nàcuáa cuu —càchí-a<sup>n</sup> xáha<sup>n</sup>-a<sup>n</sup> xì-gá.

26 Te ní xáha<sup>n</sup> Jèsús:

—Diu tée-á<sup>n</sup> cúú yùhú tée ndàtnúhu ndihí-n —càchí-gá xáha<sup>n</sup>-gã xii-a<sup>n</sup>.

27 Te òré-á<sup>n</sup> nã ndexìo cue tée xìca cuu ndihí-gá, te ní cuñúhu-güedé sá ndàtnúhu-gá ndihí ñàdihí-á<sup>n</sup>. Dico ni ì<sup>n</sup>-güedé ñá ní xìcá<sup>n</sup> tnúhú-güedé núú-gã nũu ná cuèndú ndàtnúhu-gá ndihí ñàdihí-á<sup>n</sup>. 28 Duca<sup>n</sup> te ní dándõ ñàdihí-á<sup>n</sup> yoó ndute-a<sup>n</sup> xíá<sup>n</sup>, te ní xica-a<sup>n</sup> cuánuhú-a<sup>n</sup> ñuú cùtnúhu-a<sup>n</sup> ñáyiú cuèndá Jèsús. 29 Te ní xáha<sup>n</sup>-a<sup>n</sup>:

—Chí nèhé ná quìhí<sup>n</sup>-ó, chi quiní-ndó nã cúú ì<sup>n</sup> tée núcóo yuhu dòco-á<sup>n</sup> nũu ñá díú Crìstú Yáá ní tendaha Yá Ndiöxí véxi ñuyíú-a cùu-dé nũu ní càhá<sup>n</sup> ndáá-dé nàcuáa cùu ndecu-í —càchí-a<sup>n</sup> xáha<sup>n</sup>-a<sup>n</sup> xì-yu.

30 Te sá nã níhí ñáyiú ñuú-á<sup>n</sup> tnúhu, xíá<sup>n</sup> ní xicá-yu cuáhá<sup>n</sup>-yu. 31 Te òré vátá sàá-gá-yu xíá<sup>n</sup> nã xáha<sup>n</sup> cuè tée xìca cuu ndihí-gá xii-gá:

—Mèstrú, cudèhñu na cudehñu-o —cachí-güedé xáha<sup>n</sup>-güedé xii-gá.

32 Te ní xáha<sup>n</sup>-gã:

—Ndècu ì<sup>n</sup> sá caxì-í, ì<sup>n</sup> sá ñà túú xìní nchòhó —càchí-gá xáha<sup>n</sup>-gã xii-güedé.

33 Te cue tée xìca cuu ndihí-gá xìtnàha-güedé:

—Váa ío ñáyiú ní quixi nehe sá nã xexi-gá nũu duha càhá<sup>n</sup>-gá —càchí-güedé xìtnàha-güedé.

34 Te ní xáha<sup>n</sup>-gã:

—Dàtná cuìní-ndó cùu vétú iní-ó òré xèxi-ó, duca<sup>n</sup> cùu vétú iní-í quidé-í nchaa nàcuáa ní càhá<sup>n</sup> Yá Ndiöxí Yáá ní tendaha ñaha xii-í véxi-í ñuyíú-a, te chiú<sup>n</sup>-gá ío cùdí<sup>n</sup> iní-í dandihí-í. 35 Te nchòhó càchí-ndó sã cùmání cùmí-gã yóo te cuu itú. Dico yúhú càchí-í sá cùndehe-ndo ñáyiú-ã<sup>n</sup>, chi sa ndècu túha-yu, dàtná cúú-nã itú sá sã ní cuu-ná natahu-o cùu-yu, chi sa ndècu túha-ná-yu cundedóho-yu tnúhu-í.

36 Te dàtná cúú ñáyiú natahu itú chi sa cúhu<sup>n</sup> yáhu-yu, duca<sup>n</sup> sàtnahá-xi cùu ñáyiú na càhá<sup>n</sup> tnúhu-í, chi cuáñaha-í sá ndúú tãhũ-yu na sàá nduu. Te nchaa ñáyiú na tnè<sup>n</sup> tnúhu-í te nduu tãhũ-yu cundecu-í ndihí-yu ni caa ni quíhí<sup>n</sup>. Te dàtná cúú ñáyiú ní chihi tatá-xi, ndihí ñáyiú ní natahu itú-xi cùdí<sup>n</sup>-nã iní-yu. Duca<sup>n</sup> sàtnahá-xi cùu ñáyiú na càhá<sup>n</sup> tnúhu-í. 37 Chi ndáá quée-xí nàcuáa cuáhá<sup>n</sup> ì<sup>n</sup> cuèndú sá càchí-xi: “Tucu tée ní chihi tatá, te tucu tée ní natahu”, duha cuáhá<sup>n</sup> cuèndú-á<sup>n</sup>. 38 Te yúhú tendaha ñaha-í xii-ndo quíhí<sup>n</sup>-ndó càhá<sup>n</sup>-ndó tnúhu-í núú sã ní yáha-güedé ní càhá<sup>n</sup>-güedé tnúhu-í. Te nchòhó quíhí<sup>n</sup>-ndó dícó-nã nduu cuèndá-ndó chiú<sup>n</sup>-á<sup>n</sup> —càchí-gá xáha<sup>n</sup>-gã xii-güedé.

39 Te ío cuéhé ñáyiú ñuú-á<sup>n</sup> nã xíndedóho-yu cuèndú ní caní ñàdihí-á<sup>n</sup> nũu-yu sá Jèsús ní xáha<sup>n</sup>-gã nchaa nàcuáa quide-a<sup>n</sup>, te xíá<sup>n</sup> ío vái-yu ní sándáá iní-yu Jèsús. 40 Te ní quexìo-yu núú ndécú-gã, te ní càhá<sup>n</sup> ndàhú-yu núú-gã sá quèndõ-gã ñuú-yu, núu xíá<sup>n</sup> ní xíndecu-gá ndihí-yu úú nduu. 41 Te ío cuéhé-gã-yu ní sándáá iní-yu tnúhu ní càhá<sup>n</sup> mée-gã. 42 Te ní xáha<sup>n</sup>-yu xii ñàdihí-á<sup>n</sup>:

—Vitna te ñá díú mèe-ni tnúhu ní càhá<sup>n</sup>-n ní sándáá iní-ndí-gá, chi ní càhá<sup>n</sup> mée-gã ní xíndedóho-ndí vitna

núu ní sándáá ndisa iní-ndí sá díú-gă cúu-gă Crístú Yaá ní tendaha Yă Ndiôxí véxi ñuyíú-a dàcácu nihnu-gă ñáyiú núu ùhú núu ndàhú —càchí-yu xăhă<sup>n</sup>-yu xii-a<sup>n</sup>.

*Jèsús quidé tătna-gă déhe ì<sup>n</sup> té ndèé chíú<sup>n</sup> núú gobièrnú*

43 Te nduu úní ní nucúhu<sup>n</sup> Jèsús ichi cuáhá<sup>n</sup>-gă distritú Galileá. 44 Te cuáhá<sup>n</sup>-gă yàcá<sup>n</sup>, chi mee-gă ní cachí-gă sá núu ì<sup>n</sup> té na càhá<sup>n</sup>-dé tnúhu Yă Ndiôxí ñuú núu ní cacu-dé, te ñá túú nèhé-yu sá yíñùhu núu-dé. 45 Te òré ní sáá-gă distritú Galileá, te ío váha ní cuu iní ñáhă-yu xii-gă, chi cuèndá tnàhá-yu ní xíndecu ndíhi-gă vico pàscuá ñuú Jerusàlén. Te yàcá<sup>n</sup> ní xiní-yu nchaa sá ñí quide-gă.

46 Te ní sáhá<sup>n</sup> tucu-gă ñuú Cànaá ì<sup>n</sup> ñuú yíndèhu distritú Galileá, núu ñí nadatiu-gă ndute ní nduu-xi vinú. Te ñuú Capèrnaúm ndécú ì<sup>n</sup> té ndèé chíú<sup>n</sup> núú tée cùu gobièrnú, te tée-á<sup>n</sup> cùhú ì<sup>n</sup> déhe-dé. 47 Te ní níhí-dé tnúhu sá ñí ndee Jèsús distritú Jùdeá ní ndexìo-gă distritú Galileá, núu ní sáhá<sup>n</sup>-dé núu ndécú-gă, te ní càhá<sup>n</sup> ndàhú-dé núu-gă sá quíhí<sup>n</sup>-gă cada tátna-gă déhe-dé, chi sa ndècu-na-dé sá cùu-dé. 48 Te ní xáha<sup>n</sup> Jèsús xii-dé:

—Nchòhó, chi vá quíndáá iní ñáhá-ndó xì-í te núu vá càdà-í ì<sup>n</sup> sá vă yôo tnàhí ndàcu cada quíní-ndó —càchí-gă xáha<sup>n</sup>-gă xii-dé.

49 Te ní xáha<sup>n</sup> tucu tée cùhú déhe-xi-á<sup>n</sup> xii-gă:

—Tătá, cundee iní-n ná quíhí<sup>n</sup>-ni-o càda tátna-n dèhe-í ná cuu-dé, chi càhú víhí tnàhá-dé —càchí-dé xáha<sup>n</sup>-dè xii-gă.

50 Te ní xáha<sup>n</sup> Jèsús:

—Cuanùhú te quíní-n nă ní ndúha déhe-n —càchí-gă xáha<sup>n</sup>-gă xii-dé.

Te ní sándáá iní-dé tnúhu ní càhá<sup>n</sup> Jèsús, te cuánuhú-dé. 51 Te ñùhu-dé ichi cuánuhú-dé ní sánú tnàhá ñáhá cuè tée xínu cuechi núu-dé. Te ní xáha<sup>n</sup>-güedé sá sà ta ndúha déhe-dé cuáhá<sup>n</sup>.

52 Te ní xícá<sup>n</sup> tnúhú-dé núu-güedé ná òré cúu-xí ñí ngúita-xi ta quétaú cuéhé-dé. Te ní xáha<sup>n</sup>-güedé:

—Icu dàtná òré caá ì<sup>n</sup> sacuaa ní nchíco-dé cahni —càchí-güedé xáha<sup>n</sup>-güedé xii-dé.

53 Te tătá tée cùhú-á<sup>n</sup> ñí ndacu iní-dé sá díú òré ní quétaú cuéhé-dé ní càhá<sup>n</sup> ndíhi-dé Jèsús ní xáha<sup>n</sup>-gă sá ndúha déhe-dé. Te xíá<sup>n</sup> núu ndi nchàa tée-á<sup>n</sup> vehe-dé ní sándáá iní-yu Jèsús.

54 Te sá ñí quide-gă-á<sup>n</sup> cúu ùú xito quide-gă sá vă yôo tnàhí ndàcu cada. Te sá ñí quide-gă xito cùu uú-á<sup>n</sup> cúu-xí sá ñí quide-gă cùtnàhá ní ndee-gă distritú Jùdeá cuánuhú-gă distritú Galileá.

## 5

*Jèsús quidé tătna-gă ì<sup>n</sup> té cùhú ì<sup>n</sup> xichi núú nání Bètesdá*

1 Te sáta dúcá<sup>n</sup> ñí cuu, te ní tnahá nduu ñí quide ñáyiú isràél ì<sup>n</sup> vico. Te ní sáhá<sup>n</sup> Jèsús ñuú Jerusàlén. 2 Te ní càa xico yuhu ñuú-á<sup>n</sup> ñúhú dòco, te titní yèhe-xi ndecu. Te ì<sup>n</sup> yèhe-xi-á<sup>n</sup> nání Yùyehe Mbéé, te yatni xíá<sup>n</sup> cáá ì<sup>n</sup> tanquí ndute dàna-ni-yu Bètesdá tnúhu mèé-yu tnúhu hèbreú, te yuhu tànquí-á<sup>n</sup> cáá ùhú<sup>n</sup> corrèdór. 3 Te xití corrèdór-á<sup>n</sup> xíndecu cuéhé ñáyiú cùhú, ñáyiú cuàá, ñáyiú yacua, ñáyiú ñá cúu-gă candá nihnu, ndètú-yu candá ndute-á<sup>n</sup>. 4 Chi níhí-yu tnúhu sá àma nihnu cùu<sup>n</sup> ì<sup>n</sup> espíritú xínú cuèchi núu Yă Ndiôxí, te dàcandá-xi ndute ñùhu tanquí-á<sup>n</sup>. Te ñáyiú díhna nuu nà quée xití ndute-á<sup>n</sup>, te òré-ni ndúha-yu. 5 Te yàcá<sup>n</sup> ñútnàhá ì<sup>n</sup> té ní cuu ócò sáhú<sup>n</sup> úní cuíá sá cùhú-dé. 6 Te ní xiní Jèsús cáá-dé, te ní cutnùní iní-gă sá ñí cuu cuéhé cuíá cùhú-dé, te ní xáha<sup>n</sup>-gă:

—¿Cuíní-n ndúha-n-ă<sup>n</sup>? —càchí-gă xáha<sup>n</sup>-gă xii-dé.

7 Te ní xáha<sup>n</sup> tée cùhú-á<sup>n</sup>:

—Tătá, vă yôo níhí-í dàquée ñaha xì-í xití tànquí-a òré càndá ndute, chi òré cuíní-í quée-í, te ingá-ni tucu-yu quènduú-yu núu-í cuángueé-yu —càchí-dé xáha<sup>n</sup>-dè xii-gă.

8 Te ní xáha<sup>n</sup> Jèsús:

—Ndacuíñí, te ndaca-ni-n yùu-n, te caca-n —càchí-gá xáha<sup>n</sup>-gã xii-dé.

<sup>9</sup> Te òré-ni-á<sup>n</sup> nǐ ndúha téé cùhú-á<sup>n</sup>, te ní ndaca-ni-dé yuu-dé, te ní xica-dé cuáhá<sup>n</sup>-dé. Te nduu-á<sup>n</sup> cúú-xí ndùu ndetatú ñáyiú, <sup>10</sup> núu ní xáha<sup>n</sup> cué téé isràél xii téé ní cuhu-á<sup>n</sup>:

—Vitna cùu-xi nduu ndetatú-ó núu vá cúú cuído-n yuu-n —cachí-güedé xáha<sup>n</sup>-güedé xii-dé.

<sup>11</sup> Te ní xáha<sup>n</sup>-dè:

—Mee téé ní quide tátna ñaha xii-í ní cachí-dé sá ndàcàni-í yuu-í, te caca-í —càchí-dé xáha<sup>n</sup>-dè xii-güedé.

<sup>12</sup> Te ní xáha<sup>n</sup>-güedè:

—¿Te ná cúú téé duca<sup>n</sup> nǐ cachí sá ndàcàni-n yuu-n te caca-n-í? —càchí-güedé xáha<sup>n</sup>-güedé xii-dé.

<sup>13</sup> Dico téé ní cuhú-á<sup>n</sup> ñà túú ní cùtnuní iní-dé ná cúú téé ní quide tátna ñaha xii-dé, chi Jèsús òré-ni ní xica-gá cuáhá<sup>n</sup>-gá tnuú nchaa ñáyiú chitu xñdecu xiá<sup>n</sup>. <sup>14</sup> Te sátá dúcá<sup>n</sup> te ní naníhí tnáhá Jèsús ndihí téé ní quide tátna-gá-á<sup>n</sup> xití veñúhu càhnu sá ïo cùnuu, te ní xáha<sup>n</sup>-gã xii-dé:

—Ní xiní-n ñà ní ndúha-n-va. Te vitna vá cáda-gã-n nãndí sá cuéhé sá dúhá, chi núu na càda-ni-n ña, te quixi ingá cuéhé, te vñhi-gá ndoho-n —càchí-gá xáha<sup>n</sup>-gã xii-dé.

<sup>15</sup> Duca<sup>n</sup> te ní xica téé ní cuhú-á<sup>n</sup> cuãngúñaha-dé xii cue téé isràél sá Jèsús ní quide tátna ñaha-gã xii-dé.

<sup>16</sup> Núu sátá nǐ níhí cue téé isràél tnúhu, te ní cuu úhú iní-güedé Jèsús. Te ní cuiní-güedé cahni ñaha-güedé xii-gá cuendá sá dúcá<sup>n</sup> nǐ quide tátna-gá nduu ndetatú-güedé. <sup>17</sup> Te ní xáha<sup>n</sup> Jèsús xii-güedé:

—Tàtá-í Dútú Ndiöxí quidé chiú<sup>n</sup>-ni-gá núu xiá<sup>n</sup> quidé chiú<sup>n</sup>-í tnáhá-í —càchí-gá xáha<sup>n</sup>-gã xii-güedé.

<sup>18</sup> Te ní cudéé<sup>n</sup>-güedé sá ñã ní cãnehe íi-gã nduu ndetatú-güedé, te ní cuiní-güedé cahni ñaha-güedé, te uu<sup>n</sup>-gá ní cuiní-güedé cahni ñaha-güedé xii-gá sá ní cachí-gá sá Tátá-gã cúú Dútú Ndiöxí, chi ní sani iní-güedé sá cuiní-gá nútahá-gá Yá Ndiöxí núu xiá<sup>n</sup> ío ní cudéé<sup>n</sup>-güedé.

*Jèsús Déhe Yá Ndiöxí táxi tnùní-gá*

<sup>19</sup> Te ní xáha<sup>n</sup> tùcu Jèsús xii-güedé:

—Na càchí tnúhu ndáá-í xii-ndo sã yùhú chi ni ñ<sup>n</sup> sá ñã ndàcù-í cada mee-í núu ñá túú mèe Tàtá-í dánèhé ñáhá-gã xii-í nàcuáa cada-í, chi nchaa sá quidé Tàtá-í quidé-í tnáhá-í. <sup>20</sup> Te Tàtá-í ío cùu iní ñáhá-gã xii-í núu dànèhé ñáhá-gã nchaa nàcuáa quide-gá. Te vitna ndècu vai-gá chiú<sup>n</sup> tahu-gá cada-í, chiú<sup>n</sup> sá vátá quíní-gá-ndó càda-í nàcuáa cuñúhu vñhi-ndo. <sup>21</sup> Chi Tàtá-í dandòto-gá ñáyiú ní xíhí. Te yùhú cada-í te nduu táhú nchaa ñáyiú càchí iní-í cundecu ndihí ñáhá-yu xii-í ni caa ni quíhí<sup>n</sup>. <sup>22</sup> Te na sàá nduu te ñá díú Tàtá-í cada ndáá-gá cuéchi ñáyiú, chi ní cachí-gá sá yùhú cada ndáá-í <sup>23</sup> cuendá nchaa ñáyiú canehé-yu sá yíñùhu núu-í dàtná nehé-yu sá yíñùhu núu Tàtá-í Yaá ní tendaha ñaha xii-í véxi-í ñuyíú-a. Te nchaa ñáyiú ñá túú nèhe sá yíñùhu núu yùhú, te ni núu Tàtá-í ñá túú nèhé-yu sá yíñùhu.

<sup>24</sup> Te na càchí tnúhu ndáá-í xii-ndo sã nchaa ñáyiú na cùndedóho tnúhu na càhá<sup>n</sup>-í, te núu na quíndáá iní-yu Dútú Ndiöxí Yaá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu táhú-yu cundecú-yu ndihí-gá ni caa ni quíhí<sup>n</sup>. <sup>25</sup> Te vitna na càchí tnúhu ndáá-í xii-ndo sã nchaa ñáyiú ndècu ichi cuehé ichi duha cùu-yu dàtná ñ<sup>n</sup> ñáyiú ní xíhí, te vitna ní sàá nduu cùndedóho-yu tnúhu càhá<sup>n</sup> yùhú Déhe Dútú Ndiöxí, te nchaa ñáyiú na quíndáá iní-xi, te naníhí tàhú-yu.

<sup>26</sup> Te dàtná quidé mèe Tàtá-í dácácu nihnu-gá ñáyiú, duca<sup>n</sup> nǐ cachí-gá cada-í dácácu nihnu-í-yu. <sup>27</sup> Te ní cachí tucu-gá sá sàá ñ<sup>n</sup> nduu, te cada ndáá-í cuéchi nchaa ñáyiú ñá túú quide ndáá, chi yùhú táxi tnùní-í, te cùu-í ñaní tnáhá-ndó nchaa-ndo. <sup>28</sup> Te ni vã cùñùhu-ndo tnúhu càhá<sup>n</sup>-í, chi sàá nduu te nchaa ñáyiú ní xíhí tecú dóho-yu tnúhu càhá<sup>n</sup>-í. <sup>29</sup> Te ndoto nchaa ñáyiú ní quide váha cundecu ndihí-í-yu ni caa ni quíhí<sup>n</sup>, te ndoto tnáhá nchaa ñáyiú ní quide cuéhé ní quide duha, te ñáyiú-á<sup>n</sup> quíhí<sup>n</sup>-yu núu



ùhú núú ndàhú.

*Yá Ndiöxí chindèe tnúhu-gá Jèsús*

<sup>30</sup> Te yúhú, chi ni ñá sá ñã ndácù-í cada mee-í nũu ñá díú mèe Yá Ndiöxí táúchiú<sup>n</sup>-gá nàcuáa cada-í. Te quide ndáá-í cuéchi ñáyiú nàcuáa tàxi tnuní-gá cada-í, te yúhú ñá túú quide-í sá cúú ñí mèe-í chi Tătà-í ní táúchiú<sup>n</sup>-gá nàcuáa cada-í. <sup>31</sup> Te núu na càhá<sup>n</sup>-í sá mèe-í táxi tnùn-í, te vá quindáá iní-ndó. <sup>32</sup> Chi Yá Ndiöxí chindèe tnúhu ñaha-gá xii-í, te yúhú xini-í sá tnúhu càhá<sup>n</sup>-gá cuendá-í cúú-xí ñá sá ndàá. <sup>33</sup> Te nchòhó ní téchiú<sup>n</sup>-ndó cué tée ní sáhá<sup>n</sup> ní ndúcú tnúhu-güedé núú tẽ Juáá nũu ná tnúhu càhá<sup>n</sup>-dé cuendá-í, te tée-ã<sup>n</sup> ní càhá<sup>n</sup> ndáá-dé nàcuáa ndũu cuendá-í. <sup>34</sup> Dico yúhú, chi ñá túú xini ñuhu-í ñáyiú ñuyíú-a chindee tnúhu ñàhá-yu xii-í, dico té Juáá ní càhá<sup>n</sup> váha-dé cuendá-í, te xiã<sup>n</sup> càhí tnúhu tucu-í cuendá quindáá iní-ndó, te naníhí tãhú-ndó. <sup>35</sup> Te dàtná cuiní-ndó cùu ñá iti ndéñuhú te dáyehé-xi, duca<sup>n</sup> sãtnahá-xi ní cuu té Juáá, chi sacú-ni nduu ío ní cudí iní-ndó tnúhu ní càhá<sup>n</sup>-dé. <sup>36</sup> Te váha-ni ní càhá<sup>n</sup> té Juáá, dico yúhú chi ndècu nchaa sá tá quide-í véxi nàcuáa ní táúchiú<sup>n</sup> Yá Ndiöxí cada-í, te nchaa xiã<sup>n</sup> cúú-xí ñá sá cútnùn-í iní-ndó sã mèe Yá Ndiöxí ní tendaha ñàhá-gá xii-í véxi-í ñuyíú-a. <sup>37</sup> Te diu-ni-gá chindèe tnúhu ñaha-gá xii-í, dicó-ni sá mèe-ndó ñá túú cuiní-ndó càda cuendá-ndó tnúhu càhá<sup>n</sup>-gá, te ni ñá túú xini-ndó nàcuáa càa-gá. <sup>38</sup> Te ñá túú quèe iní nchòhó tnúhu càhá<sup>n</sup>-gá, chi ñá túú sãndáá iní ñàhá-ndó xii yúhú Déhe-gá. <sup>39</sup> Te dàcuaha vihi-ndo tutú ndéé tnúhu-gá, chi sãni iní-ndó sã xiã<sup>n</sup>-ni dacuàha-ndo te naníhí tãhú-ndó. Te váha-ni quide-ndo, chi diu tutú-ã<sup>n</sup> càhá<sup>n</sup>-xi cuendá-í. <sup>40</sup> Te nchòhó ñá túú cuiní-ndó quindáá iní ñàhá-ndó xii-í cuendá naníhí tãhú-ndó.

<sup>41</sup> Te yúhú, ñá túú xini ñuhu-í sá cáda càhnu ñaha-ndo xii-í. <sup>42</sup> Dico sa xini-í nàcuáa sãni iní-ndó chi ñá túú cùu iní-ndó Yá Ndiöxí. <sup>43</sup> Te yúhú véxi-í ñuyíú-a chi Tătà-í ní tendaha ñàhá-gá, te nchòhó ñá túú

cuiní-ndó tnii-ndo tnúhu càhá<sup>n</sup>-í, dico núu quixi ñá tée càhá<sup>n</sup> cuendá mèe-xí, chi quindáá iní-ndó. <sup>44</sup> Te ná váha nchòhó ná tnii-ndó tnúhu càhá<sup>n</sup>-í, te xio xio-ni quide cahnu tnaha-ndo, te ñá túú quide cuendá-ndó sã tnúhu váha càhá<sup>n</sup> Yá Ndiöxí cuu xii-ndo. <sup>45</sup> Te vá cání iní-ndó sã yúhú ndácá<sup>n</sup> cuéchi-í núú Tătà-í nàcuáa quide-ndo, chi ndii Moisés ní chídó tnùn-í ndii núú tutú Yá Ndiöxí nàcuáa quide-ndo sã ñá túú quide váha-ndo, te mee-ndo sãni iní-ndó sã naníhí tãhú-ndó cuendá tnúhu ní càhá<sup>n</sup> ndii. <sup>46</sup> Chi núu nchòhó sãndáá ndisa iní-ndó tnúhu ní càhá<sup>n</sup> ndii Moisés ñá, te duca<sup>n</sup> te quindáá iní-ndó yúhú ní cùu, chi ndii-ã<sup>n</sup> ní chídó tnùn-í ndii nàcuáa cada-í ñuyíú-a vitna. <sup>47</sup> Te núu ñá túú sãndáá iní-ndó tnúhu ní chídó tnùn-í ndii, te diu-ni duca<sup>n</sup> càda ñaha-ndo xii-í vá quindáá iní-ndó tnúhu càhá<sup>n</sup>-í — càhí-gá xáha<sup>n</sup>-gá xii-güedé.

## 6

*Jèsús dácaxi-gá úhú<sup>n</sup> mĩ ñáyiú*

(Mt. 14:13-21; Mr. 6:30-44; Lc. 9:10-17)

<sup>1</sup> Te sátá dúcá<sup>n</sup> ñá cuu, te ní quee Jèsús cuáhá<sup>n</sup>-gá ingá xio yuhu làgúná Galileá, àdi Tiberiás chi úú diu-xi. <sup>2</sup> Te ío cuéhé ñáyiú nchìcú<sup>n</sup> ñàhá xii-gá cuáhá<sup>n</sup> cuendá sá ñá xini-yu nchaa sá vã yõ tnahí ndàcu cada ní quide-gá, chi ní quide tátna-gá nchaa ñáyiú cùhú. <sup>3</sup> Te ní sáá Jèsús ndihí cue tée xica cuu ndihí-gá ñá núú tìndúú, te xiã<sup>n</sup> ñá ngóo-gá ndihí-güedé. <sup>4</sup> Te ta cùyatni coo víco pascuá, víco quide ñáyiú isràél. <sup>5</sup> Te ní xini-gá sá ío vãi ñáyiú nchìcú<sup>n</sup> ñàhá xii-gá cuáhá<sup>n</sup>, te ní xáha<sup>n</sup>-gá xii té Lìpé:

—¿Ndèé quíhí<sup>n</sup>-ó quinguaa<sup>n</sup>-o sã cáxi nchaa ñáyiú-a? —càhí-gá xáha<sup>n</sup>-gá xii-dé.

<sup>6</sup> Te duca<sup>n</sup> ñá xáha<sup>n</sup>-gá xii-dé cuendá sá cuiní-gá quini-gá nása cunduu tnúhu càhá<sup>n</sup>-dé, dico mee-gá sa xini-gá nàcuáa cada-gá. <sup>7</sup> Te ní xáha<sup>n</sup> tẽ Lìpé xii-gá:

—Te cuéi úú ciendú díhú<sup>n</sup> denariú ná dãndoñuhu-o cuaa<sup>n</sup>-o paá, te ni vã

tnàhá caxí-yu luha luha —càchí-dé xáha<sup>n</sup>-dë xii-gá.

<sup>8</sup> Te té Ndríxí ingá téé xica cuu ndihí-gá, ñaní té Xímú, àdi Pelú chi úú diu-dé, ní xáha<sup>n</sup>-dë:

<sup>9</sup>—Iha ndècu ñ<sup>n</sup> té líhli nèhe-dé úhú<sup>n</sup> pàá cebàdá te úú chácá, dico ndéé tnahá xéhé, te cuéhé víhí ñáyiú —càchí-dé xáha<sup>n</sup>-dë xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cūñaha nà ngóo-yu nchaá-yu —càchí-gá xáha<sup>n</sup>-gã.

Te ñáyiú-á<sup>n</sup> ñí ngóo-yu, te càa vihi ité núú ñí ngóo-yu-á<sup>n</sup>, te xínu dàtná úhú<sup>n</sup> mīl mee-ni cuè téé, te dī<sup>n</sup> ñáyiú dīhí ndihí landú. <sup>11</sup> Te ní quehe<sup>n</sup> Jèsús pàá, te ní ndacá<sup>n</sup> táhú-gã núú Yá Ndiöxí, te ní sáñaha-gã pàá-á<sup>n</sup> xii cue téé xica cuu ndihí-gá, te cue téé-á<sup>n</sup> ñí dácãhñu-güedé ní xexi nchaa ñáyiú xixúcu-á<sup>n</sup>. Te diu-ni duca<sup>n</sup> ñí quide-gá chácá, te ní dácãhñu tucu-güedé-di ní xexi ñáyiú ní ndahá xití-yu. <sup>12</sup> Te òré ní túhú cóhō-yu, te ní xáha<sup>n</sup> Jèsús xii cue téé xica cuu ndihí-gá sá ná nàquehe<sup>n</sup>-güedé nchaa sá ñí quendóo cuendá sá vã quíhí<sup>n</sup>-xi núú míhí.

<sup>13</sup> Te cue téé-á<sup>n</sup> ní naquehe<sup>n</sup>-güedé nchaa sá ñí quendóo, te ní chítú ùxúú tídihi núú ùhú<sup>n</sup>-ni pàá cebàdá. <sup>14</sup> Te sá ñí xiní-yu ní nadacàyá-gá sá ñí xexí-yu, xiã<sup>n</sup> ní nguíta-yu ní xitnàhá-yu:

—Ndáá sá tēe-a sa ió cuendú sá quíxí-dë ñuyúú-a cáhá<sup>n</sup>-dé tnúhu Yá Ndiöxí —càchí-yu xitnàhá-yu.

<sup>15</sup> Te ní cutnùní iní Jèsús sá cádá yicá-yu candeca ñàhá-yu xii-gá quíhí<sup>n</sup> cuendá cundecu-gá quindaha ñàha-gá xií-yu ni cùu, núú xiã<sup>n</sup> ní xica tucu-gá cuáhá<sup>n</sup>-gá xití yucu mee dii chícuú-gá.

*Jèsús xicá-gã núú ndute*

*(Mt. 14:22-27; Mr. 6:45-52)*

<sup>16</sup> Te òré ní cuu ndiquí<sup>n</sup>, te cuáhá<sup>n</sup> cue téé xica cuu ndihí-gá yuhu làgúná. <sup>17</sup> Te ní quée-güedé bàrcú cuáhá<sup>n</sup>-güedé ñúú Capèrnaúm cáá ndàa ingá xio yuhu làgúná, te sa ní cuu ndiquí<sup>n</sup>, te ñá túú Jèsús quéxio

quée-gá bàrcú ñúhú-güedé-á<sup>n</sup>. <sup>18</sup> Te ní nguíta-xi quène táchí ñíhi, te níhi dàcandau ndéé tnahá ndùte làgúná-á<sup>n</sup>.

<sup>19</sup> Te sa ní cuu dàtná úhú<sup>n</sup> kilómetrú cuáhá<sup>n</sup>-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núú nduté, te ní yùhú-güedé. <sup>20</sup> Te ní xáha<sup>n</sup> Jèsús xii-güedé:

—Yúhú véxi-í, vá yùhú-ndó —càchí-gá xáha<sup>n</sup>-gã xii-güedé.

<sup>21</sup> Te ío ní cudí<sup>n</sup> ìní-güedé sá ñí quexio-gá cuánguee-gá bàrcú, te òré-ni ní quexio-güedé ndihí-gá ndéé ingá xio yuhu làgúná núú cuáhá<sup>n</sup>-güedé.

*Ñáyiú nànducu ñaha xii Jèsús*

<sup>22</sup> Te ingá nduu-á<sup>n</sup> xñdecu-ni nchaa ñáyiú ní quendóo yuhu làgúná. Te ní quide cuendá-yu sá ñí dii-ná bàrcú nùtní-á<sup>n</sup> ní cùu ñá túú-gã, chi cue téé xica cuu ndihí Jèsús ní quée-güedé bàrcú-á<sup>n</sup> cuáhá<sup>n</sup>-güedé. Te ní níhí-yu tnúhu sá ñà túú ní quée tnahá Jèsús.

<sup>23</sup> Te diu-ni nduu-á<sup>n</sup> ñí quee ñ<sup>n</sup> úú bàrcú ñúú Tiberiás ní sáá-xi yatni núú ñí xexí-yu pàá sá ñí ndacá<sup>n</sup> táhú Jèsús núú Yá Ndiöxí. <sup>24</sup> Te ní xiní-yu sá ñà túú Jèsús ndihí cue téé xica cuu ndihí-gá, núú ní quée-yu bàrcú-á<sup>n</sup> cuáhá<sup>n</sup>-yu ñúú Capèrnaúm cuánúndúcú ñàhá-yu xii-gá.

*Jèsús cúú-gã dàtná ñ<sup>n</sup> sá nchító-ó*

<sup>25</sup> Te ní sáá-yu ingá xio yuhu làgúná, xiã<sup>n</sup> ñí naníhí-yu Jèsús, te ní xáha<sup>n</sup>-yu xii-gá:

—Mèstrú, ¿ná òré ní sáá-n iha? —cachí-yu xáha<sup>n</sup>-yu xii-gá.

<sup>26</sup> Te ní xáha<sup>n</sup> Jèsús:

—Na càchí tnúhu ndáá-í sá nchòhó nánducu ñaha-ndo xii-í cuendá-ni sá ñí xexi-ndo ñí ndahá xití-ndó, dico ñá díú cuendá sá ñí quide-í sá vã yóo tnahí ndàcu cada nanducu ñaha-ndo.

<sup>27</sup> Te vá cádá cuendá-ndó sã méé-ní sã cáxí-ndó cáda chiu<sup>n</sup>-ndo chi xiã<sup>n</sup> vá cúdii-xi. Chi ío-gá xiní ñúhu-xi cada cuendá-ndó tnúhu Yá Ndiöxí te tñ<sup>n</sup>-ndo, te naníhí táhú-ndó. Te tnúhu-á<sup>n</sup> cachí tnúhu yúhú Téé cùu ñaní tnahá-ndó nchaa-ndo, te xiã<sup>n</sup> candeca-xi iní-ndó ñí caa ñí quíhí<sup>n</sup>, chi mee Dütú Ndiöxí ní cachí-gá

sá dúcá<sup>n</sup> càda-í —càchí-gá xáha<sup>n</sup>-gã xií-yu.

<sup>28</sup> Te ní xáhã<sup>n</sup>-yu:

—¿Nása cada-ndí cuendá ngúnu ichi-ndí nàcuáa cuení Yã Ndiõxí cunduu-i? —càchí-yu xáhã<sup>n</sup>-yu xii-gá.

<sup>29</sup> Te ní xáha<sup>n</sup> Jèsús xii-yu:

—Yá Ndiõxí cuení-gá sá quindáá iní ñáhá-ndó xii yúhú, téé ní tendaha-gã véxi ñuyíú-a —càchí-gá xáha<sup>n</sup>-gã xií-yu.

<sup>30</sup> Te ní xáha<sup>n</sup> tùcú-yu xii-gá:

—¿Ná cúú sã vã yõo tnàhí ndàcu cada, cada-n cundehe-ndí cuendá quindáá iní ñáhá-ndí xii-n-i? ¿Àdi nágá cúú sã cáda-n cuendá cutnùní iní-ndí sá ndáá càhá<sup>n</sup>-n-í? <sup>31</sup> Chi cue ñaní tnáhá-ó ñí xíndecu ndéé sanaha ñí xexí-yu pàá nání mànáá xití yucu dàtná yódó tnùní núú tùtú Yã Ndiõxí núú càchí-xi: “Yá Ndiõxí ní sáñaha-gã sá ñí xexí-yu, te ní cuu<sup>n</sup> túu-xi andíu”, duha càchí-xi núú tùtú-gá —càchí-yu xáhã<sup>n</sup>-yu xii-gá.

<sup>32</sup> Te ní xáha<sup>n</sup> Jèsús:

—Na càchí tnúhu ndáá-í xii-ndo sã ñà díú ndíi Moisés ní sáñaha ndíi pàá ní cuu<sup>n</sup> andíu ñí xexí-yu, chi mee Tàtá-í ní sáñaha-gã sá ñí xexí-yu. Te sá táxi-gã vitna cùu-xi <sup>33</sup> datná pàá véxi cuu<sup>n</sup> andíu càndeca-xi iní-ndó ñí caa ñí quíhí<sup>n</sup> —càchí-gá xáha<sup>n</sup>-gã xií-yu.

<sup>34</sup> Te ní xáhã<sup>n</sup>-yu xii-gá:

—Tàtá, mee-ni pàá-á<sup>n</sup> taxi-n càxi-ndí —càchí-yu xáhã<sup>n</sup>-yu xii-gá.

<sup>35</sup> Te ní xáha<sup>n</sup> Jèsús:

—Yúhú cúú-í dàtná ñí sá xéxí-ndó càndeca-xi iní-ndó. Te duha ndùu tnúhu càhá<sup>n</sup>-í, chi nchaa ñáyíu na quindáá iní ñáhá xii-í, te vã ndóhó-gã-yu docó te vã ndóhó-gã-yu ndute. <sup>36</sup> Dìcò-ñí sá nchòhó ñá túú sàndáá iní ñáhá-ndó cuéi xini ñáhá-ndó xii-í. <sup>37</sup> Te nchaa ñáyíu na càchí Tàtá-í nduu cuendá-í nasaá-yu núú-í, te ñáyíu-á<sup>n</sup> vã dáquèe tíhù-í-yu.

<sup>38</sup> Te ñá díú yúhú sá véxi cuu<sup>n</sup>-í andíu te quide-í nchaa sá cúú iní mée-í, chi véxi cuu<sup>n</sup>-í sá cáda-í nchaa nàcuáa ní táuchíú<sup>n</sup> mée Tàtá-í Dútú Ndiõxí Yáa ní tendaha ñaha xii-í véxi-í ñuyíú-a.

<sup>39</sup> Te cuení-gá sá ncháá ñáyíu ní cachí-gá nduu cuendá-í vã dáñà-í-yu cuíta niñnú-yu, te na sàá nduu te díu-ni-í dandòto-í-yu. <sup>40</sup> Chi duca<sup>n</sup> ñí cachí Dútú Ndiõxí cunduu sá ncháá ñáyíu na tníi tnúhu càhá<sup>n</sup>-í, te quindáá ndisa iní ñáhã-yu xii yúhú Déhe-gá, te nduu táhũ-yu cundecú-yu ndíhi Yá Ndiõxí ñí caa ñí quíhí<sup>n</sup>, te yúhú dandòto-í-yu na sàá nduu —càchí-gá xáha<sup>n</sup>-gã xií-yu.

<sup>41</sup> Te ñá ní tnàhá iní ñáyíu isràél tnúhu ní càhá<sup>n</sup> Jèsús núu ní ngúíta-yu ní càhá<sup>n</sup> cuèhé-yu cuendá-gá cuendá sá ñí xáha<sup>n</sup>-gã sá mée-gã cúú-gã dàtná sá xéxí-ó véxi cuu<sup>n</sup> andíu. <sup>42</sup> Te ní xitnàhá-yu:

—¿Náa ñá díú tée-a cùu-dé Jèsús déhe té Chèé? Nchoo xini-ó tãtá-dé, te xini-ó ñaná-dé, ñá cachí-tu tée-a sá andíu véxi cuu<sup>n</sup>-dé! —càchí-yu xitnàhá-yu.

<sup>43</sup> Te ní xáha<sup>n</sup> Jèsús xii-yu:

—Vá càhá<sup>n</sup> cuèhé-gá-ndó cuendá-í, chí dáñá. <sup>44</sup> Vá yõo quindáá iní ñáhá xii yúhú núu ñá túú mée Tàtá-í táxi cuendá ñáhá-gã xií-yu. Te díu-gá ní tendaha ñaha-gã xii-í véxi-í, te yúhú dandòto-í-yu na sàá nduu. <sup>45</sup> Te núú tùtú cue téé ní xóo càhá<sup>n</sup> tnúhu Yá Ndiõxí ndéé sanaha càchí-xi: “Yá Ndiõxí danèhé ñáhá-gã xií-yu tnúhu-gá”, duha càchí-xi. Te nchaa ñáyíu na cùndedóho nchaa tnúhu càhá<sup>n</sup> Dútú Ndiõxí, te cutúha-yu nàcuáa càhá<sup>n</sup>-gá, te ñáyíu-á<sup>n</sup> quindáá iní ñáhã-yu xii yúhú.

<sup>46</sup> Te vã yõo xini ñáhá xii Dútú Ndiõxí chi ñíndí-ni yúhú xini-í-gá, chi núú ndécú-gã ní quee-í véxi cuu<sup>n</sup>-í —càchí-gá xáha<sup>n</sup>-gã xií-yu.

<sup>47</sup> Te xáha<sup>n</sup> tùcu-gá:

—Na càchí tnúhu ndáá-í xii-ndo sã nchàa ñáyíu na quindáá iní ñáhá xii-í, te naníhí tãhú-yu. <sup>48</sup> Te yúhú cúú-í dàtná ñí sá xéxí-ndó càndeca-xi iní-ndó, te duca<sup>n</sup> sãtnahá-xi cùu-í chi yúhú cada-í te nduu táhú-ndó cundeçu-ndo ndíhi Yá Ndiõxí ñí caa ñí quíhí<sup>n</sup>. <sup>49</sup> Te cue ñaní tnáhá-ó ñí xíndecu ndéé sanaha ñí xexí-yu pàá nání mànáá xití yucu, dico ní sàá

nduu te dacuítí ní xíhí-yu. <sup>50-51</sup> Te yúhú càhá<sup>n</sup>-í cuendá mée-í, chi véxi cuu<sup>n</sup>-í andiu. Te cùu-í dàtná ì<sup>n</sup> sá nchító-ndó, te nchaa ñáyiú na càxi te candeca-xi iní-yu ni caa ni quíhí<sup>n</sup> te vá cuíta nihnu-gá-yu. Te sá táxi-í xii-ndo xíá<sup>n</sup> cúu-xí yìqui cuñú-í, te cùu-xi cuendá nchaa ñáyiú nihí ñuyú cuendá nduu táhú-yu cundecú-yu ndihí Yá Ndióxi ni caa ni quíhí<sup>n</sup> — càchí-gá xáha<sup>n</sup>-gã xii-yu.

<sup>52</sup> Te ní ngúíta ñáyiú isràél xítnàhá-yu:

—¿Nása cada-tu té-a núu càchí-tu-dé sá yìqui cuñú-dé taxi-dé caxi-o-í? — càchí-yu xítnàhá-yu.

<sup>53</sup> Te ní xáha<sup>n</sup> Jèsús:

—Na càchí tnúhu ndáá-í xii-ndo sá núu na càda iní-ndó sá dàtná sá cáxi-ndó yìqui cuñú yúhú Tée cùu ñaní tnáhá-ndó nchàa-ndo, te cada tucu iní-ndó sá dàtná sá cóhó-ndó níñí-í ñá, te xíá<sup>n</sup> quéé-xí sá quíndáá iní ñáhá-ndó nì yuhu ni iní-ndó te naníhí tàhú-ndó, te núu ñáhá te cuíta nihnu-ndo. <sup>54</sup> Nchaa ñáyiú na càda iní-xi sá dàtná sá cáxi-yu yìqui cuñú-í te cohó-yu níñí-í, ñáyiú-á<sup>n</sup> naníhí tàhú-yu te yúhú dandòto-í-yu na sàá nduu. <sup>55</sup> Chi yìqui cuñú-í ndihí níñí-í cúu-xí mée-í. <sup>56</sup> Te nchaa ñáyiú na càda iní-xi sá dàtná sá cáxi-yu yìqui cuñú-í te cohó-yu níñí-í, te ñáyiú-á<sup>n</sup> ì<sup>n</sup>-nã cuu-í ndihí-yu chi cundecu ndihí-í-yu. <sup>57</sup> Te yúhú nchító-í chi duca<sup>n</sup> nchító Tàtá-í Yáá ní tendaha ñàha xii-í véxi-í ñuyú-a. Te diu-ni duca<sup>n</sup> nchàa ñáyiú na quíndáá iní ñáhá xii-í te cundecu ndihí-í-yu ni caa ni quíhí<sup>n</sup>. <sup>58</sup> Te yúhú cúu-í dàtná ì<sup>n</sup> sá nchító-ndó véxi cuu<sup>n</sup> andiu, dico ñá díú pàá sá nání mànáá ní xèxi cue ñaní tnáhá-ó ní xíndecu ndéé sanaha, chi ní xexí-yu pàá te dacuéi ní xíhí-yu. Te nchaa ñáyiú na quíndáá iní ñáhá xii yúhú Yáá véxi cuu<sup>n</sup> andiu, te cundecu ndihí-í-yu ni caa ni quíhí<sup>n</sup> —càchí-gá xáha<sup>n</sup>-gã xii-yu.

<sup>59</sup> Nchaa tnúhu-a ní càhá<sup>n</sup>-gá xití veñúhu ñáyiú ñuú Capèrnaúm.

*Jèsús càchí tnúhu-gá nàcuáa naníhí tàhú-ó*

<sup>60</sup> Te sá dúcá<sup>n</sup> ní càhá<sup>n</sup>-gá núu vài ñáyiú nchícú<sup>n</sup> ñáhá xii-gá ní xítnàhá-yu:

—Vá tní<sup>n</sup> cuíti-o tnúhu càhá<sup>n</sup>-dé chi ñá díú tnúhu sá cúu vaha iní-ó càhá<sup>n</sup>-dé —càchí-yu xítnàhá-yu.

<sup>61</sup> Te ní cutnùní iní Jèsús sá ñà túu càhá<sup>n</sup> váha-yu cuendá tnúhu ní càhá<sup>n</sup>-gá, núu ní xáha<sup>n</sup>-gã xii-yu:

—¿Náa ñá tnàhá iní-ndó nàcuáa càhá<sup>n</sup>-í-a? <sup>62</sup> Te uu<sup>n</sup>-gá cada nchòhó núu quiní-ndó yúhú Tée cùu ñaní tnáhá-ndó nchàa-ndo ndaa-í núu ní xíndecu-í díhna. <sup>63</sup> Te espíritú ndécú ndihí yìqui cuñú-ó, xíá<sup>n</sup> ndécá ñàha-xi xii-o, te núu ñá túu xíá<sup>n</sup>, te yìqui cuñú-ó ñà túu nàndíhi-xi. Dico núu nchaa tnúhu càhá<sup>n</sup>-í-a quéé-xi iní-ndó ñá, te quiní-ndó nã xéhé candeca ñàha-xi xii-ndo núu cuahá<sup>n</sup> núu véxi. <sup>64</sup> Te dava nchòhó chi ñà túu sàndáá iní-ndó —càchí-gá xáha<sup>n</sup>-gã xii-yu.

Te duca<sup>n</sup> ní xáha<sup>n</sup>-gã chi sa naha-gá nándi cùu ñáyiú vá quíndáá iní ñáhá xii-gá. Te duca<sup>n</sup> sà naha-gá ndédacàa téé cuáha cuendá ñáhá xii-gá núu cue téé cùu úhú iní ñáhá. <sup>65</sup> Te ní xáha<sup>n</sup> tucu Jèsús xii-yu:

—Te duha càhá<sup>n</sup>-í chi sa ní cachí tnúhu-í xii-ndo sá vã yòo ì<sup>n</sup> cuíni tní<sup>n</sup> tnúhu-í te núu ñá túu Tàtá-í Dútú Ndióxi sánú ìchi ñàha-gá xii-yu — càchí-gá xáha<sup>n</sup>-gã xii-yu.

<sup>66</sup> Te òré-á<sup>n</sup> ìo vài ñáyiú nchícú<sup>n</sup> ñáhá xii-gá ní xócòo-yu ñá ní xica cuu-gá-yu ndihí-gá. <sup>67</sup> Te xíá<sup>n</sup> ní xáha<sup>n</sup> Jèsús xii ndi úxúú cue téé xica cuu ndihí-gá:

—¿Cuíni-ndó dándóo ñàha-ndo tnàhá-ndó-á<sup>n</sup>? —càchí-gá xáha<sup>n</sup>-gã xii-güedé.

<sup>68</sup> Te ní xáha<sup>n</sup> tẽ Xímú, àdi Pelú chi úú diu-dé:

—Mèstrú, ñá túu-gã ndéé quíhí<sup>n</sup>-ndí, chi nchúhú náhá-ndí sá tnúhu mee-n cùu-xi sá vaha candeca-xi iní-ndí ni caa ni quíhí<sup>n</sup>. <sup>69</sup> Chi nchúhú sa ní sàndáá iní ñáhá-ndí xii-n chi nàha-ndí sá yòhó cúu-n Crístú Déhe Dútú Ndióxi yáá ndécú àndiu —cachí-dé xáha<sup>n</sup>-dè xii-gá.



70 Te ní xáha<sup>n</sup> Jèsús:

—Nàha-ndo sá yǔhú ní cáhá<sup>n</sup> ñáhà-í xii ndí ùxúú-ndó xica cuu ndihí ñaha-í xii-ndo, dico #<sup>n</sup>-ndo quǐhu ñaha yùcu ñávàha xii-ndo —càchí-gá xáha<sup>n</sup>-gá xii-güedé.

71 Duha ní cáhá<sup>n</sup> Jèsús cuendá té Jùdás déhe té Xímú Iscàrioté #<sup>n</sup> téé ñùtnahá núú ùxí #<sup>n</sup> cue téé xica cuu ndihí-gá, chí sa nàha-gá sá téé-á<sup>n</sup> cuàha cuendá ñáhá-dě xii-gá #<sup>n</sup> nduu núú cuè téé cùu úhú iní ñáhá.

## 7

*Cue ñaní Jèsús ñá túú sàndáá iní-güedé nàcuáa ndùu tnúhu càhá<sup>n</sup>-gá*

1 Te sátá dúcá<sup>n</sup> ñí cuu, te ní xica cuu Jèsús distritú Galileá, te ñá ní sáhá<sup>n</sup>-gá distritú Jùdeá, chí yàcá<sup>n</sup> cuení cue téé isràél cahni ñaha-güedě xii-gá ní cùu.

2 Te ní cuyatni nduu càdá-yu vico, vico sá dánàní-yu Vico Vehe Tnuvixi<sup>n</sup>.

3 Te ní xáha<sup>n</sup> cuè ñaní Jèsús xii-gá:

—Váha-gá quíhí<sup>n</sup>-n distritú Jùdeá te vá cùndècu-n iha, chí yàcá<sup>n</sup> cada-n nchaa sá quidé-n iha cuendá quini nchaa ñáyiu cùndihí ñaha xii-n ndecu yacá<sup>n</sup>. 4 Chí núu cuení-ó quini nchaa ñáyiu ná chiú<sup>n</sup> cada-o te vá cáda dáyuhu-o. Te yòhó cuéhé núú sá quidé-n, te cada-n na quini nchaa ñáyiu —càchí-güedé xáha<sup>n</sup>-güedě xii-gá.

5 Duca<sup>n</sup> ñí cáhá<sup>n</sup> cue ñaní-gá, chí ni mée-güedé ñá túú sàndáá iní-güedé nàcuáa ndùu tnúhu càhá<sup>n</sup>-gá. 6 Te ní xáha<sup>n</sup> Jèsús xii-güedé:

—Vátá tnàhá-gá òré quíhí<sup>n</sup>-í dico nchòhó ndédani càa oré cuu quíhí<sup>n</sup>-ndó. 7 Chí nchaa ñáyiu ñuhu ichi cuehé ichi duha chí ñá túú cùu úhú iní ñáhá-yu xii nchòhó. Dico yúhú chí cùu úhú iní ñáhá-yu xii-í cuendá sá càhá<sup>n</sup>-í sá quidè-yu nchaa sá cuéhé sá dúhá. 8 Te chí cuáhá<sup>n</sup> nchòhó vico chí yúhú vá quíhí<sup>n</sup>-ni-í chí vátá tnàhá-gá òré quíhí<sup>n</sup>-í —càchí-gá xáha<sup>n</sup>-gá xii-güedé.

9 Te duca<sup>n</sup> ñí xáha<sup>n</sup>-gá te ní ndóo-gá Galileá, te cue téé-á<sup>n</sup> cuáhá<sup>n</sup>-güedé.

*Jèsús ndécú-gá #<sup>n</sup> vico chiñuhú-yu Yá Ndióxi*

10 Dico sátá cuáhá<sup>n</sup> cue ñaní-gá, te ní xica-gá cuáhá<sup>n</sup>-gá tnàhá-gá dicó-ni sá dáyuhu cuáhá<sup>n</sup>-gá. 11 Te ñáyiu isràél ñáyiu xíndecu vico nànducú-yu Jèsús, te xítnàhá-yu:

—¿Ndèé ndécú Jèsús? —càchí-yu xítnàhá-yu.

12 Te nchaa ñáyiu xíndecu vico xíndatnúhu-yu cuendá-gá. Te davá-yu xítnàhá-yu sá ìo váha iní-gá, te davá-yu xítnàhá-yu sá ñà díú téé váha cùu-gá, chí dándahú-gá ñáyiu.

13 Dico mee-ni xícáhá<sup>n</sup> náhí-yu, chí xiyùhú-yu cue téé cùnno núú-yu.

14 Te ta ngùhu<sup>n</sup> dava vico, te cuánguìhu Jèsús veñúhu càhnu sá ìo cùnno, te ní ngüíta-gá dácuàha-gá ñáyiu. 15 Te ñáyiu isràél ní cuñúhu vihí-yu sá ìo váha càhá<sup>n</sup>-gá, te ní xítnàhá-yu:

—¿Ná cuendá ìo váha ñùhu-tu díquí téé-a tnúhu cáhá<sup>n</sup>-dé te ñá túú ní dàcuaha-dé-i? —càchí-yu xítnàhá-yu.

16 Te ní xáha<sup>n</sup> Jèsús:

—Ñá díú cuendá mée-í cúu-xí sá dánèhé ñáhà-í xii-ndo, chí cuendá Dútú Ndióxi Yaá ní tendaha ñàha xii-í véxi-í cúu-xí. 17 Te núu ìo dava-ndo ñí yuhu ñí iní-ndó cuení-ndó càda-ndo nacuáa cuení Yá Ndióxi cunduu, te cutnùní ndáá iní-ndó sá tnúhu dàcuaha ñaha-í xii-ndo cùu-xi cuendá mée Dútú Ndióxi, te ñá díú cuendá mée-í cúu-xí. 18 Te téé cuení sá cáda càhnu ñaha ñáyiu xii-dé, téé-á<sup>n</sup> càhá<sup>n</sup>-dé nàcuáa véxi iní mée-dě. Dico yúhú cuení-í sá cáda càhnú-yu Dútú Ndióxi Yaá ní tendaha ñàha xii-í véxi-í ñuyíú-a, te càhá<sup>n</sup> ndáá-í te ñá túú dàcuandehnde-í.

19 Te ndí Moisés ní taxi ndí tnúhu sá sánú ichi ñaha xii-ndo nacuáa cundecu-ndo, te ní dùca<sup>n</sup> ñá túú sàndáá iní-ndó nàcuáa càhá<sup>n</sup> tnúhu-á<sup>n</sup>. ¿Te ná cuendá cuení-ndó càhni ñaha-ndo xii-í? —càchí-gá xáha<sup>n</sup>-gá xii-yu.

20 Te ní xáhá<sup>n</sup>-yu xii-gá:

—Yucu ñávàha dàcoto ñaha xii-ó, chí vá yòo #<sup>n</sup> cuení cahni ñaha xii-n —cachí-yu xáhá<sup>n</sup>-yu xii-gá.

21 Te ní xáha<sup>n</sup> Jèsús xii-yu:

—Sá nǐ quide-í ñ̄ sá vǎ yǒo tnàhí ndàcu cada nduu cuu-xi nduu ndetatú-ó, xiá<sup>n</sup> ío ní cuñúhu ñaha-ndo xii-í. <sup>22</sup> Te ndíi Moisés ní cachí ndíi sá cuãha-yu seña ñ̄ cue landú téé, dico ñá díú mèe ndíi ni càhu iní ndíi chi duca<sup>n</sup> tnàhí ní xóo cada cue ñaní tnàhá-ó dàvá-á<sup>n</sup>, núu xiá<sup>n</sup> nchòhó sãha-ndo seña ñ̄ landú téé cuèi cùu-xi nduu ndetatú-ó. <sup>23</sup> Te duca<sup>n</sup> quide-ndo cuendá sá ñà túú nǎ cumání-ndó núú tnũhu sá sánú lchi ñaha xii-ndo ní dándoo ndíi Moisés. ¿Te ná cuendá cudéé<sup>n</sup>-ndó núú-í sá nǐ quide tátna-í téé cùhú nduu ndetatú-ó-í? <sup>24</sup> Te váha váha cada cuendá-ndó, te vá cuendá-ni cáhá<sup>n</sup>-ndó sǎ yǔhú ndècuéchi-í chi ñá túú xini-ndó —càchí-gá xáha<sup>n</sup>-gǎ xií-yu.

### *Jèsús xáha<sup>n</sup>-gǎ xií-yu núú vèxi-gá*

<sup>25</sup> Te dava ñáyiu ñuu Jerusàlén ní ngüíta-yu xitnàhá-yu:

—¿Náa ñá díú tée-á<sup>n</sup> nándùcu-güedé cahni-güedé?, <sup>26</sup> núu náí-dé nútni núú chítú núú tàcá-ã<sup>n</sup> càhá<sup>n</sup>-dé, te vá yǒo cùyi cùñaha xii-dé ñ̄ tnúhu. Cudana te cue téé cùchiu<sup>n</sup> sandáá iní-güedé sá díú-dé cúú-dé Crìstú Yaá ní tendaha Yá Ndiõxí véxi ñuyíú-a. <sup>27</sup> Dico nchoo xini-ó ndèe ichi véxi téé-ã<sup>n</sup>, dico Crìstú ná quixi-gá chi vá yǒo ñ̄ quini ndèe ichi quixi Yaá-á<sup>n</sup> —càchí-yu xitnàhá-yu.

<sup>28</sup> Te yìhi Jesús xití veñúhu càhnu sá ño cùnuu danehe-gá ñáyiu, te ní tecú dóho-gá tnúhu càhá<sup>n</sup>-yu. Te níhi ní cáhá<sup>n</sup>-gá, te xáha<sup>n</sup>-gǎ xií-yu:

—¡Ná quini-tu nchòhó ndèe ichi véxi yúhú! Yúhú véxi-í dico ñá díú sá cúú iní mèe-í, chi Yá Ndiõxí Yaá quidé nchàa-ndi túhú sá vǎha ní tendaha ñaha-gá xii-í véxi-í, te nchòhó ñá túú xini-ndó-gǎ. <sup>29</sup> Te yúhú xini-í-gá chi núú ndécú-gǎ ní quee-í véxi-í, te ñu mee-gǎ ní tendaha ñaha-gá véxi-í —càchí-gá xáha<sup>n</sup>-gǎ xií-yu.

<sup>30</sup> Te sá dúcá<sup>n</sup> nǐ cáhá<sup>n</sup>-gá, núu cuini-güedé tñi ñaha-güedé xii-gá quíhí<sup>n</sup>-gá vecaá ní cùu, dico vá yǒo ñ̄ ni cùyi tñi ñaha xii-gá chi vátá sáa-gá òré tñi ñaha-güedé. <sup>31</sup> Dico

vài-yu ní sandáá iní ñáhã-yu xii-gá, te ní xitnàhá-yu:

—¿Nágá cúú sǎ cádá Crìstú ná quixi-gá-í?, te téé-a ío cuéhé núú sǎ tá quide-dé véxi. Váa ñu téé-a cùu-dé Crìstú Yaá ní tendaha Yá Ndiõxí véxi ñuyíú-a —càchí-yu xitnàhá-yu.

### *Cue téé cùu fariséu cuini-güedé quíhí<sup>n</sup> Jèsús vecaá*

<sup>32</sup> Te ní níhi cue téé cùu fariséu tnúhu nàcuáa càhá<sup>n</sup> ñáyiu cuendá Jèsús, núu ní ndatnúhu-güedé ndíhi cue dútú cùnuu, te ní techiu<sup>n</sup>-güedé cue téé quide cuendá veñúhu cuáhã<sup>n</sup>-güedé cuátni ñaha-güedé xii-gá ní cùu. <sup>33</sup> Te ní xáha<sup>n</sup>-gǎ xii-güedé:

—Sacú duha nduu cundecu ndíhi ñaha-í xii-ndo, te núhú tucu-í núú ndécú tátà-í Yaá ní tendaha ñaha xii-í véxi-í ñuyíú-a. <sup>34</sup> Te cuèi na nànducu ñaha-ndo dico vá ná níhi ñáhã-ndó chi vá sáa-ndó núú cùndecu-í —càchí-gá xáha<sup>n</sup>-gǎ xii-güedé.

<sup>35</sup> Te ní ngüíta ñáyiu isràél xitnàhá-yu:

—¿Ndèe quíhí<sup>n</sup>-tu téé-a te vá ná níhi-ó-dé-í? ¿Àdi quíhí<sup>n</sup>-dé na chitnahá-dé ñáyiu isràél ñáyiu nchitenuu nchaa ñuu xicá cuendá danèhé-dé ñáyiu griégú? <sup>36</sup> ¿Náa càhá<sup>n</sup>-tu-dé duha càhá<sup>n</sup>-dé: “Nanducu ñaha-ndo te vá nánihí ñáhã-ndó chi vá sáa-ndó núú cùndecu-í”, càchí-tu-dé? —càchí-yu xitnàhá-yu.

### *Nàcuáa cada Espiritú Yá Ndiõxí iní-ó*

<sup>37</sup> Te nduu nǐ yáha-ná vico cùu-xi nduu cahnu vihi, te nduu-ã<sup>n</sup> nǐ ngúnu tñi Jèsús tnuú ñáyiu, te níhi ní cáhá<sup>n</sup>-gá, te xáha<sup>n</sup>-gǎ xií-yu:

—Núu ío dava-ndo yìchí-ndó ndüte, te quixi-ndo núú-í, te coho-ndo.

<sup>38</sup> Duha càhá<sup>n</sup>-í chi nchaa ñáyiu na quindáá iní ñáhã xii-í, te cada-xi iní-yu dàtná ñ̄ núú xicá ndüte, nchaa-ni nduu xica ñá túú yìchí, duca<sup>n</sup> càda-xi iní-yu núú cuáhã<sup>n</sup> núú véxi dàtná càhá<sup>n</sup>-xi núú tütú Yá Ndiõxí —càchí-gá xáha<sup>n</sup>-gǎ xií-yu.

<sup>39</sup> Te duca<sup>n</sup> nǐ cáhá<sup>n</sup>-gá cuendá sá quixí Espiritú Yá Ndiõxí ngúndecu

ndihí nchaa ñáyi na quíndáá iní ñáhá xii-gá, chí sáá nduu ndaa-gá andiu càda cahnu ñaha Tátá-gă xii-gá, te dàvá-án te quixi Espiritú Yá Ndióxi cundecu ndihí-yu.

*Ñá ní cùu ñnuú-yu cuèndá tnúhu ní cáhá<sup>n</sup> Jèsús*

<sup>40</sup> Te dava ñáyi ní xíndedóho tnúhu ní cáhá<sup>n</sup> Jèsús ní xítnàhá-yu:

—Ndáá sá tée-a cùu-dé tée càchí-yu quixi cáhá<sup>n</sup> tnúhu Yá Ndióxi —càchí-yu xítnàhá-yu.

<sup>41</sup> Te dava tucú-yu xítnàhá-yu:

—Tée-a cùu-dé Cristú Yaá ní tendaha Yá Ndióxi véxi ñuyíu-a —càchí-yu xítnàhá-yu.

Te dava-gá tucú-yu xítnàhá-yu:

—¿Náa ndaa distritú Galileá quixi Cristú Yaá tendaha Yá Ndióxi quixi ñuyíu-a? <sup>42</sup> Chí núu tütú Yá Ndióxi càchí-xi sá Cristú Yaá tendaha Yá Ndióxi quixi ñuyíu-a cuu-gá ñ<sup>n</sup> ñani tnáhá ndíi Dàvií, te quee-gá ñuú Bèlén ñuú méé ndíi Dàvií, duha càhá<sup>n</sup>-xi núu tütú Yá Ndióxi —càchí-yu xítnàhá-yu.

<sup>43</sup> Te xǎ<sup>n</sup> núu ñá ní cùu ñnuú-yu cuèndá Jèsús. <sup>44</sup> Te davá-yu cuíní-yu tñí-yu Jèsús quíhí<sup>n</sup>-gá vecaá ní cùu, dico ni ñ<sup>n</sup>-yu ñá túú ní cùyí<sup>n</sup>-yu tñí ñàhá-yu xii-gá.

*Cue tée cùchiu<sup>n</sup> ñá túú sàndáá iní-güedé Jèsús*

<sup>45</sup> Te cue tée cuáhá<sup>n</sup> tñí ñaha xii Jèsús ní cùu ní ndexio-güedé núu cuè tée cùu fariséu ndihí núu cuè dútú cùnùu. Te xǎha<sup>n</sup> cuè tée cùnùu-án:

—¿Ná cuèndá ñá ní cǎndeca-ndo tée-án quixi? —càchí-güedé xǎha<sup>n</sup>-güedé.

<sup>46</sup> Te cue tée ní sáhá<sup>n</sup> chù<sup>n</sup> ní xǎha<sup>n</sup>-güedé:

—Ni ñ<sup>n</sup> tée ñá túú xíní-ndí cáhá<sup>n</sup> dàtná càhá<sup>n</sup> tée-án —càchí-güedé xǎha<sup>n</sup>-güedé.

<sup>47</sup> Te ní xǎha<sup>n</sup> cuè tée cùu fariséu:

—¿Náa tnàhá nchòhó ní sàndáá iní-ndó tnúhu ndehnde càhá<sup>n</sup> tée-án?

<sup>48</sup> ¿Náa ñá túú xíní-ndó sá ni ñ<sup>n</sup> cue tée tàxi tñuní nchúhú, te ni ñ<sup>n</sup> nchúhú cue tée cùu fariséu ñá túú sàndáá iní-ndí tée-án ñá? <sup>49</sup> Nchaa ñáyi tùha ñaha xii tée-án ñá túú sàndáá iní-yu nàcuáa càhá<sup>n</sup> tnúhu sá sánú ìchi ñaha

xii-o, dico cuíta nihnú-yu sá dúcá<sup>n</sup> quidé-yu —càchí-güedé xǎha<sup>n</sup>-güedé xii cue tée-án.

<sup>50</sup> Te té Nicòdemú tée ní sáhá<sup>n</sup> niú ní ndatnúhu-dé ndihí Jèsús cúu-dé tnàhá-dé ñ<sup>n</sup> tée fariséu, te ní xǎha<sup>n</sup>-dè xii-güedé:

<sup>51</sup> —Tnúhu sá sánú ìchi ñaha xii-o nacuáa cundecu-o càchí-xi sá ndéé cundedóho-o nása càhá<sup>n</sup> tée tau cuéchi cuèndá cutnùní iní-ó nǎ ní quide-dé, te dàtnùní cáhá<sup>n</sup>-ó núu ndisa ndècuéchi-dé àdi ñá túú ndècuéchi-dé —càchí-dé xǎha<sup>n</sup>-dè.

<sup>52</sup> Te ní xǎha<sup>n</sup>-güedé:

—Cùu ní cachí sá tnàhá-ò cúu-n tée distritú Galileá núu duca<sup>n</sup> càhá<sup>n</sup>-n. Dacuàha tutú yódó tñuní tnúhu Yá Ndióxi te quiní-n nàcuáa càhá<sup>n</sup>-xi sá ni ñ<sup>n</sup> tée véxi distritú Galileá ñá túú càhá<sup>n</sup>-dè tnúhu Yá Ndióxi —càchí-güedé xǎha<sup>n</sup>-güedé.

<sup>53</sup> Duca<sup>n</sup> te ndí díí<sup>n</sup> cuñuhú-güedé vehe-güedé.

## 8

*Ñ<sup>n</sup> ñadìhí ndécú vîhi cuéchi-xi*

<sup>1</sup> Te Jèsús cuáhá<sup>n</sup>-gá yucu Òlívú.

<sup>2</sup> Te sátá ní túnndáá nduu tnéé, te cuáhá<sup>n</sup> tucu-gá veñúhu cahnu sá ìo cùnùu. Te ìo cuéhé ñáyi ní chítú níhnú-yu núu-gă, te ní ngóo-gá ní dánèhé ñáhá-gă xii-yu. <sup>3</sup> Te ní quexio cue tée dàcuaha ñaha xii-yu nchaa tnúhu ní chídó tñuní ndíi Moisés, ndihí cue tée cùu fariséu, te ndèca-güedé ñ<sup>n</sup> ñadìhí ní sáá, te ñaha-án ní xíní ñáhá-yu càhá<sup>n</sup> ndihí-a<sup>n</sup> ñ<sup>n</sup> tée dico ñá díú yí<sup>n</sup>-a<sup>n</sup> cuu-dé, te ní sanutñí ñaha-güedé xii-a<sup>n</sup> tnuú nchaa ñáyi xíndecu núu Jèsús. <sup>4</sup> Te ní xǎha<sup>n</sup>-güedé xii Jèsús:

—Mèstrú, ñadìhí-a ní xíní ñáhá ñáyi xii-a<sup>n</sup> càhá<sup>n</sup> ndihí-a<sup>n</sup> ñ<sup>n</sup> tée dico ñá díú yí<sup>n</sup>-a<sup>n</sup> cuu-dé. <sup>5</sup> Te tnúhu ní chídó tñuní ndíi Moisés càchí-xi sá yúu cahni-o nchaa ñáyi dîhí duha quide. Te yòhó, ¿nása càchí-n cùnduu-i? —cachí-güedé xǎha<sup>n</sup>-güedé xii-gá.

<sup>6</sup> Duha ní cáhá<sup>n</sup>-güedé chí cuèndá sá cuíní-güedé coto ndéé ñáhá-güedé xii-gá núu nása càhá<sup>n</sup>-gá cuèndá

nucóo nchihi ñaha-güedě xii-gá ní cáhá<sup>n</sup>-güedě. Te ní ngúnu ndeyi-gá te ní ngüíta-gá téé-gá ndihi díquí ndáhá-gá lètrá núú ñuhú. <sup>7</sup> Te xicá<sup>n</sup> tnúhú-ní tucu-güedé núú-gă nũu ní ndonehe núú-gă, te ní xáha<sup>n</sup>-gă:

—Ndědani caa nchohó te núu ñá túú nă cuéchi quide-ndo te díhna nuu-gă-ndó chĩ cuăha-a<sup>n</sup> yúú — cächí-gá xáha<sup>n</sup>-gă xii-güedé.

<sup>8</sup> Te ní ngúnu ndeyi tucu-gá téé tucu-gá lètrá núú ñuhú. <sup>9</sup> Te sá dúcá<sup>n</sup> nĩ xáha<sup>n</sup>-gă xii-güedé te ní ndixi túu iní-güedé sá ñà túú quide váha mee-güedě tnáhá-güedé, núu da ñ<sup>n</sup> da ñ<sup>n</sup>-güedé ní ndee, te díhna-gá cue téé cùu sacuéhé nĩ ndee te ní ngüíta nchicú<sup>n</sup> dava-gá-güedé. Te sátá nĩ ndihi-güedé ní ndee, te ní quendóo mee-nă Jèsús ndihi ñadìhí-á<sup>n</sup>. <sup>10</sup> Te ní ndonehe núú Jèsús te ní xiní-gá sá nĩ ndihi-güedé cuáhá<sup>n</sup> te mee-nă ñadìhí-á<sup>n</sup> nĩ ndóo-a<sup>n</sup>, te ní xáha<sup>n</sup>-gă xii-a<sup>n</sup>:

—¿Nděndi cuáhá<sup>n</sup> cue téé cächí sá nĩ quide-n cuéchi? ¿Ni ñ<sup>n</sup>-güedé ñá ní cùndee tnúhu-güedé quíhí<sup>n</sup>-n cástiú-va? —cächí-gá xáha<sup>n</sup>-gă xii-a<sup>n</sup>.

<sup>11</sup> Te ní xáha<sup>n</sup>-a<sup>n</sup> xii Jèsús:

—Ñáhá, chi ni ñ<sup>n</sup>-güedé ñá ní ndàcu-güedé —cächí-a<sup>n</sup> xáha<sup>n</sup>-a<sup>n</sup>.

Te ní xáha<sup>n</sup> Jèsús:

—Te ni yúhú vá dáquihí<sup>n</sup> ñáhà-í castiú xii-n. Te vitna te núhú-n te vá cádá-gă-n nãndi sá cuèhé sá dúhá — cächí-gá xáha<sup>n</sup>-gă xii-a<sup>n</sup>.

### *Jèsús dándixi túu-gá iní-ó*

<sup>12</sup> Te ní cáhá<sup>n</sup> tucu Jèsús núú ñáyiú, te xáha<sup>n</sup>-gă xií-yu:

—Yúhú cùu-í dàtná ñ<sup>n</sup> ñuhú dáyèhe-í ñuyíú-a, te nchaa ñáyiú na chitnahá ñáhá xii-í, te vá cùndecu-gá-yu ichi cuèhé ichi duha, chi yúhú dándixi túu-í iní-yu cuendá cutnùní iní-yu nàcuáa ndùu cuendá Yă Ndiöxí, te cundecu-í ndihí-yu ni caa ni quíhí<sup>n</sup> —cächí-gá xáha<sup>n</sup>-gă xií-yu.

<sup>13</sup> Te ní xáha<sup>n</sup> cuè téé cùu fariséú xii-gá:

—Medì-n cáhá<sup>n</sup>-n sã cùu-n tée váha, te vá yõo ñ<sup>n</sup>-gá chindée tnúhu ñaha xii-n núu ná tée cùu-n, dico xiá<sup>n</sup> ñá túú nãndíhi-xi —cächí-güedé xáha<sup>n</sup>-güedě xii-gá.

<sup>14</sup> Te ní xáha<sup>n</sup> Jèsús:

—Cuèi cáhá<sup>n</sup>-í cuendá mée-í dico nãndíhi tnúhu cáhá<sup>n</sup>-í. Chi yúhú nàha-í ndée ichi véxi-í, te xiní-í ndée ichi núhú-í, dico nchòhó chi ñá túú xiní-ndó ndée ichi véxi-í, te ni ñà túú xiní-ndó ndée ichi quíhí<sup>n</sup>-í. <sup>15</sup> Te nchòhó chi cuendá-ni cáhá<sup>n</sup>-ndó cuendá ñáyiú núu quide váha-yu àdi ñá túú quide váha-yu. Te yúhú ñá túú cáhá<sup>n</sup>-í cuendá ñáyiú núu quide váha-yu àdi ñá túú quide váha-yu.

<sup>16</sup> Àdi núu cáhá<sup>n</sup>-í dico ñ<sup>n</sup> tnúhu ndáá cáhá<sup>n</sup>-í chi ñá díú-ni mée-í cáhá<sup>n</sup>, chi tnáhá Tătà-í Yaá ní tendaha ñaha xii-í véxi-í ñuyíú-a cáhá<sup>n</sup>-gá chindée tnúhu ñaha-gă xii-í. <sup>17</sup> Te tnúhu sá sánú ichi ñaha xii-ndo cachí-xi sá nũu na cùndecu úú cue téé cáhá<sup>n</sup> ndáá-güedé nàcuáa cùu ñ<sup>n</sup> sá cùndáá, te núu ñ<sup>n</sup>-ni tnúhu na cáhá<sup>n</sup>-güedé ndi ndùu-güedé te xiá<sup>n</sup> nãndíhi-xi, duha cächí tnúhu-á<sup>n</sup>. <sup>18</sup> Te diu-ni duca<sup>n</sup> cùu-xi yúhú chi cáhá<sup>n</sup>-í ñ<sup>n</sup> tnúhu ndáá sá cùu-xi mée-í, te diu-ni dàtná cáhá<sup>n</sup>-í cáhá<sup>n</sup> Tătà-í Yaá ní tendaha ñaha xii-í véxi-í ñuyíú-a —cächí-gá xáha<sup>n</sup>-gă xii-güedé.

<sup>19</sup> Te ní xáha<sup>n</sup>-güedě xii-gá:

—¿Te ndée ndécú Tătà-n-í? — cächí-güedé xáha<sup>n</sup>-güedě.

Te ní xáha<sup>n</sup> Jèsús:

—Te núu dicó xiní-ndó yòo cuu yúhú-á te duca<sup>n</sup> te quiní-ndó Tătà-í. Te ni yúhú ñá túú xiní-ndó yòo cuu-í nũu xiá<sup>n</sup> ñá túú xiní-ndó Tătà-í — cächí-gá xáha<sup>n</sup>-gă xii-güedé.

<sup>20</sup> Duha ní cáhá<sup>n</sup> Jèsús nini dàcuaha-gá ñáyiú xití veñúhu núu ndécú àlcanciá díhú<sup>n</sup>. Te vá yõo ñ<sup>n</sup> ni cùyí<sup>n</sup> tñ<sup>n</sup> ñaha xii-gá chi vátá sàá-gá òré tñ<sup>n</sup> ñaha-güedě.

*Ñáyiú ñá túú sàndáá iní ñáhá xii Jèsús vá ndácũ-yu quíhí<sup>n</sup>-yu núu nùhú-gá cundecu-gá*

<sup>21</sup> Te ní xáha<sup>n</sup> tucu Jèsús xii-güedé:



—Yúhú núhú-í te nanducu ñaha-ndo te vá nánihí ñáhá-ndó, te cuú-ndó núú yíca cuèchi-ndo, chi vá ndácú-ndó sáá-ndó núú nùhú-í cundecu-í —càchí-gá xáha<sup>n</sup>-gã xii-güedé.

22 Te ní xítñaha cue téé isràél:

—¿Te náa cahni-dé méé-dě nõu càchí-dé sá vã ndácú-ó sàá-ó núú quíhí<sup>n</sup>-dé-ã<sup>n</sup>? —càchí-güedé xítñaha-güedé.

23 Te ní xáha<sup>n</sup> Jèsús xii-güedé:

—Nchòhó chi cue téé ñuyíú-a cùu-ndo, núu ío ñùhu iní-ndó sã ío ñuyíú-a. Te yúhú chi téé núú ñnu cùu-í nõu xíã<sup>n</sup> ñá túú sã ío ñuyíú-a ñùhu iní-í. 24 Te xíã<sup>n</sup> nõu càchí-í sá cùu-ndó núú yíca cuèchi-ndo, chi ñá cuíní-ndó quíndáá iní-ndó sã yúhú véxi cuu<sup>n</sup>-í andiu, te núu xíã<sup>n</sup> ñnu-ni núú yíca cuèchi-ndo cùu-ndó —càchí-gá xáha<sup>n</sup>-gã xii-güedé.

25 Te ní xícá<sup>n</sup> tnúhú-güedé núú-gã, te xáha<sup>n</sup>-güedé:

—¿Te ná cúú yòhó nõu duca<sup>n</sup> càhá<sup>n</sup>-n-í? —càchí-güedé xáha<sup>n</sup>-güedé xii-gá.

Te ní xáha<sup>n</sup>-gã:

—Sa ní cachí tnúhu-í xii-ndo nděé díhna —càchí-gá xáha<sup>n</sup>-gã xii-güedé.

26 Te xáha<sup>n</sup> tùcu-gá:

—Ndècu cuéhé tnúhu càhá<sup>n</sup>-í cada ndáá-í cuendá nchòhó. Te Tãtã-í Yáá ní tendaha ñaha xii-í véxi-í ñuyíú-a càhá<sup>n</sup>-gá tnúhu ndáá, te tnúhu càhá<sup>n</sup> yúhú ñuyíú-a cùu-xi tnúhu ní càhá<sup>n</sup>-gá ní xíndedóho-í —càchí-gá xáha<sup>n</sup>-gã xii-güedé.

27 Te mee-güedé ñá túú ní tècu tnùní-güedé sá cuendá Dútú Ndiõxí ní càhá<sup>n</sup> Jèsús. 28 Te ní xáha<sup>n</sup>-gã xii-güedé:

—Òré ná catá cãa ñaha-ndo xii yúhú Téé cùu ñaní tnáhá-ndó nchãa-ndo núú cùrúxí cahni ñaha-ndo, te òré-ã<sup>n</sup> cutnùní iní-ndó yòo cuu-í, te ñá túú quíde-í sá cúú iní méé-í, chi yúhú càhá<sup>n</sup>-í nãcuáa ní dánèhé ñáhá Tãtã-í 29 Yáá ní tendaha ñaha xii-í véxi-í. Te ñnu-gã ndécú ndíhi ñaha-gã xii-í, te ñá túú dàña nihnu ñaha-gã chi quíde-í nchãa nãcuáa cùu iní-gá —càchí-gá xáha<sup>n</sup>-gã xii-güedé.

30 Te sá dúcá<sup>n</sup> nĩ càhá<sup>n</sup>-gã nõu ío vài ñáyiú ní sándáá iní ñáhá xii-gá.

*Ñáyiú sándáá iní ñáhá xii Yá Ndiõxí ndíhi ñáyiú ndècu ichi cuehé ichi duha*

31 Te ní xáha<sup>n</sup> Jèsús xii ñáyiú isràél ñáyiú ní sándáá iní ñáhá xii-gá:

—Te núu vá dáñá ndèé-ndó càda-ndo nchãa nãcuáa càhá<sup>n</sup>-í, te cuu ndisa-ndo cuè téé tnáhá tnúhu ndíhi-í, 32 te tecú tnùní-gá-ndó tnúhu ndáá, te duca<sup>n</sup> te cácu nihnu-ndo —càchí-gá xáha<sup>n</sup>-gã xii-yu.

33 Te ní xáhã<sup>n</sup>-yu:

—Nchúhú cúú-ndí cue ñaní tnáhá ndíi Àbrahám, te ní ñ<sup>n</sup> nduu ñá túú ndèé sácüdedí nihnu-ndí ndoho tnáhá-ndí nõu càchí-õ sá dàcácu nihnu ñaha-n xii-ndí —càchí-yu xáhã<sup>n</sup>-yu xii-gá.

34 Te ní xáha<sup>n</sup> Jèsús xii-yu:

—Na càchí tnúhu ndáá-í xii-ndo sã nchãa ñáyiú quíde nchãa sá cuéhé sá dúhá tàxi tnuní ñáhá-nã-xi xii-yu.

35 Te cue ñáyiú xinu cuechi te vá cúú ñ<sup>n</sup>-ná cúú-yu ndíhi ñáyiú díi vèhe-xi xinu cuechí-yu, dico cue déhe ñáyiú díi vèhe-xi-án chi ñ<sup>n</sup>-ni cùu ndíhi ñaha-güexi xii-yu. 36 Te núu yúhú Yáá cúú Dèhe Yá Ndiõxí dàcácu nihnu ñaha-í xii-ndo nõu nchãa yíca cuèchi-ndo, te ndáá sã nchòhó cácu nihnu ndisa-ndo. 37 Te yúhú sa xini-í sã nchòhó cúú-ndó ñaní tnáhá ndíi Àbrahám, te dicó-ni sã ñã tnáhá iní-ndó tnúhu càhá<sup>n</sup>-í nõu xíã<sup>n</sup> cuíní-ndó cahni ñaha-ndo. 38 Te yúhú càhá<sup>n</sup>-í nãcuáa ní dánèhé ñáhá Tãtã-í, te nchòhó quíde-ndó nãcuáa càhá<sup>n</sup> tãtã-ndó —càchí-gá xáha<sup>n</sup>-gã xii-yu.

39 Te ní xáhã<sup>n</sup>-yu:

—Ndíi Àbrahám cúú tãtã-ndí —càchí-yu xáhã<sup>n</sup>-yu xii-gá.

Te ní xáha<sup>n</sup> Jèsús:

—Núu ndisa ñaní tnáhá ndíi Àbrahám cúú-ndó, te cada-ndo nãcuáa ní xóo cada ndíi ni cùu. 40 Te yúhú cuéi càhá<sup>n</sup>-í ñ<sup>n</sup> tnúhu ndáá nãcuáa càhá<sup>n</sup> Yá Ndiõxí càchí tnúhu-gã xii-í, te cuíní-ndó cahni ñaha-ndo. ¡Dico ndíi Àbrahám chi ñá túú dùca<sup>n</sup> ni quíde ndíi! 41 Te nchòhó quíde-ndó nãcuáa

quide tátá-ndó —càchí-gá xáha<sup>n</sup>-gã xií-yu.

Te ní xáhã<sup>n</sup>-yu:

—Nchúhú, ñá túú yàyacá<sup>n</sup> ndécú tátá-ndí, chi ì<sup>n</sup>dii Yá Ndiõxí cúú tátá-ndí —càchí-yu xáhã<sup>n</sup>-yu xii-gá.

<sup>42</sup> Te ní xáha<sup>n</sup> Jèsús:

—Núu dícó Yá Ndiõxí ndisa cùu Tátá-ndó te cuu iní ñáhá-ndó xii-í ní cùu chi yúhú ní quee-í núú ndécú-gã véxi-í ñuyíú-a. Te ñá túú véxi-í sá cúú iní mée-í, chi mee-gã ní tendaha ñaha-gá véxi-í. <sup>43</sup> Te ñá túú tècú tnùní-ndó tnùhu càhá<sup>n</sup>-í chi ñá túú tnàhá iní-ndó. <sup>44</sup> Te nchòhó chi tátá-ndó cùu yucu ñávãha núu cùdìí iní-ndó quide-ndo nchaa nacuaa cùu iní-xi, chi ndée òré ní ngáva ñuyíú duca<sup>n</sup>-ni ndècu-xi dacáhá<sup>n</sup>-xi iní-ndó sàhni tnaha-ndo. Te ñá ì<sup>n</sup> ndùu cáhá<sup>n</sup>-xi ì<sup>n</sup> tnùhu ndáá chi ñá túú xica-xi ichi ndáá, chi mee-ni ichi tnùhu ndehnde xica-xi chi duca<sup>n</sup> iní-xi. Te diu-xi dàcahu-xi iní-ndó dàcuandehnde-ndo. <sup>45</sup> Te yúhú càhá<sup>n</sup>-í tnùhu ndáá te ñá túú cuiní-ndó quindáá iní ñáhá-ndó. <sup>46</sup> ¿Te ndédacàa nchohó xini-ndó sá quidè-í ì<sup>n</sup> sá cuèhé sá dúhá-í?, te yúhú ñá túú nã quidè-í chi càhá<sup>n</sup> ndáá-í, ¿te ná cuèndá ñá túú cuiní-ndó quindáá iní-ndó tnùhu càhá<sup>n</sup>-í? <sup>47</sup> Te nchaa ñáyiu ndècu ichi Yá Ndiõxí, ñáyiu-á<sup>n</sup> sácúndedóho-yu nchaa tnùhu càhá<sup>n</sup>-gá. Te nchòhó chi ñá díú ichi Yá Ndiõxí ndécú-ndó núu ñá túú sácúndedóho-ndo tnùhu càhá<sup>n</sup>-gá —càchí-gá xáha<sup>n</sup>-gã xií-yu.

*Dìhna-gá Crìstú sa ndècu dacúúxí ndíi Àbrahám*

<sup>48</sup> Te ní xáha<sup>n</sup> ñáyiu isràél:

—Váha-ni càhá<sup>n</sup>-ndí sá tée samaritánú cúú-n, te yucu ñávãha ndècu ndíhi-n —càchí-yu xáhã<sup>n</sup>-yu xii-gá.

<sup>49</sup> Te ní xáha<sup>n</sup> Jèsús:

—Yúhú, ñá túú yùcu ñávãha ndècu ndíhi-í, chi Tàtá-í quidé càhnu-í, te nchòhó da cùu úhú iní ñáhá-ndó xii-í —càchí-gá xáha<sup>n</sup>-gã xií-yu.

<sup>50</sup> Te xáha<sup>n</sup> tùcu-gá:

—Yúhú, ñá túú càchí-í sá cádá càhnu ñaha-ndo, dico Dútú Ndiõxí cuiní-gá sá cádá càhnu ñaha-ndo xii-í. Te mee-gã cáhá<sup>n</sup>-gá núu ndédacàa-ndo

quide váha, te ndédacàa-ndo ñá túú quide váha. <sup>51</sup> Te na càchí tnùhu ndáá-í xii-ndo sã nchaa ñáyiu na tnèi tnùhu càhá<sup>n</sup>-í te vá cuíta nihnú-yu —càchí-gá xáha<sup>n</sup>-gã xií-yu.

<sup>52</sup> Te ní xáha<sup>n</sup> tùcu ñáyiu isràél:

—Vitna te ní xiní ndáá-ndí sá yùcu ñávãha ndècu ndíhi-n, chi ndíi Àbrahám ndíhi nchaa cue tée ní xóo cáhá<sup>n</sup> tnùhu Yá Ndiõxí ndée sanaha ní xihí-güedé, te yòhó càchí-tu-n sã ncháá ñáyiu na tnèi tnùhu càhá<sup>n</sup>-n te vá cùú-gá-yu. <sup>53</sup> ¿Náa ío-gá càhnu cuu-ó dàcúúxí ñàní tnáhá-ndí ndíi Àbrahám-á<sup>n</sup>? Tée-á<sup>n</sup> dai ní xihí-dé ndíhi cue tée ní xóo cáhá<sup>n</sup> tnùhu Yá Ndiõxí ndée sanaha. ¿Te yòhó nágá-tu cùu-n te vá cùú-n càha<sup>n</sup>-n-í? —càchí-yu xáhã<sup>n</sup>-yu.

<sup>54</sup> Te ní xáha<sup>n</sup> Jèsús:

—Te núu dícó mée-í quidé càhnu-í mée-í ñá, te ñá túú nàndíhi sá quidè-í núu duca<sup>n</sup>. Dico Tàtá-í quidé càhnu ñaha-gá xii-í, te diu-ni Yaá-á<sup>n</sup> càchí-ndó cùu Ndiõxí-ndó. <sup>55</sup> Te nchòhó chi ñá túú xini-ndó-gã. Te yúhú chi xini-í-gá. Te núu na càchí-í sá ñá túú xini-í-gá te dàcuandehnde-í dàtná ndehnde mée-ndo. Te yúhú chi xini ndisa-í-gá te tnèi-í nchaa tnùhu càhá<sup>n</sup>-gá. <sup>56</sup> Te ndíi Àbrahám ñàní tnáhá-ndó ní xindecu ndée sanaha ío ní cudíí iní ndíi sá quini ñáhá ndíi xii-í, te ní sáá nduu ní xiní ñáhá ndíi xii-í núu ío ní cudíí iní ndíi —càchí-gá xáha<sup>n</sup>-gã xií-yu.

<sup>57</sup> Te ní xáha<sup>n</sup> ñáyiu isràél xii Jèsús:

—Ni vátá cùhú<sup>n</sup>-gã-n ùdico úxí cuíá-n te càchí-n sã ní xiní-n ndíi Àbrahám, te ní cunaha vèhi ní xihí ndíi-á<sup>n</sup> —càchí-yu xáhã<sup>n</sup>-yu xii-gá.

<sup>58</sup> Te ní xáha<sup>n</sup> Jèsús:

—Te na càchí tnùhu ndáá-í xii-ndo sã cùmání-gã cundecu ndíi-á<sup>n</sup> ñuyíú-a te yúhú sa ndècu-gá-í —càchí-gá xáha<sup>n</sup>-gã xií-yu.

<sup>59</sup> Te sá dúcá<sup>n</sup> ní cáhá<sup>n</sup>-gá núu xíá<sup>n</sup> ní quehé<sup>n</sup>-yu yúú cuãha ñáhá-yu xii-gá ní cùu, te ní nguívãha-gá núu-yu te ní quee-gá xití veñúhu cuáhá<sup>n</sup>-gá.

## 9

*Jèsús quidé tãtna-gá ì<sup>n</sup> téé cuàá*

<sup>1</sup> Te núú xicá cùu Jèsús ní naníhí-gã ì<sup>n</sup> téé cuàá, te sa duca<sup>n</sup> tnàhí càa núú-dě ní cacu-dé. <sup>2</sup> Te ní xáha<sup>n</sup> cuè téé xica cuu ndìhi-gá xii-gá:

—Mèstrú, ¿ná cuendá dàcá<sup>n</sup> cuàá téé-ã<sup>n</sup> ní cacu-dé? ¿Sá cuendá nchaa yicá cuèchi tãtá-dě, ã<sup>n</sup> sã cuendá nchaa yicá cuèchi nãná-dě, ã<sup>n</sup> sã cuendá nchaa yicá cuèchi mee-dě dàcá<sup>n</sup> cáá-dě ní cacu-dé? —càchí-güedé xáha<sup>n</sup>-güedé xii-gá.

<sup>3</sup> Te ní xáha<sup>n</sup> Jèsús:

—Ni ñà díú sã cuendá nchaa yicá cuèchi mee-dě, te ni ñà díú sã cuendá nchaa yicá cuèchi tãtá-dě, te ni ñà díú sã cuendá nchaa yicá cuèchi nãná-dě, chi mee Yã Ndiõxí ní cuini-gá sá dúcá<sup>n</sup> cùnduu-dé sáá-dé ñuyíú-a cuendá sá ñuyíú-a quini ñáyiu nása cada ñaha Yã Ndiõxí xii-dé ndúha núú-dě. <sup>4</sup> Te vitna ió-gá nduu cùyica sá cáda-í nchaa chiú<sup>n</sup> ní táhú Yáá ní tendaha ñaha xii-í véxi-í ñuyíú-a, chi sáá nduu te vá ndácú-gã-í cada-í chiú<sup>n</sup>-gá. <sup>5</sup> Te ñini ndècu-gá-í ñuyíú-a te dàndixi túu-í iní nchaa ñáyiu cuendá cutnùní iní-yu nàcuáa nduu cuendá Yã Ndiõxí —càchí-gá xáha<sup>n</sup>-gá xii-güedé.

<sup>6</sup> Te sátá dúcá<sup>n</sup> ñí cáhá<sup>n</sup>-gá, te ní sati-gá díí-gá núú ñúhú te ní dácá-gã luha ñuhu ní cuáha ndéhyú, te ndéhyú-ã<sup>n</sup> ñí dácánùu-gá ndúú xio núú tée cuàá-ã<sup>n</sup>. <sup>7</sup> Te ní xáha<sup>n</sup>-gá xii-dé:

—Quíhí<sup>n</sup>-n nàquete-n núú-n ndùte tanquí Silóé —càchí-gá xáha<sup>n</sup>-gá xii-dé. Te Silóé-ã<sup>n</sup> quée-xí tñuhu mèé-yu: Tée xica chiú<sup>n</sup>.

Te ní sáhá<sup>n</sup> téé cuàá-ã<sup>n</sup> ñí naquete-dé núú-dě, te òré ní ndexìo-dé te sa ndèhe-dé. <sup>8</sup> Te nchaa ñáyiu ndècu yatni núú ndécú-dě ndìhi nchaa ñáyiu xini ñáhá xii-dé núú xicá<sup>n</sup> ndàhú-dé ní xitnàhá-yu:

—¿Náa ñá díú tée-ã<sup>n</sup> ní xóo cáca<sup>n</sup> ndàhú-dé? —càchí-yu xitnàhá-yu.

<sup>9</sup> Te davá-yu càchí-yu sá díú-dě, te davá-yu càchí-yu sá ñà díú-dě, dico duca<sup>n</sup> càa-dé, càchí-yu xitnàhá-yu.

Dico mee-dě ní xáha<sup>n</sup>-dě xii-yu sá díú-dě.

<sup>10</sup> Te ní xicá<sup>n</sup> tñuhú-yu núú-dě, te xãhá<sup>n</sup>-yu:

—¿Náa ní cuu núú ní ndúha núú-n ndèhe-n vitna? —càchí-yu xãhá<sup>n</sup>-yu xii-dé.

<sup>11</sup> Te ní xáha<sup>n</sup>-dě:

—Tée ñani Jèsús-ã<sup>n</sup> ní cadúha-dé luha ndéhyú te ní dácánùu-dé núú-í, te ní táuchíú<sup>n</sup>-dě ní sáhá<sup>n</sup>-í tãnquí Silóé ní naquete-í núú-í, te òré-ã<sup>n</sup> ñí cuu cundehe-í —càchí-dé xáha<sup>n</sup>-dě xii-yu.

<sup>12</sup> Te ní xicá<sup>n</sup> tñuhú tucú-yu núú-dě, te xãhá<sup>n</sup>-yu:

—¿Te ndèé ndécú tée-ã<sup>n</sup>? —càchí-yu xãhá<sup>n</sup>-yu xii-dé.

Te ní xáha<sup>n</sup>-dě:

—Ñá túú xini-í —càchí-dé xáha<sup>n</sup>-dě xii-yu.

*Cue téé cùu fariséú ndátnùhu-güedé ndìhi téé ní ndúha núú-xi*

<sup>13</sup> Te ndèca-güedé téé ní ndúha núú-xi-ã<sup>n</sup> cuãhá<sup>n</sup> núú cuè téé cùu fariséú. <sup>14</sup> Te cuendá sá nduu ndetátú-yu ní cadúha Jèsús ndéhyú ñí dácánùu-gá núú tée-ã<sup>n</sup> te ní ndúha, <sup>15</sup> xiã<sup>n</sup> ñúú ní xicá<sup>n</sup> tñuhú cuè téé cùu fariséú núú-dě, te xáha<sup>n</sup>-güedé:

—¿Náa ní cuu ní ndúha núú-n? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dě xii-güedé:

—Ì<sup>n</sup> téé ní dácánùu-dé ndéhyú ñúú-í te ní sáhá<sup>n</sup>-í ní naquete-í, te ní cuu ndèhe-í vitna —càchí-dé xáha<sup>n</sup>-dě xii-güedé.

<sup>16</sup> Te dava cue téé cùu fariséú ní xitnàha-güedé:

—Ñá díú Yã Ndiõxí ní tendaha ñaha-gá xii téé-ã<sup>n</sup> véxi-dé ñúú duha quide-dé nchaa sá vã yõo tnàhí ndàcu cada, te ñá túú sãndáá iní-dé canehe íí-dě nduu ndetátú-ó —càchí-güedé xitnàha-güedé.

Te dava-güedé ní xitnàha-güedé:

—¿Náa ndacu-dé cada-dé sá vã yõo tnàhí ndàcu cada te núú cùu-dé téé yicá cuèchi? —càchí-güedé xitnàha-güedé.

Te ñá túú ní cùu ì<sup>n</sup>nuu-güedé tñuhu ní cáhá<sup>n</sup>-güedé. <sup>17</sup> Te ní xicá<sup>n</sup> tñuhú tucú-güedé núú tée ní ndúha núú-xi-ã<sup>n</sup>, te xáha<sup>n</sup>-güedé:

—Te yòhó, ¿nása cächí-n cuendá téé ní quide tátna núú-n te ní ndúha? — cächí-güedé xäha<sup>n</sup>-güedé xii-dé.

Te ní xáha<sup>n</sup>-dë:

—Yúhú cächí-í sá íí<sup>n</sup> tée cähá<sup>n</sup> tnúhu Yá Ndiöxí cúú-dë —cächí-dé xäha<sup>n</sup>-dë xii-güedé.

<sup>18</sup> Dico cue tée isràél ñá ní sàndáá iní-güedé sá cuää-dé ní cùu, chi cuendá sa ní ndúha núú-dë ní xini ñáhá-güedé, te xíá<sup>n</sup> núu ní cana-güedé tátá-dë ndihí náná-dë, <sup>19</sup> te ní xicá<sup>n</sup> tnúhú-güedé núú-yu, te xäha<sup>n</sup>-güedé:

—¿Diu tée-a déhe-ndo tée cächí-ndó cuää-dé ní cacu-dé-á<sup>n</sup>? ¿Te nása ní cuu ní ndúha núú-dë? —cächí-güedé xäha<sup>n</sup>-güedé xii-yu.

<sup>20</sup> Te ní xáha<sup>n</sup> tátá-dë ndihí náná-dë:

—Diu déhe-ndí cúú-dë te sa cuää ndisa-dé ní cacu-dé, <sup>21</sup> dico ñá túú xini-ndí nása ní cuu ní ndúha núú-dë, te ni ñà túú xini-ndí yoo ní quide tátna. Chí cacá<sup>n</sup> tnúhú núú méé-dë xíá<sup>n</sup> núu sa sàcuéhé-dë, te na cähá<sup>n</sup>-dë núu nása ní cuu ní ndúha núú-dë —cächí-yu xäha<sup>n</sup>-yu xii-güedé.

<sup>22</sup> Duha ní cähá<sup>n</sup> tátá-dë ndihí náná-dë ní xähá<sup>n</sup>-yu xii-güedé cuendá sá yùhú-yu cue tée cùnuu núú ñáyiú isràél, chi cue tée-á<sup>n</sup> sa ní ndatnúhu-güedé ní cuu íí<sup>n</sup>nuu-güedé sá núu ndédacáa ñáyiú na cähá<sup>n</sup> sá Jèsús cúú-gá Crístú Yaá ní tendaha Yá Ndiöxí véxi ñuyúú-a, te vá dáñá-gá-güedé quíhu-yu veñúhu.

<sup>23</sup> Núu xíá<sup>n</sup> ní xáha<sup>n</sup> tátá-dë ndihí náná-dë sá ná cacá<sup>n</sup> tnúhú-güedé núú méé-dë chi sa sacuéhé-dë.

<sup>24</sup> Te xíá<sup>n</sup> núu ní cana tucu-güedé téé ní ndúha núú-xi-á<sup>n</sup>, te ní xáha<sup>n</sup>-güedé:

—Cähá<sup>n</sup>-n íí<sup>n</sup> tnúhu ndáá chi Yá Ndiöxí ndéhé ndíí-gá nàcuáa ní cuu ní ndúha núú-n, chi nchúhú xini-ndí sá dícó íí<sup>n</sup> tée ndécu yicá cuéchi-xi cùu tée cächí-n ní quide tátna núú-n —cächí-güedé xäha<sup>n</sup>-güedé xii-dé.

<sup>25</sup> Te ní xáha<sup>n</sup>-dë:

—Yúhú, ñá túú xini-í te núu tée ndécu yicá cuéchi-xi cùu-dé àdi ñáhá. Dícó-ni sá xini-í sá cuää-í ní cùu te vitna ní cuu cundehe-í —cächí-dé xäha<sup>n</sup>-dë xii-güedé.

<sup>26</sup> Te ní xicá<sup>n</sup> tnúhú tucu-güedé núú-dë, te xäha<sup>n</sup>-güedé:

—¿Nása ní quide ñaha-dë xii-n te ní ndúha núú-n-í? —cächí-güedé xäha<sup>n</sup>-güedé xii-dé.

<sup>27</sup> Te ní xáha<sup>n</sup>-dë:

—Yúhú sa ní cähá<sup>n</sup>-í te ñá túú quide cuendá-ndó. ¿Te ná cuendá cuini-ndó cächí tnúhu-ni tucu-í? ¿Á tnáhá-ndó cuini-ndó quindáá iní-ndó tnúhu cähá<sup>n</sup>-dë? —cächí-dé xäha<sup>n</sup>-dë xii-güedé.

<sup>28</sup> Te ní cudéé<sup>n</sup>-güedé núú-dë, te ní xáha<sup>n</sup>-güedé xii-dé:

—Te núu yòhó cuini-n chinchícú<sup>n</sup>-n tée-á<sup>n</sup> te cuahá<sup>n</sup>, dico nchúhú chi canchícú<sup>n</sup> nihnu nahi-ni-ndí nàcuáa ní cähá<sup>n</sup> ndíi Moisés. <sup>29</sup> Te nchúhú chi ñaha-ndí sá Yá Ndiöxí ní cähá<sup>n</sup> ndihí-gá ndíi Moisés, dico tée cächí-n-á<sup>n</sup> chi ni ñà túú xini-ndí ndéé tée cùu-dé —cächí-güedé xäha<sup>n</sup>-güedé xii-dé.

<sup>30</sup> Te ní xáha<sup>n</sup> tée ní ndúha núú-xi-á<sup>n</sup>:

—¿Te náa ñá díú nchòhó cächí-ndó sá ïo túha-ndo? Te núu duca<sup>n</sup> cähá<sup>n</sup>-ndó sá ñà túú xini-ndó ndéé tée cùu-dé, te diu-dé ní quide tátna-dé núú-í ní ndúha —cächí-dé xäha<sup>n</sup>-dë xii-güedé.

Te xáha<sup>n</sup> tucu-dé:

<sup>31</sup> —Xini-ó sá Yá Ndiöxí ñá túú tédòho-gá tnúhu cähá<sup>n</sup> ñáyiú quide nchaa sá cuéhé sá dúhá, chi nchaa ñáyiú quide cahnu ñaha xii-gá te quidé-yu nchaa nàcuáa cùu iní-gá, te ñáyiú-á<sup>n</sup> tédòho-gá tnúhu cähá<sup>n</sup>-yu.

<sup>32</sup> Te ñá íí<sup>n</sup> ndùu cähá<sup>n</sup> ñáyiú cuendá íí<sup>n</sup> tée cada tátna núú íí<sup>n</sup> ñáyiú cuää ndéé ní cacu-xi te ndúha. <sup>33</sup> Te núu ñá díú mèe Yá Ndiöxí ní tendaha ñaha-gá xii tée-á<sup>n</sup> véxi-dé ñá, te vá ndácú-dé cada tátna-dé núú-í ní cùu —cächí-dé xäha<sup>n</sup>-dë xii-güedé.

<sup>34</sup> Te ní xáha<sup>n</sup>-güedé:

—Dico yòhó ndéé yatni vai cuéchi sa ta quide-n véxi, ¿te vitna nacanu ichi ñaha-n xii-ndí cähá<sup>n</sup>-n-á<sup>n</sup>? —cächí-güedé xäha<sup>n</sup>-güedé xii-dé.

Te ní queñuhu ñaha-güedé xii-dé tnuú-güedé ñá túú ní dáña-gá-güedé níhí tnáhá ndihí ñaha-dé xii-güedé.



*Ñáyiú ñá túú ndìxi túú iní cuèndá nchaa sá cuèhé sá dúhá quidé-yu*

35 Te ní níhí Jèsús tnúhu sá ñí queñuhu-güedé tée ní cuhú núú-xi-á<sup>n</sup> tnuú-güedé cuèndá sá vǎ tnàhá tnúhu ndìhí ñaha-gǎ-dé xii-güedé, te ní naníhí ñáhá-gǎ xii-dé te ní xáha<sup>n</sup>-gǎ:

—¿Sàndáá iní-n Dèhe Yá Ndiöxí-ǎ<sup>n</sup>? —càchí-gǎ xáha<sup>n</sup>-gǎ.

36 Te ní xáha<sup>n</sup> tée ní cuhú núú-xi-á<sup>n</sup>: —Mèstrú, cachí tnúhu núu ndèé ndécú tée-á<sup>n</sup> cuèndá quíndáá iní-í-dé —càchí-dé xáha<sup>n</sup>-dǎ xii-gǎ.

37 Te ní xáha<sup>n</sup> Jèsús: —Sa xìní-n-dǎ chi diu-dé cúú yúhú tée ndàtnúhu ndìhí-n —càchí-gǎ xáha<sup>n</sup>-gǎ xii-dé.

38 Te ní ngüíñí xítí-dǎ núú-gǎ, te ní xáha<sup>n</sup>-dǎ:

—Xítóhó Jesucrístú, sàndáá iní ñáhà-í xii-n —càchí-dé xáha<sup>n</sup>-dǎ xii-gǎ.

39 Te ní xáha<sup>n</sup> tùcu Jesús: —Yúhú véxi-í ñuyíú-a cada ndáá-í cuéchi ñáyiú. Te nchaa ñáyiú ñá túú quide váha cùú-yu dàtná ñ<sup>n</sup> ñáyiú cuáá, dico nchaa ñáyiú cùtnuní iní-xi sá ñà túú quide váha, te núu na quíndáá iní-yu tnúhu càhá<sup>n</sup>-í, te cada iní-ndó sǎ dàtná sá ñí nacaá<sup>n</sup> núú-yu chi tñí-yu tnúhu càhá<sup>n</sup>-í. Te ñáyiú càchí sá quidé váha vá núu núu-yu cuéchi-yu chi quesàhá-yu sá ïo ndáá quidé-yu, ñáyiú-á<sup>n</sup> cúú-yu dàtná ñ<sup>n</sup> ñáyiú cuáá, chi vá ndíxí tũu iní-yu sá ñà túú quide váha-yu ndécú-yu, te vá tñí-yu tnúhu càhá<sup>n</sup>-í —càchí-gǎ xáha<sup>n</sup>-gǎ xii-dé.

40 Te sá dúcá<sup>n</sup> ñí càhá<sup>n</sup>-gǎ, núu ní càhá<sup>n</sup> ñ<sup>n</sup> úú cue tée cùu fariséú, te xáha<sup>n</sup>-güedǎ:

—¿Te náa tnàhá nchúhú cuáá-ndí càhá<sup>n</sup>-n-ǎ<sup>n</sup>? —càchí-güedǎ xáha<sup>n</sup>-güedǎ xii-gǎ.

41 Te ní xáha<sup>n</sup> Jèsús: —Te núu dìcò nchòhó cuáá-ndó ñá, te vá cùndècu cuéchi-ndo ni cùu, dico càchí-ndó sǎ ndéhé-ndó ñ<sup>n</sup> sá quidé-ndó te ñá ndáá, núu xǎ<sup>n</sup> ío ndècu cuéchi-ndo.

## 10

*Jèsús càhá<sup>n</sup>-gǎ cuèndá cùrrálí mběé*

1 Te na càchí tnúhu ndáá-í xii-ndo sǎ ñ<sup>n</sup> tée ñá túú quíhu ndàa yuyehe ñ<sup>n</sup> currálí mběé, te cùtexínu-ni na cuidó-dé, tée-á<sup>n</sup> cúú-dǎ ñádúhú. 2 Dico tée quíhu ichi yèhe currálí-güedi, tée-á<sup>n</sup> cúú-dǎ xítóhó-güedi. 3 Te tée ndèé yèhe currálí-güedi nacaá<sup>n</sup>-dé te cuánguihu xítóhó-güedi te ní càhá<sup>n</sup>-dé, te ní nucúhu<sup>n</sup> ndudú ñáhá-güedi xii-dé. Te ní càhá<sup>n</sup> díú-dǎ-güedi te ní queñuhu-dé-güedi cùrrálí. 4 Te sáta ñí quee-güedi cùrrálí, te ní ngódó núú-dǎ núú-güedi, te ní ngüíta nchicú<sup>n</sup> ñáhá-güedi xii-dé chi ní nucúhu<sup>n</sup> ndudú ñáhá-güedi. 5 Te ñá túú chinchicú<sup>n</sup>-güedi ñ<sup>n</sup> tée tàtú, chi núcúhu<sup>n</sup> ndudú-güedi sá ñà díú xítóhó-güedi cùu-dé, núu xǎ<sup>n</sup> xínú-güedi núú-dǎ —càchí-gǎ xáha<sup>n</sup>-gǎ xii-güedǎ.

6 Duha ní càhá<sup>n</sup> Jèsús cuèndá sá cuení-gǎ dacuàhá-yu tnúhu-gǎ ní cùu, dico ñá ní tècú tnùní-yu nása ndùu tnúhu ní càhá<sup>n</sup>-gǎ.

*Jèsús cúú-gǎ dàtná ñ<sup>n</sup> toli*

7 Te ní xáha<sup>n</sup> tùcu Jesús xii-güedǎ: —Na càchí tnúhu ndáá-í xii-ndo sǎ yúhú cúú-í dàtná ñ<sup>n</sup> yèhe currálí núú ndíhu cue mběé. 8 Te nchaa cue tée sa yòdo nuu-gǎ ní quixi ní dándàhú-güedǎ ñáyiú cùu-güedǎ dàtná ñádúhú dùhu-güedǎ cue mběé ní cùu, dico ñá ní quide cuèndá ñáhá-güedi xii-güedǎ, chi ní cutnùní iní-güedi sá ñà díú xítóhó-güedi cùu-güedǎ. 9 Te yúhú cúú-í dàtná yuyèhe currálí cue mběé. Te duca<sup>n</sup> sǎtnahá-xi cùu-í chi nchaa ñáyiú na tùha ñaha xii-í te naníhí tàhú-yu. Te cùu-yu dàtná cue mběé quití xíquee cùrrálí-xi cuáhá<sup>n</sup>-güedi núú cáá ité caxi-güedi, te dàtnùní cuándihu-ná-güedi cùrrálí, duca<sup>n</sup> sǎtnahá-xi cúú-yu.

10 Ñádúhú òré véxi-dé chi dùhu-dé, sàhni-dé te dànaa-dé mběé, dico yúhú chi véxi-í cuèndá sá naníhí tàhú-ndó te ío cudíí iní-ndó cùnu cuechi-ndo núú Dütú Ndiöxí ni caa ni quíhí<sup>n</sup>. 11 Te yúhú cúú-í dàtná ñ<sup>n</sup> toli tée

ío nèhe cuendá mbéé-xi, chi téé-án cuéi na cùu-dé sá cúu-xí mbéé-dé cuendá-ná sá ná cãcu-güedi. <sup>12</sup> Te núu ì<sup>n</sup> téé na còto ñaha xii-güedi, te téé-án cuendá-ni sá ñúhú yãhu-dé xító-dé-güedi. Te núu na quini-dé sáá ì<sup>n</sup> quiti déé<sup>n</sup> te dàña-dé-güedi xinu-dé, te ndi<sup>hi</sup>-güedi xité nuu ñaha quiti déé<sup>n</sup>-ã<sup>n</sup>, chi ñá díú mèi xitohó-güedi cùu-dé. <sup>13</sup> Chi cuendá-ni sá ñúhú yãhu-dé xító-dé-güedi núu ñá túú ná ndihú iní-dé cuéi na dàndi<sup>hi</sup> ñaha quiti cuihna. <sup>14</sup> Te yúhú cùu-í dàtná ì<sup>n</sup> téé ío váha xito mbéé-xi, chi téé-án da ì<sup>n</sup> da ì<sup>n</sup>-di xini-í-dé nãcuáa ndãa-di, te duca<sup>n</sup> xini ñáhã-güedi xii-dé. Te duca<sup>n</sup> sãtnahã-xi cùu yúhú ndi<sup>hi</sup> nchaa ñáyiu sãndãá iní ñáhã xii-í, chi yúhú xini-í-yu te duca<sup>n</sup> mèé-yu xini ñáhã-yu xii-í.

<sup>15</sup> Te diu-ni duca<sup>n</sup> cùu-í ndi<sup>hi</sup> Tãtã-í, chi xini ñáhã-gã xii-í te xini-í-gã. Te sáá nduu cùu-í cuendá nchaa ñáyiu sãndãá iní ñáhã xii-í. <sup>16</sup> Te ndècu-gã ñáyiu vátã quindãá iní ñáhã-gã xii-í. Te xini ñuhu-xi cundedóho-yu tnúhu-í te quindãá iní ñáhã-yu cuendá ì<sup>n</sup>-ná ichi cuú-yu, te duca<sup>n</sup> cùndecu ì<sup>n</sup>-ná téé coto ñaha xii-yu cuu-dé dàtná ì<sup>n</sup> tòlí-yu, te téé coto ñaha xii-yu-án cúu yúhú.

<sup>17</sup> Te Tãtã-í ío cùdí<sup>í</sup> iní ñáhã-gã xii-í cuendá sá sãá ì<sup>n</sup> nduu te cuú-í, te cuú-í chi duca<sup>n</sup> cãchí iní-í, te ñá díú sã cúu iní ñáyiu ñuyú-a cuú-í, te cuú-í dico ndoto-í. <sup>18</sup> Te vá yõ ì<sup>n</sup> te ndacu cahni ñaha xii-í, te núu ñá díú sã cúu iní mèé-í cuú-í. Te dàtnã-ni cùu iní-í sã cùu-í te diu-ni duca<sup>n</sup> ndòto-í chi duca<sup>n</sup> ní cachí Tãtã-í Dútú Ndiõxí cunduu — cãchí-gã xãhã-gã xii-güedé.

<sup>19</sup> Te sã dúcã<sup>n</sup> ní cãhá<sup>n</sup>-gã te ñá ní cùu ì<sup>n</sup> nuu tucu ñáyiu isrãél. <sup>20</sup> Te davã-yu ní xitnãhá-yu:

—¿Nã cuendã sãndãá-tu iní-ndó tnúhu cãhá<sup>n</sup> téé-ã<sup>n</sup>, te yucu ñávãha ndècu ndi<sup>hi</sup>-dé, lúcú téé-ã<sup>n</sup>? — cãchí-yu xitnãhá-yu.

<sup>21</sup> Te davã-yu ní xitnãhá-yu:

—¿Nãa xini-ndó ì<sup>n</sup> téé ndècu ndi<sup>hi</sup> yucu ñávãha duha váha cãhá<sup>n</sup>-dé? ¿Nãa xini-ndó núu ndacu yucu ñávãha

cada tátna-xi núu ì<sup>n</sup> téé cuáá te ndúha? — cãchí-yu xitnãhá-yu.

### *Ñáyiu isrãél dáquèe tíhũ-yu Jèsús*

<sup>22</sup> Te ndi tnahã cuíã ndãdá cãhnú-yu vico veñúhu cãhnu sã ío cùnuu ñuu Jerusãlén, te mei yõ quidé víxi<sup>n</sup>-xi quidé-yu vico-ã<sup>n</sup>. <sup>23</sup> Te corrèdór veñúhu-ã<sup>n</sup> nãní-xí Sãlomón, te xiã<sup>n</sup> xicã cùu Jèsús. <sup>24</sup> Te ní chítú níhnú ñáyiu isrãél núu-gã, te ní xãhã<sup>n</sup>-yu:

—¿Nã ndéé òré cachí tnúhu ndãá-n, te núu sã Crístú Yã ní tendaha Yã Ndiõxí véxi ñuyú-a cùu-n, àdi ná téé cùu-n?, cãhá<sup>n</sup>-ni-n — cãchí-yu xãhã<sup>n</sup>-yu xii-gã.

<sup>25</sup> Te ní xãhá<sup>n</sup> Jèsús:

—Sa ní cachí tnúhu-í te ñá sãndãá iní-ndó, te ndèhe-ndo sã vái núu sã quidé-í sã ní táuchíú<sup>n</sup> Tãtã-í cada-í, te cùu-xi ì<sup>n</sup> sã cùtnúni iní-ndó ná téé cùu-í. <sup>26</sup> Dico nchòhó ñá sãndãá iní-ndó, chi ñá túú cùu-ndo ñáyiu ní chitnahã ñáhã xii-í. <sup>27</sup> Chi nchaa ñáyiu ní chitnahã ñáhã xii-í cùu-yu dàtnã cue mbéé quiti xíndecu ndi<sup>hi</sup> xitohó-xi chi núcúhu<sup>n</sup> ndudú-güedi xitohó-güedi, te duca<sup>n</sup> nãquiní ñáhã-ní xitohó-güedi xii-güedi. Duca<sup>n</sup> sãtnahã-xi cùu nchaa ñáyiu ní chitnahã ñáhã xii-í. <sup>28</sup> Te yúhú cada-í te nduu táhũ-yu cundecu ndi<sup>hi</sup> ñáhã-yu xii-í ni caa ni quíhí<sup>n</sup> te vá ì<sup>n</sup> ndúu-gã cuíta nihnú-yu, te ni vá yõ ì<sup>n</sup> ndacu naquendeé ñáhã xii-yu ndaha-í. <sup>29</sup> Chi Tãtã-í ní taxi cuendã ñáhã-gã xii-yu. Te ío cùnuu-gã núu xiã<sup>n</sup> vá yõ ì<sup>n</sup> ndacu naquendeé ñáhã xii-yu ndaha-gã. <sup>30</sup> Yúhú ndi<sup>hi</sup> Tãtã-í Dútú Ndiõxí ì<sup>n</sup>-ni cùu-ndí — cãchí-gã xãhá<sup>n</sup>-gã xii-yu.

<sup>31</sup> Te ní quehe<sup>n</sup> tucu ñáyiu isrãél yúu cuãha ñáhã-yu xii-gã ní cùu.

<sup>32</sup> Te ní xãhá<sup>n</sup>-gã xii-yu:

—Ío cuéhé sã vãha ní quide-í núu-ndó ní chindee ñaha Tãtã-í Dútú Ndiõxí. ¿Te ndèdacã sã ñá tnahã iní-ndó núu cuini-ndó cuãha ñaha-ndo yúu xii-í-í? — cãchí-gã xãhá<sup>n</sup>-gã xii-yu.

<sup>33</sup> Te ní xãhá<sup>n</sup> ñáyiu isrãél:

—Ñã díú cuendã nchaa sã vãha ni quide-n cuini-ndí cuãha ñaha-ndí yúu xii-n, chi ì<sup>n</sup> di-ni sã ío cãhá<sup>n</sup>

úhú-n cuendá Yă Ndiöxí. Te dicó ì<sup>n</sup> téé ñuyíú-a cùu-n te cächí-n sá cúu-n Ndiöxí —cächí-yu xăhă<sup>n</sup>-yu xii-gá.

<sup>34</sup> Te ní xáha<sup>n</sup> Jèsús:

—Núú tütú Yă Ndiöxí sá ndécú ndìhi-ndo cáhá<sup>n</sup>-xi nàcuáa ní cáhá<sup>n</sup>-gá, te duha ní cachí-gá: “Nchòhó quidé-ndó nùu-í”, duha ní cachí-gá.

<sup>35</sup> Te nàha-o sá vă cúú quèndé nihnu-o tnùhu yòdo tnuní núú tütú Yă Ndiöxí, chi mee-gă ní cachí-gá sá cádá-yu núú-gă, te vă cächí-ó să ñă ndáá. <sup>36</sup> Te núú duca<sup>n</sup> ní cáhá<sup>n</sup>-gá sá nùú-gă quidé nchàa ñáyíu ní sándáá iní ñáhá xii-gá ñá, ¿te ná cuendá cúdéé<sup>n</sup>-ndó nùú yùhú sá cächí-í sá cúu-í Déhe-gá? Te mee Yă Ndiöxí ní tendaha ñàha-gá xii-í véxi-í ñuyíú-a sá cádá-í chiu<sup>n</sup>-gá. <sup>37</sup> Te núú ñá túú quide-í nàcuáa ní táuchíú<sup>n</sup> Tătà-í cada-í ñá, te vă quèndáá iní ñáhá-ndó. <sup>38</sup> Te núú quide-í ñá, te cuèi vă quèndáá iní ñáhá-ndó xii mee-í dico quèndáá iní-ndó nchàa chiu<sup>n</sup> quide-í. Duca<sup>n</sup> te cutnùní ndáá iní-ndó să Yă Ndiöxí ndécú ndìhi-í te ì<sup>n</sup>-ni cùu-ndí —cächí-gá xáha<sup>n</sup>-gă xii-yu.

<sup>39</sup> Te ní cuiní-güedé tni ñaha tucu-güedé xii-gá quihí<sup>n</sup>-gá vecaá ní cùu, dico ní xinu núú ñáhá-gă xii-güedé.

<sup>40</sup> Te ní xica-gá cuáhá<sup>n</sup>-gá ndàa ingá xio yúte Jòrdán núú ní xóo dacuàndute ndíi Juàá ñáyíu ndéé díhna, yàcá<sup>n</sup> ní xindecu-gá. <sup>41</sup> Te yàcá<sup>n</sup> ío vâi ñáyíu ní sáhá<sup>n</sup> ní cáhá<sup>n</sup> ndìhi ñaha xii-gá, te ní xitnàhá-yu:

—Ndíi Juàá, cuèi ñá túú ní quide ndíi sá vă yòo tnàhí ndàcu cada dico ndáá ní cáhá<sup>n</sup> ndíi, chi dàtná-ni ní cáhá<sup>n</sup> ndíi quide téa —cächí-yu xitnàhá-yu.

<sup>42</sup> Te yàcá<sup>n</sup> ío vâi-yu ní sándáá iní ñáhă-yu xii-gá.

## 11

### *Ní xihí té Lăzarú*

<sup>1</sup> Núú Bètaniá ní xindecu ì<sup>n</sup> téé ní xinaní-dě Lăzarú. Te cahuní vîhí ní tnàhá-dé ní cuhú-dé, te ní xindecu ndìhi-dé cue cúha-dé tá Màriá ndìhi tá Màrta chi xiá<sup>n</sup> ñuú-yu. <sup>2</sup> Te tá Màriá-á<sup>n</sup>

cúu-xí xíchí ní sódó àcítí sàhá<sup>n</sup> tnámí sáhá Jèsús, te ní nadayíchí-xi sáhá-gă ndìhi idi díquí-xi. Te cuendá sá cuhú cúha-yu té Lăzarú, <sup>3</sup> núú ní tendàhá-yu ñáyíu nàha tnùhu cuáhá<sup>n</sup> núú Jèsús, te xăhă<sup>n</sup>-yu xii-gá:

—Mèstrú, téé ío cùu iní-n ío cahuní tnàhá-dé cuhú-dé —cächí-yu xăhă<sup>n</sup>-yu xii-gá.

<sup>4</sup> Te sá dúcá<sup>n</sup> cãa tnùhu ní sáá, núú ní xáha<sup>n</sup> Jèsús xii-yu:

—Dico cuéhé-ă<sup>n</sup> chi vă cúu-dé sá cúu dúcá<sup>n</sup>-dě, chi Yă Ndiöxí cuiní-gá sá quiní-yu nchaa sá cádá-gă cuendá chihuhu ñàhá-yu xii-gá, te diu-ni duca<sup>n</sup> chihuhu ñàhá-yu xii yúhú Déhe-gá —cächí-gá xáha<sup>n</sup>-gă xii-yu.

<sup>5</sup> Te cuèi ío cùu iní ñáhá Jèsús xii té Lăzarú ndìhi cue cúha-dé <sup>6</sup> dico òré ní níhí-gă tnùhu, te ní cuyaa-gă úú-gă nduu núú ndécú-gă. <sup>7</sup> Te ní xáha<sup>n</sup>-gă xii cue téé xica cuu ndìhi-gá:

—Na quihí<sup>n</sup> tucu-o dîstrítú Jùdeá —cächí-gá xáha<sup>n</sup>-gă xii-güedé.

<sup>8</sup> Te ní xáha<sup>n</sup> cuè téé xica cuu ndìhi-gá xii-gá:

—Mèstrú, vitna-ni cuiní cue téé isrâél xindecu yàcá<sup>n</sup> cuáha ñaha-güedé xii-n yúú ní cùu, ¿te cuiní-ni tucu-n quihí<sup>n</sup>-n-ú? —cächí-güedé xăhă<sup>n</sup>-güedé xii-gá.

<sup>9</sup> Te ní xáha<sup>n</sup> Jèsús:

—Úxúú òré cúú ì<sup>n</sup> nduu, te núú nduu na cãca cuu-o, te ñá túú nă candaundeé-ó chi cùtnuní núú-ó chi dîtó. <sup>10</sup> Dico núú níú ná cãca cuu-o, te ío ná candaundeé-ó chi vă cùtnuní núú-ó —cächí-gá xáha<sup>n</sup>-gă xii-güedé.

<sup>11</sup> Te ní xáha<sup>n</sup> Jèsús:

—Té Lăzarú téé ío váha tnàhá tnùhu ndìhi-o ní xidí-dé dico quihí<sup>n</sup>-ó chi ndocani-o-dě —cächí-gá xáha<sup>n</sup>-gă xii-güedé.

<sup>12</sup> Te ní xáha<sup>n</sup>-güedé xii-gá:

—Mèstrú, te núú xidí-dé te vãa sa ta ndúha-dé cuáhá<sup>n</sup> —cächí-güedé xăhă<sup>n</sup>-güedé xii-gá.

<sup>13</sup> Duha ní cáhá<sup>n</sup> Jèsús, chi té Lăzarú sa ní xihí-dé te cue téé xica cuu ndìhi-gá ní sani iní-güedé sá ní xidí ndisa-dé. <sup>14</sup> Te Jèsús ní xáha<sup>n</sup> ndáá-gă xii-güedé:

—Sa ní xíhí té Lázaru. <sup>15</sup> Váha-gá sá ñã ní sáhá<sup>n</sup>-í quíngoto-í-dé, chi ndècu ingá chiú<sup>n</sup> cada-í quini-ndó, te quíndáá iní ñáhá-gá-ndó xii-í, te vitna na quíhí<sup>n</sup>-ó núú ndécú yìquì cuñú ndí —càchí-gá xáha<sup>n</sup>-gã xii-güedé.

<sup>16</sup> Te té Mǎxí téé xáha<sup>n</sup>-güedé cuáchí ní xáha<sup>n</sup>-dè xii dava-gá-güedé:

—Na quíhí<sup>n</sup>-ó nchàa-o chi yàcá<sup>n</sup> cuú-ó ndíhi-dé —càchí-dé xáha<sup>n</sup>-dè xii-güedé.

*Jèsús càhá<sup>n</sup>-gá sá cuèi na cùú ñáyiu dico ndotó-yu cundecú-yu ndíhi-gá*

<sup>17</sup> Te òré ní sáá Jèsús ñuú Bètania, te ní xáhã<sup>n</sup>-yu sá sà ní cuu cúmí nduu ní xíhí té Lázaru. <sup>18</sup> Te ñuú-á<sup>n</sup> cáá yàtni-ni-gá ñuú Jerusàlén, dàtná cuádava-ná òré cuhu<sup>n</sup>-o ìchi te saá-ó. <sup>19</sup> Nuu xíã<sup>n</sup> vãi ñáyiu isràél ní sáhã<sup>n</sup>-yu ní càhá<sup>n</sup> ndíhi-yu tá Mǎrta ndíhi cúhú-xi tá Màriá, te ní sáñhá<sup>n</sup>-yu tñuhu ndee iní sá dúcá<sup>n</sup> ñí xíhí cúha-yu. <sup>20</sup> Te ní níhí tá Mǎrta tñuhu sá ññhú Jèsús ichi cuáhã<sup>n</sup>-gá núú ndécú-yu núú ní sáhã<sup>n</sup>-xi ní sátnahá-xi-gá, te cúhú-xi tá Màriá ní ndóo-xi vehe. <sup>21</sup> Te òré ní naníhí tá Mǎrta Jèsús, te ní xáha<sup>n</sup>-xi xii-gá:

—Mèstrú, te núú dícó ní xíndecu-n ìha te vá cùú cúha-ndí ní cùu. <sup>22</sup> Te cuèi vitna te núú ná sá ná càcá<sup>n</sup>-n núú Yá Ndiõxí te taxi-gá xii-n —càchí-xi xáha<sup>n</sup>-xi xii-gá.

<sup>23</sup> Te ní xáha<sup>n</sup> Jèsús:

—Vá ndíhú iní-n chi ndoto cúha-n —càchí-gá xáha<sup>n</sup>-gã xii-xi.

<sup>24</sup> Te ní xáha<sup>n</sup> tá Mǎrta:

—Ndáá chi sa xini-í sá ndótó-dè ná quítnahá nduu ndoto nchaa ñáyiu ní xíhí —càchí-xi xáha<sup>n</sup>-xi xii-gá.

<sup>25</sup> Te ní xáha<sup>n</sup> Jèsús:

—Yúhú dandòto-í-yu cuendá cundecú-yu ni caa ni quíhí<sup>n</sup> ná sàá nduu. Te nchaa ñáyiu na quíndáá iní ñáhã xii-í, te cuèi na cùú-yu dico ndotó-yu cundecu-í ndíhi-yu ni caa ni quíhí<sup>n</sup>. <sup>26</sup> Te nchaa ñáyiu ndècu vívú ñuyíú-a te núú na quíndáá iní ñáhã-yu xii-í, te cundecu ndíhi-í-yu ni caa ni quíhí<sup>n</sup>. ¿Sàndáá iní-n tñuhu-a ñã? —càchí-gá xáha<sup>n</sup>-gã xii tá Mǎrta.

<sup>27</sup> Te xáha<sup>n</sup>-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yá Ndiõxí, Yaá ní tendaha-gã véxi ñuyíú-a —càchí-xi xáha<sup>n</sup>-xi xii-gá.

*Jèsús ndáhí-gá núú ñí nguíndüxi té Lázaru*

<sup>28</sup> Sátá dúcá<sup>n</sup> ñí càhá<sup>n</sup>-xi te ní sáhã<sup>n</sup> ngana-xi cúhú-xi tá Màriá, te dayuhu ní xáha<sup>n</sup>-xi:

—Yácá<sup>n</sup> ní quexìo Mèstrú, te càna ñaha-dé xii-n —càchí-xi xáha<sup>n</sup>-xi.

<sup>29</sup> Te sá dúcá<sup>n</sup> xáha<sup>n</sup> cúhú tá Màriá sá cáná ñaha Jèsús xii-xi, núú ndíhi-ni ní xica-xi cuáhã<sup>n</sup>-xi núú ndécú-gã. <sup>30</sup> Te Jèsús vátá quíhu-gá xití ñuú, chi ndècu-ni-gá núú ñí sáhã<sup>n</sup> tnahá ñáhã tá Mǎrta. <sup>31</sup> Te ñáyiu isràél ndécú sáñaha tñuhu ndee iní xii tá Màriá ndíhi cúhú-xi ní sani iní-yu sá cuáhã<sup>n</sup>-xi núú yíndüxi cúha-xi ndáhyú-xi ní càhã<sup>n</sup>-yu, núú nchicú<sup>n</sup>-yu-xi cuáhã<sup>n</sup>.

<sup>32</sup> Te ní sáá tá Màriá núú ndécú Jèsús te ní nguíñí xití-xi núú-gã, te xáha<sup>n</sup>-xi xii-gá:

—Mèstrú, te núú dícó ní xíndecu-n ìha te vá cùú cúha-ndí ní cùu —cachí-xi xáha<sup>n</sup>-xi xii-gá.

<sup>33</sup> Te sá ñí xiní Jèsús ndáhyú tá Màriá ndíhi ñáyiu isràél nchicú<sup>n</sup> ñáhã cuáhã<sup>n</sup>, xíã<sup>n</sup> ío ní cuyica iní-gá. <sup>34</sup> Te ní xáha<sup>n</sup>-gã xii-yu:

—¿Ndèé ní taxi ndecu-ndo yìquì cuñú-dé-í? —càchí-gá xáha<sup>n</sup>-gã xii-yu.

Te ní xáhã<sup>n</sup>-yu:

—Mèstrú, néhé ná quíhí<sup>n</sup>-ó te quini-n —càchí-yu xáhã<sup>n</sup>-yu xii-gá.

<sup>35</sup> Te ní ndáhyú-gá tnahá-gá. <sup>36</sup> Te ní xitnàha ñáyiu isràél:

—Súúni cùu iní-dé ndíi ni cùu —cachí-yu xitnàhá-yu.

<sup>37</sup> Te davá-yu xitnàhá-yu:

—Té-a ní quide tátna-dé núú téé cuáá te ní ndúha. ¿Te nása ní cuu núú ñá túú ní quide tátna-dé té Lázaru cuendá sá vã cùú-dé ní cùu-í? —cachí-yu xitnàhá-yu.

*Jèsús dándòto-gá té Lázaru*

<sup>38</sup> Te ío ní cuyica tucu iní Jèsús òré ní quexìo-gá yuhu yàú núú ñí chihi-güedé yìquì cuñú té Lázaru. Te



yuhu yaú-án ndèdí ìn yúú. <sup>39</sup> Te ní xáha<sup>n</sup> Jèsús xií-yu:

—Chí xócàni yúú-ǎ<sup>n</sup> —càchí-gá xáha<sup>n</sup>-gǎ xií-yu.

Te ní xáha<sup>n</sup> tǎ Mǎrta cúha téé ní xíhí-ǎ<sup>n</sup>:

—Mèstrú, sa tucu sàhá<sup>n</sup>-dé chi sa ní cuu cúmí nduu sá ní xíhí-dé —càchí-xi xáha<sup>n</sup>-xi xii-gá.

<sup>40</sup> Te ní xáha<sup>n</sup> Jèsús:

—¿Náa ñá díú ní cachí-í sá ñu na quíndáá iní-n, te quiní-n sǎ ìo càhnu cuu Yá Ndiǒxí? —càchí-gá xáha<sup>n</sup>-gǎ xii-xi.

<sup>41</sup> Te ní xócání-yu yúú ndèdí yuhu yaú-án. Te ní ndacoto-gá andíu, te ní xáha<sup>n</sup>-gǎ xii Tǎtá-gǎ Dútú Ndiǒxí:

—Táu, ndàcání tǎhù-í núú-n sǎ ní tédoho-n tnúhu ní cáhá<sup>n</sup>-í. <sup>42</sup> Te yúhú sa náha-í sá ncháá-ni òré ndédóho ñaha-n xii-í, dico duha cáhá<sup>n</sup>-í cuèndá sá ná tècú dóho nchaa ñáyiú ndècu iha cuèndá quíndáá iní-yu sá díú-n ní tendaha ñaha-n xii-í véxi-í ñuyíú-a —càchí-gá xáha<sup>n</sup>-gǎ xii Dútú Ndiǒxí.

<sup>43</sup> Te sátá dúcá<sup>n</sup> ní cáhá<sup>n</sup>-gá ndihí Yá Ndiǒxí, te níhi ní cáhá<sup>n</sup>-gá xáha<sup>n</sup>-gǎ xii téé ní xíhí-ǎ<sup>n</sup>:

—¿Lázaru, tandèe xía<sup>n</sup>! —càchí-gá xáha<sup>n</sup>-gǎ xii-dé.

<sup>44</sup> Te ní ndee téé ní xíhí-ǎ<sup>n</sup> yaú-án, te ndùtu dóó cuíñí ndàha-dé ndihí sáhá-dé, te dàhu tucu ìn dóó ñúú-dé. Te ní xáha<sup>n</sup> Jèsús xii-yu:

—Chí nándàxi-dé te dañà-ndo-dé ná cáca-dé —càchí-gá xáha<sup>n</sup>-gǎ xii-yu.

*Ndùcu-güedé nàcuáa cada-güedé cahni-güedé Jèsús*

(Mt. 26:1-5; Mr. 14:1-2; Lc. 22:1-2)

<sup>45</sup> Te nchaa ñáyiú nchìcú<sup>n</sup> ñáhá xii tá Màriá cuáhá<sup>n</sup> ío vai-yu ní sándáá iní-yu Jèsús sá ní xiní-yu nàcuáa ní quide-gá. <sup>46</sup> Dico davá-yu ní sáhá<sup>n</sup>-yu núú cuè téé cùu fariséú, te ní caní-yu cuèndú núú-güedé nàcuáa ní quide Jèsús. <sup>47</sup> Te cue téé cùu fariséú ndihí cue dútú cùnùu ní natacá-güedé ní xóo-güedé jùndá, te ní xítñàha-güedé:

—¿Nása cada-o?, chi téé-ǎ<sup>n</sup> ío vai sá vǎ yǒo tñahí ndàcu cada quide-dé.

<sup>48</sup> Te núu na dàña ío te nchaa ñáyiú quíndáá iní ñáhá-yu xii-dé, te quixi

cue téé ñuú Rómá dangòyo-güedé veñúhu-o te danàa-güedé nchaa ñuú-ó —càchí-güedé xítñàha-güedé.

<sup>49</sup> Te ìn cue téé-án nání-dé Caifás, te cùnùu-gá-dé núú dàva-gá cue dútú cuíá-ǎ<sup>n</sup>, te ní xáha<sup>n</sup>-dǎ xii-güedé:

—Nchòhó ni lùha ñá túú cùnùní iní-ndó. <sup>50</sup> Te ni ñǎ sǎha-ndo cuèndá sá vǎha-gá tnahá-ó, te núu na cùu ìn-ni téé cuèndá nchaa ñáyiú isràél, te ñá díú sǎ dánàa ñaha-güedé xií-yu —càchí-dé xáha<sup>n</sup>-dǎ xii-güedé.

<sup>51</sup> Dico té Caifás chi ñá díú sǎ cúú iní mée-dé ní cáhá<sup>n</sup>-dé, chi cuèndá sá cuíá-ǎ<sup>n</sup> ní cùnùu-dé núú cuè dútú, núu xía<sup>n</sup> Yá Ndiǒxí ní dácáhú iní ñáhá-gǎ nàcuáa cáhá<sup>n</sup>-dé sá Jèsús cuú-gá sá cúú-xí nchaa ñáyiú isràél.

<sup>52</sup> Te ñá díú cuèndá mee-ni ñáyiú-án cuú-gá, chi cuú-gá tñahá cuèndá nchaa ñáyiú ní sándáá iní ñáhá xii-gá, ñáyiú nchítènuu nihí ñuyíú, te ìn-ñǎ cuú-yu ndihí-gá. <sup>53</sup> Núu ndéé nduu-ǎ<sup>n</sup> ní ndatnúhu cue téé cùnùu núú ñáyiú isràél nàcuáa cada-güedé cahni-güedé Jèsús.

<sup>54</sup> Te xía<sup>n</sup> ñuú ñá ní xica cuu-gá Jèsús quiní ñáhá ñáyiú isràél, te ní quee-gá cuáhá<sup>n</sup>-gá ñuú Efráin, ìn ñuú cáa yàtni yucu, yàcá<sup>n</sup> ní ngüíñí-gá ndihí cue téé xica cuu ndihí-gá.

<sup>55</sup> Te ta cùyatni nduu cadá-yu vico páscaá. Te cuéhé ñáyiú ní quee-yu ñuú-yu cuáhá<sup>n</sup>-yu ñuú Jerusalén cuèndá sá sà ndihí-yu ncháa-yu nduu íí, te tnahá nduu vico páscaá. <sup>56</sup> Te yàcá<sup>n</sup> nándúcú-yu Jèsús ní cùu te ñá túú-gǎ òré-án, te ní naníhí tñahá-yu xítí veñúhu, te xítñàhá-yu:

—¿Nása sàni iní-ndó-í? ¿Quixi Jèsús vico ǎ<sup>n</sup> ñáhá? —càchí-yu xítñàhá-yu.

<sup>57</sup> Te cue téé cùu fariséú ndihí cue dútú cùnùu sa ní xáha<sup>n</sup>-güedé xii ñáyiú sá ñuú ndéda-ni cáa-yu xiní-yu núú ndécú Jèsús te na cáhá<sup>n</sup>-ni-yu cuèndá tñi ñaha-güedé xii-gá.

## 12

*Ìn ñadìhí chíhí-án Jèsús acití*  
(Mt. 26:6-13; Mr. 14:3-9)

1 Ìnú-gá nduu cùmání tnahá vico pascuá, te ní sáhá<sup>n</sup> Jèsús ñuú Bètaniá, ñuú té Lázaruú téé ní dándótó-gă. 2 Te xíá<sup>n</sup> ñí cadúha-yu sá ñí cudìni Jesús. Te tá Mărta ní sani-xi cóhó, te té Lázaruú yíhí-dě mèsá ndihí Jèsús, ndihí dava-gá-güedé xéxí-güedé. 3 Te tá Măriá néhé-xí cuádava lítrú acítí sáhá<sup>n</sup> tnámí sã ìo ndèyáhu, te acítí-á<sup>n</sup> ñí cuáha mee-ni yücú nãrdú, te ní sódó-xi sáhá Jèsús, te ní nadayìchí-xi ndihí idi díquí-xi sáhá-gă. Te ñihí xítí vehe ní xíté nuu dicó acítí-á<sup>n</sup>. 4 Te té Jùdás déhe té Xímú Iscarioté ñuú-ñí ñí tée xica cuu ndihí-gá, téé cuáha cuendá ñáhá xii-gá núú cuè téé cùu úhú iní ñáhá ñí xáha<sup>n</sup>-dě xii-gá:

5 —¿Ná cuendá ñá ní cùyáhu acítí-a sá ùní ciendú díhú<sup>n</sup> denariú cuu cuendá ñáyíu ndàhú? —càchí-dé xáha<sup>n</sup>-dě xii-gá.

6 Dico sá dúcá<sup>n</sup> ñí cáhá<sup>n</sup> té Jùdás chi ñá díú sã ndísá ñùhu iní-dé ñáyíu ndàhú chi dicó-ñí ñí ñádúhú cúú-dě, chi ñuú-dé néhé cuendá-dé díhú<sup>n</sup>-güedé nchaa-güedé te ní xóo duhu ñàha-dé xii-güedé. 7 Te ní xáha<sup>n</sup> Jèsús:

—Daña, vá dásatú-n ñí xíchí-a na tàxúha nahi-xi àcítí-a, chi nàndihí ndéé òré ná nguñdũxi-í. 8 Chi nchòhó chi cuhú<sup>n</sup> tnahá-ñí ñáyíu ndàhú tnuú-ndó, dico yúhú chi vá ncháá ndùu cundecu ndihí ñàha-í xii-ndo —càchí-gá xáha<sup>n</sup>-gă xii-dé.

*Tnahá té Lázaruú cuini-güedé cahni ñàha-güedé xii-dé*

9 Te vai ñáyíu isràél ní ñihí-yu tnúhu sá ndécú Jèsús ñuú Bètaniá. Te ní sáhá<sup>n</sup>-yu cuendá quini-yu-gá, te quini-yu tnahá té Lázaruú téé ní dándótó-gă. 10 Te cue dútú cùnùu ní ndatnúhu-güedé ní cuu ñí nuu-güedé cuendá sá cáhni-güedé tnahá té Lázaruú ní cùu, 11 chi ñuú cuendá téé-á<sup>n</sup> ñí cuu cuéhé ñáyíu isràél tá dàña ñí-ñuú-yu-güedé cuáhá<sup>n</sup> cuendá sá ñí sándáá iní-yu Jèsús.

*Jèsús cuanguihu-gá ñuú Jerusàlén*  
(Mt. 21:1-11; Mr. 11:1-11; Lc. 19:28-40)

12 Te nduu tnée-á<sup>n</sup> vai ñáyíu ní quexio ñuú Jerusàlén cuendá cundécú-yu vico, te ní ñihí-yu tnúhu sá Jèsús sáhá-gá tnahá-gá cundecu-gá vico-á<sup>n</sup>, 13 núu ní xehndé-yu ndaha yùtnu ñuú, te nèhé-yu ní sáhá<sup>n</sup> ní sátnahá ñáhã-yu xii-gá. Te ñihí ní cáhá<sup>n</sup>-yu, te càchí-yu:

—Ío càhnu cuu Yá Ndiõxí! Te duca<sup>n</sup>-ñí ìo càhnu cuu Yaá ní tendaha-gă véxi quindaha ñàha xii-o —duha ní cachí-yu.

14 Te Jèsús ní ñihí-gă ñí bürü, te yòdo-gá-dí cuáhá<sup>n</sup>. Te duca<sup>n</sup> ñí cuu chí ní quee ndáá-xi nàcuáa càhá<sup>n</sup>-xi núú tütú Yá Ndiõxí núú càchí-xi:

15 Vá yùhú nchòhó cue ñáyíu ndècu ñuú Siòn,

chi iha véxi téé yindaha ñàha xii-ndo yodo-dé ñí bürü.

Duha càchí-xi núú tütú-gá. 16 Dico cue téé xica cuu ndihí Jesús ñá ní ndàcu iní-güedé nàcuáa càhá<sup>n</sup>-xi núú tütú Yá Ndiõxí nàcuáa cada Jèsús. Dico sátá cuándaa-gá andiu càda cahnu ñàha Tátá-gă xii-gá, te ní ndacu iní-güedé sá dúcá<sup>n</sup> yòdo tnuní nàcuáa cada-gá, te duca<sup>n</sup> ñí cuu.

17 Nchaa ñáyíu ní xíndecu ndihí Jèsús òré ní dándótó-gă té Lázaruú, ya yacá<sup>n</sup> ní caní-yu cuendú núú ñáyíu nàcuáa ní quide ñàha-gă xii-dé. 18 Te vai-yu ní sáhá<sup>n</sup>-yu núú ndécú Jèsús cuendá sá ñí ñihí-yu tnúhu ní quide-gá sá vã yòo tnahí ndàcu cada. 19 Te cue téé cùu fariséú ní xitnàha-güedé:

—Ní xito-ndo nã ñá túú nàndihí sá quidé-ó-vá, chi nchaa ñáyíu ní chinchícú<sup>n</sup> ñáhã-yu xii-dé —càchí-güedé xitnàha-güedé.

*Ñáyíu ñá túú cùu ñáyíu isràél nándúcú-yu Jèsús*

20 Te tnahá ñáyíu ñá túú cùu ñáyíu isràél ní sáhá<sup>n</sup>-yu vico ñuú Jerusàlén ní quide càhnu-yu Yá Ndiõxí. 21 Te ñáyíu-á<sup>n</sup> ñí sáhá<sup>n</sup>-yu núú tã Lìpé téé ñuú Bètsaidá, te ñuú-á<sup>n</sup> yíndèhu-xi dis-tritú Galileá. Te ní xáhã<sup>n</sup>-yu xii-dé:

—Tátá, vá cùndèe iní-n càchí tnúhu-n ñuú ndèé ndécú Jèsús,

chi cuiní-ndí cáhá<sup>n</sup> ndíhi-ndí-gá — cächí-yu xáhã<sup>n</sup>-yu xii-dé.

<sup>22</sup> Te té Lìpé ní naníhí-dě té Ndríxi te ní xáha<sup>n</sup>-dë nàcuáa càhá<sup>n</sup>-yu, te ndi ndùú-güedé ní sáhã<sup>n</sup>-güedé ní xáha<sup>n</sup>-güedé xii Jèsús nàcuáa càhá<sup>n</sup>-yu.

<sup>23</sup> Te ní xáha<sup>n</sup> Jèsús xii-güedé:

—Vitna ní cuyatni òré cada càhnu ñaha Tátà-í xii-í, te quiní-yu sá ïo càhnu cuu yúhú Tée cùu ñaní tnáhã-yu nchaá-yu. <sup>24</sup> Te na cächí tnúhu ndáá-í xii-ndo sã nõu ì<sup>n</sup> tatá vá ngávã-xí nõú ñúhú tēhyú-xi ña, te diu-ni duca<sup>n</sup> cùnduu-xi cundecu-xi. Dico ì<sup>n</sup> tatá ná ngávã nõú ñúhú xínu dēhe-xi, te xíã<sup>n</sup> nádacayá tnáhã-xí, te mee-xi tēhyú-xi.

<sup>25</sup> Te nchaa ñáyiú ïo ñúhu iní-xi cundecu ñuyíú-a ñá túú ñúhu iní-yu Yá Ndiõxí, te ñáyiú-á<sup>n</sup> cuíta nihnú-yu. Te nchaa ñáyiú ïo ñúhu iní ñáhã xii Yá Ndiõxí, ñáyiú-á<sup>n</sup> cundecú-yu ndíhi-gá ni caa ni quíhí<sup>n</sup>. <sup>26</sup> Te nchaa ñáyiú cuiní cunu cuechi nõù-í xini ñuhu-xi natuha ñahã-yu xii-í, te nduu táhũ-yu cundecú-yu nõú nõhú-í cundecu-í. Te nchaa ñáyiú na cunu cuechi nõù-í, te cada càhnu ñaha Tátà-í xii-yu — cächí-gá xáha<sup>n</sup>-gã xii-güedé.

*Jèsús càhá<sup>n</sup>-gá sá cáhni ñàha-güedé xii-gá*

<sup>27</sup> Te ní xáha<sup>n</sup> tucu-gá:

—Ío ndíhú iní-í. Te cúñaha-í xii Tátà-í taunihnu ñaha-gã nõu dícó sá cúú, dico vá cúú chi cuendá tnáhã-a véxi-í — cächí-gá xáha<sup>n</sup>-gã xii-güedé.

<sup>28</sup> Te ní xáha<sup>n</sup>-gã xii Tátã-gã Dútú Ndiõxí:

—Táu, cada nàcuáa ní sani iní-n cùnduu cuendá sá ná cádá càhnu ñaha ñáyiú xii-n — cächí-gá xáha<sup>n</sup>-gã.

Te duca<sup>n</sup> te ní tecú ní cáhá<sup>n</sup> Yá Ndiõxí ndéé andíu, te cächí-gá:

—Sa ní quide-í nàcuáa cachí ñáyiú sá ïo càhnu cuu-í. Te cada tucu-í cuendá cada càhnu ñaha-gã-yu xii-í — cächí Yá Ndiõxí xáha<sup>n</sup>-gã xii Déhe-gã.

<sup>29</sup> Te nchaa ñáyiú xindecu ní tecú dóho-yu ní cáhá<sup>n</sup>-gã, dico ñá túú ní sãni iní-yu sá mée-gã ní cáhá<sup>n</sup>, chi davã-yu ní xitnãhá-yu sã ñúhu ní cáhá<sup>n</sup>, te davã-yu ní xitnãhá-yu sã ì<sup>n</sup>

espíritú xínu cuèchi nõú Yá Ndiõxí ní cáhá<sup>n</sup>. <sup>30</sup> Te ní xáha<sup>n</sup> Jèsús xii-yu:

—Ñá díú cuendá yúhú ní cáhá<sup>n</sup> Yá Ndiõxí, chi ní cáhá<sup>n</sup>-gã cuendá sã nchòhó cundedóho-ndo. <sup>31</sup> Te vitna ní sáá nduu càda ndáá Yá Ndiõxí cuèchi nchaa ñáyiú ñuyíú-a, te duca<sup>n</sup> te vá cùnũ-gã yucu ñãvãha. <sup>32</sup> Te na càta caa ñaha-güedé xii-í nõú cùrúxí, te xíã<sup>n</sup> cuú-í te níhí-yu tnúhu ni càa xico ñuyíú, te quindáá iní-yu tnúhu-í — cächí-gá xáha<sup>n</sup>-gã xii-yu.

<sup>33</sup> Duha ní cáhá<sup>n</sup>-gã cuendá cutnùnì iní-yu nàcuáa ndoho-gã òré cuú-gã.

<sup>34</sup> Te ní xáhã<sup>n</sup>-yu xii-gã:

—Níhí-ndí tnúhu sá nõú tütú yódó tnùnì tnúhu Yá Ndiõxí càhá<sup>n</sup>-xi sá Crístú Yaá tendaha-gã quixi ñuyíú-a cundecu-gã ni caa ni quíhí<sup>n</sup>. ¿Te yòhó nása càhá<sup>n</sup>-tu-n sã ì<sup>n</sup> tée cùu ñaní tnáhã nchãa ñáyiú ñuyíú-a cahni ñaha-güedé nõú cùrúxí? Te cachí tnúhu-n ná cúú tē-á<sup>n</sup> — cächí-yu xáhã<sup>n</sup>-yu xii-gã.

<sup>35</sup> Te ní xáha<sup>n</sup> Jèsús:

—Yúhú cúú-í dàtnã ì<sup>n</sup> ñuhú dáyehe ñuyíú-a, dico sacú-ni nduu ndècu ndíhi ñaha-í xii-ndo. Te caca-ndo ìchi ndáá vitna dáyehe-gã-í nõú-ndó chi na cùnee te vá cùtnùnì-gã nõú-ndó ndèe ìchi quíhí<sup>n</sup>-ndó. <sup>36</sup> Quindáá iní ñáhã-ndó xii-í vitna ndècu ndíhi ñaha-gã-í xii-ndo dandixi túu-í iní-ndó, cuendá cutnùnì iní-ndó nàcuáa nduu cuendá Yá Ndiõxí, te cuu-ndo dēhe-í — cächí-gá xáha<sup>n</sup>-gã xii-yu.

Te sátã dúcã<sup>n</sup> ni cáhá<sup>n</sup> Jèsús, te ní quee-gã cuáhã<sup>n</sup>-gã ì<sup>n</sup> nõú vã ná níhí ñáhã-yu xii-gã.

*Ñáyiú isràel ñá cuiní-yu quindáá iní-yu Jèsús*

<sup>37</sup> Te cuèi ïo vãi sã vã yõo tnãhí ndàcu cada ní quide Jèsús ní xiní-yu, dico ni dùca<sup>n</sup> ñá túú ní sãndáá iní-yu-gã. <sup>38</sup> Te duca<sup>n</sup> ni quide-yu chi dacuití ni quee ndáá-xi nàcuáa ní chídó tnùnì ndí Chàia ndí ní cáhá<sup>n</sup> tnúhu Yá Ndiõxí ndéé sanaha nõú tütú-gã nõú cächí-xi:

Yòhó Yaá cúú Xitohó-í, vá yõo ì<sup>n</sup> sãndáá iní tnúhu càhá<sup>n</sup>-ndí.

Te vá yõo ñ<sup>n</sup> cùtnuní iní-xi sá ïo càhnu cuu-n.

Duha ní chídó tnùní ndíi Chàia núú tütú-gá. <sup>39</sup> Te ñá ní sàndáá iní-yu chi ní quee ndáá-xi nàcuáa ní chídó tnùní tucu ndíi Chàia núú tütú Yá Ndiõxi nàcuáa cáhá<sup>n</sup> Jèsús:

<sup>40</sup> Mee Yá Ndiõxi ní quide-gá sá vã təcú tnùní-yu, chi ní dádãhu ndodo iní ñáhá-gã xií-yu,

chi ío sáá iní-yu núú ñá ní cuiní-gá-yu quindáá iní ñáhã-yu xii-gá.

Te ni vã túhá ñáhá-yu xii yúhú cuendá dacacu nihnu-í-yu.

<sup>41</sup> Duha ní chídó tnùní ndíi Chàia nàcuáa cáhá<sup>n</sup> Jèsús chi ní xiní ndíi sá ïo càhnu cuu-gá.

<sup>42</sup> Te cuèi duca<sup>n</sup> ñí cuu dico titní cue tée cùnunu núú ñáyiu israél ní sàndáá iní ñáhá-güedé xii-gá. Dico ñá túú ní xõo cáhá<sup>n</sup> ndáá-güedé chi ní xõo yùhú-güedé sá vã dáñá-gã cue tée cùu fariséu quíhu-güedé veñúhu. <sup>43</sup> Chi ní xõo cudí-gã iní-güedé sá cáhá<sup>n</sup> ñáyiu dàcúxí tnúhu cáhá<sup>n</sup> Yá Ndiõxi.

*Ñáyiu ñá túú sàndáá iní tnúhu Jèsús cuíta nihnú-yu*

<sup>44</sup> Jèsús níhi ní cáhá<sup>n</sup>-gá, te càchí-gá: —Nchaa ñáyiu na quindáá iní ñáhá xii-í, te ñá díú-ní mèe-í quindáá iní-yu, chi tnàhá Tàtá-í Yaá ní tendaha ñàha xii-í véxi-í ñuyíú-a quindáá iní-yu. <sup>45</sup> Te ñáyiu xiní ñáhá xii yúhú xiní-yu tnàhá Tàtá-í. <sup>46</sup> Te yúhú véxi-í dandixi túu-í iní ñáyiu ñuyíú-a cuendá cutnùní iní-yu nàcuáa ndùu cuendá Yá Ndiõxi, te nchaa ñáyiu na quindáá iní ñáhá xii-í te vá cùndècu-gá-yu ichi cuèhé ichi duha. <sup>47</sup> Te núu ìo davá-yu ndèdóho-yu nàcuáa cáhá<sup>n</sup>-í te ñá túú tní-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dácúta nihnu-í-yu, chi véxi-í sá dácacu nihnu-í-yu. <sup>48</sup> Te nchaa ñáyiu na cùyíchí iní ñáhá xii-í te ñá túú quide cuendá-yu nàcuáa cáhá<sup>n</sup>-í, te ñáyiu-án ná sáá nduu te cuíta nihnú-yu chi ñá ní tní-yu tnúhu ní cáhá<sup>n</sup>-í. <sup>49</sup> Te yúhú ñá túú cáhá<sup>n</sup>-í tnúhu véxi iní mèe-í, chi mee

Tàtá-í Yaá ní tendaha ñàha xii-í véxi-í ñuyíú-a ní cachí tnúhu-gá nàcuáa cunduu tnúhu cáhá<sup>n</sup>-í danèhé-í ñáyiu. <sup>50</sup> Te yúhú xiní-í sá tnúhu ní táuchíú<sup>n</sup> Tàtá-í cáhá<sup>n</sup>-í cúú-xí ñ<sup>n</sup> sá vãha sá cúú xii-ndo chi nduu táhú-ndó cùndecu-ndo ndíhi-gá ni caa ni quíhí<sup>n</sup>, núu xíá<sup>n</sup> cáhá<sup>n</sup>-í nchaa nàcuáa ní táuchíú<sup>n</sup>-gã —càchí-gá xáha<sup>n</sup>-gã xií-yu.

## 13

*Jèsús náquète-gá sáhá cuè tée xica cuu ndíhi-gá*

<sup>1</sup> Te cùmání-gã tnahá vico pàscuá, te Jèsús sa nàha-gá sá sà ní cuyatni òré dandóo-gá ñuyíú-a, te ndaa-gá núú ndécú Tàtá-gã. Te ío ní cuu iní-gá nchaa ñáyiu ní sàndáá iní ñáhá xii-gá, te ní quide ndisa-gá sá ñí cuu iní ñáhá-gã xií-yu.

<sup>2-4</sup> Te ní quíhu yucu ñávãha díquí tẽ Jüdás déhe té Xímú Iscarioté, te ní sani iní-dé nàcuáa cada-dé cuáha cuendá-dé Jèsús núú cuè tée cùu úhú iní ñáhá xii-gá. Te Jèsús sa nàha-gá sá mée Yá Ndiõxi Yaá cúú Tàtá-gã ní sáñaha-gã tnúhu ndee iní xii-gá sá cádá-gã núú-gã, te nàha-gá sá díú núú Tàtá-gã ní quee-gá véxi-gá ñuyíú-a. Te sáá nduu nàsá tucu-gá núú Tàtá-gã. Te cùdini Jèsús ndíhi cue tée xica cuu ndíhi-gá ní cùu, te ní ndacuíní-gá yuhu mèsá, te ní taunuu-gá ñ<sup>n</sup> dóo níhnú-gã, te ní quehe<sup>n</sup>-gá ñ<sup>n</sup> dóo ñí dácútú-gã núú yíquí-gã. <sup>5</sup> Te ní chihi-gá ndute ñ<sup>n</sup> tina, te xíá<sup>n</sup> ñí naquète-gá sáhá cuè tée xica cuu ndíhi-gá, te ndíhi dóo ndútú núú yíquí-gã-á<sup>n</sup> ñí nadayíchí-gá sáhá-güedé.

<sup>6</sup> Te òré naquète-gá sáhá tẽ Xímú, àdi Pelú, ní cùu ní xáha<sup>n</sup>-dẽ xii-gá:

—Mèstrú, ¿te yòhó naquète-n sáhá-í-u? —càchí-dé xáha<sup>n</sup>-dẽ xii-gá.

<sup>7</sup> Te ní xáha<sup>n</sup> Jèsús:

—Vitna ñá cùtnùní iní-n sá quidè-í-a dico sáá nduu te cutnùní iní-n —càchí-gá xáha<sup>n</sup>-gã xii-dé.

<sup>8</sup> Te ní xáha<sup>n</sup> tẽ Pèlú:



—Yúhú chi vá ñ<sup>n</sup> ndùu te naquete-n sàhà-í —càchí-dé xàhà<sup>n</sup>-dë xii-gá.

Te ní xáha<sup>n</sup> Jèsús:

—Te núu vá náquète-í sáhá-n á<sup>n</sup>, te vá cáda-gã-n cuendá sá ndécú ndìhi ñaha-í xii-n —càchí-gá xáha<sup>n</sup>-gã xii-dé.

<sup>9</sup> Te ní xáha<sup>n</sup> tẽ Pèlú:

—Te núu duca<sup>n</sup> te vá mée-ní sàhà-í naquete-n, chi naquete-n tnàhá ndaha-í ndìhi díquì-í —càchí-dé xáha<sup>n</sup>-dë xii-gá.

<sup>10</sup> Te ní xáha<sup>n</sup> Jèsús xii-dé:

—Tée íchí ñí xichi chi xini ñuhu-xi sá sàhà-na-dë ndoo, te duca<sup>n</sup> te nduu ndoo-dé ñihí-dé. Te nchòhó sa càndoo-ndo cuéí ñá ncháá-ndó càndoo —cachí-gá xáha<sup>n</sup>-gã xii-dé.

<sup>11</sup> Te duca<sup>n</sup> ñí cáhá<sup>n</sup> Jèsús chi sa nàha-gá sá ñ<sup>n</sup> cuè téé-á<sup>n</sup> cuãha cuendá ñáhá-güedé xii-gá núu cuè téé cùu úhú iní ñáhá, xiã<sup>n</sup> núu ní xáha<sup>n</sup>-gã sá ña túu càndoo-güedé nchaa-güedé.

<sup>12</sup> Te sátá ñí naquete-gá sáhá-güedé, te ní ndécúhnu-gá dóó-gã, te ní nucóo-gá yuhu mèsá, te ní xáha<sup>n</sup>-gã xii-güedé:

—¿Te ní cutnùní iní-ndó sã ñí quide ñaha-í xii-ndo-ã<sup>n</sup>? <sup>13</sup> Te nchòhó váha-ní cáhá<sup>n</sup>-ndó sã cùnùu-í, te dânani ñaha tucu-ndo Mestrú xii-í, te ndáá cáhá<sup>n</sup>-ndó. <sup>14</sup> Te núu yúhú cùu-í Mestrú, te cùu tucu-í téé cùnùu te náquète-í sáhá-ndó, te ñi-u-ni duca<sup>n</sup> càda nchòhó tucu naquete sáhá tnáhá-ndó. <sup>15</sup> Yúhú sànu ichi ñaha-í xii-ndo nàcuáa cada-ndo. <sup>16</sup> Te na càchí tnúhu ndáá-í xii-ndo sã ñí ñ<sup>n</sup> téé xinu cuechi ñá túu cùnùu-dé dàcúxí pàtróo<sup>n</sup>-dë, te ñí ñ<sup>n</sup> téé xica chiu<sup>n</sup> ñá túu cùnùu-dé dàcúxí téé tëndaha ñaha xii-dé cuáhá<sup>n</sup>-dë chiu<sup>n</sup>. Te duca<sup>n</sup> sàtnahá-xi cùu yúhú ndìhi nchòhó. <sup>17</sup> Te núu ní cutnùní iní-ndó nàcuáa ní quide ñaha-í xii-ndo ña, te duca<sup>n</sup> càda tnaha-ndo te cuu váha iní ñáhá Yã Ndiõxí xii-ndo.

<sup>18</sup> Yúhú, ñá túu cáhá<sup>n</sup>-í cuendá-ndó nchaa-ndo, chi yúhú sa nàha-í nàcuáa sàni iní ñ<sup>n</sup> ñ<sup>n</sup> nchòhó cue téé ní nanducu ñihnu-í tnuú nchaa ñáyiu ñuhu ichi cuehé ichi duha ní cachí-í chitnahá ñáhá-ndó xii-í. Chi dacuítí sã quée ndáá-xi nàcuáa cáhá<sup>n</sup>-xi núu tütú Yã Ndiõxí núu càchí-xi: “Tée xèxi

ndìhi ñaha xii-í ngóo-dé cuu úhú iní ñáhá-dë”, duha càchí-xi núu tütú-gá.

<sup>19</sup> Te cùmání-gã sáá nduu càda ñaha-dé sá sání iní-dé, núu xiã<sup>n</sup> càchí tnúhu-í xii-ndo nàcuáa cada-dé, chi na sáá nduu-ã<sup>n</sup> te cutnùní iní-ndó sã yúhú cùu-í Crístú Yaá ní tendaha Yã Ndiõxí véxi ñuyíú-a. <sup>20</sup> Te na càchí tnúhu ndáá-í xii-ndo sã nchaa ñáyiu na quèhe<sup>n</sup> cuendá ñáhá xii cue téé tendaha-í cáhá<sup>n</sup> tnúhu-í, te cada iní-yu sá tnàhá yúhú ní quehe<sup>n</sup> cuendá-yu. Te nchaa ñáyiu na quèhe<sup>n</sup> cuendá ñáhá xii-í, te cada iní-yu sá tnàhá Tãtà-í Dútú Ndiõxí Yaá ní tendaha ñaha xii-í véxi-í ñuyíú-a ní quehe<sup>n</sup> cuendá-yu —càchí-gá xáha<sup>n</sup>-gã xii-güedé.

*Jèsús càchí-gá sá tẽ Jüdás cuáha cuendá ñáhá-dë xii-gá núu cuè téé cùu úhú iní ñáhá*  
(Mt. 26:20-25; Mr. 14:17-21; Lc. 22:21-23)

<sup>21</sup> Te sátá dúcá<sup>n</sup> ñí cáhá<sup>n</sup> Jèsús te ío ní ndíhú iní-gá, te ní xáha<sup>n</sup>-gã xii-güedé:

—Na càchí tnúhu ndáá-í xii-ndo sã díú-ní ñ<sup>n</sup> nchòhó cuáha cuendá ñáhá-ndó xii-í núu cuè téé cùu úhú iní ñáhá —càchí-gá xáha<sup>n</sup>-gã xii-güedé.

<sup>22</sup> Te ní ngüíta cue téé xica cuu ndìhi-gá ndéhe ñ<sup>n</sup> ndehe ñ<sup>n</sup> núu tnáhá-güedé, chi ñá ní cùtnuní iní-güedé ndédacàa-güedé cuendá-güedé ní cáhá<sup>n</sup>-gá. <sup>23</sup> Te ñ<sup>n</sup> téé-á<sup>n</sup> ño cùdíí iní ñáhá Jèsús, te ndècu yatni-dé ñíni-gá cùdini-dé ndìhi-gá.

<sup>24</sup> Te té Xímú, àdi Pelú chi úu ñi-u-dé, ní quide-dé sèñá núu tẽ ndècu yatni ñíni-gá-á<sup>n</sup> sá càcá<sup>n</sup> tnúhú-dë núu-gã núu ndédacàa-güedé cuendá-güedé ní cáhá<sup>n</sup>-gá. <sup>25</sup> Te téé-ã<sup>n</sup> ní sáhá<sup>n</sup> ndehe yatni-gá-dé ñíni Jesús, te ní xáha<sup>n</sup>-dë xii-gá:

—Mestrú, ¿ndédacàa-ndí cuendá-ndí ní cáhá<sup>n</sup>-n-í? —càchí-dé xáha<sup>n</sup>-dë xii-gá.

<sup>26</sup> Te ní xáha<sup>n</sup> Jèsús:

—Na chindóyo-í luha pàá, te téé na cuáha-í te téé-á<sup>n</sup> cúu-dë —càchí-gá xáha<sup>n</sup>-gã xii-dé.

Te ní chindóyo-gá luha pàá, te ní sáha-gá té Jüdás déhe té Xímú Iscarioté.

27 Te òré ní quehe<sup>n</sup>-dé pàá, te ní ngúndecu ndìhì ñaha dùu<sup>n</sup>-ná yucu ñávàha xii-dé. Te ní xáha<sup>n</sup> Jèsús:

—Sá nǐ sani iní-n càda-n te cada ndìhì-ni-n —càchí-gá xáha<sup>n</sup>-gǎ xii-dé.

28 Te nǐ ì<sup>n</sup> cue téé cùdini ndìhì-gá ñá ní tècú tnùnì-güedé nása ndùu tnúhu ní xáha<sup>n</sup>-gǎ xii té Jùdás. 29 Te dava-güedé ní sani iní-güedé sá sǎ cuendá sá ndécú ndìhì-dé sá ñúhú díhú<sup>n</sup>, te váa íó ì<sup>n</sup> sá cuáá<sup>n</sup>-dè nàndìhì-güedé vico, àdi díhú<sup>n</sup> cuáha-dé ñáyiu ndàhú xáha<sup>n</sup>-gǎ ní cáhá<sup>n</sup>-güedé. 30 Te sa ní cundi<sup>n</sup> ní quehe<sup>n</sup> cuendá té Jùdás pàá caxí-dé, te òré ní níhí-dé pàá-á<sup>n</sup> te ní quee-dé cuáhá<sup>n</sup>-dé.

### *Jèsús càchí tnúhu-gá nàcuáa cada-o*

31 Te sátá nǐ quee té Jùdás cuáhá<sup>n</sup>-dé, te ní xáha<sup>n</sup> Jèsús xii dava-gá-güedé:

—Vitna te quiní-ndó ndìhì nchaa ñáyiu sá ìo càhnu cuu yúhú Téé cùu ñaní tnáhá-ndó nchàa-ndo, te òré-á<sup>n</sup> cutnùnì iní-ndó sǎ ìo càhnu cuu tucu mee Yá Ndiòxí. 32 Te núu yúhú quidé càhnu-í Yá Ndiòxí, te ò<sup>n</sup>-ni duca<sup>n</sup> càda cahnu ñaha-gá xii yúhú, te ñá túú-gǎ tǐtní nduu te duca<sup>n</sup> càda-gá. 33 Te nchòhó cue déhe-í na càchí tnúhu-í sá sàcú duha-ná nduu ndècu ndìhì ñaha-í xii-ndo. Te nchòhó nanducu ñaha-ndo xii-í dico vá ná nihí ñáhá-ndó dàtná ní xáha<sup>n</sup>-í xii ñáyiu isràél, te ò<sup>n</sup>-ni duca<sup>n</sup> càhá<sup>n</sup>-í núu-ndó sǎ vǎ ndácú-ndó quíhì<sup>n</sup>-ndó núú quíhì<sup>n</sup>-í. 34 Te duha sànu ichi ñaha tucu-í xii-ndo nàcuáa cada-ndo sǎ cúú iní tnáhá-ndó ì<sup>n</sup> ì<sup>n</sup>-ndo datná yúhú cúú iní ñáhà-í xii-ndo. 35 Te núu na cùu iní tnáhá-ndó ì<sup>n</sup> ì<sup>n</sup>-ndo ña, te duca<sup>n</sup> te cutnùnì iní nchaa ñáyiu sá cúú-ndó cuè téé ní chitnahá ñáhá xii-í —càchí-gá xáha<sup>n</sup>-gǎ xii-güedé.

*Jèsús càhá<sup>n</sup>-gá sá tǎ Pèlú vá nǔnuu-dé sá xicá cùu ndìhì ñaha-dé xii-gá*

(Mt. 26:31-35; Mr. 14:27-31; Lc. 22:31-34)

36 Te ní xáha<sup>n</sup> tǎ Xímú, àdi Pèlú chi úú ò<sup>n</sup>-dé, xii Jèsús:

—Mèstrú, ¿ndèé quíhì<sup>n</sup>-n-í? — càchí-dé xáha<sup>n</sup>-dè xii-gá.

Te ní xáha<sup>n</sup> Jèsús:

—Vitna te vá ndácú-n cànchicú<sup>n</sup> ñáhá-n quíhì<sup>n</sup> núú quíhì<sup>n</sup>-í, dico na sáá nduu te dai sáá-n núú cùndècu-í —càchí-gá xáha<sup>n</sup>-gǎ xii-dé.

37 Te ní xáha<sup>n</sup> tǎ Pèlú xii-gá:

—Mèstrú, ¿te ná cuendá núu vá ndácú-í cànchicú<sup>n</sup> ñáhà-í xii-n quíhì<sup>n</sup> vitna-í? Chi yúhú ñá túú tnàhí yúhú-í cuèi na cùú-í sá cuendá-n —càchí-dé xáha<sup>n</sup>-dè xii-gá.

38 Te ní xáha<sup>n</sup> Jèsús:

—¿Te ndáá sá xèndé iní-n sǎ cuèi na cùú-n cuendá-í-u? Te na càchí tnúhu ndáá-í xii-n sǎ cùmání-gǎ cana líhi, te úní xito cáhá<sup>n</sup>-n sǎ ña túú xini ñáhá-n xii-í —càchí-gá xáha<sup>n</sup>-gǎ xii-dé.

## 14

### *Jèsús dánèhé ñáhá-gǎ nàcuáa cada-o nàsáá-ó núú ndécú Yá Ndiòxí*

1 Te ní xáha<sup>n</sup>-gǎ xii-güedé:

—Te ñá túú nǎ cani iní-ndó. Quíndáá iní-ndó Yá Ndiòxí, te quíndáá iní-ndó yúhú. 2 Chi núú ndécú Tàtá-í ío nùne núú cùndècu-o, chi núú ñáhá ñá te sa cachí tnúhu-í xii-ndo ni cùu. Te vitna na nùhú-í te cada túha-í núú cùndècu-ndo. 3 Te dàtnùnì quixi tucu-í te candeca ñaha-í xii-ndo quíhì<sup>n</sup> cuendá ì<sup>n</sup>-ni xìchi cundecu-o. 4 Te sa nàha-ndo ndéé quíhì<sup>n</sup>-í te sa xini-ndó ìchi —cachí-gá xáha<sup>n</sup>-gǎ xii-güedé.

5 Te ní xáha<sup>n</sup> tǎ Mǎxí xii-gá:

—Mèstrú, ñá túú xini-ndí ndèé quíhì<sup>n</sup>-n te da ichi-ná quiní-ndí —càchí-dé xáha<sup>n</sup>-dè xii-gá.

6 Te ní xáha<sup>n</sup> Jèsús:

—Yúhú cúú-í dàtná ì<sup>n</sup> ichi te càhá<sup>n</sup>-í tnúhu ndáá, te yúhú cada-í te naníhí tàhú-ndó. Te ì<sup>n</sup> dìi díi-ni yúhú cada-í te sáá-ndó núú Yá Ndiòxí cundecu-ndo te núu na quíndáá iní ñáhá-ndó xii-í. 7 Te núu dícó cùtnùnì ndisa iní-ndó yòo cuu-í-á<sup>n</sup>, duca<sup>n</sup> te cutnùnì iní-ndó yòo cuu Tàtá-í ní cùu. Dico vitna dàtná sá nǐ xini núú-ndó Dùtú Ndiòxí Yáá cúú Tàtá-í cada iní-ndó, chi ní xini-ndó yúhú —càchí-gá xáha<sup>n</sup>-gǎ xii-dé.

8 Te ní xáha<sup>n</sup> tẽ Lìpé xii-gá:

—Mèstrú, danèhé ñáhá xii-ndí Dútú Ndiõxí chi na cùu váha iní-ndí — càchí-dé xáha<sup>n</sup>-dẽ xii-gá.

9 Te ní xáha<sup>n</sup> Jèsús xii-dé:

—Lìpé, ¿te náa ñá túú xini ñáhá-n xii-í? Te sa ní cuu vai nduu ndecu ndihi ñaha-í xii-ndo, chi ñáyiú xini ñáhá xii-í te xini-yu tnàhá Tàtá-í. ¿Te ná cuendá yòhó càchí-n sã dánèhé ñàhá-í xii-ndo Tàtá-í? 10 ¿Náa ñá túú sàndáá iní-ndó sã yùhú ndécù-í ndihi Tàtá-í? Te mee-gã ndécú ndihi ñaha-gá xii-í. Te nchaa tnúhu càhá<sup>n</sup>-í núú-ndó ñá túú càhá<sup>n</sup>-í sã véxi iní mèe-í, chi Tàtá-í Yaá ndécú ndihi ñaha xii-í chindèe ñaha-gá quidè-í chiu<sup>n</sup>-gá. 11 Te quindáá iní-ndó sã yùhú ndécù-í ndihi Tàtá-í, te duca<sup>n</sup> mèe-gá ndécú ndihi ñaha-gá xii-í. Te núu ñá túú sàndáá iní-ndó tnúhu càhá<sup>n</sup>-í-a, te dandácu iní-ndó nchaa chiu<sup>n</sup> ta guide-í véxi, te quindáá iní ñáhá-ndó. 12 Te na càchí tnúhu ndáá-í xii-ndo sã nchaa ñáyiú na quindáá iní ñáhá xii-í, te cadá-yu chiu<sup>n</sup> guide-í te càhnu-gá chiu<sup>n</sup> cadá-yu chi yùhú núhú-í núú ndécú Tàtá-í cundecu-í nàcuáa níhí ndéé-gã-yu cundecu-yu. 13 Te nchaa sã ná càcá<sup>n</sup>-ndó te taxi-í te núu na quindáá iní ñáhá-ndó xii-í, te nchaa cada-í cuendá cutnùní iní ñáyiú sã ìo càhnu cuu Tàtá-í Dútú Ndiõxí. 14 Te yùhú cada-í nchaa sã cuini-ndó càcá<sup>n</sup> táhú-ndó nù-í, te núu na quindáá iní ñáhá ndisa-ndo xii-í.

*Jèsús càchí-gá sã téndàha-gá Espiritú Yá Ndiõxí quixi cundecu ndihi-o*

15 'Te núu nchòhó cúu iní ñáhá-ndó xii-í te tnii-ndo nchaa tnúhu càhá<sup>n</sup>-í. 16 Te yùhú cacá<sup>n</sup> táhú-í núú Tàtá-í sã téndàha-gá Espiritú-gá quixi cundecu ndihi-ndo cànu ichi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quihí<sup>n</sup>. 17 Te nchaa ñáyiú ndecu ichi cuehé ichi duha ñá túú xini-yu Espiritú Yá Ndiõxí te ni vã cúu cundecu ndihi-yu. Dico nchòhó sa xini-ndó Espiritú-gá te ndecu ndihi ñaha-xi xii-ndo. Te sáá ìi<sup>n</sup> nduu te cunuu Espiritú-gá iní-ndó.

18 Te yùhú vá dáñá nihnu ñaha-í xii-ndo, chi quixi tucu-í cundecu ndihi ñaha-í xii-ndo. 19 Te sácú duha-ná nduu ndecu-í te vá quini ñáhá-gã ñáyiú xii-í, dico nchòhó chi quini ñáhá-ni-ndó xii-í. Te duca<sup>n</sup>-ni cundecu-ndo ichi váha chi cundecu ndihi ñaha-í xii-ndo ni caa ni quihí<sup>n</sup>. 20 Te dàvá-á<sup>n</sup> cutnùní iní-ndó sã ndécù-í ndihi Tàtá-í, te duca<sup>n</sup> nchòhó cundecu ndihi ñaha-ni-ndo xii-í. 21 Te nchaa ñáyiú dàcuaha tnúhu-í te tnii-yu, ñáyiú-á<sup>n</sup> quidé ndisá-yu sã cúu iní ñáhá-yu xii-í. Te duca<sup>n</sup> Tàtá-í cúu iní ñáhá-gã xií-yu, te duca<sup>n</sup>-ni yùhú cúu iní-í-yu tucu, te duca<sup>n</sup> te cutnuni iní-yu sã ndécú ndihi-í-yu —càchí-gá xáha<sup>n</sup>-gã xii-dé.

22 Te ní càhá<sup>n</sup> ìi<sup>n</sup> tée nani Judás dico ñá díú tẽ Jùdás déhe té Ximú Iscarioté ní càhá<sup>n</sup>, chi ingá té Jùdás ní xáha<sup>n</sup>-dẽ xii-gá:

—Mèstrú, ¿nása cada-n cuendá cutnùní iní-ndí sã cundecu ndihi ñaha-n xii-ndí, te ñáyiú ñuhu ichi cuehé ichi duha vá cundecu ndihi-n-yu-i? —càchí-dé xáha<sup>n</sup>-dẽ xii-gá.

23 Te ní xáha<sup>n</sup> Jèsús xii-güedé:

—Nchaa ñáyiú cúu iní ñáhá xii-í te tnii-yu tnúhu càhá<sup>n</sup>-í, te ñáyiú-á<sup>n</sup> cúu iní ñáhá Tàtá-í xii-yu, te yùhú ndihi Tàtá-í ndécú-ndí ndihi-yu. 24 Te nchaa ñáyiú ñá túú cúu iní ñáhá xii-í te ñá túú tnii-yu tnúhu càhá<sup>n</sup>-í. Te nchaa tnúhu ní càhá<sup>n</sup>-í ní xindèdóho-ndo chi Tàtá-í Yaá ní tendaha ñaha xii-í véxi-í ñuyú-a ní dácáhu iní ñáhá-gã xii-í, te ñá díú mèe-í ní càhu iní-í tnúhu càhá<sup>n</sup>-í.

25 'Duha nduu tnúhu càhá<sup>n</sup>-í núú-ndó vitna ndecu ndihi ñaha-gá-í xii-ndo. 26 Dico Yá Ndiõxí tendaha-gã Espiritú-gá quixi-xi cada-xi núú-í taxi-xi tnúhu ndee iní xii-ndo, te diu-xi chindee ñaha-xi xii-ndo te danèhé ñáhá-xi xii-ndo nchaa sã cúmání quini-ndó, te diu-ni-xi dandácu iní ñáhá-xi xii-ndo nchaa nacuáa ní càhá<sup>n</sup>-í.

27 'Te yùhú chindee chituu ñaha-í xii-ndo ìo váha cuu iní-ndó cundecu-ndo datná yùhú ìo váha cúu

iní-í ndécù-í, chi sa ta cùyatni nduu nùhú-í. Te yúhú càchí tnúhu ndáá-í sá chíndèe ñaha-í xii-ndo, te vá cáda-í dàtná quídé ñáyiú ñùhu ichi cuehé ichi duha. Te ni vǎ ndìhú iní-ndó, te ni vǎ yùhú-ndó. <sup>28</sup> Te sa ní xíndèdóho-ndo ní cáhá-í sá nùhú-í, te quixi tucu-í cundecu ndìhí ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnùhú sá nùhú-í núu ndécú Tàtà-í, te cudí iní-ndó ní cùu, chi ío càhnu cuu-gá dàcúxí yùhú. <sup>29</sup> Te sa ní cachí tnúhu-í sá nùhú-í, te na sàà òré nùhú-í núu ndécú Tàtà-í, te quíndáá iní ñáhá-ndó xii-í.

<sup>30</sup> Te ñá túú-gǎ vǎi tnúhu ndatnúhu ndìhí ñaha-í xii-ndo chi sa véxi yucu ñávǎha sá táxí tnùní ñuyíú-a, dico vá táxí tnùní ñáhá-xí xii yúhú. <sup>31</sup> Te cada-í nchaa nàcuáa ní táuchíú<sup>n</sup> Tàtà-í cuèndá cutnúni iní nchaa ñáyiú ñuyíú-a sá yùhú ío cùu iní-í-gá. Te vitna chí ndácuíñí ná quíhí<sup>n</sup>-ó — càchí-gá xáha<sup>n</sup>-gǎ xii-güedé.

## 15

### *Cuèndá yoho yàha stilé ndìhí nchaa dité-xi*

<sup>1</sup> Te ní xáha<sup>n</sup> tucu-gá xii-güedé: —Yúhú cùu-í dàtná yoho yàha stilé, te Tàtà-í cùu-gǎ dàtná ì<sup>n</sup> tée xìto yoho yaha stilé-á<sup>n</sup>. <sup>2</sup> Te nchaa ñáyiú ní sándáá iní ñáhá xii-í cùu-yu dàtná dité nchaa yoho yàha stilé-á<sup>n</sup>. Te tée xìto yoho yaha stilé-á<sup>n</sup> xèhndé-dé nchaa dité-xi sá ñǎ cuìní-gǎ-xi cuu<sup>n</sup> ndéhé-xi, te ndàda ndoo-dé nchaa dité-xi sá cùu<sup>n</sup> cuèndá cuu<sup>n</sup>-gá. <sup>3</sup> Te duca<sup>n</sup> sǎtnahá-xi cùu nchohó, chi sa ní xócuíñí nchaa sá cuèhé sá dúhá ndècu ndìhí-ndo, chi ní sándáá iní-ndó tnùhú ní cáhá-í. <sup>4</sup> Te cuu ì<sup>n</sup>nuu-ndo cundecu ndìhí ñaha-ndo xii-í, te núu duca<sup>n</sup> na càda-ndo, te cundecu ndìhí ñaha-í xii-ndo. Chi núu ì<sup>n</sup> yutnu vídí ná quèndéé dité-xi, te dité-xi sá ní quèndéé-á<sup>n</sup> vǎ cùu<sup>n</sup>-gǎ sávídí-xi chí duu<sup>n</sup> duu<sup>n</sup> ní xíta-xi. Duca<sup>n</sup> sǎtnahá-xi cùu nchohó chí vá ndácú-ndó càda-ndo chiu<sup>n</sup>-í, te núu vá cùndècu ndìhí ñaha-í xii-ndo.

<sup>5</sup> 'Chi yúhú cùu-í dàtná yutnu vídí-á<sup>n</sup>, te nchòhó cùu-ndó dàtná

nchaa dité-xi. Te nchaa ñáyiú cùu ì<sup>n</sup>nuu ndìhí ñaha xii-í, te ndècu ndìhí-í-yu, te ndácú-yu quídé-yu chiu<sup>n</sup>-í. Te núu vá cùu ì<sup>n</sup>nuu ndìhí ñahá-yu xii-í, te vá ndácú-yu cada-yu chiu<sup>n</sup>-í. <sup>6</sup> Te nchaa ñáyiú vá cùu ì<sup>n</sup>nuu ndìhí ñaha xii-í, te yáha-yu dàtná yǎha ì<sup>n</sup> dité yutnu vídí sá ñà túú cùu<sup>n</sup> sávídí-xi, chí xèhndé-güedé yìchí-xi, te sàhmi-güedé.

<sup>7</sup> 'Cuu ì<sup>n</sup>nuu ndìhí ñaha-ndo xii-í, te vá nàcuánaa-ndo nacuáa ní cáhá-í. Te núu duca<sup>n</sup> na càda-ndo, te nání cuìní-ndó cǎcá<sup>n</sup>-ndó nùu-í te taxi-í. <sup>8</sup> Te núu nchòhó ná cáda vǎha-ndo cundecu-ndo, te ío cada càhnu-ndo Tàtà-í, te duca<sup>n</sup> cùtnuní sá ndísá cùu-ndo cue tée ní chitnahá ñáhá xii-í. <sup>9</sup> Te yúhú ío cùu iní ñáhá-í xii-ndo dàtná cùu iní ñáhá Yǎ Ndiòxí xii-í. Te cada-ni-ndo mèe-ni sá vǎha cuèndá cudí iní ñáhá-gǎ-í xii-ndo. <sup>10</sup> Te núu na quíndáá iní-ndó càda-ndo nchaa nacuáa ní cáhá-í, te ío cuu iní ñáhá-í xii-ndo, chí yúhú duca<sup>n</sup> ío sándáá iní-í Tàtà-í quídé-í nchaa nàcuáa ní cáhá<sup>n</sup>-gá, te xǎ<sup>n</sup> nùu ío cùu iní ñáhá-gǎ xii-í.

<sup>11</sup> 'Duha càhá-í núu-ndó cuèndá cudí ndisa iní-ndó dàtná cùu iní mèe-í. <sup>12</sup> Te duha nduu tnùhú càhá-í cuèndá sá cùu iní tnáhá-ndó ì<sup>n</sup> ì<sup>n</sup>-ndo datná cùu iní ñáhá-í xii-ndo. <sup>13</sup> Te núu ní xíhó sǎ cùu-xí ì<sup>n</sup> tée ío váha tnáhá tnúhu ndìhí-o, te xǎ<sup>n</sup> cutnúni iní ñáyiú sá ío cùu iní-ó-dě. <sup>14</sup> Te nchòhó cuu-ndo cuè tée ío váha tnáhá tnúhu ndìhí-í te núu na càda-ndo nchaa nacuáa càhá-í. <sup>15</sup> Te vá cùñaha-gǎ-í xii-ndo sá cùu-ndó cuè tée xìnu cuechi nùu-í, chí ní ì<sup>n</sup> tée xìnu cuechi ñá túú xìní-dé ná quídé pàtróo<sup>n</sup>-dè. Te yúhú càchí-í xii-ndo sá cùu-ndó cuè tée ío váha tnáhá tnúhu ndìhí-í, chí ní cachí tnúhu-í nchaa nàcuáa ní cáhá<sup>n</sup> Tàtà-í. <sup>16</sup> Te ñá díú nchòhó ní càhá<sup>n</sup> ñáhá-ndó xii yúhú, chí yúhú ní cáhá<sup>n</sup> ñáhá-í xii-ndo. Te yúhú tauchi<sup>n</sup>-í quíhí<sup>n</sup>-ndó càda-ndo nchaa nacuáa ní cáhá-í, chí tnúhu-á<sup>n</sup> vǎ ndìhí ñhnu-xi. Te duca<sup>n</sup> nchaa sá ná cǎcá<sup>n</sup>-ndó nùu Tàtà-í Yǎ Ndiòxí te taxi-gǎ, te núu na quíndáá iní ñáhá-ndó xii-í. <sup>17</sup> Te yúhú càhá-í dóho-ndo sá cùu iní tnáhá-ndó



ɛ̃n ɛ̃n-ndo.

*Ñáyi ndècu ichi cuehé ichi duha cùu úhú iní-yu Jèsús ndih nchaa ñáyi sàndáá iní tnúhu-gá*

18 Te nchaa ñáyi ndècu ichi cuehé ichi duha ñá cùu quini ñáhá-yu xii-ndo, te sa nàha-ndo sá dǐhna-gá yúhú ní ngüíta-yu duca<sup>n</sup> ñá cùu quini ñáhá-yu xii-í. 19 Te núu dícó tnàhá nchòhó ndécú-ndó ichi cuehé ichi duha ñá, te cuu iní ñáhá-yu xii-ndo dàtná cùu iní tnáhá-yu ndi mèe-yu ni cùu. Te yúhú ní nanducu nihnu ñaha-í xii-ndo tnúu ñáyi ndècu ichi cuehé ichi duha, núu xiá<sup>n</sup> ío cùu úhú iní ñáhá-yu xii-ndo cuendá sá ñá túu-gá chitnahá-ndó-yu. 20 Te dandàcu iní-ndó nàcuáa ní cáhá<sup>n</sup>-í sá ni ɛ̃n tée xinu cuechi ñá túu cùuu-dé dácúxí pàtróó<sup>n</sup>-dé. Te yúhú cùu úhú iní ñáhá-yu, te diu-ni duca<sup>n</sup> cada ñaha-yu xii nchòhó. Te núu dícó ní tní-yu tnúhu ní cáhá<sup>n</sup>-í ñá, te diu-ni duca<sup>n</sup> tní-yu tnúhu cáhá<sup>n</sup>-ndó nǔ-yu ni cùu. 21 Te duca<sup>n</sup> cada ñaha-yu xii-ndo sá cuendá-í, chi ñá xini-yu Tàtá-í Yaá ní tendaha ñaha xii-í véxi-í ñuyíú-a.

22 Te vaa vá cùndècu cuéchi-yu ni cùu, te núu ñá túu yúhú ní cáhá<sup>n</sup>-í nǔ-yu, te vitna vá cùu tnàhí cachí-yu sá ñá túu cuéchi-yu. 23 Chi nchaa ñáyi cùu úhú iní ñáhá xii-í, te cùu úhú iní-yu tnàhá Tàtá-í. 24 Te vaa ni ɛ̃n cuéchi-yu vá cùndècu ni cuu, te núu dícó ñá túu ní xini-yu nchaa sá ní quide-í sá vǎ yóo tnàhí ndàcu cada. Te cuéi ní xini-yu dico dai cùu úhú iní ñáhá-yu xii-í ndih Tàtá-í. 25 Te duha quidé-yu chi dacuítí quèe ndáá-xi nàcuáa yòdo tnuní núu tütú Yá Ndióxi sá dácuhá-yu, chi cachí-xi sá ñá túu nǎ cuéchi-í te cuu úhú iní ñáhá-yu xii-í.

26 Te Espiritú Tàtá-í Dútú Ndióxi sá ndécú nǔ-gǎ tendaha-í quixi chindee ñaha-xi xii-ndo, te canu ichi ñaha-xi nàcuáa cundecu-ndo, te Espiritú-á<sup>n</sup> cáhá<sup>n</sup> ndáá-xi cuendá cutnùni iní nchaa ñáyi yoo cùu-í. 27 Te nchòhó tnàhá-ndó cáhá<sup>n</sup> váha-ndo cuendá-í cuendá cutnùni

iní-yu yoo cùu-í, chi nàha-ndo sá ndèé òré ní ngüíta-í quidè-í chiú<sup>n</sup> Tàtá-í ní chitnahá ñáhá-ndó xii-í —cachí-gá xáha<sup>n</sup>-gǎ xii-güedé.

## 16

1 Te ní xáha<sup>n</sup> tùcu-gá xii-güedé:

—Duha cáhá<sup>n</sup>-í cuendá ná nanchòcáva iní-ndó nǔhú-ndó ichi cuehé ichi duha. 2 Chi vá dáñá-gǎ-güedé

quihu-ndo vèñúhu, te ni vǎ cùu-gǎ quini ndeé ñáhá-güedé xii-ndo. Te sáá ɛ̃n nduu te cahni ñaha-güedé xii-ndo, te xiá<sup>n</sup> cuu caha<sup>n</sup>-güedé sá quidé-güedé chiú<sup>n</sup> Yá Ndióxi. 3 Te duca<sup>n</sup> cada-güedé chi ñá túu xini-güedé Tàtá-í, te ni ñá túu xini ñáhá-güedé xii yúhú. 4 Te duha nduu tnúhu cáhá<sup>n</sup>-í núu-ndó, chi na sáá òré te ndacu iní-ndó nchaa tnúhu sá sá ní cachí tnúhu-í xii-ndo nàcuáa cada ñaha-güedé xii-í.

*Nchaa chiú<sup>n</sup> quide Espiritú Yá Ndióxi*

Te ñá túu ní cachí tnúhu-í xii-ndo ndeé dǐhna chi ndècu ndih ñaha-í xii-ndo. 5 Dico vitna sa ta cùyatni nduu nǔhú-í núu ndécú Tàtá-í Yaá ní tendaha ñaha xii-í véxi-í ñuyíú-a. Te ni ɛ̃n nchòhó ñá túu xicá<sup>n</sup> tnúhú-ndó nǔ-í nǔu ndeé quihí<sup>n</sup>-í. 6 Chi mee-ni sá ndihú iní-ndó sá dúcá<sup>n</sup> ní cáhá<sup>n</sup>-í. 7 Te na cachí tnúhu ndáá-í xii-ndo sá váha-gá sá cùu-xi-ndó nǔu nǔhú-í, chi tendaha-í Espiritú Yá Ndióxi quixi cundecu ndih-ndo chindee ñaha-xi, chi núu vá nǔhú-í te vá quixí Espiritú-gá cundecu ndih-ndo chindee ñaha-xi xii-ndo. 8 Te na quixi Espiritú-gá te dandixi túu-xi iní nchaa ñáyi ndècu ichi cuehé ichi duha sá ñá túu quide váha-yu. Te dacàhu iní ñáhá-xi sá ndécú ɛ̃n ichi váha ichi ndáá. Te Espiritú-gá-á<sup>n</sup> cada-xi nàcuáa cutnùni iní-yu sá Yá Ndióxi cada ndáá-gá cuéchi-yu. 9 Te duca<sup>n</sup> te cutnùni iní-yu sá ndécú cuéchi-yu, chi ñá túu sàndáá iní ñáhá-yu xii-í. 10 Te duca<sup>n</sup> te cutnùni iní-yu nàcuáa nduu cuendá ichi váha ichi ndáá, chi yúhú nǔhú-í núu ndécú Tàtá-í, te nchòhó vá quini ñáhá-gǎ-ndó. 11 Te duca<sup>n</sup> te cutnùni iní-yu sá Yá Ndióxi cada

ndáá-gá cuéchi-yu, chi sa ní cáhá<sup>n</sup>-gá sá yúcu ñávãha sá táxi tnùnì ñuyú-a quíhí<sup>n</sup>-xi núú ùhú núú ndàhú.

12 'Te vài-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna. 13 Te na quíxi Espiritú Yã Ndiöxí, Espiritú càhá<sup>n</sup> ndáá cuíti, te Espiritú-á<sup>n</sup> danèhé ñáhá-xí nchàa tnúhu váha tnúhu ndáá. Te vá dácàhu iní ñáhá-xí xii-ndo sá vèxi iní méé-xí chi dacàhu iní ñáhá-xí nchàa sá càhá<sup>n</sup> Yã Ndiöxí, te cachí tnúhu-xi nchaa nàcuáa cada-xi ndéé núú cuáhá<sup>n</sup> núú vèxi-gá. 14 Te Espiritú-gá-á<sup>n</sup> cada càhnu ñaha-xi xii yúhú chi ndècu ndihí-xi tnúhu-í, te danèhé ñáhá-xí xii-ndo. 15 Te nchaa sá ndécú ndihí Tàtà-í ndécú ndihí-í tnáhá-í, núú xíá<sup>n</sup> càchí-í sá Espiritú-gá danèhé ñáhá-xí nchàa tnúhu-í xii-ndo.

*Nchaa ñáyiu ndìhú iní-xi nduu dǐí iní-yu na quíxi tucu Jesús*

16 'Te ì<sup>n</sup> úú-nã nduu ndècu-í te vá quínì ñáhá-gã-ndó xii-í, dico núú sàcú-ni nduu te quínì ñáhá tùcu-ndo xii-í, te duca<sup>n</sup> chí núhú-í núú ndécú Tàtà-í —càchí-gá xáha<sup>n</sup>-gã xii-güedé.

17 Te sá dúcá<sup>n</sup> ñí cáhá<sup>n</sup>-gá ñuu ní ngüíta ì<sup>n</sup> úú cue téé xica cuu ndihí-gá xítnàha-güedé:

—¿Nása ndùu-tu tnúhu càhá<sup>n</sup>-gá sá càchí-gá sá ì<sup>n</sup> úú-nã nduu ndècu-gá te vá quínì-gá-ó-gã, dico núú sàcú-ni nduu te quínì tucu-o-gã-i?, chí núhú-gá núú ndécú Tàtà-gã —càchí-güedé xítnàha-güedé.

18 Te xítnàha tucu-güedé:

—¿Nása cuáhá<sup>n</sup>-tu tnúhu-ã<sup>n</sup> sá sàcú-ni nduu? Te ñá tècú tnùnì-ó nása ndùu tnúhu càhá<sup>n</sup>-gá —càchí-güedé xítnàha-güedé.

19 Te Jèsús ní cutnùnì iní-gá sá cuínì-güedé cáca<sup>n</sup> tnúhú-güedé núú-gã nása ndùu tnúhu ní cáhá<sup>n</sup>-gá, núú ní xáha<sup>n</sup>-gã:

—Cuèndá sá ñí cachí-í sá ì<sup>n</sup> úú-nã nduu ndècu-í te vá quínì ñáhá-gã-ndó xii-í, dico núú sàcú-ni nduu te quínì ñáhá tùcu-ndo xii-í ní cachí-í, ¿xíá<sup>n</sup> ndúcú tnúhu núú tnáhá-ndó-ã<sup>n</sup>? —càchí-gá xáha<sup>n</sup>-gã xii-güedé.

20 Te ní xáha<sup>n</sup> tùcu-gá:

—Te na càchí tnúhu ndáá-í xii-ndo sã nchòhó ndìhú víhí iní-ndó te ndáhyú-ndó, dico nchaa ñáyiu ndècu ichi cuehé ichi duha chi da cudǐí iní-yu. Dico nchòhó ñáyiu ndáhyú chí sáa nduu te nduu dǐí iní-ndó. 21 Chi dàtná cuínì-ndó cùu ì<sup>n</sup> ñadihí ñaha ní tnáhá nduu cacu déhe-xi vài sani iní-a<sup>n</sup> sá quidé ùhú ñáhá-xí. Dico na yãha cacu déhe-a<sup>n</sup>, te ñá túú-gã ndácú iní-a<sup>n</sup> sá ñí quide ùhú ñáhá-xí xii-a<sup>n</sup> chí mee-nã sá cudǐí iní-a<sup>n</sup> déhe-a<sup>n</sup>. 22 Duca<sup>n</sup> sãtnahá-xi cùu nchohó vitna chí ndìhú iní-ndó sã nùhú-í, dico quíxi tucu-í quíxi coto ñaha-í xii-ndo, te òré-á<sup>n</sup> te cudǐí ndìsa iní-ndó, te vá yõo ì<sup>n</sup>-gá dandìhú iní ñáhá xii-ndo davá-á<sup>n</sup>.

23 'Te davá-á<sup>n</sup> ñà túú-gã ná nducu tnúhu-ndo nùu-í. Te na càchí tnúhu ndáá-í xii-ndo sã Tàtà-í taxi-gá nchaa sá ná càcá<sup>n</sup>-ndó nùu-gã nùu na quíndáá iní ñáhá-ndó xii-í.

24 Te ndéé vitna vátá dúcá<sup>n</sup>-gã cada-ndo càcá<sup>n</sup>-ndó. Dico càcá<sup>n</sup>-ndó nùu-gã nùu ná cuínì-ndó te taxi-gá cuèndá cudǐí ndìsa iní-ndó —càchí-gá xáha<sup>n</sup>-gã xii-güedé.

*Xítohó Jesucristú ní cunuu tnúhu-gá núú yucu ñávãha*

25 Te xáha<sup>n</sup> tùcu-gá xii-güedé:

—Mee-ni ñí chidáhu ndodo-í tnúhu ní cáhá<sup>n</sup>-í núú-ndó, dico sáa nduu te vá chidáhu-gá-í tnúhu cáhá<sup>n</sup>-í, chí cáhá<sup>n</sup> ndáá-na-í cuèndá Tàtà-í.

26 Te davá-á<sup>n</sup> càcá<sup>n</sup>-ndó núú Tàtà-í nùu ná cuínì-ndó te taxi-gá, te núu na quíndáá iní ñáhá-ndó xii yúhú Déhe-gá. Te ñá túú-gã xínì ñùhu-xi sá yúhú cáca<sup>n</sup>-í núú-gã cuèndá-ndó chí cáca<sup>n</sup> méé-nã-ndó. 27 Chí mee Tàtà-í ío cùu iní ñáhá-gã xii-ndo cuèndá cúú iní ñáhá-ndó xii-í, te sàndáá iní-ndó sã nùu-gã ní quee-í véxi-í. 28 Te yúhú ní quee-í núú Tàtà-í véxi-í ñuyú-a, te vitna dándóo-í ñuyú-a te núhú-í núú ndécú-gã —càchí-gá xáha<sup>n</sup>-gã xii-güedé.

29 Te ní xáha<sup>n</sup> cuè téé xica cuu ndihí-gá:

—Vitna chi càhá<sup>n</sup> ndáá-nă-n, ñá túú-gă chídăhu-n tnũhu càhá-n. <sup>30</sup> Te vitna ní xiní-ndí sá ïo váha cùtnuní iní-n nchàa nacuáa cùu, te cùtnuní iní-n nchàa nacuáa sàni iní nchaa ñáyiu. Te ñá túú xini ñuhu-xi nágá nducu tnũhu-yu núú-n chi nchaa sa ní dátũu-n nũu-yu. Te xíá<sup>n</sup> nũu sàndáá iní-ndí sá nũú Yă Ndiõxí ní quee-n véxi-n —càchí-güedé xăha<sup>n</sup>-güedé xii-gá.

<sup>31</sup> Te ní xáha<sup>n</sup> Jèsús:

—¿Te vitna sàndáá iní-ndó-ă<sup>n</sup>?  
<sup>32</sup> Vitna ní sáá nduu nĩ sáá òré sá ncháá nchòhó cuténuu-ndo càa ì<sup>n</sup> caa úú cuu-ndo, te dándóo mee ñaha-ndo xii-í. Dico ñá díú mèe dii-í quendóo chi ndècu ndihí-í Tătà-í. <sup>33</sup> Duha càhá<sup>n</sup>-í cuendá cuu váha iní-ndó cùndecu-ndo, chi ñuyíú-a cuu úhú iní ñáhă-yu xii-ndo, dico ni vă yùhú-ndó chi yúhú sa ní dáquéé tĩhù-í nchaa sá cuèhé sá dúhá ío ñuyíú-a —càchí-gá xáha<sup>n</sup>-gă xii-güedé.

## 17

*Jèsús xìcá<sup>n</sup> táhú-gă núú Tătá-gă Dútú Ndiõxí cuendá cue tée xìca cuu ndihí-gá*

<sup>1</sup> Te sátá dúcá<sup>n</sup> nĩ cáhá<sup>n</sup> Jèsús te ní ndacoto-gá andũu, te ní xáha<sup>n</sup>-gă xii Tătá-gă Dútú Ndiõxí:

—Táu, vitna ní sáá nduu càda cahnu ñaha-n xii-í cuendá duca<sup>n</sup> càda cahnu ñaha-í xii-n. <sup>2</sup> Chi mee-n nĩ cachí-n sá táxí tnùn-í nchaa ñáyiu ñuyíú-a, te dácacu nihnu-í nchaa ñáyiu ní cachí-n nàníhí tàhú. <sup>3</sup> Te cundecu ndihí-õ-yu ni caa ni quíhí<sup>n</sup>, chi sàndáá iní ñáhă-yu sá ì<sup>n</sup> dìi ní yòhó cúú-n Ndiõxí ndisa, te duca<sup>n</sup> xini ñáhă-yu xii yúhú Jesucristú téé ní tendaha-n véxi ñuyíú-a.

<sup>4</sup> Te yúhú ní chiñuhu ñaha-í xii-n ñuyíú-a, te ní xínu chìu<sup>n</sup> ní cachí-n càda-í. <sup>5</sup> Táu, vitna na nàsáá-í núú-n te cada càhnu ñaha-n xii-í dàtná ní xóo cada càhnu ñaha-n xii-í ndéé cùtnàhă vátá ngăva-gă ñuyíú.

<sup>6</sup> Te nchaa ñáyiu ní nanducu nihnu-n tnuú nchaa ñáyiu ndècu ichi cuèhé ichi duha, ní taxi cuendá-n-yu,

te ní xáha<sup>n</sup>-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sàndáá iní-yu tnũhu-n. <sup>7</sup> Te vitna ní cutnùn-í iní-yu sá ncháá tnũhu ndècu ndihí-í diu-ni mee-n nĩ taxi-n. <sup>8</sup> Te ní dănèhé-í-yu nchaa tnũhu sá nĩ dănèhé ñáhă-n xii-í, te ní sàndáá iní-yu. Te ní cutnùn-í iní-yu sá nũú-n nĩ quee-í véxi-í, te ní sàndáá iní-yu sá yòhó ní tendaha ñaha-n xii-í véxi-í ñuyíú-a.

<sup>9</sup> Te yúhú càhá<sup>n</sup> ndàhú-í núú-n cuendá nchaa ñáyiu ní taxi cuendá-n. Te ñá túú càhá<sup>n</sup> ndàhú-í núú-n cuendá ñáyiu ndècu ichi cuèhé ichi duha, chi cuendá nchaa ñáyiu ní taxi cuendá-n càhá<sup>n</sup>-í, chi cuendá-n cùu-yu. <sup>10</sup> Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í tnàhă-í. Te xíquide càhnu ñahă-yu xii-í.

<sup>11</sup> Te yúhú vá cùndècu-gá-í ñuyíú-a, dico mèe-yu chi cundecu-ní-yu, te yúhú ndixi-í núú ndécú-n. Táu, yòhó ío yiñũhu ndecu-n, te yúhú càhá<sup>n</sup> ndàhú-í núú-n sã ní yùhu ni iní-n còto-n nchaa ñáyiu ní taxi cuendá-n, ñáyiu ní sàndáá iní tnũhu-í cuendá sá ì<sup>n</sup>-ní ichi cuú-yu cundecú-yu dàtná ì<sup>n</sup>-ni cùu nchoo. <sup>12</sup> Chi òré ndécú-í ndihí-yu ñuyíú-a ní xito-í-yu nàcuáa cùu iní-n, te ni ì<sup>n</sup>-yu ñá túú ní xíta nihnu, chi ì<sup>n</sup>-ni té Jùdás ní xíta nihnu tnàhí-dé, te duca<sup>n</sup> nĩ cuu cuendá sá nĩ quee ndáá-xi nàcuáa yòdo tnuní núú tütú-n.

<sup>13</sup> Te vitna sa ndixi-í núú ndécú-n, dico nini ndècu-gá-í ñuyíú-a duha càhá<sup>n</sup>-í cuendá sá cúú ì<sup>n</sup>-yú dàtná cúú ì<sup>n</sup> méè-í. <sup>14</sup> Te yúhú ní dănèhé-í-yu tnũhu-n, dico nchaa ñáyiu ndècu ichi cuèhé ichi duha cùu úhú iní ñáhă-yu xii-yu cuendá sá ñà túú-gă ndécú-yu ichi cuèhé ichi duha-á<sup>n</sup> dàtná yúhú ñá túú ndècu-í ichi-á<sup>n</sup>.

<sup>15</sup> Te ñá túú càchí-í sá xócàni-n-yu ñuyíú-a, dico càhá<sup>n</sup> ndàhú-í núú-n sã dácacu nihnú-n-yu núú yucu ñávăha. <sup>16</sup> Te yúhú ñá túú ndècu-í ichi cuèhé ichi duha, te duca<sup>n</sup> mèe-yu ñá túú-gă ndécú-yu ichi cuèhé ichi duha. <sup>17</sup> Te ío

na cùndecu yihi ñuhu-gá-yu núú-n dàcuahá-yu tnúhu-n, chi cùu-xi ñ<sup>n</sup> tnúhu ndáá. <sup>18</sup> Te dàtná ní tendaha ñàha-n xii yúhú véxi-í tnuú nchaa ñáyi ndècu ichi cuehé ichi duha, duca<sup>n</sup> càda-í tendaha-í-yu quíhí<sup>n</sup>-yu cáhá<sup>n</sup>-yu tnúhu-í tnuú nchaa ñáyi ndècu ichi cuehé ichi duha. <sup>19</sup> Te yúhú ndécú yíñuhu-í núú-n, te cada ñaha-n xii-í nàcuáa cùu iní-n sá cuendá-yu, te duca<sup>n</sup> te cundecu yíñuhú-yu núú-n dàcuahá-yu tnúhu-n.

<sup>20</sup> Te ñá díú cuendá mee-ni ñáyi sa ní sándáá iní-xi cáhá<sup>n</sup> ndàhú-í núú-n, chi tnàhá cuendá nchaa ñáyi na quíndáá iní ñáhá xii-í ndéé idá-gá nùu na cùndedóho-yu tnúhu cáhá<sup>n</sup> ñáyi na tendaha-í. <sup>21</sup> Te xicá<sup>n</sup> táhú-í núú-n sá ncháá-yu ñ<sup>n</sup>-ná ichi na cùu-yu, te ñ<sup>n</sup>-ná cani iní ndihí ñàhá-yu xii-o dàtná cúu nchòo ñ<sup>n</sup>-ni cuu-o. Te duca<sup>n</sup> ñ<sup>n</sup>-ná cuu-o ndihí-yu cuendá sá ná quíndáá iní nchaa ñáyi ndècu ichi cuehé ichi duha sá díú-n ñí tendaha ñàha-n xii-í véxi-í ñuyíú-a. <sup>22</sup> Te nchaa sá vaha ní taxi-n ndècu ndihí-í ní dánèhé-í-yu cuendá sá ñ<sup>n</sup>-ná cuú-yu cundecú-yu dàtná ndécú nchòo. <sup>23</sup> Te yúhú cundecu ndihí-í-yu, te yòhó cundecu ndihí ñàha-n xii yúhú cuendá ñ<sup>n</sup>-ná cuu ndisá-yu cundecú-yu. Te duca<sup>n</sup> te cutnùní iní nchaa ñáyi ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúu iní ñáhá-n xii yúhú.

<sup>24</sup> Táu, mee-n ñí taxi cuendá-n-yu, te cuíní-í sá cùndecú-yu núú cùndècu-í cuendá quíní-yu sá quidé càhnu ñàha-n xii-í chi duca<sup>n</sup>-ni cùu iní ñáhá-n xii yúhú ndéé cùtnàhá vátá ngáva-gá ñuyíú. <sup>25</sup> Táu, yòhó ío yíñuhu ndecu-n. Te ñáyi ndècu ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáyi ní sándáá iní ñáhá xii-í sa xini-yu sá díú-n ñí tendaha ñàha-n xii-í véxi-í ñuyíú-a. <sup>26</sup> Te sa xàha<sup>n</sup>-í xii-yu yoo cùu-n, te díu-ni duca<sup>n</sup> càda-í cuendá cuu iní tnàhá-yu dàtná cúu iní ñáhá-n xii-í,

te duca<sup>n</sup> cùndecu-í ndihí-yu —càchí-gá xáha<sup>n</sup>-gá xii Tátá-gá Dútú Ndiöxi.

## 18

*Ní tñi-güedé Jèsús ndécá ñàha-güedé cuáhá<sup>n</sup>*  
(Mt. 26:47-56; Mr. 14:43-50; Lc. 22:47-53)

<sup>1</sup> Te sátá dúcá<sup>n</sup> ñí cáhá<sup>n</sup> Jèsús, te ní quee-gá ndihí cue téé xica cuu ndihí-gá cuáhá<sup>n</sup>-güedé ndàa ingá xio yuhu yùú Cèdrón. Te yacá<sup>n</sup> cáá ñ<sup>n</sup> lahuertá, te xití lahuertá-án cuãnguihu Jèsús ndihí cue téé xica cuu ndihí-gá. <sup>2</sup> Te té Jüdás déhe té Xímú Iscarioté téé ní sáha cuendá ñáhá xii-gá núú cué téé cùu úhú iní ñáhá sa xini-dé lahuertá-án chi titní xito ní sáhá<sup>n</sup> Jèsús ndihí-güedé xía<sup>n</sup>. <sup>3</sup> Núu ndáá ichi xía<sup>n</sup> ñí sáá té Jüdás ndihí vài sandadú, ndihí cue téé quide cuendá veñuhu ní techiú<sup>n</sup> ñàha cue dútú cùnùu, ndihí cue téé cùu fariséú. Te xínehe-güedé machití ndihí ñ<sup>n</sup> úú-gá sá dèé<sup>n</sup>, te yòtnuú-güedé linterná ndihí iti ní sáá. <sup>4</sup> Te Jèsús sa ñàha-gá nchaa nàcuáa cada ñàha-güedé xii-gá nùu ní sáhá<sup>n</sup> tuha ñàha-gá xii-güedé, te ní xáha<sup>n</sup>-gá:  
—¿Yoo nànducu-ndo? —cachí-gá xáha<sup>n</sup>-gá xii-güedé.

<sup>5</sup> Te ní xáha<sup>n</sup>-güedé:

—Jèsús téé ñuú Nazàrét nánducu-ndí —càchí-güedé xáha<sup>n</sup>-güedé xii-gá.

Te ní xáha<sup>n</sup> Jèsús:

—Yúhú duca<sup>n</sup> nani-í, te náu-í ndécú-á te núu yúhú nánducu-ndo —cachí-gá xáha<sup>n</sup>-gá xii-güedé.

Te tnàhá té Jüdás téé ní sáha cuendá ñáhá xii-gá ndihí-güedé. <sup>6</sup> Te òré ní xáha<sup>n</sup> Jèsús sá díú-gá cúu téé nànducu-güedé, te ní nacaca dùma-güedé te ní nduá-güedé ndéé ñuhu. <sup>7</sup> Te ní xicá<sup>n</sup> tnúhú tùcu Jesús núu-güedé yoo nànducu-güedé. Te ní xáha<sup>n</sup> tùcu-güedé sá Jèsús téé ñuú Nazàrét nánducu-güedé, <sup>8</sup> núu ní xáha<sup>n</sup>-ná Jèsús:

—Sa ní cáhá<sup>n</sup>-í sá díú yúhú duca<sup>n</sup> nani-í, te núu yúhú nánducu-ndo, te dañà-ndo nchàa cue téé iha



na nùhú-güedé —càchí-gá xáha<sup>n</sup>-gá xii-güedé.

<sup>9</sup> Duha ní cuu chi ní quee ndáá-xi nàcuáa ní cáhá<sup>n</sup> méé Jèsús chi ní cachi-gá sá ncháá ñáyiú ní sáha cuendá ñáhá Yá Ndióxi cundecu ndihí-gá vá cuíta nihnú-yu. <sup>10</sup> Te té Xímú, àdi Pelú chi úú diù-dé, néhé-dé ñí machití, te ní tava-dé machití-án ñí-xi te ní xehndé-dé lóho xio cùha ñí tée nàni Malcú ní quéndeé duu<sup>n</sup>. Te tée-án xínú cuèchi-dé núú dütú cúnú-gá. <sup>11</sup> Te ní xáha<sup>n</sup> Jèsús xii té Pèlú:

—Nataxúha machití-án núú ñúhú-xí, chi dacuití sá ndóhò-í nàcuáa ní cachí Tàtà-í cunduu —càchí-gá xáha<sup>n</sup>-gá xii-dé.

*Jèsús ndécú-gá núú dütú cúnú-gá*  
(Mt. 26:57-58; Mr. 14:53-54; Lc. 22:54)

<sup>12</sup> Te cue sandàdú ndihí cue tée cúnú-gá núú-güedé, ndihí cue tée quide cuendá veñúhu ní tñí-güedé Jèsús, te ní dácútú ñàha-güedé. <sup>13</sup> Te ndèca ñàha-güedé xii-gá cuáhá<sup>n</sup> núú ndécú tē Ànás, te té Ànás-án cúú-dé tātá ñadihí té Caifás. Te té Caifás-án ñí cuu-dé dütú cúnú-gá cuíá-án. <sup>14</sup> Te diù-ni tée-án ñí xáha<sup>n</sup>-dē xii ñáyiú isràél sá vāha-gá sá ñí-ni tēe na cùú-dé sá cuendá-yu ncháá-yu.

*Té Pèlú càhá<sup>n</sup>-dé núú ñáyiú sá ñà túú xìní-dé Jèsús*

(Mt. 26:69-70; Mr. 14:66-68; Lc. 22:55-57)

<sup>15</sup> Te té Pèlú, àdi Xímú chi úú diù-dé, ndihí ingá tucu-dé nàcuáa xica cuu ndihí-güedé Jèsús nchícú<sup>n</sup> ñáhá-güedé xii-gá cuáhá<sup>n</sup>. Te ñí tée-án xìní tñáhá-dé ndihí dütú cúnú-án núú nchícú<sup>n</sup>-dé tñáhá-dé Jèsús cuánguihu ndéé núú cáá vèhe tée cúnú-án. <sup>16</sup> Dico té Pèlú ní ndóo-dé yuyèhe ndaa quehé, núú ní ndee tée ndihí té Pèlú-án ñí cáhá<sup>n</sup> ndihí-dé ñàha ndéé yuyèhe, te ndèca-dé té Pèlú cuánguihu. <sup>17</sup> Te ní xáha<sup>n</sup> ñàha ndéé yuyèhe-án xii té Pèlú:

—¿Náa ñá díú yòhó tñáhá-n xica cuu ndihí-n tée ndèca-güedé cuánguihu-a? —càchí-a<sup>n</sup> xáha<sup>n</sup>-a<sup>n</sup> xii-dé.

Te ní xáha<sup>n</sup> té Pèlú:

—Ñáhá, ñá túú tēe-án xícá cùu ndihí-ú —càchí-dé xáha<sup>n</sup>-dē xii-a<sup>n</sup>.

<sup>18</sup> Te ío víxi<sup>n</sup> quide-xi núú cue tée xínu cuechi, ndihí cue tée quide cuendá veñúhu ní dátñáhá-güedé ñuhú, te xínutñí teté-güedé ndihí té Pèlú.

*Dütú cúnú nducu tñúhu-dé núú Jèsús*

(Mt. 26:59-66; Mr. 14:55-64; Lc. 22:66-71)

<sup>19</sup> Te dütú cúnú ní xícá<sup>n</sup> tñúhú-dé núú Jèsús núú nándi cùu cue tée xica cuu ndihí-gá, te nándi sá dánèhé ñáhá-gá xii-güedé. <sup>20</sup> Te ní xáha<sup>n</sup>-gá:

—Yúhú càhá<sup>n</sup> ndodo-í núú ncháa ñáyiú cuéi xití veñúhu càhnu sá ío cúnú, te cuéi xití ncháa dava-gá veñúhu núú tàcá ncháa ñáyiú isràél duca<sup>n</sup>-ni dānehé-í-yu, te ñá túú dāyuhu cáhá<sup>n</sup>-í. <sup>21</sup> Núú vá càcá<sup>n</sup> tñúhú-n núú-í. Càcá<sup>n</sup> tñúhú núú ncháa ñáyiú sàcúndedóho tñúhu càhá<sup>n</sup>-í, te na càhá<sup>n</sup>-yu núú nása ndùu tñúhu càhá<sup>n</sup>-í chi xìní-yu —càchí-gá xáha<sup>n</sup>-gá xii-dé.

<sup>22</sup> Te sá dúcá<sup>n</sup> ñí cáhá<sup>n</sup> Jèsús núú ñí tée quide cuendá veñúhu nùtñí-dé tñáhá-dé te ní cani-dé ñí déhndé núú-gá. Te ní xáha<sup>n</sup>-dē:

—¿Ná cuendá duca<sup>n</sup> càhá<sup>n</sup>-n núú dütú cúnú-í? —cachí-dé xáha<sup>n</sup>-dē xii-gá.

<sup>23</sup> Te ní xáha<sup>n</sup> Jèsús xii-dé:

—Te núú nèhé ní cáhá<sup>n</sup>-í te cáhá<sup>n</sup>-n nása ndùu tñúhu ní cáhá<sup>n</sup>-í, te yúhú càhá<sup>n</sup> vāha-í te duca<sup>n</sup> càniha-n —cachí-gá xáha<sup>n</sup>-gá xii-dé.

<sup>24</sup> Te ndùtu yoho-ni Jèsús ní dánùhu ñáhá tē Ànás xii-gá ndaha té Caifás dütú cúnú-gá.

*Té Pèlú càhá<sup>n</sup> tucu-dé núú ñáyiú sá ñà túú xìní-dé Jèsús*

(Mt. 26:71-75; Mr. 14:69-72; Lc. 22:58-62)

<sup>25</sup> Te té Pèlú nùtñí teté-ni-dé, te ní xáha<sup>n</sup>-güedé xii-dé:

—¿Náa ñá díú tñáhá yòhó xícá cùu ndihí tée ndèca-ndí véxi-án? —càchí-güedé xáha<sup>n</sup>-güedé xii-dé.

Te ní xáha<sup>n</sup> té Pèlú:

—Ñáhá, ñá túú tēe-á<sup>n</sup> xicá cùu ndìhi-ú —càchí-dé xáha<sup>n</sup>-dē xii-güedé.

<sup>26</sup> Te ì<sup>n</sup> ñaní tnáhá tēe ní xehndé té Pèlú lóho-xi-á<sup>n</sup> xínú cuèchi-dé tnáhá-dé núú dütú cúnú. Te tēe-á<sup>n</sup> ní xáha<sup>n</sup>-dē xii té Pèlú:

—¿Náa ñá díú tnáhá-n ndìhi-n-dé ní xíní ñáhà-í òré ní tni-ndí-dé xití lahuertá? —càchí-dé xáha<sup>n</sup>-dē xii-dé.

<sup>27</sup> Te té Pèlú ní xáha<sup>n</sup> tùcu-dé sá ñá díú-dē, te òré-á<sup>n</sup> ní cana ì<sup>n</sup> líhi.

*Jèsús ndécú-gă núú tē Pìlatú*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáhá<sup>n</sup> vechiú<sup>n</sup> tēe cùu gobiernú. Te sa ta cùditó-ni-gá cuáhá<sup>n</sup> núu ñá ní cuíní cue tēe isràél quíhu-güedé xití vechiú<sup>n</sup> tēe cùu gobiernú-á<sup>n</sup>. Te núu nì quíhu-güedé vechiú<sup>n</sup>-á<sup>n</sup> ñá, te vá cúú-gă quíhu-güedé cudini-güedé vico pascuá ní cùu chi duca<sup>n</sup> tnáhi quide-güedé. <sup>29</sup> Núú té Pìlatú tēe cùu gobiernú ní quee-dé vechiú<sup>n</sup>-dé ní cáhá<sup>n</sup> ndìhi ñaha-dē xii-güedé, te ní xáha<sup>n</sup>-dē:

—¿Ná cuéchi ní quide tēe-a núu ndèca-ndo-dé véxi? —càchí-dé xáha<sup>n</sup>-dē xii-güedé.

<sup>30</sup> Te ní xáha<sup>n</sup>-güedé:

—Te núu dícó ñá túú cuèchi-dé-á<sup>n</sup> te vá cándeca-ndí-dé quixi núú-n ní cùu —cachí-güedé xáha<sup>n</sup>-güedé xii-dé.

<sup>31</sup> Te ní xáha<sup>n</sup> tùcu té Pìlatú xii-güedé:

—Chí cándeca-dé cuánùhú, te cada ndáá-ndó cuèchi-dé nàcuáa càa leí méé-ndó —càchí-dé xáha<sup>n</sup>-dē xii-güedé.

Te ní xáha<sup>n</sup>-güedé:

—Dico nchúhú ñáyiú isràél chi ñá túú dùca<sup>n</sup> taxi tnuní leí sá cáhni-ndí —càchí-güedé xáha<sup>n</sup>-güedé xii-dé.

<sup>32</sup> Te duca<sup>n</sup> ñí cuu chi dacuití ñí quee ndáá-xi nàcuáa ní cáhá<sup>n</sup> méé Jèsús cada-xi cuú-gá. <sup>33</sup> Te cuándihu té Pìlatú vechiú<sup>n</sup>-dé, te ní cana-dé Jèsús ní xicá<sup>n</sup> tnúhú-dē núú-gă, te xáha<sup>n</sup>-dē:

—¿Yòhó yìndaha-n ñáyiú isràél-á<sup>n</sup>? —càchí-dé xáha<sup>n</sup>-dē xii-gá.

<sup>34</sup> Te ní xáha<sup>n</sup> Jèsús:

—¿Te xíá<sup>n</sup> càhá<sup>n</sup>-n sã vëxi iní méé-n, àdi ió ì<sup>n</sup> ñáyiú ní cachí tnúhu xii-n cuendá-í? —càchí-gá xáha<sup>n</sup>-gă xii-dé.

<sup>35</sup> Te ní xáha<sup>n</sup> tē Pìlatú xii-gá:

—Ñá díú tēe isràél cùu-í núu duca<sup>n</sup> cãhá<sup>n</sup>-n, chi cue ñaní tnáhá-n cuè tēe isràél ndìhi cue dütú cúnú ní taxi cuendá ñáhá-güedé xii-n iha. ¿Te ná ní quide-n? —càchí-dé xáha<sup>n</sup>-dē xii-gá.

<sup>36</sup> Te ní xáha<sup>n</sup> Jèsús:

—Ñá díú tēe ñuyú-a cùu-í te ni ñá túú vëxi-í taxi tnuní-í ñuyú-a, chi núu dícó iha tàxi tnuní-í á<sup>n</sup> te cue tēe xica cuu ndìhi-í nàá-güedé ndìhi cue tēe isràél cuendá sá vã tñí ñaha-güedé xii-í ní cùu, dico ñá túú vëxi-í sá táxi tnuní-í ñuyú-a —càchí-gá xáha<sup>n</sup>-gă xii-dé.

<sup>37</sup> Te ní xáha<sup>n</sup> tē Pìlatú:

—¿Te tēe yìndaha ñáyiú cùu-ó vání? —càchí-dé xáha<sup>n</sup>-dē xii-gá.

Te ní xáha<sup>n</sup> Jèsús:

—Te dàtná càchí-n-á<sup>n</sup> yìndaha ndisa-í ñáyiú, chi yúhú véxi-í ñuyú-a te iha ní cacu-í te càhá<sup>n</sup>-í mee-ni tnúhu ndáá. Te nchaa ñáyiú na cùdí ìní-xi tnúhu ndáá, te tedóho-yu nchaa tnúhu càhá<sup>n</sup>-í —càchí-gá xáha<sup>n</sup>-gă xii-dé.

<sup>38</sup> Te ní xáha<sup>n</sup> tē Pìlatú:

—¿Te ná cúú-tu tnúhu ndáá-á<sup>n</sup>? —càchí-dé xáha<sup>n</sup>-dē xii-gá.

*Càchí-güedé sá cáhni-güedé Jèsús*

(Mt. 27:15-31; Mr. 15:6-20; Lc. 23:13-25)

Te sátá ñí yáha ní xicá<sup>n</sup> tnúhú tē Pìlatú núú Jèsús, te ní quee tucu-dé quehé, te xáha<sup>n</sup>-dē xii cue tēe isràél:

—Ñá túú ñá cuéchi tēe-a. <sup>39</sup> Te váha-ni chi duca<sup>n</sup> tnáhi quide nchohó sá ndì tnahá nduu vico pascuá cuíní-ndó sã dácacu-í ì<sup>n</sup> tēe yìhi vecaá. Te núu cuíní-ndó te na dácacu-í tēe yìndaha ñaha xii-ndo —cachí-dé xáha<sup>n</sup>-dē xii-güedé.

<sup>40</sup> Te sá dúcá<sup>n</sup> ñí cáhá<sup>n</sup>-dé, núu nchaa-güedé níhi ní cáhá<sup>n</sup>-güedé, te xáha<sup>n</sup>-güedé:

—¡Vá dácacu-n tēe-á<sup>n</sup>, té Barrábás dácacu-n! —càchí-güedé xáha<sup>n</sup>-güedé xii-dé.

Te té Barrábás-á<sup>n</sup> ñí cuu-dé ì<sup>n</sup> ñadúhú.

## 19

<sup>1</sup> Te té Pilatú ní táuchíú<sup>n</sup>-dě ní tñi ñaha cuè sandadú xii Jèsús, te ní caniha-güedě xii-gá ndihi ñi. <sup>2</sup> Te diu-ni cue téé-á<sup>n</sup> ñi cadúha-güedé i<sup>n</sup> coróná iñu ní chihi-güedé díquí-gă, te ní dáquíu nuu ñaha-güedě xii-gá i<sup>n</sup> dóó tícuèhé víhí. <sup>3</sup> Te ní sáhá<sup>n</sup> ndehe yatni-gá-güedé núú-gă, te ní xáha<sup>n</sup>-güedě:

—Ílo càhnu cuu yohó téé yìndaha ñaha xii ñáyiú isràél! —càchí-güedé xáha<sup>n</sup>-güedě cúdíquí ndeé ñáhá-güedě xii-gá.

Te ní cani-güedé déhndé núú-gă.

<sup>4</sup> Te ní quee tucu té Pilatú quehé te ní xáha<sup>n</sup>-dě xii nchaa ñáyiú xìndecu quehé:

—Te cundehe-ndo-dě ná ndeé ñùhu-í-dé iha, chi yúhú sàha-í cuendá sá ñà túú cuèchi-dé —càchí-dé xáha<sup>n</sup>-dě xii-yu.

<sup>5</sup> Te ní ndeñuhu ñaha té Pilatú xii Jèsús xití vechiú<sup>n</sup>-dé te ñùhu i<sup>n</sup> coroná iñu díquí-gă, te ñihnu-gá dóó tícuèhé víhí-á<sup>n</sup>. Te ní xáha<sup>n</sup> tē Pilatú xii-yu:

—¡Nái-dé-a! —càchí-dé xáha<sup>n</sup>-dě xii-yu.

<sup>6</sup> Te ní xini ñáhá cuè dútú cúnù ndihi cue téé quide cuendá veñuhu. Te ní cuáá-güedé, te xáha<sup>n</sup>-güedě:

—¡Cata caa-dé! ¡Cata caa-dé núú cùrúxí! —càchí-güedé xáha<sup>n</sup>-güedě xii-dé.

Te ní xáha<sup>n</sup> tē Pilatú:

—Váha-gá núu candeca mee-ndo-dě quíhí<sup>n</sup> cata caa-ndo-dě núú cùrúxí, chi yúhú cútnú<sup>n</sup>í iní-í sá ñà túú na cuèchi-dé —càchí-dé xáha<sup>n</sup>-dě xii-güedé.

<sup>7</sup> Te ní xáha<sup>n</sup> cuè téé isràél:

—Lèi ndécú ndihi nchúhú càchí-xi sá dàí cuú-dé, chi càchí-dé sá Dēhe Yá Ndióxi cúú-dě —càchí-güedé xáha<sup>n</sup>-güedě xii-dé.

<sup>8</sup> Te sá dúcá<sup>n</sup> ñi xáha<sup>n</sup>-güedě xii té Pilatú, te vaa-gá ní yùhú-dé. <sup>9</sup> Núu cuándihu tucu-dé vechiú<sup>n</sup>-dé, te ní xáha<sup>n</sup> tùcu-dé xii Jèsús:

—¿Te yohó ndeé téé cùu-n-i? —cachí-dé xáha<sup>n</sup>-dě xii-gá.

Dico Jèsús ñà túú ní cǎhá<sup>n</sup>-gá.

<sup>10</sup> Núu ní xáha<sup>n</sup> tē Pilatú xii-gá:

—¿Te vá càchí tñuhu-n núu ndeé téé cùu-n-u? ¿Náa ñà túú xini-n sá yúhú táxi tñuní-í, te cuu-ni tauchiú<sup>n</sup>-í cata caa ñaha-güedě xii-n núú cùrúxí cuú-n, te cuu-ni dàcácu ñaha-í xii-n-á<sup>n</sup>? —càchí-dé xáha<sup>n</sup>-dě xii-gá.

<sup>11</sup> Te ní xáha<sup>n</sup> Jèsús:

—Yohó ñà túú sá táxi tñuní ñáhá-n xii yúhú ní cùu núu ñà túú Yá Ndióxi ní cùní-gá sá dúcá<sup>n</sup> cùnduu, te téé ní taxi cuendá ñáhá xii-í núú-n tēé-á<sup>n</sup> ïo-gá ndècuéchi-dé dàcúxí yohó —càchí-gá xáha<sup>n</sup>-gă xii-dé.

<sup>12</sup> Te òré-á<sup>n</sup> ñi ngüíta té Pilatú ndúcú-dě nàcuáa cada-dé dàcácu-dé Jèsús ní cùu, dico cue téé isràél ní ngüíta-güedé ní cuáá-güedé, te xáha<sup>n</sup>-güedě:

—Te núu na dàcácu-n tēé-á<sup>n</sup>, te ñà díú tē tñáhá tñuhu ndihi té Cèsár cúú-n. Chi ndéda-ni càa téé na càchí sá cúú-dé téé yìndaha ñaha xii ñáyiú cùu úhú iní-dé té Cèsár. Te té Jèsús-á<sup>n</sup> càchí-dé sá táxi tñuní-dé —càchí-güedé xáha<sup>n</sup>-güedě xii-dé.

<sup>13</sup> Te sá dúcá<sup>n</sup> ñi xáha<sup>n</sup>-güedě xii té Pilatú núu ní quee-dé ndihi Jèsús cuáhá<sup>n</sup> ndihi ñaha-dě corrèdór núú ñi quee mee-ni yúú váha núú ñúhú, te xía<sup>n</sup> nání-xí Găbatá tñuhu hēbreú. Te xía<sup>n</sup> ndécú xilé sácóo nchihí té Pilatú xèhndé-dé cuèchi ñáyiú, núu ní nucóo-dé núú xilé-dé òré ní quexiò-dé ndihi Jèsús. <sup>14</sup> Te cùu-xi datná cuádava nduu, nduu vèspré vico pàscuá. Te ní xáha<sup>n</sup> tē Pilatú xii ñáyiú isràél:

—¡Nái téé yìndaha ñaha xii-ndo-a! —cachí-dé xáha<sup>n</sup>-dě xii-yu.

<sup>15</sup> Te ní cuáá-yu, te xǎhá<sup>n</sup>-yu:

—¡Cahni-dé! ¡Cahni-dé! ¡Cata caa-dé núú cùrúxí! —càchí-yu xǎhá<sup>n</sup>-yu.

Te ní xáha<sup>n</sup> tē Pilatú:

—¿Te yúhú cata caa-í téé yìndaha ñaha xii-ndo-u? —cachí-dé xáha<sup>n</sup>-dě xii-yu.

Te cue dútú cúnù ní xáha<sup>n</sup>-güedě:

—Nchúhú ñà túú-gă téé yìndaha ñaha xii-ndí, chi i<sup>n</sup>dii-ni té Cèsár yìndaha ñaha-dé xii-ndí —càchí-güedé xáha<sup>n</sup>-güedě xii-dé.

16 Te té Pilatú ní xáha<sup>n</sup>-dě ní quehe<sup>n</sup> cuendá-güedé Jèsús ndécá ñaha-güedé cuáhá<sup>n</sup> cata caa ñaha-güedé núú cùrúxí.

*Sàta caa-güedé Jèsús núú cùrúxí*  
(Mt. 27:32-44; Mr. 15:21-32; Lc. 23:26-43)

17 Te ní quee Jèsús nchídó-gă cùrúxí cuáhá<sup>n</sup> ì<sup>n</sup> xichi núú nání Yìquì Díquì Ndÿyi. Te tnúhu hèbreú queé-xí Gôlgotá. 18 Te yàcá<sup>n</sup> ní sata caa ñaha-güedé xii-gá núú cùrúxí-á<sup>n</sup>. Te xio xio diñi-gá ní sata caa-güedé úú cue téé ndècu ndisa cuéchi-xi diu-ni núú cùrúxí tucu. 19 Te ní táuchíú<sup>n</sup> tē Pilatú ní taxi ndecu-güedé ì<sup>n</sup> sá ndéé lètrá núú cùrúxí tá càa-gá, te duha càchí lètrá-á<sup>n</sup>: “Jèsús téé ñuú Nazàrét, téé yìndaha ñaha xii ñáyiú isràél”, duha càchí-xi. 20 Te vài ñáyiú isràél ní xiní-yu nàcuáa càhá<sup>n</sup> lètrá-á<sup>n</sup>, chi yatni-ni yuhu ñuú ní sata caa ñaha-güedé xii-gá núú cùrúxí. Te lètrá-á<sup>n</sup> càhá<sup>n</sup>-xi tnúhu hèbreú, te càhá<sup>n</sup>-xi tnúhu griégú, te càhá<sup>n</sup>-xi tnúhu làtín. 21 Te ní xáha<sup>n</sup> cuè dútú cúnúu xii té Pilatú:

—Vá táuchíu<sup>n</sup>-n tee-güedé lètrá càhá<sup>n</sup>-xi “Téé yìndaha ñaha xii ñáyiú isràél” ní cùu, váha-gá tauchíu<sup>n</sup>-n tee-güedé lètrá càhá<sup>n</sup>-xi “Téé càchí yìndaha ñaha xii ñáyiú isràél ní cùu” —cachí-güedé xáha<sup>n</sup>-güedé xii-dé.

22 Te ní xáha<sup>n</sup> tē Pilatú:

—Nàcuáa ní táuchíu<sup>n</sup>-í ní tee-güedé te duca<sup>n</sup> quèndóo-xi —càchí-dé xáha<sup>n</sup>-dě xii-güedé.

23 Te sáta ñi sata caa ñaha cuè sandadú xii Jèsús núú cùrúxí, te cúmí xichi ní quide-güedé dóó-gă, te ì<sup>n</sup> ì<sup>n</sup> xichi dóó-gă ní cáhñu cue sandadú-á<sup>n</sup>. Te ndècu ì<sup>n</sup> dóó-gă dóó cání ñà túú ní tìcu. 24 Te cuendá dóó-ă<sup>n</sup> ñi xítñaha cue sandadú-á<sup>n</sup>:

—Vá ndátá-ó dđó-a, váha-gá ñuú na còto ndéé-ó cuendá quini-ó ndédacàa-o cuu cuendá-ó —càchí-güedé xítñaha-güedé.

Te duca<sup>n</sup> ñi quide-güedé chi ní quee ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi: “Tìtní xichi ní cáhñu-güedé dóó-í. Te ní xito

ndéé-güedé cuendá cutnùní iní-güedé ndédacàa-güedé níhí-güedé dóó-í”, duha càchí-xi núú tütú-gá. Te sá dúcá<sup>n</sup> càhá<sup>n</sup>-xi núú tütú Yă Ndiöxí ñuú xíá<sup>n</sup> duca<sup>n</sup> ñi quide cue sandadú-á<sup>n</sup>.

25 Te yatni diñi curúxí núú tácaà Jesús nútñi ñaná-gă, ndihi cùhú-xi, ndihi tá Màriá ñadihi té Clèofás, ndihi tá Màriá Magdaléná. 26 Te ní xiní Jèsús ñaná-gă nútñi-a<sup>n</sup> diñi ì<sup>n</sup> téé ní xica cuu ndihi-gá, téé ío cùu iní-gá, te ní xáha<sup>n</sup>-gă xii ñaná-gă:

—Năá, téé nútñi-á<sup>n</sup> nduu-dé dàtná déhe mee-n —càchí-gá xáha<sup>n</sup>-gă xii-a<sup>n</sup>.

27 Te ní xáha<sup>n</sup>-gă xii téé ní xica cuu ndihi-gá-á<sup>n</sup>:

—Ñaha-á<sup>n</sup> nduu-a<sup>n</sup> dàtná ñaná méé-n —càchí-gá xáha<sup>n</sup>-gă xii-dé.

Núu ndéé dàvâ-á<sup>n</sup> ñi nduu ñaná ñáhâ tēe-á<sup>n</sup> xii ñaná-gă.

*Ní xihí Jèsús*

(Mt. 27:45-56; Mr. 15:33-41; Lc. 23:44-49)

28 Te ní cutnùní iní Jèsús sá ñi ndihi chiú<sup>n</sup> ní táhú Tătá-gă Dútú Ndiöxí ní quide-gá ñuú ní cachí-gá:

—Yìchí-í ndute —càchí-gá.

Te duha ní càhá<sup>n</sup>-gá chi ní quee ndáá-xi nàcuáa càhá<sup>n</sup>-xi núú tütú Yă Ndiöxí.

29 Te ndècu ì<sup>n</sup> lítu ñuú ndudí íá. Te sá dúcá<sup>n</sup> ñi càhá<sup>n</sup>-gá sá yìchí-gá ndute, núú xíá<sup>n</sup> ní quehe<sup>n</sup>-güedé cáchí te ní chindóyo-güedé xití ndudí íá-ă<sup>n</sup>, te ní chinenu-güedé díquì ì<sup>n</sup> dité yutnu nani hisópó, te ní ndocani-güedé ní chihi-güedé yuhu-gá. 30 Te sáta ñi xihí-gá ndudí íá-ă<sup>n</sup>, te càchí-gá:

—Vitna ní dâxñu cava-í nchaà chiú<sup>n</sup> ní cachí Tătâ-í cada-í —duha ní cachí-gá.

Te ní xócuïta dúcú<sup>n</sup>-gă ndàa núú-gă, te ní xihí-ni-gá.

*Ì<sup>n</sup> sandadú ní caá<sup>n</sup>-dé yiqui naha Jèsús ndihi ì<sup>n</sup> pùyá yihí càà núú-xi*

31 Te cuendá sá nduú vispré vico pascuá cúú-xí ñuú ñá ní cuini cue téé isràél cundecu-ni yiqui cùñú-gá núú cùrúxí ndihi yiqui cùñú cue téé ní sata caa-güedé diñi-gá, chi cuendá nduu tnéé-á<sup>n</sup> cúú-xí nduú ndetatú ñáyiú, te



ío quide cahnú-yu nduu-ǎ<sup>n</sup>, núu ní xáha<sup>n</sup>-güedě xii té Pilatú sá táuchüu<sup>n</sup>-dé quíhí<sup>n</sup> cue tée cáhnú-güedé díhí<sup>n</sup> Jèsús ndihí díhí<sup>n</sup> cue tée tàcaa ndihí-gá, te xocàni-güedé yiqui cùñú-gá ndihí yiqui cùñú-güedé yàcá<sup>n</sup>. <sup>32</sup> Te sátá dúcá<sup>n</sup> te ní sáhá<sup>n</sup> cue sandàdú ní sáhnú-güedé díhí<sup>n</sup> cue tée tàcaa xio xio diñi Jesús. <sup>33</sup> Te òré ní cuyatni-güedé núú-gǎ, te ní xiní-güedé sá sà ní xíhí-gá nüu ñá ní sáhnú-güedé díhí<sup>n</sup>-gá.

<sup>34</sup> Dico ì<sup>n</sup> sandàdú-á<sup>n</sup> ñi cúxi-dé püyá néhé-dě ì<sup>n</sup> xio yiqui naha-gǎ, te yìhi caá núú-xi núu ní caá<sup>n</sup>-xi yiqui naha-gǎ ní quee níñi ndihí ndute cuií. <sup>35</sup> Te yúhú té Juáá tée ní cadúha tutú-a ní xiní-í nàcuáa ní cuu ní xíhí Jèsús, te xíá<sup>n</sup> nüu càhá<sup>n</sup> ndáá-í cuendá quíndáá iní-ndó. <sup>36</sup> Te duca<sup>n</sup> ñi cuu ñá ní sáhnú-güedé díhí<sup>n</sup> Jèsús, chi ní quee ndáá-xi nàcuáa càhá<sup>n</sup>-xi núu tütú Yá Ndiöxí núu càchí-xi: “Vá càhnú-güedé ñi ì<sup>n</sup> yiqui-gá”, duha càchí-xi. <sup>37</sup> Te duca<sup>n</sup> ñi quide-güedé Jèsús ní caá<sup>n</sup>-güedé yiqui naha-gǎ, chi ingá xichi núu tütú Yá Ndiöxí càchí-xi: “Sáá nduu te quiní-güedé ì<sup>n</sup> tée ní dánicuèhé-güedé”, duha càchí-xi.

### *Chíndúxi-güedé Jèsús*

(Mt. 27:57-61; Mr. 15:42-47; Lc. 23:50-56)

<sup>38</sup> Te sátá dúcá<sup>n</sup> ñi cuu, te té Chèé téé ñuú Arimateá tñhá-dé ní sándáá iní-dé tñuhu Jèsús dico dayuhu, chi ní xóo yùhú-dé cue tée cùnuu núu ñáyiü isràél. Te téé-á<sup>n</sup> ñi xáha<sup>n</sup>-dě xii té Pilatú nüu vá dáñá-dě canehe-dé yiqui cùñú Jèsús quíhí<sup>n</sup> chíndúxi-dé, te té Pilatú ní xáha<sup>n</sup>-dě xii-dé sá cúu cànehe-dé yiqui cùñú Jèsús quíhí<sup>n</sup>, núu ní sáhá<sup>n</sup>-dé ní nuu nehe-dé yiqui cùñú-gá núu cùrúxí nchídó-dě cuáhá<sup>n</sup>. <sup>39</sup> Te té Nicòdemú téé ní sáhá<sup>n</sup> niú ní cáhá<sup>n</sup> ndihí-dé Jèsús ndéé díhna, téé-á<sup>n</sup> néhé-dě ócò úxí kílü yuchi ní cuáha mee-ni yúcú sá nání mìrrá ndihí yúcú sá nání àloés. Te ío váha tñami sahá<sup>n</sup>. <sup>40</sup> Te ní naníhí tñhá-dě ndihí té Chèé, te ní chidúcú<sup>n</sup>-nuu-güedé yiqui cùñú Jèsús mee-ni dǒo vǎha, te nàcuáa

ta dùcu<sup>n</sup> nuu-güedé yiqui cùñú-gá dǒo-ǎ<sup>n</sup>, te duca<sup>n</sup> ta chido-güedé yuchi sáhá<sup>n</sup> tñamí-ǎ<sup>n</sup> nüú dǒo-ǎ<sup>n</sup> chi duca<sup>n</sup> tñáhí quide ñáyiü isràél òré chíndúxi tñhá-yu. <sup>41</sup> Te yatni núu ñi sata caa-güedé Jèsús cáá ì<sup>n</sup> lahuertá. Te xití lahuertá-á<sup>n</sup> nchíi ì<sup>n</sup> yaú cava duha cuáhá<sup>n</sup> ndáá-xi, te vátá yǒo ì<sup>n</sup>-gá nguíndúxi xíá<sup>n</sup>. <sup>42</sup> Te cuendá sá ñi cuyatni tñhá nduu ndètatú ñáyiü isràél nüu xíá<sup>n</sup> yaú cava nchíi yatni-ni xíá<sup>n</sup> ñi chihi-güedé yiqui cùñú Jèsús.

## 20

### *Jèsús ní ndoto-gá*

(Mt. 28:1-10; Mr. 16:1-8; Lc. 24:1-12)

<sup>1</sup> Te ndumìngú tacuìhndá-gá cuáhá<sup>n</sup> tá Màriá Magdalèná cuáhá<sup>n</sup> ngoto-xi yaú núu ñi chihi-güedé yiqui cùñú Jèsús, te ní sáá-xi ní xiní-xi sá ñá túú-gǎ ndèdí yúu yèhe yaú-á<sup>n</sup>. <sup>2</sup> Núu xínu-xi cuánuhú núu ndécú tè Xímú, àdi Pelú chi úu diü-dé, ndihí ingá téé ní xica cuu ndihí-gá téé ío cùu iní-gá, te ní xáha<sup>n</sup>-xi xii-güedé:

—Nèhe-güedé yiqui cùñú Jèsús cuáhá<sup>n</sup>, te ñá xiní-ó ndéé ní taxi ndecu-güedé —càchí-xi xáha<sup>n</sup>-xi xii-güedé.

<sup>3</sup> Te ní quee té Pèlú ndihí ingá téé-á<sup>n</sup> cuáhá<sup>n</sup> ndéhé-güedě yaú núu ñi chihi-güedé yiqui cùñú-gá. <sup>4</sup> Te ndúú-güedé xínú-güedě cuáhá<sup>n</sup> ní cùu, dico ingá téé-á<sup>n</sup> ñi cuu níhi-gá sáhá-dě cuáhá<sup>n</sup>-dé nüu díhna-gá-dé ní sáá-dé yuhu yaú núu ñi chihi-güedé yiqui cùñú Jèsús ní cùu. <sup>5</sup> Te ní ngáundeyi-dé xító ñihni-dé xití yaú-á<sup>n</sup>, te ní xiní-dé mee-nǎ dǒo vǎha sá ñi xiducú<sup>n</sup> nuu-gá yúcú, dico ñá ní quíhu-dé. <sup>6</sup> Te sátá ñi sáá té Pèlú te cuànguihu-dé xití yaú-á<sup>n</sup>, núu tñhá-dé ní xiní-dé nchaa dǒo ñi xiducú<sup>n</sup> nuu-gá yúcú-ǎ<sup>n</sup>. <sup>7</sup> Te ní xiní-dé sá dǒo ñi xíndútú díquí-gǎ ñá túú càtuu jundú-xi ndihí dǒo ñi xiducú<sup>n</sup> nuu-gá chi ní nadúcú<sup>n</sup>-nuu-ná càtùu ì<sup>n</sup> xio. <sup>8</sup> Te nchícú<sup>n</sup> tuçu téé ní sáá díhna-gá-á<sup>n</sup> cuànguihu xití yaú-á<sup>n</sup>, te ní xiní-dé sá dǒo-nǎ yúcú, te ñá

túú-gã yiqui cùñú Jèsús nũu ní sándáá iní-dé sá nĩ ndoto-gá. <sup>9</sup> Chi vátá tècú tnùnì-gá-güedé nàcuáa càhá<sup>n</sup>-xi núú tütú Yã Ndiõxí núú càchí-xi sá Jèsús ndoto-gá. <sup>10</sup> Te ní xícó ndi ndúú cue téé ní sángoto yaú núú nĩ chihi-güedé yiqui cùñú Jèsús ní cùu cuánuhú-güedé vehe-güedé.

*Jèsús ní naníhí tnáhá-gã ndíhi tá Màriá Magdalèná*  
(Mr. 16:9-11)

<sup>11</sup> Te ní sáá tucu tá Màriá yuhu yaú núú nĩ chihi-güedé yiqui cùñú Jèsús te ní ngúíta-xi ndàhyú-xi, te ní ngáundeyi-xi xìto nihni-xi xití yaú-án. <sup>12</sup> Te xití yaú-án nĩ xiní-xi úú espíritú xínú cuèchi núú Yã Ndiõxí xíxíhu-xi mee-ni dõó cuixín xĩndecu-xi núú nĩ cáa yiqui cùñú-gá. Te ì<sup>n</sup>-xi nùcõo núú nĩ cáa díquí-gã, te ì<sup>n</sup>-xi nùcõo núú nĩ cáa sáhá-gã. <sup>13</sup> Te espíritú-án nĩ xáha<sup>n</sup>-xi xii tá Màriá:

—¿Ná cuèndá ndàhyú-n? —càchí-xi xáha<sup>n</sup>-xi.

Te ní xáha<sup>n</sup> tá Màriá:

—Ndàhyú-í chi nèhe-güedé yiqui cùñú Yaá cúú Xitohó-í cuáhá<sup>n</sup>, te ñá túú xiní-í ndéé ní taxi ndecu-güedé —càchí-xi xáha<sup>n</sup>-xi xii cue espíritú-án.

<sup>14</sup> Te tnúhu-ni-án nĩ cáhá<sup>n</sup>-xi te ní nchócótó-xi ì<sup>n</sup> xio, te ní xiní-xi Jèsús nútní-gá dico ñá túú ní cùtnuní iní-xi sá díú mèe-gá. <sup>15</sup> Te ní xáha<sup>n</sup> Jèsús xii-xi:

—¿Ná cuèndá ndàhyú-n? ¿Yoo nànducu-n? —cachí-gá xáha<sup>n</sup>-gã xii-xi.

Te mee-xi nĩ sani iní-xi sá tèe xìto lahuertá-án cúú tèe-án, núú ní xáha<sup>n</sup>-xi:

—Táta, te núú yòhó néhé-n yiqui cùñú Jèsús cuáhá<sup>n</sup>, te cáhá<sup>n</sup>-n ndéé ní taxi ndecu-n chi cuèndá naquehe<sup>n</sup>-í canehe-í núhú —càchí-xi xáha<sup>n</sup>-xi.

<sup>16</sup> Te ní cáhá<sup>n</sup> díú ñàha-gá xii-xi, te xáha<sup>n</sup>-gã:

—¡Màriá! —càchí-gá xáha<sup>n</sup>-gã xii-xi.

Te ní ndacoto-xi núú-gã, te ní cáhá<sup>n</sup>-xi tnúhu hèbreú, te xáha<sup>n</sup>-xi:

—¡Rabòní! —càchí-xi xáha<sup>n</sup>-xi. Te tnúhu-án quéé-xi Mèstrú.

<sup>17</sup> Te ní xáha<sup>n</sup> Jèsús:

—Daña vá ngání ñàha-n chi vátá ndáá-gã-í núú ndécú Tàtà-í. Te núhú-n cùñaha-n xii cue téé ío váha ní tnáhá tnúhu ndíhi-í sá ndáa-í núú ndécú Tàtà-í Dútú Ndiõxí, te diu-gá cúú Tàtà-ndó nchaa-ndo, te diu-ni-gá cúú Ndiõxí-ndó —càchí-gá xáha<sup>n</sup>-gã xii-xi.

<sup>18</sup> Te ní natnii tá Màriá Magdalèná ichi cuánuhú-xi cùñaha-xi xii cue téé ní xica cuu ndíhi-gá sá nĩ xiní-xi Jèsús, te ní xáha<sup>n</sup>-xi xii-güedé nchaa nàcuáa ní xáha<sup>n</sup>-gã xii-xi.

*Ni quexìo Jèsús núú xĩndecu cue téé ní xica cuu ndíhi-gá*

(Mt. 28:16-20; Mr. 16:14-18; Lc. 24:36-49)

<sup>19</sup> Te diu-ni ndumìngú sandiqui<sup>n</sup> ní natacá cue téé ní xica cuu ndíhi-gá, te xĩndedí nihnu-güedé vehe sá xiyùhú-güedé cue téé cùnuu núú ñáyiu isràél. Te ní quíhu Jèsús ndéé tnuú-güedé ní ngúnutnii-gá, te ní xáha<sup>n</sup>-gã:

—Yá Ndiõxí chĩndèe ñaha-gá xii-ndo ío váha cùu iní-ndó ndècu-ndo —cachí-gá xáha<sup>n</sup>-gã xii-güedé.

<sup>20</sup> Te ní dánèhé ñáhá-gã ndaha-gá ndíhi yiqui naha-gã xii-güedé. Te ío ní cudíí iní-güedé sá díú ndísa-gá ní xiní ñáhá-güedé. <sup>21</sup> Te ní xáha<sup>n</sup> tucu Jèsús xii-güedé:

—Yá Ndiõxí chĩndèe ñaha-gá xii-ndo ío váha cùu iní-ndó ndècu-ndo. Te dàtná ní tendaha ñàha Tàtà-í Dútú Ndiõxí xii-í véxi-í ñuyíú-a, te duca<sup>n</sup> tendaha ñaha-í xii-ndo quíhí-ndó cáhá<sup>n</sup>-ndó tnúhu-í núú ñáyiu —càchí-gá xáha<sup>n</sup>-gã xii-güedé.

<sup>22</sup> Te ní chiyóco-gã núú-güedé, te ní xáha<sup>n</sup>-gã:

—Chí ndúú tàhú Espíritú Yã Ndiõxí cundecu ndíhi-ndo. <sup>23</sup> Te nchaa ñáyiu na quĩndáá iní-xi tnúhu-í te cùñaha-ndo xii-yu sá nĩ quide càhnu iní Yã Ndiõxí nchaa cuèchi-yu. Te nchaa ñáyiu vá quĩndáá iní tnúhu-í te cùñaha-ndo xii-yu sá vã cáda càhnu iní-gá cuèchi-yu —càchí-gá xáha<sup>n</sup>-gã xii-güedé.

*Té Mǎxí càhá<sup>n</sup> ndíhi-dé Jèsús*

<sup>24</sup> Te núú ùxúú cue téé ní xica cuu ndihí-gá, te ì<sup>n</sup>-dé nání-dě Mǎxí téé ní xóo danàni-güedé Cuächí, te téé-á<sup>n</sup> ñà túú-dě ndécú ndihí-güedé òré ní sáhá<sup>n</sup> Jèsús. <sup>25</sup> Te dava-gá cue téé ní xica cuu ndihí-gá ní xáha<sup>n</sup>-güedě xii-dé:

—Ní xiní-ndí Jèsús —càchí-güedé xǎha<sup>n</sup>-güedě.

Te ní xáha<sup>n</sup> tǎ Mǎxí:

—Te vá quíndáá iní-í, chi ndéé quíní-í ndaha-gá núú ñí quée nduyú, te dàquíhu-í díquí ndáhà-í núú ñí caá<sup>n</sup> nduyú-á<sup>n</sup>, te dàquíhu ndàha-í yíquí naha-gǎ núú ñí caá<sup>n</sup>, duca<sup>n</sup> te quíndáá iní-í —càchí-dé xǎha<sup>n</sup>-dě xii-güedé.

<sup>26</sup> Te núú ùná tucu nduu ní natacá tucu cue téé ní xica cuu ndihí Jèsús ì<sup>n</sup> vehe, te nduu-ǎ<sup>n</sup> tnàhá té Mǎxí ndécú ndihí-güedé. Te cuèi ndèdí ni-hnu-güedé vehe-á<sup>n</sup>, te ní quíhu Jèsús ndéé tnuú-güedé, te ní xáha<sup>n</sup>-gǎ:

—Yá Ndiòxí chíndèe ñaha-gá xii-ndo ïo váha cùu iní-ndó ndècu-ndo —càchí-gá xáha<sup>n</sup>-gǎ xii-güedé.

<sup>27</sup> Te ní xáha<sup>n</sup>-gǎ xii té Mǎxí:

—Cundehe ndàha-í te dàquíhu-n díquí ndáhá-n núú ñí quée nduyú, te dàquíhu-n ndàha-n yíquí naha-í-a cuèndá quíndáá iní-n te vá cání ì<sup>n</sup> cani úú iní-n —càchí-gá xáha<sup>n</sup>-gǎ xii-dé.

<sup>28</sup> Te ní xáha<sup>n</sup> tǎ Mǎxí xii-gá:

—jYòhó cúú-n Xítohó-í! jYòhó cúú-n Ndiòxi-í! —càchí-dé xǎha<sup>n</sup>-dě xii-gá.

<sup>29</sup> Te ní xáha<sup>n</sup> Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xì-í te ní sándáá iní-n, dico cùdíí-gǎ iní nchaa ñáyiú ñá túú ní xiní núú ñáhá xì-í, te ní sándáá iní-yu —càchí-gá xáha<sup>n</sup>-gǎ xii-dé.

*Quíndáá iní-ó tnǎhu yòdo tnuní núú tütú-a*

<sup>30</sup> Te vài-gá sá vǎ yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndihí-gá. <sup>31</sup> Dico dava-gá ní ngódó tnùní núú tütú-a cuèndá sá quíndáá iní-ndó sǎ Jèsús cúú-gǎ Crìstú Déhe

Dútú Ndiòxí, te naníhí tàhú-ndó te núu na quíndáá iní-ndó-gǎ.

## 21

*Úsá cue téé ní xica cuu ndihí Jèsús ní xiní ñáhá-güedě xii-gá*

<sup>1</sup> Te ingá nduu tucu xíndecu cue téé ní xica cuu ndihí Jèsús yuhu làgúná ñuú Tìberias, te ní sáhá<sup>n</sup>-gá núú xíndecu-güedé-á<sup>n</sup>. Te duha ní cuu ní xiní ñáhá-güedě xii-gá. <sup>2</sup> Te ndècu té Xímú, àdi Pelú chi úú òú-dé, ndihí té Mǎxí téé ní xóo cùñaha-güedé Cuächí, ndihí té Natanàel téé ñuú Cànáá, te ñuú-á<sup>n</sup> yíndèhu-xi distritú Galileá, te tnàhá ndi ndùú déhe té Zebèdeú, ndihí úú-gá tucu cue téé ní xica cuu ndihí-gá. <sup>3</sup> Te ní xáha<sup>n</sup> tǎ Pèlú xii-güedé:

—Quíhí<sup>n</sup>-í quítní-í chácá —càchí-dé xǎha<sup>n</sup>-dě xii-güedé.

Te ní xáha<sup>n</sup>-güedě:

—Tnàhá nchúhú canchicú<sup>n</sup> ñáhá-ndí xii-n quíhí<sup>n</sup> tucu —càchí-güedé xǎha<sup>n</sup>-güedě xii-dé.

Te ní xica-güedé cuáhá<sup>n</sup>-güedé ní sáá-güedé núú ndécú bàrcú, te ní quée-güedé xití bàrcú-á<sup>n</sup> cuáhá<sup>n</sup>-güedé. Te niú-á<sup>n</sup> ñǎ ní ñíhí tnàhí-güedé chácá. <sup>4</sup> Te sa ta cùditó-ñǎ cuáhá<sup>n</sup> ní xiní-güedé Jèsús yuhu làgúná, dico ñá ní cùtnuní iní-güedé sá díú-gǎ. <sup>5</sup> Te ní xáha<sup>n</sup>-gǎ xii-güedé:

—Cue téé cuechi, ¿ní níhí-ndó chácá caxi-o ñǎ? —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedě:

—Védana chácá ñà túú ní níhí-ndí —càchí-güedé xǎha<sup>n</sup>-güedě xii-gá.

<sup>6</sup> Te ní xáha<sup>n</sup> Jèsús:

—Chí dáquèe ñunu-ndo ndàa xio cuha barcú chi níhí-ndó-dí —càchí-gá xáha<sup>n</sup>-gǎ xii-güedé.

Te duca<sup>n</sup> ñí quide-güedé, te òré nátava-güedé ñunu xití ndute, te ñá cùndèe-gá-güedé natava-güedé cuèndá sá ñí chítú chácá xití-xi. <sup>7</sup> Te téé ní xica cuu ndihí-gá téé ío cùu iní-gá ní xáha<sup>n</sup>-dě xii té Pèlú:

—¡Diu Xítohó Jesucristú! —càchí-dé xáha<sup>n</sup>-dě xii-dé.

Te sá nǐ tecú dóho té Pèlú sá dúcá<sup>n</sup> càhá<sup>n</sup>-dé nǔu ní ndíunuu-dé dóó-dě, chi dóó sǎ yímàa-ni-dé níhnú-dě ní cùu. Duca<sup>n</sup> te ní nuu ndava-dé bàrcú ní ngaunihnu-dé ndute, te cuáhá<sup>n</sup>-dé núu ndute-á<sup>n</sup> nǐ quene-dé ndéé ñuhu yìchí. <sup>8</sup> Te dava-gá cue téé ndihí té Pèlú diu-ni cue téé ní xica cuu ndihí Jèsús ní quendóo-güedé dàtná ì<sup>n</sup> ciendú-gá mètrú te quene-güedé yuhu ndùte. Te tàñuhu-ni-güedé ñunu-güedé chitu chǎcá nǐ quene-güedé ndéé yuhu ndùte. <sup>9</sup> Te òré ní quene-güedé ñuhu yìchí, te ní xiní-güedé càyú ñuhú, te núu ñùhú-á<sup>n</sup> ñùhú ì<sup>n</sup> chácá ndihí ì<sup>n</sup> pàá. <sup>10</sup> Te ní xáha<sup>n</sup> Jèsús xii-güedé:

—Quíhí<sup>n</sup> nguehe<sup>n</sup>-ndo ì<sup>n</sup> úú chácá quitì íchí nǐ tñi-ndo —càchí-gá xáha<sup>n</sup>-gǎ xii-güedé.

<sup>11</sup> Núu té Pèlú ní sáhá<sup>n</sup>-dé núu ndécú bàrcú, te ní quée-dé xití-xi ní cándéé-dé ñunu ñuhu chácá táñuhu-dé ní quene ndéé ñuhu yìchí, te chitu chǎcá náhnú, te ñuhu ì<sup>n</sup> ciendú údico úxí úní-di xití ñunu-á<sup>n</sup>, te cuèi duca<sup>n</sup> vài-di ñuhu dico ñá ní ndátá ñunu-á<sup>n</sup>. <sup>12</sup> Te ní xáha<sup>n</sup> Jèsús:

—Chí nèhé cadí iní-ndó —càchí-gá xáha<sup>n</sup>-gǎ xii-güedé.

Dico nǐ ì<sup>n</sup> cue téé ní xica cuu ndihí-gá-á<sup>n</sup> ñǎ ní xicá<sup>n</sup> tnúhú-güedé núu-gǎ nǔu yoo cùu-gá, chi sa ní cutnùní iní-güedé sá díú Jèsús cúu-gǎ. <sup>13</sup> Te Jèsús ní sáhá<sup>n</sup>-gá ní quehe<sup>n</sup>-gá pàá ní sáñaha-gǎ xii-güedé caxi-güedé, te dàtnùní ní quehe<sup>n</sup> tucu-gá chácá nǐ sáñaha-gǎ xii-güedé.

<sup>14</sup> Vitna cùu úní xito sá xiní ñáhá cue téé ní xica cuu ndihí-gá sátá nǐ ndoto-gá.

### *Jèsús càhá<sup>n</sup> ndihí-gá té Pèlú*

<sup>15</sup> Te sátá nǐ túhú cóhó-güedé ní sadí iní-güedé te ní xicá<sup>n</sup> tnúhú Jèsús núu tǎ Xímú, àdi Pelú chi úú diu-dé, te xáha<sup>n</sup>-gǎ:

—Xímú, déhe té Jònás, ¿cùu iní-gá-n yùhú dàcúxí dàva-gá cue téé-a ñǎ? —càchí-gá xáha<sup>n</sup>-gǎ xii-dé.

Te ní xáha<sup>n</sup> té Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dě xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéé lǐhli-í —càchí-gá xáha<sup>n</sup>-gǎ xii-dé.

Te cue mbéé-á<sup>n</sup> cúu-güedé ñáyiu cùu cuendá-gá.

<sup>16</sup> Te ní xáha<sup>n</sup> tùcu-gá xii té Pèlú:

—Xímú, déhe té Jònás, ¿cùu iní ñáhá-n xii-í-u? —càchí-gá xáha<sup>n</sup>-gǎ xii-dé.

Te ní xáha<sup>n</sup> tùcu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dě xii-gá.

Te ní xáha<sup>n</sup>-gǎ:

—Te núu duca<sup>n</sup>, te coto-n cue mbéé-í —càchí-gá xáha<sup>n</sup>-gǎ xii-dé.

<sup>17</sup> Te xito cùu úní ní xáha<sup>n</sup> tùcu-gá xii té Pèlú:

—Xímú, déhe té Jònás, ¿cùu iní ñáhá-n-ǎ<sup>n</sup>? —càchí-gá xáha<sup>n</sup>-gǎ xii-dé.

Te té Pèlú ío ní cundiyí-dé sá dúcá<sup>n</sup> nǐ cuu úní xito xicá<sup>n</sup> tnúhú-gǎ núu-dě nǔu ndisa sá cúu iní ñáhá-dé xii-gá, te ní xáha<sup>n</sup>-dè:

—Mèstrú, yòhó nchaa sa xiní-n, te sa cùtnuní iní-n sǎ cúu iní ñáhà-í xii-n —càchí-dé xáha<sup>n</sup>-dè xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéé-í. <sup>18</sup> Te na càchí tnúhu ndáá-í xii-n sǎ cùtnàhá cuechi-gǎ-n nǐ xóo ndécuihnu mee-n dǎó-n, te ní xóo quíhí<sup>n</sup>-n ndèni ní xóo cachí iní-n, dico na yì-n te dacàá-n ndàha-n, te ingá téé dacuihnu ñaha xii-n dóó-n te cada yica-dě candeca ñaha-dě xii-n quíhí<sup>n</sup> ì<sup>n</sup> núu ñà túu tnàhá iní-n —càchí-gá xáha<sup>n</sup>-gǎ xii-dé.

<sup>19</sup> Te sá dúcá<sup>n</sup> nǐ cáhá<sup>n</sup> Jèsús cúu-xí sǎ nǐ dátécú tnúhu ñaha-gǎ xii té Pèlú nàcuáa cada-xi cúu-dé, te duca<sup>n</sup> cada cahnu-dé Yǎ Ndióxi, te ní xáha<sup>n</sup>-gǎ xii-dé:

—¡Canchicú<sup>n</sup> ñáhá-n xii-í! —càchí-gá xáha<sup>n</sup>-gǎ xii-dé.

### *Téé ío cùu iní-gá*

<sup>20</sup> Te ní nchócótó tǎ Pèlú ndàa sátá-dé, te ní xiní-dé sá nchicú<sup>n</sup> ñáhá ingá téé xica cuu ndihí-gá cuáhá<sup>n</sup>, téé ío cùu iní-gá téé ní xínucóo diñi-gá òré ní cudini ndihí ñaha-gá xii-güedé,



te ñi-u-ni tée-á<sup>n</sup> ñi xicá<sup>n</sup> tnúhú-dě  
núu-gă dāvá-á<sup>n</sup> núu ndéda cãa tée  
cuáha cuëndá ñáhá xii-gá núu cuè tée  
cúu úhú iní ñáhá. <sup>21</sup> Te òré ní xiní té  
Pèlú sá nchicú<sup>n</sup> ñáhá tée-á<sup>n</sup>, te ní xicá<sup>n</sup>  
tnúhú-dě núu Jèsús, te xăha<sup>n</sup>-dě:

—Mèstrú, te tée-ă<sup>n</sup>, ¿ná cúu sã  
yăha-dé-i? —cächí-dé xăha<sup>n</sup>-dě xii-gá.

<sup>22</sup> Te ní xăha<sup>n</sup> Jèsús:

—Te núu yúhú cuìní-í sá cùndècu-ni-dé  
ndéé ná quixi tucu-í ñuyíú-a, ¿te yòhó  
ná cuëndá-n núu xicá<sup>n</sup> tnúhú-n? Yòhó  
canchicú<sup>n</sup> ñáhá-ní xii-í —cächí-gá  
xăha<sup>n</sup>-gă xii-dé.

<sup>23</sup> Te ní xinú tnúhu núu nchăa  
ñáyiu sândáá iní tnúhu-gá sá tée-ă<sup>n</sup>  
vã cùú-dé. Dico Jèsús ñá túú dùca<sup>n</sup>  
ní xăha<sup>n</sup>-gă sá vã cùú-dé, chi ní  
xăha<sup>n</sup>-gă: “Núu yúhú cuìní-í sá tée-ă<sup>n</sup>  
cundecu-ni-dé ndéé ná quixi tucu-í  
ñuyíú-a, ¿te yòhó ná cuëndá-n?”, duha  
ní xăha<sup>n</sup>-gă xii té Pèlú.

<sup>24</sup> Te ñi-u-ni yúhú té Juàá tée ní sani  
iní-yu sá vã cùú cãhá<sup>n</sup> ndáá-í nchăa  
năcuáa ní cuu, te duca<sup>n</sup> ñi tee-í núu  
tútú-a, te cùtnuní iní-ndó sã tnúhu  
ndáá cúú-xí.

<sup>25</sup> Te ndècu vai-gá núu sã ñi  
quide Jèsús. Te núu ñicó ní ngũndee  
nchăandí túhú ñá, te vãa ni te ñihí  
ñuyíú te vã tnăhá núu-xi cundecu  
lìbrú, te núu ñicó ní ngũndee nchăa. Te  
duca<sup>n</sup> na cùnduu. Te ío chí cádá ndèe  
iní-nă vitna.

## NCHAA NÀCUÁA NÍ QUIDE CUE TÉE NÍ TÁÚCHÍÚ<sup>n</sup> JÈSÚS DACUÀHA ÑAHA XII ÑÁYIU TNÚHU-GÁ

*Jèsús ní cachí tnúhu ndáá-gá sá quíxí Espíritú Yá Ndiöxí cundecu ndihi ñáyiú*

<sup>1</sup> Te duha ní cáhá<sup>n</sup> té Lùcá ní xíi-dé té Tèofilú: Yúhú sa ní chídó tnùn-í núú librú ndéé díhna nchaa sá ní quide Jèsús, ndihi nchaa sá ní dácuhá-gá ñáyiú. Te ní chídó tnùn-í nchaa sá ní quide-gá ndéé nduu ní quesaha-gá quidé chiú<sup>n</sup>-gá, <sup>2</sup> ndihi nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue tée ní cáhá<sup>n</sup>-gá dacuàha ñaha xii ñáyiú tnúhu-gá, te mee Espíritú Yá Ndiöxí ní chindee ñaha-xi xii-gá ní xáha<sup>n</sup>-gá nàcuáa cada-güedé. <sup>3</sup> Te sátá ní xíhí-gá te ní ndoto-gá, te ní xíndecu-gá údico nduu. Te titní xito ní sáhá<sup>n</sup>-gá núú ní xíndecu-güedé, te duca<sup>n</sup> ní quide-gá cuéndá quiní-güedé sá ndáá ní ndoto-gá, te ní xáha<sup>n</sup>-gá nàcuáa quide Yá Ndiöxí ndíhu ndaha-gá ñáyiú.

<sup>4</sup> Te ì<sup>n</sup> nduu ndècu ndihi ñaha-gá xii-güedé, te ní xáha<sup>n</sup>-gá:

—Vá quée-ní-ndó ñúú Jerusàlén, chi cundetu-ndo quixi Espíritú Yá Ndiöxí cundecu ndihi-ndo, chi sa ní cachí tnúhu-í sá dúcá<sup>n</sup> ní cáhá<sup>n</sup> Tátá-ó Dútú Ndiöxí Yaá ndécú àndiu nacuáa cunduu. <sup>5</sup> Te ndáá sá ndí Juáá ní dácuhá-gá ñaha ndí xii-ndo, dico vitna ñá túú-gá cuéhé nduu, te quexio Espíritú Yá Ndiöxí cundecu ndihi-ndo —càchí-gá xáha<sup>n</sup>-gá xii-güedé.

*Jèsús cuándaa-gá andiu*

<sup>6</sup> Te òré ní xíndecu-güedé ndihi Jèsús, te ní xáha<sup>n</sup>-güedé xii-gá:

—Mèstrú, cuíní-ndí cachí tnúhu-n núu sa ta cùyatni nduu chindee-n ñáyiú ñúú Isràél cuéndá taxi tnùn-í tucú-yu ñúú-yu —càchí-güedé xáha<sup>n</sup>-güedé xii-gá.

<sup>7</sup> Te ní xáha<sup>n</sup> Jèsús xii-güedé:

—Ñá túú xìni ñuhu-xi cunaha nchohó xíá<sup>n</sup>, chi Tátá-ó Dútú Ndiöxí náhá-gá ná nduu càda-gá nchaa sá ní cáhá<sup>n</sup>-gá. <sup>8</sup> Te òré quexio Espíritú Yá Ndiöxí cundecu ndihi-ndo, te cuyi-ndo ní yuhu ní iní-ndó quíhí<sup>n</sup>-ndó cáhá<sup>n</sup>-ndó tnúhu-í núú ñáyiú ñúú Jerusàlén ndihi núú ñáyiú distrítú Jùdeá ndihi núú ñáyiú distrítú Sàmariá. Te duca<sup>n</sup>-ni cáhá<sup>n</sup>-ndó quíhí<sup>n</sup>-ndó ní caxico ñuyú —càchí-gá xáha<sup>n</sup>-gá xii-güedé.

<sup>9</sup> Te sátá dúcá<sup>n</sup> ní cáhá<sup>n</sup>-gá, te ndèhe-güedé ní ndanchita-gá cuándaa-gá andiu cuándihu-gá xití vícò, te ñá túú-gá ní xìni náhá-güedé xii-gá. <sup>10</sup> Te ndèhe vihi-güedé andiu núu ndéé quiní ñáhá-güedé xii-gá yòtnúhu, te ní quexio cunu úú cue tée nihnu dóó cuíxí<sup>n</sup> núú ndécú-güedé.

<sup>11</sup> Te xáha<sup>n</sup>-güedé:

—Nchòhó cue tée Galileá, ¿ná cuéndá ndéhé-ndó àndiu? Te dàtná-ni càa Jesús cuándaa-gá andiu vitna, te duca<sup>n</sup>-ni cunduu-gá quixi tucu-gá —càchí cue tée nihnu dóó cuíxí<sup>n</sup>-án xáha<sup>n</sup>-güedé.

*Cuéndá sá ñà túú-gá ndí Jùdás núu ní nanducu-güedé té Màriá ní nucúnutnii-dé núú ndí*

<sup>12</sup> Te ní ndee-güedé yucu Òlívú cuánuhú-güedé ñúú Jerusàlén, te ní xúhu<sup>n</sup>-güedé cuèdicó cuádava òré ichi.

<sup>13</sup> Te òré ní ndexio-güedé ñúú-á<sup>n</sup>, te cuándaa-güedé cuàrtú ndéé núú ñnu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juáá, té Ndríxí, té Lìpé, té Mǎxí, té Bartolòmé, té Màteú, té Jàcobó déhe té Àlfeú, ndihi té Xímú tée ní cundíhi cue tée canànistá, ndihi té Jùdás ñani té Jàcobó. <sup>14</sup> Te ní naníhí tnáhá-güedé nchaa-güedé yàcá<sup>n</sup> ndihi tá Màriá náná Jèsús, ndihi cue ñani-gá

ndihí dava-gá cue ñáyiú dîhí. Te ñ<sup>n</sup>-ni ní cuú-yu ní cáhá<sup>n</sup> ndihí-yu Yá Ndiöxí.

15 Te ñ<sup>n</sup> nduu ní xindecu dàtná ñ<sup>n</sup> ciendú ócó mee-ni ñáyiú sàndáá iní tnúhu Jèsús, te ní ngúnutnîi té Pèlú núu-yu, te ní xáha<sup>n</sup>-dê xií-yu:

16-17 —Nchòhó cue ñáyiú ndècu ndihí-í ichi Xítohó Jesucristú, na càni-í cuendú núú-ndó nàcuáa ní chídó tnùnî ndii Dàvií téé ní xindecu ndéé sanaha nàcuáa ní cáhá<sup>n</sup> Espiritú Yá Ndiöxí cuendá té Jùdás. Te dacuítí dùca<sup>n</sup> ní cuu, chi tnàhá té Jùdás ní xindecu ndihí-o, te ní xinu cuechi-o ndihí-dé núú-gã sá dîhna, te duca<sup>n</sup> nî quide-dé ní sáha cuendá-dé Jèsús núú cuè téé cùu úhú iní ñáhá xii-gá.

18 Te ní cháhu ñaha-güedê xii-dé cuendá sá nî sáha cuendá ñáhá-dê xii-gá. Te ní sáhá<sup>n</sup>-dé ñ<sup>n</sup> xichi ní sata caa-dé méé-dê, te ní ngava-dé, te ní cahndí duu<sup>n</sup> xití-dé te xía<sup>n</sup> nî xihí-dé. Te ní naquehe<sup>n</sup>-güedê dîhú<sup>n</sup> sã nî cháhu-güedê ndii, te ní nacuaa<sup>n</sup>-güedê ñuhu núú nî ngava ndii-á<sup>n</sup>. 19 Te nchaa ñáyiú Jerusalén ní níhî-yu tnúhu, te ní dánánî-yu ñuhu-á<sup>n</sup> Acèldamá. Te tnúhu mée-yu quèe-xi: Ñuhu núú nî sati níñî. 20 Te duha ní cáhá<sup>n</sup> ndii Dàvií ní chídó tnùnî ndii núú librú Salmú ní dándóo ndii: “Nà ndóo nahi vèhe-dé, vá yõ ñ<sup>n</sup> quihí<sup>n</sup> cundecu”, duha ní cáhá<sup>n</sup> ndii. Te ingá tucu tnúhu ní cachí ndii: “Na nànducu-güedê ingá téé nucúnutnîi núú ndii”, duha ní cáhá<sup>n</sup> ndii Dàvií —càchí té Pèlú xáha<sup>n</sup>-dê xií-yu.

21-22 Te ní xáha<sup>n</sup> tùcu-dé:

—Te duca<sup>n</sup> nî cáhá<sup>n</sup> ndii Dàvií, te vitna xini ñuhu-xi nanducu-o ñ<sup>n</sup> téé nucúnutnîi-dé núú ndii Jùdás, te xini ñuhu-xi diu-ni ñ<sup>n</sup> téé ní xica cuu ndihí Xítohó Jesucristú cútnàhá ní xica cuu-o ndihí-gá, ñ<sup>n</sup> téé ní xiní ndéé òré ní dácuañdùte ñaha ndii Juàá xii-gá, te ndéé òré cuándaa-gá andiu. Te téé nanducu-o cùndecu-dé cáhá<sup>n</sup>-dé nàcuáa ní cuu ní ndoto-gá —càchí té Pèlú xáha<sup>n</sup>-dê xií-yu.

23 Te ní cacunehe-güedê úu tnàhá-güedê nùu ndédacàa-güedê nduu táhú-güedê nucúnutnîi-güedê

núu ndii. Te ñ<sup>n</sup>-dé nání-dê Chèé Barsàbás, àdi Justú chi úu diu-dé, te ingá-dé nání-dê Màtiá. 24 Te ní cáhá<sup>n</sup> ndihí-güedê Yá Ndiöxí, te xáha<sup>n</sup>-güedê xii-gá:

—Yòhó Dútú Ndiöxí xini-n iní nchaa ñáyiú, te mee-n nàha-n núu ndéda càa núú úu cue téé-a tnàhá iní-n 25 cáhá<sup>n</sup>-güedê tnúhu-n núu ñáyiú, te téé-á<sup>n</sup> nucúnutnîi-dé núú ndii Jùdás, chi cuáhá<sup>n</sup> ndii núú ùhú núú ndàhú núú tàú-xi quihí<sup>n</sup> ndii —càchí-güedê xáha<sup>n</sup>-güedê xii-gá.

26 Te ní xito ndéé-güedê, te ní cutnùnî sá tée nàni Matíá quendóo-dé ndihí úxí ñ<sup>n</sup> cue téé ní táuchíú<sup>n</sup>-gã dacuàha ñaha xii ñáyiú tnúhu-gá.

## 2

*Ní quexìo Espiritú Yá Ndiöxí cundecu ndihí ñáyiú*

1 Te ní sáá nduu còo vico Pentecostés te xindecu nchaa ñáyiú ñ<sup>n</sup>-ni xichi. 2 Te ní tecú dóho-yu uu<sup>n</sup>ni ní níhi andiu, dàtná quidé ñ<sup>n</sup> táchí níhi vîhi ní quide-xi, te duca<sup>n</sup> nî cuu ndéé xití vehe núú ndécü-yu nchaá-yu. 3 Te ní xiní-yu dàtná cáá itá ñuhú cáá sã ndécú xití vehe, te ní xité nuu-xi ní ngoyo ndodo-xi díqui-yu nchaá-yu. 4 Te duca<sup>n</sup> nî quide-xi òré ní quexìo Espiritú Yá Ndiöxí ní ngúndecu ndihí-yu nchaá-yu. Te ní ngúita-yu ní cáhá<sup>n</sup>-yu tnúhu cue ñáyiú ñá túú cùu ñáyiú isràél, te nchaa xía<sup>n</sup> ní quide Espiritú Yá Ndiöxí.

5 Te vâi ñáyiú isràél xindecu nchaa dava-gá ñuú ní tacá-yu ñuú Jerusalén, te ñáyiú-á<sup>n</sup> ïo ndùcu ndéé-yu dàcuahá-yu nchaa ndudú sá dácuañdùte ñaha ndii Juàá xii-gá, te ndéé òré cuándaa-gá andiu. 6 Te òré ní tecú dóho-yu níhi, te ní sáhá<sup>n</sup>-yu ní xindedóho-yu tnúhu càhá<sup>n</sup> méé-yu ñ<sup>n</sup> ñ<sup>n</sup> ñuú-yu, chi ndi díñ<sup>n</sup> ndi díñ<sup>n</sup> tnúhu càhá<sup>n</sup> ñáyiú ndècu-á<sup>n</sup>. 7 Te xía<sup>n</sup> ío ní cuñúhu ñáyiú véxi dava-gá ñuú, te ní xitnàhá-yu:

—Ñáyiú duca<sup>n</sup> xicáhá<sup>n</sup> cúu-yu ñáyiú distritú Galileá. 8 ¿Te nása ní quidé-yu ní cutúha-yu nàcuáa càhá<sup>n</sup>-ó ñ<sup>n</sup> ñ<sup>n</sup>-o

ndéé lĩhli-o? <sup>9</sup> Te iha véxi ñáyiú dava nació<sup>n</sup>, chi véxi ñáyiú Pàrtiá, véxi ñáyiú Mèdiá, véxi ñáyiú Èlám, véxi ñáyiú Mesopòtamiá, véxi ñáyiú Jùdeá, véxi ñáyiú Capadociá, véxi ñáyiú Pòntó, véxi ñáyiú Àsiá, <sup>10</sup> véxi ñáyiú Frigiá, véxi ñáyiú Pànfiliá, véxi ñáyiú Ègiptú, véxi ñáyiú Áfricá ñáyiú ndècu ndéé núú-gã-xi ñuú Cirené. Te tñahá ñáyiú ñuú Rómá véxi, te ñáyiú-á<sup>n</sup> chi ñá díú mèe-ni ñáyiú isràel cúu-yu nchaá-yu, dico ñ<sup>n</sup>-ni cùu sá dácuahá-yu. <sup>11</sup> Te véxi ñáyiú Crètà, véxi ñáyiú Àrabiá. Te nchaá-o sa ndèdóho-o càhá<sup>n</sup>-yu nàcuáa cuahá<sup>n</sup> tnúhu mee-o ñ<sup>n</sup> ñ<sup>n</sup>-o. Te nchaá ñáyiú xicahá<sup>n</sup> tnúhu-o càhá<sup>n</sup>-yu cuèndá nchaá sá vã yõo tñahí ndacu cada ní quide Yá Ndiõxí —càchí-yu xĩtnahá-yu.

<sup>12</sup> Te ní cuñúhu vñhí-yu, te ñá ná sãá iní-yu nása ní cuu, te xĩtnahá-yu:

—¿Nása ní cuu duha càhá<sup>n</sup>-yu tnúhu-o? —càchí-yu xĩtnahá-yu.

<sup>13</sup> Te davá-yu ní sácú ndeé yíchí ñahã-yu, te xĩtnahá-yu:

—Xixini ñáyiú-á<sup>n</sup> nõu ñá náhã-yu tnúhu càhá<sup>n</sup>-yu —càchí-yu xĩtnahá-yu.

#### *Tnúhu ní xáha<sup>n</sup> tẽ Pèlú xii cue ñáyiú*

<sup>14</sup> Te ní ngúnutnĩ té Pèlú ndihí úxí ñ<sup>n</sup> cue téé ní táuchíú<sup>n</sup> Jèsús dacuàha ñaha xii ñáyiú tnúhu-gá, te níhi ní càhá<sup>n</sup>-dé, te xãha<sup>n</sup>-dẽ xií-yu:

—Nchaá nchòhó ñáyiú distrítú Jùdeá ndihí nchòhó ñáyiú ñuú Jerusàlén, cundedóho váha-ndo tnúhu na càhá<sup>n</sup>-í-a. <sup>15</sup> Ná ndàá tnúhu càhá<sup>n</sup>-ndó, chi ñá túú xĩni-ndí te duca<sup>n</sup> càhá<sup>n</sup>-ndó, chi davitna cùu-xi caá ñ<sup>n</sup> dátneé, vátá tñahá-gá òré coho ñáyiú ndidí. <sup>16</sup> Te yúhú ná càchí tnúhu-í xii-ndo vitna nacuáa ní xáha<sup>n</sup> Yá Ndiõxí xii ndíi Jòél téé ní xóo càhá<sup>n</sup> tnúhu-gá ndéé sanaha nàcuáa cada ñaha-gã xii ñáyiú, te ndíi-á<sup>n</sup> ñĩ chídó tnùní ndíi nàcuáa ní càhá<sup>n</sup>-gá. <sup>17</sup> Te duha ní xáha<sup>n</sup>-gã xii ndíi:

Cùmání-gã sãá nduu nàa ñuyú, te cuãñaha-ĩ Espiritú-í cundecu ndihí nchaá ñáyiú na quindáa iní ñahá xii-í.

Te cue déhe-yu cáhá<sup>n</sup>-yu tnúhu-í, te cue téé cuechi dacòto núú ñahá-xí xii-güedé,

te duca<sup>n</sup>-ni cuè téé ni sãhnu cáhá<sup>n</sup> saní-güedé,

te ñu-ni cuèndá nchaá sá quidè-í duca<sup>n</sup> dacòto núú ñahá-xí xii-güedé.

<sup>18</sup> Te nchaá ñáyiú xinu cuechi núu-í cáhá<sup>n</sup>-yu tnúhu-í, te cuãñaha-ĩ Espiritú-í cundecu ndihí-yu.

<sup>19</sup> Te ndéé andiu, yacá<sup>n</sup> vai sá cadà-í nàcuáa cuñúhu vñhí-yu,

te núú ñuyú-a cada-í ñ<sup>n</sup> sá vátá quini tñahí-gá-yu,

te ngoyo níñi te ngoyo ñuhú te quene vñhi ñúhmá.

<sup>20</sup> Te vá dáyhé-gá nchícanhii, cuu nee ñuyú te cuu tñcuèhé núú yõo dàtná tñcuèhé níñi.

Te dàvá-á<sup>n</sup> sãá nduu quixi Yáa cúu Xitohó-yu,

te nduu-ã<sup>n</sup> cuu-xi ñ<sup>n</sup> nduu càhnu vihi, chi cada-gá nchaá sá ñá túú xini-yu, te cuñúhu vñhí-yu.

<sup>21</sup> Te òré xiá<sup>n</sup> te nchaá ñáyiú càhá<sup>n</sup> ndihí ñaha xii Yáa cúu Xitohó-yu-á<sup>n</sup> naníhí tãhú-yu.

Duha ní xáha<sup>n</sup> Yá Ndiõxí xii ndíi Jòél ní chídó tnùní ndíi.

<sup>22</sup> Te nchòhó ñáyiú isràel, cundèdóho váha-ndo tnúhu na càhá<sup>n</sup>-í-a cuèndá Jèsús téé ñuú Nazàrèt. Te Jèsús ní quide-gá chiú<sup>n</sup> Yá Ndiõxí, chi mee Yá Ndiõxí ní chindee ñaha-gá ní quide Jèsús ná daha núú chiú<sup>n</sup>, núú xiá<sup>n</sup> ní ndacu-gá ní quide-gá nchaá sá vã yõo tñahí ndacu cada, te xiá<sup>n</sup> ní cuñúhu vñhi-ndo. Te sa ñaha-ndo nacuáa ní quide-gá cùtnahá ní xica cuu-gá ñuyú. <sup>23</sup> Te ndíi Jùdás ní taxi cuèndá ñahá ndíi Jèsús xii nchòhó cue téé ní cuu úhú iní ñahá xii-gá, te ní ndúcú-ndó cuè téé úhú iní-xi ní tñi ñaha-güedé xii-gá te ní sata caa ñaha-güedé núú cùrúxí, te núú cùrúxí-á<sup>n</sup> ñĩ xihí-gá. Dico sa ní cutnùní iní Yá Ndiõxí sá dúcá<sup>n</sup> càda-ndo Jèsús, te mee Yá Ndiõxí ní cachí-gá sá dúcá<sup>n</sup> ndòho Jèsús. <sup>24</sup> Te ñu-ni mee Yá Ndiõxí ní dándótó-gã Jèsús, chi sa ní càhá<sup>n</sup>-gá sá òré cuú-gá te vá cúu dúcá<sup>n</sup>-gã. <sup>25</sup> Te ndíi Dàvíí téé



ní xíndaha ñàha xii cue ñaní tnáhá-ó ní xíndecu ndéé sanaha ní chídó tnùní ndíi nàcuáa ní cáhá<sup>n</sup> Jèsús, te duha ní cáhá<sup>n</sup>-gá:

Cùtnuní iní-í sá ncháá ndùu ndecu ndíhi-í Yá Ndiöxí, te ío chìndee ñaha-gá xii-í,

te ñá túú tnàhí sá yùhú-í.

<sup>26</sup> Te ío ndàcá<sup>n</sup> táhù-í núú Yá Ndiöxí chi cùdíí iní-í, chi sa nàha-í sá cùú-í dico ndoto-í,

<sup>27</sup> chi vá dáñá-gã quíhí<sup>n</sup> dúcá<sup>n</sup> àlmá-í núú ndécú ñáyiú ní xíhí,

te vá dáñá-gã téhyú yiqui cùñú-í chi cùu-í Déhe-gá, te yúhú sa nàha-í sá cùú iní ñáhá-gã xii-í.

<sup>28</sup> Te sa ní cachí tnúhu-gá nàcuáa cada-í cundecu-í ichi váha, te cuendá sá ndécú ndíhi ñaha-gá xii-í núu ío cùdíí iní-í.

Duha ní cáhá<sup>n</sup> Jèsús, te duca<sup>n</sup> ní chídó tnùní ndíi Dàvíí.

<sup>29</sup> Te nchòhó cue ñaní tnáhà-í, na càchí tnúhu ndáá-í xii-ndo cuendá ndíi Dàvíí téé ní xíndecu ndéé sanaha víhi, chi ní xíhí-dé, te ní chindúxi ñaha-güedé, te nàha-o tnavíí núú ní chindúxi ñaha-güedé. <sup>30</sup> Te ndíi Dàvíí ní xóo cáhá<sup>n</sup> ndíi tnúhu Yá Ndiöxí, te sa nàha ndíi sá Yá Ndiöxí ní cáhá<sup>n</sup> ndáá cuiti-gá sá díú-ní ì<sup>n</sup> tnaha ndíi taxi tnùní-dé ñáyiú isràél ndéé cuéé-gá dàtná ní xóo taxi tnùní méé ndíi cùtnàhá ní xíndecu ndíi, te téé taxi tnùní-án cùú Crístú chi cùu-gá ì<sup>n</sup> tnàha ndíi. <sup>31</sup> Te sa ní cùtnùní iní ndíi sá ndótó Crístú, núu xíá<sup>n</sup> ní chídó tnùní ndíi sá vã dáñá Yá Ndiöxí sá quíhí<sup>n</sup> dúcá<sup>n</sup> àlmá-gá cundecu-xi núú ndécú ñáyiú ní xíhí, te vá dáñá-gã téhyú yiqui cùñú-gá.

<sup>32</sup> Te ndáá chi Yá Ndiöxí ní dándótó-gã Jèsús, te nchúhú ní xiní-ndí sá ñí ndoto-gá. <sup>33</sup> Te ní xáha<sup>n</sup> Yá Ndiöxí xii Jèsús sá cundecu ndíhi ñaha-gá, te taxi tnùní Jèsús ñí caa ñí quíhí<sup>n</sup>.

Te Yá Ndiöxí ní sáñaha-gã Espíritú-gá ní ngúndecu ndíhi-gá nàcuáa ní xáha<sup>n</sup>-gã, te ñíu Jèsús ní quide-gá nchaa sá ñí xiní-ndó vitna ndíhi nchaa sá ñí xíndedóho-ndo.

<sup>34</sup> Te ndíi Dàvíí ñá túú ní ndáa túu ndíi

andíu ndíhi yiqui cuñú ndíi, te òré ndécú-gã ndíi ñuyíú-a ní cachí ndíi:

Dútú Ndiöxí ní xáha<sup>n</sup>-gã xii Yaá cùú Xítohó-í:

“Ngóo xio cùha-í,

<sup>35</sup> te yúhú cada-í te nchaa sá cùú ùhú iní ñáhá xii-n canehe-xi sá yíñùhu núu-n.”

Duha ní xáha<sup>n</sup> Dútú Ndiöxí xii Yaá cùú Xítohó-í càchí ndíi.

<sup>36</sup> Te nchòhó ñáyiú isràél cùu-ndo ndí mee-í, te cuíní-í cundedóho váha-ndo ì<sup>n</sup> tnúhu na càhá<sup>n</sup>-í-a. Jèsús ní sata caa-ndo-gã núú cùrúxí, dico Yá Ndiöxí ní cachí-gá sá Jèsús dacacu nihnu-gá ñáyiú, te vá cání ì<sup>n</sup> cani úú iní-ndó, chi ñíu-gá cùnùu-gá núú nchàa ñáyiú —càchí té Pèlú xáha<sup>n</sup>-dè xii-yu.

<sup>37</sup> Te ñáyiú ní xíndedóho tnúhu ní cáhá<sup>n</sup> té Pèlú ní ndixi túu iní-yu nàcuáa quidé-yu ndécú-yu, te ní xáhã<sup>n</sup>-yu xii-dé ndíhi dava-gá cue téé ní táuchíú<sup>n</sup> Jèsús dacuàha ñaha xii-yu tnúhu-gá:

—Nchaa nchòhó cue ñaní tnáhá-ndí, ¿nása cachí-ndó cùnduu, nása cada-ndí vitna? —càchí-yu xáhã<sup>n</sup>-yu xii-güedé.

<sup>38</sup> Te ní xáha<sup>n</sup> tẽ Pèlú xii-yu:

—Daña-ndo nchàa sá cuèhé sá dúhá quide-ndo, te cada càhnu iní Yá Ndiöxí nchaa yíca cuèchi-ndo. Te cuandute-ndo cuendá quini-yu sá ñí natuha-ndo ichi Jesús, te duca<sup>n</sup> te taxi Yá Ndiöxí Espíritú-gá cundecu ndíhi-ndo, <sup>39</sup> chi cuíní-gá taxi-gá Espíritú-gá xii mee-ndo ndíhi déhe-ndo, te cuáñaha-gã Espíritú-gá xii nchaa ñáyiú ñí càa xico ñuyíú, ñáyiú cáhá<sup>n</sup>-gá cundecu ichi-gá ndéé ìdá-gá —càchí té Pèlú xáha<sup>n</sup>-dè xii-yu.

<sup>40</sup> Te titní-gá tnúhu ní xáha<sup>n</sup>-dè nàcuáa cadá-yu, te xáha<sup>n</sup> tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó sá quidé dàva-gá-yu —càchí-dé xáha<sup>n</sup>-dè.

<sup>41</sup> Te nchaa ñáyiú ní sándáá iní-xi tnúhu ní cáhá<sup>n</sup> té Pèlú ní sanduté-yu, te ñíu-ñí nduu-ã<sup>n</sup> ñí cuu dàtná úní mĩl ñáyiú ní sándáá iní-xi ní xíndecu ndíhi ñáyiú xídácuáhá tnúhu Yá Ndiöxí. <sup>42</sup> Te ío ní xíndedóho-yu tnúhu ní cáhá<sup>n</sup>

cue téé ní táuchíú<sup>n</sup> Jèsús dacuàha ñaha xií-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá nãhá-yu sá dúcá<sup>n</sup> ñí quide Jèsús cútnàhá vátá cáhni ñàha-gá-güedé xii-gá, te ní xóo cáhá<sup>n</sup> ndihí-yu Yá Ndiõxí.

*Nàcuáa ní quide nchaa ñáyiu ní sándáá iní tnúhu Jèsús ndéé díhna nuu*

<sup>43</sup> Te nchaá-yu ní cuñúhu vñí-yu, chi cue téé ní táuchíú<sup>n</sup>-gã dacuàha ñaha xií-yu tnúhu-gá ní quide-güedé títní núú sã vã yõo tnàhí ndàcu cada, te xiã<sup>n</sup> ní cutnúni iní-yu sá méé Yá Ndiõxí chíndèe ñaha-gá xii-güedé. <sup>44</sup> Te nchaa ñáyiu sándáá iní tnúhu Jèsús càhá<sup>n</sup> ndihí tnàha váha-yu, te cuèi-ni nchaa ndachíu<sup>n</sup> nandíhi-yu ndècu cahnu. <sup>45</sup> Te ní dícõ-yu nchaa ndachíu<sup>n</sup> sá ñà túú xìni ññúhu-yu, te ní níhí-yu díhú<sup>n</sup> te ní sãñàhá-yu xii nchaa ñáyiu ñá ñihí. <sup>46</sup> Te ñ<sup>n</sup> nduu ñ<sup>n</sup> nduu ní xóo quíhí<sup>n</sup> ndihí tnàhá-yu veñúhu càhnu sá ño cùnuu. Te ní xexi ndihí tnàhá-yu vehé-yu. Te ío ní cudíi iní-yu chi ñ<sup>n</sup>-ni ní cuú-yu nchaá-yu. <sup>47</sup> Te ío ní ndacá<sup>n</sup> táhú-yu núú Yá Ndiõxí, te nchaa dava-gá ñáyiu ní cáhá<sup>n</sup> váha-yu cuèndá ñáyiu-á<sup>n</sup>. Te mee Yá Ndiõxí ní quide-gá ní sándáá iní vai-gá ñáyiu, te ní xíndecú-yu ndihí dava-gá ñáyiu xidácuáhá tnúhu-gá.

### 3

*Quide tátna-güedé ñ<sup>n</sup> téé yacua*

<sup>1</sup> Te ñ<sup>n</sup> nduu òré caá úní sacuaa, òré xícáhá<sup>n</sup>-yu ndihí Yá Ndiõxí cuáhá<sup>n</sup> té Pèlú ndihí té Juáá veñúhu càhnu sá ño cùnuu sácúú-xí ñáyiu isràél. <sup>2</sup> Te ndècu ñ<sup>n</sup> téé yacua, te duca<sup>n</sup>-ni càa-dé ní cacu-dé. Te sàhá<sup>n</sup> ndihí ñàhá-yu veñúhu càhnu sá ño cùnuu, te sácóo-dé ñ<sup>n</sup> xio yuyèhe veñúhu sá nání Yèhe Vii Caa, chi duca<sup>n</sup> nàni-xi, te xicá<sup>n</sup> ndàhú-dé núú nchaa ñáyiu sàhá<sup>n</sup> veñúhu. <sup>3</sup> Te ní xiní-dé té Pèlú ndihí té Juáá cuánguihu-güedé veñúhu, te xicá<sup>n</sup> ndàhú-dé núú-güedé. <sup>4</sup> Te ní ndacoto-güedé núú-dé, te ní xáha<sup>n</sup> tè Pèlú xii téé yacua-ã<sup>n</sup>:

—Cundehe ñàha xii-ndí —càchí té Pèlú xáha<sup>n</sup>-dè xii-dé.

<sup>5</sup> Te ní xíndéhe ñàha-dé xii-güedé, chi ní cáhá<sup>n</sup>-dè sá ño ñ<sup>n</sup> sá cuãñaha-güedé. <sup>6</sup> Te ní xáha<sup>n</sup> tè Pèlú:

—Ñá túú tnàhí díhú<sup>n</sup> néhè-í dico chindee ñàha-í xii-n, te Xítóhó Jesucristú Yaá ní xíndecu ñnuú Nazàrét, ndacu-gá cada tátna ñaha-gã xii-n, ndacuíñí te caca-n —càchí-dé xáha<sup>n</sup>-dè.

<sup>7</sup> Te té Pèlú ní tñi-dé ndaha cùha téé yacua-ã<sup>n</sup>, te ní ngüita-dé ndàcàni ñaha-dé, te òré xiã<sup>n</sup> ní naníhí ndéé-dé, te ní ndúha sàhá-dé. <sup>8</sup> Te ní ndacuíñí cunu mee-dé te ní xica-dé, te ní cachí-dé sá ño càhnu cuu Yá Ndiõxí cuèndá sá ñí ndúha-dé, te ta sãndava-dé cuánguihu ndihí ñaha-güedé veñúhu. <sup>9</sup> Te nchaa ñáyiu xíndecu-á<sup>n</sup> ñí xiní-yu sá ñí nduu váha-dé, te ndèhé-yu ndacá<sup>n</sup> táhú-dé núú Yá Ndiõxí. <sup>10</sup> Te ní naquiní ñãhá-yu xii-dé sá díú tèe xicá<sup>n</sup> ndàhú téé ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vñí-yu sá ñí ndúha-dé.

*Té Pèlú ní cáhá<sup>n</sup>-dè corrèdór sá néhé ñnuú ndí Salòmón*

<sup>11</sup> Te sátá veñúhu càa corrèdór sá néhé ñnuú ndí Salòmón. Yacá<sup>n</sup> ndécú tè Pèlú ndihí té Juáá ndihí téé ní ndúha sàhá-xi, te ñá cuíni téé ní ndúha sàhá-xi-á<sup>n</sup> dañá-dé quíhí<sup>n</sup>-güedé dandõ ñaha-güedé xii-dé. Te chítú-yu ní quexìo coyó-yu núú ndécú-güedé, te ní cuñúhu vñí-yu sá ñí ndúha sàhá tèe cùhú-á<sup>n</sup>. <sup>12</sup> Te té Pèlú ní xiní-dé ní quexìo coyó-yu, te ní xáha<sup>n</sup>-dè xií-yu:

—Nchòhó ñáyiu isràél, ¿ná cuèndá ndéé dúcá<sup>n</sup> ndèhe ñaha-ndo xii-ndí te cùñúhu-ndo sá ñí ndúha téé yacua-ái<sup>n</sup>? Nchòhó cáhá<sup>n</sup>-ndó sá méé-ndí ní quide tátna-ndí-dé sá ño váha iní-ndí, dico ñàhá chi ñá díú mèe-ndí ní quide tátna-ndí-dé. <sup>13</sup> Chi Yá Ndiõxí ní ndadúha ñaha-gã xii-dé, chi ñnuú-gá cúú Ndiõxí ndí Àbrahám ndihí ndí Isàác ndihí ndí Jàcób, te ñnuú-ni cue téé-á<sup>n</sup> cúú ñàni tnàhá-ó ñí xíndecu ndéé sanaha vñi. Te ñnuú-ni Ndiõxí-á<sup>n</sup> ñí xáha<sup>n</sup>-gã xii Déhe-gá Jèsús sá táxi tnúni-gá nchaa sá ño andiu

ndihi nchaa ñáyi ndècu ñuyíu-a, dico mee-ndo ñi sáha cuèndá-ndó Jèsús núú tée cùchiu<sup>n</sup>. Te té Pilatú ní cuini-dé dacácu-dé Jèsús ní cùu, te mee-ndo ñà ní cuini-ndó. <sup>14</sup> Te Yá Ndiöxí ní cachí-gá sá ïo váha iní Jèsús te ñá túú tnáhi cuéchi-gá. Te mee-ndo ñà túú ní cuini-ndó cãcu-gá núu ní xáha<sup>n</sup>-ndo xii té Pilatú sá váha-gá dacácu-dé ñi<sup>n</sup> tée ndècu vihi cuéchi-xi, te vá dacácu-dé Jèsús. <sup>15</sup> Te ní xáha<sup>n</sup>-ndo sá cáhni-güedé Jèsús Yaá quidé nchito-o ndecu-o, dico Yá Ndiöxí ní dándótó ñaha-gá, te ní xiní-ndí sá ndáá ní ndoto-gá. <sup>16</sup> Te nchúhú sa nàha-ndí sá díú Xitohó Jesucristú ní ndadúha-gá tée yacua, te ná-dé nútñi-a. Te duca<sup>n</sup> ñi quide-gá chi ní sándáá iní ñáhá-dé xii-gá, te vitna ní xiní-ndó sá ndáá ní ndúha-dé.

<sup>17</sup> Te nchóhó ndihi cue tée cùnúu ní sahani-ndo Xitohó Jesucristú, chi ñá ní cùnuni iní-ndó sá ñi quide-ndo. <sup>18</sup> Te cue tée ní xóo cáhá<sup>n</sup> tnúhu Yá Ndiöxí ndéé sanaha ñi chídó tnúni-güedé nàcuáa ní xáha<sup>n</sup> Yá Ndiöxí xii-güedé sá Cristú quixi-gá ñuyíu-a, te ndoho vihi-gá, te xiá<sup>n</sup> núu duca<sup>n</sup> ñi cuu ío ní ndoho-gá. <sup>19</sup> Te vitna te dañá-ndo nchàa sá cuéhé sá dúhá quide-ndo. Te quindáá iní-ndó Yá Ndiöxí, te duca<sup>n</sup> te cada càhnu iní-gá nchaa sá ñà túú váha ní quide-ndo ñuyíu-a, te canu ichi ñaha-gá xii-ndo ñi<sup>n</sup> ichi váha. <sup>20</sup> Te ní tendaha-gá Cristú ní quixi-gá ñuyíu-a, chi mee Yá Ndiöxí ní cachí-gá sá díú Cristú taunihnu ñaha-gá xii-ndo. <sup>21</sup> Te dacuití cùndecu-gá andiu ndéé ná sáá nduu nàtaxi ndecu-gá nchaa sá ndécú ñuyíu nàcuáa sàni iní mée-gá. Te diu duca<sup>n</sup> ñi cáhá<sup>n</sup> Yá Ndiöxí núu duca<sup>n</sup> ñi chídó tnúni cue tée ní xóo cáhá<sup>n</sup> tnúhu-gá ndéé sanaha. <sup>22</sup> Te ndí Moisés ní xáha<sup>n</sup> ndíi xii cue ñani tnáhá-ó ñi xíndecu ndéé sanaha: “Yá Ndiöxí tendaha-gá ñi<sup>n</sup> tée quixi-dé cáhá<sup>n</sup>-dé tnúhu-gá dàtná cuini-ndó ñi quide ñaha-gá xii yúhú, te tée-á<sup>n</sup> cuu-dé ñi<sup>n</sup> ñani tnáhá-ndó. Te cundedóho váha-ndo nchàa tnúhu cáhá<sup>n</sup>-dé. <sup>23</sup> Te nchaa ñáyi vá quindáá iní tnúhu cáhá<sup>n</sup>-dé, te cuíta

nihnú-yu chi vá quíhí<sup>n</sup>-yu núú quíhí<sup>n</sup> ñáyi sándáá iní tnúhu Yá Ndiöxí”, duha ní xáha<sup>n</sup> ndíi Moisés xií-yu — cächí té Pèlú xáha<sup>n</sup>-dè xií-yu.

<sup>24</sup> Te ní xáha<sup>n</sup> tùcu té Pèlú xií-yu:

—Ndí Sàmuel ndihi nchaa cue tée nchícú<sup>n</sup>-gá ní xóo cáhá<sup>n</sup> tnúhu Yá Ndiöxí ndéé sanaha ñi cáhá<sup>n</sup>-güedé nàcuáa cada-xi vitna. <sup>25</sup> Te Yá Ndiöxí ní cáhá<sup>n</sup>-gá ndíi cue tée ní cáhá<sup>n</sup> tnúhu-gá ndéé sanaha. Te ní quide ndáá-gá ndíi nchaa ñani tnáhá-ó ñi xíndecu ndéé sanaha nàcuáa cada-gá naníhí tãhú-ó. Te duha ní xáha<sup>n</sup>-gá xii ndíi Àbrahám: “Ío nduu cacu ñi<sup>n</sup> tnàha-n, te tée-á<sup>n</sup> cada-dé te naníhí tãhú ñáyi ñuyíu-a”, duha ní xáha<sup>n</sup>-gá xii ndíi Àbrahám. <sup>26</sup> Núu xiá<sup>n</sup> ní tendaha-gá Déhe-gá ní quixi-gá núú ndécú-ndó cuèndá dañá-ndo nchàa sá cuéhé sá dúhá quide-ndo, te naníhí tãhú-ndó —cächí té Pèlú xáha<sup>n</sup>-dè xii-yu.

## 4

*Té Pèlú ndíi té Juáá ndécú-güedé ndaha tée cùchiu<sup>n</sup>*

<sup>1</sup> Te té Pèlú ndíi té Juáá cáhá<sup>n</sup> dúcá<sup>n</sup>-ni-güedé ndíi ñáyi, ní quexio cue dútú ndíi tée tàxi tnúni ñáhá xii cue tée quide cuèndá veñúhu càhnu sá ïo cùnúu, ndíi cue tée cùu saducéú. <sup>2</sup> Te ní cudéé<sup>n</sup>-güedé nchaa-güedé núú tã Pèlú ndíi té Juáá sá xáha<sup>n</sup>-güedé xii ñáyi sá ndótó ñáyi ní xíhí dàtná ní ndoto Jèsús. <sup>3</sup> Te ní tñi ñaha-güedé ní chihí ñaha-güedé vecaá xii-güedé, te ñá ní quide ndáá tée cùchiu<sup>n</sup> cuéchi-güedé nduu-á<sup>n</sup> chi sa ní cuaa. <sup>4</sup> Te ío vai ñáyi ní sándáá iní-yu tnúhu ní cáhá<sup>n</sup>-güedé, te ñáyi-á<sup>n</sup> ndíi ñáyi sa ní sándáá iní-xi ndéé càni-gá ní xínu dàtná úhú<sup>n</sup> mĩ mee-ni cuè tée, te dñi<sup>n</sup> ñáyi dñí ndíi landú.

<sup>5</sup> Te nduu tnéé-á<sup>n</sup> diu-ni ñuu Jerusalén-á<sup>n</sup> ñi tacá cue tée yíndaha veñúhu, ndíi cue tée cùu sacuéhé núu ñáyi israhél ndíi cue tée dàcuaha ñaha xií-yu nchaa tnúhu ní chídó tnúni ndíi Moisés. <sup>6</sup> Te tnáhá dútú cùnúu-gá tée nani Anás ndécú ndíi té Caifás, ndíi té Juáá, ndíi té

Lijandrú ndihí dava-gá ñaní tnáhá dütú cúnüu-gá-á<sup>n</sup> ndécú. <sup>7</sup> Te ní xáha<sup>n</sup>-güedě xii cue té xínu cuechi núu-güedě:

—Chí cuáhá<sup>n</sup> queñuhu-ndo tē Pèlú ndihí té Juàá vecaá, te na quìxi-güedé iha —càchí-güedé xáha<sup>n</sup>-güedě.

Te ní quexìo té Pèlú ndihí té Juàá núu cuè té cùnüu, te cue té cùnüu-á<sup>n</sup> ní xícá<sup>n</sup> tnúhú-güedě núu-güedě, te xáha<sup>n</sup>-güedě:

—¿Nása ní quide-ndo cuendá té yacua-á<sup>n</sup>? ¿Yoo ní táuchíu<sup>n</sup> dùca<sup>n</sup> cada-ndo? —cachí-güedé xáha<sup>n</sup>-güedě.

<sup>8</sup> Te ndècu ndihí té Pèlú Espiritú Yă Ndiöxí, núu xíá<sup>n</sup> ní xáha<sup>n</sup>-dě xii-güedé:

—Nchòhó cue té cùchiu<sup>n</sup> ndihí nchòhó cue té cùu sacuéhé núu ñáyiú isràél, <sup>9</sup> te núu cuíní-ndó quíní-ndó nása ní quide-ndí ní ndúha té yacua-á<sup>n</sup>, <sup>10</sup> te cundedóho-ndo ñ<sup>n</sup> tnúhu na càhá<sup>n</sup>-í-a. Xìni ñuhu-xi cundedóho nchaa ñáyiú isràél cuendá quíní-yu nàcuáa ní cuu ní ndúha té-á<sup>n</sup>. Xítóhó Jesucristú Yáa ní xíndecu ñuú Nazàrét ní quide tátna-gá sáhá tē yacua ní ndúha, te diu-ni-gá ní sata caa-ndo núu cùrúxí te núu cùrúxí-á<sup>n</sup> ñí xíhí-gá, te ní dándótó ñàha Yá Ndiöxí xii-gá. <sup>11</sup> Te núu tütú Yă Ndiöxí càchí-xi: “Cristú cúu-gă dātñá ñ<sup>n</sup> yúu ndécú xíquí ñ<sup>n</sup> vehe. Te yúu càchí-yu sá ñà túu nàndíhi, te diu xíá<sup>n</sup> ní nàndíhi-xi ní ngúnutñí-xi xíquí véhé”, duha càchí-xi núu tütú-gá. Te duca<sup>n</sup> sätnahá-xi cùu Jesús, chí càchí-ndó sá ñà túu nàndíhi-gá, <sup>12</sup> dico Yá Ndiöxí ñà túu ndéé ní tàxi ndecu-gá ingá té dácácu nihnu ñàha xii-o núu ùhú núu ndàhú, chí ñ<sup>n</sup>ndí díí-ni Déhe-gá Xítóhó Jesucristú dacácu nihnu ñàha-gă xii-o —càchí té Pèlú xáha<sup>n</sup>-dě xii-güedé.

<sup>13</sup> Te té Pèlú ndihí té Juàá ñà túu tūha-güedé, te cùnūhu cue té cùchiu<sup>n</sup> sá ño ñí xíndáa-güedé. Te ní cutnùnì iní cue té cùchiu<sup>n</sup>-á<sup>n</sup> sá Jèsús ní xica cuu ndihí-güedé, núu xíá<sup>n</sup> ñà túu tnàhí yùhú-güedé càhá<sup>n</sup>-güedé. <sup>14</sup> Te cuendá ndécú ndihí té Pèlú ndihí té Juàá té ní

ndúha sáhá-xi, núu xíá<sup>n</sup> ñà ní ñíhí cue té cùchiu<sup>n</sup> tnúhu càhá<sup>n</sup>-güedé. <sup>15</sup> Te ní xáha<sup>n</sup>-güedě xii té Pèlú ndihí té Juàá sá queé-güedě quehé cuendá ndóo mee-güedě ndatnúhu-güedé. <sup>16</sup> Te ní xítñàha-güedé:

—¿Nása cada-o ũú cue té-á<sup>n</sup>?, chí nchaa ñáyiú ñuú Jerusàlén nàhă-yu sá ñí quide tátna-güedé ñ<sup>n</sup> té yacua, te xíá<sup>n</sup> xícunūhu vñhi ñáyiú. Te vá cúu càchí-ó sá ñà ndáá, chí vñhi ñáyiú ní xiní nàcuáa ní cuu. <sup>17</sup> Te dayùhú-ó-güedě te cúñaha-o sá vñhi càhá<sup>n</sup>-gá-güedé tnúhu Jèsús, chí núu ñàhá te quíndáa-gá iní-yu —càchí-güedé xítñàha-güedé.

<sup>18</sup> Te ní cana tucu-güedé té Pèlú ndihí té Juàá, te xáha<sup>n</sup>-güedě sá vñhi dácua<sup>n</sup>-gá-güedé ñáyiú tnúhu Jèsús. <sup>19</sup> Te té Pèlú ndihí té Juàá ní xáha<sup>n</sup>-güedě:

—Chí cuáha cuendá, te núu sá càchí nchòhó cada-ndí àdi sá càhá<sup>n</sup> Yă Ndiöxí cada-ndí. Te cada càhnu iní-ndó chí vá cúu càda-ndí sá càchí-ndó, chí cada nahi-ni-ndí sá càchí Yă Ndiöxí. <sup>20</sup> Chí dacuñí càhá<sup>n</sup>-ndí nàcuáa ní càhá<sup>n</sup> Jèsús, te càhá<sup>n</sup>-ndí nchaa sá ñí xiní-ndí ní quide-gá —càchí-güedé xáha<sup>n</sup>-güedě.

<sup>21</sup> Te cue té cùchiu<sup>n</sup> níhi-gá ní càhá<sup>n</sup>-güedé xáha<sup>n</sup>-güedě sá cáda cástiú ñàhá-güedě núu vá dáñá-güedě sá dácua<sup>n</sup>-güedé ñáyiú. Te duca<sup>n</sup> te ní dáñá ñàha-güedé cuánuhú-güedé, chí ñà ní ñíhí-güedě nása cada-güedé cada castiú ñàhá-güedé, chí nchaa-yu ndácá<sup>n</sup> táhū-yu núu Yă Ndiöxí sá ñí ndúha té yacua. <sup>22</sup> Te té ní quide tátna-güedé-á<sup>n</sup> ndécú-dě vñhi-gá údico cuíá-dě, te ío ní cuñūhu-yu sá ñí ndúha-dé.

*Ñáyiú sàndáa iní tnúhu Jèsús xícá<sup>n</sup> táhū-yu núu-gă sá vñhi-yu càhá<sup>n</sup>-yu tnúhu-gá*

<sup>23</sup> Te ní ndee té Pèlú ndihí té Juàá cuánuhú-güedé núu ndécú cuè té cùndihí-güedé, te ní nacani tnúhu-güedé nàcuáa ní xáha<sup>n</sup> cuè dütú cúnüu ndihí cue té cùu sacuéhé núu ñáyiú isràél. <sup>24</sup> Te sátá ñí xíndedóho-yu tnúhu ní càhá<sup>n</sup>-güedé, te ñ<sup>n</sup>-ni tnúhu ní



cáhá<sup>n</sup>-yu nchaá-yu ndihí Yá Ndiöxí, te ní xáhã<sup>n</sup>-yu xii-gá:

—Yòhó Dútú Ndiöxí, ní cadúha-n àndiu, ní cadúha-n ñuyíú, ní cadúha-n làmár, ní cadúha-n nchàandi túhú sá íó ñuyíú. <sup>25</sup> Te ndíi Dàvíí ní sándáá iní ndíi tnúhu ní cáhá<sup>n</sup>-n, te ní chídó tnùní ndíi nàcuáa ní xáha<sup>n</sup>-n cãhá<sup>n</sup> ndíi, te ñu-ni Espiritú-n ñí chindee ñàha-xi xii ndíi ní chídó tnùní ndíi, te duha ní chídó tnùní ndíi:

Ñáyiu ñá túú cùu ñáyiu isràél ío cùdèè<sup>n</sup>-yu núú Yá Ndiöxí,  
te cuíní-yu nàá-yu ndihí-gá, dico vá ndácũ-yu chi mee-gã cúnũu-gá.

<sup>26</sup> Te cue téé yíndaha nació<sup>n</sup> ndihí cue téé cùchiu<sup>n</sup> tacá-güedé nàá-güedé ndihí Dútú Ndiöxí ndihí Crístú Yaa ní quixi ñuyíú-a.

Duha ní chídó tnùní ndíi Dàvíí nàcuáa ndũu tnúhu ní cáhá<sup>n</sup>-n —càchí-yu xáhã<sup>n</sup>-yu xii Yá Ndiöxí.

<sup>27</sup> Te xáhã<sup>n</sup> tucú-yu xii-gá:

—Ndáá ní cáhá<sup>n</sup> ndíi Dàvíí chi ñu-ni ñuú iha ní tacá té Hèrodés ndihí té Pònciú Pilatú ndihí ñáyiu ñá túú cùu ñáyiu isràél ndihí ñáyiu isràél ní cáhá<sup>n</sup> cuèhé-yu cuèndá Jesús. Te Yòhó Dútú Ndiöxí, Déhe-n cùu Jesús nũu ío váha iní-gá, te ní sáha chiú<sup>n</sup>-n-gá, te ío úhú ní cuu iní ñáhá ñáyiu xii-gá. <sup>28</sup> Te ní quidé-yu nàcuáa ní sani iní-n càdá-yu ndéé sanaha, ndéé cùtnáhá ní ngáva ñuyíú. <sup>29</sup> Te Yòhó Dútú Ndiöxí sa nàha-n nása càhá<sup>n</sup> cue téé cuíní cada úhú ñáhá xii-ndí. Te quíde-ndí chiú<sup>n</sup> tahu-n, te vitna chindee ñàha-n xii-ndí cuèndá sá vã yùhú-ndí cáhá<sup>n</sup>-ndí tnúhu-n. <sup>30</sup> Te cada tátna-n ñáyiu cùhú, te chindee ñàha-n xii-ndí, te cada-ndí nchaa sá vã yõo tnàhí ndàcu cada nacuáa cuñúhu vîhí-yu. Te xìní-ndí sá méé Jesús chindee ñàha-gá xii-ndí, chi quíde-gá chiú<sup>n</sup> tahu-n —cachí-yu xáhã<sup>n</sup>-yu xii Yá Ndiöxí.

<sup>31</sup> Te sátá ñí yáha ní cáhá<sup>n</sup>-yu ndihí Yá Ndiöxí, te ní quidi-xi vehe núú xíndecú-yu, te òré-á<sup>n</sup> ñí cutáhú tucú-yu nchaá-yu Espiritú-gá. Te ní

cáhá<sup>n</sup>-yu tnúhu Yá Ndiöxí, te ñá túú tnàhí ní yùhú-yu.

*Cuèndá nchaa ndachíu<sup>n</sup> cánehe chiú<sup>n</sup>-yu*

<sup>32</sup> Te nchaa ñáyiu ní sándáá iní tnúhu Yá Ndiöxí ñí-ñí tnúhu ní cáhá<sup>n</sup>-yu nchaá-yu. ñí-ñí tnúhu ní sani iní-yu, te ní xóo chindee tnàhá-yu chi ní xóo cuáha táhú tnáhã-yu nchaa sá xíní ñùhú-yu, te ní ñí-yu ñá túú ní cáhá<sup>n</sup>-yu sá ndàchiú<sup>n</sup>-yu ñí-ñí-ní-yu cùu nchaa sá ndécú ndíhí-yu. <sup>33</sup> Te cue téé ní táuchíú<sup>n</sup> Jesús dacuàha ñaha xií-yu tnúhu-gá ío váha ní cáhá<sup>n</sup>-güedé nàcuáa ní cuu ní ndoho Xítóhó Jesu-crístú. Te ío ní chindee ñàha Yá Ndiöxí ní cáhá<sup>n</sup>-yu tnúhu-gá, te ñá túú ní cáhá<sup>n</sup> cuèhé dava-gá-yu cuèndá ñáyiu dàcuaha tnúhu-gá. <sup>34</sup> Te ñá túú tnàhí ní cùndahú-yu díhú<sup>n</sup>, chi nchaa ñáyiu ndècu ndihí ñuhú-xi, ndihí nchaa ñáyiu cãa vehe-xi ní nadicó-yu, te da ñí da ñí ndachíú<sup>n</sup>-yu ní nadicó-yu òré xíní ñùhú-yu díhú<sup>n</sup>. <sup>35</sup> Te ní sãñáhá-yu xii cue téé ní táuchíú<sup>n</sup> Jesús dacuàha ñaha xií-yu tnúhu-gá, te cue téé-á<sup>n</sup> ñí dácãhũ-güedé nchaa ñáyiu xini ñuhú. <sup>36</sup> Te distritú Chìpré ndécú ñí téé nàni-dé Chèé ñaní tnáhá ndíi Lèví, te ní xóo cunu cuechi-dé veñúhu ñáyiu isràél. Te cuèndá sá sãñaha-dé tnúhu ndee iní xií-yu, xíã<sup>n</sup> nũu ní dánání ñàha-güedé Vèé xii-dé. <sup>37</sup> Te téé-á<sup>n</sup> ñí nadico-dé luha ñuhú-dé, te nèhe-dé díhú<sup>n</sup> cuáhã<sup>n</sup> núú cuè téé ní táuchíú<sup>n</sup>-gã dacuàha ñaha xií-yu tnúhu-gá.

## 5

*Té Ananiás ndihí tá Sàfirá ñá túú ní quíde ndáá-yu*

<sup>1</sup> Te ndècu ñí téé nàni Ananiás, te ñadíhí-dé nání-á<sup>n</sup> Sàfirá, te ñáyiu-á<sup>n</sup> ñí nadicó-yu luha ñuhú-yu. <sup>2</sup> Te ní taxúha-dé sacú díhú<sup>n</sup>, te sacú-gá nehé-dé cuáhã<sup>n</sup> ní sãñaha-dé xii cue téé ní táuchíú<sup>n</sup> Jesús dacuàha ñaha xii ñáyiu tnúhu-gá, te ní dándahú ñáhã-dé xii-güedé, chi ní xáha<sup>n</sup>-dè sá ñíhíí ní sãñaha-dé, te nàha ñadíhí-dé sá dúcá<sup>n</sup>

nĩ quide-dé. <sup>3</sup> Te ní xáha<sup>n</sup> tẽ Pèlú xii-dé:

—Anàniás, ¿ná cuendá duca<sup>n</sup> nĩ quide-n nĩ dáñá-n nĩ quíhu sácúhna ínín? Te ní dácúándèhnde-n núú Espíritú Yá Ndiõxí, te ní taxúha-n sácú díhú<sup>n</sup> nĩ níhí-n cuendá ñuhu-n. <sup>4</sup> ¿Te ñuhu-á<sup>n</sup> cuendá sá ñúhú mèe-n, àdi díhú<sup>n</sup>-á<sup>n</sup> cuendá sá díhú<sup>n</sup> méé-n cùu-xi, te cuu-ni cada-n nàcuáa càchí ínín-n càha<sup>n</sup>-n ñá? ¿Ná cuendá duca<sup>n</sup> nĩ quide-n? ¿Ná ní quide-xi ínín-n nõu ní dácúándèhnde-n núú Yá Ndiõxí? Chi ñá díú-ni mèe-ni ñáyiu ni dándahú-n —càchí té Pèlú xáha<sup>n</sup>-dẽ xii-dé.

<sup>5</sup> Te òré ní ndihí tnúhu ní xáha<sup>n</sup> tẽ Pèlú, te uu<sup>n</sup>ni ní nduá-dé te ní xihí-ni-dé. Te nchaa ñáyiu ní níhí tnúhu sá nĩ xihí-dé, te ní yùhú víhí-yu.

<sup>6</sup> Te ní quixi <sup>h</sup>úú cue tée cuechi, te ní ndanehe ñaha-güedẽ ní sacá<sup>n</sup> ñahá-güedẽ núú yuu, te ní ducu<sup>n</sup> nuu ñaha-güedẽ yuu-á<sup>n</sup>, te ní xido ñaha-güedẽ néhé ñaha-güedẽ cuáhá<sup>n</sup> chindúxi ñaha-güedẽ xii-dé.

<sup>7</sup> Te ní cuu úú uní òré, te ní quexìo ñadihí téé ní xihí-á<sup>n</sup>, te vátá quíní-gá-a<sup>n</sup> sá nĩ xihí yíi-a<sup>n</sup>. <sup>8</sup> Te ní xáha<sup>n</sup> tẽ Pèlú xii-a<sup>n</sup>:

—Cuimí-í cachí tnúhu ndáá-n. ¿Ndédau ní díco-ndó ñuhu, ní díco-ndó nàcuáa ní cachí yíi-n á<sup>n</sup>? —càchí té Pèlú xáha<sup>n</sup>-dẽ xii-a<sup>n</sup>.

Te ní xáha<sup>n</sup>-a<sup>n</sup>:

—Ndáá sá díú-ni dùca<sup>n</sup> —cachí-a<sup>n</sup> xáha<sup>n</sup>-a<sup>n</sup>.

<sup>9</sup> Te ní xáha<sup>n</sup> tẽ Pèlú:

—¿Ná cuendá duca<sup>n</sup> nĩ chitnàha tnúhu-ndo dùca<sup>n</sup> ní quide-ndo nĩ cuiní-ndó dándahú-ndó Espíritú Yá Ndiõxí? Quiní-n, chi sa cuándixi cue téé ní sáhá<sup>n</sup> ní chindúxi yíi-n, te yòhó tnàhá-n càndeca ñaha tucu-güedé xii-n quíhí<sup>n</sup> vitna —càchí-dé xáha<sup>n</sup>-dẽ xii-a<sup>n</sup>.

<sup>10</sup> Te òré-á<sup>n</sup> nĩ nduá-a<sup>n</sup> núú tẽ Pèlú, te ní xihí-ni-a<sup>n</sup>. Te cuándihu cue téé cuechi-á<sup>n</sup> xití vehe, te ní xiní-güedé sá sá ní xihí-a<sup>n</sup>, núú ní xido ñaha tucu-güedé cuáhá<sup>n</sup> chindúxi-güedé-a<sup>n</sup> dñi yíi-a<sup>n</sup>. <sup>11</sup> Te ní yùhú víhí ñáyiu ní sándáá ínín tnúhu Yá Ndiõxí, ndihí dava-gá ñáyiu ní níhí tnúhu nàcuáa ní cuu.

*Ní quide-güedé titní núú sã vã yõo tnàhí ndàcu cada te ïo ní cuñúhu ñáyiu*

<sup>12</sup> Te cue téé ní táuchíú<sup>n</sup> Jèsús dacuàha ñaha xií-yu tnúhu-gá titní víhí sã vã yõo tnàhí ndàcu cada ní quide-güedé, te ní cuñúhu víhí-yu. Te nchaa ñáyiu ní sándáá ínín-xi tnúhu Jèsús ní xóo tacá-yu corrèdór néhé diu ndí Salòmón. <sup>13</sup> Te nchaa ñáyiu ñá túú dácuaaha tnúhu-gá ñá ní cùyíi-yu chitnahá-yu ñáyiu ní sándáá ínín-xi tnúhu-gá, dico nchaá-yu ní cáhá<sup>n</sup> váha-yu cuendá ñáyiu ní sándáá ínín-xi tnúhu-gá. <sup>14</sup> Te vãi téé, vãi ñadihí ní sándáá ínín-yu tnúhu-gá.

<sup>15</sup> Te cuendá sá nĩ níhí-yu tnúhu sá quidé tãtna cue téé ní xica cuu ndihí Jèsús, núú xiã<sup>n</sup> ní queñuhú-yu nchaa ñáyiu cùhú ichi, te davá-yu ní quide túha-yu camá te davá-yu ní quide túha-yu yuu, núú núú nchaa xiã<sup>n</sup> tá sácá<sup>n</sup>-yu cue ñáyiu cùhú-á<sup>n</sup> cuáhá<sup>n</sup>, te xiã<sup>n</sup> cáã-yu ndetú-yu, chi ní sani ínín-yu sá òré yáha té Pèlú te cuèdicó cuándahú-dẽ yáha ndodo ñaha-xi xií-yu te ndúha-yu. <sup>16</sup> Te ní quixi ñáyiu ñuú yatni Jerusalén ndécá-yu ñáyiu cùhú, ndihí ñáyiu yíi ñaha espíritú cúndihí yucu ñávãha ní quixi, te nchaá-yu ní ndúha.

*Ío ní quide úhú-güedé té Pèlú ndihí té Juàá*

<sup>17-18</sup> Te dútú cùnùu-gá ndihí cue téé cùu saducéú cue téé cùndihí-dé ní cudéé<sup>n</sup>-güedé sá ïo chítú-yu dácuaaha tnúhu Jèsús, núú xiã<sup>n</sup> ní tñi-güedé cue téé ní táuchíú<sup>n</sup> Jèsús dacuàha ñaha xií-yu tnúhu-gá ní chihi ñaha-güedé vecaá. <sup>19</sup> Te xití niú-á<sup>n</sup> nĩ quexìo <sup>h</sup>úú espíritú xínú cuèchi núú Yá Ndiõxí ní nacaá<sup>n</sup>-xi yèhe vecaá ní quee-güedé, te ní xáha<sup>n</sup>-xi xii-güedé:

<sup>20</sup> —Quíhí<sup>n</sup>-ndó veñúhu càhnu sá ïo cùnùu te cúñaha-ndo xii ñáyiu nàcuáa cadá-yu naníhí tãhú-yu —càchí espíritú-á<sup>n</sup> xáha<sup>n</sup>-xi xii-güedé.

<sup>21</sup> Te sá dúcá<sup>n</sup> nĩ xáha<sup>n</sup>-xi nõu sátá nĩ túndaá, te ní sáhá<sup>n</sup>-güedé veñúhu càhnu sá ïo cùnùu sá cúú-xí ñáyiu isràél ní dácuahá ñaha-güedé xií-yu.

Te dútú cúnùu-gá ndìhi cue té cùndìhi-dé ní nadatàcá tnáhá-güedě ndìhi nchaa cue té cùu sacuéhé nùú ñáyiú isràél ndìhi cue té cùchiu<sup>n</sup>, te ní tendaha-güedě sandàdú cuáhá<sup>n</sup> queñuhu-güedé cue té yìhi vecaá ní cùu. <sup>22</sup> Te ní quexìo-güedé yèhe vecaá, te ní xiní-güedé sá nì ì<sup>n</sup>-gá cue té dácuaaha ñaha xii ñáyiú tnúhu Jèsús ñá túú-gá-güedé yíhí. Te cuánuhú-güedé <sup>23</sup> ní xítñúhu-güedé cue té cùchiu<sup>n</sup>, te xáha<sup>n</sup>-güedě:

—Ní sáhá<sup>n</sup>-ndí ní sándéhé-ndí vecaá, te ndéé chóó-ni, te xíndecu-ni sandàdú cue té xíndéé yèhe vecaá. Te ní nacaá<sup>n</sup>-ndí vecaá, te vá yóo ì<sup>n</sup>-gá yíhí —càchí-güedé xáha<sup>n</sup>-güedě.

<sup>24</sup> Te sá dúcá<sup>n</sup> ñí xáha<sup>n</sup>-güedě, te cuáhá<sup>n</sup> iní cue dútú cúnùu ndìhi té tãxi tnuní cue té xíndéé veñúhu càhnu sá ìo cùnùu, te ní xítñaha-güedé:

—¿Nása cada-xi vitna duha càa ní cuu ní xinu cue té yìhi vecaá-i? —càchí-güedé xítñaha-güedé.

<sup>25</sup> Te ní quexìo ì<sup>n</sup> té ní xáha<sup>n</sup>-dě:

—Cundedóho-ndo na càchí tnúhu-í ì<sup>n</sup> tnúhu. Cue té ní chihí-ndo vecaá ndécú-güedé veñúhu càhnu sá ìo cùnùu dacuaaha-güedé ñáyiú —càchí-dé xáha<sup>n</sup>-dě.

<sup>26</sup> Te cue té ndéé veñúhu ndìhi té tãxi tnuní ñáhá xii-güedé cuánguaca ñaha-güedě, te ñá túú ní quide úhú ñáhá-güedě, chi ní yùhú-güedé cuáha yúú ñáhá ñáyiú dii ñùú-xi-á<sup>n</sup>. <sup>27</sup> Te ní ndexìo ndìhi ñaha-güedé nùú cuè té cùu sacuéhé ndìhi nùú cuè té cùchiu<sup>n</sup>. Te dútú cúnùu-gá ní ngüíta-dé ténàá ñáhá-dé xii-güedé, te xáha<sup>n</sup>-dě:

<sup>28</sup> —Te náa ñá díú ñí cachí-ndí sá vã dácuaaha-gá-ndó ñáyiú tnúhu Jèsús te dácuaaha-ni-ndó-yu, te vitna nchaa ñáyiú ñuú Jerusàlén ní níhí-yu tnúhu nàcuáa càhá<sup>n</sup>-ndó. ¿Te ná cuendá duca<sup>n</sup> quide-ndo, te càchí-ndó sã nchùhú ndècuéchi-ndí ní sahani-ndí Jèsús-i? —càchí dútú cúnùu-gá xáha<sup>n</sup>-dě xii-güedé.

<sup>29</sup> Te té Pèlú ndìhi dava-gá cue té ní táuchíú<sup>n</sup> Jèsús dacuaaha ñaha xi-yu ní xáha<sup>n</sup>-güedě xii cue té cùchiu<sup>n</sup>:

—Nchùhú, Yá Ndiöxí cúnùu-gá sàndáá iní-ndí tnúhu càhá<sup>n</sup>-gá dácúxí tnúhu càhá<sup>n</sup> ñáyiú. <sup>30</sup> Te nchòhó ní sata caa-ndo Jèsús nùú cùrúxí te nùú cùrúxí-á<sup>n</sup> nì xíhí-gá, dico ní dándótó ñaha Yá Ndiöxí xii-gá. Te Yá Ndiöxí ní sàndáá iní cue ñani tnáhá-ndí ní xíndecu ndéé sanaha. <sup>31</sup> Te Yá Ndiöxí ní xáha<sup>n</sup>-gá sá cùndecu Jesús xio cùha-gá cuendá taxi tnùnigá te dacacu nihnu-gá ñáyiú isràél nùú ùhú nùú ndàhú. Te duca<sup>n</sup>-ni dacacu nihnu-gá nchaa ñáyiú na dàña nchaa sá cuèhé sá dúhá, te cada càhnu iní-gá nchaa yíca cuèchi-yu. <sup>32</sup> Te ní xiní-ndí nàcuáa ní quide-gá, nùu xíã<sup>n</sup> cáni-ndí cuendú nùú nchaa ñáyiú, te Espíritú Yá Ndiöxí chíndèe ñaha-xi xii-ndí càhá<sup>n</sup>-ndí tnúhu-gá. Te diu-ni Espíritú-gá ní sáñaha-gá xii nchaa ñáyiú ní sàndáá iní-xi tnúhu-gá —càchí té Pèlú ndìhi dava-gá-güedé xáha<sup>n</sup>-güedě xii cue té cùchiu<sup>n</sup>.

<sup>33</sup> Te sátá dúcá<sup>n</sup> ñí xáha<sup>n</sup>-güedě xii cue té cùchiu<sup>n</sup>, te ní cudéé<sup>n</sup>-güedě, te ní ndatnúhu-güedé sá cáhni ñaha-güedé. <sup>34</sup> Te ì<sup>n</sup> té cùu fariséú tnàha-dé cúú-dě chiú<sup>n</sup>, te nàni-dé Gamaliél, te cùu-dé mèstrú dácuaaha-dé ñáyiú nàcuáa ní chídó tnùnigá ndí Moisés, te ìo yíñùhu càhá<sup>n</sup> ndìhi ñáhá-yu xii-dé. Te ní ngúnutnì<sup>n</sup>-dè, te ní xáha<sup>n</sup>-dè sá ná quèe tnaa té Pèlú ndìhi dava-gá-güedé quehé. <sup>35</sup> Te ní xáha<sup>n</sup>-dè xii cue té cùchiu<sup>n</sup>:

—Nchòhó cue té isràél, xini ñuhu-xi sá cáni vãha iní-ndó nãsa cada-ndo ndìhi cue té-ã<sup>n</sup>. <sup>36</sup> Chi ní cunaha ñí xíndecu ì<sup>n</sup> té ní xínani Tèudás, te ní cachí-dé sá cúnùu-dé, te ní cundìhi-dé dàtná cùmí ciendú cue té, te ñá ní cuini-güedé cuu ì<sup>n</sup>nuu-güedě ndìhi cue té cùchiu<sup>n</sup>. Te ní sahani ñaha cuè té cùchiu<sup>n</sup>-á<sup>n</sup> xii té Tèudás, te ní ndìhi cue té ní xica cuu ndìhi-dé ní xité nuu-güedé, te ñá túú-gá ní quide-güedé nàcuáa ní sani iní-güedé cada-güedé. <sup>37</sup> Te sátá nì xíhí té-á<sup>n</sup>, te ní tnahá nduu núcódó tnùnigá ñáyiú. Te dàvá-á<sup>n</sup> ñí xíndecu ì<sup>n</sup> té distritú Galileá ní xínani-dè

Judás. Te titní-güedé ní chitnahá ñáhá-güedě xii-dé. Te tñahá-dé ní sahani ñaha tucu cue tée cùchiu<sup>n</sup>, te nchaa cue tée ní xica cuu ndihi-dé ní xité nuu-güedé. <sup>38</sup> Te na cächí tñuhu-í sá dáñá-ndó cuè tée-á<sup>n</sup>, te ni ñà túú nǎgá tñuhu cúñaha-ndo xii-güedé, chi núu chiú<sup>n</sup> mee-güedé quidé-güedé te cuíta-güedé, <sup>39</sup> dico núu chiú<sup>n</sup> Yá Ndiöxí quidé-güedé, te vá ndínìhnu chiu<sup>n</sup> quide-güedé. Te núu quide-güedé chiú<sup>n</sup> Yá Ndiöxí, te vá nàá-ndó ndihi-güedé, chi Yá Ndiöxí nàá ndihi-ndo sá dúcá<sup>n</sup> xiquide-ndo — cächí té Gamàliél xáha<sup>n</sup>-dē xii cue tée cùchiu<sup>n</sup>.

<sup>40</sup> Te nchaa-güedé ní cáhá<sup>n</sup> sá tñuhu ndáá cáhá<sup>n</sup>-dé. Te dātñuní ní nacana tucu-güedé té Pèlú ndihi dava-gá-güedé te ní caniha-güedé, te ní cáhá<sup>n</sup> níhi-güedé, te xáha<sup>n</sup>-güedé sá vǎ cáhá<sup>n</sup>-gá-güedé tñuhu Jèsús, te dātñuní ní dáñá ñaha-güedé cuánuhú-güedé. <sup>41</sup> Te ío ní cudíí iní-güedé, chi mee Yá Ndiöxí ní cachí-gá sá dúcá<sup>n</sup> ndòho-güedé dacuàha-güedé ñáyiú tñuhu Jèsús. <sup>42</sup> Te ì<sup>n</sup> nduu ì<sup>n</sup> nduu ní dácuahá-güedé ñáyiú xití veñúhu càhnu sá ío cùnuu ndihi nchaa vehé-yu. Te ní xáha<sup>n</sup>-güedé xii-yu sá Jèsús cúu-gǎ Cristú Yáá ní quixi ñuyíú-a.

## 6

*Ní ndúcú-güedé úsá cue tée cundecu dacáhñu sá cǎxí ñáyiú*

<sup>1</sup> Te diu-ni dǎvǎ-á<sup>n</sup> ñí sándáá iní vǎi ñáyiú tñuhu Jèsús. Te cue ñáyiú grìégú ní cáhá<sup>n</sup> cuèhé-yu cuèndá ñáyiú isràél, sá ñáyiú dñí ñáyiú quèé ñáyiú cáhá<sup>n</sup> tñuhu grìégú ñá túú tñahá sá cǎxí-yu, chi ñá túú sǎñaha ì<sup>n</sup>nuu-güedé. <sup>2</sup> Te cue tée úxúú ní táuchíú<sup>n</sup> Jèsús dacuàha ñaha xii-yu tñuhu-gá, cue tée-á<sup>n</sup> ñí cana-güedé nchaa ñáyiú sándáá iní tñuhu Jèsús. Te ní xáha<sup>n</sup>-güedé xii-yu:

—Nchúhú chi vá cúú dácáhñu-ndí sá cǎxí-yu, chi mee-ni tñuhu Yá Ndiöxí cáhá<sup>n</sup>-ndí. <sup>3</sup> Te nchòhó cue tée ndècu ndihi-ndí ichi Xítohó Jesucristú cáhá<sup>n</sup>

ndihi-ndo úsá cue tée xíndecu iha, cue tée cáhá<sup>n</sup> ndihi ñáhá-yu mee-ni tñuhu yíñùhu, cue tée ndècu ndihi Espiritú Yá Ndiöxí, mee-ni cuè tée cùtnuní váha iní-xi. Te cue tée-á<sup>n</sup> cuàha-ndí-güedé chiú<sup>n</sup> cada-güedé dacáhñu-güedé sá cǎxí-yu. <sup>4</sup> Te nchúhú mee-ni Yá Ndiöxí cáhá<sup>n</sup> ndihi-ndí, te mee-ni tñuhu-gá dacuàha-ndí-yu — cächí-güedé xáha<sup>n</sup>-güedé xii-yu.

<sup>5</sup> Te nchaá-yu ní tñí-yu tñuhu ní cáhá<sup>n</sup>-güedé, núu ní ndúcú-yu cue tée cada chiú<sup>n</sup>-á<sup>n</sup>. Te ì<sup>n</sup>-dé nání-dē Těvǎ, te ío váha sándáá iní-dé Yá Ndiöxí, te ndècu ndihi-dé Espiritú-gá. Te duha ní xínani dǎva-gá-güedé: té Lìpé, té Pröcoró, té Nicànor, té Tìmon, té Pàrmenás, té Lǎxí tée ñuú Antìoquiá tée ní sándáá iní-xi sá dácuahá ñáyiú isràél te vitna ní sándáá iní-dé tñuhu Jèsús. <sup>6</sup> Te úsá cue tée-á<sup>n</sup> ñí sáhá<sup>n</sup>-güedé núu cuè tée úxúú ní táuchíú<sup>n</sup> Jèsús dacuàha ñaha xii-yu tñuhu-gá, te cue tée úxúú-á<sup>n</sup> ñí cáhá<sup>n</sup> ndihi-güedé Yá Ndiöxí, te ní sacá<sup>n</sup> ndodo-güedé ndaha-güedé díquí cuè tée úsá-á<sup>n</sup>.

<sup>7</sup> Te ñáyiú ní sándáá iní tñuhu Jèsús cuáhá<sup>n</sup>-yu titní xichi cáhá<sup>n</sup>-yu tñuhu-gá. Te vǎi-gá ñáyiú ta sándáá iní-yu tñuhu-gá cuáhá<sup>n</sup>, te ní xíndecú-yu ndihi dava-gá ñáyiú dácuahá tñuhu-gá ñuú Jerusàlén. Te titní dútú ñí sándáá iní-güedé tñuhu-gá.

*Ní tñí-güedé té Těvǎ*

<sup>8</sup> Te té Těvǎ ní quide-dé titní núu sǎ vǎ yòo tñahí ndàcu cada, te ní cuñúhu vñí-yu sá dúcá<sup>n</sup> ñí quide-dé, te duca<sup>n</sup> ñí quide-dé chi ndècu ndihi-dé Yá Ndiöxí chíndèe ñaha-gá. <sup>9</sup> Te ní xíndecu cue tée ní xóo cunu cuechi núú ì<sup>n</sup> tée tàxi tñuní, te tée tàxi tñuní-á<sup>n</sup> ñí ní xóo dáña tñahí-dé quèe-güedé núu chíú<sup>n</sup>-dē, te ní xínu-ná-güedé. Te sátá xǎ<sup>n</sup>, te ní dácáá-güedé veñúhu-güedé, te veñúhu-á<sup>n</sup> sáhá<sup>n</sup> ñáyiú ñuú Cìrené, ñáyiú ñuú Alejándriá, ñáyiú ñuú Cìliciá, ndihi ñáyiú distrítú Àsiá. Te nchaa ñáyiú-á<sup>n</sup> ñí nàá ndihí-yu té Těvǎ. <sup>10</sup> Te



ñá ní ñihĩ-yu tnúhu cáhá<sup>n</sup>-yu, chi ío váha ní sáá díquí-dě nàcuáa ní xáha<sup>n</sup>-dě xii-yu, chi Espíritú Yá Ndiöxí ní chindee ñàha-xi xii-dé. <sup>11</sup> Te ní cháhu-yu cue téé ní dácuaándèhnde tnúhu ní cáhá<sup>n</sup> té Těvá núu-yu. Te ní xáha<sup>n</sup>-güedě sá càhá<sup>n</sup> cuèhé-dé cuendá ndíi Moisés ndihĩ cuendá Yá Ndiöxí. <sup>12</sup> Te cuendá sá dúcá<sup>n</sup> ní dácuaándèhnde-güedé núu ní sándáá iní-yu, te ní cudéè<sup>n</sup>-yu núú tē Těvá. Te ní cudéé<sup>n</sup> cue téé cùu sacuéhé, te tnàhá cue téé dácuaaha ñaha xii-yu nchaa tnúhu ní chídó tnùnĩ ndíi Moisés ní cudéé<sup>n</sup>-güedě. Te ní sáhá<sup>n</sup>-güedé ní tñi-güedé té Těvá ndécá ñàha-güedé cuáhá<sup>n</sup> núú quidé cuè téé cùchiu<sup>n</sup> jundá, ndihĩ cue téé cùu sacuéhé. <sup>13</sup> Te ndécá-yu cue téé dácuaandehnde cuáhá<sup>n</sup> núú quidé-güedé jundá, te ní quesaha-ni tùcu-güedé càhá<sup>n</sup> cuèhé-güedé, te xáha<sup>n</sup>-güedé:

—Tée-a mee-ni càhá<sup>n</sup> cuèhé-dé cuendá veñúhu sá ío cùnūu, veñúhu ní cuu íi, te càhá<sup>n</sup> cuèhé-dé cuendá nchaa sá ní chídó tnùnĩ ndíi Moisés. <sup>14</sup> Te ní tecú dóho-ndí càchí-dé sá Jèsús téé ñuú Nazàrét dangòyo-dé veñúhu càhnu sá ío cùnūu te vá dáñá-gá-dé cada-ndí nàcuáa ní cachí ndíi Moisés cada-ndí —càchí-güedé xáha<sup>n</sup>-güedé.

<sup>15</sup> Te nchaa cue téé ndècu jundá ní ndacoto váha-güedé núú tē Těvá. Te ní dáyèhé-xi núú-dě dàtná quidé-xi núú espíritú xínú cuèchi núú Yá Ndiöxí.

## 7

*Té Těvá xáha<sup>n</sup>-dě sá ñà túú cuèchi-dé*

<sup>1</sup> Te ní xáha<sup>n</sup> dùtú cùnūu-gá xii-dé:

—¿Ndáá tnúhu càhá<sup>n</sup>-güedé cuendá-n-ǎ<sup>n</sup>? —càchí-dé xáha<sup>n</sup>-dě.

<sup>2</sup> Te té Těvá ní xáha<sup>n</sup>-dě xii-güedé:

—Nchòhó cue ñaní tnàhá-í ndihĩ nchòhó cue téé cùu sacuéhé, cundèdóho-ndo ñi<sup>n</sup> tnúhu na càhá<sup>n</sup>-í-a, Yá Ndiöxí ío cùnūu-gá, te ní cáhá<sup>n</sup> ndihĩ-gá ndíi Àbrahám nació<sup>n</sup> Mesopotamiá cùtnàhá vátá quihĩ<sup>n</sup>-gá ndíi cundecu ndíi ñuú Hàrán. <sup>3</sup> Te ní xáha<sup>n</sup>-gá xii ndíi: “Daña-n nchaa ñaní tnàhá-n, te daña-n ñuhu-n, te quihĩ<sup>n</sup>-n ñi<sup>n</sup> xichi núú dánèhé ñàhá-í

cundecu-n”, duha ní xáha<sup>n</sup> Yá Ndiöxí xii ndíi Àbrahám. <sup>4</sup> Te sátá dúcá<sup>n</sup> ní xáha<sup>n</sup> Yá Ndiöxí xii ndíi Àbrahám, te ní ndee ndíi ñuú Càldeá, te cuáhá<sup>n</sup> ndíi cundecu ndíi ñuú Hàrán. Te sátá ní xihĩ tātá ndíi, te ní xáha<sup>n</sup> Yá Ndiöxí quixi ndíi cundecu ndíi núú ndécú-ó vitna. <sup>5</sup> Te Yá Ndiöxí ñá túú ní sãñaha-gã ni lùha ñuhu cuu cuendá ndíi núú ní xindecu ndíi. Te ní xáha<sup>n</sup> ndáá Yá Ndiöxí xii ndíi sá cuãñaha-gã ñuhu cuu cuendá ndíi, te na cùú ndíi, te ndóo ndihĩ nchaa ñaní tnàhá ndíi cacu túu ndéé cuèé-gá. Te duca<sup>n</sup> ní xáha<sup>n</sup>-gã cuèi vátá cundècu-gá ni ñi<sup>n</sup> déhe ndíi. <sup>6</sup> Te ní xáha<sup>n</sup> tùcu Yá Ndiöxí xii ndíi Àbrahám sá díu-ni ñaní tnàhá ndíi quihĩ<sup>n</sup>-yu núú xicá cundècú-yu cúmí ciendú cuíá, te vá dáñá-yu queé-yu núú chíu<sup>n</sup>-yu, te ío dandòho ñaha-güedé núú cundècú-yu. Duha ní xáha<sup>n</sup> Yá Ndiöxí xii ndíi, te ndáá duca<sup>n</sup> ní cuu. <sup>7</sup> Te ní xáha<sup>n</sup> tùcu Yá Ndiöxí xii ndíi Àbrahám: “Yúhú dandòho-í nchaa ñayiu na dandòho ñaha xii cue ñaní tnàhá-n. Te dàvá-án te ndee cue ñaní tnàhá-n núú cundècú-yu, te quixi-yu chiñuhu ñàhá-yu xii-í iha”, duha ní xáha<sup>n</sup> Yá Ndiöxí xii ndíi Àbrahám, te ndáá duca<sup>n</sup> ní cuu. <sup>8</sup> Te Yá Ndiöxí ní quide ndáá-gá ndihĩ ndíi Àbrahám, te ní xáha<sup>n</sup>-gá xii ndíi sá cuãha-güedé seña ñi<sup>n</sup> nchaa landú téé cuendá cunàhá-yu nàcuáa ndūu sá ní quide ndáá-gá ndihĩ ndíi Àbrahám. Núu xíã<sup>n</sup> núú ùná nduu sá ní cacu té Isàác déhe ndíi Àbrahám, te ní sáha ndíi seña ñi<sup>n</sup>-dè. Te díu-ni duca<sup>n</sup> ní quide tucu té Isàác déhe-dé té Jàcób, te díu-ni duca<sup>n</sup> ní quide té Jàcób, chi úxúú déhe-dé ní xindecu, te nchaa-güedé duca<sup>n</sup> ní quide-dé. Te ndí ùxúú cue téé-á<sup>n</sup> ní cuu-güedé ñaní tnàhá-ó.

<sup>9</sup> Te ñi<sup>n</sup> déhe té Jàcób ní xínani-dè Chèé. Te ñá ní cùu váha iní cue ñaní-dé núú-dè, núu ní dícò ñàha-güedé ní quehe<sup>n</sup> ñaha cuè téé cuáhá<sup>n</sup> nació<sup>n</sup> Ègiptú, te Yá Ndiöxí ñá ní dàña ñaha-gá xii-dé cuíta nihnu-dé. <sup>10</sup> Te ní chindee ñàha-gá xii-dé ní cacu-dé cùtnàhá ní ndoho vihi-dé. Te téé yìndaha Egiptú ío ní cudíi iní-dé té Chèé, te ní cutnùnĩ iní-dé sá ío váha túha té Chèé, te duca<sup>n</sup>

nĩ cutnùnĩ iní-dé, chi Yá Ndiõxí ní chindee ñàha-gá xii té Chèé. Te ní xáha<sup>n</sup> tée yìndaha Egiptú xii té Chèé sá díú tē Chèé coo-dé gobièrnú Ègiptú, te taxi tñùnĩ-dé nchaa ñáyiu xìnu cuechi núú tē yìndaha Egiptú-á<sup>n</sup>.

11 "Te ní quíhu tnamá nihii nació<sup>n</sup> Ègiptú ndihĩ nació<sup>n</sup> Cànaá, te ío ní ndohó-yu. Te nchaa ñanĩ tnáhá-ó ní xindecu ndéé sanaha ñã ní xõo nihĩ-gá-yu sá cáxi-yu. 12 Te ní nihĩ tē Jácób tñúhu sá ío triú Ègiptú, núu ní tendaha-dē cue déhe-dé ní sáhá<sup>n</sup>-güedé ní sänguaa<sup>n</sup>-güedé triú-á<sup>n</sup>, te dàvá-á<sup>n</sup> ñĩ sáhá<sup>n</sup> cue ñanĩ tnáhá-ó xito díhna nuu nació<sup>n</sup> Ègiptú. 13 Te xito cùu uú cuáhá<sup>n</sup>-güedé, te ní xáha<sup>n</sup> tē Chèé sá ñanĩ-dé cúu-güedē. Te tē yìndaha Egiptú ní cutnùnĩ iní-dé sá díú-nĩ ñanĩ té Chèé cúu-güedē. 14-15 Te ní cana té Chèé tātá-dē té Jácób ndihĩ nchaa ñanĩ tnáhá-dē. Te cùu-xi datná únídico sáhú<sup>n</sup>-yu ndēca té Jácób cuáhá<sup>n</sup> nació<sup>n</sup> Ègiptú núú ndécú tē Chèé, te xíá<sup>n</sup> ñĩ quexió-yu ní ngóo-yu. Te yàcá<sup>n</sup> ní xihĩ té Jácób ndihĩ nchaa déhe-dé cue ñanĩ tnáhá-ó. 16 Te sátá ñĩ cuu titní cuía, te ní natava-güedé yiqui ndii Jácób ndihĩ nchaa déhe ndii nchido-güedé cuáhá<sup>n</sup> ñúú Sìquém. Te ndii Àbrahám sa ní cuu titní-gá cuía sã ñĩ nacuaa<sup>n</sup> ndii ñuhu núú cuè déhe ndii Hámór. Te xíá<sup>n</sup> nchii yaú ní nachindúxi-güedé yiqui-á<sup>n</sup>.

17 "Te cútnahá vátá nátáva-gá-güedé yiqui cue ndii, te sa ta tnáhá yatni cada Yá Ndiõxí nacuáa ní xáha<sup>n</sup>-gã xii ndii Àbrahám cada-gá sá cúu-xi ñáyiu isràél ndécú Ègiptú, te ta cãya víhĩ-yu cuáhá<sup>n</sup>. 18 Te dàvá-á<sup>n</sup> chi ingá tē yìndaha nació<sup>n</sup> Ègiptú, te ñã túú-gã ní xini-dé nása ní xóo cada ndii Chèé. 19 Te tē yìndaha Egiptú ñã ní quide ndáá-dé, chi ío ní dándóhó-dē ñanĩ tnáhá-ó ñĩ xindecu dàvá-á<sup>n</sup>. Te ní táúchiú<sup>n</sup>-dē sá xócuñi-yu dándóo-yu déhe yiqui<sup>n</sup> cuèndá ndihĩ-güexi cuú. 20 Te dàvá-á<sup>n</sup> ñĩ cacu té Moisés, te ío ní cudíi iní ñáhá Yá Ndiõxí xii-dé. Te ní xindecu ndihĩ

ñaha ñaná-dē ndihĩ tātá-dē únĩ-ni yóo. 21 Te ndēca ñahá-yu cuáhá<sup>n</sup> ingá xichi, te yàcá<sup>n</sup> ní dándóo ñahá-yu xii-dé, te ní nanihĩ ñáhá dēhe yoco tē yìndaha Egiptú, te ní xito-xi-dé datná xító-xi ñ<sup>n</sup> déhe mee-xi ñĩ xito-xi-dé ndéé ní sahnú-dé. 22 Te ní cutúha-dé nchaa sá xini cue tē ègiptú, te ío váha ní sáá díquí-dē tñúhu cáhá<sup>n</sup>-dé ndihĩ nchaa sá cádá-dē.

23 "Te cútnahá ndécú-dē údico cuía-dē, te ní cachí-dé sá quihĩ<sup>n</sup>-dé cáhá<sup>n</sup> ndihĩ-dé cue ñanĩ tnáhá-dē ñáyiu isràél. 24 Te ní xini-dé ní caniha ñ<sup>n</sup> tē ègiptú xii ñ<sup>n</sup> tē isràél, te ñã ní cundeé iní-dé cundehe-dē ñúu ní sáhá<sup>n</sup>-dé ní chindee-dē tē isràél, te ní sahní-dé tē ègiptú, 25 chi ní cachí Yá Ndiõxí sá díú-dē dacacu-dé ñanĩ tnáhá-dē ñáyiu isràél núú cuè tē ègiptú. Te ní sani iní-dé sá cútnùnĩ iní-yu nacuáa ní xáha<sup>n</sup> Yá Ndiõxí xii-dé, dico ñã túú ní cùtnunĩ iní-yu. 26 Te nduu tñéé ní xini-dé nãá úú cue tē isràél, te ñã túú ní tnáhá iní-dé nãá-güedé ñúu ní xáha<sup>n</sup>-dē xii-güedé: "¿Nã cuèndá duca<sup>n</sup> xĩnãá-ndó? ¿Nãa ñã díú ndimee-ndo núu duca<sup>n</sup> xĩnãá-ndó?" Duha ní xáha<sup>n</sup> tē Moisés xii-güedé. 27 Te tē ndēcuéchi ní sáhá<sup>n</sup>-dé ní chindaha nihnu-dé té Moisés ñ<sup>n</sup> xio, te ní xáha<sup>n</sup>-dē: "¿Nã cúu yòhó ñúu véxi-n tàxi tñunĩ ñáhá-n? 28 Te tnáhá-ni tucu yúhú cahni-n datná ní sahní-n tē ègiptú icu càha<sup>n</sup>-n á", duha ní xáha<sup>n</sup>-dē xii té Moisés. 29 Te sá dúcá<sup>n</sup> ñĩ cáhá<sup>n</sup> tē isràél ñúu ní yúhú té Moisés ní xinu-dé cuáhá<sup>n</sup>-dé ní sáá-dé nació<sup>n</sup> Mèdián. Yàcá<sup>n</sup> ní ngóo-dé, te yàcá<sup>n</sup> ní tnándaha-dé, te ní cacu úú déhe tē-dé.

30 "Te sátá ñĩ xinu údico cuía, te ní sáhá<sup>n</sup> té Moisés ñ<sup>n</sup> xio yucu Sinái. Te yàcá<sup>n</sup> ní xini-dé ñ<sup>n</sup> tñutáú nchicú<sup>n</sup> ñuhú, te xití itá ñuhú-á<sup>n</sup> ñĩ xini-dé yihĩ ñ<sup>n</sup> espíritú xínú cuèchi núú Yá Ndiõxí. 31 Te òré ní xini-dé sá yihĩ-xi xití itá ñuhú-á<sup>n</sup>, te ní cuñúhu vñhi-dé sá ñĩ xini-dé espíritú-á<sup>n</sup> xití itá ñuhú-á<sup>n</sup>, te ní sãndehe-gá-dé, te ní xindéhe váha-dé. Te ní tecú dóho-dé ní cáhá<sup>n</sup> Yá Ndiõxí, te xáha<sup>n</sup>-gã xii-dé: 32 "Yúhú

cùu-í Ndiöxí ní cáhá<sup>n</sup> ndihí cue ñaní tnáhá-n ndéé sanaha, ndíi Abrahám ndihí ndíi Isàác ndihí ndíi Jàcób, ndihí dava-gá cue ñaní tnáhá-n. Nchaa cue ndíi-á<sup>n</sup> ñí xóo cáhá<sup>n</sup> ndihí-í.” Duha ní xáha<sup>n</sup>-gã xii té Moisés. Te ní quidi ñaha-xi xii té Moisés sá ñí yùhú-dé, te ñá ní cùyii-gá-dé cundehe-dě tnutàú nchìcú<sup>n</sup> ñuhú-á<sup>n</sup>. <sup>33</sup> Te Yá Ndiöxí ní xáha<sup>n</sup>-gã xii-dé: “Queñuhu chàú-n, chi núú ñuhú ñí cuu íí nùtní-ñ. <sup>34</sup> Te yùhú ndéhè-í sá ïo ndòho nchaa ñáyiú cùu cuendá-í, ñáyiú ndècu nació<sup>n</sup> Ègiptú. Te ní tecú dóho-í sá ïo ndàhú xícáhá<sup>n</sup>-yu, núu xíá<sup>n</sup> véxi-í càchí tnúhu-í sá nùhú-n nació<sup>n</sup> Ègiptú cuendá ndeñùhú-n-yu yàcá<sup>n</sup>.” Duha ní xáha<sup>n</sup> Yá Ndiöxí xii té Moisés.

<sup>35</sup> Te ñá ní sàndáá iní-yu té Moisés ndéé díhna, chi ní xáhá<sup>n</sup>-yu: “¿Ná cuendá véxi-n tàxi tnuní ñáhá-n xii-ndí?” Duha ní xáhá<sup>n</sup>-yu xii té Moisés. Te ñu-ni té Moisés ní tendaha ñaha Yá Ndiöxí ní sáhá<sup>n</sup>-dé dacäcu-dé ñáyiú isràél nació<sup>n</sup> Ègiptú cuèi ñá ní sàndáá iní ñáhá-yu xii-dé. Dico ní taxi tnùn-í-dé-yu, chi duca<sup>n</sup> ñí xáha<sup>n</sup>-gã òré ní xini-dé espíritú xínú cuèchi núú-gã xití tnutàú nchìcú<sup>n</sup> ñuhú. <sup>36</sup> Te té Moisés ní ngúita-dé ní quide-dé sá vã yòo tnàhí ndàcu cada, te ní cuñúhu vñí-yu sá dúcá<sup>n</sup> ñí quide-dé, te duca<sup>n</sup> ñí quide-dé Ègiptú ndihí Lámár Tícuèhé. Te ní ngódó núú-dě núú-yu ní queé-yu Ègiptú cuáhá<sup>n</sup>-yu ñí ichi xití yucu núú vã yòo tnàhí ndècu, te ní xíhi-yu údico cuía xití yucu-á<sup>n</sup>, te xíá<sup>n</sup> ñí xóo cada-dé sá vã yòo tnàhí ndàcu cada. <sup>37</sup> Te ñu-ni té Moisés ní xáha<sup>n</sup>-dě xii cue ñaní tnáhá-dě dàvá-á<sup>n</sup>: “Yá Ndiöxí cada-gá te coo ñí ñaní tnáhá-ndó ndéé cuéé-gá, te téé-á<sup>n</sup> cãhá<sup>n</sup>-dé tnúhu-gá núú-ndó dàtná cuini-ndó ñí cachí-gá quidé yùhú, te ïo xini ñuhu-xi cundedóho-ndo tnúhu cáhá<sup>n</sup>-dé”, duha ní xáha<sup>n</sup> tẽ Moisés xii-yu dàvá-á<sup>n</sup>. <sup>38</sup> Te ñu-ni té Moisés ní xindecu ndihí-dé ñáyiú isràél xití yucu, te ní sáá-dé yucu Sinái, te xíá<sup>n</sup> ñí quixi ñí espíritú xínú cuèchi núú Yá Ndiöxí ní cáhá<sup>n</sup> ndihí ñaha-xi xii-dé, te yàcá<sup>n</sup> ní dácuáhá ñaha-xi tnúhu-gá, te ñu-ni

tnúhu-á<sup>n</sup> ñí ndóo dàcuaha-o.

<sup>39</sup> Te cue ñaní tnáhá-ó ñí xindecu ndéé sanaha ñã ní sàndáá iní-yu té Moisés, te ñá ní ndéé iní ñáhá-yu xii-dé, chi ní cuini-yu nuhú tucú-yu ñuú Ègiptú cundecú-yu. <sup>40</sup> Te òré ndécú tẽ Moisés yucu ní xáhá<sup>n</sup>-yu xii ñaní-dé té Àrón: “Cadúha-n ñí úú ndiöxí díhú<sup>n</sup> cuáá<sup>n</sup> codonùu núú-ó cùhu<sup>n</sup>-o ichi, chi ñá túú cùtnuní iní-ó ndéé ichi cuáhá<sup>n</sup> té Moisés, téé yòo nuu núú-ó ndùu ní quee-o Ègiptú”, duha ní xii-yu té Àrón. <sup>41</sup> Te dàvá-á<sup>n</sup> ñí cadúha-güedé ñí chẽhlu mee-ni díhú<sup>n</sup> cuáá<sup>n</sup>, te ní sahani-güedé ñí úú quiti nchìto ní quide càhnu-güedé chẽhlu-á<sup>n</sup>. Te ïo ní cudí iní-yu quiti-á<sup>n</sup>, chi ní cachí-yu sá díú-ní ndiöxí cúu-dí. <sup>42</sup> Te sá dúcá<sup>n</sup> ñí quide-yu, xíá<sup>n</sup> ñí dáñá ñaha Yá Ndiöxí xii-yu. Te ní dáñá-gã ní xóo cada càhnu-yu nchícanhii, ndihí yóo, ndihí nchaa chódíní. Te duha ní chídó tnùn-í ñí téé ní xóo cáhá<sup>n</sup> tnúhu Yá Ndiöxí ndéé sanaha nàcuáa ní xáha<sup>n</sup>-gã xii ñáyiú dàvá-á<sup>n</sup>:

Nchòhó ñáyiú isràél, ní cuu údico cuía yíhí-ndó yùcu,

te ní sahani-ndo quiti-ndo ní quide càhnu ñaha-ndo xii-í cáhá<sup>n</sup>-ndó, dico ñáhá chi ní sahani-ndo-güedé ní quide càhnu-ndo sá ñí cadúha mee-ndo.

<sup>43</sup> Te ní cadúha-ndo ñí veñúhu líhli, te ní sanutnii-ndo Mòlóc sá càchí-ndó cùu ndiöxí-ndó xica nchido-ndo xití yucu,

te ní cadúha-ndo ñí chódíní, te quiti-á<sup>n</sup> càchí-ndó sã cúu-dí ndiöxí Rénfán,

te ndi ndúú sá ñí cadúha-ndo-á<sup>n</sup> ñí quide càhnu-ndo.

Te cuendá sá dúcá<sup>n</sup> ñí quide-ndo te yùhú queñuhu ñaha-í xii-ndo quíhí<sup>n</sup>-ndó cundecu-ndo ingá xio nació<sup>n</sup> Babiloniá.

Duha ní xáha<sup>n</sup> Yá Ndiöxí xii-yu, te duca<sup>n</sup> ñí chídó tnùn-í téé ní xóo cáhá<sup>n</sup> tnúhu-gá.

<sup>44</sup> Te xití yucu-á<sup>n</sup> ñí dácuáhá-güedé ñí veñúhu vehe dóo. Te vehe-á<sup>n</sup> ñí cuu-xi ñí sá cùtnuní iní-yu sá Yá

Ndiöxí ndécú ndìhi ñaha-gá xii-yu. Te vehe-á<sup>n</sup> ñí dácáá-güedé nàcuáa ní xáha<sup>n</sup> Yá Ndiöxí xii té Moisés, chi ní dánèhé ñáhá-gá xii-dé nàcuáa dacàa-güedé. <sup>45</sup> Te sáta ñí xíhí nchaa cue téé-á<sup>n</sup>, te ní ndóo ndìhi nchaa déhe-güedé veñúhu-á<sup>n</sup>. Te ní xido tucu-güedé veñúhu-güedé cuáhá<sup>n</sup>-güedé, te cuáhá<sup>n</sup> ndìhi-güedé té Jòsué núú cündécú-yu. Te sáta ñí quexió-yu, te ní dácúnñ-yu ñáyíu dii ñúú-xi-á<sup>n</sup> chi mee Yá Ndiöxí ní chindee ñaha-gá xii-yu. Te sáta ñí ndìhi nchaa ñáyíu ní xica nchido veñúhu dóó-á<sup>n</sup> ñí xíhí, te ní ndóo ndìhi dava-gá-yu. Te duca<sup>n</sup>-ni ndècu-xi ní cacu té Dàvíí, téé ní xíndaha ñaha xii-yu. <sup>46</sup> Te Yá Ndiöxí ní cudíí víhí iní-gá té Dàvíí. Te ní xicá<sup>n</sup> tnúhú-dé núú-gá ñúu cuu dacàa-dé veñúhu cuu cuendá-gá, chi ñ<sup>n</sup>-ni Yá Ndiöxí ní xóo cada càhnu té Dàvíí ndìhi té Jàcób, ñaní tnáhá-ó ñí xíndecu ndéé sanaha víhi-gá. <sup>47</sup> Te Yá Ndiöxí ñá ní dàña-gá dacàa té Dàvíí veñúhu-gá dico déhe-dé té Salómón, chi ní dáña-gá ní dácáá-dé veñúhu cuu cuendá-gá <sup>48</sup> cuèí ñá túú sácúndecu-gá veñúhu dàcaa cue téé ñuyíú-a, chi ndèni xía<sup>n</sup> ndécú-gá chi espíritú cúú-gá. Te duha ní chídó tnùní téé ní xóo cáhá<sup>n</sup> tnúhu Yá Ndiöxí ndéé sanaha nàcuáa ní cáhá<sup>n</sup>-gá:

<sup>49</sup> Yúhú táxí tnùn-í andíu ndìhi ñuyíú, te xía<sup>n</sup> ñúu nchòhó vá ndácú-ndó chìhi ñaha-ndo xítí veñúhu dàtná quidè-yu sá càchí-yu cùu ndiöxí-yu ní cadúha-yu.

Te ñá túú xini ñuhu-í núú ndétátú-í,

<sup>50</sup> chi yúhú ní cadúha-í nchaa sá ió ñuyíú-a.

Duha ní cáhá<sup>n</sup> Yá Ndiöxí, te ñíu-ni duca<sup>n</sup> ñí chídó tnùní téé ní xóo cáhá<sup>n</sup> tnúhu-gá —duha ndúu nchaa tnúhu ní xáha<sup>n</sup> té Tèvá xii-güedé.

<sup>51</sup> Te ní xáha<sup>n</sup> tucu-dé:

—Nchòhó, ío sàá iní-ndó chi quide-ndo datná quidé ñáyíu ñá túú cùu ñáyíu isràél chi ñá túú tédóho-ndo tnúhu càhá<sup>n</sup> Yá Ndiöxí, chi ñá cuení-ndó quíndáá iní-ndó tnúhu-gá, mee-ni cùu úhú iní-ndó Espíritú-gá dàtná ní xóo cada cue

ñaní tnáhá-ndó ñí xíndecu ndéé sanaha. <sup>52</sup> Chi cue téé-á<sup>n</sup> ío ní xóo dandóho-güedé nchaa cue téé ní xóo cáhá<sup>n</sup> tnúhu Yá Ndiöxí ndéé sanaha, Te ní sahani-güedé nchaa cue téé ní cáhá<sup>n</sup> sá quíxí Crístú ñuyíú-a, te Yaá-á<sup>n</sup> ñà túú cuèchi-gá. Te ñíu-ni duca<sup>n</sup> ñí quide-ndo Crístú cùtnáhá ní quixi-gá ñuyíú-a, chi ní sáha cuendá-ndó-gá núú cuè téé ní cuu úhú iní ñáhá xii-gá ní sahani ñaha-güedé. <sup>53</sup> Te ndècu ndìhi-ndo tnúhu ní chídó tnùní ndí Moisés nàcuáa ní xáha<sup>n</sup> espíritú xínú cuèchi núú Yá Ndiöxí xii ndí, te ní dúcá<sup>n</sup> ñá túú sàndáá iní-ndó tnúhu-á<sup>n</sup> núu ní sahani-ndo Jesús. Te ñíu-ni tnúhu-á<sup>n</sup> ndécú ndìhi-ndo ndéé vitna —càchí té Tèvá xáha<sup>n</sup>-dè xii-güedé.

#### *Ní sahani-güedé té Tèvá*

<sup>54</sup> Te sá dúcá<sup>n</sup> ñí xáha<sup>n</sup> té Tèvá xii-güedé, te ní cudéé<sup>n</sup> víhí-güedé núú-dé, núu ní quide rúhñú-güedé núhu-güedé sá sàtú iní-güedé. <sup>55</sup> Te té Tèvá ndécú ndìhi-dé Espíritú Yá Ndiöxí, te ní ndacoto váha-dé andíu, te ní xini-dé súúni dàtása<sup>n</sup>-xi núú ndécú Yá Ndiöxí, te ní xini-dé Xítóhó Jesucristú nùtní-gá xio cùha Yá Ndiöxí. <sup>56</sup> Te ní xáha<sup>n</sup> té Tèvá xii-güedé:

—Chí cündèhe andíu chi yúhú ndèhè-í Xítóhó Jesucristú nùtní-gá xio cùha Yá Ndiöxí, te ñíu-gá cúú-gá ñaní tnáhá-ndó nchaa-ndo —cachí-dé xáha<sup>n</sup>-dè.

<sup>57</sup> Te ní sadí-güedé dóho-güedé cuendá sá ñá ní tnáhá iní-güedé cundedóho-güedé tnúhu càhá<sup>n</sup>-dé, te uu<sup>n</sup>-ni ní cuáá-güedé, te ní taxi ndaha ñaha-güedé xii-dé <sup>58</sup> ndécá ñaha-güedé cuáhá<sup>n</sup> ndéé ñ<sup>n</sup> xio yuhu ñúú, te yacá<sup>n</sup> ní sáñaha-güedé yúú xii-dé. Te ndècu ñ<sup>n</sup> téé cuechi nàni-dé Sàulú, te téé-á<sup>n</sup> ñí quide cuendá-dé dóó-güedé cuendá ní nune ndaha-güedé ní sáñaha-güedé yúú xii té Tèvá. <sup>59</sup> Te òré sáñaha-güedé yúú, te ní cáhá<sup>n</sup> ndìhi-dé Xítóhó Jesucristú te xáha<sup>n</sup>-dè:

—Yòhó Xítóhó Jesucristú, naquehe<sup>n</sup>-n iní-í —càchí-dé xáha<sup>n</sup>-dè xii-gá.

<sup>60</sup> Te ní ngüíñí xítí-dé, te níhi ní cáhá<sup>n</sup>-dé, te xáha<sup>n</sup>-dè:



—Yòhó Xítohó Jesucrístú, vá técuěchi-n cuè téa-sá sá dúhá quide ñaha-güedé xii-í —càchí-dé xáha<sup>n</sup>-dë xii-gá.

Te xíã<sup>n</sup>-nã ní cáhá<sup>n</sup>-dé, te ní xíhí-dé.

## 8

*Té Sàulú chíhí-dë ñáyiú sàndáá iní-xi tnúhu Jèsús vecaá*

<sup>1</sup> Te té Sàulú ní nduu vétú iní-dé sá nǐ sahní-güedé té Tëvá.

Te ñiú-ni nduu-ã<sup>n</sup> nǐ cuu níhi cuendá nchaa ñáyiú sàndáá iní-xi tnúhu Jèsús ñuú Jerusálén. Te ní ndihí-yu ní xité nuu cuáhá<sup>n</sup>-yu distritú Júdeá ndihí distritú Sàmariá. Te cue téa ní táuchíú<sup>n</sup> Jèsús dácuaá ñaha xii-yu tnúhu-gá ní ndóo-güedé ñuú Jerusálén. <sup>2</sup> Te nchaa cue téa càhá<sup>n</sup> ndihí Yá Ndiöxí ní chindúxi-güedé ndíi Tëvá. Te ío ní ndáhyú ñáyiú ní sàndáá iní tnúhu Jèsús sá nǐ xíhí ndíi. <sup>3</sup> Te té Sàulú ío dàndoho-dé-yu, chí ndi vehe ndi vehe cuáhá<sup>n</sup>-dé cuátni-dé cuèi téa cuèi ñadìhí ndécá-dë cuáhá<sup>n</sup> vecaá.

*Càhá<sup>n</sup>-yu tnúhu Yá Ndiöxí distritú Sàmariá*

<sup>4</sup> Te nchaa ñáyiú ní xité nuu cuáhá<sup>n</sup>-yu càhá<sup>n</sup>-yu tnúhu Jèsús nchaa núú quexió-yu. <sup>5</sup> Te té Lìpé cuáhá<sup>n</sup>-dé distritú Sàmariá càhá<sup>n</sup>-dé tnúhu Xítohó Jesucrístú Yaá ní tendaha Yá Ndiöxí ní quixi ñuyíú-a. <sup>6</sup> Te ío vǎi núú sǎ vǎ yóo tnàhí ndàcu cada ní quide-dé, te ní cuñúhu vǐhí-yu, te ní xíndedóho váha-yu nchaa tnúhu ní cáhá<sup>n</sup>-dé. <sup>7</sup> Te vǎi ñáyiú yǐhi ñaha espíritú cundìhi yucu ñávǎha ní queñuhu-dé nchaa espíritú-á<sup>n</sup> yiqui cùñú-yu, te ní cana saa-xi òré ní ndee-xi yiqui cùñú-yu cuáhá<sup>n</sup>-xi, te ní ndúha-yu. Te vǎi ñáyiú cùhú ñá cúú-gǎ candá nihnú-yu ndihí ñáyiú yacua ní quide tátna-dé, te ní ndúha-yu. <sup>8</sup> Te sá dúcá<sup>n</sup> nǐ cáhá<sup>n</sup>-dé tnúhu Jèsús te ní quide tátna-dé-yu, xíã<sup>n</sup> ío ní cudíi iní ñáyiú ñuú-á<sup>n</sup>.

<sup>9</sup> Te ñiú-ni ñuú-á<sup>n</sup> ndécú ñ<sup>n</sup> téa nàni Xímú, te téa-á<sup>n</sup> xini-dé cada ndúu-dé, te ní cuu naha dùca<sup>n</sup> quide-dé, te ní

xóo cuñúhu ñáyiú distritú Sàmariá sá dúcá<sup>n</sup> quide-dé, te ní cachí-dé sá díú-ní-dë cúnúu. <sup>10</sup> Te nchaa ñáyiú cuèi ñáyiú cuica te cuèi ñáyiú ndàhú ío nèhé-yu sá yǐñúhu núú-dë, te xǐtnàhá-yu:

—Téa-ã<sup>n</sup> ío chindee ñaha Yá Ndiöxí xii-dé núu vǎi núú sǎ quidé-dë —càchí-yu xǐtnàhá-yu.

<sup>11</sup> Te ní sàndáá iní-yu nàcuáa ní xóo cada ndúu-dé, te ní xóo cuñúhu vǐhí-yu, te ní cuu naha dùca<sup>n</sup>-ni dandahú ñáhá-dë xii-yu. <sup>12</sup> Te té Lìpé ní cáhá<sup>n</sup>-dé tnúhu Xítohó Jesucrístú, te ní xáha<sup>n</sup>-dë xii-yu sá Yá Ndiöxí cuini-gá ndíhu ndaha ñaha-gá xii-yu. Te cuèi téa cuèi ñadìhí ní sàndáá iní-yu tnúhu-gá, te ní sanduté-yu. <sup>13</sup> Te tnàhá té Xímú ní sàndáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chí tǐtní núú sǎ vǎ yóo tnàhí ndàcu cada ní quide té Lìpé, te ní cuñúhu vǐhi nchaa ñáyiú.

<sup>14</sup> Te dava-gá cue téa ní táuchíú<sup>n</sup> Jèsús dácuaá ñaha xii ñáyiú tnúhu-gá ní níhi-güedé tnúhu sá ñáyiú distritú Sàmariá ní sàndáá iní-yu tnúhu Yá Ndiöxí. Te ní tendaha-güedé té Pèlú ndihí té Juáa cuáhá<sup>n</sup>-güedé distritú Sàmariá. <sup>15</sup> Te ní quexió-güedé, te ní cáhá<sup>n</sup> ndihí-güedé Yá Ndiöxí ní xicá<sup>n</sup>-güedé Espíritú-gá quixi cundecu ndihí-yu. <sup>16</sup> Chí ní ñ<sup>n</sup>-yu vátá sàá-gá Espíritú-gá cundecu ndihí-yu, chí òré ní sanduté-yu, te mee-ni Jèsús ní cacunehe-güedé. <sup>17</sup> Te òré ní sacá<sup>n</sup> ndodo-güedé ndaha-güedé díquǐ-yu, te ní quexió Espíritú-gá ní ngúndecu ndihí-yu.

<sup>18</sup> Te ní xini té Xímú nàcuáa ní quide-güedé ní quexió Espíritú-gá ní ngúndecu ndihí-yu, te cuini-dé cuáñaha-dë díhú<sup>n</sup> xii té Pèlú ndihí té Juáa ní cùu. <sup>19</sup> Te ní xáha<sup>n</sup>-dë:

—Chindee ñaha-ndo cuendá ndéda-ni càa-yu cacá<sup>n</sup> ndodo-í ndaha-í díquǐ-yu, te níhi-yu Espíritú Yá Ndiöxí cundecu ndihí-yu —càchí-dé xáha<sup>n</sup>-dë xii-güedé.

<sup>20</sup> Te té Pèlú ní xáha<sup>n</sup>-dë xii-dé:

—Yòhó cuíta nihnu-n ndihí díhú-n, chi cuíní-n cuàa-n sá vǎha quide Yá Ndiǒxí. <sup>21</sup> Yòhó vá cúú càda-n chiu<sup>n</sup> quide-ndí, chi ñá túú ndècu váha iní-n nǔú Yǎ Ndiǒxí. <sup>22</sup> Te vá dúcá<sup>n</sup> cǎhá<sup>n</sup>-n, chi ío nèhé cǎhá<sup>n</sup>-n sǎ dúcá<sup>n</sup> cǎhá<sup>n</sup>-n. Te cǎhá<sup>n</sup> ndàhú-n nǔú Yǎ Ndiǒxí sá ná cáda càhnu iní-gá tnúhu ní cǎhá<sup>n</sup>-n. <sup>23</sup> Te yúhú sa xíní-í sá ío úhú iní-n, chi mee-ni sǎ cuèhé sá dúhá chido nuu-n quide-n —cachí té Pèlú xǎha<sup>n</sup>-dǎ xii té Xímú.

<sup>24</sup> Te ní xǎha<sup>n</sup> tǎ Xímú xii-güedé:

—Cǎhá<sup>n</sup> ndàhú-ndó nǔú Yǎ Ndiǒxí sá ñá túú ná tnahá-í sá dúcá<sup>n</sup> ní cǎhá<sup>n</sup>-í —cachí-dé xǎha<sup>n</sup>-dǎ.

<sup>25</sup> Te té Pèlú ndihí té Juàá ní cǎhá<sup>n</sup>-güedé tnúhu Yá Ndiǒxí núú ñǎyiu ñuú-á<sup>n</sup>. Te ní xǎha<sup>n</sup>-güedé nchaa nàcuáa ní quide Jèsús ní xini-güedé òré ní xica cuu-gá ñuyíú-a. Te ní tni-güedé ichi cuánuhú-güedé ñuú Jerusàlén, te ní yáha-güedé titní ñuú yíndèhu distritú Sàmariá, te ní cǎhá<sup>n</sup>-güedé tnúhu-gá.

*Té Lìpé ndihí ì<sup>n</sup> tée ñuú Etiòpiá*

<sup>26</sup> Te ì<sup>n</sup> espíritú xínú cuèchi núú Yǎ Ndiǒxí ní quexìo-xi ñuú Jerusàlén ní xǎha<sup>n</sup>-xi xii té Lìpé:

—Cada túha-n chi quée nuu-n ñuú Gǎzá, dico mee-ni xití yucu cuáhá<sup>n</sup> ichi —cachí-xi xǎha<sup>n</sup>-xi xii-dé.

<sup>27</sup> Te ní xica-dé cuáhá<sup>n</sup>-dé, te ní natnahá-dé ì<sup>n</sup> tée nació<sup>n</sup> Etiòpiá ñúhú-dǎ ichi. Te cùu-dé tesorérú xínú cuèchi-dé núú ì<sup>n</sup> ñadìhí ñaha yíndaha nació<sup>n</sup> Etiòpiá, te ñaha-á<sup>n</sup> nání-á<sup>n</sup> Cándacé. <sup>28</sup> Te tée etiòpiá-á<sup>n</sup> ní sáhá<sup>n</sup>-dé ñuú Jerusàlén ní cǎhá<sup>n</sup> ndihí-dé Yǎ Ndiǒxí, te ñúhu-dé ichi cuánuhú-dé ñuú-dé ñúhú-dǎ carrètá, te dàcuaha-dé tnúhu ní chídó tnùní ndí Chàíá tée ní xóo cǎhá<sup>n</sup> tnúhu Yá Ndiǒxí ndéé sanaha. <sup>29</sup> Te ní xǎha<sup>n</sup> Espíritú Yǎ Ndiǒxí xii té Lìpé:

—Quíhí<sup>n</sup> tuha-n càrretá-á<sup>n</sup> —cachí Espíritú-gá xǎha<sup>n</sup>-xi xii-dé.

<sup>30</sup> Te té Lìpé ní sátuha-dé carrètá-á<sup>n</sup>, te ní tecú dóho-dé nàcuáa cǎhá<sup>n</sup> tée etiòpiá-á<sup>n</sup>, tée ñúhu carrètá-á<sup>n</sup> dácuàha-dé nàcuáa ní chídó tnùní ndí Chàíá. Te ní xǎha<sup>n</sup> tǎ Lìpé xii tée etiòpiá-á<sup>n</sup>:

—¿Tècú tnùní-n nchàa tnúhu dàcuaha-n-á<sup>n</sup>? —cachí té Lìpé xǎha<sup>n</sup>-dǎ xii-dé.

<sup>31</sup> Te ní xǎha<sup>n</sup> tǎ etiòpiá:

—¿Nása tecú tnùní-í te vá yòo dànehé ñáhá xii-í? Ta quène iha coo-n chi danèhé ñáhá-n —cachí-dé xǎha<sup>n</sup>-dǎ xii té Lìpé.

Te cuásaá té Lìpé núú carrètá ní ngóo-dé. <sup>32</sup> Te ndèdóho-dé nàcuáa dàcuaha tée etiòpiá-á<sup>n</sup> nàcuáa ní chídó tnùní ndí Chàíá núú tùtú Yǎ Ndiǒxí núú càchí-xi:

Dàtná quidé ì<sup>n</sup> mbéé cada-dé òré candeca ñaha-güedé xii-dé quíhí<sup>n</sup> cahni ñaha-güedé chi ñá túú ná cada-dé,

dàtná cuíní-ndó quide mbéé òré dèté-di ñá túú ndàhí-di duca<sup>n</sup> càda-dé òré cahni ñaha-güedé chi ni vǎ cǎhá<sup>n</sup>-dǎ.

<sup>33</sup> Te mee-ni cùdiquí ndéé ñáhá-güedé xii-dé, te ní vǎ ndúcú tnúhu-güedé núú-dé ñuú ndáá ndècuéchi-dé.

Te ío cuu nduu cuihna iní cue ñaní tnahá-dǎ, chi cahni ñaha-güedé xii-dé ñuyíú-a.

Duha cǎhá<sup>n</sup> tutú ní dácuáhá tǎ etiòpiá ní xíndedóho té Lìpé.

<sup>34</sup> Te ní xǎha<sup>n</sup> tùcu tée Etiòpiá xii té Lìpé:

—Cundee iní-n càchí tnúhu-n yòo cacunehe tée ní cǎhá<sup>n</sup> tnúhu Yá Ndiǒxí ndéé sanaha, núú cǎhá<sup>n</sup>-dé cuèndá méé-dé àdi cǎhá<sup>n</sup>-dé cuèndá ingá ñáyiu —cachí tée etiòpiá-á<sup>n</sup> xǎha<sup>n</sup>-dǎ xii té Lìpé.

<sup>35</sup> Te té Lìpé ní cani-dé cuèndú núú tǎ etiòpiá nàcuáa ní cǎhá<sup>n</sup> ndí Chàíá nàcuáa cada Jèsús òré quixi-gá ñuyíú-a. Te ní xǎha<sup>n</sup>-dǎ nàcuáa ndùu tnúhu Jèsús ndihí nàcuáa ní quide-gá.

<sup>36</sup> Te ñúhu-güedé ichi cuáhá<sup>n</sup>-güedé ní naníhí-güedé ì<sup>n</sup> xichi núú ñúhú ndúte, te ní xǎha<sup>n</sup> tǎ etiòpiá:

—Iha ñúhu ndute, ¿te vá cúú cuàndute-í iha-á<sup>n</sup>? —cachí-dé xǎha<sup>n</sup>-dǎ xii té Lìpé.

<sup>37</sup> Te xǎha<sup>n</sup> tǎ Lìpé:

—Te núu sàndáá ndisa iní-n Jèsús, te cuu cuandute-n —cachí-dé xǎha<sup>n</sup>-dǎ.

Te ní xǎha<sup>n</sup> tǎ etiòpiá:

—Sàndáá ndisa iní-í sá Dèhe Yá Ndiöxí cúú Xítóhó Jesucristú — cächí-dé xáha<sup>n</sup>-dë.

<sup>38</sup> Te ní ngani-dé carrètá, te ní nuu-güedé ndi ndüü-güedé, te cuánguee-güedé xití ndute, te ní dácüándüte ñaha té Lìpé xii-dé. <sup>39</sup> Te òré ní nene-güedé xití ndute, te ndèca ñaha Espíritú Yá Ndiöxí xii té Lìpé cuáhá<sup>n</sup>. Te ñá túú ní xìní tée ní san-dute-á<sup>n</sup> ndéé ichi cuáhá<sup>n</sup> té Lìpé. Te ío ní cudíí iní-dé sá ñí natuha-dé ichi Yá Ndiöxí, te cuándaa-dé núú carrètá-dé cuánuhú-dé. <sup>40</sup> Te ní quexìo té Lìpé ñuú Àzotó, te ndi tnahá ñuú ndi tnahá ñuú cuáhá<sup>n</sup>-dé càhá<sup>n</sup>-dé tnúhu Yá Ndiöxí, te ní yáha-dé cuáhá<sup>n</sup>-dé ní quexìo-dé ndéé ñuú Cèsareá.

## 9

*Té Sàulú ní tuha-dé ichi Xítóhó Jesucristú*

*(Hch. 22:6-16; 26:12-18)*

<sup>1</sup> Te té Sàulú mee-ni càhá<sup>n</sup> cuèhé-dé cuèndá ñáyiú ní sàndáá iní tnúhu Jèsús, te cuíní-dé cahni ñaha-dë xii-yu. Te ní sáhá<sup>n</sup>-dé núú dütú cúnüu-gá, <sup>2</sup> te ní xáha<sup>n</sup>-dë sá cádüha dütü-ã<sup>n</sup> ñí tutú canehe-dé quíhí<sup>n</sup> cuáha-dé cue tée xindeé nchito veñúhu ñuú Dàmascú, chi cuíní-dé tñí-dé nchaa ñáyiú dàcuaha tnúhu Xítóhó Jesucristú candeca ñaha-dë quíhí<sup>n</sup> ñuú Jerusàlén. <sup>3</sup> Te ní xica-dé cuáhá<sup>n</sup>-dé tá cùyatni-dé ñuú Dàmascú, te uu<sup>n</sup>ni ní quee ñuhú andü, te ní dáyèhé-xi ndéé núú nútñí-dé. <sup>4</sup> Te ní nduá-dé ndéé ñuhu, te ní tecú dóho-dé càhá<sup>n</sup> ñí sá càhá<sup>n</sup> núú ñínu, te xáha<sup>n</sup>-xi xii-dé:

—Yòhó Sàulú, ¿ná cuèndá cúú úhú iní ñáhá-n xii-í te dàndoho ñaha-n? — cächí sá càhá<sup>n</sup>-á<sup>n</sup> xáha<sup>n</sup>-xi xii-dé.

<sup>5</sup> Te ní xáha<sup>n</sup>-dë:

—¿Ná cúú yòhó sá càhá<sup>n</sup>-á<sup>n</sup>-i? — cächí-dé xáha<sup>n</sup>-dë.

Te ní xáha<sup>n</sup> sá càhá<sup>n</sup> xii-dé:

—Yúhú cúú-í Jèsús tée cùu úhú iní-n. Te ío dàndoho-n mee-n, chi dàtná quidé ndicutu quide-n, chi quiti-á<sup>n</sup> núu na cüxi-güedé-di püyá te sáha-di patadá núú-xi, te quide úhú-di mee-di. Te duca<sup>n</sup> sätnahá-xi cùu yohó

chi ñá túú sàndáá iní ñáhá-n xii-í — cächí sá càhá<sup>n</sup>-á<sup>n</sup> xáha<sup>n</sup>-xi xii-dé.

<sup>6</sup> Te té Sàulú ní quidi ñaha-xi xii-dé sá ñí yùhú-dé, te ní xáha<sup>n</sup>-dë:

—Xítóhó Jesucristú, ¿te ná cuíní-n càda-í-i? — cächí-dé xáha<sup>n</sup>-dë.

Te Jèsús ní xáha<sup>n</sup>-gã xii-dé:

—Ndacóo, te quíhí<sup>n</sup>-n ñuú-ã<sup>n</sup>, te yacá<sup>n</sup> tecú tnúhu-n ñá cúú sá càdá-n — cächí-gá xáha<sup>n</sup>-gã xii-dé.

<sup>7</sup> Te cue tée cuáhá<sup>n</sup> ndihi té Sàulú ní tecú dóho-güedé càhá<sup>n</sup> ñí sá càhá<sup>n</sup>, dico vá yòo tñahí ní xini-güedé, te ní yùhú víhí-güedé, te ñá túú tñahí ní càhá<sup>n</sup>-güedé. <sup>8</sup> Te ní ndacóo té Sàulú, te ñá ní cùu-gá cundehe-dë, chi ní cuaa-dé, te ní tñí-güedé ndaha-dé ndécá ñaha-güedé cuáhá<sup>n</sup> ñuú Dàmascú. <sup>9</sup> Te yacá<sup>n</sup> ní xindecu-dé úní nduu, te ñá ní cùu tñahí cundehe-dë, te ñá túú ñá ní xèxi-dé, te ñá túú ní xihí-dé ndute.

<sup>10</sup> Te ndècu tée sàndáá iní tnúhu Jèsús ñuú Dàmascú, nání-dë Ananiás, te ní sáhá<sup>n</sup> Jèsús núú sání-dé, te ní xáha<sup>n</sup>-gã xii-dé:

—¡Ananiás! — cächí-gá xáha<sup>n</sup>-gã.

Te ní xáha<sup>n</sup>-dë:

—¿Yúhú càhá<sup>n</sup> ndihi-n-ã<sup>n</sup>? — cächí-dé xáha<sup>n</sup>-dë.

<sup>11</sup> Te ní xáha<sup>n</sup>-gã:

—Ndacuíñí, te quíhí<sup>n</sup>-n ñí chiu<sup>n</sup> ichi núú dánani-güedé Ichi Ndáá, te yacá<sup>n</sup> nanducu-n vehe té Jüdás, chi vehe tée-á<sup>n</sup> ndécú ñí tée ñuú Tarsú nání-dë Sàulú, te tée-á<sup>n</sup> sa càhá<sup>n</sup> ndihi ñaha-dë xii-í. <sup>12</sup> Te tée-á<sup>n</sup> ñí dácótó ñaha-xi sá ñí xini ñáhá-dë xii-n ñí quexìo-n núú ndécú-dé, te ní sacá<sup>n</sup> ndodo-n ndàha-n díquí-dë, te duca<sup>n</sup> te ní nacaá<sup>n</sup> núú-dë ní dácótó ñaha-xi xii-dé — cächí-gá xáha<sup>n</sup>-gã.

<sup>13</sup> Te té Ananiás ní xáha<sup>n</sup>-dë:

—Yòhó Xítóhó Jesucristú, cächí tnúhu-í xii-n sá ñí níhí-í tnúhu nàcuáa quide-dé sá ío quide úhú-dé ñáyiú càhá<sup>n</sup> ndihi-n ñuú Jerusàlén. <sup>14</sup> Chi nèhe-dé tutú ní sáñaha cuè dütú cúnüu cuèndá níhí-dë nàcuáa cada-dé tñí-dé nchaa ñáyiú sàndáá iní ñáhá xii-n — cächí-dé xáha<sup>n</sup>-dë xii-gã.

<sup>15</sup> Te Jèsús ní xáha<sup>n</sup>-gã xii-dé:

—Quíhí<sup>n</sup>-n ndàtnúhu-n ndìhi-dé, chi cuíní-í cada-dé chù<sup>n</sup>-í, quíhí<sup>n</sup>-dé cáhá<sup>n</sup>-dé tnúhu-í núú cuè ñáyiú isràél, ndìhi núú cuè ñáyiú ñá túú cùu ñáyiú isràél, ndìhi núú cuè té yìndaha ñaha xií-yu. <sup>16</sup> Te yúhú cuñaha-í xii-dé sá ndóhó vihi-dé cuèndá-í —càchí-gá xáha<sup>n</sup>-gá xii té Anàniás.

<sup>17</sup> Te cuáhá<sup>n</sup> té Anàniás vehe núú ndécú té Sàulú te ní sacá<sup>n</sup> ndodo-dé ndaha-dé díquí té Sàulú, te ní xáha<sup>n</sup>-dè:

—Yòhó té Sàulú té ndècu ndìhi-í ichi Xítohó Jesucristú, ñi-ni Xítohó Jesucristú Yaá ní cáhá<sup>n</sup> ndìhi ñaha xii-n ichi ní tendaha ñaha-gá véxi-í cuèndá cacá<sup>n</sup> táhù-í núú-gá cuèndá-n te ndúha núú-n, te dàtnùní quixi Espiritú-gá cundecu ndìhi-n —càchí-dé xáha<sup>n</sup>-dè.

<sup>18</sup> Te dàtná sá ñí xócání-ó ñí<sup>n</sup> sá ndèdí núú-dè ní quide ñaha-xi xii-dé, te ní nacaá<sup>n</sup> núú-dè, te ní sandute-dé. <sup>19</sup> Te ní xexi-dé, te ní naníhí ndéé-dè, te titní nduu ní xíndecu ndìhi-dé ñáyiú ní sándáá iní tnúhu-gá ñuú Dàmascú.

*Té Sàulú dácua<sup>n</sup>-de ñáyiú tnúhu Yá Ndióxi ñuú Dàmascú*

<sup>20</sup> Te sátá ñí ndúha núú-dè, te ní sáhá<sup>n</sup>-dé veñúhu cue ñáyiú isràél ní xáha<sup>n</sup>-dè sá Jèsús cúú-gá Déhe Yá Ndióxi. <sup>21</sup> Te nchaa ñáyiú ní xíndedóho tnúhu ní cáhá<sup>n</sup>-dé, te ní cuñúhu vihi-yu, te ní xítnàhá-yu:

—Ñiú téé-á<sup>n</sup> ní sahani-dé ñáyiú ní xóo chiñuhu ñaha xii Jèsús ñuú Jerusàlén. Te ní quixi-dé iha ní cuíní-dé tñi ñaha-dè xii-yu candeca ñaha-dè quíhí<sup>n</sup> núú cuè dútú cúnùu ni cuu —cachí-yu xítnàhá-yu.

<sup>22</sup> Te ío iní-gá té Sàulú xáha<sup>n</sup>-dè xií-yu sá díú Jèsús cúú-gá Cristú Yaá ní tendaha Yá Ndióxi ní quixi ñuyíú-a, te xíá<sup>n</sup> ñá ní ñíhí ñáyiú isràél ndécú ñuú Dàmascú tnúhu cáhá<sup>n</sup>-yu, te ní cuñúhu vihi-yu.

*Té Sàulú ní dáxió-dè núú ñáyiú isràél*

<sup>23</sup> Te sátá ñí cuu titní nduu, te ní ndatnúhu cue té isràél sá cáhí-güedé té Sàulú. <sup>24</sup> Te té Sàulú ní níhí-dè tnúhu nàcuáa càhá<sup>n</sup>-güedé

cada ñaha-güedé xii-dé, te cuèi nduu cuèi niú néhé cuèndá-güedé yuyèhe núú ñúdòco ndóho yuhu ñuú cuèndá cuíní-güedé tñi ñaha-güedé xii-dé te cahni ñaha-güedé. <sup>25</sup> Te ñi<sup>n</sup> niú ndécá ñaha cue té ní sándáá iní-xi tnúhu Jèsús cuáhá<sup>n</sup> ndéé núú ñúdòco ndóho yuhu ñuú. Te ní sáá-güedé núú ndóho, te ní chihi ñaha-güedé xii-dé xití tídihi te ní dándèe ñaha-güedé núú ñúhú, te ní quene-dé cuáhá<sup>n</sup>-dè.

*Te Sàulú ndécú-dè ñuú Jerusàlén*

<sup>26</sup> Te té Sàulú ní nasáá-dé ñuú Jerusàlén, te cuíní-dé chitnahá-dé ñáyiú sándáá iní tnúhu Jèsús, te ní yuhú-yu chi ní cáhá<sup>n</sup>-yu sá dándàhú ñahá-dè sá sándáá iní-dé Jèsús. <sup>27</sup> Te té Bèé ndécá-dè té Sàulú cuáhá<sup>n</sup> núú ndécú cuè té ní táuchíú<sup>n</sup> Jèsús dácua<sup>n</sup> ñaha xií-yu tnúhu-gá. Te ní cani té Bèé cuèndú núú-güedé nàcuáa ní cuu ní naníhí tnáhá té Sàulú ndìhi Jèsús ichi, te ní cáhá<sup>n</sup> ndìhi ñaha-gá xii-dé. Te ní xáha<sup>n</sup> tùcu té Bèé nàcuáa ní cáhá<sup>n</sup> té Sàulú tnúhu Jèsús núú ñáyiú Dàmascú, te ñá túú tnàhí ni yuhú-dé ní cáhá<sup>n</sup>-dé, càchí té Bèé xáha<sup>n</sup>-dè xii-güedé. <sup>28</sup> Te ní xíndecu té Sàulú ndìhi ñáyiú xídácua<sup>n</sup> tnúhu-gá ñuú Jerusàlén. Te ní ndicuu ndicuu-dé ní cáhá<sup>n</sup>-dé tnúhu Jèsús, te ñá túú tnàhí ni yuhú-dé <sup>29</sup> ní cáhá<sup>n</sup> ndìhi-dé ñáyiú isràél ñáyiú càhá<sup>n</sup> tnúhu grìégú. Te ñáyiú-á<sup>n</sup> ñí ngüíta-yu ndàtnúhu-yu sá cáhí ñahá-yu xii-dé. <sup>30</sup> Te ñáyiú sándáá iní tnúhu-gá ní níhí-yu tnúhu nàcuáa cuíní ñáyiú càhá<sup>n</sup> tnúhu grìégú cada ñahá-yu xii té Sàulú, núu ní sàndeca ñahá-yu xii-dé ñuú Cèsareá, te yàcá<sup>n</sup> ní tendaha ñahá-yu cuánuhú-dé ñuú Tàrsú.

<sup>31</sup> Te sátá xíá<sup>n</sup> te ní sanaá-yu ñá túú-gá ní xóo cada úhú-yu nchaa ñáyiú sándáá iní tnúhu Jèsús níhí distritú Júdeá, ndìhi distritú Galileá, ndìhi distritú Sàmariá. Te ní níhí ndéé-yu ní quide-yu nàcuáa ní xáha<sup>n</sup> Yá Ndióxi cadá-yu, te ío ní xíndecu yíñuhú-yu núú-gá, te Espiritú-gá ní chindee ñaha-xi xií-yu, te vai-gá ñáyiú ní sándáá iní-yu tnúhu-gá.



*Té Pèlú ní quide tátna-dé té Èneás*

<sup>32</sup> Titní xichi ní sáhá<sup>n</sup> té Pèlú ní cáhá<sup>n</sup>-dé tnúhu Yá Ndiöxí. Te ì<sup>n</sup> nduu ní sáhá<sup>n</sup>-dé ñuú Lidá ní cáhá<sup>n</sup> ndihí-dé ñáyiú sàndáá iní ñáhá xii Jesús. <sup>33</sup> Te yàcá<sup>n</sup> ní naníhí-dé ì<sup>n</sup> tée nàni Eneás, te ní cuu úná cuíá cùhú-dé, te ni lùha ñá cúú-gã candá nihnu-dé. <sup>34</sup> Te ní xáha<sup>n</sup> tẽ Pèlú xii-dé:

—Èneás, Xítohó Jesucristú cada tátna ñaha-gã xii-n tnàvíí. Ndacóo te ndocani-n yùu-n —cachí-dé xãha<sup>n</sup>-dẽ.

Te òré-ni ní ndacóo-dé. <sup>35</sup> Te nchaa ñáyiú ñuú Lidá ndihí ñáyiú ñuú Sàrón ní xiní-yu sá ñí ndúha-dé, te ní sàndáá víhí iní-yu Xítohó Jesucristú.

*Ní ndoto tá Dòrcás*

<sup>36</sup> Te ñuú Jòpé ndécú ì<sup>n</sup> ñadihí sàndáá iní-a<sup>n</sup> tnúhu Jèsús, te nàni-a<sup>n</sup> Tabitá, te tnúhu griégú xãhá<sup>n</sup>-yu Dòrcás, te ío váha ní xóo cada-a<sup>n</sup> chi ío váha iní-a<sup>n</sup>, te ní xóo chindee-a<sup>n</sup> ñáyiú ndàhú. <sup>37</sup> Te váha-ni ndècu-a<sup>n</sup> ni cuu, te ní tñi ñaha cuèhé ñí xíhí-a<sup>n</sup>, te ní nadacùchi ñahá-yu, te ní chihi ñahá-yu ì<sup>n</sup> cuàrtú ndécú ndéé núú ñnu. <sup>38</sup> Te ñáyiú ní sàndáá iní tnúhu Jèsús ñuú Jòpé ní ñihí-yu tnúhu sá ndécú tẽ Pèlú ñuú Lidá. Te yatni-ni càa ñuú-á<sup>n</sup>, te ní tendàhá-yu úú cue tée cuáhá<sup>n</sup>-güedé núú ndécú-dé cuèndá cúñaha-güedé candeca ñaha-güedé xii-dé quíhí<sup>n</sup> núú ndécú-yu. Te ní xáha<sup>n</sup>-güedé xii té Pèlú:

—Yáchí ná quíhí<sup>n</sup>-ó ñuú-ndí, chi yàcá<sup>n</sup> cáná ñahá-yu quíhí<sup>n</sup>-n tnàvíí —càchí-güedé xãha<sup>n</sup>-güedé xii té Pèlú.

<sup>39</sup> Te té Pèlú ní xica-dé cuáhá<sup>n</sup>-dé ndihí cue tée-á<sup>n</sup> ñuú Jòpé, te òré ní quexio-güedé ndihí-dé, te cuásaá ndihí ñaha-güedé cuàrtú ndéé núú ñnu. Te nchaa ñáyiú ñihí ñáyiú quèé ní tacá ndéé ñáhá xii ndíyi-á<sup>n</sup> xíndáhyú-yu, te ní dánèhé ñahá-yu nchaa dóó ñí cadúha ñaha ní xíhí-á<sup>n</sup>. Chi ní xóo cadúha-a<sup>n</sup> dícú<sup>n</sup>, te ní xóo cadúha-a<sup>n</sup> díó òré ní xíndecu-a<sup>n</sup> ñuyíú-a, te nchaa xíá<sup>n</sup> ní dánèhé ñahá-yu xii té Pèlú. <sup>40</sup> Te té Pèlú ní xáha<sup>n</sup>-dẽ sá quèé-yu ncháá-yu quehé, te ní queé-yu. Te ní ngüíñí xítí-dé te ní

cáhá<sup>n</sup> ndihí-dé Yá Ndiöxí, te dàtnùní ní ndacoto-dé núú cándòdo ndíyi-á<sup>n</sup>, te ní xáha<sup>n</sup>-dẽ:

—Tàbitá, ndacóo —càchí-dé xãha<sup>n</sup>-dẽ.

Te ní ndacoto-a<sup>n</sup> núú tẽ Pèlú te ní ndacóo-a<sup>n</sup>. <sup>41</sup> Te ní tñi-dé ndaha-a<sup>n</sup> ní nacanutñi ñaha-dẽ. Te ní cana-dé nchaa ñáyiú ñihí ñáyiú quèé ndihí nchaa ñáyiú sàndáá iní tnúhu Jèsús cuèndá quini-yu sá ñí ndoto-a<sup>n</sup>. <sup>42</sup> Te nchaa ñáyiú ñuú Jòpé ní ñihí-yu tnúhu nàcuáa ní quide té Pèlú ní ndoto ñaha ní xíhí-á<sup>n</sup>, te vai-yu ní sàndáá iní-yu Xítohó Jesucristú. <sup>43</sup> Te titní nduu ní xíndecu té Pèlú vehe té Xímú tée dàcuitá ñi.

## 10

*Té Pèlú ndihí té Còrneliú*

<sup>1</sup> Te ndècu ì<sup>n</sup> tée nàni-dé Còrneliú ñuú Cèsareá te cùu-dé capitá<sup>n</sup>, te ndècu ndihí-dé ì<sup>n</sup> cièndú sandádú. Te cue tée-á<sup>n</sup> nání-güedé Sandádú Italianú.

<sup>2</sup> Te tée cùu capitá<sup>n</sup> ío váha iní-dé, te mee-dé ndihí ñadihí-dé ndihí nchaa landú-dé ío nèhé-yu sá yíñu<sup>n</sup> núú Yá Ndiöxí, te sáha-dé ñáyiú ndàhú ñáyiú isràél díhú<sup>n</sup>, te ío cáhá<sup>n</sup> ndihí-dé Yá Ndiöxí. <sup>3</sup> Te ì<sup>n</sup> nduu dàtná òré caá úní sacuaa ní dácótó núú ñáhá-xí xii-dé sá ní sáhá<sup>n</sup> ì<sup>n</sup> espíritú xínú cuèchi núú Yá Ndiöxí núú-dé, te ní xáha<sup>n</sup>-xi:

—Còrneliú —càchí-xi xãha<sup>n</sup>-xi xii-dé.

<sup>4</sup> Te ní xiní-dé ndi ndúú xio núú-dé espíritú-á<sup>n</sup>. Te ío ní yuhú-dé. Te ní xáha<sup>n</sup>-dẽ:

—¿Ná chíú<sup>n</sup> vèxi-n? —càchí-dé xãha<sup>n</sup>-dẽ.

Te xáha<sup>n</sup>-xi:

—Ío cáhá<sup>n</sup> ndihí-n Yá Ndiöxí, te ñáyiú ndàhú sãñaha-n díhú<sup>n</sup>-n, te nchaa xíá<sup>n</sup> sa nàha-gá. <sup>5</sup> Te vitna tendaha-n cuè tée na quíhí<sup>n</sup>-güedé ñuú Jòpé quíngana-güedé ì<sup>n</sup> tée nàni Xímú, àdi Pelú chi úú diu-dé, te candeca ñaha-güedé quixi. <sup>6</sup> Te òré quexio-dé te cachí tnúhu-dé nchaa ñaha-gá sá cuini Yá Ndiöxí cada-n. Te ndècu-dé vehe ingá tucu tée nàni Xímú tée dàcuitá ñi, te vehe tée-á<sup>n</sup> caá ì<sup>n</sup> xio yuhu lamár —càchí-xi xáha<sup>n</sup>-xi xii-dé.

7 Te sáta cuáhá<sup>n</sup> espíritú-á<sup>n</sup>, te té Còrneliú ní cana-dé úú tnàhá cue téé xínú cuechi núú-dé ndìhi ì<sup>n</sup> sandàdú xínú cuechi tucu núú-dé, te tnàhá sandàdú-á<sup>n</sup> ìo càhá<sup>n</sup> ndìhi-dé Yă Ndiôxí. 8 Te té Còrneliú ní cani-dé cuèndú núú-güedě nàcuáa ní cáhá<sup>n</sup> espíritú xínú cuechi núú Yă Ndiôxí. Te ní tendaha ñàha-dé xii-güedě cuáhá<sup>n</sup>-güedě ñuú Jòpé.

9 Te nduu tněé-á<sup>n</sup> ñúhú-ní-güedě ichi cuáhá<sup>n</sup>-güedě, te cùu-xi datná òré cauxúú nduu ta cùyatni-güedě ñuú-á<sup>n</sup>, te òré-á<sup>n</sup> nǐ sáá té Pèlú díquí véhé càhá<sup>n</sup> ndìhi-dé Yă Ndiôxí. 10 Te òré-á<sup>n</sup> sa xihí-dé docó cuiní-dé caxi-dé, te nǐni càdúha-yu sá caxí-dě ní dácótó núú ñáhá-xí 11 sǎ nǐ xiní-dé ì<sup>n</sup> sá ndécú àndiu, te càa datná cáá ì<sup>n</sup> dóó cáhnú nchìcú<sup>n</sup> yoho ndi cùmí xíquí-xi véxi cuu<sup>n</sup> núú ñúhú. 12 Te núú dǒó-ǎ<sup>n</sup> yódó cǒó ndìhi quiti ndàva ndìhi nchaa núú quiti ndéé cùmí sǎhá-xi. 13 Te ní tecú dóho-dé càhá<sup>n</sup> ì<sup>n</sup> sá càhá<sup>n</sup>, te xàha<sup>n</sup> sǎ càhá<sup>n</sup>-á<sup>n</sup> xii-dé:

—Pèlú, ndacuíñí cahni-n nděda-ni càa quiti-a caxi-n-di —cachí sá càhá<sup>n</sup>-á<sup>n</sup> xàha<sup>n</sup>-xi xii-dé.

14 Te té Pèlú ní xàha<sup>n</sup>-dě:

—Vá cáhni-í-di chi càchí tnúhu sá sánú ìchi ñaha xii nchúhú ñáyiú isràél sá vǎ cúú càxi-ndí nchaa quiti-a chi cuu cuéchi, te vátá caxí-gǎ-í-di ni ì<sup>n</sup> xito —cachí-dé xàha<sup>n</sup>-dě.

15 Te ní cáhá<sup>n</sup> tucu sá nǐ cáhá<sup>n</sup>-á<sup>n</sup>, te xàha<sup>n</sup>-xi:

—Vá cúú càchí-n sǎ vǎ cúú càxi-n-di, chi mee Yă Ndiôxí ní cachí-gá sá díú nchàa quiti-a cuu caxi-o vitna —cachí sá nǐ cáhá<sup>n</sup>-á<sup>n</sup> xàha<sup>n</sup>-xi xii-dé.

16 Te duca<sup>n</sup> nǐ cáhá<sup>n</sup> sá nǐ cáhá<sup>n</sup>-á<sup>n</sup> ùní xito, te dàtnùní cuàndaa tucu dóó-ǎ<sup>n</sup> andiu. 17 Te té Pèlú ñá ní cùtnuní iní-dé ná cuèndá duca<sup>n</sup> nǐ dácótó núú ñáhá-xí xii-dé, núú xǎ<sup>n</sup> ìo cuéhé nǐ sani iní-dé. Te òré-á<sup>n</sup> nǐ quexìo cue téé ní tendaha té Còrneliú ndéé yuyèhe, chi ndi vehe ndi vehe cuáhá<sup>n</sup>-güedě ndúcú tnúhu-güedě ndéé cáá vèhe té Xímú téé dii vèhe-xi ndecu té Pèlú. 18 Te ní cáhá<sup>n</sup> níhi-güedě, te xàha<sup>n</sup>-güedě:

—Ñá túú cùdana iha ndecu ì<sup>n</sup> téé nànducu-ndí nání-dě Xímú, àdi Pelú chi úú diu-dé —càchí-güedě xàha<sup>n</sup>-güedě.

19 Te té Pèlú vǎi sani iní-dé sá nǐ dácótó núú ñáhá-xí xii-dé. Te òré-á<sup>n</sup> nǐ xàha<sup>n</sup> Espíritú Yă Ndiôxí xii-dé:

—Cundedóho-n ì<sup>n</sup> tnúhu na càhá<sup>n</sup>-í-a. Ní quexìo úní cue téé nànducu ñaha xii-n. 20 Yáchí, cuandée chi quíhí<sup>n</sup>-n ndìhi-güedě, te vǎ yùhú-n chi yùhú ní xàha<sup>n</sup>-í véxi cuaca ñaha-güedě xii-n —càchí Espíritú-gá xàha<sup>n</sup>-xi xii té Pèlú.

21 Te ní xica-dé cuánde-dé núú ndécú cuè téé xica nanducu ñaha xii-dé, te xàha<sup>n</sup>-dě xii-güedě:

—Yùhú cúú tée nànducu-ndo-á<sup>n</sup>. Náu-í-a núú ná chiú<sup>n</sup> cuiní ñáhá-ndó —càchí-dé xàha<sup>n</sup>-dě xii-güedě.

22 Te xàha<sup>n</sup>-güedě:

—Tée cùu capitá<sup>n</sup> téé nǎni Còrneliú ní tendaha ñàha-dé véxi-ndí, te téé-á<sup>n</sup> ìo váha iní-dé, chi ìo sàndáá iní-dé Yă Ndiôxí, te nchaa ñáyiú isràél ìo váha càhá<sup>n</sup>-yu cuèndá-dé. Te ì<sup>n</sup> espíritú xínú cuechi núú Yă Ndiôxí ní xàha<sup>n</sup>-xi xii-dé sá cáná ñàha-dé xii-n quíhí<sup>n</sup>-n vèhe-dé dacuàha-n-dé tnúhu Yă Ndiôxí —càchí cue téé ní tendaha té Còrneliú xàha<sup>n</sup>-güedě xii té Pèlú.

23 Te ní xàha<sup>n</sup> tǎ Pèlú sá quíhu-güedě vehe-dé, te candeca tnàha-güedě ndìhi-dé quíhí<sup>n</sup> ndéé nduu tněé. Te nduu tněé-á<sup>n</sup> nǐ xica-güedě ndécá tnàha-güedě ndìhi té Pèlú cuáhá<sup>n</sup>, te tnàhá ì<sup>n</sup> úú cue téé sàndáá iní tnúhu Jèsús ñuú Jòpé cuáhá<sup>n</sup> ndìhi ñaha-güedě xii-dé.

24 Te ndéé ingá nduu ní quexìo-güedě ñuú Cèsareá. Te té Còrneliú ndétú ñàha-dé xii-güedě vehe-dé te sa ndecu túha-dé ndìhi ñadìhí-dé ndìhi nchaa landú-dé ndìhi cue téé ìo váha tnàhá tnúhu ndìhi-dé, chi ní cana ñaha-dé ní nítnáhá-yu ndìhi-dé cundetú-yu té Pèlú. 25 Te sáta nǐ quèxio té Pèlú vehe té Còrneliú, te ní quee-dé quehé, te ní ngüíñí xítí-dě núú tǎ Pèlú chíñùhu ñaha-dé ní cùu. 26 Te té Pèlú ní xàha<sup>n</sup>-dě:

—Ndacuíñí vá ngüíñí xítí-n nùù-í chi ñá díú Ndiôxí cùu-í, dícó ì<sup>n</sup> téé

ñuyíú-a cùu-í —càchí té Pèlú xáha<sup>n</sup>-dë xii-dé.

<sup>27</sup> Te ta cǎhá<sup>n</sup> té Pèlú ndihí té Còrneliú cuánguihu-güedé xití vehe, te chitu ñáyiú xixíhi xití vehe. <sup>28</sup> Te ní xáha<sup>n</sup> tē Pèlú xií-yu:

—Sa nàha-ndo sá cǎchí tnúhu sá sánú ìchi ñaha xii nchúhú ñáyiú isràél sá vǎ cúu quìxi-ndí vehe ni ì<sup>n</sup> nchohó ñáyiú ñá túú cùu ñáyiú isràél te ni vǎ cúu tnàhá tnúhu ndihí ñaha-ndí xii-ndo. Dico Yá Ndiöxí ní cǎchí-gá sá vǎ cúu cǎhá<sup>n</sup>-í sá vǎ cúu cǎhá<sup>n</sup> ndihí-í ñáyiú ñá túú cùu ñáyiú isràél, chi cuu cuéchi. <sup>29</sup> Núu xiǎ<sup>n</sup> ndíhi-ni véxi-í òré ní quexìo tnúhu sá cáná ñàha-ndo. Te cǎchí tnúhu-ndo nǎ cuendá cáná ñàha-ndo —cǎchí té Pèlú xáha<sup>n</sup>-dë xii-yu.

<sup>30</sup> Te té Còrneliú ní xáha<sup>n</sup>-dë:

—Ní cuu cúmí nduu, te ðiu-ni dàtná òré iha cùu-xi, te yúhú ndècu-í ðiu-ni vehe-í, te ñá túú tnàhí ná xéxi-í cǎhá<sup>n</sup> ndihí-í Yǎ Ndiöxí, te òré-á<sup>n</sup> nǐ quexìo ì<sup>n</sup> espíritú xínú cuèchi núú-gǎ níhnú-xí dóo cuixí<sup>n</sup> dóo chàhnchí. <sup>31</sup> Te cǎchí-xi: “Còrneliú, ní xíndedóho Yá Ndiöxí tnúhu ní cǎhá<sup>n</sup>-n ndihí-gá, te xíní-gá sá sǎñaha-n ðíhú<sup>n</sup> xii ñáyiú ndàhú. <sup>32</sup> Te ñuú Jòpé ndécú ì<sup>n</sup> tée nàni Xímú, àdi Pelú chi úú ðiu-dé, te ndècu-dé vehe ì<sup>n</sup> tée nàni tucu Xímú tée dàcuitá ñíi, te cǎa vehe-dé ì<sup>n</sup> xio yuhu lámár, te cana-n-dé ná quìxi-dé ndatnúhu-n ndihí-dé”, duha ní cǎhá<sup>n</sup> espíritú xínú cuèchi núú Yǎ Ndiöxí. <sup>33</sup> Núu xiǎ<sup>n</sup> ndíhi-ni ní cana ñaha-í xii-n. Te táxǎhu xii-n sǎ véxi-n chi iha ndècu-ndí nchaa-ndí ndétú ñàha-ndí xii-n cùndedóho-ndí tnúhu Yá Ndiöxí, te cuíní-ndí cǎchí tnúhu-n nchàa tnúhu ní cǎchí Yá Ndiöxí cǎhá<sup>n</sup>-n —cǎchí té Còrneliú xáha<sup>n</sup>-dë.

*Té Pèlú ní ndatnúhu-dé ndihí ñáyiú ní tacá vehe té Còrneliú*

<sup>34</sup> Te té Pèlú xáha<sup>n</sup>-dë xií-yu:

—Vitna ní xíní-í sá Yǎ Ndiöxí cǎhá<sup>n</sup> ndihí-gá ñáyiú cuéi ndéda-ni cǎa ñuú, te ì<sup>n</sup>-ni quide-gá ndihí nchaa-yu. <sup>35</sup> Te nchaa ñáyiú nèhe sá yíñùhu núú Yǎ Ndiöxí, te xǐquide váha-yu, te nchaa-yu cùu váha iní ñáhá-gǎ xií-yu.

Te ñá túú quide cuendá-gá cuéi ná ñáyiú ñuú cúu-yu. <sup>36</sup> Te Yá Ndiöxí ní tendaha-gǎ Xítohó Jesucristú ní sáhá<sup>n</sup>-gá ní xíndecu-gá nàció<sup>n</sup> Isràél, te ní xáha<sup>n</sup>-gǎ xií-yu ì<sup>n</sup> tnúhu váha nàcuáa cuu váha iní-yu. Te ðiu-ni mee Jèsús cùnùu-gá núú ñáyiú ni cǎa xico ñuyíú. <sup>37</sup> Te nàha-ndo sá ðíhna-gá ndí Juáá ní cǎhá<sup>n</sup> ndí tnúhu Yá Ndiöxí núú ñáyiú, te ní dácuándute ñaha ndí xií-yu. Te dàtnùní ní ngüíta Jèsús ní cǎhá<sup>n</sup>-gá tnúhu-gá distritú Galileá, te dàtnùní ní sáhá<sup>n</sup>-gá níhí nàció<sup>n</sup> Isràél ní cǎhá<sup>n</sup>-gá tnúhu-gá núú ñáyiú. <sup>38</sup> Te sa nàha-ndo sá Yǎ Ndiöxí ní sǎñaha-gǎ Espíritú-gá xii Jèsús tée ñuú Nazàrét ndécú ndihí-dé chíndèe ñaha-xi xii-dé. Te nàha-ndo sá nǐ xica cuu Jèsús ní quide tátna-gá nchaa ñáyiú yíhi ñaha espíritú cùndíhi yucu ñávàha. Te ío vǎi-gá sá vǎha ní quide ñaha-gǎ xií-yu, te duca<sup>n</sup> nǐ quide-gá, chi Yá Ndiöxí ní chindee ñaha-gá. <sup>39</sup> Te mee-ndí ní xíní-ndí nàcuáa ní quide Jèsús ñuú Jerusàlén ndihí níhí nàció<sup>n</sup> Isràél. Te ní sata caa ñaha-güedé xii-gá núú cùrúxí te yàcá<sup>n</sup> ní xíhí-gá. <sup>40</sup> Te núú ùní nduu ní dándótó ñaha Yá Ndiöxí xii-gá. Te ní cuíní-gá sá cùndècu Xítohó Jesucristú titní nduu sátá nǐ ndoto-gá cuendá cǎhá<sup>n</sup> ndihí ñaha-gǎ xii-ndí nchaa-ndí nàcuáa ní xica cuu-ndí ndihí-gá. <sup>41</sup> Te ñá ncháá ñáyiú ni xíní ñáhá xii-gá, chi mee-ni nchúhú cue tée ní cǎchí-gá sá cǎhá<sup>n</sup> ndáá-ndí sá nǐ ndoto-gá, chi ní xíndecu ndihí-ndí-gá, te ní xihí ní xexi-ndí ndihí-gá, núu cǎhá<sup>n</sup> ndáá-ndí sá nǐ ndoto-gá. <sup>42</sup> Te ní cǎchí-gá sá nchúhú quíhí<sup>n</sup>-ndí cúñaha-ndí xii ñáyiú sá mée Yǎ Ndiöxí ní táuchíú<sup>n</sup>-gǎ sá Jèsús cada ndáá-gá cuéchi nchaa ñáyiú ndècu vívú ndihí cuéchi nchaa ñáyiú ní xíhí. Te duca<sup>n</sup> nǐ xáha<sup>n</sup> Yǎ Ndiöxí xii Jèsús, te ðiu-ni duca<sup>n</sup> nǐ cǎchí Jèsús cǎhá<sup>n</sup>-ndí. <sup>43</sup> Te cue tée ní cǎhá<sup>n</sup> tnúhu Yá Ndiöxí ndéé sanaha ní cǎhá<sup>n</sup>-güedé sá quíxí Jèsús, te ní cǎchí-güedé sá ncháá ñáyiú na quíndáá iní ñáhá xii Jesús, te cada cǎhnu iní-gá nchaa

cuèchi-yu —càchí té Pèlú xăha<sup>n</sup>-dě xií-yu.

*Ní quexìo Espiritú Yă Ndiöxí ní ngúndecu ndihí cue ñáyiu ñá túú cùu ñáyiu isràél*

<sup>44</sup> Te mei òré càhá<sup>n</sup>-dé ndèdóho-yu ní quexìo Espiritú Yă Ndiöxí ní ngúndecu ndihí nchaa ñáyiu-á<sup>n</sup>. <sup>45</sup> Te cue téee isràél cuáhá<sup>n</sup> ndihí té Pèlú, cue téee ní sándáá iní tnúhu Jèsús ní cuñúhu vihi-güedé sá ñí quexìo Espiritú Yă Ndiöxí ní ngúndecu ndihí-yu, chi cuèndá sá ñà díú ñáyiu isràél cúu-yu núu xiá<sup>n</sup> ní cuñúhu-güedé. <sup>46</sup> Te ní cutnùní sá ñí quexìo Espiritú Yă Ndiöxí ní ngúndecu ndihí-yu, chi ní ngüíta-yu càhá<sup>n</sup>-yu tnúhu sá dácàhu iní ñáhá Espiritú-gá, tnúhu sá ñà túú xíní-yu càhá<sup>n</sup>-yu. Te ní ndacá<sup>n</sup> táhü-yu núu Yă Ndiöxí cuèndá nchaa sá ñí guide-gá. <sup>47</sup> Te dătnùní ní xáha<sup>n</sup> tē Pèlú:

—Vitna te cuandute ñáyiu ní natuha ichi Xítohó Jesucrístú chi sa ndècu ndihí-yu Espiritú Yă Ndiöxí dătná cuíní-ndó ndècu ndihí nchoo, núu xiá<sup>n</sup> vá cúú càchí dava-gá ñáyiu sá vă cúú cuànduté-yu —càchí-dé xăha<sup>n</sup>-dě xií-yu.

<sup>48</sup> Te dătnùní ní xáha<sup>n</sup>-dě xii ñáyiu:

—Vitna te cuandute-ndo, te òré-á<sup>n</sup> te cacunehe-ndo Xítohó Jesucrístú —càchí-dé xăha<sup>n</sup>-dě xií-yu.

Te dătnùní ní càhá<sup>n</sup> ndàhú-yu núu tē Pèlú cundecu ndihí ñaha-dě xií-yu ñí<sup>n</sup> ũú nduu.

## 11

*Té Pèlú ní cani-dé cuèndú núu ñáyiu sándáá iní tnúhu Jèsús ñúú Jerusàlén*

<sup>1</sup> Te cue téee ní táuchíú<sup>n</sup> Jèsús dacuàha ñaha xii ñáyiu tnúhu-gá, ndihí cue ñáyiu ní sándáá iní tnúhu-gá, ñáyiu ndècu distritú Jùdeá ní níhí-yu tnúhu sá ñáyiu ñá túú cùu ñáyiu isràél ní sándáá iní-yu tnúhu Yă Ndiöxí. <sup>2</sup> Te òré ní ndexìo té Pèlú ñúú Jerusàlén, te ñáyiu isràél ñáyiu ní cachí sá cáda nchàa nacuáa ní càhá<sup>n</sup> ndíi Moisés ní satnuhu ñáhá-yu xii-dé. <sup>3</sup> Te ní xáhă<sup>n</sup>-yu xii té Pèlú:

—¿Ná cuèndá ní sáhá<sup>n</sup>-n ndéé ndíácă<sup>n</sup> ní càhá<sup>n</sup> ndihí-n ñáyiu-ă<sup>n</sup>, te ñá túú quidé-yu dătná quidé nchòo-i? Te ní sáhá<sup>n</sup>-n yàcá<sup>n</sup> ní xexi-n ndihí-yu —càchí-yu xáhă<sup>n</sup>-yu xii-dé.

<sup>4</sup> Te té Pèlú ní cani-dé cuèndú nacuáa ní cuu núu ñí sáhá<sup>n</sup>-dé, te xáhă<sup>n</sup>-dě:

<sup>5</sup> —Ní xíndecu-í ñúú Jòpé. Te òré càhá<sup>n</sup> ndihí-í Yă Ndiöxí, te ní dácótó ñàha-xi xii-í sá vëxi cuu<sup>n</sup> ñí<sup>n</sup> dóó cáhnú àndiu, te ndùtu ndi cumí xíquí-xi, te ní ngava-xi núu ndécù-í. <sup>6</sup> Te ní xíndéhé văha-í, te ní xíní-í nchaa quiti yòdo núu-xi. Te ñí<sup>n</sup> xichi yòdo quiti cúmí sáhá-xi, te ñí<sup>n</sup> xichi yòdo quiti déé<sup>n</sup>, te ñí<sup>n</sup> xichi yòdo cóó, te ñí<sup>n</sup> xichi yòdo quiti ndava. <sup>7</sup> Te ní tecú dóho-í càhá<sup>n</sup> ñí<sup>n</sup> sá càhá<sup>n</sup>, te càchí-xi: “Pèlú, ndacuñí cahni-n ndèda-ni càa quiti-a caxi-n-di”, cachí sá ñí càhá<sup>n</sup>-á<sup>n</sup>. <sup>8</sup> Te ní xáha<sup>n</sup>-í: “Vá cáhni-í-di chi càchí tnúhu sá sánú ichi ñaha xii nchúhú ñáyiu isràél sá vă cúú càxi-ndí nchaa quiti-a”, xáhă<sup>n</sup>-í.

<sup>9</sup> Te ní tecú dóho-í càhá<sup>n</sup>-ni tucu núu ñínu, te càchí sá càhá<sup>n</sup>-á<sup>n</sup>: “Vá cúú càchí-n să vă cúú càxi-n-di, chi mee Yă Ndiöxí ní cachí-gá sá díú nchàa quiti-á<sup>n</sup> cuu caxi-o”, càchí sá càhá<sup>n</sup>-á<sup>n</sup>. <sup>10</sup> Te duca<sup>n</sup> ñí càhá<sup>n</sup> sá ñí càhá<sup>n</sup>-á<sup>n</sup> ũní xito, te dătnùní cuàndaa dóó-ă<sup>n</sup> ndihí nchaa quiti-á<sup>n</sup> andiu. <sup>11</sup> Te òré-ni ní quexìo úní cue téee vehe núu ndécù-í. Te cue téee-á<sup>n</sup> ñí tendaha ñàha ñí<sup>n</sup> téee ñúú Cèsareá nándücu ñaha-güedé xii-í. <sup>12</sup> Te mee Espiritú Yă Ndiöxí ní cachí-xi sá quihí<sup>n</sup>-í ndihí-güedé, te ní cachí-xi sá ñà túú ñá cani iní-í. Te tnàhá íñú cue téee ndècu iha ní sáhá<sup>n</sup> ndihí ñaha-güedé xii-í, te nchaa-ndí ní sáhá<sup>n</sup>-ndí vehe té Còrneliú ñúú Cèsareá. <sup>13</sup> Te ní cani-dé cuèndú nacuáa ní cuu ní sáhá<sup>n</sup> ñí<sup>n</sup> espíritú xínú cuèchi núu Yă Ndiöxí vehe-dé, te ní quihu-xi ndéé xití vehe-dé, te ní xáha<sup>n</sup>-xi xii-dé: “Tendaha-n cuè téee na quihí<sup>n</sup>-güedé ñúú Jòpé quíngana-güedé ñí<sup>n</sup> téee nàni Xímú, àdi Pelú chi úú diu-dé. Te candeca ñaha-güedé quixi. <sup>14</sup> Te téee-á<sup>n</sup> cachí tnúhu-dé nása cada-n nàníhí tàhú-n ndihí ñadihí-n, ndihí landú-n, ndihí



nchaa ñáyiú xínu cuechi vehe-n”, duha ní xáha<sup>n</sup> espíritú-á<sup>n</sup> xii té Còrneliú. <sup>15</sup> Te òré ní ngüíta-í càhá<sup>n</sup> ndihí-í-yu ní quexìo Espíritú Yă Ndiöxí ní ngúndecu ndihí-yu dàtná ní quide-xi cútnàhá ní taxi Yá Ndiöxí Espíritú-gá ndéé díhna ní ngúndecu ndihí nchoo. <sup>16</sup> Te ní ndacu iní-í nàcuáa ní cáhá<sup>n</sup> Xítóhó Jesucristú, te duha ní cachí-gá: “Té Juáa ní xóo dacuàndute-dé ñáyiú, dico yúhú sãñaha-í Espíritú Yă Ndiöxí cundecu ndihí-yu”, duha ní cachí-gá. <sup>17</sup> Te Yá Ndiöxí ní sãñaha-gă Espíritú-gá cundecu ndihí ñáyiú ñá túú cùu ñáyiú isràél dàtná ní quide-gá cútnàhá ní sàndáa iní-ó tnúhu Jèsús, núu xiá<sup>n</sup> vá càchí-í sá vâ cúú càda-í ì<sup>n</sup> sá cuiní Yă Ndiöxí cada-í —càchí té Pèlú xăha<sup>n</sup>-dê xií-yu.

<sup>18</sup> Te sátá dúcá<sup>n</sup> ñí xáha<sup>n</sup> tē Pèlú, te ñá túú-gă ná tnúhu ní cãhá<sup>n</sup>-yu, te ío ní cudí<sup>n</sup> iní-yu nchaa nàcuáa ní quide Yă Ndiöxí, te ní xítñàhá-yu:

—Tnàhá nchaa ñáyiú ñá túú cùu ñáyiú isràél naníhí tãhú-yu núu na dàñá-yu nchaa sá cuèhé sá dúhá quidé-yu, chi duca<sup>n</sup> cuiní Yă Ndiöxí cunduu —càchí-yu xítñàhá-yu.

*Ñáyiú sàndáa iní tnúhu Jèsús ñuú Antiòquiá*

<sup>19</sup> Te sátá ñí sahani-güedé té Těvá, te ní cuiní-güedé cada úhú-güedé nchaa ñáyiú ní sàndáa iní-xi tnúhu Jèsús, te ní xité nuú-yu ndi tnahá ì<sup>n</sup> ì<sup>n</sup> ñuú. Te davá-yu cuáhá<sup>n</sup>-yu ndéé distritú Fèniciá ndihí distritú Chìpré ndihí ñuú Antiòquiá. Te ní cáhá<sup>n</sup>-yu tnúhu Jèsús núu mee-ni ñáyiú isràél, te ñá ní xítñúhu-yu dava-gá-yu. <sup>20</sup> Te dava-gá ñáyiú distritú Chìpré ndihí ñáyiú ñuú Cirené ní sáhá<sup>n</sup>-yu ñuú Antiòquiá. Te ñá díú mèe-ni ñáyiú isràél ní cãhá<sup>n</sup> ndihí-yu, chi tnàhá ñáyiú ñá túú cùu ñáyiú isràél ní xáhã<sup>n</sup>-yu tnúhu Jèsús. <sup>21</sup> Te ní chindee ñàha-gá xii ñáyiú càhá<sup>n</sup> tnúhu-gá, te vâi-gá-yu ní sàndáa iní-yu-gá chi ní tuhá-yu ichi-gá.

<sup>22</sup> Te ñáyiú ndècu ñuú Jerusàlén ñáyiú ní sàndáa iní tnúhu Jèsús ní níhí-yu tnúhu nàcuáa ní cuu, núu xiá<sup>n</sup>

ní tendàhá-yu té Bèé cuáhá<sup>n</sup>-dé ñuú Antiòquiá. <sup>23</sup> Te òré ní quexìo té Bèé, te ní xiní-dé nàcuáa ní quide ñaha-gă xií-yu sá ñí naníhí tãhú-yu, núu xiá<sup>n</sup> ío ní cudí<sup>n</sup> iní-dé. Te ní dácáhu iní ñáhã<sup>n</sup>-dê, te ní xáha<sup>n</sup>-dê:

—Ío nducu ndèe-ndo cada-ndo nchaa sá càchí Yă Ndiöxí cada-ndo —càchí-dé xăha<sup>n</sup>-dê xií-yu.

<sup>24</sup> Te té Bèé cúú-dê ì<sup>n</sup> tée váha iní-xi, te ndècu ndihí-dé Espíritú Yă Ndiöxí, te ío sàndáa iní-dé tnúhu Jèsús. Te vâi vihi ñáyiú ní tuhá-yu ichi-gá.

<sup>25</sup> Te dàtnùní cuáhá<sup>n</sup> té Bèé ñuú Tarsú cuánúndúcú-dé té Sàulú. <sup>26</sup> Te òré ní naníhí ñáhã<sup>n</sup>-dê, te ndèca ñaha-dé cuáhá<sup>n</sup> ñuú Antiòquiá, te yacá<sup>n</sup> ní xíndecu-güedé ì<sup>n</sup> cuíá ndihí ñáyiú ní sàndáa iní tnúhu Jèsús, te vâi-yu ní dácuáhã ñàha-güedé tnúhu-gá. Te dïu-ni ñuú Antiòquiá ní dánání ñàhá-yu Cristiànú xii nchaa ñáyiú sàndáa iní tnúhu Jèsús.

<sup>27</sup> Te ndéé dàvá-á<sup>n</sup> ñí quee ì<sup>n</sup> úú cue tée càhá<sup>n</sup> tnúhu Yă Ndiöxí ñuú Jerusàlén cuáhã<sup>n</sup>-güedé ñuú Antiòquiá. <sup>28</sup> Te ì<sup>n</sup>-dé nání-dê Àgabú, te ní chindee ñàha Espíritú Yă Ndiöxí xii-dé, te ní sáhã<sup>n</sup>-dé núu nchaa ñáyiú sàndáa iní tnúhu-gá, te ní xáha<sup>n</sup>-dê xií-yu sá quíxí ì<sup>n</sup> tnamá nihí ñuyú. Te duca<sup>n</sup> ñí cuu sátá ñí ngúnutnã té Claudiú tée yìndaha cuèhé nació<sup>n</sup>. <sup>29</sup> Núu xiá<sup>n</sup> nchaa ñáyiú sàndáa iní tnúhu Jèsús ñuú Antiòquiá ní ndatnúhu-yu sá chíndéé-yu nchaa ñáyiú sàndáa iní tnúhu-gá ndécú distritú Júdeá cuendá vá ndóhó vîhí-yu docó. Te nàcuáa ní níhí-yu, te duca<sup>n</sup> ñí sacá<sup>n</sup> tnáhã<sup>n</sup>-yu. <sup>30</sup> Te ní tacá díhú<sup>n</sup>-ã<sup>n</sup>, te nèhe té Bèé ndihí té Sàulú cuáhã<sup>n</sup>, cuàha-güedé cue tée yìndaha ñáyiú sàndáa iní tnúhu-gá.

## 12

*Sátá ñí xihí té Jàcobó, te ní ngava té Pèlú vecáa*

<sup>1</sup> Te ndéé dàvá-á<sup>n</sup> ñí ngüíta té Hèrodés tée yìndaha ñaha xii ñáyiú isràél ní quide úhú-dé ì<sup>n</sup> úú ñáyiú sàndáa iní tnúhu Yă Ndiöxí. <sup>2</sup> Te ní táuchíú<sup>n</sup>-dê ní tñi-güedé té Jàcobó

ñaní té Juàá, te ní sahani ñaha-güedë ndihi machití. <sup>3</sup> Te ío ní cudíí iní dava ñáyiú isràél cuendá sá ñí sahani ñaha-güedë xii té Jàcobó, núu xíá<sup>n</sup> ní tendaha tùcu té Hèrodés sandàdú-dé ní sáhá<sup>n</sup> tñi tùcu-güedé té Pèlú. Te duca<sup>n</sup> ñí quide-dé cútnàhá ní xóo vico ní xexí-yu pàá sá ñà túú yíhi levadurá. <sup>4</sup> Te ní naníhí-güedë té Pèlú, te ní tñi ñaha-güedë ndécá ñaha-güedé cuáhá<sup>n</sup> vecaá. Te té Hèrodés ní taúchíú<sup>n</sup>-dë cuáhá<sup>n</sup> sáhú<sup>n</sup> ñ<sup>n</sup> sandàdú cùndeé-güedé té Pèlú. Te ní xáha<sup>n</sup>-dë:

—Cundeé-ndó ndí cùmí ndí cùmí-ndó tée-á<sup>n</sup> —càchí-dé xáha<sup>n</sup>-dë xii-güedé.

Te té Hèrodés ní sani iní-dé queñuhu-dé té Pèlú vecaá òré ná yáha vico cuendá cahni ñaha-güedë cáhá<sup>n</sup>-dë ní cùu. <sup>5</sup> Te ní xíhi-ni té Pèlú vecaá, te ní xindeé cuaa ñaha sandadú xii-dé. Te cue ñáyiú sandáá iní tnúhu Yá Ndiöxí ío ní xícá<sup>n</sup> táhü-yu núú-gã cuendá sá ñà túú nã cada ñaha-güedë xii-dé.

*Yá Ndiöxí ní dácãcu-gá té Pèlú vecaá*

<sup>6</sup> ñ<sup>n</sup> niú-gá quihi té Pèlú vecaá ní cùu, te nduu tnëé tauchiú<sup>n</sup> té Hèrodés quihí<sup>n</sup> sandàdú queñuhu ñaha-güedë xii-dé vecaá cuendá quiní nchaa ñáyiú nása cada ñaha-güedë ní cùu. Te té Pèlú cáá-dë xidí-dé xití vecaá, te ndi ndúú dúcú<sup>n</sup> ndáhá-dë ndútú càdená, te xio xio ñíhi-dé ndécú sandadú, te dava-gá sandadú xindeé-güedé yèhe vecaá. <sup>7</sup> Te ní quexìo ñ<sup>n</sup> espíritú xínú cuèchi núú Yá Ndiöxí xití vecaá núú cáá tã Pèlú xidí-dé, te uu<sup>n</sup> ní dáyhé-xi xití vecaá, te ní danguíhi ñaha-xi xii-dé, te xáha<sup>n</sup>-xi xii-dé:

—Yáchí, ndácóo —càchí-xi xáha<sup>n</sup>-xi xii-dé.

Te ní ndacóo-dé, te nchaa cadená ndútú dúcú<sup>n</sup> ndáhá-dë ní nandáxi. <sup>8</sup> Te ní xáha<sup>n</sup> tùcu espíritú-á<sup>n</sup> xii-dé:

—Yáchí, nucuíhnu dóo-n, te ndíhu-n chàu-n —càchí-xi xáha<sup>n</sup>-xi xii-dé.

Te ní ndíhu nuu-dé dóo-dë, te ní xáha<sup>n</sup> tùcu espíritú-á<sup>n</sup>:

—Candixi dóo-n, te na quihí<sup>n</sup>-ó —càchí-xi xáha<sup>n</sup>-xi xii-dé.

<sup>9</sup> Te té Pèlú ní chinchícú<sup>n</sup>-dë espíritú-á<sup>n</sup>, te ñá ní cùtnuní iní-dé núu

ndáá ñ<sup>n</sup> espíritú xínú cuèchi núú Yá Ndiöxí duca<sup>n</sup> quide àdi ñáhá, te dàcoto ñaha-xi xii-dé ní sani iní-dé. <sup>10</sup> Te ndëndaha-ni-dë espíritú-á<sup>n</sup> cuáhá<sup>n</sup> ní yáha-dé nàcuáa xínutñi sandadú, te ta yáha-gá-dé núú ndécú dava-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáhá<sup>n</sup> ndéé xití ñuu, te ní nacaá<sup>n</sup> méé yèhe-á<sup>n</sup>, te ní quee-dé cuáhá<sup>n</sup>-dë ndihi espíritú-á<sup>n</sup>. Te ní tnahá-dé ñ<sup>n</sup> tnuú, te yacá<sup>n</sup> ní dándõ ñaha espíritú-á<sup>n</sup> xii-dé. <sup>11</sup> Te dàtnuní ní nene váha saní núú-dë, te ní cutnuní iní-dé, te ní cachí-dé:

—Ndáá sá Yá Ndiöxí ní tendaha-gã espíritú-á<sup>n</sup> ní quixi-xi ní dácãcu ñaha-xi xii-í cuendá sá và cáhni ñaha té Hèrodés. Te dava ñáyiú isràél ío ní cudíí iní-yu cuendá sá ñí cuiní té Hèrodés cahni ñaha-dé xii-í —duha ní cachí-dé sátá ní cutnuní iní-dé.

<sup>12</sup> Te sátá ñí cutnuní iní-dé sá ñí cacu-dé, te cuáhá<sup>n</sup>-dë vehe ñ<sup>n</sup> ñaha nani Mariá nãná tã Juàá, àdi Mácú chi úú diu-dé, te xía<sup>n</sup> ndécú vai-yu càhá<sup>n</sup> ndihí-yu Yá Ndiöxí. <sup>13</sup> Te té Pèlú ní quexìo-dé ndéé yuyèhe ní dácásá<sup>n</sup>-dë, te ní quixi ñ<sup>n</sup> xíchí nání Ròdé ní quixi ndehe-xi nã cúú ñáyiú dàcasa<sup>n</sup>. <sup>14</sup> Te ní nucúhu<sup>n</sup> ndudú-xi sá díú tã Pèlú, te ní cudíí víhí iní-xi, dico ñá ní nacaá<sup>n</sup>-xi yuyèhe. Te ní quene cunu-xi cuáhá<sup>n</sup> ngüñaha-xi xii-yu sá nùtni té Pèlú yuyèhe ndaa quehé. <sup>15</sup> Te ñá ní sandáá iní-yu tnúhu ní cáhá<sup>n</sup>-xi, te xáhá<sup>n</sup>-yu xii-xi:

—¡Ná tnúhu víhi cáhá<sup>n</sup>-õ<sup>n</sup> xíchí lúcú! —càchí-yu xáhá<sup>n</sup>-yu.

Te xáhá<sup>n</sup>-xi sã ndáá nùtni-dé, te xáhá<sup>n</sup>-yu:

—Ñá díú tã Pèlú chi espíritú sá xító ñaha xii-dé cúú sã càhá<sup>n</sup> —càchí-yu xáhá<sup>n</sup>-yu xii-xi.

<sup>16</sup> Te òré duca<sup>n</sup> xítnàhá-yu, te té Pèlú ní dácásá<sup>n</sup> tùcu-dé yuyèhe. Te ní sáhá<sup>n</sup>-yu ní nacaá<sup>n</sup>-yu yuyèhe, te ní xiní-yu sá díú tã Pèlú, te ní cuñúhu víhí-yu. <sup>17</sup> Te ní quide-dé ndaha-dé núú-yu cuendá cadí-yu yuhú-yu. Te ní ngüíta-dé ní caní-dé cuendú nàcuáa ní quide ñaha Yá Ndiöxí xii-dé sá ñí

dácăcu ñaha ì<sup>n</sup> espíritú xínú cuèchi núú-gă xii-dé vecaá, te ní xáha<sup>n</sup>-dě xií-yu:

—Cúu-ndo tĕ Jăcobó ndihî dava-gă ñăyiu sândáá iní tnúhu Jĕsús năcuáa ní quide ñaha Yă Ndiôxí xii-í —căchí-dé xăha<sup>n</sup>-dě xií-yu.

Te sátá dúcá<sup>n</sup> ñă xáha<sup>n</sup>-dě, te ní quee-dé cuáhá<sup>n</sup>-dé ingá xichi.

<sup>18</sup> Te sátá ñă túndaá, te ní ngúita nchaa sandádú cáhá<sup>n</sup> ì<sup>n</sup> cáhá<sup>n</sup> ì<sup>n</sup>-güedé, te xĭtnàha-güedé:

—Ñá túú-gă tĕ Pĕlú yĭhí vĕcaá, ¿te nása cada-o-i? —căchí-güedé xĭtnàha-güedé.

<sup>19</sup> Te tĕ Hĕrodés ní tendaha-dĕ tĭtní sandádú cuáhá<sup>n</sup>-güedé cuánúndúcú ñaha-güedé, te ñá ní nánihí ñáhá-güedé xii-dé. Te dătnùnî ní cana-dé sandádú cue tĕe ní xindeé ñáhá xii tĕ Pĕlú, te ní tenáá ñáhá-dĕ xii-güedé, te ní xáha<sup>n</sup>-dě xii dava-gă cue sandádú-dé:

—Cahni-ndo cuè tĕe-ă<sup>n</sup> —căchí tĕ Hĕrodés xăha<sup>n</sup>-dě.

Te dătnùnî ní quee tĕ Hĕrodés distritú Júdeá cuáhá<sup>n</sup>-dé ñuú Cĕsareá, yácá<sup>n</sup> ní ngúndecu-dé.

#### *Ní xihí tĕ Hĕrodés*

<sup>20</sup> Tĕ Hĕrodés ní cudéé<sup>n</sup>-dĕ núú ñăyiu ñuú Tirú ndihî núú ñăyiu ñuú Sidón. Te xiă<sup>n</sup> ní ndatnúhu-yu ní cuu ì<sup>n</sup>nuu tnúhu-yu, te ní xicá-yu cuáhá<sup>n</sup>-yu cuáhá<sup>n</sup> ndatnúhu ndihî ñáhá-yu xii-dé, te ní ndatnúhu ndihî-yu tĕ Blástú. Te tĕe-á<sup>n</sup> cúú-dĕ chiu<sup>n</sup> quide-dé núú tĕ Hĕrodés, te ní chindee tnúhu ñaha-dĕ xií-yu, chi ní cáhá<sup>n</sup> ndáhú-yu núú tĕ Hĕrodés sá vă cádá ũhú ñáhá-dĕ xií-yu. Te duca<sup>n</sup> ñă quidé-yu cuëndá ñuú tĕ Hĕrodés-á<sup>n</sup> quée să xéxĭ-yu. <sup>21</sup> Te ní xáha<sup>n</sup> tĕ Hĕrodés ná nduu quĭhĭ<sup>n</sup>-yu ndatnúhu ndihî ñaha-dĕ xií-yu, te nduu-ă<sup>n</sup> ñă quĭunuu-dé ì<sup>n</sup> dóó văha, ì<sup>n</sup> sá sácũhnu tĕe tàxi tnunî. Te ní ngóo-dé núú xilé văha, xilé sá sácũo nchihî tĕe tàxi tnunî, te ní ngúita-dé ní cáhá<sup>n</sup> sàhú-dé dóho-yu. <sup>22</sup> Te uu<sup>n</sup>i ní cuáá-yu te căchí-yu:

—ĭTĕe-a cáhá<sup>n</sup>-dé dico ñá díú tĕe ñuyúú-a cùu-dé chi ndiôxí cúú-dĕ! —căchí-yu xĭtnàhá-yu.

<sup>23</sup> Te dĭu-ni òré-á<sup>n</sup> ñă yáha ì<sup>n</sup> espíritú xínú cuèchi núú Yă Ndiôxí, te ní sáñaha-xi cuĕhé xii tĕ Hĕrodés. Te duca<sup>n</sup> ñă tnahá-dé chi mee-dĕ ñá ní xăha<sup>n</sup>-dě sá ñăyiu cùu-dé, te ní cáhă<sup>n</sup>-yu sá ndiôxí cúú-dĕ. Te nchĭto-gă-dé ní sanú ñáhá tĭndácú xii-dé, te dătnùnî ní xihí-dé.

<sup>24</sup> Te ío tĭtní xichi ní sáhá<sup>n</sup> ñăyiu sândáá iní tnúhu Yă Ndiôxí ní cáhá<sup>n</sup>-yu tnúhu-gă, te ío chĭtú-yu ní sândáá iní-yu tnúhu-gă.

<sup>25</sup> Te tĕ Bĕe ndihî tĕ Săulú ní ndihî chiu<sup>n</sup>-güedé, te ní ndee-güedé ñuú Jerusàlén cuáhá<sup>n</sup>-güedé ndihî tĕ Juáá, àdi Mácú chi úú dĭu-dé.

## 13

### *Tĕ Bĕe ndihî tĕ Săulú cuáhá<sup>n</sup>-güedé dăcuàha-güedé ñăyiu tnúhu Yă Ndiôxí nchaa ñuú xicá*

<sup>1</sup> Te ñuú Antiòquia ndécú ì<sup>n</sup> úú cue tĕe cáhá<sup>n</sup> tnúhu Yă Ndiôxí núú nchaa ñăyiu ní sândáá iní-xi tnúhu-gă. Te ndĕcu tucu ì<sup>n</sup> úú cue tĕe cùu mestrú dăcuàha ñaha-güedé xií-yu tnúhu-gă. ì<sup>n</sup>-dé nání-dĕ Bĕe, te ì<sup>n</sup>-dé nání-dĕ Xĭmú, te tĕ Xĭmú-á<sup>n</sup> xăha<sup>n</sup>-güedĕ Nĕgrú chi tnuu-dĕ. Te ingá-dé nání-dĕ Lúciú, te tĕe-á<sup>n</sup> cúú-dĕ tĕe ñuú Cirené. Te ingá-dé nání-dĕ Săulú, te ingá tucu-dé nání-dĕ Manàén. Te tĕ Manàén-á<sup>n</sup> ndihî tĕ Hĕrodés tĕe cùu gobiernú Galileá ío văha ní xóo cáhá<sup>n</sup> ndihî tnàha-güedé cútnàhá ní cuu lĭhli-güedé. <sup>2</sup> Te ì<sup>n</sup> nduu ñá túú ñă ní xĕxi ñăyiu ní sândáá iní tnúhu Yă Ndiôxí cuëndá mee-ni-gă ní cáhá<sup>n</sup> ndihî-yu, te ní xáha<sup>n</sup> Espíritú Yă Ndiôxí xií-yu:

—Tendaha-ndo tĕ Bĕe ndihî tĕ Săulú quĭhĭ<sup>n</sup>-güedé dava-gă ñuú cada-güedé chiu<sup>n</sup> tahu-í, chi duca<sup>n</sup> cuĭnĭ-í cunduu —căchí Espíritú-gă xăha<sup>n</sup>-xi xií-yu.

<sup>3</sup> Te ní cáhá<sup>n</sup> ndihî tucú-yu Yă Ndiôxí, te ñá túú tnàhĭ ná ní xĕxi tucú-yu, te ní sacá<sup>n</sup> ndodo-güedé ndaha-güedé díquí tĕ Bĕe ndihî tĕ Săulú. Te sátá dúcá<sup>n</sup> ñă quide-güedé, te ní quide ndee ì<sup>n</sup> ñáhă-yu xii-güedé.

*Té Bèé ndihi té Sàulú cuáhán-güedé distritú Chìpré cáhán-güedé tnúhu Yá Ndiöxí*

<sup>4</sup> Te té Bèé ndihi té Sàulú ní quee-güedé cuáhán-güedé cuèndá duca<sup>n</sup> cuìní Espiritú Yá Ndiöxí cundu sá cáca cùu-güedé dava-gá ñuú, te ní quexìo-güedé ñuú Selèucia, te yàcá<sup>n</sup> ní quee-güedé bàrcú cuáhán-güedé distritú Chìpré. Te ñuú-án cáá xití làmár chi ndècu ñuhu yichí xití ndute. <sup>5</sup> Te ní quexìo-güedé mei ñuú Salàminá, te ní quene-güedé bàrcú, te ní xica-güedé cuáhán-güedé nchaa veñúhu ñáyiu isràél cáhán-güedé tnúhu Yá Ndiöxí. Te cuáhán ndihi-güedé té Juàá cuèndá chindee ñaha-dé xii-güedé. <sup>6</sup> Te ní tñi-güedé ichi cuáhán-güedé ñuú Páfós cáá ndàa ingá xio Chìpré, te yàcá<sup>n</sup> ní naníhí tnáhá-güedé ndihi ñ<sup>n</sup> tée isràél nání-dé Barjèsús, te tée-án xìní-dé cada ndùu-dé, te càchí-dé sá cáhán-dé tnúhu Yá Ndiöxí dico ñá ndàá. <sup>7</sup> Te tée-án quidé chiù<sup>n</sup>-dé ndihi té Sèrgiú, àdi Páblú chi úú diu-dé, te cùu-dé gobièrnú Chìpré, te ío túha-dé. Te ní cana-dé té Bèé ndihi té Sàulú, chi cuìní-dé cundedóho-dé tnúhu Yá Ndiöxí. <sup>8</sup> Te tée quide nduu-án ñá ní dàña-dé cáhán-güedé tnúhu-gá, chi ñá ní cuìní-dé sá tée cùu gobièrnú-án tuha-dé ichi Yá Ndiöxí. Te duca<sup>n</sup> ñi quide té Barjèsús, tée xáha<sup>n</sup>-güedé Èlimás. <sup>9</sup> Te tnáhá tucu té Sàulú ndécú úú diu-dé chi xáha<sup>n</sup> tùcu-güedé Páblú, te ndècu ndihi-dé Espiritú Yá Ndiöxí. Te ní xíndéhé ñí ñáhá-dé xii tée quide nduu-án. <sup>10</sup> Te ní xáha<sup>n</sup>-dè:

—Yòhó, chi dàtná quidé yùcu ñávaha quide-n chi mee-ni dándahú-n ñáyiu. Yòhó cúu-n dèhe sácuihná, chi nchaa tnúhu váha cuìní Yá Ndiöxí cáhán-yu, te yòhó ñá dáñá-n. <sup>11</sup> Te vitna quiní-n nàcuáa cunduu, chi taxi Yá Ndiöxí ñ<sup>n</sup> castiú xii-n chi vá cútnùní-gá núu-n càca cuu-n ñ<sup>n</sup> úú nduu —càchí-dé xáha<sup>n</sup>-dè xii tée quide nduu-án.

Te òré duca<sup>n</sup> ñi xáha<sup>n</sup> tē Páblú xii-dé, te òré-ni ní cuaa-dé, te ñá túú ní cùtnuní tnáhí-gá núu-dé, te ní xóo nducu-ná-dé ñáyiu ní xóo cuita nehe ñaha xii-dé. <sup>12</sup> Te tée cùu gobièrnú ní

xiní-dé nàcuáa ní quide té Páblú, te ío ní cuñúhu-dé. Te ní tnáhá iní-dé tnúhu Jèsús, núu xiá<sup>n</sup> ní sándáá iní-dé.

*Té Páblú ndihi té Bèé ndécú-güedé ñuú Antiòquia Pìsidiá*

<sup>13</sup> Te té Páblú ndihi dava-gá cue tée xica cuu ndihi-dé ní quee-güedé bàrcú, te ní quee-güedé ñuú Páfós cuáhán-güedé ñuú Pèrgé, te ñuú-án yíndèhu-xi distritú Pánfilía. Te té Juàá ní nacuico-dé ní dándóo ñaha-dé xii-güedé cuánuhú-dé ñuú Jerusalén. <sup>14</sup> Te dava-gá-güedé ní quee-güedé ñuú Pèrgé cuáhán-güedé ñuú Antiòquia, te Pìsidiá yíndaha-xi ñuú-án. Te nduu xíndetátú-yu, te ní sáhán-güedé veñúhu ñáyiu isràél, te ní ngóo-güedé xití veñúhu. <sup>15</sup> Te cue tée ndècu veñúhu ní quehe<sup>n</sup>-güedé tutú yódó tnùnì nchaa tnúhu sá ñi chídó tnùnì ndíi Moisés ndihi tutú yódó tnùnì nchaa tnúhu sá ñi chídó tnùnì dava-gá cue tée ní xóo cáhán tnúhu Yá Ndiöxí ndéé sanaha, te ní dácuáhá-güedé ní xíndedóho cue ñáyiu, te dàtnùnì cue tée yíndaha veñúhu-án ñi xáha<sup>n</sup>-güedé xii té Páblú ndihi dava-gá-güedé:

—Nchòhó cue tée cùu ñaní tnáhá-ndí, te núu cuìní-ndó cáhán-ndó tnúhu Yá Ndiöxí, te cuu cáhán-ndó tnávíi cuèndá cutúha-yu —càchí-güedé xáha<sup>n</sup>-güedé.

<sup>16</sup> Te té Páblú ní ndacuíñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tnúhu cáhán-dé, te ní xáha<sup>n</sup>-dè:

—Te nchòhó ñáyiu quide nchaa nacuáa cáhán Yá Ndiöxí ndihi nchaa nchòhó ñáyiu isràél, cundedóho-ndo nchàa-ndo ñ<sup>n</sup> tnúhu na cáhán-í-a. <sup>17</sup> Te cuèi ndéé sanduu te cuèi vitna chindee ñaha-ni Yá Ndiöxí xii nchaa ñáyiu isràél, te ní nacáxi ñaha-gá xii-yu te ní chindee ñaha-gá cuèndá cáyá-yu, chi cuìní-gá sá cúú vai-yu, te duca<sup>n</sup> ñi quide-gá cútnáhá ní xíndecú-yu nació<sup>n</sup> Ègiptú. Te dàtnùnì ní dácácu ñaha-gá xii-yu ñuú-án, chi mee-gá nchaa ndàcu-gá quidé-gá. <sup>18</sup> Te ní xíndecú-yu ñ<sup>n</sup> xichi núu



ñà túú tnàhí sàcúndecu ñáyiú údico cuíá, te xítí údico cuíá-ã<sup>n</sup> ñí cundee ìní-gá nchaa sá ñí quidé-yu. <sup>19</sup> Te Yá Ndiöxí ní chindee ñàha-gá xii ñáyiú isràél, te ní dánáã-yu úsá nàció<sup>n</sup>, chi cuèndá ní cuini-gá cuu cuèndá-yu ñuhú-á<sup>n</sup>. <sup>20</sup> Te dàtnùní ní cachí Yá Ndiöxí sá díú-ní cuè téè cùchiu<sup>n</sup> taxi tnuni-güedé nchaa ñáyiú, te duca<sup>n</sup> ñí quide-güedé dàtná cúmí cièndú dava cuíá. Te sátá xiã<sup>n</sup>, te ní xíndecu té Sàmúél téè ní cáhá<sup>n</sup> tnúhu Yá Ndiöxí. <sup>21</sup> Te dàvã-á<sup>n</sup> ñí cuini ñáyiú isràél sá cúndecu ñí<sup>n</sup> téè quindaha ñàha-dé xií-yu, te Yá Ndiöxí ní cachí-gá sá tè Sàúl quindaha-dé-yu, te téè-á<sup>n</sup> ñí cuu-dé déhe té Cís, te té Benjamín téè ní xíndecu ndéé sanaha-gã ní cuu ñaní tnáhã-dé. Te té Sàúl ní xíndaha-dé ñáyiú údico cuíá. <sup>22</sup> Te Yá Ndiöxí ñá ní cuini-gá cundecu-ni-dé quindaha-dé ñáyiú, chi ní cuini-gá sá tè Dàvíí ndíhu ndaha-dé cue ñáyiú isràél, te ní cachí-gá: “Ío váha ní tnahá iní-í nàcuáa quide té Dàvíí déhe téè Isàí, te cada-dé nchaa nàcuáa cúñaha-í xii-dé”, duha ní cachí Yá Ndiöxí —cachí té Pãblú xãha<sup>n</sup>-dë xií-yu.

<sup>23</sup> Te ní xãha<sup>n</sup> tucu té Pãblú:

—Díu-ni ñaní tnáhã tè Dàvíí cúú Jèsús. Te Yá Ndiöxí ní tendaha-gã Jèsús ní quixi-gá ñuyíú-a cuèndá nchaa ñáyiú isràél ná quindáá iní ñáhã xii Jèsús naníhí tãhú-yu, chi duca<sup>n</sup> ñí cachí Yá Ndiöxí cunduu. <sup>24</sup> Te cútnáhã vátã ngüita-gá Jèsús cáhá<sup>n</sup>-gã tnúhu Yá Ndiöxí, te ní cáhá<sup>n</sup> té Juáá núú ñáyiú isràél sá xíní ñúhu-xi dañã-yu nchaa sá cuèhé sá dúhá, te cuanduté-yu. <sup>25</sup> Te sa ta cùyatni-ni-gá cuú-dé, te ní xãha<sup>n</sup>-dë xií-yu: “Nchòhó càchí-ndó sã yùhú cúú-í Crìstú Yáá ndétú-ndó dico ñáhã, chi ñá díú yùhú cúú-í Crìstú, chi davitna quixi Crìstú Yáá tendaha Yá Ndiöxí quixi ñuyíú-a. Te yùhú cúú-í ñí<sup>n</sup> téè duu<sup>n</sup> duu<sup>n</sup> ñá túú tàú nandaxi cuèdicó chàú-gá dico quide-í chiú<sup>n</sup>-gã”, duha ní cáhá<sup>n</sup> te Juáá —cachí té Pãblú xãha<sup>n</sup>-dë xií-yu.

<sup>26</sup> Te ní xãha<sup>n</sup> tucu té Pãblú:

—Cundedóho tucu-ndo ìngã tnúhu na cáhá<sup>n</sup>-í. Nchòhó tnáhã-ndó

cúu-ndo ñaní tnáhã ndíi Àbrahãm, te xíní-ndó sã Yá Ndiöxí cúnúu-gã. Te díu-ni-gã cuini-gã sá ncháá-ndó cundedóho-ndo tnúhu-gã, chi cúu-xi tnúhu sã cáhá<sup>n</sup> nàcuáa naníhí tãhú-ndó. <sup>27</sup> Te nchaa ñáyiú ndècu ñúú Jerusálén ndíhi nchaa cue téè cúnúu ñá ní cùtnuní iní-yu ndíhi-güedé sã Yá Ndiöxí ní tendaha-gã Jèsús ní quixi-gã ñuyíú-a. Te ñá ní sãha-yu cuèndá sã díú Jèsús ní cacunehe cue téè ní cáhá<sup>n</sup> tnúhu Yá Ndiöxí ndéé sanaha cuèi ní dácúáhã-yu tnúhu-gã veñúhu-yu ndí tnahã únã nduu, nduu ndètatú-yu. Te ní cachí-yu sã ndècuéchi Jèsús, te ní xãhá<sup>n</sup>-yu sã cáhni ñàha-güedé xii-gã. Te xiã<sup>n</sup> sa ñàha cue téè ní xóo cáhá<sup>n</sup> tnúhu-gã ndéé sanaha sã dúcã cáhá<sup>n</sup>-yu. <sup>28</sup> Te cuèi ñá túú ñã ní quide-gã te ní xãhá<sup>n</sup>-yu xii té Pilatú téè cúu gobiernú sã táuchìu<sup>n</sup>-dé cahni ñàha-güedé xii-gã. <sup>29</sup> Te xiã<sup>n</sup> núu ní sata caa ñàha-güedé xii-gã núú cùrúxí. Te ní quide-güedé nchaa nàcuáa ní chídó tnùní cue téè ní cáhá<sup>n</sup> tnúhu Yá Ndiöxí ndéé sanaha. Te sátã ñí xíhí-gã, te ní nunehe ñàha-güedé xii-gã núú cùrúxí, te nchìdo ñàha-güedé cuáhã<sup>n</sup>, te ní chihi ñàha-güedé ñí<sup>n</sup> xítí yaú. <sup>30</sup> Te Yá Ndiöxí ní dándótó-gã Jèsús. <sup>31</sup> Te titní xito ní sáhã<sup>n</sup> Jèsús núú ndécú ñáyiú ní xica cuu ndíhi-gã, ñáyiú ní quee distritú Galileá ní sáhã<sup>n</sup>-yu ndíhi-gã ñúú Jerusálén. Te vitna nchaa ñáyiú-á<sup>n</sup> xãhá<sup>n</sup>-yu xii dava-gã ñáyiú isràél nàcuáa ní cuu ní ndoto-gã.

<sup>32</sup> Te nchúhú cáhá<sup>n</sup>-ndí nàcuáa cada-ndo naníhí tãhú-ndó, chi Yá Ndiöxí ní xãha<sup>n</sup>-gã xii cue ñaní tnáhã-ó ñí xíndecu ndéé sanaha sã téndaha-gã Déhe-gã Jèsús quixi-gã ñuyíú-a. <sup>33</sup> Te ní quixi-gã ní xíhí-gã, te ní dándótó ñàha Yá Ndiöxí xii-gã, te núu xiã<sup>n</sup> naníhí tãhú-ó núu na quindáá iní-ó-gã. Te ñí<sup>n</sup> téè ní cáhá<sup>n</sup> tnúhu Yá Ndiöxí ndéé sanaha ñí chídó tnùní-dé núú sãlmú cúú úú nàcuáa ní cáhá<sup>n</sup> Yá Ndiöxí ní xãha<sup>n</sup>-gã xii Déhe-gã, te duha ní xãha<sup>n</sup>-gã: “Yòhó cúú-n Déhe-í, te vitna cutnùní iní ñáyiú sã yùhú cúú-í Tãtã-n”, duha ní

xáha<sup>n</sup>-gã xii Jèsús. Te ðiu-ni duca<sup>n</sup> nĩ chídó tnùnì téé ní cáhá<sup>n</sup> tnúhu-gá ndéé sanaha. <sup>34</sup> Te ingá xichi tucu núú tütú-gá ní chídó tnùnì ì<sup>n</sup> téé ní xíndecu ndéé sanaha nàcuáa ní xáha<sup>n</sup>-gã xii Déhe-gá, te duha ní xáha<sup>n</sup>-gã: “Mee-ni sã vãha cada ñaha-ĩ dàtná ní xii-í té Dàvií”, duha ní xáha<sup>n</sup>-gã. Te duca<sup>n</sup> nĩ chídó tnùnì téé ní xíndecu ndéé sanaha nàcuáa ní cáhá<sup>n</sup> Yã Ndiöxí, chi òré ní xihí Jèsús te ní dándótó ñaha-gá cuendá sá vã tíú yiqui cuñú-gá. <sup>35</sup> Te núú xiã<sup>n</sup> duha ní chídó tnùnì ì<sup>n</sup> téé ní xíndecu ndéé sanaha núú librí Sãlmú nàcuáa ní xáha<sup>n</sup>-dẽ xii-gá: “Vã dáñá-n sã tíú yiqui cuñú Déhe-n chi ío váha quide-gá”, duha ní chídó tnùnì téé ní xíndecu ndéé sanaha —càchí té Pãblú xáha<sup>n</sup>-dẽ xii-yu.

<sup>36</sup> Te xáha<sup>n</sup> tucu-dé:

—Te té Dàvií ní quide-dé nchaa chiú<sup>n</sup> ní táhú Yã Ndiöxí cada-dé, te dàtnùnì ní xihí-dé. Te ní chindúxi ñaha-güedẽ xii-dé yatni nàcuáa yindúxi cue ñaní tnáhá-dẽ ndéé sanaha-gã, te xiã<sup>n</sup> nĩ téhyú yiqui cùñú-dé. <sup>37</sup> Te Jèsús chi ñá ní téhyú yiqui cùñú-gá, chi ní dándótó ñaha Yã Ndiöxí xii-gá. <sup>38</sup> Te cuiní-í cachí tnúhu-í xii-ndo cuendá cutnùnì iní-ndó nchaa-ndo sá cáda càhnu iní Yã Ndiöxí nchaa cuéchi-o, chi ní xihí Jèsús cuendá naníhí tàhú-ó. <sup>39</sup> Te nchaa ñáyiu na quindáá iní ñáhá xii Jèsús te cada càhnu iní-gá nchaa sá ñà túú vãha ní quide-yu, chi núú mee-ni tnúhu ní chídó tnùnì ndíi Moisés ná quindáá iní-yu te vá naníhí tàhú-yu.

<sup>40-41</sup> Te ío coto-ndo mée-ndo cuendá sá vã yãha-ndo dàtná ní cachí Yã Ndiöxí yáha cue ñáyiu ñá túú ní quide váha ní xíndecu ndéé sanaha. Te nàcuáa ní cáhá<sup>n</sup>-gá ní chídó tnùnì ì<sup>n</sup> téé ní cáhá<sup>n</sup> tnúhu-gá ndéé sanaha, te duha ní xáha<sup>n</sup>-gã xii-yu dàvá-á<sup>n</sup>:

Cundedóho nchaa nchòhó ñáyiu cuèhé yuhu-xi na càhá<sup>n</sup>-í ì<sup>n</sup> tnúhu te quiní-ndó nã cuñúhu-ndo,

yúhú quide-í vai núú sã ío váha vitna ndècu-ndo ñuyíú-a,

te cuèi na cò ñáyiu cachí tnúhu xii-ndo nàcuáa ndùu nchaa

sá vãha-á<sup>n</sup>, dico nchòhó vá quindáá iní-ndó,

te sá dúcá<sup>n</sup> càda-ndo vá quindáá iní-ndó, te dàcuíta nihnu-ndo mée-ndo.

Duha ní xáha<sup>n</sup>-gã xii-yu te duca<sup>n</sup> nĩ chídó tnùnì téé ní cáhá<sup>n</sup> tnúhu-gá ndéé sanaha —càchí té Pãblú xáha<sup>n</sup>-dẽ xii-yu.

<sup>42</sup> Te òré ní ndee té Pãblú veñúhu ñáyiu isràél ndihí cue téé xica cuu ndihí-dé, te ní cáhá<sup>n</sup> ndàhú ñáyiu yihí veñúhu núú-dẽ sá quihí<sup>n</sup>-dé núú ùná nduu, te ðiu-ni tnúhu ní cáhá<sup>n</sup>-dé cáhá<sup>n</sup> tucu-dé òré quexio-dé. <sup>43</sup> Te sá tá ná nĩ túhú veñúhu-yu, te vai ñáyiu isràél ndihí ñáyiu ní chitnahá ñáhá xii-yu nchìcú<sup>n</sup> nihnu quide nacuáa quide-yu càhá<sup>n</sup> ndihí-yu Yã Ndiöxí cuáhá<sup>n</sup> ndihí-yu té Pãblú ndihí té Bèé. Te ní xáha<sup>n</sup>-güedẽ xii-yu sá vã dáñá ndèe-yu canchicú<sup>n</sup> nihnú-yu tnúhu sá càhá<sup>n</sup> nàcuáa quide Yã Ndiöxí sá cúú-xi-yu.

<sup>44</sup> Te núú ùná nduu, nduu ndetátú-yu ní quexio vai vihi ñáyiu, chi nihí ñuú ní quexio ndedóho-yu tnúhu Yã Ndiöxí. <sup>45</sup> Te cuendá sá ío vai ñáyiu ní quexio, núú xiã<sup>n</sup> ní cuu cuédú iní ñáhá ñáyiu isràél xii té Pãblú, te ní xicuèhé ñáhã-yu xii-dé. Te ní xáhá<sup>n</sup>-yu xii-dé sá dándàhú ñáhá-dẽ xii-yu ndihí tnúhu càhá<sup>n</sup>-dé. <sup>46</sup> Te té Pãblú ndihí té Bèé ñá túú ní yúhú ñáhá-güedẽ xii-yu. Te ní xáha<sup>n</sup>-güedẽ:

—Xini ñuhu-xi díhna-gá nchòhó ñáyiu isràél cáhá<sup>n</sup> ndihí-ndí tnúhu Yã Ndiöxí, te mee-ndo ñã cuiní-ndó cundedóho-ndo. Te sá dúcá<sup>n</sup> quide-ndo, te vá naníhí tàhú-ndó, te ni vã càhá<sup>n</sup>-gá-ndí tnúhu Yã Ndiöxí núú-ndó, dico cáhá<sup>n</sup>-ndí núú dàva-gá ñáyiu cuèi ñá díú ñáyiu isràél cúú-yu,

<sup>47</sup> chi duca<sup>n</sup> nĩ táuchíú<sup>n</sup> Yã Ndiöxí cada-ndí. Te ní cachí-gá:

Cuiní-í cundecu-ndo dàtná ì<sup>n</sup> téé yòtnuú ñuhú cundecu-ndo

cáhá<sup>n</sup>-ndó tnúhu-í núú nchaa ñáyiu ñá túú cùndihí-ndo ñáyiu ndècu nihí ñuyíú, te naníhí tàhú-yu,

duha ní cáhá<sup>n</sup>-gá —càchí té Păblú ndihí té Bèé xăha<sup>n</sup>-güedě xií-yu.

<sup>48</sup> Te ñáyiú ñá túú cùu ñáyiú isràél ío ní cudíí iní-yu sá dúcá<sup>n</sup> ñí cáhá<sup>n</sup>-güedé, te ní xítñahá-yu sá ío váha cuáhá<sup>n</sup> tnúhu Yá Ndiöxí. Te mee Yă Ndiöxí sa ñaha-gá nándi cùu ñáyiú naníhí tǎhú, te ñu-ni ñáyiú-á<sup>n</sup> ñí sándáá iní-yu. <sup>49</sup> Te nchaa xichi xiá<sup>n</sup> ñí sáhá<sup>n</sup>-yu ní cáhá<sup>n</sup>-yu tnúhu-gá. <sup>50</sup> Te cue téé isràél ní ndatnúhu-güedé ndihí cue téé cùnūu, ndihí cue ñáyiú ñíhí cùnūu, te ñáyiú ñíhí-á<sup>n</sup> ñà túú tnàhí cùmáñi-yu veñúhu. Te ní xáha<sup>n</sup>-güedé sá cádá ũhú-yu té Păblú ndihí té Bèé, te dǎtnùní cuícú<sup>n</sup> ñáhă-yu xii-güedé, te duca<sup>n</sup> ñí quidé-yu. <sup>51</sup> Te ní casa<sup>n</sup> ñuhu té Păblú ndihí té Bèé sáhá-güedé ní naquidi-güedé tícá chúhmá ñí tní sáhá-güedé. Te duca<sup>n</sup> ñí quide-güedé cuendá cutnùní iní-yu sá ñà túú ní quide váha-yu. Te dǎtnùní ní quee-güedé cuáhá<sup>n</sup>-güedé ñuú Ìconiú. <sup>52</sup> Te ñáyiú ní sándáá iní-xi tnúhu Jèsús ío váha ní cuu iní-yu cuendá sá ñí naníhí tǎhú-yu, te nchaá-yu sa ndècu ndihí-yu Espíritú Yă Ndiöxí.

## 14

*Té Păblú ndihí té Bèé ndécú-güedé ñuú Ìconiú*

<sup>1</sup> Te ní quexìo té Păblú ndihí té Bèé ñuú Ìconiú. Te ní sáhá<sup>n</sup>-güedé veñúhu ñáyiú isràél, te ío váha ní cáhá<sup>n</sup>-güedé tnúhu Yá Ndiöxí, te vâi ñáyiú isràél ndihí ñáyiú ñá túú cùu ñáyiú isràél ní sándáá iní-yu tnúhu-gá. <sup>2</sup> Te dava ñáyiú isràél ñá ní sándáá iní-yu, te ní cáhá<sup>n</sup> cuèhé-yu cuendá té Păblú ndihí té Bèé cuendá sá vǎ quíndáá iní ñáyiú ñá túú cùu ñáyiú isràél. <sup>3</sup> Te ní xíndecu-güedé títní nduu, te ñá túú tnàhí ni yùhú-güedé ní dácuáhá-güedé ñáyiú tnúhu Yá Ndiöxí. Te mee-gǎ ní chindee ñaha-gá ní quide-güedé títní núú sǎ vǎ yôo tnàhí ndàcu cada, te ío ní cuñúhu-yu. Te duca<sup>n</sup> ñí quide-gá cuendá cutnùní iní-yu sá ndàá càhá<sup>n</sup>-güedé sá méé-gǎ ío cùu iní ñáhă-gǎ xií-yu, te naníhí tǎhú-yu

núu na quíndáá iní-yu tnúhu-gá. <sup>4</sup> Te ní quee dava ñáyiú ñuú Ìconiú, davá-yu cùndihí-yu ñáyiú isràél ñáyiú ñá túú sándáá iní tnúhu Jèsús. Te davá-yu cùndihí-yu cue téé ní táuchíú<sup>n</sup> Jèsús càhá<sup>n</sup> tnúhu-gá. <sup>5</sup> Te ñáyiú isràél ndihí dava-gá ñáyiú ñá túú sándáá iní-xi ní cuu ñí<sup>n</sup>núú-yu ndihí cue téé cùnūu sá cáni-yu-güedé, te cuáha yúú ñáhă-yu xii-güedé. <sup>6</sup> Te té Păblú ndihí té Bèé ní níhí-güedé tnúhu sá cuíní-yu canihá-yu, núu xiá<sup>n</sup> dayuhu ñí quee-güedé cuáhá<sup>n</sup>-güedé ñuú Lìstrá ndihí ñuú Dèrbé. Te ndi ndùú ñuú-á<sup>n</sup> yíndèhu-xi Licaoniá. Te ní sáhá<sup>n</sup>-güedé dava-gá ñuú lìhli càa yatni xiá<sup>n</sup>. <sup>7</sup> Te nchaa ñuú-á<sup>n</sup> ñí cáhá<sup>n</sup>-güedé tnúhu Jèsús.

*Ñuú Lìstrá ní sáha yúú ñáhă-yu xii té Păblú*

<sup>8</sup> Te ñuú Lìstrá ndécú ñí<sup>n</sup> téé yacua, mee-ni núcóo-dé chi duca<sup>n</sup> tnàhí càa-dé ní cacu-dé. <sup>9</sup> Te ndèdóho-dé tnúhu càhá<sup>n</sup> té Păblú, te ní cutnùní iní té Păblú sá ío sándáá iní téé yacua-ǎ<sup>n</sup> sǎ Yă Ndiöxí cada tátna ñaha-gǎ xii-dé, núu xiá<sup>n</sup> ní xíndéhé ñaha váha té Păblú xii-dé. <sup>10</sup> Te té Păblú ní cáhá<sup>n</sup> níhi-dé, te ní xáha<sup>n</sup>-dè:

—Ndacuíñí cunutnîi váha-n —càchí-dé xăha<sup>n</sup>-dè.

Te ní ndacuíñí cunu-dé te ní xica-ni-dé. <sup>11</sup> Te òré ní xiní-yu sá té Păblú ní quide tátna-dé téé yacua-ǎ<sup>n</sup>, te nchaá-yu ní cáhá<sup>n</sup>-yu tnúhu mèe-yu tnúhu Licàoniá. Te ní cáhá<sup>n</sup> níhi-yu, te xítñahá-yu:

—Cue téé-ǎ<sup>n</sup> sànuu sá ñáyiú cùu-güedé dico ñáhă, chi ndiöxí cúu-güedé te ní quexìo-güedé ñuyíú-a —càchí-yu xítñahá-yu.

<sup>12</sup> Te ní cachí-yu sá tǎ Bèé cúú-dě ndiöxí dánàni-yu Jüpitér, te té Păblú cúú-dě ndiöxí dánàni-yu Mèrcuriú, chi cuendá téé-á<sup>n</sup> cúú-dě téé càhá<sup>n</sup>. <sup>13</sup> Te càa ñí<sup>n</sup> veñúhu yuhu ñuú-á<sup>n</sup> núú quidé càhnú-yu ndiöxí sá dánàni-yu Jüpitér. Te dútú yíndàha veñúhu-á<sup>n</sup> ndécá-dě ñí<sup>n</sup> úú ndicutu cuáhá<sup>n</sup> quehé veñúhu, te ñuhu itá dúcú<sup>n</sup>-güedi. Te cue quiti-á<sup>n</sup> cahni-dé cada càhnu-dé

ndihí-yu té Bèè ndihí té Páblú ní cùu, chi duca<sup>n</sup> quidé-yu quide cahnú-yu ndiöxí-yu. <sup>14</sup> Te té Bèè ndihí té Páblú ní níhí-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuendá cutnùní iní-yu sá ñã tnàhá iní-güedé nàcuáa sàni iní-yu cadá-yu. Te xínu-güedé cuánguñhu-güedé tnuú-yu, te níhi ní cáhá<sup>n</sup>-güedé, te xáha<sup>n</sup>-güedé:

<sup>15</sup> —¿Ná cuendá duca<sup>n</sup> cuñí-ndo càda-ndo? Te ñu-ni tnàha ñáyiu-ndo cùu-ndí, dìcò-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vã cadá-gã-ndó nàcuáa quide-ndo, te quindáá iní-ndó Yá Ndiöxí, chi ñ<sup>n</sup>dli-ni Yá Ndiöxí ndécú. Te ñu-gá ní cadúha-gá andiu ndihí ñuyíú-a ndihí lámár ndihí nchaandi túhú sá ío ñuyíú-a. <sup>16</sup> Te ndéé sanaha ñí dáña Yá Ndiöxí ní quidé-yu nàcuáa cuáhá<sup>n</sup> iní mée-yu. <sup>17</sup> Te ní xóo cada-gá sá vãha cuendá cutnùní iní-yu sá ío vãha iní-gá. Te ñu-gá dácùu<sup>n</sup>-gá dáu, te tàxi-gá sá nchító-ó chi xito-gá nchaa tatá xítú-ó, te xiã<sup>n</sup> cúñí ñí-ó ndecu-o ñuyíú-a —càchí té Páblú ndihí té Bèè xáha<sup>n</sup>-güedé xii-yu.

<sup>18</sup> Te cuèi duca<sup>n</sup> ñí xáha<sup>n</sup>-güedé nchaa tnúhu-á<sup>n</sup>, dico ío úhú ní sándáá iní-yu ñá ní sàhñi-yu ndicutu-á<sup>n</sup> chi cuendá duca<sup>n</sup> tnàhí quidé-yu sàhñi-yu ndicutu òré quidé cahnú-yu ndiöxí-yu.

<sup>19</sup> Te ñuú Antiòquiá ndihí ñuú Ìconiú xíndecu dava ñáyiu isràél, te ní queé-yu cuáhá<sup>n</sup>-yu ñuú Lìstrá núu ndécú té Páblú. Te xiá<sup>n</sup> ñí quexió-yu te ní xáhã<sup>n</sup>-yu xii ñáyiu dii ñuú xiá<sup>n</sup> sã cáhñi-yu té Páblú. Te ní sáha yúú ñáhã-yu xii-dé, te ní cáhã<sup>n</sup>-yu sá ñí xihí-dé, te ní tñi ñaha-güedé xii-dé, te tàñuhu ñaha-güedé xii-dé cuáhá<sup>n</sup> ñ<sup>n</sup> xio yuhu ñuú ní sá dáquéné ñaha-güedé. <sup>20</sup> Te ní quexió cue ñáyiu sándáá iní tnúhu Jèsús núu cátùu-dé-á<sup>n</sup>, te ní nadúcú<sup>n</sup> ndéé ñáhã-yu xii-dé, te ñini xñnutnñi-yu-á<sup>n</sup> ñí ndacóo-dé cuánuhú ndihí ñaha tùcu-dé xii-yu xití ñuú. Te nduu tnéé-á<sup>n</sup> ñí ndee-dé ndihí té Bèè cuáhá<sup>n</sup>-güedé ñuú Dèrbé.

<sup>21</sup> Te ní cáhá<sup>n</sup>-güedé tnúhu Yá Ndiöxí ñuú-á<sup>n</sup>, te ío vãi ñáyiu ní sándáá iní-yu tnúhu-gá. Te dàtnùní ní quee-güedé cuáhá<sup>n</sup> tucu-güedé ñuú Lìstrá, ndihí ñuú Ìconiú, ndihí ñuú Antiòquiá. <sup>22</sup> Te ní xáha<sup>n</sup>-güedé xii-yu sá vã dáña ñihnú-yu tnúhu Jèsús. Te sá dúcá<sup>n</sup> ñí cáhá<sup>n</sup>-güedé, te vñhi-gá ní cudñi iní-yu cadá-yu nàcuáa cuñí Yá Ndiöxí cadá-yu, te ní xáha<sup>n</sup>-güedé:

—Dacuitíí cùndecu-o ñuyíú-a ndoho-o, te dàtnùní duca<sup>n</sup> te nacuaca ñaha Yá Ndiöxí xii-o —càchí-güedé xáha<sup>n</sup>-güedé xii-yu.

<sup>23</sup> Te ní sáhá<sup>n</sup>-güedé ndi tnahá ñ<sup>n</sup> ñ<sup>n</sup> xichi núu ndécú ñáyiu dacuaha tnúhu Yá Ndiöxí, te ní taxi ndecu-güedé cue té quindaha ñaha xii-yu, te ní cáhá<sup>n</sup> ndihí-güedé Yá Ndiöxí, te ñá túú tnàhí ná ní xèxi-güedé cuendá sá ñí cáhá<sup>n</sup> ndihí-güedé-gá. Te ní xáha<sup>n</sup>-güedé sá Yá Ndiöxí coto ñaha-gã xii-yu chi ñu-ni-gá ní sándáá iní-yu.

*Té Páblú ndihí té Bèè cuáhá<sup>n</sup> tucu-güedé ñuú Antiòquiá Síría*

<sup>24-25</sup> Te dàtnùní ní quee té Páblú ndihí té Bèè cuáhá<sup>n</sup>-güedé, ní yáha-güedé distritú Pìsidiá. Te ní quexio-güedé ñuú Pèrgé, xiá<sup>n</sup> ñí cáhá<sup>n</sup>-güedé tnúhu Jèsús. Te ñuú-á<sup>n</sup> yíndèhu-xi Panfiliá. Te dàtnùní cuáhá<sup>n</sup>-güedé ñuú Àtaliá. <sup>26</sup> Te yacá<sup>n</sup> ní quee-güedé bàrcú cuánuhú tucu-güedé ñuú Antiòquiá. Te ñuú-á<sup>n</sup> cúu-xí ñuú núu ñí xicá<sup>n</sup> táhñu-yu núu Yá Ndiöxí cuendá sá chíndèe ñaha-gá xii-güedé chiu<sup>n</sup> quide-güedé. Te cuendá sá ñí ndihí chiu<sup>n</sup>-güedé nchaa ñuú núu ñí sáhá<sup>n</sup>-güedé, núu xiã<sup>n</sup> cuánuhú-na-güedé. <sup>27</sup> Te ní ndexio-güedé ñuú-á<sup>n</sup>, te ní cana-güedé nchaa ñáyiu sándáá iní tnúhu-gá, te ní cani-güedé cuendú núu-yu nchaa nàcuáa ní cuu núu ñí sáhá<sup>n</sup>-güedé, te xáha<sup>n</sup>-güedé: “Yá Ndiöxí ío ní chindee ñaha-gá xii-ndí ní cáhá<sup>n</sup>-ndí tnúhu-gá núu ñí sáhá<sup>n</sup>-ndí, te mee-gã ní quide sá tnàhá ñáyiu ñá túú cùu ñáyiu isràél ní xíndedóho-yu tnúhu-gá cuendá quindáá iní-yu”, càchí-güedé



xáha<sup>n</sup>-güedě xii-yu. <sup>28</sup> Te vai nduu ní xíndecu-güedé ñúú Antiòquia ndihi nchaa ñáyiú ní sándáá iní tnúhu Jèsús.

## 15

### *Ní natacá ñáyiú sàndáá iní tnúhu Jèsús ñúú Jerusálén*

<sup>1</sup> Te ní quee ì<sup>n</sup> úú cue téé distritú Jùdeá cuáhá<sup>n</sup>-güedé ñúú Antiòquia, te ní sáá-güedé, te ní xáha<sup>n</sup>-güedé xii ñáyiú sàndáá iní tnúhu Jèsús sá nùu vá cuáha-güedé sèñá ñ<sup>ii</sup> nchaa cue téé dàtná ní cachí ndíi Moisés, te vá nánihí tàhú-güedé. <sup>2</sup> Te sá dúcá<sup>n</sup> nǐ cáhá<sup>n</sup> cue téé-á<sup>n</sup>, te ní ngüíta té Páblú ndihí té Bèé ní tenáá-güedé cue téé-á<sup>n</sup>, chi dandàhú ñáhá-güedé cuìní-güedé ní cùu. Te nchaa ñáyiú sàndáá iní tnúhu-gá ní cachí-yu sá quìhí<sup>n</sup> té Páblú ndihí té Bèé ndihí ì<sup>n</sup> úú-gá-güedé ñúú Jerusálén. Te yàcá<sup>n</sup> cada-güedé ì<sup>n</sup> jùndá ndihí mee-ni cuè téé ní táuchíú<sup>n</sup> Jèsús cáhá<sup>n</sup> tnúhu-gá, ndihí cue téé yìndaha ñáyiú sàndáá iní tnúhu-gá ñúú-á<sup>n</sup>, te jùndá-á<sup>n</sup> cada ndáá-güedé tnúhu ní cáhá<sup>n</sup> cue téé ní sáá ñúú Antiòquia.

<sup>3</sup> Te nchaa ñáyiú sàndáá iní tnúhu-gá ní quide ndee iní ñáhá-yu xii-güedé, te ní tñi-güedé ichi cuáhá<sup>n</sup>-güedé. Te ní yáha-güedé distritú Fèniciá ndihí distritú Sámariá, te yàcá<sup>n</sup> ní caní-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí iní nchaa ñáyiú ní xíndedóho-á<sup>n</sup>.

<sup>4</sup> Te té Páblú ndihí té Bèé ní ndexìo-güedé ñúú Jerusálén, te ío ní cudíí iní-yu sá nǐ ndexìo váha-güedé. Te ndècu dava-gá cue téé ní táuchíú<sup>n</sup> Jèsús dácuàha ñaha xii-yu tnúhu-gá, ndihí cue téé yìndaha ñaha xii-yu, ndihí dava-gá ñáyiú sàndáá iní tnúhu-gá, te ní caní-güedé cuèndú núu-yu nàcuáa ní quide Yá Ndiòxí ní chindee ñàha-gá xii-güedé ní quide-güedé chiu<sup>n</sup>-gá. <sup>5</sup> Te ndècu ì<sup>n</sup> úú cue téé ní tuha ichi Yá Ndiòxí, te cue téé-á<sup>n</sup> cúú-güedé cue téé fariséú, te ní ndacuíñí-güedé, te ní xáha<sup>n</sup>-güedé:

—Dacuití xini ñuhu-xi sá cuáha-güedé sèñá ñ<sup>ii</sup> cue téé cùmání cue téé ñá túú cùu ñáyiú isràél, te cùñaha-ndo sá ná cáda-güedé nchaa nàcuáa ní chídó tnùní ndíi Moisés —càchí cue téé cùu fariséú-á<sup>n</sup> xáha<sup>n</sup>-güedé xii-güedé.

<sup>6</sup> Te cue téé ní táuchíú<sup>n</sup> Jèsús dacuàha ñaha xii ñáyiú tnúhu-gá, ndihí cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. <sup>7</sup> Te vai vihi tnúhu ní cáhá<sup>n</sup>-güedé. Te té Pèlú ní ndacuíñí-dé, te ní xáha<sup>n</sup>-dè xii-güedé:

—Nchòhó cue téé ndècu ndihí-í ichi Xítóhó Jesucristú, chí cùndedóho ì<sup>n</sup> tnúhu na càhá<sup>n</sup>-í-a. Sa nàha-ndo sá nǐ cachí Yá Ndiòxí sá diù-í cáhá<sup>n</sup>-í tnúhu Jèsús núú ñáyiú ñá túú cùu ñáyiú isràél cuèndá sá quìndáá iní-yu, te naníhí tàhú-yu. <sup>8</sup> Dico Yá Ndiòxí sa nàha-gá nása càa iní ì<sup>n</sup> ñáyiú. Te cùtnuní iní-ó sá cúú iní ñáhá-gá xii cue ñáyiú ñá túú cùu ñáyiú isràél, chi ní sáñaha-gá Espiritú-gá ndécú ndihí-yu dàtná cuìní-ndó nǐ taxi-gá ndécú ndihí nchoo. <sup>9</sup> Chi Yá Ndiòxí ì<sup>n</sup> nuu-ni cùu iní ñáhá-gá xii-o nchaa-o ndihí cue ñáyiú ñá túú cùu ñáyiú isràél, chí tnàhá-yu ní xócání-gá nchaa sá cuèhé sá dúhá nǐ xóo cadá-yu ndéé òré ní sándáá iní-yu Jèsús. <sup>10</sup> ¿Te ná cuèndá nchòhó cuìní-ndó càda ñáyiú ní sándáá iní tnúhu-gá ì<sup>n</sup> sá ñá tnàhá iní-gá sá cáda-yu? Te cuìní-ndó dàndoho-ndó-yu. Te ni nchò te ni cue ñaní tnàhá-ó nǐ xíndecu ndéé sanaha ñá ní ndàcú-yu cadá-yu nchaa xiá<sup>n</sup>. <sup>11</sup> Te vá dúcá<sup>n</sup> cáhá<sup>n</sup>-ndó, chi sa nàha-ndo sá Yá Ndiòxí ní cundàhú iní ñáhá-gá xii-o, te dió duca<sup>n</sup> nǐ quide-gá sá nánihí tàhú-ó nchaa-o. Te diu-ni duca<sup>n</sup> nǐ quide-gá ñáyiú ñá túú cùu ñáyiú isràél, te ní naníhí tàhú-yu —càchí té Pèlú xáha<sup>n</sup>-dè xii-güedé.

<sup>12</sup> Te dàtnuní té Bèé ndihí té Páblú ní ngüíta-güedé ní cáhá<sup>n</sup>-güedé, te ní xíndedóho-yu nchaa tnúhu ní cáhá<sup>n</sup>-güedé. Te ní xáha<sup>n</sup>-güedé xii-yu nàcuáa ní chindee ñàha Yá Ndiòxí xii-güedé, te ní quide-güedé vai núú sá vá yóo tnàhí ndàcu cada, te duca<sup>n</sup> te ní cutnùní iní ñáyiú ñá túú cùu ñáyiú

israél sá ndàá càhá<sup>n</sup>-güedé. <sup>13</sup> Te òrè ní ndìhi cuèndú ní càhá<sup>n</sup>-güedé, te té Jàcobó ní xáha<sup>n</sup>-dë:

—Nchòhó cue tée ndècu ndìhi-í ichi Xítóhó Jesucristú, chí cündedóho ì<sup>n</sup> tnúhu na càhá<sup>n</sup>-í-a. <sup>14</sup> Té Xímú, àdi Pelú chi úú òu-dé, ní cani-dé cuèndú nàcuáa ní quide Yá Ndiòxí ndéé díhna ní dáquée ò<sup>n</sup>-gá ñáyiú ñá túú cùu ñáyiú israél tnuú nchaa ñáyiú ñá túú ndècu ichi-gá, cuèndá cuèni-gá chiñuhu ñàhá-yu xii-gá. <sup>15</sup> Te dàtnùní ní càhá<sup>n</sup>-dé nàcuáa ní càhá<sup>n</sup> Yá Ndiòxí ndéé sanaha. Te duha ní chídó tnùnì cue tée ní xóo càhá<sup>n</sup> tnúhu-gá ndéé sanaha nàcuáa ní càhá<sup>n</sup>-gá, te duha ní cachí-gá:

<sup>16</sup> Dàtná cuèni-ndó cùu ì<sup>n</sup> vehe ní sáa te ní ngoyo te dàndaa-güedé xito cùu uú, duca<sup>n</sup> sãtnahá-xi cada-xi ì<sup>n</sup> nduu,

chi ñaní tnáhá ndì Dáví ní xóo càhá<sup>n</sup> ndìhi ñàhá-yu xii-í ní cùu, te ní dàñá ndéé-yu ichi-í,

te na quixi-í te natuha ñaha tùcú-yu.

<sup>17</sup> Te duca<sup>n</sup> te vài ñáyiú ñá túú cùu ñáyiú israél nandúcú-yu ichi-í te càhá<sup>n</sup> ndìhi ñàhá-yu.

<sup>18</sup> Duha ní càhá<sup>n</sup> Yá Ndiòxí, te duca<sup>n</sup> ní chídó tnùnì cue tée ní xóo càhá<sup>n</sup> tnúhu-gá ndéé sanaha —càchí té Jàcobó xáha<sup>n</sup>-dë xii-güedé.

<sup>19</sup> Te xáha<sup>n</sup> tùcu-dé:

—Yúhú càchí iní-í sá vã cúú dàsatú-ó iní nchaa ñáyiú ta sãndáa iní-xi tnúhu Yá Ndiòxí, ñáyiú ñá túú cùu ñáyiú israél, te ì<sup>n</sup> úú-ni tnúhu cúñaha-o nàcuáa cadá-yu. <sup>20</sup> Dico xini ñuhu-xi daquihí<sup>n</sup>-ó tùtú cúñaha-o sã vã cáxi-gã-yu nchaa sá nchító-ó ndùu táhú nchaa sá càchí-yu cùu ndiòxí-yu. Te cúñaha-o sã vã càhá<sup>n</sup> ndìhi cue tée ñadìhi te núu ñá díú ñadìhi-güedé cúú-yu, te ni cuè ñáyiú dìhi vá càhá<sup>n</sup> ndìhi-yu tée te núu ñá díú yí<sup>n</sup>-yu cùu-güedé, te vá cáxi-yu cuñú quiti cuèhné, te vá cáxi-yu níñí. <sup>21</sup> Te duca<sup>n</sup> cúñaha-o, chí ndi tnahá ñuú núú ndécú-yu, te xíndecu ñáyiú israél dácuahá-yu tnúhu ní chídó tnùnì ndì Moisés, te ndi tnahá nduu ndètátú-yu

dàcuahá-yu tnúhu ndì veñúhu-yu —càchí té Jàcobó xáha<sup>n</sup>-dë xii-güedé.

<sup>22</sup> Te dàtnùní cue tée ní táuchíú<sup>n</sup> Jèsús dacuàha ñaha xii-yu tnúhu-gá, ndìhi cue tée yíndaha ñáyiú sãndáa iní tnúhu-gá ní cachí-güedé sá ndúcú-güedé ì<sup>n</sup> úú-gá cue tée quíhí<sup>n</sup> ndìhi té Páblú ndìhi té Bèé ñuú Antiòquiá, te òu-ni duca<sup>n</sup> ní càhá<sup>n</sup> dava-gá ñáyiú ndècu ichi-gá. Te úú cue tée ní ndúcú-güedé, ì<sup>n</sup>-dé nání-dë Silás, te ì<sup>n</sup>-dé nání-dë Jùdás, àdi Barsabás chi úú òu-dé, te cùnuu-güedé ndi ndúú-güedé. <sup>23</sup> Te ní cadúha nchaa cue tée cùnuu tutú canehe-güedé quíhí<sup>n</sup>, te duha càhá<sup>n</sup>-xi:

“Cóvãha díí-ndó nchàa-ndo. Nchúhú cue tée ní táuchíú<sup>n</sup> Jèsús càhá<sup>n</sup>-ndí tnúhu-gá, ndìhi cue tée yíndaha cue ñáyiú sãndáa iní tnúhu-gá quide ndee iní ñàhá-ndí xii nchòhó cue ñáyiú ndècu ndìhi-ndí ichi-gá cuèi ñá díú ñáyiú israél cúú-ndó. Te nchòhó ñáyiú xíndecu ñuú Antiòquiá, ndìhi nchòhó ñáyiú ndècu distritú Sìriá, ndìhi nchòhó ñáyiú ndècu distritú Cìliciá, càchí tnúhu-ndí xii-ndo sã <sup>24</sup> ní níhí-ndí tnúhu sá ì<sup>n</sup> úú cue tée ndècu iha ní quixi-güedé núú ndécú-ndó, te ñá túú chiú<sup>n</sup> ni tahu-ndí quixi-güedé. Te sá ì<sup>n</sup> tnúhu ní càhá<sup>n</sup>-güedé ní xáha<sup>n</sup>-güedé xii-ndo sã ngündecu seña ñi-ndo, te canchicú<sup>n</sup> ñihnu-ndo nchàa nàcuáa ní chídó tnùnì ndì Moisés, te xíã<sup>n</sup> ní sani ì<sup>n</sup> ní sani úú iní-ndó, chí ñá túú xini-ndó núu ndáa tnúhu càhá<sup>n</sup>-güedé àdi ñá ndáa. <sup>25</sup> Te ní ndatnúhu-ndí nàcuáa cunduu sá téndaha-ndí úú cue tée quixi-güedé ndìhi té Bèé ndìhi té Páblú, cue tée ío cùu iní-ndí, te cue tée-á<sup>n</sup> càhá<sup>n</sup>-güedé nàcuáa càhá<sup>n</sup>-ndí-a. <sup>26</sup> Te òu-ni té Bèé ndìhi té Páblú ní sáhá<sup>n</sup>-güedé ní càhá<sup>n</sup>-güedé tnúhu Xítóhó Jesucristú nchaa xichi. Te ndi tnahá cuáhá<sup>n</sup>-güedé cuèni-yu cahni ñàhá-yu xii-güedé. <sup>27</sup> Te tendaha-ndí té Jùdás ndìhi té Silás quixi-güedé tnahá-güedé cachí tnúhu váha-güedé nàcuáa cuáhá<sup>n</sup> tnúhu càhá<sup>n</sup>-ndí.

28 Te diu-ni duca<sup>n</sup> càhá<sup>n</sup>-ndí cächí tñúhu-ndí nàcuáa càhá<sup>n</sup> Espiritú Yă Ndiöxí cada-ndo, chi nchúhú vá càhá<sup>n</sup>-ndí sá cádá-ndó nchàa sá nĩ càhá<sup>n</sup> ndí Moisés cada ñáyiu, chi ío úhú, te vá yõ ndacu cada. Te vitna na càhá<sup>n</sup>-ndí ì<sup>n</sup> úú-ni tñúhu nàcuáa cada-ndo. 29 Vá cáxí-ndó sã nchító-ó ndúu táhú nchaa sá cächí ñáyiu cùu ndióxí-yu, te vá cáxí-ndó nĩñí, te vá cáxí-ndó cùñú quití cuèhné, te vá càhá<sup>n</sup> ndihí cue tée ñadihí te núu ñá díú ñàdihí-güedé cúú-yu, te ni cuè ñáyiu dñí vá càhá<sup>n</sup> ndihí-yu tée te núu ñá díú yñ-yu cùu-güedé. Te núu na càda-ndo nchaa nacuáa càhá<sup>n</sup>-ndí-a, te cada váha-ndo. Te vitna ío cada ndee ìní-ndó nchàa-ndo-na.” Duha ní chídó tñuní-güedé núu tütú ní tendaha-güedé cuáhá<sup>n</sup>.

30 Te ní quide ndee ìní-yu cue tée quíhí<sup>n</sup> ñuú Antiòquia, te duca<sup>n</sup> te ní xica-güedé cuáhá<sup>n</sup>-güedé. Te òré ní quexio-güedé ñuú-á<sup>n</sup>, te ní cana-güedé nchaa ñáyiu sándáá ìní tñúhu Jèsús, te ní sãñaha-güedé tutú xii-yu. 31 Te ní dácuhã-yu tutú ní sãñaha-güedé-á<sup>n</sup>, te ní cudíí víhí ìní-yu chi ío váha càhá<sup>n</sup> tutú-á<sup>n</sup>. 32 Te té Jüdás ndihí té Silás tñahá-güedé ní nduu táhú-güedé càhá<sup>n</sup>-güedé tñúhu sá dácàhu ìní ñáhá Yă Ndiöxí. Te ní xáha<sup>n</sup>-güedé vãi tñúhu nàcuáa cadá-yu, te vñhi-gá ní cudíí ìní-yu cadá-yu nàcuáa càhá<sup>n</sup> Yă Ndiöxí cadá-yu. 33 Te ní xindecu-güedé ì<sup>n</sup> úú nduu ndihí-yu, te dätñuní ní quide ndee ìní ñáhã-yu xii-güedé cuendá sá nùhú-güedé núu vèxi-güedé, te mee-ni tã Jüdás cuánuhú-dé. 34 Te té Silás ní xáha<sup>n</sup>-dë sá vã nùhú-ni-dé. 35 Te té Pãblú ndihí té Bèé ní ndóo-güedé ní càhá<sup>n</sup>-güedé tñúhu Yă Ndiöxí ñuú Antiòquia, te vãi-gá tucu ñáyiu Antiòquia ní càhá<sup>n</sup>-yu tñúhu-gá.

*Xito cùu uú cuáhá<sup>n</sup> té Pãblú càhá<sup>n</sup>-dé tñúhu Yă Ndiöxí núu ñáyiu*

36 Te sátá nĩ cuu cuèhé nduu, te ní xáha<sup>n</sup> tã Pãblú xii té Bèé:

—Na quíhí<sup>n</sup>-ó nchàa ñuú núu nĩ sáhá<sup>n</sup>-ó nĩ càhá<sup>n</sup>-ó tñúhu Yă Ndiöxí càhá<sup>n</sup> ndihí-o nchàa ñáyiu ní tuha

ichi-gá cuendá quini-ó nõu ndècu váha-yu —cächí-dé xáha<sup>n</sup>-dë.

37 Te té Bèé ní xáha<sup>n</sup>-dë sá quíhí<sup>n</sup> ndihí-güedé té Juáá, àdi Mácú chi úú diu-dé. 38 Dico té Pãblú ñá ní dàña-gá-dé quíhí<sup>n</sup> té Juáá, chi ní dándóo ñaha-dë xii-güedé cùtnàhá ní xindecu-güedé Pãfiliá, te ní nacuico-dé cuánuhú-dé, te ñá túú-gã ní sáhá<sup>n</sup> ndihí ñaha-dë xii-güedé. 39 Xíã<sup>n</sup> ní cuu ní tenáá tñahá tã Bèé ndihí té Pãblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáhá<sup>n</sup>-güedé Chìpré. 40 Te té Pãblú ní xáha<sup>n</sup>-dë xii té Silás sá quíhí<sup>n</sup> ndihí ñaha-dë, te ñáyiu sándáá ìní-xi tñúhu Jèsús ní càhá<sup>n</sup> ndihí-yu Yă Ndiöxí sá chindèe ñaha-gá xii-güedé. 41 Te ní xica-güedé cuáhá<sup>n</sup>-güedé te ní yáha-güedé nihí distritú Siriá ndihí distritú Ciliciá. Te ní càhá<sup>n</sup>-güedé tñúhu Jèsús núu nchàa ñáyiu ní sándáá ìní tñúhu-gá, núu xíã<sup>n</sup> ío-gá ní cudíí ìní-yu cadá-yu nàcuáa càhá<sup>n</sup> Yă Ndiöxí.

## 16

*Tñahá té Timùteú cuáhá<sup>n</sup> ndihí-dé té Pãblú ndihí té Silás*

1 Te té Pãblú ndihí té Silás cuáhá<sup>n</sup>-güedé ñuú Dèrbé ndihí ñuú Lìstrá, te ñuú Lìstrá yacá<sup>n</sup> ndécú ì<sup>n</sup> tée nani Timuteú. Te tée-á<sup>n</sup> sándáá ìní-dé tñúhu Jèsús, te tñahá nãná-dë sándáá ìní-a<sup>n</sup> tñúhu-gá, te ñaha isràel cúú-á<sup>n</sup>, te tée griégú cúú tãtã-dë.

2 Te nchaa ñáyiu ní sándáá ìní tñúhu-gá ñáyiu ndècu ñuú Lìstrá, ndihí ñáyiu ñuú Iconiú, nchaa ñáyiu-á<sup>n</sup> cudíí ìní-yu nàcuáa quide-dé. 3 Te ní cuini té Pãblú sá tñahá té Timùteú quíhí<sup>n</sup> ndihí-dé dava-gá ñuú, núu xíã<sup>n</sup> díhna-gá seña ní sáha té Pãblú ññí té Timùteú, chi ñá ní tñahá ìní té Pãblú sá càhá<sup>n</sup> cuèhé ñáyiu isràel cuendá té Timùteú. Te nchaa ñáyiu isràel ndécú ñuú-á<sup>n</sup> xini-yu sá tãe griégú cúú tãtã-dë, te ñá díú tãe isràel cúú-dë, te xíã<sup>n</sup> ní sáha té Pãblú seña ññí té Timùteú. 4 Te ndi tñahá ñuú ndi tñahá ñuú cuáhá<sup>n</sup>-güedé càhá<sup>n</sup> ndihí-güedé nchaa ñáyiu ní sándáá ìní tñúhu Jèsús.

Te ní xáha<sup>n</sup>-güedě nàcuáa càhá<sup>n</sup> tutú ní cadúha cue téé ní táuchíú<sup>n</sup> Jèsús dacuàha ñaha xií-yu tnúhu-gá, ndihí cue téé yíndaha ñáyiú sàndáá iní tnúhu-gá ñuú Jerusàlén. <sup>5</sup> Te cuèndá duca<sup>n</sup> ñí sáhá<sup>n</sup>-güedé nchaa ñuú núú ndécú ñáyiú sàndáá iní tnúhu-gá ní dácúhá ñàha-güedé xií-yu, núú xiá<sup>n</sup> tá cùu túha-gá-yu tnúhu Yá Ndiöxí, te vài-gá-yu ní tuhá-yu ichi-gá.

*Ní dácótó ñàha-xi xii té Pàblú sá ní xiní-dé ñí té distritú Macèdoniá*

<sup>6</sup> Te ñá ní dàña Espiritú Yá Ndiöxí quíhí<sup>n</sup>-güedé càhá<sup>n</sup>-güedé tnúhu-gá distritú Àsiá, núú ní sáhá<sup>n</sup>-güedé distritú Frìgiá ndihí distritú Gàlaciá càhá<sup>n</sup>-güedé tnúhu-gá. <sup>7</sup> Te ní sáá-güedé yuhu distritú Misiá. Te quíhí<sup>n</sup>-güedé distritú Bitiniá ní cùu, dico ñá ní dàña Espiritú Yá Ndiöxí quíhí<sup>n</sup>-güedé yàcá<sup>n</sup>. <sup>8</sup> Te ní yáha-güedé Misiá, te ní quexìo-güedé ñuú Tròás, te yàcá<sup>n</sup> ní nanínáhá-ndí ndihí-dé. <sup>9</sup> Te ñí níú ní dácótó-xí núú tē Pàblú sá ñí xiní-dé ñí té distritú Macèdoniá nútñí-dé, te ní xáha<sup>n</sup> tē-á<sup>n</sup> xii té Pàblú: “Cada ndee iní-n quíhí<sup>n</sup>-n Macedoniá chi dacuàha ñàha-n nchaa sá xiní-n”, càchí-dé xáha<sup>n</sup>-dē, ní dácótó ñàha-xi xii té Pàblú. <sup>10</sup> Te cuèndá sá dúcá<sup>n</sup> ñí dácótó ñàha-xi xii té Pàblú núu ní ndatnúhu-ndí quíhí<sup>n</sup>-ndí Macèdoniá, chi ní cutnùní iní-ndí sá cáná ñàha Yá Ndiöxí quíhí<sup>n</sup>-ndí càhá<sup>n</sup>-ndí tnúhu-gá núú ñáyiú yàcá<sup>n</sup>.

*Té Pàblú ndihí té Silás ndécú-güedé ñuú Filipú*

<sup>11</sup> Te ní quée-ndí bàrcú ñuú Tròás, te cuáhá<sup>n</sup> ndáá-ndí ñuú Samòtraciá, te yàcá<sup>n</sup> ní quexìo-ndí, te ní yáha-ni-ndí cuáhá<sup>n</sup>-ndí. Te nduu tnéé ní quexìo-ndí ñuú Nèápolis. <sup>12</sup> Te yàcá<sup>n</sup> ní quene-ndí bàrcú, te xìca-na-ndí cuáhá<sup>n</sup>-ndí ñuú Filipú te ñuú-á<sup>n</sup> yíndèhu-xi distritú Macèdoniá. Te yàcá<sup>n</sup> ní cudíi-ndí ní xíndecu tnaa-ndí. Te ñuú Filipú-á<sup>n</sup> ío cùnno-xi, chi ío chitu ñáyiú rómá ní ngóo-yu. <sup>13</sup> Te nduu ndètátú-yu ní quée-ndí ñuú

cuáhá<sup>n</sup>-ndí ñí xio yuhu yíte, chi yàcá<sup>n</sup> sáhá<sup>n</sup>-yu càhá<sup>n</sup> ndihí-yu Yá Ndiöxí. Te òré ní quexìo-ndí, te ní naníhí tnáhá-ndí ndihí mee-ni ñáyiú dñí, te ní càhá<sup>n</sup>-ndí tnúhu Yá Ndiöxí ní xíndedóho-yu. <sup>14</sup> Te ndècu ñí ñàha nani Lidiá ní xíndedóho-a<sup>n</sup> nàcuáa ní càhá<sup>n</sup>-ndí, te ñàha ñuú Tiàtirá cúu-á<sup>n</sup>, te dīco-a<sup>n</sup> dóo murádú, te ío càhá<sup>n</sup> ndihí-a<sup>n</sup> Yá Ndiöxí. Te diu-ni mee Yá Ndiöxí ní chindee ñàha-gá ní sàndáá iní-a<sup>n</sup> tnúhu ní càhá<sup>n</sup> té Pàblú. <sup>15</sup> Te ní sandute-a<sup>n</sup> ndihí landú-a<sup>n</sup>, ndihí nchaa ñáyiú xínu cuechi núu-a<sup>n</sup>, te ní cachí-a<sup>n</sup> xii-ndí:

—Te núu ní cutnùní iní-ndó sá ñí sàndáá ndisa iní-í tnúhu Jèsús, te cundecu tnaa-ndo vehe-í —càchí-a<sup>n</sup> xii-ndí.

Te ní quide yica-a<sup>n</sup> ñí xíndecu-ndí vehe-a<sup>n</sup>.

<sup>16</sup> Te ñí nduu ñùhu-ndí ichi cuáhá<sup>n</sup>-ndí núu càhá<sup>n</sup> ndihí-yu Yá Ndiöxí, te ní naníhí-ndí ñí xíchí ñúhú ichi, te yíhi ñàha espíritú cùndihí yucu ñávàha xii-xi. Te xiá<sup>n</sup> ní quide ní càhá<sup>n</sup>-xi nchaa sá vā yōo tnàhí cùtnuní iní-xi núu nchaa ñáyiú ní sàngándihí ñàha xii-xi. Te ñáyiú dii vehe-xi xínu cuechi-xi ío vài díhú<sup>n</sup> ñí níhi-yu chi ní cháhu nchaa ñáyiú ní sàngándihí ñàha xii-xi. <sup>17</sup> Te xíchí-á<sup>n</sup> ñí chinchícú<sup>n</sup> ñáhá-xí xii-ndí ndihí té Pàblú ndèndaha ñàha-xi cuáhá<sup>n</sup>, te ní càhá<sup>n</sup> níhi-xi xáha<sup>n</sup>-xi xii dāva-gá ñáyiú:

—Cue téé-a xínu cuechi-güedé núu Yá Ndiöxí, chi ío càhnu cuu-gá, te càchí tnúhu-güedé nása cada-ndo naníhí tñhú-ndó —càchí-xi xáha<sup>n</sup>-xi xií-yu.

<sup>18</sup> Te titní xito ní yáha-ndí duca<sup>n</sup>-ni ñí càhá<sup>n</sup>-xi. Te ñá ní cùndee-gá iní té Pàblú sá dúcá<sup>n</sup> càhá<sup>n</sup>-xi, núu ní nanhocuñhu-dé núu nútñí-xi, te ní xáha<sup>n</sup>-dē xii espíritú cùndihí yucu ñávàha yíhi ñàha xii-xi:

—Ío càhnu cuu Xítóhó Jesucristú, núu xiá<sup>n</sup> càchí-í sá xócuñí-n vā quíhí-gá-n yiqui cuñú xíchí-a —càchí-dé xáha<sup>n</sup>-dē.



Te òré-ni ní quee espíritú cùndìhi yucu ñávãha-án yiqui cùñú-xi.

19-20 Te ñáyiu dii vèhe-xi xinu cuechi-xi-án ñi cutnùnì iní-yu sá vã ñihí-gá-yu díhú<sup>n</sup> cuèndá tnúhu càhá<sup>n</sup>-xi, núu ní tñí-yu té Pãblú ndìhi té Silás ndécá ñàhá-yu cuáhá<sup>n</sup> núu cuè té cùchiu<sup>n</sup> Romá, te xáhã<sup>n</sup>-yu xii-güedé:

—Cue té-a cùu-güedé cue tée isràél, te ío dusa<sup>n</sup> xíquide-güedé ñúú-ó. 21 Te cuìnì-güedé cada-o nàcuáa quide-güedé, te vã cúú dùca<sup>n</sup> cada-o chi ñáyiu nació<sup>n</sup> Rómá cúú-ó —càchí-yu xáhã<sup>n</sup>-yu xii cue té cùchiu<sup>n</sup>.

22 Te uu<sup>n</sup>ni ní cáhá<sup>n</sup> nchaá-yu, te xáhã<sup>n</sup>-yu sá ñà túú quide váha té Pãblú ndìhi té Silás. Te cue té cùchiu<sup>n</sup> ní cándeé-güedé dóó tẽ Pãblú ndìhi dóó tẽ Silás ní ndátá-güedé, te ní táuchíú<sup>n</sup>-güedé caniha-güedé ndìhi tñudì xii-güedé.

23 Te ní caniha-güedé, te dãtnùnì ní chihi ñaha-güedé vecaá. Te ní xáhã<sup>n</sup>-güedé xii tée ndënchito vecaá sá cáda cuèdadú víhí-dé cuèndá ná canú-güedé vecaá. 24 Te cuèndá sá dúcá<sup>n</sup> ñi cáhá<sup>n</sup>-güedé, núu tée ndënchito vecaá ní dáyãha ñaha-dé ñngá cuártú ndécú xití vecaá, te ní chihi-dé sáhá-güedé yaú nduhu, te ní quide tii-dé.

25 Te dava niú ní cáhá<sup>n</sup> ndìhi té Pãblú ndìhi té Silás Yã Ndióxi, te ní xita-güedé ndudú ní quide càhnu ñaha-güedé xii-gá. Te dava-gá cue té yìhi vecaá ní xíndedóho-güedé nàcuáa ní xita-güedé. 26 Te uu<sup>n</sup>ni níhi víhi ní tñáa ní quidi-xi ndéé cimièntú vecaá, te ní nacaá<sup>n</sup> nchaa yèhe vecaá, te ní ndìhi cadèná ndútú cuè té yìhi vecaá ní nandáxi. 27 Te ní ndiquíú cúnú ñni tée ndënchito vecaá, te ní quide cuèndá-dé nchíi nchaa yèhe vecaá. Te ní tava-dé machití-dé cahni-dé méé-dé ní cùu, chi ní cáhá<sup>n</sup>-dè sá ñi ndìhi cue té yìhi vecaá ní xinu ni cùu. 28 Te té Pãblú ní cáhá<sup>n</sup> níhi-dé, te xáhã<sup>n</sup>-dè xii tée ndënchito vecaá:

—Vã dúcá<sup>n</sup> càda-n cahni-n mee-n, chi nchaa-ni-ndí yíhi —càchí-dé xáhã<sup>n</sup>-dè xii tée ndënchito vecaá.

29 Te dãtnùnì ní xicá<sup>n</sup> tée ndënchito vecaá ñuhú, te xinu-dé cuánguihu xití vecaá núu yíhi tẽ Pãblú ndìhi té Silás, te quidi ñaha-ná-xi xii-dé ní quexìo-dé ní ngüíñí xití-dé núu-güedé.

30 Te dãtnùnì ndécá ñàhá-dé xii-güedé ní ndee vecaá, te ní xicá<sup>n</sup> tnúhú-dé núu-güedé, te xáhã<sup>n</sup>-dè:

—Nchòhó cachí tnúhu-ndo nãsa cada-í naníhi tãhú-í —càchí-dé xáhã<sup>n</sup>-dè.

31 Te ní xáhã<sup>n</sup>-güedé:

—Quindáa ñni-n ndìhi ñadihí-n, ndìhi landú-n, ndìhi nchaa ñáyiu xinu cuechi núu-n tnúhu càhá<sup>n</sup> Xitohó Jesucristú, te naníhi tãhú-ndó —càchí-güedé xáhã<sup>n</sup>-güedé.

32 Te ní dácúhá ñàhá-güedé xii tée ndënchito vecaá ndìhi nchaa ñáyiu ndècu vehe-dé tnúhu Yã Ndióxi.

33 Te diu-ni òré-án ñi naquete-dé sátá-güedé núu ñi ñani, te dãtnùnì ní sandute-dé ndìhi-yu. 34 Te ndèca ñàhá-dé cuáhá<sup>n</sup> vehe-dé ní sãñaha-dé sá ñi xexi-güedé, te ní cudíí víhi ñni tée ndënchito vecaá ndìhi nchaa-dé vehe-dé sá ñi tuhá-yu ichi Yã Ndióxi. Te cuándihu tucu té Pãblú ndìhi té Silás vecaá.

35 Te nduu tñéé ní xáhã<sup>n</sup> cuè té cùchiu<sup>n</sup> xii poleciá cuáhã<sup>n</sup>-güedé cúu-güedé tée ndënchito vecaá queñuhu-dé úú cue tée cuánguihu ndedí nduu ñcu núhú-güedé. 36 Te tée ndënchito vecaá ní xáhã<sup>n</sup>-dè xii té Pãblú ndìhi té Silás:

—Cue té cùchiu<sup>n</sup> ní cachí-güedé sá queé-ndó ñuhú-ndó, chi ña túú-gã ná cada-güedé, chi sa ní yãha cuèndá-ndó —càchí tée ndënchito vecaá xáhã<sup>n</sup>-dè xii-güedé.

37 Te té Pãblú ní xáhã<sup>n</sup>-dè xii cue té cùu poleciá:

—Té rómá cúú-ndí, te vã cúú dùca<sup>n</sup>-ni cunduu, chi ní caniha-güedé tñudì xii-ndí, te ní xiní-yu nchaá-yu. Te ña túú tñahí ñi xicá<sup>n</sup> tnúhú-güedé ñuu ndáa ndècuéchi-ndí àdi ñàhá, chi cuèndá-ni ní chihi ñaha-güedé vecaá xii-ndí. Te vitna cuìnì-güedé dacacu ñaha-güedé núhú-ndí cuèndá sá vã yõo quiní ñàhá ñuhú-ndí cáhá<sup>n</sup>-güedé,

dico vá cúú dùca<sup>n</sup> cada ñaha-güedé xii-ndí. Chí cuáhá<sup>n</sup> cúñaha-ndo na quixi mee-güedé queñuhu ñaha-güedé —càchí té Páblú xii-dé cue poleciá.

<sup>38</sup> Te cue tée cùu poleciá cuánuhú-güedé núú ndécú cuè tée cùchiu<sup>n</sup>, te ní xáha<sup>n</sup>-güedé nàcuáa ní cáhá<sup>n</sup> té Páblú. Te sá dúcá<sup>n</sup> ñí xáha<sup>n</sup> pòleciá sá tée ròamá cúú-güedé, xíá<sup>n</sup> ní yùhú-güedé. <sup>39</sup> Te ní sáhá<sup>n</sup> cue tée cùchiu<sup>n</sup> yehe vecaá, te ní xáha<sup>n</sup>-güedé sá cádá càhnu iní-güedé sá ñí chihi ñaha-güedé vecaá, te ní ndeñuhu ñaha-güedé vecaá. Te ní cáhá<sup>n</sup> ndàhú-güedé núú cuè tée ní xíhi vecaá sá ndée-güedé ñuú-á<sup>n</sup> nùhú-güedé. <sup>40</sup> Te ní ndee-güedé vecaá, te cuáhá<sup>n</sup>-güedé vehe tá Lidiá, te ní ndatnúhu-güedé ndihí nchaa ñáyiu ní sándáa iní-xi tnúhu Jèsús, te ní xáha<sup>n</sup>-güedé xii-yu nàcuáa cadá-yu, te ío ní cudíí iní-yu, te duca<sup>n</sup> te ní xica-güedé cuáhá<sup>n</sup>-güedé.

## 17

### *Ío dusa<sup>n</sup> quide ñáyiu ñuú Tesalónica*

<sup>1</sup> Te ní yáha-güedé ñuú Anfípolís ndihí ñuú Apòloniá, te ní quexìo-güedé ñuú Tesalónica, te yàcá<sup>n</sup> cáa ñí veñúhu ñáyiu isràél. <sup>2</sup> Te ní sáhá<sup>n</sup> té Páblú veñúhu-á<sup>n</sup>, chí duca<sup>n</sup> tnàhí quide-dé, te ndi tnahá nduu ndètatú-yu ní sáhá<sup>n</sup>-dé veñúhu-á<sup>n</sup> ùní xito. Te ní ndatnúhu ndihí ñaha-dé xii-yu nàcuáa ní chídó tnùnì cue tée ní xóo cáhá<sup>n</sup> tnúhu Yá Ndiòxí ndée sanaha. <sup>3</sup> Te ní xitnúhu ñaha-dé nàcuáa ní cáhá<sup>n</sup> cue tée-á<sup>n</sup> sá Cristú Yaá tendaha Yá Ndiòxí quixi ñuyíú-a ndoho vihi-gá, te cuú-gá, te ndoto-gá, te xáha<sup>n</sup>-dè:

—Te diu Jèsús cúú Cristú Yaá ní tendaha Yá Ndiòxí ní quixi ñuyíú-a, núú xíá<sup>n</sup> càchí tnúhu-í vitna —càchí té Páblú xáha<sup>n</sup>-dè xii-yu.

<sup>4</sup> Te dava ñáyiu isràél ní sándáa iní-yu tnúhu ní cáhá<sup>n</sup> té Páblú, te ní níhí tnáhã-yu ndihí-dé, ndihí té Silás. Te vai ñáyiu griégú ñáyiu càhá<sup>n</sup> ndihí Yá Ndiòxí ní sándáa iní-yu tnúhu Jèsús. Te ndècu titní ñáyiu dìhí ñáyiu cùnuu, te ñáyiu-á<sup>n</sup> tnàhá-yu ní sándáa

iní-yu tnúhu-gá. <sup>5</sup> Te dava ñáyiu isràél ñá túú ní cùu váha iní-yu núú té Páblú nùu ní ndúcü-yu cue tée cuihna iní-xi tuhío-güedé cada chiu<sup>n</sup>-güedé, ghi ndi cuihnu ndi cuihnu-ni-güedé, te nchaá-yu ndihí cue tée-á<sup>n</sup> ndi coyo ndi coyó-yu xicuáa-yu. Te sátá ñí tecú dóho dava-gá-yu, te ní sáhá<sup>n</sup> tuhá-yu, te ío ní quide dùsá<sup>n</sup>-yu. Te nísáhá<sup>n</sup>-yu vehe té Jàsón, te ní quide yicá-yu ní quíhu-yu vehe-dé nándúcú-yu té Páblú ndihí té Silás cuèndá queñuhu ñahá-yu núú nchaa ñáyiu. <sup>6</sup> Te ñá ní nàníhí ñáhã-yu xii-güedé, núú xíá<sup>n</sup> ní tñí-yu té Jàsón ndihí ñí ùú-gá cue tée sándáa iní tnúhu Jèsús, te tãñuhu ñahá-yu xii-güedé cuáhá<sup>n</sup> núú cuè tée cùchiu<sup>n</sup>. Te òré ní quexìo-yu núú ndécú cuè tée cùchiu<sup>n</sup>, te ní ngüíta-yu ní cuáa-yu, te xáhã<sup>n</sup>-yu xii-güedé:

—Ní quexìo cue tée-á<sup>n</sup> ñuú-ó, te ío dusa<sup>n</sup> quide-güedé, te duca<sup>n</sup>-ni quide-güedé nchaa ñuú núú xicá cùu-güedé. <sup>7</sup> Te té Jàsón-á<sup>n</sup> ní xáha<sup>n</sup>-dè sá cúú cùndecu-güedé vehe-dé, te ñá túú sándáa iní-güedé nàcuáa càhá<sup>n</sup> té Cèsár tée yindaha cuéhé nació<sup>n</sup>, te càchí-güedé sá ndécú ñngá té cùnuu-gá tucu nàni-dé Jèsús —càchí-yu xáhã<sup>n</sup>-yu xii cue tée cùchiu<sup>n</sup>.

<sup>8</sup> Te sátá dúcá<sup>n</sup> ñí cáhá<sup>n</sup>-yu, te ní cudée<sup>n</sup> víhí cuè tée cùchiu<sup>n</sup> ndihí dava-gá ñáyiu ndèdóho. <sup>9</sup> Te vai díhú<sup>n</sup> ñí xicá<sup>n</sup> cue tée cùchiu<sup>n</sup> núú té Jàsón ndihí dava-gá cue tée cuáhá<sup>n</sup> ndihí-dé cuèndá té Páblú ndihí té Silás, te núu na ndèe-güedé nùhú-güedé, te nacuañaha cuè tée cùchiu<sup>n</sup> díhú<sup>n</sup>-güedé.

### *Té Páblú ndihí té Silás ndécú-güedé ñuú Bèréa*

<sup>10</sup> Te òré ní cundiquí<sup>n</sup>, te ní quide ndee ñí ñáhã ñáyiu sándáa iní tnúhu Jèsús xii té Páblú ndihí té Silás, te ní xica-güedé cuáhá<sup>n</sup>-güedé ñuú Bèréa. Te diu-ni nduu ñí sáa-güedé yàcá<sup>n</sup> ní sáhá<sup>n</sup>-güedé veñúhu ñáyiu isràél. <sup>11</sup> Te váha-gá iní ñáyiu ñuú Bèréa dácúúxí ñáyiu ñuú Tesalónica, chí ío ní cudíí iní-yu ní xíndedóho-yu tnúhu Jèsús, te ñí nduu ñí nduu ní dácuañã-yu

tnúhu ní chídó tnùnì cue téé ní xóo cáhá<sup>n</sup> tnúhu Yá Ndiöxí ndéé sanaha cuendá cuínì-yu quínì-yu núu ndáá cáhá<sup>n</sup> té Páblú ndihì té Silás. <sup>12</sup> Te titní ñáyiú isràél ní sándáá iní-yu tnúhu-gá ndihì titní cue téé griégú ndihì ñáyiú dèhí ñáyiú cùnùu ní sándáá iní-yu. <sup>13</sup> Te dāva ñáyiú isràél ndécū-yu ñuú Tesalónica, te ñáyiú-á<sup>n</sup> ñí ñíhì-yu tnúhu sá ndécú tē Páblú ndihì té Silás ñuú Bèréá cáhá<sup>n</sup>-güedé tnúhu Yá Ndiöxí, núu xiǎ<sup>n</sup> ní sáhá<sup>n</sup>-yu ñuú Bèréá ní dácuándèhndé-yu núu nchàa ñáyiú vátá dácuàha-gá. Te ñáyiú-á<sup>n</sup> ñí sándáá iní-yu tnúhu ndehnde te ní cudéé<sup>n</sup> víhì-yu núu-güedé. <sup>14</sup> Te òrè-á<sup>n</sup> ñí xáha<sup>n</sup> ñáyiú sándáá iní tnúhu-gá xii té Páblú sá quíhì<sup>n</sup>-dé yuhu lámár, te ní xica-dé cuáhá<sup>n</sup>-dé, te té Silás ndihì té Timùteú ní quendóo-güedé ñuú Bèréá. <sup>15</sup> Te ñí<sup>n</sup> ùú-güedé cuáhá<sup>n</sup> ndihì-güedé té Páblú, te ndèca ñaha-güedé cuáhá<sup>n</sup> ndéé ñuú Àtenás, te ní xáha<sup>n</sup> tē Páblú xii-güedé:

—Núu na nùhú-ndó, te cúu-ndo tē Silás ndihì té Timùteú ná quíxì ndihì-ni-güedé nanítnáhá-ndí iha — cāchí-dé xáha<sup>n</sup>-dē.

Te ní xica-güedé cuánuhú-güedé.

#### *Té Páblú ndécú-dé ñuú Àtenás*

<sup>16</sup> Te ñuú Àtenás ndétú tē Páblú quíhì<sup>n</sup> té Silás ndihì té Timùteú. Te yacá<sup>n</sup> ní xiní-dé sá ño cuéhé sá cāchí-yu cùu ndiöxí-yu ndècu te ñá ndáá sá díú ndiöxí cúu-xí, te xiǎ<sup>n</sup> ñá túú ní cùu váha iní-dé, chi ñá tnàhá iní-dé nācuáa quidé-yu. <sup>17</sup> Te ní sáhá<sup>n</sup>-dé veñúhu ní cáhá<sup>n</sup> ndihì-dé ñáyiú isràél ndihì dāva-gá ñáyiú cáhá<sup>n</sup> ndihì Yá Ndiöxí. Te ñí<sup>n</sup> nduu ñí<sup>n</sup> nduu sáhá<sup>n</sup>-dé xití ñuú cáhá<sup>n</sup>-dé tnúhu-gá ndihì nchaa ñáyiú xica cuu yacá<sup>n</sup>. <sup>18</sup> Te cue téé cùu epicureú ndihì cue téé cùu estoicú, cue téé-á<sup>n</sup> ñí ndatnúhu-güedé ndihì té Páblú, te dāva-güedé xítnàha-güedé:

—¡Ná tnúhu víhì cáhá<sup>n</sup> téé lùcú-á<sup>n</sup>! —cāchí-güedé xítnàha-güedé.

Te dāva-güedé xítnàha-güedé:

—Sàni iní-ndí sá cáhá<sup>n</sup>-dé cuendá ndiöxí sá vátá quínì-gá-ó — cāchí-güedé xítnàha-güedé.

Te duca<sup>n</sup> xítnàha-güedé, chi cáhá<sup>n</sup> té Páblú tnúhu Jèsús, te ní cáhá<sup>n</sup>-dé nācuáa ní dándótó ñaha Yá Ndiöxí xii-gá, xiǎ<sup>n</sup> núu duca<sup>n</sup> xítnàha-güedé. <sup>19</sup> Te ndèca ñaha-güedé xii té Páblú cuáhá<sup>n</sup> ñí<sup>n</sup> xichi núu nání Àreópagú, te ní xáha<sup>n</sup>-güedé xii-dé:

—Cāchí tnúhu ndáá-n nāsa cuáhá<sup>n</sup> tnúhu cáhá<sup>n</sup>-n, chi na cùtnuní ndáá iní-ndí, <sup>20</sup> chi duca<sup>n</sup>-ni cáhá<sup>n</sup>-n tnúhu sá ñà túú sácúndèdóho-ndí, te cuínì-ndí cāchí tnúhu ndáá-n nāsa nduu tnúhu-á<sup>n</sup> cuendá cutnùnì váha iní-ndí —cāchí-güedé xáha<sup>n</sup>-güedé xii-dé.

<sup>21</sup> Te nchaa ñáyiú ñuú Àtenás ndihì ñáyiú dāva-gá ñuú, mee-ni tnúhu saa cuínì-yu cáhá<sup>n</sup>-yu, nchaa sá vátá cùndèdóho-gá-yu cuínì-yu cundèdóho-yu.

<sup>22</sup> Te té Páblú ní ngúnutñí-dé núu xixúcu-yu nchaa<sup>n</sup>-yu, te xáha<sup>n</sup>-dē:

—Nchòhó cue ñáyiú ñuú Àtenás, cundèdóho-ndo nchàa tnúhu na cáhá<sup>n</sup>-í-a. Ío quide cahnu nchohó sá cāchí-ndó cùu ndiöxí-ndó. <sup>23</sup> Te vitna ní quexìo-í ñuú-ndó, te ní xiní-í sá yāyacá<sup>n</sup> ndécú nchàa sá cāchí-ndó cùu ndiöxí-ndó cáhá<sup>n</sup> ndihì-ndo. Te ní xiní-í ñí<sup>n</sup> xichi núu ndéé tnuní quidé cahnu-ndo Yá Ndiöxí Yaá ñá túú xiní-ndó, te díu-ni duca<sup>n</sup> cáhá<sup>n</sup> lètrá ndéé tnuní xiá<sup>n</sup>, te cāchí-xi: “Iha quide cahnu-ndí Ndiöxí sá ñà túú xiní-ndí”, duha cáhá<sup>n</sup> lètrá-á<sup>n</sup>. Te quide cahnu-ndo Yá Ndiöxí cáhá<sup>n</sup>-ndó, dico ñá túú xiní-ndó nāsa cāa-gá, te yúhú xiní ndáá-í nācuáa cāa Yá Ndiöxí, chi díu-ni Yá Ndiöxí cáhá<sup>n</sup> ndihì-í, te díu tnúhu-gá cáhá<sup>n</sup>-í vitna.

<sup>24</sup> Te díu Yá Ndiöxí ní cadúha-gá ñuyíú-a ndihì nchaa sá ñó, núu díu-gá cúu Xítohó ñuyíú-a ndihì andíu. Te ñá túú xini ñuhu-gá vehe dáca ñáyiú ñuyíú-a cundecu-gá. <sup>25</sup> Te ñá túú xini ñuhu-gá ñáyiú chindee ñahá-yu xii-gá, chi mee-gá quidé-gá nchító-ó ndècu-o te tàxi-gá yócó tächí-ó ndihì nchaa sá xiní ñuhu-o.

<sup>26</sup> Te ndéé sanaha ñí cadúha-gá ñí<sup>n</sup> dīi-ni téé, te díu-ni ñíñí-dé cúu ñáyiú ndècu nīcaxico ñuyíú. Te díu-ni mee

Yă Ndiöxí ní xáha<sup>n</sup>-gă nchaa núú cùndècú-yu, te mee-gă ní cáhá<sup>n</sup>-gá ná daha cuiá cudíi nchaa nàció<sup>n</sup> ndihí mèé-yu. <sup>27</sup> Te cùní-gá sá ncháá ñăyiu nanducu ñàhá-yu cáhá<sup>n</sup> ndihí ñàhá-yu xii-gá, te mee-gă ndécú túha-gá sá cáhá<sup>n</sup> ndihí ñaha-gă xii-yu ñ<sup>n</sup> ñ<sup>n</sup>-yu. <sup>28</sup> Te ñiu-ni Yă Ndiöxí xító ñàha-gá xii-yu núú cùdíi-yu ndécú-yu te càndá-yu. Te duha ní cáhá<sup>n</sup> ñ<sup>n</sup> ñani tñáhá-ndó, téé ní cutnùní iní-xi ní xíndecu ndéé sanaha, te ní xáha<sup>n</sup>-dè xii-yu: “Nchaa-o cùu-o déhe Yă Ndiöxí”, duha ní xáha<sup>n</sup>-dè xii-yu. <sup>29</sup> Te núú déhe Yă Ndiöxí cúü-yu ncháá-yu, te vá cúú cáhá<sup>n</sup>-yu sá Yă Ndiöxí cúú sá ñí cadúha-yu ndahá-yu. Te sá ñí cadúha-yu cùu ndiöxí-yu-á<sup>n</sup>, dava cùu-xi díhú<sup>n</sup> cuáá<sup>n</sup>, dava cùu-xi díhú<sup>n</sup> cuixí<sup>n</sup>, dava cùu-xi yúú. Te mèé-yu ní cahu iní-yu nàcuáa cunduu sá cúú ndiöxí-yu. <sup>30</sup> Te cùtnàhá ñá túú ní cùtnuní iní-yu sá nèhé ní quidé-yu ní cadúha-yu nchaa xíá<sup>n</sup>, te ñá túú ní quide cuendá Yă Ndiöxí sá dúcá<sup>n</sup> ñí quidé-yu. Te vitna càchí Yă Ndiöxí sá dáñá ncháa ndi túhú-yu nchaa sá cuèhé sá dúhá quidé-yu. <sup>31</sup> Te Yă Ndiöxí náhá-gă ná nduu cùndecu nchaa ñáiyu núú-gă, te mee-gă sa ñaha-gá ndëndida càa ñáiyu ní quide váha, te ndëndida càa ñáiyu ñá túú ní quide váha. Te mee-gă ní xáha<sup>n</sup>-gă xii Déhe-gá Yaá nání Jèsús cúñaha-gă xii-yu núú ndëndida càá-yu ní quide váha te ndëndida càá-yu ñá túú ní quide váha. Te mee Jèsús cáhá<sup>n</sup> ndáá cui<sup>n</sup>-gá, te sa ñaha-o sá ncháá xíá<sup>n</sup> cada Jèsús, chi ñiu cuendá-á<sup>n</sup> ñí dándótó ñàha Yă Ndiöxí xii-gá —càchí té Păblú xáha<sup>n</sup>-dè xii-yu.

<sup>32</sup> Te òré ní cáhá<sup>n</sup> té Păblú sá ñí ndoto Jèsús, te dava ñáiyu ñá ní tñáhá iní-xi tñúhu ní cáhá<sup>n</sup>-dé ní cáhá<sup>n</sup> yíchí-yu. Te davá-yu ní xáhá<sup>n</sup>-yu xii-dé:

—Te ingá xito quixi-n, te cáhá<sup>n</sup> tucu-n tñúhu ní cáhá<sup>n</sup>-n vitna —cachí-yu xáhá<sup>n</sup>-yu xii-dé.

<sup>33</sup> Te ní xica-dé cuáhá<sup>n</sup>-dé. <sup>34</sup> Te dava ñáiyu ní xíndedóho tñúhu ní cáhá<sup>n</sup> té Păblú ní sándáá iní-yu Jèsús,

te ní chindee tñúhu ñàhá-yu xii-dé. Te ñ<sup>n</sup> téé cùchiu<sup>n</sup> Areópagú nání-dé Níxú ndihí ñ<sup>n</sup> ñadihí nání-á<sup>n</sup> Dămarís, tñáhá-yu ní sándáá iní-yu tñúhu-gá ndihí dava-gá-yu.

## 18

### *Té Păblú ndécú-dè ñúú Còrintú*

<sup>1</sup> Te té Păblú ní quee-dé ñúú Àtenás cuáhá<sup>n</sup>-dé ñúú Còrintú. <sup>2</sup> Te yàcá<sup>n</sup> ní naníhí tñáhá-dè ndihí ñ<sup>n</sup> téé isràél nání-dé Àquilú, te téé-á<sup>n</sup> cúú-dè téé distrítú Pòntó, te ní xíndecu-dé ndihí ñadihí-dé tá Priscilá ñúú Rómá. Te té Césár téé yíndaha cuèhé nàció<sup>n</sup>, téé nàni Claudiú ní xáha<sup>n</sup>-dè sá vá cúú-gă cundecu ñáiyu isràél ñúú Rómá, te xíá<sup>n</sup> núú ní ndee té Àquilú ndihí ñadihí-dé cuáhá<sup>n</sup>-yu ñúú Còrintú. Te sácú-ni nduu ní cuu sá ñí quexió-yu ñúú-á<sup>n</sup>, te ní sáhá<sup>n</sup> té Păblú ní ndatnúhu ndihí ñaha-dè xii-yu vehé-yu. <sup>3</sup> Te ní xáhá<sup>n</sup>-yu sá cùndecu-dé cada chi<sup>n</sup> ndihí ñahá-yu, chi ñ<sup>n</sup>-ni chi<sup>n</sup> quide-dé ndihí-yu, te ní xóo dacáa-yu vehe dóó. Te núú xíá<sup>n</sup> ní xíndecu ndihí ñaha té Păblú ní quide chi<sup>n</sup> ndihí ñaha-dé xii-yu. <sup>4</sup> Te núú ùná núú ùná nduu, nduu ndetatú-yu, ní xóo quíhí<sup>n</sup>-dé veñúhu ñáiyu isràél. Te ní ndatnúhu-dé ndihí ñáiyu isràél ndihí ñáiyu ñá túú cùu ñáiyu isràél, te ní xáha<sup>n</sup>-dè sá quíndáá iní-yu tñúhu Jèsús.

<sup>5</sup> Te té Silás ndihí té Timùteú ní quee-güedé distrítú Macèdoniá cuáhá<sup>n</sup>-güedé núú ndécú té Păblú. Te òré ní quexió-güedé, te ní cáhá<sup>n</sup>-ni té Păblú tñúhu Yă Ndiöxí núú ñáiyu isràél, te xáha<sup>n</sup>-dè xii-yu sá Jèsús cúú-gă Crístú Yaá ní tendaha Yă Ndiöxí ní quixi ñuyíú-a. <sup>6</sup> Te sá dúcá<sup>n</sup> ñí cáhá<sup>n</sup>-dé núú ní nàá ndihí ñàhá-yu xii-dé, te ní cáhá<sup>n</sup> cuèhé-yu cuendá-dé, núú xíá<sup>n</sup> ní naquidi-dé dóó-dé. Te duca<sup>n</sup> ñí quide-dé cuendá sá cùtnùní iní-yu sá ñá ní tñáhá iní-dé nàcuáa ní cáhá<sup>n</sup>-yu, te ní xáha<sup>n</sup>-dè xii-yu:

—Yúhú ñá túú cuèchi-í, te núú ní xíta nihnu-ndo, xíá<sup>n</sup> quèndóo cuèchi mee-nă-ndó. Te vitna quíhí<sup>n</sup>-í cáhá<sup>n</sup>



ndihí-í ñáiyu ñá túú cùu ñáiyu isràèl, te vâ nánducu-gá-í nchòhó ñáiyu isràèl cáhá<sup>n</sup> ndihí ñaha-í xii-ndo —càchí-dé xâha<sup>n</sup>-dê xii-yu.

<sup>7</sup> Te ní xica-dé cuáhá<sup>n</sup>-dé vehe ñ<sup>n</sup> téé nàni Justú, te téé-á<sup>n</sup> ndécú yàtni-dé núú cáá veñúhu, te tnàhá-dé cáhá<sup>n</sup> ndihí-dé Yâ Ndiöxí. <sup>8</sup> Te té Crispú téé yîndaha veñúhu-á<sup>n</sup> ñí sándáá iní-dé Jèsús ndihí ñadìhí-dé ndihí landú-dé. Te vâi ñáiyu ñuú Còrintú ní sáhá<sup>n</sup>-yu ní xíndedóho-yu tnúhu-gá, te ní sándáá iní ñáhâ-yu xii-gá, te ní sanduté-yu. <sup>9</sup> Te ñ<sup>n</sup> níú ní cáhá<sup>n</sup> saní té Páblú sá ñí xâha<sup>n</sup> Yâ Ndiöxí xii-dé:

—Cáhá<sup>n</sup>-ni-n tnúhu-í, te vâ yùhú-n nchâa tnúhu cuèhé tnúhu duha cáhá<sup>n</sup> ñáiyu, <sup>10</sup> chí yúhú chindee ñaha-í xii-n, te vâ yôo ñ<sup>n</sup> cada úhú ñáhâ xii-n, te vâi-gá ñáiyu ñuú-á<sup>n</sup> quîndáá iní-yu tnúhu-í —càchí-gá xâha<sup>n</sup>-gâ núú saní-dé.

<sup>11</sup> Te ñuú Còrintú ní xíndecu té Páblú ñ<sup>n</sup> cuíá dava, te mee-ni tnúhu Yâ Ndiöxí ní xóo dacuâha-dé ñáiyu.

<sup>12</sup> Te ndècu-gá-dé ñuú-á<sup>n</sup> ñí ngóo té Gàlìón chiù<sup>n</sup> taxi tnuní-dé distritú Acáyá. Te dàvá-á<sup>n</sup> ñí cudéé<sup>n</sup> ñáiyu isràèl núú tē Páblú, te ní tnñ ñàhá-yu xii-dé ndécá ñàhá-yu cuáhá<sup>n</sup> núú cuè téé cùchiu<sup>n</sup>. <sup>13</sup> Te ní xáhâ<sup>n</sup>-yu xii té Gàlìón téé cùu gobiernú:

—Téé-a ní quexìo-dé ñuú-ó xica cuu-dé te cuiní-dé dandàhú ñáhâ-dé chitnahá-ndí-dé cada-ndí nâcuáa quìde-dé quídé càhnu-dé Ndiöxí-dé, te dañâ-ndí vâ cádá-gâ-ndí nâcuáa cáhá<sup>n</sup> tnúhu sá sánú ìchi ñaha xii-o nâcuáa cundecu-o cuiní-dé —càchí-yu xáhâ<sup>n</sup>-yu xii téé cùu gobiernú.

<sup>14</sup> Te té Páblú cuiní-dé caní-dé cuèndú ní cùu, te ní nguíta té Gàlìón cáhá<sup>n</sup>-dé, te xâha<sup>n</sup>-dê xii-yu:

—Nchòhó ñáiyu isràèl, cund-edóho-ndo tnúhu na cáhá<sup>n</sup>-í-a. Te núu ndècu núú ñ<sup>n</sup> cuéchi ní quide-dé àdi ní sahani-dé ñ<sup>n</sup> ndíyi, te cuu cundáá-xi ìha, te cáhá<sup>n</sup>-ndó núu nândi cùu sá ñí quide-dé, <sup>15</sup> àdi dico-ni sá ñ<sup>n</sup> tnúhu ní cáhá<sup>n</sup>-dé, te yáchí-gá chí cuáhá<sup>n</sup> yàcá<sup>n</sup> ndatnúhu-ndo núú méé-ndó, chí mee-ni sâ ñá túú quide-dé nâcuáa

cáhá<sup>n</sup> tnúhu sá sánú ìchi ñaha xii-ndo cáhá<sup>n</sup>-ndó, te yúhú ñá túú tnàhá iní-í cada ndáá-í nchaa xíá<sup>n</sup> —càchí-dé xâha<sup>n</sup>-dê.

<sup>16</sup> Te ní cudéé<sup>n</sup>-dê, te ní ndeñuhu ñaha-dê xii-yu vechiù<sup>n</sup>. <sup>17</sup> Te ñáiyu ñá túú cùu ñáiyu isràèl ní tnñ<sup>n</sup>-yu té Sòstenés téé yîndaha veñúhu ñáiyu isràèl, te ndèhe té Gàlìón téé cùu gobiernú ní caníhá-yu xii-dé, dico ñá túú tnàhí ná tnúhu ní cáhá<sup>n</sup>-dé tauni-hnu-dé téé ní caní-yu-á<sup>n</sup>.

*Té Páblú cuáhá<sup>n</sup> tucu-dé ñuú Antiòquiá, te yàcá<sup>n</sup> ní xica tucu-dé cuáhá<sup>n</sup>-dé dava-gá ñuú cáhá<sup>n</sup>-dé tnúhu Yâ Ndiöxí*

<sup>18</sup> Te titní-gá nduu ní xíndecu té Páblú ñuú Còrintú, te ní quide ndee iní-dé nchaa ñáiyu ní sándáá iní-xi tnúhu Jèsús, te ní tnñ<sup>n</sup>-dé ìchi cuáhá<sup>n</sup>-dé distritú Siríá ndihí té Àquilú ndihí ñadìhí té Àquilú-á<sup>n</sup> tã Priscilá, te ní quexìo-yu ñuú Cèncreá. Te cùmání-gâ tnñ<sup>n</sup>-yu ìchi quíhí<sup>n</sup>-yu ñuú Éfesú, te ní dèté díquí tē Páblú, chí duca<sup>n</sup> ñí xâha<sup>n</sup>-dê xii Yâ Ndiöxí sá ndéé xínu ñ<sup>n</sup> chiù<sup>n</sup> ní saní iní-dé cada-dé cuèndá-gá, te dàtnuní dèté-dé. Te ní quée-yu bàrcú cuáhá<sup>n</sup>-yu. <sup>19</sup> Te ní quexìo-yu ñuú Éfesú, te yàcá<sup>n</sup> ní xâha<sup>n</sup> tē Páblú sá cùndècu té Àquilú ndihí ñadìhí-dé, te mee-dê quíhí<sup>n</sup>-dé dava-gá ñuú. Te cùmání-gâ caca-dé quíhí<sup>n</sup>-dé, te ní sáhá<sup>n</sup>-dé veñúhu ñáiyu isràèl ní ndatnúhu ndihí ñaha-dê xii-yu. <sup>20</sup> Te ní xáhâ<sup>n</sup>-yu sá cùndècu-dé titní nduu, te ñá ní cuiní-dé cundecu-dé. <sup>21</sup> Te ní xâha<sup>n</sup>-dê:

—Núhú-í chí dacuití xini ñuhu-xi cundecu-í vico coo ñuú Jerusalén, te quixi tucu-í te núu Ndiöxí ná càchí-gá, te vitna chí cádá ndèe iní —càchí-dé xâha<sup>n</sup>-dê xii-yu.

Te ní quée-dé bàrcú cuáhá<sup>n</sup>-dé. <sup>22</sup> Te ní quexìo-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusalén, te ní ndexìo-dé, te ní dándácõo váha-dé ñáiyu ndècu ìchi Yâ Ndiöxí, te dàtnuní ní xica-dé cuáhá<sup>n</sup>-dé ñuú Antiòquiá.

23 Te yàcá<sup>n</sup> ní xíndecu-dé títí nduu, te dǎtnú<sup>n</sup> ní tñi-dé ichi cuáhá<sup>n</sup>-dé. Te ní sáhá<sup>n</sup>-dé ñihí distritú Gàlaciá ñihí distritú Frigiá. Te ñdi tnahá ñuú ní sáhá<sup>n</sup>-dé ní cáhá<sup>n</sup>-dé ñihí ñáyiú sándáá iní tñúhu Yá Ndiöxí, te ní ndúcú ndéé-gǎ-yu ní quidé-yu nchaa nácuáa ní xáha<sup>n</sup>-dē cadá-yu.

### *Té Àpolós càhá<sup>n</sup>-dé tñúhu Yá Ndiöxí ñuú Éfesú*

24 Te dává-á<sup>n</sup> ñi quèxio ñ<sup>n</sup> téé isràél ñuú Éfesú, te nani-dé Àpolós, te cùu-dé téé ñuú Alejandriá, te ío váha túha-dé tñúhu Yá Ndiöxí, te ío váha ñúhu díquí-dē nácuáa cáhá<sup>n</sup>-dé, 25 chi sa xini-dé nácuáa ní xóo cáhá<sup>n</sup> ndí Juáa cùtnahá ní xóo dacuándute ndí ñáyiú. Te ío ní cudí iní-dé ní cáhá<sup>n</sup>-dé nchaa nácuáa ní cuu cuendá Jèsús, dico vátá dácúaha-gá-dé nchaa tñúhu ní cáhá<sup>n</sup> méé Jèsús. 26 Te ní sáhá<sup>n</sup>-dé veñúhu ñáyiú isràél, te yàcá<sup>n</sup> ní cáhá<sup>n</sup>-dé ñi yùhu ñi iní-dé. Te ndècu té Àquilú ñihí ñadhí-dé tá Priscilá ndedóho-yu tñúhu ní cáhá<sup>n</sup>-dé, te ní xáhá<sup>n</sup>-yu sá quíhí<sup>n</sup>-dé vehé-yu, te ní sáhá<sup>n</sup>-dé, te ní xítnúhu ñáhá-yu xii-dé dava-gá tñúhu Yá Ndiöxí sá ñà túú xini-dé. 27 Te ní cachí té Àpolós sá quíhí<sup>n</sup>-dé distritú Acáyá, núu xiá<sup>n</sup> ní cadúha ñáyiú ñuú Éfesú ñ<sup>n</sup> tutú canehe-dé quíhí<sup>n</sup> ndaha ñáyiú sándáá iní tñúhu-gá xíndecu Acáyá. Te xáhá<sup>n</sup>-yu núu tütú-yu: “Cáhá<sup>n</sup> váha-ndo ñihí té Àpolós ñuú ní quèxio-dé”, cächí-yu xáhá<sup>n</sup>-yu núu tütú-yu. Te ní xica-dé cuáhá<sup>n</sup>-dé, te ní quèxio-dé Acáyá. Te nchaa ñáyiú sándáá iní tñúhu-gá yàcá<sup>n</sup>, ñi-ni mee Yá Ndiöxí ní chindee ñàha-gá ní sándáá iní ñáhá-yu xii-gá. Te té Àpolós ío váha ní cáhá<sup>n</sup>-dé tñúhu Yá Ndiöxí núu-yu, te xiá<sup>n</sup> ío ní ndúcú ndéé-gǎ-yu ní quidé-yu chiu<sup>n</sup>-gá. 28 Te té Àpolós ní ndatnúhu-dé ñihí ñáyiú isràél, te ní xíndedóho dava-gá-yu. Te ío váha ní cani-dé cuendú nchaa nácuáa ní xóo cáhá<sup>n</sup> cue téé ndéé sanaha sá quíxí Crístú ñuyíú-a. Te ní cáhá<sup>n</sup> ndáá-dé ní xáha<sup>n</sup>-dē sá díú-ní Jèsús cúu-gǎ Crístú Yaá ní tendaha Yá Ndiöxí ní quixi

ñuyíú-a. Te ñáyiú isràél xíndatnúhu-yu sá ñà ndáá nácuáa cáhá<sup>n</sup>-dé, dico ñà ní ñihí-yu tñúhu cúñahá-yu xii-dé, chi ío váha ñúhu díquí-dē tñúhu cáhá<sup>n</sup>-dé.

## 19

### *Té Pǎblú ndécú-dē ñuú Éfesú*

1 Te cùtnahá ndécú-gǎ té Àpolós ñuú Còrintú, te ní xica té Pǎblú cuáhá<sup>n</sup>-dé tá yáha-dé mee-ni xití yucu cuáhá<sup>n</sup>, te ní sáá-dé ndéé ñuú Éfesú. Te ñuú-á<sup>n</sup> ñi naníhí tñáhá-dē ñihí cue téé sándáá iní tñúhu Jèsús. 2 Te ní xicá<sup>n</sup> tñúhú-dē núu-güedē, te xáha<sup>n</sup>-dē:

—¿Sa ní quèxio Espiritú Yá Ndiöxí ní ngúndecu ñihí-ndo ndéé òré ní sándáá iní-ndó Jèsús-á<sup>n</sup>? —cächí-dé xáha<sup>n</sup>-dē xii-güedé.

Te ní xáha<sup>n</sup>-güedē:

—Ñá túú xini-ndí sá ío Espiritú Yá Ndiöxí —cächí-güedé xáha<sup>n</sup>-güedé xii-dé.

3 Te ní xáha<sup>n</sup> tucu-dé:

—¿Nása ní cáhá<sup>n</sup> téé ní dácúándute ñaha xii-ndo-i? —cachí-dé xáha<sup>n</sup>-dē xii-güedé.

Te ní xáha<sup>n</sup>-güedē:

—Ní cáhá<sup>n</sup>-dé nácuáa ní xóo cáhá<sup>n</sup> ndí Juáa —cächí-güedé xáha<sup>n</sup>-güedé xii-dé.

4 Te ní xáha<sup>n</sup> tē Pǎblú:

—Ndí Juáa ní dácúándute ñaha ndí xii ñáyiú, chi ní cuini-yu sá dáñá-yu nchaa sá cuèhé sá dúhá quidé-yu. Te ní xáha<sup>n</sup> ndí xií-yu: “Quíndáá iní-ndó tñúhu Jèsús chi dacuití quíxi-gá ñ<sup>n</sup> nduu”, duha ní xáha<sup>n</sup> ndí Juáa xií-yu —cächí té Pǎblú xáha<sup>n</sup>-dē xii-güedé.

5 Te sá dúcá<sup>n</sup> ñi cáhá<sup>n</sup> té Pǎblú xáha<sup>n</sup>-dē xii-güedé, núu xiá<sup>n</sup> ní sandute-güedé nácuáa ní dándoo tñúhu Jèsús. 6 Te ní sacá<sup>n</sup> ndodo té Pǎblú ndahá-dé díquí-güedé, te òré-ni ní quèxio Espiritú Yá Ndiöxí ní ngúndecu ñihí-güedé, te ní ngúita-güedé ní cáhá<sup>n</sup>-güedé tñúhu sá dácáhu iní ñáhá Espiritú-gá, tñúhu sá ñà túú xini-güedé cáhá<sup>n</sup>-güedé, te ní cáhá<sup>n</sup>-güedé tñúhu Yá Ndiöxí nácuáa ní dácáhu iní ñáhá Espiritú-gá xii-güedé. 7 Te cùu datná úxúú tñáhá-güedé.

8 Te té Păblú ní sáhá<sup>n</sup>-dé veñúhu ñáyiú isràél ní cáhá<sup>n</sup> ndihí-dé-yu, te úní yóó ñí xínu ní xica cuu-dé veñúhu-yu. Te ío váha ñùhu díquí-dé tnúhu cáhá<sup>n</sup>-dé, núu xiá<sup>n</sup> ní cuyi-dé ní cáhá<sup>n</sup>-dé, te ní xáha<sup>n</sup>-dē sá quindáá iní-yu tnúhu Jèsús, te duca<sup>n</sup> te ndihu ndaha ñaha Yá Ndióxi xií-yu. 9 Te davá-yu ío sàá iní-yu ñá ní cuiní-yu quindáá iní-yu, te ío ní cáhá<sup>n</sup> cuèhé-yu cuendá Jèsús xiti veñúhu núu dàva-gá-yu. Te té Păblú ní ndee-dé veñúhu cuáhá<sup>n</sup>-dé ndihí ñáyiú sàndáá iní tnúhu Jèsús. Te ì<sup>n</sup> nduu ì<sup>n</sup> nduu ní sáhá<sup>n</sup>-dé scuèlá té Tiranú ní dácuhá ñaha-dé xií-yu. 10 Te úú cuíá duca<sup>n</sup> ñí sáhá<sup>n</sup>-dé scuèlá ní dácuhá-dé ñáyiú. Te nchaa ñáyiú isràél ñáyiú ndècu nihí distritú Àsiá ndihí nchaa ñáyiú ñá túú cùu ñáyiú isràél ní xindedóho-yu tnúhu Jèsús. 11 Te té Păblú ío ní chindee ñaha Yá Ndióxi xii-dé ní quide-dé vai núu sá vǎ yóo tnàhí ndàcu cada. 12 Te pañú díquí-dé ndihí dóó cándèé núu yíquí-dé ní xicá<sup>n</sup>-yu nehé-yu ní sáhá<sup>n</sup> núu ndécú ñáyiú cùhú, te xiá<sup>n</sup> ní tñi ñáyiú cùhú ndihí ñáyiú yìhi ñaha espíritú cùndìhi yucu ñávǎha, te ní ndúha-yu.

13 Te ñuú Isràél véxi cue téé tatna xica cuu-güedé quidé tátna-güedé ñáyiú yìhi ñaha espíritú cùndìhi yucu ñávǎha. Te ní ngüita-güedé ní cacu nehè-güedé Jèsús cuendá quee espíritú-á<sup>n</sup> yíqui cùñú-yu, te ní xáha<sup>n</sup>-güedé:

—Xocuiñí-n, chi càchí Jèsús sá vǎ cùndècu ndihí-gá-n tēe-a. Te diu-ni Jèsús cacú nehè té Păblú òré càhá<sup>n</sup>-dé tnúhu-gá —càchí-güedé xáha<sup>n</sup>-güedé xii espíritú-á<sup>n</sup>.

14 Te úsá tnàhá-güedé duca<sup>n</sup> ñí xóo cada-güedé. Te tátá-güedé ní xínani-dé Èsevá, te téé-á<sup>n</sup> ñí cuu-dé dútú cùñu. 15 Te sá dúcá<sup>n</sup> ñí cáhá<sup>n</sup>-güedé, te ní xáha<sup>n</sup> espíritú cùndìhi yucu ñávǎha-á<sup>n</sup> xii-güedé:

—¿Te ná cúú nchòhó ñuu dayùhú ñáhá-ndó? Te xìní-í Jèsús, te xìní-í

yoo cùu té Păblú, te nchòhó ñá túú xini ñáhà-í xii-ndo —càchí espíritú-á<sup>n</sup> xáha<sup>n</sup>-xi xii-güedé.

16 Te téé yìhi ñaha espíritú cùndìhi yucu ñávǎha-á<sup>n</sup> ñí ndanchita-dé ní tñi-dé cue téé quide tátna-á<sup>n</sup>, te ní ndihí dóó-güedé ní ndátá-dé, te ní dánicuehé ñáhá-dé xii-güedé, te ní xinu-güedé cuáhá<sup>n</sup>-güedé. 17 Te nchaa ñáyiú isràél ndécú ñuú Éfesú ndihí dava-gá ñáyiú ndècu diu-ni ñuú-á<sup>n</sup> ñí níhi-yu tnúhu nàcuáa ní cuu, te ío ní yùhú-yu, te vai-yu ní cachí sá ío càhnu cuu Xítohó Jesucristú.

18 Te dava ñáyiú ní sàndáá iní-xi tnúhu Jèsús ní sáhá<sup>n</sup>-yu núu ndécú té Păblú, ndihí núu ndécú nchaa ñáyiú ní sàndáá iní tnúhu-gá ní náhmá-yu nàcuáa ní xóo cada-yu. 19 Te titní ñáyiú ní xóo cada nduu nehé-yu tutú-yu ní sáhá<sup>n</sup> núu ndécú nchaa ñáyiú sàndáá iní-xi tnúhu-gá, te yacá<sup>n</sup> ní ndada cuendá-yu sá ío yahu ní sáha-yu tutú-yu, chi ndéé údico úxí mǐl díhú<sup>n</sup> cuixí<sup>n</sup> ní sáha-yu núu ncháá. Te ncháá-yu ní sahmí-yu tutú-yu. 20 Te sátá ñí cáyú nchaa tutú-á<sup>n</sup>, te vai-gá ñáyiú ní tuhá-yu ichi Yá Ndióxi, te ní sáha-yu cuendá sá ío xini ñuhu tnúhu Yá Ndióxi.

21 Te ní cachí té Păblú sá quihí<sup>n</sup>-dé distritú Macèdoniá ndihí distritú Acáyá, te dàtnùní nùhú-dé ñuú Jerusalén, te duca<sup>n</sup> te dàtnùní quihí<sup>n</sup>-dé ñuú Rómá. 22 Te ndècu ndihí-dé té Timùteú ndihí té Èrastú cue téé chindee ñaha xii-dé. Te té Păblú ní xáha<sup>n</sup>-dē xii-güedé sá códo ñuu-güedé quihí<sup>n</sup> Macèdoniá, te ní xica-güedé cuáhá<sup>n</sup>-güedé, te mee-dé ní quendóo-dé.

*Ñáyiú Éfesú ío dusa<sup>n</sup> quidé-yu ñuú-yu*

23 Te dàvá-á<sup>n</sup> ío ní cudéñ-yu núu nchaa ñáyiú ní tuha ichi Yá Ndióxi. 24 Te ì<sup>n</sup> téé ñuú Éfesú nání-dé Demètriú. Te téé-á<sup>n</sup> ñí xóo canehè chiú<sup>n</sup>-dé mee-ni díhú<sup>n</sup> cuixí<sup>n</sup> ní xóo cadúha-dé veñúhu lihí, dàtná cuiní-ndó càa veñúhu Diáná sá cúú ndiòxi-yu. Te vai díhú<sup>n</sup> ñí xóo níhi-dé ndihí cue téé ní xóo cada chiú<sup>n</sup>

ndihí-dé. <sup>25</sup> Te ní cana-dé cue téé quide chiu<sup>n</sup> ndihí-dé, ndihí nchaa cue téé quide chiu<sup>n</sup> ndihí díhú<sup>n</sup> cuixí<sup>n</sup>, te ní xáha<sup>n</sup>-dē xii-güedé:

—Nàha-ndo sá ïo váha nihí-ó díhú<sup>n</sup> cuendá chiu<sup>n</sup> quide-o. <sup>26</sup> Te nàha-ndo sá cächí té Páblú sá ñà díú ndiöxí cúú sá ní cadúha ñáyiú ñuyíú-a. Te duca<sup>n</sup> cáhá<sup>n</sup>-dé ñuú-ó, te duca<sup>n</sup>-ni cáhá<sup>n</sup>-dé nihí distritú Àsiá, te ío-gá vai ñáyiú sàndáá iní tnúhu cáhá<sup>n</sup>-dé. <sup>27</sup> Te ío úhú ñuu na cuíta chiu<sup>n</sup> quide-o, vá yõo-gá cuaa<sup>n</sup> sá cádúha-o. Te ngüíta-yu cáhá<sup>n</sup>-yu sá veñúhu Diána ñá túú cáváha, te vá cádá cànhu-gá-yu sàndú-ó. Te nàha-ndo sá ïo cànhu cuu Dianá, chí nchaa ñáyiú distritú Àsiá quidé cànhu ñahá-yu ndihí ñáyiú xñdecu ní càa xico ñuyíú —cächí té Demètriú xáha<sup>n</sup>-dē xii-güedé.

<sup>28</sup> Te sá dúcá<sup>n</sup> ní cáhá<sup>n</sup> té Demètriú, xíá<sup>n</sup> ní cudéé<sup>n</sup>-güedé núú tē Páblú, te uu<sup>n</sup> ní cuáá-güedé te cächí-güedé:

—¡Ío cànhu cuu Dianá sàndú ñáyiú Éfesú! —cächí-güedé.

<sup>29</sup> Te nchaa ñáyiú ñuú Éfesú ndi coyo ndi coyó-yu xicáhá<sup>n</sup>-yu. Te tñahá úú cue téé distritú Macèdoniá xicá cuu-güedé ndihí té Páblú, ñ<sup>n</sup>-dé nání-dē Gáyú, te ñ<sup>n</sup>-dé nání-dē Aristarcú. Te ní tñi-güedé úú cue téé-á<sup>n</sup>, te cuánguñhu coyo ndihí ñaha-güedé vehe núú quidé-güedé jündá. <sup>30</sup> Te té Páblú cuini-dé quíhu-dé tñahá-dé vehe-á<sup>n</sup> cáhá<sup>n</sup> ndihí ñaha-dē ní cuu, te ñá ní dàña cue téé ní sàndáá iní tnúhu-gá. <sup>31</sup> Te ñ<sup>n</sup> úú cue téé cùnuu distritú Àsiá ní cáhá<sup>n</sup> váha-güedé cuendá té Páblú, te ní xáha<sup>n</sup>-güedé xii ñ<sup>n</sup> téé xínu cuechi núú-güedé ní sáhá<sup>n</sup>-dé ní xáha<sup>n</sup>-dē xii té Páblú sá vā quíhu-dé vehe núú quidé-güedé jündá. <sup>32</sup> Te uu<sup>n</sup> ní cuáá-yu ncháá-yu, te ñá ñ<sup>n</sup>-ní tñuhu ní cáhá<sup>n</sup>-yu, chí ndi díñ tñuhu ní cáhá<sup>n</sup>-yu ñ<sup>n</sup> ñ<sup>n</sup>-yu. Te chitu-gã ñáyiú ñá ní cùnuni iní-yu ná cuendá ní dátacá ñahá-güedé xití vehe-á<sup>n</sup>, chí ñá ñ<sup>n</sup>-ní tñuhu ní cáhá<sup>n</sup>-yu. <sup>33</sup> Te davá-yu ní cáhá<sup>n</sup>-yu sá cuéchi té Lijandrú cúú-xí, chí ní xáha<sup>n</sup> ñáyiú israél

xii-dé sá cáhá<sup>n</sup>-dé yuhú-yu chindee tñuhu ñaha-dē xií-yu. Te ní quide-dé ndaha-dé núu-yu sá cündedóho-yu tñuhu cáhá<sup>n</sup>-dé chindee tñuhu ñaha-dē xií-yu yòtnúhu. <sup>34</sup> Te ní cutnuni iní-yu sá tēe israél cúú-dē, te uu<sup>n</sup> ní cuáá tucú-yu, ñá ní dàñá-yu cáhá<sup>n</sup>-dé, te cächí-yu:

—¡Ío cùnuu Dianá sàndú ñuú Éfesú! —cächí-yu. Te dàtná úú òré ñ<sup>n</sup>-ni tñuhu ní cáhá<sup>n</sup>-yu.

<sup>35</sup> Te téé cuu secretariú-ni-gá ní cáhá<sup>n</sup>-dé, te dàtnuni cuéé cuéé ní sadí-yu yuhú-yu. Te ní xáha<sup>n</sup>-dē xii-yu:

—Nchaa-ndo cündedóho-ndo ñ<sup>n</sup> tñuhu na cáhá<sup>n</sup>-í-a. Ío cùnuu Dianá, te nchaandi túhú ñáyiú sa nahá-yu sá ncháá-ó ïo nèhe cuendá-ó veñúhu-á<sup>n</sup>. Te nahá-yu sá néhé cuendá-ó sàndú-á<sup>n</sup>, chí véxi cuu<sup>n</sup>-gá andiú. <sup>36</sup> Te vá yõo ñ<sup>n</sup> cächí sá ñá ndáá. Te coto-ndo mēe-ndo, te vá cuidó-ndó cada-ndo, te vá cuidó-ndó cáhá<sup>n</sup>-ndó. <sup>37</sup> Te ná cuendá ndécá-ndó cué téé-á<sup>n</sup> véxi, te ñá túú ñá ní quide-güedé, te ñá túú ñá ní dùhu-güedé veñúhu, te ñá túú cáhá<sup>n</sup> cuéhé-güedé cuendá Diána. <sup>38</sup> Te núu ío yoo nàá ndihí ñaha xii té Demètriú ndihí cue téé quide chiu<sup>n</sup> ndihí-dé, te quíñ<sup>n</sup>-güedé cacá<sup>n</sup> cuéchi-güedé núú cué téé cùchiu<sup>n</sup>. Te cue téé cùchiu<sup>n</sup> na cundoho-güedé núu quehndé-güedé cuéchi-yu àdi ñáhá. <sup>39</sup> Àdi ío-gá ná cuendú ñúhú iní-ndó, te cáhá<sup>n</sup>-ndó òré ná cóo jündá. <sup>40</sup> Te ío úhú ñuu na nihí téé tàxi tñuni ñáhá xii-o tñuhu sá dúhá ïo quide dusa<sup>n</sup>-o, te cächí-dé sá ndècuéchi-o chí ñá túú sàndáá iní-ó-dē quesaha-dē. Te ñá túú tñahí ndùu váha-xi sá dúhá cada-o ní cuu, te vitna duha ní quide-o, te ñá cùnuni iní-ó ñasa cùñaha-o xii téé tàxi tñuni ñáhá xii-o núu na càna ñaha-dé —cächí téé cuu secretariú xáha<sup>n</sup>-dē xií-yu.

<sup>41</sup> Te ní xáha<sup>n</sup>-dē sá nùhú-yu te ní ndihí-yu cuánuhú.

## 20

*Té Páblú cuáhá<sup>n</sup>-dé distritú Macèdoniá ndihí distritú Grèciá*



<sup>1</sup> Te òré ñá túú-gă ní quide dusá<sup>n</sup>-yu, te ní cana ñaha tẽ Păblú xii nchaa ñáyiú sàndáá iní tnúhu Jèsús ní cáhá<sup>n</sup>-dé dóho-yu nàcuáa cadá-yu. Te ní quide ndee iní ñáhá-dě xií-yu, te ní tñi-dé ichi cuáhá<sup>n</sup>-dé distritú Macèdoniá. <sup>2</sup> Te tayăha-dé cuáhá<sup>n</sup> ì<sup>n</sup> ì<sup>n</sup> ñuú yíndèhu Macedoniá. Te càhá<sup>n</sup>-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudíí iní-yu cadá-yu nàcuáa càhá<sup>n</sup> Yă Ndiõxí cadá-yu sá dúcá<sup>n</sup> ní cáhá<sup>n</sup>-dé dóho-yu. Té ní quexìo-dé distritú Grèciá. <sup>3</sup> Te xíá<sup>n</sup> ñí xíndecu-dé úní yóó. Te xíá<sup>n</sup> quëe-dé bàrcú quíhí<sup>n</sup>-dé distritú Siriá ní cùu, te ní níhí-dě tnúhu sá ndétú ñàha ì<sup>n</sup> úú cue tée isràél cahni ñaha-güedě xii-dé ní cùu, núu xíá<sup>n</sup> ní tñi-dé ichi cuáhá<sup>n</sup>-dé ní yáha-dé ichi distritú Macèdoniá. <sup>4</sup> Te cuáhá<sup>n</sup> ndihí-dé té Sopàtér tée ñuú Bèréá, ndihí té Arìstarcú, ndihí ì<sup>n</sup> tée nàni Segundú. Te ndi ndúú cue tée-á<sup>n</sup> cúu-güedě cue tée ñuú Tesalónica. Te tnàhá té Găyú tée ñuú Dèrbé, ndihí té Timùteú cuáhá<sup>n</sup> ndihí-dé, te tnàhá té Tiquicú ndihí té Tròfimú cuáhá<sup>n</sup> ndihí-dé, te úú cue tée-á<sup>n</sup> cúu-güedě cue tée distritú Asiá. Te nchaa cue tée-á<sup>n</sup> cuáhá<sup>n</sup> ndihí-güedě té Păblú. <sup>5-6</sup> Te ní quexìo-güedě ñuú Fìlipú, te yàcá<sup>n</sup> ní naníhí ñáhá-güedě xii-ndí. Te té Păblú ní tendaha-dě cue tée ndihí-dé cuáhá<sup>n</sup>-güedě ñuú Tròás, te ní xáha<sup>n</sup>-dě sá díú-ní yàcá<sup>n</sup> cundetu ñaha-güedě xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhi levadurá. Te sáta ñí yáha vico, te ní quée-ndí bàrcú cuáhá<sup>n</sup>-ndí, te ní xúhu<sup>n</sup>-ndí ichi úhú<sup>n</sup> nduu, te ní quexìo-ndí ñuú-á<sup>n</sup>. Te yàcá<sup>n</sup> ní naníhí tnáhá-ndí ndihí cue tée yòdo nuu cuáhá<sup>n</sup> ní xíndecu-ndí úsá nduu.

*Té Păblú cuáhá<sup>n</sup> ngándihí-dé ñáyiú ñuú Tròás*

<sup>7</sup> Te ì<sup>n</sup> nduu ndumìngú ní naníhí tnáhá-ndí ndihí nchaa ñáyiú ní sàndáá iní-xi tnúhu Jèsús ní xexi-ndí pàá ndihí-yu. Te duca<sup>n</sup> ñí quide-ndí, chi

ní cachí Jèsús sá dúcá<sup>n</sup> càda-o cuendá sá vă nàcuànaa-o sá ñí xíhí-gá cuendá naníhí tàhú-ó. Te té Păblú ní ngüita-dé càhá<sup>n</sup>-dé tnúhu-gá, te càhá<sup>n</sup>-dé ní cuu dava niú, chi cuendá ná tũndaá ingá nduu-á<sup>n</sup>, te caca-dé quíhí<sup>n</sup>-dé ingá xichi. <sup>8</sup> Te ndècú-yu vehe yòdo tnaha, te yìhí-yu ndéé cuàrtú cúú ùní núú ññu, te càyú víhí ñùhú xití cuàrtú-á<sup>n</sup>. <sup>9</sup> Te ì<sup>n</sup> tée sa ta cùu sacuéhé luha nàni-dé Eùticú núcòo-dé yèhe ventaná, cuiní-dé cúdú-dé, chi ní cunaha víhi cahá<sup>n</sup> té Păblú, te ní tñi ñaha sàni xii-dé ní xidí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñáhá-yu, te sa ní xíhí-dé, chi ío dùcú<sup>n</sup> ní ngava-dé. <sup>10</sup> Te tnàhá té Păblú nchicú<sup>n</sup>-dé ní nuu. Te ní quexìo cunu-dé núú cātùu tée ní xíhí-á<sup>n</sup>, te ní numi ñaha-ni-dě, te ní xáha<sup>n</sup>-dě xií-yu:

—Vá ndìhú iní-ndó, chi ní ndoto-dé —càhí-dé xáha<sup>n</sup>-dě xií-yu.

<sup>11</sup> Te dătnùní cuánda ndihí ñaha tũcu-dé xií-yu cuàrtú núú yìhí-yu ní cùu, te yàcá<sup>n</sup> ní xexi ndihí ñaha-dě xií-yu, dătnùní ní ngüita-dé vâi-gá tnúhu ní cáhá<sup>n</sup>-dé, te càhá<sup>n</sup>-ni-dé ní tũndaá, te dătnùní ní xica-dé cuáhá<sup>n</sup>-dé. <sup>12</sup> Te tée ní ngava-á<sup>n</sup> ní sánúndeca ñáhá-yu xii-dé ndéé vehe-dé, te ío ní cudíí iní-yu sá ñí ndoto-dé.

*Ní quée-güedě ñuú Tròás cuáhá<sup>n</sup>-güedě ñuú Miletú*

<sup>13</sup> Te té Păblú ní cachí-dé sá quíhí<sup>n</sup>-ndí ndihí bàrcú ndéé ñuú Àsón, te mee-dě caca saha-dě, te yàcá<sup>n</sup> naníhí tnáhá-ndí ndihí-dé te quée-dé bàrcú, te ní quée-ndí bàrcú cuáhá<sup>n</sup>-ndí. <sup>14</sup> Te ní naníhí tnáhá-ndí ndihí-dé ñuú Àsón, te yàcá<sup>n</sup> ní quée-dé bàrcú tnáhá-dé cuáhá<sup>n</sup>-ndí ñuú Mitilené. <sup>15</sup> Te ní quexìo-ndí ndéé ingá nduu yatni ñuú Quiú, te ndéé nduu tnéé ní quexìo-ndí ñuú Sámú te yàcá<sup>n</sup> ní yáha-ndí, te ní quexìo-ndí ñuú Trògiliú. Te ndéé nduu idá ní quexìo-ndí ñuú Miletú. <sup>16</sup> Te té Păblú ñá ní cuiní-dé yáha-ndí

ñuú Éfesú, chi ñá túú ní tnàhá iní-dé cuyaa-dě ichi, chi ío ndìhi iní-dé cuendá cuiní-dé quini-dé nũu vá ndácú-dě ndexìo-dé ñuú Jerusàlén cundecu-dé vico Pentecòstés.

*Té Păblú càhá<sup>n</sup> ndìhi-dé cue té yìndaha ñaha xii ñáyiú sàndáá iní tnúhu Jèsús ñuú Éfesú*

<sup>17</sup> Te òré ndécú tē Păblú ñuú Miletú, te ní cana-dé cue té yìndaha ñaha xii ñáyiú sàndáá iní tnúhu Jèsús ñuú Éfesú sá quihí<sup>n</sup>-güedé núú ndécú-dě. <sup>18</sup> Te sátá nĩ quexìo-güedé, te ní xáha<sup>n</sup>-dě xii-güedé:

—Nàha-ndo nacuáa ní quide-í ndéé cùtnàhá ní quexìo-í distritú Àsiá. <sup>19</sup> Chi ní quide-í nàcuáa ní càhá<sup>n</sup> Yă Ndiòxí cada-í, ñá túú ní tühío-í, te ñá túú ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tìtní xito ní cuiní ñáyiú isràél cahni ñàhá-yu xii-í ní cùu, te ío ní ndoho-í ní cácu-í. <sup>20</sup> Te sa nàha-ndo sá ncháándì túhú sa ní cachí tnúhu-í nàcuáa cada-ndo cuendá sá chindèe ñaha Yă Ndiòxí xii-ndo. Te ní càhá<sup>n</sup>-í tnúhu-gá núú-ndó ncháa-ndo, te ñu-ni duca<sup>n</sup> nĩ quixi-í ndi tnahá vehe-ndo nĩ càhá<sup>n</sup>-í tnúhu-gá núú-ndó. <sup>21</sup> Te ní xáha<sup>n</sup>-í xii ñáyiú isràél ndìhi ñáyiú ñá túú cùu ñáyiú isràél sá dáñá-yu nchaa sá cuèhé sá dúhá quidé-yu te quindáá iní-yu tnúhu Xítohó Jesucristú. <sup>22</sup> Te dacutíí quihí<sup>n</sup>-í ñuú Jerusàlén, chi Espíritú Yă Ndiòxí ní cachí-xi sá dáí quihí<sup>n</sup>-í, te ñá túú xini-í nándi cada ñaha-güedě xii-í yàcá<sup>n</sup> te núu na quèxio-í. <sup>23</sup> Te ñ<sup>n</sup> ñ<sup>n</sup> ñuú núú sàhá<sup>n</sup>-í càchí tnúhu Espíritú-gá sá chíhí ñàha-güedé vecaá, te cada úhú ñàhá-güedě. <sup>24</sup> Dico ñá túú tnàhí ná cuu cuèi na càhni ñaha-güedé xii-í, dico cuiní-í sá ñ<sup>n</sup> iní dandìhi-í nchaa sá nĩ cachí Xítohó Jesucristú cada-í. Te ní cachí Yă Ndiòxí sá càhá<sup>n</sup>-í núú ñáyiú sá ío cùu iní ñàhá-gá xii-yu, te naníhí tànhú-yu núu na quindáá iní-yu tnúhu-gá.

<sup>25</sup> Te sa ní cachí tnúhu-í xii-ndo ncháa-ndo sá nũu na quindáá iní-ndó

Yă Ndiòxí, te ndíhu ndaha ñàha-gá xii-ndo. Te na càchí tnúhu-í sá nĩ ñ<sup>n</sup> nduu-gá vá quini ñàhá-ndó xii-í ñuyíú-a. <sup>26-27</sup> Te yúhú ñá túú cuèchi-í nũu ío ñáyiú vá naníhí tànhú, chi sa ní cachí tnúhu-í nchaa sá nĩ càhá<sup>n</sup> mée Yă Ndiòxí cada-ndo. <sup>28</sup> Te coto-ndo mée-ndo, te coto-ndo tnàhá ñáyiú sàndáá iní tnúhu-gá, chi Espíritú-gá ní cachí-xi sá cùnũu-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbèe-ndó cùu-yu, te mee-ndo cùu-ndo datná toli xito-ndó-yu duca<sup>n</sup> càda-ndo cuendá, chi nàha-ndo sá Jèsús ní sati níhí-gă, te ní xihí-gá cuendá naníhí tànhú-ó ndìhi-yu. <sup>29</sup> Te yúhú sa cùtnuní iní-í sá òré ñá túú-gă-í ndécú, te quixi ñáyiú dandàhú ñàhá xii-ndo cuendá dañà-ndo tnúhu Yă Ndiòxí, te cada ñàhá-yu xii-ndo dàtná quidé ñàñá òré tní-dí mbèe. <sup>30</sup> Te ñu-ni ñ<sup>n</sup> úú cue té ndècu ndìhi-ndo, cue té-á<sup>n</sup> dacuàndehnde-güedé, te cudana davá-yu quindáá iní-yu chítnàhá ñàhá-yu xii-güedé. <sup>31</sup> Te xiã<sup>n</sup> nũu càchí tnúhu-í sá ío quihí iní-ndó cundecu-ndo ndìhi nchaa ñáyiú sàndáá iní tnúhu-gá. Te nàha-ndo sá yúhú ní xindecu-í úní cuiá nĩ càhá<sup>n</sup>-í tnúhu Jèsús núú ñáyiú cuèi nduu cuèi niú. Te áma ní xóo ndáhyú-í, chi ñá ní cuiní-yu quindáá iní-yu ncháa-yu tnúhu ní càhá<sup>n</sup>-í —càchí té Păblú xáha<sup>n</sup>-dě xii-güedé.

<sup>32</sup> Te xáha<sup>n</sup> tùcu-dé:

—Nchòhó cue té ndècu ndìhi-í ichi Xítohó Jesucristú, ío cuiní-í sá mée Yă Ndiòxí chindee ñàha-gá xii-ndo. Te mee-gă ní càhá<sup>n</sup>-gá sá ío cùdí iní ñàhá-gă xii-ndo. Te naníhí tànhú-ndó ndìhi nchaa ñáyiú cùu cuendá-gá, te chindee ñàha-gá xii-ndo cuendá cada-ndo ncháa sá càhá<sup>n</sup>-gá. <sup>33</sup> Te òré ní xindecu ndìhi ñaha-í xii-ndo, te ní ñ<sup>n</sup> ní dōó ñá túú ní cùdí iní-í. <sup>34</sup> Te mee-ndo sá nàha-ndo sá yúhú ní quide chiú<sup>n</sup>-í, te ní níhí-í nchaa sá nĩ nandìhi-í ndìhi cue té xica cuu ndìhi-í. <sup>35</sup> Te sa ní xini-ndó nàcuáa ní quide-í ní quide chiú<sup>n</sup>-í, te ñu-ni duca<sup>n</sup> càda chiú<sup>n</sup>-ndo cuendá chindee-ndo ncháa ñáyiú ndàhú,

chi sa nàha-ndo nacuáa ní cachí Xítóhó Jesucristú, te duha ní cachí-gá: “Cùdí-gã iní-ó cuãha-o ñãyi ndàhú sá xíní ñùhú-yu dàcúúxí sã táxí-yu xii mee-o”, duha ní cachí-gá —càchí té Páblú xãha<sup>n</sup>-dë xii-güedé.

<sup>36</sup> Te sátá dúcá<sup>n</sup> ñí cáhá<sup>n</sup>-dé, te ní ngüíñí xítí-dë ndihi dava-gá-güedé, te ní cáhá<sup>n</sup> ndihi-dé Yã Ndiöxí. <sup>37</sup> Te sátá ñí túhú tnúhu ní cáhá<sup>n</sup>-dé ndihi Yã Ndiöxí, te ní ndáhyú víhí-güedé sá quíhí<sup>n</sup>-dé, te ní numi ñaha-güedé, te ní teyuhu ñaha-güedé. <sup>38</sup> Te ní ndíhú víhí iní-güedé, chi ní xãha<sup>n</sup> tã Páblú sá ñí ñí<sup>n</sup> nduu-gá vá nánihí tnáhá-güedé cáhá<sup>n</sup> ndihi tnàha-güedé. Te cuáhá<sup>n</sup> ndihi ñaha-güedé xii-dé núú ndécú bàrcú.

## 21

### *Té Páblú cuáhá<sup>n</sup>-dé ñuú Jerusálén*

<sup>1</sup> Te ní quide ndee iní-ndí nchaa cue té cùnuu. Te ní quée-ndí bàrcú cuáhá<sup>n</sup> ndáá ichi-ndí ñuú Cös. Te nduu tnëé ní sáhá<sup>n</sup>-ndí ñuú Ròdás, te ní yáha-ndí cuáhá<sup>n</sup>-ndí ñuú Pàtará. <sup>2</sup> Te yàcá<sup>n</sup> ní naníhí-ndí ñí<sup>n</sup> bàrcú ñúhú ichi-xi quíhí<sup>n</sup>-xi distritú Fènicia, xíã<sup>n</sup> ní quée-ndí cuáhá<sup>n</sup>-ndí. <sup>3</sup> Te ichi cuáhá<sup>n</sup>-ndí ní xíní-ndí distritú Chìpré cáá cuádava xítí làmár, te ní yáha-ndí, te ní quendóo ñuú-á<sup>n</sup> xio dàtni-ndí. Te cuáhá<sup>n</sup>-ndí ñuú Tìrú ñí<sup>n</sup> ñuú yíndèhu distritú Siriá cuendá yàcá<sup>n</sup> tava-güedé nchaa sá nchídó bàrcú. <sup>4</sup> Te yàcá<sup>n</sup> ní naníhí tnáhá-ndí ndihi ñáyi ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáhã<sup>n</sup>-yu sá vã quíhí<sup>n</sup> té Páblú ñuú Jerusálén, chi Espiritú Yã Ndiöxí ní xãha<sup>n</sup>-xi xii-yu sá ndóhó vñhi-dé ñú na quíhí<sup>n</sup>-dé. <sup>5</sup> Te sátá ñí yáha nduu úsá, te ní quée-ndí cuáhá<sup>n</sup>-ndí yuhu làmár. Te ní quée nchaa ñáyi ní sándáá iní tnúhu-gá, té, ñadìhí, nchaa landú, ncháá-yu ní sándeca ñáhá-yu yuhu làmár, te òré ní quexìo-ndí, te ní ngüíñí xítí-ndí ní cáhá<sup>n</sup> ndihi-ndí Yã Ndiöxí. <sup>6</sup> Te ní quide ndee iní tnáhá-ndí ndihí-yu, te dàtnùní ní

quée-ndí bàrcú, te ní naquehé<sup>n</sup>-yu ichi cuánuhú-yu vehé-yu.

<sup>7</sup> Te ní xica bàrcú ñúhú-ndí ní quée-xi ñuú Tìrú cuáhá<sup>n</sup>-ndí ndihi-xi ñuú Tolèmaidá. Te xíã<sup>n</sup> ñí sáá-xi te ní quene-ndí, te ní sáhá<sup>n</sup>-ndí ní cáhá<sup>n</sup> ndihi-ndí nchaa ñáyi sándáá iní-xi tnúhu Jèsús, te ní xíndecu-ndí ndihí-yu ñí<sup>n</sup> nduu. <sup>8</sup> Te nduu tnëé ní ndée tucu-ndí bàrcú cuáhá<sup>n</sup>-ndí ñuú Cèsareá, te yàcá<sup>n</sup> ní quene tucu-ndí bàrcú, te cuáhá<sup>n</sup>-ndí vehe té Lìpé cundecu-ndí ndihi-dé. Te té-á<sup>n</sup> ñí xóo cada chiú<sup>n</sup> ndihi-dé íñú-gá cue té ní chindee ñaha xii ñáyi sándáá iní tnúhu-gá ñuú Jerusálén ní xóo cuãñaha-güedé sá ñí xóo caxí-yu. Te dàtnùní mee-nã tnúhu Yã Ndiöxí cáhá<sup>n</sup>-dé xíca cùu-dé. <sup>9</sup> Te té Lìpé-á<sup>n</sup> ndècu cùmí dèhe dñhí-dé, te ní ñí<sup>n</sup>-yu vátá ndúcú ñaha-gá té xii-yu, te ncháá-yu càhá<sup>n</sup>-yu tnúhu Yã Ndiöxí tnúhu sá dácahu iní ñáhá mèe-gá. <sup>10</sup> Te xíã<sup>n</sup> ñí cuu titní nduu ndècu-ndí, te ní quexìo ñí<sup>n</sup> té nàni Agabú ñuú-á<sup>n</sup>, véxi-dé distritú Jùdeá, te té-á<sup>n</sup> tnáhá-dé càhá<sup>n</sup>-dé tnúhu Yã Ndiöxí. <sup>11</sup> Te ní níhí-dé tnúhu núú ndécú-ndí ñú ní quixi-dé ní cáhá<sup>n</sup> ndihi ñaha-dé xii-ndí. Te ní xíca<sup>n</sup>-dé cínchú té Páblú, te ní ngóo-dé, te ní ngüíta-dé ní dácútú-dé sáhá-dé ndihi ndaha-dé, te ní cachí-dé xii-ndí:

—Espiritú Yã Ndiöxí ní cachí-xi sá tãe dii cínchú-xi-a tñi ñaha cuè té isràél ñuú Jerusálén, te duha dacutu ñaha-güedé xii-dé, te cuáha cuendá ñáhá-güedé xii-dé núú cuè té ñuú Rómá. Duha ní cáhá<sup>n</sup> Espiritú-gá —càchí té Àgabú.

<sup>12</sup> Te sá dúcá<sup>n</sup> ñí cáhá<sup>n</sup>-dé, te ní xãha<sup>n</sup>-ndí nchaa-ndí sá vã quíhí<sup>n</sup> té Páblú ñuú Jerusálén. <sup>13</sup> Te té Páblú ní cachí-dé:

—¿Ná cuendá ndéé dúcá<sup>n</sup> ndàhyú-ndó dàndihú iní ñáhá-ndó xii-í-i? Te ñá túú nã cuu cuèi na dacutu ñaha-güedé, àdi cuèi na càhni ñaha-güedé xii-í cuendá sá càhá<sup>n</sup> ndihi-í Jèsús, chi sa ndècu túha-í sá cùú-í —càchí-dé.

14 Te ñá túú ní sándáá iní-dé sá dúcá<sup>n</sup> xáha<sup>n</sup>-ndí, núú xiá<sup>n</sup> ñá túú-gá ná ní xáha<sup>n</sup>-ndí xii-dé sá vǎ quíhí<sup>n</sup>-dé, te ní xítñaha-ndí:

—Mee-ni-gǎ Yǎ Ndiöxí ná cùnaha-gá nása sàni iní-gá cada-gá —xítñaha-na-ndí.

15 Te ní quehe<sup>n</sup>-ndí ndàchíu<sup>n</sup>-ndí, te ní xica-ndí cuáhá<sup>n</sup>-ndí ñuú Jerusálén.

16 Te cuáhá<sup>n</sup> ndíhi-ndí ñí<sup>n</sup> úú cue téé Cèsareá, cue téé ní sándáá iní tnúhu Jèsús. Te ndèca ñaha-güedé xii-ndí cuáhá<sup>n</sup> vehe té Mnàson, te téé-á<sup>n</sup> cúú-dé téé distritú Chìpré, te ndècu-dé ñuú Jerusálén, te sa ní cuu vǎi nduu ní sándáá iní-dé tnúhu-gá, te vehe téé-á<sup>n</sup> ñí xíndecu-ndí.

#### *Té Pǎblú ndátñúhu-dé ndíhi té Jàcobó*

17 Te òré ní quexìo-ndí ñuú Jerusálén, te nchaa ñáyíu ní sándáá iní tnúhu Jèsús ní quixí-yu ní dándácõ vǎha ñàhá-yu, chí ní cudíí víhí iní-yu sá ñí quexìo-ndí. 18 Te nduu tnèé cuáhá<sup>n</sup> ndíhi-ndí té Pǎblú cuendá cáhá<sup>n</sup> ndíhi-ndí té Jàcobó, te òré ní quexìo-ndí núú ndécú-dé, te ndècu ndíhi-dé nchaa cue téé yíndaha ñaha xii ñáyíu sándáá iní tnúhu Jèsús. 19 Te té Pǎblú ní dándácõ vǎha ñaha-dé xii-güedé, te ní xáha<sup>n</sup>-dé nàcuáa ní quide Yá Ndiöxí ní chindee ñaha-gá xii-dé ní cáhá<sup>n</sup>-dé tnúhu-gá núú ñáyíu ñá túú cùu ñáyíu isràél. 20 Te sátá ñí yáha ní cáhá<sup>n</sup>-dé, te ní ndácá<sup>n</sup> táhú-yu núú Yǎ Ndiöxí cuendá nchaa sá ñí quide-gá. Te dàtnùní ní xáha<sup>n</sup>-güedé xii té Pǎblú:

—Yòhó sa nàha-n sá ñí cuu titní mǐl ñáyíu isràél ní sándáá iní-yu tnúhu Jèsús, te cǎchí-yu sá ìo xìni ñuhu-xi cadá-yu nchaa nàcuáa cǎhá<sup>n</sup> tnúhu sá ñí chídó tnùní ndíi Moisés. 21 Te ní níhí-yu tnúhu sá dǎcuàha-n ñáyíu isràél ñáyíu ndècu ñuú xícá cuendá sá vǎ cadá-gǎ-yu nàcuáa ní cachí ndíi Moisés cadá-yu. Te xáha<sup>n</sup>-n xii-yu sá vǎ cuàha-gá-yu sèñá ñí landú-yu, te vǎ cadá-gǎ-yu dàtná ní xóo cada ñáyíu ndéé sanaha, duha dàcuaha-n ñáyíu ní níhí-yu tnúhu. 22 Te na nihí-yu tnúhu sá ndécú-n ìha,

te tnávíí ngúíta-yu cáhá<sup>n</sup> cuèhé-yu cuendá-n. 23 Te na cǎchí tnúhu-ndí nàcuáa cada-n. Ndècu cúmí cue téé vátá cadá-gǎ-güedé nàcuáa ní cáhá<sup>n</sup> méé-güedé sá cadá-güedé cuendá nduu vétú iní Yǎ Ndiöxí. 24 Te quíhí<sup>n</sup>-n ndíhi-güedé te cada-n nchaa nàcuáa ní xóo cada ñáyíu ndéé sanaha cuendá nduu vétú iní Yǎ Ndiöxí. Te tava-n díhú<sup>n</sup> cuu núú-güedé cháhu-güedé veñúhu, te duca<sup>n</sup> te dàtnùní ndacu dèté díquí-güedé. Nchaa xiá<sup>n</sup> cada-n, te quini ñáyíu sá ñǎ ndáa tnúhu cǎhá<sup>n</sup> nchaa ñáyíu cǎhá<sup>n</sup> cuèhé cuendá-n. Te na cùtnuní iní-yu sá tnàhá-n quide-n nchaa nàcuáa ní chídó tnùní ndíi Moisés cadá-yu. 25 Te sa ní quide ndáá-ndí cuendá nchaa ñáyíu ñuú xícá, nchaa ñáyíu ní tuha ichi Jèsús. Te sa ní cadúha-ndí tutú ní tendaha-ndí cuáhá<sup>n</sup> ndaha nchaa ñáyíu-á<sup>n</sup> sǎ vǎ cǎxí-yu nchaa sá nchító-ó ndúu táhú nchaa sá cǎchí-yu cùu ndióxí ní cadúha cue ñáyíu ñuyíú-a. Te ní xáha<sup>n</sup>-ndí sá vǎ cǎxí-yu níhí, te vǎ cǎxí-yu cuñú nchaa quiti cuèhné. Te vǎ cǎhá<sup>n</sup> ndíhi cue téé ñadíhí te núu ñá díú ñadíhí-güedé cúú-yu, te ní cué ñáyíu díhí vǎ cǎhá<sup>n</sup> ndíhí-yu téé te núu ñá díú yíí-yu cùu-güedé. Duha ní tee-ndí núú tütú cuáhá<sup>n</sup> —cǎchí-güedé xáha<sup>n</sup>-güedé xii té Pǎblú.

#### *Ní tní-güedé té Pǎblú xití veñúhu ñáyíu isràél*

26 Te nduu tnèé cuáhá<sup>n</sup> té Pǎblú ndíhi cúmí cue téé veñúhu cǎhnu sá ìo cùnuu núú ñáyíu isràél cada-güedé nàcuáa ní xóo cada ñáyíu ndéé sanaha cuendá nduu vétú iní Yǎ Ndiöxí. Te ní quíhu-dé veñúhu cǎhnu sá ìo cùnuu-á<sup>n</sup> ñí xáha<sup>n</sup>-dé ná daha-gá nduu cùmání dandíhi-güedé nàcuáa ní xóo cada ñáyíu ndéé sanaha, te dàtnùní cǎnehe-güedé sá ndúú táhú Yǎ Ndiöxí quíhí<sup>n</sup> veñúhu.

27 Te cùmání-gǎ cuu úsá nduu sá ñí sáhá<sup>n</sup>-güedé veñúhu cǎhnu sá ìo cùnuu, te sa ndècu tucu té Pǎblú veñúhu. Te cue téé isràél véxi distritú Àsiá ní xiní-güedé té Pǎblú yíhí-dé veñúhu,



te ní tñi ñaha-güedě xii-dé, te ío ní cáhá<sup>n</sup> cuèhé-güedé cuèndá-dé núú dáva-gá ñáyu yihi veñúhu cuèndá sá cúde<sup>n</sup>-yu núú tē Pāblú. <sup>28</sup> Te níhi ní cáhá<sup>n</sup>-güedé, te xāha<sup>n</sup>-güedě xií-yu:

—¿Nchòhó ñáyu isràél, yáchí-ndó chì cuánùndaha ñaha-ndo! Chì tée-a yayacá<sup>n</sup> cuáhá<sup>n</sup>-dé cāhá<sup>n</sup>-dé sá ñà túú nāndíhi-o, te cāhá<sup>n</sup>-dé sá vā cādá-ó nchāa nacuāa cāhá<sup>n</sup> tnúhu sá nī chídó tnùnī ndíi Moisés, te cāchí-dé sá ñà túú nāndíhi veñúhu-a. Te ñá díú-ní xǎ<sup>n</sup> chi sa ní quíhu-dé veñúhu-a ndíhi cue tée ñá túú cùu ñáyu isràél, te sá dúcá<sup>n</sup> nī quide-dé, te ñá túú-gǎ ní cānehe íí-dě xití veñúhu. Te veñúhu-a cùu-xi vehe Yá Ndióxi —cāchí-güedé xāha<sup>n</sup>-güedě xií-yu.

<sup>29</sup> Te duca<sup>n</sup> nī cáhá<sup>n</sup>-güedé chi ní sani iní-güedé sá nī quíhu ndíhi-dé té Trófimú veñúhu-güedé, chi ní xiní-güedé xíca cùu ndíhi ñaha-dé xití ñuú. Te tée-á<sup>n</sup> cúú-dě tée ñuú Éfesú, te ñá díú tée isràél cúú-dě.

<sup>30</sup> Te chitu ñáyu ñuú-á<sup>n</sup> nī tacá-yu ní tñi-yu té Pāblú táñuhu ñahá-yu ní ndee veñúhu cāhnu sá ío cùnūu, te òré-ni ní nacadí-güedé yèhe veñúhu-á<sup>n</sup>. <sup>31</sup> Te sa cahní-yu té Pāblú ní cùu, te ní sáhá<sup>n</sup> ñ<sup>n</sup> úú-güedé núú ndécú tée cùu capitá<sup>n</sup> cùnūu-gá, te ní xāha<sup>n</sup>-güedě xii-dé sá ncháá ñáyu ñuú Jerusalén xñàá-yu. <sup>32</sup> Te òré-á<sup>n</sup> cuáhá<sup>n</sup> tée cùu capitá<sup>n</sup> cùnūu-gá ndíhi dava-gá cue tée nchícú<sup>n</sup>-gá ndíhi sandádú-dé. Te òré ní xiní-yu ní quexío coyo-güedé núú xixúcu-yu, te ní yùhú-yu ñá túú-gǎ ní cānī-yu té Pāblú. <sup>33</sup> Te tée cùu capitá<sup>n</sup> ní sátuha-dé té Pāblú, te ní xāha<sup>n</sup>-dě xii cue sandádú-dé sá tñí ñaha-güedé dacùtu ñaha-güedé úú cadèná. Te dātnùnī ní xíca<sup>n</sup> tnúhú-dě núú-yu, te xāha<sup>n</sup>-dě:

—¿Ná cúú tēe-a? ¿Ná ní quide-dé? —cāchí-dé xāha<sup>n</sup>-dě xií-yu.

<sup>34</sup> Te tée cùu capitá<sup>n</sup>-á<sup>n</sup> ñǎ ní cùtnuní iní-dé núu ná cúú sǎ nī quide té Pāblú, chi uu<sup>n</sup>ni ní cuáá-yu. Te tucu cāhá<sup>n</sup> ñ<sup>n</sup>, tucu cāhá<sup>n</sup> ñ<sup>n</sup>-yu, núu xǎ<sup>n</sup> ní xāha<sup>n</sup>-dě cue sandádú-dé sá cāndèca

ñaha-güedé xii-dé quíhí<sup>n</sup> cuàrtél núú ndécú-güedě. <sup>35-36</sup> Te nchícú<sup>n</sup> ñáhǎ-yu cuáhá<sup>n</sup> ní quexío ndéé nācuāa cāa nchio cuínī-yu cahní ñahá-yu xii-dé ní cùu. Te níhi ní cáhá<sup>n</sup>-yu xāhǎ<sup>n</sup>-yu sá cāhní ñaha-güedé, te xǎ<sup>n</sup> ní ndacani ñaha-güedě ndécá ñaha-güedé cuásáá nchio-ǎ<sup>n</sup>.

*Té Pāblú xāha<sup>n</sup>-dě xii-güedé sá ñà túú cuèchi-dé*

<sup>37</sup> Te cuánguihu-güedé cuàrtél ndíhi té Pāblú ní cùu, te ní xāha<sup>n</sup>-dě xii tée cùu capitá<sup>n</sup> cùnūu-gá:

—Cāhá<sup>n</sup> ndàhú-í núú-n cùndetu-na cūñaha-í ñ<sup>n</sup> úú tnúhu xií-yu —cāchí-dé xāha<sup>n</sup>-dě.

Te tée tàxi tnuní-á<sup>n</sup> nī xāha<sup>n</sup>-dě:

—¿Náa tnàhá yòhó cāhá<sup>n</sup>-n tnúhu griégú? <sup>38</sup> Te ní cáhá<sup>n</sup>-í sá tēe ègíptú cúú-n, chi díu-n nī ndúcú-n cuè tēe ní nāá ndíhi tēe cùchiu<sup>n</sup> Cesár ní cáhá<sup>n</sup>-í, chi díu ñ<sup>n</sup> tēe yacá<sup>n</sup> ní ndúcú-dě cūmí mīl cue tēe ní sahní ndíyi. Te ndèca tnaha-güedé ní sáhá<sup>n</sup> xití yucu ní xíhi váha-güedé —cāchí-dé xāha<sup>n</sup>-dě xii té Pāblú.

<sup>39</sup> Te té Pāblú ní xāha<sup>n</sup>-dě:

—Ñá díú tēe ègíptú cúú-í, chi tēe isràél cúú-í, chi díu-ni tēe isràél cúú tātà-í, te dícó-ni sá nī cacu-í ñuú Tàrsú ñuú cāhnú, te ñuú-á<sup>n</sup> yíndèhu-xi distritú Ciliciá. Te cuínī-í cada ndee iní-n dāña-n na cāhá<sup>n</sup> ndíhi-í-yu —cāchí-dé xāha<sup>n</sup>-dě.

<sup>40</sup> Te ní xāha<sup>n</sup> tēe cùu capitá<sup>n</sup> cùnūu-gá sá cúú cāhá<sup>n</sup> té Pāblú, núu ní ngúnutñí-dé núú nchio, te ní quide-dé ndaha-dé sá cùndedóho-yu. Te ní sadí-yu yuhú-yu, te ní cáhá<sup>n</sup>-dé tnúhu ñáyu isràél, te xāha<sup>n</sup>-dě xií-yu:

## 22

<sup>1</sup> —Chí cādá cāhnu iní nchòhó cue tēe sa cuèhé ndíhi nchòhó cue tēe cuechi, na cāhá<sup>n</sup>-í ñ<sup>n</sup> tnúhu cundedóho-ndo sǎ ñà túú cuèchi-í, chi ñá túú ñǎ ní quide-í, te ní ñà túú ñǎ tnúhu cāhá<sup>n</sup>-í —cāchí-dé xāha<sup>n</sup>-dě xii-güedé.

<sup>2</sup> Te cuèndá sá dúcá<sup>n</sup> nī cáhá<sup>n</sup>-dé tnúhu mèe-yu núu tnávíí-ñǎ ní sadí-yu yuhú-yu ní xíndedóho-yu ní cáhá<sup>n</sup>-dé, te xāha<sup>n</sup>-dě:

3 —Yúhú cùu-í tée isràél, te ní cacu-í ñuú Tàrsú, te ñuú-án yíndèhu-xi Ciliciá. Te davitna líhli-í cútnàhá ní quexìo-í ñuú Jerusàlén ní dácuáhá ñàha té Gamàliél. Te ní dácuáhà-í nchaa tnúhu ní chídó tnùnì nchaa cue tée ndéé sanaha nàcuáa cada ñáyi. Te yúhú ní cahu iní-í ní quide-í títí nùú chiú<sup>n</sup> nacuáa cuu váha iní Yă Ndiöxí ní cáhà<sup>n</sup>-í, te ñuú-á<sup>n</sup> dácuáhá quide nchahó tucu. 4 Te ní sánú ndúcù-í nchaa ñáyi sàndáá iní-xi tnúhu Jèsús, cuèi tée, cuèi ñáyi dîhí ní dácútù-í-yu, te ní chihi-í-yu vecaá, te ní níhì-í tnúhu ndee iní sá cáhnì-ndí-yu. 5 Te dútú cúnú-gá ndîhi cue tée cúnú nùú-ndó nàha-güedé sá ndáa càhà<sup>n</sup>-í chi mee-güedé ní taxi-güedé tutú cuáñaha-í xii ñáyi isràél ñáyi ndècu ñuú Dàmascú cuendá cutnùnì iní-yu ná chiú<sup>n</sup> cuáhà<sup>n</sup>-í ní cùu. Te ñuú-í ichi cuáhà<sup>n</sup>-í ñuú-á<sup>n</sup> cuánúndúcù-í ñáyi ní sàndáá iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñáhà-güedé xii-yu ní cùu.

*Té Păblú xăha<sup>n</sup>-dē xii ñáyi nàcuáa ní cuu ní tuha-dé ichi Jèsús*  
(Hch. 9:1-19; 26:12-18)

6 Te ta cùyatni-í ñuú Dàmascú cuáhà<sup>n</sup>-í, te cùu-xi datná òré caúxúú nduu, te uu<sup>n</sup> ní quee ñuhú andîu, te ní dáyèhé-xi ndéé nùú nùtnî-í. 7 Te ní quide nee-xi nùú-í, xiá<sup>n</sup> ní nduá-í ndéé ñuhu. Te ní tecú dóho-í càhà<sup>n</sup> ñ<sup>n</sup> sá càhà<sup>n</sup> andîu, te càchì-xi: “Yòhó té Sàulú, ¿ná cuendá cúú ùhú iní ñáhà-n dândoho ñaha-n xii-í?”, càchì sá càhà<sup>n</sup>-án. 8 Te ní xáha<sup>n</sup>-í: “¿Ná cúú yòhó sá càhà<sup>n</sup>-ái?”, xăha<sup>n</sup>-í. Te ní càhà<sup>n</sup> tucu ñngá xito te càchì-xi: “Yúhú cùu-í Jèsús tée ní xíndecu ñuú Nazàrét, te duca<sup>n</sup> ño dândoho ñaha-n xii-í”, càchì sá càhà<sup>n</sup>-án. Te xiá<sup>n</sup> ní cutnùnì iní-í sá díú Jèsús càhà<sup>n</sup>. 9 Te nchaa cue tée ndîhi-í ní xiní-güedé ní dáyèhé ñuhú, te ní yuhú-güedé, dico ñá túú ní tècú dóho-güedé òré ní càhà<sup>n</sup>-gá. 10 Te ní xáha<sup>n</sup>-í xii-gá: “Yòhó Xítóhó Jesucristú, ¿ná cuínì-n càda-í?”, xăha<sup>n</sup>-í xii-gá. Te ní cachì-gá: “Ndacóo, te quíhì<sup>n</sup>-n ñuú Dàmascú, yàcá<sup>n</sup> tecú

tnúhu-n nchaa nacuáa cuínì Yă Ndiöxí cada-n”, càchì-gá —càchì té Păblú xăha<sup>n</sup>-dē xii-yu.

11 Te ní xáha<sup>n</sup> tucu té Păblú:

—Te cuendá sá ní dácuáá ñàha ñuhú xii-í nùu ní tñî cue tée ndîhi-í ndaha-í ndéca ñàha-güedé cuáhà<sup>n</sup> ndéé ñuú Dàmascú.

12 Te yàcá<sup>n</sup> ndécú ñ<sup>n</sup> tée nàni Ananiás, te ío vâi sá ní chídó tnùnì ndîi Moisés cadá-yu quide-dé. Te nchaa ñáyi ñuú Dàmascú ío váha càhà<sup>n</sup> ndîhi ñáhà-yu xii-dé. 13 Te ní quexìo-dé nùú ndécù-í, te ní cachì-dé: “Yòhó té Sàulú, tée ndècu ndîhi-í ichi Xítóhó Jesucristú, ndúha nùú-n”, càchì-dé. Te òré-ni ní nacaá<sup>n</sup> nùú-í te ní xiní-í-dé. 14 Te dâtnùnì ní cachì-dé: “Yă Ndiöxí ní cáhà<sup>n</sup> ndîhi-gá ñanì tñáhà-ó ní xíndecu ndéé sanaha. Te ñuú-gá ní cáxi ñaha-gá xii-n cuendá quínì-n nchaa sá váha cuínì-gá cada-n. Te quínì-n Jèsús Yaá ñá túú cuèchi-xi, te ñuú-ni mee-gá càhà<sup>n</sup> ndîhi ñaha-gá xii-n. 15 Te càhà<sup>n</sup>-n tnúhu Jèsús nùú nchaa ñáyi, te càhà<sup>n</sup>-n nchaa sá ní xiní-n ndîhi nchaa sá ní xíndedóho-n. 16 Tñavîi, te quíhì<sup>n</sup>-n cuàndute-n, te càhà<sup>n</sup> ndîhi-n Yă Ndiöxí cuendá cada càhnu iní-gá nchaa sá cuèhé sá dúhá ní quide-n”, duha ní cachì té Ananiás xii-í —càchì té Păblú xăha<sup>n</sup>-dē xii-yu.

*Té Păblú ní cani-dé cuèndú nàcuáa ní xáha<sup>n</sup> Jèsús cada-dé quíhì<sup>n</sup>-dē ñuú nùú xíndecu ñáyi ñá túú cùu ñáyi isràél*

17 Te ní xáha<sup>n</sup> tucu té Păblú:

—Te ní ndee-í cuándixi-í ñuú Jerusàlén. Te ní sáhà<sup>n</sup>-í veñúhu càhnu sá ño cúnú ní càhà<sup>n</sup> ndîhi-í Yă Ndiöxí, te ní dácótó nùú ñáhà-xi sá mée Jèsús ní xiní-í xití veñúhu, 18 te ní cachì-gá: “Yáchì, quee-n ñuú Jerusàlén, chi ñáyi-a vá quíndáá iní-yu nàcuáa ní cachì-í cúñaha-n xii-yu cuendá-í”, duha ní cachì-gá xii-í. 19 Te ní xáha<sup>n</sup>-í xii-gá: “Yòhó Xítóhó Jesucristú, sa xiní-n sá ncháá ñáyi nàhá-yu sá ní sáhà<sup>n</sup>-í ndî tñáhà ñ<sup>n</sup> ndî tñáhà ñ<sup>n</sup> veñúhu nànducu-í ñáyi sàndáá iní tnúhu-n, te ní tñî-í-yu, ní chihi-í-yu vecaá, te ní táuchíu<sup>n</sup>-í ní caniha-güedé xii-yu. 20 Te cútnàhá ní sahnì-güedé ndîi Těvá tée ní xóo càhà<sup>n</sup> tnúhu-n,

te tñàhá-í ndécú òré-á<sup>n</sup> te ní xíndeé-í dóó cue téé ní sahní ñàha xii ndíí. Te yúhú ní cáhà<sup>n</sup>-í sá ní quide váha-güedé sá dúcá<sup>n</sup> ní quide-güedé”, duha ní xáha<sup>n</sup>-í xii-gá. <sup>21</sup> Te ní cachí tñúhu-gá xii-í: “Cuàhá<sup>n</sup> chi cuíní-í quihí<sup>n</sup>-n nchàa ñúú xícá nùú xíndecu cue ñáyiú ñá túú cùu ñáyiú isràél cáhá<sup>n</sup>-n tñúhu-í”, cächí-gá —cächí té Pàblú xáha<sup>n</sup>-dè xii-yu.

*Te Pàblú ndíhi téé tàxi tñuní ñáhá xii cue sandadú*

<sup>22</sup> Te sá dúcá<sup>n</sup> ní cáhá<sup>n</sup>-dè, te ñá ní tñàhá-gá iní-yu cundedóho-yu tñúhu cáhá<sup>n</sup>-dè. Te ì<sup>n</sup>-ní ní cuú-yu nchaá-yu, te ní cuáá-yu, te xähá<sup>n</sup>-yu:

—¡Chí cáhní-dè! ¡Ñá díú sá cündècu-dé ñuyíú-a! —cächí-yu xähá<sup>n</sup>-yu.

<sup>23</sup> Te mei òré duca<sup>n</sup> ní cáhá<sup>n</sup>-yu, te ní ndátá-yu dóö-yu, te ní dáquénè-yu núú ñinu sá sätú iní-yu. Te ní quèhnu-yu ñuhu, te ní dácácòyó-yu núú ñinu sá ïo sätú iní-yu. <sup>24</sup> Te téé cùu capitá<sup>n</sup> cùnùu-gá ní xáha<sup>n</sup>-dè xii cue sandadú-dé:

—Chí dítá-dè ná quíhu-dé ndéé xití vehe, te cani-ndo-dè ñii, chi na quène yuhu-dé ná tñúhu ní cáhá<sup>n</sup>-dè nùu ndéé dúcá<sup>n</sup> cùdèñ<sup>n</sup>-yu núú-dè —cächí-dé xáha<sup>n</sup>-dè xii-güedé.

<sup>25</sup> Te sátá ní dácútú ñàha-güedé xii té Pàblú sá cání ñàha-güedé ní cùu, te ní xáha<sup>n</sup>-dè xii téé cùu capitá<sup>n</sup> ndécú-á<sup>n</sup>:

—Te na cächí tñúhu-í sá vã cúú caniha-güedé ñii, chi téé ròrá cúú-í, te vátá quíní ndáá-gá-ndó nùu ndècuéchi-í àdi ñáhá —cächí-dé xáha<sup>n</sup>-dè xii téé cùu capitá<sup>n</sup>.

<sup>26</sup> Te sá dúcá<sup>n</sup> ní cáhá<sup>n</sup>-dè, te ní sáhá<sup>n</sup> téé cùu capitá<sup>n</sup> núú tée cùnùu-gá, te ní xáha<sup>n</sup>-dè:

—Vá cúú cànì-o téé-á<sup>n</sup>, chi téé ròrá cúú-dè —cächí-dé xáha<sup>n</sup>-dè.

<sup>27</sup> Te ní sáhá<sup>n</sup> téé cùu capitá<sup>n</sup> cùnùu-gá ndéé núú tée Pàblú, te ní xáha<sup>n</sup>-dè:

—Cáhá<sup>n</sup> ndáá-n nùu ndisa téé ròrá cúú-n —cächí-dé xáha<sup>n</sup>-dè.

Te ní xáha<sup>n</sup> tée Pàblú:

—Ndáá sá tée ròrá cúú-í —cächí té Pàblú xáha<sup>n</sup>-dè xii téé cùnùu-á<sup>n</sup>.

<sup>28</sup> Te ní xáha<sup>n</sup> téé cùnùu-á<sup>n</sup>:

—Yúhú tñàhá-í cúú-í téé ròrá, chi vãi díhú<sup>n</sup> ní cháhu-í —cächí-dé xáha<sup>n</sup>-dè.

Te té Pàblú ní xáha<sup>n</sup>-dè:

—Tñàhá-í cúú-í téé yàcá<sup>n</sup> tucu, chi tãtã-í cúú-dè téé ròrá —cächí té Pàblú xáha<sup>n</sup>-dè xii téé cùu capitá<sup>n</sup> cùnùu-gá.

<sup>29</sup> Te uu<sup>n</sup>ni ní nacaca sata cuè téé cuáhá<sup>n</sup> caniha xii-dé ní cùu. Te ní yúhú téé tàxi tñuní sá dúcá<sup>n</sup> ní xáha<sup>n</sup> tée Pàblú sá tée ròrá cúú-dè, chi ní xáha<sup>n</sup>-dè ní dácútú ñàha-güedé xii-dé, núu xíá<sup>n</sup> ní yùhu-dé.

*Té Pàblú ní cáhá<sup>n</sup> ndíhi-dé cue téé cùnùu oré ní quide-güedé jündá*

<sup>30</sup> Te téé tàxi tñuní sandadú ñá ní xíní-dé ná cuéchi ní dácáá ñáyiú isràél díquí tée Pàblú, núu xíá<sup>n</sup> nduu tñéé ní cana-dé cue dútú cùnùu, ndíhi cue téé cùchiu<sup>n</sup>, ndíhi cue téé cùu sacuéhé, te ní xáha<sup>n</sup>-dè sá cádá-güedé jündá cuendá nducu tñúhu-güedé núú tée Pàblú ná cuéchi ní dácáá-yu díquí-dè. Te ní xáha<sup>n</sup>-dè xii cue sandadú sá nándaxi ñàha-güedé cadená ndútú-dé, te candeca ñàha-güedé quihí<sup>n</sup> núú cádá-güedé jündá. Te ní sáhá<sup>n</sup>-güedé ní nandaxi ñàha-güedé xii-dé ndécá ñàha-güedé cuáhá<sup>n</sup> jündá, te ní quexiò-güedé, te ní ngúnutñii-dé núú cuè téé cùchiu<sup>n</sup>.

## 23

<sup>1</sup> Te yàcá<sup>n</sup> ní xíndéhé vãha té Pàblú núú nchàa-güedé, te ní xáha<sup>n</sup>-dè:

—Cada cànno iní nchòhó cue téé cùchiu<sup>n</sup>, te duca<sup>n</sup> nchòhó cue téé cùu sacuéhé, véxi-í cächí tñúhu-í sá ñà túú cuéchi-í, chi mee Yã Ndiòxí náhá-gã nása ndècu-í ñuyíú-a, te ñá túú cùcaha<sup>n</sup> núú-í núú-gã —cächí té Pàblú xáha<sup>n</sup>-dè xii-güedé.

<sup>2</sup> Te té Ananiás téé cùu dútú cùnùu-gá ní xáha<sup>n</sup>-dè xii cue téé nùtñii yatni dñii té Pàblú sá cání-güedé déhndé yuhu-dé. <sup>3</sup> Te té Pàblú ní xáha<sup>n</sup>-dè xii dútú-á<sup>n</sup>:

—Yòhó, chi úhú tñàhí iní-n, chi ní ndúcú-n tée ní caniha xii-í, te ñá túú cuéchi-í, dico quíní-n nã cada ñàha Yã Ndiòxí xii-n. Te yòhó ní cana ñàha-n ndùcu tñúhu-n nùu quide-í nchaa nàcuáa cáhá<sup>n</sup> tñúhu sá ní chídó

tnùní ndíi Moisés cada-o. Te mee-n ní ndúcú-n tée ní caniha, te ñá túú dùca<sup>n</sup> ní cáhá<sup>n</sup> ndíi cada-o —càchí té Páblú xáha<sup>n</sup>-dě xii dútú cúnùu-gá-á<sup>n</sup>.

<sup>4</sup> Te cue tée xĩnutnĩ ãiñi té Páblú ní xáha<sup>n</sup>-güedě xii-dé:

—Néhé ní quide-n chi ní xícuèhé-n dútú cúnùu-gá tée xĩnu cuechi núú Yă Ndiõxí —càchí-güedě xáha<sup>n</sup>-güedě xii té Páblú.

<sup>5</sup> Te té Páblú ní xáha<sup>n</sup>-dě xii-güedě:

—Cada càhnu iní-ndó chi ñá túú xĩní-í sá dútú cúnùu-gá cúú-dé, chi núú tütú Yă Ndiõxí càchí-xi sá vâ cúú càhá<sup>n</sup> cuèhé-ó cuendá ñ<sup>n</sup> tée cúnùu ñúú-ó yòtnúhu. Te yúhú ñá túú xĩní-í sá tée cúnùu cuu-dé nũu ní sácóo-í ní cáhá<sup>n</sup>-í —càchí té Páblú xáha<sup>n</sup>-dě xii-güedě.

<sup>6</sup> Te òré-á<sup>n</sup> ñi cutnùní iní té Páblú sá dáva-güedě cündihí-güedě cue tée cùu saducéú, te dava-güedě cündihí-güedě cue tée cùu fariséú, te níhi ní cáhá<sup>n</sup>-dé ní xáha<sup>n</sup>-dě xii-güedě:

—Yúhú cúú-í tée fariséú, te tnàhá tātà-í ndihí xĩ-í cúú-güedě cue tée fariséú tucu. Te tnàhá yúhú sàndáá iní-í sá ndótó nchàa ñáyiu ní xíhí, te núu xĩá<sup>n</sup> cuiní-ndó ndùcu tnúhu-ndo nũú-í cáná ñàha-ndo —cachí-dé xáha<sup>n</sup>-dě xii-güedě.

<sup>7</sup> Te sá dúcá<sup>n</sup> ñi cáhá<sup>n</sup>-dé xĩá<sup>n</sup> ní nàá ndihí tnàha cue tée cùu fariséú ndihí cue tée cùu saducéú, chi ñá ñ<sup>n</sup>-ní tnúhu ní càhá<sup>n</sup>-güedě, chi ní ndi quehe<sup>n</sup> ndi quehe<sup>n</sup>-güedě sá ñi cáhá<sup>n</sup>-güedě. <sup>8</sup> Te cue tée cùu saducéú càchí-güedě sá vâ ndótó cuè ñáyiu ní xíhí, te cue tée cùu fariséú càchí-güedě sá ndótó-yu. Te cue tée cùu saducéú càchí-güedě sá ñà túú espíritú xínú cuèchi núú Yă Ndiõxí, te cue tée cùu fariséú càchí-güedě sá ño espíritú xínú cuèchi núú-gă. <sup>9</sup> Te ta cùdée<sup>n</sup>-güedě cuáhá<sup>n</sup>, te níhi-gá cúú iní-güedě càhá<sup>n</sup>-güedě, te ñ<sup>n</sup> úú cue tée cùu fariséú cue tée dàcuaha ñaha xii ñáyiu nchaa tnúhu ní chídó tnùní ndíi Moisés ní cáhá<sup>n</sup> níhi-güedě, te xáha<sup>n</sup>-güedě:

—Ñá túú cuèchi-dé, te cudana te ní cáhá<sup>n</sup> ndihí-dé ñ<sup>n</sup> espíritú xínú cuèchi núú Yă Ndiõxí te vâ ngõo vâ cúú

váha iní-ó nũú-gă —càchí cue tée cùu fariséú xáha<sup>n</sup>-güedě xii-güedě.

<sup>10</sup> Te cuendá sá ño xĩnàá-güedě, xĩá<sup>n</sup> ní yúhú tée cùu capitá<sup>n</sup> cúnùu-gá sá cáhni-güedě té Páblú, núu xĩá<sup>n</sup> ní xáha<sup>n</sup>-dě sá quihí<sup>n</sup>-güedě cúnúcuaca ñaha-güedě candeca ñaha-güedě núhú cuàrtél.

<sup>11</sup> Te ndéé niú cúú úú ní quexìo Xítohó Jesucristú núú ndécú tē Páblú, te ní xáha<sup>n</sup>-gă:

—Ñíi cunduu-n, vâ yúhú-n, chi nàcuáa ní cáhá<sup>n</sup>-n ñi cacunehe ñaha-n xii-í iha, te diu-ni duca<sup>n</sup> càhá<sup>n</sup>-n càcunehe ñaha-n xii-í quihí<sup>n</sup>-n ñúú Rómá —càchí-gá xáha<sup>n</sup>-gă xii-dé.

### *Cahni-güedě té Páblú ní cùu*

<sup>12-13</sup> Te nduu tnéé ní natacá vñhi-gá údico cue tée israhél ní ndatnúhu-güedě sá cáhni-güedě té Páblú, te ní xitnàha-güedě:

—Ni dítá vâ cáxí-ó te ni ndùte vâ cóhó-ó ndéé ndacu-o càhni-o té Páblú, te dàtnùní caxi-o dítá, te coho-o ndùte, chi sa ní sani iní-ó sá cádá-ó, te cuu cuèchi xii-o nũu vâ cádá-ó —càchí-güedě xitnàha-güedě.

<sup>14</sup> Te ní sáhá<sup>n</sup>-güedě núú ndécú nchàa dútú cúnùu ndihí nchaa cue tée cùu sacuéhé, te ní xáha<sup>n</sup>-güedě:

—Ní cachí-ndí sá ni dítá vâ cáxí-ndí ndéé nũu ní ndacu-ndí ní sahani-ndí té Páblú, chi sa ní sani iní-ndí sá cádá-ndí, te cuu cuèchi núu vâ cádá-ndí. <sup>15</sup> Te duha cada-ndo ndihí dava-gá cue tée cúnùu, chi cùñaha-ndo xii tée cùu capitá<sup>n</sup> cúnùu-gá: “Quixi ndihí-n tē Páblú núú ndécú-ndí cuendá ndatnúhu ndihí-ndí-dé, chi cuiní-ndí nducu tnúhu váha-gá-ndí ná cúú sá ñi quide-dé”, duha cùñaha-ndo xii tée tàxi tnuní sandàdú. Te duca<sup>n</sup>-ni cùñaha-ndo dándahú-ndó-güedě cuendá quixi ndihí-güedě té Páblú, te nchúhú sa cundetu-ndí-güedě ichi, chi quiní té Páblú ná cahni-ndí-dé —càchí-güedě xáha<sup>n</sup>-güedě xii cue tée cùchiu<sup>n</sup>.

<sup>16</sup> Te déhe cúha té Páblú ní níhí-dé tnúhu nàcuáa cada-güedě dító-dé. Te ní sáhá<sup>n</sup>-dé cuàrtél, te ní xáha<sup>n</sup>-dě xii dító-dé nàcuáa càhá<sup>n</sup>-güedě cada



ñaha-güedë. <sup>17</sup> Te ní cana té Păblú ñí tée cùu capitán, te ní xáha<sup>n</sup>-dë:

—Vá cündèe iní-n, quíhí<sup>n</sup> ndíhi-n tée-a na càhá<sup>n</sup> ndíhi-dé tée cùnuu-gá, chi ndècu ñí cuendú cúñaha-dë cuíní-í —càchí té Păblú xáha<sup>n</sup>-dë xii tée cùu capitán.

<sup>18</sup> Te dătnùní ní xica tée cùu capitán ndécá-dë dăxí<sup>n</sup> té Păblú cuáhá<sup>n</sup> núu ndécú tée cùnuu-gá, te òré ní quexìo-güedé núu-dë, te ní xáha<sup>n</sup> tée cùu capitán xii-dé:

—Té Păblú tée yìhi vecaá ní cana ñaha-dë xii-í, te ní cachí-dé véxi-í ndíhi tée-a cuendá cachí tnúhu-dé ñí cuendú cuíní-dé —càchí-dé xáha<sup>n</sup>-dë xii tée cùnuu-gá.

<sup>19</sup> Te tée cùnuu-á<sup>n</sup> ñí tñi-dé ndaha dăxí<sup>n</sup> tē Păblú, te tănèhe ñaha-dé cuáhá<sup>n</sup> ñí xio, te ní xícá<sup>n</sup> tnúhú-dë núu-dë, te xáha<sup>n</sup>-dë:

—¿Ná cuendú cuíní-n cǎhá<sup>n</sup>-n? —càchí-dé xáha<sup>n</sup>-dë xii dăxí<sup>n</sup> tē Păblú.

<sup>20</sup> Te ní xáha<sup>n</sup>-dë xii tée cùnuu-á<sup>n</sup>:

—Cue tée isràél ní ndatnúhu ndáá-güedé sá quíxí-güedé tneé cǎhá<sup>n</sup> ndàhú-güedé núu-n cǎndeca-n té Păblú quíhí<sup>n</sup> jündá, te yàcá<sup>n</sup> cǎcá<sup>n</sup> tnúhú ndáá-güedé núu-dë ná cúu sǎ ñí quide-dé, càchí-güedé xǐtnàha-güedé. <sup>21</sup> Te vá quíndáá iní-n chi dícó dandàhú ñáhá-güedé, chi vìhi-gá údico-güedé ndátnúhu-güedé cundedí-güedé ichi cahni ñaha-güedé. Te xǐtnàha-güedé sá ñí dítá vǎ cǎxí-güedé, te ñí ndúte vá cóhó-güedé ndéé núu ní ndacu-güedé ní sahani ñaha-güedé, te dătnùní caxi-güedé dítá, te coho-güedé ndute, chi sa ní sani iní-güedé sá cǎdá-güedé, te cuu cuéchi núu vá cǎdá-güedé, càchí-güedé xǐtnàha-güedé. Te cundecu túha-ná-güedé cundetú ñaha-güedé tneé, te núu na quíndáá iní-n cǎndeca-n-dé quíhí<sup>n</sup> jündá —càchí-dé xáha<sup>n</sup>-dë xii tée cùnuu-á<sup>n</sup>.

<sup>22</sup> Te tée cùnuu-á<sup>n</sup> ñí xáha<sup>n</sup>-dë:

—Cuanùhú, te vá yòo tnàhí cúñaha-n sǎ ñí quixi-n ñí cachí tnúhu-n nàcuáa càhá<sup>n</sup>-güedé cada-güedé té Păblú —càchí-dé xáha<sup>n</sup>-dë.

*Ndèca-güedé té Păblú cuáhá<sup>n</sup> núu tē Juéllí tée cùu gobiernú*

<sup>23</sup> Te tée cùnuu-gá ní cana-dé úu cue tée cùu capitán, te xáha<sup>n</sup>-dë:

—Tava-ndo úu ciendú sandàdú cue tée xica saha, ndíhi únídico úxí sandàdú cue tée yòdo cuayú, ndíhi úu ciendú sandàdú mee-ñi cuè tée xínehe lǎnzá. Te cada túha-ndo chi caca-ndo òré caá ñí níu quíhí<sup>n</sup>-ndó ñíu Cèsareá ndíhi té Păblú. <sup>24</sup> Te nducu-ndo cuèdicó ñí úu cuayú codo-dé ndíhi cue tée ndéé ñáhá xii-dé. Te cada cuedàdú-ndó-dé ichi, te cǎndeca-ndo-dé quíhí<sup>n</sup> quíndeca-ndo-dé núu tée cùu gobiernú —càchí tée cùnuu-á<sup>n</sup> xáha<sup>n</sup>-dë xii cue tée cùu capitán.

<sup>25</sup> Te tée cùnuu-á<sup>n</sup> ñí cadúha-dé tutú cuendá quíhí<sup>n</sup> ndaha té Juéllí tée cùu gobiernú. Te duha ní chídó tnùní-dé núu tütú cuáhá<sup>n</sup>:

<sup>26</sup> “Còvǎha dǐi-n, tǎtá gobernàdór. Ío cada càhnu iní, yúhú nání-í Clàudiú Lìsiás. Yúhú ní tendaha-í ñí tutú véxi ndaha-n cuendá quíni tnùní-n nàcuáa ní cuu iha. <sup>27</sup> Cue tée isràél ní tñi-güedé ñí tée nàni Păblú cuíní-güedé cahni ñaha-güedé ní cùu, te ní níhí-í tnúhu sá tē rómá cúu-dë núu ní sáhá<sup>n</sup>-í ndíhi sandàdú-í ní dǎcǎcu-ndí-dé. <sup>28</sup> Te ní cuíní-í quíni-í ná cuendá tē ñaha-güedé cuéchi xii-dé, núu xǎ<sup>n</sup> ndécá-í-dé ní sáhá<sup>n</sup> núu ñí quide cue tée cùchiu<sup>n</sup> isràél jündá. <sup>29</sup> Te yàcá<sup>n</sup> ní níhí-í tnúhu sá ñà túu nǎ cuéchi ñí quide-dé, chi cuendá-ñi sá ñí níhí-güedé tnúhu sá ñà túu sǎndáá iní-dé cada-dé nchaa sá ñí xóo cada ñáyiu ní xíndecu ndéé sanaha nchícú<sup>n</sup> nihnu-güedé quide-güedé, xǎ<sup>n</sup> ní cudéé<sup>n</sup>-güedé núu-dé. Te ñà túu cuéchi càhnu ñí quide-dé núu quíhí<sup>n</sup>-dë vecaá àdi cahni-í-dé. <sup>30</sup> Te ní níhí-í tnúhu sá cuè tée isràél ndúcú-güedé nàcuáa cada-güedé cahni ñaha-güedé xii-dé, xǎ<sup>n</sup> ní xáha<sup>n</sup>-í xii sandàdú-í sá cǎndèca ñaha-güedé quixi xǎ<sup>n</sup>. Te ní xáha<sup>n</sup>-í xii cue tée tē ñaha cuéchi sá quíxí-güedé ndéé xǎ<sup>n</sup> cǎhá<sup>n</sup>-güedé núu ná cuéchi ní quide-dé. Te cada càhnu iní-n chi duha-ñi ndúu tnúhu càhá<sup>n</sup>-í, te cundee iní-n quèhe<sup>n</sup> cuendá-n-dë”,

duha ní chídó tnùní tée ní cadúha tutú cuáhá<sup>n</sup> ndaha té Juéí.

<sup>31</sup> Te cue sandàdú ní quide-güedé nàcuáa ní xáha<sup>n</sup> tée tàxi tnuní ñáhá xii-güedé chi ní xica-güedé ndihí té Páblú òré caá í<sup>n</sup> niú, te ñu-ni niú-á<sup>n</sup> ní quexio-güedé ñuú Antipatrís. <sup>32</sup> Te sátá ñí tundaá, te ní nacuico cuè tée xínehe lánzá ndihí dava-gá sandàdú xicá sàha cuánuhú-güedé cuàrtél, te mee-nã sandàdú cue tée yòdo cuayú cuáhá<sup>n</sup> ndihí té Páblú. <sup>33</sup> Te òré ní quexio-güedé ñuú Cèsareá, te ní sàha-güedé tée cùu gobiernú tutú néhé-güedé cuáhá<sup>n</sup>. Te ní quehe<sup>n</sup> cuèndá-dé té Páblú. <sup>34</sup> Te sátá ñí dácuhá tée cùu gobiernú-á<sup>n</sup> tutú-á<sup>n</sup> te ní xicá<sup>n</sup> tnúhú-dé núú tẽ Páblú, te xáha<sup>n</sup>-dẽ:

—¿Ndéé tée cùu-n? —cachí-dé xáha<sup>n</sup>-dẽ.

Te ní xáha<sup>n</sup> tẽ Páblú:

—Tée Ciliciá cùu-í —càchí-dé xáha<sup>n</sup>-dẽ.

<sup>35</sup> Te ní xáha<sup>n</sup> tée cùu gobiernú-á<sup>n</sup>:

—Òré quexio cue tée tée ñaha cuéchi xii-n, te cáhá<sup>n</sup>-n nãsa ní cuu, chi ñihí-í nàcuáa cada ndáá-í cuèndá-n —càchí-dé xáha<sup>n</sup>-dẽ xii té Páblú.

Te ní xáha<sup>n</sup>-dẽ xii sandàdú sá cùndèé-güedé té Páblú vehe càhnu té Hèrodés.

## 24

*Té Páblú xáha<sup>n</sup>-dẽ xii té Juéí sá ñà túú cuéchi-dé*

<sup>1</sup> Te sátá ñí cuu úhú<sup>n</sup> nduu, te té Ananiás dútú cùnùu-gá cuáhá<sup>n</sup>-dé ñuú Cèsareá ndihí cue tée cùu sacuéhé ndihí í<sup>n</sup> tée nàni Tèrtulú tée càhá<sup>n</sup> yuhu-güedé. Te cuáhá<sup>n</sup>-güedé núú tée cùu gobiernú cuáhá<sup>n</sup> dácuanèhnde-güedé núú-dé sá ndècuéchi té Páblú. <sup>2</sup> Te ní sànguaca-güedé té Páblú. Te òré ní quexio-dé núú-güedé, te ní ngúíta té Tèrtulú xáha<sup>n</sup>-dẽ xii té Juéí nàcuáa cà cuéchi tée-güedé té Páblú:

—Ío càhnu cada iní tãtã gobernàdór. Duha ndùu chiu<sup>n</sup> ndéé iní ñáhá-ndí xii-n vèxi-ndí, núu nãsa cachí-n cùnduu. Táxãhu xii-n, chi ío váha ndècu nchaa ñáyíu, te ñã túú nàá-yu chi ío váha quide-n. <sup>3</sup> Te ío cùdíí

íní-yu chi nchaa-ni nduu xíndecu váha-yu ncháá-yu, te ío táxãhu Ndiõxí xii-n sã dúcá<sup>n</sup> quide-n. <sup>4</sup> Te cada càhnu iní, cuíní-í ndatnúhu-o í<sup>n</sup> úú-ni cuèndú cuèndá sá vã cùyàa-o dáciuíta-í chiú<sup>n</sup>-n. <sup>5</sup> Te í<sup>n</sup> tée íha ío dásatú iní ñáhá-dẽ, chi ndèni ní cuu cuáhá<sup>n</sup>-dé ndátnúhu-dé ndihí ñáyíu isràél dánáá-dé-yu. Te nèhé quide-dé chi cuáhá<sup>n</sup>-dé dácàhá<sup>n</sup>-dé nchaa ñáyíu cuèndá quíndáá iní-yu tnúhu tée ní xíndecu ñuú Nazàrèt. <sup>6</sup> Chi duca<sup>n</sup> càhá<sup>n</sup> cue tée íha sá ñí sáhá<sup>n</sup>-dé veñúhu càhnu sá ío cùnùu, te cuíní-dé daquèe tíhú-dẽ veñúhu cuèndá cuíní-dé xocàni-dé sá íí ndécú, núu xíã<sup>n</sup> ní tñí ñaha-güedé ndécá ñaha-güedé cuáhá<sup>n</sup> núú cuè tée cùchiu<sup>n</sup> cuèndá cáca<sup>n</sup> tnúhú-güedé núú-dé núu ná cuèndá duca<sup>n</sup> cuíní-dé cada-dé, chi duca<sup>n</sup> cà leí ndécú ndihí-güedé sá cáda ndáá-güedé núu ná í<sup>n</sup> sá cúu. <sup>7</sup> Te té Lisiú tée cùu capitá<sup>n</sup> cùnùu-gá ní quexio-dé ndihí sandàdú, te ní dácúnú-güedé nchaa cue tée nùtní ndihí té Páblú, te dàtnùní ní tñí ñaha-güedé xii-dé ndécá ñaha-güedé cuáhá<sup>n</sup>. <sup>8</sup> Te sátá xíã<sup>n</sup>, te ní xáha<sup>n</sup>-dẽ sá quíxí-güedé ndéé ndíha cundáá cuéchi-dé. Te yòhó cundee íní-n càcá<sup>n</sup> tnúhú-n núú-dé, te núu ndáá duca<sup>n</sup> ñí quide-dé àdi ñáhá —càchí té Tèrtulú xáha<sup>n</sup>-dẽ xii té Juéí tée cùu gobiernú.

<sup>9</sup> Te dava-gá cue tée isràél xínutní xíã<sup>n</sup> ñí cáhá<sup>n</sup>-güedé sá ndáá càhá<sup>n</sup> té Tèrtulú. <sup>10</sup> Te tée cùu gobiernú ní quide-dé ndaha-dé núú tẽ Páblú cuèndá cáhá<sup>n</sup>-dé, te té Páblú ní xáha<sup>n</sup>-dẽ:

—Yòhó sa ní cuu titní cuíá ndécú-n íha xehndé-n cuéchi nchaa ñáyíu xínáá, núu xíã<sup>n</sup> ío cùdíí iní-í sá ndíha téhndé cuéchi tée ñaha-güedé xii-í. Te cundee íní-n cùndedóho-n na càni-í cuèndú nàcuáa ní cuu. <sup>11</sup> Te nducu tnúhu-n te quiní-n nã càhá<sup>n</sup> ndáá-í, chi sa ní cuu úxúú nduu sá ñí sáhá<sup>n</sup>-í veñúhu càhnu sá ío cùnùu ñuú Jerusalén ní cáhá<sup>n</sup> ndihí-í Yã Ndiõxí. <sup>12</sup> Te ni ñã túú ní nàá-í ndihí ñáyíu xítí veñúhu, te ñã túú ní xáha<sup>n</sup>-í nàá-yu ni í<sup>n</sup> xichi, te ni í<sup>n</sup> veñúhu líhli ní

sáhá<sup>n</sup>-í ñá túú nă ní xăha<sup>n</sup>-î cadá-yu.  
 13 Te ni ñà túú quèñuhu-güedé cue  
 tée cáhá<sup>n</sup> ndáá te núu ndáá duca<sup>n</sup> ñi  
 quide-í. 14 Te yúhú cáhá<sup>n</sup> ndáá-í sá  
 cáhá<sup>n</sup> ndihí-í Yă Ndiöxí, chi diu-ni Yă  
 Ndiöxí ní xóo cáhá<sup>n</sup> ndihí ñáyiú ndéé  
 sanaha, núu xíá<sup>n</sup> ní tuha-í ichi-gá. Te  
 cue tée-a cächí-güedé sá ñà díú ñ<sup>n</sup> ichi  
 váha ni tuha-í. Te yúhú sàndáá iní-í  
 nchaa sá ñi chídó tnùní ndíi Moisés  
 ndihí dava-gá cue tée ní xóo cáhá<sup>n</sup>  
 tnúhu Yă Ndiöxí ndéé sanaha. 15 Te  
 sàndáá tucu iní-í sá ndótó nchàa ñáyiú  
 ní xíhí, cuèi ñáyiú váha iní-xi, te cuèi  
 ñáyiú úhú iní-xi, dico ndotó-yu. Te  
 duca<sup>n</sup> ñi xóo quindáá iní nchaa ñáyiú  
 ní xíndecu ndéé sanaha. 16 Te yúhú ío  
 ndücu ndee-í quidè-í nchaa sá cáhá<sup>n</sup>  
 Yă Ndiöxí cuèndá sá vă cúú caha<sup>n</sup>  
 núu-í núú-gă ndihí núú ñáyiú ñuyúú-a.

17 Te sa ní cuu titní cuía sá ñà  
 túú-gă sáhá<sup>n</sup>-í ñuú Jerusálén, te ní  
 sáhá<sup>n</sup> tucu-í néhè-í díhú<sup>n</sup> ñi taxi ñáyiú  
 ñuú xicá cuèndá cuáñaha-í xii ñáyiú  
 ñuú Jerusálén. Te ní ndúcú-í sá  
 cuăha táhú-í Yă Ndiöxí. 18 Te ní  
 xíndecu-í veñúhu cahnú sá ío cúnúu  
 ní quide-í nchaa năcuáa ní xóo cada  
 ñáyiú ní xíndecu ndéé sanaha cuèndá  
 nduu vétú iní Yă Ndiöxí. Te ñá  
 túú chítú-yu ni sáhá<sup>n</sup>, te ni ñà túú  
 nă ní cùu, te ní naníhí ñáhá ñ<sup>n</sup> úú  
 cue tée israhél xii-í, cue tée véxi dis-  
 trítú Asíá. 19 Te quixi mee-güedé  
 iha cáhá<sup>n</sup>-güedé, te núu sá ndáá ní  
 xini-güedé sá yúhú ndècuéchi-í ní cùu,  
 20 àdi ñáhá. Dico cachí tnúhu cue  
 tée-á<sup>n</sup> năsa ní cuu òré ní xíndecu-í  
 jündá-güedé núu ndècuéchi-í àdi ñá  
 túú ndècuéchi-í. 21 Dico ñá túú cuèchi-í  
 chi ñ<sup>n</sup>di-ni tnúhu ni cáhá<sup>n</sup>-í ní xăha<sup>n</sup>-î  
 xii-güedé sá sàndáá iní-í sá ndótó  
 nchàa ñáyiú ní xíhí, te diu-ni núu xíá<sup>n</sup>  
 cächí-güedé sá ndècuéchi-í —cächí té  
 Păblú xăha<sup>n</sup>-dë xii té Juéli.

22 Te té Juéli sa xini váha-dé năcuáa  
 cuáhá<sup>n</sup> tnúhu Jesús, núu xíá<sup>n</sup> ñá ní  
 cuini-gá-dé ndatnúhu-dé ndihí té  
 Păblú, te ní xăha<sup>n</sup>-dë:

—Sa ní cuu, cundetu-n na quèxio  
 té Lisiú té cùu capitá<sup>n</sup> cúnúu-gá, te  
 òré-á<sup>n</sup> cundáá cuèndá-n —cächí té  
 Juéli xăha<sup>n</sup>-dë.

23 Te ní xăha<sup>n</sup>-dë xii té cùu capitá<sup>n</sup>:  
 —Cundeé-n tē Păblú-ă<sup>n</sup>, te núu năsa  
 cächí-dé cada-n, te dañá-n na cáhá<sup>n</sup>  
 ndihí-dé cue tée xini tnáhá ndihí-dé  
 núu cuáñaha-güedé nchaa sá xini  
 ñuhu-dé àdi năsa cada-güedé —cächí  
 té Juéli xăha<sup>n</sup>-dë xii té cùu capitá<sup>n</sup>.

24 Te ní cuu titní nduu, te ní  
 sáhá<sup>n</sup> té Juéli vechiú<sup>n</sup> ndihí ñadihí-dé,  
 te ñaha-á<sup>n</sup> nání-á<sup>n</sup> Drüsilá, te ñaha  
 israhél cúú-á<sup>n</sup>. Te ní xăha<sup>n</sup>-dë sá  
 quingueñuhu-güedé té Păblú, te òré  
 ní quexio-dé vechiú<sup>n</sup>, te ní cáhá<sup>n</sup>-dë  
 núu-yu ncháa-yu sá quindáá iní-yu  
 tnúhu Xítohó Jesucristú. 25 Te ní  
 xăha<sup>n</sup>-dë:

—Mee-ni sá văha cada-ndo. Te  
 coto-ndo mēe-ndo, te vá cadá-ndó ñi  
 ñ<sup>n</sup> sá cuèhé sá dúhá, chi ñ<sup>n</sup> nduu cáhá<sup>n</sup>  
 Yă Ndiöxí ndèdacàa ñáyiú váha iní-xi,  
 te ndèdacàa ñáyiú úhú iní-xi —cächí té  
 Păblú xăha<sup>n</sup>-dë.

Te sá dúcá<sup>n</sup> ñi xăha<sup>n</sup>-dë, te ní yúhú  
 té Juéli, te ní xăha<sup>n</sup>-dë:

—Vá cáhá<sup>n</sup>-gá-ó tnávíí, cuáhá<sup>n</sup>, te  
 òré cüyächí-í, te cana ñaha-í xii-n —  
 cächí-dé xăha<sup>n</sup>-dë.

26 Te té Juéli ní quide-dé cuèndá  
 sá cuáñaha tē Păblú díhú<sup>n</sup> te vá  
 ndihu-gá-dé vecaá ní cùu, núu xíá<sup>n</sup>  
 titní xito ní cana-dé té Păblú vechiú<sup>n</sup>  
 ní ndatnúhu ndihí tnàha-güedé, dico  
 ñá túú ní chăhu-dé. 27 Te úú cuía  
 duca<sup>n</sup> ñi quide-güedé, te dătnùní ní  
 xínu té Juéli chiú<sup>n</sup>-dé, te ní ngúnutnăi  
 té Pòrsiú Fèstú. Te òré ní xínu té Juéli  
 chiú<sup>n</sup>-dé, te ní dándöo-dé té Păblú  
 yíhí-ni-dë vecaá. Te duca<sup>n</sup> ñi quide-dé  
 cuèndá ní cuini-dé cudüu-dé núu cuè  
 tée israhél.

## 25

### *Té Păblú cáhá<sup>n</sup> ndihí-dé té Fèstú*

1 Te ní cuu úní nduu sá ñi quexio  
 té Fèstú ñuú Cèsareá ní quehe<sup>n</sup>-dé  
 chiú<sup>n</sup>, te ní quee-dé cuáhá<sup>n</sup>-dé ñuú  
 Jerusálén. 2 Te yacá<sup>n</sup> ní naníhí  
 tnáhá-dë ndihí nchaa dútú cúnúu  
 ndihí nchaa cue tée taxi tnuní ñáhá  
 xii ñáyiú israhél, te xăha<sup>n</sup>-güedé xii  
 té Fèstú sá ndáá ndècuéchi té Păblú.  
 3 Te ní cáhá<sup>n</sup> ndáhú-güedé núu-dë sá  
 téndàha-dé sandádú-dé quingueñuhu

ñaha-güedë vecaá xii-dé ndéé ñuú Cèsareá te candeca ñaha-güedë quíhí<sup>n</sup>. Te duca<sup>n</sup> ní cáhá<sup>n</sup>-güedé, chi ní ndatnúhu-güedé sá cáhni ñaha-güedé xii té Páblú ichi ni cùu. <sup>4</sup> Te té Fèstú ní xáha<sup>n</sup>-dë:

—Vá cúu quíxi-dé ndéé ndíha. Na cùndetu-dé ñuú Cèsareá chi sacú-ni nduu cuyaa-í iha te dàtnúni núhú-í yàcá<sup>n</sup>. <sup>5</sup> Te yáchí-gá quíhí<sup>n</sup> ndíhi-í cue té cùnuu-gá, te yàcá<sup>n</sup> cuu cáhá<sup>n</sup>-ndó nùu ndáá ndècuéchi-dé àdi cáhá<sup>n</sup> méé-dë nùu ndáá ndècuéchi-dé àdi ñáhá, te cutnúni iní-ndó —càchí-dé xáha<sup>n</sup>-dë.

<sup>6</sup> Te ní xíndecu té Fèstú úná úxí nduu ñuú Jerusalén, te dàtnúni cuánuhú-dé ñuú Cèsareá. Te nduu tnéé cuáhá<sup>n</sup>-dë vechiú<sup>n</sup>, te òré ní quexiò-dé, te ní xáha<sup>n</sup>-dë xii cue sandádú xínú cuèchi sá quíhí<sup>n</sup>-güedé queñuhu-güedé té Páblú vecaá te candeca ñaha-güedë quíhí<sup>n</sup> vechiú<sup>n</sup>. <sup>7</sup> Te òré ní quexiò té Páblú vechiú<sup>n</sup>, te sa ndècu cue té israél cue té ní quee ñuú Jerusalén, te cuánguihu-güedé ndéé dñi té Páblú ní ngúnutní-güedé, te xáha<sup>n</sup>-güedë xii cue té cùchiú<sup>n</sup> sá ndècuéchi vñhi-dé, dico ñá túú ní cùndee tnúhu-güedé.

<sup>8</sup> Te té Páblú ní xáha<sup>n</sup>-dë xii té Fèstú:

—Ñá túú ndècuéchi-í, ñá túú ñá ní quide-í, chi ñá túú tnàhá iní-í cada-í ñ<sup>n</sup> sá càchí lèi sá vã cúu càda-o. Te ni xití veñúhu càhnu sá ïo cùnuu ñá túú ñá quide-í, te ni té Cèsár té yìndaha cuéhe nació<sup>n</sup> ñá túú càhá<sup>n</sup> cuèhé-í cuèndá-dé —càchí té Páblú xáha<sup>n</sup>-dë xii-dé.

<sup>9</sup> Te té Fèstú ní cuini-dé cada-dé nàcuáa cudíu-dé núu cuè té israél ní cùu, núu xíá<sup>n</sup> ní xáha<sup>n</sup>-dë xii té Páblú:

—¿Cundee iní-n quíhí<sup>n</sup>-n ñuú Jerusalén-á<sup>n</sup>? Te yàcá<sup>n</sup> cundáa cuéchi sá sàa díquí-n —càchí té Fèstú xáha<sup>n</sup>-dë xii té Páblú.

<sup>10</sup> Te xáha<sup>n</sup> tã Páblú:

—Díu-ni ñ<sup>n</sup> vechiú<sup>n</sup> té cùchiú<sup>n</sup> Cesár ndécú-í iha, te díu-ni iha cada ndáá-n nùu cuini-n ní cùu. ¿Te ná cuèndá candeca ñaha-n quíhí<sup>n</sup> ingá xichi? Yòhó tnàhá-n xini-n sã ñá túú ñá quide-í ñáyi israél. <sup>11</sup> Chi núu dícó yúhú ní quide-í ñ<sup>n</sup> cuéchi càhnu, te ñá túú ñá cada-xi cuèi na càhni ñaha-ndo

xii-í ní cùu. Te sa ní cutnúni iní-n sã ñá ndáá, chi mee-ni tnúhu ndehnde xicáhá<sup>n</sup>-güedé, te ñá túú nduu váha-xi duca<sup>n</sup> càda-n cúñaha-n sã quíhí<sup>n</sup>-í ndíhi-güedé ingá xichi. Te xíá<sup>n</sup> cuini-í quíhí<sup>n</sup>-í núu tã Cèsár té yìndaha cuéhe nació<sup>n</sup>, te yàcá<sup>n</sup> cáhá<sup>n</sup> méé-dë nùu ndáá ndècuéchi-í —càchí té Páblú xáha<sup>n</sup>-dë xii té Fèstú.

<sup>12</sup> Te ní ndatnúhu té Fèstú ndíhi cue té cùndee tnúhu ñaha xii-dé, te dàtnúni ní xáha<sup>n</sup>-dë xii té Páblú:

—Te sa ní cáhá<sup>n</sup>-n sã quíhí<sup>n</sup>-n quítnahá-n tã Cèsár te díu-ni quíhí<sup>n</sup>-n, te quini-n nãsa cáhá<sup>n</sup> té-á<sup>n</sup> yàcá<sup>n</sup> —càchí-dé xáha<sup>n</sup>-dë xii té Páblú.

*Té Páblú càhá<sup>n</sup> ndíhi-dé té Àgripá té yìndaha nació<sup>n</sup> Israél*

<sup>13</sup> Te sáta ní cuu cuéhe nduu, te ní quee té Àgripá té yìndaha nació<sup>n</sup> Israél cuáhá<sup>n</sup>-dë ñuú Cèsareá ndíhi ñadíhí-dé, te ñaha-á<sup>n</sup> nání-á<sup>n</sup> Berènicé te òré ní quexiò-yu, te ní cáhá<sup>n</sup> ndíhi-yu té Fèstú. <sup>14</sup> Te sáta ní cuu titní nduu, te ní cáhá<sup>n</sup> té Fèstú cuèndá té Páblú ní xii-dé té Àgripá:

—Ndècu ñ<sup>n</sup> té ní dándõ té Juéllí vecaá nání-dë Páblú. <sup>15</sup> Te cútnahá ní sáhá<sup>n</sup>-í ñuú Jerusalén ní nanítnahá-í ndíhi cue dútú cùnuu ndíhi cue té cùu sacuéhé nùu ñáyi israél. Te ní dácaá díquí-güedé té Páblú cuéchi, te ní cachí-güedé sá táuchíu<sup>n</sup>-í cahni ñaha-güedé xii-dé ní cùu. <sup>16</sup> Te ní xáha<sup>n</sup>-í xii-güedé sá vã cúu, chi ñá túú dùca<sup>n</sup> quide nchúhú cue té rómá cùtexínu cada castiú-ndí ñáyi, chi díhna-gá ndúcú tnúhu-ndí núu ñáyi sàa cuéchi díquí-xi cuèndá quini-ndí nùu nãsa cáhá<sup>n</sup> méé-yu ndíhi ñáyi sàcá<sup>n</sup> cuéchi cuèndá-yu, te òré-á<sup>n</sup> cutnúni iní-ndí nùu ndáá ndècuéchi-yu àdi ñáhá, te duca<sup>n</sup> te nihí-ndí nàcuáa quide ndáá-ndí cuèndá-yu, duha ní xáha<sup>n</sup>-í xii-güedé —càchí té Fèstú xáha<sup>n</sup>-dë xii té Àgripá.

<sup>17</sup> Te ní xáha<sup>n</sup> tucu té Fèstú:

—Te sáta ní quexiò-güedé ndéé ndíha, te nduu tnéé ní sáhá<sup>n</sup>-ni-ndí vechiú<sup>n</sup>. Te ní xáha<sup>n</sup>-í sá quíngueñuhu-güedé



té Păblú candeca ñaha-güedě quixi, te òré ní quexìo-dé, <sup>18</sup> te ní ngüíta-güedě xăha<sup>n</sup>-güedě sá ndècuéchi-dé. Te ní sani iní-í sá íí<sup>n</sup> cuěchi cāhnu tee ñaha-güedě dico ñáhá, chi dicó-ni sá íí<sup>n</sup> tnūhu ní cáhá<sup>n</sup>-dé, xiă<sup>n</sup> duca<sup>n</sup> nĩ quide-güedě. <sup>19</sup> Te ní tenăă ñáhá-güedě xii-dé, chi cāchí-güedě sá ñă túú cāhá<sup>n</sup> váha-dé cuendá ndiôxí-güedě. Te tnăhá-ni cuendá íí<sup>n</sup> tée năni Jesús cāhá<sup>n</sup>-dé, chi cāchí-dé sá ní xihí tée-á<sup>n</sup> te ní ndoto-dé cāchí-dé xăha<sup>n</sup>-dē xii-güedě, cāchí-güedě. <sup>20</sup> Te ñă ní cūtnuní iní-í nása cūñaha-í xii-güedě cuendá téhndé cuéchi-dé. Te xiă<sup>n</sup> ní xicá<sup>n</sup> tnūhu-í núú tē Păblú nūu cundee iní-dé quihí<sup>n</sup>-dé ñuú Jerusálén, te ndéé ndiácă<sup>n</sup> cada ndăá-ndí cuendá-dé, te núu ndăá ndècuéchi-dé năcuăa cāhá<sup>n</sup>-güedě àdi ñáhá ní cūu. <sup>21</sup> Te dătnuní té Păblú ní cachí-dé sá cūndècu tnaa-dé vecaá te dătnuní quihí<sup>n</sup>-dé núú tē Cèsár, te tée-á<sup>n</sup> cada ndăá-dé cuendá-dé. Te cuendá sá dúcá<sup>n</sup> nĩ cáhá<sup>n</sup> té Păblú, xiă<sup>n</sup> nūu ní xăha<sup>n</sup>-í sá cūndèé ñáhá cuè sandadú xii-dé, nini na còto-í nása cada-í quihí<sup>n</sup>-dé núú tē Cèsár, duha ní xăha<sup>n</sup>-í xii-güedě —cāchí té Fèstú xăha<sup>n</sup>-dē xii té Àgripá.

<sup>22</sup> Te té Àgripá ní xăha<sup>n</sup>-dē xii té Fèstú:

—Te tnăhá yúhú ío cudíí iní-í cundedóho-í tnūhu cāhá<sup>n</sup>-dé —cāchí-dé xăha<sup>n</sup>-dē.

Te ní xăha<sup>n</sup> tē Fèstú:

—Tneé cana-í-dé te cundedóho-n nása cáhá<sup>n</sup>-dé —cāchí-dé xăha<sup>n</sup>-dē.

<sup>23</sup> Te nduu tněé ní quexìo té Àgripá ndihí ñadihí-dé tá Berènicé vechiū<sup>n</sup>, te ío ní quide cāhnu ñaha-güedě xii-yu. Te cuánguihú-yu vechiū<sup>n</sup> ndihí cue tée cūu capitá<sup>n</sup> cūnū-gá ndihí cue tée cūnuu ñuú Cèsareá. Te té Fèstú ní xăha<sup>n</sup>-dē sá quingueñuhu-güedě té Păblú vecaá, te òré ní quexìo-dé, <sup>24</sup> te ní xăha<sup>n</sup> tē Fèstú xii té Àgripá ndihí nchaa ñăyiu xĩndecu-á<sup>n</sup>:

—Chí cūndèhe tée iha chi tée-a cāchí cue tée isràél sá ndècuéchi-dé, te cūtnăhá ní xĩndecu-í ñuú Jerusálén ní cachí-güedě sá ndăá ndècuéchi-dé, te ñiū-ni duca<sup>n</sup> cāhá<sup>n</sup>-güedě iha.

Te nchaa-güedě ní cuăá-güedě te cāchí-güedě sá táuchiu<sup>n</sup>-í cahni ñaha-güedě xii-dé ní cūu. <sup>25</sup> Te sátá nĩ ndihí cuendú ní cáhá<sup>n</sup>-güedě, te ní cutnūmí iní-í sá ñă túú nĩ íí<sup>n</sup> cuéchi cāhnu ní quide-dé, núu ñă túú ní tàuchiu<sup>n</sup>-í cahni ñaha-güedě xii-dé. Te mee-dě ní cachí-dé sá quihí<sup>n</sup>-dé núú tē Cèsár tée yĩndaha cuéhé nació<sup>n</sup>, te ní xăha<sup>n</sup>-í sá cúu quihí<sup>n</sup>-dé. <sup>26</sup> Te ñă túú ní xini váha-í nása ní quide-dé, núu xiă<sup>n</sup> ñă ní ñihí-í năcuăa cadúha-í tutú quihí<sup>n</sup> ndaha té Cèsár, te xiă<sup>n</sup> ní cana-í-dé véxi-dé iha cuendá nchaa-ndo cāhá<sup>n</sup> ndihí-ndo-dé. Te duca<sup>n</sup> cānuu cadíhna-gá yòhó tătá Àgripá cācá<sup>n</sup> tnūhú-n nūu-dē nūu nása cáhá<sup>n</sup>-dé, te òré-á<sup>n</sup> cutnūmí iní-í nása cada-í cadúha-í tutú quihí<sup>n</sup> ndaha té Cèsár. <sup>27</sup> Chi sàni iní-í sá ñă túú ndūu váha-xi sá quihí<sup>n</sup> íí<sup>n</sup> tée tàu cuéchi te núu vá códó tnūmí núú íí<sup>n</sup> tutú năcuăa cāu cuéchi tàu-dé —cāchí té Fèstú xăha<sup>n</sup>-dē xii-güedě.

## 26

### *Te Păblú cāhá<sup>n</sup> ndihí-dé té Àgripá*

<sup>1</sup> Te dătnuní ní xăha<sup>n</sup> tē Àgripá tée yĩndaha nació<sup>n</sup> Isràél xii té Păblú:

—Te vitna cáhá<sup>n</sup>-n nūu nása ní cuu cuendá-n —cāchí-dé xăha<sup>n</sup>-dē.

Te té Păblú ní ndacani-dé ndaha-dé sá cūndedóho-güedě, te ní xăha<sup>n</sup>-dē xii té Àgripá tée yĩndaha nació<sup>n</sup> Isràél:

<sup>2-3</sup> —Tătá Àgripá, ío cudíí iní-í sá ní naníhí tnăhá-ó vitna, chi yòhó ío váha xini-n nchăa năcuăa quide ñăyiu isràél quidé cāhnú-yu Yá Ndiôxí, te ío váha xini-n nchăa tnūhu xĩtnăhá-yu. Te vitna cundee iní-n cūndedóho-n íí<sup>n</sup> úu tnūhu na cāhá<sup>n</sup>-í. Na cāchí tnūhu-í sá ñă ndăá ní quide-í nchaa sá cāhá<sup>n</sup> cue tée isràél.

*Té Păblú cāhá<sup>n</sup>-dé năcuăa ní quide-dé cūtnăhá vátá túhá-gă-dé ichi Yá Ndiôxí*

<sup>4</sup> "Te sa năha nchaa cue tée cūnuu núu ñăyiu isràél năcuăa ní quide-í ñuú-í ndihí ñuú Jerusálén cūtnăhá ní cuu landú-í. <sup>5</sup> Te mee-güedě năhá-güedě sá ndèé lĩhli-í ní chitnahá-í cue tée cūu fariséú. Te núu

cuiní-güedé cáhá<sup>n</sup>-güedé sá tée fariséú cùu-í àdi ñáhá dico nchaa-güedé sa ñaha-güedé sá cuè téé-á<sup>n</sup> ñi chitnahá-í. Te cue téé cùu fariséú-á<sup>n</sup> ño cuiní-güedé cada-güedé nchaa ñacuáa nchicú<sup>n</sup> nihnu ñáyu quidé-yu. Te yúhu nchaa sá nchicú<sup>n</sup> nihnú-yu quidé-yu-á<sup>n</sup> ñi quide-í. <sup>6</sup> Te vitna ndècu-í iha, te cáhá<sup>n</sup>-n ñuu váha-ñi quide-í àdi ñáhá, chi cue téé-á<sup>n</sup> téé ñaha-güedé cuéchi xii-í cuendá sá sándáá iní-í sá ndótó nchaa ñáyu ní xihí. Te ñu-ñi duca<sup>n</sup> ñi xáha<sup>n</sup> Yá Ndiöxí xii nchaa ñani tnáhá-ó ñi xindecu ndéé sanaha. <sup>7</sup> Te nchaa ñáyu-á<sup>n</sup> xindetú-yu nduu ndoto ñáyu ní xihí ní cùu. Te ñu-ñi duca<sup>n</sup> ndetu nchaa ñani tnáhá-ó ndècu ñuyíu-a ndéé vitna, te xiá<sup>n</sup> ñuu cuèi nduu cuèi niú cáhá<sup>n</sup> ndihí-yu Yá Ndiöxí. Te sá sándáá iní-í ñuu xiá<sup>n</sup> ní cáhá<sup>n</sup>-í, te tée ñaha cue téé israhél cuéchi xii-í. <sup>8</sup> ¿Te ná cuendá nchòhó cue téé israhél ñá túu cuiní-ndó quindáá iní-ndó sá dándoto Yá Ndiöxí nchaa ñáyu ní xihí? —càchí té Páblú xáha<sup>n</sup>-dè.

*Té Páblú caní-dè cuendú sá ñi xóo chihi-dé ñáyu sándáá iní tnúhu Jèsús vecaá*

<sup>9</sup> Te ní xáha<sup>n</sup> tucu té Páblú:

—Ndéé ñavá-á<sup>n</sup> ñi quide úhú-í ñáyu sándáá iní-xi tnúhu Jèsús Yaá ní quee ñuu Nazàrét, te ní cáhá<sup>n</sup>-í sá váha-ñi ní quide-í sá dúcá<sup>n</sup> ñi quide-í. <sup>10</sup> Te ñu-ñi duca<sup>n</sup> ñi quide-í ñuu Jerusálén. Te cue dútu cúnú ní taxi-güedé ñi tutú cuendá tñi-í ñáyu ní sándáá iní tnúhu Jèsús, te vai-yu ní chihi-í vecaá. Te òré ní cáhá<sup>n</sup>-güedé sá cáhni-güedé ñáyu-á<sup>n</sup>, te tnáhá-í ní cáhá<sup>n</sup>-í sá cúu cáhni ñaha-güedé xií-yu. <sup>11</sup> Te titní xito ní sáhá<sup>n</sup>-í nchaa veñúhu ñáyu israhél, te ní caní-í-yu te ní xáha<sup>n</sup>-í sá dáñá-yu ichi Jèsús. Te cuendá ío ní cudéè<sup>n</sup>-í núu-yu, xiá<sup>n</sup> ní sáhá<sup>n</sup>-í nchaa ñuu xicá ñi sánúnducú-í dava-gá ñáyu sándáá iní tnúhu-gá cuendá dándoto ñaha-güedé xií-yu.

*Té Páblú cáhá<sup>n</sup> tucu-dé nása ní cuu ní tuha-dé ichi Yá Ndiöxí*  
(Hch. 9:1-19; 22:6-16)

<sup>12</sup> Te cuendá xiá<sup>n</sup> ní xica tucu-í cuáhá<sup>n</sup>-í ñuu Dámascú, nehé-í tutú ní

taxi cue dútu cúnú cuáhá<sup>n</sup>, cuendá sá ndácú-í tñi-í nchaa ñáyu sándáá iní tnúhu Jèsús ní cùu. <sup>13</sup> Te òré cauxúu nduu ñuhu-í ichi cuáhá<sup>n</sup>-í, te uu<sup>n</sup> ní quee ñuhú andiu ñi dáyehe-xi ndéé núu núnñi-í ndihí cue téé ndèca tnaha ndihí-í, te níhi-gá ní dáyehe-xi dàcúxí nchicanhii. <sup>14</sup> Te nchaa-ndí ní nduá-ndí ndéé ñuhu, te ní tecú dóho-í cáhá<sup>n</sup> ñi sá cáhá<sup>n</sup> tnúhu ñáyu israhél, te càchí-xi: “Yòhó Sàulú, ¿Ná cuendá cúu úhú iní ñáhá-n xii-í dándoto ñaha-n? Te ío dándoto-n mee-n, chi dàtná cuiní-n quide ndicutu quide-n chi quiti-á<sup>n</sup> òré cuxi-güedé-ñi puyá te sáha-ñi patadá núu-xi, te sá dúcá<sup>n</sup> quide-ñi te quide úhú-ñi mee-ñi. Te duca<sup>n</sup> sátnahá-xi cùu yohó chi ñá túu sándáá iní ñáhá-n xii-í”, càchí sá ñi cáhá<sup>n</sup>-á<sup>n</sup>.

<sup>15</sup> Te ní xáha<sup>n</sup>-í: “¿Ná cúu yòhó sá ñi cáhá<sup>n</sup>-ái<sup>n</sup>?”, xáha<sup>n</sup>-í. Te càchí sá cáhá<sup>n</sup>-á<sup>n</sup>: “Yúhu cúu-í Jèsús Yaá cúu úhú iní-n”, duha ní cachí sá cáhá<sup>n</sup>-á<sup>n</sup>. Te xiá<sup>n</sup> ní cutnúní iní-í sá Jèsús cáhá<sup>n</sup>. <sup>16</sup> Te ní cachí-gá:

“Ndacuíñi-n chi yúhu cáhá<sup>n</sup>-í chi cuiní-í quihí<sup>n</sup>-n cáda-n chiu<sup>n</sup>-í, chi quihí<sup>n</sup>-n cáhá<sup>n</sup>-n núu ñáyu ñacuáa ní cuu ní xiní ñáhá-n xii-í vitna, te quixi tucu-í cáhá<sup>n</sup> ndihí ñaha-í xii-n, te cúñaha-n xii-yu ñacuáa cáhá<sup>n</sup>-í. <sup>17</sup> Chi cuiní-í quihí<sup>n</sup>-n cáhá<sup>n</sup>-n tnúhu-í núu ñáyu israhél ndihí núu ñáyu ñá túu cùu ñáyu israhél, te coto ñaha-í xii-n cuendá vá cáhni ñáhá-yu xii-n.

<sup>18</sup> Te cuiní-í quihí<sup>n</sup>-n cúñaha-n xii-yu sá dáñá-yu nchaa ichi cuéhe ichi duha ndécú-yu, te tuhá-yu ichi váha cuendá vá quindáá iní-yu cadá-yu sá cáhá<sup>n</sup> yucu ñávaha, te quindáá iní-yu cadá-yu nchaa ñacuáa cáhá<sup>n</sup> Yá Ndiöxí. Te núu na quindáá iní-yu tnúhu cáhá<sup>n</sup>-í, te cada cáhnu iní-í nchaa cuéchi-yu, te naníhi tãhú-yu ndihí dava-gá ñáyu sa ní xocuíñi nchaa sá cuéhe sá dúhá ñi xindecu iní-yu”, duha ní cachí-gá xii-í —càchí té Páblú xáha<sup>n</sup>-dè xii té Àgripá té yindaha nació<sup>n</sup> Israhél.

*Té Páblú quidé-dé nchaa ñacuáa ní xáha<sup>n</sup> Jèsús cada-dé*

19 Te ní xáha<sup>n</sup> tùcu té Păblú xii té Àgripá:

—Ñá túú dàña ndeé-í quidè-í nchaa nàcuáa ní cáhá<sup>n</sup> Jèsús òré ní cáhá<sup>n</sup>-gá andiú. 20 Te díhna-gá ñáyiú ñúú Dàmascú ní cáhá<sup>n</sup>-í tnúhu-gá núu-yu, te ní xáha<sup>n</sup>-í xii-yu sá dáñá-yu nchaa sá cuèhé sá dúhá quidè-yu, te cáhá<sup>n</sup> ndihí-yu Yá Ndiöxí, te cadá-yu mee-ni sá vâha cuendá cutnùní iní dava-gá-yu sá ñí dáñá-yu nchaa sá ñà túú vâha ní xóo cadá-yu. Te duca<sup>n</sup>-ni nì xáha<sup>n</sup>-í xii ñáyiú ñúú Jerusàlén ndihí ñáyiú ñhì nació<sup>n</sup> Isràél ndihí nchaa ñáyiú ñá túú cùu ñáyiú isràél. 21 Te cuendá sá dúcá<sup>n</sup> ñí cáhá<sup>n</sup>-í núu ní tñi ñaha cuè té isràél xii-í cútnàhá ní sáhá<sup>n</sup>-í veñúhu càhnu sá ïo cùnuu cahni ñaha-güedé ní cùu. 22 Te ñi-ni mee Yá Ndiöxí ní chindee ñaha-gá xii-í núu ndècu-í iha tnàví cáhá<sup>n</sup>-í tnúhu-gá, te mee-ni tnúhu-gá cáhá<sup>n</sup> ndihí-í nchaá-yu, cuèi ñáyiú cuica, te cuèi ñáyiú ndàhú. Te ndii Moisés ndihí dava-gá cue téé ní xóo cáhá<sup>n</sup> tnúhu Yá Ndiöxí ndéé sanaha ñí cáhá<sup>n</sup>-güedé nàcuáa cada-xi vitna, te ñi-ni duca<sup>n</sup> cáhá<sup>n</sup>-í nchaa-ni nduu. 23 Te cue téé-á<sup>n</sup> ñí cachí-güedé sá Cristú Yaá tendaha Yá Ndiöxí quixi ñuyú-a ndoho tnahá-gá, te cuú-gá, te dàtnùní ndoto-gá. Te duca<sup>n</sup> càda-xi nchaa ñáyiú ní xihí ndotó-yu núu na sàá nduu chi duca<sup>n</sup> càda-xi ní cachí meé Yá Ndiöxí. Te cuendá sá dúcá<sup>n</sup> ñí ndoto-gá, xiá<sup>n</sup> cútnùní sá cúú nàñhí tàhú ñáyiú, cuèi ñáyiú isràél, te cuèi ñáyiú ñá túú cùu ñáyiú isràél. Te dàtná-ni nduu tnúhu ní cáhá<sup>n</sup> cue téé ní xóo cáhá<sup>n</sup> tnúhu-gá ndéé sanaha-á<sup>n</sup>, te ñi-ni duca<sup>n</sup> cáhá<sup>n</sup> yúhú tucu —càchí té Păblú xáha<sup>n</sup>-dè.

*Té Păblú xáha<sup>n</sup>-dè xii té Àgripá sá quindáa iní-dé tnúhu Jèsús*

24 Te sá dúcá<sup>n</sup> ñí cáhá<sup>n</sup> té Păblú, te ní cáhá<sup>n</sup> ñihí té Fèstú, te xáha<sup>n</sup>-dè:

—Păblú, jío lùcú cáhá<sup>n</sup>-n! Cuendá ío vâi ní dácuáhá-n, núu xiá<sup>n</sup> ndádá lùcú ñáhá-xi xii-n —cachí-dé xáha<sup>n</sup>-dè.

25 Te ní xáha<sup>n</sup> té Păblú:

—Ñáhá, vá dúcá<sup>n</sup> cáhá<sup>n</sup>-n chi ñá díú sá lùcú-í duha cáhá<sup>n</sup>-í, chi tnúhu ndáa cáhá<sup>n</sup>-í. 26 Te té Àgripá-a sa nàha-dé

ndihí nchaa ñáyiú isràél nàcuáa ní cuu, chi sa ní ñihí-dè tnúhu ndihí dava-gá-yu nàcuáa ní cáhá<sup>n</sup>-í, núu xiá<sup>n</sup> cúyè-í cáhá<sup>n</sup> ndihí-í-dé —càchí-dé xáha<sup>n</sup>-dè xii té Fèstú.

27 Te ní xáha<sup>n</sup>-dè xii té Àgripá:

—Yúhú sa xini-í sá sàndáa iní-n tnúhu ní chídó tnùní cue téé ní xóo cáhá<sup>n</sup> tnúhu Yá Ndiöxí ndéé sanaha —càchí-dé xáha<sup>n</sup>-dè.

28 Te ní xáha<sup>n</sup> té Àgripá:

—¿Quide-n cuendá sá ñí<sup>n</sup> úú tnúhu ní cáhá<sup>n</sup>-n te quindáa iní-í tnúhu Jèsús cáhá<sup>n</sup>-n-á<sup>n</sup>? —càchí-dé xáha<sup>n</sup>-dè.

29 Te ní xáha<sup>n</sup> tùcu té Păblú:

—Cuèi vitna te cuèi ndéé cuèé-gá dico cuini-í sá dàcuítíi sá quindáa iní-n tnúhu Jèsús. Te ñi-ni duca<sup>n</sup> xicá<sup>n</sup> táhù-í núu Yá Ndiöxí sá ncháá ñáyiú ndècu ndihí-o iha quindáa iní-yu tnúhu-gá dàtná cuini-n ñí quide yúhú, duca<sup>n</sup> cadá-yu. Dìcò-ni sá núu vá quihí<sup>n</sup>-ni-yu vecaá dàtná cuini-n ndòho yúhú —càchí-dé xáha<sup>n</sup>-dè xii té Àgripá.

30 Te sá tá dúcá<sup>n</sup> ñí cáhá<sup>n</sup>-dé, te ní ngúnutnii té Àgripá téé yindaha nació<sup>n</sup> Isràél, ndihí té Fèstú téé cùu gobiernú, ndihí tá Berènicé ndihí dava-gá ñáyiú xínucóo yatni. 31 Te ní tnahá-yu ndèca tnahá-yu cuáhá<sup>n</sup> ñí xio. Te ní xitnàhá-yu:

—Téé-á<sup>n</sup> ñá túú nã cuèchi ní quide-dé núu chihi ñaha-güedé vecaá àdi cahni ñaha-güedé —càchí-yu xitnàhá-yu.

32 Te té Àgripá ní xáha<sup>n</sup>-dè xii té Fèstú:

—Cuèchi mee-dè chi ní cachí-dé sá quitnahá-dé té Cèsár, xiá<sup>n</sup> núu ndihu tucu-dé vecaá, te núu ñá túú duca<sup>n</sup> ní cáhá<sup>n</sup>-dé, te cácu-dé ní cùu —cachí-dé xáha<sup>n</sup>-dè xii té Fèstú.

## 27

*Té Păblú cuáhá<sup>n</sup>-dé ñúú Rómá*

1-2 Te ní ndatnúhu-güedé sá quihí<sup>n</sup> té Păblú ndihí bàrcú nació<sup>n</sup> Italiá, te tnahá yúhú quihí<sup>n</sup>-í ndihí-dé. Te tnahá ñí<sup>n</sup> téé nàni Aristarcú cuini-dé quihí<sup>n</sup> ndihí-ndí-dé, te cùu-dé téé ñúú Tesalónica, te ñúú-á<sup>n</sup> yindèhu-xi

distritú Macèdoniá. Te ní sáha cuèndá-güedé té Páblú ndíhi ìñ ùú-gá cue téé xixíhi vecaá ní quehe<sup>n</sup> cuèndá ñáhá tē Jülüú téé cùu capitá<sup>n</sup>, téé yíndaha nchaa sandadú nání Àugustú, te ní quée-ndí nchaa-ndí bàrcú ñuú Adràmitiú. Te ní xica bàrcú-á<sup>n</sup> cuáhá<sup>n</sup>-ndí ndíhi-xi te cuita yáha-ndí ìñ ùú ñuú yíndèhu distritú Àsiá quíhí<sup>n</sup>. <sup>3</sup> Te nduu tnée ní quexìo-ndí ñuú Sidón. Te ío váha ní quide té Jülüú, chi ní dáñá-dē ní quene té Páblú ní sáhá<sup>n</sup>-dé ní cáhá<sup>n</sup> ndíhi-dé cue téé ío váha tnáhá tnúhu ndíhi-dé ñuu cudana cundáhú iní ñáhá-güedé cuáñaha-güedé nchaa sá xíní ñùhu-dé. <sup>4</sup> Te dātnú<sup>n</sup> ní ndée tucu-dé bàrcú cuáhá<sup>n</sup>-ndí. Te ío níhi táchí te ñá ní dáña-xi caca ndáá bàrcú, te ní sáhá<sup>n</sup> bàrcú ndée yatni yuhu dístritú Chìpré, te dístritú-á<sup>n</sup> cáá cuädava xití làmár, te xíá<sup>n</sup> ñà túú cuèhé táchí ní yáha-ndí. <sup>5</sup> Te ta yáha-ndí cuáhá<sup>n</sup>, te ní yáha-ndí ìñ xio yuhu dístritú Cìliciá ndíhi yuhu dístritú Pànfilíá, te ní sáá-ndí ndée ñuú Mírá ìñ ñuú yíndèhu dístritú Lìciá.

<sup>6</sup> Te ní quene téé cùu capitá<sup>n</sup> cuándúcú-dē ingá bàrcú, te ní níhí-dē ìñ bàrcú téé ñuú Alejándriá, ñúhú ìchi-xi quíhí<sup>n</sup>-xi nació<sup>n</sup> Italiá. Te ní ndícuaca ñaha-dē xii-ndí cuáhá<sup>n</sup>-ndí ní quée-ndí bàrcú-á<sup>n</sup>, te ní xica-xi cuáhá<sup>n</sup>-xi. <sup>7</sup> Te ío cuèé cuáhá<sup>n</sup> bàrcú-á<sup>n</sup>, cuèhé nduu ní xúhu<sup>n</sup>-xi ichi, te yica-ni ñí quexìo-ndí yuhu ñuú Nidú, te ñá ní dáña-gá táchí quíhí<sup>n</sup> ndáá bàrcú ñuu ní xícó ndúú-xi. Te ní yáha-ndí ìñ xio yuhu dístritú Crètá núú ñà túú quène vihi táchí, te ñuu-ni cuádava tucu làmár cáá dístritú-á<sup>n</sup>. Te ní yáha-ndí yuhu ñuú Salmón, te ñuu-ni Crètá yíndaha-xi ñuú-á<sup>n</sup>. <sup>8</sup> Te ní yáha-ndí cuáhá<sup>n</sup>-ndí mee-nā núú rayá dístritú Crètá, te ío ní ndoho-ndí ní sáá-ndí ìñ xichi núú nání Puèrtú Váha, yatni víi-ni-gá ñuú Làseá.

<sup>9</sup> Te ní cuyaa vihi-ndí ichi, duca<sup>n</sup>-ni cùu-ndí ní tnáhá yóó cúú<sup>n</sup> dāú táchí, te ío úhú yáha bàrcú ñuu na quíhí<sup>n</sup>-ni-xi. <sup>10</sup> Te ní xáha<sup>n</sup> tē Páblú xii-güedé:

—Nchaa-ndo cùndedóho-ndo tnúhu na càhá<sup>n</sup>-í-a. Ío úhú núú na càda yica-o quíhí<sup>n</sup>-ó ndíhi bàrcú chi cuíta càrgá te cuíta bàrcú, te cuu-ni iní-xi tnáhá-ni mee-o cùú-ó chi cáhá-ó ñuu na ngàunihnu-o xití ndute —càchí-dé xáha<sup>n</sup>-dē xii-güedé.

<sup>11</sup> Te téé cùu capitá<sup>n</sup> ñá ní sàndáá iní-dé tnúhu ní cáhá<sup>n</sup> té Páblú. Dico tnúhu ní cáhá<sup>n</sup> téé dàcaca bàrcú ndíhi xitohó-xi chi ní sàndáá iní-dé. <sup>12</sup> Te ñá ní tnáhá iní-güedé Puèrtú Váha cuèndá sá ñí tnáhá yóó cúú<sup>n</sup> dāú táchí, te ñá túú dāhu váha táchí xíá<sup>n</sup>, núu vai-güedé ní cuini-güedé yáha-güedé quíhí<sup>n</sup>-güedé sáá-güedé ndée ñuú Fènicé ní cùu. Te yacá<sup>n</sup> cundecu-güedé yóó cúú<sup>n</sup> dāú táchí cuèi ñá túú càváha vihi, chi nchíi nàcuáa yáha bàrcú, te yacá<sup>n</sup> quíhu táchí, dico dāhu-gá. Núu xíá<sup>n</sup> ndée ndíácá<sup>n</sup> nátacá bàrcú yóó cúú<sup>n</sup> dāú táchí, te ñuu-ni Crètá yíndaha-xi ñuú-á<sup>n</sup>.

#### *Nítùhú làmár cúú<sup>n</sup> dāú táchí*

<sup>13</sup> Te duha ní quene nuu luha táchí, xíá<sup>n</sup> ní sani iní-güedé sá ndácú-güedé quíhí<sup>n</sup>-güedé, núu ní natava-güedé caá ndètní ndée bàrcú, te ní xica-xi cuáhá<sup>n</sup>-xi ní yáha-ndí yatni víi yuhu dístritú Crètá. <sup>14</sup> Te tnaa-ni ní cuu sá ñí xica bàrcú, te duha ní cunuu dāú táchí ìñ xio yuhu ñuú-á<sup>n</sup> <sup>15</sup> te nchita ichi cuáhá<sup>n</sup> bàrcú. Te ñá ní ndàcu-gá-xi quíhí<sup>n</sup> ndáá-xi nàcuáa cuáhá<sup>n</sup>-xi ní cùu, núu ní dáñá-ndí cuáhá<sup>n</sup> méé-nā bàrcú. <sup>16</sup> Te ní yáha-ndí ìñ ñuú nání Clàudá, te ñuú-á<sup>n</sup> cáá cuädava xití làmár. Te ìñ xio yuhu ñuú núú ñà túú quène vihi táchí ñí yáha-ndí, te bàrcú líhli sá nchícú<sup>n</sup> sátá bàrcú cáhnú, chi ní ndacu-ndí ní taxúha-ndí xití bàrcú cáhnú. <sup>17</sup> Te sátá ñí ndacu-ndí ní taxúha-ndí bàrcú líhli, te ní ducu<sup>n</sup> nuu-güedé yoho bàrcú cáhnú. Te ío ní yúhú-güedé sá yáha bàrcú ndée núú ñúhú cùchí yuhu ñuú Sírté, núu xíá<sup>n</sup> ní ndíhi dóó nchítá dīquí bàrcú ní nuu nehe-güedé, chi dóó-á<sup>n</sup> ío níhi chíndaha táchí, núu xíá<sup>n</sup> cuáhá<sup>n</sup> bàrcú ìñ xio. Te ní dáñá-güedé ñá túú-gá ní



dàcaca-güedé, núu cuáhá<sup>n</sup> méé-nà-xi ta chindaha táchí cuáhá<sup>n</sup>. <sup>18</sup> Te ío níhi dáú táchí, te ñá ní cuíní tñahí-xi yáha. Te nduu úú sá dúcá<sup>n</sup> ñà túú-gă ní dàcaca-güedé bàrcú te ní ngüíta-güedé ní dängöyo-güedé sá nchídó-xí cuendá cuíní-güedé nduu ñamá-xi. <sup>19</sup> Te nduu úní ní dängöyo-güedé nchaa ndachiu<sup>n</sup> cánehe chiú<sup>n</sup>-güedé xití bàrcú. <sup>20</sup> Te cuéhé nduu ñá túú ní xíní-ndí ní chòdíní ní nchícanhii, chí ío níhi ní cuu<sup>n</sup> dáú táchí, núu ní cáhá<sup>n</sup>-ndí sá vǎ cǎcu-ndí, chí ndíhi-ndí cáhá ní cáhá<sup>n</sup>-ndí.

<sup>21</sup> Te ní cuu titní nduu ñá túú-gă xéxi-ndí, núu xǎ<sup>n</sup> ní ngúnutnǎi té Pǎblú núú-güedé, te xǎha<sup>n</sup>-dǎ:

—Quindáá iní-ndó tñuhu ní cáhá<sup>n</sup>-í, te cundecu nahi-o Crétá ní cùu. Te núu ní tñi-ndo tñuhu-í, te vǎ dácuita-o càrgá ndíhi dava-gá ndàchiu<sup>n</sup> ní cuu. <sup>22</sup> Te vǎ yùhú-ndó chí vǎ cùú ní ì<sup>n</sup>-ndo dico bàrcú chí cuíta. <sup>23</sup> Te nàha-ndo sá yùhú cáhá<sup>n</sup> ndíhi-í Yǎ Ndiòxí te quide-í nàcuáa cáhá<sup>n</sup>-gá. Te diu-ni mee-gă ní techiú<sup>n</sup>-gá ì<sup>n</sup> espíritú xínú cuèchi núú-gă ní quixi, <sup>24</sup> te ní cachí-xi xii-í: “Vǎ yùhú-n chí vǎ cùú-n, dico dacuití quíhí<sup>n</sup>-n cáhá<sup>n</sup> ndíhi-n tǎ Cèsár. Te ní ì<sup>n</sup> tée ndíhi-n vǎ cùú, chí ío cùdíí iní ñáhá Yǎ Ndiòxí xii-n”, duha ní cáhá<sup>n</sup> espíritú xínú cuèchi núú-gă ní cachí tñuhu-xi xii-í. <sup>25</sup> Núu xǎ<sup>n</sup> cǎchí tñuhu-í sá vǎ yùhú-ndó, chí sa cùtnuní iní-í sá cǎdá Yǎ Ndiòxí nàcuáa ní cáhá<sup>n</sup> espíritú xínú cuèchi núú-gă. <sup>26</sup> Te mee táchí chindaha-xi bàrcú daquíhí<sup>n</sup>-xi ndéé yuhu ndute —cachí té Pǎblú xǎha<sup>n</sup>-dǎ xii-güedé.

<sup>27</sup> Te sa ní cuu sáhú<sup>n</sup> nduu sáhú<sup>n</sup> niú sá ní ngüíta-xi cùu<sup>n</sup> dáú táchí, te ñá túú-gă dácaca-güedé bàrcú, chí mee-nǎ táchí tá chindaha-xi bàrcú cuáhá<sup>n</sup> núú ndute lámár Àdríá. Te sátá ní cuu dava niú, te ní quide cuendá cue tée dàcaca bàrcú sá tá cùyatni-güedé ñuhu yíhí. <sup>28</sup> Te ní chicuáhá-güedé ná daha-gá mǎtrú néhé-xí sǎ cùnú xití ndute cuendá cutnùní iní-güedé sá tá cùyatni-xi ndéé yuhu lámár, te

nèhe-xi ócò sáhú<sup>n</sup> ì<sup>n</sup>-ni-gá mǎtrú. Te ní xica tucu bàrcú luha-gá, te dàtnùní ní chicuáhá tucu-güedé, te xǎ<sup>n</sup> néhé-xí ócò úsá-ni-gá mǎtrú. <sup>29</sup> Te ní yùhú-güedé sá candaundeé-xi cava, te ní quehe<sup>n</sup>-güedé cúmí caá náhnú sǎ nchícú<sup>n</sup> yoho, te ní dáquǎe-güedé xití ndute ndàa sátá bàrcú, te dàtnùní ní ngüíhí-xi ñá ní xica-gá-xi, te ní cuíní-güedé sá òré-ni tundaá ní cùu. <sup>30</sup> Te cue tée dàcaca bàrcú ní natava-güedé bàrcú líhli dándéé-güedé núú ndute ní cùu, te ní cachí-güedé sá quíhí<sup>n</sup>-güedé ndàa núú bàrcú dàquǎe-güedé úú-gá caá cuendá cuita candéé-xi bàrcú cáhnú cuendá sá vǎ cǎcá-xí. Te cuíní-güedé dandáhú-güedé dava-gá nchúhú cue tée ñuhu ndíhi-güedé bàrcú, chí ní ndatnúhu-güedé sá cùnú-güedé ní cùu. <sup>31</sup> Te té Pǎblú ní xǎha<sup>n</sup>-dǎ xii tée cùu capitá<sup>n</sup> ndíhi dava-gá sandádú:

—Te núu na dándóo ñaha cuè tée dàcaca bàrcú cunu-güedé, te vǎ cǎcu-o —cǎchí-dé xǎha<sup>n</sup>-dǎ.

<sup>32</sup> Te sá dúcá<sup>n</sup> ní xǎha<sup>n</sup>-dǎ núu ní sáhá<sup>n</sup> sandádú ní xehndé-güedé yoho nchícú<sup>n</sup> bàrcú líhli dängáúnhnu-güedé xití ndute cuáhá<sup>n</sup>-xi.

<sup>33</sup> Te váha váha-ni ta tundaá cuáhá<sup>n</sup>, te ní xǎha<sup>n</sup> tǎ Pǎblú:

—Sa ní cuu sáhú<sup>n</sup> nduu ñá túú tñahí xèxi-ndo sá ndíhú iní-ndó. <sup>34</sup> Te vitna yáchí-ndó, chí caxi-ndo cuendá naníhí ndéé-ndó, te vǎ yùhú-ndó chí ñá túú nǎ tnahá ní ì<sup>n</sup>-ndo —cachí-dé xǎha<sup>n</sup>-dǎ xii-güedé.

<sup>35</sup> Te sátá dúcá<sup>n</sup> ní cáhá<sup>n</sup>-dé, te ní quehe<sup>n</sup>-dé ì<sup>n</sup> pàá, te ní ndacá<sup>n</sup> táhú-dǎ núú Yǎ Ndiòxí, te núú-güedé nchaa-güedé duca<sup>n</sup> ní quide-dé, te dàtnùní ní táhú-dǎ luha ní xexi-dé. <sup>36</sup> Te duca<sup>n</sup> te dàtnùní ní cuyí<sup>n</sup>-güedé ní xexi-güedé nchaa-güedé. <sup>37</sup> Te úú ciéndú únídico sáhú<sup>n</sup> ì<sup>n</sup>-ndí ñuhú bàrcú núú tñahá té Pǎblú, te nchaa-ndí ní xexi ndíhi-ndí-dé. <sup>38</sup> Te ní xexi-ndí ní ndahá xití-ndí, Te dàtnùní ní ngüíta-güedé ní tava-güedé nchaa ngohnchi triú ní dängöyo-güedé xití ndute cuendá nduu ñamá-gá bàrcú.

*Ní dáhu bàrcú xití làmár*

<sup>39</sup> Te sáta ñí túndaá, te ñá ní cùtnuní-gá iní-güedé ndèé cúu-xí nùú ñí sáá-güedé, te ní xiní-güedé ñí xichi núú ñí xícó ndùú luha yuhu làmár, te vai vihi cúchí dándáá-xí yùhu ndute, te xía<sup>n</sup> ñà túú dàcandá víhí tǎchí ndute, Te ní ndatnúhu-güedé sá ndácú-güedé dacàca-güedé bàrcú quíhí<sup>n</sup>-xi ndéé núú ñùhú cǔchí. <sup>40</sup> Te xía<sup>n</sup> nùú ní sáhá<sup>n</sup>-güedé ní xehndé-güedé nchaa yoho nchícú<sup>n</sup> caá tácàndeé bàrcú ní ndóo xití làmár, te ní nadatáyá-güedé vítú sǎ dácuico-xi barcú, te ní nacata caa-güedé ñí dóo díquí bàrcú, te ta chindhaha táchí cuáhá<sup>n</sup> yuhu làmár tá cùyatni-xi ñuhu yichí cuáhá<sup>n</sup>. <sup>41</sup> Te ndècu ñí xichi ní nataká víhí cǔchí xití ndute, te xía<sup>n</sup> ñí nguíndǔxi nihnu bàrcú-güedé, te ní cutí-xi xití cúchí, te ñá ní ñíhí-gǎ-güedé nàcuáa cada-güedé nene-xi. Te ío níhi ní dácandá táchí ndute, te ní chúcú ndèé-xi ndàa sáta bàrcú, te ní ndíhi ní táhú-xí. <sup>42</sup> Te cue sandádú ní xítñàha-güedé sá cáhni-güedé nchaa cue téé ní xíhi vecaá cuèndá sá vǎ quíhí<sup>n</sup>-güedé núú ndute te cunu-güedé. <sup>43</sup> Te téé cùu capitá<sup>n</sup> ñá ní dàña-dé cahni-güedé cue téé ní xíhi vecaá, chi ñá ní cùndee iní-dé cahni-güedé tñàhá té Pǎblú. Te ní xáha<sup>n</sup>-dè xii-güedé sá cuè téé xícuu cada quíhí<sup>n</sup> núú ndute te na yáha-güedé ndute quene-güedé yuhu làmár. <sup>44</sup> Te dává cue téé ñá cúu càda, ní xáha<sup>n</sup>-dè nanducu-güedé vítú ñí àdi vítú ñí táhú sǎ ñí xíhi bàrcú, te núú xǎ<sup>n</sup> caundodo-güedé yáha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

**28***Té Pǎblú ndécú-dè ñuú Mǎltá cáá cuádava làmár*

<sup>1</sup> Te sáta ñí cácu-ndí ní nene-ndí ñuhu yìchí, te ní níhí-ndí tñúhu nàcuáa nàni ñuú núú ñí sáá-ndí, te ñuú-á<sup>n</sup> nání-xí Mǎltá, te càa-xi cuádava làmár. <sup>2</sup> Te ío quide víxi<sup>n</sup>-xi cuèndá ío cùu<sup>n</sup> dáú. Te ñáyiú ñuú-á<sup>n</sup> ñí cundàhú iní

ñáhǎ-yu xii-ndí, ní dátñàhá-yu ñuhú te ní cana ñàhá-yu ní sáhá<sup>n</sup>-ndí ní nacuídí-ndí. <sup>3</sup> Te té Pǎblú dátacá-dé nducú, te tñàhá-ñí ñí cóó dèé<sup>n</sup> ñí tñí nihnu-dé-di, te òré cuáhá<sup>n</sup> ndaha-dé chucu-dè núú ñùhú, te ní ñáni-di cahni, te ní ndee-di xití nducú ní sándúu-di ndaha-dé, te ní xexiha<sup>n</sup>-di xii-dé. <sup>4</sup> Te nchaa ñáyiú ndèhé-yu sá tácàndeé-di ndaha-dé, te ní nguíta-yu ní xítñàhá-yu:

—Váa ndíyi ní sahani téé-a, te ñá ní xíhí-dé làmár, te dacuítí sǎ cùu-dé vitna, chi sa nàha Yá Ndiòxí ná ní quide-dé ñuyíú-a —càchí-yu xítñàhá-yu.

<sup>5</sup> Te té Pǎblú ní quidi-dé ndaha-dé ní ngaunihnu-di núú ñùhú, te ñá túú tñàhí ná ní cùu núú ñí xexi-di. <sup>6</sup> Te ñáyiú ñuú-á<sup>n</sup> xíndéhè-yu núu daquíhí<sup>n</sup>-xi chúhú<sup>n</sup> àdi nduá-dé cuú-dé. Te naha ñí xíndéhé ñàhá-yu núu nása cada ñaha-xi xii-dé, te ñá túú tñàhí ná ní quide ñaha-xi, te ní xítñàhá-yu:

—Váa ndiòxí cúu tée-a núu dàcá<sup>n</sup> ñá túú tñàhí ná ní quide-xi ndaha-dé núú ñí xexi cóó —càchí-yu xítñàhá-yu.

<sup>7</sup> Te yatni núú dúcá<sup>n</sup> ñí xexiha<sup>n</sup> cóó-á<sup>n</sup> cáá ñùhu xitu téé nàni Publiú, te téé-á<sup>n</sup> táxi tñuní-dé níhí ñuú cáá cuádava xití làmár núú ndécú-ndí nduu-á<sup>n</sup>. Te ío váha iní-dé chi ní cana ñaha-dè ní sáhá<sup>n</sup>-ndí ní xíndecu-ndí úní nduu vehe-dé. <sup>8</sup> Te tǎtá tǎ Pùbliú-á<sup>n</sup> cáá-dé cùhú-dé ñùhú-dé cahni, te tñàhá-dé daxi. Te té Pǎblú ní sáhá<sup>n</sup>-dè núú cáá-dé, te ní cáhá<sup>n</sup> ndíhi-dé Yǎ Ndiòxí, te ní sacá<sup>n</sup> ndodo-dé ndaha-dé díquí tée cùhú-á<sup>n</sup>, te duca<sup>n</sup>-ni ñí quide-dé, te ní ndúha téé cùhú-á<sup>n</sup>. <sup>9</sup> Te sáta dúcá<sup>n</sup> ñí quide té Pǎblú, te ní quixi nchaa ñáyiú cùhú núú ndécú-ndí, te ní quide tátña ñaha tǎ Pǎblú xii-yu te ní ndúha-yu. <sup>10</sup> Te òré ndécú-ndí xía<sup>n</sup>, te vai sá ñí taxi táhú-güedé, te òré ní xica-ndí ní taxi tucu-güedé nchaa sá xíní ñùhu-ndí ichi.

*Té Pǎblú ní quexio-dé ñuú Rómá*

<sup>11</sup> Te yàcá<sup>n</sup> ní xíndecu-ndí úní yóó, te sa ndècu ñí barcú téé ñuú Alejándriá

òré ní quexìo-ndí, te ní xíndecu-xi níhí yóó cúú dáú táchí. Te núú-xi càndodo sandú sá dánàni-güedé Càstór ndíhí sàndú sá dánàni-güedé Pòlúx, te xití bàrcú-án nǐ quée-ndí cuáhá<sup>n</sup>-ndí. <sup>12</sup> Te ní quexìo-ndí ñuú Siràcusá, te yàcá<sup>n</sup> ní xíndecu-ndí úní nduu. <sup>13</sup> Te ní xica tucu bàrcú cuáhá<sup>n</sup>-xi, te ní quexìo-ndí ñuú Règiú. Te nduu tněé duha ní quene nuu táchí. Te ní xica bàrcú cuáhá<sup>n</sup>-xi, te ndéé nduu úú ní quexìo-ndí ñuú Pùteolí. <sup>14</sup> Te yàcá<sup>n</sup> ní naníhí tnáhá-ndí ndíhí ñáyíu sàndáá iní tnúhu Jèsús, te ní cachí-yu sá cùndècu-ndí úná nduu, núu xǐá<sup>n</sup> ní xíndecu-ndí úná nduu ndíhí-yu. Te ní xica tucu bàrcú cuáhá<sup>n</sup>-xi, te ní quexìo-ndí ñuú Ròmá. <sup>15</sup> Te ñáyíu ròmá ñáyíu sàndáá iní tnúhu Jèsús, ní níhí-yu tnúhu sá cuáhá<sup>n</sup>-ndí, te ní quixí-yu ní quixi tnahá ñáhá-yu ichi. Te davá-yu ní naníhí-ndí ñuú Fòrú Àpiú, te davá-yu ní naníhí-ndí ñuú Úní Tàbernás. Te òré ní xini té Pàblú nchaa ñáyíu véxi tnahá ñáhá xìi-ndí, te ndee ndèe ní cuu iní-dé, te ní ndacá<sup>n</sup> táhú-dé núú Yá Ndiòxí sá dúcá<sup>n</sup> nǐ quidè-yu. <sup>16</sup> Te sáta nǐ quexìo-ndí ñuú Ròmá, te cue té cùchiu<sup>n</sup> ní xáha<sup>n</sup>-güedé xii té Pàblú sá cùndècu dǐ<sup>n</sup>-dé, te ní xindeé ñáhá cuàa sandadú xii-dé.

*Té Pàblú càhá<sup>n</sup>-dé tnúhu Yá Ndiòxí ñuú Ròmá*

<sup>17</sup> Nduu úní sá nǐ quexìo té Pàblú, te ní cana-dé cue té cùnuu núú ñáyíu isràél ndécú ñuú Ròmá, te ní sáhá<sup>n</sup>-güedé núú ndécú-dé, te ní xáha<sup>n</sup>-dè:

—Nchòhó cue té isràél, càchí tnúhu-í sá ñà túú nǎ ní quide-í ní ñ<sup>n</sup> ñáyíu cútnáhá ní xíndecu-í ñuú Jerusàlén. Te ñà túú ní càhá<sup>n</sup> cuèhé-í sá quidè-yu nchaa nàcuáa ní xóo cada cue ñani tnáhá-ó nǐ xíndecu ndéé sanaha, te ñà túú nǎ ní quide-í te ní tnǐ ñaha-güedé ní sáha cuendá ñáhá-güedé xii-í núú cuè té ròmá, cue té ndècu yacá<sup>n</sup>. <sup>18</sup> Te cue té-án nǐ ndúcú tnúhu-güedé núu ndáa ndècuéchi-í, te ní cutnùní iní-güedé sá

ñà túú nǎ ní quide-í, te xǐá<sup>n</sup> cuìní-güedé queñuhu ñaha-güedé xii-í vecaá ní cùu. <sup>19</sup> Te ñu-ni cue té isràél ñà ní dàña-güedé cácu-í, chi cuìní-güedé sá cáhní ñaha cue té ròmá, cue té xíndecu yàcá<sup>n</sup> xii-í ní cùu, te xǐá<sup>n</sup> núu ní xáha<sup>n</sup>-í sá quixí-í càhá<sup>n</sup> ndíhí-í té Cèsár cuendá iha cada ndáa méé-dé cuendá-í, te vǎ yóo ñ<sup>n</sup> tee-í cuéchi. <sup>20</sup> Núu xǐá<sup>n</sup> ní cana ñaha-í xii-ndo cuendá cunaha-ndo nàcuáa ní cuu. Te ní xáha<sup>n</sup>-í sá sàndáá iní-í sá ndótó ñáyíu ní xíhí, te ñu-ni duca<sup>n</sup> càhá<sup>n</sup> dava-gá ñáyíu isràél, te sá dúcá<sup>n</sup> nǐ càhá<sup>n</sup>-í, te ní chihi ñaha-güedé vecaá, te xindeé ñáhá-güedé ndéé vitna — càchí té Pàblú xáha<sup>n</sup>-dè xii-güedé.

<sup>21</sup> Te ní xáha<sup>n</sup>-güedé xii-dé:

—Ñà túú tnáhí tutú ní tëndaha cue té distritú Jùdeá quixi cuendá-n. Te ní cuè té isràél ñà túú ní quixi-güedé càhá<sup>n</sup> cuèhé-güedé cuendá-n. <sup>22</sup> Te cuìní-ndí cundedóho-ndí nása cunduu tnúhu càhá<sup>n</sup>-n, chi sa ní níhí-ndí tnúhu sá ncháa xìchi ío xícáhá<sup>n</sup> cuèhé-yu cuendá nchaa ñáyíu sàndáá iní tnúhu Jèsús —càchí-güedé xáha<sup>n</sup>-güedé xii té Pàblú.

<sup>23</sup> Te ní xáha<sup>n</sup>-güedé nduu cùyáchí-güedé te quixi-güedé cund-edóho-güedé dava-gá cuendú càhá<sup>n</sup> té Pàblú. Te ní tnahá nduu nǐ ndatnúhu-güedé quíhí<sup>n</sup>-güedé núú quidè véhe-dé, te vǎi-yu ní sáhá<sup>n</sup>-yu ní xíndedóho-yu tnúhu ní càhá<sup>n</sup>-dé, te nchàca nchaa ní càhá<sup>n</sup> ndíhí-dé-yu. Te ní xáha<sup>n</sup>-dè xii-yu sá ndí Moisés ndíhí dava-gá cue té ní xóo càhá<sup>n</sup> tnúhu Yá Ndiòxí ndéé sanaha nǐ chídó tnùní-güedé núú tütú-güedé sá díú-gǎ tendaha-gǎ Crístú quixi-gǎ ñuyíú-a. Te ní chídó tnùní-güedé nchaa nàcuáa cada-gǎ, te ñu-ni nàcuáa càhá<sup>n</sup> tutú-güedé cada Crístú, te duca<sup>n</sup> nǐ quide-gǎ cútnáhá ní xica cuu-gǎ ñuyíú-a, núu xǐá<sup>n</sup> ní cutnùní sá díú Jèsús cúú-gǎ Crístú Yá ní tendaha Yá Ndiòxí ní quixi ñuyíú-a. Te núu quindáá iní-yu, te ndíhu ndaha ñaha Yá Ndiòxí xii-yu. <sup>24</sup> Te davá-yu ní sàndáá iní-yu tnúhu ní càhá<sup>n</sup>-dé, te davá-yu ñà túú ní sàndáá iní-yu. <sup>25</sup> Te

cuëndá sá ñǎ ĩ<sup>n</sup>-ní tnũhu ni cǎhá<sup>n</sup>-yu,  
núu xǎ<sup>n</sup> cuìní-yu núhú-yu ni cùu. Te  
ní xáha<sup>n</sup> tẽ Pǎblú sá cùndetu tnaá-yu  
cáhá<sup>n</sup>-dé ingá tnúhu, te xǎha<sup>n</sup>-dě:

—Ní xáha<sup>n</sup> Espíritú Yá Ndiõxí xii  
ndíi Chaiá nàcuáa cǎhá<sup>n</sup> ndíi núu  
nchaa ñaní tnáhá-ó ñí xíndecu ndéé  
sanaha. Te ní cǎhá<sup>n</sup> Espíritú-gá ĩ<sup>n</sup> sá  
ndàá ní xáha<sup>n</sup>-xi xii ndíi, te duha ní  
xáha<sup>n</sup>-xi:

<sup>26</sup> Quíhí<sup>n</sup>-n te cúñaha-n xii ñáyiu:

Nchòhó mee-ni cùndedóho-ndo tnũhu  
cáhá<sup>n</sup> Yá Ndiõxí, dico ni vǎ tēcú  
tnùní-ndó.

Te cada-gá titní núú sǎ vǎ yõo  
tnàhí ndàcu cada, dico ni vǎ  
cùtnùní iní-ndó nàcuáa ndùu sá  
cádá-gǎ,

<sup>27</sup> chi cuëndá sá ño sàá iní-ndó,  
xǎ<sup>n</sup> duca<sup>n</sup> ñà túú sǎha-ndo cuëndá  
nása cuáhá<sup>n</sup> tnúhu cǎhá<sup>n</sup>-gǎ,  
chi ñǎ cuìní-ndó cùndedóho-ndo, te ni  
ñǎ sàndáá iní-ndó.

Te ni ñǎ cuìní-ndó dǎña-ndo nchaa sá  
cuèhé sá dúhá quide-ndo  
cuendá xocàni-gǎ nchaa xǎ<sup>n</sup> iní-ndó,  
duha cúñaha-n xii-yu.

Càchí Espíritú-gǎ xǎha<sup>n</sup>-xi xii ndíi.

<sup>28</sup> Te na càchí tnúhu-í sá quíhí<sup>n</sup> cue  
tée cǎhá<sup>n</sup> tnúhu Yá Ndiõxí cǎhá<sup>n</sup>-güedé  
tnúhu-gǎ núu ñáyiu ñǎ túú cùu ñáyiu  
isràél, chi ñáyiu isràél ñǎ túú cuìní-yu  
cundedóho-yu. Dico ñáyiu ñǎ túú  
cùu ñáyiu isràél chi cùdíi iní-yu cund-  
edóho-yu, núu xǎ<sup>n</sup> naníhí tǎhú-yu —  
càchí té Pǎblú xǎha<sup>n</sup>-dě xii-yu.

<sup>29</sup> Te sátá ñí ndíhi cuëndú ní  
xáha<sup>n</sup>-dě, te ní ndeé-yu cuánuhú-yu  
ta ndàtnúhu-yu cuáhá<sup>n</sup>.

<sup>30</sup> Te úu cuíá ñí xínu ní xíndecu té  
Pǎblú ĩ<sup>n</sup> vehe ní cháhu-dé. Te ní xóo  
cáhá<sup>n</sup> váha-dé ndíhi nchaa ñáyiu ní  
xóo quíhí<sup>n</sup> vehe-dé. <sup>31</sup> Te ní xáha<sup>n</sup>-dě  
sá ndíhu ndaha ñàha Yá Ndiõxí xii-yu  
núu quíndáá iní-yu tnúhu-gǎ, te vǎ  
yõo ĩ<sup>n</sup> ni sàdí yuhu-dé. Te mee-ni  
tnũhu Xítóhó Jesucristú ní cǎhá<sup>n</sup>-dé  
núu-yu.



## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ RÒMÁ

*Té Păblú cādūha-dé tutú quíhí<sup>n</sup> ndaha ñáyiú xĩndecu ichi Xítóhó Jesucristú ndécú ñúú Rómá*

<sup>1</sup> Yúhú té Păblú xínú cuèchi-í núú Xítóhó Jesucristú, chi mee Yă Ndiöxí ní cachí-gá sá cùu-í ì<sup>n</sup> tée cáhá<sup>n</sup> tnúhu-gá núú ñáyiú, te tnúhu-gá cùu-xí tnúhu sá cáhá<sup>n</sup> nàcuáa naníhí tǎhú-ó, núú ñuú-gá ní tendaha ñàha-gá xii-í xicá cùu-í cáhá<sup>n</sup>-í tnúhu-gá.

<sup>2</sup> Te ndée sanaha ñí cachí Yă Ndiöxí sá dàcuítíí sáa nduu ngũndecu ndíhi ñáyiú tnúhu-gá. Te duca<sup>n</sup> ñí xáha<sup>n</sup>-gá xii cue tée ní cáhá<sup>n</sup> tnúhu-gá dàvá-á<sup>n</sup> ñí chídó tnúni-güedé núú tütú-gá.

<sup>3</sup> Te tnúhu-gá sá cáhá<sup>n</sup>-í-a cáhá<sup>n</sup>-xi ñuú cuèndá Xítóhó Jesucristú Yaá cùu Dēhe-gá. Te Dēhe-gá-á<sup>n</sup> cùu-gá ì<sup>n</sup> ñáyiú, te cùu-gá ñaní tnáhá ndíi Dávíí. <sup>4</sup> Te cùu-gá Yaá ñá túú tnàhí cuèchi-xi. Te ní xihí-gá te ní ndoto-gá, te xíá<sup>n</sup> cúnùní iní-ó sá cùu-gá Dēhe Yă Ndiöxí, te ío cǎhnu cuu-gá. <sup>5</sup> Te ñuú Xítóhó Jesucristú ní quide-gá ní nduu tǎhú-í núú Yă Ndiöxí sá cáhá<sup>n</sup>-í tnúhu-gá núú cuè ñáyiú ñuyíú-a cuèndá quíndáá iní-yu tnúhu-gá te canchicú<sup>n</sup> nihnú-yu cadá-yu nchaa nàcuáa cáhá<sup>n</sup>-xi, te duca<sup>n</sup> ío cuu cǎhnu-gá. <sup>6</sup> Te tnáhá nchòhó cùu-ndó ñáyiú sa nchícú<sup>n</sup> nihnu quide-ndo nchaa nàcuáa cáhá<sup>n</sup> tnúhu-á<sup>n</sup>, chi ní cachí Yă Ndiöxí sá nchòhó tnáhá tnúhu-ndo ndíhi Xítóhó Jesucristú.

<sup>7</sup> Te nchòhó ñáyiú xĩndecu ñuú Rómá, ñáyiú ío cùu iní ñáhá Yă Ndiöxí, cādúha-í tutú-a daquixi-í ndaha-ndo. Te ñuú nchòhó cùu-ndó cuè ñáyiú ní cachí Yă Ndiöxí cada ndáá cundecu-ndo núú-gá. Te xicá<sup>n</sup> tǎhú-í núú Tátá-ó Dütú Ndiöxí ndíhi núú Xítóhó Jesucristú sá ío na chindee chitúú ñaha-gá xii-ndo, te duca<sup>n</sup> ndíi nduú-gá ná cǎda te ío váha cuu iní-ndó cundecu-ndo.

*Té Păblú cuini-dé quíhí<sup>n</sup> ngoto-dé cue ñáyiú xĩndecu ichi Xítóhó Jesucristú ndécú ñúú Rómá*

<sup>8</sup> Te díhna nuu-gá cǎchí tnúhu-í xii-ndo sá ío ndácá<sup>n</sup> tǎhú-í núú Yă Ndiöxí cuèndá sá ío sàndáá iní-ndó-gá, te nchaa ñáyiú nihí-yu tnúhu sá dúcá<sup>n</sup> quide-ndo. Te Xítóhó Jesucristú dáyǎha-gá nchaa tnúhu cáhá<sup>n</sup>-í núú Yă Ndiöxí. <sup>9</sup> Te ndíi tnáhá òré cáhá<sup>n</sup> ndíhi-í Yă Ndiöxí duca<sup>n</sup>-ní xicá<sup>n</sup> tǎhú-í núú-gá cuèndá-ndo, te mee-gá náhá-gá sá cáhá<sup>n</sup> ndáá-í, te ñuú-ni núú-gá xínú cuèchi-í ní yúhu ní iní-í, chi cáhá<sup>n</sup>-í nàcuáa ní quide Dēhe-gá Xítóhó Jesucristú cuèndá naníhí tǎhú-ó. <sup>10</sup> Te xicá<sup>n</sup> tǎhú-í núú Yă Ndiöxí sá ñuú mee-gá ná cǎchí te sáá ì<sup>n</sup> nduu quixi coto ñaha-í xii-ndo.

<sup>11</sup> Chi ío cuini-í cundecu ndíhi ñaha-í xii-ndo dǎnehé ñáhà-í ì<sup>n</sup> úú tnúhu nàcuáa ío-gá chindee ñaha Espíritú Yă Ndiöxí xii-ndo, te duca<sup>n</sup> ío-gá cuita nducu ndèe-ndo cada-ndo nchaa nàcuáa cuini-gá. <sup>12</sup> Te ío chí ná cuǎha tnàha-o tnúhu ndee iní cundecu-o ichi-gá, chi nchòhó ndíhi yúhú ío sàndáá iní-ó-gá.

<sup>13</sup> Te nchòhó ñáyiú ndècu ndíhi-í ichi Xítóhó Jesucristú na cǎchí tnúhu-í xii-ndo sá dúcá<sup>n</sup>-ní ío sàni iní-í quixi coto ñaha-í xii-ndo. Te cuini-í sá òré quixi coto ñaha-í xii-ndo, te vá cuíta chiu<sup>n</sup> quixi-í dàtná quidè-í òré sǎngoto-í nchaa ñáyiú dava-gá ñuú ñá túú xíta chiu<sup>n</sup>-í chí ío váha sǎhúu<sup>n</sup>-yu tnúhu cáhá<sup>n</sup>-í, dico ñá ndácù-í quixi-í quixi coto ñaha-í xii-ndo. <sup>14</sup> Te yúhú yídiquí-í cáhá<sup>n</sup>-í tnúhu Xítóhó Jesucristú núú nchaa ñáyiú cáhá<sup>n</sup> tnúhu gríégú, ndíhi núú nchaa ñáyiú cáhá<sup>n</sup> dava-gá núú tnúhu, ndíhi núú nchaa ñáyiú túha, ndíhi núú nchaa ñáyiú ñá túú túha. <sup>15</sup> Te cuèndá sá dúhá yídiquí-í cáhá<sup>n</sup>-í tnúhu-gá, xíá<sup>n</sup> ío cuini-í dǎnehé ñáhà-í xii nchaa nchòhó ñáyiú ñuú Rómá nàcuáa nduu tnúhu sá cáhá<sup>n</sup> nàcuáa naníhí tǎhú-ó.

*Ío cùnuu tnúhu Xítóhó Jesucristú*

<sup>16</sup> Te yúhú ñá túú tnàhí cùcaha<sup>n</sup> núu-í cáhá<sup>n</sup>-í tnúhu Xítóhó Jesucristú, chi cùu-xi tnúhu ío cùnuu, chi Yă Ndiöxí ní cachí-gá sá ncháá

ñáiyu na quíndáá iní-xi tnúhu-á<sup>n</sup> te naníhí tǎhú-yu. Te ní cachí-gá sá díhnanuu-gǎ ñáiyu isràél ngúndecu ndihí-yu tnúhu-á<sup>n</sup> te dǎtnùní ngúndecu ndihí ñáiyu ñá túú cùu ñáiyu isràél. <sup>17</sup> Te tnúhu-á<sup>n</sup> dánèhé ñáhá-xí xii-o sá cúdiu-o núú Yǎ Ndiǒxí te núu mee-ni sǎ quíndáá iní-ó-gǎ dǎtná càhá<sup>n</sup>-xi núú tǔtú-gá núú càchí-xi: “Nchaa ñáiyu sàndáá iní ñáhá xii Yǎ Ndiǒxí cúdiú-yu núú-gǎ, te ndècu ndihí ñáhá-yu xii-gá”, duha càchí-xi núú tǔtú-gá.

*Nchaa ñáiyu ndècu ñuyíú ndècuéchi-yu*

<sup>18</sup> Te ndéé andiu tëndaha Yǎ Ndiǒxí sá ùhú quixi sá cúú-xí nchaa ñáiyu ñá túú quide ndáá núú-gǎ, ñáiyu quide nchaa sá cuèhé sá dúhá. Te cuèndá nchaa sá quidè-yu-á<sup>n</sup> xǎ<sup>n</sup> ñá túú cuíní-yu tñí-yu tnúhu ndáá tnúhu Yǎ Ndiǒxí cuèndá cuu-xi ñ<sup>n</sup> sá vǎha sá cúú-xí-yu. <sup>19</sup> Te cuèi duca<sup>n</sup> quidè-yu dico cùtnuní ndáá iní-yu nàcuáa ndùu sá sání iní Yǎ Ndiǒxí ndihí nàcuáa ndùu sá quidè-gǎ dǎtná cùtnuní iní nchaa dava-gá-yu, chi diu-gá dánèhé ñáhá-gǎ xii-yu. <sup>20</sup> Te ni vǎ ndácú-ó quíní núú-ó nǎsa càa-gá, te ni vǎ ndácú-ó quíní-ó nǎsa càa iní-gá, te ni vǎ ndácú-ó quíní-ó nǎsa quide-gá táxí tnùní-gá nchaa nduu nchaa quíú. Te cuèi duca<sup>n</sup> dico ndéé cùtnàhá ní ngáva ñuyíú ní ngúita nchaa ñáiyu tècú tnùní váha-yu nàcuáa ndùu sá sání iní-gá ndihí nàcuáa ndùu sá quidè-gǎ te duca<sup>n</sup> tècú tnùní-yu cuèndá nchaa sá ñí cadúha-gá ndéhè-yu ió ñuyíú-a, núu xǎ<sup>n</sup> vá càchí-yu sá ñà túú cuéchi-yu. <sup>21</sup> Te cuèi duca<sup>n</sup> ñí cutnùní iní-yu cuèndá Yǎ Ndiǒxí dico ñá túú cuíní-yu canehé-yu sá yíñùhu núú-gǎ nàcuáa tàú-xi cunduu. Te ni ñà túú cuíní-yu ndacá<sup>n</sup> tǎhǔ-yu núú-gǎ cuèndá nchaa sá vǎha quide ñaha-gá xii-yu, chi mee-ni nchaa sá ñà túú vèdana nàndíhí ñùhu iní-yu. Te quidè-yu dǎtná quidè ñ<sup>n</sup> ñáiyu ñá túú ndècu ndihí nchaa sá xíní tnùní-xi. Te uu<sup>n</sup>-gá uu<sup>n</sup>-gá tá quidè-yu cuáhá<sup>n</sup>. <sup>22</sup> Te càchí-yu sá cúú-yu ñáiyu ió váha sàá sá xíní tnùní-xi dico ñá

ndáá, chi cùú-yu ñáiyu ió ñí díquí-xi. <sup>23</sup> Te ñá túú cuíní-yu cáhá<sup>n</sup>-yu sá ió càhnu cuu Yǎ Ndiǒxí Yaá ndécú nchaa nduu nchaa quíú, chi da nchaa sá ñí cadúha mèé-yu quide cahnú-yu. Te ní cadúha-yu nchaa sá nàhá ñáiyu ñá túú cùdii ndècu ñuyíú-a. Te ní cadúha-yu sá nàhá quiti ndáva, ndihí sá nàhá quiti sàcuíta ñuhu mee-xi, ndihí sá nàhá nchaa dava-gá quiti, nchaa xǎ<sup>n</sup> quidè cahnú-yu.

<sup>24</sup> Te xǎ<sup>n</sup> núu ní dáñá Yǎ Ndiǒxí quidè-yu nchaa sá cuèhé sá dúhá sàni iní-yu. Te xǎ<sup>n</sup> ió quide ndihí tnahá-yu sá cuèhé sá dúhá sàcúú-xí yiqui cuñú-yu. <sup>25</sup> Te duca<sup>n</sup> quidè-yu chí ñá túú sàndáá iní-yu tnúhu ndáá tnúhu Yǎ Ndiǒxí. Te mee-ni tñùhu ndehnde sàndáá iní-yu, te nèhé-yu sá yíñùhu núú dàva sá ñí cadúha-gá ió ñuyíú-a ndihí dava sá ndéé andiu te quide cahnú-yu, te ñá túú càchí-yu sá mèé-gǎ ió càhnu cuu-gá, dico mee-gǎ xíní ñùhu-xi cáhá<sup>n</sup>-yu sá ió càhnu cuu-gá ni caa ni quíhí<sup>n</sup>. Te ndáá ndisa sá ió càhnu cuu-gá.

<sup>26</sup> Te sá dúcá<sup>n</sup> ñà túú quide váha-yu núu xǎ<sup>n</sup> ní dáñá-nǎ Yǎ Ndiǒxí quidè-yu nchaa sá cuèhé sá dúhá sàni iní mèé-yu. Te dava ñáiyu dìhí càhá<sup>n</sup> ndihí tnahá-yu ndi mèe dìhí-yu te ñá túú quidè-yu nàcuáa ní nduu tǎhǔ-yu cadá-yu. <sup>27</sup> Te diu-ni duca<sup>n</sup> xiquide dava cue téé chi sàni cuehé sání dùha iní-güedé sá cúú-xí yiqui cuñú-güedé ndi mèe tnahá téé-güedé, chi càhá<sup>n</sup> ndihí tnahá ndi mee-güedé te ñá túú quide-güedé nàcuáa ní nduu tǎhǔ-güedé cada-güedé, te sá dúcá<sup>n</sup> quide-güedé te ñá túú tnahí cùu váha iní-güedé ndécú-güedé, te duca<sup>n</sup> tnahí tàú-xi ndoho-güedé cundecu-güedé.

<sup>28</sup> Te ñá túú tnahí ñùhu iní-yu Yǎ Ndiǒxí núu xǎ<sup>n</sup> duu<sup>n</sup> duu<sup>n</sup> ní dáñá ñihnu ñaha-gá xii-yu sàni cuehé sání dùha iní-yu, te quidè-yu nchaa sá ñà túú tàú-yu cadá-yu. <sup>29</sup> Te nchaa núu sǎ cuèhé sá dúhá cùnuu quidè-yu. Te cue téé càhá<sup>n</sup> ndihí-güedé ñáiyu dìhí te ñá díú ñàdihí-güedé cúú-yu. Te diu-ni duca<sup>n</sup> xiquide cue ñáiyu dìhí chi

càhá<sup>n</sup> ndihí-yu cue téé te ñá díú yíi-yu cùu-güedé. Te mee-ni sã ñà túú vãha quidé-yu sã cúú-xí tnàha ñáyíu-yu, te xihó-yu cundecu ndihí-yu sã ndécú ndihí dava-gá tnàha ñáyíu-yu, te ío sàni cuehé sání dùha iní-yu sã cúú-xí tnàha ñáyíu-yu, te ío cuédú iní-yu, te sãhni tnahá-yu, te ío plètú-yu, te dándahú tnáhã-yu, te cùu úhú iní-yu cue tnàha ñáyíu-yu, te ío yiti yùhú-yu. <sup>30</sup> Te càhá<sup>n</sup> cuèhé-yu cuendá nchaa dava-gá tnàha ñáyíu-yu, te cùu úhú iní-yu Yá Ndiöxí, te xio xio cuini-yu cunuu tnúhu-yu, te mee-ni sàni iní-yu sã ío váha cunduú-yu, te ío quide cahnú-yu mée-yu, te ío sàni iní-yu sã cádá úhú-yu tnàha ñáyíu-yu, te ñá túú sándáá iní-yu ni tátã-yu ni nãã-yu. <sup>31</sup> Te ñá túú tècú tnùní-yu sã vãha, te ñá túú quidé-yu #<sup>n</sup> sã càhá<sup>n</sup>-yu, te ñá túú cùu iní-yu ni ñáyíu cùu ndi meé-yu, te ni dàva-gá tnàha ñáyíu-yu, te ñá túú quide cahnu iní-yu #<sup>n</sup> sã cúmãní nùú tnáhã-yu, te ni ñà túú cùndahú iní-yu tnàha ñáyíu-yu. <sup>32</sup> Te Yá Ndiöxí ní cachí-gá sã ncháá ñáyíu duca<sup>n</sup> xíquide quíhí<sup>n</sup>-yu núú ùhú núú ndàhú. Te xini-yu sã Yá Ndiöxí daquihí<sup>n</sup> ñáhã-gã xii-yu núú ùhú núú ndàhú sã dúcã<sup>n</sup> quidé-yu, dico uu<sup>n</sup>-gá quidé-yu chi váha-gá cúú iní-yu cue ñáyíu quide datná quidé mée-yu.

## 2

*Yá Ndiöxí cada ndáá-gá cuéchi nchaa ñáyíu ndècu ñuyíú*

<sup>1</sup> Te nchòhó ñáyíu càchí sã ío ndècu cuéchi dava-gá ñáyíu tnàhá-ndó ío ndècu cuéchi-ndo cuéi nágá ñáyíu cùu-ndo, chi tnàhá-ndó quide-ni-ndo nchaa nacuáa quide dava-gá ñáyíu càchí-ndó ndècu cuéchi-xi, te sã dúcã<sup>n</sup> càhá<sup>n</sup>-ndó sã ndécú cuéchi ñáyíu-á<sup>n</sup> te dàcaa-ndo cuéchi díquí-ndó chi tnàhá-ndó quide-ndo datná quidé-yu. <sup>2</sup> Te nchoo xini-ó sã Yá Ndiöxí ío váha cùtnuní iní-gá nacuáa cada ndáá-gá cuéchi #<sup>n</sup> #<sup>n</sup> nchoo ñáyíu ndècu ñuyíú-a, chi daquihí<sup>n</sup>-gá nchaa ñáyíu quide nacuáa ní cáhá<sup>n</sup>-í núú ùhú núú

ndàhú. <sup>3</sup> Te nchòhó ñáyíu #<sup>n</sup>-ni quide ndihí ñáyíu càchí mée-ndó sã ndécú cuéchi-xi dacuítí sã ná chãhu-ndo núú Yá Ndiöxí sã dúcã<sup>n</sup> quide-ndo. <sup>4</sup> Te ñá túú cùu váha iní-ndó sã Yá Ndiöxí cùndahú iní ñáhã-gã xii-ndo, te ni ñà túú cùu váha iní-ndó sã ío cuini-gá cada cahnu iní-gá nchaa sã ñà túú vãha quide-ndo, te ni ñà túú quide cuendá-ndó sã Yá Ndiöxí quidé vãha ñaha-gã xii-ndo cuendá cuini-gá sã nchòhó ndixi túu iní-ndó sã ñà túú quide váha-ndo ndècu-ndo. <sup>5</sup> Te nchòhó cúú-ndó ñáyíu ío sàá iní-xi, chi ñá túú cuini-ndó ndixi túu iní-ndó sã ñà túú quide váha-ndo ndècu-ndo, te xíã<sup>n</sup> núu ío-gá tá cùu vai tnúndòho sã cúú-xí-ndó. Te na sàá nduu tnúhu ndòho tnúhu ndàhú te ío ndoho-ndo, chi Yá Ndiöxí cada ndáá-gá nacuáa ndècu cuéchi-ndo. <sup>6</sup> Te dàvá-á<sup>n</sup> cada ndáá Yá Ndiöxí nchaa nacuáa ndècu nchaa sã ní quide #<sup>n</sup> #<sup>n</sup> ñáyíu ndècu ñuyíú-a. <sup>7</sup> Te nchaa ñáyíu nchicú<sup>n</sup> nihnu-ni quide mee-ni sã vãha, ñáyíu-á<sup>n</sup> nduu táhú-yu cundecú-yu ndihí Yá Ndiöxí ni caa ni quíhí<sup>n</sup>, te duca<sup>n</sup> quide váha-yu chi cuini-yu sã Yá Ndiöxí cuu váha iní ñáhã-gã xii-yu, te cuini tucú-yu nduu táhú-yu núú ío váha càa ndècu Yá Ndiöxí cundecú-yu ni caa ni quíhí<sup>n</sup>. <sup>8</sup> Te ío cùdée<sup>n</sup>-gã núú ncháa ñáyíu ñèhu iní mee-ni sã cúú-xí mée-xi, te ñá túú sándáá iní-yu tnúhu ndáá chi mee-ni sã cuèhé sã dúhá quidé-yu. <sup>9</sup> Te nchaa ñáyíu duca<sup>n</sup> xíquide ío ndíhú iní-yu. Te díhna-gá ñáyíu isràél ngüíta-xi ndohó-yu, te dàtnuní ngüíta-xi ndoho nchaa ñáyíu ñá túú cùu ñáyíu isràél. <sup>10</sup> Te nchaa ñáyíu ní quide váha, te Yá Ndiöxí cada-gá te ngúndecú-yu núú ío váha càa ndècu-gá, te cachí-gá sã ní quide váha-yu, te ío váha cuu iní-yu cundecú-yu. Te díhna-gá ñáyíu isràél ñáyíu ní quide váha duca<sup>n</sup> càda ñaha-gã xii-yu, te dàtnuní duca<sup>n</sup> càda ñaha-gã xii ñáyíu ñá túú cùu ñáyíu isràél ñáyíu ní quide váha.

<sup>11</sup> Te ñá túú quide cuendá-gá cuéi náí ñáyíu cùú-yu. <sup>12</sup> Te nchaa ñáyíu ndècu ndihí nchaa tnúhu ní

chídó tnùní ndíi Moisés, Yá Ndiöxí cada ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Te nchaa ñáyiú ñá túú ndècu ndíhi tnúhu ní chídó tnùní ndíi-á<sup>n</sup>, Yá Ndiöxí vá cada ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Dico nchaa ñáyiú quide náandi sá cuèhé sá dúhá dàcutíí cuíta nihnú-yu cuèi ndècu ndíhi-yu tnúhu ní chídó tnùní ndíi Moisés àdi ñá túú ndècu ndíhi-yu. <sup>13</sup> Te nchaa ñáyiú dicó-ni sàcúndedóho nchaa tnúhu ní cáhá<sup>n</sup> ndíi Moisés te ñá túú tní-yu, ñáyiú-á<sup>n</sup> ñá túú cùdú-yu núú Yá Ndiöxí, dico nchaa ñáyiú tní nchaa tnúhu ní cáhá<sup>n</sup> ndíi, ñáyiú-á<sup>n</sup> càchí Yá Ndiöxí sá cùdú-yu núú-gă, chi ñá túú-gă cuéchi-yu ndècu núú-gă. <sup>14</sup> Te nchaa ñáyiú ñá túú ndècu ndíhi tnúhu ní chídó tnùní ndíi Moisés, te núu quidé-yu nchaa nàcuáa ní cáhá<sup>n</sup> ndíi te cùu-xi ñ<sup>n</sup> sá sání tnàhí iní méè-yu cada-yu, te sá sání iní-yu-á<sup>n</sup> cúu-xí ñ<sup>n</sup> tnúhu váha sá sánú ìchi ñaha xii-yu nàcuáa cada váha-yu cundecú-yu. <sup>15</sup> Te sá dúcá<sup>n</sup> quidé-yu xiá<sup>n</sup> cútnùní sá sání iní-yu dàtná càhá<sup>n</sup> tnúhu ní chídó tnùní ndíi Moisés cada ñáyiú isràél, te ío váha cùtnuní iní-yu nchaa nàcuáa quidé-yu chi ndíxi túu iní-yu òré ñá túú quide váha-yu. <sup>16</sup> Te sáá nduu te Yá Ndiöxí cúñaha-gă xii Xítóhó Jesucristú cada ndáá-gá nchaa cuéchi ñáyiú, nchaa sá sání iní méè-yu ndùu yuhu, te cada-gá dàtná càhá<sup>n</sup> tnúhu sá sánú ìchi ñaha xii-o nàcuáa naníhí tãhú-ó, tnúhu sá dãnèhé ñàhà-í xii-ndo.

*Cuèndá ñáyiú isràél ndíhi cuèndá nchaa tnúhu ní chídó tnùní ndíi Moisés*

<sup>17</sup> Te nchòhó ñáyiú isràél nchaa-ndo cùu-ndo ndí mee-í, te càchí-ndó sã nchìcú<sup>n</sup> nihnu-ndo quide-ndo nchaa tnúhu ní cáhá<sup>n</sup> ndíi Moisés nùu xiá<sup>n</sup> ndécú váha-ndo, te càchí-ndó sã ío càhnu cuu-ndo sá ndécú ndíhi-ndo Yá Ndiöxí. <sup>18</sup> Te cùtnuní iní-ndó nchaa nàcuáa cuíní Yá Ndiöxí cada-ndo, te sá dúcá<sup>n</sup> nchìcú<sup>n</sup> nihnu-ndo quide-ndo nàcuáa càhá<sup>n</sup> tnúhu-á<sup>n</sup> xiá<sup>n</sup> cútnùní iní-ndó nchaa sá ío-gá váha xini ñuhu-xi cada-ndo. <sup>19</sup> Te càchí-ndó

sã ío váha xini-ndó cànuichi-ndo nchaa ñáyiú ñá túú cùtnuní iní-xi, te càchí tucu-ndo sã ío váha xini-ndó nà canu ichi-ndo nchaa ñáyiú ndècu ichi cuehé ichi duha. <sup>20</sup> Te sànu ichi-ndo nchaa ñáyiú ío ñí dîquí-xi, ndíhi nchaa ñáyiú vitna ta tècú tnùní nchaa sá váha, te duca<sup>n</sup> quide-ndo chi ndècu ndíhi-ndo nchaa tnúhu ní chídó tnùní ndíi Moisés, te tnúhu-á<sup>n</sup> cúu-xí tnúhu ndáá, chi sànu ichi ñaha-xi xii-ndo nàcuáa cada-ndo. <sup>21</sup> Te nchòhó dàcuaha-ndo ñáyiú nàcuáa cada-yu, te mee-ndo ñá túú dàcuaha-ndo cada-ndo nchaa nàcuáa tàú-xi cunduu, te xãha<sup>n</sup>-ndo xii-yu sá vã cúu dùhú-yu te mee-ndo dùhu-ndo. <sup>22</sup> Te dàcuaha-ndó-yu sá cuè téé vá cúu cãhá<sup>n</sup> ndíhi-güedé ñáyiú dîhí te núu ñá díú ñàdîhí-güedé cúu-yu, te duca<sup>n</sup>-ni cuè ñáyiú dîhí, vá cúu cãhá<sup>n</sup> ndíhi-yu téé te núu ñá díú yíi-yu cùu-güedé. Te nchaa sá xãha<sup>n</sup>-ndo vã cúu càda ñáyiú te mee-ndo quide-ni-ndo, te xãha<sup>n</sup>-ndo xii-yu sá vã cãnèhé-yu sá yíñùhu núu nchaa sá càchí-yu cùu ndiöxí-yu, te mee-ndo nèhé-gá quidé-ndó, chi dùhu-ndo nchaa sá ndécú venúhu. <sup>23</sup> Te càchí-ndó sã ío cùnuu nchaa tnúhu ní chídó tnùní ndíi Moisés, te ñá túú quide-ndo nchaa nàcuáa ní cáhá<sup>n</sup> ndíi, te sá dúcá<sup>n</sup> quide-ndo-á<sup>n</sup> te dàquee tíhú-ndó Yá Ndiöxí. <sup>24</sup> Te quèe ndáá-xi nàcuáa càhá<sup>n</sup>-xi núu tütú Yá Ndiöxí nàcuáa quide-ndo-á<sup>n</sup> nùu càchí-xi sá ncháá ñáyiú ñá túú cùu ñáyiú isràél càhá<sup>n</sup> cuèhé-yu cuèndá Yá Ndiöxí sá cuèndá-ndó.

<sup>25</sup> Te nchòhó ñáyiú isràél nchaa-ndo cùu-ndo ndí mee-í, te tnàhá-ndó ndècu ndíhi-ndo seña ñíi-ndo, te váha-ni sá dúcá<sup>n</sup> te núu quide-ndo nchaa nàcuáa ní cáhá<sup>n</sup> ndíi Moisés. Dico núu ñá túú quide-ndo nchaa nàcuáa ní cáhá<sup>n</sup> ndíi ña, te ñá túú nàndíhi-xi sá cúu-ndó ñáyiú isràél cuèi ndècu seña ñíi-ndo. <sup>26</sup> Te nchaa ñáyiú ñá túú ndècu ndíhi seña ñíi-xi, te núu quidé-yu nchaa nàcuáa ní cáhá<sup>n</sup> ndíi Moisés, te cùu-yu dàtná cue ñáyiú ndècu ndíhi seña ñíi-xi, chi quidé-yu



nchaa nàcuáa ní cáhá<sup>n</sup> ndíi. <sup>27</sup> Te ñáyiú ñá túú ndècu ndihí seña ñí-xi, te núu na càdá-yu nchaa nàcuáa ní cáhá<sup>n</sup> ndíi Moisés, te ñáyiú-á<sup>n</sup> cachí-yu sá ñà túú quide ndáá nchaa nchòhó ñáyiú ndècu ndihí seña ñí-xi, chi ndècu ndihí-ndo nchaa tnúhu ní chídó tnùní ndíi te ñá túú quide-ndo nacuáa càhá<sup>n</sup> tnúhu-á<sup>n</sup>. <sup>28</sup> Te nchòhó ñáyiú isràél, ñáyiú nchìcú<sup>n</sup> nihnu-ni quide nchaa nacuáa ta quide tnahi-ndo véxi, ñá túú quide-ndo sá cúu-ndó ñáyiú isràél, te mee-ndo ndècu seña ñí-ndo dico ñá túú quide-ndo nacuáa tàù-xi cada nchaa ñáyiú ndècu seña ñí-xi, te mee-ni seña-á<sup>n</sup> sàha-ndo ñí-ndo te ñá túú quide-ndo nacuáa cuìní Yá Ndiòxí cada-ndo. <sup>29</sup> Te nchaa ñáyiú sàndáá ndisa iní-xi Yá Ndiòxí, ñáyiú-á<sup>n</sup> cúu ndìsá-yu ñáyiú isràél, te sa ní nduu ndoo ní nduu nine iní-yu chi Espiritú Yá Ndiòxí duca<sup>n</sup> ní quide-xi, dico ñá díú sá sàha-yu seña ñí-yu dàtná ní cachí ndíi Moisés. Te ñáyiú-á<sup>n</sup> cúu vâha iní ñáhá Yá Ndiòxí xii-yu cuèi ñá túú càhá<sup>n</sup> vâha tnàha ñáyiú-yu cuèndá-yu.

### 3

<sup>1</sup> Te sá dúhá càhá<sup>n</sup>-í te ió dava ñáyiú quesàhá-yu sá ñí-ní cùu ñáyiú ñá túú cùu ñáyiú isràél ndihí nchoo ñáyiú isràél, te quesaha tùcú-yu sá ñí-ní quide tucu-xi cuèi na cuãha àdi vá cuãha seña ñí-yu. <sup>2</sup> Dico yúhú càchí-í sá ncháá ñáyiú isràél ío-gá cùnùu-yu, chi ío tìtní núú sá vâha ní quide ñaha Yá Ndiòxí xii-yu, chi ní sáñaha-gã tnúhu-gá ndécú ndihí-yu. <sup>3</sup> Te davá-yu ñá túú cuìní-yu cada ndáá-yu, dico ñá díú sá xíã<sup>n</sup> te cùyica iní Yá Ndiòxí ñá túú quide ndáá-gá. <sup>4</sup> Dico ñáhá chi xini ñuhu-xi sá ncháá ñáyiú cada cuèndá-yu sá Yá Ndiòxí cúu-gã Yaá quidé ndáá cuiti, te cuèi ncháá-yu na càchí-yu sá ñà túú quide ndáá-gá, dico mee-gã chi quide ndáá-ni-gá. Te núú tùtú-gá càhá<sup>n</sup>-xi nàcuáa ní xáha<sup>n</sup> ñí tée ní xíndecu ndéé sanaha xii-gá, te duha ní xáha<sup>n</sup>-dè:

Yòhó Dútú Ndiòxí, cùtnuní iní ñáyiú sá ío ndáá càhá<sup>n</sup>-n,  
te cùnùu nahi-ni tnúhu-n cuèi òré càchí ñáyiú sá ñà túú càhá<sup>n</sup> ndáá-n.

Duha ní xáha<sup>n</sup> tée ndéé sanaha-ã<sup>n</sup> xii-gá càchí-xi núú tùtú-gá.

<sup>5</sup> Te cuèndá nchaa sá cuèhé sá dúhá quide ñáyiú, xíã<sup>n</sup> cùtnuní iní-yu sá Yá Ndiòxí cúu-gã Yaá ío vâha quide ndáá, chi mee-gã ñá túú dùca<sup>n</sup> quide-gá. Te cuèi duca<sup>n</sup> dico vá caní iní-yu sá Yá Ndiòxí ñá túú quide ndáá-gá sá dándòho ñaha-gá xii-yu na sàá nduu, te núu duca<sup>n</sup> na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. <sup>6</sup> Te vá dúcá<sup>n</sup> càni iní-yu, chi núu Yá Ndiòxí ñá túú quide ndáá-gá ñá, te vá cúu càda ndáá-gá nchaa cuèchi cue ñáyiú ñuyú-a te núu duca<sup>n</sup>.

<sup>7</sup> Te núu yúhú ná càni iní-í cáhá<sup>n</sup>-í ñí tnúhu ndehnde, te sá tnúhu-á<sup>n</sup> te caní tucu iní-í sá quidé càhnu-gá-í tnúhu ndáá tnúhu Yá Ndiòxí, te sá dúcá<sup>n</sup> ná càhá<sup>n</sup>-í te caní tucu iní-í sá vâ cúu càhá<sup>n</sup> Yá Ndiòxí sá ndécú cuèchi-í. <sup>8</sup> Te núu na càni tucu iní-í sá vâha-gá cada-í nchaa sá cuèhé sá dúhá cuèndá Yá Ndiòxí cada-gá sá vâha, dico ñá ndáá. Te ío ñáyiú càhá<sup>n</sup> cuèhé cuèndá-í te càchí-yu sá díú-ní dùca<sup>n</sup> dacuaha-í ñáyiú dico ñá ndáá sá dúcá<sup>n</sup> dānehé-í-yu, te ñáyiú-á<sup>n</sup> nacháhu-yu tnúhu càhá<sup>n</sup>-yu, chi duca<sup>n</sup> tàù-xi cunduu.

#### *Nchaa ñáyiú ñuyú-a ndècuèchi-yu*

<sup>9</sup> Te vitna càchí dava ñáyiú sá ío-gá cùnùu nchoo cue ñáyiú isràél dàcúúxí dāva-gá ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sá nchàa ñáyiú ndècuèchi-yu cuèi ñáyiú isràél te cuèi ñáyiú ñá túú cùu ñáyiú isràél. <sup>10</sup> Te núú tùtú Yá Ndiòxí càchí-xi:

Vá yõo ñí quide ndáá,

<sup>11</sup> te ni vá yõo ñí tēcú tnùní tnúhu vâha, te ni vá yõo ñí nānducu nihnu Yá Ndiòxí.

<sup>12</sup> Chi ncháá-yu ñá túú nchìcú<sup>n</sup> nihnú-yu ichi vâha, te ncháá-yu cùu-yu ñáyiú xíndecu neñùú sá cúu-xí Yá Ndiòxí.

Te ni ñá túú quidé-yu ñá sá vâha.

13 Te cada iní-ndó sã yúhũ-yu cùu-xi datná cúú ñá yaú núú yíndũxi ndíyí núú ïo ndehe sãhá<sup>n</sup>,

te duca<sup>n</sup> sãtnahá-xi cùu yuhú-yu, chi ío cãhá<sup>n</sup> cuèhé-yu, te mee-ni dândahú-yu nchaa tnàha ñáyíú-yu.

Te cada iní-ndó sã vènenú cóo yíhí yuhú-yu chi mee-ni cãhá<sup>n</sup> úhú-yu cuendá tnàha ñáyíú-yu.

14 Te ío iní-yu cãhá<sup>n</sup> úhú tnáhã-yu.

15 Te àú<sup>n</sup> nã cuu àú<sup>n</sup> nã xíã<sup>n</sup> xĩsahni tnàhá-yu.

16 Te nchaa núú xícá cùú-yu quide úhú iní-yu nchaa tnàha ñáyíú-yu nãcuáa ndíhú iní ñáyíú-á<sup>n</sup>.

17 Te ñá túú cùní-yu cundecu ndíhi tnàha váha-yu.

18 Te ñá túú sãni iní-yu canehé-yu sá yíñũhu núú Yã Ndiõxí.

Duha quidé-yu cãchí-xi núú tütú-gá.

19 Te cùtnuní iní-ó sã nchãa tnúhu ní chídó tnùní ndíi Moisés cúú-xí cuendá nchaa ñáyíú nchícú<sup>n</sup> nihnu nchaa tnúhu-á<sup>n</sup>. Te tnúhu-á<sup>n</sup> cúú-xí cuendá sã vã yóo tnàhí cachí sã ñà túú cuèchi-xi, te duca<sup>n</sup> te nchaandi túhú ñáyíú cutnùní iní-yu sã ná chãhu-yu nchaa sã quidé-yu núú Yã Ndiõxí.

20 Te duca<sup>n</sup> càda-xi chi ni ñá ñáyíú vá cãchí-ó sã vã cùndècu cuèchi-yu núú Yã Ndiõxí cuendá-ni sã nchícú<sup>n</sup> nihnú-yu nchaa tnúhu sã ní chídó tnùní ndíi Moisés, te tnúhu-á<sup>n</sup> cãchí tnúhu-xi cuendá-ni sã cùtnuní iní-ó sã ndécú-ó ìchi cuehé ichi duha.

*Te núu na quíndáa iní-ó Xítohó Jesucristú te naníhí tàhú-ó*

21 Te vitna ní cutnùní iní-ó sã ñà díú sã cáda-ó nchãa nacuáa ní cãhá<sup>n</sup> ndíi Moisés cudíu-o núú Yã Ndiõxí, chi mee-gã quidé cùdiu-o núú-gã. Te núú tütú ndíi Moisés ndíhi núú tütú cue téé ní xóo cãhá<sup>n</sup> tnúhu Yã Ndiõxí ndéé sanaha cãhá<sup>n</sup>-xi nãcuáa cada ñaha-gã xii-o vitna. 22 Te duca<sup>n</sup> cùdiu-o núú Yã Ndiõxí te núu na quíndáa iní-ó Xítohó Jesucristú. Te díu-ni duca<sup>n</sup> cùdiu nchaa ñáyíú ñuyíú te núu na quíndáa iní ñáhã-yu xii-gá, chi ñá-ni cùu-o nchaa-o sã cúú-xí Yã Ndiõxí.

23 Chi nchaa-yu ndècu cuèchi-yu, chi ñá ñá-yu quidé-yu nãcuáa cãhá<sup>n</sup> Yã Ndiõxí sã cúú-yu ñáyíú quide váha.

24 Dico Yã Ndiõxí ío váha iní-gá chi ní quide ñaha-gã xii-o ñá sã vâha, chi dícó-ni duca<sup>n</sup> ní quide-gá nãcuáa vá cùndècu-gá cuèchi-o núú-gã, chi Xítohó Jesucristú ní sati níñí-gã te ní xíhí-gá, te duca<sup>n</sup> ní yáha-gá cuendá sã vã cùndècu-gá cuèchi-o. 25 Te Yã Ndiõxí ní taxi ndecu-gá Xítohó Jesucristú núú ñáyíú ñuyíú-a, te ní xíhí-gá sã cuendá nchaa yícá cuèchi-yu, te duca<sup>n</sup> ní cuu cuendá sã nchãá ñáyíú na quíndáa iní ñáhã xii-gá te vá náchãhu-yu cuèchi-yu núú Yã Ndiõxí. Te Yã Ndiõxí ní quide ndee iní-gá nchaa sã cuèhé sã dúhá ní quide cue ñáyíú ní xíndecu ndéé sanaha. Te xíã<sup>n</sup> ní xíhí Xítohó Jesucristú cuendá cutnùní iní-ó sã Yã Ndiõxí cúú-gã Yã ío váha quide ndáa cuèi duca<sup>n</sup> ní quide ndee iní-gá nchaa sã ní quide cue ñáyíú-á<sup>n</sup>. 26 Núu xíã<sup>n</sup> vitna ní cutnùní ndisa iní-ó sã quidé ndáa-gá, te quide-gá sã cuè ñáyíú vá cùndècu-gá cuèchi-yu núú-gã, te núu na quíndáa iní-yu Xítohó Jesucristú.

27 Te vitna vá cãchí-ó sã ío cãhnu cuu-o cuendá sã ñà túú-gã cuèchi-o ndècu núú Yã Ndiõxí, te duca<sup>n</sup> ñà túú-gã cuèchi-o ndècu núú-gã cuendá sã sãndáa iní-ó Xítohó Jesucristú, te ñá díú sã cuendá nchaa tnúhu ní cãhá<sup>n</sup> ndíi Moisés. 28 Te cùtnuní iní-ó sã ndèda-ni cãa ñáyíú vá cùndècu-gá cuèchi-yu núú Yã Ndiõxí te núu na quíndáa iní-yu Xítohó Jesucristú cuèi ní quidé-yu nchaa nãcuáa ní cãhá<sup>n</sup> ndíi Moisés àdi ñá túú ní quidé-yu.

29 Te cùtnuní iní-ó sã Yã Ndiõxí cúú-gã Ndiõxí nchaandi túhú ñáyíú, te ñá díú mèe-ni Ndiõxí ñáyíú isràél cúú-gã. 30 Te ñá-díi díí-gã cúú-gã Ndiõxí, te nchaa ñáyíú sãndáa iní ñáhã xii Xítohó Jesucristú te vá cùndècu-gá cuèchi-yu núú Yã Ndiõxí cuèi cùú-yu ñáyíú isràél àdi ñá túú cúú-yu. 31 Te ñá díú sã sãndáa iní-ó Xítohó Jesucristú te cãchí-ó sã ñà túú nãndíhi nchaa tnúhu sã sãnú ìchi

ñaha xii-o nacuaa cada-o, te ñáhá chi sá dúhá sándáá iní-ó-gã te xiã<sup>n</sup> nchícú<sup>n</sup> nihnu-o quide-o nacuaa cãhá<sup>n</sup> tnúhu-á<sup>n</sup>.

## 4

### *Cuendá ndíi Àbrahám*

<sup>1</sup> Te vitna na cãchí tnúhu-í xii-ndo cuendá ndíi Àbrahám tée ní cuu ñaní tnáhá-ó ní xindecu ndéé sanaha. <sup>2</sup> Te ndíi-á<sup>n</sup> ñà túú ní xindecu cuéchi ndíi núú Yá Ndiöxí, dico ñá díú cuendá ñ<sup>n</sup> chiú<sup>n</sup> ní quide ndíi duca<sup>n</sup> ñà túú ní xindecu cuéchi ndíi núú-gã. Chi núu cuendá ñ<sup>n</sup> chiú<sup>n</sup> ní quide ndíi duca<sup>n</sup> ñà túú ní xindecu cuéchi ndíi núú Yá Ndiöxí ñá, te cada cãhnu ndíi mee ndíi ni cùu, dico ñá díú núú Yá Ndiöxí cada cãhnu ndíi mee ndíi te núu duca<sup>n</sup> ñ<sup>n</sup> quide ndíi. <sup>3</sup> Te chí dándacu iní nãcuáa cãhá<sup>n</sup>-xi núú tütú Yá Ndiöxí núú cãchí-xi: “Té Àbrahám ní sándáá iní-dé Yá Ndiöxí, te xiã<sup>n</sup> ní cachí-gá sá cúdiu-dé núú-gã”, duha cãchí-xi núú tütú-gã. <sup>4</sup> Te sá cùhú<sup>n</sup> yãhu ñ<sup>n</sup> tée quide chiú<sup>n</sup>, te vá cãchí-ó sã xiã<sup>n</sup> cúú-xí ñ<sup>n</sup> táhú sã cúú-xí-dé chi yãhu tnãhí-dé cúú-xí. <sup>5</sup> Te vá yõ ñ<sup>n</sup> ndacu cada ñ<sup>n</sup> chiú<sup>n</sup> nacuaa cudíu-xi núú Yá Ndiöxí. Te ñá túú ñà chiú<sup>n</sup> xini ñuhu-xi cada ñáyiú te cudíu-yu núú-gã, chi xini ñuhu-ni-xi sá quindáá-ni iní-yu-gã. Te diu-gã cãchí-gá sá ñáyiú ndècu ichi cuehé ichi duha vá cundècu-gã cuéchi-yu núú-gã, te núu na quindáá iní ñáhã-yu xii-gã. <sup>6</sup> Te diu-ni duca<sup>n</sup> ñ<sup>n</sup> cãhá<sup>n</sup> ndíi Dàvií, chi ní cachí ndíi sá ïo váha táhú nchaa ñáyiú ní cachí Yá Ndiöxí cudíu núú-gã, dico ñá díú cuendá ñ<sup>n</sup> chiú<sup>n</sup> quidé-yu cudíu-yu núú-gã. <sup>7</sup> Te duha ní cachí ndíi:

Váha táhú nchaa ñáyiú quide cahnu iní Yá Ndiöxí nchaa cuéchi-xi, te ñá túú-gã quidé cuendá-gã nchaa sá cuehé sá dúhá ñ<sup>n</sup> quidé-yu.

<sup>8</sup> Váha táhú-yu chi Yá Ndiöxí cãchí-gã sá ñà túú-gã cuéchi-yu.

Duha ní cachí ndíi Dàvií.

<sup>9</sup> Te ñá díú mèe-ni ñáyiú ngündecu seña ñ<sup>n</sup>-xi duca<sup>n</sup> váha táhú-yu, chi tnáhá ñáyiú ñá túú ngündecu seña

ñ<sup>n</sup>-xi duca<sup>n</sup> váha táhú-yu. Te sa naha-o sá Yá Ndiöxí ní cachí-gá sá cúdiu ndíi Àbrahám núú-gã cuendá sá ni sándáá iní ñáhá ndíi xii-gã. <sup>10</sup> Te cunaha-ndo sã ñhna-gã ní cachí Yá Ndiöxí sá cúdiu ndíi Àbrahám núú-gã te dãtnúni ngündecu seña ñ<sup>n</sup> ndíi.

<sup>11</sup> Te ní ngündecu seña ñ<sup>n</sup> ndíi cuendá xiã<sup>n</sup> cuu-xi ñ<sup>n</sup> seña sá cúdiu ndíi núú Yá Ndiöxí. Te ndéé cútnáhá vátá ngündecu-gã seña ñ<sup>n</sup> ndíi, te sa cúdiu ndíi núú-gã chi ní sándáá iní ñáhá ndíi xii-gã. Te sá dúcá<sup>n</sup> ñà túú ndècu seña ñ<sup>n</sup> ndíi cútnáhá ní sándáá iní ndíi Yá Ndiöxí xiã<sup>n</sup> ní cuu ndíi dàtná ñ<sup>n</sup> díhí dütú nchaa ñáyiú sándáá iní ñáhá xii-gã, ñáyiú ñá túú ní ngündecu seña ñ<sup>n</sup>-xi, te cudíu-yu núú-gã. <sup>12</sup> Te ndíi Àbrahám ní cuu tucu ndíi dàtná ñ<sup>n</sup> díhí dütú nchaa ñáyiú ní ngündecu seña ñ<sup>n</sup>-xi, dico ñá díú cuendá-ni sá ñ<sup>n</sup> ngündecu seña ñ<sup>n</sup>-yu cùu ndíi díhí dütú-yu, chi cuendá sá sándáá iní-yu Yá Ndiöxí nchícú<sup>n</sup> nihnú-yu nacuaa ní quide ndíi ní sándáá iní ñáhá ndíi xii-gã ndéé cútnáhá vátá ngündecu-gã seña ñ<sup>n</sup> ndíi.

### *Yá Ndiöxí cada-gã nchaa nãcuáa ní cachí-gã te núu na quindáá iní-ó-gã*

<sup>13</sup> Te Yá Ndiöxí ní xáha<sup>n</sup>-gã xii ndíi Àbrahám sá ndúú táhú ndíi cunuu ndíi ñuyíú, ndíhi cue déhe ndíi, ndíhi nchaa dava-gã cue ñaní tnáhá ndíi vitna cacu túu. Te duca<sup>n</sup> ñ<sup>n</sup> xáha<sup>n</sup> Yá Ndiöxí xii ndíi ndíhi cue ñaní tnáhá ndíi, chi ní sándáá iní ñáhá ndíi xii-gã núu xiã<sup>n</sup> ní cudíu ndíi núú-gã. Te duca<sup>n</sup> ñ<sup>n</sup> xáha<sup>n</sup>-gã xii ndíi dico ñá díú cuendá sá ñ<sup>n</sup> quide ndíi nãcuáa ní xáha<sup>n</sup> Yá Ndiöxí xii ndíi Moisés cada ñáyiú ndéé cuéé-gã. <sup>14</sup> Te núu mee-ni ñáyiú nchícú<sup>n</sup> nihnu quide nacuaa ní cãhá<sup>n</sup> ndíi Moisés ní ndúu táhú-yu cunúu-yu ñuyíú-a ni cùu ña, te ñá túú xini ñuhu-xi quindáá iní-ó Yá Ndiöxí, te ñá túú nãndíhi tnúhu ní xáha<sup>n</sup> Yá Ndiöxí xii ndíi Àbrahám ní cùu te núu duca<sup>n</sup>. <sup>15</sup> Te núu ñ<sup>n</sup> ñáyiú ñá túú quide nacuaa cãhá<sup>n</sup> tnúhu sá sánú ichi ñaha xii-o nacuaa cada-o te nacháhu-yu sá dúcá<sup>n</sup> quidé-yu. Te núu ñá túú

tnũhu sá sánú ìchi ñaha-xi xii-o nacuáa cada-o ni cùu ña, te ñá túú cuèchi-o ni cùu.

16 Te duca<sup>n</sup> ñi xáha<sup>n</sup> Yă Ndiöxí xii ndíi Àbrahám nàcuáa cada-gá, chi cuendá sá ni sàndáá iní ñáhá ndíi xii-gá. Te duca<sup>n</sup> ñi quide-gá chi ío váha iní-gá, dico ñá díú sã ñi<sup>n</sup> chiu<sup>n</sup> ni quide ndíi duca<sup>n</sup> ñi xáha<sup>n</sup>-gã. Te sá dúcá<sup>n</sup> ñi cuu te cùu-xi ñi<sup>n</sup> tnũhu ndáá sá cúú-xí nchaa ñani tnáhá ndíi, ñáyiú sàndáá iní ñáhá xii-gá dàtná ní sàndáá iní ñáhá mèe ndíi xii-gá, te ñá díú mèe-ni cuendá nchaa ñani tnáhá ndíi nchícú<sup>n</sup> nihnu nchaa nàcuáa ní cáhá<sup>n</sup> ndíi Moisés, chi ndíi Àbrahám-á<sup>n</sup> ñi cuu ndíi dàtná ñi<sup>n</sup> díhí dütú cue ñáyiú sàndáá iní ñáhá xii Yă Ndiöxí. 17 Te núú tütú Yă Ndiöxí cáhá<sup>n</sup>-xi nàcuáa ní xáha<sup>n</sup>-gã xii ndíi, te duha ní xáha<sup>n</sup>-gã: “Yòhó té Àbrahám ní quide ñaha-ï xii-n dàtná ñi<sup>n</sup> díhí dütú cue ñáyiú xĩndecu nihíi ñuyíú.” Duha ní xáha<sup>n</sup> Yă Ndiöxí xii ndíi, cächí-xi núú tütú-gá. Te Yă Ndiöxí náhá ndáá-gá sá cádá-xí nàcuáa ní xáha<sup>n</sup>-gã xii ndíi Àbrahám, te ñi-gá cúú Yá ní sàndáá iní ndíi, te ñi-gá dándòto-gá ñáyiú ní xihí, te ñi-gá quidé tá ngũndecu nchaa sá vátá cùndècu-gá ñuyíú-a.

18 Te Yă Ndiöxí ní xáha<sup>n</sup>-gã xii ndíi Àbrahám sá ío cuéhé dèhe ndíi coo, te ío ní sàndáá iní ndíi nàcuáa ní xáha<sup>n</sup>-gã dico ñá túú ní cùtnuní iní ndíi nása cada-gá, chi ío ní sahnu ndíi. Te cuendá sá dúcá<sup>n</sup> ío ní sàndáá iní ndíi tnũhu ní xáha<sup>n</sup>-gã núu xiã<sup>n</sup> ní cuu ndíi díhí dütú vai ñáyiú xĩndecu nihíi ñuyíú. 19 Te ndíi Àbrahám ñũhu ndíi ñi<sup>n</sup> cièndú cuíá cùtnáhá duca<sup>n</sup> ñi xáha<sup>n</sup> Yă Ndiöxí xii ndíi, te ní cutnùní iní ndíi sá ñà túú tãhú ndíi sá cóó dèhe ndíi ndíi ñadíhí ndíi ndíi Sără, chi ndíi ndúú-yu sa ní sahnu vèhí-yu, te cuèi duca<sup>n</sup> dico ní sàndáá-ni iní ndíi nàcuáa ní xáha<sup>n</sup> Yă Ndiöxí. 20 Te ñá túú ní sãni ñi<sup>n</sup> sãni úú iní ndíi nàcuáa ní xáha<sup>n</sup> Yă Ndiöxí cada-gá sá cúú-xí ndíi, chi da uu<sup>n</sup>-gá váha ní sàndáá iní ndíi nàcuáa ní xáha<sup>n</sup>-gã, te ní cachí ndíi sá ío càhnu cuu-gá. 21 Te ní cutnùní ndáá iní ndíi sá Yă Ndiöxí ndácú-gã quidé-gã nchaa sá cáhá<sup>n</sup>-gã. 22 Te sá ni sàndáá iní ndíi

nàcuáa ní cáhá<sup>n</sup> Yă Ndiöxí, núu xiã<sup>n</sup> ní cachí-gá sá cúú ndíi ñi<sup>n</sup> téé ñá túú cuèchi-xi núú-gã.

23 Te ní ngódó tnùní núú tütú Yă Ndiöxí cuendá ndíi Àbrahám sá ñi cachí-gá sá ñà túú cuèchi ndíi núú-gã, te ñá díú-ni cuendá mèe ndíi ni ngödó tnùní núú tütú-gá. 24 Chi tnáhá cuendá-ó nchaa-o ní ngódó tnùní núú tütú-gá. Te cächí-gá sá ñà túú cuèchi-o núú-gã chi sàndáá iní-ó-gã, te ñi-gá cúú-gã Yá ní dándótó ñaha xii Xitohó Jesucristú Yá cúú Xitohó-ó. 25 Te Yă Ndiöxí ní cachí-gá sá díú Xitohó Jesucristú cuú-gá cuendá nacháhu-gá nchaa cuèchi-o. Te ní xihí-gá te ní ndoto-gá cuendá nchaa-o vã cùndècu-gá cuèchi-o núú Yă Ndiöxí te núu na quèndáá iní-ó-gã.

## 5

*Ío váha tnáhá ñáyiú cächí Yă Ndiöxí sá ñà túú cuèchi-xi*

1 Te vitna, ñá túú-gã cuèchi-o ndècu núú Yă Ndiöxí chi sàndáá iní-ó Xitohó Jesucristú, te ío váha ndècu ndíi-o Yă Ndiöxí vitna sá cuendá Xitohó Jesucristú. 2 Te cuendá sá ni sàndáá iní-ó Xitohó Jesucristú xiã<sup>n</sup> ñi-gá ní quide ní ngũndecu váha-o núú Yă Ndiöxí, te duca<sup>n</sup>-ni cùndecu-o, te ío cùdíi iní-ó chi ndècu ndíi-o tnũhu ndee iní sá sáa nduu ngũndecu-o núú ío váha càa ndecu Yă Ndiöxí. 3 Te ñá díú-ni sã cuendá sá ndúú tãhú-ó cùndecu-o núú ndécú-gã cúdíi iní-ó, chi cùdíi iní-ó ndòho-o cuendá-gá, chi cùtnuní iní-ó sã núu na ndòho-o cuendá-gá te cunduu càhnu-gá iní-ó, 4 te núu cùu-o ñáyiú ta quide cahnu-gá iní-xi te cùtnuní sá cúú-ó ñáyiú quide váha, te núu cùu-o ñáyiú quide váha te uu<sup>n</sup>-gá tá ngũndecu ndíi-o tnũhu ndee iní cuáhá<sup>n</sup> sá cádá váha ñaha Yă Ndiöxí xii-o. 5 Te núu duca<sup>n</sup> te vá ñi<sup>n</sup> ndúu ndixi cuèchi iní-ó sã ndécú ndíi-o tnũhu ndee iní ngũndecu váha-o. Te Espíritú sá ñi taxi Yă Ndiöxí ndécú ndíi-o xiã<sup>n</sup> quidé-xi cùtnuní iní-ó sã ío cùu iní ñáhá Yă Ndiöxí xii-o.



<sup>6</sup> Te nchoo ñà túú vèdana ná ní ndàcu-o cada-o cuendá dácácu ni-hnu-o mée-o, dico Xítoho Jesucristú ní xihí-gá cuendá-ó, ndihi cuendá nchaa dava-gá ñáiyu ñà túú tnàhá tnúhu ndihi Yá Ndiöxí, te ní xihí-gá mei ndùu taú-xi cuú-gá. <sup>7</sup> Te cudana-ni núu xihí ì<sup>n</sup> ñáiyu sá cuendá ì<sup>n</sup> ñáiyu quide ndáá, te áma xihí tucu ì<sup>n</sup>-yu sá cuendá ñáiyu quide váha tnàhá ñáiyu-xi. <sup>8</sup> Te Yá Ndiöxí ní quide-gá sá nchóó cùtnuní iní-ó sã ïo cùu iní ñáhá-gã xii-o, chi cùtnàhá ndécú-ó ìchi cuehé ìchi duha te ní tendaha-gã Xítoho Jesucristú ní quixi-gá ñuyíú-a ní xihí-gá cuendá-ó. <sup>9</sup> Te sá cuendá sá ñí xihí Xítoho Jesucristú xiã<sup>n</sup> ñà túú-gã cuéchi-o ndècu núú Yá Ndiöxí, te vitna ní cutnùní ndáá iní-ó sã vã dáquihí<sup>n</sup> ñáhá-gã Yá Ndiöxí xii-o nùú ùhú núu ndàhú sá cuendá Xítoho Jesucristú. <sup>10</sup> Te cùtnàhá ñà túú tnàhá tnúhu-o ndihi Yá Ndiöxí ní cùu ní xihí Xítoho Jesucristú Yaá cúú Dèhe-gá cuendá cuu váha iní ñáhá-gã xii-o, te duca<sup>n</sup> te nduu táhú-ó cùndecu-o ndihi-gá ni caa ni quíhí<sup>n</sup> cuendá sá ñí ndoto Xítoho Jesucristú. <sup>11</sup> Te ndètu-o sáá nduu ngùndecu-o ndihi-gá ni caa ni quíhí<sup>n</sup>, te ñà díú-ní xiã<sup>n</sup> quidé-ó chi tnàhá cùdí iní-ó Yá Ndiöxí, chi Xítoho Jesucristú ní quide-gá duca<sup>n</sup> cùdí iní-ó-gã, te diu-ni Xítoho Jesucristú ní quide-gá ní nucùndecu váha-o ndihi Yá Ndiöxí.

*Nàcuáa ní quide ndíi Adán ndihi nàcuáa ní quide Xítoho Jesucristú*

<sup>12</sup> Te ndíi Adán ñà túú ní quide ndáá ndíi núú Yá Ndiöxí nùu xiã<sup>n</sup> ní ngùndecu nchaa sá cuehé sá dúhá ñuyíú-a, te sá cuendá nchaa sá cuehé sá dúhá quide ñáiyu xiã<sup>n</sup> xihí-yu, te nchaá-yu xihí-yu chi nchaá-yu quidé-yu nchaa sá cuehé sá dúhá. <sup>13</sup> Te sa quide-gá-yu nchaa sá cuehé sá dúhá te dàtnùní ní ngùndecu nchaa tnúhu sá ñí chidó tnùní ndíi Moisés nàcuáa ní xáha<sup>n</sup> Yá Ndiöxí cada ñáiyu, te nchoo cùtnuní iní-ó sã nùu ñà túú tnúhu sá sánú ìchi ñaha xii-o nàcuáa cada-o, te ñà túú cuéchi-o sànuu. <sup>14</sup> Te ndéé cùtnàhá ní xíndecu ndíi Adán

ní quesaha-xi xihí ñáiyu, te duca<sup>n</sup>-ni xihí-yu ndéé ní sáá nduu ñí xíndecu ndíi Moisés. Te duca<sup>n</sup> ñí xihí-yu chi ní quidé-yu nchaa sá cuehé sá dúhá cuéi ñà túú ní quidé-yu nàcuáa ní quide ndíi Adán, chi ndíi-á<sup>n</sup> ñà túú ní sàndáá iní ndíi nàcuáa ní xáha<sup>n</sup> Yá Ndiöxí cada ndíi. Te ndíi Adán ní cuu ndíi ì<sup>n</sup> téé cùu cahnu ní xíndecu ñuyíú-a, te sátá dúcá<sup>n</sup> te ní quixi Xítoho Jesucristú te Yaá-á<sup>n</sup> ïo-gá cahnu cuu-gá.

<sup>15</sup> Te sá ñí quide ndíi Adán te vá cächí-ó sã ì<sup>n</sup>-ní cùu-xi ndihi sá ñí cachí Yá Ndiöxí nduu táhú-ó vitna. Te sá ñà túú ní quide ndáá ndíi xiã<sup>n</sup> nchaa ñáiyu xihí-yu, dico Yá Ndiöxí ío váha iní-gá chi ío váha ní quide-gá sá cúú-xí nchaa nchoo ñáiyu ndècu ñuyíú-a, chi dicó duca<sup>n</sup> ñí cachí-gá sá nánihí tàhú-ó, te ì<sup>n</sup>díi-ni téé tnàhá-dé ío váha ní quide-dé sá cúú-xí-ó, te téé-á<sup>n</sup> cúú-dé Xítoho Jesucristú. <sup>16</sup> Te sá ñí quide ì<sup>n</sup>díi-ni ndíi Adán ñà túú ì<sup>n</sup>-ni cuu-xi ndihi sá ñí quide Yá Ndiöxí sá cúú-xí-ó, chi ndíi-á<sup>n</sup> ñà túú ní quide ndáá ndíi núú-gã. Te sá dúcá<sup>n</sup> ñí quide ndíi te xiã<sup>n</sup> ní cuu-xi cuéchi díhna nuu ñí quide ndíi, núu xiã<sup>n</sup> ní cachí Yá Ndiöxí sá cue ñáiyu quíhí<sup>n</sup>-yu núú ùhú núu ndàhú nacháhu-yu nchaa sá cuehé sá dúhá quidé-yu. Dico mee-gã ní quide sá cue ñáiyu naníhí tàhú-yu dicó-ni duca<sup>n</sup>, te duca<sup>n</sup> te vá cùndècu-gá cuéchi-yu núú-gã cuéi ío vai cuéchi-yu. <sup>17</sup> Te sá dúcá<sup>n</sup> ñà túú ní quide ndáá ì<sup>n</sup>díi-ni ndíi Adán-á<sup>n</sup> nùú Yá Ndiöxí, xiã<sup>n</sup> ní quide-xi xihí nchaa ñáiyu. Te sá cuendá sá ñí quide ì<sup>n</sup>díi-ni Xítoho Jesucristú xiã<sup>n</sup> ío váha ní quide ñaha Yá Ndiöxí xii ñáiyu, chi dicó-ni duca<sup>n</sup> ñí nduu táhú-yu cùdíú-yu núú-gã. Te nchaa ñáiyu duca<sup>n</sup> cùdíú núú-gã nduu táhú-yu cunúú-yu ndihi Xítoho Jesucristú cuendá sá ñí quide-gá sá váha sá cúú-xí-yu.

<sup>18</sup> Te sá dúcá<sup>n</sup> ñí quide ndíi Adán ñà túú ní quide ndíi nàcuáa ní xáha<sup>n</sup> Yá Ndiöxí xii ndíi ì<sup>n</sup> xito, núu xiã<sup>n</sup> ní cachí-gá sá ncháá ñáiyu

tàú-yu nacháhu-yu nchaa cuéchi-yu, dico Xítohó Jesucristú ní quide-gá ì<sup>n</sup> sá vâha cuendá nchaa ñáyiú vá cùndècu-gá cuéchi-yu núú Yă Ndiöxí te núu na quíndáá iní ñáhă-yu xii-gá, te duca<sup>n</sup> te cundecú-yu ndihî-gá ni caa ni quíhî<sup>n</sup>. 19 Te sá ñà túú ní sàndáá iní ì<sup>n</sup>dii-ni ndíi Àdán nàcuáa ní xáha<sup>n</sup> Yă Ndiöxí xii ndíi, xíă<sup>n</sup> ní nguínchicú<sup>n</sup> nihnu nchaa ñáyiú quidè-yu nchaa sá cuèhé sá dúhá. Te duca<sup>n</sup> ì<sup>n</sup>dii-ni Xítohó Jesucristú ní quide-gá nàcuáa ní xáha<sup>n</sup> Yă Ndiöxí cuendá sá Yă Ndiöxí cachî-gá sá cúú-yu núú-gă.

20 Te Yă Ndiöxí ní xáha<sup>n</sup>-gă xii ndíi Moisés nàcuáa cada ñáyiú, te sá cuendá tnúhu-á<sup>n</sup> uu<sup>n</sup>-gá ní nguíta nchaa ñáyiú quidè-yu nchaa sá cuèhé sá dúhá, te Yă Ndiöxí uu<sup>n</sup>-gá cùndàhú iní ñáhă-gă xii-yu tucu. 21 Te sá cuendá nchaa cuéchi ñáyiú xíă<sup>n</sup> xihî-yu, dico Yă Ndiöxí ío váha iní-gá chi ðiu-gá ní cachî-gá sá ncháá ñáyiú na tnàhá tnúhu ndihî ñaha xì-gá cudú-yu núú-gă, te cundecú-yu ndihî-gá ni caa ni quíhî<sup>n</sup>, te duca<sup>n</sup> chi Xítohó Jesucristú ní quide-gá sá vâha sá cúú-xî-yu.

## 6

*Ñáyiú ñà túú-gă ndécú ìchi cuehé ìchi duha ndècú-yu cuendá Xítohó Jesucristú*

1 Te sá dúcá<sup>n</sup> quide Yă Ndiöxí, te vá cání ìní-ó cànchicú<sup>n</sup> nihnu-ni-o ìchi cuehé ìchi duha, chi ñà díú sá cànchicú<sup>n</sup> nihnu-o ìchi-á<sup>n</sup> te ngóo càni ìní-ó sá ío-gá cundàhú iní ñáhă-gă xii-o. 2 Te vá cúú cànchicú<sup>n</sup> nihnu-o ìchi cuehé ìchi duha, chi nchoo cùu-o datná cue ñáyiú sa ní xihî, núu xíă<sup>n</sup> vá cúú-gă canchicú<sup>n</sup> nihnu-o ìchi-á<sup>n</sup>. 3 Te sa nàha-o sá cuendá sá ñí sandute-o quèe-xi sá tnàhá tnúhu-o ndihî Xítohó Jesucristú. Te sá ñí sandute-o quèe tucu-xi sá cúú-ó datná ñáyiú ní xihî ndihî-gá. 4 Te ñà díú-ní sá ñí xihî-ó ndihî-gá chi quèe tucu-xi sá ñí nguíndüxi-o ndihî-gá te ní ndoto-o datná ní ndoto mee-gă ní dándótó ñaha Dútú Ndiöxí Yáá ío

càhnu cuu, te duca<sup>n</sup> ñí cuu cuendá sá vâ cùndècu-gá-ó datná ní xíndecu-o.

5 Te núu ì<sup>n</sup>-ni cùu-o ndihî Xítohó Jesucristú cuendá sá cúú-ó datná ñáyiú ní xihî ndihî-gá, te ndáá sá cúú-ó datná ñáyiú ní ndoto ní nguíndecu váha datná ní ndoto mee-gă ní nucúndecu váha-gá. 6 Te nchoo nàha-o sá cúú-ó ñáyiú ío ndècu cuéchi-xi ni cùu, dico sátá ñí cuu-o datná ñáyiú ní xihî datná ní xihî Xítohó Jesucristú núú cùrúxí, te ndéé dàvá-á<sup>n</sup> ní dáñă-ó ncháa ìchi cuehé ìchi duha ndècu-o ni cuu, te ñà túú-gă cùnùu sá cuèhé sá dúhá ìní-ó. 7 Chi nchaa ñáyiú ní xihî ñà túú-gă ndécú-yu ìchi cuehé ìchi duha.

8 Te núu cùu-o datná ñáyiú ní xihî datná ní xihî Xítohó Jesucristú ñà, te cùtnuní ndáá ìní-ó sá cùndècu-o ndihî-gá ni caa ni quíhî<sup>n</sup>. 9 Te sa nàha-o sá Xítohó Jesucristú ní xihî-gá te ní ndoto-gá te vá ì<sup>n</sup> ndùu ì<sup>n</sup> quíú-gă te cuú-gá, chi ñà túú ñăgá sá cádá cúú-gá. 10 Te Xítohó Jesucristú ní xihî-gá ì<sup>n</sup> xito-ni sá cuendá nchaa cuéchi nchoo ñáyiú ñuyíú, te vá ì<sup>n</sup> ndùu-gá cuú-gá, te ndècu-ni-gá sá cúú-xí Yă Ndiöxí. 11 Núu xíă<sup>n</sup> nchòhó cada ìní-ndó sá datná sá ñí xihî-ndó vâ cùndècu-gá-ndó sá cúú-xí ìchi cuehé ìchi duha, chi ndècu-ná-ndó sá cúú-xí Yă Ndiöxí, chi ní tnàhá tnúhu-ndo ndihî Xítohó Jesucristú Yáá cúú Xítohó-ó.

12 Te núu xíă<sup>n</sup> vá dáñă-gă-ndó cùnùu ni ì<sup>n</sup> sá cuèhé sá dúhá ìní-ndó cuendá sá vâ cádá-gă-ndó ni ì<sup>n</sup> sá cuèhé sá dúhá sàni ìní-ndó. 13 Te vá dáñă-ndó tàxi tnuní ñáhă ni ì<sup>n</sup> sá cuèhé sá dúhá-á<sup>n</sup> xii-ndo cuendá sá vâ cádá-gă-ndó, te chí dáñă ná tàxi tnuní ñáhă Yă Ndiöxí xii-ndo, te chí dáñă ná chîndee ñaha-gá cada-ndo mèe-ni sá vâha, te duca<sup>n</sup> te cada ìní-ndó sá cúú-ndó datná ñáyiú ní xihî te ní ndoto ndècu. 14 Te duca<sup>n</sup> càda-ndo chi vá ndácú-gă ni ì<sup>n</sup> sá cuèhé sá dúhá tàxi tnuní ñáhă-xí xì-ndo, chi Yă Ndiöxí cùndàhú iní ñáhă-gă chîndèe ñaha-gá xii-ndo. Te duca<sup>n</sup> chi ñà túú-gă cùnùu nchaa tnúhu sá ñí chídó tnuní ndíi Moisés cada ñáyiú.

### *Ñáiyu nchicú<sup>n</sup> nihnu sá vǎha*

15 Te ñá díú sǎ cúnđáhu iní ñáhá Yǎ Ndiǒxí xii-o chindee ñaha-gá ndihi sá ñá túú-gǎ cúnúu nchaa tnúhu ní chídó tnùní ndíi Moisés, te cachí-ó sǎ cúú-ní cúnđecu-o ichi cuehé ichi duha. 16 Te nchoo xini-ó sǎ núu na cuǎha-o tnúhu cunu cuechi-o núú ñáiyu cuini cunu cuechi-o núú-xi, te cùu-ná-ó ñáiyu xinu cuechi núú-yu te quide-o nchaa chiu<sup>n</sup> tahú-yu. Te duca<sup>n</sup> sǎtnahá-xi cùu nchaa ñáiyu quide nchaa sǎ cuèhé sǎ dúhá chi tàxi tnuní ñáhá-nǎ-xi xii-yu, te diu nchaa xiǎ<sup>n</sup> dácuíta nihnu ñaha-xi xii-yu, te diu-ni duca<sup>n</sup> sǎtnahá-xi cùu nchaa ñáiyu sǎndáá iní ñáhá xii Yǎ Ndiǒxí chi tàxi tnuní ñáhá-gǎ xii-yu, te quide-yu nchaa sǎ vǎha nǎcuáa cuini méé-gǎ cada-yu. 17 Te nchòhó duca<sup>n</sup> nǐ xóo cada-ndo nchaa sǎ cuèhé sǎ dúhá ní cùu, dico táxǎhu xii Yǎ Ndiǒxí chi vitna ni yùhu ni iní-ndó quide-ndo nchaa nǎcuáa cǎhá<sup>n</sup> tnúhu-gǎ sǎ nǐ ngúnđecu ndihi-ndo. 18 Te vitna ñá túú-gǎ táxi tnùní ñáhá ni ñá sǎ cuèhé sǎ dúhá xii-ndo, te quide-ná-ndó nchaa sǎ vǎha tàuchiu<sup>n</sup> Yǎ Ndiǒxí cada-ndo. 19 Te duha cǎhá<sup>n</sup>-í cuendá cue ñáiyu xinu cuechi cuendá sǎ nchòhó tecú tnùní-ndó nǎcuáa ndùu tnúhu cǎhá<sup>n</sup>-í. Te nchòhó ní dáñá-ndó nǐ taxi tnùní ñáhá nchaa sǎ cuèhé sǎ dúhá xii-ndo, te ñá túú ní quide-ndo nǎcuáa ní cǎhá<sup>n</sup> Yǎ Ndiǒxí cada-ndo chi da vǐhi-gǎ ní quide-ndo, te diu-ni duca<sup>n</sup> chí dáñá ná tàxi tnuní ñáhá Yǎ Ndiǒxí xii-ndo vitna cuendá cada-ndo mee-ni sǎ vǎha nǎcuáa cuini méé-gǎ cada-ndo, te duca<sup>n</sup> te cuu-ndo ñáiyu quide ndáá cundecu núú-gǎ.

20 Te nchoo cǔtnáhá ní xóo cada-ndo nchaa sǎ cuèhé sǎ dúhá ñá túú ní xóo cada-o ni ñá sǎ vǎha cuini Yǎ Ndiǒxí cada-o. 21 Te dicó sǎcǎ<sup>n</sup>núú sǎñaha nchaa sǎ cuèhé sǎ dúhá-ǎ<sup>n</sup> te núu na cǎda-o, te ni ñá sǎ vǎha vá nihí-ó te núu na cǎda-o nchaa xiǎ<sup>n</sup>, te diu nchaa xiǎ<sup>n</sup> dácuíta nihnu ñaha-xi xii-o. 22 Te vitna ñá túú-gǎ cúú-ó ñáiyu ndècu ichi cuehé ichi duha, chi cùu-ná-ó ñáiyu quide nchaa nǎcuáa cǎhá<sup>n</sup> Yǎ Ndiǒxí. Te sǎ dúhá quide-o cuu ndisa-xi ñá sǎ vǎha sǎ cúú-xi-ó, te cùu-o ñáiyu quide ndáá ndécú-ó núú-gǎ vitna, te

sǎá nduu cúnđecu-o ndihi-gǎ ni caa ni quíhí<sup>n</sup>. 23 Te nchaa sǎ cuèhé sǎ dúhá dicó dácuíta nihnu ñaha-xi xii-o, dico Yǎ Ndiǒxí ní quide-gǎ sǎ dicó-ni duca<sup>n</sup> ndùu táhú-ó cúnđecu-o ndihi-gǎ ni caa ni quíhí<sup>n</sup>, chi ní tnahá tnúhu-o ndihi Xítóhó Jesucristú Yaá cúú Xítóhó-ó.

## 7

### *Cuendá ñáiyu tnǎndaha*

1 Te nchaa nchòhó ñáiyu ndècu ndihi-í ichi Xítóhó Jesucristú sa naha-ndo nǎcuáa cǎhá<sup>n</sup> tnúhu sǎ dánèhé ñáhá xii-o nǎcuáa cada-o cúnđecu-o, chi tnúhu-ǎ<sup>n</sup> cǎhá<sup>n</sup>-xi dóho nchaa ñáiyu xindecu vǐvú ñuyú-a. 2 Te nchaa ñáiyu dǐhí sa ndècu yǐi-xi, te diu tnúhu-ǎ<sup>n</sup> dánèhé ñáhá-xi xii-yu sǎ vǎ dáñá-yu yǐi-yu, dico núu na cúú yǐi-yu te ñá túú-gǎ ná cǎhá<sup>n</sup> tnúhu-ǎ<sup>n</sup> cuendá-yu. 3 Dico núu vátá cùu-gǎ yǐi-yu te ñá túú ndùu váha-xi naquehé<sup>n</sup>-yu ingá téé, dico núu na cúú yǐi-yu te quendóo mee-yu, te ñá túú nǎgǎ cǎhá<sup>n</sup> tnúhu sǎ dánèhé ñáhá xii-yu nǎcuáa cada-yu te duca<sup>n</sup> te cuu naquehé<sup>n</sup>-yu ingá téé, te ñá túú cùu-xi ñá cuéchi.

4 Te nchòhó cue ñáiyu ndècu ndihi-í ichi Xítóhó Jesucristú cúú-ndó dàtná ñáiyu ní xíhí dàtná ní xíhí-gǎ. Te xiǎ<sup>n</sup> ñá túú-gǎ táxi tnùní ñáhá nchaa tnúhu ní chídó tnùní ndíi Moisés xii-ndo. Te duca<sup>n</sup> nǐ cuu cuendá nchòhó ngúnđecu-ndo ndihi Xítóhó Jesucristú Yaá ní xíhí ní cùu te ní ndoto-gǎ. Te duca<sup>n</sup> nǐ cuu cuendá nchaa nchoo ñáiyu ndècu ichi-gǎ cada-o nchaa nǎcuáa cǎhá<sup>n</sup> Yǎ Ndiǒxí. 5 Te nchoo nǐ xindecu-o ichi cuehé ichi duha, te tnúhu sǎ sǎnú ichi ñaha xii-o nǎcuáa cada-o cúnđecu-o cachí-xi sǎ ñá túú vǎha cundecu-o ichi-ǎ<sup>n</sup>, te nchoo dà uu<sup>n</sup>-gǎ ní quide-o nchaa sǎ cuèhé sǎ dúhá sǎ dúcǎ<sup>n</sup> cǎhá<sup>n</sup> tnúhu-ǎ<sup>n</sup>, te sǎ dúcǎ<sup>n</sup> nǐ quide-o te ta xǐta nihnu-o cuǎhá<sup>n</sup> ní cùu. 6 Te vitna cada iní-ó sǎ cúú-ó dàtná ñáiyu ní xíhí sǎ cúú-xi tnúhu sǎ dánèhé ñáhá xii-o nǎcuáa cada-o cúnđecu-o, chi ñá túú-gǎ cúnúu-xi, te vitna mee-nǎ Espíritú Yǎ Ndiǒxí chindee ñaha-xi



xii-o xinu cuechi-o núú-gă, te ñá díú cuendá nchaa tnúhu sá ñí ngúndéé ndéé díhna cada ñáyiú xínu cuechi-o núú-gă vitna.

*Nchaa sá cuèhé sá dúhá ñùhu iní-í*

<sup>7</sup> Te cuèi duha càhá<sup>n</sup>-í dico vá cúú tnàhí càhá<sup>n</sup>-ó sã tnúhu sá sánú ichi ñaha xii-o nacuáa cada-o cùndecu-o ñá díú tnúhu váha cùu-xi. Te yúhú ñá túú cùtnuní iní-í ná cúú nchàa sá cuèhé sá dúhá ní cùu te núu ñá túú tnúhu-á<sup>n</sup> ní càhí tnúhu-xi xii-í, te ni ñà túú cùtnuní tucu iní-í núu váha àdi ñá túú váha sá nchídó ìní-í sá ndécú ndìhí tnahá ñáyiú-o ní cùu te núu ñá túú tnúhu-á<sup>n</sup> ní càhí-xi sá vã cúú cùu iní-í sá ndécú ndìhí-yu. <sup>8</sup> Te tnúhu-á<sup>n</sup> ñí dánèhé ñáhá-xí xii-í sá vã cúú càda-í ní ñí sá cuèhé sá dúhá, dico sá cuendá tnúhu-á<sup>n</sup> uu<sup>n</sup>-gá duca<sup>n</sup> ñí sani iní-í ní quide-í. Te núu ñá túú tnúhu sá sánú ichi ñaha xii-o nacuáa cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. <sup>9</sup> Te cútnàhá vátá ñhí-gá-í tnúhu-á<sup>n</sup> te ñá túú tnàhí ná sání ìní-í ndécù-í ní cùu, dico sá tá ní ñhí-í tnúhu-á<sup>n</sup> te ní cutnùní iní-í sá ndécú cuèchi-í, te ta xíta nihnu-í cuáhá<sup>n</sup> ní cùu. <sup>10</sup> Te núu ní quide-í nchaa nacuáa càhá<sup>n</sup> tnúhu-á<sup>n</sup> te sa ndéé ama-gá naníhí tàhú-í ní cùu, dico ñá túú ní quide-í núu ní cutnùní iní-í sá tá xíta nihnu-í cuáhá<sup>n</sup> ní cùu. <sup>11</sup> Te sá xíí tnúhu-á<sup>n</sup> xiá<sup>n</sup> uu<sup>n</sup>-gá ní cunuu nchàa sá cuèhé sá dúhá ñí dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáhá<sup>n</sup> ní cùu.

<sup>12</sup> Te tnúhu sá sánú ichi ñaha xii-o nacuáa cada-o cùndecu-o cuu-xi tnúhu ío yíñùhu ní taxi Yá Ndiòxí, te ñí ñí tnúhu-á<sup>n</sup> cúú-xí mèe-ni tnúhu váha, te ni ñí tnúhu cuèhé tnúhu duha ñá túú ñùhu tnahá. <sup>13</sup> Te vá cúú càhí-í sá tnúhu váha-á<sup>n</sup> ñí quide-xi ta xíta nihnu-í cuáhá<sup>n</sup> ní cùu, chi nchaa sá cuèhé sá dúhá ñí quide-í, xiá<sup>n</sup> tá dàcuíta nihnu ñaha-xi xii-í cuáhá<sup>n</sup> ní cùu, te sá cuendá tnúhu váha-á<sup>n</sup> ñí cutnùní iní-í sá quidè-í nchaa sá cuèhé sá dúhá, te xiá<sup>n</sup> tá xíta nihnu-í cuáhá<sup>n</sup> ní cùu. Te sá cuendá nchaa nacuáa càhá<sup>n</sup> tnúhu sá sánú ichi ñaha xii-o nacuáa cada-o cùndecu-o ní cutnùní iní-í sá xidó ndécú cuèchi-í ní cùu.

<sup>14</sup> Te tnúhu-á<sup>n</sup> ñí taxi Espiritú Yá Ndiòxí ndécú ndìhí-o cachí tnúhu-xi nacuáa cada váha-o. Te nchoo cùu-o mee-ni ñáyiú yíca cuèchi, te tàxi tnuní ñáhá nchàa sá cuèhé sá dúhá xii-o ni cuu. <sup>15</sup> Dico nchoo tnàhá iní-ó càda-o nchaa sá váha dico ñá túú quide-o, te da nchaa sá ñà túú tnàhá iní-ó càda-o quide-o, te ñá túú cùtnuní iní-ó ñá cuendá duca<sup>n</sup> quide-o. <sup>16</sup> Te sá dúcá<sup>n</sup> quide-o nchaa sá ñà túú tnàhá iní-ó, te xiá<sup>n</sup> ndíxí túu iní-ó sã tnúhu sá dúcá<sup>n</sup> sànu ichi ñaha xii-o nacuáa cada-o cùndecu-o cuu-xi tnúhu ío váha. <sup>17</sup> Te cùtnuní iní-ó sã nchàa sá cuèhé sá dúhá ñùhu iní-ó, xiá<sup>n</sup> quidè-xí duca<sup>n</sup> quide-o sá ñà túú váha, te ñá díú sã càhú ìní mèé-ó duca<sup>n</sup> quide-o. <sup>18</sup> Te cùu-o cue ñáyiú sàni cuèhé sání dùha iní-xi, te cuìní-ó càda-o nchaa sá váha dico ñá túú ñhí ndéé-ó càda-o. <sup>19</sup> Te cuìní-ó càda-o nchaa sá váha dico ñá ndácú-ó, te ñá túú cuìní-ó càda-o datná quidè nchàa ñáyiú ndècu ichi cuèhé ichi duha, chi ñáyiú-á<sup>n</sup> mee-ni nchàa sá cuèhé sá dúhá quidè-yu, dico ñíu-ni nchaa xiá<sup>n</sup> quidè-ó tnàhá-ó. <sup>20</sup> Te sá dúcá<sup>n</sup> quide-o nchaa sá ñà túú tnàhá iní-ó càda-o te ñá díú mèe-o duca<sup>n</sup> cahu iní-ó quide-o, chi nchaa sá cuèhé sá dúhá ñùhu iní-ó xiá<sup>n</sup> quidè-xí duca<sup>n</sup> quide-o.

<sup>21</sup> Te duca<sup>n</sup> tnàhí yáha-o òré cuìní-ó càda-o sá váha, chi da mee-ni nchàa sá cuèhé sá dúhá quide-o. <sup>22</sup> Te ío cùdíí ìní-ó càda-o nchaa nacuáa càhá<sup>n</sup> Yá Ndiòxí, <sup>23</sup> te dícó-ni sá ncháá sã cuèhé sá dúhá ñùhu iní-ó, xiá<sup>n</sup> quidè-xí ngàni ñaha-xi xii-o ñá túú quide-o sá váha sàni iní-ó càda-o, te duca<sup>n</sup> yáha-o chi nchaa sá cuèhé sá dúhá-á<sup>n</sup> cùnùu-xi taxi tnuní ñáhá-xí xii-o.

<sup>24</sup> ¡Te ndàhú ní cuu nchoo! Chi vá yóo ñí ní ndàcu cada nacuáa vá táxi tnùní ñáhá-gã nchaa sá cuèhé sá dúhá xii-o sá tá dàcuíta nihnu ñaha xii-o cuáhá<sup>n</sup> ní cùu. <sup>25</sup> Te táxàhu xii Yá Ndiòxí sá Xitohó Jesucristú ní quide-gá cuendá sá vã táxi tnùní ñáhá-gã ní ñí sá cuèhé sá dúhá xii-o, sá tá dàcuíta nihnu ñaha xii-o cuáhá<sup>n</sup> ní cùu. Te mee-o sàni iní-ó càda-o nchaa nacuáa càhá<sup>n</sup> Yá Ndiòxí, dico núu nchaa sá cuèhé sá dúhá ná cùnùu-xi



taxi tnuní ñáhá-xí xii-o, te ñu-ni nchaa xiǎ<sup>n</sup> cada-o.

## 8

*Ñáyiú quide nchaa nacuaáa cãhá<sup>n</sup> Espíritú Yã Ndiõxí*

<sup>1</sup> Te vitna nchaa nchoo ñáyiú tnàhá tnúhu ndihi Xítohó Jesucristú vá cuíta nihnu-gá-ó, chi ñá túú-gã ndécú-ó ìchi cuehé ichi duha, chi mee-ñã nchaa nacuaáa cãhá<sup>n</sup> Espíritú Yã Ndiõxí quidé-ó. <sup>2</sup> Te Espíritú Yã Ndiõxí-ã<sup>n</sup> táxi tnuní ñáhá-xí xii-o, te duca<sup>n</sup> chi ndècu ndihi-o Xítohó Jesucristú, te sá dúcã<sup>n</sup> tàxi tnuní ñáhá Espíritú-gá xii-o ñúu xiǎ<sup>n</sup> ñá túú-gã táxi tnuní ñáhá ni ñ<sup>n</sup>-gã sá cuèhé sá dúhá xii-o, te duca<sup>n</sup> quide Espíritú-gá cuendá sá vã cuíta nihnu-o, te ñu-ni Espíritú-gá quidé-xí cuendá sá nchóó ndùu táhú-ó cùndecu-o ndihi-gá ni caa ni quíhí<sup>n</sup>.

<sup>3</sup> Te nchoo ñã ní ndàcu-o cada-o nchaa nacuaáa cãhá<sup>n</sup> tnúhu sá sánú ìchi ñaha xii-o nacuaáa cada-o cùndecu-o, núu xiǎ<sup>n</sup> tnúhu-á<sup>n</sup> ñá túú ní nihí ndéé-xí càda-xi cuendá sá nchóó vã cuíta nihnu-o. Dico Yã Ndiõxí ní tendaha-gã Déhe mee-gã ní quixi ñuyú-a, te Yaá-á<sup>n</sup> cúú-gã ñ<sup>n</sup> ñáyiú, te cãa-gã dàtná cáá ñáyiú ndècu cuéchi-xi xĩndecu ñuyú-a, te sá cuendá nchaa cuéchi nchaa nchoo ñáyiú xĩndecu ñuyú-a ní quixi-gã, te ndéé dàvá-á<sup>n</sup> ñí quide-gã cuendá sá vã táxi tnuní ñáhá-gã ni ñ<sup>n</sup> sá cuèhé sá dúhá xii-o.

<sup>4</sup> Te duca<sup>n</sup> ñí quide-gã cuendá nchoo nchícú<sup>n</sup> nihnu-o quide-o nacuaáa cãhá<sup>n</sup> tnúhu sá sánú ìchi ñaha xii-o nacuaáa cada-o, chi ñá túú-gã cùnùu ni ñ<sup>n</sup> sá cuèhé sá dúhá ìní-ó, chi Espíritú Yã Ndiõxí-ñã táxi tnuní ñáhá-xí xii-o.

<sup>5</sup> Te nchaa ñáyiú cùnùu nchaa sá cuèhé sá dúhá ìní-xi mee-ni xiǎ<sup>n</sup> ñúhú ìní-yu te quidé-yu. Dico nchoo ñáyiú quide nchaa nacuaáa cuíni Espíritú Yã Ndiõxí ñúhú ìní-ó mèe-ni nacuaáa cãhá<sup>n</sup> Espíritú-gá-á<sup>n</sup> te quide-o. <sup>6</sup> Te núu mee-ni nchaa sá cuèhé sá dúhá cùnùu ìní-ó, te cuíta nihnu-o, dico núu mee-ni nchaa tnúhu cãhá<sup>n</sup> Espíritú Yã Ndiõxí cùnùu ìní-ó, te ío váha cuu ìní-ó cùndecu-o ndihi-gá ni caa ni quíhí<sup>n</sup>.

<sup>7</sup> Te nchaa ñáyiú ñùhu ìní mee-ni

sã cuèhé sá dúhá cùu úhú ìní-yu Yã Ndiõxí, te ñá túú cuíni-yu cada-yu nacuaáa cãhá<sup>n</sup>-gã, te ni ñã ndácù-yu cada-yu. <sup>8</sup> Te nchaa ñáyiú duca<sup>n</sup> cùnùu nchaa sá cuèhé sá dúhá ìní-xi-á<sup>n</sup> ñá túú cùdiú-yu núu Yã Ndiõxí.

<sup>9</sup> Te nchòhó chi ñá túú-gã cùnùu sá cuèhé sá dúhá ìní-ndó, chi mee-ñã nacuaáa cãhá<sup>n</sup> Espíritú Yã Ndiõxí quidé-ndó, te duca<sup>n</sup> quide-ndo chi ndècu ndihi-ndo Espíritú-gã, te ñu-ni Espíritú-gá-á<sup>n</sup> ñí tendaha Xítohó Jesucristú véxi ndècu ndihi-o, te nchaa ñáyiú ñá túú ndècu ndihi Espíritú sá ñí tendaha Xítohó Jesucristú véxi ndècu ndihi-o ñá túú ndècu ndihi ñáhá-yu xii-gã. <sup>10</sup> Te núu ndècu ndihi-ndo Xítohó Jesucristú, te cuéi na cùu yiqui cùñú-ndó sã cuendá nchaa sá cuèhé sá dúhá ío ñuyú-a, dico ìní-ndó chi cundecu ndihi-xi Yã Ndiõxí chi ñá túú-gã cuéchi-ndo ndècu núú-gã.

<sup>11</sup> Te núu ndècu ndihi-ndo Espíritú Yã Ndiõxí Yaá ní dándótó ñaha xii Xítohó Jesucristú, te ñu-ni-gã cada te ndoto yiqui cùñú-ndó sã tá xita nihnu cuáhã<sup>n</sup> ñúu na cùú-xi, te duca<sup>n</sup> chi ndècu ndihi-ndo Espíritú-gã.

<sup>12</sup> Te nchòhó ñáyiú ndècu ndihi-í ichi Xítohó Jesucristú, ñá túú-gã tàú-ndó cùnùu ni ñ<sup>n</sup> sá cuèhé sá dúhá ìní-ndó nacuaáa vá cùndecu-gã-ndó ìchi cuehé ichi duha. <sup>13</sup> Chi núu na cùnùu sá cuèhé sá dúhá ìní-ndó te cuíta nihnu-ndo, chi quíhí<sup>n</sup>-ndó ñúu úhú núu ndàhú. Dico núu dañã-ndo mèe-ndo chindee ñaha Espíritú Yã Ndiõxí xii-ndo cuendá sá vã cùnùu-gã sá cuèhé sá dúhá ìní-ndó ñá, te nduu táhú-ndó cùndecu-ndo ndihi-gã ni caa ni quíhí<sup>n</sup> te núu duca<sup>n</sup> na càda-ndo.

<sup>14</sup> Chi nchaa ñáyiú quide nchaa nacuaáa sãnu ichi ñaha Espíritú Yã Ndiõxí cúú-yu déhe-gã. <sup>15</sup> Te Espíritú sá ñí taxi Yã Ndiõxí ndécú ndihi-o ñá túú quide-xi sá nchóó yùhú-ó cùnùu cuechi-o núú-gã, chi Espíritú-á<sup>n</sup> quidé-xí sã nchóó cùu-o déhe-gã, te ñu-ni Espíritú-á<sup>n</sup> quidé xãha<sup>n</sup>-o xii Yã Ndiõxí: “¡Yòhó Dútú Ndiõxí cúú-n Tãtã méé-ndí!” duha xãha<sup>n</sup>-o xii-gã. <sup>16</sup> Te ñu-ni Espíritú-gã-ã<sup>n</sup> tnàhá tnúhu-xi ndihi ìní-ó, te cãhá<sup>n</sup>

ndáá-xi sá nchóó cùu-o déhe-gá. <sup>17</sup> Te sá dúcá<sup>n</sup> cùu-o déhe Yá Ndiöxí xiá<sup>n</sup> ní cachí-gá sá tnàhá-ó ndùu táhú-ó sá ní nduu táhú Xítohó Jesucristú, te duca<sup>n</sup> ndùu táhú-ó te núu na càda ndee iní-ó ndòho-o datná ní ndoho Xítohó Jesucristú, te núu duca<sup>n</sup> te ío cuu càhnu-o ndihi-gá ní caa ní quíhí<sup>n</sup>.

<sup>18</sup> Te yúhú càchí-í sá ñà túú ñà cada-xi cuéi ndòho-o cuendá-gá ndécú-ó ñuyíú-a, chi ío váha càa núu ndúú táhú-ó cùndecu-o na saá nduu. <sup>19</sup> Te nchaandi túhú sá ní cadúha Yá Ndiöxí ní taxi ndecu-gá ñuyíú-a ndètu cahnu-ná-xi sáá nduu càchí-gá sá ío càhnu cuu nchaa déhe-gá. <sup>20</sup> Te nchaa sá ní cadúha Yá Ndiöxí ní taxi ndecu-gá ñuyíú-a ní sáá nduu ñà túú-gá cúu-xí sá vâha sá cúu-xí-gá. Te ñá díú mèe sá ní taxi ndecu Yá Ndiöxí ñuyíú-a duca<sup>n</sup> ní sàni iní-xi cunduu, chi mee-gã duca<sup>n</sup> tnàhí ní cachí-gá cunduu sá sàá nduu vâ cúu-xí sá vâha sá cúu-xí-gá, dico sáá tucu nduu te nchaa xiá<sup>n</sup> cuu tucu-xi sá vâha sá cúu-xí-gá. <sup>21</sup> Te nchaa sá ní taxi ndecu-gá ñuyíú-a vá cùndùu-gá-xi dàtná cáá-xí vitna te ní vâ dánàa-gá, chi nduu saa-xi te ngúndecu váha-xi dàtná ngúndecu váha nchaa cue déhe-gá. <sup>22</sup> Te nàha-o sá ncháándì túhú sá nchító ní cadúha Yá Ndiöxí ndécú ñuyíú-a ndòho-xi vitna datná ndóhó ñí ñadihí sa ní tnàhá òré cacu déhe-xi. <sup>23</sup> Te ñá díú-ní nchàa sá dúcá<sup>n</sup> ní cadúha-gá-ã<sup>n</sup> duca<sup>n</sup> ndòho-xi, chi tnàhá nchoo dùca<sup>n</sup> ndoho-o ndecu-o ñuyíú-a tucu, te nchoo sà ní nduu táhú-ó Espíritú Yá Ndiöxí Espíritú sá ní cachí mée-gã nduu táhú-ó dñhanuu. Te ío ndòho tnàhá-ó ndècu-o ñuyíú-a te ndètu cahnu-ná-ó sáá nduu ndàda saa-gá yiqui cùñú-ó, te cáhá<sup>n</sup>-gá sá cúu-ó déhe-gá. <sup>24</sup> Te Yá Ndiöxí ní quide-gá ní naníhí táhú-ó nñu xiá<sup>n</sup> ní ngúndecu ndihi-o tnñhu ndee iní ndétú-ó sáá nduu càda-gá nàcuáa ní cachí-gá, te núu sa ndècu ndihi-o sá ndúú táhú-ó te vá cúu cáhá<sup>n</sup>-ó sá cùndètu-o sá ndúú táhú-ó chi sa ndècu ndihi-o. <sup>25</sup> Dico sá ndétú-ó ndùu táhú-ó cùu-xi sá vátá cùndècu ndihi-gá-ó, te xini ññhu-ni-xi cada ndee-ni iní-ó cùndetu-o ndée sáá

nduu ndùu táhú-ó sá dúcá<sup>n</sup> ní cachí Yá Ndiöxí nduu táhú-ó.

<sup>26</sup> Te Espíritú-gá chindee ñàha-xi xii-o nacuáa níhí ndée-ó cùndecu-o, te nchoo ñà túú xini-ó cáhá<sup>n</sup> ndihi-o Yá Ndiöxí nàcuáa tàú-xi cunduu dico Espíritú-gá cáhá<sup>n</sup> ndàhú-xi núu-gã cuendá-ó cuéi òré ñà níhí-ó tnñhu cáhá<sup>n</sup>-ó cuendá nchaa sá ío cùñí-ó cáhá<sup>n</sup>-ó nñú-gã. <sup>27</sup> Te Yá Ndiöxí sa nàha ndáá-gá nchaa nàcuáa sàni iní-ó, te duca<sup>n</sup> sà naha ndáá-gá nchaa nàcuáa sàni iní Espíritú-gá. Te Espíritú-gá cáhá<sup>n</sup> ndàhú-xi núu-gã cuendá nchoo ññyiu yìndaha-gá, te cáhá<sup>n</sup> ndàhú-xi núu-gã nàcuáa cùñí mée-gã cunduu.

*Nchaa sá ná càda ñaha ññyiu te vá ndácù-yu nadatùhú-yu iní-ó chi ndacu nahi-ni-o yãha-o nchàa sá ná cádá ñàhá-yu*

<sup>28</sup> Te sa nàha-o sá Yá Ndiöxí quidé-gã sá ncháá sá yãha-o ndècu-o ñuyíú-a cùu-xi sá vâha sá cúu-xí nchòo cue ññyiu cùu iní ñàhá xii-gá, chi cùu-o ññyiu ní cáhá<sup>n</sup>-gá cundecu ndihi-gá dàtná ní cachí iní mée-gã. <sup>29</sup> Te ndée cùtnàhá vátá ngãva-gá ñuyíú, te Yá Ndiöxí sa nàha-gá nàndi cùu ññyiu cundecu ndihi-gá, te ññyiu ndée dàvá-á<sup>n</sup> ní cachí-gá sá ññyiu-á<sup>n</sup> cunduu váha iní-yu dàtná váha iní Déhe mee-gã, te duca<sup>n</sup> ní cachí-gá cuendá sá Déhe mee-gã-á<sup>n</sup> cunuu-gã núu nchàa ññyiu cundecu ndihi-gá. <sup>30</sup> Te nchaa ññyiu duca<sup>n</sup> ní cachí-gá cundecu ndihi-gá ndée cùtnàhá vátá ngãva-gá ñuyíú cáhá<sup>n</sup> ñàhá-gã xií-yu vitna, te nchaa ññyiu duca<sup>n</sup> cáhá<sup>n</sup>-gá càchí-gá sá ñà túú-gã cuéchi-yu ndècu núu-gã, te ññyiu-á<sup>n</sup> cachí-gá sá ío càhnu cuú-yu.

<sup>31</sup> Te vitna ní cutnùnì iní-ó, te ñà túú nãgá canì iní-ó, chi Yá Ndiöxí ndécú ndihi ñàha-gá xii-o, te vá yòo ññ-gá ndacu quehdé nihnu cuendá sá vâ chindèe ñàha-gá xii-o. <sup>32</sup> Te Yá Ndiöxí ñà túú ní cùdí iní-gá Déhe-gá sá cùú-gá cuendá nchaa nchoo ññyiu xíndecu ñuyíú-a, te sá dúcá<sup>n</sup> ndée Déhe-gá ñà túú ní cùdí iní-gá xiá<sup>n</sup> cùtnùnì iní-ó sá táxí-gã nchaandi túhú

sá xíní ñùhu-o. <sup>33</sup> Te vá yõo ì<sup>n</sup> ndacu cacá<sup>n</sup> cuéchi núú Yă Ndiõxí cuendá nchaa ñáyíu ní cachí-gá cundecu ndihí-gá te núu ná cúú cuéchi-yu ndècu. Chì mee-gă cächí-gá sá ñà túú ndècu cuéchi-yu núú-gă. <sup>34</sup> Te vá yõo ì<sup>n</sup> ndacu daquihí<sup>n</sup> ñáhá xii-o núú ùhú núú ndàhú, chì Xítóhó Jesucristú ní xihí-gá te ní ndoto-gá, te cuándaa-gá núú ndécú Dütú Ndiõxí núcõo-gá xio cùha-gá, te duca<sup>n</sup> ìo cùnuu-gá, te yàcá<sup>n</sup> càhá<sup>n</sup> ndàhú-gá núú Dütú Ndiõxí cuendá-ó. <sup>35</sup> Te vá yõo ì<sup>n</sup> ndacu cada ñaha xii-o ì<sup>n</sup> sá ñà túú vâha cuendá sá vâ cúú ìní ñáhá-gă Xítóhó Jesucristú xii-o, te ni tnúndòho tnúhu ndàhú, te ni sá ndihú ìní-ó ñă cútnùní ìní-ó ñăsa cada-o căcu nihnu-o ì<sup>n</sup> sá ná yâha-o, te ni nchàa sá cádá ñaha ñáyíu sá cuendá-gá, te cuèi-ni sá vâ nihí-ó sá còhó sá caxí-ó, te cuèi-ni sá vâ nihí-ó dõó cuihnu-o, te cuèi ndècu-ná-ó sá yâha-o ì<sup>n</sup> sá yâha-o, te cuèi sa ndècu-ná-ó sá cáhni ñáhá-yu, dico Xítóhó Jesucristú vá dâná ndéé-gá sá cúú ìní ñáhá-gă xii-o. <sup>36</sup> Te quee ndáá-xi nâcuáa ní cáhá<sup>n</sup> ì<sup>n</sup> tée ní xóo cáhá<sup>n</sup> tnúhu Yă Ndiõxí ndéé sanaha ñí ngódó tnùní núú tütú-gá núú cächí-xi:

Yòhó Dütú Ndiõxí nchaa-ni nduu nchaa-ni òré cuìní ñáyíu cahni ñáhá-yu xii-ndí sá cuendá-n,

te cächí-yu sá cúú-ndí dàtná cue mbèé cue quití sa ndècu túha-ná cahni-yu.

Duha ní cachí tée ní xóo cáhá<sup>n</sup> tnúhu-gá-á<sup>n</sup>, te duca<sup>n</sup> ñí ngódó tnùní núú tütú-gá. <sup>37</sup> Te cuèi duca<sup>n</sup> ñândí sá ná càda ñahá-yu xii-o, dico vá ndácũ-yu nadatùhú-yu ìní-ó chì ndacu nahi-ni-o yâha-o nchàa sá dúcá<sup>n</sup> ná càda ñahá-yu xii-o, te duca<sup>n</sup> chì Xítóhó Jesucristú Yaá ìo cùu ìní ñáhá xii-o ndecu ndihí ñaha-gá chindèe ñaha-gá. <sup>38-39</sup> Te yúhú cútnùní ndáá ìní-í sá ñí ì<sup>n</sup> sá ìó ñuyíú-a vá ndácú-xí càda-xi cuendá sá vâ cúú ìní ñáhá-gă Yă Ndiõxí xii-o, te ni sá cùú-ó, te ni sá cùndècu-o ñuyíú-a, te ni ì<sup>n</sup> espíritú sá ìo cùnuu cundihí yucu ñávâha te ni ì<sup>n</sup> dava-gá cue espíritú

cundihí-xi vá ndácú-xí càda-xi cuendá sá vâ cúú ìní ñáhá Yă Ndiõxí xii-o. Te ni sá cúú ñuyíú-a vitna, te ni sá cúú ndèe cuèe-gá, te ni ì<sup>n</sup> sá ndécú àndiù, te ni ì<sup>n</sup> sá ndécú ñuyíú-a, te ni ì<sup>n</sup> sá ñí cadúha mee Yă Ndiõxí, ni ì<sup>n</sup> xiá<sup>n</sup> vá ndácú-xí càda-xi cuendá sá vâ cúú ìní ñáhá-gă xii-o chì ndècu ndihí-o Xítóhó Jesucristú Yaá cúú Xítóhó-ó.

## 9

*Yă Ndiõxí ní cachí-gá sá ñáyíu isràél cuú-yu ñáyíu canchicú<sup>n</sup> nihnu ñaha xii-gá*

<sup>1</sup> Te yúhú càhá<sup>n</sup> ndáá-í chì cùu-í ì<sup>n</sup> tée ndècu ndihí Xítóhó Jesucristú, te ndècu ndihí-í Espíritú Yă Ndiõxí ñúu xiá<sup>n</sup> cútnùní ìní-í sá càhá<sup>n</sup> ndáá-í. <sup>2</sup> Te nchaa-ni nduu nchaa-ni òré ìo ndihú ìní-í, te duca<sup>n</sup>-ni ìo quide úhú-xi ìní-í <sup>3</sup> sá cuendá nchaa ñáyíu cùu ndi mee-í. Te núu dìcò cúú-xí ì<sup>n</sup> sá chindèe ñaha xii-yu nucúndecu váha-yu núú Yă Ndiõxí ñá, te dàña-í mée-í dàcuíta nihnu ñaha Xítóhó Jesucristú ñúu dìcò sá cúú. <sup>4</sup> Te nchaa ñáyíu cùu ndi mee-í-á<sup>n</sup> cúú-yu ñáyíu isràél, te Yă Ndiõxí ní cachí-gá sá cúú-yu déhe-gá, te ní quide-gá nâcuáa ní cutnùní ìní-yu sá ìo cànhu cuu-gá, te ní cáhá<sup>n</sup> ndáá-gá ñúu-yu nâcuáa cada ñaha-gă xii-yu, te ní xáha<sup>n</sup>-gă xii ndí Moisés ní chídó tnùní ndí nâcuáa cadá-yu cundecú-yu. Te ní xáha<sup>n</sup>-gă xii-yu nâcuáa cadá-yu cada cànhu ñahá-yu xii-gá, te ní xáha<sup>n</sup> tũcu-gá xii-yu nchaa nâcuáa cada-gá ndéé cuèe-gá. <sup>5</sup> Te nchaa ñáyíu-á<sup>n</sup> cúú-yu ñaní tnáhá nchàa cue tée ní cùnuu ñí xíndecu ndéé sanaha, te diu-ni ñaní tnáhá-yu cùu Xítóhó Jesucristú Yaá ní tendaha Dütú Ndiõxí ní quixí ñuyíú-a, te tnáhá-gá cúú-gă Ndiõxí te ìo cùnuu-gá, te nchaa nduu nchaa quíú ìo cànhu cuu-gá. Te duca<sup>n</sup> na cùnduu.

<sup>6</sup> Te vá cächí-ó sá Yă Ndiõxí ñá túú ní quide-gá nchaa nâcuáa ní cachí-gá cada-gá cuendá sá ñà túú sândáá ìní ñáhá dâva ñáyíu isràél xii-gá. Te sá dúcá<sup>n</sup> xíquide davá-yu te ñá túú quidé-yu nâcuáa tàú-xi cadá-yu sá cúú-yu ñáyíu isràél. Te ñáyíu duca<sup>n</sup>

xĩquide-á<sup>n</sup> cúŷ-yu ñáŷiu ñá túú cùu cuendá ñáhá Yă Ndiõxí. <sup>7</sup> Te cuèi nchaá-yu cùu-yu ñaní tnáhá ndii Àbrahám dico ñá túú quidé-yu nchaa nàcuáa tàú-xi cunduu cadá-yu sá cúŷ-yu ñaní tnáhá ndii. Te Yá Ndiõxí ní xáha<sup>n</sup>-gă xii ndii Àbrahám: “Nchaa cue ñaní tnáhá tē Isàác tēe cùu déhe ducu<sup>n</sup>-n, mee-ni cuè ñáŷiu-á<sup>n</sup> cuu ñaní tnáhá-n”, duha ní xáha<sup>n</sup>-gă xii ndii Àbrahám. <sup>8</sup> Te xiă<sup>n</sup> cútnùní iní-ó sã ñă ncháá ñáŷiu cùu ñaní tnáhá ndii Àbrahám cúŷ-yu ñáŷiu cùu cuendá Yă Ndiõxí, chi mee-ni ñáŷiu sàndáá iní nàcuáa ní cáhá<sup>n</sup>-gă cada-gă, ñáŷiu-á<sup>n</sup> cúú cuendá-gă. <sup>9</sup> Te duha nduu tnúhu ní xáha<sup>n</sup> Yă Ndiõxí xii ndii Àbrahám: “Sáá nduu te yúhú cada-í te coo ì<sup>n</sup> déhe-n ndii ñadihí-n tă Sărá”, duha ní xáha<sup>n</sup>-gă xii ndii.

<sup>10</sup> Te ñá díú-ni xiă<sup>n</sup> ní quide Yă Ndiõxí, chi tnáhá ní ndatnúhu-gă ndii ndii Rèbecá cútnáhá vitna ñúhu úú déhe ndii ndii Isàác tēe ní cuu ñaní tnáhá-ó ní xĩndecu ndéé sanaha. <sup>11-13</sup> Te cútnáhá vitna ñúhu-gă déhe ndii Rèbecá, cútnáhá vátá cadá-gă-güexi ni ì<sup>n</sup> sá cuèhé sá dúhá, te ni ì<sup>n</sup> sá vâha, ní xáha<sup>n</sup> Yă Ndiõxí xii ndii: “Déhe-n tēe díhna na càcu te tēe-á<sup>n</sup> tñi-dé nchaa tnúhu cáhá<sup>n</sup> déhe-n tēe cùu uú ná càcu”, duha ní xáha<sup>n</sup>-gă xii ndii Rèbecá. Te ní quee ndáá-xi nàcuáa ní cáhá<sup>n</sup> Yă Ndiõxí núú tütú-gă núú càchí-xi: “Té Jàcób ní cuu váha iní-í núú-dě, te té Esàú ñá túú ní cùu váha iní-í núú-dě”, duha càchí-gă núú tütú-gă. Te duca<sup>n</sup> ní cuu chi duca<sup>n</sup> ní cachí méé-gă cunduu sá càhá<sup>n</sup>-gă nchaa ñáŷiu cuiní méé-gă, te ñá díú cuendá ì<sup>n</sup> chiùn quidé-yu càhá<sup>n</sup> ñáhá-gă xií-yu.

<sup>14</sup> Te vá cúú tnáhí cáhá<sup>n</sup>-ó sã Yă Ndiõxí ñá túú quide váha-gă sá dúcá<sup>n</sup> quide-gă chi mee-gă ío ndáá quidé-gă! <sup>15</sup> Te mee-gă ní xáha<sup>n</sup>-gă xii ndii Moisés: “Cundáhú iní-í chindee-í mee-ni cuè ñáŷiu càchí iní-í”, duha ní xáha<sup>n</sup>-gă xii ndii. <sup>16</sup> Te xiă<sup>n</sup> cútnùní iní-ó sã cundáhú iní-gă ñáŷiu chi duca<sup>n</sup> cuiní méé-gă cunduu, dico ñá túú cundáhú iní ñáhá-gă xií-yu cuendá

sá dúcá<sup>n</sup> cuiní-yu cada-gă, te ni ñă túú cundáhú iní ñáhá-gă xií-yu cuendá sá ío ndùcu ndeé-yu quidé-yu ì<sup>n</sup> sá quidě-yu. <sup>17</sup> Te núú tütú Yă Ndiõxí càhá<sup>n</sup>-xi nàcuáa ní xáha<sup>n</sup>-gă xii tēe ní cuu Faràón tēe ní xĩndaha nació<sup>n</sup> Ègíptú, te duha ní xáha<sup>n</sup>-gă: “Yúhú ní quide-í yĩndàha-n ñáŷiu cuendá cada-í titní núú sã cadá-í núú-n cuendá cutnùní iní-n sã ío càhnu cuu-í, te duca<sup>n</sup> nchaa ñáŷiu ñuyú cutnùní iní-yu sá yúhú cúú-í Ndiõxí”, duha ní xáha<sup>n</sup>-gă xii tēe ní cuu Faràón. <sup>18</sup> Te xiă<sup>n</sup> cútnùní iní-ó sã Yă Ndiõxí cundáhú iní-gă mee-ni cuè ñáŷiu càchí iní méé-gă, te duca<sup>n</sup> ndàda dí-gă iní nchaa ñáŷiu càchí iní méé-gă duca<sup>n</sup> càda-gă.

<sup>19</sup> Te sá dúhá càhá<sup>n</sup>-í te dava-ndo quèsaha-ndo: “Ná cuendá Yă Ndiõxí dácàa-gă cuèchi díquí ñáŷiu núu ni ì<sup>n</sup>-yu ñă ndácú-yu quehndé nihnú-yu cuendá sá vã cadá Yă Ndiõxí nàcuáa cuiní-gă”, quesaha-ndo. <sup>20</sup> Te chí cuâha cuendá sá dìcò ñáŷiu ñuyú-a cùu-ndo te ñá túú nduu váha-xi sá nchòhó cáhá<sup>n</sup>-ndó ì<sup>n</sup> tnúhu sá ñă túú nduu váha sá cúú-xí Yă Ndiõxí. Te duha na càhá<sup>n</sup>-í núú-ndó nàcuáa tecú tnùní-gă-ndó nàcuáa nduu tnúhu càhá<sup>n</sup>-í. Te ñá túú xini-ó sã ì<sup>n</sup> quídi ñúhu cúñaha-xi xii ñáŷiu ní cadúha ñaha xii-xi: “Ná cuendá duha ní cadúha ñaha-n xii-í”, cúñaha-xi. <sup>21</sup> Chi ñáŷiu cadúha nchaa quídi-á<sup>n</sup> cuu-ni cadúha-yu ndii ñúhu cuèi nása na cunduu quídi cadúha-yu canehe chiùn-yu, chi ì<sup>n</sup>-ni ñúhu cadúha-yu quídi cánehe chiùn-yu ndi tnahá nduu sácóo-yu vico ndii quídi sá cãnehe chiùn-yu nduu cùtexínu.

<sup>22</sup> Te diu-ni duca<sup>n</sup> quide Yă Ndiõxí, chi cuiní-gă dandòho-gă ñáŷiu ñá túú quide nchaa nàcuáa nduu vétú iní-gă, te cada-gă nàcuáa cutnùní iní-yu sá ío càhnu cuu-gă. Te sa ndècu túha-ná-yu sá quihí<sup>n</sup>-yu núú ùhú núú ndáhú, te cuèi duca<sup>n</sup> dico ío ta quide cahnu iní-gă cuáhá<sup>n</sup>. <sup>23</sup> Te duca<sup>n</sup> quide-gă cuendá cutnùní iní nchaa ñáŷiu ñuyú sã ío váha quide-gă sá cúú-xí nchaa



nchoo ñáiyu cùndahú iní-gá, chi ní cachí-gá sá nchoó cuè ñáiyu cùndahú iní-gá nduu táhú-ó cùndecu-o ndihi-gá núú ío váha càa ndecu-gá. <sup>24</sup> Te dava nchoo ñáiyu ní cáhá<sup>n</sup> Yá Ndiöxí cúú-ó ñáiyu isràél, te dava-o cùu-o ñáiyu ñá túú cùu ñáiyu isràél. <sup>25</sup> Te ní quee ndáá-xi nàcuáa ní xáha<sup>n</sup> Yá Ndiöxí xii ndíi Òseás téé ní xóo cáhá<sup>n</sup> tnúhu-gá ndéé sanaha ñí chídó tnùní ndíi núú tütú-gá núú càchí-xi:

Ñáiyu ñá túú cùu cuendá-í ní cùu te nduu cuendá-í-yu,

te ñuú-ni ñáiyu-á<sup>n</sup> ñà túú cùu váha iní-í núú-yu ní cùu, dico vitna cùu váha iní-í núú-yu.

<sup>26</sup> Te ñuú-ni ñuú núú dúcá<sup>n</sup> ñí cachí-í sá ñà túú ñáiyu cùu cuendá-í ñuú-ni ñuú-á<sup>n</sup> coo ñáiyu cuu déhe yúhú Dútú Ndiöxí Yáa ndécú tũu andiu.

Duha ní xáha<sup>n</sup> Yá Ndiöxí xii ndíi Òseás ní chídó tnùní ndíi núú tütú-gá.

<sup>27</sup> Te ndíi Chàíá téé ní xóo cáhá<sup>n</sup> tucu tnúhu Yá Ndiöxí ndéé sanaha ñí cáhá<sup>n</sup> ndíi cuendá ñáiyu isràél, te duha ní cachí ndíi: “Cuèi cuéhé víhí ñáiyu isràél dàtná cuéhé ñuúhú cúchí làmár dico sacú-ni-yu vá quíní-yu tnúndòho tnúhu ndàhú. <sup>28</sup> Te Yá Ndiöxí ío ndíhi cada-gá nchaa nàcuáa càhá<sup>n</sup>-gá ñuyú”, duha ní cachí ndíi. <sup>29</sup> Te ní cáhá<sup>n</sup> tucu ndíi nàcuáa cada-xi ndéé cuéé-gá, te ní cachí ndíi:

Yá Ndiöxí Yáa táxí tnùní nchaandi túhú sá ío andiu ndíhi ñuyú ñà túú ní dànaa-gá nchaa ñáiyu isràél, chi núu ní ndíhi-yu danàa ñaha-gá,

te nchoo cùu-o datná ní cuu nchaa ñáiyu ní xíndecu ñuú Sodomá ndíhi nchaa ñáiyu ní xíndecu ñuú Gómorrá, te ndíhi-o nàa datná ní naa nchaa ñáiyu-á<sup>n</sup> ní cùu.

Duha ní cachí ndíi.

*Ñáiyu isràél ñá túú sàndáá iní-yu tnúhu Xítohó Jesucristú*

<sup>30</sup> Te sá cuendá xí<sup>n</sup> ñuú vitna càchí tnúhu-í xii-ndo sá cuè ñáiyu ñá túú cùu ñáiyu isràél ñá túú ní nànducu nihnú-yu nàcuáa cada-yu

cudiú-yu núú Yá Ndiöxí, dico vitna cudiú-yu núú-gá chi ní sàndáá iní-yu Xítohó Jesucristú. <sup>31</sup> Te ñáiyu isràél nchicú<sup>n</sup> nihnú-yu tnúhu sá dánèhé ñáhá xii-yu nàcuáa cada-yu cudiú-yu núú Yá Ndiöxí dico ñá túú cudiú-yu núú-gá chi ñá ndácú-yu cada-yu nchaa nàcuáa càhá<sup>n</sup>-xi. <sup>32</sup> Te duca<sup>n</sup> ñà túú cudiú-yu núú Yá Ndiöxí chi ñá túú sàndáá iní-yu Xítohó Jesucristú, te sàni iní-yu sá sá cuendá mee-ni nchaa sá quidé mèe-yu cudiú-yu núú-gá, te sá dúcá<sup>n</sup> quidé-yu te cùu-yu dàtná ñí ñáiyu nguñenu ñí yúú te nduá-yu. Te duca<sup>n</sup> sàtnahá-xi cùu-yu chi ñá túú cùu váha iní-yu núú Xítohó Jesucristú.

<sup>33</sup> Te quee ndáá-xi nàcuáa ní cáhá<sup>n</sup> Yá Ndiöxí ñí xichi núú tütú-gá núú càchí-xi:

Yúhú táxí ndècu-í ñí téé ñuú Sìón, te cuu-dé dàtná ñí yúú, te yúú-á<sup>n</sup>

nguñenu ñáiyu te nduá-yu,

te nchaa ñáiyu na quíndáá iní ñáhá xii-dé, te vá ndíxí cuèchi iní-yu sá dúcá<sup>n</sup> ñí sàndáá iní ñáhá-yu xii-dé.

Duha càchí-gá núú tütú-gá.

## 10

<sup>1</sup> Te nchòhó ñáiyu ndècu ndíhi-í ichi Xítohó Jesucristú càchí tnúhu-í xii-ndo sá càhá<sup>n</sup> ndíhi-í Yá Ndiöxí cuendá ñáiyu isràél, chi ío cuíní-í sá nánihí tàhú-yu. <sup>2</sup> Te na càhá<sup>n</sup> ndáá-í cuendá-yu sá ío ndècu ndéé-yu xinu cuechí-yu núú Yá Ndiöxí, te dicó-ni sá ñà túú quidé-yu nàcuáa cuíní méé-gá cada-yu. <sup>3</sup> Chi ñá túú quide cuendá-yu nàcuáa cuíní Yá Ndiöxí cada ñaha-gá xii-yu nàcuáa cudiú-yu núú-gá, te quide-ni-yu nàcuáa sàni iní méé-yu cudiú-yu núú-gá te ñá túú cuíní-yu tní-yu tnúhu càhá<sup>n</sup>-gá nàcuáa cudiú-yu núú-gá. <sup>4</sup> Te Xítohó Jesucristú ní quide-gá cuendá sá vã cùnù-gá nchaa tnúhu ní chídó tnùní ndíi Moisés, te nchaa ñáiyu na quíndáá iní ñáhá xii-gá te ñuú-gá cada te cudiú-yu núú Yá Ndiöxí.

<sup>5</sup> Te ndíi Moisés càhá<sup>n</sup> ndíi núú tütú ndíi cuendá ñáiyu cuíní cudiú

núú Yă Ndiöxí cuëndá sá nchícú<sup>n</sup> nihnú-yu nchaa nàcuáa ní cáhá<sup>n</sup> ndíi. Te ní cachí ndíi sá ncháá ñáyiú na càda nchaa nàcuáa ní xáha<sup>n</sup> Yă Ndiöxí xii ndíi ní chídó tnùní ndíi te naníhí tàhú-yu, te núú dicó ndacú-yu cadá-yu nchaa nàcuáa ní cáhá<sup>n</sup> ndíi. <sup>6</sup> Dico vitna núu na quindáá iní-ó Xítóhó Jesucristú, te cudíu-o núú Yă Ndiöxí. Te duha cächí tnúhu ní chídó tnùní ndíi núú tütú-gá: “Vá cání iní-ndó sã xíní ñúhu-xi cada-ndo ñ<sup>n</sup> sá vã yõo tnàhí ndàcu cada sá cáá tũu-ndo àndíu te cùñaha-ndo xii Cristú cuu<sup>n</sup>-ndo ndíhí-gá núú ñúyíú-a. <sup>7</sup> Te ni vã cání tucu iní-ndó sã quíhí<sup>n</sup> túu-ndo nũú xĩndecu nchaa ñáyiú ní xíhí te cada-ndo sã Crístú ndoto-gá”, duha cächí tnúhu-án sã vã dúcá<sup>n</sup> càni iní-ó. <sup>8</sup> Te cächí tucu tnúhu-án: “Tnúhu Yá Ndiöxí sá ndécú ndíhí ñaha-xi xii-ndo chi sàni iní-ndó cuëndá tnúhu-án te càhá<sup>n</sup>-ndó”, duha cächí tnúhu-án. Te tnúhu sá ndécú ndíhí-ndo-án cúu-xí tnúhu càhá<sup>n</sup>-ndí núú ñáyiú, te xini ñuhu-xi sá quindáá iní-yu tnúhu-án. <sup>9</sup> Te núu na nũnuu-ndo càhá<sup>n</sup>-ndó sã Xítóhó Jesucristú cúu-gã Xítóhó-ndó, te quindáá iní-ndó nì yuhu nì iní-ndó sã Yă Ndiöxí ní dándótó-gã Xítóhó Jesucristú, te naníhí tàhú-ndó te núu duca<sup>n</sup> na càda-ndo. <sup>10</sup> Te nchaa ñáyiú duca<sup>n</sup> sàndáá iní te cáhá<sup>n</sup>-yu sá Xítóhó Jesucristú cúu-gã Xítóhó-yu, ñáyiú-án cúdíu-yu núú Yă Ndiöxí te naníhí tàhú-yu.

<sup>11</sup> Te núú tütú Yă Ndiöxí cächí-xi sá nì ñ<sup>n</sup> ñáyiú sàndáá iní ñáhá xii Xítóhó Jesucristú vã ndíxí cuèchi iní-yu sá dúcá<sup>n</sup> sàndáá iní ñáhã-yu xii-gá. <sup>12</sup> Te sá cúu-xí Xítóhó Jesucristú chi ñ<sup>n</sup>-ni cùu ñáyiú isràél ndíhí ñáyiú ñá túú cùu ñáyiú isràél, chi díu-gá cúu-gã Yaá cúnúu taxi tnuní-gá nchaa ñáyiú, te ío váha quide-gá sá cúu-xí ncháa ñáyiú càhá<sup>n</sup> ndíhí ñaha xii-gá. <sup>13</sup> Te quèe ndáá-xi nàcuáa càhá<sup>n</sup>-xi núú tütú Yă Ndiöxí núú cächí-xi: “Nchaa ñáyiú na càhá<sup>n</sup> ndàhú núú Xítóhó Jesucristú sá dácacu nihnu ñaha-gã xií-yu, te ñáyiú-án naníhí tàhú-yu”, duha cächí-xi núú tütú-gá. <sup>14</sup> Te ñáyiú-án

vã nihí-yu nàcuáa cáhá<sup>n</sup> ndàhú-yu núu-gã te núu ñá túú sàndáá iní ñáhã-yu xii-gá, te ni vã nihí-yu nàcuáa cadá-yu quindáá iní ñáhã-yu xii-gá te núu vátá cùndedóho-gá-yu tnúhu-gá, te ni vã nihí-yu tnúhu-gá te núu vã yõo quíhí<sup>n</sup> cùtnuhu ñaha xii-yu. <sup>15</sup> Te ni vã yõo quíhí<sup>n</sup> duca<sup>n</sup> cùtnuhu ñaha xii-yu tnúhu-gá te núu Yá Ndiöxí vã téndaha-gá ñáyiú quíhí<sup>n</sup> cùtnuhu ñaha xii-yu. Te núú tütú Yă Ndiöxí cächí-xi: “Ío vii ío váha cùu iní-ó vèxi ñáyiú dànehé ñáhá xii-o nàcuáa ndúu tnúhu sá càhá<sup>n</sup> nàcuáa naníhí tàhú-ó”, duha càhá<sup>n</sup>-xi núú tütú-gá.

<sup>16</sup> Te ñá ncháá-yu cuení-yu quindáá iní-yu tnúhu-án. Te ní quee ndáá-xi nàcuáa ní xáha<sup>n</sup> ndíi Chaiá xii Yá Ndiöxí te duha ní xáha<sup>n</sup> ndíi xii-gá: “Yòhó Dútú Ndiöxí na nàcani tnúhu-í núu-n sã ío sacú-ni ñáyiú sàndáá iní-yu tnúhu càhá<sup>n</sup>-ndí”, duha ní xáha<sup>n</sup> ndíi xii-gá. <sup>17</sup> Te xini ñuhu-xi sá díhna-gá cundedóho-yu tnúhu-án cuëndá duca<sup>n</sup> te quindáá iní-yu, te tnúhu-án cúu-xí tnúhu Xítóhó Jesucristú.

<sup>18</sup> Te vá cúu càhá<sup>n</sup>-ó sã ñà túú ní ñíhí ñáyiú isràél tnúhu-gá, chi ncháá-yu ní ñíhí-yu tnúhu-gá, chi núú tütú Yă Ndiöxí cächí-xi:

Cue tée ní cáhá<sup>n</sup> tnúhu Yá Ndiöxí ní cáhá<sup>n</sup>-güedé tnúhu-gá núú ñáyiú,

te tnúhu-án ñí xité nuu-xi ñíhí ñúyíú. Duha cächí-xi núú tütú-gá. <sup>19</sup> Te ni vã càhá<sup>n</sup>-ó sã ñáyiú isràél ñá túú ní cùu tnuní iní-yu nàcuáa ndúu tnúhu-gá chi ní tecú tnùní-yu. Te ndéé sanaha ñí chídó tnùní ndíi Moisés nàcuáa ní xáha<sup>n</sup> Yă Ndiöxí xii ñáyiú isràél, te duha ní xáha<sup>n</sup>-gã xií-yu:

Yúhú cada váha-í nchaa ñáyiú ñá túú cùu ñáyiú isràél, ñáyiú ñá túú cùtnuní iní-xi nàcuáa cada váha cundecu núu-í,

te nchòhó cudéé<sup>n</sup>-ndó nũu-yu te cuu cuédú iní-ndó-yu.

Duha ní xáha<sup>n</sup> Yă Ndiöxí xií-yu te duca<sup>n</sup> ñí chídó tnùní ndíi Moisés. <sup>20</sup> Te ndíi Chaiá ñá túú tnàhí nì yuhú ndíi ní

quide ndíi núú Yă Ndiöxí ní cáhá<sup>n</sup> ndíi tnúhu-gá, te ní cachí ndíi:

Ñáyiú ñá túú nànducu ñaha xii-í ní cùu ní naníhí ñáhă-yu xii-í,

te ni ñà túú ndùcu tnúhu ñáhă-yu xii-í ní cùu te ní xiní ñáhă-yu.

Duha ní cachí ndíi Chàíá ní cáhá<sup>n</sup> ndíi tnúhu Yă Ndiöxí. <sup>21</sup> Te ní quide tucu ndíi núú Yă Ndiöxí ní cáhá<sup>n</sup> ndíi tnúhu-gá cuendá ñáyiú isràél, te ní cachí ndíi: “Nchaa-ni nduu yìhi-í càhá<sup>n</sup>-í ñáyiú isràél te ñá túú cuiní-yu quindáá iní-yu chi ío sàá iní-yu”, duha ní cachí ndíi Chàíá ní cáhá<sup>n</sup> ndíi tnúhu Yă Ndiöxí.

## 11

*Cuendá ñáyiú isràél ñáyiú naníhí tànhú*

<sup>1</sup> Te cuèi duca<sup>n</sup> dico vá càhá<sup>n</sup>-ó sã Yă Ndiöxí dáquèe tìhú-gă ñáyiú isràél chi ðiu-ni ñáyiú-á<sup>n</sup> cúú cuendá-gá, chi yúhú tñahá-í cúú-í mei tēe isràél, te ñani tñahá-í ní cuu ndíi Àbrahám tēe ní xindecu ndéé sanaha v̄hi-gá, te ðiu-ni ñani tñahá-í ní cuu tucu ndíi Benjamín. <sup>2</sup> Te ndéé sanaha ðuca<sup>n</sup> ní cachí Yă Ndiöxí sá nchùhú ñáyiú isràél cúú-ndí ñáyiú cùu cuendá-gá, te ñá túú dàquèe tìhú ñáhă-gă xii-ndí, te nchòhó sa xìní-ndó nàcuáa càhá<sup>n</sup>-xi núú tütú Yă Ndiöxí núú càchí-xi nàcuáa ní quide té Èliás ní ndacá<sup>n</sup> cuéchi-dé núú-gă cuendá ñáyiú isràél. <sup>3</sup> Te duha ní xáha<sup>n</sup>-dē xii-gá: “Yòhó Dútú Ndiöxí, ná nàcani tnúhu-í núú-n sã ñi sahní-yu cue tēe càhá<sup>n</sup> tnúhu-n, te ní dátñànú-yu núú xihí quiti ndùu tànhú-n, te yúhú-nã ní cácu-í ndécù-í dico nànducu ñahă-yu chi tñahá-í cuiní-yu cahni ñáhă-yu xii-í”, duha ní xáha<sup>n</sup>-dē xii Yă Ndiöxí. <sup>4</sup> Te Yă Ndiöxí ní xáha<sup>n</sup>-gă xii-dé: “Sa ní dáquée ði<sup>n</sup>-í úsá m̄l cue tēe cùu cuendá-í, te ñá túú nèhe-güedé sá yíñùhu núú Bàál sá càchí-yu cùu ndiöxí-yu te ñá ndàá sá ndiöxí cúú-xí”, duha ní xáha<sup>n</sup>-gă xii té Èliás. <sup>5</sup> Te duca<sup>n</sup> sãtnahă-xi cùu vitna chi xindecu ñáyiú ní cáhá<sup>n</sup>-gá ní chitnahă ñáhă xii-gá, te duca<sup>n</sup> ñi quide-gá chi ní cundàhú iní ñáhă-gă xii-yu. <sup>6</sup> Te duca<sup>n</sup> ñi cáhá<sup>n</sup> ñáhă-gă

xii-yu sá cundàhú iní ñáhă-gă, te ñá ðíú cuendá ði<sup>n</sup> chiu<sup>n</sup> quidé-yu duca<sup>n</sup> ní cáhá<sup>n</sup> ñáhă-gă xii-yu, chi núu ðicó cuendá ði<sup>n</sup> chiu<sup>n</sup> quidé-yu duca<sup>n</sup> ní cáhá<sup>n</sup> ñáhă-gă xii-yu ña, te ñá ðíú-gă sá cúú iní mēé-gă duca<sup>n</sup> ní cáhá<sup>n</sup> ñáhă-gă xii-yu te núu duca<sup>n</sup>.

<sup>7</sup> Te na càchí tnúhu-í xii-ndo nàcuáa cùu vitna sá ñáyiú isràél cuiní-yu cudíú-yu núú Yă Ndiöxí dico ñá ndácü-yu, dico dava ñáyiú ní cáhá<sup>n</sup>-gá ñáyiú-á<sup>n</sup> cudíú-yu núú-gă, te ñáyiú duca<sup>n</sup> ñà túú cùu núú-gă-á<sup>n</sup> ío ní cuu sàá iní-yu núú-gă. <sup>8</sup> Te ní quee ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi: “Yă Ndiöxí ní cachí-gá sá cúú-yu ñáyiú ío ñi ðiquí-xi, chi cuèi ndèhé-yu nàcuáa càhá<sup>n</sup> tnúhu-gá dico ñá cùtnùní iní-yu nàcuáa càhá<sup>n</sup>-xi, te cuèi ndèdòho-yu dico ñá túú quèe ðiquí-yu, te duca<sup>n</sup>-ni quidé-yu ndéé vitna”, duha càchí-xi núú tütú-gá. <sup>9</sup> Te ndíi Dàvií ní cachí ndíi:

Ñáyiú ío váha ndècu te cùdí iní-yu quidé-yu vico,

dico yáha-yu dátñá yáha ði<sup>n</sup> quiti ngáva trampá àdi ði<sup>n</sup> quiti ñá cùtnùní iní-xi quée xití ñunu,

chi cuíta nihnú-yu te nacháhu-yu nchaa sá quidē-yu.

<sup>10</sup> Te cúú-yu ñáyiú ñá túú vèdana tècú tñùní, te cùu tucú-yu dátñá ði<sup>n</sup> ñáyiú ío ndòho nchido ði<sup>n</sup> sá vèe.

Duha ní cachí ndíi Dàvií.

*Ñáyiú ñá túú cùu ñáyiú isràél naníhí tànhú-yu*

<sup>11</sup> Te cuèi duca<sup>n</sup> dico vá càchí-ó sã sá dúcá<sup>n</sup> ñá túú ní quide ndáá ñáyiú isràél te ní xíta nihnu duú<sup>n</sup>-yu, te ñáhă chi sá dúcá<sup>n</sup> ñi quidé-yu te ní ngúndecu ndi<sup>hi</sup> dava-gă ñáyiú tnúhu sá càhá<sup>n</sup> nàcuáa naníhí tànhú-yu, te ñáyiú isràél quiní-yu nàcuáa naníhí tànhú ñáyiú ñá túú cùu ñáyiú isràél, te tñahă-yu cudí iní-yu naníhí tànhú-yu.

<sup>12</sup> Te sá dúcá<sup>n</sup> ñi quide sàá iní-yu ñá túú ní quide ndáá-yu núú Yă Ndiöxí, te xíá<sup>n</sup> ní cuu-xi ði<sup>n</sup> sá vãha sá cúú-xí ñáyiú nihí ñuyíú, dico sàá nduu te cada ñáyiú isràél nchaa nàcuáa càhá<sup>n</sup>

Yă Ndiöxí, te dàvá-á<sup>n</sup> ïo-gá váha cuu xii nchaa ñáyiú nihi ñuyíú.

13 Te nchòhó ñáyiú ñá túú cùu ñáyiú isràél cächí tnúhu-í xii-ndo sá Yă Ndiöxí ní cachí-gá sá cãhá<sup>n</sup>-í tnúhu-gá núú-ndó, te yúhú cächí-í sá ïo cãhnu cuu chiu<sup>n</sup> quide-í. 14 Te duha cãhá<sup>n</sup>-í cuendá sá ñu cudana ïo dava ñáyiú cùu ndi mee-í cudí<sup>n</sup> iní-yu cada váha ñaha Yă Ndiöxí xii-yu dàtná quidé váha ñaha-gã xii-ndo, te naníhí tàhú-yu. 15 Te sá cuendá sá ñi quee tíhú ñáyiú isràél ní nacáhá<sup>n</sup> cáhnú iní tnáhá ñáyiú nihi ñuyíú ndihí Yă Ndiöxí, dico na sáá nduu núcúndecu váha ñáyiú isràél ndihí Yă Ndiöxí, te ïo-gá váha tnahá ñáyiú nihi ñuyíú, te ñáyiú-á<sup>n</sup> cada iní-ó sá cúú-yu dàtná ñáyiú ní xihí, dico dàvá-á<sup>n</sup> cada tucu iní-ó sá cúú-yu dàtná ñáyiú ní ndoto chi núcúndecu váha-yu ndihí-gá. 16 Te núu sá lúhá-ní ñ<sup>n</sup> tílúú yusa<sup>n</sup> cãváha te ñu-ni duca<sup>n</sup> cãváha nihi. Te núu cãváha yóho ñ<sup>n</sup> yutnu te ñu-ni duca<sup>n</sup> cãváha-xi nihi-xi. Te ñu-ni duca<sup>n</sup> sãtnahá-xi cùu ñáyiú isràél, chi ñani tnáhã-yu ní xindecu ndéé sanaha ñi cuú-yu ñáyiú ní cuu cuendá ñáhá Yă Ndiöxí, te ñu-ni duca<sup>n</sup> cùu cuendá ñáhá-gã xii mèé-yu ndéé vitna.

17 Te ïo ñ<sup>n</sup> yutnu váha nani olívú, te dava dité yutnu-á<sup>n</sup> ñi téhndé te ní nucódó dité yutnu òlívú cùtexínu, te mee-ñá yutnu òlívú váha-á<sup>n</sup> ïo váha quide-xi nchito dité yutnu òlívú cùtexínu-á<sup>n</sup>. Te dité nchaa yutnu òlívú váha-á<sup>n</sup> cúú-xí dàtná ñáyiú isràél, te nchaa dité-xi sá ñi téhndé-á<sup>n</sup> cúú-xí ñu-ni ñáyiú isràél ñáyiú ñá túú tnáhá tnúhu ndihí Yă Ndiöxí. Te dité yutnu òlívú cùtexínu sá ñi nucódó tnáhá-á<sup>n</sup> cúú-xí dàtná ñáyiú ñá túú cùu ñáyiú isràél tnáhá tnúhu ndihí Yă Ndiöxí. 18 Te vá cání iní-ndó sá sá dúcá<sup>n</sup> ndècu váha-ndo ndihí Yă Ndiöxí te ïo cùnuu-ndo dacúxí ñáyiú isràél, te vá dúcá<sup>n</sup> càni iní-ndó chi sá cuendá nchaa ñani tnáhá ñáyiú isràél ní xindecu ndéé sanaha duca<sup>n</sup> ndècu váha-ndo ndihí Yă Ndiöxí vitna, te ñá díú sá cuendá nchòhó ndécú ndihí váha ñáyiú-á<sup>n</sup> Yă Ndiöxí vitna.

19 Te cudana sàni iní-ndó te cächí-ndó sá ñáyiú isràél ní quee tíhú-yu cuendá sá nchòhó nucuíñí-ndó ñu-yu núcúndecu váha-ndo ndihí Yă Ndiöxí. 20 Te ndáá sá ñi quee tíhú-yu chi ñá túú ní sãndáá iní ñáhã-yu xii-gá, te nchòhó ïo váha cùu ndecu-ndo ndihí-gá chi ní sãndáá iní-ndó-gã, dico vá cächí-ndó sá ïo cãhnu cuu-ndo, te ïo váha chí cuãha cuendá nacuáa cundecu-ndo. 21 Te cue ñáyiú isràél cúú-yu ñáyiú cùu cuendá-gá ní cùu te ní dáquéé tíhú ñáhã-gã xii-yu cuendá sá ñá túú ní sãndáá iní ñáhã-yu xii-gá, te tnáhã nchòhó daquéè tíhú ñáhã-gã xii-ndo te núu na càda-ndo datná ní quide ñáyiú-á<sup>n</sup>. 22 Te chí cádá cuendá sá Yă Ndiöxí ïo váha iní-gá, dico cùdéé<sup>n</sup>-gã núú nchaa ñáyiú ñá túú sãndáá iní ñáhã xii-gá, dico sá cúú-xí nchòhó cue ñáyiú sãndáá iní ñáhã xii-gá chí ïo váha iní-gá. Te duca<sup>n</sup>-ni cùnduu váha iní-gá sá cúú-xí-ndó te núu vá dáñá ndéé-ndó càda-ndo nacuáa cãhá<sup>n</sup>-gã cuendá sá ïo váha iní-gá, te núu ñáhã te tnáhã nchòhó quee tíhú-ndó dàtná ní quee tíhú ñáyiú isràél, ñáyiú ñá túú ní sãndáá iní ñáhã xii-gá. 23 Dico núu ñáyiú isràél ñáyiú ní dáquéé tíhú ñáhã Yă Ndiöxí quíndáá iní ñáhã-yu xii-gá te nduu cuendá ñáhã tucu-gá xii-yu, te ñáyiú-á<sup>n</sup> cúú-yu dàtná dava dité yutnu òlívú sá ñi téhndé te ní nucódó tnáhã tucu. Te duca<sup>n</sup> sãtnahá-xi cùu-yu te núu na quíndáá iní ñáhã-yu xii-gá. 24 Te nchòhó cúú-ndó dàtná nchaa dité yutnu òlívú cùtexínu, chí ñá díú ñáyiú isràél cúú-ndó, te dité nchaa yutnu òlívú cùtexínu-á<sup>n</sup> ñi nucódó-xi núú dité yutnu òlívú váha-á<sup>n</sup>. Te yáchí-gá núcúndecu váha ñáyiú isràél ndihí Yă Ndiöxí, chí cùu-yu dàtná nchaa dité yutnu òlívú váha sá ñi téhndé te ní nucódó tnáhã tucu. Te duca<sup>n</sup> sãtnahá-xi cùu-yu te núu na quíndáá iní ñáhã-yu xii-gá.

*Sáá nduu te naníhí tàhú ñáyiú isràél*

25 Te nchòhó ñáyiú ndècu ndihí-í ichi Xítóhó Jesucristú, na cächí tnúhu-í



xii-ndo ì<sup>n</sup> tnúhu ndùu yuhu ni cuu, cuendá sá vǎ cání ìní-ndó sǎ ìo-gá váha sǎá díquí-ndó dàcúúxí ñǎyiu isràél, chi dava ñáyiu isràél cúú sǎá ìní-yu núú Yǎ Ndiòxí ñini na ndìhi ñáyiu ní cachí Yǎ Ndiòxí ngúndecu váha ndìhi ñáhá-yu xii-gá, ñáyiu ñá túú cùu ñáyiu isràél. <sup>26</sup> Te nduu na ndìhi ñáyiu-á<sup>n</sup> ngúndecu váha-yu ndìhi Yá Ndiòxí, te dǎvá-á<sup>n</sup> naníhí tàhú ñáyiu isràél chi quee ndáá-xi nàcuáa càhá<sup>n</sup> Yǎ Ndiòxí núú tütú-gá núú càchí-xi:

Ndàa ñuú Sìón quixi Yaá cada naníhí tàhú nchaa ñáyiu,

te ñu-ni Yaá-á<sup>n</sup> cada-gá cuendá sá dáñá nchaa ñáyiu isràél ichi cuèhé ichi duha.

<sup>27</sup> Te yúhú cada càhnu ìní-í nchaa cuèchi ñáyiu isràél, chi cada-í dàtná ní cachí-í ndéé sanaha.

Duha càchí Yǎ Ndiòxí núú tütú-gá.

<sup>28</sup> Te sá cuendá tnúhu sá càhá<sup>n</sup> nàcuáa naníhí tàhú-ó xǎ<sup>n</sup> cúú ùhú ìní ñáyiu isràél Yǎ Ndiòxí, te sá dúcá<sup>n</sup> quidé-yu xǎ<sup>n</sup> nchòhó ní níhí-ndó tnúhu sá càhá<sup>n</sup> nàcuáa naníhí tàhú-ndó. Te ní cachí Yǎ Ndiòxí sá ñáyiu isràél cuu cuendá-gá, te cùu ìní ñáhá-ní-gǎ xií-yu, te duca<sup>n</sup> quide-gá chi duca<sup>n</sup> ñí xáha<sup>n</sup>-gǎ xii cue ñani tnáhǎ-yu ní xíndecu ndéé sanaha.

<sup>29</sup> Te Yá Ndiòxí ñá túú ndùu ùhú ìní-gá ì<sup>n</sup> sá táxí-gǎ, te ni ñá túú ndìxi cuèchi ìní-gá sá càhá<sup>n</sup> ñáhá-gǎ xii-o. <sup>30</sup> Te nchòhó chi ñá túú sàndáá ìní-ndó Yǎ Ndiòxí ní cùu, dico vitna ñini ñá túú sàndáá ìní ñáhá ñáyiu isràél xii-gá, te ní cundàhú ìní ñáhá-gǎ ní dácácu nihnu ñaha-gǎ xii-ndo núú ùhú núú ndàhú. <sup>31</sup> Te vitna quidé-yu dàtná ní xóo cada nchòhó cùtnàhá ñá túú ní xóo quindáá ìní-ndó-gǎ. Dico sáá nduu te natuha ñáhá-yu xii-gá te dácácu nihnu ñaha-gǎ xií-yu sá cundàhú ìní ñáhá-gǎ dàtná ní quide ñaha-gǎ xii nchòhó. <sup>32</sup> Te Yá Ndiòxí ní dáñá-gǎ sá dúcá<sup>n</sup> cùnduu saá ìní nchaa ñáyiu cuendá cuìní-gá cundàhú ìní ñáhá-gǎ xií-yu.

<sup>33</sup> Te súúní vǎha quide ñaha Yá Ndiòxí xii-o, te ío váha xíní-gá nchaa cuèi sá ío andiu te cuèi sá ío ñuyíú-a,

te duca<sup>n</sup> ìo váha sǎá nchaa sá xíní tnúní-gá. Te ñá ndácú-ó cùtnuní ìní-ó ñá cúú nchaa sá sání ìní-gá cada-gá, te ni ñá ndácú-ó cùtnuní ìní-ó nàcuáa ndùu cuendá nchaa sá quidé-gǎ.

<sup>34</sup> Te núú tütú-gá càchí-xi: “Vá yóo ì<sup>n</sup> cùtnuní ìní-xi nàcuáa sání ìní Yǎ Ndiòxí, te ni vǎ yóo ì<sup>n</sup> ndàcu dacahu ìní ñáhá xii-gá nàcuáa càhá<sup>n</sup>-gá. <sup>35</sup> Te Yá Ndiòxí ñá túú quide yica ìní-gá cada-gá sá vǎha sá cúú-xi ñáyiu cuendá ì<sup>n</sup> sá sǎñáhá-yu xii-gá chi ñá túú dùca<sup>n</sup> quide-gǎ”, duha càchí-xi núú tütú-gá. <sup>36</sup> Te duca<sup>n</sup> chi mee Yǎ Ndiòxí ní taxi ndecu-gá nchaandi túhú sá ío ñuyíú, te ñu-ni mee-gǎ táxí tnúní-gá nchaa sá ñí taxi ndecu-gá, te nchaa cùu-xi cuendá-gá. Te vitna chí ná càchí-ó sǎ ìo càhnu cuu-gá ni caa ni quíhí<sup>n</sup>. Te duca<sup>n</sup> na cùnduu.

## 12

### *Cada-o nàcuáa nduu vétú ìní Yǎ Ndiòxí*

<sup>1</sup> Te vitna nchòhó ñáyiu ndècu ndìhi-í ichi Xítóhó Jesucristú càchí tnúhu-í xii-ndo sǎ Yǎ Ndiòxí cundàhú ìní ñáhá-gǎ xii-o chindee ñaha-gá, núú xǎ<sup>n</sup> càhá<sup>n</sup> ndàhú-í núú-ndó sǎ dáñá-ndó mèe-ndo núú ndáhá-gǎ, te cada ìní-ndó sǎ cúú-ndó dàtná ì<sup>n</sup> tàhú sǎ nchító-ó ñí nduu tàhú-gǎ. Te cuu-ndo ñáyiu váha ñáyiu cada nchaa nàcuáa nduu vétú ìní Yǎ Ndiòxí chi duca<sup>n</sup> tàú-ndó càda-ndo sá cúú-xi-gǎ.

<sup>2</sup> Te vá cànchìcú<sup>n</sup> nihnu-gá-ndó càda-ndo datná xíquide nchaa ñáyiu ndècu ichi cuehé ichi duha ndècu ñuyíú-a, te vá cúhú<sup>n</sup>-gǎ ìní-ndó ìchi cuehé ichi duha-á<sup>n</sup>, chi mee-nǎ sá váha cuhu<sup>n</sup> ìní-ndó, te duca<sup>n</sup> te cùtnuní ìní-ndó nchaa nàcuáa cuìní Yǎ Ndiòxí cada-ndo, te nchaa sá cuìní-gá cada-ndo cùu-xi mee-ni sá vǎha, sá ìo váha ndùu vétú ìní-gá, te cùu-xi nchaa sá xíní ñuhu-xi cada-ndo núú-gǎ.

<sup>3</sup> Te sá cuendá chiú<sup>n</sup> ní cundàhú ìní ñáhá Yǎ Ndiòxí ní taxi-gá xii-í xǎ<sup>n</sup> núu na càhá<sup>n</sup>-í dóho-ndo vitna: Vá cání ìní-ndó ì<sup>n</sup> sá ñá túú tàú-ndó càni ìní-ndó te cucaha<sup>n</sup>-ndo sǎ ìo càhnu cuu-ndo. Te nchòhó ní sàndáá ìní-ndó Yǎ Ndiòxí núu chindee ñaha-gá

xii-ndo, te vitna chí cuãha cuendá nũu ná daha núu chiũn-gá ndacu-ndo càda-ndo. <sup>4</sup> Te nchoo titní xichi cùu yiqui cuñú-ó, te ndi díĩn ndi díĩn chiũn quide-xi ñn ñn-xi. <sup>5</sup> Te duca<sup>n</sup> sãtnahá tucu-xi cùu nchoo ñáyiu ndècu ndihi Xítohó Jesucristú chi cuẽi ná daha tnàhá-ó dico ñn-ni cùu-o ndihi-gá, te duca<sup>n</sup> mèe-o tucu ñn-ni cùu-o.

<sup>6</sup> Te mee Yã Ndiõxí ní cundàhú iní ñáhá-gã xii-o ñi taxi-gá chiũn taú-ó càda-o ñn ñn-o te chindee ñaha-gá xii-o, te xini ñuhu-xi cada-o nacuaá ndũu chiũn ní taxi-gá cada-o. Te núu ní nduu táhú-ó nũu-gã sá càhá<sup>n</sup>-ó tnũhu sá dácàhu iní ñáhá mèe-gá xii-o te càhá<sup>n</sup>-ó nàcuáa sãndáá iní-ó chindee ñaha-gá xii-o, <sup>7</sup> àdi ní nduu táhú-ó nũu-gã sá ïo váha chindee-o tnàha ñáyiu-o te ñiu-ni duca<sup>n</sup> càda-o, àdi ní nduu táhú-ó dãnehé-ó ñáyiu tnũhu-gá te ñiu-ni duca<sup>n</sup> càda-o, <sup>8</sup> àdi ní nduu táhú-ó nũu-gã sá dácàhá<sup>n</sup>-ó ñáyiu canchicú<sup>n</sup> nihnú-yu ichi-gá te ñiu-ni duca<sup>n</sup> càda-o, àdi ní nduu táhú-ó nũu-gã sá cuãñaha-o xii tnaha ñáyiu-o sã ñihí-ó ndècu ndihi-o te ñiu-ni duca<sup>n</sup> càda-o, dico ñi yũhu ñi iní-ó cuãñaha-o xii-yu, àdi ní nduu táhú-ó nũu-gã taxi tnũn-ó te ñiu-ni duca<sup>n</sup> càda-o, te ñi yũhu ñi iní-ó càda-o, àdi ní nduu táhú-ó nũu-gã chindee-o cuè ñáyiu ndècu ndihi tnũndòho tnũhu ndàhú te ñiu-ni duca<sup>n</sup> càda-o, te ïo cudíĩ iní-ó càda-o chiũn-á<sup>n</sup>.

*Nchaa nàcuáa tàú-xi cada nchaa ñáyiu ndècu ichi Xítohó Jesucristú*

<sup>9</sup> Te cuu iní tnáhá ndisa-ndo ñn ñn-ndo, te dañá-ndo nchaa sá cuèhé sá dúhá te cada-ndo mèe-ni sá váha. <sup>10</sup> Te ïo cuu iní tnáhá-ndó, te cada-ndo cuendá sá ñn-ni ñáyiu cùu-ndo, te ñn ñn-ndo càni-gá iní-ndó cànehe yĩñuhu núu tnáhá-ndó.

<sup>11</sup> Te nducu ndèe-ndo cada-ndo nchaa chiũn tahu Xítohó Jesucristú vá tũhío-ndo, te cada-ndo ñi yuhu ñi iní-ndó sã cúu-xi-gã.

<sup>12</sup> Te ïo cudíĩ iní-ndó cundecu-ndo chi ní ngũndecu ndihi-ndo tnũhu ndee iní sá cundècu ndihi-ndo Xítohó Jesucristú, te cada càhnu iní-ndó cuèi nãndi na càda ñaha ñáyiu xii-ndo sã

cuendá-gá, te vá dáñá ndèe-ndó càhá<sup>n</sup> ndihi-ndo Yã Ndiõxí.

<sup>13</sup> Te chindee tnàha-ndo te núu ïo dava nchòhó ñáyiu ndècu ichi-gá ïo ñn sá cúmãní xii-ndo, te ïo váha cuu iní-ndó còto-ndo ñáyiu véxi vehe-ndo.

<sup>14</sup> Te cáca<sup>n</sup> táhú-ndó nũu Yã Ndiõxí cuendá nchaa ñáyiu nãndi quide ñaha xii-ndo, te cáca<sup>n</sup> táhú-ndó nũu-gã sá ná chindee ñaha-gá xii-yu te ñá díú dà cáca<sup>n</sup> táhú-ndó nũu-gã sá ná dàcuíta nihnu ñaha-gã xii-yu.

<sup>15</sup> Te núu ïo ñáyiu cudíĩ iní-xi te cudíĩ iní-ndó ndihí-yu, te núu ïo ñáyiu ndihú iní-xi te ndihú iní-ndó ndihí-yu.

<sup>16</sup> Te cuu ñn-nu-ndo cundecu-ndo, te vá cáda càhnu-ndo mee-ndo, te tnahá tnũhu-ndo ndihi nchaa ñáyiu ndàhú iní-xi, te vá cáni iní-ndó sã ïo-gá túha-ndo.

<sup>17</sup> Te vá nãnchòcáva-ndo nãchinaa-ndo ñn sá quidé ñaha ñáyiu xii-ndo, te ïo nducu ndèe-ndo cada-ndo mee-ni sá váha nàcuáa cuu váha iní ñáyiu.

<sup>18</sup> Te ïo nducu ndèe-ndo cada-ndo sã ndácú-ndó cundecu váha-ndo ndihi nchaa ñáyiu. <sup>19</sup> Te nchòhó ñáyiu ïo cùu iní-í, vá cáni iní-ndó nãchinaa-ndo ñn sá cáda ñaha ñáyiu xii-ndo, chi

cundet-ndo sã mée Yã Ndiõxí ná nãchinaa-gá sá quidé ñáhá-yu xii-ndo, chi quee ndáá-xi nàcuáa càhá<sup>n</sup> Yã Ndiõxí núu tũtú-gá núu càchí-xi: “Yúhú dandòho-í-yu chi nachinaa-í nchaa sá quidè-yu”, duha càchí-gá núu tũtú-gá. <sup>20</sup> Te xini ñuhu tucu-xi cada-ndo nacuaá càhá<sup>n</sup> tucu-xi ingá xichi núu tũtú-gá núu càchí-xi: “Te núu ñáyiu cùu úhú iní ñáhá xii-ndo ñá túú sã cóhó sã cáxí-yu te cuãñaha-ndo xii-yu, te núu duca<sup>n</sup> na càda-ndo te ïo cucaha<sup>n</sup> núu-yu”, duha càchí-xi núu tũtú-gá. <sup>21</sup> Te núu ïo ñn sá quidé ñaha tnaha ñáyiu-ndo xii-ndo te vá nãnchòcáva-ndo nãchinaa-ndo sã quidé ñáhá-yu xii-ndo, chi cada-ndo sã váha sã cúu-xi-yu, te duca<sup>n</sup> te vá cáda-ndó sã ñà túú taú-ndó càda-ndo núu Yã Ndiõxí dàtná quidé-yu.

## 13

<sup>1</sup> Te nchaa ñáyiu tàú-yu quindáá

iní-yu nchaa cue tée cùchiu<sup>n</sup>, chi Yá Ndiöxí ní cachí-gá sá cùndècu tée cùchiu<sup>n</sup> ñuyú-a, núu xiá<sup>n</sup> xñdecu-güedé vitna. <sup>2</sup> Te nchaa ñáyiú ñá túú sàndáá iní ñáhá xii cue tée cùchiu<sup>n</sup> ñá túú tnàhá iní Yá Ndiöxí sá dúcá<sup>n</sup> quidé-yu, chi mee-gã ní cachí-gá sá cùndècu-güedé. Te nchaa ñáyiú duca<sup>n</sup> ñá túú sàndáá iní ñáhá xii cue tée cùchiu<sup>n</sup> nacháhu-yu sá dúcá<sup>n</sup> quidé-yu. <sup>3</sup> Te nchaa ñáyiú quide váha ñá túú yuhú-yu cue tée cùchiu<sup>n</sup> chi quide váha-yu, dico nchaa ñáyiú ñá túú quide váha chi xiyuhú-yu cue tée cùchiu<sup>n</sup>. Te vitna núu nchòhó cuiní-ndó sã vá yuhú-ndó cuè tée cùchiu<sup>n</sup> te chí cádá váha, te duca<sup>n</sup> te cáhá<sup>n</sup> váha-güedé cuendá-ndó. <sup>4</sup> Te Yá Ndiöxí duca<sup>n</sup> ñí cachí-gá cundecu-güedé cuendá cada-güedé sá ñá túú nã cuu cundecu-ndo, te núu ñá túú quide váha-ndo ndècu-ndo te quiyuhú iní-ndó núú-güedé, chi ñá túú àú<sup>n</sup> nã cuu ndècu ndihi-güedé tnúhu ndee iní dandòho-güedé nchaa ñáyiú ñá túú quide váha, chi Yá Ndiöxí duca<sup>n</sup> ñí cachí-gá cundecu-güedé sá dúcá<sup>n</sup> càda-güedé dandòho-güedé nchaa ñáyiú ñá túú quide váha. <sup>5</sup> Núu xiá<sup>n</sup> ío xini ñuhu-xi sá quindáá iní-ndó nchàa cue tée cùchiu<sup>n</sup>, te ñá díú sã yuhú-ndó dandòho ñaha-güedé xii-ndo, chi cada-ndo sã cùtnùní iní-ndó sã cúú-xí ñí<sup>n</sup> sá váha. <sup>6</sup> Chi díu cuendá xiá<sup>n</sup> sàcá<sup>n</sup>-ndó díhú<sup>n</sup> núú cuè tée cùchiu<sup>n</sup>, te duca<sup>n</sup> chi Yá Ndiöxí duca<sup>n</sup> ñí cachí-gá cundecu-güedé te díu-ná chiu<sup>n</sup> ndeé-güedé ñíhú iní-güedé.

<sup>7</sup> Te nacháhu-ndo nchàa sá tàú-ndó núú nchàa ñáyiú tàú-ndó núú-xi, te cuèi díhú<sup>n</sup> tàú-ndó cuendá ñuhu-ndo núú cuè tée cùchiu<sup>n</sup> àdi nágá díhú<sup>n</sup> tàú-ndó núú-güedé te nacháhu-ndo núú-güedé. Te ío-gá canehe-ndo sã yíñuhu núú nchàa ñáyiú cùnuu, te cáhá<sup>n</sup> váha-ndo ndihí-yu. <sup>8</sup> Te vá dácúidó-ndó ndùu nacháhu-ndo sã tàú-ndó núú tnàhá ñáyiú-ndo, te cuu iní tnàhá-ndó ñí<sup>n</sup> ñí<sup>n</sup>-ndo. Te núu duca<sup>n</sup> quide-ndo ndecu-ndo ña, te quide-ndo nchaa nacuaá càhá<sup>n</sup> tnúhu

sá sánú ìchi ñaha xii-o nacuaá cada-o cùndecu-o. <sup>9</sup> Te duha ndùu tnúhu càhá<sup>n</sup> Yá Ndiöxí cuendá nchaa sá vá cúú càda-o: “Nchaa nchòhó cue tée vá càhá<sup>n</sup> ndihi-ndo ñáyiú díhí te núu ñá díú ñàdihí-ndó cùú-yu, te duca<sup>n</sup>-ni nchàa nchòhó cue ñáyiú díhí tucu vá càhá<sup>n</sup> ndihi-ndo tée te núu ñá díú yí-ndo cuu-güedé, te vá cáhni-ndó tnàhá ñáyiú-ndo, te vá dúhú-ndó sã ndécú ndihí-yu, te vá dácàcu-ndo cuèchi neñúú, te vá xíhó-ndó sã ndécú ndihí tnàhá ñáyiú-ndo”, nchaa xéhe càhí Yá Ndiöxí sá vá cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuaá cada-o cùndecu-o, te núu quide-o ingá tnúhu sá càhí-xi: “Cuu iní-ndó nchàa tnàhá ñáyiú-ndo dàtná cúú iní-ndó mèe-ndo”, duha càhá<sup>n</sup> tnúhu-á<sup>n</sup>. Te nchaa dava-gá quidé-ó te núu quide-o nacuaá càhá<sup>n</sup> tnúhu-a. <sup>10</sup> Te nchaa ñáyiú cùu iní tnàhá ñáyiú-xi te ñá túú quide úhú iní-yu tnàhá ñáyiú-yu, te núu duca<sup>n</sup> cùu iní-yu tnàhá ñáyiú-yu te quidé-yu nacuaá càhá<sup>n</sup> tnúhu sá sánú ìchi ñaha xii-o nacuaá cada-o cùndecu-o.

<sup>11</sup> Te duca<sup>n</sup> xini ñuhu-xi cada-ndo chi sa ní cutnùní iní-ndó nacuaá ta xica nduu cuahá<sup>n</sup> ñuyú-a, te ní sáá nduu sá ío xini ñuhu-xi ndixi túu iní-ó càda-o nchaa nacuaá càhá<sup>n</sup> Yá Ndiöxí, chi vitna sa ní cuyatni-gá nduu nacuaa ñaha Xítohó Jesucristú xii-o dácúúxí ndeé cùtnàhá ní sàndáá iní-ó tnúhu-gá. <sup>12</sup> Te cada iní-ndó sã dàtná ñí<sup>n</sup> niú sá sã ta cuyatni túndaá, duca<sup>n</sup> sãtnahá-xi cùu ñuyú yíca cuèchi-a chi sa ta cùyatni nduu quixi tucu Xítohó Jesucristú, te núu xiá<sup>n</sup> xini ñuhu-xi dañ-a-o nchaa sá cuèhé sá dúhá te cada-o mèe-ni sá váha, te duca<sup>n</sup> te ni ñí<sup>n</sup> sá cuèhé sá dúhá vá cùnùu-xi taxi tnuní ñáhá-xí xii-o, te duca<sup>n</sup> te vá cúú-gã-ó dàtná ñáyiú ndècu núú néé chi cuu-ná-ó dàtná ñáyiú ndècu núú ditó. <sup>13</sup> Te cada-o nchàa nacuaá tàú-xi cunduu cundecu-o dàtná tàú-xi cada ñáyiú ndècu ichi Xítohó Jesucristú, te vá quíhí<sup>n</sup>-ó víco cuèhé víco duha, te vá cúú-ó ñáyiú quihu, te ni vá càhá<sup>n</sup> ndihi-o ñáyiú díhí te núu ñá

díú ñàdihí-ó cùú-yu, te duca<sup>n</sup>-ni cuè ñáiyu dñí tucu vá càhá<sup>n</sup> ndihí-yu téé te núu ñá díú yñ-yu cùu-güedé, te ni vǎ cùndècu-o ichi dñí ìní, te ni vǎ nàá-ó ndihí tñaha ñáiyu-o, te ni vǎ cúú-ó ñáiyu cuédú ìní. <sup>14</sup> Te vitna nchòhó dañà-ndo mée-ndo sǎ Xítohó Jesucristú ná chindee ñaha-gǎ xii-ndo càda váha-ndo cùndecu-ndo datná quidé mée-gǎ ndécú-gǎ, te vá cáni-gǎ ìní-ndó càda-ndo datná ní xóo cada-ndo cùtnàhá ní cunuu nchàa sǎ cuèhé sǎ dúhá ìní-ndó.

## 14

*Vá cuátnùhu tñaha-o nacuaa ndècu-o ichi Xítohó Jesucristú*

<sup>1</sup> Te núu ñáiyu ndècu ichi Xítohó Jesucristú ñá túú tècú tñuní váha-yu nàcuáa cuñí Yǎ Ndiöxí cadá-yu, te quehe<sup>n</sup> cuendá-ni-ndö-yu te vá ténàá tñahá-ndó ndihí-yu. <sup>2</sup> Chi lò ñáiyu sàni ìní sǎ cúú vǎha ìní Yǎ Ndiöxí sǎ cúú càxí-yu nání nìhí-yu, te dava ñáiyu ñá túú cùtnuní váha ìní-yu nàcuáa càhá<sup>n</sup> Yǎ Ndiöxí te mee-ni yúcú xéxí-yu. <sup>3</sup> Te ñáiyu xèxi nchaa núú sǎ nìhí-yu te vá dáquèe tíhù-yu ñáiyu ñá túú xèxi, te duca<sup>n</sup>-ni ñáiyu duca<sup>n</sup> ñà túú xèxi-án vǎ cuátnùhù-yu nchaa ñáiyu duca<sup>n</sup> xèxi nchaa núú sǎ nìhí-xi-án, chi tñahá ñáiyu duca<sup>n</sup> xèxi nchaa núú sǎ nìhí-xi-án quèhé<sup>n</sup> cuendá ñahá Yǎ Ndiöxí xii-yu. <sup>4</sup> Te ñá túú ndècu ndihí-o tñuhu ndee ìní cuatnúhu-o ñáiyu xìnu cuechi, chi mee ñáiyu cùu patród<sup>n</sup>-yu tàù-yu cáhá<sup>n</sup>-yu te núu cùndáá ñáiyu xìnu cuechi núú-yu àdi ñá túú cùndáá-yu. Te duca<sup>n</sup> sǎtnahá-xi cùu ñáiyu xìnu cuechi núú Yǎ Ndiöxí, chi mee-gǎ cáhá<sup>n</sup>-gǎ te núu nása quidé-yu, te ñu-ni mee-gǎ cada te cundáá-yu cundécú-yu núú-gǎ.

<sup>5</sup> Te na càchí tñuhu tucu-í xii-ndo sǎ lò ñáiyu càchí sǎ lò dava nduu ío càhnu cuu-xi, te ío tucu dava ñáiyu càchí-yu sǎ ñá-ni cuu-xi nchaa-ni nduu, te xìni ñuhu-xi sǎ cùtnuní ndáá ìní-yu sǎ ndáá cúú-xi nàcuáa càhá<sup>n</sup>-yu ñá ñá-yu. <sup>6</sup> Te ñáiyu cánehe íi dava nduu quidé-yu sǎ néhè-yu sǎ yíñùhu núú Yǎ

Ndiöxí, te ñáiyu càchí sǎ ñá-ni cùu-xi nchaa-ni nduu quidé-yu sǎ néhè-yu sǎ yíñùhu núú Yǎ Ndiöxí tñahá-yu. Te ñu-ni duca<sup>n</sup> sǎtnahá-xi cùu nchaa ñáiyu xèxi nchaa nání nìhí-yu, chi quidé-yu sǎ néhè-yu sǎ yíñùhu núú Yǎ Ndiöxí, chi ndàcá<sup>n</sup> tǎhù-yu núú-gǎ cuendá nchaa sǎ nìhí-yu. Te ñu-ni duca<sup>n</sup> sǎtnahá-xi cùu nchaa ñáiyu ñá túú xèxi nchaa núú sǎ nchító-ó chi quidé-yu sǎ néhè-yu sǎ yíñùhu núú Yǎ Ndiöxí, te ndàcá<sup>n</sup> tǎhù-yu núú-gǎ cuendá nchaa sǎ nìhí-yu.

<sup>7</sup> Te nchoo cuèi vitna ndècu vívú-ó àdi cuèi na cùú-ó dico ñá díú cuendá mée-ó cùú-ó. <sup>8</sup> Chi vitna ndècu vívú-ó te ndècu-o sǎ cúú-xi Xítohó Jesucristú àdi cuèi na cùú-ó dico cuú-ó ñu-ni sǎ cúú-xi-gǎ, núu xiǎ<sup>n</sup> cuèi vitna ndècu vívú-ó àdi cuèi na cùú-ó dico ñu-ni Xítohó Jesucristú cúú cuendá ñahá-gǎ xii-o. <sup>9</sup> Chi Xítohó Jesucristú ní xihí-gǎ te ní ndoto-gǎ, te vitna cùu-gǎ Xítohó nchaa ñáiyu, cuèi ñáiyu xìndecu vívú te cuèi ñáiyu ní xihí.

<sup>10</sup> Te nchòhó, ñá túú nduu váha-xi cuatnuhu tñaha-ndo nacuaa ndècu-ndo ichi Xítohó Jesucristú, te ni ñà túú nduu váha-xi daquèe tíhù tñahá-ndó, chi nchaa-o sǎá nduu cùndecu-o núú Xítohó Jesucristú, te mee-gǎ cachí-gǎ te núu ní quide ndáá-ó àdi ñá túú ní quide ndáá-ó. <sup>11</sup> Te Yǎ Ndiöxí càchí-gǎ núú tütú-gǎ:

Yúhú Yǎ Ndiöxí ndécú-í càchí tñuhu ndáá-í xii-ndo sǎ nchàa ñáiyu ngüíñí xití-yu núú-í,

te nchaa-yu cáhá<sup>n</sup>-yu sǎ yúhú cùu-í Ndiöxí.

Duha càchí Yǎ Ndiöxí núú tütú-gǎ.

<sup>12</sup> Núu xiǎ<sup>n</sup> nchaa-o ndi dñí nàcani tñuhu-o núú Yǎ Ndiöxí nchaa sǎ ní quide-o.

*Vá dácuíta nihnu tñaha-o*

<sup>13</sup> Núu xiǎ<sup>n</sup> vá cuátnùhu tñaha-gǎ-ndó, te cada yica-ndo càda-ndo mee-ni sǎ váha, te vá cadá-ndó ñá sǎ ñà túú tàù-ndó càda-ndo cuendá sǎ vǎ cuíta nihnu dava ñáiyu ndècu ndihí-ndo ichi Xítohó Jesucristú. <sup>14</sup> Te yúhú ndécú ndihí-í Xítohó Jesucristú te cùtnuní ndáá ìní-í sǎ nchàá núú sǎ



cúu càxi-o cuu-ni caxi-o te vá cúu cuéchi. Te ñáyiú sàni iní sá vá cúu càxí-yu te núu na càxí-yu te cuu cuéchi xii-yu. <sup>15</sup> Te nchòhó, te núu cuèndá sá xéxí-ndó nchàa núú sá cúu càxi-ndo, cuèndá xiǎ<sup>n</sup> ñá túú-gǎ cúu váha iní nchaa ñáyiú ndècu ndìhi-ndo ichi Xítóhó Jesucristú, te ñá túú-gǎ quidé-ndó sá cúu ìní ndisa-ndò-yu te núu duca<sup>n</sup> na càda-ndo, te núu ì<sup>n</sup> sá sání ìní-ndó càxi-ndo te cùtnuní ìní-ndó sá xiǎ<sup>n</sup> cada-xi cuíta nihnu ñáyiú ndècu ndìhi-ndo ichi Xítóhó Jesucristú te vá caxí-ndó xiǎ<sup>n</sup> te núu duca<sup>n</sup>, chi Xítóhó Jesucristú ní xíhí-gá cuèndá-yu. <sup>16</sup> Te núu ì<sup>n</sup> sá quidé-ndó sàni ìní-ndó sá cúu-xí ì<sup>n</sup> sá váha, te ñáyiú càchí-yu sá ñà túú váha te vá cáda-ndó cuèndá sá vá càhá<sup>n</sup> cuèhé-yu cuèndá-ndó. <sup>17</sup> Te sá yíndàha ñaha Yá Ndiòxí xii-o xiǎ<sup>n</sup> ío xini ñuhu-xi cada ndáá-ó cùndecu-o, te cundecu váha ndìhi tnàha-o, te cudí<sup>í</sup> ìní-ó cùndecu-o chi Espiritú-gá ndécú ndìhi ñaha-xi xii-o, te nchaa xéhé ío-gá cúnùu dacúxí sá cóhó sá caxí-ó. <sup>18</sup> Te nchaa ñáyiú duca<sup>n</sup> quide nchaa sá ío-gá xini ñuhu-xi, xinu cuechí-yu núú Xítóhó Jesucristú, te sá dúcá<sup>n</sup> quidé-yu te ndùu vétú iní Yá Ndiòxí, te cùdíu-yu núú ñáyiú.

<sup>19</sup> Te nchoo chí ná ndùcu-o nacuaá cada-o cùndecu ndìhi váha tnàha-o, te nducu tùcu-o nacuaá cada-o chindee tnùhu tnàha-o nacuaá cuíta cundáá-gá-ó núú Xítóhó Jesucristú quíhí<sup>n</sup>. <sup>20</sup> Te ñá díú sá cuèndá ì<sup>n</sup> núú sá xéxí-ó, te dàquee tíhú-ó sá váha ní quide ñaha Yá Ndiòxí xii tnàha ñáyiú-o. Te na càchí tnùhu ndáá-í xii-ndo sá ncháá-ní núú sá cúu càxi-o, te dícó-ni sá ñà túú ndùu váha-xi núú sá cuèndá-ni sá caxí-ó ì<sup>n</sup> núú sá cúu càxi-o cuíta nihnu ì<sup>n</sup> tnàha ñáyiú-o. <sup>21</sup> Te váha-gá sá vá caxí-ó cúnú te vá cóhó ndídí, te ni ñà túú nǎgá cada-o te núu xito-o sá xiǎ<sup>n</sup> cada te ngúíta tnàha ñáyiú-o càda-yu sá ñà túú váha, àdi xito-o sá xiǎ<sup>n</sup> cada te ngúíta-yu cani ì<sup>n</sup> cani úú ìní-yu cundecú-yu ichi Xítóhó Jesucristú, te vá cundáá-gá-yu núú-gǎ te núu duca<sup>n</sup> na càda-o. <sup>22</sup> Te núu ì<sup>n</sup> sá váha sàni ìní-ó càda-o, te vá

dátüu-o núú ñáyiú chi mee-ni núú Yá Ndiòxí dàtúu-o. Te nchoo cùu-o ñáyiú ío váha táhú-xi te núu cùtnuní ndáá ìní-ó sá quidé ndáá-ó núu nándi cùu sá quidé-ó, te cùtnuní ìní-ó sá ñà díú ì<sup>n</sup> cuéchi cùu-xi sá quidé-ó. <sup>23</sup> Te núu nchoo sàni ìní-ó sá quidé váha-o àdi ñá túú quide váha-o òré xéxí-ó ì<sup>n</sup> núú sá xéxí-ó, te cuu cuéchi xii-o te núu duca<sup>n</sup> na càda-o, Te duca<sup>n</sup> cùu cuéchi xii-o chi ñá túú ì<sup>n</sup>-ni sá sání ìní-ó, chi nchaa núú sá quidé-ó sàni ì<sup>n</sup> sání úú ìní-ó núu váha-ni àdi ñá túú váha-ni, te cuu cuéchi xii-o sá dúcá<sup>n</sup> quide-o.

## 15

*Cada-o sá váha sá cúu-xí tnàha ñáyiú-o*

<sup>1</sup> Te nchoo ñáyiú ío váha sàndáá ìní ñáhá xii Xítóhó Jesucristú, xini ñuhu-xi cuáñaha-o tnùhu ndee ìní xii ñáyiú ñá túú nihí ndéé cùndecu ichi-gá, te vá cáda-ó mée-ni sá cúu-xí mée-o. <sup>2</sup> Te cada-o sá váha nàcuáa cuu váha ìní tnàha ñáyiú-o cuèndá cuu-xi sá váha sá cúu-xí-yu, te duca<sup>n</sup> cuíta nihí ndéé-gá-yu quindáá ìní-yu Xítóhó Jesucristú. <sup>3</sup> Te Xítóhó Jesucristú ñá túú ní quide-gá mee-ni sá cúu váha ìní mée-gǎ, te ní quee ndáá-xi nàcuáa càhá<sup>n</sup>-xi núú tùtú Yá Ndiòxí nàcuáa ní xáha<sup>n</sup> Xítóhó Jesucristú xii-gá, te càchí-xi: “Nchaa ñáyiú cùu úhú ìní ñáhá xii-n ní xícuèhé ní xíduha ñáhá-yu xii-í”, duha càhá<sup>n</sup>-xi núú tùtú Yá Ndiòxí nàcuáa ní xáha<sup>n</sup> Xítóhó Jesucristú xii-gá. <sup>4</sup> Te ndéé sanaha ní ngúndeé nchaa tnùhu Yá Ndiòxí núú tùtú-gá, te duca<sup>n</sup> ní ngúndeé cuèndá dacuàha-o, te tnùhu-á<sup>n</sup> dánèhé ñáhá-xí cùnduu cahnu ìní-ó cuéi nándi nà yáha-o cùndecu-o ichi-gá, te sá xii tnùhu-á<sup>n</sup> te vá ndìhú-gá ìní-ó cùndecu-o, te diu-ni sá xii tnùhu-á<sup>n</sup> cundecu ndìhi-o tnùhu ndee ìní. <sup>5</sup> Te Yá Ndiòxí quidé-gǎ ndécú ndìhi-o tnùhu cahnu ìní, te diu-ni-gá quidé-gǎ ñá túú ndìhú ìní-ó ndècu-o. Te xicá<sup>n</sup> táhú-í núú-gǎ sá díú-gǎ ná cáda te cuu ì<sup>n</sup>nuu-ndo cùndecu-ndo datná ní quide mee Xítóhó Jesucristú cùtnàhá ní xíndecu-gá ñuyúú-a. <sup>6</sup> Te duca<sup>n</sup> nchàa-ndo cuu ì<sup>n</sup>nuu-ndo, te

daníhí tnáhá-ndó yóco táchí-ndó te cachí-ndó sá ïo càhnu cuu Yá Ndiöxí Yáa cúu Tátá Xítohó Jesucristú.

*Ñáyiú ñá túú cùu ñáyiú isràél ní nĩhĩ-yu tnúhu Xítohó Jesucristú*

<sup>7</sup> Te núu xiã<sup>n</sup> chí quéhé<sup>n</sup> cuèndá tnáhá dàtná ní quide Xítohó Jesucristú ní quehe<sup>n</sup> cuèndá ñáhá-gã xii-o, te núu duca<sup>n</sup> na càda-ndo te ío cuu càhnu Yá Ndiöxí. <sup>8</sup> Te na càchí tnúhu-í xii-ndo sá Xítohó Jesucristú ní quixi-gá ní quide-gá sá vâha sá cúu-xí ñáyiú isràél, te sá dúcá<sup>n</sup> nĩ quide-gá xiã<sup>n</sup> cútnuní ndáá iní-ó sá Yá Ndiöxí quidé-gã ì<sup>n</sup> sá càhá<sup>n</sup>-gá, chí Xítohó Jesucristú ní quide-gá nchaa nâcuáa ní xáha<sup>n</sup> Yá Ndiöxí xii cue ñaní tnáhá-ó nĩ xindecu ndéé sanaha. <sup>9</sup> Te duca<sup>n</sup> nĩ quide Xítohó Jesucristú sá vâha sá cúu-xí ñáyiú isràél cuèndá nchaa ñáyiú ñá túú cùu ñáyiú isràél cachí-yu sá ïo càhnu cuu Yá Ndiöxí, te duca<sup>n</sup> quèsahá-yu chí ío cùndahú iní ñáhá-gã chíndèe ñaha-gã xii-yu, te quee ndáá-xi nâcuáa càhá<sup>n</sup>-xi núu tütú Yá Ndiöxí núu càchí-xi:

Yúhú cachí-í sá ïo càhnu cuu-n núu nchaa ñáyiú ñá túú cùu ñáyiú isràél,

te cata-í ndudú chiñuhu ñaha-í xii-n.

Duha càchí-xi núu tütú-gá. <sup>10</sup> Te càchí tucu-xi núu tütú-gá:

Te nchòhó ñáyiú ñá túú cùu ñáyiú isràél ío chí cúdí<sup>í</sup> iní ndihí ñáyiú isràél ñáyiú ndècu ndihí-í.

Duha càchí-xi núu tütú-gá. <sup>11</sup> Te càchí tucu-xi ìngá xichí núu tütú-gá:

Nchaa nchòhó ñáyiú ñá túú cùu ñáyiú isràél chí càhá<sup>n</sup> sá ïo càhnu cuu Yá Ndiöxí,

te nchaa ñáyiú na càhá<sup>n</sup>-yu sá ïo càhnu cuu-gá.

Duha càchí-xi núu tütú-gá. <sup>12</sup> Te ndí Chàíá càchí tucu ndí núu tütú Yá Ndiöxí:

Coo ì<sup>n</sup> ñaní tnáhá ndí Isàí téé ní xindecu ndéé sanaha,

te téé-á<sup>n</sup> taxi tnùní-dé cue ñáyiú ñá túú cùu ñáyiú isràél,

te ñáyiú-á<sup>n</sup> cundee cùu cahnu iní ñáhã-yu xii-dé.

Duha ní càhá<sup>n</sup> ndí Chàíá càchí-xi núu tütú-gá.

<sup>13</sup> Te xicá<sup>n</sup> táhù-í núu Yá Ndiöxí Yáa ní taxi tnúhu ndee iní ndécú ndihí-o sá méé-gã ná càda ío cudí<sup>í</sup> iní-ndó cùndecu-ndo, te duca<sup>n</sup> ïo vâha cundecu iní-ndó núú-gã chí sàndáá iní-ndó-gã, te duca<sup>n</sup> Espiritú-gá ná càda te uu<sup>n</sup>-gá uu<sup>n</sup>-gá cuita ngùndecu ndihí-ndo tnúhu ndee iní quíhí<sup>n</sup> sá cáda vâha ñaha-gã xii-ndo.

<sup>14</sup> Te nchòhó ñáyiú ndècu ndihí-í ichi Xítohó Jesucristú cùtnuní ndáá iní-í sá nchòhó ío vâha iní-ndó, te duca<sup>n</sup> ïo vâha cùtnuní iní-ndó nchaa tnúhu vâha, te duca<sup>n</sup> ïo dâsahú tnáhá-ndó nâcuáa cundecu-ndo. <sup>15</sup> Te ðava tnúhu ní chídó tnùní-í núu tütú-a cùu-xi tnúhu sá ïo càhá<sup>n</sup>-í dóho-ndo, te duca<sup>n</sup> nĩ tee-í cuèndá sá nchòhó dandàcu iní-ndó tnúhu-á<sup>n</sup>, te ní tee-í chí Yá Ndiöxí ní cundahú iní ñáhá-gã xii-í ní taxi-gá chiú<sup>n</sup> quide-í

<sup>16</sup> xínú cuèchi-í núu Xítohó Jesucristú càhá<sup>n</sup>-í tnúhu-gá núu ñáyiú ñá túú cùu ñáyiú isràél. Te tnúhu-á<sup>n</sup> cúu-xí tnúhu sá sánú ichi ñaha xii-o nâcuáa naníhí tàhú-ó, te duca<sup>n</sup> ðanehé-í ñáyiú ñá túú cùu ñáyiú isràél tnúhu Yá Ndiöxí cuèndá cuú-yu dàtná ì<sup>n</sup> sá ndúú tàhú-gã, te Espiritú-gá quidé-xí cùu-yu ñáyiú cùdìu núú-gã, te cùu vâha iní ñáhá-gã xií-yu.

<sup>17</sup> Te ío vâha cùu iní-í cuèndá nchaa chiú<sup>n</sup> quide-í sá cúu-xí Yá Ndiöxí, chí Xítohó Jesucristú ndécú ndihí ñaha-gã xii-í. <sup>18</sup> Te mee-ni nâcuáa quide Xítohó Jesucristú chíndèe ñaha-gã xii-í xiã<sup>n</sup>-ni càhá<sup>n</sup>-í, te sá dúcá<sup>n</sup> quide-gá xiã<sup>n</sup> ní sàndáá iní cue ñáyiú ñá túú cùu ñáyiú isràél tnúhu-gá. Te duca<sup>n</sup> chí ní chindee ñaha-gã xii-í ní càhá<sup>n</sup>-í tnúhu-gá te duca<sup>n</sup>-ni nĩ chindee ñaha-gã xii-í ní quide-í titní núu sã nĩ quide-í núú-yu ní xiní-yu. <sup>19</sup> Te Espiritú Yá Ndiöxí ní quide-xi ní quide-í titní núu sã vã yõ tnàhí ndàcu cada ní xiní-yu te ío ní cuñúhu-yu. Te nchaa ñuú ní sáhá<sup>n</sup>-í ní càhá<sup>n</sup>-í tnúhu Xítohó Jesucristú núu ñáyiú cuèi ndéé ñuú Jerusàlén, te cuèi ndéé distritú Ilíricú, núu nchaa ñuú-á<sup>n</sup> nĩ sáhá<sup>n</sup>-í ní càhá<sup>n</sup>-í núu-yu tnúhu sá càhá<sup>n</sup> nâcuáa naníhí tàhú-ó. <sup>20</sup> Te duca<sup>n</sup> ïo nducu ndee-í càhá<sup>n</sup>-í tnúhu

sá cãhá<sup>n</sup> nãcuáa naníhí tãhú-ó nũu vátã nĩhí-gã-yu tnũhu cuendã Xítohó Jesucristú, te duca<sup>n</sup> quide-í chi ñã túú cuiní-í quihí<sup>n</sup>-í cãhá<sup>n</sup>-í tnũhu-gã núú sã xĩndecu ñãyiu cãhá<sup>n</sup> tnũhu-gã. <sup>21</sup> Te quide-í nãcuáa cãhá<sup>n</sup>-xi núú tũtú Yã Ndiõxí núú cãchí-xi: Ñãyiu vátã nĩhí-gã tnũhu cuendã Yaa quixi ñuyú te nĩhí-yu, te duca<sup>n</sup> tècú tnũnĩ-yu tnũhu-gã. Duha cãchí-xi núú tũtú-gã.

*Té Pãblú cuiní-dé quihí<sup>n</sup>-dé ñuú Ròmã*

<sup>22</sup> Te sã dúcã<sup>n</sup> cãhá<sup>n</sup>-í tnũhu-gã nũu xiã<sup>n</sup> ñã túú ní ndãcu-í quixi-í quixi coto ñaha-ĩ xii-ndo cuẽi duca<sup>n</sup>-ni sãni iní-í quixi coto ñaha-ĩ. <sup>23</sup> Te ní cuu titnĩ cuíã duca<sup>n</sup>-ni sãni iní-í quixi coto ñaha-ĩ xii-ndo, te vitna ní ndihí-í nchaa iha ní cãhá<sup>n</sup>-í tnũhu Xítohó Jesucristú núú nchãa ñãyiu. <sup>24</sup> Núu xiã<sup>n</sup> sãní iní-í sã ndũu na quihí<sup>n</sup>-í nãciõ<sup>n</sup> España te yãha cãhá<sup>n</sup>-í quini-í nása ndëcu-ndo, te dãvã-ã<sup>n</sup> ïo cudí iní-ó cũndecu tnaa-o, te duca<sup>n</sup> te òré nucúhu<sup>n</sup> tucu-í ichi te cada ndee iní-ndó chĩndee ñaha-ndo xii-í. <sup>25</sup> Te vitna quihí<sup>n</sup>-í ñuú Jerusalén quĩnehe-í sã ndúú tãhú ñãyiu ndëcu ichi Xítohó Jesucristú xĩndecu yãcã<sup>n</sup>. <sup>26</sup> Te ñãyiu xĩndecu ichi Xítohó Jesucristú ndécú dístítú Macèdoniã, ndihí dístítú Acãyã ní cuu ñũnũú-yu ní sacã<sup>n</sup> tnãhã-yu sã ndúú tãhú ñãyiu ndãhú xĩndecu ichi-gã ndécú ñũú Jerusalén. <sup>27</sup> Te duca<sup>n</sup> tnãhí ní cudí iní-yu cadã-yu, te duca<sup>n</sup> tnãhí tàú-yu cadã-yu chindèé-yu ñãyiu xĩndecu ñũú Jerusalén. Te ñãyiu Macèdoniã ndihí ñãyiu Acãyã-ã<sup>n</sup> ñã túú cuú-yu ñãyiu isrãel. Te ñãyiu xĩndecu ñũú Jerusalén cuú-yu mee-ni ñãyiu isrãel, te duca<sup>n</sup> tàú-yu cadã-yu chi sã cuendã ñãyiu isrãel-ã<sup>n</sup> nĩ nĩhí-yu tnũhu sã cãhá<sup>n</sup> nãcuáa naníhí tãhú-yu, núu xiã<sup>n</sup> tàú-yu chĩndee ñãhã-yu ndihí nchaa sã nĩhí-yu. <sup>28</sup> Te sãtã ná yãha quĩnguãha cuendã-í-yu sã ndúú tãhũ-yu, te duca<sup>n</sup> te dãtnũnĩ quee-í quihí<sup>n</sup>-í nãciõ<sup>n</sup> España, te ichi yãha-í yãha cãhá<sup>n</sup>-í núú ndécú-ndó. <sup>29</sup> Te

cũtnuní ndãã iní-í sã òré ná quèxio-í núú ndécú-ndó, te Xítohó Jesucristú ïo chĩndee ñãha-gã xii-í cãhá<sup>n</sup>-í tnũhu-gã núú-ndó nãcuáa ïo váha cundecu-ndo ìchi-gã.

<sup>30</sup> Te nchòhó ñãyiu ndëcu ndihí-í ichi Xítohó Jesucristú cãhá<sup>n</sup> ndãhú-í núú-ndó sã ïo chĩndee ñãha-ndo xii-í cãhá<sup>n</sup> ndihí-o Yã Ndiõxí cuendã-í, te duca<sup>n</sup> càda-ndo chi ndëcu ndihí-ndo Xítohó Jesucristú. Te Espíritú Yã Ndiõxí quidè-xí cùu iní tnãhá-ó ñũnũ<sup>n</sup>-o. <sup>31</sup> Te ïo chí càcã<sup>n</sup> tãhú nũu Yã Ndiõxí sã ná còto ñaha-gã xii-í, te ñã túú ñã cada ñaha nchãa ñãyiu ñã túú sãndãã iní ñãhá xii-gã xĩndecu dístítú Jùdeã. Te càcã<sup>n</sup> tãhú tũcu-ndo núú-gã sã nchãã sã cãnehe-í quihí<sup>n</sup> nduu tãhú ñãyiu ndëcu ichi-gã ndécú ñũú Jerusalén ïo váha cuu iní-yu quehe<sup>n</sup> cuendã-yu. <sup>32</sup> Te duca<sup>n</sup> càda-ndo cuendã sã nũu Yã Ndiõxí ná cãchí-gã te ïo cudí iní-í òré quexio-í núú ndécú-ndó, te ïo váha cuu iní-í cundecu ndihí ñaha tnãi xii-ndo. <sup>33</sup> Te vitna xicã<sup>n</sup> tãhũ-í núú Yã Ndiõxí Yaa quidè ïo váha cùu iní-ó ndëcu-o sã ná chĩndee chitũu ñaha-gã xii-ndo nchãa-ndo. Te duca<sup>n</sup> na cũnduu.

## 16

*Té Pãblú quidè ndèe iní-dé ñãyiu ndëcu ñũú Ròmã*

<sup>1</sup> Te yúhú tendaha-ĩ tá Fèbé quixi-xi núú ndécú-ndó, te tnãhá-xi ndëcu-xi ichi Xítohó Jesucristú, te quide-xi chiu<sup>n</sup> Yã Ndiõxí sã cúú-xi ñãyiu ndëcu ichi Xítohó Jesucristú xĩndecu ñũú Cèncreã. <sup>2</sup> Te cuiní-í sã ïo váha cuu iní-ndó quèhe<sup>n</sup> cuendã-ndó-xi, chi ndëcu ndihí-xi Xítohó Jesucristú, te cada-ndo nãcuáa tàú-xi cunduu dãtnã tàú-xi cada ñãyiu ndëcu ichi-gã, te ïo chĩndee-ndo-xi te núu ná cúú sã xini ñũhu-xi, chi tnãhá-xi ïo chĩndee-xi cue ñãyiu ndëcu ichi Xítohó Jesucristú, te tnãhá yúhú duca<sup>n</sup> ïo chĩndee-xi.

<sup>3</sup> Te cũñaha-ndo ïo na càda ndee iní té Àquilú ndihí ñãdihí-dé tá Priscilã, chi ñãyiu-ã<sup>n</sup> nĩ quide chiu<sup>n</sup>-í ndihí-yu ní quide-ndí chiu<sup>n</sup> Xítohó Jesucristú. <sup>4</sup> Chi mèé-yu ní càcu cuú-yu sã cuendã sã nĩ dácãcu ñãhá-yu xii-í sã

nǐ yáha-í, núu xiǎ<sup>n</sup> ío ndàcá<sup>n</sup> táhù-í núu-yu, te ñá díú-ní yǔhú duca<sup>n</sup> ío ndàcá<sup>n</sup> táhù-í núu-yu chi tnàhá nchaa ñáyiú ñá túú cùu ñáyiú isràél xǐndecu ichi-gá xǐndecu nchaa xichi duca<sup>n</sup> ío ndàcá<sup>n</sup> táhù-yu núu tē Àquilú ndihí núu ñadìhí-dé tá Prìscilá. <sup>5</sup> Te cúñaha tùcu-ndo sá ío na càda ndee iní nchaa ñáyiú xǐndecu ichi Xítóhó Jesucristú tàcá vehe té Àquilú ndihí tá Prìscilá dácuahá-yu tnúhu-gá, te cúñaha tùcu-ndo sá ío na càda ndee iní té Epènetú chi tnàhá-dé ío ñùhu iní-í-dé, chi té-á<sup>n</sup> cúú-dě té díhna nuu nǐ sándáá iní tnúhu Xítóhó Jesucristú distritú Acáyá. <sup>6</sup> Te cúñaha tùcu-ndo sá ío na càda ndee iní tá Màriá xíchí ndécú ndihí-ndo, xíchí ío ndùcu ndee xinu cuechi núu Xítóhó Jesucristú. <sup>7</sup> Te cúñaha tùcu-ndo sá ío na càda ndee iní cue té cùu ndi mee-í té Àndrónicú ndihí té Jùniás, chi tnàhá-güedé ní xíhí ndihí ñaha-güedé xii-í vecaá, te ío cùdiu-güedé núu nchaa cue té ní táuchíú<sup>n</sup> Jèsús cáhá<sup>n</sup> tnúhu-gá. Te díhna-gá-güedé ní sándáá iní-güedé tnúhu Xítóhó Jesucristú dácúúxí yǔhú.

<sup>8</sup> Te cúñaha-ndo sá ná càda ndee iní té Ampliás chi tnàhá-dé ío ñùhu iní-í-dé, te ndècu-dé tnàhá-dé ichi Xítóhó Jesucristú. <sup>9</sup> Te cúñaha tùcu-ndo xii té Bǎnú té cùndihí ñaha xii-o quide-o chiu<sup>n</sup> Xítóhó Jesucristú sá ná càda ndee iní-dé, te cúñaha tùcu-ndo xii té Èstaquís sá ná càda ndee iní-dé chi tnàhá-dé ío ñùhu iní-í-dé. <sup>10</sup> Te cúñaha tùcu-ndo xii té Àpelés sá ío na càda ndee iní-dé, chi té-á<sup>n</sup> ío váha cùndáá-dé núu Xítóhó Jesucristú, te cúñaha tùcu-ndo xii ñáyiú xǐndecu vehe té Arístóbulú sá ío na càda ndee iní-yu. <sup>11</sup> Te cúñaha-ndo xii té Heròdión té cùu ndi mee-í sá ío na càda ndee iní-dé, te cúñaha-ndo xii ñáyiú ndècu ichi Xítóhó Jesucristú xǐndecu vehe té Nàrcisú sá ío na càda ndee iní-yu. <sup>12</sup> Te cúñaha-ndo xii tnàhá tá Trifená ndihí tá Trifosá sá ío na càda ndee iní-yu, chi tnàhá-yu quidé-yu chiú<sup>n</sup> Xítóhó Jesucristú. Te tnàhá tá Pèrsidá xíchí ndécú ndihí-o ichi Xítóhó Jesucristú

cúñaha-ndo xii-xi sá ío na càda ndee iní-xi, chi tnàhá-xi ío ndùcu ndee-xi quide-xi chiu<sup>n</sup> Xítóhó Jesucristú. <sup>13</sup> Te cúñaha-ndo tnàhá té Rǔfú téé ío váha sándáá iní tnúhu Xítóhó Jesucristú sá ío na càda ndee iní-dé ndihí nǎná-dě, chi ñaha-á<sup>n</sup> quidé iní-í sá cúú-á<sup>n</sup> datná nǎná-í. <sup>14</sup> Te cúñaha-ndo sá ío na càda ndee iní té Àsíncritú, ndihí té Flègonté, ndihí té Hèrmás, ndihí té Pàtrobás, ndihí té Hèrmés, ndihí nchaa dava-gá cue ñáyiú ndècu ndihí-o ichi Xítóhó Jesucristú xǐndecu ndihí-güedé. <sup>15</sup> Te cúñaha tùcu-ndo sá ío na càda ndee iní té Filológó, ndihí tá Jùliá, ndihí té Nèréú, ndihí cúha té Nèréú, ndihí tá Òлимпás, ndihí nchaa dava-gá ñáyiú sándáá iní tnúhu Xítóhó Jesucristú xǐndecu ndihí-yu.

<sup>16</sup> Te ío yiñùhu cada ndee iní tnàhá-ndó ñ<sup>n</sup> ñ<sup>n</sup>-ndo. Te nchaa ñáyiú tàcá nchaa iha dácuaaha tnúhu Xítóhó Jesucristú quidé ndee iní ñáhá-yu xii-ndo.

<sup>17</sup> Te nchòhó ñáyiú ndècu ndihí-í ichi Xítóhó Jesucristú càhá<sup>n</sup>-í dóho-ndo sá cadá cuendá-ndó núu ío ñáyiú quide nacuaá vá cúú ñ<sup>n</sup>nuu-ndo cundecu-ndo, chi ñáyiú-á<sup>n</sup> sánú ìchi ñahá-yu ñ<sup>n</sup> ichi ñá túú váha, chi ñá túú ñ<sup>n</sup>-ni cuu-xi tnúhu càhá<sup>n</sup>-yu ndihí tnúhu sá nǐ níhí-ndó ndècu ndihí-ndo, te ñáyiú duca<sup>n</sup> xǐquide vá nihí tnàhá-gǎ-ndó ndihí-yu. <sup>18</sup> Chi ñáyiú-á<sup>n</sup> ñà túú quidé-yu chiú<sup>n</sup> sá cúú-xí Xítóhó Jesucristú, chi mee-ni sá cúú-xí mèe-yu quidé-yu, te mee-ni nchaa tnúhu sá ío vii ío váha cuáhá<sup>n</sup> càhá<sup>n</sup>-yu òré cuáhá<sup>n</sup>-yu dándahú-yu nchaa ñáyiú ío yáchí sándáá iní-xi ñ<sup>n</sup> tnúhu. <sup>19</sup> Te nchaa ñáyiú nihí-yu tnúhu sá nchòhó sándáá iní-ndó tnúhu Xítóhó Jesucristú, núu xiǎ<sup>n</sup> ío cùdíí iní-í. Te cuiní-í sá nchòhó ío váha cutnùní iní-ndó nàcuáa cada-ndo mèe-ni sá váha, te vá cání iní-ndó càda-ndo datná xǐquide nchaa ñáyiú ndècu ichi cuehé ichi duha. <sup>20</sup> Te Yá Ndiöxí Yaá quidé ío váha cùu iní-ó ndècu-o ío ndihí cada-gá cuendá sá sàcuíhná ñà túú-gǎ ná cada ñaha-xi xii-ndo, te xicá<sup>n</sup> táhù-í núu Xítóhó Jesucristú sá ío na chindee chitúu ñaha-gǎ xii-ndo.



21 Te té Timùteú té quède ndihi-í chiu<sup>n</sup> Xítóhó Jesucristú iha quède ndee iní ñáhá-dě xii-ndo, te tnàhá té Lùciú, ndihi té Jàsón, ndihi té Sosipàtér cue tée cùu ndi mee-í quidé ndèe iní ñáhá-güedě xii-ndo.

22 Te tnàhá yúhú té Tèrciú té càdúha tutú-a cuendá té Pàblú quidé ndèe iní ñáhá-í xii-ndo, chi ì<sup>n</sup>-ni cùu-o ndihi Xítóhó Jesucristú.

23 Te tnàhá té Găyú té dii vèhe-xi ndecu-í quidé ndèe iní ñáhá-dě xii-ndo, te ñiu-dé ní taxi nùu-dé vehe tàcá ñăyiu dàcuahá-yu tnúhu Xítóhó Jesucristú. Te tnàhá té Èrastú té yìndaha díhú<sup>n</sup> ñùú quidé ndèe iní ñáhá-dě xii-ndo, te tnàhá té Cuártú té ndècu ndihi-o ichi Xítóhó Jesucristú quidé ndèe iní ñáhá-dě xii-ndo.

24 Te xìcá<sup>n</sup> táhù-í núú Xítóhó Jesucristú sá ïo na chìndee chitúu ñaha-gă xii-ndo nchàa-ndo. Te duca<sup>n</sup> na cùnduu.

*Cáhá<sup>n</sup>-ó sá ïo càhnu cuu Yá Ndiöxí*

25 Te vitna chí ná cächí-ó sá ïo càhnu cuu Yá Ndiöxí, chí mee-gă cada te ío-gá cuita níhí ndéé-gă-ndó cùndecu-ndo ichi Xítóhó Jesucristú dàtná cächí tnúhu sá cáhá<sup>n</sup> nàcuáa naníhí tãhú-ó, tnúhu sá dánèhé-í ñăyiu cuendá Xítóhó Jesucristú, te nchaa tnúhu-a ì<sup>n</sup>-ni cùu-xi ndihi nchaa tnúhu sá ñí cachí Yă Ndiöxí cuu yuhu ndéé cútnàhá ní ngáva ñuyíú, te vitna ní quee túu-xi, <sup>26</sup> chí mee Yă Ndiöxí ní dátúu-gá núú-ó vitna, te cáhá<sup>n</sup>-ndí nàcuáa ní chídó tnùní cue tée ní xóo cáhá<sup>n</sup> tnúhu Yá Ndiöxí ndéé sanaha. Te duca<sup>n</sup> tnúhu sá ndúú yùhu ñi cuu ta xíté nuu-xi ñihí ñuyíú cuáhá<sup>n</sup>, chí duca<sup>n</sup> ñí cachí Yă Ndiöxí Yaá ndécú nchàa nduu nchaa quíú cunduu cuendá sá quìndáá iní ñáhá ñăyiu xii-gá, te tñí-yu nchaa tnúhu cáhá<sup>n</sup>-gá.

27 ¡Te ì<sup>n</sup>di-ni Yá Ndiöxí cúú-gă Yaá ío sáá sá xìní tnùní-xi! ¡Te nchaa-o chí ná cächí-ó sá ïo càhnu cuu-gá, chí ndècu ndihi-o Xítóhó Jesucristú, te duca<sup>n</sup>-ni càda-o ñi caa ñi quíhí<sup>n</sup>! Te duca<sup>n</sup> na cùnduu. Te ío chí cádá ndèe iní-nă vitna.

## TUTÚ DÍHNA NUU NĪ CADÚHA TÉ PĀBLŪ QUIHĪ<sup>n</sup> NDAHA ÑÁYIU ÑUÚ CÒRINTÚ

*Té Pāblū cādūha-dé tutú quihī<sup>n</sup> ndaha ñáyiu xñdecu ichi Xítoho Jesucristú ndécú ñuú Còrintú*

<sup>1</sup> Yúhú té Pāblū ní cáhá<sup>n</sup> ñáhá Yá Ndiöxí xii-í cuendá sá cáhá<sup>n</sup>-í tnúhu Xítoho Jesucristú núú ñáyiu, chi duca<sup>n</sup> nī cachí Yá Ndiöxí cunduu. Te cādūha-í tutú-a ndihí té Sōstenés té ndècu ndihí-o ichi Xítoho Jesucristú <sup>2</sup> cuendá daquixi-í ndaha nchòhó ñáyiu xñdecu ichi Yá Ndiöxí ndécú ñuú Còrintú, chi nchòhó cúu-ndó ñáyiu cùu cuendá Yá Ndiöxí cuendá sá ndécú ndihí-ndo Xítoho Jesucristú. Te diu-ni-ndo cùu-ndo ñáyiu ní cáhá<sup>n</sup> ñáhá Yá Ndiöxí cuendá cundecu yññuhu-ndo núu-gã, ndihí nchaa dava-gá ñáyiu ndècu nchaa xichi, ñáyiu cāchí sá ïo cāhnu cuu Xítoho Jesucristú. Te Yaá-á<sup>n</sup> cúu-gã Xítoho-yu, te diu-ni-gá cúu-gã Xítoho nchoo tucu. <sup>3</sup> Te xicá<sup>n</sup> táhù-í núú Tātá-ó Dütú Ndiöxí ndihí núú Xítoho Jesucristú sá ndè nduú-gá ïo na chindee chitúu ñaha-gã xii-ndo, te ïo váha cuu iní-ndó cundecu-ndo.

*Yá Ndiöxí ïo chindee ñaha-gá xii-o cuendá sá ndécú-ó ndihí Xítoho Jesucristú*

<sup>4</sup> Te duca<sup>n</sup>-ni ïo ndacá<sup>n</sup> táhù-í núú Yá Ndiöxí cuendá-ndó, chi mee-gã ïo chindee chitúu ñaha-gá xii-ndo sá cuendá Xítoho Jesucristú. <sup>5</sup> Te cuendá sá ndécú-ndó ndihí Xítoho Jesucristú, núu xiá<sup>n</sup> Yá Ndiöxí ïo chindee ñaha-gá xii-ndo sáá díquí-ndó nācuāa cáhá<sup>n</sup>-ndó, ndihí nācuāa cùtnuní iní-ndó, <sup>6</sup> chi tnúhu sá ni nīhí-ndó cuendá Xítoho Jesucristú ní quee-xi iní-ndó. <sup>7</sup> Te xiá<sup>n</sup> nūu nchaa sá váha ñá túú tnàhí cùmání xii-ndo chi Yá Ndiöxí ïo chindee ñaha-gá. Te duca<sup>n</sup> quide-gá nini nchòhó nī yūhu nī iní-ndó ndètu-ndo sáá nduu quixi

tucu Xítoho Jesucristú. <sup>8</sup> Te Yá Ndiöxí duca<sup>n</sup>-ni ïo chindee ñaha-gá xii-ndo cuendá sá vá yō teñaha cuēchi nduu na quixi tucu Xítoho Jesucristú. <sup>9</sup> Te nchaa sá cáhá<sup>n</sup> Yá Ndiöxí dacuítí quide-gá, te diu-gá cúu-gã Yaá ní cáhá<sup>n</sup> ñáhá xii-ndo cuendá cuu ñnuu-ndo ndihí Déhe-gá Xítoho Jesucristú Yaá cúu Xítoho-ó.

*Ñá túú cùu ñnuu ñáyiu ndècu ichi Xítoho Jesucristú*

<sup>10</sup> Te nchòhó ñáyiu ndècu ndihí-í ichi Xítoho Jesucristú cáhá<sup>n</sup>-í dóho-ndo sá vá ndè díí<sup>n</sup> càni iní-ndó, te ïo cuu ñnuu-ndo cundecu-ndo, te ñni càni iní-ndó, te ñni càda-ndo chi duca<sup>n</sup> cùnì-gá cunduu. <sup>11</sup> Te duha cáhá<sup>n</sup>-í dóho nchòhó ñáyiu ndècu ndihí-í ichi Xítoho Jesucristú, chi cue ñáyiu vehe té Clòe ní cachí tnúhu-yu xii-í sá ñà túú cùu ñnuu-ndo ndecu-ndo. <sup>12</sup> Te duha nduu tnúhu ní nīhí-í nācuāa cùu ndecu-ndo, chi dava-ndo cāchí-ndó: “Yúhú cúu-í cuendá té Pāblū.” Te dava-ndo cāchí-ndó: “Yúhú cúu-í cuendá té Apolós.” Te dava-ndo cāchí-ndó: “Yúhú cúu-í cuendá té Pélú.” Te dava tucu-ndo cāchí-ndó: “Yúhú cúu-í cuendá Xítoho Jesucristú”, duha cāchí-ndó. <sup>13</sup> Te vá dúcá<sup>n</sup> cáhá<sup>n</sup>-ndó chi ñá túú nā dāha Xítoho Jesucristú ndécú chi ñdii-ni-gá. Te ñá díú yūhú té Pāblū ní xīhí-í núú cùrúxí sá cuendá-ndó, te ni ñà túú ní sàndute-ndo cuendá sá yūhú cuu cuendá ñahà-í xii-ndo. <sup>14</sup> Te táxāhu xii Yá Ndiöxí chi ñá díú nchāa-ndo ni dacuandute-í, chi té Crispú-ni ndihí té Gāyú-ni ní dacuandute-í-güedé. <sup>15</sup> Te xiá<sup>n</sup> nūu vá cúu tnàhí cáhá<sup>n</sup>-ndó sá nī sandute-ndo sá cúu cuendá ñahà-í xii-ndo. <sup>16</sup> Te ní ndacu tucu iní-í sá tnàhá tucu ñáyiu cùu ndi mee té Èstefanás ní dacuandute-í, te diu-ná ñáyiu-á<sup>n</sup> te sànuu sá ñà túú-gã nāgá ñáyiu ni dacuandute-í. <sup>17</sup> Te Xítoho Jesucristú ñá túú ní tēndaha ñaha-gá xii-í sá dacuandute-í ñáyiu, chi ní tēndaha ñaha-gá xii-í sá cáhá<sup>n</sup>-í tnúhu-gá núu-yu, tnúhu sá cáhá<sup>n</sup> nācuāa naníhí tēhú-ó. Te ñá túú cáhá<sup>n</sup>-í dàtná cáhá<sup>n</sup> ñáyiu túha. Te duca<sup>n</sup> quide-í cuendá

sá nchòhó quíndáá váha iní-ndó tnúhu sá càhá<sup>n</sup> nàcuáa ní xíhí Xítohó Jesucristú núú cùrúxí. Chi núu na càhá<sup>n</sup>-í dàtná càhá<sup>n</sup> ñáyiú túha te nchòhó vá quíndáá iní-ndó tnúhu-á<sup>n</sup> nàcuáa tàú-xí cunduu.

*Sá cuendá Xítohó Jesucristú cútnùní iní-ó sã ïo càhnu cuu Yá Ndiöxí*

<sup>18</sup> Te nchaa ñáyiú ta xíta nihnu cuáhá<sup>n</sup> càchí-yu sá ñà túú nándíhi tnúhu sá càhá<sup>n</sup> nàcuáa ní xíhí Xítohó Jesucristú núú cùrúxí, dico sá cúú-xí nchò ñáyiú sa ní naníhí tàhú, chi tnúhu-á<sup>n</sup> cúú-xí ñ<sup>n</sup> tnúhu sá ñí taxi Yá Ndiöxí ndécú ndíhi-o cuendá ndacu-gá cada-gá nchaa nàcuáa cuíní-gá iní-ó, <sup>19</sup> te quèe ndáá-xi nàcuáa càhá<sup>n</sup>-gá núú tütú-gá núú càchí-xi:

Yúhú cada-í te nchaa ñáyiú túha vá nándíhi-gá nchaa sá xíní tnùní-yu,

te nchaa ñáyiú ío váha sàá díquí-xi vá nándíhi-gá nchaa nàcuáa sàni iní-yu.

Duha càchí Yá Ndiöxí núú tütú-gá.

<sup>20</sup> Te xiã<sup>n</sup> cútnùní iní-ó sã ncháá ñáyiú sàni iní-xi sá ïo túha ndècu ñuyíú-a, ndíhi nchaa cue téè dàcuaha ñaha xii-yu nchaa tnúhu ní chídó tnùní ndíi Moisés, ndíhi nchaa ñáyiú ío váha sàá díquí-xi càhá<sup>n</sup> cuendá nchaa sá ío ñuyíú-a, te nchaa ñáyiú-á<sup>n</sup> càchí Yá Ndiöxí sá ñà túú nándíhi nchaa sá xíní tnùní-yu sá cúú-xí-gá. <sup>21</sup> Te Yá Ndiöxí ío váha cùtnuní iní-gá nàcuáa quide-gá, chi ñà túú dāña-gá cundècu ndíhi ñàhá-yu xii-gá sá cuendá nchaa sá ñí sáá díquí mée-yu, te duca<sup>n</sup> quide-gá chi cuíní-gá sá cundédóho-yu tnúhu sá sání iní-yu ñà túú nándíhi. Te sá cuendá tnúhu-á<sup>n</sup> te naníhí tàhú-yu te núu na quíndáá iní ñàhá-yu xii-gá.

<sup>22</sup> Te cue ñáyiú isràél cuíní-yu quini-yu sá vã yõo tnàhí ndàcu cada, te cue ñáyiú griégú nchicú<sup>n</sup> nihnú-yu nchaa sá dácuaha ñáyiú ío túha.

<sup>23</sup> Dico nchoo yíhi-o càhá<sup>n</sup>-ó núú ñáyiú sá Xítohó Jesucristú ní xíhí-gá núú cùrúxí. Te cue ñáyiú isràél ñà túú tnàhí tnàhá iní-yu cundédóho-yu

tnúhu-á<sup>n</sup>. Te cue ñáyiú ñà túú cùu ñáyiú isràél càchí-yu sá ñà túú vèdana nándíhi tnúhu-á<sup>n</sup>. <sup>24</sup> Dico sá cúú-xí nchaa ñáyiú ní càhá<sup>n</sup> ñàhá Yá Ndiöxí chi cuèi cùú-yu ñáyiú isràél àdi ñà túú cùú-yu, dico ñáyiú-á<sup>n</sup> càchí-yu sá sã cuendá Xítohó Jesucristú cútnùní iní-yu sá ïo càhnu cuu Yá Ndiöxí te ndècu ndíhi-gá nchaa sá xíní tnùní-gá.

<sup>25</sup> Te sá quidé Yá Ndiöxí càchí ñáyiú ñuyíú-a sá ñà túú nándíhi, dico xiã<sup>n</sup> ío-gá nándíhi dàcúúxí sã sání iní mée-yu. Te sá ñí xíhí Xítohó Jesucristú núú cùrúxí, xiã<sup>n</sup> càchí ñáyiú sá ñà túú ní nihí ndée Yá Ndiöxí cada-gá sá ñí sani iní-gá cada-gá. Dico sá dúcá<sup>n</sup> ñí quide Yá Ndiöxí, xiã<sup>n</sup> cúú-xí sã ïo-gá ní nihí ndée-gã ní quide-gá ñ<sup>n</sup> sá ñí sani iní-gá dàcúúxí sã sání iní mée ñáyiú ñuyíú-a. <sup>26</sup> Te nchòhó ñáyiú ndècu ndíhi-í ichi Xítohó Jesucristú,

chí dándàcu iní nàcuáa ndècu-ndo cútnàhá ní càhá<sup>n</sup> ñàhá Yá Ndiöxí xii-ndo, chi sacú-ni-ndo túha dàcúúxí ñáyiú ñà túú ndècu ichi-gá. Te duca<sup>n</sup> sacú-ni-ndo tàxi tnuní-ndó, te ñu-ni duca<sup>n</sup> sacú-ndó nèhe ñáyiú sá yíñùhu núú-ndó. <sup>27</sup> Te ñáyiú ñà túú ndècu ichi Yá Ndiöxí càchí-yu sá ñà túú tnàhí túha dava-gá tnàha ñáyiú-yu, dico dava ñáyiú ñà túú túha-á<sup>n</sup> càhá<sup>n</sup> ñàhá Yá Ndiöxí xii-yu cundècu-yu ichi-gá, te cundècu ndíhi ñaha-gã xii-yu, te duca<sup>n</sup> dándóo canúú-yu nchaa ñáyiú càchí sá ïo túha. Te càhá<sup>n</sup> tucu-gá ñáyiú càchí dava-gá ñáyiú sá ñà túú tnàhí tàú cunuu cundècu-yu ichi-gá, te duca<sup>n</sup> cundècu ndíhi ñaha-gá xii-yu, te dándóo canúú-yu nchaa ñáyiú càchí sá táxi tnùní. <sup>28</sup> Te duca<sup>n</sup> Yá Ndiöxí càhá<sup>n</sup>-gá ñáyiú ñà túú tnàhí cunuu cundècu ndíhi-gá, ndíhi ñáyiú quèe tíhú núú dàva-gá tnàha ñáyiú-xi, ndíhi ñáyiú càchí-yu sá ñà túú vèdana nándíhi, nchaa ñáyiú-á<sup>n</sup> càhá<sup>n</sup>-gá cundècu ndíhi-gá, te duca<sup>n</sup> quide-gá cuendá dándóo canúú-yu nchaa ñáyiú càchí sá ïo cunuu. <sup>29</sup> Te núu xiã<sup>n</sup> ni ñ<sup>n</sup> ñáyiú vá cúú càchí-yu sá ïo càhnu cuú-yu núú Yá Ndiöxí.

<sup>30</sup> Dico nchòhó chi mee Yá Ndiöxí

ní quide-gá ndécú-ndó ndìhi Xítohó Jesucristú, te Xítohó Jesucristú ní quide-gá ní cutnùnì iní-ó sã Yã Ndiöxí cúú-gã Yaá ndécú ndìhi nchaa sá xìnì tñùnì-gá. Te ñu-ni Xítohó Jesucristú ní quide-gá cuendá sá nchóó vã cùndècu-gá cuèchi-o nùú Yã Ndiöxí, te duca<sup>n</sup> cùndecu yĩñuhu-o núú-gã, te nduu táhú-ó cùndecu-o ndìhi-gá ni caa ni quíhí<sup>n</sup>. <sup>31</sup> Te sá dúcá<sup>n</sup> quide-gá nùu xíá<sup>n</sup> xìnì ññuhu-xi cada-o nacuaa càhá<sup>n</sup>-xi núú tütú Yã Ndiöxí núú càchí-xi: “Vá càchí-ndó sã méé-ndó ïo càhnu cuu-ndo, chi càchí-ndó sã Yáa cúú Xítohó-ndó ïo càhnu cuu-gá”, duha càchí-xi núú tütú-gá.

## 2

*Tnúhu sá càhá<sup>n</sup> nàcuáa ní cuu ní xíhí Xítohó Jesucristú núú cùrúxí*

<sup>1</sup> Te nchòhó ññáyu ndècu ndìhi-í ichi Xítohó Jesucristú sa nàha-ndo sá cùtnàhá ní quixi-í ní càhá<sup>n</sup>-í tñuhu Yá Ndiöxí núú-ndó, te ñá túú ní càhá<sup>n</sup>-í dàtná càhá<sup>n</sup> ì<sup>n</sup> ññáyu ïo váha sàá díquí-xi, àdi datná càhá<sup>n</sup> ì<sup>n</sup> ññáyu ïo túha. <sup>2</sup> Chi cùtnàhá ní xìndecu ndìhi ññaha-í xii-ndo chi ní sani iní-í sá méé-ní cuendá Xítohó Jesucristú càhá<sup>n</sup>-í núú-ndó ndìhi nacuaa ní cuu ní xíhí-gá, te ñu duca<sup>n</sup> ññá quide-í. <sup>3</sup> Te cùtnàhá ní quexìo-í núú ndécú-ndó te ni ñá cùtnùnì iní-í nása cada-í ní cùu, te ïo ní quiyùhú iní-í ní càhá<sup>n</sup>-í tñuhu-gá núú-ndó. <sup>4</sup> Te cùtnàhá ní càhá<sup>n</sup>-í nàcuáa ndùu tñuhu Xítohó Jesucristú núú-ndó, te nàha-ndo sá Espiritú Yá Ndiöxí ní chindee ññaha-xi xii-í ní càhá<sup>n</sup>-í tñuhu-gá núú-ndó, te tñuhu-á<sup>n</sup> ññá quée-xi iní-ndó. Te ñá túú ní càhá<sup>n</sup>-í ì<sup>n</sup> tñuhu càhnu núú-ndó tñuhu sá càhá<sup>n</sup> cue ññáyu ïo váha sàá díquí-xi. <sup>5</sup> Te duca<sup>n</sup> ññá cuu cuendá sá nchòhó quíndáá iní-ndó tñuhu Yá Ndiöxí chi ní quide-gá sá vãha sá cúú-xí iní-ndó, te ñá díú sã cuendá tñuhu sá càhá<sup>n</sup> ññáyu càchí sá ïo túha duca<sup>n</sup> ññá sándáá iní-ndó tñuhu-gá.

*Espiritú Yã Ndiöxí quidé-xí cùtnunì iní-ó nàcuáa sàni iní-gá*

<sup>6</sup> Te nchoo càhá<sup>n</sup>-ó tñuhu càhnu núú ññáyu sa ní níhí ndéé ndècu

ichi Xítohó Jesucristú. Te tñuhu-á<sup>n</sup> ñá túú càhá<sup>n</sup> ññáyu ñá túú ndècu ichi-gá, te ni cuè téé yìndaha ññaha xii-yu ñá túú càhá<sup>n</sup>-güedé tñuhu-á<sup>n</sup> chi cue téé-á<sup>n</sup> naa-güedé. <sup>7</sup> Te tñuhu càhnu-á<sup>n</sup> cúú-xí tñuhu Yá Ndiöxí, te mee-gã ní cachí-gá ndéé cùtnàhá vátá ngãva-gá ñuyú sã ncháá ññáyu na quíndáá iní tñuhu-á<sup>n</sup> te nduu táhú-yu cundecú-yu ndìhi-gá núú ïo váha càa ndecu-gá ni caa ni quíhí<sup>n</sup>. Te tñuhu-á<sup>n</sup> ndúú yùhu-xi ni cuu. <sup>8</sup> Te ni ì<sup>n</sup> cue téé yìndaha cue ññáyu ñuyú-a ñá túú tècú tñùnì-güedé tñuhu-á<sup>n</sup>, chi núu dìcò tècú tñùnì-güedé tñuhu-á<sup>n</sup> te vã catá càa-güedé Xítohó Jesucristú núú cùrúxí cahni ññaha-güedé xii-gá ní cùu. Te ñu-ni Yaá-á<sup>n</sup> ïo càhnu cuu-gá. <sup>9</sup> Dico duca<sup>n</sup> ññá cuu chi ní quee ndáá-xi nàcuáa càhá<sup>n</sup>-xi núú tütú Yã Ndiöxí núú càchí-xi:

Yá Ndiöxí sa ní sani iní-gá nchaa nàcuáa cada-gá sá cúú-xí cuendá nchaa ññáyu cùu iní ññáhá xii-gá.

Te sá ññá sani iní-gá cada-gá cúú-xí sã vátá quíni-gá ññáyu te ni vátá cùndèdóho-gá-yu,

te ni ñá túú tñàhí cùtnunì iní-yu nása cada-gá.

Duha càchí-xi núú tütú-gá. <sup>10</sup> Te mee Yá Ndiöxí ní cachí-gá sá Espiritú-gá cada-xi te nchoo cùtnunì iní-ó nchaa nacuaa sàni iní-gá cada-gá, nùu xíá<sup>n</sup> duca<sup>n</sup> tècú tñùnì-ó vītna, chi Espiritú-gá xìnì-xi nchaandi túhú nàcuáa sàni iní-gá cada-gá.

<sup>11</sup> Te ñá ì<sup>n</sup> ññáyu xìnì ndáá-yu nàcuáa sàni iní ingá ññáyu, chi mee ññáyu-á<sup>n</sup> xìnì ndáá-yu nchaa nàcuáa sàni iní-yu. Te duca<sup>n</sup> sãtnahá-xi cùu Yá Ndiöxí chi medì-ni Espiritú-gá xìnì-xi nchaa nàcuáa sàni iní-gá. <sup>12</sup> Te nchoo chi Yá Ndiöxí ní taxi-gá Espiritú-gá ndécú ndìhi-o, te ñá díú ññáyu-a duca<sup>n</sup> ni quèe espíritú ní ngùndecu ndìhi-o. Te duca<sup>n</sup> ññá taxi-gá Espiritú-gá ndécú ndìhi-o cuendá duca<sup>n</sup> cùtnunì iní-ó nàcuáa ndùu nchaa sá vãha sá dìcò duca<sup>n</sup> ññá taxi-gá ndécú ndìhi-o. <sup>13</sup> Te cuendá nchaa sá vãha-á<sup>n</sup> càhá<sup>n</sup>-ndí,



te càhá<sup>n</sup>-ndí nàcuáa dàcahu iní ñáhá Espíritú Yá Ndiöxí xii-ndí, te ñá túú càhá<sup>n</sup>-ndí nàcuáa càhu iní ñáyiu ñuyíú-a càhá<sup>n</sup>-yu, te ñu-ni nchaa tnúhu dàcahu iní ñáhá Espíritú-gá xii-ndí càhá<sup>n</sup>-ndí, ñu-ni nchaa xiá<sup>n</sup> dánèhé-ndí nchaa ñáyiu ndècu ndihi tucu Espíritú-gá.

14 Te ñáyiu ñá túú ndècu ndihi Espíritú Yá Ndiöxí ñá túú tnàhá iní-yu nàcuáa ndùu tnúhu dàtecu tnúhu ñaha Espíritú-gá xií-yu, te ni ñà túú tècu tnúni-yu, te càchí-yu sá ñà túú nàndíhi-xi. Te duca<sup>n</sup> chi mee-ni nchaa ñáyiu ndècu ndihi Espíritú-gá tècu tnúni-yu nàcuáa ndùu tnúhu-á<sup>n</sup>. 15 Te cue ñáyiu duca<sup>n</sup> ndècu ndihi Espíritú Yá Ndiöxí cútnùni ndáá iní-yu ná cúu nchaa sá vâha, te vá yõo ñ<sup>n</sup> xini nchaa nàcuáa sàni iní-yu. 16 Te núú tùtú Yá Ndiöxí càchí-xi: “Vá yõo ñ<sup>n</sup> xini nàcuáa sàni iní Yá Ndiöxí, núu xiá<sup>n</sup> vá yõo ñ<sup>n</sup> ndacu ná danèhé ñáhá xii-gá”, duha càchí-xi núú tùtú-gá. Te nchoo chi ñ<sup>n</sup>-ni sàni iní-ó ndihi Xítóhó Jesucrístú.

### 3

#### *Cue téé xíquide chiù<sup>n</sup> Yá Ndiöxí*

1 Te nchòhó ñáyiu ndècu ndihi-í ichi Xítóhó Jesucrístú càchí tnúhu-í xii-ndo sá ñá ní ñihí-í nàcuáa cada-í càhá<sup>n</sup>-í tnúhu-gá núú-ndó dàtná càhá<sup>n</sup>-í núú nchaa ñáyiu quide nchaa nacuáa càhá<sup>n</sup> Espíritú Yá Ndiöxí, chi ní càhá<sup>n</sup>-í núú-ndó dàtná càhá<sup>n</sup>-í núú nchaa ñáyiu cùnùu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyiu íchí ñí sándáá iní tnúhu Xítóhó Jesucrístú, núu xiá<sup>n</sup> duca<sup>n</sup> ñí càhá<sup>n</sup>-í núú-ndó. 2 Te ní quide ñaha-í xii-ndo dàtná ñ<sup>n</sup> déhe yiqui<sup>n</sup> vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ñ<sup>n</sup> sá ñà túú tnàhí úhú tecú tnúni-ndó, te ñá túú ní dánèhé ñáhà-í xii-ndo ñ<sup>n</sup> sá xitò-í sá vâ tècu tnúni-ndó. Te quide cuendá-í sá díú-ní dùca<sup>n</sup> vá tècu tnúni-ndó ndéé vitna te núu na dánèhé ñáhà-í xii-ndo nchaa dava-gá tnúhu. 3 Te duca<sup>n</sup> chi quide-ni-ndo nacuáa sàni iní méé-ndó, chi ndècu-ni-ndo ichi cuédú

íní, te nàá ndihi tnàha-ni-ndo, te ñá túú tnàhí cùu ñ<sup>n</sup>nuu-ndo ndecu-ndo. Te xiá<sup>n</sup> cútnùni sá méé-ní nchaa nacuáa sàni iní méé-ndó quide-ndo, te xíquide-ndo dàtná quidé nchaa ñáyiu ñá túú ndècu ichi Xítóhó Jesucrístú. 4 Te dava-ndo càchí-ndó: “Yúhú cúu-í cuendá té Páblú.” Te dava-ndo càchí-ndó: “Yúhú cúu-í cuendá té Apolós”, duha càchí-ndó. Te sá dúcá<sup>n</sup> càhá<sup>n</sup>-ndó xiá<sup>n</sup> cútnùni sá quidé-ni-ndó mee-ni nchaa nacuáa sàni iní méé-ndó.

5 Te yúhú té Páblú càchí tnúhu-í xii-ndo sá ñà túú cùnùu-í, te ni té Àpolós ñá túú cùnùu-dé chi dícó cue téé xinu cuechi núú Yá Ndiöxí cúu-ndí, te ní càhá<sup>n</sup>-ndí tnúhu-gá núú-ndó, núu xiá<sup>n</sup> ní sándáá iní-ndó. Te ndi díí<sup>n</sup> ndí díí<sup>n</sup> ndùu chiu<sup>n</sup> ní táhú Yá Ndiöxí cada-ndí. 6 Te yúhú cúu-í dàtná ñ<sup>n</sup> téé chihí tatá chi dàcahá<sup>n</sup> ñáhà-í xii-ndo tùha-ndo ichi Yá Ndiöxí. Te té Àpolós cúu-dé dàtná ñ<sup>n</sup> téé nàcuhñu chi téé-á<sup>n</sup> ndécú-dé dánèhé ñáhà-dé xii-ndo tnúhu-gá. Te Yá Ndiöxí cúu-gá Yaá quidé sàhnu tatá ní chihí-í-á<sup>n</sup>, te duha càhá<sup>n</sup>-í chi ñu-gá quidé-gá tá ñihí ndéé-ndó ndècu-ndo ichi-gá. 7 Te núu xiá<sup>n</sup> ni téé chihí tatá te ní téé nàcuhñu ñá túú cùnùu-güedé, dico Yá Ndiöxí ío cùnùu-gá chi ñu-gá quidé-gá xinu tatá-á<sup>n</sup> te sàhnu-xi. 8 Te ñ<sup>n</sup>-ni cùu téé chihí tatá ndihi téé nàcuhñu. Te duca<sup>n</sup> sàtnahá-xi cùu nchúhú cue téé xíquide chiù<sup>n</sup> Yá Ndiöxí, te nàcuáa ndùu chiu<sup>n</sup> ní quide-ndí te duca<sup>n</sup> cùnduu táhú taxi Yá Ndiöxí nduu táhú-ndí. 9 Te nchòhó cúu-ndó dàtná ñ<sup>n</sup> xichi núú ñí quée tatá, te nchúhú cúu ñ<sup>n</sup>nuu-ndí quidé chiù<sup>n</sup>-ndí xiá<sup>n</sup>. Te duca<sup>n</sup> sàtnahá-xi cùu-ndo chi cùu cuendá ñáhá Yá Ndiöxí xii-ndo, te nchúhú cúu ñ<sup>n</sup>nuu-ndí quidé-ndí chiù<sup>n</sup>-gá.

Te cùu tucu-ndo datná ñ<sup>n</sup> vehe sá vitná sáá, te duca<sup>n</sup> sàtnahá-xi cùu-ndo chi Yá Ndiöxí quidé-gá tá sàhnu nihnu-ndo ichi-gá cuáhá<sup>n</sup>. 10 Te yúhú cúu-í dàtná ñ<sup>n</sup> téé cùnùu dacia vehe te ní tava-í cimièntú-xi, te díí<sup>n</sup> cue téé véxi dàcaa-güedé ndóho, te ñ<sup>n</sup> ñ<sup>n</sup> cue téé-á<sup>n</sup> ío xini ñuhu-xi cada

cuendá-güedé nàcuáa dacàa-güedé. Núu duca<sup>n</sup> sàtnahá-xi cùu yúhú chi Yá Ndiöxí ní taxi-gá chiu<sup>n</sup> quide-í te chindee ñaha-gá, chi díhna-gá-í ní quixi-í ní cáhá<sup>n</sup>-í tnúhu Xítóhó Jesucristú núu-ndó, te dè<sup>n</sup> cue téé véxi dàcuaha ñaha-ná xii-ndo tnúhu-gá, te ñ<sup>n</sup> ñ<sup>n</sup> cue téé-á<sup>n</sup> ïo xini ñuhu-xi cada cuendá-güedé nàcuáa dacuàha ñaha-güedé xii-ndo tnúhu-gá. <sup>11</sup> Te cimièntú vehe-á<sup>n</sup> cada iní-ó sá cúu-xí mee Xítóhó Jesucristú, te duca<sup>n</sup> chi yúhú ní dánèhé ñàhà-í xii-ndo ní ngúndecu ndihi-ndo Xítóhó Jesucristú, te vá yóo-gá cundecu ndihi-ndo chi ñ<sup>n</sup>dii díi-ni-gá ndécú. <sup>12</sup> Te dava cue téé dàcaa-güedé vehe váha te chihí-güedé díhú<sup>n</sup> cuáá<sup>n</sup>, ndihi díhú<sup>n</sup> cuixí<sup>n</sup>, ndihi yúú sá ïo vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixi<sup>n</sup>. <sup>13</sup> Te sáá nduu te nchaa vehe-á<sup>n</sup> càyú-xi, te vehe vítú-á<sup>n</sup> ndihi vehe ité-á<sup>n</sup> ndihi vehe tnuvixi<sup>n</sup>-á<sup>n</sup> ndoo ndoo càyú, te nchaa vehe váha-á<sup>n</sup> vā càyú-xi cuèi na yāha ñuhú. Te nchaa cue téé ní dácáá vèhe váha-á<sup>n</sup> cada iní-ó sá cúu-güedé ñáyiú ío váha quide chiu<sup>n</sup> Yá Ndiöxí. Te nchaa cue téé ní dácáá vèhe vítú, ndihi cue téé ní dácáá vèhe ité, ndihi cue téé ní dácáá vèhe tnuvixi<sup>n</sup> cada iní-ó sá cúu-güedé ñáyiú ñá túú cuini cada chiu<sup>n</sup> Yá Ndiöxí nàcuáa tàù-xi cunduu. Te sáá nduu te cutnùní nàcuáa nduu chiu<sup>n</sup> ní quide ñ<sup>n</sup> ñ<sup>n</sup> ñáyiú, chi Yá Ndiöxí cáhá<sup>n</sup>-gá nàcuáa nduu chiu<sup>n</sup> ní quide ñ<sup>n</sup> ñ<sup>n</sup> ñáyiú ní quide chiu<sup>n</sup>-gá. <sup>14</sup> Te cue ñáyiú ío váha xíquide chiu<sup>n</sup> Yá Ndiöxí te cùdí chiu<sup>n</sup> quidé-yu, te ñáyiú-á<sup>n</sup> ñhí-yu sá ndúú tǎhú-yu. <sup>15</sup> Te cue ñáyiú ñá túú quide chiu<sup>n</sup> Yá Ndiöxí nàcuáa tàù-xi cunduu, te vá cùdí chiu<sup>n</sup> ní quidé-yu chi cuíta te ndóo-ná-yu duha, dico mèe-yu chi naníhí tǎhú-yu.

<sup>16</sup> Te yúhú cáhá<sup>n</sup>-í dóho-ndo dāndacu-í iní-ndó sá cúu-ndó dàtná vehe Yá Ndiöxí, chi Espiritú-gá ndécú ndihi ñaha-xi xii-ndo. <sup>17</sup> Te núu yoo na dànaa ñaha xii nchóhó ñáyiú cùu veñúhu-gá, te Yá Ndiöxí danàa ñaha-gá xii ñáyiú-á<sup>n</sup>, te duca<sup>n</sup>

càda-gá chi nchóhó cúu-ndó ñáyiú cùu cuendá-gá.

<sup>18</sup> Te vá dāndahú-ndó mèe-ndo sá ïo túha-ndo. Te núu ío dava-ndo sàni iní-ndó sá túha-ndo dàtná sàni iní cue ñáyiú ñá túú ndècu ichi Yá Ndiöxí, te cada-ndo sá cúu-ndó dàtná ñáyiú ñá túú tnàhí túha, te duca<sup>n</sup> te cuu ndisa-ndo ñáyiú túha sá cúu-xí Yá Ndiöxí. <sup>19</sup> Te nchaa sá xini tnùní nchaa ñáyiú càchí sá ïo túha ñá túú ndècu ichi Yá Ndiöxí ñá túú nāndíhi-xi sá cúu-xí-gá. Te càchí-xi núu tütú-gá: “Nchaa ñáyiú càchí sá ïo túha te Yá Ndiöxí dandóo canúú ñáhá-gá xií-yu núu nchàa sá quidè-yu”, duha càchí-xi núu tütú-gá. <sup>20</sup> Te càchí tucu-xi ingá xichi: “Yá Ndiöxí cùtnùní iní-gá nchaa nàcuáa sàni iní ñáyiú càchí sá ïo túha. Te nchaa nàcuáa sàni iní-yu-á<sup>n</sup> càchí-gá sá ñá túú vèdana nāndíhi-xi”, duha càchí-xi núu tütú-gá. <sup>21</sup> Núu xíá<sup>n</sup> cáhá<sup>n</sup>-í dóho-ndo sá vá càchí-ndó sá nchúhú cue téé dānehé ñáhá xii-ndo tnúhu-gá ío càhnu cuu-ndí. Te nchaa sá ío ñuyíú-a cùu-xi sá vāha sá cúu-xí-ndó. <sup>22</sup> Te cuèi yúhú ndihi té Àpolós ndihi té Pèlú ndécú-ndí sá cúu-xí-ndó, te cuèi nchaa sá ío ñuyíú-a te cuèi nchaa nduu ndècu-ndo te cuèi sá cùu-ndó dico nchaa cùu-xi sá vāha sá cúu-xí-ndó. Te cuèi nchaa sá ndécú tnāví, te cuèi nchaa sá cóo ndèe cuèe-gá nchaa cùu-xi sá vāha sá cúu-xí-ndó. <sup>23</sup> Te mee-ndo ndècu-ndo sá cúu-xí Xítóhó Jesucristú, te mee Xítóhó Jesucristú ndécú-gá sá cúu-xí Yá Ndiöxí.

## 4

*Nàcuáa nduu chiu<sup>n</sup> quide cue téé ní táuchíú<sup>n</sup> Xítóhó Jesucristú cáhá<sup>n</sup> tnúhu-gá*

<sup>1</sup> Te cada cuendá-ndó sá nchúhú dicó-ni cue téé xinu cuechi núu Xítóhó Jesucristú cúu-ndí, te chiu<sup>n</sup>-á<sup>n</sup> ní taxi Yá Ndiöxí quidé-ndí cáhá<sup>n</sup>-ndí tnúhu sá ní cachí-gá yíyùhu ni cuu. <sup>2</sup> Te xini ñuhu-xi sá ncháá ñáyiú duca<sup>n</sup> ní sáñaha Yá Ndiöxí chiu<sup>n</sup> quidé-yu cada ndáá-yu cadá-yu chiu<sup>n</sup>-á<sup>n</sup>. <sup>3</sup> Te yúhú ñá túú quide cuendá-í nūu nása nduu

tnúhu cãhá<sup>n</sup>-ndó cuendá-í nũu cùu-í tée váha àdi ñá túú cùu-í. Te ðiu-ni duca<sup>n</sup> ñà túú quide cuendá-í nũu nása-gá cãhá<sup>n</sup> nchaa dava-gá ñáyiu cuendá-í. Te ni mée-í ñá túú cãhá<sup>n</sup>-í nũu cùu-í tée váha àdi ñá túú cùu-í. <sup>4</sup> Te sãnuu iní-í sã ñà túú ñã cúmãni-í núú Yã Ndiõxí, dico ñá ðíú sã xiã<sup>n</sup> te cachí-í sã ñã túú cuèchi-í ndécú nũú-gã, chi mee-gã náhá ndãá-gã te núu nása quide-í ndécú-í. <sup>5</sup> Te nchòhó vá cãhá<sup>n</sup>-gã-ndó sã ñà túú cùndáá ñáyiu núú Yã Ndiõxí, chi vátá sãá-gã nduu cùndáá cuèchi-yu. Te na sãá nduu quixi tucu Xítóhó Jesucristú te dàvá-á<sup>n</sup> dàtúu-gã nchaa sã quidè-yu, nchaa sã ñà túú xini-ó quidè-yu vitna, te duca<sup>n</sup> dàtúu-gã nchaa nãcuáa sãni iní-yu. Te Yã Ndiõxí cãhá<sup>n</sup> váha-gã cuendá nchaa ñáyiu ní quide váha.

<sup>6</sup> Te nchòhó ñáyiu ndècu ndihí-í ichi Xítóhó Jesucristú, càcunehe-í té Àpolós ndihí yúhú núú-ndó dànehé ñáhà-í xii-ndo nãcuáa cada-ndo cuendá duca<sup>n</sup> cùu-xi ñã sã váha sã cúu-xi-ndó, ndihí cuendá sã nchòhó canchicú<sup>n</sup> nihnu-ndo càda-ndo mee-ni nchaa nãcuáa yòdo tnuní núú tütú Yã Ndiõxí. Te duca<sup>n</sup> te vá càchí-ndó sã ñã tée cãhá<sup>n</sup> tnúhu Yã Ndiõxí ío-gã càhnu cuu-dé dàcúxí ñngá-dé. <sup>7</sup> Te nchòhó vá càchí-ndó sã ío-gã cùnũu-ndo dacúxí dàva-gã ñáyiu chi Yã Ndiõxí ní quide-gã ní ngúndecu ndihí-ndo nchãa sã xini tnuní-ndó. Te mee-gã duca<sup>n</sup> ñã quide-gã ¿Te ná cuendá nchòhó duca<sup>n</sup> quide cahnu-ndo mee-ndo? Te quide-ndo datná tnúhu sã mée-ndó ñã quide-ndo dùca<sup>n</sup> ní ngúndecu ndihí-ndo nchãa sã xini tnuní-ndó.

<sup>8</sup> Te nchòhó quidè-ndó sã ñà túú tnàhí-gã ná cúmãni-ndó nũú Yã Ndiõxí, te quide-ndo sã ni ñihí-ndó nchãa sã cuini-ndó nũú-gã ndécú ndihí-ndo, te sãnuu sã cúu-ñã-ndó dàtná cue tée yíndaha ñáyiu, te nchúhú ñá túú cùu ñãnuu ndihí ñaha-ndí xii-ndo quíndaha ndihí ñaha-ndí xii-ndo ñáyiu, ¿te váha-ni te núu dicó ndisa sã yíndaha-ndo ñáyiu chi tnàhá nchúhú ní tnàhá

ndihí ñaha-ndí xii-ndo quíndaha-ó-yu te núu dicó cúu-xi ñã sã ndãá dico ñáhá! <sup>9</sup> Te yúhú quidè cuendá-í sã nchúhú cue tée ní táuchíu<sup>n</sup> Xítóhó Jesucristú cãhá<sup>n</sup> tnúhu-gã núú ñáyiu ní cachí Yã Ndiõxí sã cúu-ndí cue tée ñá túú nãndihí sã cúu-xi dàva-gã ñáyiu. Te ní cachí tucu-gã sã cúu-ndí dàtná cue ñáyiu sa ní tnàhá òré cuú-xi quíhí<sup>n</sup> nacháhu cuèchi-xi, te nchaa ñáyiu cùnũhu ñáhã-yu xii-ndí sã dúcã<sup>n</sup> ndòho-ndí, te tnàhá nchaa espíritú cùnũhu ñaha-xi xii-ndí. <sup>10</sup> Te cuendá sã xínú cuèchi-ndí núú Xítóhó Jesucristú, xiã<sup>n</sup> cúu-ndí dàtná cue tée ñá túú vèdana nãndihí sã cúu-xi ñáyiu. Te nchòhó quidè-ndó sã cúu-ndó ñáyiu ío túha ndècu ndihí Xítóhó Jesucristú. Te ñáyiu càchí-yu sã nchúhú cúu-ndí cue tée ñá túú ndàcu cada ñã sã cáda sã cúu-xi Yã Ndiõxí. Te nchòhó quidè-ndó sã cúu-ndó ñáyiu ío váha ndàcu quide ñã sã sãni iní-ndó sã cúu-xi-gã. Te cue ñáyiu dàquee tihú ñáhã-yu xii-ndí, te nchòhó nehè-yu sã yíñũhu núú-ndó. <sup>11</sup> Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiu quide úhú ñáhã-yu xii-ndí, te ni vèhe-ndí ñá túú ndèé cáá cùndecu-ndí. <sup>12</sup> Te ío ndòho-ndí quidè chiu<sup>n</sup>-ndí ñihí-ndí sã xéxi-ndí. Te cue ñáyiu xicuehé ñáhã-yu xii-ndí dico xicã<sup>n</sup> táhú-ndí núú Yã Ndiõxí cuendá-yu, te ñá cúu tnàhí quiní ndèé ñáhã-yu xii-ndí dico quide cahnu iní-ndí nchaa sã quidè ñáhã-yu. <sup>13</sup> Te mee-ni tnũhu cuèhé tnúhu duha cãhá<sup>n</sup>-yu cuendá-ndí dico sãcahnu iní-ndí te dàsahú-ndí-yu mee-ni tnũhu váha. Te càchí-yu sã cúu-ndí dàtná ñã sã ñà túú-gã vèdana nãndihí, te nchaa-ni nduu duca<sup>n</sup> cãhá<sup>n</sup>-yu xãhá<sup>n</sup>-yu xii-ndí.

<sup>14</sup> Te yúhú duha cãhá<sup>n</sup>-í núú tütú-a dàsahú ñáhã-í xii-ndo, dico ñá ðíú tnũhu sã cúu cãhá<sup>n</sup> núú-ndó cãhá<sup>n</sup>-í. Te duha cãhá<sup>n</sup>-í dóho-ndo chi quide iní-í sã sũúni dàtná déhe mee-í

cúu-ndó chi ío cùu iní ñáhà-í xii-ndo. <sup>15</sup> Te nchaa-o ndècu-o ichi Xítóhó Jesucrístú vitna, dico yúhú cùu-í tée díhna nuu ní dánèhé ñáhá xii-ndo nacuaá ndùu tnúhu sá cáhá<sup>n</sup> nàcuáa naníhí táhú-ó, núu xiá<sup>n</sup> cùu-í dàtná tātá-ndó. Te cuèi vài vihi cue tée na quixi-güedé danèhé ñáhá-güedé xii-ndo tnúhu-gá dico ì<sup>n</sup> dìi-ni yúhú cùu-í tée díhna nuu-gã ní dánèhé ñáhá xii-ndo tnúhu-gá. <sup>16</sup> Núu xiá<sup>n</sup> cáhá<sup>n</sup>-í dóho-ndo sã cáncí<sup>n</sup> níhnu-ndo cada-ndo nchaa nacuaá quide-í.

<sup>17</sup> Te xiá<sup>n</sup> núu sa ní tendaha-í té Timùteú véxi coto ñaha-dé xii-ndo, te tée-án ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucrístú, te tée-án cachí tnúhu-dé xii-ndo nchaa nacuaá quide-í ndécú-í ichi-gá. Te ñu-ni nàcuáa na cächí tnúhu-dé-án ñu-ni duca<sup>n</sup> quide-í nchaa xichi núu tàcá ñáyiú dàcuaha tnúhu Xítóhó Jesucrístú. <sup>18</sup> Te dava nchòhó ío quide cahnu-ndo mee-ndo chi sàni iní-ndó sã vã quixí-gã-í quixi coto ñaha-í xii-ndo. <sup>19</sup> Dico núu mee Yá Ndiõxí ná cächí-gá te ío ndíhi quixi coto ñaha-í xii-ndo, te dàvá-án quini-í te núu nása quide nchaa ñáyiú duca<sup>n</sup> ío xiquide càhnu mee-xi-án ndécú-yu ichi Xítóhó Jesucrístú. Te vá cáda cuendá-í tnúhu cáhá<sup>n</sup>-yu chi chiú<sup>n</sup> quidé-yu cada cuendá-í. <sup>20</sup> Te vitna yíndaha ñaha Yá Ndiõxí xii-o, te chindee ñaha-gá xii-o quide-o nchaa sã vãha sàni iní-ó quide-o te ñá díú mèe-ni sã cáhá<sup>n</sup>-ó. <sup>21</sup> Te ío chí cání ñi núu ndédacàa sã vãha-gá cada-í òré ná quèxió-í núu ndécú-ndó, núu sã ténàá ñáhà-í xii-ndo àdi sã cáhá<sup>n</sup> ndíhi ñaha-í xii-ndo ndíhi tnúhu vii tnúhu vãha nàcuáa cutnùní iní-ndó sã cúu iní ñáhà-í xii-ndo.

## 5

### *È<sup>n</sup> cuéchi càhnu vihi*

<sup>1</sup> Te yúhú sa ní níhí ndáá-í tnúhu nàcuáa cùu ndecu-ndo, chi ì<sup>n</sup> tée ndècu ndíhi-ndo ndeca-dé nãná chàhá-dé. Te xiá<sup>n</sup> cúu-xí ì<sup>n</sup> cuéchi càhnu vihi, chi ndéé nchaa ñáyiú ñá túú ndècu ichi Yá Ndiõxí cächí-yu sã vã cúu tnàhí duca<sup>n</sup> cada-o.

<sup>2</sup> ;Te nchòhó ío quide cahnu-ni-ndo mee-ndo xindecu-ndo! ;Te tàú-ndó sã cündiyí-ndó ndixi cuéchi iní-ndó sã dúcá<sup>n</sup> cùu ndecu-ndo ni cuu! Te tée duca<sup>n</sup> quide-án xini ñuhu-xi sã vã dáñá-gã-ndó nihí tnáhá ndíhi ñaha-dé xii-ndo ni cùu dico ñá túú dùca<sup>n</sup> quide-ndo. <sup>3</sup> Te yúhú ñá túú ndècu ndíhi ñaha-í xii-ndo dico dàtná tnúhu sã ndécú ndíhi ñaha-í xii-ndo chi duca<sup>n</sup>-ni ío ñuhu iní ñáhà-í xii-ndo. Te yúhú cächí-í sã nàchãhu tée-án cuéchi-dé sã dúcá<sup>n</sup> quide-dé, te ñu-ni duca<sup>n</sup> cáhá<sup>n</sup>-í núu-ndó te núu dicó ndécú ndíhi ñaha-í xii-ndo. <sup>4</sup> Te òré nātácá-ndó cáhá<sup>n</sup> ndíhi-ndo Yá Ndiõxí te ñu-ni Xítóhó Jesucrístú ñá túú dàña ndéé-gá chindèe ñaha-gá xii-ndo, te òré-án cada-ndo nàcuáa cuini Xítóhó Jesucrístú cada-ndo, te cada iní-ndó sã tnáhá-í ndécú ndíhi ñaha-í xii-ndo. <sup>5</sup> Chi tàú-xi sã tée duca<sup>n</sup> quide-án daquèe tíhú-ndó-dé, te duca<sup>n</sup> te sácúhná dandòho ñaha-xi xii-dé cuèi na cúu-dé, dico na sãá nduu te nduu táhú-dé cundecu-dé ndíhi Xítóhó Jesucrístú.

<sup>6</sup> Te nchòhó ñá túú ndùu váha-xi sã cächí-ndó sã ío càhnu cuu-ndo. Te xini-ndó sã cuèi luha-ni levadùrá ná quíhu yuchi cuáha pãá dándàa-xi cuèi luha-ni nà quíhu te nihí-ni yuchi sàhá<sup>n</sup> ndoho-xi. Te duca<sup>n</sup> sãtnahá-xi cùu nchòhó chi núu ndècu ndíhi-ndo ì<sup>n</sup> ñáyiú quide sã ñá túú vãha te nchaa-ndo ñá túú-gã cúu vãha iní-ndó ndècu-ndo. <sup>7</sup> Te xini ñuhu-xi sã cáda-ndó dàtná quidé cue ñáyiú quide vico pascuá, chi ñá túú chihí-yu levadùrá yuchi cuáha pãá xéxi-yu nduu quidé-yu vico-án. Te sã quíhu pãá-án cada iní-ó sã cúu-xí nchaa sã cuèhé sã dúhá ní xóo cada-ndo. Te vá cáda-gã-ndó ni ì<sup>n</sup> sã cuèhé sã dúhá, te duca<sup>n</sup> te cuu-ndo ñáyiú váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-án cada iní-ó sã cúu-güedé datná Xítóhó Jesucrístú nàcuáa ní xihí-gá núu cùrúxí. <sup>8</sup> Te núu xiá<sup>n</sup> xini ñuhu-xi sã vã cáda-gã-ndó ni ì<sup>n</sup> sã cuèhé sã dúhá sã ní xóo cada-ndo, te ni vã cúhú<sup>n</sup>-gã iní-ndó te ni vã cáda-gã-ndó, te ni yùhu ni



iní-ná-ndó càda-ndo mee-ni sá vâha.  
 9 Te tutú sá sà ní dáquixì-í ndaha-ndo ñi cachí-í sá vâ ñihí tnáhá-ndó ndihí cue ñáyiú ndècu ichi díí ñí. 10 Te sá dúcá<sup>n</sup> càhá<sup>n</sup>-í núú tutú ní dáquixì-í ndaha-ndo te vá caní ñí-ndó sá yùhú càchí-í sá vâ cúú-gã tnahá tnúhu-ndo ndihí cue ñáyiú ndècu ichi cuehé ichi duha, ndihí ñáyiú ndècu ichi díí ñí, ndihí ñáyiú xihò nchaa sá ió ñuyíú, ndihí ñáyiú dùhu sá ndécú ndihí tnahá ñáyiú-xi, ndihí ñáyiú quide cahnu sá càchí-yu cùu ndiòxí te ñá ndáá sá ndiòxí cúú-xí chí dicó cue téé ñuyíú-a ní cadúha nchaa xíã<sup>n</sup>, chí núu duca<sup>n</sup> na càda-ndo vá tnáhá tnúhu-gá-ndó ndihí-yu te xini ñuhu-xi sá vâ cùndècu-gá-ndó núú ndécú-yu. 11 Te ñá túú duca<sup>n</sup> quee-xi nacuaá càhá<sup>n</sup>-í núú tutú-í, chí yùhú càchí-í sá vâ cúú tnáhá tnúhu-ndo ndihí ñáyiú càchí sá ndécú ichi Xítohó Jesucristú te ñá ndáá sá ndécú-yu ichi-gá. Te núu cùú-yu ñáyiú ndècu ichi díí ñí, àdi cuú-yu ñáyiú xihò nchaa sá ió ñuyíú-a, àdi cuú-yu ñáyiú quide cahnu nchaa sá càchí-yu cùu ndiòxí te ñá ndáá chí dicó cue téé ñuyíú-a ní cadúha nchaa xíã<sup>n</sup>, àdi cuú-yu ñáyiú yiti yùhu-xi, àdi cuú-yu ñáyiú quihu, àdi cuú-yu ñáyiú dùhu sá ndécú ndihí tnahá ñáyiú-xi, te nchaa ñáyiú duca<sup>n</sup> càchí sá ndécú ichi-gá te ñá ndáá te duca<sup>n</sup> xíquidè-yu, te ni vá cúú ñihí tnáhá-ndó ndihí-yu caxi-ndo ndihí-yu. 12-13 Te ñá díú yùhú cúú-í téé càhá<sup>n</sup> cuendá nchaa ñáyiú ñá túú ndècu ichi Xítohó Jesucristú núu quide ndáá-yu àdi ñá túú quide ndáá-yu ndécú-yu, chí mee Yá Ndiòxí càhá<sup>n</sup>-gá te núu nása quidè-yu ndécú-yu. Dico nchòhó chí tàú-ndó càda cuendá-ndó núu nása quide cue ñáyiú ndècu ndihí-ndo ichi Xítohó Jesucristú. Núu xíã<sup>n</sup> xini ñuhu-xi daquee tíhú-ndó téé duca<sup>n</sup> ñá túú quide váha ndècu ndihí-ndo-á<sup>n</sup>, te vá dáñá-gá-ndó ñihí tnáhá ndihí ñaha-dé xii-ndo.

## 6

*Nàcuáa tàú-xi cada ñáyiú ndècu ichi*

*Xítohó Jesucristú te núu ñá túú ndècu ndihí váha tnáhá-yu*

1 Te dava nchòhó òré ñá túú ndècu ndihí váha tnáhá-ndo te cùuyi-ndo cuáhá<sup>n</sup>-ndó núú cuè téé cùchiu<sup>n</sup> ñá túú ndècu ichi Xítohó Jesucristú sàcá<sup>n</sup> cuéchi-ndo, te ñá túú duca<sup>n</sup> taú-xi cada-ndo chí núú cuè téé ndècu ichi-gá duca<sup>n</sup> tàú-ndó quihí<sup>n</sup>-ndó càcá<sup>n</sup> cuéchi-ndo. 2 Te nchòhó sa nàha-ndo sá ncháá ñáyiú cùu cuendá Yá Ndiòxí sáá nduu càhá<sup>n</sup>-yu te núu ní quide ndáá nchaa dava-gá ñáyiú àdi ñá túú ní quide ndáá-yu, te nchòhó tnáhá-ndó cùu-ndo ñáyiú duca<sup>n</sup> càhá<sup>n</sup>, te núu duca<sup>n</sup> te cutnùní ñí-ndó sá ndácú-ndó càda ndáá-ndó ncháa cuéchi sá ñá túú úhú cundáá vitna ndècu-ndo ñuyíú-a. 3 Te nchòhó sa nàha-ndo sá ncháá ndéé cue espíritú xini cuéchi núu Yá Ndiòxí sáá nduu càhá<sup>n</sup>-ó te núu nása quide-xi ndècu-xi. ¡Núu xíã<sup>n</sup> cutnùní ñí-ó sá úú<sup>n</sup>-gã ndacu-o càda ndáá-ó ncháa cuéchi sá ió ñuyíú-a! 4 Te núu ió dava-ndo ió nása cùu ndècu-ndo te xináá-ndó, te vá quihí<sup>n</sup>-ndó càcá<sup>n</sup> cuéchi-ndo núú cuè téé ndèhe-ndo sá ñá túú ndècu-güedé ichi Yá Ndiòxí, dico nchòhó chí da núú cuè téé-á<sup>n</sup> cuáhá<sup>n</sup>-ndó sàcá<sup>n</sup> cuéchi-ndo. 5 Te duha càhá<sup>n</sup>-í cuendá cucaha<sup>n</sup> núú-ndó chí ñá túú quide váha-ndo sá dúcá<sup>n</sup> quide-ndo. ¿Te náa dicó-ñá ñá túú tnáhí ñi<sup>n</sup> téé cutnùní ñí-xi nàcuáa cada ndáá cuéchi-ndo ndècu ndihí-ndo ichi Xítohó Jesucristú-á<sup>n</sup>? 6 Te nchòhó, ñá túú quide váha-ndo, chí dava-ndo cuáhá<sup>n</sup>-ndó núú cuè téé ñá túú ndècu ichi Xítohó Jesucristú sàcá<sup>n</sup> cuéchi-ndo cuendá dava-gá cue ñáyiú ndècu ndihí-ndo ichi-gá.

7 Te ñá túú quide váha-ndo sá dúcá<sup>n</sup> nàá ndihí tnáhá-ndo te cuáhá<sup>n</sup>-ndó sàcá<sup>n</sup> cuéchi-ndo, te váha-gá sá cáda càhnu ñí-ndó cuéi nándi na càda ñaha tnahá ñáyiú-ndo xii-ndo cuéi dùhú-yu sá ndécú ndihí-ndo dico cada càhnu-ni ñí-ndó. 8 Dico nchòhó chí ñá túú quide cahnu ñí-ndó chí da uu<sup>n</sup>-gá ñá túú quide váha-ndo sàcúú-xí tnàha ñáyiú-ndo, chí cùu úhú ñí-ndó-yu, te dùhu-ndó-yu, te ndéé méé-ndó nàcuáa ndècu-ndo

ichi Xítohó Jesucristú duca<sup>n</sup> quide tnaha-ndo.

<sup>9</sup> Te nchòhó sa naha-ndo sá ncháá ñáyiú ndècu ichi cuehé ichi duha vá ndúú tãhũ-yu cundecú-yu núú ndécú Yã Ndiõxí táxí tnùnì-gá, núú xíã<sup>n</sup> vá cání iní-ndó sã ñáyiú-á<sup>n</sup> nduu tãhũ-yu cundecú-yu ndihì-gá. Te ni cuè ñáyiú ndècu ichi díí ìní, te ni cuè ñáyiú quide cahnu nchaa sá càchì-yu cùu ndiòxí te ñá ndáá chi dícó cue téé ñuyíú-a ní cadúha nchaa xíã<sup>n</sup>, te ni cuè téé càhá<sup>n</sup> ndihì ñadìhì te ñá díú ñadìhì-güedé cúú-yu, te ni cuè ñáyiú dìhì càhá<sup>n</sup> ndihì téé te ñá díú yí-yu cùu-güedé, te ni cuè téé càhá<sup>n</sup> ndihì tnàha téé-xi, <sup>10</sup> te ni cuè ñáyiú dùhu, te ni cuè ñáyiú xìho sá ndécú ndihì tnaha ñáyiú-xi, te ni cuè ñáyiú quihu, te ni cuè ñáyiú càhá<sup>n</sup> úhú, te ni cuè ñáyiú dànícuehé tnàha ñáyiú-xi te dùhu ñahá-yu, te ni ì<sup>n</sup> cue ñáyiú duha xíquide vá ndúú tãhũ-yu cundecú-yu núú ndécú Yã Ndiõxí táxí tnùnì-gá. <sup>11</sup> Te dava nchòhó duca<sup>n</sup> ñí xóo cada-ndo ni cùu, te vitna ní cuu-ndo ñáyiú sa ní nduu ndoo ní nduu nine iní-xi, te ní cuu-ndo ñáyiú cùu cuendá Yã Ndiõxí, te ní cuu tucu-ndo ñáyiú ñá túú-gã cuèchi-xi ndècu núú-gã. Te duca<sup>n</sup> ñí quide ñaha Yã Ndiõxí xii-ndo sã vãha sá cuendá Xítohó Jesucristú, te ní ngúndecu ndihì-ndo Espíritú Yã Ndiõxí.

#### *Nàcuáa ndùu cuendá yiqui cùñú-ó*

<sup>12</sup> Te càchì ñáyiú sá ncháá sã sání ìní-ó cuu cada-o, te ndáá càhá<sup>n</sup>-yu dícó-ni sá ñã ncháá cùu-xi sá vãha sá cúú-xí-ó. Te núu cùnì nchaa sá sání ìní-ó-ã<sup>n</sup> taxi tnùnì ñahá-xi te vá cáda-ó. <sup>13</sup> Te nchòhó sa xínì-ndó sã ncháá sã xéxí-ó cuãguee-xi xítí-ó, te xítí-ó ñí cuáha tnàhì-xi sá cúhú<sup>n</sup> ncháa sá cáxí-ó, dico xítí-ó ndihì nchaa sá xéxí-ó chi naa-xi. Te Xítohó Jesucristú néhé cuendá-gá yiqui cùñú-ó, te duca<sup>n</sup> yiqui cùñú-ó cùu-xi cuendá-gá, te ñá túú ní cuãha yiqui cùñú-ó sã cùndècu-xi ichi díí ìní. <sup>14</sup> Te dàtná ní quide Yã Ndiõxí ní dándótó-gã Xítohó Jesucristú duca<sup>n</sup> càda ñaha-gá xii

nchoo tùcu chi dandòto ñaha-gá xii-ó núu na cùú-ó, chi ndàcu-gá quidé-gã nchaa sá vãha.

<sup>15</sup> Te nchòhó sa naha-ndo sá yiqui cùñú-ó cùu-xi cuendá Xítohó Jesucristú chi ì<sup>n</sup>-ni cùu-o ndihì-gá, núu xíã<sup>n</sup> ñá túú tnàhì ndùu váha-xi càhá<sup>n</sup> ndihì-o ñáyiú ndècu ichi díí ìní, chi yiqui cùñú-ó cùu-xi cuendá Xítohó Jesucristú, te núu duca<sup>n</sup> na càda-o te cada iní-ó sã cuendá-ñã ñáyiú-á<sup>n</sup> cúú yiqui cùñú-ó, núu xíã<sup>n</sup> ñá túú tnàhì ndùu váha-xi duca<sup>n</sup> càda-o. <sup>16</sup> Te sa xínì-ndó sã núu ì<sup>n</sup> téé na càhá<sup>n</sup> ndihì-dé ì<sup>n</sup> ñadìhì ndécú ìchi díí ìní te cada iní-ó sã ì<sup>n</sup>-ñã yiqui cùñú cúú-yu. Te duca<sup>n</sup> càhá<sup>n</sup>-xi núú tùtú Yã Ndiõxí núú càchì-xi: “Ì<sup>n</sup> téé na càhá<sup>n</sup> ndihì-dé ì<sup>n</sup> ñadìhì te ì<sup>n</sup>-ñã yiqui cùñú cúú-yu”, duha càchì-xi. <sup>17</sup> Te duca<sup>n</sup> sãtnahá-xi cùu nchaa ñáyiú tnàhá tnúhu ndihì Xítohó Jesucristú, chi ì<sup>n</sup>-ñã cúú-yu ndihì-gá.

<sup>18</sup> Te núu xíã<sup>n</sup> càhá<sup>n</sup>-í dóho-ndo sã vã cùndècu-ndo ichi díí ìní, chi núu duca<sup>n</sup> na càda-ndo te ñá túú tnàhì sã vãha cùu-xi sá cúú-xí yiqui cùñú-ndó chi ío dàcuíta nihnu-xi yiqui cùñú-ndó. Te nchaa dava-gá sá cuehé sá dúhá ñá túú quide-xi yiqui cùñú-ndó dàtná quidé xíã<sup>n</sup>. <sup>19</sup> Te nchòhó sa cùtnunì iní-ndó sã yiqui cùñú-ndó cùu-xi datná ì<sup>n</sup> vehe núú ndécú Espíritú Yã Ndiõxí. Te duca<sup>n</sup> sãtnahá-xi cùu yiqui cùñú-ndó chi ndècu-ndo ndihì Espíritú-gá. Te mee-gã ní taxi-gá Espíritú-gá ndécú ndihì-ndo, te ñá díú mée-ndo cuu cuendá-ndó mée-ndo chi Yã Ndiõxí cúú cuendá ñahá-gã xii-ndo. <sup>20</sup> Te duca<sup>n</sup> cùu-ndo ñáyiú cùu cuendá Yã Ndiõxí chi Xítohó Jesucristú ní nacháhu-gá nchaa yíca cuèchi-ndo. Te núu xíã<sup>n</sup> xínì ñùhu-xi sá ñihíí ní ndúú-ndó càda-ndo nacuáa cuu càhnu Yã Ndiõxí, te duca<sup>n</sup> tàú-xi cada-ndo chi espíritú-ndó ndihì yiqui cùñú-ndó cùu-xi cuendá-gá.

## 7

### *Sáhú sã cúú-xí ñáyiú ní tnándaha*

<sup>1</sup> Te ní quexìo tutú sá ñí dáquíxí-ndó ndàha-í, te vitna na càchì tnúhu-í

xii-ndo cuendá tnúhu cãhá<sup>n</sup>-ndó nõu tütú-ndó. Te váha cada-xi te nõu vá cãndeca tée ñadihí, te duca<sup>n</sup>-ni váha cada-xi te nõu ñáyiú ðihí vá cãndecá-yu tée. <sup>2</sup> Te ðicó-ni sá nõu duca<sup>n</sup> na càda-ndo te dava-ndo càni iní-ndó cùndecu-ndo ichi ðí iní. Nõu xiá<sup>n</sup> xíní ñùhu-xi sá ncháá cuè tée ndi ðí<sup>n</sup> cùndecu ñadihí-güedé, te duca<sup>n</sup>-ni tucu nchaá cue ñáyiú ðihí ndi ðí<sup>n</sup> cùndecu yí-yu. <sup>3</sup> Te cãchí tnúhu-í xii-ndo sã ncháá cuè tée vá cúú cãchí-güedé sã vá cúú cãhá<sup>n</sup> ndihí-güedé ñadihí-güedé, te ðiu-ni duca<sup>n</sup> cuè ñáyiú ðihí tucu, vá cúú cãchí-yu sã vá cúú cãhá<sup>n</sup> ndihí-yu yí-yu. <sup>4</sup> Te nchaá cue ñáyiú ðihí chi ñá ðíú mèe-ní-yu cùu cuendá-yu yiqui cùñú-yu chi tnàhá cúú cuendá yí-yu, te duca<sup>n</sup>-ni ncháa cue tée tucu chi ñá ðíú-ní mèe-güedé cúú cuendá-güedé yiqui cùñú-güedé chi tnàhá cúú cuendá cue ñadihí-güedé. <sup>5</sup> Te cue tée vá cúú cãchí-güedé sã vá cúú cãhá<sup>n</sup> ndihí-güedé ñadihí-güedé. Te ni cuè ñáyiú ðihí vá cúú cãchí-yu sã vá cúú cãhá<sup>n</sup> ndihí-yu yí-yu. Àdi te nõu ní ndatnúhu-yu sã vá dúcá<sup>n</sup> càdá-yu ñ<sup>n</sup> úú nduu cuendá sã cuíni-yu ío cãhá<sup>n</sup> ndihí-yu Yá Ndiõxí, dico nà yáha nõu ná daha nduu duca<sup>n</sup> ñi ndatnúhu-yu sã vá dúcá<sup>n</sup> càdá-yu te naníhí tnàhá tucú-yu, chi nõu ñáhá te cudana te vá cuácãhnu iní-yu te sãcuíhná dacãhá<sup>n</sup> ñáhá-xí xii-yu cadá-yu sã ñà túú tau-yu cadá-yu.

<sup>6</sup> Te tnúhu cãhá<sup>n</sup>-í-a quèe-xi sá tée ndihí ñadihí cuu candeca tnàhá-yu dico ñá túú quide yica-í sá dúcá<sup>n</sup> càdá-yu. <sup>7</sup> Te yúhú sání iní-í sá nõu ðicó sá cúú te nchaá-ndo cùndecu-ndo datná ndécú-í, dico ñáhá chi mee Yá Ndiõxí ní cachí-gá nãcuáa nduu táhú-ó ñ<sup>n</sup> ñ<sup>n</sup>-o cundecu-o, chi dava-o ní cutáhú-ó nõú-gã sã cùndecu ñadihí-ó te dava-o ñáhá. <sup>8</sup> Te cãchí tnúhu-í xii nchòhó cue tée vátá ñihí-gá ñadihí-xi sã vãha-gá sã nõu vá cùndecu ñadihí-ndó dàtná yúhú. Te duca<sup>n</sup>-ni nchòhó cue ñáyiú ðihí ñáyiú vátá

ñihí-gá yí-xi sã vãha-gá sã nõu vá cùndecu yí-ndo. Te ðiu-ni duha cãhá<sup>n</sup>-í sã cúú-xi ncháa nchòhó ñáyiú ðihí ní quendóo quèe sã vãha-gá sã nõu vá cãndeca-gá-ndó tée. <sup>9</sup> Te cãchí tnúhu-í xii nchaá-ndo sã nõu xito-ndo sã vá cùndèe iní-ndó cùndecu mee-ndo te vãha-gá sã nõu tnãndaha-ndo, te ñá ðíú sã mèe-ní càni cuehé cani duha iní-ndó cùndecu-ndo.

<sup>10</sup> Te nchaá nchòhó ñáyiú sa ní tnãndaha cãhá<sup>n</sup>-í dóho-ndo, te ñá ðíú mèe-í duha càhu iní-í cãhá<sup>n</sup>-í dóho-ndo chi Xítóhó Jesucristú duca<sup>n</sup> dàcahu iní ñáhá-gã xii-í, chi mee-gã cuíni-gá cada-ndo nãcuáa na cãhá<sup>n</sup>-í-a. Te nchaá nchòhó cue ñáyiú ðihí cãhá<sup>n</sup>-í dóho-ndo sã vá dáñá-ndó yí-ndo. <sup>11</sup> Te nõu ío dava-ndo sã ní dáñá-ndó yí-ndo, te xini ñùhu-xi sã vá cãndeca-gá-ndó tée, chi cundecu mee-nã-ndó àdi nõu ñáhá te naquehe<sup>n</sup> tucu-ndo tée ní cuu yí-ndo. Te nchaá nchòhó cue tée ndècu ñadihí-xi cãhá<sup>n</sup>-í dóho-ndo sã vá dáñá-ndó ñáyiú cùu ñadihí-ndó.

<sup>12</sup> Te tnúhu na cãhá<sup>n</sup>-í-a cùu-xi sã ní sani iní mèe-í te ñá ðíú tnúhu sã ní cachí Xítóhó Jesucristú cãhá<sup>n</sup>-í cúú-xi. Te nõu dava nchòhó cue tée ndècu ichi Xítóhó Jesucristú ndécá-ndó ñáyiú ðihí ñáyiú ñá túú ndècu ichi-gá, te vá dáñá-ndó-yu te nõu cùu váha iní-yu ndèca ñáhá-yu xii-ndo. <sup>13</sup> Te nõu dava nchòhó cue ñáyiú ðihí ñáyiú ndècu ichi Xítóhó Jesucristú ndécá-ndó cuè tée ñá túú ndècu ichi-gá te vá dáñá-ndó-güedé te nõu cùu váha iní-güedé ndécá ñáha-güedé xii-ndo. <sup>14</sup> Te nõu ñ<sup>n</sup> tée ñá túú sãndáá iní-dé Xítóhó Jesucristú te ñadihí-dé sãndáá iní ñáhá-á<sup>n</sup> xii-gá, te tée-á<sup>n</sup> ñi cuu-dé ñ<sup>n</sup> tée sa ní cuyatni tnàhá tnúhu ndihí ñáha xii-gá sã cuendá ñadihí-dé. Te duca<sup>n</sup> sãtnahá-xi cùu tucu ñadihí ñá túú sãndáá iní ñáhá xii Xítóhó Jesucristú te yí-a<sup>n</sup> sãndáá iní ñáhá-dé xii-gá, te ñáha-á<sup>n</sup> sa ní cuyatni tnàhá tnúhu-a<sup>n</sup> ndihí-gá sã cuendá yí-a<sup>n</sup>, te ðiu-ni duca<sup>n</sup> sãtnahá-xi cùu cue landú-yu chi sa ní cuyatni tnàhá tnúhu-güexi ndihí-gá. Te nõu vá

dúcá<sup>n</sup> cùu te cue landú-yu-á<sup>n</sup> ìo xica cùndecu-güexi núú-gá. <sup>15</sup> Te núu ì<sup>n</sup> tée ñá túú sàndáá iní ñáhá xii Xítóhó Jesucristú cuiní-dé dañá tnàha-dé ndihí ñadìhí-dé ñaha sàndáá iní ñáhá xii Xítóhó Jesucristú, te ñu-ni na càda-dé nàcuáa sàni iní-dé. Te ñu-ni duca<sup>n</sup> tucu te núu ñadìhí ñaha ñá túú sàndáá iní ñáhá xii Xítóhó Jesucristú cuiní-a<sup>n</sup> dañá-a<sup>n</sup> tée sàndáá iní ñáhá xii-gá, tée cùu yì-a<sup>n</sup> te ñu-ni na càda-a<sup>n</sup> nacuáa sàni iní-a<sup>n</sup>. Chi tée sàndáá iní ñáhá xii Xítóhó Jesucristú ñá túú tàú-dé cada yica-dé ñadìhí-dé cundecu ndihí ñaha-a<sup>n</sup> xii-dé te núu ñá túú cuiní-a<sup>n</sup>. Te ñu-ni duca<sup>n</sup> ñadìhí ñaha sàndáá iní ñáhá xii-gá ñá túú tàú-a<sup>n</sup> cada yica-a<sup>n</sup> cundecu ndihí ñaha yì-a<sup>n</sup> xii-a<sup>n</sup> te núu ñá túú cuiní-dé cundecu ndihí ñaha-dé xii-a<sup>n</sup>, chi Yá Ndiòxí cuiní-gá sá ncháá nchò ñá yiu ndècu ichi-gá cundecu váha-o vā nàá-ó. <sup>16</sup> Chi cue tée sàndáá iní tnúhu Xítóhó Jesucristú ñá túú cùtnuní iní-güedé te núu ndacu-güedé canu ichi-güedé ñadìhí-güedé ichi-gá àdi ñáhá te núu ñá túú sàndáá iní ñáhá-yu xii-gá, te duca<sup>n</sup>-ni cuè ñá yiu ñadìhí sàndáá iní tnúhu Xítóhó Jesucristú ñá túú cùtnuní iní-yu te núu ndacu-yu canu ichi-yu yì-yu ichi-gá àdi ñáhá te núu ñá túú sàndáá iní ñáhá-güedé xii-gá.

<sup>17</sup> Te duha na càchí tnúhu-í xii-ndo, nchaa chiu<sup>n</sup> ní nduu táhú-ndó núú Yá Ndiòxí quidé-ndó ndéè cùtnàhá ní cáhá<sup>n</sup> ñáhá-gá xii-ndo ní natuha-ndo ìchi-gá te ñu-ni chiu<sup>n</sup>-á<sup>n</sup> cada-ndo cùndecu-ndo. Te nchaa xichi núú tàcá ñá yiu dàcuaha tnúhu-gá ñu-ni duha càhá<sup>n</sup>-í dóho-yu. <sup>18</sup> Te nchaa cue tée ndècu seña ñì-xi dàtná ní cachi ndíi Moisés, cue tée ní cáhá<sup>n</sup> Yá Ndiòxí ndécú ichi-gá, te ñu-ni duca<sup>n</sup> cùnduu-güedé cundecu-güedé, te nchaa cue tée ñá túú ndècu seña ñì-xi ní cáhá<sup>n</sup>-gá cundecu ichi-gá, ñu-ni duca<sup>n</sup> cùnduu-güedé cundecu-güedé vá cuàha-güedé seña ñì-güedé. <sup>19</sup> Te ñì-ni cùu-xi cuéi na cuàha-o seña ñì-o àdi vá cuàha-o. Te sá ìo-gá xini ñuhu-xi cada-o xiá<sup>n</sup> cúu-xi sá càdá-ó ncháa nacuáa cuiní Yá Ndiòxí. <sup>20</sup> Chi

xini ñuhu-xi sá cùndecu-ni-o datná ndécú-ó cùtnàhá ní cáhá<sup>n</sup> ñáhá Yá Ndiòxí xii-o ní ngùndecu-o ìchi-gá. <sup>21</sup> Te núu cùu-ndo ñá yiu ñá túú tnàhí dàñá quee núú chíu<sup>n</sup> patróo<sup>n</sup>-xi cùtnàhá ní cáhá<sup>n</sup> ñáhá Yá Ndiòxí xii-ndo, te ñá túú nã cani iní-ndó, dico núu dàñá ñaha patróo<sup>n</sup>-ndó quèe-ndo núú chíu<sup>n</sup>-ndó te váha-ni quee-ndo núú chíu<sup>n</sup>-ndó. <sup>22</sup> Te sátá ní cáhá<sup>n</sup> ñáhá Xítóhó Jesucristú xii nchòhó ñá yiu duca<sup>n</sup> ñá túú tnàhí dàñá quee núú chíu<sup>n</sup> patróo<sup>n</sup>-xi-á<sup>n</sup>, te ní cuu-ndo dàtná ñá yiu dàñá quèe núú chíu<sup>n</sup> patróo<sup>n</sup>-xi sá cúu-xi-gá, te duca<sup>n</sup> chi ñá túú-gá ndécú-ndó ìchi cuehé ichi duha. Te nchòhó ñá yiu dàñá quèe núú chíu<sup>n</sup> patróo<sup>n</sup>-xi cùu-ndo datná ñá yiu ñá túú tnàhí dàñá quee núú chíu<sup>n</sup> patróo<sup>n</sup>-xi sá cúu-xi Xítóhó Jesucristú, te duca<sup>n</sup> chi xinu cuechi-ná-ndó núú-gá. <sup>23</sup> Te Yá Ndiòxí ní nduu cuendá ñáhá-gá xii-o chi Xítóhó Jesucristú ní nacháhu-gá nchaa yíca cuèchi-o sã ndécú núú Yá Ndiòxí ní cùu, te vá dàñá-ndó sã tnàha ñá yiu-ndo nàdatuhú iní ñáhá-yu xii-ndo vã cúnú cuèchi-ndo núú Xítóhó Jesucristú nacuáa tàú-xi cunduu. <sup>24</sup> Te núu xiá<sup>n</sup> càchí tnúhu-í xii nchaa nchòhó ñá yiu ndècu ndihí-í ichi Xítóhó Jesucristú sá cùndecu-ni-ndo datná-ni ndècu-ndo ndéè cùtnàhá ní cáhá<sup>n</sup> ñáhá-gá xii-ndo, te ñu-ni duca<sup>n</sup> cùndecu-ndo ichi-gá.

<sup>25</sup> Te càchí tnúhu tucu-í xii-ndo sã Xítóhó Jesucristú ñá túú càchí tnúhu-gá xii-í núú nása cáhá<sup>n</sup>-í cuendá nchaa ñá yiu vátá tnãndaha-gá. Te duha sàni iní-í cáhá<sup>n</sup>-í cuendá-yu, te nchòhó cuu quíndáá iní-ndó tnúhu càhá<sup>n</sup>-í chi Xítóhó Jesucristú chindèe chitúu ñaha-gá xii-í. <sup>26</sup> Te yúhú càchí-í sá sã cuendá nchaa tnúndòho tnúhu ndàhú ìo ñuyíú-a vitna, te váha-gá sã ncháá ñá yiu te núu nása xíndecú-yu te duca<sup>n</sup>-ni na cùndecú-yu. <sup>27</sup> Te nchaa cue tée ndècu ñadìhí-xi te duca<sup>n</sup>-ni na cùndecu-güedé ndihí-yu, te nchaa cue tée ñá túú ñadìhí-xi te duca<sup>n</sup>-ni na cùnduu-güedé vá ndúcú-güedé ñadìhí-güedé. <sup>28</sup> Dico nchaa cue



tée na ndùcu ñadihí-xi te ñá díú ñ<sup>n</sup> cuéchi cùu-xi sá dúcá<sup>n</sup> ná ndùcu-güedé ñadihí-güedé, te diu-ni duca<sup>n</sup> cùu tucu cue ñáyiú dihí te núu na nihí-yu yí-yu chi ñá díú ñ<sup>n</sup> cuéchi cùu-xi sá dúcá<sup>n</sup> nihí-yu yí-yu. Te núu cue tée na nihí-güedé ñadihí-güedé te nándi ndohó-yu cundecú-yu ñuyíú-a, te núu xí<sup>n</sup> duha càhá<sup>n</sup>-í cuendá sá vǎ ndúcú-güedé ñadihí-güedé cuendá sá vǎ ndóhó-yu.

29 Te nchaa nchòhó ñáyiú ndècu ndihí-í ichi Xítohó Jesucristú na càchí tnúhu-í xii-ndo sǎ ñǎ túú-gǎ vǎ nduu cumání te quixi tucu Xítohó Jesucristú, núu xí<sup>n</sup> xíní ñùhu-xi sǎ ndèé vitna ngüíta nchaa cue tée ndècu ñadihí-xi cada-güedé chiú<sup>n</sup> Xítohó Jesucristú, te cada-güedé dàtná sǎ ñǎ túú ñadihí-güedé. 30 Te nchaa ñáyiú ndihú iní-xi te na càda-ní-yu sǎ ñǎ túú ndihú iní-yu cadá-yu chiú<sup>n</sup> Yǎ Ndióxi. Te nchaa ñáyiú cùd<sup>í</sup> iní-xi te na càda-ní-yu sǎ ñǎ túú cùd<sup>í</sup> iní-yu cadá-yu chiú<sup>n</sup>-gǎ, te nchaa ñáyiú ndècu ndihí nándi sǎ ndécú ndihí te na càda-ní-yu sǎ ñǎ túú ñǎ ndécú ndihí-yu cadá-yu chiú<sup>n</sup>-gǎ. 31 Te nchaa ñáyiú nèhe chiú<sup>n</sup> nchaa sǎ ío ñuyíú-a te na càda-ní-yu cuendá sǎ ñǎ túú ñǎ néhé chiú<sup>n</sup>-yu cadá-yu chiú<sup>n</sup> Yǎ Ndióxi, chi nchaa sǎ ío ñuyíú-a sa ñùhu-xi ichi cuáhá<sup>n</sup>-xi núú ndihí ñhnu-xi.

32 Te cuíní-í sǎ vǎ cúhú<sup>n</sup> iní-ndó nándi sǎ ío ñuyíú-a, te ni ñǎ túú tnàhí ná cani iní-ndó cundecu-ndo, chi nchaa cue tée ndècu ichi Xítohó Jesucristú xíndecu mee ío ñùhu iní-güedé cada-güedé chiú<sup>n</sup>-gǎ nàcuáa cudíu-güedé núú-gǎ. 33 Te nchaa cue tée sa ndècu ñadihí-xi cue tée ndècu ichi-gǎ ñùhu iní-güedé nàcuáa cada-güedé cundecu-güedé ñuyíú-a cuendá duca<sup>n</sup> cudíu-güedé núú ñadihí-güedé. 34 Te diu-ni duca<sup>n</sup> cùu tucu cue ñáyiú dihí chi ñǎ túú ñ<sup>n</sup>-ni cuu ñáyiú sa ndècu yí-xi ndihí ñáyiú vátá cundècu-gǎ yí-xi, chi ñáyiú ndècu ichi Xítohó Jesucristú ñǎ túú ndèca

tée ío ñùhu iní-yu cadá-yu chiú<sup>n</sup>-gǎ nàcuáa nihí ní ndúú-yu cundecu yíñùhú-yu núú Yǎ Ndióxi, dico cue ñáyiú dihí ndécá tée ndècu ichi-gǎ ío ñùhu iní-yu nàcuáa cundecú-yu ñuyíú-a cuendá cudíu-yu núú yí-yu.

35 Te duha càhá<sup>n</sup>-í cuendá cúu-xí ñ<sup>n</sup> sǎ vǎha xii-ndo, te cudíu núú tnáhá-ndó, te cuu-ndo ñáyiú cada ndáá núú Xítohó Jesucristú, te mee-ni-gǎ cuhu<sup>n</sup> iní-ndó. Te ñǎ díú sǎ dúhá càhá<sup>n</sup>-í te quide yica-í sǎ cadá-ndó nàcuáa càhá<sup>n</sup>-í.

36 Te núu ío dava-ndo sǎni iní-ndó sǎ ñǎ túú ndùu váha-xi sǎ ío cuu sacuéhé dèhe yoco-ndo cundecú-yu ñǎ, te núu sǎni iní-ndó sǎ vǎha-gǎ candecá-yu tée te cada-ndo nàcuáa sǎni iní-ndó, chi ñǎ díú ñ<sup>n</sup> cuéchi cùu-xi. 37 Te núu dava-ndo ndècu dèhe yoco-ndo, te vǎ yóo ñ<sup>n</sup> cada yica ñǎha xii-ndo sǎ cándecá-yu tée. Te núu mee-ndo sǎni váha iní-ndó nàcuáa cada-ndo, te núu vǎ dásá<sup>n</sup>-ndó dèhe yoco-ndo càndeca ñǎha tée te quide váha-ndo sǎ dúcá<sup>n</sup> quide-ndo. 38 Te nchaa ñáyiú dása<sup>n</sup> dèhe yoco-xi càndeca ñǎha tée te váha-ni quidé-yu, te nchaa ñáyiú ñǎ túú dása<sup>n</sup> dèhe yoco-xi càndeca ñǎha tée te váha-gǎ tucu quidé-yu sǎ dúcá<sup>n</sup> quidé-yu.

39 Te nchaa ñáyiú dihí ndécú yí-xi xini ñùhu-xi sǎ cundècu-ní-yu ndihí yí-yu ñini ndècu vívú-güedé chi duca<sup>n</sup> càhá<sup>n</sup> tnúhu sǎ dánèhé ñáhá xii-o nacuáa cada-o cundecu-o, dico núu na cùu-güedé te cuu naquehé<sup>n</sup>-yu ingá tée candecá-yu dicó-ni sǎ diu-ni tée ndècu ichi Xítohó Jesucristú. 40 Te yúhú sǎni iní-í sǎ ío-gǎ váha cundecú-yu te núu vǎ nándúcú-yu ingá tée candecá-yu, te duha càhá<sup>n</sup>-í chi Espíritú Yǎ Ndióxi duca<sup>n</sup> dàcahu iní ñáhá-xí xii-í cáhá<sup>n</sup>-í.

## 8

*Cuendá nchaa sǎ nchító-ó sǎñaha ñáyiú ndùu táhú nchaa sǎ càchí-yu cùu ndióxi*

1 Te vitna na càhá<sup>n</sup>-í cuendá nchaa sǎ nchító-ó sǎñaha ñáyiú ndùu táhú nchaa sǎ càchí-yu cùu ndióxi te ñǎ

ndàá chi dicó ndaha cue tee ñuyíú-a ní cuáha nchaa xiá<sup>n</sup>. Te nchoo sa cùtnuní váha iní-ó cuendá nchaa xiá<sup>n</sup>, dicó-ni sá cuendá nchaa sá cùtnuní váha iní-ó xiá<sup>n</sup> quidé cànno-o mee-o, dico núu cùu iní-ó tnàha ñáyiú-o te canu ichi-ò-yu ichi váha. <sup>2</sup> Te núu dava-ndo sàni iní-ndó sã tũha-ndo dico cùu-ndo ñáyiú vátá cútũha-gá nàcuáa tàú-xi cunduu. <sup>3</sup> Te núu nchòhó cúú iní-ndó Yã Ndiòxí te mee-gã cáhá<sup>n</sup>-gá sá cúú-ndó ñáyiú cùu cuendá-gá.

<sup>4</sup> Te vitna na càchí tnúhu-í xii-ndo nàcuáa ndùu cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndiòxí te ñà ndàá chi dicó ndaha cue tée ñuyíú-a ní cuáha nchaa xiá<sup>n</sup>. Te nchoo cùtnuní iní-ó sã ncháá sã càchí ñáyiú cùu ndiòxí cádũha-yu ñuyíú-a ñà túú cùu-xi ndiòxí, chi ñndii díí-ni Yã Ndiòxí ndécú. <sup>5</sup> Te cue ñáyiú ñuyíú-a càchí-yu sá cuéi andiú te cuéi ñuyíú-a ndècu tĩtní ndiòxí. Te ndàá sá ndèni ní cuu ndècu espíritú sá càchí ñáyiú cùu ndiòxí te ñà ndàá sá ndiòxí cúú-xí, te nchaa xiá<sup>n</sup> táxí tnùnì ñáhá-xí xii-yu. <sup>6</sup> Te nchoo cùtnuní ndàá iní-ó sã ñndii díí-ni Yã Ndiòxí ndécú te diu-gá cúú-gã Tãtá-ó, te nchoo cùu-o ñáyiú cùu cuendá-gá. Te diu-ni mee-gã ní táuchíú<sup>n</sup>-gã ní cuáha nchaa sá ió ñuyíú-a, te cùtnuní tucu iní-ó sã ñndii díí-ni Xítóhó Jesucristú ndécú, te Yaá-á<sup>n</sup> ñi quide-gá nchaa chiú<sup>n</sup> ní táhú Dütú Ndiòxí ní cadúha-gá nchaandi túhú sá ió ñuyíú. Te diu-ni mee Xítóhó Jesucristú quidé ndècu-o ichi-gá vitna.

<sup>7</sup> Te ñà ncháá nchòhó ñáyiú ndècu ichi Xítóhó Jesucristú cùtnuní iní-ndó nàcuáa ndùu tnúhu càhá<sup>n</sup>-í. Chi sa ní cáa<sup>n</sup>-ndo quide cànno-ndo nchaa sá càchí-yu cùu ndiòxí ní cùu. Te cuendá xiá<sup>n</sup> núu nàquehe<sup>n</sup>-ni-ndo nchaa sá nchító-ó ndùu táhú nchaa sá càchí-yu cùu ndiòxí-án xéxi-ndó, te sàni-ni iní-ndó sã quidé cànno-ndo nchaa sá càchí-yu cùu ndiòxí-án te ñà ndàá sá ndiòxí cúú-xí. Te núu sàni iní-ndó sã ñà túú vãha caxi-ndo sã dúcá<sup>n</sup> ndùu táhú-xi-án te xéxi-ndo te xiá<sup>n</sup> ñà túú cùu vãha iní-ndó cuendá sá

dúcá<sup>n</sup> quide-ndo. <sup>8</sup> Te ñà díú nchàa sá xéxi-ó quide-xi cudiú-o núú Yã Ndiòxí, chi ñni quide-xi cuéi na càxi-o àdi vá cáxi-ó chi ni ñni sá cáxi-ó vá chindèe ñaha-xi cudiú-o núú Yã Ndiòxí. Te cuéi vá cáxi-ó dico ñà díú xiá<sup>n</sup> cada sá vá cudiú-o núú-gã. <sup>9</sup> Te cuu-ni caxi-ndo nchàa nàni ñihí-ndó. Te dicó-ni sá càda cuendá-ndó sã ñà díú cuendá sá xéxi-ndó-án cuíta ñihnu dava ñáyiú ndècu ndihhi-ndo ichi Xítóhó Jesucristú cadá-yu nàndi sá cadã-yu nàcuáa vá cúú vãha iní Yã Ndiòxí chi ñáyiú-án ñà túú cùtnuní iní-yu. <sup>10</sup> Te nchòhó ñáyiú xini váha cuendá nchaa sá càchí-yu cùu ndiòxí, te núu na quihí<sup>n</sup>-ndó núú ndécú nchàa xiá<sup>n</sup> te ngóo-ndo càxi-ndo nchaa sá ñi cutáhú-xi, te quini ñáyiú ndècu ndihhi-ndo ichi Xítóhó Jesucristú, ñáyiú vátá cùtnuní-gá iní-xi nàcuáa ndùu cuendá nchaa sá dúcá<sup>n</sup> càchí-yu cùu ndiòxí-án, te cuéi sàni iní-yu sá ñà túú quide váha-ndo sã dúcá<sup>n</sup> quide-ndo te cudana te cada yicá-yu caxi-yu tnàhá-yu nchaa sá dúcá<sup>n</sup> ñi nduu táhú nchaa sá càchí-yu cùu ndiòxí-án te ñà ndàá sá ndiòxí cúú-xí. <sup>11</sup> Te núu duca<sup>n</sup> cùtnuní iní-ndó nàcuáa ndùu cuendá nchaa xiá<sup>n</sup> te duca<sup>n</sup> quide-ndo, te sá dúcá<sup>n</sup> quide-ndo-án te dàcuíta ñihnu-ndo dàva-gá ñáyiú ndècu ndihhi-ndo ichi Xítóhó Jesucristú, ñáyiú vátá cùtnuní-gá iní-xi nàcuáa ndùu cuendá nchaa xiá<sup>n</sup>, te diu cuendá tnàhá ñáyiú-án ñi xihí Xítóhó Jesucristú. <sup>12</sup> Te sá dúcá<sup>n</sup> quide-ndo-án cúú-xí ñni cuéchi núú Xítóhó Jesucristú, chi quide-ndo nacúaa xínu iní-yu cadá-yu ñni sá sání iní-yu ñà túú vãha, núu xiá<sup>n</sup> ñà túú quide váha-ndo sã cúú-xí-yu. <sup>13</sup> Te núu yúhú cùtnuní iní-í sá sã cuendá ñni sá cáxi-í te ngóo ñni ñáyiú ndècu ndihhi-í ichi Xítóhó Jesucristú cadá-yu ñni sá vá cúú vãha iní Yã Ndiòxí, te váha-gá sá vá cáxi-gã-í xiá<sup>n</sup> cuendá sá vá cadã-yu ñni sá vá cúú vãha iní-gá.

## 9

*Nchaa sá cúú càda cue tée ní táuchíú<sup>n</sup> Xítóhó Jesucristú cáhá<sup>n</sup>*

*tnúhu-gá*

1 Te yúhú chi cuu cada-í nchaa sá sání ìní-í, chi tnàhá-í ní táúchíú<sup>n</sup> Xítohó Jesucristú cáhá<sup>n</sup>-í tnúhu-gá núú ñáyiú. Te yúhú ní xiní núú-í Xítohó Jesucristú Yá cúú Xítohó-ó te nchòhó cúú-ndó ñáyiú ní sándáá iní tnúhu-gá sá cáhá<sup>n</sup>-í te duca<sup>n</sup> chi ndècu ndihí-í-gá. 2 Te ió dava ñáyiú ñá túú sándáá iní-yu sá Xítohó Jesucristú ní táúchíú<sup>n</sup>-gá cáhá<sup>n</sup>-í tnúhu-gá, dico nchòhó chi cùtnuní ndáá iní-ndó sá díú-gá ní tendaha ñàha-gá xii-í xícá cùu-í cáhá<sup>n</sup>-í tnúhu-gá, te duca<sup>n</sup> chi yúhú ní cáhá<sup>n</sup>-í tnúhu-gá núú-ndó te ní sándáá iní-ndó-gá te xíá<sup>n</sup> cútnuní sá díú-gá ní tendaha ñàha-gá xii-í xícá cùu-í cáhá<sup>n</sup>-í tnúhu-gá núú ñáyiú.

3 Te duha ndùu tnúhu cáhá<sup>n</sup>-í cuèndá cundedóho nchaa ñáyiú sàtnuhu ñaha xii-í. 4 Chi yúhú cuu-ni caxi-í nchaa núú sá cúú càxi-o na taxi ñáyiú. 5 Te cuu-ni cundecu ñadìhí-í te caca ndeca-í-yu nchaa núú xícá cùu-í cáhá<sup>n</sup>-í tnúhu Yá Ndiöxí dàtná quidé dàva-gá cue téé cáhá<sup>n</sup> tnúhu-gá, ndihí cue téé cùu ñaní Xítohó Jesucristú, ndihí té Pèlú. 6 Te tnàhá yúhú ndihí té Bèé cuu daña-ndí chiu<sup>n</sup> quide-ndí te cada-ndí dàtná xiquide dàva-gá-güedé cáhá<sup>n</sup>-güedé tnúhu Xítohó Jesucristú. 7 Te nchoo xiní-ó sá ncháá cuè sandadú dacuití sá ñúhú yáhu-güedé xinú cuèchi-güedé, te ñá túú dicó duca<sup>n</sup> xinú cuechi-güedé. Te duca<sup>n</sup> sàtnahá-xi cùu tucu ñáyiú xítu ì<sup>n</sup> sá xítú chi dacuití ñihí-yu ì<sup>n</sup> sá xítü-yu xèxi-yu, te ñá díú dicó duca<sup>n</sup> xítü-yu. Te duca<sup>n</sup> cùu tucu cue téé cùu toli chi quihni-güedé dícu quití xító-güedé xihí-güedé te ñá túú dicó duca<sup>n</sup> xító-güedé-di. 8 Te vá cání ìní-ndó sá sá dúhá cáhá<sup>n</sup>-í te càhu iní mée-í duha cáhá<sup>n</sup>-í, chi tnúhu cáhá<sup>n</sup>-í-a ì<sup>n</sup>-ni quèe-xi ndihí tnúhu ní cáhá<sup>n</sup> ndí Moisés. 9 Chi ndí-á<sup>n</sup> ní chídó tnuní ndí núú tütú ndí nàcuáa ní xáha<sup>n</sup> Yá Ndiöxí xii ndí, te cächí-xi: “Vá chíhí-ndó ñunu yuhu ndicutu oré danchihí-di triú”, duha cächí-xi núú tütú ndí. Te ñá díú sá dúcá<sup>n</sup> ñí cáhá<sup>n</sup> Yá Ndiöxí te

cáhá<sup>n</sup>-gá mee-ni cuèndá ndicutu-á<sup>n</sup>. 10 Chi ní cáhá<sup>n</sup>-gá cuèndá nchoo cuè ñáyiú ndècu ichi-gá, te ndáá sá díú cuèndá-ó dùca<sup>n</sup> ní cáhá<sup>n</sup>-gá. Te nchaa cue téé xítu chihi tatá sàni iní-güedé sá díú tàtá chíhí-güedé-á<sup>n</sup> cuu sá caxí-güedé, te diu-ni duca<sup>n</sup> cùu tucu cue téé xicani triú chi càni-güedé cuèndá quee caxi-güedé. 11 Te duca<sup>n</sup> sàtnahá-xi cùu nchúhú cue téé cáhá<sup>n</sup> tnúhu Xítohó Jesucristú, chi dànehé ñáhá-ndí xii-ndo cuèndá nchaa sá vaha quide ñaha Yá Ndiöxí xii-o, núu xíá<sup>n</sup> dai tàú-xi sá nchòhó chindee ñàha-ndo xii-ndí núu ná cúú sá xiní ñúhu-ndí. 12 Te núu dava cue téé cáhá<sup>n</sup> tnúhu Yá Ndiöxí chindèe-ndo-güedé, te uu<sup>n</sup>-gá duca<sup>n</sup> tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tàú ndisa-ndo sá chindèe ñaha-ndo xii-ndí dico ñá túú dùca<sup>n</sup> cahá<sup>n</sup>-ndí núú-ndó càda-ndo, te quide cahnu iní-ndí cuèi nándi sá tá yáha-ndí véxi. Te duca<sup>n</sup> quide-ndí cuèndá sá ñà túú ñà cani iní ñáyiú cuèndá-ndí te duca<sup>n</sup> cuíta cutènuu-gá tnúhu sá cáhá<sup>n</sup> nàcuáa naníhí tàhú-ó quíhí<sup>n</sup>. 13 Te nchòhó xiní-ndó sá ncháá cuè téé xinú cuechi veñúhu diu-ni xíá<sup>n</sup> ñihí-güedé xéxi-güedé, te diu-ni cue téé-á<sup>n</sup> xinú cuèchi-güedé núú xihí quití ndùu tàhú Yá Ndiöxí, te diu-ni xíá<sup>n</sup> ñihí tucu-güedé sá xéxi-güedé. 14 Te diu-ni duca<sup>n</sup> sàtnahá-xi cùu nchúhú cue téé cáhá<sup>n</sup> tnúhu sá cáhá<sup>n</sup> nàcuáa naníhí tàhú-ó, chi Xítohó Jesucristú ní cachí-gá sá díú-ni cuèndá chiu<sup>n</sup> quide-ndí ñihí-ndí caxi-ndí. 15 Te ñá ì<sup>n</sup> ndùu cáhá<sup>n</sup>-í núú-ndó càda-ndo nàcuáa tàú-xi cunduu sá cúú-xi-í, te vá cání ìní-ndó sá sá dúhá cáhá<sup>n</sup>-í te ì<sup>n</sup> sá xícá<sup>n</sup>-í núú-ndó. ¡Chi cuèi na cùú-í sá ndòhò-í te ñá díú sá cáhá<sup>n</sup> ñáyiú sá sá cuèndá sá cáhá<sup>n</sup>-í tnúhu Xítohó Jesucristú ñihí-í xèxi-í!

16 Te yúhú ñá túú quide cahnú-í mée-í sá cáhá<sup>n</sup>-í tnúhu sá cáhá<sup>n</sup> nàcuáa naníhí tàhú-ó, chi tàú tnàhá-í sá cadà-í chi duca<sup>n</sup> ñí cachí Yá Ndiöxí cada-í. ¡Te ndàhú ní cuu yúhú te núu vá cáhá<sup>n</sup>-í tnúhu-á<sup>n</sup>! 17 Te ñá túú cáhá<sup>n</sup>-í tnúhu-gá sá cúú iní mée-í chi mee-gá

ní táuchíú<sup>n</sup>-gã cáhá<sup>n</sup>-í tnúhu-gá. Te núu cãhá<sup>n</sup>-í tnúhu-gá sá cúú ìní mée-í te tàú-í níhì-í sá ndúú tãhù-í ní cùu. <sup>18</sup> Dico sá sà ní nduu tãhù-í cúú-xí sã ïo cùdí ìní-í sá dìcò duca<sup>n</sup> cãhá<sup>n</sup>-í tnúhu sá cãhá<sup>n</sup> nãcuáa naníhí tãhù-ó. Te cuèi tàú-í quehe<sup>n</sup>-í sá táxí-ndó ndùu tãhù-í sá cuendá sá cãhá<sup>n</sup>-í tnúhu Xítohó Jesucristú, dico ñá túú dùca<sup>n</sup> quide-í. <sup>19</sup> Te sá dúcá<sup>n</sup> dìcò duca<sup>n</sup> cãhá<sup>n</sup>-í tnúhu sá cãhá<sup>n</sup> nãcuáa naníhí tãhù-ó, xiã<sup>n</sup> ni ì<sup>n</sup> ñáyiu ñuyíú-a vá cúú cãchí-yu sá táxí tnùnì ñáhã-yu xii-í, te cuèi duca<sup>n</sup> dico mee-í ní sanì iní-í sá cúú-í dàtná ì<sup>n</sup> téé xínu cuechì núú nchãa ñáyiu cuendá duca<sup>n</sup> cuíta cuu vaí-yu tuhá-yu ichi Xítohó Jesucristú quíhí<sup>n</sup>. <sup>20</sup> Te òré ñúhú tnàhí tnuú cue ñáyiu isràél te quide-í sá ì<sup>n</sup>-ní cùu-í ndihí-yu cuèi ñá túú nchìcú<sup>n</sup> nihnu-í tnúhu ní cáhá<sup>n</sup> ndí Moisés, te duca<sup>n</sup> quide-í cuendá sá ñáyiu-á<sup>n</sup> quindáá iní-yu tnúhu cãhá<sup>n</sup>-í te tuhá-yu ichi Xítohó Jesucristú. <sup>21</sup> Te òré ñúhú tnàhí tnuú nchãa ñáyiu ñá túú nchìcú<sup>n</sup> nihnu-í tnúhu ní cáhá<sup>n</sup> ndí Moisés, te quide-ni-í sá quidè-í dàtná quidé mée-yu cuendá quindáá iní-yu tnúhu cãhá<sup>n</sup>-í, te tuhá-yu ichi Xítohó Jesucristú. Te cuèi duca<sup>n</sup> quide-í dico ñá túú dàña ndeé-í quidè-í nchãa nãcuáa cuiní Yã Ndiõxí cada-o, te duca<sup>n</sup> chí nchìcú<sup>n</sup> nihnu-í quidè-í nchãa nãcuáa cãhá<sup>n</sup> Xítohó Jesucristú. <sup>22</sup> Te òré ndécù-í ndihì nchãa ñáyiu ñá túú cùtnunì váha iní-xi nãcuáa cundecu ichi Xítohó Jesucristú, te tnàhá-í quidè-í dàtná quidè-yu cuendá sá ná tédóho-yu nchãa tnúhu cãhá<sup>n</sup>-í te duca<sup>n</sup> cùtnunì-gá iní-yu nãcuáa cundecú-yu ichi-gá. Te nchãandì túhú ñáyiu quide-í sá ì<sup>n</sup>-ni cuu-í ndihí-yu cuendá duca<sup>n</sup> níhì-í nãcuáa cada-í te cundedóho-yu tnúhu cãhá<sup>n</sup>-í te tní-yu ichi Xítohó Jesucristú te naníhí tãhù-yu. <sup>23</sup> Te duha quide-í cuendá sá cuítá quindáá iní-yu tnúhu sá cãhá<sup>n</sup> nãcuáa naníhí tãhù-ó quíhí<sup>n</sup>, te duca<sup>n</sup> te tnàhá yúhú ïo váha cundecu-í dàtná cãhá<sup>n</sup> tnúhu-á<sup>n</sup>.

<sup>24</sup> Te nchòhó sa xìnì-ndó sã nchãá cuè téé xínu quíhu màrcúhyú

nchãa-güedé xínú-güedé, dico ì<sup>n</sup>-ni-dé cúú tée ndàcu ngodó núú te téé-á<sup>n</sup> cúú tée níhí sá ndúú tãhù-xi, te duca<sup>n</sup> xìnì ñuhu-xi cada nchòhó tucu chi cada-ndo nchãa nãcuáa cuiní Yã Ndiõxí cada-ndo cuendá duca<sup>n</sup> níhì-ndó sã ndúú tãhù-ndó. <sup>25</sup> Te nchãa cue téé xìnì dadiqui te váha váha quide cuendá-güedé núu ná cúú sã cadá tnèñu te xòcani-güedé cuendá sá ñà díú xiã<sup>n</sup> cada te cuíta-güedé òré dadiqui-güedé. Te duca<sup>n</sup> quide-güedé cuendá cuiní-güedé níhì-güedé sá ndúú tãhù-güedé, te sá ndúú tãhù-güedé-á<sup>n</sup> cúú-xí ì<sup>n</sup> sá ndíhí níhnu ñuyíú-a. Dico nchoo ndècu ndeé-o quide-o nãcuáa níhì-ó sã ndúú tãhù-ó, te xiã<sup>n</sup> cudí-xi cundecu ndihì-o nì caa nì quíhí<sup>n</sup>. <sup>26</sup> Te yúhú quidè-í dàtná quidé cuè téé xínu, chí cue téé-á<sup>n</sup> xìnì-güedé núú quèxìo-güedé, te quide tucu-í dàtná xíquide cue téé sa ní cutúha nãá, te ñá túú quide-í dàtná quidé cuè téé vitna dàcuaha naá. Te duca<sup>n</sup> chí yúhú quidè-í nchãa nãcuáa cuiní Yã Ndiõxí cunduu. <sup>27</sup> Te yúhú ñá túú dàña-í taxi tnùnì ñáhã nì ì<sup>n</sup> sá cuèhé sá dúhá xii-í chí yòtni-í mée-í. Te duca<sup>n</sup> quide-í chí yúhú cãhá<sup>n</sup>-í tnúhu Xítohó Jesucristú núú ñáyiu, te cuiní-í sá vã cuíta sá nì cachí Yã Ndiõxí nduu tãhù-í.

## 10

*Cuendá nchãa sá nì cadúha cue téé ñuyíú-a quide cahnu ñáyiu*

<sup>1</sup> Te nchòhó ñáyiu ndècu ndihì-í ichi Xítohó Jesucristú na cãchí tnúhu-í xii-ndo cuendá nchãa ñanì tnàhá-ndí ñáyiu isràél ní xíndecu ndeé sanaha, chí vitna tnàhá nchòhó cúú-ndó dàtná cue ñanì tnàhá nchãa ñáyiu-á<sup>n</sup> chí ndècu-ndo ichi-gá. Te nchãa ñáyiu-á<sup>n</sup> nì taxi ndecu Yã Ndiõxí ì<sup>n</sup> vícò nì dánèhé ñáhã-xí xii-yu ichi quíhí<sup>n</sup>-yu, te ní quée dava ndute làmár nánì Măr Tícuèhé te nchãá-yu ní yáha-yu. <sup>2</sup> Te sá dúcá<sup>n</sup> nì cuu te nchãá-yu ì<sup>n</sup>-ná ní cuú-yu ndihì ndí Moisés, te ní xíhì ndaha ñàha ndí xii-yu. <sup>3</sup> Te nchãá-yu ní xexí-yu sá nì sãñaha Yã Ndiõxí xii-yu. <sup>4</sup> Te duca<sup>n</sup>



nchàa tucú-yu ní xihí-yu ndute sá nǐ sǎñaha-gǎ xii-yu, ndute sá nǐ quee yiqui nàha cava. Te cava-á<sup>n</sup> cada iní-ó sǎ cúu-xí dàtná Xítóhó Jesucristú te duca<sup>n</sup> chi ndihí ñaha-gǎ xii-yu ichi cuáhá<sup>n</sup>-yu dàvá-á<sup>n</sup>. <sup>5</sup> Dico ío vǎi-yu ñá túú ní quidé-yu nàcuáa càhá<sup>n</sup> Yǎ Ndiǒxí, te xiǎ<sup>n</sup> ñá túú ní cùu váha iní ñáhá-gǎ xii-yu. Te sá dúcá<sup>n</sup> nǐ quidé-yu núu xiǎ<sup>n</sup> òré ñúhǔ-yu ichi cuáhá<sup>n</sup>-yu xití yucu ío vǎi-yu ní xihí.

<sup>6</sup> Te duca<sup>n</sup> nǐ cuu cuèndá nchoo vǎ cǎnchícú<sup>n</sup> nihnu-o càda-o nacuáa ní quidé-yu, chi ñáyiú-á<sup>n</sup> mee-ni nchàa sá cuèhé sá dúhá nǐ sani iní-yu ní quidé-yu. Te nchoo xini ñuhu-xi sá vǎ dúcá<sup>n</sup> càda-o. <sup>7</sup> Te yúhú càhá<sup>n</sup>-í dóho-ndo sǎ vǎ quèndáá iní-ndó te ni vǎ cáda càhnu-ndo ni ì<sup>n</sup> sá càchí-yu cùu ndióxí ní cadúha cue téé ñuyíú-a dàtná ní quide cue ñaní tnáhá-ndí ní xindecu ndéé sanaha. Chi ñáyiú-á<sup>n</sup> nǐ quidé-yu dàtná càhá<sup>n</sup>-xi núu tütú Yǎ Ndiǒxí núu càchí-xi: “Nchaa ñáyiú ní xexí-yu ní xihí-yu ní quidé-yu vico, ní quide càhnu-yu sá càchí-yu cùu ndióxí ní cadúha-yu te ñá ndàá sá ndiǒxí cúu-xí”, duha càchí-xi núu tütú-gá. <sup>8</sup> Te ni vǎ cùndècu-ndo ichi díí iní dàtná ní quide dava ñáyiú-á<sup>n</sup>, chi sá dúcá<sup>n</sup> nǐ quidé-yu te ní xihí ócò úní mǐl-yu ì<sup>n</sup>-ni ndùu. <sup>9</sup> Te vǎ cǎní iní-ndó sǎ sá cǎhnú iní Yǎ Ndiǒxí te nǎndi sá cuèhé sá dúhá càda-ndo cuendá cuiní-ndó quèní-ndó nǔu nása cada ñaha-gǎ xii-ndo, chi ñáyiú ní xindecu ndéé sanaha-á<sup>n</sup> duca<sup>n</sup> nǐ xóo cadá-yu, te ní xihí-yu ní xexiha<sup>n</sup> còó. <sup>10</sup> Te ni vǎ càhá<sup>n</sup> cuèhé-ndó cuendá Yǎ Ndiǒxí, chi dava ñáyiú ní xindecu ndéé sanaha-á<sup>n</sup> duca<sup>n</sup> nǐ quidé-yu ní càhá<sup>n</sup> cuèhé-yu cuèndá-gá te ní quixi espíritú xínú cuèchi núu-gǎ ní sahani ñaha-xi xii-yu.

<sup>11</sup> Te duca<sup>n</sup> nǐ cuu te duca<sup>n</sup> nǐ ngundeé núu tütú Yǎ Ndiǒxí cuendá dacuàha-o vitna ta cuyatni nduu naa ñuyíú-a. Te nchaa tnúhu sá nǐ ngódó tnùn-á<sup>n</sup> càhá<sup>n</sup> dóho ñaha-xi xii-o cuendá sá vǎ cáda-ó dàtná ní quide ñáyiú-á<sup>n</sup>. <sup>12</sup> Te xiǎ<sup>n</sup> nǔu nchaa nchòhó ñáyiú sàni iní sá ío

váha cùndáá ndécú ìchi Xítóhó Jesucristú cada cuèndá-ndó sǎ dúcá<sup>n</sup>-ní cùndáá-ndó nǔú-gǎ, te vǎ dáná cuèndá-ndó càda-ndo sá ñà túú cùu váha iní Yǎ Ndiǒxí. <sup>13</sup> Te ñu-ni dàtná quidé sàcuíhná dácàhá<sup>n</sup>-xi iní nchaa dava-gá ñáyiú nǎndi quidé-yu, te ñu-ni duca<sup>n</sup> quide ñaha-xi xii-ndo. Dico mee Yǎ Ndiǒxí cúu-gǎ Yá quidé ndáá chi quide-gá nchaa sá càhá<sup>n</sup>-gá, te ñá dáñá-gǎ sá sùúní cuídó sàcuíhná coto ndeé ñáhá-xi xii-ndo, chi není-ni nacuáa cùndee iní-ndó dáña-gá duca<sup>n</sup> quide ñaha-xi xii-ndo. Te ñu-ni-gá chindee ñaha-gá xii-ndo cùndee iní-ndó vǎ cáda-ndó cuèi nǎndi sá ná dàcahu iní ñáhá-xi xii-ndo.

<sup>14</sup> Te xiǎ<sup>n</sup> nǔu càhá<sup>n</sup>-í dóho nchòhó ñáyiú ío cùu iní-í sá vǎ quèndáá iní-ndó ni ì<sup>n</sup> sá càchí-yu cùu ndióxí te ñá ndáá chi dícò ndaha cue téé ñuyíú-a ní cuáha nchaa xiǎ<sup>n</sup>, te ni vǎ cáda càhnu-ndo. <sup>15</sup> Te duha càhá<sup>n</sup>-í chi cùu-ndo ñáyiú tècú tnùn-í, te mee-ndo ío váha cuáha-ndo cuèndá te núu váha-ni càhá<sup>n</sup>-í àdi ñá túú váha-ni. <sup>16</sup> Te nchoo ndácá<sup>n</sup> táhú-ó nǔú Yǎ Ndiǒxí cuendá ndudí ndéhé yoho yàha stilé sá xihí-ó, te sá dúcá<sup>n</sup> xihí-ó ndudí ndéhé yoho yàha stilé-á<sup>n</sup>, te xiǎ<sup>n</sup> ndácú iní-ó sǎ ì<sup>n</sup>-ní cùu-o ndihí Xítóhó Jesucristú cuèndá sá nǐ sati ñíñi-gǎ ní xihí-gá núu cùrúxí, te ñu-ni duca<sup>n</sup> sǎtnahá tucu-xi cùu paá sá xexí-ó òré xihí-ó ndudí ndéhé yoho yàha stilé-á<sup>n</sup>, chi sá dúcá<sup>n</sup> xexi-o paá-á<sup>n</sup> xiǎ<sup>n</sup> ndácú iní-ó sǎ ì<sup>n</sup>-ní cùu-o ndihí Xítóhó Jesucristú sá cuèndá yiqui cùnú-gá. <sup>17</sup> Te cuèi vǎi vihi-o dico ì<sup>n</sup>di-ni paá xexí-ó, te sá dúcá<sup>n</sup> ì<sup>n</sup>dii-ni paá xexí-ó xiǎ<sup>n</sup> ndácú iní-ó sǎ ì<sup>n</sup>-ní cùu-o ndihí Xítóhó Jesucristú.

<sup>18</sup> Te cada cuèndá-ndó nàcuáa quide ñáyiú isràél, chi ñáyiú-á<sup>n</sup> xexí-yu sá ndúú táhú Yǎ Ndiǒxí. Te sá dúcá<sup>n</sup> quidé-yu-á<sup>n</sup> cùtnùn-í iní-ó sǎ tnáhá tnúhu-yu ndihí-gá. <sup>19</sup> Te vǎ cǎní iní-ndó sǎ sá dúhá càhá<sup>n</sup>-í te cachí-ndó sǎ cùnuu nchaa sá càchí-yu cùu ndióxí ní cadúha cue téé ñuyíú-a chi ñá túú nǎ cúu ni ì<sup>n</sup> nchaa xiǎ<sup>n</sup>. Te ñu-ni duca<sup>n</sup> cùu tucu nchaa sá sǎñaha ñáyiú ndùu táhú-xi chi ñá túú cùnuu-xi, chi ì<sup>n</sup>-ni cùu-xi ndihí

nchaa dava-gá sá xéxí-ó. <sup>20</sup> Te yúhú cächí-í sá sã dúcá<sup>n</sup> quide nchaa ñáyíu ñá túú tnàhá tnúhu ndìhì Yá Ndiòxí, te dícó nchaa espíritú cündìhì yucu ñávãha sãñahá-yu sá ndúú tãhú-xi sá dúcá<sup>n</sup> quidé-yu. Te ñá díú Yã Ndiòxí sãñahá-yu sá ndúú tãhú-gã. Te yúhú cuiní-í sá vã tnàhá tnúhu-ndo ndìhì cue espíritú cündìhì yucu ñávãha. <sup>21</sup> Te duca<sup>n</sup> chi vá cúú tnàhá tnúhu-ndo ndìhì cue espíritú cündìhì yucu ñávãha te tnahá tnúhu-ndo ndìhì Xítohó Jesucristú, te ñá túú ndúu váha-xi ngóo càxi-o coho-o sá ndúú tãhú cue espíritú cündìhì yucu ñávãha-án, te ngóo càda-o nacuaá ní dándõo tnúhu Xítohó Jesucristú coho-o ndúdí ndéhé yoho yãha stilé, te caxi-o pãá cada-o sã ndácú iní-ó sã ñí xíhí-gá núú cùrúxí. <sup>22</sup> Te vá cání iní-ó dùca<sup>n</sup> cada-o cuendá sá vã cudéé<sup>n</sup> Yã Ndiòxí, chi ñá túú ñã càhnu cuu-o núu càda-o ñãni véxi iní mée-ó, chi mee-gã ío càhnu cuu-gã.

#### *Cada-o nchaa nacuaá cuu càhnu Yá Ndiòxí*

<sup>23</sup> Te ndáá sá ncháá sã cuiní-ó càda-o te cuu cada-o dico ñá ncháá cùu-xi sá vãha sá cúú-xí-ó, te ni ñã ncháá-xi chindee ñaha-xi nacuaá ñíhí ndéé-gã-ó cùndecu-o ichi Xítohó Jesucristú. <sup>24</sup> Te xini ñuhu-xi sá cáda-ó sã vãha sá cúú-xí tnàha ñáyíu-o te ñá díú mée-ni sá cúú-xí mée-o cada-o.

<sup>25</sup> Te nchòhó cuu caxi-ndo nchaa cuñú sá cùyãhu cuñú sá xini caxi-ndo, te vá ndúcú tnúhu-ndo te núu cùu-xi cuñú sá ñí nduu tãhú sã cächí-yu cùu ndiòxí. Te ñá túú ñã cani iní-ndo càxi-ndo, <sup>26</sup> chi ñuyíú-a ndìhì nchaa sá ío cúú-xí cuendá Yã Ndiòxí.

<sup>27</sup> Te núu ñí ñáyíu ñá túú ndècu ichi Xítohó Jesucristú càhá<sup>n</sup> ñáhã-yu xii-ndo quíhí<sup>n</sup>-ndó càxi-ndo dítã vehé-yu, te núu sãni iní-ndo sã quíhí<sup>n</sup>-ndó te cuu quíhí<sup>n</sup>-ndó te caxi-ndo cuèi náí cùu sá táxí-yu dico vá càcá<sup>n</sup> tnúhú-ndó nũ-yu núu ndéé ní ñíhí-yu, te duca<sup>n</sup> te cuu vãha iní-ndo càxi-ndo. <sup>28</sup> Te núu ñí ñáyíu cächí-yu sá xíã<sup>n</sup> cúú-xí sã ñí nduu tãhú sã cächí-yu cùu ndiòxí te vá cáxí-ndó cuendá sá ñáyíu duca<sup>n</sup> càhá<sup>n</sup>-án cuu vãha iní-yu te ñá túú

tnàhí ná cani iní-yu. <sup>29</sup> Te yúhú càhá<sup>n</sup>-í cuendá nacuáa sãni iní mée ñáyíu duca<sup>n</sup> càhá<sup>n</sup>-án te ñá díú sã nacuáa sãni iní mée-ndó quide-ndo.

Te dava-ndo cächí-ndó: “Cuu-ni cada-o nchaa nacuaá sãni iní mée-ó cuèi dava-gã ñáyíu sãni iní-yu sã ñã túú ndúu vãha-xi sá dúcá<sup>n</sup> càda-o”, duha cächí-ndó. <sup>30</sup> Te cächí tucu-ndo: “Ñá túú tàú-xi cáhá<sup>n</sup> cuèhé ñáyíu cuendá-ó sã cuendá nchaa sá xéxí-ó chi ndácá<sup>n</sup> tãhú-ó nũú Yã Ndiòxí òré xéxí-ó”, duha cächí-ndó. <sup>31</sup> Te cuèi nãndí sá xini caxi-ndo ñíhí-ndó xèxi-ndo àdi quide-ndo, te cada-ndo nacuáa cáhá<sup>n</sup> vãha ñáyíu cuendá Yã Ndiòxí. <sup>32</sup> Te vá cáda-ndó sã ñã túú tàú-ndó càda-ndo cuendá sã vã cáda ñáyíu ñí sã ñã túú cùu vãha iní Yã Ndiòxí. Te ni sã cúú-xí cuè ñáyíu isràél, te ni sã cúú-xí cuè ñáyíu ñã túú cùu ñáyíu isràél, te ni sã cúú-xí cuè ñáyíu ndècu ichi-gã vá dúcá<sup>n</sup> càda-ndo sá cúú-xí-yu. <sup>33</sup> Te yúhú ío ndècu ndee-í quidé-í nacuáa cudíu-í núú nchaa ñáyíu, te quide-í sã vãha sá cúú-xí-yu, te ñã túú quide-í mee-ni sã cúú-xí mée-í. Te duca<sup>n</sup> quide-í cuendá quíndáá iní-yu tnúhu Xítohó Jesucristú te naníhí tãhú-yu.

## 11

<sup>1</sup> Te chí cãnchícú<sup>n</sup> nihnu cada-ndo nchaa nacuaá quide-í nchícú<sup>n</sup> nihnu-í nchaa nacuáa quide Xítohó Jesucristú.

#### *Nacuáa tàú-xi cada nchaa ñáyíu ñíhí núú tàcá-yu dàcuahá-yu tnúhu Yá Ndiòxí*

<sup>2</sup> Te nchòhó ñáyíu ndècu ndìhí-í ichi Xítohó Jesucristú cächí tnúhu-í xii-ndo sã ío cùdíí iní-í, chi ndàcu iní ñáhã-ndó xii-í, te quide-ndo nchaa nacuaá ní dánèhé ñáhã-í xii-ndo. <sup>3</sup> Te cuiní-í sã nchòhó cutnùní iní-ndo sã ñíndii-ni Yá Ndiòxí cúú-gã Yá cùnùu taxi tñuní ñáhã xii Xítohó Jesucristú, te duca<sup>n</sup> Xítohó Jesucristú ñíndii-ni-gã cùnùu taxi tñuní-gã nchaa cue tée, te nchaa cue tée díu-ni mee-güedé cùnùu-güedé táxí tñuní-güedé ñadìhí-güedé. <sup>4</sup> Te núu nchoo cuè tée na dàdãhu-o díquí-ó òré càhá<sup>n</sup>-ó nũú ñáyíu tnúhu sã dácãhu

iní ñáhá Yá Ndiõxí xii-o àdi oré càhá<sup>n</sup> ndihí-o-gã, te ì<sup>n</sup> sácá<sup>n</sup>núú cúú-xí te núu duca<sup>n</sup> na càda-o dadáhu-o díquí-ó. <sup>5</sup> Dico núu ñáyiú dìhí vá dádáhu-yu díquí-yu òré càhá<sup>n</sup> ndihí-yu Yá Ndiõxí, àdi oré càhá<sup>n</sup>-yu tnúhu sá dácàhu iní ñáhá-gã xií-yu núú tnàhá ñáyiú-yu, te sácá<sup>n</sup>núú cúú-xí te núu vá dádáhu-yu díquí-yu, chi ì<sup>n</sup>-ni cùu-xi te núu na dèté ndí<sup>n</sup>-yu díquí-yu. <sup>6</sup> Te núu ñá túú cuìní cue ñáyiú dìhí dàdàhu-yu díquí-yu te váha-gá sá ná dèté ndí<sup>n</sup>-yu díquí-yu. Te núu cùcaha<sup>n</sup> núu-yu sá dèté díquí-yu te váha-gá sá ná dàdàhu-yu díquí-yu. <sup>7</sup> Te nchoo cuè téé vá cúú dàdàhu-o díquí-ó òré càhá<sup>n</sup> ndihí-o Yá Ndiõxí ni òré càhá<sup>n</sup>-ó tnúhu sá dácàhu iní ñáhá-gã xii-o núú ñáyiú chi díhna-gá-ó ñí cadúha ñaha Yá Ndiõxí xii-o, te ní taxi ndecu-gá nchaa sá xìní tnùn-ó dàtná ndécú nchaa sá xìní tnùn-ó méé-gã. Te duca<sup>n</sup> ñí quide-gá chi cuìní-gá sá nchóó càda-o nacuaá cáhá<sup>n</sup> nchaa dava-gá ñáyiú sá ìo càhnu cuu-gá, te cue ñáyiú dìhí quidè-yu nàcuáa cunuu nchòo cue téé. <sup>8</sup> Te Yá Ndiõxí ní cadúha-gá téé, dico ñá díú yìquì naha ñadìhí ní quenehe-gá ní cadúha-gá téé chi yìquì naha téé ní quenehe-gá ní cadúha-gá ñadìhí. <sup>9</sup> Te sá cuèndá téé duca<sup>n</sup> ñí cadúha-gá ñadìhí-á<sup>n</sup> te ñá díú sã cuèndá ñadìhí ní cadúha-gá téé. <sup>10</sup> Núu xiã<sup>n</sup> tàú-xi sá ncháá ñáyiú dìhí dàdàhu-yu díquí-yu cuèndá duca<sup>n</sup> cùtnuní sá ñá túú cùnuú-yu dàtná cùnùu nchoo cue téé. Te duca<sup>n</sup> xìní ñuhu-xi cadá-yu sá cuèndá nchaa espíritú xínú cuèchi núú Yá Ndiõxí. <sup>11</sup> Te vitna nchoo ñáyiú ndècu ichi Xítohó Jesucristú, vá càchí-ó sã cuè téé ñá túú xìní ñuhu-güedé cue ñáyiú dìhí chindee ñàhá-yu, te ni vá càchí-ó sã cuè ñáyiú dìhí ñá túú xìní ñuhú-yu cue téé chindee ñàha-güedé xií-yu. <sup>12</sup> Te ì<sup>n</sup> yìquì naha téé ní queñuhu Yá Ndiõxí ní cadúha-gá ñadìhí, dico vitna chi ñáyiú dìhí dácàcú-yu téé. Te téé, ñadìhí ní cadúha Yá Ndiõxí, te ñi-ni duca<sup>n</sup> ñí

cadúha-gá nchaa dava-gá sá ìo.

<sup>13</sup> Te mee-ndo càda cuendá-ndo te núu ndùu váha-xi sá vá dádàhu cue ñáyiú dìhí díquí-yu òré càhá<sup>n</sup> ndihí-yu Yá Ndiõxí àdi ñáhá. <sup>14</sup> Te nchaa ñáyiú càhá<sup>n</sup>-yu sá ñá túú ndùu váha-xi sá cuè téé cunduu nàni idi díquí-güedé, chi ì<sup>n</sup> sácá<sup>n</sup>núú cúú-xí càchí-yu. <sup>15</sup> Te nchaa ñáyiú dìhí ñáyiú nàni idi díquí-xi càchí ñáyiú sá ì<sup>n</sup> sá váha cùu-xi sá cúú-xí-yu sá dúcá<sup>n</sup> nàni idi díquí-yu. Te duca<sup>n</sup> chi Yá Ndiõxí ní cachí-gá sá dúcá<sup>n</sup> cùnduú-yu cuèndá quidáhu-xi díquí-yu. <sup>16</sup> Te núu ìo ñáyiú cuìní dacáa cuèndú cuèndá sá ñí cáhá<sup>n</sup>-í-a, te na cùnahá-yu sá ncháá nchùhú cue téé càhá<sup>n</sup> tnúhu Xítohó Jesucristú ñi-ni duca<sup>n</sup> sàni iní-ndí cada nchaa ñáyiú dìhí. Te ñi-ni duca<sup>n</sup> sàni iní nchaa ñáyiú ndècu ichi-gá.

*Cuèndá ñáyiú ñá túú quide datná ní quide Xítohó Jesucristú cùtnàhá ní cudìni-gá ndihí cue téé ní xica cuu ndihí-gá*

<sup>17</sup> Te nchòhó ñá túú quide váha-ndo ndècu-ndo núu xiã<sup>n</sup> duha na càhá<sup>n</sup>-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá váha, chi da nàdatuhú iní tnàhá-ndó nàcuáa ndècu-ndo. <sup>18</sup> Te díhna-gá na càchí tnúhu-í xii-ndo sã ñihí-í tnúhu sá òré tàcá-ndó quide-ndo nacuaá ní cáhá<sup>n</sup> Xítohó Jesucristú, te ñá túú cùu ì<sup>n</sup>nuu-ndo oré duca<sup>n</sup> quide-ndo nacuaá ní cáhá<sup>n</sup>-gá. Te dava sá càhá<sup>n</sup> ñáyiú sàndáá iní-í te dava ñáhá. <sup>19</sup> Te ndáá sá dúcá<sup>n</sup> tnàhí cada-xi vá cúú ì<sup>n</sup>nuu-ndo cuèndá duca<sup>n</sup> cùtnuní núu ndèdacàa-ndo sandáá ndisa iní-ndó tnúhu Xítohó Jesucristú te ndèdacàa-ndo ñáhá! <sup>20</sup> Te ndí tnàhá òré tàcá-ndó quide-ndo datná ní quide Xítohó Jesucristú cùtnàhá ní cudìni-gá ndihí cue téé ní xica cuu ndihí-gá, te ñá túú quide-ndo nacuaá tàú-xi cunduu chi cùtexínu-ni quide-ndo. <sup>21</sup> Chi òré tàcá-ndó quide-ndo nacuaá ní cachí Xítohó Jesucristú, te dava-ndo ngòdó núú-ndó díhna-gá-ndó xèxi-ndo sá



néhé-ndó te ñá túú sã cündetu tnaaha-ndo, te ñá túú càhá<sup>n</sup> tñáhá-ndó nũu xíá<sup>n</sup> dava-ndo ñá túú xèxi-ndo ndahá xítí-ndó, te dava-ndo xidó-ndó quide-ndo chi xĩni-ndo. <sup>22</sup> Te vá dúcá<sup>n</sup> càda-ndo chi càa vehe-ndo núú dúcá<sup>n</sup> càxi-ndo coho-ndo cada-ndo ndéé ndahá xítí-ndó, chi sá dúcá<sup>n</sup> quide-ndo te dàquee tíhú-ndó nchàa dava-gá ñáyiú ndècu ndihí-ndo ichi Yá Ndiöxí, te dándóo canúú-ndó nchàa ñáyiú ndàhú sá dúcá<sup>n</sup> quide-ndo. ¡Núu xíá<sup>n</sup> vá cúú càchí-í sá cúú-ndó ñáyiú quide váha chi ñá túú quide váha-ndo sã dúcá<sup>n</sup> quide-ndo ndecu-ndo!

*Xítohó Jesucristú ní dándóo tñúhu-gá sá cóhó-ó ndùdí ndéhé yoho yàha stilé te caxi-o pàá cuendá ndacu iní-ó sã ní xíhí-gá*

(Mt. 26:26-29; Mr. 14:22-25; Lc. 22:14-20)

<sup>23</sup> Te dàtná-ni ní dánèhé ñáhá Xítohó Jesucristú xii-í te ñiú-ni duca<sup>n</sup> ní dánèhé ñáhá-í xii-ndo, chi ñiú-ni níú cútñahá ní sáha cuendá ñáhá ndii Jüdás Iscarioté xii-gá núú cuè téé cùu úhú iní ñáhá ní quehe<sup>n</sup>-gá pàá, <sup>24</sup> te ní ndacá<sup>n</sup> táhú-gã núú Yá Ndiöxí, te ní táhú cuèchi-gá, te ní xáha<sup>n</sup>-gã xii cue téé xica cuu ndihí-gá: “Chí quéhé<sup>n</sup> pàá-a caxi-ndo te cada iní-ndó sã cúú-xí dàtná yiqui cùñú-í, chi yúhú cuú-í sácuendá-ndó. Te duca<sup>n</sup>-ni càda-ndo cundecu-ndo cuendá ndacu iní ñáhá-ndó xii-í”, càchí-gá xáha<sup>n</sup>-gã xii-güedé. <sup>25</sup> Te sátá ní yáha ní xexi-güedé pàá sá ní sáñaha-gã, te ní quehe<sup>n</sup>-gá tásá<sup>n</sup> ñúhú ndùdí ndéhé yoho yàha stilé, te ní ndacá<sup>n</sup> táhú tucu-gá núú Yá Ndiöxí. Te ní xáha<sup>n</sup>-gã xii cue téé xica cuu ndihí-gá: “Chí cóhó ndùdí ndéhé yoho yàha stilé-a, te cada iní-ndó sã cúú-xí dàtná níñi-í, te cuendá níñi-í sá cáti òré cuú-í cutnùní ndáá sá Yá Ndiöxí cada-gá ingá núú sã vãha sá cúú-xí ñáyiú. Te ndi tnahá òré coho-ndo ndùdí ndéhé yoho yàha stilé-án te ndacu iní ñáhá-ndó xii-í, te duca<sup>n</sup>-ni càda-ndo cundecu-ndo”, cachí-gá xáha<sup>n</sup>-gã xii-güedé. <sup>26</sup> Te ndi tnahá òré xéxi-ndó pàá te xihí-ndo ndudí ndéhé yoho yàha stilé, te xíá<sup>n</sup> dátũu-ndo núú

ñáyiú sá Xítohó Jesucristú ní xíhí-gá cuendá-yu, te duca<sup>n</sup>-ni càda-ndo cundecu-ndo ndéé ná sàá nduu quixi tucu Xítohó Jesucristú.

*Nàcuáa cada-o òré caxi-o pàá ndihí òré coho-o ndùdí ndéhé yoho yàha stilé dàtná ní cachí Xítohó Jesucristú*

<sup>27</sup> Te dava-ndo ñá túú quide-ndo nacuaá cuení Yá Ndiöxí cada-ndo òré xéxi-ndó pàá ndihí òré xíhí-ndó ndùdí ndéhé yoho yàha stilé, te sá dúcá<sup>n</sup> quide-ndo-án te cucuéchi xii-ndo chi ñá túú nèhe-ndo sá yíñuhu sá cúú-xí yiqui cuñú Xítohó Jesucristú, te ní ñá túú nèhe-ndo sá yíñuhu sá cúú-xí níñi-gã. <sup>28</sup> Te ío váha cada cuendá-ndó te núú ndècu váha iní-ndó núú Xítohó Jesucristú òré cúmání-gã caxi-ndo pàá ndihí òré cúmání-gã coho-ndo ndùdí ndéhé yoho yàha stilé. Te núú ndècu váha iní-ndó núú-gã te caxi-ndo te coho-ndo. <sup>29</sup> Te dava nchòhó ñá túú sàni váha iní-ndó cuendá yiqui cuñú Xítohó Jesucristú te xèxi-ndo pàá te xihí-ndo ndudí ndéhé yoho yàha stilé, te nacháhu-ndo sã dúcá<sup>n</sup> ñá túú sàni váha iní-ndó. <sup>30</sup> Te ñiú sá dúcá<sup>n</sup> quide-ndo núú xíá<sup>n</sup> vãi-ndo cuhú, te ío ndàhú ndécú-ndó, te dava ñáyiú ndècu ndihí-ndo sa ní xíhí-yu. <sup>31</sup> Dico núú ío váha sáha-o cuendá nàcuáa ndècu-o núú Yá Ndiöxí, te vá dúcá<sup>n</sup> dándóo ñaha-gá xii-o. <sup>32</sup> Te òré ndéhé Yá Ndiöxí sá ñá túú quide ndáá-ó ndècu-o te dándóo ñaha-gá xii-o. Te duca<sup>n</sup> quide-gá cuendá sá vã cuíta nihnu-o, chi núú ñáhá te cuíta nihnu-o ndihí nchaa ñáyiú ndècu ichi cuehé ichi duha.

<sup>33</sup> Te núú xíá<sup>n</sup> càhá<sup>n</sup>-í dóho nchaa nchòhó ñáyiú ndècu ndihí-í ichi Xítohó Jesucristú sá òré tacá-ndó càda-ndo nacuaá ní quide Xítohó Jesucristú cútñahá ní cudini-gá ndihí cue téé ní xica cuu ndihí-gá, te cundetu tñaha-ndo nduu nchaa-ndo te dàtnùní duca<sup>n</sup> càda-ndo. <sup>34</sup> Te núú dava-ndo xíhí-ndó dòcò te caxi duu-ndo vèhe-ndo te dàtnùní nat-acá-ndó, cuendá òré nataká-ndó te vá cádá-ndó ñiú sá ñá túú tàú-ndó càda-ndo cuendá sá vã dándóo ñaha Yá Ndiöxí xii-ndo. Te òré quixi coto





te vá cùndùu-xi nacuáa tàú-xi cunduu ni cùu te núu duca<sup>n</sup>. <sup>20</sup> Dico titní xichi cùu yiqui cuñú-ó, te ì<sup>n</sup>-ni cùu-xi nihíí-xi.

<sup>21</sup> Te sa nàha-o sá vǎ cúú cǎchí-ó sǎ tìnuu-o ñá túú xini ñuhu-xi ndaha-o, àdi díquí-ó ñà túú xini ñuhu-xi sáhá-ó. <sup>22</sup> Te nchoo sà naha-o sá dává xichi yiqui cuñú-ó sǎ cǎchí-ó sǎ ñà túú cùnuu ío-gá xíní ñuhu-xi. <sup>23</sup> Te dava xichi yiqui cùñú-ó sǎ ñà túú quide cuendá cǎvíhí-ó nchàa xǎ<sup>n</sup> sá quidáhu dóó sǎcuñhu-o, te dava xichi yiqui cùñú-ó ñà cúú cùtúu chi dacutíí sǎ quidáhu. <sup>24</sup> Te nchaa xichi yiqui cùñú-ó sǎ cúú cùtúu ñá túú xini ñuhu-xi quidáhu. Te Yá Ndióxi ní taxi ndecu-gá nchaa xichi yiqui cùñú-ó nàcuáa tàú-xi cunduu. Te ní cachí-gá sá dává-gǎ xichi yiqui cùñú-ó núú vǎ cúú cùtúu quidáhu. <sup>25</sup> Te duca<sup>n</sup> ní quide-gá cuendá sá ì<sup>n</sup>-ní cùu yiqui cuñú-ó. Te duca<sup>n</sup> ndì tnahá ì<sup>n</sup> ì<sup>n</sup> xichi yiqui cùñú-ó chindee tnahá-xi. Te duca<sup>n</sup> sǎtnahá-xi cùu nchoo vitna ndecu-o ichi Xítoho Jesucristú chi chindee tnahá-o. <sup>26</sup> Te núu ì<sup>n</sup> xichi yiqui cùñú-ó ná tnahúhú te nihíí-ó quide úhú-xi, te núu ì<sup>n</sup> xichi yiqui cùñú-ó ío váha ndècu-xi te duca<sup>n</sup> nihíí yiqui cùñú-ó cúú vǎha-xi. Te duca<sup>n</sup> sǎtnahá-xi cùu-o vitna ndecu-o ichi Xítoho Jesucristú.

<sup>27</sup> Te nchoo ndècu ndìhi-o Xítoho Jesucristú, te cùu-o datná yiqui cùñú-gá te ì<sup>n</sup> ì<sup>n</sup>-o cùu-o datná ì<sup>n</sup> ì<sup>n</sup> xichi yiqui cùñú-gá. <sup>28</sup> Te duca<sup>n</sup> sǎtnahá-xi cùu-o chi Yá Ndióxi ní taxi-gá ndí díí<sup>n</sup> ndí díí<sup>n</sup> chù<sup>n</sup> quide-o sá cúú-xí nchàa ñáyiu ndècu ichi-gá. Te díhna-gá cue téé caca cuu cǎhá<sup>n</sup> tnúhu-gá núú ñáyiu ní taxi ndecu-gá, te dǎtnùní ní taxi ndecu-gá cue téé cǎhá<sup>n</sup> tnúhu-gá nàcuáa dàcahu iní ñáhá mèe-gá, te dǎtnùní ní taxi ndecu-gá cue téé dǎnehé ñáhá xì ñáyiu tnúhu-gá núú tàcá-yu, te dǎtnùní ní taxi ndecu tucu-gá cue téé ndàcu quide sá vǎ yǒo tnahí ndàcu cada. Te ní taxi ndecu tucu-gá cue téé xicá<sup>n</sup> táhú-ní núú Xítoho Jesucristú cuendá ñáyiu cùhú te ndúha-yu. Te ní taxi ndecu

tucu-gá cue téé chindee cue ñáyiu ndècu ichi-gá. Te ní taxi ndecu tucu-gá cue téé yìndaha ñaha xii ñáyiu ndècu ichi-gá, te ní taxi ndecu tucu-gá cue téé cǎhá<sup>n</sup> tnúhu sá dǎcàhu iní ñáhá Espiritú-gá tnúhu sá ñà túú xini-güedé. <sup>29</sup> Te ñá ncháá-ó cùu-o cue téé ní táuchíú<sup>n</sup> Xítoho Jesucristú cǎhá<sup>n</sup> tnúhu-gá núú ñáyiu, te ñá ncháá-ó cùu-o cue téé cǎhá<sup>n</sup> tnúhu sá dǎcàhu iní ñáhá Yǎ Ndióxi xii-o. Te ñá ncháá-ó cùu-o cue téé dǎcuaha ñaha xii-yu. Te ñá ncháá-ó cùu-o cue téé quide sá vǎ yǒo tnahí ndàcu cada. <sup>30</sup> Te ñá ncháá-ó cùu-o cue téé dicó-ni cǎcá<sup>n</sup> táhú núú Xítoho Jesucristú cuendá ñáyiu cùhú te ndúha-yu. Te ñá ncháá-ó cùu-o cue téé cǎhá<sup>n</sup> tnúhu sá dǎcàhu iní ñaha Espiritú Yǎ Ndióxi tnúhu sá ñà túú xini-ó, te ñá ncháá-ó cùu-o cue téé cùtnuní iní-xi cǎhá<sup>n</sup> nàcuáa ndùu tnúhu-á<sup>n</sup>. <sup>31</sup> Te ío nducu ndèe-ndo cada-ndo nacuáa nduu táhú-ndó núú Yǎ Ndióxi nchaa sá ío-gá cùnùu cada-ndo. Te vitna na dǎnehé ñáhá tucu-í xii-ndo nàcuáa cada-ndo, dico sá dǎnehé ñáhá-í-a ío-gá cùnùu-xi.

## 13

### *Cuu iní-ó tnahá ñáyiu-o*

<sup>1</sup> Te núu nchoo xini-ó cǎhá<sup>n</sup>-ó tnúhu sá ío vii ío váha cuáhá<sup>n</sup> cǎhá<sup>n</sup> ñáyiu ñuyíú-a, àdi xini-ó cǎhá<sup>n</sup>-ó tnúhu sá ío vii ío váha cuáhá<sup>n</sup> cǎhá<sup>n</sup> cue espíritu xínú cuèchi núú Yǎ Ndióxi, te núu xini-ó cǎhá<sup>n</sup>-ó nchàa tnúhu-á<sup>n</sup> te ñá túú cùu iní-ó cuè tnahá ñáyiu-o ña, te ñá túú nǎndíhi-xi sá xini-ó cǎhá<sup>n</sup>-ó tnúhu-á<sup>n</sup> te cùu-o datná dava caá sá ío dusa<sup>n</sup> quide. <sup>2</sup> Te núu cùu-o ñáyiu cǎhá<sup>n</sup> tnúhu sá dǎcàhu iní ñáhá Yǎ Ndióxi, àdi cuu-o ñáyiu cùtnuní iní-xi nàcuáa cuáhá<sup>n</sup> nchaa tnúhu ndùu yuhu ni cuu, àdi cuu-o ñáyiu ío váha cùtnuní iní-xi nchaa nàcuáa quide Yá Ndióxi, àdi cuu-o ñáyiu ío váha sǎndáá iní ñáhá xii Yá Ndióxi nàcuáa ndacu-o cùu-o ì<sup>n</sup> yucu xocuiñí-xi núú ndécú-xí, te núu nchaa xǎ<sup>n</sup> xini-ó càda-o te ñá túú cùu iní-ó cuè tnahá ñáyiu-o ña, te ñá túú vǎdana nǎndíhi-xi te núu vá cúú iní-ó tnahá ñáyiu-o cuèi na càda-o nchaa xǎ<sup>n</sup>. <sup>3</sup> Te cuèi nchaa

sá ndécú ndìhi-o na dacáhñu-o, te cuèi na cuãha cuendá-ó mèe-o cáyú-ó sá cúu-xí Yă Ndiõxí, dico ñá túú vèdana chindee ñaha-xi xii-o sá dúcá<sup>n</sup> càda-o te núu ñá túú cùu iní-ó cuè tñaha ñáyiu-o.

<sup>4</sup> Dico núu cùu iní-ó cuè tñaha ñáyiu-o, te càhnu iní-ó, te quide váha-o, te ñá túú cùu-o ñáyiu cuédú ínì, te ni ñà túú càhá<sup>n</sup>-ó nùu cùu cahnu-o, te ni ñà túú sàni iní-ó càda cahnu-o mee-o, <sup>5</sup> te ni ñà túú ñùhu cuehé iní-ó, te ni ñà túú ndùcu-o mee-ni sá cúu-xí mèe-o, te ni ñà túú-gă cúdeé<sup>n</sup>-ó cuendá ñ<sup>n</sup> sá cúu, te ni ñà túú-gă sácũhu<sup>n</sup> iní-ó sá quidé ñàha tñaha ñáyiu-o xii-o. <sup>6</sup> Te ni ñà túú-gă cudĩ iní-ó nchàa sá ñà túú váha quide ñáyiu, chi mee-nă cuendá nchaa sá váha cùdĩ iní-ó. <sup>7</sup> Te nchaa sá yãha-o sàcahnu iní-ó, te sàni váha iní-ó cuendá nchaa ñáyiu, te sàni iní-ó sá díu-ní nchàa sá váha cuu xii nchaa tñaha ñáyiu-o ndéè cuéé-gá, te ío quide cahnu iní-ó cuèi nándi sá yãha-o, te nchaa xiã<sup>n</sup> quidé-ó te núu cùu iní-ó cuè tñaha ñáyiu-o.

<sup>8</sup> Te ni caa ni quíhí<sup>n</sup> duha-ni cuu iní-ó cuè tñaha ñáyiu-o. Dico sáá nduu te vá cóo-gă ñáyiu cáhá<sup>n</sup> tnúhu sá dácàhu iní ñáhá Yă Ndiõxí, te ni vá cóo-gă ñáyiu cáhá<sup>n</sup> tnúhu sá dácàhu iní ñáhá Espíritú Yă Ndiõxí tnúhu sá ñà túú xini-yu, te ni vá cóo-gă ñáyiu túha dàtná túha ñáyiu vitna. <sup>9</sup> Te vitna ñá túú cùtnuní iní-ó nchàa nacuáa sàni iní Yă Ndiõxí chi sacú-ni cùtnuní iní-ó, te duca<sup>n</sup> sacú-ni càhá<sup>n</sup>-ó nàcuáa ndùu tnúhu-gá, dico càhá<sup>n</sup>-ó tnúhu-gá nàcuáa dàcahu iní ñáhá-gă xii-o. <sup>10</sup> Te na sáá nduu càda Yă Ndiõxí nchaa nàcuáa tàú-xi cunduu, te dàvá-á<sup>n</sup> te nchaa sá càchí-gá ñá túú ndècu-xi nacuáa tàú-xi cunduu vá dúcá<sup>n</sup>-gă cundecu-xi.

<sup>11</sup> Te yúhú cùtnàhá ní cuu landú-í ní xóo cada-í sá cùu-í landú, ní xóo cáhá<sup>n</sup>-í, ní xóo caní iní-í, te ní xóo tecú tnùnì-í dàtná quidé cuè landú xñdecu vitna, dico sátá ñi cuu-í ñ<sup>n</sup> téè cùu sacuéhé te ñá túú-gă quidé-í dàtná ní xóo cada-í cùtnàhá ní cuu landú-í. <sup>12</sup> Te duca<sup>n</sup> sãtnahá-xi cùu-o vitna ndecu-o ichi Xítóhó Jesucrístú, chi ñá túú cùtnuní váha iní-ó nàcuáa

cùu cuendá Yă Ndiõxí, te cùu-o datná ñáyiu ndèhe ñ<sup>n</sup> núu yútátá sá ñà túú tũu váha núu-xi, te duca<sup>n</sup> sãtnahá-xi cùu-o chi ñá túú cùtnuní váha iní-ó nãsa cùu cuendá-gá, dico sáá nduu quínì núu-ó-gă. Te nchoo sacú-ni cùtnuní iní-ó nàcuáa ndùu-gá vitna dico na sáá nduu te quínì ndáá-ó nàcuáa càa nacuáa ndùu-gá dàtná xini ñáhá mèe-gá xii-o. <sup>13</sup> Te ni caa ni quíhí<sup>n</sup> duca<sup>n</sup>-ni quíndáá iní-ó Yă Ndiõxí, te duca<sup>n</sup>-ni cùndecu ndìhi-o tnúhu ndee iní cundecu-o ndìhi-gá, te duca<sup>n</sup>-ni ío cuu iní-ó-gă ndìhi tñaha ñáyiu-o. Te sá cúu iní-ó Yă Ndiõxí ndìhi sá cúu iní-ó tñaha ñáyiu-o xiã<sup>n</sup> ío-gá cùnùu-xi dacúúxí dàva-gá.

## 14

*Ñáyiu càhá<sup>n</sup> tnúhu sá dácàhu iní ñáhá Espíritú Yă Ndiõxí*

<sup>1</sup> Te vá dáñá ndéè-ndó cùu iní-ndó tñaha ñáyiu-ndo, te cuhu<sup>n</sup> iní-ndó sá ndùu táhú-ndó nùú Yă Ndiõxí tĩtní núu chiù<sup>n</sup> cada-ndo nacuáa chindee ñàha Espíritú-gá xii-ndo, te ío cuhu<sup>n</sup> iní-ndó sá ndúú táhú-ndó càhá<sup>n</sup>-ndó tnúhu sá dácàhu iní ñáhá Yă Ndiõxí xii-ndo. <sup>2</sup> Te cue ñáyiu càhá<sup>n</sup> tnúhu sá dácàhu iní ñáhá Espíritú Yă Ndiõxí tnúhu sá ñà túú xini-yu, te tnúhu càhá<sup>n</sup>-yu-á<sup>n</sup> cúu-xí sá cúu-xí Yă Ndiõxí te ñá díu sá cúu-xí ñáyiu chi ñá túú tècú tnùnì-yu, te mee Espíritú Yă Ndiõxí quidé-xí dùca<sup>n</sup> cáhá<sup>n</sup>-yu tnúhu yiyuhu. <sup>3</sup> Te cue ñáyiu ní nduu táhú núu Yă Ndiõxí cáhá<sup>n</sup> tnúhu sá dácàhu iní ñáhá-gă xii-yu, te ñáyiu-á<sup>n</sup> dácàhá<sup>n</sup>-yu ñáyiu nàcuáa cuita níhí ndéé-gă-yu cundecu-yu ichi-gá, te duca<sup>n</sup> cuãñahá-yu tnúhu ndee iní xií-yu òré ndìhú iní-yu. <sup>4</sup> Te ñáyiu càhá<sup>n</sup> tnúhu sá dácàhu iní ñáhá Espíritú Yă Ndiõxí xií-yu tnúhu sá ñà túú xini-yu-á<sup>n</sup>, ñáyiu-á<sup>n</sup> mee-ñi-yu nihí ndéé-yu ndècú-yu ichi-gá. Dico ñáyiu càhá<sup>n</sup> tnúhu sá dácàhu iní ñáhá-gă xií-yu, càhá<sup>n</sup>-yu tnúhu-á<sup>n</sup> nàcuáa níhí ndéé dàva-gá ñáyiu nchìcú<sup>n</sup> nihnu ichi-gá.

<sup>5</sup> Te yúhú ío cudĩ iní-í te núu nchaa-ndo càhá<sup>n</sup>-ndó tnúhu sá dácàhu

iní ñáhá Espíritú Yă Ndiöxí xii-ndo tnúhu sá ñà túú xìní-ndó. Dico ío-gá cúdí ìní-í te núu nchaa-ndo cǎhá<sup>n</sup>-ndó tnúhu sá dǎcǎhu iní ñáhá-gǎ, chí ío-gá xíní ñúhu-xi sá cǎhá<sup>n</sup>-ndó tnúhu-á<sup>n</sup> dǎcúxí sǎ cǎhá<sup>n</sup>-ndó tnúhu sá dǎcǎhu iní ñáhá Espíritú-gá cǎhá<sup>n</sup>-ndó tnúhu sá ñà túú xìní-ndó. Dico ì<sup>n</sup>-ni nǔtnahá-xi quide-ndo te núu nchòhó ñáyiú cǎhá<sup>n</sup> tnúhu sá dǎcǎhu iní ñáhá Espíritú-gá cǎhá<sup>n</sup>-ndó nǎcuáa quèe-xi tnúhu-á<sup>n</sup>. Te duca<sup>n</sup> te nchaa ñáyiú ndècu ichi Yá Ndiöxí cuita níhí ndéé-gǎ-yu quíhí<sup>n</sup> cundecú-yu ichi-gá. <sup>6</sup> Te núu yúhú quexìo-í núu ndécú nchòhó ñáyiú ndècu ndíhi-í ichi Xítóhó Jesucristú, te ngúita-í cǎhá<sup>n</sup>-í mee-ni tnúhu sá dǎcǎhu iní ñáhá Espíritú Yă Ndiöxí xii-í tnúhu sá ñà túú xìní-í, te ñá túú nǎ sá vǎha cuu-xi sá cúu-xi-ndó. Dico cuu-xi sá vǎha xii-ndo te núu na cǎhá<sup>n</sup>-í núu-ndó nchaa tnúhu sá dǎnèhé ñáhá Yă Ndiöxí xii-í tnúhu sá vǎtá dǎcuàha-gǎ-í, ndíhi nchaa tnúhu sá sǎ xìní-í, ndíhi nchaa tnúhu sá dǎcǎhu iní ñáhá-gǎ xii-í cǎhá<sup>n</sup>-í, ndíhi nchaa dava-gǎ tnúhu-gǎ.

<sup>7</sup> Te na càda-o cuendá sá núu ì<sup>n</sup> tée tíú-dé vílu àdi caní-dé àrpá te núu ñá túú sǎhnú-dé ndíhi-xi ì<sup>n</sup> yaá, te ñá cútñuní iní-ó nǎ yaá caní-dé àdi ná yaá tíú-dé te núu duca<sup>n</sup> na càda-dé. <sup>8</sup> Te ñi-ni duca<sup>n</sup> sǎtnahá-xi cùu tucu tée cùu sandadú tíú cútú, chí núu vá tíú váha-dé nǎcuáa tàú-xi cunduu òré quíhí<sup>n</sup>-güedé nǎá-güedé, te vá ngündecu túha dava-gǎ cue sandadú te núu duca<sup>n</sup> na càda-dé vá tíú váha-dé. <sup>9</sup> Te duca<sup>n</sup> sǎtnahá-xi cùu nchohó te núu vá cǎhá<sup>n</sup>-ndó ì<sup>n</sup> tnúhu nǎcuáa tàú-xi cunduu núu ñáyiú te vá tècú tnùní-yu tnúhu cǎhá<sup>n</sup>-ndó. ¡Chí àú<sup>n</sup> nǎ cuu cǎhá<sup>n</sup>-ndó te núu duca<sup>n</sup> na càda-ndo! <sup>10</sup> Te ío títní núu tnúhu ìó ñuyíú, te ì<sup>n</sup> ì<sup>n</sup> núu tnúhu-á<sup>n</sup> cútñuní iní ñáyiú nǎcuáa quèe-xi. <sup>11</sup> Te núu nchoo ñǎ tècú tnùní-ó ì<sup>n</sup> tnúhu cǎhá<sup>n</sup> ì<sup>n</sup> ñáyiú, te quide-ó-yu ñáyiú ñuú xicá chí ñá túú cǎhá<sup>n</sup>-yu tnúhu cǎhá<sup>n</sup>-ó, te ñi-ni duca<sup>n</sup> quide ñahá-yu xii nchoo tucu. <sup>12</sup> Te xǎ<sup>n</sup> núu cǎchí tnúhu-í xii nchaa nchòhó ñáyiú ío cuíní nduu

táhú núú Yă Ndiöxí sá Espíritú-gá chindee ñàha-xi xii-ndo cada-ndo ná daha núú chiu<sup>n</sup>, te ío nducu ndèe-ndo cada-ndo chiu<sup>n</sup> sá ñi nduu táhú-ndó nǎcuáa cuita níhí ndéé-gǎ ñáyiú ndècu ichi-gá quíhí<sup>n</sup>.

<sup>13</sup> Te núu cǎhá<sup>n</sup>-ndó tnúhu sá ñà túú xìní-ndó, tnúhu sá dǎcǎhu iní ñáhá Espíritú Yă Ndiöxí xii-ndo, te xíní ñúhu-xi sá cǎcǎ<sup>n</sup> táhú-ndó núú Yă Ndiöxí cuendá sá ná chindee ñaha-gǎ xii-ndo cǎhá<sup>n</sup>-ndó núú ñáyiú núu nǎsa quèe-xi tnúhu-á<sup>n</sup>. <sup>14</sup> Chí núu nchoo na cǎhá<sup>n</sup> ndíhi-o Yă Ndiöxí ndíhi tnúhu sá ñà túú xìní-ó, te ñi yúhu ñi iní-ó cǎhá<sup>n</sup> ndíhi-o-gǎ dícó-ni sá ñǎ tècú tnùní-ó nǎcuáa ndùu tnúhu cǎhá<sup>n</sup>-ó. <sup>15</sup> Te xǎ<sup>n</sup> núu xíní ñúhu-xi cǎhá<sup>n</sup> ndíhi-o Yă Ndiöxí ñi yúhu ñi iní-ó nǎcuáa chindee ñaha Espíritú-gá xii-o te cǎhá<sup>n</sup>-ó nǎcuáa tecú tnùní-ó, te ñi-ni duca<sup>n</sup> càda-o òré xítá yúhu-o chíñuhu-o Yá Ndiöxí, chí ñi yúhu ñi iní-ó dùca<sup>n</sup> càda-o nǎcuáa chindee ñaha Espíritú-gá xii-o, te cútñuní iní-ó nǎcuáa cuáhá<sup>n</sup> nchaa tnúhu cǎhá<sup>n</sup>-ó xita-o. <sup>16</sup> Chí núu nchoo na ndàcǎ<sup>n</sup> táhú-ó núú Yă Ndiöxí ndíhi mee-ni tnúhu sá ñà túú xìní-ó tnúhu sá dǎcǎhu iní ñáhá Espíritú-gá xii-o, te ñáyiú ñá túú ní ndùu táhú cǎhá<sup>n</sup> tnúhu cǎhá<sup>n</sup>-ó ndédóho ñáhá-yu xii-o, te ñáyiú-á<sup>n</sup> vǎ ndácǔ-yu cǎhá<sup>n</sup>-yu tnúhu cǎhá<sup>n</sup>-ó ndàcǎ<sup>n</sup> táhú-ó ndíhi-yu núú Yă Ndiöxí chí ñá túú tècú tnùní-yu tnúhu cǎhá<sup>n</sup>-ó. <sup>17</sup> Te váha-ni quide-o sá dúcǎ<sup>n</sup> cǎhá<sup>n</sup>-ó ndàcǎ<sup>n</sup> táhú-ó núú Yă Ndiöxí, te dícó-ni sá tnúhu-á<sup>n</sup> ñà túú chindee-xi ñáyiú nǎcuáa cuita níhí ndéé-gǎ-yu cundecú-yu ichi-gá. <sup>18</sup> Te yúhú ío ndàcǎ<sup>n</sup> táhú-í núú Yă Ndiöxí chí cǎhá<sup>n</sup>-í tnúhu sá ñà túú xìní-í tnúhu sá dǎcǎhu iní ñáhá Espíritú-gá xii-í, te cǎhá<sup>n</sup>-gǎ-í dǎcúxí nchaa nchohó. <sup>19</sup> Te òré tàcá ñáyiú ndècu ichi Yá Ndiöxí dǎcuàhá-yu tnúhu-gǎ, te cǎhá<sup>n</sup>-í tnúhu-gǎ núú-yu sá sǎ ní cútñuní iní mee-í nǎcuáa duca<sup>n</sup> cútñuní iní-yu nǎcuáa ndùu tnúhu cǎhá<sup>n</sup>-í. Te tnahá-gǎ iní-í cǎhá<sup>n</sup>-í úhú<sup>n</sup>-ni tnúhu-á<sup>n</sup> núú-yu dǎcúxí sǎ cǎhá<sup>n</sup>-í úxí mǐl tnúhu sá ñà túú xìní-í, tnúhu sá dǎcǎhu iní ñáhá Espíritú Yă Ndiöxí xii-í cǎhá<sup>n</sup>-í.



20 Te nchòhó ñáyiú ndècu ndìhi-í ichi Xítóhó Jesucristú, vá cání ìní-ndó dàtná sání ìní cue landú, chi caní ìní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú líhli vá cùndècu-ndo ichi cuehé ichi duha, chi cue landú-á<sup>n</sup> ñà túú ndècu-güexi ichi-á<sup>n</sup>. 21 Te núú tütú Yă Ndiöxí càhá<sup>n</sup>-xi nàcuáa ní càhá<sup>n</sup>-gá, te cachí-xi: “Cue tée ñúú xicá càhá<sup>n</sup> ndi ðí<sup>n</sup> núú tnúhu quíhí<sup>n</sup>-güedé càhá<sup>n</sup>-güedé tnúhu-í núú ñáyiú israhél cada-güedé núú-í, te cuèi duca<sup>n</sup> dico vá quíndáá ìní-yu tnúhu-í”, duha ní cachí Yă Ndiöxí te duca<sup>n</sup> ñí ngúndéé núú tütú-gá. 22 Te tnúhu sá dácàhu ìní ñáhá Espiritú Yă Ndiöxí xii-o tnúhu sá ñà túú xíní-ó, xí<sup>n</sup> cúú-xí cuendá sá cútnùní ìní cue ñáyiú ñà túú sàndáá ìní tnúhu Yă Ndiöxí sá ñà túú cùu váha ìní ñáhá-gá xii-yu. Dico sá cúú-xí cue ñáyiú sàndáá ìní tnúhu-gá ñà túú nă quidé-xí sá cúú-xí-yu. Te tnúhu sá dácàhu ìní ñáhá Yă Ndiöxí xii-o, xí<sup>n</sup> cúú-xí cuendá sá cútnùní ìní cue ñáyiú sàndáá ìní tnúhu-gá sá ndécú ndìhi ñaha-gá xii-yu, dico ñà túú dùca<sup>n</sup> sani ìní cue ñáyiú ñà túú sàndáá ìní tnúhu-gá. 23 Te núú ní tacá nchaa nchòhó ñáyiú ndècu ichi Yă Ndiöxí, te nchaa-ndo ñí ngüíta-ndo càhá<sup>n</sup>-ndó tnúhu sá dácàhu ìní ñáhá Espiritú Yă Ndiöxí xii-ndo tnúhu sá ñà túú xíní-ndó, te mei òré-á<sup>n</sup> quexio cue ñáyiú ñà túú sàndáá ìní tnúhu-gá, ndìhi cue ñáyiú vátá quíni dana-gá tnúhu-gá núú ndécú-ndó, te ñáyiú-á<sup>n</sup> quesàhá-yu sá lúcú-ndó te núú duca<sup>n</sup> càhá<sup>n</sup>-ndó tnúhu sá dácàhu ìní ñáhá Espiritú-gá xii-ndo òré quexió-yu. 24 Dico núú nchaa-ndo càhá<sup>n</sup>-ndó tnúhu sá dácàhu ìní ñáhá Yă Ndiöxí xii-ndo, te mei òré-á<sup>n</sup> quexio cue ñáyiú duca<sup>n</sup> ñà túú sàndáá ìní-xi tnúhu-gá, ndìhi cue ñáyiú duca<sup>n</sup> ñà túú xíní dana tnúhu-gá-á<sup>n</sup>, te ñáyiú-á<sup>n</sup> cutnùní ìní-yu sá ndécú cuèchi-yu núú-gá, te ngüíta-yu cuáha-yu cuendá sá ñà túú quide váha-yu ndécú-yu cuendá sá càhá<sup>n</sup>-ndó tnúhu-gá ndédóho-yu. 25 Te nchaa sá cuèhé sá dúhá ñí quidé-yu sàni ìní-yu yiyuhu ndacu ìní-yu, te ngüíta-yu náhmá-yu nchaa sá ñà túú

váha ní quidé-yu núú Yă Ndiöxí, te cachí-yu sá ño càhnu cuu-gá, te cachí tucú-yu sá ndàá ndécú ndìhi-ndo-gá.

### *Cada-o nàcuáa tàú-xi cunduu*

26 Te vitna nchòhó ñáyiú ndècu ndìhi-í ichi Xítóhó Jesucristú xini ñuhu-xi duha cada-ndo. Òré tacá-ndó te dava-ndo càta yuhu-ndo chiñuhu-ndo Yă Ndiöxí, te dava-ndo dàsahú-ndó ñáyiú tnúhu-gá, te dava-ndo càhá<sup>n</sup>-ndó nàcuáa dàquixi túú Yă Ndiöxí ìní-ndó, te dava-ndo càhá<sup>n</sup>-ndó tnúhu sá dácàhu ìní ñáhá Espiritú Yă Ndiöxí xii-ndo tnúhu sá ñà túú xíní-ndó, te dava-ndo càhá<sup>n</sup>-ndó nàcuáa quèe-xi tnúhu-á<sup>n</sup>. Te nchaa sá quidé-ndó ná cùu-xi nacuáa chindee-xi ñáyiú nàcuáa cuita níhí ndéé-gá-yu cundécú-yu ichi-gá. 27 Te òré càhá<sup>n</sup>-ndó tnúhu sá dácàhu ìní ñáhá Espiritú Yă Ndiöxí xii-ndo tnúhu sá ñà túú xíní-ndó, te úú-ni-ndo àdi úní-ni tnàhá-ndó càhá<sup>n</sup>-ndó tnúhu-á<sup>n</sup> te vá úú<sup>n</sup> ní càhá<sup>n</sup>-ndó chi ndéé ndìhi ðí<sup>n</sup>-ndo te dàtnùní ngüíta ingá-ndó càhá<sup>n</sup>-ndó. Te xini ñuhu-xi sá ðí<sup>n</sup> ñáyiú càhá<sup>n</sup>-yu nàcuáa quèe-xi tnúhu càhá<sup>n</sup>-ndó-á<sup>n</sup>. 28 Te núú ñà túú ñáyiú tècú tnùní nàcuáa quèe-xi tnúhu càhá<sup>n</sup>-ndó-á<sup>n</sup>, te núú mée núú ðí<sup>n</sup>-ní-ndó càhá<sup>n</sup>-ndó tnúhu-á<sup>n</sup> càhá<sup>n</sup> ndìhi-ndo Yă Ndiöxí te vá càhá<sup>n</sup>-ndó núú ñáyiú. 29 Te òré càhá<sup>n</sup>-ndó tnúhu sá dácàhu ìní ñáhá Yă Ndiöxí xii-ndo te úú-ni-ndo àdi úní-ni tucu-ndo càhá<sup>n</sup>, te dava-gá-ndó cùndedóho-ndo tnúhu-á<sup>n</sup> te càhá<sup>n</sup>-ndó núú váha-ni càhá<sup>n</sup>-güedé àdi ñà túú váha-ni. 30 Te núú ðí<sup>n</sup>-ndo ñí dácáhu ìní ñáhá Yă Ndiöxí xii-ndo ðí<sup>n</sup> tnúhu càhá<sup>n</sup>-ndó, te núú ðí<sup>n</sup>-ndo sà càhá<sup>n</sup>-ndó te ngüíta-ndó te quíhu tucu ingá-ndó càhá<sup>n</sup>-ndó nàcuáa ní dácáhu ìní ñáhá Yă Ndiöxí xii-ndo. 31 Te nchaa nchòhó ñáyiú ní nduu táhú càhá<sup>n</sup> tnúhu sá dácàhu ìní ñáhá Yă Ndiöxí, te vá úú<sup>n</sup>-ní càhá<sup>n</sup>-ndó chi díhna-gá ðí<sup>n</sup>-ndo càhá<sup>n</sup> te dàtnùní càhá<sup>n</sup> tucu ingá-ndó. Te duca<sup>n</sup> càda-ndo cuendá nchaa-ndo tècú tnùní-ndó nàcuáa ndùu tnúhu càhá<sup>n</sup> ðí<sup>n</sup> ðí<sup>n</sup>-ndo, te duca<sup>n</sup> te cudí<sup>n</sup>-gá ìní-ndó càncicú<sup>n</sup> nihnu-ndo ìchi-gá. 32 Te nchaa ñáyiú càhá<sup>n</sup> tnúhu Yă

Ndiöxí sa nàha-ná méě-yu nàcuáa quidé-yu càhá<sup>n</sup>-yu tnúhu-gá nàcuáa ñá túú quide cutexínu-yu. <sup>33</sup> Te Yá Ndiöxí cúú-gã Yaá quidé ïo váha cùu ì<sup>n</sup>nuu-ndo ndecu-ndo, te ñá túú daticá nuu ñaha-gã xii-ndo.

Te na cächí tnúhu-í xii-ndo nàcuáa càhá<sup>n</sup>-í nchaa núú tàcá cue ñáyiú ndècu ndihí-o ichi Xítóhó Jesucristú. <sup>34</sup> Te yúhú cächí-í sá vã cúú cãhá<sup>n</sup> cue ñáyiú ðihí òré tàcá-ndó dàcuaha-ndo tnúhu-gá, chi ñá túú dùca<sup>n</sup> cuini-gá cadá-yu, te quíndáá-ni iní-yu cadá-yu nàcuáa tàú-xi cunduu. <sup>35</sup> Te núú ì<sup>n</sup> sá cuini-yu nducu tnúhu-yu te ndéé òré nasáá-yu vehé-yu te nducu tnúhu-yu núú yí-yu, chi ñá túú ndùu váha-xi sá càhá<sup>n</sup>-yu núú tàcá nchaa ñáyiú dàcuáha ndihí-yu tnúhu-gá.

<sup>36</sup> Te chí dándacu iní sá ñà díú nchòhó cúú-ndó ñáyiú ní ngúndecu ndihí tnúhu Yá Ndiöxí díhna nuu nàcuáa datècú tnúhu-ndo dàva-gá ñáyiú, te ni ñà díú mèe-ni nchòhó sa ní ngúndecu ndihí-ndo tnúhu Yá Ndiöxí vitna, núú xiã<sup>n</sup> vá cächí-ndó sã ïo cùnuu-ndo. <sup>37</sup> Te núú dawa nchòhó sání iní-ndó sã càhá<sup>n</sup>-ndó nàcuáa dàcahu iní ñáhá Yá Ndiöxí xii-ndo àdi sani iní-ndó sã quidé-ndó nàcuáa chindee ñaha Espiritú-gá xii-ndo, te cuáha váha-ndo cuendá sá ncháá tnúhu càhá<sup>n</sup>-í-a cùu-xi tnúhu sá ní cachí tnúhu mee Xítóhó Jesucristú cada-o. <sup>38</sup> Te ndéda-ni cãa ñáyiú ndècu ndihí-ndo te núú ñá túú sándáá iní-yu tnúhu càhá<sup>n</sup>-í, te vá cadá cuendá-ndó tnúhu càhá<sup>n</sup>-yu.

<sup>39</sup> Te vitna nchòhó ñáyiú ndècu ndihí-í ichi Xítóhó Jesucristú, ío cani iní-ndó cãhá<sup>n</sup>-ndó tnúhu sá dácàhu iní ñáhá Yá Ndiöxí núú ñáyiú, te dañá-ndo na càhá<sup>n</sup> cue ñáyiú ní nduu táhú núú Yá Ndiöxí sá càhá<sup>n</sup>-yu tnúhu sá dácàhu iní ñáhá Espiritú-gá xií-yu tnúhu sá ñà túú xini-yu. <sup>40</sup> Te cada-ndo nchaa nacuáa tàú-xi cunduu nàcuáa ñá túú ñã cuu cundecu-ndo.

## 15

### *Ní ndoto Xítóhó Jesucristú*

<sup>1</sup> Te vitna nchòhó ñáyiú ndècu ndihí-í ichi Xítóhó Jesucristú cuini-í sá dándacu iní-ndó nàcuáa ní dánèhé ñáhá-í xii-ndo tnúhu sá càhá<sup>n</sup> nàcuáa naníhí tàhú-ó, chi díu tnúhu-á<sup>n</sup> ní sándáá iní-ndó te nchìcú<sup>n</sup> nihnu-ndo. <sup>2</sup> Te sá xíí tnúhu-á<sup>n</sup> níhnú-ndó ichi cuáhá<sup>n</sup>-ndó núú ndúú táhú-ndó cùndecu-ndo ndihí Yá Ndiöxí ní caa ní quíhí<sup>n</sup>, te duca<sup>n</sup> ndùu táhú-ndó núú cùndècu-ndo ní caa ní quíhí<sup>n</sup> ndihí Yá Ndiöxí te núu nchìcú<sup>n</sup> nihnu-ndo nàcuáa ní dánèhé ñáhá-í xii-ndo, te núu ñá túú nchìcú<sup>n</sup> nihnu-ndo te ñá túú ní sándáá iní-ndó nàcuáa tàú-xi cunduu.

<sup>3</sup> Te yúhú sa ní cachí tnúhu-í xii-ndo ì<sup>n</sup> tnúhu sá ïo cùnuu ní níhí-í, chi ní cachí tnúhu-í xii-ndo sã Xítóhó Jesucristú ní xíhí-gá cuendá nchaa yíca cuèchi-o, te duca<sup>n</sup> ní cuu chi duca<sup>n</sup> càhá<sup>n</sup>-xi núú tùtú Yá Ndiöxí sá dúcá<sup>n</sup> yãha-gá. <sup>4</sup> Te ní chindúxi ñaha-güedé xii-gá te nduu úní ní dándótó ñaha Yá Ndiöxí xii-gá, te duca<sup>n</sup> ní cuu chi duca<sup>n</sup> càhá<sup>n</sup>-xi núú tùtú Yá Ndiöxí. <sup>5</sup> Te sátá ní ndoto-gá te ní quee túu-gá núú tẽ Pèlú, te dàtnùní ní quee túu-gá núú dàva-gá cue téé ní táuchíú<sup>n</sup>-gã càhá<sup>n</sup> tnúhu-gá. <sup>6</sup> Te sátá dúcá<sup>n</sup> te dàtnùní ní quee túu-gá núú ùhú<sup>n</sup> ciendú cue ñáyiú ndècu ichi-gá, te vãi-yu xíndecu-ní-yu vitna chi sacú-ni-yu ní xíhí. <sup>7</sup> Te dàtnùní ní quee túu-gá núú tẽ Jàcobó, te sátá dúcá<sup>n</sup> te dàtnùní ní quee túu-gá núú nchaa cue téé ní táuchíú<sup>n</sup>-gã càhá<sup>n</sup> tnúhu-gá.

<sup>8</sup> Te ndéé núú ní ndihí-ná te ní quee túu-gá núú méé-í, te òré ní quee túu-gá núú-í te cùu-í dàtná ì<sup>n</sup> déhe yíquí<sup>n</sup> vátá sàá-gá nduu càcu chi cùu-í ì<sup>n</sup> téé ñá túú sání váha iní-xi cuendá-gá ní cùu. <sup>9</sup> Te yúhú ñá túú cùnuu-í dàtná cùnuu cue téé ní táuchíú<sup>n</sup> Xítóhó Jesucristú càhá<sup>n</sup> tnúhu-gá. Te cùu-í ì<sup>n</sup> téé ní táuchíú<sup>n</sup>-gã càhá<sup>n</sup> tnúhu-gá, cuèí ñá túú tàú-í sá càhá<sup>n</sup>-í tnúhu-gá, chi ní xóo cuu úhú iní-í cue ñáyiú ndècu ichi Yá Ndiöxí. <sup>10</sup> Dico Yá Ndiöxí ío váha iní-gá chi ní quide ñaha-gã xii-í ì<sup>n</sup> téé váha, chi ñá túú-gã quidè-í dàtná ní xóo cada-í. Te ío cùndahú iní ñáhá-gã chindèe

ñaha-gá xii-í dico ñá túú àú<sup>n</sup> nă cuu chindee ñaha-gá, chi ío-gá vai chiu<sup>n</sup>-gá ní cuu sa ta quide-í cuáhá<sup>n</sup> dàcúúxí dăva-gá cue tée ní táuchíú<sup>n</sup>-gă cáhá<sup>n</sup> tnúhu-gá te ñá díú mēe-í duca<sup>n</sup> quide-í chi mee Yă Ndiöxí ío cundahú iní ñáhá-gă chindēe ñaha-gá xii-í quide-í chiu<sup>n</sup>-gá. <sup>11</sup> Te ñá túú nă cada-xi cuēi dăva-gă-güedé sa ní cuu vai-gă chiu<sup>n</sup>-gá quide-güedē àdi yúhú, chi ñ<sup>n</sup>-ni tnúhu cáhá<sup>n</sup>-ndí te tnúhu-á<sup>n</sup> cúu tnúhu ní sándáá iní-ndó.

### *Cue ñáyiú ní xihí ndotó-yu*

<sup>12</sup> Te nchúhú cue tée cáhá<sup>n</sup> tnúhu Xítohó Jesucristú cáhá<sup>n</sup>-ndí sá ní xihí-gá te ní ndoto-gá, ¿te ná cuendá dăva nchòhó cächí-ndó să vă ndótó cuē ñáyiú ní xihí? <sup>13</sup> Te núu duca<sup>n</sup> sàni iní-ndó să vă ndótó cuē ñáyiú ní xihí te ni Xítohó Jesucristú ñá túú ní ndòto-gá te núu duca<sup>n</sup>. <sup>14</sup> Te núu dicó Xítohó Jesucristú ñá túú ní ndòto-gá ñá, te nchaa tnúhu sá dănēhé ñáhá-ndí xii-ndo ñà túú nândíhi-xi te núu duca<sup>n</sup>, te àú<sup>n</sup> nă cuu sándáá iní-ndó-gă te núu duca<sup>n</sup>. <sup>15</sup> Te núu dicó cúu-xí ñ<sup>n</sup> sá ndáá tnúhu sàni iní dăva-ndo ña, te dàcuandehnde-ndí sá cáhá<sup>n</sup>-ndí tnúhu Yă Ndiöxí núu-ndó te núu duca<sup>n</sup>, te ñá túú cáhá<sup>n</sup> ndáá-ndí núu-ndó să Yă Ndiöxí ní dándótó-gă Xítohó Jesucristú, te núu ndáá năcuáa sàni iní dăva-ndo să vă ndótó cuē ñáyiú ní xihí, dico ñá ndáá năcuáa sàni iní-ndó. <sup>16</sup> Te núu vá ndótó cuē ñáyiú ní xihí te ni Xítohó Jesucristú ñá túú ní ndòto-gá. <sup>17</sup> Te núu Xítohó Jesucristú ñá túú ní ndòto-gá ñá, te àú<sup>n</sup> nă cuu sándáá iní-ndó-gă te núu duca<sup>n</sup>, te ndècu-ni cuéchi-ndo núú Yă Ndiöxí te núu duca<sup>n</sup>. <sup>18</sup> Te núu ndáá năcuáa sàni iní-ndó ñá te cue ñáyiú ní sándáá iní ñáhá xii Xítohó Jesucristú ñáyiú ní xihí ní xita nihnú-yu te núu duca<sup>n</sup>. <sup>19</sup> Te núu nchoo ndècu ndíhi-o tnúhu ndee iní núú Xítohó Jesucristú cuendá-ni sá cundècu-o ñuyíú-a ña, te cùu-o ñáyiú ío-gá duu<sup>n</sup> duu<sup>n</sup> ndàhú sá cúu-xí dăva-gă ñáyiú te núu duca<sup>n</sup>.

<sup>20</sup> Dico ndáá sá Xítohó Jesucristú ní xihí-gá te ní ndoto-gá núu xíá<sup>n</sup> cútnùni iní dăva-o să ndótó cuē ñáyiú ní xihí

ñáyiú ní sándáá iní tnúhu-gá. <sup>21</sup> Te sá cuéchi ñ<sup>n</sup>-ni tée ní xindecu ñuyíú-a xíá<sup>n</sup> xihí ñáyiú, te sá cuendá ñ<sup>n</sup>-ni tucu ingá tée te ndoto cue ñáyiú ní xihí. <sup>22</sup> Te nchaa ñáyiú xihí-yu sá cuéchi ñ<sup>n</sup> tée, te tée-á<sup>n</sup> cúu-dē ndí Àdán tée díhna nuu ní cuu ñani tnáhá cuē ñáyiú ñuyíú. Te díu-ni duca<sup>n</sup> sá cuendá ñ<sup>n</sup>-ni tée te ndoto cue ñáyiú ní xihí, te tée-á<sup>n</sup> cúu-dē Xítohó Jesucristú chi nchaa ñáyiú ndècu ndíhi-gá ndotó-yu. <sup>23</sup> Te díhna-gá Xítohó Jesucristú ní ndoto-gá xíá<sup>n</sup> cútnùni iní dăva-o să ndùu na quixi tucu-gá ñuyíú-a te dăvá-á<sup>n</sup> ndoto nchaa ñáyiú ní xihí ñáyiú ní sándáá iní tnúhu-gá. <sup>24</sup> Te dătnùni duca<sup>n</sup> te sáá nduu nă nchaa sá ío ñuyíú, te Xítohó Jesucristú danăa-gă nchaa ndi túhú sá cúnùu ío ñuyíú-a, chi danăa-gă nchaa ñáyiú ío cúnùu, ndíhi yucu ñávăha, ndíhi nchaa espíritú xínú cuéchi núu-xi. Te duca<sup>n</sup> te cúñaha-gă xii Tătá-ó Dütú Ndiöxí taxi tnùni-gá. <sup>25</sup> Chi Xítohó Jesucristú dacuití taxi tnuni-gá ndéé ná sáá nduu danăa-gă nchaa sá cúu ũhú iní ñáhá xii-gă. <sup>26</sup> Te ndéé núu ní ndíhi-ná te danăa-gă sá quide xihí ñáyiú. <sup>27</sup> Te duca<sup>n</sup> chi cáhá<sup>n</sup>-xi núu tütú Yă Ndiöxí sá mée-gă ní nachihi-gă nchaa sá ío ndaha Xítohó Jesucristú cuendá sá mée Xítohó Jesucristú taxi tnùni-gá, te vá yōo ñ<sup>n</sup> taxi tnuni ñáhá xii Yă Ndiöxí, chi mee Yă Ndiöxí cúu-gă Yaá ní nachihi-gă nchaa sá ío ndaha Xítohó Jesucristú. <sup>28</sup> Te díhna-gá ní xáha<sup>n</sup> Yă Ndiöxí xii Xítohó Jesucristú Yaá cúu Dēhe-gá sá quíndăha-gă nchaa sá ío, te òré ná quíndaha Xítohó Jesucristú nchaa sá ío, te cúñaha-gă xii Yă Ndiöxí taxi tnùni ñáhá-gă xii-gă, te duca<sup>n</sup> te mee-nă Yă Ndiöxí taxi tnùni-gă nchaandi túhú sá ío.

<sup>29</sup> Te núu ñá túú ndáá cáhá<sup>n</sup>-í, ¿te ná cuendá dăva ñáyiú sànduté-yu cuendá ñáyiú ní xihí núu ñá túú ndáá sá ndótó ñáyiú ní xihí?

<sup>30</sup> Te nchúhú duca<sup>n</sup>-ni sàni iní ñáyiú cahni ñáhá-yu xii-ndí, te núu vá ndótó ñáyiú ní xihí te àú<sup>n</sup> nă cuu duca<sup>n</sup>

quède cahnu iní-ndí duca<sup>n</sup> cuíní-yu cahni ñàhá-yu xii-ndí te núu duca<sup>n</sup>.  
 31 Te nchòhó ñáiyu ndècu ndìhi-í ichi Xítohó Jesucristú ío váha sàni iní-í cuèndá-ndó, chi ndècu-o ichi-gá. Te na càchí tnúhu ndáá-í xii-ndo sã ñ<sup>n</sup> nduu ñ<sup>n</sup> nduu ndeé iní ñàhá ñáiyu cahni ñàhá-yu xii-í. 32 Te núu dicó ndáá sá vã ndótó ñáiyu ní xihí dàtná càchí dava ñáiyu, te àú<sup>n</sup> nã cuu ní xíndecu-í ñuú Éfesú ní cuu úhú iní ñàhá ñáiyu xii-í te núu duca<sup>n</sup>, chi ñáiyu-á<sup>n</sup> ñí quidé-yu dàtná quidé ñ<sup>n</sup> quítì déé<sup>n</sup> sã cúu-xi-í. Te núu ndáá sá vã ndótó ñáiyu ní xihí ñá, te váha-gá nũu cachí-ó dàtná càchí ñáiyu: “Vitna na còho-o te na càxi-o chi tneé idá cuú-ó”, duha càchí-yu.

33 Te vá dáñá-ndó mèe-ndo dan-dahú ñàhá ñáiyu ndècu ichi cuehé ichi duha xii-ndo, te ngüíta-ndo càni iní-ndó dàtná sání iní-yu. Chi quèe ndáá-xi nàcuáa càhá<sup>n</sup> tucu dava-gá ñáiyu, chi càchí-yu sá nũu ñáiyu quède váha na nihí tnáhã-yu ndìhi ñáiyu ndècu ichi cuehé ichi duha, te ngüíta ñáiyu quède váha-á<sup>n</sup> cadá-yu tnàhá-yu nchaa sá cuèhé sá dúhá dàtná quidé ñáiyu-á<sup>n</sup>. 34 Te ío váha cuáha-ndo cuèndá nàcuáa cundecu-ndo, te vá cadá-gã-ndó dàtná quidé cuè ñáiyu ndècu ichi cuehé ichi duha. Te dava-ndo quède-ndo datná quidé cuè ñáiyu ndècu ichi cuehé ichi duha chi ñá túú sàndáá iní-ndó Yã Ndiöxí. Te duha càhá<sup>n</sup>-í cuèndá sá cúcàhá<sup>n</sup> núu-ndó cuèndá nchaa sá ñà túú váha quède-ndo.

#### *Nàcuáa ndoto ñáiyu ní xihí*

35 Te cudana dava-ndo ndècu tnúhu-ndo nũu nása ndoto ñáiyu ní xihí, te nása cunduu yiqui cùñú-yu òré ndotó-yu. 36 Te nchòhó ñáiyu duca<sup>n</sup> càhá<sup>n</sup> cúu-ndó ñáiyu ñá túú tnàhí cùtnuní iní-xi, te duha na càhá<sup>n</sup>-í nàcuáa tecú tnùní-ndó. Te núu ñ<sup>n</sup> tatá ná chíhí-ó te tèhyú mée-xí te xínu déhe-xi. 37 Dico ñá díú sã sã ní xínu ta sàhnu cuáhá<sup>n</sup> ní cùxi-o, te ñ<sup>n</sup> duca<sup>n</sup> quède-o cuéi triú ndìhi nchaa dava-gá tatá xítú-ó. 38 Te Yã Ndiöxí quidé-gã sácũnduu tatá xínu-á<sup>n</sup> dàtná

cuíní mée-gã cunduu. Te ndèda-ni càa tatá te ñ<sup>n</sup> duca<sup>n</sup> quidé-gã sácũnduu-xi nàcuáa tàú-xi cunduu. 39 Te ndí dí<sup>n</sup> ndáa nchaa yiqui cùñú, chi tucu càa yiqui cùñú nchoo cuè ñáiyu, te tucu càa yiqui cùñú nchaa quítì xica núu ñúhú, te tucu càa yiqui cùñú nchaa quítì ndàva, te tucu càa yiqui cùñú nchaa chácá. 40 Te duca<sup>n</sup> ñà túú ñ<sup>n</sup>-ni caa nchaa yiqui cùñú sá ío andíu ndìhi nchaa yiqui cùñú ñáiyu ío ñuyú-a, te duca<sup>n</sup> ñà túú ñ<sup>n</sup>-ni ndáa vii nchaa sá ío andíu ndìhi ñuyú-a. 41 Te duca<sup>n</sup> cùu tucu-xi nchícanhí chi tucu dàyehé-xi, te tucu dàyehé yóó, te tucu dàyehé nchaa chódíní, te duca<sup>n</sup> ñà túú ñ<sup>n</sup>-ni dayehé nchaa chódíní. 42 Te duca<sup>n</sup> sãtnahá-xi cùu ñáiyu ní xihí te ndoto, chi tucu càa yiqui cùñú-yu sá nguĩndũxi te tucu cunduu yiqui cùñú-yu òré ndotó-yu, te yiqui cùñú sá ndótó ndìhí-yu-á<sup>n</sup> vã ndìhí ñihnu-gá-xi. 43 Te yiqui cùñú ñáiyu xihí ñá túú nandìhi-xi, dico yiqui cùñú sá ndótó ndìhí-yu te ío váha cunduu. Te nchaa yiqui cùñú ñáiyu xihí ñá túú tnàhí-gá ndee-xi, dico yiqui cùñú ndoto ndìhí-yu xíã<sup>n</sup> ío cunduu ndee-xi. 44 Te yiqui cùñú nchaa ñáiyu xihí cúu-xi cuèndá ñuyú-a, dico yiqui cùñú sá ndótó ndìhí-yu xíã<sup>n</sup> cundecu-ná-xi cuèndá Espiritú Yã Ndiöxí. Te dàtná ío yiqui cùñú sá cúu-xi cuèndá ñuyú-a, te duca<sup>n</sup> ío yiqui cùñú sá cúu-xi cuèndá mee-nã Espiritú Yã Ndiöxí.

45 Te núu tütú Yã Ndiöxí càchí-xi: “Ndí Ádán ndí ní xíndecu ndeé díhna ní chíhi Yã Ndiöxí iní ndí”, duha càchí-xi núu tütú-gá. Te ingá tucu tée cùu-dé dàtná ndí Ádán te tée-á<sup>n</sup> cúu-dé Xítohó Jesucristú, te Yáá-á<sup>n</sup> quidé-gã sá mèe-ná Espiritú Yã Ndiöxí quidé-xi ndècu-o ichi-gá vitna. 46 Te díhna-gá yiqui cùñú cuèndá ñuyú-a ní nguĩndecu, te dàtnuní nguĩndecu yiqui cùñú cundecu ndìhi mee-nã Espiritú Yã Ndiöxí. 47 Te tée díhna nuu ñí xíndecu ñuyú-a chi ñuhu ní cadúha ñaha Yã Ndiöxí xii-dé, te tée-á<sup>n</sup> cúu-dé



ndíi Ádán, te ingá tucu téé ní cuu<sup>n</sup>-dé andíu te téé-á<sup>n</sup> cúú-dě Xítóhó Jesucristú. <sup>48</sup> Te nchaa ñáyiú cãa yiqui cuñú-yu dàtná cáá yiqui cuñú té Ádán téé duca<sup>n</sup> ñi cuáha ñuhu-á<sup>n</sup>, te nchaa ñáyiú ní nduu táhú cundecu ndíhi téé duca<sup>n</sup> vëxi cuu<sup>n</sup> andíu-á<sup>n</sup>, ñáyiú-á<sup>n</sup> nduu yiqui cuñú-yu dàtná cáá yiqui cuñú ní nduu táhú-dě ndécú ndíhi-dé vitna, te téé-á<sup>n</sup> cúú-dě Xítóhó Jesucristú. <sup>49</sup> Te nchaa ñáyiú ñuyíú-a cãa-yu dàtná-ni cãa datná-ni nduu téé duca<sup>n</sup> ñi cuáha ñuhu-á<sup>n</sup>. Te nchaa nchoo ñáyiú ní nduu táhú cundecu ndíhi téé duca<sup>n</sup> vëxi cuu<sup>n</sup> andíu-á<sup>n</sup> nduu-o dàtná-ni cãa datná-ni nduu téé-á<sup>n</sup> tucu.

<sup>50</sup> Te nchòhó ñáyiú ndècu ndíhi-í ichi Xítóhó Jesucristú cãchí tñuhu-í xii-ndo sã ncháá nãcuáa cãa yiqui cuñú ñáyiú xñdecu vitna vá sãa-xi cundecu-xi núú ndécú Yã Ndiöxí táxi tñùn-í-gá, chí ñuyíú-a ndíhi ñihnu-xi. Dico sã tàú-xi sáá núú ndécú-gã táxi tñùn-í-gá xini ñuhu-xi cuu-xi sã cúdíi cundecu. <sup>51</sup> Te na cãchí tñuhu-í xii-ndo ñ<sup>n</sup> tñuhu sã yíyùhu ni cuu: Dava-o cùú-ó te dava-o cundecu-ni-o, dico nchaa-o nãdáma yiqui cuñú-ó. <sup>52</sup> Te uu<sup>n</sup>ni duca<sup>n</sup> nãdáma yiqui cuñú-ó òré cáhá<sup>n</sup> ñ<sup>n</sup> cúú, te cúú-á<sup>n</sup> cãhá<sup>n</sup>-xi òré sa ta cùyatni naa ñuyíú. Te òré cáhá<sup>n</sup> cúú-á<sup>n</sup> te ndoto nchaa ñáyiú ní xihí ñáyiú ní xñdecu ichi Xítóhó Jesucristú, te duca<sup>n</sup> te vá ñ<sup>n</sup> nduu ñ<sup>n</sup> quíú-gã cuú-yu. Te nchaa ñáyiú ndècu vívú te nãdáma yiqui cuñú-yu tñáhá-yu. <sup>53</sup> Te nchaa yiqui cuñú ndécú ndíhi nchaa ñáyiú ndècu ñuyíú-a vitna ñá túú cùdíi-xi chí xihí-xi, dico yiqui cuñú nduu táhú nchoo ñáyiú ndècu ichi Xítóhó Jesucristú chí cudíi-xi ni caa ni quíhí<sup>n</sup> chí vá cùú-gá-xi. <sup>54</sup> Te òré ná nduu táhú-ó yiqui cuñú sã dúcá<sup>n</sup> cùdíi ni caa ni quíhí<sup>n</sup>-á<sup>n</sup>, te vá cundècu ndíhi-gá-ó yiqui cuñú sã ñà túú cùdíi. Te dàvá-á<sup>n</sup> te quee ndáá-xi nãcuáa cãhá<sup>n</sup>-xi núú tütú Yã Ndiöxí núú cãchí-xi: “Vitna ñá túú-gã xihí ñáyiú chí mee-nã Yã Ndiöxí cúnú-gã táxi tñùn-í ñáhá-gã

xii-yu. <sup>55</sup> Te ñá túú tñáhí-gá ná ndoho ñáyiú sã cuendá tñuhu xihí, chí vá cóó-gã tñuhu xihí”, duha cãchí-xi núú tütú Yã Ndiöxí. <sup>56</sup> Te cue ñáyiú ndècu ndíhi-yu tñuhu sã sánú ichi ñaha xii-yu nãcuáa cadá-yu cundecu-yu dico uu<sup>n</sup>-gã quídè-yu nchaa sã cuèhé sã dúhá. Te sã cuendá nchaa sã cuèhé sã dúhá quídè-yu-á<sup>n</sup>, te xiã<sup>n</sup> ní ngundecu tñuhu xihí dándòho ñaha-xi xii-yu. <sup>57</sup> Dico táxãhu xii Yã Ndiöxí chí ní taxi-gã tñuhu ndee iní ndécú ndíhi-o sã sãá nduu te vá quíní-gá-ó tñuhu xihí, te duca<sup>n</sup> chí ndècu ndíhi-o Xítóhó Jesucristú.

<sup>58</sup> Te xiã<sup>n</sup> nũu cãhá<sup>n</sup>-í dóho nchòhó cue ñáyiú ndècu ndíhi-í ichi Xítóhó Jesucristú chí ío cùu iní ñáhá-í xii-ndo, te cãhá<sup>n</sup>-í dóho-ndo sã cãchícú<sup>n</sup> ñihnu-ni-ndo ichi Xítóhó Jesucristú cuèi nãndi na cãda ñaha ñáyiú xii-ndo sã cuendá-gã, te ío nducu ndèe-ni-ndo cada-ndo chiu<sup>n</sup>-gã, chí sa ñaha-ndo sã ncháá chiu<sup>n</sup> quide-o cuendá-gã ñá túú àú<sup>n</sup> nã cuu quide-o.

## 16

### *Nãcuáa sãcã<sup>n</sup> tñáhá ñáyiú díhú<sup>n</sup>*

<sup>1</sup> Te na cãchí tñuhu-í xii-ndo cuendá díhú<sup>n</sup> sã sãcã<sup>n</sup> tñáhá-ndó sã cúú-xi ñáyiú ñuú Jerusálén, chí ñu-ni duha ní dánèhé-í cue ñáyiú xñdecu ichi Xítóhó Jesucristú ndécú ñ<sup>n</sup> ñ<sup>n</sup> xichi distritú Gàlaciá. <sup>2</sup> Te duha cada-ndo ndí tñáhá nduu ndumíngú, te ñ<sup>n</sup> ñ<sup>n</sup>-ndo dàquee díhú<sup>n</sup>-ndo sacú díhú<sup>n</sup> nãcuáa chindee ñaha Yã Ndiöxí xii-ndo ñihí-ndó cuendá òré quexio-í te sa cundecu túha díhú<sup>n</sup>-á<sup>n</sup>. <sup>3</sup> Te òré quexio-í te mee-ndo cãxi-ndó-yu núú ndédacãa-yu sãni iní-ndó cãda ndáá canehé díhú<sup>n</sup>-á<sup>n</sup> quíhí<sup>n</sup> ndaha ñáyiú xñdecu ichi Xítóhó Jesucristú ndécú ñuú Jerusálén. Te cadúha-í ñ<sup>n</sup> úú tutú canehé-yu quíhí<sup>n</sup> cuendá cutnùn-í iní ñáyiú ñuú Jerusálén nãcuáa nduu chiu<sup>n</sup> cuáhá<sup>n</sup>-yu. <sup>4</sup> Te núu xini ñuhu-xi sã quíhí<sup>n</sup>-í te candeca-í-yu quíhí<sup>n</sup>.

*Té Pãblú sãní iní-dé quíngoto-dé cue ñáyiú ndècu ichi Xítóhó Jesucristú*



## TUTÚ CÚÚ ÛÚ NÍ CADÚHA TÉ PĀBLŪ QUIHĪ<sup>n</sup> NDAHA ÑÁYIU ÑUÚ CÒRINTÚ

*Té Pāblū cādūha-dé tutú quihĭ<sup>n</sup>  
ndaha ñáyiu xĭndecu ichi Xítóhó Jesu-  
crístú ndécú ñuú Còrintú*

<sup>1</sup> Yúhú té Pāblū cāhā<sup>n</sup>-í tnúhu Xítóhó Jesucristú chi duca<sup>n</sup> ñ cachí Yá Ndiöxí cunduu. Te cādúha-í tutú-a ndihĭ té Timüteú té ndècu ndihĭ-o ichi-gá cuendá daquixi-í ndaha nchòhó ñáyiu xĭndecu ichi Yá Ndiöxí ndécú ñuú Còrintú, te tutú-a cuu-xi tnàhá cuendá nchaa ñáyiu cùu cuendá Yá Ndiöxí xĭndecu nchaa ñuú yĭndèhu distritú Acāyá. <sup>2</sup> Te xicá<sup>n</sup> táhù-í núú Tātá-ó Dútú Ndiöxí ndihĭ núú Xítóhó Jesucristú sá ïo na chĭndee chitúu ñaha-gă xii-ndo, te ðiu-ni ndĭ ndùú-gá ná càda te ïo váha cuu iní-ndó cùndecu-ndo.

*Té Pāblū cāhā<sup>n</sup>-dé nchaa nàcuáa  
ndòho-dé*

<sup>3</sup> Te chí ná cāchĭ-ó sá ïo váha iní Dútú Ndiöxí Yaá cúú Tātá Xítóhó Jesucristú, te ðiu-ni Dútú Ndiöxí cúú-gă Yaá ïo cùndahú iní ñáhá xii-o, te ðiu-ni-gă cúú-gă Yaá táxí tnúhu ndee iní. <sup>4</sup> Te cuēi nāndĭ ndòho-o ndecu-o dico ðiu-ni Dútú Ndiöxí táxí-gă tnúhu ndee iní xii-o, te duca<sup>n</sup> quide-gă cuendá sá nchóó cuāñaha-o tnúhu ndee iní xii nchaa ñáyiu nāndĭ ndòho ndecu, te ðiu-ni nchaa tnúhu ndee iní táxí-gă xii-o ðiu-ni nchaa tnúhu ndee iní-á<sup>n</sup> cuāñaha-o xĭ-yu. <sup>5</sup> Te Xítóhó Jesucristú ïo ní ndoho-gá, te duca<sup>n</sup> nchòo tucu ïo ndòho-o, te duca<sup>n</sup> ïo vāi tnúhu ndee iní nihĭ-ó ndècu ndihĭ-o chi ndècu-o ndihĭ Xítóhó Jesucristú. <sup>6</sup> Te nchúhú nāndĭ ndòho-ndĭ ndécú-ndĭ cuendá sá nchòhó nihĭ-ndó tnúhu ndee iní cundecu ndihĭ-ndo te nanihĭ tǎhú-ndó. Te Yá Ndiöxí táxí-gă tnúhu ndee iní xii-ndĭ, te duca<sup>n</sup> quide-gă cuendá sá nchòhó tnàhá-ndó nihĭ-ndó tnúhu ndee iní-á<sup>n</sup> te nanihĭ tǎhú-ndó, te duca<sup>n</sup> càda

ndee cada cahnu iní-ndó ndòho-ndo datná ndóhó nchúhú. <sup>7</sup> Te nchúhú ïo váha sàni ndáá iní-ndĭ cuendá-ndó chi ndòho-ndo datná ndóhó-ndĭ, te duca<sup>n</sup> tàxi Yá Ndiöxí tnúhu ndee iní xii-ndo datná táxí-gă xii-ndĭ.

<sup>8</sup> Te nchòhó ñáyiu ndècu ndihĭ-ndĭ ichi Xítóhó Jesucristú cuinĭ-ndĭ cachí tnúhu-ndĭ xii-ndo nàcuáa ní yáha-ndĭ cùtnàhá ní xĭndecu-ndĭ distritú Àsiá chi dàvá-á<sup>n</sup> ïo ní ndoho-ndĭ, te luha-ná te vá cùndèe iní-ndĭ yáha-ndĭ nchaa tnúndòho-á<sup>n</sup> ní cùu chi ní xehndé iní-ndĭ sá vǎ cǎcu-ndĭ. <sup>9</sup> Chi ní sani iní-ndĭ sá ndĭyi-ná cuu-ndĭ ní cùu, te duca<sup>n</sup> ñ yáha-ndĭ cuendá sá ïo-gá quĭndáá iní-ndĭ Yá Ndiöxí sá díú-gă taunihnu ñaha-gă xii-ndĭ, te ñá díú mèe-ndĭ taunihnu-ndĭ mée-ndĭ, te ðiu-gă cúú-gă Yaá dándòto cuēi ñáyiu sa ní xĭhĭ. <sup>10</sup> Te ðiu-ni-gă ní taunihnu ñaha-gă ñá túú ní sàhni ñaha ñáyiu xii-ndĭ, te ðiu-ni-gă táunihnu ñaha-gă xii-ndĭ cuēi vitna, te cùtnunĭ ndáá iní-ndĭ sá díú-ni-gă taunihnu ñaha-gă xii-ndĭ núú cuahá<sup>n</sup> núú vĕxi te vá cáhni ñaha ñáyiu. <sup>11</sup> Te nchòhó tnàhá-ndó chĭndee ñaha-ndo xii-ndĭ chi cāhā<sup>n</sup> ndihĭ-ndo Yá Ndiöxí cuendá-ndĭ, te ïo vāi ñáyiu cāhā<sup>n</sup> ndihĭ ñàhá-yu xii-gă cuendá-ndĭ, te duca<sup>n</sup> ïo vāi ñáyiu ndàcá<sup>n</sup> táhū-yu núú-gă cuendá nchaa sá vǎha quide ñaha-gă xii-ndĭ.

*Té Pāblū cāhā<sup>n</sup>-dé ná cuendá ñá túú  
ní náyaha-dé ñuú Còrintú*

<sup>12</sup> Te ïo váha cùu iní-ndĭ chi cùtnunĭ iní-ndĭ sá cúú-ndĭ cue tée cùu ndáá datná cuinĭ Yá Ndiöxí cunduu ndècu-ndĭ ñuyúú-a, te ðiu-ni duca<sup>n</sup> quide-ndĭ sá cúú-xi-ndó chi mee-gă cùndahú iní ñáhá-gă xii-ndĭ chĭndèe ñaha-gă, te ñá túú quide-ndĭ datná sání iní cue ñáyiu ñuyúú-a. <sup>13-14</sup> Nchaa nàcuáa ndèu tnúhu chĭdo tnunĭ-ndĭ dáquixi-ndĭ ndaha-ndo cùu-xi mee-ni tnúhu sá ñà túú ũhú tecú tnùnĭ-ndó. Te nchòhó sá cùtnunĭ luha iní-ndó nàcuáa quide-ndĭ ndécú-ndĭ, te cuinĭ-ndĭ sá ïo-gá váha

tecú tnùní-ndó cuèndá sá òré ná quìxi tucu Xítohó Jesucristú, te dàvá-á<sup>n</sup> ò cada nínu ñaha-ndo xii-ndí dàtná cada nínu ñaha-ndí xii-ndo. <sup>15</sup> Te cuèndá xiá<sup>n</sup> núu ní sani iní-í yáha cáhá<sup>n</sup>-í úú xito núu ndécú-ndó cuèndá ío cudíí iní-ndó. <sup>16</sup> Chi ní sani iní-í sá òré quíhí<sup>n</sup>-í distritú Macèdoniá te yáha cáhá<sup>n</sup>-í núu ndécú-ndó, te òré ndixi tucu-í te nayáha cáhá<sup>n</sup> tucu-í, te òré nayáha cáhá<sup>n</sup>-í te taxi-ndo sã cúú ìchi-í cuèndá quíhí<sup>n</sup>-í distritú Jùdeá, duha ní sani iní-í ní cùu. <sup>17</sup> Te sá dúcá<sup>n</sup> ñà túú ní quíxi coto ñaha-í xii-ndo te cudana sàni iní-ndó sã yùhú ñà túú ní sãha váha-í cuèndá nàcuáa ní sani iní-í cada-í, àdi cudana ñáyiu ndècu ichi cuehé ichi duha, chi cue ñáyiu-á<sup>n</sup> tnaa càchí-yu sá cúú càdá-yu ì<sup>n</sup> sá sání ìní-yu cada-yu te tnaa càchí-yu sá ñáhá. <sup>18</sup> Dico Yá Ndiòxí Yaá ío váha quide ndáá nàha ndáá nàhá càxi-gá sá nchùhú ñà túú dàma-ndí sá càhá<sup>n</sup>-ndí. <sup>19</sup> Te yùhú ndíhi té Silvanú ndíhi té Timùteú dánèhé ñáhá-ndí xii-ndo cuèndá Xítohó Jesucristú Yaá cúú Dèhe Yá Ndiòxí, te Xítohó Jesucristú cúú-gã Yaá ñà túú dàma-gã tnúhu càhá<sup>n</sup>-gã, chi cùu-gã Yaá càhá<sup>n</sup> mee-ni tnúhu ndáá tnúhu cuíti. <sup>20</sup> Te ñu-ni Xítohó Jesucristú cúú-gã Yaá quidé nchàa nàcuáa ní cachí Yá Ndiòxí. Te sá cuèndá sá dúcá<sup>n</sup> quide Xítohó Jesucristú xiá<sup>n</sup> càchí-ó sã ío càhnu cuu Yá Ndiòxí. Te nchaa-o na càchí-ó sã díú-ní òuca<sup>n</sup> na cada-gã. <sup>21</sup> Te mee Yá Ndiòxí quidé-gã ndécú-ní-ó ìchi Xítohó Jesucristú. Te ñu-ni mee-gã ní cáhá<sup>n</sup> ñáhá-gã xii-o cuèndá cunu cuechi-o núu-gã. <sup>22</sup> Te Yá Ndiòxí ní quide-gã sá nchóó cùu-o ñáyiu cùu cuèndá-gã, te ní taxi-gã Espiritú-gã ní ngúndecu ndíhi-o cuèndá cutnùní iní-ó sã ndáa cada ñaha-gã xii-o nàcuáa ní cachí-gã cada-gã.

<sup>23</sup> Te Yá Ndiòxí nàhá-gã sá yùhú càhá<sup>n</sup> ndáá-í ná cuèndá vátá quíxi-gã-í quíxi coto ñaha-í xii-ndo, te vátá quíxi-gã-í chi ñà túú cuíní-í dandíhú-í iní-ndó. <sup>24</sup> Te nchúhú ñà túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndiòxí, chi sa

sàndáá váha iní-ndó-gã, chi nchúhú cuíní-ndí chindee tnúhu ñaha-ndí xii-ndo nàcuáa ío-gã cudíí iní-ndó cùndecu-ndo.

## 2

<sup>1</sup> Te ní sani ndáá iní-í sá vã quíxi ndíhi-ni-í quíxi coto ñaha-í xii-ndo cuèndá sá vã dándíhú-í iní-ndó. <sup>2</sup> Te nchòhó cúú-ndó ñáyiu tàxi tnúhu ndee ìní xii-í cudíí ìní-í ndécú-í, te xiá<sup>n</sup> núu ñà túú cuíní-í dandíhú-í iní-ndó, chi núu duca<sup>n</sup> na càda-í te vá cùndècu váha-gã iní-ndó nàcuáa taxi-ndo tnúhu ndee ìní xii-í. <sup>3</sup> Te xiá<sup>n</sup> núu ní tendaha-í tutú véxi ndaha-ndo cuèndá sá òré quíxi coto ñaha-í xii-ndo, te dàvá-á<sup>n</sup> quíní-í sá quidé-ndó nàcuáa cudíí ìní-í te ñà díú dà dandíhú-ndó ìní-í òré quexì-í, chi nchòhó tàú-ndó càda-ndo sá yùhú cudíí ìní-í. Te cùtnuní ndáá iní-í sá núu yùhú cudíí ìní-í te tnàhá nchòhó cudíí ìní-ndó cuèndá sá dúcá<sup>n</sup> cudíí ìní-í. <sup>4</sup> Te ndàhyú-í sá ndíhú iní-í òré ní cadúha-í tutú ní dáquixì-í ndaha-ndo, chi ío cuehé sã sání ìní-í, te ñà túú ní dàquixì-í tutú-á<sup>n</sup> ndaha-ndo cuèndá sá dándíhú iní ñáhà-í xii-ndo, chi ní dáquixì-í cuèndá sá nchòhó cutnùní iní-ndó sã ío cùu iní ñáhà-í xii-ndo.

*Nàcuáa tàú ñáyiu ñuú Còrintú cada-yu cuèndá ì<sup>n</sup> ñáyiu ñà túú quide ndáá*

<sup>5</sup> Te na càchí tnúhu-í xii-ndo cuèndá ì<sup>n</sup> tée ní quide ì<sup>n</sup> sá ñà túú tàú-dé cada-dé ndécú ndíhi-ndo, te ní quide ndàhú-xi luha iní-í cuèndá sá ñí quide-dé-á<sup>n</sup> dico nchòhó tnàhá-ndó ñí dándíhú-dé luha iní-ndó, te duha càchí-í sá lúhá-ní ñí dándíhú-dé iní-ndó cuèndá sá vã cuidó-gã-í ná tnúhu cáhá<sup>n</sup>-í. <sup>6</sup> Te nàcuáa ní ndatnúhu-ndo ñí quide ndáá-ndó cuèchi tée-á<sup>n</sup> te sa ndóí-gã cuu nàcuáa ní quide-ndo-dé. <sup>7</sup> Te vitna tàú-ndó càda cahnu iní-ndó sã ñí quide-dé, te cuáñaha-ndo tnúhu ndee ìní xii-dé chi núu ñáhá te vá ñíhí ndéé-gã-dé cada-dé sá vãha cuèndá sá ndíhú iní-dé. <sup>8</sup> Te xiá<sup>n</sup> núu càhá<sup>n</sup> ndàhú-í núu-ndó sã càdá tucu-ndo sá cúú



iní-ndó-dě. <sup>9</sup> Te d̄u-ni cuendá iha cãhá<sup>n</sup>-í ì<sup>n</sup> núú tütú sá sã ní dáquixì-í ndaha-ndo, te duca<sup>n</sup> ñi quide-í xító ndèe ñáhà-í xii-ndo nõu ndisa cuiní-ndó càda-ndo nchaa nacuaa cãhá<sup>n</sup>-í. <sup>10</sup> Te ndèda-ni cà ñáyiù na càda cahnu iní-ndó ì<sup>n</sup> sá quidè-yu, te tnàhá yúhú cada càhnu iní-í sá quidè-yu tucu. Te núu ìó ì<sup>n</sup> sá xíní ñùhu-xi cada cahnu iní-í te quide cahnu iní-í, te mee Xítóhó Jesucristú nãhá-gã sá dúcã<sup>n</sup> quide-í, te duca<sup>n</sup> quide-í cuendá sá nchòhó cuu-xi sã vãha xii-ndo. <sup>11</sup> Te duca<sup>n</sup> te sãcuíhnã vã ñihí-xi ná cada ñaha-xi xii-o, chi nchoo sã xini-ó nãcuãa quide-xi.

### *Té Pãblú ndìhú iní-dé ndécú-dě ñuú Tròás*

<sup>12</sup> Te ní xica-í cuáhã<sup>n</sup>-í ñuú Tròás cuendá yacã<sup>n</sup> cãhá<sup>n</sup>-í tnúhu sã cãhá<sup>n</sup> nãcuãa naníhí tãhú-ó tnúhu Xítóhó Jesucristú, te òré ní quexìo-í te ní níhì-í ì<sup>n</sup> ichi càhnu cãhá<sup>n</sup>-í tnúhu-gã. <sup>13</sup> Dico ñã túú ní cùu vãha iní-í chi ñã túú ní naníhì-í té Títú tée ndècu ndìhi-o ichi Xítóhó Jesucristú, núu xiã<sup>n</sup> ní quide ndee iní tnãhá-í ndìhi cue ñáyiù ñuú-ã<sup>n</sup>, te ní xica-í cuáhã<sup>n</sup>-í distritú Macèdoniã.

### *Dàquetìhú-ó yucu ñãvãha chi ndècu ndìhi-o Xítóhó Jesucristú*

<sup>14</sup> Te táxãhu xii Yã Ndiõxí chi duca<sup>n</sup>-ni sãnu ichi ñaha-gã xii-ndí nãcuãa cunuu-ndí núú yucu ñãvãha chi ndècu ndìhi-ndí Xítóhó Jesucristú, te mee Yã Ndiõxí sãchìu<sup>n</sup> ñaha-gã xii-ndí cãhá<sup>n</sup>-ndí tnúhu-gã. Te cada iní-ó sã tnúhu-gã-ã<sup>n</sup> cúu-xí dàtnã ì<sup>n</sup> yúcu sã ìo vãha sãhá<sup>n</sup> te ta xítenuu dicó-xi ndèni ní cuu cuáhã<sup>n</sup>. Te duca<sup>n</sup> sãtnahã-xi cùu tnúhu-gã chi nchúhú quidè-ndí nãcuãa ta xítenuu ndèni ní cuu cuáhã<sup>n</sup>. <sup>15</sup> Te cùu-ndí dàtnã dicó ì<sup>n</sup> yúcu sã ìo vãha sãhá<sup>n</sup>, te nãcãni cuendá Xítóhó Jesucristú núú Yã Ndiõxí, te dicó yúcu-ã<sup>n</sup> nchítã cuèi núú xĩndecu cue ñáyiù sa ní naníhí tãhú, te cuèi núú xĩndecu cue ñáyiù ta xĩta ñihnu cuáhã<sup>n</sup>. <sup>16</sup> Te sã cúu-xí cuè ñáyiù ta xĩta ñihnu cuáhã<sup>n</sup>-ã<sup>n</sup>, dicó yúcu-ã<sup>n</sup> cúu-xí dàtnã ì<sup>n</sup> sã sãhni ñaha xií-yu, dico sã cúu-xí

cuè ñáyiù sa ní naníhí tãhú, dicó yúcu-ã<sup>n</sup> cúu-xí dàtnã ì<sup>n</sup> sã ndécã iní-yu, duca<sup>n</sup> sãtnahã-xi cùu nchúhú. Te vitna chí cuãha cuendá nõu ná cúu ñáyiù sãni iní-ndó ndàcu cada nacuaa ndùu tnúhu cãhá<sup>n</sup>-í-a. <sup>17</sup> Chi nchúhú cãhá<sup>n</sup>-ndí tnúhu Yã Ndiõxí dico ñã túú ndãhú quidè-ndí ndìhi tnúhu-gã dàtnã xĩquide dava-gã-güedé, chi quide ndãã-ndí cãhá<sup>n</sup>-ndí tnúhu-gã, te mee-gã ní cachí-gã sã dúcã<sup>n</sup> càda-ndí te ndèhe-gã sã nchúhú quidè-ndí nãcuãa ní cachí-gã, chi ndècu ndìhi-ndí Xítóhó Jesucristú.

## 3

### *Cuendã ìngã núú sã vãha ní cachí Yã Ndiõxí cada-gã ñáyiù*

<sup>1</sup> Te cuèi duha cãhá<sup>n</sup>-ndí núú-ndó dico ñã túú xini ñùhu-xi sã cũñaha-ndí xii-ndo sã cúu-ndí cue tée quide vãha, te ni ñã túú xini ñùhu-xi cacanehe-ndí ì<sup>n</sup> tutú núú cãhá<sup>n</sup>-xi sã cúu-ndí cue tée vãha danèhé ñáhã xii-ndo datnã xĩquide dava-gã-güedé, te ni ñã túú xini ñùhu-xi sã nchòhó taxi-ndo ì<sup>n</sup> tutú núú cãhá<sup>n</sup>-ndó sã nchúhú cúu-ndí cue tée quide vãha. <sup>2</sup> Te ñã túú xini ñùhu-xi duca<sup>n</sup> cada-ndí. Te cùtnuní ndãã iní-ndí sã nchòhó cúu-ndó dàtnã ì<sup>n</sup> tutú sã ìo vãha cãhá<sup>n</sup> cuendã-ndí. Te duca<sup>n</sup> sãtnahã-xi cùu-ndo chi nchaa ñáyiù ñihí-yu tnúhu nãcuãa quide-ndo ndecu-ndo, te xiã<sup>n</sup> cùtnuní iní-yu sã nchúhú cúu-ndí cue tée quide vãha. <sup>3</sup> Te nchòhó cúu-ndó cuendã Xítóhó Jesucristú, te cùu-ndo datnã tutú-gã te tutú-ã<sup>n</sup> ñi táuchíu<sup>n</sup>-gã xii-ndí ní cadúha-ndí, te mee-ni ndìhi Espiritú Yã Ndiõxí ní ngúndee tnúhu-ã<sup>n</sup> te ñã díú ndìhi tindã ní ngúndee. Te ñã díú ì<sup>n</sup> núú yúú ní ngúndee chi iní-ndó cùu-xi núú dúcã<sup>n</sup> ñi ngúndee tnúhu-ã<sup>n</sup> te duca<sup>n</sup> sãtnahã-xi cùu-ndo.

<sup>4</sup> Te duha cãhá<sup>n</sup>-ndí chi cùtnuní ndãã iní-ndí sã Yã Ndiõxí quidè vãha ñaha-gã xii-ndí, chi ndècu ndìhi-ndí Xítóhó Jesucristú. <sup>5</sup> Te nchúhú chi ndàcu-ndí quidè-ndí sã

váha dico ñá díú mée-ndí duca<sup>n</sup> ndàcu-ndí quidé-ndí, chi mee Yá Ndiöxí chíndèe ñaha-gá xii-ndí nüu ndàcu-ndí quidé-ndí sá vâha. <sup>6</sup> Te mee Yá Ndiöxí ní quide-gá sá nchühú ndacu-ndí cunu cuechi-ndí núú-gã cáhá<sup>n</sup>-ndí núú ñáyiú cuendá ingá núú sã vâha ní cachí-gá cada ñaha-gã xií-yu. Te sá vâha ní cachí-gá cada ñaha-gã xií-yu-á<sup>n</sup> ñà túú ñ<sup>n</sup>-ni cuu-xi ndihí nchaa tnúhu sá ñí xáha<sup>n</sup>-gã xii ndíi Moisés ní chídó tnùní ndíi, te duca<sup>n</sup> chi espíritú Yá Ndiöxí néhé chiú<sup>n</sup>-xi nchaa tnúhu sá cáhá<sup>n</sup> cuendá nchaa sá vâha-á<sup>n</sup>. Te nchaa tnúhu ní chídó tnùní ndíi Moisés, dándixi túu-xi iní nchaa ñáyiú ndècu ndihí tnúhu-á<sup>n</sup> sã cuíta nihnú-yu cuendá nchaa cuéchi-yu, dico cue ñáyiú ndècu ndihí Espíritú Yá Ndiöxí ñáyiú-á<sup>n</sup> ndécú ndihí-yu tnúhu ndee iní sá cãcu nihnú-yu.

<sup>7</sup> Te tnúhu sá ñí cáhá<sup>n</sup> Yá Ndiöxí ndéé díhna nãcuáa cada ñáyiú ní ngúndeé-xi ñ<sup>n</sup> núú yúú quèhé<sup>n</sup>. Te òré ní dátúu ndíi Moisés nãcuáa cáhá<sup>n</sup> tnúhu sá ñí cáhá<sup>n</sup> Yá Ndiöxí ndéé núú yúú-á<sup>n</sup> núú cuè ñáyiú isrâél, te súúni ñí tása<sup>n</sup> núú ndíi te ñá túú-gã ní cùu cundehé-yu núú ndíi, te duca<sup>n</sup>-gã duca<sup>n</sup>-gã quidé-xí dátãsa<sup>n</sup>-xi núú ndíi ní cùu ñá túú-gã duca<sup>n</sup> ní quide-xi. Te tnúhu ndéé núú yúú-á<sup>n</sup> dándixi túu-xi iní cue ñáyiú sá cuíta nihnú-yu sá cuendá nchaa cuéchi-yu, te ío váha ní quide-xi cútnáhá ní ngúndecu ndihí cue ñáyiú isrâél tnúhu-á<sup>n</sup>. <sup>8</sup> Te sá dúcá<sup>n</sup> ñí quide-xi xiá<sup>n</sup> cútnùní sá tnúhu cáhá<sup>n</sup> Espíritú Yá Ndiöxí vitna uu<sup>n</sup>-gá duca<sup>n</sup> ío-gá váha quide-xi. <sup>9</sup> Te núu duca<sup>n</sup> ío váha ní quide-xi cútnáhá ní ngúndecu ndihí cue ñáyiú isrâél tnúhu sá dándixi túu iní-yu sá cuíta nihnú-yu sá cuendá nchaa cuéchi-yu, te uu<sup>n</sup>-gá duca<sup>n</sup> váha quide-xi vitna ní ngúndecu ndihí-o tnúhu sá cáhá<sup>n</sup> nãcuáa quide Yá Ndiöxí cuendá sá vã cundècu-gá cuéchi ñáyiú núú-gã. <sup>10</sup> Te vá càchí-ó sã cùtnáhá ní ngúndecu ndihí cue ñáyiú isrâél tnúhu ndéé núú yúú-á<sup>n</sup> ío-gá váha ní quide-xi, te ñáhá chi uu<sup>n</sup>-gá váha quide-xi vitna

cuendá tnúhu sá cáhá<sup>n</sup> nãcuáa quide Yá Ndiöxí. <sup>11</sup> Te núu duca<sup>n</sup> ío váha ní quide-xi cútnáhá ní ngúndecu ndihí ñáyiú isrâél tnúhu sá ñà túú ní cùdíi, te uu<sup>n</sup>-gá duca<sup>n</sup> ío váha quide-xi vitna ní ngúndecu ndihí-o tnúhu sá vã ndíhí nihnu tnahí-gá.

<sup>12</sup> Te cùtnuní iní-ndí sá vã ndíhí nihnu sá dúcá<sup>n</sup> ío váha quide-xi, núu xiá<sup>n</sup> ío víi ío váha cùu iní-ndí cáhá<sup>n</sup>-ndí tnúhu sá ñí ngúndecu ndihí-o. <sup>13</sup> Te ñá túú quide-ndí dàtná ní xóo cada ndíi Moisés, chi ndíi-á<sup>n</sup> ñí xóo dàdáhu ndíi núú ndíi òré dátãsa<sup>n</sup>-xi núú ndíi cuendá sá vã quíni cue ñáyiú isrâél òré ñá túú-gã dátãsa<sup>n</sup>-xi núú ndíi. <sup>14</sup> Te cue ñáyiú isrâél ñá túú ní tècú tnùní váha-yu nãcuáa ní xóo danèhé ñáhá ndíi Moisés xií-yu, te cuèi ndéé vitna ñá túú tècú tnùní-yu òré dãcuáhá-yu tnúhu sá ñí cáhá<sup>n</sup> Yá Ndiöxí ndéé díhna nãcuáa cada-gá, te cada iní-ó sã dàtná sá ñí xídáhu núú ndíi Moisés yídáhu núú-yu cuendá sá vã cútnùní núú-yu cundehé-yu te tecú tnùní-yu, dico núu tnahá tnúhu-yu ndihí Xítohó Jesucristú te tecú tnùní-yu. <sup>15</sup> Te cuèi ndéé vitna òré dãcuáhá-yu nchaa tnúhu sá ñí chídó tnùní ndíi Moisés nchaa núú tütú ndíi, te cada iní-ó sã dàtná sá ñí xídáhu núú ndíi yídáhu núú-yu chi ñá túú tècú tnùní-yu. <sup>16</sup> Dico cue ñáyiú na túha ñaha xii Xítohó Jesucristú te tècú tnùní-yu tnúhu-gá. <sup>17</sup> Te Xítohó Jesucristú ñ<sup>n</sup>-ni cùu-gá ndihí Espíritú Yá Ndiöxí, te nchaa ñáyiú ndècu ndihí Espíritú-gá ñá túú-gã táxi tnùní ñáhá ní ñ<sup>n</sup> sá ñà túú váha xií-yu. <sup>18</sup> Te dàtná cúú ñ<sup>n</sup> yutátá sã dánèhé núú ñáhá-xí xii ñáyiú ñ<sup>n</sup> sá vâha, duca<sup>n</sup> sãtnahá-xi cùu-o chi quide-o nacuáa cáhá<sup>n</sup> ñáyiú sá ío càhnu cuu Xítohó Jesucristú, te duca<sup>n</sup> uu<sup>n</sup>-gá uu<sup>n</sup>-gá tá cundáá-ó ndècu-o ichi-gá dàtná quidé mée-gá quidé ndãá-gá. Te Espíritú-gá quidé-xí dùca<sup>n</sup> ta cundáá-ó núú-gã cuáhá<sup>n</sup>.

#### 4

<sup>1</sup> Te mee Yá Ndiöxí ní cundáhú iní ñáhá-gã xii-ndí ní taxi-gá chiú<sup>n</sup>

quide-ndí cãhá<sup>n</sup>-ndí tnúhu-gá, núu xíã<sup>n</sup> ñá túú tnàhí nàtúhú iní-ndí cãhá<sup>n</sup>-ndí tnúhu-gá. <sup>2</sup> Te nchúhú dàquee tíhú-ndí nchaandi túhú sá ñà túú vãha quide dayuhu ñáyiu, chi nchaa xíã<sup>n</sup> cúú-xí ñ<sup>n</sup> sácá<sup>n</sup>núú sá cúú-xí-yu, te nchúhú ñá túú sàni iní-ndí dandàhú-ndí ñáyiu te ni ñá túú sàni iní-ndí dama-ndí nàcuáa cãhá<sup>n</sup> tnúhu Yá Ndiõxí, chi cãhá<sup>n</sup> ndáá-ndí nàcuáa tàú-xi cãhá<sup>n</sup>-ndí, te mee Yá Ndiõxí nãhá-gã nàcuáa ndùu tnúhu cãhá<sup>n</sup>-ndí núú ñáyiu, te ñáyiu-án cútnùní iní-yu sá nchúhú cãhá<sup>n</sup> váha-ndí. <sup>3</sup> Te cue ñáyiu ñá túú tècú tnùní nàcuáa ndùu tnúhu sá cãhá<sup>n</sup> nàcuáa naníhí tàhú-ó cãhá<sup>n</sup>-ndí núú-yu, ñáyiu-án cúú-yu ñáyiu ta xíta nihnu cuáhá<sup>n</sup>. <sup>4</sup> Te cue ñáyiu-án cúú-yu ñáyiu ío sàá iní-xi chi ñá túú cuíní-yu quíndáá iní-yu tnúhu Xítohó Jesucristú, te xíã<sup>n</sup> núu sácúhna cúnùu-xi núú-yu te nihí-xi nàcuáa quide-xi dadáhu ndodo iní ñáhá-xí xii-yu cuendá sá vã tècú tnùní-yu tnúhu sá cãhá<sup>n</sup> nàcuáa naníhí tàhú-yu, te tnúhu-án cúú-xí tnúhu sá ío váha chi cãhá<sup>n</sup>-xi sá ío cãhnu cuu Xítohó Jesucristú, te cùu-gá dàtná méé Tãtã-gã Dútú Ndiõxí. <sup>5</sup> Te nchúhú ñá túú cãhá<sup>n</sup>-ndí cuendá sá cúú-xí mèe-ndí núú-ndó chi cãhá<sup>n</sup>-ndí cuendá Xítohó Jesucristú, te cãhí-ndí xii-ndo sã díú-gã cúú-gã Yaá ío cùnùu, te cãhí-ndí xii-ndo sã mée-ndí cúú-ndí dicó-ni cue téé xínu cuechi sá cúú-xí-ndó, te duca<sup>n</sup> quide-ndí nàcuáa cuu vii cuu váha iní Xítohó Jesucristú. <sup>6</sup> Te Yá Ndiõxí Yaá ní dáyèhé ndéé cútnàhá nee ñuyíú ní cùu, Yaá-án ní cachí-gá sá Xítohó Jesucristú cada-gá nàcuáa tecú tnùní-ó sã ío cãhnu cuu mee Yá Ndiõxí. Te sá dúcã<sup>n</sup> ní quide-gá te cada iní-ó sã dàtná tnúhu sá ní dáyèhé-gá iní-ó.

### *Ío quíndáá iní-ó Yá Ndiõxí*

<sup>7</sup> Te nchúhú ndécú ndíhi-ndí tnúhu Xítohó Jesucristú, te tnúhu-gá cúú-xí dàtná ñ<sup>n</sup> sá ío váha ñùhu ñ<sup>n</sup> xítí quídi ñuhu, te nchúhú cúú-ndí dàtná

quídi-án. Te duca<sup>n</sup> sãtnahá-xi cùu-ndí chi tnúhu-gá ío cãhnu cuu-xi te mee-ndí ñáhá, te duca<sup>n</sup> cùu nacuáa cutnùní sá méé Yá Ndiõxí quidé-gã nchaa sá vãha te ñá díú mèe-ndí. <sup>8</sup> Te cuéi ío ndòho-ndí ndécú-ndí dico nihí-ndí nàcuáa quide-ndí tá yãha-ndí nchaa tnúndòho-án cuáhá<sup>n</sup>, cuéi áma sa ndètu víi-ñã quehndé iní-ndí sá vã ndácú-ndí yãha-ndí nchaa tnúndòho-án, dico ndàcu-ndí yãha-ndí. <sup>9</sup> Te cuéi nànducu ñaha ñáyiu cuíní-yu ná cada ñáhá-yu xii-ndí dico ñá túú dàña ñaha Yá Ndiõxí xii-ndí, te cuéi cãnihá-yu xii-ndí dico cãcu-ndí ñá túú sàhni ñahá-yu. <sup>10</sup> Te ndèni ní cuu cuáhá<sup>n</sup>-ndí xícá cùu-ndí, te cãcu cãcu cahni ñáhá-yu xii-ndí dàtná ní quidé-yu Xítohó Jesucristú, te duca<sup>n</sup> yãha-ndí cuendá cutnùní sá ndécú tũu Xítohó Jesucristú andíu te chindee ñaha-gá xii-ndí. <sup>11</sup> Te nchúhú ñini ndècu-ndí ñuyíú-a te nchaa-ni nduu cãcu cãcu cahni ñaha ñáyiu xii-ndí sá cuendá Xítohó Jesucristú, te duca<sup>n</sup> yãha-ndí ndécú-ndí cuendá cutnùní sá Xítohó Jesucristú ndécú ndíhi ñaha-gá xii-ndí cuéi vá cúdí yiqui cùnù-ndí cundecu-xi. <sup>12</sup> Te sá dúcã<sup>n</sup> cãcu cãcu cahni ñaha ñáyiu xii-ndí xíã<sup>n</sup> nchòhó uu<sup>n</sup>-gá tá nihí ndéé-ndó cuáhá<sup>n</sup> ndécú-ndó ìchi Xítohó Jesucristú.

<sup>13</sup> Te ñ<sup>n</sup> téé ní xíndecu ndéé sanaha ñí chidó tnùní-dé núú tütú Yá Ndiõxí núú cãhí-xi: “Yúhú ní sãndáá iní-í Yá Ndiõxí núu xíã<sup>n</sup> ní cãhá<sup>n</sup>-í”, duha ní cachí téé-án. Te dàtná-ni ní sàni iní téé-án ní cãhá<sup>n</sup>-dé te díu-ni duca<sup>n</sup> sàni iní nchúhú tucu núu xíã<sup>n</sup> cãhí-ndí: “Sãndáá iní-ndí Yá Ndiõxí núu xíã<sup>n</sup> cãhá<sup>n</sup>-ndí”, duha cãhí-ndí. <sup>14</sup> Te cùtnuní iní-ndí sá núu na cùu-ndí te Yá Ndiõxí dandòto ñaha-gá xii-ndí dàtná ní dándótó-gã Xítohó Jesucristú, te tnàhá nchòhó duca<sup>n</sup> càda ñaha-gá xii-ndo, te dàvá-án candeca ñaha-gã xii-o quíhí<sup>n</sup> nucúndecu-o núú-gã. <sup>15</sup> Te nchúhú nãndí cùu sá tá yãha-ndí véxi cuendá nchòhó ngúndecu váha-ndo, te duca<sup>n</sup> cuíta cáyã-gã ñáyiu ngúndecu

váha sá xíi Yă Ndiöxí, te diu-ni duca<sup>n</sup> cuíta cuu vai-gá ñáyiu ndacá<sup>n</sup> táhũ-yu núú-gă te cachí-yu sá ïo cãhnu cuu-gă.

16 Te xíã<sup>n</sup> nõu nchúhú ñá túú tnàhí nàtúhú iní-ndí ndécú-ndí ichi Xítóhó Jesucristú, te cuëi yiqui cùñú-ndí tá xàú-xi cuáhá<sup>n</sup> dico iní-ndí chi uu<sup>n</sup>-gá uu<sup>n</sup>-gá tá nihí ndéé-xí cuáhá<sup>n</sup>. 17 Te nchaa sá ndóhó-ndí ñuyíú-a ñá túú cãchí-ndí sá cúú-xí ï<sup>n</sup> tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yá Ndiöxí ío váha cada ñaha-gă xii-ndí nduu na sàá-ndí núú ndécú-gă, te diu-ni duca<sup>n</sup> càda ñaha-gă xii-ndí ni caa ni quíhí<sup>n</sup>. 18 Te nchúhú ñá túú nchícú<sup>n</sup> nihnu-ndí sá tũu ndèhe-ndí ío ñuyíú-a, chi nchícú<sup>n</sup> nihnu-ndí sá vátá quíní-gá-ndí ndécú àndiu, te duca<sup>n</sup> quide-ndí chi nchaa sá tũu ndèhe-ndí ío ñuyíú-a vá cúdĩ-xi cundecu-xi, te nchaa sá ñà túú tũu ndècu andiu xíã<sup>n</sup> cudíi-xi cundecu-xi ni caa ni quíhí<sup>n</sup>.

## 5

1 Te yiqui cùñú-ó cùu-xi datná ï<sup>n</sup> vehe, te vehe-á<sup>n</sup> ñà túú cúdĩ-xi, te duca<sup>n</sup> sãtnahá-xi cùu yiqui cùñú-ó chi vá cúdĩ-xi, te na sàá nduu vã cùndècu-gá-ó ndíhi yiqui cùñú-ó, te Yá Ndiöxí taxi-gá ï<sup>n</sup> yiqui cùñú sáá sã cúú-xí-ó, te xíã<sup>n</sup> cúú-xí datná ï<sup>n</sup> vehe sá ñà túú ní càdúha cue ñáyiu ñuyíú-a, chi mee Yă Ndiöxí ní càdúha-gă vehe-á<sup>n</sup> te vehe-á<sup>n</sup> cudíi-xi cundecu-xi ni caa ni quíhí<sup>n</sup> andiu. Te duca<sup>n</sup> sãtnahá-xi cùu yiqui cùñú sá táxí Yă Ndiöxí xii-o chi cudíi-xi cundecu-xi ni caa ni quíhí<sup>n</sup>. 2 Te nchúhú ndècu ndíhi-gá-ndí yiqui cùñú-ndí sá ndécú ndíhi-ndí vitna te sama cuíní-ndí sá ío ndíhi taxi Yá Ndiöxí yiqui cùñú sáá cùndecu ndíhi-ndí. 3 Chi mee-gă vá dáñá-gă sá dúcá<sup>n</sup>-ní cùnduu-ndí cundecu-ndí, chi dai taxi-gá yiqui cùñú sáá-ã<sup>n</sup> xii-ndí. 4 Te ñini ndècu-ndí ndíhi yiqui cùñú-ndí vitna ío sàni iní-ndí te ndíhú iní-ndí, dico ñá díú sã dúhá

quide-ndí te ñá túú-gă tnàhá iní-ndí cundecu-ndí ndíhi yiqui cùñú-ndí, chi cuíní-ndí sá Yă Ndiöxí ío ndíhi taxi-gá yiqui cùñú sáá nduu táhú-ndí, chi xíã<sup>n</sup> cudíi-xi ni caa ni quíhí<sup>n</sup> te yiqui cùñú-ndí sá tá ndíhi nihnu cuáhá<sup>n</sup>-a vá cúdĩ-xi cundecu-xi. 5 Te duca<sup>n</sup> tnàhí ní cachí Yă Ndiöxí cunduu sá dúcá<sup>n</sup> nduu táhú-ó yiqui cùñú sáá-ã<sup>n</sup>, te ní taxi-gá Espiritú-gá ní ngúndecu ndíhi-o cuëndá cutnùní iní-ó sã ndàá taxi-gá yiqui cùñú sáá-ã<sup>n</sup> nduu táhú-ó.

6 Te xíã<sup>n</sup> nõu nchúhú nihí ndéé-ndí ndécú-ndí, te cùtnuní iní-ndí sá ñini ndecu-ndí ndíhi yiqui cùñú-ndí sá ndécú ndíhi-ndí vitna te vátá sàá-gá-ndí cundecu-ndí mei nõu ndécú Xítóhó Jesucristú. 7 Te duca<sup>n</sup> cùtnuní iní-ndí chi sàndáá iní-ndí Yă Ndiöxí ndécú-ndí ñuyíú-a cuëi ñá túú xíní-ndí-gá. 8 Te ío váha cùu iní-ndí ndécú-ndí, te sàni iní-ndí sá vãha-gă sá nõu vá cùndècu-gá-ndí ndíhi yiqui cùñú-ndí sá ndécú ndíhi-ndí vitna. Te duca<sup>n</sup> sàni iní-ndí chi váha-gă cundecu-ndí mei nõu ndécú Xítóhó Jesucristú. 9 Te ío ndècu ndee-ndí quidé-ndí nàcuáa cuu vii cuu váha iní Xítóhó Jesucristú vitna ndècu-ndí ñuyíú-a, te diu-ni duca<sup>n</sup> càda-ndí cuëi òré vá cùndècu-gá-ndí. 10 Te dacuítí sã ncháá-ó cùndecu-o núú Xítóhó Jesucristú ï<sup>n</sup> nduu, te dàvá-á<sup>n</sup> mee-gă cáhá<sup>n</sup>-gá te núu nása nduu chiu<sup>n</sup> ní quide-o ï<sup>n</sup> ï<sup>n</sup>-o, núu ní quide váha-o àdi ñá túú ní quide váha-o, te nàcuáa nduu chiu<sup>n</sup> ní quide-o ï<sup>n</sup> ï<sup>n</sup>-o te duca<sup>n</sup> nduu sá táxí-gă nduu táhú-ó.

*Nàcuáa ní cuu ní ngúndecu váha-o ndíhi Yá Ndiöxí*

11 Te nchúhú quíyùhú iní-ndí nàcuáa cada Xítóhó Jesucristú, núu xíã<sup>n</sup> càhá<sup>n</sup>-ndí tnúhu-gá núu ñáyiu cuëndá xínu iní-yu tuha ñàhá-yu xii-gă. Te mee Yă Ndiöxí sa nàha-gă nàcuáa quide-ndí ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí.



12 Te sá dúhá càhá<sup>n</sup>-ndí te vá cání ìní-ndó sã nchùhú càhá<sup>n</sup> váha-ndí cuèndá-ndí nàcuáa nchòhó cuu váha iní ñáhá-gã-ndó xii-ndí te ñáhá, chi duha càhá<sup>n</sup>-ndí cuèndá sá nchòhó ñíhí-ndó tnúhu càhá<sup>n</sup> váha-gã-ndó cuèndá-ndí núú ñáyiú. Te duca<sup>n</sup> ñíhí-ndó tnúhu cúñaha-ndo xii cue ñáyiú quide nínu mee-xi, chi cue ñáyiú-á<sup>n</sup> ñà túú quide cuendá-yu nása ndècu iní-yu. 13 Te núu nchòhó sání ìní-ndó sã lùcú-ndí cuèndá nàcuáa quide-ndí ndécú-ndí te cùu-xi cuendá Yã Ndiõxí, àdi núu sání iní-ndó sã ñà túú lùcú-ndí cuèndá nàcuáa quide-ndí ndécú-ndí te cùu-xi sá vãha sá cúú-xí-ndó. 14 Te quide-ndí nàcuáa cuení Xítóhó Jesucristú chi cùtnuní iní-ndí sá ìo cùu iní-gá nchaa ñáyiú, te duca<sup>n</sup> xíní ndáá-ndí sá ñí xíhí-gá cuèndá ncháá-yu, te xíã<sup>n</sup> núu cada iní-ó sã dàtná tnúhu sá ncháá ñáyiú ní xíhí-yu ndíhi-gá. 15 Te duca<sup>n</sup> ñí xíhí Xítóhó Jesucristú cuèndá nchaa ñáyiú chi cuení-gá sá ncháá-yu cundecú-yu cada-yu nàcuáa cuení méé-gã te vá cáda-yu nàcuáa cuení méé-yu, chi mee-gã ní xíhí-gá te ní ndoto-gá cuèndá cuu-xi sá vãha sá cúú-xí-yu. 16 Te xíã<sup>n</sup> núu nchùhú ñà túú-gã ná sání ìní-ndí cuèndá tnàha ñáyiú-ndí núu nándíhi-yu àdi ñà túú nándíhi-yu dàtná ní xóo caní iní-ndí cùtnàhá ní xíndecu-ndí ichi cuèhé ichi duha, te dàvá-á<sup>n</sup> ñí xóo caní iní-ndí cuèndá Xítóhó Jesucristú dàtná sání iní cue ñáyiú ndècu ichi cuehé ichi duha vitna. 17 Te nchaa nchoo ñáyiú ní tnàhá tnúhu ndíhi Xítóhó Jesucristú ní nduu-o dàtná ñí ñáyiú saa, te duca<sup>n</sup> chi ñà túú-gã quidé-ó dàtná ní xóo cada-o cùtnàhá ní xíndecu-o ìchi cuehé ichi duha, chi ní ngúita-o quide-o mee-ná sá vãha te nchaa xíã<sup>n</sup> cúú-xí sá sáá sá cúú-xí-ó chi vátá quíni-gá-ó càda-o.

18 Te duca<sup>n</sup> quide-o ndecu-o chi mee Yã Ndiõxí quidé-gã sá dúcá<sup>n</sup> càda-o cundecu-o. Te Xítóhó Jesucristú ní quide-gá ní ngúndecu váha-o ndíhi Yã Ndiõxí vitna, te duca<sup>n</sup> chi mee

Yã Ndiõxí duca<sup>n</sup> tnàhí ní cachí-gá cunduu, te diu-ni mee Yã Ndiõxí ní taxi-gá chiú<sup>n</sup> quide-ndí càhá<sup>n</sup>-ndí tnúhu-gá nàcuáa ngúndecu váha cue ñáyiú ndíhi-gá. 19 Te duca<sup>n</sup> chi mee-gã ní cachí-gá sá Xítóhó Jesucristú cada-gá nàcuáa nucúndecu váha nchaa nchoo cue ñáyiú ndècu ñuyúú-a ndíhi Yã Ndiõxí. Te nchaa ñáyiú ní tuha ñaha xii-gá ñà túú-gã sání ìní-gá sá ñáyiú-á<sup>n</sup> nacháhu-yu cuéchi-yu núú-gã. Te mee Yã Ndiõxí ní taxi-gá chiú<sup>n</sup> quide-ndí càhá<sup>n</sup>-ndí tnúhu-gá núú ñáyiú nàcuáa ngúndecu ndíhi ñaha vãha-yu xii-gá. 20 Te Xítóhó Jesucristú ní cachí-gá sá nchùhú càhá<sup>n</sup>-ndí tnúhu-gá núú nchaa ñáyiú, te sá dúhá quide-ndí càhá<sup>n</sup>-ndí tnúhu-gá te quide-ndí núú Yã Ndiõxí càhá<sup>n</sup>-ndí yuhu-gá, te xíã<sup>n</sup> núu càhá<sup>n</sup> ndàhú-ndí núú-ndó sã tnàhá tnúhu-ndo ndíhi Yã Ndiõxí cuèndá cundecu váha-ndo ndíhi-gá, te duha càhá<sup>n</sup>-ndí chi duca<sup>n</sup> càhí Xítóhó Jesucristú cada-ndí. 21 Te Xítóhó Jesucristú cúú-gã Yaá ñà túú tnàhí cuéchi-xi, dico Yã Ndiõxí ní quide ñaha-gã xii-gá dàtná ñí ñáyiú ndècu cuéchi-xi, te duca<sup>n</sup> chi Xítóhó Jesucristú ní xido-gá cuéchi nchaa nchoo ñáyiú ñuyúú-a, te duca<sup>n</sup> ñí xido Xítóhó Jesucristú nchaa cuéchi-o cuèndá sá núu na tnàhá tnúhu-o ndíhi-gá te cudíu-o núú Yã Ndiõxí, te duca<sup>n</sup> ñí cuu chi mee Yã Ndiõxí duca<sup>n</sup> ñí cachí-gá cunduu.

## 6

1 Te nchoo ñí-ni cùu-o quide chiu<sup>n</sup>-o cuèndá Yã Ndiõxí núu xíã<sup>n</sup> càhá<sup>n</sup> ndàhú-ndí núú-ndó sã vã dícó-ni duca<sup>n</sup> cùndedóho-ndo tnúhu Yã Ndiõxí, chi cada-ndo nàcuáa na chindee ñaha-ni-gá. 2 Chi mee-gã càhí-gá ñí xíhí núú tütú-gá núú càhí-xi:

Sáá nduu te cundàhú iní ñáhà-í xii-ndo chindee ñaha-í cuèndá naníhí tàhú-ndó,  
te ní sáá nduu tàú-xi sá cundàhú iní ñáhà-í xii-ndo chindee ñaha-í cuèndá naníhí tàhú-ndó,  
núu xíã<sup>n</sup> ní xíndedóho-í tnúhu ní càhá<sup>n</sup>-ndó te ní chindee

ñaha-í xii-ndo nàcuáa naníhí tãhú-ndó.

Duha càchí-gá núú tütú-gá. Te vitna cùu-xi nduu cundahú iní ñáhá Yá Ndiöxí chindèe ñaha-gá, te cùu-xi nduu naníhí tãhú-ó.

<sup>3</sup> Te nchúhú ñá túú quide-ndí ì<sup>n</sup> sá ñà túú tàú-ndí cada-ndí sá cúú-xí ñáyiú, chi cuíní-ndí sá vã càhá<sup>n</sup> cuèhé-yu cuèndá chiú<sup>n</sup> quide-ndí. <sup>4</sup> Te nchaa sá quidé-ndí cúú-xí nàcuáa cutnùní iní cue ñáyiú sá nchúhú xínú cuèchi-ndí núú Yá Ndiöxí, te ío quide cahnu iní-ndí cuèndá nchaa sá ndóhó-ndí, chi nándí quide ñaha ñáyiú xii-ndí, te duca<sup>n</sup>-ni ta quide cahnu iní-ndí cuèi nándí-gá nchaa sá tá yãha-ndí véxi. <sup>5</sup> Te duha ta yãha-ndí véxi, núú cánha ñáyiú xii-ndí, núú chíhí ñáhá-yu vecaá, núú cuáá ndeé ñáhá ñáyiú xii-ndí xícuèhé ñáhã-yu, te ío ndòho-ndí quidé-ndí chiú<sup>n</sup> Yá Ndiöxí, te áma xidí-ndí te áma ñá túú xidí-ndí, te áma nihí-ndí sá xéxi-ndí te áma ñá túú nihí-ndí. <sup>6</sup> Te quide ndáá-ndí ndécú-ndí, te cùtnuní váha iní-ndí nàcuáa càhá<sup>n</sup> tnúhu Yá Ndiöxí, te quide cahnu iní-ndí cuèi nándí quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaa sá váha nàcuáa chindèe ñaha Espiritú Yá Ndiöxí xii-ndí, te ío ndisa iní-ndí cúú ìní-ndí cue tnàha ñáyiú-ndí. <sup>7</sup> Te dànehé-ndí ñáyiú mee-ni tnúhu ndáá, te nchaa chiú<sup>n</sup> quide-ndí te quide-ndí nàcuáa chindèe ñaha Yá Ndiöxí xii-ndí, te cuèndá sá quidé ndáá-ndí ndécú-ndí nùu xíã<sup>n</sup> nihí ndéé-ndí dáquèe tíhú-ndí nchaa sá cuèhé sá dúhá. <sup>8</sup> Te dava ñáyiú quide nínu ñáhá-yu xii-ndí, te davá-yu tnúhu cuèhé tnúhu duha càhá<sup>n</sup>-yu xãhá<sup>n</sup>-yu xii-ndí, te davá-yu xícáhá<sup>n</sup> váha-yu cuèndá-ndí te davá-yu xícáhá<sup>n</sup> cuèhé-yu, te davá-yu càchí-yu sá dándahú-ndí ñáyiú dico ñá ndáá chi càhá<sup>n</sup> ndáá-ndí. <sup>9</sup> Te davá-yu càchí-yu sá ñà túú xíní-yu ná ñáyiú cùu-ndí,

te davá-yu càchí-yu sá xíní-yu yoo cùu-ndí, te davá-yu cuíní-yu cahni ñáhá-yu xii-ndí dico vátá cáhni ñaha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiöxí, te cuèi ndòho-ndí dico ñá túú cùu-xi sá cùú-ndí. <sup>10</sup> Te cuèi ndihú iní-ndí dico ñá túú dàña ndeé-ndí sá cúdí<sup>n</sup> ìní-ndí, te cùu-ndí cue téé ndàhú dico sànu ichi-ndí vãi ñáyiú ichi Yá Ndiöxí cuèndá ngúndecu váha-yu sá cuèndá-gá, te cuèi ñá túú ñá ndécú ndihí-ndí dico ñá túú ñá cúmãní xii-ndí.

<sup>11</sup> Te nchòhó ñáyiú ndècu ndihí-í ichi Xítóhó Jesucristú ndécú ñúú Còrintú ío cùu iní ñáhá-ndí xii-ndo, te ñi yùhu ñi iní-ndí càhá<sup>n</sup>-ndí nchaa tnúhu càhá<sup>n</sup>-ndí sá cúú-xí-ndó. <sup>12</sup> Te nchúhú chi ñi yùhu ñi iní-ndí cúú ìní ñáhá-ndí xii-ndo, dico nchòhó chi ñá túú dùca<sup>n</sup> quide-ndo sá cúú-xí-ndí. <sup>13</sup> Te yúhú càhá<sup>n</sup> ndàhú-í núú-ndó dàtná quidé ì<sup>n</sup> téé cùu tátá òré càhá<sup>n</sup> ndihí-dé cue déhe-dé sá ñi yuhu ñi iní-ndó cùu iní ñáhá-ndó xii-ndí dàtná quidé mèe-ndí cúú ìní ñáhá-ndí xii-ndo.

*Nchoo cùu-o datná ì<sup>n</sup> vehe Yá Ndiöxí*

<sup>14</sup> Te cue ñáyiú ñá túú sàndáá iní tnúhu Xítóhó Jesucristú, te vá cúú ì<sup>n</sup>nuu-ndo ndihí-yu cada-ndo dàtná xíquidé-yu, chi dè<sup>n</sup> cuu nchaa sá váha te dè<sup>n</sup> cuu nchaa sá cuèhé sá dúhá, te ñúmí nchícanhii ndihí niú chi ñá túú ì<sup>n</sup>-ni cuu-xi. Te duca<sup>n</sup> sãtnahá-xi cùu nchaa sá váha ndihí nchaa sá cuèhé sá dúhá chi ñá túú ì<sup>n</sup>-ni cuu-xi. <sup>15</sup> Te diu-ni duca<sup>n</sup> ñá túú ì<sup>n</sup>-ni cuu Xítóhó Jesucristú ndihí sácúíhná, te diu-ni duca<sup>n</sup> ñá túú ì<sup>n</sup>-ni cuu ñáyiú sàndáá iní ñáhá xii Xítóhó Jesucristú ndihí ñáyiú ñá túú sàndáá iní ñáhá xii-gá. <sup>16</sup> Te diu-ni duca<sup>n</sup> sãtnahá tucu-xi cùu vehe Yá Ndiöxí ndihí nchaa sá càchí ñáyiú cùu ndiöxí ní cadúha cue téé ñuyúú-a, chi vá cúú quèhi ñi ì<sup>n</sup> xíã<sup>n</sup> xití vehe-gá. Te nchoo cùu-o datná vehe Yá Ndiöxí Yaá ndécú tũu andiú,

chi mee-gă cächí-gá núú tütú-gá núú cächí-xi:

Yúhú vá cúmăní cundecu-í ndihí-yu nděni ní cuu na cùndecú-yu,

te diu-ni yúhú cuu-í Ndiöxí-yu,

te mée-yu cuú-yu ñáyiu cùu cuendá-í.

Duha cächí-gá núú tütú-gá. <sup>17</sup> Te xíă<sup>n</sup> núu cächí tucu-gá ingá xichi núú tütú-gá núú cächí-xi:

Chí tá quèe tnuú nchaa ñáyiu ñá túú sàndáá iní ñáhá xii-í,

te vá cání iní-ndó càda-ndo ni ì<sup>n</sup> sá cuèhé sá dúhá,

te duca<sup>n</sup> te quehe<sup>n</sup> cuendá ñáhà-í xii-ndo,

<sup>18</sup> te yúhú cuu-í Tătá-ndó,

te nchòhó cuu-ndo cuè déhe ducu<sup>n</sup>-í, ndihi cue déhe yoco-í,

duha càhá<sup>n</sup> yúhú Yaá ío càhnu cuu.

Duha cächí-gá núú tütú-gá.

## 7

<sup>1</sup> Te sá dúcá<sup>n</sup> ío váha càhá<sup>n</sup> Yă Ndiöxí sá cúú-xí-ó núu xíă<sup>n</sup> càhá<sup>n</sup>-í dóho nchòhó ñáyiu ío cùu iní-í sá dùu<sup>n</sup> duu<sup>n</sup> daña-o nchaa sá cuèhé sá dúhá, chi nchaa xíă<sup>n</sup> ñá túú cùu-xi sá váha sá cúú-xí iní-ó ndihi yiqui cuú-ó, te cada-o nàcuáa tàú-xi cunduu nàcuáa cundáá-ó núu Yă Ndiöxí, te cada-o sã néhé-ó sã yíñuhu núú-gă.

*Cue ñáyiu ñuú Còrintú quidé vâha-yu*

<sup>2</sup> Te ni yùhu ni iní-ndó chì cúú iní ñáhá xii-ndí, chi nchúhú vá yõ ì<sup>n</sup> quide úhú iní-ndí, te ni vã yõ ì<sup>n</sup> dàcuíta nihnu-ndí, te ni vã yõ ì<sup>n</sup> dândahú-ndí. <sup>3</sup> Te sá dúhá càhá<sup>n</sup>-í te vá cání iní-ndó sã ì<sup>n</sup> cuéchi dàcaa-í díqui-ndó, chi dàtná sa ní cachí-í xii-ndo sã yùhú ío cùu iní ñáhà-í xii-ndo, te cuèi vitna ndècu-gá-ó ñùyíú-a àdi cuéi na cùú-ó dico diu-ni duca<sup>n</sup> cùu iní ñáhà-í xii-ndo. <sup>4</sup> Te yúhú ío váha sàni iní-í cuendá-ndó, te duca<sup>n</sup> ío váha càhá<sup>n</sup>-í cuendá-ndó, te ío ndècu ndihi-í tnúhu ndee iní cuendá-ndó, te ío cùdíí iní-í sá cuendá-ndó cuèi nândi ndòho-í ndihi dava-gá-güedé ndécú-ndí.

<sup>5</sup> Te nchúhú cútnáhá ní sáhá<sup>n</sup>-ndí distritú Macèdoniá, te ñá túú tnàhí ni ndètátú-ndí cuendá nchaa sá ñí

yáhandi chi ío ní ndoho-ndí cuendá nchaa sá ñí quidé-yu, chi ío ní cuándeé ñáhă-yu xii-ndí, te ío ní sani iní-ndí núu nása-gá yáha-ndí ní cùu.

<sup>6</sup> Dico Yă Ndiöxí ní taxi-gá tnúhu ndee iní xii-ndí òré ní quexìo té Títú núú ndécú-ndí, te diu-ni Yaá-á<sup>n</sup> cúú-gă Yaá sãñaha-gă tnúhu ndee iní xii cue ñáyiu ndihú iní-xi. <sup>7</sup> Te duca<sup>n</sup> ñí taxi Yă Ndiöxí tnúhu ndee iní xii-ndí cuendá sá ñí quexìo té Títú núú ndécú-ndí,

te ñá díú-ní sã cuendá ní quexìo-dé chi ní níhí tucu-ndí tnúhu ndee iní cuendá ní cani-dé cuendú núú-ndí sá nchòhó ní sãñaha-ndo tnúhu ndee iní xii-dé, te ní cachí tnúhu-dé xii-ndí sá nchòhó ío cuèni-ndó càhá<sup>n</sup> ndihi ñaha-ndo xii-ndí, te ní cachí tnúhu tucu-dé xii-ndí sá nchòhó ío ndihú iní-ndó cuendá nàcuáa cùu ndecu-ndo ni cuu, ndihi cuendá sá ío sàni iní-ndó cuendá-í, te sá dúcá<sup>n</sup> ndùu cuendú ní cani-dé núú-ndí núu xíă<sup>n</sup> ío ní cudíí iní-í.

<sup>8</sup> Te nchòhó ní ndihú iní-ndó cuendá tnúhu càhá<sup>n</sup>-í núú tütú sá ñí dáquíxi-í ndaha-ndo, te òré ní níhí-í tnúhu sá ndihú iní-ndó te tnaa-ni ní ndixi cuéchi iní-í sá dúcá<sup>n</sup> ñí quide-í te dàtnùní ñá túú-gă ní ndixi cuéchi iní-í. <sup>9</sup> Te vitna ní ndihú iní-ndó, te xíă<sup>n</sup> ní quide-xi ní ndixi cuéchi iní-ndó sã ñá túú quide váha-ndo ndècu-ndo ni cuu, te ní cudíí iní-í dico ñá díú cuendá sá ni ndihú iní-ndó ñí cudíí iní-í chi cuendá sá ñí ndixi cuéchi iní-ndó, te ní ndihú iní-ndó nàcuáa ní cuu váha iní Yă Ndiöxí, te xíă<sup>n</sup> núu ní cuu-xi ì<sup>n</sup> sá váha sá cúú-xí-ndó cuendá tnúhu ní càhá<sup>n</sup>-í te ñá túú ní cùu-xi ì<sup>n</sup> sá cuèhé sá cúú-xí-ndó. <sup>10</sup> Te nchoo núu na ndihú iní-ó nàcuáa cuu váha iní Yă Ndiöxí, te ndixi cuéchi iní-ó te núu ñá túú quide váha-ndècu-o, te sá dúcá<sup>n</sup> quide-o te nàníhí tãhú-ó, te vá ndihú iní-ó sã dúcá<sup>n</sup> ñí quide-o, te dava ñáyiu xĩndecu ichi cuèhé ichi duha ndihú iní-yu dico ñá túú ndixi cuéchi iní-yu cuendá nchaa sá ñá túú váha quidé-yu, te sá dúcá<sup>n</sup> quidé-yu te cuíta nihnú-yu. <sup>11</sup> Te sá dúcá<sup>n</sup> ñí ndihú iní-ndó nàcuáa ní cuu

váha iní Yă Ndiöxí, te xiă<sup>n</sup> nũu ndücu ndee-ndo quide-ndo nchaa nacuaáa tàú-xi cunduu, te vitna ni yùhu ni iní-ndó càhá<sup>n</sup>-ndó sã quidé vâha-ndo, te ío cùdéé<sup>n</sup>-ndó nũu méé-ndó sã ñà túú quide váha-ndo ndècu-ndo ni cuu, te yùhú-ndó ndècu-ndo cuendá sã ñà túú quide váha-ndo ni cùu, te ío ní xúhu<sup>n</sup> iní ñáhá-ndó xì-í, te ní ndúcú ndéé-ndó ñi quide ndáá-ndó cuendá téé ndècuéchi ndècu ndìhi-ndo, te sá dúcá<sup>n</sup> ñi quide-ndo te xiă<sup>n</sup> ní cutnùní sá méé-ndó ñà túú cuéchi-ndo. <sup>12</sup> Te ní cadúha-í tutú ní dáquixì-í ndaha-ndo, te ní quide-ndo nàcuáa ní cáhá<sup>n</sup>-í, te sá dúcá<sup>n</sup> ñi quide-ndo xiă<sup>n</sup> ní cutnùní iní-ndó sã ïo cùu iní ñáhá-ndó xì-í. Te Yă Ndiöxí náhá-gã sá díú cuendá xiă<sup>n</sup> ní dáquixì-í tutú ndaha-ndo, te ñà díú-ní cuendá sá sání iní-í cuendá téé ndècuéchi ndècu ndìhi-ndo, te ní ñà díú-ní cuendá ñáyiu ní dándìhú téé ndècuéchi-á<sup>n</sup> iní-xi ní càdúha-í tutú ní dáquixì-í ndaha-ndo. <sup>13</sup> Te cuendá sá quidé vâha-ndo ndècu-ndo xiă<sup>n</sup> cúu-xí tñũhu ndee iní ndécú ndìhi-ndí.

Dico ñà díú-ní xiă<sup>n</sup> chi tñàhá ío cùdí iní-ndí cuendá sá ïo cùdí iní té Títú, te duca<sup>n</sup> cùdí iní-dé chi nchòhó ní sãñaha-ndo tñũhu ndee iní xii-dé. <sup>14</sup> Te yùhú ñà túú cùcaha<sup>n</sup> núu-í sá ní cáhá<sup>n</sup> váha-í cuendá-ndó nũu tẽ Títú cùtñàhá vátá quíxi-gã-dé núu ndécú-ndó, chi ní cutnùní iní-dé sá ndàá càhá<sup>n</sup> váha-í nàcuáa quide-ndo datná cúu-xí sã ndàá nchaa tñũhu dàcuaha ñaha-í xii-ndo. <sup>15</sup> Te vitna ío-gá váha cùu iní té Títú cuendá-ndó, chi ndàcu iní-dé sá ncháá-ndó ïo váha ní tñi-ndo nchaa tñũhu ní cáhá<sup>n</sup>-dé núu-ndó, te ndàcu tucu iní-dé sá ní quehe<sup>n</sup> cuendá váha-ndo-dé, te ní dátũu-ndo nũu-dé sá ïo ní quiyùhú iní-ndó sã vã ndácú-ndó càda-ndo nchaa nacuaáa tàú-xi cunduu. <sup>16</sup> Te ío cùdí iní-í cuendá-ndó chi cùtnuní ndáá iní-í sã ñà túú ñàña ndéé-ndó quide-ndo nchaa nacuaáa tàú-xi cunduu.

## 8

### *Ío váha cuu iní-ó chindee tñaha-o*

<sup>1</sup> Te nchòhó ñáyiu ndècu ndìhi-ndí ichi Xítóhó Jesucristú càchí tñũhu-ndí

xii-ndo nàcuáa quide ñaha Yă Ndiöxí xii cue ñáyiu xindecu ichi-gá ndécú dístítú Macèdoniá, chi ío chindee ñaha-gá xií-yu cuendá sá quidé vâha-yu ndécú-yu. <sup>2</sup> Te cuéi ndòho vihí-yu ndécú-yu dico ío-ni cùdí iní-yu, te cuendá xiă<sup>n</sup> nũu ni yùhu ni iní-yu ní sacá<sup>n</sup> tñáhã-yu díhú<sup>n</sup> sã cúu-xí tñàhá ñáyíu-yu, te ñà túú tñàhí ni xĩnduu díi-yu cuéi ío ndàhú-yu.

<sup>3</sup> Te ñà díú-ní nàcuáa ní sani iní-yu ndacú-yu cacá<sup>n</sup> tñáhã-yu, chi ní quide yica iní-yu ní sacá<sup>n</sup> tñáhã-gã-yu, te yùhú càchí tñũhu ndáá-í xii-ndo sã ní yuhu ni iní-yu duca<sup>n</sup> ñi quidé-yu. <sup>4</sup> Te ío ní cáhá<sup>n</sup> ndàhú-yu núu-ndí cuendá sá cuãha-ndí tñũhu sá tñàhá-yu chindèé-yu dava-gá cue ñáyiu cùu cuendá Yă Ndiöxí. <sup>5</sup> Te ñà díú-ní nàcuáa ní sani iní-ndí ní quidé-yu, chi ní xídó-gã-yu ní quide váha-yu, te duca<sup>n</sup> chi mèé-yu ní sani iní-yu sá cadã-yu nchaa nàcuáa cuení Yă Ndiöxí, te dátñuní duca<sup>n</sup> te ní cachí-yu sá cúu càdá-yu nchaa nàcuáa na cũñaha-ndí xií-yu. Te duca<sup>n</sup> ñi quidé-yu chi duca<sup>n</sup> ñi cuení méé Yă Ndiöxí cunduu. <sup>6</sup> Te sá dúcá<sup>n</sup> ñi quide ñáyiu-á<sup>n</sup> nũu xiă<sup>n</sup> càhá<sup>n</sup> ndàhú-ndí núu tẽ Títú sá quíxi tũcu-dé núu ndécú-ndó cuendá dàxínu cava-dé chiú<sup>n</sup> sá sã ní ngũíta-dé quidé-dé dátacá-dé díhú<sup>n</sup> sã sã ní ngũíta-ndo sàcá<sup>n</sup> tñáhã-ndó, te duca<sup>n</sup> quide-ndo chi cundahú iní-ndó tñàhá ñáyiu-ndo. <sup>7</sup> Te nchòhó cúu-ndó ñáyiu ío ngòdónúú quide nchaa sá váha, te ío váha sàndáá iní-ndó Xítóhó Jesucristú, te ío váha cùtnuní iní-ndó nàcuáa càhá<sup>n</sup> tñũhu-gá, te ío váha dàcuaha-ndo ñáyiu tñũhu-gá, te ío ndücu ndee-ndo quide-ndo mee-ni sã váha, te duca<sup>n</sup> ïo cùu iní ñáhã-ndó xì-ndí, te sá dúcá<sup>n</sup> quide-ndo núu xiă<sup>n</sup> càhá<sup>n</sup> ndàhú-í núu-ndó sã ngòdó núu-gã-ndó càda-ndo sá cúu-xí tñàhá ñáyiu-ndo.

<sup>8</sup> Dico yùhú ñà túú tàuchiú<sup>n</sup>-í sá dúcá<sup>n</sup> càda-ndo, chi cuendá-ni sá càchí tñũhu-í xii-ndo nàcuáa quide dava-gá cue ñáyiu ndècu ichi Xítóhó Jesucristú, chi cue ñáyiu-á<sup>n</sup> ni yùhu ni iní-yu



quidé-yu sá vǎha sá cúú-xí tnàha ñáyíu-yu, te càchí tnúhu-í xii-ndo nàcuáa quidé-yu cuèndá cutnùní nùu nása cada-ndo nùu ndisa sá cúú iní-ndó cuè tnaha ñáyíu-ndo. <sup>9</sup> Te nchòhó sa xìní-ndó sǎ Xítóhó Jesucristú ío cùndahú iní ñáhá-gǎ xii-o, te ío váha ndècu-gá ní cùu te ní quixi-gá ñuyíu-a ní quide váha ñaha-gǎ xii-o, te ñuyíu-a ñá túú ní xǐndecu váha-gá, te duca<sup>n</sup> ñí quixi-gá ñuyíu-a cuèi ñá túú ní xǐndecu váha-gá cuèndá sá nchóó ngǔndecu váha-o nùú ndécú-gǎ.

<sup>10</sup> Te na càchí tnúhu-í xii-ndo nàcuáa sàni iní-í. Chìu<sup>n</sup> sá ñí yuhu ñí iní-ndó ñí ngúita-ndo quide-ndo cuía ñí yáha chi cùu-xi sá vǎha sá cúú-xí-ndó nùu na dàxínu cava-ndo. <sup>11</sup> Te dàtná-ñí ñí yùhu ñí iní-ndó ñí tausaha-ndo chìu<sup>n</sup>-á<sup>n</sup> te duca<sup>n</sup>-ñí ñí yuhu ñí iní-ndó dàxínu cava-ndo, te cacá<sup>n</sup> tnáhá-ndó sǎ ndécú ndíhi-ndo nacuáa xító mee-ndo ndacu-ndo. <sup>12</sup> Te núu nchòhó ñí yùhu ñí iní-ndó càcá<sup>n</sup> tnáhá-ndó sǎ xító mèe-ndo ndacu-ndo ña, te cùu váha iní Yǎ Ndiǒxí, chi mee-gǎ sa nàha-gá nása ndècu-o te ndùu vétú-ñí iní-gá.

<sup>13</sup> Te sá dúhá ndùu tnúhu càhá<sup>n</sup>-í te vá cání iní-ndó sǎ yùhú cuíní-í sá nchòhó ndoho-ndo cùndecu-ndo te dava-gá-yu ngúndecu váha-yu sá cuèndá-ndó. <sup>14</sup> Te vitna ndècu ndee iní-ndó nàcuáa ndacu-ndo chindee-ndo cue ñáyíu xini ñuhu, te nduu ñá túú ndècu ndee iní-ndó te cue ñáyíu-á<sup>n</sup> chindee ñáhá-yu xii-ndo te núu ndècu ndee iní-yu, te duca<sup>n</sup> te ñí nchòhó ñá túú ñá cumání xii-ndo te ñí cuè ñáyíu-á<sup>n</sup> ñá túú ñá cumání xií-yu. <sup>15</sup> Te duca<sup>n</sup> te quee ndáá-xi nàcuáa càhá<sup>n</sup>-xi núú tütú Yǎ Ndiǒxí núú càchí-xi: “Cue ñáyíu ío vǎi sá ñí ñíhí ñá túú ní cùu sobrá xií-yu, te cue ñáyíu sacú ní ñíhí ñá túú ní cùmání xií-yu”, duha càchí-xi núú tütú-gá.

#### *Té Títú ndíhi cue té cùndíhi-dé*

<sup>16</sup> Te ndàcá<sup>n</sup> tǎhù-í núú Yǎ Ndiǒxí chi mee-gǎ ní quide sá tǎ Títú ío ñuhu iní ñáhá-dé xii-ndo dàtná ñúhú iní ñáhá-í xii-ndo. <sup>17</sup> Te yùhú ñí xáha<sup>n</sup>-í xii-dé sá quíxí còto ñaha-dé xii-ndo te ní sáha-dé tnúhu, te ñá

díú mèe-ñí sá dúcá<sup>n</sup> ñí xáha<sup>n</sup>-í xii-dé quixi coto ñaha-dé xii-ndo, chi mee-dé cùdǎ<sup>n</sup> tnàhí iní-dé quixi coto ñaha-dé xii-ndo.

<sup>18</sup> Te tendaha-ndí ñí<sup>n</sup> téé ndècu ndíhi-o ichi Xítóhó Jesucristú quixi-dé ndíhi té Títú, te téé quixi ndíhi té Títú-á<sup>n</sup> cúú-dé ñí<sup>n</sup> téé ío váha càhá<sup>n</sup> cue ñáyíu xǐndecu ichi Xítóhó Jesucristú cuèndá-dé cuèndá sá ío váha quide-dé chìu<sup>n</sup> Xítóhó Jesucristú càhá<sup>n</sup>-dé tnúhu-gá tnúhu sá càhá<sup>n</sup> nàcuáa naníhí tǎhú-ó. <sup>19</sup> Te cue ñáyíu xǐndecu ichi Xítóhó Jesucristú ñá díú-ñí sǎ càhá<sup>n</sup> váha-yu cuèndá-dé, chi tnàhá ñí cáxi ñáhá-yu xii-dé cuèndá sá cacá cùu ndíhi ñaha-dé xii-ndí chindee ñaha-dé tacá sá cúú-xí ñáyíu ndáhú, te quide-ndí chìu<sup>n</sup>-a cuèndá ío cuu càhnu Yǎ Ndiǒxí, te cue ñáyíu cutnùní iní-yu sá nchòhó ñí yùhu ñí iní-ndó quide-ndo nchaa sá vǎha sá cúú-xí cuè tnaha ñáyíu-ndo. <sup>20</sup> Te cuíní-ndí sá vǎ càhá<sup>n</sup> cuèhé ñáyíu cuèndá nàcuáa quide-ndí ndíhi sá ngǎutnàha sá cúú-xí cuè tnaha ñáyíu-o, te ío vǎi cuu-xi. <sup>21</sup> Chi ndècu ndee-ndí quidé-ndí nàcuáa càhá<sup>n</sup> váha Xítóhó Jesucristú cuèndá-ndí, te quide tucu-ndí nàcuáa càhá<sup>n</sup> váha ñáyíu sá quidé vǎha-ndí.

<sup>22</sup> Te tendaha tucu-ndí ingá tucu téé ndècu ndíhi-o ichi Xítóhó Jesucristú quixi-dé ndíhi cue téé úú quixi coto ñaha xii-ndo, te téé quixi ndíhi-güedé-á<sup>n</sup> ñí cuu vǎi xító quide-dé nàcuáa cutnùní iní-ndí sá ío ndècu ndee-dé quidé-dé sá vǎha, te vitna ío-gá cuíní-dé cada-dé sá vǎha vitna quixi-dé núú ndécú-ndó, chi cùtnuní ndáá iní-dé sá cúú-ndó cuè ñáyíu quide váha. <sup>23</sup> Te càchí tnúhu-í xii-ndo sǎ tǎ Títú cúú-dé ñí<sup>n</sup> téé cùndíhi-í quidé-ndí chìu<sup>n</sup> Xítóhó Jesucristú, te tnàhá-dé cúú-dé ñí<sup>n</sup> téé xínu cuechi núú-ndó càhá<sup>n</sup>-dé tnúhu-gá. Te càchí tnúhu tucu-í xii-ndo cuèndá cue téé úú quixi ndíhi-dé, chi cue téé-á<sup>n</sup> cúú-güedé cue téé tendaha cuè ñáyíu xǐndecu ichi Xítóhó Jesucristú quixi coto ñaha xii-ndo. Te cue téé-á<sup>n</sup> quidé-güedé

nàcuáa cachí ñáiyu sá ïo càhnu cuu Xítohó Jesucristú. <sup>24</sup> Te chí cáda sá cúu ìní ndisa-ndo-güedě cuendá duca<sup>n</sup> na cùtnuní iní nchaa dava-gá ñáiyu xĩndecu ichi Xítohó Jesucristú sá ndàá ndisa duca<sup>n</sup> quide-ndo, te duca<sup>n</sup> cùtnuní iní-yu sá ndàá ndisa quide váha-ndo dàtná càhá<sup>n</sup>-ndí cuendá-ndo sá quidé vâha-ndo.

## 9

*Cuendá sá ngăutnâha sá cúu-xí cuè ñáiyu xĩndecu ichi Xítohó Jesucristú*

<sup>1</sup> Te cuendá sá ngăutnâha sá cúu-xí cuè ñáiyu ndècu ichi Xítohó Jesucristú ñá túú-gă xíní ñùhu-xi cachí tnúhu-í xii-ndo nũú tûtú-a nàcuáa cada-ndo, <sup>2</sup> chí sa cùtnuní iní-í sá ïo cuení-ndo chĩndee-ndó-yu. Te duca<sup>n</sup>-ni ïo váha càhá<sup>n</sup>-í cuendá-ndo nũú ñáiyu xĩndecu ichi Xítohó Jesucristú ndécú dístítú Macèdoniá, te xâha<sup>n</sup>-í xií-yu sá nchòhó ñáiyu xĩndecu ichi Xítohó Jesucristú ndécú dístítú Acâyá sa ní cuu ì<sup>n</sup> cuíá duca<sup>n</sup> cuení-ndo càcá<sup>n</sup> tnáhá-ndo sá cúu-xí cuè ñáiyu ndàhú ndécú ìchi-gá. Te vâi cue ñáiyu dístítú Macèdoniá cuení-yu cacá<sup>n</sup> tnáhâ-yu sá cúu-xí cuè ñáiyu ndàhú ndécú ìchi Xítohó Jesucristú cuendá sá ñí ñíhí-yu tnúhu sá nchòhó ïo cuení-ndo dùca<sup>n</sup> cada-ndo. <sup>3</sup> Te cuendá sá sání ìní-ndo càda-ndo xiã<sup>n</sup> tendaha-í cue téé ndècu ndihí-o ichi Xítohó Jesucristú quixi-güedé núú ndécú-ndo cuendá dàtúha ñaha-güedě xii-ndo, cuendá sá vâ quée ndèhnde-í núú ñáiyu sá ñí càhá<sup>n</sup> váha-í cuendá-ndo, te duca<sup>n</sup> cùndecu túha ndisa-ndo dàtná sa ní càhá<sup>n</sup>-í nũ-yu. <sup>4</sup> Chi na cuáhá<sup>n</sup> ndèé quixi-í ndihí ì<sup>n</sup> ũú cue ñáiyu dístítú Macèdoniá núú ndécú-ndo te quini-yu sá ñà túú ndècu túha-ndo, te cucaha<sup>n</sup> núu-í nũ-yu sá ñí càhá<sup>n</sup> váha-í cuendá-ndo te núú ñá túú ndècu túha-ndo, te tnáhá-ndo cùcaha<sup>n</sup> núú-ndo. <sup>5</sup> Te xiã<sup>n</sup> nũu ní sani iní-í sá vâha-gá codonuu cue téé ndècu ndihí-o ichi Xítohó Jesucristú quixi coto ñaha-güedě xii-ndo cuendá chĩndee ñaha-güedě tacá sá ñí sani iní-ndo càcá<sup>n</sup> tnáhá-ndo cuendá sá cùndecu túha-xi, te cuu-xi dàtná ì<sup>n</sup>

táhú sá ñí quene cuu iní méé-ndo càcá<sup>n</sup> tnáhá-ndo sá cúu-xí cuè tnaha ñáiyu-ndo. Te duca<sup>n</sup> te vá yoo cani iní-xi quesàhá-yu sá nchũhú ní quide yica-ndí duca<sup>n</sup> ñí sacá<sup>n</sup> tnáhá-ndo.

<sup>6</sup> Te nchòhó sa xíní-ndo sá ñáiyu na chĩhi vai tatá te vâi ñíhí-yu cùu, te cue ñáiyu na chĩhi sacú tatá te sacú ñíhí-yu cùu. Duca<sup>n</sup> sãtnahá-xi cùu ñáiyu sàcá<sup>n</sup> tnáhá sá cúu-xí tnaha ñáiyú-yu. <sup>7</sup> Te ì<sup>n</sup> ì<sup>n</sup>-ndo càcá<sup>n</sup> tnáhá-ndo nàcuáa quène cuu iní méé-ndo, te ïo váha cuu iní-ndo dùca<sup>n</sup> cada-ndo te vá cáda-ndo cuendá-ni sá quidé yica ñaha ñáiyu xii-ndo, chí Yá Ndiõxí cúu vâha iní-gá núú nchâa ñáiyu cùdí ìní sàcá<sup>n</sup> tnáhá sá cúu-xí cuè tnaha ñáiyu-xi. <sup>8</sup> Te Yá Ndiõxí ndacu-gá chĩndee ñaha-gá xii-ndo nàcuáa cundecu váha-ndo, chí ðiu-gá cada te níhí-ndo nchâa núú sá xíní ñùhu-ndo cundecu ndihí-ndo, te ñá túú tnáhí-gá ná cumání xii-ndo, te mee-gă chĩndee ñaha-gá xii-ndo ñíhí-ndo ïo vâi cundecu ndihí-ndo cuendá duca<sup>n</sup> chĩndee-ndo cue tnaha ñáiyu-ndo. <sup>9</sup> Te núú tûtú Yá Ndiõxí càchí-xi ì<sup>n</sup> xichi:

Ì<sup>n</sup> ñáiyu ïo vâi sá ñí sãñahá-yu xii ñáiyu ndàhú,

te sá ñí quide ñáiyu-á<sup>n</sup> ñí cuu-xi sá vâha sá vâ yoo cùnaa.

Duha càchí-xi núú tûtú-gá. <sup>10</sup> Te mee Yá Ndiõxí táxi-gă nchaa sá cúu tàtá nchaa nchòhó ñáiyu xítu nândi sá xítú cuendá cuu sá cúu nchìto-ndo, te ðiu-gá cada te ïo vâi sá ñíhí-ndo cùndecu ndihí-ndo, te duca<sup>n</sup> ïo-gá vâi sá vâha cada-ndo sá cúu-xí cuè tnaha ñáiyu-ndo. <sup>11</sup> Te Yá Ndiõxí taxi-gá vâi núú sá cùndecu ndihí-ndo cuendá duca<sup>n</sup> ñí yuhu ñí iní-ndo vâi cuãñaha-ndo sá cúu-xí tnaha ñáiyu-ndo. Te cuendá nchaa sá sàcá<sup>n</sup> tnáhá-ndo quèhe<sup>n</sup> cuendá-ndí cuu xii tnaha ñáiyu-ndo, te cue ñáiyu-á<sup>n</sup> ïo ndacá<sup>n</sup> táhũ-yu núú Yá Ndiõxí cuendá sá dúcá<sup>n</sup> sàcá<sup>n</sup> tnáhá-ndo sá cúu-xí-yu. <sup>12</sup> Te sá dúcá<sup>n</sup> quide-ndo sacá<sup>n</sup> tnáhá-ndo sá cúu-xí cuè ñáiyu cùu cuendá Yá Ndiõxí, te ñáiyu-á<sup>n</sup> ñà túú-gă ná cumání xií-yu, te ïo ndacá<sup>n</sup>

táhũ-yu núú Yă Ndiõxí sá dúcá<sup>n</sup> quide-ndo. <sup>13</sup> Te ñáyiu-á<sup>n</sup> cutnùnì iní-yu sá nchòhó quidé-ndó sã sàndáá ndisa iní-ndó tnũhu Xítohó Jesucristú, te cuendá xíá<sup>n</sup> te ñáyiu-á<sup>n</sup> chiñũhũ-yu Yá Ndiõxí, te cuendá sá dúcá<sup>n</sup> nì yuhu ni iní-ndó sácá<sup>n</sup> tnáhá-ndó sã cúú-xĩ-yu ndihĩ sá cúú-xí nchàa dava-gá ñáyiu, te cachĩ-yu sá ïo càhnu cuu Yá Ndiõxí. <sup>14</sup> Te ñáyiu-á<sup>n</sup> cãhá<sup>n</sup> ndihĩ-yu Yá Ndiõxí cuendá-ndó, te ïo cuu váha iní ñáhã-yu xii-ndo cuendá sá Yă Ndiõxí chindèe ñaha-gá xii-ndo quide-ndo sá váha sá cúú-xĩ-yu ndihĩ dava-gá ñáyiu. <sup>15</sup> Te ïo ndàcá<sup>n</sup> táhú-ó nũú Yă Ndiõxí cuendá sá ñĩ taxi-gá sá ïo váha ndècu ndihĩ-o, te ni ñã cútnùnì iní-ó ñãsa cunduu tnũhu cãhá<sup>n</sup>-ó cuendá sá vãha ní taxi-gá.

## 10

*Té Pãblú ndécú ndihĩ-dé tnũhu ndee iní sã cãhá<sup>n</sup>-dé tnũhu Xítohó Jesucristú*

<sup>1</sup> Te Xítohó Jesucristú ïo càhnu iní-gá, te cùndahú iní ñáhã-gã xii-o chindèe ñaha-gá, núu xíá<sup>n</sup> yúhú té Pãblú duca<sup>n</sup> quide-í cãhá<sup>n</sup> ndàhú-í núú-ndó nàcuáa cada-ndo. Te dava-ndo càchĩ-ndó sã yúhú ïo ndàhú iní-í òré ndécú ndihĩ ñaha-í xii-ndo, te òré ñá túú ndècu ndihĩ ñaha-í xii-ndo te ïo ñĩ cãà-í. <sup>2</sup> Te cãhá<sup>n</sup> ndàhú-í núú-ndó sã cãdá-ndó nàcuáa vá cãhá<sup>n</sup> ñĩ-í núú-ndó òré quixi-í quixi coto ñaha-í xii-ndo. Te cuìnì-í sá ndihĩ tnũhu ñĩ iní-xi cãhá<sup>n</sup> ndihĩ-í cue ñáyiu càchĩ sá ñĩ<sup>n</sup>-ni cuu-í ndihĩ cue ñáyiu ñá túú sàndáá iní tnũhu Xítohó Jesucristú. <sup>3</sup> Te nchúhú cùu-ndí cue tée ñuyíú-a, dico ndùcu ndee-ndí quidé-ndí nàcuáa ndàcu-ndí dáquèe tíhú-ndí nchaa sá cuèhé sá dúhá, dico ñá díú mèe-ndí duca<sup>n</sup> ndàcu-ndí quidé-ndí, <sup>4</sup> te ni ñĩ<sup>n</sup> sá ïo ñuyíú-a ñá túú chindèe ñaha-xi, chi mee Yă Ndiõxí chindèe ñaha-gá xii-ndí dáquèe tíhú duu<sup>n</sup>-ndí nchaa núú sã cuèhé sá dúhá. <sup>5</sup> Te xíá<sup>n</sup> nũu nihĩ-ndí tnũhu cãhá<sup>n</sup>-ndí sàdí-ndí yuhu cue ñáyiu cãhá<sup>n</sup> tnũhu sá ñà túú cùu váha iní Yă Ndiõxí, ñáyiu xíquide nínu mee-xi càchĩ sá ñà túú

nàndíhĩ tnũhu-gá. Te quide-ndí sá ñáyiu-á<sup>n</sup> quindáá iní-yu tnũhu Xítohó Jesucristú. <sup>6</sup> Te nchúhú sa ndècu túha-ndí sá dáquètíhú-ndí cue ñáyiu ñá túú cuìnì cada nàcuáa cuìnì Xítohó Jesucristú, dico díhna-gá xínì ñũhu-xi sá ncháá nchòhó ñáyiu cuìnì cada nàcuáa cuìnì-gá cundáá-ndó.

<sup>7</sup> Te nchòhó nàcuáa ndùu sá ndéhé-ndó te duca<sup>n</sup> sàni iní-ndó, dico vá dúcá<sup>n</sup> càni iní-ndó cuendá-ndí. Chi núu cùtnunì ndáá iní-ndó sã cúú-ndó cuendá Xítohó Jesucristú, te diu-ni duca<sup>n</sup> tàú-ndó càni iní-ndó cuendá-ndí tucu. <sup>8</sup> Te Xítohó Jesucristú ní taxi-gá tnũhu ndee iní ndécú ndihĩ-ndí sá dánèhé ñáhã-ndí xii-ndo nàcuáa cuíta cuehnu nihnu-ndo ìchi-gá quihĩ<sup>n</sup>, te ñá díú sã dánèhé ñáhã-ndí xii-ndo nàcuáa cuíta nihnu-ndo, te cuèi na chido-gá-í cãhá<sup>n</sup>-í cada nínu-í mèe-í cuendá tnũhu ndee iní ní taxi Xítohó Jesucristú ndécú ndihĩ-ndí, dico vá cúcàhã<sup>n</sup> núú-í chi cãhá<sup>n</sup> ndáá-í. <sup>9</sup> Te ñá túú cuìnì-í sá nchòhó canì iní-ndó sã yúhú dáyùhú ñáhã-í xii-ndo nàcuáa ndùu tnũhu cãhá<sup>n</sup>-í núú tütú-í. <sup>10</sup> Te dava-ndo càchĩ-ndó sã ténã ñáhã-í xii-ndo nũú tütú-í, te mee-ni tnũhu càhnu sá ïo cùnuu cuu-xi, te càchĩ tucu-ndo sã òré ndécú ndihĩ ñaha-í xii-ndo te ñá túú cãà-í sá cúú-í ñĩ<sup>n</sup> tée cùu váha cùu dico iní-ndó, te càchĩ tucu-ndo sã ñà túú tnáhã iní-ndó nàcuáa quide-í òré dácuàhã ñaha-í xii-ndo. <sup>11</sup> Te nchòhó ñáyiu duca<sup>n</sup> cãhá<sup>n</sup> cada cuendá váha-ndo sã dàtnã-ni cãhá<sup>n</sup>-ndí núú tütú-ndí diu-ni duca<sup>n</sup> quide-ndí òré ndécú ndihĩ ñaha-ndí xii-ndo.

<sup>12</sup> Te nchúhú, vá cúú tnáhĩ cãhá<sup>n</sup>-ndí sá ñĩ<sup>n</sup>-ni cuu-ndí ndihĩ cue ñáyiu cãhá<sup>n</sup> váha cuendá mèe-xí, chi ñáyiu-á<sup>n</sup> sání iní-yu ná cúú sã vãha te quidé-yu te xíá<sup>n</sup> càchĩ-yu sá ïo váha quidé-yu, te càchĩ-yu sá quidé váha-gá-yu dàcúúxí tnàhã ñáyíú-yu, te sá dúcá<sup>n</sup> cãhá<sup>n</sup>-yu te quidé-yu dàtnã quidé cue ñáyiu ñá túú tnáhĩ cùtnunì iní-xi. <sup>13</sup> Te dico nchúhú ñá túú xidó-ndí cãhá<sup>n</sup> váha-ndí cuendá-ndí, chi cãhá<sup>n</sup> váha-ndí cuendá-ndí dico nàcuáa ndùu chiu<sup>n</sup> ní taxi Yă Ndiõxí

càhá<sup>n</sup>-ndí, chi mee-gă ní cachí-gă ndèé neni sáá-ndí càhá<sup>n</sup>-ndí tnúhu-gă, te ní sáá-ndí ndéé ñuú-ndó càhá<sup>n</sup>-ndí tnúhu-gă. <sup>14</sup> Te vitna ndècu ndihí-ndí tnúhu ndee ìní sá tnàhà nchòhó cuu càhá<sup>n</sup> ndihí ñaha-ndí xii-ndo, chi díhna-gă nchúhú ní quixi-ndí ní càhá<sup>n</sup>-ndí tnúhu Xítohó Jesucristú ñuú-ndó, tnúhu sá càhá<sup>n</sup> nàcuáa naníhí tàhú-ó. <sup>15</sup> Te nchúhú ñá túú quide cahnu-ndí mée-ndí cuendá chiu<sup>n</sup> quide dava-gă-güedé que-saha-ndí sá chíu<sup>n</sup> mée-ndí cúú-xí. Te cuini-ndí sá nchòhó cuita quindáá-gă iní-ndó Xítohó Jesucristú, te duca<sup>n</sup> te níhí-gă-ndí nàcuáa cada-ndí chiu<sup>n</sup>-gă nchaa dava-gă xichi núú ní cachí-gă cada-ndí chiu<sup>n</sup>-gă. <sup>16</sup> Chi càhá<sup>n</sup>-ndí tnúhu-gă tnúhu sá càhá<sup>n</sup> nàcuáa naníhí tàhú-ó, te yáha-gă-ndí ñuú-ndó quíhí<sup>n</sup>-ndí nchaa dava-gă xichi càhá<sup>n</sup>-ndí, te vá cadá cahnu-ndí mée-ndí cuendá chiu<sup>n</sup> sá sà ní quide dava-gă-güedé.

<sup>17</sup> Te cue ñáyiú cuini cada cahnu mee-xi te vá dúcá<sup>n</sup> cadá-yu, chi mee Xítohó Jesucristú ná cada cahnú-yu-gă. <sup>18</sup> Te nchaa ñáyiú na càhá<sup>n</sup> váha Xítohó Jesucristú cuendá-yu, ñáyiú-á<sup>n</sup> cúdiú-yu núú-gă, te ñá túú cùdiú-yu núú-gă cuendá sá càhá<sup>n</sup> váha-yu cuendá mée-yu.

## 11

*Cuendá té Páblú ndihí cuendá cue téé cachi sá càhá<sup>n</sup> tnúhu Yá Ndiöxí te ñá ndáá*

<sup>1</sup> Te cuini-í sá nchòhó cada ndee iní-ndó cündedóho-ndo tnúhu na càhá<sup>n</sup>-í, chi càhá<sup>n</sup>-í dàtná càhá<sup>n</sup> cue ñáyiú ñá túú cùtnuní iní-xi, te cuèi nása-gă ná cùnduu tnúhu càhá<sup>n</sup>-í dico chí cadá ndèe iní cündedóho-ndo. <sup>2</sup> Chi yúhú ío ñúhu iní ñáhà-í xii-ndo dàtná ñúhú ìní ñáhà mée Yá Ndiöxí xii-o, te ní càhá<sup>n</sup>-í tnúhu Xítohó Jesucristú núú-ndó núu xíá<sup>n</sup> ní tnahá tnúhu-ndo ndihí-gă vitna, te sá dúcá<sup>n</sup> ní quide-í te cada iní-ndó sá yúhú cúú-í dàtná ñ<sup>n</sup> téé xíca ndáhú te nchòhó cúú-ndó dàtná ñ<sup>n</sup> xíhí cuéchi,

te Xítohó Jesucristú cúú-gă dàtná ñ<sup>n</sup> téé tnándaha ndihí xíhí cuéchi-á<sup>n</sup>. Te duca<sup>n</sup> cada iní-ndó chi na sáá nduu te yúhú na càni cuendá ñáhà-í xii-ndo núú Xítohó Jesucristú, te cuu-ndo ñáyiú vá cündècu tnahí-gă cuéchi-xi. <sup>3</sup> Te yúhú-í sá sàcuíhná dandáhú ñáhà-xí xii-ndo vá cání-gă iní-ndó cànchicú<sup>n</sup> nihnu-ndo ní yuhu ní iní-ndó ìchi Xítohó Jesucristú dàtná nchicú<sup>n</sup> nihnu-ndo vitna. Te yúhú-í ná yáha-ndo dàtná ní yáha tá Èvá, chi sàcuíhná ní nduu-xi cóó ní dándáhú ñáhà-xí xii-xi, chi sàcuíhná-á<sup>n</sup> ío váha ní xito-xi nàcuáa ní quide-xi ní dándáhú-xi tá Èvá-á<sup>n</sup>. <sup>4</sup> Te nchòhó, quidé ndèe iní-ndó sàcündedóho-ndo nchaa tnúhu càhá<sup>n</sup> cue téé càhá<sup>n</sup> ingá núú tnúhu cuendá Jèsús tnúhu sá ñá túú dènehé ñáhà-ndí xii-ndo, te quide ndee tucu iní-ndó ndèdóho-ndo dènehé ñáhà-güedé xii-ndo cuendá ingá espíritú, te ñá díú cuendá Espíritú Yá Ndiöxí sá ní ngúndecu ndihí-ndo dènehé ñáhà-güedé xii-ndo, te quide ndee tucu iní-ndó ndèdóho-ndo dènehé ñáhà-güedé xii-ndo ingá núú tnúhu sá cachi-güedé càhá<sup>n</sup> nàcuáa naníhí tàhú-ndó, te ñá díú nàcuáa nduu tnúhu sá ní sàndáá iní-ndó cuendá naníhí tàhú-ndó càhá<sup>n</sup>-güedé. <sup>5</sup> Te cue téé duca<sup>n</sup> càhá<sup>n</sup>-á<sup>n</sup> cachi-güedé sá Yá Ndiöxí ní tendaha ñaha-gă xii-güedé xíca cùu-güedé càhá<sup>n</sup>-güedé tnúhu-gă te ío cùnuu-güedé, dico ñá ndáá sá càhá<sup>n</sup>-güedé tnúhu-gă. Te yúhú cùtnuní iní-í sá cuè téé-á<sup>n</sup> ñá túú cùnuu-güedé dàtná cùnùu yúhú. <sup>6</sup> Te cuèi ñá túú càhá<sup>n</sup>-í dàtná càhá<sup>n</sup> cue téé ío váha sáá díquí-xi dico ío váha cùtnuní iní-í cuendá nchaa sá dácuaíha-í, te yúhú sa quide-í nàcuáa cùtnuní iní-ndó sá ío váha cùtnuní iní-í nàcuáa nduu nchaa tnúhu càhá<sup>n</sup>-í. <sup>7</sup> Te cudana te sàni iní-ndó sá yúhú ñá túú ní quide váha-í sá ní quide-í mée-í dàtná ñ<sup>n</sup> téé ío ndáhú iní-xi, chi ñá túú ní xíca<sup>n</sup>-í yáhu-í núú-ndó cuendá sá ní càhá<sup>n</sup>-í tnúhu Yá Ndiöxí tnúhu sá càhá<sup>n</sup> nàcuáa naníhí tàhú-ó núú-ndó. <sup>8</sup> Te ní quehe<sup>n</sup>-í díhú<sup>n</sup> ní taxi dava-gă cue ñáyiú ndècu ichi Xítohó Jesucristú, te díhú<sup>n</sup>-á<sup>n</sup> ní dándóñúhu-í



ní saa<sup>n</sup>-í nchaa sá nǐ xini ñùhu-í cùtnàhá ní cáhá<sup>n</sup>-í tnúhu Xítóhó Jesucristú núú-ndó. <sup>9</sup> Te cùtnàhá ní xíndecu ndihí ñaha-í xii-ndo te áma ní xóo cumání sá xíní ñùhu-í, te ñá túú nǎ ní xǐcá<sup>n</sup>-í núú ni ñ<sup>n</sup>-ndo. Chi cue ñáyiú xíndecu ichi Xítóhó Jesucristú ndécú dìstrítú Macèdoniá ní quixí-yu ní taxí-yu sá cúmání xii-í, te ñá túú tnàhí ni dàsatú iní ñáhà-í xii-ndo cǎcá<sup>n</sup>-í núú-ndó núu ná cúú sá xíní ñùhu-í, te ñu-ni duca<sup>n</sup> càda-í. <sup>10</sup> Te ñu-ni duha cáhá<sup>n</sup> váha-í cuèndá-í te ni ñ<sup>n</sup> cue ñáyiú distritú Acáyá vá nihí-yu tnúhu cúñàhá-yu xii-í cuèndá cadí-yu yuhu-í. Te mee Xítóhó Jesucristú nàhá-gǎ sá ndàá cáhá<sup>n</sup>-í dàtná cáhá<sup>n</sup> ndáá mée-gǎ. <sup>11</sup> Te cudana te sàni iní-ndó sá sá dúhá cáhá<sup>n</sup>-í te ñá túú cùu iní ñáhà-í xii-ndo, dico ñáhà chi mee Yá Ndiõxí nàhá-gǎ sá yúhú ío cùu iní ñáhà-í xii-ndo.

<sup>12</sup> Te nàcuáa-ni ta quide-í véxi te ñu-ni duca<sup>n</sup> càda-í cuèndá sá cuè téé cuèni cada nínu mee-xi cǎchí sá ñ<sup>n</sup>-ni cuu ndihí ñaha-güedé xii-í vá nihí-güedé tnúhu cáhá<sup>n</sup>-güedé cǎchí-güedé sá ñ<sup>n</sup>-ni chiu<sup>n</sup> quide ndihí ñaha-güedé xii-í. <sup>13</sup> Te cue téé-á<sup>n</sup> cǎchí-güedé sá Yá Ndiõxí ní tendaha ñàha-gǎ xii-güedé xícá cùu-güedé cáhá<sup>n</sup>-güedé tnúhu-gǎ dico ñá ndàá, chi mee-ni dándahú-güedé ñáyiú ndihí tnúhu cáhá<sup>n</sup>-güedé, te quide-güedé dàtná quidé cuè téé cáhá<sup>n</sup> tnúhu Xítóhó Jesucristú dico ñá ndàá sá cúú-güedé cue téé cáhá<sup>n</sup> tnúhu-gǎ. <sup>14</sup> Te vá cúñùhu-o sǎ dúcá<sup>n</sup> quide cue téé-á<sup>n</sup>, chi mee sàcuíhná quidé-xí sǎ cúú-xí dàtná ñ<sup>n</sup> espíritú xínú cuèchi núú ío váha cǎa ndecu Yá Ndiõxí dico ñá ndàá sá xínú cuèchi-xi xíá<sup>n</sup>. <sup>15</sup> Te xíá<sup>n</sup> vá cúñùhu-o sǎ cuè téé xínu cuechi núú-xi quide-güedé sá cúú-güedé cue téé quide váha chi ñá ndàá sá quidé váha-güedé chi dándahú-güedé ñáyiú. Te nàcuáa ndùu nchaa sá quidé-güedé te duca<sup>n</sup> nàcháhu-güedé núú Yá Ndiõxí.

*Té Pǎblú ío ndòho-dé cuèndá sá cúú-dé téé cáhá<sup>n</sup> tnúhu Xítóhó Jesucristú*

<sup>16</sup> Te yúhú cáhá<sup>n</sup> tucu-í dóho-ndo sǎ vǎ cǎní iní-ndó sǎ yúhú cúu-í ñ<sup>n</sup>

tée cáhá<sup>n</sup> lúcú cáhá<sup>n</sup> duha, te núu dava-ndo dùca<sup>n</sup> sani iní-ndó dico chí cǎdá ndèe iní cundedóho-ndo tnúhu na cáhá<sup>n</sup>-í cuèndá duca<sup>n</sup> tnàhá-í cada nínu-í mée-í. <sup>17</sup> Te vitna na cáhá<sup>n</sup>-í dàtná cáhá<sup>n</sup> ñ<sup>n</sup> téé ñá túú cùtnuní iní-xi, chi tnúhu cáhá<sup>n</sup>-í ñá túú ñ<sup>n</sup>-ni cuu-xi ndihí tnúhu Xítóhó Jesucristú, chi vitna cáhá<sup>n</sup>-í nàcuáa cada nínu-í mée-í. <sup>18</sup> Te ío cuéhé ñáyiú quide nínu mee-xi cuèndá nchaa sá ío ñuyúú-a te xíá<sup>n</sup> núu tnàhá-í cuèni-í cada nínu-í mée-í. <sup>19</sup> Chi cùtnuní sá nchòhó quidé ndèe iní-ndó sàcúndedóho-ndo nchaa tnúhu cáhá<sup>n</sup> cue téé cáhá<sup>n</sup> lúcú cáhá<sup>n</sup> duha, te duca<sup>n</sup> quide ndee iní-ndó sàcúndedóho-ndo tnúhu cáhá<sup>n</sup>-güedé chi cǎchí-ndó sǎ ío túha-ndo. <sup>20</sup> Te nchòhó, quide ndee iní-ndó tnè-ndo nchaa tnúhu cáhá<sup>n</sup> cue téé quide yica ñaha xii-ndo sá cúnú cuèchi-ndo núú-güedé, te xícá<sup>n</sup>-güedé nándi sá xícá<sup>n</sup>-güedé núú-ndó, te tàxi tnuní ñáhà-güedé xii-ndo, te quide-güedé sá ío cùnuu-güedé ndécú ndihí ñaha-güedé xii-ndo, te cànha-güedé xii-ndo, te cuèi nchaa xíá<sup>n</sup> quidé ñàha-güedé xii-ndo dico quide ndee-ni iní-ndó. <sup>21</sup> Te nchòhó cǎchí-ndó sǎ cúú-ndí cue téé ñá túú ní cùyi cada nándi sá cǎdá, te ndàá chi ñá túú ñ<sup>n</sup>-ni cuu-ndí ndihí cue téé duca<sup>n</sup> xiquide.

Dico núu cue téé-á<sup>n</sup> cùyi-güedé quidé nínu-güedé mée-güedé, te tnàhá-í cùyi-í duca<sup>n</sup> càda-í. Te sá dúhá cáhá<sup>n</sup>-í te cáhá<sup>n</sup>-í dàtná ñ<sup>n</sup> téé ñá túú cùtnuní iní-xi. <sup>22</sup> Te núu quide cahnu-güedé mée-güedé cuèndá sá cáhá<sup>n</sup>-güedé tnúhu hèbreú, te yúhú tucu ñu-ni téé cáhá<sup>n</sup> tnúhu hèbreú cúu-í, àdi quide cahnu-güedé mée-güedé cuèndá sá cúú-güedé cue téé isràél, te yúhú tucu tnàhá-í cúu-í téé isràél, àdi quide cahnu-güedé mée-güedé cuèndá sá cúú-güedé ñaní tnàhá ndíi Àbrahám, te tnàhá yúhú cúu-í ñaní tnàhá ndíi Àbrahám tucu. <sup>23</sup> Àdi quide cahnu-güedé mée-güedé cuèndá sá sání iní-güedé sá díú núu Xítóhó Jesucristú xínu cuèchi-güedé, dico yúhú ío-gǎ xínu cuèchi ndisa-í núú-gǎ. Te sá dúhá quide cahnu-í

mée-í te cãhá<sup>n</sup>-í dàtná ì<sup>n</sup> tée ñá túú cùtnuní iní-xi, te yúhú cúú-í ì<sup>n</sup> tée ío-gá quidé chiú<sup>n</sup>-gá dàcúxí cuè tée-á<sup>n</sup>, te vãi xito ní cuu càniha ñáyiu xii-í, te vãi xito ní cuu chìhi ñahá-yu vecaá xii-í, te vãi xito ní cuu cãcu cãcu cahni ñaha ñáyiu xii-í. <sup>24</sup> Te cue ñáyiu israhél ní canihá-yu xii-í úhú<sup>n</sup> xito, te ndi tnahá ì<sup>n</sup> ì<sup>n</sup> xito ní canihá-yu ní dáquẽe-yu ócó sáhú<sup>n</sup> cúmí ñi sàtà-í. <sup>25</sup> Te úní xito ní caniha tùcu ñáyiu xii-í ndihi carrutí, te ì<sup>n</sup> xito ní sãha yúú ñáhã-yu xii-í, te ní cuu úní xito quẽe naa bàrcú xití ndute òré sácũhu<sup>n</sup>-í, te ì<sup>n</sup> xito ío ní ndoho-í ní xíndecu-í ì<sup>n</sup> nduu ì<sup>n</sup> niú núú ndute làmár. <sup>26</sup> Te ío títñí xichi ní cuu xica cuu-í, te dava xichi ní cãcu cuido ñaha ndute ñuhu xii-í, te dava xichi ní cãcu duhu ñadúhú nchaa ndachiu<sup>n</sup>-í, te dava xichi ní cãcu cada ñaha cuè ñáyiu cùu ndi mee-í ì<sup>n</sup> sá cádá ñahá-yu xii-í, te ñu-ni duca<sup>n</sup> ñi cãcu cada ñaha tùcu cue ñáyiu ñá túú cùu ndi mee-í ì<sup>n</sup> sá cádá ñahá-yu xii-í ní cùu, te cuẽi xití ñuú te cuẽi xití yucu cãcu cãcu cada ñaha ñáyiu xii-í ì<sup>n</sup> sá cádá ñahá-yu, te ñu-ni duca<sup>n</sup> cãcu cãcu quini-í tnúndòho oré ñúhù-í bàrcú cuáhã<sup>n</sup> núú ndute làmár. Te cue ñáyiu cãchí sá ndécú ichi Xítoho Jesucristú te ñá ndáa cãcu cãcu cada ñahá-yu xii-í ì<sup>n</sup> sá cádá ñahá-yu. <sup>27</sup> Te ío ndòho-í cuendá chiú<sup>n</sup> quide-í chi ío xàú-í, te ní cuu vãi xito ñá túú xidí-í, te títñí xito ní cuu xihí víhì-í docó, te títñí xito ní cuu yichí-í ndute, te títñí xito ní cuu ñá túú tnàhí ná xéxi-í cuendá chiú<sup>n</sup> quide-í, te títñí xito ní cuu ndòho-í sá víxi<sup>n</sup>, te títñí xito ní cuu ñá túú ñihí-í dóo cuihnu-í.

<sup>28</sup> Te ñá ñá-í ní xĩã<sup>n</sup> chi ì<sup>n</sup> nduu ì<sup>n</sup> nduu ío sàni iní-í cuendá nchaa ñáyiu ndècu ichi Xítoho Jesucristú xíndecu nchaa xichi. <sup>29</sup> Te ndèda-ni càa ñáyiu ñá túú ñihí ndéè cùndecu ichi Xítoho Jesucristú, te ío cùndahú iní-í chi sãnuu sá tnàhá-í ñá túú ñihí ndéè-í cùndecu-í ichi-gá sá dúcã<sup>n</sup> quidé-yu. Te núu ì<sup>n</sup> ñáyiu quidé-yu sá ì<sup>n</sup> nchohó ñáyiu ndècu ichi Xítoho Jesucristú quidé-ndó ì<sup>n</sup> sá ñá túú

tàú-ndó càda-ndo te vá cúú vãha iní-í chi cudéè<sup>n</sup>-í. <sup>30</sup> Te núu xini ñuhu-xi sá cádá cãhnu-í mee-í, te cuu duca<sup>n</sup> càda-í te cãhá<sup>n</sup>-í mee-ni cuendá nchaa sá quidé nãcuáa ñá túú ñihí ndéè yiqui cuñú-í. <sup>31</sup> Te Dútú Ndiõxí Yá cúú Tãtã Xítoho Jesucristú nãhá-gã sá yúhú cãhá<sup>n</sup> ndáá-í núú-ndó, te ñu-gá tàú-gá cachí-ó sã ío cãhnu cuu-gá ni caa ni quíhí<sup>n</sup>. <sup>32</sup> Te cùtnahá ní xíndecu-í ñuú Dãmascú te tée cùu gobiernú tée cùndihi tée yíndaha ñáyiu nãni Aretás ní taxi ndecu-dé cue tée ní xíndedí yuyèhe sá ñúhú dòco ñuú cuendá òré quee-í te tnã ñaha-güedé xii-í ní cùu. <sup>33</sup> Dico yúhú ní queè-í ì<sup>n</sup> xití tídihi, te cue ñáyiu cùndihi ñaha xii-í ní queñuhu ñahá-yu ndaa ventaná nchí yiqui naha sã ñúhú dòco ñuú-á<sup>n</sup>, te duca<sup>n</sup> te ní cãcu-í ñá túú ní ndãcu-güedé tnã ñaha-güedé xii-í.

## 12

*Té Pãblú cãhá<sup>n</sup>-dé sã ío vii càa sã ñi dãnèhé núú ñahá Xítoho Jesucristú xii-dé*

<sup>1</sup> Te ñá túú ndéè nãndíhi-xi sã cãhá<sup>n</sup> váha-o cuendá mee-ó, dico vitna xini ñuhu-xi duca<sup>n</sup> càda-í chi cãhá<sup>n</sup>-í nãcuáa ní quide ñaha Xítoho Jesucristú xii-í, chi ní quide-gá sã ñi cùtnuní iní-í nãcuáa nduu tnúhu-gá, te vãi núú sã ñi dãnèhé núú ñahá-gã xii-í. <sup>2</sup> Te yúhú xini-í ì<sup>n</sup> tée sãndáa iní ñahá xii Xítoho Jesucristú, te sa ní cuu úxícúmi cuíá sã tée-á<sup>n</sup> ñi sãá-dé ndéè andiu cùu uní, te ñá túú xini-í te núu ndihi yiqui cùñú-dé ní sãá-dé àdi ñahá, chi ì<sup>n</sup> ñi dí-ni Yá Ndiõxí nãhá-gã te núu nása càa-dé ní sãá-dé. <sup>3</sup> Te yúhú cãhá<sup>n</sup> ndáá-í cuendá tée-á<sup>n</sup>, dico dàtná ní cachí-í sã ñá túú xini-í te núu ndihi yiqui cùñú-dé ní sãá-dé andiu àdi ñahá, chi mee Yá Ndiõxí nãhá-gã te núu nása càa-dé ní sãá-dé. <sup>4</sup> Te tée-á<sup>n</sup> ñi sãá-dé ì<sup>n</sup> xichi núú ío váha càa andiu, te yacã<sup>n</sup> ní xíndedóho-dé tnúhu mee-ni sã cúú-xi cuendá mee-dé, te tnúhu-á<sup>n</sup> vã cúú tnàhí cãhá<sup>n</sup>-dé núú ñi ì<sup>n</sup> ñáyiu. <sup>5</sup> Te yúhú quidé ñinu-í tée-á<sup>n</sup>, dico mee-í ñá túú cãhá<sup>n</sup> váha-í cuendá-í cuendá cada ñinu-í mee-í, chi cãhá<sup>n</sup>-ni mee-ni cuendá nchaa sã

quidé nàcuáa ñá túú ñihí ndéé yiqui cuñú-í. <sup>6</sup> Te núu dícó yúhú cuení-í te cuu cáhá<sup>n</sup> váha-í cuendá-í cuendá cada nínu-í mée-í, te núu duca<sup>n</sup> na cãhá<sup>n</sup>-í te ñá túú cùu-xi ñ<sup>n</sup> tnúhu neñúú cáhá<sup>n</sup>-í, chi cùu-xi ñ<sup>n</sup> sã cáhá<sup>n</sup> ndáá-í te núu na cãhá<sup>n</sup>-í. Dico vá dúcá<sup>n</sup> cãda-í chi cuení-í sã nchòhó cada cuendá-ndó nàcuáa ndúu tnúhu cãhá<sup>n</sup>-í ndihí nàcuáa quide-í, te duca<sup>n</sup> mée-ndo cáhá<sup>n</sup>-ndó te núu ná téé cùu-í, te ñá díú sã yúhú cáhá<sup>n</sup> váha-í cuendá mée-í cuendá nchòhó cachí-ndó sã ño cùnúu-í.

<sup>7</sup> Te sã ñí dánèhé núú ñáhá Xítóhó Jesucristú xii-í cúu-xí sã xidó ío váha, te cuendá sã vã cáda cãhnu-í mée-í ñúu xiã<sup>n</sup> Xítóhó Jesucristú ní quide-gá duha ndòho yiqui cuñú-í vitna. Te sã dúcá<sup>n</sup> quide ñaha-gá xii-í te xiã<sup>n</sup> sãcuíhná ñí ñihí-xi ichi cãhnu dandòho ñaha-xi xii-í. <sup>8</sup> Te ní cuu úní xito cãhá<sup>n</sup> ndàhú-í núú Xítóhó Jesucristú sã ná cáda-gã nàcuáa vá ndóhó-gã yiqui cùñú-í. <sup>9</sup> Dico mee-gã cãchí-gá xii-í: “Yúhú ío cùndahú iní ñáhà-í xii-n chindee ñaha-í, te ñá túú nã cúmání xii-n, te cùtnuní sã ño-gá chindèe-í cue ñáyíu ñá túú ñihí ndéé cùndecu”, duha ní cachí-gá xii-í. Te xiã<sup>n</sup> ñúu yúhú ío cùdíí iní-í sã ñá túú ñihí ndéé-í ndécú-í, chi díu cuendá xiã<sup>n</sup> Xítóhó Jesucristú ñá túú dàña ñhnu ñaha-gá xii-í chindèe ñaha-gá. <sup>10</sup> Te xiã<sup>n</sup> ñúu cùdíí iní-í sã dúhá ñá túú ñihí ndéé-í ndécú-í, te cùdíí tucu iní-í cuendá nchaa tnúhu cuèhé tnúhu duha cãhá<sup>n</sup> ñáyíu cuendá-í, te cùdíí iní-í cuendá nchaa sã ndóhò-í, te cùdíí tucu iní-í cuendá sã quidé ñaha ñáyíu xii-í, te cùdíí tucu iní-í cuendá nchaa dava-gá sã ndóhò-í cuendá Xítóhó Jesucristú. Te òré ñá túú ñihí ndéé-í te Xítóhó Jesucristú chindèe ñaha-gá xii-í ñihí ndéé-í.

*Té Pãblú ío sàni iní-dé cuendá cue ñáyíu xindecu ichi Xítóhó Jesucristú ndécú ñúú Còrintú*

<sup>11</sup> Te cùu-í dàtná ñ<sup>n</sup> téé ñá túú cùtnuní iní-xi sã dúhá cãhá<sup>n</sup> váha-í cuendá-í, te duca<sup>n</sup> quide-í chi mee-ndo quide-ndo sã dúcá<sup>n</sup> cãhá<sup>n</sup>-í, dico mee-ndo tàú-ndó cãhá<sup>n</sup> váha-ndo cuendá-í ní cùu. Te dava cue téé

íó quide cãhnu-güedé mée-güedé, te cãchí-güedé sã Xítóhó Jesucristú ní táuchíú<sup>n</sup>-gã sã cãhá<sup>n</sup>-güedé tnúhu-gá, dico yúhú cùnúu-gá-í dàcúúxí cué téé-á<sup>n</sup> cuéi ñá túú vèdana ná cùu-í ndécú-í ñuyíu-a. <sup>12</sup> Te cùtnhá ní xindecu ndihí ñaha-í xii-ndo ío ní quide cãhnu iní-í nãndí sã ñí yáha-í ní quide-í chiú<sup>n</sup> Xítóhó Jesucristú sã cúu-xí-ndó. Te ní chindee ñaha-gá xii-í ní quide-í tñní núú sã vã yòo tnàhí ndàcu cada te ní cuñúhu-ndo, te sã dúcá<sup>n</sup> ñí chindee ñaha-gá xii-í ní cutnùní iní-ndó sã yúhú cúu ndísa-í ñ<sup>n</sup> téé ní cachí Xítóhó Jesucristú sã cãhá<sup>n</sup>-í tnúhu-gá. <sup>13</sup> Te yúhú ñ<sup>n</sup>-ni quide ndihí ñaha-í xii-ndo ndihí nchaa dáva-gá cue ñáyíu ndècu ichi Xítóhó Jesucristú, te dícó-ni sã yúhú ñá túú ní cuení-í taxi-ndo sã xini ñúhu-í dàtná ní quide-í dáva-gá-yu. Te núu ñá túú ní quide váha-í sã dúcá<sup>n</sup> ñí quide-í ñá túú ní cuení-í chindee ñaha-ndo te chí cáda cãhnu iní ñáhá xii-í.

<sup>14</sup> Te vitna sa ndècu túha-í sã quíxí-í núú ndécú-ndó, te sã quíxí còto ñaha tucu-í xii-ndo cùu-xi xito cuu úní sã quíxí-í, te cuení-í sã vã dándihú-ndó iní-ndó ndècu-ndo sã táxi-ndó cùu xii-í, chi ñá díú xiã<sup>n</sup> ndéé iní-í chi mee-ndo ndéé iní-í quíxí-í. Te duha cãhá<sup>n</sup>-í chi nchòhó xini-ndó sã cué téé cùu tátá sãñaha-güedé sã cúu-xí cué déhe-güedé te ñá díú cué déhe-güedé sãñaha-güedé sã cúu-xí mée-güedé. <sup>15</sup> Te yúhú ío váha cùu iní-í dandòñuhu-í sã ndécú ndihí-í nàcuáa ndacu-í chindee ñaha-í xii-ndo cùndecu váha-ndo sã cúu-xí Yã Ndióxi chi ío cùdíí iní-í, te cuéi na cùu-í sã cuendá-ndó, chi ío cùu iní ñáhà-í xii-ndo, te sã dúcá<sup>n</sup> cùu iní ñáhà-í xii-ndo, te sãnuu sã nchòhó ñá túú cùu iní ñáhá cãvihu-ndo xii-í.

<sup>16</sup> Te ñaha-ndo sã ñá túú ní dándihú-í iní-ndó nã taxi-ndo cùu xii-í, dico dáva-ndo cãchí-ndó sã ío váha ní xito-í nàcuáa ní quide-í nàcuáa ní dándahú ñáhà-í xii-ndo. <sup>17</sup> Te chí cãhá<sup>n</sup> te núu yúhú ní dándahú ñáhà-í xii-ndo ndihí cue téé ní tendaha-í ní quíxí coto ñaha xii-ndo. <sup>18</sup> Te ní cãhá<sup>n</sup> ndàhú-í núú tẽ Títú ndihí núú ñngá tucu téé ndècu ndihí-o ichi Xítóhó

Jesucristú ní quixi coto ñaha-güedë xii-ndo. Te nchòhó cùtnùní iní-ndó sã tẽ Titú ñã túú ní dándahú ñáhá-dë xii-ndo, te duca<sup>n</sup> chi ñ<sup>n</sup>-ni sàni iní-ndí te ñ<sup>n</sup>-ni quide-ndí.

<sup>19</sup> Te cudana te sàni iní-ndó sã sã dúhá càhá<sup>n</sup>-ndí te tàunihnu-ndí méé-ndí, dico ñã díú dùca<sup>n</sup> quee-xi tnúhu càhá<sup>n</sup>-ndí, chi càhá<sup>n</sup>-ndí nàcuáa tàú-xi càhá<sup>n</sup>-ndí chi ndècu ndihí-ndí Xítohó Jesucristú, te mee Yã Ndiõxí náhá ndáá-gá nàcuáa ndùu tnúhu càhá<sup>n</sup>-ndí, te nchaá sã càhá<sup>n</sup>-ndí cúú-xí cuendá nchòhó cue ñáyiu ío cùu iní-ndí, te càhá<sup>n</sup>-ndí nàcuáa cundecu váha-ndo ìchi Xítohó Jesucristú.

<sup>20</sup> Te ío sàni iní-í cuendá-ndó chi na cuáhá<sup>n</sup> te òré quixi-í quixi coto ñaha-í xii-ndo, te ñã túú quide-ndo nacuáa cuu váha iní-í, te sã dúcá<sup>n</sup> te yúhú càhá<sup>n</sup>-í nàcuáa vá cúú váha iní-ndó, te duca<sup>n</sup> ño sàni iní-í cuendá-ndó chi na cuáhá<sup>n</sup> òré quexìo-í te nàá-ndó, àdi ndecu-ndo ìchi cuédú iní, àdi cudéé<sup>n</sup> núú tnáhá-ndó, àdi ñã túú cùu ñ<sup>n</sup>nuu-ndo ndecu-ndo, àdi càhá<sup>n</sup> cuèhé-ndó cuendá tnàha ñáyiu-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusa<sup>n</sup> dóho tnàha-ndo.

<sup>21</sup> Te ío sàni iní-í cuendá-ndó chi na cuáhá<sup>n</sup> òré quixi-í, te Yã Ndiõxí cada-gá te cucaha<sup>n</sup> núú-í sã cuendá-ndó, te ío ndíhú iní-í cuendá-ndó te núu vátá dáñá-gã-ndó nchàa sã cuèhé sã dúhá ñí ngüíta-ndo quide-ndo ndéé sanduu, te vài-ndo ní ngüíta-ndo dùca<sup>n</sup> quide-ndo, chi ndècu-ndo ìchi díí iní te nándi-gá nchaá sã cuèhé sã dúhá quide-ndo, te duca<sup>n</sup> ño ndíhú iní-í te núu vátá dáñá-gã-ndó nchàa xíã<sup>n</sup>.

## 13

### *Tnúhu ndéé núú ñí ndihí-ná*

<sup>1</sup> Te sã quixì-í vitna núú ndécú-ndó cùu-xi xito cuu úní sã quixí còto ñaha-í xii-ndo. Te càchí tnúhu-í xii-ndo sã òré cundáá cuéchi-ndo te canehe núú ǔú àdi úní ñáyiu càhá<sup>n</sup> ndáá nàcuáa ndùu cuéchi-ndo. <sup>2</sup> Te yúhú sa ní càhá<sup>n</sup>-í dóho-ndo cùtnàhá ní quixi-í ní quixi

coto ñaha-í xii-ndo xito cuu úú, te dju-ni duca<sup>n</sup> càhá<sup>n</sup> tucu-í dóho-ndo vitna vátá quixí tucu-gá-í quixi coto ñaha-í xii-ndo. Te nchòhó ñáyiu ní cunduu ñí ngüíta quide nchaá sã cuèhé sã dúhá, tenàá ñáhá-í xii-ndo òré quexìo-í te núu vátá dáñá-gã-ndó nchàa sã cuèhé sã dúhá quide-ndo te tnàhá nchaá dava-gá-ndó tènàá ñáhá-í xii-ndo. <sup>3</sup> Te nchòhó cuìní-ndó quìní-ndó núu ndáá sã quide-í núú Xítohó Jesucristú càhá<sup>n</sup>-í yuhu-gá, dico dàvá-á<sup>n</sup> cutnùní ndáá iní-ndó. Te Xítohó Jesucristú quide-gã nàcuáa cutnùní iní-ndó sã ño càhnu cuu-gá te ñã túú quide-gá dàtná quide ñ<sup>n</sup> ñáyiu ñã túú ñihí ndéé cundecu. <sup>4</sup> Te Xítohó Jesucristú ní ndoho-gá dàtná ñ<sup>n</sup> ñáyiu ñã túú ñihí ndéé cundecu, chi ní sahani ñaha-güedë xii-gá núú cùrúxí dico mee Yã Ndiõxí ní quide-gá ní ñihí ndéé Xítohó Jesucristú ní ndoto-gá ndécú-gã vitna, te tnàhá nchúhú tucu duca<sup>n</sup> yàha-ndí ñã túú ñihí ndéé-ndí cundecu-ndí, dico mee Yã Ndiõxí chindèe ñaha-gá xii-ndí ñihí ndéé-ndí ndécú-ndí cuendá sã ndécú ndihí-ndí Xítohó Jesucristú, te xíã<sup>n</sup> núu ndàcu-ndí quide-ndí nàcuáa tàú-xi cunduu sã cúú-xí-ndó.

<sup>5</sup> Te chí cáda cuendá váha te núu ndisa sã sàndáá iní-ndó tnúhu Xítohó Jesucristú, te núu ndáá sã ndécú-ndó ìchi-gá te cùtnuní iní-ndó sã ndécú-ndó ndihí-gá. <sup>6</sup> Te cuìní-ndí sã nchòhó cutnùní ndáá iní-ndó sã nchúhú ndécú ndihí ndisa-ndí Xítohó Jesucristú. <sup>7</sup> Te nchúhú càhá<sup>n</sup> ndihí-ndí Yã Ndiõxí cuendá-ndó cuendá sã vá cáda-ndó ñí ñ<sup>n</sup> sã cuèhé sã dúhá, te vá cáni iní-ndó sã sã dúcá<sup>n</sup> càhá<sup>n</sup> ndihí-ndí-gá cuendá-ndó, te cuìní-ndí sã nchòhó cutnùní iní-ndó sã nchúhú ío ndècu yíñuhu-ndí núú-gã, te ñáhá chi càhá<sup>n</sup> ndihí-ndí-gá cuendá-ndó chi cuìní-ndí sã nchòhó cada váha-ndo cundecu-ndo cuéi sàni iní-ndó sã nchúhú cúú-ndí cue tée ñã túú ndècu yíñuhu núú-gã.

<sup>8</sup> Te nchúhú mee-ni càhá<sup>n</sup> váha-ndí cuendá tnúhu ndáá tnúhu Yã Ndiõxí, te ñã túú càhá<sup>n</sup>-ndí ñ<sup>n</sup> tnúhu sã



ñà túú tàú-xi cáhá<sup>n</sup>-ndí cuendá tnúhu-á<sup>n</sup>. <sup>9</sup> Te cùdíí ìní-ndí sá ñà túú-gă xíní ñùhu-xi cada-ndí nàcuáa níhí ndéé-ndí tenáa ñáhá-ndí xii-ndo cáhá<sup>n</sup>-ndí dóho-ndo, chí nchòhó sa ní níhí ndéé-ndó ndècu-ndo ichi-gá. Te nchúhú cáhá<sup>n</sup> ndíhi-ndí Yă Ndiõxí cuendá-ndó cuendá sá nchòhó cundáá-ndó cùndecu-ndo ñá túú-gă ná cumání-ndó nǔú-gă. <sup>10</sup> Te xiǎ<sup>n</sup> nǔu duha ndùu nchaa tnúhu tèe-í nǔú tǔtú-a daquixi-í ndaha-ndo vitna ñá túú ndècu ndíhi ñaha-í xii-ndo, cuendá sá òré ná cùndecu ndíhi ñaha-í xii-ndo te vá ío níhí cáhá<sup>n</sup>-í dóho-ndo nàcuáa ndùu tnúhu ndee ìní ní taxi Xítohó Jesucristú ndécú ndíhi-í, chí ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhí<sup>n</sup>, te ñá díú cuendá sá cánúichi ñaha-í xii-ndo cuíta nihnu-ndo.

<sup>11</sup> Te vitna nchaa nchòhó ñáyiú ndècu ndíhi-ndí ichi Xítohó Jesucristú ío quide ndee ìní ñáhá-ndí xii-ndo, te ío chí ndúcú nàcuáa cada-ndo cundáá-ndó nǔú Yă Ndiõxí cuendá sá ñà túú tnáhí-gá ná cumání-ndó nǔú-gă, te ndee ndèe cada ìní-ndó cùndecu-ndo, te chí cúú ñí<sup>n</sup>nuu cundecu ndíhi tnaha, te duca<sup>n</sup> te Yă Ndiõxí cundecu ndíhi ñaha-gă xii-ndo chí ío cùu ìní ñáhá-gă xii-o, te díu-gá quidé-gă ío váha cùu ìní-ó ndècu-o. <sup>12</sup> Te ndíhi tnúhu yíñùhu chí cáda ndèe ìní tnáhá. <sup>13</sup> Te nchaa ñáyiú cùu cuendá Yă Ndiõxí ndécú ìha quide ndee ìní ñáhă-yu xii-ndo.

<sup>14</sup> Te xicá<sup>n</sup> táhú-ndí nǔú Xítohó Jesucristú sá ío na chindee chítúu ñaha-gă xii-ndo. Te mee Yă Ndiõxí ná cáda-gă nàcuáa cutnùní ìní-ndó sá ío cùu ìní ñáhá-gă xii-ndo, te Espíritú-gá cundee cùu cahnu ìní-ndó cùndecu-ndo. Te duca<sup>n</sup> na cùnduu. Te ío chí cáda ndèe ìní-nă vitna.

## TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU DISTRÌTÚ GÁLACIÁ

*Té Päblú cádūha-dé tutú quihí<sup>n</sup>  
ndaha nchaa ñáyiú sàndáá iní ñáhá xii  
Xítóhó Jesucristú ndécú distritú Gálaciá*

<sup>1</sup> Te yúhú té Päblú ní tendaha ñaha Xítóhó Jesucristú, ndihí Dútú Ndiöxí véxi-í cãhá<sup>n</sup>-í tnúhu-gá. Te ðiu Yá Ndiöxí ní dándótó-gã Xítóhó Jesucristú Yaá ní xihí ní cùu. Te cãchí tnúhu-í xii-ndo sã ñà díú ñáyiú ñuyíú-a ni tendaha ñaha xii-í véxi-í, te ni Yá Ndiöxí te ni Xítóhó Jesucristú ñá túú ní xãha<sup>n</sup>-gã xii ñá ñáyiú quixí-yu cachí tnúhu-yu nãcuáa cada-í. <sup>2</sup> Te yúhú té Päblú cádūha-í tutú-a ndihí nchaa dava-gã ñáyiú ndècu ichi Yá Ndiöxí ndécú ndihí-í iha cuèndá daquixi-í ndaha nchòhó ñáyiú sàndáá iní ñáhá xii Xítóhó Jesucristú ndécú distritú Gálaciá. <sup>3</sup> Te xicã<sup>n</sup> táhù-í núú Dútú Ndiöxí, ndihí núú Xítóhó Jesucristú sã ïo na chindee chitúu ñaha-gã xii-ndo, te duca<sup>n</sup> ndì nduú-gá ná cádá te ío váha cuu iní-ndó cùndecu-ndo. <sup>4</sup> Te Xítóhó Jesucristú ní xihí-gá sã cuèndá nchaa cuèchi nchoo cuè ñáyiú ndècu ñuyíú-a. Te duca<sup>n</sup> ñí quide-gá, chi cuiní-gá sã vã cùndècu-o ichi cuehé ichi duha. Te duca<sup>n</sup> ñí cuu, chi Dútú Ndiöxí duca<sup>n</sup> ñí cuiní-gá cunduu. <sup>5</sup> Te ío chí ná ndàcã<sup>n</sup> táhù-ó núú Yá Ndiöxí cuèndá sã ïo càhnu cuu-gá, te ðiu-ni duca<sup>n</sup> càda-o ni caa ni quihí<sup>n</sup>! Te duca<sup>n</sup> na cùnduu.

*Mee-ni tnúhu Xítóhó Jesucristú  
cúu-xí tnúhu sã cãhá<sup>n</sup> nãcuáa naníhí  
tãhù-ó*

<sup>6</sup> Te ío cùñúhu-í cúu chi ío ndihí ní dáñá-ndó ichi Yá Ndiöxí. Te Yaá-á<sup>n</sup> ñí cãhá<sup>n</sup> ñáhã-gã xii-ndo, chi Xítóhó Jesucristú ío ní cundãhú iní ñáhã-gã ní quide váha ñaha-gã xii-ndo, te vitna dàcuaha tucu-ndo ingá tnúhu, te cãchí-ndó sã xĩã<sup>n</sup> dàcãcu nihnu

ñaha-xi xii-ndo núú ùhú núú ndãhú. <sup>7</sup> Dico ñáhã, chi ñá túú-gã tnúhu sã dácãcu nihnu ñaha xii-o núú ùhú núú ndãhú. Te ðicó-ni sã ío ñáyiú véxi dàticã nuu ñahã-yu xii-ndo dãnehé ñáhã-yu tnúhu sã dãcuíta nihnu ñaha xii-ndo, chi tnúhu-á<sup>n</sup> ñà túú cùu-xi tnúhu Xítóhó Jesucristú. <sup>8</sup> Te yúhú cãhá<sup>n</sup>-í tnúhu Xítóhó Jesucristú, dico núú ío ñáyiú véxi dãnehé ñáhã xii-ndo ingá tnúhu sã ñà túú ní dãnehé ñáhã-í xii-ndo, te nchòhó cachí-ndó sã ñáyiú-á<sup>n</sup> nachãhu-yu núú Yá Ndiöxí sã dúcã<sup>n</sup> quidé-yu. Te cuèi yúhú, te núu na dàma-í tnúhu danèhé ñáhã-í xii-ndo, te ðiu-ni duca<sup>n</sup> cãhá<sup>n</sup>-ndó sã nãchãhu-í núú-gã te núu duca<sup>n</sup> na càda-í. Àdi te núu ñí<sup>n</sup> espíritú xínú cuèchi núú-gã véxi-xi cãhá<sup>n</sup>-xi ingá tnúhu sã ñà túú ní dãnehé ñáhã-í xii-ndo nãcuáa naníhí tãhù-ndó ñá, te ðiu-ni duca<sup>n</sup> cãhá<sup>n</sup>-ndó sã nãchãhu-xi núú Yá Ndiöxí te núu duca<sup>n</sup> na càda-xi. <sup>9</sup> Te ðiu-ni duha sa ní dãnehé ñáhã-í xii-ndo sã núu véxi ñáyiú dãnehé ñáhã ingá tnúhu sã ñà túú ní dãnehé ñáhã-í xii-ndo nãcuáa naníhí tãhù-ndó ñá, te cachí-ndó sã ñáyiú-á<sup>n</sup> nachãhu-yu núú Yá Ndiöxí sã dúcã<sup>n</sup> quidé-yu, duha ní cachí-í xii-ndo.

<sup>10</sup> Te duha ndùu tnúhu cãhá<sup>n</sup>-í chi nchòhó sa xini-ndó sã yúhú cuiní-í sã Yá Ndiöxí cãhá<sup>n</sup>-gã sã quidé vãha-í ndécù-í, te ñá díú sã ñáyiú ñuyíú-a cachí-yu sã quidé vãha-í, àdi sã ïo cùdíí iní-yu nchaa nãcuáa quide-í ndécù-í. Te núu na càni iní-í cudìu-í núú ñáyiú ñuyíú-a, te ñá túú cùu-í téé xínu cuechi núú Xítóhó Jesucristú te núu duca<sup>n</sup> na càda-í.

*Nãcuáa ní cuu ní ngüita té Päblú  
cãhá<sup>n</sup>-dé tnúhu Yá Ndiöxí*

<sup>11-12</sup> Te nchòhó ñáyiú ndècu ndihí-í ichi Xítóhó Jesucristú cãchí tnúhu-í xii-ndo sã tnúhu sã dãnehé ñáhã-í xii-ndo nãcuáa naníhí tãhù-ndó cùu-xi tnúhu sã ñí cachí tnúhu mee Xítóhó Jesucristú xii-í, te ñá díú ñí<sup>n</sup> ñáyiú ñuyíú-a ni càhu iní-yu tnúhu-á<sup>n</sup>, àdi danèhé ñáhã-yu xii-í, chi mee Xítóhó Jesucristú ní dãnehé ñáhã-gã.

<sup>13</sup> Te nchòhó sa nihí-ndó tnúhu nãcuáa ní xóo cada-í cùtnãhá nchicú<sup>n</sup>

nihnu-í nchaa nàcuáa dàcuaha ñáiyu cùu ndi mee-í ñáiyu isràèl ní cùu. Te dàvá-á<sup>n</sup> ïo ní xóo cuu úhú iní-í nchaa ñáiyu ndècu ichi Yá Ndiöxí, te nándi sá ñi xóo cada-í-yu, te ní cuini-í danàa-í-yu ni cùu. <sup>14</sup> Te yúhú ío-gá ní xóo quene cáva-í ní xóo dacuàha-í nchaa sá dácuaaha ñáiyu cùu ndi mee-í dácúúxí ñáiyu ñi-ni cuià-í ndihí-yu ni cùu, te ío-gá ní xóo cuini-í cada ndáa-í canchicú<sup>n</sup> nihnu-í nchaa nàcuáa ní dánèhé ñáhá cuè ñaní tnàhà-í ní xíndecu ndéé sanaha ni cùu. <sup>15</sup> Te ndéé cútnàhá vátá cécú-gã-í Yá Ndiöxí sa nèhe váha ñaha-gã xii-í cuendá sá càhá<sup>n</sup>-í tnúhu-gá, núu xiá<sup>n</sup> ní cáhá<sup>n</sup> ñáhá-gã xii-í quidè-í chiú<sup>n</sup>-gá vitna, te sá dúcá<sup>n</sup> ñi quide-gá te ío váha ní quide ñaha-gã xii-í. <sup>16</sup> Te òré ní cáhá<sup>n</sup> ñáhá Yá Ndiöxí xii-í te ní cachí tnúhu-gá cuendá Déhe-gá Xítoho Jesucristú. Te duca<sup>n</sup> ñi quide Yá Ndiöxí cuendá sá cuini-gá sá cùñaha-í xii ñáiyu ñá túú cùu ñáiyu isràèl cuendá Yaá cúú Déhe-gá. Te cútnàhá ní cáhá<sup>n</sup> ñáhá Yá Ndiöxí xii-í, te vá yóo ñi ní núu-xi ni ndècu tnúhu-í nàcuáa cada-í. <sup>17</sup> Te ni ñà túú ní sáhá<sup>n</sup>-í ñuú Jerusàlén nducu tnúhu-í núu cuè téé díhna nuu ñi tendaha Xítoho Jesucristú càhá<sup>n</sup> tnúhu-gá núu nása cada-í, chi ndihí-ni ní sáhá<sup>n</sup>-í distritú Arabiá ní xíndecu tnaa-í te dàtnùní cuánuhú tucu-í ñuú Dàmascú.

<sup>18</sup> Te núu ùní cuiá sã ñi cáhá<sup>n</sup> ñáhá Yá Ndiöxí xii-í, te ní sáhá<sup>n</sup> tucu-í ñuú Jerusàlén ní cáhá<sup>n</sup> ndihí-í té Pèlú, te ní xíndecu-í ndihí-dé sáhú<sup>n</sup> nduu. <sup>19</sup> Te tnàhá té Jàcobó ñaní Xítoho Jesucristú ní cáhá<sup>n</sup> ndihí-í. Te ñá túú ní xini-í dava-gá cue téé ní tendaha Xítoho Jesucristú càhá<sup>n</sup> tnúhu-gá. <sup>20</sup> Te Yá Ndiöxí ndéhé ndi ndehe caxi-gá sá ncháá tnúhu tèe-í núu tùtú-a sá cúú-xi-ndó cùu-xi ñi sá ndáá.

<sup>21</sup> Te sátá ñi sáhá<sup>n</sup>-í ñuú Jerusàlén, te dàtnùní ní sáhá<sup>n</sup>-í distritú Siriá, ndihí distritú Ciliciá. <sup>22</sup> Te nchaa ñáiyu xíndecu ichi Xítoho Jesucristú ndécú distritú Jùdeá ñá túú xini ñáhá-yu xii-í ní cùu. <sup>23</sup> Dico ní xóo níhi-yu tnúhu nchaa nàcuáa ní xóo cada-í, te ní cachí-yu: “Téé cùu úhú iní ñáhá xii nchaa nchoo ñáiyu

ndècu ichi Xítoho Jesucristú càhá<sup>n</sup>-dé tnúhu-gá núu ñáiyu cuendá quindáá iní ñáhá-yu xii-gá, te diu-dé nándi sá quidé ñàha-dé, te cuini-dé danàa ñaha-dé cuendá sá vã cóo-gã ñáiyu quindáá iní ñáhá xii-gá ní cùu”, duha ní cachí-yu cuendá-í. <sup>24</sup> Te ní ngúita-yu ní cachí-yu sá ïo càhnu cuu Yá Ndiöxí cuendá sá ñà túú-gã quidè-í dàtná ní xóo cada-í.

## 2

*Té Páblú ní níhi tnàhá-dé ndihí dava-gá cue téé càhá<sup>n</sup> tnúhu Yá Ndiöxí*

<sup>1</sup> Te ní nútnahá úxícúmí cuiá sã ñi sáhá<sup>n</sup>-í ñuú Jerusàlén ní cáhá<sup>n</sup> ndihí-í té Pèlú, te dàtnùní ndécà-í té Bèé ní sáhá<sup>n</sup>, te tnàhá té Títú ní sáhá<sup>n</sup> ndihí-ndí-dé. <sup>2</sup> Te ní sáhá<sup>n</sup>-í chi mee Yá Ndiöxí ní cachí-gá sá quihí<sup>n</sup>-í. Te yacá<sup>n</sup> ní tacá mee-ni cuè téé cùnuu. Te ní xáha<sup>n</sup>-í xii-güedé nàcuáa nduu tnúhu dānehé-í ñáiyu ñá túú cùu ñáiyu isràèl cuendá naníhi tãhú-yu. Te duca<sup>n</sup> ñi quide-í cuendá cuini-í quini-güedé nàcuáa nduu chiu<sup>n</sup> quide-í, chi nacuahá<sup>n</sup> cachí-güedé sá ñà túú nandíhi-xi. <sup>3</sup> Te té Títú téé ndècu ndihí-í chi ñá díú téé isràèl cúú-dé, dico ñá túú ní quide yica-güedé cuáha-güedé seña ñi-dé. <sup>4</sup> Te ñáiyu càhí sá ndécú ichi Xítoho Jesucristú te ñá ndáá sá ndécú-yu ichi-gá, ñáiyu-á<sup>n</sup> ñi chitnahá ñáhá-yu xii-ndí cuendá cuini-yu quini-yu nása quide-ndí ndécú-ndí ichi Xítoho Jesucristú. Te duca<sup>n</sup> ñi quidé-yu cuendá sá nchúhú sa ní cácu nihnu-ndí ñá túú-gã quidé-ndí nchaa nàcuáa ní cáhá<sup>n</sup> ndí Moisés. Te cuini-yu sá núcuíta saa tùcu-ndí cada-ndí nchaa nàcuáa ní cáhá<sup>n</sup> ndí nucúndecu-ndí dàtná ní xíndecu-ndí cútnàhá vátá cácu nihnu-gá-ndí núu tnúhu-á<sup>n</sup> ni cùu. <sup>5</sup> Te nchúhú ñá túú tnàhí ni dàña-ndí méé-ndí dandàhú ñáhá-yu xii-ndí. Te duca<sup>n</sup> ñi quide-ndí, chi cuini-ndí sá ñà túú nãgá tnúhu dácánuu ndihí tnúhu sá càhá<sup>n</sup> nàcuáa naníhi tãhú-ó ndècu ndihí-ndo.

6 Te ni ñ<sup>n</sup> tnúhu sá vătă quíni-gá-í ñá túú ní cächí tnúhu cue tée cùnūu núú ñáyiū cada-í. Dico yúhú chi ñá túú ní quide cuendá-í nūu cùnūu-güedé àdi ñá túú cùnūu-güedé, chi núú Yá Ndiöxí ñ<sup>n</sup>-ni cùu-o nchaa-o. 7 Te ní cutnùní iní-güedé sá Yá Ndiöxí ní cachí-gá xii-í sá cähá<sup>n</sup>-í tnúhu-gá núú ñáyiū ñá túú cùu ñáyiū isràél datná ní quide-gá té Pèlú ní xáha<sup>n</sup>-gá cähá<sup>n</sup>-dé tnúhu-gá núú ñáyiū isràél. 8 Te duca<sup>n</sup> ñ<sup>n</sup> cutnùní iní-güedé, chi ñ<sup>n</sup> Yá Ndiöxí Yaá chindèe ñaha xii té Pèlú cähá<sup>n</sup>-dé tnúhu-gá núú ñáyiū isràél, ñ<sup>n</sup> Yaá-á<sup>n</sup> chindèe ñaha-gá xii-í cähá<sup>n</sup>-í tnúhu-gá núú ñáyiū ñá túú cùu ñáyiū isràél.

9 Te té Jàcobó, ndihí té Pèlú, ndihí té Juàá, cue tée ío cùnūu-gá ní cutnùní iní-güedé sá Yá Ndiöxí ío chindèe ñaha-gá xii-í quidè-í chiū<sup>n</sup>-gá. Te ío váha ní cähá<sup>n</sup> ndihí ñaha-güedé xii-í, ndihí té Bèé, te ní cuu ñ<sup>n</sup>nuu-ndí sá nchúhú quíhí<sup>n</sup>-ndí cähá<sup>n</sup>-ndí tnúhu Yá Ndiöxí núú nchaa ñáyiū ñá túú cùu ñáyiū isràél, te mee-güedé cähá<sup>n</sup>-güedé tnúhu-gá núú ñáyiū isràél. 10 Te ñ<sup>n</sup>-ni tnúhu ní cähá<sup>n</sup>-güedé dóho-ndí te ní cachí-güedé xii-ndí sá chindèe-ndí cue ñáyiū ndàhú, te sa duca<sup>n</sup> tnàhí sàni iní-ndí cada-ndí.

#### *Té Păblú cähá<sup>n</sup>-dé dóho té Pèlú ñūú Antiòquiá*

11 Te cùtnàhá ní sähá<sup>n</sup> té Pèlú ñūú Antiòquiá yacá<sup>n</sup> ní cähá<sup>n</sup>-í dóho-dé, chi quide-dé ñ<sup>n</sup> sá ñá túú tàú-dé cada-dé ní cùu. 12 Te quide váha-dé ní cùu chi xèxi-dé ndihí ñáyiū ñá túú cùu ñáyiū isràél, dico òré ní sáá ñ<sup>n</sup> úú ñáyiū cùndihí té Jàcobó, te òré-á<sup>n</sup> ñá túú-gá ní cùni-dé caxi-dé ndihí ñáyiū-á<sup>n</sup>. Te duca<sup>n</sup> ñ<sup>n</sup> quide-dé chi ní yúhú-dé cue ñáyiū nchìcú<sup>n</sup> nihnu quide nchaa nacuaá ní cähá<sup>n</sup> ndí Moisés sá vă cähá<sup>n</sup> váha-yu cuendá-dé. 13 Te tnàhá dava-gá ñáyiū isràél xindècu ichi Yá Ndiöxí ñá túú quide váha-yu, chi quide-yu datná quidé tē Pèlú ní cùu, te ndéé tnàhá té Bèé ní ngüita-dé duca<sup>n</sup> quide-dé ní cùu. 14 Te òré ní xiní-í sá ñá túú quide-güedé ndihí-yu nacuaá

cähá<sup>n</sup> tnúhu Yá Ndiöxí, te núú nchaa ñáyiū ndècu ichi Yá Ndiöxí ní xáha<sup>n</sup>-í xii té Pèlú: “Yòhó cúu-n tēe isràél, te ñá túú quide-n nchaa nacuaá quide ñáyiū isràél, chi quide-ni-n datná quidé nchaa ñáyiū ñá túú cùu ñáyiū isràél. Te núú duca<sup>n</sup> quide-n, ¿te ná cuendá dánèhé-n ñáyiū ñá túú cùu ñáyiū isràél sá cadă-yu nchaa nacuaá quide ñáyiū isràél?”, duha ní xáha<sup>n</sup>-í xii té Pèlú.

#### *Ñ<sup>n</sup>-ni nànhí tàhú-ó ndihí ñáyiū isràél nūu na quindáá iní-ó Xitohó Jesucristú ndihí-yu*

15 Te yúhú ndihí té Pèlú cúu-ndí ñaní tnàhá ñáyiū isràél, te ñá túú ndècu-ndí ichi cuèhé ichi duha datná ndécú nchaa ñáyiū ñá túú cùu ñáyiū isràél. 16 Te xiní-ó sá vă cùndècu-gá cuèchi-o nūú Yá Ndiöxí te núu na quindáá iní-ó Xitohó Jesucristú, te ñá díú sá cànchícú<sup>n</sup> nihnu-o cada-o nchaa nacuaá ní cähá<sup>n</sup> ndí Moisés. Te tnàhá dava nchúhú ñáyiū isràél sàndáá iní-ndí Xitohó Jesucristú, te xíá<sup>n</sup> cùtnùní iní-ndí sá ñá túú-gá cuèchi-ndí ndécú nūú-gă, dico ñá díú sá ñ<sup>n</sup> cànchícú<sup>n</sup> nihnu-ndí ní quide-ndí nacuaá ní cähá<sup>n</sup> ndí Moisés, chi cuendá sá sàndáá iní-ndí Xitohó Jesucristú. Te vá yôo ñ<sup>n</sup> cachí-ó sá ñá túú ndècu cuèchi-xi núú Yá Ndiöxí cuendá sá nchìcú<sup>n</sup> nihnú-yu nchaa nacuaá ní cähá<sup>n</sup> ndí Moisés.

17 Te núu cùni-ó sá vă cùndècu cuèchi-o nūú Yá Ndiöxí cuendá sá sàndáá iní-ó Xitohó Jesucristú, te xíá<sup>n</sup> cùtnùní iní-ó sá ñá túú quide váha-o. ¿Te vá cúu tnàhí caní iní-ó sá Xitohó Jesucristú dánèhé ñàhá-gă xii-o sá vă cadă váha-o cùndècu-o! 18 Te yúhú cächí-í sá vă cànchícú<sup>n</sup> nihnu-gá-ó nchaa nacuaá ní cähá<sup>n</sup> ndí Moisés, dico núu vitna cächí-í sá xiní ñūhu-xi cada-o nchaa nacuaá ní cähá<sup>n</sup> ndí ñá, te ñá túú quide váha-í núú Yá Ndiöxí te núu duca<sup>n</sup> na cada-í. 19 Te yúhú duu<sup>n</sup> duu<sup>n</sup> ní cutnùní iní-í sá vă ndácù-í cada-í nchaa nacuaá ní cähá<sup>n</sup> ndí Moisés nūu xíá<sup>n</sup> ní dáñá-í ñá túú-gă nchìcú<sup>n</sup> nihnu-í nchaa nacuaá



ní cáhá<sup>n</sup> ndíi cuendá sá cuení-í cundecu-í sá cúú-xí Yá Ndiöxí. <sup>20</sup> Te Xítoho Jesucristú ní xihí-gá cuendá-í, dico dàtná tnúhu sá tnàhá-í ní xihí ndihí-gá, chi ñá cúú-gá cada-í nchaa nàcuáa sàni iní mée-í, chi Xítoho Jesucristú-nă ndécú ndihí ñaha-gá xii-í táxí tnùní ñáhá-gă. Te vitna ndècu-í ñuyíú-a, te ío sândáá iní-í Xítoho Jesucristú Déhe Yá Ndiöxí, te chindee ñaha-gá xii-í. Te ñu-ni Xítoho Jesucristú ío cùu iní ñáhá-gă xii-í nùu ní xihí-gá núú cùrúxí sá cuendá-í. <sup>21</sup> Te vitna ñá túú dàquee tíhù-í sá vâha ní quide ñaha Yá Ndiöxí xii-í, chi núu ní ndàcu-o vá cùndècu cuéchi-o nùú Yá Ndiöxí cuendá sá nchícú<sup>n</sup> nihnu-o quide-o nchaa nàcuáa ní cáhá<sup>n</sup> ndíi Moisés ní cùu ña, te àú<sup>n</sup> nă cuu ní xihí Xítoho Jesucristú ní cùu te núu duca<sup>n</sup>.

### 3

#### *Vá dáñá ndèé-ó quèndáá iní-ó tnúhu Xítoho Jesucristú*

<sup>1</sup> Te nchòhó ñáyiú distritú Gàlaciá, ñáyiú sa xĩndecu ichi Xítoho Jesucristú, ¿ná cuendá ío ñí iní-ndó ñă cuení-ndó tnè-ndo nchaa tnúhu càhá<sup>n</sup>-gá?, ¿te yoo ní dáđáhu ndodo iní ñáhá xii-ndo núu duca<sup>n</sup> quide-ndo? Te naha-ndo sá ío váha ní dánèhé ñáhá-ndí xii-ndo nàcuáa ní cuu ní xihí Xítoho Jesucristú. <sup>2</sup> Te vitna cáhá<sup>n</sup>-ndó nùu sá nchícú<sup>n</sup> nihnu-ndo nchaa nàcuáa ní cáhá<sup>n</sup> ndíi Moisés ní níhí-ndó Espíritú Yá Ndiöxí ndécú ndihí-ndo, àdi sá ní sândáá iní-ndó tnúhu Xítoho Jesucristú sá ní dánèhé ñáhá-ndí xii-ndo ní níhí-ndó Espíritú-gá ndécú ndihí-ndo. <sup>3</sup> Te nchòhó ío ñí ñíquí-ndó chi Espíritú Yá Ndiöxí tá quide váha ñaha-xi xii-ndo cuáhá<sup>n</sup> ní cùu. ¿Te náa vitna mee-nă-ndó cuení-ndó càda-ndo nàcuáa ta quide ñaha Espíritú-gá cuáhá<sup>n</sup> xii-ndo ní cùu-án? <sup>4</sup> Te sàni ñí sàni úú iní-í cuendá-ndó sá àú<sup>n</sup> nă cuu nándí yáha-ndo ndècu-ndo ichi Yá Ndiöxí. <sup>5</sup> Te xini-ndó sá Yá Ndiöxí ní taxi-gá Espíritú-gá ní ngúndecu ndihí-ndo, te ní quide-gá sá vâ yôo tnàhí ndàcu cada núú-ndó ní xini-ndó. Te duca<sup>n</sup>

ní quide-gá, chi ní sândáá iní-ndó-gă, dico ñá ñíu cuendá nchaa nàcuáa ní cachí ndíi Moisés cada ñáyiú duca<sup>n</sup> ní quide-gá.

<sup>6</sup> Te ndíi Àbrahám duca<sup>n</sup> ío ní sândáá iní ndíi Yá Ndiöxí, núu xíá<sup>n</sup> ní cachí-gá sá ní cudíu ndíi núú-gă sá dúcá<sup>n</sup> ní quide ndíi. <sup>7</sup> Te càchí tnúhu ndáá-í xii-ndo sá ncháá ñáyiú sândáá iní ñáhá xii Yá Ndiöxí dàtná ní sândáá iní ñáhá ndíi Àbrahám xii-gá, ñáyiú-án ñí-ni cùú-yu ndihí ndíi núú-gă. <sup>8</sup> Te núú tütú Yá Ndiöxí ní ngódó tnùní tnúhu váha, tnúhu sá ní xáha<sup>n</sup> Yá Ndiöxí xii ndíi Àbrahám, te duha ní xáha<sup>n</sup>-gă xii ndíi: “Nchaa ñáyiú nihí ñuyíú cada váha-í-yu sá cuendá-n”, duha ní xáha<sup>n</sup>-gă xii ndíi. Te sá dúcá<sup>n</sup> ní ngódó tnùní núú tütú Yá Ndiöxí ndéé dàvá-án, te xíá<sup>n</sup> cùtnùní sá sá nduu, te cue ñáyiú ñá túú cùu ñáyiú isràél vá cùndècu-gá cuéchi-yu núú-gă te núu na quèndáá iní ñáhá-yu xii-gá. <sup>9</sup> Te xíá<sup>n</sup> nùu nchaa ñáyiú sândáá iní ñáhá xii Yá Ndiöxí cada váha ñaha-gă xii-yu dàtná ní quide váha-gá ndíi Àbrahám, chi ndíi-án duca<sup>n</sup> ní sândáá iní ñáhá ndíi xii-gá.

<sup>10</sup> Te nchaa ñáyiú cuení cada nchaa nàcuáa ní cáhá<sup>n</sup> ndíi Moisés cuendá sá cuení-yu sá vâ cùndècu-gá cuéchi-yu núú Yá Ndiöxí, ñáyiú-án ñá ñíhnu ñaha-gá xii-yu, chi vá ndácú-yu cadá-yu nàcuáa sàni iní-yu, te duca<sup>n</sup> càda-gá chi quèe ndáá-xi nàcuáa càhá<sup>n</sup>-xi núú tütú-gá núú càchí-xi sá ncháá ñáyiú ñá túú quide nchaandi túhú nàcuáa ní cáhá<sup>n</sup> ndíi Moisés te ñá ñíhnu ñaha-gá xii-yu. <sup>11</sup> Te núu na càchícú<sup>n</sup> nihnu-ni-o càda-o nàcuáa ní cáhá<sup>n</sup> ndíi Moisés, te ñá túú vèdana chindee ñaha-xi xii-o nàcuáa vá cùndècu-gá cuéchi-o nùú Yá Ndiöxí. Te ndáá chi núú tütú-gá càchí-xi sá ncháá ñáyiú sândáá iní ñáhá xii-gá, ñáyiú ñá túú-gă cuéchi-xi ndècu ío váha ndécú-yu núú-gă. <sup>12</sup> Te núu dícó ío ñáyiú quide nchaandi túhú nàcuáa ní cáhá<sup>n</sup> ndíi Moisés ñá, te ñá túú xini ñíhnu-xi quèndáá iní-yu tnúhu Xítoho Jesucristú, chi núú tütú Yá Ndiöxí càchí-xi sá nùu dícó ío ñáyiú

ndacu cada nchaa nàcuáa ní cáhá<sup>n</sup> ndíi Moisés ñá, te cundecu váha-yu núú Yá Ndiöxí.

<sup>13</sup> Te tnúhu ní chídó tnùní ndíi Moisés càchí-xi sá ìo ndècu cuéchi-o núú Yá Ndiöxí cuendá sá ñá ndácú-ó càda-o nchaa nacuáa ní cáhá<sup>n</sup> ndíi, te cuendá xiá<sup>n</sup> tá dàña nihnu ñaha-gá xii-o cuáhá<sup>n</sup>. Dico Xítoho Jesucristú ní xido-gá nchaa cuéchi-o cuendá sá vǎ dáña nihnu ñaha-gá Yá Ndiöxí xii-o. Te càchí-xi núú tütú Yá Ndiöxí: “<sup>13</sup> Tée na càta caa-güedé <sup>13</sup> yutnu, te tée-á<sup>n</sup> cúú-dě tée dàña nihnu ñaha Yá Ndiöxí”, duha càchí-xi núú tütú-gá.

<sup>14</sup> Te duca<sup>n</sup> ñi yáha Xítoho Jesucristú, chi cuíní Yá Ndiöxí sá ndùu táhú nchaa ñáyiu ñá túú cùu ñáyiu isràél cundecu váha-yu dàtná ní nduu táhú ndíi Àbrahám ndécú vǎha ndíi. Te duca<sup>n</sup> ñi yáha-gá cuendá nchaa nchoo ñáyiu sàndáá iní ñáhá xii-gá ngúndecu ndíi-o Espíritú Yá Ndiöxí sá ñi cachí méé-gá taxi-gá.

#### *Nàcuáa ní cachí Yá Ndiöxí cada-gá*

<sup>15</sup> Te nchòhó cue ñáyiu ndècu ndíi-í ichi Yá Ndiöxí na càchí tnúhu-í xii-ndo nàcuáa quide cue ñáyiu ñuyíú-a cuendá tecú tnùní-gá-ndó nàcuáa quide Yá Ndiöxí. Chi ñáyiu-á<sup>n</sup> òré cuíní-yu cadá-yu <sup>15</sup> sá cadá-yu, te díhna-gá ndátnùhu-yu te òré cúú <sup>15</sup> ñnuú-yu, te sáha fírmá-yu <sup>15</sup> ñi tutú te tutú-á<sup>n</sup> vǎ yóo <sup>15</sup> ñi ndacu cáhá<sup>n</sup> sá vǎ nándíhi-gá-xi, te ñi vǎ yóo-gá ndacu nágá tnúhu chido tnùní núú-xí.

<sup>16</sup> Te duca<sup>n</sup> ñi quide Yá Ndiöxí ndíi ndíi Àbrahám, chi ní xáha<sup>n</sup>-gǎ xii ndíi nàcuáa cada-gá, te tnúhu-á<sup>n</sup> cúú-xí cuendá méé ndíi ndíi cuendá <sup>16</sup> ñi ñaní tnáhá ndíi cundecu ñuyíú-a ndéé cuèé-gá. Te núú tütú-gá càchí-xi sá tnúhu-á<sup>n</sup> cúú-xí cuendá <sup>16</sup> ñi ñaní tnáhá ndíi te ñá díú cuendá nchaá-yu. Te ñaní tnáhá ndíi tée cùu cuendá tnúhu-á<sup>n</sup> cúú Xítoho Jesucristú. <sup>17</sup> Te na càchí tnúhu-í xii-ndo sǎ Yá Ndiöxí ní quide ndáá duu<sup>n</sup>-gá ndíi ndíi Àbrahám nàcuáa cada-gá. Te sa ní cuu cúmí cièndú ócò úxí cuíá sǎ dúcá<sup>n</sup> ñi xáha<sup>n</sup> Yá Ndiöxí xii ndíi Àbrahám, te dàtnùní ní xáha<sup>n</sup>-gǎ xii ndíi Moisés chido tnùní ndíi nàcuáa cada ñáyiu,

te nchaa tnúhu ní chídó tnùní ndíi Moisés ñá túú dàquee tìhú-xi tnúhu sá ñi xáha<sup>n</sup> Yá Ndiöxí xii ndíi Àbrahám nàcuáa cada-gá. <sup>18</sup> Te núu dícó cuendá nchaa tnúhu sá ñi chídó tnùní ndíi Moisés ní náníhí tàhú-ó ñá, te ñá túú-gǎ xíní ñùhu-xi cada cuendá-ó tnúhu ní xáha<sup>n</sup> Yá Ndiöxí xii ndíi Àbrahám cada-gá ní cùu te núu duca<sup>n</sup>. Te ndíi-á<sup>n</sup> ñi naníhí tàhú ndíi chi duca<sup>n</sup> ñi cachí Yá Ndiöxí cada ñaha-gǎ xii ndíi.

<sup>19</sup> Te nchaa tnúhu ní cáhá<sup>n</sup> ndíi Moisés ní ngódó núú-xí nchicú<sup>n</sup> nihnu ñáyiu cuendá duca<sup>n</sup> cùtnuní iní-yu sá ndécú cuéchi-yu, te nchicú<sup>n</sup> nihnu-ní-yu ndéé ní sáá nduu ñi quexio Yaá cúú ñaní tnáhá ndíi Àbrahám, chi Yaá-á<sup>n</sup> duca<sup>n</sup> ñi xáha<sup>n</sup> Yá Ndiöxí quixi-gá cada váha-gá nchaa ñáyiu. Te nchaa tnúhu ní chídó tnùní ndíi Moisés, chi Yá Ndiöxí ní tendaha-gǎ cue espíritú xínú cuèchi núú-gǎ ní sáhá<sup>n</sup>-xí ní xítñùhu ñaha-xi xii ndíi nàcuáa danèhé ndíi ñáyiu. <sup>20</sup> Te Yá Ndiöxí ñá túú ní cáhá<sup>n</sup>-gá núú méé ñáyiu, chi ndíi Moisés ní cáhá<sup>n</sup> ndíi yuhu-gá núú-yu, dico cùtnáhá ní cáhá<sup>n</sup> ndíi-gá ndíi Àbrahám chi núú méé núú <sup>20</sup> ñi ndíi ndíi-gá ní xáha<sup>n</sup>-gǎ xii ndíi nàcuáa cada-gá.

#### *Nàcuáa ndùu nchaa tnúhu ní chídó tnùní ndíi Moisés*

<sup>21</sup> Te nchaa nàcuáa ní chídó tnùní ndíi Moisés, ndíi nchaa nàcuáa ní xáha<sup>n</sup> Yá Ndiöxí xii ndíi Àbrahám cada-gá, ñá túú dàquee tìhú tnáhá-xí. Te núu dícó naníhí tàhú ñáyiu nchicú<sup>n</sup> nihnu nchaa nàcuáa ní cáhá<sup>n</sup> ndíi Moisés ñá te cudíú-yu núú-gǎ cuendá-ni sá nchicú<sup>n</sup> nihnú-yu nchaa nàcuáa ní cáhá<sup>n</sup> ndíi ñi cùu. <sup>22</sup> Te núú tütú Yá Ndiöxí càchí-xi: “Nchaa nchòhó ñáyiu ndècu ñuyíú ndécú cuéchi-ndo”, duha càchí-xi. Te duca<sup>n</sup> cáhá<sup>n</sup>-xi cuendá quíndáá iní-ó Xítoho Jesucristú, te naníhí tàhú-ó chi duca<sup>n</sup> ñi cachí Yá Ndiöxí cada-gá.

<sup>23</sup> Te cùtnáhá vátá cùndècu ndíi-gá-ó tnúhu Xítoho Jesucristú, te nchicú<sup>n</sup> nihnu-o nchaa nàcuáa ní cáhá<sup>n</sup> ndíi Moisés, te ñi cùtnuní iní-ó sǎ ìo ndècu cuéchi-o ñi cùu. Te

duca<sup>n</sup>-ni nchìcú<sup>n</sup> nihnu-o ndéé ní sáá nduu nǐ quexìo Xítohó Jesucristú ñuyíú-a, te ní sándáá iní-ó-gă. <sup>24</sup> Te nchaa tnúhu sá nǐ chídó tnùnì ndí Moisés ní sanu ichi ñaha-xi xii-o nacuaá cada-o cùndecu-o, te duca<sup>n</sup>-ni sànu ichi ñaha-xi xii-o ndéé ní sáá nduu ní quexìo Xítohó Jesucristú ñuyíú-a. Te duca<sup>n</sup> nǐ cuu cuendá quíndáá iní-ó-gă, te vá cùndècu-gá cuèchi-o núú Yă Ndiòxí. <sup>25</sup> Te vitna ní ngúndecu ndihì-o tnúhu Xítohó Jesucristú, te ñá túú-gă xínì ñuhu-xi canu ichi ñaha nchaa tnúhu ní chídó tnùnì ndí Moisés.

<sup>26</sup> Te vitna tnàhá nchaa nchòhó cúú-ndó dèhe Yă Ndiòxí, chi ní sándáá iní-ndó Xítohó Jesucristú. <sup>27</sup> Te nchòhó ní sandute-ndo dàtná càchì-gá, te ndècu-ndo ndihì-gá, te quide-ndo nchaa nacuaá ní cáhá<sup>n</sup>-gá ndécú-ndó, te ío ndècu yǐñuhu-ndo núú Yă Ndiòxí dàtná ndécú yǐñuhu mee Xítohó Jesucristú. <sup>28</sup> Te vitna ì<sup>n</sup>-ni cùu-o nchaa-o ndecu-o ndihì Xítohó Jesucristú cuèi cùu-o ñáyiu israhél àdi ñá túú cùu-o, te cuèi cùu-o ñáyiu ñá túú tnàhí dàñá quee núú chíú<sup>n</sup> pàtróó<sup>n</sup>-xi àdi cuu-o ñáyiu dàñá queé núú chíú<sup>n</sup> pàtróó<sup>n</sup>-xi, te cuèi téte te cuèi ñadihí ì<sup>n</sup>-ni cùu-o nchaa-o ndecu-o ndihì Xítohó Jesucristú. <sup>29</sup> Te nchòhó ndécú ndihì-ndo Xítohó Jesucristú, te cùu-ndo datná cue ñani tnàhá ndí Àbrahám, chi ní nduu táhú-ndó cùndecu váha-ndo núú Yă Ndiòxí dàtná ní nduu táhú ndí-á<sup>n</sup> ndécú váha ndí núú-gă, te duca<sup>n</sup> chi mee-gă duca<sup>n</sup> nǐ cachì-gá cunduu.

#### 4

<sup>1</sup> Te nchòhó xínì-ndó sǎ ì<sup>n</sup> té lǐhli chi vátá nǎgá cuañaha tátá-dé cuu cuendá-dé chi lǐhli-dé, te ì<sup>n</sup>-ni cùu-dé ndihì téte xínu cuechi, dico na sáá nduu cuèhnu-dé, te nduu táhú-dé nchaa sá ndécú ndihì tátá-dé. <sup>2</sup> Te xító-yu té lǐhli-á<sup>n</sup> sáhnú-dé ndéé sáá nduu nǐ cachì tátá-dé sá cuañaha-dé sá ndúú táhú-dé. <sup>3</sup> Te duca<sup>n</sup> sátnahá-xi cùu nchoo, chi nchìcú<sup>n</sup> nihnu-o nchàa nacuaá ní cáhá<sup>n</sup> cue téte ní xíndecu ndéé sanaha ni cùu. <sup>4</sup> Te ní sáá nduu nǐ quide Yă Ndiòxí dàtná ní cachì-gá, te ní tendaha-gă Déhe-gă

Xítohó Jesucristú ní quixi-gă ñuyíú-a, ní dácácú ñaha ì<sup>n</sup> ñadihí te ní cuu-gá ñáyiu, te ní quide-gă nchaa nacuaá ní cáhá<sup>n</sup> ndí Moisés. <sup>5</sup> Te duca<sup>n</sup> nǐ tendaha Yă Ndiòxí Déhe-gă cuendá sá vǎ cànchìcú<sup>n</sup> nihnu-gá-ó nchàa nacuaá ní chídó tnùnì ndí Moisés cuendá duca<sup>n</sup> te cuu-o dèhe Yă Ndiòxí.

<sup>6</sup> Te Yă Ndiòxí ní taxi-gă Espiritú Déhe-gă Xítohó Jesucristú ndécú ndihì-ndo chi cùu-ndo déhe-gă, te Espiritú-á<sup>n</sup> chíndèe ñaha-xi xii-ndo te càchì-ndó: “Yòhó Dútú Ndiòxí cúú-n Tátá méé-ndí”, duha càchì-ndó. <sup>7</sup> Te xiǎ<sup>n</sup> cùtnùnì iní-ndó sǎ cúú-ndó dèhe Yă Ndiòxí vitna, te ñá túú-gă cúú-ndó dàtná cue ñáyiu ñá túú tnàhí dàñá quee núú chíú<sup>n</sup> pàtróó<sup>n</sup>-xi. Te sá dúcá<sup>n</sup> cùu-ndo déhe-gă, te Xítohó Jesucristú taxi-gă nchaa sá vǎha ní cachì Yă Ndiòxí nduu táhú-ndó.

*Té Pǎblú ío sàni iní-dé cuendá nchaa ñáyiu ndècu ichi Xítohó Jesucristú*

<sup>8</sup> Te cùtnàhá vátá quíndáá-gá iní-ndó tnúhu Yă Ndiòxí ní xínu cuechi-ndo núú nchàa sá càchì-yu cùu ndiòxí te ñá ndáá sá ndiòxí cúú-xí. <sup>9</sup> Te vitna nchòhó cáhá<sup>n</sup> ndihì-ndo Yă Ndiòxí, te mee-gă xínì ñáhá-gă xii-ndo, te ñá túú ndùu váha-xi nanchòcáva iní-ndó càda tucu-ndo nacuaá ní xóo cada-ndo díhna, chi nchaa xiǎ<sup>n</sup> ñá túú vèdana nàndíhì-xi. <sup>10</sup> Te nchòhó cǎnehe íi-ni-ndo ndùu cachì-ndó íi, te diu-ni duca<sup>n</sup> quide-ndo dava yoó ndihì dava cuíá, te ndi tnàhá nduu sàcòo vico diu-ni duca<sup>n</sup> quide-ndo cǎnehe íi-ndó ndùu-á<sup>n</sup>. <sup>11</sup> Te ío sàni iní-í cuendá-ndó, chi na cuáhá<sup>n</sup> àú<sup>n</sup> nǎ cuu ní dánèhé ñàhá-í xii-ndo tnúhu Yă Ndiòxí.

<sup>12</sup> Te cáhá<sup>n</sup> ndàhú-í núú nchòhó ñáyiu ndècu ndihì-í ichi Xítohó Jesucristú sá cádá-ndó dàtná quídè-í ñá túú nchìcú<sup>n</sup> nihnu-í nchaa tnúhu ní cáhá<sup>n</sup> ndí Moisés, chi yúhú quídè-í vitna dàtná ní quide nchòhó ñá túú ní cànchìcú<sup>n</sup> nihnu-ndo nacuaá ní cáhá<sup>n</sup> ndí. Te cùtnàhá ní xíndecu ndihì ñaha-í xii-ndo nǐ quide váha ñaha-ndo xii-í. <sup>13</sup> Te sa ñaha-ndo sá cùtnàhá ní cáhá<sup>n</sup>-í tnúhu Xítohó Jesucristú núú-ndó ndéé díhna ní cuhú-í, núú xiǎ<sup>n</sup> ní xíndecu ndihì ñaha-í xii-ndo nǐ



cáhá<sup>n</sup>-í tnúhu-gá núú-ndó. <sup>14</sup> Te cuéhé sã ní tnahá-í-á<sup>n</sup> cúú-xí ì<sup>n</sup> cuéhé sã vã yõ tnahí cundee ìní-xi cundecu ndihí ñaha xì-í ní cùu, dico nchòhó chi ío váha ní cáhá<sup>n</sup> ndihí ñaha-ndo xì-í, te ñá túú ní sàni cuehé ní sàni duha iní-ndó cuèndá-í, te ní cáhá<sup>n</sup> ndihí ñaha-ndo xì-í dàtná tnúhu sã yùhú cùú-í ì<sup>n</sup> espíritú xínú cuèchi núú Yã Ndiõxí àdi datná méé Xítóhó Jesucristú. <sup>15</sup> ¿Te ná ní tnahá-ndó núu ñá túú-gã sání vãha iní-ndó cuèndá-í dàtná ní xóo cada-ndo ndéé díhna ío váha ní xóo cani iní-ndó cuèndá-í? Te na càchí tnúhu ndáá-í xii-ndo sã ío ní cuu iní ñáhá-ndó xì-í cùtnhá ní xíndecu ndihí ñaha-í xii-ndo, te nãndi sã ndécú ndihí-ndo taxi-ndo xii-í ní cùu, te núu dicó sã cúú te ndéé tìnùu-ndo tava-ndo te taxi-ndo xì-í ní cùu. <sup>16</sup> ¿Te náa cùu úhú iní ñáhá-ndó xì-í vitna cuèndá sã cáhá<sup>n</sup>-í tnúhu ndáá tnúhu Yã Ndiõxí núú-ndó-ã<sup>n</sup>?

<sup>17</sup> Te ío ñáyiu ío váha cáhá<sup>n</sup> ndihí ñaha xì-ndo, dico ñáyiu-á<sup>n</sup> ñúhú cuéhé iní-yu, chi cuìní-yu sã vã cúú-gã cáhá<sup>n</sup> ndihí tñaha-o, chi mee-nã-yu cundecu ndihí-ndo cuìní-yu. <sup>18</sup> Te váha quide ñáyiu cáhá<sup>n</sup> ndihí ñaha xì-ndo ndihí tnúhu yíñùhu, te núu cuìní-yu cada-yu ì<sup>n</sup> sã vãha sã cúú-xí-ndó. Te duca<sup>n</sup>-ni na càdá-yu cuèi òré ñá túú ndècu ndihí ñaha-í xii-ndo. <sup>19</sup> Te nchòhó ñáyiu ní sanu ichi-í ichi Xítóhó Jesucristú càchí tnúhu-í xii-ndo sã quidé-xí iní-í dàtná quidé-xí iní ì<sup>n</sup> ñadìhí ñaha sa ní tnahá òré cacu déhe-xi, te duca<sup>n</sup> quide-xi iní-í, chi ío vãi sani iní-í cuèndá-ndó dàtná ní xóo cada-í ndéé díhna, te duca<sup>n</sup>-ni càdá-í ndéé ná sãá nduu càda-ndo nchaa nacuaá cáhá<sup>n</sup> Xítóhó Jesucristú. <sup>20</sup> ¿Te ío váha cada-xi te núu dicó tnavíi sa ndècu ndihí ñaha-í xii-ndo cuèndá cáhá<sup>n</sup>-í núú-ndó nacuaá cada-ndo, te ñá cùtnùní iní-í nása cada-í cuèndá-ndó!

#### *Cuèndá ndíi Àgár ndihí ndíi Sãrá*

<sup>21</sup> Te nchòhó ñáyiu cuìní canchicú<sup>n</sup> nihnu nchaa tnúhu ní cáhá<sup>n</sup> ndíi Moisés, ¿náa ñá túú tècú tnùn-ndó nacuaá cáhá<sup>n</sup>-xi tnúhu ní chídó tnùn-ndó ndíi? <sup>22</sup> Chi càchí tnúhu ní chídó tnùn-ndó ndíi-á<sup>n</sup> sã ndíi Abrahám ní xíndecu úú déhe ducu<sup>n</sup> ndíi, te ì<sup>n</sup>-dé ní cuu

déhe ndíi ndihí ñadìhí méé ndíi ndíi Sãrá, te ìngá-dé ní cuu-dé déhe ndíi ndihí ì<sup>n</sup> ndíi ní xinu cuechi nũ-yu ní xínani Àgár. <sup>23</sup> Te sã dúcá<sup>n</sup> ní cacu déhe ndíi Sãrá, chi mee Yã Ndiõxí ní cundáhú iní ñáhá-gã xii-a<sup>n</sup>, chi duca<sup>n</sup> ní cachí-gá cada-gá. Dico ndíi ní xinu cuechi-ã<sup>n</sup> chi duca<sup>n</sup> tñahí ní nduu táhú ndíi-á<sup>n</sup> sã cóo dèhe ndíi. <sup>24</sup> Te na càchí tnúhu-í xii-ndo nã cúú sã nánèhé ndí nduú cue ndíi dèhí-á<sup>n</sup>. Te úú xito ní cáhá<sup>n</sup> Yã Ndiõxí nacuaá cada-gá, te ì<sup>n</sup> ndíi-á<sup>n</sup> nánèhé ndíi nacuaá ní cáhá<sup>n</sup> Yã Ndiõxí xito díhna nuu, te ìngá tucu ndíi-á<sup>n</sup> nánèhé ndíi nacuaá ní cáhá<sup>n</sup> tucu-gá xito cùu uú. Te ndíi Àgár-á<sup>n</sup> nánèhé ndíi nacuaá ní xáha<sup>n</sup> Yã Ndiõxí xii ndíi Moisés yucu Sinái cada ñáyiu, te nchaa ñáyiu nchicú<sup>n</sup> nihnu nchaa tnúhu-á<sup>n</sup> cúú-yu dàtná déhe ndíi Àgár téé ní xinu cuechi, chi téé-á<sup>n</sup> ñá túú tñahí ní dàñá-dé quee-dé núú chíú<sup>n</sup> pàtróó<sup>n</sup>-dè, te duca<sup>n</sup> sãtnahá-xi cùú-yu chi nchicú<sup>n</sup> nihnú-yu nchaa nacuaá ní xáha<sup>n</sup> Yã Ndiõxí xii ndíi Moisés. <sup>25</sup> Te tnúhu Àgár quée-xi: Yucu Sinái, te yucu-á<sup>n</sup> yíndèhu-xi nació<sup>n</sup> Àrabíá. Te ndíi Àgár-á<sup>n</sup> nánèhé tucu ndíi cue ñáyiu ndècu ñúú Jerusalén, chi ñáyiu-á<sup>n</sup> ndécú-ní-yu dàtná ní xíndecu ndíi Àgár ndihí déhe ndíi, chi cue ndíi-á<sup>n</sup> ní cuu cue ndíi ñáyiu ñá túú tñahí ní dàñá quee núú chíú<sup>n</sup> pàtróó<sup>n</sup>-xi, te duca<sup>n</sup> sãtnahá-xi cùu ñáyiu-á<sup>n</sup> chi nchicú<sup>n</sup> nihnu-ní-yu nchaa nacuaá ní cáhá<sup>n</sup> ndíi Moisés. <sup>26</sup> Dico nchoo ní nduu táhú-ó cùndecu-o ñúú Jerusalén sãá nũú ndécú Yã Ndiõxí, te vitna chi ñá túú-gã nchicú<sup>n</sup> nihnu-o nchaa nacuaá ní cáhá<sup>n</sup> ndíi Moisés. <sup>27</sup> Te duha cáhá<sup>n</sup>-í, chi núú tütú Yã Ndiõxí càchí-xi:

Yòhó ñaha ní nduu táhú vã cóo dèhe-xi ní cùu, vitna cana saa-n sã cúdíi ìní-n cuèi vátá quìní-gá-n nása càcu ì<sup>n</sup> landú.

Te cuèi ní cuu táhú-n sã vã cóo dèhe-n ní cùu dico ío-gá titní déhe-n còo dacúxí xíchí ní cuu táhú tñahí sã cóo dèhe-xi.

Duha càchí-xi núú tütú-gá. <sup>28</sup> Te nchoo cuè ñáyiu ndècu ichi Xítóhó Je-



sucristú vitna cùu-o datná ndíi Isàác, chi ndíi-á<sup>n</sup> nǐ cacu ndíi, chi mee Yǎ Ndiǒxí ní cachí-gá sá cǎcú ndíi. Te duca<sup>n</sup> sǎtnahá-xi cùu nchoo chi ní nduu-o dēhe-gá vitna chi duca<sup>n</sup> nǐ cachí tucu-gá cunduu. <sup>29</sup> Te dēhe ndíi Àgár ní nduu táhú tnahí ndíi sá cǎcú ndíi ñuyíú-a, te ndíi-á<sup>n</sup> nǐ cuu úhú iní ndíi ndíi Isàác, te ndíi Isàác-á<sup>n</sup> chi Espíritú Yǎ Ndiǒxí ní quide ní cacu ndíi. Te duca<sup>n</sup> sǎtnahá-xi cùu vitna, chi nchaa nchoo ñáyiú ndècu ndíi Espíritú Yǎ Ndiǒxí cúú úhú iní ñáhá ñáyiú xii-o. <sup>30</sup> Te núú tütú Yǎ Ndiǒxí cǎchí-xi: “Chí nácuíú<sup>n</sup> xíchí xínú cuèchi ndíi dēhe-xi na nùhú-yu, chi dēhe xíchí xínú cuèchi-á<sup>n</sup> ñà túú nǎ níhí-dě nduu táhú-dě, chi mee-ni dēhe ñaha ndècu vehe-xi nduu táhú-dě sá cuǎñaha tátá-dě”, duha cǎchí-xi núú tütú-gá. <sup>31</sup> Te nchoo cuè ñáyiú ndècu ichi Xítóhó Jesucristú ñá túú-gá cúú-ó datná cúú dēhe ndíi ní xinu cuechi-ǎ<sup>n</sup>, chi ní cuu-o vitna datná cúú ndíi ní nduu táhú nchaa sá ní sǎñaha tátá-xi-á<sup>n</sup>. Te duca<sup>n</sup> nǐ cuu, chi Yǎ Ndiǒxí ní dǎcǎcu ñaha-gǎ xii-o cuendá sá vǎ cǎnchícú<sup>n</sup> nihnu-gá-o nchàa nacuáa ní cáhá<sup>n</sup> ndíi Moisés.

## 5

### *Canchicú<sup>n</sup> nihnu-ni-o ichi Xítóhó Jesucristú*

<sup>1</sup> Te Xítóhó Jesucristú ní quide-gá nǎcuáa vǎ cǎní iní-ó sǎ nǎnǐhí tǎhú-ó te núu na cǎnchicú<sup>n</sup> nihnu-o nǎcuáa ní cáhá<sup>n</sup> ndíi Moisés, te díu-ni duca<sup>n</sup> cǎní iní-ó cundecu-o te vǎ ngǎo cǎní iní-ó sǎ nǎnǐhí tǎhú-ó te núu na cǎnchicú<sup>n</sup> nihnu-o càda-o nacuáa ní cáhá<sup>n</sup> ndíi, chi núu duca<sup>n</sup> na càda-o te ío dandóho-o mee-o datná ní xóo ndoho-o cǔtnáhá vátá cundècu-gá-ó ìchi-a.

<sup>2</sup> Te yúhú té Pǎblú cuíní-í sá cundédóho-ndo ñ<sup>n</sup> tnúhu na cǎhá<sup>n</sup>-í-a. Te núu nchòhó cuǎha-ndo seǎá ñ<sup>n</sup>-ndo cuendá sá sǎndáá iní-ndo nǎcuáa ní cachí ndíi Moisés cada-ndo, te núu duca<sup>n</sup> na càda-ndo ña, te àú<sup>n</sup> nǎ cuu ndècu-ndo ichi Xítóhó Jesucristú te núu duca<sup>n</sup>. <sup>3</sup> Te datná ní cachí-í xii-ndo, te díu-ni duca<sup>n</sup> cǎhá<sup>n</sup> tucu-í vitna sá núu nděda-ni càa ñ<sup>n</sup> té na cuǎha-dé seǎá ñ<sup>n</sup>-dé, te xini ñuhu-xi sá dǎcuítí tǎú-dé cada-dé

nchaa nǎcuáa ní cáhá<sup>n</sup> ndíi Moisés. <sup>4</sup> Te nchaa nchòhó ñáyiú sǎni iní sá ñà túú-gǎ cuèchi-xi ndècu núú Yǎ Ndiǒxí cuendá sá nchícú<sup>n</sup> nihnu-ndo nchàa nacuáa ní cáhá<sup>n</sup> ndíi Moisés, ñá túú-gǎ ndécú-ndó ndíi Xítóhó Jesucristú, te ni Yǎ Ndiǒxí ñá túú-gǎ cundáhú iní ñáhá-gǎ xii-ndo càda váha ñaha-gǎ. <sup>5</sup> Dico nchaa nchoo ñáyiú sǎndáá iní ñáhá xii-gǎ cùdúu-o núú-gǎ, chi chindee ñaha Espíritú-gǎ xii-o, te ndètu cahnu-ná-ó sǎá nduu cǔñaha núú Yǎ Ndiǒxí xii-o sǎ cúdúu-o núú-gǎ. <sup>6</sup> Te nchoo cuè ñáyiú ndècu ndíi Xítóhó Jesucristú ñ<sup>n</sup>-ni quide-xi cuéi na cuǎha-o seǎá ñ<sup>n</sup>-o àdi vǎ cuǎha-o, chi ñá túú chindee ñaha-xi xii-o nacuáa cundecu váha-o ndíi-gǎ. Te ñ<sup>n</sup>-ni díi-ni sá xini ñuhu-xi quindáá iní-ó Xítóhó Jesucristú, te núu duca<sup>n</sup> na càda-o te cuu iní-ó cuè tnahá ñáyiú-o.

<sup>7</sup> Te nchòhó ío váha quide-ndo ndècu-ndo ichi Yǎ Ndiǒxí ní cùu, te vitna cǔñúhu-í sá ñà túú-gǎ sǎndáá váha iní-ndó tnúhu-gǎ, te duca<sup>n</sup> quide-ndo chi ndècu ñáyiú sǎnu ichi ñaha xii-ndo ingá ichi. <sup>8</sup> Te ñá díú Yǎ Ndiǒxí Yaá ní cáhá<sup>n</sup> ñáhá xii-ndo duca<sup>n</sup> ni cachí-gǎ cada-ndo sǎ vǎ quindáá-gǎ iní-ndó tnúhu-gǎ. <sup>9</sup> Te nchòhó xini-ndó sǎ núu luha levadùrá ná quíhu yuchi te dǎndaa-xi. Duca<sup>n</sup> sǎtnahá-xi cùu ñáyiú dǎndáhú ñáhá xii-ndo, chi cuíní-yu dǎcuíta nihnu ñáhá-yu xii-ndo nchàa-ndo. <sup>10</sup> Te yúhú cútnúni ndáá iní-í sá Xítóhó Jesucristú chindee ñaha-gǎ xii-ndo cuendá sá ñá túú nǎgǎ tnúhu quindáá iní-ndó, dico nchaa ñáyiú duca<sup>n</sup> dǎndáhú ñáhá xii-ndo nacháhu-yu núú Yǎ Ndiǒxí nchaa sá quidě-yu cuéi náí-gǎ ñáyiú cùu-yu.

<sup>11</sup> Te cǎchí tnúhu-í xii nchòhó ñáyiú ndècu ndíi-í ichi Yǎ Ndiǒxí sá núu dícó dǎnehé-ni-í ñáyiú sá cuǎha-yu seǎá ñ<sup>n</sup>-yu datná ní cachí ndíi Moisés ñá, te vǎ yǎo cuu úhú iní ñáhá xii-í ní cùu, te ni vǎ túu úhú iní-yu cuendá sá nǐ xihí Xítóhó Jesucristú núú cùrúxí ní cùu. <sup>12</sup> Te nchaa ñáyiú dǎsatú iní ñáhá xii-ndo sǎ cuǎha-ndo seǎá ñ<sup>n</sup>-ndo,

te váha-gá sá ná cáďă-yu mée-yu ñ<sup>n</sup> tnúndòho, te ñá díú sá dúcá<sup>n</sup> cànuichi ñaha-yu xii-ndo cùndecu-ndo.

<sup>13</sup> Te nchòhó ñáyiú ndècu ndìhi-í ichi Xítóhó Jesucristú ñu-gá ní tau-nihnu ñaha-gă xii-ndo cuendá sá vă cáncicú<sup>n</sup> nihnu-gá-ndó nchàa nacuáa ní cáhă<sup>n</sup> ndíi Moisés, dico vá cáni iní-ndó sá sá dúcá<sup>n</sup> ñi taunihnu ñaha-gă xii-ndo, te cuu-ñi cada-ndo nãndi sá cuèhé sá dúhá vëxi iní-ndó, dico cuu iní tnáhă-ndó ñ<sup>n</sup> ñ<sup>n</sup>-ndo te chindee tnàha-ndo. <sup>14</sup> Chi duca<sup>n</sup> càhă<sup>n</sup> Yă Ndiöxí sá cúú iní-ó cuè tnaha ñáyiú dàtná cúú iní-ó mée-o. Te núu duca<sup>n</sup> na càda-o, te quide-o nchaa nacuáa tàú-xi cada-o dàtná càhă<sup>n</sup> nchaa tnúhu ní chídó tnùní ndíi Moisés. <sup>15</sup> Te núu nchòhó cúú úhú iní tnáhă-ndó ndècu-ndo, te ñá túú quide váha-ndo te núu duca<sup>n</sup> quide-ndo, dico yúhú càchí-í sá vă dúcá<sup>n</sup>-gă cada-ndo cùndecu-ndo cuendá sá vă dăcuíta nihnu tnàha-ndo.

*Nàcuáa sàni iní ñáyiú ndècu ichi cuehé ichi duha ndìhi nàcuáa sàni iní ñáyiú ndècu ndìhi Espíritú Yă Ndiöxí*

<sup>16</sup> Te na càchí tnúhu-í xii-ndo sá cáďă-ndó nchàa nacuáa cuini mée Espíritú Yă Ndiöxí cada-ndo, te duca<sup>n</sup> te vá cáni-gă iní-ndó càda-ndo nãndi nchaa sá cuèhé sá dúhá sàni iní mée-ndó. <sup>17</sup> Chi nchaa xiă<sup>n</sup> ñá túú tnàhá tnúhu-xi ndìhi Espíritú Yă Ndiöxí. Te ñu-ñi duca<sup>n</sup> quide Espíritú Yă Ndiöxí, chi ñá túú tnàhá iní-xi nchaa sá cuèhé sá dúhá sàni iní-ndó. Te sá dúcá<sup>n</sup> ñá túú tnàhá tnúhu tnàha-xi xiă<sup>n</sup> ñá túú ñihí ndée-ndó càda-ndo ñ<sup>n</sup> sá văha sàni iní-ndó càda-ndo. <sup>18</sup> Te núu quide-ndo nchaa nacuáa sànu ichi ñaha Espíritú Yă Ndiöxí, te ñá túú-gă táxi tnùní ñáhă nchàa tnúhu ní chídó tnùní ndíi Moisés xii-ndo.

<sup>19</sup> Te nchaa ñáyiú xini-yu nchaa nàcuáa quide ñáyiú quide cuehé quidé ñuha. Te duha quidé-yu: Cue téé càhă<sup>n</sup> ndìhi-güedé ñáyiú ñihí te ñá díú ñàdihí-güedé cúú-yu, te ñu-ñi duca<sup>n</sup> xiquide cue ñáyiú ñihí, te nãndi-gă nchaa sá cuèhé sá dúhá cuăhá<sup>n</sup> véxi-yu quidé-yu. <sup>20</sup> Te quide cahnú-yu nchaa sá càchí-yu cùu

ndiöxí te ñá ndàá sá ndiöxí cúú-xí, te quide nduu tnahă-yu, te cùu úhú iní tnáhă-yu, te nàá-yu, te cùu cuiñú tnáhă-yu, te ío yáchí cúdeñ<sup>n</sup>-yu, te ndúcú-yu mee-ñi sá cúú-xí mée-yu, te ñá túú cùu ñ<sup>n</sup>nuú-yu cundecú-yu, te quide ñ<sup>n</sup> tnahă-yu. <sup>21</sup> Te cùu cuedú iní-yu nchaa sá ndécú ndìhi dava-gă-yu, te sàhni tnahă-yu, te ío quihú-yu, te ndí cuu ndí cuú-yu quidé-yu nchaa sá cuèhé sá dúhá, te nãndi-gă nchaa sá cuèhé sá dúhá quidé-yu. Te sa càchí tnúhu-í xii-ndo sá ncháá ñáyiú duca<sup>n</sup> xiquide vá ndúú tãhú-yu cundecú-yu núú ndécú Yă Ndiöxí táxi tnùní-gă.

<sup>22</sup> Dico Espíritú Yă Ndiöxí chindèe ñaha-xi xii-o cuu iní tnáhă-ó, te cúdeñ<sup>n</sup> iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tnáhă-ó, te quide ndáá-ó ndècu-o. <sup>23</sup> Te ndàhú iní-ó, te quide-o nchaa nacuáa tàú-ó càda-o, te nchaa xiă<sup>n</sup> chindèe ñaha Espíritú Yă Ndiöxí quidé-ó, te núu duca<sup>n</sup> quide-o, te vá yóo ñ<sup>n</sup>-gă cáhă<sup>n</sup> sá ñá túú quide váha-o ndècu-o. <sup>24</sup> Te nchoo cuè ñáyiú ndècu ndìhi Xítóhó Jesucristú, sa nàha-o sá ñi xihí-gă núú cùrúxí sá cuendá-ó, núu xiă<sup>n</sup> duu<sup>n</sup> duu<sup>n</sup> ní dáñă-ó nchàa ichi cuehé ichi duha, te ñá túú-gă táxi tnùní ñáhă ñi ñ<sup>n</sup> sá cuèhé sá dúhá sá ñi xóo cani iní-ó ní cùu. <sup>25</sup> Te vitna ní ngúndecu ndìhi-o Espíritú Yă Ndiöxí chindèe ñaha-xi, te xini ñuhu-xi sá cáďă-ó nàcuáa sànu ichi ñaha Espíritú-gă cada-o.

<sup>26</sup> Te vá cáďă càhnu-o mee-o, te vá ndúcú-ó plètú, te ñi vă cúú cuedú iní-ó sá ndécú ndìhi tnaha ñáyiú-o.

## 6

*Chindee tnàha-o ñ<sup>n</sup> ñ<sup>n</sup>-o*

<sup>1</sup> Te nchòhó ñáyiú ndècu ndìhi-í ichi Xítóhó Jesucristú càchí tnúhu-í xii-ndo sá ñu ñ<sup>n</sup> ñáyiú ndècu ndìhi-ndo ichi-gă ní quidé-yu ñ<sup>n</sup> sá ñá túú tàú-yu cáďă-yu núú-gă, te nchòhó ñáyiú quide váha ndècu ndìhi Espíritú Yă Ndiöxí cáhă<sup>n</sup>-ndó ñuho cue ñáyiú duca<sup>n</sup> xiquide-á<sup>n</sup> cuendá nucunu ichí-yu, te vii vii cáhă<sup>n</sup> ndìhi-ndó-yu,

te ío coto-ndo mèe-ndo cuendá sá vǎ cáda-ndó ñ<sup>n</sup> sá ñá túú tàú-ndó càda-ndo núú-gǎ. <sup>2</sup> Te ío chindee tnàha-ndo, te cuáha tnàha-ndo tnúhu ndee ìní cundecu-ndo cuendá nchaa sá yáha-ndo. Te núú duca<sup>n</sup> na càda-ndo, te quide-ndo nchaa nacuaá ní cáhá<sup>n</sup> Xítohó Jesucristú cada-o.

<sup>3</sup> Te núú ío ñ<sup>n</sup>-ndo càchí-ndó sǎ ño váha quide-ndo ndecu-ndo ichi Yá Ndióxi te ñá ndàá ñá, te dicó dándàhú-ndó mèe-ndo sá dúcá<sup>n</sup> quide-ndo. <sup>4</sup> Te ndi dí<sup>n</sup> ndi dí<sup>n</sup> càda cuendá-ndó nñu quide váha-ndo ndècu-ndo àdi ñá túú quide váha-ndo. Te núú quide váha-ndo ndècu-ndo ña, te cudí<sup>n</sup> ìní-ndó sǎ cúú-xí mèe-ndo, te vá cání ìní-ndó sǎ quidé váha-gá-ndó dàcúúxí dǎva-gá-yu. <sup>5</sup> Chi tàú-ó sǎ ndi dí<sup>n</sup> ndi dí<sup>n</sup> càda cuendá-ó nacuaá ndècu-o.

<sup>6</sup> Te nchaa nchòhó ñáyíu dàcuaha tnúhu Yá Ndióxi chindee-ndo cuè tée dàcuaha ñaha xii-ndo tnúhu-gǎ cuáñaha-ndo nǎndi sá xíní ññu-güedé.

<sup>7</sup> Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yá Ndióxi, chi nchòhó xíní-ndó sǎ nñu na càda váha-o cùndecu-o, te cùu-xi ñ<sup>n</sup> sá váha sá cúú-xí-ó, dico núú vá cáda váha-o ña, te ío ndoho-o te núú duca<sup>n</sup> na càda-o. <sup>8</sup> Te núú quide-o nchaa sá cuèhé sá dúhá sàni ìní-ó, te ññu-ni xǎ<sup>n</sup> dàcuíta nihnu ñaha-xi xii-o, dico núú quide-o nchaa nacuaá sànu ichi ñaha Espíritú Yá Ndióxi xii-o, te cundecu ndihi-o Yá Ndióxi ni caa ni quí<sup>n</sup>. <sup>9</sup> Te xini ññu-xi vá dáñá ndeé-ó càda váha-o cùndecu-o, te duca<sup>n</sup> te sáá nduu càda váha ñaha Yá Ndióxi xii-o, te núú vá ná túú ìní-ó càda váha-o cùndecu-o. <sup>10</sup> Te cada-o sǎ váha sá cúú-xí nchàa tnaha ñáyíu-o vitna ndecu-o ñuyíú-a, te ío-gǎ tàú-ó chindee-o cue ñáyíu ndècu ndihi-o ichi Xítohó Jesucristú.

### *Tnúhu ndéé núú ñí ndihi-ná*

<sup>11</sup> Te cundehe-ndo sǎ ndǎa ndǎa lètrá tée-í núú tütú-a sá cúú-xí-ndó.

<sup>12</sup> Te nchaa ñáyíu quide yicá sá cuáha-ndo seña ññi-ndo dàtná ní cachí ndí Moisés, ñáyíu-á<sup>n</sup> cúú-yu ñáyíu cuení cudíu núú tnàha ñáyíu-xi.

Te duca<sup>n</sup> quidé-yu cuendá sá vǎ ndóhó-yu cuendá nchaa tnúhu sá dánèhé ñáhá sǎ ñí xíhí Xítohó Jesucristú núú cùrúxí. <sup>13</sup> Te ni ñáyíu sa ní ngúndecu ndihi seña ññi-xi ñá túú quidé-yu nchaa nacuaá ní cáhá<sup>n</sup> ndí Moisés, dico mèe-yu cuení-yu sá cuáha-ndo seña ññi-ndo. Te duca<sup>n</sup> quidé-yu chi quide cahnú-yu mèe-yu núú nchàa dǎva-gǎ ñáyíu. <sup>14</sup> Te yúhú chi ñá túú quide cahnu-í mèe-í cuendá nchaa sá quidé-í, chi mee-ni sǎ ño cùu váha ìní-í sá Xítohó Jesucristú ní xíhí-gǎ núú cùrúxí cuendá-ó. Te ññu cuendá sǎ ñí xíhí-gǎ ñá túú-gǎ ndécù-í ichi cuèhé ichi duha, te ni ñá túú-gǎ táxí tnùní ñáhá ni ñ<sup>n</sup> sá cuèhé sá dúhá xii-í. <sup>15</sup> Te ñá túú ná chindèe ñaha-xi xii-o cuéi na cuáha-o seña ññi-o àdi vá cuáha-o, chi ndècu ndihi-o Xítohó Jesucristú, te ní nduu-o dàtná ñ<sup>n</sup> ñáyíu saa, te xǎ<sup>n</sup> cúú-xí sǎ ño-gǎ xíní ññu-xi. <sup>16</sup> Te xicá<sup>n</sup> táhù-í núú Yá Ndióxi sá ncháá nchòhó ñáyíu quide nchaa nacuaá cáhá<sup>n</sup>-í-a cundecu nahi-ndo, nchòhó ñáyíu cùu cuendá Yá Ndióxi dàtná ñáyíu isràel chi ñáyíu-á<sup>n</sup> ñí cachí-gǎ sá cúú cuendá-gǎ. Te mee-gǎ ío cundàhú ìní ñáhá-gǎ xii-ndo chindee ñaha-gǎ.

<sup>17</sup> Te není vitna cuení-í sá vǎ yóo ññi-gǎ chidácá nihnu ñaha xii-í cuendá chiú<sup>n</sup> quide-í, chi yayacá<sup>n</sup> sa ní nduu tìlòhó ññi-í cuendá sá ndóhò-í cuendá Xítohó Jesucristú.

<sup>18</sup> Te nchòhó ñáyíu ndècu ndihi-í ichi Xítohó Jesucristú xicá<sup>n</sup> táhù-í núú-gǎ sá ño na chindee ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cáda ndèe ìní-ñá vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ ÉFESÚ

*Té Păblú cádüha-dé tutú quihi<sup>n</sup> ndaha ñáyiu xñdecu ichi Xítoho Jesucristú ndécú ñuú Éfesú*

<sup>1</sup> Yúhú té Păblú ní tendaha ñaha Yá Ndiöxí cáhá<sup>n</sup>-í tnúhu Xítoho Jesucristú núú ñáyiu, chi duca<sup>n</sup> ñí cachí Yá Ndiöxí cunduu, te vitna càdüha-í tutú-a cuendá daquixi-í ndaha nchaa nchòhó ñáyiu cùu cuendá Yá Ndiöxí xñdecu ñuú Éfesú, te diu-ni nchòhó cúu-ndó ñáyiu sàndáá iní ñáhá xì Xítoho Jesucristú.

<sup>2</sup> Te xicá<sup>n</sup> táhù-í núú Dütú Ndiöxí Yaá cúu Tátá-ó, ndihi núú Xítoho Jesucristú sá ná chindee chitúu ñaha-gă xii-ndo, te duca<sup>n</sup> ndi nduú-gá ná cádá te ío váha cuu iní-ndó cùndecu-ndo.

*Espíritú Yá Ndiöxí chindèe ñaha-xi xii-o chi ndècu ndihi-o Xítoho Jesucristú*

<sup>3</sup> Te cachí-ó sá ío càhnu cuu Yá Ndiöxí Yaá cúu Tátá Xítoho Jesucristú, te ndéé andi quide Yá Ndiöxí nchaa sá vâha sá cúu-xí-ó cuendá sá ndécú ndihi-o Espíritú-gá, te duca<sup>n</sup> quide-gá chi ndècu ndihi-o Xítoho Jesucristú.

<sup>4</sup> Te ndéé cútnàhá vátá ngăva-gá ñuyíú ñí cachí Yá Ndiöxí sá nchóó cùu-o ñáyiu cùu cuendá-gá, te duca<sup>n</sup> ñí cachí-gá sá cuendá Xítoho Jesucristú cuendá sá nchóó cùu-o ñáyiu ñá túú tnàhí ná cumání cundecu núú-gă, te duca<sup>n</sup> te vá cùndècu cuèchi-o. <sup>5</sup> Te Yá Ndiöxí ío cùu iní ñáhá-gă xii-o ñuú xí<sup>n</sup> duca<sup>n</sup> ñí cachí-gá ndéé cútnàhá vátá ngăva-gá ñuyíú sá nchóó ndùu-o déhe-gá. Te sá cuendá nchaa sá cádá Xítoho Jesucristú sá cúu-xí-ó, xí<sup>n</sup> duca<sup>n</sup> ñí cachí Yá Ndiöxí, te duca<sup>n</sup> ñí cachí-gá chi duca<sup>n</sup> tnàhí ní sani iní-gá cunduu. <sup>6</sup> Te xí<sup>n</sup> ñuú xini ñuhu-xi sá nchóó càchí-ó sá ío càhnu cuu Yá Ndiöxí, chi ío cùndahú iní ñáhá-gă chindèe ñaha-gă xii-o. Te duca<sup>n</sup> quide-gá chi ndècu ndihi-o Xítoho Jesucristú Yaá ío cùu iní-gá.

<sup>7</sup> Te Yá Ndiöxí ío cùu iní ñáhá-gă xii-o ñuú xí<sup>n</sup> Xítoho Jesucristú ní sati ñíhí-gă te ní xíhí-gá cuendá dacăcu nihnu ñaha-gă xii-o ñuú ùhú núú ndàhú, te duca<sup>n</sup> càda cahnu iní-gá nchaa yícá cuèchi-o. <sup>8</sup> Te Yá Ndiöxí ío cùndahú iní ñáhá-gă chindèe ñaha-gă xii-o, nàcuáa ngúndecu ndihi-o nchaa sá xini tnùni-ó te duca<sup>n</sup> te cuu-o ñáyiu tècú tnùni. <sup>9</sup> Te Yá Ndiöxí ní dánèhé ñáhá-gă xii-o nchaa sá ndúú yùhu, nchaa sá ñí sani iní-gá cada-gá. Te duca<sup>n</sup> ñí quide-gá chi duca<sup>n</sup> ñí sani iní-gá cunduu. <sup>10</sup> Te sá ñí sani iní-gá cada-gá te dacuítíí sá cádá-gă ná sàá nduu, te na sàá nduu-á<sup>n</sup> te mee-gă cada sá Xítoho Jesucristú quindaha-gă nchaa sá ío andi, ndihi nchaa sá ío ñuyíú-a.

<sup>11</sup> Te nchoo ñí nduu táhú-ó ñí nduu-o ñáyiu cùu cuendá Yá Ndiöxí chi ndècu ndihi-o Xítoho Jesucristú. Te duca<sup>n</sup> ñí cuu chi duca<sup>n</sup> tnàhí ní sani iní Yá Ndiöxí cunduu. Te nchaandi túhú sá quide-gă, quide-gá nàcuáa sàni iní méé-gă cunduu. <sup>12</sup> Te duca<sup>n</sup> ñí cuu cuendá sá nchùhú ñáyiu díhna nuu ñí sàndáá iní tnúhu Xítoho Jesucristú cáhá<sup>n</sup>-ndí sá ío càhnu cuu mee Yá Ndiöxí cuendá nchaa sá vâha quide-gá. <sup>13</sup> Te nchòhó tucu cútnàhá ní xindedóho-ndo tnúhu ndáá tnúhu sá cáhá<sup>n</sup> nàcuáa naníhí táhú-ó ní cuu ñnuu-ndo ndihi Xítoho Jesucristú chi ní sàndáá iní-ndó-gă. Te xí<sup>n</sup> cútnùni sá nchòhó ní nduu-ndo ñáyiu cùu cuendá Yá Ndiöxí, chi ní ngúndecu ndihi-ndo Espíritú-gá sá ñí cachí-gá taxi-gá. <sup>14</sup> Te sá ndécú ndihi-o Espíritú Yá Ndiöxí xí<sup>n</sup> cútnùni sá ndáá nduu táhú-ó cùndecu-o ndihi-gá ná sàá nduu nàcuaca ñaha-gă xii nchaa nchoo ñáyiu cùu cuendá-gá, te sá dúcá<sup>n</sup> càda-gá ñuú xí<sup>n</sup> tàú-ó càchí-ó sá ío càhnu cuu-gá.

*Té Păblú xicá<sup>n</sup> táhú-dé núú Yá Ndiöxí cuendá cue ñáyiu ndècu ichi-gá*

<sup>15</sup> Te yúhú nihí-í tnúhu sá nchòhó ío váha sàndáá iní-ndó Xítoho Jesucristú, te nchaa ñáyiu cùu cuendá Yá Ndiöxí ío cùu iní-ndó-yu. <sup>16</sup> Te xí<sup>n</sup> ñuú ñá túú dàña ndéé-í ndàcá<sup>n</sup> táhù-í núú-gă



cuendá-ndó, te ío xicá<sup>n</sup> táhù-í <sup>17</sup> núú Yá Ndiöxí Yáá cúú Tátá Xítohó Jesucristú cuendá-ndó. Te diu-ni Yá Ndiöxí cúú-gã Yáá ío càhnu cuu. Te xicá<sup>n</sup> táhù-í núú Yá Ndiöxí sá mée-gã ná cádá sã Espiritú-gá chindee ñaha-xi xii-ndo cuendá cuu-ndo ñáyiú təcú tnùní, te na càda-xi sá cútñuní iní-ndó nàcuáa sàni iní Yá Ndiöxí. <sup>18</sup> Te duca<sup>n</sup> xicá<sup>n</sup> táhù-í núú Yá Ndiöxí cuendá-ndó, cuendá sá nchòhó tecú tnùní-ndó nàcuáa ndùu tnúhu ndee iní ní taxi-gá ní ngúndecu ndihí-ndo cútñahá ní cáhá<sup>n</sup> ñáhá-gã xii-ndo. Te duca<sup>n</sup> cútñuní tucu iní-ndó sã ncháá sã ní cachí-gá taxi-gá nduu táhú nchoo cuè ñáyiú cùu cuendá-gá cúú-xí mèe cuií-ni sá ío-gá váha. <sup>19</sup> Te cútñuní tucu iní-ndó sã Yá Ndiöxí ío càhnu cuu-gá quidé-gã nchaa núú sã váha sá cúú-xí nchòhó ñáyiú sàndáá iní ñáhá xii-gá, chi quide-gá sá vã yõ tnàhí ndàcu cada sá cúú-xí-ó dàtná ní quide-gá <sup>20</sup> ní dándótó-gã Xítohó Jesucristú cútñahá ní xihí-gá. Te ní taxinucóo-gá Xítohó Jesucristú xio cùha-gá táxi tnùní-gá. <sup>21</sup> Te Xítohó Jesucristú ío-gá cùnùu-gá dàcúúxí nchaa núú cuè espíritú, ndihí dàcúúxí nchaa cue téé yìndaha ñáyiú, ndihí dàcúúxí nchaa dava-gá cue téé cùnùu. Te cuèi vitna te cuèi ndéé núú cuahá<sup>n</sup> núú vèxi duca<sup>n</sup>-ni ío cunuu-gã taxi tnùní-gá. <sup>22</sup> Te mee Yá Ndiöxí ní quide-gá sá Xítohó Jesucristú taxi tnùní-gá nchaandi túhú sá ío, te diu-ni mee Yá Ndiöxí ní cachí-gá sá ncháá ñáyiú cùu cuendá-gá quindaha ñaha Xítohó Jesucristú. <sup>23</sup> Te cada iní-ó sã ncháá ñáyiú cùu cuendá Yá Ndiöxí cúú-yu yiqui cùnùú Xítohó Jesucristú, chi ñ<sup>n</sup>-ni cùú-yu ndihí-gá, te mee-gã táxi tnùní-gá nchaandi túhú sá ío.

## 2

*Yá Ndiöxí ío cùndahú iní ñáhá-gã xii-o núu xiá<sup>n</sup> ní dácäcu nihnu ñaha-gã*

<sup>1</sup> Te nchòhó cúú-ndó dàtná ñáyiú ní xihí cuendá nchaa sá cuèhé sá dúhá quide-ndo ní cuu, dico vitna cada iní-ndó sã dàtná ní ndoto-ndo chi ní nduu táhú-ndó cùndecu-ndo ndihí Yá Ndiöxí ní caa ní quihí<sup>n</sup>. <sup>2</sup> Te

duca<sup>n</sup> ní xíndecu-ndo ichi cuehé ichi duha, chi ní cáncicú<sup>n</sup> nihnu-ndo nchaa sá cuèhé sá dúhá ío ñuyíú-a, te ní xóo cada-ndo nchaa nacuáa càhá<sup>n</sup> sácuíhná, te diu-ni sácuíhná-á<sup>n</sup> táxi tnùní-xi nchaa dava-gá espíritú cùndèhi-xi, te diu-ni-xi ndècu ndihí-xi nchaa ñáyiú ñá túú cuení tñi tnúhu càhá<sup>n</sup> Yá Ndiöxí, te dàcahá<sup>n</sup> ñáhá-xí xii-yu cuendá cundecu-ni-yu ichi cuehé ichi duha. <sup>3</sup> Te nchaa-o dùca<sup>n</sup> ní xóo cada-o dàtná quidé cuè ñáyiú-á<sup>n</sup>, chi ní xóo cada-o nchaa sá cuèhé sá dúhá ní xóo caní iní-ó, te nándi-gá nchaa sá cuèhé sá dúhá ní xóo cahu iní-ó ní xóo cada-o, núu xiá<sup>n</sup> tàú-ó sã dándòho ñaha Yá Ndiöxí xii-o ní cùu datná tàú-xi dándòho-gá nchaa ñáyiú duca<sup>n</sup> ndècu ichi cuehé ichi duha-á<sup>n</sup>. <sup>4</sup> Te Yá Ndiöxí ío cùu iní ñáhá-gã xii-o núu xiá<sup>n</sup> ní cundàhú iní ñáhá-gã xii-o <sup>5</sup> cuèi cùu-o datná ñáyiú ní xihí sá cuendá nchaa sá cuèhé sá dúhá quide-o ní cuu. Te duca<sup>n</sup> ní quide-gá ní cundàhú iní ñáhá-gã xii-o cuendá cundecu-o ndihí Xítohó Jesucristú vitna, te cuu ñ<sup>n</sup>nuu-o ndihí-gá. Te sá cuendá-ni sá cùndahú iní ñáhá Yá Ndiöxí xii-o xiá<sup>n</sup> ní quide-gá nàcuáa nchoo nàníhí tàhú-ó. <sup>6</sup> Te cada iní-ó sã dàtná ní quide Yá Ndiöxí cútñahá ní dándótó-gã Xítohó Jesucristú cútñahá ní xihí-gá duca<sup>n</sup> ní quide ñaha-gã xii-o chi ndècu-o ndihí-gá vitna. Te Xítohó Jesucristú sa ndècu-gá andiú núú ndécú Yá Ndiöxí. Te cada iní-ó sã Yá Ndiöxí sa ní quide-gá sá nchòhó ní ngúndecu túu-o ndihí Xítohó Jesucristú, chi ío váha ndècu-o vitna. <sup>7</sup> Te Yá Ndiöxí quidé vãha ñaha-gã xii-o vitna cuendá sá ná sàá nduu, te diu-ni mee-gã cada te cutñuní iní nchaa ñáyiú sá ío cùu iní ñáhá-gã xii-o, te duca<sup>n</sup> ío chindee chitúu ñaha-gã xii-o cuendá sá ndécú ndihí-o Xítohó Jesucristú. <sup>8</sup> Te Yá Ndiöxí ío cùndahú iní ñáhá-gã xii-ndo núu xiá<sup>n</sup> ní quide-gá sá nchòhó nàníhí tàhú-ndó. Te duca<sup>n</sup> ní quide-gá chi ní sàndáá iní-ndó-gã. Te ñá díú sã cuendá ñ<sup>n</sup> chiú<sup>n</sup> ní quide-ndo duca<sup>n</sup> ní nàníhí tàhú-ndó, chi mee Yá Ndiöxí ní cuiní-gá sá dícó-ni duca<sup>n</sup> nàníhí

tàhú-ndó. <sup>9</sup> Te mee Yá Ndiöxí ní cachí-gá sá ñà díú cuendá ì<sup>n</sup> chiú<sup>n</sup> quide-o naníhí tàhú-ó, te duca<sup>n</sup> ñí cachí-gá cuendá sá vǎ cádá càhnu-o mee-o. <sup>10</sup> Te Yá Ndiöxí ní quide ñaha-gǎ xii-o dàtná ì<sup>n</sup> ñáyiú saa cuendá sá ñí tnahá tnúhu-o ndìhì Xítóhó Jesucristú, te duca<sup>n</sup> ñí quide-gá cuendá sá cádá-ó mèe-ni sá vǎha. Te Yá Ndiöxí duca<sup>n</sup> tnahí ní sani iní-gá cunduu sá nchóó cùu-o ñáyiú cada mee-ni sǎ vǎha.

*Xítóhó Jesucristú quidé-gǎ ío váha cùu iní-ó ndècu-o*

<sup>11</sup> Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiú isràél, te ni ñà túú quide-ndo datná quidé ñáyiú-á<sup>n</sup>, chí ñáyiú-á<sup>n</sup> sǎha-yu sèñá ñí<sup>i</sup>-yu, te dàquee tíhǔ-yu nchaa ñáyiú ñá túú ndècu seña ñí<sup>i</sup>-xi. <sup>12</sup> Te chí dándàcu iní nàcuáa ní xíndecu-ndo, chí dàvǎ-á<sup>n</sup> ñà túú ní xíndecu-ndo ndìhì Xítóhó Jesucristú, te ni ñà túú ní xǒo cuu tnahá tnúhu-ndo ndìhì ñáyiú isràél, te ni ñà túú ní xíní tnùní-ndó nàcuáa ndùu tnúhu sá ñí cáhá<sup>n</sup> ndáá Yá Ndiöxí nàcuáa cada váha-gǎ ñáyiú, te ni ñà túú ní cùu-ndo ñáyiú quíndaha-gǎ, te ni ñà túú ní xǒo níhí-ndó tnúhu ndee iní sá cùndècu-ndo ndìhì-gǎ. <sup>13</sup> Te cuèi ní cuu-ndo ñáyiú ñá túú tnahá tnúhu ndìhì Yá Ndiöxí ní cùu, dico vitna ní tnahá tnúhu-ndo ndìhì-gǎ chí cùu ì<sup>n</sup>nuu-ndo ndìhì Xítóhó Jesucristú, cuendá sá ñí sati níñí-gǎ te ní xíhí-gǎ te xǎ<sup>n</sup> duca<sup>n</sup> tnahá tnúhu-ndo ndìhì Yá Ndiöxí vitna. <sup>14</sup> Te Xítóhó Jesucristú ní quide-gǎ sá nchóó ío váha cuu iní-ó cùndecu-o, te ðiu-ni-gǎ ní quide cuendá sá vǎ dáquee tíhú ñáhá ñáyiú isràél xii ñáyiú ñá túú cùu ñáyiú isràél, te duca<sup>n</sup> ì<sup>n</sup>-ná cuú-yu cundecú-yu. <sup>15</sup> Te sá ñí xíhí Xítóhó Jesucristú, xǎ<sup>n</sup> ñá túú-gǎ cúnùu nchaa tnúhu sá sánú ichi ñaha xii ñáyiú nàcuáa cáda-yu cundecú-yu ni cùu. Te duca<sup>n</sup> ñí xíhí Xítóhó Jesucristú cuendá sá cuè ñáyiú isràél ndìhì cue ñáyiú ñá túú cùu ñáyiú isràél ì<sup>n</sup>-ná cuú-yu cundecú-yu ichi-gǎ, te duca<sup>n</sup> te vá dáquee tíhú tnahá-gǎ-yu,

te ío váha cundecu ndìhì tnahá-yu. <sup>16</sup> Te duca<sup>n</sup> ñí quide Xítóhó Jesucristú ní xíhí-gǎ núú cùrúxí cuendá sá cuè ñáyiú cùu ñáyiú isràél ndìhì cue ñáyiú ñá túú cùu ñáyiú isràél vá dáquee tíhú tnahá-gǎ-yu. Te duca<sup>n</sup> ñí xíhí-gǎ cuendá ì<sup>n</sup>-ná cuú-yu tnahá tnúhu-yu ndìhì Yá Ndiöxí nàcuáa cuu váha iní ñáhá-gǎ xií-yu.

<sup>17</sup> Te cuèi cùu-ndo ñáyiú ñá túú tnahí xíní ndáá cuendá Yá Ndiöxí ní cùu, dico Xítóhó Jesucristú ní quixi-gǎ ñuyíú-a ní cáhá<sup>n</sup>-gǎ tnúhu váha nàcuáa ío váha cuu iní-ndó cùndecu-ndo ndìhì Yá Ndiöxí. Te ðiu-ni duca<sup>n</sup> ñí quide-gǎ sá cúú-xí nchaa ñáyiú sa xíní cuendá Yá Ndiöxí, ðiu-ni ñáyiú isràél. <sup>18</sup> Te cuèi cùu-o ñáyiú isràél àdi ñá túú cùu-o dico ðiu-ni mee Xítóhó Jesucristú ní quide-gǎ sá ncháá-ó tnahá tnúhu-o ndìhì Dútú Ndiöxí Yaá cúú Tǎtá-ó. Te duca<sup>n</sup> ñí tnahá tnúhu-o ndìhì Yá Ndiöxí chí ní ngúndecu ndìhì-o Espíritú-gǎ. <sup>19</sup> Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnahá tnúhu ndìhì Yá Ndiöxí ní cùu, dico vitna chí ì<sup>n</sup>-ná ní cuu-ndo ndìhì nchaa dáva-gǎ ñáyiú cùu cuendá-gǎ chí cùu-ndo déhe-gǎ. <sup>20</sup> Te cada iní-ó sǎ cuè téé ní táuchíú<sup>n</sup> Xítóhó Jesucristú cáhá<sup>n</sup> tnúhu-gǎ, ndìhì cue téé ní xóo cáhá<sup>n</sup> tnúhu Yá Ndiöxí ndéé sanaha cùu-güedé dàtná cimientú ì<sup>n</sup> vehe, te nchòhó cúú-ndó dàtná ndóho sá sǎa vehe-á<sup>n</sup>, te cada tucu iní-ó sǎ Xítóhó Jesucristú cúú-gǎ ì<sup>n</sup> yúú cúnùu cuu cimientú vehe-á<sup>n</sup>. <sup>21</sup> Te duca<sup>n</sup> ío váha cùu ì<sup>n</sup>nuu nchaa ndóho-á<sup>n</sup> ndìhì yúú cúnùu-á<sup>n</sup>, te duca<sup>n</sup> tucu ío váha ta quèe tnahá nchaa ndóho-á<sup>n</sup> cuásaá. Te xǎ<sup>n</sup> cada iní-ó sǎ cúú-xí vèhe Yá Ndiöxí, vehe sá ío ní cuu íí. Te duca<sup>n</sup> sǎtnahá-xi cùu nchaa ñáyiú ndècu ichi Xítóhó Jesucristú chí ní tnahá tnúhu-yu ndìhì-gǎ, te ì<sup>n</sup> nduu ì<sup>n</sup> nduu ta cùu vii cuu váha-gǎ-yu núú Yá Ndiöxí cuáhá<sup>n</sup>. <sup>22</sup> Te tnahá nchòhó duca<sup>n</sup> sǎtnahá-xi cùu-ndo chí ní ngúndecu ndìhì-ndo Xítóhó Jesucristú, te duca<sup>n</sup> ta cùu vii cuu váha tucu-ndo núú Yá Ndiöxí cuáhá<sup>n</sup>, te cùu-ndo datná vehe Yá Ndiöxí chí ndècu ndìhì-ndo Espíritú-gǎ.

## 3

*Té Păblú yíhí dǐquí-dě cáhán-dé  
tnúhu Xítohó Jesucristú núú ñáyiu ñá  
túú cùu ñáyiu isràél*

<sup>1</sup> Te yúhú té Păblú yíhí-í vecaá sá cuendá sá cáhán-í tnúhu Xítohó Jesucristú núú nchòhó ñáyiu ñá túú cùu ñáyiu isràél, núú xiǎ<sup>n</sup> diu cuendá-gá duha yíhí-í vecaá vitna. <sup>2</sup> Te nchòhó sa nàha-ndo sá Yă Ndiöxí ní cundàhú iní ñáhá-gă xii-í, te ní cachí-gá sá yúhú quíhí dǐquí-í cáhán-í tnúhu Xítohó Jesucristú núú-ndó, te cuendá sá cáhán-í tnúhu-gá núú-ndó te cuu-xi sá vâha sá cúu-xí-ndó. <sup>3</sup> Te yúhú sa ní cachí tnúhu-í xii-ndo lùha nacuaá ndùu tnúhu ndùu yuhu ní cuu, sá ní cachí tnúhu Yă Ndiöxí xii-í. <sup>4</sup> Te òré dâcuaha-ndo tnúhu ndùu yuhu-án ní cùu te quiní-ndó sǎ yúhú tècú tnùn-í nâcuáa ndùu tnúhu-án, te tnúhu-án cáhán-xi cuendá Xítohó Jesucristú. <sup>5</sup> Te tnúhu-án cúu-xí tnúhu sá vǎ yôo tnàhí xini ní cùu, dico cue tée ní táuchíú<sup>n</sup> Xítohó Jesucristú cáhán tnúhu-gá, ndihí cue tée cáhán nâcuáa dâcahu iní ñáhá Yă Ndiöxí ní níhí-güedé tnúhu ndùu yuhu-án, chí Espiritú Yă Ndiöxí ní xáha<sup>n</sup>-xi xii-güedé. <sup>6</sup> Te duha cáhán tnúhu ndùu yuhu-án ní cùu: “Cuèi ñáyiu ñá túú cùu ñáyiu isràél te cuèi ñáyiu cùu ñáyiu isràél dico ì<sup>n</sup>-ni ndùu tǎhǔ-yu sá vâha núú Yă Ndiöxí, te núu na quindáa iní-yu tnúhu sá cáhán nâcuáa naníhí tǎhú-yu, te ì<sup>n</sup>-nǎ cúu-yu cundecú-yu, te duca<sup>n</sup> ì<sup>n</sup>-ni cada vâha ñaha Yă Ndiöxí xii-yu te núu na cundecu ndihí-yu Xítohó Jesucristú”, duha ndùu tnúhu ndùu yuhu-án ní cùu.

<sup>7</sup> Te Yă Ndiöxí ní cundàhú iní ñáhá-gă xii-í ní taxi-gá chiu<sup>n</sup> quide-í cáhán-í tnúhu-gá, te mee-gă quidé-gă sá yúhú ndacu-í cáhán-í tnúhu-gá. <sup>8</sup> Te nchaa ñáyiu cùu cuendá Yă Ndiöxí cúu-yu ñáyiu ío-gá cúnùu cadá-yu chiu<sup>n</sup>-gá dâcúxí yúhú, te cuèi duca<sup>n</sup> dico Yă Ndiöxí ní cundàhú iní ñáhá-gă xii-í ní taxi-gá chiu<sup>n</sup> quide-í cáhán-í tnúhu-gá núú cuè ñáyiu ñá túú cùu ñáyiu isràél. Te tnúhu-gá-án

cáhán-xi sá sũúni ío vâha cada ñaha Xítohó Jesucristú xii-o. <sup>9</sup> Te duca<sup>n</sup> ní cachí Yă Ndiöxí sá cáhán-í tnúhu-gá cuendá danèhé-í nchaa ñáyiu. Te sá danèhé-í-yu-án cúu-xí tnúhu ndùu yuhu sá ní sani iní-gá ndéé sanaha nâcuáa cada vâha-gá cue ñáyiu. Te ndéé dâvâ-án ní quesaha ndùu yuhu tnúhu-án ní cùu. Te diu-ni-gá cúu-gă Yáa ní cadúha nchaandi túhú sá ío. <sup>10</sup> Te duca<sup>n</sup> ndùu yuhu tnúhu-án ní cùu cuendá sá ncháa espíritú cúnùu ndecu andiu quiní-xi vitna nâcuáa quide nchaa ñáyiu ní tuha ñaha xii Yă Ndiöxí cuendá duca<sup>n</sup> cùtnuní iní-xi sá ío vâha cùtnuní iní-gá nâcuáa cada-gá. <sup>11</sup> Te Yă Ndiöxí ní sani iní-gá ndéé sanaha nâcuáa ní cuiní-gá cada Xítohó Jesucristú, te ní sáa nduu ní quide Xítohó Jesucristú nâcuáa ní cuiní Yă Ndiöxí cada-gá. <sup>12</sup> Te vitna cùyii-o cáhán ndihí-o Yă Ndiöxí cuendá sá ndécú ndihí-o Xítohó Jesucristú, te sândáa iní-ó-gă. <sup>13</sup> Te núu xiǎ<sup>n</sup> cáhán-í dóho-ndo sǎ cuèi duha ndòho-í vitna dico vá ná túhú iní-ndó cànchicú<sup>n</sup> nihnu-ndo ìchi Xítohó Jesucristú. Te sá dúhá ndòho-í te cùu-xi sá vâha sá cúu-xí-ndó, chí cuu-ndo ñáyiu cùu cahnu núú Yă Ndiöxí.

*Xítohó Jesucristú ío cùu iní ñáhá-gă  
xii-o*

<sup>14</sup> Te sá cuendá nchaa sá ní sani iní Dútú Ndiöxí quidé-gă xiǎ<sup>n</sup> yúhú ngüñí xiti-í núu-gă cáhán ndihí-í-gá, te diu-ni-gá cúu Yáa cúu Tǎtá Xítohó Jesucristú. <sup>15</sup> Te mee Yă Ndiöxí ní cachí-gá sá ncháa espíritú ndécú àndiu cunduu-xi datná ní cachí méé-gă cunduu-xi. Te ní cachí tucu-gá sá nchóo cùu-o ñáyiu, te cunduu-o datná cuiní méé-gă cunduu-o. <sup>16</sup> Te xicá<sup>n</sup> tǎhú-í núú Dútú Ndiöxí sá Espíritú-gá ná cadá nâcuáa cuita níhí ndéé-gă-ndó quíhí<sup>n</sup> cundecu-ndo ìchi-gá, te duca<sup>n</sup> xicá<sup>n</sup> tǎhú-í núu-gă cada Espíritú-gá chí ío cahnu cuu-gá. <sup>17</sup> Te xicá<sup>n</sup> tǎhú tucu-í núú Yă Ndiöxí sá Xítohó Jesucristú ná cundecu ndihí ñaha-ni-gá xii-ndo chí sândáa iní-ndó-gă, te duca<sup>n</sup> te vá dáñá ndéé-ndó ío cuu iní tnáhá-ndó.

18 Te xicá<sup>n</sup> táhú tùcu-í núú Yă Ndiöxí cuendá-ndó ndìhi cuendá dava-gá ñáyiù cùu cuendá-gá, cuendá sá cùtnùní iní-ndó sá sùúni cùu iní ñáhá Xítóhó Jesucristú xii-o. 19 Te duha xicá<sup>n</sup> táhú-í núú Yă Ndiöxí chi cuení-í sá ncháá-ndó tècú tnùní-ndó sá ìo cùu iní ñáhá Xítóhó Jesucristú xii-o cuèi vá ndácú càva-o quini-ó nàcuáa cùu iní ñáhá-gá xii-o. Te xicá<sup>n</sup> táhú tùcu-í núú Yă Ndiöxí sá ìo na cùndecu ndìhi ñaha-gá xii-ndo, te duca<sup>n</sup> càncicú<sup>n</sup> nihnu-ndo càda-ndo nchaa nacuáa quède mee-gá.

20 Te Yă Ndiöxí ío-gá vai sá ndácú-gá táxi-gá dàcúúxí sá xicá<sup>n</sup>-ó nùú-gá, te cuèi ndéé nchaa sá ñà túú sàni iní-ó nìhí-ó te tàxi-gá, te duca<sup>n</sup> chi mee-gá ndécú ndìhi ñaha-gá xii-o, te ndàcu-gá quidé-gá nándi sá vâha sá cúu-xí-ó.

21 Te vitna nchaa nchoo ñáyiù ndècu ichi Xítóhó Jesucristú chí ná càchí-ó sá ìo càhnu cuu Yă Ndiöxí, te duca<sup>n</sup>-ni càhá<sup>n</sup>-ó sá ìo càhnu cuu-gá ni caa ni quíhí<sup>n</sup> chi ndècu ndìhi-o Xítóhó Jesucristú. Te duca<sup>n</sup> na cùnduu.

#### 4

*Espíritú Yă Ndiöxí quidé-xí cùu ñnuu-o ndecu-o*

1 Te yúhú té Păblú yíhí-í vecaá sá cuendá Xítóhó Jesucristú, te càhá<sup>n</sup> ndàhú-í núú-ndó sá cadá vâha-ndo cùndecu-ndo datná tàú-xi cada cue ñáyiù ní càhá<sup>n</sup> Yă Ndiöxí cundecu ndìhi-gá. Te nchòhó tnàhá-ndó cùu-ndo ñáyiù ní càhá<sup>n</sup> ñáhá Yă Ndiöxí cundecu ndìhi-gá. 2 Te vá cadá càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnàhá-ndó nàcuáa duca<sup>n</sup> cùndee iní-ndó nùu ná cúú sá cúmăní nùú tnàhá-ndó. 3 Te ío nducu ndè-ndo cuu ñnuu-ndo cundecu-ndo, chi Espíritú Yă Ndiöxí chindee ñaha-xi xii-ndo, te duca<sup>n</sup> ìo váha cuu iní-ndó cùndecu-ndo chi cùu ñnuu-ndo.

4 Te nchoo ñáyiù ndècu ichi Xítóhó Jesucristú ñ<sup>n</sup>-ni cùu-o, te duca<sup>n</sup> ñ<sup>n</sup>-ni Espíritú Yă Ndiöxí ndécú, te ðiu-ni duca<sup>n</sup> ñ<sup>n</sup>-ni tnúhu ndee ìní ní ngúndecu ndìhi-o cùtnàhá ní càhá<sup>n</sup> ñáhá Yă Ndiöxí xii-o. 5 Te ñ<sup>n</sup>-ni Xítóhó Jesucristú ndécú tàxi tnuní ñáhá-gá xii-o,

te ñ<sup>n</sup>-ni cùu-o sandáá iní-ó tnúhu-gá, te ñ<sup>n</sup>-ni ñí sandute-o. 6 Te ñ<sup>n</sup>-ni Dütú Ndiöxí cúú Yáá cúú Tătá-ó nchàa-o, te ðiu-gá cùnùu-gá yíndàha ñaha-gá xii-o nchàa-o. Te Yă Ndiöxí dácàhá<sup>n</sup>-gá iní-ó quède-o chiu<sup>n</sup>-gá, te duca<sup>n</sup> ndècu ndìhi ñaha-gá xii-o nchàa-o.

7 Te nchoo ndì ðí<sup>n</sup> ndì ðí<sup>n</sup> chindee ñaha Yă Ndiöxí xii-o quède-o nacuáa ndùu chiu<sup>n</sup> ní cachí Xítóhó Jesucristú cada-o. 8 Te quèe ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi:

Xítóhó Jesucristú cuándaa-gá andiu te ìo cùnuu-gá,

chi nchaa cue espíritú cúú ùhú iní ñáhá xii-gá ñà túú ní ndàcu-xi naá ndìhi ñaha-xi xii-gá,

te mee-gá ní cachí-gá nàcuáa ndùu chiu<sup>n</sup> nduu táhú ñ<sup>n</sup> ñáyiù cadá-yu.

Duha càchí-xi núú tütú-gá.

9 Te sá dúcá<sup>n</sup> càhá<sup>n</sup>-xi sá cuándaa-gá andiu xíá<sup>n</sup> cùtnùní iní-ó sá ñí cuu<sup>n</sup>-gá ñuyíú-a. 10 Te Xítóhó Jesucristú ní cuu<sup>n</sup>-gá ñuyíú-a, te ðiu-ni-gá cuándaa-gá andiu cuendá ìo cunuu-gá taxi tnùní-gá nchaandi túhú sá ìo.

11 Te ní dácàhñu-gá cue téé xínu cuechi núú-gá ñ<sup>n</sup> núú chiù<sup>n</sup> cada-güedé. Te ní cachí-gá sá dàva-güedé càhá<sup>n</sup>-güedé tnúhu-gá, te dava-güedé ní cachí-gá sá càhá<sup>n</sup>-güedé nàcuáa dàcahu iní ñáhá Yă Ndiöxí xii-güedé. Te dava-güedé ní cachí-gá sá cúu-güedé cue téé datècú tnúhu cue ñáyiù nàcuáa cadá-yu naníhí tàhú-yu. Te dava-güedé ní cachí-gá sá cúu-güedé cue téé quíndaha ñaha xii ñáyiù dacuàha ñaha-güedé xii-yu tnúhu-gá.

12 Te duca<sup>n</sup> ñí cachí-gá cada cue téé-á<sup>n</sup> cuendá canu ichi-güedé cue ñáyiù cùu cuendá Yă Ndiöxí cuendá duca<sup>n</sup> ñáyiù-á<sup>n</sup> ñíhí-yu nàcuáa cadá-yu chiù<sup>n</sup>-gá, te duca<sup>n</sup> cuíta níhí ndéé-gá-yu cundécú-yu ichi Xítóhó Jesucristú. 13 Te duca<sup>n</sup> ñí cachí Xítóhó Jesucristú cunduu ndéé sáá nduu cùu ñnuu-o quíndáá iní-ó tnúhu-gá,

te duca<sup>n</sup> cùu ñnuu-o tècú tnùní-ó nàcuáa ndùu cuendá-gá chi ðiu-gá cúu-gá Déhe Yă Ndiöxí, te cuu-o



ñáyiú ío quíde ndáá dàtná quíde mèe Xítóhó Jesucristú. Te duca<sup>n</sup> te ñá túú tnàhí-gá ná cùmání-ó nũú Yă Ndiõxí. **14** Te duca<sup>n</sup> te vá cúú-gă-ó dàtná cue landú vátá cùtnùní váha-gá iní-xi, te ni vă cádă-gă-ó dàtná quíde ndùte lamár, chi ndute-á<sup>n</sup> òré quéné tǎchí te cuáhă<sup>n</sup>-xi duha cuáhă<sup>n</sup>-xi dàcá<sup>n</sup>, te duca<sup>n</sup> chi vá quíndăá-gá iní-ó tnũhu cǎhá<sup>n</sup> nchaa ñáyiú dândahú ñáhă xii-o, chi ñáyiú-á<sup>n</sup> ío váha xító-yu năcuăa dândahú ñáhă-yu xii-o chi cǎchí-yu sá cǎhá<sup>n</sup>-yu tnũhu Yă Ndiõxí dico ñá ndăá. **15** Te nchoo ío cuu iní tnáhă-ó, te vá dândahú tnáhă-ó, chi cǎhá<sup>n</sup>-ó mèe-ni sá ndăá. Te xini ñuhu-xi sá ñ<sup>n</sup> nduu ñ<sup>n</sup> nduu cuita cada ndăá-gă-ó quíhí<sup>n</sup> dàtná quíde ndăá méé-gă, te diu-ni-gă cúú-gă Yăá cúnúu cuu díhna tàxi tnuní ñáhă-gă xii-o. **16** Te diu-ni Xítóhó Jesucristú quíde ñàha-gă xii nchaa nchoo ñáyiú ndècu ichi-gă dàtná yiqui cùñú méé-gă, chi ñ<sup>n</sup> yiqui cùñú ío váha ní quée tnàha ñ<sup>n</sup> ñ<sup>n</sup> xichi, te duca<sup>n</sup> yihí túchi yiqui cùñú-ă<sup>n</sup> yótnhí-xi nchaa nacuăa ní quée tnàha. Te duca<sup>n</sup> sǎtnahă-xi cùu nchoo chi ñ<sup>n</sup>-ni cùu-o ndècu-o ichi Xítóhó Jesucristú táxi tnùní ñáhă-gă xii-o. Te núu nchoo quíde-o nchaa nacuăa tàú-xi cunduu te cùu iní tnáhă-ó, te duca<sup>n</sup> ta nihí ndéé-gă-ó cuáhă<sup>n</sup> ndécú-ó ichi-gă.

*Vă cádă-gă-ó dàtná ní xóo cada-o cùtnàhá ní xíndecu-o ichi cuehé ichi duha*

**17** Te vitna yúhú cǎhá<sup>n</sup>-í dóho-ndo quíde-í núú Xítóhó Jesucristú sá vă cùndècu-gă-ndó dàtná xíndecu ñáyiú ñá túú sândăá iní ñáhă xii Yă Ndiõxí, chi nchaa ñáyiú-á<sup>n</sup> ñà túú vèdana nândihí nchaa sá sání iní-yu. **18** Te ni ñà túú vèdana cùtnuní iní-yu năcuăa ndùu tnũhu ndăá tnũhu Yă Ndiõxí. Te ñáyiú-á<sup>n</sup> ñà túú ndùu táhũ-yu cundecú-yu năcuăa cuíní Yă Ndiõxí, chi ñá túú vèdana tècú tnùní-yu te duca<sup>n</sup> chi ío sàá iní-yu. **19** Te ñá túú tnàhí-gá ná sání iní-yu ndécú-yu ichi cuehé ichi duha, te ío cùdí<sup>n</sup> iní-yu ndécú-yu ichi dí<sup>n</sup> iní, te ñá díú-ní xǎ<sup>n</sup>

chi nándi-gă nchaa sá cuèhé sá dúhá quíde-yu ndécú-yu. **20** Dico tnũhu Xítóhó Jesucristú sá ní sândăá iní-ndó chi ñá túú dùca<sup>n</sup> sanu ichi ñàha-xi xii-ndo cada-ndo. **21** Te nchòhó ní cùtnùní iní-ndó năcuăa ndùu cuendă Xítóhó Jesucristú, te dăcuaha-ndo tnũhu ndăá diu-ni tnũhu-gă năcuăa ndècu-ndo ichi-gă. **22** Te vitna vá cání-gă iní-ndó cada-ndo datná ní xóo cada-ndo cùtnàhá ní xíndecu-ndo ichi cuehé ichi duha, chi núu nchaa-ni sá cuèhé sá dúhá-ă<sup>n</sup> ná cùhu<sup>n</sup>-ni iní-ndó cǎda-ndo, te uu<sup>n</sup>-gă uu<sup>n</sup>-gă cuita dacuăa nihnu ñàha-xi xii-ndo quíhí<sup>n</sup>, chi núu nchaa-ni sá cuèhé sá dúhá-ă<sup>n</sup> ná cùhu<sup>n</sup>-ni iní-ndó te dàtcá nuu ñàha-xi xii-ndo. **23** Te nchòhó, xini ñuhu-xi sá vă dúcă<sup>n</sup>-gă caní iní-ndó cǎda-ndo te tàú-ndó ndùu-ndo datná ñ<sup>n</sup> ñáyiú ní cacu túu saa. **24** Te nduu iní-ndó dàtná cuíní méé Yă Ndiõxí cunduu, chi nduu-xi năcuăa cǎa iní méé-gă, te duca<sup>n</sup> te cuu-ndo ñáyiú ío váha cada ndăá, te cuu ndisa-ndo ñáyiú ñá túú tnàhí ná cumání cundecu núú-gă.

**25** Te cuendă xǎ<sup>n</sup> nũu cǎhá<sup>n</sup>-í dóho-ndo sá nchòhó vă dăcuàndehnde-gă-ndó dàtná ní xóo cada-ndo, te mee-nă sá ndăá cǎhá<sup>n</sup> ndihí tnàha-ndo, chi ñ<sup>n</sup>-ni cùu-o ndècu-o ichi Xítóhó Jesucristú.

**26** Te núu cùdéé<sup>n</sup>-ndó te cada cuendă-ndó sǎ vă cádă-ndó ñ<sup>n</sup> cuéchi sá dúcă<sup>n</sup> cùdéé<sup>n</sup>-ndó, te vá dúcă<sup>n</sup>-ní cùhu<sup>n</sup> iní-ndó tnũhu sàtú iní-á<sup>n</sup>. **27** Te vă dáñă-ndó mèe-ndo dândahú ñáhă sàcùhnă xii-ndo.

**28** Te núu dava-ndo cùu-ndo ñadúhú te vá dúcă<sup>n</sup>-gă cada-ndo, chi nducu-nă-ndó ñ<sup>n</sup> chiu<sup>n</sup> váha cada-ndo năcuăa duca<sup>n</sup> nihí-ndó sá chíndèe-ndo cue ñáyiú ndàhú ñáyiú ñá túú nă ndécú ndihí.

**29** Te vá cǎhá<sup>n</sup>-gă-ndó ni ñ<sup>n</sup> tnũhu cuehé, chi mee-nă tnũhu vii tnũhu váha cǎhá<sup>n</sup>-ndó năcuăa duca<sup>n</sup> ngũnu ichi cue ñáyiú ndèdóho ñàha xii-ndo, te núu duca<sup>n</sup> na cǎda-ndo te cuu-xi sá vǎha sá cúú-xí ñáyiú duca<sup>n</sup> ndèdóho ñàha xii-ndo-á<sup>n</sup>. **30** Te vá cádă-gă-ndó ni ñ<sup>n</sup> sá ñà túú tàú-ndó cǎda-ndo cuendă sá vă dândihú-ndó iní Espiritú Yă Ndiõxí, chi diu Espiritú-gă ndécú ndihí-ndo, te xǎ<sup>n</sup> cùtnùní iní-ndó

să sàà nduu nàcuaca ñaha-gá xii-ndo cùndecu-ndo ndihi-gá ni caa ni quíhí<sup>n</sup>.

<sup>31</sup> Te vá dásatú-gá-ndó iní tnàha ñáyiu-ndo, te ni vǎ cúhú<sup>n</sup> iní-ndó tnúhu sàtú iní, te ni vǎ cúděé<sup>n</sup>-gǎ-ndó, te cuěi núú chítú núú tàcá vǎ càhá<sup>n</sup> cana-ndo cǔcuèhé-ndó tnàha ñáyiu-ndo, te ni vǎ cuátnúhu-ndo tnaha ñáyiu-ndo, te ni vǎ cání cuèhé cani duha iní-ndó cuendá tnàha ñáyiu-ndo. <sup>32</sup> Te cundàhú iní tnáhá-ndó, te cada tnàha-ndo sǎ vǎha, te cada càhnu iní tnáhá-ndó núu ná cúú sǎ cúmǎní núú tnáhá-ndó dàtná ní quide Yá Ndiöxí ní quide càhnu iní-gá nchaa yícá cuèchi-ndo sǎ cuendá Xítóhó Jesucristú.

## 5

*Nàcuáa tàú-xi cundecu nchaa ñáyiu cùu déhe Yá Ndiöxí*

<sup>1</sup> Te nchòhó cúú-ndó ñáyiu ío cùu iní ñáhá Yá Ndiöxí, te diu déhe-gá cúú-ndó núu xǎ<sup>n</sup> xíní ñúhu-xi canchicú<sup>n</sup> nihnu-ndo càda-ndo datná quidé mèe-gá. <sup>2</sup> Te ío cuu iní tnáhá-ndó cùndecu-ndo datná cúú iní ñáhá Xítóhó Jesucristú xii-ndo, chi diu-gá ní cachí-gá sǎ cùú-gá cuendá nchaa cuèchi-o te ní xíhí-gá, te sǎ dúcá<sup>n</sup> ñí xíhí-gá te ní cuu-gá dàtná ñ<sup>n</sup> táhú sǎ cúú-xí Yá Ndiöxí, te ío vǎha ní cuu iní Yá Ndiöxí sǎ dúcá<sup>n</sup> ní quide-gá.

<sup>3</sup> Te sǎ cuendá sǎ nchòhó cúú-ndó ñáyiu cùu cuendá Yá Ndiöxí núu xǎ<sup>n</sup> nchaa nchòhó cue tée vǎ càhá<sup>n</sup> ndihi-ndo ñáyiu dìhí te núu ñá díú ñàdihí-ndó cúú-yu, te duca<sup>n</sup>-ni nchàa nchohó cue ñáyiu dìhí tucu vǎ càhá<sup>n</sup> ndihi-ndo cuè tée te núu ñá díú yíi-ndo cuu-güedé, te ni vǎ cání tnàhí iní-ndó cùndecu-ndo ichi díí iní, te ni vǎ xíhó-ndó ñí ñ<sup>n</sup> sǎ ndécú ndihi tnaha ñáyiu-ndo, te ni ñ<sup>n</sup> nchaa xǎ<sup>n</sup> vǎ cání iní-ndó càda-ndo, te ni vǎ cacú nèhe-ndo. <sup>4</sup> Te ni vǎ càhá<sup>n</sup>-ndó ñ<sup>n</sup> tnúhu sǎ ni vǎ cúú cùndedóho ñáyiu, te ni vǎ càhá<sup>n</sup>-ndó ñ<sup>n</sup> tnúhu cùtexínu, te ni dàva-gá nchaa tnúhu sǎ ñà túú vèdana nàndíhi vǎ càhá<sup>n</sup>-ndó, chi nchaa tnúhu-á<sup>n</sup> ñà túú tàú-xi càhá<sup>n</sup>-ndó, te xíní ñuhu-xi sǎ vǎha-gá

sǎ ndàcá<sup>n</sup> táhú-ndó núú Yá Ndiöxí cuendá nchaa sǎ vǎha quide-gá. <sup>5</sup> Te nchòhó sa xíní ndáá-ndó sǎ ncháá cuè tée càhá<sup>n</sup> ndihi ñáyiu dìhí te ñá díú ñàdihí-güedé cúú-yu, ndihi cue ñáyiu dìhí càhá<sup>n</sup> ndihi cue tée te ñá díú yíi-yu cùu-güedé, nchaa ñáyiu-á<sup>n</sup> vǎ ndúú tǎhú-yu cundecú-yu núú ndécú Yá Ndiöxí ndihi Xítóhó Jesucristú táxí tnùní-gá. Te ni cuè ñáyiu xíndecu ichi díí iní, te ni cuè ñáyiu xího nchaa sǎ ndécú ndihi tnaha ñáyiu-xi vǎ ndúú tǎhú-yu cundecú-yu ndihi-gá núú ndécú-gǎ táxí tnùní-gá. Te tnúhu sǎ càchí-ó xího-o nchaa sǎ ndécú ndihi tnaha ñáyiu-o, ñ<sup>n</sup>-ni cùu-xi ndihi tnúhu sǎ càchí ñáyiu quide cahnú-yu nchaa sǎ càchí-yu cùu ndiöxí te ñá ndáá sǎ ndiöxí cúú-xí. <sup>6</sup> Te vá quíndáá iní-ndó ñí ñ<sup>n</sup> tnúhu sǎ ñà túú nàndíhi càhá<sup>n</sup> ñáyiu, chi ñáyiu-á<sup>n</sup> ío dandòho ñaha Yá Ndiöxí xii-yu cuendá nchaa sǎ cuèhé sǎ dúhá quidé-yu chi ñá túú sàndáá iní ñáhǎ-yu xii-gá. <sup>7</sup> Núu xǎ<sup>n</sup> càhá<sup>n</sup>-í dóho-ndo sǎ vǎ ñíhí tnáhá-ndó ndihi cue ñáyiu-á<sup>n</sup>.

<sup>8</sup> Te nchòhó ní cuu-ndo dàtná cue ñáyiu ní xíndecu núú nées chi ní xíndecu-ndo ichi cuehé ichi duha, dico vitna ní ngúndecu-ndo ichi Xítóhó Jesucristú, te ñá túú-gǎ ndécú-ndó núú nées dàtná ní xíndecu-ndo ni cùu. Te vitna cada-ndo nchàa nacuáa tàú-xi cunduu chi ndècu-ndo ichi-gá.

<sup>9</sup> Te sǎ cuendá sǎ ndécú-ndó ichi-gá núu xǎ<sup>n</sup> cúú-ndó ñáyiu vǎha, te quide ndáá-ndó ndècu-ndo, te ñá túú dàcuandehnde-ndo chi càhá<sup>n</sup>-ndó mèe-ñí sǎ ndáá. <sup>10</sup> Te ío vǎha càda cuendá-ndó nchàa sǎ cúú vǎha iní Xítóhó Jesucristú, te xǎ<sup>n</sup> càda-ndo. <sup>11</sup> Te vá cǎnchícú<sup>n</sup> nihnu-ndo tnáhá-ndó càda-ndo datná quidé cue ñáyiu ndècu ichi cuehé ichi duha, chi nchòhó tàú-ndó càhá<sup>n</sup>-ndó dòho nchaa ñáyiu duca<sup>n</sup> ndècu ichi cuehé ichi duha-á<sup>n</sup> cuendá nchaa sǎ quidé-yu. <sup>12</sup> Te cucaha<sup>n</sup> núú-ndó vǎ càhá<sup>n</sup>-ndó cuendá ni ñ<sup>n</sup> sǎ cuèhé sǎ dúhá quide dayuhu nchaa ñáyiu-á<sup>n</sup>.

<sup>13</sup> Dico òré dándixi túu tnúhu Yá Ndiöxí iní-yu nàcuáa quidé-yu te cùtnuní iní-yu sǎ ñá túú quide vǎha-yu, te

duca<sup>n</sup> ndixi cuéchi iní-yu cuendá nchaa sá cuèhé sá dúhá quidé-yu.

14 Te núú tütú Yă Ndiöxí cächí-xi: Nchòhó cúú-ndó dàtná ñáyiu xídí, te vitna ndiquíú iní-ndó, te cùu tucu-ndo datná ñáyiu ní xíhí, te vitna ndoto-ndo, te Xítohó Jesucristú chindee ñaha-gá xii-ndo nàcuáa vá cùndècu-gá-ndó ichi cuehé ichi duha. Duha cãhá<sup>n</sup>-xi núú tütú-gá.

15 Te ío váha cada cuendá-ndó nàcuáa cada-ndo cùndècu-ndo, te vá cáda-ndó dàtná xíquide cue ñáyiu ñá túú tècú tnùní, chi cada-ndo dàtná xíquide ñáyiu ío váha sàá díquí-xi.

16 Te ñ<sup>n</sup> nduu ñ<sup>n</sup> nduu cani iní-ndó càda-ndo nchaa nacuáa tàú-xi cundu, chi vitna ío cùnuu nchaa sá cuèhé sá dúhá. 17 Te cuu-ndo ñáyiu tècú tnùní cuendá duca<sup>n</sup> cùtnuní iní-ndó nàcuáa cuíní Yă Ndiöxí cada-ndo, te vá cáda-ndó dàtná xíquide cue ñáyiu ñá túú tnàhí cùtnuní iní-xi nàcuáa cuíní Yă Ndiöxí cáda-yu. 18 Te vá cúú-ndó ñáyiu quihu chi núu duca<sup>n</sup> na càda-ndo te dàcuíta nihnu-ndo mèe-ndo, te dañá-ndo mèe-ndo sá Espíritú Yă Ndiöxí ná tàxi tnuní ñáhá-xí xii-ndo. 19 Te cãhá<sup>n</sup>-ndó nàcuáa-ñi cuáhá<sup>n</sup> ndudú sá ñi xóo cata nchaa cue ñáyiu ndéé sanaha ñi xóo chiñuhú-yu Yă Ndiöxí. Te cãhá<sup>n</sup>-ndó nàcuáa cuáhá<sup>n</sup> ndudú sá chíñuhu-ndo Yă Ndiöxí, te cata-ndo. Te cuèi nchaa dava-gá ndudú ñi-ndó duca<sup>n</sup> cãhá<sup>n</sup>-ndó te cata-ndo. Te ñi yùhu ñi iní-ndó càta-ndo nchaa ndudú-á<sup>n</sup> chiñuhu-ndo Yă Ndiöxí. 20 Te vá dáña ndéé-ndó ndàcá<sup>n</sup> táhú-ndó núú Tãtá-ó Dütú Ndiöxí cuèi ndècu váha-ndo àdi ñá túú ndècu váha-ndo. Te duca<sup>n</sup> càda-ndo chi ndècu ndíhi-ndo Xítohó Jesucristú.

*Tàú-xi sá quèndáa iní tnàhá cuè ñáyiu ndècu ichi Xítohó Jesucristú*

21 Te nchòhó ñáyiu ndècu ichi Xítohó Jesucristú tàú-xi sá quèndáa iní tnàhá-ndó, te duca<sup>n</sup> càda-ndo chi nèhe-ndo sá yíñuhu núú Yă Ndiöxí.

22 Te nchaa nchòhó ñáyiu ñíhí ndécú yí-xi, xìni ñuhu-xi sá quèndáa iní-ndó yí-ndo datná sàndáa iní-ndó

Xítohó Jesucristú. 23 Chi yí-ndo tàxi tnuní ñáhá-güedé xii-ndo dàtná quidé Xítohó Jesucristú táxi tnùní ñáhá-gá xii nchoo cuè ñáyiu ndècu ichi-gá. Te ñi-gá cúú-gá Yaá ní dácacu nihnu ñaha xii-o núú ùhú núú ndàhú, te cùu-o datná yíqui cùñú-gá. 24 Te dàtná quidé nchòo ñáyiu ndècu ichi Xítohó Jesucristú sàndáa iní-ó tnè-o nchaa tnúhu cãhá<sup>n</sup>-gá, duca<sup>n</sup> tàú-xi cada nchaa nchòhó ñáyiu ñíhí quèndáa iní-ndó tnè-ndo nchaa tnúhu cãhá<sup>n</sup> yí-ndo.

25 Te tnàhá nchaa nchòhó cue tée tucu tàú-xi sá ío cuu iní-ndó ñàdihí-ndó dàtná quidé Xítohó Jesucristú cúú iní ñáhá-gá xii nchaa nchoo ñáyiu ndècu ichi-gá, chi mee-gá ní xíhí-gá sá cuèndá-ó sá cúú iní ñáhá-gá xii-o. 26 Te duca<sup>n</sup> ñi quide-gá cuèndá sá ncháa ñáyiu vitna ngùndècu ichi-gá cuu yíñuhú-yu núú Yă Ndiöxí, te duca<sup>n</sup> ndàda ndoo ndada nine-gá iní-yu sá cuèndá sá quèndáa iní-yu tnúhu Yă Ndiöxí, te cuanduté-yu. 27 Te duca<sup>n</sup> ñi quide-gá cuèndá sá ncháa ñáyiu na ngùndècu ichi-gá ío váha cundècu-yu núú-gá, te duca<sup>n</sup> vã cùndècu-gá ñi ñ<sup>n</sup> cuéchi-yu núú-gá, te ñi ñ<sup>n</sup>-gá sá ñà túú-gá ná cumání-yu núú-gá chi ío cundècu yíñuhú-yu. 28 Te sá dúcá<sup>n</sup> quide Xítohó Jesucristú sá cúú-xi cuè ñáyiu ndècu ichi-gá, xí<sup>n</sup> tàú-xi sá nchòhó cue tée xíndècu ñàdihí-xi cuu iní-ndó ñàdihí-ndó, te coto-ndó-yu dàtná xító-ndó yíqui cuñú mée-ndó, te cada iní-ndó sá ncháa cuè tée ío cùu iní ñàdihí-xi cùu iní-güedé mée-güedé chi ñ<sup>n</sup>-ná cúú-yu. 29 Te nchoo sà naha-o sá ñi ñ<sup>n</sup> ñáyiu ñá túú dàquee tíhú-yu yíqui cùñú-yu, chi da uu<sup>n</sup>-gá chíndéé-yu te xító-yu. Te ñi-ndó duca<sup>n</sup> quide Xítohó Jesucristú ndíhi nchaa ñáyiu ndècu ichi-gá, 30 chi cùu-o datná yíqui cùñú mée-gá, te duca<sup>n</sup> chi ñ<sup>n</sup>-ni cùu-o ndíhi-gá. 31 Te tnúhu Yă Ndiöxí cächí-xi: “Sá cuèndá xí<sup>n</sup> núu nchaa cue tée na ñíhí ñàdihí-xi te ñí<sup>n</sup>-ná cada-güedé tãtá-güedé ndíhi nãná-güedé, te ñàdihí-nã-güedé cuu cuu ndíhi-güedé,

te duca<sup>n</sup> ì<sup>n</sup>-ná cuu-güedé ndihí-yu”, duha càchí-xi. <sup>32</sup> Te tnúhu-a cùu-xi ì<sup>n</sup> tnúhu càhnu vihi, te duca<sup>n</sup> sã tnàhá-xi cùu Xítóhó Jesucristú ndihí cue ñáyiu ndècu ichi-gá. <sup>33</sup> Te càhá<sup>n</sup>-ni tucu-í dóho nchaa nchòhó cue téé xĩndecu ñadĩhí-xi sá ìo cuu iní-ndó ñadĩhí-ndó te coto-ndó-yu dàtná xító-ndó mèe-ndo, te duca<sup>n</sup>-ni nchaa nchohó ñáyiu dìhí tucu canehe-ndo sã yĩñùhu núú yĩ-ndo.

## 6

<sup>1</sup> Te nchaa nchòhó cue landú, quindáá iní-ndó tãtã-ndó ndihí náná-ndó chi duca<sup>n</sup> cuiní Yã Ndiõxí cunduu, te ñu duca<sup>n</sup> tnàhí tàú-xi cada-ndo. <sup>2</sup> Te Yã Ndiõxí ní cachí-gá sá cánèhe-ndo sã yĩñùhu núú tãtã-ndó ndihí núú náná-ndó. Te tnúhu-á<sup>n</sup> cúú-xí tnúhu cùnuu ní cáhá<sup>n</sup>-gá cada cue ñáyiu cuendá cada váha ñaha-gã xii-yu. <sup>3</sup> Te ní cachí-gá sá nũu duca<sup>n</sup> na càda-ndo te ìo váha cundecu-ndo, te duca<sup>n</sup> ìo naha cùdí-ndo cundecu-ndo ñuyíú-a.

<sup>4</sup> Te nchaa nchòhó cue téé cùu tãtã, vá dásatú-ndó ìní cue déhe-ndo chi canu ichi-ndo-güèxi nacuáa tàú-xi cunduu, te dacuàha-ndo-güèxi nchaa tnúhu váha nacuáa cuiní Yã Ndiõxí cunduu.

<sup>5</sup> Te nchaa nchòhó cue ñáyiu xĩnu cuechi, quindáá iní-ndó cuè ñáyiu dii chiú<sup>n</sup>-xi quide-ndo, te canehe-ndo sã yĩñùhu núú-yu, te ìo váha cuu iní-ndó càda-ndo chiú<sup>n</sup>-yu, te duca<sup>n</sup> nì yuhu nì iní-ndó càda-ndo. Te cada iní-ndó sã dàtná tnúhu sá chiú<sup>n</sup> Xítóhó Jesucristú quidé-ndó. <sup>6</sup> Te dava ñáyiu xĩnu cuechi, mee-ni òré ndéhé ñáyiu dii chiú<sup>n</sup>-xi quidé-yu ìo ndècu ndeé-yu quide chiu<sup>n</sup> váha-yu cuendá cuiní-yu cudíú-yu. Dico nchòhó vá dúcá<sup>n</sup> càda-ndo, chi cuèi ndècu ñáyiu dii chiú<sup>n</sup>-xi quide-ndo àdi ñá túú-yu dico cada chiú<sup>n</sup> váha-ni-ndo, te cada iní-ndó sã dàtná tnúhu sá chiú<sup>n</sup> Xítóhó Jesucristú quidé-ndó, te cada-ndo nì yuhu nì iní-ndó nacuáa cuiní Yã Ndiõxí cunduu. <sup>7</sup> Te ìo váha cuu iní-ndó càda-ndo chiu<sup>n</sup>-á<sup>n</sup>, chi cada iní-ndó sã dàtná tnúhu sá chiú<sup>n</sup>

Xítóhó Jesucristú quidé-ndó te ñá díú chiú<sup>n</sup> cue ñáyiu ñuyíú-a. <sup>8</sup> Te nchòhó sa cùtnuní iní-ndó sã nacuáa ndècu chiu<sup>n</sup> váha ní quide-ndo ì<sup>n</sup> ì<sup>n</sup>-ndo, te duca<sup>n</sup> cùnduu sá táxí Xítóhó Jesucristú nduu táhú-ndó cuèi cùu-ndo ñáyiu dàñá quée nũú chiú<sup>n</sup> pàtró<sup>n</sup>-xi àdi cuu-ndo ñáyiu ñá túú tnàhí dàñá quee núú chiú<sup>n</sup> pàtró<sup>n</sup>-xi.

<sup>9</sup> Te nchaa nchòhó ñáyiu xĩndecu ndihí ñáyiu xĩnu cuechi, tnàhá-ndó tàú-ndó càda váha-ndo sã cúú-xí cuè ñáyiu xĩnu cuechi núú-ndó, te vá cùnduu nínu iní-ndó nũú-yu, te chí cuàha cuendá sá díú-ní Xítóhó Jesucristú Yá ndécú àndiu taxi tnuní ñáhá-gã xii-ndo ndihí-yu, te sá cúú-xí mèe-gá chi ì<sup>n</sup>-ni cùu-ndo núú-gã, te ì<sup>n</sup>-ni càda ñaha-gã xii-ndo.

*Yá Ndiõxí chĩndè-gá cue ñáyiu ndècu ichi-gá cuendá sá vã ndácú sàculhá nàá ndihí ñaha-xi xii-yu*

<sup>10</sup> Te vitna nchaa nchòhó ñáyiu ndècu ndihí-í ichi Xítóhó Jesucristú càchí tnúhu-í xii-ndo sã ìo nducu-ndo nacuáa cada-ndo ñihí ndeé-ndó cùu ì<sup>n</sup>nuu-ndo ndihí Xítóhó Jesucristú, chi mee-gã ìo càhnu cuu-gá, te chindee ñaha-gã xii-ndo. <sup>11</sup> Te ñu-ni nchaa sá ñi nduu táhú-ndó nũú Yã Ndiõxí ñu-ni nchaa xiã<sup>n</sup> cuhu<sup>n</sup> iní-ndó, chi xiã<sup>n</sup> chindee ñaha-xi xii-ndo ñihí ndeé-ndó cundecu-ndo cuendá sá vã dándàhú ñáhá sàculhá xii-ndo. <sup>12</sup> Chi nchoo ñá díú cuè ñáyiu ñuyíú-a nàá ndihí-o, chi ndihí cue espíritú cùndihí yucu ñávãha, te ñu-ni nchaa espíritú-á<sup>n</sup> cùnuu-xi cuèi núú ñi nu quide-xi nchaa sá cuèhé sá dúhá, te ñu-ni-xi cùnuu-xi ñuyíú-a sànu ichi-xi cue ñáyiu quidé-yu nchaa sá cuèhé sá dúhá. <sup>13</sup> Te ìo cuhu<sup>n</sup> iní-ndó nchaa sá ñi nduu táhú-ndó nũú Yã Ndiõxí cuendá duca<sup>n</sup> ñihí ndeé-ndó cundecu-ndo, te vá ndácú yùcu ñávãha ná cada ñaha-xi xii-ndo oré cuiní-xi coto ndeé ñáhá-xí. Te sãtá ná dàquee tíhú-ndó yùcu ñávãha te ñi-ni cunduu-ndo cundecu-ndo ichi Yá Ndiõxí. <sup>14</sup> Te duca<sup>n</sup> cundecu-ni-ndo ichi Yá Ndiõxí cada-ndo dàtná xiquide cue sandàdú, chi cue téé-á<sup>n</sup> ìo ñi xĩndáa-güedé.



Te cǎhá<sup>n</sup>-ndó mēe-ni tnúhu ndáá tnúhu Yá Ndiǒxí, te cuu-ndo dàtná cue sandàdú cue tée ndàda tii xití-xi òré quíhí<sup>n</sup>-güedé nàá-güedé. Te duca<sup>n</sup> sǎtnahá-xi cuu-ndo te núu na cǎhá<sup>n</sup>-ndó mēe-ni tnúhu ndáá tnúhu Yá Ndiǒxí. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue tée xixíhnu sá yídǎhu ñaha xii-güedé òré nàá-güedé cuendá sá vǎ ñicuèhé-güedé. Te duca<sup>n</sup> sǎtnahá-xi cuu-ndo te núu na cada ndáá-ndó cùndecu-ndo ichi-gá.

15 Te cundecu túha-ndo cǎhá<sup>n</sup>-ndó tnúhu Xítóhó Jesucristú, tnúhu sá cǎhá<sup>n</sup> nàcuáa cuu váha iní ñáyi cuendécú-yu, te cuu-ndo dàtná cue sandàdú cue tée ndíhu zapátú-xi quíhí<sup>n</sup>-güedé nàá-güedé. Te duca<sup>n</sup> sǎtnahá-xi cuu-ndo te núu na cùndecu túha-ndo cǎhá<sup>n</sup>-ndó tnúhu Xítóhó Jesucristú núu ñáyi. 16 Te cǎchí tnúhu tucu-í xii-ndo sǎ ò quindáa iní-ndó Yá Ndiǒxí cuendá sá vǎ ndácú sàcuíhná nǎ cada ñaha-xi xii-ndo, te duca<sup>n</sup> te cuu-ndo dàtná cue sandàdú cue tée xínehe vítú chínèe-güedé sáquídáhu ñaha-xi xii-güedé cuendá sá vǎ cuicú<sup>n</sup>-güedé sá nchicú<sup>n</sup> ñuhú téé ñaha cue téé nàá ndíhi-güedé. Te duca<sup>n</sup> sǎtnahá-xi cuu-ndo te núu na quindáa iní-ndó Yá Ndiǒxí. 17 Te ò cuhu<sup>n</sup> iní-ndó sǎ ñí naníhí tǎhú-ndó, te cuu-ndo dàtná cue sandàdú cue téé ñúhu mbelú cáxí<sup>n</sup>. Te duca<sup>n</sup> sǎtnahá-xi cuu-ndo te núu na cùhu<sup>n</sup> iní-ndó sǎ ñí naníhí tǎhú-ndó. Te ò cuhu<sup>n</sup> iní-ndó tnúhu Yá Ndiǒxí, chí tnúhu-á<sup>n</sup> ñí taxi Espíritú-gá ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machití cuáhá<sup>n</sup>-güedé nàá-güedé. Te duca<sup>n</sup> sǎtnahá-xi cuu-ndo te núu na cùhu<sup>n</sup> iní-ndó tnúhu Yá Ndiǒxí. 18 Te vá dáñá ndéé-ndó cǎhá<sup>n</sup> ndíhi-ndo Yá Ndiǒxí nàcuáa chindee ñaha Espíritú-gá xii-ndo, te cǎcá<sup>n</sup> tǎhú-ndó núu-gǎ núu ná cuiní-ndó, te ò cundecu túha-ndo cǎhá<sup>n</sup> ndíhi-ndo-gǎ, te vá nátùhú iní-ndó cǎcá<sup>n</sup> tǎhú-ndó núu-gǎ cuendá nchaa dava-gǎ cue ñáyi cù cuendá-gǎ. 19 Te tnàhá cuendá-í cǎcá<sup>n</sup> tǎhú-ndó núu Yá Ndiǒxí cuendá sá ná chindee ñaha-gǎ xii-í níhí-í tnúhu cǎhá<sup>n</sup>-í òré cǎhá<sup>n</sup>-í

tnúhu-gǎ, te duca<sup>n</sup> vǎ yùhú-í cǎhá<sup>n</sup>-í nàcuáa ndùu tnúhu sá cǎhá<sup>n</sup> nàcuáa naníhí tǎhú-ó núu ñáyi tnúhu sá vǎtá cùndédóho-gǎ-yu. 20 Te Yá Ndiǒxí ní cachí-gǎ sǎ yùhú cuu-í ñí téé cada-í núu-gǎ cǎhá<sup>n</sup>-í tnúhu-gǎ núu ñáyi, te ñu cuendá tnúhu-á<sup>n</sup> yíhí-í vecá vitna. Te ò cǎcá<sup>n</sup> tǎhú-ndó núu Yá Ndiǒxí cuendá-í cuendá sǎ yùhú cuyí-í ñí yùhu ñí iní-í cǎhá<sup>n</sup>-í tnúhu-gǎ núu ñáyi nàcuáa tǎu-xi cunduu.

### *Tnúhu ndéé núu ñí ndíhi-ná*

21 Te té Tiquicú téé ò cù iní-í ndécú ndíhi-o ichi Xítóhó Jesucristú cúu-dé ñí téé ò váha quide ndáa xínú cuèchi-dé núu Xítóhó Jesucristú, téé-á<sup>n</sup> cachí tnúhu-dé xii-ndo nàcuáa cù ndecu-í ndíhi nchaa nàcuáa quide-í cuendá duca<sup>n</sup> cùtnuní iní-ndó. 22 Te cuendá xíá<sup>n</sup> núu cuiní-í tendaha-í-dé quixi-dé núu ndécú-ndó cuendá cachí tnúhu-dé xii-ndo nchaa nàcuáa cù ndecu-ndí iha, te duca<sup>n</sup> tǎxi-gǎ-dé tnúhu ndee ñí cundecu ndíhi-ndo.

23 Te xicá<sup>n</sup> tǎhú-í núu Tǎtá-ó Dütú Ndiǒxí ndíhi núu Xítóhó Jesucristú sá ncháa nchòhó ñáyi ndecu ndíhi-í ichi-gǎ sǎ ñu-gǎ ná cáda te ò váha cuu iní-ndó cùndecu-ndo, te duca<sup>n</sup> ò cuu iní tnàhá-ndó, te ò quindáa iní-ndó-gǎ. 24 Te nchòhó ò cù iní-ndó Xítóhó Jesucristú, te ñá túu dàña ndéé-ndó cù iní-ndó-gǎ. Te mee Yá Ndiǒxí ò na chindee chitúu ñaha-gǎ xii-ndo. Te duca<sup>n</sup> na cunduu. Te ò chí cáda ndèe iní-nǎ vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ FÌLIPÚ

*Té Păblú cádüha-dé tutú quihi<sup>n</sup>  
ndaha ñáyiú quide ndáá xñdecu ichi  
Xítóhó Jesucristú ndécú ñuú Filipú*

<sup>1</sup> Yúhú té Păblú ndihi té Timùteú cúú-ndí cue téé xínu cuechi núú Xítóhó Jesucristú, te tëndaha-ndí tutú-a véxi ndaha nchòhó cue téé yìndaha nchaa ñáyiú ndècu ichi Xítóhó Jesucristú, ndihi cue téé chindee ñaha xii-ndo, ndihi nchaa dava-gá ñáyiú xñquide ndáá ndécú ìchi-gá ñuú Fìlipú. <sup>2</sup> Te xìcá<sup>n</sup> táhù-í núú Tátá-ó Dútú Ndiòxí ndihi núú Xítóhó Jesucristú sá ná chindee chitúu ñaha-gá xii-ndo, te duca<sup>n</sup> ndí nduú-gá ná cádá te ío váha cuu iní-ndó cùndecu-ndo.

*Té Păblú càhá<sup>n</sup> ndihi-dé Yă Ndiòxí  
cuendá nchaa ñáyiú ndècu ichi-gá*

<sup>3</sup> Te ndi tnahá òré ndácú iní ñáhà-í xii-ndo, te ndàcá<sup>n</sup> táhù-í núú Tátá-ó Dútú Ndiòxí sá ndécú-ndó ìchi-gá. <sup>4</sup> Te ndi tnahá òré duca<sup>n</sup> quide-í te ío cùdí iní-í càhá<sup>n</sup> ndihi-í-gá cuendá-ndó. <sup>5</sup> Chi ndéé cùtnàhá ní sándáá iní-ndó-gá ní nguíta-ndo tnahá-ndó quide váha-ndo ndècu-ndo cuendá sá quìndáá iní ñáyiú tnúhu Xítóhó Jesucristú. <sup>6</sup> Te yúhú sàni ndáá iní-í sá Yă Ndiòxí Yaá ní quesaha chindee ñaha xii-ndo quide váha-ndo ndècu-ndo, te ñu-ndi-gá chindee ñaha-gá xii-ndo càda váha-ndo cùndecu-ndo ndéé ná sàá nduu quìxi tucu Xítóhó Jesucristú. <sup>7</sup> Te duca<sup>n</sup> tnahí tàú-xi cani iní-í sá cúú-xí-ndó, chi ío cùu iní ñáhà-í xii-ndo. Te tnahá-ndó ìo chindee chitúu ñaha Yă Ndiòxí xii-ndo ndècu-ndo, te ñu-ndi duca<sup>n</sup> chindee ñaha-gá xii-ndo tnahá-ndó cuèi vitna yìhi-í vecaá, te ñu-ndi duca<sup>n</sup> chindee ñaha-gá xii-í cuèi òré cuáhà<sup>n</sup>-í núú cuè ñáyiú ñá túú tnahá iní tnúhu-gá, chi nihí-í tnúhu nàdanchocáva-í núú ná tnúhu càhá<sup>n</sup>-yu cuendá-gá, te nchaa

ñáyiú xàhá<sup>n</sup>-í xii-yu sá tnúhu-gá cúú-xí tnúhu ndáá cuiti. <sup>8</sup> Te mee Yă Ndiòxí náhà ndáá-gá sá yùhú ío cùu iní ñáhà-í xii-ndo dàtná cúú iní ñáhà mèe Xítóhó Jesucristú xii-o. <sup>9</sup> Te xìcá<sup>n</sup> táhù-í núú Yă Ndiòxí sá díú-gá ná chindee ñaha-gá xii-ndo te uu<sup>n</sup>-gá cuita cuu iní tnahá-gá-ndó quìhí<sup>n</sup>, te duca<sup>n</sup> ìo váha cuita cutnùní iní-ndó nchàa nacuaá sàni iní-gá cada-ndo, te duca<sup>n</sup> ìo váha cuita cutnùní tucu iní-ndó nàcuáa cundecu-ndo. <sup>10</sup> Te duca<sup>n</sup> cùtnuní tucu iní-ndó nchàa sá ìo-gá váha xini ñuhu-xi cada-ndo, te duca<sup>n</sup> te cuu-ndo ñáyiú cada mee-ni sá vâha, te duca<sup>n</sup> ñà túú tnahí ná cùmání-ndó núú Yă Ndiòxí ndéé ná sàá nduu quìxi tucu Xítóhó Jesucristú. <sup>11</sup> Te ñu-ndi Xítóhó Jesucristú chindee ñaha-gá xii-ndo càda-ni-ndo nchaa núú sá váha nàcuáa cùní Yă Ndiòxí. Te sá dúcá<sup>n</sup> ná càda-ndo te ío cada càhnu-ndo-gá, te nchaa dava-gá ñáyiú càhá<sup>n</sup> váha-yu cuendá-gá.

*Xítóhó Jesucristú ío cùnuu-gá ndécú  
ndihi-gá té Păblú*

<sup>12</sup> Te nchaa nchòhó ñáyiú ndècu ndihi-í ichi Xítóhó Jesucristú na càchí tnúhu-í xii-ndo sá úú<sup>n</sup>-gá tá xité nuu tnúhu-gá vitna yìhi-í vecaá. <sup>13</sup> Te nchaa cue téé cùu sandadú xñdecu vechi<sup>n</sup> núú ndécú téé cùnuu xini-güedé sá sá cuendá sá càhá<sup>n</sup>-í tnúhu Xítóhó Jesucristú duha yìhi-í vecaá, te ñu-ndi duca<sup>n</sup> sá xini nchaa dava-gá ñáyiú sá sá càhá<sup>n</sup>-í tnúhu-gá duha yìhi-í vecaá. <sup>14</sup> Te cuendá sá dúhá yìhi-í vecaá xíá<sup>n</sup> ío-gá vai ñáyiú ndècu ichi Yă Ndiòxí ta cùtnuní-gá iní-yu sá cúú-gá ñi<sup>n</sup> Yaá ío quide ndáá, te uu<sup>n</sup>-gá tá cùyí<sup>n</sup>-yu càhá<sup>n</sup>-yu tnúhu-gá, te ñá túú tnahí-gá yùhú-yu càhá<sup>n</sup>-yu.

<sup>15</sup> Te na càchí-í tnúhu ndáá-í xii-ndo sá dàva ñáyiú càhá<sup>n</sup>-yu tnúhu Xítóhó Jesucristú cuendá-ni sá cúú cuèdú iní ñáhà-yu xii-í sá ìo chindee ñaha-gá xii-í càhá<sup>n</sup>-í tnúhu-gá. Te duca<sup>n</sup> quidè-yu chi cùní-yu nàá ndihi ñáhà-yu xii-í, dico davá-yu chi ío váha sàni iní-yu càhá<sup>n</sup>-yu tnúhu-gá. <sup>16-17</sup> Te ñáyiú-á<sup>n</sup> càhá<sup>n</sup>-yu tnúhu-gá chi

cùu iní ñàhá-yu xii-í, te sa nàhá-yu sá sã cuendá sá càhá<sup>n</sup> váha-í cuendá tnúhu-gá núú ñáyiú ñá túú tnàhá iní tnúhu-gá, cuendá xiã<sup>n</sup> yihí-í vecaá. Te dava-gá-yu càhá<sup>n</sup>-yu tnúhu Xítohó Jesucristú cuendá-ni sá cuini-yu cuu sá vâha xii mée-yu, te ñá díú sã càhá<sup>n</sup>-yu cuendá sá sání vâha iní-yu. Te duca<sup>n</sup> quidé-yu chi cuendá cuini-yu sá nãndi-gá cada ñaha-güedê xii-í. **18** Dico ío cùdíí iní-í sá càhá<sup>n</sup>-yu tnúhu Xítohó Jesucristú cuéi cùu váha iní-yu àdi ñá túú cùu váha iní-yu càhá<sup>n</sup>-yu.

Te diu-ni duca<sup>n</sup> cùdíí iní-í núú cuahá<sup>n</sup> núú véxi. **19** Te cùtnuní iní-í sá sã cuendá nchaa sá quidé ñaha-güedê xii-í, cuendá xiã<sup>n</sup> cada váha ñaha Yã Ndiõxí xii-í, chi nchòhó ío càhá<sup>n</sup> ndihi-ndo-gã cuendá-í, te Espiritú ní taxi Xítohó Jesucristú ndécú ndihi-o ío chindee ñaha-xi xii-í. **20** Te cuini-í sá ñá túú tnàhí ná cumáni-í núú Yã Ndiõxí cuendá sá vã cúú càhá<sup>n</sup> núú-í, te cùtnuní iní-í sá díú-gã chindee ñaha-gã xii-í. Te cuini tucu-í sá ïo cuyi-í cáhá<sup>n</sup>-í tnúhu-gá vitna dàtná tá quidé-í véxi, te duca<sup>n</sup> ïo cada nínu-í Xítohó Jesucristú cuéi vitna nini ndècu-í ñuyiú-a te cuéi na cùú-í duca<sup>n</sup>-ni càda nínu-í-gã. **21** Te nini ndècu-í ñuyiú-a te Xítohó Jesucristú ío cùnuu-gã ndécú ndihi ñaha-gã xii-í, te na sãá nduu cùú-í te ío-gã váha tnàhá-í chi nucúndecu-í ndihi-gã. **22** Te núu na cùndecu-gã-í ñuyiú-a te cada-gã-í chiú<sup>n</sup> sá cúú-xí Yã Ndiõxí, te ñá cùtnuní iní-í nása cada-í núú sá cùndecu-í àdi sá cùú-í. **23** Te ío vâi sani iní-í te cuini-í cuú-í chi ío-gã váha cundecu-í núú ndécú Xítohó Jesucristú. **24** Dico sá cúú-xí nchòhó chi ío xini ñuhu-xi cundecu-í. **25** Te cùtnuní ndáá iní-í sá ï<sup>n</sup> tnúhu ndáá càhá<sup>n</sup>-í, te cùtnuní tucu iní-í sá cùndecu-ni-í cundecu ndihi ñaha-í xii-ndo nchàa-ndo cuendá chindee ñaha-í xii-ndo cuíta quindáá-gã iní-ndó Xítohó Jesucristú quihí<sup>n</sup>, te duca<sup>n</sup> ïo cudíí iní-ndó cùndecu-ndo. **26** Te duca<sup>n</sup> te uu<sup>n</sup>-gã cachí-ndó sã ïo càhnu cuu Xítohó Jesucristú cuendá sá ñí dácãcu ñaha-gã xii-í ndécú ndihi

ñaha-í xii-ndo.

**27** Te xini ñuhu-xi cada-ndo nchaa nacuaá càhá<sup>n</sup> tnúhu Xítohó Jesucristú. Te núu ní ndacu-í véxi coto ñaha-í xii-ndo, te dává-á<sup>n</sup> quini ndáá-í sá ndécú-ni-ndó ìchi Xítohó Jesucristú. Dico núu ñá túú ní ndacu-í quixi coto ñaha-í xii-ndo ña, te diu-ni níhi-í tnúhu sá ndécú-ni-ndó ìchi-gã, te níhi tucu-í tnúhu sá ï<sup>n</sup>-ní cùu-ndo ndecu-ndo, te níhi tucu-í tnúhu sá ï<sup>n</sup>-nuu nducu ndee-ndo cahá<sup>n</sup>-ndó tnúhu Yã Ndiõxí núú ñáyiú, tnúhu sá sãndáá iní-ndó. **28** Te ñá túú yùhú-ndó nchàa sá quidé ñaha ñáyiú cùu úhú iní ñàhá xii-ndo, te sá dúcá<sup>n</sup> quide-ndo ñá túú yùhú-ndó nchàa sá quidé ñàhá-yu xii-ndo, te ndixi túu iní-yu sá nchòhó ndécú-ndó ï<sup>n</sup> ìchi núú nánihí tàhú-ndó, te ñáyiú-á<sup>n</sup> cuíta nihnú-yu, chi duca<sup>n</sup> ñí cachí Yã Ndiõxí cunduu. **29** Te mee Yã Ndiõxí ní taxi-gã tnúhu ndee iní sá quindáá iní-ó Xítohó Jesucristú, te ñá díú-ni sã quindáá iní-ó-gã chi tnàhá ndoho-o cuendá-gã. **30** Te tnàhá nchòhó ndóhó-ndó cuendá-gã vitna, te nchòhó ní xiní núú-ndó nãcuáa ní ndoho-í, te vitna nihí-ndó tnúhu nchaa nãcuáa ndòho tucu-í.

## 2

*Xítohó Jesucristú ñá túú ní quide nínu-gã mée-gã dico Yã Ndiõxí ní quide nínu ñaha xii-gã*

**1** Te Xítohó Jesucristú dácãhu iní ñàhá-gã xii-ndo nãcuáa cundecu-ndo, te cùu iní ñàhá-gã xii-ndo nãcuáa cuu váha iní-ndó cùndecu-ndo, te ndècu ndihi-ndo Espiritú Yã Ndiõxí, te ío cùndahú iní tnàhá-ndó. **2** Te xiã<sup>n</sup> núú càhá<sup>n</sup>-í dóho-ndo sã ïo cuu ï<sup>n</sup>-nuu-ni-ndo cùndecu-ndo nacuaá ío-gã cudíí iní-í, te ï<sup>n</sup>-ni cùu iní tnàhá-ndó, te ï<sup>n</sup>-ni càni iní-ndó, te ï<sup>n</sup>-ni càda-ndo. **3** Te vã cáda nínu-ndo mée-ndo nducu-ndo mee-ni sá cúú-xí mée-ndo, chi cunduu ndàhú iní-ndó, te caní iní-ndó sã tnàha ñáyiú-ndo ío-gã cùnùú-yu dácúúxí mée-ndo. **4** Te ñí vã cãní iní-ndó nducu-ndo mee-ni sá váha sá cúú-xí mée-ndo, chi nducu-ndo sã cúú-xí tnàhá cuendá tnàha ñáyiú-ndo.

5 Te ío váha cani iní-ndó nàcuáa cundecu-ndo dàtná quidé mée Xítóhó Jesucristú. 6 Te ì<sup>n</sup>-ni cùu Xítóhó Jesucristú ndihí Yá Ndiöxí. Te cuèi duca<sup>n</sup> dico mee Xítóhó Jesucristú ní sani iní-gá sá ñà túú cùyica cundecu-gá taxi tnùní-gá ndihí Yá Ndiöxí. 7 Te ní dáñá-gá sá cúnùu-gá andíu te ní quixi-gá ñuyíú-a ní cuu-gá ì<sup>n</sup> ñáyíu, te ní quide-gá dàtná quidé ì<sup>n</sup> téé xínu cuechi. 8 Te ní cuu-gá ì<sup>n</sup> téé dàtná ndáa cue téé xíndecu ñuyíú-a, te ní cuu-gá ì<sup>n</sup> téé ío ndàhú iní-xi chí ñá túú ní quide nínu-gá mée-gă, te ní sándáá iní-gá ní quide-gá nchaa nàcuáa ní xáha<sup>n</sup> Yá Ndiöxí xii-gá cùtnàhá ní quixi-gá ñuyíú-a. Te sá dúcá<sup>n</sup> ní sándáá iní-gá xíá<sup>n</sup> ní xíhí-gá núú cùrúxí. 9 Te xíá<sup>n</sup> ío ní quide nínu ñaha Yá Ndiöxí xii Xítóhó Jesucristú cuèndá ío cunuu-gă. Te ní xáha<sup>n</sup> Yá Ndiöxí xii Xítóhó Jesucristú sá cúú-gă Xítóhó nchaa ñáyíu ndècu ñuyíú-a. 10 Te duca<sup>n</sup> ní quide Yá Ndiöxí cuèndá nchaa Espíritú ndécú àndíu, ndihí nchaa ñáyíu ndècu ñuyíú-a, ndihí nchaa ñáyíu ní xíhí ngüíñí xítí-yu ndihí nchaa espíritú-á<sup>n</sup> te cachí-yu ndihí-xi sá ío càhnu cuu Xítóhó Jesucristú. 11 Te ncháá-yu cachí-yu sá Xítóhó Jesucristú cúú-gă Yaá táxi tnùní. Te sá dúcá<sup>n</sup> càdá-yu, te quide cahnú-yu Dútú Ndiöxí.

*Ñáyíu ndècu ichi Xítóhó Jesucristú cúú-yu dàtná ì<sup>n</sup> ñuhú*

12 Te xíá<sup>n</sup> núu nchaa nchòhó ñáyíu ío cùu iní-í cuìní-í sá quíndáá iní ñáhá-ndó xii-í dàtná ní quide-ndo cùtnàhá ní xíndecu ndihí ñaha-í xii-ndo, chí dàvá-á<sup>n</sup> ñà túú tnàhí ní dàña ndeé-ndó ní sándáá iní ñáhá-ndó xii-í. Te cuìní-í sá úú<sup>n</sup>-gă quíndáá iní ñáhá-ndó xii-í vitna ñá túú ndècu ndihí ñaha-í xii-ndo. Te ío nducu ndèe-ndo cada-ndo nchaa nacuéa tàú-xi cunduu ndéé ná sàá nduu ndúu táhú-ndó cùndecu-ndo ndihí Xítóhó Jesucristú, te ío canehe-ndo sá yíñùhu núú-gă. 13 Te Yá Ndiöxí ío váha dàcahu iní ñáhá-gă xii-ndo càda-ndo nchaa nacuéa cuìní

mée-gă, te diu-ni mee-gă chíndèe ñaha-gă xii-ndo dùca<sup>n</sup> quide-ndo.

14 Te vá cání iní-ndó nă tnúhu cáhá<sup>n</sup>-ndó cuèndá ñáyíu, te ní ñà túú năndí tnúhu cùtnàha-ndo ndihí-yu, 15 te duca<sup>n</sup> te cuu-ndo ñáyíu ñá túú cuèchi-xi núú Yá Ndiöxí. Te nchòhó ñáyíu cùu déhe Yá Ndiöxí, ñá túú tnàhí-gá ná cumání-ndó núú-gă níni ndècu-ndo tnuú nchaa ñáyíu ndècu ichi cuehé ichi duha ñuyíú-a, ñáyíu cuihna iní-xi. Te cuu-ndo dàtná chódíní sá dáyèhé níu nee, 16 te duca<sup>n</sup> chí dàcuaha-ndo ñáyíu tnúhu Yá Ndiöxí tnúhu sá cáhá<sup>n</sup> nàcuáa naníhí táhú-yu. Te núu duca<sup>n</sup>-ni na càda-ndo te òré ná sàá nduu càda ndáá Xítóhó Jesucristú nchaa yíca cuèchi ñáyíu, te dàvá-á<sup>n</sup> vă cúú càha<sup>n</sup> núú-í, chí ñá túú dió duca<sup>n</sup> ní sàhni iní-í cada-í nchaa chiú<sup>n</sup> ní táhú-gă. 17 Te nchòhó ío váha quide-ndo ndecu-ndo ichi Yá Ndiöxí chí sándáá iní-ndó-gă, te yúhú cahni ñaha-güedé xii-í cuèndá nchaa sá văha quide-ó. Te xíá<sup>n</sup> ío cùdíí iní-í te cùdíí tucu iní-í dàtná cùdíí iní-ndó cuèndá nchaa sá văha quide-ndo. 18 Te diu-ni duca<sup>n</sup> ío chí cùdíí iní dàtná cùdíí iní mée-í cuèndá nchaa sá yáha-í ndécú-í.

*Té Timùteú ndihí té Epafrodítú*

19 Te núu Xítóhó Jesucristú ná càchí-gă te ndíhi-ni tendaha-í té Timùteú quixi-dé quixi coto ñaha-dé xii-ndo nàcuáa cudíí iní-ndó. Te òré ndixi-dé canaha-dé tnúhu ndixi núu nása cùu ndecu-ndo, te tnàhá yúhú ío cudíí iní-í tucu. 20 Te núu ncháá cuè téé ndècu ndihí-í te ì<sup>n</sup>di-í ní té Timùteú-a cùu-dé téé ío váha sàni iní-xi dàtná sání iní-í, chí diu tnàhí-ni-dé ío sàni iní-dé núu nása ndècu-ndo. 21 Chí dava-gă-güedé mee-ni sá cúú-xí mée-güedé ío sàni iní-güedé, te ñá túú sàni iní-güedé cada-güedé chiú<sup>n</sup> tahu Xítóhó Jesucristú. 22 Te nchòhó sa xíní-ndó sá té Timùteú-a cùu-dé ì<sup>n</sup> téé quide váha chí năndí sá tá yăha-dé véxi te quide ndee iní-dé. Te cùu-dé dàtná ì<sup>n</sup> déhe-í ndécú ndihí ñaha-dé xii-í xínú cuèchi-ndí núú Xítóhó Jesucristú cáhá<sup>n</sup>-ndí tnúhu-gă núú



ñáyiú. <sup>23</sup> Te òré ná cùtnuní nũ nása cada ñaha-güedé xii-í te ndĩhi-ni tendaha-ĩ-dé quixi coto ñaha-dě xii-ndo. <sup>24</sup> Te sàni iní-í sá Xítóhó Jesucristú cada-gá te tnàhá mée-í ío ndĩhi quixi coto ñaha-ĩ xii-ndo.

<sup>25</sup> Te tnàhá sání iní-í sá ío xini ñuhu-xi tendaha-í té Epafròditú té ndècu ndĩhi-o ichi Xítóhó Jesucristú ndixi coto ñaha-dě xii-ndo, chi tnàhá-dé quidé-dě chiú-gá te quide ndee iní-dé tnàhá-dé nándi yáha-dé sá cuendá-gá, te ðiu mee-ndo ni tendaha-ndo-dě véxi-dé cuendá coto ñaha-dě xii-í. <sup>26</sup> Te duca<sup>n</sup> cuiní-í tendaha-ĩ-dé ndixi-dé chi mee-dě ío sàni iní-dé ndixi cáhá<sup>n</sup> ndĩhi ñaha-dě xii-ndo, te ío ndihú iní-dé sá ni nĩhí-ndó tnũhu sá cùhú-dé ní cùu. <sup>27</sup> Te ndáá sá nĩ cuhú-dé chi luha ndiqui<sup>n</sup>-ná cuú-dé ní cùu, dico Yá Ndiõxí ní cundàhú iní ñáhá-gă xii-dé ní quide tátna ñaha-gă te ní ndúha-dé. Te ñá díú-ní mée-dé duca<sup>n</sup> ni cundahú iní ñáhá-gă xii-dé chi tnàhá yúhú ío ní cundàhú iní ñáhá-gă xii-í, chi núu ni xĩhí-dé te ío-gá ndihú iní-í ní cùu. <sup>28</sup> Te xiá<sup>n</sup> ío ndĩhi cuiní-í tendaha-ĩ-dé ndixi-dé cuendá òré nasáá-dé núú-ndó te ío cudí<sup>í</sup> iní-ndó, te duca<sup>n</sup> yúhú ñá túú-gă ná caní iní-í. <sup>29</sup> Te òré nasáá-dé te ío cudí<sup>í</sup> iní-ndó nàquehe<sup>n</sup> cuendá-ndó-dě, te duca<sup>n</sup> ío ndacá<sup>n</sup> táhú-ndó nũ Xítóhó Jesucristú cuendá-dé. Te ío canehe-ndo sá yĩñũhu núu nchàa cue té quide datná quidé-dě. <sup>30</sup> Chi té-a sa luha ndiqui<sup>n</sup>-ná cuú-dé ní cùu sá xínú cuèchi-dé núú Xítóhó Jesucristú, te ní sani iní-dé sá ñà túú nă cada-xi cuèi na cùú-dé ní quide-dé nchaa chiú<sup>n</sup> sá cúmăní cada-ndo cuendá-í ní cùu.

### 3

#### *Ñáyiú cundáá núú Yá Ndiõxí*

<sup>1</sup> Te vitna nchaa nchòhó ñáyiú ndècu ndĩhi-í ichi Xítóhó Jesucristú càhá<sup>n</sup> ndàhú-í núú-ndó sá ío cudí<sup>í</sup> iní-ndó sá yindàha ñaha-gá xii-ndo. Te yúhú ñá túú cùu dusa<sup>n</sup>-í tee tucu-í nchaa tnũhu sá sà ní dánèhé ñàhá-í xii-ndo, chi cùu-xi tnũhu sá

ío chindee ñaha-xi xii-ndo. <sup>2</sup> Te ío quihí iní-ndó vă cádá cuendá-ndó nĩ ñ<sup>n</sup> tnũhu càhá<sup>n</sup> cue téé ío cuihna iní-xi ñá túú tnàhí cuiní cada sá vâha, chi cue téé-á<sup>n</sup> néhé-güedé iní iná chi càchí-güedé sá ncháá cue téé xini ñuhu-xi cuáha-güedé seña ñi-güedé cuendá duca<sup>n</sup> cùdiu-güedé núú Yá Ndiõxí. <sup>3</sup> Dico nchoo chi cùdiu-o núú Yá Ndiõxí cuèi dava-o sá ní ngúndecu seña ñi-o te dava-o ñáhá, chi Espiritú-gá chindèe ñaha-xi xii-o quide-o nchaa nacuaá tàú-xi cunduu cuendá cuu càhnu-gá. Te ío cudí<sup>í</sup> iní-ó càchí-ó sá ío càhnu cuu Xítóhó Jesucristú, te ñá túú sàni iní-ó sá sá cuendá nchaa sá vâha quide-o cudiu-o núú Yá Ndiõxí. <sup>4</sup> Te núu dícó cuendá nchaa sá vâha quide-o cudiu-o núú Yá Ndiõxí, te yúhú sa ama-gá cudiu-í núú-gă cuendá nchaa sá nĩ quide-í ní cùu te núu dícó duca<sup>n</sup>. Te ío cue téé càchí-güedé sá cùdiu-güedé núú Yá Ndiõxí cuendá nchaa sá vâha quide-güedé. Te yúhú uu<sup>n</sup>-gá duca<sup>n</sup> cáhá<sup>n</sup>-í nũ dícó sá cúú chi yúhú ní xídó-gă-í ní quide-í dâcúúxí dâva-gă-güedé. <sup>5</sup> Te núú uná-ni nduu sá nĩ cacu-í te ní sâha-güedé seña ñi-í, te yúhú cùú-í téé isrâél, te mei ñàní tnàhá ndi Benjàmín téé ní xindecu ndéé sanaha cùu-í. Te càhá<sup>n</sup>-í tnũhu hêbreú tnũhu càhá<sup>n</sup> tâtá-í ndĩhi nânâ-í, te ní cundihí-í nchaa cue téé cùu fariséú, te ní cãchicú<sup>n</sup> nihnu-í nchaa nâcuáa ní cáhá<sup>n</sup> ndi Moisés datná xiquide mee-güedé. <sup>6</sup> Te yúhú ní sani iní-í sá ñ<sup>n</sup> ichi ndáá ndécù-í ní cùu, te ío ní cuiní-í cunu cuechi-í núú Yá Ndiõxí, núu xiá<sup>n</sup> nándi sá nĩ quide-í nchaa ñáyiú ndècu ichi Xítóhó Jesucristú, te vá yòo ñ<sup>n</sup> ni xóo cúñaha ñ<sup>n</sup> tnũhu xii-í cachí-yu sá ñà túú quide-í nâcuáa ní cáhá<sup>n</sup> ndi Moisés ní cùu. <sup>7</sup> Te nchaa sá sání iní-í sá ío nândihí nchicú<sup>n</sup> nihnu-í ní cùu, ní cutnùní iní-í sá ñà túú tnàhí chindee ñaha-xi nacuaá cundáá-í núú Yá Ndiõxí, núu xiá<sup>n</sup> duu<sup>n</sup> duu<sup>n</sup> ní xehndé iní-í sá vă chindèe ñaha-xi cuendá sá ní cuiní-í cundecu ndihí-í Xítóhó Jesucristú. <sup>8</sup> Te nchaa sá càchí ñáyiú chindee ñaha cundáá-ó nũ Yá Ndiõxí ní cutnùní iní-í sá ñà túú

chindee ñaha-xi. Te yúhú ní cutnùní iní-í sá ïo-gá váha tnahá tnúhu-o ndìhi Xítohó Jesucristú. Te nchaa sá sání iní-í chindèe ñaha xii-í ní cùu, ñá túú-gã sàndáá iní-í sá chindèe ñaha-xi vitna chi ní cutnùní iní-í sá ñà túú nàndìhi-xi. Te duca<sup>n</sup> quide-í ñá túú-gã sàndáá iní-í nchaa xiã<sup>n</sup> sá chindèe ñaha-xi, chi cuiní-í sá úú<sup>n</sup>-gã cuita tnahá tnúhu-í ndìhi Xítohó Jesucristú quíhí<sup>n</sup>, <sup>9</sup> te cuu ì<sup>n</sup>nuu-í ndìhi-gá, te duca<sup>n</sup>-ni cùndáá-í núú Yã Ndiõxí dàtná cùndáá-í vitna, dico ñá díú cuendá sá nchìcú<sup>n</sup> nihnu-í nàcuáa ní cáhá<sup>n</sup> ndí Moisés ní cùu, chi cuendá sá sàndáá iní-í Xítohó Jesucristú. Te Yã Ndiõxí ní quide-gá cùndáá-í núú-gã, te duca<sup>n</sup> chi ní sàndáá iní-í Xítohó Jesucristú. <sup>10</sup> Te cuiní-í cutnùní iní-í nchaa nàcuáa sàni iní Xítohó Jesucristú, te cuiní-í sá ïo chindee ñaha-gá, te ñu-ni-gá cúú-gã Yaá ní xíhí te ní ndoto-gá, te duca<sup>n</sup> cuiní-í cada-gá cuendá cada-í nchaa nàcuáa cuiní-gá. Te cuiní-í tnahá-í ndoho-í dàtná ní ndoho-gá. Te yúhú cuiní-í sá vã cadà-í ní ì<sup>n</sup> sá ñà túú tnahá iní Yã Ndiõxí, chi ñu cuendá-á<sup>n</sup> ní xíhí Xítohó Jesucristú. <sup>11</sup> Te cuiní-í sá Yã Ndiõxí cachí-gá te tnahá-í ndoto na sáá nduu ndòto nchaa ñáyiú sa ní xíhí ní xíndecu ichi-gá.

*Cada-o nchaa nàcuáa tàú-xi cunduu cuendá níhí-ó sá ndúú tãhú-ó*

<sup>12</sup> Te cùmání-gã cada-í nchaa nàcuáa càhá<sup>n</sup>-í-a, te cumání-gã cada-í nchaa nàcuáa càhá<sup>n</sup> Yã Ndiõxí cuendá sá ñà túú-gã ná cumání-í núú-gã. Te ïo ndùcu ndee-í nchìcú<sup>n</sup> nihnu-í quidè-í nàcuáa duca<sup>n</sup> ñà túú-gã ná cumání-í núú-gã, chi ñu cuendá-á<sup>n</sup> ní cáhá<sup>n</sup> ñáhá Xítohó Jesucristú xii-í. <sup>13</sup> Te nchaa nchòhó ñáyiú ndècu ndìhi-í ichi Xítohó Jesucristú càhí tnúhu-í xii-ndo sá cùtnuní ndáá iní-í sá vítná cùmání-gã cada-í nchaa nàcuáa ñá túú-gã ná cumání-í núú-gã. Te ní níhí-í ì<sup>n</sup> sá ïo xini ñuhu-xi cada-í te xiã<sup>n</sup> quidè-í, te ñá túú-gã quidé cuendá-í nchaa sá ní xóo cada-í, te ïo ndùcu ndee-í quidè-í nchaa nàcuáa càhá<sup>n</sup> Yã Ndiõxí. <sup>14</sup> Te ndùcu ndee vihi-í nchìcú<sup>n</sup> nihnu-í quidè-í nchaa nàcuáa

càhá<sup>n</sup>-gá, te ñu-ni duca<sup>n</sup> càda-í ndéé ná sáá nduu sáá-í núú ndécú-gã taxi-gá sá ndúú tãhú-í. Te duca<sup>n</sup> tnahí sa ní cáhá<sup>n</sup> ñáhá-gã xii-o cùndecu-o ndìhi-gá, te duca<sup>n</sup> ní cáhá<sup>n</sup> ñáhá-gã xii-o sá cuendá Xítohó Jesucristú chi tnahá tnúhu-o ndìhi-gá.

<sup>15</sup> Te nchaa nchòhó ñáyiú quide váha ndècu ichi Yã Ndiõxí xini ñuhu-xi cani iní-ndó dàtná sání iní-í-a, àdi núú ñáyiú-ndo ñà túú sàni iní-ndó dàtná sání iní-í-a, dico mee Yã Ndiõxí dandixi túú-gá iní-ndó te cutnùní iní-ndó nàcuáa cada-ndo. <sup>16</sup> Te xini ñuhu-ni-xi cada-o nchaa nàcuáa ta quide-o véxi.

<sup>17</sup> Te nchaa nchòhó ñáyiú ndècu ndìhi-í ichi Xítohó Jesucristú càhá<sup>n</sup>-í dóho-ndo sá cànchìcú<sup>n</sup> nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchìcú<sup>n</sup> nihnu nchaa nàcuáa dānehé ñáhá-í xii-ndo cuendá duca<sup>n</sup> càda-ndo tnahá-ndó. <sup>18</sup> Te sa ní cuu vãi xito cachí tnúhu-í xii-ndo sá ïo ñáyiú ñá túú tnahí cùu váha iní-xi sá ní xíhí Xítohó Jesucristú núú cùrúxí cuendá sá nánihí tãhú-ó. Te ndìhi ndute núú-í dāndācu iní ñáhá-í xii-ndo cuendá-yu. <sup>19</sup> Te sáá nduu te nchaa ñáyiú duca<sup>n</sup> xíquide-á<sup>n</sup> cuita nihnú-yu, chi mee-ni nchaa sá cuèhé sá dúhá ñuhu iní-yu te ñu-ni nchaa xiã<sup>n</sup> cùnùu quidé-yu, te cucaha<sup>n</sup> núú-yu cuendá nchaa sá quidè-yu núú dicó sá cúú, dico ñáhá chi da quide cahnú-yu mée-yu cuendá nchaa xiã<sup>n</sup>. Te mee-ni nchaa sá ïo ñuyú-a ñuhu iní-yu. <sup>20</sup> Dico nchoo chi andiú ndècu núú cúú ñúú-ó, te ndètu cahnú-o sáá nduu quixi tucu Xítohó Jesucristú nàcuaca ñaha-gã xii-o. Te ñu-ni-gá cúú-gã Yaá ní dācācu nihnu ñaha xii-o núú ùhú núú ndàhú. <sup>21</sup> Te yiqui cùñú-ó chi vá cùdñi-xi cundecu-xi dàtná cáá-xí vitna, dico mee Xítohó Jesucristú nadama-gá yiqui cùñú-ó te ndada-gá dàtná ní nduu yiqui cùñú mée-gã cùtnáhá ní ndoto-gá. Te duca<sup>n</sup> càda-gá chi ndàcu-gá quidé-gã nchaa sá váha càhí iní-gá, te duca<sup>n</sup> tàxi tnuní-gá nchaandi túhú sá ïo.

## 4

*Ío cudíí ìní-ó sǎ ndécú-ó ìchi Xítóhó Jesucristú*

<sup>1</sup> Te nchaa nchòhó ñáyiú ío cùu iní-í ndécú ndìhi-í ìchi Xítóhó Jesucristú ío cuìní-í cáhá<sup>n</sup> ndìhi ñaha-í xii-ndo. Te ío cudíí ìní-í cuèndá nchaa sá vǎha quide-ndo chí ñá túú ní xíta chiu<sup>n</sup> Yá Ndiöxí ní quide-í sá cúú-xí-ndó, te ñu-ni nchòhó ñáyiú ío cùu iní-í càhá<sup>n</sup>-í dóho-ndo sǎ cǎnchícú<sup>n</sup> nihnu-ni-ndo ìchi Xítóhó Jesucristú.

<sup>2</sup> Te yòhó tá Vòdiá ndìhi yòhó tá Sǐntiqué càhá<sup>n</sup> ndàhú-í núú-ndó sǎ cúú ñ<sup>n</sup>nuu-ndo cundecu-ndo ìchi Xítóhó Jesucristú. <sup>3</sup> Te yòhó té cùndìhi-í quide ndáá quidé nchaa chiu<sup>n</sup> quide-í, càhá<sup>n</sup> ndàhú-í núú-n sǎ chǐndèe tnúhu-n úú ñáyiú dìhí-á<sup>n</sup> cuèndá sá ná cùu ñ<sup>n</sup>nuú-yu cundecú-yu, chí cùtnàhá ní xǐndecu ndìhi ñàhá-yu xii-í ío ní chindee ñàhá-yu xii-í, ndìhi té Clémenté, ndìhi nchaa dava-gá-yu ní quide-ndí chiu<sup>n</sup> Xítóhó Jesucristú, te nchaa ñáyiú-á<sup>n</sup> sa yòdo tnuní-yu núú tütú Yá Ndiöxí sá ndúú tǎhú-yu cundecú-yu ndìhi-gá ní caa ní quíhí<sup>n</sup>.

<sup>4</sup> Te nchaa-ni nduu ío cudíí ìní-ndó sǎ ndécú-ndó ìchi Xítóhó Jesucristú. ;Te càhá<sup>n</sup>-ni tucu-í dóho-ndo sǎ cudíí ndisa iní-ndó! <sup>5</sup> Te ío váha cuu iní-ndó càhá<sup>n</sup> ndìhi-ndo ñáyiú cuèndá ná cùtnuní iní-yu sá cúú-ndó ñáyiú váha iní-xi, chí sa ta cùyatni nduu quixi tucu Xítóhó Jesucristú.

<sup>6</sup> Te ñá túú tnàhí ná cani iní-ndó te núu nása cùu ndecu-ndo, chí cáhá<sup>n</sup> ndìhi-ndo Yá Ndiöxí cuèndá sá ná chindee ñaha-gá xii-ndo. Te ío ndacá<sup>n</sup> tǎhú-ndó nǔú-gǎ. <sup>7</sup> Te núu duca<sup>n</sup> na càda-ndo te Yá Ndiöxí cada-gá te ío váha cuu iní-ndó cùndecu-ndo. Te nchoo ñáyiú ñá túú cùtnuní iní-ó nása quide-gá ndéé duca<sup>n</sup> ío váha cùu iní-ó, te duca<sup>n</sup> ío váha cùu iní-ó chí cùu ñ<sup>n</sup>nuu-o ndìhi Xítóhó Jesucristú.

*Mee-ni sǎ vǎha cuhu<sup>n</sup> iní-ó*

<sup>8</sup> Te càhá<sup>n</sup> ndàhú tucu-í núú nchaa nchohó ñáyiú ndècu ndìhi-í ìchi Xítóhó Jesucristú sá méé-ní sǎ vǎha cuhu<sup>n</sup> iní-ndó. Te xini ñuhu-xi cuhu<sup>n</sup>

iní-ndó mèe-ni nchaa tnúhu ndáá, ndìhi nchaa tnúhu yǐñùhu, ndìhi nchaa tnúhu sá ío cudíí ìní-ó, ndìhi nchaa tnúhu sá ío vii ío váha cuáhá<sup>n</sup>, ndìhi nchaa tnúhu sá ñà túú ñùhu tnahá tnúhu cuèhé, ndìhi nchaa tnúhu sá cǎchí ñáyiú váha, ndìhi nchaa dava-gá tnúhu sá sání ìní méé-ndó sǎ ío váha te ñu-ni nchaa xǐá<sup>n</sup> cuhu<sup>n</sup> iní-ndó.

<sup>9</sup> Te cùtnàhá ní xǐndecu ndìhi ñaha-í xii-ndo ní dánèhé ñàhá-í nàcuáa cada-ndo te ní sándáá iní-ndó. Te xǐá<sup>n</sup> càhá<sup>n</sup>-í dóho-ndo sǎ vǎ dáñá ndèé-ndó càda-ndo, te ñu-ni duca<sup>n</sup> vǎ dáñá ndèé-ndó càda-ndo nchaa nacuáa ní quide-í ní xini-ndó. Te núu duca<sup>n</sup> na càda-ndo te Yá Ndiöxí Yáa quidé ío váha cùu iní-ó ndècu-o cundecu ndìhi ñaha-gá xii-ndo.

*Ñáyiú ñuú Filipú ndécú ìchi Xítóhó Jesucristú sǎñàhá-yu sá ndúú tǎhú tǎ Pǎblú*

<sup>10</sup> Te cudíí víhí ìní-í ndàcá<sup>n</sup> tǎhú-í núú Xítóhó Jesucristú sá ní ndacu iní ñàhá-ndó xii-í, dico ñá díú sǎ ñà túú ñùhu iní ñàhá-ndó xii-í chí dǐcó sǎ ñá ñihí-ndó nàcuáa cada-ndo chindee ñaha-ndo xii-í ní cùu. <sup>11</sup> Te ñá díú sǎ dúhá càhá<sup>n</sup>-í te cani iní-ndó sǎ cǎchí tnúhu-í xii-ndo sǎ ío ñ<sup>n</sup> sǎ cùmání xii-í, chí yúhú cùu váha-ni iní-í núu ío xii-í àdi ñá túú ío. <sup>12</sup> Te xini-í cunduu ndàhú-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñá túú vèdana ná ndécú ndìhi-o, te xini-í nàcuáa quide-xi oré xidó ndécú ndìhi-o. Te duca<sup>n</sup> ní cutúha-í quide-í cuèndá nchaa nàcuáa ta yǎha-í véxi. <sup>13</sup> Te nchaa ndàcu-í quide-í chí Xítóhó Jesucristú chǐndèe ñaha-gá xii-í. <sup>14</sup> Te nchòhó ío váha ní quide-ndo ní cundàhú iní ñàhá-ndó xii-í ní chindee ñàha-ndo vitna ndecu ndìhi-í tnúndòho.

<sup>15</sup> Te nchòhó cue ñáyiú ñuú Filipú sa ñaha-ndo nacuáa ní cuu cùtnàhá ní ngúíta-í càhá<sup>n</sup>-í tnúhu Xítóhó Jesucristú distritú Macèdoniá, te cùtnàhá ní ndee-í distritú-á<sup>n</sup> te ñu tnàhí-ni nchòhó ní taxi-ndo sǎ ndúú tǎhú-í, te nchaa ñáyiú ndècu ìchi Xítóhó Jesucristú dava-gá xichi ñá túú tnàhí

ni chindee ñahá-yu xii-í. <sup>16</sup> Te cuëi cútnàhá ní xíndecu-í ñúú Tesalónica títñí xito ní tendaha-ndo sã ndúú tãhù-í sá ñí cutnùní iní mée-ndó ñí xini ñùhu-í. <sup>17</sup> Te vá cãní ìní-ndó sã sã dúhá càhá<sup>n</sup>-í te cuìní-í nãndi-gá taxi táhú-ndó, te duha càhá<sup>n</sup>-í chi Yá Ndiöxí ío-gá vãi sã vãha cada ñaha-gã xii-ndo sã dúcã<sup>n</sup> quide-ndo. <sup>18</sup> Te ní xídó vãi nchaa sã xíní ñùhu-í ndécú ndìhi-í vitna, te duca<sup>n</sup> ïo vãi sã ndécú ndìhi-í ní cuu chi ní tendaha tucu-ndo sã ndúú tãhù-í véxi ndìhi té Epafròditú. Te táhú-a cùu-xi datná ì<sup>n</sup> táhú sã ñí sãha-ndo mée Yá Ndiöxí, te cùu vii cuu vãha iní-gá sã dúcã<sup>n</sup> ñí quide-ndo. <sup>19</sup> Te núu ná cúú sã xíní ñùhu-ndo, te mee Yã Ndiöxí ío vãi taxi-gá chi ío vãi sã ndécú ndìhi-gá, te duca<sup>n</sup> càda-gá chi ndècu ndìhi-o Xítóhó Jesucristú. <sup>20</sup> Te vitna nchaa-o chí ná càchí-ó sã ïo càhñu cuu Tátá-ó Dütú Ndiöxí ñí caa ñí quihí<sup>n</sup>. Te duca<sup>n</sup> na cùnduu.

*Tnúhu ndéé núú ñí ndìhi-ná*

<sup>21</sup> Te cúñaha-ndo sã ïo na càda ndee iní nchaa ñáyiu ndècu ichi Xítóhó Jesucristú, ñáyiu cùu cuendá Yã Ndiöxí. Te tnàhá nchaa ñáyiu xíndecu ichi Xítóhó Jesucristú ndécú ndìhi-í quidé ndèe iní ñáhã-yu xii-ndo. <sup>22</sup> Te nchaa ñáyiu cùu cuendá Yã Ndiöxí xínú cuèchi vehe té Cèsár té yíndaha cuéhé nació<sup>n</sup> quidé ndèe iní ñáhã-yu xii-ndo, ndìhi nchaa dava-gá ñáyiu cùu cuendá-gá.

<sup>23</sup> Te Xítóhó Jesucristú ío na chindee chitúu ñaha-gã xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nã vitna.



## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ CÒLOSÁ

*Té Păblú cadúha-dé tutú quihi<sup>n</sup> ndaha ñáyiú xĩndecu ichi Xĩtohó Jesucristú ndécú ñuú Còlosá*

<sup>1</sup> Yúhú té Păblú ní tendaha ñaha Yá Ndiöxí cãhá<sup>n</sup>-í tnúhu Xĩtohó Jesucristú núú ñáyiú chi duca<sup>n</sup> cuini méé Yá Ndiöxí cunduu, te cadúha-í tutú-a ndihi té Timúteú <sup>2</sup> cuendá daquixi-í ndaha nchòhó ñáyiú ñuú Còlosá, ñáyiú cùu cuendá Yá Ndiöxí, ñáyiú quide ndáá ndécú ichi Xĩtohó Jesucristú, te xicá<sup>n</sup> táhú-í núú Tãtá-ó Dütú Ndiöxí sá ío na chĩndee chitúu ñaha-gã xii-ndo, te duca<sup>n</sup> ndi nduú-gá ná cadá te ío váha cuu iní-ndó cundecu-ndo.

*Té Păblú cãhá<sup>n</sup> ndihi-dé Yá Ndiöxí cuendá ñáyiú sãndáá iní ñáhá xii Xĩtohó Jesucristú*

<sup>3</sup> Te duca<sup>n</sup>-ni cãhá<sup>n</sup> ndihi-ndí Yá Ndiöxí Yaá cúu Tãtá Xĩtohó Jesucristú ndacá<sup>n</sup> táhú-ndí núú-gã cuendá nchaa nacuáa quide-ndo ndecu-ndo, <sup>4</sup> chi nihí-ndí tnúhu sá ío sãndáá iní-ndó Xĩtohó Jesucristú, te duca<sup>n</sup> ío cùu iní-ndó nchaa ñáyiú cùu cuendá Yá Ndiöxí. <sup>5</sup> Te duca<sup>n</sup> quide-ndo chi sãndáá iní-ndó sã ndúú táhú-ndó cundecu-ndo núú ndécú Xĩtohó Jesucristú, te tnúhu-á<sup>n</sup> ní nihí-ndó cùtnàhá ní xĩndedóho-ndo tnúhu ndáá tnúhu Xĩtohó Jesucristú. <sup>6</sup> Te tnúhu Xĩtohó Jesucristú tá xitè nuu-xi nihí ñuyúu cuáhá<sup>n</sup>. Te vai ñáyiú ta sãndáá iní-yu cuáhá<sup>n</sup>, te ta quidé-yu mee-ni sã váha cuáhá<sup>n</sup> ndécü-yu ichi-gá. Te nchòhó chi ndéé cùtnàhá ní tecú dóho-ndo tnúhu-gá ní quesaha-xi ta cùu vai ñáyiú ñuú-ndó tá quide ndáá-yu núú-gã cuáhá<sup>n</sup>. Te dàvá-á<sup>n</sup> ní cutnùní ndáá ndisa iní-ndó sã Yá Ndiöxí ío chĩndee chitúu ñaha-gã xii-ndo. <sup>7</sup> Te duca<sup>n</sup> ní dánèhé ñáhá tè Èpafrás téé ío cùu iní-ndí, chi tnàhá-dé ío quide ndáá-dé xínú cuèchi-dé núú Xĩtohó Jesucristú quidé-dé núú-ndí

dácuàha ñaha-dé xii-ndo tnúhu-gá. <sup>8</sup> Te cãchí tnúhu-dé xii-ndí sá ío cùu iní ñáhá-ndó xii-ndí, te duca<sup>n</sup> quide-ndo chi Espiritú Yá Ndiöxí chĩndee ñaha-xi xii-ndo.

<sup>9</sup> Te ndéé cùtnàhá ní nihí-ndí tnúhu nacuáa quide-ndo ndecu-ndo ndéé dàvá-á<sup>n</sup> ní ngüita-ndí ñá túú dàña ndee-ndí xicá<sup>n</sup> táhú-ndí núú Yá Ndiöxí cuendá-ndó sã Espiritú-gá ná tàxi-xi nchaa-gá sá cúmání quini tnùní-ndó, te duca<sup>n</sup> te cutnùní váha-gá iní-ndó nacuáa cuini Yá Ndiöxí cada-ndo. <sup>10</sup> Te sá dúcá<sup>n</sup> te ndacu-ndo cada-ndo mee-ni sá váha dàtná cuini Xĩtohó Jesucristú cada nchaa ñáyiú ndécü ichi-gá. Te duca<sup>n</sup> ío nduu vétú iní-gá te núu na cada-ndo nchaa núú sã váha. Te duca<sup>n</sup> ío-gá cuita cutnùní iní-ndó nchaa nacuáa cuini Yá Ndiöxí cada-ndo. <sup>11</sup> Te mee-gã cúu-gã Yaá ío cùnuu, te diu-gá ío chĩndee ñaha-gã xii-ndo, te cudí iní-ndó cuèi nándi na cada ñaha ñáyiú xii-ndo sã cuendá-gá, te duca<sup>n</sup> ío cunduu cãhnu iní-ndó, <sup>12</sup> Te ndacá<sup>n</sup> táhú-ó núú Dütú Ndiöxí chi ní quide túha ñaha-gã xii-o cuendá nduu táhú-ó cundecu-o ndihi nchaa dava-gã ñáyiú yĩndaha-gã xĩndecu núú cãndòo canine ñá túú tnàhí-gá ni ñ<sup>n</sup> cuèchi ío. <sup>13</sup> Te diu-gá ní quide ní dáñá-ó nchaa ichi cuehé ichi duha núú táxi tnùní yucu ñávãha, te ní nachihi ñaha-gã xii-o ndàha Déhe-gã Yaá ío cùu iní-gá. <sup>14</sup> Te Déhe-gá ní xihí-gá cuendá sá nchóó cãcu nihnu-o núú ùhú núú ndàhú, te ní quide cãhnu iní-gá nchaa sá cuèhé sá dúhá ní quide-o.

*Ñáyiú cùu ñ<sup>n</sup>nuu ndihi Yá Ndiöxí cuendá sá ní xihí Xĩtohó Jesucristú*

<sup>15</sup> Te Yá Ndiöxí cúu-gã Yaá vá cúu quini-ó dico Xĩtohó Jesucristú chi ní quixi túu-gá ñuyú-a, te ní quide-gá nchaa nacuáa sãni iní-gá. Te dàtná-ni sãni iní-gá te duca<sup>n</sup> sãni iní Yá Ndiöxí, te Yaá-á<sup>n</sup> duca<sup>n</sup>-ni ndecu-gá ndéé cùtnàhá vátá ngãva-gã ñuyúu. <sup>16</sup> Te Xĩtohó Jesucristú ní quide-gá núú Yá Ndiöxí ní cadúha-gã nchaa sá ío andiú ndihi nchaa sá ío ñuyú-a, te ní cadúha-gã nchaa sá cúu quini núú-ó

cùndehe-o, ndihi nchaa sá vǎ quini tnahí-o, ndihi nchaa espíritú cùnù vihi xinu cuechi núú Yǎ Ndiǒxí, ndihi nchaa dava-gá espíritú xínú cuèchi. Te nchaa ní cadúha Xítoho Jesucristú chi duca<sup>n</sup> ñi cachí Yǎ Ndiǒxí cunduu. Te duca<sup>n</sup> ñi cachí Yǎ Ndiǒxí cunduu cuendá nchaa cuu-xi mee-ni sǎ vǎha sá cúu-xí Xítoho Jesucristú. <sup>17</sup> Te Xítoho Jesucristú duca<sup>n</sup>-ni ndècu-gá ndéé cùtnahá vátá ngǎva-gá ñuyú-a, te ñiu núú ndáhá-gǎ cándodo ñuyú-a, ndihi andiu, ndihi nchaandi túhú sá ío. <sup>18</sup> Te ñiu Xítoho Jesucristú cùnù-gá yíndaha ñaha-gá xii nchaa nchoo ñayiu ndècu ichi-gá, te ñiu-gá quidé-gǎ ndécú vǎha-o núú-gǎ. Te núú ncháá ñayiu ndoto ñiu-gá cúu-gǎ Yaá ío càhnu cuu sa ní ndoto, te sá dúcá<sup>n</sup> ñi ndoto-gá te xǎ<sup>n</sup> cúu-gǎ Yaá ío tàxi tnuní nchaandi túhú sá ío ñuyú-a ndihi andiu. <sup>19</sup> Te duca<sup>n</sup> ío cùnù-gá táxi tnùnigá chi ndáá sá ñi<sup>n</sup>-ni cuu-gá ndihi Yá Ndiǒxí. <sup>20</sup> Te Xítoho Jesucristú ní xíhigá núú cùrúxí, chi duca<sup>n</sup> ñi cuini Yǎ Ndiǒxí cunduu cuendá sá vǎ yǒo ñi<sup>n</sup>-gá cuu úhú iní ñáhá xigá cuèi ñayiu xíndecu ñuyú-a, te cuèi cue espíritú ndécú àndiu.

<sup>21</sup> Te nchòhó cùtnahá vátá cùndècu-gá-ndó ichi Xítoho Jesucristú ñá túú tnahí ñi xǒo cáhá<sup>n</sup> ndihi-ndo-gǎ, chi mee-ni ñi xóo cuu úhú iní-ndó-gǎ, te mee-ni ncháa sá cuèhé sá dúhá ñi xóo cunuu ñi xóo cada-ndo ñi cùu, dico Xítoho Jesucristú ní quide-gá ní tnahá tnúhu-ndo ndihi Yá Ndiǒxí vitna. <sup>22</sup> Chi ñiu cuendá-á<sup>n</sup> ñi xíhí Xítoho Jesucristú núú cùrúxí cuendá sá nchóo ndù ndoo nduu nine iní-ó ngúndecu-o núú Yǎ Ndiǒxí, te duca<sup>n</sup> te ñá túú tnahí-gá ná cumánigá-ó núú-gǎ, te vǎ yǒo ñi<sup>n</sup>-gá cachí sá nchóo ndècu cuèchi-o. <sup>23</sup> Te núú vǎ dáñá ndéé-ndó quíndáá iní-ndó Xítoho Jesucristú, te cundecu-ni-ndo ichi-gá, te vǎ cáni iní-ndó dàña-ndo tnúhu ndee iní ní taxi-gá ndécú ndihi-o. Te nchaa tnúhu-gá-á<sup>n</sup> tá xité nuu-xi ñihí ñuyú cuáhá<sup>n</sup>, te ñiu-ni tnúhu-á<sup>n</sup> càhá<sup>n</sup> yúhú té Pǎblú dánèhé-í ñayiu.

*Té Pǎblú yíhí díquí-dě cáhá<sup>n</sup>-dē tnúhu Xítoho Jesucristú núú ñayiu ndècu ichi-gá*

<sup>24</sup> Te vitna ío cùdí iní-í ndòhò-í cuendá-ndó, chi Xítoho Jesucristú ío ní ndoho-gá cuendá-ó, te tnahá yúhú ndòhò-í cuendá nchaa ñayiu ndècu ichi-gá, dico vitna cùmánigá-ndóhò-í cuendá-yu. <sup>25</sup> Te Yá Ndiǒxí ní cachí-gá sá yúhú quíhí díquí ñáhá-í xii nchaa nchòhó ñayiu ndècu ichi-gá cuendá danèhé ñáhá vǎha-í xii-ndo tnúhu-gá cuendá cuu-xi sá vǎha sá cúu-xí-ndó. <sup>26</sup> Te nchaa tnúhu sá dánèhé ñáhá-í xii-ndo ñá túú ní tècú dóho nchaa ñayiu ní xíndecu ndéé sanaha, te mee-gǎ ní cuini-gá sá ncháá nchòo ñayiu yíndaha-gá vitna cundecu ndihi-o tnúhu-á<sup>n</sup>. <sup>27</sup> Te mee-gǎ ní cachí-gá sá dátù-gá nchaa tnúhu sá ío vii ío vǎha cuáhá<sup>n</sup> núú ncháa ñayiu yíndaha-gá. Te tnúhu-á<sup>n</sup> cúu-xí cuendá tnahá nchaa nchòhó ñayiu ñá túú cùu ñayiu israhél. Te tnúhu-á<sup>n</sup> dánèhé ñáhá-xí xii-ndo sá Xítoho Jesucristú ndécú ndihi ñaha-gá xii-ndo. Te cuendá xǎ<sup>n</sup> ní ngúndecu ndihi-ndo tnúhu ndee iní cundecu-ndo ndihi-gá ñi caa ñi quíhí<sup>n</sup>.

<sup>28</sup> Te nchúhú mee-ni cuendá Xítoho Jesucristú càhá<sup>n</sup> vǎha-ndí, te dàsahú-ndí ñayiu nàcuáa cadá-yu. Te vǎha vihi danèhé-ndí nchaa ñayiu nàcuáa tecú tnùnigá-ndó, te duca<sup>n</sup> danèhé-ndí-yu nàcuáa cundáa-yu núú Yǎ Ndiǒxí, te duca<sup>n</sup> chi tnahá tnúhu-yu ndihi Xítoho Jesucristú. <sup>29</sup> Te cuendá xǎ<sup>n</sup> ío ndècu ndee-í quidè-í chiu<sup>n</sup> Xítoho Jesucristú, te mee-gǎ ío chindee ñaha-gá xii-í núú xǎ<sup>n</sup> ndácú-í quidè-í chiu<sup>n</sup>-gá.

## 2

<sup>1</sup> Te cuini-í sá nchòhó cùtnùnigá iní-ndó sá ío sàni iní-í cuendá-ndó, ndihi cuendá nchaa ñayiu ndècu ñuú Laodiceá, ñayiu xíndecu ichi Xítoho Jesucristú. Te duca<sup>n</sup>-ni ío sàni iní-í cuendá nchaa ñayiu vátá quini ñáhá-gǎ xii-í. <sup>2</sup> Te cuini-í sá nchòhó ndihi nchaa ñayiu-á<sup>n</sup> ío nducu

ndèe-ndo canchicú<sup>n</sup> nihnu-ndo ìchi Xítohó Jesucristú, te ío cuu iní tnáhá-ndó, te duca<sup>n</sup> cùu ì<sup>n</sup>nuu-ndo cundecu-ndo. Te cuiní-í sá nchòhó ndìhi dava-gá ñáyiú-á<sup>n</sup> ío váha sáá sá xìní tnùní-ndó cuèndá tecú tnùní-ndó nchàa nacuáa ndùu cuendá Xítohó Jesucristú chí ío ndùu yuhu ní cuu, dico vitna ní dátüu-gá núú-ó. <sup>3</sup> Te Xítohó Jesucristú néhé vâha-gá nchaa tnúhu sá ío xìní ñuhu-xi tecú tnùní-ó. <sup>4</sup> Te duha càhá<sup>n</sup>-í chí cuiní-í sá vâ quindáá iní-ndó nì ì<sup>n</sup> tnúhu càhá<sup>n</sup> nchaa ñáyiú cuiní dandàhú ñáhá xii-ndo cuéi ío váha càhá<sup>n</sup>-yu. <sup>5</sup> Te cuéi ñá túú ndècu ndìhi ñaha-í xii-ndo dico duca<sup>n</sup>-ni ío ñuhu iní ñáhà-í, te ío cùdí iní-í chí ñihí-í tnúhu sá ío cùu ì<sup>n</sup>nuu-ndo ndecu-ndo, te ñá túú dàña ndeé-ndó sàndáá iní-ndó Xítohó Jesucristú.

<sup>6</sup> Te dàtná-ni ní sàndáá iní-ndó Xítohó Jesucristú, te duca<sup>n</sup>-ni quindáá iní-ndó-gá canchicú<sup>n</sup> nihnu-ndo ìchi-gá. <sup>7</sup> Te nì yùhu nì iní-ndó càncicú<sup>n</sup> nihnu-ndo ìchi-gá, te duca<sup>n</sup> cuíta cutnuni-gá iní-ndó nchàa nacuáa càhá<sup>n</sup>-gá quíhí<sup>n</sup>. Te vá dáñá ndeé tnàhí-ndo quindáá iní-ndó nchàa tnúhu sá nì dánèhé ñáhá cuè téè càhá<sup>n</sup> tnúhu-gá xii-ndo. Te xìní ñuhu-xi ndacá<sup>n</sup> táhú vîhi-ndo núú Yá Ndiöxí cuèndá nchaa tnúhu-á<sup>n</sup>.

*Ñáyiú ío váha tnàhá tnúhu ndìhi Xítohó Jesucristú*

<sup>8</sup> Te ío quíhi iní-ndó cùndecu-ndo chí xìca cuu ñáyiú cuiní dandàhú ñáhá xii-ndo, te ñáyiú-á<sup>n</sup> càhá<sup>n</sup>-yu mee-ni nchàa tnúhu ní cahu iní nchaa cue téè ñuyíú-a, te nchaa tnúhu-á<sup>n</sup> ñá túú vèdana nàndíhi-xi. Te duca<sup>n</sup> quidè-yu chí nchicú<sup>n</sup> nihnu-ní-yu nchaa nàcuáa ní xóo cada ñáyiú ní xíndecu ndeé sanaha. Te càhá<sup>n</sup>-yu nàcuáa sàni iní yucu ñávâha, te ñá túú càhá<sup>n</sup>-yu nàcuáa cuiní méé Xítohó Jesucristú.

<sup>9</sup> Te Xítohó Jesucristú cúú-gá ì<sup>n</sup> ñáyiú dico ì<sup>n</sup>-ni cùu-gá ndìhi Dútú Ndiöxí. <sup>10</sup> Te nchòhó chí ñá túú tnàhí-gá ná cúmàní-ndó núú-gá chí ndècu ndìhi-ndo Xítohó Jesucristú. Te ío cùnuu-gá te tàxi tnuní-gá nchaa núú

cuè espíritú cúnùu. <sup>11</sup> Te mee-gá ní ndada ndoo ní ndada nine-gá iní-ndó chí ní ngúndecu ndìhi-ndo-gá te duca<sup>n</sup> ñà túú-gá ndécú-ndó ìchi cuehé ìchi duha, te cada iní-ndó sá nì ngúndecu ndìhi-ndo ì<sup>n</sup> seña, chí ní ndada ndoo ní ndada nine-gá iní-ndó, dico ñá díú ì<sup>n</sup>-ni cuu-xi ndìhi seña sá sâha cue téè isràél ñi-güedé. <sup>12</sup> Te nchòhó sa ní sandute-ndo te cada iní-ndó sá dàtná tnúhu sá nì xíhí-ndó ndìhi Xítohó Jesucristú, te ní nguindüxi-ndo ndìhi-gá, te ní ndoto-ndo ndìhi-gá, te duca<sup>n</sup> càda iní-ndó chí ñá túú-gá ndécú-ndó ìchi cuehé ìchi duha. Te duca<sup>n</sup> chí sàndáá iní-ndó nchàa nacuáa quide Yá Ndiöxí, te díu-gá ní dándótó-gá Xítohó Jesucristú. <sup>13</sup> Te nchòhó cùtnàhá ndécú-ndó ìchi cuehé ìchi duha cùu-ndo datná ñáyiú ní xíhí, chí ñá túú tnàhá tnúhu-ndo ndìhi Yá Ndiöxí ní cùu, te nì ñà díú ñáyiú isràél cúú-ndó. Te Yá Ndiöxí ní cachí-gá sá nchóó ío váha tnàhá tnúhu-o ndìhi Xítohó Jesucristú vitna. Te duca<sup>n</sup> nì quide-gá chí sa ní quide càhnu iní-gá nchaa sá cuèhé sá dúhá nì xóo cada-o. <sup>14</sup> Te vitna duu<sup>n</sup> duu<sup>n</sup> ñá túú-gá cuéchi-o ndècu núú-gá. Te nchoo ñà túú cuiní-ó càda-o nacuáa càhá<sup>n</sup>-gá, te cuèndá xíá<sup>n</sup> ío ndècuéchi-o, te vâi nacháhu-o núú-gá ní cùu. Te vitna ñá túú-gá nì ì<sup>n</sup> cuéchi-o ndècu núú-gá, chí díu cuèndá-á<sup>n</sup> nì xíhí Xítohó Jesucristú núú cùrúxí. <sup>15</sup> Te sá dúcá<sup>n</sup> nì xíhí Xítohó Jesucristú núú cùrúxí, te duu<sup>n</sup> duu<sup>n</sup> ní dáquée tíhú-gá sàcuíhná ndìhi nchaa espíritú cùndìhi-xi, te ní quendóo canúú-xi, te mee-gá ío cùnuu-gá táxi tnùní-gá.

*Nanducu nihnu-o mee-ni sá vâha càhí Xítohó Jesucristú*

<sup>16</sup> Te núu dava ñáyiú xícuèhé ñáhâ-yu xii-ndo cuèndá sá ñà túú xèxi-ndo xíhi-ndo datná quidè mèé-yu te vá cáda cuèndá-ndó, te nì vâ cáda cuèndá-ndó te núu xícuèhé ñáhâ-yu xii-ndo cuèndá sá ñà túú cànehe íí-ndó víco quide meé-yu núú cuíá núú cuíá, ndìhi víco quidè-yu ndì tnahá yóó, ndìhi cuèndá sá ñà túú cànehe íí-ndó ndùu ndetatú-yu.

17 Te nàcuáa quidé-yu ndi tnahá òré quidé-yu nchaa vico-án, ndihi nàcuáa quidé-yu ndi tnahá nchaa nduu cãnehe ì-yu-án, te cada iní-ó sã sã quidé-yu-án dánèhé núú ñáhá-xí nàcuáa cada Xítohó Jesucristú núú cuáhá<sup>n</sup> núú vëxi. 18 Te vá quindáá iní-ndó ni ì<sup>n</sup> tnúhu càhá<sup>n</sup> ñáyiu càchí sã cuíta nihnu-ndo cuendá sã ñã túú tnì-ndo tnúhu càhá<sup>n</sup>-yu, chi càchí-yu sã ìo xini ñuhu-xi cada cahnu-o nchaa cue espíritú xínú cuèchi núú Yá Ndiöxí, te ni yùhu ni iní-ó cãnehe-o sã yíñuhu núú-xi. Te ñáyiu-án càchí-yu sã ndáá càhá<sup>n</sup>-yu chi dàcoto ñaha saní-yu nàcuáa càhá<sup>n</sup>-yu, te ío quide cahnú-yu mée-yu cuendá nchaa sã sání iní mée-yu quidé-yu, te ñã túú vëdana nàndìhi nchaa sã quidé-yu. 19 Te nchaa ñáyiu duca<sup>n</sup> xíquide-án ñã túú tnàhá tnúhu-yu ndihi Xítohó Jesucristú. Te mee-gã cúú-gã Yaá cúnùu taxi tnuní ñáhá-gã xii nchaa nchoo ñáyiu ndècu ichi-gã, te chindee ñaha-gã xii-o ndècu-o ichi-gã, te mee-gã quidé-gã cúú ì<sup>n</sup>nuu-o ndècu-o, te ta quide-o nchaa nacuáa cuení Yá Ndiöxí cuáhá<sup>n</sup>.

20 Te nchòhó cúú-ndó dàtná ñáyiu ní xihí ndihi Xítohó Jesucristú cuendá sã vã cáncihí<sup>n</sup> nihnu-gá-ndó nàcuáa càhá<sup>n</sup> ñáyiu ñã túú ndècu ichi-gã. Te núú duca<sup>n</sup> ñã, ¿te ná cuendá tní-ní-ndó tnúhu càhá<sup>n</sup> ñáyiu-án te quide-ni-ndo datná quidé-yu? 21 Chi ñáyiu-án càchí-yu sã ìo sã ní vã cúú tèe ndaha-o, te dava ni vã cúú càxi-o, te dava ni vã cúú tnì-o. 22 Te nchaa xiã<sup>n</sup>, núú néhé chù<sup>n</sup>-ni-o ndihi nihnu-xi. Te nchaa sã dúcá<sup>n</sup> càhá<sup>n</sup>-yu-án cúú-xí mèe-ni sã ñi cahu iní mée nchaa ñáyiu ñuyíú-a nàcuáa cadá-yu cundecú-yu. 23 Te nchaa tnúhu càhá<sup>n</sup>-yu-án sánùu sã cúú-xí ì<sup>n</sup> tnúhu càhá<sup>n</sup> ì<sup>n</sup> tée ío váha sàá díquí-xi, chi càchí-yu sã cadá cahnu-o Yá Ndiöxí nàcuáa véxi iní mée-ó, te cunduu ndàhú iní-ó dico ñã túú dènehé ñáhã-yu nàcuáa tàú-xi cunduu. Te càchí tucú-yu sã cadá ùhú-ó mèe-o, chi duca<sup>n</sup> cuení Yá Ndiöxí cada-o càchí-yu. Te nchaa xiã<sup>n</sup>

ñã túú vëdana chindee ñaha-xi xii-o cuendá sã vã táxi tnuní ñáhá ni ì<sup>n</sup> sã cuèhé sã dúhá sãni iní-ó.

### 3

1 Te nchòhó cada iní-ndó sã ñi xihí-ndó ndihi Xítohó Jesucristú te ní ndoto-ndo ndihi-gã, núú xiã<sup>n</sup> tàú-ndó càda-ndo nchaa sã vãha dàtná cuení mée-gã chi mee-gã núcõo-gã xio cùha Dútú Ndiöxí chi tnàhá-gã ío cùnùu-gã. 2 Te ío cuhu<sup>n</sup> iní-ndó nchaa sã vãha càchí Xítohó Jesucristú nduu táhú-ndó cundecu ndihi-ndo, te vá cúhú<sup>n</sup> iní-ndó mèe-ni nchaa sã ío ñuyíú-a. 3 Te duca<sup>n</sup> càda-ndo chi cùu-ndo datná ñáyiu ní xihí ndihi Xítohó Jesucristú, chi ñã túú-gã ndécú-ndó ìchi cuèhé ichi duha. Te Yá Ndiöxí néhé cuendá ñáhá-gã xii-ndo chi tnàhá tnúhu-ndo ndihi Xítohó Jesucristú. 4 Te Xítohó Jesucristú cúú-gã Yaá ndécú ndihi ñaha xii-o vitna, te sáá nduu quèe túu ndihi ñaha-gã xii-o àndiu, te tnàhá-ó ío cunuu-o ndihi-gã.

*Duu<sup>n</sup> duu<sup>n</sup> dañ-a-o nchaa sã cuèhé sã dúhá ñuhu iní-ó te cada-o mèe-ni sã vãha*

5 Te duu<sup>n</sup> duu<sup>n</sup> dañ-ndo nchaa sã cuèhé sã dúhá ñuhu iní-ndó. Te nchaa nchòhó cue tée vã càhá<sup>n</sup> ndihi-ndo ñáyiu dìhí te núú ñã díú ñàdihí-ndó cùú-yu, te duca<sup>n</sup>-ni nchaa nchohó cue ñáyiu dìhí tucu vã càhá<sup>n</sup> ndihi-ndo cuè tée te núú ñã díú yì-ndo cuu-güedé, te nchaa-ndo vã cání-gã iní-ndó càda-ndo ni ì<sup>n</sup> sã cuèhé sã dúhá ndihi tnahã ñáyiu-ndo. Te vá cání cuèhé cani duha-gã iní-ndó sã cúú-xí-ndó ndihí-yu, te vá cání-gã iní-ndó ni ì<sup>n</sup> sã cuèhé sã dúhá, te ni vã xihó-ndó ì<sup>n</sup> sã ndécú ndihi tnahã ñáyiu-ndo, chi núú duca<sup>n</sup> na càda-ndo xiho-ndo sã ndécú ndihí-yu te ì<sup>n</sup>-ni cùu-ndo ndihi ñáyiu chihñuhu nchaa sã càchí-yu cùu ndiöxí te ñã ndáá sã ndiöxí cúú nchaa xiã<sup>n</sup>. 6 Te nchaa ñáyiu duca<sup>n</sup> xíquide ío dandòho ñaha Yá Ndiöxí xii-yu na sáá nduu tnúndòho tnúhu ndàhú, chi ñã túú sàndáá iní ñáhã-yu xii-gã. 7 Te nchòhó cútnàhá ní xindecu-ndo ìchi cuèhé ichi duha, te tnàhá-ndó ñi xóo cada-ndo



dàtná quidé nchàa ñáyi-u-á<sup>n</sup>. <sup>8</sup> Te vitna duu<sup>n</sup> duu<sup>n</sup> dañà-ndo nchàa sá ná càchí tnúhu-í-a: Vá cúdeé<sup>n</sup>-gã-ndó, te ni vã cúndùu líhli-gá iní-ndó, te ni vã cúu ùhú-gá iní-ndó tnàha ñáyi-u-ndo, te ni vã cùcuèhé-gá-ndõ-yu, te ni ì<sup>n</sup>-gá tnúhu cuèhé vá càhá<sup>n</sup>-ndó. <sup>9</sup> Te ni vã dácùandehnde-gá-ndó, chi nchòhó sa ní dáñá-ndó nchàa ichi cuehé ichi duha, te ñá túú-gã sání cuèhé sání dùha iní-ndó nã cada-ndo vitna datná ní xóo cada-ndo. <sup>10</sup> Te vitna nchòhó ní nduu-ndo ñáyi-u váha, te uu<sup>n</sup>-gá tá cùtnuní iní-ndó nchàa nacuáa cuíní Yá Ndiõxí cada-ndo, te duca<sup>n</sup> ta ndùcu ndee-ndo quide-ndo mee-ni sá váha dàtná quidé mèe-gá. <sup>11</sup> Te vitna ní ngúndecu ndìhi-ndo Xítóhó Jesucristú, te vá cáda cuendá-gá-ndó nùu cùu-ndo ñáyi-u isràel àdi ñá túú cùu-ndo, te ni vã cáda cuendá-ndó nùu cùu-ndo ñáyi-u ní ngúndecu sèñá ñì-xi àdi ñáhá, te ni vã cáda cuendá-ndó nùu cùu-ndo ñáyi-u véxi ñuú xicá, te ni vã cáda cuendá-ndó nùu cùu-ndo ñáyi-u cùu neñuú, te ni vã cáda cuendá-ndó nùu cùu-ndo ñáyi-u ñá túú tnàhí dàñá quee núú chíú<sup>n</sup> pàtróó<sup>n</sup>-xi, te ni vã cáda cuendá-ndó nùu cùu-ndo ñáyi-u dàñá queé núú chíú<sup>n</sup> pàtróó<sup>n</sup>-xi, chi Xítóhó Jesucristú cùnùu-gá ndécú ndìhi ñaha-gá xii-ndo nchàa-o.

<sup>12</sup> Te Yá Ndiõxí ní dáquée dì<sup>n</sup> ñaha-gá xii-ndo cuendá cundecu-ndo ndìhi-gá, te vitna cùu-ndo ñáyi-u quide ndáá ndécú ichi-gá. Te mee-gã ío cùu iní ñáhá-gã xii-ndo nùu xí<sup>n</sup> tàú-ndó cùndahú iní tnáhá-ndó, te ío váha cuu iní-ndó chindee tnaha-ndo, te cuu-ndo ñáyi-u ndàhú iní-xi, te ío vii ío váha cuu iní-ndó cùndecu ndìhi tnaha-ndo, te ío càhnu cunduu iní-ndó cuendá nchaa sá quidé ñaha ñáyi-u xii-ndo. <sup>13</sup> Te duca<sup>n</sup> cànehe-ndo tnúhu càhnu iní núú ndì mèe-ndo nacuáa ndècu-ndo ichi-gá, te cada càhnu tucu iní-ndó nùu ná cúu sã cúmãní nùú tnáhá-ndó. Te dàtná ní quide càhnu iní Xítóhó Jesucristú nchaa sá ñá túú váha ní xóo cada-ndo duca<sup>n</sup> càda-ndo cada càhnu iní-ndó nchàa sá cúmãní nùú tnáhá-ndó ndècu-ndo. <sup>14</sup> Te xini ñuhu vihi-xi sá

íu cuu iní tnáhá-ndó cùndecu-ndo, chi núu duca<sup>n</sup> na càda-ndo, te quide-ndo nchaa dava-gá sá càhá<sup>n</sup>-í, te ñá túú tnàhí-gá ná cúmãní-ndó. <sup>15</sup> Te dañà-ndo sã Yá Ndiõxí ná chindee ñaha-gá nàcuáa ío váha cuu iní-ndó cùndecu-ndo, chi dïu cuendá-á<sup>n</sup> ní càhá<sup>n</sup> ñáhá Yá Ndiõxí xii-ndo cuendá cuu ñ<sup>n</sup>nuu-ndo ndìhi nchaa dava-gá ñáyi-u ndècu ichi-gá, te duca<sup>n</sup>-ni ío ndacá<sup>n</sup> táhú-ndó nùú-gã.

<sup>16</sup> Te ío cuhu<sup>n</sup> iní-ndó tnúhu Xítóhó Jesucristú, te ío váha cuáha-ndo cuendá nàcuáa càhá<sup>n</sup> tnúhu-gá te duca<sup>n</sup> dānehé tnáhá-ndó. Te ío càhá<sup>n</sup> dóho tnàha-ndo nacuáa cada-ndo càncìcú<sup>n</sup> nihnu-ndo càda-ndo nchaa nacuáa càhá<sup>n</sup> tnúhu-gá, te cata-ndo ndùdú ndèé núú tütú Yá Ndiõxí, ndìhi nchaa dava-gá ndudú sá xini méé-ndó xita-ndo te nchaa xí<sup>n</sup> cata-ndo chìñuhu-ndo Yá Ndiõxí. Te òré xitá-ndó te ni yùhu ni iní-ndó ndacá<sup>n</sup> táhú-ndó nùú-gã. <sup>17</sup> Te cuhu<sup>n</sup> iní-ndó Xítóhó Jesucristú òré sání iní-ndó càda-ndo ñ<sup>n</sup> chiu<sup>n</sup> àdi ná tnúhu cuíní-ndó càhá<sup>n</sup>-ndó, te dïu-ni-gá cuhu<sup>n</sup> iní-ndó. Te xini ñuhu-xi ndacá<sup>n</sup> táhú-ndó nùú Yá Ndiõxí, te dïu-ni Xítóhó Jesucristú chindee ñaha-gá xii-ndo ndacá<sup>n</sup> táhú-ndó nùú Tātá-ó Dütú Ndiõxí.

*Nàcuáa tàú ñáyi-u ndècu ichi Xítóhó Jesucristú cadá-yu sá cúu-xi ndì mee-yu*

<sup>18</sup> Te nchaa nchòhó ñáyi-u dìhí ñáyi-u ndècu yì-xi quindáá iní-ndó yì-ndo, chi duca<sup>n</sup> tàú-xi cada nchaa ñáyi-u dìhí ndécú ichi Xítóhó Jesucristú. <sup>19</sup> Te nchaa nchòhó cue téé ndècu ñadìhí-xi cuu iní-ndó ñadìhí-ndó, te vá cùcuèhé-ndõ-yu. <sup>20</sup> Te nchaa nchòhó ñáyi-u ndècu tátá-xi ndìhi nãná-xi quindáá iní-ndõ-yu, chi núu duca<sup>n</sup> na càda-ndo te ndùu vétú iní Yá Ndiõxí. <sup>21</sup> Te nchaa nchòhó ñáyi-u cùu tátá ndìhi nãná vá dásatú-ndó iní cue déhe-ndo, chi núu duca<sup>n</sup> na càda-ndo te ni vã quíxí-gã iní-güexi cada-güexi sá váha. <sup>22</sup> Te nchaa nchòhó ñáyi-u xinu cuechi quindáá iní-ndó nchàa ñáyi-u cùu patróó<sup>n</sup>-ndó, te ni yùhu ni iní-ndó càda-ndo nchaa chiu<sup>n</sup> tahú-yu

cuèi òré ndécü-yu àdi oré ñá túú-yu, te ñá díú òré-ni ndèhé-yu cada-ndo cuèndá-ni sá cuíní-ndó cùdiu-ndo núú-yu, chi cada-ndo sá néhé-ndó sá yíñùhu núú Xítóhó Jesucristú. <sup>23</sup> Te nchaa chiú<sup>n</sup> sani iní-ndó càda-ndo te cada-ndo ñi yuhu ñi iní-ndó, te sá dúcá<sup>n</sup> càda-ndo-á<sup>n</sup> te cada-ndo cuèndá sá xínú cuèchi-ndo núú Xítóhó Jesucristú te ñá díú núú ñáyiú ñuyíú-a xínu cuechi-ndo. <sup>24</sup> Te nchòhó sa nàha-ndo sá Xítóhó Jesucristú taxi-gá sá ndúú tǎhú-ndó te núu duca<sup>n</sup> na càda-ndo, chi cùu-ndo ñáyiú xínu cuechi núú-gǎ. <sup>25</sup> Te nchaa ñáyiú quide nchaa sá cuèhé sá dúhá nácháhu-yu núú Yǎ Ndiǒxí cuèndá nchaa sá quídě-yu, te mee-gǎ vá cáda cuèndá-gǎ cuèi náí ñáyiú cùu-yu, chi ncháá-yu nacháhu-yu nchaa sá ñà túú váha quidé-yu núú-gǎ.

#### 4

<sup>1</sup> Te nchaa nchòhó ñáyiú cùu patróo<sup>n</sup> cuu-ndo ñáyiú váha, te cada-ndo ncháa nacuaá tàú-xi cunduu ndihi nchaa ñáyiú xínu cuechi núú-ndó, te cunaha-ndo sǎ àndiu ndecu Yaá cúu Xítóhó-ndó tàxi tnuní ñáhá-gǎ xii-ndo.

<sup>2</sup> Te nchaa nchòhó ñáyiú ndècu ichi Xítóhó Jesucristú, vá dáñá ndèé-ndó cǎhá<sup>n</sup> ndihi-ndo Yǎ Ndiǒxí, te ío cuhu<sup>n</sup> iní-ndó-gǎ òré cǎhá<sup>n</sup> ndihi-ndo-gǎ, te òré-á<sup>n</sup> ío ndacá<sup>n</sup> tǎhú-ndó núú-gǎ.

<sup>3</sup> Te cǎcá<sup>n</sup> tǎhú-ndó tnàhá cuèndá-ndí núú-gǎ cuèndá sá díú-gǎ ná cáda te ndacu-ndí cǎhá<sup>n</sup>-ndí tnúhu-gǎ núú ncháa dava-gǎ ñáyiú, te duca<sup>n</sup> cǎhá<sup>n</sup>-ndí tnúhu Xítóhó Jesucristú sá ñá túú ní xíndecu ndihi nchaa ñáyiú ní xíndecu ndéé sanaha, te diu cuèndá tnúhu-á<sup>n</sup> yíhí-í vecaá vitna. <sup>4</sup> Te cǎhá<sup>n</sup> ndihi-ndo Yǎ Ndiǒxí cuèndá cǎhá<sup>n</sup>-í nacuaá tàú-xi cunduu te tecú tnùní-yu.

<sup>5</sup> Te cada-ndo ncháa nacuaá tàú-xi cunduu sá cúu-xí ncháa ñáyiú ñá túú ndècu ichi-gǎ, te duca<sup>n</sup>-ni ío nducu ndèe-ndo cada-ndo nchaa nacuaá tàú-xi cunduu. <sup>6</sup> Te cada cuèndá-ndó sǎ ío vii ío váha cunduu tnúhu cǎhá<sup>n</sup> ndihi-ndó-yu, te cǎhá<sup>n</sup>-ndó ñ<sup>n</sup> tnúhu nacuaá cuu váha iní-yu, te ío váha

cundehe-ndo nacuaá cunduu tnúhu cúñaha-ndo xii ñ<sup>n</sup> ñ<sup>n</sup>-yu.

#### *Tnúhu ndéé núú ñi ndihi-ná*

<sup>7</sup> Te té Tiquicú téé ío cùu iní-ó ndècu ndihi-o ichi Xítóhó Jesucristú, téé-á<sup>n</sup> cachí tnúhu-dé nchaa nacuaá cùu ndecu-í. Te tnàhá-dé xínú cuèchi-dé núú Xítóhó Jesucristú te ío váha quide ndáá-dé. <sup>8</sup> Te tendaha-í-dé quixi-dé cachí tnúhu-dé nchaa nacuaá cùu ndecu-ndí iha, te taxi-dé tnúhu ndee iní cundecu ndihi-ndo. <sup>9</sup> Te tnàhá tucu té Onésimú téé ío cùu iní-ó ndècu ndihi-o ichi Xítóhó Jesucristú quixi ndihi-dé, te diu-ni téé ñuú-ndó cùu-dé te tnàhá-dé ío váha quide ndáá-dé. Te ndi ndúú-güedé cachí tnúhu-güedé nchaa nacuaá cùu iha.

<sup>10</sup> Te té Arístarcú téé yíhi ndihi-í vecaá quidé ndèe iní ñáhá-dě xii-ndo ndihi té Mǎcú ñaní pǎmú tǎ Bèé. Te sa nàha-ndo nchaa nacuaá ní cǎhá<sup>n</sup>-í cada-ndo quèhe<sup>n</sup> cuèndá-ndó tǎ Mǎcú, te núu na quixi-dé quixi coto ñaha-dě xii-ndo, te ío váha cuu iní-ndó quèhe<sup>n</sup> cuèndá-ndó-dě. <sup>11</sup> Te tnàhá téé nàni Jesús, àdi Bustú chi úú diu-dé, quidé ndèe iní ñáhá-dě xii-ndo. Te cue téé-a cùu-güedé cue téé isràél ní chitnahá ñáhá-güedě xii-í cǎhá<sup>n</sup>-ndí núú ñáyiú nacuaá ndíhu ndaha ñaha Yǎ Ndiǒxí xii-yu, te ni ñ<sup>n</sup>-gǎ ñáyiú isràél ñá túú quide datná quidé-güedě. Te ío váha tàxi-güedé tnúhu ndee iní xii-í. <sup>12</sup> Te tnàhá téé ñuú-ndó tǎ Ēpafrás quidé ndèe iní ñáhá-dě xii-ndo, te cùu-dé tnàhá-dé téé xínu cuechi núú Xítóhó Jesucristú. Te duca<sup>n</sup>-ni ñi yuhu ñi iní-dé xicá<sup>n</sup> tǎhú-dě núú Yǎ Ndiǒxí cuèndá-ndó cuèndá sá cǎnchicú<sup>n</sup> nihnu-ni-ndo ìchi-gǎ, te duca<sup>n</sup> te ío váha tecú tnùní-ndó ncháa nacuaá cuíní Yǎ Ndiǒxí cada-ndo, te diu-ni duca<sup>n</sup> cǎnchicú<sup>n</sup> nihnu-ndo càda-ndo. <sup>13</sup> Te yúhú cǎchí tnúhu ndáá-í xii-ndo sǎ sùúní sàni iní-dé sá mée-ní sǎ váha cuu xii-ndo cùndecu-ndo ndihi nchaa ñáyiú xíndecu ichi Xítóhó Jesucristú ndécú ñuú Laodiceá, ndihi nchaa ñáyiú xíndecu tucu ichi-gǎ ndécú ñuú Hiérápolís. <sup>14</sup> Te tnàhá té Lùcá téé xíní nchaa núú yücú sǎ quidé tǎtna quide ndee iní ñáhá-dě xii-ndo téé ío cùu

iní-ó, te tnàhá tucu té Děmás quidé ndèe iní ñáhá-dě xii-ndo.

<sup>15</sup> Te cúñaha-ndo na càda ndee iní nchaa ñáyi ndècu ndihí-o ichi Xítohó Jesucristú ndécú ñùú Laodiceá, ndihí tá Mĩnfás, ndihí nchaa ñáyi ndècu ichi-gá tàcá vehe-xi dàcuahá-yu tnúhu-gá. <sup>16</sup> Te tutú cádũha-í-a tendaha-í quixi ndaha-ndo, te

òré ná ndihí dàcuaha-ndo te tendaha-ndo quihí<sup>n</sup> ndaha ñáyi xĩndecu ichi-gá ndécú ñùú Laodiceá cuendá dacuahá-yu tnàhá-yu. Te diu-ni duca<sup>n</sup> dàcuaha-ndo tutú tendaha-í quihí<sup>n</sup> ndaha ñáyi ñuú Laodiceá òré ná dándixí-yu ndaha-ndo. <sup>17</sup> Te na cächí tnúhu-í xii-ndo nàcuáa cúñaha-ndo xii té Àrquipú, te duha cúñaha-ndo xii-dé: “Yá Ndiõxí ní taxi-gá chiu<sup>n</sup> quide-n, te ío váha cada cuendá-n càda-n nchaa nacuáa ní cachí-gá”, duha cúñaha-ndo xii-dé.

<sup>18</sup> Te yúhú té Păblú ndihí ndaha mee-í téé-í ì<sup>n</sup> ũú tnúhu-a quide ndee iní ñáhà-í xii-ndo, te cunaha-ndo sã yúhú yíhí-í vecaá. Te Yá Ndiõxí ío na chĩndee chitúu ñaha-gã xii-ndo. Te duca<sup>n</sup> na cùnduu. Te ío chí cádá ndèe iní-nã vitna.

# TUTÚ DÍHNA NUU NĪ CADÚHA TĒ PĀBLŪ QUIHĪ<sup>n</sup> NDAHA ÑÁYIU ÑUÚ TESÀLÓNICÁ

*Té Pāblū ndihī cue tée cūndihī-dé cādūha-güedé tutú quihī<sup>n</sup> ndaha ñáyiu xīndecu ichi Xítoho Jesucristú ndécú ñuú Tesàlónicá*

<sup>1</sup>Yúhú té Pāblū cādūha-í tutú-a ndihī té Silvanú, ndihī té Timúteú cuendá daquixi-í ndaha nchòhó ñáyiu ndècu ndihī-ndí ichi Xítoho Jesucristú ndécú ñuú Tesàlónicá, chi cū ñuú-ndo ndihī Tātá-ó Dütú Ndiöxí, ndihī Xítoho Jesucristú. Te xicá<sup>n</sup> táhú-í núú Dütú Ndiöxí, ndihī núú Xítoho Jesucristú sá ño na chindee chitúu ñaha-gă xii-ndo, te duca<sup>n</sup> ndí nduú-gá ná càda te ío váha cuu iní-ndó cūndecu-ndo.

*Ñáyiu ñuú Tesàlónicá ío váha sàndáá iní-yu Yá Ndiöxí*

<sup>2</sup>Te ndí tnahá òré càhá<sup>n</sup> ndihī-ndí Yá Ndiöxí ndácá<sup>n</sup> táhú-ndí núú-gă sá ño quide váha-ndo ndècu-ndo, te duca<sup>n</sup> xicá<sup>n</sup> táhú-ndí núú-gă sá ná còto ñaha-gă xii-ndo. <sup>3</sup>Te ío ndácá<sup>n</sup> táhú-ndí núú Tātá-ó Dütú Ndiöxí sá ñi yuhu ñi iní-ndó sàndáá iní-ndó-gă, te xīnu cuechi-ndo núú-gă, te cū iní tnahá-ndó nàcuáa ndècu-ndo ichi-gá ñuú xīá<sup>n</sup> ío xito tnahá-ndo. Te cūtnuní ndáá iní-ndó sá quixí tūcu Xítoho Jesucristú ñuú xīá<sup>n</sup> ñá túú dàña ndeé-ndó ndètu-ndo-gă. <sup>4</sup>Te nchòhó ñáyiu ndècu ndihī-ndí ichi Xítoho Jesucristú sa nàha-ndí sá Yá Ndiöxí ío cū iní ñáhá-gă xii-ndo, te diu-gá ní càhá<sup>n</sup> ñáhá-gă xii-ndo cuendá cūndecu-ndo ichi-gá. <sup>5</sup>Te cūtnàhá ní dānehé ñáhá-ndí xii-ndo tnūhu-gă, chi ñá díú sá cúú iní méé-ndí duca<sup>n</sup> ñí dānehé ñáhá-ndí xii-ndo, chi mee Espiritú Yá Ndiöxí ní chindee ñàha-xi ní càhá<sup>n</sup>-ndí ñi yuhu ñi iní-ndí tnūhu-gá núú-ndó. Te nàha-ndo sá cūtnàhá ní xīndecu ndihī

ñaha-ndí xii-ndo ñí quide-ndí nàcuáa càhá<sup>n</sup> Yá Ndiöxí cuendá sá cúú-xí sá váha sá cúú-xí-ndó.

<sup>6</sup>Te nchòhó nchicú<sup>n</sup> ñihnu-ndo quide-ndo vitna datná quidé-ndí, chi quide váha-ndo datná quidé mèe Xítoho Jesucristú, te díú iní ní tnū-ndo ichi-gá cuéi ní ndoho ní tnahá-ndó, chi mee Espiritú-gá ní chindee ñàha-xi xii-ndo. <sup>7</sup>Te sá dúcá<sup>n</sup> quide váha-ndo ñuú Yá Ndiöxí, xīá<sup>n</sup> yīnchicú<sup>n</sup> ñihnu ñáyiu distritú Macèdoniá, ndihī ñáyiu distritú Acāyá xīquide váha-yu tnahá-yu, ñáyiu xīndecu ichi-gá. <sup>8</sup>Te diu-ndo ñí sanu ichi-ndo ñáyiu distritú Macèdoniá, ndihī ñáyiu distritú Acāyá, te ñá díú-ní ñáyiu nchaa ñuú-á<sup>n</sup> chi nchaa ñáyiu dava-gá ñuú ñihí-yu tnūhu sá ño sàndáá iní-ndó Yá Ndiöxí. Te ñá túú-gă ná tnūhu càhá<sup>n</sup>-ndí cuendá-ndó, chi nchaá-yu sa ñihí-yu tnūhu sá ño váha quide-ndo ndecu-ndo. <sup>9</sup>Te mèe-yu xīcáhá<sup>n</sup> váha-yu cuendá-ndó sá ño váha ní quehe<sup>n</sup> cuendá ñáhá-ndó xī-ndí cūtnàhá ní quixi-ndí díhna nuu. Te ní dáñá-ndó nchàa sá càchí-ndó cū ndiöxí-ndó chi ñá díú ndiöxí cúú-xí, te ní tnū-ndo ichi Yá Ndiöxí Yá ndécú tūu andiū chi diu-gá cúú-gă Ndiöxí ndisa, te xīnu cuechi-ndo núú-gă vitna, <sup>10</sup>te ndètu-ndo quixi tūcu Xítoho Jesucristú Déhe Yá Ndiöxí Yá ndécú andiū, chi diu-ni-gá ní quixi-gá ñuyíú-a ní xīhí-gá, te ní ndoto-gá ní dāndótó ñàha Yá Ndiöxí xii-gá. Te diu-ni Xítoho Jesucristú dácācu ñihnu ñaha-gă xii-o núú ùhú núú ndàhú, chi sàndáá iní-ó-gă.

## 2

*Nàcuáa ndiū chiu<sup>n</sup> ní quide té Pāblū ñuú Tesàlónicá*

<sup>1</sup>Te nchòhó ñáyiu ndècu ndihī-ndí ichi Xítoho Jesucristú nàha-ndo sá ñá díú àú<sup>n</sup> nă cuu ñi quixi coto ñaha-ndí xii-ndo, chi ní sàndáá iní-ndó tnūhu Yá Ndiöxí. <sup>2</sup>Te nàha-ndo sá cūtnàhá ní xīndecu-ndí ñuú Filipú ío ní xūhu<sup>n</sup> tnūhu cuèhé tnūhu duha núú-ndí,



te ní caniha-güedě xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáhá<sup>n</sup>-ndí tnúhu Yá Ndiöxí núú-ndó, chi mee-gă ní chindee ñaha-gá xii-ndí cuëi ío chitu ñăyiu ní cuu úhú iní ñáhá xii-ndí. <sup>3</sup> Te ñá túú ní dândahú ñáhá-ndí xii-ndo chi mee-ni tnúhu ndáá ní cáhá<sup>n</sup>-ndí núú-ndó, te ni ñà túú ni ñ<sup>n</sup> tnúhu cuèhé ñúhú iní-ndí ní cáhá<sup>n</sup>-ndí tnúhu-gá núú-ndó chi sa ní nduu ndoo ní nduu nine iní-ndí. <sup>4</sup> Te mee Yá Ndiöxí ní cachí-gá sá càhá<sup>n</sup>-ndí tnúhu-gá, te càhá<sup>n</sup>-ndí nàcuáa cùu iní méé-gă, chi sa nàha-gá nàcuáa càa iní-ndí, te ñá túú càhá<sup>n</sup>-ndí nàcuáa cùu iní ñăyiu. <sup>5</sup> Te nàha-ndo sá ñà díú ñ<sup>n</sup> tnúhu cudí iní-ndó cùndecu-ndo ichi ñuyíú ní càhá<sup>n</sup>-ndí núú-ndó cuendá taxi-ndo dîhú<sup>n</sup>. Te Yá Ndiöxí sa nàha-gá sá càhá<sup>n</sup> ndáá-ndí. <sup>6</sup> Te ñá ñ<sup>n</sup> ndùu ni quide-ndí ñ<sup>n</sup> sá cádá-ndí cuendá-ni sá cádá càhnu ñaha-ndo xii-ndí, àdi cada cahnu ñaha dava-gá ñăyiu, te cuëi tàú ndisa-ndí sá cádá càhnu ñaha-ndo xii-ndí ní cùu, chi chiu<sup>n</sup> Xítohó Jesucristú quidé-ndí, te dîcò-ni sá nchùhú ñá túú ní cuiní-ndí sá dúcá<sup>n</sup> càda-ndo. <sup>7</sup> Te ío vii ío váha ní cáhá<sup>n</sup>-ndí núú-ndó, dàtná quidé ñ<sup>n</sup> ñaha cuu náná vii vii càhá<sup>n</sup> ndihí cue déhe-a<sup>n</sup> dâcuehnu ñaha-a<sup>n</sup> xii-güexi. <sup>8</sup> Te duca<sup>n</sup> ío cùu iní ñáhá-ndí xii-ndo, dico ñá díú-ni sá ñí cáhá<sup>n</sup>-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñàha-xi, te núu dîcò ní cùu-xi sá cúú, cuendá sá ío cùu iní ñáhá-ndí xii-ndo. <sup>9</sup> Te nchòhó ñăyiu ndècu ndihí-ndí ichi Xítohó Jesucristú nàha-ndo sá ío ní quide chiu<sup>n</sup>-ndí cuendá ní níhí-ndí sá ñí xexi-ndí. Te cuëi nduu cuëi niú ní quide chiu<sup>n</sup>-ndí ní níhí-ndí sá ñí xexi-ndí ní cáhá<sup>n</sup>-ndí tnúhu Yá Ndiöxí núú-ndó cuendá sá ñà túú ní cuiní-ndí chichiu<sup>n</sup> ñaha-ndí xii-ndo.

<sup>10</sup> Te nchòhó ñăyiu sàndáá iní tnúhu Yá Ndiöxí xini ndáá-ndó sá cúú-ndí cue téé váha te duca<sup>n</sup> sá naha Yá Ndiöxí tucu, te ní xica-ndí ichi ndáá

òré ní cáhá<sup>n</sup>-ndí tnúhu-gá núú-ndó te diu-ni duca<sup>n</sup> quide-ndí vitna. Te vá yoo ñ<sup>n</sup> càhá<sup>n</sup> sá ñà túú quide ndáá-ndí ndécú-ndí. <sup>11</sup> Te nàha tucu-ndo sá ñí dácàhá<sup>n</sup> ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ñ<sup>n</sup> tátá ndihí cue déhe-dé ní quide-ndí. <sup>12</sup> Te ní cachí-ndí xii-ndo sá cádá ndáá-ndó cùndecu-ndo nacuáa tàú-xi cada nchaa ñăyiu tnàhá tnúhu ndihí Yá Ndiöxí, chi mee-gă ní cáhá<sup>n</sup> ñáhá-gă xii-o cuendá nduu tãhú-ó cùndecu-o ndihí-gá núú ío váha càa ndecu-gá táxi tnùní-gá.

<sup>13</sup> Te xiã<sup>n</sup> ío ndàcá<sup>n</sup> tãhú-ndí núú Yá Ndiöxí sá nchòhó òré ní tedòho-ndo tnúhu-gá ní cáhá<sup>n</sup>-ndí, te ní sàndáá iní-ndó chi ní cutnùní iní-ndó sá díú tnúhu Yá Ndiöxí cúú-xí, te ñá díú tnúhu ñăyiu ñuyíú-a cùu-xi. Te ndáá sá cúú-xí ñ<sup>n</sup> sá ío váha sá cúú-xí nchòo cue ñăyiu ní sàndáá iní tnúhu-gá. <sup>14</sup> Te nchòhó ñăyiu ndècu ndihí-í ichi Xítohó Jesucristú, ío ní ndoho ní tnàhá-ndó sá ñí quide ñaha ñăyiu ñuú-ndó. Te nchòhó ní ndoho-ndo dàtná ní ndoho nchaa ñăyiu tàcá dâcuáha tnúhu Xítohó Jesucristú ndécú dîstrítú Jùdeá, chi tnàhá-yu ío ní dándóhó ñàha ñăyiu ñuú-yu. <sup>15</sup> Te diu-ni ñăyiu dîstrítú Jùdeá-á<sup>n</sup> ñí sahní-yu cue téé ní xóo cáhá<sup>n</sup> tnúhu Yá Ndiöxí ndéé sanaha. Te diu-ni ñaní tnàhá-yu cùu cue ñăyiu ní sahní ñaha xii Xítohó Jesucristú, te sáta xiã<sup>n</sup> te ní ngúíta-yu ní cuu úhú iní ñáhá-yu xii-ndí, núu xiã<sup>n</sup> ñá túú tnàhá iní Yá Ndiöxí nchaa sá quidé-yu, te ndéé nchaa dava-gá ñaní tnàhá-yu cùu úhú iní-yu. <sup>16</sup> Te ío chidácá nihnu ñáhá-yu xii-ndí òré càhá<sup>n</sup>-ndí tnúhu Yá Ndiöxí núú ñăyiu ñá túú cùu ñăyiu isràél, te duca<sup>n</sup> quide ñăyiu-á<sup>n</sup> cuendá cuiní-yu sá vã càhá<sup>n</sup>-ndí tnúhu-gá, sá cádá cuendá naníhí tãhú ñăyiu ñá túú cùu ñăyiu isràél-á<sup>n</sup>, te sá dúcá<sup>n</sup> quidé-yu te ío ta cùu vai-gá cuéchi-yu cuáhá<sup>n</sup>. Te Yá Ndiöxí ío cùdéé<sup>n</sup>-gă núú-yu, te tendaha-gă ñ<sup>n</sup> tnúndòho quixi sá cúú-xí-yu te ío ndohó-yu.

*Té Pãblú cuiní-dé quíngoto-dé ñăyiu*

*xĩndecu ichi Xĩtohó Jesucristú ndécú ñuú Tesalónica*

<sup>17</sup> Te nchòhó ñáyiu ndècu ndihì-ndí ichi Xĩtohó Jesucristú ní quee-ndí núú-ndó, te cuèi ní cuxica-ndí dico duca<sup>n</sup>-ni ñuhu iní ñáhá-ndí xii-ndo, te ío ñuhu iní-ndí sá quixí còto ñaha tucu-ndí xii-ndo. <sup>18</sup> Te yúhú té Páblú duca<sup>n</sup>-ni ñuhu iní-í sá cuèdicó mée-í quixi-í, quixi coto ñaha-í xii-ndo, dico yucu ñávãha chidácá nihnu ñaha-xi xii-í. <sup>19</sup> Te nchoo ñáyiu ndècu ichi Xĩtohó Jesucristú ndètu-ni-gá-ó quèxio-gá candeca ñaha-gã xii-ò ndàa andiu cundecu-o ndihì-gá. Te cùdíí víhí iní-ndí sá cuèndá-gá chi ní chindee ñaha-gá ní sanu ichi ñaha-ndí xii-ndo ìchi-gá, te ío vãi ñáyiu cáhá<sup>n</sup> váha-yu cuèndá-ndí ná sàa nduu quixi tucu-gá. <sup>20</sup> Te duca<sup>n</sup> ño vãi ñáyiu cáhá<sup>n</sup> váha-yu cuèndá-ndí cuèndá sá ñi sanu ichi ñaha-ndí xii-ndo ìchi-gá, te quide váha-ndo. Te xíã<sup>n</sup> ío cùdíí iní-ndí.

### 3

<sup>1-2</sup> Te sa ní cunduu ñá túú-gã cáhá<sup>n</sup> ndihì tñaha-o, núu xíã<sup>n</sup> ñá ní cundee-gá iní-ndí ní tendaha-ndí té Timùteú ní quixi coto ñaha-dé xii-ndo, te nchúhú ní quendóo-ndí ñuú Àtenás, chi tñahá-dé xínú cuèchi-dé núú Yã Ndiõxí, ndihì núú Xĩtohó Jesucristú càhá<sup>n</sup>-dé tñuhu-gá núú ñáyiu. Te ní quixi-dé ní taxi-dé tñuhu ndee iní xii-ndo cuèndá sá ño quindáá-ni iní-ndó Xĩtohó Jesucristú, te canchicú<sup>n</sup> nihnu-ni-ndo ñi yuhu ñi iní-ndó ìchi-gá. <sup>3</sup> Te vá nátùhú iní-ndó càchicú<sup>n</sup> nihnu-ndo ìchi-gá sá dúhá cùu úhú iní ñáhá ñáyiu xii-ò, te nchòhó sa ñaha-ndo sá dàcuítíí sã ndóhó vñhi-ò cuèndá-gá. <sup>4</sup> Te ndéé cùtñahá ndécú ndihì ñaha-gá-ndí xii-ndo ñi cachí tñuhu ndáá-ndí sá ño ndoho-o, te duca<sup>n</sup> ndisa quide-xi. <sup>5</sup> Te xíã<sup>n</sup> ñuu ñá ní cùu váha-gá iní-í chi cuèndá ñá túú-gã ní ñhì-í tñuhu ñacuáa cùu ndecu-ndo núu ní tendaha-í té Timùteú ní quixi-dé ní ndúcú tñuhu-dé núú-ndó ñuu ndècu-ni-ndo ichi Xĩtohó Jesucristú, chi ní sani ñi<sup>n</sup>

ní sani úu iní-í sá cúu-xi-ndó, chi ná ndéé chidácá nihnu ñaha yucu ñávãha xii-ndo te cuíta chiú<sup>n</sup> ní quide-ndí sá cúu-xi-ndó ñi cáhã<sup>n</sup>-í.

<sup>6</sup> Te ñáhá, chi ní ndexìo té Timùteú sá ñi quixi-dé ñuú-ndó, te ñaha-dé tñuhu ní nasáá sá ñi yuhu ñi iní-ni-ndo sàndáá iní-ndó Yã Ndiõxí, te cùu iní-ndó cuè tñaha ñáyiu-ndo. Te càchí-dé sá ño ñuhu iní ñáhá-ndó xii-ndí, te ío cuèní-ndó cáhá<sup>n</sup> ndihì ñaha-ndo, te diu-ni duca<sup>n</sup> ño cuèní nchúhú cáhá<sup>n</sup> ndihì ñaha-ndí xii-ndo tucu. <sup>7</sup> Te ío ndòho-ndí chi ío cùu úhú iní ñáhá ñáyiu xii-ndí, dico sá ñi ñhì-ndí tñuhu sá nchòhó ñáyiu ndècu ndihì-ndí ichi Xĩtohó Jesucristú ñá túú dàña ndéé-ndó sàndáá iní-ndó Yã Ndiõxí, te xíã<sup>n</sup> cúu-xi ñi<sup>n</sup> tñuhu càhnu iní ní ñhì-ndí chi ní naníhí ndéé-ndí. <sup>8</sup> Te ní nduu vétú iní-ndí sá ñi ñhì-ndí tñuhu ndècu-ni-ndo ichi-gá. <sup>9</sup> Te òré cáhá<sup>n</sup> ndihì-ndí Yã Ndiõxí, te ío ndacá<sup>n</sup> táhú-ndí núú-gã cuèndá sá ña túú dàña nihnu-ndo ichi-gá, núu xíã<sup>n</sup> ío cùdíí iní-ndí. <sup>10</sup> Te cuèi nduu cuèi níu xicá<sup>n</sup> táhú-ndí núú Yã Ndiõxí sá mée-gã ná càda te sáá ñi<sup>n</sup> nduu naníhí tñahá-ó cuèndá danèhé ñáhá váha-gá-ndí tñuhu-gá sá cùmãní-gã xii-ndo.

<sup>11</sup> Te mee Tãtá-ó Dùtú Ndiõxí, ndihì Xĩtohó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. <sup>12</sup> Te mee Xĩtohó Jesucristú ná chindee ñaha-gá xii-ndo, te ío-gá cuita cuu iní tñahá-gã-ndó ñacuáa ndècu-ndo ichi-gá ndihì nchaa dava-gá ñáyiu dàtná cúu iní ñáhá-ndí xii-ndo. <sup>13</sup> Te xicá<sup>n</sup> táhú tucu-ndí núú Tãtá-ó Dùtú Ndiõxí sá ñi yuhu ñi iní-ndó càchicú<sup>n</sup> nihnu-ni-ndo ìchi-gá, te duca<sup>n</sup> te cundáá-ndó núú-gã, te ñá túú-gã ná cùmãní-ndó òré ná sàa nduu quixi tucu Xĩtohó Jesucristú ndihì nchaa ñáyiu sa ndècu ndihì-gá.

### 4

*Ñacuáa cuèní Yã Ndiõxí cada-o*

<sup>1</sup> Te nchòhó ñáyiu ndècu ndihì-í ichi Xĩtohó Jesucristú càhá<sup>n</sup> ndàhú-í

núú-ndó sã cùndèdóho-ndo na càhá<sup>n</sup>-í nàcuáa ndùu tnúhu càhá<sup>n</sup> Xítóhó Jesucristú, chi mee-gã cuíní-gã sã cáda-ndó nàcuáa ní dánèhé ñáhá-ndí xii-ndo cuendá cuu váha iní Yá Ndiöxí núú-ndó, te duca<sup>n</sup>-ni càda-ndo ndéé núú cuahá<sup>n</sup> núú vëxi.

<sup>2</sup> Te nchòhó sa nàha-ndo nacuáa ní càhá<sup>n</sup>-ndí núú-ndó, chi ní càhá<sup>n</sup>-ndí nàcuáa ní táuchíú<sup>n</sup> Xítóhó Jesucristú te ní cachí-gã sã <sup>3</sup> Yá Ndiöxí cuíní-gã sã cáda ndää-ó cùndecu-o ichi-gã. Te nchoo cuè téé vá càhá<sup>n</sup> ndihí-o ñáyiu dìhí te núú ñá díú ñàdihí-ó cùú-yu, te ni cuè ñáyiu dìhí vá càhá<sup>n</sup> ndihí-yu téé núú ñá díú yí-yu cùu-güedé. <sup>4</sup> Te núú xiã<sup>n</sup> nchaa nchòhó tnàha téé-í ndi díí<sup>n</sup> cùndecu ñadihí-ndó, te diu-ni duca<sup>n</sup> nchòhó cue ñáyiu dìhí tucu ndi díí<sup>n</sup> cùndecu yí-ndo, te mee-ni tnúhu yíñuhu càhá<sup>n</sup> ndihí tnàha-ndo. <sup>5</sup> Te vá cání cuèhé cani duha iní-ndó dàtná quidé cuè ñáyiu ñá túú sàndáá iní tnúhu Yá Ndiöxí. <sup>6</sup> Te ni ì<sup>n</sup>-ndo vá cání iní-ndó dándahú-ndó tnàha téé-ndo càhá<sup>n</sup> ndihí-ndo ñadihí-güedé. Te duca<sup>n</sup>-ni nchòhó cue ñáyiu dìhí tucu vá cání iní-ndó dándahú-ndó tnàha dihí-ndó càhá<sup>n</sup> ndihí-ndo yí-yu. Chi núú duca<sup>n</sup> na càda-ndo, te Yá Ndiöxí ío dandòho ñaha-gã xii-ndo dàtná ní cachí-ndí ndéé díhna. <sup>7</sup> Chi Yá Ndiöxí ní càhá<sup>n</sup> ñáhá-gã xii-o cuendá sã cáda-ó mèe-ni sã vãha, te ñá díú sã cuèhé sã dúhá. <sup>8</sup> Te nchaa ñáyiu na càda sáá iní-xi tnúhu càhá<sup>n</sup>-ndí, te quide sáá iní-yu núú Yá Ndiöxí, chi ñá díú tnúhu téé ñuyú-a cùu-xi, chi tnúhu Yá Ndiöxí, Yaá ní taxi Espiritú-gã ndécú ndihí-o cuu-xi.

<sup>9</sup> Te nchòhó ñáyiu ndècu ndihí-í ichi Xítóhó Jesucristú, ñá túú-gã xíní ñuhu-xi cachí tnúhu-í xii-ndo sã cúú iní tnáhá-ndó, chi Yá Ndiöxí sa ní dánèhé ñáhá-gã xii-ndo nàcuáa cuu iní tnáhá-ndó, ndihí nàcuáa cuu iní-ndó dàva-gã tnàha ñáyiu-ndo. <sup>10</sup> Te duca<sup>n</sup> xíquide-ndo ndihí nchaa ñáyiu ndècu ndihí-ndo ichi Xítóhó Jesucristú ndécú dìstrítú Macèdoniá. Te càhá<sup>n</sup> ndàhú-ndí núú-ndó sã cáda ndää-gã-ndó, te cuíta cuu iní-gã-ndó

cuè tnaha ñáyiu-ndo quíhí<sup>n</sup>. <sup>11</sup> Te cada ndee iní-ndó cùndecu ñucaxi iní-ndó, te cuhu<sup>n</sup> iní-ndó chiú<sup>n</sup> mee-ndo, te xiã<sup>n</sup> cada-ndo dàtná ní dánèhé ñáhá-ndí xii-ndo. <sup>12</sup> Te duca<sup>n</sup> te tnàhá nchaa ñáyiu ñá túú sàndáá iní tnúhu Yá Ndiöxí càhá<sup>n</sup> váha-yu cuendá-ndó, te duca<sup>n</sup> te ñá túú tnàhí-gã ná cùmání xii-ndo.

*Nàcuáa cada-xi òré quixi tucu Xítóhó Jesucristú*

<sup>13</sup> Te vitna na càchí tnúhu-ndí xii nchòhó ñáyiu ndècu ndihí-ndí ichi Xítóhó Jesucristú cuendá nchaa ñáyiu sa ní xíhí, ñáyiu ní sàndáá iní tnúhu Yá Ndiöxí cuendá sã vã ndihú iní-ndó cuendá-yu dàtná xíquide nchaa ñáyiu ñá túú yíhí iní-xi sã quixí tucu Xítóhó Jesucristú ñuyú-a. <sup>14</sup> Te nchoo sàndáá iní-ó sã ní xíhí Xítóhó Jesucristú te ní ndoto-gã ní dándótó ñàha Yá Ndiöxí, te sàndáá tucu iní-ó sã dàtná ní dándótó Yá Ndiöxí Xítóhó Jesucristú, duca<sup>n</sup> dándoto-gã nchaa ñáyiu ní xíhí ñáyiu ní sàndáá iní ñáhá xii-gã.

<sup>15</sup> Te na càchí tnúhu tucu-ndí ingá tnúhu nàcuáa ní càhá<sup>n</sup> Xítóhó Jesucristú, chi ní cachí-gã sã ná sáá nduu quixi tucu-gã te nchaa ñáyiu sàndáá iní tnúhu-gã ndécú vívú ñuyú-a vá códó nùú-yu núú ñáyiu ní xíhí ndaa andiu, chi jùndú candeca ñaha-gã xii-yu ndaa. <sup>16</sup> Chi Xítóhó Jesucristú quee túu-gã andiu, te cana-gã nchaa ñáyiu ní sàndáá iní tnúhu-gã, te òré-án Yá Ndiöxí cada-gã te òré-án, càhá<sup>n</sup> ì<sup>n</sup> cútú te òré-ni-án ndoto nchaa ñáyiu ní xíhí, ñáyiu ní sàndáá iní tnúhu-gã. <sup>17</sup> Te dàtnùní nchaa nchoo ñáyiu xíndecu vívú ñuyú-a naníhí tnáhá-ó ndihí-yu, te ndanchita-o ndíhu-o xítí vícò naníhí tnáhá-ó ndihí Xítóhó Jesucristú, te candeca ñaha-gã xii-o ndaa andiu cundecu ndihí-o-gã ni caa ni quíhí<sup>n</sup>. <sup>18</sup> Núú xiã<sup>n</sup> chí cuãha tnàha tnúhu ndee iní, te vá ndihú iní-ndó chi naníhí tàhú-ndó nùú-gã.

## 5

<sup>1</sup> Te nchòhó ñáyiu ndècu ndihí-í ichi Xítóhó Jesucristú ñá túú-gã xíní

ñùhu-xi sá cächí tnúhu-í xii-ndo sã quíxí tucu-gá, te ni ñà túú-gã xíní ñùhu-xi sá cächí tnúhu-í xii-ndo nãsa cada-xi òré quixi-gá. <sup>2</sup> Chi nchòhó sa nàha ndáá-ndó sã Xìtohó Jesucristú quixi-gá nduu ñà túú yìhi iní-ó, chi dàtná quidé ì<sup>n</sup> ñadúhú cada-gá òré quixi-gá, chi nduu ñà túú nã yíhí iní-ó quixi tucu-gá. <sup>3</sup> Te sáá nduu te cachí nchaa ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñà túú-gã ná cúmání xii-o”, duha quesàhá-yu. Te ñáyiú-á<sup>n</sup> òré ñà túú nã yíhí iní-yu, te quèxio tnúndòho tnúhu ndàhú sá cúú-xí-yu. Chi cada-xi dàtná quidé-xí ì<sup>n</sup> ñáyiú dìhí ní tnahá òré cacu déhe-xi, chi na iní-yu ní dátñuhú ñáhá-xí te vá cácu-yu núú tnúndòhó-yu, te duca<sup>n</sup> sã tnahá-xi yáha nchaa ñáyiú ñà túú ndècu ichi-gá, chi na iní-yu quèxio tnúndòho sá cúú-xí-yu te vá cácu-yu núú tnúndòho-á<sup>n</sup>. <sup>4</sup> Te nchòhó ñáyiú ndècu ndìhi-í ichi Xìtohó Jesucristú, ñà túú-gã ndécú-ndó ìchi cuehé ichi duha, núú xíã<sup>n</sup> sa yìhi-ná iní-ndó ndùu quixi-gá te vá yãha-ndo dàtná yáha nchaa ñáyiú ñà túú ndècu ichi-gá, chi ñáyiú-á<sup>n</sup> ñà túú nã yíhí iní-yu sá quíxí-gã. Te na iní-yu quèxio-gá dàtná quidé ñadúhú na iní-ó quìhu-güedé vehe-o dùhu-güedé duca<sup>n</sup> càda-gá òré quixi-gá. <sup>5</sup> Te nchoo ñà túú-gã ndécú-ó ìchi cuehé ichi duha, te ichi-á<sup>n</sup> cúú-xí dàtná ì<sup>n</sup> ichi nee ndècu-o ni cuu, te vitna sa ní ngúndecu-o ìchi váha, te duca<sup>n</sup> chi Yá Ndiöxí ní dándíxí tũu-gá iní-ó cuèndá cutnùní iní-ó nàcuáa ndùu cuèndá-gá. <sup>6</sup> Te xìni ñùhu-xi dandixi túu-o iní-ó, te cada váha-o cùndecu-o ichi-gá, te vá cáda-ó dàtná quidé nchaa ñáyiú ñà túú sàndáá iní ñáhá xii-gá, chi ñáyiú-á<sup>n</sup> ñà túú-gã quidé cuèndá-yu te núú quide váha-yu àdi ñà túú quide váha-yu ndécú-yu. <sup>7</sup> Te nchaa ñáyiú quide cuehé quidé dùha cuú-yu dàtná ì<sup>n</sup> ñáyiú xidí àdi xíni, chi ñà túú quide cuèndá-yu nàcuáa cada-yu ì<sup>n</sup> sá váha dàtná cuíní Yá Ndiöxí. <sup>8</sup> Te nchòhó ñáyiú sa ní cutnùní iní-xi nàcuáa

ndùu ichi váha, dandixi túu-ndo iní-ndó cùndecu-ndo, te quíndáá ndisa iní-ndó Yá Ndiöxí, te cuu iní-ndó cuè tnahá ñáyiú-ndo te duca<sup>n</sup> te vá táxí tnùní ñáhá nì ì<sup>n</sup> sá cuèhé sá dúhá xii-ndo. Te ío cuhu<sup>n</sup> iní-ndó sã cùndècu-ndo ndìhi-gá ni caa ni quíhí<sup>n</sup>. <sup>9</sup> Chi Yá Ndiöxí ní cachí-gá sá vã quíhí<sup>n</sup>-ó núú ùhú núú ndàhú, chi mee-gã nacuaca ñaha-gã xii-o cùndecu-o ndìhi-gá, chi ní sàndáá iní-ó Xìtohó Jesucristú. <sup>10</sup> Te mee Xìtohó Jesucristú ní xíhí-gá sá cuèndá nchaa yíca cuèchi-o, te ní ndoto-gá cuèndá nduu táhú-ó cùndecu-o ndìhi-gá andiú na sáá nduu cuèi sa ní xíhí-ó, àdi vátá cùú-gá-ó. <sup>11</sup> Núú xíã<sup>n</sup> chí cuãha tnahá tnúhu ndee iní, te chindee tnahá-ndo cundecu-ndo ichi-gá dàtná tá quide-ndo véxi.

*Té Pãblú dáquíní sàhú-dé ñáyiú ndècu ichi Xìtohó Jesucristú*

<sup>12</sup> Te nchòhó ñáyiú ndècu ndìhi-ndí ichi Xìtohó Jesucristú, càhá<sup>n</sup> ndàhú-ndí núú-ndó sã cánèhe-ndo sá yíñùhu núú cuè téé cùnùu xinu cuechi núú Yá Ndiöxí, cue téé dànehé ñáhá xii-ndo nacuáa cundecu-ndo ìchi-gá. <sup>13</sup> Te cáhá<sup>n</sup> váha-ndo ndìhi-güedé, te cuu iní-ndó-güedé, chi nàha-ndo sá chíú<sup>n</sup> Yá Ndiöxí quidé-güedé. Te cundecu ndìhi váha tnahá-ndo nchaa-ndo.

<sup>14</sup> Te càhá<sup>n</sup> ndàhú tucu-ndí núú-ndó sã cáhá<sup>n</sup>-ndó dòho nchaa ñáyiú ñà túú cuíní cada chiú<sup>n</sup>, te duca<sup>n</sup> cuãñaha-ndo tnúhu ndee iní xii nchaa ñáyiú quíyuhu iní-xi canchicú<sup>n</sup> nihnu ichi-gá, te chindee tucu-ndo nchaa ñáyiú vátá ngũnu ichi váha-gá, te cunduu càhnu iní-ndó núú-yu nchaa-yu.

<sup>15</sup> Te cada ndee iní-ndó te núú ndècu tnahá ñáyiú-ndo cùu ùhú iní ñáhã-yu xii-ndo, te vá tnahá-ni-ndo cùu ùhú iní-ndó-yu. Te mee-ni sã váha cada-ndo sã cúú-xí nchaa tnahá ñáyiú-ndo.

<sup>16</sup> Te nchaa nduu ío cudíí iní-ndó cùndecu-ndo. <sup>17</sup> Te ì<sup>n</sup> nduu ì<sup>n</sup> nduu cáhá<sup>n</sup> ndìhi-ndo Yá Ndiöxí. <sup>18</sup> Te ndacá<sup>n</sup> táhú-ndó núú-gã te núú nándi cùu sá yãha-ndo ndècu-ndo, chi duca<sup>n</sup>



cuini-gá cada-o, te diu duca<sup>n</sup> ndùu  
tnúhu càhá<sup>n</sup> Xítóhó Jesucristú.

<sup>19</sup> Te vá quèhndé nihnu-ndo chiú<sup>n</sup>  
quide Espíritú Yá Ndiǒxí iní-ndó.

<sup>20</sup> Te vá cádá sàá iní-ndó núú  
cuè téé càhá<sup>n</sup> tnúhu Yá Ndiǒxí  
nàcuáa dàcahu iní ñáhá-gă xii-güedé.

<sup>21</sup> Te cada cuendá váha-ndo nàcuáa  
càhá<sup>n</sup>-güedé, te tni-ndo nchàa tnúhu  
váha càhá<sup>n</sup>-güedé. <sup>22</sup> Te dañando  
nchàa ichi cuehé ichi duha.

<sup>23</sup> Te mee Yá Ndiǒxí quidé-gă ío  
váha cùu iní-ó ndècu-o ichi-gá. Te  
xìcá<sup>n</sup> táhù-í núú-gă sá ná càda íí  
ñáhá-gă xii-ndo, te na còto ñaha-gá  
xii-ndo ndihí iní-ndó cuendá sá vǎ  
cáda-gă-ndó nì ñ<sup>n</sup> sá cuèhé sá dúhá, te  
diu-ni duca<sup>n</sup> na càda-gá sá cúú-xí-ndó  
ndéé ná sàá nduu quixi tucu Xítóhó Je-  
sucristú ñuyíú-a. <sup>24</sup> Chi Yá Ndiǒxí Yaá  
ní cáhá<sup>n</sup> ñáhá xii-o cada-gá nàcuáa ní  
càhá<sup>n</sup>-gá, te chindee ñaha-gá xii-ndo.

*Té Pǎblú quidé ndèe iní-dé ñáyiu  
xǎndecu ichi Xítóhó Jesucristú ndécú ñùú  
Tesâlónicá*

<sup>25</sup> Te nchòhó ñáyiu ndècu ndihí-í  
ichi Xítóhó Jesucristú, cácá<sup>n</sup> táhù-ndó  
núú Yá Ndiǒxí sá ná chindee ñaha-gá  
xii-ndí.

<sup>26</sup> Te cúñaha-ndo xii nchaa ñáyiu  
ndècu ndihí-o ichi Xítóhó Jesucristú  
sá nì yuhu nì iní-ndí quidé ndèe iní  
ñáhá-ndí xii-ndo ndihí-yu.

<sup>27</sup> Te vitna mee Yá Ndiǒxí ndéhé-gă  
sá càhá<sup>n</sup> ndàhù-í núú-ndó sǎ  
dàcuàha-ndo tutú-a núú nchàa ñáyiu  
ndècu ndihí-o ichi-gá.

<sup>28</sup> Te Xítóhó Jesucristú ío na chindee  
chitúu ñaha-gá xii-ndo núú cuàhá<sup>n</sup>  
núú vǎxi. Te duca<sup>n</sup> na cùnduu. Te ío  
chí cádá ndèe iní-nǎ vitna.

## TUTÚ CÚÚ ÒÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ TESÀLÓNICÁ

*Té Păblú ndihi cue té cùndihi-dé cādūha-güedé tutú quihi<sup>n</sup> ndaha ñáyiu xñdecu ichi Xítóhó Jesucristú ndécú ñúú Tesàlónicá*

<sup>1</sup>Yúhú té Păblú cādūha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiu ndècu ndihi-ndí ichi Xítóhó Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dütú Ndiöxí, ndihi Xítóhó Jesucristú. <sup>2</sup>Te xicá<sup>n</sup> táhú-ndí núú Dütú Ndiöxí, ndihi núú Xítóhó Jesucristú sá ná chindee chitúu ñaha-gá xii-ndo, te duca<sup>n</sup> ndí nduú-gá ná cáda te ío váha cuu iní-ndó cùndecu-ndo.

*Yá Ndiöxí cada ndáá-gá cuéchi nchaa ñáyiu ndècu ichi cuehé ichi duha na sàá nduu quixi tucu Xítóhó Jesucristú*

<sup>3</sup>Te nchòhó ñáyiu ndècu ndihi-ndí ichi Xítóhó Jesucristú, cāhí tnúhu-í xii-ndo sã cúnàha-ndo sá ñà túú dàña ndee-ndí ndácá<sup>n</sup> táhú-ndí núú Yá Ndiöxí cuendá-ndó, chi dacuítí dūca<sup>n</sup> taú-xi cunduu chi ío-gá tá sàndáá iní-ndó-gã cuáhá<sup>n</sup>, te duca<sup>n</sup> ùu-gá tá cùu iní tnàhá-ndó nācuāa ndècu-ndo ichi Yá Ndiöxí. <sup>4</sup>Núu xiá<sup>n</sup> nchúhú ío váha cāhá<sup>n</sup>-ndí cuendá-ndó núú nchāa ñáyiu sàndáá iní tnúhu Yá Ndiöxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gã, te ñá túú dàña ndeé-ndó nchícú<sup>n</sup> nihnu-ndo ichi-gá, te quide cahnu-ni iní-ndó cuéi nándi sá yāha-ndo ndècu-ndo ichi-gá. <sup>5</sup>Te sá dúcá<sup>n</sup> quide váha-ndo ndècu-ndo xiá<sup>n</sup> cùtnùni nācuāa cada ñaha Yá Ndiöxí xii-ndo na sàá nduu, chi nduu táhú-ndó cùndecu-ndo núú táxi tnùnigá, te duca<sup>n</sup> càda-gá chi cùu-gá Yaá quidé ndáá cuíti. Te vitna ndòho-ndo nācuāa ndíhu ndaha-gã dava-gá ñáyiu.

<sup>6</sup>Te Yá Ndiöxí ío váha ndáá quidé-gã, chi mee-gã nachinaa-gá nchaa sá quidé ñàha ñáyiu cùu úhú iní ñáhá xii-ndo, <sup>7</sup>te nchoo ñáyiu ndòho cuendá Xítóhó Jesucristú nucúndecu váha-o na sàá nduu núu túu-gá andiu, te tnàhá cue espíritú xínú cuéchi núu Yá Ndiöxí cuu<sup>n</sup> ndihi-gá, te cue espíritú-á<sup>n</sup> quidé-xí nchāa núu chiù<sup>n</sup> tahu-gá. Te òré nuu túu-gá andiu ndihi cue espíritú-á<sup>n</sup>, te ío dátasa<sup>n</sup>-xi andiu. <sup>8</sup>Te dandòho-gá nchaa ñáyiu ñá túú tnàhá tnúhu ndihi Yá Ndiöxí, ñáyiu ñá túú sàndáá iní tnúhu Xítóhó Jesucristú tnúhu sá cāhá<sup>n</sup> nācuāa naníhí tǎhú-yu. <sup>9</sup>Te nchaa ñáyiu-á<sup>n</sup> ío dandòho ñaha-gá xii-yu, chi ndohó-yu ni caa ni quíhí<sup>n</sup>, te vá cùndécú-yu núú ío váha cāa ndecu-gá táxi tnùnigá. <sup>10</sup>Te duca<sup>n</sup> càda ñaha-gá xii-yu na sàá nduu, te dàvá-á<sup>n</sup> ío cada cāhnu ñaha nchaa ñáyiu sàndáá iní ñáhá xii-gá. Te tnàhá nchaa nchòhó ñáyiu ní sàndáá iní tnúhu ní cāhá<sup>n</sup>-ndí duca<sup>n</sup> càda-ndo, te nchaa-o ío cuñúhu-o-gã dàvá-á<sup>n</sup>.

<sup>11</sup>Te cuendá xiá<sup>n</sup> núu ío xicá<sup>n</sup> táhú-ndí núú Dütú Ndiöxí sá ná chindee ñaha-gá xii-ndo cùndecu váha-ndo ichi-gá dàtná cuíni méé-gã cundecu nchaa ñáyiu ní cāhá<sup>n</sup>-gá cundecu ndihi-gá. Te xicá<sup>n</sup> táhú tucu-ndí núu-gã sá ío na chindee ñaha-gá xii-ndo càda-ndo nchaa sá váha sàni iní-ndó, ndihi cuendá chiù<sup>n</sup> quide-ndo cuendá-gá, te duca<sup>n</sup> chi sàndáá iní-ndó-gã. <sup>12</sup>Te núu duca<sup>n</sup> na càda-ndo, te cāhá<sup>n</sup> váha ñáyiu cuendá Xítóhó Jesucristú, te tnàhá-ni nchòhó cāhá<sup>n</sup> váha-yu cuendá-ndó, chi mee Yá Ndiöxí ndihi Xítóhó Jesucristú cùndàhú iní ñáhá-gã chindèe ñaha-gá xii-ndo.

## 2

*Té quixi dandàhú ñáyiu*

<sup>1</sup>Te nchòhó ñáyiu ndècu ndihi-ndí ichi Xítóhó Jesucristú cāhí tnúhu-ndí xii-ndo nācuāa cada-xi nduu na quixi tucu-gá, chi quixi-gá nācuaca ñaha-gã xii-o, núu xiá<sup>n</sup> cāhá<sup>n</sup>-ndí dóho-ndo. <sup>2</sup>Te ñá díú sã íí<sup>n</sup> tnúhu tecú dóho-ndo

te nguíta-ndo càni ì<sup>n</sup> cani úú iní-ndó, te ni vǎ yùhú-ndó te núu véxi ì<sup>n</sup> téè cǎchí-dé sǎ cǎhá<sup>n</sup>-dé tnúhu Yá Ndiòxí, te cǎchí-dé sǎ sà véxi Xítóhó Jesucristú, te vá quíndáá iní-ndó tnúhu cǎhá<sup>n</sup>-dé chi ñǎ ndáá, àdi véxi ì<sup>n</sup> téè nèhe ì<sup>n</sup> tutú núu-ndó te cǎchí-dé sǎ yùhú ní tendaha-ǐ véxi, te núu tütú-á<sup>n</sup> cǎhá<sup>n</sup>-xi sǎ sà véxi Xítóhó Jesucristú, te ðiu-ni vá quíndáá iní-ndó nàcuáa cǎhá<sup>n</sup>-xi, te ndéda-ni càa ñáyiu cǎhá<sup>n</sup>-yu dàvá-á<sup>n</sup> sǎ sà véxi-gá dico vá quíndáá tnàhí iní-ndó. <sup>3</sup> Núu xiǎ<sup>n</sup> dátùha ñaha-ǐ xii-ndo cuèndá sǎ vǎ dáñá tnàhí-ndo mèe-ndo dandahú ñáhá ñáyiu. Chi cùmání-gǎ sǎá nduu quíxi tucu Xítóhó Jesucristú, te nguíta nchaa ñáyiu cuu úhú iní-yu Yá Ndiòxí, te dàvá-á<sup>n</sup> quíni-yu ì<sup>n</sup> téè xidó quidé nchaa sǎ cuèhé sǎ dúhá, te téè-á<sup>n</sup> quíhí<sup>n</sup>-dé núu ùhú núu ndàhú ni caa ni quíhí<sup>n</sup>. <sup>4</sup> Te ðiu-ni téè-á<sup>n</sup> vǎ ndéè iní-dé nchaa sǎ cǎchí ñáyiu cùu ndiòxí-yu ndíhi nchaa dava-gǎ sǎ quidé cǎhnú-yu, te cachí-dé sǎ ïo cùnuu-dé, te quíhu-dé ndéé xití veñúhu núu ndécú cuè ñáyiu chiñuhu ñaha xii Yá Ndiòxí coo-dé, te cúñaha-dé xií-yu sǎ cúú-dé Yá Ndiòxí.

<sup>5</sup> Te dandàcu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xíndecu ndíhi ñaha-ǐ. <sup>6</sup> Te nchòhó sa cùtnuní iní-ndó nǎ cúú sǎ ngání ñaha xii téè-á<sup>n</sup> núu ñǎ túú-dé vitna, dico na sǎá nduu tàú-xi quee-dé caca cuu-dé te dàvá-á<sup>n</sup> quíni ñáhá nchaa ñáyiu. <sup>7</sup> Te ïo titní núu sǎ cuèhé sǎ dúhá quíde yucu ñávǎha ðicó-ni sǎ vǎtá quíni-gǎ ñáyiu, dico ndècu ì<sup>n</sup> sǎ ñǎ dáñá càda-xi nchaandí túhú nàcuáa cǎchí iní-xi, dico sǎá nduu xòcuíñí sǎ ñǎ dáñá-á<sup>n</sup> te dàvá-á<sup>n</sup> càda-xi nchaa nàcuáa cǎchí iní-xi. <sup>8</sup> Te sǎá nduu quíni-yu téè quíde nchaa sǎ cuèhé sǎ dúhá-á<sup>n</sup> ñuyíú-a. Te òré ná quíxi túu Xítóhó Jesucristú, te mee-ni sǎ dátǎsa<sup>n</sup>-xi, ndíhi yócó yuhu-gǎ cuú téè-á<sup>n</sup>. <sup>9</sup> Te sǎcúíhná tendaha-xi téè-á<sup>n</sup> quíxi-dé, te cuáñaha-xi tnúhu ndee ìní càda-dé nándi sǎ cáda-dé. Te cada-dé sǎ ñǎ túú tnàhí ndàcu ni ì<sup>n</sup> ñáyiu ñuyíú-a cadá-yu, dico mee-ni dandahú ñáhá-dé xií-yu caca cuu-dé. <sup>10</sup> Te

nchaa núu sǎ cuèhé sǎ dúhá càda-dé dandahú-dé nchaa ñáyiu sa ñùhu ichi cuáhá<sup>n</sup> núu ùhú núu ndàhú, chi ñǎ túú ní cuíni-yu quíndáá iní-yu tnúhu ndáá tnúhu Yá Ndiòxí cuèndá naníhí tàhú-yu. <sup>11</sup> Te sǎ dúcá<sup>n</sup> ñǎ túú ní cuíni-yu quíndáá iní-yu tnúhu ndáá, núu xiǎ<sup>n</sup> dañá Yá Ndiòxí dacáhá<sup>n</sup> yucu ñávǎha iní-yu quíndáá iní-yu nchaa tnúhu ndehnde <sup>12</sup> cuèndá cuíta nihnú-yu, te duca<sup>n</sup> yǎha-yu chi ñǎ túú sándáá iní-yu tnúhu ndáá cǎhá<sup>n</sup> Yá Ndiòxí, chi mee-ni nchaa sǎ cuèhé sǎ dúhá cùdíí iní-yu quíde-yu, te cuíta nihnú-yu chi duca<sup>n</sup> ní cachí Yá Ndiòxí cunduu.

### *Ñáyiu ní cachí Yá Ndiòxí naníhí tàhú*

<sup>13</sup> Te nchòhó ñáyiu ndècu ndíhi-ndí ichi Xítóhó Jesucristú, ñáyiu ïo cùu iní-gǎ cǎchí tnúhu-ndí xii-ndo sǎ ñǎ túú dàña ndee-ndí ndàcá<sup>n</sup> táhú-ndí núu Yá Ndiòxí cuèndá-ndó, chi duca<sup>n</sup> tàú-xi cunduu, chi Yá Ndiòxí ní cachí-gǎ ndéé cùtnàhá vǎtá ngǎva-gǎ ñuyíú sǎ naníhí tàhú-ndó, te ðiu Espíritú-gǎ dacáhá<sup>n</sup>-xi iní-ndó ndècu yíñuhu-ndo núu-gǎ, te sándáá iní-ndó tnúhu ndáá cǎhá<sup>n</sup>-gǎ núu xiǎ<sup>n</sup> ní naníhí tàhú-ndó. <sup>14</sup> Chi cuèndá tnàhí-a ní cǎhá<sup>n</sup> ñáhá Yá Ndiòxí xii-ndo, te duca<sup>n</sup> ní naníhí tàhú-ndó chi ní sándáá iní-ndó tnúhu Xítóhó Jesucristú ní cǎhá<sup>n</sup>-ndí núu-ndó, te sǎá nduu te cundecu-ndo tnàhá-ndó núu ïo váha càa ní nduu táhú Xítóhó Jesucristú ndécú-gǎ.

<sup>15</sup> Núu xiǎ<sup>n</sup> nchòhó ñáyiu ndècu ndíhi-ndí ichi Xítóhó Jesucristú ïo cǎhá<sup>n</sup>-ndí dóho-ndo sǎ vǎ dáñá nihnu-ndo ichi-gǎ, te ni vǎ nàcuánaa-ndo nchaa tnúhu ní cǎhá<sup>n</sup>-ndí núu-ndó cùtnàhá ní xíndecu ndíhi ñaha-ndí xii-ndo, te ðiu-ni duca<sup>n</sup> càda-ndo nchaa tnúhu tendaha-ndí véxi. <sup>16-17</sup> Te xicá<sup>n</sup> táhú-ndí núu-gǎ sǎ ná dàcáhá<sup>n</sup>-gǎ iní-ndó cùndecu-ni-ndo ichi-gǎ, te duca<sup>n</sup> ïo na chindee ñaha-gǎ xii-ndo cǎhá<sup>n</sup>-ndó mèe-ni tnúhu váha, te cada váha-ndo cùndecu-ndo nàcuáa cuu váha iní-gǎ, chi mee Dütú Ndiòxí ïo cùu iní ñáhá-gǎ xii-o, te ðiu-gǎ ní taxi-gǎ tnúhu ndee ìní cundecu ndíhi-o ni caa ni quíhí<sup>n</sup>, te ní cachí

tnúhu tucu-gá ingá tnúhu váha sá cùndètu-o Xítóhó Jesucristú.

### 3

*Cáhá<sup>n</sup> ndihí-ndo Yă Ndiöxí cuèndá-ndí*

<sup>1</sup> Te nchòhó ñáyiú ndècu ndihí-ndí ichi Xítóhó Jesucristú, ndéé núú ndíhí-nă cächí tnúhu-í xii-ndo sã cáhá<sup>n</sup> ndihí-ndo Yă Ndiöxí cuèndá-ndí cuèndá sá ná chindee ñaha-gá xii-ndí, te duca<sup>n</sup> ndíhí-ni cuténuu tnúhu Xítóhó Jesucristú nchaa xichi, te cudí iní-yu tnúhu-gá dàtná quidé nchòhó. <sup>2</sup> Te cáhá<sup>n</sup> ndihí tucu-ndo Yă Ndiöxí cuèndá sá ná còto ñaha-gá xii-ndí, te ñá túú nă cada ñaha ñáyiú cuihna iní-xi ndècu ichi cuehé ichi duha xii-ndí, chi ñá ncháă-yu sàndáá iní-yu tnúhu-gá. <sup>3</sup> Dico Xítóhó Jesucristú quidé-gă nchaa sá cáhá<sup>n</sup>-gá, te ñu-gá cada te nchòhó cundecu-ni-ndo ìchi-gá, te coto ñaha-gă xii-ndo cuèndá sá ñá túú nă cada ñaha yùcu ñávăha. <sup>4</sup> Te Xítóhó Jesucristú quidé-gă cùtnùní iní-ndí sá nchòhó quidé-ndó nchàa nacuáa ní dánèhé ñáhá-ndí xii-ndo, te ñu-ni duca<sup>n</sup> càda-ndo cundecu-ndo. <sup>5</sup> Te xicá<sup>n</sup> táhú-ndí núú Yă Ndiöxí sá ná chindee ñaha-gá xii-ndo cùu iní-ndó-gă, te ñu-ni-gá ná chindee ñaha-gá xii-ndo cùnduu cahnu iní-ndó, chi Xítóhó Jesucristú duca<sup>n</sup> ño cahnú iní-gá.

*Tàú-ó càda chiu<sup>n</sup>-o*

<sup>6</sup> Te nchòhó ñáyiú ndècu ndihí-í ichi Xítóhó Jesucristú, cáhá<sup>n</sup>-í dóho-ndo sá méé-gă cuíní-gá sá vă nihí tnáhá-gă-ndó ndihí ndéda-ni càa ñáyiú cächí sá sàndáá iní tnúhu-gá, ñáyiú ñá túú cuíní cada chiu<sup>n</sup>, chi ñáyiú duca<sup>n</sup> xiquide ñá túú cuíní-yu tní-yu tnúhu sá ñí dánèhé ñáhá-ndí xii-ndo. <sup>7</sup> Te nchòhó sa xini-ndó nacuáa cada-ndo cundecu-ndo canchicú<sup>n</sup> nihnu-ndo nacuáa quide-ndí. Te cùtnàhá ní xindecu ndihí ñaha-ndí xii-ndo chi ní ñí<sup>n</sup> nduu ñá túú ní tühío-ndí. <sup>8</sup> Te ní ñá túú dícó duca<sup>n</sup> ní quèhe<sup>n</sup>-ndí sá ndécú ndihí ñáyiú caxi-ndí àdi canehe-ndí, chi cuéi nduu cuéi niú ío ní quide

chiu<sup>n</sup>-ndí ní nihí-ndí díhú<sup>n</sup> ñí saa<sup>n</sup>-ndí nchaa sá ñí nàndíhí-ndí cuèndá sá ñá túú ní cuíní-ndí chichiu<sup>n</sup> ñaha-ndí xii-ndo. <sup>9</sup> Te cuéi tàú ndisa-ndí cachí tnúhu-ndí xii-ndo sã chindee ñaha-ndo xii-ndí ní cùu, dico ní quide chiu<sup>n</sup>-ndí cuèndá ní cuíní-ndí dánèhé ñáhá-ndí xii-ndo nacuáa cada-ndo cundecu-ndo. <sup>10</sup> Te cùtnàhá ní xindecu ndihí ñaha-ndí xii-ndo ñí cachí-ndí sá ncháa ñáyiú ñá túú cuíní cada chiu<sup>n</sup> te vă cuăha-ndó-yu sá caxí-yu.

<sup>11</sup> Te vitna nihí-ndí tnúhu sá ío daya nchòhó ñá túú tnàhí quide chiu<sup>n</sup>-ndo, chi àú<sup>n</sup> nă cuu ndí cuu ndí cuu-ni-ndo núú ndécú dàva-gá tnàha ñáyiú-ndo.

<sup>12</sup> Te yúhú cáhá<sup>n</sup>-í dóho nchaa nchòhó ñáyiú duca<sup>n</sup> ñá túú cuíní cada chiu<sup>n</sup> sá cádá chiu<sup>n</sup>-ndo cuèndá nihí-ndó nchàa sá cóhó sã caxí-ndó, te duha cáhá<sup>n</sup>-í dóho-ndo, chi duca<sup>n</sup> cuíní Xítóhó Jesucristú Yaá táxí tnùní ñáhá xii-o cada-ndo, te òré cada chiu<sup>n</sup>-ndo te vă ío cada dusa<sup>n</sup>-ndo.

<sup>13</sup> Te nchòhó ñáyiú ndècu ndihí-í ichi Xítóhó Jesucristú, vă dáñá ndéé-ndó càda-ndo mee-ni sá văha. <sup>14</sup> Te núú ñí<sup>n</sup> ñáyiú ndècu ndihí-ndo ñá túú cuíní-yu tní-yu tnúhu cáhá<sup>n</sup>-ndí núú tütú-a, te cundehe-ni-ndo núú ndéda càa-yu, te vă nihí tnáhá-gă-ndó ndihí-yu cuèndá sá ná cùcaha<sup>n</sup> núú-yu, <sup>15</sup> dico vă cúú ùhú iní-ndó-yu, chi cáhá<sup>n</sup>-ndó dóho-yu cada-ndo sã ndécú-ndó ìchi Xítóhó Jesucristú ndihí-yu.

*Tnúhu ndéé núú ñí ndihí-ná*

<sup>16</sup> Te mee Xítóhó Jesucristú ío váha cùu iní-gá ndécú-gă, te xicá<sup>n</sup> táhú-í núú-gă sá méé-gă ná cádá te ío váha cuu iní-ndó tnáhá-ndó cundecu-ndo cuéi nása-gá ná cundecu-ndo. Te mee-gă ná cundecu ndihí ñaha-gá xii-ndo nchàa-ndo.

<sup>17</sup> Te vitna yúhú té Păblú tée-í tnúhu-a quide ndee iní ñáhá-í xii-ndo, te ñu-ni duha càa nchaa letrá-í nchaa núú tütú cádúha-í. <sup>18</sup> Te xicá<sup>n</sup> táhú-í núú Xítóhó Jesucristú sá ío na chindee chitúu ñaha-gă xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nă vitna.



## TUTÚ DÍHNA NUU NĪ CADÚHA TÉ PĀBLŪ QUIHĪ<sup>n</sup> NDAHA TÉ TIMŪTEÚ

*Té Pāblū cādūha-dé tutú quihī<sup>n</sup>  
ndaha té Timūteú*

<sup>1</sup> Yúhú té Pāblū ní tendaha ñaha Yá Ndiōxí cāhā<sup>n</sup>-í tnúhu Xítohó Jesucristú núú ñáyiú chi duca<sup>n</sup> ñí cachí Yá Ndiōxí cunduu, te ñu-gá cúu-gă Yaá ní dácăcu nihnu ñaha xī-o núú ùhú núú ndáhú. Te tnàhá Xítohó Jesucristú duca<sup>n</sup> ñí cachí-gá sá cāhā<sup>n</sup>-í tnúhu-gá, te ñu-gá ní taxi-gá tnúhu ndee ìní xī-o sá cūndecu-o ndihī-gá ñí caa ñí quihī<sup>n</sup>. <sup>2</sup> Te yòhó té Timūteú cúu-n ñí tée ní sanu ichi ndisa-í ichi Xítohó Jesucristú chi ío váha ní sándáá ìní-n-gă. Te cādúha-í ñí tutú daquixi-í ndaha-n. Te xicā<sup>n</sup> táhù-í núú Tátá-ó Dútú Ndiōxí ndihī núú Xítohó Jesucristú sá ío na chindee chitúu ñaha-gă xīi-n, te duca<sup>n</sup> ndi nduú-gá ná cáda te ío váha cuu ìní-n cūndecu-n.

*Cuendá nchaa ñáyiú dāndahú tnàha ñáyiú-xi*

<sup>3</sup> Te nàha-n nacuáa ní cāhā<sup>n</sup>-í cūtnàhá ní quee-í ñuú Éfesú véxi-í distritú Macèdoniá, chi ní cachí-í sá quéndoo-n ñuú-á<sup>n</sup> cāhā<sup>n</sup>-n dōho nchaa ñáyiú dāndahú ñáhá cāhí sá cāhā<sup>n</sup> tnúhu Yá Ndiōxí te ñá ndáá sá cāhā<sup>n</sup>-yu tnúhu-gá, te ñu-ni duca<sup>n</sup> cāhā<sup>n</sup>-í vitna cada-n cūndecu-n. <sup>4</sup> Te cúñaha-n xīi-yu sá vā cáda cuendá-yu nchaa cuendú ñihí-yu nācuáa ní xóo cada ñáyiú ní xīndecu ndéé sanaha, te nchaa cuendú-á<sup>n</sup> dīcō chínàá ñáhá-xí chi ñá túú vèdana nāndihī-xi, te ñí ñá túú chindee ñaha-xi cada-o nacuáa cuiní Yá Ndiōxí, chi mee-ñí sá quindáá ìní-ó-gă quidé-xí quide-o nchaa nacuáa cuiní-gă.

<sup>5</sup> Te duha cāhā<sup>n</sup>-í cúñaha-n xīi-yu cuendá sá ná cū ìní-yu tnàha ñáyiú-yu, te xīni ñuhu-xi nduu ndoo nduu ñine ìní-yu, te cunduu váha ìní-yu, te quindáá ìní-yu Yá Ndiōxí, te

vá cání ñí cani úú ìní-yu, te núu duca<sup>n</sup> na cādá-yu te cuu ìní ndisá-yu nchaa tnàha ñáyiú-yu. <sup>6</sup> Chi dava ñáyiú ñá túú-gă quidé-yu nchaa nācuáa cāhā<sup>n</sup>-í-a, chi mee-ñá nchaa cuendá sá ñá túú vèdana nāndihī xīcāhā<sup>n</sup>-yu. <sup>7</sup> Te cuiní-yu cāhā<sup>n</sup>-yu nchaa tnúhu ní cāhā<sup>n</sup> ndí Moisés dico ñá ndácū-yu, chi cuēi ñí yùhu ñí ìní-yu cāhā<sup>n</sup>-yu dico ñá tècú tnūnī-yu nācuáa ní cāhā<sup>n</sup> ndí, te ñí tnūhu cāhā<sup>n</sup> mēē-yu ñá cūtnūnī ìní-yu nācuáa ndūu-xi.

<sup>8</sup> Te sa nàha-o sá nchāá tnūhu ní cāhā<sup>n</sup> ndí Moisés váha, te núu na tècú tnūnī-ó ñá cuendá duca<sup>n</sup> ñí ngūndecu nchaa tnúhu-á<sup>n</sup>. <sup>9</sup> Te cūtnūnī ìní-ó sá ñá díú sá cúu-xí nchāa ñáyiú quide váha ndecu ñuyíú-a ñí ngūndecu nchaa tnúhu-á<sup>n</sup>, chi ní ngūndecu-xi sá cúu-xí nchāa ñáyiú ñá túú quide váha, ndihī cuendá nchaa ñáyiú ío sáá ìní-xi, ndihī cuendá nchaa ñáyiú quide cuehé quidé dūha, ndihī cuendá nchaa ñáyiú ío ndecu cuéchi-xi, ndihī cuendá nchaa ñáyiú ñá túú nèhe vèdana sá yīñūhu núú Yá Ndiōxí, ndihī cuendá nchaa ñáyiú ñá túú cāhā<sup>n</sup> váha cuendá ichi Yá Ndiōxí, ndihī cuendá nchaa ñáyiú sàhni tátá-xi ndihī nāná-xi, ndihī cuendá nchaa dava-gă ñáyiú sàhni tnaha, <sup>10</sup> ndihī cuendá nchaa cue tée cāhā<sup>n</sup> ndihī ñáyiú ñihí te ñá díú ñāndihī-güedé cúu-yu, ndihī cuendá tucu nchaa ñáyiú ñihí cāhā<sup>n</sup> ndihī cue tée te ñá díú yī-yu cūu-güedé, ndihī cuendá nchaa cue tée cāhā<sup>n</sup> ndihī tnàha ndi mee tée-xi, ndihī cuendá nchaa ñáyiú chiváha tnàha ñáyiú-xi cuendá sá cuiní-yu ñihī-yu díhú<sup>n</sup>, ndihī cuendá nchaa ñáyiú ndehnde, ndihī cuendá nchaa ñáyiú cācunehe ndéé Yá Ndiōxí cuendá cuiní-yu cutnūnī ìní tnàha ñáyiú-yu sá cāhā<sup>n</sup> ndáá-yu, te ñá ndáá sá cāhā<sup>n</sup> ndáá-yu, ndihī cuendá nchaa ñáyiú quide nchaa dava-gă sá ñá túú tàuchiu<sup>n</sup> Yá Ndiōxí cadá-yu. Cuendá nchaa ñáyiú duca<sup>n</sup> xīquide ní ngūndecu nchaa tnúhu-á<sup>n</sup>. <sup>11</sup> Te nchaa tnúhu-á<sup>n</sup> ñí-ni cūu-xi ndihī nchaa tnúhu sá ñí cachí Yá Ndiōxí cāhā<sup>n</sup>-í, te tnúhu-á<sup>n</sup> cúu-xí tnúhu váha vīhi, chi mee-gă ío váha ìní-gă.

*Té Păblú ndàcá<sup>n</sup> táhú-dě núú Yă Ndiöxí sá nǐ cundàhú iní ñáhá-gă xii-dě*

12 Te Xítohó Jesucristú ní cutnùní iní-gá sá cádá ndáá-í cada-í nchaa chiú<sup>n</sup> tahu-gá. Te ndàcá<sup>n</sup> táhú-í núú-gă sá nǐ taxi-gá chiú<sup>n</sup>-gá quidè-í, te ío chindee ñaha-gá xii-í. 13 Te ní taxi-gá chiú<sup>n</sup>-gá quidè-í cuèi ní xóo cáhá<sup>n</sup> cuèhé-í cuèndá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá nǐ xóo cada-í-yu dico ní cundàhú iní ñáhá Yă Ndiöxí xii-í, chi vátá quindáá-gá iní-í Xítohó Jesucristú cútnàhá duca<sup>n</sup> nǐ xóo cada-í, te ni ñă cútnùní iní-í nchaa sá quidè-í ní cùu, te cuèi duca<sup>n</sup> nǐ xóo cada-í, 14 dico Yă Ndiöxí ío ní cundàhú iní ñáhá-gă xii-í te chindee ñaha-gá. Te mee Xítohó Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

15 Te nihí-ó tnùhu sá Xítohó Jesucristú ní quixi-gá ñuyíú-a cuèndá sá dácăcu nihnu-gá nchaa ñáyiú ndècu ichi cuehé ichi duha. Te tnùhu-á<sup>n</sup> cúú-xí ñ<sup>n</sup> tnùhu ndáá, te xini ñuhu-xi quindáá iní nchaa nchoo ñáyiú ndècu ñuyíú-a. Te yúhú cúú-í téé ío-gá ndécú cuèchi-xi núú Yă Ndiöxí ní cùu. 16 Te Yă Ndiöxí ní cundàhú iní ñáhá-gă ní dácăcu nihnu ñaha-gă xii yúhú téé xidó ndécú cuèchi-xi ní cùu, cuèndá cutnùní iní nchaa ñáyiú sá Xítohó Jesucristú ío càhnu iní-gá. Te sá dúcá<sup>n</sup> nǐ quide ñaha-gă xii-í, te xíá<sup>n</sup> cutnùní iní-yu sá nùu na quindáá iní ñáhá-yu xii-gá te cundécú-yu ndihí-gá nǐ caa nǐ quíhí<sup>n</sup>. 17 Te nchaa-o chí ná càchí-ó sǎ ío càhnu cuu Yă Ndiöxí, te canehe-o sǎ yíñùhu núú-gă nǐ caa nǐ quíhí<sup>n</sup>, chi mee-gă cúú-gă Yaá táxí tnùní nchaa nduu nchaa quíú. Te cùu-gá ñ<sup>n</sup> Yaá ñá túú xini núú-ó, te ñ<sup>n</sup>dii díí-ni-gă ío ndècu ndihí-gá nchaa sá xini tnùní-gá.

18 Te yòhó té Timùteú téé cùu datná ñ<sup>n</sup> déhe mee-í sa nàha-n nacuáa ní cáhá<sup>n</sup> dava-gá cue téé cáhá<sup>n</sup> tnùhu Yă Ndiöxí cuèndá-n, te ñ<sup>n</sup>-ni duca<sup>n</sup> cáhá<sup>n</sup>-ú tucu, te cada-n nchaa nacuáa cáhá<sup>n</sup> tnùhu-á<sup>n</sup> chí ñ<sup>n</sup>-ni duca<sup>n</sup> tnùhu-á<sup>n</sup> canu ichi ñaha-xi xii-n cada-n nchaa

nacuáa cuèni Yă Ndiöxí. 19 Te ío quindáá iní-n Xítohó Jesucristú, te cada váha-n cundecu-n nacuáa cundecu váha iní-n, chí dava ñáyiú ñá túú-gă duca<sup>n</sup> quidè-yu núu xíá<sup>n</sup> ñá túú-gă sàndáá iní-yu nacuáa cáhá<sup>n</sup> tnùhu-gá. 20 Te ñ<sup>n</sup>-ni duca<sup>n</sup> nǐ quide té Himèneú ndihí té Lìjandrú ní dáñá ndèe-güedé ñá túú-gă sàndáá iní-güedé nacuáa cáhá<sup>n</sup> tnùhu Xítohó Jesucristú, te ní xáha<sup>n</sup>-í xii-güedé sá ná cundoho-ná-güedé nùu nása cada ñaha sàculhá xii-güedé, te duca<sup>n</sup> nǐ xáha<sup>n</sup>-í cuèndá sá vǎ cáhá<sup>n</sup> cuèhé-gá-güedé cuèndá Yă Ndiöxí.

## 2

### *Nacuáa cáhá<sup>n</sup> ndihí-o Yă Ndiöxí*

1 Te na càchí tnùhu-í xii-n nchaa nacuáa cada-n. Te díhna-gá càchí tnùhu-í sá cáhá<sup>n</sup> ndihí-n Yă Ndiöxí cuèndá nchaa ñáyiú te núu nása cùu xíndécú-yu, te cácá<sup>n</sup> táhú-n nùú-gă cuèndá-yu, te duca<sup>n</sup> ío ndacá<sup>n</sup> táhú-n nùú-gă cuèndá nchaa sá vǎha quide ñaha-gá xii-yu. 2 Te duca<sup>n</sup> cáhá<sup>n</sup> ndihí-n Yă Ndiöxí cuèndá nchaa cue téé cùnuu ndihí cuèndá nchaa dava-gá cue téé cùchiú<sup>n</sup> cuèndá cada váha-güedé, te duca<sup>n</sup> nchòo ñá túú nǎ cuu cundecu-o, te ñá túú tnàhí ná caní iní-ó cundecu-o, te ío cundecu yíñùhu-o núú Yă Ndiöxí, te cada-o nchaa nacuáa tàú-xi cunduu. 3 Te núu duca<sup>n</sup> na càda-o cáhá<sup>n</sup> ndihí-o Yă Ndiöxí cuèndá nchaa ñáyiú te quide váha-o, te ndùu vétú iní Yă Ndiöxí Yaá ní dácăcu nihnu ñaha xii-o núú ùhú núú ndàhú. 4 Te mee-gă cuèni-gá sá ncháá ñáyiú tecú tnùní-yu nchaa tnùhu cáhá<sup>n</sup>-gá, chí cuèni-gá sá nánihí tàhú-yu. 5 Te ñ<sup>n</sup>-ni Dútú Ndiöxí ndécú, te ñ<sup>n</sup>-ni Xítohó Jesucristú, te medii-ni Xítohó Jesucristú quidè-gă tnàhá tnùhu-o ndihí Yă Ndiöxí. 6 Te Xítohó Jesucristú ní dáñá-gă mée-gă ní sahní ñaha-güedé xii-gá cuèndá sá cuèni-gá sá cácu nihnu nchaa ñáyiú ndècu ñuyíú núú ùhú núú ndàhú. Te Yă Ndiöxí cuèni-gá sá ncháá ñáyiú ñuyíú ndécú vitna níhí-yu tnùhu nacuáa ní cuu ní xihí Xítohó Jesucristú. 7 Te Yă Ndiöxí ní cachí-gá sá cáhá<sup>n</sup>-í tnùhu-á<sup>n</sup>

ndëni ní cuu núú xĩndecu ñáyiú ñá túú cùu ñáyiú isràèl, te mee-ni tnũhu ndáá dánèhé-í-yu nàcuáa quindáá iní ñáhã-yu xii-gá, te yúhú càhá<sup>n</sup> ndáá-í sá Yá Ndiõxí ní cachí-gá sá càhá<sup>n</sup>-í tnũhu-gá chi ndècu ndihí-í Xítóhó Jesucrístú, te ñá túú dándahú ñáhà-í xii-n.

8 Te yúhú cuiní-í sá ncháá xichi càhá<sup>n</sup> ndihí cue téé Yá Ndiõxí, te na cùnduu ndoo cunduu nine iní-güedé òré ndonehe-güedé ndaha-güedé càhá<sup>n</sup> ndihí ñaha-güedé xii-gá, chi vá cúú cùdéé<sup>n</sup>-güedé cuendá nchaa sá quidé ñaha ñáyiú xii-güedé, te ni vã cání iní-güedé cúcuèhé tnáhã-güedé ndihí-yu. 9 Te càchí tnũhu-í xii-n sã ncháá ñáyiú dñí ná cùnduu díoyu nàcuáa tàú-xi cunduu, te vá cùnduu cuehé cunduu duha dàtná cáá dño nchaa ñáyiú ndècu ichi cuehé ichi duha, te na ndádã-yu díquĩ-yu nàcuáa tàú-xi cunduu, te vá ndádã cuèhé ndada duhá-yu, te vá cání iní-yu cunduu víi-yu ndihí sá ïo ndèyáhu, te ni vã cání iní-yu cuihnú-yu dóó sã ïo ndèyáhu. 10 Te mee-ni sã vãha cadã-yu, chi duca<sup>n</sup> tàú-xi cada nchaa ñáyiú dñí ndécú ichi Yá Ndiõxí. 11 Te òré tàcã-yu núú dácuahá-yu tnũhu Yá Ndiõxí, te cue ñáyiú dñí-á<sup>n</sup> na nãhi dacuahá-yu tnũhu-gá, te cadã-yu nchaa nàcuáa càhá<sup>n</sup> cue téé dàcuaha ñaha xii-yu tnũhu-gá. 12 Te yúhú càchí-í sá vá cúú dàcuaha ñáyiú dñí cue téé, te ni vã cúú tàxi tnuní ñáhã-yu xii-güedé chi cunduu tnávíi-ni yuhú-yu cundedóho-yu. 13 Te duca<sup>n</sup> xini ñuhu-xi cadã-yu, chi Yá Ndiõxí ní cadúha-gá díhna-gá té Àdán te dàtnùní ní cadúha-gá tá Èvá. 14 Te ñá díú mèe té Àdán ní dándahú ñáhã sàcuíhnã xii-dé, chi tá Èvá ní dándahú-xi, te ñá túú ní quide váha-xi núú Yá Ndiõxí sá dúcã<sup>n</sup> ñí sándáá iní-xi tnũhu ní càhá<sup>n</sup> sàcuíhnã-ã<sup>n</sup>. 15 Dico ñáyiú dñí ní nduu táhũ-yu sá cóo dèhe-yu, te naníhí tàhũ-yu te núú vá dáñã ndèé-yu canchicú<sup>n</sup> nihnú-yu ichi Yá Ndiõxí, te cundecu yíñhũ-yu núú-gã, te cuu iní-yu nchaa tnãha

ñáyiú-yu, te cadã-yu nchaa nàcuáa tàú-xi cunduu cundecú-yu.

### 3

*Nàcuáa tàú cue téé yindaha ñaha xii ñáyiú ndècu ichi Yá Ndiõxí cada-güedé*

1 Te ío ñ<sup>n</sup> tnũhu càhá<sup>n</sup> ñáyiú sá nõu ñ<sup>n</sup> téé cuiní quindaha ñaha xii ñáyiú ndècu ichi Yá Ndiõxí, te ñ<sup>n</sup> sá vãha cuiní-dé cada-dé càchí-yu, te ndáá quèé-xí tnũhu càhá<sup>n</sup>-yu. 2 Te yúhú càchí-í sá cuè téé duca<sup>n</sup> na quindaha ñaha xii ñáyiú te xini ñuhu-xi cuu-güedé cue téé quide ndáá cuendá sá vá càhá<sup>n</sup> ñáyiú cuendã-güedé sã ñã túú quide ndáá-güedé. Te na cùu-güedé cue téé ndèca ñ<sup>n</sup> caa-ni ñadihí, te na cùu-güedé cue téé ñã túú quide cutexínu ndècu, te na cùu-güedé cue téé quide nchaa nacuaáa tàú-xi cunduu, te na cùu-güedé cue téé sãñaha nõu vehe ndetatú nchaa ñáyiú ñuhu ichi, te na cùu-güedé cue téé dñehé ñáhã vãha xii ñáyiú tnũhu Yá Ndiõxí. 3 Te vá cúú-güedé cue téé quihu, te ni vã cúú-güedé cue téé ndècu pletú, te ni vã cúú-güedé cue téé dicó-ni duca<sup>n</sup> ñihí díhú<sup>n</sup>, te ni vã cúú-güedé cue téé sãni iní nãá, te ni vã cúú-güedé cue téé ñuhu iní mee-ni díhú<sup>n</sup>. Chi na cùu-güedé cue téé váha iní-xi te cunduu càhnu iní-güedé. 4 Te na cùu-güedé cue téé ío váha sãnu ichi ñadihí-xi ndihí landú-xi, te na cùu-güedé cue téé quide nacuaáa sãndáá iní ñáhã landú-xi cuendã canehe-güexi sã yíñhũ núú-güedé. 5 Chi núú cùu-güedé cue téé ñã ndácú cànuichi ñadihí-xi ndihí landú-xi, te vá ndácú-güedé quindaha-güedé cue ñáyiú ndècu ichi Yá Ndiõxí. 6 Te vá cúú-güedé cue téé íchí ñí sãndáá iní-xi tnũhu Yá Ndiõxí, chi na cuáhã<sup>n</sup> te cada ñinu-güedé mée-güedé te cuíta nihnu-güedé dàtnã ní xíta nihnu sàcuíhnã. 7 Te xini ñuhu-xi cuu-güedé cue téé càhá<sup>n</sup> váha ñáyiú cuendã-xi, cuèi ñã díú ñáyiú ndècu ichi Yá Ndiõxí cuendã sã vá cuátnũhu ñaha ñáyiú xii-güedé, chi núú ñáhã te cudana

te sácuihná quesaha-xi tàxi tnuní ñáhá-xí xii-güedé.

*Cue téé chindee ñaha xii cue téé yíndaha ñaha xii ñáyiú ndècu ichi Yá Ndiöxí*

<sup>8</sup> Te tnàhá cue téé chindee ñaha xii cue téé yíndaha ñaha xii ñáyiú ndècu ichi Yá Ndiöxí xíní ñùhu-xi cuu-güedé cue téé quide nchaa nacuaá tàú-xi cunduu, te vá cúú-güedé cue téé càchí sá càhá<sup>n</sup> ndáá te ñá ndáá, te ni vâ cúú-güedé cue téé quihu, te ni vâ cúú-güedé cue téé sàni iní-xi dicó-ni duca<sup>n</sup> ñíhí dǐhú<sup>n</sup>. <sup>9</sup> Te xìni ñùhu-xi cuu-güedé cue téé ñá túú dàña ndeé sàndáá iní tnúhu Yá Ndiöxí, te na cùu-güedé cue téé ío váha cùu iní-xi cuendá nchaa sá váha quide-güedé. <sup>10</sup> Te xìni ñùhu-xi coto ndeé ñáhá xii-güedé te núu cùu-güedé cue téé quide váha, te núu cùu-güedé cue téé quide váha ña te cuu chindee-güedé cue téé yíndaha ñaha xii ñáyiú ndècu ichi Yá Ndiöxí. <sup>11</sup> Te tnàhá tucu nchaa ñáyiú dǐhí ná càdá-yu nchaa nacuaá tàú-xi cunduu, te vá cùndùu yiti yuhú-yu, te ni vâ cúú-yu ñáyiú quide cutexínu ndècu, te na cùú-yu ñáyiú ío váha quide ndáá. <sup>12</sup> Te nchaa cue téé chindee ñaha xii cue téé yíndaha ñaha xii ñáyiú ndècu ichi Yá Ndiöxí, xìni ñùhu-xi cuu-güedé cue téé ndècu ñ<sup>n</sup> caa-ni ñadihí-xi, te na cùu-güedé cue téé sànu ichi váha ñadihí-xi ndihí landú-xi. <sup>13</sup> Te núu na càda ndáá-güedé chindee-güedé cue téé yíndaha ñaha xii ñáyiú ndècu ichi Yá Ndiöxí, te canehé-yu sá yíñùhu núú-güedé, te duca<sup>n</sup> te vá cúú càhá<sup>n</sup> núú-güedé càhá<sup>n</sup>-güedé núú ñáyiú tnúhu Xítohó Jesucristú sá sàndáá iní-güedé.

*Ío càhnu cuu tnúhu càhá<sup>n</sup> Yá Ndiöxí*

<sup>14</sup> Te cuiní-í ndihí-ni quixi coto ñaha-í xii-n dico díhna-gá cadúha-í tutú-a daquixi-í ndaha-n <sup>15</sup> chi na cuahá<sup>n</sup> cuyaa-í. Te xía<sup>n</sup> núu cadúha-í tutú-a daquixi-í ndaha-n cuendá cutnùní iní-n ñasa cada-n cùndecu-n ndihí nchaa ñáyiú ndècu ichi Yá Ndiöxí. Te ñáyiú-á<sup>n</sup> cúú-yu dàtná ñ<sup>n</sup>

vehe cùu cuendá Yá Ndiöxí Yaá ndécú nchaa nduu nchaa quiú, chi ndècu ndihí ñaha-gá xii-yu, te cùú-yu ñáyiú càhá<sup>n</sup> váha cuendá tnúhu-gá. <sup>16</sup> Te cùtnuní ndáá iní-ó sǎ ío càhnu cuu tnúhu càhá<sup>n</sup> Xítohó Jesucristú, tnúhu sá càhá<sup>n</sup> nacuaá ndùu ichi ndecu-o, te duha càhá<sup>n</sup> tnúhu-á<sup>n</sup>:

Te ní quixi Yá cúú Ndiöxí ñuyíú-a ní cuu-gá ñ<sup>n</sup> ñáyiú,

te Espiritú Yá Ndiöxí ní càhá<sup>n</sup> ndáá-xi sá cúú-gǎ ñ<sup>n</sup> Yaá ío váha quide ndáá,

te cue espíritú xínú cuèchi núú Yá Ndiöxí ní xíní ndáá-xi nchaa nacuaá ní quide Yaá ní quixi ñuyíú-a.

Te ní xité nuu tnúhu-gá ñihí ñuyíú-a, te ndèni ní cuu ní ngúita-yu sàndáá iní ñáhǎ-yu xii-gá,

te mee-gǎ cuánda-gá andiu.

Duha càchí tnúhu-á<sup>n</sup>.

#### 4

*Ñáyiú dàña ñihnu vá quíndáá-gá iní-yu Yá Ndiöxí*

<sup>1</sup> Te Espiritú Yá Ndiöxí càhá<sup>n</sup> ndáá-xi sá sáá nduu dàña ñihnu dava ñáyiú ndècu ichi-gá vá quíndáá iní ñáhǎ-gǎ-yu xii-gá, te duca<sup>n</sup> chi cue espíritú cùndihí yucu ñávǎha dandáhú ñáhǎ-xí xii-yu, te mee-ñǎ nchaa tnúhu càhá<sup>n</sup> nchaa ñáyiú cùndihí nchaa espíritú-á<sup>n</sup> cuhu<sup>n</sup> iní-yu. <sup>2</sup> Te nchaa ñáyiú duca<sup>n</sup> cùndihí cue espíritú cùndihí yucu ñávǎha-á<sup>n</sup> cúú-yu ñáyiú ío dándahú méé-xí chi càchí-yu sá càhá<sup>n</sup> ndáá-yu te ñá ndáá, te ñá túú tnàhí-gá ná quidé-xí iní-yu cuendá nchaa sá cuèhé sá dúhá quidé-yu.

<sup>3</sup> Te ñáyiú-á<sup>n</sup> quesàhá-yu sá vâ cúú càndeca tnaha ñáyiú, te ni vâ cúú càxí-yu dava núú sǎ xíní-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuiní-gá sá ncháá nchòo ñáyiú sàndáá iní tnúhu-gá ndacá<sup>n</sup> táhú-ó núú-gǎ òré caxi-o. <sup>4</sup> Te nchaa sá ñí cadúha Yá Ndiöxí cúú-xí sǎ váha te vá dáquée tíhú-ó, te xìni ñùhu-xi ndacá<sup>n</sup> táhú-ó núú-gǎ cuendá nchaa xíǎ<sup>n</sup>. <sup>5</sup> Te Yá Ndiöxí càchí-gá sá méé-gǎ quidé-gǎ



cúu-xí sã vãha sã cúu-xí-ó te núu na ndàcá<sup>n</sup> táhú-ó núú-gã.

*Tée quide ndáá xínú cuèchi núú Xìtohó Jesucristú*

<sup>6</sup> Te núu na dàcuaha-n ñáyiú ndècu ndihí-o ichi Xìtohó Jesucristú nchaa nàcuáa càhá<sup>n</sup>-í-a ña, te cuu-n ì<sup>n</sup> tée quide ndáá xínú cuèchi núú-gã, te nducu ndèe-ni-n dacuaha-n tnúhu Yá Ndiòxí sã sàndáá iní-n, te canchicú<sup>n</sup> nihnu-ni-n càda-n nchaa nacuáa càhá<sup>n</sup>-gã, te núu duca<sup>n</sup> nà cada-n, te níhí ndéé-n cùndecu-n ichi-gã.

<sup>7</sup> Te vá cáda cuendá-n nchàa cuendú cuèhé cuendú duha càhá<sup>n</sup> ñáyiú, ndihí nchaa dava-gã cuendú sã ñà túú nàndíhi cuendá sã ñà túú nã cumání-n cùndecu-n núú Yá Ndiòxí.

<sup>8</sup> Te núu ì<sup>n</sup> chiu<sup>n</sup> cada-o te nàcaá luha yiqui-o te nàndíhi-xi luha, dico ío-gã nàndíhi-xi te núu cada-o sã cùndecu yíñuhu-o núú Yá Ndiòxí. Te núu duca<sup>n</sup> na càda-o te cùu-xi ì<sup>n</sup> sã vãha sã cúu-xí-ó vitna, te ni caa ni quíhí<sup>n</sup> duca<sup>n</sup> cùu-xi ì<sup>n</sup> sã vãha sã cúu-xí-ó. <sup>9</sup> Te xini ñuhu-xi sã ncháá-ndó quindáá iní-ndó nchàa tnúhu càhá<sup>n</sup>-í-a chi cùu-xi tnúhu ndáá. <sup>10</sup> Te vitna ío nducu ndee-o quide-o chiu<sup>n</sup> Yá Ndiòxí Yaá ndécú nchàa nduu nchaa quíú te quide ndee iní-ó cuendá nchaa sã quidé ñàha ñáyiú xii-o, chi sàndáá iní-ó sã díú-gã chindèe ñaha-gã xii-o. Te nchaa ñáyiú cùndahú iní ñáhá-gã te chindee ñaha-gã xií-yu, dico ñáyiú sàndáá iní ñáhá xii-gã ío-gã cúnúú-yu chindee ñaha-gã xií-yu, chi dàcácu nihnu ñaha-gã núú ùhú núú ndàhú.

<sup>11</sup> Te nchaa tnúhu-á<sup>n</sup> cñaha-n xií-yu, te càhá<sup>n</sup>-n dõho-yu sã ná càdá-yu nchaa nàcuáa càhá<sup>n</sup>-xi. <sup>12</sup> Te ío cada vãha-n cùndecu-n cuendá sã vã yõo daquèe tíhú ñáhá xii-n cuendá sã cúu-n tée cuechi, te ío vãha càda-n nchàa sã tàú-n càda-n cuendá duca<sup>n</sup> canchicú<sup>n</sup> nihnu nchaa ñáyiú ndècu ichi Yá Ndiòxí, te vii vii càhá<sup>n</sup> ndihí-n-yu, te cuu iní-n-yu, te ío quindáá iní-n Yá Ndiòxí, te mee-ni sã vãha cani iní-n, te duca<sup>n</sup> càda-n cuendá canchicú<sup>n</sup> nihnú-yu. <sup>13</sup> Te nini cùyaa-í quixi-í, te ío nducu ndèe-n càhá<sup>n</sup> ndodo-n tnúhu Yá Ndiòxí

núu-yu, te dacuàhá-n-yu nàcuáa càhá<sup>n</sup> tnúhu-gã, te càhá<sup>n</sup>-n dõho-yu nàcuáa cuu vii cuu vãha iní-yu cundecú-yu ichi Yá Ndiòxí. <sup>14</sup> Te vá dáñá ndèe-n càda-n nacuáa nduu táhú ní taxi Yá Ndiòxí ní ngúndecu ndihí-n cùtnàhá ní sacá<sup>n</sup> ndodo cue tée yìndaha ñaha xii ñáyiú ndècu ichi Yá Ndiòxí ndaha-güedé díquí-n, te ní cachí tnúhu-güedé sã dúcá<sup>n</sup> ní cuiní Yá Ndiòxí cunduu.

<sup>15</sup> Te ni yùhu ni iní-n càda-n nchaa nacuáa càhá<sup>n</sup>-í-a cuendá sã ná quíní ñáyiú sã ío-gã vãha ta quide-n cuáhá<sup>n</sup>. <sup>16</sup> Te ío vãha cundehe-n nchàa nacuáa quide-n, ndihí nchaa nàcuáa dānehé-n-yu, te vá dáñá ndèe-n dùca<sup>n</sup> cada-n. Te núu duca<sup>n</sup> na càda-n te nduu táhú-n cùndecu vãha-n núú Yá Ndiòxí ni caa ni quíhí<sup>n</sup> ndihí nchaa ñáyiú na tédóho nchaa tnúhu càhá<sup>n</sup>-n.

## 5

*Nàcuáa tàú-xi cada-o cùndecu-o ndihí ñáyiú sàndáá iní tnúhu Yá Ndiòxí*

<sup>1</sup> Te vá ténàá-n nchàa cue tée cùu sacuéhé chi vii vii càhá<sup>n</sup>-n dõho-güedé, te cada iní-n sã dàtná tātá-n cùu-güedé, te diu-ni duca<sup>n</sup> vii vii càhá<sup>n</sup>-n dõho nchaa cue tée cuechi, te cada iní-n sã dàtná cue ñaní-n cùu-güedé. <sup>2</sup> Te diu-ni duca<sup>n</sup> vii vii càhá<sup>n</sup> tucu-n dõho nchaa ñáyiú dñí ñáyiú cùu sacuéhé, te cada iní-n sã dàtná nāná-n cùu-yu, te diu-ni duca<sup>n</sup> vii vii càhá<sup>n</sup> tucu-n dõho nchaa ñáyiú dñí ñáyiú cuechi, te cada iní-n sã dàtná cue cúha-n cùu-yu, te ío cuu vãha iní-n òré duca<sup>n</sup> càhá<sup>n</sup>-n dõho nchaa ñáyiú cuechi-ã<sup>n</sup>.

<sup>3</sup> Te canehe-n sã yíñùhu núú ñáyiú dñí ní quendóo quèé, te chindèe-n-yu núu ndàhú-yu. <sup>4</sup> Te núu ì<sup>n</sup> ñaha quèé ndécú cuè déhe-a<sup>n</sup> àdi cue déhe ñani-a<sup>n</sup>, te ío xini ñuhu-xi cada-güexi nchaa nacuáa tàú-xi cunduu núu-a<sup>n</sup> chi duca<sup>n</sup> cuiní Yá Ndiòxí cada-güexi. Te núu duca<sup>n</sup> na càda-güexi te nānchocáva-güexi quide-güexi sã vãha sã cúu-xí ñáyiú ní dācuéhnú ñàha xii-güexi. Te núu duca<sup>n</sup> na càda-güexi te quide vãha-güexi te ío nduu vétú

iní Yă Ndiöxí. <sup>5</sup> Te ñáyiú quèé ñáyiú ndàhú ndécú ichi Yă Ndiöxí sàndáá iní-yu sá díú-gă chindèe ñaha-gá xií-yu, te cuèi nduu cuèi niú ñá túú dàña ndeé-yu càhá<sup>n</sup> ndihí ñàhá-yu xii-gá. <sup>6</sup> Te nchaa ñáyiú quèé cúdí iní quidé nchaa sá cuèhé sá dúhá cùú-yu dàtná ñáyiú ní xihí cuèi ndècu vívũ-yu. <sup>7</sup> Te cúñaha-n xii nchaa ñáyiú sá ná cádá-yu nchaa tnúhu càhá<sup>n</sup>-í-a cuèndá sá ñà túú nă cumání-yu cundecú-yu, te duca<sup>n</sup> vă yõ cáhá<sup>n</sup> cuèhé cuèndá-yu. <sup>8</sup> Te ío xini ñuhu-xi chindeé-yu cue tnàha ñáyiú-yu, dico ío-gá xini ñuhu-xi chindeé-yu cue ñáyiú cùu ndi meé-yu ndècu ndihí-yu, te núu vá dúcá<sup>n</sup> càdá-yu te ñá túú-gă sàndáá iní-yu cadá-yu nàcuáa càhá<sup>n</sup> Yă Ndiöxí. Te sá dúcá<sup>n</sup> ná càdá-yu te vihi-gá quidé-yu dàcúúxí ñáyiú ndècu ichi cuehé ichi duha.

<sup>9</sup> Te chido tnùní-n mèe-ni ñáyiú quèé ñáyiú sa ndècu únídico cuía-xi àdi vihi-gá cuèndá ñáyiú-á<sup>n</sup> cadá-yu nchaa nàcuáa cuini Yă Ndiöxí núu nchaa ñáyiú ndècu ichi-gá, te ñáyiú-á<sup>n</sup> xini ñuhu-xi cuú-yu mee-ni ñáyiú ní quide ndáá ní xindecu ndihí yí-xi. <sup>10</sup> Te na cùú-yu ñáyiú quèé quidé vâha cùú-yu núu nchaa ñáyiú, te na cùú-yu ñáyiú quèé xini canu ichi váha cue landú-xi, te na cùú-yu ñáyiú sãñaha nùu vehe ndetatú cue ñáyiú ñuhu ichi, te na cùú-yu ñáyiú ndècu túha quide nani chiú<sup>n</sup> cuèndá cue ñáyiú ndècu ichi Yă Ndiöxí, te na cùú-yu ñáyiú chindee nchaa ñáyiú ndècu ndihí tnúndòho tnúhu ndàhú, te na cùú-yu ñáyiú ñá túú dàña ndeé quidé nchaa núu sã vâha.

<sup>11</sup> Te vá chídó tnùní-n ñáyiú quèé ñáyiú ñá túú ndècu únídico cuía-xi cada chiú<sup>n</sup> Yă Ndiöxí, chi núu cuechi-gă-yu ña, te vá cúndáá-yu cadá-yu chiú<sup>n</sup>-gá, chi quesàhá-yu natnándaha tucú-yu. <sup>12</sup> Te sá cuèndá xiá<sup>n</sup> te nacháhu-yu núu Yă Ndiöxí, chi vá cádá-gă-yu nàcuáa ní cuu tnúhu cadá-yu ni cùu. <sup>13</sup> Te ngúíta-yu cani iní-yu quíhí<sup>n</sup>-yu ndi vehe ndi vehe caca nihní-yu, te nchaa ñáyiú duca<sup>n</sup>

quide ío cùu cuhndú-yu, te cùyiti yuhú-yu, te ndèni ní cuu cuáhá<sup>n</sup>-yu chinee díquí<sup>n</sup>-yu vehe tnàha ñáyiú-yu ndèhé-yu núu nása ndécú-yu, te ñá túú tàú-yu duca<sup>n</sup> càdá-yu, te càhá<sup>n</sup>-yu mee-ni tnúhu sá ñà túú nàndíhi. <sup>14</sup> Núu xiá<sup>n</sup> cuini-í sá ncháá ñáyiú quèé ñáyiú cuechi na natnándaha tucú-yu cuèndá cuú-yu náná, te duca<sup>n</sup> càdá-yu nchaa sá xini ñuhu-xi cadá-yu vehé-yu, te núu duca<sup>n</sup> na càdá-yu, te nchaa ñáyiú cùu úhú iní ñáhá xii-o vá nihí-gá-yu tnúhu cáhá<sup>n</sup> cuèhé-yu cuèndá tnúhu Yă Ndiöxí. <sup>15</sup> Te dava ñáyiú quèé ndécú ichi Yă Ndiöxí ní cùu ní dáñá-yu te ní tní-yu tnúhu càhá<sup>n</sup> sácuíhná.

<sup>16</sup> Te núu dava ñáyiú ndècu ichi Yă Ndiöxí ndécú ndihí-yu ñ<sup>n</sup> ñaha quèé cúú ndi meé-yu ña, te tàú-yu chindee ñàhá-yu xii-a<sup>n</sup> cuèndá sá vă ío chi chiú<sup>n</sup>-a<sup>n</sup> nchaa ñáyiú ndècu ichi Yă Ndiöxí, te duca<sup>n</sup> te nchaa ñáyiú ndècu ichi-gá-á<sup>n</sup> nihí ndéé-gă-yu chindèe-yu dava-gá ñáyiú quèé ñá túú vèdana ndècu ndihí.

<sup>17</sup> Te nchaa cue téé ío váha quide yindaha ñaha xii ñáyiú ndècu ichi Yă Ndiöxí ío xini ñuhu-xi canehe sá yíhí ñuhu núu-güedé, te chindee ñàha xii-güedé. Te uu<sup>n</sup>-gá tàú ñáyiú duca<sup>n</sup> càdá-yu sá cúú-xí nchaa cue téé ni yùhu ni iní càhá<sup>n</sup> tnúhu-gá. <sup>18</sup> Te núu tütú Yă Ndiöxí càchí-xi: “Vá chíhí-ndó ñunu yuhu ndicutu oré danchihí-dí triú”, duha càchí-xi. Te càchí tucu-xi ingá xichi: “Ë<sup>n</sup> téé quide chiu<sup>n</sup> dacuítí tàú-xi sá cùhú<sup>n</sup> yáhu-dé”, duha càchí-xi núu tütú-gá.

<sup>19</sup> Te núu ío ñáyiú véxi sàcá<sup>n</sup> cuéchi núu-n cuèndá ñ<sup>n</sup> téé yindaha ñaha xii ñáyiú ndècu ichi Yă Ndiöxí ñá, te cada cuèndá-n tnúhu càhá<sup>n</sup>-yu te núu véxi-yu ndihí úú àdi úní ñáyiú càhá<sup>n</sup> ndáá nàcuáa ní cuu, á<sup>n</sup> núu ñáhá te vá cádá cuèndá-n tnúhu càhá<sup>n</sup>-yu. <sup>20</sup> Te núu cue téé yindaha ñaha xii ñáyiú-á<sup>n</sup> ndécú cuéchi-güedé, te cáhá<sup>n</sup>-n dôho-güedé núu nchaa ñáyiú ndècu ichi-gá cuèndá sá dává-gă-yu vá cùyí<sup>n</sup>-yu duca<sup>n</sup> càdá-yu. <sup>21</sup> Te

Yá Ndiöxí ndihi Xítohó Jesucristú náhá-gã ndihi cue espíritú xínú cuèchi núú-gã sá yùhú càhá<sup>n</sup>-í dóho-n sã cáda-n nchaa nacuaa càhá<sup>n</sup>-í-a, te ì<sup>n</sup>-ni càhá<sup>n</sup> ndihi-n cuè téé xíní tnáhá ndihi-n, ndihi cue téé ñá túú xíní tnáhá ndihi-n. <sup>22</sup> Te vá ìo cundihí iní-n tàxi ndecu-n ì<sup>n</sup> téé quindaha ñàha xii ñáyiú, chi díhna-gá cada cuendá-n te núú cùu-dé ì<sup>n</sup> téé quide ndáá, chi núú cuendá-ni na tàxi ndecu-n-dé te vá cáda ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ìo coto-n mèe-n vá cáda-n ni ì<sup>n</sup> sá cuèhé sá dúhá.

<sup>23</sup> Te duca<sup>n</sup> ìo mee-ni cùhú xití-n te vá cóhó-n mèe-ni ndute, chi tnáhá luha vínú ndéhé yoho yàha stilé coho-n cuendá cada tátna-xi.

<sup>24</sup> Te dava ñáyiú cùtnuní nchaa sá cuèhé sá dúhá quidé-yu, te cùtnuní tucu sá náchãhu-yu na sàá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sàá nduu cùndáá cuèchi-yu te dáva-á<sup>n</sup> cutnùní. <sup>25</sup> Te duca<sup>n</sup> sãtnahá-xi cùu nchaa sá váha quide dáva-yu chi cùtnuní, te cuèi ñá túú cùtnuní òré-ni dico dacuítí sã sàá nduu cùtnuní.

## 6

<sup>1</sup> Te nchaa ñáyiú ndècu tnuú quidé chiú<sup>n</sup> ndihi ì<sup>n</sup> patróó<sup>n</sup> xini ñuhu-xi ìo canehé-yu sá yíñuhu núú-dé cuendá sá vã càhá<sup>n</sup> cuèhé ñáyiú cuendá Yá Ndiöxí, te ni vã càhá<sup>n</sup> cuèhé-yu cuendá tnúhu-gá. <sup>2</sup> Te núú patróó<sup>n</sup> cue ñáyiú xínu cuechi-á<sup>n</sup> sãndáá iní-dé Yá Ndiöxí, te ñá díú sã dúcá<sup>n</sup> sãndáá iní-dé Yá Ndiöxí te vá cánèhé-yu sá yíñuhu núú-dé, chi uu<sup>n</sup>-gá tàú-yu cada váha-yu cunu cuèchí-yu núú-dé, te duca<sup>n</sup> na càda-yu chi xínu cuechí-yu núú tãe sãndáá iní ndihí-yu tnúhu Yá Ndiöxí. Te vá dáñá ndéé-n dànehé-n-yu nchaa nacuaa càhá<sup>n</sup>-í-a, te cúñaha-n xii-yu sá ná càda-yu.

*Nduu vétú iní-ó cùndecu-o*

<sup>3</sup> Te ìo cue téé ñá túú tní-güedé nacuaa càhá<sup>n</sup> tnúhu Xítohó Jesucristú, te cue téé-á<sup>n</sup> càchí-güedé sá càhá<sup>n</sup> ndáá-güedé dico ñá ndáá, chi ñá túú càhá<sup>n</sup>-güedé nacuaa cuáhá<sup>n</sup> tnúhu-gá. Te nchaa tnúhu Xítohó Jesucristú cúu-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. <sup>4</sup> Te nchaa cue téé duca<sup>n</sup> xiquide quide cahnu-güedé méé-güedé dico ñá túú vèdana xíní-güedé, te cue téé-á<sup>n</sup> ñá túú ndècu váha iní-güedé chi nándi tnúhu sá ñá túú nãndíhi cuíní-güedé cútnáha-güedé. Te ngüíta-güedé cúu cuèdú iní tnáhá-güedé, te náá ndihi tnáhá-güedé, te xicuèhé tnáhá-güedé, te ñá túú-gã cúu váha iní núú tnáhá-güedé. <sup>5</sup> Te cue téé-á<sup>n</sup> mee-ni náá-güedé chi ñá túú sãni váha iní-güedé, te ni ñá túú xíní-güedé nacuaa cuáhá<sup>n</sup> tnúhu ndáá tnúhu Yá Ndiöxí, te càchí-güedé sá ìo váha cundecu-güedé ichi-gá chi sãni iní-güedé sá ìo vãi díhú<sup>n</sup> ñihí-güedé cundecu ndihi-güedé. Te yúhú càhá<sup>n</sup>-í dóho-n sã vã ñihí tnáhá-n ndihi nchaa cue téé duca<sup>n</sup> xiquide. <sup>6</sup> Te ndáá sá ichi Yá Ndiöxí cúu-xí ì<sup>n</sup> ichi sá ìo váha cundecu-o, dico xini ñuhu-xi nduu vétú iní-ó nacuaa ndècu-o ñuyíú-a.

<sup>7</sup> Te nchoo cuè ñáyiú chi ñá túú vèdana nèhe-o ní quexìo ñuyíú-a, te diu-ni duca<sup>n</sup> ñá túú vèdana canehé-o quíhí<sup>n</sup> òré ná cùú-ó. <sup>8</sup> Te ìo xini ñuhu-xi nduu vétú iní-ó te núú ndècu-ni sã cúnchìto-o ndihi dóo cuihnu-o. <sup>9</sup> Te ìo ñáyiú ìo cuíní-yu cuu cuicá-yu, te ñáyiú-á<sup>n</sup> dácàhu iní ñáhá yùcu ñávãha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidé-yu, te nchaa sá quidé-yu-á<sup>n</sup> ñá túú vèdana nãndíhi-xi chi uu<sup>n</sup>-gá ndádá ndáhú ñáhá-xi xii-yu, te dàcuíta nihnu ñaha-xi. <sup>10</sup> Chi nchaa ñáyiú ñuhu iní mee-ni díhú<sup>n</sup>, te xíá<sup>n</sup> quidé-xí ngüíta-yu sãni iní-yu cadá-yu nándi sá cuèhé sá dúhá. Te ìo ñáyiú ndècu ichi Yá Ndiöxí te sá tnúhu duca<sup>n</sup> ñuhu iní mee-ni díhú<sup>n</sup> ní dáñá-yu ñá túú-gã sãndáá iní ñáhá-yu xii-gá, te vitna ñá túú tnáhi-gá ndècu

vãha iní-yu.

*Cahni iní-ó càda-o nchaa nacuáa càhá<sup>n</sup> Yã Ndiõxí chi sàndáá iní-ó-gã*

<sup>11</sup> Te yòhó té quide chiu<sup>n</sup> Yá Ndiõxí xini ñuhu-xi vá cáda-n dàtná quidé nchaa ñáyiú ní cachí-í sá ñà túú quide ndáá, te vá dáñá ndèé-n càda ndáá-n cùndecu-n, te cada-n nàcuáa nduu vétú iní Yã Ndiõxí, te ío quindáá iní-n-gã, te cuu iní-n nchaa tnaha ñáyiú-n, te cada càhnu iní-n nchaa sá ná yãha-n cùndecu-n ichi-gá, te cunduu ndàhú iní-n. <sup>12</sup> Te cahni iní-n càda-n nchaa nacuáa cuiní Yã Ndiõxí chi sàndáá iní-n-gã, te ío cuhu<sup>n</sup> iní-n sá cùndècu-n ndihí Yá Ndiõxí ni caa ni quíhí<sup>n</sup>, chi ñu cuendá tnàhí-á<sup>n</sup> nì cáhá<sup>n</sup> ñáhá-gã xii-n, te ní cáhá<sup>n</sup> ndáá-n núú vai ñáyiú sá ío váha sàndáá iní-n-gã.

<sup>13</sup> Te Yá Ndiõxí Yaá quidé nchito nchaandi túhú sá ío ñuyíú naha-gá sá càhá<sup>n</sup>-í dóho-n vitna, te ñu-ni duca<sup>n</sup> naha tucu Xítohó Jesucristú Yaá ní cáhá<sup>n</sup> tnúhu ndáá núú tẽ Pilatú <sup>14</sup> sá quindáá iní-n càda-n nchaa nacuáa càhá<sup>n</sup> Yã Ndiõxí, te nchaa tnúhu càhá<sup>n</sup>-gá cada-n nàcuáa vá dáquèe tíhú ñáhá ñáyiú xii-n, te duca<sup>n</sup>-ni càda-n ndéé ná sàá nduu quixi tucu Xítohó Jesucristú. <sup>15</sup> Te quixi tucu-gá chi duca<sup>n</sup> ñí cachí Yã Ndiõxí cunduu, te mee Yã Ndiõxí ñáhá-gã ná nduu quixi tucu Xítohó Jesucristú. Te Yá Ndiõxí ío váha cùu iní-gá te ñndii díí-ni-gã ío-gá cùnùu-gá dàcúxí cuè téè tàxi tnuní ñndii ñndii nàció<sup>n</sup> ndihí nchaa ñáva-gá cue téè cùnùu, chi tàxi tnuní ñáhá-gã xii-güedé, te nchaa ñáyiú ndècu ñuyíú-a tàxi tnuní-gá. <sup>16</sup> Te ñu-gá cúú-gã Yaá ndécú nchaa nduu nchaa quíú, te ío càhnu cuu-gá chi dàtná dáyhé nchíanchii dàyhé-xi núú ndécú-gã, te vá yõo ñndii cùyii dayatni núú ndécú-gã, te ni ñá túú nì ñndii ñáyiú xini ñáhá xii-gã te ni vá ndácũ-yu quini ñáhá-yu xii-gã. Te ío na cànehe nchaa ñáyiú sá yíñuhu núú-gã ni caa ni quíhí<sup>n</sup>, te duca<sup>n</sup> ío na tàxi tnuní-gá ni caa ni quíhí<sup>n</sup>. Te duca<sup>n</sup> na cunduu.

<sup>17</sup> Te cáhá<sup>n</sup>-n dõho nchaa ñáyiú cuica ndècu ndihí nchaa sá ío ñuyíú-a cuendá sá vá cáda càhnu-yu mée-yu, te duu<sup>n</sup> duu<sup>n</sup> vá cùndéé iní-yu ni ñndii sá ndécú ndihí-yu chi vá cúdí-xi, te cáhá<sup>n</sup>-n dõho-yu sá ná cùndéé iní-yu Yá Ndiõxí chi ñu-gá cúú-gã Yaá ndécú nchaa nduu nchaa quíú, te chitu núú ndáhá tàxi-gã nchaa sá xini ñuhu-o, chi cuiní-gá sá ío cuu váha iní-ó cùndecu-o. <sup>18</sup> Te cáhá<sup>n</sup> tucu-n dõho-yu sá ná cáda-yu mee-ni sá váha, te cuendá nchaa sá váha cáda-yu-á<sup>n</sup> te cuú-yu ñndii ñáyiú cuica sá cúú-xí Yã Ndiõxí, te na cùndecu túha-yu chindéé-yu cue ñáyiú ndàhú cuñhá-yu sá xini ñuhú-yu. <sup>19</sup> Te núu duca<sup>n</sup> na cáda-yu te Yá Ndiõxí cuñhá-gã sá ndúú tãhú-yu na sàá nduu, te ngùndecu váha-yu ndihí-gã ni caa ni quíhí<sup>n</sup>.

*Tnúhu ndéé núú ñndii-á*

<sup>20</sup> Te yòhó té Timùteú càhá<sup>n</sup>-í dóho-n sá ío cada cuendá-n vá dáma tnúhu ní taxi Yá Ndiõxí danèhé-n ñáyiú, te vá cáda cuendá-n nchaa cuendú cuèhé cuendú duha ío ñuyíú-a chi ñá túú nàndii-xi, te ni vá cáda cuendá-n nchaa tnúhu xitnaha ñáyiú càchí sá xicá naha tnúhu cue téè túha chi ñá díú ñndii tnúhu ndáá cúú-xí. <sup>21</sup> Te ío ñáyiú ñá túú-gã sàndáá iní-yu tnúhu Yá Ndiõxí, chi ní quide cuendá-yu nchaa tnúhu xica naha ñáyiú-á<sup>n</sup>.

Te Yá Ndiõxí ná chindéé chitúu ñaha-gã xii-n. Te duca<sup>n</sup> na cunduu. Te ío cada ndee iní-nã vitna.



## TUTÚ CÚÚ ÒÚ NÍ CADÚHA TÉ PĀBLÚ QUIHI<sup>n</sup> NDAHA TÉ TIMÙTEÚ

*Té Pāblú cādūha-dé tutú quíhí<sup>n</sup>  
ndaha té Timùteú*

<sup>1</sup> Yúhú té Pāblú ní tendaha ñaha Yá Ndiòxí cāhá<sup>n</sup>-í tnúhu Xítohó Jesucristú núú ñāyiu, chi duca<sup>n</sup> nǐ cachí Yá Ndiòxí cunduu. Te cāhá<sup>n</sup>-í dàtná ní cachí Yá Ndiòxí sá ncháá nchò ñāyiu ndècu ndíhi Xítohó Jesucristú naníhí tǎhú-ó. <sup>2</sup> Te yúhú té Pāblú cādūha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te diu-í ní sanu ichi ñaha-í xii-n ichi Xítohó Jesucristú, te xicá<sup>n</sup> tǎhù-í núú Dütú Ndiòxí ndíhi núú Xítohó Jesucristú sá ío na chindee chítúu ñaha-gǎ xii-n, te cundǎhú iní ñáhá-gǎ, te duca<sup>n</sup> ndì nduú-gá ná cádá te ío váha cuu iní-n cùndecu-n.

*Cáhá<sup>n</sup> váha-o cuèndá Xítohó Jesucristú*

<sup>3</sup> Te cuèi nduu cuèi niú duca<sup>n</sup>-ni cāhá<sup>n</sup> ndíhi-í Yá Ndiòxí cuèndá-n, te ndàcá<sup>n</sup> tǎhù-í núú-gǎ, te xínu cuechi-í núú-gǎ dàtná ní quide cue ñani tnáhà-í ní xíndecu ndéé sanduu, te cùtnuní iní-í sá quidé ndáá-í núú-gǎ dàtná ní xóo cada-güedé. <sup>4</sup> Te ío sǎni iní-í naníhí tnáhá-ó cuèndá ío cudí iní-í, chi ndàcu iní-í sá ío ní ndáhyú-n sǎ ndíhú iní-n cùtnáhá ní quide ndee iní-í tnáhá-ó. <sup>5</sup> Te ñaha-í sá sàndáá ndisa iní-n Yá Ndiòxí dàtná ní ngúita díhna-gá xítná-n tǎ Lòidá ndíhi nǎná-n tǎ Eùnicé quidè-yu, te cùtnuní ndáá iní-í sá díú tnáhà-n ío váha sàndáá iní-n-gǎ.

<sup>6</sup> Te xíá<sup>n</sup> dándàcu iní ñáhà-í xii-n cuèndá sá ío-gá nducu ndèe-n cada-n chiu<sup>n</sup> ní nduu tǎhú-n núú Yá Ndiòxí cada-n, chi ní taxi-gá tnúhu ndee iní ní ngúndecu ndíhi-n cùtnáhá ní sacá<sup>n</sup> ndodo-í ndaha-í díquí-n sǎ díú chiu<sup>n</sup>-gá cada-n. <sup>7</sup> Te Espíritú sá nǐ taxi Yá Ndiòxí ndécú ndíhi-o ñá túú cùu-xi

í<sup>n</sup> Espíritú sá cádá nàcuáa yùhú-ó, chi cùu-xi í<sup>n</sup> Espíritú sá táxi tnúhu ndee iní cada-o chiu<sup>n</sup>-gá, te diu-xi quide cuu iní tnáhá-ó í<sup>n</sup> í<sup>n</sup>-o, te diu-ni tucu-xi quide cutnuní iní-ó nàcuáa cada-o cùndecu-o. <sup>8</sup> Te xíá<sup>n</sup> núú vá cùcàhà<sup>n</sup> núú-n cǎhá<sup>n</sup> váha-n cuèndá Xítohó Jesucristú, te ní vá cùcàhà<sup>n</sup> núú-n sǎ dúhá yíhi-í vecaá sá cuèndá-gá, te xini ñuhu-xi sá tnáhà-n ndòho-n sá cuèndá tnúhu-gá, te cundee iní-n ndòho-n, chi Yá Ndiòxí chindee ñaha-gá xii-n. <sup>9</sup> Te Yá Ndiòxí ní dácàcu nihnu ñaha-gǎ xii-o núú ùhú núú ndàhú, te ní cachí-gá sá cádá-ó ncháa nacuáa cuíni méé-gǎ cunduu, te duca<sup>n</sup> nǐ quide-gá chi duca<sup>n</sup> nǐ sani iní méé-gǎ cunduu sá cádá váha ñaha-gǎ xii-o, te ñá díú sǎ ío váha quide-o ndecu-o duca<sup>n</sup> ní quide-gá. Te ndéé cùtnáhá vátá ngáva-gá ñuyíú nǐ cachí-gá sá cádá váha ñaha-gǎ xii nchaa nchoo ñāyiu ní ngúndecu ndíhi Xítohó Jesucristú vitna. <sup>10</sup> Te vitna cùtnuní iní-ó sǎ ío váha quide ñaha-gá xii-o, chi ní quixi Xítohó Jesucristú ñuyíú-a ní dácàcu nihnu ñaha-gǎ xii-o núú ùhú núú ndàhú, te Yaá-á<sup>n</sup> nǐ quide-gá cuèndá sá vá cùú-gá-ó cùú dúcá<sup>n</sup>-ó, chi ní cachí-gá sá cùndècu-o ní caa ní quíhí<sup>n</sup> te núu na quíndáá iní-ó tnúhu-gá.

<sup>11</sup> Te ní cachí-gá sá cāhá<sup>n</sup>-í tnúhu-gá núú ñāyiu ñá túú cùu ñāyiu israél te dacuàha váha-í-yu tnúhu-gá, te cuèi ndèni ní cuu ndècú-yu te quíhí<sup>n</sup>-í cāhá<sup>n</sup>-í tnúhu-gá núú-yu chi duca<sup>n</sup> nǐ cachí-gá cunduu. <sup>12</sup> Te cuèndá xíá<sup>n</sup> nándi sá ndóhò-í vitna cuèndá-gá, dico ñá túú cùcàhà<sup>n</sup> núú-í chi cùtnuní váha iní-í nàcuáa sǎni iní Xítohó Jesucristú Yaá sàndáá iní-í, te yúhú ní dáñà-í méé-í núú ndáhá-gǎ, te cùtnuní ndáá iní-í sá cótó ñaha-gá xii-í ndéé ná sǎa nduu nàcuaca ñaha-gá.

<sup>13</sup> Te vá dáñá ndèe-n càda-n nchaa nacuáa cāhá<sup>n</sup> tnúhu váha ní dánèhé ñáhà-í xii-n, te ío quíndáá iní-n Yá Ndiòxí, te nchaa-o nàcuáa ndècu-o ndíhi Xítohó Jesucristú ío cuu iní tnáhá-ó í<sup>n</sup> í<sup>n</sup>-o. <sup>14</sup> Te cada cuèndá váha-n sǎ vá dáma tnúhu Yá Ndiòxí sá nǐ taxi-gá ndécú ndíhi-n, te

Espiritú-gá sá nǐ taxi-gá ndécú ndìhi-o chindee ñaha-xi xii-n.

<sup>15</sup> Te yòhó sa xìní-n sǎ nchàa ñáyiu ndècu distritú Àsiá, ñáyiu ní sándáá iní tnúhu Xítóhó Jesucristú ní dáñá ñáhá-yu xii-í, te tnàhá té Fígeló ndìhi té Hèrmógenés ní dáñá ñaha-güedé xii-í. <sup>16</sup> Te xicá<sup>n</sup> táhù-í núú Xítóhó Jesucristú sá ná chindee-gá cue ñáyiu cùu ndi mee té Onèsíforó, chi diu-dé ío vǎi xito ní quixi-dé ní quide cuendá ñáhá-dě xii-í, te ní taxi-dé tnúhu ndee iní, te ñá túú ní cùcaha<sup>n</sup> núú-dě sá yíhì-í vecaá. <sup>17</sup> Te cútnàhá ní xindecu-dé ñúú Rómá duca<sup>n</sup>-ni nǐ xóo nanducu ñaha-dé xii-í ndéé ndéé naníhí ñáhá-dé. <sup>18</sup> Te xicá<sup>n</sup> táhú tucu-í núú Xítóhó Jesucristú sá ná cùndahú iní ñáhá-gǎ xii-dé nduu na sáá cundáá cuéchi nchaa ñáyiu. Te yòhó sa xìní ndáá-n sǎ ío ní chindee ñaha-dé xii-o cùtnàhá ní xindecu-o ñúú Éfesú.

## 2

*Tée quide ndáá xínú cuéchi núú Xítóhó Jesucristú*

<sup>1</sup> Te yòhó té cùu datná ì<sup>n</sup> déhe mee-í ío nducu ndèe-n cada-n nacuaá níhí ndéé-gǎ-n cùndecu-n ichi Xítóhó Jesucristú chi diu-gá chindee ñaha-gá xii-n. <sup>2</sup> Te nchaa tnúhu sá nǐ dánèhé ñáhà-í xii-n ndìhi nchaa dava-gá ñáyiu, xǎ<sup>n</sup> danèhé-n dàva-gá cue téé quide ndáá cuendá danèhé-güedé dava-gá ñáyiu.

<sup>3</sup> Te cahni iní-n ndòho-n cunu cuechi-n núú Xítóhó Jesucristú datná cuíní-n ndòho ì<sup>n</sup> sandadú sàhni iní-dé xínú cuéchi-dé. <sup>4</sup> Chi ni ì<sup>n</sup> sandadú ñá túú nǎgá sání iní-dé cada-dé òré xínú cuéchi-dé cuendá cudìu-dé núú téé taxi tnuní ñáhá. <sup>5</sup> Te diu-ni duca<sup>n</sup> sǎtnahá-xi cùu tucu ì<sup>n</sup> téé dàdiqui, chi núu vá dádiqui-dé nàcuáa tàú-xi cunduu te vá nihí-dé sá ndúú táhú-dě. <sup>6</sup> Te núu ì<sup>n</sup> téé xínu cuechi ío ndùcu ndee-dé quidé chiú<sup>n</sup>-dé chíhí-dé tatá, te diu-dé tàú-dé díhna-gá-dé níhí-dě sá cùhú<sup>n</sup> yǎhu-dé. <sup>7</sup> Te cani iní-n nchaa tnúhu càhá<sup>n</sup>-í-a, te Xítóhó Jesucristú chindee ñaha-gá xii-n te tecú tnùn-í nchaa.

<sup>8</sup> Te ndacu iní-n sǎ Xítóhó Jesucristú ní cuu-gá ñaní tnàhá ndìi Dàvií, te ní xíhí-gá te ní ndoto-gá, te diu duca<sup>n</sup> ndùu tnúhu dànehé-í ñáyiu. <sup>9</sup> Te ío dándoho ñaha ñáyiu xii-í cuendá sá càhá<sup>n</sup>-í tnúhu-gá, te quide ñáhá-yu xii-í datná quidé-yu ì<sup>n</sup> téé ní quide ì<sup>n</sup> cuéchi càhnu, chi ní chihi ñáhá-yu vecaá xii-í, dico tnúhu Yá Ndiòxí chi vá ndácù-yu nganí-yu. <sup>10</sup> Te xǎ<sup>n</sup> nùu cuéi nándi cùu nchaa sá quidé ñáhá-yu xii-í, dico quide cahnu iní-í cuendá sá naníhí tàhú tnàhá nchaa dava-gá ñáyiu cuíní Yá Ndiòxí cundecu ndìhi-gá, chi nchaa ñáyiu na tnàhá tnúhu ndìhi Xítóhó Jesucristú nduu táhú-yu cundecu-yu ndìhi-gá núú ío váha càa ndecu-gá ni caa ni quíhí<sup>n</sup>.

<sup>11</sup> Te xéhé cúú-xí ì<sup>n</sup> tnúhu ndáá cuiti:

Nchoo cùu-o datná ñáyiu ní xíhí ndìhi Xítóhó Jesucristú chi ñá túú-gǎ ndécú-ó ìchi cuehé ichi duha, te xǎ<sup>n</sup> nùu cuéi na sáá nduu cùú-ó ñùyú-a, dico diu-ni cundecu-o ndìhi-gá.

<sup>12</sup> Te núu na cùndee iní-ó ndòho-o nándi sá ndóhó-ó sǎ cuendá-gá, te sáá nduu te cunuu-o ndìhi-gá.

Te núu na càhá<sup>n</sup>-ó sǎ ñà túú xìní-ó-gǎ, te diu-ni duca<sup>n</sup> cùñaha-gǎ xii-o sǎ ñà túú xìní ñáhá-gǎ ná sáá nduu càa ndáá-gá cuéchi nchaa ñáyiu.

<sup>13</sup> Te núu nchoo ñà túú quide ndáá-ó ndècu-o núú-gǎ ñá, dico mee-gǎ chi ío ndáá quidé-gǎ, chi Yá Ndiòxí nchaa sá sání iní-gá quidé-gǎ.

*Tée quide nacuaá ndùu vétú iní Yá Ndiòxí*

<sup>14</sup> Te dandacu iní-n nchaa ñáyiu ndècu ndìhi-o ichi Xítóhó Jesucristú nchaa tnúhu càhá<sup>n</sup>-í-a, te cùñaha-n xii-yu sá Xítóhó Jesucristú cuíní-gá sá ñà túú-gǎ nándi tnúhu cútnàhá-yu, chi nchaa tnúhu càhá<sup>n</sup>-yu-á<sup>n</sup> dácuíta nihnu-xi ñáyiu ndèdóho ñaha xii-yu, chi ñá túú vèdana nándìhi nchaa tnúhu-á<sup>n</sup>. <sup>15</sup> Te ío nducu ndèe-n cada

ndáá-n cùndecu-n núú Yă Ndiöxí, te cada-n chiù<sup>n</sup>-gá nàcuáa nduu vétú iní-gá, te cáhá<sup>n</sup> ndáá-n tnúhu-gá, cuèndá sá vă cúcàha<sup>n</sup> núú-n nùú-gă.

<sup>16</sup> Te vă cádá cuèndá-n nchàa tnúhu sá ñà túú vĕdana nàndíhi càhá<sup>n</sup> ñáyiu cuèndá Yă Ndiöxí, chi nchaa ñáyiu càhá<sup>n</sup> tnúhu-á<sup>n</sup> ndihí nchaa ñáyiu sàcúndedóho ñaha xii-yu uu<sup>n</sup>-gá quidĕ-yu nchaa sá cuèhé sá dúhá.

<sup>17</sup> Te nchaa tnúhu-á<sup>n</sup> cüténuu-xi dàtná quidé ñ<sup>n</sup> cuèhé să ñăni ñaha xii ñáyiu xité nuu-xi nihí yiqui cùñú-yu. Te tnàhá té Himènéú ndihí té Filetú càhá<sup>n</sup>-güedé tnúhu-á<sup>n</sup> quidé-güedé dàtná quidé ñáyiu-á<sup>n</sup>.

<sup>18</sup> Te cue téé-á<sup>n</sup> ñà túú-gă càhá<sup>n</sup> ndáá-güedé dàtná càhá<sup>n</sup> tnúhu Yă Ndiöxí, chi càchí-güedé sá ncháá nchòo ñáyiu ndècu ichi Yă Ndiöxí cúú-ó dàtná cue ñáyiu sa ní ndoto, dico na cùú ndisa-o te vă ndótó-gă-ó càchí-güedé. Te dava ñáyiu ní dáñă-yu sá sàndáá iní-yu tnúhu Yă Ndiöxí sá dúcá<sup>n</sup> càhá<sup>n</sup>-güedé.

<sup>19</sup> Te cuĕi duca<sup>n</sup> quide davá-yu, dico Yă Ndiöxí ní taxi ndecu-gá cue ñáyiu ni yùhu ni iní ndécú ichi-gá, te cùtnuní sá ndécú ndihí ñaha-gá xii-yu, chi ñ<sup>n</sup> xichi núú tütú-gá càchí-xi sá mée-gă xini-gá cue ñáyiu cùu cuendá-gá. Te ñngá tucu xichi núú tütú-gá càchí-xi sá ncháá ñáyiu sàndáá iní ñáhá xii Xitohó Jesucristú xini ñùhu-xi sá vă cùndecu-gă-yu ichi cuèhé ichi duha.

<sup>20</sup> Te ñáyiu cuica chi ndècu ndihí-yu vehé-yu cóhó să ñi cuáha mee-ni dīhú<sup>n</sup> cuàá<sup>n</sup>, ndihí cóhó să ñi cuáha mee-ni dīhú<sup>n</sup> cuixí<sup>n</sup>, te nchaa cóhó-ă<sup>n</sup> cúú-xí dàtná cue ñáyiu ñà túú nă cúmăní nùú Yă Ndiöxí. Te ndècu ndihí tucú-yu cóhó să ñi cuáha mee-ni ñùhu, ndihí cóhó să ñi cuáha mee-ni yùtnu, te nchaa cóhó-ă<sup>n</sup> cúú-xí dàtná cue ñáyiu ñà túú quide ndáá núú Yă Ndiöxí.

<sup>21</sup> Te nchaa ñáyiu ío ndècu yifñuhu núú Yă Ndiöxí cúú-yu ñáyiu ñà túú nihí tnáhá ndihí cue ñáyiu ñà túú quide ndáá núú-gă, te cue ñáyiu ndècu yifñuhu núú-gă-á<sup>n</sup> ñà túú tnàhí quée cáva-yu quidé-yu nchaa chiù<sup>n</sup> tahu-gá.

<sup>22</sup> Te ío cada cuèndá-n vă cádá-n nàcuáa quide cue téé cuechi ndècu

ichi cuehé ichi duha, te cada-n nàcuáa cundáá-n cùndecu-n ichi Yă Ndiöxí, te quindáá iní-n-gă, te cuu iní-n nchàa tnaha ñáyiu-n, te cundecu nahi-n, chi duca<sup>n</sup> tàú-xi cada-n ndihí nchaa dava-gá ñáyiu sa ní nduu ndoo ní nduu nine iní-xi ñáyiu càhá<sup>n</sup> ndihí ñaha xii Yă Ndiöxí.

<sup>23</sup> Te vă cádá cuèndá-n ñ<sup>n</sup> tnúhu xitnàha ñáyiu chi ñà túú vĕdana nàndíhi-xi, chi núu na càda cuendá-ó te dicó dánàá ñáhá-xí.

<sup>24</sup> Chi nchaa cue téé xinu cuechi núú Yă Ndiöxí xini ñùhu-xi càhá<sup>n</sup> váha-güedé ndihí nchaa ñáyiu, te danèhé ñáhá váha-güedé tnúhu-gá, te cunduu càhnu iní-güedé te vă nàá-güedé.

<sup>25</sup> Te vii vii càhá<sup>n</sup>-güedé dóho nchaa ñáyiu sàá iní-xi, ñáyiu ñà túú tnàhá iní tnúhu ndáá tnúhu Yă Ndiöxí, te duca<sup>n</sup> te cudana Yă Ndiöxí cada-gá te ndixi túu iní-yu sá ñà túú quide váha-yu ndécú-yu te quindáá iní-yu tnúhu-gá.

<sup>26</sup> Te duca<sup>n</sup> te cutnùní iní-yu sá sàcuíhná cùnùu-xi taxi tnuní ñáhá-xí xii-yu, chi dàcahu iní ñáhá-xí xii-yu quidé-yu nchaa nàcuáa cùu iní-xi ni cùu.

### 3

*Nàcuáa cada ñáyiu òré sa ta cùyatni sáá nduu quixi tucu Xitohó Jesucristú*

<sup>1</sup> Te càchí tnúhu-í xii-n cuèndá cunaha-n nàcuáa cada-xi òré sa ta cùyatni sáá nduu quixi tucu Xitohó Jesucristú, chi davá-á<sup>n</sup> ío cada úhú-xi.

<sup>2</sup> Chi ngüita ñáyiu cuhu<sup>n</sup> iní-yu mee-ni sá cúú-xí mèé-yu, te cuhu<sup>n</sup> iní-yu mee-ni dīhú<sup>n</sup>, te ío cada càhnú-yu mèé-yu, te cunduu yíchí iní-yu, te càhá<sup>n</sup> cuèhé-yu cuèndá Yă Ndiöxí, te vă quindáá-gá iní-yu ni tătă-yu ni nănă-yu, te ñi vă ndácá<sup>n</sup> táhú nùú tnáhă-yu cuèndá nchaa sá váha cada tnàhá-yu, te cadá-yu mee-ni să ñà túú tnàhá iní Yă Ndiöxí.

<sup>3</sup> Te vă cúú ñi tnáhá ndi meé-yu, te nàá-yu te vă cuánàá-yu, te tee tnàhá-yu cuéchi neñúú, te vă cuánàá-yu cadá-yu nchaa sá cuèhé sá dúhá sàni iní-yu, te ío cunduu cuihna iní-yu, te vă tnàhá iní-yu nchaa sá váha.

<sup>4</sup> Te dayuhu cuáha cuèndá tnáhă-yu núú cué téé cùchiu<sup>n</sup>, te ío cunduu yifñ iní-yu

cadá-yu nándi sá ñà túú vâha, te ío cada nínu-yu mée-yu, te mee-ni nchàa sá cúdíí ìní-yu cadá-yu, te vá cúdíí ìní-yu nanducu ñìhnú-yu Yá Ndiòxí. <sup>5</sup>Te quesàhá-yu sá tnàhá-yu ndècú-yu ichi Yá Ndiòxí dico vá cadã-yu nchaa nàcuáa càhá<sup>n</sup>-gá.

Te yúhú càchí tnúhu-í xii-n sã vã ñihí tnàhá-n ndìhi nchaa ñáyiu duca<sup>n</sup> quide. <sup>6</sup>Te dava ñáyiu-á<sup>n</sup> quíhí<sup>n</sup>-yu dava vehe núú xíndecu ñáyiu, te ngúíta-yu dandàhú-yu ñáyiu òhí ñá túú xíní dana cuendá Yá Ndiòxí, te ñáyiu òhí-á<sup>n</sup> cúú-yu ñáyiu ndècu vihi cuéchi-xi, chi ío cùdíí ìní-yu quidé-yu nchaa náni sá cuèhé sá dúhá sàni ìní-yu. <sup>7</sup>Te cuéi ío dàcuahá-yu, dico ñá túú cùtnuní ìní-yu nása cuáhá<sup>n</sup> tnúhu ndáá tnúhu Yá Ndiòxí. <sup>8</sup>Te ñáyiu duca<sup>n</sup> dandahú ñáhá xii cue ñáyiu òhí-á<sup>n</sup> ñà túú càhá<sup>n</sup> váha-yu cuendá tnúhu Yá Ndiòxí, chi quidé-yu dàtná ní quide ndí Jánés ndìhi ndí Jámbrés chi cue ndí-á<sup>n</sup> ñà túú ní cùu váha ìní cue ndí núú ndí Moisés cuendá tnúhu ní càhá<sup>n</sup> ndí. Te ñáyiu-á<sup>n</sup> cúú-yu ñáyiu sàni ìní mee ñine-ni nchaa sá cuèhé sá dúhá, te cuéi càchí-yu sá sàndáá ìní-yu Yá Ndiòxí dico ñá ndáá sá sàndáá ìní ñáhã-yu xii-gá. <sup>9</sup>Dico vá ndácú-gã-yu dandàhú-yu vâi ñáyiu, chi nchaa ñáyiu cutnùní ìní-yu sá ïo ñi ðíquí-yu, te ñá túú càhá<sup>n</sup> ndáá-yu dàtná ní quide cue téé úú ñá túú ní tnàhá ìní tnúhu ní càhá<sup>n</sup> ndí Moisés.

#### *Té Pãblú dásàhú-dé té Timùteú*

<sup>10</sup>Te yòhó quidé-n nchaa nacuáa ní dánèhé ñáhã-í xii-n, te ní xíní-n nchaa nacuáa quide-í ndècú-í, te cùtnuní ìní-n nàcuáa sàni ìní-í ndècú-í ñuyíú-a, te xíní-n sã ïo sàndáá ìní-í Yá Ndiòxí, te ío càhnu ìní-í, te cùu ìní-í nchaa ñáyiu, te xíní tucu-n sã ïo quide cahnu ìní-í cuéi nándi sá yáha-í ndècú-í dico ñá túú dàña ndeé-í ichi-gá. <sup>11</sup>Te ío vâi sá quidé ñàha ñáyiu xii-í dándòho ñahá-yu sá ndècú-í ichi Xítóhó Jesucristú, te sa nàha tucu-n datná ní quide ñàhá-yu xii-í cùtnàhá ní xíndecu-í ñuú Antiòquia, ndìhi ñuú Ìconiú, ndìhi ñuú Lìstrá, chi ío ní

dándòhó ñàhá-yu xii-í sá cuendá-gá. Dico Xítóhó Jesucristú ío ní xito ñàha-gã xii-í te ní chindee ñàha-gá cuéi nándi cùu sá ñi yáha-í. <sup>12</sup>Te na càchí tnúhu ndáá-í xii-n sã ïo vâi sá ñà túú vâha cada ñàha ñáyiu xii nchaa ñáyiu cuini sá ñà túú ñà cumání núú Yá Ndiòxí cuendá sá ndècú ndìhi-yu Xítóhó Jesucristú. <sup>13</sup>Dico dava ñáyiu càchí-yu sá càhá<sup>n</sup>-yu tnúhu Yá Ndiòxí te ñá ndáá sá càhá<sup>n</sup>-yu tnúhu-gá, ñáyiu-á<sup>n</sup> uu<sup>n</sup>-gá cuita cada-gã-yu nchaa sá cuèhé sá dúhá quíhí<sup>n</sup>, te duca<sup>n</sup>-ni ïo dandàhú tnáhã-yu.

<sup>14</sup>Te yòhó chi ío váha ní sàndáá ìní-n tnúhu Yá Ndiòxí sá dácua<sup>n</sup>-n, te vitna càhá<sup>n</sup>-í dóho-n sã vã dàña ndeé-n quíndáá ìní-n tnúhu-á<sup>n</sup>, te yòhó sa nàha-n ná cúú ñáyiu ní dánèhé ñáhã xii-n tnúhu-gá. <sup>15</sup>Te yòhó chi ndeé cùtnàhá cúú lãndú-n ní ngúíta-n dàcuaha-n tnúhu ndeé núú tütú Yá Ndiòxí, te ðiu-ni nchaa tnúhu-gá canu ichi ñàha-xi xii-n te naníhí tàhú-n, chi sàndáá ìní-n Xítóhó Jesucristú. <sup>16</sup>Te nchaa cue téé ní tee tnúhu Yá Ndiòxí, chi ðiu-ni mee-gã ní dácáhú ìní ñáhã-gã xii-güedé nàcuáa tee-güedé, te tnúhu-gá ío váha dácua<sup>n</sup>-o nchaa dava-gã ñáyiu, te càhá<sup>n</sup>-xi dóho-o sã vã cùndècu-gã-ó ichi cuehé ichi duha, te núu ñá túú quide ndáá-ó ndècu-o te nàcanu ichi ñàha-xi, te dānehé ñáhã-xí nàcuáa cada-o cùndáá-ó núú Yá Ndiòxí. <sup>17</sup>Te ðiu-ni tnúhu-gá dátüha ñàha vâha-xi xii nchoo cué ñáyiu ndècu ndìhi-gá cuendá cada-o nchaa núú sã vâha.

## 4

<sup>1</sup>Te Xítóhó Jesucristú quixi-gá taxi tnùní-gá ñuyíú-a, te cada ndáá-gá cuéchi nchaa ñáyiu sa ní xíhí, ndìhi cuéchi nchaa ñáyiu xíndecu vívú. Te mee-gã ndìhi Yá Ndiòxí náhá-gã sá ïo càhá<sup>n</sup>-í dóho-n vitna <sup>2</sup>sá ïo dácua<sup>n</sup>-n ñáyiu tnúhu-gá, te vá dàña ndeé-n dàcuahá-n-yu ndèda-ni càa oré cuéi ñá túú cuini-yu cundedòho-yu, te nchaa ñáyiu ñá túú cuini cada ndáá cúñaha ndáá-n nchaa nacuáa quidé-yu. Te cúñaha tucu-n xii-yu sá vã dúcã<sup>n</sup>-gã cadá-yu, te càhá<sup>n</sup>-n dóho-yu cuendá



cada ndáá-yu cundecú-yu. Te ío cunduu càhnu iní-n òré cáhá<sup>n</sup>-n dôho-yu, te ío dacuàhá-n-yu tnúhu-gá. <sup>3</sup> Chi sáá nduu te vá càchí-gá-yu cundedóho-yu nchaa tnúhu sá sánú ìchi ñaha cundecu váha-o nũú Yă Ndiôxí, chi mee-nă nchaa sá cúdíí iní mée-yu cundedóho-yu, te ndúcú-yu cue tée danèhé ñáhá xii-yu nchaa tnúhu cùu iní-yu-á<sup>n</sup>. <sup>4</sup> Te vá cádá cuendá tnáhí-gá-yu tnúhu ndáá tnúhu Yă Ndiôxí, chi mee-nă tnúhu sá ñà túú nândíhi cada cuendá-yu. <sup>5</sup> Dico yòhó ío quíhi iní-n cundecu-n, te cahni iní-n cuèi nándi na ndòho-n, te dacuàha-ni-n ñáyiu tnúhu Yă Ndiôxí, ñáyiu vátá quèndáá iní ñáhá-gă xii-gá, te cada-ni-n nchaa chiu<sup>n</sup> ní táhú-gă cada-n.

<sup>6</sup> Te yúhú sa ñùhu ichi-ná-í quíhí<sup>n</sup>-í núú ndécú Yă Ndiôxí cundecu-í, chi sa ní cuyatni cahni ñaha-güedé xii-í cuendá sá xínú cuèchi-í núú-gă. <sup>7</sup> Te ní quide-í nchaa chiú<sup>n</sup> ní táhú Yă Ndiôxí cada-í te vitna ní xínu cava nchaa chiú<sup>n</sup> ní táhú-gă-á<sup>n</sup> nĩ quide-í, te ñá túú ní daña ndeé-í ní sándáá iní-í-gá, te duca<sup>n</sup>-ni sándáá iní-í-gá ndeé vitna. <sup>8</sup> Te vitna sa ndècu túha-ná sá ndúú táhù-í cuendá sá quidé ndáá-í núú Yă Ndiôxí, te Xítóhó Jesucristú taxi-gá táhú-ă<sup>n</sup> nduu táhù-í ná sáá nduu, chi cùu-gá ì<sup>n</sup> Yaá quidé ndáá cuíti, te ñá díú-ní yúhú taxi-gá táhú-ă<sup>n</sup> cuu cuendá-í, chi tnáhá nchaa ñáyiu ndètu cahnu-ná sáá nduu quixi tucu-gá ñuyú-a cuáñaha-gă táhú-ă<sup>n</sup> nduu táhù-yu.

### *Chiú<sup>n</sup> tahu té Păblú cada té Timùteú*

<sup>9</sup> Te cuiní-í sá ìo ndíhi quixi-n quixi coto ñaha-n xii-í. <sup>10</sup> Chi té Dêmás ñá túú-gă quidé cuendá ñáhá-dě xii-í, chi mee-nă nchaa sá ìo ñuyú-a ío cùdíí iní-dé. Te ní dándõo ñaha-dě cuáhá<sup>n</sup>-dé ñuú Tesalónica, te té Crèscénté cuáhá<sup>n</sup>-dé cundecu-dé distritú Galaciá, te té Títú cuáhá<sup>n</sup>-dé cundecu-dé distritú Dalmaciá. <sup>11</sup> Te ì<sup>n</sup>ndii-ná té Lúca ndécú ndíhi ñaha-dé xii-í, te cúñaha-n xii-í té Măcú quixi-n ndíhi-dé, chi tée-á<sup>n</sup> ndacu-dé cada-dé

ì<sup>n</sup> chiú<sup>n</sup>-í. <sup>12</sup> Te té Tiquicú ní ten-daha-î-dé cuáhá<sup>n</sup>-dé ñuú Éfesú. <sup>13</sup> Te òré quixi-n te yáha-n vèhe té Càrpú cáá ñuú Tròás canehe-n ì<sup>n</sup> dóó tìcachi ní dándõo-í vehe-dé quixi, ndíhi nchaa librú-í, te tnáhá nchaa dava-gá tutú-í ndécú vèhe-dé canehe-n quixi chi xii<sup>n</sup> ío-gá xíní ñùhu-í. <sup>14</sup> Te té Lijandrú tée cùu rerú ío vài sá ñà túú vâha ní cuu quide ñaha-dé xii-í, dico mee Yă Ndiôxí náhá-gă nása cada ñaha-gă xii-dé cuendá sá dúcá<sup>n</sup> quide-dé. <sup>15</sup> Te vá ñíhi tnáhá-n ndíhi-dé chi ío cáhá<sup>n</sup> cuèhé-dé cuendá nchaa tnúhu cáhá<sup>n</sup>-ó.

<sup>16</sup> Te cútnáhá ndécá ñaha-güedé xii-í ní sáhá<sup>n</sup> núú cuè tée cùchiu<sup>n</sup> xito díhna nuu, chi mee díi ní sáhá<sup>n</sup> te ñá túú ní sáhá<sup>n</sup> ní ì<sup>n</sup> cue tée cùndíhi-í, chi nchaa-güedé ní dándõo ñaha-güedé xii-í, te yúhú xicá<sup>n</sup> táhù-í núú Yă Ndiôxí sá vă cádá cuendá-gá sá dúcá<sup>n</sup> nĩ quide-güedé. <sup>17</sup> Dico Xítóhó Jesucristú ní chindee ñaha-gă xii-í, chi ní taxi-gá tnúhu ndee iní ní cáhá<sup>n</sup>-í tnúhu-gá năcuáa tàú-xi cunduu núú cuè tée-á<sup>n</sup> ndíhi núú nchaa ñáyiu, dico ñá díú ñáyiu isràel cúú-yu, te díu-gá ní dácăcu nihnu ñaha-gă xii-í ñá túú ní sàhni ñaha-güedé. <sup>18</sup> Te mee Xítóhó Jesucristú coto ñaha-gă xii-í te ñá túú nă cuu cuèi nándi sá ná cádá ñaha ñáyiu xii-í te díu-ni-gá coto ñaha-gă xii-í ndeé ná sáá nduu sáá-í andíu nũú ndécú-gă táxí tnùn-í-gá. Te nchaa-o chí ná càchí-ó sá ìo càhnu cuu-gá ní caa ní quíhí<sup>n</sup>. Te duca<sup>n</sup> na cùnduu.

### *Tnúhu ndeé núú nĩ ndíhi-ná*

<sup>19</sup> Te ío cúñaha-n na càda ndee iní tá Priscá, ndíhi té Aquilú, ndíhi cue ñáyiu cùu ndi mee té Onèsíforó. <sup>20</sup> Te té Èrastú ní quendõo-dé ñuú Còrintú, te té Trôfimú ní dándõo-í-dé ñuú Miletú chí cùhú-dé. <sup>21</sup> Te ío cundíhi iní-n quixi-n oré vátá sáá-gá yóó quidé vîxí<sup>n</sup>-xi. Te ío cada ndee iní-n càchí té Eúbulú, ndíhi té Pudenté, ndíhi té Línú, ndíhi tá Claudiá, ndíhi nchaa dava-gá ñáyiu sándáá iní tnúhu Xítóhó Jesucristú.

<sup>22</sup> Te xicá<sup>n</sup> táhù-í núú Xítóhó Jesucristú sá ná cùndecu ndíhi ñaha-gă

xii-n ndìhi nchaa dava-gá-yu. Te  
duca<sup>n</sup> ò na chìndee chitúu ñaha-gă  
xii-ndo nchàa-ndo. Te duca<sup>n</sup> na  
cùnduu. Te ío chí cádá ndèe iní-nă  
vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA TÉ TÌTÚ

*Té Păblú cádüha-dé tutú quihi<sup>n</sup>  
ndaha té Títú*

<sup>1</sup> Yúhú té Păblú xínú cuèchi-í núú Yă Ndiöxí, te diu-gá ní tendaha ñaha-gá xii-í càhá<sup>n</sup>-í tnúhu Xítóhó Jesucristú núú ñáyiú cuèndá quíndáá iní nchaa ñáyiú ní cachí Yă Ndiöxí naníhí tǎhú, ndihí cuèndá sá təcú tnùní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. <sup>2</sup> Te yúhú dácuàha-í-yu tnúhu-gá cuèndá cundecu ndihí-yu tnúhu ndee iní sá cundècu ndihí-yu Yă Ndiöxí ní caa ní quihi<sup>n</sup>, chi ndée cútnàhá vátá ngáva-gá ñuyíú-a ní cachí-gá sá cundècu ndihí ñaha-gá xii-yu, te ñá túú dándahú ñáhá-gǎ, chi quide-gá #<sup>n</sup> sá càhá<sup>n</sup>-gá. <sup>3</sup> Te ní sáá nduu ní cachí-gá sá nihí-yu tnúhu nàcuáa cuáhá<sup>n</sup> tnúhu-gá, te diu-ni tnúhu-á<sup>n</sup> ní cachí Yă Ndiöxí Yaá dácăcu nihnu ñaha xii-o núú ùhú núú ndàhú sá dácuàha-í ñáyiú. <sup>4</sup> Te tutú-a càdüha-í cuèndá daquixi-í ndaha yòhó té Títú, té ní sanu ichi ndisa-í ichi Xítóhó Jesucristú, chi #<sup>n</sup>-ni tnúhu sàndáá iní-ó. Te xicá<sup>n</sup> tǎhú-í núú Tǎtá-ó Dütú Ndiöxí sá ío na chindee chitúú ñaha-gǎ xii-n, te diu-ni-gá ná càda te ío váha cuu iní-n cundecu-n. Te xicá<sup>n</sup> tǎhú tùcu-í núú Xítóhó Jesucristú Yaá dácăcu nihnu ñaha xii-o núú ùhú núú ndàhú sá díú-ní duca<sup>n</sup> na cada ñaha-gá xii-n.

*Chiu<sup>n</sup> quide té Títú distritú Crétá*

<sup>5</sup> Te yúhú ní dándóo ñaha-í xii-n distritú Crétá, chi cuíní-í cada-n nchaa chiu<sup>n</sup> cumání, te cuíní-í taxi ndecu-n cuè téé quíndaha ñaha xii cue ñáyiú sàndáá iní tnúhu Yă Ndiöxí xíndecu #<sup>n</sup> #<sup>n</sup> ñuu yíndèhu distritú-á<sup>n</sup>, te cada-n nàcuáa ní cachí-í cada-n. <sup>6</sup> Te cue téé cada chiu<sup>n</sup>-á<sup>n</sup> xíní ñúhu-xi cuu-güedé mee-ni cuè téé ío váha quide ndáá nàcuáa vá yòo càhá<sup>n</sup> dóho-güedé, te

na cùu-güedé cue téé ndècu #<sup>n</sup> dii-ni ñadihí-xi. Te duca<sup>n</sup> nchaa landú-güedé ná cùu-güexi landú sàndáá iní ñáhá xii Yă Ndiöxí cuèndá sá vá yòo cu-atnuñàha xii-güexi quesahá-yu sá ío sáá iní-güexi te quide-güexi nándi sá ñà túú tàú-güexi cada-güexi. <sup>7</sup> Chi xini ñuhu-xi sá ncháá cuè téé quíndaha ñaha xii ñáyiú sàndáá iní tnúhu Yă Ndiöxí ío cundecu yíñuhu-güedé, chi duca<sup>n</sup> tàú-xi cada nchaa cue téé quide chiu<sup>n</sup> Yă Ndiöxí, te xini ñuhu tucu-xi sá vá cúú-güedé cue téé ñí iní-xi, te ní vá cúú-güedé cue téé líhli iní-xi, te ní vá cúú-güedé cue téé quihu, te ní vá cúú-güedé cue téé plètú, te ní vá cúú-güedé cue téé dícó-ni duca<sup>n</sup> ñíhí díhú<sup>n</sup>. <sup>8</sup> Te xini ñuhu-xi cuu-güedé cue téé sǎñaha nùu vehe ndetatú cue ñáyiú ñuhu ichi, cue téé quide váha sá cúú-xí tnàha ñáyiú-xi, cue téé ío váha cùtnuní iní-xi nàcuáa cada cundecu ñuyíú-a, cue téé quide ndáá xíndecu, cue téé quide nchaa nàcuáa ndùu vétú iní Yă Ndiöxí, cue téé xito mee-xi ñá túú quide cutexínu. <sup>9</sup> Te na cùu-güedé cue téé ío váha sàndáá iní tnúhu váha tnúhu Yă Ndiöxí sá ní dánèhé ñáhà-í xii-ndo cuèndá duca<sup>n</sup> te cue téé-á<sup>n</sup> ndacu-güedé càhá<sup>n</sup>-güedé dóho ñáyiú cuèndá càdá-yu nchaa nàcuáa càhá<sup>n</sup> Yă Ndiöxí, te níhí-güedé tnúhu càhá<sup>n</sup> váha-güedé núú nchaa ñáyiú dàquee tíhú tnúhu Yă Ndiöxí, te mee-ni cuè téé duca<sup>n</sup> quide váha taxi ndecu-n quíndaha-güedé ñáyiú sàndáá iní tnúhu-gá.

<sup>10</sup> Te na càchí tnúhu-í xii-n sǎ váí ñáyiú sáá iní-xi ío, te càhá<sup>n</sup>-yu mee-ni tnúhu sá ñà túú nándihí, te dándahú-yu tnàhá ñáyiú-yu, te ñáyiú isràél ío-gá vǎi-yu duca<sup>n</sup> xíquide. <sup>11</sup> Te nchaa ñáyiú duca<sup>n</sup> xíquide xini ñuhu-xi nducu-o tnúhu cúñaha-o xii-yu cuèndá cadí-yu yuhú-yu, chi dǎnehé-yu dava-gá ñáyiú #<sup>n</sup> sá ñà túú tàú-yu dacuàhá-yu, te duca<sup>n</sup> quide-yu cuèndá-ni sá nihí-yu díhú<sup>n</sup>, te ío titní xichi ní cuu dándahú-yu nchaa ñáyiú xíndecu #<sup>n</sup>-ni vèhe.

<sup>12</sup> Te ní cachí #<sup>n</sup> téé ío váha sáá díquí-xi ndècu mei ñuu distritú

Crètá sá ncháá ñáyiú ñuú-dé-á<sup>n</sup> ïo ndèhndé-yu, te ïo cuihna ìní-yu, te ïo vài xexí-yu, te cùhndú-yu. <sup>13</sup> Te ndáá ní cáhá<sup>n</sup>-dé chi duca<sup>n</sup> quidé-yu, te xíá<sup>n</sup> ïo cáhá<sup>n</sup>-n dôho-yu cuendá sá ná quíndáá váha ìní-yu tnúhu Yá Ndiöxí. <sup>14</sup> Te cúñaha-n xii-yu sá vǎ cádá cuendá-yu nchaa tnúhu ndehnde cáhá<sup>n</sup> ñáyiú isràél, te ní vǎ cádá cuendá-yu nchaa tnúhu cáhá<sup>n</sup> ñáyiú ñá túú cuíni quíndáá ìní tnúhu Yá Ndiöxí.

<sup>15</sup> Te nchaa sá ñí cadúha Yá Ndiöxí ïó ñuyíú-a cùu-xi mee nine-ni sá váha sá cúú-xí ncháa ñáyiú sa ní nduu ndoo ní nduu nine ìní-xi ndècu ichi Yá Ndiöxí. Dico nchaa sá ñí cadúha-gǎ ñá túú cùu-xi sá váha sá cúú-xí ncháa ñáyiú ndècu ichi cuehé ichi duha, chi ñá túú sàndáá ìní-yu tnúhu-gǎ, chi mee-ni sǎ cuèhé sá dúhá ñuhu ìní-yu, te ñá túú quíde cuendá-yu núu quíde váha-yu ádi ñá túú quíde váha-yu ndècú-yu. <sup>16</sup> Te càchí-yu sá sàndáá ìní-yu Yá Ndiöxí, dico nchaa sá quíde-yu-á<sup>n</sup> càchí tnùnì-xi sá ñǎ ndáa. Te Yá Ndiöxí chi duu<sup>n</sup> duu<sup>n</sup> ñá túú tnàhá ìní-gǎ nchaa nàcuáa quíde-yu, chi ïo sàá ìní-yu, te ñá túú quíde-yu ní ìí<sup>n</sup> sá váha.

## 2

### *Tnúhu váha tnúhu Yá Ndiöxí*

<sup>1</sup> Te yòhó òré dánèhé-n ñáyiú, te dánèhé-n-yu mee-ni nàcuáa cáhá<sup>n</sup> tnúhu váha tnúhu Yá Ndiöxí. <sup>2</sup> Te nchaa cue téé cùu sacuéhé ná càda cuendá-güedé vǎ cádá cùtexínu-güedé cundecu-güedé, te na cùndecu yíñuhu-güedé, te na cuǎha váha-güedé cuendá nàcuáa cada-güedé cundecu-güedé, te na quíndáá váha ìní-güedé Yá Ndiöxí, te na cùu ìní-güedé tnàha ñáyiú-güedé, te na cùnduu cahnu ìní-güedé cuèi nándi sá ná yǎha-güedé. <sup>3</sup> Te vitna cáhá<sup>n</sup> tucu-í sá cúú-xí ncháa ñáyiú ðíhí ñáyiú cùu sacuéhé sǎ ná cùndecu yíñuhú-yu, te vǎ cúú-yu ñáyiú yíti yùhu-xi, te ní vǎ cúú-yu ñáyiú quíhu, te na dánèhé-yu nchaa dava-gǎ ñáyiú cada váha-yu. <sup>4</sup> Te na dàsahú-yu nchaa ñáyiú ðíhí

ñáyiú cuechi cuendá ná cùu ìní-yu yíí-yu, ndíhi cue landú-yu, <sup>5</sup> ndíhi cuendá sá ná càni váha ìní-yu nàcuáa cundecú-yu, ndíhi cuendá sá vǎ cání ìní-yu cadá-yu ní ìí<sup>n</sup> sá cuèhé sá dúhá, ndíhi cuendá sá ná càdá-yu nchaa chiú<sup>n</sup> ñuhu vehé-yu, ndíhi cuendá sá cádá váha-yu nchaa tnàha ñáyiú-yu, ndíhi cuendá sá ná cádá-yu nchaa nàcuáa cáhá<sup>n</sup> yíí-yu, te duca<sup>n</sup> xini ñuhu-xi cadá-yu cuendá sá vǎ yòo cáhá<sup>n</sup> cuèhé cuendá tnúhu Yá Ndiöxí. Duha cúñaha-n xii cue ñáyiú ðíhí ñáyiú cùu sacuéhé cuendá duca<sup>n</sup> dàsahú-yu nchaa ñáyiú ðíhí ñáyiú cuechi.

<sup>6</sup> Te yòhó cáhá<sup>n</sup>-n dôho nchaa cue téé cuechi cuendá sá ná càni váha ìní-güedé nàcuáa cundecu-güedé, <sup>7</sup> te cada-n mèe-ni sá váha cuendá duca<sup>n</sup> càncicú<sup>n</sup> nihnu-güedé cada-güedé, te òré dánèhé-n-güedé te ïo váha cuu ìní-n dànèhé-n-güedé, te ndíhi tnúhu yíñuhu cáhá<sup>n</sup> ndíhi-n-güedé. <sup>8</sup> Te cáhá<sup>n</sup>-n mèe-ni tnúhu váha, te duca<sup>n</sup> te vǎ yòo ìí<sup>n</sup> cáhá<sup>n</sup> cuèhé cuendá tnúhu cáhá<sup>n</sup>-n, te nchaa ñáyiú cùu úhú ìní ñáhá xii-o cucaha<sup>n</sup> núú-yu, te vǎ ñíhí-yu tnúhu cáhá<sup>n</sup> cuèhé-yu cuendá-ó.

<sup>9</sup> Te ïo cáhá<sup>n</sup>-n dôho nchaa cue téé xinu cuechi sá ná quíndáá ìní-güedé cada-güedé nchaa chiú<sup>n</sup> tahu patróo<sup>n</sup>-güedé nàcuáa cudíu-güedé núu cuè téé-á<sup>n</sup>, te vǎ cáhá<sup>n</sup> sàá ìní-güedé. <sup>10</sup> Te vǎ cání ìní-güedé duhu-güedé, te cada ndáá-güedé cuendá sá ñá túú ñá caní ìní ñáhá cuè patróo<sup>n</sup>-güedé, te duca<sup>n</sup> te cutnùnì ìní ñáyiú sá tnúhu Yá Ndiöxí ïo váha dànèhé ñáhá-xí nàcuáa cada-o cùndecu-o, te ðiu-gǎ cúú-gǎ Yaá dǎcǎcu nihnu ñaha xii-o núú ùhú núú ndáhú.

<sup>11</sup> Te nchoo ñí cutnùnì ìní-ó sǎ Yá Ndiöxí ïo cùndahú ìní-gǎ nchaa nchoo ñáyiú ndècu ñuyíú-a, te ní taxi-gǎ tnúhu ndee ìní sá nánihí tàhú nchaandi túhú ñáyiú te núu na quíndáá ìní ñáhá-yu xii-gǎ. <sup>12</sup> Te ní cachí-gǎ sá dáñá-ó ncháa ichi cuehé ichi duha chi ñá tnàhá ìní-gǎ cundecu-o ìchi-á<sup>n</sup>, te vǎ ïo cuhu<sup>n</sup> ìní-ó ncháa sá ïó ñuyíú-a, te ní



cachí tucu-gá sá ïo cani iní-ó nàcuáa cundecu-o vitna ndecu-o ñuyíu-a te cada ndáá-ó cundecu-o cuendá nduu vétú iní-gá. <sup>13</sup> Te cundetu-o sáá nduu càhnu vihi, nduu quìxi tucu Xítohó Jesucristú Yaá cúu Ndiöxí-ó, te diu-gá ní dácäcu nihnu ñaha-gã xii-o nũú ùhú núú ndàhú. Te nduu-ã<sup>n</sup> ïo cudíí iní-ó. <sup>14</sup> Te mee-gã ní xihí-gá chi duca<sup>n</sup> ñi cuiní-gá cunduu, te duca<sup>n</sup> ñi quide-gá cuendá nchoo vã cündecu-gá-ó ìchi cuehé ichi duha, te nduu ndoo nduu nine iní-ó, te duca<sup>n</sup> te cuu-o cuè ñáyiu quindaha-gã, te ñi yùhu ñi iní-ó càda-o mee-ñi sá vãha.

<sup>15</sup> Te nchaa tnúhu-á<sup>n</sup> danèhé-n-yu te cúñaha-n xii-yu nàcuáa cadá-yu, te cáhá<sup>n</sup>-n dôho-yu te núu ñá túú quide ndáá-yu. Te cada-n sã cúu-n ñi<sup>n</sup> téé xinu cuechi núú Yá Ndiöxí, te vá dáñá-n mèe-n daquee tíhú ñáhá ñáyiu xii-n.

### 3

#### *Nchaa sá tàú ñáyiu ndècu ichi Yá Ndiöxí cadá-yu*

<sup>1</sup> Te cúñaha-n xii-yu sá ná quindáá iní-yu cadá-yu nchaa nàcuáa càhá<sup>n</sup> nchaa cue téé cùchiu<sup>n</sup>, te tàú-yu chindee ñáhá-yu xii-güedé nchaa chiú<sup>n</sup> váha quide-güedé. <sup>2</sup> Te vá càhá<sup>n</sup> cuèhé-yu cuendá ñáyiu, te vá cündùu pletú-yu, te na cùu-yu ñáyiu ndàhú iní-xi, te na cündahú iní-yu nchaa tnàha ñáyíu-yu.

<sup>3</sup> Te tnàhá-ó ñi xóo cada-o dàtná quidé ñáyíu-á<sup>n</sup> vitna, chi ío ñi dîquí-ó chi ñá tècú tnùní-ó nàcuáa càhá<sup>n</sup> tnúhu Yá Ndiöxí ní cùu, te ío ní xinduu sáá iní-ó nũú-gã, te ní xíndecu-o ñi<sup>n</sup> ichi sá ñà túú tàú-ó cündecu-o ñi cuu, te nándi sá cuèhé sá dúhá ío ñuyíu-a ní xóo cudíí iní-ó ñi xóo cada-o chi ní xóo taxi tnùní ñáhá-xí xii-o, te ní xóo cada cuèhé ní xóo cada duha-o ñi cùu, te ní xíndecu-o ìchi cuedú iní, te cuendá nchaa sá ñi xóo cada-o-ã<sup>n</sup> xíã<sup>n</sup> ío ní xóo cuu ùhú iní ñáhá ñáyiu xii-o, te duca<sup>n</sup>-ni nchòo tucu ní xóo cuu ùhú iní-ö-yu. <sup>4</sup> Te Yá Ndiöxí Yaá ní dácäcu nihnu ñaha xii-o núú ùhú núú ndàhú ní dándíxí túu-gã iní-ó

nàcuáa cutnùní iní-ó sã ïo váha iní-gá, te cùu iní ñáhá-gã xii nchaa nchoo ñáyiu ndècu ñuyíu-a. <sup>5</sup> Te Yá Ndiöxí ní dácäcu nihnu ñaha-gã xii-o nũú ùhú núú ndàhú, dico ñá díú cuendá ñi<sup>n</sup> sá vãha quide-o ndecu-o ñuyíu-a duca<sup>n</sup> ñi quide-gá, chi mee-gã duca<sup>n</sup> tnàhí ní cundàhú iní ñáhá-gã xii-o. Te ní nduu ndoo ní nduu nine iní-ó, te ní cuu-o dàtná ñi<sup>n</sup> ñáyiu saa, chi Espiritú Yá Ndiöxí duca<sup>n</sup> ñi quide ñaha-xí xii-o. <sup>6</sup> Te Espiritú-gá ní taxi-gá ñi yùhu ñi iní-gá ndécú ndìhi-o, te duca<sup>n</sup> ñi quide-gá chi ní sándáá iní-ó Xítohó Jesucristú Yaá ní dácäcu nihnu ñaha xii-o núú ùhú núú ndàhú. <sup>7</sup> Te ío cündahú iní ñáhá-gã xii-o nũu sa ní quide ndáá-gá cuèchi-o te ní cuu-o dèhe-gá, núu xíã<sup>n</sup> vitna ndètu-ná-ó sáá nduu ndùu táhú-ó cündecu-o ndìhi-gá ñi caa ñi quíhí<sup>n</sup>.

<sup>8</sup> Te tnúhu ní cáhá<sup>n</sup>-í-a cùu-xi tnúhu ndáá cuiti, te cuiní-í sá ñi yuhu ñi iní-n cáhá<sup>n</sup>-n tnúhu-gá núu-yu cuendá sá ncháá ñáyiu sándáá iní ñáhá xii Yá Ndiöxí nducu ndèe-yu cadá-yu mee-ñi sá vãha, te tnúhu-á<sup>n</sup> cúu-xí mèe-ñi tnúhu váha, te ío váha sá cúu-xí-yu. <sup>9</sup> Te vá cadá cuendá-n nchaa tnúhu sá ñà túú nándíhi xitnàha ñáyiu, te vá cadá cuendá-n ñáyiu nándi càhá<sup>n</sup> cuendá nchaa sá ñi xóo cada cue ñáyiu ní xíndecu ndéé sanaha, te vá cadá cuendá-n nchaa tnúhu xitnàha ñáyiu xicuehé tnàhá cuendá tnúhu ní chídó tnùní ndíi Moisés, chi nchaa tnúhu xitnàhá-yu-á<sup>n</sup> ñà túú tnàhí nándíhi-xi, te dàcuíta ñaha-xi xii-o.

<sup>10</sup> Te núu ío ñáyiu ní ngüíta-yu nándi tnúhu càhá<sup>n</sup>-yu cuendá sá vã cúu ñi<sup>n</sup>nuu cue ñáyiu ndècu ichi Yá Ndiöxí ñá, te ñáyíu-á<sup>n</sup> cáhá<sup>n</sup> sàhú-n dôho-yu ñi<sup>n</sup> úú xito, te núu vá tní<sup>n</sup>-yu tnúhu càhá<sup>n</sup>-n ñá, te vá ñihí tnàhá-gã-n ndìhí-yu. <sup>11</sup> Te duca<sup>n</sup> càda-n, chi ñáyíu-á<sup>n</sup> duu<sup>n</sup> duu<sup>n</sup> ñá túú-gã cuiní-yu cadá-yu sá vãha, chi mee-ñá sá cuèhé sá dúhá tnàhá iní-yu cadá-yu, te cùtnuní iní mèe-yu sá ñà túú quide ndáá-yu, te sáá nduu te nacháhu-yu nchaa sá quidé-yu.

*Nàcuáa cada té Titú*

<sup>12</sup> Te cuìní-í tendaha-ĩ té Àrtemás quixi-dé núú ndécú-n àdi té Tìquicú, te òré ná quèxio ndéda-ni càa ì<sup>n</sup> cue téa-a núú ndécú-n, te ío nducu ndèe-n quihí<sup>n</sup>-n ñùú Nicópolis núú quihí<sup>n</sup>-í cundecu-í, chi yàcá<sup>n</sup> cuìní-í quihí<sup>n</sup>-í cundecu-í yóó quidé v̄xi<sup>n</sup>-xi. <sup>13</sup> Te ío cuáñaha-n nchàa sá xíní ñùhu té Zénás téa ío váha x̄íní nchaa nàcuáa càhá<sup>n</sup> lèí, ndihí té Àpolós cuendá sá ñà túú nã cumání xii-güedé ichi. <sup>14</sup> Te cuìní-í sá ncháá ñáyiú ndècu ndihí-o ichi Yá Ndiõxí cada váha-yu, te cuáñahá-yu ì<sup>n</sup> sá xíní ñùhu ñáyiú, te ío váha chiú<sup>n</sup> cadá-yu te núú duca<sup>n</sup> na càdá-yu.

*Tnúhu ndéé núú ñí ndihí-ná*

<sup>15</sup> Te vitna ío cada ndee ìní-n càchí nchaa ñáyiú ndècu ndihí-í iha, te cúñaha-n sã ío na càda ndee iní nchaa ñáyiú cùu iní ñáhá x̄i-o, ñáyiú sãndáá iní ñáhá x̄i Yá Ndiõxí. Te Yá Ndiõxí ío na ch̄indee chitúu ñaha-gã xii-ndo nchàa-ndo. Te duca<sup>n</sup> na cùnduu. Te ío chí cáda ndèe iní-nã vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA TÉ FILEMÓN

*Té Păblú cādūha-dé tutú quihí<sup>n</sup>  
ndaha té Filemón*

<sup>1</sup> Te yúhú té Păblú té yìhi vecaá sá cuendá Xítohó Jesucristú cādūha-í ì<sup>n</sup> tutú ndìhi té Timùteú cuendá daquixi-í ndaha yòhó té Filemón, te ío cùu iní ñáhà-í xii-n chi tnàhá-n quide-n chiu<sup>n</sup> Yá Ndiòxí. Te tutú-a tēndaha-í quixi ndaha-n <sup>2</sup> ndìhi ndaha ñaha nàni Apiá ñaha ndècu ndìhi-o ichi Xítohó Jesucristú, ndìhi ndaha té Àrquipú, chi tnàhá-dé quidé-dě chiu<sup>n</sup> Yá Ndiòxí, ndìhi ndaha nchaa ñáyiu tàcá vehe-n dàcuahá-yu tnúhu-gá. <sup>3</sup> Te xicá<sup>n</sup> táhù-í núú Tātá-ó Dütú Ndiòxí ndìhi núú Xítohó Jesucristú sá ío na chindee chitúu ñaha-gă xii-ndo, te duca<sup>n</sup> ndì nduú-gá ná cādá te ío váha cuu iní-ndó cūndecu-ndo.

*Té Filemón ío sàndáá iní-dé Xítohó  
Jesucristú te cùu iní-dé tnàha ñáyiu-dé*

<sup>4</sup> Te ndi tnahá òré cāhá<sup>n</sup> ndìhi-í Yá Ndiòxí cuendá-n ndacá<sup>n</sup> táhù-í núú-gă. <sup>5</sup> Chi ñihí-í tnúhu sá ío sàndáá iní-n Xítohó Jesucristú, te cùu iní-n cuè ñáyiu ndècu ichi-gă. <sup>6</sup> Te xicá<sup>n</sup> táhù-í núú Yá Ndiòxí sá dàtná-ni sàndáá iní-n-gă duca<sup>n</sup>-ni dānehé-n ñáyiu cuendá duca<sup>n</sup> ngūnu ichi-yu tnàhá-yu, te cutnūnī iní-yu nācuáa ndūu nchaa sá vāha tàxi Xítohó Jesucristú xii-o, te tnàhá-yu nduu táhū-yu nchaa sá vāha-á<sup>n</sup>. <sup>7</sup> Te yòhó té Filemón cúu-n tēe ndècu ndìhi-í ichi Xítohó Jesucristú cāchí tnúhu-í xii-n sá ío cùdí iní-í cuendá sá ío váha quide-n ndecu-n, chi cùu iní-n nchaa ñáyiu ndècu ichi Yá Ndiòxí, te uu<sup>n</sup>-gá ñihí ndéè-í sá dúcá<sup>n</sup> quide-n, te ñiu-n ío sáhā-n-yu tnúhu ndee iní ndécú ndìhi-yu.

*Té Păblú chíndèe tnúhu-dé té  
Ònésimú*

<sup>8</sup> Te yúhú té Păblú ní taxi Xítohó Jesucristú tnúhu ndee iní ndécú ndìhi-í

sá táxi tnūnī ñáhà-í xii-n te tahu-í chiu<sup>n</sup> cada-n, dico vá táxi tnūnī ñáhà-í xii-n, <sup>9</sup> chi váha-gá sá cāhá<sup>n</sup> ndāhú-í núú-n sá cādá-n nchaa nacuáa cāhá<sup>n</sup>-í chi ío cùu iní ñáhà-í xii-n. Chi yúhú sa ta yì-í cuáhá<sup>n</sup>, te yìhi-í vecaá cuendá sá cāhá<sup>n</sup>-í tnúhu Xítohó Jesucristú. <sup>10</sup> Te cāhá<sup>n</sup> ndāhú-í núú-n sá ñā túú ñā canī iní-n cuendá té Ònésimú, chi ní cuu-dé vitna dàtná ì<sup>n</sup> déhe-í, chi ní sàndáá iní-dé tnúhu Yá Ndiòxí ní xáha<sup>n</sup>-í xii-dé vitna yìhi-í vecaá.

<sup>11</sup> Te nàha-n sá cūtnāhá ní xīndecu ndìhi-n-dě ñā túú ní quide ndáá-dé, dico vitna ío váha quide-dé ndécú ndìhi-í-dé, te ñiu-ni duca<sup>n</sup> cāda-dé òré cundecu ndìhi tucu-n-dě. <sup>12</sup> Te vitna tendaha-í-dé ndixi-dé cundecu tucu-n ndìhi-dé, te òré quehe<sup>n</sup> cuendá-n-dě, te cada iní-n sá yúhú ní quehe<sup>n</sup> cuendá-n. <sup>13</sup> Te vitna yìhi-í vecaá sá cuendá tnúhu Xítohó Jesucristú, te cuiní-í ngani-í-dé cunu cuechi-dé núú-í cuendá cada-dé núú-n ní cùu. <sup>14</sup> Dico ñā túú ní ngāni-í-dé, chi vātā ndātnūhu ndìhi ñaha-gă-í xii-n nūu nása cachí-n cūnduu. Te ñā cūndēe iní-í cada yica-í cada-n ì<sup>n</sup> sá vāha sá cúu-xi-í, chi cuiní-í sá méé-n cāni iní-n nūu cuu àdi sá vā cúu. <sup>15</sup> Te ní cūnduu ñi quee té Ònésimú vehe-n, te cudana te mee Yá Ndiòxí duca<sup>n</sup> ñi cachí-gá cūnduu cuendá dacuāha-dé cada váha-dé. Te ndixi tucu-dé cundecu ndìhi duca<sup>n</sup>-nā-n-dě. <sup>16</sup> Te vá cúu-gă-dé dàtná ì<sup>n</sup> tēe xīnu cuechi chi ní cuu-dé dàtná ì<sup>n</sup> ñāni-ó chi ní sàndáá iní-dé Yá Ndiòxí, te yúhú ío cùu iní-í-dé, dico yòhó uu<sup>n</sup>-gá cuu iní-n-dě, chi cùu-dé ì<sup>n</sup> tnàha ñáyiu-o, te ndècu-dé ichi Yá Ndiòxí.

<sup>17</sup> Te ì<sup>n</sup>-ni cùu-o ndecu-o ichi Yá Ndiòxí nūu xiá<sup>n</sup> cāhá<sup>n</sup> ndāhú-í núú-n sá quéhé<sup>n</sup> cuendá-n-dě dàtná quéhé<sup>n</sup> cuendá-n yúhú òré quéxió-í vehe-n. <sup>18</sup> Te núu ló ì<sup>n</sup> sá ñi cumání-dě núú-n ñā túú ní quide ndáá-dé cūtnāhá ní xīndecu-n ndìhi-dé, àdi ío ì<sup>n</sup> sá tàú-dé te vá ndacá<sup>n</sup> cuendá-n nūú-dě, chi yúhú ndacá<sup>n</sup> cuendá-n nūú-í. <sup>19</sup> Te ndaha mee yúhú té Păblú cādūha-í tutú-a cāchí tnúhu-í xii-n sá ná chāhu-í nchaa sá ñi quide-dé. Dico dandācu saú iní-n sá yúhú ní sanu

ichi ñaha-ĩ xii-n ìchi Xítóhó Jesucrìstú.

<sup>20</sup> Dico yòhó té ndècu ndihí-í ichi Xítóhó Jesucrìstú cada ndee ìní-n càda-n tnúhu ndàhú càhá<sup>n</sup>-í núú-n chí ndècu-o ichi-gá. Te duca<sup>n</sup> càda-n nacuaa cuu-xi dàtná ì<sup>n</sup> tnúhu ndee ìní sá cúú-xì-í, chí ndi ndùú-ó ndècu-o ichi-gá.

<sup>21</sup> Te cùtnuní ìní-í sá cáda-n nchàa nacuaa càhá<sup>n</sup>-í, te cùtnuní tucu ìní-í sá ìo-gá vài sá vãha cada-n dàcúúxí tnúhu ndàhú càhá<sup>n</sup>-í núú-n, núu xíã<sup>n</sup> tëndaha-í tutú-a véxi ndaha-n. <sup>22</sup> Te vitna cuìní-í cada túha-n ì<sup>n</sup> vehe cundecu-í, chí sàni ìní-í sá quíxí còto ñaha-í xii-ndo, te ndètu-í sáá nduu-ã<sup>n</sup> chí nchòhó xicá<sup>n</sup> táhú-ndó núú Yã Ndiõxí cuèndá-í.

*Tnúhu ndéé núú ñí ndihí-ná*

<sup>23</sup> Te ío cada ndee ìní-n càchí té Ěpafrás té yihí ndihí-í vecaá sá cuèndá tnúhu Xítóhó Jesucrìstú. <sup>24</sup> Te ío cada ndee ìní tucu-n càchí té Măcú, ndihí té Arístarcú, ndihí té Dĕmás, ndihí té Lùcá, chí tnàhá cue téé-ã<sup>n</sup> quide-güedé chiú<sup>n</sup> Xítóhó Jesucrìstú.

<sup>25</sup> Te Xítóhó Jesucrìstú ío na chindee chitúu ñaha-gã xii-ndo nchàa-ndo. Te duca<sup>n</sup> na cùnduu. Te ío chí cáda ndèe ìní-ñá vitna.



## TUTÚ QUIHI<sup>n</sup> NDAHA CUE ÑÁYIU HÈBREÚ

*Dútú Ndiõxí ní cachí-gá sá Dēhe-gá cada núú-gă*

<sup>1</sup> Te ndéé sanaha, Yá Ndiõxí ní xáha<sup>n</sup>-gă xii cue téé ní cachí iní méé-gă cada núú-gă cáhá<sup>n</sup>-güedé tnúhu-gă núú nchàa ñani tnáhá-ó nǐ xíndecu ndéé dāvá-á<sup>n</sup> te ñiu duca<sup>n</sup> nǐ quide-güedé. Te tǐnǐ xito duca<sup>n</sup> nǐ xáha<sup>n</sup>-gă xii-güedé ní cáhá<sup>n</sup>-güedé tnúhu-gă. Te ndi ñǐ<sup>n</sup> ndi ñǐ<sup>n</sup> nǐ xítñúhu ñaha-gă xii-güedé nàcuáa cáhá<sup>n</sup>-güedé tnúhu-gă núú-yu. <sup>2</sup> Te sátá nǐ cuu vǎi nduu ta yáha cuáhá<sup>n</sup>, te ní sáa nduu nǐ cachí Yá Ndiõxí sá Dēhe-gá cada núú-gă cáhá<sup>n</sup> tnúhu-gă núú-ó. Te ñiu-ni mee-gă ní táuchíú<sup>n</sup> nǐ cadúha Dēhe-gá ñuyíú ndihí nchaa sá íó, te ní cachí-gá sá ncháa cùu-xi cuendá Dēhe-gá. <sup>3</sup> Te Dēhe Yá Ndiõxí ío càhnu cuu-gă dàtná càhnu cuu mee-gă, te dàtná-ni sàni iní méé-gă ñiu-ni duca<sup>n</sup> sàni iní Dēhe-gá chi tnàhá-gă cúú-gă Ndiõxí, te sá cuendá tnúhu cáhá<sup>n</sup> Dēhe-gá xiǎ<sup>n</sup> ndécú-ní nchàa sá íó ñuyíú, te duca<sup>n</sup> chi ío càhnu cuu Dēhe-gá, te ñiu-ni Dēhe-gá ní quide nàcuáa vá cündecu-gă cuèchi-o. Te sátá dúcá<sup>n</sup> te ní ngóo-gă xio cùha Tátá-gă Dútú Ndiõxí Yáa ío cùnnu ndecu andiu.

*Dēhe Dútú Ndiõxí ío-gă cùnnu-gă dàcúúxí cuè espíritú xínú cuèchi núú-gă*

<sup>4</sup> Te Dēhe Yá Ndiõxí ío-gă cùnnu-gă dàcúúxí cuè espíritú xínú cuèchi núú-gă, te duca<sup>n</sup> chi ní nduu táhú-gă núú Tátá-gă Dútú Ndiõxí sá ío-gă cùnnu-gă dàcúúxí cuè espíritú-á<sup>n</sup>. <sup>5</sup> Chi Yá Ndiõxí ñá túú ní xáha<sup>n</sup>-gă xii ní ñ<sup>n</sup> cue espíritú xínú cuèchi núú-gă dàtná ní xáha<sup>n</sup>-gă xii Dēhe-gá, te duha ní xáha<sup>n</sup>-gă:  
Yòhó cúú-n Dēhe mee-í,  
te duca<sup>n</sup>-ni cündecu-n núú ndécú-í.  
Duha ní xáha<sup>n</sup>-gă. Te ní cachí tucu Yá Ndiõxí:  
Yúhú cúú-í Tátá Yàa-á<sup>n</sup>,

te mee-gă cúú-gă Dēhe-í.

Duha ní cachí-gá. <sup>6</sup> Te cùtnàhá ní tendaha-gă Dēhe-gá Yáa ío cùnnu ní quixi-gă ñuyíú-a, te ní cachí-gá:

Tàú-xi sá ncháa cuè espíritú xínú cuèchi núú-í chiñuhu-xi Dēhe-í.  
Duha ní cachí-gá. <sup>7</sup> Te Yá Ndiõxí ní cáhá<sup>n</sup>-gă cuendá cue espíritú xínú cuèchi núú-gă, te ní cachí-gá:

Yúhú quídè-í sá ncháa cuè espíritú xínú cuèchi núú-í cúú-xí dàtná táchí,

te ñiu-ni cue espíritú-á<sup>n</sup> quídè-í sá cúú-xí dàtná itá ñuhú.

Duha cǎchí-gă. <sup>8</sup> Dico Dēhe-gă chi ñá túú dùca<sup>n</sup> ní xáha<sup>n</sup>-gă, chi duha ní xáha<sup>n</sup>-gă:

Yòhó tnàhá-n cùu-n Ndiõxí dàtná cúú yúhú Yáa cúú Tátá-n,

te duca<sup>n</sup>-ni tàxi tnuní-n nǐ caa ní quíhí<sup>n</sup>,

te ío váha ndáa quídè-n tàxi tnuní-n.

<sup>9</sup> Te dàquee tihú-n nchàa sá cuèhé sá dúhá, te cùu iní-n nchàa sá vǎha,

núu xiǎ<sup>n</sup> yúhú Yáa cúú Tátá-n nǐ quide-í sá ío-gă vii ío-gă váha cuu iní-n,

dàcúúxí nchàa dava-gă ñáyiu ndecu ndihí-n.

Duha ní xáha<sup>n</sup>-gă xii Dēhe-gă. <sup>10</sup> Te ní xáha<sup>n</sup> tucu Yá Ndiõxí xii Dēhe-gá:

Yòhó cúú-n Yáa ío cùnnu, chi ndéé cùtnàhá ñá túú vèdana ná íó te ní cadúha-n ñuyíú ndihí andiu.

<sup>11</sup> Te andiu ndihí ñuyíú chi naa-xi, dico yòhó chi cundecu-ni-n nǐ caa ní quíhí<sup>n</sup>.

Te andiu ndihí ñuyíú chi ndihí-xi dàtná ndíhí ñ<sup>n</sup> dóó,

<sup>12</sup> te dàtná cuíní-n quide ñáyiu ndihí ñ<sup>n</sup> dóó òré ndàcá<sup>n</sup> tnáhnú-yu tàxi ndécú-yu ñ<sup>n</sup> xio, duca<sup>n</sup> càda-n ñuyíú ndihí andiu,

te dàtná nádãma dóó ñáyiu duca<sup>n</sup> càda tucu-n ñuyíú ndihí andiu.

Te yòhó dàtná-ni càa-n ndecu-n vitna duca<sup>n</sup>-ni cùnduu-n cundecu-n ní caa ní quíhí<sup>n</sup>, chi vá yíí tnàhí-n.

Duha ní xáha<sup>n</sup> Yá Ndiõxí xii Dēhe-gă.

<sup>13</sup> Te Yá Ndiõxí ñá túú ní xáha<sup>n</sup>-gă xii

ni ñ<sup>n</sup> cue espíritú xínú cuèchi núú-gã dâtná ní xáha<sup>n</sup>-gã xii Déhe-gá, te duha ní xáha<sup>n</sup> tùcu-gá:

Ngóo xio cùha-í taxi tnùnì-n, te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.

Duha ní xáha<sup>n</sup>-gã xii Déhe-gá. <sup>14</sup> Te nchaa espíritú xínú cuèchi núú Yã Ndiöxí mee-ni chù<sup>n</sup>-gã quidé-xí, chi tëndaha-gá cue espíritú-á<sup>n</sup> cuáhá<sup>n</sup>-xi nchaa núú ndécú cuè ñáyiú ní nduu táhú cundecu ndihí-gá chindee ñàha-xi xií-yu.

## 2

*Vá dáñá ndèé-ó tnùhu sá cãhá<sup>n</sup> nàcuáa naníhí tãhú-ó*

<sup>1</sup> Te sá cuendá sá ño cùnùu Xítohó Jesucristú, núú xiã<sup>n</sup> ío xini ñùhu-xi cada cuendá-ó nchaa tnúhu cãhá<sup>n</sup>-gá sá sá ní xíndedóho-o cuendá sá vã dáñá ñihnu-o. <sup>2</sup> Te cue espíritú xínú cuèchi núú Yã Ndiöxí ní cãhá<sup>n</sup>-xi tnúhu-gá ndéé sanaha, te tnúhu ní cãhá<sup>n</sup> cue espíritú-á<sup>n</sup> cúú-xí sã ndáa cuítì. Te nchaa ñáyiú ñá túú ní cuínì tñi nchaa tnúhu ní cãhá<sup>n</sup> cue espíritú-á<sup>n</sup>, te ni ñà túú ní cuínì-yu cundedóho-yu, nchaa ñáyiú-á<sup>n</sup> ñi nacháhu-yu nàcuáa ndùu nchaa cuèchi ní quidé-yu ñ<sup>n</sup> ñ<sup>n</sup>-yu. <sup>3</sup> Te sá dúcá<sup>n</sup> ñi yáha cue ñáyiú-á<sup>n</sup>, xiã<sup>n</sup> cútnùnì ndáá iní-ó sã vã cãcu ñihnu-o te núu na dáña ñihnu-o tnúhu sá cãhá<sup>n</sup> nàcuáa naníhí tãhú-ó, tnúhu sá ño cùnùu, chi nacháhu-o te núu duca<sup>n</sup> na càda-o. Te díhna-gá Xítohó Jesucristú ní cãhá<sup>n</sup>-gá tnúhu-á<sup>n</sup> te nchaa ñáyiú ní xíndedóho nchaa nàcuáa ndùu tnúhu-á<sup>n</sup> ñi cãhá<sup>n</sup> ndáá-yu tnúhu-á<sup>n</sup> nùú-ó. <sup>4</sup> Te tnàhá Yã Ndiöxí cùndihí-gá nchaa ñáyiú-á<sup>n</sup> quidé-gã nàcuáa cutnùnì iní-ó sã tnùhu-á<sup>n</sup> cúú-xí tnùhu ndáá, chi quide-gá titní núú sã vã yõo tnàhí ndàcu cada te ío cùnùhu-o. Te Espíritú Yã Ndiöxí quidé-xí nàcuáa nduu táhú-ó ndì díí<sup>n</sup> nùú chù<sup>n</sup> cada-o nàcuáa cuínì mée-gã. Te sá dúcá<sup>n</sup> quide Yã Ndiöxí nchaa xiã<sup>n</sup>, xiã<sup>n</sup> cútnùnì iní-ó sã tnàhá-gá cãhá<sup>n</sup>-gá sá tnùhu-á<sup>n</sup> cúú-xí tnùhu ndáá.

*Xítohó Jesucristú ní xínduu yiqui cùnù-gá dâtná cáa yiqui cuñú nchoo cuè ñáyiú ñuyúú-a*

<sup>5</sup> Te Yã Ndiöxí vá táxí ndècu-gá cue espíritú xínú cuèchi núú-gã taxi tnùnì-xi ñuyúú sáá sã vátá quínì-gá-ó, te ñu cuendá xiã<sup>n</sup> cãhá<sup>n</sup>-í. <sup>6</sup> Te núú tütú Yã Ndiöxí cãchí-xi:

Yòhó Dútú Ndiöxí ñá túú ñá cúú cuè ñáyiú ñuyúú nùu ndacu iní-n-yu, àdi chindee-n-yu.

<sup>7</sup> Te yòhó ní cachí-n sã nchaa ñáyiú ñuyúú-a vá cùnùú-yu dâtná cùnùu cue espíritú xínú cuèchi núú-n,

dico ní cachí-n sã sáá nduu te ío cùnùú-yu tnàhá-yu, te mee-n cãhá<sup>n</sup>-n sã ío cãhnu cuú-yu,

te ní cachí tucu-n sã táxí tnùnì-yu nchaa sá ñi cadúha-n.

<sup>8</sup> Te duca<sup>n</sup> nchãandi túhú sá ío quindáhá-yu.

Duha cãchí-xi núú tütú-gá. Te sá dúcá<sup>n</sup> ñi cachí Yã Ndiöxí sá quindàha ñáyiú ñuyúú nchaa sá ío, xiã<sup>n</sup> cútnùnì sá nchãandi túhú sá ío taxi tnùnì-yu, dico vátá sáa-gá nduu dúca<sup>n</sup> quínì-ó càda-xi. <sup>9</sup> Te nchoo sa ñàha-o sá tnáá-ni ñi quide Yã Ndiöxí cuendá sá vã cùnùu Xítohó Jesucristú dâtná cùnùu cue espíritú xínú cuèchi núú-gã. Te duca<sup>n</sup> ñi quide Yã Ndiöxí chi ní cundáhú iní-gá nchaa ñáyiú ñuyúú-a, chi ní cachí-gá sá Déhe-gá cuú cuendá nchaa-yu, te Xítohó Jesucristú ío ní ndoho-gá òré ní xihí-gá, núú xiã<sup>n</sup> ní nduu táhú-gã cùnùu vihi-gá vitna. Te mee Yã Ndiöxí cãchí-gá sá ío cãhnu cuu Déhe-gá.

<sup>10</sup> Te Yã Ndiöxí ní cadúha-gá nchãandi túhú sá ío nàcuáa ní cachí iní mée-gã, te sá dúcá<sup>n</sup> ñi quide-gá nùu xiã<sup>n</sup> váha-ni sá ñi cachí-gá sá Xítohó Jesucristú nãndi ndoho-gá te cuú-gá cuendá duca<sup>n</sup> ñà túú tnàhí-gá ná cùmání-gã núú Yã Ndiöxí. Te sá dúcá<sup>n</sup> ñi cuu núú xiã<sup>n</sup> ní níhí Yã Ndiöxí nàcuáa cada-gá càndeca-gá nchaa ñáyiú cùu déhe-gá quíhí<sup>n</sup> núú ío váha càa cundecú-yu ndihí-gá ñi caa ñi quíhí<sup>n</sup>. Te Xítohó Jesucristú cúú-gã Yáa ní quide nàcuáa nduu táhú cue ñáyiú cundecú-yu ndihí Yá

Ndiöxí. <sup>11</sup> Te Xítohá Jesucristú cúu-gã Yaá quidé ndècu yĩñuhu ñáyiu núú Yã Ndiöxí ñáyiu sàndáá iní ñáhá xii-gã, te Xítohá Jesucristú ndihí cue ñáyiu-á<sup>n</sup> ì<sup>n</sup>-ni Yàá cúú Tãtã-yu ndihí-gã, núú xíã<sup>n</sup> Xítohá Jesucristú Yaá cúú Dèhe Dútú Ndiöxí ñá túú cùcahã<sup>n</sup> núú-gã càhá<sup>n</sup>-gã sá ñàní-gã ndihí cúha-gã cúú nchàa ñáyiu-á<sup>n</sup>. <sup>12</sup> Te quèe ndáá-xi nàcuáa càhá<sup>n</sup>-xi núú tütú Yã Ndiöxí núú càchí-xi nàcuáa ní xáha<sup>n</sup> Xítohá Jesucristú xii Tãtã-gã Dútú Ndiöxí, te duha ní xáha<sup>n</sup>-gã:

Cáhã<sup>n</sup> váha-í cuèndá-n núú nchàa cue tée cùu datná ñaní-í ndihí núú nchàa cue ñáyiu ðihí cúú dàtná cúha-í,

te cata-í ndudú chiñuhu ñaha-í xii-n núú tàcá-yu.

Duha yòdo tnuní núú tütú-gã nàcuáa ní xáha<sup>n</sup> Dèhe-gã xii-gã. <sup>13</sup> Te ingá tucu xichi núú tütú Yã Ndiöxí càhá<sup>n</sup>-xi nàcuáa ní càhá<sup>n</sup> Xítohá Jesucristú cuèndá-gã, te duha ní cachí-gã:

Yúhú nchaa-ni nduu quindáá iní-í Tãtã-í Dútú Ndiöxí.

Duha càchí-xi núú tütú Yã Ndiöxí nàcuáa ní càhá<sup>n</sup> Xítohá Jesucristú. Te ingá tucu xichi núú tütú Yã Ndiöxí càhá<sup>n</sup>-xi nàcuáa ní càhá<sup>n</sup> tucu Xítohá Jesucristú, te duha ní cachí-gã:

Iha ndècu ndihí-í nchaa ñáyiu cùu déhe Tãtã-í Dútú Ndiöxí, te ðiu-ni ñáyiu-á<sup>n</sup> ñí taxi cuèndá Tãtã-í cuu cuèndá-í.

Duha càchí-xi núú tütú-gã nàcuáa ní càhá<sup>n</sup> Xítohá Jesucristú.

<sup>14</sup> Te sá cuèndá nchaa ñáyiu cùu déhe Yã Ndiöxí cúu-yu yiqui cùñú, núú xíã<sup>n</sup> duca<sup>n</sup> tnàhá Xítohá Jesucristú ní cuu-gã yiqui cùñú, te duca<sup>n</sup> ñí cuu-gã yiqui cùñú cuèndá cuú-gã, te sá dúcã<sup>n</sup> cúu-gã te ndacu-gã daquèe tíhú-gã sácúíhná, te ðiu sácúíhná-ã<sup>n</sup> quidé-xí xihí ñáyiu. <sup>15</sup> Te duca<sup>n</sup> ñí quide-gã cuèndá sá cuè ñáyiu ñuyíú-a vá yuhú-gã-yu sá cúu-yu, chi nchaa-ni nduu yuhú-yu sá cúu-yu.

<sup>16</sup> Te na càchí tnúhu ndáá-í sá Xítohá Jesucristú ní quixi-gã cuèndá chindee-gã cue ñáyiu cùu ñaní tnàhá ndíi Àbrahã, te ñá ðíú cuèndá sá chindèe-gã cue espíritú xínú cuèchi

núú Yã Ndiöxí. <sup>17</sup> Te cuèndá xíã<sup>n</sup> núu dai ní xini ñuhu-xi sá cúu-gã ñáyiu cuèndá yãha-gã nãndi sá yãha-gã dàtná yãha cue ñáyiu cùu ndi mee-gã cuèndá duca<sup>n</sup> cùu-gã dútú ïo cùnuu te cuu ndáá-gã núú Yã Ndiöxí, te cundàhú iní-gã nchaa ñáyiu te cuú-gã cuèndá sá vã cùndècu-gã cuèchi-yu núú Yã Ndiöxí. <sup>18</sup> Te mei òré ndóhó Xítohá Jesucristú ní xito ndéé ñáhá sácúíhná xii-gã te núu ndisa sá vã cadã-gã ni ì<sup>n</sup> sá ñà túú tàú-gã cada-gã, te sá dúcã<sup>n</sup> ñí ndoho-gã xíã<sup>n</sup> núu ndácú-gã chindèe-gã nchaa ñáyiu duca<sup>n</sup> yãha.

### 3

*Xítohá Jesucristú ío-gã cùnùu-gã dàcúúxí ndíi Moisés*

<sup>1</sup> Te nchòhó cúu-ndó ñáyiu ndècu ndihí-í ichi Xítohá Jesucristú ñáyiu cùu cuèndá Yã Ndiöxí, te tnàhá-ndó cùu-ndo ñáyiu ní càhá<sup>n</sup> ñáhã-gã cuèndá cundecu-ndo ndihí-gã. Te yúhú càchí tnúhu-í xii-ndo sã ïo váha cada cuèndá-ndó nàcuáa ndùu cuèndá Xítohá Jesucristú, chi ðiu-gã cúu-gã Yaá ní tendaha ñàha Dútú Ndiöxí ní quixi-gã ñuyíú-a, te ðiu-gã cúu-gã Dútú ïo cùnuu chi quide-gã núú Yã Ndiöxí. Te ðiu-ni cuèndá Xítohá Jesucristú càhá<sup>n</sup> tnúhu sá ni sàndáá iní-ó. <sup>2</sup> Te mee Yã Ndiöxí ní sãha chiu<sup>n</sup>-gã Xítohá Jesucristú, te ío ndáá quidé-gã chiu<sup>n</sup>-á<sup>n</sup> sã cúu-xí Yã Ndiöxí, te ðiu-ni duca<sup>n</sup> ñí quide ndíi Moisés ní quide ndíi chiu<sup>n</sup> ní táhú Yã Ndiöxí, te ío ndáá ní quide ndíi chiu<sup>n</sup>-gã sá cúu-xí nchàa ñáyiu cùu cuèndá-gã, te cue ñáyiu-á<sup>n</sup> cúu-yu dàtná vehe mee-gã. <sup>3</sup> Te ì<sup>n</sup> tée dàcaa ì<sup>n</sup> vehe váha ío càhnu-gã cúu-dè dàcúúxí vèhe dácaa-dé. Te duca<sup>n</sup> sãtnahã-xi cùu Xítohá Jesucristú chi ío-gã càhnu cuu-gã dàcúúxí ndíi Moisés. <sup>4</sup> Te nchoo sã naha-o sã ncháá vèhe dacuití ndècu cue tée ní dácaa, dico sa naha tucu-o sã Yã Ndiöxí quidé-gã ndécú nchàa sá ío ñuyíú-a. <sup>5</sup> Te ndíi Moisés-á<sup>n</sup> ïo ndáá ní quide ndíi chiu<sup>n</sup> ní táhú Yã Ndiöxí ní quide ndíi sá cúu-xí nchàa ñáyiu cùu cuèndá-gã.

Te sá dúcá<sup>n</sup> nǐ quide ndíi xǎ<sup>n</sup> ní cuu ndíi ñ<sup>n</sup> téé ní xinu cuechi nǔú Yă Ndiöxí. Te ní xáha<sup>n</sup> ndíi xii nchaa ñáyiú cùu cuendá-gá nàcuáa cáhá<sup>n</sup>-gá ndéé cuéé-gá. <sup>6</sup> Dico Xítóhó Jesucristú cúu-gă Déhe mee Yă Ndiöxí, te cùu-gă Yaá ío quide ndáá yíndàha-gá nchaa ñáyiú cùu cuendá Yă Ndiöxí. Te tnáhá-ó cùu-o ñáyiú cùu cuendá-gá, te ðiu-ni duca<sup>n</sup> cùu cuendá ñáhá-gă xii-o te núu na càncicú<sup>n</sup> nihnu-ni-o càni ndáá iní-ó cuendá-gá ndéé ná sàá nduu gǔndecu-o ndíhi-gá.

*Cue ñáyiú cùu cuendá Yă Ndiöxí ío váha cùu iní-yu ndécú-yu ndíhi-gá*

<sup>7</sup> Te núu tütú Yă Ndiöxí yódó tnùnǐ nàcuáa ní cáhá<sup>n</sup> Espíritú-gá, te duha ní cachí-xi:

Te núu nchòhó ndédóho-ndo nchaa tnúhu cáhá<sup>n</sup> Yă Ndiöxí vitna,

<sup>8</sup> te vá cǔndùu sàá iní-ndó dàtná ní xínduu sàá iní ñáyiú ní dáquéé tǐhú tnúhu Yă Ndiöxí, ñáyiú ní xíndecu xití yucu,

chi ñáyiú-á<sup>n</sup> nǐ xito ndéé-yu Yă Ndiöxí nǔu nása cada ñaha-gă xii-yu.

Duha ní cachí Espíritú-gá. <sup>9</sup> Te càchí tucu Espíritú Yă Ndiöxí nàcuáa ní cáhá<sup>n</sup> méé-gă, te duha ní cachí-gá:

Xití yucu ní xito ndéé ñáhá cué ñani tnáhá-ndó nǐ xíndecu ndéé sanaha xii-í,

te duca<sup>n</sup> nǐ quide ñáhá-yu cuéi ní xiní-yu nchaa sá nǐ quide-í ndí ùdico cuía nǐ xíndecú-yu xití yucu-á<sup>n</sup>.

<sup>10</sup> Te sá dúcá<sup>n</sup> nǐ quidé-yu núu xǎ<sup>n</sup> ní cudéè<sup>n</sup>-í nǔú-yu,

núu xǎ<sup>n</sup> ní cáhá<sup>n</sup>-í cuendá-yu, te ní cachí-í:

“Ñáyiú-a quide-ní-yu nchaa sá ñà túú tàú-yu cadá-yu te ni ñà túú cuiní-yu cadá-yu nchaa nàcuáa sàni iní-í,

te ni ñà túú cuiní-yu cadá-yu nàcuáa cáhá<sup>n</sup>-í”,

duha ní cáhá<sup>n</sup>-í cuendá-yu.

<sup>11</sup> Te xǎ<sup>n</sup> nǔu ní cudéè<sup>n</sup>-í nǔú-yu te ní xáha<sup>n</sup> ndáá-í xii-yu sá vǎ ndúú tǎhǔ-yu cundecu váha-yu núu ndécú-í.

Duha ní cachí Yă Ndiöxí càchí Espíritú-gá.

<sup>12</sup> Te nchòhó ñáyiú ndècu ndíhi-í ichi Xítóhó Jesucristú, cáhá<sup>n</sup>-í dóho-ndo sǎ ío cada cuendá-ndó vǎ cáni cuèhé iní-ndó te ngóo-ndo vǎ quíndáá-gá iní-ndó Yă Ndiöxí te ðaña-ndo ìchi-gá, te ðiu-gá cúu-gă Yaá ndécú nchaa nduu nchaa quíú.

<sup>13</sup> Te ñ<sup>n</sup> nduu ñ<sup>n</sup> nduu ío chí cuáha tnàha tnúhu ndee iní cundecu-ndo nini ndecu-ndo ñuyíú-a cuendá sá vǎ xǐnu iní-ndó càda-ndo nándi sá cuèhé sá dúhá, te duca<sup>n</sup> te vá cúú sàá iní-ndó nǔú Yă Ndiöxí. <sup>14</sup> Te vá dáñá ndéé-ó càni ndáá iní-ó nàcuáa cada ñaha Yă Ndiöxí xii-o, te dàtná-ni ní sani iní-ó ndéé cútnáhá ní tuha-o ìchi Yă Ndiöxí, te ðiu-ni duca<sup>n</sup> càni iní-ó ndéé ná sàá nduu vǎ cǔndecu-gá-ó ñuyíú-a, te núu duca<sup>n</sup> na càda-o te cùu ñ<sup>n</sup>nuu-o ndíhi Xítóhó Jesucristú.

<sup>15</sup> Te duha cáhá<sup>n</sup>-xi ñ<sup>n</sup> xichi núu tütú Yă Ndiöxí:

Te núu nchòhó ndédóho-ndo nàcuáa cáhá<sup>n</sup> Yă Ndiöxí vitna,

te vá cǔndùu sàá iní-ndó dàtná ní xínduu sàá iní cue ñáyiú ní dáquéé tǐhú tnúhu-gá ndéé sanaha.

Duha càchí-xi núu tütú-gá. <sup>16</sup> Te cue ñáyiú duca<sup>n</sup> nǐ xínduu sàá iní-xi cúu-yu ñáyiú ní ndeñuhu ndíi Moisés nació<sup>n</sup> Egiptú, te ñáyiú-á<sup>n</sup> nǐ xíndedóho-yu tnúhu ní cáhá<sup>n</sup> Yă Ndiöxí te ní quide sàá iní-yu ní dáquéé tǐhǔ-yu tnúhu-gá. <sup>17</sup> Te ndí ùdico cuía nǐ xúhu<sup>n</sup>-yu ichi ío ní cùdéé<sup>n</sup> Yă Ndiöxí nǔú-yu cuendá sá nǐ quidé-yu nándi nchaa sá cuèhé sá dúhá, te ñáyiú-á<sup>n</sup> nǐ xíhi-yu xití yucu. <sup>18</sup> Te nchaa ñáyiú-á<sup>n</sup> ñà túú ní cuiní-yu tní-yu tnúhu ní cáhá<sup>n</sup> Yă Ndiöxí nǔu xǎ<sup>n</sup> ní cáhá<sup>n</sup> ndáá-gá sá vǎ ndúú tǎhǔ-yu cundecú-yu núú ío váha càa ndecu-gá.

<sup>19</sup> Te xǎ<sup>n</sup> nǔu nchoo cǔtnuní iní-ó sǎ nchaa ñáyiú-á<sup>n</sup> ñà túú ní ndúu tǎhǔ-yu cundecu váha-yu núu ndécú-gă, chi ñà túú ní sàndáá iní-yu tnúhu ní cáhá<sup>n</sup>-gá.

## 4

<sup>1</sup> Te vitna ndècu ndíhi-gá-ó tnúhu



Yá Ndiöxí tnúhu sá dánèhé ñáhá xii-o sá cúú cundecu váha-o núú ndécú-gă, te tàú-xi quiyuhú iní-ó chi na cuáhán te vá ndúú tãhú-ó cundecu váha-o núú ndécú-gă. <sup>2</sup> Te tnáhá nchoo ní ngúndecu ndihí-o tnúhu sá cãhá<sup>n</sup> nãcuáa naníhí tãhú-ó dàtná ní xíndecu ndihí cue ñáyiu ndéé sanaha, dico ñáyiu-án chi ñá túú vèdana ni nãndíhí-xi cuèi ní xíndedóho-yu tnúhu-án chi ñá túú ní sãndáá iní ñáhã-yu xii-gă. <sup>3</sup> Dico nchoo cùu-o ñáyiu ní sãndáá iní tnúhu Yá Ndiöxí, núu xíã<sup>n</sup> nduu tãhú-ó cundecu váha-o núú ndécú-gă, te ní quee ndáá-xi nãcuáa cãhá<sup>n</sup>-gă núú tütú-gă núú cãchí-xi:

Yúhú ní cudèè<sup>n</sup>-í núú-yu, te ní cãhá<sup>n</sup> ndáá-í sá vã ndúú tãhú-yu cundecu váha-yu núú ndécú-í.

Duha ní cachí-gă. Te cuu nduu tãhú-yu cundecu váha-yu núú ndécú Yá Ndiöxí ní cùu, chi sa ní xínu cava nchaá chiu<sup>n</sup> ní quide-gă sá ní cadúha-gă ñuyúú. <sup>4</sup> Te núú tütú Yá Ndiöxí cãhá<sup>n</sup>-xi nãcuáa ní quide-gă nduu úsá, te duha cãchí-xi:

Yá Ndiöxí ní quide chiu<sup>n</sup>-gă íñú nduu ní quide-gă nchaá chiu<sup>n</sup>-gă te ní ndetatú-gă nduu úsá.

Duha cãchí-xi núú tütú-gă. <sup>5</sup> Te cãchí tucu-xi núú tütú Yá Ndiöxí nãcuáa ní cãhá<sup>n</sup>-gă cuendá cue ñáyiu ndéé sanaha, te duha ní cachí-gă:

Cue ñáyiu-a vá ndúú tãhú-yu cundecu váha-yu núú ndécú-í ndétátú-í.

Duha ní cachí-gă. <sup>6</sup> Te ñáyiu ní xíndedóho tnúhu sá cãhá<sup>n</sup> nãcuáa naníhí tãhú-ó ndéé sanaha, ñá túú ní nduu tãhú-yu cundecu váha-yu núú ndécú Yá Ndiöxí ndétátú-gă, te duca<sup>n</sup> chi ñá túú ní sãndáá iní ñáhã-yu xii-gă, dico íó-gă ñáyiu nduu tãhú cundecu váha núú ndécú-gă ndétátú-gă. <sup>7</sup> Te ní xica cuéhé nduu sá dúcá<sup>n</sup> ñá túú ní sãndáá iní ñáhá ñáyiu-án xii-gă, te dàtnúni ní cãhá<sup>n</sup> ndíi Dávíi yuhu-gă nãcuáa cada-gă vitna, te ñiu-ni nãcuáa sa yòdo tnuní ñiu-ni duca<sup>n</sup> chido tnuní tucu-í nãcuáa ní cãhá<sup>n</sup> ndíi yuhu-gă, te duha ní cachí-gă:

Te núu nchòhó ndèdóho-ndo tnúhu cãhá<sup>n</sup>-í te vá cáda sãá iní-ndó.

Duha ní cachí-gă. <sup>8</sup> Te ndíi Jòsué ní sanu ichi ndíi ñáyiu núú quíhí<sup>n</sup>-yu cundecu váha-yu, dico ñá díú cuendá xíã<sup>n</sup> ní cãhá<sup>n</sup> Yá Ndiöxí, chi cuendá nãcuáa cada-gă vitna ní cãhá<sup>n</sup>-gă. <sup>9</sup> Núu xíã<sup>n</sup> sáá nduu nduu tãhú nchaá ñáyiu cùu cuendá Yá Ndiöxí ngúndecu váha-yu núú ndécú-gă ndétátú-gă. <sup>10</sup> Te nchaá ñáyiu duca<sup>n</sup> na nduu tãhú cundecu váha núú ndécú Yá Ndiöxí ndétátú-gă, te tnáhã-yu ndetatú-yu cuendá nchaá sá váha ní quidé-yu dàtná ndétátú méé-gă. <sup>11</sup> Te xini ñuhu-xi sá nchóó ío nducu ndèe-o nducu-o nãcuáa cada-o cuendá nduu tãhú-ó ngúndecu váha-o núú ndécú Yá Ndiöxí ndétátú-gă, chi na cuáhán dava-ndo càda-ndo datná ní quide cue ñáyiu ñá túú ní sãndáá iní ñáhá xii-gă, te vá ndúú tãhú-ndó cundecu váha-ndo núú ndécú-gă te núu duca<sup>n</sup> na càda-ndo.

<sup>12</sup> Te tnúhu Yá Ndiöxí cúú-xí dàtná ñ<sup>n</sup> sá nchító-ó chi quide-xi nãndí sá quidé-xí, te cùu-xi datná ñ<sup>n</sup> sá dèé<sup>n</sup> víhí-gă dàcúxí ñ<sup>n</sup> yuchí sá ndéé úú xio núú-xi. Te duca<sup>n</sup> sãtnahá-xi cùu tnúhu-gă chi quée-xi iní-ó, te dàndixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o. <sup>13</sup> Te ni ñ<sup>n</sup> sá ní cadúha Yá Ndiöxí vá cání iní-ó sã ndácú-xí nguivãha-xi núú-gă, chi nchaandi túhú sá sání iní-ó ndècu túu-xi núú-gă, te ñiu núú Yáá-án na càni cuendá-ó nchãa sá quidé-ó.

#### *Xítóhó Jesucristú cúú-gă Dútú ño cùnuu*

<sup>14</sup> Te Xítóhó Jesucristú cúú-gă Dútú ño cùnuu ndecu ndihí-o, te ñiu-gă cúú-gă Déhe Dútú Ndiöxí, te Yáá-án cuãndaa-gă andíu ní nucúndecu-gă núú Yá Ndiöxí, núu xíã<sup>n</sup> tàú-xi sá cãchícú<sup>n</sup> nihnu-ni-o quíndáá iní-ó-gă. <sup>15</sup> Te mee Yáá-án ño cùnuu-gă cúú-gă dútú-ó ndècu ndihí-o, te ío na cùndahú iní ñáhã-gă xii-o cuendá sá ñã nihí ndéé-ó cundecu-o. Te duca<sup>n</sup> càda-gă chi ní yãha-gă dàtná yãha mee-o, chi nchaá sá ní yãha-gã-án ní cuu-xi sá cáda-gã nãndí nchaá sá cuéhé sá dúhá ní cùu dico ni ñ<sup>n</sup> ñá túú

ní quide-gá. <sup>16</sup> Núu xiá<sup>n</sup> tàú-ó sã nchóó nì yuhu ni iní-ó cãhá<sup>n</sup> ndihi-o Yã Ndiöxí Yaá ío cùndahú iní ñáhá xì-o chindee ñaha-gá, te duca<sup>n</sup> càda-o te cundàhú iní ñáhá-gã chindee ñaha-gá xii-o ndèda-ni càa oré xíní ñùhu-o-gá.

## 5

<sup>1</sup> Te nchaa cue dútú cùnùu núu ñáyiu isràèl diu-ni ñáyiu cùu-güedé, te duca<sup>n</sup> ñi ngúndecu-güedé cuendá cada-güedé chiú<sup>n</sup> sá cúu-xí Yã Ndiöxí cuendá-yu, chi diu cue téé-á<sup>n</sup> ñi xóo nacani cuendá-güedé núu-gã quiti ní xóo cahni-güedé ní xóo nduu táhú-gã, te duca<sup>n</sup> ñi xóo cada-güedé cuendá sá cáda càhnu iní Yã Ndiöxí cuéchi-yu, te duca<sup>n</sup> ñi xóo nacani cuendá tucu-güedé núu-gã nchaa dava-gá sá ñi xóo níhí-güedé ní xóo nduu táhú-gã. <sup>2</sup> Te nchaa cue dútú-ã<sup>n</sup> ñi xóo cundee iní-güedé nchaa sá ñi xóo cada nchaa ñáyiu ñá túú ní quide ndáá ñáyiu ñá túú cùtnuní iní-xi, te duca<sup>n</sup> ñi xóo cada cue dútú-ã<sup>n</sup> chi tnàhá-güedé ñá túú ní xóo níhí ndéé-güedé cundecu-güedé cuendá nchaa sá ñi xóo yáha-güedé. <sup>3</sup> Te sá cuendá sá dúcá<sup>n</sup> ñá túú ní xóo níhí ndéé-güedé núu xiá<sup>n</sup> dai ní xini ñuhu-xi sá tnàhá-güedé cuáha-güedé Yã Ndiöxí sá ndúú táhú-gã cuendá méé-güedé dàtná quidé-güedé cuendá ñáyiu.

<sup>4</sup> Te ni ñi<sup>n</sup> téé vá ndácú-dé cuu-dé dútú cùnùu cuendá-ni sá cãchí iní méé-dé te núu ñá díú mèe Yã Ndiöxí duca<sup>n</sup> cuini-gá sá cúu-dé dútú cùnùu datná ní quide-gá ndíi Àrón. <sup>5</sup> Te cuéi Xítohó Jesucristú chi ñá díú mèe-gá ní quide-gá méé-gã ñi<sup>n</sup> dútú cùnùu nacuaá cada nínu-gá méé-gã, chi mee Tãtã-gã Dútú Ndiöxí duca<sup>n</sup> ñi cachí-gá sá cúu-gã Dútú cùnùu, te duca<sup>n</sup> chi Yã Ndiöxí ní xáha<sup>n</sup>-gã:

Yòhó cúu-n Dèhe-í,  
te cuini-í sá dúhá-ni cùndecu-n núu ndécù-í.

Duha ní xáha<sup>n</sup>-gã xii Xítohó Jesucristú. <sup>6</sup> Te núu tütú Yã Ndiöxí yódó tnùnì nacuaá ní xáha<sup>n</sup> tucu-gá xii Xítohó Jesucristú, te duha ní xáha<sup>n</sup>-gã:

Yòhó cúu-n dútú cundecu ni caa ni quíhí<sup>n</sup>,

te cùu-n datná ní cuu ndíi Melquisèdec. Duha ní xáha<sup>n</sup>-gã xii Xítohó Jesucristú.

<sup>7</sup> Te cùtnàhá ní xíndecu Xítohó Jesucristú ñuyíú-a te níhi ní xóo cáhá<sup>n</sup> ndihi-gá Yã Ndiöxí te ní xóo cáhá<sup>n</sup> ndàhú-gá núu-gã, te ní xóo ndáhyú-gá òré duca<sup>n</sup> ñi xóo cáhá<sup>n</sup> ndihi-gá Yã Ndiöxí, te duca<sup>n</sup> ñi quide-gá chi nàha-gá sá Yã Ndiöxí cúu-gã Yaá ndacu dàcácu nihnu ñaha xii-gá cuendá sá vã cùú dúcá<sup>n</sup>-gã. Te Yã Ndiöxí ní xíndedóho-gá nchaa tnúhu ní cáhá<sup>n</sup> Xítohó Jesucristú cuendá sá ñi quide-gá nchaa nacuaá ní xáha<sup>n</sup> Yã Ndiöxí cada-gá. <sup>8</sup> Te sá cuendá nchaa sá ñi ndoho Xítohó Jesucristú xiá<sup>n</sup> ní cutnùnì iní-gá cada-gá nchaa dava-gá sá vãha nacuaá cuini méé Yã Ndiöxí cada-gá. Te duca<sup>n</sup> ñi cuu cuéi cùu-gá Déhe Yã Ndiöxí. <sup>9</sup> Te sá dúcá<sup>n</sup> ñi quide-gá nchaa nacuaá cuini méé Yã Ndiöxí, xiá<sup>n</sup> núu vitna cùu-gá Yaá dàcácu nihnu nchaa ñáyiu sàndáá iní ñáhá xii-gá núu ùhú núu ndàhú. <sup>10</sup> Te mee Yã Ndiöxí ní cachí-gá sá Xítohó Jesucristú cúu-gã dútú cùnùu datná ní cunuu ndíi Melquisèdec cùtnàhá ní cuu ndíi dútú ñuyíú-a.

*Cuendá ñáyiu cuini dañá nihnu ichi Yã Ndiöxí*

<sup>11</sup> Te vai-gá tnúhu ndècu cáhá<sup>n</sup>-í nacuaá ndúu cuendá Xítohó Jesucristú, ndihi ndíi Melquisèdec, te dicó-ni sá nchòhó ío cuéé tècú tnùnì-ndó, te yúhú ío ùhú nihí-í nacuaá cáhá<sup>n</sup>-í nacuaá tecú tnùnì-ndó.

<sup>12</sup> Te nchòhó sa ní cuu cuéhé nduu ndècu-ndo ichi Xítohó Jesucristú, te tàú-ndó dānehé-ndó cué ñáyiu ndècu ichi-gá tnúhu-gá núu dicó sá cúu, dico xini ñuhu-ni-xi sá cùndècu ñáyiu danèhé ñáhá tnúhu-gá xii-ndo, tnúhu sá ñi dācuáhá-ndó ndéé díhna sá ñá túú ùhú tecú tnùnì-ndó. Te sá dúcá<sup>n</sup> quide-ndo núu xiá<sup>n</sup> cúu-ndó dàtná cue landú vitna sàdi camá, landú vátá cúu-gã caxi dítá. <sup>13</sup> Chi nchaa ñáyiu cùu datná landú vitna sàdi, ñáyiu-á<sup>n</sup> cúu nèñuú-yu ñá túú cùtnuní iní-yu nacuaá càhá<sup>n</sup> tnúhu sá càhá<sup>n</sup> nacuaá

cada ndáá-yu cundecú-yu. <sup>14</sup> Te nchaa sá vátá cúú-gă caxi cue landú yíquín xíá<sup>n</sup> cúú-xí cuendá cue ñáyiú sacuéhé, te xíá<sup>n</sup> cúú-xí datná tnúhu sá dâcuâha ñáyiú sa ní níhí ndéé ndècu ichi-gá, ñáyiú sa ní cutnùnî váha iní-xi nândi cùu nchaa sá cuèhé sá dúhá, ndihî nândi cùu nchaa sá vâha.

## 6

<sup>1</sup> Te xíá<sup>n</sup> nûu vitna xîni ñuhu-xi dacuaha-o dava-gá tnúhu Yá Ndiôxí cuendá duca<sup>n</sup> te cuu-o ñáyiú tècú tnùnî nchaa tnúhu-gá. Te xîni ñuhu-xi sá ncháá tnúhu Xítohó Jesucristú sá ní dâcuáhá-ó ndèé díhna vá dâcuâha-gá-ó datná ní dâcuáhá-ó chi sa tècú tnùnî-ó. Te ñá túú-gă xínî ñuhu-xi dacuaha-o datná ní dâcuáhá-ó ndèé díhna nâcuáa cada-o ndixi cuéchi iní-ó cuendá nchaa sá cuèhé sá dúhá quide-o, sá tá dâcuíta nihnu ñaha xîi-o cuáhá<sup>n</sup> ní cùu. Te duca<sup>n</sup> vâ dâcuâha-gá tucu-o datná ní dâcuáhá-ó ndèé díhna nâcuáa cada-o quindáá iní-ó Yá Ndiôxí, <sup>2</sup> ndihî cuendá nâcuáa ní dâcuáhá-ó nâcuáa cuandute-o, ndihî cuendá nâcuáa cada-o càcá<sup>n</sup> ndodo-o ndâha-o díquî ñáyiú ní sândáá iní ñáhá xîi-gá. Te duca<sup>n</sup> ñà túú-gă xínî ñuhu tucu-xi dacuaha-o datná ní dâcuáhá-ó ndèé díhna cuendá nâcuáa ndoto cue ñáyiú ní xíhí, ndihî cuendá nâcuáa ní dâcuáhá-ó sã Yá Ndiôxí daquihí<sup>n</sup>-gá ñáyiú núú ùhú núú ndâhú ni caa ni quihí<sup>n</sup>. <sup>3</sup> Te núu Yá Ndiôxí ná càchí-gá, te cuita dâcuâha-gá-ó nchâa dava-gá tnúhu sá cúmăní quihí<sup>n</sup>.

<sup>4</sup> Te cue ñáyiú sa tècú tnùnî tnúhu Yá Ndiôxí, ñáyiú sa xínî nchaa nâcuáa ndùu nchaa sá vâha quide ñaha Yá Ndiôxí xii-o ndihî-yu, ñáyiú sa chîndee ñaha Espíritú Yá Ndiôxí, <sup>5</sup> ñáyiú sa cùtnunî iní-xi sá ïo váha tnúhu Yá Ndiôxí, ñáyiú sa xínî nâcuáa ta quide Yá Ndiôxí véxi nchaa sá vâ yôo tnâhî ndâcu cada, <sup>6</sup> te núu ñáyiú-á<sup>n</sup> ná ngüita tucú-yu daquêe tíhú duú<sup>n</sup>-yu tnúhu Yá Ndiôxí, te vá ndácú-gă-ó nâ canu ichi-ó-yu nâcuáa ndixi cuéchi iní-yu te núu duca<sup>n</sup> na càdá-yu, te sá dúcá<sup>n</sup> ná càdá-yu te tnâhá-yu cùu-yu datná

cue téé ní sahnî ñaha xîi Xítohó Jesucristú Déhe Yá Ndiôxí núú cùrúxí. Te sá dúcá<sup>n</sup> ná càdá-yu te ngôo dava-gá ñáyiú cáhá<sup>n</sup> cuèhé-yu cuendá Xítohó Jesucristú. <sup>7</sup> Te nchaa ñáyiú cùu-yu datná ñuhu, chi ñuhu-á<sup>n</sup> ndi tnâhá òré cúú<sup>n</sup> dâú te xihî-xi ndute, te dava ñuhu váha cùu sá xítú ñáyiú, te sá cúú núú ñuhu-á<sup>n</sup> ïo nândihî-xi, te mee Yá Ndiôxí quidé-gă cúú sã vâha núú ñúhú-ă<sup>n</sup>. <sup>8</sup> Dico núu da ïñu na ndâa núú ñuhu-á<sup>n</sup> te ñá túú vèdana nândihî-xi te núu duca<sup>n</sup>, te Yá Ndiôxí vá cúú vâha iní-gá cuendá ñuhu-á<sup>n</sup> sã dúcá<sup>n</sup> dà ïñu ndaa núú-xi, te ïñu-á<sup>n</sup> ndihî-xi cáyú. Te duca<sup>n</sup> sâtnahá-xi cùu ñáyiú dàquee tíhú tnúhu Yá Ndiôxí chi ñá túú cùu váha iní-gá núú-yu.

### *Níhí-ó sã ndétú-ó ndiùu táhú-ó*

<sup>9</sup> Te cuéi duha càhá<sup>n</sup>-í dico nchòhó cue ñáyiú ïo cùu iní-í, chi cùtnunî ndáá iní-í sá vâ càdá-ndó datná xíquide dava-gá ñáyiú, te mee-ni sã vâha cuu xii-ndo chi cùu-ndo ñáyiú sa ní naníhí táhú. <sup>10</sup> Te duca<sup>n</sup> chi Yá Ndiôxí cúú-gă Yaá ïo váha quide ndáá, te vá dáná ndòdo iní-gá nchaa sá vâha quide-ndo, te ni vâ dáná ndòdo iní-gá nâcuáa quide-ndo cuu iní-ndó-gă, te sá dúcá<sup>n</sup> quide-ndo cuu iní-ndó-gă xíá<sup>n</sup> chîndèe-ndo cue ñáyiú ndècu ndihî-ndo ichi Xítohó Jesucristú, te duca<sup>n</sup>-ni ta quide-ndo véxi ndéé vitna. <sup>11</sup> Te cuínî-í sá ïñ ïñ-ndo nducu ndee-ndo cada-ndo nâcuáa cuínî Yá Ndiôxí datná tá quide-ndo véxi, te diu-ni duca<sup>n</sup> càda-ndo ndéé ná sâa nduu ndùu táhú-ndó cùndecu-ndo ndihî-gá núú ndécú-gă, te duca<sup>n</sup> te níhî-ndó nchâandi túhú sá ndétú-ndó ndùu táhú-ndó cùndecu ndihî-ndo ni caa ni quihí<sup>n</sup>. <sup>12</sup> Te yúhú cuínî-í sá nchòhó vá túhío-ndo càda-ndo nchaa nâcuáa cuínî Yá Ndiôxí, te cada-ndo datná quidé ñáyiú sândáá iní tnúhu-gá, ñáyiú càhnu iní-xi. Te sá dúcá<sup>n</sup> quidé-yu xíá<sup>n</sup> nihî-yu nchaa sá ní cachí Yá Ndiôxí nduu táhú-yu.

<sup>13</sup> Te cùtnahá ní xáha<sup>n</sup> Yá Ndiôxí xii ndíi Ábrahám nâcuáa cada-gá, te ní cacunehe-gá méé-gă nâcuáa cutnùnî iní ndíi sá ndâa cada-gá nâcuáa ní xáha<sup>n</sup>-gă xii ndíi, te vá yôo ïñ ni

càcunehe-gá cuendá sá quíndáá iní ndíi tnúhu ní cáhá<sup>n</sup>-gá. Te duca<sup>n</sup> nĩ quide-gá chi ñ<sup>n</sup>díi díi-ni mee-gã ío cùnuu-gá. <sup>14</sup> Te duha ní xáha<sup>n</sup>-gã xii ndíi Àbrahám: “Yòhó té Àbrahám na cächí tnúhu ndáá-í xii-n sã ío chindee ñaha-í xii-n, te cáyá cuéhé víhí ñani tnáhá-n”, duha ní xáha<sup>n</sup>-gã xii ndíi. <sup>15</sup> Te ndíi Àbrahám ío ní quide ndee iní ndíi ní xíndetu ndíi, te duca<sup>n</sup> te Yá Ndiöxí ní quide-gá nàcuáa ní xáha<sup>n</sup>-gã cada-gá sá cúu-xí ndíi. <sup>16</sup> Te núu ñ<sup>n</sup> ñáyiu cãhá<sup>n</sup> ñ<sup>n</sup> tnúhu ndáá cuiti te càcu nehé-yu Yá Ndiöxí cuendá quíndáá iní tnaha ñáyíu-yu tnúhu cãhá<sup>n</sup>-yu, te òré duca<sup>n</sup> na cãhá<sup>n</sup>-yu te ñá túú-gã sá dácãá ñáyiu cãhá<sup>n</sup> ndíhi-yu cuendú. <sup>17</sup> Te duca<sup>n</sup> nĩ quide Yá Ndiöxí ní cáhá<sup>n</sup> ndáá-gá sá cádá-gã nàcuáa ní cachí-gá, te duca<sup>n</sup> nĩ cáhá<sup>n</sup>-gá cuendá nchaa ñáyiu ní cachí-gá nduu táhú sã cádá-gã nàcuáa cutnùní iní-yu sá quidé-gã ñ<sup>n</sup> sá cãhá<sup>n</sup>-gá, te ni ñà túú nädáma-gá ñ<sup>n</sup> sá cãhá<sup>n</sup>-gá. <sup>18</sup> Te nchoo nĩ natuha-o Yá Ndiöxí cuendá dàcácu nihnu ñaha-gã xii-o núú ùhú núú ndàhú, te ní níhí-ó tnúhu ndee iní ndécú ndíhi-o cuendá sá vã dáña ndéé-ó cùndetu-o sáa nduu ndúu táhú-ó cùndecu-o ndíhi-gá. Te duca<sup>n</sup> nĩ níhí-ó tnúhu ndee iní chi Yá Ndiöxí ní cáhá<sup>n</sup> ndáá-gá sã cádá-gã nàcuáa ní cachí-gá, te ñá túú dándahú ñáhá-gã, te ni ñà túú nädáma-gá ñ<sup>n</sup> sá nĩ cachí-gá cada-gá. <sup>19</sup> Te tnúhu ndee iní ndécú ndíhi-o xíã<sup>n</sup> quidé-xí cùtnuní ndáá iní-ó sã ndúú táhú-ó cùndecu-o ndíhi Yá Ndiöxí núú ndécú-gã, te duca<sup>n</sup> cùtnuní ndáá ndisa iní-ó sã cuendá Xítohó Jesucristú Yáa ndécú núú Yá Ndiöxí. <sup>20</sup> Te duca<sup>n</sup> nĩ nucúndecu Xítohó Jesucristú núú Yá Ndiöxí cuendá duca<sup>n</sup> cànchicú<sup>n</sup> nihnu-o càda-o, te duca<sup>n</sup> nĩ nucúndecu-gá núú Yá Ndiöxí chi cùu-gá dútú cùnùu datná ní cunuu ndíi Melquisèdec ñuyíu-a, te duca<sup>n</sup>-ni cùu-gá dútú cùnùu ni caa ni quíhí<sup>n</sup>.

## 7

*Xítohó Jesucristú cúu-gã dútú dàtná ní cuu ndíi Melquisèdec*

<sup>1</sup> Te ndíi Melquisèdec ní xíndaha ndíi cue ñáyiu ñuú Sàlém, te ní cuu ndíi dútú nĩ xinu cuechi ndíi núú Dútú Ndiöxí Yáa ío cùnuu. Te ndíi Melquisèdec-á<sup>n</sup> nĩ xíca<sup>n</sup> táhú ndíi núú Yá Ndiöxí cuendá ndíi Àbrahám cútnahá ní sáhá<sup>n</sup> ndíi Àbrahám-á<sup>n</sup> nĩ nàá ndíi ndíhi cue dava-gá cue téé yíndaha ñáyiu. Te cue téé-á<sup>n</sup> ñà túú ní ndàcu-güedé nàá-güedé ndíhi ndíi Àbrahám-á<sup>n</sup> chi ní xíta-güedé. <sup>2</sup> Te nchaa sá nĩ níhí ndíi Àbrahám-á<sup>n</sup> núú nĩ nàá ndíi, te ní quide ndíi úxí xichi te ñ<sup>n</sup> xichi núú ùxí-á<sup>n</sup> nĩ sãñaha ndíi xii ndíi Melquisèdec. Te ðíu ndíi Melquisèdec-á<sup>n</sup> quée-xí: Téé ío váha quide ndáá yíndaha ñaha xii ñáyiu, duha quée-xí. Te ní xóo danàni ñahá-yu xii ndíi Téé yíndaha ñuú Sàlém, duha ní xóo danàni ñahá-yu. Te tnúhu Sàlém-á<sup>n</sup> quée-xí: Ñuú ndécú nàhi, duha quée-xí tnúhu-á<sup>n</sup>. Núu xíã<sup>n</sup> quée tucu-xi nacuáa nàni ndíi Téé yíndaha ñuú ndécú nàhi, duha quée tucu-xi ðíu ndíi. <sup>3</sup> Te ñá túú tnúhu núu yoo cùu tátá ndíi ndíhi nãná ndíi, te ni ñà túú tnúhu núu yoo cùu xíi ndíi ndíhi xítná ndíi, te ni ñà túú tnúhu núu nándi cùu ñáyiu ní cuu ñani tnáhá ndíi ní xíndecu ndéé sanaha-gã, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-á<sup>n</sup> duca<sup>n</sup>-ni nĩ cuu ndíi dútú nĩ xíndecu ndíi, te duca<sup>n</sup> sãtnahá-xi cùu Xítohó Jesucristú déhe Yá Ndiöxí chi cuu-gá dútú ni caa ni quíhí<sup>n</sup>.

<sup>4</sup> Te vitna chí cuãha váha cuendá sá ndíi Melquisèdec ní cuu ndíi ñ<sup>n</sup> téé ío ní cuu cãhnu ní xíndecu ñuyíu-a, chi ndíi Àbrahám téé ní cuu ñani tnáhá-ó nĩ xíndecu ndéé sanaha nĩ quide ndíi úxí xichi nchaa sá nĩ níhí ndíi núú nĩ nàá ndíi. Te ñ<sup>n</sup> xichi núú ùxí-á<sup>n</sup> nĩ sãñaha ndíi xii ndíi Melquisèdec. <sup>5</sup> Te ndíi Moisés ní chídó tnùní ndíi nàcuáa cada nchaa dútú, cue téé ní cuu ñani tnáhá ndíi Lèví sá cuè téé-á<sup>n</sup> quehe<sup>n</sup>-güedé ñ<sup>n</sup> xichi núú ùxí xichi sá níhí cue ñáyiu isràél ñáyiu cùu ñani tnáhá-güedé cuu cuendá-güedé. Te duca<sup>n</sup> quide-güedé



cuëi ñaní tnáhá-güedë ndihí-yu ní cuu ndíi Àbrahám. <sup>6</sup> Te cuëi ñá díú ñàní tnáhá ndíi Melquisèdec cúu ndíi Àbrahám dico ní quehe<sup>n</sup> ndíi Melquisèdec-á<sup>n</sup> ì<sup>n</sup> xichi núú ùxí xichi nchaa sá ñí níhí ndíi Àbrahám. Te ndíi Melquisèdec-á<sup>n</sup> ñí xícá<sup>n</sup> táhú ndíi núú Yá Ndiöxí cuendá ndíi Àbrahám. Te ñíu-ni ndíi Àbrahám-á<sup>n</sup> ñí xáha<sup>n</sup> Yá Ndiöxí xii ndíi sá cáda váha ñaha-gá xii ndíi. <sup>7</sup> Te sa cùnuni iní-ó sá núu ì<sup>n</sup> tée na cáca<sup>n</sup> táhú-dé núú Yá Ndiöxí cuendá ì<sup>n</sup> ñáyiú, te tée-á<sup>n</sup> cúnú-gá-dé. <sup>8</sup> Te cue dútú ñáyiú isràél quéhé<sup>n</sup>-güedë ì<sup>n</sup> xichi núú ùxí xichi nchaa sá ñíhí-yu cùu cuendá-güedë, te cue tée-á<sup>n</sup> cuú-güedë. Te núú tütú Yá Ndiöxí càhí-xí sá ndíi Melquisèdec ndécú-ní ndíi, te duca<sup>n</sup> càhá<sup>n</sup>-xí chi ñá túú tnùhu sá ñí xíhí ndíi. <sup>9-10</sup> Te sá dúcá<sup>n</sup> ñí sáñaha ndíi Àbrahám sá ñí nduu táhú ndíi Melquisèdec, te xíá<sup>n</sup> cada iní-ó sá sá ndecu ndihí ndíi Àbrahám cue ñaní tnáhá ndíi Lèví cue tée cùu dútú, cue tée quehe<sup>n</sup> ì<sup>n</sup> xichi núú ùxí xichi nchaa sá ñíhí ñáyiú isràél cuëi vátá cácu-gá-güedë. Te cada iní-ó sá tnáhá-güedë ní sáha-güedë ndíi Melquisèdec ì<sup>n</sup> xichi núú ùxí xichi nchaa sá ñí níhí ndíi Àbrahám núú ñí nàá ndíi. Te duca<sup>n</sup> càda iní-ó chi cue tée-á<sup>n</sup> cuú-güedë ñaní tnáhá ndíi Àbrahám cuëi vátá cácu-gá-güedë dàvá-á<sup>n</sup>.

<sup>11</sup> Te sá cuendá cue dútú cue tée cùu ñaní tnáhá ndíi Lèví ní ngúndecu ndihí cue ñáyiú isràél tnùhu sá sánú ìchi ñaha xii-yu nàcuáa cáda-yu cundecú-yu. Te ñaní tnáhá ndíi Àrón cúu cuè dútú-á<sup>n</sup>. Te núú dícó cue dútú-á<sup>n</sup> ní ndàcu-güedë cada-güedë nàcuáa cudíu ñáyiú isràél núú Yá Ndiöxí, te ñá túú-gá xíní ñùhu-xi ngúndecu ìngá dútú dàtná ndíi Melquisèdec ní cùu. Te dútú-á<sup>n</sup> ñà túú ní cùu-dé dàtná ní cuu cue ñaní tnáhá ndíi Àrón. <sup>12</sup> Te núú cuè dútú cue tée cùu ñaní tnáhá ndíi Lèví-á<sup>n</sup> ñí ngúndecu ìngá dútú. Te sá dúcá<sup>n</sup> ñí ngúndecu ìngá dútú xíá<sup>n</sup> dacuítí ñí xini ñùhu-xi sá dáma nàcuáa nduu tnùhu sá sánú ìchi ñaha xii-yu nàcuáa cáda-yu cundecú-yu. <sup>13-14</sup> Te ñíu-ni cuendá dútú-á<sup>n</sup> sa

ñíhí-ó tnùhu, te dútú-á<sup>n</sup> cúu Xítohó Jesucristú, te ñá díú ñàní tnáhá ndíi Àrón cúu-gá chi ñaní tnáhá ndíi Jùdá cúu-gá. Te nchaa-o tà xíní ndáá-ó sá ñàní tnáhá ndíi Jùdá cúu-gá, te ndíi Moisés ñá túú tnàhí ná ní càhí ndíi cuendá cue ñaní tnáhá ndíi Jùdá sá cúu-güedë dútú, chi ñí ì<sup>n</sup>-güedë ñá túú ní cùu-güedë dútú ní cùu.

<sup>15</sup> Te vitna cùnuni ndáá iní-ó nàcuáa ní cuu, chi Xítohó Jesucristú cúu-gá ìngá dútú dàtná ní cuu ndíi Melquisèdec. <sup>16</sup> Te ñá díú cuendá tnùhu sá sánú ìchi ñaha xii ñáyiú nàcuáa cáda-yu cundecú-yu duca<sup>n</sup> ní cùu-gá dútú, chi ní cuu-gá dútú cuendá sá cúu-gá Yáá cundecu ní caa ní quíhí<sup>n</sup> chi vá ì<sup>n</sup> nduu te ndihí nihnu-gá. <sup>17</sup> Te duha ní xáha<sup>n</sup> Yá Ndiöxí xii-gá:

Yòhó cúu-n dútú dàtná ní cuu ndíi Melquisèdec,

te cundecu-n nchaa nduu nchaa quíú. Duha ní xáha<sup>n</sup> Yá Ndiöxí xii-gá. <sup>18</sup> Te xíá<sup>n</sup> núu nchaa tnùhu ndéé díhna, tnùhu sá ñí xíndecu ndihí cue dútú ñà túú-gá cúnú-xi vitna chi ñá túú-gá xíní ñùhu-xi te ní ñà túú nà chindèe ñaha-xi. <sup>19</sup> Te ñíu-ni tnùhu-á<sup>n</sup> cúu-xí tnùhu sá ñí chídó tnùní ndíi Moisés canu ìchi ñaha xii ñáyiú nàcuáa cáda-yu cundecú-yu. Te tnùhu-á<sup>n</sup> ñà túú vèdana ní quide-xi nàcuáa chindee-xi ñáyiú cudíu-yu núú Yá Ndiöxí. Dico vitna ní ngúndecu ndihí-o tnùhu ndee ìní sá ìo-gá váha dàcúxí tnùhu ndéé díhna, chi ndècu ndihí-o Xítohó Jesucristú Yáá cúu dútú-ó. Te Yáá-á<sup>n</sup> quidé-gá tnàhà tnùhu-o ndihí Yá Ndiöxí vitna.

<sup>20</sup> Te Yá Ndiöxí ní cáhá<sup>n</sup> ndáá cuítí-gá sá Xítohó Jesucristú cuu-gá dútú. <sup>21</sup> Dico ñá túú dùca<sup>n</sup> ní cáhá<sup>n</sup>-gá cuendá cue ñaní tnáhá ndíi Lèví cue tée ní cuu dútú, cuëi meí òré ní chisaha-güedë ní cuu-güedë dútú. Te cúnahá ní chisaha Xítohó Jesucristú cúu-gá dútú, te Yá Ndiöxí ní xáha<sup>n</sup> ndáá cuítí-gá xii-gá, te duha ní xáha<sup>n</sup>-gá:

Yúhú Dútú Ndiöxí càhá<sup>n</sup> ndáá cuítí-í te vá dáma-í tnùhu càhá<sup>n</sup>-í:

“Yòhó cúú-n dǔtú dàtná ndíi Melquisèdec,

te cundecu-n nì caa nì quíhí<sup>n</sup>.”

Duha ní xáha<sup>n</sup> Yă Ndiǒxí xii Xítóhó Jesucristú. <sup>22</sup> Te Xítóhó Jesucristú quidé-gă nàcuáa cutnùnì ndáá iní-ó sǎ Yă Ndiǒxí cada-gă ingá núú sǎ vǎha sǎ cúú-xí-ó dàtná ní cachí-gă, te xiǎ<sup>n</sup> cúú-xí sǎ ïo-gă vǎha dàcúúxí tnǔhu ní cáhá<sup>n</sup>-gă ndéé díhna. <sup>23</sup> Te ío cuéhé cue ñanì tnáhá ndíi Lèví ní cuu-güedé dǔtú, te duca<sup>n</sup> cuendá sǎ ñà túú ní cùdí-güedé cundecu-güedé chi ní ndihí-güedé ní xíhí. <sup>24</sup> Dico Xítóhó Jesucristú chi vá cùú-gă, chi cundecu-gă nì caa nì quíhí<sup>n</sup> nǔu xiǎ<sup>n</sup> diu-ni-gă cuu-gă dǔtú, te vá yòo ñ<sup>n</sup>-gă cuu dǔtú cada núú-gă. <sup>25</sup> Te núu xiǎ<sup>n</sup> Xítóhó Jesucristú dácăcu nihnu ñaha-gă xii nchoo ñǎyiu núú ùhú núú ndàhú, nchoo ñǎyiu sàndáá iní ñáhá xii-gă, te diu-ni nchoo cùu-o ñǎyiu tnáhá tnúhu ndihí Yă Ndiǒxí, te vá ñ<sup>n</sup> ndùu-gă te cuíta nihnu-o. Te duca<sup>n</sup> chi Xítóhó Jesucristú ñà túú xòcuñí-gă núú Yă Ndiǒxí càhá<sup>n</sup> ndàhú-gă cuendá-ó.

<sup>26</sup> Te Xítóhó Jesucristú cúú-gă Yaá cúú dǔtú cúnùu xini ñuhu-o cundecu ndihí-o, te diu-gă cúú-gă Yaá chindèe chitúu ñaha xii-o, te cùu-gă Yaá ío quide ndáá núú Yă Ndiǒxí, te cùu-gă Yaá cándòo canine chi ñà túú tnàhí cuéchi-gă. Te ñà túú tnàhí quide-gă dàtná quidé nchàa cue ñǎyiu ndècu ichi cuehé ichi duha, te cùu-gă Yaá ní nucúndecu andiu nǔú ndécú Yă Ndiǒxí te yàcá<sup>n</sup> táxí tnùnì-gă. <sup>27</sup> Te ñà túú quide-gă dàtná ní quide cue dǔtú nǐ cunuú nǐ xíndecu, chi cue dǔtú-ǎ<sup>n</sup> ñ<sup>n</sup> nduu ñ<sup>n</sup> nduu ní xóo cahni-güedé quitì ní xóo nduu táhú Yă Ndiǒxí, te díhna-gă cuendá nchaa cuéchi mee-güedé duca<sup>n</sup> nǐ xóo cada-güedé te dàtnùnì duca<sup>n</sup> nǐ xóo cada tucu-güedé cuendá nchaa cuéchi ñǎyiu. Dico Xítóhó Jesucristú chi ñ<sup>n</sup> xito-ni ní xíhí-gă sǎ cúú-xí nchàa ñǎyiu chi duca<sup>n</sup> nǐ sani iní-gă, te vá ñ<sup>n</sup> ndùu-gă duca<sup>n</sup> càda tucu-gă. <sup>28</sup> Te sǎ cuendá nchaa tnúhu ní chídó tnùnì ndíi Moisés xiǎ<sup>n</sup> ní xíndecu cue téé ní cuu

dǔtú cúnùu, te cue téé-á<sup>n</sup> nǐ cuu-güedé cue téé yíca cuéchi-xi. Te sátá dúcá<sup>n</sup> nǐ chídó tnùnì ndíi Moisés nàcuáa cada ñǎyiu, te ní xica cuéhé víhí ndùu te dàtnùnì ní cáhá<sup>n</sup> ndáá cuitì Yă Ndiǒxí sǎ Dèhe-gă cuu-gă dǔtú cúnùu. Te Yaá cúú Dèhe-gă-á<sup>n</sup> nǐ quide-gă nchaa nàcuáa tàú-xi cunduu, te diu-ni duca<sup>n</sup> càda-gă nì caa nì quíhí<sup>n</sup>.

## 8

### *Xítóhó Jesucristú cúú-gă dǔtú cúnùu*

<sup>1</sup> Te Xítóhó Jesucristú Yaá cúú dǔtú cúnùu ndecu ndihí-o cuándaa-gă andiu, te ní ngóo-gă xio cùha Dǔtú Ndiǒxí Yaá ío cúnuu, te tnàhá-gă cúnùu-gă. Te diu cuendá-a cùu-xi sǎ ïo-gă cúnùu ta cáhá<sup>n</sup>-ndí véxi. <sup>2</sup> Te núú ndécú Yă Ndiǒxí cúú-xí nǔú ìí víhí. Te cada iní-ó sǎ cúú-xí ñ<sup>n</sup> vehe te xiǎ<sup>n</sup> ndécú Xítóhó Jesucristú cúú-gă dǔtú, te vehe-á<sup>n</sup> nǐ dácáá mèe Yă Ndiǒxí te ñà díú cuè téé ñuyíu-a. <sup>3</sup> Te sǎ cuendá nchaa tnúhu ní chídó tnùnì ndíi Moisés xiǎ<sup>n</sup> ní xíndecu cue dǔtú cúnùu cuendá sǎ cáhni-güedé quitì nduu táhú Yă Ndiǒxí, te nacani cuendá-güedé núú-gă nchaa dava-gă sǎ nihí-güedé nduu táhú-gă. Te xiǎ<sup>n</sup> nǔu dai ní xini ñuhu-xi sǎ tnàhá Xítóhó Jesucristú cuáñaha-gă ñ<sup>n</sup> sǎ ndúú táhú Yă Ndiǒxí, te táhú-ǎ<sup>n</sup> cúú-xí mèe-gă chi ní xíhí-gă ní cuu-gă dàtná ñ<sup>n</sup> táhú sǎ cúú-xí Yă Ndiǒxí. <sup>4</sup> Te núu nì xíndecu-ni Xítóhó Jesucristú ñuyíu-a te vá cúú-gă dǔtú ní cùu, chi sa ndècu cue dǔtú sǎñaha nchàa sǎ ndúú táhú Yă Ndiǒxí dàtná càhá<sup>n</sup> nchaa tnúhu ní chídó tnùnì ndíi Moisés. <sup>5</sup> Te nchaa sǎ quidé cue dǔtú ñǎyiu isràèl nǔtnahá-xi luha nchaa sǎ quidé Xítóhó Jesucristú Yaá cúú dǔtú cúnùu ndecu andiu. Te quèe ndáá-xi nàcuáa ní xáha<sup>n</sup> Yă Ndiǒxí xii ndíi Moisés cúnàhá tá cùyatni ngúita ndíi dacàa ndíi vehe-gă, te duha ní xáha<sup>n</sup>-gă: “Ío vǎha cada cuendá-n nàcuáa dacàa-n vehe-í dàtná cáá sǎ ní dánèhé ñàhà-í xii-n xitì yucu”, duha ní xáha<sup>n</sup>-gă xii ndíi. <sup>6</sup> Dico vitna chi Xítóhó Jesucristú cúú-gă dǔtú cúnùu, te ío-gă càhnu nduu chiu<sup>n</sup> quide-gă dàcúúxí cue dǔtú cue ñǎyiu isràèl. Te diu Xítóhó

Jesucrìstú cúu-gă Yaá quidé tnàhă tnúhu-o ndîhi Yá Ndiöxí, te duca<sup>n</sup> chi Yá Ndiöxí ío-gá váha ndùu tnúhu ní cáhá<sup>n</sup>-gá xito cùu uú dàcúúxí tnúhu ní cáhá<sup>n</sup>-gá ndéé díhna, te duca<sup>n</sup> ío váha ndùu tnúhu ní cáhá<sup>n</sup>-gá xito cùu uú chi ní cachí-gá sá ìngá núú sã ío-gá váha cada ñaha-gă xii-o vîtna.

<sup>7</sup> Te núu nàcuáa ní cachí Yă Ndiöxí cada ñaha-gă xii-o ndéé díhna ní quide-xi nchaa nacuáa tàú-xi cunduu nàcuáa nduu táhú-ó cùndecu váha-o núú-gă ñá, te ñá túú xîni ñuhu-xi cáhá<sup>n</sup> tucu-gá sá cádá-gă ìngá núú sã váha sá cúu-xí-ó vîtna ní cuu. <sup>8</sup> Te Yá Ndiöxí ñá túú ní cùu váha iní-gá núú ñáyiú isrâél núu xîá<sup>n</sup> ní cáhá<sup>n</sup>-gá cuendá-yu, te duha ní cachí-gá:

Yúhú cúu-í Dútú Ndiöxí, te duha ndùu tnúhu na cáhá<sup>n</sup>-í: Sáá nduu te cada-í ìngá núú sã váha sá cúu-xí cuè ñaní tnáhă ñáyiú isrâél, ndîhi cue ñaní tnáhă ndîi Júdă diu-ni ñáyiú isrâél.

<sup>9</sup> Te tnúhu sá cáhá<sup>n</sup>-í-a ñá túú ñ<sup>n</sup>-ni cuu-xi ndîhi tnúhu sá ñí xáha<sup>n</sup>-í xii cue ñáyiú ní cuu ñaní tnáhă-yu ní xîndecu ndéé sanaha càda-í-yu,

te diu-ni dàvá-á<sup>n</sup> ñí quide yica-í ní ndeñuhu-í-yu nació<sup>n</sup> Ègíptú,

te ñá túú ní cuiní-yu tñí-yu tnúhu ní xáha<sup>n</sup>-í xii-yu cuendá duca<sup>n</sup> càda váha-í-yu,

te xîá<sup>n</sup> núu ní dáñá ñìhnu-í-yu ñá túú-gă ní quide cuendá-í-yu.

<sup>10</sup> Te na sàá nduu te duha ndùu tucu ìngá núú sã váha cada-í cue ñáyiú isrâél.

Te yúhú cada-í nàcuáa cutnùní váha iní-yu nàcuáa cuiní-í cadá-yu,

te duca<sup>n</sup> ñí yuhu ñí iní-yu cadá-yu.

Te yúhú Yă Ndiöxí quindaha-í-yu,

te mèe-yu cuú-yu ñáyiú cùu cuendá-í.

<sup>11</sup> Te dàvá-á<sup>n</sup> chi ní ñáyiú cùu ndî meé-yu,

te ní cuè dava-gă ñáyiú vá cùtnúhu tnáhă-yu sá nátùha ñahă-yu xii-í,

chi dàvá-á<sup>n</sup> nchaa ñáyiú cundecu ndîhi ñahă-yu xii-í,

cuèi ñáyiú cùnuu te cuèi ñáyiú ñá túú cùnuu.

<sup>12</sup> Te dàvá-á<sup>n</sup> cada càhnu iní-í nchaa sá cuèhé sá dúhá quidé-yu,

te vá ñ<sup>n</sup> ndùu-gá ndacu iní-í nchaa sá quidé-yu.

Duha ní cachí Yă Ndiöxí cuendá ñáyiú isrâél. <sup>13</sup> Te sá dúcá<sup>n</sup> ñí cáhá<sup>n</sup> Yă Ndiöxí sá cádá-gă ìngá núú sã váha sá cúu-xí ñáyiú xîá<sup>n</sup> cùtnùní sá tnúhu sá ñí cáhá<sup>n</sup>-gá díhna ñá túú-gă xíní ñuhu-xi. Te cada iní-ó sã tnúhu-á<sup>n</sup> cúu-xí ñ<sup>n</sup> sá ñí cunaha ndècu te ñá túú-gă nándîhi-xi te cuíta-ná-xi, duca<sup>n</sup> sãtnahă-xi cùu tnúhu sá ñí cáhá<sup>n</sup>-gá ndéé díhna.

## 9

### *Cuendá vehe Yá Ndiöxí*

<sup>1</sup> Te tnúhu sá ñí cáhá<sup>n</sup> Yă Ndiöxí ndéé díhna cùu-xi cuendá nàcuáa cada ñáyiú isrâél chiñuhu ñahă-yu xii-gă, ndîhi cuendá vehe-gá caa ñuyíú-a. <sup>2</sup> Te ñáyiú isrâél ní dácá-yu vehe Yá Ndiöxí, te vehe-á<sup>n</sup> ñí cuu-xi vehe dóó te ní xúhu<sup>n</sup> nehu xítí-xi. Te cuártú díhna ní xínani-xi cuártú ní cuu íí, te xîá<sup>n</sup> ñí xîndecu ñ<sup>n</sup> sá ndéé dité-xi sá ñí cándodó ñ<sup>n</sup> caa candíl núú dité-xi, te ní xínutñí ñ<sup>n</sup> mèsá ní xóo códó pàá ní xóo nduu táhú Yă Ndiöxí.

<sup>3</sup> Te cuártú cúu úú ní xínani-xi cuártú ní cuu íí víhí-gă. <sup>4</sup> Te xítí cuártú-á<sup>n</sup> ñí xínutñí ñ<sup>n</sup> sá ñí cuáha mee-ni díhú<sup>n</sup> cuáá<sup>n</sup> te núú xîá<sup>n</sup> ní xóo cahmi-güedé dúsa sá sàhá<sup>n</sup> tnámí. Te diu-ni xîá<sup>n</sup> ñí xîndecu tucu ñ<sup>n</sup> càjá ní cuu mee-ni díhú<sup>n</sup> cuáá<sup>n</sup> te xítí càjá-á<sup>n</sup> ñí xúhu<sup>n</sup> ñ<sup>n</sup> lítu ní cuáha mee-ni díhú<sup>n</sup> cuáá<sup>n</sup>, te xítí lítu-á<sup>n</sup> ñí xúhu<sup>n</sup> mànáá sá ñí xóo caxí-yu dàvá-á<sup>n</sup>. Te diu-ni xítí càjá-á<sup>n</sup> ñí xúhu<sup>n</sup> tñudî ndîi Àrón sá ñí saa itá-xi, ndîhi yúú sã ñí xîndé tnúhu ní cáhá<sup>n</sup> Yă Ndiöxí nàcuáa cada ñáyiú. Te duha ní xínani càjá-á<sup>n</sup>: Càjá sá ñíhú tnúhu ní cáhá<sup>n</sup> Yă Ndiöxí sá cúu-xí ñáyiú, duha ní xínani-xi. <sup>5</sup> Te núú càjá-á<sup>n</sup> ñí cándodó úú tnáhă sá ñí cadúha-yu, te xîá<sup>n</sup> cáá-xí dàtná cáá espíritú xínú cuèchi núú Yă Ndiöxí. Te cuendá úú xîá<sup>n</sup> ní cutnùní iní-yu sá ío càhnu cuu Yá Ndiöxí, te sá ñí cadúha-yu-á<sup>n</sup> ndéé ndíxí<sup>n</sup>-xi, te

ndíxí<sup>n</sup>-xi-á<sup>n</sup> dǎhu-xi xio xio núú quidé càhnu iní Yǎ Ndiǒxí nchaa yíca cuèchi ñáyiu, dico vá cúú-gǎ cáhá<sup>n</sup>-í cuèndá nchaa dava-gá xiǎ<sup>n</sup> vitna.

6 Te nchaa xiǎ<sup>n</sup> ní xíndecu xití vehe Yá Ndiǒxí, te cue dútú ní xóo quíhu-güedé #<sup>n</sup> nduu #<sup>n</sup> nduu xití cuàrtú díhna ní xóo cada-güedé nàcuáa tàú-güedé cada-güedé sá cúú-xí Yǎ Ndiǒxí. 7 Te cuàrtú cúú ùú-á<sup>n</sup> chí mee-ni dútú cúnùu ní xóo quíhu-dé #<sup>n</sup> xito-ni ndi tnahá cuíá. Te ndi tnahá òré duca<sup>n</sup> ñí xóo quíhu dútú cúnùu-á<sup>n</sup> te ní xóo canehé-dé níñí ñí xóo quíhu ní xóo nduu táhú Yǎ Ndiǒxí. Te duca<sup>n</sup> ñí xóo cada dútú-ǎ<sup>n</sup> cuèndá sá Yǎ Ndiǒxí cada càhnu iní-gá nchaa yíca cuèchi mee-dé, ndihi nchaa yíca cuèchi ñáyiu. 8 Te sá dúcá<sup>n</sup> mée-ni dútú cúnùu ní xóo quíhu-dé xití cuàrtú ní cuu íí-gǎ-á<sup>n</sup>, xiǎ<sup>n</sup> Espíritú Yǎ Ndiǒxí quidé-xí cùtnuní iní-ó sǎ ñini duca<sup>n</sup> ní xíndecu vehe-á<sup>n</sup> ñí xóo cadá-yu nàcuáa ní xóo cúnaha Yǎ Ndiǒxí cadá-yu. Te xiǎ<sup>n</sup> cùtnuní sá vǎtá sàa-gá nduu cáhá<sup>n</sup> ndihí-yu Yǎ Ndiǒxí nàcuáa tàú-xi cunduu. 9 Te sá dúcá<sup>n</sup> ñí xíndecu vehe-á<sup>n</sup>, ndihi sá dúcá<sup>n</sup> ñí xóo cada nchaa cue dútú-ǎ<sup>n</sup>, xiǎ<sup>n</sup> cùtnuní iní-ó nàcuáa quide Yǎ Ndiǒxí vitna, chí nchaa quití ní xóo cahni cue dútú-ǎ<sup>n</sup> ñí xóo nduu táhú Yǎ Ndiǒxí, ndihi nchaa dava-gá sá ñí xóo nduu táhú-gǎ ñá túú ní quide-xi nacuáa nduu ndoo nduu nine iní cue ñáyiu nàcuáa cutnùní iní-yu sá ñà túú-gǎ cuèchi-yu ndècu núú Yǎ Ndiǒxí. 10 Te sá dúcá<sup>n</sup> ñí xóo cada nchaa dútú-ǎ<sup>n</sup> ñí níhí tnahá-xí ndihi nchaa tnúhu sá dánèhé ñáhá xii ñáyiu ná cúú sǎ cáxi-yu ndihi ná cúú sǎ cúú còhó-yu ndihi nàcuáa ndàhá-yu. Te tnúhu-á<sup>n</sup> ñí cuu-xi mee-ni sǎ ñí sanu ichi ñaha xii-yu nàcuáa cundecú-yu ñuyíú-a. Te tnúhu-á<sup>n</sup> ñí nándíhi-xi ndéé ní sáá nduu ñí nadama Yǎ Ndiǒxí tnúhu-á<sup>n</sup> cuèndá sá vǎ dúcá<sup>n</sup>-gǎ cadá-yu cundecú-yu.

11 Te Xítohó Jesucristú ní quixi-gá ñuyíú-a, te diu-gá cúú-gǎ Yaá cúú dútú cúnùu, te xiǎ<sup>n</sup> núu quide-gá nchaa sá vǎha sá cúú-xí-ó. Te vitna

ní nucúndecu-gá núú ïo vii ïo váha càa, te núú ndécú-gǎ-á<sup>n</sup> ñà túú cùu-xi #<sup>n</sup> vehe sá ñí dácáa cuè téé ñuyíú-a. 12 Te cada iní-ó sǎ Xítohó Jesucristú cuánguihu-gá xití cuàrtú núú ñí cuu íí víhí dàtná ní xóo cada dútú cúnùu ní xíndecu ndéé sanaha, chí ní nucúndecu-gá núú ndécú Yǎ Ndiǒxí. Dico ñá túú ní quide-gá dàtná ní xóo cada dútú cúnùu ní xíndecu ndéé sanaha, chí dútú-ǎ<sup>n</sup> òré ní xóo quíhu-dé xití cuàrtú ní cuu íí-gǎ-á<sup>n</sup>, te ní xóo canehé-dé níñí chivá ndihi níñí chéhlu ní xóo quíhu. Dico Xítohó Jesucristú chí níñí méé-gǎ ní sati ní xihí-gá núú cùrúxí, te xiǎ<sup>n</sup> duu<sup>n</sup> duu<sup>n</sup> cuáhá<sup>n</sup>-gá ní nucúndecu-gá núú ndécú Yǎ Ndiǒxí. Te sá dúcá<sup>n</sup> ñí quide-gá xiǎ<sup>n</sup> ní naníhí táhú-ó. 13 Te nchaa ñáyiu ní xóo cada nàcuáa vá cúú-gǎ-yu ñáyiu ní cuu íí, ñáyiu-á<sup>n</sup> ñí xóo códó ñáhá cuè dútú níñí ndicutu, ndihi níñí chivá, ndihi yáa cúnú chéhlu quití sàhni-güedé cuèndá nduu íí tucú-yu. 14 ¡Dico níñí Xítohó Jesucristú chí ío-gá nándíhi-xi sá cúú-xí nchòo ñáyiu xíndecu vitna! Te cuèndá níñí-gǎ-á<sup>n</sup>, chí Espíritú Yǎ Ndiǒxí sá ndécú nchaa nduu nchaa quíú ñí cuu #<sup>n</sup>nuu-xi ndihi Xítohó Jesucristú sá cúú cùú-gá cuèndá cuu-gá dàtná #<sup>n</sup> táhú sǎ cúú-xí Yǎ Ndiǒxí cuèi cùu-gá Yaá ñá túú tnàhí cuèchi-xi, te ní sati níñí-gǎ te ní xihí-gá. Te cuèndá xiǎ<sup>n</sup> ní cutnùní iní-ó sǎ Yǎ Ndiǒxí ní quide càhnu iní-gá nchaa sá ñà túú vǎha ní quide-o, te ní nduu ndoo ní nduu nine iní-ó. Te duca<sup>n</sup> ñí nduu ndoo ní nduu nine iní-ó cuèndá sá ndácú-ó cúnùu cuechi-o núú Yǎ Ndiǒxí Yaá ndécú nchaa nduu nchaa quíú.

15 Te Xítohó Jesucristú ní quide ndáa-gá núú Yǎ Ndiǒxí cuèndá cue ñáyiu ndècu ñuyíú-a. Te cuèndá xiǎ<sup>n</sup> Yǎ Ndiǒxí cada-gá ingá núú sǎ vǎha sá cúú-xí-yu dàtná ní cachí-gá, te duca<sup>n</sup> càda-gá sá cuèndá nchaa ñáyiu ní cáhá<sup>n</sup>-gá cundecu ndihi-gá, chí ñáyiu-á<sup>n</sup> nduu táhú-yu cundecu ndihi váha ñàhá-yu xii-gá ñí caa ñí quíhí<sup>n</sup> chí duca<sup>n</sup> ñí cachí-gá, te duca<sup>n</sup>



chi Xítohó Jesucristú ní xíhí-gá núú cùrúxí cuendá sá Yă Ndiöxí cada cãhnu iní-gá nchaa yíca cuëchi-yu, nchaa cuëchi sá nǐ quidé-yu cútnàhá ní cunuu tnúhu sá nǐ cáhá<sup>n</sup>-gá díhna. <sup>16</sup> Te nchoo xìní-ó sá nǔu ì<sup>n</sup> téé na càdúha ì<sup>n</sup> tutú nàcuáa cada ñáyíu dàcãhñu-yu nchaa sá ndécú ndìhi-dé, te tutú-á<sup>n</sup> xíní ñùhu-xi ndéé ná yãha nduu cùú-dé. <sup>17</sup> Te ñá túú tàú-xi cada ñáyíu nàcuáa càhá<sup>n</sup>-xi núú tütú-á<sup>n</sup> nini ndècu téé ní cadúha, dico sátá ná yãha cuú-dé te cadá-yu nàcuáa càhá<sup>n</sup>-xi. <sup>18</sup> Te cuëi tnúhu ní cáhá<sup>n</sup> Yă Ndiöxí ndéé díhna nàcuáa cada váha-gá ñáyíu, te ñu-ni ndìhi níñí nǐ cundáá-xi chi ní sahani-güedé quiti te ní sati níñí-güedi. <sup>19</sup> Te ndí Moisés ní cáhá<sup>n</sup> ndodo ndí núú nchaa ñáyíu nàcuáa ní cachí Yă Ndiöxí cadá-yu, te nàcuáa-ni ndùu tnúhu ní chídó tnùní ndí núú tütú ndí ní cáhá<sup>n</sup> ndí, te ní dácá ndí ndute níñí chëhlu ndìhi níñí chívà lǐhli, te ní quehe<sup>n</sup> ndí ì<sup>n</sup> dité yutnu nani hisópó ndìhi luha idi ticuèhé, te ní chindóyo ndí níñí-ã<sup>n</sup>. Te ní sódo ndí núú tütú ndéé tnúhu Yă Ndiöxí sá nǐ chídó tnùní ndí-á<sup>n</sup>, te tnàhá cue ñáyíu xǐndecu-á<sup>n</sup> nǐ chúcú ndí. <sup>20</sup> Te ní xáha<sup>n</sup> ndí Moisés xií-yu: “Cuendá níñí-a ní cundáá sá Yă Ndiöxí cada ñaha-gã xii-ndo sá váha chi duca<sup>n</sup> ní cachí-gá cada-gá sá cúú-xí-ndó”, duha ní xáha<sup>n</sup> ndí xií-yu. <sup>21</sup> Te ñu-ni duca<sup>n</sup> nǐ quide tucu ndí ní chúcú ndí níñí vehe-gá ndìhi nchaa sá nándìhi-güedé òré chíñùhu-güedé Yă Ndiöxí ndécú xítí vehe-gá-á<sup>n</sup>. <sup>22</sup> Te tnúhu ní chídó tnùní ndí Moisés càchí-xi sá mée-ní níñí chucu-güedé nchaa sá cãnehe chù<sup>n</sup>-güedé òré chíñùhu-güedé Yă Ndiöxí, te sacú-nã te ndìhi ndoo nchaa xíã<sup>n</sup> chucu-güedé níñí ni cùu. Te dacuití nǐ xini ñuhu-xi sã cáti níñí cuendá duca<sup>n</sup> càda cahnu iní Yă Ndiöxí nchaa yíca cuëchi ñáyíu.

*Xítohó Jesucristú ní xíhí-gá núú cùrúxí cuendá sá vã cùndècu-gá cuëchi-ò núú Yă Ndiöxí*

<sup>23</sup> Te sá cuendá sá nǐ xíhí Xítohó Jesucristú núú cùrúxí, xíã<sup>n</sup> ñá túú-gã cuëchi-ò ndècu núú Yă Ndiöxí.

Te cuendá nchaa sá nǐ xíhí xítí vehe-gá sá nǐ dácáá ñáyíu isràél xíã<sup>n</sup> cútnùní iní-ó nàcuáa quide-xi núú ndécú-gã. Te dacuití nǐ xini ñuhu-xi sã cáhni-güedé cue quiti ní cachí Yă Ndiöxí cuendá nduu íí nchaa sá nǐ xíhí xítí vehe-gá-á<sup>n</sup>. Te cuëi duca<sup>n</sup> nǐ sahani-güedé cue quiti-á<sup>n</sup> dico ñá túú ní quide-xi nacuáa ngúndecu váha-o núú Yă Ndiöxí. Dico Xítohó Jesucristú ní xíhí-gá, te sá nǐ xíhí-gá xíã<sup>n</sup> ní quide-gá nàcuáa ngúndecu váha-o núú Yă Ndiöxí. <sup>24</sup> Te Xítohó Jesucristú cuánda-gã andíu núú ndécú Yă Ndiöxí càhá<sup>n</sup> ndàhú-gã cuendá-ó, te Xítohó Jesucristú chi ñá díú ì<sup>n</sup> vehe ní dácáá cue téé ñuyíú-a cuánguihu-gá. Te vehe Yă Ndiöxí sá nǐ dácáá cue ñáyíu isràél ñuyíú-a ndéé sanaha, ndìhi nchaa nàcuáa ní xóo cada-güedé xítí vehe-gá-á<sup>n</sup> xíã<sup>n</sup> cútnùní iní-ó nàcuáa quide-xi núú ndécú-gã. <sup>25</sup> Te dúttú cùnùu núú ñáyíu isràél ní xóo quíhu-dé núú cuíá núú cuíá xítí cuártú ní cuu íí víhí-gã-á<sup>n</sup>, te ní xóo canehe-dé níñí nǐ xóo quíhu xítí cuártú-á<sup>n</sup> dico ñá díú níñí mée-dé. Dico Xítohó Jesucristú chi ñá túú dùca<sup>n</sup> ní quide-gá chi ì<sup>n</sup> xito-ni ní sati níñí-gã te ní xíhí-gá. <sup>26</sup> Chi núu ní xíhí-gá nuu núu te ndéé cútnàhá ní ngáva ñuyíú duca<sup>n</sup> ngüíta-gã cada-gã ní cùu, te vitna ta ndìhi nduu cuáhã<sup>n</sup> ní quixi-gã ñuyíú-a ní xíhí-gá ì<sup>n</sup> xito-ni cuendá cuu-gã dàtná ì<sup>n</sup> táhú sã cúú-xí Yă Ndiöxí, te duca<sup>n</sup> nǐ quide-gã cuendá sá vã cùndècu-gã cuëchi ñáyíu núú Yă Ndiöxí. <sup>27</sup> Te nchoo cue ñáyíu ñuyíú-a chi ì<sup>n</sup> xito-ni cuú-ó te dàtnùní duca<sup>n</sup> te cada ndáá Yă Ndiöxí cuëchi-o. <sup>28</sup> Te duca<sup>n</sup> sãtnahã-xi cùu Xítohó Jesucristú chi ì<sup>n</sup> xito-ni ní xíhí-gá cuendá sá vã cùndècu-gã cuëchi ñáyíu núú Yă Ndiöxí, te duca<sup>n</sup> nǐ cuu ní xíhí-gá chi mee-gã duca<sup>n</sup> nǐ cachí-gã cunduu. Te quixi tucu Xítohó Jesucristú ñuyíú-a dico ñá díú-gã sá cadá-gã cuendá sá vã cùndècu-gã cuëchi ñáyíu núú Yă Ndiöxí, chi quixi-gã nacuaca-gã nchaa ñáyíu ndètu ñaha xii-gã cuendá

cundecú-yu ndihi-gá ni caa ni quíhí<sup>n</sup>.

## 10

<sup>1</sup> Te nchaa tnúhu ní xáha<sup>n</sup> ndíi Moisés xii ñáyiú isràél cada-yu, nchaa tnúhu-á<sup>n</sup> ñi quide-xi ní cutnùní luha iní-yu nàcuáa cada Yá Ndiöxí cada váha ñaha-gã xii-o vitna. Dico ñá díú mèi nacuáa ní xáha<sup>n</sup> ndíi Moisés xii ñáyiú quide Yá Ndiöxí vitna chi dâma quide-gá. Te nchaa tnúhu ní cáhá<sup>n</sup> ndíi Moisés ñá túú ní ndàcu-xi cada-xi nacuáa cundáa nchaa ñáyiú tûha ñaha xii Yá Ndiöxí cuèi ní xóo cahni-güedé quiti ní xóo nduu táhú-gã núú cuíá núú cuíá. <sup>2</sup> Te núú dîcô sá ñi xóo cahni-güedé quiti ní xóo nduu táhú Yá Ndiöxí ní quide-xi nacuáa nduu ndoo nduu nine iní cue ñáyiú, te vá cáhni-gã-güedé cue quiti-á<sup>n</sup> nduu táhú-gã ní cùu, te duca<sup>n</sup> te cutnùní iní-yu sá ñà túú-gã cuéchi-yu ndècu núú Yá Ndiöxí ní cùu. <sup>3</sup> Te sá dúcá<sup>n</sup> ñi xóo cahni-güedé quiti ní xóo nduu táhú Yá Ndiöxí núú cuíá núú cuíá, xíã<sup>n</sup> ní xóo ndacu iní cue ñáyiú nchaa sá cuèhé sá dúhá ñi xóo cada-yu. <sup>4</sup> Te duca<sup>n</sup> chi níñi ndicutu-á<sup>n</sup> ndihi níñi chivá-á<sup>n</sup> ñà túú ní xóo ndacu-xi cada-xi nàcuáa vá cündècu cuéchi-yu núú Yá Ndiöxí.

<sup>5</sup> Te xíã<sup>n</sup> núu cútnàhá ní quexìo Xítohó Jesucristú ñuyíú-a ní xáha<sup>n</sup>-gã xii Yá Ndiöxí:

Yòhó Tătà-í, ñá túú ndùu vétú váha iní-n sá sàhni-güedé quiti ndùu táhú-n,

te ni ñá túú ndùu vétú váha tucu iní-n cuendá nchaa dava-gá sá táxi-güedé ndúú táhú-n,

núu xíã<sup>n</sup> ní quide túha-n yiqui cuñú-í cuendá yúhú cuú-í te nduu táhú ñáhá-n xii-í.

<sup>6</sup> Te ni ñà túú ndùu vétú váha iní-n cuendá quiti sàhmi-güedé ndúú táhú-n te ni ñà túú ndùu vétú váha iní-n cuendá nchaa dava-gá sá táxi-güedé ndúú táhú-n cuendá sá vá cündècu-gá cuéchi ñáyiú núú-n.

<sup>7</sup> Núu xíã<sup>n</sup> yúhú ní cachí-í xii yòhó Tătà-í Dútú Ndiöxí sá yúhú véxi-í ñuyíú-a cada-í nchaa sá

cuiní-n cada-í dàtná yódó tnùnì cuendá-í núú tütú-n.

Duha ní xáha<sup>n</sup> Xítohó Jesucristú xii Tătá-gã Dútú Ndiöxí. <sup>8</sup> Te Xítohó Jesucristú díhna-gá ní xí-gá Yá Ndiöxí Yaá cúú Tătá-gã: “Yòhó Tătà-í ñá túú ndùu vétú váha iní-n cuendá quiti sàhni-güedé ndúú táhú-n, ndihi cuendá quiti sàhmi-güedé ndúú táhú tucu-n cuendá sá vá cündècu-gá cuéchi ñáyiú núú-n, ndihi cuendá nchaa dava-gá táhú sá táxi-güedé xii-n ñà túú ndùu vétú váha iní-n cuendá nchaa xíã<sup>n</sup>”, duha ní xáha<sup>n</sup> Xítohó Jesucristú xii Tătá-gã Dútú Ndiöxí.

Te duca<sup>n</sup> ñi xáha<sup>n</sup>-gã cuèi núú tütú ndíi Moisés yódó tnùnì sá dúcá<sup>n</sup> cada-güedé. <sup>9</sup> Te sá táxi-güedé te ní xáha<sup>n</sup> tucu-gá xii Tătá-gã Dútú Ndiöxí: “Yòhó Tătà-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuiní-n”, duha ní xáha<sup>n</sup>-gã xii Tătá-gã. Te sá dúcá<sup>n</sup> ñi cáhá<sup>n</sup> Xítohó Jesucristú xíã<sup>n</sup> ní cutnùní sá ñà túú-gã xini ñuhu-xi duca<sup>n</sup> cada-güedé cahni-güedé nchaa quiti-á<sup>n</sup>, te duca<sup>n</sup> chi mee Xítohó Jesucristú ní xihí-gá ní cuu-gá dàtná ñi táhú sá cúú-xí Yá Ndiöxí, te duca<sup>n</sup> ñi cuu chi duca<sup>n</sup> tnàhí ní cachí Yá Ndiöxí cunduu. <sup>10</sup> Te Xítohó Jesucristú ní quide-gá nàcuáa ní cuiní Yá Ndiöxí cada-gá, chi ní xihí-gá núú cùrúxí chi duca<sup>n</sup> ñi cuiní méé-gã cunduu, te ñi xito-ni ní xihí-gá sá cuendá nchaa ñáyiú, te cuendá xíã<sup>n</sup> núu ndècu yíñuhu-o núú-gã vitna.

<sup>11</sup> Te cue dútú ñáyiú isràél chi ñi nduu ñi nduu ní xóo cahni-güedé quiti ní xóo nduu táhú-gã, te ñá túú ní dâma-güedé nàcuáa ní xóo cada-güedé. Te nchaa sá ñi xóo cada-güedé-á<sup>n</sup> ñà túú ní quide-xi nacuáa vá cündècu-gá cuéchi ñáyiú núú Yá Ndiöxí. <sup>12</sup> Dico Xítohó Jesucristú ní cachí-gá sá cúú cúú-gá, te ní xihí-gá núú cùrúxí cuendá nchaa yíca cuéchi nchaa nchoo ñáyiú ndècu ñuyíú-a. Te sá táxi-güedé te dàtnùnì ní ngóo-gá xio cùha Dútú Ndiöxí táxi tnùnì-gá, te vá ñi ndùu ñi quíú-gã te cuú-gá. <sup>13</sup> Te díu-ni xíã<sup>n</sup> cundècu-gá cundetu-gá ndéé sáá nduu cànehe nchaa sá cúú ùhú iní

ñáhá xii-gá sá yíñùhu núú-gă. <sup>14</sup> Te cuendá sá nǐ xihí Xítohó Jesucristú ñ<sup>n</sup> xito-ni xiá<sup>n</sup> ní cuu-gá dàtná ñ<sup>n</sup> táhú sá cúú-xí Yă Ndiöxí, xiá<sup>n</sup> ní quide-xi sá ncháá ñăyiu cùu cuendá-gă ñá túú-gă ná cumánǐ-yu núú-gă nǐ caa nǐ quíhí<sup>n</sup>. <sup>15</sup> Te mee Espíritú Yă Ndiöxí càhá<sup>n</sup> ndáá-xi nàcuáa ní càhá<sup>n</sup>-gă cuendá-ó, te duha ní càhá<sup>n</sup>-gă:

<sup>16</sup> Sáa nduu te cada-í nchaa ñăyiu nàcuáa na càhá<sup>n</sup>-í-a, te cada-í nàcuáa cutnùnǐ iní-yu tnúhu sá dánèhé-í-yu tnúhu sá cánúichi ñaha xií-yu nàcuáa cadá-yu cundecú-yu,

te cada tucu-í sá tñǐ-yu nchaa tnúhu-á<sup>n</sup>.

Duha ní cachí-gă. <sup>17</sup> Te ní cachí tucu-gă:

Te vá ñ<sup>n</sup> ndùu ñ<sup>n</sup> quíú-gă ndacu iní-í sá quidé sàá iní-yu tnúhu-í,

te nǐ vá ñ<sup>n</sup> ndùu ñ<sup>n</sup> quíú-gă te ndacu iní-í nchaa sá cuèhé sá dúhá quidé-yu.

Duha ní càhá<sup>n</sup> Yă Ndiöxí càchí Espíritú-gă. <sup>18</sup> Te sá dúcá<sup>n</sup> quide cahnu iní Yă Ndiöxí nchaa cuéchi-o, núu xiá<sup>n</sup> ñá túú-gă xínǐ ñùhu-xi cuú quiti nduu táhú-gă cuendá nchaa sá cuèhé sá dúhá quide-o.

### *Tàú-ó sǎ tnàhá tnúhu-o ndìhi Yă Ndiöxí*

<sup>19</sup> Te cue dútú nǐ xóo cunuu nùú ñăyiu israél cue téé-á<sup>n</sup> nǐ xóo quíhu-güedé xití cuàrtú ní cuu íí víhí-gă. Dico nchoo cue ñăyiu ndècu ichi Xítohó Jesucristú vitna tàú-ó sǎ nǐ yuhu nǐ iní-ó tnàhá tnúhu-o ndìhi Yă Ndiöxí. Te cuu tnahá tnúhu-o ndìhi-gă chi Xítohó Jesucristú ní sati níñǐ-gă te ní xihí-gă núú cùrúxí. <sup>20</sup> Te cada iní-ó sǎ dǒó sǎ nǐ xíndedí nàcuáa ní xóo quíhu-güedé xití cuàrtú ní cuu íí víhí-gă-á<sup>n</sup> nǐ xócuñǐ, te duca<sup>n</sup> càda iní-ó chi Xítohó Jesucristú ní xihí-gă cuendá nchoo ñhí-ó nàcuáa cada-o ngündecu váha-o sǎ cúú-xí-gă. <sup>21</sup> Te ñiu-gă cúú-gă Yaá cúú dútú-ó, te ñiu-gă cúú-gă Dútú cùnùu ndecu-gă núú ndécú Yă Ndiöxí. <sup>22</sup> Núu xiá<sup>n</sup> xínǐ ñùhu-xi sá ño tnahá tnúhu-o

ndìhi Yă Ndiöxí, te vá cánǐ ñ<sup>n</sup> cani úú iní-ó, te ío váha quindáá iní-ó-gă chi ñiu-gă ní ndada ndoo ní ndada nine-gă iní-ó cuendá nchoo cùnùnǐ iní-ó sǎ ñà túú-gă cuéchi-o ndècu núú-gă. Te ní sandute-o cuendá sá dúcá<sup>n</sup> nǐ nduu ndoo ní nduu nine iní-ó. <sup>23</sup> Te nchoo càhá<sup>n</sup> ndáá-ó sǎ ndécú ndìhi-o tnúhu ndee iní sá ndúú táhú-ó cündecu ndìhi-o Yă Ndiöxí, te xínǐ ñùhu-xi sá vǎ dáñá ndèé-ó cànchicú<sup>n</sup> ñihnu-o tnúhu ndee iní-á<sup>n</sup> chi Yă Ndiöxí cada-gă nàcuáa ní cachí-gă sá cúú-xí-ó. <sup>24</sup> Te xínǐ ñùhu-xi cuhu<sup>n</sup> iní tnàhá-ó te chindee tnàha-o nacuáa duca<sup>n</sup> cùu iní tnàhá-gă-ó, te cada-o mèe-ni sá vǎha. <sup>25</sup> Te nchoo vǎ dáñá ndèé-ó nàtacá-ó nùú dácuàha-o tnúhu Yă Ndiöxí, te vá cadá-ó dàtná xiquide davá-yu ñá túú-gă cuini-yu quixí-yu núú dácuàha-o tnúhu-gă. Chi xínǐ ñùhu-xi sá cuàha tnàha-o tnúhu ndee iní canchicú<sup>n</sup> ñihnu-o ñchi-gă, te uu<sup>n</sup>-gă duca<sup>n</sup> tàú-xi cada-o vitna ta cuyatni nduu quixi tucu Xítohó Jesucristú ñuyúú-a.

<sup>26</sup> Te cue ñăyiu sa ní tecú tnùnǐ nàcuáa càhá<sup>n</sup> tnúhu Yă Ndiöxí te núu na ngüita-yu ñucùu<sup>n</sup> cadá-yu nándǐ sá cuèhé sá dúhá, te àú<sup>n</sup> nǎ cuu ní xihí Xítohó Jesucristú cuendá-yu, te nǐ vǎ yǒo ñ<sup>n</sup>-gă cuú cuendá sá vǎ cündecu-gă cuéchi-yu núú Yă Ndiöxí.

<sup>27</sup> Te núu duca<sup>n</sup> na cadá-yu nándǐ sá cuèhé sá dúhá, te ío quiyùhú iní-yu nàcuáa cada ñaha Yă Ndiöxí xií-yu. Chi nchaa ñăyiu cùu úhú iní ñáhá xii-gă daquihí<sup>n</sup> ñáhá-gă xií-yu núú ñùhú núú càyú núú ño ndohó-yu. <sup>28</sup> Te nchaa ñăyiu ní xóo daquèe tihú tnúhu ní càhá<sup>n</sup> ndí Moisés, te núu ndècu úú àdi únǐ ñăyiu càhá<sup>n</sup> ndáá sá dúcá<sup>n</sup> nǐ dáquèe tihú-yu tnúhu ní càhá<sup>n</sup> ndí, te vá yǒo nǐ xóo cundàhú iní ñáhá xii nchaa ñăyiu duca<sup>n</sup> nǐ xóo cada chi ní xóo cahni ñaha-güedé. <sup>29</sup> Te núu duca<sup>n</sup> nǐ ndoho cue ñăyiu duca<sup>n</sup> nǐ dáquèe tihú tnúhu ní càhá<sup>n</sup> ndí Moisés-á<sup>n</sup>, te uu<sup>n</sup>-gă ndoho cue ñăyiu dàquee tihú ñáhá xii Xítohó Jesucristú Yaá cúú Dèhe Yă Ndiöxí ñiu-ni ñăyiu càchí sá ñà túú nándìhi níñǐ-gă. Te

níñí-gă-á<sup>n</sup> nǐ sati, te ní xíhí-gá, te duca<sup>n</sup> nǐ cuu cuendá cada Yá Ndiöxí ingá núú sǎ vǎha sǎ cúú-xí nchòo ñáyiú ndècu ñuyíú-a dàtná ní cachí-gá cada-gá. Te diu-ni cuendá níñí-gă-á<sup>n</sup> nǐ nduu ndoo ní nduu ñine iní cue ñáyiú-á<sup>n</sup> ní cùu, te diu-ni ñáyiú-á<sup>n</sup> càhá<sup>n</sup> úhú-yu Espiritú Yá Ndiöxí sǎ chindèe chítúu ñaha xii-o. <sup>30</sup> Te nchoo sǎ naha-o sǎ Yá Ndiöxí càchí-gá ñ<sup>n</sup> xichi núú tütú-gá: “Yúhú cada-í te nacháhu ñáyiú nchaa sǎ quidě-yu, te duha càhá<sup>n</sup>-í chi nachinaa-í cuendá nchaa sǎ quidě-yu-á<sup>n</sup>”, duha càchí-gá. Te sa nàha tucu-o nacuáa càhá<sup>n</sup>-xi núú tütú-gá núú càchí-xi: “Yá Ndiöxí cada ndáá-gá cuendá nchaa sǎ quidé ñáyiú cùu cuendá-gá”, duha càchí-xi núú tütú-gá. <sup>31</sup> Te ío ndàhú ndoho cue ñáyiú na dāndoho ñaha Yá Ndiöxí, te diu-gá cúú-gǎ Yaá cúnùu nchaa nduu nchaa quíú!

<sup>32</sup> Te chí dándàcu iní nàcuáa ní quide-ndo cǔtnàhá vitna cuu saa ní tecú tnùnín-dó tnùhu Yá Ndiöxí, chí dāvá-á<sup>n</sup> nǐ quide càhnu iní-ndó cuèi nándi sǎ nǐ yáha-ndo cuendá-gá. <sup>33</sup> Te dava-ndo nǐ quide úhú ñáhá ñáyiú xii-ndo núú chítú núú tàcá, te nándi tnúhu cuèhé tnúhu duha ní xáhǎ<sup>n</sup>-yu xii-ndo. Te dava-ndo nǐ cuy<sup>ñ</sup>-ni-ndo nǐ xindecu ndìhi tnàha-ndo cuèi nándi ní ndoho dava-gá-ndó. <sup>34</sup> Te ní cundàhú iní-ndó cuè ñáyiú yìhi ve-caá, te cuèi ní quendeé ñáyiú sǎ ndécú ndìhi-ndo dico ñá túú ní ndìhú iní-ndó chí ní cud<sup>ñ</sup>-ni iní-ndó. Te duca<sup>n</sup> nǐ quide-ndo chí sa nàha-ndo sǎ ndúú tǎhú-ndó sǎ ío-gá vǎha, te xǎ<sup>n</sup> cundecu ndìhi-ndo nǐ caa nǐ quíhí<sup>n</sup>. <sup>35</sup> Te xǎ<sup>n</sup> vǎ dǎná ndèe-ndó quindáá iní-ndó nàcuáa ní cachí Yá Ndiöxí cada ñaha-gǎ xii-ndo, chí sǎá nduu te ío vǎha cada ñaha-gǎ xii-ndo. <sup>36</sup> Te nchòhó xíní ñùhu-xi ío cada ndee iní-ndó càda-ndo nchaa nacuáa càhá<sup>n</sup> Yá Ndiöxí, te duca<sup>n</sup> te nduu tǎhú-ndó sǎ nǐ cachí-gá nduu tǎhú-ndó cundecu ndìhi-ndo nǐ caa nǐ quíhí<sup>n</sup>. <sup>37</sup> Te Yá Ndiöxí càchí-gá núú tütú-gá:

Ta cùyatni vií-nǎ nduu quìxi Yaá quixi ñuyíú-a, te vǎ cùyàa-gá.

<sup>38</sup> Te nchaa ñáyiú cundáá núú-í ñá túú dǎña ndeé-yu sàndáá iní ñáhǎ-yu xii-í, te cuendá xǎ<sup>n</sup> cundecu-ní-yu ichi-í, dico núu na dǎñá-yu ichi-í te vǎ cúú vǎha iní-í núú-yu. Duha càchí Yá Ndiöxí núú tütú-gá.

<sup>39</sup> Dico nchoo chí ñá túú cùu-o ñáyiú duca<sup>n</sup> xíquide dǎñá-ó ichi Yá Ndiöxí, chí cùu-o ñáyiú nchicú<sup>n</sup> ni-hnu-ni sàndáá iní-ó-gǎ, te sǎ dúcá<sup>n</sup> te nduu tǎhú-ó cundecu-o ndìhi-gá nǐ caa nǐ quíhí<sup>n</sup>, te ñá túú cùu-o ñáyiú dǎña nihnu ichi-gá te xǎta nihnú-yu.

## 11

### *Ñáyiú sàndáá iní ñáhá xii Yá Ndiöxí*

<sup>1</sup> Te núu sàndáá ndisa iní-ó Yá Ndiöxí te duca<sup>n</sup> cǔtnuní ndáá iní-ó sǎ ñihí-ó sǎ cuíní-ó núú-gǎ. Te núu sàndáá iní-ó-gǎ te duca<sup>n</sup> cǔtnuní ndáá tucu iní-ó sǎ càhá<sup>n</sup> ndáá-gá cuendá nchaa sǎ ñà túú xíní-ó. <sup>2</sup> Te duca<sup>n</sup> nǐ quide ñáyiú ní xindecu ndeé sanaha ío ní sàndáá iní-yu Yá Ndiöxí te xǎ<sup>n</sup> núu ío vǎha ní cuu iní ñáhá-gǎ xií-yu.

<sup>3</sup> Te núu nchoo sàndáá ndisa iní-ó Yá Ndiöxí te cǔtnuní ndáá iní-ó sǎ sǎ cuendá tnúhu ní càhá<sup>n</sup>-gá ní cuáha andiú ndìhi ñuyíú-a. Te cǔtnuní iní-ó sǎ ñà díú sǎ cuendá ñ<sup>n</sup> sǎ tǔu ndèhe-o ío ñuyíú-a ní cuáha andiú ndìhi ñuyíú-a.

<sup>4</sup> Te ndíi Àbél ío ní sàndáá iní ndíi Yá Ndiöxí núu xǎ<sup>n</sup> ío-gá ní cuu iní-gá sǎ nǐ sǎñaha ndíi ní nduu tǎhú-gǎ dàcúxí sǎ nǐ sǎñaha ndíi Càin xii-gá ní nduu tǎhú-gǎ. Te ndíi Àbél-á<sup>n</sup> nǐ cutnùní iní ndíi sǎ nǐ cud<sup>ñ</sup> ndíi núú Yá Ndiöxí cuendá sǎ nǐ quehe<sup>n</sup> cuendá-gá sǎ nǐ sǎñaha ndíi ní nduu tǎhú-gǎ. Te cuèi ñá túú-gǎ ndíi ndècu ñuyíú-a dico yòdo tnuní sǎ nǐ sàndáá iní ndíi Yá Ndiöxí cuendá duca<sup>n</sup> càda-o canchicú<sup>n</sup> nihnu-o.

<sup>5</sup> Te té Ènóc téé ní xindecu ndeé sanaha ñà túú ní xíhí-dé chí ní nacuaca ñaha túu Yá Ndiöxí xii-dé cuendá sǎ nǐ sàndáá iní ñáhá-dé xii-gá. Te vǎ yòo ni nànihí ñáhá xii-dé chí mee-gǎ ní nacuaca ñaha-gǎ xii-dé. Te núú tütú Yá Ndiöxí càchí-xi sǎ cǔtnàhá



vátá nàcuàca ñaha-gá xii té Ènóc, te ní guide-dé mee-ni nàcuáa ní cuu váha iní ñáhá-gã xii-dé. <sup>6</sup> Te nchaa ñáyiu ñá túú sàndáá iní ñáhá xii Yá Ndiõxí ñá ndácù-yu cadá-yu nàcuáa cudíu-yu núú-gã, chi nchaa ñáyiu cuìní tuha ñaha xii-gá xíní ñùhu-xi sá quìndáá iní-yu sá ndécú-gã, te quìndáá iní-yu sá ñùu na nànducu nihnu ñahá-yu xii-gá te cuañaha-gã xii-yu sá ndúú tãhù-yu.

<sup>7</sup> Te Yá Ndiõxí ní dátùha-gá ndí Nöé nchaa nàcuáa cada-gá. Te ní guide ndí nchaa nàcuáa ní xáha<sup>n</sup> Yá Ndiõxí cada ndí, te ní cadúha ndí ñ<sup>n</sup> bàrcú cuèndá xití bàrcú-á<sup>n</sup> quèe ndí ndíhi nchaa ñáyiu vehe ndí cuèndá cácu nihnú-yu. Te duca<sup>n</sup> ñí guide ndí chi ní sàndáá iní ndí Yá Ndiõxí. Te sá dúcá<sup>n</sup> ñí sàndáá iní ndí-á<sup>n</sup> Yá Ndiõxí xiã<sup>n</sup> ní cutnùní sá ncháá ñáyiu ío ndècu cuèchi-yu, chi ñá túú ní cãchicú<sup>n</sup> nihnú-yu cadá-yu nàcuáa ní guide ndí. Te sá dúcá<sup>n</sup> ñí guide ndí ní sàndáá iní ndí Yá Ndiõxí xiã<sup>n</sup> ío ní cundáá ndí núú-gã.

<sup>8</sup> Te Yá Ndiõxí ní xáha<sup>n</sup>-gã xii ndí Àbrahám sá quèe ndí ñuú núú ndécú ndí quíhí<sup>n</sup> ndí ñngá xichi cundecu ndí. Te ní guide ndí nàcuáa ní xáha<sup>n</sup> Yá Ndiõxí chi ní quee ndí cuáhá<sup>n</sup> ndí núú cuañaha Yá Ndiõxí cundecu ndí. Te òré ní quee ndí núú ndécú ndí te ñá túú ní cùtnuní iní ndí ndéé cúú ñùú cuáhá<sup>n</sup> ndí cundecu ndí. Te duca<sup>n</sup> ñí guide ndí chi ní sàndáá iní ndí Yá Ndiõxí. <sup>9</sup> Te sá dúcá<sup>n</sup> ñí sàndáá iní ndí Yá Ndiõxí ñùu xiã<sup>n</sup> ní xíndecu ndí núú ñí sãñaha-gã cundecu ndí, te cuèi duca<sup>n</sup> dico ñá túú ní quède ñuú ndí xiá<sup>n</sup>. Te ní xóo cundecu ndí vehe cùtexínu vehe dóó. Te diu-ni duca<sup>n</sup> ñí guide ndí Isàác ndíhi ndí Jàcób chi tnàhá cue ndí-á<sup>n</sup> ñí cachí Yá Ndiõxí sá ndúú tãhù cue ndí xiá<sup>n</sup> cundecu cue ndí. <sup>10</sup> Te duca<sup>n</sup> ñí guide ndí Àbrahám chi ní xíndetu ndí ndéé ní sáá nduu nduu tãhù ndí cundecu ndí núú ndécú Yá Ndiõxí. Te núú ndécú-gã-á<sup>n</sup> cúú-xí ñùú ní cadúha mee-gã, te ñuú-á<sup>n</sup> cudíi-xi ní caa ní quíhí<sup>n</sup>.

<sup>11</sup> Te ndí Sără, sa ní xídó cuíá ndí

sá cóo dèhe ndí chi sa ní sahnu vèhi ndí, dico Yá Ndiõxí ní guide-gá te ní xóo ñ<sup>n</sup> dèhe ndí. Te duca<sup>n</sup> chi ní sàndáá iní ndí Yá Ndiõxí te ní cutnùní ndáá iní ndí sá cadá-gã nàcuáa ní xáha<sup>n</sup>-gã xii ndí. <sup>12</sup> Te cuèi ío ní sahnu ndí Àbrahám ndíhi ñadìhí ndí, ndí Sără dico dacuitíí ñí nduu tãhù-yu ní xóo ñ<sup>n</sup> dèhe-yu. Te xiã<sup>n</sup> ñùu ío cuèhé ndíquí<sup>n</sup> yãvá ndí Àbrahám ní cáyá dàtná cuèhé chòdíní ndéé andíu, ndíhi dàtná cuèhé ñuhu cúchí làmár, chi ní vã yõo ñ<sup>n</sup> ndacu cahu ñaha xii-yu sá cuèhè-yu.

<sup>13</sup> Te cue ndí-á<sup>n</sup> duca<sup>n</sup>-ni ñí sàndáá iní cue ndí Yá Ndiõxí ndéé ní sáá nduu ñí xíhí cue ndí. Te cue ndí-á<sup>n</sup> ñá túú ní nduu tãhù cue ndí quini cue ndí nchaa nàcuáa ní cachí Yá Ndiõxí cada-gá, dico ní cutnùní ndáá iní cue ndí-á<sup>n</sup> nàcuáa cada-gá núú cuáhá<sup>n</sup> núú vèxi. Te ío ní cudíi iní cue ndí, te ní cachí cue ndí sá dícó-ni ichi yáha cue ndí ñuyú-a, chi ñá díú ñuyú-a cundecu duca<sup>n</sup> cuè ndí.

<sup>14</sup> Te sá dúcá<sup>n</sup> nduu tnùhu ní cáhá<sup>n</sup> cue ndí-á<sup>n</sup>, xiã<sup>n</sup> ní cutnùní sá cuìní cue ndí ñngá xichi núú cùndècu cue ndí. <sup>15</sup> Te ní ñá díú ñuú núú ñí quee cue ndí ní cuìní cue ndí núhú cue ndí. Chi núu duca<sup>n</sup> ní sãni iní cue ndí te núhú cue ndí ní cùu. <sup>16</sup> Dico ñáhá chi cuìní cue ndí quíhí<sup>n</sup> cue ndí ñ<sup>n</sup> xichi núú vãha-gá cáá cùndecu cue ndí. Te núú dúcá<sup>n</sup> ío-gã váha càa-á<sup>n</sup> cúú-xí ñùú núú ndécú Yá Ndiõxí, te sá dúcá<sup>n</sup> ñí sãni iní cue ndí xiã<sup>n</sup> ñùu ío váha cùu iní Yá Ndiõxí càchí-gá sá ñá túú cùcaha<sup>n</sup> núú-gã cúú-gã Ndiõxí cue ndí-á<sup>n</sup>, te cùtnuní iní-ó sá ndáá sá dúcá<sup>n</sup> càhá<sup>n</sup>-gã chi ní guide túha-gá ñ<sup>n</sup> xichi núú cùndècu cue ndí-á<sup>n</sup>.

<sup>17</sup> Te ndí Àbrahám ní xíndecu ñ<sup>n</sup> dèhe ndí ndíhi ñadìhí ndí, te cùtnàhá ní xito ndéé ñáhá Yá Ndiõxí xii ndí ní xicã<sup>n</sup>-gã dèhe ndí, ndí Isàác cuèndá nduu tãhù ñáhá-gã xii ndí. Te ní xáha<sup>n</sup> ndí sá cúú nduu tãhù-gã dèhe ndí, te duca<sup>n</sup> ñí guide ndí chi ní sàndáá iní ñáhá ndí xii-gã. Te sa ndècu túha ndí sá cuañaha ndí dèhe ndí xii-gã cuèi mee Yá Ndiõxí ní xáha<sup>n</sup> ndáá-gã xii ndí <sup>18</sup> sá sã cuèndá ndí Isàác te ngúndecu cue ñaní tnàhá ndí.

19 Te duca<sup>n</sup> ñi quide ndíi Àbrahám, chi ní cutnùní ndáá iní ndíi sá Yá Ndiöxí ndácú-gã dándòto-gá cuèi ñáyiú sa ní xíhí. Te sá dúcá<sup>n</sup> ñi xáha<sup>n</sup> ndíi xii Yá Ndiöxí sá cúú ndúu táhú-gã déhe ndíi, te xíá<sup>n</sup> cada iní-ó sá sà ní xíhí ndíi Isàác te ní ndoto tucu ndíi ní nucúndecu ndíi ndíi tātá ndíi, ndíi Àbrahám.

20 Te ndíi Isàác ní xícá<sup>n</sup> táhú ndíi núú Yá Ndiöxí cuendá sá cáda vaha-gá cue déhe ndíi, ndíi Jácób ndíi ndíi Esáú núú cuahá<sup>n</sup> núú vèxi. Te duca<sup>n</sup> ñi quide ndíi chi ní sándáá iní ndíi Yá Ndiöxí. 21 Te sa ta cùyatni-ná nduu cùú ndíi Jácób, te ní xícá<sup>n</sup> táhú ndíi núú Yá Ndiöxí cuendá cue déhe ñaní ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yá Ndiöxí. Te duca<sup>n</sup> ñi quide ndíi chi ní sándáá iní ñáhá ndíi xii-gá. 22 Te cùtnàhá sa ta cùyatni vii-nà nduu cùú ndíi Chèé, te ní cachí ndíi sá cuè ñáyiú isràél sáá nduu quèé-yu núú xíndecú-yu-á<sup>n</sup>. Te ní cáhá<sup>n</sup> tucu ndíi nàcuáa cada-yu yiqui cùñú ndíi na sàá nduu quèé-yu núú ndécú-yu-á<sup>n</sup>. Te duca<sup>n</sup> ñi quide ndíi chi ní sándáá iní ndíi Yá Ndiöxí.

23 Te cùtnàhá ní cacu ndíi Moisés te ní chiváha ñaha ñaná ndíi ndíi tātá ndíi úní yóó. Te duca<sup>n</sup> ñi quide cue ndíi-á<sup>n</sup> chi ní sándáá iní cue ndíi Yá Ndiöxí. Te ní quide cuendá cue ndíi-á<sup>n</sup> sá ño váha càa ndíi Moisés déhe cue ndíi, te ñá túú ní yùhú cue ndíi nàcuáa ní cáhá<sup>n</sup> tée cùu Faraón sá cáhni-dè cue landú. 24 Te sátá ñi sahnu ndíi Moisés te duu<sup>n</sup> duu<sup>n</sup> ní cachí ndíi sá vã càhá<sup>n</sup> ñáyiú sá déhe yoco tée cùu Faraón cúú ñaná ndíi. Te duca<sup>n</sup> ñi quide ndíi chi ní sándáá iní ndíi Yá Ndiöxí. 25 Te duca<sup>n</sup> ñi quide tucu ndíi chi ní tnahá-gá iní ndíi ndoho ndíi ndíi nchaa ñáyiú cùu cuendá Yá Ndiöxí dàcúxí sá cúdíi iní ndíi cundecu tnaa ndíi ichi cuèhé ichi duha. 26 Chi ní sani iní ndíi sá vaha-gá ndoho ndíi cúcuèhé ñáhá cuè ñáyiú xii ndíi sá cuendá Yaá quixi ñuyú-a dàcúxí sá cùndecu ndíi ndíi nchaa sá ío Ègiptú. Te duca<sup>n</sup> ñi quide ndíi chi ní xúhu<sup>n</sup> iní ndíi sá Yá Ndiöxí cuañaha-gã sá ndúú táhú ndíi. 27 Te ndíi Moisés ní quee ndíi nació<sup>n</sup> Ègiptú te ñá túú ní

quide cuendá ndíi sá ño cùdéé<sup>n</sup> tée cùu Faraón núú ndíi. Te duca<sup>n</sup> ñi quide ndíi chi ní sándáá iní ndíi Yá Ndiöxí. Te ní quide càhnu iní ndíi cuendá nchaa sá ñi yáha ndíi, te ní quide iní ndíi sá Yá Ndiöxí ndécú ndíi ñaha túu-gá xii ndíi cuèi ñá túú ní xíni núú ñáhá ndíi xii-gá. Te duca<sup>n</sup> ñi sani iní ndíi chi Yá Ndiöxí ndécú ndíi ñaha-gá xii ndíi.

28 Te ndíi Moisés cúú ndíi téé ní tausaha ñi quide vico pásua ndíi cue ñáyiú isràél, te dàvá-á<sup>n</sup> ñi táuchíu<sup>n</sup> ndíi ní sahní-yu mbéé te níñi quiti-á<sup>n</sup> ñi dácánúu-yu yuyèhé-yu. Te duca<sup>n</sup> ñi quide ndíi chi ní sándáá iní ndíi Yá Ndiöxí. Te duca<sup>n</sup> ñi quide tucu ndíi cuendá sá espíritú sá ñi tendaha Yá Ndiöxí cahni-xi mee-ni déhe téé déhe díhna cue ñáyiú Ègiptú, te vá cáhni-xí ñi ñi<sup>n</sup> déhe cue ñáyiú isràél. 29 Te ndute làmár sá nání Mår Tícuèhé ní quée dava-xi ní natúu ñuhu yìchí ní níhí ñi yáha cue ñáyiú isràél. Te duca<sup>n</sup> ñi cuu chi ní sándáá iní-yu Yá Ndiöxí. Te cue téé Ègiptú tnahá-güedé nchícú-güedé cuahá<sup>n</sup> dico ñá túú ní ndàcu-güedé yáha-güedé chi ní ndíi-güedé ní cáhá.

30 Te cue ñáyiú isràél ní dúcú<sup>n</sup> ndèé-yu úsá nduu ñuú Jericó te ní ngoyo nchaa sá ñúdòco. Te duca<sup>n</sup> ñi cuu chi ní sándáá iní-yu Yá Ndiöxí. 31 Te ñi<sup>n</sup> ñaha ní xíndecu ichi díi iní ní xínani-a<sup>n</sup> Ràháb, ñaha-á<sup>n</sup> ña túú ní xíhí-a<sup>n</sup> dàtná ní xíhí nchaa ñáyiú ío ní cuu sàá iní-xi núú Yá Ndiöxí, chi ní cuu váha iní-a<sup>n</sup> núú cuè téé ní tendaha cuè ñáyiú isràél ní sángoto dayuhu ñuú-a<sup>n</sup>. Te duca<sup>n</sup> ñi quide-a<sup>n</sup> chi ní sándáá iní-a<sup>n</sup> Yá Ndiöxí.

32 Te núu dicó sá cúú te cáhá<sup>n</sup>-í cuendá ndíi Gedèón, ndíi cuendá ndíi Bàrác, ndíi cuendá ndíi Sànsón, ndíi cuendá ndíi Jèfté, ndíi cuendá ndíi Dàví, ndíi cuendá ndíi Sàmuel, ndíi cuendá nchaa cue téé ní xóo cáhá<sup>n</sup> tñuhu Yá Ndiöxí ndéé sanaha, te nchaa cuendá cue téé-á<sup>n</sup> cáhá<sup>n</sup>-í te núu dicó cùyáchí-í dico ñá túú cùyáchí-í. 33 Te nchaa cue ndíi-á<sup>n</sup> ñi sándáá iní cue ndíi Yá Ndiöxí núu xíá<sup>n</sup> ní xóo ndacu cue ndíi ní xóo nãa cue ndíi ndíi nchaa ñáyiú

dava-gá ñuú. Te nchaa ñáyiú-án ñà túú ní xóo ndacú-yu nàá-yu ndihí cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gã xii cue ndíi. Te cuèi nchaa cue quití déé<sup>n</sup> ñà túú ní ndàcu-güedi ná cada ñaha-güedi xii cue ndíi. <sup>34</sup> Te ní xóo ndacu cue ndíi ní xóo ndahvá cue ndíi ñuhú sá vã yóo tnàhí ndàcu ndahvá, te ní cácu cue ndíi vã yóo ni ndàcu cahni ñaha xii cue ndíi. Te cue ndíi-án ñà túú níhí ndéé cuè ndíi ní cùu, dico ní níhí ndéé cuè ndíi chí Yá Ndiöxí ní chindee ñaha-gá xii cue ndíi, te nchaa ndíi-án<sup>n</sup> ïo ní níhí ndéé cuè ndíi ní nàá cue ndíi ndihí nchaa ñáyiú ní cuu úhú iní ñáhá xii cue ndíi, te nchaa ñáyiú duca<sup>n</sup> ní xóo nàá ndihí cue ndíi-án ñà túú ní xóo ndacú-yu nàá ndihí ñahá-yu xii cue ndíi chí ní xóo cunú-yu. Te duca<sup>n</sup> ní cuu chí ní sándáá iní cue ndíi Yá Ndiöxí. <sup>35</sup> Te dava ñáyiú ñihí ní nduu táhũ-yu ní ndoto cue ñáyiú ní xíndecu ndihí-yu ní nucúndecu ndihí ñaha tùcú-yu.

Te dava ñáyiú ïo ní dándóhó ñaha tnaha ñáyiú-yu te ní xihí-yu, dico ñà túú ní dàñá-yu ichi váha nàcuáa cácu nihnú-yu núú tnàha ñáyiú-yu, te duca<sup>n</sup> chí ní cuiní-yu sá ndótó-yu ndéé cuèé-gá nàcuáa ngúndecu váha-yu núú ndécú Yá Ndiöxí. <sup>36</sup> Te dava cue ndíi ïo ní ndoho cue ndíi chí ïo ní cudíquí ndéé ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñahá-yu, te ní chihí ñahá-yu xii cue ndíi vecaá. <sup>37</sup> Te dava cue ndíi ní sahani ñahá-yu ndihí yúú. Te dava cue ndíi ní chidava ndáá ñahá-yu ní xehndé ñahá-yu ndihí sierrá. Te dava cue ndíi ní xito ndéé ñahá-yu te núu ndisa sá sándáá iní cue ndíi Yá Ndiöxí, te dava cue ndíi ní sahani ñahá-yu ndihí machití. Te mee-ni ñhí mbéé ndihí ñhí chivá, ní xóo cuu dóo cue ndíi. Te mee-ni ñhí cue quití-án<sup>n</sup> ní xóo cuu dóo cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ïo ní xóo dandihú-yu iní cue ndíi, te

nándi sá ní xóo cada ñahá-yu xii cue ndíi ní xóo dandòho ñahá-yu. <sup>38</sup> Te cue ndíi-án<sup>n</sup> ïo-gá ní xínduu váha iní cue ndíi dàcúxí nchaa dava-gá ñáyiú. Te nchaa cue ndíi-án<sup>n</sup> ní xica cuu cue ndíi cuèi nchaa núú ñà túú vã yóo tnàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchii yaú ní xóo cundecu cue ndíi. <sup>39</sup> Te ïo ní cudíu cue ndíi núú Yá Ndiöxí cuèndá sá ní sándáá iní ñahá cuè ndíi xii-gá. Te cuèi duca<sup>n</sup> ní quide cue ndíi dico ñà túú ní xini cue ndíi nchaa sá ní cachí Yá Ndiöxí cada-gá. <sup>40</sup> Te duca<sup>n</sup> ní cuu chí ñhí sá ïo-gá váha ní cachí Yá Ndiöxí cada-gá. Te sá dúcá<sup>n</sup> ïo-gá váha ní cachí-gá cada-gá cúu-xí cuèndá nchoo ndihí cuèndá cue ndíi-án<sup>n</sup> cuèndá sá ñà díú mèe-ni cue ndíi-án<sup>n</sup> cundáá cue ndíi núú-gã, chí tnàhá nchoo cundáá-ó núú-gã.

## 12

### *Ío cuhu<sup>n</sup> iní-ó Xítohó Jesucrístú*

<sup>1</sup> Te cue ñáyiú ní xíndecu ndéé sanaha ní quide-yu nàcuáa ní cutnùní sá ní sándáá iní-yu Yá Ndiöxí. Te cada iní-ó sã ncháá ñáyiú-án<sup>n</sup> xíndéhe ñahá-yu xii-o vitna. Núu xí<sup>n</sup> xini ñuhu-xi sá vã cáda-ó ni ñhí sá cuèhé sá dúhá chí díu nchaa xí<sup>n</sup> quide-xi ñà túú cundáá-ó núú Yá Ndiöxí. Te vã cáda cuèndá-ó nchaa sá quide tnèñu iní-ó nàcuáa ndacu-o cáda-o nchaa nacuaá càhá<sup>n</sup>-gá. Te ïo càhnu cunduu iní-ó càncicú<sup>n</sup> nihnu-o cáda-o nchaa nacuaá ní cachí-gá cada-o cundecu-o ñuyíú-a. <sup>2</sup> Te ïo cuhu<sup>n</sup> iní-ó Xítohó Jesucrístú, chí díu-gá ní quide ní sándáá iní-ó Yá Ndiöxí, te díu-ni duca<sup>n</sup> quide-gá cuèi vitna te cuèi ndéé núú cuahá<sup>n</sup> núú vèxi díu-ni duca<sup>n</sup> cáda-gá sá quèndáá iní-ó Yá Ndiöxí. Te Xítohó Jesucrístú ïo ní quide ndee iní-gá ní ndoho-gá te ní xihí-gá núú cùrúxí, te ñà túú ní quide cuèndá-gá cuèi ñhí sácá<sup>n</sup> núú cúu-xí sã dúcá<sup>n</sup> ní ndoho-gá. Te duca<sup>n</sup> ní quide-gá chí sa nàha-gá sá ná yãha sá dúcá<sup>n</sup> ndòho-gá te ïo cudíí iní-gá. Te vitna núcóo-gá xio cùha núú núcóo Yá Ndiöxí te tàxi tnuní-gá.

3 Te xini ñuhu-xi sá ïo cada cuendá-ndó nàcuáa ní guide Xítóhó Jesucristú chi Yaá-án ïo ní guide càhnu iní-gá nchaa sá ñi ndoho-gá ní guide ñaha nchàa ñáyi ndècu ichi cuehé ichi duha xii-gá. Te duca<sup>n</sup> càda cuendá-ndó nàcuáa ní guide-gá cuendá sá vã tũu dusa<sup>n</sup>-ndo, te ni vã nátũhú iní-ndó càda-ndo nchaa nacuáa càhá<sup>n</sup>-gá. 4 Te nchòhó dáquèe tihú-ndó nchàa sá cuehé sá dúhá dico vátá cáhni ñaha-gá-yu xii-ndo sã dúcá<sup>n</sup> guide-ndo. 5 Te ndacu iní-ndó nàcuáa càhá<sup>n</sup> Tãtá-ó Dũtú Ndiõxí dásahú ñáhá-gã xii nchoo cue ñáyi cùu dèhe-gá. Te duha càchí-gá núu tütú-gá:

Nchòhó cue dèhe mee-ï, vã cáni iní-ndó sã àu<sup>n</sup> nã cuu dandoho ñaha-í xii-ndo,

te ni vã nátũhú iní-ndó òré càhá<sup>n</sup>-í dóho-ndo nàcuáa cada-ndo cundecu-ndo.

6 Chi mee-ï dándòho-í nchaa ñáyi cùu iní-í cuendá sá cundáa-yu núu-í,

te quide úhú-í-yu, te ñu-ní-yu cùu-yu ñáyi càchí-í cùu dèhe-í.

Duha càchí-gá núu tütú-gá. 7 Te ïo cada ndee iní-ndó sã dúcá<sup>n</sup> dandoho ñaha Yã Ndiõxí xii-ndo, chi guide-gá sá cùu-gã Tãtá-ó. Te ñá túú ñi ñi<sup>n</sup> tée cùu tátá te cachí-ó sã ñà túú sãnu ichi-dé cue dèhe-dé nàcuáa tãú-xi cunduu.

8 Te núu Yã Ndiõxí ñá túú dandoho ñaha-gá xii-ndo dàtná dándòho-gá cue ñáyi càchí-gá cùu dèhe-gá, te ñá díú dèhe mee-gã cùu-ndó te núu duca<sup>n</sup>, chi cùu-ndo datná cue ñáyi ñá túú cùnuni yoo cùu tátá-xi.

9 Te nchoo sã naha-o sã cùnàhá ní cuu landú-ó ñi sanu ichi ñaha tátá-ó nàcuáa tãú-xi cunduu, te duca<sup>n</sup> ñi xóo canehe-o sã yĩñuhu núu-güedè te ñu-ni duca<sup>n</sup> nèhe-o sã yĩñuhu núu-güedè vitna. Te núu duca<sup>n</sup> ñi sãndáa iní-ó tátá-ó, te ïo-gá xini ñuhu-xi quindáa iní-ó Tãtá-ó Dũtú Ndiõxí cuendá duca<sup>n</sup> nduu tãhú-ó cundecu-o ndihí-gá ñi caa ñi quihí<sup>n</sup>, chi ñu-gá cùu-gã Yaá ní chihi iní-ó. 10 Te cùnàhá ní cuu landú-ó, ñá túú tĩtní nduu ñi càniha tátá-ó ñi sanu ichi ñaha-güedè xii-o nàcuáa ní cuu iní mée-güedè. Te Yã

Ndiõxí duca<sup>n</sup> dandoho ñaha-gá xii-o sãnu ichi ñaha-gá cuendá cùu-xi sã vãha sá cùu-xi-ó, te duca<sup>n</sup> guide-gá cuendá nchoo càda ndáa-ó dàtná quidé mèe-gá. 11 Te òré véxi ñi<sup>n</sup> tñundòho sá cùu-xi-ó te ñá túú cùu-í iní-ó chi dandihú iní ñáhá-xi xii-o. Te nchaa ñáyi ngúnu ichi sá cuendá nchaa tñundòho-án te ngũita-yu guide ndáa-yu, te ïo vãha cùu iní-yu ndècú-yu.

### *Vã dáquèe tihú-ó tñuhu Yã Ndiõxí*

12 Te núu xiã<sup>n</sup> ïo chí ndúcú ndèe-gá canchicú<sup>n</sup> nihnu-ndo ichi Xítóhó Jesucristú, te vã dico yica cùu iní-ndó canchicú<sup>n</sup> nihnu-ndo ichi-gá. 13 Te cada vãha-ndo cundecu-ndo ichi-gá cuendá nchaa ñáyi sãni ñi<sup>n</sup> sani úú iní-xi níhi ndéè-yu cundecú-yu ichi-gá te vã ná tũhú iní-yu canchicú<sup>n</sup> nihnú-yu.

14 Te nducu-ndo nàcuáa cada-ndo cundecu vãha-ndo ndihí cue tñaha ñáyi-ndo, te ïo cada vãha-ndo cundecu-ndo nacuáa cundáa-ndó núu Yã Ndiõxí chi núu vã dúcá<sup>n</sup> càda-ndo te vã ndúú tãhú-ndó cundecu-ndo ndihí-gá. 15 Te ïo vãha cada cuendá-ndó nàcuáa cada-ndo cundecu-ndo, chi núu ñáhá te vã chindèe ñaha-gá Yã Ndiõxí xii-ndo.

Te ïo vãha cada cuendá tucu-ndo nàcuáa cundecu-ndo vã cáni cuehé iní-ndó cuendá Yã Ndiõxí, chi núu duca<sup>n</sup> na càda-ndo te dava-gá ñáyi ndècu ndihí-ndo ichi-gá tñahá-yu ngũita-yu duca<sup>n</sup> càdá-yu, te vã cundècu vãha-gá-ndó ndihí-yu ichi-gá.

16 Te cada cuendá tucu-ndo sã vã cundècu-ndo ichi díú iní, te ni vã dáquèe tihú-ndó ñi ñi<sup>n</sup> sá cùu cuendá Yã Ndiõxí dàtná ní guide ndí Esàú, chi sá cuãñaha tátá ndí-án nduu tãhú ndí ñi cùu ní dama ndí ñi<sup>n</sup> cóhó comidá. 17 Te nchòhó sa naha-ndo sã cùnàhá ní cuini ndí Esàú cáca<sup>n</sup> tãhú tátá ndí núu Yã Ndiõxí cuendá nchaa sã ndúú tãhú ndí ñi cùu, te ñá túú ní xicá<sup>n</sup> tãhú tátá ndí núu Yã Ndiõxí nàcuáa cuini mée ndí ñi cùu. Te ní ndáhyú víhi ndí, te cuèi duca<sup>n</sup> ñi guide ndí dico ñá túú ní ndacu-gá ndí nãníhi ndí tãhú sã ñi dama ndí comidá.



18 Te cue ñáyiú isràél ní sátuhá-yu ñi yucu núú càyú ñuhú, te nchòhó ñá túú ndéé duca<sup>n</sup> sàhá<sup>n</sup> tuha-ndo ñi yucu núú càyú ñuhú dàtná ní quide cue ñáyiú-á<sup>n</sup>. Te cútnàhá duca<sup>n</sup> ní sátuhá-yu yucu-á<sup>n</sup> te ní cunee vñhi ñihí yucu-á<sup>n</sup>, te ní quene táchí ñhi. 19 Te ní tecú dóho-yu ní cáhá<sup>n</sup> ñi cútú, te ní tecú tucu dóho-yu ní cáhá<sup>n</sup> Yă Ndiöxí ní cáhá<sup>n</sup> ndihí ñaha-gă xií-yu. Te nchaa ñáyiú ní tecú dóho-xi ní cáhá<sup>n</sup>-gă te ní cuiní-yu sá vă cáhá<sup>n</sup>-gă. 20 Te duca<sup>n</sup> ñi quidé-yu chi ñá túú ní cùndee iní-yu nàcuáa ní cáhá<sup>n</sup>-gă, te duha ní cachí-gă: “Te cuèi ñi quiti nà yáha xítí yucu-a, te cahni-ndo-di ndihí yúú àdi ndihí ñi yutnu puyá”, duha ní cachí-gă. 21 Te sá dúcá<sup>n</sup> ñi quide-xi ní xiní-yu xiá<sup>n</sup> ío ní dáyùhú ñáhá-xí xií-yu. Te tnàhá té Moisés ní yùhú-dé, te ní cachí-dé: “Quèdi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiú-á<sup>n</sup> ñi sáhá<sup>n</sup> tuhá-yu yucu-á<sup>n</sup>, dico cada iní-ndó sá sá ní tuha-ndo yùcu Sión sá ndécú nùú ndécú Yă Ndiöxí, ndihí ñuú-gă ñuú Jerusalén sá cáa àndiu te diu-gă cúú-gă Yaá ndécú nchàa nduu nchaa quíú. Te diu-ni xiá<sup>n</sup> xíndecu cuéhé víhí cuè espíritú xínú cuèchi núú-gă 23 chíñùhu ñaha-xi xii-gă. Te nchòhó cúú-ndó cuè ñáyiú cùu cuendá Yă Ndiöxí, te ní tnàhá tnùhu-ndo ndihí nchaa dava-gă ñáyiú cùu cuendá-gă, ñáyiú yòdo tnuní núú tütú-gă ndécú àndiu, te diu-ni ñáyiú-á<sup>n</sup> cuañaha-gă xií-yu sá ndúú tãhú-yu. Te nchòhó ní tuha-ndo Yă Ndiöxí Yaá cada ndáá yíca cuèchi nchaa ñáyiú. Te cada iní-ndó sá ñi tnàhá tnùhu-ndo ndihí cue ñáyiú ní quide ndáá ní xíndecu ichi Yă Ndiöxí ñuyíú-a. Te ñáyiú-á<sup>n</sup> ñà túú tnàhí-gă ná cúmãñí-yu vitna ndécú-yu núú-gă. 24 Te ní tnàhá tnùhu-ndo ndihí Xítohó Jesucristú Yaá ní quide nàcuáa cada Yă Ndiöxí íngá núú sá vâha sá cúú-xí nchàa nchoo ñáyiú ndècu ñuyíú-a, chi ní sati níñí-gă te ní xihí-gă núú cùrúxí. Te níñí Xítohó Jesucristú ñá túú ñi-ni cuu-xi

ndihí níñí ndi Abél, chi diu cuèndá níñí-gă-á<sup>n</sup> ñi quide càhnu iní Yă Ndiöxí nchaa cuèchi-o.

25 Núu xiá<sup>n</sup> ío cada cuèndá-ndó vă dáquèe tihú-ndó tnùhu càhá<sup>n</sup> Yă Ndiöxí, chi nchaa ñáyiú ní xíndecu ndéé sanaha dùca<sup>n</sup> ní quidé-yu ní dáquèe tihú-yu tnùhu ní cáhá<sup>n</sup>-gă ñuyíú-a sá cúú-xí-yu. Te ñá túú ní cãcu-yu chi ní nacháhu-yu sá dúcá<sup>n</sup> ñi quidé-yu. Te uu<sup>n</sup>-gă tucu nchoo chi vă cãcu-o te núu duca<sup>n</sup> na dàquèe tihú-ó tnùhu càhá<sup>n</sup> Yă Ndiöxí ndéé àndiu sá cúú-xí-ó. 26 Te cútnàhá ní cáhá<sup>n</sup> Yă Ndiöxí ndéé sanaha te ní quidi-xi ñuyíú. Te vitna cãchí-gă: “Yùhú quidi tucu-í íngá xito ñuyíú, te ñá díú mèe-ni ñuyíú duca<sup>n</sup> quidi-í chi tnàhá àndiu quidi-í”, cãchí-gă. 27 Te sá dúcá<sup>n</sup> càhá<sup>n</sup>-gă sá íngá xito tucu duca<sup>n</sup> càda-gă xiá<sup>n</sup> cútnuní sá ncháándi túhú sá tũu ndèhe-o danaa-gă. Te nchaa sá ñà túú ndéé tũu quini-ó ñuyíú-a xiá<sup>n</sup> vă quidi-xí te ni vă náá-xí. 28 Te núú ñi cachí Yă Ndiöxí nduu tãhú-ó cùndecu-o chi mee-gă táxi tnuní-gă xiá<sup>n</sup>, te ni vă quidi-xí te ni vă náá-xí. Te xiá<sup>n</sup> ío xini ñuhu-xi ndacá<sup>n</sup> tãhú-ó nùú-gă, te yíñùhu yíñùhu cunu cuechi-o núú-gă nàcuáa cuu vâha iní-gă, te duca<sup>n</sup> cùhu<sup>n</sup> iní-ó sá ío càhnu cuu-gă. 29 Te Tãtá-ó Dütú Ndiöxí cúú-gă dàtná ñi ñuhú chi danàa-gă nchaa sá ñà túú quide nàcuáa cuu vâha iní-gă.

## 13

*Nàcuáa tàú-xi cada-o cuèndá cuu vâha iní Yă Ndiöxí*

1 Te nchaa nchòhó ñáyiú ndècu ichi Xítohó Jesucristú, vă dáñá ndéé-ndó cùu iní tnàhá-ndó nàcuáa ndècu-ndo ichi-gă. 2 Te cunaha-ndo sá nùu ío ñáyiú ñùhu ichi ní quexió-yu vehe-ndo te cuañaha-ndo vèhe ndetátú-yu, te cuañaha-ndo sá cáxi-yu. Chi davá-yu ndéé espíritú xínú cuèchi núú Yă Ndiöxí ní sáhá<sup>n</sup> vehé-yu ní quehe<sup>n</sup> cuèndá-yu te ñá túú ní cùtnuní iní-yu sá díú espíritú xínú cuèchi núú-gă cúú-xí.

3 Te ndacu tucu iní-ndó cuè ñáyiú xixíhi vecaá, te cada iní-ndó sã tnàhá-ndó yíhi-ndo vecaá ndihí-yu. Te ndacu tucu iní-ndó nchàa ñáyiú ío ndòho, te cada iní-ndó sã tnàhá-ndó ndòho-ndo ndihí-yu.

4 Te nchaa ñáyiú na càchí-yu sã ì<sup>n</sup> sã vãha cùu-xi sã ì<sup>n</sup> tée ndihí ì<sup>n</sup> ñadihí ná nihí tnàhá-yu candeca tnàhá-yu. Te nchòhó cue tée vá cání ìní-ndó cãhá<sup>n</sup> ndihí-ndo ñadihí te núu ñá díú ñadihí-ndó cùú-yu. Te duca<sup>n</sup>-ni nchòhó cue ñáyiú ðihí tucu vá cání ìní-ndó cãhá<sup>n</sup> ndihí-ndo tée te núu ñá díú yíhi-ndo cuu-güedé, chi Yá Ndiöxí dandòho-gá nchaa ñáyiú ndècu ichi díí ìní.

5 Te vá cùhú<sup>n</sup> ìní-ndó mèe-ni díhú<sup>n</sup>. Te núu nándi cùu nchaa sã ndécú ndihí-ndo te ðiu-ni nchaa xíã<sup>n</sup> sa nduu vétú ìní-ndó, chi Yá Ndiöxí ní cachí-gá: “Ni ì<sup>n</sup> nduu vá dáñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

6 Te xíã<sup>n</sup> núu nchoo ñi yuhu ñi iní-ó cãhá<sup>n</sup>-ó ì<sup>n</sup> ì<sup>n</sup>-o, te cachí-ó:

Yá Ndiöxí cùú-gã Yaá chindèe ñaha xii-í,

núu xíã<sup>n</sup> ñá túú yùhú-í cuèi nándi cãhá<sup>n</sup> ñáyiú cada ñàhá-yu xii-í.

Duha cachí-ó.

7 Chí ndácú ìní cue tée ní sanu ichi ñaha xii-ndo ichi Xítohó Jesucristú cue tée ní cãhá<sup>n</sup> tnúhu Yá Ndiöxí núú-ndó, te ío váha chí nácuãha cuendá nàcuáa ní quide nchaa cue tée-á<sup>n</sup> ñi xíndecu-güedé ndéé ní sáa nduu ñi xíhi-güedé. Te ío quindáa ìní-ndó Yá Ndiöxí dàtná ní xóo cada cue tée-á<sup>n</sup>.

8 Te dàtná-ni ní quide Xítohó Jesucristú ndéé sanaha ðiu-ni duca<sup>n</sup> quide-gá vitna, te ðiu-ni duca<sup>n</sup> càda-gá ndéé núú cuahá<sup>n</sup> núú vëxi. 9 Te vá dáñá-ndó mèe-ndo dandahú ñáhá ñáyiú dacahá<sup>n</sup> ñáhá xii-ndo natuha-ndo ingá ichi, ñáyiú ðanehé tnàha ñáyiú-xi nándi sã ñi cutúha-yu, te nchaa xíã<sup>n</sup> ñá túú ì<sup>n</sup>-ni cahá<sup>n</sup>-xi ndihí tnúhu sã ndécú ndihí-ndo. Te Yá Ndiöxí chindèe ñaha-gá xii-o nàcuáa nihí ndéé-ó cùndecu-o ichi-gá, te

duca<sup>n</sup> te cuu-xi sã vãha sã cùú-xí-ó, te ñá díú cuendá ì<sup>n</sup> sã xéxi-ó nihí ndéé-ó ndècu-o ichi-gá. Te dava ñáyiú càchí-yu sã dává núú comidá cuu caxi-o te dava ñáhá nàcuáa nihí ndéé-ó cùndecu-o ichi-gá, dico ñá ndáa sã sã dúcá<sup>n</sup> vã cáxi-ó nchàa núú comidá nihí ndéé-ó cùndecu-o ichi-gá.

10 Chi Xítohó Jesucristú ní xíhi-gá cuendá-ó núú cùrúxí, te nchaa ñáyiú nchícú<sup>n</sup> nihnu-ni quide nchaa nacuáa ní quide nchaa dútú ñi xinu cuechi núú Yá Ndiöxí ndéé sanaha, ñáyiú-á<sup>n</sup> vã cùú tnàhá tnúhu-yu ndihí Xítohó Jesucristú Yaá ní xíhi núú cùrúxí sã dúcá<sup>n</sup> quide-yu. 11 Chi dútú cùnùu-gá ní xíndecu ndihí cue ñáyiú isràel, tée-á<sup>n</sup> ñi xóo canehe-dé níñi nchaa quití ní xóo cahni-dé ní xóo quíhu ndéé xití cuartú ní cuu íi-gã. Te duca<sup>n</sup> ñi xóo cada dútú-á<sup>n</sup> cuendá cada càhnu ìní Yá Ndiöxí nchaa yíca cuèchi ñáyiú, te cuñú nchaa quití-á<sup>n</sup> ñi xóo cahmi-güedé ì<sup>n</sup> xio yuhu ñúú.

12 Te duca<sup>n</sup> ñi yáha Xítohó Jesucristú chi ndéé ì<sup>n</sup> xio yuhu ñúú ní sahani ñaha-güedé xii-gá. Te cuendá níñi-gã sã ñi sati núú cùrúxí núú ñi xíhi-gá, ní nduu ndoo ní nduu nine ìní cue ñáyiú sàndáa ìní ñáhá xii-gá. 13 Te vitna chí ná tùha-o Xítohó Jesucristú te cada ndee ìní-ó ndòho-o dàtná ní ndòho-gá. 14 Te ñuyíú-a ñi ì<sup>n</sup> xichi ñá túú ndéé cáa ì<sup>n</sup> ñúú cudíi ñi caa ñi quíhí<sup>n</sup> cuendá cundecu-o, dico duca<sup>n</sup>-ni ñúhu ìní-ó ì<sup>n</sup> xichi núú ndúú tãhú-ó cùndecu-o ñi caa ñi quíhí<sup>n</sup>.

15 Te núu xíã<sup>n</sup> xíni ñúhu-xi sã vá dáñá ndéé-ó chihnuhu-o Dútú Ndiöxí chí Xítohó Jesucristú ní quide-gá nàcuáa ndacu-o tnàhá tnúhu-o ndihí Yá Ndiöxí, te òré cãhá<sup>n</sup> ndihí-o-gã te nuu núu ndacá<sup>n</sup> tãhú-ó núú-gã. Te nchaa tnúhu cãhá<sup>n</sup>-ó òré cãhá<sup>n</sup> ndihí-o-gã cùú-xi dàtná ì<sup>n</sup> tãhú sã cùú-xí-gã. 16 Te vá dáñá ndéé-ndó càda-ndo mee-ni sã vãha cundecu-ndo, te duca<sup>n</sup> chindee tnaha-ndo ì<sup>n</sup> ì<sup>n</sup>-ndo ndihí sã ndécú ndihí-ndo. Te núu duca<sup>n</sup> na càda-ndo te caní ìní-ndó sã cùú-xí dàtná ì<sup>n</sup> tãhú sã ío váha cùu ìní Yá Ndiöxí.

17 Te quindáa ìní-ndó càda-ndo

nchaa nacuáa cãhá<sup>n</sup> cue tée yìndaha ñaha xii-ndo nacuáa ndècu-ndo ichi Xítohó Jesucristú, chi ñá túbú cue tée-á<sup>n</sup> quidé cuendá ñáhá-güedë xii-ndo nãcuáa cundecu váha-ndo núú-gã. Te sáá nduu nãcani tnúhu-güedé núú-gã núu ní quide váha-güedé àdi ñá túbú ní quide váha-güedé ní xíndecu ndihí ñaha-güedë xii-ndo. Te núu duca<sup>n</sup> na càda-ndo quindáá iní-ndó-güedë te cudíí iní-güedé cundecu ndihí ñaha-güedë xii-ndo, te vá ndihú iní-güedé. Te núu vá dúcá<sup>n</sup> càda-ndo te vá cúú-xí sã vãha xii-ndo nchãa sã quidé-güedë sã cúú-xí-ndó.

18 Te cãhá<sup>n</sup> ndàhú-í núú-ndó sã cãhá<sup>n</sup> ndihí-ndo Yã Ndiöxí cuendá-ndí. Te nchúhú cútñuní ndáá iní-ndí sã ñá túbú nã cúmãní-ndí núú Yã Ndiöxí, te duca<sup>n</sup> chi ndücu-ndí nãcuáa quide-ndí cundáá-ndí núú-gã.

19 Te cãhá<sup>n</sup> ndàhú tucu-í núú-ndó sã ño cáca<sup>n</sup> táhú-ndó núú Yã Ndiöxí cuendá sã méé-gã ná cáda te ño ndihí quixi coto ñaha tucu-í xii-ndo.

#### *Tnúhu ndéé núú nĩ ndihí-ná*

20 Te Yã Ndiöxí Yaá quidé cùu váha iní-ó ndècu-o, Yaá-á<sup>n</sup> nĩ dándótó-gã Xítohó Jesucristú. Te Xítohó Jesucristú-á<sup>n</sup> cúú-gã dàtná ñ<sup>n</sup> toli ño-gã quéné cãva xito mbéé. Te duca<sup>n</sup> sãtnahá-xi cùu-gã cuendá sã nĩ sati nĩñí-gã te ní xihí-gã, te duca<sup>n</sup> nĩ cuu cuendá sã nĩ quide ndáá-gã ndihí Yã Ndiöxí sã cáda-gã ñngá núú sã vãha sã cúú-xí nchòo cue ñáyiu ndècu ñuyíú-a. Te nãcuáa ní quide ndáá-gã ndihí Yã Ndiöxí te ñiu-ni duca<sup>n</sup> càda-xi núú cuãhá<sup>n</sup> núú vëxi. 21 Te xicá<sup>n</sup> táhú-í núú Yã Ndiöxí sã méé-gã ná chindee ñaha-gã xii-ndo cuendá cada-ndo mée-ni sã vãha nãcuáa cuini méé-gã, te mee-gã ná cáda ñaha-gã xii-o nchãa sã vãha sã sání iní-gã. Te ñiu-ni duca<sup>n</sup> na tàuchiu<sup>n</sup>-gã cada Xítohó Jesucristú sã cúú-xí-ó, ñuha xicá<sup>n</sup> táhú-í núú-gã. Te vitna nchaa-o chí ná cãchí-ó sã ño cãhnu cuu Xítohó Jesucristú nĩ caa nĩ quíhí<sup>n</sup>. Te duca<sup>n</sup> na cùnduu.

22 Te cãhá<sup>n</sup> ndàhú-í núú nchòhò ñáyiu ndècu ndihí-í ichi Xítohó Jesucristú sã cáda cãhnu iní-ndó

nãcuáa ndùu nchaa tnúhu cãhá<sup>n</sup>-í dásàhú ñáhà-í xii-ndo, chi ñá túbú vãi tnúhu chido tnuní-í núú túbú-a sã cúú-xí-ndó.

23 Te cãchí tnúhu-í xii-ndo sã tẽ Timùteú tée ndècu ndihí-o ichi Xítohó Jesucristú ní cácu-dé ñá túbú-gã yíhí-dë vecaá. Te núu na quèxio ndihí-dé núú ndécú-í te quixi-í ndihí-dé núú ndécú-ndó quixi coto ñaha-ndí.

24 Te cúñaha-ndo sã ño na càda ndee iní nchaa cue tée yìndaha ñaha xii-ndo nacuáa ndècu-ndo ichi Yã Ndiöxí. Te duca<sup>n</sup> cúñaha tucu-ndo xii nchaa dava-gã ñáyiu cùu cuendá-gã sã ño na càda ndee iní-yu. Te cue ñáyiu nãció<sup>n</sup> Itàliá ñáyiu ndècu ndihí-o ichi-gã cãchí-yu sã ño cada ndee iní-ndó. 25 Te Yã Ndiöxí ño na chindee chitúu ñaha-gã xii-ndo nchãa-ndo. Te duca<sup>n</sup> na cùnduu. Te ño chí cáda ndee iní-nã vitna.

## TUTÚ NÍ CADÚHA TÉ SANTIAÚ

*Té Sàntiaú cádũha-dé tutú quíhí<sup>n</sup>  
ndaha ñáyiú isràél nchìté nuu ñihí  
ñuyúú*

<sup>1</sup> Yúhú té Sàntiaú xínú cuèchi-í núú Yă Ndiõxí ndihí núú Xítohó Jesucristú, te tèe-í tnúhu-a quide ndee iní ñáhà-í xii nchòhó ñáyiú isràél nchìté nuu ñihí ñuyúú-a.

*Yá Ndiõxí táxí-gă sá xìní tnùnì-ó*

<sup>2</sup> Te nchòhó ñáyiú ndècu ndihí-í ichi Xítohó Jesucristú, ío cudíí ìní-ndó cùndecu-ndo cuéi náí cùu sá ùhú véxi cuèndá-ndó, <sup>3</sup> chi duca<sup>n</sup> te cutnùnì iní-ndó sá sàndáá ndisa iní-ndó-gă, te cunduu càhnu iní-ndó cuéi náí ná yáha-ndo. <sup>4</sup> Te cunduu càhnu-ni iní-ndó te duca<sup>n</sup> te cuu-ndo ñáyiú váha, te cundáá-ndó núú Yă Ndiõxí, te duca<sup>n</sup> te ñá túú-gă ná cumánì-ndó núú-gă.

<sup>5</sup> Te núu cùmánì sá xìní tnùnì-ó, te cacá<sup>n</sup>-ó núú Yă Ndiõxí te mee-gă taxi-gă, chi ío váha iní-gă, te ñá túú cùnini iní-gă núú-ó. <sup>6</sup> Te ni yùhu ni iní-ó cãcá<sup>n</sup>-ó núú-gă, te quindáá ndisa iní-ó sá táxí-gă sá cúmăní quiní tnùnì-ó, te vá cánì ñ<sup>n</sup> canì úú iní-ó. Chi nchaa ñáyiú sàni ñ<sup>n</sup> sàni úú iní-xi cùú-yu dàtná ndute làmár cuáhá<sup>n</sup>-xi duha cuáhá<sup>n</sup>-xi dàcá<sup>n</sup> nàá-xi òré quéné tâchí. <sup>7</sup> Te nchaa ñáyiú duca<sup>n</sup> sàni iní-xi, te vá cánì ìní-yu sá ñihí-yu sá xicá<sup>n</sup>-yu núú-gă. <sup>8</sup> Chi nchaa ñáyiú sàni ñ<sup>n</sup> sàni úú iní-xi ñá cùtnùnì iní-yu ndèdacàa sá sánì ìní-yu cadá-yu.

<sup>9</sup> Te nchaa ñáyiú ndàhú ñáyiú ndècu ichi-gă, xìnì ñuhu-xi ñá túú-gă ná canì iní-yu, mee-nă cudíí ìní-yu, chi Yă Ndiõxí chíndèe ñaha-gă xií-yu. <sup>10</sup> Te nchaa ñáyiú cuica xìnì ñuhu-xi cundecu váha iní-yu núú Yă Ndiõxí cuéi náí ná yáha-yu. Chi ñáyiú-án cùú-yu dàtná itá nchaa cùhú sá ñà túú cùdíi naha. <sup>11</sup> Chi òré ní cuu ñihí cahni nchícanhii, te ní dádí-ñi-xi nchaa cùhú cuíí-ă<sup>n</sup> te ní cóyo-ni nchaa

itá-xi, te ñá túú-gă cáá vìi. Te duca<sup>n</sup> sàtnahá-xi cùu ñáyiú cuica chi núú chíú<sup>n</sup>-ñi-yu xihí-yu.

*Nchaa ñáyiú quide cahnu iní-xi  
nchaa sá yăha-yu*

<sup>12</sup> Te váha táhú nchaa ñáyiú quide cahnu-ni iní-xi cuéi nándì sá yăha-yu ndècú-yu ichi Yă Ndiõxí, chi òré ná ndíhí nchaa xíà<sup>n</sup> yăha-yu, te cuáñaha Yă Ndiõxí ñ<sup>n</sup> coróná váha vìhi cundecu ndihí-yu, te ndáá chi duca<sup>n</sup> càhá<sup>n</sup> Yă Ndiõxí sá táxí-gă xii nchaa nchoo ñáyiú ñùhu iní ñáhá xii-gă. <sup>13</sup> Te nchaa ñáyiú sàni iní-xi cada nándì sá cuèhé sá dúhá, te vá cánì ìní-yu sá Yă Ndiõxí táuchìu<sup>n</sup>-gă duca<sup>n</sup> cadá-yu, chi Yă Ndiõxí ñá quíú te canì iní-gă cada-gă ñ<sup>n</sup> sá cuèhé sá dúhá, te ni ñà túú tàuchìu<sup>n</sup>-gă sá dúcá<sup>n</sup> cadá-yu. <sup>14</sup> Te cùnì-yu cadá-yu nchaa sá cuèhé sá dúhá chi duca<sup>n</sup> véxi iní-yu. <sup>15</sup> Te nchaa ñáyiú ío ñùhu iní nchaa sá cuèhé sá dúhá te quidè-yu, te núu na càda-ní-yu te cuíta nihnú-yu.

<sup>16</sup> Te nchòhó ñáyiú ío cùu iní-í ndècú ndihí-í ichi Xítohó Jesucristú, vá dáñá-ndó mèe-ndo dandahú ñáhá ñáyiú xii-ndo. <sup>17</sup> Chi nchaa sá vâha véxi-xi núú Yă Ndiõxí Yaá ndècú àndìu, chi ñìu mee-gă ní cadúha-gă andìu ndihí nchaa chódínì, ndihí yóó, ndihí nchícanhii. Te Yă Ndiõxí ñá túú ndì quehe<sup>n</sup> ndì quehe<sup>n</sup>-gă sá cánì ìní-gă, te ni ñà túú cùu-gă dàtná ñ<sup>n</sup> cuándáhú cuáhá<sup>n</sup>-xi duha cuáhá<sup>n</sup>-xi dàcá<sup>n</sup>, chi ñ<sup>n</sup>-ni sá sánì ìní-gă. <sup>18</sup> Te Yă Ndiõxí ní cuinì-gă sá cùú-ó dèhe-gă, te ndáá sá cùú-ó dèhe-gă chi sàndáá iní-ó tnùhu-gă. Te nchoo ñáyiú sàndáá iní-xi tnùhu-gă cùnùu-gă-ó chi ní nduu-o dèhe-gă.

*Ichi ndáá cuítì*

<sup>19</sup> Te nchòhó ñáyiú ío cùu iní-í ndècú ndihí-í ichi Xítohó Jesucristú, cundedóho-ndo ñ<sup>n</sup> tnùhu na càhá<sup>n</sup>-í-a. Te cùnì-í sá cùndecu túha-ndo cùndedóho-ndo tnùhu Yă Ndiõxí, te canì váha iní-ndó nàcuáa càhá<sup>n</sup>-ndó, te cunduu càhnu iní-ndó te vá cùdèé<sup>n</sup>-ndó. <sup>20</sup> Chi núu na cùdèé<sup>n</sup>-ó te ñá túú quide váha-o núú Yă Ndiõxí.



21 Te dañà-ndo nchàa sá cuèhé sá dúhá íó ñuyíú-a. Te quindáá iní-ndó tnúhu Yá Ndiöxí ndécú ndìhi-ndo, te vá cùndùu sáá iní-ndó, te duca<sup>n</sup> te naníhí tàhú-ndó.

22 Te quindáá iní-ndó tnúhu-gá te vá cuèndá-ni cundedóho-ndo, chi núu na cundedóho-ndo te vá tníí-ndó ñá, te dícó-ni dándahú-ndó mée-ndo te vá naníhí tàhú-ndó. 23 Chi nchaa ñáyiú dícó-ni sácúndedóho tnúhu-gá te ñá túú sàndáá iní-yu, ñáyiú-á<sup>n</sup> cúú-yu dàtná ì<sup>n</sup> ñáyiú sácúndéhé-ní núú-xi núú yùtátá. 24 Chi nini ndèhé-yu ní xiní-yu núú-yu, te ní xócání-yu te ní nacuanáa-ní-yu nàcuáa càa núú-yu. Te duca<sup>n</sup> sàtnahá-xi cùu ñáyiú sácúndedóho tnúhu Yá Ndiöxí, te ñá túú tníí-yu. 25 Te nchaa ñáyiú dàcuaha ndisa tnúhu ní dándóo Yá Ndiöxí ñihnu-ní-yu ichi-gá, chi ñá díú ì<sup>n</sup> sá vèe cùu-xi. Te ñáyiú-á<sup>n</sup> ñá túú dícó-ni sácúndedóho-yu chi quide ndáá-yu núú-gã, te cùdíí iní-yu xíndecú-yu.

26 Te nchaa ñáyiú cächí sá ndécú ìchi ndáá te cùtèxínu-ni càhá<sup>n</sup>-yu, te xíá<sup>n</sup> dícó-ni dándahú-yu mée-yu sá ndécú-yu ichi ndáá. 27 Te núu ndècu-o ichi ndáá cuítì ichi Dútú Ndiöxí, te chindee-o nchàa ñáyiú ní ndóo ndàhú, ndìhi ñáyiú quèé ndécú ndìhi tnúndòho tnúhu ndàhú, te vá cádá-o nãndi sá cuèhé sá dúhá íó ñuyíú-a.

## 2

### *È<sup>n</sup>nuu-ni cùu iní-ó nchàa tnaha ñáyiú-o*

1 Te nchòhó ñáyiú ndècu ndìhi-í ichi Xítóhó Jesucristú Yaá cùnùu, è<sup>n</sup>nuu-ni càhá<sup>n</sup> ndìhi váha-ndo nchàa tnaha ñáyiú-ndo. 2 Te núu núú nátàcá-ndó chiñuhu-ndo Yá Ndiöxí ní sáá ì<sup>n</sup> téé ío váha càa dóó ñihnú-dè, te ní sáá tucu ì<sup>n</sup> téé ñihnu dóó ndàhú, 3 te núu téé ñihnu dóó vaha-ni-á<sup>n</sup> néhé-ndó sã yíñùhu núú-dè, te taxinucóo-ndo-dè ì<sup>n</sup> núú xilé váha, te téé ndàhú-á<sup>n</sup> daxòcòo-ndo-dè ì<sup>n</sup> xio àdi canucóo-ndo-dè núú ñúhú, 4 te núu duca<sup>n</sup> na càda-ndo te ñá túú quide váha-ndo. Chi è<sup>n</sup>-ni-dé cúú ìní-ndó, te è<sup>n</sup>-dé ñá túú cùu iní-ndó.

5 Te nchòhó ñáyiú ío cùu iní-í ndécú ndìhi-í ichi Xítóhó Jesucristú, chí cùndedóho tucu tnúhu na càhá<sup>n</sup>-í-a. Yá Ndiöxí càhá<sup>n</sup>-gá vai ñáyiú ndàhú cuèndá tnahá tnúhu ndìhi ñàhá-yu xii-gá, te ndècu váha-gá-yu dàcúúxí ñáyiú cuica ñáyiú ñá túú sàndáá iní tnúhu-gá, chi ní cachí-gá sá ncháá ñáyiú na cùu iní ñàhá xii-gá nduu táhù-yu cundecú-yu ndìhi-gá ni caa ni quíhí<sup>n</sup>. 6 Te nchòhó, ñá túú nèhe-ndo sá yíñùhu núú ñáyiú ndàhú, chi núú ñáyiú cuica-ni nèhe-ndo sá yíñùhu. ¿Te náa ñá cútnùní iní-ndó sã ñáyiú cuica dándòho ñaha-gá-yu xii-ndo, te càndeca ñàhá-yu sàhá<sup>n</sup> núú cuè téé cùchiu-á<sup>n</sup>? 7 Te diu-ní-yu ío càhá<sup>n</sup> cuèhé-yu cuèndá Xítóhó Jesucristú, te nchòhó sa ní nduu-ndo dèhe-gá.

8 Te è<sup>n</sup> ndudú cùnùu-gá ní càhá<sup>n</sup> Yá Ndiöxí ní ngódó tnùnì núú tütú-gá cächí-xi sá cúú ìní-ó tnàha ñáyiú-o dàtná cúú ìní-ó mée-o. Te núu duca<sup>n</sup> na càda-o te quide váha-o. 9 Dico núu ñá túú cùu iní è<sup>n</sup>nuu-o cuè tnaha ñáyiú-o, te cuu cuèchi xii-o chí ñá túú quide-o nacuaá càhá<sup>n</sup> Yá Ndiöxí. 10 Te núu è<sup>n</sup> ñáyiú ndaunihnu è<sup>n</sup> sá càhá<sup>n</sup> Yá Ndiöxí, te dava-ni quidé-yu ña, te ñáyiú-á<sup>n</sup> ñá túú quidé-yu nàcuáa càhá<sup>n</sup> ndudú Yá Ndiöxí. 11 Te Yá Ndiöxí ní cachí-gá sá téé ndècu ñadìhí-xi vá càhá<sup>n</sup> ndìhi-dé ìngá ñadìhí. Te diu-ni-gá ní cachí-gá sá vã cáhni-ó tnàha ñáyiú-o. Te cuèi ñá túú càhá<sup>n</sup> ndìhi-o ìngá ñadìhí, te núu sàhni-o tnaha ñáyiú-o te ñá túú quide-o nacuaá càhá<sup>n</sup> ndudú Yá Ndiöxí. 12 Te nchoo xini ñuhu-xi càhá<sup>n</sup>-ó tnúhu váha te cada ndáá-ó, chí ñá díú è<sup>n</sup> sá vèe cùu-xi sá ñí cachí Yá Ndiöxí cada-o. Te mee-gã ní cachí-gá sá cádá ndáá-gá cuèchi-o na sáá nduu. 13 Te nchaa ñáyiú ñá túú cùndahú iní tnàha ñáyiú-xi, te vá cùndahú iní ñàhá-gã xii-yu na sáá nduu càda ndáá-gá cuèchi-yu. Te nchaa ñáyiú cùndahú iní tnàha ñáyiú-xi te Yá Ndiöxí cùndahú iní ñàhá-gã xii-yu na sáá nduu-á<sup>n</sup>.

*Quindáá iní-ó Yá Ndiöxí te cada váha-o*

14 Te nchòhó ñáyiú ndècu ndìhi-í ichi Xítóhó Jesucristú, te núu càchí-ó sã sàndáá iní-ó Yã Ndiòxí te ñá túú quide-o sã vãha, te ñá túú ndèé nándìhi-xi, chi vá nánìhí tàhú-ó te núu duca<sup>n</sup> na càda-o. 15 Te núu ndèhe-o ì<sup>n</sup> tñaha ñáyiú-o ñà túú dõ-<sup>n</sup>yu àdi ñá túú sã cúnchító-yu, 16 te xãha<sup>n</sup>-o: “Núhú-n te nducu-n dõó cuihnu-n te nducu-n sã cáxí-n”, xãha<sup>n</sup>-o, te ñá túú ñã sãñaha-o, te sã dúcã<sup>n</sup> quide-o te ñá túú quide váha-o. 17 Te núu càchí-ó sã sàndáá iní-ó Yã Ndiòxí te ñá túú quide váha-o ndècu-o, te vèdana nándìhi-xi.

18 Te ío ñáyiú càchí-yu sã sàndáá iní-yu Yã Ndiòxí, te ío ñáyiú càchí-yu sã méé-ní sã vãha quide-yu. Te yúhú càchí-í sã núu ñá túú quide-o sã vãha, te ñá túú sàndáá iní-ó Yã Ndiòxí. Te nchoo quide-o sã vãha núu xíã<sup>n</sup> cútnùní iní-ó sã sàndáá iní-ó-gã. 19 Te ío ñáyiú càchí sã ì<sup>n</sup>dii-ni Yã Ndiòxí ndécú, te váha-ni càhá<sup>n</sup>-yu. Te tñahá yucu ñãvãha ndìhi nchaa espíritú cúnðìhi-xi xiní-xi sã ndécú ì<sup>n</sup>dii-ni Yã Ndiòxí, te yùhú-xi dico ñá túú tñi-xi tñúhu-gã. 20 Te ío ñi dǎquí-ó te núu na càchí-ó sã sàndáá iní-ó Yã Ndiòxí, te vá cádá-ó sã vãha. 21 Te ñaní tñahá-ó ndíi Àbrahám téé ní xíndecu ndéé sanaha ní ngúndecu váha ndíi núú Yã Ndiòxí, chi ní xito ndéé ñáhã-gã xii ndíi núu ndisa sã cáhni ndíi déhe ndíi té Isàác nduu táhú-gã ní cùu, te dává-á<sup>n</sup> ñi cutnùní iní-gã sã ío sàndáá iní ñáhã ndíi xii-gã, núu ñá ní dàña-gã cahni ndíi déhe ndíi. 22 Te ñaha-o sã ndíi Àbrahám ñá díú-ní sã méé-ní sã ñi sàndáá iní ñáhã ndíi xii-gã, chi ní tñi ndíi tñúhu-gã. 23 Te duca<sup>n</sup> ñi quee ndáá-xi nàcuáa càhá<sup>n</sup>-xi núú tütú Yã Ndiòxí núú càchí-xi: “Ndíi Àbrahám ní sàndáá iní ndíi ní quide ndíi nchaa nàcuáa ní xãha<sup>n</sup> Yã Ndiòxí, te ní ngúndecu váha ndíi núú-gã, te ní cachí-gã sã cúú ndíi ì<sup>n</sup> téé ío váha tñahá tñúhu ndìhi-gã”, duha càchí-xi núú tütú-gã.

24 Te xíã<sup>n</sup> cútnùní iní-ó sã ñà díú mèe-ni sã quindáá iní-ó Yã Ndiòxí, chi núu na càda-o nàcuáa cuu váha iní-gã te ngúndecu váha-o núú-gã 25 dàtná ní

quide-gã tá Ràháb ì<sup>n</sup> ñadìhí ní xíndecu ndéé sanaha, chi xíchí-ã<sup>n</sup> ñi xíndecu-xi ichi díi iní, dico ní tuha-xi ichi Yã Ndiòxí te ní ngúndecu váha-xi núú-gã, chi ní chindee-xi cuè téé isràél cue téé ní xica chlu<sup>n</sup>-gã, te ní sanu ichi ñaha-xi xii-güedé ì<sup>n</sup> ichi núú vã nánìhí ñáhã cuè téé cùu úhú iní ñáhã xii-güedé. 26 Te nchaa ñáyiú càchí sã sàndáá iní Yã Ndiòxí, te ñá túú quide-yu nàcuáa càhá<sup>n</sup>-gã ñáyiú-á<sup>n</sup> cúú-yu dàtná ì<sup>n</sup> ñáyiú ní xíhí. Chi ñá túú-gã ndíxí tñu iní-yu nchaa sã cuèhé sã dúhá quide-yu. Duha sãtnahá-xi cùu nchaa ñáyiú ñá túú cuìní tñi tñúhu càhá<sup>n</sup> Yã Ndiòxí.

### 3

#### *Nàcuáa quide yaa-o*

1 Te nchòhó ñáyiú ndècu ndìhi-í ichi Xítóhó Jesucristú, vá ncháá-ndó càni iní-ndó cùu-ndo mestrú dacuàha-ndo ñáyiú tñúhu Yã Ndiòxí chi íi cáá-xí. Chi na quítnahá nduu nàcuáha-o cuendá núú-gã, te núu ñá túú ní quide ndáá-ó ñá, te vá cúú vãha iní-gã núú-ó. 2 Te nchaa-o ío cuèhé sã ñà túú váha quide-o. Te nchaa ñáyiú ñá túú càhá<sup>n</sup> tñúhu cuèhé tñúhu duha cúú-yu ñáyiú ñá túú ñã cùmãní chi ío ndáá quidè-yu. Te xiní-yu cotñi-yu mèe-yu, te quide váha-yu núú Yã Ndiòxí. 3 Te dàtná cuìní-ndó cùu ì<sup>n</sup> quiti te núu na chìhi-o frenú yuhu-di, te cotñi-o-di te ngúnu ichi-di, te duca<sup>n</sup> sãtnahá-xi cùu ñáyiú sàcótñi mee-xi, chi ñá túú càhá<sup>n</sup>-yu tñúhu cuèhé tñúhu duha. 4 Te dàtná cuìní-ndó cùu barcú cuèi ñàhnu vihi-xi, dico òré quéné ñihi táchí te tündaha-xi ì<sup>n</sup> xio, dico téé dàcaca ndacu-dé dáquihí<sup>n</sup>-dé-xi ndìhi ì<sup>n</sup> yutnu sã dánàni-güedé tímú ndàa núú càchí iní-dé quihí<sup>n</sup>-xi. 5 Te duca<sup>n</sup> cùu tucu yaa-o chi ío lĩhli-xi dico ío cuèhé tñúhu càhá<sup>n</sup>-ó ndìhi-xi. Te duca<sup>n</sup>-ni sãtnahá-xi cùu tucu sã lúhá ñùhú chi sãhmi-xi ì<sup>n</sup> yucu. 6 Te díu-ni duca<sup>n</sup> sãtnahá-xi cùu yaa-o chi ío cuèhé tñúhu cuèhé tñúhu duha càhá<sup>n</sup>-ó ndìhi-xi, te dàcuíta nihnu ñaha-xi xii-o. Te ío cuèhé cuèchi quide-o ndìhi-xi

cuendá sá ñùyíú-a ñùhu tnahá ñúhú tñi yucu ñávãha dàticá nihnu ñaha-xi. <sup>7</sup> Te ndacu-o càda masú-ó nchàa núu quiti ío ñuyíú cuèi quiti déé<sup>n</sup> quiti xica núu ñúhú, te cuèi quiti ndàva, te cuèi cóo, te cuèi quiti ñùhu xiti ndute làmár, chi duca<sup>n</sup> quide dava cue téé ñuyíú-a. <sup>8</sup> Dico yàa-o chi vá yõo ñ<sup>n</sup> ndacu cada masú ñáhá xii-xi nacuaá cáhá<sup>n</sup>-ó mée-ni tñuhu váha ndihí-xi, chi mee-ni tñuhu cuèhé tñuhu duha cùnuu-gá cáhá<sup>n</sup>-ó ndihí-xi. Te cùu-xi datná ñ<sup>n</sup> venènú chi dàtiú-xi iní-ó. <sup>9</sup> Te ñiú-ni ndihí yàa-o quide cahnu-o Dútú Ndiõxí Yáa cúú Tátá-ó, te ñiú-ni ndihí yàa-o cáhá<sup>n</sup> úhú-ó cuè tnahá ñáyíu-o. Te xini ñuhu-xi vá dúcá<sup>n</sup> càda-o, chi mee-gã ní chihi-gá sá xini tñuní-ó ndihí iní-ó, dàtná cáá mée-gá ñúhú iní-gá. <sup>10</sup> Te ñiú-ni yuhu-o quèe tñuhu váha cáhá<sup>n</sup>-ó, te ñiú-ni yuhu-o quèe tñuhu cuèhé tñuhu duha. Te nchòhó ñáyíu ndècu ndihí-í ichi Xítohó Jesucristú cunaha-ndo sã ñà túú ndùu váha-xi duca<sup>n</sup> càda-o. <sup>11</sup> Te ñá túú xini-ndó sã ñ<sup>n</sup> núu quèé ñihni ndute, te quèe ndute váha te quèe ndute úá-ã<sup>n</sup>. <sup>12</sup> Te nchòhó ñáyíu ndècu ndihí-í ichi Xítohó Jesucristú, te ñá túú xini-ndó sã ñ<sup>n</sup> yutnu ngúxí, te cùu<sup>n</sup> aceitúná, àdi xini-ndó sã ñ<sup>n</sup> yoho yaha stilé te cùu<sup>n</sup> ngúxí. Te duca<sup>n</sup> cuèi ñ<sup>n</sup> núu quèé ñihni ndute, vá cúú quèe ndute váha te quèe ndute úhá. Te duca<sup>n</sup> sãtnahá-xi cùu yuhu-o chi vá cúú cáhá<sup>n</sup>-ó tñuhu váha te cáhá<sup>n</sup>-ó tñuhu cuèhé tñuhu duha.

#### *Nchaa sá vãha xini tñuní-ó taxi Yá Ndiõxí*

<sup>13</sup> Te núu ndècu ñáyíu túha tnuú-ndó ñáyíu cùnuni iní-xi, te xini ñuhu-xi mee-ni sá vãha cadá-yu, duca<sup>n</sup> te cutnuni iní-ó sã túha ndisá-yu, te vá cáda càhnú-yu mée-yu. <sup>14</sup> Te núu nchoo cuèdú iní-ó te cuini-ó cùnuu-o núu tñaha ñáyíu-o, te vá càchí-ó sã túha-o, chi ñá túú quide ndáá-ó te núu duca<sup>n</sup> na càda-o. <sup>15</sup> Chi ñá díú xã<sup>n</sup> ní dànehé ñáhá Yá Ndiõxí, chi ñuyíú iha ní cacu nihnu-xi cuendá sá yucu ñávãha dàcahu iní ñáhá-xi. <sup>16</sup> Te núu ndécú ñáyíu cuèdú iní

ñáyíu cuini cunuú, te yacá<sup>n</sup> mee-ni ndáhú nàá xñdecú-yu, te ñá túú quide váha-yu, chi mee-ni nchàa sá cuèhé sá dúhá quide-yu. <sup>17</sup> Te núu ní taxi Yá Ndiõxí sá xini tñuní-ó, te cada váha-o, te cáhá<sup>n</sup> ndihí váha-o nchàa tnahá ñáyíu-o, te tñi-o tñuhu váha cáhá<sup>n</sup>-yu, te cundáhú iní-ó-güé-yu te chindee-õ-yu, te vá caní ñ<sup>n</sup> cani úú iní-ó, te ío cunduú ndáá iní-ó. <sup>18</sup> Te núu cuini-ó ñá túú ñà cuu cundecu-o ñuyíú-a, te cada váha-o sã cúú-xi tñaha ñáyíu-o cuendá sá ñà túú ñà cuu cundecu-o ndihí-yu. Te duca<sup>n</sup> te nguínchicú<sup>n</sup> dava-gá tñaha ñáyíu-o càda váha-yu.

## 4

### *Vá cúú cundecu-o ichi Yá Ndiõxí te cada-o nãndi sá cuèhé sá dúhá*

<sup>1</sup> ¿Te xini-ndó ñà cuendá nàá ñáyíu te xisahni tñahá-yu-ã<sup>n</sup>? Te nàá-yu sá tñuhu cuèdú iní, chi ñiú-ni xã<sup>n</sup> ñúhú iní-yu, te ñá túú ndècu váha iní-yu. <sup>2</sup> Chi cuini-yu cundecu ndihí-yu ñ<sup>n</sup> sá ñà túú ndècu ndihí-yu, te ñá túú ñihí-yu núu xã<sup>n</sup> xicuu cuèdú iní tñahã-yu, te xicuehé tñahã-yu, te cani tnahá-yu, te xisahni tñahá-yu. Te ñá túú ñihí-yu sá cuini-yu chi ñá túú xicá<sup>n</sup>-yu núu Yá Ndiõxí. <sup>3</sup> Te cuèi xicá<sup>n</sup>-yu ñ<sup>n</sup> sá cuini-yu núu-gã te ñá túú sãñaha-gã, chi ñá túú xicá<sup>n</sup>-yu ñ<sup>n</sup> sá cúú xii-yu sá vãha, chi ñ<sup>n</sup> sá ná ndihí-yu núu cáda-yu nchaa sá cuèhé sá dúhá xicá<sup>n</sup>-yu, núu xã<sup>n</sup> ñá ñihí-yu. <sup>4</sup> Te nchaa ñáyíu duca<sup>n</sup> xiquide ío cùu sáá iní-yu núu Yá Ndiõxí. Te naha-ndo sá ncháá ñáyíu cùdí iní-xi cundecu ichi cuèhé ichi duha cùu úhú iní-yu Yá Ndiõxí, chi vá cúú cundecu-o ichi cuèhé ichi duha, te cundecu-o ñchi-gá. <sup>5</sup> Te ñá túú díó duca<sup>n</sup> cáhá<sup>n</sup>-xi núu tütú Yá Ndiõxí núu càchí-xi: “Yá Ndiõxí ní taxi-gá Espiritú-gá ndécú ndihí-o. Te Espiritú-gá-á<sup>n</sup> cuini-xi sá mée-ní-gã cuhu<sup>n</sup> iní-ó”, duha càchí-xi núu tütú-gá. <sup>6</sup> Te Yá Ndiõxí ío chindee ñaha-gá cuendá cada ndáá-ó núu-gã dàtná càchí tucu-xi núu tütú-gá núu càchí-xi: “Yá Ndiõxí ñá túú cùu

váha iní-gá núú nchàa ñáyiú quide cahnu mee-xi, dico chindee-gá cue ñáyiú ndàhú iní-xi”, duha càhá<sup>n</sup>-xi núú tütú-gá. <sup>7</sup> Te cada-ndo nàcuáa càhá<sup>n</sup> Yá Ndiöxí. Te vá cáda-ndo nàcuáa cuini yucu ñávãha, duca<sup>n</sup> te xóo cóo ndéé ñáhá-xi xii-ndo. <sup>8</sup> Te tñi-ndo tñuhu càhá<sup>n</sup> Yá Ndiöxí te cundecu ndihi ñaha-gã xii-ndo. Te nchaa nchòhó ñáyiú ndècu ichi cuehé ichi duha dañã-ndo ichi-á<sup>n</sup> te cada váha-ndo. Te nchaa nchòhó ñáyiú sàni iní cunu cuechi núú Yá Ndiöxí te quide-ni-ndo nchaa sá cuéhé sá dúhá, te ñá túú quide váha-ndo núú duca<sup>n</sup>, chi xini ñuhu-xi sá càcá<sup>n</sup>-ndó núú Yá Ndiöxí sá ná ndádá ndòo ndada nine-gá iní-ndó. <sup>9</sup> Te ndixi cuéchi iní-ndó nchàa sá quidé-ndó ndèé ndáhyú ndisa-ndo sã ndihú iní-ndó, te ñá díú dà cudíí iní-ndó. <sup>10</sup> Te náhmá-ndó núú Yá Ndiöxí nchaa sá ñi quide-ndo, te ngúndecu váha-ndo núú-gã.

*Vá càhá<sup>n</sup>-ó nchàa sá quidé tnàha ñáyiú-o*

<sup>11</sup> Te nchòhó ñáyiú ndècu ndihi-í ichi Xítohó Jesucristú, vá cuátnuhu tnaha-ndo, chi nchaa ñáyiú sàtnuhu tnaha dicó-ni ndàa nuú-yu ndèhe tnahá-yu, te ñá túú càhá<sup>n</sup> váha-yu cuendá tñuhu Yá Ndiöxí sá sánú ichi ñaha xií-yu nàcuáa cundecú-yu, chi dàquee tíhũ-yu tñuhu-á<sup>n</sup>. Te núú càchí-ndó sã ñà túú càhá<sup>n</sup> váha tñuhu Yá Ndiöxí, te xiá<sup>n</sup> quéé-xi sã ñà túú sàndáá iní-ndó tñuhu càhá<sup>n</sup>-gá, te cuini-ndó cùnno tñuhu-ndo núú tñuhu-gá. <sup>12</sup> Te mee Yá Ndiöxí ní cachí-gá nàcuáa cada-o, te ñi-ni mee-gã càhá<sup>n</sup>-gá te núú ní quide váha-o, àdi ñá túú ní quide váha-o. Te ñi-ni mee-gã dàcácu nihnu ñaha-gã xii-o núú ùhú núú ndàhú, te ñi-ni-gá daquihí<sup>n</sup> ñáhá-gã xii-o núú ùhú núú ndàhú-á<sup>n</sup> te núú vá cáda váha-o. Te nchoo ñà túú ná cúú-ó, te núú mee-ni nchàa sá quidé tnàha ñáyiú-o cùndehe-o.

*Ñá túú cùnno iní-ó nãsa túndaá-ó ìngá nduu*

<sup>13</sup> Te dava nchòhó càchí-ndó sã vítná àdi tneé quihí<sup>n</sup>-ndó ñi<sup>n</sup> ñuuú, te yacá<sup>n</sup> cundecu-ndo ñi<sup>n</sup> cuía cada-ndo ñi<sup>n</sup> ndàhú te níhí-ndó díhú<sup>n</sup>. <sup>14</sup> Te ni ñã xìní-ndó ná cúú sã yãha-ndo vitna àdi tneé. Te nchoo cùu-o datná ñi<sup>n</sup> vícò núhú, chi vícò-ã<sup>n</sup> tñavíí ndéhé-ó te tna tnaa-gá sa ní ndòñúhú-xi. Duca<sup>n</sup> sãtnahá-xi cùu nchoo chi ñi<sup>n</sup> úú nduu duha vèxi-o ñuyíú-a te ndoñuhu-o. <sup>15</sup> Te núú sàndáá iní-ó Yá Ndiöxí te duha càhá<sup>n</sup>-ó: “Te núú Ndiöxí ná càchí-gá sá cùndecu tnaa-o ñuyíú-a te cada chi<sup>n</sup>-o”, duha cachí-ó. <sup>16</sup> Dico mee-ndo chi ío ñi<sup>n</sup> iní-ndó cuini-ndó cùnno tñuhu-ndo núú Yá Ndiöxí, te ñá túú nduu váha-xi sá dúcá<sup>n</sup> quide-ndo. <sup>17</sup> Te núú xìní-ó càda-o sã váha te ñá túú quide-o, te cùu-xi ñi<sup>n</sup> cuéchi núú-gã.

## 5

*Tñuhu sá dátũha ñaha xì nchaa ñáyiú cuica ñà túú sàndáá iní tñuhu Yá Ndiöxí*

<sup>1</sup> Te nchòhó ñáyiú cuica ñáyiú cuihna iní-xi cundedóho-ndo tñuhu na càhá<sup>n</sup>-í-a. Vitna ngúita-ndo ndihú iní-ndó, te ndáhyú víhí-ndó, chi quixi ñi<sup>n</sup> tñúndòho cuendá-ndó te ndoho víhi-ndo. <sup>2</sup> Te nchaa sá ndécú ndihi-ndo ndihi cuita tíu quihí<sup>n</sup>, te quee tíquidi dóo-ndó, <sup>3</sup> te díhú<sup>n</sup>-ndó caxi cudi ñuhu. Te xiá<sup>n</sup> cuita naquiní ndeé-ndó tñúndòho sã ñà túú quide váha-ndo. Te ndihi-ndo ndihi díhú<sup>n</sup>-ndó sã ñi taxúha-ndo, chi vitna sa ta cùyatni sáá nduu ndihi ñuyíú-a. <sup>4</sup> Te nchaa cue téé ní quide chi<sup>n</sup> núú chíú<sup>n</sup>-ndó ñi ndatnúhu-ndo ndihi-güedé nàcuáa cháhu-ndo-güedé ní cùu, te ñá túú ní cháhu-ndo-güedé nàcuáa ní xáha<sup>n</sup>-ndo xì-güedé, núú xiá<sup>n</sup> ío ndècuéchi-ndo. Te Yá Ndiöxí Yaá ndécú àndiu ní tecú dóho-gá nàcuáa càhá<sup>n</sup>-güedé sã ní dándàhú-ndó-güedé. <sup>5</sup> Te nchòhó ñáyiú cuica, sá ndécú váha-ni-ndo cùndee iní-ndó, núú quide-ni-ndo nchaa sá vèxi iní-ndó. Te cùu-ndo datná ñi<sup>n</sup> quiti nùcuíhnu mee-ni xèxi-di, te sáá nduu sàhni-güedé-di. Te duca<sup>n</sup> sãtnahá-xi cùu nchòhó chi



ndècu váha-ndo vitna, te sáá ñ<sup>n</sup> nduu nàcháhu-ndo nchàa sá quidé-ndó núú Yă Ndiöxí te núu vá quindáá iní-ndó-gă. <sup>6</sup> Te quide úhú iní-ndó sàhni-ndo cue ñáyiu quide ndáá núú Yă Ndiöxí, te ñá túú nă quidě-yu.

*Cunduu càhnu iní-ó te cáhá<sup>n</sup> ndihí-o Yă Ndiöxí*

<sup>7</sup> Te nchòhó ñáyiu ndècu ndihí-í ichi Xítohó Jesucristú, cada ndee-ni iní-ndó cùndetu-ndo ndéé ná quixi tucu-gă ñuyú-a, te cada-ndo dàtná quidé nchàa ñáyiu chihí tata chi sàcùndetú-yu ndéé cúú<sup>n</sup> dáú te chihí-yu. Te cùndee-ni iní-yu sàcùndetú-yu ndéé cúú<sup>n</sup>-gă dáú te cùu itú-yu, te ndùdí iní-yu. <sup>8</sup> Te duca<sup>n</sup> càda nchòhó tucu cada ndee iní-ndó cùndetu-ndo, chi sa ta cùyatni nduu quixi tucu Xítohó Jesucristú. <sup>9</sup> Te duha ndùu tnúhu càhá<sup>n</sup>-í núú nchòhó ñáyiu ndècu ndihí-í ichi Xítohó Jesucristú, vá ndàcá<sup>n</sup> cuéchi núú tnáhá-ndó te núu nása cùu ndecu-ndo, chi ñá cuéhé-gă nduu cùmání te quixi Crístú nacuaca ñaha-gă xii-o cùndecu-o núú Yă Ndiöxí, te mee-gă cada ndáá-gă cuéchi-o. <sup>10</sup> Te nchòhó ñáyiu ndècu ndihí-í ichi Xítohó Jesucristú, ndacu iní-ndó nàcuáa ní quide nchaa cue téé ní xóo cáhá<sup>n</sup> tnúhu Yă Ndiöxí ndéé sanaha sá ío càhnu ní xínduu iní-güedé cuéi nándí ní ndoho-güedé. <sup>11</sup> Te cùtnuní iní-ó sá cúú-ó ñáyiu ío váha táhú-xi te núu na càda cahnu iní-ó nchàa sá ná yăha-o cuëndá Yă Ndiöxí. Te nàha-ndo sá ndí Job duca<sup>n</sup> ní quide ndí, chi nándí sá ní yáha ndí te ní quide càhnu iní ndí. Te sátá ní yáha ní ndoho ndí, te ío cuéhé sá ní sáñaha Yă Ndiöxí xii ndí. Chi ío váha iní-gă te ío cùndahú iní-gă nchaa ñáyiu ío càhnu iní-xi.

<sup>12</sup> Te nchòhó ñáyiu ndècu ndihí-í ichi Xítohó Jesucristú, chí cùndédóho tucu tnúhu na càhá<sup>n</sup>-í-a, chi ío xini ñuhu-xi. Vá cácu nèhe-ndo Yă Ndiöxí òré cuíní-ndó sá cùtnuní iní ñáyiu sá ndáá cada-ndo ñ<sup>n</sup> sá càhá<sup>n</sup>-ndó. Te ní vá cácu nèhe-ndo sá càchí-yu cùu ndióxí cadúha cue téé ñuyú-a. Te núu ñ<sup>n</sup> sá xicá<sup>n</sup> tnàha ñáyiu-ndo núú-ndó te cúñaha-ni-ndo te núu cuu àdi sá vă

cúú. Te vá cácu nèhe-ndo Yă Ndiöxí, duca<sup>n</sup> te vá dándòho ñaha-gă xii-ndo.

<sup>13</sup> Te núu ndòho-ndo te cáhá<sup>n</sup> ndihí-ndo Yă Ndiöxí, àdi te núu ndècu váha-ndo te cudí iní-ndó te chiñuhu-ndo-gă, <sup>14</sup> àdi núu cùhú-ndó te cana-ndo cuè téé yíndaha ñaha xii-ndo nacuáa ndècu-ndo ichi Yă Ndiöxí cuëndá tee-güedé acití díquí-ndó, te cáca<sup>n</sup> táhú-güedé núú-gă cuëndá-ndó dàtná ní cachí mée-gă cunduu. <sup>15</sup> Te núu quindáá ndisa iní-ndó sá ndúha-ndo, te ndúha-ndo chi Yă Ndiöxí cada tátna ñaha-gă xii-ndo, àdi núu ní quide-ndo ñ<sup>n</sup> sá ñà túú tàú-ndó càda-ndo núú-gă te cada càhnu iní-gă cuéchi-ndo. <sup>16</sup> Te xini ñuhu-xi cùtnúhu tnàha-ndo òré ñá túú cùndáa-ndó núú Yă Ndiöxí cuëndá chindee tnúhu tnàha-ndo cáhá<sup>n</sup> ndihí-ndo-gă te xocàni-gă cuéhé-ndó, te cada càhnu iní-gă nchaa sá ñà túú vâha ní quide-ndo te núu cundecu váha iní-ndó. Te nchaa ñáyiu ndècu váha iní-xi núú Yă Ndiöxí na càcá<sup>n</sup>-yu ñ<sup>n</sup> sá cuíní-yu núú-gă te nihí-yu, chi sáa tnúhu-yu núú-gă. <sup>17</sup> Te té Eliás, téé ní xíndecu ndéé sanaha ní cá-a-dé dàtná cáá nchò. Te ní cáhá<sup>n</sup> ndihí-dé Yă Ndiöxí ní yùhu ní iní-dé ní xáha<sup>n</sup>-dê xii-gă sá vă dácù<sup>n</sup>-gă dáú, te ní tní-gă tnúhu ní cáhá<sup>n</sup>-dé, te ñá ní dàcuu<sup>n</sup>-gă dáú ùní cuíá dava. <sup>18</sup> Te dàtnuní duca<sup>n</sup> te ní cáhá<sup>n</sup> ndihí tucu té Eliás-á Yă Ndiöxí sá dácù<sup>n</sup>-gă dáú te ní cuu<sup>n</sup>, te ní cuu tucu nchaa sá ní xitu-güedé.

<sup>19</sup> Te nchòhó ñáyiu ndècu ndihí-í ichi Xítohó Jesucristú, te núu dava-ndo sà ndecu-ndo ichi Yă Ndiöxí ní cùu te ní dáñá-ndó, te ndècu tucu dava-ndo nadaxínu iní tnáhá-ndó nùcùndecu tucu-ndo ichi-gă, <sup>20</sup> te núu duca<sup>n</sup> na càda-ndo te dàcácu nihnu tnàha-ndo núú ùhú núú ndàhú, te mee Yă Ndiöxí cada càhnu iní ñáhá-gă xii-ndo cuéi ío cuéhé cuéchi ní quide-ndo.

## TUTÚ DÍHNA NUU NĪ CADÚHA TÉ PÈLÚ

*Té Pèlú cádúha-dé tutú sá cúu-xí cuè ñáyiu sàndáá iní ñáhá xì Yá Ndiöxí*

<sup>1</sup> Yúhú té Pèlú ní tendaha ñaha Xítóhó Jesucristú xíca cùu-í càhá<sup>n</sup>-í tnúhu-gá, te cádúha-í tutú-a sá cúu-xí nchóhó ñáyiu xínchíté nuu ndècu distritú Pòntó, ndihí distritú Gàlaciá, ndihí distritú Capadociá, ndihí distritú Àsiá, ndihí distritú Bitiniá. <sup>2</sup> Chi Dútú Ndiöxí ní cachí-gá sá cúu-ndó dèhe-gá ndéé cútñahá vátá ngáva-gá ñuyú, te Espiritú-gá ní quide-xi ndècu yíñuhu-ndo núu-gã vitna. Te ní cachí-gá sá cúu-ndó dèhe-gá cuèndá tñi-ndo nchàa tnúhu càhá<sup>n</sup> Xítóhó Jesucristú, ndihí cuèndá nduu ndoo nduu nine iní-ndó, chi ñi cuèndá-á<sup>n</sup> nì xíhí Xítóhó Jesucristú. Te xíca<sup>n</sup> táhù-í núu Yá Ndiöxí sá ño na chindee chítúu ñaha-gã xii-ndo cuèi vitna te cuèi núu cuàhá<sup>n</sup> núu vèxi, te ñi-ni-gá ná cáda te ío váha cuu iní-ndó cùndecu-ndo.

*Tnúhu ndee iní sá ndécú ndihí ñáyiu sàndáá iní ñáhá xì Yá Ndiöxí*

<sup>3</sup> Te vitna chí ná càchí-ó sã ño càhnu cuu Yá Ndiöxí Yaá cúu Tátá Xítóhó Jesucristú, chí ñi-gá ío ní cundàhú iní ñáhá-gã xii-o núu xíá<sup>n</sup> ní quide-gá sá nchóó nì nduu-o dàtná ñi<sup>n</sup> ñáyiu saa vitna. Te duca<sup>n</sup> nì quide ñaha-gã xii-o cuèndá sá Xítóhó Jesucristú ní xíhí-gá te ní ndoto-gá. Te cuèndá sá nì nduu-o dàtná ñi<sup>n</sup> ñáyiu saa, xíá<sup>n</sup> ní ngúndecu ndihí-o tnúhu ndee iní <sup>4</sup> sá cùndecu ndihí-o-gá nì caa nì quíhí<sup>n</sup>, chí duca<sup>n</sup> nì cachí-gá cunduu. Te yàcá<sup>n</sup> vá quíni-gá-ó nì ñi<sup>n</sup> sá cuèhé sá dúhá, te ío cùdí<sup>n</sup> iní-ó cùndecu-o ndihí-gá nì caa nì quíhí<sup>n</sup>. <sup>5</sup> Te sá sàndáá iní-ó Yá Ndiöxí, núu xíá<sup>n</sup> coto ñaha-gã xii-o ndéé ná sàa nduu nàquehe<sup>n</sup> cuèndá ñáhá-gã chí ío càhnu cuu-gá.

<sup>6</sup> Te xíá<sup>n</sup> ío cùdí<sup>n</sup> iní-ndó ndècu-ndo, te cuèi nándi ndòho-ndo ndecu-ndo dico sacú-ni nduu duca<sup>n</sup> ndòho-ndo. <sup>7</sup> Te òré ná cáda càhnu iní-ndó

yáha-ndo nchàa sá ná cáda ñaha ñáyiu xii-ndo, te duca<sup>n</sup> te cutnùni sàndáá ndisa iní-ndó Yá Ndiöxí, te sá dúcá<sup>n</sup> sàndáá iní-ndó Yá Ndiöxí ío-gá váha dàcúxí dǐhú<sup>n</sup> cuàá<sup>n</sup> chí xíá<sup>n</sup> ñá túu cùdí-xi. Te cuèi duca<sup>n</sup> dico xito ndéé náhí-ní-güedé núu ndisa cùu-xi dǐhú<sup>n</sup> cuàá<sup>n</sup>. Te duca<sup>n</sup> sãtnahá-xi cùu nchóhó cuèndá nchaa sá ndóhó-ndó, te na sàa nduu quixi tucu Xítóhó Jesucristú te cúñaha-gã xii-ndo: “Ío váha ní quide-ndo, te vitna ío càhnu cuu-ndo, te tàú-ndó nùcùndecu váha-ndo”, duha cúñaha-gã xii-ndo.

<sup>8</sup> Te vitna ío cùu iní-ndó Xítóhó Jesucristú cuèi vátá quíni-gá-ndó-gã, te duca<sup>n</sup> ío sàndáá iní-ndó-gã, te ío cùdí<sup>n</sup> iní-ndó te súúni nì ñá cùtnùni iní-ndó nãsa cunduu tnúhu càhá<sup>n</sup>-ndó sã dúcá<sup>n</sup> ío cùdí<sup>n</sup> iní-ndó <sup>9</sup> cuèndá sá nì naníhí táhú-ndó, chí ní sàndáá iní-ndó-gã.

<sup>10</sup> Te cue téé ní xóo càhá<sup>n</sup> tnúhu Yá Ndiöxí ndéé sanaha nì cachí-güedé nàcuáa cada-gá cundàhú iní ñáhá-gã xii-o vitna. Te cue téé-á<sup>n</sup> ío váha ní dàcuáhá-güedé nàcuáa cada Yá Ndiöxí dàcácu nihnu ñaha-gã xii-o vitna. <sup>11</sup> Te Espiritú Xítóhó Jesucristú ní ngúndecu ndihí cue téé-á<sup>n</sup> nì xáha<sup>n</sup>-xi xii-güedé nàcuáa ndoho-gá, te ní xáha<sup>n</sup> tùcu-xi xii-güedé sá sãtá ná yáha ndoho-gá te ío cunuu-gã ndihí Yá Ndiöxí. Te ío ní sani iní-güedé núu ná nduu sãa duca<sup>n</sup> càda-xi, ndihí nchaa nándi-gá cúu sã cáda-xi. <sup>12</sup> Te Yá Ndiöxí ní xáha<sup>n</sup>-gã xii-güedé sá ncháá tnúhu váha càhá<sup>n</sup>-güedé vá cúu-xí cuèndá méé-güedé, chí cuèndá nchoo cuè ñáyiu ndècu ñuyú-a vitna cùu-xi. Te ñi-ni tnúhu-á<sup>n</sup> cúu tnúhu càhá<sup>n</sup> nchúhú cue téé càhá<sup>n</sup> tnúhu Yá Ndiöxí núu-ndó. Te Espiritú sá nì taxi Yá Ndiöxí ndécú ndihí-o chindee ñaha-xi xii-ndí càhá<sup>n</sup>-ndí tnúhu-gá. Te cue espíritú xínú cuèchi núu Yá Ndiöxí ío cuíni-xi quíni ndáá-xi nchaa nàcuáa cuáhá<sup>n</sup> tnúhu-á<sup>n</sup>.

*Yá Ndiöxí càchí-gá sá cáda-ó mèe-ni sá vãha*

<sup>13</sup> Te sá dúcá<sup>n</sup> ío váha ní quide ñaha Yá Ndiöxí xii-ndo xíá<sup>n</sup> xíní ñuhu-xi ío váha cuáha-ndo cuèndá nàcuáa cundecu-ndo te vá cáni iní-ndó

càda-ndo ni ì<sup>n</sup> sá cuèhé sá dúhá, te ío quíndáá iní-ndó sá Yá Ndiöxí cada váha ñaha-gã nduu na quixi tucu Xítohó Jesucristú. <sup>14</sup> Te ío tñi-ndo nchàa tnúhu càhá<sup>n</sup> Yá Ndiöxí, te vá cùhú<sup>n</sup>-gã iní-ndó nãndi sá cuèhé sá dúhá sá ní xúhu<sup>n</sup> iní-ndó cùtnàhá vátá cùndecu-gã-ndó ichi-gá te ní vá cáda-ndó. <sup>15</sup> Te cada-ndo mée-ni sá váha cundecu-ndo dàtná quidé mée Yá Ndiöxí Yaá ní cáhá<sup>n</sup> ñáhá xì-o cundecu-o ndihi-gá. <sup>16</sup> Te cächí-gá núú tütú-gá: “Cada-ndo mée-ni sá váha cundecu-ndo, chi duca<sup>n</sup> quíde yúhú”, duha cächí-gá núú tütú-gá.

<sup>17</sup> Te Yá Ndiöxí cada ndáá-gá cuéchi nchaa ñáyiú, te vá cáda cuèndá-gá cuéi náí ñáyiú cùú-yu, te nchòhó cächí-ndó sá díú Tátá-ndó cùu-gá te ndáá, núú xiá<sup>n</sup> xíní ñuhu-xi canehe-ndo sá yíñuhu núú-gã ndi nchàa nduu cundecu-ndo ñuyíú-a. <sup>18</sup> Te diu-gá ní dácäcu nihnu ñaha-gã xii-ndo ì<sup>n</sup> ichi sá ñà túú nãndíhi ní sanu ichi ñaha cué ñaní tnáhá-ndó ní xíndecu ndéé sanaha ní cùu, te nchòhó sa nàha-ndo sá sá dúcá<sup>n</sup> ní quíde ñaha Yá Ndiöxí ní dácäcu nihnu ñaha-gã xii-ndo ichi-á<sup>n</sup> ñà túú ní chãhu-gá ni ì<sup>n</sup> díhú<sup>n</sup> cuáá<sup>n</sup>, te ní ì<sup>n</sup> díhú<sup>n</sup> cuixí<sup>n</sup> sá ndíhí nihnu ñuyíú-a cuèndá-ndó. <sup>19</sup> Chi Xítohó Jesucristú ní quixi-gá ní sati níñí-gã, te ní xíhí-gá núú cùrúxí cuèndá sá nchóó nãníhí tàhú-ó, te cùu-gá dàtná ì<sup>n</sup> mbéé quiti ío váha iní-xi, quiti càndoo canine. <sup>20</sup> Te duca<sup>n</sup> ní ndoho Xítohó Jesucristú, chi duca<sup>n</sup> ñí ndoho Xítohó Jesucristú, chi duca<sup>n</sup> tnáhí ndéé tñuní ndoho-gá ndéé cùtnàhá vátá ngãva-gá ñuyíú. Te duca<sup>n</sup> ní yáha-gá cùtnàhá ní quixi-gá òré vitna cùmání sáá nduu nàa ñuyíú-a cuèndá nchoo cùu-xi sá váha xii-o vitna. <sup>21</sup> Te nchòhó sa nihí-ndó tnúhu nàcuáa ní yáha Xítohó Jesucristú cùtnàhá ní quixi-gá ñuyíú-a, núú xiá<sup>n</sup> sàndáá iní-ndó Yá Ndiöxí. Te Yá Ndiöxí ní dándótó-gã Xítohó Jesucristú, te sátá ní dándótó ñaha-gá te ní cachí-gá sá ío càhnu cuu Xítohó Jesucristú. Te sá dúcá<sup>n</sup> ní cuu, xiá<sup>n</sup> ío sàndáá iní-ndó Yá Ndiöxí, te ní taxi-gá tnúhu ndee iní ndécú

ndihi-ndo sá sàá nduu cùndecu-ndo ndihi-gá ni caa ni quíhí<sup>n</sup>.

<sup>22</sup> Te Espíritú Yá Ndiöxí ní quíde-xi te ní sàndáá iní-ndó tnúhu-gã, te xiá<sup>n</sup> ní nduu ndoo ní nduu nine iní-ndó, te cùu iní tnáhá ndisa-ndo nacuáa ndecu-ndo ichi Yá Ndiöxí, te xìni ñuhu ndisa-xi sá ío ní yùhu ní iní-ndó cùu iní tnáhá-ndó ì<sup>n</sup> ì<sup>n</sup>-ndo. <sup>23</sup> Te nchòhó ní nduu-ndo dàtná ì<sup>n</sup> ñáyiú saa sá cuèndá tnúhu Yá Ndiöxí, te tnúhu-á<sup>n</sup> candeca-xi iní-ndó ní caa ni quíhí<sup>n</sup>, te vá ì<sup>n</sup> ndùu ndihi nihnu-xi, te ñá díú cuèndá ñáyiú ñuyíú-a ní ndùu-ndo ì<sup>n</sup> ñáyiú saa chi cuèndá tnúhu-gá. <sup>24</sup> Chi núú tütú Yá Ndiöxí cächí-xi:

Nchaa ñáyiú ndècu ñuyíú-a cùú-yu dàtná cùhú, chi cùhú-á<sup>n</sup> tnaa-ni cùdí-xi te xíhí-xi, duca<sup>n</sup> sãtnahá-xi cùú-yu.

Te nchaa sá ndécú ndihi-yu cùu-xi datná ì<sup>n</sup> itá cùhú-á<sup>n</sup>, chi itá-á<sup>n</sup> tnaa-ni tucu cùdí-xi te ndàhvá-xi, duca<sup>n</sup> sãtnahá-xi cùu nchaa sá ndécú ndihi-yu.

<sup>25</sup> Dico tnúhu Yá Ndiöxí chi vá náá tnáhí-xi, chi duha-ni ndècu-xi, te diu-ni duha cundecu-xi ní caa ni quíhí<sup>n</sup>.

Duha cächí-xi núú tütú-gá. Te diu tnúhu-á<sup>n</sup> ní dánèhé ñáhá nchùhú cue téè càhá<sup>n</sup> tnúhu Yá Ndiöxí xii-ndo.

## 2

<sup>1</sup> Te xiá<sup>n</sup> xíní ñuhu-xi dañá-ndo nchaa núú sá cuèhé sá dúhá, te dañá-ndo ichi tnúhu ndehnde, te dañá-ndo vã dándàhú-gã-ndó mée-ndo sá quidé vãha-ndo, te dañá-ndo ichi cuèdú iní, te dañá-ndo nchàa tnúhu yiti. <sup>2</sup> Te cada-ndo cuèndá sá cùú-ndó dàtná cue landú yíquí<sup>n</sup> vitna sadi camá, chi landú-á<sup>n</sup> mee-ni sàdi-güexi te sãhnu-güexi. Te cada iní-ndó sá dúcá<sup>n</sup> càda-ndo chi xìni ñuhu-xi sá ío cuhu<sup>n</sup> iní-ndó dàcuaha-ndo tnúhu Yá Ndiöxí, chi xiá<sup>n</sup> cùú-xí mée-ni tnúhu váha, te duca<sup>n</sup> te cuita cuehnu nihnu-ndo ichi-gá quíhí<sup>n</sup> ndéé ná sàá nduu cùndecu-ndo núú ndécú-gã. <sup>3</sup> Te duca<sup>n</sup> xìni ñuhu-xi cada-ndo, chi nchòhó sa ní cutnùní ndisa iní-ndó sá Yá Ndiöxí ío váha iní-gá.

*Xítohó Jesucristú cúú-gă dàtná ì<sup>n</sup> yúú*

<sup>4</sup> Te ío nanducu nihnu-ni-ndo Xítohó Jesucristú Yaá quidé nàcuáa naníhí tàhú-ó. Te ñu-gá ní cuu-gá dàtná ì<sup>n</sup> yúú sã ñà túú nãndihí sá cúú-xí ñáyíu ñuyíú-a, chi ní dáquée tíhú ñáhã-yu xii-gá. Dico Yá Ndiöxí ní cachí-gá sá Xítohó Jesucristú cúú-gă dàtná ì<sup>n</sup> yúú sã ño-gá váha, chi ío cùnuu-gá. <sup>5</sup> Te nchòhó sa ní naníhí tàhú-ndó, te ío-gá chí nãndücu nihnu Yá Ndiöxí cuëndá cuu ì<sup>n</sup>nuu-ndo cündecu-ndo ndihí Espíritú-gá. Te núu duca<sup>n</sup> na càda-ndo te cuu-ndo dàtná yúú vãha dàcaa-güedé dava vehe, te cuu tucu-ndo dàtná cue dútú ní xinu cuechi núú Yá Ndiöxí ndéé sanaha, nàcuáa ñá túú nã cumání-ndó núú-gă, chi nchaa cue téé-á<sup>n</sup> ní xóo cuáha ñaha-güedé sá ní xóo nduu táhú-gă. Te nchòhó vitna tàú-ndó càda-ndo nchaa nacuáa càhá<sup>n</sup>-gá, te nduu vétú iní-gá. Te duca<sup>n</sup> càda-ndo chi ndècu-ndo ndihí Xítohó Jesucristú. <sup>6</sup> Te Yá Ndiöxí càchí-gá núú tütú-gá:

Yúhú taxi ndecu-í ì<sup>n</sup> Yaá ñuú Sìón, te cuu-gá dàtná ì<sup>n</sup> yúú vãha sá sánútní-güedé xíquí cimientú ì<sup>n</sup> vehe, chi yúhú ní cachí-í sá Yáá-á<sup>n</sup> ño cunuu-gă.

Te nchaa ñáyíu quëndáá iní ñáhã xii-gá vá ì<sup>n</sup> ndüu ndixi cuéchi iní-yu sá dúcá<sup>n</sup> sãndáá iní ñáhã-yu xii-gá.

Duha càchí-gá núú tütú-gá. <sup>7</sup> Te nchòhó ñáyíu sãndáá iní ñáhã xii Xítohó Jesucristú ío cùu iní-ndó-gă, te nchaa ñáyíu ñá túú sãndáá iní ñáhã xii-gá quidé-yu dàtná càhá<sup>n</sup>-xi núú tütú Yá Ndiöxí núú càchí-xi:

Yúú sã ní dáquée tíhú cue téé dàcaa vehe, xiã<sup>n</sup> cúú-xí yúú sã ño-gá nãndihí vitna.

Duha càchí-xi núú tütú-gá. Te yúú-ã<sup>n</sup> cada iní-ó sã cúú-xí Xítohó Jesucristú, chi ní dáquée tíhú ñáhã-güedé xii-gá.

<sup>8</sup> Te càchí tucu-xi ñngá xichi núú tütú Yá Ndiöxí:

Yúú-ã<sup>n</sup> nguñenu ñáyíu te ndüá-yu.

Duha càchí-xi núú tütú-gá. Te tnúhu-á<sup>n</sup> quée-xí sã ño quide sáá iní

ñáyíu núú-gă, chi ñá túú cuiní-yu tníi-yu tnúhu càhá<sup>n</sup>-gá, te duca<sup>n</sup> tnàhí ndéé tnuní sá ncháá ñáyíu ñá túú cuiní tníi tnúhu càhá<sup>n</sup>-gá, te ío cùu sáá iní-yu núú-gă.

*Ñáyíu ndècu ndihí Yá Ndiöxí*

<sup>9</sup> Te nchoo cùu-o ñáyíu sa ní dáquée ð<sup>n</sup> ñaha Yá Ndiöxí xii-o cuëndá cundecu-o ndihí-gá, te cùu-o dútú xínú cuéchi-o núú-gă, te mee-gă cúú-gă Yaá ío cùnuu, te cùu-o ñáyíu quide ndáá xĩndecu ichi-gá te cùu tucu-o ñáyíu yìndaha-gá. Te duca<sup>n</sup> ní quide ñaha-gă xii-o cuëndá sá cũñaha-o xii nchaa ñáyíu sã ño càhnu cuu-gá, te ío vãi núú sã vãha quide-gá, te ñu-gá ní quide ní dáñá-ó nchãa ichi cuehé ichi duha ndècu-o ní cuu, te ní sanu ichi ñaha-gă xii-o ì<sup>n</sup> ichi váha, te vitna cùtnuní iní-ó sã ño càhnu cuu-gá.

<sup>10</sup> Te nchoo cùu-o ñáyíu ñá túú ndècu ndihí Yá Ndiöxí ní cùu, dico vitna ní ngündecu ndihí-o-gă, te dàvá-á<sup>n</sup> vátá sãá-gá nduu càda váha ñaha-gă xii-o, dico vitna sa ní sáá nduu quide váha ñaha-gă xii-o, chi ío cùndahú iní ñáhã-gă.

*Cada váha-o cündecu-o cunu cuechi-o núú Yá Ndiöxí*

<sup>11</sup> Te nchòhó ío cùu iní ñáhã-í xii-ndo, te càchí tnúhu-í xii-ndo sã nchóo cùu-o datná cue ñáyíu ndècu tnaduha ì<sup>n</sup> ñuú, te duca<sup>n</sup> sãtnahã-xi cùu-o chí tnaa-ni ndècu-o ñuyíú-a, te sáá nduu ndüu táhú-ó cündecu-o núú ndécú Yá Ndiöxí táxí tnúni-gá, te xiã<sup>n</sup> càhá<sup>n</sup> ndàhú-í núú-ndó sã vã cádá-ndó ñi ì<sup>n</sup> sá cuehé sá dúhá sãni iní-ndó, chí nchaa xiã<sup>n</sup> ñá túú cùu-xi sã vãha sá cúú-xi-ndó. <sup>12</sup> Te cada váha-ndo cündecu-ndo núú nchãa ñáyíu ñá túú ndècu ichi Yá Ndiöxí, te cuéi na càhá<sup>n</sup> ñáyíu sá nchòhó nchícú<sup>n</sup> nihnu-ndo ichi cuehé ichi duha, dico quiní-yu nchaa sá vãha quide-ndo, dico na sãá nduu dãndixi túu Yá Ndiöxí iní-yu sã ñà túú quide váha-yu ndécú-yu, te dàvá-á<sup>n</sup> cachí-yu sá quidé vãha-ndo ndècu-ndo, te cada càhnú-yu Yá Ndiöxí.

<sup>13</sup> Te Xítohó Jesucristú cuiní-gá sá nchòhó ío quëndáá iní-ndó nchãa cue



tée cùchiu<sup>n</sup> taxi tnuní ñáhá xii-ndo, te duca<sup>n</sup>-ni quindáá iní-ndó cuèi mee tée cùnui vihi-gá yíndaha ñaha xii ñáiyu. <sup>14</sup> Te duca<sup>n</sup>-ni quindáá iní-ndó nchàa dava-gá cue tée cùnui, chi Yá Ndiöxí duca<sup>n</sup> ní cachí-gá cunduu sá cuè tée-á<sup>n</sup> cada ndáá-güedé nchaa cuéchi ñáiyu quide cuehé quidé dùha ndecu, te cáhá<sup>n</sup> váha-güedé cuendá nchaa ñáiyu xíquide váha ndècu. <sup>15</sup> Te Yá Ndiöxí cuiní-gá sá cáda váha-ndo cùndecu-ndo cuendá nchaa ñáiyu ío nñi dǐquí-xi cáhá<sup>n</sup> cuèhé cuendá-ndó sá ndécú-ndó ichi Yá Ndiöxí vá ñihí-gá-yu tnúhu cáhá<sup>n</sup>-yu.

<sup>16</sup> Te nchòhó, Yá Ndiöxí ní quide-gá sá cúu-ndó ñáiyu cuu cada nàcuáa véxi iní mee-xí, dico ñá díú sá dúcá<sup>n</sup> ní quide ñaha-gá xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sá cúu-ndó ñáiyu xínu cuechi núu Yá Ndiöxí. <sup>17</sup> Te canehe-ndo sá yíñuhu núu nchàa ñáiyu, ndihí núu tée cùnui vihi yíndaha ñaha xii-yu, te cuu iní tnáhá ndè mee-ndo nacuáa ndècu-ndo ichi Yá Ndiöxí, te ío canehe-ndo sá yíñuhu núu-gá.

#### *Nchaa nàcuáa ndoho-o cùndecu-o ichi Xítohó Jesucristú*

<sup>18</sup> Te nchaa nchòhó ñáiyu xínu cuechi canehe-ndo sá yíñuhu núu cuè patrón-ndó, te quindáá iní-ndó càda-ndo nchaa chiu<sup>n</sup> tahu-güedé. Te ñ<sup>n</sup>-ni càda-ndo núu cuè tée váha iní-xi, ndihí núu cuè tée ío cuihna iní-xi. <sup>19</sup> Te núu nchòhó ná càda ndee iní-ndó ndòho-ndo nchaa sá ñà túu tàú-ndó ndòho-ndo cuendá sá cuiní-ndó cùndáá-ndó núu Yá Ndiöxí ñá, te ío nduu vétú iní-gá. <sup>20</sup> Te núu nchòhó ní quide-ndo ñ<sup>n</sup> cuéchi, te sàhni iní-ndó dándoho ñaha ñáiyu xii-ndo, ¿te ná sá váha cùu xíá<sup>n</sup>-i? Dico núu nchòhó ná cáda ndèe iní-ndó ndòho-ndo nchaa sá cáda ñaha ñáiyu xii-ndo sá cuendá sá quidé-ndó sá váha ña, te núu duca<sup>n</sup> na càda-ndo te cùu-xi ñ<sup>n</sup> sá váha núu Yá Ndiöxí. <sup>21</sup> Te Yá Ndiöxí ní cachí-gá sá cáda ndèe iní-ó ndòho-o nándi ndòho-o sá cuendá sá quidé-ó sá váha, chi ío ní

ndoho Xítohó Jesucristú cuendá-ó, te duca<sup>n</sup> tàú-ó cànchicú<sup>n</sup> nihnu-o càda ndee iní-ó ndòho-o nándi ndòho-o, chi duca<sup>n</sup> ní quide-gá. <sup>22</sup> Te mee-gá ñà túu quide-gá ni ñ<sup>n</sup> sá cuèhé sá dúhá, te ni ñ<sup>n</sup> tnúhu ndehnde ñà túu cáhá<sup>n</sup>-gá. <sup>23</sup> Te òré ní xóo cúcuèhé ñáhá-güedé xii-gá, te ñà túu ní xóo danchòcáva-gá tnúhu cuèhé, te òré ní xóo dándoho ñaha-güedé xii-gá, te ñà túu ní xáha<sup>n</sup>-gá xii-güedé sá ío ná cada ñaha-gá, chi núu ndáhá Yá Ndiöxí ní xóo nachihi-gá mee-gá, ndihí nchaa sá sání iní-güedé cada ñaha-güedé xii-gá. Te Yá Ndiöxí cúu-gá Yá ío váha cada ndáá cuéchi nchaa ñáiyu na sáa nduu. <sup>24</sup> Te Xítohó Jesucristú cúu-gá Yá ní xihí núu cùrúxí cuendá nchaa cuéchi nchoo ñáiyu ndècu ñuyíú-a. Te duca<sup>n</sup> ní xihí-gá cuendá nchoo dùu<sup>n</sup> duu<sup>n</sup> dañá-o nchaa ichi cuehé ichi duha, te cada ndáá-ó cùndecu-o ichi-gá. Te ní dánicuehé ñáhá-güedé xii-gá, te sá dúcá<sup>n</sup> ní ndòho-gá xíá<sup>n</sup> ní ngúndecu váha nchoo vitna. <sup>25</sup> Te nchoo cùu-o datná cue mbéé cue quiti ní xíta ní cùu, dico vitna ní tuha-o Xítohó Jesucristú, te Yá-á<sup>n</sup> cúu-gá datná ñ<sup>n</sup> toli xito ñaha-gá xii-o vitna cuendá sá vǎ cuíta nihnu-o.

### 3

#### *Nàcuáa tàú ñáiyu tnándaha cadá-yu cundecú-yu*

<sup>1</sup> Te nchaa nchòhó ñáiyu dǐhí ní tnandaha ío quindáá iní-ndó yñ-ndo cuendá sá núu ñà túu sándáá iní-güedé tnúhu Yá Ndiöxí te quindáá iní-güedé cuendá sá ndéhé-güedé quidé ndáá-ndó ndècu-ndo, te ni ñà túu xini ñuhu-xi cáhá<sup>n</sup>-ndó tnúhu-gá núu-güedé. <sup>2</sup> Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yíñuhu núu Yá Ndiöxí. <sup>3</sup> Te vá cání iní-ndó mèe-ni cunduu vii-ndo, te ndada-ndo dǐquí-ndó nàcuáa tàú-xi cunduu, te vá cání iní-ndó nándi canehe-ndo, te ni vǎ cání iní-ndó cuihnu-ndo mee-ni dóo váha sá ío vii ndáa. <sup>4</sup> Chi iní-ndó xini ñuhu-xi cunduu vii cunduu váha-xi núu Yá Ndiöxí cuèi vitna te cuèi núu

cuăhá<sup>n</sup> núú vĕxi, te cuu-ndo ñăyiu ío cãhnu iní-xi, te núu duca<sup>n</sup> na càda-ndo te ío cuu váha iní Yă Ndiöxí. <sup>5</sup> Te duca<sup>n</sup> ío vii ío váha ní xínduu iní nchaa ñăyiu ðihí ní xíndecu ndéé sanaha, te ñăyiu-á<sup>n</sup> ío ní sándáá iní-yu Yá Ndiöxí te ní cudîú-yu núú-gă, te ní tñî-yu nchaa tnúhu ní cáhá<sup>n</sup> yî-yu. <sup>6</sup> Te duca<sup>n</sup> nî xóo cada ndíi Sără ní xóo quindáá iní ndíi yî ndíi, ndíi Àbrahám, te ní cánehe ndíi ðihí-á<sup>n</sup> sã yîñùhu núú yî ndíi. Te núu nchòhó quidé vâha-ndo ndècu-ndo te ñá túú yùhú-ndó nă cada ñaha tnàha ñăyiu-ndo xii-ndo, te núu duca<sup>n</sup> quide váha-ndo ndècu-ndo te quide-ndo datná ní quide ndíi Sără.

<sup>7</sup> Te nchòhó cue téé ndècu ñadihí-xi ío váha cuáha-ndo cuendá năcuáa cundecu váha-ndo ndihí-yu, te ío vii cáhá<sup>n</sup> ndihí-ndö-yu, chi ñăyiu-á<sup>n</sup> î-gă-yu dàcúxí nchòo cue téé, te duca<sup>n</sup> càda-ndo chi ndi ndùú-ndó ndùu táhú-ndó cundecu-ndo ndihí Yá Ndiöxí, te núu duca<sup>n</sup> na càda-ndo te òré cáhá<sup>n</sup> ndihí-ndo Yă Ndiöxí te tedóho ñaha-gă xii-ndo.

#### *Ñăyiu quide sá vâha ndòhó-yu*

<sup>8</sup> Te càchí tnúhu tucu-í xii-ndo sã ío cuu ñnuu-ndo cundecu-ndo, te cundàhú iní tnáhá-ndó ñ<sup>n</sup> ñ<sup>n</sup>-ndo, te cuu iní tnáhá tùcu-ndo năcuáa ndècu-ndo ichi Yá Ndiöxí, te cuu-ndo ñăyiu ndàhú iní-xi. <sup>9</sup> Te núu ñ<sup>n</sup> sá ñà túú vâha quide ñaha ñăyiu xii-ndo, te ñá díú-ní dùca<sup>n</sup> nanchocáva-ndo càda-ndó-yu, àdi xicuèhé ñahá-yu xii-ndo, te vá ná danchocáva-ndo ðiu-ni tnúhu cuèhé, chi cáca<sup>n</sup> táhú-ndó núú Yă Ndiöxí cuendá sá ná cádá vâha ñaha-gă xii-yu, te duca<sup>n</sup> càda-ndo chi Yá Ndiöxí ní cáhá<sup>n</sup> ñahá-gă xii-ndo cuendá sá cádá vâha ñaha-gă xii-ndo tnáhá-ndó. <sup>10</sup> Te núu tùtú Yă Ndiöxí càchí-xi:

Nchaa ñăyiu cuiní cundecu váha ndi nchàa nduu nini cundecú-yu ñuyíú-a,  
xìni ñuhu-xi sá vâ cáhá<sup>n</sup>-yu tnúhu cùtexínu, te ni vâ dàcuàndehndé-yu

<sup>11</sup> Te xìni ñuhu-xi duu<sup>n</sup> duu<sup>n</sup> dañá-yu nchaa ichi cuèhé ichi duha, te cáda-yu mee-ni sã vâha,

te ío ndùcú-yu năcuáa cadá-yu cundecu váha-yu ndihí tnàha ñăyíú-yu te ðiu-ni duca<sup>n</sup> cànchicú<sup>n</sup> nihnú-yu cadá-yu.

<sup>12</sup> Te Yá Ndiöxí xító-gă nchaa ñăyiu quide ndáá núú-gă te tedóho-gă nchaa tnúhu cáhá<sup>n</sup>-yu, dico nchaa ñăyiu ñá túú cuiní cada ndáá, ñăyiu-á<sup>n</sup> ñà túú cùu váha iní-gá núú-yu.

Duha càchí-xi núú tùtú-gá.

<sup>13</sup> Te vá yòo níhí ndéé càda ñaha xii-o ñ<sup>n</sup> sá ñà túú vâha te núu mee-ni sã vâha na càda-o cundecu-o. <sup>14</sup> Adi núu ná cúú sã ná cádá ñaha ñăyiu xii-o sã cuendá sá quidé vâha-o ndècu-o ña, te sá dúcá<sup>n</sup> ná cádá ñahá-yu xii-o cùu-xi ñ<sup>n</sup> sá vâha sá cúú-xí-ó núú Yă Ndiöxí. Te na càchí tnúhu-í xii-ndo sã vâ yùhú-ndö-yu, te ni vâ cundiyí-ndó cuendá nchaa sá ná càda ñahá-yu xii-ndo. <sup>15</sup> Te nèhe-ndo sá yîñùhu núú Xítóhó Jesucristú. Te ío cundecu túha-ndo dānehé-ndó ñăyiu véxi ndùcu tnúhu núú-ndó năcuáa ndùu tnúhu ndee iní ní taxi Xítóhó Jesucristú ndécú ndihí-ndo, te cuu vii cuu váha iní-ndó cáhá<sup>n</sup> ndihí-ndö-yu, te cáhá<sup>n</sup>-ndó núú-yu mee-ni tnúhu yîñùhu năcuáa cùu váha iní Yă Ndiöxí.

<sup>16</sup> Te ío cada váha-ndo cundecu-ndo cuendá sá vâ cundiyí-ndó, te núu duca<sup>n</sup> na càda-ndo, te nchaa ñăyiu xicuèhé ñahá xii-ndo cuendá sá quidé vâha-ndo ndècu-ndo ichi Xítóhó Jesucristú quendóo canúú-yu ndihí nchaa tnúhu cáhá<sup>n</sup>-yu, chi nchòhó quidé vâha-ndo ndècu-ndo. <sup>17</sup> Te váha-gá sá ndóhó-ó cuendá sá quidé-ó sã vâha te núu mee Yă Ndiöxí duca<sup>n</sup> cuiní-gá cunduu, te ñá díú sã ndóhó-ó cuendá sá ñà túú quide-o sá vâha.

<sup>18</sup> Te Xítóhó Jesucristú ní xihí-gá sá cuendá nchaa cuéchi nchaa nchoo ñăyiu ndècu ñuyíú-a, te ñ<sup>n</sup> xito-ni duca<sup>n</sup> nî xihí-gá te duca<sup>n</sup> te vá cùu tnàhí-gá, te mee-gă cúú-gă Yaá ñá túú tnàhí cuéchi-xi, te duca<sup>n</sup> nî ndoho-gá cuendá nchaa cuéchi ñăyiu ndècu ñuyíú-a ñăyiu ñá túú cuiní cada ndáá núú Yă Ndiöxí, te duca<sup>n</sup> nî cuu cuendá sá núcundecu váha-yu núú Yă Ndiöxí

te núu na quíndáá iní ñáhă-yu xii-gá. Te mee-gă ní xíhí-gá dico Espíritú-gá chi ní xíndecu-ni-xi, <sup>19</sup> te Espíritú-gá ní sáhă-xi ní cáhă-xi tnúhu Yá Ndiöxí núu nchăa espíritú ñáyíu ndècu núu ùhú núu ndàhú. <sup>20</sup> Te ñáyíu-án cúú ñáyíu ní xíndecu ndéé sanaha cŭtnàhá ní xíndecu ndíi Nöé, chi ñáyíu-án ío ní quide sàá iní-yu núu Yá Ndiöxí. Te Yá Ndiöxí ío váha iní-gá, chi ní dácácă-gă nduu ñí xíndecuu ndíi Nöé ní cadúha ndíi bàrcú cuèndá ndétú-gă ndixí cuéchi iní-yu sá ñà túú quide váha-yu ndècú-yu ní cùu. Te dàvá-án ñí ndaa ndute ñuyíú te ní cácu úná duha ná tnàhá ñáyíu, chi ní quée-yu xití bàrcú-án, te ñà túú ní cáhă-yu. <sup>21</sup> Te sá dúcă ñí cácu ñáyíu úná-án ñà túú ní cáhă-yu ndute ní ndaa ñuyíú dàvá-án. Te xíá ñí quée-xí sá cuándute ñáyíu vitna, te naníhí tàhú-yu te núu na quíndáá iní-yu tnúhu ndáá tnúhu Yá Ndiöxí. Te ñà díú sá cuándute-o te nduu ndoo nduu nine yíqui cùñú-ó te naníhí tàhú-ó, chi xìni ñuhu-xi nàhmă-ó núú Yá Ndiöxí nchaa yíca cuéchi-o, te nduu ndoo nduu nine iní-ó, te duca ñí naníhí tàhú-ó, chi Xítohó Jesucristú ní xíhí-gá cuèndá-ó te ní ndoto-gá. <sup>22</sup> Te Yaá-án cuândaa-gá andíu, te ní ngóo-gá xio cùha Yá Ndiöxí, te tàxi tnuní-gá nchaa espíritú cúnúu ndíhi nchaa dava-gá cue espíritú xínú cuèchi.

#### 4

##### *Cada-o nàcuáa cuíni méé Yá Ndiöxí*

<sup>1</sup> Te Xítohó Jesucristú ní ndoho-gá cŭtnàhá ní xíndecu-gá ñuyíú-a, te vitna nchòhó cundecu túha-ndo ndòho-ndo cuèndá-gá, chi nchaa ñáyíu ndòho nándi sá ndóhó cuèndá-gá dàñă-yu nchaa sá cuèhé sá dúhá. <sup>2</sup> Te duca ñà túú-gă ndècú-yu ichi cuèhé ichi duha, chi mee-ñă nàcuáa cáhă Yá Ndiöxí quídě-yu ndècú-yu ñuyíú-a. <sup>3</sup> Te nchòhó sa nàha-ndo sá ío cuèhé núú sá cuèhé sá dúhá ñí xóo cada-o cŭtnàhá vátă cúndecu-gá-ó ichi Yá Ndiöxí, chi ní xóo cada-o nchăa sá cuèhé sá dúhá cùdíí iní nchaa ñáyíu ñà túú sàndáá iní tnúhu-gá, te dàvá-án

ñí xóo cada-o nchăa núú sá cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáyíu quíhu, te ní xóo cundecu-o víco núú ñí xóo cada-o nchăa sá ñà túú vâha, te ní xóo níhí tnáhă-ó ndíhi nchaa tnaha quíhu-o, te ní xóo chíñuhu-o nchăa sá cächí-yu cùu ndióxí te ñà ndáá sá ndiöxí cúú nchăa xíá, te nándi-gá nchaa sá cuèhé sá dúhá ñí xóo cada-o dàvá-án. <sup>4</sup> Te ñáyíu-án cùñúhu-yu vitna sá ñà túú-gă ñíhí tnáhă-ó ndíhi-yu cada-o nchăa sá cuèhé sá dúhá quídě-yu, te xíá ñí cáhă ñí cuèhé-yu cuèndá-ó vitna. <sup>5</sup> Dico sáá nduu te ñáyíu-án nàhmă-yu nchaa sá quídě-yu núú Xítohó Jesucristú, chi díu-gá sa ndècu túha-gá sá cáda ndáá-gá cuéchi nchaa ñáyíu sa ní xíhí, ndíhi cuéchi nchaa ñáyíu xíndecu vívú. <sup>6</sup> Te cue ñáyíu sa ní xíhí ní xíndedóho tnúhu Xítohó Jesucristú, te cuéi ní xíhí-yu dàtná xíhí dava-gá ñáyíu, dico espíritú-yu chi ní nduu tàhú-xi ndècu váha-xi dàtná ndècú Yá Ndiöxí.

<sup>7</sup> Te vitna ta cùyatni danaa Yá Ndiöxí ñuyíú-a núu xíá ío váha cuáha-ndo cuèndá nàcuáa cundecu-ndo, te cáhă ñí ndíhi-ndo-gă. <sup>8</sup> Te xìni ñuhu-xi sá ío cuu iní tnáhă-ndó ñí ñí-ndo, chi núu duca ñí cùu iní tnáhă-ndó ñí ñí-ndo, te vá cání-gă iní-ndó càda cuèndá-ndó nchăa sá ñà túú vâha quide ñaha ñáyíu xii-ndo, <sup>9</sup> te nchòhó ñáyíu xíndecu vehe-xi cuáha ñu-ndo vehe xii cue ñáyíu ñuhu ichi na ndetatú-yu, te ío váha cuu iní-ndó dŭca ñí cada-ndo. <sup>10</sup> Te Yá Ndiöxí ní taxi-gá ndí díí ñí túú tàhú ndècú ndíhi-ndo ñí ñí-ndo, te nàcuáa ndúu tàhú ñí nduu tàhú-ndó ñí ñí-ndo te duca ñí chindee tnaha-ndo, te vá dàñă ndéé-ndó càda-ndo nchaa nàcuáa tàuchiu Yá Ndiöxí cada-ndo, te chindee ñàha-gá xii-ndo. <sup>11</sup> Te dava nchòhó ñáyíu cáhă ñí tnúhu Yá Ndiöxí núú ñáyíu, xìni ñuhu-xi cáhă-ndó nàcuáa ndúu tnúhu-gá núu-yu, te dava nchòhó ñáyíu quide nchaa núú chíu ñí chindee tnaha ñáyíu-xi, xìni ñuhu-xi cada-ndo sá Yá Ndiöxí chíndèe ñaha-gá xii-ndo, te duca ñí càda-ndo nchaa núú sá vâha, chi

Xítohó Jesucristú tnàhá-gá chindèe ñaha-gá xii-ndo, te duca<sup>n</sup> ïo cuu càhnu Yá Ndiöxí. Te vitna tàú-ó càhá<sup>n</sup>-ó sã ïo càhnu cuu Xítohó Jesucristú, chi diu-gá cúnùu-gá nchaa nduu nchaa quíú, te duca<sup>n</sup> na cünduu.

*Ndoho tnahá-ó cündecu-o ichi Xítohó Jesucristú*

<sup>12</sup> Te nchòhó ñáyiu ío cùu iní-í, vá cúnñuhu-ndo sã ïo ndòho-ndo ndecu-ndo ichi Xítohó Jesucristú, chi sá dúcá<sup>n</sup> ndòho-ndo-á<sup>n</sup> cùtnùnì ndisa sã sàndáá iní-ndó-gá, te vá cání iní-ndó nã cuendá duca<sup>n</sup> ndòho-ndo. <sup>13</sup> Chi da cudíí iní-ndó te núu ndòho-ndo datná ní ndoho Xítohó Jesucristú, te duca<sup>n</sup> sũúní cùdíí iní-ndó òré ná quíxi tucu-gá ñuyíú-a te dàvá-á<sup>n</sup> quíní-ndó sã ïo càhnu cuu-gá. <sup>14</sup> Te núu xícuèhé ñáhá ñáyiu ndècu ichi cuehé ichi duha xii-ndo cuendá sã ndécú-ndó ìchi Xítohó Jesucristú, te xíá<sup>n</sup> cúú-xí ì<sup>n</sup> sá vãha sá cúú-xí-ndó núú-gã, te duca<sup>n</sup> chi Espíritú Yá Ndiöxí sã ïo cùnùu ndecu ndíhi ñaha-xi xii-ndo, te nchaa ñáyiu ndècu ichi cuehé ichi duha-ã<sup>n</sup> càhá<sup>n</sup> cuèhé-yu cuendá Xítohó Jesucristú, dico nchòhó càchí-ndó sã ïo càhnu cuu-gá. <sup>15-16</sup> Te núu nchòhó dándòho ñaha ñáyiu xii-ndo sã cuendá sã ndécú-ndó ìchi Xítohó Jesucristú ñá, te vá cúú càhá<sup>n</sup> núú-ndó, chi ndacá<sup>n</sup> táhú-ndó núú Yá Ndiöxí cuendá sã ndécú-ndó ìchi-gá. Te cuèi ndòho-ndo ndecu-ndo, dico ñá túú cùu-ndo ñáyiu sàhni ndíyi te ni ñà túú cùu-ndo ñáyiu dùhu, te ni ñà túú cùu-ndo ñáyiu quíde cuehé quíde dùha, te ni ñà túú cùu-ndo ñáyiu chindee tnúhu tnàha ñáyiu-xi ì<sup>n</sup> sá ñà túú tàú-ndó càda-ndo.

<sup>17</sup> Te vitna sa quèsaha Yá Ndiöxí cada ndáá-gá nchaa sá quíde nchòo ñáyiu ndècu ndíhi-gá, te núu duca<sup>n</sup> te ndèe-gá cada-gá nchaa ñáyiu ñá túú sàndáá iní ñáhá xii-gá òré ná sãá nduu dùca<sup>n</sup> cada ñaha-gá xii-yu. <sup>18</sup> Te nchòhó xíní-ndó sã ñáyiu quíde váha ndècu ichi Xítohó Jesucristú ndòho tnahá-yu ndécú-yu, dico sáá nduu te nduu táhú-yu cundecú-yu ndíhi-gá. Te núu duca<sup>n</sup> ndòho nchaa ñáyiu

quíde váha ña, ¿te nása-gá yáha nchaa ñáyiu ndècu ichi cuehé ichi duha na sãá nduu càda ndáá Yá Ndiöxí cuéchi-yu-i? <sup>19</sup> Te nchaa nchòhó ñáyiu ndòho nacuéa cuíní Yá Ndiöxí xini ñuhu-xi sá vã dáñá ndèe-ndó càda váha-ndo cündecu-ndo, te ío quíndáá iní-ndó sã xító ñaha-gá xii-ndo. Te diu-gá cúú-gã Yáá ní cadúha ñaha xii-o, te quíde-gá ì<sup>n</sup> sá càhá<sup>n</sup>-gá.

## 5

*Nàcuáa tàú-xi cada ñáyiu ndècu ichi Xítohó Jesucristú*

<sup>1</sup> Te yúhú càhá<sup>n</sup>-í dóho nchaa nchòhó cue téé yíndaha nchaa dava-gá ñáyiu ndècu ichi Xítohó Jesucristú, chi tnàhá yúhú yíndaha-í ñáyiu ndècu ichi-gá, te sàndáá iní-í tnúhu-gá, te ní xíní-í nchaa nàcuáa ní ndoho-gá, te sáá nduu te tnàhá-í cunuu-í ndíhi-gá. <sup>2</sup> Te ío canehe cuendá-ndó nchaa ñáyiu ndècu ichi Yá Ndiöxí yíndaha-ndo te cada-ndo datná quíde cuè toli, chi cue téé-á<sup>n</sup> ïo váha xito-güedé mbèé-güedé. Te canehe cuendá-ndó-yu sá cúú iní méé-ndó te ñá díú sã ío ì<sup>n</sup> ñáyiu cada yica ñaha xii-ndo, te ni ñà díú sã cuíní-ndó cùhu<sup>n</sup> yáhu-ndo, chi ni yùhu ni iní-ndó còto-ndó-yu, chi duca<sup>n</sup> cuíní Yá Ndiöxí cunduu. <sup>3</sup> Te vá cadá-ndó sã ïo cùnùu-ndo núú-yu, chi cada-ndo mèe-ni sá vãha cuendá duca<sup>n</sup> càncicú<sup>n</sup> nihnú-yu cadá-yu tnàhá-yu. <sup>4</sup> Te òré ná quíxi tùcu Xítohó Jesucristú Yáá néhé cuendá ñáhá xii-o nchaa-o ñuyíú-a, te taxi-gá sã ïo váha nduu táhú-ó, te cunuu-o ndíhi-gá ni caa ni quíhí<sup>n</sup>.

<sup>5</sup> Te nchòhó ñáyiu ndècu ichi Xítohó Jesucristú càhá<sup>n</sup>-í dóho-ndo sã ïo quíndáá iní-ndó cuè téé yíndaha ñaha xii-ndo nacuéa ndècu-ndo ichi-gá, te nchaa-ndo tàú-ndó quíndáá iní tnàhá-ndó ì<sup>n</sup> ì<sup>n</sup>-ndo, chi núú tùtú Yá Ndiöxí càchí-xi ì<sup>n</sup> xichi: Nchaa ñáyiu quíde cahnu mee-xi ñá túú cùu váha iní Yá Ndiöxí núú-yu,



dico nchaa ñáyi ndàhú iní-xi te chindee ñaha-gá xií-yu.

Duha càchí-xi núú tütú-gá. <sup>6</sup> Te dañando mée-ndo núú ndáhá Yá Ndióxi, chi mee-gá ío cunu-gá. Te núu duca<sup>n</sup> na càda-ndo, te sáá nduu te cada nínu ñaha-gá xii-ndo. <sup>7</sup> Te nchaa sá yáha-ndo ndècu-ndo te nachihi-ndo ndàha Yá Ndióxi, chi mee-gá xító ñaha-gá xii-ndo.

<sup>8</sup> Te ío váha cuáha-ndo cuendá cundecu-ndo, te quíhi iní-ndó chi sácuíhná xicá cùu-xi cuiní-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ì<sup>n</sup> quíti déé<sup>n</sup> xicá ndùcu sá cáxí-xí. <sup>9</sup> Te ío quindáá iní-ndó Xítohó Jesucristú, te vá dáñá-ndó mée-ndo dandahú ñáhá sácuíhná xii-ndo càda-ndo nacuáa cuiní-xi, chi nàha-ndo sá ncháá ñáyi ndècu ichi Xítohó Jesucristú xíndecu nihí ñuyíú ndóhó-yu datná ndóhó nchòo ndecu-o ichi-gá. <sup>10</sup> Dico sacú-ni nduu duha cundoho-o te dātnùní ñá túú-gá ná cumání-ó cundecu-o núú Yá Ndióxi, te dàvá-á<sup>n</sup> vā cání ì<sup>n</sup> caní úú iní-ó cundecu-o ichi-gá. Te ío-gá ngúndecu ndihi-o tñuhu ndee iní cada-o nchàa nacuáa càhá<sup>n</sup>-gá, te duca<sup>n</sup> càda-o chi mee Yá Ndióxi ío chindee ñaha-gá xii-o, te diu-ni Yaá-á<sup>n</sup> ío cùu iní ñáhá-gá xii-o, chi ní cáhá<sup>n</sup> ñáhá-gá xii-o cundecu-o núú ío váha càa ndecu-gá cundecu-o nì caa ní quíhí<sup>n</sup>, te duca<sup>n</sup> nì quide-gá chi ní sándáá iní-ó Xítohó Jesucristú. <sup>11</sup> Te ío ndacá<sup>n</sup> táhú-ó núú Yá Ndióxi chi ío càhnu cuu-gá, te cunu-gá nchaa nduu nchaa quíú. Te duca<sup>n</sup> na cundu.

### *Tnúhu ndéé núú ní ndihi-ná*

<sup>12</sup> Te té Silvanú xini-í sá cúu-dé ì<sup>n</sup> té quide ndáá ndécú ichi Xítohó Jesucristú, te diu-dé ní cáhá<sup>n</sup> ndàhú-í núu-dé ní tee-dé ì<sup>n</sup> úú tnúhu sá ní xáha<sup>n</sup>-í xii-dé núú tütú-a cuendá daquixi-í ndaha-ndo, te núú tütú-a càchí tnúhu ndáá-í xii-ndo sá Yá Ndióxi ío cùu iní ñáhá-gá, te chindee ñaha-gá xii-ndo ndècu-ndo, te càchí tnúhu tucu-í xii-ndo sá ío quindáá iní-ndó sá ndàá duca<sup>n</sup> quide ñaha-gá xii-ndo.

<sup>13</sup> Te cue ñáyi ndècu ñuú Babiloniá, ñáyi ndècu ichi Yá Ndióxi, diu-ni ñáyi ní cachí Yá Ndióxi sá nánihí táhú datná cúu nchòhó, ío quide ndee iní ñáhá-yu xii-ndo, te tnàhá té Mácú té cùu datná ì<sup>n</sup> déhe-í quidé ndèe iní ñáhá-dé xii-ndo. <sup>14</sup> Te ndihi tnúhu yíñuhu cada ndee iní tnáhá-ndó ì<sup>n</sup> ì<sup>n</sup>-ndo, te xicá<sup>n</sup> táhú-í núú Yá Ndióxi sá ío na cundecu nahi nchaa nchóhó ñáyi ndècu ndihi Xítohó Jesucristú. Te duca<sup>n</sup> na cundu. Te ío chí cáda ndèe iní-ná vitna.

## TUTÚ CÚÚ ÒÚ NÍ CADÚHA TÉ PÈLÚ

*Té Pèlú cádúha-dé tutú quíhí<sup>n</sup> ndaha ñáyiú sàndáá iní tnúhu Yá Ndiöxí*

<sup>1</sup> Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chi mee-gă ní tendaha ñàha-gá xii-í xícá cùu-í càhá<sup>n</sup>-í tnúhu-gá. Te cádúha-í tutú-a sá cúú-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te duca<sup>n</sup> chi Tătá-ó Dütú Ndiöxí ní dácàhá<sup>n</sup>-gá iní-ó nǐ sàndáá iní-ó-gă, chi cùu-gá Yaá ío váha quide ndáá ndíhi Xítóhó Jesucristú Yaá dácăcu nihnu ñaha xii-o núú ùhú núú ndàhú. <sup>2</sup> Te xicá<sup>n</sup> táhù-í núú Yá Ndiöxí sá ùu<sup>n</sup>-gá uu<sup>n</sup>-gá ná cuita chindee chitúu ñaha-gă xii-ndo quíhí<sup>n</sup>, te duca<sup>n</sup> ío váha cuu iní-ndó cùndecu-ndo, te duca<sup>n</sup> càda-gá chi ta cùtnuní-gá iní-ndó nàcuáa ndùu cuendá-gá, te duca<sup>n</sup> ta cùtnuní tucu iní-ndó nchàa nacuáa ndùu cuendá Xítóhó Jesucristú Yaá cúú Xítóhó-ó.

*Nàcuáa quide ñáyiú ndècu ichi Xítóhó Jesucristú*

<sup>3</sup> Te Yá Ndiöxí ío càhnu cuu-gá chi chindee ñaha-gá xii-o quide ndáá-ó ndècu-o datná cuení méé-gă, te duca<sup>n</sup> chi cùtnuní iní-ó nàcuáa sàni iní Xítóhó Jesucristú Yaá ní càhá<sup>n</sup> ñáhá xii-o. Te òré ní càhá<sup>n</sup> ñáhá-gă xii-o te ní cutnùní iní-ó sǎ ío càhnu cuu-gá te ío váha quide-gá. <sup>4</sup> Te duca<sup>n</sup> nǐ cutnùní tucu iní-ó nàcuáa ní càhá<sup>n</sup>-gá cada ñaha-gă xii-o, te tnúhu ní càhá<sup>n</sup>-gá-án ío càhnu cuu-xi te ío váha, te nchoo nǐ sàndáá iní-ó tnúhu-án nǔu xǎ<sup>n</sup> ñá túú-gă ndécú-ó ìchi cuehé ichi duha te ni ñà túú-gă sání ìní-ó càda-o nándi sá cuèhé sá dúhá, te ní cuu vii ní cuu váha iní-ó vǐtna. <sup>5</sup> Te sá dúcá<sup>n</sup> quide-gá te xǎ<sup>n</sup> ío nducu ndèe-ndo cada-ndo nchaa nacuáa càhá<sup>n</sup>-í-a, te nchòhó sàndáá iní-ndó-gă dico ñá díú mèe-ni xǎ<sup>n</sup> chi tnàhá xíní ñúhu-xi cada ndáá-ndó cùndecu-ndo. Te núú quide ndáá-ndó ndècu-ndo te xini

ñuhu-xi tecú tnùní-ndó tnúhu-gá. <sup>6</sup> Te núú tècú tnùní-ndó te cùu-ndo ñáyiú xíní cotnǐ mee-xi, te núú cùu-ndo ñáyiú sàcòo tnǐ mee-xi te xini ñuhu-xi cunduu cahnu iní-ndó cuèi nándi sá ná yàha-ndo cùndecu-ndo, te núú càhnu iní-ndó te xini ñuhu-xi cada ndáá-ndó cùndecu-ndo datná cuení méé Yá Ndiöxí cada-ndo. <sup>7</sup> Te núú quide ndáá-ndó ndècu-ndo, te xini ñuhu-xi ío cuu iní tnàhá ndí mee-ndo nacuáa ndècu-ndo ichi-gá, te núú cùu iní tnàhá ndí mee-ndo te xini ñuhu-xi cuu iní-ndó nchàa dava-gá tnàha ñáyiú-ndo.

<sup>8</sup> Te núú sa duca<sup>n</sup> quide-ndo ndecu-ndo te uu<sup>n</sup>-gá cuita duca<sup>n</sup> càda-ndo quíhí<sup>n</sup> núú cuàhá<sup>n</sup> núú vèxi, te núú duca<sup>n</sup> quide-ndo te cùu-ndo cue ñáyiú ñá túú dàna iní-xi xǐndecu, te cuita cutnùní-gá iní-ndó nchàa nacuáa sàni iní Xítóhó Jesucristú quíhí<sup>n</sup>. <sup>9</sup> Te nchaa ñáyiú ñá túú cuení duca<sup>n</sup> càda cuú-yu ñáyiú ñá túú tnàhí ndíxi túu iní-xi sá Yá Ndiöxí sa ní ndada ndoo ní ndada nine-gá iní-yu cuendá nchaa sá cuèhé sá dúhá nǐ xóo cadá-yu, te ñáyiú-án cúú-yu dàtná ì<sup>n</sup> ñáyiú cuàá àdi datná ì<sup>n</sup> ñáyiú ñá túú cùtnuní váha núú-xi, te duca<sup>n</sup> sǎtnahá-xi cùu-yu cuendá sá dúcá<sup>n</sup> quide-yu. <sup>10</sup> Te xǎ<sup>n</sup> nǔu yúhú càhá<sup>n</sup>-í dóho nchaa nchòhó ñáyiú ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sǎ Yá Ndiöxí ní càhá<sup>n</sup> ñáhá-gă xii-ndo, te duca<sup>n</sup> nǐ quide-gá chi duca<sup>n</sup> nǐ cachí-gá cada-gá. Te vá ì<sup>n</sup> ndùu cani iní-ndó dàña-ndo ichi-gá, te núú vá dáña ndèe-ndó càda-ndo nchaa nacuáa càhá<sup>n</sup>-í-a. <sup>11</sup> Te núú duca<sup>n</sup> na càda-ndo cundecu-ndo, te ío vii ío váha cada Yá Ndiöxí quehe<sup>n</sup> cuendá ñáhá-gă xii-ndo òré ná sàá-ndó nǔú ndécú Xítóhó Jesucristú táxi tnùní-gá nchaa nduu nchaa quíú, te òú-ni Yaá-án cúú Xítóhó-ó te ní dácăcu nihnu ñaha-gă xii-o núú ùhú núú ndàhú.

<sup>12</sup> Te duca<sup>n</sup>-ni quíhí-í dandăcu iní ñáhà-í xii-ndo nchàa tnúhu càhá<sup>n</sup>-í-a cuèi sa xíní-ndó tnúhu-án, te cuèi sàndáá váha iní-ndó nchàa tnúhu

ndáá dácuaaha-ndo. <sup>13</sup> Te yúhu quidé cuendá-í sá ïo tàú-xi cáhá<sup>n</sup>-í dóho-ndo ñini ndecu-í ñuyíú-a cuendá sá vǎ nácuaanaa-ndo nácuaa cada-ndo cùndecu-ndo. <sup>14</sup> Chi Xítoho Jesucristú ní cachí-gá sá ñà túú-gǎ vai nduu cundecu-í ñuyíú-a te cuú-í. <sup>15</sup> Te ío nducu ndèe-í nducu-í nácuaa cada-í cuendá quendóo ndihi-ndo nchaa tnúhu cáhá<sup>n</sup>-í-a, te cuèi na yǎha cuú-í dico vǎ nácuaanaa-ndo cada-ndo nchaa nácuaa cáhá<sup>n</sup> tnúhu sá dánèhè ñáhà-í xii-ndo vitna.

*Cue tée ní xiní núú sǎ ïo cǎhnu cuu Xítoho Jesucristú*

<sup>16</sup> Te sa ní dánèhè ñáhà-ndǐ xii-ndo sǎ ïo cǎhnu cuu Xítoho Jesucristú. Te ní cachí tnúhu tucu-ndǐ nácuaa cada-gǎ òré quixi tucu-gǎ, te tnúhu-á<sup>n</sup> cúú-xí tnúhu ndáá cuítǐ te ñǎ díú tnúhu sá ñǐ sani iní cue ñáyiu ñuyíú-a cùu-xi, chi nchúhú ní xiní núú-ndǐ nácuaa ní quide-xi cutnàhá ní cutnùnǐ iní-ndǐ sǎ ïo cǎhnu cuu Xítoho Jesucristú. <sup>17</sup> Chi dàvǎ-á<sup>n</sup> ïo váha ní quide Tǎtá-ó Dútú Ndiöxí ní quide cǎhnu-gǎ Xítoho Jesucristú, te ñiu-ni dàvǎ-á<sup>n</sup> ñǐ cáhá<sup>n</sup> Dútú Ndiöxí ndéé andǐu ñǐ xáha<sup>n</sup>-gǎ xii Xítoho Jesucristú: “Yòhó cúú-n Dèhe-í téé ío cùu iní-í, te ío cùdí ñǐ ñáhà-í xii-n”, duha ní xáha<sup>n</sup> Yǎ Ndiöxí xii Xítoho Jesucristú. <sup>18</sup> Te nchúhú ní tecú dóho-ndǐ ní cáhá<sup>n</sup> Yǎ Ndiöxí ndéé andǐu cutnàhá duca<sup>n</sup> ñǐ xáha<sup>n</sup>-gǎ xii Xítoho Jesucristú, chi tnàhá-ndǐ ndécú-ndǐ ndihi-gǎ yucu núú dúcá<sup>n</sup> ní quide cǎhnu ñaha Yǎ Ndiöxí xii-gǎ.

<sup>19</sup> Te ndècu ndihi-o nchaa tnúhu ní cáhá<sup>n</sup> cue téé ní xóo cáhá<sup>n</sup> tnúhu Yǎ Ndiöxí ndéé sanaha te nchaa tnúhu-á<sup>n</sup> cáhá<sup>n</sup>-xi nchaa nácuaa cada-xi vitna, te cutnùnǐ iní-ó sǎ tnúhu ndáá cúú-xí, te xìni ñuhu-xi cada cuendá váha-ndo nchaa nácuaa cáhá<sup>n</sup> tnúhu-á<sup>n</sup>, chi tnúhu-á<sup>n</sup> cúú-xí dàtnǎ ñǐ ñuhú dáyèhé-xi ndéé òré véxi túndaá quéné chòdínǐ cáhnú dáyèhé-di. Te duca<sup>n</sup> sǎtnahá-xi cùu tnúhu-á<sup>n</sup> chi quide-xi nácuaa cutnùnǐ iní-ó cuendá Xítoho Jesucristú. <sup>20</sup> Te xìni ñuhu-xi sǎ ïo-gǎ cada cuendá-ndó sǎ ñà túú ñáyiu tecú tnùnǐ ní ñǐ tnúhu sá ñǐ chídó tnùnǐ cue téé ní cáhá<sup>n</sup> tnúhu Yǎ

Ndiöxí ndéé sanaha, te núu Yǎ Ndiöxí vǎ cada-gǎ nácuaa cutnùnǐ iní-yu nácuaa cáhá<sup>n</sup> nchaa tnúhu-á<sup>n</sup>. <sup>21</sup> Te cue téé-á<sup>n</sup> ïo ní xíndecu yǐñuhu-güedé núu Yǎ Ndiöxí, te nchaa tnúhu sá ñǐ cáhá<sup>n</sup>-güedé-á<sup>n</sup> ñà túú cùu-xi tnúhu sá ñǐ cahu iní méé-güedé, chi Espíritú Yǎ Ndiöxí ní dácáhú iní ñáhà-xí xì-güedé nácuaa cunduu tnúhu cáhá<sup>n</sup>-güedé.

## 2

*Cue téé cǎchí sǎ cáhá<sup>n</sup> tnúhu Yǎ Ndiöxí te ñǎ ndáá*

<sup>1</sup> Te ndéé sanduu chi ní xíndecu cue téé ní xóo dandàhú ñáhà xì ñáyiu isràèl cǎchí sǎ cáhá<sup>n</sup> tnúhu Yǎ Ndiöxí te ñǎ ndáá sǎ cáhá<sup>n</sup>-güedé tnúhu-gǎ, te ñiu-ni duca<sup>n</sup> tucu cundecu cue téé dandàhú ñáhà xì-ndo vitna, chi cachí-güedé sǎ cáhá<sup>n</sup>-güedé tnúhu Yǎ Ndiöxí te ñǎ ndáá. Te cue téé-á<sup>n</sup> ïo yídáhu cáhá<sup>n</sup>-güedé, te nchaa tnúhu cáhá<sup>n</sup>-güedé-á<sup>n</sup> dacuítǎ nihnu ñaha-xi xì-ndo te núu na tédóho-ndo, chi cue téé-á<sup>n</sup> vǎ ñunuu-güedé sǎ Xítoho Jesucristú ní xíhí-gǎ cuendá-güedé. Te sǎ dúcá<sup>n</sup> càda-güedé ío-gǎ ndihi dacuítǎ nihnu-güedé méé-güedé. <sup>2</sup> Te vai ñáyiu xínu iní-yu cadá-yu nándǐ sǎ cuèhé sǎ dúhá cuendá sǎ dúcá<sup>n</sup> càda cue téé-á<sup>n</sup>, te cuendá xǐǎ<sup>n</sup> ngóo ñáyiu cáhá<sup>n</sup> úhú-yu cuendá ichi Yǎ Ndiöxí. <sup>3</sup> Te mee-ni tnúhu sá ñǐ cahu iní cue ñáyiu ñuyíú-a danèhé ñáhà-güedé xii-ndo, te quesaha-güedé sǎ cúú-xí tnúhu ndáá te ñǎ ndáá cuendá-ni sǎ cuǎñaha-ndo dǐhú<sup>n</sup> xii-güedé, chi ñiu-ni xǐǎ<sup>n</sup> tnàhí cuhu<sup>n</sup> iní-güedé, dico Yǎ Ndiöxí sa ní cunaha ndècu túha-gǎ cuendá cada ndáá-gǎ cuèchi-güedé, te na sàá nduu te cuítǎ nihnu duu<sup>n</sup>-güedé, chi Yǎ Ndiöxí vǎ nácuaanaa-gǎ ñǐ sǎ ñǐ cachí-gǎ cada-gǎ.

<sup>4</sup> Te Yǎ Ndiöxí ñǎ túú ní quide cǎhnu iní-gǎ sǎ ñǐ quide cue espíritú ñǎ túú ní cuínǐ cada ndáá xínú cuèchi núú-gǎ ní cùu, chi ní dáquihí<sup>n</sup> ñáhà-gǎ xii-xi ñǐ xichi núú ïo ndòho-xi ndecu-xi, te xǐǎ<sup>n</sup> cundedǐ nihnu-xi ndéé sáá nduu cuítǎ nihnu duu<sup>n</sup>-ná-xi. <sup>5</sup> Te Yǎ Ndiöxí ñǎ túú ní quide cǎhnu tucu iní-gǎ nchaa sǎ ñǐ quide ñáyiu ñuyíú dǐhna, chi dàvǎ-á<sup>n</sup> ñǐ dándáá-gǎ ndute ñuyíú

nǐ cáhá nchaa ñáyi ndècu ichi cuehé ichi duha te ñndi-ni té Nöé ndihí úsá-gá tucu cue ñáyi cùu ndi mee-dé ní dácäcu nihnu-gá. Te té Nöé-ǎ<sup>n</sup> cúu-dě téé ní cáhá<sup>n</sup> dóho-yu nàcuáa cada váha-yu cundecú-yu ni cùu te ñá túú ní cuini-yu. <sup>6</sup> Te Yá Ndiöxí ní dängává-gǎ ñuhú ní dánáá-gǎ ñáyi ñuú Sodomá ndihí ñáyi ñuú Gómorrá te mee-nǎ yáá nǐ nduu ñuú-á<sup>n</sup>. Te sá dúcá<sup>n</sup> nǐ cuu xǎ<sup>n</sup> cútnùní iní-ó nàcuáa cada ñaha Yǎ Ndiöxí xii nchaa ñáyi ñá túú quide váha. <sup>7</sup> Dico té Löt téé ní quide ndáá ní xíndecu ñ<sup>n</sup> ñuú-á<sup>n</sup> dàvá-á<sup>n</sup> chi ní dácäcu nihnu ñaha-gǎ xii-dé. Te nchaa ñáyi ñuú núú nǐ xíndecu-dé-á<sup>n</sup> ío ní xínduu cuina iní-yu, te mee-ni ìchi dí iní ní xíndecú-yu, te sá dúcá<sup>n</sup> nǐ xóo cadá-yu xǎ<sup>n</sup> ío ní ndihú iní té Löt. <sup>8</sup> Te ñ<sup>n</sup> nduu ñ<sup>n</sup> nduu ní xóo cada ndàhú-xi iní té Löt-á<sup>n</sup> cuendá nchaa tnúhu cuehé tnúhu duha ní xóo cáhá<sup>n</sup>-yu ní xóo cundedóho-dé, ndihí cuendá nchaa sá cuehé sá dúhá ní xóo cadá-yu ní xóo quini-dé, te mee-dě ní cuu-dé ñ<sup>n</sup> téé ní xínduu vii ní xínduu váha iní-xi núú Yǎ Ndiöxí. <sup>9</sup> Te sá dúcá<sup>n</sup> nǐ yáha té Nöé ndihí té Löt, xǎ<sup>n</sup> cútnùní iní-ó sǎ Yǎ Ndiöxí ío chindee-gá cue ñáyi quide ndáá ndécú ìchi-gá cuendá sá vǎ cadǎ-yu nándi sá cuehé sá dúhá cuèi nándi na ndòhó-yu cundecú-yu. Te Yá Ndiöxí càchí-gá sá ncháá ñáyi ndècu ichi cuehé ichi duha sa ndècu túha-yu sá quihí<sup>n</sup>-yu núú ùhú núú ndàhú nduu nà yáha cundáá cuèchi-yu.

<sup>10</sup> Te uu<sup>n</sup>-gá cada ñaha Yǎ Ndiöxí xii nchaa cue téé ndècu ichi dí iní, te dàquee tíhú-güedé nchaa tnúhu sá sánú ìchi ñaha xii-o nacúáa cada-o cundecu-o, te cùu-güedé cue téé ñ<sup>n</sup> iní-xi, te y<sup>n</sup> iní-güedé, te ñá túú yùhú-güedé cáhá<sup>n</sup> úhú-güedé cuendá nchaa espíritú cùnù. <sup>11</sup> Te cue espíritú xínú cuèchi núú Yǎ Ndiöxí ío cùnù-xi dacúúxí cuè téé-á<sup>n</sup>, dico ñá túú cùy<sup>n</sup>-xi cáhá<sup>n</sup>-xi dàtná cáhá<sup>n</sup> cue téé-á<sup>n</sup> òré ndàcá<sup>n</sup> cuèchi-xi núú Yǎ Ndiöxí cuendá nchaa sá quidé cuè espíritú cündihí yucu ñávaha.

<sup>12</sup> Te nchaa cue téé dandàhú ñáhá xii-ndo-á<sup>n</sup> cúu-güedé dàtná

cue quiti, chi cue quiti-á<sup>n</sup> ñǎ túú ndècu sá xíní tnùnigüedi, chi cue quiti-á<sup>n</sup> nǐ cacu-güedi sá tníí-ó-güedi te cahni-o-güedi. Te duca<sup>n</sup> sǎtnahá-xi cùu nchaa cue téé-á<sup>n</sup>, chi cáhá<sup>n</sup> cuèhé-güedé cuendá ndédani càa espíritú cuèi ñá túú xínigüedé ná espíritú cúu-xí, te diu-ni mee-güedé dácúta nihnu-güedé mée-güedé sá dúcá<sup>n</sup> quide-güedé, <sup>13</sup> te sáá nduu te nacháhu-güedé nchaa sá quidé-güedé-á<sup>n</sup>, te cuèi nduu cuèi niú cúdí iní-güedé quidé-güedé nchaa núú sá cuehé sá dúhá sàni iní-güedé. Te òré nàtacá-ndó cada-ndo ñ<sup>n</sup> vico chiñuhu-ndo Yá Ndiöxí te chitnahá ñáhá-güedé xii-ndo, te cada dusa<sup>n</sup>-güedé sá cúdí iní-güedé sá dándàhú ñáhá-güedé xii-ndo, te dícó sácá<sup>n</sup>-núú cuàha ñaha-güedé xii-ndo dùca<sup>n</sup> na cada-güedé.

<sup>14</sup> Te nchaa cue téé-á<sup>n</sup> òré xínigüedé ñ<sup>n</sup> ñáyi dñí te ndñi-ni sàni iní-güedé cáhá<sup>n</sup> ndihí ñaha-güedé xii-yu, te ñá túú ndùu vétú iní-güedé cuendá nchaa sá cuehé sá dúhá quide-güedé chi uu<sup>n</sup>-gá uu<sup>n</sup>-gá sání iní-güedé cada-güedé. Te cuáhá<sup>n</sup>-güedé dándàhú-güedé nchaa ñáyi ñá túú nihí ndéé càda ndáá cuendá canchicú<sup>n</sup> nihnú-yu nchaa tnúhu cáhá<sup>n</sup>-güedé. Te mee-ni nchaa sá ndécú ndihí tnahá ñáyi-güedé cúu iní-güedé, te cue téé-á<sup>n</sup> cúu-güedé cue téé duu<sup>n</sup> duu<sup>n</sup> sa ní xíta nihnu núú Yǎ Ndiöxí. <sup>15</sup> Chi cùu-güedé cue téé vǎ caní-gǎ iní-xi cada ndáá, te nchicú<sup>n</sup> nihnu-ná-güedé quidé-güedé nàcuáa ní xóo cada ndíi Bàlaám déhe ndíi Bèór, chi ndíi Bàlaám-á<sup>n</sup> nǐ xóo tnahá iní ndíi cada ndíi chiú<sup>n</sup> cuehé nàcuáa ní xóo níhí ndíi díhú<sup>n</sup>. <sup>16</sup> Te Yá Ndiöxí ní quide-gá ní cáhá<sup>n</sup> búrru ndíi ní tenáá ñáhá-dí xii ndíi cuendá sá vǎ cadá ndíi ñ<sup>n</sup> cuèchi sàni iní ndíi cada ndíi ni cùu. Te sá dúcá<sup>n</sup> nǐ cuu xǎ<sup>n</sup> ní nguítuu ndíi ñá túú ní quide ndíi ñ<sup>n</sup> sá ñá túú nándihí sàni iní ndíi ni cùu.

<sup>17</sup> Te nchaa cue téé duca<sup>n</sup> xíquide cùu-güedé dàtná ñ<sup>n</sup> doco yìchí, te cùu tucu-güedé dàtná ñ<sup>n</sup> vícò sǎ xídó tǎchí te ñá túú dǎú nchídó-xí, te sa ndècu



túha ñ<sup>n</sup> xichi núú ïo nee quíhí<sup>n</sup>-güedé cundecu-güedé ñi caa ñi quíhí<sup>n</sup>. 18 Te cue téé-á<sup>n</sup> cáhá<sup>n</sup>-güedé dàtná cáhá<sup>n</sup> ñ<sup>n</sup> téé ío cùu cahnu dico ñá túú vèdana nàndihí nchaa tnúhu cáhá<sup>n</sup>-güedé, te cue téé-á<sup>n</sup> dándàhú-güedé nchaa ñáyiu íchí ñí dáñá ìchi cuehé ichi duha, te xáha<sup>n</sup>-güedé xii-yu sá cúú-ní càdá-yu nchaa sá cuèhé sá dúhá quide nchaa ñáyiu ndècu ichi díí iní, 19 te xáha<sup>n</sup> tùcu-güedé sá cúú-ní càdá-yu nání véxi iní-yu cuèi sá vaha te cuèi sá cuèhé, dico mee-güedé chi mee-ni sá cuèhé sá dúhá cùnunu quide-güedé. Te nchaa ñáyiu ñá ndácú dàña nándi sá cuèhé sá dúhá cùu-yu dàtná ñ<sup>n</sup> ñáyiu xinu cuechi ñá túú tnàhí dàñá quee núú chíú<sup>n</sup> pàtróo<sup>n</sup>-xi. Te duca<sup>n</sup> sàtnahá-xi cùu-yu chi ñá ndácú-yu dàñá-yu nándi sá cuèhé sá dúhá quide-yu. 20 Te núu ñáyiu sa ní dáñá nchàa ichi cuehé ichi duha cuèndá sá ñí cutnùní iní-yu nàcuáa ndùu tnúhu Xítoho Jesucristú, Yaá ní dácácu nihnu ñaha xii-o núú ùhú núú ndàhú ná nanchocáva iní-yu cundecu tucú-yu ichi cuèhé ichi duha, te mee-ná sá cuèhé sá dúhá tàxi tnuní ñáhá-xí xii-yu, te núu duca<sup>n</sup> te vaa-gá tucu cadá-yu dàcúxí dàtná ní xóo cadá-yu cùtnahá vátá cùtnùní-gá iní-yu nàcuáa ndùu tnúhu-gá. 21 Te váha-gá sá vã ngũnu ichí-yu ichi ndáá ní cùu te ñá díú sã sà ní ngũnu ichí-yu te ní dáñá-yu nchaa tnúhu-gá sá sà ní níhí-yu ndècu ndihí-yu sànu ichi ñaha-xi nacuáa cundecú-yu ñi cùu. 22 Te ñáyiu duca<sup>n</sup> xíquide quèe ndáá-xi nàcuáa cuáhá<sup>n</sup> ñ<sup>n</sup> cuèndú sá cächí-xi: “Iná ní nacaxi-dí sá ñí ndusa<sup>n</sup>-dí, te cùchí quiti íchí ñí xichi ndute càndoo cuáhá<sup>n</sup>-ni tucu-dí cuchi ñuhu-dí núú ndèhyú”, duha cuáhá<sup>n</sup> cuèndú-á<sup>n</sup>.

### 3

#### *Xítoho Jesucristú quixi tucu-gá*

1 Te nchaa nchòhó ñáyiu ío cùu iní-í cùtnuní iní-í sá ïo váha sàni iní-ndó, te xéhé cúú-xí tütú cúú ùú càdũha-í sá cúú-xí-ndó, te ñ<sup>n</sup>-ni cáhá<sup>n</sup>-í dándacu iní ñáhà-í xii-ndo nchàa tnúhu sá sà ní xíndedóho-ndo. 2 Chi cuini-í sá vã nàcuáana-ndo nchaa tnúhu ní cáhá<sup>n</sup>

nchaa cue téé ní xóo cáhá<sup>n</sup> tnúhu Yá Ndiõxí ndéé sanaha, te ñí vã nàcuáana-ndo nchaa tnúhu ní cáhá<sup>n</sup> cue téé ní cáhá<sup>n</sup> tnúhu Xítoho Jesucristú Yaá ní dácácu nihnu ñaha xii-o núú ùhú núú ndàhú, chi ñiu nchaa tnúhu-á<sup>n</sup> sánú ìchi ñaha-xi xii-o nacuáa cada-o cùndecu-o.

3 Te ío-gá xíní ñuhu-xi cutnuní iní-ndó nàcuáa cada-xi òré vátá sáa-gá nduu quixi tucu Xítoho Jesucristú ñuyíú-a, te cächí tnúhu-í xii-ndo sá cùndecu ñáyiu cuhu<sup>n</sup> iní mee-ni nchàa sá cuèhé sá dúhá te mee-ni xiã<sup>n</sup> cadá-yu, te cáhá<sup>n</sup> cuèhé cáhá<sup>n</sup> duhá-yu cuèndá tnúhu Yá Ndiõxí. 4 Te cachí-yu: “Ñá ndáa sá quixí Xítoho Jesucristú ñuyíú-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna ñiu-ni duha ní quesaha-xi quide-xi ndéé cùtnahá ní ngáva ñuyíú, te ñiu-ni duha quide-xi ndéé cùtnahá ní xíndecu cue ñaní tnáhá-ó ndéé sanaha, te ñiu-ni duha quide-xi ndéé ní sáa nduu ní xíhí-güedé, te ñiu-ni duha quide-xi ndéé vitna”, duha cáhá<sup>n</sup>-yu. 5 Te ñucùu<sup>n</sup> cadá-yu vã cadá cuèndá-yu sá Yá Ndiõxí ní cáhá<sup>n</sup>-gá te ní ngũndecu andiu ndihí ñuyíú-a, te ñiu-gá ní quide ní quene ñuhu yìchí xití ndute ní ngũndecu-xi ñ<sup>n</sup> xio. 6 Te ñ<sup>n</sup> xito ní dándáa Yá Ndiõxí ndute ñuyíú-a ní dánáa-gã nchaa sá ío. 7 Te Yá Ndiõxí ní cachí-gá sá cùndecu-ni ñuyíú-a ndihí andiu ndéé ná sáa nduu càda-gá nchaa nàcuáa ní cáhá<sup>n</sup>-gá sá cúú-xí nchàa ñáyiu ndècu ichi cuehé ichi duha, te dàvá-á<sup>n</sup> danàa-gá nchaa ñáyiu-á<sup>n</sup> chi cáyú andiu ndihí ñuyíú-a.

8 Te nchaa nchòhó ñáyiu ío cùu iní-í, ío cuhu<sup>n</sup> iní-ndó tnúhu na cáhá<sup>n</sup>-í-a, chi Yá Ndiõxí ñá túú sàni iní-gá dàtná sání iní mée-ó, te ñ<sup>n</sup> nduu cùu-xi datná úxí cièndú cuíá, te úxí cièndú cuíá-á<sup>n</sup> cúú-xí dàtná ñ<sup>n</sup> nduu sá cúú-xí-gá. 9 Te Yá Ndiõxí ñá túú dàna ndodo iní-gá vã cadá-gã ñ<sup>n</sup> sá cáhá<sup>n</sup>-gá dàtná cächí cue ñáyiu sá dáná ndòdo iní-gá cada-gá ñ<sup>n</sup> sá cáhá<sup>n</sup>-gá, chi ñucùu<sup>n</sup> tnahí dàcaca-gá nduu cuèndá sá ïo cùndahú iní ñáhá-gã xii-o, te cuini-gá sá ncháa ñáyiu ndixi túu iní-yu sá

ñà túú quide váha-yu ndécú-yu te tuhá-yu ichi-gá, te duca<sup>n</sup> quide-gá chi cuiní-gá sá vâ cuíta nihnu ni ñ<sup>n</sup>-yu.

10 Te dàtná quidé cuè ñadúhú quǐhu-güedé ñ<sup>n</sup> vehe dùhu-güedé òré ñá túú yǐhi iní xítóhó vehe-á<sup>n</sup>, te duca<sup>n</sup> càda Xítóhó Jesucristú chi nduu ñà túú yǐhi iní ñáyiu ñuyíú-a quixi tucu-gá, te dàvâ-á<sup>n</sup> cada-xi andiú dàtná quidé-xí òré níhi vìhi cahá<sup>n</sup> ñúhu, te ñiú-ni òré-á<sup>n</sup> ndoñuhu àndiú, te cáyú nchaa chódíní, te cáyú tucu tnàhá ñuyíú-a ndihi nchaa sá ío.

11 Te vitna nchòhó sa xìní-ndó sá nàá ñuyíú-a te xǐá<sup>n</sup> ío xìni ñuhu-xi cada váha-ndo cùndecu-ndo, te cada-ndo nàcuáa cuiní méé Yá Ndióxi cunduu. 12 Te ío nducu ndèe-ndo duca<sup>n</sup> cada-ndo cuendá duca<sup>n</sup> ndihi-ni sáa nduu càda-gá nchaa nàcuáa càhá<sup>n</sup>-gá, te duca<sup>n</sup> nchòhó cundecu túha-ndo sáa nduu-á<sup>n</sup>. Te ñiú-ni nduu-á<sup>n</sup> ndoñuhu àndiú chi cáyú-xi, te ñiú-ni duca<sup>n</sup> ndòñuhu tucu nchaa chódíní chi ndihi-dí cáyú. 13 Te nchoo ndètu-o sáa nduu cùndecu-o ñ<sup>n</sup> ñuyíú sáa, te quini-ó ñ<sup>n</sup> andiú saa datná ní cachí Yá Ndióxi, te yàcá<sup>n</sup> chi mee-nă cue ñáyiu quide váha cundecu.

14 Te nchòhó ñáyiu ío cùu iní-í, ñini ndètu-ndo sáa nduu dùca<sup>n</sup> cada-xi ío nducu ndèe-ndo cada-ndo mee-ni sá vâha cundecu-ndo ìchi Yá Ndióxi, te cundecu nahi-ndo, te cada-ndo nchàa nacuáa vá cùndècu cuèchi-ndo núú-gă. 15 Te ío cada cuendá-ndó sá dàcaca-gá nduu dùca<sup>n</sup> cada-gá chi cuiní-gá sá ncháa ñáyiu naníhi tǎhú-yu. Te té Pǎblú téé ío cùu iní-ó ndècu ndihi-o ichi Xítóhó Jesucristú ñiú-ni nàcuáa càhá<sup>n</sup>-í-a ñiú-ni duca<sup>n</sup> ní tee-dé ñ<sup>n</sup> núú tütú ní dáquixí-dé ndaha-ndo, te ní tee-dé nàcuáa ní dácáhú ñini ñáhá Yá Ndióxi xii-dé. 16 Te ñiú-ni duca<sup>n</sup> càhá<sup>n</sup>-dé nchaa dava-gá núú tütú cǎdũha-dé, te dava tnúhu càhá<sup>n</sup>-dé ío úhú tecú tnùní-ó, núu xǐá<sup>n</sup> ñáyiu ñá túú cùtnuní váha iní-xi, ñáyiu ío yáchí sàndáa iní-xi ñ<sup>n</sup> tnúhu, ñáyiu-á<sup>n</sup> tècú tnùní dátñi-yu nchaa tnúhu ní chídó tnùní-dé, ndihi nchaa dava-gá tnúhu yòdo tnuní núú tütú Yá Ndióxi, te sá dúcá<sup>n</sup> quidé-yu te dacuíta

nihnú-yu mèé-yu.

17 Te nchòhó ñáyiu ío cùu iní-í, sa cùtnuní iní-ndó nàcuáa quide dava ñáyiu, núu xǐá<sup>n</sup> ío xìni ñuhu-xi quíhi iní-ndó cùndecu-ndo cuendá duca<sup>n</sup> cùndecu-ni-ndo ichi-gá, te vá dáñá-ndó mèe-ndo dandahú ñáhá nchàa cue téé ndècu ichi cuehé ichi duha, chi cue téé-á<sup>n</sup> ñà túú sàni váha iní-güedé cuendá tnúhu Yá Ndióxi. Te núu na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ìchi-gá dàtná ndécú-ndó vitna. 18 Te nchòhó uu<sup>n</sup>-gá uu<sup>n</sup>-gá cuita cutnùní-gá iní-ndó quíhí<sup>n</sup> nchaa nàcuáa ta chìndee ñaha Xítóhó Jesucristú xii-ndo cuáhá<sup>n</sup>. Te duca<sup>n</sup> ío-gá cuita cutnùní iní-ndó nchàa nacuáa sàni iní-gá, te ñiú-gá cúú-gă Yá ní dácăcu nihnu ñaha xii-o núú ùhú núú ndáhú. Te chí ná cǎchí-ó sá ío cǎhnu cuu-gá cuèi vitna té cuèi ndéé núú cuáhá<sup>n</sup> núú vǎxi. Te duca<sup>n</sup> na cùnduu. Te ío chí cǎdá ndèe iní-nă vitna.

## TUTÚ DÍHNA NÍ CADÚHA TÉ JUÁÁ

*Tnúhu sá cãhá<sup>n</sup> nãcuáa naníhi  
tãhú-ó*

<sup>1</sup> Te yúhú té Juáá cãchí tnúhu-í xii-ndo cuendá Cristú Yaá cãhá<sup>n</sup> nãcuáa cundecu ndihí-o Yã Ndiõxí. Te Cristú-á<sup>n</sup> sa ndècu-gá ndéé cútnhá ní ngáva ñuyú. Te yúhú ní xiní núu-í ndihí cue téé ní xica cuu ndihí-í nãcuáa cãa nãcuáa nduu-gá. Te ní xíndedóho-ndí tnúhu ní cãhá<sup>n</sup>-gá, te ní tendaha-ndí-gá te ní cutnùní ndáá iní-ndí sá ñ<sup>n</sup> yiqui cuñú cúu-gã. <sup>2</sup> Te ní quixi túu-gá ñuyú-a, te ní xiní-ndí-gá, te xíã<sup>n</sup> cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gã ndihí Tãtá-gã Dútú Ndiõxí ní cùu, te ní quixi-gá ñuyú-a ní xíndecu-ndí ndihí-gá. Te ní cãchí tnúhu-gá xii-ndí sá ndúú tãhú-ó cundecu ndihí-o Yã Ndiõxí ní caa ní quíhí<sup>n</sup> te núu na quíndáá iní-ó-gã. <sup>3</sup> Te xíã<sup>n</sup> dátúu-ndí núu-ndó nchaa sá ní xiní-ndí, ndihí nchaa sá ní xíndedóho-ndí cuendá cuu ñ<sup>n</sup>nuu-o nchaa-o datná nchúhú cúu ñ<sup>n</sup>nuu-ndí ndihí Tãtá-ó Dútú Ndiõxí, ndihí Déhe-gá Xítohó Jesucristú. <sup>4</sup> Te xíã<sup>n</sup> núu tèe-í nchaa tnúhu-a cuendá cudí iní-ó nchaa-o.

*Yã Ndiõxí cúu-gã datná ñ<sup>n</sup> ñuhú*

<sup>5</sup> Te nchaa tnúhu ní dánèhé ñáhá Xítohó Jesucristú xii-ndí, xíã<sup>n</sup> dánèhé ñáhá-í xii-ndo. Te ní cãchí-gá sá Yã Ndiõxí cúu-gã datná ñ<sup>n</sup> ñuhú dáyèhé-gá iní-ó, te duca<sup>n</sup> sãtnhá-xi cùu-gá chi ío váha quide-gá, te ñá túú quide-gá ní ñ<sup>n</sup> sá cuèhé sá dúhá. <sup>6</sup> Te núu cãchí-ó sã ndécú-ó ìchi Yã Ndiõxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núu-gã. <sup>7</sup> Te núu na càda váha-o datná quidé mèe-gá, te cuu ñ<sup>n</sup>nuu-o nchaa-o. Te ndada ndoo ndada nine-gá iní-ó, chi cada càhnu iní-gá nchaa sá cuèhé sá dúhá quide-o,

chi diu cuendá-á<sup>n</sup> ní xíhí Déhe-gá Xítohó Jesucristú núu cùrúxí.

<sup>8</sup> Te núu cãchí-ó sã ñá túú quide-o ní ñ<sup>n</sup> sá cuèhé sá dúhá, te dandahú-ó mèe-o, te ñá túú quide ndáá-ó núu Yã Ndiõxí. <sup>9</sup> Te núu na nãhmá-ó nchaa yíca cuèchi-o núu-gã, te mee-gã cada càhnu iní-gá, te ndada ndoo-gá iní-ó, cuendá cada ndáá-ó cundecu-o ìchi-gá, chi mee-gã ío váha quide-gá te ío ndáá quidé-gã, duca<sup>n</sup> ní cãhá<sup>n</sup>-gá te duca<sup>n</sup> quide-gá. <sup>10</sup> Te núu na cãchí-ó sã ñá túú quide-o ní ñ<sup>n</sup> sá cuèhé sá dúhá, te quide-o Yã Ndiõxí ñ<sup>n</sup> ñándéhné, dico ñá túú ndèhnde-gá. Te ñá túú ndècu tnúhu-gá iní-ó te núu duca<sup>n</sup> na càda-o.

## 2

*Xítohó Jesucristú cãhá<sup>n</sup> ndàhú-gá  
cuendá-ó*

<sup>1</sup> Te nchòhó ñáyiu cùu datná déhe-í, chido tnuní-í nchaa tnúhu-a cuendá sá vã cadá-ndó ní ñ<sup>n</sup> sá cuèhé sá dúhá. Dico núu ñ<sup>n</sup>-ndo quide-ni-ndo nãndí sá cuèhé sá dúhá, te ndècu ñ<sup>n</sup> Yaá cãhá<sup>n</sup> ndàhú cuendá-ó núu Yã Ndiõxí. Te Yaá-á<sup>n</sup> cúu-gã Xítohó Jesucristú Yaá quidé ndáá. <sup>2</sup> Te ní xíhí-gá sá cuendá nchaa yíca cuèchi-o cuendá ngúndecu váha-o núu-gã te núu na quíndáá iní-ó-gã. Te ñá díú-ní sã cuendá yíca cuèchi nchoo ní xíhí-gá, chi tnàhá cuendá nchaa yíca cuèchi ñáyiu ní càa xico ñuyú.

<sup>3</sup> Te núu cada-o nchaa nãcuáa cãhá<sup>n</sup> Yã Ndiõxí, te cutnùní iní-ó sã ndécú-ó ìchi-gá. <sup>4</sup> Te núu cãchí-ó sã ndécú-ó ìchi-gá te ñá túú quide-o nãcuáa cãhá<sup>n</sup>-gá, te dàcuandehnde-o, te ñá túú quide ndáá-ó núu-gã. <sup>5</sup> Te núu sãndáá ndisa iní-ó tnúhu-gá, te quide-o nchaa nãcuáa cãhá<sup>n</sup>-gá, te duca<sup>n</sup> te cùu iní ndisa-o-gã, te cutnùní ndáá iní-ó sã ndécú-ó ìchi-gá. <sup>6</sup> Te núu cãchí-ó sã ndécú-ó ìchi Yã Ndiõxí, te xini ñuhú-xi cada ndáá-ó cundecu-o ñuyú-a datná ní quide ndáá Xítohó Jesucristú cútnhá ní xíndecu-gá ñuyú-a.

*Ndudú sáá*

<sup>7</sup> Te nchòhó ñáyiu ndècu ndihí-í ìchi Xítohó Jesucristú, ñá túú chido tnuní-í ñ<sup>n</sup> tnúhu saa sã cúu-xí-ndó, chi

d̄iu-ni tnúhu sá n̄i ngúndecu nd̄ihi-ndo ndéé díhna, tnúhu ní x̄indedóho-ndo ndéé cútnàhá ní s̄andáá iní-ndó-gá, x̄iá<sup>n</sup> chídó tnùn̄í-í. <sup>8</sup> Te tnúhu-a cùu-xi datná ì<sup>n</sup> tnúhu saa tèe-í d̄ándacu iní ñáhà-í xii-ndo n̄acuaa ní quide Xítohó Jesucristú cútnàhá ní quixi-gá ñuyíú-a ní quide váha-gá, te tnàhá nchòhó ní tn̄i-ndo tn̄hu-gá te quide váha-ndo tnàhá-ndó. Te vitna ì<sup>n</sup> nduu ì<sup>n</sup> nduu ta cùu vai ñáyiu ta d̄aña nchaa sá cuèhé sá dúhá cuáhá<sup>n</sup>, chi Xítohó Jesucristú tá d̄andixi túu-gá iní-yu cuendá cutnùn̄í iní-yu n̄acuaa ndùu cuendá Yá Ndiöxí.

<sup>9</sup> Te núu c̄achí-ó s̄á quidé váha-o, te cùu úhú iní-ó tnàha ñáyiu-o, te x̄iá<sup>n</sup> ñá túú quide ndáá-ó, chi ndècu-ni-ochi cuehé ichi duha sá dúcá<sup>n</sup> quide-o. <sup>10</sup> Te núu na cùu iní-ó tnàha ñáyiu-o d̄atná cúú iní ñáhá m̄èe Yá Ndiöxí xii-o ña, te quide ndáá-ó n̄úú-gá, te vá c̄anúichi-o tnahe ñáyiu-o ì<sup>n</sup> ichi cuehé ichi duha. <sup>11</sup> Te núu cùu úhú iní-ó tnàha ñáyiu-o, te ñá túú quide váha-o n̄úú Yá Ndiöxí, chi ndècu-ni-ochi cuehé ichi duha, te ñá túú cùtnuní iní-ó s̄á quidé-ó. Chi cùu-o datná ì<sup>n</sup> té ndècu núú néé chi ñá cútnùn̄í núú-d̄é ndéé ichi quíh̄í<sup>n</sup>-dé. Duca<sup>n</sup> s̄atnahá-xi cùu nchoo chi ñá cútnùn̄í iní-ó ndéé ichi quíh̄í<sup>n</sup>-ó te núu duca<sup>n</sup> na c̄ada-o cuu úhú iní-ó tnàha ñáyiu-o.

<sup>12</sup> Te nchòhó ñáyiu cùu datná déhe-í, yúhú chídó tnùn̄í-í tnúhu-a ì<sup>n</sup> núu t̄utú c̄achí tnúhu-í xii-ndo s̄á n̄i quide c̄ahnu iní Yá Ndiöxí nchaa cuéchi-ndo, chi d̄iu cuendá-á<sup>n</sup> n̄i x̄ihí Xítohó Jesucristú. <sup>13</sup> Te nchòhó ñáyiu sacuéhé, yúhú tèe-í tnúhu-a sá cúú-xi-ndó chi c̄ahá<sup>n</sup> nd̄ihi-ndo J̄esús, te Yaá-á<sup>n</sup> sa ndècu-gá ndéé cútnàhá ní ngáva ñuyíú. Te nchòhó ñáyiu nchicú<sup>n</sup>-gá té t̄ucu-í tnúhu-a sá cúú-xi-ndó chi ñá túú s̄andáá iní-ndó tn̄hu c̄ahá<sup>n</sup> yucu ñávaha.

Te nchaa nchòhó ñáyiu cùu datná déhe-í, té t̄ucu-í tnúhu-a sá cúú-xi-ndó, chi sa c̄ahá<sup>n</sup> nd̄ihi-ndo T̄atá-ó D̄ütú Ndiöxí. <sup>14</sup> Te nchòhó ñáyiu n̄i s̄ahnu, yúhú chídó tnùn̄í-í tnúhu-a ì<sup>n</sup> núu t̄utú chi c̄ahá<sup>n</sup> nd̄ihi-ndo J̄esús, te Yaá-á<sup>n</sup> sa ndècu-gá

ndéé cútnàhá ní ngáva ñuyíú. Te nchòhó ñáyiu nchicú<sup>n</sup>-gá, yúhú chídó tnùn̄í-í tnúhu-a chi ío n̄ihí ndéé-ndó ndècu-ndo, chi tn̄i-ndo tnúhu c̄ahá<sup>n</sup> Yá Ndiöxí. Te ñá túú s̄andáá iní-ndó tn̄hu c̄ahá<sup>n</sup> yucu ñávaha.

<sup>15</sup> Te vá cúhú<sup>n</sup> iní-ndó n̄i ì<sup>n</sup> sá cuèhé sá dúhá ío ñuyíú-a, te n̄i v̄á c̄aní iní-ndó c̄ada-ndo. Chi núu na c̄uhu<sup>n</sup> iní-ó nchaa sá cuèhé sá dúhá ío ñuyíú-a ña, te ñá túú T̄atá-ó D̄ütú Ndiöxí ñúhú iní-ó te núu duca<sup>n</sup> na c̄ani iní-ó. <sup>16</sup> Te nchaa ñáyiu ñuyíú-a quidé-yu nchaa sá cuèhé sá dúhá, chi d̄iu nchaa x̄iá<sup>n</sup> cúdí<sup>n</sup> iní-yu cadá-yu. Te nchaa sá cuèhé sá dúhá s̄ani iní-yu, nd̄ihi nchaa sá x̄ini-yu quidé-yu. Te x̄iquide nínu-yu m̄èe-yu cuendá nchaa sá ndécú nd̄ihí-yu. Te nchaa sá ña túú váha ní cacu nihnu-xi ñuyíú-a. <sup>17</sup> Te nchaa sá ña túú váha ío ñuyíú-a, nd̄ihi nchaa sá s̄aní cuèhé s̄aní d̄uha iní-yu cuita nd̄ihi nihnu-xi quíh̄í<sup>n</sup>. Te nchaa ñáyiu tn̄i tnúhu c̄ahá<sup>n</sup> Yá Ndiöxí cundecú-yu nd̄ihi-gá n̄i caa n̄i quíh̄í<sup>n</sup>.

#### *Tnúhu ndáá tnúhu Yá Ndiöxí nd̄ihi tnúhu ndehnde*

<sup>18</sup> Te nchòhó ñáyiu cùu datná déhe-í, sa n̄ihí-ndó tn̄hu sá quíxí ì<sup>n</sup> té cunuu-gá-dé cuu úhú iní-dé Crístú. Te sa x̄indecu-gá ñáyiu cùu úhú iní ñáhá x̄i-gá, núu x̄iá<sup>n</sup> cútnùn̄í iní-ó s̄á s̄a ta cuyatni nduu naa ñuyíú-a. <sup>19</sup> Te ñáyiu-á<sup>n</sup> n̄i x̄indecu nd̄ihi ñáhá-yu xii-o, te ní queé-yu cuáhá<sup>n</sup>-yu chi ñá túú ní cùu ì<sup>n</sup>nuu-o nd̄ihí-yu. Chi núu dicó ní cùu ì<sup>n</sup>nuu-o nd̄ihí-yu te cundecu nd̄ihi ñáhá-yu xii-o ní cùu. Te duha ní cuu cuendá cutnùn̄í ndáá iní-ó nchaa-o sá ña túú cùu ì<sup>n</sup>nuu-o nd̄ihí-yu, chi ñá túú s̄andáá iní-yu Yá Ndiöxí.

<sup>20</sup> Te Xítohó Jesucristú ní taxi-gá Espiritú Yá Ndiöxí ndécú nd̄ihí-o, núu x̄iá<sup>n</sup> t̄ecú tnùn̄í-ó tn̄hu-gá. <sup>21</sup> Te cuendá sá x̄ini-ndó tn̄hu ndáá tnúhu Yá Ndiöxí n̄u x̄iá<sup>n</sup> té-í tnúhu-a, te ñá díú ì<sup>n</sup> sá ña cútnùn̄í iní-ndó cùu-xi. Te sa nàha-ndo sá n̄i ì<sup>n</sup> tnúhu ndehnde ña túú ñ̄utnahá-xi núu tn̄hu Yá Ndiöxí, chi mee n̄ine-ni tnúhu ndáá cúú-xi.



22 Te nchaa ñáyiú càchí sá ñà díú Jèsús cúú Crìstú Yaá ní tendaha Yá Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te díu-ní-yu càchí-yu sá ñà díú Dèhe Yá Ndiöxí cúú Jèsús, te sá dúcá<sup>n</sup> quidé-yu te cùu úhú iní-yu Yá Ndiöxí ndihí Dèhe-gá Jèsús. 23 Te nchaa ñáyiú ñá túú sàndáá iní sá Dèhe Yá Ndiöxí cúú Jèsús, ñáyiú-á<sup>n</sup> ñà túú ndécú-yu ichi Tátá-ó Dütú Ndiöxí. Te nchaa ñáyiú càhá<sup>n</sup> sá Dèhe Yá Ndiöxí cúú Jèsús, ñáyiú-á<sup>n</sup> ndécú-yu ichi Tátá-ó Dütú Ndiöxí.

24 Te nchaa tnúhu Yá Ndiöxí ní tecú dóho-ndo ndéé díhna, tnúhu-á<sup>n</sup> cuhu<sup>n</sup> iní-ndó. Te núu nchaa tnúhu-á<sup>n</sup> ná cùhu<sup>n</sup>-ni iní-ndó, te cundecu ndihí-ndo Yá Ndiöxí ndihí Dèhe-gá cuèi vá cùndècu túu-ndo ndihí-gá ñuyíú-a. 25 Te Jèsús ní cachí-gá sá ndúú tǎhú-ó cùndecu ndihí-o-gá ni caa ni quíhí<sup>n</sup> andíu.

26 Te cuendá nchaa ñáyiú dándahú ñáhá xii-ndo ní chídó tnùní-í tnúhu-a, 27 dico nchòhó chi ndècu ndihí-ndo Espiritú Yá Ndiöxí sá ní taxi Xítóhó Jesucristú. Núu xiá<sup>n</sup> ñá túú xini ñuhu-ndo ñáyiú danèhé ñáhá xii-ndo, chi mee Espiritú-gá dánèhé ñáhá-xí nchaa sá vǎha. Te nchaa sá dánèhé ñáhá-xí xii-ndo cuu-xi sá ndáá, te ñá díú ñ<sup>n</sup> tnúhu ndehnde. Te vitna chí cǎnchícú<sup>n</sup> nihnu-ni ichi Yá Ndiöxí dàtná ní sanu ichi ñaha mée Espiritú-gá xii-ndo.

28 Te nchòhó ñáyiú cùu datná déhe-í, chí cǎnchícú<sup>n</sup> nihnu-ni ichi Xítóhó Jesucristú, chi cuendá òré ná quíxi tucu-gá ñuyíú-a te vá yùhú-ndó te nì vá cúú càhá<sup>n</sup> núú-ndó núú-gǎ. 29 Te nchòhó sa nàha-ndo sá mée-gǎ quidé ndáá-gá, te sa xini-ndó sǎ ncháá ñáyiú quide ndáá cúú-yu déhe Yá Ndiöxí.

### 3

#### *Ñáyiú cùu déhe Yá Ndiöxí*

1 Te chí cuǎha cuendá sá ño cùu iní ñáhá Tátá-ó Dütú Ndiöxí xii-o cuendá sá cúú-ó déhe-gá, chí duca<sup>n</sup> ní cachí-gá, te déhe ndisa-gá cúú-ó. Te núu xiá<sup>n</sup> ñáyiú ndècu ichi cuèhé ichi duha ñá cúú quini ñáhá-yu xii-o, chí

ñá túú xini-yu nàcuáa ndùu cuendá Yá Ndiöxí. 2 Te nchòhó ñáyiú ño cùu iní-í, vitna cùu-o déhe Yá Ndiöxí, te vátá cùtnuní váha-gá iní-ó nǎsa cunduu-o ndéé núú cuáhá<sup>n</sup> núú vǎxi. Dico sa cùtnuní iní-ó sǎ òré ná quíxi tucu Xítóhó Jesucristú te nduu-o dàtná cáa mée-gá, chí quini-ó-gǎ nàcuáa-ni caa nàcuáa-ni ndùu-gá. 3 Te nchaa ñáyiú sa ndètu ñaha xii-gá sa ta ngùndecu túha-yu cuáhá<sup>n</sup>, chí ta ndùu ndoo nduu nine iní-yu cuáhá<sup>n</sup> dàtná cáa ndoo caa nine mee-gá.

4 Te nchaa ñáyiú quide nándi sá cuèhé sá dúhá ñá túú quide váha-yu núú Yá Ndiöxí, chí ní cachí-gá sá vá dúcá<sup>n</sup> càda-o. 5 Te sa nàha-ndo sá ní quíxi túu Xítóhó Jesucristú ñuyíú-a cuendá cada càhnu iní-gá nchaa sá cuèhé sá dúhá quide-o, chí mee-gǎ ñá túú quide-gá ni ñ<sup>n</sup> sá cuèhé sá dúhá. 6 Te nchaa ñáyiú ndècu ichi Yá Ndiöxí ñá túú ñùhú-yu ichi cuèhé ichi duha. Te nchaa ñáyiú ñùhu ichi cuèhé ichi duha ñá túú xini-yu nàcuáa ndùu cuendá Xítóhó Jesucristú te ní ñá túú xini-yu nàsa càa-gá. 7 Te nchòhó ñáyiú cùu datná déhe-í, vá dáñá-ndó mée-ndo dándahú ñáhá ñáyiú ndècu ichi cuèhé ichi duha, chí cǎchí-yu sá cúú cùndecu-o ichi Yá Ndiöxí te cada-o nándi sá cuèhé sá dúhá dico ñá ndáá. Te nchaa ñáyiú quide váha quide ndáá-yu dàtná quidé mée Jesús. 8 Te nchaa ñáyiú ndècu ichi cuèhé ichi duha ndècu ndihí-yu yucu ñávǎha, chí duca<sup>n</sup> quide mee-xi ndéé cùtnáhá vátá ngǎva-gá ñuyíú. Te xiá<sup>n</sup> ní quíxi Jèsús Dèhe Yá Ndiöxí ní dáquéé tǎhú-gǎ nchaa sá quidé yùcu ñávǎha.

9 Te nchaa ñáyiú ní natuha ichi Yá Ndiöxí ní nduú-yu déhe-gá, te ñá túú-gǎ quidé-yu nándi sá cuèhé sá dúhá chí ní ndada ndoo ní ndada nine-gá iní-yu. Núu xiá<sup>n</sup> ñá túú-gǎ quidé-yu nándi sá cuèhé sá dúhá, chí ní ngùndecu ndihí ñaha-gǎ xii-yu. 10 Te cùtnuní iní-ó nándi cùu ñáyiú cùu déhe Yá Ndiöxí, te cùtnuní iní-ó nándi cùu ñáyiú cùu déhe yucu ñávǎha. Te nchaa ñáyiú ñá túú quide ndáá, te cùu úhú iní-yu tnàha ñáyiú-yu, te ñáyiú-á<sup>n</sup> ñà

díú dēhe Yá Ndiǒxí cúŷ-yu.

*Cuu iní tnáhá-ó ññ ññ-o*

<sup>11</sup> Te ndéé òré ní natuha-o ìchi Yá Ndiǒxí ní tecú dóho-o sǎ cúú ìní-ó tnàha ñáyi-u-o. <sup>12</sup> Te vá cùndùu úhú ìní-ó dàtná ní quide ndíi Cǎin, chi ndíi-á<sup>n</sup> ñí xíndecu ndíi ndihí yucu ñǎvǎha núu xiǎ<sup>n</sup> ní sahni ndíi ñaní ndíi. Te duca<sup>n</sup> ñí quide ndíi chi ní xíndecu ndíi ìchi cuèhé ìchi duha, te ñaní ndíi ní xíndecu-dé ìchi váha.

<sup>13</sup> Te nchòhó ñáyi-u ndècu ndihí-í ìchi Xítóhó Jesucristú, vá cáda cuèndá-ndó sǎ cúú úhú ìní ñáhá nchàa ñáyi-u ndècu ìchi cuehé ìchi duha xii-ndo. <sup>14</sup> Te cunaha-ndo na càchí tnúhu-í xii-ndo sǎ núu na cùu ìní-ó tnàha ñáyi-u-o, te cùtnuní ìní-ó sǎ sà ní dáñá-ó ìchi sǎ tá dàcuíta nihnu ñaha xii-o cuáhá<sup>n</sup> ní cùu, te vitna ní tní-o ìchi váha. Te nchaa ñáyi-u ñá túú cùu ìní tnàha ñáyi-u-xi ñúhu-ní-yu ìchi cuáhá<sup>n</sup>-yu núú úhú núú ndàhú. <sup>15</sup> Te nchaa ñáyi-u ñá cúú quíni ndéé tnàha ñáyi-u-xi cùu-yu dàtná ññ ñáyi-u sàhni ndíyí. Te nchòhó sa nàha-ndo sǎ ñí ññ ñáyi-u sàhni ndíyí ñá túú ndècu ndihí-yu tnúhu ndee ìní sǎ nánihí tàhú-yu. <sup>16</sup> Te Xítóhó Jesucristú ní xihí-gá cuèndá nchaa yíca cuèchi-o, núu xiǎ<sup>n</sup> cútnuní ìní-ó sǎ ìo cùu ìní ñáhá-gǎ xii-o. Te xiǎ<sup>n</sup> cútnuní ìní-ó nàcuáa cada-o cùu ìní-ó tnàha ñáyi-u-o, te cuèi na cùú-ó cuèndá sǎ cúú-xí ññ-yu, cuèndá-nǎ sǎ ná dàcácu nihnu-ǒ-yu núú tnúndòho ndecú-yu. <sup>17</sup> Te núu ndècu ndihí-o sǎ cóhó sǎ cáxí-ó ndihí nchaa sǎ nándihí-o, te ndècu ñáyi-u ndàhú ñá túú vèdana ná ndécú ndihí, te ñá túú chindee-ó-yu, te ñá túú cùu ìní-ó Yá Ndiǒxí te núu duca<sup>n</sup> na càda-o. <sup>18</sup> Te nchòhó ñáyi-u cùu datná déhe-í vá cuèndá-ni cùnàha cáhá<sup>n</sup>-ndó sǎ cúú ìní tnáhá-ndó, chi cuu ìní tnáhá ndísa-ndo te coto tnàha-ndo.

*Vá yùhú-ó núú Yá Ndiǒxí*

<sup>19</sup> Te núu duca<sup>n</sup> na càda-o, te cutnùní ìní-ó sǎ ndécú-ó ìchi ndáa ìchi Yá Ndiǒxí, te ñá túú-gǎ ná quihí ìní-ó núú-gǎ. <sup>20</sup> Te núu ndihú ìní-ó cuèndá ññ sǎ ñí quide-o, te sa nàha Yá

Ndiǒxí te núu ní quide váha-o àdi ní quide cuèhé-ó, chi sa nàha ndáa-gá nàcuáa càa ìní-ó. <sup>21</sup> Te nchòhó ñáyi-u ío cùu ìní-í, na càchí tnúhu-í xii-ndo, te núu ñá túú ná sání ìní-ó te ñá túú ná quidé-ó, te vá yùhú-ó núú Yá Ndiǒxí. <sup>22</sup> Te nchaa sǎ váha na càcá<sup>n</sup>-ó núú Yá Ndiǒxí, te mee-gǎ taxi-gǎ chi tní-o tnúhu càhá<sup>n</sup>-gǎ, te quide-o nchaa nàcuáa cùu ìní-gǎ. <sup>23</sup> Te ní cachí Yá Ndiǒxí sǎ quíndáa ìní-ó Dēhe-gǎ Xítóhó Jesucristú, te cuu ìní-ó tnàha ñáyi-u-o dàtná ní cachí-gǎ. <sup>24</sup> Te nchaa ñáyi-u tní tnúhu-gǎ ndécú-yu ìchi-gǎ, te ndècu ndihí ñaha-gǎ xii-yu. Te cùtnuní ìní-ó sǎ ndécú-ó ndihí-gǎ chi ní taxi-gǎ Espiritú-gǎ ndécú ndihí-o.

## 4

*Ñáyi-u ndècu ndihí Espiritú Yá Ndiǒxí ndihí ñáyi-u cùu úhú ìní ñáhá xii Xítóhó Jesucristú*

<sup>1</sup> Te nchòhó ñáyi-u ío cùu ìní-í, vá cùtexínu quíndáa ìní-ndó tnúhu càhá<sup>n</sup> nchaa ñáyi-u càchí sǎ ndécú ndihí Espiritú Yá Ndiǒxí. Chi díhna-gǎ cada cuèndá váha-ndo te núu càhá<sup>n</sup> ndáa-yu nàcuáa càhá<sup>n</sup> tnúhu Yá Ndiǒxí, chi ío vǎi ñáyi-u ñuyú-a cachí-yu sǎ càhá<sup>n</sup>-yu tnúhu-gǎ dico ñá ndáa. <sup>2</sup> Te duha cutnùní ìní-ó nǎndí cùu ñáyi-u ndècu ndihí Espiritú Yá Ndiǒxí. Nchaa ñáyi-u càhá<sup>n</sup> ndáa sǎ Xítóhó Jesucristú ní quixi-gǎ ñuyú-a te ní cuu-gǎ ññ yiqui cùñú, ñáyi-u-á<sup>n</sup> cúú-yu ñáyi-u cùu cuèndá Yá Ndiǒxí. <sup>3</sup> Te nchaa ñáyi-u ñá túú càhá<sup>n</sup> nàcuáa càa Jesús cútnáhá ní quixi-gǎ ñuyú-a ñáyi-u-á<sup>n</sup> dándàhú ñáhǎ-yu, chi ñá túú cùu-yu ñáyi-u cùu cuèndá Yá Ndiǒxí. Te díu-ní-yu cùu úhú ìní-yu Jèsús. Te nchòhó sa nàha-ndo sǎ cùndècu ñáyi-u cuu úhú ìní ñáhá xii-gǎ, dico yúhú càchí tnúhu-í xii-ndo sǎ sǎ ndecú-yu.

<sup>4</sup> Te nchòhó ñáyi-u cùu datná déhe-í, ndècu ndihí-ndo Yá Ndiǒxí, te ñá dáñá-ndó dándàhú ñáhá nchàa ñáyi-u càchí sǎ càhá<sup>n</sup> tnúhu-gǎ te ñá ndáa. Te ñá túú sándáa ìní-ndó chi Yá Ndiǒxí Yaá ndécú ndihí-ndo taxi tnuní víhí-gǎ dàcúxí yucu ñávàha

ndècu ndìhi nchaa ñáyiu ñùhu ichi cuehé ichi duha. <sup>5</sup> Te nchaa ñáyiu dándahú ñáhá sã càhá<sup>n</sup> tnúhu Yá Ndiöxí ndécü-yu ichi cuèhé ichi duha, te mee-ni cuendá nchaa sá ìó ñuyíú-a càhá<sup>n</sup>-yu. Te tédóho ñaha nchàa dava-gá ñáyiu ndècu ñu-ni ichi cuehé ichi duha. <sup>6</sup> Te nchoo cùu-o ñáyiu cùu cuendá Yá Ndiöxí. Te nchaa ñáyiu xíndecu ichi-gá tní-yu tnúhu càhá<sup>n</sup>-ó, te nchaa ñáyiu ñá túú ndècu ichi-gá ñá túú tní-yu tnúhu càhá<sup>n</sup>-ó. Te duha te cùtnuní iní-ó nãndi cùu ñáyiu càhá<sup>n</sup> ndáá, te cùtnuní tucu iní-ó nãndi cùu ñáyiu dándahú ñáhá.

*Cuu iní-ó tnàha ñáyiu-o dàtná cúu ìní ñáhá mèe Yá Ndiöxí xii-o*

<sup>7</sup> Te nchòhó ñáyiu ío cùu iní-í, xìni ñuhu-xi cuu iní tnáhá-ó dàtná cúu ìní ñáhá mèe Yá Ndiöxí xii-o, chi mee-gã táxi-gã sá xìní tnùnì-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùu-yu déhe Yá Ndiöxí, te cùtnuní ndáá iní-yu sá ndécü ndìhi ñaha-gá xií-yu. <sup>8</sup> Te nchaa ñáyiu ñá túú cùu iní tnàha ñáyiu-xi ñá túú ndècu ndìhi-yu Yá Ndiöxí. Te nchaa ñáyiu ndècu ndìhi Yá Ndiöxí, ñáyiu-á<sup>n</sup> sãñaha-gã sá xìní tnùnì-yu cuendá cuu iní-yu tnàha ñáyiu-yu. <sup>9</sup> Te cùtnuní iní-ó sã cúu ìní ñáhá Yá Ndiöxí xii-o nchàa-o, chi ní tendaha-gã ñndì díí-ni Déhe-gá Xítohó Jesucristú ní quixi-gá ñuyíú-a cuendá sá díú-gã cada te naníhí tàhú-ó, te núu na quíndáá iní-ó tnùhu-gá. <sup>10</sup> Te ío cùu iní ñáhá Yá Ndiöxí xii-o nchàa-o. Te ñá díú sã méé-ó cùu iní-ó-gã, chi díhna-gá méé-gã sa cùu iní ñáhá tnàhí-gá xii-o, núu xíá<sup>n</sup> ní tendaha-gã Déhe-gá ní quixi-gá ñuyíú-a ní xíhí-gá sá cuendá nchaa yíca cuèchi-o.

<sup>11</sup> Te nchòhó ñáyiu ío cùu iní-í, xìni ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o.

<sup>12</sup> Te ní ñndì nchoo ñáyiu ndècu ñuyíú-a ñá túú xìní-ó nàcuáa càa Yá Ndiöxí, dico nchoo ñáyiu ní tuha ichi-gá chi cùtnuní iní-ó sã ndécü ndìhi ñaha-gá xii-o. Núu xíá<sup>n</sup> cúu ìní tnáhá-ó ñndì ñndì-o, te cùtnuní iní-ó sã cúu ìní ndisa-o-gã.

<sup>13</sup> Te cùtnuní iní-ó sã ndécü-ó ìchi-gá, te ndècu ndìhi ñaha-gá xii-o, chi ní taxi-gá Espiritú-gá ndécü ndìhi-o.

<sup>14</sup> Te yúhú ndìhi dava-gá cue téé ní xica cuu ndìhi-gá càhá<sup>n</sup>-ndí sá ní xiní-ndí Jèsús Déhe Yá Ndiöxí ní quixi-gá ñuyíú-a, chi Tãtá-ó Dütú Ndiöxí ní tendaha ñàha xii-gá ní quixi-gá cuendá dàcácu nihnu-gá nchaa nchoo ñáyiu ndècu ñuyíú-a núú ùhú núú ndàhú. <sup>15</sup> Te nchaa ñáyiu càhá<sup>n</sup> ní yùhu ní iní-xi sá Déhe Yá Ndiöxí cúu Jèsús, ñáyiu-á<sup>n</sup> ndécü-yu ichi-gá te ndècu ndìhi ñaha-gá xií-yu.

<sup>16</sup> Te sàndáá iní-ó ní yuhu ní iní-ó sã Yá Ndiöxí cúu ìní ñáhá-gã xii-o, chi duca<sup>n</sup> ìní-gá. Te nchaa ñáyiu cùu iní ñáhá xìi Yá Ndiöxí ndécü ndìhi ñaha-gá xií-yu. <sup>17</sup> Te núu ndisa cùu iní-ó Yá Ndiöxí te vá yùhú-ó òré ná sàá nduu tàudí<sup>n</sup> ñaha-gá xii-o tnúú nchaa ñáyiu ndècu ichi cuehé ichi duha, chi quíde ndáá-ó ndècu-o núú-gã ñuyíú-a dàtná ní quíde mee Jèsús.

<sup>18</sup> Chi nchaa ñáyiu cùu iní ñáhá xìi Yá Ndiöxí ñá túú-gã yùhú-yu, te núu cùu iní ndisá-yu-gá. Te núu yùhú-yu te xíá<sup>n</sup> sa ndòhó-yu, chi ñùhú-yu ichi cuáhá<sup>n</sup>-yu núú ùhú núú ndàhú, chi nchaa ñáyiu yùhú ñá túú cùu iní ndisá-yu Yá Ndiöxí.

<sup>19</sup> Te cuu iní-ó Yá Ndiöxí, chi mee-gã ndéé cùtnàhá vátá quíndáá-gã iní-ó tnùhu-gá sa cùu iní ñáhá-gã xii-o.

<sup>20</sup> Te nchaa ñáyiu càchí sá cúu ìní-yu Yá Ndiöxí, te cùu ùhú iní-yu tnàha ñáyiu-yu, ñáyiu-á<sup>n</sup> dácuàndehndé-yu. Te núu ñá túú cùu iní-yu tnàha ñáyiu-yu ndècu ñuyíú-a ña, te uu<sup>n</sup>-gã quíde-yu Yá Ndiöxí Yaá ñá túú xìní núú-yu. <sup>21</sup> Te càchí-gá núú tnùhu-gá sá ñáyiu na cùu iní ñáhá xìi Yá Ndiöxí, te duca<sup>n</sup>-ni cùu iní-yu tnàha ñáyiu-yu.

## 5

*Nchaa ñáyiu ní ndacu ní dáñá ichi cuehé ichi duha*

<sup>1</sup> Te nchaa ñáyiu sàndáá iní sá Jèsús cúu-gã Cristú Yaá ní quixi ñuyíú-a, ñáyiu-á<sup>n</sup> cúu-yu déhe Yá Ndiöxí. Te cùu iní-yu Tãtá-ó Dütú Ndiöxí, te cùu

iní-yu Déhe-gá. <sup>2</sup> Te núu cùu iní-ó Yá Ndiöxí te quide-o nacuaa cãhá<sup>n</sup>-gá, te cùtnuní iní-ó sã cúu iní tnáhã ndisa-o nacuaa ndècu-o ichi-gá. <sup>3</sup> Te núu cùu iní-ó Yá Ndiöxí te tñi-o tnúhu cãhá<sup>n</sup>-gá, chi cùtnuní iní-ó sã ñã díú ñ<sup>n</sup> sã ùhú cúu-xí dàtnã cãchí ñáyiu. <sup>4</sup> Te nchaa nchoo ñáyiu cùu déhe-gá sa ní dáñá-ó ichi cuehé ichi duha, chi ní sãndáá iní-ó Jèsús núu xiã<sup>n</sup> ní ndacu-o ñí dáñá-ó ichi-á<sup>n</sup>. <sup>5</sup> Te nchaa ñáyiu sãndáá iní sã Déhe Yá Ndiöxí cúu Jèsús ní ndacú-yu ní queé-yu ichi cuehé ichi duha.

### *Nàcuáa ní cãhá<sup>n</sup> Yá Ndiöxí cuendá Jèsús*

<sup>6</sup> Te Xítoho Jesucristú ní quixi-gá ñuyíu-a, te ní sandute-gá. Te ñã díú-ní xiã<sup>n</sup>, chi ní xihí-gá sã cuendá nchaa yíca cuèchi-o. Te Espiritú Yá Ndiöxí cãhá<sup>n</sup>-xi mee-ni sã ndáá, chi cãhá<sup>n</sup> Espiritú-gá-á<sup>n</sup> sã Jèsús cúu-gã Cristú Yaá ní quixi ñuyíu-a. <sup>7</sup> Te úní testiú ndécú àndiu, Tãtã-ó Dütú Ndiöxí, ndihi Déhe-gá Xítoho Jesucristú, ndihi Espiritú-gá. Te ñ<sup>n</sup>-ni tnúhu cãhá<sup>n</sup> ndi nùní testiú-á<sup>n</sup>. <sup>8</sup> Te duca<sup>n</sup> cùu-xi ñuyíu-a tucu, chi cãhá<sup>n</sup> Espiritú Yá Ndiöxí sã Jèsús cúu-gã Cristú. Te ní sandute-gá, te ní xihí-gá sã cuendá nchaa yíca cuèchi-o. Te xiã<sup>n</sup> cùtnùní ndáá iní-ó sã díú Jèsús cúu-gã Cristú. <sup>9</sup> Te núu tñi-o tnúhu váha cãhá<sup>n</sup> ñáyiu, te váha-gá tñi-o tnúhu cãhá<sup>n</sup> Yá Ndiöxí, chi cãhá<sup>n</sup> ndáá-gá sã Déhe-gá cúu Jèsús. <sup>10</sup> Te nchaa ñáyiu sãndáá iní sã Jèsús cúu-gã Déhe Yá Ndiöxí, ñáyiu-á<sup>n</sup> cùtnùní iní-yu sã cúu-xí ñ<sup>n</sup> sã ndáá. Te nchaa ñáyiu ñã túú sãndáá iní tnúhu cãhá<sup>n</sup> Yá Ndiöxí quidé-yu-gá ñ<sup>n</sup> ñándéhdé, dico ñã túú ndèhnde-gá, chi mèé-yu ñã túú sãndáá iní-yu sã Déhe-gá cúu Jèsús dàtnã cãchí mèé-gã. <sup>11</sup> Te Yá Ndiöxí cãchí tnúhu ndáá-gá sã cùndècu-o ndihi-gá ñi caa ñi quíhí<sup>n</sup>. Te duha cãhá<sup>n</sup>-gá chi sãndáá iní-ó Déhe-gá. <sup>12</sup> Te nchaa ñáyiu na quíndáá iní ñáhã xì Déhe-gá cundecú-yu ndihi-gá ñi caa ñi quíhí<sup>n</sup>. Te nchaa ñáyiu ñã túú sãndáá iní ñáhã xì Déhe-gá vá cùndècú-yu ndihi-gá.

### *Sáhu ndèé núu ñi ndihi-ná*

<sup>13</sup> Te cuendá sã sãndáá iní-ndó Déhe Yá Ndiöxí núu xiã<sup>n</sup> chídó tñuní-í tnúhu-a cuendá cutnùní iní-ndó sã cùndècu ndihi-o-gá ñi caa ñi quíhí<sup>n</sup>.

<sup>14</sup> Te ñã túú tnúhu yùhú cãhá<sup>n</sup> ndihi-o Yá Ndiöxí, chi tedóho ñaha-gã xii-o núu ñ<sup>n</sup>-ná sã ná cãcã<sup>n</sup>-ó núu-gã dàtnã cùní mèé-gã. <sup>15</sup> Te cùtnuní iní-ó sã táxi-gã sã xicã<sup>n</sup>-ó núu-gã, chi ñaha-o sã tedóho ñaha-gã xii-o núu na cãcã<sup>n</sup>-ó nãcuáa cùu iní-gá.

<sup>16</sup> Te núu xìní-ó ñáyiu ndècu ichi Yá Ndiöxí te quidé-yu sã ñã túú váha núu-gã, te ndèhe-o sã ñã túú ní xíta nihnu duú<sup>n</sup>-yu, te cãhá<sup>n</sup> ndihi-o Yá Ndiöxí cuendá-yu, te dàcácu nihnu ñaha-gã xii-yu te núu na núcunu ichi váha-yu. Chi ío ñáyiu xidó quidé nãndi sã ñã túú váha te xíta nihnu duú<sup>n</sup>-yu, te vá cãhá<sup>n</sup> ndihi-gã-ó Yá Ndiöxí cuendá-yu. <sup>17</sup> Te nchaa sã cuehé sã dúhá cùu-xi yíca cuèchi, dico ñã ncháá-xí cùu-xi sã dácuíta nihnu ñaha dùu<sup>n</sup>.

<sup>18</sup> Te ñaha-o sã nchóo ñáyiu cùu déhe Yá Ndiöxí ñã túú-gã sání iní-ó càda-o nãndi sã cuehé sã dúhá. Te duca<sup>n</sup> chi mee Jèsús déhe Yá Ndiöxí xító ñaha-gã xii-o, núu xiã<sup>n</sup> ñã ndacú-gã yucu ñávãha dàxínu iní ñáhã-xí xì-o cada-o sã ñã túú váha.

<sup>19</sup> Te nchoo ñaha-o sã ndécú ndihi-o Yá Ndiöxí. Te nchaa ñáyiu ndècu ichi cuehé ichi duha tàxi tñuní ñáhã-nã yucu ñávãha xii-yu.

<sup>20</sup> Te ñaha tucu-o sã ñuyíu-a ní quixi Jèsús Déhe Yá Ndiöxí ní taxi-gá sã xìní tñuní-ó cuendá cutnùní iní-ó sã mèé-gã cúu-gã Ndiöxí-ó. Te ndècu ndihi-o mee-gã ndihi Déhe-gá Jèsús, te ñ<sup>n</sup>dii díi-ni mee-gã cúu-gã Yá Ndiöxí, te ndècu dava-gã sã nãcuàca ñaha-gã xii-o cùndècu-o ndihi-gá ñi caa ñi quíhí<sup>n</sup>. <sup>21</sup> Te nchóo ñáyiu cùu datná déhe-í, vá quíndáá iní-ndó nchã sã cãchí-yu cùu ndiöxí, chi dícó ndaha cue téé ñuyíu-a ní cuáha nchaa xiã<sup>n</sup>. Te duca<sup>n</sup> na cùnduu. Te ío chí cádá ndèé iní-nã vitna.



## TUTÚ CÚÚ ÒÚ NÍ CADÚHA TÉ JUÁÁ

*Tnúhu Yá Ndiöxí ndihi nàcuáa cuu iní tnáhá-ó*

<sup>1</sup> Te yúhú té Juáá tée yìndaha ñaha xii ñáyiú sàndáá iní tnúhu Jèsús, tée-í tnúhu-a ñ<sup>n</sup> núú tütú daquixi-í ndaha yòhó ñaha ní cáhá<sup>n</sup> ñáhá Yá Ndiöxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiöxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhá-ndí xii-ndo. <sup>2</sup> Te cùu iní ñáhá-ndí xii-ndo chi ndècu ndihi-ndo tnúhu ndáá tnúhu Yá Ndiöxí, te duca<sup>n</sup>-ni cùndecu-o ndihi tnúhu-á<sup>n</sup> ni caa ni quíhí<sup>n</sup>. <sup>3</sup> Te xicá<sup>n</sup> táhù-í núú Tátá-ó Dütú Ndiöxí, ndihi núú Dèhe-gá Xítóhó Jesucristú sá ná chindèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xicá<sup>n</sup> táhù-í núú-gá chi ndècu ndihi-o tnúhu ndáá tnúhu Yá Ndiöxí, te cùu iní-ó-gá.

<sup>4</sup> Te ío cùdíí iní-í, chi ní naníhì-í ñ<sup>n</sup> úú déhe-n, te quidé-yu nàcuáa sànu ichi ñaha tnúhu ndáá dàtná ní táúchíú<sup>n</sup> mèe Tátá-ó Dütú Ndiöxí. <sup>5</sup> Te vitna yòhó ñaha ní cáhá<sup>n</sup> ñáhá Yá Ndiöxí, cächí tnúhu-í xii-n sã xíní ñùhu-xi cuu iní-ó tnàha ñáyiú-o. Te ñá díú ñ<sup>n</sup> tnúhu saa cùu-xi, chi díu-ni tnúhu sá ní ngùndecu ndihi-o ndéé cùtnáhá ní tuha-o ichi Yá Ndiöxí. <sup>6</sup> Te núu cùu iní-ó Yá Ndiöxí, te cùu iní-ó tnàha ñáyiú-o dàtná ní cachí méé-gá, te tñi-o nchaa tnúhu càhá<sup>n</sup>-gá. Te ní cachí-gá sá cúú iní-ó-gá, te cuu iní-ó tnàha ñáyiú-o. Te tnúhu-a ní tecú dóho-o ndéé cùtnáhá ní tuha-o ichi-gá.

*Cue tée dàndahú tnàha ñáyiú-xi*

<sup>7</sup> Te ío vai ñáyiú dàndahú ñáhá xica cuú-yu ñuyíú-a, te cächí-yu sá ñã ndáá sá Xítóhó Jesucristú ní cuu-gá ñ<sup>n</sup> ñáyiú ndisa. Te nchaa ñáyiú duha càhá<sup>n</sup> dácùandehndé-yu, te cùu úhú iní-yu Jèsús. <sup>8</sup> Te quíhi iní-ndó sã vã dándahú

ñáhá ñáyiú-á<sup>n</sup> xii-ndo cuèndá sá vã cuíta chiú<sup>n</sup> Yá Ndiöxí ní quide-o. Te òré ná quíxí tùcu Jèsús ñuyíú-a te taxi-gá nchaa sá vãha cùu iní méé-gá cundecu ndihi-o.

<sup>9</sup> Te nchaa ñáyiú dàña tnúhu Xítóhó Jesucristú, te nàtní-yu ingá ichi, ñáyiú-á<sup>n</sup> ñà túú ndècu ndihí-yu Yá Ndiöxí. Te nchaa ñáyiú ñá túú dàña tnúhu Xítóhó Jesucristú ndècu ndihí-yu Yá Ndiöxí ndihi Déhe-gá Xítóhó Jesucristú. <sup>10</sup> Te núu véxi ñáyiú núú ndécú-ndó cächí-yu sá càhá<sup>n</sup>-yu tnúhu Yá Ndiöxí te ñá ndáá, te vá cuãha-ndo tnúhu danèhé ñáhã-yu xii-ndo, te ni vã cuãha-ndõ-yu tnúhu ndee iní cuèndá chiú<sup>n</sup> quidé-yu. <sup>11</sup> Chi núu na càhá<sup>n</sup> ndihi váha-ndõ-yu, te dàtná tnúhu sá chindèe-ndó-yu quidé-yu nchaa sá cuèhé sá dúhá.

*Tnúhu ndéé núú ñí ndihi-ná*

<sup>12</sup> Te ío vai-gá tnúhu cuíni-í cachí tnúhu-í xii-ndo, dico vá tée-gá-í chi cuíni-í quixi-í núú ndécú-ndó ndàtnúhu-o cuèndá cudíí víhí iní-ó nchãa-o.

<sup>13</sup> Te nchaa cue déhe cùhú-n, ñáyiú ní cáhá<sup>n</sup> ñáhá Yá Ndiöxí quidé ndèe iní ñáhã-yu xii-n.

## TUTÚ CÚÚ ÒNÍ NÍ CADÚHA TÉ JUÁÁ

### *Càhá<sup>n</sup> váha-yu cuèndá té Gǎyú*

1 Te yúhú té Juáá té yìndaha ñaha xii ñáyiú sàndáá iní tnúhu Jèsús, chido tnuní-í tnúhu-a ñ<sup>n</sup> núú tùtú sá cúú-xí yòhó té Gǎyú téé ío cùu iní-í, chi ndècu ndihí-n tnúhu ndáá tnúhu Yá Ndiòxí.

2 Te yòhó téé ío cùu iní-í, xìcá<sup>n</sup> táhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhú-n, chi sa nàha-í sá ndécú vǎha-n núú Yá Ndiòxí. 3 Te ío ní cudǎí iní-í òré ní sáá ñáyiú ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá ðiu-ni tnúhu-gá te tní-n nchaa nacúáa càhá<sup>n</sup> tnúhu-án. 4 Te ío cudǎí iní-í ní níhí-í tnúhu sá ncháá-ní ñáyiú ní sanu ichi-í ichi Yá Ndiòxí ndécú-ní-yu ichi-gá, te quide-ní-yu nchaa nacúáa càhá<sup>n</sup>-gá.

5 Te yòhó téé ío cùu iní-í, ío váha quide-n núú Yá Ndiòxí, chi chindee-n nchaa ñáyiú véxi dava-gá ñuú xìcá, ñáyiú sàndáá iní tnúhu Yá Ndiòxí. 6 Te nchaa ñáyiú-án càhá<sup>n</sup>-yu núú tàcá ñáyiú càhá<sup>n</sup> ndihí Yá Ndiòxí iha sá ío cùu iní-n nchaa tnaha ñáyiú-n dàtná càhá<sup>n</sup> Yá Ndiòxí. Te yúhú càhá<sup>n</sup> ndàhú-í núú-n sǎ cáda ndèe-ni iní-n chindee-n nchaa ñáyiú-án nchaa sá xíní ñùhú-yu ichi. Te núu duca<sup>n</sup> na càda-n te quide-n nacúáa cùu iní Yá Ndiòxí, te xínu cuechi-n tnahá-n núú-gǎ. 7 Chi nchaa ñáyiú-án ní tní-yu ichi cuáhá<sup>n</sup>-yu càhá<sup>n</sup>-yu tnúhu Jèsús. Te ñá túú tní-yu ni ñ<sup>n</sup> sá sǎñaha ñáyiú ñá túú ndècu ichi Yá Ndiòxí. 8 Te núu xǎá<sup>n</sup> nchoo xìni ñuhu-xi chindee-o nchaa ñáyiú xínu cuechi núú-gǎ ñáyiú càhá<sup>n</sup> tnúhu-gá, te duca<sup>n</sup> te cutnùní iní-ó sǎ tnàhá-ó xínu cuechi-o ndihí-yu núú-gǎ.

### *Ñá túú quide váha té Diótrefés*

9 Te yúhú ní tendaha-í tutú cuáhá<sup>n</sup> núú tàcá ñáyiú chìñuhú-yu Yá Ndiòxí, dico ñ<sup>n</sup> téé ndècu-án nání-dě Diótrefés, te ñá sàndáá iní-dé nchaa tnúhu

càhá<sup>n</sup>-í, chi cuíní-dé cunuu-dě núú-yu.

10 Te òré quixi-í te cada ndáá-ó nchaa tnúhu cuèhé tnúhu duha càhá<sup>n</sup>-dé cuèndá-í. Te ñá díú-ní xǎá<sup>n</sup> quidé-dě, chi nchaa ñáyiú véxi ingá ñuú càhá<sup>n</sup> tnúhu Yá Ndiòxí ñá túú càhá<sup>n</sup> ñáhá-dě vehe-dé, te ní ñá dáñá-dé càhá<sup>n</sup> ndihí ñaha dàva-gá ñáyiú xii-yu. Te nchaa ñáyiú cuíní càhá<sup>n</sup> ndihí ñaha xii-yu, te quèñuhu ñaha duu<sup>n</sup>-ni-dé ñá dáñá-gǎ-dé níhí tnáhá-yu ndihí nchaa ñáyiú tàcá dácúaha tnúhu Yá Ndiòxí.

11 Te yòhó téé ío cùu iní-í, vá cùndècu-n ichi cuehé ichi duha dàtná quidé nchaa dava-gá ñáyiú, cada-n mèe-ni sá vǎha. Chi nchaa ñáyiú quide váha ndécú-yu ichi Yá Ndiòxí. Te nchaa ñáyiú quide nchaa sá cuèhé sá dúhá ñà túú ndécú-yu ichi Yá Ndiòxí.

### *Nchaa ñáyiú càhá<sup>n</sup> váha-yu cuèndá té Demètriú*

12 Te nchaa ñáyiú càhá<sup>n</sup> váha-yu cuèndá té Demètriú, chi quide ndáá-dé dàtná càhá<sup>n</sup> Yá Ndiòxí. Te tnàhá yúhú càhá<sup>n</sup>-í cuèndá-dé sá ío váha quide-dé, te nchòhó sa nàha-ndo sá yùhú càhá<sup>n</sup> ndáá-í.

### *Tnúhu ndée núú ní ndihí-ná*

13 Te vǎi-gá tnúhu cuíní-í cachí tnúhu-í xii-n ni cùu, dico ñá ní tèe-gá-í, 14 chi cuíní-í quixi ndihí-í, te càhá<sup>n</sup>-ó núú núú-ó.

15 Te ío cada ndee iní, te xìcá<sup>n</sup> táhù-í núú Yá Ndiòxí sá ná cùndècu váha-n ñà túú nǎ cuu cundècu-n. Te nchaa cue ñáyiú xíní tnáhá ndihí-o ndècu iha quide ndee iní ñáhá-yu xii-n. Te yòhó cúñaha-n nchaa ñáyiú xíní tnáhá ndihí-í ndécú xǎá<sup>n</sup> ná càda ndee iní-yu. Te ío cada ndee iní-nǎ vitna.

## TUTÚ NÍ CADÚHA TÉ JUDÁS

*Té Jùdás cádüha-dé tutú quíhí<sup>n</sup>  
ndaha ñáyiú ní cachí Yá Ndiöxí nduu  
cuèndá-gá*

<sup>1</sup> Yúhú té Jùdás ñaní té Jàcobó xínú cuèchi-í núú Xítohó Jesucristú, te cadúha-í tutú-a sá cúú-xí nchòhó ñáyiú ní cachí Yá Ndiöxí Yaá cúú Tátá-ó nduu cuendá-gá, ñáyiú ío cùu iní-gá. Te dàtná-ni xìto ñaha-gá xii-ndo vitna ñu-ni duca<sup>n</sup> còto ñaha-gá xii-ndo ndéé ná sàá nduu quèxi tucu Xítohó Jesucristú ñuyíú-a. <sup>2</sup> Te xìcá<sup>n</sup> táhù-í núú Yá Ndiöxí sá ïo-gá ná chindee chitúu ñaha-gá xii-ndo, te na cùtnuní-gá iní-ndó sá ïo cùu iní ñáhá-gá xii-ndo, te duca<sup>n</sup> ïo váha cuu iní-ndó cùndecu-ndo.

*Ñáyiú ñá túú càhá<sup>n</sup> tnúhu ndáá  
tnúhu Yá Ndiöxí  
(2 Pedro 2:1-17)*

<sup>3</sup> Te nchòhó ñáyiú ío cùu iní-í, duca<sup>n</sup>-ni ïo sàni iní-í cadúha-í ñ<sup>n</sup> tutú sá cúú-xí-ndó cuèndá danèhé ñáhà-í xii-ndo nàcuáa ní cuu ní naníhí táhù-ó dico ñá túú cadúha-í, dico vitna quide cuendá-í sá xíní ñuhu-gá-xi càhá<sup>n</sup>-í núú tütú-í sá nchòhó ío cundehe-ndo tnúhu càhá<sup>n</sup>-ndó ndíhi ñáyiú, te càhá<sup>n</sup>-ndó nàcuáa nduu tnúhu sàndáá iní mée-ndó, chi ñu-ni tnúhu-á<sup>n</sup> ní càhá<sup>n</sup> Yá Ndiöxí sá cúú-xí nchàa ñáyiú ndècu ichi-gá. Te vitna ñá túú-gá ná tnúhu càhá<sup>n</sup>-gá sá cúú-xí-yu, chi sa ní càhá<sup>n</sup> duu<sup>n</sup>-gá. <sup>4</sup> Te duha càhá<sup>n</sup>-í núú tütú-a sá cúú-xí-ndó, chi nihí-í tnúhu sá xìcá cùu ñáyiú chìtnahá ñáhá xii-ndo, te ni ñà túú xíní-ndó ñá ñáyiú cùú-yu, te ñáyiú-á<sup>n</sup> cùú-yu ñáyiú cùu úhú iní ñáhá xii Yá Ndiöxí. Te ñ<sup>n</sup> xichi núú tütú Yá Ndiöxí càchí-xi sá ñáyiú-á<sup>n</sup> quíhí<sup>n</sup>-yu núú ùhú núú ndàhú, te ñu-ni ñáyiú-á<sup>n</sup> càchí-yu sá ïo váha iní Yá Ndiöxí ñuu xíá<sup>n</sup> cuu-ni cadá-yu nchaa sá cuèhé sá dúhá. Te dàquee tíhù-yu Yá Ndiöxí Yaá ío cùnuu, ndíhi Xítohó Jesucristú.

<sup>5</sup> Te nchòhó sa xíní váha-ndo nàcuáa ní quide Yá Ndiöxí ndéé sanaha dico dándacu iní ñáhà-í xii-ndo, chi dàvá-á<sup>n</sup> ñí queñuhu-gá ñáyiú isràél nàció<sup>n</sup> Ègiptú, te dava ñáyiú-á<sup>n</sup> ñà túú ní sàndáá iní ñáhà-yu xii-gá te ní dánáá ñàha-gá xií-yu. <sup>6</sup> Te nchaa espíritú ñá túú ní cuíní cada ndáá cunu cuechi núú Yá Ndiöxí ní quee-xi núú ndécú-xí, te mee-gá ní sadí nihnu ñaha-gá xii-xi ñ<sup>n</sup> xichi núú néé te vá càcu-xi, chi sáá nduu te nayáha-xi cundecu-xi núú ùhú núú ndàhú ñi caa ñi quíhí<sup>n</sup>. <sup>7</sup> Te dándacu iní ñáhá tucu-í xii-ndo nàcuáa ní yáha ñáyiú ñuu Sòdomá, ndíhi ñáyiú ñuu Gòmorrá, ndíhi nchaa ñáyiú ñuu ní cáa yatni xíá<sup>n</sup>, chi tnàhá-yu ñá túú ní quide váha-yu dàtná ní quide nchaa cue espíritú-á<sup>n</sup>. Chi cue téé ní xóo càhá<sup>n</sup> ndíhi tnàha ndi mee-güedé, te ñu-ni duca<sup>n</sup> ñí xóo cada cue ñáyiú ñíhi tucu. Te sá dúcá<sup>n</sup> ñí quidé-yu núú ní dányóyó Yá Ndiöxí ñuhú ñuu-yu ní dánáá ñàha-gá xií-yu. Te xíá<sup>n</sup> cùtnuní iní-ó sá nchàa ñáyiú ñá túú cuíní cada váha núú-gá quíhí<sup>n</sup>-yu núú ùhú núú ndàhú ñi caa ñi quíhí<sup>n</sup>.

<sup>8</sup> Te ñu-ni duca<sup>n</sup> quide ñáyiú chìtnahá ñáhá xii-ndo cuíní-yu dandàhú ñáhà-yu, chi càchí-yu sá dàcòto ñaha saní-yu nàcuáa cadá-yu, núú xíá<sup>n</sup> nándi nchaa sá cuèhé sá dúhá quidé-yu sá cúú-xí yiqui cuñú-yu, te dàquee tíhù-yu nchaa nàcuáa càhá<sup>n</sup> Yá Ndiöxí cada-o, te càhá<sup>n</sup> úhú-yu cuèndá nchaa espíritú cùnùu. <sup>9</sup> Te mee espíritú cùnùu-gá xínú cuèchi núú Yá Ndiöxí nání Mìguél ní nàá-xi ndíhi sácúhná cuèndá yiqui cuñú ndíhi Moisés. Te espíritú-á<sup>n</sup> ñà túú ní cùyí-xi càhá<sup>n</sup> úhú-xi sácúhná-á<sup>n</sup>, chi ní xáha<sup>n</sup>-ni-xi: “Mee Yá Ndiöxí ñáhá-gá te núú nása cada ñaha-gá xii-n”, duha ní xáha<sup>n</sup>-xi. <sup>10</sup> Te nchaa ñáyiú duca<sup>n</sup> dandàhú ñáhá xii-ndo-á<sup>n</sup> càhá<sup>n</sup> cuèhé-yu cuèndá nchaa sá vátá cùtnuní-gá iní-yu nása nduu, te quidé-yu dàtná quidé cuè quiti chi cue quiti-á<sup>n</sup> quidé-güèdi nání véxi iní-güèdi, te ni ñà túú cùtnuní iní-güèdi

nchaa sá quidé-güedi. Te duca<sup>n</sup> sá tnahá-xi cùu-yu, chi nchaa sá cuèhé sá dúhá vëxi iní-yu quidé-yu, te sá dúcá<sup>n</sup> quidé-yu xiá<sup>n</sup> tá xíta nihnú-yu cuáhá<sup>n</sup>.

11 Te ndàhú ní cuú-yu chi ío ndohó-yu!, chi quidé-yu dàtná ní quide ndíi Càin. Te nándi sá quidè-yu cuendá sá cuìní-yu díhú<sup>n</sup> dàtná ní xóo cada ndíi Bàlaám. Te ío cùu sáá iní-yu núú Yá Ndiöxí dàtná ní xóo cada ndíi Còré, núu xiá<sup>n</sup> tá xíta nihnú-yu cuáhá<sup>n</sup>.

12 Te dìcò sácá<sup>n</sup>núú sàha ñàhá-yu xii-ndo òré nátàcá-ndó quide-ndo vico chiñuhu-ndo Yá Ndiöxí. Te òré xéxi ndíi ñàhá-yu xii-ndo te mee-ni sá cúu-xí mèe-yu quide cuendá-yu, te ñá túú nèhé-yu sá yíñuhu núú Yá Ndiöxí. Te cùu-yu dàtná ñ<sup>n</sup> vícò sá cuáhá<sup>n</sup>-xi duha cuáhá<sup>n</sup>-xi dàcá<sup>n</sup> te ñá túú dáu nchídó-xí, duca<sup>n</sup> sá tnahá-xi cùu-yu. Te cùu tucú-yu dàtná ñ<sup>n</sup> yutnu vídí sá ñà túú tnahí cùu<sup>n</sup> sávídí-xi, te nchaa yutnu duca<sup>n</sup> ñà túú cùu<sup>n</sup> sávídí-xi te tñuhu-güedé ndéé yóho-xi te xihí duu<sup>n</sup>-xi. Te duca<sup>n</sup> sãtnahá-xi cùu-yu, chi ñá túú quide váha-yu.

13 Te cùu tucú-yu dàtná ndute làmár, chi ndute-á<sup>n</sup> òré càndá-xi te quecòo tíñú-xi ñ<sup>n</sup> xio. Te cùu tucú-yu dàtná ñ<sup>n</sup> chódíní cuáhá<sup>n</sup>-dì duha cuáhá<sup>n</sup>-dì dàcá<sup>n</sup>. Te duca<sup>n</sup> sãtnahá-xi cùu-yu, chi ñá túú cuìní-yu cada váha-yu. Te ñáyíu-á<sup>n</sup> daquìhí<sup>n</sup> ñàhá Yá Ndiöxí xii-yu ñ<sup>n</sup> xichi núú néé núú sá ndecu túha cundecú-yu ni caa ni quíhí<sup>n</sup>.

14 Te ndíquín<sup>n</sup> yává ndíi Àdán téé cùu usá ní xínani Ènóc ní dácáhu iní ñàhá Yá Ndiöxí xii-dé ní cáhá<sup>n</sup>-dé diu-ni cuendá nchaa ñáyíu-á<sup>n</sup>. Te ní cachí-dé: “Na cachí tñuhu-í xii-ndo sá Yá Ndiöxí quixi-gá ndíi cuèhé víhí espíritú xínú cuèchi núú-gã. 15 Te dàvá-á<sup>n</sup> cada ndáá-gá cuèchi nchaa ñáyíu te daquìhí<sup>n</sup>-gá nchaa ñáyíu ndècu ichi cuèhé ichi duha núú ùhú núú ndàhú, te duca<sup>n</sup> càda ñàha-gá xii-yu, chi mee-ni sá cuèhé sá dúhá quidé-yu, te càhá<sup>n</sup> úhú ñàhá-yu xii-gá”, duha ní cachí te Ènóc. 16 Te ñáyíu-á<sup>n</sup> ío yica iní-yu chi ñá túú ndùu vétú iní-yu nacuáa ndècú-yu ñuyíu-a, te

sãtnuhú-yu tñaha ñáyíu-yu te mee-ni sá cuèhé sá dúhá sàni iní-yu quidé-yu, te quide cahnú-yu mèe-yu, te mee-ni càhá<sup>n</sup> váha-yu núú tñaha ñáyíu-yu cuendá cuìní-yu sá cáda váha ñaha ñáyíu-á<sup>n</sup> xii-yu.

*Té Jùdás càhá<sup>n</sup>-dé dóho ñáyíu ndècu ichi Yá Ndiöxí*

17 Te nchòhó ñáyíu ío cùu iní-í, càhá<sup>n</sup> ndàhú-í núú-ndó sá ío cuhu<sup>n</sup> iní-ndó tñuhu sá sá ní dánèhé ñàhá cuè téé ní tendaha Xítóhó Jesucristú càhá<sup>n</sup> tñuhu-gá núú ñáyíu. 18 Te sa naha-ndo sá ní cachí-güedé sá cùmání-gã quixi tucu Xítóhó Jesucristú ñuyíu-a, te coo ñáyíu càhá<sup>n</sup> cuèhé càhá<sup>n</sup> duha cuendá tñuhu-gá. Te ñáyíu-á<sup>n</sup> cadá-yu mee-ni sá cuèhé sá dúhá vëxi iní mèe-yu. 19 Te ñáyíu-á<sup>n</sup> cùu-yu ñáyíu càhá<sup>n</sup> nándi tñuhu sá ñà túú nándíi cuendá sá vã cúu ñ<sup>n</sup>nuu-ndo cundecu-ndo, te mee-ni sá cuèhé sá dúhá ñuhu iní-yu, te ñá túú ndècu ndíhí-yu Espíritú Yá Ndiöxí.

20 Te nchòhó ñáyíu ío cùu iní-í, ío dacuàha-ndo tñuhu Yá Ndiöxí sá ní sãndáa iní-ndó cuendá duca<sup>n</sup> cùu cuèhnu nihnu-ndo ichi-gá quíhí<sup>n</sup>, te cáhá<sup>n</sup> ndíi-ndo Yá Ndiöxí nacuáa dàcahu iní ñàhá Espíritú-gá xii-ndo.

21 Te ío coto-ndo mèe-ndo cundecu-ndo cuendá cuu váha iní ñàhá Yá Ndiöxí xii-ndo, te cundetú-ndo sáa nduu quixi Xítóhó Jesucristú ñuyíu-a nacuaca ñaha-gã xii-ndo cundecu-ndo ndíi-gá ni caa ni quíhí<sup>n</sup>, chi Yaá-á<sup>n</sup> ío cundahú iní ñàhá-gã xii-o.

22 Te ñáyíu sàni ñ<sup>n</sup> sani úú iní-xi cùñaha-ndo xii-yu nacuáa cadá-yu cundecú-yu ichi Yá Ndiöxí. 23 Te nchaa ñáyíu ta xíta nihnu ñuhu ichi cuáhá<sup>n</sup> núú ùhú núú ndàhú, ío cundíhí iní-ndó cùñaha-ndo xii-yu tñuhu Yá Ndiöxí cuendá sá ná cacu nihnú-yu, te cundàhú iní-ndó-yu, te quíhí iní-ndó vã cáda-ndó tnahá-ndó nacuáa quidé-yu, chi daquèe tíhú-ndó nchaa sá cuèhé sá dúhá quidé-yu-á<sup>n</sup>.

*Nacuáa ndacá<sup>n</sup> táhú-ó núú Yá Ndiöxí*

24 Te Yá Ndiöxí chindee ñàha-gá xii-ndo cuendá sá vã cundècu-ndo



ichi cuehé ichi duha, te cunduu ndoo cunduu nine iní-ndó càndeca ñaha-gá xii-ndo quíhí<sup>n</sup> cundecu-ndo nũú ïo váha càa ndecu-gá, te ío cudíí iní-ndó. <sup>25</sup> Te Yá Ndiöxí ío ndècu ndihí-gá nchaa sá xini tnùnì-gá te diu-gá ní dácăcu nihnu ñaha-gă xii-o nũú ùhú núú ndàhú, te duca<sup>n</sup> nĩ quide ñaha-gă xii-o chi ndècu ndihí-o Xítohó Jesucristú. Te ío ndacá<sup>n</sup> táhú-ó nũú Yă Ndiöxí, chi ío càhnu cuu-gá ndécú-gă táxí tnùnì-gá, te súúní vâha iní-gá, te ndàcu-gá quidé-gă nchaa sá vâha, te duca<sup>n</sup>-ni ïo càhnu cuu-gá ndéé cútnàhá vátá ngăva-gá ñuyíú, te duca<sup>n</sup>-ni ïo càhnu cuu-gá ndéé vitna, te diu-ni duca<sup>n</sup> ïo càhnu cuu-gá ni caa ni quíhí<sup>n</sup>, duha xini ñuhu-xi ndacá<sup>n</sup> táhú-ó nũú-gă. Te duca<sup>n</sup> na cunduu. Te ío chí cádá ndèe iní-nă vitna.

## NCHAA SÁ NĪ XINÍ TÉ JUÁÁ NDIHI NCHAA SÁ NĪ TECÚ DÓHO-DÉ

*Xítoho Jesucristú xáha<sup>n</sup>-gã xii té Juáá nchaa nàcuáa cada-xi ñuyú*

<sup>1</sup> Te Yá Ndiöxí ní xáha<sup>n</sup>-gã xii Xítoho Jesucristú nchaa sá tá cüyatni vií-nã cada-xi ñuyú-a cuendá sá cũñaha-gã xii cue tée xínu cuechi núú-gã, te Xítoho Jesucristú ní tendaha-gã ñ<sup>n</sup> espíritú xínu cuèchi núú-gã ní quixi-xi ní cachí tnúhu-xi nchaa tnúhu-án xii yúhú té Juáá tée xínu cuechi núú-gã, te nchaa tnúhu-án ndéé núú tütú-a. <sup>2</sup> Te yúhú cächí tnúhu ndáá-í xii-ndo nàcuáa ní cáhá<sup>n</sup> Yá Ndiöxí, te cáhá<sup>n</sup> ndáá tucu-í cuendá Xítoho Jesucristú, ndihi cuendá nchaa sá nĪ xini-í.

<sup>3</sup> Te váha táhú ñáyiú dàcuaha nchaa tnúhu ndéé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tnĪ nacuáa cáhá<sup>n</sup>-xi, chi sa ta cüyatni vií-nã nduu càda-xi nchaa nacuáa cáhá<sup>n</sup>-xi.

*Té Juáá cádüha-dé tutú quíhí<sup>n</sup> ndaha ndi usá xichi cue ñáyiú ndècu ichi Yá Ndiöxí*

<sup>4</sup> Te yúhú té Juáá cádüha-í tutú daquixi-í ndi usá xichi núú ndécú nchòhó ñáyiú ndècu ichi Yá Ndiöxí ndécú dīstrítú Àsiá. Te mee-gã ná chindee chitúu ñaha-gã xii-ndo, te ío váha cuu iní-ndó cūndecu-ndo. Te cuèi ndéé sanaha ñi-ni-gá ndécú, te ñi-ni-gá ndécú cuèi vitna, te duca<sup>n</sup>-ni cūndecu-gá cuèi ndéé núú cuahá<sup>n</sup> núú vĕxi, te ñi-ni duca<sup>n</sup> ío na chindee chitúu ñaha ndi usá cue espíritú ndécú núú-gã xii-ndo, te ío váha cuu iní-ndó cūndecu-ndo. <sup>5</sup> Te ñi-ni duca<sup>n</sup> na càda tucu Xítoho Jesucristú, te ñi-ni-gá cúú-gã Yaá cáhá<sup>n</sup> ndáá, te ñi-ni-gá ní xihí-gá te díhna-gá ní ndoto, te dātñuní ndéé cuèé-gá te ndoto cue ñáyiú ní xihí, te ñi-ni-gá táxí tnūnī-gá nchaa cue tée yīndaha ñaha xii ñáyiú ndècu ñuyú-a. Te ío cūu iní ñáhá-gã

xii-o, te mee-gã ní sati níñi-gã te ní xihí-gá núú cūrúxí sá cuendá nchaa sá cuèhé sá dúhá quide-o, te ní ndada ndoo ní ndada nine-gá iní-ó, <sup>6</sup> te vitna ní quide ñaha-gã xii-o dātñá cue tée yīndaha ñáyiú, te ní quide ñaha tūcu-gá xii-o dātñá cue dūtú xínu cuèchi-o núú Tātá-gã Dūtú Ndiöxí. Te vitna nchaa-o chí ná cächí-ó sã ío cāhnu cuu Xítoho Jesucristú, te ío cūnuu-gá, te duca<sup>n</sup>-ni na cūnuu-gá ni caa ni quíhí<sup>n</sup>. Te duca<sup>n</sup> na cūnduu.

<sup>7</sup> ;Te cundehe-ndo àndi! Chi ichi xití vícú quixi Xítoho Jesucristú, te nchaa ñáyiú ndècu ñuyú-a quini ñáhá-yu xii-gá, te tnáhá nchaa ñáyiú ñi-ni cūu ndihi ñáyiú ní dánicuehé ñáhá xii-gá quini ñáhá-yu, te nchaa ñáyiú xīndecu nihií ñuyú, ñáyiú ñá túú cūu váha iní ñáhá xii-gá ndihú iní-yu òré quini ñáhá-yu xii-gá, te ndáá sá dúcá<sup>n</sup> càda-xi.

<sup>8</sup> Te Yá Ndiöxí cächí-gá: “Yúhú ío cūnuu-í chi ñi-í sa ndècu ndéé cūtnáhá ní ngáva ñuyú, te ñi-ni-í cūndecu ndéé ná sã nduu nà-xi ndihi nchaa sá ío, chí yúhú cūndecu-í ni caa ni quíhí<sup>n</sup>”, duha cächí Yá Ndiöxí Yaá ndácú quide nchaandi túhú sá váha. Chi ñi-ni-gá sa ndècu ndéé cūtnáhá ní ngáva ñuyú, te ñi-ni-gá ndécú-gã vitna, te duca<sup>n</sup>-ni cūndecu-gá ni caa ni quíhí<sup>n</sup>.

*Té Juáá ní xini-dé Xítoho Jesucristú Yaá ío cūnuu*

<sup>9</sup> Te yúhú té Juáá té ndècu ndihi-ndo ichi Xítoho Jesucristú, tnáhá-í ndóhó-í cuendá-gá dātñá ndóhó-ndó, te tnáhá-í nduu táhú-í cūndecu ndihi ñaha-í xii-ndo núú ndécú Yá Ndiöxí táxí tnūnī-gá. Te ío quide cahnu iní-ó cuèi nándi yáha-o ndècu-o sá cuendá Xítoho Jesucristú. Te yúhú ní ngava-í vecaá ñi-ñuú nání Pātmós, te ñuú-án cáá xití ndute lámár. Te duca<sup>n</sup> ñi-ñuú cuendá sá cáhá<sup>n</sup>-í tnúhu Yá Ndiöxí, te cáhá<sup>n</sup> váha-í cuendá Xítoho Jesucristú. <sup>10</sup> Te ñi-ñuú nduu ndumíngú nduu nātacá-ó chíñuhu-o Yá Ndiöxí ní quide ñaha Espíritú-gá xii-í nàcuáa cächí iní-xi, te

ní tecú dóho-í níhi ní cáhá<sup>n</sup> ì<sup>n</sup> sá nǐ cáhá<sup>n</sup> ndàa sàtá-í te dàtná níhi cáhá<sup>n</sup> ì<sup>n</sup> cútú duca<sup>n</sup> níhi ní cáhá<sup>n</sup>-xi. <sup>11</sup> Te càchí sá cáhá<sup>n</sup>-á<sup>n</sup>:

—Yúhú sa ndècu-í ndéé cútñàhá ní ngáva ñuyíú, te ñi-í cundecu-í ndéé ná sàá nduu nàa-xi ndihì nchaa sá ìó, te chido tnùnì-n ì<sup>n</sup> núú tütú sá ná dànehé núú ñáhà-í xii-n, te daquìhì<sup>n</sup>-n tütú-á<sup>n</sup> ndi ùsá xichi núú xĩndecu cue ñáyiu ndècu ichi Yá Ndiöxí xĩndecu distritú Àsiá, ndaha ñáyiu ñuú Éfesú, ndaha ñáyiu ñuú Èsmirná, ndaha ñáyiu ñuú Pèrgamú, ndaha ñáyiu ñuú Tiàtirá, ndaha ñáyiu ñuú Sàrdís, ndaha ñáyiu ñuú Filàdelfiá, ndaha ñáyiu ñuú Laodiceá, nchaa ñáyiu ñuú-á<sup>n</sup> daquìhì<sup>n</sup>-n tütú-á<sup>n</sup> ndahá-yu —càchí sá cáhá<sup>n</sup>-á<sup>n</sup>.

<sup>12</sup> Te ní nchócuñhu-í ndéhè-í nǔu ná cúú sá cáhá<sup>n</sup>-á<sup>n</sup>, te ní xiní-í xĩnutnì ùsá tnàhá sá nǐ cuáha mee-ni dǐhú<sup>n</sup> cuáá<sup>n</sup> sá ndéé dité-xi, te núú dité-xi-á<sup>n</sup> yĩndodo ì<sup>n</sup> caa candíl. <sup>13</sup> Te cuádava tnuú nchaa xǐá<sup>n</sup> ní xiní-í nǔtnì Yá cáá dàtná cáá nchàa nchoo ñáyiu ndècu ñuyíú-a, te ñihnu-gá ì<sup>n</sup> dóó cání càa-xi ndéé núú sàhá-gá, te yĩdúcú<sup>n</sup>nuu ì<sup>n</sup> sìncúú ní cuáha mee-ni dǐhú<sup>n</sup> cuáá<sup>n</sup> pèchú-gá. <sup>14</sup> Te idi díquí-gá cuìxí<sup>n</sup> quiyí dàtná cuìxí<sup>n</sup> idi dava mbèé, àdi yúhá sá quée òré quidé vǐxi<sup>n</sup>-xi, te tĩnùu-gá quidé-xí dàtná quidé-xí òré sàá itá ñuhú. <sup>15</sup> Te sàhá-gá súúní dàtása<sup>n</sup>-xi dàtná dàtása<sup>n</sup> sá nání bròncé òré càyú-xi duca<sup>n</sup> dàtása<sup>n</sup>-xi sàhá-gá, te dǒndaha tnúhu càhá<sup>n</sup>-gá quidé-xí dàtná quidé-xí dǒndaha titní víhí yǔte. <sup>16</sup> Te xio ndaha cùha-gá nùndàha-gá úsá tnàhá chódíní, te mei yùhu-gá quéné ì<sup>n</sup> yuchí cáhnú ndéé úú xio núú-xi, te núú-gá quidé-xí dàtná quidé-xí nǔu nchĩcanchii òré súúní ngòyo cahni.

<sup>17</sup> Te sá dúcá<sup>n</sup> càa Yáá-á<sup>n</sup> nǐ xiní-í nǔu xǐá<sup>n</sup> ní yúhú-í ní nduá-í núú-gá, te ní cuu-í dàtná ì<sup>n</sup> téé ní xǐhí sá dúcá<sup>n</sup> ìó ní yúhú-í, dico mee-gá ní sacá<sup>n</sup> ndodo-gá ndaha cùha-gá núú yĩquì cùñú-í, te ní cachí-gá:

—Vá yúhú-n, chi ñi-í yúhú sa ndècu-í ndéé cútñàhá ní ngáva ñuyíú,

te ñi-í yúhú cundecu-í ndéé ná sàá nduu nàa-xi ndihì nchaa sá ìó. <sup>18</sup> Te yúhú cúu-í Yáá ní xǐhí te ní ndoto-í, te vitna ndècu vívù-í, te duca<sup>n</sup>-ni cundecu-í ni caa ni quíhì<sup>n</sup>. Te yúhú cùnùu-í núú nchàa ñáyiu ní xǐhí te ñi-í cùnùu-í núú ndécú-yu. <sup>19</sup> Te chido tnùnì-n nchàa sá nǐ xiní-n-á<sup>n</sup> ì<sup>n</sup> núú tütú, ndihì nchaa nàcuáa cùu vitna, ndihì nchaa sá cádá-xí ndéé núú cuáhá<sup>n</sup> núú vèxi-gá. <sup>20</sup> Te na càchí tnúhu-í xii-n nàcuáa quée-xi ndi usá chódíní nǐ xiní-n yòtnì-í xio ndaha cùha-í, ndihì nàcuáa quée-xi ndi usá sá nǐ cuáha mee-ni dǐhú<sup>n</sup> cuáá<sup>n</sup>, sá ndéé dité-xi te yĩndodo ì<sup>n</sup> caa candíl núú dité-xi-á<sup>n</sup>. Te ndi ùsá chódíní-á<sup>n</sup>, xǐá<sup>n</sup> cúú-xí sá cútñùnì iní-ó sá ndécú ùsá cue téé xĩnu cuechi núú Yá Ndiöxí, te ndi ùsá cue téé-á<sup>n</sup> ndécú-güedé ndi ùsá xichi núú ndécú ñáyiu ndècu ichi Yá Ndiöxí. Te cuendá ndi ùsá sá ndéé dité-xi-á<sup>n</sup>, xǐá<sup>n</sup> cúú-xí sá cútñùnì iní-ó sá ndécú ùsá xichi ñáyiu ndècu ichi Yá Ndiöxí —duha càchí Yáá cáhá<sup>n</sup>-á<sup>n</sup>.

## 2

*Tnúhu sá cúú-xí ñáyiu xĩndecu ichi Yá Ndiöxí ndécú ñuú Éfesú*

<sup>1</sup> Te ní cachí tucu Yáá cáhá<sup>n</sup>-á<sup>n</sup> xii-í sá chídó tnùnì-í nchaa tnúhu sá vítná cáhá<sup>n</sup>-gá ì<sup>n</sup> núú tütú, te tendaha-í quíhì<sup>n</sup> ndaha téé xĩnu cuechi núú Yá Ndiöxí ndécú ñuú Éfesú sá cúú-xí cue ñáyiu xĩndecu ichi-gá ndécú ñuú-á<sup>n</sup>, te duha ní cachí-gá: “Yúhú cúu-í Yáá nùndàha úsá chódíní xio ndaha cùha-í, te xica cuu-í núú ndécú ndi usá sá nǐ cuáha mee-ni dǐhú<sup>n</sup> cuáá<sup>n</sup>, sá ndéé dité-xi te yĩndodo ì<sup>n</sup> caa candíl núú dité-xi. <sup>2</sup> Te yúhú xiní-í nchaa nàcuáa quide nchohó ñáyiu xĩndecu ichi Yá Ndiöxí ndécú ñuú Éfesú, te xiní-í sá ìó ndècu ndee-ndo quide chiu<sup>n</sup>-ndo cuendá-gá, te ìó quide cahnu iní-ndó ndècu-ndo quide-ndo chiu<sup>n</sup>-gá. Te xiní-í sá ñà túú tnàhí tnàhá iní-ndó nàcuáa quide nchaa ñáyiu ndècu ichi cuehé ichi duha. Te xiní tucu-í sá xító ndéé-ndó cue téé càchí sá nǐ tendaha-í véxi cáhá<sup>n</sup> tnúhu-í te ñá ndàá sá cáhá<sup>n</sup>-güedé tnúhu-í, te duca<sup>n</sup> te cùtnunì iní-ndó sá

ñã ndáá sá càhá<sup>n</sup>-güedé tnúhu-í. <sup>3</sup> Te xini tucu-í sá ïo ndòho-ndo quide-ndo chiu<sup>n</sup> cuendá-í, te duca<sup>n</sup> ïo quide cahnu iní-ndó cuèi nándi yáha-ndo, te ñá túú cùu dusa<sup>n</sup>-ndo quide-ndo chiu<sup>n</sup>-án. <sup>4</sup> Dico ñá túú cùu váha iní-í chi nchòhó ñá túú-gã quidé-ndó datná ní xóo cada-ndo cùtnàhá vitna cùu vii-ni ní sándáá iní ñáhá-ndó xii-í, chi vitna ñá túú-gã cúú iní ñáhá vihi-ndo datná ní xóo cada-ndo dàvã-án. <sup>5</sup> Te chí dándacu iní nàcuáa ní xóo cada-ndo cùtnàhá vitna cùu saa ní sándáá iní ñáhá-ndó xii-í, te ndixi cuèchi iní-ndó sã ñà túú-gã quidé váha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhna. Te nchòhó cada iní-ndó sã ndécú ndihi-ndo ì<sup>n</sup> sá ní cuáha mee-ni díhú<sup>n</sup> cuáa<sup>n</sup>, sá ndéé dité-xi te yindodo ì<sup>n</sup> caa candíl núú dité-xi. Te núú vá ndíxí cuèchi iní-ndó nàcuáa quide-ndo ndecu-ndo ña, te quixi-í xocàni-í xiã<sup>n</sup>, te duca<sup>n</sup> sãtnahá-xi cada ñaha-í xii-ndo te núú vá ndíxí cuèchi iní-ndó nàcuáa quide-ndo ndecu-ndo, te duca<sup>n</sup> te vá yoo-gã nàtacá chiñuhu ñaha xii-í ñúú-ndó. <sup>6</sup> Dico quide váha-ndo ì<sup>n</sup> xichi chi dàquee tihú-ndó nchaa sá quidé cuè ñáyiú cùu nicolaitás, te yúhú tnàhá-í dáquee tihú-í nchaa sá quidé ñáyiú-án. <sup>7</sup> Te nchòhó cada cuendá váha-ndo nàcuáa xãha<sup>n</sup>-í xii Espiritú Yã Ndiõxí xãha<sup>n</sup>-xi xii cue ñáyiú ndècu ichi-gã xĩndecu nchaa xichi. Te duha ndùu tnúhu xãha<sup>n</sup>-í xii Espiritú-gã xãha<sup>n</sup>-xi xii-yu: Cúñaha-n xii nchaa ñáyiú sá núu na càda ndee iní-yu yáha-yu nándi sá ná yáha-yu sá cuendá-í, te yúhú cada-í te nduu táhú-yu cundecu váha-yu núú ndécú Yã Ndiõxí, duha xãha<sup>n</sup>-í xii Espiritú-gã cúu-xi ñáyiú”, duha càchí Yáá càhá<sup>n</sup>-án. Te nchaa tnúhu-án ní chídó tnùn-í sá cúú-xí ñáyiú xĩndecu ichi Yá Ndiõxí ndécú ñúú Èsmirná.

*Tnúhu sá cúú-xí ñáyiú xĩndecu ichi Yá Ndiõxí ndécú ñúú Èsmirná*

<sup>8</sup> Te ní cachí tucu Yáá càhá<sup>n</sup>-án xii-í sá chídó tnùn-í nchaa tnúhu sá vitná càhá<sup>n</sup>-gã ì<sup>n</sup> núú tütú, te tendaha-í quíhí<sup>n</sup> ndaha téé xĩnu cuechi núú

Yã Ndiõxí ndécú ñúú Èsmirná sá cúú-xí cuè ñáyiú xĩndecu ichi-gã ndécú ñúú-án, te duha càchí-gã: “Yúhú ndécú-í ndéé cùtnàhá ní ngáva ñuyúú, te ñu-ni-í cundecu-í ndéé ná sã nduu nãa-xi ndihi nchaa sá ïó, te ñu-ni-í ní xihí te ní ndoto-í ndécú-í vitna. <sup>9</sup> Te yúhú xini-í nchaa nàcuáa quide nchòhó ñáyiú ndècu ichi Yá Ndiõxí ndécú ñúú Èsmirná. Te xini-í sá ïo ndòho-ndo ndecu-ndo sá cuendá-í, te xini tucu-í sá ïo ndàhú-ndó dico cùu-ndo ñáyiú xĩndecu váha núú Yã Ndiõxí. Te xini tucu-í sá ïo càhá<sup>n</sup> cuèhé ñáyiú isràél cuendá-ndó, dico ñá túú quidé-yu nàcuáa tàú-yu cada-yu sá cúú-yu ñáyiú isràél, chi cùú-yu ñáyiú xĩnu cuechi mee-ni núú sàcuíhná. <sup>10</sup> Dico nchòhó vá yúhú-ndó cuèi nándi cùu nchaa sá ná ndòho-ndo cuendá-í, chi sàcuíhná cada-xi te ngava dáva-ndo vècaá, te duca<sup>n</sup> càda-xi chi cuini-xi coto ndéé ñáhá-xi xii-ndo núú ndisa sá vá ná tühú iní-ndó sã nchicú<sup>n</sup> nihnu-ndo ichi Yá Ndiõxí. Te ndòho-ndo ùxí nduu dico vá dáñá ndéé-ndó càncicú<sup>n</sup> nihnu-ni-ndo ichi-gã cuèi na cùú-ndó sã cuendá-gã, te yúhú cada-í te nduu táhú-ndó cundecu-ndo ndihi-gã ní caa ní quíhí<sup>n</sup>. <sup>11</sup> Te nchaa nchòhó cada cuendá váha-ndo nàcuáa xãha<sup>n</sup>-í xii Espiritú Yã Ndiõxí xãha<sup>n</sup>-xi xii cue ñáyiú ndècu ichi-gã xĩndecu nchaa xichi, te duha ndùu tnúhu xãha<sup>n</sup>-í xii Espiritú-gã xãha<sup>n</sup>-xi xii-yu: Cúñaha-n xii nchaa ñáyiú sá núu na cùndee iní-yu yáha-yu nándi sá ná yáha-yu sá cuendá-í te vá cuíta nihnú-yu na sã nduu cuíta nihnu nchaa dáva-gã ñáyiú, duha xãha<sup>n</sup>-í xii Espiritú-gã cúu-xi ñáyiú”, duha ní cachí Yáá càhá<sup>n</sup>-án. Te nchaa tnúhu-án ní chídó tnùn-í sá cúú-xí ñáyiú xĩndecu ichi Yá Ndiõxí ndécú ñúú Èsmirná.

*Tnúhu sá cúú-xí ñáyiú xĩndecu ichi Yá Ndiõxí ndécú ñúú Pèrgamú*

<sup>12</sup> Te ní cachí tucu Yáá càhá<sup>n</sup>-án xii-í sá chídó tnùn-í nchaa tnúhu sá vitná càhá<sup>n</sup>-gã ì<sup>n</sup> núú tütú, te tendaha-í quíhí<sup>n</sup> ndaha téé xĩnu cuechi núú Yã Ndiõxí ndécú ñúú Pèrgamú sá cúú-xí cuè ñáyiú xĩndecu ichi-gã ndécú ñúú-án, te duha càchí-gã: “Yúhú cúú-í



Yaá néhé ñ<sup>n</sup> yuchí cání te ndèé úú xio núú-xi. <sup>13</sup> Te yúhú xìní-í nchaa nàcuáa quìde nchohó cue ñáyiú xñdecu ichi Yá Ndiòxí ndécú ñúú Pèrgamú, te xìní tucu-í sá ndécú-ndó nùú ïo cùnuu yucu ñávàha, te ñá túú dàña ndeé-ndó nchìcú<sup>n</sup> nihnu-ndo ìchi-í, te duca<sup>n</sup> ïo sàndáá iní ñáhá-ní-ndó xii-í, te ñiú-ni duca<sup>n</sup> ní quide-ndo cùtnàhá ní sahani-güedé té Àntipás núú ndécú-ndó ñiú-ni núú dúcá<sup>n</sup> ïo cùnuu yucu ñávàha. Te ndíi-á<sup>n</sup> ní quide ndáá ndíi ní xñdecu ndíi ichi-í chi ní cáhá<sup>n</sup> vaha ndíi cuèndá-í. <sup>14</sup> Dico ñá túú cùu vaha iní-í cuèndá ñ<sup>n</sup> úú sá quidé-ndó, chi ndècu ndíhi-ndo ñáyiú nchìcú<sup>n</sup> nihnu-ni nchaa nàcuáa ní cáhá<sup>n</sup> ndíi Bàlaám. Chi ndíi-á<sup>n</sup> ñá túú ní quide vaha ndíi chi ní dácáhu iní ndíi ñngá téé ní xñnani Bàlác nàcuáa cada-dé canu ichi-dé cue ñáyiú isràél ñngá ichi sá ñá túú vaha, chi ní xáha<sup>n</sup> tē Bàlác-á<sup>n</sup> xii-yu sá cáxi-yu nchaa sá ndúú tǎhú nchaa sá ní cadúha cue téé ñuyíú-a ñanani ñáyiú ndiòxí te ñá ndáá sá ndiòxí cúú-xí, te ní dácáhu iní ñáhá-dē xii-yu sá cùndécú-yu ichi dñí iní. <sup>15</sup> Te ndècu ndíhi tucu-ndo ñáyiú nchìcú<sup>n</sup> nihnu sá dácuàha cue ñáyiú cùu nicolaitás. Te nchaa sá dácuàha ñáyiú-á<sup>n</sup> dáquèe tíhù-í, <sup>16</sup> te nchòhó chí dándixi cuèchi iní sá ñá túú quide vaha-ndo ndècu-ndo, chi núú ñáhá te quixi-í nàá-í ndíhi cue ñáyiú-á<sup>n</sup> ndíhi yuchí cání sǎ quéné yùhu-í. <sup>17</sup> Te nchaa nchòhó cada cuèndá vaha-ndo nàcuáa xǎha<sup>n</sup>-í xii Espíritú Yá Ndiòxí xǎha<sup>n</sup>-xi xii cue ñáyiú ndècu ichi-gá xñdecu nchaa xichi. Te duha ndùu tnúhu xǎha<sup>n</sup>-í xii Espíritú-gá xǎha<sup>n</sup>-xi xii-yu: Cúñaha-n xii nchaa ñáyiú sá nùu na càda ndee iní-yu yáha-yu nándi sá ná yǎha-yu sá cuèndá-í, te yúhú cuáñaha-í sá ndúú yùhu xii-yu caxí-yu ñ<sup>n</sup> sá vátá quini-gá-yu caxí-yu. Te xǎ<sup>n</sup> cúú-xí mànáá sá ní xóo caxí cue ñáyiú ní xñdecu ndéé sanaha, te cuáñaha tucu-í ñ<sup>n</sup> caa yúú cuixín xii-yu, te núú yúú-ǎ<sup>n</sup> cundeé ñ<sup>n</sup> ñiú saa. Te ñiú-á<sup>n</sup> vǎ yòo tnàhí xìní chi ñ<sup>n</sup> ñiú ní ñáyiú na quèhe<sup>n</sup> cuèndá ñiú-á<sup>n</sup> quini-yu, duha xǎha<sup>n</sup>-í xii Espíritú-gá cúu-xi ñáyiú”, duha càchí Yaá càhá<sup>n</sup>-á<sup>n</sup>. Te nchaa

tnúhu-á<sup>n</sup> ní chídó tnùní-í sá cúú-xí ñáyiú xñdecu ichi Yá Ndiòxí ndécú ñúú Pèrgamú.

*Tnúhu sá cúú-xí cuè ñáyiú xñdecu ichi Yá Ndiòxí ndécú ñúú Tiàtirá*

<sup>18</sup> Te ní cachí tucu Yaá càhá<sup>n</sup>-á<sup>n</sup> xii-í sá chídó tnùní-í nchaa tnúhu sá vítná càhá<sup>n</sup>-gá ñ<sup>n</sup> núú tütú, te tendaha-í quíhí<sup>n</sup> ndaha tēe xñnu cuechi núú Yá Ndiòxí ndécú ñúú Tiàtirá sá cúú-xí cuè ñáyiú xñdecu ichi-gá ndécú ñúú-á<sup>n</sup>, te duha càchí-gá: “Yúhú cúú-í Déhe Yá Ndiòxí, te càa tñuu-í dàtná cáá itá ñuhú, te sáhà-í cáá dàtná cáá sǎ nání bròncé òré ñuhú-xí nùú ñuhú càyú-xi. <sup>19</sup> Te yúhú xìní-í nchaa nàcuáa quìde nchohó ñáyiú xñdecu ichi Yá Ndiòxí ndécú ñúú Tiàtirá. Te xìní tucu-í sá ïo cùu iní-ndó Yá Ndiòxí te sàndáá iní-ndó-gǎ. Te xìní tucu-í nàcuáa ndùu chiu<sup>n</sup> quide-ndo sá cúú-xí-gǎ. Te xìní tucu-í sá ïo quide cahnu iní-ndó cuèi nándi cùu sá yǎha-ndo ndècu-ndo. Te xìní tucu-í sá ïo-gá ndúcú ndèe-ndo quide vaha-ndo vítna dacúxí cùtnàhá vítna cùu saa ní sàndáá iní-ndó Yá Ndiòxí. <sup>20</sup> Dico ñá túú cùu vaha iní-í cuèndá ñ<sup>n</sup> sá quidé-ndó, chi ñá túú tnàhí ná sání iní-ndó ndècu ndíhi-ni-ndo ñáyiú nchìcú<sup>n</sup> nihnu nchaa nàcuáa dànehé ñáhá ñàha nani Jezabél. Te ñàha-á<sup>n</sup> càchí-a<sup>n</sup> sá càhá<sup>n</sup>-a<sup>n</sup> tnúhu Yá Ndiòxí dico ñá ndáá sá càhá<sup>n</sup>-a<sup>n</sup> tnúhu-gá, te cuáhá<sup>n</sup>-a<sup>n</sup> dándahú-a<sup>n</sup> nchaa ñáyiú xñnu cuechi núú-í ndíhi nchaa sá dánhé ñáhá-á<sup>n</sup> cuèndá cundécú-yu ichi dñí iní, te caxí-yu nchaa sá ndúú tǎhú nchaa sá ní cadúha cue téé ñuyíú-a ñanani ñáyiú ndiòxí te ñá ndáá sá ndiòxí cúú nchaa xǎ<sup>n</sup>. <sup>21</sup> Te ní cuu vǎi nduu ta dacaca-í ndécú-á<sup>n</sup> cuèndá ndixi cuèchi iní-a<sup>n</sup> sá ñá túú quide vaha-a<sup>n</sup> ndècu-a<sup>n</sup>, te cuèi duca<sup>n</sup> quide-í dico ñá túú cuini-a<sup>n</sup> dàña-a<sup>n</sup> ní ñ<sup>n</sup> sá cuèhé sá dúhá quide-a<sup>n</sup>. <sup>22</sup> Te vítna yúhú ïo dandòho-í-a<sup>n</sup> chi tñí ñàha cuèhé xii-a<sup>n</sup>, te ñiú-ni duca<sup>n</sup> ïo dandòho-í nchaa ñáyiú quide datná quidé-á<sup>n</sup> te núú vǎ ndíxí cuèchi iní-yu sá ñá túú quide vaha-yu ndécú-yu, te dàñá-yu nchaa sá cuèhé sá dúhá quidé-yu. <sup>23</sup> Te nchaa ñáyiú cùndíhi ñàha xii ñàha-á<sup>n</sup> cahni-í-yu, te duca<sup>n</sup> te nchòhó ndíhi

dava-gá nchaa ñáyiú xĩndecu ichi Yá Ndiõxí ndécú nchaa xichi cutnuni iní-ndó ndihí-yu sá yúhú cúu-í Yaá xíní ndáá nchaa nàcuáa sàni iní ñáyiú, ndihí nchaa nàcuáa quide-xi iní-yu. Te nchòhó nàcuáa nduu sá quidé-ndó ñáyiú ñá túbú Tiàtirá, ñáyiú ñá túbú nchìcú<sup>n</sup> nihnu nàcuáa dànehé ñáhá ñàha nani Jezabél-án ñà túbú xíní-ndó nã cúu sá càchí ñáyiú nduu yuhu dachá iní ñáhá yùcu ñávàha. Te nchòhó, ñá túbú nãgá cachí tnúhu-í xii-ndo càda-ndo<sup>24</sup> ñáyiú ñá túbú ndèe-ndo cada-ndo nchaa nacuáa càhá<sup>n</sup> tnúhu sá ndécú ndihí-ndo, te duca<sup>n</sup>-ni càda-ndo ndéé òré quixi tucu-í. <sup>25</sup> Te nchaa nchòhó ñáyiú na càda ndee iní yáha nándi sá ná yáha sá cuendá-í, te núu na càda-ni-ndo nchaa nacuáa cuení-í cada-ndo ndéé nduu vã cundecu-gá-ndó ñúyíú-a, te yúhú taxi-í tnúhu ndee iní xii-ndo sá táxi tnúni-ndó nchaa ñáyiú ñúyíú <sup>26</sup> dàtná ní quide mee Tãtà-í Dútú Ndiõxí ní taxi-gá tnúhu ndee iní ndécú ndihí-í, te duca<sup>n</sup> càda ñàha-í xii-ndo tàxi-í tnúhu ndee iní xii-ndo cuendá ío taxi tnúni-ndó, te cada iní-ndó sá càdá-ndó cuè ñáyiú dàtná quidé-xi ñáyiú quídi òré tàhú-xi càchi duu<sup>n</sup>-xi, te duca<sup>n</sup> chi nchòhó cada-ndo sã nchãá ñáyiú ñá túbú quide váha cuíta nihnú-yu. <sup>27</sup> Te cada iní-ndó sã dàtná dáyhé chódíní quití quène oré sa ta tũndaá-nã cuáhá<sup>n</sup> duca<sup>n</sup> càda-xi oré ná sãá nduu ngũta-xi cada váha-xi, te duca<sup>n</sup> chi yúhú cada-í nàcuáa nduu táhú-ndó cundecu ndihí ñàha-ndo xii-í núu ío váha càa ndecu-í. <sup>28</sup> Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiõxí xáha<sup>n</sup>-xi xii cue ñáyiú ndècu ichi-gá xĩndecu nchaa xichi”, duha càchí Yaá càhá<sup>n</sup>-án. Te nchaa tnúhu-án ñi chídó tnúni-í sá cúu-xi ñáyiú xĩndecu ichi Yá Ndiõxí ndécú ñúu Tiàtirá.

### 3

*Tnúhu sá cúu-xi ñáyiú xĩndecu ichi Yá Ndiõxí ndécú ñúu Sãrdís*

<sup>1</sup> Te ní cachí tucu Yaá càhá<sup>n</sup>-án xii-í sá chídó tnúni-í nchaa tnúhu sá vítná

cãhá<sup>n</sup>-gá ñáyiú núu túbú, te tendaha-í quíhí<sup>n</sup> ndaha téé xĩnu cuechi núu Yá Ndiõxí ndécú ñúu Sãrdís sá cúu-xi cuè ñáyiú xĩndecu ichi-gá ndécú ñúu-án te duha càchí-gá: “Yúhú cúu-í Yaá ndécú ndihí ndi usá espíritú cúu cuendá Yá Ndiõxí, te ñáyiú cúu-í Yaá ndécú ndihí ndi usá chódíní. Te yúhú xíní-í nchaa nàcuáa quide nchòhó ñáyiú xĩndecu ichi Yá Ndiõxí ndécú ñúu Sãrdís, te xíní-í sá cúu-ndó dàtná ñáyiú ní xihí cuèi càchí ñáyiú sá ñáhá. <sup>2</sup> Te chí cuáha cuendá nàcuáa quide-ndo ndecu-ndo vítna, te nducu ndèe-ndo cada-ndo ñáyiú úu-gá nchaa sá váha nchìcú<sup>n</sup> nihnu-ndo vítna, chi sa ndètu víi-nã dañá-ndo nchaa-ndi túhú sá váha quide-ndo ni cuu, te quide cuendá-í sá ñà túbú quide-ndo nchaa nacuáa cuení Yá Ndiõxí cada-ndo. <sup>3</sup> Te chí dándacu iní nàcuáa càhá<sup>n</sup> tnúhu sá ní xĩndedóho-ndo cutnãhá ní tuha-ndo ichi Yá Ndiõxí, te canchicú<sup>n</sup> nihnu-ndo càda-ndo nacuáa càhá<sup>n</sup> tnúhu-án, te ndixi cuèchi iní-ndó sã ñà túbú quide váha-ndo ndècu-ndo, te núu vá nàcuáha-ndo cuendá nàcuáa quide-ndo ndecu-ndo ña, te cada-í dàtná quidé ñàdúhú, chi òré ñá túbú nã yihí iní-ndó quèxio-í núu ndécú-ndó. <sup>4</sup> Dico ndècu ndihí-ndo ñáyiú cãndoo caa nine iní-xi, chi ñáyiú-án ñi nduu táhú-yu cuihnú-yu dóo cuixí<sup>n</sup> cuendá cundecu ndihí-í-yu, te duca<sup>n</sup> chí cudiú-yu núu-í. <sup>5</sup> Te nchaa ñáyiú na càda ndee iní-xi yáha nándi sá ná yáha sá cuendá-í, te ñáyiú-án nduu táhú-yu cuihnú-yu dóo cuixí<sup>n</sup>, te vá náquète-í ñáyiú núu túbú núu yódó tnúni-í cue ñáyiú ní nduu táhú cundecu ndihí-í ní caa ní quíhí<sup>n</sup>, te cúñaha-í xii Tãtà-í Dútú Ndiõxí ndihí cue espíritú xínú cuèchi núu-í sá ñáyiú-án cúu-yu ñáyiú cúu cuendá-í. <sup>6</sup> Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiõxí xáha<sup>n</sup>-xi xii cue ñáyiú ndècu ichi-gá xĩndecu nchaa xichi”, duha càchí Yaá càhá<sup>n</sup>-án. Te nchaa tnúhu-án ñi chídó tnúni-í sá cúu-xi ñáyiú xĩndecu ichi Yá Ndiõxí ndécú ñúu Sãrdís.

*Tnúhu sá cúu-xi cuè ñáyiú xĩndecu ichi Yá Ndiõxí ndécú ñúu Filãdelfía*

7 Te ní cachí tucu Yaá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ì<sup>n</sup> núú tütú, te tendaha-í quíhí<sup>n</sup> ndaha téé xínu cuechi núú Yá Ndiöxí ndécú ñúú Filàdelfiá sá cúú-xí cuè ñáyíu xíndecu ichi-gá ndécú ñúú-á<sup>n</sup>, te duha càchí-gá: “Yúhú cúú-í Yaá ío váha quíde ndáá te ñá túú tnàhí cuéchi-í. Te díhna-gá ndí Dàvíí ní taxí tnùn-í ndí ñáyíu, te vítna yúhú táxí tnùn-í-yu, te yúhú càhá<sup>n</sup>-í te núu ndëndida càa ñáyíu ndíhu ndaha-í te ndëndida càa ñáyíu vá ndíhu ndaha-í. 8 Te yúhú xín-í nchaa nàcuáa quíde nchóhó ñáyíu xíndecu ichi Yá Ndiöxí ndécú ñúú Filàdelfiá, te yúhú ní quíde-í nàcuáa ní níhí-ndó ì<sup>n</sup> ichi cahnu quíde-ndo chiu<sup>n</sup>-í, te vá yóo ì<sup>n</sup> cada nàcuáa vá nihí-gá-ndó nàcuáa cada-ndo chiú<sup>n</sup>-í. Te cuéi ñá túú ío nihí ndéé-ndó cùndecu-ndo ichi Yá Ndiöxí díco tñ-ndo nchaa tnúhu càhá<sup>n</sup>-í, te ní ì<sup>n</sup> xito ñá túú càhá<sup>n</sup>-ndó sá ñà túú ndècu ndíhí ñaha-ndo xii-í. 9 Te nchaa ñáyíu quíde nchaa nàcuáa cuíni yucu ñávàha, ñáyíu-á<sup>n</sup> cúú-yu ñáyíu isràél, te cuéi cúú-yu ñáyíu isràél díco ñá túú quíde-yu nàcuáa tàú-yu cada-yu, te yúhú cada-í sá ncháá ñáyíu-á<sup>n</sup> canehé-yu sá yíñùhu núu-ndó, te cutnùn-í iní-yu sá yúhú ío cùu iní ñáhà-í xii-ndo. 10 Te ío quíde ndee-ni iní-ndó nchicú<sup>n</sup> nihnu-ndo quíde-ndo nchaa nàcuáa ní càhá<sup>n</sup>-í, te xíá<sup>n</sup> coto ñaha-í xii-ndo ñà túú ñà tnahá-ndó ndúu na quixi nchaa tnúndòho tnúhu ndàhú ñuyíú-a. Te òré quexìo nchaa tnúndòho-á<sup>n</sup> ñuyíú-a te dává-á<sup>n</sup> cutnùn-í nàcuáa ndúu sá quíde ì<sup>n</sup> ñáyíu. 11 Te ío ndíhí quixi tucu-í. Te vá dáñá ndéé-ndó càda-ndo nchaa sá váva nchicú<sup>n</sup> nihnu-ndo quíde-ndo cuendá sá váva cuíta sá ní cachí Yá Ndiöxí ndúu táhú-ndó. 12 Te nchaa nchóhó ñáyíu na càda ndee iní yáha nándí sá ná yáha sá cuendá-í, te yúhú cada-í sá nchóhó ío cuu càhmu-ndo cundecu-ndo núu ndécú Tàtá-í Dútú Ndiöxí, te vá ì<sup>n</sup> ndúu-gá xocuíñ-ndó núu ndécú-gá. Te cada iní-ndó sá dàtná sá chídó tnùn-í díu Tàtá-í Dútú Ndiöxí ñ-ndo chí duca<sup>n</sup>-ni cùndecu-ndo ndíhí-gá, te

cada tucu iní-ndó sá dàtná sá chídó tnùn-í nàcuáa nàni ñúú-gá ñ-ndo, chí díu ñúú-gá-á<sup>n</sup> cundecu-ndo, te ñúú-á<sup>n</sup> nání-xí Jèrusalén Sáá, duha nàni ñúú-gá. Te ñúú-á<sup>n</sup> quee-xi andíu núu ndécú Yá Ndiöxí Yaá cúú Tàtá-í quée-xi ñuyíú. Te cada tucu iní-ndó sá dàtná sá chídó tnùn-í díu mee-í ñ-ndo, te xíá<sup>n</sup> cúú-xí ì<sup>n</sup> díu saa, te duca<sup>n</sup> càda iní-ndó chí cundecu ndíhí ñaha-ndo xii-í. 13 Te nchaa nchóhó cada cuendá váha-ndo nàcuáa xáha<sup>n</sup>-í xii Espíritú Yá Ndiöxí xáha<sup>n</sup>-xi xii cue ñáyíu ndècu ichi-gá xíndecu nchaa xichi”, duha càchí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> ní chídó tnùn-í sá cúú-xí ñáyíu xíndecu ichi Yá Ndiöxí ndécú ñúú Filàdelfiá.

*Tnúhu sá cúú-xí ñáyíu xíndecu ichi Yá Ndiöxí ndécú ñúú Laodiceá*

14 Te càchí tucu Yaá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ì<sup>n</sup> núú tütú, te tendaha-í quíhí<sup>n</sup> ndaha téé xínu cuechi núú Yá Ndiöxí ndécú ñúú Laodiceá sá cúú-xí cuè ñáyíu xíndecu ichi-gá ndécú ñúú-á<sup>n</sup>, te duha càchí-gá: “Yúhú cúú-í Yaá quíde núú Yá Ndiöxí, te cúu-í Yaá quíde ndáá chí càhá<sup>n</sup> ndáá cuítí-í nàcuáa càhá<sup>n</sup> Yá Ndiöxí. Te yúhú cúú-í Yaá ní quíde ní ngúndecu nchaa sá ní cadúha Yá Ndiöxí. 15 Te yúhú xín-í nchaa nàcuáa quíde nchóhó ñáyíu xíndecu ichi Yá Ndiöxí ndécú ñúú Laodiceá, te xín-í sá ñà túú cuíni-ndó càncicú<sup>n</sup> nihnu-ndo nchaa nàcuáa càhá<sup>n</sup>-í, te ní ñà túú cuíni-ndó dàña duu<sup>n</sup>-ndo. Te váha-gá sá dúú<sup>n</sup> dùu<sup>n</sup> cada-ndo nchaa nàcuáa càhá<sup>n</sup>-í àdí núu ñáhá te duu<sup>n</sup> duu<sup>n</sup> dàña-ndo. 16 Te sá dúcá<sup>n</sup> quíde-ndo ñá túú cuíni-ndó dùu<sup>n</sup> duu<sup>n</sup>-ni cada-ndo nàcuáa càhá<sup>n</sup>-í, te ní ñà túú cuíni-ndó dùu<sup>n</sup> duu<sup>n</sup>-ni dàña-ndo te sáá nduu váva cùndè-gá iní-í cuendá nchaa sá quíde-ndó-á<sup>n</sup>, te daquèe tíhú ñáhà-í xii-ndo. 17 Te càchí-ndó sá cuicá-ndó, te ío váha ta yáha-ndo nchaa nduu cuáhá<sup>n</sup>, te ñá túú tnàhí ná cúmání xii-ndo, te ñá túú cutnùn-í iní-ndó sá cúú-ndó dàtná cue ñáyíu ío ndàhú yáha, te cúu-ndo datná ñáyíu ndàhú, ñáyíu ío cùndahú iní ñáhá tnahà ñáyíu-xi, te cúu-ndo datná cue ñáyíu cuáá, te cúu tucu-ndo



datná cue ñáyi ndàhú ñá túú tnàhí dóó-xi. <sup>18</sup> Te na càchí tnúhu-í xii-ndo sã cádá-ndó dàtná xiquide cue ñáyi sàa<sup>n</sup> ì<sup>n</sup> sã ñi cuáha mee-ni dǐhú<sup>n</sup> cuáá<sup>n</sup> sã ìo váha càa, te duca<sup>n</sup> quidé-yu te ío-gá cúú cuicá-yu. Te cada tucu-ndo dàtná xiquide cue ñáyi sàa<sup>n</sup> dóó cuixí<sup>n</sup> sácuihnu-yu cuendá sã vǎ cúú-yu dàtná ñáyi ndàhú ñá túú dóó-xi, te cada tucu-ndo dàtná quidé cue ñáyi sàa<sup>n</sup> yúcu quée núú-xi nàcuáa cutnùní váha núú-yu, te duha càhá<sup>n</sup>-í xǎha<sup>n</sup>-í xii-ndo chi cuiní-í sã nàtuha ñaha-ndo xii-í, te ío váha cundecu-ndo sã cúú-xí Yá Ndióxi. <sup>19</sup> Te càhá<sup>n</sup>-í dóho nchaa ñáyi cùu iní-í òré ñá túú quide ndáá-yu, te dàndoho-í-yu, núú xǎ<sup>n</sup> cuiní-í sã nchòhó ndixi cuéchi iní-ndó sã ñá túú quide váha-ndo ndècu-ndo. <sup>20</sup> Te na càchí tnúhu-í xii-ndo sã yúhú cúú-í dàtná ì<sup>n</sup> tée nùtnǐ yuyèhe ndaa quehé te càhá<sup>n</sup>-í ñáyi yǐhi xití vehe, te núu na càda cuendá-yu sã càhá<sup>n</sup>-í te nacaá<sup>n</sup>-yu yuyèhe te quíhu-í xití vehe cudini-í ndihí-yu, te duha càhá<sup>n</sup>-í chi cuiní-í cundecu ndihí ñaha-í xii-ndo. <sup>21</sup> Te nchaa nchòhó ñáyi na càda ndee iní-xi yáha nándi sã ná yáha sã cuendá-í, te yúhú taxi-í xii-ndo ì<sup>n</sup> xichi núú ndécù-í cundecu-ndo te cunuu-ndo tnàhá-ndó dàtná cùnùu-í, chi yúhú duca<sup>n</sup> ñi quide ndee iní-í ní yáha-í nándi sã ñi yáha-í te vitna ní nduu táhù-í ndécù-í núú ndécú Tǎtà-í Dútú Ndióxi cùnùu-í. <sup>22</sup> Te nchaa nchòhó cada cuendá váha-ndo nàcuáa càhá<sup>n</sup> Espiritú Yá Ndióxi xǎha<sup>n</sup>-xi xii cue ñáyi ndècu ichi-gá xǐndecu nchaa xichi”, duha càchí Yá càhá<sup>n</sup>-á<sup>n</sup>. Te nchaa tnúhu-á<sup>n</sup> ñi chídó tnùn-í sã cúú-xí ñáyi xǐndecu ichi Yá Ndióxi ndécú ñùú Laodiceá.

## 4

*Nàcuáa chǐñuhu ñáyi Yá Ndióxi andiu*

<sup>1</sup> Te sátá ñi yáha duca<sup>n</sup> ñi cuu te ní xiní-í nchǐ andiu, te ní cáhá<sup>n</sup> tucu Yá ní cáhá<sup>n</sup> ndihí ñaha xii-í dǐhna, te Yá-á<sup>n</sup> ñi cáhá<sup>n</sup> níhi-gá dàtná càhá<sup>n</sup> níhi ì<sup>n</sup> cútú, te ní cachi-gá xii-í:

—Taquène iha te na dànehé ñáhà-í xii-n nchàa nàcuáa cada-xi ndéé núú cuáhá<sup>n</sup> núú vǐxi —càchí-gá.

<sup>2</sup> Te òré-ni-á<sup>n</sup> ñi quide ñaha tucu Espiritú Yá Ndióxi xii-í nàcuáa càchí iní-xi, te diu-ni òré-á<sup>n</sup> ñi xiní-í nùtnǐ ì<sup>n</sup> xilé váha andiu te càa datná cáá xilé sácóo nchihí cue ñáyi ìo cùnùu, te núú xilé váha-á<sup>n</sup> núcóo Yá táxi tnùn-í. <sup>3</sup> Te Yá-á<sup>n</sup> cáá-gá dàtná cáá yúú chàhchí yúú váha sã nání jǎspé, te càa tucu-gá dàtná cáá yúú váha sã nání còrnalíná, te ñùhu doco ñaha ì<sup>n</sup> cóo yáhnchí xii-gá, te tǎsa<sup>n</sup>-di dàtná tǎsa<sup>n</sup> ì<sup>n</sup> yúú váha sã nání èsmeraldá. <sup>4</sup> Te ní xiní tucu-í nùtnǐ ócó cúmí xilé váha ní càndéé núú núcóo-gá, te núú xilé-á<sup>n</sup> xǐnucóo ócó cúmí cue tée cùu sacuéhé te xǐxǐhnu-güedé mee-ni dóó cuixí<sup>n</sup>, te ì<sup>n</sup> caa coróná sã ñi cuáha mee-ni dǐhú<sup>n</sup> cuáá<sup>n</sup> xǐxúhu<sup>n</sup> dǐquí-güedé. <sup>5</sup> Te núú núcóo Yá táxi tnùn-í-á<sup>n</sup> sàá nduté, te càhá<sup>n</sup> ñùhu te xica chihí-xi dóndaha, te càyú úsá ití núú núcóo-gá, te sã úsá ití-á<sup>n</sup> xǐǎ<sup>n</sup> cùtnùn-í sã ndécú úsá espíritú cúú cuendá-gá. <sup>6</sup> Te ndècu ì<sup>n</sup> sã ndécú ndaa núú-gá te xǐǎ<sup>n</sup> cáá dàtná cáá làmár, te dàtná cáá vǐdriú cáá ñihí.

Te ñi càndéé dǐñi Yá núcóo-á<sup>n</sup> xǐnutnǐ cúmí quiti te titní víhí tinuu-güedi ndéé ndaa sátá-güedi ndihí ndaa núú-güedi. <sup>7</sup> Te quiti dǐhna nuu càa-di datná cáá ndìcaha, te quiti cùu uú cáá-dí dàtná cáá ndìcutu, te quiti cùu uní néhé-dí núú tǎe, te quiti cùu cúmí cáá-dí dàtná cáá yàcolo óré cuáhá<sup>n</sup>-di núú tàchí. <sup>8</sup> Te ndi cùmí quiti-á<sup>n</sup> ndéé ìñú ndíxí<sup>n</sup>-güedi ì<sup>n</sup> ì<sup>n</sup>-güedi, te ñihí xití ndíxí<sup>n</sup>-güedi ndihí ndaa sátá ndíxí<sup>n</sup>-güedi ndéé tinùu-güedi, te nduu nùu chíñùhu-güedi Yá Ndióxi, te xǎha<sup>n</sup>-güedi xii-gá:

Yòhó Dútú Ndióxi duca<sup>n</sup>-ni ta quide ndáá-n vǐxi, te duca<sup>n</sup>-ni quide ndáá-n cuéi vitna, te diu-ni duca<sup>n</sup> càda ndáá-n núú cuáhá<sup>n</sup> núú vǐxi,

te cùu-n Yá quidé nchàa-ndi túhú sã váha,



te diu-ni-n sà ndecu-n ndéé cútñàhá ní cuáha ñuyíú,

te diu-ni-n ndècu-n cuéi vitna, te diu-ni-n cùndecu-n cuéi ndéé núú cuáhá<sup>n</sup> núú vèxi.

Duha xàha<sup>n</sup> cuè quiti-á<sup>n</sup> xii Yaá núcõo núú xilé váha-á<sup>n</sup> chíñùhu ñaha-güedi.

<sup>9</sup> Te cue quiti-á<sup>n</sup> ïo ndàcá<sup>n</sup> táhú-güedi núú Yàá núcõo núú xilé váha-á<sup>n</sup> cuendá nchaa sá quidé-gã. Te Yaá-á<sup>n</sup> cúú-gã Yaá ndécú nchaa nduu nchaa quíú. Te cue quiti-á<sup>n</sup> cächí-güedi sá ïo càhnu cuu-gá te nèhe-güedi sá yíñùhu núú-gã. Te ndi tnahá òré duca<sup>n</sup> càhá<sup>n</sup>-güedi, <sup>10</sup> te ndi òcò cúmí cue téé cùu sacuéhé xñucóo-á<sup>n</sup> ngüñí xítí-güedě núú Yàá núcõo-á<sup>n</sup>, chi diu-gá cúú-gã Yaá ndécú nchaa nduu nchaa quíú te chíñuhu ñaha-güedé xii-gá, te tàva-güedé coróná ñúhú dǐquí-güedě te tàxi ndecu-güedé núú-gã, te xàha<sup>n</sup>-güedě xii-gá:

<sup>11</sup> Yòhó cúú-n Dütú Ndiõxí Yaá cúú cuendá ñáhá xii-ndí, te ío càhnu cuu-n, te ío váha quide-n, te nèhe-ndí sá yíñùhu núú-n, chi duca<sup>n</sup> tàú-xi cada-ndí, chi yòhó cúú-n Yàá ní cadúha nchaandi túhú sá ïó, te duca<sup>n</sup> ñí ngúndecu nchaa xǎ<sup>n</sup> chi mee-n dùca<sup>n</sup> ní sani iní-n càda-n.

## 5

*Cuendá Yaá cáá dàtná cáá ñ<sup>n</sup> mbéé quití ní dánícuèhé-güedé ndíhi cuendá ñ<sup>n</sup> tutú*

<sup>1</sup> Te ní xini tucu-í sá Yàá núcõo núú xilé váha-á<sup>n</sup> núndàha-gá ñ<sup>n</sup> tutú ní nacaúnuu xio ndaha cùha-gá, te ndéé lètrá ndàa sáta-xi ndíhi ndàa xítí-xi, te úsá tñáhá tutú líhli ñùhu seyú ndéé sáta tütú-á<sup>n</sup> cuendá sá vǎ dáñá-xí nàcaá. <sup>2</sup> Te ní xini-í ñ<sup>n</sup> espíritú xínú cuèchi núú Yǎ Ndiõxí, te ndee vñhi-xi te níhi càhá<sup>n</sup>-xi, te cächí-xi:

—¿Yoo tàú-xi xocàni nchaa tutú líhli ñùhu seyú ndéé sáta tütú-a te nadacáa-xi? —cächí espíritú-á<sup>n</sup>.

<sup>3</sup> Dico ní àndíu, te ní núú ñùyíú-a, te ní ndàa xítí ñuhu ñá túú ñ<sup>n</sup> ñáyíu tàú-xi

nadacáa tutú-á<sup>n</sup> te cundèhé-yu. <sup>4</sup> Te yúhú ní ngüíta-í ndàhyú vñhi-í cuendá sá ñà túú ní ñ<sup>n</sup> ñáyíu tàú-xi nadacáa tutú-á<sup>n</sup> cundèhé-yu. <sup>5</sup> Te ñ<sup>n</sup> cue téé cùu sacuéhé xñucóo xǎ<sup>n</sup> ñí cachí-güedé xii-í:

—Vá ndàhyú-gá-n, te cada cuendá-n chí Yaá ïo cùnuu cuu ndi mee cue ñáyíu cùu ñaní tñáhá ndíhi Jùdá, diu-ni Yaá cúú ñaní tñáhá ndíhi Dávíi, Yaá-á<sup>n</sup> cúú-gã Yaá ní ndacu ní yáha nchaa nándi sá ñí yáha, núu xǎ<sup>n</sup> diu-gá tàú-gá xocàni-gá nchaa tutú líhli ñùhu seyú ndéé sáta tütú-á<sup>n</sup> te nadacáa-gá —duha cächí téé cùu sacuéhé-á<sup>n</sup>.

<sup>6</sup> Te tnuú ndi òcò cúmí cue téé cùu sacuéhé xñucóo-á<sup>n</sup>, ndíhi tnuú ndi cùmí quiti xñnutñí-á<sup>n</sup>, ndíhi núú núcõo Yaá táxi tñuní-á<sup>n</sup> ñí xini-í nùtní ñ<sup>n</sup> Yaá cáá dàtná cáá ñ<sup>n</sup> mbéé quiti ní dánícuèhé-güedé te ní xihí-di ní cùu te ní ndoto-di, te ndéé úsá ndiqui-di, te ndéé úsá tinùu-di, te sá úsá tinùu-di-á<sup>n</sup> cùtnùní sá ndécú úsá espíritú cúú cuendá Yǎ Ndiõxí, duca<sup>n</sup> càa Yaá-á<sup>n</sup> ñí xini-í. Te cue espíritú-á<sup>n</sup> ñí tendaha-gã xícá cùu-xi ní caa xico ñuyíú. <sup>7</sup> Te Yaá cáá dàtná cáá ñ<sup>n</sup> mbéé quiti ní dánícuèhé-güedé-á<sup>n</sup> ñí sáhá<sup>n</sup>-gá núú Yàá núcõo núú xilé váha-á<sup>n</sup>.

<sup>8</sup> Te òré ní quehe<sup>n</sup>-gá tutú-á<sup>n</sup> te ndi cùmí quiti xñnutñí xǎ<sup>n</sup> ñí ngüñí xítí-güedi núú-gã, te duca<sup>n</sup> ñí ngüñí xítí tucu ndi òcò cúmí cue téé cùu sacuéhé xñucóo-á<sup>n</sup>, te ndi dǐí<sup>n</sup> núú-güedě xñnehe-güedé yaá sá nání àrpá, te xñnehe tucu-güedé ndí dǐí<sup>n</sup> núú-güedě ñ<sup>n</sup> caa tǐcùú ní cuáha mee-ni dǐhú<sup>n</sup> cuáá<sup>n</sup>, te chitu dǐsa sá sáhá<sup>n</sup> tñámí. Te ñúhmá dǐsa sá sáhá<sup>n</sup> tñámí-á<sup>n</sup> cúú-xí dàtná nchaa tñúhu càhá<sup>n</sup> nchaa ñáyíu ndècu ichi Yǎ Ndiõxí òré càhá<sup>n</sup> ndíhi ñáhá-yu xii-gá.

<sup>9</sup> Te xita-güedé ñ<sup>n</sup> ndudú sáa ndíhi cue quiti-á<sup>n</sup> chíñùhu ñaha-güedé xii-gá, te cächí-güedé ndíhi cue quiti-á<sup>n</sup>:

Yòhó tàú-n quehe<sup>n</sup>-n tutú-a te xocàni-n nchaa tutú líhli ñùhu seyú ndéé sáta-xi,

chi yòhó ní sati níñí-n te ní xihí-n, te cuendá xǎ<sup>n</sup> ní nduu cuendá Yǎ Ndiõxí cue ñáyíu ñ<sup>n</sup> ñ<sup>n</sup> nació<sup>n</sup>,

ndihi ñáyiú xĩndecu ì<sup>n</sup> ì<sup>n</sup> ñuú,  
ndihi ñáyiú càhá<sup>n</sup> ndí díí<sup>n</sup> ndí  
díí<sup>n</sup> núú tnùhu, ndihi ñáyiú  
xĩndecu ì<sup>n</sup> ì<sup>n</sup> xichi.

10 Te ní quidé-n-yu dàtná cue téé  
yìndaha ñáyiú, te ní quide  
tùcú-n-yu dàtná cue dútú sá  
cúú-xí Yá Ndiõxí.

Te sáá nduu te taxi tnùnì-yu ñuyíú-a.  
Duha càhá<sup>n</sup> cue téé-á<sup>n</sup> ndihi cue  
quiti-á<sup>n</sup> chíñùhu-güedé ndihi-güedi  
Yaá-á<sup>n</sup>.

11 Te sáta dúcá<sup>n</sup> te ní tecú dóho-í  
ní cáhá<sup>n</sup> cuéhé víhí espíritú xínú  
cuèchi ni candéé núú núcõo Yaá táxí  
tnùnì-á<sup>n</sup>, ndihi núú xĩnutnìí ndí cùmí  
cue quiti-á<sup>n</sup>, ndihi núú xĩnucóo cue téé  
cùu sacuéhé-á<sup>n</sup>, te ní xiní-í sá sùúní  
cuéhé víhí espíritú-á<sup>n</sup> xĩndecu xiá<sup>n</sup>,  
12 te níhi ní cáhá<sup>n</sup> cue espíritú-á<sup>n</sup>, te  
càchí-xi:

Yòhó Yaá cáá dàtná cáá ì<sup>n</sup> mbéé quiti  
ní dánìcuéhé-güedé te ní xihí ní  
cùu te ní ndoto,

te yòhó ío càhnu cuu-n, te ndècu  
ndihi-n nchaandi túhú,

te ío ndècu ndihi-n sá xiní tnùnì-n,  
te ndàcu-n quide-n nchaa sá cuìnì-n,  
te nèhe-ndí sá yíñùhu núú-n, te ío váha  
quide-n,

te chíñuhu ñaha-ndí xii-n, chi duca<sup>n</sup>  
tàú-ndí cada-ndí chi ío càhnu  
cuu-n.

Duha càchí nchaa cue espíritú-á<sup>n</sup>  
xáha<sup>n</sup>-xi xii-gá chíñùhu ñaha-xi.

13 Te ní tecú dóho-í ní cáhá<sup>n</sup>  
nchaandi túhú sá ñí cadúha Yá Ndiõxí  
ndécú àndíu, ndihi nchaa sá ndécú  
ñuyíú, ndihi nchaa sá ndécú xití ñuhu,  
ndihi nchaa sá ñuhú xití ndute làmár,  
te xicachí-xi:

Yòhó Yaá núcõo núú xilé váha, ndihi  
yòhó Yaá cáá dàtná cáá ì<sup>n</sup>  
mbéé quiti ní dánìcuéhé-güedé  
táxí tnùnì-ndó, te nèhe-ndí sá  
yíñùhu núú-ndó,

te duca<sup>n</sup> ío ndàcá<sup>n</sup> táhú-ndí núú-ndó,  
chi ío váha quide-ndo te ío  
cùnuu-ndo,

te diu-ni duha cáhá<sup>n</sup> váha-ndí  
cuèndá-ndó ñí caa ñí quíhí<sup>n</sup>.

Duha càchí nchaa sá ñí cadúha Yá  
Ndiõxí.

14 Te ndí cùmí cue quiti xĩnutnìí-á<sup>n</sup>  
càchí-güedi:

—¡Duca<sup>n</sup> na cùnduu! —cachí-güedi.

Te ndí òcò cùmí cue téé cùu sacuéhé  
xĩndecu-á<sup>n</sup> ñí ngüíñí xití-güedé  
chíñùhu-güedé Yaá ndécú nchaa nduu  
nchaa quíú.

## 6

### *Cuèndá úsá tutú ñhli ñùhu seyú*

1 Te sáta dúcá<sup>n</sup> te ní xiní-í sá  
Yáá cáá dàtná cáá ì<sup>n</sup> mbéé quiti ní  
dánìcuéhé-güedé-á<sup>n</sup> ñí xócání-gã ì<sup>n</sup>  
tutú ñhli ñùhu seyú ndéé sáta tütú sá  
ñí nadúcú<sup>n</sup> nuu-á<sup>n</sup>, te ní tecú dóho-í  
ní cáhá<sup>n</sup> ì<sup>n</sup> quiti cùmí xĩnutnìí-á<sup>n</sup>, te  
níhi ní cáhá<sup>n</sup>-di dàtná càhá<sup>n</sup> ñùhu, te  
càchí-di:

—¡Taquìxi cundehe-n! —cachí-di.

2 Te òré-ni-á<sup>n</sup> ñí xiní-í ì<sup>n</sup> cuàyú  
cuìxí<sup>n</sup> yódó ñàha ì<sup>n</sup> sá yódó ñàha xii-di,  
te sá yódó ñàha xii-di-á<sup>n</sup> néhé-xí ì<sup>n</sup>  
arcú sá cúú tnùxí-xi, te ní nduu  
táhú-xi ì<sup>n</sup> coròná, te ní ndacu-xi  
ní cunu-xi te duca<sup>n</sup>-ni ta cunu-xi  
cuáhá<sup>n</sup>.

3 Te òré ní xócání-gã tutú ñhli  
cùu uú ñùhú sèyú ndéé sáta tütú  
sá ñí nadúcú<sup>n</sup> nuu-á<sup>n</sup>, te ní tecú  
dóho-í ní cáhá<sup>n</sup> tucu ingá quiti cùu uú  
xĩnutnìí-á<sup>n</sup>, te càchí-di:

—¡Taquìxi cundehe-n! —cachí-di.

4 Te òré-ni-á<sup>n</sup> ñí xiní tucu-í ì<sup>n</sup> cuàyú  
tícuéhé ní quee-di cuáhá<sup>n</sup>-di, te yòdo  
ñàha ì<sup>n</sup> sá yódó ñàha xii-di, te sá yódó  
ñàha xii-di-á<sup>n</sup> ñí níhí-xi tnùhu ndee ìní  
sá dátìcánuu-xi ñáyiú vá cùndècu ndihi  
tnaha váha-gá-yu, te ngüíta ñáyiú  
cahni tnàhá-yu, te ní nduu táhú-xi ì<sup>n</sup>  
yuchí cáhnú vihi.

5 Te òré ní xócání tucu Yaá-á<sup>n</sup> ingá  
tutú ñhli cùu uní ñùhú sèyú ndéé sáta  
tütú sá ñí nadúcú<sup>n</sup> nuu-á<sup>n</sup>, te ní tecú  
dóho-í ní cáhá<sup>n</sup> quiti cùu uní xĩnutnìí  
xiá<sup>n</sup>, te càchí-di:

—¡Taquìxi cundehe-n! —cachí-di.

Te òré-ni-á<sup>n</sup> ñí xiní tucu-í ì<sup>n</sup> cuàyú  
tnúú te yòdo ñàha tucu ì<sup>n</sup> sá yódó ñàha  
xii-di, te sá yódó ñàha-á<sup>n</sup> núndàha-xi  
úú yaxi<sup>n</sup> libré. 6 Te ní tecú dóho-í ní

cáhá<sup>n</sup> ì<sup>n</sup> sá ñí cáhá<sup>n</sup> tnuú cue quiti xĩnutnĩ-á<sup>n</sup>, te cächí-xi:

—Ì<sup>n</sup> cuàrtú-nă triú níhí-ndó sã ì<sup>n</sup> dǐhú<sup>n</sup> denàriú, te úní cuàrtú-nă cebàdá níhí-ndó sã ì<sup>n</sup> tùcu dǐhú<sup>n</sup> denàriú, dico acítí ndihí ndudí ndéhé yoho yàha stilé chi vá ndíhí ñihnu — duha cächí sá cáhá<sup>n</sup>-á<sup>n</sup>.

<sup>7</sup> Te òré ní xócání tùcu Yaá-á<sup>n</sup> tutú lǐhli cùu cumí ñúhú sèyú ndéé sátá tütú sá ñí nadúcú<sup>n</sup> nuu-á<sup>n</sup>, te ní tecú tucu dóho-í ní cáhá<sup>n</sup> tucu íngá quiti cùu cumí xĩnutnĩ-á<sup>n</sup>, te cächí-di:

—¡Taquìxi cundehe-n! —cachí-di.

<sup>8</sup> Te òré-ni-á<sup>n</sup> ñí xiní tucu-í ì<sup>n</sup> cuàyú yàhá, te yòdo ñaha tucu ì<sup>n</sup> sá yódó ñaha xii-di, te sá yódó ñaha xii-di-á<sup>n</sup> nání-xí Sã xihí, te xiã<sup>n</sup> sáhní-xí ñáyiu, te sátá xiã<sup>n</sup> nchicú<sup>n</sup> sá nèhé núú ndécú ñáyiu ní xihí. Te cúmí xichi cùu ñuyíú, te sá sáhní ñaha xii ñáyiu-á<sup>n</sup> ñí níhí-xi tnúhu ndee ìní danàa-xi ñáyiu ì<sup>n</sup> xichi ñuyíú, te davá-yu cahni ñaha-xi ndihí yuchí, te cada-xi sá cóo tnámá te cuú-yu, te cada tucu-xi sá cóo cuéhé cahni-xi ñáyiu, te diu-ni tucu-xi cada sá ncháá quiti déé<sup>n</sup> cahni-di ñáyiu.

<sup>9</sup> Te òré ní xócání tùcu Yaá-á<sup>n</sup> tutú lǐhli cùu uhú<sup>n</sup> ñúhú sèyú ndéé sátá tütú sá ñí nadúcú<sup>n</sup> nuu-á<sup>n</sup>, te òré-á<sup>n</sup> ñí xiní-í nútnĩ ì<sup>n</sup> núú sácódó sã ndúú tǎhú Yá Ndiõxí, te ndàa caha xiã<sup>n</sup> ní xiní-í xĩndecu nchaa àlmá ñáyiu ní sahní-güedé núú ñuyíú sã cuendá tnúhu Yá Ndiõxí, ndihí sá cuendá sá ñí cáhá<sup>n</sup> váha-yu cuendá-gá. <sup>10</sup> Te nchaa àlmá-á<sup>n</sup> ñihí xĩcáhá<sup>n</sup>-xi, te xǎha<sup>n</sup>-xi xii Yá Ndiõxí:

—Yòhó Dútú Ndiõxí cúu-n Yàá ñá túú tnàhí cuéchi-xi, te ñá túú tnàhí queé cáva-n quide-n ì<sup>n</sup> sá cáhá<sup>n</sup>-n. ¿Te ná ndéé ama dandòho-n ñáyiu ndècu ñuyíú nachinaa-n cuendá sá ñí quide ñàhá-yu xii-ndí-i? —cächí cue àlmá-á<sup>n</sup> xǎha<sup>n</sup>-xi xii-gá.

<sup>11</sup> Te sátá dúcá<sup>n</sup> te nchaa cue àlmá ñáyiu-á<sup>n</sup> ñí níhí-xi dóó cuixí<sup>n</sup> ní queé cuĩhnu-xi, te ní xitnúhu ñaha xii-xi sá ná ndètatú-xi te cundetú tnaa-xi ndéé ná xĩnu cava cuú ñáyiu nàcuáa ndéé tnuní dàtná ní xihí cue ñáyiu dii àlmá-xi cùu-xi. Te ñáyiu sa ní xihí-á<sup>n</sup> ì<sup>n</sup>-ni cùu-yu ndihí ñáyiu vitna

cuú-á<sup>n</sup> chi mee-ni chiu<sup>n</sup> Xítóhó Jesucristú quidè-yu, te diu-ni ichi-gá ndécú-yu.

<sup>12</sup> Te òré ní xócání tùcu Yaá-á<sup>n</sup> tutú lǐhli cùu iñú ñúhú sèyú ndéé sátá tütú sá ñí nadúcú<sup>n</sup> nuu-á<sup>n</sup>, te ní xiní-í súúní ñihí ní quidi-xi ñuyíú, te ní cutnuu ñihí núú nchicanhii dàtná ì<sup>n</sup> dóó tnuú, te ní cuu tìcuéhé ñíhí ñihí núú yóó. <sup>13</sup> Te ní xiní-í ní ngoyo chódíní ñuyíú-a dàtná ngóyó ngúxí yíhí òré quéné tǎchí ñihí. <sup>14</sup> Te ní xiní-í ní nadúcú<sup>n</sup> nuu andiú dàtná nádúcú<sup>n</sup> nuu ì<sup>n</sup> tutú te ní ndóñúhú-xí, te nchaa tĩndúú ñí xica ndehe-xi núú ndécú-xí, te duca<sup>n</sup> ñí xica ndehe tucu nchaa tĩndúú yìchí ndécú xití ndute làmár. <sup>15</sup> Te nchaa cue tée yìndaha ñáyiu ní nguiváha-güedé, ndihí nchaa dava-gá cue tée ío tàxi tnuní, ndihí nchaa ñáyiu cuica, ndihí nchaa cue tée tàxi tnuní sandàdú, ndihí cue sandàdú cue tée ío váha sáa díquí-xi nàcuáa cada-güedé nàa-güedé, ndihí nchaa ñáyiu ñá túú tnàhí dàhá quee núú chíú<sup>n</sup> pàtróó<sup>n</sup>-xi, ndihí nchaa ñáyiu dàhá queé núú chiu<sup>n</sup> patróó<sup>n</sup>-xi.

Te dava ñáyiu-á<sup>n</sup> ñí nguiváha-yu xití yaú, te davá-yu ní nguiváha-yu nchaa tnuú cava. <sup>16</sup> Te xǎhǎ<sup>n</sup>-yu nchaa tĩndúú ndihí nchaa cava:

—Chí tǎcùu<sup>n</sup> chiváha ñaha-ndo xii-ndí cuendá sá vǎ quini ñáhá Yàá ío tàxi tnuní núcòo núú xilé váha, ndihí cuendá sá vǎ dándòho ñaha Yàá cáa dàtná cáa ì<sup>n</sup> mbéé quiti ní dánìcuéhé-güedé, chi Yaá-á<sup>n</sup> ío cùdéé<sup>n</sup>-gǎ núú-ndí —duha cächí nchaa ñáyiu-á<sup>n</sup> xǎhǎ<sup>n</sup>-yu xii nchaa tĩndúú-á<sup>n</sup> ndihí nchaa cava-á<sup>n</sup>.

<sup>17</sup> Te vitna ní sáa nduu ío cùu cahnu nduu tnúndòho tnúhu ndàhú, te vá yóo ì<sup>n</sup> cundee ìní-xi yáha nchaa tnúndòho-a.

## 7

### *Ñáyiu israél ñáyiu nanhí tǎhú*

<sup>1</sup> Te sátá xiã<sup>n</sup> te ní xiní-í cúmí tnàhá espíritú xínú cuéchi núú Yá Ndiõxí xĩnutnĩ-xi ndi cùmí xio ñuyíú, te cue espíritú-á<sup>n</sup> ñí ngani-xi tǎchí cuendá sá vǎ cuícó-gǎ-xi ni làmár, te

ni dǐquí yutnu, te ni ì<sup>n</sup> xichi ñuyíú vǎ cuícó-gǎ-xi. <sup>2</sup> Te cue espíritú-á<sup>n</sup> ndécú ndìhi-xi tnúhu ndee ìní danàa-xi sá ìó làmár ndìhi sá ìó ñuhu yìchí, te ní xini tucu-í ingá espíritú xínú cuèchi núú Yǎ Ndiòxí ní quee nchita-xi ndàa nacuáa quène nchícanhii, te nùndaha-xi seyú Yǎ Ndiòxí Yaá ndécú nchàa nduu nchaa quíú, te níhi ní cáhá<sup>n</sup>-xi xǎha<sup>n</sup>-xi xìi ndi cumí cue espíritú-á<sup>n</sup>:

<sup>3</sup> —Vǎ dánàa-ndo sá ìó làmár, te ni vǎ dánàa-ndo yutnu, te ni ì<sup>n</sup> sá ìó ñuyíú vǎ dánàa-ndo, chi cundet-ndo ndéé ná tàxi ndecu-ndí ì<sup>n</sup> sèñá tneé nchaa ñáyiú xínu cuechi núú Tǎtá-ó Dútú Ndiòxí —duha càchí espíritú-á<sup>n</sup> xǎha<sup>n</sup>-xi xìi ndi cumí espíritú xǐnutnǐi ndi cùmí xichi ñuyíú.

<sup>4</sup> Te ní tecú dóho-í ní cáhá<sup>n</sup> ì<sup>n</sup> sá ní cáhá<sup>n</sup>, te ní cachí-xi sá núú ndí ùxúú xichi cue ñáyiú isràél te ní xínu ì<sup>n</sup> cièndú údico cùmí mǐl-yu ní ngúndecu sèñá tneé-yu. <sup>5</sup> Te núú ì<sup>n</sup> cièndú údico cùmí mǐl ñáyiú-á<sup>n</sup>, te ní xínu úxúú mǐl cue ñaní tnáhá ndíi Jùdá ní ngúndecu sèñá tneé-yu, te úxúú mǐl cue ñaní tnáhá ndíi Rùbén, te úxúú mǐl cue ñaní tnáhá ndíi Gǎd, <sup>6</sup> te úxúú mǐl cue ñaní tnáhá ndíi Àsér, te úxúú mǐl cue ñaní tnáhá ndíi Neftàlì, te úxúú mǐl cue ñaní tnáhá ndíi Manàsés, <sup>7</sup> te úxúú mǐl cue ñaní tnáhá ndíi Mìó, te úxúú mǐl cue ñaní tnáhá ndíi Lèví, te úxúú mǐl cue ñaní tnáhá ndíi Isàcár, <sup>8</sup> te úxúú mǐl cue ñaní tnáhá ndíi Zabùlón, te úxúú mǐl cue ñaní tnáhá ndíi Chèé, te úxúú mǐl cue ñaní tnáhá ndíi Benjàmín, nchaandi túhú ñáyiú-á<sup>n</sup> ní ngúndecu sèñá tneé-yu.

#### *Cuéhé víhí ñáyiú ñihnu dóó cuixí<sup>n</sup>*

<sup>9</sup> Te sátá xǎ<sup>n</sup> te ní xini-í cuéhé víhí ñáyiú, ñáyiú ì<sup>n</sup> ì<sup>n</sup> nàció<sup>n</sup>, ndìhi ñáyiú ì<sup>n</sup> ì<sup>n</sup> ñúú, ndìhi ñáyiú càhá<sup>n</sup> ndi dǐ<sup>n</sup> ndí dǐ<sup>n</sup> núú tnúhu, ndìhi ñáyiú ní xíndecu ì<sup>n</sup> ì<sup>n</sup> xichi, te nchaa ñáyiú-á<sup>n</sup> xǐnutnǐi-yu ndàa núú Yàá táxi tnùnì núcòo núú xilé váha, ndìhi núú Yàá cáá dàtná cáá ì<sup>n</sup> mbéé quiti ní dánícuèhé-güedé, te vá yòo ì<sup>n</sup> ndàcu cahu ñaha xií-yu chi cuéhé víhí-yu,

te nchaá-yu xǐxǐhnu-yu mee-ni dǒó cuixí<sup>n</sup>, te nùndahá-yu nchaá-yu ì<sup>n</sup> caa ndàha yutnu ñúú. <sup>10</sup> Te nchaá-yu níhi xǐcáhá<sup>n</sup>-yu, te càchí-yu:

Yaá táxi tnùnì núcòo núú xilé váha cùu-gá Ndiòxí-ó,

te diu-gá ndìhi Yaá cáá dàtná cáá ì<sup>n</sup> mbéé quiti ní dánícuèhé-güedé ní dácácu ñihnu ñaha-gǎ xii-o núú ùhú núú ndàhú.

Duha càchí nchaa ñáyiú-á<sup>n</sup>. <sup>11</sup> Te nchaa espíritú xínú cuèchi núú Yǎ Ndiòxí ní nadúcú<sup>n</sup>ndéé-xi xǐnutnǐi-xi ní càndéé núú núcòo Yaá núcòo núú xilé váha, ndìhi núú xínucóo cue téé cùu sacuéhé, ndìhi cue ndi cùmí quiti xǐnutnǐi-á<sup>n</sup>, te nchaa-xi ní ngüñí xítí-xí te ní ngúnu ndeyi-xi núú Yàá núcòo núú xilé váha-á<sup>n</sup>, te nchaa-xi ní ngüíta-xi chǐñuhu ñaha-xi xii-gá, <sup>12</sup> te càchí-xi:

Na càhá<sup>n</sup> ndáá-ndí núú yòhó Tǎtá-ndí Dútú Ndiòxí sá ìó càhnu cuu-n, te ndàcu-n quide-n nchaa sá váha cuiní-n, te ìó váha quide-n, te ndècu ndìhi-n nchaa sá xini tnùnì-n,

te chǐñuhu ñaha-ndí xii-n, te duca<sup>n</sup> ndàcá<sup>n</sup> táhú-ndí núú-n cuèndá nchaa sá quidé-n, te nèhe-ndí sá yǐñùhu núú-n,

te tnúhu càhá<sup>n</sup>-ndí-a cùu-xi tnúhu ndáá, te diu-ni duha càhá<sup>n</sup>-ndí ndéé núú cuàhá<sup>n</sup> núú vèxi.

Duha càchí nchaa cue espíritú-á<sup>n</sup> xǎha<sup>n</sup>-xi xìi Yaá núcòo núú xilé váha-á<sup>n</sup>.

<sup>13</sup> Te ì<sup>n</sup> cue téé cùu sacuéhé xíndecu-á<sup>n</sup> ní xicá<sup>n</sup> tnúhú-dé núú-í, te càchí-dé:

—¿Yóndi cùu ñáyiú dàcá<sup>n</sup> xǐxǐhnu dóó cuixí<sup>n</sup>-á<sup>n</sup>, te ndéé véxi-yu núu dàcá<sup>n</sup> xǐndáá-yu-í? —càchí-dé.

<sup>14</sup> Te yúhú ní xáha<sup>n</sup>-í:

—Tǎtá, ñá túú xini-í, dico mee-n xini-n —duha ní xáha<sup>n</sup>-í xii-dé.

Te dàtnùnì ní cachí tnúhu-dé xii-í ná cúú ñáyiú-á<sup>n</sup>, te càchí-dé:

—Nchaa ñáyiú-a cùu-yu ñáyiú ní quee núú ìó víhí tnúhu ndòho tnúhu ndàhú sá vǎ cùndèe iní-ó te véxi-yu iha, te cùu-yu ñáyiú sa ní nduu ndoo ní nduu nine iní-xi cuèndá



sá nǐ sati níńí Yàá cáá dàtná cáá ìṣṣ mbéé quiti ní dánìcuèhé-güedé, cuèndá xǎ́ vitna ní ndihí-yu ní nduu cuixíṣ dódó xǐxǐhnu-yu. <sup>15</sup> Te núu xǎ́ vitna ní nduu táhǔ-yu ndécú-yu núu ndécú Yǎ Ndiòxí Yáá táxí tnùnì núcóo núu xilé váha, te cuèi nduu cuèi niú xínú cuèchí-yu núu-gǎ vitna, te diu-gǎ xító ñaha-gǎ xii-yu. <sup>16</sup> Te vitna ní sáá-yu núu-gǎ cundecú-yu te vá ndóhó-gǎ-yu docó, te ni vǎ quíní-gǎ-yu ndohó-yu yíchí-yu ndute, te ni vǎ quíní-gǎ-yu ndohó-yu cahni nchíanchii, te ñá túú-gǎ ná cahni ndohó-yu. <sup>17</sup> Te ducaṣ chi Yáá cáá dàtná cáá ìṣṣ mbéé quiti ní dánìcuèhé-güedé ndécú-gǎ núu nútñí xilé váha núcóo Yá Ndiòxí Yáá táxí tnùnì, Yáá-áṣ coto ñaha-gǎ xii-yu dàtná quidé ìṣṣ toli oré xító-dě mbéé-dě, te candeca ñaha-gǎ xii-yu quíhíṣ núu tóo ndute, te ndute-áṣ cúu-xí ndute candeca iní-yu, te Yá Ndiòxí cada-gǎ sá vǎ quíní-gǎ-yu tnúhu ndàhyú —duha ní cachí tnúhu téé cùu sacuéhé-áṣ xii-í.

## 8

### *Cuèndá tícuú sá nǐ cuáha mee-ni dǐhúṣ cuááṣ*

<sup>1</sup> Te sátá dúcáṣ te Yáá cáá dàtná cáá ìṣṣ mbéé quiti ní dánìcuèhé-güedé ní xócání-gǎ tutú líhli cùu usá ñuhú sèyú ndéé sátá tütú sá nǐ nadúcúṣ nuu-áṣ, te òré-áṣ nǐ cunahi sùúnì nàvii-nǎ ní cuu andiu dàtná cuádava òré. <sup>2</sup> Te ní xini-í úsá tñhá espíritú xínú cuèchi núu Yǎ Ndiòxí xǐnutñí-xi núu núcóo-gǎ, te ní níhí-xi ìṣṣ caa cütú xǐnehe-xi. <sup>3</sup> Te dàtnùnì ní xini tucu-í ñngá espíritú xínú cuèchi núu-gǎ ní quexìo-xi nehe-xi ìṣṣ tícuú ní cuáha mee-ni dǐhúṣ cuááṣ te ñuhu vai dúsa sá sàháṣ tñámí, te ní ngúnutñí espíritú-áṣ núu ndécú sǎ nǐ cuáha mee-ni dǐhúṣ cuááṣ núu sácódó sǎ ndúú táhú Yǎ Ndiòxí, te xǎ́ nútñí-xi ndàa núu-gǎ, te dúsa sá sàháṣ tñámí-áṣ cahmi espíritú-áṣ núu sácódó sǎ ndúú táhú-gǎ-áṣ cuèndá ñúhmá dǔsa-áṣ cundìhi-xi nchaa tnúhu càháṣ ñáyiú càháṣ ndihí ñaha xii-gǎ, nchaa ñáyiú cùu cuèndá-gǎ.

<sup>4</sup> Te nùndaha espíritú-áṣ tícuú ñuhú dǔsa sá sàháṣ tñámí càyú, te quène ñúhmá nútñí-xi núu Yǎ Ndiòxí, te ñúhmá-áṣ cundìhi-xi nchaa tnúhu càháṣ ñáyiú càháṣ ndihí ñaha xii-gǎ, nchaa ñáyiú cùu cuèndá-gǎ. <sup>5</sup> Te ní queheṣ espíritú-áṣ tícuú te ní dáchítú-xi ñuhú yódó núu sácódó sǎ ndúú táhú Yǎ Ndiòxí, te ní xiténuu-xi ñuyiú, te òré ducaṣ nǐ guide-xi te ní càháṣ víhí ñuhu, te ío dusaṣ nǐ guide-xi ñuyiú, te ní sáá nduté, te níhí víhí ní tñáa.

### *Ndi ùsá espíritú ní tíu-xi ìṣṣ caa cütú xǐnehe-xi*

<sup>6</sup> Te ndi ùsá cue espíritú xǐnehe ìṣṣ caa cütú-áṣ nǐ ngúndecu túha-xi cuèndá tíu-xi.

<sup>7</sup> Te espíritú dǐhna nuu nǐ tíu-xi cütú néhé-xí, te ñuyiú-a ní ngoyo ñíñi dàcánuu-xi ndihí ñuhú ndihí níńí, te luha-ná te cuu dava ñuyiú nǐ cáyú, te luha-ná te cuu dava tucu nchaa yutnu ío ñuyiú nǐ cáyú, te luha-ná te cuu dava tucu nchaa cùhú ío ñuyiú nǐ cáyú.

<sup>8</sup> Te espíritú cúu ùú ní tíu-xi cütú néhé-xí, te dàtná cáá ìṣṣ tǐndúú cáá ìṣṣ sá nǐ ngava xití làmár te nchìcúṣ ñuhú, te luha-ná te cuu dava ndute làmár-áṣ nǐ nduu-xi níńí. <sup>9</sup> Te luha-ná te cuu dava nchaa quiti xǐxúhuṣ xití làmár-áṣ nǐ xíhí-güedi, te luha-ná te cuu dava nchaa bàrcú ní quée naa-xi xití ndute.

<sup>10</sup> Te espíritú cúu ùnì ní tíu-xi cütú néhé-xí, te ní ngava ìṣṣ chódínì cáhnú ndéé andiu ñuyiú te nchìcúṣ ñuhú-di, te ñuhú-áṣ cáá dàtná cáá ñuhú iti. Te luha-ná te cuu dava nchaa yúte ní ngava chódínì-áṣ, te luha-ná te cuu dava tucu nchaa núu quèñihni ndute ní ngava-di. <sup>11</sup> Te chódínì-áṣ nánì-dí: Yúcú Úá. Te ndute xica nchaa yúte-áṣ ndihí nchaa ndute quèñihni-áṣ nǐ cuu úa-xi dàtná yúcú úá, te ío cuéhé ñáyiú ní xíhí sá dúcáṣ nǐ cuu úá ndute-áṣ.

<sup>12</sup> Te espíritú cúu cùmì ní dácàháṣ-xi cütú néhé-xí, te luha-ná te cuu dava nchíanchii ñá túú ní dàyehé-xi, te ducaṣ lùha-ná tucu cuu dava yóo ñà túú ní dàyehé-di, te ducaṣ lùha-ná

te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchíanchii, te duca<sup>n</sup> lùha-ná te cuu dava niú ñà túú ní dàyehé yóó ndihi nchaa chódíní.

<sup>13</sup> Te sátá dúcá<sup>n</sup> te ní xiní-í xícó ì<sup>n</sup> espíritú xínú cuèchi núú Yá Ndióxi núú tàchí, te ní tecú dóho-í níhi càhá<sup>n</sup>-xi, te càchí-xi:

—Ío ndàhú ndoho nchaa ñáyiu xíndecu ñuyíú òré ná dàcahá<sup>n</sup> úní-gá cue espíritú cúmání cútú xínehe-xi, chi sa xíndecu túha-ná-xi sá dácàhá<sup>n</sup>-xi!— duha càchí espíritú-á<sup>n</sup>.

## 9

<sup>1</sup> Te espíritú cúú ùhú<sup>n</sup> ní tíú-xi cútú néhé-xí, te òré-á<sup>n</sup> ní xiní-í ní quee ì<sup>n</sup> espíritú andíu te càa-xi datná cáá ì<sup>n</sup> chódíní, te ní ngava-xi ñuyíú, te ní níhí-xi ì<sup>n</sup> ndacaá néhé-xí cuèndá nacaá<sup>n</sup>-xi yuyèhe yaú cùnú víhí. <sup>2</sup> Te ní nacaá<sup>n</sup>-xi yaú-á<sup>n</sup> te ní ngúita-xi ní quene ñúhmá datná quéné ñúhmá ì<sup>n</sup> xítnú cáhnú víhi, te ní quene táchí ní xítenuu-xi ñúhmá-á<sup>n</sup> te ní sadí-xi núú nchíanchii, te ní cunee ñuyíú. <sup>3</sup> Te xítí ñúhmá-á<sup>n</sup> ní quene tíca làngóstá, te ní xítenuu-dí ñuyíú, te déé<sup>n</sup>-güedi datná déé<sup>n</sup> nchacua. <sup>4</sup> Te ní ngúndecu ndihi-güedi tnúhu ndee ìní cuèndá sá dándòho-güedi mee-ni ñáyiu ñà túú ndèé seña Yá Ndióxi tneé-xi, te ñà túú nà cada-dí nchaa yutnu ndihi nchaa cùhú. <sup>5</sup> Te ñà túú tnúhu ndee ìní ndécú ndihi-güedi sá cáhní-güedi ñáyiu, chi mee-ni sá dándòho ñaha-güedi xíi-yu úhú<sup>n</sup> yóó. Te òré ní ngúita-güedi dándòho ñaha-güedi xíi-yu te tàhú tnùhú núú dáquèe-güedi iñu-güedi datná quidé-xí núú dáquèe nchacua iñu-güedi. <sup>6</sup> Te ñáyiu-á<sup>n</sup> xìcá<sup>n</sup> táhú-yu sá ndíhi cuú-yu cuèndá sá Ío ndòhó-yu dàquèe ñaha nchaa quití-á<sup>n</sup> iñu-dí xíi-yu te ñà cuíní-xi cuú-yu, te ì<sup>n</sup> nduu ì<sup>n</sup> nduu sàni ìní-yu cuú-yu te ñà túú cuíní-xi cuú-yu chi ñà túú tnúhu xihí sá cúú-xí-yu.

<sup>7</sup> Te nchaa tíca làngóstá-á<sup>n</sup> xíndáa-güedi datná ndáa nchaa cuáyú cue téé cuáhá<sup>n</sup> nàa, te díquí-güedi

ñùhu ì<sup>n</sup> sá cáá datná cáá còroná ní cuáha mee-ni díhú<sup>n</sup> cuáá<sup>n</sup>, te núú-güedi càa datná cáá núú cuè téé. <sup>8</sup> Te idi díquí-güedi càa datná cáá ìdi díquí ñáyiu díhí, te núhu-güedi càa datná cáá núhu ndícaha. <sup>9</sup> Te yídúcú<sup>n</sup>nuu-güedi ì<sup>n</sup> sá cáá datná cáá càa, te ndíxí<sup>n</sup>-güedi quide-xi datná quidé-xí núú vèxi cuéhé víhí càrretá sá táñùhu cuáyú cuáhá<sup>n</sup>-güedé ndihi-güedi núú nàa-güedé. <sup>10</sup> Te ndèé iñu núú lùhmá-güedi datná ndèé iñu núú lùhmá nchacua, te iñu núú lùhmá-güedi-á<sup>n</sup> dáquèe-güedi ñáyiu dándòho ñaha-güedi xíi-yu, te duca<sup>n</sup>-ni càda-güedi dándòho ñaha-güedi xíi-yu ndèé xínu úhú<sup>n</sup> yóó. <sup>11</sup> Te nchaa tíca làngóstá-á<sup>n</sup> táxi tnùní ñáhá espíritú sá táxi tnùní yaú cùnú víhí, te espíritú-á<sup>n</sup> nání-xí Àbadón tnúhu hèbreú, te tnúhu grìégú nání-xí Àpolión, te ndi ndùú tnúhu-á<sup>n</sup> quée-xí: Sá dánàa ñáyiu.

<sup>12</sup> Te tnúndòho-a cuu-xi tnúndòho díhna nuu, te vitna cúmání úú-gá.

<sup>13</sup> Te espíritú cúú iñú ní tíú-xi cútú néhé-xí. Te núú Yá Ndióxi nútní ì<sup>n</sup> sá ní cuáha mee-ni díhú<sup>n</sup> cuáá<sup>n</sup> núú sácódó sá ndúú táhú-gá, te ndi cúmí xíquí-xi xíndecu ì<sup>n</sup> caa ndíqui, te ní tecú dóho-í ní cáhá<sup>n</sup> ì<sup>n</sup> sá ní cáhá<sup>n</sup> ni-hnu ndi cúmí ndíqui-á<sup>n</sup>. <sup>14</sup> Te sá càhá<sup>n</sup> nihnu ndíqui-á<sup>n</sup> xáha<sup>n</sup>-xi xìi espíritú cúú iñú sá ní tíú cútú-á<sup>n</sup>:

—Cuáhá<sup>n</sup> nandaxi-n ndi cúmí espíritú ndútú ndècu yúte càhnu nani Eúfratés —càchí sá càhá<sup>n</sup>-á<sup>n</sup> xáha<sup>n</sup>-xi xìi espíritú-á<sup>n</sup>.

<sup>15</sup> Te sátá dúcá<sup>n</sup> te ní nandaxí ndi cúmí cue espíritú-á<sup>n</sup> cuèndá cahni-xi cuéhé víhí ñáyiu, te sa yatni datná cuádava ñáyiu xíndecu ñuyíú cahni-xi, te duca<sup>n</sup> chi sa ndècu túha tnàhí cue espíritú-á<sup>n</sup> ndétú-xí sáa òré, àdi nduu, àdi yóó, àdi cuía duca<sup>n</sup> càda-xi cahni-xi ñáyiu. <sup>16</sup> Te ní xiní-í nchaa cue sandàdú cùndíhi-xi xixódó-güedé cuáyú, te ní níhí-í tnúhu sá xínu úú cièndú millón-güedé.

<sup>17</sup> Te duha xíndáa cue cuáyú-á<sup>n</sup> ndihi cue téé yòdo ñaha-á<sup>n</sup> ní xiní-í: Te cue téé-á<sup>n</sup> yídúcú<sup>n</sup> nuu ì<sup>n</sup> sá yídúcú<sup>n</sup>nuu pèchú-güedé, te luha

ticuèhé te luha cuì datná cuì andiu, te luha cuàá<sup>n</sup>, te ncha cuàyu-á<sup>n</sup> cáá dǐquí-güedi dàtná cáá dǐquí ndicaha, te yuhu-güedi quène ñuhú ndihí ñúhmá, ndihí àzufré nchìcú<sup>n</sup> ñuhú. <sup>18</sup> Te ío cuèhé ñáyu ñuyú ní xihí chi luha-ná te cudavá-yu ní xihí sá cuèndá ñuhú-á<sup>n</sup> ndihí ñúhmá-á<sup>n</sup> ndihí àzufré-á<sup>n</sup>. <sup>19</sup> Te ndihí núú lùhmá-güedi ndihí yuhu-güedi dàndoho-güedi ñáyu, te núú lùhmá-güedi nèhe-xi dǐquí cǒó, te ñu-ni dàtná cáá cǒó cáá ñihí lùhmá-güedi.

<sup>20</sup> Te ncha dava-gá ñáyu ní cácu ñá túú ní xihí núú nchàa tnúndòho-á<sup>n</sup> ñà túú ní cuìni-yu dàñá-yu ichi cuèhé ichi duha ndécú-yu, chi quide cahnu-ni-yu ncha espíritu cùndihí yucu ñávaha, ndihí ncha sá cǎchí-yu cùu ndióxí ní cadúha cue téé ñuyú-a, te dava xǎ<sup>n</sup> ní cuáha mee-ni dǐhú<sup>n</sup> cuàá<sup>n</sup>, te dava ní cuáha mee-ni dǐhú<sup>n</sup> cuixí<sup>n</sup>, te dava ní cuáha sá nání brǒncé, te dava ní cuáha mee-ni yúu, te dava ní cuáha mee-ni yùtnu, te ncha xǎ<sup>n</sup> ñá túú cùtnuní núú-xi, te ni ñà túú tècú dóho-xi, te ni ñà ndácú-xí càca-xi. <sup>21</sup> Te ni sǎ sǎhni tnahá-yu, te ni sǎ sǎhni ndùu tnahá-yu, te ni sǎ ndécú-yu ichi dǐí iní, te ni sǎ dúhú ndàchiu<sup>n</sup> tnahá-yu ñà túú ní cuìni-yu dàñá-yu.

## 10

*Ñ<sup>n</sup> espíritu xínu cuèchi núú Yǎ Ndiǒxí nèhé-xí ñ<sup>n</sup> librú*

<sup>1</sup> Te sǎtá dúcá<sup>n</sup> te ní xiní tucu-í ñ<sup>n</sup> espíritu cùnuu xinu cuechi núú Yǎ Ndiǒxí ní quee-xi andiu, te yìhi-xi xití vícú cuǎnguee-xi ñuyú te ndàa dǐquí-xi ndècu ñ<sup>n</sup> cóo yáhnchí, te núú-xi súuní chàhnchí dàtná chàhnchí núú nchìcanchii, te ndi ndùú dǐhí<sup>n</sup>-xi càa datná cáá itá ñuhú. <sup>2</sup> Te nùndaha-xi ñ<sup>n</sup> librú lǐhli ní nandíca, te sǎhá cùha-xi ní sani-xi núú ndute làmár, te sǎhá dàtni-xi ní sani-xi núú ñuhu yìchí. <sup>3</sup> Te espíritu-á<sup>n</sup> ñihí vǐhi ní cáhá<sup>n</sup>-xi, te ní quide-xi dàtná quidé ñ<sup>n</sup> ndicaha oré cánásaa-di, te òré duca<sup>n</sup> ñihí vǐhi ní cáhá<sup>n</sup>-xi te úsá xito ní cáhá<sup>n</sup> ñuhu. <sup>4</sup> Te sǎtá ñí yáha ní cáhá<sup>n</sup>

ñuhu-á<sup>n</sup> úsá xito, te chido tnùn-í ñ<sup>n</sup> núú tütú nàcuáa ní cáhá<sup>n</sup>-xi ní cùu, te meí òré-á<sup>n</sup> ñí tecú dóho-í ní cáhá<sup>n</sup> ñ<sup>n</sup> sǎ ñí cáhá<sup>n</sup> andiu te cǎchí-xi:

—Vá chídó tnùn-í nàcuáa ní cáhá<sup>n</sup> ñuhu-á<sup>n</sup>, iní mée-ni-n ná cùhu<sup>n</sup> — duha cǎchí sǎ ñí cáhá<sup>n</sup>-á<sup>n</sup>.

<sup>5</sup> Te espíritu sǎ nùtnǐ ñ<sup>n</sup> xio sǎhá-xi núú ndute làmár-á<sup>n</sup> ndihí ñngá xio sǎhá-xi núú ñuhu yìchí-á<sup>n</sup> ní xiní-í ní ndonehe-xi ndaha cùha-xi, <sup>6</sup> te cǎchí-xi:

—Yá Ndiǒxí Yáá ndécú nchàa nduu ncha quíú Yáá ní cadúha ñuyú, ndihí andiu, ndihí làmár, ndihí ncha sǎ ío, Yáá-á<sup>n</sup> nǎhá ndáá-gá sǎ yǐhú cáhá<sup>n</sup> ndáá-í, te vá cùyàa vǐhi <sup>7</sup> te cada-xi ncha nàcuáa ndùu tnúhu ndùu yuhu ní cáhá<sup>n</sup>-gá, tnúhu ní xáha<sup>n</sup>-gǎ xii cue téé ní xinu cuechi nùú-gǎ, cue téé ní xóo cáhá<sup>n</sup> tnúhu-gá ndéé sanaha, chi òré ná tǐu espíritu cùú úsá cútú nèhé-xí, te òré-á<sup>n</sup> cada-xi ncha nàcuáa ndùu tnúhu ndùu yuhu sǎ ñí xáha<sup>n</sup>-gǎ xii ncha cue téé-á<sup>n</sup> — duha cǎchí espíritu-á<sup>n</sup>.

<sup>8</sup> Te sǎtá dúcá<sup>n</sup> te ní tecú tucu dóho-í ní cáhá<sup>n</sup> tucu sǎ ñí cáhá<sup>n</sup> andiu-á<sup>n</sup>, te cǎchí-xi xii-í:

—Cuàhá<sup>n</sup> te quehe<sup>n</sup>-n librú lǐhli sǎ ñí nandíca nùndaha espíritu-á<sup>n</sup>, espíritu sǎ nùtnǐ ñ<sup>n</sup> xio sǎhá-xi núú ndute làmár, te ñ<sup>n</sup> xio sǎhá-xi núú ñuhu yìchí —duha cǎchí sǎ ñí cáhá<sup>n</sup>-á<sup>n</sup>.

<sup>9</sup> Te yúhú ní sǎhá<sup>n</sup>-í núú ndécú espíritu-á<sup>n</sup> xìcá<sup>n</sup>-í librú lǐhli nèhe-xi-á<sup>n</sup>, te ní cachí-xi:

—Iha te caxi-n, te cuvídí yuhu-n dàtná cúvídí òré xihí-n ndùdí ñúñú, dico xití-n chi cada úa-xi —cǎchí-xi.

<sup>10</sup> Te ní quehe<sup>n</sup>-í librú lǐhli nùndaha espíritu-á<sup>n</sup> ñí xexi-í, te yuhu-í ní quide vídí-xi dàtná vídí ndudí ñúñú, dico sǎtá ñí ngava-xi xití-í te ní quide úa-xi. <sup>11</sup> Te ní cachí tucu espíritu-á<sup>n</sup> xii-í:

—Dacutíí cǎhá<sup>n</sup> tucu-n nàcuáa cǎchí Yǎ Ndiǒxí cuèndá ñáyu titní vǐhí nàción, ndihí cuèndá ñáyu titní vǐhí ñúu, ndihí cuèndá ñáyu cáhá<sup>n</sup> ndí dǐí<sup>n</sup> ndí dǐí<sup>n</sup> núú tnúhu, ndihí cuèndá cue téé yìndaha ñáyu.

# 11

*Cuendá úú cue tée cãhá<sup>n</sup> nãcuáa cãchí Yã Ndiõxí*

<sup>1</sup> Te ní níhì-í ì<sup>n</sup> tnuyoo nãcuáa chicùhá-í ì<sup>n</sup> sá chícùhá-í, te ní cãhá<sup>n</sup> ì<sup>n</sup> sá ní cãhá<sup>n</sup>, te cãchí-xi:

—Ndacuíñí te chicùhá-n vèhe Yã Ndiõxí, te chicùhá tucu-n núú sácódó sã ndúú tãhú-gã, te cahu-n nã daha tnàhá ñáyiú chĩñuhu ñaha xii-gã xĩndecu. <sup>2</sup> Dico vá chícùhá-n ndãa quehé vehe-gã, chi xiá<sup>n</sup> ní nduu cuendá cue ñáyiú ñá túú cùu ñáyiú isràél, te ñáyiú-á<sup>n</sup> nduu nuu-nã-yu núú ní cuu ñuú-gã, te cadá-yu dàtná cãchí iní méé-yu, te údico úú yóó duca<sup>n</sup> càdá-yu. <sup>3</sup> Te yúhú tendaha-í úú tnàhá cue tée cãhá<sup>n</sup> yuhu-í nãcuáa cãchí Yã Ndiõxí, te úxúú ciendú únídico nduu duca<sup>n</sup> cãhá<sup>n</sup>-güedé yuhu-í cada-güedé núú-í, te cuihnu-güedé dóó tnúú sã sãcuñnu cue ñáyiú ndihú iní-xi — duha cãchí sã cãhá<sup>n</sup>-á<sup>n</sup>.

<sup>4</sup> Te ndi ndúú cue tée-á<sup>n</sup> cúu-güedé dàtná úú yutnu òlívú sã xĩnutnã núú Yã Ndiõxí, ndihì dàtná úú sã ndèé dité-xi, sã yĩndòdo ì<sup>n</sup> caa candíl núú dité-xi ndècu tucu núú-gã, te ñuú-gã cúu-gã Yaa yĩndàha ñuyú. <sup>5</sup> Te ñáyiú na càni iní-xi ná cada ñaha xii-güedé te yuhu-güedé quene ñuhú cahmi ñaha-xi xii-yu, te duca<sup>n</sup> càda-güedé cahni-güedé nchaa ñáyiú na cùu úhú iní ñáhã xii-güedé. <sup>6</sup> Te ndi ndúú-güedé ndécú ndihì-güedé tnúhu ndee iní cada-güedé sã vã cúú<sup>n</sup> dãú, te duca<sup>n</sup> càda-güedé ñini cãhá<sup>n</sup>-güedé nãcuáa cãchí Yã Ndiõxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyiú titní núú tnúhu ndòho, te duca<sup>n</sup> càda-güedé ná daha xito cãchí iní méé-güedé. <sup>7</sup> Te nã yãha sã cãhá<sup>n</sup>-güedé nãcuáa ní cachí Yã Ndiõxí, te dàvá-á<sup>n</sup> quene ì<sup>n</sup> quití déé<sup>n</sup> yàú cùnú víhí sã ìo nèhé cáá, te quití-á<sup>n</sup> ngũita-di nàá-di ndihì ndi ndúú cue tée-á<sup>n</sup> te cahni ñaha-di xii-güedé. <sup>8</sup> Te yiqui cùñú cue tée-á<sup>n</sup> cautùu-xi ì<sup>n</sup> tnuú ñuú cãhnú núu ní sahni-güedé Xitohó Jesucristú núú

cùrúxí, te ñuú Yaa-á<sup>n</sup> cúu Xitohó-ó ndihì-güedé, te cãchí ñáyiú sã ñuú-á<sup>n</sup> cúu-xi dàtná ñuú Sòdomá ndihì nació<sup>n</sup> Ègiptú. <sup>9</sup> Te úní nduu dava cautùu yiqui cùñú-güedé xiá<sup>n</sup>, te ñáyiú nchaa nació<sup>n</sup>, ndihì ñáyiú nchaa ñuú, ndihì ñáyiú cãhá<sup>n</sup> ndí ñuú ndí ñuú núú tnúhu, ndihì ñáyiú xĩndecu nchaa xichi quini-yu yiqui cùñú-güedé, te vá dàñã-yu nguĩndúxi. <sup>10</sup> Te nchaa ñáyiú-á<sup>n</sup> nduu vétú iní-yu sã dúcã<sup>n</sup> cúu cue tée cãhá<sup>n</sup> nãcuáa cãchí Yã Ndiõxí-á<sup>n</sup>, te ìo cudí iní-yu, te nãndí sã cuãha tãhú tnãhã-yu sã cúdí iní-yu sã dúcã<sup>n</sup> ní xihí-güedé, te duca<sup>n</sup> chi ñuú-güedé ní quide ìo ní ndohó-yu. <sup>11</sup> Te sátá ná yãhá úní nduu dava sã dúcã<sup>n</sup> cúu-güedé te Yã Ndiõxí dandòto ñaha-gã xii-güedé, te ndacóo-güedé, te nchaa ñáyiú na quini sã ndótó-güedé te yùhú víhí-yu. <sup>12</sup> Te ndi ndúú cue tée-á<sup>n</sup> tecú dóho-güedé cãhá<sup>n</sup> ì<sup>n</sup> sã cãhá<sup>n</sup> ndéé andiú, te cùñaha-xi xii-güedé:

—Chí táquene iha —duha cùñaha sã cãhá<sup>n</sup>-á<sup>n</sup> xii-güedé.

Te cue tée-á<sup>n</sup> quĩhu-güedé ì<sup>n</sup> xití vícò caa-güedé andiú, te nchaa ñáyiú cùu úhú iní ñáhã xii-güedé quini ñáhã-yu xii-güedé caa-güedé andiú. <sup>13</sup> Te òré-á<sup>n</sup> ñihì víhì tnãa ñuyú, te úxí xichi cùu-xi ñuú núú cùndècu-güedé-á<sup>n</sup> te ì<sup>n</sup> xichi ñuú-á<sup>n</sup> naa, te cuú úsã mĩ ñáyiú, te nchaa dava-gã ñáyiú cácu vá cùu yùhú víhí-yu, te cachí-yu sã ìo cãhnu cuu Yã Ndiõxí Yaa ndécú andiú.

<sup>14</sup> Te tnúndòho-a cuu-xi tnúndòho cuu úú yãha, te vitna sa ndètu vii-nã tucu sãá tnúndòho cuu úní.

*Espíritú cúu ùsã tíu-xi cútú nêhé-xi*

<sup>15</sup> Te espíritú cúu ùsã ní tíu-xi cútú nêhé-xi, te òré-á<sup>n</sup> ní tecú níhi ní cãhá<sup>n</sup> titní sã ní cãhá<sup>n</sup> andiú, te cãchí-xi:

Nchaa sã cúu cuendá nchaa ñáyiú ñuyú táxi tnúni-yu ní cùu ní nduu cuendá Tãtã-ó Dütú Ndiõxí táxi tnúni-gã,

Te tnàhá Yaa ní tendaha-gã ní sãhá<sup>n</sup> ñuyú táxi tnúni-gã nchaa xiã<sup>n</sup>, te ñuú-gã taxi tnúni-gã ní caa ní quihí<sup>n</sup>.



Duha ní cáhá<sup>n</sup> nchaa sá nǐ cáhá<sup>n</sup>-á<sup>n</sup>.  
 16 Te ndi òcò cùmí cue téé sacuéhé  
 xñucóo núú xilé váha ní ngüíñí  
 xítí-güedě núú Yá Ndiöxí, te ní nuu  
 núú-güedě ndàa núú ñúhú te ní  
 ngüíta-güedé chíñùhu ñaha-güedé  
 xii-gá,<sup>17</sup> te càchí-güedé:

Ío ndàcá<sup>n</sup> táhú-ndí núú yòhó Dútú  
 Ndiöxí,

Yaá ndácú quide nchaandi túhú sá  
 váha,

te ñu-ni-n ndècu-n ndéé cútnàhá  
 ní ngáva ñuyíú, te ñu-ni-n  
 ndècu-n vitna, te ñu-ni-n  
 cùndecu-n ndéé núú cuàhá<sup>n</sup>  
 núú vèxi,

te ío càhnu cuu-n te ní ngüíta-n ïo-gá  
 táxí tnùní-n.

18 Te nchaa ñáyiú xñdecu ñuyíú  
 xícudé<sup>n</sup>-yu núú-n,

te vitna ní sáá nduu dándohó-n-yu chi  
 ñá túú cùu váha iní-n nǔ-yu,

te cada ndáá-n cuèchi nchaa ñáyiú sa  
 ní xíhí,

te ní sáá tucu nduu cuñaha-n  
 sá ndúú táhú nchaa ñáyiú  
 ní xinu cuechi nǔú-n nǐ  
 cáhá<sup>n</sup>-yu tnúhu-n, ndihí nchaa  
 dava-gá ñáyiú cùu cuendá-n,  
 chi ñáyiú-á<sup>n</sup> néhě-yu sá yíñùhu  
 núú-n,

te cuèi ñáyiú cùnnu ndihí ñáyiú ñá  
 túú cùnnu cuñaha-n sá ndúú  
 táhú-yu,

te ní sáá tucu nduu dànaa-n nchaa  
 ñáyiú sàhni tnaha ñáyiú-xi.

Duha càchí ndi òcò cùmí cue téé  
 sacuéhé-á<sup>n</sup> xáha<sup>n</sup>-güedě xii Yá Ndiöxí.

19 Te ní xiní-í ní nacaá<sup>n</sup> yuyèhe vehe  
 Yá Ndiöxí andi, te xítí vehe-gá-á<sup>n</sup>  
 nǐ xiní-í ndécú càjá ñúhú sá yódó  
 tnùní nàcuáa ní cundáa cada-gá sá  
 cúú-xí ñáyiú, te òré-á<sup>n</sup> nǐ xiní-í ní sáá  
 ndúté, te ní cáhá<sup>n</sup> ñúhu te ío dusa<sup>n</sup> nǐ  
 quide-xi, te níhi vìhi ní tnáa, te súúni  
 càhnu dáú ñíñí nǐ cuu<sup>n</sup>.

## 12

*Cuendá ññadìhí ndihí cuendá ññ quití  
 déé<sup>n</sup> nání dràgón*

1 Te ío vìhi ní quide-xi ññ sá nǐ  
 quide-xi andi, te ní xiní-í ññ ñadìhí te  
 dóo níhnú-á<sup>n</sup> quide-xi datná quidé-xí

nǔú nchìcanchii, te ndàa núú sàhá-a<sup>n</sup>  
 quide-xi datná quidé-xí nǔú yóó, te  
 ñùhu ññ coroná díquí-a<sup>n</sup> te ndèé úxúú  
 chódíní.

2 Te ñùhu déhe-a<sup>n</sup> te càna  
 saa-a<sup>n</sup> sá quidé ùhú ñhá-xí xii-a<sup>n</sup>  
 chí sa ndètu vii-nǎ cacu déhe-a<sup>n</sup>.

3 Te dàtnùní ní quide tucu-xi sá nǐ  
 quide-xi andi, te ní xiní-í ññ quití  
 càhnu quití ticuehé, quití déé<sup>n</sup> nání  
 dràgón, te ndèé úsá díquí-di ndihí úxí  
 ndiqui-di, te ññ caa coroná ñúhú ññ  
 caa díquí-di-á<sup>n</sup>.

4 Te quití-á<sup>n</sup> luha-ná  
 te cuu dava nchaa chódíní dàngòyo-di  
 ñuyíú ndihí lúhmá-di, te quití-á<sup>n</sup> nǐ  
 ngúnu tní-di núú ñaha ndètu vii-nǎ  
 cacu déhe-xi-á<sup>n</sup> cuendá caxi-di déhe-a<sup>n</sup>  
 òré cacu nǐ cùu.

5 Te ñaha-á<sup>n</sup> nǐ cacu  
 déhe-a<sup>n</sup> te téé cùu-dé, te té líhli-á<sup>n</sup> ïo  
 cunuu-dě taxi tnùní-dé nchaa ñáyiú  
 ñuyíú, te mee Yá Ndiöxí ní nacuaca  
 ñaha-gá xii té líhli-á<sup>n</sup> cuendá cundecu  
 ndihí ñaha-dě xii-gá núú ndécú-gá  
 táxí tnùní-gá.

6 Te ñadìhí-á<sup>n</sup> nǐ xinu-a<sup>n</sup>  
 cuàhá<sup>n</sup>-a<sup>n</sup> xítí yucu núú nǐ quide túha  
 Yá Ndiöxí cundecu-a<sup>n</sup> cuendá xía<sup>n</sup>  
 níhí-a<sup>n</sup> caxi-a<sup>n</sup>, te duca<sup>n</sup> níhí-a<sup>n</sup> sá  
 caxí-á<sup>n</sup> ùxúú cièndú únídico nduu chi  
 duca<sup>n</sup> nduu cundecu-a<sup>n</sup> xía<sup>n</sup>.

7 Te sátá dúcá<sup>n</sup> te andi nǐ xiní-í  
 espíritú cùnnu xinu cuechi núú Yá  
 Ndiöxí nání Miguél, ndihí nchaa  
 dava-gá espíritú cundìhí-xi, te nchaa  
 espíritú-á<sup>n</sup> nàa-xi ndihí quití déé<sup>n</sup>  
 nání dràgón ndihí nchaa espíritú  
 cundìhí-di.

8 Te quití-á<sup>n</sup> ñá túú  
 ní ndàcu-di ndihí nchaa espíritú  
 cundìhí-di, te ñá túú ní níhí-gá-di núú  
 cundècu-di andi ndihí nchaa espíritú  
 cundìhí-di-á<sup>n</sup>.

9 Te cue espíritú xínú  
 cuèchi núú Yá Ndiöxí-á<sup>n</sup> nǐ dàngává-xí  
 quití déé<sup>n</sup> nání dràgón-á<sup>n</sup> ndihí nchaa  
 espíritú cundìhí-di ñuyíú, te quití-á<sup>n</sup>  
 cúú-dí mèi sácúhna àdi sá càchí-ó cùu  
 yucu ñávaha, te ñu xía<sup>n</sup> ní dándàhú-xi  
 ñáyiú níhí ñuyíú, te ñu-ni xía<sup>n</sup> ní  
 nduu-xi cóo nǐ dándàhú-xi ñáyiú ndéé  
 sanaha.

10 Te ní tecú dóho-í níhi ní cáhá<sup>n</sup>  
 tucu ññ sá ní cáhá<sup>n</sup> andi, te càchí-xi:

—Vitna te Yá Ndiöxí ní quide-gá ní  
 ngúndecu ñáyiú ndihí-gá, te ío càhnu

cuu-gá, te ío tàxi tnuní-gá, te tnàhá Cristú Yaá ní tendaha Yă Ndiǒxí ní quixi ñuyíú-a ío tàxi tnuní-gá, te duca<sup>n</sup> chi sa ní xócuíñí sácuíhná sã sũúni nùnúu sacá<sup>n</sup> cuéchi núú Tătá-ó Dűtú Ndiǒxí cuendá nchaa ñáyíu ndècu ndihí-o ichi-gá, te nduu niú duca<sup>n</sup> sàcá<sup>n</sup> cuéchi-xi núú-gă cuendá-yu ni cùu. <sup>11</sup> Dico ní ndacu-yu ní cunúu-yu núú sácuíhná sã dúcá<sup>n</sup> sàcá<sup>n</sup> cuéchi cuendá-yu-á<sup>n</sup> ní cùu, te duca<sup>n</sup> ní cunúu-yu sá cuendá Yaá cáá dàtná cáá ñ<sup>n</sup> mbéé quiti ní dánícuèhé-güedé, chi Yaá-á<sup>n</sup> ñí sati níñí-gă te ní xíhí-gá sá cuendá-yu, te duca<sup>n</sup> ñí cunuu tucú-yu sá cuendá sá sàndáá iní ñáhă-yu xii Yaá-á<sup>n</sup>, te ñá túú ní yùhú-yu cuú-yu sá cuendá-gá. <sup>12</sup> Te vitna ío chí cúdí ñí nchaa nchòhó espíritú xínú cuéchi núú Yă Ndiǒxí, ndihí nchaa nchòhó ñáyíu ndècu andíu, dico ñndàhú ní cuu nchaa ñáyíu xĩndecu ñihí ñuyíú! Chi sũúni cùdéé<sup>n</sup> sácuíhná ñí ngava-xi te nándi cada ñaha-xi xii-yu, te duca<sup>n</sup> chi cùtnuní iní-xi sá sàcú duha-ná nduu cudí-xi cundecu-xi —duha cächí sá ní cáhá<sup>n</sup> andíu.

<sup>13</sup> Te sátá ñí quee quiti déé<sup>n</sup> nání dràgón-á<sup>n</sup> andíu ñí ngava-di ñuyíú quiti cùu mei sácuíhná-á<sup>n</sup>, te quiti-á<sup>n</sup> ñí chinchícú<sup>n</sup>-di ñadìhí ñaha ní cacu déhe téé-xi-á<sup>n</sup>. <sup>14</sup> Te ñadìhí-á<sup>n</sup> ñí nduu táhú-a<sup>n</sup> ní quene úú ndíxí-a<sup>n</sup>, te càa datná cáá ndíxí<sup>n</sup> ñ<sup>n</sup> yacòlo cahnu vihi cuendá ndava-a<sup>n</sup> núhú-a<sup>n</sup> yucu núú ñí cachí Yă Ndiǒxí cundecu-a<sup>n</sup>, te yàcá<sup>n</sup> cundecu-a<sup>n</sup> úní cuíá dava cuendá sá vă ñihí ñáhá quiti déé<sup>n</sup> quiti nani dragón-á<sup>n</sup> te xíá<sup>n</sup> ñíhí-a<sup>n</sup> sá cáxí-á<sup>n</sup>, te quiti-á<sup>n</sup> cúú tucu-di datná ñ<sup>n</sup> cóo déé<sup>n</sup>. <sup>15</sup> Te quiti-á<sup>n</sup> ñí quene cuéhé ndute yuhu-di, te ndute ní quene yuhu-di-á<sup>n</sup> ñí cuu-xi ñ<sup>n</sup> yúte, te duca<sup>n</sup> ñí quide-di cuendá ndute-á<sup>n</sup> cuido-xi ñadìhí-á<sup>n</sup> ní cùu. <sup>16</sup> Te ñuhu yíchí ní chindee-xi ñadìhí-á<sup>n</sup>, chi ní ndátá te ní quée naa-ni ndute ní quene yuhu quiti-á<sup>n</sup>. <sup>17</sup> Te sá dúcá<sup>n</sup> ñí quide-xi xíá<sup>n</sup> ní cudéé<sup>n</sup> víhí quiti-á<sup>n</sup> nũú ñadìhí-á<sup>n</sup>, te ní xica-di cuáhá<sup>n</sup>-di núú xĩndecu nchaa dava-gá cue déhe ñadìhí-á<sup>n</sup> cuendá nàá ndihí ñaha-di, te

ñáyíu-á<sup>n</sup> cúú-yu ñáyíu tní nchaa tnúhu càhá<sup>n</sup> Yă Ndiǒxí, te nchícú<sup>n</sup> ñihnú-yu nchaa tnúhu sá càhá<sup>n</sup> váha cuendá Xítóhó Jesucristú.

## 13

### *Cuendá úú quiti*

<sup>1</sup> Te yúhú ní ngúnu tní-í yuhu làmár, te ní xiní-í ní quene ñ<sup>n</sup> quiti te ndéé úsá díquí-di te úxí ndíquí-di, te núú ñ<sup>n</sup> ñ<sup>n</sup> ndíquí-di-á<sup>n</sup> ndécú ñ<sup>n</sup> caa coroná. Te ñ<sup>n</sup> ñ<sup>n</sup> díquí-di-á<sup>n</sup> ndéé tnúhu sá càhá<sup>n</sup> úhú-xi cuendá Yă Ndiǒxí. <sup>2</sup> Te quiti-á<sup>n</sup> cáá-dí dàtná cáá cuíñí, te sáhá-di càa datná cáá sáhá òso, te yuhu-di càa datná cáá yùhu ndicaha. Te quiti déé<sup>n</sup> nání dràgón ní sáñaha-di tnúhu ndee ñí xii quiti-á<sup>n</sup> cuendá taxi tnuní víhí-dí, te dràgón-á<sup>n</sup> ñí sáñaha-di nũú ndécú-dí tàxi tnuní-di xii quiti ní quene xití làmár-á<sup>n</sup>, te duca<sup>n</sup> ñí quide-di cuendá sá ñihí ndéé quiti-á<sup>n</sup> cunuu-di. <sup>3</sup> Te ñ<sup>n</sup> díquí quiti ní quene xití làmár-á<sup>n</sup> càhú víhí càa ní nícuèhé, te sa ndètu vii-nă cuú-di sànuu dico ní ndúha-di, te ñihí ñuyíú ñí ñihí ñáyíu tnúhu sá dúcá<sup>n</sup> ñí cuu, te ío ní cuñúhu-yu te ní tuhá-yu quiti-á<sup>n</sup>. <sup>4</sup> Te nchaa ñáyíu-á<sup>n</sup> ñí cachí-yu sá ío càhnu cuu quiti déé<sup>n</sup> quiti nani dragón-á<sup>n</sup> cuendá sá ñí sáñaha-di tnúhu ndee ñí sá táxí tnuní quiti ní quene xití làmár-á<sup>n</sup>, te ní ngũíta-yu ní chiñuhú-yu quiti ní quene xití làmár-á<sup>n</sup>, te cächí-yu:

—Vă yõo ñ<sup>n</sup> nũtnahá ñáhá xii quiti-a, te ñí vă yõo ñ<sup>n</sup> ndacu nàá ndihí ñaha xii-di —cachí-yu.

<sup>5</sup> Te ní níhí-di tnúhu ndee ñí sá càhá<sup>n</sup> úhú-di Yă Ndiǒxí, te cada càhnu-di mee-di, te údico úú yóo duca<sup>n</sup> ñí níhí-di tnúhu ndee ñí-á<sup>n</sup> cunuu-di. <sup>6</sup> Te duca<sup>n</sup> ñí quide-di ní cáhá<sup>n</sup> úhú-di Yă Ndiǒxí ndihí cuendá nchaa sá quidé-gă, te diu-ni duca<sup>n</sup> ñí cáhá<sup>n</sup> úhú-di núú ndécú-gă, te ní cáhá<sup>n</sup> úhú tucu-di nchaa ñáyíu ndècu ndihí-gá andíu. <sup>7</sup> Te duca<sup>n</sup> ñí níhí-di tnúhu ndee ñí sá nàá-di ndihí nchaa ñáyíu cùu cuendá Yă Ndiǒxí, te duca<sup>n</sup> nàá ndihí ñaha-di xii-yu ndéé òré vá

ndácú-gă-yu nàá ndihî ñàhá-yu xii-di, te tnàhá ní ngúndecu ndihî-di tnúhu ndee ìní sá táxí tnùnî-di ñáyîu nchaa nàció<sup>n</sup>, ndihî ñáyîu nchaa ñuú, ndihî nchaa ñáyîu càhá<sup>n</sup> ndí díí<sup>n</sup> ndì díí<sup>n</sup> nùú tnúhu, ndihî ñáyîu xĩndecu nchaa xichi. <sup>8</sup> Te cue ñáyîu nihî ñuyíú nĩ cachí-yu sá ïo càhnu cuu quitî-á<sup>n</sup>, te ñáyîu-á<sup>n</sup> cúú-yu ñáyîu ñá túú yòdo tnunî núú tûtú Yaa cáá dàtná cáá ìí<sup>n</sup> mbéé quitî ní dánicuéhé-güedé Yaa ní xihî ní cùu te ní ndoto. Te ndéé cùtnàhá ní ngáva ñuyíú sa yòdo tnunî ñáyîu naníhî tàhú, dico ñáyîu càchí sá ïo càhnu cuu quitî-á<sup>n</sup> ñà túú yòdo tnunî-yu núú tûtú-gá.

<sup>9</sup> Te nchaa nchòhó ñáyîu xĩndedóho chí cùndedóho váha nchaa nàcuáa cuáhá<sup>n</sup> tnúhu-á<sup>n</sup>. <sup>10</sup> Te nchaa ñáyîu na chihi tnaha ñáyîu-xi vecaá te sáá nduu te quíhî<sup>n</sup>-yu tnàhá-yu vecaá, te nchaa ñáyîu sàhni tnaha ñáyîu-xi ndihî yuchí te ñiu-ni ndihî yuchí cuú-yu tnàhá-yu, te xíá<sup>n</sup> nùu ío xini ñuhu-xi sá ncháá ñáyîu cùu cuendá Yá Ndiòxí cunduu càhnu iní-yu, te quĩndáá iní ñáhă-yu xii-gá.

<sup>11</sup> Te ní xiní tucu-í ingá quitî ní quene-di núú ñuhu yìchí, te ndéé úú ndiqui-di te càa datná cáá ndiqui canerú, te càhá<sup>n</sup>-di dàtná càhá<sup>n</sup> quitî déé<sup>n</sup> nání drágón. <sup>12</sup> Te dàtná ndécú ndihî quitî ní quene xití làmár-á<sup>n</sup> tnúhu ndee ìní sá táxí tnùnî-di duca<sup>n</sup> ndècu ndihî quitî ní quene ñuhu yìchí-á<sup>n</sup> tnúhu ndee ìní taxi tnùnî-di cada-di núú quitî ní quene xití làmár-á<sup>n</sup>, te quitî ní quene ñuhu yìchí-á<sup>n</sup> nĩ quide yica-di sã ncháá ñáyîu xĩndecu nihî ñuyíú chiñuhú-yu quitî ní quene xití làmár-á<sup>n</sup>, quitî càhú víhí nĩ tnahá ní nícuèhé te ní ndúha-di. <sup>13</sup> Te quitî ní quene xití ñuhu yìchí-á<sup>n</sup> nĩ quide-di titní núú sã vã yòo tnàhî ndàcu cada, te nchaa ñáyîu ní xiní-yu sá ndéé andiu nĩ dányóyó-dí ñuhú ñuyíú. <sup>14</sup> Te sá dúcá<sup>n</sup> nĩ ngúndecu ndihî-di tnúhu ndee ìní ní quide-di nchaa xíá<sup>n</sup> ní quide-di núú quitî ní quene xití làmár-á<sup>n</sup>, te sá dúcá<sup>n</sup> nĩ quide-di te xíá<sup>n</sup> ní dándàhú-di

nchaa ñáyîu xĩndecu nihî ñuyíú, te ní xáha<sup>n</sup>-di xii-yu sá ndúcú-yu ìí<sup>n</sup> sá cadúha-yu nàcuáa-ni càa nacuáa-ni nduu quitî ní quene xití làmár-á<sup>n</sup>, quitî càhú víhí nĩ tnahá ní nícuèhé díquí-xi-á<sup>n</sup> nĩ quée machití te ñá túú ní xihî-di chí ní xĩndecu-ni-di. <sup>15</sup> Te quitî ní quene xití ñuhu yìchí ní ngúndecu ndihî tucu-di tnúhu ndee ìní sá chíhí-dí ìní sá nĩ cadúha-yu-á<sup>n</sup>, sá nĩ natavá-yu dàtná cáá quitî ní quene xití làmár-á<sup>n</sup>, te duca<sup>n</sup> nĩ quide quitî-á<sup>n</sup> cuendá càhá<sup>n</sup> sá nĩ cadúha-yu-á<sup>n</sup>, te xíá<sup>n</sup> cada-xi cuú nchaa ñáyîu ñá túú ní cuíní chiñuhu ñaha xii-di. <sup>16</sup> Te quitî ní quene xití ñuhu-á<sup>n</sup> quidé-dí sã ncháá ñáyîu ngúndéé ìí<sup>n</sup> tnunî ndaha cùhá-yu àdi tneé-yu, te duca<sup>n</sup> nĩ quide-di cuèi ñáyîu cùnuu te cuèi ñáyîu ñá túú cùnuu, te cuèi ñáyîu cuica te cuèi ñáyîu ndàhú, te cuèi ñáyîu ñá túú dàñá quee núú chíú<sup>n</sup> pàtróó<sup>n</sup>-xi, te cuèi nchaa ñáyîu dàñá quée núú chíú<sup>n</sup> pàtróó<sup>n</sup>-xi ncháá-yu duca<sup>n</sup> nĩ ngúndéé tnunî ñíí-yu. <sup>17</sup> Te ní quide-di sá ncháá ñáyîu ñá túú ndéé tnunî ñíí-xi vã cúú cuáá<sup>n</sup>-yu sá càchí iní-yu te ní vã cúú dícó-yu ìí<sup>n</sup> sá cuíní-yu dícó-yu, te tnunî-á<sup>n</sup> cúú-xí ñiu quitî ní quene xití làmár-á<sup>n</sup> àdi númerú-di. <sup>18</sup> Te xini ñuhu-xi sá ncháá ñáyîu ío váha cùtnunî iní-xi ío váha cuáha-yu cuendá nàcuáa quèe-xi númerú quitî-á<sup>n</sup>, te númerú-á<sup>n</sup> cúú-xí ñnú ciendú únídico ñnú, te cùu-xi cuendá ìí<sup>n</sup> ñáyîu ñuyíú.

## 14

### *Cuendá ìí<sup>n</sup> ciendú údico cúmí mĩ ñáyîu*

<sup>1</sup> Te sátá dúcá<sup>n</sup> te ní xiní-í Yaa cáá dàtná cáá ìí<sup>n</sup> mbéé quitî ní dánicuéhé-güedé nútñî-gá ìí<sup>n</sup> yucu ñuú nání Sión ndécú àndiu, te nutñî-gá ndihî ìí<sup>n</sup> ciendú údico cúmí mĩ ñáyîu, te tneé-yu ndéé ñiu-gá ndihî ñiu tátá-gă Dútú Ndiòxí. <sup>2</sup> Te ní tecú dóho-í ní quide-xi andiu dàtná quidé-xi núú xíca cuèhé víhí ndùte, te quide tucu-xi datná quidé-xi òré níhî víhi cahá<sup>n</sup> ñúhu, te quide tucu-xi datná quidé-xi òré cuèhé víhí ñáyîu

càní-yu àrpá. <sup>3</sup> Te ní tecú dóho-í xǐxita yuhu sǎ xítá yùhu núú Yàá núcõo núú xilé váha, ndìhi núú ndi cùmi cue quitì xǐnutnì-á<sup>n</sup>, ndìhi núú nchàa cue tée cùu sacuéhé xǐnucóo-á<sup>n</sup>, te xǐxita-xi ì<sup>n</sup> ndudú sáá. Te mee-ni cuè ñáyiú ì<sup>n</sup> ciendú údico cùmí mǐl-á<sup>n</sup> quèe díquí-yu ndudú-á<sup>n</sup>, te ñáyiú-á<sup>n</sup> cùú-yu ñáyiú ní dácäcu nihnu ñaha Yàá cáá dàtná cáá ì<sup>n</sup> mbéé quitì ní dánicuéhé-güedé núú ñáyiú ndècu ichi cuéhé ichi duha xǐndecu ñuyíú, te vá yõo ì<sup>n</sup>-gá quèe díquí-xi ndudú sáá-á<sup>n</sup> chi mee-ni ñáyiú ní cácu nihnu-á<sup>n</sup> quèe díquí-yu. <sup>4</sup> Te ñáyiú ní cácu nihnu-á<sup>n</sup> cùú-yu ñáyiú ñá túú ní xǐndecu ichi díí ìní, te cùú-yu ñáyiú càndoo canine iní-xi, te ndèni ní cuu cuáhá<sup>n</sup> Yaá cáá dàtná cáá ì<sup>n</sup> mbéé quitì ní nícuéhé-á<sup>n</sup>, te duca<sup>n</sup>-ni ndëndaha ñàhá-yu xii-gá cuáhá<sup>n</sup>, te ñáyiú-á<sup>n</sup> ní cácu nihnú-yu núú nchàa ñáyiú ñuyíú, ñáyiú ndècu ichi cuéhé ichi duha, te ñáyiú ní cácu nihnu-á<sup>n</sup> cùú-yu ñáyiú díhna nuu ñi nduu táhú Yǎ Ndiõxí cuu cuendá-gá ndìhi Yaá cáá dàtná cáá ì<sup>n</sup> mbéé quitì ní dánicuéhé-güedé. <sup>5</sup> Te cùú-yu ñáyiú ñá túú càhá<sup>n</sup> ni ì<sup>n</sup> tnúhu ndehnde, te càndoo canine iní-yu ndècú-yu núú núcõo Yǎ Ndiõxí táxí tnùnì-gá.

*Cuendá únì cue espíritú xínú cuèchi núú Yǎ Ndiõxí*

<sup>6</sup> Te sátá dúcá<sup>n</sup> te ní xínì-í ì<sup>n</sup> espíritú xínú cuèchi núú Yǎ Ndiõxí xícó-xí cuädava andiú, te ndècu ndìhi-xi tnúhu sá càhá<sup>n</sup> nàcuáa naníhí tàhú-ó, tnúhu sá ñà túú tnàhí ndìhi nihnu te tnúhu-á<sup>n</sup> danèhé espíritú-a<sup>n</sup> nchaa ñáyiú ndècu ñuyíú, ñáyiú nchaa nació<sup>n</sup>, ndìhi ñáyiú nchaa ñuú, ndìhi nchaa ñáyiú càhá<sup>n</sup> ndí díí<sup>n</sup> ndí díí<sup>n</sup> núú tnúhu, ndìhi ñáyiú xǐndecu nchaa xichi. <sup>7</sup> Te níhi ní cáhá<sup>n</sup>-xi te càchì-xi:

—Nchaa nchòhó ñáyiú ndècu ñuyíú canehe-ndo sǎ yǐñùhu núú Yǎ Ndiõxí, te cachì-ndó sǎ ìo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gǎ chi diu-gá ní cadúha-gá andiú, ndìhi ñuhu

yìchí, ndìhi làmár, ndìhi nchaa ndóhyo —duha càchì espíritú-á<sup>n</sup>.

<sup>8</sup> Te nchìcú<sup>n</sup> tucu ingá espíritú xínú cuèchi núú Yǎ Ndiõxí, te càchì-xi:

—Vitna ní naa ñuú Babiloniá ñuú ìo cùnuu, te duca<sup>n</sup> ní naa chi cue ñáyiú ñuú-á<sup>n</sup> ní quidé-yu ní xíta nihnu nchaa ñáyiú nihí ñuyíú, chi ní sanu ichi ñàhá-yu ichi cuéhé ichi duha — duha càchì espíritú-á<sup>n</sup>.

<sup>9</sup> Te nchìcú<sup>n</sup> tucu ingá espíritú xínú cuèchi núú Yǎ Ndiõxí te níhi càhá<sup>n</sup>-xi, te càchì-xi:

—Nchaa ñáyiú chiñuhu ñaha xii quitì ní quene xití làmár, ndìhi sá ñi natava ñàhá-yu nàcuáa càa-di-á<sup>n</sup>, ñáyiú ní dáñá mèe-xi ní ngúndeé tnunì ndahá-yu àdi tneé-yu, <sup>10</sup> ñáyiú-á<sup>n</sup> sùúnì dándoho ñaha Yǎ Ndiõxí xii-yu chi ìo cùdèé<sup>n</sup>-gǎ, te duca<sup>n</sup> ìo dandòho ñaha-gá xii-yu chi daquihí<sup>n</sup> ñàhá-gǎ xii-yu núú ñuhú núú ñuhú àzufré càyú-xi, te núú cuè espíritú xínú cuèchi núú-gǎ duca<sup>n</sup> dándoho ñaha-gá xii-yu, ndìhi núú Yàá cáá dàtná cáá ì<sup>n</sup> mbéé quitì ní dánicuéhé-güedé. <sup>11</sup> Te ní caa ní quíhí<sup>n</sup> quene ñúhmá núú dúcá<sup>n</sup> cùndecú-yu ndohó-yu-á<sup>n</sup>, te cuèi nduu cuèi niú duca<sup>n</sup> ndòhó-yu. Te duca<sup>n</sup> ndòho nchaa ñáyiú chiñuhu ñaha xii quitì ní quene xití làmár, ndìhi sá ñi natava ñàhá-yu nàcuáa càa-di-á<sup>n</sup>, te diu-ni ñáyiú-á<sup>n</sup> cùú-yu ñáyiú ní ngúndeé tnunì ndaha-xi àdi tneé-xi —duha càchì espíritú-á<sup>n</sup>.

<sup>12</sup> Te xǐá<sup>n</sup> xínì ñùhu-xi sá ncháá ñáyiú cùu cuendá Yǎ Ndiõxí cunduu càhnu iní-yu, chi diu-ni-yu cùú-yu ñáyiú tnèi nchaa tnúhu càhá<sup>n</sup>-gá, te ní yùhu ní iní-yu sàndáá iní-yu Xítóhó Jesucristú.

<sup>13</sup> Te sátá dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> sá ní cáhá<sup>n</sup> andiú, te càchì-xi:

—Chido tnùnì-n ì<sup>n</sup> núú tütú nàcuáa na càhá<sup>n</sup>-í-a. “Není vitna ìo váha táhú nchaa ñáyiú sàndáá iní tnúhu Xítóhó Jesucristú te xihí-yu” —duha càchì sá ní cáhá<sup>n</sup>-á<sup>n</sup>.

Te Espíritú Yǎ Ndiõxí ní cáhá<sup>n</sup>-xi, te càchì-xi:

—Ndáá, chi ndetatú-yu chi ñá túú-gǎ nágá chiú<sup>n</sup> ndohó-yu cadá-yu,



te Yá Ndiöxí sa nàha-gá nchaa nàcuáa ndùu chiu<sup>n</sup> ní quidé-yu —duha càchí Espiritú-gá.

### *Nchaa sá cúú nùú ñuhú*

<sup>14</sup> Te sáta dúcá<sup>n</sup> te dàtnùní ní xiní-í ñ<sup>n</sup> vícò cuìxí<sup>n</sup>, te nùú vícò-ǎ<sup>n</sup> ñ<sup>n</sup> xiní-í núcòo ñ<sup>n</sup> Yaá, te càa-gá dàtná cáá ñ<sup>n</sup> téé ñuyúú, te díquí-gǎ ñuhú ñ<sup>n</sup> coroná ní cuáha mee-ni ðihú<sup>n</sup> cuáá<sup>n</sup>, te nùndaha-gá ñ<sup>n</sup> yuchí ndíquí te súúní dǎé<sup>n</sup>. <sup>15</sup> Te ní xiní-í ñ<sup>n</sup> espíritú xínú cuèchi núú Yá Ndiöxí ní quee-xi xítí vehe-gá, te níhi ní cáhá<sup>n</sup>-xi xǎha<sup>n</sup>-xi xìi Yaá núcòo núú vícò-ǎ<sup>n</sup>:

—Sa ní cuu nàquehndé-n nchaa sá ñ<sup>n</sup> cuu ñuyúú ndihi yuchí ndíquí-n, chi sa ní cuu nuçóo tnàha-xi —duha càchí espíritú-á<sup>n</sup> xǎha<sup>n</sup>-xi xìi Yaá-á<sup>n</sup>.

<sup>16</sup> Te Yaá núcòo núú vícò-ǎ<sup>n</sup> ñ<sup>n</sup> dáyǎha ndodo-gá yuchí ndíquí-gǎ núú ñuyúú ñ<sup>n</sup> nataxi tnàha-gá nchaa sá ñ<sup>n</sup> cuu.

<sup>17</sup> Te ní xiní tucu-í ñ<sup>n</sup> ingá espíritú xínú cuèchi núú Yá Ndiöxí ní quee-xi xítí vehe-gá sá cáá àndiu, te nùndaha-xi tnàhá-xi ñ<sup>n</sup> yuchí ndíquí dǎé<sup>n</sup>. <sup>18</sup> Te ní xiní tucu-í ní quee tucu ñ<sup>n</sup> ingá espíritú xínú cuèchi núú Yá Ndiöxí núú nùtní núú sácódó sǎ ndúú tǎhú-gǎ, te ndécu ndihi-xi tnúhu ndee ñ<sup>n</sup> táxí tnùn-í-xi ñuhú, te espíritú-á<sup>n</sup> ñ<sup>n</sup> níhi ní cáhá<sup>n</sup>-xi xǎha<sup>n</sup>-xi xìi espíritú néhé yùchí ndíquí dǎé<sup>n</sup>-á<sup>n</sup>:

—Ngúíta naquehndé-n ndihi yuchí ndíquí-n ndéhé yoho yàha stilé sá ñ<sup>n</sup> ñuyúú chi sa ní cuu nàtehndé —duha càchí espíritú-á<sup>n</sup> xǎha<sup>n</sup>-xi xìi espíritú néhé yùchí ndíquí-ǎ<sup>n</sup>.

<sup>19</sup> Te espíritú néhé yùchí ndíquí-ǎ<sup>n</sup> ñ<sup>n</sup> dáyǎha ndodo-xi yuchí ndíquí-xi nùú ñuyúú ñ<sup>n</sup> nàquehndé-xi nchaa ndéhé yoho yàha stilé, te ní chihi-xi ñ<sup>n</sup> xichi núú ñ<sup>n</sup> chihi-xi cuèndá xíá<sup>n</sup> quihni-xi quee ndudí-xi, te sá dúcá<sup>n</sup> ñ<sup>n</sup> quide-xi xíá<sup>n</sup> cútnùní iní-ó sǎ ñ<sup>n</sup> cùdǎé<sup>n</sup> Yá Ndiöxí núú ñáyiu ñuyúú.

<sup>20</sup> Te ndéhé yoho yàha stilé-á<sup>n</sup> ñ<sup>n</sup> quihni-xi ñ<sup>n</sup> xio yuhu ñúú, te ndudí ndéhé yoho yàha stilé-á<sup>n</sup> ñ<sup>n</sup> nduu-xi níhi te ní quee-xi núú quíhni ñ<sup>n</sup> ndu espíritú-á<sup>n</sup>. Te úní cièndú mǐl mètrú ní

xica níhi-ǎ<sup>n</sup>, te dàtná ñ<sup>n</sup> mètrú dava ní sáá cuehnu níhi-ǎ<sup>n</sup> ñ<sup>n</sup> xica-xi.

## 15

### *Úsá tnúndòho*

<sup>1</sup> Te ío vìhi ní quide-xi ñ<sup>n</sup> sá ñ<sup>n</sup> quide-xi andiu te ní cuñúhu vìhi-í, te ní xiní-í úsá tnàhá espíritú xínú cuèchi núú Yá Ndiöxí, te ñ<sup>n</sup> ñ<sup>n</sup> cue espíritú-á<sup>n</sup> ndécú ndihi-xi tnúhu ndee ñ<sup>n</sup> dandòho-xi ñáyiu ñuyúú, te nà yáha nchaa tnúndòho-á<sup>n</sup>, te vǎ cùdǎé<sup>n</sup>-gǎ Yá Ndiöxí núú-yu dándòho ñaha-gá xíi-yu.

<sup>2</sup> Te ní xiní-í ñ<sup>n</sup> làmár te ndute làmár-á<sup>n</sup> cáá dàtná cáá vǐdriú, te dàcánuu-xi ndihi ñuhú, te yuhu làmár-á<sup>n</sup> xǐnutní nchaa ñáyiu ní ndacu ní dáquéé tǐhú ñáhá xìi quiti ní quene xítí làmár-á<sup>n</sup>, te duca<sup>n</sup> ñ<sup>n</sup> ndacú-yu ní dáquéé tǐhú-yu sá ñ<sup>n</sup> natava ñáhá-yu nàcuáa càa-di-á<sup>n</sup>, te duca<sup>n</sup> ñ<sup>n</sup> ndacu tucú-yu ní dáquéé tǐhú tucú-yu númerú-di sá cúú dàtná ðiu-di, te nchaa ñáyiu-á<sup>n</sup> ñ<sup>n</sup> nduu tǎhú-yu núú Yá Ndiöxí àrpá xǐnehé-yu cuèndá caní-yu. <sup>3</sup> Te xítá-yu ndudú sá ñ<sup>n</sup> xita ndíi Moisés ndíi ní xinú cuechi núú Yá Ndiöxí ndéé sanaha, te xita tucú-yu ndudú Yaá cáá dàtná cáá ñ<sup>n</sup> mbéé quiti ní dánícuèhé-güedé, te càchí-yu:

Yòhó Dútú Ndiöxí ío càhnu cuu-n, chi quide-n nchaa sá vǎ yòo tnàhí ndacu cada,

te cùu-n Yaá ndacú quide nchaandi túhú sá vǎha,

te ío ndáá quidé-n te ío ndáá càhá<sup>n</sup>-n, te yǐndaha-n nchaa ñáyiu ñihí ñuyúú.

<sup>4</sup> Te nchaa ñáyiu nèhé-yu sá yǐñùhu núú-n,

te nchaá-yu càchí-yu sá ñ<sup>n</sup> càhnu cuu-n,

chi ñ<sup>n</sup> dǐi ní yòhó cúú-n Yáá ío vǎha quide ndáá,

te nchaa ñáyiu ñihí ñuyúú nataká-yu chiñuhu ñáhá-yu xii-n,

te duca<sup>n</sup> càdá-yu chi ndéhé-yu nchaa sá vǎha quide-n.

Duha càchí ñáyiu-á<sup>n</sup> xítá-yu.

5 Te sáta dúcá<sup>n</sup> te ní xiní-í ní nacaá<sup>n</sup> yuyèhe vehe Yá Ndiöxí andiu, te xití vehe-gá-á<sup>n</sup> ndécú sã ndèé tnúhu-gá. 6 Te xití vehe-gá-á<sup>n</sup> ní quee úsá tnàhá espíritú xínú cuèchi núú-gã, te ì<sup>n</sup> ì<sup>n</sup>-xi ndècu ndihí-xi tnúhu ndee iní dandòho-xi ñáyiu, te xixíhnu-xi mee-ni dóó vãha, te súúni vãha càndoo, te chàhnc hí, te yidúcú<sup>n</sup>nuu cìnchú ní cuáha mee-ni dǐhú<sup>n</sup> cuáá<sup>n</sup> pèchú ndi úsá cue espíritú-á<sup>n</sup>. 7 Te ì<sup>n</sup> quití cùmí xĩnutnǐ núú nǔtnǐ xilé vãha ní sãñaha-di ì<sup>n</sup> caa sã nàhá tícùú ní cuáha mee-ni dǐhú<sup>n</sup> cuáá<sup>n</sup> xii ì<sup>n</sup> ì<sup>n</sup> espíritú-á<sup>n</sup>, te xití nchaa tícùú-á<sup>n</sup> ñúhú ì<sup>n</sup> sã ñúhú te xíá<sup>n</sup> cútnùní sã Yá Ndiöxí dandòho-gá ñáyiu ñuyúú, te diu-gá cúú-gã Yáá ndécú nchaa nduu nchaa quúú. 8 Te xití vehe-gá-á<sup>n</sup> ní chítú ñǔhmá, te duca<sup>n</sup> ní quide-gá cuendá cutnùní iní ñáyiu sã ìo càhnu cuu-gá táxí tnùní-gá, te vá yõo ì<sup>n</sup> cuu quíhu xití vehe-gá-á<sup>n</sup> ndèé ndihí ndi úsá tnúndòho cada ndi usá cue espíritú-á<sup>n</sup> ñuyúú.

## 16

### *Tnúndòho cada-xi ñuyúú*

1 Te sáta dúcá<sup>n</sup> te ní tecú dóho-í níhi ní cáhá<sup>n</sup> ì<sup>n</sup> sã ní cáhá<sup>n</sup> xití vehe Yá Ndiöxí, te xãha<sup>n</sup>-xi xii ndi usá cue espíritú-á<sup>n</sup>:

—Chí cuáhá<sup>n</sup> coyo-ndo sã ñúhú xití nchaa tícùú néhé-ndó-ã<sup>n</sup> núú ñuyúú, chí sã ñúhú-ã<sup>n</sup> cúú-xí tnúndòho tendaha Yá Ndiöxí sã cúú-xí nchaa ñáyiu ñuyúú —duha càchí sã càhá<sup>n</sup>-á<sup>n</sup>.

2 Te espíritú díhna ní sáhá<sup>n</sup>-xi ní coyo-xi sã ñúhú xití tícùú néhé-xí-ã<sup>n</sup> ñuyúú, te nchaa ñáyiu ñùhu tnuní quití ní quene xití làmár ñáyiu ní chiñuhu sã ní natava ñàhá-yu xii-di, nchaa ñáyiu-á<sup>n</sup> ní quené-yu ndíhyi tèhyú te súúni dándòho ñaha-xi xií-yu.

3 Te espíritú cúú ùú ní coyo-xi sã ñúhú xití tícùú néhé-xí núú làmár, te ndute làmár-á<sup>n</sup> ní nduu-xi níñí te càa-xi datná cáá níñí ñáyiu sa ní xíhí, te nchaa quití ñùhu xití làmár-á<sup>n</sup> ní xíhí-güedi.

4 Te espíritú cúú ùní ní coyo-xi sã ñúhú xití tícùú néhé-xí nchaa yúte ndihí nchaa núú quènihni ndute, te ndute nchaa yúte-á<sup>n</sup> ndihí nchaa ndute quènihni-á<sup>n</sup> ní nduu-xi níñí. 5 Te sáta dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> espíritú xínú cuèchi núú Yá Ndiöxí, espíritú yíndàha ndute, te xãha<sup>n</sup>-xi xii Yá Ndiöxí:

—Yòhó Dútú Ndiöxí cúú-n Yáá quidé ndáá cuítí núú duha quide-n tendaha-n tnúndòho-a, te diu-ni-n cúu-n Yáá ndécú ndèé cútnàhá ní ngáva ñuyúú, te diu-ni-n cúu-n Yáá ndécú vitna te ñá túú tnàhí cuèchi-n, 6 Chí cue ñáyiu ñuyúú ní dácácã-yu níñí nchaa ñáyiu ní cáhá<sup>n</sup> tnúhu-n ndihí nchaa dava-gá ñáyiu cùu cuendá-n, te ní sahní-yu nchaa ñáyiu-á<sup>n</sup>, te vitna ní dátíú-n ndute ní nduu-xi níñí te duca<sup>n</sup>-ni càa ndute-á<sup>n</sup> xíhi-yu, te duca<sup>n</sup> tàú-xi ndohó-yu cuendá sã ní sahní-yu cue ñáyiu cùu cuendá-n —duha càchí espíritú-á<sup>n</sup> xãha<sup>n</sup>-xi xii-gá.

7 Te ní tecú tucu dóho-í ní cáhá<sup>n</sup> ì<sup>n</sup> sã ní cáhá<sup>n</sup> núú nǔtnǐ núú sácódó sã ndúú tãhú Yá Ndiöxí, te xãha<sup>n</sup>-xi xii-gá:

—Ndáá sã yòhó Dútú Ndiöxí Yáá ndácú quide nchaandi túhú sã vãha dándòho-n ñáyiu nàcuáa tàú-xi cundu —duha càchí sã càhá<sup>n</sup>-á<sup>n</sup> xãha<sup>n</sup>-xi xii-gá.

8 Te espíritú cúú cùmí ní coyo-xi sã ñúhú xití tícùú néhé-xí núú nchíanchii cuendá nchíanchii-á<sup>n</sup> cahmi-xi nchaa ñáyiu ñuyúú. 9 Te ncháá-yu ní ndoho vǐhí-yu ní cáyú-yu, te cuèi duca<sup>n</sup> ní ndohó-yu dico ñá túú ní cuíní-yu ndixi cuèchi iní-yu cuendá nchaa sã ñà túú vãha quidé-yu, te ni ñà túú ní càchí-yu sã ìo càhnu cuu Yá Ndiöxí chí da ní cáhá<sup>n</sup> úhú-yu cuendá-gá, te diu-gá cúú-gã Yáá duca<sup>n</sup> ní tendaha tnúndòho-á<sup>n</sup> sã cúú-xí-yu.

10 Te espíritú cúú ùhú<sup>n</sup> ní coyo-xi sã ñúhú xití tícùú néhé-xí núú ndécú quití ní quene xití làmár-á<sup>n</sup> táxí tnùní-di, te nchaa núú táxí tnùní-di ní cuu nee, te nchaa ñáyiu ñuyúú ndèé yáá-ná-yu nàcaxi nihnú-yu sã ndóhó-yu. 11 Dico ni dùca<sup>n</sup> ñá túú

ní cuení-yu dàñá-yu ni ì<sup>n</sup> sá cuèhé sá dúhá quidé-yu, chi da ní cáhá<sup>n</sup> úhú-yu cuèndá Yá Ndiòxí Yáá ndécú àndiu sá cuèndá sá dándòho ñaha ndíhyi tèhyú ndèé-yu-á<sup>n</sup> ndíhi nchaa dava-gá sá yáha-yu.

<sup>12</sup> Te espíritú cúú ìnú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-á<sup>n</sup> nǐ yíchí cuèndá yáha cue téé yíndaha ñáyiú xíndecu ndàa xio nacuaa quène nchíanchii.

<sup>13</sup> Te ní xiní-í ní quee ì<sup>n</sup> espíritú cúndíhi yucu ñávãha yuhu quití déé<sup>n</sup> nání dràgón, te ní xiní tucu-í ní quee tucu ingá espíritú cúndíhi yucu ñávãha yuhu quití ní quene xítí làmár, te ní xiní tucu-í ní quee tucu ingá espíritú cúndíhi yucu ñávãha yuhu téé dándahú ñáyiú càchí sá cáhá<sup>n</sup> tnúhu Yá Ndiòxí te ñá ndàá, te ndi nùní espíritú-á<sup>n</sup> xíndáa-xi dàtná cáá làhvá. <sup>14</sup> Te ndi nùní espíritú-á<sup>n</sup> quidé-xí sá vã yòo tnàhí ndàcu cada, te xica datacá-xi nchaa cue téé yíndaha ñaha xii ñáyiú xíndecu nihíí ñuyíú cuèndá nàá-güedé mei ndùu cachí Yá Ndiòxí coo tnúndòho cahnu vihi-gá, te diu mee Yá Ndiòxí cúú-gã Yáá ío càhnu cuu. <sup>15</sup> Te Yáá cúú Xitohó-ó nǐ cachí-gá: “Cunaha-ndo chi nduu ñà túú yíhi iní-ndó quixi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiú xíndecu túha, chi cùu-ndo datná cue ñáyiú xíndecu túha xíxíhnu-ni dóo-xi cuèndá sá vã cúcàha<sup>n</sup> núú-yu dàtná cúcàha<sup>n</sup> núú cuè ñáyiú ñá túú nihnu dóo-xi, te duha cáhá<sup>n</sup>-í cuèndá sá nchòhó cundecu túha-ndo òré quexìo-í”, duha càchí-gá. <sup>16</sup> Te ndi nùní cue espíritú cúndíhi yucu ñávãha-á<sup>n</sup> nǐ dátacá-xi nchaa cue téé yíndaha ñaha xii ñáyiú, te ní taxi ndecu ñaha-xi ì<sup>n</sup> xichi núú nání Àrmedagón, duha nani xiá<sup>n</sup> tnúhu hèbreú.

<sup>17</sup> Te espíritú cúú ùsá ní coyo-xi sá ñúhú xítí tícúú néhé-xí núú tàchí, te ní tecú dóho-í níhi ní cáhá<sup>n</sup> Yáá núcòo núú xilé váha xítí vehe-gá, te càchí-gá:

—Xéhé-nã cúmãní te xínu cava nchaa tnúndòho tnúhu ndàhú —duha càchí-gá.

<sup>18</sup> Te sátá dúcá<sup>n</sup> te ní sáá nduté te ní cáhá<sup>n</sup> ñúhu, te súúni dùsa<sup>n</sup> ní quide-xi, te níhi vihi ní tnáa ñuyíú, te ndéé cútnàhá ní ngúndecu ñáyiú ñuyíú te vátá ì<sup>n</sup> xito-gá níhi tnáa dàtná ní quide-xi. <sup>19</sup> Te ñuú cáhnu ío cùnuu nani Babiloniá ní quée dava-xi ní cuu-xi úní xichi, te nchaa ñuú cáá nihíí ñuyíú nǐ ngoyo nchaa vehe, chi Yá Ndiòxí ní ndacu iní-gá nchaa sá cuèhé sá dúhá quide nchaa ñáyiú ñuú Babiloniá-á<sup>n</sup>, te duca<sup>n</sup> nǐ quide ñaha-gã xii-yu chi ío cùdéé<sup>n</sup>-gã núú-yu. <sup>20</sup> Te nchaa tìndúú nǐ ndóñúhú-xí cuèi nchaa tìndúú ñuhu yíchí ndécú xítí làmár. <sup>21</sup> Te ní xiní-í ní cuu<sup>n</sup> ñiñi nàhnu vihi ní ngaundodo-xi cue ñáyiú ñuyíú, te nchaa ñiñi-á<sup>n</sup> vëe-xi dàtná údico kílu, te cue ñáyiú ñuyíú nǐ cáhá<sup>n</sup> úhú-yu cuèndá Yá Ndiòxí sá dúcá<sup>n</sup> nǐ dácúú<sup>n</sup>-gã ñiñi nàhnu vihi-á<sup>n</sup>, chi ní cuu-xi ì<sup>n</sup> tnúndòho cahnu vihi sá cúú-xí-yu.

## 17

### *Ñadíhi ndécú ichi díí iní*

<sup>1</sup> Te núú ùsá espíritú néhé tícúú-á<sup>n</sup>, te ì<sup>n</sup>-xi ní quixi-xi núú ndécú-í, te càchí-xi xii-í:

—Néhé ná quíhí<sup>n</sup>-ó dānehé ñáhà-í xii-n nchaa tnúndòho sá ndóhó ñàdihí ñaha ndècu ichi díí iní, te ñaha-á<sup>n</sup> cúnùu-a<sup>n</sup> nucóo-a<sup>n</sup> núú ñúhú vihi ndute. <sup>2</sup> Te ñaha-á<sup>n</sup> ndécú díí iní-a<sup>n</sup> ndíhi nchaa cue téé yíndaha ñaha xii ñáyiú xíndecu nihíí ñuyíú, te nchaa dava-gá ñáyiú ñuyíú ío iní-yu nchicú<sup>n</sup> nihnú-yu quidé-yu nchaa nàcuáa quide ñaha-á<sup>n</sup> —duha càchí espíritú-á<sup>n</sup>.

<sup>3</sup> Te òré duca<sup>n</sup> quide ñaha Espíritú Yá Ndiòxí xii-í nàcuáa càchí iní-xi, te ì<sup>n</sup> espíritú xínú cuèchi núú-gã ndécá ñaha-xi xii-í cuáhá<sup>n</sup> ì<sup>n</sup> xítí yucu, te xítí yucu-á<sup>n</sup> nǐ xiní-í ì<sup>n</sup> ñadíhi yódó-á<sup>n</sup> ì<sup>n</sup> quití ticuehé, te ndèé úsá díquí-di te úxí ndíquí-di, te nihíí-di ndèé tnuní-di mee-ni tnúhu sá cáhá<sup>n</sup> úhú cuèndá

Yă Ndiöxí. <sup>4</sup> Te ñadìhí-á<sup>n</sup> níhnú-á<sup>n</sup> dóó muràdú ndihí dóó tícuèhé, te mee-ni sã ní cuáha díhú<sup>n</sup> cuáá<sup>n</sup>, ndihí yúú vâha sã nání pèrlá, ndihí nchaa dava-gá núú yúú vâha, mee-ni nchaa xíá<sup>n</sup> ní cuáha sã yíhí lõho-a<sup>n</sup>, ndihí sã ñúhú dũcú<sup>n</sup>-a<sup>n</sup>, ndihí sã ñúhú dũcú<sup>n</sup> ndáhá-á<sup>n</sup>, te nùndaha-a<sup>n</sup> ì<sup>n</sup> tícuú ní cuáha mee-ni díhú<sup>n</sup> cuáá<sup>n</sup> te ñúhu mee-ni sã cuèhé sã dúhá, te xíá<sup>n</sup> cútnùní iní-ó sã cúú-xí ì<sup>n</sup> ñadìhí ñaha ndècu ichi cuehé ichi duha. <sup>5</sup> Te tneé-a<sup>n</sup> ndèé tnuní ì<sup>n</sup> tnúhu, te cächí-xi: “Ñúú Babiloniá ñúú ío cùnūu, cada iní-ndó sã cúú-xí mèi ñadìhí-a, te ñú ñadìhí-a cùu-a<sup>n</sup> ñaha sanu ichi ñaha xii nchaa ñáyiu ñáhí ñáyiu ndècu ichi díí ìní, te nándi-gá nchaa sã cuèhé sã dúhá sànu ichi-a<sup>n</sup> nchaa ñáyiu cadá-yu”, duha cãhá<sup>n</sup> tnúhu ndèé tnuní tneé ñadìhí-á<sup>n</sup>. Te vá yõo tècú tnùní ná cuendá duca<sup>n</sup> cãhá<sup>n</sup> tnúhu-á<sup>n</sup>. <sup>6</sup> Te ní cutnùní iní-í sã díú ñaha-á<sup>n</sup> ñí dácácá-á<sup>n</sup> ñíhí ñáyiu cùu cuendá Yă Ndiöxí ní sahní ñaha-a<sup>n</sup> xii-yu, te ñáyiu ní xíhí-á<sup>n</sup> cúú-yu ñáyiu ní cãhá<sup>n</sup> vâha cuendá Xítóhó Jesucristú, te sã dúcá<sup>n</sup> ñí quide-a<sup>n</sup> te ní nduu-a<sup>n</sup> dàtná ì<sup>n</sup> ñáyiu quíhu. Te ío ní cuñúhu-í sã dúcá<sup>n</sup> ñí cuu ní xiní-í. <sup>7</sup> Te sátá dúcá<sup>n</sup> te espíritú xínú cuèchi núú Yă Ndiöxí-á<sup>n</sup> cächí tucu-xi xii-í:

—Vá ndèé dúcá<sup>n</sup> cuñúhu-n, chi vitna na cächí tnúhu-í xii-n nãcuáa quèe-xi cuendá quiti ndèé úsá díquí-xi ndihí úxí ndiqui-xi-á<sup>n</sup>, ndihí nãcuáa quèe-xi cuendá ñadìhí ñaha yòdo ñaha xii-di-á<sup>n</sup>. <sup>8</sup> Te quiti ní xiní-n-ã<sup>n</sup> cúú-dí ì<sup>n</sup> quiti sa ní xindecu te vitna ñá túú-gã-di ndècu, te sáá nduu te quene-di yaú cùnú vîhí sã ìo nèhé cáá, te dàtnùní sáá nduu te quíhí<sup>n</sup>-di núú ùhú núú ndàhú ñi caa ñi quíhí<sup>n</sup>, te cue ñáyiu xindecu ñuyúú cuñúhu vîhí-yu quiti-á<sup>n</sup> chi cùu-di ì<sup>n</sup> quiti sa ní xindecu ñi cùu te sáá nduu cùndecu tucu-di, te ñáyiu duca<sup>n</sup> cuñúhu ñaha xii-di-á<sup>n</sup> ñà túú yòdo tnuní-yu núú tütú núú yódó tnùní cue ñáyiu naníhí tàhú, chi ndèé cútnàhá vátá ngáva-gá ñuyúú duca<sup>n</sup> sa yòdo

tnuní cue ñáyiu naníhí tàhú.

<sup>9</sup> Te nchaa ñáyiu tècú tnùní xini ñuhu-xi caní vâha iní-yu cuendá tnúhu-a. Te ndi úsá díquí quiti-á<sup>n</sup> cada iní-ó sã cúú-xí úsá tìndúú nùú núcõ ñadìhí-á<sup>n</sup>. <sup>10</sup> Te ndi úsá díquí quiti-á<sup>n</sup> cada iní-ó sã cúú-xí úsá tnàhá cue téé yìndaha ñaha xii ñáyiu, te úhú<sup>n</sup> cue téé-á<sup>n</sup> ñà túú-gã cùnūu-güedé vitna, te ì<sup>n</sup> téé-á<sup>n</sup> cùnūu-dé vitna te ingá-dé vátá sàá-gá nduu cùnūu-dé, te na sáá nduu dùca<sup>n</sup> cùnūu-dé te sacú-ni nduu cùnūu-dé. <sup>11</sup> Te quiti ní xindecu ñi cùu te ñá túú-gã-di ndècu vitna, cùu-di datná téé cùu uná yìndàha ñaha xii ñáyiu, te ì<sup>n</sup>-ni cùu-di ndihí cue téé úsá yìndàha ñáyiu-á<sup>n</sup>, te quiti-á<sup>n</sup> sáá nduu cuíta nihnu-di quíhí<sup>n</sup>-di núú ùhú núú ndàhú ñi caa ñi quíhí<sup>n</sup>.

<sup>12</sup> Te ndi úxí ndiqui quiti-á<sup>n</sup> cada iní-n sã cúú-xí úxí tnàhá cue téé quìndaha ñaha xii ñáyiu, dico vátá sàá-gá nduu cùnūu-güedé quìndaha ñaha-güedé xii-yu. Te cue téé-á<sup>n</sup> ñíhí-güedé tnúhu ndee ìní taxi tnùní-güedé ndihí quiti-á<sup>n</sup>, dico tnaa-ni taxi tnùní-güedé ndihí quiti-á<sup>n</sup>. <sup>13</sup> Te ndi úxí cue téé-á<sup>n</sup> cuu ì<sup>n</sup>nuu-güedé taxi tnùní-güedé, te chindee-güedé quiti-á<sup>n</sup> cuendá cuu ì<sup>n</sup>nuu-güedé ndihí-di cuendá taxi tnùní-gã-di. <sup>14</sup> Te cue téé-á<sup>n</sup> nàá-güedé ndihí Yaá cáá dàtná cáá ì<sup>n</sup> mbéé quiti ní dánicuèhé-güedé dico vá ndácú-güedé nàá-güedé ndihí-gá chi cuíta-güedé. Te ñú-gã cúú-gã Yaá ío cùnūu taxi tnuní cuèi nchaa téé yìndaha ñaha xii ñáyiu, te duca<sup>n</sup>-ni taxi tnuní-gã cuèi nchaa dava-gá-yu. Te mee Yă Ndiöxí ní cachí-gá nándi cùu nchaa ñáyiu cundecu ndihí Yaá cáá dàtná cáá ì<sup>n</sup> mbéé quiti ní dánicuèhé-güedé-á<sup>n</sup>, te ñú-ni ñáyiu-á<sup>n</sup> cúú-yu ñáyiu ní cãhá<sup>n</sup>-gã te cúú-yu ñáyiu quide ndáá ndécú ìchi-gã — duha cächí espíritú xínú cuèchi núú-gã.

<sup>15</sup> Te ní cachí tucu espíritú-á<sup>n</sup> xii-í:

—Ndute ñúhu núú núcõ ñadìhí ñaha ndècu ichi díí ìní-á<sup>n</sup>, ndute-á<sup>n</sup> cada iní-n sã cúú-xí ñáyiu nchaa



nàció<sup>n</sup>, ndihi ñáyíu nchaa ñuú, ndihi ñáyíu xĩndecu nchaa xichi, ndihi ñáyíu càhá<sup>n</sup> ndí díí<sup>n</sup> ndí díí<sup>n</sup> nũú tñũhu. <sup>16</sup> Te dàtná ní cachí-í sá ndí uxí ndiqui quití ní xiní-n-á<sup>n</sup> cúú-xí úxí tñàhá cue téé quĩndaha ñàha xii ñáyíu, te cue téé-á<sup>n</sup> cuu úhú iní-güedé ñadĩhí ñaha ndècu ichi díí iní-á<sup>n</sup>, te ni vã cáda cuendá ñáhá-gã-güedé xii-a<sup>n</sup>, te ndada ndàhú ñáhá-güedé, te dacàchi ñaha-güedé xii-a<sup>n</sup>, te cahmi ñaha-güedé. <sup>17</sup> Te mee Yã Ndiõxí duca<sup>n</sup> dàcahá<sup>n</sup>-gá iní cue téé-á<sup>n</sup> cuendá cada-güedé nàcuáa cuení méé-gã, te xíá<sup>n</sup> nũu cuu ñ<sup>n</sup>nuu-güedé cuendá cúñaha-güedé xii quití-á<sup>n</sup> cada-di núú-güedé taxi tñuní-di, te duca<sup>n</sup>-ni càda-di núú-güedé taxi tñuní-di ndéé ná sáá nduu càda Yã Ndiõxí nàcuáa ní cachí-gá. <sup>18</sup> Te ñadĩhí ñaha ní xiní-n-á<sup>n</sup> cada iní-n sã cúú-á<sup>n</sup> ñũú cáhnú ñũú ío cùnũu, te ñuú-á<sup>n</sup> ndécú tée ío-gá cùnũu taxi tñuní nchaa cue téé yĩndaha ñaha xii ñáyíu xĩndecu ñuyíú —duha ní cachí espíritú xínú cuèchi núú Yã Ndiõxí xii-í.

## 18

### *Ní naa ñuú Babiloniá*

<sup>1</sup> Te duca<sup>n</sup> te dàtnú ní xiní tucu-í ñngá espíritú xínú cuèchi núú Yã Ndiõxí, te ndéé andíu nì dátãsa<sup>n</sup>-xi te ní dátyèhé-xi ñuyíú, te espíritú-á<sup>n</sup> ío cùnũu-xi. <sup>2</sup> Te níhi ní cáhá<sup>n</sup>-xi, te càchí-xi:

—Ní sáá nduu nàa ñuú cáhnú ñũú cùnũu nani Babiloniá, te xíá<sup>n</sup>-nã nat-acá nchaa núú espíritú cundĩhi yucu ñávãha cundecu-xi, te vã quée-gã-xi xíá<sup>n</sup>, te diu-ni xíá<sup>n</sup> nataká nchaa quití ndàva núú tàchí nchaa quití ndehe quide, quití ñá túú tñàhá iní ñáyíu te xíá<sup>n</sup>-nã cundecu-güedé. <sup>3</sup> Te duca<sup>n</sup> chi ñáyíu ñuú-á<sup>n</sup> sánú ichí-yu nchaa ñáyíu ñihí ñuyíú ichi cuèhé ichi duha, te duca<sup>n</sup>-ni xĩnchícú<sup>n</sup> nihnu nchaa ñáyíu ñuyíú xĩquidé-yu, te nchaa cue téé cùnũu yĩndaha ñaha xii ñáyíu, cue téé-á<sup>n</sup> cúú ñ<sup>n</sup>nuu-güedé ndihi nchaa ñáyíu ñuú-á<sup>n</sup> quidé-güedé ndihí-yu nándi sá cuèhé sá dúhá. Te nchaa ñáyíu díco nándi sá díco quèhe<sup>n</sup> ñáyíu

ñuú-á<sup>n</sup> ío cùu cuicá-yu, te duca<sup>n</sup> quèhe<sup>n</sup> nchaa ñáyíu ñuú Babiloniá-á<sup>n</sup> nchaa sá díco ñáyíu-á<sup>n</sup> cuendá xíá<sup>n</sup> cãnehé-yu ndécú-yu ichi cuèhé ichi duha —duha càchí espíritú-á<sup>n</sup>.

<sup>4</sup> Te sátá dúcá<sup>n</sup> te ní tecú dóho-í ní cáhá<sup>n</sup> ñ<sup>n</sup> sá ní cáhá<sup>n</sup> andíu, te càchí-xi:

—Nchaa nchòhó ñáyíu cùu cuendá-í quee-ndo ñuú Babiloniá cuendá sá vã cundècu-ndo tñahá-ndó ichi cuèhé ichi duha dàtná ndécú ñáyíu ñuú-á<sup>n</sup>, te duca<sup>n</sup> te vã quení-ndó tñũndòho tñũhu ndàhú sá quíxí cùu xii ñáyíu-á<sup>n</sup>. <sup>5</sup> Chi ío cuèhé cuèchi-yu ní cuu ndècu núú Yã Ndiõxí, te mee-gã náhá-gã nàcuáa ndũu nchaa sá quidé-yu. <sup>6</sup> Te nchòhó ñáyíu cùu cuendá-í, chí nãnchòcáva dandòho-ndo ñáyíu-á<sup>n</sup> dàtná quidé mèé-yu dandohó-yu cue ñáyíu, te úú xito nãnchòcáva-ndo dandohó-ndo-yu, te duca<sup>n</sup> càda-ndo cuendá ío-gá ndohó-yu. <sup>7</sup> Te ío quide cahnú-yu mèé-yu, te ío cùdí iní-yu quidé-yu nchaa núú sã cuèhé sá dúhá,

te sá dúcá<sup>n</sup> xidó-yu quidé-yu nchaa sá cuèhé sá dúhá nũu xíá<sup>n</sup> nchòhó ío dandòho-ndo-yu, te duca<sup>n</sup> chí ñáyíu ñuú-á<sup>n</sup> sání iní-yu, te càchí-yu: “Nchúhú cúú-ndí dàtná ñ<sup>n</sup> ñadĩhí ñá túú quée, ñaha ío cùnũu yĩndaha ñaha xii ñáyíu. Te duca<sup>n</sup> sátnahá-xi cùu-ndí chí nchaa-ni nduu ío váha cùu iní-ndí ndécú-ndí, te ni vã sáá ñ<sup>n</sup> nduu te ndíhú iní-ndí”, duha càchí ñáyíu ñuú-á<sup>n</sup>. <sup>8</sup> Te sá cuendá nchaa sá quidé-yu-á<sup>n</sup> nũu xíá<sup>n</sup> ñ<sup>n</sup>-ni ndũu sáá tñũndòho sá cúú-xí-yu, te ío ndohó-yu chí ñuú-yu coo tnamá, te coo cuèhé cahni ñaha-xi xii-yu, te ío ndíhú iní-yu, te cáyú ñuú-yu, te duca<sup>n</sup> ndohó-yu chí Dútú Ndiõxí ío cùnũu-gá, te diu-gá duca<sup>n</sup> dandohó ñaha-gá xii-yu —duha càchí sá ní cáhá<sup>n</sup> àndíu-á<sup>n</sup>.

<sup>9</sup> Te nchaa cue téé cùnũu yĩndaha ñaha xii ñáyíu ío ndáhyú-güedé sá ndíhú iní-güedé òré ná quení-güedé quene ñúhmá cáyú ñuú cue ñáyíu Babiloniá, chí diu cue téé-á<sup>n</sup> cúú-güedé cue téé cùu ñ<sup>n</sup>nuu ndihí-yu quide-güedé nchaa núú sã cuèhé

sá dúhá ndihí-yu, te duca<sup>n</sup> chi ío tnàhá iní-güedé cundecu-güedé ndihí-yu ichi díí iní. **10** Te cue téé-á<sup>n</sup> xica-nã cundecu-güedé cundehe-güedé nàcuáa ndoho nchaa ñáyiú ñuú-á<sup>n</sup> sã yùhú-güedé nchaa tnúndòho-á<sup>n</sup>, te cachí-güedé:

—¡Ndàhú nchòhó ñáyiú ñuú cáhnú ñuú cúnúu nani Babiloniá! Chi uu<sup>ni</sup> ní sáá nchaa tnúndòho tnúhu ndàhú sá cúu-xí-ndó —duha cachí-güedé.

**11** Te nchaa ñáyiú dīco nchaa sá nándihí ñáyiú ñuú Babiloniá tnàhá-yu ío ndáhyú-yu sá ndihú iní-yu chi vá yòo-gá cuaa<sup>n</sup> nchaa sá díco-yu. **12** Te díco-yu nchaa sá ñi cuáha mee-ni díhú<sup>n</sup> cuáá<sup>n</sup>, ndihí nchaa sá ñi cuáha mee-ni díhú<sup>n</sup> cuixí<sup>n</sup>, te díco tucú-yu sá ñi cuáha mee-ni yúú vãha yúú nání pèrlá, ndihí nchaa dava-gá sá ñi cuáha dava-gá yúú vãha, te díco-yu tnàhá dóo sèdá, ndihí ingá núú dōó vãha sá nání línú, ndihí dóo murádú, ndihí dóo tícuèhé te mee-ni dóo vãha cùu-xi, te díco tucú-yu tnàhá yutnu sá sàhá<sup>n</sup> tnámí, te díco tucú-yu sá ñi cuáha sá nání mǎrfíl, te díco tucú-yu sá ñi cuáha mee-ni yutnu vãha sá ío ndèyáhu, te díco tucú-yu sá ñi cuáha mee-ni càá, ndihí sá ñi cuáha mee-ni sã nání bròncé, ndihí sá ñi cuáha mee-ni yúú vãha yúú nání mǎrmól. **13** Te díco tucú-yu canelá, ndihí yúcu sã sàhá<sup>n</sup> tnámí, ndihí dúsa sá sàhá<sup>n</sup> tnámí, ndihí yúcu sã nání mǎrrá, te díco tucú-yu ingá núú dúsa sá sàhá<sup>n</sup> tnámí nani olivánú, te díco tucú-yu ndudí ndéhé yoho yãha stilé, ndihí acití yutnu nani olívú, ndihí yuchi triú vãha, te díco tucú-yu nchaa dava-gá núú triú, te díco-yu tnàhá mbéé, ndihí cuáyú, ndihí nchaa dava-gá quití tatá, te díco tucú-yu tnàhá carrètá, te díco tucú-yu tnàhá ñáyiú xīnu cuechi, ñáyiú ñá túú tnàhí dàná quee núú chíu<sup>n</sup> pàtróo<sup>n</sup>-xi. **14** Te nchaa ñáyiú díco-á<sup>n</sup> cũñàhá-yu xii ñáyiú ñuú Babiloniá:

—¡Nchaa sá ío cùdíí iní-ndó cūndecu ndihí-ndo ní cuu vá ndácú-gã-ndó ñihí-ndó vitna, te nchaa sá sání iní-ndó sã ío vãha càa ndecu ndihí-ndo ndihí nchaa dava-gá sá ndécú

ndihí-ndo ní ndihí nihnu-xi vitna, te ní ñ<sup>n</sup> nduu-gá vá ñihí-ndó ní ñ<sup>n</sup> xíã<sup>n</sup> cundecu ndihí-ndo! —duha cúñaha ñáyiú-á<sup>n</sup> xii-yu.

**15** Te nchaa ñáyiú ní cuu cuica ñi xóo dico nándi nchaa sá ñi xóo dico ñi quehe<sup>n</sup> cue ñáyiú ñuú Babiloniá, nchaa ñáyiú-á<sup>n</sup> xica-nã cundecú-yu cundehé-yu sá yùhú-yu cuendá nchaa tnúndòho sá yãha cue ñáyiú ñuú-á<sup>n</sup>, te ío ndáhyú-yu sá ndihú iní-yu sá dúcá<sup>n</sup> ndòho ñáyiú-á<sup>n</sup>. **16** Te cúñaha tucú-yu:

—¡Ndàhú nchòhó ñáyiú xīndecu ñuú cáhnú ñuú nání Babiloniá! Chi nchòhó cúu-ndó dàtná ñ<sup>n</sup> ñadihí ñaha nihnu dóo vãha dóo murádú, ndihí dóo tícuèhé, te mee-ni sã ñi cuáha díhú<sup>n</sup> cuáá<sup>n</sup>, ndihí mee-ni sã ñi cuáha yúú vãha yúú nání pèrlá, ndihí sá ñi cuáha dava-gá yúú vãha sá ío vii ndãa mee-ni nchãa xíã<sup>n</sup> ní cuáha sá yihí lõho-a<sup>n</sup>, ndihí sá ñuhú dūcú<sup>n</sup>-a<sup>n</sup>, ndihí sá ñuhú dūcú<sup>n</sup> ndáhá-á<sup>n</sup>. **17** ¡Te uu<sup>ni</sup> ní ndihí nihnu nchaandi túhú sá ndécú ndihí ñadihí-á<sup>n</sup>, te duca<sup>n</sup> sãtnahá-xi cūu nchòhó ní cūu! —duha cúñàhá-yu xii cue ñáyiú ñuú Babiloniá.

Te nchaa cue téé dàcaca barcú ndihí nchaa cue téé táxi tnuní bàrcú-á<sup>n</sup>, ndihí nchaa ñáyiú ñuhu xití bàrcú-á<sup>n</sup>, ndihí nchaa dava-gá cue téé nándi chíu<sup>n</sup> quide ndecu lamár, nchaa ñáyiú-á<sup>n</sup> xica cūndecú-yu **18** te quiní-yu òré quene ñuhmá cáyú ñuú cue ñáyiú Babiloniá, te níhi cáhá<sup>n</sup>-yu, te cachí-yu:

—Ní ñ<sup>n</sup> ñuú ñá túú nūtnahá-xi ñuú Babiloniá —duha cáhá<sup>n</sup>-yu.

**19** Te nchaa ñáyiú-á<sup>n</sup> chidó-yu ñuhu díquí-yu, te ngúita-yu ndáhí-yu sá ndihú iní-yu, te níhi cáhá<sup>n</sup>-yu, te cachí tucú-yu:

—¡Ndàhú nchòhó ñáyiú xīndecu ñuú cáhnú ñuú nání Babiloniá! Chi ío cuica-ndo ní cūu, te díu-ndo ñi quide ní cuu cuica nchãa ñáyiú ndècu ndihí barcú, te vitna uu<sup>ni</sup> ní naa-ndo ndihí ñuú-ndó —duha cachí-yu.

**20** Te nchaa nchòhó ñáyiú ndècu andiu ío chí cùdíí iní sá dúcá<sup>n</sup> dāndòho Yá Ndiõxí nchaa ñáyiú ñuú

Babiloniá-án, te ðiu-ni duca<sup>n</sup> chǐ cúđǐ ìní nchaa nchòhó cue téé ní cachí Xítóhó Jesucristú cáhá<sup>n</sup> tnúhu-gá, te ðiu-ni duca<sup>n</sup> chǐ cúđǐ ìní nchaa nchòhó cue téé cáhá<sup>n</sup> tnúhu Yá Ndiòxí nàcuáa dàcahu ìní ñáhá-gǎ xii-ndo, te ðiu-ni duca<sup>n</sup> chǐ cúđǐ ìní nchaa dava-gá nchòhó ñáyíu cùu cuendá-gá cuendá sá dúcá<sup>n</sup> dàndoho-gá nchaa ñáyíu ñuú-á<sup>n</sup>. Te duca<sup>n</sup> càda ñaha-gá xii cue ñáyíu-á<sup>n</sup> cuendá nchaa sá quidé ñáhá-yu xii-ndo.

<sup>21</sup> Te sátá dúcá<sup>n</sup> te ní xiní-í ì<sup>n</sup> espíritú xínú cuèchi núú Yá Ndiòxí, te espíritú-á<sup>n</sup> ò ndee-xi te ní quehe<sup>n</sup>-xi ì<sup>n</sup> yúú cáhnú dàtná càhnu yódó te ní dáquèe-xi xití ndute làmár, te càchí-xi:

—Dàtná ní quide-í ní dáquèe-í yúú xití ndute duca<sup>n</sup> càda-xi ñuú cáhnú ñuú Babiloniá, chi ñáyíu ñuú-á<sup>n</sup> ò ndíhi naá-yu ndíhi ñuú-yu, te vá ì<sup>n</sup> ndùu ì<sup>n</sup> quíú-gǎ quini ñáhá ñáyíu xii-yu. <sup>22</sup> Te ni ì<sup>n</sup>-gá ñáyíu càni arpá, te ni ì<sup>n</sup>-gá ñáyíu tiú vǐlu, te ni ì<sup>n</sup>-gá ñáyíu tiú cútú, te ni ì<sup>n</sup>-gá yaá vá cóo ñuú-á<sup>n</sup>, te ni ì<sup>n</sup>-gá cue ñáyíu xiní cada ì<sup>n</sup> núú chù<sup>n</sup> vá cóo-gǎ, te ni vá yòo-gá canehe chù<sup>n</sup> yúú cúú yódó mulínú. <sup>23</sup> Te ni ì<sup>n</sup>-gá ñuhú vá cùndècu ñuú-á<sup>n</sup>, te ni ì<sup>n</sup> nduu-gá vá cóo víco tnándaha, te ñáyíu ñuú-á<sup>n</sup> ñáyíu quide ndáhú cúú-yu ñáyíu ío-gá cuicá-yu dàcúúxí ñáyíu quide ndáhú xĩndecu ñihí ñuyíú, dico nchaá-yu naá-yu chi quide nduú-yu te ío dàndahú-yu cue ñáyíu ñuyíú sǎ dúcá<sup>n</sup> quidé-yu.

<sup>24</sup> Te ðiu-ni ñuú-á<sup>n</sup> ní dácáçã-yu ñíñí cue téé ní cáhá<sup>n</sup> tnúhu Yá Ndiòxí, te ðiu-ni duca<sup>n</sup> ní quidé-yu nchaa dava-gá cue ñáyíu cùu cuendá-gá, te ðiu-ni-yu quide xísahni tnàha ñáyíu ñuyíú —duha càchí espíritú-á<sup>n</sup>.

## 19

<sup>1</sup> Te sátá dúcá<sup>n</sup> te ní tecú dóho-í níhi ní cáhá<sup>n</sup> cuéhé víhí ñáyíu andíu, te càchí-yu:

Ío càhnu cuu Yá Ndiòxí!, chi ðiu-gá cúú-gǎ Yaá ní dácáçu nihnu ñaha xì-o núú ùhú núú ndáhú,

te ío cùnuu-gá, te mee-ni sǎ vǎha quide-gá,

<sup>2</sup> te mee-gǎ ío váha ndáá quidé-gǎ quidé ndáá-gá cuèchi nchaa ñáyíu,

chi ðiu-gá ní dáquihí<sup>n</sup>-gá ñadìhí ñaha ndècu ichi dǐ ìní núú ùhú núú ndáhú,

chi ðiu-a<sup>n</sup> ní sanu ichi-a<sup>n</sup> ñáyíu ñuyíú ichi cuéhé ichi duha,

te duca<sup>n</sup> ní dáquihí<sup>n</sup> ñáhá-gǎ xii-a<sup>n</sup> núú ùhú núú ndáhú chi nàchinaa-gá sá ní sahní-a<sup>n</sup> cue ñáyíu ní xinu cuechi núú-gǎ.

Duha càchí-yu.

<sup>3</sup> Te càchí tucú-yu:

—Ío càhnu cuu Yá Ndiòxí!, chi nchaa nduu nchaa quíú duca<sup>n</sup>-ni quène ñúhmá núú ñúhú ñàha-á<sup>n</sup> càyú-a<sup>n</sup> —duha càchí-yu.

<sup>4</sup> Te ndí òcò cúmí cue téé cùu sacuéhé xĩndecu-á<sup>n</sup> ní ngúíñí xití-güedé núú Yá Ndiòxí núú núcòo-gá táxí tnùní-gá, te tnàhá cue quití cúmí xĩnutnì-á<sup>n</sup> ní ngúíñí xití-güedé núú-gǎ, te cue téé-á<sup>n</sup> càchí-güedé ndíhi cue quití-á<sup>n</sup>:

—Sá ndáá sá ò càhnu cuu Yá Ndiòxí —duha càchí-güedé ndíhi cue quití-á<sup>n</sup>.

<sup>5</sup> Te sátá dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> sá ní cáhá<sup>n</sup> mei núú nútñí xilé váha núcòo Yá Ndiòxí, te càchí sá cáhá<sup>n</sup>-á<sup>n</sup>:

Nchaa nchòhó ñáyíu xĩnu cuechi núú Yá Ndiòxí, ðiu-ni nchòhó ñáyíu nèhe sá yíñùhu núú-gǎ,

càhá<sup>n</sup>-ndó sǎ ò càhnu cuu-gá cuèi cùnuu-ndo àdi ñá túú cùnuu-ndo.

Duha càchí sá cáhá<sup>n</sup>-á<sup>n</sup>.

*Í<sup>n</sup> vico cùu datná vico tnándaha*

<sup>6</sup> Te sátá dúcá<sup>n</sup> te ní tecú dóho-í ní cáhá<sup>n</sup> cuéhé víhí ñáyíu andíu, te òré duca<sup>n</sup> ní cáhá<sup>n</sup>-yu te ní quide-xi dàtná quidé-xí núú xicá cuéhé víhí ndùte, te ní quide tucu-xi dàtná quidé-xí òré cáhá<sup>n</sup> níhi víhi ñúhu, te càchí-yu:

Ío càhnu cuu Dútú Ndiòxí Yaá cúú Tǎtá-ó! Te ío cùnuu-gá táxí tnùní-gá, te quide-gá nchaandi túhú sá vǎha.

7 Te ío chí ná cùdíí iní-ó, te chí ná càchí-ó sã ìo càhnu cuu Yá Ndiöxí,

chi vitna ní sáá nduu càda Yaá cáá dàtná cáá ì<sup>n</sup> mbéé quiti ní dánìcuèhé-güedé ì<sup>n</sup> vico, te cùu-xi datná vico tnãndaha.

Te nchaa ñáyiu cùu cuendá-gá sa ní ndihí-yu sa ndècu túha-yu cundecú-yu vico-á<sup>n</sup>, te cada iní-ó sã ñáyiu-á<sup>n</sup> cúu-yu dàtná ì<sup>n</sup> ñadhí xíchí tnãndaha ndihí-gá,

8 te ñáyiu-á<sup>n</sup> ní nduu táhù-yu cuihnú-yu dóó vãha dóó chàhnchí sã ìo vãha càndoo.

Duha càchí-yu.

Te sã dúcá<sup>n</sup> ní nduu táhù ñáyiu cùu cuendá Yã Ndiöxí dóó vãha ñihnú-yu, xíã<sup>n</sup> cútnuní iní-ó sã cúu-yu ñáyiu quìde ndáá núu-gã.

9 Te ì<sup>n</sup> espíritú xínú cuèchi núú Yã Ndiöxí ní cachí tnúhu-xi xii-í, te càchí-xi:

—Chido tnùní-n ì<sup>n</sup> núú tütú nàcuáa na càhá<sup>n</sup>-í-a: “Vãha táhù nchaa ñáyiu ní cáhá<sup>n</sup> ñáhá Yá cáá dàtná cáá ì<sup>n</sup> mbéé quiti ní dánìcuèhé-güedé cundecú-yu vico, te vico-á<sup>n</sup> cúu-xí dàtná vico tnãndaha cada-gá”, te duha chido tnùní-n chí tnúhu-a cùu-xi tnúhu ndáá tnúhu Yá Ndiöxí —duha càchí espíritú-á<sup>n</sup>.

10 Te ní ngüíñí xití-í núú espíritú-á<sup>n</sup> cuendá chiñuhu-í-xi ní cùu, te ní cachí-xi:

—Vã dúcá<sup>n</sup> càda-n, chí tnàhá-í dicó xínú cuèchi-í núú Yã Ndiöxí dàtná quidé-n xínu cuechi-n núu-gã ndihí nchaa dava-gá ñáyiu ndècu ndihí-n ichi-gá, ñáyiu nchícú<sup>n</sup> nihnu quide ní yuhu ní iní nchaa nàcuáa càhá<sup>n</sup> Xítohó Jesucrístú, te núu xíã<sup>n</sup> càchí-í sã vã dúcá<sup>n</sup> càda-n, chí mee Yã Ndiöxí chiñuhu-n —duha càchí espíritú-á<sup>n</sup>.

Te nchaa cue téè càhá<sup>n</sup> tnúhu Yá Ndiöxí càhá<sup>n</sup>-güedé nàcuáa ndùu tnúhu càhá<sup>n</sup> Xítohó Jesucrístú.

### *Cuendá Yaá yódó ì<sup>n</sup> cuayú cuixí<sup>n</sup>*

11 Te ní xiní-í nchí andiu, te ní xiní-í ní quee ì<sup>n</sup> Yaá yódó-gã ì<sup>n</sup> cuayú cuixí<sup>n</sup>. Te Yaá-á<sup>n</sup> nání-gã Yaá quidé ndáá cuiti, duha nàni-gã. Te quide-gá nchaa sã càhá<sup>n</sup>-gã, te ío vãha quide

ndáá-gã cuèchi nchaa ñáyiu, te nchaa ñáyiu nàá ndihí ñaha xii-gá ío vãha xiní-gã nàcuáa cada ñaha-gã xii-yu chí ío ndáá quidé-gã. 12 Te tinúu-gá dáyèhé-xi dàtná dáyèhé ñuhú, te titní coróná ñuhú díquí-gã, te nèhe-gá ì<sup>n</sup> sã ndèè diu-gá, te vá yóo ì<sup>n</sup> cùtnuní iní-xi nása cuáhá<sup>n</sup> tnúhu-á<sup>n</sup>, chí ì<sup>n</sup> dii díí-ni mee-gã náhá-gã nàcuáa càhá<sup>n</sup>-xi. 13 Te Yaá-á<sup>n</sup> níhnú-gã ì<sup>n</sup> dóó ní cuu mee-ni ñíñí, te Yaá-á<sup>n</sup> càchí tnúhu-gá nchaa nàcuáa sàni iní Yã Ndiöxí, núu xíã<sup>n</sup> nání-gã Tnúhu Yá Ndiöxí. 14 Te sátá-gã nchícú<sup>n</sup> nchaa espíritú xínú cuèchi núú Yã Ndiöxí, te cue espíritú-á<sup>n</sup> cúu-xí dàtná sandadú, te xixíhnu-xi dóó cuixí<sup>n</sup> dóó vãha sã càndoo, te xixódó-xi cuayú cuixí<sup>n</sup>. 15 Te yuhu Yaá yódónùu-á<sup>n</sup> quéné ì<sup>n</sup> yuchí cáhnú, te ndihí yuchí-á<sup>n</sup> dánìcuèhé-gá nchaa ñáyiu xíndecu ñuyíú, te ío dandòho ñaha-gã xii-yu, te dàtná quidé téè quihni ndéhé yoho yãha stilé duca<sup>n</sup> sãtnahá-xi cada ñaha-gã xii-yu, chí ío dandòho ñaha-gã xii-yu cuendá sã ìo cùdèé<sup>n</sup>-gã. Te mee-gã ío cùnuu-gá táxi tnùní-gã, te quide-gá nchaandi túhú sã vãha. 16 Te sátá dõó níhnú Yaá-á<sup>n</sup> ndihí núú tìcáca<sup>n</sup>-gã yódó tnùní nàcuáa nàni-gã, te duha càhá<sup>n</sup>-xi: “Téè ío cùnuu taxi tnuní ñáhá xii nchaa cue téè yíndaha ñaha xii ñáyiu ndihí nchaa dava-gã ñáyiu”, duha ndèè tnuní sátá dõó-gã-á<sup>n</sup> ndihí tìcáca<sup>n</sup>-gã-á<sup>n</sup>.

17 Te dàtnuní ní xiní-í ì<sup>n</sup> espíritú xínú cuèchi núú Yã Ndiöxí nùtní-xi núú nchícanhii, te níhi ní cáhá<sup>n</sup>-xi, te xãha<sup>n</sup>-xi xii nchaa quiti ndava núú tàchí:

—Nchaa nchòhó quiti ndava, chí táquixi chí caxi-ndo nchaa sã ní quide túha Yá Ndiöxí, 18 chí caxi-ndo cùñú nchaa cue téè yíndaha ñaha xii ñáyiu, ndihí cuñú nchaa cue téè tàxi tnuní ñáhá xii cue sandadú, ndihí cuñú nchaa cue téè ío ñíí xíndáa, ndihí cuñú nchaa cuayú, ndihí cuñú nchaa cue téè ní xódó ñaha xii-güedi, ndihí cuñú nchaa dava-gã ñáyiu, ñáyiu ñá túú tnàhí ní dàñá quee núú chíú<sup>n</sup> pàtróo<sup>n</sup>-xi, ndihí cuñú nchaa ñáyiu



ní dǎná nǐ quee núú chíú<sup>n</sup> pàtróó<sup>n</sup>-xi, ndihì cuñú nchaa ñáyiú cùnúu, ndihì cuñú nchaa ñáyiú ñá túú cùnúu, te nchaa cuñú-á<sup>n</sup> caxi-ndo —càchí espíritú-á<sup>n</sup> xǎha<sup>n</sup>-xi xìi nchaa quitì-á<sup>n</sup>.

19 Te sátá dúcá<sup>n</sup> te ní xiní tucu-í quitì ní quene xitì làmár, ndihì nchaa cue tée yìndaha ñaha xii ñáyiú, ndihì nchaa cue tée cùu sandadú-güedé ní naníhí tnáhá-güedé ndihì quitì-á<sup>n</sup> cuendá cuu ì<sup>n</sup>nuu-güedé ndihì-dì nǎá-güedé ndihì Yaá yódó cuáyú-á<sup>n</sup>, ndihì nchaa cue espíritú cúu sàndadú ndihì-gá. 20 Te cue espíritú cúu sàndadú ndihì Yaá-á<sup>n</sup> nǐ tñi-xi quitì-á<sup>n</sup>, ndihì tée ío dándahú ñáhá xii ñáyiú càchí sá càhá<sup>n</sup> tnúhu Yá Ndiöxí te ñá ndáá sá càhá<sup>n</sup>-dé tnúhu-gá, te diu-ni téé-á<sup>n</sup> nǐ quide-dé titní núú sǎ vǎ yǒo tnàhí ndàcu cada núú quitì-á<sup>n</sup>. Te sá dúcá<sup>n</sup> nǐ quide téé-á<sup>n</sup> xǎá ní dándahú-dé ñáyiú ní sándáá iní-yu ní quée-yu tnuní quitì-á<sup>n</sup>, te ní chiñuhú-yu sá nǐ dándácú ñáhá-yu xii-dì, te cue espíritú-á<sup>n</sup> nǐ dáquée-xi quitì-á<sup>n</sup> núú ñuhú núú ñuhú àzufre càyú-xi, ndihì téé duca<sup>n</sup> dándahú ñáhá xii ñáyiú-á<sup>n</sup>, te xǎá cuhu<sup>n</sup> téé-á<sup>n</sup> ndihì quitì-á<sup>n</sup>, te ío ndoho-dé ndihì-dì. 21 Te ndihì yuchí cáhnú sǎ quéné yùhu Yaá yódó cuáyú-á<sup>n</sup> nǐ sahani-gá nchaa dava-gá cue téé cùndihì quitì-á<sup>n</sup>, te nchaa cue quitì ndàva ní chítú xitì-güedi ní xexi-güedi cuñú nchaa cue téé-á<sup>n</sup>.

## 20

### *Úxí cièndú cuíá*

1 Te sátá dúcá<sup>n</sup> te ní xiní-í ì<sup>n</sup> espíritú xínú cuèchi núú Yǎ Ndiöxí ní quee-xi andiu, te nùndaha-xi ndacaá nacaá<sup>n</sup>-xi yèhe ì<sup>n</sup> yaú cùnú víhí núú cùndècu sácúíhná, te nùndaha tucu-xi ì<sup>n</sup> cadená cáhnú. 2 Te espíritú-á<sup>n</sup> nǐ tñi-xi quitì déé<sup>n</sup> nání dràgón, te diu-ni quitì-á<sup>n</sup> cúú-dí mèi yucu ñávǎha sá nání sácúíhná, te diu xǎá ní nduu-xi cóo ndéé sanaha. Te espíritú-á<sup>n</sup> nǐ dácútú ñàha-xi xii-dì, te duca<sup>n</sup>-ni cùndutu-dì ndéé xínu úxí cièndú cuíá. 3 Te sátá nǐ dácútú ñàha espíritú-á<sup>n</sup> xii-dì te ní dáquée ñàha-xi xii-dì

yaú-á<sup>n</sup> chi diu yaú-á<sup>n</sup> tàú-dì quée-dì cundecu-dì. Te ní nacadí-xi yuyèhe yaú-á<sup>n</sup>, te ní tee-xi sèyú yuyèhe-á<sup>n</sup> cuendá sá vǎ quéné-gǎ-dì dándahú-dì cue ñáyiú ñuyíú, te xǎá cundedí nihnu-dì ndéé xínu úxí cièndú cuíá. Te sátá ná yǎha úxí cièndú cuíá-á<sup>n</sup> te nandáxí-dì te quene-dì yaú núú ñuhú-dì-á<sup>n</sup> caca cuu tnaa-dì ì<sup>n</sup> úú nduu.

4 Te dǎtnùní ní xiní-í xǎnutnǐ titní xilé váha, te xǎá xǎnucóo nchaa ñáyiú ní ngúndecu ndihì tnúhu ndee iní cada ndáá cuèchi nchaa ñáyiú, te ní xiní-í xǎndecu tnáhá cue ñáyiú ní xehndé-güedé dúcú<sup>n</sup>-xi cuendá sá nǐ càhá<sup>n</sup>-yu tnúhu Yá Ndiöxí, ndihì cuendá sá nǐ càhá<sup>n</sup> váha-yu cuendá Xítóhó Jesucristú. Te diu-ni ñáyiú-á<sup>n</sup> cúú-yu ñáyiú ñá túú ní chiñuhú-yu quitì ní quene xitì làmár-á<sup>n</sup>, te ní ñá túú ní chiñuhú-yu sá nǐ dándácú ñáyiú ní natava ñáhá-yu xii-dì, te ní ñá túú ní dǎná-yu mèé-yu quée-yu tnuní quitì-á<sup>n</sup> chi ní tnéé-yu te ní ndáhá-yu ñá túú ní dǎná-yu quée tnuní-dì. Te ní xiní-í ní ndoto cue ñáyiú-á<sup>n</sup> cuendá tnáhá-yu cunúú-yu taxi tnùnì-yu ndihì Xítóhó Jesucristú úxí cièndú cuíá. 5 Te dava ñáyiú ní xǎhí ñá túú ní ndòtó-yu, chi ndéé yáha úxí cièndú cuíá te dǎtnùní ndotó-yu. Te ñáyiú ní xiní-í ní ndoto-á<sup>n</sup> cúú-yu ñáyiú ní ndoto díhna nuu. 6 ¡Te ío váha ní tnáhá nchaa ñáyiú ní nduu táhú nǐ ndoto díhna nuu!, chi cue ñáyiú-á<sup>n</sup> ío cùdúú-yu núú Yǎ Ndiöxí, te nchaa ñáyiú-á<sup>n</sup> vǎ quíhí<sup>n</sup>-yu núú ùhú núú ndàhú, te ñáyiú-á<sup>n</sup> cúú-yu dútú ndécú-yu núú Yǎ Ndiöxí ndihì núú Xítóhó Jesucristú, te ñáyiú-á<sup>n</sup> cùnúú-yu dǎtná cùnúú Xítóhó Jesucristú, te cunuu ndihì ñáhá-yu xii-gá úxí cièndú cuíá.

7 Te sátá ná yǎha úxí cièndú cuíá-á<sup>n</sup> te sácúíhná quee-xi núú yíndedí nihnu-xi-á<sup>n</sup>, 8 te ngúita tucu-xi dándahú-xi nchaa ñáyiú xǎndecu nihí ñuyíú, te cuèi ñáyiú ñuú Góg, te cuèi ñáyiú ñuú Mágóg duca<sup>n</sup> quíhí<sup>n</sup>-xi dándahú ñáhá-xí xii-yu, te datàcá-xi

nchaa ñáyiú cuendá nàá-yu, te cuéhé víhí-yu dàtná cuéhé ñuhu cúchí làmár. <sup>9</sup> Te nchaa ñáyiú-án tñí-yu ichi quíhí<sup>n</sup>-yu ñí ichi sá cuahá<sup>n</sup> núú cáá ñí yodo cahnu vihi, te sáá-yu núú xíndecu ñáyiú cùu cuendá Yá Ndiöxí, te ñáyiú-án chidòcò-yu cue ñáyiú cùu cuendá-gá-án ndihí ñuú-yu, te ñuú-án ío cùu iní-gá, dico mee Yá Ndiöxí dangòyo-gá ñuhú cahmi-gá nchaa ñáyiú duca<sup>n</sup> chidoco ñaha xii ñáyiú cùu cuendá-gá-án, te nchaa ñáyiú-án cuú. <sup>10</sup> Te sácúhí<sup>n</sup> sá dúcá<sup>n</sup> dàndahú ñáhá xii ñáyiú chidoco ñaha xii ñáyiú cùu cuendá Yá Ndiöxí-án dàquée ñaha-gá xii-xi núú ñùhú núú ñùhú àzufré càyú-xi, te diu-ni xiá<sup>n</sup> sa ñuhu qui<sup>n</sup> ní quene xití làmár, ndihí téé ní dándahú ñáyiú ní xáha<sup>n</sup>-dè xii-yu sá càhá<sup>n</sup>-dé tñúhu Yá Ndiöxí te ñá ndáá sá càhá<sup>n</sup>-dé tñúhu-gá, te xiá<sup>n</sup> cuhu<sup>n</sup>-xi ndoho-xi ni caa ni quíhí<sup>n</sup> ndihí qui<sup>n</sup> ní quene xití làmár, ndihí téé càchí sá càhá<sup>n</sup> tñúhu Yá Ndiöxí te ñá ndáá sá càhá<sup>n</sup>-dé tñúhu-gá.

### *Cùndáá cuéchi ñáyiú*

<sup>11</sup> Te ní xiní-í nútñí ñí xilé váha xilé cuixí<sup>n</sup>, te núú xilé-án núcõo ñí Yaá. Te ndèhe Yaá-án ní ndóñuhú àndiú ndihí ñuyíú-a, te duca<sup>n</sup> ní ndóñuhú-xí chi vá cùndècu-gá-xi. <sup>12</sup> Te sátá dúcá<sup>n</sup> te ní xiní-í nchaa ñáyiú ní xihí ní cùu, ñáyiú cùnuu ndihí ñáyiú ñá túú cùnuu xínutñí-yu núú Yáá núcõo núú xilé váha-án, te Yaá-án cúú-gá Yá Ndiöxí, te òré-án ní nandicá nchaa tutú núú yódó tñuní nchaa nàcuáa ndùu sá ní quide ñí ñí ñáyiú-án, te ní nandicá tucu ingá tutú núú yódó tñuní nchaa ñáyiú ní naníhí tàhú, te nchaa ñáyiú ní xihí ní cùu xínutñí-yu núú Yá Ndiöxí cundáá cuéchi-yu, te nchaa nàcuáa ndùu nchaa cuéchi-yu yòdo tñuní núú nchaa tutú-án duca<sup>n</sup> cundáá. <sup>13</sup> Te nchaa ñáyiú ní xihí xití ndute làmár, ndihí nchaa ñáyiú ní xihí núú ñuhu yìchí nchaa ñáyiú-án cundáá cuéchi-yu nàcuáa ní quidé-yu ñí ñí-yu. <sup>14</sup> Te vitna te vá cùú-gá ñáyiú chi ñá túú-gá tñúhu xihí, te nchaa ñáyiú ñuhu

núú ñùhú núú càyú ñáyiú-án cúú-yu ñáyiú ní xíta nihnu ni caa ni quíhí<sup>n</sup>. <sup>15</sup> Te duca<sup>n</sup> chi nchaa ñáyiú ñá túú yòdo tñuní núú tütú núú yódó tñuní nchaa ñáyiú naníhí tàhú ní dáquée ñaha Yá Ndiöxí xii-yu núú ñùhú núú càyú.

## 21

### *Andiú sàa ndihí ñuyíú sáá*

<sup>1</sup> Te sátá dúcá<sup>n</sup> te ní xiní-í andiú sàa ndihí ñuyíú sáá, te andiú sá ndécú dñhna ndihí ñuyíú sá ndécú dñhna ní ndóñuhú-xí, te tñahá làmár ní ndóñuhú-xí. <sup>2</sup> Te yúhú té Juáá ní xiní-í ñuú Jerusàlén sáá ní quee-xi núú ndécú Yá Ndiöxí, te ñuú-án cúú-xí ñuú méé-gá, te ío vii càa chi càa datná cáá ñí ñadìhí xíchí tñandaha. <sup>3</sup> Te ní tecú dóho-í níhí ní càhá<sup>n</sup> ñí sá ní càhá<sup>n</sup> andiú, te càchí-xi:

—Chí cùndèdóho ñí tñúhu na càhá<sup>n</sup>-í-a: Yá Ndiöxí ndécú ndihí-gá cue ñáyiú vitna, te duca<sup>n</sup>-ná cundecu ndihí ñaha-gá xii-yu, te diú-yu cùú-yu ñáyiú cùu cuendá-gá, te vá ñí ndùu ñí quíú-gá te dañá ñaha-gá xii-yu. <sup>4</sup> Te mee Yá Ndiöxí cada-gá sá ñá túú tñahí-gá ná caní iní-yu cundecu-yu, te ní vǎ quíní-gá-yu tñúhu xihí, te ní vǎ quíní-gá-yu tñúhu ndàhyú, te ní vǎ quíní-gá-yu tñúhu ndìhú iní-xi, te ní vǎ quíní-gá-yu tñúhu cùhú, chi nchaa sá ní xiní-yu ñuyíú dñhna vá quíní-gá-yu vitna —duha càchí sá ní càhá<sup>n</sup>-án.

<sup>5</sup> Te Yaá núcõo núú xilé váha-án ní cachí tñúhu-gá xii-í, te càchí-gá:

—Yúhú quidè-í nàcuáa nduu saa nchaa sá cùndècu vitna. Te vitna chido tñuní-ñí ñí núú tütú nchaa tñúhu sá ní càhá<sup>n</sup>-í-a, chi nchaa tñúhu-a cùu-xi tñúhu ndáá cuí<sup>n</sup> —duha càchí-gá.

<sup>6</sup> Te dàtñuní ní cachí tñúhu tucu-gá xii-í:

—Sa ní xínu cava nchaa chiu<sup>n</sup> ní sani iní-í cada-í, te diu-ni yúhú cùú-í Yaá sa ndècu ndéé cùtñahá ní ngáva ñuyíú, te diu-ni-í cundecu-í ni caa ni quíhí<sup>n</sup>. Te nchaa ñáyiú cuíní tuha ñaha xii-í te cada iní-yu sá dàtná

ndute cùu-xi sá cuãñaha tãhù-í xii-yu candeca-xi iní-yu ni caa ni quíhí<sup>n</sup>.  
 7 Te nchaa ñáyiú na cùndee iní yáha nándi sá ná yãha-yu sá cuendá-í, te ñáyiú-á<sup>n</sup> nduu tãhù-yu cundecu vãha-yu, te yúhú cuu-í Ndiõxí-yu, te duca<sup>n</sup> mée-yu cuú-yu déhe-í. 8 Te nchaa ñáyiú na yùhú ndoho cuendá-í quíhí<sup>n</sup>-yu núú ñùhú núú càyú ndihí ñáyiú ñá túú sàndáá iní ñáhá xii-í, ndihí ñáyiú quide nándi nchaa sá cuèhé sá dúhá, ndihí ñáyiú sàhni tnahá, ndihí ñáyiú ndècu ichi díí iní, ndihí ñáyiú quide nduu, ndihí ñáyiú chiñuhu nchaa sá càchí-yu cùu ndiõxí ní cadúha cue téé ñuyíú-a, ndihí ñáyiú dàcuandehnde, nchaa ñáyiú duca<sup>n</sup> xíquide-á<sup>n</sup> cuíta nihnú-yu chi quíhí<sup>n</sup>-yu núú ñùhú núú ñùhú àzufre càyú-xi —duha ní cáhá<sup>n</sup> Yã Ndiõxí ní cachí tnúhu-gá xii-í.

### *Ñuú Jerusàlén sáá*

9 Te núú ùsá espíritú xínehe tícùú ñùhú tnúhu ndòho, te ñ<sup>n</sup>-xi ní quixi-xi te càchí-xi:

—Taquixi, te na dànehé ñáhà-í xii-n nchaa ñáyiú cùu cuendá Yaa cáá dàtná cáá ñ<sup>n</sup> mbéé quiti ní dánícuèhé-güedé, ñáyiú-á<sup>n</sup> cada iní-n sã cúú-yu dàtná ñ<sup>n</sup> xíchí cuéchí vitna tnándaha, te duca<sup>n</sup> càda iní-n sã cúú-yu chi cundecú-yu ndihí-gá —duha ní cachí tnúhu espíritú-á<sup>n</sup> xii-í.

10 Te òré quidé ñàha espíritú Yã Ndiõxí xii-í nàcuáa càchí iní-xi, te espíritú néhé tícùú-á<sup>n</sup> ndécá ñàha-xi xii-í cuásaá ñ<sup>n</sup> tìndúú dùcú<sup>n</sup>, te xiá<sup>n</sup> ní dánèhé núú ñáhá-xí xii-í ñuú Jerusàlén te ñuú-á<sup>n</sup> ní quee-xi núú ndécú Yã Ndiõxí, te ñuú-á<sup>n</sup> cúu-xí ñuú mée-gã. 11 Te ñuú-á<sup>n</sup> ïo càhnu cuu-xi chi duca<sup>n</sup> ïo càhnu cuu mee-gã, te dátãsa<sup>n</sup>-xi dàtná dátãsa<sup>n</sup> yúú vãha sá nání jãspé yúú cáá dàtná cáá vidiú sá túu ingá xio ndàa sátá-xi. 12 Te ni càndéé yuhu ñuú-á<sup>n</sup> sùúni dùcú<sup>n</sup> nchaa sá ñùhú dòco, te nchíí úxúú yuyèhe-xi, te ndi tnahá ñ<sup>n</sup> ñ<sup>n</sup> yuyèhe-á<sup>n</sup> xíndecu ñ<sup>n</sup> caa espíritú xínú cuèchi núú Yã Ndiõxí. Te ndi tnahá ñ<sup>n</sup> ñ<sup>n</sup> yuyèhe-á<sup>n</sup> yódó tnúni

díu ñ<sup>n</sup> caa xichi cue ñáyiú isràèl. 13 Te úní yuyèhe-xi nchíí ndàa xio nacuáa quène nchíanchii, te úní tucu yuyèhe-xi nchíí ndàa nacuáa quée nchíanchii, te úní tucu yuyèhe-xi nchíí ndàa xio cuha nacuáa quène nchíanchii, te úní tucu yuyèhe-xi nchíí ndàa xio datni nacuáa quène tucu nchíanchii. 14 Te sá ñùhú dòco-á<sup>n</sup> chí úxúú tnàhá yúú cúú cìmientú-xi, te ndi tnahá ñ<sup>n</sup> ñ<sup>n</sup> yúú-ã<sup>n</sup> ndèé ñ<sup>n</sup> caa díu cue téé ní cáhá<sup>n</sup> tnúhu Yaa cáá dàtná cáá ñ<sup>n</sup> mbéé quiti ní dánícuèhé-güedé, te díu mee-gã ní táuchíú<sup>n</sup>-gã ní cáhá<sup>n</sup>-güedé tnúhu-gã.

15 Te espíritú sá cáhá<sup>n</sup> ndihí ñaha xii-í-á<sup>n</sup> néhé-xí ñ<sup>n</sup> sá cání ní cuáha mee-ni díhú<sup>n</sup> cuáa<sup>n</sup>, te ndihí xiá<sup>n</sup> chícuhá-xi ñuú-á<sup>n</sup>, ndihí sá ñùhú dòco ñuú-á<sup>n</sup>, ndihí nchaa yuyèhe-xi. 16 Te ñuú-á<sup>n</sup> ñ<sup>n</sup>-ni nèhe-xi cuendá quèhé<sup>n</sup>-xi ndihí cuendá càni-xi, te espíritú-ã<sup>n</sup> ní chícuhá-xi ndihí sá néhé-xí-ã<sup>n</sup> ñuú-á<sup>n</sup>, te nèhe-xi ócò úú cièndú míl mètrú sá cání te díu-ni duca<sup>n</sup> nèhe-xi cuendá quèhé<sup>n</sup>-xi, te díu-ni duca<sup>n</sup> nèhe-xi sá dùcú<sup>n</sup> nchaa vehe càa ñuú-á<sup>n</sup>. 17 Te dàtnúni ní chícuhá-xi sá ñùhú dòco ñuú-á<sup>n</sup>, te xiá<sup>n</sup> néhé-xí ùnídico cúmí mètrú sá dùcú<sup>n</sup>, te ní chícuhá-xi dàtná chícuhá cue ñáyiú ñuyíú-a.

18 Te sá ñùhú dòco-á<sup>n</sup> ní cuáha mee-ni yúú vãha yúú sã nání jãspé, te niñi ñuú-á<sup>n</sup> cúu-xí mèe-ni díhú<sup>n</sup> cuáa<sup>n</sup>, te càa datná cáá vidiú sá ïo vãha càndoo te túu ndàa ingá xio. 19 Te ndi úxúú yúú cúú cìmientú sá ñùhú dòco-á<sup>n</sup> ndèé ndí díí<sup>n</sup> núú yúú vii càa sátá-xi, te yúú díhna ndèé mee-ni yúú vãha sá nání jãspé sátá-xi, te yúú cúú úú ndèé tucu ingá núú yúú vãha sá nání zàfirú sátá-xi, te yúú cúú ùní ndèé tucu ingá núú yúú vãha sá nání àgatá sátá-xi, te yúú cúú cùmí ndèé ingá núú yúú vãha sá nání èsmeraldá sátá-xi. 20 Te yúú cúú ùhú<sup>n</sup> ndèé tucu ingá núú yúú vãha sá nání ònícé sátá-xi, te yúú cúú iñú ndèé tucu ingá núú yúú vãha sá nání còrnalíná sátá-xi, te yúú cúú ùsá ndèé tucu ingá núú yúú vãha sá nání crìsòlitú sátá-xi, te yúú cúú ùná ndèé tucu ingá núú yúú vãha sá nání bèrilú sátá-xi, te yúú

cúú ñ<sup>n</sup> ndèé tucu ingá núú yúú vǎha sá nání tòpacíú sátá-xi, te yúú cúú ùxí ndèé tucu ingá núú yúú vǎha sá nání crìsopásá sátá-xi, te yúú cúú ùxí ñ<sup>n</sup> ndèé tucu ingá núú yúú vǎha sá nání jàcintú sátá-xi, te yúú cúú ùxúú ndèé tucu ingá núú yúú vǎha sá nání àmatístá sátá-xi. <sup>21</sup> Te ndi ùxúú yuyèhe sá ñúhú dòco-á<sup>n</sup> cúú-xí mèe-ni yúú vǎha sá nání pǎrlá, te ndúu ñi yúú cúú ñ<sup>n</sup> ñ<sup>n</sup> yuyèhe-á<sup>n</sup>. Te tnuú cáhnú ndècu xití ñuú-á<sup>n</sup> cúú-xí mèe-ni díhú<sup>n</sup> cuáá<sup>n</sup>, te cǎa-xi datná cáá vidriú sá túu ndaa ingá xio.

<sup>22</sup> Te ní xiní-í sá ñà túú vèhe núú chíñùhu ñáyiú Dútú Ndiòxí cáá ñuú-á<sup>n</sup>, chí mee-nǎ Dútú Ndiòxí Yaá quidé nchaa-ndi túhú sá vǎha ndècu ñuú-á<sup>n</sup>, ndihi Yaá cáá datná cáá ñ<sup>n</sup> mbéé quiti ní dánícuèhé-güedé. <sup>23</sup> Te ñuú-á<sup>n</sup> ñà túú-gǎ xíní ñùhu-xi nchícanhii dayèhé-xi, te ni yóó ñà túú-gǎ xíní ñùhu-xi, chí mee-nǎ Yǎ Ndiòxí dáyehe-gǎ ñuú-á<sup>n</sup> ndihi Yaá cáá datná cáá ñ<sup>n</sup> mbéé quiti ní dánícuèhé-güedé. <sup>24</sup> Te cue ñáyiú nchaa ñuú cáá ñùyíú, ñáyiú ní naníhí tàhú xíndecu ñuú-á<sup>n</sup> dáyehe-gǎ núú-yu, te nchaa cue téé yíndaha ñaha xii-yu nèhe-güedé sá yíñùhu sá cúú-xí ñuú-á<sup>n</sup>, te quide cahnu ñaha-güedé xii-gǎ. <sup>25</sup> Te yuyèhe ñuú-á<sup>n</sup> ñà túú tnàhí nàndedí, te ñuú-á<sup>n</sup> ñà túú tnàhí cùndiquí<sup>n</sup>. <sup>26</sup> Te nchaa ñáyiú nèhé-yu sá yíñùhu sá cúú-xí ñuú-á<sup>n</sup> te quide cahnú-yu Yǎ Ndiòxí. <sup>27</sup> Te ñuú-á<sup>n</sup> vǎ cúú cùndecu ní ñ<sup>n</sup> ñáyiú ndècu ichi cuehé ichi duha, te ni ñ<sup>n</sup> ñáyiú ndehnde, te ni ñ<sup>n</sup> ñáyiú quide sá ñà túú cùu vǎha iní Yǎ Ndiòxí vǎ cúú cùndecu-yu ñuú-á<sup>n</sup>, chí mee-ni ñáyiú naníhí tàhú ñáyiú yòdo tnuní núú tütú Yaá cáá datná cáá ñ<sup>n</sup> mbéé quiti ní dánícuèhé-güedé, mee-ni ñáyiú-á<sup>n</sup> cundecu-yu ñuú-á<sup>n</sup>.

## 22

<sup>1</sup> Te sátá dúcá<sup>n</sup> te diu-ni espíritú-á<sup>n</sup> ní dánèhé núú ñáhá-xí xii-í yúte núú ñúhú ndute candoo canine, te ndute-á<sup>n</sup> candeca-xi iní ñáyiú ní caa

ni quíhí<sup>n</sup>, te ndute-á<sup>n</sup> quéé-xí mèi núú núcõo Yǎ Ndiòxí ndihi Yaá cáá datná cáá ñ<sup>n</sup> mbéé quiti ní dánícuèhé-güedé.

<sup>2</sup> Te cuádava tnuú cáhnú yǎha xití ñuú-á<sup>n</sup> cáá yúte-á<sup>n</sup>, te xio xio yuhu yúte-á<sup>n</sup> níhnú yùtnu cuu<sup>n</sup> sávidí-xi, te sávidí nchaa yutnu-á<sup>n</sup> cúú tucu-xi sá cándèca iní ñáyiú ní caa ní quíhí<sup>n</sup>, te nchaa yutnu-á<sup>n</sup> cúú<sup>n</sup> sávidí-xi úxúú xito ñ<sup>n</sup> cuía chí ndi tnahá yóo cúú<sup>n</sup> sávidí-xi, te nchaa ndaha-xi cùu-xi tátna sá cúú-xí nchaa ñáyiú.

<sup>3</sup> Te vǎ yóo ñ<sup>n</sup>-gǎ cada ñ<sup>n</sup> sá ñà túú cùu vǎha iní Yǎ Ndiòxí ñuú-á<sup>n</sup>. Chí ñuú-á<sup>n</sup> núcõo mee Yǎ Ndiòxí ndihi Yaá cáá datná cáá ñ<sup>n</sup> mbéé quiti ní dánícuèhé-güedé xitaxi tnùní-gǎ, te nchaa ñáyiú xínu cuechi núú-gǎ cada càhnu ñáhá-yu xii-gǎ. <sup>4</sup> Te nchaa ñáyiú-á<sup>n</sup> cundehe núú-yu Dútú Ndiòxí, te tneé-yu cundéé diu-gǎ.

<sup>5</sup> Te ñuú-á<sup>n</sup> vǎ quíní-gǎ-yu niú, te ni vǎ cánèhe chiu<sup>n</sup>-gǎ-yu ñuhú cutnùní núú-yu, te ni nchícanhii ñà túú-gǎ xíní ñùhu-xi dayèhé ñuú-á<sup>n</sup> chí mee Dútú Ndiòxí dáyehe-gǎ, te ni caa ní quíhí<sup>n</sup> cunúú-yu cundecu-yu ñuú-á<sup>n</sup>.

### *Sa ta cùyatni nduu quixi tucu Xítoho Jesucristú*

<sup>6</sup> Te sátá dúcá<sup>n</sup> te ní cachí tnúhu espíritú xínu cuèchi núú Yǎ Ndiòxí-á<sup>n</sup> xii-í:

—Nchaandi túhú tnúhu-a cùu-xi mee-ni tnúhu ndáá cuiti. Te Yǎ Ndiòxí Yaá dácàhu iní nchaa cue téé cǎhá<sup>n</sup> tnúhu-gǎ nàcuáa cǎhá<sup>n</sup>-güedé ní tendaha-gǎ ñ<sup>n</sup> espíritú xínu cuèchi núú-gǎ ní quixi-xi ní dánèhé-xi nchaa ñáyiú xínu cuechi núú-gǎ nchaa nàcuáa cada-gǎ, te vǎ cùyàa-gǎ duca<sup>n</sup> càda-gǎ —duha càchí espíritú-á<sup>n</sup>.

<sup>7</sup> Te ní cǎhá<sup>n</sup> Xítoho Jesucristú, te càchí-gǎ:

—Ío ndihi quixi tucu-í!

’jTe ío vǎha tnahá nchaa ñáyiú tnè nchaa tnúhu cǎhá<sup>n</sup> Yǎ Ndiòxí yódó tnùní núú tütú-a! —duha càchí-gǎ.

<sup>8</sup> Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xiní núú-í nchaa nàcuáa cada-xi ndéé cuèé-gǎ. Te sátá dúcá<sup>n</sup> ní



cuu te ní ngüíñí xítí-í núú espíritú sá ní dánèhé núú ñáhá nchaa xiá<sup>n</sup> cuèndá chiñuhu-í-xi ní cùu. <sup>9</sup> Te ní cachí-xi:

—Vá dúcá<sup>n</sup> càda-n, chi yúhú òcò xínú cuèchi-í núú Yá Ndiòxí dàtná cúú yòhó ndìhi nchaa dava-gá ñáyiú ndècu ndìhi-n ichi-gá càhá<sup>n</sup>-ndó tñuhu-gá, ndìhi nchaa ñáyiú tñi nchaa tñuhu ndèé núú tütú-a, te xiá<sup>n</sup> càchí-í sá vǎ dúcá<sup>n</sup> càda-n, chi mee Yá Ndiòxí duca<sup>n</sup> chiñuhu-n-gá —càchí espíritú-án xii-í.

<sup>10</sup> Te ní cachí tñuhu tucu-xi xii-í, te càchí-xi:

—Vá chidǎhu-n nì ì<sup>n</sup> tñuhu Yá Ndiòxí ndèé núú tütú-a, chi sa ní cuyatni cada-xi nchaa nàcuáa ndèé tñuní. <sup>11</sup> Te dañá sǎ ncháá ñáyiú ndècu ichi cuehé ichi duha na cùndecu-ní-yu ichi-án, te duca<sup>n</sup>-ni dàña-n nchaa ñáyiú quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiú quide váha te duca<sup>n</sup>-ni na càda váha-yu cundecú-yu, te nchaa ñáyiú quide nchaa nacuáa cùu váha iní Yá Ndiòxí te òu-ni duca<sup>n</sup> na càdá-yu cundecú-yu —duha càchí espíritú-án.

<sup>12</sup> Te ní cachí Xítóhó Jesucrístú:

—Cundedóho-n tñuhu na càhá<sup>n</sup>-í-a. Ío ndìhi quixi tucu-í, te canehe-í nchaa sá ndúú tǎhú ñáyiú quixi, te nàcuáa ndùu chiu<sup>n</sup> ní quidé-yu ì<sup>n</sup> ì<sup>n</sup>-yu te duca<sup>n</sup> cùnduu sá cuǎñaha-í nduu tǎhú-yu. <sup>13</sup> Te yúhú cúú-í Yaá sa ndècu ndèé cùtnàhá ní ngáva ñuyúú, te òu-ni-í cundecu-í ní caa ní quíhí<sup>n</sup> —duha càchí-gá.

<sup>14</sup> Te váha tǎhú nchaa ñáyiú sa ní nduu ndoo ní nduu nine iní-xi, chi ñáyiú-án ní nduu tǎhú-yu quíhu-yu xítí ñuú-án, te caxí-yu sávidí yutnu nùtní-án te xiá<sup>n</sup> candeca-xi iní-yu ní caa ní quíhí<sup>n</sup>. <sup>15</sup> Te ñuú-án vǎ cúú quíhu ní ì<sup>n</sup> ñáyiú ndècu ichi cuehé ichi duha, ní cuè ñáyiú quide nduu, te ní cuè ñáyiú ndècu ichi díí iní, te ní cuè ñáyiú sàhni tñaha ñáyiú-xi, te ní cuè ñáyiú chiñuhu nchaa sá ní cadúha cue téé ñuyúú-a càchí-yu cùu ndiòxí, te ní cuè ñáyiú tñàhá iní dacuàndehnde,

te ní ì<sup>n</sup> ñáyiú duca<sup>n</sup> xǐquide vá ndúú tǎhú-yu quíhu-yu xítí ñuú-án.

<sup>16</sup> Te ní cáhá<sup>n</sup> tucu Xítóhó Jesucrístú, te càchí-gá:

—Yúhú Xítóhó Jesucrístú ní tendaha-í espíritú xínú cuèchi núú-í cuèndá cachí tñuhu-xi xii-n nàcuáa ndùu tñuhu cúñaha-n xii nchaa ñáyiú ndècu ndìhi-n ichi-í dácuàha tñuhu-í ì<sup>n</sup> ì<sup>n</sup> ñuú. Te yúhú cúú-í mei ñàní tñáhá ndíi Dàvíí, te cada iní-n sá cúú-í dàtná ì<sup>n</sup> chódíní quítí quène datneé —duha càchí-gá.

<sup>17</sup> Te nchaa ñáyiú cùu cuèndá Xítóhó Jesucrístú Yaá cáá dàtná cáá ì<sup>n</sup> mbéé quítí ní dánícuèhé-güedé, òu-ni ñáyiú-án cúú-yu ñáyiú cada iní-ó sǎ cúú-yu ì<sup>n</sup> ñadìhí xíchí tñàndaha ndìhi ñaha xii-gá, te ñáyiú-án ì<sup>n</sup>-ni càhá<sup>n</sup>-yu ndìhi Espíritú Yá Ndiòxí, te xǎhǎ<sup>n</sup>-yu ndìhi Espíritú-gá xii nchaa dava-gá ñáyiú:

—Chí táquixi —cachí-yu xǎhǎ<sup>n</sup>-yu ndìhi Espíritú Yá Ndiòxí.

Te nchaa ñáyiú duca<sup>n</sup> ndèdóho tñuhu-án vitna, te xini ñuhu-xi duca<sup>n</sup> cáhá<sup>n</sup>-yu tñàhá-yu cúñàhá-yu xii nchaa dava-gá ñáyiú-án, te nchaa ñáyiú cuení tuha ichi-gá te na quíxí-yu, te òcò duca<sup>n</sup> cùu tǎhú-yu sá cándèca iní-yu ní caa ní quíhí<sup>n</sup>.

<sup>18</sup> Te nchaa nchòhó ñáyiú ndèdóho nchaa nàcuáa càhá<sup>n</sup> tñuhu Yá Ndiòxí ndèé núú tütú-a càhá<sup>n</sup>-í dóho-ndo. Te núu ì<sup>n</sup> ñáyiú na còdo-gá tñuhu chido tñuní-yu núú tütú-a, te Yá Ndiòxí ío dandòho ñaha-gá xii-yu chi yáha-yu nchaa tñúndòho yodo tñuní núú tütú-a te núu duca<sup>n</sup> na càdá-yu. <sup>19</sup> Te núu ì<sup>n</sup> ñáyiú na chidáhu dava tñuhu Yá Ndiòxí ndèé núú tütú-a te ñáyiú-án vǎ ndúú tǎhú-yu cundecú-yu ñuú-gá, te ní vǎ ndúú tǎhú-yu sá cándèca iní-yu ní caa ní quíhí<sup>n</sup> dàtná yódó tñuní núú tütú-a.

<sup>20</sup> Te Xítóhó Jesucrístú Yaá càhá<sup>n</sup> sá ncháá tñuhu-a cùu-xi tñuhu ndáá ní cáhá<sup>n</sup>-gá ní tecú dóho-í, te càchí-gá:

—Ndáá sá ío ndìhi quixi tucu-í —duha càchí-gá.

Te yúhú ní xáha<sup>n</sup>-í xii-gá:

—Duca<sup>n</sup> na cùnduu, taquìxi yohó Xítóhó Jesucrìstú —duha ní xáha<sup>n</sup>-ĩ xii-gá.

<sup>21</sup> Te Xítóhó Jesucrìstú ío na chìndee chitúu ñaha-gă xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nă vitna.